

प्रकाशक-बाबू रामलाल जैन नायब तहसीलदार
मंत्री-श्रीसूत्रागमप्रकाशकसमिति
जैनस्थानक, रेल्वे रोड, गुडगाँव-छावनी
(पूर्वपंजाब)

सर्वाधिकार समिति द्वारा सुरक्षित

मुद्रक—
लक्ष्मीबाई नारायण चौधरी, निर्णयसागर प्रेस,
२६।२८ कोलभाट स्ट्रीट, मुंबई नं.-२

समप्पणं

जाण किंवाए मम मणस्स चवल्या नट्ठा, जेसिमुवण्णसेण मज्झंतककरणे संतिसंचारो
हृओ, जाणमव्भुअचरित्तजोगेण संपदाइगयाबंधणुम्मूलणनिच्छयं पत्तो, जेसिं
वोहवयणेहिं अखंडअत्तसुहमग्गो लट्ठो, जेसिमपारअणुग्गहवच्छल्लुच्छा-
हृदाणेण मह लेहणकलाए पडत्ती जाया, जेसि णं धारणाववहाराणुसारं
पयामणमिणं वट्ठए, तेसिमज्झप्पसत्थाणुराइअप्पडिबद्धविहारिक्क-
वइनिक्कामपरोवयारिसंतमुहभब्बुद्धारगमहारिसिपवरथविरपय-
विभूसियणायपुत्तमहावीरजइणसंघाणुयाइगयसग्गपरम-
पुज्ज १०८ सिरिजइणमुणिफकीरचंदमहारायाणं
पुणीयसमरणे हिययविसुद्धभत्तिपुव्वगं एक्का-
रसंगसंजुयमेयं सुत्तागमपढम-

अंसं समप्पिणोमि ।

पुप्फभिकखू

जमोऽत्थु णं समणस्स भगवओ णायपुत्त-महावीरस्स

कृतज्ञताप्रकाश

जिसप्रकार स्थापत्यकलाक्रीविद अपनी मस्तिष्क शक्तिका उपयोग करके मालिकके आदेश-निर्देशमें तत्पर होकर एक सुन्दर प्रासादका निर्माण करता है उसी भाँति मेरे अन्तेवासी प्रशिष्य आणुष्मान् 'जिणचंदभिक्षू' ने अपनी विनयता, मृदुता, भक्ति-वैयावृत्य-सेवातत्परता, दक्षता और प्राकृतविज्ञानकलामर्मज्ञता आदि सद्भावनाओंमें तन्मय होकर 'सुत्तागमे' के प्रकाशन संबंधी कार्य तथा प्रूफसंशोधनादिकी सेवाका सहयोग देकर ज्ञातपुत्र महावीर भगवान्की शासनसेवा, और जिनवाणीकी भक्तितत्परता द्वारा खूब ही साथ दिया है। भला इस कीमती सेवा के मृदु संस्मरणोंको कैसे भुलाया जासकता है। मैं इस मूल्यवान् सेवाकी बड़ी कदर करता हूँ। आखिर मनुष्य दो प्रकारके ही तो होते हैं एक उपकार करनेवाला और दूसरा उपकारज।

पुष्पभिक्षू

प्रकाशकीय

१. आजके इस वैज्ञानिक युगमें जहां मनुष्यने विज्ञानके द्वारा नई २ व्यवहारो-पयोगी वस्तुओंका आविष्कार किया है वहां महान् से महान् संहारक अणुबम जैसे शस्त्रोंका भी । यह सब किसलिए ? मेरी सूता समस्त संसार पर छा जाए, मैं ही सबका प्रभु हो जाऊं, एक ओर तो शस्त्रोंकी होड़में एक देश दूसरे देशसे आगे निकल जाँचो चाहता है तब दूसरी ओर आधुनिक जनता का अधिक भाग युद्धको न चाहकर शांतिकी ग्रंथना करता है परन्तु शांति शस्त्रोंके चलवूते पर किए गए युद्धोंसे नहीं मिल सकती शांतिका वास तो आध्यात्मिकतामें है भौतिकतामें नहीं और ज्ञातपुत्र महावीर भगवान्के द्वारा प्रतिपादित आगम आध्यात्मिकतासे भरपूर है, उस आध्यात्मिकताके प्रसारके लिए ज्ञातपुत्र महावीर जैनसंघानुयायी उग्रविहारी जैन मुनि १०८ श्रीकूलचंद्रजी महाराज की विशुद्ध प्रेरणासे समितिने आगमोंके प्रकाशनका कार्य अपने हाथमें लिया है जिसका प्रथम फल आपके सन्मुख है । ३२ सूत्रोंको 'सुत्तागम' के रूपमें एक ही जिल्दमें देनेकी उत्कट इच्छा होते हुए भी ग्रंथराजका देह-सूत्र बढ़ जानेसे ११ अंगोंका प्रथम अंश अलग बनाना पड़ा । इसके प्रकाशनमें जिन २ महानुभावोंने प्रत्यक्ष या परोक्ष रूपमें किसी भी प्रकारकी जिनवाणीकी सेवा की है उनका हम हार्दिक आभार मानते हैं, साथ ही सूत्रोंके निकले हुए अलग २ प्रकाशनों पर जिन २ मुनिवरोंने अपनी २ शुभ सम्मतिऐं भिजवाई हैं हम उनके अनुगृहीत हैं और सहधर्मी महानुभावोंसे निवेदन है कि वे इस पवित्र कार्यमें सहयोग देकर हमारे उत्साह को बढ़ाएँ ।

हम हैं जिनवाणीके सेवाकांक्षी,

प्रधान—मास्टर दुर्गाप्रसाद जैन B. A. B. T.

मंत्री—बाबू रामलाल जैन नायब तहसीलदार

सुत्तागमे पर लोकमत

(नं. १) “श्रीपुष्पभिक्षु द्वारा सम्पादित ‘आचारांग’ का मैंने भली भाँति अवलोकन किया है, धर्मोपदेष्टाजीका यह प्रयास प्रशंसनीय है, संपादन बहुत ही सुंदर बना है, विशेषतः स्वाध्यायप्रेमियोंके लिए इस शैलीसे अन्य सूत्रोंका भी संपादन हो। मुद्रणकलाकी दृष्टिसे भी रमणीय रहा है, आगमप्रेमी सज्जनगण इस प्रयासमें अधिकसे अधिक सहयोग देकर जिनवाणीका प्रचार करेंगे।”

पूज्य श्रीपृथिवीचंद्रजी महाराज, आगरा (लोहामंडी)

(नं. २) “श्रीधर्मोपदेष्टाजी द्वारा संपादित ‘आचारांगसूत्र’ मैंने ध्यानपूर्वक देखा है, संपादनकी शैली सुंदर और युगानुकूल है, स्वाध्यायप्रेमियोंके लिए और साधु-साध्वियोंके लिए यह संस्करण बहुत ही उपयुक्त सिद्ध होगा। मुद्रणकलाकी दृष्टिसे भी प्रस्तुत ग्रंथ बड़ा रमणीय दीख पड़ता है, शुद्धिपर काफी ध्यान रक्खा गया है, आचारांग का प्रस्तुत संस्करण समाजमें अधिकाधिक स्थान ग्रहण करे, यही हार्दिक अभिलाषा है, पुस्तक मुझे पसंद है।”

**कविरत्न, उपाध्याय श्रीअमरचंद्रजी महाराज, जैनमुनि
कुंदनभवन व्यावर**

(नं. ३) “यह लघुपुस्तिका लघु होते हुए भी परमोपयोगी है, नित्यपाठ करनेवालोंके लिए यह नित्यकी सहायिका है, इसका प्रकाशन भी बहुत सुंदर हुआ है। इस प्रेमोपहारके लिए जैनमुनि पं. श्रीहेमचंद्रजी महाराजने आपका और गायपुत्तमहावीरजङ्गणसंघाणुआई लहुअम पुष्पभिक्षू का शतशः धन्यवाद किया है और हार्दिक कृतज्ञता प्रगट की है, तथा मुनिश्रीको सस्नेह सुखसाता पूछी है।”

समाना मंडी पटियाला (पंजाब)

भगवानदास ब्रजलाल जैन वजाज

(नं. ४) “मैंने श्रद्धेय मुनि श्रीफूलचंद्रजी महाराज द्वारा संपादित आचारांगसूत्रके प्रथमश्रुतस्कंध के मूल संस्करण को देखा, इसे पढ़कर मैं अत्यधिक आनंदित हुआ, इस प्रकार के सुंदर प्रकाशन के लिए मुनिश्री धन्यवाद के पात्र हैं।”

**श्रीमान् श्रद्धेय प्रवर्तक स्वामीजी
श्री श्री हजारीमलजी म. जैन स्थानक व्यावर**

(नं. ५) “जैनधर्मोपदेष्टा उग्रविहारी पं. मुनिश्री फूलचंद्रजी महाराज से संपादित होकर प्रकाशित मूल आचारांग सूत्रके प्रथम श्रुतस्कंधको देखकर मुझे बहुतही हर्ष हुआ, इस संस्करणके मूलपाठ बहुत शुद्ध हैं, अपने परिश्रममें मुनिश्री बहुत सफल बने हैं।”

जैन न्याय साहित्यतीर्थ तर्कमनीषी पं. मुनिश्री सिध्दीमलजी
म. (मधुकर) प्रेपक धूलचंदजी महता व्यावर

(नं. ६) “सुत्तागमे (आचार) पुस्तक पहुंच गई, यह उनकी बहुत कृपा है; उनको महाराज साहिव कोटि कोटि धन्यवाद करते हैं और अर्ज करते हैं कि और कोई पुस्तक अगर आपने छपवाई हो तो कृपा करके भेजे।”

गणावच्छेदक मुनिश्री रघुवरदयालजी महाराज
प्रेपक तेलूराम जैन रईसेआज़म, जालंधर-छावनी (पू. पंजाब)

(नं. ७) “आचारांग सूत्र” जैसी पूर्ण बत्तीसी सूत्ररूपसे निकले, स्वाध्याय करनेवालोंके लिए बड़ी उच्चकोटीकी वस्तु होगी, ऐसा श्रीमुनि हीरालालजी म. ने फर्माया है।”

लालभवन जयपुर

(नं. ८) “तमारा तरफ्थी सुत्तागमे ए नामनुं पवित्र आगम आचारांगजी नो प्रथम भाग मूलपाठे सम्पादक भिक्खु फूलचंदजी महाराज। सदरहु पुस्तक तमोए रवाना करेल ते अमोने गई काले मल्यो छे अने ते महाराज श्रीशामजीस्वामी ने आपेल छे, पुस्तकनी शुद्धि अने व्यवस्थित जोई महाराजश्री घणा खुशी थया छे।”

शा. मोहनलाल रतनजी कच्छ मांडवी

(नं. ९) जैन जगतके सुप्रसिद्ध पर्यटक एवं जैन धर्मोपदेष्टा श्री पुष्पभिक्षू द्वारा संपादित सूत्रकृतांगसूत्रका मूलसंस्करण देखकर महती प्रसन्नता हुई । मूलपाठका शुद्धरूप उत्तम संपादन और नयनाभिराम प्रकाशन, वस्तुतः आजके युगमें सर्वतोभावेन आदरणीय है ।

स्वाध्याय प्रेमी विद्वानोंके लिए यह प्रयत्न बहुत ही स्तुत्य प्रयत्न है । इस दिशामें श्रीपुष्पभिक्षूका यह सत्प्रयास चिरस्मरणीय रहेगा । मूल आगमों के प्रकाशनकी उनकी योजनाकी मैं हृदयसे सफलता चाहता हूँ । सर्वसाधारण जनताके लिए बड़े काम की वस्तु है ।

शंकरलाल वाटिका
१६ मई १९५१
व्यावर

मुनि 'अमर'

(नोट) आपका पूरा नाम जगद्विख्यात कविरत्न, उपाध्याय, मुनि श्री १०८ श्री अमरचंद्रजी महाराज है ।

(नं. १०) श्रीमान् श्रद्धेय मुनिश्री हजारीमलजी महाराज तथा पंडित मुनिश्री मिश्रीमलजी (मधुकर) महाराज की सम्मति

“आचारांग” की तरह ‘सूत्रकृतांग’ का प्रकाशन भी बहुत सुंदर हुआ है । स्वाध्याय रसिकोंके लिए यह प्रकाशन बहुत उपयोगी सिद्ध होगा ।

जैनधर्मोपदेष्टा उग्रविहारी पंडित मुनिश्री फूलचंद (पुष्पभिक्षू) का आगम-साहित्यकी दिशामें यह सत्प्रयत्न हृदयसे अभिनंदनीय है । आशा है जैनसमाज मुनिश्री की इस विराट् आगमसंपादन योजनाका उदार हृदयसे स्वागत करेगा । हम मुनिश्रीके इस स्तुत्य प्रयासकी हार्दिक सफलता चाहते हैं ।

प्रेमक श्रीधूलचंदजी महता व्यावर

(नं. ११) “मैंने पंडितरत्न, मधुर व्याख्याता उग्रविहारी अनथक प्रचारक जैन धर्मोपदेष्टा मुनिश्रीफूलचंद्रजी महाराज द्वारा संपादित सूत्रकृतांग सूत्र उतागमरूप पुस्तकाकार देखा । संपादकने इसमें पाठोंकी शुद्धि, उपकरणमें हलका तथा मुद्रणकलाकी दृष्टिसे सुंदर व्यवस्थित छपाई आदिका विशेष ध्यान रक्खा

है, अतः स्वाध्याय प्रेमियोंके लिए विशेष उपयोगी है । संपादक शतशः धन्य-
वादके पात्र हैं, क्योंकि सुत्तागम प्रकाशनरूपे जिनवाणीकी अनथक रूपसे आप
उपासना कर रहे हैं । मुझे यह भी आशा है कि आगे इसी प्रकार निर्विघ्नतया
सेवा करते रहेंगे ।”

मुनि प्रेमचंद, मानसा (E. P.)

(नं. १२) “श्रीयुत पंडितरत्न, सुत्तागम संपादक, जैनधर्मोपदेष्टा, ‘पुष्प-
भिक्षु’ द्वारा संपादित ठाणांग सूत्र देखा, जिसमें पाठशुद्धि, भारमें हलका
और सुंदर छपाई आदिका ध्यान संपादकका खूब रहा है । इस नई शैलीके
प्रकाशनको देखकर प्रत्येक व्यक्ति यह खुले दिलसे कह सकता है कि गागरमें
सागरकी उक्ति साफ चरितार्थ है । मुझे पूरा संतोष तब ही होगा जब पूर्ण
आगम वत्तीसी सुत्तागमरूपेण प्रकाशित होगी । संपादक और सहायक शतशः
धन्यवादार्ह हैं ।”

निवेदक मुनि प्रेमचंद मानसा (E. P.)

(नं. १३) श्रीमान् पूज्यवर जैनधर्मोपदेष्टा वीरशासन प्रभाकर विद्यावारिधि,
धर्मनायक, पुष्पभिक्षु सादर स्नेहसुधासिक्त अनेक वंदन । और अँगलभाषा
विशारद सुमित्त भिक्षुको सुखशांति पृच्छा । आपश्री का सुत्तागमे सूत्रोंके मूल-
पाठका संपादनका सुंदर कार्य जैन समाज पर, विशेषकर मुनि और साध्वीवर्ग पर
महान उपकारी है । आपने समाजके लिए यह अपूर्व अवसर दिया है । आपका यह
मंगलकार्य महान स्तुत्य है । मेरी चिरकालीन अभिलाषा साकार हो उठी । क्योंकि
मेरी यह प्रबल इच्छा थी कि जिस प्रकार चार वेद हैं इसी प्रकार हमारे ३२
सूत्रोंका चार भागोंमें प्रकाशन हो । पहला मूलपाठके रूपमें, दूसरा शब्दार्थके
रूपमें, तीसरा भावार्थके रूपमें और चौथा संस्कृतच्छाया तथा नई टीकाओंके
रूपमें । मूलपाठ सुंदर अक्षरोंमें पुस्तकाकार हो । जैसे कुरान वाईबल ग्रंथसाहब
आदि पाए जाते हैं । इसके उपरांत अंग्रेजी, जापानी, चीनी और फ्रेच आदि
पाश्चात्यभाषाओंमें भी अनुवाद हो । आपने तो मेरी सैकड़ों मीलकी दूर रही
भावनाको जानकर यह मंगलकार्य बंबई नगरमें रह कर आरंभ किया है, मुझे तो
ठीक यही भास हो उठा है । ठीक भी है क्योंकि मनको मनसे राहत होती है ।

हे ज्योतिर्धर ! वैसे तो आपके जीवनका प्रत्येक अमूल्य क्षण प्राणीमात्रके हित
और जैनसमाजके उत्थानमें व्यतीत हुआ है । आपने भगवान् ज्ञातपुत्र महावीर
प्रभुकी पवित्र वाणीको भारतवर्षके कोने कोनेमें पहुंचाकर सभ्य जनसमाज को
सुनाया है । अपनी मधुर और ओजस्वी वाणी द्वारा पत्थर दिलोंको दयाके

पानीसे पिघला दिया है। कितने ही पशुओंकी बलिवेदीके अट्टोंको उखाड़ फेका है। हजारो मूक प्राणिओंके प्राणोको मौतके घाट उतरनेसे बचाया है। धन्य है आपके विश्व वत्सल जीवन को, इस क्रूर हिंसाकी भयावह अंधियारी निशामें आप जैसे भिक्खु ही दयाके प्रकाशमान उडुपति हैं तथा लाइट ऑफ मिनार हैं। आपने अहिंसाके ऊंचे ध्वजको फहराया है यानी देशके बड़े बड़े नगरोंमें दयाधर्मके झंडेको हाथमें लेकर भ्रमण किया है। जैसे कश्मीर, कराची, कलकत्ता, ब्रारिया, कानपुर आदि २ और अबकी बार विभवपूर्ण और सौंदर्य-सम्पन्न कुबेरनगरीके समान बंबई नगरमें जैनधर्मकी विजयपताका लहरा रहे हैं।

इतनी दूर जाकर वीरशासनकी सेवा करना अपनी उपमा आपही है। अस्तु !

मेरी तो शासनदेवसे यही प्रार्थना है कि आप दीर्घायु हों। और आपने जो जैनागम प्रचारका शुभसंकल्प किया है इस भगीरथ कार्यमें आपको महान सफलता मिले और तीर्थकर पदके भागी बनें। यद्यपि आपके पावन दर्शनका अवसर मुझे नहीं मिला तब क्या मैं यह आशा कर सकता हूं कि चतुर्मासके बाद इधर पधार कर दर्शनाभिलाषा पूरी करेंगे? क्योंकि आपके मनोहर और क्रांतिकारी उपदेश सुनने को दिल बहुत चाहता है और जो २ सूत्र प्रकाशित हों उन्हें भिजवानेकी कृपा करें आपकी बड़ी महरबानी होगी। भूलके लिए क्षमा !

प्रेषक
सेक्रेटरी S. S. जैन सभा }
मूलक (पेप्सू)

आपका प्यारा दास
मुनि भागचंद

(नं. १४) श्री १००८ श्री गणावच्छेदक श्रीरघुवरदयालजी महाराज के पास अपना भेजा हुआ सूत्रकृतांग सूत्र मिला. "संपादन" सुंदर है। धर्मोपदेश श्रीफूलचंदजी महाराजके परिश्रमका यह फल है। आपकी परिश्रमशीलताको देखकर कौनसा मानव है जो आपकी स्तुति न करे। आप जैन साहित्यका कार्य करके अपने जीवनका चरमलक्ष्य पूरा करेंगे। जिसके लिए आपने कदम उठाया है। महाराज श्री आपको धन्यवाद देते हैं।

निवेदक

५-१०-५१ लाला अछरूमल जैन रईसेआज़म
चौक कसेरान

पटियाला (E. P.)

(नं. १५) ता. २०-९-५१ श्रीमान् चावू रामलालजी साहव !

जय जिनेंद्र ! आपका इरसाल करदह श्री आंचारांग सूत्र तथा सूत्रकृताङ्ग सूत्र मोसूल हुए । मुलाहिजा श्री १००८ श्रीवहुसूत्री पंडितरत्न श्रीमुनि नरपतरायजी महाराजने अत्यन्त प्रसन्नता प्रगट की । नीज मुनि श्री फूलचंद्रजीके इस प्रयासकी अति प्रशंसा करते हैं और फर्माते हैं कि यह कार्य जो उन्होंने आरंभ किया है, भगवान् उनको सफलता दे ।

संघ सेवक

मदनलाल जैन

फर्म-वंसीलाल बनारसीदास जैन

होशियारपुर E. P.

(नं. १६) मेवाड़भूषण पूज्य श्री १००८ श्रीमोतीलालजी महाराज फर्माते हैं कि “आपकी तरफसे ‘सुत्तागमे’ सूयगडे नामकी किताब मिली । पूज्यश्रीके नज़र(मेंट)करदी गई । पूज्यश्रीने फर्माया है कि पुस्तक चढ़ी ही सराहनीय है । आपने बड़े परिश्रमके साथ आगमोद्धार करना आरंभ किया है । आपको हार्दिक धन्यवाद है ।”

कालूराम हरकलाल जैन

कपासन (मेवाड़)

(नं. १७) “आपका भिजवाया हुआ (ठाणांग-समवायांग-मूल सूत्र दो प्रतिं) बुक-पोष्ट लाला परसराम जैन खत्री द्वारा हमें प्राप्त हुआ है । एतदर्थ सुमहान धन्यवाद ! ये महान् अनमोल रत्न भिजवाकर हमे कृतार्थ किया है और भविष्यके लिए आशा करते हैं कि इसी प्रकार अन्य अनमोल रत्न भी भिजवाकर अनुगृहीत करते रहेंगे । पुस्तककी छपाई-शुद्धता-सुंदरता-लघुता-आकार-प्रकार सब कुछ वैसा ही है जैसा मैं चाहता था, मानो मेरे विचारोंको समझकर ही आपने प्रकाशित करानेका प्रयत्न किया हो । यह संस्करण स्वाध्यायपरायण लघुविहारी मुनिराजोंके लिए परमोपयोगी है ।”

रोपड़ १-९-१९५२ }

भवदीय
मुनि फूलचंद्र (श्रमण)

(नं. १८) “श्रद्धेय धर्मोपदेष्टाजी जो आगमोंका संशोधित मूलपाठ प्रकाशित करवा रहे हैं इसकी परमावश्यकता थी, इस दिशाकी ओर बहुत कम विद्वान

મુનિઓંકા ધ્યાન ગયા હૈં ઇસ મગીરથ કાર્યકે લિંએ શ્રીધર્મોપદેષ્ટાજીકા જૈનસમાજ સદૈવ હી આભારી રહેગા ।”

કવિરાજ શ્રીચંદનમુનિ,
મુ० ગીદહવહા મંડી E. P.

(નં ૧૯)...શ્રી ૧૦૦૮ શ્રીરઘુવરદયાલજી મ૦ ઠા० ૬ સુખશાંતિસે વિરાજમાન હૈં, આપકે મેજે દો સૂત્ર પ્રાપ્ત હુએ, વે અતિ સુંદર છપાઈ સફાઈ કાગજાદિ સવ દૃષ્ટિસે વિદ્વાનોંકે લિંએ મહતોપયોગી હૈં । આપકા કાર્ય કેવલ પ્રશંસાકે યોગ્ય હી નહીં બલ્કિ આદર્શ ઔર આચરણકે યોગ્ય હૈં ઔર નિઃશુલ્ક મિજવાકર તો અપને સમાજ પર અપની અતિ ઉદારતાકા પરિચય દિયા હૈં અતઃ ઇસકે લિંએ કોટિ ૨ ધન્યવાદ !

તા. ૧-૯-૫૨ } મંત્રી S. S. જૈનસભા.
માલેરકોટલા. E. P.

(નં ૨૦) શ્રી આંબાજી સ્વામીએ આપને વહુમાનથી વંદના કરી સુખ-શાતા પુછાવેલ છે. આપે મગવતી સહિત સાત સૂત્રો છુટક છુટક કરી મોકલ્યા તે સાતે પુષ્પો મલ્યા છે. તે સહર્ષ સ્વીકારી લીધા છે । તમો શાસ્ત્રોદ્ધારનું કામ કરી જૈનસમાજની સેવા વજાવી રહ્યા છો. તે ઘણું ઇચ્છવા યોગ્ય કામ છે. તમોએ તથા ત્યાંની સમિતિના કાર્યકર્તાઓએ સૂત્રાનુવાદ ગુજરાતી અને હિંદી તથા કાવ્યોમાં વનાવવાની ભાવના પ્રદર્શિત કીધી છે એ અતિસ્તુત્ય છે.

પોરબંદર તા० ૧૦-૯-૧૯૫૨.

(નં. ૨૧) તમારા તરફ થી માગધીમાપામાં આપણા શાસ્ત્રની પુસ્તિકાઓ મોકલી તે મળી છે ‘સુત્તાગમે’ તેની બે જુદી ૨ મળી છે. આપ આ જ્ઞાનોદ્ધારક શાસ્ત્રોદ્ધારને માટે કાર્ય કરો છો તે માટે એમના મંત્રીશ્રીને સ્થરેસ્થર ધન્યવાદ છે. એ પ્રકાગન જગત્પયોગી છે. એ આપની પરોપકારી ભાવનાને ધન્યવાદ ઘટે છે.

પોરબંદર તા. ૩૧-૮-૫૨

મુનિશ્રી આંબાજી સ્વામી

(नं. २२) जैन मुनि श्रीश्री हजारीमलजी महाराज व पं. मुनिश्री सिथीमलजी (मधुकर) महाराज की सम्मति

“स्थानांगसूत्रके दोनों अंश और समवायांगसूत्र हमने पढ़े। आचारांग और सूत्रकृतांगकी तरह ये प्रकाशन भी बहुत सुंदर निकले हैं। इन आगमोंके सम्पादनमें जैनधर्मोपदेष्टा उग्रविहारी मंत्री मुनि श्रीफूलचंद्रजी महाराजने जो परिश्रम उठाया है वह अत्यन्त प्रशंसाके योग्य है। स्वाध्यायप्रेमियोंके लिए मुनिश्रीका यह प्रयास बहुत सफल सिद्ध हो रहा है।

भावना तो यह है कि आगेके प्रकाशनभी बहुत शीघ्र हमारे हाथोंमें आजाएँ।”
प्रेषक—गजमल विरधीचंद तातेड़ मु० पो० विजयनगर (अजमेर)

(नं. २३) मुनि श्रीफूलचंद्रजी म. द्वारा संपादित ‘सुत्तागम’ अंतर्गत आचारांग-सूत्रकृतांग-ठाणायंग और समवायांग पुस्तक नंग ४ भेंट मिली। ‘सुत्तागमे’ की उपरोक्त पुस्तकें स्वाध्याय योग्य होनेसे स्वाध्याय करके अतिप्रमोद प्राप्त हुआ है। जिज्ञासु और स्वाध्याय करनेवालों के लिए यह बहुत उपयोगी साधन है। विजय-ढायरी पढ़नेसे मालूम हुआ है कि ‘सुत्तागमप्रकाशकसमिति’ (गुड़गाँव पंजाब)ने आगमप्रचारविषयक योजना विशाल रखी है। यदि सुत्तागमकी तरह सौ १०० भाषाओंमें श्रीश्रमण भगवान महावीरस्वामी द्वारा निर्दिष्ट जगज्जंतुकल्याणक अनेकान्त स्याद्वादगर्भित जैनसिद्धान्त का प्रतिदेश प्रतिप्रान्त और प्रतिघरमें प्रचार हो तो इसके सिवाय दूसरा पुण्यकार्य क्या हो सकता है। यह धर्मप्रचारकी सर्वोपरि योजना है, यह कहते हुए हमें हर्ष होता है। जैनसमाजके श्रीमान् विद्वानोंका और श्रीमान् लक्ष्मीनंदनोका इसमें पूरा साथ हो तो कार्य जल्दी सुचारुरूपसे हो सकता है अतः दोनों उदार बनें।

जामजोधपुर ता. ३१-८-५२ शुभेच्छुक जैन भिक्षु गव्वुलालजी म०

(नं. २४) आपकी ओरसे सूत्रोंका बुकपोस्ट मिला, मेवाड़ भूपण. चतुर्मास-विहारमंत्री श्री १००८ मोतीलालजी म. की सेवामें प्रस्तुत किया. उत्तरमें फर्माया है कि आपको हार्दिक धन्यवाद है, आप बड़े परिश्रमपूर्वक शास्त्रोद्धार कर रहे हैं आपका शास्त्रोद्धार सराहनीय है। ऐसा परिश्रम करके

शास्त्रोद्धार करनेवाले विरले मुनि है। आपको जितनी उपमा दी जायें थोड़ी है। आपश्री चतुर्विध संघके लिए बड़ा ही सराहनीय कार्य कर रहे हो। ऐसा कार्य करने ही से समाजमें ज्ञानप्रचार व शास्त्रोद्धार हो सकता है, थोड़ेसेमें बहुत समझे। श्रीमान्-श्रावक संघका पैसा भी सदुपयोगमें लग रहा है। श्रावकसंघको चाहिए कि ऐसे कार्यमें कंजूसी न करते हुए द्रव्यका इसके प्रचारमें सदुपयोग करें जिसमें सबका कल्याण समाया हुआ है।

ता० ३१-७-१९५२

आपका भँवरलाल जैन, खमनौर

(नोट) इनके अतिरिक्त और बहुतसी सम्मतिएँ ग्रंथ बढ़नेके भयसे नहीं दे रहे। आपने इन पृष्ठपटोपर अंकित सम्मतिओसे यह तो जान ही लिया होगा कि ये प्रकाशन कैसे है। वैसे तो सब संप्रदायोके मुनिओ और महासतिओकी ओरसे सूत्रोंकी मांगें धड़ाधड़ आती रहती हैं, अर्थात् सूत्रोंका प्रचार आग्रासे अधिक हो रहा है। इसी प्रकार ३२ आगमोंको यथासमय मुनिओ और महासतिओके करकमलोंमें पहुंचाकर समिति अपना ध्येय पूरा करनेका प्रयत्न करेगी। समिति यही चाहती है कि हमारे मुनिगण प्रकाण्ड विद्वान् बन कर जिनशासनका उत्थान करें।

मंत्री

सूयणा

इक्कारसंगाइमिमाइमह धम्मगुरुण गरिमजियमेरुण साहुकुलचूलामणीण अहिल-
 सग्गुणखणीण चत्तअदत्तकलत्तपुत्तमिताण पसंतचित्ताण अग्गिब्ब उग्गतवतेयदित्ताण
 पोम्मं व अलित्ताण पागयजणमुच्छाविहाणनियाणविसयगामविरयाण पंचविहायार-
 निरइयारचरणनिरयाण भवोयहितारणतरंडाण अण्णाणतमोहपयंडमायंडाण मोहेभ-
 निवारणवरंडाण पासंडिमाणसेलमहणवज्जदंडाण वाउरिव अपडिबद्धाण तवसिरिस-
 मिद्धाण सम्मअवगयजिणमयसम्मयसुहुमयरवियारसयलभवसिद्धियलोयहिययंगमाण
 सुसंजयपंचपसियतरलयरकरणतुरंगमाण दुज्जयअणंगमायंगभंगसारंगपुंगवसरिच्छाण
 अक्कुव्व सुयणंवुरुहवोहणअण्णाणमोहतिमिरभरहरणधम्मज्जोयकरणिक्कतल्लिच्छाण दुह-
 तरुउम्मूलणेक्कखरपवणाण चरित्ताणणदंसणफललुद्धमुणिंदसउणमेखवणाण सारयस-
 लिलं व सुद्धमणाण पाविधणोहहुयासणाण संसारणवमज्जतजीवमणतारणसमत्थवो-
 हित्थाण अद्दिव्व धीरिमापडिहत्थाण जिणपवयणगयणनिसायराण मेराणाणचरणाइ-
 निम्मलगुणरयणरयणायराण नियसुद्धवएसदेसणाणिण्णासियभव्वजन्तुजायजीवियभू-
 यसम्मदंसणणासणपच्चलमिच्छादंसणुग्गरलाण दुज्जणदुव्वयणपवणवाए वि अतर-
 लाण विसयसुहनिप्पिवासाण मुक्कगिहवासपासाण दूरपरिचत्तविइगिच्छाअरइरइभीइ-
 हासाण मित्तसत्तुजणजुम्मसमाणमणोविलासाण नवविहवंभचेरुत्तिसम्मसंरक्खणेक्कप-
 रायणाण दुक्कम्मदइच्चनिवहविद्धंसणनारायणाण सुत्तत्थविसारयाण जिणधम्म-
 पसारयाण मरालुव्व परगुणखीरगहणदोसंवुविवज्जणवियक्खणाण कयच्छक्कायर-
 क्खणाण खं व अणप्पकुवियप्पसंकप्पसुण्णाण खंतिमुत्तिअज्जवमह्वलाघवाइपुण्णाण
 धरामंडलव्व सव्वसहाण भवदुक्खायवसंतत्तपंथिसंतिदायगदहाण चंदणवणं व
 सुसीयलाण जसच्छाइयधरणीयलाण कंदप्पदप्पदलणिक्कमल्लाण नीसल्लाण नियनिख-
 मवयणकलारंजियसयललोगाण सव्वहा निम्ममयाए निरासीकयसोगाण आइच्चुव्व
 तेयसा फुरंताण धम्मुव्व मुत्तिमंताण जियतिजयदप्पकंदप्पमत्तगयवियडकुंभयड-
 दलणसीहाण निरीहाण जिणगणहरसमणुच्चिण्णसम्ममग्गाणुयाईण निहिलागमपार-
 याईण परजियपियहियसियफुडभासीण सयलगुणरासीण माणावमाणपसंसणिंदण-
 लाहालाहसुहुदुहसमाणमणसाण अंसुमालिब्व फेडियदुम्मइतमसाण संतिमुत्तीण
 सियकित्तीण जीवुव्व अप्पडिहयगईण जिणपवयणाणुसारमईण असयनिग्गमुव्व
 सोमसहावाण महापहावाण पंचाणणुव्व दुप्पधंसणिज्जाण सयलजणाभिगमणिज्जाण
 सासणपभावगाण जीवे सम्मग्गे ठावगाण जम्मजरसरणक्कलोललोलजलपडलपुण्ण-

विविहमहायंकसमुल्लसंतललकणक्कचक्कअणवरयविसप्पिररोगसोगमयराइभीमभवण-
 वाउ भव्वे धम्मदोणीतारणसमट्ठकुसलकण्णधाराण धीरधुरधवलुव्व उव्वहिय-
 दुव्वहपंचमहव्वयगुरुभाराण उदहिविव गहीराण मोहमल्लिकवीराण पावदावग्गि-
 नीराण दुरियरयसमीराण जिणधम्मरहसुसारहीण धम्मकर्हीण तिगुत्तिवग्गावसीक-
 यदुट्ठमणस्साण अवगयदुग्गमसिद्धंतरहस्साण अपसत्थासवदारनिरोहगाण बहुभव्व-
 जणसमाजवोहगाण जिइंदियाण धम्मपियाण पंचविहसज्जायविहिविहाणविहावग-
 सावहाणाण अहिलजगज्जंतुजायवियरंतअभयदाणाण भवजलहिवुत्तजंतुसंतरण-
 अणहवरजाणाण भवभयचारयवंधणविच्छेयनिमित्तसत्ताणाण समतिणमणिलेट्ठ-
 कंचणाण छड्डियमयतण्हावंचणाण अण्णाणतिमिरावरियअन्तरणयणजणताविइण्ण-
 तदुग्घाडणारिहतव्विमलयाहेउपरमणाणंजणाण सखुव्व निरंजणाण कम्ममहीरहकु-
 मइलउप्पाडणगइंदाण परतित्थियमियमइंदाण कासकुसुमालिनिम्मलजसभरपरिभरिय-
 भुवणयलाण दारिदुदुमदवानलाण सोमुव्व सोम्मयागुणगरिट्ठाण सव्वसाहुजणपगिट्ठाण
 सीहुव्व असंखोहाण आहिवाहिउवार्हिकसायग्गिउलहवणमेहसंदोहाण वज्जियलोह-
 नियडिमयकोहाण पणट्ठसंपदायपक्खवायमोहाण अण्णाणंधयारावडियदावियमुत्ति-
 मग्गाण गयसग्गाण कि बहुणा सव्वसाहुगुणोवमाजुत्ताण ससहरुव्व विवुहजणम-
 णचओरामंदाणंददायगभव्वहिययकेरववियासगनियसियसुजसजुण्हाधवलियदियंतर-
 अण्णउत्थियचक्कविहडणपयडमहप्पपावकलंकवंकत्तणमुत्ताण अज्जपरमपुज्जाण वंदणि-
 ज्जाण ४ सिरि १०८ सिरिफकीरचंदमहारायाण धारणाववहाराणु-
 सारं वट्ठंति जइ मे पयासेण कस्स वि किचि वि लाहो होहिइ तो सपयत्तसाहल्लं
 मणिस्स, दिट्ठिमुद्दणक्खरजोजगदोसा कहिंपि कावि असुद्धी होउ सोहिज्जउ, पेसि-
 ज्जउ ससम्मई, इमाण सज्जायं कट्ठु वुहा निरावाहं सुहं पाउणंतु त्ति ।

गुरुपयंवुरुहदुरेहो-पुष्पभिक्षू

सूचना

यह प्रकाशन मेरे धर्मगुरु धर्माचार्य साधुकुलशिरोमणि १०८ श्रीफकीर-
 चंद्रजीमहाराज (स्वर्गाय) के धारणाव्यवहारानुसार है, यदि कोई दृष्टि-
 मुद्रणादि दोष हो तो स्वाध्याय प्रेमी सज्जन सुधारकर पढ़ें । यदि इस प्रयत्नसे
 मुमुक्षुओंको ज्ञानसाधनाका लाभ मिला तो परिश्रम सफल समझकर सन्तोष
 होगा । इन अंगसूत्रोंका अहर्निश स्वाध्याय करते हुए वे निराबाध सुख प्राप्त करें ।
 मुनिगण अपनी सम्मति समितिको भेजें ।

गुरुचरणचंचरीक

पुष्पभिक्षू

प्रस्तावना

इस अनादि अनंत संसारमें आत्माने अनन्त वार जन्म मरण किए हैं परन्तु अपने स्वरूपको भूलकर विभाव-परपरिणतिमें रच पचकर कर्मवश होकर अनन्त-नन्त दुःख सहन करता रहा है। यद्यपि सुखको पानेके लिए अनेक प्रकारके पापड़ बेलता है लेकिन अवतक उसे वह सच्चा और टिकाऊ सुख नहीं मिल सका है कि जिसके द्वारा संसृतिके सब दुःखोंसे नितान्त छुटकारा पालेता, परन्तु धर्म पुरुषार्थके विना वह सुख कहां? 'धर्मात्सुखं' धर्मसे सुख मिलता है, सुखके पानेमें धर्म कारणभूत है, तब कारणके विना कार्य कैसे संपन्न हो सकता है। साथ ही यह भी स्मरण रहे कि धर्मपुरुषार्थ ही मोक्षका वास्तविक मार्ग है जिसके सुख्य तीन प्रकार सर्वज्ञों द्वारा प्रतिपादित हैं, वे हैं सम्यग्ज्ञान, सम्यग्दर्शन और सम्यक्चरित्र। शरीर और मनके दुःखोंसे छुटकारा दिलाने वाला यही रत्नत्रय समर्थ साधन है। इस रत्नत्रयमें 'पदमं नाणं तजो दया'के अनुसार सम्यग्ज्ञानकी प्रधानता है। मोहरूपी महा अंधकारके समूहको नष्ट करनेमें ज्ञान सूर्यके समान है। इष्ट वस्तुको प्राप्त करानेमें ज्ञान कल्पवृक्ष है। दुर्जय कर्मरूपी हाथीको पछाड़नेमें ज्ञान सिंह जैसा है। ज्ञानके अभावमें मुँहपर दो आंखे होनेपर भी वह अन्धके सदृश है। ज्ञानके भी पांच प्रकार हैं जिनमें 'श्रुतज्ञान' बड़े ही महत्वकी वस्तु और परोपकारी है। केवली भगवान्का केवलज्ञान उनके स्वयंके लिए लाभ दायक है औरोंके लिए नहीं वे भी श्रुतज्ञानके द्वारा ही जगत्के असंख्य भव्य-जीवोंको प्रतिबोध देकर महान् उपकार करते हैं। लेकिन श्रुतज्ञानकी भी दो वीथियाँ हैं जिन्हें सम्यक्श्रुत और मिथ्याश्रुत कहते हैं। सम्यक्श्रुतके भी अनेक भेद हैं जिनमें वर्तमान समयमें केवल ३२ आगम ही उपलब्ध हैं और जो १४ पूर्वोक्त श्रुतज्ञान महान् समुद्रके समान था उसका काल दोषसे इस समय विच्छेद हो चुका है। यह हमारे मंदभाग्य ही का कारण है, तो भी ये वर्तमानिक आगम आजके सत्साहित्यके मूल स्रोतके समान हैं। इन्हीं स्रोतों द्वारा हमारा साहित्य अमर विभूति प्राप्त है। साहित्य वह वस्तु है जो प्रत्येक धर्म और राष्ट्रका प्राणभूत होता है। जिसका अपना निजीसाहित्य न हो वह धर्म मृतकके समान है।

जैनसाहित्यमें आगमोंका स्थान—यो तो जैनसाहित्य अन्य साहित्योंकी अपेक्षा अत्यन्त विशाल है। कोई ऐसा विषय नहीं है जिसपर जैनसाहित्यों की लेखनी न उठी हो, परन्तु उसमें भी आगमोंका स्थान सर्वोच्च है। या यो कहिए

कि ये आगमसूत्र जैनसाहित्यके लिए प्राणभूत है। इन आगमों का सहारा लेकर बड़े २ विद्वानोंने नाना प्रकारकी उत्तमोत्तम रचनाएँ की हैं। इससे यह पाया पड़ता है कि ये हमारे पवित्र आगम जिनशासनरूपी कल्पवृक्षके दृढतम मूल हैं।

आगम रचयिता—जिस समय तीर्थंकर भगवान् चारों तीर्थोंकी स्थापना करते हैं उस समय द्वादशांगीके बीजभूत महत्त्वपूर्ण तीन वचनोंका प्रकाश गणधरोके सन्मुख करते हैं, उस उत्पाद व्यय और ध्रौव्यरूप त्रिपदीके द्वारा गणधरदेव द्वादशांगीकी रचना करते हैं * वर्तमानसमयमें जो ३२ आगम उपलब्ध हैं वे सब ज्ञातपुत्र महावीर भगवान्के सदुपदेशोंसे भरपूर होनेके कारण हमारे लिए अक्षय कोपके समान हैं।

वर्तमान आगमोंका इतिहास—भगवान् महावीर प्रभुके निर्वाणसे ९८० वर्ष तक उस समयके साधु साध्वियों सम्पूर्ण सिद्धान्त-आगमोंको अपनी तीक्ष्ण-बुद्धिके कारण कण्ठस्थ रखते रहे। वे दिन रातमें १२ घण्टे तक उनका स्वाध्यायके रूपमें परावर्तन किया करते थे। इसके पश्चात् कालदोषसे स्मरणशक्तिमें कमी आ जानेके कारण जहाँ तहाँ स्खलना पड़ने लगी। कहा जाता है कि उस समयके विद्यमान आचार्य देवर्द्धिगणि क्षमा-श्रमणने इस कमीको महसूस किया 'जिन-शासनकी रक्षा प्रत्येक प्रकारसे करनी चाहिए और शासनकी रक्षा सिद्धान्तकी रक्षा करनेसे ही हो सकती है, इस उद्देश्यसे उन्होंने आगामी भव्यलोकोके उपकारके लिए वीरसंवत् ९८० विक्रमसंवत् ५११, तदनुसार ई. सन् ४५४ में वल्लभी नगरीमें तत्कालीन समस्त जैनमुनियोंको एकत्रित किया। जिसे जितना याद था सुना और फिर उस महान् ज्ञानको यथाक्रम पुस्तकारूढ़ किया। उस सम्मेलनके बाद मूलरूपसे गणधर भाषित होनेपर भी सब आगमोंके संकलयिता देवर्द्धिगणि क्षमाश्रमण ही समझे जाने लगे, उदाहरणके लिए श्रीभगवतीसूत्र श्रीसुधर्माचार्य प्रणीत है और प्रज्ञापनासूत्र भगवान् महावीर प्रभुके निर्वाणके ३३५ वर्ष बाद श्रीश्यामाचार्य द्वारा संकलित किया गया पर भगवती में कई स्थलोपर 'जहा पणवणाए' ऐसा पाठ

.. अथ भासइ अरिहा, सुत्तं गंधंति गणहरा निउण। † पडिक्कमामि चउक्काल सज्झायस्स अकरणयाए; अथ च उत्तराध्ययने समाचारी नाम षड्विंशतितमे अध्ययने प्रथमा समाचारी स्वाध्यायरूपा स्थापिता येन ज्ञानस्य विसरणं न भवेत्। ‡ इतना और स्मरण रहे कि इससे पहले पाटलीपुत्र का सम्मेलन और नागार्जुनक्षमाश्रमणके तत्त्वावधानसे माथुरीवाचना हो चुकी थी। देखो 'आगमोंकी भाषा' का प्रकरण।

मिलता है। इसी भांति और अंगोंमें भी उपांगोंकी साक्षियां पाई जाती हैं, अर्थात् अमुक उपांगोंसे समझ लेना चाहिए। इससे यह स्वयंसिद्ध है कि देवर्द्धिगणि क्षमाश्रमण वर्तमान आगमोंके संकलयिता थे, उन्होंने लिपिवद्ध करते समय पाठोमें साम्य देखकर समयका अपव्यय न हो इसलिए ऐसा किया। आगमोंको पुस्तका-रुद्ध करके उन्होंने जैन समाज पर जो महान् उपकार किया है उसे कभी भी नहीं भुलाया जा सकता।

एक आगमका उसी आगममें निर्देश—आगमोंमें प्रस्तुत आगमका प्रस्तुत आगममें भी निर्देश पाया जाता है, जैसे समवायांगसूत्रमें १२ अंगोंके वर्णन में समवायांगका भी वर्णन है, यही क्रम और आगमोंमें भी मिलता है, इसका कारण आगमोंकी प्राचीन शैली है, यही प्राचीन प्रवृत्ति वेदोंमें भी पाई जाती है। जैसे “सुपुर्णोऽसि गरुडोऽसि शिरो गायत्रं चक्षुर्वृद्धयन्तरे पक्षौ स्तोमं आत्मा छन्दाश्चस्यज्ञानि यजूंषि नाम।”

जैनसाहित्यपर नई २ आपत्तियाँ—जिसकालमें बौद्धों और जैनोके साथ हिंदुओंका महान् संघर्ष था उस समय धर्मके नाम पर बड़े से बड़े अत्याचार हुए, उस अंधड़में साहित्यको भी भारी धक्का लगा, फिर भी जैनसमाजका शुभ उदय समझे या आगमोंका माहात्म्य ! जिससे आगम वाल २ वचे और सुरक्षित रहे। परन्तु बड़ों पर आपत्तियाँ आया ही करती है। इसके अनन्तर चैत्यवासियोंका युग आया, उन्होंने चैत्यवादका जोर शोरसे आंदोलन किया और अपनी मान्यताको मजबूत करनेके लिए नई २ बातें घड़नी गुरु की, जैसे कि अंगूठे जितनी प्रतिमा बनवा देनेसे स्वर्गकी प्राप्ति होती है, जो पशु मंदिरकी ईंटे ढोते हैं वे भी देवलोक जाते हैं, आदि २। वे यहां तक ही नहीं रुके बल्के उन्होंने आगमोंमें भी अनेक वनावटी पाठ घुसेड़ दिए। जिस प्रकार रामायणमें क्षेपकोंकी भरमार है उसी प्रकार आगमोंमें भी। इसके बाद युगने करवट बदली और उसी कटाकटीके समय धर्मप्राण लोंकाशाह जैसे क्रान्तिकारी पुरुष प्रगट हुए। उन्होंने जनताको सन्मार्ग सुझाया और उसपर चलनेकी प्रेरणा दी। चैत्यवासियोंने तो उनको अनेक कष्ट दिए पर वे कहा टससे मस होनेवाले थे। “धम्मो मंगलमुक्खिं” गाथा पढ़कर और चैत्यवासियोंमें आचार विचार संबंधी शिथिलता देखकर उन्होंने वह आवाज उठाई कि जिससे लोगोमें क्रांति और जागृति उत्पन्न हुई तथा लवजी धर्मशी धर्मदासजी जीवराजजी जैसे भव्य-भावुकोंने धर्मकी वास्तविकताको अपनाया और उसके स्वरूपका प्रचार आरंभ

किया । परिणाम स्वरूप आज भी उनकी प्रेरणाओंको जीवित रखनेवालोंकी संख्या ५ लाखसे कहीं अधिक पाई जाती है । लोंकाशाह सहित इन चारों महापुरुषोंने चैत्यवासी मान्य अन्य आगमोंमें परस्पर विरोध एवं मर्ने घड़न्त वाते देखकर ३२ आगमोंको ही मान्य किया ।

आगमोंकी भाषा—समवायांग सूत्र तथा औपपातिकसूत्रमें क्रमशः पाठ आते हैं “भगवं च णं अद्धमागहीए भासाए धम्ममाइक्खइ” “तए णं समणे भगवं महावीरे कूणियस्स रण्णो भिंभिसारपुत्तस्स”..... अद्धमागहाए भासाए भासइ । ...सा वि य णं अद्धमागहा भासा तेसिं सब्वेसिं आरियमणारियाणं अप्पणो सभासाए परिणामेणं परिणमइ” अर्थात् ज्ञातपुत्र-महावीर भगवान् अर्धमागधी भाषामें उपदेश करते थे और वह भाषा सब जीवोंकी अपनी २ भाषामें परिणत होती थी । उनके पांचवें गणधर श्रीसुधर्मा स्वामीने द्वादशांगीकी रचना भी अर्धमागधीमें ही की । दिगंबरोंके मतसे ये १२ अंग विच्छिन्न हो चुके हैं परन्तु अपने मतानुसार जैसा कि पहले लिखा जा चुका है देवर्दिगणि क्षमाश्रमणने आगमोको लिपिवद्ध किया । इतने समयके बाद लिखे जानेपर भी भाषाकी प्राचीनतामें कमी नहीं आई । क्योंकि सैकड़ों वर्षोंतक जैसे ब्राह्मणोंने मुखपाठके द्वारा वेदोकी रक्षा की उसी प्रकार जैन मुनिओने भी लगभग १००० वर्ष पर्यन्त शिष्य परम्परासे इन पवित्र आगमोको स्मृतिपथमें रक्खा । दूसरा कारण यह है कि जैन धर्ममें शुद्धपाठोच्चारण पर खूब जोर दिया गया है, और ‘हीणक्खरं’ आदि अतिचार बताए गए हैं । फिर भी वारीकीसे देखनेपर यह अवश्य मानना पड़ेगा कि चाहे जैसे भाषामें परिवर्तन जरूर हुआ है । इसका होना असंभव भी नहीं कहा जा सकता, क्योंकि आगम वेदोकी भान्ति शब्द-प्रधान न होकर अर्थ-प्रधान हैं । ये सूत्र उस समयकी जनसाधारणकी कथ्यभाषामें निर्मित हुए और समयानुसार बोलीमें (लोकभाषामें) होनेवाले परिवर्तनका प्रभाव लोगोके समझानेके लिए आगमोपर भी होना आश्चर्यजनक नहीं । इसका एक मुख्यकारण यह भी है कि ज्ञातपुत्र-महावीर भगवान् के मोक्ष जानेके लगभग २०० वर्ष पीछे, जे. न. प. ३१० चद्रगुप्तके समयमें मगधमें १२ वर्षका भयानक अकाल पड़नेके कारण मुनिओको सयम निभानेके लिए दक्षिण देशमें जाना पड़ा और परावर्तन

१. दंगो ‘एनुअल रिपोर्ट ऑफ एशियाटिक सोसायटी बेगल’ १८५८ डॉ. रॉबिन्सन का लेख ।

न कर सकनेके कारण उन्हें भूल से गए । उसके बाद पाटलीपुत्रमें संघ एकत्र हुआ और जिसे जितना याद था सुनकर ११ अंगोका संकलन किया गया अर्धमागधीमें मगधके आसपासके प्रदेशोंकी भाषाओंकी अपेक्षा दूरस्थ महाराष्ट्रकी भाषाका जो अधिक साम्य देखा जाता है उसका कारण भी यही है । इतिहास द्वारा यह भी सिद्ध है कि पुराने समयमें जैनधर्मका दक्षिणमें भली भांति प्रचार हुआ था, तब यह अनुमान असंगत नहीं हो सकता कि दुर्भिक्षकालमें मुनिवर्ग दक्षिणमें न गया हो, तद्देशीय भाषाज्ञानके बिना प्रचार सम्यक्तया नहीं हो सकता, अतः उसका प्रभाव कंठस्थ आगमोंकी भाषा पर भी पड़ा, इसके द्वारा प्रभावित बहुतसे मुनि पूर्वोक्त सम्मेलनमें पधारे, इसलिए अंगोके संकलनमें भी इसका थोड़ा बहुत असर पड़ा । उससे लगभग ८०० वर्ष बाद थोड़े २ अंतरसे मथुरा और वल्लभीमें आगमोंको पुस्तकारूढ़ करनेके लिए साधुसम्मेलन हुए, जिनमें सब प्रान्तोंसे मुनि आए, जिनके मुखस्थ सूत्रोंपर तत्तत्प्रदेशोंमें बहुत समय तक विचरनेसे उस देशकी भाषा, उच्चारण आर व्याकरणका कुछ न कुछ प्रभाव अंकित था । यही कारण है कि अंगोमें एक ही अगके भिन्न २ भागोंमें और कहीं २ एक ही वाक्यमें भाषाभेद दृष्टिगोचर होता है । इस प्रकार भाषापरिवर्तनके बहुतसे कारणोंके उपस्थित होनेपर भी पाटलीपुत्रके सम्मेलनके बाद विल्कुल अथवा अधिक परिवर्तन न होकर मात्र थोड़ा बहुत भाषा-भेद ही हुआ और अर्धमागधीके सैकड़ों प्राचीन रूप अपने स्वरूपमें सुरक्षित रह सके, इसका श्रेय अशुद्ध उच्चारणके लिए पापबंधके धार्मिक नियमको है जो कि सम्मेलनके पीछे और भी मजबूत किया गया । वर्तमान आगमोंमें कहीं २ जो पाठ-भेद मिलते हैं उनका कारण उपरोक्त वाचनाएँ हैं । समवायांग औपपातिक व्याख्या-प्रज्ञप्ति और प्रज्ञापनासूत्र तथा बहुतसे प्राचीन ग्रंथोंमें जिसे अर्धमागधी कहा

१ देखो स्थविरावलिचरित्र सर्ग ९ श्लो. ५५ से ५८ तक । २ देवा ण भंते ! कयराए भासाए भासंति ? कयरा वा भासा भासिज्जमाणी विसिस्सति ? गोयमा ! देवा णं अद्ध-मागहाए भासाए भासंति, सा वि य णं अद्धमागहा भासा भासिज्जमाणी विसिस्सति । ३ से कि तं भासारिया ? भासारिया जे णं अद्धमागहाए भासाए भासति । ४ ! आरिस-वयणे सिद्धं, देवाण अद्धमागहा वाणी । (काव्यालंकारकी नमिसाधु कृत टीका २, १२)
!! सर्वार्धमागधीं सर्वभाषासु परिणामिणीम् । सर्वपा सर्वतो वाचं, सार्वशीं प्रणिदध्महे ॥
(वाग्भट्टकाव्यानुशासन पृ० २) !!! अकृत्रिमस्वादुपदा, परमार्थाभिधायिनीम् । सर्व-भाषापरिणतां, जैनी वाचमुपासहे ॥ (स्वोपज्ञ काव्यानुशासन, हेमचंद्राचार्य)

गया । स्थानींगसूत्र तथा अनुयोगद्वारमें जिसे 'इसिभासिया' कहा गया है और इसीके आधारपर हेमचंद्राचार्य आदिने इसका नाम 'आर्ष' रक्खा अर्थात् अर्धमागधी ऋषिभाषिता और आर्ष तीनों एक ही बात हैं । पहला नाम उत्पत्ति स्थान तथा अन्य उस भाषाको सर्वप्रथम साहित्यमें स्थान दायकोंसे संबंधित हैं । हेमचंद्राचार्यने अपने बनाए हुए प्राकृत व्याकरणमें आर्षके जो लक्षण तथा उदाहरण बताए हैं उनसे और 'अत एत् सौ पुंसि मागध्यां' (हे. प्रा. ४-२८७) इस सूत्रकी व्याख्यामें जो "यद्यपि पोरणमद्धमागहभासानिययं हवइ सुत्तं" इत्यादिना आर्षस्यार्धमागधभाषानियतत्वमाम्नायि वृद्धैस्तदपि प्रायोऽस्यैव विधानात् न वक्ष्यमाणलक्षणस्य" ऐसा कहकर उसके अनन्तर जो 'कयरे आगच्छइ' 'से तारिसे जिइंदिए' के उदाहरण दिए हैं उनसे उक्त बात भली भांति सिद्ध हो जाती है, डॉक्टर हर्मेन जेकोबीने जैनागमोंकी भाषाको प्राचीन महाराष्ट्री कहकर 'जैन महाराष्ट्री' नाम दिया है । जिसका डॉ. पिशलने अपने विख्यात प्राकृत व्याकरणमें खंडन करके सप्रमाण सिद्ध किया है कि अर्धमागधीमें बहुलतासे ऐसी अनेक विशेषताएँ हैं जो महाराष्ट्री आदि किसी प्राकृतमें हूँदनेसे भी नहीं मिलतीं । इसलिए उपरोक्त नाम नहीं दिया जा सकता । नाटकोंमें जो अर्धमागधी पाई जाती है उसमें और सूत्रोंकी अर्धमागधीमें समानताकी अपेक्षा अत्यधिक भेद है । भरत मार्कण्डेय और क्रमदीश्वरने अर्धमागधीके भिन्न २ लक्षण बताए हैं, लेकिन वे केवल नाटकीय अर्धमागधीके लिए हैं । हेमचंद्राचार्यने अपने व्याकरणमें अर्धमागधीको 'आर्ष प्राकृत' और अर्वाचीन रूपको महाराष्ट्री माना है । इससे यह सिद्ध होता है कि महाराष्ट्रीसे अर्धमागधी बहुत प्राचीन है । अथवा यों कहिए कि अर्धमागधी ही महाराष्ट्रीका मूल है ।

१ सकता पागता चैव, दुहा भणितीओ आहिया । सरमंडलम्मि गिज्जंते, पसत्था इसिभासिता । २ सकाया पायया चैव, भणिईओ होति दोण्णि वा । सरमंडलम्मि गिज्जंते, पसत्था इसिभासिता ॥ ३ देखो हेमचंद्राचार्यका प्राकृतव्याकरण सूत्र १-३ । आर्षो-
त्थमार्पतुल्यं च द्विविधं प्राकृतं विदुः । (काव्यादर्श टीका १-३३ में प्रेमचंद्र तर्क-
वागीशद्वारा उद्धृत पद्यांश) ॥ ४ डॉ. हॉर्नलीने चंड कृत प्राकृत लक्षणके इन्ट्रोडक्शन
पृ. १८-१९ में हेमाचार्यके मतमें पोरण आर्ष प्राकृतका नाम लिखा परंतु वह बिल्कुल
गलत है, कारण यह सूत्रका विशेषण है भाषाका नहीं । ५ इंट्रोडक्शन डू प्राकृत
लक्षण ऑफ़ चंड पृ. १९ डॉ. हॉर्नली ।

अर्धमागधीकी संगत व्युत्पत्ति—बहुतसे लोग इसकी व्युत्पत्ति 'अर्धमागध्याः' करते हैं अर्थात् जिसका आधा अंश मागधी भाषा हो वह अर्धमागधी है, क्योंकि नाटकीय अर्धमागधीमें मागधीके लक्षण बहुलतासे पाए जाते हैं इसलिए वह अर्धमागधी है और जैनसूत्रोंमें मागधीके लक्षण बहुत कम मिलते हैं इसलिए वह अर्धमागधी नहीं। परन्तु उनकी यह व्युत्पत्ति भ्रमात्मक एवं असंगत है। इसकी वास्तविक व्युत्पत्ति है 'अर्धमगधस्येयं' अर्थात् मगधदेशके अर्धांशकी जो भाषा हो वह भाषा अर्धमागधी है। इसकी उत्पत्ति पश्चिम मगध अथवा मगध और शूरसेनका मध्यप्रदेश (अयोध्या) होनेपर भी इसमें मागधी और शूरसेनीके इतने लक्षण नहीं दिखते जितने महाराष्ट्रीके। इसका कारण पहले लिखा जा चुका है, दुष्काल और मुनिओका दक्षिण गमन एवं तद्देशीय भाषाका प्रभाव।

अर्धमागधी और महाराष्ट्रीमें भेद—(१) अर्धमागधीमें दो स्वरोंके मध्यवर्ती असंयुक्त 'क' के स्थानमें प्रायः सर्वत्र 'ग' और बहुतसी जगह 'त' और 'य' होता है। जैसे—लोक=लोग, आकाश=आगास आदि। 'त' सामाङ्क=सामातित इत्यादि। 'य' शोक=सोय, कायिक=काइय आदि।

(२) दो स्वरोंके बीचका असंयुक्त 'ग' प्रायः कायम रहता है, जैसे भगवन्=भगवं, आनुगामिक=आणुगामिय वगैरह। 'त' अतिग=अतित, 'य' सागर=सायर आदि।

(३) दो स्वरोंके बीचके असंयुक्त 'च' और 'ज' के स्थानमें 'त' और 'य' दोनों होते हैं। जैसे रुचि=रुति, वचस्=वति, लोच=लोय आदि। 'ज' के स्थानमें 'त' जैसे ओजस्=ओत, राजेश्वर=रातीसर इत्यादि। 'ज' के स्थानमें 'य' आत्मज=अत्तय, कामध्वजा=कामज्जया आदि।

(४) दो स्वरोंका मध्यवर्ती 'त' प्रायः कायम रहता है और कहीं २ 'य' भी होता है, जैसे कि जाति=जाति; 'य' करतल=करयल प्रभृति।

(५) स्वरोंके बीचमें स्थित 'द' का 'द' और 'त' ही अधिकांश देखा जाता है, कहीं २ 'य' भी होता है, जैसे—प्रदिशः=प्रदिसो, भेद=भेद आदि। 'त' यदि=जति, मृषावाद=मुसावात आदि। 'य' चतुष्पद=चउप्पय, पाद=पाय आदि।

(६) दो स्वरोंके मध्यमें स्थित 'प' के स्थानमें प्रायः सर्वत्र 'व' ही होता है जैसे—अध्युपपन्न=अज्झोववन्न, आधिपत्य=आहेवच्च वगैरह।

(७) स्वरोंका मध्यवर्ती 'य' प्रायः कायम रहता है जैसे—निरय=निरय, इन्द्रिय=इंदिय आदि। अनेक स्थानोंमें इसके स्थानपर 'त' भी देखा जाता है, जैसे—पर्याय=परियात इत्यादि।

(८) दो स्वरोंके बीचके 'व' के स्थानमें 'व' 'त' और 'य' होते हैं, जैसे गौरव=गारव; 'त' कवि=कति; 'य' परिवर्तना=परियट्टणा इत्यादि ।

(९) महाराष्ट्रीमें स्वरोंके मध्यवर्ती असंयुक्त 'क-ग-च-ज-त-द-प-य-व' का प्रायः सर्वत्र लोप होता है और कई व्याकरणोंके अनुसार इनके स्थानमें कोई अन्य वर्ण नहीं होता । हेमचंद्राचार्यके प्राकृतव्याकरणानुसार उक्त लुप्तव्यंजनोके दोनों ओर 'अ' या 'आ' होनेपर उनके स्थानमें 'य' होता है, किन्तु जैन अर्धमागधीमें जैसा कि ऊपरके नियमोंसे घटित है, प्रायः उनके स्थानमें अन्य व्यंजन होते हैं, और कहीं २ तो वही कायम रहता है । कहीं २ दोनों बातें न होकर महाराष्ट्रीकी तरह लोप भी होता है परन्तु वहीं जहां उक्त व्यंजनोंके बाद अवर्णसे भिन्न कोई स्वर हो । जैसे-आतुर=आउर, लोक.=लोओ प्रभृति ।

(१०) शब्दके आदि मध्य और संयोगमें सर्वत्र 'ण' की तरह 'न' भी होता है । जैसे-ज्ञातपुत्र=नायपुत्र; अनल=अनल; अन्योन्य=अनमन्न; सर्वज्ञ=सव्वञ्जु इत्यादि ।

(११) एव से पूर्वके 'अम्' के स्थानमें 'आम्' होता है, जैसे यामेव=जामेव; क्षिप्रमेव=खिप्पामेव; एवमेव=एवामेव वगैरह ।

(१२) दीर्घ स्वरके बादके 'इति वा' के स्थानमें 'ति वा' और 'इ वा' होता है, जैसे-इन्द्रमह इति वा=इंदमहे ति वा-इंदमहे इ वा इत्यादि ।

(१३) 'यथा' और 'यावत्' शब्दके 'य' का लोप और 'ज' दोनों ही देखे जाते हैं जैसे-यथाख्यात=अहक्खाय; यथानामक=जहानामए; यावत्कथा=आव-कहा; यावज्जीव=जावज्जीव ।

वर्णागम—अर्धमागधीमें गद्यमें भी अनेक जगह पर समासके उत्तर शब्दके पहले 'म्' का आगम होता है, जैसे-अजहन्नमणुक्कोस, अदुक्खमसुहा, गोणमाइ, णिरयंगामी, सामाइयमाइयाई, उड्डंगारव आदि । महाराष्ट्रीमें पद्यमें ही पादपूर्तिके लिए कहीं २ 'म्' का आगम देखा जाता है गद्यमें नहीं ।

शब्दभेद—(१) अर्धमागधीमें ऐसे बहुतसे शब्द हैं जिनका प्रयोग महाराष्ट्रीमें प्रायः उपलब्ध नहीं होता, जैसे-अज्झत्थिय, अज्झोववन्न, अणुवीति, आघवणा, आघवेत्तग, आणापाणु, आवीकम्म, कणहुइ, केमहालए, दुरुढ, पच्चत्थि-मिल्ल, पाउकुव्वं, पुरत्थिमिल्ल, पोरेवच्च, महतिमहालिया, वक्क, विउस इत्यादि ।

(२) ऐसे शब्द भी प्रचुर संख्यामें पाए जाते हैं जिनके रूप अर्धमागधी और महाराष्ट्रीमें भिन्न २ प्रकारके होते हैं । जैसे कि-

अर्धमागधी	महाराष्ट्री	अर्धमागधी	महाराष्ट्री
अभियागम	अब्भाअम	नितिय	णिच्च
आउंटण	आउंचण	निएय	णिअअ
आहरण	उआहरण	पडुप्पन्न	पच्चुप्पन्न
उप्पि	उवरिं-अवरिं	पच्छेकम्म	पच्छाकम्म
किया	किरिआ	पाय (पात्र)	पत्त
कीस-केस	केरिस	पुढो (पृथक्)	पुहं-पिहं
केवच्चिर	किअच्चिर	पुरेकम्म	पुराकम्म
गेहि	गिद्धि	पुर्वि	पुव्वं
चियत्त	चइअ	माय (मात्र)	मत्त-मेत्त
छच्च	छक्क	माहण	वम्हण
जाया	जत्ता	मिलक्खु-मेच्छ	मिलिच्छ
णिगण-णिगिण(नग्न)	णग्ग	वग्गू	वाआ
णिगिणिण (नाग्न्य)	णग्गत्तण	वाहणा (उपानह्)	उवाणआ
तच्च (तृतीय)	तइअ	सहेज्ज	सहाअ
तच्च (तथ्य)	तच्छ	सीआण-सुसाण	मसाण
तेगिच्छा	चिइच्छा	सुमिण	सिमिण
दुवालसंग	वारसंग	सुहम-सुहुम	सण्ह
दोच्च	दुइअ	सोहि	सुद्धि

और दुवालस, तेरस, अउणवीसड, वत्तीस, पणत्तीस, इगयाल, तेयालीस, पणयाल, अढयाल, एगट्टि, वावट्टि, तेवट्टि, छावट्टि, अडसट्टि, अउणत्तरि, वाव-त्तरि, पण्णत्तरि, सत्तहत्तरि, तेयासी, छलसीइ, वाणउइ प्रभृति संख्या शब्दोंके रूप जैसे अर्धमागधीमें पाए जाते हैं वैसे महाराष्ट्रीमें नहीं ।

नामविभक्ति-(१) अर्धमागधीमें पुलिंग अकारांत शब्दके प्रथमाके एकवचनमें प्रायः सर्वत्र 'ए' और क्वचित् 'ओ' होता है जब कि महाराष्ट्रीमें केवल 'ओ' ही होता है ।

(२) सप्तमीका एक वचन 'स्सि' होता है किन्तु महाराष्ट्रीमें 'म्मि' ।

(३) चतुर्थीके एकवचनमें 'आए' या 'आते' होता है, जैसे-अट्टाए, गम-णाए, देवाए, सवणयाए, अहिनाते इत्यादि । महाराष्ट्रीमें ऐसा नहीं ।

(४) अनेक शब्दोंके नृतीयाके एकवचनमें 'सा' होता है, जैसे-मणसा,

वयसा, कायसा, जोगसा, वलसा, चक्खुसा । महाराष्ट्रीमें अनुक्रमे उनके स्थानमें मणेण, वण्ण, काण्ण, जोगेण, वलेण, चक्खुणा होते हैं ।

(५) 'कम्म' और 'धम्म' शब्दके तृतीयाके एकवचनमें 'कम्मुणा' और 'धम्मुणा' होता है, जिसका अनुकरण पाली भाषा भी करती है, जबकि महाराष्ट्रीमें 'कम्मेण' और 'धम्मेण' होता है ।

(६) अर्धमागधीमें 'तत्' शब्दके पंचमीके बहुवचनमें 'तैच्चो' रूप भी देखा जाता है, जब कि महाराष्ट्रीमें इसका 'अदर्शनं लोपः' है ।

(७) 'युष्मत्' शब्दका षष्ठीका एकवचन 'तव' और 'अस्मन्' का पर्यायका बहुवचन 'अस्माकम्' जिसका अनुकरण संस्कृतभाषा भी करती है, अर्धमागधीमें है महाराष्ट्रीमें नहीं ।

आख्यात-विभक्ति—अर्धमागधीमें भूतकालके बहुवचनमें 'इनु' प्रत्ययका प्रयोग होता है, जैसे 'आभासिसु' 'गच्छिसु' 'पुच्छिसु' आदि । महाराष्ट्रीमें यह प्रयोग लुप्त है ।

धातुरूप—अर्धमागधीमें अकासी-अन्ववी-आइक्खइ-आघं आहंमु-कुब्बइ-घेच्छिइ-तिउट्टइ-तिउट्टिजा-तिवायए-दुरुहइ-पडिसंघयाति-पहारेत्था-भूया-भुवि-विग्गि-चए-समुच्छिहिति-सारयती-हुत्था-होक्खती-होत्था-प्रभृति प्रभूत प्रयोगोंमें धातुकी प्रकृति प्रत्यय अथवा दोनों जिस आकारमें पाए जाते हैं महाराष्ट्रीमें वे अलग २ प्रकारके देखे जाते हैं ।

धातुप्रत्यय—अर्धमागधीमें 'त्त्वा' प्रत्यय के रूप अनेक तरहके होते हैं ।

(१) (अ) टु; जैसे-अवहट्टु, कट्टु, साहट्टु आदि ।

(आ) इत्ता, एत्ता, इत्ताणं और एत्ताणं; यथा-चइत्ता, पासित्ता, विउट्टित्ता, करेत्ता, पासित्ताणं, करेत्ताणं इत्यादि ।

(इ) इत्तु; जैसे-जाणित्तु, दुरुहित्तु, वधित्तु वगैरह ।

(ई) च्चा; यथा-किच्चा, चेच्चा, णच्चा, भोच्चा, सोच्चा प्रभृति ।

(उ) इया; जैसे-दुरुहिया, परिजाणिया आदि ।

इनके अतिरिक्त अणुवीति, निसम्म, विउक्कम्म, लद्धं, लद्धूण, समिच्च, संखाए, दिस्सा आदि प्रयोगोंमें 'त्वा' के रूप भिन्न २ प्रकारके पाए जाते हैं ।

(२) 'तुम्' प्रत्ययके स्थानमें 'इत्तए' या 'इत्तते' प्रायः देखा जाता है । जैसे-करित्तए, गच्छित्तए, विहरित्तए, संभुजित्तए, उवसामित्तते आदि ।

(३) ऋकारांत धातुके 'त' प्रत्ययके स्थानमें 'ड' होता है, जैसे-कड, मड, अभिहड, वावड, संवुड, वियड, वित्थड प्रभृति ।

तद्धित

(१) अर्धमागधीमें 'तर' प्रत्ययका 'तराय' रूप होता है, जैसे-अणिट्तराए, अप्पतराए, बहुतराए, कंततराए इत्यादि ।

(२) आउसो, आउसंतो, गोमी, वुसिमं, भगवंतो, पुरत्थिम, पच्चत्थिम, ओयंसि, दोसिणो, पोरेवच्च आदि प्रयोगोंमें 'मतुप्' और अन्य तद्धित प्रत्ययोंके जैसे रूप जैन अर्धमागधीमें देखे जाते हैं महाराष्ट्रीमें वे भिन्न प्रकारके होते हैं ।

महाराष्ट्री और अर्धमागधीमें इनके अतिरिक्त बहुतसे सूक्ष्म भेद हैं जिनका उल्लेख लेखका देहसूत्र बढनेके भयसे नहीं किया ।

आगमोद्धार

जैसाकि हम ऊपर आगमोंके इतिहास प्रकरणमें लिख चुके हैं स्थानकवासी समाजमे उत्तरोत्तर वृद्धि होती चली गई, अतः ज्ञानमे वृद्धि होनी ही थी । सबसे पहले श्रीधर्मशी स्वामीने मूलसूत्रोंपर 'टब्बे' लिखे, जो कि साधारण अभ्यासीके लिए अत्यंत उपयोगी है । क्या ही अच्छा होता यदि उन्हें प्रकाशित किया जाता । इसके बाद पूज्य श्रीअमोलक ऋषिजी म० ने वत्तीसों सूत्रोंका अनुवाद किया । जिसका प्रकाशन हजारों रुपया व्यय करके श्रीमान् राजा बहादुर शेठ दानवीर सुखदेवसहाय ज्वालाप्रसाद जौहरीने किया, इसके लिए वे अधिकाधिक धन्यवादके पात्र हैं । लेकिन पाठोकी अशुद्धि, कागज़की खराबी और मिश्रित हिन्दी होनेके कारण समाजको इतना लाभ न मिल सका जितना मिलना चाहिए था । इसके अनन्तर जैनाचार्य पूज्य श्रीआत्मारामजी महाराज और पूज्य श्री-हस्तीमलजी म० ने भी कई सूत्रोंके अनुवाद किए और घासीलालमुनि भी कर रहे हैं ।

इसके अतिरिक्त रायबहादुर धनपतसिंह (मकसूदाबादवाले) और आगमोदय-समिति आदिने भी आगमोंका प्रकाशन किया है पर वे भी अशुद्धियोंसे खाली नहीं । कई प्राध्यापकों ने भी इंग्लिश अनुवाद सहित कुछ सूत्र प्रकाशित किए, परंतु अतिसंक्षिप्त और महाराष्ट्री प्रधान होनेके कारण स्वाध्यायी के लिए अधिक उपयोगी नहीं ।

सूत्रागमप्रकाशकसमिति

वैदिक प्रेस अजमेरकी छपी हुई चारो मूल वेदोंकी पुस्तक एक किसानने गुरु महाराजकी सेवामे पेश की और पूछा कि आपके आगम भी एक जिल्दमे मिल

सकते हैं, गुरु महाराज क्या उत्तर देते? अनः उन्होंने गुडगान ग्यानश्यामी जैन संघको प्रेरणा दी और श्रीसूत्रागमप्रकाशकमसमितिकी स्थापना हुई। जिसका विस्तृत वर्णन 'विजय डायरी', 'मोहन डायरी', 'नामाधिकसूत्र' हिन्दी 'ज्ञानि प्रकाश' और 'नेमराजुल वारहमासा' गुजरातीमें पढ़ सकते हैं। विन्तारभयमें उसका उल्लेख यहां नहीं किया गया। सूत्रागमप्रकाशकमसितिका पहला ध्येय ३२ आगमोको आगमत्रयकी पद्धतिसे प्रकाशित करना है।

मूलसूत्रोंका प्रकाशन

मूलसूत्रोंका प्रकाशन छुटक २ कई संस्थाओंने किया है परन्तु पूरे सूत्र किसीने अब तक मूल रूपमें प्रकाशित नहीं किए। आज तक उत्तराख्ययन-द्वयवैकांतिक-सुखविपाक-नंदी बहुतसे और सूयगडाग-आचारांग-अनुयोगद्वार न्यून संग्रहमें मूलरूपमें छपे हैं। परन्तु अनुक्रमसे सबके सब आगम नहीं। सूत्रागमप्रकाशक-समितिकी योजना बत्तीसों सूत्रोंको 'सुत्तागमे' के रूपमें एकही पुस्तकमें प्रकाशित करनेकी थी, परन्तु ग्रन्थकी देहयष्टी बहुत बढ़ जानेसे वैसा न हो सका। इसलिए ११ अंगोंका प्रथम खंड बनाना पड़ा जिसमें लगभग १४०० पृष्ठोंमें ३५,००० श्लोक हैं यह जानकर किसे प्रसन्नता न होगी।

आगमोंमें ११ अंगोंका महत्व—यो तो सारे ही आगम अत्यन्त उपयोगी और ज्ञानके अगाध समुद्र रूप हैं, परन्तु उनमें भी ११ अंगोंका अनोखा स्थान है। **आचारांगमें** साधु साध्वियोंके आचार, भगवान् महावीरकी परिपह-सहिष्णुता, एषणा, पाच महाव्रतोंकी २५ भावना आदिका वर्णन है। जो 'आचारः प्रथमो धर्मः' की उक्तिको चरितार्थ करता है। **सूत्रकृतांगमें** अन्यमतोंका दिग्दर्शन, उनका खंडन और स्वसमयका मंडन किया गया है। **स्थानांगसूत्रमें** १ से लेकर १० पर्यंत संख्याकी वस्तुओंका वर्णन है। विशेष नौवें ठाणेमें श्रेणिक राजाके आगामी भव पर प्रकाश डाला है। **समवायांगसूत्रमें** १ से लगाकर कोडाकोडी संख्यातकके विषय वर्णित हैं। इसके अतिरिक्त द्वादशांगी स्वरूप भूत-भविष्यत्-वर्तमान त्रिषष्टिशलाका पुरुषोंके माता पिताओंके नाम एवं उनके नाम, पूर्वभव और आगामी भवके नामोंका वर्णन है। ठाणाग और समवायागकी यही विशेषता है कि कोई भी विषय इनसे अछूता नहीं। **भगवतीमें** भगवान् गौतम द्वारा पूछे गए ३६००० प्रश्नोंके उत्तर हैं। इसके अतर्गत रोहा अणगार, स्कंदक, तामली तापस, शिवराजर्षि, महाबल, ऋषभदत्त-देवानंदा, जमालि, गागेय अणगार, अतिमुक्तकुमारश्रमण, गोशालक, उदायन, मृगावती, जयंती

श्राविका, सोमिल ब्राह्मण आदिके चरित्र भी है । ज्ञाताधर्मकथांगमें प्रथम-श्रुतस्कंधमें १९ कथाएं उपनय सहित हैं । जो कि रोचक होनेके साथ २ बोधप्रद भी हैं, मेघकुमारकी यावत् कंडरीक-पुंडरीककी । दूसरे श्रुतस्कंधमें शिथिलाचार द्वारा होनेवाले दोषोंका दिग्दर्शन करानेवाली कथाएँ हैं । उपासकदशांगमें ज्ञातपुत्र महावीर भगवान् के १० मुख्य श्रावकोंका वर्णन है । उनमें भी आनंद और कामदेव का मुख्य स्थान है । अंतकृद्दशांगमें उन ९० महापुरुषोंका चरित्र है जिन्होंने कर्मोंका निकंदन करके मोक्ष प्राप्त किया है । इसमें गजसुकुमाल, पद्मावती राणी, अर्जुन माली, अयवन्ताकुमारकी कथाएँ विशेष उल्लेखनीय हैं । अनुत्तरोपपातिकसूत्रमें अनुत्तरविमानमें उत्पन्न होनेवाले महापुरुषोंका वर्णन है । जिसमें महातपोधन धन्ना अणगार का वर्णन मुख्य है । प्रश्न-व्याकरणमें आस्रवद्वारमें हिंसा-असत्य-स्तेय-अब्रह्म और परिग्रह इन पांचोंका स्वरूप समझाया है । इनके कर्ताओं और इनके फलका वर्णन भी है । संवरद्वारमें अहिंसा-सत्य-अचौर्य-ब्रह्मचर्य-अपरिग्रह, उनका फल और साथ ही उनकी भावनाएँ वर्णित हैं । विपाकसूत्रके प्रथम श्रुतस्कंधमें १० जीवोंका वर्णन है । जिन्होंने असीम पाप करके महान् कष्ट उठाए, मृगापुत्रका यावत् अंजूका । दूसरे श्रुतस्कंधमें उन १० जीवोंका वर्णन है जिन्होंने सुपात्र दान देकर सुख प्राप्त किया । सुबाहुकुमारका यावत् वरदत्तकुमारका ।

इन ११ अंगोंमें धर्मकथानुयोग (प्रथमानुयोग) गणितानुयोग, द्रव्यानुयोग और चरणकरणानुयोगके प्रायः सभी विषय वर्णित हैं । इनका अध्ययन-चिन्तन-मनन करके अनेक भव्य आत्माओंने उत्तरोत्तर संसारका अन्त करके मुक्तिको पाया है । इनकी अधिक महत्ता बताना सूर्यको दीपक दिखानेके समान है । ये सुभाषितोंके महाभंडार हैं ।

प्रस्तुत प्रकाशनकी विशेषता-(१) पाठशुद्धिका पूरा २ ख़याल रक्खा गया है ।

(२) इसके संपादनमें शुद्ध प्रतियोंका उपयोग किया है ।

(३) संक्षिप्त अर्धमागधी व्याकरण भी दिया गया है ताकि समझनेमें सरलता हो सके ।

(४) पाठान्तर नवीन पद्धतिसे दिए हैं ।

कार्यविवरण-इसका आरम्भ पूना चातुर्मासमें हुआ । वहाँ केवल आचा-

रांग का प्रथम श्रुतस्कंध ही अलग रूपमें प्रगट हो सका जो कि बहुतसे साधु-साध्वियोंके करकमलोंमें पहुँचाया गया। इसके अनन्तर गुरुदेव घोड़नदी अहमदनगर आदि क्षेत्रोंमें विचरते हुए नासिक पधारे। वहाँ तक केवल स्थानांगसूत्र तक छप सका। तदनन्तर घाटकोपर चातुर्मासमें समवायांग और भगवतीसूत्र तैयार हुए। पूर्वोक्त सूत्र भी कई साधु-साध्वियोंके पास पहुँचाए गए। शुद्धपाठका निर्णय करनेमें काफी से ज्यादा परिश्रम उठाना पड़ा है। इसके बाद सादड़ी सम्मेलनमें जाना पड़ा। अतः लगभग पांच मास तक कार्य बंद रहा। **दौंडायचा** चातुर्मासमें फिर कार्य आरंभ हुआ। जहाँ से लगभग १००० सूत्र साधु-साध्वियोंके हाथोंमें पहुँचाए गए। शनैः २ कार्य चलता रहा और **सिरपुर** में ११ अंगोंके कार्यकी पूर्णाहुति हुई।

स्पष्टीकरण—(१) जिनका ११ अंगोंमें वर्णन है उन्होंने भी ११ अंगोंका अध्ययन किया, इसका कारण यह कि इनके प्रणेता श्रीसुधर्मा स्वामी हैं। भगवान् महावीरके पश्चात् वे ही पट्टपर आए, और शासनकी वागडोर संभाली। जैसे अनुत्तरोपपातिकसूत्रमें धन्ना अणगारका वर्णन है। कई प्रतियोंके आरंभमें पाठ मिलता है...**सेणिओ राया**...लेकिन श्रेणिक तो पहले ही मर चुके थे। अतः वह पाठ अशुद्ध है ऐसा जानना चाहिए।

(२) शब्दकोष गाथाबद्ध सानुवाद तैयार किया जा रहा है, अतः शब्दकोष नहीं दिया गया।

(३) अन्य उपयुक्त विषय जो कि ग्रंथके देहसूत्र बढ़ जानेके कारण नहीं दिए जा सके, वे अन्य पुस्तकमें दिए जायेंगे।

शांतिभवन
अंबरनाथ C. R.

}

जिणचंदभिकखू

ता० ७-२-१९५३

संक्षिप्त-अर्धमागधी-व्याकरण

स्वरोंका प्रयोग

(१) अर्धमागधीमें 'ऋ' 'लृ' 'ऐ' 'औ' का प्रयोग नहीं होता ।

(२) संयुक्त व्यंजनसे पूर्वके दीर्घ स्वरके स्थानमें ह्रस्वका प्रयोग होता है, जैसे-आम्र=अंब इत्यादि ।

(३) 'ऋ' के स्थानमें 'अ' और कहीं २ 'इ' 'उ' और 'रि' भी होता है। जैसे-
 ऋत=घय; कृपा=किपा; स्पृष्ट=पुष्ट; ऋद्धि=रिद्धि ।

(४) 'लृ' के स्थानमें 'इलि' होता है, जैसे-कृत=किलित ।

(५) संयुक्त व्यंजनसे पूर्वके 'इ' और 'उ' के स्थानमे 'ए' और 'ओ' का प्रयोग प्रायः होता है, जैसे-विल्व=बेल्ल; पुष्करिणी=पोखरिणी।

(६) 'ऐ' और 'औ' के स्थानमे 'ए' 'अइ' और 'ओ' 'अउ' होता है, जैसे-
वैद्य=वेज; वैशाख=वइसाह; यौवन=जोव्वण; पौर=पउर; विशेष=सौन्दर्यम्=सुंदेरं;
दौवारिकः=दुवारिओ; गौरवम्=गारवं-गउरवं; नौ=नावा इत्यादि ।

व्यंजनों का प्रयोग-(१) 'म्ह' 'ण्ह' और 'ल्ह' के अतिरिक्त विजातीय संयुक्त व्यंजन प्रयुक्त नहीं होते, जैसे-पक्क=पक्क ।

(२) स्वर रहित केवल व्यंजनका प्रयोग नहीं होता, जैसे-राजन्=राय;
तमस्=तम ।

संयुक्त व्यंजनोंमें परिवर्तन-(१) क्त-क्व-क्-क्क-क्त्-र्क-ल्क-के स्थानमें 'क' होता है । जैसे-मुक्त=मुक; शाक्य=सक; शक=सक; विक्कव=विकव; पक्क=पक; उत्कंठा=उकंठा; अर्क=अक; वल्कल=वकल ।

(२) ख क्ष-ख्य-क्ष्य-त्क्ष-त्ख-ष्क-स्क-स्ख-के स्थानमें 'कख' होता है । जैसे-
दुःख=दुकख; मक्षिका=मक्खिया; मुख्य=मुक्ख; भक्ष्य=भक्ख; उक्षिप्त=उक्खित्त;
उत्खात=उक्खाय; पुष्कर=पोक्खर; प्रस्कंदन=पक्खंदण; प्रखलित=पक्खलिय ।

(३) न-ग्म-ग्य-ग्र-ङ्ग-द्र-र्ग-ल्ग-के स्थानमें 'ग्ग' होता है । जैसे-संविग्र=संविग्ग; युग्म=जुग्ग; आरोग्य=आरोग्ग; समग्र=समग्ग, खड्ग=खग्ग; मुद्र=मुग्ग; मार्ग=मग्ग; वल्ग=वग्ग ।

(४) घ्र-घ्र-द्ध-र्घ-के स्थानमे 'घ' होता है । जैसे-कृतघ्र=कयघ; शीघ्र=सिघ्र; उद्धाटन=उग्घाडण; दीर्घ=दिघ ।

(५) च्य-त्य-त्व-थ्य-र्च-के स्थानमे 'च्च' होता है । जैसे-वाच्य=वच्च;
अपत्य=अवच्च; कृत्वा=किच्चा; तथ्य=तच्च; वर्च=वच्च ।

(६) थ्य-क्ष-क्ष्म-च्छ-त्स-त्स्य-थ्य-प्स-च्छ-श्च-स्त-के स्थानमे 'च्छ' होता है । जैसे-दक्ष=दच्छ; लक्ष्मी=लच्छी; कृच्छ्र=किच्छ; वत्सल=वच्छल; मत्स्य=मच्छ; नेपथ्य=नेवच्छ; अप्सरा=अच्छरा; मूर्च्छा=मुच्छा; पश्चात्=पच्छा; विस्तीर्ण=विच्छिन्न ।

(७) ज्य-ज्र-ज्व-य-द्व-ब्ज-य्य-र्य-र्ज-ज्य-के स्थानमें 'ज' होता है, जैसे-विभाज्य=विभज; वज्र=वज; प्रज्वलित=पज्जलिय; अनवय=अणवज; विद्वान्=विज्ज; अब्ज=अज; शय्या=सिजा; आर्या=अजा; तर्जनी=तज्जणी; वर्ज्य=वज ।

(८) ध्य-ध्व-ह्य-के स्थानमें 'ज्झ' होता है, जैसे-उपाध्याय=उवज्जाय; बुध्वा=बुज्झा; ग्राह्य=गेज्झ ।

(९) र्त्त-र्त्त-के स्थानमे 'ट्ट' होता है । जैसे-वर्ती=वट्टी; पत्तन=पट्टण; नर्त्तक=नट्टग ।

(१०) ष्ट-ष्ठ-र्थ-के स्थानमें 'ट्ठ' होता है, जैसे-संतुष्ट=संतुट्ठ; निष्ठुर=निट्ठुर; समर्थ=समट्ठ । र्त-र्द-के स्थानमे 'ड्ड' होता है, जैसे-गर्ता=गट्ठा; विच्छर्द=विच्छड्ड । व्य-द्ध-र्ध-के स्थानमे 'ड्ड' होता है, जैसे-धनाढ्य=धणड्ड; वृद्धि=वुड्धि; वर्धमान=वड्डमाण ।

(११) ज-ण्य-न्य-न्व-न्न-र्ण-के स्थानमे 'ण्ण' होता है, जैसे-विज्ञान=विज्ञाण; हिरण्य=हिरण्ण; धन्य=धण्ण; अन्वर्थ=अण्णत्थ; निन्न=निण्ण; सुवर्ण=सुवण्ण ।

(१२) क्षण-श्न-ष्ण-स्न-ह्ण-के स्थानमे 'ण्ह' होता है, जैसे-श्लक्ष्ण=सण्ह; प्रश्न=पण्ह; पृष्णि=पण्हि; स्नान=ण्हाण, पूर्वाह्न=पुव्वण्ह; वह्नि=वण्हि ।

(१३) क्त-त्त-त्म-त्र-त्व-त्त-र्त्त-के स्थानमे 'त्त' होता है, जैसे-भुक्त=भुत्त; प्रयत्न=पयत्त, आत्मा=अत्ता; पत्र=पत्त; तत्त्व=तत्त; प्राप्त=पत्त; कर्ता=कत्ता ।

(१४) कथ-त्र-र्थ-स्त-स्थ-के स्थानमे 'त्थ' होता है, जैसे-सिक्थ=सित्थ; तत्र=तत्थ, समर्थ=समत्थ; विस्तार=वित्थार; इन्द्रप्रस्थ=इंदपत्थ । द्र द्र ब्द-र्द-के स्थानमें 'द्द' होता है । जैसे-समुद्र=समुद्द; प्रद्वेष=पद्देस; शब्द=सद्द; कर्दम=कद्दम । रध-ध्व-ब्ध-र्ध-के स्थानमे 'द्ध' होता है, जैसे-दुग्ध=दुद्ध; अध्वन्=अद्ध; लब्धि=लद्धि; वर्धमान=वद्धमाण ।

(१५) क्म-त्प-त्म-प्य-प्र-प्ल-र्प-ल्प-के स्थानमे 'प्प' होता है, जैसे-रुक्मिणी=रुप्पिणी; उत्पल=उप्पल, परमात्मन्=परमप्प; क्षिप्र=खिप्प; विप्लव=विप्पव; सर्प=सप्प; जल्प=जप्प; कल्प=कप्प । त्फ-ष्प-ष्फ-स्प-स्फ-के स्थानमे 'प्फ' होता है, जैसे-उत्फुट्ठ=उप्फुट्ठ; पुष्प=पुप्फ; निष्फल=निप्फल; बृहस्पति=बिहप्फइ; प्रस्फो-

टित=पप्फोडिय । द्व-र्व-त्र-के स्थानमे 'व्व' होता है, जैसे-उद्वोधित=उव्वोहिय; निर्वल=निव्वल; अव्रह्म-अव्वंभ । रम-द्ध-म्म-भ्र-र्भ-व्ह-इनके स्थानमे 'व्भ' होता है, ईपत्प्राग्भार=ईसिपव्वभार; सद्धूत=सव्वभूय; अभ्यास=अव्वभास; शुभ्र=सुव्वभ; अर्भक=अव्वभग; विव्हल=विव्वल ।

(१६) रम-न्म-म्य-र्म-ल्म-झ-र्म्य-के स्थानमें 'म्म' होता है, जैसे-युग्म=जुम्म; मन्मथ=वम्मह; साम्य=सम्म; धर्म=धम्म; गुल्म=गुम्म; पद्म=पोम्म; हर्म्य=हम्म ।

श्म-श्म-ष्म-स्म-ह्य-के स्थानमें 'म्ह' होता है, जैसे-पक्ष्मन्=पम्ह; कुश्मान=कुम्हाण; ग्रीष्म=गिम्ह; विस्मय=विम्हय; ब्रह्मा=वम्हा; विशेष-ब्राह्मण=वम्हण, वंभण ।

(१७) र्य-र्ल-ल्य-ल्व-के स्थानमें 'ल्ल' होता है, जैसे-पर्यस्त=पल्लथ; निर्लज्ज=निल्लज्ज; कल्याण=कल्लाण; पल्वल=पल्लल; 'ह' को 'ल्ह' आह्लाद=आल्हाय । द्व-र्व-व्य-त्र-के स्थानमे 'व्व' होता है, जैसे-उद्वेग=उव्वेग; उर्वी=उव्वी; काव्य=कव्व; प्रव्रज्या=पव्वज्जा ।

(१८) पै-श्म-श्य-श्र-श्व-ष्य-स्य-स्त्र-स्त्र-के स्थानमें 'स्स' होता है, जैसे-वर्ष=वस्स; रश्मि=रस्सि; लेश्या=लेस्सा; विश्राम=विस्साम; ईश्वर=इस्सर; दूष्य=दुस्स; तस्य=तस्स; सहस्र=सहस्स; ओजस्विन्=ओयस्सि ।

असंयुक्त व्यंजनोंमें परिवर्तन

(१) क-ग-च-ज-त-द-प-य-व=लुक् और ण-न-के लिए देखो अर्धमागधी और महाराष्ट्रीमे भेद (१) से (१०) तक ।

(२) ख-घ-थ-ध-भ-के स्थानमें 'ह' होता है, जैसे-सुख=सुह; मेघ=मेह, रथ=रह; वधिर=वहिर; सफल=सहल; सभा=सहा ।

(३) ट-ठ-ड-के स्थानमे ढ-ढ-ल होते हैं जैसे-भट=भड; शठ=सड; गुड=गुल ।

(४) आदि के 'य' को 'ज' होता है और उपसर्ग के पीछे 'य' आनेपर कहीं २ 'ज' होता है, जैसे-यम=जम; संयोग=संजोग ।

(५) कहीं २ 'र' को 'ल' होता है, जैसे-दरिद्र=दलिद् ।

(६) 'श' और 'प' के स्थानमे 'स' होता है जैसे-विशेष=विसेस ।

(७) अनुस्वारके पीछे 'ह' आवे तो उसे 'घ' विकल्पसे होता है, जैसे-संहारः=संघारो, संघारो ।

शेष-(१) आदि के क्ष-स्क-त्य-द्य-ध्य-ध्व-स्त-स्थ-स्प और 'ज्ञ' के स्थानमे ख-छ-झ, ख, च, ज, झ, झ, थ, ठ-थ, फ और ण-न होते हैं, जैसे-क्षयः=खओ, क्षीर=छीर, क्षर=झर; स्कन्ध=खंध; त्यागः=चाओ; द्युति=जुइ; ध्यान=झाण; ध्वजः=झओ; स्तुति=थुइ;

स्थान-ठाण; स्थावर=थावर; स्पर्श=फास; ज्ञान=णाण-नाण; आदिके 'क' आदि के स्थानमे 'क' आदि होते हैं जैसे-क्रम=कम; प्रसित=गसिय; घ्राण=घ्राण; द्रह=दह; प्रहार=पहार; भ्रम=भम; म्रक्षण=मक्खण; व्रण=वण; श्रम=सम; हास=हास; त्रस=तस ।

(२) उष्ट्र, इष्टा, संदष्ट के 'ष्ट्र' और 'ष्ट' को 'ट्ट' न होकर 'ट्ट' होता है, 'समस्त' और 'स्तव' के 'स्त' को 'त्थ' और 'थ' नहीं होता, समस्त=समत; स्तंव=तंव । 'ष्प' और 'स्प' को कहीं २ 'फ' नहीं होता । जैसे-निष्प्रभ=निप्पह; परस्पर=परोप्पर । 'ज्झ' को 'प्प' होता है, जैसे-कुज्झल=कुप्पल । 'ज्ञ' के 'ज' का लोप भी विकल्पसे होता है, मनोज्ञ=मणोज्ज-मणोण्ण ।

(३) द्विरुक्तिको पाए हुए खख-छछ-ठठ-थथ-फफ-धध-झझ-ट्ट-ट्ट-ढढ-के स्थानमें अनुक्रमसे कख-च्छ-ट्ट-त्थ-प्फ-ग्घ-ज्झ-ड्ड-ढढ होते हैं ।

(४) शब्दवर्ती 'र्य' का 'रिय' और 'र्ह' का 'रिह' होता है, इसी प्रकार श्री-ही-कृत्त-क्रिया इन शब्दोंमें संयुक्त अन्त्याक्षरके पूर्व 'इ' होता है, जैसे-भार्या=भारिया, गर्हा=गरिहा; श्री.=सिरी; ही.=हिरी; कृत्त=कसिण; क्रिया=किरिया ।

(५) संयुक्त 'ल'के पहले 'इ' होता है, जैसे-क्लेश=किलेस; श्लोक=सिलोग ।

(६) 'र्श' अथवा 'र्ष' को 'रिस' विकल्पसे होता है, और 'तप्त' 'वज्र' शब्दमें भी संयुक्त अन्त्याक्षर के पहले 'इ' का आगम विकल्पसे होता है, जैसे-दर्शन=दरिसण-दंसण; वर्षा=वरिसा-वासा; तप्त=तवियं-तत्तं; वज्र=वइरं-वज्जं ।

(७) स्याद् भव्य और चौर्य तथा उसके समान शब्दोंके संयुक्त व्यंजनोंके अन्त्याक्षरके पूर्व 'इ' होता है, जैसे-स्यात्=सिया; भव्य:=भविओ; सूर्य:=सूरिओ ।

(८) जिनके अन्तमे 'वी' संयुक्त व्यंजन हो ऐसे स्त्रीलिंग नामोंमे उससे पूर्व 'उ' होता है, जैसे-तन्वी=तणुवी; पृथ्वी=पुहुवी ।

(९) जिस अव्ययके अन्तमे 'त्र' हो उसके स्थानमे हि-ह-त्थ होता है जैसे-तत्र=तहि-तह-तत्थ ।

(१०) य-र-व-श-प-स ये श-ष-स-के साथ पहले या पीछे जुड़े हुए हो तो नियमानुसार लोप होनेपर श-ष स-को द्वित्व नहीं होता, परन्तु उसके पूर्वका स्वर प्रायः दीर्घ होता है, जैसे-पश्यति=पासइ; वर्ष:=वासो; कस्यचित्=कासइ आदि ।

(११) अव्ययोमे तथा 'उत्वात्' आदि शब्दोंमे और 'घञ्' प्रत्ययके निमित्तसे वृद्धि पाए हुए 'आ' को 'अ' होता है, जैसे-यथा=जह-जहा । उत्वात्=उक्खयं-उक्खाय । प्रवाह.=पवहो-पवाहो आदि ।

(१२) 'उत्साह' और 'उत्सन्न' को छोड़कर जिन शब्दोंमें 'त्स' और 'च्छ' हो तो उनके पूर्वके 'उ' को 'ऊ' होता है, जैसे-उत्सुकः=ऊसुओ; उच्छ्वास=ऊसास ।

(१३) 'दृश' के 'दृ' को 'रि' होता है एवं ऋण-ऋजु-ऋपभ-ऋतु-ऋषि इनमें 'ऋ' को 'रि' विकल्पसे होता है, जैसे-सदृश=सरिस; सदृक्ष=सरिच्छ; ऋण=रिण-अण; ऋजु=रिजु-उजु; ऋपभ=रिसह-उसह; ऋतु=रिउ-उउ; ऋषि=रिसि-इसि ।

(१४) संख्यावाचक शब्दोंमें असंयुक्त 'द' को 'र' होता है और दश-पापाण शब्दमें ञ-पको 'ह' विकल्पसे होता है, जैसे-एकादश=एयारह-एगारस; दश=दह-दस; पापाण=पाहाण-पासाण ।

(१५) शब्दके अन्य व्यंजनका लोप होता है । सामासिक शब्दोंमें प्रयोगके अनुसार (नित्य अथवा विकल्पसे) लोप होता है, जैसे-तावत्=ताव; सज्जन=सज्जण-सजण ।

(१६) स्त्रीलिंगी शब्दोंके अन्य व्यंजनके स्थानमें 'आ' अथवा 'या' होता है जैसे-सरित्=सरिआ-सरिया; अपवाद—विद्युत्=विजु; क्षुब्ध=क्षुहा; दिक्=दिसा; अप्सरस=अच्छरसा-अच्छरा; प्रावृष्=पाउस्; ककुब्ध=कउहा । व्यंजनान्त स्त्रीलिंगमें अन्य 'र्' को 'रा' होता है, जैसे-धुर्=धुरा । शरद् आदि शब्दोंमें अन्य व्यंजनको 'अ' होता है जैसे-शरद्=सरओ; भिपक्=भिसओ विशेष—आयुष्=आउसो-आउ, धनुष्=धणुह-धणू ।

(१७) दीर्घ स्वर और अनुस्वारके पीछे शेष व्यंजन और आदेशभूत व्यंजनको द्वित्व नहीं होता, एवं र-ह-को भी द्वित्व नहीं होता, जैसे—स्पर्श=फास; सन्ध्या=सझा; ब्रह्मचर्य=वंभचेर; कार्पापण=काहावण । समासमे द्वित्व विकल्प से होता है, जैसे-देवस्तुति=देवत्युइ-देवथुइ ।

(१८) संयुक्त व्यंजनके अन्तमे म-न-य-ल-व-व-र हो तो उसका और संयुक्त व्यंजनका पहला व्यंजन ल-व-व-र हो तो लोप होता है । जहां दोनोंका लोप होता हो वहां प्रयोगानुसार दो में से एक का लोप होता है, जैसे-स्मर=सर; श्याम=साम; श्लक्ष्ण=सण्ह-लण्ह आदि ।

संधि

स्वरसंधि

(१) अर्धमागधीमें यदि एक ही पदमें दो स्वर साथमें आवें तो संधि नहीं होती, जैसे-कुणइ, करेइत्था, जिणाओ। अपवाद रूपसे कहीं २ एक पदमें भी संधि होती है, जैसे-होहिइ=होही, बिइओ=बीओ। भिन्न २ दो पदोंके स्वरोंकी संधि संस्कृतके समान विकल्पसे होती है और ये दोनों पद सामासिक होने चाहिएँ, जैसे-मगह+अहिवो=मगहाहिवो; सुर+ईसो=सुरेसो इत्यादि। कहीं २ असामासिक दो पदोंमें भी संधि होती है, जैसे-तत्थ+आगओ=तत्थागओ।

(२) समासमें ह्रस्व स्वरको दीर्घ और दीर्घको ह्रस्व प्रयोगानुसार होता है, जैसे-सत्त+वीसा=सत्तावीसा; नई+कूलं=नइकूलं।

(३) इ-ई अथवा उ-ऊ के पीछे विजातीय स्वर आवे तो संधि नहीं होती, इसी प्रकार ए और ओ के बाद कोई भी स्वर हो तो संधि नहीं होती, जैसे-वंदामि अजवइरं=वंदामि अजवइरं; नई एत्थ=,, माऊ एइ=,, वणे अडइ=,, अहो अच्छरियं=,,।

(४) स्वर परे हो तो पहले स्वरका प्रयोगानुसार प्रायः लोप होता है, जैसे-नीसास+ऊसासा=नीसासूसासा।

(५) 'ल्यट्' आदि सर्वनाम तथा अव्ययके पीछे आए हुए 'ल्यट्' आदि सर्वनाम अथवा अव्ययके प्रथम स्वरका प्रायः लोप होता है, जैसे-अम्हे+एत्थ=अम्हेत्थ; को+इमो=कोमो; जइ+अहं=जइहं।

(६) 'इ' आदि पुरुषबोधक प्रत्ययके पीछे स्वर आवे तो संधि नहीं होती, जैसे-होइ+इह=होइ इह।

(७) व्यंजन सहित स्वरमें से व्यंजनका लोप होने पर शेष स्वरकी पूर्वके स्वरके साथ संधि नहीं होती, जैसे-पयावई=पयावई। कहीं २ संधि भी देखी जाती है जैसे-कुंभआरो=कुंभारो।

व्यंजनसंधि

(१) अकारसे परे विसर्ग होनेपर पूर्वके स्वर सहित ओ होता है, जैसे-अप्रतः=अग्रओ; इसी प्रकार तन् प्रत्ययके स्थानमें तो, दो विकल्पसे होते हैं, जैसे-तन्=तन्ओ, तत्तो, तदो इत्यादि।

(२) पदान्त 'म्' के पूर्वके अक्षरके ऊपर अनुस्वार होता है, यदि 'म्' के

पीछे स्वर हो तो अनुस्वार विकल्पसे होता है, जब अनुस्वार न हो तो 'म्' में पिछला स्वर मिल जाता है। जैसे-जिनम्=जिणं; उसभम् अजियं=उसभं अजियं, उसभमजियं; कहीं २ अन्त्य व्यंजनको भी अनुस्वार हो जाता है, जैसे-साक्षात्=सक्खं; यत्=जं; तत्=त; सम्यक्=सम्मं।

(३) शब्दवर्ती 'ङ्-ञ्-ण-न्' को अनुस्वार होता है, जैसे-पराङ्मुख=परंमुह; काञ्चनम्=कंचणं; उत्कण्ठा=उक्कंठा; वन्ध्या=वंझा।

(४) अनुस्वारको सवर्गी व्यंजन परे हो तो अनुनासिक विकल्पसे होता है, जैसे-गङ्गा, गंगा; लञ्छणं, लंछणं; कण्टए, कंटए; आणन्दे, आणंदे; चम्पा-चंपा।

(५) वक्त्रादि शब्दोंमें पहले दूसरे या तीसरे स्वर पर प्रयोगानुसार अनुस्वार होता है, जैसे-वक्त्रम्=वंकं; मनस्वी=मणंसी; उपरि=उवरिं।

(६) जहां स्वरादि पदोंकी द्विरुक्ति हो वहां विकल्पसे 'म्' का आगम होता है, जैसे-एक+एक=एकमेक, एक्केक।

(७) कई शब्दोंमें प्रयोगानुसार अनुस्वार का लोप होता है, जैसे-त्रिंशत्=तीसा; सिंह=सीह।

अव्ययसंधि

(१) अपि (अवि) अव्यय किसी भी पदके परे हो तो उसके आदिके 'अ' का लोप विकल्पसे होता है, जैसे-तं+अपि=तंपि-तमवि; केण+अवि=केणवि, केणावि।

(२) पदान्तमें स्वरसे परे 'इति' के स्थानमें 'त्ति' होता है, यदि पदान्तमें स्वर न हो तो 'चि' होता है; जैसे-तहा+इति=तहत्ति; जुत्तं+इति=जुत्तंति।

कारक

(१) अर्धमागधीमें द्विवचन नहीं होता बल्के उसके स्थानमें बहुवचन का ही प्रयोग होता है, जैसे-हस्तौ=हत्था।

(२) चतुर्थी विभक्ति के स्थानमें षष्ठीका प्रयोग होता है, जैसे-नमोऽर्हद्भ्यः=णमो अरिहंताणं।

(३) एक विभक्तिके स्थानमें अन्य विभक्तिका प्रयोग भी देखा जाता है, जैसे-तृतीयाके स्थानमें छट्ठी-तैरेतदनाचीर्णं=तेसिं एयमणाइणं; सप्तमीके स्थानमें छट्ठी-दानेपु श्रेष्ठं=दाणाण सेट्ठं; सप्तमीके स्थानमें तृतीया-तस्मिन् काले तस्मिन् समये=तेणं कालेणं तेणं समएणं इत्यादि।

शब्दोंके रूप

अकारान्त पुल्लिङ्ग

वद्धमाण

एकवचन

बहुवचन

षट्श्या-वद्धमाणे, वद्धमाणो

विड्या-वद्धमाणं

तड्या-वद्धमाणेण, वद्धमाणेणं

चउत्थी-वद्धमाणस्स, वद्धमाणाए-ते

पंचमी-वद्धमाणा, वद्धमाणत्तो, वद्ध-
माणाओ-तो-उ-तु-हि-हितो

छट्ठी-वद्धमाणस्स

सत्तमी-वद्धमाणे, वद्धमाणंसि, वद्ध-
माणम्मिसंघोहण-वद्धमाणे, वद्धमाणो, वद्ध-
माण, वद्धमाणा

वद्धमाणा

वद्धमाणे, वद्धमाणा

वद्धमाणेहिं, वद्धमाणेहिं-हिं

वद्धमाणाण, वद्धमाणाणं

वद्धमाणत्तो, वद्धमाणाओ-तो-उ-तु-हि-

हितो-सुंतो, वद्धमाणेहि-हितो-सुंतो

वद्धमाणोण, वद्धमाणाणं

वद्धमाणेसु, वद्धमाणेसुं

वद्धमाणा

अकारान्त नपुंसकलिङ्ग

जल

प०-जलं

वि०-

जलाणि, जलाई-ई-इ

,, ,, ,, ,,

तृतीयासे सप्तमी तक 'वद्धमाण' की तरह जानें।

सं०-जल

। (प्रथमाके अनुसार)

(नोट) पुल्लिङ्गके प्रथमाके एक वचन 'वद्धमाणे' की तरह नपुंसक-लिङ्गमे भी 'णयरे' 'वद्धाणे' आदि प्रथमाके एकवचनके रूप अर्द्धमागवीमें पाए जाते हैं।

इकारान्त पुल्लिङ्ग

मुणि

प०-मुणी	मुणओ-उ, मुणिणो, मुणी
वि०-मुणिं	मुणिणो, मुणी
त०-मुणिणा	मुणीहि-हिं-हिं
च०-मुणिणो, मुणिस्स	मुणीण, मुणीणं
पं०-मुणित्तो, मुणीओ-उ-हित्तो, मुणिणो	मुणित्तो, मुणीओ-उ-हित्तो-सुत्तो
छ०-मुणिणो, मुणिस्स	मुणीण, मुणीणं
स०-मुणिसि, मुणिम्मि	मुणीसु, मुणीसुं
सं०-मुणी, मुणि	(प्रथमाके अनुसार)

उकारान्त पुल्लिङ्ग

साहु

प०-साहु	साहवो, साहवे, साहओ-उ, साहु,
वि०-साहुं	साहुणो
	साहुणो, साहु, साहवे,

इससे आगेके रूप इकारान्त 'मुणि' शब्दके समान जानने चाहिए ।

इकारान्त नपुंसक-लिङ्ग

दहि

प०-दहि	दहीणि, दहीइ-इं
वि०-,,	,, ,, - ,,
	तृतीयासे सप्तमी तकके रूप 'मुणि' के समान समझें ।
सं०-दहि	(प्रथमाके अनुसार)

उकारान्त नपुंसक-लिङ्ग

महु

प०-महुं	महूणि-इं-इं
वि०-,,	,, ,, - ,,
	तृतीयासे सप्तमी तक 'साहु' शब्दके समान जानें ।
सं०-महु	(प्रथमाके अनुसार)

ऋकारान्त पुल्लिङ्ग

पियर=पिउ (पितृ)

प०-पिया, पियरो

पियओ, पियवो, पियउ, पिऊ, पियरा,
पिउणो

बि०-पियरं

पियरे, पियरा, पिउणो, पिऊ

तृतीयासे सप्तमी तक 'साहु' शब्दके समान जानें । 'पियर' के रूप 'वद्धमाण' के समान होते हैं ।

विशेष-छठी विभक्तिके एकवचनमें 'पिउए' भी होता है ।

सं०-हे पिय ! पियर, पियरो | (प्रथमाके अनुसार)

(नोट) पितृ आदि शब्द विशेष्यवाची हैं, विशेष्यवाचक शब्दके अन्त्य 'ऋ' के स्थानमें 'उ' और 'अर' होता है, जैसे-पितृ=पिउ, पियर; जामातृ=जामाउ, जामायर । दातृ आदि शब्द विशेषण-वाचक हैं, इनके स्थानमें 'उ' और 'आर' होता है, जैसे-दातृ=दाउ, दायार; कर्तृ=कर्तु, कत्तार ।

व्यंजनान्तनाम

(१) जिन नामोंके अंतमें मत्-वत् और अत् हो उनके अंतके अत्के स्थानमें अन्तका प्रयोग होता है और उनके रूप अकारान्त 'वद्धमाण' के समान चलते हैं । जैसे-भगवत्=भगवंत; भवत्=भवंत; धीमत्=धीमंत । भगवत् शब्दका प्रथमाका एकवचन 'भगवं' होता है जो कि शौरसेनीके समान है ।

(२) जिन नामोंके अन्तमें 'अन्' है उन नामोंके अन्तके 'अन्' को 'आण' विकल्पसे होता है और उसके रूप अकारान्त पुल्लिङ्गके समान होते हैं । यथा-राजन्=रायाण, राय; आत्मन्=अप्पाण, अप्प ।

'अन्' अंत वाले शब्दोंके और भी रूप होते हैं जो नीचे दिए जाते हैं ।

अप्पा-अप्पाण

प०-अप्पा, अप्पो, अप्पाणो	अप्पा, अप्पाणा, अप्पाणो
वि०-अप्पं, अप्पाणं, अप्पिणं	अप्पे, अप्पा, अप्पाणे, अप्पाणा-णो
त०-अप्पेण-णं, अप्पाणेण-णं, अप्पणा	अप्पेहि-हिं-हिं, अप्पाणेहि-हिं-हिं
च०-अप्पस्स, अप्पाणस्स, अप्पणो	अप्पाण-णं, अप्पाणाण-णं, अप्पिणं
पं०-अप्पत्तो, अप्पाओ-उ-हि-हितो, अप्पा, अप्पाणो, अप्पाणत्तो, अप्पाणाओ-उ-हि-हितो, अप्पाणा	अप्पत्तो, अप्पाओ-उ-हि-हितो-सुंतो, अप्पेहि-हितो-सुंतो, अप्पाणत्तो, अप्पा- णाओ-उ-हि-हितो-सुंतो, अप्पाणेहि-हितो- सुंतो
छ०-अप्पस्स, अप्पाणस्स, अप्पणो	अप्पाण-णं, अप्पाणाण-णं, अप्पिणं
स०-अप्पे, अप्पम्मि, अप्पाणे, अप्पा- णम्मि	अप्पेसु-सुं, अप्पाणसु-सुं
सं०-हे अप्प, अप्पो, अप्पा, अप्पाण, अप्पाणो, हे अप्पाणा	अप्पा, अप्पाणा, अप्पाणो

इस प्रकार 'अन्' अंत सब नामोंके रूप जानना ।

विशेषः—'राय=रायाण' शब्दके रूपोंमें जो विशेषता है वह इस प्रकार है (१.) णो, णा, म्मि ये तीन प्रत्यय लगाते समय पूर्वके 'य' को विकल्पसे 'इ' होता है, जैसे—राइणो, रायणो; राइणा, रायणा; राइम्मि, रायम्मि ।

(२) द्वितीयाके एकवचन और छट्ठीके बहुवचनमें प्रत्यय सहित 'राय' शब्दके 'य' को 'इणं' आदेश विकल्पसे होता है । जैसे—द्वि. ए. राइणं अथवा रायं, छ. व. राइणं अथवा रायाणं ।

(३) तृतीया पंचमी और छट्ठीके एकवचनमें णा, णो प्रत्ययके पहले 'राय' शब्दके 'आय' को 'अण' विकल्पसे होता है

तृ. ए.	रण्णा	अथवा	राइणा,	रायणा
पं. ए.	रण्णो	अथवा	राइणो,	रायाणो
छ. ए.	रण्णो	अथवा	राइणो,	रायणो

(४) तृतीया, चतुर्थी, पंचमी, षष्ठी और सप्तमीके बहुवचनमें प्रत्ययोंसे पहले 'राय' शब्दके 'य' को विकल्पसे 'ई' होता है

तृ. व.	राईहि	अथवा	राएहि	
च. छ. व.	राईणं	अथवा	राइणं,	रायाणं
पं. व.	राईओ, राईसुतो	अथवा	रायाओ,	रायासुंतो
स. व.	राईसु	अथवा	राएसुं	

आकारान्त स्त्रीलिंग

कहा

प०-कहा

वीया-कहं

त०-कहाय, कहाइ, कहा(ते)ए

च० छ०-,, ,, ,,

पं०-कहाय, कहाइ, कहाए, कहत्तो,

कहाओ-उ-हिंतो

स०-कहाय, कहाइ, कहाए

सं०-कहे, कहा

कहाओ, कहाउ, कहा

,, ,, ,,

कहाहि, कहाहिं, कहाहिं

कहाण, कहाणं

कहत्तो, कहाओ-उ-हिंतो-सुंतो

कहासु-सुं

(प्रथमाके अनुसार)

इकारान्त स्त्रीलिंग

मई

प०-मई

वी०-मईं

त०-मईय, मईइ, मईए

च० छ०-,, ,, ,,

पं०-,, ,, ,, मइत्तो, मईओ-उ-हिंतो

स०-मईय, मईइ, मईए

सं०-मइ, मई

मईओ, मईउ, मई

,, ,, ,,

मईहि-हिं-हि

मईण, मईणं

मइत्तो, मईओ-उ-हिंतो-सुंतो

मईसु, मईसुं

(प्रथमाके अनुसार)

दीर्घ ईकारान्त ह्रस्व उकारान्त और दीर्घ ऊकारान्तके रूप भी 'मई'के समान जानें ।

ऋकारान्त स्त्रीलिंग

'मातृ' शब्दके स्थानमे 'माया' और 'मायरा' प्रयुक्त होते हैं, इसके सब रूप 'कहा' के समान हैं । केवल संबोधन प्रथमाकी तरह ही होता है ।

सर्वनाम

अकारान्त पुल्लिंग सर्वनामके रूप 'वद्धमाण' शब्दकी तरह जानें, विशेषता निम्नलिखित है ।

सव्व

प०-...

सव्वे

च०छ०-...

सव्वेसिं

पं०-सव्वम्हा

स०-सव्वत्थ, सव्वस्सि, सव्वहिं,
सव्वम्मि

(नोट) 'एय' और 'इम' को 'हिं' प्रत्यय नहीं लगता ।

आकारान्त स्त्रीलिंग सर्वनाम के रूप 'कहा' की तरह होते हैं । विशेष छट्टीके बहुवचनमें 'सिं' प्रत्यय होता है ।

अकारान्त नपुंसकलिंगके रूप 'जल' के समान जाने ।

तुम्ह-अम्ह के उपयोगी रूप

तुम्ह

पं०-तं, तुं, तुमं

तुम्हे, तुब्भे, तुज्झे, भे

वी०-तं, तुं, तुमं

,, ,, ,, ,, वो

त०-तए, तुमए, तुमे

तुब्भेहिं, तुम्हेहिं, भे

च० छ०-ते, तुह, तुज्झ

तुब्भाण, तुम्हाण, भे, वो

पं०-तुमत्तो, तुमाओ

तुम्हत्तो, तुम्हाओ, तुब्भत्तो, तुब्भाओ

स०-तुमए, तए, तइ

तुब्भेसु, तुम्हेसु-सुं

अम्ह

प०-हं, अहं, अहयं

अम्हे, मो, वयं

बी०-मं, ममं

अम्हे, णे

त०-मइ, मए

अम्हेहिं, णे

च० छ०-मे, मम, मज्झ, मह, मज्झं

अम्हं, अम्हाणं, णे, णो

पं०-ममत्तो, ममाओ

अम्हत्तो, अम्हाओ

स०-मइ, मज्झे, ममसि, मम्हि

अम्हेसु

संख्यावाचक शब्द

एग-एक-इक शब्दके रूप तीनों लिंगोंमें प्रयुक्त होते हैं, उनके रूप 'सव्व' के समान जानना ।

‘दो’ से ‘अट्ठारह’ तकके रूप बहुवचनमें प्रयुक्त होते हैं और तीनों लिंगोंमें समान रहते हैं। ‘अट्ठारह’ तकके संख्यावाचक शब्दोंके छट्टीके बहुवचनमें ‘ण्ह’ और ‘ण्हं’ प्रत्यय लगता है।

दु-दो-वे

प० बी०-दुवे, दोणि, दुणि, वेणि, विणि, दो, वे

त०-दोहि-हिं-हिं, वेहि-हिं-हिं

च० छ०-दोण्ह, दोण्हं, दुण्ह, दुण्हं, वेण्ह, वेण्हं, विण्ह, विण्हं

पं०-दुत्तो, दोओ-उ-हितो-सुत्तो, वित्तो, वेओ-उ-हितो-सुत्तो

स०-दोसु-सुं, वेसु-सुं

ति

प० बी०-तिणि

च० छ०-तिण्ह, तिण्हं

शेष रूप ‘मुणि’ शब्दके बहुवचनानुसार जानें।

चउ

प० बी०-चत्तारो, चउरो, चत्तारि

त०-चउहि-हिं-हिं, चऊहि-हिं-हिं

च० छ०-चउण्ह, चउण्हं

शेष ‘साहु’ के बहुवचनानुसार जानें।

पंच

प० बी०-पंच

त०-पंचहि-हिं-हिं

च० छ०-पंचण्ह, पंचण्हं

शेष ‘वद्धमाण’ के बहुवचनानुसार।

क्रियापद

जैसे संस्कृतमें दश गण और उनमें परस्मैपदी, आत्मनेपदी, उभयपदी धातु और उनके भिन्न २ प्रत्यय होते हैं, वैसे अर्धमागधीमें नहीं। अर्धमागधीमें वर्तमानकाल, भूतकाल (ह्यस्तन परोक्ष. अद्यतन भूतके स्थानमें) आज्ञार्थ, विध्यर्थ, भविष्यकाल (श्वस्तन भविष्य और सामान्य भविष्यके स्थानमें) और क्रियाति-प्रत्यय इतने कालोंका प्रयोग होता है।

स्वरान्त और व्यंजनान्त धातुमें भेद

व्यंजनान्त धातुके अन्तमें 'अ' अवश्य लगता है और स्वरान्त धातुके विकल्पसे ।

वर्तमान काल

हस्

एकवचन

प्र० पु०-हसइ, हसेइ, हसए

बहुवचन

हसन्ति, हसन्ते, हसिरे,
हसेति, हसेते, हसेइरे,
हसिति, हसिते, हसइरे

म० पु०-हससि, हसेसि, हससे

हसह, हसित्या, हसेह, हसेइत्या, हस-
इत्या, हसेत्या

उ० पु०-हसामि, हसमि, हसेमि

हसिमो, हसामो, हसमो, हसेमो

(नोट) उत्तम पुरुषके बहुवचनमें 'मो-मु-म' ये तीन प्रत्यय लगते हैं यहाँ केवल 'मो' के रूप दिए हैं 'मु' और 'म' के रूप भी इसी प्रकार जानलें ।

सर्ववचन सर्वपुरुष

हसेज्ज, हसेज्जा, हसिज्ज, हसिज्जा

'अस्' धातुके रूप

प्र० पु०-अत्थि

सन्ति

म० पु०-सि

ह

उ० पु०-मि, अंसि

मो

स्वरान्तधातु 'हो'

जब उपरोक्त नियमानुसार 'अ' लगता है तो इसके रूप 'हस्' की तरह होते हैं जैसे—होअइ, होअसि, होअमि इत्यादि ।

जब 'अ' नहीं लगता तो इसके रूप इस प्रकार होते हैं ।

प्र० पु०-होइ

होंति, हुंति, होते, होइरे

म० पु०-होसि

होह, होइत्या

उ० पु०-होमि

होमो, होमु, होम

विशेष—स्वरान्त धातुओंमें 'दा' धातुको पुरुषबोधक प्रत्यय लगाते समय अन्य 'आ' को कहीं २ 'ए' होता है, जैसे-देइ, देति, दिन्ति, देसि, देमि, देमु इत्यादि ।

भूतकाल

व्यंजनान्त धातुओंके सर्ववचन और सर्वपुरुषमें 'ईअ' प्रत्यय लगता है, जैसे-वस्+ईअ=वसीअ ।

स्वरान्त धातुओंको 'सी' 'ही' 'हीअ' प्रत्यय लगते हैं, जैसे-कासी-काही-काहीअ ।

अस्

सर्ववचन सर्वपुरुष—आसि, अहेसि

परिवर्तनसे होनेवाले रूप—अवोच, अभू, आसी, आसिमो-मु, अदक्खु, अकासि ।

(२) सर्ववचन और सर्वपुरुषमें धातुको 'त्था' और 'इंसु' प्रत्यय होता है, जैसे-होत्था, पलाइत्था । 'इंसु' प्रत्ययके लिए देखो आख्यात-विभक्ति प्रकरण ।

विशेष—(१) कहीं २ 'इंसु' को गुण भी होता है, जैसे—परिकहेसु ।

(२) धातुके पूर्व कहीं २ 'अ' का आगम भी होता है, जैसे—अकहिंसु ।

भविष्यकाल

हस्

प्र० पु०—हसिहिइ-हिए-स्सइ-स्सए

हसेहिइ-,,-,,-,,

अ० पु०—हसिहिसि-हिसे-स्ससि-स्ससे-

हसेहिसि-,,-,,-,,

उत्तम पु०—हसिस्सं-स्सामि-हामि-हिमि

हसेस्सं-स्सामि-हामि-हिमि

हसिहिंति-ते-हिरे

हसेहिंति-,,-,,

हसिस्संति-ते, हसेस्संति-ते

हसिहिह-स्सह-हित्था

हसेहिह-,,-,,

हसिस्सामो-मु-म-हामो-मु-म-हिमो-मु-म-

हिस्सा-हित्था

हसेस्सामो-मु-म-हामो-मु-म-हिमो-मु-म-

हिस्सा-हित्था

सर्वपुरुष-सर्ववचन-हसेज्ज-ज्जा, हसिज्ज-ज्जा

हो

उपरोक्त नियमानुसार 'हो' और 'होअ' दोनोंको हस्के समान प्रत्यय लगाएँ ।

विशेष—कर् धातुको भविष्यकालमें 'का' आदेश विकल्पसे होता है, और उत्तम पुरुषके एक वचनमें 'काहं' विकल्पसे होता है । ऐसे ही 'दा' धातुके विषयमें भी जानें ।

आज्ञार्थ और विध्यर्थ

हस्

प्र० पु०—हसउ, हसेउ, हसए, हसे	हसंतु, हसेंतु, हसितु
म० पु०—हसहि, हससु, हसिजमु-जहि- जे-जसि-जासि-जाहि, हसेहि- सु-जसु-जहि जे-जसि-जासि- जाहि, हस, हसे, हसाहि	हसह, हसेह, हसिजाह, हसेजाह
उ० पु०—हसमु, हसामु, हसिमु, हसेमु	हसमो, हसामो, हसिमो, हसेमो
सर्वपुरुष-सर्ववचन-हसेज-जा, हसिज-जा	

हो

(१) 'होअ' में हस्के समान प्रत्यय जुड़ते हैं ।

(२) केवल 'हो' के रूप नीचे लिखे अनुसार हैं ।

प्र०पु०—होउ	होंतु
म०पु०—होसु, होहि	होह
उ०पु०—होमु	होमो

क्रियातिपत्यर्थ

'क्रियातिपत्यर्थ' क्रियाकी निष्फलताका सूचक है जैसे—'ऐसा हुआ होता तो ऐसा होता' पर पहला कार्य न होने से दूसरा कार्य भी न बना ।

प्रत्यय—विशेष्य के लिंगानुसार प्रथमा के 'एकवचन और बहुवचनके उस २ लिंगके प्रत्यय, 'न्त' लगाकर तैयार किए गए प्रत्यय और सर्ववचन सर्वपुरुषमें ज-जा प्रत्यय लगानेसे क्रियातिपत्यर्थके रूप होते हैं ।

पुल्लिङ्ग-हस्-हसन्ते, हसन्तो
हो-होन्ते, हुन्ते, होतो,
हुंते

हसन्ता
होन्ता, हुन्ता

स्त्रीलिङ्ग-हस्-हसन्ती, हसन्ता
हो-होन्ती, हुन्ती, होता,
हुन्ता

‘ओ’ और जोड़ देनेसे बहुवचनके रूप
बन जाते हैं ।

नपुंसकलिङ्ग-हस्-हसन्तं
हो-होन्तं, हुन्तं

हसन्ताइं
होन्ताइं, हुंताइं

‘होअ’ अंगके रूप

पुल्लिङ्ग
होअन्तो {होअन्ता

स्त्रीलिङ्ग
होअन्ती {होअन्ता

नपुंसकलिङ्ग
होअन्तं {होअन्ताइं

सर्ववचन सर्वपुरुष

हस्-हसेज, हसेजा

हो-होज, होजा, होएज, होएजा

कर्मणि

जो धातु सकर्मक हो उसका कर्मणि प्रयोग होता है, कर्तामें तृतीया विभक्ति और कर्ममें प्रथमा विभक्ति होती है तथा कर्मके आधार पर क्रियापद होता है जैसे-वालो पुत्थयं पढइ—वालेण पुत्थयं पढिज्जइ इत्यादि । भाव प्रयोगसे कर्ताके स्थानमें तृतीया विभक्तिका प्रयोग होता है और कर्म न होनेके कारण क्रियापद प्रथम पुरुषके एकवचनमें प्रयुक्त होता है, जैसे-सो गच्छइ—तेण गम्मइ आदि ।

धातुसे कर्म और भावमें रूप बनानेके लिए ‘ईअ’ अथवा ‘इज्ज’ प्रत्यय प्रयुक्त होता है, इसके बाद काल के पुरुषबोधक प्रत्यय लगते हैं ।

भविष्यकाल क्रियातिपत्यर्थ आदिके रूप भाव और कर्मसे कर्ताके समान होते हैं ।

कर्म और भावमें प्रयुक्त होनेवाले कुछ धातु

कर्तरि

कर्मणि

वय्

वुच्च

सुण्

सुव्व

हण्

हम्म

उह्

उज्झ

भण्

भण्ण

लह्

लब्भ

हर

हीर

कर

कीर

जाण्

नज्ज

इत्यादि विकल्पसे

पास्

दीस

आदि नित्य

कृदन्त

वर्तमानकृदन्त

हसन्त, हसेन्त, हसमाण, हसेमाण (पुल्लिङ्गके रूप वद्धमाणके समान और नपुंसकलिङ्गके रूप जलके समान होते हैं)

स्त्रीलिङ्ग-हसन्ती, हसन्ता, हसेन्ती, हसेंता, हसमाणी-माणा, हसेमाणी-माणा (आकारान्त कहाके समान और ईकारान्त मइ के समान)

हो

पुल्लिङ्ग-होन्त, हुन्त, होमाण, होअन्त, होएन्त, होअमाण, होएमाण (पुल्लिङ्ग वद्धमाणकी तरह नपुंसकलिङ्ग जलकी तरह)

स्त्रीलिङ्ग-होन्ती, हुन्ती, होन्ता, हुन्ता, होमाणी-माणा-ई-अई-एई-अन्ती-अन्ता-एन्ती-एन्ता-अमाणी-एमाणी-अमाणा-एमाणा (आकारान्त कहाकी भांति और ईकारान्त मइकी भांति)

धातुके कर्मणि अङ्गको ये ही प्रत्यय लगानेसे कर्मणि वर्तमान कृदन्त होता है ।

विध्यर्थ कृदन्त

धातुके अङ्गको तव्व-यव्व-अणीअ और अणिज्ज प्रत्यय लगानेसे विध्यर्थ कर्मणि कृदन्त होता है, यदि 'तव्व' और 'यव्व' प्रत्यय लगाते समय पूर्वमें 'अ' हो तो उसे 'इ' अथवा 'ए' होता है, जैसे—झाइटव्वं-झाएतव्वं-झाइयव्वं-झाएयव्वं-झाअणीअं-झाअणिज्जं इत्यादि ।

पुल्लिंग-हस्-हसन्ते, हसन्तो
हो-होन्ते, हुन्ते, होतो,
हुंतो

हसन्ता
होन्ता, हुन्ता

स्त्रीलिंग-हस्-हसन्ती, हसन्ता
हो-होन्ती, हुन्ती, होँता,
हुन्ता

‘ओ’ और जोड़ देनेसे बहुवचनके रूप
बन जाते हैं ।

नपुंसकलिंग-हस्-हसंतं
हो-होन्तं, हुन्तं

हसन्ताइं
होन्ताइं, हुंताइं

‘होअ’ अंगके रूप

पुल्लिंग
होअन्तो {होअन्ता

स्त्रीलिंग
होअन्ती {होअन्ता

नपुंसकलिंग
होअन्तं {होअन्ताइं

सर्ववचन सर्वपुरुष

हस्-हसेज, हसेजा

हो-होज, होजा, होएज, होएजा

कर्मणि

जो धातु सकर्मक हो उसका कर्मणि प्रयोग होता है, कर्तामे तृतीया विभक्ति और कर्ममें प्रथमा विभक्ति होती है तथा कर्मके आधार पर क्रियापद होता है जैसे-वालो पुत्थयं पढइ—वालेण पुत्थयं पढिज्जइ इत्यादि । भाव प्रयोगमें कर्ताके स्थानमे तृतीया विभक्तिका प्रयोग होता है और कर्म न होनेके कारण क्रियापद प्रथम पुरुषके एकवचनमें प्रयुक्त होता है, जैसे-सो गच्छइ-तेण गम्मइ आदि ।

धातुसे कर्म और भावमे रूप बनानेके लिए ‘ईअ’ अथवा ‘इज्ज’ प्रत्यय प्रयुक्त होता है, इसके बाद काल के पुरुषबोधक प्रत्यय लगते हैं ।

भविष्यकाल क्रियातिपत्यर्थ आदिके रूप भाव और कर्ममे कर्ताके समान होते हैं ।

कर्म और भावमें प्रयुक्त होनेवाले कुछ धातु

कर्तरि

वय्

सुण्

हण्

उह्

भण्

लह्

हर्

कर्

जाण्

पास्

कर्मणि

वुच्च

सुव्व

हम्म

उज्ज

भण्ण

लब्भ

हीर

कीर

नज्ज

दीस्

इत्यादि विकल्पसे

आदि नित्य

कृदन्त

वर्तमानकृदन्त

हसन्त, हसेन्त, हसमाण, हसेमाण (पुल्लिङ्गके रूप वद्धमाणके समान और नपुंसकलिङ्गके रूप जलके समान होते हैं)

स्त्रीलिङ्ग-हसन्ती, हसन्ता, हसेन्ती, हसेंता, हसमाणी-माणा, हसेमाणी-माणा (आकारान्त कहाके समान और ईकारान्त मइ के समान)

हो

पुल्लिङ्ग-होन्त, हुन्त, होमाण, होअन्त, होएन्त, होअमाण, होएमाण (पुल्लिङ्ग वद्धमाणकी तरह नपुंसकलिङ्ग जलकी तरह)

स्त्रीलिङ्ग-होन्ती, हुन्ती, होन्ता, हुन्ता, होमाणी-माणा-ई-अई-एई-अन्ती-अन्ता-एन्ती-एन्ता-अमाणी-एमाणी-अमाणा-एमाणा (आकारान्त कहाकी भांति और ईकारान्त मइकी भांति)

धातुके कर्मणि अङ्गको ये ही प्रत्यय लगानेसे कर्मणि वर्तमान कृदन्त होता है ।

विध्यर्थ कृदन्त

धातुके अङ्गको तव्व-यव्व-अणीअ और अणिज्ज प्रत्यय लगानेसे विध्यर्थ कर्मणि कृदन्त होता है, यदि 'तव्व' और 'यव्व' प्रत्यय लगाते समय पूर्वमें 'अ' हो तो उसे 'इ' अथवा 'ए' होता है, जैसे—झाइटव्वं-झाएतव्वं-झाइयव्वं-झाएयव्वं-झाअणीअं-झाअणिज्जं इत्यादि ।

भूत-कृदन्त

धातुको 'य' अथवा 'त' प्रत्यय लगानेसे कर्मणि भूत कृदन्त होता है । प्रत्यय लगाते समय 'अ' को 'इ' होता है और यह कृदन्त विशेषण होता है । तथा स्त्रीलिंग करना हो तो 'आ' लगानेसे वैसा हो जाता है । जैसे-हसियं-हसितं, हसिए-ते, हसिओ-तो, हसिया-ता, हू+अ=हूअ-हूइअ-हूउत, हू=हूअ, हूत ।

हेत्वर्थ कृदन्त

धातुके अंगको उं-तुं-तुं-इत्तए प्रत्यय लगानेसे हेत्वर्थ कृदन्त होता है , पूर्वमें यदि 'अ' हो तो उसे 'इ' अथवा 'ए' होता है, जैसे-हसिउं, हसेउं, हसितुं, हसेतुं, हसितुं, हसेतुं । 'इत्तए' के लिए देखो धातु-प्रत्यय नियम नं० २ ।

संबंधक भूत कृदन्त

धातुके अंगको तुं-उं-य-तूण-ऊण-तुआण-तूण-ऊण-तुआण-उआण-उआण प्रत्यय लगानेसे संबंधक भूत कृदन्त होता है तथा पूर्वके 'अ' को 'इ' अथवा 'ए' होता है । जैसे-हसितुं-उं-य-तूण-ऊण-तुआण-तूण-ऊण-तुआण-उआण-उआण, हसेतुं-उं-तूण-यावत् उआण । विशेषताके लिए देखो धातु-प्रत्यय नियम नं० १ ।

समास

संस्कृतके समान अर्धमागधीमें भी सात समास होते हैं ।

गाहा-दंदे य वहुव्वीही, कम्मधारयए दिगुयए चेव ।

तप्पुरिसे अव्वईभावे, एगसेसे य सत्तमे ॥ १ ॥ (अनुयोगद्वारसूत्र)

विशेषता यह है कि संस्कृतके स्थानमें अर्धमागधी शब्दोंका प्रयोग होता है ।

सुत्ताणुक्रमणिया

सुत्तणामं	पिटुसंखा
आयारे	१
सूयगडं	१०१
ठाणे	१८३
समवाए	३१६
भगवई-विवाहपण्णत्ती	३८४
णायाधम्मकहाओ	९४१
उवासगदसाओ	११२७
अंतगडदसाओ	११६१
अणुत्तरोववाइयदसाओ	११९१
पण्हावागरणं	११९९
विवागसुयं	१२४१



णमोऽत्थु णं समणस्स भगवओ णायपुत्त-महावीरस्स

सुत्तागमे

तत्थ णं

आयारे

सुयं मे आउसं ! तेणं भगवया एवमक्खायं ॥ १ ॥ इह-मेगेसि णो सण्णा भवइ, तंजहा-पुरत्थिमाओ वा दिसाओ आगओ अहमंसि ? दाहिणाओ वा दिसाओ आगओ अहमंसि, पच्चत्थिमाओ वा दिसाओ आगओ अहमंसि, उत्तराओ वा दिसाओ आगओ अहमंसि, उट्ठाओ वा दिसाओ आगओ अहमंसि ? अहो दिसाओ वा आगओ अहमंसि ? अण्णयरीओ वा दिसाओ अणुदिसाओ वा आगओ अहमंसि ? एवमेगेसिं णो णायं भवइ. अत्थि मे आया उववाइए. णत्थि मे आया उववाइए के अहं आसि ? के वा इओ चुओ इह पेच्चा भविस्सामि ? ॥ २ ॥ से जं पुण जाणेज्जा सहसंमइयाए परवागरणेणं. अण्णेसिं अंतिए वा सोच्चा. तंजहा— पुरत्थिमाओ वा दिसाओ आगओ अहमंसि. जाव अण्णयरीओ दिसाओ अणुदिसाओ वा आगओ अहमंसि. एवमेगेसिं जं णायं भवइ. अत्थि मे आया उववाइए. जौ इमाओ-दिसाओ अणुदिसाओ वा अणुसंचरइ सोहं, सव्वाओ दिसाओ-अणुदिसाओ जो आगओ अणुसंचरइ, सोहं । से आयावाई, लोयावाई, कम्मावाई, किरियावाई ॥ ३ ॥ अकरिस्सं चाहं कारवेसुं चऽहं करओ यावि समणुत्ते भविस्सामि; एयावंति सव्वावंति लोगंसि कम्मसमारंभा परिजाणियव्वा भवंति ॥ ४ ॥ अपरिण्णायकम्मं खलु अयं पुरिसे, जो इमाओ दिसाओ अणुदिसाओ अणुसंचरइ, सव्वाओ दिसाओ सव्वाओ अणुदिसाओ साहेइ, अणेगरूवाओ जोणीओ संघेइ, विरूवरूवे फासे पडिसंवेदेइ ॥ ५ ॥ तत्थ खलु भगवया परिण्णा पवेइया ॥ ६ ॥ इमस्स चेव जीवियस्स परिचंदणमाणणपूयणाए, जाईमरणमोयणाए, दुक्खपडिघायहेउं ॥ ७ ॥ एयावंति सव्वावंति लोगंसि कम्मसमारंभा परिजाणियव्वा भवंति ॥ ८ ॥ जस्सेते लोगसि कम्मसमारंभा परिण्णाया भवंति से हु मुणी परिण्णायकम्मं ति वेमि ॥ ९ ॥ पढमो उद्देशो ॥

अट्ठे लोए परिजुण्णे दुस्संवोहे अविजाणए अस्सि लोए पव्वहिए तत्थ तत्थ पुढो यास आतुरा अस्सि परितावेंति ॥ १० ॥ संति पाणा पुढोसिया, लज्जमाणा पुढो

पास ॥ ११ ॥ अणगारा मोत्ति एगे पवयमाणा; जमिणं विस्वरुवेहिं सत्थेहिं पुढ-
 विकम्मसमारंभेणं पुढविसत्थं समारंभमाणे अणेगरुवे पाणे विहिसइ ॥ १२ ॥ तत्थ
 खलु भगवया परिण्णा पवेइआ । इमस्स चेव जीवियस्स परिवंदण-माणण-पूयणाए,
 जाइमरणमोयणाए, दुक्खपडिघायहेउं, से सयमेव पुढविसत्थं समारंभइ, अण्णेहिं
 वा पुढविसत्थं समारंभावेइ । अण्णेवा पुढविसत्थं समारंभंते समणुजाणइ । तं से
 अहियाए, तं से अबोहिए ॥ १३ ॥ से तं संवुज्जमाणे आयाणीयं समुट्ठाय सोच्चा
 खलु भगवओ, अणगाराणं अंतिए; इहमेगेसि णातं भवति-एस खलु, गंथे एस खलु
 मोहे, एस खलु मारे, एस खलु णरए । इच्चत्थं गट्ठिए लोए जमिणं विस्वरुवेहिं
 सत्थेहिं पुढविकम्मसमारंभेण पुढविसत्थं समारंभमाणे अण्णे अणेगरुवे पाणे
 विहिसइ ॥ १४ ॥ से वेमि-अप्पेगे अधमब्भे, अप्पेगे अंधमच्छे; अप्पेगे पाय-
 मब्भे, अप्पेगे पायमच्छे, अप्पेगे गुप्फमब्भे, २ अप्पेगे जंधमब्भे, २ अप्पेगे
 जाणुमब्भे २ अप्पेगे ऊरुमब्भे, २ अप्पेगे कडिमब्भे, २ अप्पेगे णाभिमब्भे,
 २ अप्पेगे उयरमब्भे, २ अप्पेगे पासमब्भे, २ अप्पेगे पिट्ठिमब्भे, २ अप्पेगे
 उरमब्भे, २ अप्पेगे हिययमब्भे, २ अप्पेगे थणमब्भे, २ अप्पेगे खंधमब्भे,
 २ अप्पेगे बाहुमब्भे, २ अप्पेगे हत्थमब्भे, २ अप्पेगे अंगुलिमब्भे, २ अप्पेगे
 णहमब्भे, २ अप्पेगे गीवमब्भे, २ अप्पेगे हणुमब्भे, २ अप्पेगे होठुमब्भे,
 २ अप्पेगे दंतमब्भे, २ अप्पेगे जिब्भमब्भे, २ अप्पेगे तालुमब्भे, २ अप्पेगे
 गलमब्भे, २ अप्पेगे गंडमब्भे, २ अप्पेगे कण्णमब्भे, २ अप्पेगे णासमब्भे,
 २ अप्पेगे अच्छिमब्भे, २ अप्पेगे भमुहमब्भे, २ अप्पेगे णिडालमब्भे, २ अप्पेगे
 सीसमब्भे, २ अप्पेगे संपमारए, अप्पेगे उद्दवए ॥ १५ ॥ इत्थं सत्थं समारंभमा-
 णस्स इच्चेते आरंभा अपरिण्णाता भवंति । एत्थ सत्थं असमारंभमाणरस इच्चेते
 आरंभा परिण्णाता भवंति ॥ १६ ॥ तं परिण्णाय मेहावी नेव सयं पुढवि सत्थं
 समारंभेज्जा, णेवण्णेहि पुढविसत्थं समारंभावेज्जा, णेवण्णे पुढविसत्थं समारंभंते
 समणुजाणेज्जा । जस्सेते पुढविकम्मसमारंभा परिण्णाता भवंति से हु मुणी परि-
 ण्णातकम्मेत्ति वेमि ॥ १७ ॥ **बीयो उद्देसो ॥**

से वेमि, जहावि अणगारे उज्जुकडे, णियायपडिवण्णे अमायं कुब्बमाणे विया-
 हिते, जाए सद्धाए णिक्खंतो तमेवअणुपालिया वियहित्तु विसोत्तियं- ॥ १८ ॥
 पणया वीरा महावीहिं, लोगं च आणाए अभिसमेच्चा अकुओभयं ॥ १९ ॥ से
 वेमि णेव सयं लोगं अब्भाइक्खिज्जा, णेव अत्ताणं अब्भाइक्खिज्जा । जे लोयं
 अब्भाइक्खइ, से अत्ताणं अब्भाइक्खइ, जे अत्ताणं अब्भाइक्खइ, से लोयं अब्भा-

इक्खइ ॥ २० ॥ लज्जमाणा पुढो, पास, अणगारा मो त्ति एगे पवयमाणा; जमिणं विरुवरुवेहिं सत्थेहि उदयकम्मसमारंभेणं उदयसत्थं समारंभमाणे अणेगरुवे पाणे विहिंसइ ॥ २१ ॥ तत्थ खलु भगवया परिण्णा पवेइया, इमरस चेव जीवियस्स परिवंदण, माणण, पूयणाए जाइमरणमोयणाए, दुक्खपडिघायहेउं, से सयमेव उदयसत्थं समारभति, अण्णेहिं वा उदयसत्थं समारंभावेति, अन्ने उदयसत्थं समारंभंते समणुजाणति, तं से अहियाए, तं से अवोहीए ॥ २२ ॥ से तं संवुज्जमाणे आयाणीयं समुठ्ठाय सोच्चा खलु भगवओ अणगाराणं अंतिए इहमेगेसि णायं भवति, एस खलु गंथे, एस खलु मोहे, एस खलु मारे, एस खलु णरए । इच्चत्थं गट्ठिए लोए जमिणं विरुवरुवेहिं सत्थेहिं उदयकम्मसमारंभेणं उदयसत्थं समारंभमाणे अण्णे अणेगरुवे पाणे विहिंसइ ॥ २३ ॥ से बेमि, संति पाणा उदयनिस्सिया जीवा अणेगे, इह च खलु भो ! अणगाराणं उदयजीवा वियाहिया । सत्थं चेत्थं अणुवीइ पासा । पुढो सत्थं पवेदितं ॥ २४ ॥ अदुवा अदिन्नादाणं ॥ २५ ॥ कप्पइ णे कप्पइ णे पाउं, अदुवा विभूसाए, पुढो सत्थेहिं विउट्ठंति एत्थंवि तेसि णो णिकरणाए ॥ २६ ॥ एत्थ सत्थं समारभमाणस्स इच्चेते आरंभा अपरिण्णाया भवंति । एत्थ सत्थं असमारंभमाणस्स इच्चेते आरंभा परिण्णाया भवंति । तं परिण्णाय मेहावी णेव सयं उदयसत्थं समारंभेज्जा, णेवन्नेहिं उदयसत्थं समारंभावेज्जा उदयसत्थं समारंभंतेऽवि अण्णे ण समणुजाणेज्जा, जस्सेते उदयसत्थसमारंभा परिण्णाया भवंति से हु मुणी परिण्णातकम्मे त्ति बेमि ॥ २७ ॥ तइओइेसो ॥

से बेमि णेव सयं लोयं अब्भाइक्खेज्जा, णेव अत्ताणं अब्भाइक्खेज्जा, जे लोगं अब्भाइक्खति, से अत्ताणं अब्भाइक्खति, जे अत्ताणं अब्भाइक्खति, से लोगं अब्भाइक्खति ॥ २८ ॥ जे दीहलोगसत्थस्स खेयन्ने, से असत्थस्स खेयन्ने; जे असत्थस्स खेयन्ने, से दीहलोगसत्थस्स खेयन्ने ॥ २९ ॥ वीरेहि एयं अभिभूय दिट्ठं, संजतेहिं सया जत्तेहिं सया अप्पमत्तेहिं ॥ ३० ॥ जे पमत्ते गुणट्ठीए, से हु दंडे त्ति पवुच्चति । तं परिण्णाय मेहावी इयाणि णो जमहं पुव्वमकासी पमादेणं ॥ ३१ ॥ लज्जमाणा पुढो पास-अणगारा मोत्ति एगे पवयमाणा जमिणं विरुवरुवेहिं सत्थेहिं अगणिकम्मसमारंभेणं अगणिसत्थं समारभमाणे, अण्णे अणेगरुवे पाणे विहिंसति ॥ ३२ ॥ तत्थ खलु भगवया परिण्णा पवेदिया, इमस्स चेव जीवियस्स परिवंदण-माणणपूयणाए, जाइमरणमोयणाए, दुक्खपडिघायहेउं, से सयमेव अगणिसत्थं समारंभति, अण्णेहिं वा अगणिसत्थं समारंभावेइ अण्णेवा अगणिसत्थं समारभमाणे समणुजाणति । तं से अहियाए तं से अवोहिए ॥ ३३ ॥ से तं संवुज्जमाणे आया-

णीयं समुठ्ठाय सोच्चा भगवओ अणगाराणं इहमेगेसि णायं भवति-एस खलु गंधे एस खलु मोहे एस खलु मारे एस खलु णरए । इच्चत्थं गट्ठिए लोए जमिणं विरुवरुवेहि सत्थेहिं अगणिकम्मसमारभमाणे अण्णे अणेगरुवे पाणे विहिसति ॥ ३४ ॥ से बेमि, संति पाणा, पुढविणिसिया, तणणिसिया, पत्तणिसिया, कट्ठणिसिया, गोमयणिसिया, कयवरणिसिया; सन्ति संपातिमा पाणा, आहच्च संपयंति । अगणिं च खलु पुठ्ठा, एगे संघायमावज्जंति । जे तत्थ संघायमावज्जंति, ते तत्थ परियावज्जंति, जे तत्थ परियावज्जंति ते तत्थ उद्दायंति ॥ ३५ ॥ एत्थ सत्थं असमारंभमाणस्स इच्चेते आरंभा परिण्णया भवंति ॥ ३६ ॥ तं परिण्णाय मेहावी नेव सयं अगणिसत्थं समारंभेज्जा, नेवन्नेहिं अगणिसत्थं समारंभावेज्जा, अगणिसत्थं समारंभमाणे अन्ने न समणुजाणेज्जा । जस्सेते अगणिकम्मसमारंभा परिण्णया भवंति, से हु मुणी परिण्णायकम्मे ति बेमि ॥ ३७ ॥ चउत्थोद्देसो ॥

तं णो करिस्सामि समुठ्ठाए मत्ता मतिमं, अभयं विदिता, तं जे णो करए, एसोवरए, एत्थोवरए, एस अणगारे ति पवुच्चइ ॥ ३८ ॥ जे गुणेसे आवट्टे जे आवट्टे से गुणे ॥ ३९ ॥ उट्ठं-अहं-तिरियं-पाईणं पासमाणे रुवाइं पासइ, सुणमाणे सद्दाइं सुणइ, उट्ठं-अहं-तिरियं पाईणं मुच्छमाणे रुवेसु मुच्छति, सद्देसु यावि एस लोणे वियाहिए । एत्थ अगुत्ते अणाणाए पुणो पुणो गुणासाते वंकसमायारे पमत्तेऽगारमावसे ॥ ४० ॥ लज्जमाणा पुढो पास, अणगारा मोत्ति एगे पवदमाणा; जमिणं विरुवरुवेहिं सत्थेहिं वणस्सइकम्मसमारंभेणं वणस्सइसत्थं समारभमाणा अण्णे अणेगरुवे पाणे विहिंसंति ॥ ४१ ॥ तत्थ खलु भगवया परिण्णा पवेदिता । इमस्स चेव जीवियस्स परिवंदण, माणण, पूयणाए, जातिमरण मोयणाए दुक्खपडिघायहेउं से सयमेव वणस्सइसत्थं समारंभइ, अण्णेहिं वा वणस्सइसत्थं समारंभावेइ, अण्णे वा वणस्सइसत्थं समारभमाणे समणुजाणइ, तं से अहियाए, तं से अवोहीए ॥ ४२ ॥ से तं संवुज्जमाणे आयाणीयं समुठ्ठाए सोच्चा भगवओ, अणगाराणं वा अंतिए इह मेगेसिं णायं भवति-एस खलु गंधे एस खलु मोहे एस खलु मारे एस खलु णरए । इच्चत्थं गट्ठिए लोए; जमिणं विरुवरुवेहिं सत्थेहिं वणस्सइकम्मसमारंभेणं वणस्सइसत्थं समारंभमाणे अन्ने अणेगरुवे पाणे विहिसति ॥ ४३ ॥ से बेमि, -इमंपि जाइधम्मयं, एयंपि जाइधम्मयं, इमंपि बुद्धिधम्मयं एयंपि बुद्धिधम्मयं; इमंपि चित्तमंतयं एयंपि चित्तमंतयं; इमंपि छिन्नं मिलाति, एयंपि छिन्नं मिलाति; इमंपि आहारगं, एयंपि आहारगं, इमंपि अणिच्चयं, एयंपि अणिच्चयं; इमंपि असासयं, एयंपि असासयं; इमंपि चओवचइयं, एयंपि चओवचइयं; इमंपि विपरिणामधम्मयं, एयंपि

विपरिणायधम्मयं ॥ ४४ ॥ एत्थ सत्थं समारंभमाणस्स इच्चेते आरंभा अपरिण्णाता भवंति । एत्थ सत्थं असमारंभमाणस्स इच्चेते आरंभा परिण्णाया भवंति । तं परिण्णाय मेहावी णेव सयं वणस्सइसत्थं समारंभेज्जा, णेवण्णेहिं वणस्सइसत्थं समारंभावेज्जा, णेवण्णे वणस्सइसत्थं समारंभंते समणुजाणेज्जा, जस्सेते वणस्सइसत्थसमारंभा परिण्णाया भवंति से हु मुणी परिण्णायकम्मे त्ति वेमि ॥ ४५ ॥ पंचमोद्देसो ॥

से वेमि, संतिमे तसा पाणा, तंजहा-अंडया, पोयया, जराउया, रसया, संसेयया, संमुच्छिमा, उब्भियया, उववातिया, एस संसारेत्ति पवुच्चति, मंदस्स अविद्याणतो ॥ ४६ ॥ णिज्झाइत्ता पडिलेहिता पत्तेयं परिणिव्वाणं सव्वेसि पाणाणं, सव्वेसिं भूयाणं, सव्वेसिं जीवाणं, सव्वेसिं सत्ताणं, असातं अपरिणिव्वाणं, महब्भयं दुक्खं त्ति वेमि ॥ ४७ ॥ तसंति पाणा पदिसोदिसासुय । तत्थ तत्थ पुढो पास आउरा परितावेत्ति । संति पाणा पुढोसिता ॥ ४८ ॥ लज्जमाणा पुढो पास अणगारा मोत्ति एगे पवयमाणा जमिगं विरुवरुवेहि सत्थेहि तसकायसमारंभेणं तसकायसत्थं समारंभमाणे अण्णे अणेगरुवे पाणे विहिसइ ॥ ४९ ॥ तत्थ खलु भगवया परिण्णा पवेदिता । इमस्स चेव जीवियस्स परिवंदण, माणण, पूयणाए, जाइमरणमोयणाए, दुक्खपडिघायहेउं, से सयमेव तसकायसत्थं समारंभति, अण्णेहि वा तसकायसत्थं समारंभावेइ, अण्णे वा तसकायसत्थं समारंभमाणे समणुजाणति; तं से अहियाए, तं से अवोहीए ॥ ५० ॥ से तं संवुज्जमाणे आयाणीयं समुठाय सोच्चा भगवओ, अणगाराणं अंतिए इहमेगेसिं णायं भवइ-एस खलु गंथे, एस खलु मोहे, एस खलु मारे, एस खलु णरए । इच्चत्थं गट्ठिए लोए; जमिगं विरुवरुवेहि सत्थेहि तसकायसमारंभेणं तसकायसत्थं समारंभमाणे अण्णे अणेगरुवे पाणे विहिसति ॥ ५१ ॥ से वेमि-अप्पेगे अच्चाए वहंति, अप्पेगे अजिणाए वहंति, अप्पेगे मंसाए वहंति, अप्पेगे सोणिताए वहंति, अप्पेगे हिययाए वहंति, एवंपित्ताए वसाए-पिच्छाए-पुच्छाए-वालाए-विसाणाए-दंताए-दाढाए-णहाए-णहारुणीए-अठ्ठीए-अठ्ठीमिंजाए-अठ्ठाए-अणठ्ठाए-अप्पेगे हिंसिंसु मेत्ति वा वहंति, अप्पेगे हिंसंति मेत्ति वा वहंति, अप्पेगे हिंसिस्संति मेत्ति वा वहंति ॥ ५२ ॥ एत्थ सत्थं समारंभमाणस्स इच्चेते आरंभा अपरिण्णाया भवंति एत्थ सत्थं असमारंभमाणस्स इच्चेते आरंभा परिण्णाया भवंति ॥ ५३ ॥ तं परिण्णाय मेहावी णेवसयं तसकायसत्थं समारंभेज्जा, णेवण्णेहिं तसकायसत्थं समारंभावेज्जा, णेवण्णे तसकायसत्थं समारंभंते समणुजाणेज्जा, जस्सेते तसकायसत्थसमारंभा परिण्णाया भवंति, से हु मुणी परिण्णायकम्मे त्ति वेमि ॥ ५४ ॥ इइ छट्ठोद्देसो ॥

पहू एजरस दुगंछणाए, आयंकदंसी अहियंति नचा । जे अज्जत्थं जाणट, से वहिया जाणइ, जे वहिया जाणइ, से अज्जत्थं जाणइ । एयं तुलमन्नेमि । इह संतिगया दविया णावकंखंति जीविउं ॥ ५५ ॥ लज्जमाणा पुढो, पास, अणगारा मोत्ति एगे पवयमाणा; जमिणं विरुवरुवेहि सत्थेहि, वाउकम्मसमारंभेणं वाउसत्थं नमारंभमाणे अण्णे अण्ण-गरुवे पाणे विहिसइ ॥ ५६ ॥ तत्थ खलु भगवया परिण्णा पवेइया, इमस्स चैव जीवियस्स परिवंदण, माणण, पूयणाए, जाइमरणमोयणाए दुक्खपडिघायहेउं, से सयमेव वाउसत्थं समारंभति, अन्नेहिं वा वाउसत्थं समारंभावेति, अन्ने वा वाउसत्थं समारंभंते समणुजाणति, तं से अहियाए तं से अवोहीए ॥ ५७ ॥ से तं संवुज्जमाणं आयाणीयं समुठाए सोच्चा भगवओ अणगाराणं अंतिए इहमेगंसि णायं भवति-एग खलु गंथे, एस खलु मोहे, एस खलु मारे, एस खलु णरए । इत्थं गट्टिए लोए, जमिणं विरुवरुवेहिं सत्थेहिं वाउकम्मसमारंभेणं वाउसत्थं समारंभमाणे अन्ने अण्ण-गरुवे पाणे विहिसति ॥ ५८ ॥ से वेमि, संति संपाइमा पाणा, आहच्च संपयंति य फरिसं च खलु पुढा एगे संघायमावज्जंति । जे तत्थ संघायमावज्जंति, ते तत्थ परि-यावज्जंति, जे तत्थ परियावज्जंति, ते तत्थ उद्दयंति ॥ ५९ ॥ एत्थ सत्थं समारंभ-माणस्स इच्चेते आरंभा अपरिण्णाया भवंति । एत्थ सत्थं असमारंभमाणस्स इच्चेते आरंभा परिण्णाया भवंति ॥ ६० ॥ तं परिण्णाय मेहावी णेव सयं वाउसत्थं समारंभेज्जा, णेवन्नेहि वाउसत्थं समारंभावेज्जा, णेवन्ने वाउसत्थं समारंभंते समणु-जाणेज्जा । जस्सेते वाउसत्थसमारंभा परिण्णाया भवंति से हु मुणी परिण्णायकम्मे त्ति वेमि ॥ ६१ ॥ एत्थं पि जाणे उवादीयमाणा जे आचार्ये न रमंति, आरंभमाणा विणयं वयंति, छंदोवणीया, अज्झोववणा, आरंभसत्ता पकरंति संगं ॥ ६२ ॥ से वसुमं सव्वसमण्णागयपण्णाणेणं अप्पाणेणं अकरणिज्जं पावकम्मं णो अन्नेसि ॥ ६३ ॥ तं परिण्णाय मेहावी णेव सयं छज्जीवणिकायसत्थं समारंभेज्जा, णेवन्नेहिं छज्जीवणि-कायसत्थं समारंभावेज्जा, णेवन्ने छज्जीवणिकायसत्थं समारंभंते समणुजाणेज्जा । जस्सेते छज्जीवणिकायसत्थसमारंभा परिण्णाया भवंति, से हु मुणी परिण्णायक-म्मेत्ति वेमि ॥ ६४ ॥ **सत्तमोद्देशो ॥**

॥ सत्थपरिण्णा णाम पढमज्झयणं समत्तं ॥

जे गुणे से मूलठाणे, जे मूलठाणे से गुणे, इति से गुणट्ठी महता परियावेणं पुणो पुणो वसे पमत्ते, तंजहा-माया मे, पिया मे, भाया मे, भइणी मे, भज्जा मे, पुत्ता मे, धूया मे, णुसा मे, सहि-सयण-संगंथ-संथुया मे, विविच्चुवगरण-परिवट्टण-भोयण-

च्छायणं मे, इच्चत्थं गद्धिए लोए वसे पमत्ते ॥ ६५ ॥ अहोय राओ परियप्पमाणे,
 कालाकालसमुठ्ठाई, संजोगट्ठी, अठ्ठालोभी, आलुंपे, सहसाकारे, विणिविठ्ठचित्ते
 एत्थ सत्थे पुणो पुणो ॥ ६६ ॥ अप्पं च खलु आउयं इहमेगेसि माणवाणं; तंजहा सो-
 यपरिण्णाणेहिं, परिहायमाणेहिं, चक्खुपरिण्णाणेहिं परिहायमाणेहिं, घाणपरिण्णाणेहिं
 परिहायमाणेहिं, रसणापरिण्णाणेहिं परिहायमाणेहिं, फासपरिण्णाणेहिं परिहायमा-
 नेहिं, अभिक्कंतं च खलु वयं संपेहाए तओ से एगया मूढभावं जणयति ॥ ६७ ॥
 जेहि वा सद्धि संवसति, तेविणं एगया णियगा पुव्वि परिव्वयंति । सो वि ते णियगे
 पच्छा परिवएज्जा, णालं ते तव ताणाए वा, सरणाए वा । तुमं पि तेसि नालं
 ताणाए वा, सरणाए वा । से ण हासाए, ण किट्ठाए, ण रतीए, ण विभूसाए, ॥ ६८ ॥
 इच्चेवं समुठ्ठिए अहोविहाराए अंतरं च खलु इमं संपेहाए धीरो मुहुत्तमवि णो पमा-
 यए । वओ अच्चेइ जोव्वणं च ॥ ६९ ॥ इह जीविए जे पमत्ता । से हंता, छेत्ता,
 मेत्ता, लुंपित्ता, विलुंपित्ता, उद्वित्ता, उत्तासइत्ता, अकडं करिस्सामित्ति मण्ण-
 माणे ॥ ७० ॥ जेहि वा सद्धि संवसति ते वा णं एगया णियगा तं पुव्वि पोसेंति,
 सो वा ते नियगे पच्छा पोसिज्जा । णालं ते तव ताणाए वा, सरणाए वा । तुमं पि
 तेसिं णालं ताणाए वा सरणाए वा ॥ ७१ ॥ उवाइयसेसेण वा संणिहिसंणियओ-कि-
 ज्जति, इहमेगेसि असंजताणं भोयणाए । तओ से एगया रोगसमुप्पाया समुप्प-
 ज्जंति ॥ ७२ ॥ जेहि वा सद्धि संवसति ते वा णं एगया णियगा तं पुव्वि परिहरंति,
 सो वा ते णियगे पच्छा परिहरिज्जा । णालं ते तव ताणाए वा सरणाए वा तुमं पि
 तेसिं नालं ताणाए वा सरणाए वा ॥ ७३ ॥ एवं जाणित्तु दुक्खं पत्तेयं सायं, अणभि-
 क्तं च खलु वयं संपेहाए खणं जाणाहि पंडिए ॥ ७४ ॥ जाव सोयपरिण्णाणा
 अपरिहीणा, जाव नेत्तपरिण्णाणा अपरिहीणा, जाव घाणपरिण्णाणा अपरिहीणा, जाव
 जीहपरिण्णाणा अपरिहीणा, जाव फासपरिण्णाणा अपरिहीणा, इच्चेतेहि विरूवरूवेहि
 पन्नाणेहिं अपरिहीणेहिं आयठ्ठं सम्मं समणुवासिज्जासित्ति बेमि ॥ ७५ ॥ **पढमो-**
देसो समत्तो ॥

अरइं आउट्टे से मेहावी; खणंसि मुक्के ॥ ७६ ॥ अणाणाय पुट्ठावि एगे णियट्ठंति
 संदा मोहेण पाउडा ॥ ७७ ॥ “अपरिग्गहा भविस्सामो” समुट्ठाय लद्धे कामे
 अभिगाहेति, अणाणाए मुणिणो, पडिलेहंति, एत्थं मोहे पुणो पुणो सण्णा, णो हव्वाए
 णो, पाराए ॥ ७८ ॥ विमुत्ता हु ते जणा, जे जणा पारगामिणो लोभं अलोभेण
 दुगंछमाणे लद्धे कामे णाभिगाहइ, विणावि लोभं निक्खम्म एस अकम्मं जाणति
 यासति । पडिलेहाए णावकंखति, एस अणगारित्तिपवुच्चति ॥ ७९ ॥ अहोयराओ

परितप्पमाणे कालाकालसमुट्ठाइ, संजोगट्ठी, अठालोभी, आलुंफे, सहसाकारे, विणि-
विठ्ठचित्ते एत्थ, सत्थे पुणो पुणो ॥ ८० ॥ से आयवले, से णाइवले, से सयणवले,
से मित्तवले, से पिच्चवले, से देववले, से रायवले, से चोरवले, से अतिहिंवल्ले, से
किविणवले, से समणवले, इच्चेतेहि विरूवरूवेहि कज्जेहि दंडसमायाणं संपेहाए भया
कज्जति । पावमुक्खुत्ति मण्णमाणे अदुवा आसंसाए ॥ ८१ ॥ तं परिण्णाय मेहावी,
णेव सयं एएहि कज्जेहिं दंडं समारंभिज्जा, णेवणं एएहि कज्जेहि दंडं समारंभाविज्जा,
एएहि कज्जेहि दंडं समारंभंतेवि अण्णे णो समणुजाणिज्जा ॥ ८२ ॥ एस मग्गे
आयरिएहि पवेदिए, जहेत्थ कुसले णोवलिप्पिज्जासि-त्ति वेमि ॥ ८३ ॥ वीओ-
देसो समत्तो ॥

से असइं उच्चागोए, असइं णीयागोए । णो हीणे, णो अइरित्ते, णोऽपीहए, इय
संखाय को गोयावादी, को माणावादी, कंसि वा एगे गिज्जा ॥ ८४ ॥ तम्हा पंडिए
णो हरिसे, णो कुप्पे, भूएहि जाण पडिलेह सातं, समिते एयाणुपस्सी, तंजहा-
अंधत्तं, वहिरत्तं, मूयत्तं, काणत्तं, कुंटत्तं, खुज्जत्तं, वडभत्तं, सामत्तं, सवलत्तं, सहप-
माणं, अणेगरूवाओ जोणीओ, संधायति, विरूवरूवे फासे परिसंवेदेइ ॥ ८५ ॥
से अबुज्जमाणे हतोवहते जाइमरणमणुपरियट्ठमाणे ॥ ८६ ॥ जीवियं पुढो पियं
इहमेगेसि माणवाणं खित्तवत्थुममायमाणानं ॥ ८७ ॥ आरत्तं विरत्तं मणिकुंडलं, सह
हिरण्णेण इत्थियाओ परिगिज्जति तत्थेव रत्ता ॥ ८८ ॥ “ण इत्थ तवो वा, दमो
वा, णियमो वा, दिस्सति,” संपुणं वाले जीविउकामे लालप्पमाणे मूढे विप्परियास-
मुवेति ॥ ८९ ॥ इणमेव णावकंखंति, जे जणा धुवचारिणो; जातीमरणं परिन्नाय,
चरे संक्रमणे दढे ॥ ९० ॥ णत्थि कालस्स णागमो ॥ ९१ ॥ सव्वे पाणा पिया-
उया, सुहसाया, दुक्खपडिकूला, अप्पियवहा, पियजीविगो, जीविउकामा, ॥ ९२ ॥
सव्वेसिं जीवियं पियं ॥ ९३ ॥ तं परिगिज्ज दुपयं चउप्पयं अभिजुंजिया णं,
संसिचियाणं, तिविधेण जावि से तत्थ मत्ता भवइ अप्पा वा बहुगा वा से तत्थ
गड्ढिए चिठ्ठइ, भोयणाए ॥ ९४ ॥ तओ से एगया विविहं परिसिट्ठं संभूयं महोवगरणं
भवति । तंपि से एगया दायाया वा विभयंति, अदत्तहारो वा से अवहरति, रायाणो
वा से विलुंप्पंति, णस्सति वा से, विणस्सति वा से, अगारदाहेण वा से डज्जइ ॥ ९५ ॥
इय से परस्सट्ठाए कूराइं कम्माइं वाले पकुव्वमाणे तेण दुक्खेण संमूढे विप्परिया-
समुवेति ॥ ९६ ॥ मुणिणा हु एयं पवेइयं ॥ ९७ ॥ अणोहंतरा एते, णय ओहं
तरित्तए, अतीरंगमा एते, णयतीरं गमित्तए । अपारंगमा एते णय पारं गमि-
त्तए ॥ ९८ ॥ आयाणिज्जं च आयाय, तंमि ठाणे ण चिठ्ठइ । वितहं पप्पऽखेयन्ने

तंमि ठाणंमि चिठ्ठइ ॥ ९९ ॥ उद्देसो पासगस्स णत्थि ॥ १०० ॥ वाले पुण णिहे कामसमणुण्णे असमितदुक्खे दुक्खी दुक्खाणमेव आवट्ठं अणुपरियट्ठइ त्ति वेमि ॥ १०१ ॥ तइओद्देसो समत्तो ॥

ततो से एगया रोगसमुप्पाया समुप्पज्जंति ॥ १०२ ॥ जेहिं वा साद्धि संवसति, ते वा णं एगया णियया पुव्वि परिवयंति । सो वा ते णियगे पच्छा परिवइज्जा, णालं ते तव ताणाए वा, सरणाए वा, तुमं पि तेसि णालं ताणाए वा सरणाए वा ॥ १०३ ॥ जाणित्तु दुक्खं पत्तेयं सायं ॥ १०४ ॥ भोगा मे व अणुसोयंति—इहमेगेसिं माणवाणं, तिविहेण, जावि से तत्थ मत्ता भवइ, अप्पा वा, बहुगा वा, से तत्थ गट्ठिए चिठ्ठति, भोयणाए ॥ १०५ ॥ ततो से एगया विपरिसिठ्ठं संभूयं महोवगरणं भवति, तंपि से एगया दायाया विभयंति, अदत्तहारो वा से हरति, रायाणो वा से विलुंपंति, णस्सइ वा से, विणस्सइ वा से, अगारडाहेण वा से डज्जइ ॥ १०६ ॥ इय, से वाले परस्स अट्ठाए कूराणि कम्माणि पकुव्वमाणे तेण दुक्खेण मूढे विप्परियासमुवेति ॥ १०७ ॥ आसं च छंदं च विगिच्च धीरे ॥ १०८ ॥ तुमं चेव तं सल्लमाहट्ठु ॥ १०९ ॥ जेणसिया तेण णो सिया ॥ ११० ॥ इणमेव णाव-वुज्जंति, जे जणा मोहपाउडा ॥ १११ ॥ थीलोएपव्वहिए ते भो वयंति “एयाइं आयतणाइं” ॥ ११२ ॥ से दुक्खाए-मोहाए-माराए-णरगाए-णरगतिरि-क्खाए ॥ ११३ ॥ सततं मूढे धम्मं णाभिजाणाति ॥ ११४ ॥ उदाहु वीरे, अप्प-मादो महामोहे ॥ ११५ ॥ अलं कुसलस्स पमादेणं, संति मरणं संपेहाए, भेउरधम्मं संपेहाए ॥ ११६ ॥ णालं पास अलं ते एएहिं, एयं पस्स, मुणी ? महब्भयं ॥ ११७ ॥ णातिवाइज्ज कंचणं ॥ ११८ ॥ एस वीरे पसंसिए—जे ण णिविज्जति आदाणाए ॥ ११९ ॥ “ण मे देति” ण कुप्पिज्जा, थोवं लद्धं ण खिसए, पडिसेहियो परिण-मिज्जा, पडिलाभिओ परिणमेज्जा ॥ १२० ॥ एयं मोणं समणुवासिज्जासित्ति वेमि ॥ १२१ ॥ चउत्थोद्देसो समत्तो ॥

जमिणं विरूवरुवेहि सत्थेहि लोगस्स कम्मसमारंभा कज्जंति, तंजहा—अप्पणो से पुत्ताणं, धूयाणं, सुण्हाणं, णातीणं, धातीणं, राईणं, दासाणं, दासीणं, कम्मकराणं, कम्मकरीणं, आएसाए, पुढोपेहणाए, सामासाए, पायरासाए, संणिहि-संनिचओ कज्जई, इह मेगेसिं माणवाणं भोयणाए ॥ १२२ ॥ समुट्ठिते अणगारे आरिए आरि-यदंसी, आरियपण्णे, अयंसंधित्ति, अदक्खु, से णादिए, णादिआवए, णादियंतं समणुजाणइ ॥ १२३ ॥ सव्वामगंधं परिण्णाय णिरामगंधो परिव्वए ॥ १२४ ॥ अदिस्समाणे कयविक्कएसु; से ण किणे, ण किणावए, किणंतं ण समणुजाणइ ॥ १२५ ॥

से भिक्खु कालण्णे-वालण्णे-मायण्णे-खेयण्णे-खणयण्णे-विणयण्णे-ससमयण्णे-परसम-
यण्णे-भावण्णे-परिग्गहं अममायमाणे, कालाणुठाई, अपडिन्ने दुहओ छेत्ता,
नियाइ ॥ १२६ ॥ वत्थं-पडिग्गहं-कंवलं-पायपुच्छं-उग्गाहं च कडासणं, एतेसु
चेव जाणिज्जा ॥ १२७ ॥ लद्धे आहारे, अणगारो मायं जाणिज्जा, से जहेयं भगवया
पवेइयं ॥ १२८ ॥ लाभुत्ति ण मज्जिज्जा, अलाभुत्ति ण सोइज्जा, वहुंपि लद्धं ण
णिहे, परिग्गहाओ अप्पाणं अवसक्किज्जा, अण्णहा णं पासए परिहरिज्जा ॥ १२९ ॥
एस मग्गे आयरिएहि पवेदिते, जहित्य कुसले णोवलिप्पिज्जासित्ति वेमि ॥ १३० ॥
कामा दुरतिक्रमा, जीवियं दुप्पडिवूहणं, कामकामी खलु अयं पुरिसे, से सोयति,
जूरति, तिप्पति, पिडुति, परितप्पति ॥ १३१ ॥ आययचक्खू लोगविपासी लोगस्स
अहो भागं जाणति, उड्डं भागं जाणति, तिरियंभागं जाणति ॥ १३२ ॥ गद्धिए
लोए अणुपरियट्टमाणे, संधि विदित्ता इह मच्चिएहिं, एस वीरे पसंसिए जे वद्धे
पडिमोयए ॥ १३३ ॥ जहा अंतो तहा वाहिं जहा वाहिं तहा अंतो ॥ १३४ ॥
अंतो पूतिदेहंतराणि पासति पुढोवि सवंताइं पंडिए पडिलेहाए ॥ १३५ ॥ से मइमं
परिण्णाय माय हु लालं पच्चासी, मा तेसु तिरिच्छमप्पाणमावायए ॥ १३६ ॥ कासं-
कासे खलु अयं पुरिसे, बहुमाई, कडेण मूढे, पुणो तं करेइ लोभं, वेरं वद्धेति
अप्पणो ॥ १३७ ॥ जमिणं परिकहिज्जइ इमस्स चेव पडिवूहणयाए अमराय महा-
सद्धी अट्टमेतं तु पेहाए ॥ १३८ ॥ अपरिन्नाय कंदति, से तं जाणह जमहं वेमि
॥ १३९ ॥ ते इच्छं पंडिते पवयमाणे, से हंता, छित्ता भित्ता, लुंपइत्ता, विलुंपइत्ता
उद्वइत्ता, अकडं करिस्सामित्ति मण्णमाणे, जस्सवि य णं करेइ, अलं वालस्स
संगेणं, जे वा से कारइ बाले, ण एवं अणगारस्स जायतित्ति वेमि ॥ १४० ॥
पंचमोद्देशो समत्तो ॥

से तं संवुज्जमाणे आयाणीयं समुठ्ठाय तम्हा पावकम्मं णेव कुज्जा, ण कार-
वेज्जा ॥ १४१ ॥ सिया तत्थएगयरं विप्परामुसति, छसु अण्णयरंमि, कप्पति ॥ १४२ ॥
सुहट्ठी लालप्पमाणो सएण दुक्खेण मूढे विप्परियासमुवेति । सएण विप्पमाणेण पुढो
वयं पकुव्वति, जं सि मे पाणा पव्वहिया, पडिलेहाए णो णिकरण्याए एस परिण्णा
पवुचति, कम्मोवसंती ॥ १४३ ॥ जे ममाइयमति जहाति, से चयइ ममाइयं से हु
दिठ्ठपहे मुणी जरस, णत्थि ममाइतं ॥ १४४ ॥ तं परिण्णाय मेहावी विदित्ता लोगं
वंता लोगसणं से मतिमं परिकमिज्जासित्ति वेमि ॥ १४५ ॥ णारति सहते वीरे,
वीरे णो सहते रति । जम्हा अविमणे वीरे, तम्हा वीरे ण रज्जति ॥ १४६ ॥ सदे
फासे अहियासमाणे, णिव्विद णंदि इह जीवियस्स ॥ १४७ ॥ मुणी सोणं समायाय,

धुणे कम्मसरीरंगं; पंतं ल्हं च सेवंति, वीरा संमत्तदंसिणो ॥ १४८ ॥ एस ओघंतरे
 मुणी, तिन्ने मुत्ते, विरते वियाहितेत्ति वेमि ॥ १४९ ॥ दुव्वसुमुणी अणाणाए०
 तुच्छए गिलाइ वत्तए ॥ १५० ॥ एस वीरे पसंसिए, अच्छेइ लोयसंजोयं, ॥ १५१ ॥
 एस णाए पवुच्चइ, जं दुक्खं पवेदितं इह माणवाणं, तस्स दुक्खस्स कुसला परिण्ण-
 मुदाहरंति ॥ १५२ ॥ इति कम्मं परिण्णाय सव्वसो ॥ १५३ ॥ जे अणन्नदंसी से
 अण्णारामे, जे अण्णारामे से अण्णदंसी ॥ १५४ ॥ जहा पुण्णस्स कत्थति
 तहा तुच्छस्स कत्थति, जहा तुच्छस्स कत्थति तहा पुण्णस्स कत्थति ॥ १५५ ॥
 अविय हणो अणातियमाणे । एत्थंपि जाण, सेयंति णत्थि ॥ १५६ ॥ केयं पुरिसे
 कंच णए ? एस वीरे पसंसिए, जे वद्धे पडिमोयए, उद्धं अहं तिरियं दिसासु ॥ १५७ ॥
 से सव्वतो सव्वपरिण्णाचारि ण लिप्पति छणपण्ण, वीरे ॥ १५८ ॥ से, मेहावी
 अणुघायणखेयन्ने जे य वंधपमुक्खमन्नेसी ॥ १५९ ॥ कुसले पुण णो वद्धे, णो
 मुक्के ॥ १६० ॥ से जं च आरमे जं च णारमे । अणारद्धं च ण आरमे ॥ १६१ ॥
 छणं छणं परिण्णाय लोगसन्नं च सव्वसो ॥ १६२ ॥ उद्देसो पासगस्स णत्थि
 ॥ १६३ ॥ वाले पुणे णिहे कामसमणुन्ने असमियदुक्खे दुक्खी दुक्खाणमेव आवट्ठं
 अणुपरियट्ठति वेमि ॥ १६४ ॥ छट्ठोद्देसो समत्तो ॥

लोगविजय णाम वीअमज्झयणं समत्तं ॥

सुत्ता अमुणी मुणिणो सया जागरंति ॥ १६५ ॥ लोयंसि जाण अहियाय
 दुक्खं ॥ १६६ ॥ समयं लोगस्स जाणित्ता, इत्थ सत्योवरए ॥ १६७ ॥ जस्सिमे
 सद्दा य-रूवाय-नांथा य-रसा य-फासा य-अहिसमन्नागया भवंति, से आयवं-णाणवं-
 चेयवं-धम्मवं-वंभवं- पन्नाणेहिं परियाणइ लोयं, मुणीति वुच्चे धम्मविऊ, उज्जू आव-
 ट्ठसोए संगमभिजाणाति, सीउसिणच्चाई, से निगंथे, अरइरइसहे फस्सयं णो वेदेति,
 जागरे-वेरोवरए-धीरे एवं दुक्खा पमुच्चति ॥ १६८ ॥ जरामच्चुवसोवणीए णरे सययं
 मृद्धे धम्मं णाभिजाणाति ॥ १६९ ॥ पासिय आउरपाणे, अप्पमत्तो परिव्वए ॥ १७० ॥
 मंता य, मइमं-पास ॥ १७१ ॥ आरंभजं दुक्खमिगंति णच्चा, माइ पमाइ पुण-एइ
 गव्वं, उवेहमाणो सद्धवेसु उज्जू, माराभिसंकी मरणा पमुच्चति ॥ १७२ ॥ अप्पमत्तो
 कामेहिं, उवरतो पावकम्मोहिं, वीरे आयगुत्ते खेयन्ने ॥ १७३ ॥ जे पज्जवजायस-
 त्थस्स खेयन्ने, से असत्थस्स खेयन्ने; जे असत्थस्स खेयन्ने, से पज्जवजाय सत्थस्स
 खेयन्ने ॥ १७४ ॥ अकम्मस्स ववहारो न विज्जइ, कम्मुणा उवाही जायइ ॥ १७५ ॥
 कम्मं च पडिलेहाए, कम्ममूलं च जं छणं ॥ १७६ ॥ पडिलेहिय, सव्वं समायाय

दोहि अंतेहि अदिस्समाणे ॥ १७७ ॥ तं परिण्णाय मेहावी विदित्ता लोगं, वंता लोगसत्तं से मइमं परक्कमिज्जासित्ति बेमि ॥ १७८ ॥ **पढमोद्देसो समत्तो ॥**

जाति च वुड्ढि च इहज्ज पासे, भूतेहि जाणे पडिलेह सातं । तम्हाऽतिविज्जो परमंति णच्चा, संमत्तदंसी ण करेति पावं ॥ १७९ ॥ उम्मुंच पासं इह मच्चिएहि, आरंभजीवी उभयाणुपस्सी । कामेसु गिद्धा णिचयं करेति । संसिच्चमाणा पुणरिति गव्वं ॥ १८० ॥ अवि से हासमासज्ज, हंता णंदीति मन्नति । अलं बालस्स संगेणं वेरं वड्ढेति अप्पणो ॥ १८१ ॥ तम्हा-तिविज्जो परमंति णच्चा, आयंकदंसी ण करेति पावं ॥ १८२ ॥ अग्गं च मूलं च विगिच धीरे, पलिच्छिदिया णं णिक्कम्मदंसी ॥ १८३ ॥ एस मरणा पमुच्चति, से हु दिठ्ठभए मुणी, लोयंसी परमदंसी विवित्तजीवी उवसंते समिते सहिते सयाजए कालकंखी परिव्वए ॥ १८४ ॥ वहुं च खलु पावकम्मं पगडं, सच्चंमि धिइं कुव्वहा, एत्थोवरए मेहावी सव्वं पावकम्मं झोसति ॥ १८५ ॥ अणेगचित्ते खलु अयं पुरिसे, से केयणं अरिहए पूरेण्णए से अन्नवहाए, अण्णपरियावा ए अण्णपरिग्गहाए, जणवयवहाए, जणवयपरियावाए, जणवयपरिग्गहाए ॥ १८६ ॥ आसेवित्ता एतमठ्ठं इच्चेवेगे समुठ्ठिया, तम्हा तं विइयं नो सेवे णिस्सारं पासिय णाणी ॥ १८७ ॥ उववायं चवणं णच्चा, अण्णणं चर माहणे ॥ १८८ ॥ से ण छणे- ण छणावए, छणंतं णाणुजाणइ ॥ १८९ ॥ णिव्विद णंदि अरते पयासु, अणोमदंसी णिसन्ने पावेहि कम्मोहि ॥ १९० ॥ कोहाइमाणं हणिया य वीरे, लोभस्स पासे णिरयं महंतं । तम्हाय वीरे विरते वहाओ, छिदिज्ज सोयं लहुभूयगामी ॥ १९१ ॥ गथं परिन्नाय इहज्ज वीरे, सोयं परिण्णाय चरिज्ज दंते । उम्मज्ज लहुं इह माणवेहिं, णो पाणिणं पाणे समारभिज्जासि-त्ति बेमि ॥ १९२ ॥ **बीओद्देसो समत्तो ॥**

संधि लोगस्स जाणित्ता ॥ १९३ ॥ आययो बहिया पास, तम्हा ण हंताण- विधायये ॥ १९४ ॥ जमिणं अन्नमन्नवित्तिगिच्छाए पडिलेहाए ण करेइ पावं कम्मं, किं तत्थ मुणी कारणं सिया? समयं तत्थुवेहाए अप्पाणं विप्पसायए ॥ १९५ ॥ अण्णणपरमं नाणी, णो पमाए कयाइवि । आयगुत्ते सया धीरे, जायामायाइ जावए ॥ १९६ ॥ विरागं रुवेहि गच्छिज्जा महता खुड्ढएहिं य ॥ १९७ ॥ आगति गति परिण्णाय दोहिवि अंतेहि अदिस्समाणेहिं से ण छिज्जइ, ण भिज्जइ, ण डज्जइ, ण हम्मइ कंचणं सव्वलोए ॥ १९८ ॥ अवरेण पुव्वि ण सरंति एगे, किमस्सतीतं किवाऽऽगमिस्सं । भासंति एगे इह माणवाओ, जमस्सतीतं तं आगमिस्सं ॥ १९९ ॥ णातीतमठ्ठं णय आगमिस्सं, अठ्ठं निअच्छंति तहागया उ; विधूतकप्पे एताणुपस्सी, गिज्जोमइत्ता खवगे महेसी ॥ २०० ॥ का अरई! के आणंदे? एत्थंपि अग्गहे

चरे । सव्वं हासं परिच्चज्ज, आलीणगुत्तो परिव्वए ॥ २०१ ॥ **पुरिसा, तुममेव तुमं मित्तं, किं वहिया मित्तमिच्छसि ॥ २०२ ॥** जं जाणिज्जा उच्चालइयं तं जाणिज्जा दूरालइयं, जं जाणिज्जा दूरालइयं तं जाणेज्जा उच्चालइयं ॥ २०३ ॥ पुरिसा ! अत्ताणमेवं अभिणिगिज्ज एवं दुक्खा पमुच्चसि ॥ २०४ ॥ पुरिसा ! सच्चमेव समभिजाणार्हि, सच्चस्साणाए से उवठ्ठिए मेहावी मारं तरति, सहिओ धम्ममायाय सेयं समणुपस्सति ॥ २०५ ॥ दुहुओ, जीवियस्स परिवंदणमाणणपूयणाए, जंसि एगे पमायंति ॥ २०६ ॥ सहिओ दुक्खमत्ताए पुठ्ठो णो झंझाए; पासिमं दविए लोए लोयालोयपवंचाओ मुच्चइत्ति वेमि ॥ २०७ ॥ **तइओदेसो समत्तो ॥**

से वंता कोहं च, माणं च, मायं च, लोभं च, एयं पासगस्स दंसणं, उवरयसत्थस्स पलियंतकरस्स आयाणं सगडब्भि ॥ २०८ ॥ **जे एगं जाणइ से लव्वं जाणइ, जे सव्वं जाणइ से एगं जाणइ ॥ २०९ ॥ सव्वतो पमत्तस्स भयं, सव्वतो अप्पमत्तस्स णत्थि भयं ॥ २१० ॥** जे एगं णामे से वहुं णामे, जे वहुं णामे से एगं णामे ॥ २११ ॥ दुक्खं लोयस्स जाणित्ता, वंता लोगस्स संजोगं, जंति वीरा महाजाणं, परेण परं जंति, नावकंखंति जीवियं ॥ २१२ ॥ एगं विगिचमाणे पुठ्ठो विगिंचइ पुठ्ठो विगिचमाणे एगं विगिंचइ ॥ २१३ ॥ सद्धी आणाए मेहावी ॥ २१४ ॥ लोगं च आणाए अभिसमेच्च अकुओभयं ॥ २१५ ॥ अत्थि सत्थं परेण परं, णत्थि असत्थं परेण परं ॥ २१६ ॥ जे कोहदंसी से माणदंसी, जे माणदंसी से मायादंसी, जे मायादंसी से लोभदंसी, जे लोभदंसी से पिज्जदंसी, जे पिज्जदंसी से दोसदंसी, जे दोसदंसी से मोहदंसी, जे मोहदंसी से गव्वभदंसी, जे गव्वभदंसी से जम्मदंसी, जे जम्मदंसी से मारदंसी, जे मारदंसी से णरयदंसी, जे णरयदंसी से तिरियदंसी, जे तिरियदंसी से दुक्खदंसी ॥ २१७ ॥ से मेहावी अभिनिवट्ठिज्जा, कोहं च-माणं च-मायं च-लोहं च-पिज्जं च-दोसं च-मोहं च-गव्वं च-जम्मं च-मरणं च-णरगं च-तिरियं च-दुक्खं च-एयं पासगस्स दंसणं उवरयसत्थस्स पलियंतकरस्स ॥ २१८ ॥ आयाणं णिसिद्धा सगडब्भि ॥ २१९ ॥ किमत्थि ओवाहि पासगस्स ? ण विज्जइ ? णत्थित्ति, वेमि ॥ २२० ॥ **चउत्थोदेसो समत्तो ॥**

सीयोसणीयं तइयज्झयणं समत्तं

से वेमि—जेय अईया, जेय पडुप्पन्ना, जेय आगमिस्सा-अरहंता भगवंतो ते सव्वे, एव-माइक्खंति-एवं भासंति-एवं पण्णवित्ति, एवं पहरुवित्ति—सव्वे पाणा, सव्वे भूया, सव्वे जीवा, सव्वे सत्ता, ण हंतव्वा, ण अज्जावेयव्वा, ण परिधितव्वा, ण

परितावेयव्वा, ण उद्देवेयव्वा, ॥ २२१ ॥ एस धम्मे सुद्धे, णिइए-सासए-समिच्च लोयं
 खेयन्नेहि पवेइए, तंजहा-उठ्ठिएसु वा, अणुठ्ठिएसु वा, उवठ्ठिय-अणुवठ्ठिएसु वा, उव-
 रयदंडेसु वा, अणुवरयदंडेसु वा, सोवहिएसु वा, अणोवहिएसु वा, संजोगरएसु वा,
 असंजोगरएसु वा ॥ २२२ ॥ तच्चं चेयं तहा चेयं अस्सि चेयं पवुच्चइ ॥ २२३ ॥
 तं आइत्तु ण णिहे ण णिक्खिखे, जाणित्तु धम्मं जहा तहा ॥ २२४ ॥ दिठ्ठेहिं णिव्वेयं
 गच्छिज्जा ॥ २२५ ॥ णो लोगस्सेसणं चरे ॥ २२६ ॥ जस्स णत्थि इमा जाई अन्ना
 तस्स कओ सिया ! ॥ २२७ ॥ दिठ्ठं सुयं मयं विन्नायं, जमेयं परिकहिज्जइ ॥ २२८ ॥
 समेमाणा पलेमाणा पुणो पुणो जाति पक्कपंति ॥ २२९ ॥ अहोय राओय जयमाणे
 र्वारे सया आगयपन्नाणे, पमत्ते वहिया पास अप्पमत्ते सया परिकमिज्जासित्ति
 वेमि ॥ २३० ॥ पढमोद्देसो समत्तो ॥

जे आसवा ते परिस्सवा, जे परिस्सवा ते आसवा ॥ २३१ ॥ जे अणासवा
 ते अपरिस्सवा, जे अपरिस्सवा ते अणासवा ॥ २३२ ॥ एए पए संवुज्जमाणे लोयं
 च आणाए अभिसमिच्चा पुढो पवेइयं ॥ २३३ ॥ आघाइ णाणी इह माणवाणं
 नंसारपडिवन्नाणं संवुज्जमाणाणं विन्नाणपत्ताणं, अट्ठावि संता अदुवा पमत्ता, अहा
 सच्च मिगंति-वेमि ॥ २३४ ॥ नाणागमो मच्चुमुहस्स अत्थि । इच्छापणीया वंका-
 णिकेया कालग्गहीआ णिचयणिविट्ठा पुढो पुढो जाइं पक्कपयंति, ॥ २३५ ॥ इह-
 मेगेसिं तत्थ तत्थ संथवो भवति । अहोववाइए फासे पडिसंवेयंति ॥ २३६ ॥ चिट्ठं
 कूरेहि कम्मेहि, चिट्ठं परिचिट्ठति; अचिट्ठं कूरेहि कम्मेहि णो चिट्ठं परिचिट्ठति ॥ २३७ ॥
 एगे वयंति अदुवावि णाणी, णाणी वयंति अदुवावि एगे ॥ २३८ ॥ आवंती केयावंती
 लोयंस्सि समणा य माहणाय पुढो विवायं वदंति, “से दिठ्ठं च णे, सुयं च णे, मयं च
 णे, विण्णायं च णे, उट्ठं अहं तिरियं दिसासु सव्वतो सुपडिलेहियं च णे सव्वे पाणा,
 सव्वे भूया, सव्वे जीवा, सव्वे सत्ता-हंतव्वा-अज्जावेयव्वा-परिघेतव्वा-परियावेयव्वा-
 उद्देवेयव्वा । एत्थं पि जाणह, णत्थित्थ दोसो ।” अणारियवयणमेयं ॥ २३९ ॥ तत्थ
 जे ते आरिया, ते एवं वयासी—“से दुद्धिट्ठं च मे, दुस्सुयं च मे, दुम्मयं च मे,
 दुब्बजायं च मे, उट्ठं, अहं, तिरियं दिसासु सव्वतो दुप्पडिलेहियं च मे; जं णं तुब्बे
 णव्वाटक्कवह, एवं भागह, एवं पत्तवेह-एवं पन्नवेह-सव्वे पाणा-सव्वे भूया-सव्वे जीवा-
 सव्वे गणा, हंतव्वा, अज्जावेयव्वा, परिघेतव्वा-परियावेयव्वा-उद्देवेयव्वा-एत्थवि
 जाणह नत्थित्थ दोसो ।” अणारियवयणमेयं ॥ २४० ॥ वयं पुण एवमाइक्खामो,
 एवं भागामो, एवं पत्तवेमो, एवं पन्नवेमो, “सव्वे पाणा, सव्वे भूया, सव्वे जीवा,
 सव्वे गणा, य हंतव्वा, य अज्जावेतव्वा, य परिघेतव्वा, य परियावेयव्वा, य उद्दे-

वेयव्वा, एत्थवि जाणह, णत्थित्थ दोसो ।” आरियवयणमेयं ॥ २४१ ॥ पुव्वं
निकायसमयं, पत्तेयं पत्तेयं पुच्छिस्सामो, हं भो पवादिया, किं भे सायं दुक्खं उदाहु
असायं ? समिया पडिवन्ने यावि एवं वूया,—सव्वेसि पाणाणं, सव्वेसि भूयाणं,
सव्वेसि जीवाणं, सव्वेसि सत्ताणं, असायं, अपरिणिव्वाणं महब्भयं दुक्खं त्ति
वेमि ॥ २४२ ॥ **वीओहेसो समत्तो ॥**

उवेहि णं वहिया य लोयं, से सव्वलोयंमि जे केइ विन्नू ॥ २४३ ॥ अणुवीइ
पास, णिक्खित्तदंडा जे केइ सत्ता पलियं चयंति, णरे मुयच्चा धम्मविदुत्ति अंजू;
आरंभजं दुक्खमिगंति णच्चा, एवमाहु संमत्तदंसिणो ॥ २४४ ॥ ते सव्वे पावाइया
दुक्खस्स कुसला परिन्नमुदाहरंति, इति कम्मं परिन्नाय सव्वसो ॥ २४५ ॥ इह
आणाकंखी पंडिए अणिहे, एगमप्पाणं संपेहाए धुणे सरीरं ॥ २४६ ॥ कसेहि
अप्पाणं, जरेहि अप्पाणं ॥ २४७ ॥ जहा जुन्नाइं कट्ठाइं हव्ववाहो पमत्थति, एवं
अत्तसमाहिए अणिहे ॥ २४८ ॥ विगिच कोहं अविकंपमाणे, इमं णिरुद्धाउयं संपेहाए
॥ २४९ ॥ दुक्खं च जाण अदुवागमेस्सं, पुढो फासाइं च फासे, लोयं च पास, विप्फं-
दमाणं ॥ २५० ॥ जे णिव्वुडा, पावेहि कम्मेहि अणियाणा ते वियाहिया ॥ २५१ ॥
तम्हाऽतिविजो णो पडिसंजलिज्जासित्ति वेमि ॥ २५२ ॥ **तइओहेसो समत्तो ॥**

आवीलए पवीलए निप्पीलए, जहित्ता पुव्वसंजोगं हिच्चा उवसमं ॥ २५३ ॥
तम्हा अविमणे वीरे, सारए समिए सहिते सया जए ॥ २५४ ॥ दुरणुचरो मग्गो
वीराणं अणियट्ठगामीणं ॥ २५५ ॥ विगिच मंससोणियं, एस पुरिसे दवीए वीरे
आयाणिजे वियाहिए, जे धुणाइ समुस्सयं वसित्ता वंभचेरंमि ॥ २५६ ॥ णित्तेहिं
पलिच्छिन्नेहिं आयाणसोयगट्टिए वाले, अव्वोच्छिन्नबंधणे अणभिकंतसंजोए । तमंसि
अविजाणओ आणाए लंभो णत्थि-त्ति वेमि ॥ २५७ ॥ जस्स नत्थि पुरा पच्छा,
मज्जे तस्स कुओ सिया ? ॥ २५८ ॥ से हु पन्नाणमंते बुद्धे आरंभोवरए, सम्ममेयंति
पासह, जेण वंधं वहं घोरं परितावं च दासणं ॥ २५९ ॥ पलिच्छिदिय वाहिराणं
च सोयं, णिक्कम्मदंसी इह मच्चिएहि ॥ २६० ॥ कम्माणं सफलं दट्ठूण तओ णिज्जइ
पुव्ववी ॥ २६१ ॥ जे खलु भो ! वीरा ते समिता सहिता सयाजता संघडदंसिणो
आतोवरया अहातहं लोगमुवेहमाणा पाईणं पडीणं दाहीणं उदीणं इति सच्चंसि परि-
चिठ्ठिसु ॥ २६२ ॥ साहिस्सामो णाणं वीराणं समियाणं सहियाणं, सयाजताणं
संघडदंसिणं आतोवरयाणं अहातहं लोगंसमुवेहमाणाणं किमत्थि उवाधी ? पासगरस्स
ण विज्जति णत्थित्ति वेमि ॥ २६३ ॥ **चउत्थोहेसो समत्तो ॥**

सम्मत्तं णाम चउत्थमज्झयणं समत्तं

आवंती केयावंती लोयंसि विप्परामुसंति अट्टाए अणट्टाए वा । एएसु चेव विप्परामुसंति, गुरु से कामा, तओ से मारंते, जओ से मारंते, तओ से दूरे, णेव से अंतो णेव से दूरे ॥ २६४ ॥ से पासति फुसियमिव कुसग्गे पणुञ्जं णिवइतं वाते-रितं, एवं वालस्स जीवियं मंदस्स अविजाणओ ॥ २६५ ॥ कूराइं कम्माइं वाले पकुव्वमाणे तेण दुक्खेण मूढे विपरियासमुवेति, मोहेण गब्भं मरणाइ एति, एत्थ मोहे पुणो पुणो ॥ २६६ ॥ संसयं परियाणतो संसारे परिण्णाते भवति, संसयं अपरिजाणओ संसारे अपरिण्णाते भवति ॥ २६७ ॥ जे छेए से सागारियं ण सेवइ ॥ २६८ ॥ कट्ठु एवं अविजाणओ वितिया मंदस्स वालया ॥ २६९ ॥ लद्धा हुरत्था पडिलेहाए आगमित्ता आणविज्जा अणासेवणयत्ति वेमि ॥ २७० ॥ पासह एगे रुवेसु गिद्धे परिणिज्जमाणे, इत्थ फासे पुणो पुणो, आवंती केयावंती लोयंसि आरंभजीवी ॥ २७१ ॥ एएसु चेव आरंभजीवी, इत्थवि वाले परिपच्चमाणे रमति पावेहि कम्मेहि असरणे सरणंति मण्णमाणे ॥ २७२ ॥ एहमेगेसि एगचरिया भवति, से बहुकोहे, बहुमाणे-बहुमाए-बहुलोहे-बहुरए-बहुनडे-बहुसडे-बहुसंकप्पे, आसवसत्ती पल्लिउच्छन्ने उट्ठियवायं पवयमाणे “मा मे केइ अदक्खू” अण्णाणपमायदोसेणं, सययं मूढे धम्मं णाभिजाणाइ ॥ २७३ ॥ अट्टा पया माणव? कम्मकोविया जे अणुवरया अविज्जाए पल्लिमुक्खमाहु आवट्टमेव अणुपरियट्ठंति वेमि ॥ २७४ ॥

पढमोद्देशो समत्तो ॥

आवंती केयावंती लोए अणारंभजीविणो तेसु ॥ २७५ ॥ एत्थोवरए तं झोसमाणे “अयं संधीति” अदक्खु, जे इमस्स विग्गहस्स अयं खणेत्ति अज्जेसी ॥ २७६ ॥ एस मग्गे आरिएहि पवेदिते, उट्ठिए णो पमायए, जाणि तु दुक्खं पत्तेयं सायं ॥ २७७ ॥ पुढो छंदा इह माणवा, पुढो दुक्खं पवेदितं, से अविहिंसमाणे अणवयमाणे, पुढो फासे विप्पणुन्नए । एस समिया परियाए वियाहिते ॥ २७८ ॥ जे असत्ता पावेहि कम्मेहि उदाहु ते आयंका फुसंति इति उदाहु धीरे ते फासे पुढो अहियासइ ॥ २७९ ॥ से पुव्वं पेयं, पच्छापेयं भिउरधम्मं विद्धंसणधम्मं-अधुवं अणितियं असासयं चयावचइयं विप्परिण्णामधम्मं, पासह एयं रुवसंधिं ॥ २८० ॥ समुप्पेहमाणस्स इक्कायणरयस्स इह विप्पमुक्कस्स णत्थि मग्गे विरयस्सति वेमि ॥ २८१ ॥ आवंती केयावंती लोयंसि परिग्गहावंती;—से अप्पं वा, बहुयं वा, अणुं वा, थूलं वा, चित्तमंतं वा, अचित्तमंतं वा, एतेसु चेव परिग्गहावंती ॥ २८२ ॥ एवमेवेगेसि महच्चमयं भवति, लोगवित्तं च णं उवेहाए ॥ २८३ ॥ एए संगे अवि-जाणतो से सुपडिवद्धं सुव्वणीयंति णच्चा, पुरिसा ! परमचक्खू विप्परिक्कमा, एतेसु

चेव वंभचेरं ति वेमि ॥ २८४ ॥ से सुयं च मे, अज्झत्थयं च मे, वंधपमुक्खो
अज्झत्थेव ॥ २८५ ॥ इत्थ विरते अणगारे दीहरायं तितिक्खए ॥ २८६ ॥ पमत्ते
वहिया पास, अप्पमतो परिव्वए ॥ २८७ ॥ एयं मोणं सम्मं अणुवासिज्जासित्ति
वेमि ॥ २८८ ॥ **वीयोद्देसो समत्तो ॥**

आवंती के यावंती लोयंसि अपरिग्गहावंती एएसु चेव अपरिग्गहावंती सुच्चा वई
मेहावी, पंडियाण णिसामिया ॥ २८९ ॥ समियाए धम्मे आरिएहि पवेदिते
जहित्य मए संधी झोसिए एवमण्णत्य संधी दुज्झोसए भवति, तम्हा वेमि णो
णिहणिज्ज वीरियं ॥ २९० ॥ जे पुव्वुठ्ठाई णो पच्छाणिवाई, जे पुव्वुठ्ठाई पच्छाणि-
वाई, जे णो पुव्वुठ्ठाई णो पच्छाणिवाई, सेऽवि तारिसिए सिया, जे परिण्णाय लोग-
मण्णेसयंति, एयं णियाय मुणिणा पवेदितं ॥ २९१ ॥ इह आणाकंखी पंडिए
अणिहे, पुव्वावररायं जयमाणे सया सीलं सुपेहाए ॥ २९२ ॥ सुणिया भवे अकामे
अञ्जं ॥ २९३ ॥ इमेण चेव जुज्झाहि, किं ते जुज्झेण वज्झओ? जुद्धारिहं खलु
दुल्लहं ॥ २९४ ॥ जहित्य कुसलेहिं परिन्नाविवेगे भासिए, चुए हु बाले गव्भाइसु
रज्जइ ॥ २९५ ॥ अस्सिं चयं पव्वुच्चति, ख्वंसि वा छणंसि वा ॥ २९६ ॥ से हु
एगे संविद्धपहे मुणी, अण्णहा लोगमुवेहमाणे ॥ २९७ ॥ इति कम्मं परिण्णाय
सव्वसो से ण हिंसति संजमति णो पगब्भति, उवेहमाणो पत्तेयं सायं ॥ २९८ ॥
चन्नाएसी णारभे कंचणं सव्वलोए, एगप्पमुहे विदिसप्पइन्ने निव्विन्नचारी अरए
पयासु ॥ २९९ ॥ से वसुमं सव्वसमन्नागयपन्नाणेणं अप्पाणेणं अकरणिज्जं पावकम्मं
तं णो अन्नेसी ॥ ३०० ॥ जं सम्मं ति पासहा तं मोणं ति पासहा, जं मोणं ति
पासहा तं सम्मं ति पासहा ॥ ३०१ ॥ ण इमं सक्कं सिद्धिलेहि अदिज्जमाणेहिं
गुणासाएहि वंक्समायारेहिं पमत्तेहिं गारमावसंतेहि ॥ ३०२ ॥ मुणी मोणं समायाए,
धुणे कम्मसरीरगं, पंतं ल्हं सेवति, वीरा संमत्तदंसिणो ॥ एस ओहं तरे मुणी,
तिण्णे मुत्ते विरए वियाहिएत्ति वेमि ॥ ३०३ ॥ **तइओद्देसो समत्तो ॥**

गामाणुगामं दूइज्जमाणस्स दुज्जातं दुप्परकंतं भवति अवियत्तस्स भिक्खुणो
॥ ३०४ ॥ वयसावि एगे वुइया कुप्पंति माणवा, उन्नयमाणे य णरे महता मोहेण
मुज्झति, संवाहा वहवे भुज्जो २ दुरतिक्रमा अजाणतो, अपासतो, एयं ते मा होउ,
एयं कुसलस्स दंसणं ॥ ३०५ ॥ तद्धिठ्ठीए तम्मुत्तीए तप्पुरक्कारे तस्सन्नी तन्निवेसणे
जयं विहारी चित्तणिवाती पंथणिज्झाती पलिवाहिरे, पासिय पाणे गच्छिज्जा । से
अभिक्रममाणे पडिक्कमाणे संकुचमाणे पसारमाणे विणिवट्टमाणे संपलिमज्जमाणे
॥ ३०६ ॥ एगया गुणसमियस्स रीयतो कायसंफासं समणुचिन्ना एगतिया पाणा

उद्दायंति; इहलोगवेयणविज्जावडियं, जं आउट्टिकयं कम्मं तं परिन्नाय विवेगमेति,
 एवं से अप्पमाणं विवेगं किट्ठति पुव्ववी ॥ ३०७ ॥ से पभूयदंसी पभूयपरिन्नाणे
 उवमंते समिए सहिते सयाजए, दट्ठं विप्पडिवेदेति अप्पाणं, “किमेस जणो करि-
 रसति ! एस से परमारामो जाओ लोगंमि इत्थीओ”, सुणिणा हु एतं पवेदितं
 ॥ ३०८ ॥ उव्वाहिज्जमाणे गामधम्मोहिं अवि णिब्वलासए, अवि ओमोयरियं कुज्जा,
 अवि उव्वं ठाणं ठाइज्जा, अवि गामाणुगामं दूइज्जिज्जा, अवि आहारं वुच्छिदिज्जा,
 अवि चए इत्थिमु मगं ॥ ३०९ ॥ पुव्वं दंडा पच्छा फासा, पुव्वं फासा पच्छा
 दंडा, इच्चेते कलहासंगकरा भवंति । पडिलेहाए आगमित्ता आणविज्जा अणासेवणाए
 त्ति वेमि ॥ ३१० ॥ से णो काहिए, णो पासणिए, णो मामए, णो कयकिरिए,
 वडगुत्ते, अज्जप्पसवुडे, परिवज्जइ सदा पावं, एयं मोणं समणुवासिज्जासि-त्ति
 वेमि ॥ ३११ ॥ चउत्थोद्देसो समत्तो ॥

से वेमि—तंजहा, अवि हरए पडिपुत्ते समंसि भोमे चिट्ठइ उवसंतरए सारक्ख-
 माणे, से चिट्ठति सोयमज्जगए, से पास, सव्वतो गुत्ते, पास, लोए महेसिणो, जे य
 पन्नाणमंता पवुद्धा आरंभोवरया सम्ममेयंति पासह, कालस्स कंखाए परिव्वयंति
 त्ति वेमि ॥ ३१२ ॥ वित्तिगिच्छसमावन्नेणं अप्पाणेणं णो लभति समाधि ॥ ३१३ ॥
 सिया वेगे अणुगच्छंति, असिया वेगे अणुगच्छंति, अणुगच्छमाणेहि अणुगच्छ-
 माणे कट्ठं ण णिव्विज्जे, तमेव सच्चं णीसंक्रं जं जिणेहिं पवेइयं ॥ ३१४ ॥ सट्ठिस्स
 णं नमणुन्नस्स सपव्वयमाणस्स समियंति मण्णमाणस्स एगया समिया होति, समियंति
 मग्गमाणस्स एगया असमिया होति, असमियंति मण्णमाणस्स एगया समिया होति,
 असमियंति मण्णमाणस्स एगया असमिया होति ॥ ३१५ ॥ समियंति मण्णमाणस्स
 नमिया वा, असमिया वा, समिया होति उवेहाए ॥ ३१६ ॥ असमियंति मण्णमाणस्स
 नमिया वा, असमिया वा, असमिया होति उवेहाए ॥ ३१७ ॥ उवेहमाणो अणुवेहमाणं
 दूया—“उवेहाहि समियाए इच्चेवं तत्थ संधी ओसितो भवति” ॥ ३१८ ॥ से
 उट्ठिरम ठियस्स गति समणुपासह, एत्थवि वालभावे अप्पाणं णो उवदंसेज्जा
 ॥ ३१९ ॥ तुमंनि नाम सच्चेव, जं हंतव्वंति मज्जसि, तुमंसि नाम सच्चेव, जं अज्जा-
 वेयव्वंति मज्जसि, तुमंनि नाम सच्चेव, जं परितावेयव्वंति मज्जसि, एवं जं परिवित्तव्वंति
 मज्जसि, जं उदवेयव्वंति मज्जसि । अंजू चैयपडिवुद्धजीवी तम्हा ण हंता, ण विघायए;
 अणुमयेत्तमापाणेणं जं हंतव्वं णाभिपत्त्यए ॥ ३२० ॥ जे आया से विन्नाया, जे
 विन्नाय नं आया, जेण विजाणति से आया, तं पडुच्च परिसंखाए, एस आयावादी
 मज्जि-ए परियाए विवाहितेति वेमि ॥ ३२१ ॥ पंचमोद्देसो समत्तो ॥

अणाणाए एगे सोवट्ठाणा आणाए एगे निरुवट्ठाणा एतं ते मा होउ, एयं कुस-
लस्स दंसणं ॥ ३२२ ॥ तद्धिठीए तम्मुत्तीए तप्पुरक्कारे तस्सण्णी तण्णिवेसणे,
अभिभूय अदक्खू, अणभिभूते पभू निरालंबणयाए; जे महं अवहिमणे ॥ ३२३ ॥
पवाएणं पवायं जाणिज्जा, सहसम्मइयाए, परवागरणेणं अन्नेसिं वा अंतिए सोच्चा ॥ ३२४ ॥
णिद्धेसं णातिवट्ठेज्जा मेहावी सुपडिलेहिया सव्वतो सव्वप्पणा सम्ममेव समभिण्णाय
॥ ३२५ ॥ इह आरामं परिण्णाय अल्लीणगुत्तो आरामो परिव्वए, णिद्धियट्ठी वीरे
आगमेण सदा परिक्कमेज्जासि त्ति वेमि ॥ ३२६ ॥ उट्ठं सोता, अहे सोता, तिरियं सोता
वियाहिया; एते सोया वियक्खाया, जेहिं संगंति पासहा ॥ ३२७ ॥ आवट्ठं तु
उवेहाए, एतय विरमिज्ज पुव्ववी ॥ ३२८ ॥ विणइत्तु सोयं णिक्खम्म एसमहं अकम्मा
जाणति, पासति, पडिलेहाए णावकंखति, इह आगति गतिं परिण्णाय अच्चेइ जाति-
मरणस्स वट्ठमगं विक्खायरए ॥ ३२९ ॥ सव्वे सरा णियट्ठंति, तक्का जत्तय ण
विज्जइ, मई तत्तय ण गाहिता, ओए अप्पतिट्ठाणस्स खेयन्ने ॥ ३३० ॥ से ण दीहे
ण हस्से ण वट्ठे ण तंसे ण चउरंसे ण परिमंडले, न किण्हे, न णीले, ण लोहिए, ण
हालिदे ण सुक्किल्ले ण सुरहिगंधे ण दुरहिगंधे ण तित्ते ण कडुए, ण कसाए ण अंबिले ण
महुरे ण कक्खडे ण मउए ण गरुए ण लहुए ण सीए ण उण्हे ण णिद्धे ण लुक्खे ण
काऊ ण रुहे ण संगे ण इत्थी ण पुरिसे ण अन्नहा परिण्णे, सण्णे ॥ ३३१ ॥ उवमा
ण विज्जए, अरुवी सत्ता, अपयस्स पयं णत्थि ॥ ३३२ ॥ से ण सदे ण रुवे ण गंधे-
ण रसे ण फासे इच्चेवत्ति वेमि ॥ ३३३ ॥ छट्ठोद्देसो समत्तो ॥

॥ लोकसारणाम पंचमज्झयणं समत्तं ॥

ओवुज्जमाणे इह माणवेसु आघाइ से णरे, जस्सिमाओ जाइओ सव्वओ सुप-
डिलेहियाओ भवंति, आघाइ से णाणमणेलिसं ॥ ३३४ ॥ से किट्ठति तेसि समु-
ट्ठियाणं णिक्खित्तदंडाणं समाहियाणं पन्नाणमंताणं इह मुत्तिमगं, एवं एगे महावीरा
विप्परिक्कमंति, पासह एगे अविसीयमाणे अणत्तपन्ने ॥ ३३५ ॥ से वेमि से जहावि
कुम्मे हरए विणिविट्ठचित्ते पच्छन्नपलासे उम्मगं से णो लहइ ॥ ३३६ ॥ भंजगा
इव सन्निवेसं णो चयंति, एवं एगे अणेगरुवेहिं कुलेहिं जाया, रुवेहिं सत्ता, कल्लुणं
थणंति, णियाणओ ते ण लमंति मुक्खं ॥ ३३७ ॥ अह पास तेहिं कुलेहि आयत्ताए
जाया ॥ ३३८ ॥ गंडी अदुवा कुट्ठी, रायंसी अवमारियं । काणियं झिमियं चेव,
कुणियं खुज्जियं तहा ॥ उअरिं पास मूयं च, सूणिअं च गिलासिणिं, वेवइं पीढसप्पि
च, सिलिवयं महुमेहणिं सोलस एते रोगा, अक्खाया अणुपुव्वसो, अह णं फुसंति

आयंका, फासाय असमंजसा ॥ मरणं तेसि संपेहाए, उवचायं चवणं णच्चा; परियाणं
च संपेहाए, तं सुणेह जहा तहा ॥ ३३९ ॥ संति पाणा अंधा तमंसि वियाहिया;
तामेव सइं असइं अइ अच्च उच्चावयफासे पडिसंवेदेति, बुद्धेहिं एवं पवेदितं ॥ ३४० ॥
संति पाणा वासगा, रसगा उदए उदएचरा आगासगामिणो पाणा पाणे किलेसंति
॥ ३४१ ॥ पास लोए महब्भयं ॥ ३४२ ॥ बहुदुक्खाहु जंतवो ॥ ३४३ ॥ सत्ता
कामेसु माणवा, अवलेण वहं गच्छंति सरीरेणं पभंगुरेण ॥ ३४४ ॥ अट्टे से बहुदुक्खे,
इति वाले पकुब्बइ; एते रोगा बहु णच्चा, आउरा परितावए ॥ ३४५ ॥ णालं पास,
अलं तवेएहिं । एयं पास मुणी ! महब्भयं, णातिवाएज्ज कंचणं ॥ ३४६ ॥ आयाणं
भो ! सुस्सस ! भो धूयवादं पवेदइस्सामि इह खलु अत्तताए तेहिं तेहिं कुलेहिं अभि-
सेएण, अभिसंभूता, अभिसंजाता, अभिणिव्वुडा, अभिसंबुद्धा, अविसंबुद्धा अभिणि-
कंता अणुपुव्वेणं महामुणी ॥ ३४७ ॥ तं परिकमंतं परिदेवमाणा मा चयाहि इति
ते वदंति; “छंदोवणीया अज्झोववन्ना,” अकंदकारी जणगा स्वंति । अतारिसे मुणी णो
ओहंतरए, जणगा जेण विप्पजडा ॥ ३४८ ॥ सरणं तत्थ णो समेति कहं नु णाम से तत्थ
रमति ? एवं णाणं सया समणुवासिज्जासि-त्ति वेमि ॥ ३४९ ॥ **पढमोद्देसो समत्तो ॥**

आतुरं लोयमायाए चइत्ता पुव्वसंजोगं, हिच्चा उवसमं, वसित्ता बंभचेरंमि,
वसु वा अणुवसु वा जाणिन्तु धम्मं अहा तहा, अहेगे तमन्नाइ कुसीला, वत्थं पडिग्गहं
कंवलं पायपुंछणं विउसिज्जा, अणुपुव्वेण अणहियासेमाणा परीसहे दुरहियासए, कामे
ममायमाणस्स, इयाणि मुहुत्तेण वा अपरिमाणाए भेए, एवं से अंतराएहिं कामेहिं
आकेवलिएहिं अवइन्नाचेए ॥ ३५० ॥ अहेगे धम्ममादाय आयाणप्पभिइसु पणिहिंए
चरे अप्पलीयमाणे दढे ॥ ३५१ ॥ सव्वं गिद्धिं परिण्णाय एस पणए महामुणी
॥ ३५२ ॥ अइअच्च सव्वतो संगं “णमहं अत्थित्ति इति एगोहमंसि” जयमाणे
एत्थ विरत्ते, अणगारे, सव्वओ मुंडे, रीयंते, जे अचेले परिचुसिए संचिकखति
णोमोयरियाए ॥ ३५३ ॥ से आकुट्ठो वा, हए वा, लुंचिए वा, पलियं पकत्थ, अदुच्चा
पकत्थ, अतहेहिं सट्ठफासेहिं, इति संखाए एगतरे अन्नयरे अभिन्नाय तितिकखमाणे
परिच्चाए, जे य हिरी जे य अहिरीमाणा, चिच्चा सव्वं विसोत्तियं संफासे फासे
समियदंमणे ॥ ३५४ ॥ एते भो णणिगा वुत्ता, जे लोगंसि अणागमणधम्मिणो,
॥ ३५५ ॥ “आणाए मामगं धम्मं” एस उत्तरवादे इह माणवाणं वियाहिते ॥ ३५६ ॥
एत्थोचराए तं घोयमाणे, आयाणिज्जं परिण्णाय परियाएणं विगिंचइ ॥ ३५७ ॥ इह
नेगंमि एगचरिया होति, तत्थियरा इयरेहिं कुलेहिं सुद्धेसणाए सव्वेसणाए से मेहावी
परिण्णाय, गुब्भि अदुच्चा दुब्धि अदुच्चा तत्थ मेरवा पाणापाणे किलेसंति ते फासे
उट्ठो भातो अट्ठियासेज्जागित्ति वेमि ॥ ३५८ ॥ **दीओद्देसो समत्तो ॥**

एयं खु मुणी आयाणं सया सुअक्खायधम्ममे विधूतकप्पे णिज्झोसइत्ता ॥३५९॥
 जे अचेले परिवुसिए तस्स णं भिक्खुस्स णो एवं भवइ परिजुण्णे मे वत्थे वत्थं जाइ-
 स्सामि, सुत्तं जाइस्सामि, सूइं जाइस्सामि, संधिस्सामि, सीविस्सामि, उक्कसिस्सामि
 वोक्कसिस्सामि, परिहिस्सामि पाउणिस्सामि ॥ ३६० ॥ अदुवा तत्थ परक्कमंतं भुज्जो
 अचेलं तणफासा फुसंति, तेउफासा सीयफासा फुसंति, दंसमसगफासा फुसंति,
 एगयरे अन्नयरे विरुवरुवे फासे अहियासेति, अचेले लाघवं आगममाणे, तवेसे
 अभिसमण्णागए भवति ॥ ३६१ ॥ जहेयं भगवता पवेदितं तमेव अभिसमेच्चा
 सव्वतो सव्वत्ताए समत्तमेव समभिजाणिज्जा एवं तेसि महावीराणं चिरराइं पुव्वाइं
 वासाणि रीयमाणानं दवियाणं पास, अहियासियं ॥ ३६२ ॥ आगयपन्नाणानं किंसा
 बाहवो भवंति, पयणुए मंससोणिए, विस्सेणिं कट्ठु परिण्णाए, एस तिच्चे मुत्ते विरए
 वियाहिंएत्ति वेमि ॥ ३६३ ॥ विरयं भिक्खुं रीयंतं चिररातोसियं अरती तत्थ किं
 विहारए ॥३६४॥ संधे माणे समुट्ठिए, जहासे दीवे असंदीणे ॥३६५॥ एवं से धम्मो
 आयरियपदेसिए ॥३६६॥ ते अणवकंखमाणा, पाणे अणत्तिवातेमाणा जइया मेहाविणो
 पंडिया ॥ ३६७ ॥ एवं तेसिं भगवओ अणुट्ठाणो जहा से दियापोए एवं ते सिस्सा
 दिया य राओ य अणुपुव्वेण वाइय त्ति वेमि ॥३६८॥ तइओइेसो समत्तो ॥

एवं ते सिस्सा दिया य राओ य अणुपुव्वेण वाइया तेहिं महावीरेहिं पण्णाण-
 मंतेहिं तेसिमंतिए पण्णाणमुवलब्भ हिच्चा उवसमं फारुसियं समादियंति ॥ ३६९ ॥
 वसित्ता वंभचेरंसि आणं तं णो त्ति मण्णमाणा ॥३७०॥ अग्घायं तु सोच्चा णिसम्म
 “समणुन्ना जीविस्सामो” एगे णिक्खमंते असंभवेत्ता विडज्जमाणा कामेहिं गिद्धा
 अज्झोववण्णा समाहिमाघायमजोसयंता सत्थारमेव फरुसं वदंति ॥ ३७१ ॥
 सीलमंता उवसंता संखाए रीयमाणा “असीला” अणुवयमाणस्स वितिया मंदस्स
 बालया ॥ ३७२ ॥ णियट्ठमाणा वेगे आयारगोयरमाइक्खंति ॥ ३७३ ॥ णाणभट्ठा
 दंसणल्लसिणो णममाणा एगे जीवितं विप्परिणामंति ॥ ३७४ ॥ पुट्ठावेगे णियट्ठंति
 जीवियस्सेव कारणा, णिक्खंतंपि तेसिं दुन्निक्खंतं भवति ॥ ३७५ ॥ वालवयणिज्जा
 हु ते नरा पुणो पुणो जातिं पक्कपंति अहे संभवंता विहायमाणा अहमंसि ति
 विउक्कसे उदासीणे फरुसं वदंति, पलियं पक्कथे अदुवा पक्कथे अतहेहिं तं मेहावी
 जाणिज्जा धम्मं ॥ ३७६ ॥ अहम्मट्ठी तुमंसि णामबाले, आरंभट्ठी अणुवयमाणे
 “हणपाणे” घायमाणे, हणओयावि समणुजाणमाणे “घोरे धम्मो उदीरिए” उवेहइ
 णं आणाणाए एस विसण्णे वियदे वियाहिते त्ति वेमि ॥ ३७७ ॥ किमणेणं भो
 जणेण करिस्सामि त्ति मण्णमाणा एवं एगे वइत्ता, मातरं पितरं हिच्चा, णातओ य

परिग्गहं, वीरायमाणा समुट्ठाए, अविहिंसा सुव्वया दंता, पस्स दीणे उप्पइए पडिव-
यमाणे ॥ ३७८ ॥ वसट्ठा कायरा य जणा लूसगा भवंति ॥ ३७९ ॥ अहमेगेसिं
सिलोए पावए भवइ, से समणो भवित्ता विव्वंतेर ॥ ३८० ॥ पासहेगे सम-
न्नागएहिं सह असमण्णागए, णममाणेहिं अणममाणे विरतेहिं अविरते दविएहिं अद-
विए ॥ ३८१ ॥ अभिसमेच्चा पंडिए मेहावी णिठ्ठियठ्ठे वीरे आगमेणं सया परक्क-
मेज्जासि त्ति वेमि ॥ ३८२ ॥ चउत्थोद्देसो समत्तो ॥

से गिहेसु वा, गिहंतरेसु वा, गामेसु वा, गामंतरेसु वा, नगरेसु वा, नगरंतरेसु
वा, जणवएसु वा, जणवयंतरेसु वा, गामजणवयंतरे वा गामणयरंतरे वा,
णगरजगवयंतरे वा, संतेगतिया जणा लूसगा भवंति, अदुवा फासा फुसंति, ते
फासे पुट्ठो धीरो अहियासए ओए समियदंसणे ॥ ३८३ ॥ दयं लोगस्स, जाणित्ता
पादीगं पडीगं, दाहीगं उदीगं, आइक्खे, विभये, किट्ठे, पुव्ववी ॥ ३८४ ॥
से उट्ठिएसु वा, अणुट्ठिएसु वा सुस्सूसमाणेसु पवेदए, संति, विरति, उवसमं, णिव्वाणं
सोयं अज्जवियं महुवियं लाघवियं अणइवत्तियं ॥ ३८५ ॥ सव्वेसि पाणाणं सव्वेसि
भूयाणं सव्वेसि जीवाणं सव्वेसि सत्ताणं अणुवीइ भिक्खु धम्ममाइक्खेज्जा ॥ ३८६ ॥
अणुवीइ भिक्खु धम्ममाइक्खमाणे णो अत्ताणं आसाइज्जा, णो परं आसाइज्जा, णो
अन्नाइं पाणाइं भूयाइं जीवाइं सत्ताइं आसाएज्जा ॥ ३८७ ॥ से अणासादए अणासा-
दमाणे वज्ज्रमाणणं पाणाणं भूयाणं जीवाणं सत्ताणं, जहा से दीवे असंदीणे एवं से
भवति सरणं महामुणी ॥ ३८८ ॥ एवं से उट्ठिए ठियप्पा अणिहे अचले चले
अवहिंसेस्से परिव्वए ॥ ३८९ ॥ संखाय पेसलं धम्मं, दिट्ठिमं परिणिव्वुडे ॥ ३९० ॥
तम्हा सगं ति पासह, गंधेहिं गढिया णरा विसण्णा कामक्कंता, तम्हा लुहाओ णो
परिवित्तसेज्जा ॥ ३९१ ॥ जस्सिमे आरंभा सव्वतो सव्वप्पयाए सुपरिण्णाया भवंति
तेमिमे लूसिणो णो परिवित्तसंति से वंता कोहं च माणं च मायं च लोभं च, एस
तुट्ठे वियाहिते त्ति वेमि ॥ ३९२ ॥ कायस्स वियाघाए संगामसीसे वियाहिए, से
हु पारंगमे मुणी, अविहम्ममाणे फलगावयठ्ठि कालोवणीते कंखेज्जकालं जाव सरीर
भेउत्ति वेमि ॥ ३९३ ॥ पंचमोद्देसो समत्तो ॥

॥ धूताक्खं छट्ठमज्झयणं समत्तं ॥

महापरिण्णा णामं सत्तमज्झयणं वोच्छिण्णं

से वेमि समणुजस्स वा असमणुजस्स वा असणं वा, पाणं वा, खाइमं वा, साइमं
वा, कयं वा, पडिग्गहं वा, कंवलं वा, पायपुच्छणं वा णो पाएज्जा, णो णिमत्तिज्जा

णो कुज्जा वेयावडियं परं आढायमाणेत्ति वेमि ॥ ३९४ ॥ धुयं चेतं जाणेज्जा असणं वा जाव पायपुच्छं वा, लभिया णो लभिया, भुंजिया णो भुंजिया पथं विउत्ता विउक्कम्म विभत्तं धम्मं जोसेमाणे समेमाणे चलेमाणे पाएज्जा वा णिमंतेज्जा वा कुज्जा वेयावडियं परं अणाढायमाणेत्ति वेमि ॥ ३९५ ॥ इहमेगेसि आयार-
गोयरे णो सुणिसंते भवति, ते इह आरंभट्ठी अणुवयमाणा “हण पाणा” घायमाणा हणतो यावि समणुजाणमाणा अदुवा अदिन्नमाययंति, अदुवा वायाओ विउज्जति; तंजहा-अत्थि लोए णत्थि लोए धुवे लोए अधुवे लोए सादिए लोए अणादिए लोए सपज्जवसिते लोए अपज्जवसिते लोए सुक्खेत्ति वा दुक्खेत्ति वा कल्लणेत्ति वा पावेत्ति वा साहुत्ति वा असाहुत्ति वा सिद्धीत्ति वा, असिद्धीत्ति वा, णिरएत्ति वा अणिरएत्ति वा ॥ ३९६ ॥ जमिणं विप्पडिवण्णा “मामगं धम्मं” पन्नवेमाणा, इत्थवि जाणहं अकम्हा । एवं तैसिं णो सुअक्खाए सुपन्नते धम्मे भवति, से जहेयं भगवया पवेदितं आसुपण्णेण जाणया पासया, अदुवा गुत्ती वओगोयरस्स ति वेमि ॥ ३९७ ॥ सव्वत्थ संमयं पावं, तमेव उवाइक्कम्म, एस महं विवेगे वियाहिते ॥ ३९८ ॥ गामे अदुवा रण्णे, णेव गामे णेव रण्णे, धम्ममायाणह पवेदितं माहणेण मईमया ॥ ३९९ ॥ जामा तिण्णि उदाहिया, जेसु इमे आयरिया संवुज्झमाणा समुट्ठिया ॥ ४०० ॥ जे णिव्वुया पावेहिं कम्मेहिं अणियाणा ते वियाहिया ॥ ४०१ ॥ उट्ठं अहे तिरियं दिसासु सव्वतो सव्वावंति च णं पाडियक्कं जीवेहिं कम्मसमारंभे णं ॥ ४०२ ॥ तं परिण्णाय मेहावी णेव सयं एतेहिं कायेहिं दंडं समारंभेज्जा, णेवण्णे एतेहिं कायेहिं दंडं समारंभावेज्जा, नेवन्ने एएहिं काएहिं दंडं समारंभंतेवि समणुजाणेज्जा ॥ ४०३ ॥ जेयन्ने एतेहिं काएहिं दंडं समारंभंति तेसिंपि वयं लज्जामो ॥ ४०४ ॥ तं परिण्णाय मेहावी तं वा दंडं अण्णं वा णो दंडेमि, दंडं समारंभिज्जासि ति वेमि ॥ ४०५ ॥ **पढमोद्देसो समत्तो ॥**
, से भिक्खु परक्कमेज्ज वा, चिट्ठेज्ज वा, णिसीएज्ज वा, तुयट्ठेज्ज वा, सुसाणंसि वा, सुन्नागारंसि वा, गिरिगुहंसि वा, स्क्खमूलंसि वा, कुंभाराययणंसि वा, हुरत्था वा, कहिं चि विहरमाणं तं भिक्खुं उवसंक्रमित्तु गाहावती वूया आउसंतो समणा ! अहं खलु तव अट्ठाए असणं वा, पाणं वा, खाइमं वा, साइमं वा, वत्थं वा, पडिग्गहं वा, कंवलं वा, पायपुच्छं वा, पाणाइं, भूयाइं, जीवाइं, सत्ताइं, समारब्भ समुद्दिस्स कीयं, पामिच्चं, अच्छिज्जं, अणिसट्ठं, अभिहडं आहट्ठु चेतेमि, आवसहं वा समुस्सि-
णोमि, से भुंजह, वसह ॥ ४०६ ॥ आउसंतो समणा ! भिक्खु तं गाहावति समणसं सवयसं संपडियाइक्खे आउसंतो गाहावति ! णो खलु ते वयणं आढामि, णो खलु ते वयणं परिजाणामि, जो तुमं मम अट्ठाए असणं वा (४) वत्थं वा (४), पाणाइं

वा (४) जाव समारब्भ समुद्दिस्स कीयं पामिच्चं, अच्छिज्जं, अणिसट्ठं, अभिहडं आहट्ठु चेएसि, आवसहं वा समुस्सिणासि, से विरतो आउसो ! गाहावती ! एयस्स अकरणयाए ॥ ४०७ ॥ से भिक्खुं परिक्रमेज्ज वा जाव हुरत्था वा कहिंचि विहरमाणं तं भिक्खुं उवसंक्रमित्तु गाहावड् आयगयाए पेहाए असणं वा (४) वत्थं वा (४) पाणाइं (४) जाव आहट्ठु चेएति आवसहं वा समुस्सिणाति भिक्खुं परिघासिउं, तं च भिक्खु जाणेज्जा सह संमइयाए परवागरणेणं अण्णेसिं वा सोच्चा “अय खलु गाहावड् ! मम अट्ठाए असणं वा (४) वत्थं वा (४) पाणाइं वा (४) समारब्भ जाव चेएति आवसहं वा समुस्सिणाति” तं च भिक्खु संपडिलेहाए आगमेत्ता धाणवेज्जा अणासेवणाए ति वेमि ॥ ४०८ ॥ भिक्खुं च खलु पुट्ठा वा अपुट्ठा वा जे इमे आहच्च गंधा फुसंति से हंता “हणह खणह छिंदह दहह पयह आलुं पह विलुं पह सहसा कारेह विप्परासुसह” ते फासे पुट्ठो धीरो. अहियासए अदुवा आचार्यगोयरमाइक्खे तक्कियाणमणेत्तिसं, अदुवा वड्डुत्तिए गोयरस्स अणुपुट्ठेण सम्मं पडिलेहाए आयगुत्ते जिणेहिं एयं पवेदितं ॥ ४०९ ॥ से समणुत्ते असमणुत्तस्स असणं वा (४) वत्थं वा (४) नोपाएजा, नोनिमंतेज्जा, नो कुज्जा वेयावडियं परं आढायमाणेत्ति वेमि ॥ ४१० ॥ धम्ममायाणह पवेइयं माहणेण मतिमया समणुत्ते समणुत्तस्स असणं वा, (४) वत्थं वा (४) पाएज्जा णिमंतेज्जा कुज्जा वेयावडियं परं आढायमाणेत्ति वेमि ॥ ४११ ॥ **वीओहेसो समत्तो ॥**

मज्झिमेणं वयसावि एगे संवुज्झमाणा समुट्ठिता ॥ ४१२ ॥ सोच्चा मेहावी वयणं पंडियाणं निसामित्ता ॥ ४१३ ॥ समियाए धम्मे आरिएहिं पवेदिते ॥ ४१४ ॥ ते अणवकंलमाणा अणतिवाएमाणा अपरिग्गहमाणा णो परिग्गहावंति सव्वावंति च णं लोभंति । णिहाय दंडं पाणेहिं पावं कम्मं अकुव्वमाणे एस महं अगंधे वियाहिए, ओए जुत्तिमस्स खेयत्ते उववायं चवणं च णच्चा ॥ ४१५ ॥ आहारोवचया देहा, परिसह पभंगुरा । पासहेगे सव्विदिएहिं परिगिलायमाणेहिं ॥ ४१६ ॥ ओए दयं दयइ ॥ ४१७ ॥ जे सनिहाणसत्थस्स खेयत्ते से भिक्खु कालणो वलणो मायणो खणणो विणयणो समयणो परिग्गहं अममायमाणे कालेणुट्ठाइ अपडिन्ने दुहओ छेत्ता गियाति ॥ ४१८ ॥ तं भिक्खुं सीयफासपरिवेवमाणगायं उवसंक्रमित्तु गाहावड् वूया, “आउसंतो समणा, णो खलु ते गामधम्मा उव्वाहंति” आउसंतो गाहावड् ! णो रत्तु मम गामधम्मा उव्वाहंति सीयफास च णो खलु अहं संचाएमि अहियासित्ताए । एो रत्तु मे वण्णति अगणिकायं उज्जालेत्ताए पज्जालेत्ताए वा कायं आयावेत्ताए पयावेत्ताए वा, अण्णेसिं वा वयणाओ ॥ ४१९ ॥ सिया से एवं वदंतस्स परो अगणिकायं

उज्जालेत्ता पज्जालेत्ता कायं आयावेज्जा वा पयावेज्जा वा, तं च भिक्खु पडिलेहाए आगमेत्ता आणविज्जा, अणासेवणाए त्ति वेमि ॥४२०॥ तइओदेसो समत्तो ॥

जे भिक्खु तिवत्थेहिं परिवुसिते पायचउत्थेहिं तस्स णं णो एवं भवति “चउत्थं वत्थं जाइस्सामि” से अहेसणिज्जाइं वत्थाइं जाएज्जा, अहापरिग्गहियाइं वत्थाइं धारेज्जा, णो धोविज्जा णो रएज्जा णो धोयरत्ताइं वत्थाइं धारेज्जा, अपलिओवमाणे, गामंतरेसु, ओमचेलिए, एयं खु वत्थधारिस्स सामग्गियं ॥ ४२१ ॥ अह पुण एवं जाणेज्जा; उवातिक्कंते खलु हेमंते, गिम्हे पडिवन्ने अहापरिजुज्जाइं वत्थाइं परिट्ठविज्जा, अदुवा संत्तरुत्तरे, अदुवा ओमचेले, अदुवा एगसाडे, अदुवा अचेले, लाघवियं आगममाणे, तवे से अभिसमन्नागए भवति । जमेयं भगवया पवेदितं तमेव अभिसमेच्चा, सव्वतो सव्वत्ताए समत्तमेव समभिजाणिया ॥ ४२२ ॥ जस्स णं भिक्खुस्स एवं भवति, पुट्ठो खलु अहमंसि, नालमहमंसि सीयफासं अहियासित्तए, से वसुमं सव्वसमण्णा-गयपन्नाणेणं अप्पाणेणं केइ अकरणयाए आउट्टे, तवस्सिणो हु तं सेयं जमेगे विह-माइए, तत्थवि तस्स कालपरियाए, से वि तत्थ विअंतिकारए, इच्चेतं विमोहायतणं द्वियंसुहंखमंणिस्सेयसं आणुगामियं त्ति वेमि ॥४२३॥ चउत्थोदेसो समत्तो ॥

से भिक्खु दोहिं वत्थेहिं परिवुसिते, पायतइएहिं, तस्स णं णो एवं भवति, तइयं वत्थं जाइस्सामि, से अहेसणिज्जाइं वत्थाइं जाएज्जा, जाव एवं खलु तस्स भिक्खुस्स सामग्गियं ॥ ४२४ ॥ अह पुण एवं जाणेज्जा, उवाइक्कंते खलु हेमते, गिम्हे पडिवन्ने, अहा परिजुज्जाइं वत्थाइं परिट्ठवेज्जा २ अदुवा संत्तरुत्तरे, अदुवा ओमचेलए, अदुवा एगसाडे, अदुवा अचेले, लाघवियं आगममाणे, तवे से अभिसमण्णागए भवति, जहेयं भगवता पवेदितं तमेव अभिसमेच्चा सव्वतो सव्वत्ताए सम्मत्तमेव समभिजाणिया ॥ ४२५ ॥ जस्सणं भिक्खुस्स एवं भवति, पुट्ठो अवलो अहमंसि, नालमहमंसि गिहंतरसंक्रमणं भिक्खायरियं गमणाए, से चेवं वदंतस्स परो अभिहडं असणं वा (४) आहट्टु दलएज्जा से पुव्वामेव आलोएज्जा आउसंतो गाहावती णो खलु मे कप्पइ अभिहडं असणं वा (४) भोत्तए वा, पायए वा, अन्ने वा एय-प्पगारे ॥ ४२६ ॥ जस्सणं भिक्खुस्स अयं पगप्पे; अहं च खलु पडिण्णत्तो अप-डिन्नत्तेहिं, गिलाणो अगिलाणेहिं, अभिकंख साहम्मिएहिं, कीरमाणं वेयावडियं साइ-ज्जिस्सामि । अहं वा वि खलु अपडिन्नत्तो पडिण्णत्तस्स अगिलाणे गिलाणस्स, अभिकंख साहम्मिअस्स कुज्जा वेयावडिअं करणाए ॥ ४२७ ॥ आहट्टु परिणं अणुक्खिस्सामि, आहडं च सातिज्जिस्सामि, (१) आहट्टु परिणं आणक्खेस्सामि, आहडं च णो सातिज्जिस्सामि (२) आहट्टु परिणं, णो आणक्खेस्सामि, आहडं

च सातिजिस्सामि (३) आहट्टु परिणं णो आणक्खेस्सामि, आहडं च णो साति-
जिस्सामि (४) एवं से अहाकिट्टियमेव, धम्मं समहिजाणमाणे संते विरते
सुसमाहितत्से तत्थवि तस्स कालपरियाए, से तत्थ विअंतिकारए, इच्चेतं विमोहायतणं
हितं सुहं खमं णिस्सेसं आणुगामियं त्ति वेमि ॥ ४२८ ॥ पंचमोद्देशो समत्तो ॥

जे भिक्खु एगेण वत्थेण परिवुसिते पायवितिएण, तस्सणं णो एवं भवइ, “वित्थियं
वत्थं जाइस्सामि” से अहेसणिज्जं वत्थं जाएज्जा, अहापरिगगहियं वा वत्थं धारेज्जा,
जाव गिम्हे पडिवण्णे अहा परिजुञ्जं वत्थं परिठ्वेज्जा २ अदुवा एग साडे अदुवा
अचेले लाघवियं आगममाणे, जाव सम्मतमेव समभिजाणिया, जस्स णं भिक्खुस्स
एवं भवइ एगे अहमंसि न मे अत्थि कोइ न याहमवि कस्स वि, एवं से एगागिण-
मेव अप्पाणं समभिजाणिज्जा लाघवियं आगममाणे तवे से अभिसमन्नागए भवइ
जाव समभिजाणिया ॥ ४२९ ॥ से भिक्खु वा भिक्खुणी वा असणं वा (४)
आहारमाणे णो वामाओ हणुयाओ दाहिणं हणुयं संचारेज्जा आसाएमाणे, दाहिणाओ
वा हणुयाओ वामं हणुयं णो संचारेज्जा आसाएमाणे, से अणासायमाणे लाघवियं
आगममाणे, तवेसे अभिसमन्नागए भवइ । जहेयं भगवता पवेइयं तमेव अभिसमेच्चा
सव्वतो सव्वत्ताए सम्मतमेव समभिजाणिया ॥ ४३० ॥ जस्सणं भिक्खुस्स एवं
भवति, से गिलामि च खलु अहं इमंमि समए णो संचाएमि इमं सरीरगं अणुपुव्वेण
परिवहित्तए, से अणुपुव्वेण आहारं संवट्टेज्जा, आहारं अणुपुव्वेण संवट्टित्ता, कसाए
पयणए किच्चा, समाहियच्चे फलगावयट्ठी उट्ठाय भिक्खु अभिनिव्वुडच्चे अणुपविसित्ता
गामं वा, णगरं वा, खेडं वा, कव्वडं वा, मंडवं वा, पट्टणं वा, दोणमुहं वा, आगरं वा,
आसमं वा, संणिवेसं वा, णिगमं वा, रायहाणिं वा, तणाइं जाएज्जा, तणाइं जाइत्ता
से तमायाए एगंतमवक्कमिज्जा, एगंतमवक्कमित्ता, अप्पंडे-अप्पपाणे-अप्पवीए-अप्पह-
रिए-अप्पोसे-अप्पोदए-अप्पुत्तिग-पणय-दग-मट्टियमक्कडासंताणए पडिलेहिय २ पम-
जिय २ तणाइं सयरेज्जा, तणाइं संयरेत्ता एत्थवि समए इत्तरियं कुज्जा ॥ ४३१ ॥
तं गच्चं मज्जवादी ओए तिण्णे, छिण्णकहं कहे, आतीतट्ठे अणातीते चिच्चाण भिउरं
कायं संविट्ठय विट्ठवह्वे परिसहोवसग्गे अस्सि विसंभणयाए भेरवमणुचिण्णे, तत्थवि
तस्स कालपरियाए, जाव आणुगामियं त्ति वेमि ॥ ४३२ ॥ छट्ठोद्देशो समत्तो ॥

जे भिक्खु अचेले परिवुसिते, तस्स णं एवं भवति, चाएमि अहं तणकासं
अहिंयासित्तए, सीयकासं अहिंयासित्तए, तेउकासं अहिंयासित्तए, दंसमसगकासं
अहिंयासित्तए, णग्तरे अन्नतरे विट्ठवह्वे फासे अहिंयासित्तए हिरिपडिच्छादणं चऽहं

णो संचाएमि अहियासित्तए, एवं से कप्पति कडिबंधणं धारित्तए ॥ ४३३ ॥ अदुवा
तत्थ परक्कमंतं भुज्जो अचेलं तणफासा फुसंति, सीयफासा फुसंति, तेउफासा
फुसंति, दसमसगफासा फुसंति, एगयरे अन्नयरे विरुवरुवे फासे अहियासेति
अचेले लाघवियं आगममाणे, जाव समभिजाणिया ॥ ४३४ ॥ जस्सणं
भिक्खुस्स एवं भवति; अहं च खलु अन्नेसिं भिक्खूणं असणं वा (४) आहट्ठु
दलइस्सामि, आहडं च सातिजिस्सामि [१] जस्सणं भिक्खुस्स एवं भवति, अहं
च खलु अन्नेसि भिक्खूणं असणं वा (४) आहट्ठु दलइस्सामि आहडं च णो
सातिजिस्सामि (२) जस्सणं भिक्खुस्स एवं भवति; अहं च खलु असणं वा (४)
आहट्ठु नो दलइस्सामि आहडं च सातिजिस्सामि (३) जस्सणं भिक्खुस्स एवं
भवति अहं च खलु अण्णेसि भिक्खूणं असणं वा (४) आहट्ठु नो दलइस्सामि
आहडं च णो सातिजिस्सामि ॥ ४ ॥ अहं च खलु तेण अहाइरित्तेणं अहेसणिज्जेण
अहापरिग्गहिणं असणेणं वा (४) अभिकंख साहम्मियस्स कुज्जा वेयावडियं
करणाए, अहं वावि तेण अहातिरित्तेणं अहेसणिज्जेणं अहापरिग्गहिणं असणेणं वा
(४) अभिकंख साहम्मिएहिं कीरमाणं वेयावडियं सातिजिस्सामि लाघवियं आग-
ममाणे जाव सम्मत्तमेव समभिजाणिया ॥ ४३५ ॥ जस्सणं भिक्खुस्स एवं भवति
से गिलामि खलु अहं इमम्मि समये इमं सरीरं अणुपुव्वेणं परिवहित्तए, से
अणुपुव्वेणं आहारं संवट्टेज्जा, संवट्टइत्ता कसाए पयणू किच्चा समाहिअच्चे फलगा-
वयट्ठी उट्ठाय भिक्खू अभिणिव्वुडच्चे, अणुपविसित्ता गामं वा जाव रायहाणिं वा
तणाइं जाएज्जा, तणाइं जाएत्ता, से तमायाए एगंतमवक्कमेज्जा, अप्पंडे जाव तणाइं
संथरेज्जा, इत्थवि समए कायं च, जोगं च, इरियं च, पच्चक्खाएज्जा ॥ ४३६ ॥
तं सच्चं सच्चावादीओए तिन्ने छिन्नकहंकहे आतीतट्ठे अणातीते चेच्चाण भिउरं कायं
संविहूणिय विरुवरुवे परिसहोवसग्गे अस्सि विसंभणाए भेरवमणुचिन्ने तत्थवि
तस्सकालपरियाए से तत्थ विअंतिकारए इच्चेयं विमोहायतणं हियं सुहं खमं णिस्से-
यसं आणुगामियं त्ति वेमि ॥ ४३७ ॥ **सत्तमोद्देसो समत्तो ॥**

अणुपुव्वेण विमोहाइं, जाइं धीरा समासज्ज; वसुमंतो मइमंतो, सव्वं णच्चा अणेलिंसं
॥ १ ॥ ४३८ ॥ दुविहंपि विदित्ताणं, जिणा धम्मस्स पारगा; अणुपुव्वीइ संखाए, कम्मु-
णाउ तिउट्ठति ॥ २ ॥ ४३९ ॥ कसाए पयणू किच्चा, अप्पाहारो तितिक्खए; अह भिक्खु
गिलाएज्जा, आहारस्सेव अंतियं ॥ ३ ॥ ४४० ॥ जीवियं णाभिकंखेज्जा, मरणं णोवि
पत्थए; दुहतोवि ण सज्जेज्जा, जीविते मरणे तहा ॥ ४ ॥ मज्झत्यो णिज्जरापेही, समा-

हिमणुपालए; अंतो वहिं विउस्सिज्ज, अज्झत्थं सुद्धमेसए ॥५॥४४१॥ जं किंचुवक्कमं
जाणे, आउक्खेमस्स अप्पणो; तस्सेव अंतरद्वाए, खिप्पं सिक्खेज्ज पडिए
॥६॥४४२॥ गामे वा अदुवा रण्णे, थंडिलं पडिलेहिया; अप्पपाणं तु विन्नाय, तणाइं
संयरे मुणी ॥७॥४४३॥ अणाहारो तुअट्टेज्जा, पुट्ठो तत्थ हियासए; णातिवेलं उवचरे,
माणस्सेहिं विपुठ्ठवं ॥८॥४४४॥ संसप्पगा य जे पाणा, जे उ उद्धमहाचरा; भुंजंति
मंससोणितं, ण छणे ण पमज्जए ॥ ९ ॥ ४४५ ॥ पाणा देहं विहिंसंति, ठाणाओ
ण वि उब्भमे; आसवेहिं विवित्तेहिं, तिप्पमाणोऽहियासए ॥ १० ॥ गंथेहिं विवित्तेहिं,
आउक्कालस्स पारए ॥४४६॥ पग्गहियतरगं चेयं, दवियस्स वियाणतो ॥११॥४४७॥
अयं से अवरे धम्मे, णायपुत्तेण साहिए; आयवज्जं पडीयारं, विज्जहिज्जा तिहा
तिहा ॥ १२ ॥ ४४८ ॥ हरिएसु ण णिवज्जेज्जा, थंडिलं मुणिआ सए; विउस्सिज्ज
अणाहारो, पुट्ठो तत्थ हियासए ॥ १३ ॥ ४४९ ॥ इंदिएहिं गिलायंते, समियं
आहरे मुणी; तहावि से अगरिहे, अचले जे समारिए ॥ १४ ॥ ४५० ॥ अभिक्कमे
पडिक्कमे, संकुचए पसारए; कायसाहारणट्ठाए, इत्थं वा वि अचेयणे ॥१५॥४५१॥
परिक्कमे परिकिलंते, अदुवा चिट्ठे अहायते; ठाणेण परिकिलंते, णिसिइज्जाय अंतसो
॥ १६ ॥ ४५२ ॥ आसीणे णेलिसं मरणं, इंदियाणि समीरए; कोलावासं समासंइ,
वितहं पादुरेसए ॥ १७ ॥ ४५३ ॥ जओ वज्जं समुप्पज्जे, ण तत्थ अवलंबए;
ततो उक्कसे अप्पाणं, सव्वे फासे अहियासए ॥ १८ ॥ ४५४ ॥ अयं चायततरे
सिया, जो एवं अणुपालए; सव्वगायणिरोधेवि, ठाणातो णवि उब्भमे ॥१९॥४५५॥
अयं से उत्तमे धम्मे, पुव्वट्ठाणस्स पग्गहे; अचिरं पडिलेहित्ता, विहरे चिट्ठ माहणो
॥ २० ॥ ४५६ ॥ अचित्तं तु समासज्ज, ठावए तत्थ अप्पगं; वोसिरे सव्वसो
कायं, ण मे टेहे परीसहा ॥ २१ ॥ ४५७ ॥ जावज्जीवं परीसहा, उवसग्गा इति
संगया; सवुडे देहमेयाए, इति पण्णे हियासए ॥२२॥४५८॥ भेउरेसु न रज्जेज्जा,
कांगेमु बहुतरेमु वि; इच्छा लोभं ण सेवेज्जा, धुवं वज्जं सपेहिया ॥ २३ ॥ ४५९ ॥
सागण्हि णिमंतेज्जा, दिव्वमायं ण सदहे; तं पडिवुज्ज माहणे, सव्वं नूमं विधूणिया
॥ २४ ॥ ४६० ॥ सव्वट्ठेहिं अमुच्छिए, आउक्कालस्स पारए; तितिक्खं परमं
पत्ता, निमोहदानरं हितं ति वेमि ॥ २५ ॥ ४६१ ॥ अट्ठमोदेसो समत्तो ॥

॥ विमोक्खणाममट्ठमज्झयणं समत्तं ॥

अहासुयं वदिस्सामि, जहा से समणे भगवं उट्ठाए; संखाय तंसि हेमंते, अहुणा पव्वइए रीयत्था ॥ ४६२ ॥ णो चेविमेण वत्थेण, पिहिस्सामि तंसि हेमंते; से पारए आवकहाए, एवं खु अणुधम्मियं तस्स ॥ ४६३ ॥ चत्तारि सार्हिए मासे, बहवे पाणजाइया आगम्म; अभिरुज्झकायं विहरिंसु, आरुहियाणं तत्थ हिंसिसु ॥ ४६४ ॥ संवच्छरं साहियं मासं, जं ण रिक्कासि वत्थगं भगवं; अचेलए ततो चाई, तं वोसिरिज्ज वत्थमणगारे ॥ ४६५ ॥ अदु पोरिसिं तिरियंभित्ति, चक्खुमासज्ज अंतसो ज्ञायति; अह चक्खुभीया संहिया, ते हंता बहवे कंदिंसु ॥ ४६६ ॥ सयणेहिं वित्तिमिस्सेहिं, इत्थीओ तत्थसे परिण्णाय; सागारियं ण सेवेइ, य इति से सयं पवेसिया ज्ञाति ॥ ४६७ ॥ जे केइ इमे अगारत्था, मीसीभावं पहाय ते ज्ञाति; पुट्ठो वि णाभिभासिसु, गच्छति णाइवत्तइ अंजू ॥ ४६८ ॥ णो सुगरमेतमेगेसि, णाभिभासे अभिवायमाणे; हयपुव्वो तत्थ दंडेहिं, लूसियपुव्वो अप्पपुच्चेहिं ॥ ४६९ ॥ फरसाइं दुत्तितिक्खाइं, अतिअच्च मुणी परक्कममाणे; आघायणट्ठगीताइं, दंडजुज्जाइं मुट्ठिजुज्जाइं ॥ ४७० ॥ गढिए मिहो कहासु, समयंमि **णायसुए** विसोगे अदक्खू; एताइं सो उरालाइं, गच्छइ णायपुत्ते असरणाए ॥ ४७१ ॥ अविसार्हिए दुवे वासे, सीतोदं अभोच्चा णिक्खंते; एगत्ताए पिहियच्चे, से अहिंन्नायदंसणे संते ॥ ४७२ ॥ पुढविं च आउक्कायं, तेउक्कायं च वाउकायं च; पणगाइं बीयहरियाइं, तसकायं च सव्वसो णच्चा “एयाइं संति” पडिलेहे, चित्तमंताइं से अभिन्नाय; परिवज्जिय विहरित्था, इति संखाय से महावीरे ॥ ४७३ ॥ अदु थावरा तसत्ताए, तसजीवाय थावरत्ताए; अदुवा सव्वजोणीया, सत्ता कम्मुणा कप्पिया पुढो बाला ॥ ४७४ ॥ भगवं च एवमन्नेसि, सोवर्हिए हु लुप्पती बाले; कम्मं च सव्वसो णच्चा, तं पडियाइक्खे पावगं भगवं ॥ ४७५ ॥ दुविहं समिच्च मेहावी, किरियमक्खायमणेलिसं णाणी; आयाण-सोयमतिवायसोयं जोगं च सव्वसोणच्चा ॥ ४७६ ॥ अइवत्तियं अणाउट्ठि, सयमन्नेसि अकरणयाए; जस्सिस्थिओ परिण्णाय, सव्वकम्मावहाउसे अदक्खू ॥ ४७७ ॥ अहाकडं न से सेवे, सव्वसो कम्मुणा वंथं अदक्खू; जं किंचि पावगं भगवं, तं अकुव्वं वियडं भुंजित्था ॥ ४७८ ॥ णो सेवती य परवत्थं, परपाएवि से ण भुंजित्था; परिवज्जियाण ओमाणं, गच्छति संखडिं असरणाए ॥ ४७९ ॥ मायन्ने असण-पाणस्स, णाणुनिद्धे रसेसु अपडिण्णे; अर्च्छिपि णो पमज्जिज्जा, णोवि य कंहुयये मुणी गायं ॥ ४८० ॥ अप्पं तिरियं पेहाए, अप्पं पिट्ठओ व पेहाए; अप्पं वुइए पडिभाणी, पंथपेही चरे जयमाणे ॥ ४८१ ॥ सिसिरंसि अद्धपडिवन्ने, तं वोसिज्ज वत्थमणगारे; पसारित्तु बाहुं परक्कमे, णो अवलंबिया ण खंधंमि ॥ ४८२ ॥ एस

विही अणुक्रंतो, माहणेण मईमया; बहुसो अप्पडिन्नेण, भगवया एवं रियंति त्ति वेमि ॥ ४८३ ॥ पढमोद्देसो समत्तो ॥

चरियासणाईं सेजाओ, एगतियाओ जाओ बुइयाओ; आइक्खताईं सयणास-
णाईं, जाईं सेवित्था से महावीरो ॥ ४८४ ॥ आवेसणसभापवासु, पणियसालासु,
एगदा वासो; अदुवा पलियठ्ठाणेसु, पलालपुंजेसु एगदा वासो ॥ ४८५ ॥ आगंतारे
आरामागारे तह य णगरे वि एगदा वासो, सुसाणे सुण्णागारे वा, रुक्खमूले वि
एगदा वासो ॥ ४८६ ॥ एतेहिं मुणी सयणेहिं, समणे आसी पत्तेरसवासे; राईं
दिवं पि जयमाणे, अप्पमत्ते समाहिए ज्ञाति ॥ ४८७ ॥ णिंदंपि णो पगामाए,
सेवइ य भगवं उठ्ठाए; जग्गावती य अप्पाणं, ईसि साति य अपडिन्ने ॥ ४८८ ॥
संबुज्जमाणे पुणरवि, आसिंसु भगवं उठ्ठाए; णिक्खम्म एगदा राओ, बहिं चंकमिता
मुहुत्ताणं ॥ ४८९ ॥ सयणेहिं तत्थुवसग्गा, भीमा आसी अणेगरूवाय; संसप्पगाय
जे पाणा, अदुवा जे पक्खिणो उवचरंति ॥ ४९० ॥ अदुवा कुचरा उवचरंति,
गामरक्खाय सत्तिहत्थाय; अदुगामिया उवसग्गा इत्थी एगतिया पुरिसा य
॥ ४९१ ॥ इहलोइयाईं परलोइयाईं, भीमाईं अणेगरूवाईं; अवि सुब्बिदु-
व्विगंधाईं, सद्दाईं अणेगरूवाईं अहियासए सया समिए, फासाईं विरूवरूवाईं
॥ ४९२ ॥ अरइं रइं अभिभूय, रीयईं माहणे अबहुवाईं ॥ ४९३ ॥ स जणेहिं
तत्थ पुच्छिमु, एगचरा वि एगदा राओ; अब्वाहिए कसाइत्था, पेहमाणे समाहिं
अपडिन्ने ॥ ४९४ ॥ अयमंतरंसि को एत्थ, अहमंसिति भिक्खू आहट्ठु; अयमुत्तमे
से धम्मे तुसिणीए सकसाइए ज्ञाति ॥ ४९५ ॥ जंसिप्पेगे पवेयंति, सिसिरे मारुए
पवायंते; तंसिप्पेगे अणगारा, हिमवाए णिवायमेसंति ॥ संघाडिओ पवेसिस्सामो,
एहा य समादहमाणा, पिहिया वा सक्खामो, अतिदुक्खे हिमगसंफासा ॥ तंसि
भगवं अपडिन्ने, अहे वियडे अहियासए दविए, णिक्खम्म एगदा राओ, ठाइए
भगवं समियाए ॥ ४९६ ॥ एस विही अणुक्रंतो माहणेण मईमया; बहुसो अपडि-
ण्णं, भगवया एवं रियंति त्ति वेमि ॥ ४९७ ॥ वित्तिओद्देसो समत्तो ॥

तगसासे, सीयफासे, तेउफासे य, दंसमसगे य, अहियासए सया समिए, फासाईं
वित्थवत्ताईं ॥ ४९८ ॥ अह दुचरलाढमचारी, वज्जभूमि च सुब्बभूमि च; पंतं
मेज्जं मेविंमु, आसणगाईं चेव पंताईं ॥ ४९९ ॥ लाढेसु तस्सुवसग्गा, वहवे जाणवया
सन्ति, अह लहदेतिए भत्ते, कुकुरा तत्थ हिंसिंसु णिवत्तिंसु ॥ ५०० ॥ अप्पे जणे
त्तिगरे, लग्गाए नुणए डसमाणे; छुल्लुकारंति आहंसु 'समणं कुकुरा डसंतु'त्ति
॥ ५०१ ॥ एत्थिक्खए जगा भुजो, वहवे वज्जभूमि फल्सासी; लठ्ठि गहाय णालीयं,

संमणा तत्थ य विहरिंसु ॥ ५०२ ॥ एवं पि तत्थ विहरंता, पुट्टपुच्चा अहेसि
 सुणएहि; संलुंचमाणा सुणएहिं, दुच्चरगाणि तत्थ लाढेहिं ॥ निधाय दंडं पाणेहिं, तं
 कायं वोसिज्जमणगारे ॥ अह गामकंटए भगवं, ते अहियासए अभिसमेच्चा ॥ ५०२ ॥
 णागो संगामसीसे वा, पारए तत्थ से महावीरे ॥ ५०३ ॥ एवं पि तत्थ लाढेहिं,
 अलद्धपुच्चो वि एगदा गामे उवसंकमंतमपडिन्नं, गामंतियंमि अप्पत्तं; पडिणिक्ख-
 मित्तु लसिंसु, एतातो परं पलेहिति ॥ ५०४ ॥ हयपुच्चो तत्थ दंडेण, अदुवा
 मुठ्ठिणा, अदु कुंताइफलेणं; अदु लेलुणा कवालेणं, हंता हंता वहवे कंदिंसु ॥ ५०५ ॥
 मंसाणि छिन्नपुच्चाइं, उठ्ठंभिया एगया कायं; परीसहाइं लुंचिंसु, अहवा पंसुणा
 उवकरिंसु ॥ उच्चालइय णिहगिंसु, अदुवा आसणाओ खलइंसु; वोसट्ठकाये पणयासी,
 दुक्खसहे भगवं अपडिन्ने ॥ ५०६ ॥ सूरुो संगामसीसे वा, संवुडे तत्थ से महा-
 वीरे; पडिसेवमाणे फल्साइं, अचले भगवं रीइत्था ॥ ५०७ ॥ एस विही अणुकंतो,
 माहणेण मईमया; बहुसो अपडिन्नेणं, भगवया एवं रीयंति, ति वेमि ॥ ५०८ ॥
तइओदेसो समत्तो ॥

ओमोदरियं चाएति, अपुट्ठेवि भगवं रोगेहिं; पुट्ठो वा से अपुट्ठो वा, णो से साति-
 ज्जाति तेइच्छं ॥ ५०९ ॥ संसोहणं च वमणं च, गायब्भंगणं च सिणाणं च; संवा
 हणं ण से कप्पे, दंतपक्खालण परिण्णाए ॥ ५१० ॥ विरए य गामधम्मेहिं, रीयति
 माहणो अवहुवाई ॥ ५११ ॥ सिसिरंमि एगदा भगवं, छायाए झाई आसीया ॥
 आयावई य गिम्हाणं, अच्छति उकुडुए अभित्तावे ॥ ५१२ ॥ अदु जावइत्थ
 लहेणं, ओयणमंथुकुम्मासेणं ॥ एयाणि तिन्नि पडिसेवे, अठ्ठमासे य जावयं भगवं
 ॥ ५१३ ॥ अवि इत्थ एगया भगवं, अद्धमासं अदुवा मासंपि ॥ अविसाहिए
 दुवे मासे, छप्पिमासे अदुवा विहरित्था ॥ रायोवरायं अपडिन्ने, अन्नगिलायमेगया
 भुंजे; छट्ठेण एगया भुंजे, अदुवा अठ्ठमेणं दसमेणं; दुवालसमेण एगया भुंजे, पेह-
 माणे समाहिं अपडिन्ने ॥ ५१४ ॥ णच्चा णं से महावीरे, णोवि य पावगं सयमकासी ॥
 अन्नेहिं वा ण कारित्था, कीरंतंमि णाणुजाणित्था ॥ ५१५ ॥ गामं पविस्स णयरं
 वा, घासमेसे कडं परट्ठाए; सुविसुद्धमेसिया भगवं, आयतजोगयाए सेवित्था
 ॥ ५१६ ॥ अदु वायसा दिगिच्छित्ता, जे अन्ने रसेसिणो सत्ता; घासेसणाए चिट्ठंति,
 सययं णिवत्तिए य पेहाए ॥ ५१७ ॥ अदु माहणं व समणं वा, गामपिंडोलगं च
 अतिहिं वा; सोवागं मूसियारं वा कुकुरं वा विठ्ठितं पुरतो ॥ वित्तिच्छेदं वज्जंतो,
 तेसिमप्पत्तियं परिहरंतो; मंदं परक्कमे भगवं, अहिंसमाणो घासमेसित्था ॥ ५१८ ॥
 अविसूइयं वा सुक्कं वा, सीयपिंडं पुराणकुम्मासं; अदु बुक्कसं पुलागं वा, लद्धे पिडे

अलङ्घ्ये दविण् ॥ ५१९ ॥ अवि ज्ञाति से महावीरे, आसणत्थे अकुक्कुए ज्ञाणं;
 उद्धमहेयं तिरियं च, पेहमाणे समाहिमपडिन्ने ॥ ५२० ॥ अकसायी विगय-
 गेही य, सङ्खवेसु अमुच्छिण् ज्ञाति; छउमत्थो वि परक्कममाणो, ण पमायं सइंपि
 कुव्वित्था ॥ ५२१ ॥ सयमेव अभिसमागम्म, आयतजोगमायसोहीए । अभिणिव्वुडे
 अमाङ्गळे आवक्कहं भगवं समिआसी ॥ एस विधी अणुक्कंतो माहणेण मईमया; बहुसो
 अपडिन्नेणं भगवया एवं रीयंति ति वेसि ॥ ५२२ ॥ चउत्थोद्देसो समत्तो ॥

॥ उवहाणसुयं नवमज्झयणं समत्तं ॥

॥ बंभचैरणाम पढमै सुयक्खंधे संपुण्णे ॥

णमो त्थु णं समणस्स भगवओ णायपुत्त-महावीरस्स विइये सुयक्खंधे

से भिक्खू वा, भिक्खुणी वा, गाहावइकुलं पिंडवायपडियाए अणुपविट्ठे समाणे, से जं पुणजाणेज्जा असणं वा पाणं वा खाइमं वा साइमं वा पाणेहिं वा पणएहिं वा वीएहिं वा, हरिएहिं वा, संसत्तं उम्मिस्सं सीओदएण वा ओसित्तं, रयसा वा परिघा-सियं, तहप्पगारं असणं वा पाणं वा खाइमं वा साइमं वा, परहत्यंसि वा परपायंसि वा, अफासुयं अणेसणिज्जंति मण्णमाणे लाभेवि संते णो पडिगाहेज्जा ॥ ५२३ ॥ से य आहच्च पडिग्गाहिए सिया से तं आयाय एगंतमवक्कमेज्जा, एगंतमवक्कमिता अहे आरामसि वा अहे उवस्सयंसि वा, अप्पंडे-अप्पपाणे-अप्पवीए, अप्पहरिए, अप्पोसे, अप्पोदए, अप्पुत्तिंग-पणग-दग-मट्ठियमक्कडासंताणए विगिंचिय विगिंचिय उम्मीसं विसोहिय विसोहिय तओ संजयामेव भुंजिज्ज वा, पीइज्ज वा, जं च णो संचाइज्जा भोत्तए वा पायए वा, से तमायाय एगंतमवक्कमिज्जा, एगंतमवक्कमिता, अहे ज्जामयंडिलंसि वा, किट्ठरासिंसि वा, तुसरासिंसि वा, सुक्कगोमयरसिंसि वा अण्ण-यरंसि वा तहप्पगारंसि थंडिलंसि पडिलेहिय २ पमजिय २ तओ संजयामेव परि-ट्ठविज्जा ॥ ५२४ ॥ से भिक्खू वा, भिक्खुणी वा, गाहावइकुलं पिंडवायपडियाए अणुपविट्ठे समाणे, से जाओ पुण ओसहीओ जाणेज्जा कसिणाओ सासिआओ अवि-दलकडाओ अतिरिच्छछिन्नाओ, अव्वोच्छिन्नाओ तरुणियं वा छिवाडि अणभिकंत-भजियं पेहाए, अफासुयं अणेसणिज्जंति मण्णमाणे लाभे संते णो पडिगाहिंज्जा ॥ ५२५ ॥ से भिक्खू वा, भिक्खुणी वा, जाव. पविट्ठे समाणे से जाओ पुण ओसहीओ जाणेज्जा, अकसिणाओ असासियाओ, विदलकडाओ, तिरिच्छछिन्नाओ, वोच्छिण्णाओ, तरुणिअं वा छिवाडिं अभिकंतं भजियं पेहाए फासुयं एसणिज्जंति मण्णमाणे लाभे संते पडिगाहेज्जा ॥ ५२६ ॥ से भिक्खू वा भिक्खुणी वा जाव पविट्ठे समाणे से जं पुण जाणेज्जा, पिहुयं वा बहुरयं वा, भुजियं वा, मंथुं वा, चाउलं वा, चाउलपलंबं वा, सइं संभजियं, अफासुयं अणेसणिज्जं मण्णमाणे लाभे संते णो पडिगाहिंज्जा ॥ ५२७ ॥ से भिक्खू वा, भिक्खुणी वा, जाव पविट्ठे समाणे से जं पुण जाणिज्जा, पिहुयं वा जाव चाउलपलंबं वा असइं भजियं दुक्खुत्तो वा भजियं तिक्खुत्तो वा भजियं फासुयं एसणिज्जं जाव लाभे संते पडिगाहिंज्जा ॥ ५२८ ॥ से भिक्खू वा भिक्खुणी वा, गाहावइकुलं जाव पविसिउकामे णो अन्नउत्थिएण वा गारत्थिएण वा परिहारिओ वा अपरिहारिएणं सद्धिं गाहावइकुलं पिंडवायपडियाए

पविसिज्ज वा णिक्खमिज्ज वा ॥५२९॥ से भिक्खू वा भिक्खुणी वा, वहिया वियारभूमिं वा, विहारभूमि वा, णिक्खममाणे पविसमाणे वा, णो अण्णउत्थिएण वा गारत्थिएण वा परिहारिओ वा अपरिहारिएण सद्धि बहिया वियारभूमिं वा विहारभूमिं वा णिक्खमिज्ज वा पविसिज्ज वा ॥५३०॥ से भिक्खू वा भिक्खुणी वा जाव पविट्ठे समाणे से णो अण्णउत्थिएस्स वा गारत्थिएस्स वा परिहारिओ वा अपरिहारिएस्स वा असणं पाणं खाइमं साइमं वा देज्जा अणुपदेज्जा वा ॥ ५३१ ॥ से भिक्खू वा भिक्खुणी वा गामाणुगामं दूइज्जमाणे णो अण्णउत्थिएण वा गारत्थिएण वा, परिहारिओ अपरिहारिएण वा, सद्धि गामाणुगामं दूइज्जिज्जा ॥ ५३२ ॥ से भिक्खू वा भिक्खुणी वा जाव पविट्ठे समाणे से जं पुण जाणिज्जा, असणं वा (४) अस्संपडियाए एगं साहम्मियं समुद्दिस्स पाणाइं, भूयाइं जीवाइं, सत्ताइं समारब्भ समुद्दिस्स कीयं पामिच्चं अच्छिज्जं अणिसट्ठं अभिहडं आहट्टु चेएइ तं तहप्पगारं असणं वा (४) पुरिसंतरकडं अपुरिसंतरकडं वा वहिया णीहडं वा अणीहडं वा अत्तट्ठियं वा अणत्तट्ठियं वा, परिभुत्तं वा अपरिभुत्तं वा आसेवियं वा अणासेवियं वा अफासुयं जाव णो पडिगाहिज्जा ॥ ५३३ ॥ एवं वहवे साहम्मिया, एगा साहम्मिणी, वहवे साहम्मिणीओ समुद्दिस्स चत्तारि आलावगा भाणियव्वा ॥ ५३४ ॥ से भिक्खू वा (२) गाहावइकुलं जाव पविट्ठे समाणे से जं पुण जाणिज्जा, असणं वा (४) वहवे समणमाहणअतिहिकिवणवणीमए पगणिय पगणिय समुद्दिस्स पाणाइं वा ४ जाव समारब्भ आसेवियं वा अफासुयं अणेसणिज्जंति मण्णमाणे लाभे संते जाव णो पडिगाहिज्जा ॥ ५३५ ॥ से भिक्खू वा (२) गाहावइकुलं जाव पविट्ठे समाणे से जं पुण जाणेज्जा, असणं वा (४) वहवे समणमाहणअतिहिकिवणवणीमए समुद्दिस्स पाणाइं (४) आहट्टु चेएइ, तं तहप्पगारं असणं वा (४) अपुरिसंतरकडं अवहिया णीहडं अणत्तट्ठियं अपरिभुत्तं अणासेवितं अफासुयं अणेसणिज्जं जाव णो पडिगाहिज्जा ॥ ५३६ ॥ अह पुण एवं जाणिज्जा पुरिसंतरकडं वहिया णीहडं अत्तट्ठियं परिभुत्तं आसेवियं फासुयं एसणिज्जं जाव पडिगाहिज्जा ॥ ५३७ ॥ से भिक्खू वा (२) गाहावइकुलं पिंडवायपडियाए पविसित्तु कामे से जाइं पुण कुलाइं जाणिज्जा, इमेसु खलु कुलेसु णितिए पिडे दिज्जइ, णितिए अग्गपिडे दिज्जइ, णितिए भाए दिज्जइ, अवट्ठभाए दिज्जइ, तहप्पगाराइं कुलाइं णितियाइं णितिओमाणाइं, णो भत्ताए वा णो पाणाए वा पविसिज्ज वा णिक्खमिज्ज वा ॥ ५३८ ॥ एयं खलु तरस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सयाजए त्ति वेमि ॥ ५३९ ॥ पढमोद्देसो समत्तो ॥

से भिक्खू वा भिक्खुणी वा गाहावइकुलं पिडवायपडियाए अणुपविट्ठे समाणे से जं पुण जाणेज्जा, असणं वा (४) अठ्ठमिपोसहिण्णसु वा, अद्धमासिण्णसु वा, मासिण्णसु वा, दोमासिण्णसु वा, तिमासिण्णसु वा, चाउमासिण्णसु वा, पंचमासिण्णसु वा, छमासिण्णसु वा, उऊसु वा, उऊसंधीसु वा, उउपरियट्ठेसु वा, बहवे समणमाहणअतिहिक्खिणवणीमगे एगाओ उक्खाओ परिणसिज्जमाणे पेहाए, दोहिं उक्खाहिं परिणसिज्जमाणे पेहाए, तिहिं उक्खाहिं परिणसिज्जमाणे पेहाए, चउहिं उक्खाहिं परिणसिज्जमाणे पेहाए, कुंभीमुहाओ वा कलोवाइओ वा, संणिहिंसंणिचयाओ वा परिणसिज्जमाणे पेहाए तहप्पगारं असणं (४) अपुरिसंतरकडं जाव अणासेवियं अफासुयं अणेसणिज्जं णो पडिगाहिज्जा ॥ ५४० ॥ अह पुण एवं जाणिज्जा पुरिसंतरकडं जाव आसेवियं फासुयं जाव पडिगाहिज्जा ॥ ५४१ ॥ से भिक्खू वा (२) जाव पविट्ठे समाणे जाइं पुण कुलाइं जाणिज्जा; तंजहा-उग्गकुलाणि वा भोगकुलाणि वा, राइण्णकुलाणि वा, खत्तियकुलाणि वा, इक्खागकुलाणि वा, हरिवंसकुलाणि वा, एसियकुलाणि वा, वेसियकुलाणि वा, गंडागकुलाणि वा, कोट्टागकुलाणि वा, गामरक्खकुलाणि वा, वोक्कसालियकुलाणि वा, अण्णयरेसु वा तहप्पगारेसु कुलेसु अदुगुंछिण्णसु अगरहिण्णसु वा, असणं वा (४) फासुयं एसणिज्जं जाव पडिगाहिज्जा ॥ ५४२ ॥ से भिक्खू वा (२) गाहावइकुलं पिडवायपडियाए अणुपविट्ठे समाणे से जं पुण जाणेज्जा असणं वा (४) समवाणसु वा, पिंडणियरेसु वा, इंदमहेसु वा, खंदमहेसु वा, रुद्धमहेसु वा, मुगुंदमहेसु वा, भूयमहेसु वा, जक्खमहेसु वा, णागमहेसु वा, थूभमहेसु वा, स्खमहेसु वा, गिरिमहेसु वा, दरिमहेसु वा, अगडमहेसु वा, तडागमहेसु वा, दहमहेसु वा, णईमहेसु वा, सरमहेसु वा, सागरमहेसु वा, आगरमहेसु वा, अण्णयरेसु वा तहप्पगारेसु विरुवरुवेसु महामहेसु वट्टमाणेसु, बहवे समणमाहणअतिहिक्खिणवणीमगे एगाओ उक्खाओ परिणसिज्जमाणे पेहाए, दोहिं जाव संणिहिंसंणिचयाओ वा परिणसिज्जमाणे पेहाए तहप्पगारं असणं वा (४) अपुरिसंतरकडं जाव णो पडिगाहिज्जा ॥ ५४३ ॥ अह पुण एवं जाणिज्जा, दिण्णं जं तेसिं दायव्वं, अह तत्थ भुंजमाणे पेहाए गाहावइभारियं वा, गाहावइभगिणि वा, गाहावइपुत्तं वा, गाहावइधूयं वा, सुण्हं वा, धाईं वा, दासं वा, दासिं वा, कम्मकरं वा, कम्मकरिं वा, से पुव्वामेव आलोएज्जा, आउसि त्ति वा भगिणित्ति वा, दाहिसि मे इत्तो अन्नयरं भोग्गणजायं? से सेवं वयंतस्स परो असणं वा (४) आहट्ठु दलएज्जा तहप्पगारं असणं वा (४) सयं वा पुण जाएज्जा, परो वा से देज्जा, फासुयं जाव पडिगाहिज्जा ॥ ५४४ ॥ से भिक्खू वा (२) परं अद्धजोयणमेराए

संखडिं णच्चा संखडिपडियाए णो अभिसंधारेज्जा गमणाए ॥ ५४५ ॥ से भिक्खू वा (२) पाईणं संखडिं णच्चा पडीणं गच्छे अणाढायमाणे पडीणं संखडिं णच्चा पाईणं गच्छे अणाढायमाणे दाहिणं संखडिं णच्चा उदीणं गच्छे अणाढायमाणे, उदीणं संखडिं णच्चा दाहिणं गच्छे अणाढायमाणे ॥ ५४६ ॥ जत्थेव सा संखडी सिया, तंजहा गामंसि वा, णगरंसि वा, खेडंसि वा, कव्वडंसि वा, मंडवंसि वा, पट्टगंसि वा, आगरंसि वा, दोणमुहंसि वा, णिगमंसि वा, आसमंसि वा, रायहाणिसि वा, जाव संणिवेसंसि वा, संखडिं संखडिपडियाए णो अभिसंधारेज्जा गमणाए, केवली बूया 'आयाणमेयं' ॥ ५४७ ॥ संखडिं संखडिपडियाए अभिसंधारेमाणे आहाकम्मियं वा उद्देसियं, मीस-जायं वा, कीयगडं वा पामिच्चं वा, अच्छेज्जं वा, अणिसट्ठं वा, अभिहडं वा, आहट्टु दिज्जमाणं भुंजिज्जा, असंजए भिक्खुपडियाए, खुड्डियदुवारियाओ महल्लियदुवारियाओ कुज्जा, महल्लियदुवारियाओ खुड्डियदुवारियाओ कुज्जा, समाओ सिज्जाओ विसमाओ कुज्जा, विसमाओ सिज्जाओ समाओ कुज्जा, पवायाओ सिज्जाओ णिवायाओ कुज्जा, णिवायाओ सिज्जाओ पवायाओ कुज्जा, अंतो वा, वहिं वा उवस्सयस्स हरियाणिं छिंदिय २ दालिय २ संधारगं संधारिज्जा एस विलुंगयामो सिज्जाए तम्हा से संजए णियंठे अण्णयरं वा तहप्पगारं पुरे संखडिं वा पच्छासंखडि वा संखडि संखडिपडियाए णो अभिसंधारिज्ज गमणाए ॥ ५४८ ॥ एयं खलु तस्स भिक्खुस्स भिक्खुणीए वा साम-ग्गियं जं सव्वट्ठेहिं समिए सहिए सयाजए त्ति वेमि ॥ ५४९ ॥ **वीओद्देसो समत्तो ॥**

से एगया अण्णतरं संखडिं आसित्ता पिपित्ता छट्ठेज्ज वा वमेज्ज वा, भुत्ते वा से णो सम्मं परिणमिज्जा अण्णतरे वा से दुक्खे रोयातंके समुपज्जिज्जा, केवली बूया आयाणमेयं ॥ ५५० ॥ इह खलु भिक्खू गाहावइहिं वा, गाहावइणीहिं वा, परिवा-यएहिं वा, परिवाइयाहिं वा, एगज्जं सद्धि सोंडं पाउं भो वतिमिस्सं हुरत्था वा, उवस्सयं पडिलेहेमाणे णो लमिज्जा, तमेव उवस्सयं संमिस्सिभावमावज्जिज्जा अण्ण-मण्णे वा से मत्ते विप्परियासियभूए इत्थिविग्गहे वा किलीबे वा तं भिक्खुं उवसंक-मित्तु बूया 'आउसंतो समणा अहे आरामंसि वा, अहे उवस्सयंसि वा, राओ वा, वियाले वा, गामधम्मणियंतियं कट्ठु, रहस्सियंमेहुणधम्मपरियारणाए आउट्टामो' तं चेवेगइओ साइज्जिज्जा, अकरणिज्जं चेयं संखाए । एते आयतणाणि संति संचिज्जमाणा पचवाया भवंति, तम्हा से संजए णियंठे तहप्पगारं पुरेसंखडिं वा पच्छासंखडि वा संखडिं संखडिसंपडियाए णो अभिसंधारिज्जा गमणाए ॥ ५५१ ॥ से भिक्खू वा (२) अनयरिं संखडिं वा सोच्चा णिसम्म संपरिहावइ उस्सुयभूयेण अप्पाणेणं 'धुवा संखडी' णो संचाएइ, तत्थ इयरेयरेहिं कुलेहिं सामुदाणियं एसियं वेसियं पिडवायं पडिगा-

हिता आहारं आहारेत्तए, माइट्ठाणं संपासे णो एवं करिज्जा, से तत्थ कालेण अणुप-
 विसित्ता तत्थेयरेयरेहिं कुलेहिं सामुदाणियं एसियं वेसियं पिडवायं पडिगाहिता आहारं
 आहारिज्जा ॥ ५५२ ॥ से भिक्खू वा (२) से जं पुण जाणेज्जा गामं वा जाव
 रायहाणिं वा, इमंसि खलु गामंसि वा जाव रायहाणिंसि वा संखडि सिया तंपि य
 गामं वा जाव रायहाणिं वा संखडिं संखडिपडियाए णो अभिसंधारेज्जा गमणाए,
 केवली वूया आयाणमेयं ॥ ५५३ ॥ आइण्णा अवमा णं संखडि अणुपविस्समाणस्स
 पाएण वा पाए अकंतपुव्वे भवइ, हत्थेण वा हत्थे संचालियपुव्वे भवइ, पाएण वा
 पाए आवडियपुव्वे भवइ, सीसेण वा सीसे संघट्टियपुव्वे भवइ, काएण वा काए
 संखोभियपुव्वे भवइ, दंडेण वा मुठ्ठिणा वा लेलुणा वा कवालेण वा अभिहयपुव्वे वा
 भवइ, सीओदएण वा उस्सित्तपुव्वे भवइ, रयसा वा परिघासियपुव्वे भवइ, अणेस-
 णिज्जेग वा परिभुत्तपुव्वे भवइ, अण्णेसिं वा दिज्जमाणे पडिगाहियपुव्वे भवइ, तम्हा
 से संजए णिग्गंथे तहप्पगारं आइण्णाऽवमा णं संखडिं संखडिपडियाए नो अभिसं-
 धारिज्जा गमणाए ॥ ५५४ ॥ से भिक्खू वा (२) गाहावइकुलं पिंडवायपडियाए
 पविट्ठे समाणे से जं पुण जाणेज्जा, असणं वा (४) एसणिज्जं सिया अणेसणिज्जं सिया
 वित्तिगिच्छसमावण्णेणं अप्पाणेणं असमाहडाए लेस्साए तहप्पगारं असणं वा (४)
 लामे संते णो पडिगाहिज्जा ॥ ५५५ ॥ से भिक्खू वा (२) गाहावइकुलं पविसित्तु
 कामे सव्वं भंडगमायाय गाहावइकुलं पिंडवायपडियाए पविसिज्ज वा णिक्खमिज्ज
 वा ॥ ५५६ ॥ से भिक्खू वा (२) वहिया वियारभूमिं वा विहारभूमि वा णिक्ख-
 ममाणे पविसमाणे वा सव्वं भंडगमायाए वहिया वियारभूमिं वा विहारभूमिं वा
 णिक्खमिज्ज वा पविसिज्ज वा ॥ ५५७ ॥ से भिक्खू वा (२) गामाणुगामं दूइज्ज-
 माणे सव्वं भंडगमायाए गामाणुगामं दूइज्जिज्जा ॥ ५५८ ॥ से भिक्खू वा (२)
 अह पुण एवं जाणिज्जा तिक्वदेसियं वासं वासेमाणं पेहाए, तिक्वदेसियं महियं
 सण्णिचयमाणं पेहाए महावाएण वा रयं समुद्धयं पेहाए तिरिच्छसंपाइमा वा तसा
 पाणा संथडा सन्निचयमाणा पेहाए, से एवं णच्चा णो सव्वं भंडगमायाय गाहावइ-
 कुलं पिंडवायपडियाए पविसिज्ज वा णिक्खमिज्ज वा वहिया वियारभूमि वा विहार-
 भूमिं वा पविसिज्ज वा णिक्खमिज्ज वा गामाणुगामं दूइज्जिज्जा ॥ ५५९ ॥ से भिक्खू
 वा (२) से जाइं पुण कुलाइं जाणिज्जा, तंजहा-खत्तियाण वा, राईण वा, कुराईण
 वा, रायपेसियाण वा, रायवंसट्ठियाण वा अंतो वा वहिं वा सण्णिविठ्ठाण वा, गच्छंताण
 वा णिमंतेमाणाण वा अणिमंतेमाणाण वा असणं वा (४) लामे संते णो पडिगा-
 हिज्जा त्ति वेमि ॥ ५६० ॥ तइओदेसो समत्तो ॥

से भिक्खू वा (२) जाव पविट्ठे समाणे से जं पुण जाणेज्जा, आहेणं वा पहेणं वा, हिंगोलं वा, संमेलं वा हीरमाणं संपेहाए अंतरा से मग्गा बहुपाणा, बहुवीया, बहुहरिया, बहुओसा, बहुउदया, बहुउत्तिगपणगदगमट्टियमक्कडासंताणगा, बहवे तत्थ समणमाहणअतिहिकिवणवणीमगा उवागता उवागमिस्संति तत्थाइण्णावित्ती णो पण्णस्सणि क्खमणपवेसाए, णो वायणपुच्छणपरियट्ठणाणुपेहधम्ममाणुओगचिंताए, सेवं णच्चा तहप्पगारं पुरेसंखडिं वा पच्छासंखडिं वा संखडिं संखडिपडियाए णो अभिसंधारेज्जा गमणाए ॥ ५६१ ॥

से भिक्खू वा (२) गाहावइकुलं पिंडवायपडियाए पविट्ठे समाणे से जं पुण जाणेज्जा, आहेणं वा जाव संमेलं वा हीरमाणं पेहाए, अंतरा से मग्गा अप्पंडा जाव अप्पसंताणगा णो जत्थ बहवे समणमाहणा जाव उवागमिस्संति, अप्पाइण्णावित्ती पण्णस्स गिक्खमणपवेसाए पण्णस्स वायणपुच्छणपरियट्ठणाणुपेहधम्ममाणुओगचिंताए सेवं णच्चा तहप्पगारं पुरेसंखडिं वा पच्छासंखडिं वा संखडिपडियाए अभिसंधारेज्ज गमणाए ॥ ५६२ ॥

से भिक्खू वा (२) गाहावइकुलं जाव पविसिउकामे जं पुण जाणेज्जा, खीरिणियाओ गावीओ खीरिज्जमाणीओ पेहाए असणं वा (४) उवसंखडिज्जमाणं पेहाए पुरा अप्पजूहिए सेवं णच्चा णो गाहावइकुलं पिंडवायपडियाए गिक्खमिज्ज वा पविसिज्ज वा से तमायाए एगंतमवक्कमिज्जा, अणावायमसंलोए चिट्ठिज्जा, अह पुण एवं जाणेज्जा खीरिणीओ गावीओ खीरियाओ पेहाए, असणं वा (४) उवक्खडियं पेहाए पुराए जूहिए से एवं णच्चा तओ संजयामेव गाहावइकुलं पिंडवायपडियाए पविसिज्जवा गिक्खमिज्ज वा ॥ ५६३ ॥

भिक्खागाणामेगे एवमाहंसु समाणा वा वसमाणा वा गामाणुगामं दूइज्जमाणे 'खुट्ठाए खलु अयं गामे संगिख्खाए णो महालए से हंता, भयंतारो वाहिरगाणि गामाणि भिक्खायरियाए वयह ॥ ५६४ ॥ संति तत्थेगइयस्स भिक्खुस्स पुरे संथुया वा पच्छासंथुया वा परिवसंति, तंजहा-गाहावइ वा, गाहावइणीओ वा, गाहावइपुत्ता वा, गाहावइधूयाओ वा, गाहावइसुण्हाओ वा, धाईओ वा, दासा वा, दासीओ वा, कम्मकरा वा, कम्मकरीओ वा, तहप्पगाराइं कुलाइं पुरे संथुयाणि वा पच्छासंथुयाणि वा, पुच्चामेव भिक्खायरियाए अणुपविसिस्सामि अविय इत्थ लभिस्सामि, पिंडं वा लोयं वा, असणं वा, पाणं वा, खीरं वा, दधि वा, घयं वा, गुलं वा, तेहं वा, सक्कुलि, फाणियं वा, पूयं वा, सिहरिणि वा, तं पुच्चामेव भुच्चा पिच्चा पडिग्गहं संलिहिय संमज्जिय तओ पच्छा भिक्खूहिं सद्धि गाहावइकुलं पिंडवायपडियाए पविसिस्सामि गिक्खमिस्सामि वा, माइट्ठाणं संपासे, तं णो एवं करेज्जा, से तत्थ भिक्खूहिं सद्धि कालेण अणुपविसित्ता, तत्थियरेयरेहिं कुलेहिं सामुदाणियं एसियं

वेसियं पिंडवायं पडिगार्हिता आहारं आहारिज्जा ॥ ५६६ ॥ एयं खलु तस्स भिक्खुस्स वा भिक्खुणीए वा सामग्गियं ॥ ५६६ ॥ **चउत्थोहेसो समत्तो ॥**

से भिक्खू वा (२) जाव पविट्ठे समाणे से जं पुण जाणिज्जा, अग्गपिंडं उक्खिप्पमाणं पेहाए, अग्गपिंडं णिक्खिप्पमाणं पेहाए अग्गपिंडं हीरमाणं पेहाए, अग्गपिंडं परिभाइज्जमाणं पेहाए, परिभुंजमाणं पेहाए, अग्गपिंडं परिट्ठविज्जमाणं पेहाए, पुरा असिणाइ वा, अवहाराइ वा पुरा जत्यन्ने समणमाहणअतिहिकिवण-वणीमगा खद्धं खद्धं उवसंक्रमंति, से हंता अहमवि खद्धं २ उवसंक्रमामि, माइठ्ठाणं संकासे णो एवं करिज्जा ॥ ५६७ ॥ से भिक्खू वा, (२) जाव पविट्ठे समाणे अंतरा से वप्पाणि वा, फलिहाणि वा, पागाराणि वा, तोरणाणि वा, अग्गलाणि वा, अग्गलपासगाणि वा सइ परक्कमे संजयामेव परक्कमिज्जा, णो उज्जुयं गच्छिज्जा, केवली वूया आयाणमेयं ॥ ५६८ ॥ से तत्थ परक्कममाणे पयलिज्ज वा, पक्खलेज्ज वा पवडिज्ज वा, से तत्थ पयलेमाणे वा पक्खलेज्जमाणे पवडमाणे वा, तत्थ से काये उच्चारणे वा पासवणे वा खेले वा सिंघाणे वा, वंतेण वा पित्तेण वा, पूएण वा, सुक्केण वा, सोणिएण वा, उवलित्ते सिया, तहप्पगारं कायं णो अणंतरहि-याए पुढवीए णो ससिणिद्धाए पुढवीए, णो ससरक्खाए पुढवीए, णो चित्तमंताए सिलाए, णो चित्तमंताए लेलूए, कोलावासंसि वा, दारुए जीवपइट्ठिए सअंडे सपाणे जाव ससंताणए, णो आमज्जिज्ज वा पमज्जिज्ज वा, संलिहिज्ज वा, विलिहिज्ज वा, उव्वलिज्ज वा, उवट्ठिज्ज वा, आयाविज्ज वा, पयाविज्ज वा, से पुव्वामेव अप्पससरक्खं तणं वा, पत्तं वा, कट्ठं वा, सक्करं वा, जाइज्जा, जाइत्ता सेतमायाय एगंतमवक्कमिज्जा, २ अहे आमथंडिलंसि वा, जाव अण्णयरंसि वा, तहप्पगारंसि पडिलेहिय २ पमज्जिय २ तओ संजयामेव आमज्जिज्ज वा जाव पयाविज्ज वा ॥ ५६९ ॥ से भिक्खू वा (२) जाव पविट्ठे समाणे से जं पुण जाणेज्जा गोणं वियालं पडिपहे पेहाए, महिसं वियालं पडिपहे पेहाए एवं मणुस्सं आसं हत्थिं सीहं वग्घं विगं दीवियं अच्छं तरच्छं परिसरं सियालं विरालं सुणयं कोलसुणयं कोकंतियं चित्ताचेल्लरयं वियालं पडिपहे पेहाए सइपरक्कमे संजयामेव परक्कमेज्जा णो उज्जुयं गच्छेज्जा ॥ ५७० ॥ से भिक्खू वा (२) जाव समाणे अंतरा से ओवाओ वा, खाणू वा, कंटए वा, घसी वा, भिल्ला वा, विसमे वा, विज्जले वा, परियावज्जिज्जा, सति परक्कमे संजयामेव परक्कमेज्जा णो उज्जुयं गच्छिज्जा ॥ ५७१ ॥ से भिक्खू वा (२) गाहावइकुलस्स दुवार-वाहं कंटक्कोदियाए परिपिहियं पेहाए तेसिं पुव्वामेव उग्गहं अण्णुन्नविय अपडि-लेहिय अपमज्जिय णो अवंगुणिज्ज वा, पविसिज्ज वा णिक्खमिज्ज वा, तेसिं पुव्वामेव

उगहं अणुन्नविय पडिलेहिय २ पमजिय २ तओ संजयामेव अवंगुणिज्ज वा पविसेज्ज वा णिक्खमेज्ज वा ॥ ५७२ ॥ से भिक्खू वा (२) जाव समाणे से जं पुण जाणेज्जा, समणं वा, माहणं वा, गामपिंडोलगं वा, अतिहिं वा, पुव्वपविट्ठं पेहाए णो तेसिं संलोए सपडिदुवारे चिट्ठेज्जा, केवली बूया आयाणमेयं ॥ ५७३ ॥ पुरा पेहाए तस्सट्ठाए परो असणं वा, (४) आहट्ठु दलएज्जा अह भिक्खूणं पुव्वोवदिट्ठा एस पइन्ना एस हेऊ, एस उवएसो, जं णो तेसिं संलोए सपडिदुवारे चिट्ठेज्जा से तमायाए एगंतमवक्कसिज्जा अणावायमसंलोए चिट्ठेज्जा ॥ ५७४ ॥ से परो अणावायमसंलोए चिट्ठमाणस्स असणं वा (४) आहट्ठु दलएज्जा से य वदेज्जा “आउसंतो समणा इमे भे असणे वा (४) सव्वजणाए निसिठ्ठे, तं भुंजह च णं परिभाएह च णं” तं चेगइओ पडिगाहेत्ता तुसिणीओ उवेहेज्जा, अवियाइ एयं मममेव सिया एवं माइट्ठाणं संफासे, णो एवं करेज्जा, से तमायाए तत्थ गच्छेज्जा (२) से पुव्वामेव आलोएज्जा, “आउसंतो समणा, इमे भे असणं वा (४) सव्व जणाए णिसिठ्ठे तं भुंजह च णं परिभाएह च णं” सेवं वदंतं परो वएज्जा ‘आउसंतो समणा, तुमं चेव णं परिभाएहि, से तत्थ परिभाएमाणे णो अप्पणो खद्धं २ डायं २ ऊसढं २ रसियं २ मणुजं २ णिद्धं २ लुक्खं २ से तत्थ अमुच्छिए अगिद्धे अगडिए अणज्झोववण्णे, बहुसममेव, परिभाएज्जा ॥ ५७५ ॥ से णं परिभाएमाणं परो वएज्जा ‘आउसंतो समणा मा णं तुमं परिभाएहि सव्वे वेगतिया ठिया उ भोक्खामो वा पाहामो वा’ से तत्थ भुंजमाणे णो अप्पणा खद्धं २ जाव लुक्खं २ से तत्थ अमुच्छिए (४) बहुसममेव भुंजिज्ज वा पीइज्ज वा ॥ ५७६ ॥ से भिक्खू वा (२) जाव समाणे से जं पुण जाणिज्जा, समणं वा, माहणं वा, गामपिंडोलगं वा, अतिहिं वा, पुव्वपविट्ठं पेहाए णो ते उवाइक्कम्म पविसेज्ज वा ओभासेज्ज वा से तमायाय एगंतमवक्कमेज्जा अणावायमसंलोए चिट्ठिज्जा, अह पुण एवं जाणिज्जा, पडिसेहिए वा दिन्ने वा तओ तंसि णियत्तिए संजयामेव पविसिज्ज वा ओभासिज्ज वा ॥ ५७७ ॥ एयं खलु तस्स भिक्खुस्स भिक्खुणीए वा सामग्गियं ॥ ५७८ ॥ पंचमोद्देशो समत्तो ॥

से भिक्खू वा (२) जाव समाणे से जं पुण जाणेज्जा, रसेसिणो बहवे पाणा घासेसणाए संथडे संणिवइए पेहाए तंजहा-कुक्कुडजाइयं वा, सूयरजाइयं वा अगगपिंडंति वा वायसा संथडा संणिवइया पेहाए सइ परक्कमे संजयामेव परक्कमेज्जा नो उज्जुयं गच्छिज्जा ॥ ५७९ ॥ से भिक्खू वा (२) जाव पविट्ठे समाणे नो गाहावइकुलस्स दुवारसाहं अवलंबिय २ चिट्ठेज्जा, नो गाहावइकुलस्स दगच्छइणमत्तए

चिठ्ठिजा, नो गाहावइकुलस्स चंदणिउयए चिठ्ठेजा, णो० सिणाणस्स वा वच्चस्स वा संलोए सपडिदुवारे चिठ्ठिजा, णो गाहावइकुलस्स आलोयं वा थिग्गलं वा संधिं वा दग्गभवणं वा बाहाउ पगिज्झिय २ अंगुलियाए वा उद्दिसिय २ उण्णामिय २ अवन्मिय २ णिज्जाइजा, णो गाहावइ अंगुलियाए उद्दिसिय २ जाइजा, णो गाहावइ अंगुलियाए चालिय २ जाएजा, णो गाहावइ अंगुलियाए तज्जिय २ जाएजा, णो गाहावइ अंगुलियाए उक्खुलंपिय २ जाएजा, णो गाहावइ वंदिय २ जाएजा, णो वयणं फस्सं वइजा ॥ ५८० ॥ अह तत्थ कंचि भुंजमाणं पेहाए, तंजहा-गाहावइ वा जाव कम्मकरिं वा से पुव्वामेव आलोइजा, “आउसो त्ति वा, भइणि त्ति वा दाहिसि मे एत्तो अन्नयरं भोयणजायं” से एवं वयंतस्स परो हत्थं वा मत्तं वा दव्वि वा भायणं वा सीओदगवियडेण वा, उसिणोदगवियडेण वा, उच्छोलेज्ज वा, पहोएज्ज वा, से पुव्वामेव आलोएजा “आउसो त्ति, वा भइणित्ति वा, मा एयं तुमं हत्थं वा, मत्तं वा, दव्वि वा, भायणं वा, सीओदगवियडेण वा उसिणोदगवियडेण वा, उच्छोलेहि वा पहोवेहि वा, अभिकंखसि मे दाउं एमेव दलयाहि” से सेवं वयंतस्स परो हत्थं वा (४) सीओदगवियडेण वा २ उच्छोलेत्ता पहोइत्ता आहट्ठु दलएजा तहप्पगारेण पुरे कम्मकएणं हत्थेण वा (४) असणं वा (४) अफासुयं अणेसणिज्जं जाव णो पडिगाहिजा, अह पुण एवं जाणिजा णो पुरेकम्मएणं उदउल्लेणं तहप्पगारेण वा ससिणिद्धेण वा हत्थेण वा (४) असणं वा (४) अफासुयं जाव णो पडिगाहिजा अह पुण एवं जाणेजा णो उदउल्लेण ससिणिद्धेणं सेसं तं चेव, एवं ससरक्खे, मट्ठिया, ऊसे हरियाले, हिं गुलए, मणोसिला, अंजणे, लोणे, गेरुय, वन्निय, सेढिय, सोरठ्ठिय पिट्ठ कुक्कस उकुट्ठ संसट्ठेणं ॥ ५८१ ॥ अह पुण एवं जाणिजा, णो असंसट्ठे, संसट्ठे तहप्पगारेण संसट्ठेण हत्थेण वा (४) असणं वा (४) फासुयं जाव पडिगाहिजा ॥ ५८२ ॥ से भिक्खू वा (२) से जं पुण जाणेजा पिहुयं वा बहुरयं वा जाव चाउलपलवं वा, असंजए भिक्खुपडियाए चित्तमंताए सिलाए जाव मक्कडासंताणाए कुट्टिसु वा, कुट्टिति वा, कुट्टिस्संति वा, उप्फणिसु वा (३) तहप्पगारं पिहुयं वा, जाव चाउलपलवं वा, अफासुयं जाव णो पडिगाहिजा ॥ ५८३ ॥ से भिक्खू वा (२) जाव समाणे से जं पुण जाणिजा विलं वा लोणं उब्भियं वा लोणं असंजए भिक्खुपडियाए चित्तमंताए सिलाए जाव संताणाए भिंदिसु वा, भिंदंति वा, भिंदिस्संति वा, रुच्चिसु वा (३) विलं वा लोणं उब्भियं वा लोणं अफासुयं जाव णो पडिगाहिजा ॥ ५८४ ॥ से भिक्खू वा जाव समाणे से जं पुण जाणेजा असणं वा (४) अगणिणिक्खत्तं तहप्पगारं

असणं वा (४) अफासुयं लामे संते णो पडिगाहिज्जा, केवली बूया, “आयाणमेयं” असंजए भिक्खुपडियाए उस्सिचमाणे वा, निस्सिचमाणे वा, आमज्जमाणे वा, पमज्जमाणे वा, ओयारेमाणे वा, उव्वत्तमाणे वा, अगणिजीवे हिंसिज्जा, अह भिक्खूणं पुव्वोवदिट्ठा एस पइण्णा, एस हेऊ, एस कारणे, एसुवएसे, जं तहप्पगारं असणं वा, (४) अगणिणिक्खित्तं अफासुयं अणेसणिज्जं लामे संते णो पडिगाहिज्जा ॥ ५८५ ॥ एवं खलु तस्स भिक्खुस्स वा भिक्खुणीए वा सामग्गियं ॥ ५८६ ॥

छट्ठोद्देशो समत्तो ॥

से भिक्खू वा (२) जाव समाणे से जं पुण जाणेज्जा असणं वा (४) खंधंसि वा थंभंसि वा, मंचंसि वा, मालंसि वा, पासायंसि वा, हम्मियतलंसि वा, अन्नयरंसि वा, तहप्पगारंसि अंतलिक्खजायंसि उवगिक्खित्ते सिया, तहप्पगारं मालोहडं असणं वा (४) जाव अफासुयं णो पडिगाहिज्जा, केवली बूया “आयाणमेयं” असंजए भिक्खुपडियाए पीढं वा फलगं वा, गिस्सेणि वा, उदूहलं वा, आहट्ट उस्सविय दुरुहेज्जा, से तत्थ दुरुहमाणे, पयलेज्जा वा पवडेज्जा वा, से तत्थ पयलेमाणे वा पवडेमाणे वा, हत्थं वा, पायं वा, वाहु वा, ऊरुं वा, उदरं वा, सीसं वा, अण्णयरं वा कायंसि इंदियजायं लूसिज्ज वा, पाणाणि वा, भूयाणि वा, जीवाणि वा, सत्ताणि वा, अभिहणिज्ज वा, वित्तासिज्ज वा, लेसिज्ज वा, संघसिज्ज वा, संघट्ठिज्ज वा, परियाविज्ज वा, किलामिज्ज वा, ठाणाओ ठाणं संकामिज्ज वा, तं तहप्पगारं मालोहडं असणं वा, (४) लामे संते णो पडिगाहिज्जा ॥ ५८७ ॥ से भिक्खू वा, (२) जाव समाणे से जं पुण जाणेज्जा, असणं वा (४) कुट्टियाओ वा कोलेज्जाओ वा, असंजए भिक्खुपडियाए, उक्कुज्जिय अवउज्जिय ओहरिय, आहट्ट, दलइज्जा, तहप्पगारं असणं वा, (४) मालोहडंति णच्चा लामे संते णो पडिगाहिज्जा ॥ ५८८ ॥ से भिक्खू वा (२) जाव समाणे से जं पुण जाणेज्जा असणं वा (४) मट्टियाओलित्तं तहप्पगारं असणं वा (४) जाव लामे संते णो पडिगाहिज्जा । केवली बूया ‘आयाण, मेयं’ असंजए भिक्खुपडियाए मट्टिओलित्तं असणं वा (४) उब्भिदमाणे पुढवीकायं समारंभिज्जा, तहा तेऊ-वाऊ-वणस्सइ-तस कायं समारंभिज्जा पुणरवि ओलिंपमाणे पच्छाकम्मं करिज्जा । अह भिक्खूणं पुव्वोवदिट्ठा जाव जं तहप्पगारं मट्टिओलित्तं असणं वा, (४) लामे संते णो पडिगाहिज्जा ॥ ५८९ ॥ से भिक्खू वा (२) जाव पविट्ठे समाणे से जं पुण जाणेज्जा असणं वा (४) पुढविकायपइट्ठियं तहप्पगारं असणं वा (४) अफासुयं जाव णो पडिगाहिज्जा ॥ ५९० ॥ से भिक्खू वा भिक्खुणी वा से जं पुण जाणिज्जा, असणं वा

(४) आउकायपइठियं चेव एवं अगणिकायपइठियं लामे संते णो पडिगाहिज्जा, 'केवलीबूया' "आयाणमेयं" असंजए भिक्खूपडियाए अगणि उस्सक्किय २ णिस-
 क्किय २ ओहरिय २ आहट्टु, दलएज्जा अह भिक्खूणं पुव्वोवदिट्ठा जाव णो पडिगा-
 हिज्जा ॥ ५९१ ॥ से भिक्खू वा (२) जाव पविट्ठे समाणे से जं पुण जाणिज्जा,
 असणं वा (४) अञ्चसिणं असंजए भिक्खुपडियाए, सुप्पेण वा, विहुयणेण वा,
 तालियंटेण वा, पत्तेण वा, साहाए वा, साहाभंगेण वा, पिहुणेण वा, पिहुणहत्थेण
 वा, चेलेण वा, चेलकन्नेण वा, हत्थेण वा, मुहेण वा, फुमिज्ज वा, वीएज्ज वा,
 से पुव्वामेव आलोएज्जा "आउसो त्ति वा, भगिणि त्ति वा, मा एयं तुमं, असणं
 वा, (४) अञ्चसिणं सुप्पेण वा जाव फुमाहि वा, वीयाहि वा, अभिकंखसि मे दाउं
 एमेव दल्याहि" से सेवं वयंतस्स परो सुप्पेण वा जाव वीइत्ता आहट्टु दलएज्जा,
 तहप्पगारं असणं वा (४) अफासुयं जाव णो पडिगाहिज्जा ॥ ५९२ ॥ से भिक्खू
 वा (२) जाव समाणे से जं पुण जाणेज्जा, असणं वा (४) वणस्सइकायपइठियं
 तहप्पगारं असणं वा (४) वणस्सइकायपइठियं अफासुयं अणेसणिज्जं लामे संते
 णो पडिगाहिज्जा, एवं तसकाएवि ॥ ५९३ ॥ से भिक्खू वा (२) जाव पविट्ठे
 समाणे से जं पुण पाणगजायं जाणेज्जा, तंजहा-उस्सेइमं वा, संसेइमं वा, चाउलोदगं
 वा, अण्णयरं वा तहप्पगारं पाणगजायं, अहुणाधोयं, अणंबिलं, अवोक्कंतं, अपरिणयं
 अविद्धत्थं, अफासुयं, अणेसणिज्जं, मण्णमाणे णो पडिगाहिज्जा ॥ ५९४ ॥ अह पुण
 एवं जाणिज्जा, चिराधोयं, अंबिलं, वुक्कंतं, परिणयं, विद्धत्थं, फासुयं जाव पडिगा-
 हिज्जा ॥ ५९५ ॥ से भिक्खू वा, (२) जाव पविट्ठे समाणे से जं पुण पाणगजायं
 जाणेज्जा, तंजहा-तिलोदगं वा, तुसोदगं वा, जवोदगं वा, आयामं वा, सोवीरं वा,
 सुद्धवियडं वा, अण्णयरं वा तहप्पगारं पाणगजायं पुव्वामेव आलोएज्जा "आउसो
 त्ति वा, भगिणित्ति वा, दाहिसि मे एत्तो अन्नयरं पाणगजायं ?" से सेवं वयंतं परो
 वएज्जा "आउसंतो समणा, तुमं चेवेदं पाणगजायं पडिग्गहेण वा उस्सिचियाणं २
 ओयत्तियाणं गिण्हाहि" तहप्पगारं पाणगजायं सयं वा गिणिहज्जा, परो वा से दिज्जा,
 फासुयं लामे संते पडिगाहिज्जा ॥ ५९६ ॥ से भिक्खू वा (२) से जं पुण पाणगं
 जाणेज्जा अणंतरहियाए पुढवीए जाव संताणए ओहट्टु निक्खित्ते सिया असंजए
 भिक्खुपडियाए, उदउल्लेण वा, ससिणिद्धेण वा, सकसाएण वा, मत्तेण वा सीओद-
 एण वा, संभोएत्ता आहट्टु दलएज्जा तहप्पगारं पाणगजायं अफासुयं लामे संते णो
 पडिगाहिज्जा ॥ ५९७ ॥ एयं खलु तस्स भिक्खुस्स भिक्खुणीए वा सामग्गियं
 ॥ ५९८ ॥ सत्तमोद्देसो समत्तो ॥

से भिक्खू वा (२) जाव पविट्ठे समाणे से जं पुण पाणगजायं जाणिज्जा, तंजहा-अंबपाणगं वा, अंबाडगपाणगं वा, कविट्ठपाणगं वा, माउलिंगपाणगं वा, मुद्दियापाणगं वा, दाडिमपाणगं वा, खजूरपाणगं वा, णालिएरपाणगं वा, करीर-पाणगं वा, कोलपाणगं वा, आमलगपाणगं वा, चिंचापाणगं वा, अण्णयरं वा तहप्पगारं पाणगजायं सकण्णयं सवीयगं असंजए भिक्खुपडियाए छव्वेण वा दूसेण वा, वालगेण वा, आवीलियाण वा, पवीलियाण परिसाइयाण आहट्टु दलएज्जा, तहप्पगारं पाणगजायं अफासुयं लामे संते णो पडिगाहिज्जा ॥ ५९९ ॥ से भिक्खू वा (२) जाव पविट्ठे समाणे, से आगंतारेसु वा, आरामागारेसु वा, गाहावडकुलेसु वा, परियावसहेसु वा, अन्नगंधाणि वा, पाणगंधाणि वा, सुरभिगंधाणि वा, अग्घाय २ से तत्थ आसायवडियाए मुच्छिए, गिद्धे, गडिए, अज्झोववन्ने 'अहो गंधो २' णो गंधमाघाइज्जा ॥ ६०० ॥ से भिक्खू वा (२) जाव समाणे, से जं पुण जाणेज्जा, सालुयं वा, विरालियं वा, सासवणालियं वा, अण्णतरं वा तहप्पगारं आमगं असत्थपरिणयं अफासुयं जाव णो पडिगाहिज्जा ॥ ६०१ ॥ से भिक्खू वा (२) जाव पविट्ठे समाणे से जं पुण जाणेज्जा, पिप्पलिं वा, पिप्पलि-चुण्णं वा, मिरियं वा, मिरियचुण्णं वा, सिगबेरं वा, सिगबेरचुण्णं वा, अण्णतरं वा तहप्पगारं आमगं असत्थपरिणयं अफासुयं जाव णो पडिगाहिज्जा ॥ ६०२ ॥ से भिक्खू वा (२) जाव पविट्ठे समाणे से जं पुण जाणेज्जा, पलंबजायं तंजहा-अंबपलंबं वा, अंबाडगपलंबं वा, तालपलंबं वा, झिज्जिरिपलंबं वा, सुरभिपलंबं वा, सल्लइपलंबं वा, अन्नयरं वा तहप्पगारं पलंबजायं आमगं असत्थपरिणयं अफासुयं अणेसणिज्जं जाव लामे संते णो पडिगाहिज्जा ॥ ६०३ ॥ से भिक्खू वा (२) जाव पविट्ठे समाणे से जं पुण पवालजायं जाणिज्जा, तंजहा-आसोत्थपवालं वा, णग्गोह-पवालं वा, पिलंखुपवालं वा, णीपूरपवालं वा, सल्लइपवालं वा, अन्नयरं तहप्पगारं पवालजायं आमगं असत्थपरिणयं अफासुयं अणेसणिज्जं जाव णो पडिगाहिज्जा ॥ ६०४ ॥ से भिक्खू वा (२) जाव समाणे से जं पुण सरडुयजायं जाणिज्जा, तंजहा-अंबसरडुयं वा, कविट्ठसरडुयं वा, दाडिमसरडुयं वा, विल्लसरडुयं वा, अण्ण-यरं वा तहप्पगारं सरडुयजायं आमं असत्थपरिणयं अफासुयं णो पडिगाहिज्जा ॥ ६०५ ॥ से भिक्खू वा (२) जाव पविट्ठे समाणे, से जं पुण मंथुजायं जाणिज्जा, तंजहा-उंवरमंथुं वा, णग्गोहमंथुं वा, पिलंखुमंथुं वा, आसोत्थमंथुं वा, अण्णयरं वा तहप्पगारं मंथुजायं आमयं दुल्लं साणुवीयं अफासुयं णो पडिगा-हिज्जा ॥ ६०६ ॥ से भिक्खू वा (२) जाव समाणे से जं पुण जाणिज्जा, आमडागं

वा, पूइपिण्णागं वा, सप्पिं वा, पेज्जं वा लेज्झं वा खाइमं वा साइमं वा, पुराणं
 एत्थ पाणा, अणुप्पसूया, एत्थ पाणा संवुद्धा, एत्थ पाणा जाया, एत्थ पाणा अवुक्कंता,
 एत्थ पाणा अपरिणया, एत्थ पाणा अविद्धत्था, णो पडिगाहिज्जा ॥ ६०७ ॥ से भिक्खू
 वा, (२) जाव समाणे से जं पुण जाणिज्जा, उच्छुमेरगं वा अंककरेलुयं वा, कसेरुगं
 वा, सिग्घाडगं वा, पूतिआलुगं वा, अन्नयरं वा तहप्पगारं आमं असत्थपरिणयं
 जाव णो पडिगाहिज्जा ॥ ६०८ ॥ से भिक्खू वा (२) से जं पुण जाणिज्जा, उप्पलं
 वा, उप्पल नालं वा, भिसं वा, भिसमुणालं वा, पोक्खलं वा, पोक्खलविभंगं वा,
 अण्णतरं वा तहप्पगारं, जाव णो पडिगाहिज्जा ॥ ६०९ ॥ से भिक्खू वा, (२) जाव
 समाणे, से जं पुण जाणिज्जा, अग्गवीयाणि वा, मूलवीयाणि वा, खंधवीयाणि वा,
 पोरवीयाणि वा, अग्गजायाणि वा, मूलजायाणि वा, खंधजायाणि वा, पोरजायाणि
 वा, णण्णत्थ तक्कलिमत्थएण वा, तक्कलिसीसेण वा, णालिएरमत्थएण वा, खज्जरमत्थ-
 एण वा, तालमत्थएण वा, अन्नयरं वा तहप्पगारं आमं असत्थपरिणयं जाव णो पडि-
 गाहिज्जा ॥ ६१० ॥ से भिक्खू वा (२) जाव समाणे से जं पुण जाणिज्जा, उच्छुं
 वा, काणगं, अंगारियं संमिस्सं, विगदूसियं, वेत्तगं वा, कंदलीऊसयं वा, अण्णयरं
 वा, तहप्पगारं आमं असत्थ परिणयं जाव णो पडिगाहिज्जा ॥ ६११ ॥ से भिक्खू
 वा (२) जाव समाणे से जं पुण जाणिज्जा, लसुणं वा, लसुणपत्तं वा, लसुणनालं
 वा, लसुणकंदं वा, लसुणचोयं वा, अण्णयरं वा तहप्पगारं कंदजायं णो पडिगा-
 हिज्जा ॥ ६१२ ॥ से भिक्खू वा (२) जाव समाणे से जं पुण जाणिज्जा, अंच्छिअं
 वा, कुंभिपक्कं, तिदुगं वा, टिबस्यं वा, विलुयं वा, पलगं वा, कासवणालियं वा, अण्ण-
 तरं वा आमं असत्थपरिणयं जाव णो पडिगाहिज्जा ॥ ६१३ ॥ से भिक्खू वा, (२)
 जावे समाणे से जं पुण जाणिज्जा, कणं वा कणकुंडगं वा, कणपूयलियं वा, चाउलं
 वा, चाउलपिट्ठं वा, तिलं वा, तिलपिट्ठं वा, तिलप्पडगं वा, अन्नतरं वा, तहप्प-
 गारं आमं असत्थपरिणयं जाव लाभे संते णो पडिगाहिज्जा ॥ ६१४ ॥ एस खलु
 तस्स भिक्खुस्स भिक्खुणीए वा सामग्गियं ॥ ६१५ ॥ अट्ठमोद्देशो समत्तो ॥

इह खलु पाईणं वा, पडीणं वा, दाहिणं वा, उदीणं वा, संतेगइया सद्धा भवन्ति,
 गाहावइ वा जाव कम्मकरी वा; तेसिं च णं एवं वुत्तपुव्वं भवइ जे इमे भवन्ति
 समणा, भगवंतो, सीलमंता, वयमंता, गुणमंता, संजया, संवुडा, वंभचारी, उवरया
 मेहुणाओ धम्माओ, णो खलु एएसिं कप्पइ आहाकम्मिए असणं वा (४) भोइत्तए
 वा पाइत्तए वा; से जं पुण इमं अम्हं अप्पणो अट्ठाए णिट्ठियं, तंजहा-असणं वा
 (४) सव्वमेयं समणाणं णिसिरामो, अवियाइं वय पच्छा अप्पणो अट्ठाए असणं

वा (४) चेइस्सामो एयप्पगारं णिग्घोसं सोच्चा णिसम्म तहप्पगारं असणं वा
 (४) अफासुयं अणेसणिज्जं लाभे संते णो पडिगाहिज्जा ॥ ६१६ ॥ से भिक्खू वा
 (२) जाव समाणे वसमाणे वा गामाणुगामं दूइज्जमाणे से जं पुण जाणिज्जा, गामं
 वा जाव रायहाणिं वा, इमंसि खलु गामंसि वा जाव रायहाणिसि वा संतेगइयस्स
 भिक्खुस्स पुरे संथुया वा पच्छासंथुया वा परिवसंति, तंजहा-गाहावइ वा जाव
 कम्मकरी वा तहप्पगाराइं कुलाइं णो पुव्वामेव भत्ताए वा पाणाए वा णिक्खमेज्ज
 वा पविसेज्ज वा, केवली बूया, 'आयाणमेयं' । पुरा पेहाए तस्स परो अट्ठाए असणं
 वा (४) उवकरेज्ज वा, उवक्खडेज्ज वा, अह भिक्खूणं पुव्वोवदिट्ठा (४) जं णो
 तहप्पगाराइं कुलाइं पुव्वामेव भत्ताए वा पाणाए वा पविसेज्ज वा णिक्खमेज्ज वा ।
 से तमायाय एगंतमवक्कमिज्जा अणावायमसंलोए चिट्ठेज्जा, से तत्थ कालेणं अणुपवि-
 सिज्जा (२) तत्थियरेयरेहिं कुलेहिं सामुदाणियं एसियं वेसियं पिडवायं एसित्ता
 आहारं आहारिज्जा ॥ ६१७ ॥ सिया से परो कालेण अणुपविट्ठस्स आहाकम्मियं
 असणं वा (४) उवकरेज्ज वा उवक्खडेज्ज वा, तं चेगइओ तूसणीओ उवेहेज्जा,
 'आहडमेव पच्चाइक्खिस्सामि' माइट्ठाणं संफासे, णो एवं करेज्जा, से पुव्वामेव
 आलोएज्जा 'आउसो त्ति वा भगिणि त्ति वा, णो खलु मे कप्पइ आहाकम्मियं असणं
 वा (४) भोत्तए वा पायए वा । मा उवकरेहि, मा उवक्खडेहि, से सेवं वयंतस्स
 परो आहाकम्मियं असणं वा (४) उवक्खडावित्ता आहट्ठ दलएज्जा, तहप्पगारं
 असणं वा (४) अफासुयं लाभे संते णो पडिगाहिज्जा ॥ ६१८ ॥ से भिक्खू वा
 (२) जाव समाणे से जं पुण जाणिज्जा, असणं वा ४ आएसाए उवक्खडिज्जमाणं
 पेहाए णो खद्धं २ उवसंकमित्तु ओभासेज्जा णत्तत्थ गिलाणणीसाए ॥ ६१९ ॥ से भिक्खू
 वा जाव समाणे अण्णतरं भोयणजायं पडिगाहिता सुब्भि सुब्भि भोच्चा दुब्भि दुब्भि
 परिट्ठवेइ, माइट्ठाणं संफासे, णो एवं करेज्जा, सुब्भि वा दुब्भि वा सव्वं भुंजे न छट्ठए
 ॥ ६२० ॥ से भिक्खू वा (२) जाव समाणे अण्णतरं वा पाणयजायं पडिगाहिता
 पुप्फं २ आसाइत्ता कसायं २ परिट्ठवेइ, माइट्ठाणं संफासे णो एवं करिज्जा, पुप्फं
 पुप्फेति वा कसायं कसाएत्ति वा सव्वमेयं भुंजिज्जा णो किंचिवि परिट्ठवेज्जा ॥ ६२१ ॥
 से भिक्खू वा (२) बहुपरियावणं भोयणजायं पडिगाहिता बहवे साहम्मिया
 तत्थ वसंति संभोइया, समणुण्णा अपरिहारिया, अदूरगया तेसि अणालोइया अणा-
 मंतिय परिट्ठवेइ, माइट्ठाणं संफासे णो एवं करेज्जा से तमादाय तत्थ गच्छेज्जा (२)
 से पुव्वामेव आलोएज्जा, "आउसंतो समणा इमे मे असणं वा (४) बहुपरियावणो,
 तं भुंजह च णं" से सेवं वयंतं परो वएज्जा "आउसंतो समणा आहारमेयं असणं वा

(४) जावइयं (२) परिसडइ तावइयं (२) भोक्खामो वा, पाहामो वा, सव्वमेयं परिसडइ, सव्वमेयं भोक्खामो वा” २ ॥ ६२२ ॥ से भिक्खू वा (२) से जं पुण जाणिज्जा, असणं वा, पाणं वा, खाइमं वा, साइमं वा, परं समुद्दिस्स बहिया णीहडं तं परेहिं असमणुत्तायं अणिसिद्धं अफासुयं जाव णो पडिगाहिज्जा, तं परेहिं समणुत्तायं संणिसिद्धं फासुयं लामे संते जाव पडिगाहिज्जा ॥ ६२३ ॥ एस खलु तस्स भिक्खुस्स भिक्खुणीए वा सामग्गियं ॥ ६२४ ॥ **नवमोद्देशो समत्तो ॥**

१ से एगइओ साहारणं वा पिंडवायं पडिगाहिता, ते साहम्मिए अणापुच्छिता जस्स जस्स इच्छइ तस्स तस्स खद्धं खद्धं दलयइ, माइट्ठाणं संफासे णो एवं करेज्जा, से तमायाए तत्थ गच्छेज्जा (२) पुव्वामेव आलोएज्जा “आउसंतो समणा, संति मम पुरे संथुया वा पच्छासंथुया वा, तंजहा-आयरिए वा, उवज्झाए वा, पवित्ती वा, थेरे वा, गणी वा, गणहरे वा, गणावच्छेइए वा, अवियाइं एएसिं खद्धं खद्धं दाहामि” से सेवं वयंतं परो वएज्जा, कामं खलु आउसो अहापज्जतं णिसिराहि जावइयं २ परो वयइ तावइयं २ णिसिरेज्जा, सव्वमेयं परो वयइ सव्वमेयं णिसिरेज्जा ॥ ६२५ ॥ से एगइओ मणुत्तं भोयणजायं पडिगाहिता पंतेण भोयणेण पलिच्छाएति “मामेयं दाइयं संतं, दट्ठुं सयमायए, आयरिए वा जाव गणावच्छेइए वा, णो खलु मे कस्सवि किंचि दायव्वं सिया” माइट्ठाणं संफासे णो एवं करेज्जा, से तमायाए तत्थ गच्छेज्जा, (२) पुव्वामेव उत्ताणए हत्थे पडिग्गहं कट्ठु “इमं खलु इमं खलु त्ति” आलोएज्जा, णो किंचिवि णिगूहेज्जा ॥ ६२६ ॥ से एगइओ अण्णतरं भोयणजायं पडिगाहिता, भइयं भइयं भोच्चा, विवत्तं विरसमाहरइ, माइट्ठाणं संफासे, णो एवं करिज्जा ॥ ६२७ ॥ से भिक्खू वा, (२) से जं पुण जाणिज्जा, अंतरुच्छियं वा, उच्छुगंडियं वा, उच्छुचोयगं वा, उच्छुमेरगं वा, उच्छुसालगं वा, उच्छुडालगं वा, सिंवलं वा, सिंवलथालगं वा, अस्सि खलु पडिग्गहियंसि अप्पे सिया भोयणजाए, बहुउज्झियधम्मिए, तहप्पगारं अंतरुच्छियं जाव सिंवली थालगं वा अफासुयं जाव णो पडिगाहिज्जा ॥ ६२८ ॥ से भिक्खू वा (२) से जं पुण जाणिज्जा, बहुवीयगं-बहुकंटगं-फलं अस्सि खलु पडिगाहियंसि अप्पेसिया भोयणजाए बहुउज्झियधम्मिए-तहप्पगारं बहुवीयगं बहुकंटगं फलं लामे संते जाव णो पडिगाहिज्जा ॥ ६२९ ॥ से भिक्खू वा (२) जाव समाणे, सिया णं परो बहुवीयएण, बहुकंटगेण फलेण उवणिमंतेज्जा “आउसंतो समणा अभिकंखसि! बहुवीयअं-बहुकंटगं फलं पडिगाहित्तए?” एयप्पगारं णिग्घोसं सोच्चा णिसम्म से पुव्वामेव आलोएज्जा “आउसो त्ति वा भडणित्ति वा. णो खलु मे कप्पइ से बहकंटयं बह-

वीयअं फलं पडिगाहित्तए, अभिकंखसि मे दाउं, जावइयं तावइयं फलस्स सार-
भागं दलयाहि, मा य वीयाइं “से सेवं वयंतस्स परो अभिहट्ठु अंतो पडिग्गह-
गंसि बहुवीयअं २ फलं परिभाएत्ता णिहट्ठु दलएज्जा, तहप्पगारं पडिग्गहगं
परहत्थंसि वा परपायंसि वा अफासुयं अणेसणिज्जं लाभे संते णो पडिगाहिज्जा, से
आहच्च पडिगाहिए सिया तं णो हिं त्ति वएज्जा, णो अणहिंत्ति वएज्जा, से तमायाए
एगंतमवक्कमेज्जा (२) अहे आरामंसि वा, अहे उवस्सयंसि वा, अप्पंडए जाव
अप्पसंताणए, फलस्स सारभागं भुच्चा वीयाइं कंटए गहाय से तमायाए
एगंतमवक्कमेज्जा, अहे ज्झामयंडिलंसि वा, जाव पमज्जिय २ परिठ्ठुविज्जा ॥ ६३० ॥
से भिक्खु वा (२) जाव समाणे सिया परो अभिहट्ठु अंतो पडिग्गहए विलं वा
लोगं, उब्बिभयं वा लोगं, परिभाएत्ता णीहट्ठु दलएज्जा, तहप्पगारं पडिग्गहगं परह-
त्थंसि वा, परपायंसि वा अफासुयं जाव णो पडिगाहिज्जा से आहच्च पडिग्गहए
सिया तं च णाइदूरगए जाणिज्जा, से त्तमार्थाए तत्थ गच्छिज्जा (२) पुव्वामेव
आलोएज्जा “आउसो त्ति वा, भइणि त्ति वा, इमं ते किं जाणया दिन्नं उदाहु
अजाणया ? सो य भणेज्जा, णो खलु मे जाणया दिन्नं अजाणया दिन्नं, कामं खलु
आउसो इदाणिं णिसिरामि तं भुंजह च णं परिभाएह च णं, तं परेहिं समणुत्तायं
समणुसिठ्ठं तओ संजयामेव, भुंजेज्ज वा पीएज्ज वा, जं च णो संचाएत्ति भोत्तए वा
पायए वा साहम्मिया तत्थ वसंति संभोइया समणुत्ता अपरिहारिया अदूरगया
तेसिं अणुपयायव्वं, सिया णो जत्थ साहम्मिया जहेव बहुपरियावन्ने कीरति तहेव
कायव्वं सिया ॥ ६३१ ॥ एस खलु तस्स भिक्खुस्स भिक्खुणीए वा सामग्गियं
॥ ६३२ ॥ **दसमोद्देशो समत्तो ॥**

भिक्खागा णामेगे एवमाहंसु समाणे वा वसमाणे वा गामाणुगामं वा दूइज्जमाणे
मणुणं भोयणजायं लभित्ता “से य भिक्खु गिलाई से हंदह णं तस्साहरह से य
भिक्खु णो भुंजिज्जा आहरेज्जा तुमं चेव णं भुंजिज्जासि” से एगइओ भोक्खामित्ति
कट्ठु पलिउंचिय २ आलोएज्जा, तंजहा-इमे पिडे इमे लोए इमे तित्तए इमे कडुए
इमे कसाए इमे अविले इमे महुरे णो खलु एत्तो किंचि गिलाणस्स सयइत्ति
माइठ्ठाणं संफासे, णो एवं करेज्जा, तहेव तं आलोएज्जा, जहेव तं गिलाणस्स
सयइत्ति, तंजहा-तित्तयं तित्तएत्ति वा, कडुयं कडुएत्ति वा, कसायं कसाएत्ति वा,
अंविंलं अंविंलेत्ति वा, महुरं महुरेत्ति वा ॥ ६३३ ॥ भिक्खागा णामेगे एवमाहंसु,
समाणे वा वसमाणे वा, गामाणुगामं दूइज्जमाणे मणुणं भोयणजायं लभित्ता से
भिक्खु गिलाइ से हंदह णं तस्साहरह सेय भिक्खु णो भुंजिज्जा, आहरेज्जा, से णं

णो खलु मे अंतराए आहरिस्सामि इच्चेयाइं आयतणाइं उवाइक्कम्म ॥ ६३४ ॥ अह
 भिक्खू जाणिज्जा सत्त पिंडेसणाओ सत्त पाणेसणाओ तत्थ खलु इमा पढमा पिंडेसणा
 असंसट्ठे हत्थे असंसट्ठे मत्ते, तहप्पगारेण असंसट्ठेण हत्थेण वा मत्तेण वा, असणं
 वा पाणं वा खाइमं वा साइमं वा सयं वा णं जाएज्जा, परो वा से दिज्जा, फासुयं
 जाव पडिगाहिज्जा, इति पढमा पिंडेसणा ॥ ६३५ ॥ अहावरा दोच्चा
 पिंडेसणा, संसट्ठे हत्थे संसट्ठे मत्तए तहेव दोच्चा पिंडेसणा इति दोच्चा पिंडे-
 सणा ॥ ६३६ ॥ अहावरा तच्चा पिंडेसणा, इह खलु पाईणं वा ४ संतेगइया
 सट्ठा भवंति गाहावइ वा जाव कम्मकरी वा, तेसिं च णं अण्णतरेसु विरूवरूवेसु
 भायणजाएसु उवणिक्खित्तपुण्वे सिया तंजहा थालंसि वा, पिढरंसि वा सरगंसि वा,
 परगंसि वा, वरगंसि वा, अह पुण एवं जाणिज्जा, असंसट्ठे हत्थे संसट्ठे मत्ते, संसट्ठे
 हत्थे असंसट्ठे मत्ते से य पडिग्गहधासी सिया पाणिपडिग्गहिं वा, से पुव्वामेव
 आलोएज्जा “आउसोत्ति वा, भगिणिं तिं वा, एएणं तुमं असंसट्ठेण हत्थेण संसट्ठेण
 मत्तेण संसट्ठेण वा हत्थेण असंसट्ठेण मत्तेण अस्सि पडिग्गहगंसि वा पाणिसि वा
 णिहट्ठु उचित्तु दलयाहिं” तहप्पगारं भोयणजायं सयं वा णं जाएज्जा, परो वा से
 देज्जा, फासुयं जाव पडिगाहिज्जा, तच्चा पिंडेसणा ॥ ६३७ ॥ अहावरा चउत्था
 पिंडेसणा ॥ से भिक्खू वा, (२) से जं पुण जाणिज्जा, पिहुअं वा, जाव चाउ-
 लपलंबं वा, अस्सि खलु पडिग्गहियंसि अप्पे पच्छाकम्मे अप्पे पज्जवजाए, तहप्प-
 गारं पिहुयं वा जाव चाउलपलंबं वा सयं वा जाएज्जा जाव पडिगाहिज्जा । इति
 चउत्था पिंडेसणा ॥ ६३८ ॥ अहावरा पंचमा पिंडेसणा से भिक्खू वा
 भिक्खुणी वा, जाव समाणे, उग्गहितमेव भोयणजायं जाणिज्जा, तंजहा-सरावंसि
 वा, डिडिमंसि वा, कोसगंसि वा, अह पुण एवं जाणिज्जा बहुपरियावन्ने पाणीसु
 उदगलेवे तहप्पगारं असणं वा (४) सयं वा णं जाएज्जा, जाव पडिगाहिज्जा ॥
 पंचमा पिंडेसणा ॥ ६३९ ॥ अहावरा छट्ठा पिंडेसणा, से भिक्खू वा (२)
 पग्गहियमेव भोयणजायं जाणिज्जा, जं च सयट्ठाए पग्गहियं जं च परट्ठाए पग्गहियं
 तं पायपरियावन्नं तं पाणिपरियावणं फासुयं जाव पडिगाहिज्जा, छट्ठा पिंडेसणा
 ॥ ६४० ॥ अहावरा सत्तमा पिंडेसणा, से भिक्खू वा (२) जाव समाणे बहु
 उज्झियधम्मियं भोयणजायं जाणिज्जा, जं चऽन्ने वहवे दुपय-चउप्पय-समण-माहण-
 अतिहि-क्खिण-वणीमगा णावकंखंति तहप्पगारं उज्झियधम्मियं भोयणजायं सयं वा
 णं जाएज्जा परो वा से दिज्जा जाव फासुयं पडिगाहिज्जा ॥ सत्तमा पिंडेसणा ॥
 इच्चेयाओ सत्त पिंडेसणाओ ॥ ६४१ ॥ अहावराओ सत्त पाणेसणाओ, तत्थ

खलु इमा पढमा पाणेषणा, असंसठे हत्थे २ तं चेव भाणियव्वं, णवरं चउत्थाए
 णाणत्तं, से भिक्खू वा (२) जाव समाणे से जं पुण पाणगजायं जाणिज्जा, तंजहा-
 तिलोदगं वा, तुसोदगं वा, जवोदगं वा, आयामं वा, सोवीरं वा, सुद्धवियडं वा,
 अस्सि खलु पडिग्गाहियंसि अप्पे पच्छाकम्मे, तहेव पडिग्गाहिज्जा ॥ ६४२ ॥
 इच्चेयासि सत्तण्हं पिडेसणाणं सत्तण्हं पाणेषणाणं अण्णतरं पडिमं पडिवज्जमाणे णो एवं
 वएज्जा “मिच्छापडिवण्णा खलु एते भयतारो अहमेगे सम्मं पडिवन्ने, जे एते भयं-
 तारो एयाओ पडिमाओ पडिवज्जित्ताणं विहरंति, जो य अहमंसि एयं पडिमं पडिव-
 ज्जित्ताणं विहरामि सव्वेऽवि ते उ जिणाणाए उवठ्ठिया अन्नोन्नसमाहीए एवं च णं
 विहरंति ॥ ६४३ ॥ एयं खलु तस्स भिक्खुस्स भिक्खुणीए वा सामग्गियं ॥ ६४४ ॥
पिडेसणा णामज्झयणस्स एगारसमोद्देशो, विइयसुयक्खंधस्स पिडे-
सणा णामं पढमज्झयणं समत्तं ॥

से भिक्खू वा (२) अभिक्खेज्जा, उवस्सयं एसित्ताए, से अणुपविसे गामं वा
 जाव रायहाणिं वा ॥ ६४५ ॥ से जं पुण उवस्सयं जाणिज्जा, सअंडं जाव ससं-
 ताणयं तहप्पगारे उवस्सए णो ठाणं वा सेज्जं वा निसीहियं वा चेतेज्जा ॥ ६४६ ॥
 से भिक्खू वा (२) से जं पुण उवस्सयं जाणिज्जा, अप्पंडं अप्पपाणं जाव अप्प-
 संताणयं तहप्पगारे उवस्सए पडिलेहिता पमज्जित्ता, तओ संजयामेव ठाणं वा सेज्जं
 वा निसीहियं वा चेतेज्जा ॥ ६४७ ॥ से जं पुण उवस्सयं जाणिज्जा अस्सिपडियाए
 एगं साहम्मियं समुद्दिस्स पाणाइं भूयाइं जीवाइं सत्ताइं समारब्भ समुद्दिस्स कीयं
 पामिच्चं अच्छिज्जं अणिसठ्ठं अभिहडं आहट्ठु चेएति तहप्पगारे उवस्सए पुरिसंत-
 रगडे वा अपुरिसंतरगडे वा जाव अणासेविते वा णो ठाणं वा सेज्जं वा णिसीहियं
 वा चेतेज्जा । एवं बहवे साहम्मिया एगा साहम्मिणी बहवे साहम्मिणीओ ॥ ६४८ ॥
 से भिक्खू वा (२) से जं पुण उवस्सयं जाणिज्जा असंजए भिक्खुपडियाए बहवे
 समणमाहणअतिहिकिवणवणीमए पगणिय २ समुद्दिस्स पाणाइं भूयाइं जीवाइं
 सत्ताइं जाव चेएइ तहप्पगारे उवस्सए अपुरिसंतरगडे जाव अणासेविए णो ठाणं
 वा सेज्जं वा णिसीहियं वा चेतेज्जा, अह पुण एवं जाणिज्जा पुरिसंतरगडे जाव आसे-
 विए पडिलेहिता पमज्जित्ता तओ संजयामेव ठाणं वा सेज्जं वा णिसीहियं वा चेतेज्जा
 ॥ ६४९ ॥ से भिक्खू वा (२) से जं पुण उवस्सयं जाणिज्जा, असंजए भिक्खु-
 पडियाए कडिए वा, उक्कंविए वा, छन्ने वा, लित्ते वा, घट्ठे वा, मट्ठे वा, संमट्ठे वा,
 संपध्मिए वा, तहप्पगारे उवस्सए अपुरिसंतरगडे जाव अणासेविए, णो ठाणं वा,
 सेज्जं वा, णिसीहियं वा, चेतेज्जा, अह पुण एवं जाणिज्जा पुरिसंतरगडे जाव आसे-

विए, पडिलेहिता पमजिता, तओ संजयामेव जाव चेतेज्जा ॥ ६५० ॥ से भिक्खू वा (२) से जं पुण उवस्सयं जाणिज्जा, असंजए भिक्खुपडियाए खुड्डियाओ दुवारियाओ महल्लिआओ कुज्जा, जहा पिडेसणाए जाव संथारगं संथारिज्जा, वहिया वा णिण्णक्खु तहप्पगारे उवस्सए अपुरिसंतरगडे जाव अणासेविते णो ठाणं वा, सेज्जं वा निसीहियं वा चेतेज्जा, अह पुण एवं जाणिज्जा पुरिसंतरगडे जाव आसेविए पडिलेहिता पमजिता तओ संजयामेव जाव चेतेज्जा ॥ ६५१ ॥ से भिक्खू वा (२) से जं पुण उवस्सयं जाणिज्जा, असंजए भिक्खुपडियाए उदगप्पसूयाणि वा, कंदाणि वा, मूलाणि वा, पत्ताणि वा, पुप्फाणि वा, फलाणि वा, बीयाणि वा, हरियाणि वा, ठाणाओ ठाणं साहरति, वहिया वा णिण्णक्खु तहप्पगारे उवस्सए अपुरिसंतरगडे जाव णो ठाणं वा सेज्जं वा निसीहियं वा चेतेज्जा । अह पुण एवं जाणिज्जा, पुरिसंतरगडे जाव चेतेज्जा ॥ ६५२ ॥ से भिक्खू वा, भिक्खुणी वा, से जं पुण जाणिज्जा, असंजए भिक्खूपडियाए पीढं वा फलगं वा णिस्सेणिं वा उदूहलं वा ठाणाओ ठाणं साहरइ वहिया वा णिण्णक्खु, तहप्पगारे उवस्सए अपुरिसंतरगडे जाव णो ठाणं वा सेज्जं वा निसीहियं वा चेतेज्जा, अह पुण एवं जाणिज्जा पुरिसंतरगडे जाव चेतेज्जा ॥ ६५३ ॥ से भिक्खू वा (२) से जं पुण उवस्सयं जाणिज्जा, तंजहा खंधंसि वा मंचंसि वा मालंसि वा पासायंसि वा हम्मियतलंसि वा अन्नतरंसि वा तहप्पगारंसि अंतल्लिक्खजायंसि, णण्णत्थ आगाढाणागाढेहि कारणेहिं, ठाणं वा सेज्जं वा निसीहियं वा णो चेतेज्जा ॥ ६५४ ॥ से आहच्च चेतिते सिया णो तत्थ सीओदगवियडेण वा, उसिणोदगवियडेण वा, हत्थाणि वा, पादाणि वा, अच्छीणि वा, दंताणि वा, मुहं वा, उच्छोलेज्ज वा पहोएज्ज वा, णो तत्थ ऊसढं पगरेज्जा, तंजहा-उच्चारं वा, पासवणं वा, खेलं वा, सिंघाणं वा, वंतं वा, पित्तं वा, पूयं वा, सोणियं वा, अन्नयरं वा सरीरावयवं केवली बूया “आयाण मेयं” से तत्थ ऊसढं पगरेमाणे पयलेज्ज वा, पवडेज्ज वा, से तत्थ पयलेमाणे पवडेमाणे वा हत्थं वा, जाव सीसं वा अन्नतरं वा कायंसि इंदियजालं लूसेज्जा पाणाणि वा ४ अभिहणेज्ज वा जाव ववरोवेज्ज वा, अह भिक्खूणं पुव्वोवदिट्ठा एस पइन्ना जाव जं तहप्पगारे उवस्सए अंतल्लिक्खजाए णो ठाणं वा सेज्जं वा निसीहियं वा चेतेज्जा ॥ ६५५ ॥ से भिक्खू वा (२) से जं पुण उवस्सयं जाणिज्जा सइत्थियं सखुड्ढं सपसुभत्तपाणं तहप्पगारे सागारिए उवस्सए णो ठाणं वा सेज्जं वा निसीहियं वा चेतेज्जा, आयाणमेयं भिक्खुस्स गाहावइकुलेण सद्धि संवसमाणस्स अलसए वा, विसूइया वा छड्डी वा उव्वाहिज्जा अन्नतरे वा से दुक्खे रोगायंके समुप्पजेज्जा असं-

जए कलुणपडियाए तं भिक्खुस्स गातं तेहेण वा, घएण वा, उव्वट्टणेण वा अचमं-
गेज्ज मक्खिज्ज वा, सिणाणेण वा, कक्केण वा, लोहेण वा, वण्णेण वा चुन्नेण वा,
पउमेण वा, आघंसेज्ज वा, पधंसेज्ज वा, उव्वलेज्ज वा, उव्वट्टेज्ज वा सीओदगविय-
डेण वा, उसिणोदगवियडेण वा, उच्छोलेज्ज वा, पच्छोलेज्ज वा, पट्ठोण्ण वा, मिणा-
विज्ज वा, सिचिज्ज वा, दारुणा वा दारुपरिणामं कट्ठु, अगणिकायं उज्जालेज्ज वा,
पज्जालिज्ज वा, उज्जालित्ता २ कायं आयावेज्ज वा पयावेज्ज वा अह भिक्खूणं पुव्वो-
वदिट्ठा एस पइन्ना जं तहप्पगारे सागारिए उवस्सए णो ठाणं वा सेज्जं वा निसी-
हियं वा चेतेज्जा ॥ ६५६ ॥ आयाणमेयं भिक्खुरस्स सागारिए उवस्सए वसमा-
णस्स इह खलु गाहावइ वा जाव कम्मकरी वा अन्नमन्नं अक्कोसंति वा, पचंति वा
रुभंति वा उद्द्विंति वा अह भिक्खूणं उच्चावयं मणं णियंछेज्जा एते खलु अन्नमन्नं
उक्कोसंतु वा मा वा उक्कोसंतु जाव मा वा उद्द्विंतु । अह भिक्खूणं पुव्वोवदिट्ठा
एस पइन्ना जाव जं तहप्पगारे सागारिए उवस्सए णो ठाणं वा सेज्जं वा
निसीहियं वा चेतेज्जा ॥ ६५७ ॥ आयाणमेयं भिक्खुरस्स गाहावइहिं सद्धि
संवसमाणस्स इह खलु गाहावइ अप्पणो सअट्ठाए अगणिकायं उज्जालेज्ज वा, पज्जा-
लेज्ज वा विज्ज्जावेज्ज वा, अह भिक्खू उच्चावयं मणं णियंछेज्जा, एते खलु अगणि-
कायं उज्जालेंतु वा जाव मा वा विज्ज्जावेंतु अह भिक्खूणं पुव्वोवदिट्ठा जाव जं
तहप्पगारे उवस्सए नो ठाणं वा सेज्जं वा, निसीहियं वा चेतेज्जा ॥ ६५८ ॥ आया-
णमेयं भिक्खुरस्स गाहावइहिं सद्धि संवसमाणस्स इह खलु गाहावइस्स कुंडले वा,
गुणे वा, मणी वा, मोत्तिए वा, हिरण्णे वा, सुवण्णे वा, कडगाणि वा, तुडियाणि वा,
तिसरगाणि वा, पालंबाणि वा, हारे वा, अद्धहारे वा, एगावली वा, मुत्तावली वा,
कणगावली वा, रयणावली वा, तरुणियं वा कुमारिं अलंक्रियविभूसियं पेहाए,
अह भिक्खू उच्चावयं मणं, णियंछेज्जा, “एरिसिया वा सा णो वा एरिसिया” इति वा
णं वूया, इति वा णं मणं साएज्जा, अह भिक्खूणं पुव्वोवदिट्ठा ४ जाव जं तहप्पगारे
उवस्सए णो ठाणं वा जाव चेतेज्जा ॥ ६५९ ॥ आयाणमेयं भिक्खुरस्स गाहाव-
इहिं सद्धि संवसमाणस्स इह खलु गाहावइणीओ वा, गाहावइधूयाओ वा, गाहावइ-
सुण्हाओ वा, गाहावइधाईओ वा, गाहावइदासीओ वा, गाहावइकम्मकरीओ वा,
तासिं च णं एवं वुत्तपुव्वं भवइ, “जे इमे भवंति समणा भगवंतो जाव उवरया
मेहुणधम्माओ णो खलु एतेसि कप्पइ मेहुणधम्मं परियारणाए आउट्ठिए, जा य
खलु एएहिं सद्धिं मेहुणधम्मं परियारणाए आउट्ठाविज्जा पुत्तं खलु सा लभेज्जा,
ओयस्सि तेयस्सि वच्चस्सि जसस्सि संपराइयं आलोयणदरिसिणिज्जं,” एयप्पगारं

णिग्घोसं सोच्चा णिसम्म तासिं च णं अण्णयरी सद्धी तं तवस्सि भिक्खुं मेहुण-
धम्मपरियारणाए आउट्टावेज्जा, अह भिक्खूणं पुव्वोवदिट्ठा जाव जं तहप्पगारे
सागारिए उवस्सए णो ठाणं वा सेज्जं वा णिसीहियं वा चेतेज्जा ॥ ६६० ॥ एयं
खलु तस्स भिक्खुस्स भिक्खुणीए वा सामग्गियं ॥ ६६१ ॥ **सेज्जाज्झयणस्स
पढमोद्देसो समत्तो ॥**

गाहावइ णामेगे सुइसमायारा भवंति से भिक्खू य असिणाणाए से तग्गंधे दुग्गंधे
पडिकूले पडिलोमे यावे भवइ, जं पुव्वकम्मं तं पच्छाकम्मं, जं पच्छाकम्मं तं
पुव्वकम्मं तं भिक्खुपडियाए वट्टमाणे करेज्जा वा नो करेज्जा वा अह भिक्खूणं
पुव्वोवदिट्ठा जाव जं तहप्पगारे उवस्सए णो ठाणं वा जाव चेतेज्जा ॥ ६६२ ॥
आयाणमेयं भिक्खुस्स गाहावइहिं सद्धिं संवसमाणस्स इह खलु गाहावइस्स
अप्पणो सअट्ठाए विरुवरुवे भोयणजाए उवक्खडिए सिया अह पच्छा भिक्खुपडियाए
असणं वा (४) उवक्खडेज्ज वा उवकरेज्ज वा तं च भिक्खू अभिक्खेज्जा भोत्तए वा
पायए वा वियट्ठित्तए वा अह भिक्खूणं पुव्वोवदिट्ठा जाव जं नो तहप्पगारे
उवस्सए ठाणं चेतेज्जा ॥ ६६३ ॥ आयाणमेयं भिक्खुरस गाहावइणा सद्धिं संवस-
माणस्स इह खलु गाहावइस्स अप्पणो सयट्ठाए विरुवरुवाइं दास्याइं भिन्नपुव्वाइं
भवंति, अह पच्छा भिक्खुपडियाए विरुवरुवाइं दास्याइं भिदेज्ज वा, किणेज्ज वा
पामिच्चेज्ज वा, दास्या वा दासपरिणामं कट्ठु अगणिकायं उज्जालेज्ज वा, पज्जालेज्ज वा,
तत्थ भिक्खू अभिक्खेज्ज वा आतावेत्तए वा, पयावेत्तए वा, वियट्ठित्तए वा,
अह भिक्खूणं पुव्वोवदिट्ठा जाव जं तहप्पगारे उवस्सए णो ठाणं चेतेज्जा
॥ ६६४ ॥ से भिक्खू वा (२) उच्चारपासवणेणं उव्वाहिज्जमाणे राओ वा विआले
वा, गाहावइकुलस्स दुवारवाहं अवंगुणेज्जा तेणे य तस्संधिचारी अणुपविसेज्जा,
तस्स भिक्खुस्स णो कप्पइ एवं वदित्तए “अयं तेणे पविसइ वा णो वा पविसइ,
उवल्लियइ वा णो वा उवल्लियइ, आवयति वा णो वा आवयति, वदति वा णो वा
वदति, तेण हडं अण्णेण हडं, तस्स हडं अण्णस्स हडं, अयं तेणे अयं उवयरए,
अयं हंता, अयं एत्थमकासी,” तं तवस्सि भिक्खुं अतेणं तेणं ति संकइ, अह
भिक्खूणं पुव्वोवदिट्ठा जाव णो चेतेज्जा ॥ ६६५ ॥ से भिक्खू वा (२) से जं पुण
उवस्सयं जाणिज्जा तणपुंजेसु पलालपुंजेसु वा, सअंडे जाव ससंताणए तहप्प-
गारे उवस्सए णो ठाणं वा सेज्जं वा णिसीहियं वा चेएज्जा ॥ ६६६ ॥ से भिक्खू
वा (२) से जं पुण उवस्सयं जाणिज्जा, तणपुंजेसु वा, पलालपुंजेसु वा अप्पंडे
जाव चेएज्जा ॥ ६६७ ॥ से आगंतारेसु वा, आरामागारेसु वा, गाहावइकुलेसु वा

परियावसहेसु वा अभिक्खणं अभिक्खणं साहम्मिएहिं ओवयमाणेहिं णो ओवएज्जा
 ॥ ६६८ ॥ से आगंतारेसु वा जाव परियावसहेसु वा, जे भयंतारो उडुवद्धियं वासा-
 वासियं वा कप्पं उवातिणिता तत्थेव भुज्जो भुज्जो संवसंति, अयमाउसो कालाइकंत-
 किरिया भवइ ॥ ६६९ ॥ से आगंतारेसु वा जाव परियावसहेसु वा, जे भयंतारो
 उडुवद्धियं वा, वासावासियं वा, कप्पं उवातिणाविता तं दुगुणा दुगुणेण अपरिहरित्ता
 तत्थेव भुज्जो भुज्जो संवसंति, अयमाउसो इत्तरा उवट्ठाणकिरिया यावि भवइ ॥ ६७० ॥
 इह खलु पाईणं वा पडीणं वा दाहीणं वा उदीणं वा संतेगइया सद्धा भवंति
 तंजहा गाहावइ वा जाव कम्मकरीओ वा तेसि च णं आयारगोयरे णो सुणिसंते
 भवइ तं सइहमाणेहिं, तं पत्तियमाणेहिं, तं रोयमाणेहिं वहवे समणमाहणअतिहि-
 किवणवणीमए समुद्दिस्स तत्थ तत्थ अगारीहिं अगाराइं चेतिआईं भवंति, तंजहा-
 आएसणाणि वा आयतणाणि वा देवकुलाणि वा सहाओ वा पवाणि वा पणिय-
 गिहाणि वा पणियसालाओ वा जाणगिहाणि वा जाणसालाओ वा सुहाकम्मंताणि
 वा दब्भकम्मंताणि वा वद्धकम्मंताणि वा, वक्कयकम्मंताणि वा, वणकम्मंताणि वा
 इंगालकम्मंताणि वा कठुकम्मंताणि वा सुसाणकम्मंताणि वा संति कम्मंताणि वा
 सुण्णागारकम्मंताणि वा गिरिकम्मंताणि वा कंदराकम्मंताणि वा सेलोवट्ठाणकम्मंताणि
 वा भवणगिहाणि वा जे भयंतारो तहप्पगाराइं आएसणाणि वा जाव भवणगिहाणि
 वा तेहिं ओवयमाणेहिं ओवयंति, अयमाउसो अभिक्कंतकिरिया या वि भवइ ॥ ६७१ ॥
 इह खलु पाईणं वा पडीणं वा दाहिणं वा उदीणं वा संतेगइया सद्धा भवंति जाव
 तं रोयमाणेहिं वहवे समण जाव वणीमए समुद्दिस्स, तत्थ २ अगारीहिं अगाराइं
 चेतिआईं भवंति, तंजहा-आएसणाणि वा जाव भवणगिहाणि वा जे भयंतारो
 तहप्पगाराइं आएसणाणि वा जाव भवणगिहाणि वा तेहिं अणोवयमाणेहिं
 ओवयति अयमाउसो ! अणभिक्कंतकिरिया या वि भवति ॥ ६७२ ॥ इह खलु पाईणं वा
 पडीणं वा दाहिणं वा उदीणं वा संतेगइया सद्धा भवंति, तंजहा-गाहावइ वा जाव
 कम्मकरी वा, तेसिं च णं एवं वुत्तपुव्वं भवइ, “जे इमे भवंति समणा भगवंतो
 सीलमंता जाव उवरया मेहुणधम्माओ, णो खलु एएसिं भयंताराणं कप्पइ
 आहाकम्मिए उवस्सए वत्थए, से जाणि इमाणि अम्हं अप्पणो सअट्ठाए
 चेतिताइं भवंति, तंजहा आएसणाणि वा, जाव भवणगिहाणि वा, सव्वाणि ताणि
 समणाणं णिसिरामो अवियाइं वयं पच्छा अप्पणो सअट्ठाए चेतिस्सामो तंजहा-
 आएसणाणि वा जाव भवणगिहाणि वा, एयप्पगारं णिग्घोसं सोच्चा णिसम्म जे
 भयंतारो तहप्पगाराइं आएसणाणि वा जाव भवणगिहाणि वा उवागच्छंति उवा-

गच्छिता इयराइयरेहिं पाहुडेहिं वट्ठंति अयमाउसो वज्जकिरिया या वि भवइ ॥६७३॥
 इह खलु पाईणं वा पडीणं वा दाहीणं वा उदीणं वा संतेगइया सद्धा भवंति तेसि
 च णं आयारगोयरे णो सुणिसंते भवइ, जाव तं रोयमाणेहिं बहवे समण जाव
 चणीमए पगणिय २ समुद्दिस्स तत्थ २ अगारीहिं अगाराइं चेतिताइं भवंति तंजहा-
 आएसणाणि वा जाव भवणगिहाणि वा जे भयंतारो तहप्पगाराइं आएसणाणि
 वा जाव भवणगिहाणि वा उवागच्छंति, इयराइयरेहिं पाहुडेहिं वट्ठंति अयमाउसो
 महावज्जकिरिया या वि भवइ ॥६७४॥ इह खलु पाईणं वा पडीणं दाहीणं वा उदीणं
 वा संतेगइया सद्धा भवंति जाव तं रोयमाणेहिं बहवे समण० जाव समुद्दिस्स तत्थ
 तत्थ अगारीहिं अगाराइं चेतिताइं भवंति-तंजहा आएसणाणि वा जाव भवण-
 गिहाणि वा जे भयंतारो तहप्पगाराइं आएसणाणि वा जाव भवणगिहाणि वा
 उवागच्छंति इयराइयरेहिं पाहुडेहिं वट्ठंति, अयमाउसो सावज्जकिरिया या वि भवइ
 ॥ ६७५ ॥ इह खलु पाईणं वा जाव उदीणं वा संतेगइया सद्धा भवंति तंजहा-
 गाहावइ वा जाव कम्मकरी वा तेसि च णं आयारगोयरे णो सुणिसंते भवइ जाव
 तं रोयमाणेहिं एकं समणजायं समुद्दिस्स तत्थ तत्थ अगारीहिं अगाराइं चेतिताइं
 भवंति, तंजहा आएसणाणि वा जाव भवणगिहाणि वा, महया पुढवीकायसमारंभेणं
 एवं महया आउ-तेउ-वाउ-वणस्सइ-तसकायसमारंभेणं महया संरंभेणं महया आरं-
 भेणं महया विरुवरुवेहिं पावकम्मेहिं तंजहा छायणओ, लेवणओ, संथारदुवारपिह-
 णाओ, सीतोदए वा, परिठुवियपुव्वे भवइ, अगणिकाए वा उज्जालियपुव्वे भवइ, जे
 भयंतारो तहप्पगाराइं आएसणाणि वा जाव भवणगिहाणि वा उवागच्छंति इय-
 राइयरेहिं पाहुडेहिं वट्ठंति दुपक्खं ते कम्मं सेवंति अयमाउसो महासावज्जकिरिया या
 वि भवइ ॥ ६७६ ॥ इह खलु पाईणं वा जाव तं रोयमाणेहिं अप्पणो सअट्ठाए
 तत्थ २ अगारीहिं जाव भवणगिहाणि वा, महया पुढविकायसमारंभेणं जाव अग-
 णिकाए वा उज्जालियपुव्वे भवइ जे भयंतारो तहप्पगाराइं आएसणाणि वा जाव
 भवणगिहाणि वा उवागच्छंति इयराइयरेहिं पाहुडेहिं वट्ठंति एगपक्खं ते कम्मं सेवंति
 अयमाउसो अप्पसावज्जा किरिया या वि भवइ ॥ ६७७ ॥ एस खलु तस्स भिक्खुस्स
 भिक्खुणीए वा सामग्गियं ॥ ६७८ ॥ **सेज्जाज्झयणस्स वीओदेसो समत्तो ॥**

“से य णो सुलमे फासुए उंछे अहेसणिज्जे णो य खलु सुद्धे इमेहिं पाहुडेहिं,
 तंजहा-छायणओ, लेवणओ संथारदुवारपिहणओ पिडवाएसणाओ से य भिक्खु
 चरियारए ठाणरए निसीहियारए सेज्जासंथारपिडवाएसणारए” संति भिक्खुणो एव
 मक्खाइणो उज्जुया णियागपडिवन्ना अमायं कुव्वमाणा वियाहिया ॥ ६७९ ॥ संते-

गइआ पाहुडिया उक्खित्तपुव्वा भवइ एवं णिक्खित्तपुव्वा भवइ परिभाइयपुव्वा भवइ परिभुत्तपुव्वा भवइ परिठ्वियपुव्वा भवइ एवं वियागरेमाणे समियाए वियागरेति ? हंता भवइ ॥ ६८० ॥ से भिक्खू वा (२) से जं पुण उवस्सयं जाणिज्जा खुड्डियाओ खुड्डुवारियाओ नीयाओ संनिरुद्धाओ भवन्ति, तहप्पगारे उवस्सए राओ वा विआले वा णिक्खममाणे वा पविसमाणे वा पुरा हत्थेण वा पच्छा पाएण वा तओ संजयामेव णिक्खमेज्ज वा पविसेज्ज वा, केवली बूया, 'आयाणमेयं' जे तत्थ समणाण वा माहणाण वा छत्तए वा मत्तए वा दडए वा लठ्ठिआ वा भिसिया वा नालिया वा चेले वा चिलिमिली वा चम्मए वा चम्मकोसए वा चम्म-छेदणए वा दुव्वद्धे दुण्णिक्खित्ते अणिकंपे चलाचले भिक्खू य राओ वा वियाले वा णिक्खममाणे वा पविसमाणे वा पयलिज्ज वा पवडेज्ज वा, से तत्थ पयलेमाणे वा पवडेमाणे वा, हत्थं वा पायं वा जाव इंदियजायं वा लूसेज्ज वा, पाणाणि जाव सत्ताणि वा, अभिहणेज्ज वा जाव ववरोवेज्ज वा, अह भिक्खूणं पुव्वोवदिट्ठा जाव जं तहप्पगारे उवस्सए पुरा हत्थेणं पच्छा पाएणं तओ संजयामेव णिक्खमेज्ज वा पविसेज्ज वा ॥ ६८१ ॥ से आगंतारेसु वा अणुवीइ उवस्सयं जाएज्जा, जे तत्थ ईसरे जे तत्थ समहिट्ठाए, ते उवस्सयं अणुणवेज्जा, कामं खलु आउसो अहालंदं अहापरिण्णातं वसिस्सामो जाव आउसंतो जाव आउसंतस्स उवस्सए जाव साहम्मियाए तओ उवस्सयं गिहिस्सामो तेण परं विहरिस्सामो ॥ ६८२ ॥ से भिक्खू वा (२) जस्सुवस्सए संवसिज्जा तस्स णामगोयं पुव्वामेव जाणिज्जा तओ पच्छा तस्स गिहे णिमंतेमाणस्स अणिसंतेमाणस्स वा असणं वा (४) अफासुयं जाव णो पडिग्गाहिज्जा ॥ ६८३ ॥ से भिक्खू वा (२) से जं पुण उवस्सयं जाणिज्जा ससागारियं सागणियं सउदयं णो पण्णस्स निक्खमणपवेसणाए, णो पण्णस्स वायण जाव चिताए, तहप्पगारे उवस्सए णो ठाणं वा सेज्जं वा निसीहियं वा चेतेज्जा ॥ ६८४ ॥ से भिक्खू वा (२) से जं पुण उवस्सयं जाणिज्जा गाहावइकुलस्स मज्झं मज्जेणं गंतुं पंथए पएपएपडिबद्धं णो पण्णस्स निक्खमण जाव चिताए तहप्पगारे उवस्सए णो ठाणं वा सेज्जं वा निसीहियं वा चेतेज्जा ॥ ६८५ ॥ से भिक्खू वा (२) से जं पुण उवस्सयं जाणिज्जा इह खलु गाहावइ वा जाव कम्मकरीओ वा अण्णमण्णमकोसंति वा जाव उद्वेति वा णो पण्णस्स जाव चिताए सेवं णच्चा तहप्पगारे उवस्सए णो ठाणं वा जाव चेतेज्जा ॥ ६८६ ॥ से भिक्खू वा (२) से जं पुण उवस्सयं जाणिज्जा इह खलु गाहावइ वा जाव कम्मकरीओ वा अण्णमण्णस्स गायं तेल्लेण वा घएण वा अब्भंगेति वा

मक्खेति वा णो पण्णस्स जाव चिंताए, तहप्पगारे उवस्सए णो ठाणं वा जाव चेतेज्जा ॥ ६८७ ॥ से भिक्खू वा (२) से जं पुण उवस्सयं जाणिज्जा, इह खलु गाहावड् वा जाव कम्मकरीओ वा, अण्णमण्णस्स गायं सिणाणेण वा कक्केण वा लोहेण वा वण्णेण वा चुण्णेण वा पउमेण वा, आघंसंति वा पधंसंति वा उव्वलंति वा उव्वट्ठिति वा णो पण्णस्स णिक्खमण जाव चिताए तहप्पगारे उवस्सए णो ठाणं वा जाव चेतेज्जा ॥ ६८८ ॥ से भिक्खू वा (२) से जं पुण उवस्सयं जाणिज्जा इह खलु गाहावड् वा जाव कम्मकरीओ वा अण्णमण्णस्स गायं सीओद-गवियडेण वा उसिणोदगवियडेण वा, उच्छोलंति वा पधोवेति वा सिचंति वा सिणावेति वा णो पण्णस्स जाव णो ठाणं वा जाव चेतेज्जा ॥ ६८९ ॥ से भिक्खू वा (२) से जं पुण उवस्सयं जाणिज्जा, इह खलु गाहावड् वा जाव कम्मकरीओ वा णिगिणा ठिआ णिगिणा उल्लीणा मेहुणधम्मं विण्णवेति रहस्सियं वा मंतं मंतंति वा णो पण्णस्स जाव णो ठाणं वा जाव चेतेज्जा ॥ ६९० ॥ से भिक्खू वा (२) से जं पुण उवस्सयं जाणिज्जा आइण्णसंलिक्खं णो पण्णस्स जाव चिताए जाव णो ठाणं वा सेज्जं वा निसीहियं वा चेतेज्जा ॥ ६९१ ॥ से भिक्खू वा (२) अभिक्खेज्जा संधारं एसित्तए ॥ ६९२ ॥ से जं पुण संधारयं जाणिज्जा सअंडं जाव ससं-ताणगं तहप्पगारं संधारगं लामे संते णो पडिगाहिज्जा ॥ ६९३ ॥ से भिक्खू वा (२) से जं पुण संधारयं जाणिज्जा अप्पंडं जाव संताणगं गरुयं तहप्पगारं लामे संते णो पडिगाहिज्जा ॥ ६९४ ॥ से भिक्खू वा (२) से जं पुण संधारगं जाणिज्जा, अप्पंडं जाव संताणगं लहुयं अपाडिहारियं तहप्पगारं सेज्जा संधारयं लामे संते णो पडिगाहिज्जा ॥ ६९५ ॥ से भिक्खू वा (२) से जं पुण संधारगं जाणिज्जा, अप्पंडं जाव संताणगं लहुयं पाडिहारियं णो अहावड् तहप्पगारं लामे संते णो पडिगाहिज्जा ॥ ६९६ ॥ से भिक्खू वा (२) से जं पुण संधारयं जाणिज्जा अप्पंडं जाव संताणगं लहुयं पाडिहारियं अहावड् तहप्पगारं संधारयं जाव लामे संते पडिगाहिज्जा ॥ ६९७ ॥ इच्चेयाइं आयतणाइं उवाइक्कम्म अह भिक्खू जाणिज्जा इमाहिं चउहिं पडिमाहिं संधारगं एसित्तए तत्थ खलु इमा पढमा पडिमा;—से भिक्खू वा (२) उद्दिसिय उद्दिसिय संधारगं जाएज्जा, तंजहा—इक्कडं वा कठिणं वा जंतुयं वा परगं वा मोरगं वा तणं वा सोरगं वा कुसं वा कुच्चगं वा पव्वगं वा पिप्पलगं वा पलालगं वा से पुव्वामेव आलोएज्जा आउसो त्ति वा भगिणी त्ति वा दाहिसि मे एत्तो अण्णयरं संधारगं ? तहप्पगारं सयं वा णं जाएज्जा परो वा से देज्जा फासुयं एसणिज्जं लामे संते पडिगाहिज्जा पढमा पडिमा

॥ ६९८ ॥ अहावरा दोच्चा पडिमा, से भिक्खू वा (२) पेहाए संयारंगं जाएज्जा तंजहा-गाहावई वा जाव कम्मकरिं वा पुव्वामेव आलोएज्जा आउसो त्ति वा भगिणि त्ति वा दाहिसि मे एत्तो अण्णयरं संथारंगं ?” तहप्पगारं संथारंगं सयं वा णं जाएज्जा परो वा से देज्जा फासुयं एसणिज्जं जाव पडिगाहिज्जा दोच्चा पडिमा ॥ ६९९ ॥ अहावरा तच्चा पडिमा, से भिक्खू वा (२) जस्सुव-स्सए संवसेज्जा जे तत्थ अहासमण्णागए तंजहा-इक्कडेइ वा जाव पलालेइवा तस्स लामे संवसेज्जा तस्स अलामे उक्कुडुए वा निसज्जिए वा विहरेज्जा तच्चा पडिमा ॥ ७०० ॥ अहावरा चउत्था पडिमा, से भिक्खू वा (२) अहा संथडमेव संथारंगं जाइज्जा तंजहा-पुढविसिलं कट्टसिलं वा, अहा संथडमेव तस्स लामे संते संवसेज्जा, अलामे उक्कुडुए वा निसज्जिए वा विहरेज्जा, चउत्था पडिमा, ॥ ७०१ ॥ इच्चेयाणं चउण्हं पडिमाणं अण्णयरं पडिमं पडिवज्जमाणे तं चेव जाव अन्नोन्नसमा-हीए एवं चणं विहरंति ॥ ७०२ ॥ से भिक्खू वा (२) अभिकंखेज्जा संथारं पच्चप्पिणित्तए से जं पुण संथारंगं जाणिज्जा सअंडं जाव संताणगं तहप्पगारं संथारंगं णो पच्चप्पिणिज्जा ॥ ७०३ ॥ से भिक्खू वा (२) अभिकंखेज्जा संथारंगं पच्चप्पि-णित्तए, से जं पुण संथारंगं जाणिज्जा अप्पंडं जाव संताणगं तहप्पगारं संथारंगं पडिलेहिय २ पमज्जिय २ आयाविय २ विधूणिय २ तओ संजयामेव पच्चप्पिणेज्जा ॥ ७०४ ॥ से भिक्खू वा (२) समाणे वा वसमाणे वा गामाणुगामं दूइज्जमाणे पुव्वामेव णं पण्णस्स उच्चारपासवणभूमिं पडिलेहिज्जा केवली वूया ‘आयाणमेयं’ अपडिलेहियाए उच्चारपासवणभूमिए भिक्खू वा भिक्खुणी वा राओ वा वियाले वा उच्चारपासवणं परिठ्वेमाणे, पयलेज्ज वा पवडेज्ज वा से तत्थ पयलेमाणे पवडमाणे वा हत्थं वा पायं वा जाव लूसिज्जा पाणाणि वा ४ जाव ववरोवेज्जा, अह भिक्खूणं पुव्वोवदिट्ठा जाव जं पुव्वामेव पण्णस्स उच्चारपासवणभूमि पडिलेहेज्जा ॥ ७०५ ॥ से भिक्खू वा (२) अभिकंखेज्जा सेज्जासंयारगभूमि पडिलेहित्तए णण्णत्थ आय-रिएण वा उवज्जाएण वा जाव गणावच्छेएण वा वालेण वा बुद्धेण वा सेहेण वा गिलाणेण वा आएसेण वा अंतेण वा मज्जेण वा समेण वा विसमेण वा पवाएण वा णिवाएण वा तओ संजयामेव पडिलेहिय २ पमज्जिय २ तओ संजयामेव बहु-फासुयं सिज्जासंयारंगं संयरिज्जा ॥ ७०६ ॥ से भिक्खू वा (२) बहुफासुयं सेज्जा-संयारंगं संयरित्ता अभिकंखेज्जा, बहुफासुए सेज्जासंयारए दुरुहित्तए ॥ ७०७ ॥ से भिक्खू वा (२) बहुफासुए सेज्जासंयारए दुरुहमाणे से पुव्वामेव ससीसोवरियं कार्यं पाए य पमज्जिय २ तओ संजयामेव बहुफासुए सिज्जासंयारगे दुरुहित्ता तओ संज-

यामेव बहुफासुए सेज्जासंथारए सएज्जा ॥ ७०८ ॥ से भिक्खू वा (२) बहुफासुए सेज्जा संथारए सयमाणे णो अण्णमण्णस्स हत्थेण हत्थं पाएण पायं काएण कायं, आसाएज्जा, से अणासायमाणे तओ संजयामेव बहुफासुए सेज्जासंथारए सएज्जा ॥ ७०९ ॥ से भिक्खू वा (२) उस्सासमाणे वा णीसासमाणे वा कासमाणे वा छीयमाणे वा जंभायमाणे वा उड्डुए वा वायणिसग्गे वा करेमाणे पुव्वामेव आसयं वा पोसयं वा पाणिणा परिपिहित्ता तओ संजयामेव ऊससेज्ज वा जाव वायणिसग्गं वा करेज्जा, ॥ ७१० ॥ से भिक्खू वा (२) समावेगया सेज्जा भवेज्जा, विसमा वेगया सेज्जा भवेज्जा, पवाता वेगया सेज्जा भवेज्जा, णिवाता वेगया सेज्जा भवेज्जा, ससरक्खा वेगया सेज्जा भवेज्जा, अप्पससरक्खा वेगया सेज्जा भवेज्जा, सदंसम-सगा वेगया सेज्जा भवेज्जा, अप्पदंसमसगा वेगया सेज्जा भवेज्जा, सपरिसाडा वेगया सेज्जा भवेज्जा, अपरिसाडा वेगया सेज्जा भवेज्जा, सउवसग्गा वेगया सेज्जा भवेज्जा, णिरुवसग्गा वेगया सेज्जा भवेज्जा, तहप्पगाराहिं सेज्जाहिं संविज्जमाणाहिं पग्गहित-तरागं विहारं विहरेज्जा, णो किंचिवि गिलाएज्जा ॥ ७११ ॥ एस खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिए सया जएज्जासि त्ति वेमि ॥ ७१२ ॥ सेज्जाज्झयणस्स तइओदेसो समत्तो ॥

॥ सेज्जाणामविइयमज्झयणं समत्तं ॥

“अब्भुवगए खलु वासावासे अभिपवुट्ठे वहवे पाणा अभिसंभूया, वहवे वीया-अहुणुन्मिन्ना, अंतरा से मग्गा, बहुपाणा बहुवीया, जाव संताणगा, अणभिकंता पंथा णो विण्णाया मग्गा” सेवं णच्चा णो गामाणुगामं दूइजेज्जा, तओ सजयामेव वासावासं उवल्लिएज्जा ॥ ७१३ ॥ से भिक्खू वा (२) से जं पुण जाणिज्जा गामं वा जाव रायहाणिं वा, इमंसि खलु गामंसि रायहाणिसि वा णो महती विहारभूमी णो महती विचारभूमी, णो सुलभे पीढफलगसेज्जासंथारए णो सुलभे फासुए उच्छे अहेसणिज्जे वहवे जत्थ समणमाहणअतिहिक्किवणवणीमगा उवागया उवागमिरसंति य अच्चाइण्णा वित्ती णो पण्णस्स निक्खमणपवेसाए जाव धम्माणुओगचिताए सेवं णच्चा तहप्पगारं गामं वा णगरं वा जाव रायहाणिं वा णो वासावासं उवल्लिएज्जा ॥ ७१४ ॥ से भिक्खू वा (२) से जं पुण जाणिज्जा गामं वा जाव रायहाणि वा, इमंसि खलु गामंसि वा रायहाणिसि वा महती विहारभूमी महती विचारभूमी सुलभे जत्थ पीढफलगसेज्जासंथारए सुलभे फासुए उच्छे अहेसणिज्जे णो जत्थ वहवे समण

जाव उवागया उवागमिस्संति य अप्पाइण्णा वित्ती जाव रायहाणिंसि वा तओ संज-
यामेव वासावासं उवळ्ळिएज्जा ॥ ७१५ ॥ अह पुण एवं जाणिज्जा चत्तारि मासा
वासावासाणं वीइक्कंता हेमंताण य पंचदसरायकप्पे परिवुसिए अंतरा से मग्गा
वहुपाणा जाव संताणगा णो जत्थ बहवे समण जाव उवागया उवागमिस्संति य
सेवं णच्चा णो गामाणुगामं दूइज्जेज्जा ॥ ७१६ ॥ अह पुण एवं जाणिज्जा चत्तारि मासा
वासा वासाणं वीइक्कंता हेमंताण य पंच दस रायकप्पे परिवुसिए, अंतरा से मग्गा
अप्पंडा जाव असंताणगा बहवे जत्थ समण जाव उवागमिस्संति य सेवं णच्चा तओ
संजयामेव गामाणुगामं दूइज्जेज्जा ॥ ७१७ ॥ से भिक्खू वा (२) गामाणुगामं
दूइज्जमाणे पुरओ जुगसायं पेहमाणे दट्ठूण तसे पाणे उद्धट्ठु पायं रीएज्जा साहट्ठु
पायं रीएज्जा उक्खिप्पपायं रीएज्जा तिरिच्छं वा कट्ठु पायं रीएज्जा सति परक्कमे संज-
यामेव परिक्कमेज्जा णो उज्जुयं गच्छेज्जा, तओ संजयामेव गामाणुगामं दूइज्जेज्जा
॥ ७१८ ॥ से भिक्खू वा (२) गामाणुगामं दूइज्जमाणे अंतरा से पाणाणि वा
वीयाणि वा हरियाणि वा उदए वा मट्ठिया वा अविद्धत्थे सइ परक्कमे जाव णो उज्जुयं
गच्छेज्जा, तओ संजयामेव गामाणुगामं दूइज्जेज्जा ॥ ७१९ ॥ से भिक्खू वा (२)
गामाणुगामं दूइज्जमाणे अंतरा से विरुवरूवाणि पच्चंतिकाणि दस्सुगायतणाणि मिल-
क्खूणि अणायरियाणि दुस्सन्नप्पाणि दुप्पण्णवणिज्जाणि अकालपडिवोहीणि अकाल-
परिभोईणि सति लाढे विहाराए संथरमाणेहिं जाणवएहिं णो विहारवत्तियाए पव-
ज्जेज्जा गमणाए केवली बूया 'आयाणमेयं' ते णं वाला "अयं तेणे अयं उवचरए
अयं तओ आगए" ति कट्ठु तं भिक्खुं अक्कोसेज्ज वा जाव उद्वेज्ज वा वत्थं पडि-
ग्गहं कंवलं पायपुंछणं अच्छिदेज्ज वा अभिंदेज्ज वा अवहरिज्ज वा, परिठ्ठविज्ज वा,
अह भिक्खूणं पुव्वोवदिट्ठा पइण्णा जाव जं णो तहप्पगाराणि विरुवरूवाणि पच्चंति-
याणि दस्सुगायतणाणि जाव विहारवत्तियाए णो पवज्जेज्जा गमणाए, तओ संजयामेव
गामाणुगामं दूइज्जेज्जा ॥ ७२० ॥ से भिक्खू वा (२) गामाणुगामं दूइज्जमाणे
अंतरा से अरायाणि वा, गणरायाणि वा, जुवरायाणि वा, दोरज्जाणि वा, वेरज्जाणि
वा, विरुद्धरज्जाणि वा, सइ लाढे विहाराए संथरमाणेहिं जणवएहिं णो विहारवत्तियाए
पवज्जेज्जगमणाए, केवली बूया 'आयाणमेयं' ते णं वाला 'अयं तेणे' तं चेव जाव
णो विहारवत्तियाए पवज्जेज्ज गमणाए तओ संजयामेव गामाणुगामं दूइज्जेज्जा ॥ ७२१ ॥
से भिक्खू वा (२) गामाणुगामं दूइज्जमाणे अंतरा से विहं सिया से जं पुण विहं
जाणिज्जा, एगाहेण वा, दुयाहेण वा, तियाहेण वा, चउयाहेण वा, पंचाहेण वा,
पाउणिज्ज वा, नो पाउणिज्ज वा, तहप्पगारं विहं अणेगाहगमणिज्जं सति लाढे जाव

णो विहारवत्तियाए पवजेज्ज गमणाए, केवली वूया 'आयाणमेयं' अंतरा से वासे
 सिया, पाणेषु वा, पणएसु वा, वीएसु वा, हरिएसु वा, उदएसु वा, मट्ठियाए वा,
 अविट्ठयाए, अह भिक्खुणं पुव्वोवदिट्ठा जाव जं तहप्पगारं अणेगाहगमणिज्जं जाव
 णो गमणाए, तओ संजयामेव गामाणुगामं दूइजेज्जा गमणाए ॥ ७२२ ॥ से भिक्खु
 वा (२) गामाणुगामं दूइज्जमाणे अंतरा से णावा संतारिमे उदए सिया, से जं
 पुण णावं जाणिज्जा, असंजए भिक्खुपडियाए किणेज्ज वा, पामिच्चेज्ज वा, णावाए
 वा णावं परिणामं कट्ठ, थलाओ वा णावं जलंसि ओगाहेज्जा, जलाओ वा णावं
 थलंसि उक्कसेज्जा, पुण्णं वा णावं उस्सिच्चेज्जा, सण्णं वा णावं उप्पीलावेज्जा, तह-
 प्पगारं णावं उट्ठुगामिणिं वा, अहेगामिणिं वा, तिरियगामिणिं वा, परं जोयणमेराए
 अद्धजोयणमेराए अप्पतरो वा, भुज्जतरो वा, णो दुरुहेज्ज गमणाए ॥ ७२३ ॥ से
 भिक्खु वा (२) पुव्वामेव तिरिच्छसंपातिमं णावं जाणिज्जा जाणित्ता से तमायाए
 एगंतमवक्कमिज्जा, भंडगं पडिलेहिज्जा, पडिलेहिता एगओ भोयणभंडगं करेज्जा २
 ससीसोवरियं कायं पाए य पमजेज्जा पमजित्ता सागारियभत्तं पच्चक्खाएज्जा पच्च-
 क्खाइत्ता एगं पायं जले किच्चा एगं पायं थले किच्चा तओ संजयामेव णावं दुरुहेज्जा
 ॥ ७२४ ॥ से भिक्खु वा (२) णावं दुरुहमाणे णो णावाए पुरओ दुरुहेज्जा, णो
 णावाए अग्गओ दुरुहेज्जा, णो णावाए मज्झतो दुरुहेज्जा, णो वाहाओ पगिज्झिय पगि-
 जिज्झय अंगुलिए उवदंसिय २ ओणमिय २ उण्णमिय २ णिज्झाएज्जा ॥ ७२५ ॥ से णं
 परो णावागतो णावागयं वएज्जा "आउसंतो समणा ! एयं ता तुमं णावं उक्कसाहि
 वा वोक्कसाहि वा खिवाहि वा रज्जूए वा गहाय आकसाहि" णो से तं परिञ्चं परि-
 जाणेज्जा तुसिणीओ उवेहेज्जा ॥ ७२६ ॥ से णं परो णावागतो णावागयं वएज्जा
 "आउसंतो समणा णो संचाएसि णावं उक्कसित्ते वा वोक्कसित्ते वा खिवित्ते वा
 रज्जुयाए वा गहाय आकसित्ते आहर एतं णावाए रज्जूयं सयं चेव णं वयं णावं
 उक्कसिस्सामो वा जाव रज्जूए वा गहाय आकसिस्सामो" णो से तं परिणं परिजा-
 नेज्जा तुसिणीओ उवेहेज्जा ॥ ७२७ ॥ से णं परो णावागतो णावागयं वएज्जा
 आउसंतो समणा एयं ता तुमं णावं आलित्तेण वा, पीढेण वा वंसेण वा वलएण वा
 अवलएण वा वाहेहि णो से तं परिणं परिजाणिज्जा तुसिणीओ उवेहेज्जा ॥ ७२८ ॥
 से णं परो णावागतो णावागयं वदेज्जा "आउसंतो समणा एयं ता तुमं णावाए
 उदयं हत्थेण वा पाएण वा मत्तेण वा पडिग्गहेण वा णावा उस्सिच्चणेण वा उस्सि-
 चाहि" णो से तं परिणं परिजाणिज्जा तुसिणीओ उवेहेज्जा ॥ ७२९ ॥ से णं परो
 णावागतो णावागयं वएज्जा, आउसंतो समणा एतं तो तुमं णावाए उत्तिगं हत्थेण

वा पाएण वा बाहुणा वा उरुणा वा उदरेण वा सीसेण वा काएण वा णावा उस्सि-
 च्चणेण चेलेण वा मट्ठियाए वा कुसपत्तएण वा कुरुविदेण वा पिहेहि” णो से तं
 परिणं परिजाणिज्जा ॥ ७३० ॥ से भिक्खू वा (२) णावाए उत्तिगेणं उदयं आस-
 वमाणं पेहाए उवस्वरि णावं कज्जलावेमाणि पेहाए णो परं उवसंक्रमित्तु एवं वूया,
 “आउसंतो गाहावइ एयं ते णावाए उदयं उत्तिगेण आसवति, उवस्वरिं वा णावा
 कज्जलावेति” एतप्पगारं मणं वा वायं वा णो पुरओ कट्ठ विहरेज्जा, अप्पुस्सुए
 अबहिंहेस्से एगंतगएणं अप्पागं विउसेज्ज समाहीए, तओ संजयामेव णावासंतारिमे
 उदए अहारियं रीएज्जा ॥ ७३१ ॥ एयं खलु तस्स भिक्खुस्स भिक्खुणीए वा
 सामग्गियं जं सव्वट्ठेहिं सहिए सदा जएज्जासि त्ति वेमि ॥ ७३२ ॥ इरिया-
 ज्जयणे पढमोद्देसो समत्तो ॥

से णं परो णावागओ णावागयं वदेज्जा, “आउसंतो समणा एयं ता तुमं छत्तगं
 वा जाव चम्मछेयणं वा गिण्हाहि, एयाणि तुमं विरुवरुवाणि सत्थजायाणि
 धारेहि, एयं ता तुमं दारगं वा, पजेहि” णो से तं परिणं परिजाणिज्जा, तुसिणीओ
 उवेहेज्जा ॥ ७३३ ॥ से णं परो णावागए णावागयं वदेज्जा एसणं समणे णावाए
 भंडभारिए भवइ से णं बाहाए गहाय णावाओ उदगंसि पक्खिवह” एतप्पगारं
 णिग्घोसं सोच्चा णिसम्म से य चीवरधारी सिया खिप्पामेव चीवराणि उव्वेद्धिज्ज वा
 णिव्वेद्धिज्ज वा उप्फेसं वा करिज्जा ॥ ७३४ ॥ अह पुण एवं जाणिज्जा अभिक्कंत-
 कूरकम्मा खलु बाला बाहाहिं गहाय नावाओ उदगंसि पक्खिविज्जा से पुव्वामेव
 वएज्जा ‘आउसंतो ! गाहावइ ! मा मेत्तो बाहाए गहाय णावाओ उदगंसि पक्खिवह
 सयं चेव णं अहं णावातो उदगंसि ओगाहिस्सामि,’ से णेवं वयंतं परो सहसा बलसा
 बाहाहिं गहाय उदगंसि पक्खिविज्जा तं णो सुमणे सिया णो दुम्मणे सिया णो उच्चा-
 वयं मणं णियंछिज्जा, णो तेसि बालाणं घातए वहाए समुट्ठिज्जा, अप्पुस्सुए जाव
 समाहीए तओ संजयामेव उदगंसि पविज्जा ॥ ७३५ ॥ से भिक्खू वा (२) उद-
 गंसि पवमाणे णो हत्थेण हत्थं पाएण पायं काएण कायं आसाएज्जा, से अणासाय-
 णाए अणासायमाणे तओ संजयामेव उदगंसि पविज्जा ॥ ७३६ ॥ से भिक्खू वा
 (२) उदगंसि पवमाणे णो उम्मुग्गणिम्मुग्गियं करिज्जा, मामेयं उदगं कण्णेसु वा
 अच्छीसु वा णक्कंसि वा मुहंसि वा परियावज्जिज्जा, तओ संजयामेव उदगंसि पविज्जा
 ॥ ७३७ ॥ से भिक्खू वा (२) उदगंसि पवमाणे दोब्बलियं पाउणिज्जा खिप्पामेव
 उवहिं विगिचिज्ज वा विसोहिज्ज वा, णो चेव णं सातिज्जिज्जा अह पुण एवं जाणिज्जा
 पारए सिया उदगाओ तीरं पाउणित्तए तओ संजयामेव उदउल्लेण वा ससिणिद्धेण

वा काएण उदगतीरे चिठ्ठिज्जा ॥ ७३८ ॥ से भिक्खू वा (२) उदउल्लं वा ससि-
 णिद्धं वा कायं णो आमज्जिज्ज वा पमज्जिज्ज वा संलिहिज्ज वा णिल्लिहिज्ज वा उव्व-
 लिज्ज वा उव्वट्ठिज्ज वा, आयाविज्ज पयाविज्ज वा, अह पु० विगओदओ मे काए
 छिन्नसिणेहे काए त० आ० पयाविज्ज वा० तओ संजयामेव गामाणुगामं दूइजेज्जा
 ॥ ७३९ ॥ से भिक्खू वा (२) गामाणुगामं दूइज्जमाणे णो परेहिं सद्धिं परिज-
 विय परिजविय गामाणुगामं दूइज्जिज्जा, तओ संजयामेव गामाणुगामं दूइज्जिज्जा
 ॥ ७४० ॥ से भिक्खू वा (२) गामाणुगामं दूइज्जमाणे अंतरा से जंघासंतारिमे
 उदए सिया से पुव्वामेव ससीसोवरियं कायं पादे य पमजेज्जा से पुव्वामेव पम-
 ज्जित्ता एगं पायं जले किच्चा एगं पायं थले किच्चा तओ संजयामेव जंघासंतारिमे
 उदए अहारियं रीएज्जा ॥ ७४१ ॥ से भिक्खू वा (२) जंघासंतारिमे उदगे अहा-
 रियं रीयमाणे णो हत्थेण वा हत्थं पाएण वा पायं काएण वा कायं आसाएज्जा, से
 अणासायए अणासायमाणे तओ संजयामेव जंघासंतारिमे उदए अहारियं रीएज्जा
 ॥ ७४२ ॥ से भिक्खू वा (२) जंघासंतारिमे उदए अहारियं रीयमाणे णो साया-
 वडियाए णो परिदाहवडियाए महइ महालयंसि उदगंसि कायं विउसिज्जा, तओ
 संजयामेव जंघासंतारिमे उदए अहारियं रीएज्जा, अह पुण एवं जाणिज्जा पारए
 सिया उदगाओ तीरं पाउणित्तए तओ संजयामेव उदउल्लेण वा ससिणिद्धेण वा
 काएण उदगतीरे चिठ्ठेज्जा ॥ ७४३ ॥ से भिक्खू वा (२) उदउल्लं वा कायं ससि-
 णिद्धं वा कायं णो आमजेज्ज वा पमजेज्ज वा, अह पुण एवं जाणिज्जा विगतोदए मे
 काए छिण्णसिणेहे तहप्पगारं कायं आमजेज्ज वा जाव पयावेज्ज वा, तओ संजया-
 मेव गामाणुगामं दूइजेज्जा ॥ ७४४ ॥ से भिक्खू वा (२) गामाणुगामं दूइज्जमाणे
 णो मट्ठियामएहिं पाएहिं हरियाणि छिंदिय २ विकुज्जिय २ विफालिय २ उम्मग्गेणं
 हरियवहाए गच्छेज्जा “जहेयं पाएहिं मट्ठियं खिप्पामेव हरियाणि अवहरंतु” माइठ्ठाणं
 संफासे णो एवं करेज्जा से पुव्वामेव अप्पहारियं मग्गं पडिल्लेहेज्जा, तओ संजयामेव
 गामाणुगामं दूइजेज्जा ॥ ७४५ ॥ से भिक्खू वा (२) गामाणुगामं दूइज्जमाणे
 अंतरा से वप्पाणि वा, फलिहाणि वा, पागाराणि वा, तोरणाणि वा, अग्गलाणि वा,
 अग्गलपासगाणि वा, गट्ठाओ वा, दरीओ वा, सइ परक्कमे संजयामेव परक्कमेज्जा,
 णो उज्जुयं गच्छेज्जा, केवली वूया ‘आयाणमेयं’ से तत्थ परक्कममाणे पयलेज्ज वा
 पवडेज्ज वा ॥ ७४६ ॥ से तत्थ पयलमाणे वा, पवडेमाणे वा, रुक्खाणि वा,
 गुच्छाणि वा, गुम्माणि वा, लयाओ वा, वल्लीओ वा, तणाणि वा, गहणाणि वा,
 हरियाणि वा, अवलंबिय २ उत्तरेज्जा, जे तत्थ पाडिपहिया उवागच्छंति, ते पाणी

जाएज्जा, तओ संजयामेव अवलंबिय २ उत्तरेज्जा, तओ गामाणुगामं दूइजेज्जा ॥ ७४७ ॥ से भिक्खू वा (२) गामाणुगामं दूइज्जमाणे अंतरा से जवसाणि वा, सगडाणि वा, रहाणि वा, सचक्काणि वा, परचक्काणि वा, से णं वा विरुवरुवं संणि-
रुद्धं पेहाए सइ परक्कमे संजयामेव णो उज्जुयं गच्छेज्जा ॥ ७४८ ॥ से णं परो सेणा-
गओ वएज्जा, आउसंतो एसणं समणे सेणाए अभिनिवारियं करेइ, से णं वाहाए
गहाय आगसह सेणं परो वाहाहिं गहाय आगसेज्जा, तं णो सुमणे सिया जाव
समाहीए तओ संजयामेव गामाणुगामं दूइजेज्जा ॥ ७४९ ॥ से भिक्खू वा (२)
अंतरा से पाडिपहिया उवागच्छेज्जा तेणं पाडिपहिया एवं वदेज्जा आउसंतो समणा
केवइए एस गामे वा रायहाणी वा केवइया एत्थ आसा हत्थी गामपिंडोलगा
मणुस्सा परिवसंति ? से बहुभत्ते बहुउदए बहुजणे बहुजवसे से अप्पुदए अप्पभत्ते
अप्पजणे अप्पजवसे, एयप्पगाराणि पसिणाणि पुट्ठो वा अपुट्ठो वा णो आइक्खेज्जा,
एतप्पगाराणि पसिणाणि णो पुच्छेज्जा ॥ ७५० ॥ एयं खलु तस्स भिक्खुस्स भिक्खु-
णीए वा सामग्गियं ॥ ७५१ ॥ इरियाज्झयणे वीओइेसो समत्तो ॥

से भिक्खू वा (२) गामाणुगामं दूइज्जमाणे अंतरा से वप्पाणि वा, फलिहाणि
वा, पागाराणि वा, जाव दरीओ वा, कूडागाराणि वा, पासादाणि वा, णूमगिहाणि
वा, रुक्खगिहाणि वा, पव्वयगिहाणि वा, आएसणाणि वा, जाव भवणगिहाणि वा,
णो वाहाओ पगिज्झिय २ अंगुलियाए उद्दिसिय २ ओ०२ उण्णमिय २ णिज्झाएज्जा,
तओ संजयामेव गामाणुगामं दूइजेज्जा ॥ ७५२ ॥ से भिक्खू वा (२) गामाणुगामं
दूइज्जमाणे अंतरा से कच्छाणि वा, दवियाणि वा, णूमाणि वा, वलयाणि वा, गह-
णाणि वा, गहणविदुग्गाणि वा, वणाणि वा, वणपव्वयाणि वा, पव्वतविदुग्गाणि वा,
पव्वतगिहाणि वा, अगडाणि वा, तलागाणि वा, दहाणि वा, णदीओ वा, वावीओ
वा, पुक्खरणीओ वा, दीर्हियाओ वा, गुंजालियाओ वा, सराणि वा, सरपंतियाणि
वा, सरसरपंतियाणि वा, णो वाहाओ पगिज्झिय जाव णिज्झाएज्जा, केवली बूया
'आयाण-मेयं' जे तत्थ मिगा वा, पसू वा, पक्खी वा, सिरीसिवा वा, सीहा वा,
जलचरा वा, थलचरा वा, खहचरा वा, सत्ता ते उत्तसेज्ज वा, वित्तसेज्ज वा, वाडं
वा नरणं वा कंखेज्जा, "चारित्ति मे अयं समणे" अह भिक्खूणं पुव्वोवदिट्ठा एस
पडण्णा जं णो वाहाओ पगिज्झिय २ जाव णिज्झाएज्जा, तओ संजयामेव आयरिय
उवज्जाएहिं सद्धिं गामाणुगामं दूइजेज्जा ॥ ७५३ ॥ से भिक्खू वा (२) आयरि-
यउवज्जाएहिं सद्धिं गामाणुगामं दूइज्जमाणे, णो आयरियउवज्जायस्स हत्थेण वा
हत्थं जाव अणासायमाणे तओ संजयामेव आयरियउवज्जाएहिं सद्धिं जाव दूइ-

जिज्जा ॥ ७५४ ॥ से भिक्खू वा (२) आयरियउवज्जाएहिं सद्धि दूइज्जमाणे अंतरा से पाडिपहिया उवागच्छेज्जा, ते णं पाडिपहिया से एवं वएज्जा “आउसंतो समणा के तुब्भे ? कओ वा एह ? कहिं वा गच्छिहिह” जे तत्थ आयरियउवज्जाए से भासेज्ज वा, वियागरेज्ज वा, आयरियोवज्जायस्स भासमाणस्स वा वियागरे-माणस्स वा णो अंतराभासं करेज्जा, तओ संजयामेव अहारातिणिए वा० दूइजेज्जा ॥ ७५५ ॥ से भिक्खू वा (२) अहारातिणियं गामाणुगामं दूइज्जमाणे णो अहारा-तिणियस्स हत्थेण हत्थं जाव अणासायमाणे तओ संजयामेव अहारातिणियं गामा-णुगामं दूइज्जिज्जा ॥ ७५६ ॥ से भिक्खू वा (२) अहारातिणियं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वदेज्जा, आउसंतो समणा के तुब्भे ? कओ वा एह ? कहिं वा गच्छिहिह ? जे तत्थ सव्वरातिणिए से भासेज्ज वा वागरेज्ज वा अहारातिणियस्स भासमाणस्स वियागरेमाणस्स वा णो अंतराभासं भासेज्जा, तओ संजयामेव अहाराइणियाए गामाणुगामं दूइज्जिज्जा ॥ ७५७ ॥ से भिक्खू वा (२) गामाणुगामं दूइज्जमाणे अंतरा से पाडिपहिया आगच्छेज्जा, ते णं पाडिपहिया एवं वदेज्जा “आउसंतो समणा ! अवियाइं एत्तो पडिपहे पासह तंजहा-मणुस्सं वा गोणं वा महिसं वा पसुं वा पक्खि वा, सिरीसिवं वा जलयरं वा से आइक्खह दंसेह” तं णो आइक्खेज्जा णो दंसेज्जा णो तेसिं तं परिणं परिजाणिज्जा, तुसिणीओ उवेहेज्जा, जाणं वा, णो जाणंति वएज्जा, तओ संजयामेव गामा-णुगामं दूइजेज्जा ॥ ७५८ ॥ से भिक्खू वा (२) गामाणुगामं दूइज्जमाणे अंतरा से पाडिपहिया आगच्छेज्जा ते णं पाडिपहिया एवं वएज्जा “आउसंतो समणा अवियाइं एत्तो पडिपहे पासह उदगपसूयाणि कंदाणि वा मूलाणि वा तयाणि वा पत्ताणि वा पुप्फाणि वा फलाणि वा बीयाणि वा हरियाणि वा उदगं वा संणिहियं अगणिं वा संणिक्खत्तं, सेसं तं चेव से आइक्खह, जाव दूइजेज्जा ॥ ७५९ ॥ से भिक्खू वा (२) गामाणुगामं दूइज्जमाणे अंतरा से पाडिपहिया उवागच्छेज्जा ते णं पाडिपहिया एवं वएज्जा, आउसंतो समणा अवियाइं एत्तो पडिपहे पासह, जवसाणि वा, जाव से णं वा, विरुवरुवं संणिविट्ठं, से आइक्खह जाव दूइज्जिज्जा ॥ ७६० ॥ से भिक्खू वा (२) गामाणुगामं दूइज्जमाणे अंतरा से पाडिपहिया जाव “आउसंतो समणा ! केवइए एत्तो गामे वा जाव रायहाणी वा से आइक्खह जाव दूइज्जिज्जा ॥ ७६१ ॥ से भिक्खू वा (२) गामाणुगामं दूइज्जमाणे अंतरा से पाडिपहिया जाव “आउसंतो समणा केवइए एत्तो गामस्स णगरस्स वा जाव राय-हाणीए वा मग्गे, से आइक्खह तहेव जाव दूइज्जिज्जा ॥ ७६२ ॥ से भिक्खु वा

(२) गामाणुगामं दूइज्जमाणे अंतरा से गोणं वियालं पडिपहे पेहाए जाव चित्तचि-
 ल्लंडं वियालं पडिपहे पेहाए गो तेसि भीओ उम्मग्गेणं गच्छेज्जा, गो मग्गाओ उम्मग्गं
 संकमिज्जा, गो गहणं वा वणं वा दुग्गं वा अणुपविसेज्जा, गो रुक्खंसि दुरुहेज्जा, गो
 महइमहालयंसि उदयंसि कायं विउसेज्जा, गो वाडं वा सरणं वा सेणं वा सत्थं वा
 कंखेज्जा, अप्पुस्सुए जाव समाहीए तओ संजयामेव गामाणुगामं दूइज्जिज्जा ॥ ७६३ ॥
 से भिक्खु वा (२) गामाणुगामं दूइज्जमाणे अंतरा से विहं सिया से जं पुण विहं
 जाणिज्जा, इमंसि खलु विहंसि वहवे आमोसगा उवगरणपडियाए संपिडिया गच्छेज्जा,
 गो तेसि भीओ उम्मग्गेण गच्छेज्जा, जाव समाहीए तओ संजयामेव गामाणुगामं
 दूइज्जिज्जा ॥ ७६४ ॥ से भिक्खु वा (२) गामाणुगामं दूइज्जमाणे अंतरा से आमो-
 सगा संपिडिया गच्छेज्जा ते णं आमोसगा एवं वदेज्जा, आउसंतो समणा, आहर
 एयं वत्थं वा पायं वा कंवलं वा पायपुंछणं वा देहि णिक्खिवाहि, तं गो देज्जा
 णिक्खिवेज्जा, गो वंदिय २ जाएज्जा, गो अंजलिं कट्ठु जाएज्जा, गो कलुणपडियाए
 जाएज्जा, धम्मियाए जाएज्जा, तुसिणीयभावेण वा उवेहिज्जा, ते णं आमोसगा 'सयं
 करणिज्जं' ति कट्ठु, अक्कोसंति वा जाव उवद्वंति वा वत्थं वा पायं वा कंवलं वा
 पायपुंछणं अर्च्छिदेज्जा वा, जाव परिठ्वेज्जा वा, तं णं गो गामसंसारियं कुज्जा, गो
 रायसंसारियं कुज्जा, गो परं उवसंकमित्तु वूया, आउसंतो गाहावइ एए खलु मे
 आमोसगा उवगरणपडियाए सयं करणिज्जं ति कट्ठु अक्कोसंति वा जाव परिठ्वेति
 वा, एयप्पगारं मणं वा वयणं वा गो पुरओ कट्ठु विहरेज्जा, अप्पुस्सुए जाव समाहीए
 तओ संजयामेव गामाणुगामं दूइजेज्जा ॥ ७६५ ॥ एयं खलु तस्स भिक्खुस्स
 भिक्खुणीए वा सामगियं, जं सव्वठ्ठेहिं सहिए सया जएज्जासि ति वेमि ॥ ७६६ ॥
 इरियाज्झयणस्स तइओदेसो समत्तो ॥ तइयं इरियाज्झयणं समत्तं ॥

से भिक्खु वा (२) इमाइं वयायाराइं सोच्चा णिसम्म इमाइं अणायाराइं
 अणायरियपुव्वाइं जाणिज्जा, जे कोहा वा माणा वा मायाए वा लोहा वा वायं विडंजंति,
 जागओ वा फल्सं वयंति, अजाणओ वा फल्सं वयंति, सव्वमेयं सावज्जं वजेज्जा,
 विवेगमायाए ॥ ७६७ ॥ धुवं चेयं जाणिज्जा, अधुवं चेयं जाणिज्जा, असणं वा (४)
 लभिय गो लभिय, भुंजिय गो भुंजिय, अदुवा आगए गो आगए, अदुवा एइ
 गो एइ, अदुवा एहिति गो एहिति, एत्थवि आगए गो आगए, एत्थवि एइ गो एइ,
 एत्थवि एहिति गो एहिति ॥ ७६८ ॥ अणुवीइ णिठाभासी, समियाए संजए भासं
 भासेजा, तंजहा-एगवयणं, दुवयणं, बहुवयणं, इत्थिवयणं, पुरिसवयणं, णपुंसगवयणं,

अज्झत्थवयणं, उवणीयवयणं, अवणीयवयणं, उवणीयावणीयवयणं, अवणीयोवणी-
यवयणं, तीयवयणं, पडुप्पन्नवयणं, अणागयवयणं, पच्चक्खवयणं, परोक्खवयणं
॥ ७६९ ॥ से एगवयणं वदिस्सामीति एगवयणं वएज्जा, जाव परोक्खवयणं वइ-
स्सामीति परोक्खवयणं वएज्जा, इत्थी वेस पुरिसो वेस, णपुंसं वेस, एवं वा चेयं,
अण्णं वा चेयं, अणुवीइ णिट्ठाभासी, समियाए संजए भासं भासिज्जा, इच्चेयाइं
आयतणाइं उवातिकम्म ॥ ७७० ॥ अह भिक्खू जाणिज्जा चत्तारि भासज्जायाइं,
तंजहा-सच्चमेगं पढमं भासज्जायं, वीयं मोसं, तइयं सच्चामोसं, जं णेव सच्चं णेव
मोसं नेव सच्चामोसं “असच्चामोसं” णाम तं चउत्थं भासजातं ॥ ७७१ ॥ से बेमि
जे अतीता जे य पडुप्पन्ना जे य अणागया अरहंता भगवंतो सव्वे ते एयाणि
चेव चत्तारि भासाजायाइं भासिंसु वा भासंति वा भासिस्संति वा, पण्णविसु वा,
पण्णवेंति वा, पण्णविस्संति वा, सव्वाइं च णं एयाइं अचित्ताणि वण्णमंताणि गंध-
मंताणि रसमंताणि फासमंताणि चओवचइयाइं विपरिणामधम्माइं भवंतीति सम-
क्खायाइं ॥ ७७२ ॥ से भिक्खू वा (२) पुर्व्वि भासा अभासा भासमाणा भासा
भासा, भासासमयविइकंता च णं भासिया भासा अभासा ॥ ७७३ ॥ से भिक्खू वा (२)
जाय भासा सच्चा, जाय भासा मोसा, जाय भासा सच्चामोसा, जाय भासा असच्चा-
मोसा, तहप्पगारं भासं सावज्जं सकिरियं कक्कसं कडुयं निट्ठुरं फरुसं अण्हयकरि
छेयणभेयणकरिं परितावणकरिं उट्ठवकरिं भूतोवघाइयं अभिकंख भासं णो भासेज्जा
॥ ७७४ ॥ से भिक्खू वा (२) जा य भासा सच्चा सुहुमा जाय भासा असच्चा-
मोसा तहप्पगारं भासं असावज्जं अकिरियं जाव अभूतोवघाइयं अभिकंख भासं
भासेज्जा, अदुवा य पुमं आमंतेमाणे आमंतिते वा अपडिसुणेमाणं णो एवं वएज्जा,
होले ति वा गोले ति वा वसुले ति वा कुपक्खे ति वा घडदासे ति वा साणे ति
वा तेणे ति वा चारिए ति वा माई ति वा मुसावाई ति वा एयाइं तुमं ते जणगा
वा, एतप्पगारं भासं सावज्जं सकिरियं जाव अभिकंख नो भासेज्जा ॥ ७७५ ॥ से
भिक्खू वा (२) पुमं आमंतेमाणे आमंतिए वा अपडिसुणेमाणे एवं वएज्जा, अमुगे
ति वा आउसोत्ति वा आउसंतोत्ति वा सावगे ति वा उपासगेति वा धम्मिएति वा
धम्मपियेति वा एयप्पगारं भासं असावज्जं जाव अभूतोवघाइयं अभिकंख भासेज्जा
॥ ७७६ ॥ से भिक्खू वा (२) इत्थि आमंतेमाणे आमंतिए य अपडिसुणेमाणीं
नो एवं वएज्जा, होली इ वा गोली इ वा इत्थीगमेगं णेतव्वं ॥ ७७७ ॥ से भिक्खू
वा (२) इत्थियं आमंतेमाणे आमंतिए य अपडिसुणेमाणीं एवं वएज्जा, आउसि
ति वा भगिणि ति वा भगवइ ति वा साविगे ति वा उवासिए ति वा धम्मिए ति

वा धम्मपियेति वा एतप्पगारं भासं असावज्जं जाव अभिकंख भासेज्जा ॥ ७७८ ॥
 से भिक्खू वा (२) णो एवं वएज्जा, णभोदेवेति वा गज्जदेवेति वा विज्जुदेवे ति
 वा पवुठ्ठदेवेति वा निवुठ्ठदेवेति वा पडउ वा वासं मा वा पडउ णिप्फज्जउ वा
 सस्सं मा वा णिप्फज्जउ विभाउ वा रयणी मा वा विभाउ उदेउ वा सूरिए मा वा
 उदेउ सो वा राया जयउ मा वा जयउ णो एतप्पगारं भासं भासिज्जा, पण्णवं
 ॥ ७७९ ॥ से भिक्खू वा (२) अंतलिकखेति वा गुज्झाणुचरिएति वा संमुच्छिए
 वा णिवइए वा पओवएज्जा वा वुठ्ठबलाहगेति वा ॥ ७८० ॥ एयं खलु तस्स भिक्खुस्स
 भिक्खुणीए वा सामगियं जं सव्वठ्ठेहिं समिए सहिए सया जएज्जासि ति बेमि
 ॥ ७८१ ॥ **भासाज्झयणस्स पढमोद्देसो समत्तो ॥**

से भिक्खू वा (२) जहा वेगइयाइं रुवाइं पासेज्जा तहावि ताइं णो एवं वएज्जा,
 तंजहा-गंडी गंडीति वा, कुट्ठी कुट्ठीति वा, जाव महुमेहुणीति वा, हत्थछिन्नं
 हत्थछिन्नेति वा, एवं पादणक्कण्णउठ्ठच्छिण्णेति वा । जे या वण्णे तहप्पगारा
 एयप्पगाराहिं भासाहिं वुइया वुइया कुप्पंति माणवा, तेयावि तहप्पगाराहिं भासाहिं
 अभिकंख णो भासेज्जा ॥ ७८२ ॥ से भिक्खू वा (२) जहा वेगइयाइं रुवाइं
 पासिज्जा तहावि ताइं एवं वएज्जा तंजहा-ओयंसी ओयंसीति वा, तेयंसी तेयंसी ति
 वा, वच्चंसी वच्चंसीति वा, जसंसी जसंसीति वा, अभिरुवं अभिरुवेति वा पडिरुवं
 पडिरुवेति वा, पासाइयं पासाइयंति वा दरिसणिज्जं दरिसणीएति वा, जेया वण्णे
 तहप्पगारा एयप्पगाराहिं भासाहिं वुइया वुइया णो कुप्पंति माणवा, तेयावि तहप्प-
 गारा एयप्पगाराहिं भासाहिं अभिकंख भासिज्जा । तहप्पगारं भासं असावज्जं जाव
 भासेज्जा ॥ ७८३ ॥ से भिक्खू वा (२) जहा वेगइयाइं रुवाइं पासेज्जा तंजहा-
 वप्पाणि वा जाव भवणगिहाणि वा, तहावि ताइं णो एवं वएज्जा, तंजहा-सुकडे इ
 वा सुठ्ठुकडे इ वा साहुकडे इ वा कल्लाणे इ वा करणिज्जे इ वा एयप्पगारं
 भास सावज्जं जाव णो भासेज्जा ॥ ७८४ ॥ से भिक्खू वा (२) जहा वेगइयाइं
 रुवाइं पासेज्जा, तंजहा-वप्पाणि वा जाव भवणगिहाणि वा तहावि ताइं एवं
 वएज्जा, तंजहा-आरंभकडेइ वा सावज्जकडे इ वा पयत्तकडे इ वा पासाइयं
 पासाइएति वा दरिसणीयं दरिसणीएति वा अभिरुवं अभिरुवेति वा पडिरुवं
 पडिरुवेति वा एयप्पगारं भास असावज्जं जाव भासेज्जा ॥ ७८५ ॥ से भिक्खू वा
 (२) असणं वा (४) उवक्खडियं पेहाए तहाविहं तं णो एवं वएज्जा, तंजहा-सुकडेति
 वा सुठ्ठुकडे इ वा साहुकडे इ वा कल्लाणे इ वा करणिज्जे इ वा एयप्पगारं भासं सावज्जं
 जाव णो भासेज्जा ॥ ७८६ ॥ से भिक्खू वा (२) असणं वा (४) उवक्खडियं

पेहाए एवं वएज्जा, तंजहा-आरंभकडे ति वा सावज्जकडे ति वा पयत्तकडेति वा
 भद्दयं भद्दए ति वा ऊसढं ऊसढे ति वा रसियं रसिए ति वा मणुण्णं मणुण्णे ति
 वा एयप्पगारं भासं असावज्जं जाव भासेज्जा ॥ ७८७ ॥ से भिक्खू वा (२)
 मणुस्सं वा गोणं वा महिसं वा मिगं वा पसुं वा पक्खिं वा सरीसिवं वा जलयरं
 वा से तं परिवूढकायं पेहाए णो एवं वएज्जा थूलेइ वा पमेइलेइ वा वट्टेइ वा
 वज्जेइ वा पाइमेइ वा एयप्पगारं भासं सावज्जं जाव णो भासिज्जा ॥ ७८८ ॥
 से भिक्खू वा (२) मणुस्सं जाव जलयरं वा से तं परिवूढकायं पेहाए एवं
 वएज्जा, परिवूढकाएति वा, उवचियकाए ति वा थिरसंघयणेति वा उवचियमंस-
 सोणिएति वा बहुपडिपुण्णइंदिएति वा एयप्पगारं भासं असावज्जं जाव भासिज्जा
 ॥ ७८९ ॥ से भिक्खू वा (२) विरुवरूवाओ गाओ पेहाए णो एवं वएज्जा,
 तंजहा-गाओ दोज्झाओ ति वा दम्मेति वा गोरहति वा वार्हिमति वा रहजोग्गति
 वा एयप्पगारं भासं सावज्जं जाव णो भासिज्जा ॥ ७९० ॥ से भिक्खू वा (२)
 विरुवरूवाओ गाओ पेहाए एवं वएज्जा तंजहा-जुवंगवेति वा धेणु ति वा
 रसवइ ति वा हस्सेइ वा महल्लएइ वा महव्वएइ वा संवहणि ति वा
 एयप्पगारं भासं असावज्जं जाव अभिक्खं भासिज्जा ॥ ७९१ ॥ से भिक्खू वा
 (२) तहेव गंतुमुज्जाणाइं पव्वयाइं वणाणि वा रुक्खा महल्ला पेहाए णो एवं
 वएज्जा, तंजहा-पासायजोग्गा ति वा तोरणजोग्गाति वा गिहजोग्गाइ वा
 फलिहजोग्गाइ वा अगगल-नावा-उदगदोणि-पीढ-वंगबेर-गंगल-कुलिय-जंतलठ्ठी-
 णाभि-नंडी-आसण-सयण-जाण-उवस्सय-जोग्गाइ वा, एयप्पगारं भासं सावज्जं
 जाव णो भासिज्जा ॥ ७९२ ॥ से भिक्खू वा (२) तहेव गंतुमुज्जाणाइं पव्व-
 याणि वणाणि य रुक्खा महल्ला पेहाए एवं वएज्जा, तंजहा-जातिमंताइ वा
 दीहवट्ठाइ वा महालयाइ वा पयायसालाइ वा विडिमसालाइ वा
 पासाइयाइ वा जाव पडिरूवाइ वा एयप्पगारं भासं असावज्जं जाव अभिक्खं
 भासिज्जा ॥ ७९३ ॥ से भिक्खू वा (२) बहुसंभूया वणफला पेहाए तहावि
 ते णो एवं वएज्जा तंजहा-पक्का ति वा पायक्खज्जाइ वा वेलोइयाति वा टालाइ
 वा वेहियाइ वा एयप्पगारं भासं सावज्जं जाव णो भासिज्जा ॥ ७९४ ॥ से
 भिक्खू वा (२) बहुसंभूयाफला अंवा पेहाए एवं वएज्जा, तंजहा-असंथडाइ वा
 बहुणिवट्ठिमफलाइ वा बहुसंभूयाइ वा भूयरूविति वा एयप्पगारं भासं असावज्जं
 जाव भासेज्जा ॥ ७९५ ॥ से भिक्खू वा (२) बहुसंभूयाओ ओसहीओ पेहाए
 तहावि ताओ णो एवं वएज्जा, तंजहा-पक्काइ वा नीलियाइ वा छवीड वा

लाइमा इ वा भजिमा इ वा बहुखज्जा इ वा एयप्पगारं भासं सावज्जं जाव णो भासेज्जा ॥ ७९६ ॥ से भिक्खू वा (२) बहुसंभूयाओ ओसहीओ पेहाए तहावि एवं वएज्जा, तंजहा-रूढा इ वा बहुसंभूया इ वा थिरा इ वा ऊसढा इ वा गब्भिया इ वा पसूया इ वा ससारा इ वा एयप्पगारं असावज्जं जाव भासेज्जा ॥ ७९७ ॥ से भिक्खू वा (२) जहा वेगइयाइं सद्दाइं सुणेज्जा, तहावि एयाइं णो एवं वएज्जा, तंजहा-सुसदे इ वा दुसदे इ वा एयप्पगारं सावज्जं जाव णो भासेज्जा, तहावि ताइं एवं वएज्जा, तंजहा-सुसदे सुसदे ति वा दुसदे दुसदे ति वा एयप्पगारं असावज्जं जाव भासेज्जा ॥ ७९८ ॥ एवं रुवाइं कण्हे ति वा ५ गंधाइं सुब्भिगंधे ति वा २ रसाइं तित्ताणि वा ५ फासाइं कक्खडाणि वा ८ ॥ ७९९ ॥ से भिक्खू वा (२) वंतां कोहं च माणं च मायं च लोभं च अणुवीइ णिट्ठाभासी णिसम्म भासी अतुरियभासी विवेगभासी समियाए संजए भासं भासेज्जा ॥ ८०० ॥ एयं खलु तस्स भिक्खुस्स भिक्खुणीए वा सामगियं ॥ ८०१ ॥ भासाज्झयणे बीओइेसो समत्तो ॥ चउत्थं भासाज्झयणं समत्तं ॥

से भिक्खू वा (२) अभिकंखेज्जा वत्थं एसित्तए, से जं पुण वत्थं जाणिज्जा, तंजहा-जंगियं-साणयं-पोत्तयं-खोमियं वा तूलकडं वा तहप्पगारं वत्थं ॥ ८०२ ॥ जे णिग्गंथे तरुणे जुगवं वलवं अप्पायंके थिरसंघयणे से एगं वत्थं धारेज्जा णो वितियं, जा णिग्गंथी सा चत्तारि संघाडीओ धारेज्जा, एगं दुहत्थवित्थारं, दो तिहत्थ-वित्थाराओ, एगं चउहत्थवित्थारं, एएहिं वत्थेहिं असंघिज्जमाणेहिं अह पच्छा एगमेगं संसीविज्जा ॥ ८०३ ॥ से भिक्खू वा (२) परं अद्धजोयणमेराए वत्थपडियाए नो अभिसंधारेज्जा गमणाए ॥ ८०४ ॥ से भिक्खू वा (२) से जं पुण वत्थं जाणिज्जा अस्सिंपडियाए एगं साहम्मियं समुद्धिस्स पाणाइं (जहा पिंडेसणाए) ॥ ८०५ ॥ एवं वहवे साहम्मिया, एगं साहम्मिणि, वहवे साहम्मिणीओ, वहवे समणमाहणा, तहेव पुरिसंतरकडं (जहा पिंडेसणाए) ॥ ८०६ ॥ से भिक्खू वा (२) से जं पुण वत्थं जाणिज्जा, असंजए भिक्खुपडियाए कीय वा धोयं रत्तं वा घट्टं वा मट्ठं वा संसट्ठं वा संपधूमियं वा तहप्पगारं वत्थं अपुरिसंतरकडं जाव णो पडिगाहेज्जा, अह पुण एवं जाणिज्जा पुरिसंतरकडं जाव पडिगाहेज्जा ॥ ८०७ ॥ से भिक्खू वा (२) से जाइं पुण वत्थाइं जाणिज्जा, विरुवरुवाइं महद्धणमोल्लाइं तंजहा-आ-जिगाणि वा, सहिणाणि वा, सहिणकल्लाणाणि वा, आयाणि वा, कायकाणि वा, नोमियाणि वा, दुगुत्ताणि वा, पट्टाणि वा, मलयाणि वा, पनुण्णाणि वा, अंसुयाणि

वा, चीगंसुयाणि वा, देसरागाणि वा, अमिलाणि वा, गज्जफलाणि वा, फालियाणि वा, कोयवाणि वा, कंबलगाणि वा, पावरणाणि वा, अण्णयराणि वा तहप्पगाराइं वत्थाइं महद्धणमोल्लाइं लामे संते णो पडिगाहिज्जा ॥ ८०८ ॥ से भिक्खू वा (२) से जाइं पुण आईणपाउरणाणि वत्थाणि जाणिज्जा, तंजहा-उद्दाणि वा पेसाणि वा, पेसलाणि वा किण्हमिगाईणगाणि वा णीलमिगाईणगाणि वा गोरमिगाईणगाणि वा कणगाणि वा कणगकंताणि वा कणगपट्टाणि वा कणगखइयाणि वा कणगफुसियाणि वा वग्घाणि वा विवग्घाणि वा आभरणाणि वा आभरणविचि-
त्ताणि वा अण्णयराणि वा तहप्पगाराणि आईणपाउरणाणि वत्थाणि लामे संते णो पडिगाहिज्जा ॥ ८०९ ॥ इच्चेइयाइं आयतणाइं उवाइक्कम्म अह भिक्खू जाणिज्जा, चउहिं पडिमाहिं वत्थं एसित्तए ॥ ८१० ॥ तत्थ खलु इमा पढमा पडिमा, से भिक्खू वा (२) उद्दिसिय २ वत्थं जाएज्जा, तंजहा-जंगियं वा साणयं वा पोत्तयं वा खोमियं वा तूलकडं वा तहप्पगारं वत्थं सयं वा णं जाएज्जा परो वा णं देज्जा, फासुयं एसणीयं लामे संते पडिगाहिज्जा, **पढमा पडिमा** ॥ ८११ ॥ **अहावरा दोच्चा पडिमा** ॥ से भिक्खू वा (२) पेहाए २ जाएज्जा, तंजहा-गाहावई वा जाव कम्मकरी वा, से पुव्वामेव आलोएज्जा, आउसो त्ति वा भगिणि त्ति वा, दाहिसि मे एत्तो अण्णतरं वत्थं ? तहप्पगारं वत्थं सयं वा णं जाएज्जा, परो वा से देज्जा, जाव फासुयं एसणीयं लामे संते पडिगाहिज्जा ॥ **दोच्चा पडिमा**, ॥ ८१२ ॥ **अहावरा तच्चा पडिमा** ॥ से भिक्खू वा (२) से जं पुण वत्थं जाणिज्जा तंजहा-अंतरिज्जगं वा उत्तरिज्जगं वा तहप्पगारं वत्थं सयं वा णं जाएज्जा जाव पडिगाहिज्जा ॥ **तच्चा पडिमा** ॥ ८१३ ॥ **अहावरा चउत्था पडिमा** ॥ से भिक्खू वा (२) उज्झियधम्मियं वत्थं जाएज्जा, जं चऽण्णे बहवे समणमाहणअतिहिकिवणवणीमगा णावकंखंति, तहप्पगारं उज्झियधम्मियं वत्थं सयं वा णं जाएज्जा परो वा से देज्जा फासुयं जाव पडिगाहेज्जा, **चउत्था पडिमा** ॥ ८१४ ॥ इच्चेयाणं चउण्हं पडिमाणं जहा पिडेसणाए ॥ ८१५ ॥ सिया णं एयाए एसणाए एसमाणं परो वएज्जा आउसंतो समणा एज्जाहि तुमं मासेण वा दसराएण वा पंचराएण वा सुए वा सुयतरे वा तो ते वयं आउसो अण्णयरं वत्थं दाहामो ।” तहप्पगारं णिग्घोसं सोच्चा णिसम्म से पुव्वामेव आलोएज्जा आउसो त्ति वा भइणि त्ति वा णो खलु मे कप्पइ एयप्पगारे संगारे वयणे पडिसुणेत्तए अभिकंखसि मे दाउं इयाणिमेव दलयाहि, से णेवं वयंतं परो वएज्जा आउसंतो समणा अणुगच्छाहि तो ते वयं अण्णतरं वत्थं दाहामो से पुव्वामेव आलोएज्जा

आउसो त्ति वा भइणि त्ति वा णो खलु मे कप्पइ एयप्पगारे संगारवयणे पडिमु-
 नेत्तए, अभिकंखसि मे दाउं इयाणिमेव दलयाहि ।” से सेवं वयंतं परो णेया
 वदेज्जा “आउसो त्ति वा भइणि त्ति वा आहरेयं वत्थं समणस्स दाहामो अविद्याइं
 वयं पच्छावि अप्पणो सयट्ठाए पाणाइं भूयाइं जीवाइं सत्ताइं समारब्भ समुद्दिस्स
 जाव चेइस्सामो” एयप्पगारं णिग्घोसं सोच्चा णिसम्म तहप्पगारं वत्थं अफासुयं
 जाव णो पडिगाहेज्जा ॥ ८१६ ॥ सिया णं परो णेया वएज्जा “आउसो त्ति वा
 भइणि त्ति वा आहरेयं वत्थं सिणाणेण वा ४ जाव आघंसित्ता वा पघंसित्ता वा
 समणस्स णं दाहामो” एयप्पगारं णिग्घोसं सोच्चा णिसम्म से पुव्वामेव आलो-
 एज्जा, आउसो त्ति वा भइणि त्ति वा मा एयं तुमं वत्थं सिणाणेण वा जाव पघंसाहि
 वा अभिकंखसि मे दाउं, एमेव दलयाहि” से सेवं वयंतस्स परो सिणाणेण वा जाव
 पघंसित्ता दलएज्जा, तहप्पगार वत्थं अफासुयं जाव णो पडिगाहेज्जा ॥ ८१७ ॥ से
 णं परो णेया वएज्जा, “आउसो त्ति वा भइणि त्ति वा आहर एयं वत्थं सीओदग-
 वियडेण वा उसिणोदगवियडेण वा उच्छोलेत्ता वा पधोवेत्ता वा समणस्स दाहामो
 एयप्पगारं णिग्घोसं सोच्चा णिसम्म से पुव्वामेव आलोएज्जा आउसो त्ति वा भइणि
 त्ति वा मा एयं तुमं वत्थं सीओदगवियडेण वा उसिणोदगवियडेण वा उच्छोलेहि
 वा पधोवेहि वा अभिकंखसि सेसं तहेव जाव णो पडिगाहेज्जा ॥ ८१८ ॥ से णं
 परो णेया वएज्जा “आउसो त्ति वा भइणि त्ति वा आहरेयं वत्थं कंदाणि वा जाव
 हरियाणि वा विसोहिता समणस्स दाहामो” एयप्पगारं णिग्घोसं सोच्चा णिसम्म
 जाव “भइणि त्ति वा मा एयाणि तुमं कंदाणि वा जाव विसोहेहि णो खलु मे
 कप्पइ एयप्पगारे वत्थे पडिगाहिताए” से सेवं वयंतस्स परो कंदाणि वा जाव
 विसोहिता दलएज्जा तहप्पगारं वत्थं अफासुयं णो पडिगाहेज्जा ॥ ८१९ ॥ सिया
 से परो णेया वत्थं णिसिरेज्जा से पुव्वामेव आलोएज्जा “आउसो त्ति वा भइणि त्ति
 वा तुमं चेवणं संतियं वत्थं अंतोअंतेणं पडिलेहिज्जिस्सामि” केवली बूया आयाणमेयं
 वत्थंतेण वद्धे सिया कुंडले वा गुणे वा हिरण्णे वा सुवण्णे वा मणी वा जाव
 रयणावली वा पाणे वा वीए वा हरिए वा अह भिक्खूणं पुव्वोवदिट्ठा जाव जं
 पुव्वामेव वत्थं अंतोअंतेणं पडिलेहिज्जा ॥ ८२० ॥ से भिक्खू वा (२) से जं
 पुण वत्थं जाणिज्जा सअंडं जाव संताणगं तहप्पगारं वत्थं अफासुयं जाव णो पडि-
 गाहेज्जा ॥ ८२१ ॥ से भिक्खू वा (२) से जं पुण वत्थं जाणिज्जा अप्पंडं जाव
 अप्पसंताणगं अणलं अथिरं अधुवं आधारणिज्जं रोइज्जंतं ण रोच्चइ तहप्पगारं वत्थं
 अफासुयं जाव णो पडिगाहेज्जा ॥ ५२२ ॥ से भिक्खू वा (२) से जं पुण वत्थं

जाणिज्जा, अप्पंडं जाव संताणगं अलं थिरं धुवं धारणिज्जं रोइज्जंतं रुच्चइ तहप्पगारं
 वत्थं फासुयं जाव पडिग्गाहेज्जा ॥ ८२३ ॥ पुण णो णवए मे वत्थे त्ति कट्ठु णो बहुदेसिएण
 सिणाणेण वा जाव पधंसेज्जा ॥ ८२३ ॥ पुण णो णवए मे वत्थे त्ति कट्ठु णो बहुदे-
 सिएण सीतोदगवियडेण वा जाव पडोवेज्जा ॥ ८२४ ॥ पुण दुब्भिगंधे मे वत्थे
 त्ति कट्ठु णो बहुदेसिएण सिणाणेण वा तहेव सीओदगवियडेण वा उसिणोदगवियडेण
 वा (आलावओ) ॥ ८२५ ॥ पुण अभिकंखेज्ज वत्थं आयावेत्तए वा पयावेत्तए वा
 तहप्पगारं वत्थं णो अणंतरहियाए जाव पुढवीए णो ससिणद्धाए जाव संताणाए
 आयावेज्ज वा पयावेज्ज वा ॥ ८२६ ॥ पुण अभिकंखेज्जा वत्थं आयावेत्तए वा
 पयावेत्तए वा तहप्पगारं वत्थं थूणंसि वा गिहेल्लुगंसि वा उसुयालंसि वा कामजलंसि
 वा अण्णयरे वा तहप्पगारे अंतलिक्खजाए दुब्बद्धे दुब्भिविक्खत्ते अणिकंपे चलाचले
 णो आयावेज्ज वा पयावेज्ज वा ॥ ८२७ ॥ पुण अभिकंखेज्जा वत्थं आयावेत्तए
 पयावेत्तए वा तहप्पगारं वत्थं कुडियंसि भित्तिसि सिलंसि वा लेलंसि वा अण्णतरे
 वा तहप्पगारे अंतलिक्खजाए जाव णो आयावेज्ज वा पयावेज्ज वा ॥ ८२८ ॥
 पुण अभिकंखेज्जा वत्थं आयावेत्तए पयावेत्तए वा तहप्पगारे वत्थे खंधंसि वा मंचं-
 मालंसि-पासायंसि-हम्मियतलंसि वा अण्णयरे वा तहप्पगारे अंतलिक्खजाए जाव
 णो आयावेज्ज वा पयावेज्ज वा ॥ ८२९ ॥ से तमादाय एगंतमवक्कमेज्जा अहे
 ज्जामथंडिलंसि वा जाव अण्णयरंसि वा तहप्पगारंसि थंडिलंसि पडिलेहिंय २ पम-
 ज्जिय २ तओ संजयामेव वत्थं आयावेज्ज वा पयावेज्ज वा ॥ ८३० ॥ एयं खलु
 तत्तस्स भिक्खुस्स भिक्खुणीए वा सामग्गियं सया जइज्जासि त्ति वेमि ॥ ८३१ ॥
वत्थेसणाज्जयणे पढमोद्देसो समत्तो ॥

से भिक्खू वा भिक्खुणी वा, अहेसणिज्जाइं वत्थाइं जाएज्जा, अहापरिग्गाहियाइं
 वत्थाइं धारेज्जा, णो धोएज्जा, णो रएज्जा, णो धोयरत्ताइं वत्थाइं धारेज्जा अपलि-
 उंचमाणे गामंतरेसु ओमचेलिए, एयं खलु वत्थधारिस्स सामग्गियं ॥ ८३२ ॥ से
 भिक्खू वा (२) गाहावइ कुलं पिंडवायपडियाए पविसिउकामे सव्वं चीवरमायाए
 गाहावइकुलं पिंडवायपडियाए णिक्खमेज्ज वा पविसेज्ज वा, एवं वहिया विचारभूमिं
 विहारभूमिं वा गामाणुगामं दूइजेज्जा । अह पुण एवं जाणिज्जा तिब्बदेसियं वा
 वासं वासमाणं पेहाए जहा पिडेसणाए णवरं सव्वं चीवरमायाए ॥ ८३३ ॥ से
 एगइओ मुहुत्तगं २ पाडिहारियं वीयं वत्थं जाएज्जा, जाव एगाहेण वा दुयाहेण वा
 तिया-चउ-पंचाहेण वा विप्पवसिय २ उवागच्छेज्जा, तहप्पगारं वत्थं णो अप्पणा
 गिण्हेज्जा, णो अण्णमण्णस्स देज्जा, णो पामिच्चं कुज्जा, णो वत्थेण वत्थपरिणामं

करेज्जा, णो परं उवसंकमिन्ता एवं वएज्जा “आउसंतो समणा अभिकंखसि वत्थं धारेत्तए परिहरित्तए वा” थिरं वा णं संतं णो पलिच्छिदिय २ परिट्टवेज्जा, तहप्पगारं ससंधितं वत्थं तस्स चेव णिसिरेज्जा, णो अत्ताणं साइजेज्जा ॥ ८३४ ॥ से एगइओ तहप्पगारं णिग्घोसं सोच्चा णिसम्म जे भयंतारो तहप्पगाराणि वत्थाणि ससंधियाणि मुहुत्तं २ जाइत्ता जाव एगाहेण वा जाव पंचाहेण वा विप्पवसिय विप्पवसिय उवागच्छंति, तहप्पगाराणि वत्थाणि णो अप्पणा गिण्हंति. नो अण्णमण्णस्स दलयंति अणुवयंति, तं चेव जाव णो साइज्जंति बहुवयणेण भाणियव्वं ॥ ८३५ ॥ से हंता “अहमवि मुहुत्तं पाडिहारियं वत्थं जाइत्ता जाव एगाहेण वा जाव पंचाहेण वा विप्पवसिय २ उवागच्छिस्सामि, अवियाइं एयं ममेव सिया” माइट्ठाणं संफासे णो एवं करिज्जा ॥ ८३६ ॥ पुण णो वण्णमंताइं वत्थाइं विवण्णाइं करेज्जा, णो विवण्णाइं वण्णमंताइं करेज्जा, “अन्नं वा वत्थं लभिस्सामि त्ति” कट्ठु नो अण्णमण्णस्स दिज्जा, णो पामिच्चं कुज्जा, णो वत्थेण वत्थपरिणामं कुज्जा, णो परं उवसंकमिन्तु एवं वएज्जा, “आउसंतो समणा अभिकंखसि मे वत्थं धारित्तए वा परिहरित्तए वा” थिरं वा णं संतं णो पलिच्छिदिय २ परिट्टविज्जा, जहा मेयं वत्थं पावगं परो मन्नइ, परं च णं अदत्तहारि पडिपहे पेहाए तस्स वत्थस्स णिदाणाए णो तेसिं भीओ उम्मग्गेणं गच्छेज्जा । जाव अप्पुस्सुए तओ संजयामेव गामाणुगामं दूइज्जिज्जा ॥ ८३७ ॥ से भिक्खू वा (२) गामाणुगामं दूइज्जमाणे अंतरा से विहं सिया से जं पुण विहं जाणिज्जा, इमंसि खलु विहंसि वहवे आमोसगा वत्थपडियाए संपिडिया गच्छेज्जा णो तेसिं भीओ उम्मग्गेणं गच्छेज्जा, जाव गामाणुगामं दूइजेज्जा ॥ ८३८ ॥ पुण गामाणुगामं दूइज्जमाणे अंतरा से आमोसगा पडियागच्छेज्जा, ते णं आमोसगा एवं वएज्जा “आउसंतो समणा आहरेयं वत्थं देहि निक्खिवाहि” जहा इरियाए णाणत्तं वत्थपडियाए ॥ ८३९ ॥ एयं खलु तस्स भिक्खुस्स भिक्खुणीए वा सामगियं ॥ ८४० ॥ वत्थेसणाज्झयणे वीओहेसो ॥ पंचमं वत्थेसणाज्झयणं समत्तं ॥

से भिक्खू वा (२) अभिकंखिज्जा पायं एसित्तए, से जं पुण पायं जाणिज्जा तंजहा अलाउयपायं वा दारुपायं मट्ठियापायं वा तहप्पगारं पायं जे णिग्गंथे तरुणे जाव थिरसंघयणे से एगं पायं धारेज्जा णो वीयं ॥ ८४१ ॥ पुण परं अद्धजोयणमेराए पायपडियाए णो अभिसंधारेज्जा गमणाए ॥ ८४२ ॥ से जं पुण पायं जाणिज्जा अस्सिपडियाए एगं साहम्मियं समुद्दिस्स पाणाइं ४ जहा पिंडेसणाए चत्तारि

आलावगा, पंचमे बहवे समणमाहणा पगणिय २ तहेव ॥ ८४३ ॥ पुण असंजए भिक्खुपडियाए बहवे समणमाहणा (वत्थेसणाऽऽलावओ) ॥ ८४४ ॥ से भिक्खू वा (२) से जाइं पुण पादाइं जाणिज्जा विरूवरूवाइं महद्धणमुल्लाइं तंजहा-अयपादाणि वा तउ० तंवपादाणि वा सीसग-हिरण्ण-सुवण्ण-रीरिय-हारपुड-पायाणि वा मणि-काय-कंस-संख-सिंग-दंत-चेल-सेल-पायाणि वा चम्मपायाणि वा अण्णयरानि वा तहप्पगाराइं विरूवरूवाइं महद्धणमुल्लाइं पायाइं अफासुयाइं जाव णो पडिग्गाहेज्जा ॥ ८४५ ॥ से भिक्खू वा (२) से जाइं पुण पायाइं जाणिज्जा, विरूवरूवाइं महद्धणवंधणाइं तं० अयवंधणाणि वा जाव चम्मवंधणाणि वा अन्नयराइं तहप्पगाराइं महद्धणवंधणाइं अफासुयाइं जाव णो पडिग्गाहेज्जा, इच्चेइयाइं आयतणाइं उवातिकम्म ॥ ८४६ ॥ अह भिक्खू जाणिज्जा चउहिं पडिमाहिं पायं एसित्तए, तत्थ खलु इमा पढमा पडिमा से भिक्खू वा (२) उद्दिसिय २ पायं जाएज्जा, तंजहा-अलाउयपायं वा दारूपायं वा मट्टियापायं वा तहप्पगारं पायं सयं वा णं जाएज्जा, जाव पडिगाहिज्जा ॥ **पढमा-पडिमा** ॥ ८४७ ॥ **अहावरा दोच्चा पडिमा**, से भिक्खू वा (२) पेहाए पायं जाएज्जा, तंजहा-गाहावइं वा जाव कम्मकरिं वा से पुव्वामेव आलोएज्जा, “आउसो त्ति वा भइणि त्ति वा दाहिसि मे एत्तो अण्णयरं पायं, तंजहा-अलाउयपायं वा” जाव तहप्पगारं पायं सयं वा णं जाएज्जा, परो वा से देज्जा जाव पडिगाहेज्जा ॥ **दोच्चा पडिमा** ॥ ८४८ ॥ **अहावरा तच्चा पडिमा** ॥ से भिक्खू वा (२) से जं पुण पायं जाणिज्जा, संगतियं वा वेजइयंतियं वा तहप्पगारं पायं सयं वा जाव पडिगाहिज्जा ॥ **तच्चा पडिमा** ॥ ८४९ ॥ **अहावरा चउत्था पडिमा** ॥ से भिक्खू वा (२) उज्जियधम्मियं पायं जाएज्जा, जं चऽण्णे बहवे समणमाहणा जाव वणीमगा णावकं खंति, तहप्पगारं पायं सयं वा णं जाव पडिगाहिज्जा, **चउत्था पडिमा** ॥ ८५० ॥ इच्चेयाणं चउण्हं पडिमाणं अण्णयरं पडिमं (जहा पिंडेसणाए) ॥ ८५१ ॥ से णं एताए एसणाए एसमाणं पासित्ता परो वएज्जा, “आउसंतो समणा एज्जासि तुमं मासेण वा जाव” जहा वत्थेसणाए ॥ ८५२ ॥ से णं परो जेया वएज्जा, आउसो त्ति वा भइणि त्ति वा आहरेयं पायं तेहेण वा घएण वा अब्भंगेत्ता वा तहेव सिणाणाइ तहेव सीओदगकंदाइं तहेव ॥ ८५३ ॥ से णं परो जेया वएज्जा, “आउसंतो समणा मुहुत्तगं २ अच्छाहि जाव ताव अम्हे असणं वा उवकरेंसु उव-क्खडेसु वा, तो ते वयं आउसो सपाणं सभोयणं पडिग्गहगं दाहामो, तुच्छए पडिग्गहए दिण्णे समणस्स णो सुट्ठु साहु भवइ” से पुव्वामेव आलोएज्जा आउसो

त्ति वा भइणि त्ति वा, णो खलु मे कप्पइ आहाकम्मिए असणे वा पाणे वा खाइमे
वा साइमे वा भोत्तए वा पायए वा मा उवकरेहि मा उवक्खडेहि, अभिकंखसि मे
दाउं एमेव दलयाहि से सेवं वयंतस्स परो असणं वा जाव उवकरित्ता उवक्खडित्ता,
सपाणगं सभोयणं पडिग्गहगं दलएज्जा तहप्पगारं पडिग्गहं अफासुयं जाव णो
पडिगाहेज्जा ॥ ८५४ ॥ सिया से परो उवणेत्ता पडिग्गहं णिसिरेज्जा से पुव्वामेव
आलोएज्जा आउसो त्ति वा भइणि त्ति वा तुमं चेव णं संतियं पडिग्गहगं अंतोअंतेणं
पडिलेहिस्सामि ॥ ८५५ ॥ केवली वूया 'आयाणमेयं' अंतो पडिग्गहंसि पाणाणि
वा बीयाणि वा हरियाणि वा जाव अह भिक्खूणं एस पइण्णा जं पुव्वामेव पडि-
ग्गहगं अंतोअंतेणं पडिलेहिज्जा ॥ ८५६ ॥ सअडाइं सव्वे आलावगा भाणियव्वा
जहा वत्थेसणाए, णाणत्तं तेल्लेण वा घएण वा सिणाणाइ जाव अण्णयरंसि वा तहप्प-
गारंसि थंडिलंसि पडिलेहिय २ पमज्जिय २ तओ संजयामेव आमज्जिज्जा ॥ ८५७ ॥
एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिएहि सया
जएज्जासि त्ति वेमि ॥ ८५८ ॥ पत्तेसणाज्झयणे पढमोद्देसो समत्तो ॥

से भिक्खू वा (२) गाहावइकुलं पिंडवायपडियाए पविट्ठे समाणे, पुव्वामेव
पेहाए पडिग्गहगं अवहट्ठु पाणे पमज्जिय रयं ततो संजयामेव गाहावइकुलं पिंडवाय
पडियाए णिक्खमेज्ज वा पविसेज्ज वा ॥ ८५९ ॥ केवली वूया 'आयाणमेयं' अंतो
पडिग्गहगंसि पाणे वा बीए वा रए वा परियावज्जेज्जा अह भिक्खूणं पुव्वोवदिट्ठा
एस पइण्णा जं पुव्वामेव पेहाए पडिग्गहं अवहट्ठु पाणे पमज्जिय रयं तओ संज-
यामेव गाहावइकुलं पिंडवायपडियाए पविसेज्ज वा णिक्खमेज्ज वा ॥ ८६० ॥ से
भिक्खू वा (२) गाहावइ० जाव० समाणे सिया से परो आहट्ठु अंतो पडिग्गहगंसि
सीओदगं परिभाएत्ता णीहट्ठु दलएज्जा तहप्पगारं पडिग्गहं परहत्थंसि वा परपायंसि
वा अफासुयं जाव णो पडिग्गहेज्जा ॥ ८६१ ॥ सेय आहच्च पडिग्गहिए सिया से
खिप्पामेव उदगंसि साहरिज्जा, से पडिग्गहमायाए पाणं परिट्ठवेज्जा, ससणिद्धाए
वा भूमीए णियमिज्जा ॥ ८६२ ॥ से भिक्खू वा (२) उदउल्लं वा ससिणिद्धं वा
पडिग्गहं णो आमज्जिज्ज वा जाव पयावेज्ज वा ॥ ८६३ ॥ अह पुण एवं जाणिज्जा-
विगओदए मे पडिग्गहए छिण्णसिणेहे तहप्पगारं पडिग्गहं तओ संजयामेव आम-
ज्जिज्ज वा जाव पयाविज्ज वा ॥ ८६४ ॥ से भिक्खू वा (२) गाहावइकुलं वा०
पविसिउकामे से पडिग्गहमायाए गाहा० पिंडवायपडियाए पविसिज्ज वा णिक्ख-
मिज्ज वा एवं वहिया विचारभूमिं वा विहारभूमिं वा गामाणुगामं दूइज्जिज्जा
॥ ८६५ ॥ तिव्वदेसियाए जहा विइयाए वत्थेसणाए णवरं एत्थ पडिग्गहे ॥ ८६६ ॥

एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिए सया
जएज्जासि त्ति वेमि ॥ ८६७ ॥ पत्तेसणाज्झयणे वीओदेसो समत्तो ॥
छट्ठं पत्तेसणाज्झयणं समत्तं ॥

समणे भविस्सामि अणगारे अकिंचणे अपुत्ते अपसू परदत्तभोई पावं कम्मं
णो करिस्सामि त्ति समुट्ठाए सव्वं भंते अदिण्णादाणं पच्चक्खामि ॥ ८६८ ॥
से अणुपविसित्ता गामं वा जाव० णेव सयं अदिन्नं गिण्हिज्जा, णेवण्णेणं अदिण्णं
गिण्हावेज्जा, णेवण्णेणं अदिण्णं गिण्हंतं समणुजाणेज्जा । जेहिवि सद्धि संपव्वइए
तेसिं पुव्वामेव उग्गहं अणुणविय अपडिलेहिय अपमज्जिय णो गिण्हेज्ज वा
पगिण्हेज्ज वा तेसि पुव्वामेव उग्गहं जाइज्जा अणुणविय पडिलेहिय पमज्जिय
तओ सं० उगिण्हिज्ज वा पगिण्हिज्ज वा ॥ ८६९ ॥ से आगंतारेसु वा (४)
अणुवीइ उग्गहं जाएज्जा, जे तत्थ ईसरे जे तत्थ समहिट्ठाए ते उग्गहं अणु-
णवेज्जा कामं खलु आउसो अहालंदं अहापरिणातं वसामो जाव आउसंतस्स
उग्गहे जाव साहम्मिया एइ ताव उग्गहं गिण्हिस्सामो तेण परं विहरिस्सामो
॥ ८७० ॥ से कि पुण तत्थोग्गहंसि एवोग्गहियंसि ? जे तत्थ साहम्मियां
संभोइया समणुण्णा उवागच्छेज्जा, जे तेण सयमेसित्तए असणे वा (४) तेण
ते साहम्मिया संभोइया समणुण्णा उवणिमंतेज्जा, णो चेव णं परवडियाए उगि-
ज्जिय २ उवणिमंतेज्जा ॥ ८७१ ॥ से आगंतारेसु वा (४) जाव से कि पुण
तत्थोग्गहंसि एवोग्गहियंसि, जे तत्थ साहम्मिया अण्णसंभोइया समणुच्चा उवाग-
च्छेज्जा जे तेणं सयमेसित्तए पीढे वा फलए वा सेज्जासंथारए वा, तेण ते साह-
म्मिए अण्णसंभोइए समणुच्चे उवणिमंतेज्जा णो चेव णं परवडियाए उगिज्जिय २
उवणिमंतेज्जा ॥ ८७२ ॥ से आगंतारेसु वा (४) जाव से कि पुण तत्थोग्गहंसि
एवोग्गहियंसि जे तत्थ गाहावईण वा गाहावइपुत्ताण वा सूई वा पिप्पलए वा कण्ण-
सोहणए वा णहच्छेयणए वा अप्पणो तं एगस्स अट्ठाए पाडिहारियं जाइत्ता णो
अण्णमण्णस्स देज्ज वा अणुपदेज्ज वा सयं करणिज्जं त्ति कट्ठु से तमादाए तत्थ
गच्छेज्जा गच्छित्ता पुव्वामेव उत्ताणए हत्थे त्ति कट्ठु भूमीए वा ठवेत्ता 'इमं खलु
इमं खलु' त्ति आलोएज्जा, णो चेव णं सयं पाणिणा परपाणिसि पच्चप्पिणेज्जा
॥ ८७३ ॥ से भिक्खू वा (२) से जं पुण उग्गहं जाणिज्जा अणंतरहियाए पुढवीए
ससणिद्धाए पुढवीए जाव संताणाए तहप्पगारं उग्गहं णो उगिण्हेज्ज वा पगिण्हेज्ज
वा ॥ ८७४ ॥ से भिक्खू वा (२) से जं पुण उग्गहं जाणिज्जा थूणंसि वा (४)
तहप्पगारे अंतलिक्खजाए दुव्वद्धे जाव णो उग्गहं उगिण्हेज्ज वा पगिण्हेज्ज वा

॥ ८७५ ॥ से भिक्खू वा (२) से जं पुण उग्गहं जाणिज्जा कुलियंसि वा जाव णो उगिण्हेज्ज वा (२) ॥ ८७६ ॥ से भिक्खू वा (२) खंधंसि वा अण्णयरे वा तहप्पगारे जाव णो उगिण्हेज्ज वा (२) ॥ ८७७ ॥ से जं पुण उग्गहं जाणिज्जा ससागारियं सागणियं सउदयं सइत्थि सखुडं सपसुं सभत्तपागं णो पण्णस्स णिक्खम-
णपवेसे जाव धम्माणुओगचिताए सेवं णच्चा तहप्पगारे उवस्सए ससागारिए जाव सखुडु-पसु-भत्तपाणे णो उग्गहं उगिण्हेज्जा वा २ ॥ ८७८ ॥ से भिक्खू वा (२) से जं पुण उग्गहं जाणिज्जा गाहावड्कुलस्स मज्झमज्जेणं गंतुं पंथे पडिवद्धं वा णो पण्णस्स जाव से एवं णच्चा तहप्पगारे उवस्सए णो उग्गहं उगिण्हेज्ज वा २ ॥ ८७९ ॥ से भिक्खू वा (२) से जं पुण उग्गहं जाणिज्जा, इह खलु गाहावड् वा जाव कम्मकरीओ वा अण्णमण्णं अक्कोसंति वा तहेव तेह-सिणाण-सीओदगवि-
यडणिगिणाइ य जहा सिज्जाए आलावगा णवरं उग्गहवत्तवया ॥ ८८० ॥ से भिक्खू वा (२) से जं पुण उग्गहं जाणिज्जा आइण्णसंलिक्खे णो पण्णस्स जाव चिंताए, तहप्पगारे उवस्सए णो उग्गहं उगिण्हेज्ज वा २ ॥ ८८१ ॥ एयं खलु तस्स भिक्खुस्स २ सामग्गियं ॥ ८८२ ॥ उग्गहपडिमाज्झयणे पढमोद्देसो ॥

से आगंतारेसु वा (४) अणुवीइ उग्गहं जाएज्जा, जे तत्थ ईसरे समहिट्ठाए ते उग्गहं अणुण्णविज्जा कामं खलु आउसो अहालंदं अहा परिण्णायं वसामो जाव आउसो, आउसंतस्स उग्गहे जाव साहम्मियाए ताव उग्गहं उगिण्हिस्सामो तेण परं विहरिस्सामो ॥ ८८३ ॥ से किं पुण तत्थ उग्गहंसि एवोग्गहियंसि ? जे तत्थ समणाण वा माहणाण वा दंडए वा छत्ताए वा जाव चम्मछेदणए वा तं णो अंतो-
हिंतो वाहिं णीणेज्जा, वहियाओ वा णो अंतो पवेसेज्जा, णो सुत्तं वा णं पडिवोहेज्जा, णो तेसिं किंचिवि अप्पत्तियं पडिणीयं करेज्जा ॥ ८८४ ॥ से भिक्खू वा (२) अभिकंखेज्जा अंबवणं उवागच्छित्ताए जे तत्थ ईसरे जे तत्थ समहिट्ठाए ते उग्गहं अणुजाणावेज्जा, कामं खलु जाव विहरिस्सामो ॥ ८८५ ॥ से किं पुण तत्थोग्ग-
हंसि एवोग्गहियंसि अह भिक्खु इच्छेज्जा अंबं भोत्ताए वा से जं पुण अंबं जाणिज्जा सअंडं जाव ससंताणं तहप्पगारं अंबं अफासुयं जाव णो पडिगाहिज्जा, ॥ ८८६ ॥ से भिक्खू वा (२) से जं पुण अंबं जाणिज्जा, अप्पंडं जाव अप्पसंताणगं अति-
रिच्छच्छिन्नं अवोच्छिन्नं अफासुयं जाव णो पडिगाहिज्जा ॥ ८८७ ॥ से भिक्खू वा (२) से जं पुण अंबं जाणिज्जा, अप्पंडं जाव संताणगं तिरिच्छच्छिण्णं वोच्छिन्नं फासुयं जाव पडिगाहिज्जा ॥ ८८८ ॥ से भिक्खू वा (२) अभिकंखेज्जा अंबभि-
त्तगं वा अंबपेसियं वा अंबचोयगं वा अंबसालगं वा अंबडालगं वा

भोत्तए वा पायए वा से जं पुण जाणिज्जा, अंवभित्तगं वा जाव अंवडालगं वा सअंडं जाव संताणगं अफासुयं जाव णो पडिग्गाहिज्जा ॥ ८८९ ॥ से भिक्खू वा (२) से जं पुण जाणिज्जा, अंवभित्तगं वा जाव, अप्पंडं जाव संताणगं अतिरिच्छच्छिन्नं वा अवोच्छिन्नं वा अफासुयं जाव णो पडिग्गाहिज्जा ॥ ८९० ॥ से भिक्खू वा (२) से जं पुण जाणिज्जा अंवभित्तगं वा जाव, अप्पंडं जाव संताणगं तिरिच्छच्छिन्नं वोच्छिन्नं फासुयं जाव पडिग्गाहिज्जा ॥ ८९१ ॥ से भिक्खू वा (२) अभिकंखेज्जा उच्छुवणं उवागच्छित्तए जे तत्थ ईसरे जाव उग्गहंसि ॥ ८९२ ॥ अह भिक्खू इच्छेज्जा उच्छुं भोत्तए वा पायए वा से जं उच्छुं जाणिज्जा, सअंडं जाव णो पडिग्गाहिज्जा ॥ अतिरिच्छच्छिन्नं तहेव, तिरिच्छच्छिन्ने वि तहेव ॥ ८९३ ॥ से भिक्खू वा (२) से जं पुण अभिकंखेज्जा अंतरुच्छुयं उच्छुगंडियं वा उच्छुचोयगं वा उच्छुसालगं वा उच्छुडालगं वा सअंडं जाव णो पडिग्गाहिज्जा ॥ ८९४ ॥ से भिक्खू वा (२) से जं पुण जाणिज्जा, अंतरुच्छुयं वा जाव डालगं वा सअंडं जाव णो पडिग्गाहिज्जा ॥ ८९५ ॥ से भिक्खू वा (२) से जं पुण जाणिज्जा अंतरुच्छुयं वा जाव डालगं वा अप्पंडं जाव णो पडिग्गाहिज्जा, अतिरिच्छच्छिन्नं तहेव ॥ ८९६ ॥ तिरिच्छच्छिन्नं तहेव पडिग्गाहिज्जा ॥ ८९७ ॥ से भिक्खू वा (२) आगंतारेसु वा (४) जाव उग्गहियंसि जे तत्थ, गाहावईण वा गाहावइपुत्ताण वा इच्चेयाई आयतणाई उवाइक्कम्म ॥ ८९८ ॥ अह भिक्खू जाणिज्जा इमाहिं सत्ताहिं पडिमाहिं उग्गहं उगिण्हित्तए ॥ ८९९ ॥ पढमा पडिमा, से आगंतारेसु वा (४) अणुवीइ उग्गहं जाएज्जा जाव० विहरिस्सामो ॥ ९०० ॥ दोच्चा पडिमा, जस्सणं भिक्खुस्स एवं भवइ “अहं च खलु अण्णेसिं भिक्खूणं अट्ठाए उग्गहं गिण्हिस्सामि, अण्णेसिं भिक्खूणं उग्गहिए उग्गहे उवल्लिस्सामि, ॥ ९०१ ॥ तच्चा पडिमा, जस्सणं भिक्खुस्स एवं भवइ “अहं च खलु अण्णेसिं भिक्खूणं अट्ठाए उग्गहं उगिण्हिस्सामि, अण्णेसिं च उग्गहिए उग्गहे णो उवल्लिस्सामि ॥ ९०२ ॥ चउत्था पडिमा, जस्सणं भिक्खुस्स एवं भवइ “अहं च खलु अण्णेसिं भिक्खूणं अट्ठाए उग्गहं णो उगिण्हिस्सामि अण्णेसिं च उग्गहे उग्गहिए उवल्लिस्सामि ॥ ९०३ ॥ पंचमा पडिमा, जस्सणं भिक्खुस्स एवं भवइ, अहं च खलु अप्पणो अट्ठाए उग्गहं उगिण्हिस्सामि, णो दोण्हं, णो तिण्हं, णो चउण्हं, णो पंचण्हं, ॥ ९०४ ॥ छट्ठा पडिमा, जस्सेव उग्गहे उवल्लि-एज्जा, जे तत्थ अहा समण्णागए, तंजहा-इक्कडे जाव पलाळे वा तस्स लाभे संवसेज्जा, तस्स अलाभे उकुडुए वा णेसज्जिए वा विहरेज्जा ॥ ९०५ ॥ सत्तमा

पडिमा, से भिक्खू वा, अहासंथडमेव उग्गहं जाएजा, तंजहा-पुढविसिलं वा, कट्टसिलं वा, अहासंथडमेव तस्स लाभे संवसेजा, तस्स अलाभे उकुटुओ वा णेसज्जिओ वा, विहरेजा ॥ ९०६ ॥ इच्चेसिं सत्तण्हं पडिमाणं अण्णयरं, जहा पिंडे-सणाए ॥ ९०७ ॥ सुयं मे आउसं तेणं भगवया एवमक्खायं इह खलु थरेहिं भगवंतेहिं पंचविहे उग्गहे पण्णत्ते, तंजहा-देविदोग्गहे, रायोग्गहे, गाहावइउग्गहे, सागारियउग्गहे, साहम्मियउग्गहे ॥ ९०८ ॥ एवं खलु तरस भिक्खुस्स २ सामग्गियं ॥ ९०९ ॥ उग्गहपडिमाज्झयणे वीओद्देसो समत्तो ॥ सत्तमं उग्गहपडिमाज्झयणं समत्तं, पढमा चूडा समत्ता ॥

से भिक्खू वा (२) अभिकंखेज्जा ठाणं ठाइत्तए से अणुपविसिज्जा, गामं वा, नगरं वा, जाव सण्णिवेसं वा, से अणुपविसित्ता, गामं वा जाव सण्णिवेसं वा, से जं पुण ठाणं जाणिज्जा, सअंडं जाव समक्कडासंताणयं तं तहप्पगारं ठाणं अफासुयं अणेसणिज्जं लाभे संते णो पडिगाहिज्जा, एवं सेज्जागमेण णेयव्वं, जाव उदयपसूया-इंति ॥ ९१० ॥ इच्चेयाइं आयतणाइं उवातिकम्म अह भिक्खू इच्छेज्जा, चउहिं पडिमाहिं ठाणं ठाइत्तए ॥ ९११ ॥ **पढमा पडिमा**-अचित्तं खलु उवसजेज्जा अवलंबेज्जा काएण विपरिकम्मादि सवियारं ठाणं ठाइस्सामि ॥” ॥ ९१२ ॥ **दोच्चा पडिमा**-अचित्तं खलु उवसजेज्जा अवलंबेज्जा काएण विपरिकम्माइ णो सवियारं ठाणं ठाइस्सामि ॥ ९१३ ॥ **तच्चा पडिमा**-अचित्तं खलु उवसजेज्जा अवलंबेज्जा णो काएण, विपरिकम्माइं णो सवियारं ठाणं ठाइस्सामि त्ति ॥ ९१४ ॥ **चउत्था पडिमा**-अचित्तं खलु उवसजेज्जा, णो अवलंबेज्जा काएण, णो विपरिकम्माइं णो सवियारं ठाणं ठाइस्सामि त्ति वोसठ्ठकाए वोसठ्ठकेसमंसुलोमणहे संणिरुद्धं वा ठाणं ठाइस्सामि त्ति ॥ ९१५ ॥ इच्चेयासिं चउण्हं पडिमाणं जाव पग्गहियतरायं विहरेज्जा, णो तत्थ किंचिवि वएज्जा ॥ ९१६ ॥ एयं खलु तस्स भिक्खुस्स २ वा सामग्गियं जाव जएज्जासि त्ति वेमि ॥ ९१७ ॥ **ठाणसत्तिकयं अट्ठमं अज्झयणं समत्तं, पढमं सत्तिकयं समत्तं ॥**

से भिक्खू वा (२) अभिकंखेज्जा णिसीहियं फासुयं गमणाए से पुण णिसीहियं जाणिज्जा, सअंडं सपाणं जाव मक्कडासंताणयं तहप्पगारं णिसीहियं अणेसणिज्जं लाभे संते णो चेतिस्सामि ॥ ९१८ ॥ से भिक्खू वा (२) अभिकंखेज्जा णिसीहियं गमणाए से जं पुण णिसीहियं जाणिज्जा अप्पंडं अप्पपाणं जाव मक्कडासंताणयं तहप्पगारं णिसीहियं फासुयं एसणिज्जं लाभे संते चेतिस्सामि एवं सेज्जागमेणं

ण्येयव्वं जाव उदगप्पसूयाइं ॥ ९१९ ॥ जे तत्थ दुवग्गा जाव पंचवग्गा वा अभिसंधारेति णिसीहियं गमणाए ते णो अण्णमण्णस्स कायं आलिंगेज्ज वा विलिंगेज्ज वा चुंवेज्ज वा दंतेहिं णहेहिं वा अर्च्छिदेज्ज वा वुच्छिदेज्ज वा ॥ ९२० ॥ एयं खलु तस्स भिक्खुस्स (२) वा सामगियं जं सव्वट्ठेहिं सहिए समिए सया जएज्जा सेयमिणं मण्णिज्जासि त्ति वेमि ॥ ९२१ ॥ णवमं णिसीहियाज्झयणं समत्तं, णिसीहियासत्तिकयं समत्तं वीयं ॥

से भिक्खू वा (२) उच्चारपासवणकिरियाए उव्वाहिज्जमाणे सयस्स पायपुंछ-
णस्स असईए तओ पच्छा साहम्मियं जाएज्जा ॥ ९२२ ॥ से भिक्खू वा (२)
से जं पुण थंडिलं जाणिज्जा सअंडं सपाणं जाव मक्कडासंताणयं तहप्पगारंसि
थंडिलंसि णो उच्चारपासवणं वोसिरेज्जा ॥ ९२३ ॥ से भिक्खू वा (२) से जं पुण
थंडिलं जाणिज्जा, अप्पपाणं अप्पवीयं जाव मक्कडासंताणयं तहप्पगारंसि थंडिलंसि
उच्चारपासवणं वोसिरेज्जा ॥ ९२४ ॥ से भिक्खू वा (२) से जं पुण थंडिलं
जाणिज्जा, अस्सिपडियाए एगं साहम्मियं समुद्दिस्स अस्सिपडियाए वहवे साह-
म्मिया समुद्दिस्स अस्सिपडियाए एगं साहम्मिणिं समुद्दिस्स अस्सि पडियाए वहवे
साहम्मिणीओ समुद्दिस्स अस्सि० वहवे समणमाहणवणीमया पगणिय पगणिय
समुद्दिस्स पाणाइं (४) जाव उद्देसियं चेतेति, तहप्पगारं थंडिलं पुरिसंतरकडं
जाव वहिया णीहडं वा अनीहडं वा अण्णयरंसि वा तहप्पगारंसि थंडिलंसि णो
उच्चारपासवणं वोसिरेज्जा ॥ ९२५ ॥ से भिक्खू वा (२) से जं पुण थंडिलं
जाणिज्जा, वहवे समणमाहणक्किवणवणीमगअतिही समुद्दिस्स पाणाइं (४) जाव
उद्देसियं चेतेति, तहप्पगारं थंडिलं अपुरिसंतरकडं जाव वहिया अणीहडं वा
अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९२६ ॥
अह पुण एवं जाणिज्जा, पुरिसंतरकडं जाव वहिया णीहडं वा अण्णयरंसि तहप्प-
गारंसि थंडिलंसि उच्चारपासवणं वोसिरेज्जा ॥ ९२७ ॥ से भिक्खू वा (२) से
जं पुण थंडिलं जाणिज्जा, अस्सिपडियाए कयं वा कारियं वा पामिच्चियं वा छण्णं
वा घट्ठं वा मट्ठं वा लित्तं वा संपधूमियं वा अण्णयरंसि तहप्पगारंसि थंडिलंसि णो
उच्चारपासवणं वोसिरेज्जा ॥ ९२८ ॥ से भिक्खू वा (२) से जं पुण थंडिलं
जाणिज्जा, इह खलु गाहावइ वा गाहावइपुत्ता वा कंदाणि वा मूलाणि वा जाव
हरियाणि वा अंतराओ वा वाहिं णीहरंति वहियाओ वा अंतो साहरंति अण्णयरंसि
वा तहप्पगारंसि थंडिलंसि णो उच्चारपासवणं वोसिरेज्जा ॥ ९२९ ॥ से भिक्खू वा
(२) से जं पुण थंडिलं जाणिज्जा, खंवंसि वा पीढंसि वा मंचंसि वा मालंसि वा

अट्टंसि वा पासायंसि वा अण्णयरंसि वा थंडिलंसि णो उच्चारपासवणं वोसिरेज्जा ॥ ९३० ॥ से भिक्खू वा (२) से जं पुण थंडिलं जाणिज्जा, अगंतरहियाए पुढवीए ससिणिद्धाए पुढवीए ससरक्खाए पुढवीए मट्टियामकडाए चित्तमंताए सिलाए चित्तमंताए लेलुयाए कोलावासंसि वा दारुयंसि वा जीवपइट्ठियंसि वा जाव मक्कडासंताणयंसि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३१ ॥ से भिक्खू वा (२) से जं पुण थंडिलं जाणिज्जा, इह खलु गाहावइ वा गाहावइ पुत्ता वा कंदाणि वा जाव बीयाणि वा परिसाडेंसु वा परिसाडित्ति वा परिसाडिस्संति वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३२ ॥ से भिक्खू वा (२) से जं पुण थंडिलं जाणिज्जा, इह खलु गाहावइ वा गाहावइ पुत्ता वा सालीणि वा वीहीणि वा मुग्गाणि वा मासाणि वा कुलत्थाणि वा जवाणि वा जवजवाणि वा पतिरिसु वा पतिरिरिति वा पतिरिस्संति वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३३ ॥ से भिक्खू वा (२) से जं पुण थंडिलं जाणिज्जा, आमोयाणि वा घासाणि वा भिलुयाणि वा विज्जलयाणि वा खाणुयाणि वा कडयाणि वा पगडाणि वा दरीणि वा पदुग्गाणि वा समाणि वा विसमाणि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३४ ॥ से भिक्खू वा (२) से जं पुण थंडिलं जाणिज्जा, माणुसरंधणाणि वा, महिसकरणाणि वा, वसभकरणाणि वा, अस्सकरणाणि वा, कुक्कुडकरणाणि वा, मक्कडकरणाणि वा लावयकरणाणि वा, वट्टयकरणाणि वा, तित्तिरकरणाणि वा, कवोयकरणाणि वा, कपिजलकरणाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३५ ॥ से भिक्खू वा (२) से जं पुण थंडिलं जाणिज्जा, वेहाणसट्ठाणेषु वा, गिद्धपिठ्ठाणेषु वा, तरुपडण्ठाणेषु वा, मेरुपडण्ठाणेषु वा, विसभक्खणयट्ठाणेषु वा, अगणिपडण्ठाणेषु वा अण्णयरंसि वा तहप्पगारंसि णो उच्चारपासवणं वोसिरेज्जा ॥ ९३६ ॥ से भिक्खू वा (२) से जं पुण थंडिलं जाणिज्जा, आरामाणि वा, उज्जाणाणि वा, वणाणि वा वणसंडाणि वा, देवकुलाणि वा, सभाणि वा, पवाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३७ ॥ से भिक्खू वा (२) से जं पुण थंडिलं जाणिज्जा, अट्ठालयाणि वा, चरियाणि वा, दाराणि वा, गोपुराणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३८ ॥ से भिक्खू वा (२) से जं पुण थंडिलं जाणिज्जा, तिगाणि वा, चउक्काणि वा, चच्चराणि वा, चउमुहाणि वा, अण्णयरंसि वा तहप्पगारंसि थंडिलंसि णो उच्चारपासवणं

वोसिरेज्जा ॥ ९३९ ॥ से भिक्खू वा (२) से जं पुण थंडिलं जाणिज्जा, इगार-
 डाहेसु वा, खारडाहेसु वा, मडयडाहेसु वा, मडयथूभियासु वा, अण्णयरंसि वा
 तहप्पगारंसि थंडिलंसि णो उच्चारपासवणं वोसिरेज्जा ॥ ९४० ॥ से भिक्खू वा
 (२) से जं पुण थंडिलं जाणिज्जा णदियाययणेसु वा, पंकाययणेसु वा, ओघाय-
 यणेसु वा, सेयणवहंसि वा, अण्णयरंसि वा तहप्पगारंसि थंडिलंसि णो उच्चारपा-
 सवणं वोसिरेज्जा ॥ ९४१ ॥ से भिक्खू वा (२) से जं पुण थंडिलं जाणिज्जा,
 णवियासु वा मट्टियखाणियासु णवियासु गोप्पहिलियासु वा, गवाणीसु वा, खाणीसु
 वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९४२ ॥
 से भिक्खू वा (२) से जं पुण थंडिलं जाणिज्जा, डागवच्चंसि वा, सागवच्चंसि वा,
 मूलगवच्चंसि वा, हत्थंकरवच्चंसि वा, अण्णयरंसि वा तहप्पगारंसि थंडिलंसि णो
 उच्चारपासवणं वोसिरेज्जा ॥ ९४३ ॥ से भिक्खू वा (२) से जं पुण थंडिलं
 जाणिज्जा, असंणवणंसि वा, सणवणंसि वा, धायइवणंसि वा, केयइवणंसि वा,
 अंववणंसि वा, असोगवणंसि वा, णागवणंसि वा, पुण्णागवणंसि वा, चुल्लगवणंसि
 वा, अण्णयरेसु वा तहप्पगारेसु वा पत्तोवेएसु वा, पुप्फोवेएसु वा, फलोवेएसु वा,
 बीओवेएसु वा, हरिओवेएसु वा णो उच्चारपासवणं वोसिरेज्जा ॥ ९४४ ॥ से
 भिक्खू वा (२) सयपाययं वा परपाययं वा गहाय सेतमायाए एगंतमवक्कमेज्जा,
 अणावायंसि असंलोइयंसि अप्पपाणंसि जाव मक्कडासंताणयंसि अहारामंसि वा
 उवस्सयंसि तओ संजयामेव उच्चारपासवणं वोसिरेज्जा, उच्चारपासवणं वोसिरित्ता
 सेतमायाए एगंतमवक्कमे अणावाहंसि जाव मक्कडासंताणयंसि अहारामंसि वा,
 ज्झामथंडिलंसि वा, अण्णयरंसि वा तहप्पगारंसि थंडिलंसि अचित्तंसि तओ संजया-
 मेव उच्चारपासवणं परिठुवेज्जा ॥ ९४५ ॥ एयं खलु तस्स भिक्खुस्स २ वा साम-
 गियं जाव जएज्जासि त्तिबेमि ॥ ९४६ ॥ उच्चारपासवणसत्तिकयं दसम-
 मज्झयणं समत्तं ॥ सत्तिकयं समत्तं तइयं ॥

से भिक्खू वा (२) मुइंगसद्दाणि वा, नंदीसद्दाणि वा, झल्लरीसद्दाणि वा,
 अण्णयराणि वा तहप्पगाराणि विरुवरूवाणि वितताइं सद्दाइं कण्णसोयणपडियाए
 णो अभिसंधारेज्जा गमणाए ॥ ९४७ ॥ से भिक्खू वा (२) अहावेगइयाइं सद्दाइं
 सुणेइ तंजहा-वीणासद्दाणि वा, विपंचीसद्दाणि वा, पिप्पीसगसद्दाणि वा, तूणयसद्दाणि
 वा, वणयसद्दाणि वा, तुंबवीणियसद्दाणि वा, ढंकुणसद्दाणि वा अण्णयराइं वा
 तहप्पगाराइं विरुवरूवाणि सद्दाणि वितताइं कण्णसोयपडियाए णो अभिसंधारेज्जा
 गमणाए ॥ ९४८ ॥ से भिक्खू वा (२) अहावेगइयाइं सद्दाइं सुणेति तंजहा-

तालसद्दाणि वा, कंसतालसद्दाणि वा, लत्तियसद्दाणि वा, गोहियसद्दाणि वा, किरिकिरियसद्दाणि वा अण्णयराणि वा तहप्पगाराइं विरुवत्त्वाइं तालसद्दाइं कण्णसोयपडियाए णो अभिसंधारेज्जा गमणाए ॥ ९४९ ॥ से भिक्खू वा (२) अहावेगइयाइं सद्दाइं सुणेति तंजहा-संखसद्दाणि वा, वेणुसद्दाणि वा, वंससद्दाणि वा, खरमुहीसद्दाणि वा, पिरिपिरियसद्दाणि वा अण्णयराइं वा तहप्पगाराइं विरुवत्त्वाइं सद्दाइं झुसिराइं कण्णसोयपडियाए णो अभिसंधारेज्जा गमणाए ॥ ९५० ॥ से भिक्खू वा (२) अहावेगइयाइं सद्दाइं सुणेति तंजहा-वप्पाणि वा, फलिहाणि वा, जाव सराणि वा, सागराणि वा सरपंतियाणि वा, सरसरपंतियाणि वा, अण्णयराइं तहप्पगाराइं विरुवत्त्वाइं सद्दाइं कण्णसोयपडियाए णो अभिसंधारेज्जा गमणाए ॥ ९५१ ॥ से भिक्खू वा (२) अहावेगइयाइं सद्दाइं सुणेति तंजहा-कच्छाणि वा, णूमाणि वा, गहणाणि वा, वणाणि वा, वणदुग्गाणि वा, पव्वयाणि वा, पव्वयदुग्गाणि वा, अण्णयराइं वा तहप्पगाराइं विरुवत्त्वाइं सद्दाइं कण्णसोयपडियाए णो अभिसंधारेज्जा गमणाए ॥ ९५२ ॥ से भिक्खू वा (२) अहावेगइयाइं सद्दाइं सुणेति तंजहा-गामाणि वा, णगराणि वा, णिगमाणि वा, रायहाणि आसमपट्टणसंनिवेसाणि वा, अण्णयराइं तहप्पगाराइं सद्दाइं णो अभिसंधारेज्जा गमणाए ॥ ९५३ ॥ से भिक्खू वा (२) अहावेगइयाइं सद्दाइं सुणेति तंजहा-आरामाणि वा, उज्जाणाणि वा, वणाणि वा, वणसंडाणि वा, देवकुलाणि वा सभाणि वा, पवाणि वा, अण्णयराइं वा तहप्पगाराइं सद्दाइं णो अभिसंधारेज्जा गमणाए ॥ ९५४ ॥ से भिक्खू वा (२) अहावेगइयाइं सद्दाइं सुणेति तंजहा अट्ठाणि वा, अट्ठालयाणि वा, चरियाणि वा, दाराणि वा, गोपुराणि वा, अण्णयराइं वा तहप्पगाराइं सद्दाइं णो अभिसंधारेज्जा गमणाए ॥ ९५५ ॥ से भिक्खू वा (२) अहावेगइयाइं सद्दाइं सुणेति तंजहा-तियाणि वा, चउक्काणि वा, चच्चराणि वा, चउम्मुहाणि वा, अण्णयराइं वा तहप्पगाराइं सद्दाइं णो अभिसंधारेज्जा गमणाए ॥ ९५६ ॥ से भिक्खू वा (२) अहावेगइयाइं सद्दाइं सुणेति तंजहा-महिसट्ठाणकरणाणि वा, वसभट्ठाणकरणाणि वा, अस्सट्ठाणकरणाणि वा, हत्थिट्ठाणकरणाणि वा जाव कविंजलट्ठाणकरणाणि वा, अण्णयराइं वा तहप्पगाराइं सद्दाइं णो अभिसंधारेज्जा गमणाए ॥ ९५७ ॥ से भिक्खू वा (२) अहावेगइयाइं सद्दाइं सुणेति तंजहा-महिसजुद्धाणि वा, वसभजुद्धाणि वा, अस्सजुद्धाणि वा, हत्थिजुद्धाणि वा जाव कविंजलजुद्धाणि वा, अण्णयराइं वा तहप्पगाराइं णो अभिसंधारेज्जा गमणाए ॥ ९५८ ॥ से भिक्खू वा (२) अहावेगइयाइं सद्दाइं सुणेति तंजहा-जूहियट्ठाणाणि वा, हयजूहियट्ठाणाणि अण्णयराइं

तहप्पगाराइं णो अभिसंधारेज्ज गमणाए ॥ ९५९ ॥ से भिक्खू वा (२) जाव सुणेति तंजहा-अक्खाइयट्ठाणाणि वा, माणुम्माणियट्ठाणाणि वा, महयाऽऽहयणट्ठीयवाइय-
तंतितलतालतुडियपडुप्पवाइयट्ठाणाणि वा, अण्णयराइं वा तहप्पगाराइं णो अभिसं-
धारेज्ज गमणाए ॥ ९६० ॥ से भिक्खू वा (२) जाव सुणेति तंजहा-कलहाणि वा,
डिंवाणि वा, डमराणि वा, दोरज्जाणि वा, वैररज्जाणि वा विरुद्धरज्जाणि वा, अण्णय-
राइं वा तहप्पगाराइं सदाइं णो अभिसंधारेज्ज गमणाए ॥ ९६१ ॥ से भिक्खू वा (२)
जाव सदाइं सुणेइ खुड्डियं दारियं परिभुत्तमंडियालंकियनिवुज्झमाणि पेहाए एगं पुरिसं
वा वहाए णीणिज्जमाणं पेहाए अण्णयराइं वा तहप्पगाराइं णो अभिसंधारेज्ज गमणाए
॥ ९६२ ॥ से भिक्खू वा (२) अण्णयराइं विरुवरूवाइं महासवाइं एवं जाणिज्जा
तंजहा बहुसगडाणि वा, बहुरहाणि वा, बहुमिलक्खूणि वा, बहुपच्चंताणि वा, अण्ण-
यराइं वा तहप्पगाराइं विरुवरूवाइं महासवाइं कण्णसोयपडियाए णो अभिसंधारेज्ज
गमणाए ॥ ९६३ ॥ से भिक्खू वा (२) विरुवरूवाइं महुस्सवाइं एवं जाणिज्जा
तंजहा-इत्थीणि वा, पुरिसाणि वा, थेराणि वा, डहराणि वा, मज्झिमाणि वा, आभ-
रणविभूसियाणि वा, गायंताणि वायंताणि वा, णच्चंताणि वा, हसंताणि वा, रमंताणि
वा, मोहंताणि वा, विउलं असणपाणखाइमसाइमं परिभुंजंताणि वा, परिभाइंताणि
वा, विच्छड्डियमाणाणि वा, विगोवयमाणाणि वा, अण्णयराइं वा तहप्पगाराइं विरु-
वरूवाइं महुस्सवाइं कण्णसोयपडियाए णो अभिसंधारेज्ज गमणाए ॥ ९६४ ॥ से
भिक्खू वा (२) णो इहलोइएहिं सदेहिं णो परलोइएहिं सदेहिं, णो सुएहिं सदेहिं,
णो असुएहिं सदेहिं, णो दिट्ठेहिं सदेहिं णो अदिट्ठेहिं सदेहिं, णो कंतेहिं सदेहिं सज्जिज्जा,
णो रजेज्जा, णो गिज्जेज्जा, णो मुज्जेज्जा, णो अज्झोववजेज्जा ॥ ९६५ ॥ एवं खलु
तस्स भिक्खुस्स २ वा सामग्गियं जाव जएज्जासि त्ति वेमि ॥ ९६६ ॥ **सद्दस-**
त्तिक्रयं पयारहममज्झयणं समत्तं सद्दसत्तिक्रयं चउत्थं ॥

से भिक्खू वा (२) अहावेगइयाइं रूवाइं पासइ तंजहा-गंथिमाणि वा, वेढिमाणि
वा, पूरिमाणि वा, संघाइमाणि वा, कट्ठकम्माणि वा, पोत्थकम्माणि वा, चित्तक-
म्माणि वा, मणिकम्माणि वा, दंतकम्माणि वा, पत्तच्छेज्जकम्माणि वा, विविहाणि
वा वेढिमाइं जाव अण्णयराइं वा तहप्पगाराइं विरुवरूवाइं चक्खुदंसणपडियाए णो
अभिसंधारेज्ज गमणाए ॥ ९६७ ॥ एवं णायव्वं जहा सद्दपडियाए सव्वा वाइत्तवज्जा
रूवपडियाएवि ॥ ९६८ ॥ **रूवसत्तिक्रयं दुवालसममज्झयणं समत्तं रूव-**
सत्तिक्रयं पंचमं ॥

परकिरियं अज्झत्थियं संसेसियं णो तं सायए णो तं णियमे ॥ ९६९ ॥ सिया

से परो पाए आमजिज्ज वा पमजिज्ज वा णो तं सायए णो तं णियमे सिया से परो
पादाइं संवाहेज्ज वा पलिमहिज्ज वा णो तं सायए णो तं णियमे सिया से परो
पायाइं फुसेज्ज वा रएज्ज वा णो तं सायए णो तं णियमे सिया से परो पादाइं
तेल्लेण वा घएण वा मक्खेज्ज वा अब्भंगिज्ज वा णो तं सायए णो तं नियमे,
सिया से परो पादाइं लोहेण वा कक्केण वा चुन्नेण वा वण्णेण वा उल्लोढिज्ज वा
उव्वलिज्ज वा णो तं सायए णो तं नियमे, सिया से परो पादाइं सीओदगविय-
डेण वा उसिणोदगवियडेण वा उच्छोलेज्ज वा पधोएज्ज वा णो तं सायए णो तं
णियमे, सिया से परो पादाइं अण्णयरेण विलेवणजाएण आलिपेज्ज वा विलिपेज्ज
वा णो तं सायए णो तं नियमे, सिया से परो पादाइं अण्णयरेण धूवणजाएण धूवेज्ज
वा पधूवेज्ज वा णो तं सायए णो तं णियमे, सिया से परो पादाओ खाणुं वा
कंटयं वा णीहरेज्ज वा विसोहेज्ज वा णो तं सायए णो तं णियमे । सिया से परो
पादाओ पूयं वा सोणियं वा णीहरेज्ज वा विसोहेज्ज वा णो तं सायए णो तं
णियमे ॥ ९७० ॥ सिया से परो कायं आमजेज्ज वा पमजेज्ज वा णो तं सायए
णो तं णियमे, सिया से परो कायं लोहेण वा संवाहिज्ज वा पलिमहिज्ज वा णो तं
सायए णो तं णियमे, सिया से परो कायं तेल्लेण वा घएण वा मक्खेज्ज वा
अब्भंगेज्ज वा णो तं सायए णो तं णियमे, सिया से परो कायं लोहेण वा कक्केण
वा चुण्णेण वा वण्णेण वा उल्लोढिज्ज वा उव्वलिज्ज वा णो तं सायए णो तं
णियमे सिया से परो कायं सीओदगवियडेण वा उसिणोदगवियडेण वा उच्छोलेज्ज
वा पधोएज्ज वा णो तं सायए णो तं णियमे, सिया से परो कायं अण्णयरेणं
विलेवणजाएणं आलिपेज्ज वा, विलिपेज्ज वा, णो तं सायए, णो तं णियमे । सिया से
परो कायं अण्णयरेण धूवणजाएण धूवेज्ज वा, पधूवेज्ज वा, णो तं सायए णो तं
णियमे ॥ ९७१ ॥ सिया से परो कायंसि वणं आमजेज्ज वा पमजेज्ज वा णो तं
सायए णो तं नियमे, सिया से परो कायंसि वणं संवाहेज्ज वा पलिमहेज्ज वा णो तं
सायए णो तं नियमे, सिया से परो कायंसि वणं तेल्लेण वा घएण वा मक्खेज्ज वा
अब्भंगिज्ज वा, णो तं सायए णो तं नियमे । सिया से परो कायंसि वणं लोहेण वा
कक्केण वा चुण्णेण वा वण्णेण वा उल्लोढिज्ज वा उव्वलेज्ज वा णो तं सायए णो तं
नियमे, सिया से परो कायंसि वणं सीओदगवियडेण वा उसिणोदगवियडेण वा उच्छो-
लेज्ज वा पधोवेज्ज वा णो तं सायए णो तं नियमे ॥ ९७२ ॥ से सिया परो कायंसि
वणं अण्णयरेणं विलेवणजाएणं आलिपेज्ज वा विलिपेज्ज वा नो तं २। सिया से परो
कायंसि वणं अण्णयरेणं धूवणजाएणं धूवेज्ज वा प० नो तं ० २। सिया से परो कायंसि

चणं अन्नयरेणं सत्थजाएणं अच्छिदिज्ज वा विच्छिदिज्ज वा प० नो तं० २। सिया से परो कायंसि वणं अन्न० सत्थजाएणं आच्छिदिता वा विच्छिदिता वा पूयं वा सोणियं वा नीहरेज्ज वा वि० नो तं० २। सिया से परो कायंसि गंडं वा, अरइं वा, पुलइयं वा, भगंदलं वा, आमजेज्ज वा, पमजेज्ज वा, णो तं सायए णो तं नियमे । सिया से परो कायंसि गंडं वा, अरइयं वा, पुलइयं वा, भगंदलं वा, संवाहेज्ज वा पल्लिमेज्ज वा, णो तं सायए णो तं नियमे, सिया से परो कायंसि गंडं वा जाव भगंदलं वा, तेल्लेण वा घएण वा मक्खेज्ज वा अट्ठिमगेज्ज वा णो तं सायए णो तं नियमे । सिया से कायंसि गंडं वा जाव भगंदलं वा, लोहेण वा, कक्केण वा चुत्तेण वा, वण्णेण वा उल्लोढिज्ज वा, उव्वलेज्ज वा, णो तं सायए णो तं नियमे । सिया से परो कायंसि गंडं वा भगंदलं वा, सीओदगवियडेण वा, उस्सिणोदगवियडेण वा, उच्छो-
लेज्ज वा, पथोवेज्ज वा, णो तं सायए, णो तं नियमे, सिया से परो कायंसि गंडं वा जाव भगंदलं वा अण्णयरेणं सत्थजाएणं अच्छिदेज्ज विच्छिदेज्ज वा, सिया से परो अण्णयरेणं सत्थजाएणं अच्छिदिता वा २ पूयं वा सोणियं वा णीहरेज्ज वा णो तं सायए णो तं नियमे ॥९७३॥ सिया से परो कायाओ सेयं वा जल्लं वा णीहरेज्ज वा विसोहेज्ज वा णो तं सायए णो तं नियमे ॥९७४॥ सिया से परो अच्छिमलं, कण्णमलं वा, दंतमलं वा णहमलं वा, णीहरेज्ज वा विसोहिज्ज वा णो तं सायए णो तं नियमे ॥९७५॥ सिया से परो दीहाइं वालाइं, दीहाइं रोमाइं, दीहाइं भमुहाइं, दीहाइं कक्ख-
रोमाइं, दीहाइं वत्थिरोमाइं, कप्पेज्ज वा संठवेज्ज वा णो तं सायए णो तं नियमे ॥९७६॥ सिया से परो सीसाओ लिक्खं वा जूयं वा णीहरेज्ज वा विसोहेज्ज वा णो तं सायए णो तं नियमे ॥ ९७७ ॥ सिया से परो अंकंसि पल्लियंकंसि वा तुयट्ठावित्ता पादाइं आमज्जिज्ज वा पमज्जिज्ज वा एवं हिट्ठिमो गमो पायादि भाणियव्वो, सिया से परो अंकंसि वा पल्लियंकंसि वा तुयट्ठावित्ता, हारं वा अद्धहारं वा उरत्थं वा, गेवेयं वा, मउडं वा, पालंवं वा सुवण्णसुत्तं वा, आविहिज्ज वा, पिणहिज्ज वा णो तं सायए णो तं नियमे ॥ ९७८ ॥ सिया से परो आरामंसि वा, उज्जाणंसि वा, णीहरित्ता वा पविसित्ता वा पायाइं आमजेज्ज वा पमजेज्ज वा, णो तं सायए णो तं नियमे ॥ ९७९ ॥ एवं णेयव्वा अण्णमण्णकिरियावि ॥ ९८० ॥ सिया से परो सुद्धेणं वड्ढवलेणं तेइच्छं आउट्ठे सिया से परो असुद्धेणं वतिवलेणं तेइच्छं आउट्ठे, सिया से परो गिलाणस्स सच्चित्ताणि कंदाणि वा मूलाणि वा तयाणि वा हरियाणि वा खणित्तु वा कट्ठित्तु वा कट्ठावित्तु वा तेइच्छं आउट्ठाविज्जा णो तं सायए णो तं नियमे ॥ ९८१ ॥ कडुवेयणा पाणभूयजीवसत्ता वेयणं वेइंति ॥ ९८२ ॥

एयं खलु तस्स भिक्खुस्स २ सामग्गियं जं सव्वट्ठेहिं सहिते समिते सदा जए
सेयमिणं मण्णेज्जासि त्ति वेमि ॥ ९८३ ॥ परकिरियासत्तिकयं समत्तं छट्ठं,
तेरहममज्झयणं समत्तं ॥

से भिक्खू वा (२) अण्णमण्णकिरियं अज्झत्थियं संसेइयं णो तं सायए णो तं
नियमे ॥ ९८४ ॥ सिया से अण्णमण्णं पाए आमज्जेज वा पमज्जेज वा णो तं
सायए णो तं नियमे ॥ ९८५ ॥ सेसं तं चेव ॥ ९८६ ॥ एयं खलु तस्स भिक्खुस्स २
वा सामग्गियं ॥ ९८७ ॥ अचुन्नकिरिया सत्तिकयं समत्तं सत्तमं,
चउद्दसममज्झयणं समत्तं, बीया चूडा समत्ता ॥

तेणं कालेणं तेणं समएणं समणे भगवं महावीरे पंचहत्युत्तरे यावि होत्था,
तंजहा-हत्युत्तराहिं चुए चइत्ता गब्भं वक्कंते, हत्युत्तराहिं गब्भाओ गब्भं साहरिए,
हत्युत्तराहिं जाए, हत्युत्तराहिं मुंडे भवित्ता आगाराओ अणगारियं पव्वइए, हत्युत्त-
राहिं कसिणे पडिपुण्णे अव्वाधाए निरावरणे अणंते अणुत्तरे केवलवरनाणदंसणे
समुप्पण्णे, साइणा परिनिव्वुए भगवं ॥ ९८८ ॥ समणे भगवं महावीरे, इमाए
ओसप्पिणीए सुसमसुसमाए समाए विइक्कंताए, सुसमाए समाए वीतिक्कंताए, सुस-
मदुसमाए समाए वीतिक्कंताए, दुसमसुसमाए समाए बहुवीतिक्कंताए, पण्णहत्तरीए
वासेहिं मासेहिं य अद्धणवयसेसेहिं, जे से गिम्हाणं चउत्थे मासे अठ्ठमे पक्खे,
आसाढसुद्धे, तस्सणं आसाढसुद्धस्स छट्ठीपक्खेणं हत्युत्तराहिं णक्खत्तेणं जोगमुवागएणं,
महाविजयसिद्धत्थपुप्फुत्तरपवरपुंडरीयदिसासोवत्थियवद्धमाणाओ महाविमाणाओ
वीसंसागरोवमाइं आउयं पालइत्ता, आउक्खएणं, भवक्खएणं ठिइक्खएणं चुए चइत्ता
इह खलु जंवुदीवे दीवे, भारहे वासे, दाहिणद्धुभरहे दाहिणमाहणकुंडपुरसंनिवेशंसि
उसभदत्तस्स माहणस्स कोडालसगोत्तस्स देवाणंदाए माहणीए जालंधरस्स गुत्ताए
सीहुब्भवभूएणं अप्पाणेणं कुच्छिसि गब्भं वक्कंते, समणे भगवं महावीरे तिन्नाणो-
वगए यावि होत्था, चइस्सामित्ति जाणइ चुएमित्ति जाणइ, चयमाणे न जाणेइ,
सुहुमे णं से काले पन्नत्ते । तओ णं समणे भगवं महावीरे हियाणुकंपए णं देवेणं
जीयमेयं त्ति कट्ठु जे से वासाणं तच्चे मासे पंचमे पक्खे आसोयबहुले तस्स णं
आसोयबहुलस्स तेरसीपक्खेणं हत्युत्तराहिं नक्खत्तेणं जोगमुवागएणं वासीहिं राइंदि-
एहिं विइक्कंतेहिं तेसीइमस्स राइंदियस्स परियाए वट्ठमाणे दाहिणमाहणकुंडपुरसंनि-
वेशाओ उत्तरखत्तियकुंडपुरसंनिवेशंसि णायाणं खत्तियाणं सिद्धत्थस्स खत्तियस्स
कासवगुत्तस्स तिसलाए खत्तियाणीए वासिठ्ठसगुत्ताए असुभाणं पुग्गलाणं अवहारं
करित्ता, सुभाणं पुग्गलाणं पक्खेवं करित्ता कुच्छिसि गब्भं साहरइ, जेविय से

तिसलाए खत्तियाणीए कुच्छिसि गब्भे तंपि य दाहिणमाहणकुंडपुरसंनिवेशंसि
 उस...को...देवा...जालंधरायणगुत्ताए कुच्छिसि गब्भं साहरइ ॥ ९८९ ॥ समणे
 भगवं महावीरे तिण्णाणोवगए यावि होत्था, साहरिजिस्सामित्ति जाणइ, साहरिज्ज-
 माणे न जाणइ साहरिएमित्ति जाणइ समणाउसो । ॥ ९९० ॥ तेणं कालेणं तेणं
 समएणं तिसलाए खत्तियाणीए अह अण्णया कयाइ णवण्हं मासाणं बहुपडिपुण्णाणं
 अद्धठ्ठमाणं राइंदियाणं वीतिकंतानं जे से गिम्हाणं पढमे मासे दोच्चे पक्खे चित्तसुद्धे
 तस्सणं चित्तसुद्धस्स तेरसीपक्खेणं, हत्थुत्तराहिं जोगमुवागएणं समणं भगवं महावीरं
 आरोयारोयं पसूया ॥ ९९१ ॥ जं णं राइं तिसला खत्तियाणी समणं भगवं महावीरं
 आरोयारोयं पसूया, तं णं राइं भवणवइवाणमंतरजोइसियविमाणवासिदेवेहि य देवी-
 हि य उवयंतेहि य उप्पयंतेहि य एगे महं दिव्वे देवुज्जोए देवसण्णिवाते देवकहक्कहे
 उप्पिजलगभूए यावि होत्था ॥ ९९२ ॥ जं णं रयणिं तिसला खत्तियाणी समणं
 भगवं महावीरं आरोयारोयं पसूया तं णं रयणिं वहवे देवा य देवीओ य एगं महं
 अमयवासं च, गंधवासं च, चुण्णवासं च, पुप्फवासं च, हिरण्णवासं च, रयणवासं
 च वासिंसु ॥ ९९३ ॥ जं णं रयणिं तिसला खत्तियाणी समणं भगवं महावीरं
 आरोयारोयं पसूया, तं णं रयणिं भवणवइवाणमंतरजोइसियविमाणवासिणो देवा य
 देवीओ य समणस्स भगवओ महावीरस्स सइकम्मइ तित्थयराभिसेयं च करिसु
 ॥ ९९४ ॥ जओ णं पभिइ भगवं महावीरे तिसलाए खत्तियाणीए कुच्छिसि गब्भं
 आगए ततो णं पभिइ तं कुलं विपुलेणं हिरण्णेणं सुवण्णेणं धणेणं धण्णेणं माणिक्केणं
 मोत्तिएणं संखसिलप्पवालेणं अईव २ परिवड्ढइ, ततो णं समणस्स भगवओ महावीरस्स
 अम्मापियरो एयमठ्ठं जाणित्ता णिव्वत्तदसाहंसि वोक्कंतंसि सुचिभूयंसि विपुलं
 असणपाणखाइमसाइमं उवक्खडावेत्ति उवक्खडावेत्ता मित्तणातिसयणसंवंधिवग्गं
 उवणिमंतंति उवणिमंतेत्ता वहवे समणमाहणकिवणवणिमगाहिं भिच्छुंडगपंडरगातीण
 विच्छड्ढंति विग्गोवेत्ति विस्साणंति दातारेसु णं दाणं पज्जभाइंति, विच्छड्ढित्ता विग्गो
 वित्ता विस्साणित्ता दायारेसु णं दाणं पज्जभाइत्ता मित्तणाइसयणसंवंधिवग्गं भुंजावेत्ति
 भुंजावेत्ता मित्तणाइसयणसंवंधिवग्गेण इमेयारुवं णामधेज्जं कारवेंति, जओ णं पभिइ
 इमे कुमारे तिसलाए खत्तियाणीए कुच्छिसि गब्भे आगए, तओणं पभिइ इमं कुलं,
 विउलेणं हिरण्णेणं सुवण्णेणं धणेणं धण्णेणं माणिक्केणं मोत्तिएणं संखसिलप्पवालेणं
 अईव २ परिवड्ढइ तं होउ णं कुमारं “वद्धमाणे” ॥ ९९५ ॥ तओ णं समणे भगवं
 महावीरे पंचधातिपरिखुडे तंजहा-खीरधाईए-मज्जणधाईए-मंडावणधाईए-खेलावण-
 धाईए-अंकधाईए अंकाओ अंकं साहरिज्जमाणे रम्मे मणिकोद्धिमतले गिरिकंदरस-

मल्लीणे विव चंपयपायवे अहाणुपुन्वीए संवड्डइ ॥ ९९६ ॥ तओ णं समणे भगवं
महावीरे विण्णायपरिणये विणियत्तबालभावे अणुस्सुयाइं उरालाइं माणुस्सगाइं
प्रंचलक्खणाइं कामभोगाइं सदफरिसरसरूवगंधाइं परियारेमाणे एवं च णं विहरइ
॥ ९९७ ॥ समणे भगवं महावीरे कासवगोत्ते तस्सणं इमे तिण्णि णाम धेज्जा
एवमाहिज्जंति, अम्मापिउसंतिए “वद्धमाणे,” सहसम्मइए “समणे” भीमभयभेरवं
उरालं अचेलयं परिसहं सहइ त्ति कट्ठु देवेहिं से णामं कयं “समणे भगवं महावीरे”
॥ ९९८ ॥ समणस्स णं भगवओ महावीरस्स पिआ कासवगोत्तेणं तस्स णं तिण्णि
णामधेज्जा एवमाहिज्जंति, तंजहा-सिद्धत्थे त्ति वा, सेज्जंसेत्ति वा, जसंसे त्ति वा
॥ ९९९ ॥ समणस्स भगवओ महावीरस्स अम्मा वासिठुसगोत्ता तीसेणं तिण्णि
णामधेज्जा, एवमाहिज्जंति तंजहा-तिसला इ वा, विदेहदिण्णा इ वा, पियकारिणी
इ वा ॥ १००० ॥ समणस्स णं भगवओ महावीरस्स पित्तियए ‘सुपासे’ कासव-
गोत्तेणं, समणस्स णं भगवओ महावीरस्स जेठ्ठे भाया णंदिवद्धणे कासवगोत्तेणं,
समणस्स णं भगवओ महावीरस्स जेठ्ठा भइणी सुदंसणा कासवगोत्तेणं, समणस्स
णं भगवओ महावीरस्स भज्जा जसोया गोत्तेणं कोडिण्णा, समणस्स भगवओ
महावीरस्स धूया कासवगोत्तेणं, तीसेणं दो णाम धेज्जा, एवमाहिज्जंति, तंजहा-
अणोज्जा इ वा, पियदंसणा इ वा, समणस्स णं भगवओ महावीरस्स णत्तुई
कोसियगोत्तेणं तीसेणं दो णामधेज्जा, एव माहिज्जंति, तंजहा-सेसवई इ वा, जसवती
इ वा ॥ १००१ ॥ समणस्स णं भगवओ महावीरस्स अम्मापियरो पासावच्चिज्जा,
समणोवासगा यावि होत्था, ते णं बहूइं वासाइं समणोवासगपरियागं पालइत्ता,
छण्हं जीवनिक्कायाणं संरक्खणनिमित्तं आलोइत्ता निदिता गरहिता पडिक्कमिता
अहारिहं उत्तरगुणपायच्छित्तं पडिवज्जिता कुससंथारं दुरुहिता, भत्तं पच्चक्खाइंति,
भत्तं पच्चक्खाइत्ता अपच्छिमाए मारणंतियाए संलेहणाए झुसियसरीरा कालमासे
कालं किच्चा तं सरीरं विप्पजहिता अच्चुए कप्पए देवत्ताए-उव्वण्णा, तओणं आउ-
क्खणं भवक्खणं ठिइक्खणं चुए चइत्ता महाविदेहवासे चरिमेणं ऊसासेणं
सिज्जिस्संति, वुज्जिस्संति, मुच्चिस्संति, परिणिन्वाइस्संति, सव्वदुक्खाणमंतं करि-
स्संति ॥ १००२ ॥ तेणं कालेणं तेणं समएणं समणे भगवं महावीरे णाय
णायपुत्ते णायकुलणिव्वत्ते विदेहे विदेहदिण्णे विदेहजच्चे-विदेहसूमाले तीसं
वासाइं विदेहंसित्ति कट्ठु अगरमज्झे वसित्ता अम्मापिऊहिं कालगएहिं देवलोगमणु-
पत्तेहिं समत्तपइण्णे चिच्चा हिरण्णं, चिच्चा सुवण्णं, चिच्चा वलं, चिच्चा वाहणं चिच्चा
धणधण्णकणयरयणसंतसारसावइज्जं, विच्छेत्ता, विगोवित्ता, विस्साणित्ता, दायारेसु

दाणं दाइत्ता परिभाइत्ता, संवच्छरं दलइत्ता, जे से हेमंताणं पढमे मासे पढमे पक्खे, मग्गसिरवहुल्ले, तस्सणं मग्गसिरवहुलस्स दसमीपक्खेणं हत्थुत्तराहिं णक्खत्तेणं जोगमुवागएणं अभिणिक्खमणाभिप्पाए यावि होत्था ॥ १००३ ॥ संवच्छरेण होहिति अभिणिक्खमणं तु जिणवरिंदाणं, तो अत्थि संपदाणं, पव्वत्तई पुव्वसूराओ ॥ १००४ ॥ एगा हिरण्णकोडी, अठ्ठेव अणूणयां सयसहस्सा, सूरुदयमाईयं दिज्जइ जा पायरासोत्ति ॥ १००५ ॥ तिण्णेव य कोडिसयां अठ्ठासीई च होति कोडीओ, असिई च सयसहस्सा, एवं संवच्छरे दिण्णं ॥ १००६ ॥ वेसमणकुंडलधरा, देवा लोगंतिया महिद्धिया । वोहिति य तित्थयरं, पण्णरससु कम्मभूमिसु ॥ १००७ ॥ वंभंमि य कप्पंमि य वोद्धव्वा कणहराइणो मज्झे; लोगंतिया विमाणा, अठ्ठसुवत्था असंखेज्जा ॥ १००८ ॥ एते देवणिकाया, भगवं वोहिति जिणवरं वीरं, सव्वजगज्जीवहियं, अरहं तित्थं पव्वत्तेहि ॥ १००९ ॥ तओ णं समणस्स भगवओ महावीरस्स अभिणिक्खमणाभिप्पायं जाणेत्ता भवणवइवाणमंतरजोइसियविमाणवासिणो देवा य देवीओ य सएहिं सएहिं रुवेहिं, सएहिं सएहिं णेवत्थेहिं, सएहिं सएहिं चिधेहिं, सव्विद्धीए, सव्वजुईए, सव्ववलसमुदएणं, सयाईं सयाईं जाणविमाणाईं दुरुहंति सयाईं २ जाणविमाणाईं दुरुहत्ता, अहा वादराईं पोग्गलाईं परिंसाडेति परिंसाडित्ता, अहासुहुमाईं पोग्गलाईं परियाइंति परियाइत्ता, उद्धं उप्पयंति उप्पइत्ता, ताए उक्किठाए सिग्घाए चवलाए तुरियाए दिव्वाए देवगईए अहेणं उवयमाणा २ तिरिएणं असंखेज्जाईं दीवसमुद्दाईं वीतिक्कममाणा २ जेणेव जंबुद्धीवे दीवे तेणेव उवागच्छंति उवागच्छित्ता, जेणेव उत्तरखत्तियकुंडपुरसंणिवेसे तेणेव उवागच्छित्ता; तस्स उत्तरपुरत्थिमे दिसिभाए तेणेव झत्तिवेगेण उवट्ठिया ॥ १०१० ॥ तओ णं सक्के देविंदे देवराया सणियं सणियं जाणविमाणं ठवेति ठवेत्ता, सणियं २ जाणविमाणाओ पच्चोत्तरति, पच्चोत्तरित्ता एगंतमवक्कमेति एगंतमवक्कमेत्ता, महया वेउव्विएणं समुग्घाएणं समोहणति, महया वेउव्विएणं समुग्घाएणं समोहणित्ता, एगं महं णाणामणिकणगरयणभत्तिचित्तं सुभं चारुक्कंतरुवं देवच्छंदयं विउव्वति, तस्सणं देवच्छंदयस्स बहुमज्जेदेसभाए एगं महं सपायपीढं सीहासणं णाणामणिकणगरयणभत्तिचित्तं सुभं चारुक्कंतरुवं विउव्वइ विउव्वित्ता, जेणेव समणे भगवं महावीरे तेणेव उवागच्छति उवागच्छित्ता समणं भगवं महावीरं तिक्खुत्तो आयाहिणं पयाहिणं करेइ, समणं भगवं महावीरं वंदति णमंसति, वंदित्ता णमंसित्ता समणं भगवं महावीरं गहाय जेणेव देवच्छंदए तेणेव उवागच्छति उवागच्छित्ता, सणियं २ पुरत्थाभिमुहे सीहासणे णिसीयावेइ णिसीयावेत्ता सयपागसहस्सपागेहिं तेहेहिं अब्भंगेति

अब्भंगेत्ता गंधकासाइएहिं उल्लोलेति उल्लोलित्ता, सुद्धोदणं मज्जावेइ मज्जावित्ता,
जस्स णं मुल्लं सयसहस्सेणं तिपडोलतित्तिणं साहिणं सीएणं गोसीसरत्तचंदणेणं
अणुलिंपति अणुलिंपित्ता ईसिणिस्सासवातवोज्झं वरणगरपट्टणुगयं कुसलणरपसंसितं
अस्सलालापेलवं छेयायरियकणगखचियंतकम्मं हंसलक्खणं, पट्टजुयलं णियंसावेइ,
णियंसावेत्ता हारं अद्धहारं उरत्थं नेवत्थं एगावलिं पालंवसुत्तं पट्टमउडरयणमालाओ
आविंधावेति आविंधावेत्ता गंठिमवेढिमपूरिमसंधाइमेणं मल्लेणं कप्परुक्खमिव समलं-
करेति २ दोच्चंपि महया वेउव्वियसमुग्घाएणं समोहणइ, समोहणित्ता एगं महं चंद-
प्पभं सिवियं सहस्सवाहिणिं विउव्वइ तंजहा-ईहामियउसभतुरगणरमकरविहगवा-
णरकुंजररुत्सरभचमरसदूलसीहवणलयपउमलयभत्तिचित्तलयविचित्तविज्जाहरमिहुण-
जुयलजंतजोगजुत्तं, अच्चीसहस्समालिणीयं सुणिरुवियं मिसिमिसितरुवगसहस्सकलियं,
ईसिभिसमाणं भिब्भिसमाणं चक्खुल्लोयणलेसं, मुत्ताहलमुत्तजालंतरोपियंतवणीय-
पवरलंबूसगपलंबंतमुत्तदामं, हारद्धहारभूसणसमोणयं अहियपिच्छणिज्जं पउमलयभ-
त्तिचित्तं, असोककुंदणाणालयभत्तिचित्तं विरइयं सुभं चारुक्तंरुवं णाणामणिपंचवण्ण-
घंटापडायपरिमंडियग्गसिहरं पासादीयं दरिसणीयं सुरूवं ॥ १०११ ॥ सीया उवणीया
जिणवरस्स-जरमरणविप्पमुक्कस्स; ओसत्तमल्लदामा, जलथलयदिव्वकुसुमेहिं ॥ १ ॥
सिवियाइ मज्झयारे, दिव्वं वररयणरुवचिंचइयं; सीहासणं महरिहं सपादपीढं जिण-
वरस्स ॥ २ ॥ आलइयमालमउडो भासुरबोदी वराभरणधारी; खोमियवत्थणि-
यत्थो, जस्स य मोल्लं सयसहस्सं ॥ ३ ॥ छट्ठेण उ भत्तेणं अज्झवसाणेण सोहणेण
जिणो, लेसाहि विसुज्झंतो, आरुहइ उत्तमं सीयं ॥ ४ ॥ सीहासणे णिविठो सक्की-
साणा य दोहिं पासेहिं, वीयंति चामराहिं मणिरयणविचित्तदंडाहिं ॥ ५ ॥ पुव्वि
उक्खित्ता माणुसेहिं साहठुरोमपुलएहि, पच्छा वहंति देवा, सुरअसुरगरुलणागिंदा
॥ ६ ॥ पुरओ सुरा वहंती असुरा पुण दाहिणंमि पासंमि । अवरे वहंति गरुला,
णागा पुण उत्तरे पासे ॥ ७ ॥ वणसंडं व कुसुमियं, पउमसरो वा जहा सरयकाले;
सोहइ कुसुमभरेणं, इय गगणयलं सुरगणेहिं ॥ ८ ॥ सिद्धत्थवणं व जहा, कणिया-
रवणं व चंपयवणं वा, सोहइ कुसुमभरेणं, इय गगणयलं सुरगणेहिं ॥ ९ ॥
वरपडहमेरिज्झल्लरिसंखंसयसहस्सिएहि तूरेहिं । गगणतले धरणितले तूरणिणाओ
परमरम्मो ॥ १० ॥ ततविततं घणञ्जुसिरं आउज्जं चउविहं बहुविहीयं; वायंति तत्थ
देवा, बहुहिं आणट्टगसएहिं ॥ ११ ॥ १०१२ ॥ तेणं कालेणं तेणं समएणं जे से
हेमंताणं पढमे मासे पढमे पक्खे, मग्गसिरबहुले, तस्सणं मग्गसिरबहुलस्स दस-
मीपक्खेणं, सुव्वएणं दिवसेणं, विजएणं मुहुत्तेणं, हत्थुत्तराणक्खत्तेणं जोगोवगएणं

पाईणगामिणीए छायाए विइयाए पोरिसीए छठ्ठेणं भत्तेणं अपाणएणं, एगसाडगमा-
याए, चंदप्पहाए सिवियाए सहस्सवाहिणीए सदेवमणुयासुराएपरिसाए समणिज्जमाणे
२ उत्तरखत्तियकुंडपुरसंणिवेसस्स मज्झमज्झेणं णिगच्छित्ता जेणेव णायसंडे उज्जाणे
तेणेव उवागच्छइ, उवागच्छित्ता ईसिरयणिप्पमाणं अच्छोप्पेणं भूमिभागेणं सणियं
२ चंदप्पभं सिवियं सहस्सवाहिणिं ठवेइ ठवेत्ता सणियं २ चंदप्पभाओ सिवियाओ
सहस्सवाहिणीओ पच्चोयरइ, पच्चोयरित्ता सणियं २ पुरत्थाभिमुहे सीहासणे णिसीयेइ,
आभरणालंकारं ओमुयइ, तओणं वेसमणे देवे जन्नुव्वायपडिओ समणस्स भगवओ
महावीरस्स हंसलक्खणेणं पडेणं आभरणालंकारं पडिच्छइ; तओ णं समणे भगवं
महावीरे दाहिणेणं दाहिणं वामेणं वामं पंचमुठ्ठियं लोयं करेइ, तओ णं सक्के देविंदे
देवराया समणस्स भगवओ महावीरस्स जन्नुव्वायपडिए वयरामयेणं थालेणं केसाइं
पडिच्छइ, पडिच्छित्ता “अणुजाणेसि भंते” ति कट्ठु खीरोयसायरं साहरइ, तओ णं
समणे भगवं महावीरे दाहिणेणं दाहिणं वामेणं वामं पंचमुठ्ठियं लोयं करेत्ता सिद्धाणं
णमोक्कारं करेइ करेत्ता, “सव्वं मे अकरणिज्जं पावकम्मं” ति कट्ठु सामाइयं
चरित्तं पडिवज्जइ, सामाइयं चरित्तं पडिवज्जित्ता देवपरिसं मणुयपरिसं च आल्लिक्ख-
चित्तभूयमिव ठुवेइ ॥ १०१३ ॥ दिव्वो मणुस्सघोसो, तुरियणिणाओ य सक्कवय-
णेण, खिप्पामेव णिलुक्को, जाहे पडिवज्जइ चरित्तं ॥ १ ॥ पडिवज्जित्तु चरित्तं अहो-
णिसिं सव्वपाणभूतहितं; साहट्ठु लोमपुलया, सव्वे देवा निसामिति २ ॥ १०१४ ॥
तओ णं समणस्स भगवओ महावीरस्स सामाइयं खाओवसमियं चरित्तं पडिवज्जस्स
मणपज्जवणाणे णामं णाणे समुप्पन्ने, अट्ठाइजेहिं दीवेहिं दोहिं य समुदेहिं सण्णीणं
पंचेंदियाणं पज्जत्ताणं वियत्तमणसाणं मणोगयाइं भावाइं जाणेइ ॥ १०१५ ॥ तओ णं
समणे भगवं महावीरे पव्वइते समाणे मित्तणातिसयणसंवंधिवग्गं पडिविसज्जेति,
पडिविसज्जित्ता इमं एयारूवं अभिग्गहं अभिगिण्हइ, “वारसवासाइं वोसट्ठकाए चत्त-
देहे जे केइ उवसग्गा समुप्पज्जंति, तंजहा-दिव्वा वा, माणुस्सा वा, तेरिच्छिया
वा, ते सव्वे उवसग्गे समुप्पण्णे समाणे सम्मं सहिस्सामि, खमिस्सामि अहिया-
सइस्सामि” ॥ १०१६ ॥ तओ णं समणे भगवं महावीरे इमेयारूवं अभिग्गहं अभि-
गिण्हित्ता वोसट्ठकाए चत्तदेहे दिवसे मुहुत्तसेसे कुमारंगामं समणुपत्ते ॥ १०१७ ॥
तओ णं समणे भगवं महावीरे वोसट्ठचत्तदेहे अणुत्तरेणं आलएणं, अणुत्तरेणं विहा-
रेणं, एवं संजमेणं, पग्गहेणं, संवरेणं तवेणं, वंभचेरवासेणं, खंतीए, मोत्तीए, तुठ्ठीए,
समितीए, गुत्तीए, ठाणेणं, कम्मेणं, सुचरियफलणिव्वाणमुत्तिमग्गेणं, अप्पाणं भावे-
माणे विहरइ ॥ १०१८ ॥ एवं वा विहरमाणस्स जे केइ उवसग्गा समुपज्जंति दिव्वा

वा माणुस्सा वा तेरिच्छिया वा ते सव्वे उवसग्गे समुप्पन्ने समाणे अणाउले अव्व-
 हिए अदीणमाणसे तिविहमणवयणकायगुत्ते सम्मं सहइ खमइ तितिकखइ अहियासेइ
 ॥ १०१९ ॥ तओ णं समणस्स भगवओ महावीरस्स एएणं विहारेणं विहरमाणस्स
 वारसवासा विइक्कंता, तेरसमस्स वासस्स परियाए वट्टमाणस्स जे से गिम्हाणं दोच्चे
 मासे चउत्थे पक्खे वइसाहसुद्धे, तस्सणं वइसाहसुद्धस्स दसमीपक्खेणं सुव्वएणं
 दिवसेणं विजएणं मुहुत्तेणं हत्थुत्तराहिं णक्खत्तेणं जोगोवगतेणं पाईणगामिणीए छायाए
 वियत्ताए पोरिसीए जंभियगामस्स णगरस्स बंहिया णईए उज्जुवालियाए उत्तरे
 कूले, सामागस्स गाहावइस्स कट्टकरणंसि वेयावत्तस्स चेइयस्स उत्तरपुरत्थिमे
 दिसीभाए सालक्खस्स अदूरसामंते उक्कुड्डयस्स गोदोहियाए आयावणाए आयावे-
 माणस्स छट्ठेणं भत्तेणं अपाणएणं उड्डंजाणुअहोसिरस्स धम्मज्जाणकोट्टोवगयस्स
 सुक्कज्जाणंतरियाए वट्टमाणस्स निव्वाणे, कसिणे, पडिपुण्णे, अव्वाहए, णिरावरणे,
 अणंते, अणुत्तरे, केवलवरणाणदंसणे समुप्पण्णे ॥ १०२० ॥ से भयवं अरहा
 जिणे जाए, केवली सव्वणू सव्वभावदरिसी, सदेवमणुयासुरस्स लोयस्स पज्जाए
 जाणइ, तंजहा-आगति गतिं ठिति चवणं, उववायं भुत्तं पीयं कडं पडिसेवियं
 आवीकम्मं रहोकम्मं लवियं कहियं मणोमाणसियं सव्वलोए सव्वजीवाणं, सव्व-
 भावाइं जाणमाणे पासमाणे एवं च णं विहरइ ॥ १०२१ ॥ जणं दिवसं समणस्स
 भगवओ महावीरस्स णिव्वाणे कसिणे जाव समुप्पण्णे, तणं दिवसं भवणवइवाण-
 मंतरजोइसियविमाणवासिदेवेहिं य देवीहि य उव्वयंतेहिं य जाव उप्पिजलग-
 भूए यावि होत्था ॥ १०२२ ॥ तओ णं समणे भगवं महावीरे उप्पण्णवरणाणदंसणधरे
 अप्पाणं च लोगं च अभिसमिक्ख पुव्वं देवाणं धम्ममाइक्खति तओ पच्छा
 मणुस्साणं ॥ १०२३ ॥ तओ णं समणे भगवं महावीरे उप्पण्णणाणदंसणधरे गोय-
 माईणं समणाणं णिग्गंथाणं पंच महव्वयाइं सभावणाइं छज्जीवनिकायाइं आइक्खइ,
 भासइ, पखुवेइ, तंजहा-पुढविकाए जाव तसकाए ॥ १०२४ ॥ पढसं भंते ! महव्वयं
 पच्चक्खामि, सव्वं पाणाइवायं से सुहुमं वा वायंरं वा तसं वा थावरं वा णेव
 सयं पाणाइवायं करेज्जा ३ जावज्जीवाए तिविहं तिविहेणं मणसा वयसा कायसा,
 तस्स भंते ! पडिक्कमामि निंदामि गरिहामि अप्पाणं वोसिरामि ॥ १०२५ ॥
 तस्सिमाओ पंच भावणाओ भवंति ॥ १०२६ ॥ तत्थिमा पढमा भावणा,
 इरियासमिए से णिग्गंथे, णो अणइरियासमिए त्ति, केवली बूया अणइरियासमिए से
 णिग्गंथे, पाणाइं ४ अभिहणेज्ज वा, वत्तेज्ज वा, परियावेज्ज वा, लेसेज्ज वा, उइवेज्ज
 वा, इरियासमिए से णिग्गंथे, णो अणइरियासमिए त्ति पढमा भावणा ॥ १०२७ ॥

अहावरा दोच्चा भावणा, मणं परिजाणाइ से णिग्गंथे, जे य मणे पावए सावज्ज सकिरिए अण्हयकरे छेयकरे भेयकरे अधिकरणिए पाउसिए, परिताविए पाणाइवाइए, भूओवघाइए तहप्पगारं मणं णो पवारेज्जा, मणं परिजाणाति से णिग्गंथे जे य मणे अपावए ति दोच्चा भावणा ॥ १०२८ ॥ अहावरा तच्चा भावणा ॥ वई परिजाणाइ से णिग्गंथे जा य वई पाविया सावज्जा सकिरिया जाव भूओवघाइया तहप्पगारं वई णो उच्चारिज्जा, जे वई परिजाणाइ से णिग्गंथे जाय वई अपाविय ति तच्चा भावणा ॥ १०२९ ॥ अहावरा चउत्था भावणा, आयाणभंडमत्तणिक्खेवणासमिए से णिग्गंथे, णो अणायाणभंडमत्तणिक्खेवणासमिए णिग्गंथे केवली वूया, आयाणभंडमत्तणिक्खेवणाअसमिए णिग्गंथे पाणाइंभूयाइंजीवाइं सत्ताइं अभिहणेज्ज वा जाव उद्देवज्ज वा, तम्हा आयाणभंडमत्तणिक्खेवणासमिए से णिग्गंथे णो आयाणभंडमत्तणिक्खेवणाअसमिए ति चउत्था भावणा ॥ १०३० ॥ अहावरा पंचमा भावणा, आलोइयपाणभोयणभोई से णिग्गंथे, णो अणालोइयपाणभोयणभोई, केवली वूया, अणालोइयपाणभोयणभोई से णिग्गंथे पाणाइं वा ४ अभिहणेज्ज वा जाव उद्देवज्ज वा, तम्हा आलोइयपाणभोयणभोई से णिग्गंथे, णो अणालोइयपाणभोयणभोइ ति पंचमा भावणा ॥ १०३१ ॥ एतावता पढमे महव्वए सम्मं काएण फासिए पालिए तीरिए किट्टिए अवट्टिए आणाए आराहिए यावि भवइ ॥ १०३२ ॥ पढमे भंते ! महव्वए पाणाइवायाओ वेरमणं ॥ १०३३ ॥ अहावरं दोच्चं महव्वयं पच्चक्खामि सव्वं मुसावायं वइदोसं से कोहा वा, लोहा वा, भया वा, हासा वा, णेव सयं मुसं भासेज्जा, णेवच्चेणं मुसं भासावेज्जा, अण्णं पि मुसं भासंतं ण समणुजाणेज्जा, तिविहं तिविहेणं मणसा वायसा कायसा तस्स भंते पडिक्कमामि जाव वोसिरामि ॥ १०३४ ॥ तस्सिमाओ पंच भावणाओ भवंति ॥ १०३५ ॥ तत्थिमा पढमा भावणा, अणुवीइभासी से णिग्गंथे, णो अणणुवीइभासी; केवली वूया, अणणुवीइभासी से णिग्गंथे समावज्जिज्ज मोसं वयणाए, अणुवीइभासी से णिग्गंथे, णो अणणुवीइभासि ति पढमा भावणा ॥ १०३६ ॥ अहावरा दोच्चा भावणा, कोहं परिजाणाइ से णिग्गंथे, णो कोहणे सिया, केवली वूया, कोहपत्ते कोहत्तं समावदेज्जा मोसं वयणाए, कोहं परिजाणाइ से णिग्गंथे, णये कोहणे सियत्ति दोच्चा भावणा ॥ १०३७ ॥ अहावरा तच्चा भावणा, लोभं परिजाणाइ से णिग्गंथे, णो य लोभणए सिया, केवली वूया, लोभपत्ते लोभी समावदेज्जा मोसं वयणाए, लोभं परिजाणाइ से णिग्गंथे, णो य लोभणए सियत्ति तच्चा भावणा ॥ १०३८ ॥ अहावरा चउत्था भावणा,

भयं परिजाणाइ से णिग्गंथे, णो भयभीरुए सिया; केवली वूया, भयप्पत्ते भीरु समावदेज्जा सोसं वयणाए, भयं परिजाणइ से णिग्गंथे, णो भयभीरुए सिय ति चउत्था भावणा ॥ १०३९ ॥ **अहावरा पंचमा भावणा**, हासं परिजाणइ से णिग्गंथे, णो य हासणए सिया, केवली वूया, हासप्पत्ते हासी समावदेज्जा सोसं वयणाए, हासं परिजाणइ से णिग्गंथे, णो य हासणए सिय ति पंचमा भावणा ॥ १०४० ॥ एतावता दोच्चे महव्वए सम्मं काएण फासिए जाव आणाए आराहिए या वि भवति ॥ **दोच्चे भंते महव्वए०** ॥ १०४१ ॥ **अहावरं तच्चं भंते ! महव्वयं** पच्चक्खामि सव्वं अदिण्णादाणं; से गामे वा, नगरे वा, अरण्णे वा, अप्पं वा, बहं वा, अणुं वा, थूलं वा, चित्तमंतं वा, अचित्तमंतं वा, णेव सयं अदिण्णं गिण्हिज्जा, णेवण्णेहिं अदिण्णं गेण्हावेज्जा अण्णंपि अदिण्णं गिण्हंतं न समणुजाणिज्जा जावज्जीवाए जाव वोसिरामि ॥ १०४२ ॥ तस्सिमाओ **पंचभावणाओ** भवंति तत्थिमा **पढमा भावणा**, अणुवीइ मिउग्गहं जाई से णिग्गंथे णो अणुवीइमिउग्गहं जाई से णिग्गंथे केवली वूया अणुवीइमिओग्गहं जाई से णिग्गंथे अदिण्णं गिण्हेज्जा अणुवीइमिउग्गहं जाई से णिग्गंथे णो अणुवीइमिओग्गहं जाइ ति पढमा भावणा ॥ १०४३ ॥ **अहावरा दोच्चा भावणा**, अणुण्णवियपाणभोयणभोई से णिग्गंथे णो अणुण्णवियपाणभोयणभोई, केवली वूया, अणुण्णवियपाणभोयणभोई से णिग्गंथे अदिण्णं भुंजेज्जा, तम्हा अणुण्णवियपाणभोयणभोई से णिग्गंथे, णो अणुण्णवियपाणभोयणभोइ ति दोच्चा भावणा ॥ १०४४ ॥ **अहावरा तच्चा भावणा**, णिग्गंथे णं उग्गहंसि उग्गहियंसि एतावताव उग्गहणसीलए सिया, केवली वूया, णिग्गंथेणं उग्गहंसि अणुग्गहियंसि एतावताव अणोग्गहणसीले अदिण्णं गिण्हेज्जा णिग्गंथेणं उग्गहंसि उग्गहियंसि एतावताव उग्गहणसीलए सियति तच्चा भावणा ॥ १०४५ ॥ **अहावरा चउत्था भावणा**, णिग्गंथेणं उग्गहंसि उग्गहियंसि अभिक्खणं २ उग्गहणसीलए सिया, केवली वूया, णिग्गंथेणं उग्गहंसि उग्गहियंसि अभिक्खणं २ अणोग्गहणसीले अदिण्णं गिण्हेज्जा णिग्गंथे उग्गहंसि उग्गहियंसि अभिक्खणं २ उग्गहणसीलए सिय ति चउत्था भावणा ॥ १०४६ ॥ **अहावरा पंचमा भावणा**, अणुवीइमितोग्गहजाई से णिग्गंथे साहम्मिएसु णो अणुवीइमिउग्गहजाई, केवली वूया, अणुवीइमिउग्गहजाई से णिग्गंथे साहम्मिएसु अदिण्णं उगिण्हेज्जा, अणुवीइमिओग्गहजाई से णिग्गंथे साहम्मिएसु णो अणुवीइमिओग्गहजाई इइ पंचमा भावणा ॥ १०४७ ॥ एतावताव तच्चे महव्वए सम्मं जाव आणाए आराहिए यावि भवइ, तच्चं भंते मह-

व्वयं ॥ १०४८ ॥ अहावरं चउत्थं महव्वयं पच्चक्खामि सव्वं मेहुणं, से दिव्वं वा, माणुसं वा, तिरिक्खजोणियं वा, णेव सयं मेहुणं गच्छेज्जा तं चेव अदिण्णा-
दाणवत्तव्वया भाणियव्वा, जाव वोसिरामि ॥ १०४९ ॥ तस्सिमाओ पंच भाव-
णाओ भवंति ॥ १०५० ॥ तत्थिमा पढमा भावणा, णो णिग्गंथे अभिक्खणं
२ इत्थीणं कहं कहइत्तए सिया, केवली वूया, णिग्गंथेणं अभिक्खणं २ इत्थीणं
कहं कहेमाणे संतिभेदा संतिविभंगा संतिकेवलीपण्णत्ताओ धम्माओ भंसेज्जा, णो
णिग्गंथेणं अभिक्खणं २ इत्थीणं कहं कहित्तए सिय त्ति पढमा भावणा ॥ १०५१ ॥
अहावरा दोच्चा भावणा, णो णिग्गंथे इत्थीणं मणोहराईं २ इंदियाईं आलोए-
त्तए णिज्झाइत्तए सिया, केवली वूया, णिग्गंथे णं इत्थीणं मणोहराईं २ इंदियाईं
आलोएमाणे णिज्झाएमाणे संतिभेदा संतिविभंगा जाव धम्माओ भंसेज्जा, णो
णिग्गंथे इत्थीणं मणोहराईं २ इंदियाईं आलोएत्तए णिज्झाइत्तए सिय त्ति दोच्चा
भावणा ॥ १०५२ ॥ अहावरा तच्चा भावणा, णो णिग्गंथे इत्थीणं पुव्वरयाईं
पुव्वकीलियाईं सरित्तए सिया, केवली वूया, णिग्गंथे णं इत्थीणं पुव्वरयाईं पुव्वकी-
लियाईं सरमाणे संतिभेदा जाव भंसेज्जा, णो णिग्गंथे इत्थीणं पुव्वरयाईं पुव्वकी-
लियाईं सरित्तए सिय त्ति तच्चा भावणा ॥ १०५३ ॥ अहावरा चउत्था भावणा,
णाइमत्तपाणभोयणभोई से णिग्गंथे णो पणीयरसभोयणभोई, केवली वूया, अइम-
त्तपाणभोयणभोई से णिग्गंथे पणीयरसभोयणभोई य संतिभेदा जाव भंसेज्जा,
णोऽतिमत्तपाणभोयणभोई से णिग्गंथे, णो पणीयरसभोयणभोई त्ति चउत्था
भावणा, ॥ १०५४ ॥ अहावरा पंचमा भावणा, णो णिग्गंथे इत्थीपसुपंड-
गसंसत्ताईं सयणासणाईं सेवित्तए सिया, केवली वूया, णिग्गंथेणं इत्थीपसुपंडग-
संसत्ताईं सयणासणाईं सेवेमाणे संतिभेदा जाव भंसेज्जा, णो णिग्गंथे इत्थीपसुपंडग-
संसत्ताईं सयणासणाईं सेवित्तए सियत्ति पंचमा भावणा ॥ १०५५ ॥ एतावताव चउत्थे
महव्वए सम्मं काएण फासिए जाव आराहिए या वि भवइ, चउत्थं भंते ! महव्वयं ०
॥ १०५६ ॥ अहावरं पंचमं भंते ! महव्वयं सव्वं परिग्गहं पच्चक्खामि, से अप्पं वा, वहुं
वा, अणुं वा, थूलं वा, चित्तमंतं वा, अचित्तमंतं वा, णेव सयं परिग्गहं गिण्हेज्जा,
णेवण्णेहिं परिग्गहं गिण्हाविज्जा, अण्णंपि परिग्गहं गिण्हंतं ण समणुजाणिज्जा, जाव
वोसिरामि ॥ १०५७ ॥ तस्सिमाओ पंच भावणाओ भवंति ॥ तत्थिमा पढमा
भावणा, सोयओणं जीवे मणुण्णामणुण्णाईं सदाईं सुणेइ, मणुण्णामणुण्णेहिं सदेहिं णो
सजेज्जा, णो रजेज्जा, णो गिज्झेज्जा, णो मुज्झेज्जा, णो अज्झोववजेज्जा, णो
विणिग्घायमावजेज्जा, केवली वूया, णिग्गंथेणं मणुण्णामणुण्णेहिं सदेहिं सज्जमाणे

जाव विणिग्घायमावज्जमाणे संतिभेया संतिविभंगा संतिकेवलिपण्णत्ताओ धम्माओ भंसेज्जा ॥ १०५८ ॥ ण सक्का ण सोउं सद्दा, सोयविसयमागता; रागदोसा उ जे तत्थ ते भिक्खू परिवज्जए ॥ १०५९ ॥ सोयओ जीवो मणुण्णामणुण्णाइं सद्दाइं सुणेइ० ॥ १०६० ॥ अहावरा **दोच्चा भावणा**, चक्खूओ जीवो मणुण्णामणुण्णाइं रुवाईं पासइ, मणुण्णामणुण्णेहिं रुवेहिं णो सज्जेज्जा, णो रज्जेज्जा, जाव णो विणिग्घायमावज्जेज्जा, केवली बूया, मणुण्णामणुण्णेहिं रुवेहिं सज्जमाणे रज्जमाणे जाव विणिग्घायमावज्जमाणे संतिभेया संतिविभंगा जाव भंसेज्जा ॥ १०६१ ॥ ण सक्का रुवमदट्ठुं चक्खुविसयमागयं, रागदोसा उ जे तत्थ, ते भिक्खू परिवज्जए ॥ १०६२ ॥ चक्खूओ जीवो मणुण्णामणुण्णाइं रुवाईं पासइ ॥ १०६३ ॥ अहावरा **तच्चा भावणा**, घाणओ जीवो मणुण्णामणुण्णाइं गंधाईं अग्घायइ, मणुण्णामणुण्णेहिं गंधेहिं णो सज्जेज्जा, णो रज्जेज्जा, जाव णो विणिग्घायमावज्जेज्जा, केवली बूया, मणुण्णामणुण्णेहिं गंधेहिं सज्जमाणे रज्जमाणे जाव विणिग्घायमावज्जमाणे संतिभेया संतिविभंगा जाव भंसेज्जा ॥ १०६४ ॥ णो सक्का गंधमग्घाउं णासाविसयमागयं, रागदोसा उ जे तत्थ ते भिक्खू परिवज्जए ॥ १०६५ ॥ घाणओ जीवो मणुण्णामणुण्णाइं गंधाईं अग्घायइ० ॥ १०६६ ॥ अहावरा **चउत्था भावणा**, जिब्भाओ जीवो मणुण्णामणुण्णाइं रसाईं अस्सादेइ, मणुण्णामणुण्णेहिं रसेहिं णो रज्जेज्जा, जाव णो विणिग्घायमावज्जेज्जा, केवली बूया, णिग्गंथे णं मणुण्णामणुण्णेहिं रसेहिं सज्जमाणे जाव विणिग्घायमावज्जमाणे संतिभेया जाव भंसेज्जा ॥ १०६७ ॥ णो सक्का रसमस्साउं, जीहाविसयमागयं; रागदोसा उ जे तत्थ, ते भिक्खू परिवज्जए ॥ १०६८ ॥ जीहाओ जीवो मणुण्णामणुण्णाइं रसाईं अस्सादेइ० ॥ १०६९ ॥ अहावरा **पंचमा भावणा**, फासओ जीवो मणुण्णामणुण्णाइं फासाईं पडिसंवेदेइ, मणुण्णामणुण्णेहिं फासेहिं णो सज्जेज्जा, णो रज्जेज्जा, णो गिज्जेज्जा, णो मुज्जेज्जा, णो अज्झोववज्जेज्जा, णो विणिग्घायमावज्जेज्जा, केवली बूया, णिग्गंथे णं मणुण्णामणुण्णेहिं फासेहिं सज्जमाणे जाव विणिग्घायमावज्जमाणे, संतिभेया संतिविभंगा, संतिकेवलिपण्णत्ताओ धम्माओ भंसेज्जा ॥ १०७० ॥ णो सक्का फासमवेदेउं फासविसयमागयं; रागदोसा उ जे तत्थ, ते भिक्खू परिवज्जए ॥ १०७१ ॥ फासओ मणुण्णामणुण्णाइं फासाईं पडिसंवेदेइ० ॥ १०७२ ॥ एतावताव पंचमे महव्वए सम्मं काएण फासिएपालिएतीरिएकिट्टिए अहिट्टिए आणाए आराहिए यावि भवइ, पंचमं भंते ! महव्वयं ॥ १०७३ ॥ इच्चेएहिं पंचमहव्वएहिं, पणवीसाहिं य भावणाहिं संपण्णे अणगारे अहासुयं अहाकप्पं अहामग्गं सम्मं काएण फासित्ता,

पालिता, तीरिता, किट्टिता, आणाए आराहिए यावि भवइ ॥ १०७४ ॥ भावणा-
ज्झयणं पणरहमं समत्तं इय तइआ चूला समत्ता ॥

अणिच्चमावासमुवेति जंतुणो, पलोयए सुच्चमिदं अणुत्तरं; विऊसिरे विञ्जु अगार-
बंधणं, अभीरु आरंभपरिग्गहं चए ॥ १०७५ ॥ तहागअं भिक्खुमणंतसंजयं,
अणेलिसं विञ्जु चरंतमेसणं; तुदंति वायाहिं अभिद्दवं णरा, सरेहिं संगामगयं व
कुंजरं ॥ १०७६ ॥ तहप्पगारेहिं जणेहिं हीलिए, ससद्दफासा फरुसा उईरिया;
तितिक्खए णाणि अदुट्ठचेयसा, गिरिव्व वाएण ण संपवेयए ॥ १०७७ ॥ उवेहमाणे
कुसलेहिं संवसे, अकंतदुक्खी तसथावरा दुही; अल्लसए सव्वसहे महामुणी, तहा हि
से सुस्समणे समाहिए ॥ १०७८ ॥ विऊ णए धम्मपयं अणुत्तरं, विणीयतण्हस्स
मुणिस्स ज्झायओ; समाहियस्सऽग्गिसिहा व तेयसा, तवो य पण्णा य जसो य
वड्डइ ॥ १०७९ ॥ दिसोदिसिंऽणंतजिणेण ताइणा, महव्वया खेमपदा पवेदिता;
महागुरु णिस्सयरा उदीरिया, तमेव तेऊत्तिदिसं पगासया ॥ १०८० ॥ सिएहिं
भिक्खू असिए परिव्वए, असज्जमित्थीसु चएज्ज पूअणं; अणिस्सिओ लोगमिणं तहा
परं, णमिज्जइ कामगुणेहिं पंडिए ॥ १०८१ ॥ तहा विमुक्कस्स परिण्णचारिणो
धिईमओ दुक्खखमस्स भिक्खुणो; विसुज्झई जंसि मलं पुरेकडं, समीरियं रूपमलं
व जोइणा ॥ १०८२ ॥ से हु प्परिण्णा समयंमि वड्डइ, णिराससे उवरय मेहुणा
चरे; भुजंगमे जुण्णतयं जहा जहे, विमुच्चइ से दुहसेज्ज माहणे ॥ १०८३ ॥ जमाहु
ओहं सलिलं अपारगं, महासमुदं व भुयाहिं दुत्तरं; अहे य णं परिजाणाहि पंडिए, से
हु मुणी अंतकडे त्ति वुच्चइ ॥ १०८४ ॥ जहा हि वड्ढं इह माणवेहिं, जहा य तेसिं
तु विमोक्ख आहिओ; अहा तहा बंधविमोक्ख जे विऊ, से हु मुणी अंतकडे त्ति
वुच्चइ ॥ १०८५ ॥ इमंमि लोए परए य दोसुवि, ण विज्जइ बंधणं जस्स किंचिवि;
से हु णिरालंबणमप्पइट्ठिए, कलंकली भावपहं विमुच्चइ त्ति बेमि ॥ १०८६ ॥
सोलहमं विमुत्तिज्झयणं समत्तं ॥ सदाचारणाम बीओ सुयक्खंधो
संपुण्णो, चउत्था चूडा समत्ता ॥

इइ आयारे



णमो त्थु णं समणस्स भगवओ णायपुत्त महावीरस्स

सूयगडं

पढमे सुयक्खंधे

समयज्झयणे पढमे

बुज्झिज्ज त्ति तिउट्टिज्जा बन्धणं परिजाणिया । किमाह बन्धणं वीरो किं वा जाणं
 तिउट्टइ ॥ १ ॥ १ ॥ चित्तमन्तमचित्तं वा परिगिज्झ किसामवि । अन्नं वा अणुजा-
 णाइ एवं दुक्खा न मुच्चई ॥ २ ॥ २ ॥ सयं तिवायए पाणे अदुवऽन्नेहि घायए ।
 हणन्तं वाऽणुजाणाइ वेरं वट्ठेइ अप्पणो ॥ ३ ॥ ३ ॥ जस्सि कुले समुप्पन्ने जेहिं वा
 संवसे नरे । ममाइ लुप्पई वाले अन्ने अन्नेहि मुच्छिए ॥ ४ ॥ ४ ॥ वित्तं सोयरिया
 चेव सव्वमेयं न ताणइ । संखाएँ जीवियं चेवं कम्मणा उ-तिउट्टइ ॥ ५ ॥ ५ ॥ एए
 गन्धे विउक्कम्म एगे समणमाहणा । अयाणन्ता विउस्सित्ता सत्ता कामेहि माणवा
 ॥ ६ ॥ ६ ॥ सन्ति पच्च महब्भूया इहमेगेसिमाहिया । पुढवी आउ तेऊ वा वाउ
 आगासपच्चमा ॥ ७ ॥ ७ ॥ एए पच्च महब्भूया तेब्भो एगो त्ति आहिया । अह
 तेसिं विणासेणं विणासो होइ देहिणो ॥ ८ ॥ ८ ॥ जहा य पुढवीथूमे एगे नाणाहि
 दीसइ । एवं भो कसिणे लोए विन्नू नाणाहि दीसइ ॥ ९ ॥ ९ ॥ एवमेगे त्ति जम्पन्ति
 मन्दा आरम्भनिस्सिया । एगे किच्चा सयं पावं तिब्बं दुक्खं नियच्छइ ॥ १० ॥ १० ॥
 पत्तेयं कसिणे आया जे वाला जे य पण्डिया । सन्ति पिच्चा न ते सन्ति नत्थि
 सत्तोववाइया ॥ ११ ॥ ११ ॥ नत्थि पुण्णे व पावे वा नत्थि लोए इओवरे । सरी-
 रस्स विणासेणं विणासो होइ देहिणो ॥ १२ ॥ १२ ॥ कुब्बं च कारयं चेव सव्वं
 कुब्बं न विज्जई । एवं अकारओ अप्पा एवं ते उ पगब्भिया ॥ १३ ॥ १३ ॥ जे ते
 उ वाइणो एवं लोए तेसिं कओ सिया । तमाओ ते तमं जन्ति मन्दा आरम्भनि-
 स्सिया ॥ १४ ॥ १४ ॥ सन्ति पच्च महब्भूया इहमेगेसिमाहिया । आयछट्ठा पुणो
 आहु आया लोगे य सासए ॥ १५ ॥ १५ ॥ दुहओ न विणस्सन्ति नो य उप्पज्जए
 असं । सव्वे वि सव्वहा भावा नियत्तीभावमागया ॥ १६ ॥ १६ ॥ पच्च खन्धे
 वयन्तेगे बाला उ खणजोइणो । अन्नो अणन्नो नेवाहु हेउयं च अहेउयं ॥ १७ ॥ १७ ॥
 पुढवी आउ तेऊ य तहा वाऊ य एगओ । चत्तारि धाउणो ख्वं एवमाहंसु आवरे
 ॥ १८ ॥ १८ ॥ अगारमावसन्ता वि अरणा वा वि पव्वया । इमं दरिमणमावन्ना
 सव्वदुक्खा विमुच्चई ॥ १९ ॥ १९ ॥ ते नावि संधिं नच्चा णं न ते धम्मविऊ जणा ।

जे ते उ वाइणो एवं न ते ओहंतराऽऽहिया ॥ २० ॥ २० ॥ ते नावि संधिं नच्चा णं
 न ते धम्मविऊ जणा । जे ते उ वाइणो एवं न ते संसारपारगा ॥ २१ ॥ २१ ॥
 ते नावि संधिं नच्चा णं न ते धम्मविऊ जणा । जे ते उ वाइणो एवं न ते गव्भस्स
 पारगा ॥ २२ ॥ २२ ॥ ते नावि संधिं नच्चा णं न ते धम्मविऊ जणा । जे ते उ
 वाइणो एवं न ते जम्मस्स पारगा ॥ २३ ॥ २३ ॥ ते नावि संधिं नच्चा णं न ते
 धम्मविऊ जणा । जे ते उ वाइणो एवं न ते दुक्खस्स पारगा ॥ २४ ॥ २४ ॥ ते
 नावि संधिं नच्चा णं न ते धम्मविऊ जणा । जे ते उ वाइणो एवं न ते मारस्स
 पारगा ॥ २५ ॥ २५ ॥ नाणाविहाइं दुक्खाइं अणुहोन्ति पुणो पुणो । संसारचक्क-
 वालम्मि मच्चुवार्हिजराकुले ॥ २६ ॥ २६ ॥ उच्चावयाणि गच्छन्ता गव्भमेस्सन्ति
 णन्तसो । नायपुत्ते महात्रीरे एवमाह जिणुत्तमे ॥ २७ ॥ २७ ॥ त्ति वेमि ॥
 समयज्झयणे पढमुद्देशो ॥

आघायं पुण एगेसिं उववन्ना पुढो जिया । वेदयन्ति सुहं दुक्खं अदु वा लुप्पन्ति
 ठाणओ ॥ १ ॥ २८ ॥ न तं सयं कडं दुक्खं कओ अन्नकडं च णं । सुहं वा जइ
 वा दुक्खं सेहियं वा असेहियं ॥ २ ॥ २९ ॥ सयं कडं न अनेहिं वेदयन्ति पुढो
 जिया । संगइयं तं तहा तेसि इहमेगेसिमाहियं ॥ ३ ॥ ३० ॥ एवमेयाणि जम्पन्ता
 बाला पण्डियमाणिणो । निययानिययं सन्तं अयाणन्ता अबुद्धिया ॥ ४ ॥ ३१ ॥
 एवमेगे उ पासत्था ते भुजो विप्पगब्भिया । एवं उवट्ठिया सन्ता न ते दुक्ख-
 विमोक्खंगा ॥ ५ ॥ ३२ ॥ जविणो मिगा जहा सन्ता परियाणेण वज्जिया ।
 असङ्कियाइं सङ्कन्ति सङ्कियाइं असङ्किणो ॥ ६ ॥ ३३ ॥ परियाणियाणि सङ्कन्ता
 पासियाणि असङ्किणो । अन्नाणभयसंविग्गा संपलन्ति तहिं तहिं ॥ ७ ॥ ३४ ॥
 अह तं पवेज्ज वज्जं अहे वज्जस्स वा वए । मुचेज्ज पयपासाओ तं तु मन्दे न
 देहई ॥ ८ ॥ ३५ ॥ अहियप्पाहियपन्नाणे विसमन्तेणुवागए । स बद्धे पयपासेण
 तत्थ घायं नियच्छइ ॥ ९ ॥ ३६ ॥ एवं तु समणा एगे मिच्छदिट्ठी अणारिया ।
 असङ्कियाइं सङ्कन्ति सङ्कियाइं असङ्किणो ॥ १० ॥ ३७ ॥ धम्मपन्नवणा जा सा
 तं तु सङ्कन्ति मूढगा । आरम्भाइं न सङ्कन्ति अवियत्ता अकोविया ॥ ११ ॥ ३८ ॥
 सव्वप्पगं विउक्कस्सं सव्वं नूमं विहूणिया । अप्पत्तियं अकम्मंसे एयमट्ठं मिगे चुए
 ॥ १२ ॥ ३९ ॥ जे एयं नाभिजाणन्ति मिच्छदिट्ठी अणारिया । मिगा वा पास-
 वद्धा ते घायमेस्सन्ति णन्तसो ॥ १३ ॥ ४० ॥ माहणो समणा एगे सव्वे नाणं
 सयं वए । सव्वलोगे वि जे पाणा न ते जाणन्ति किंचण ॥ १४ ॥ ४१ ॥ मिलक्ख
 अमिलक्खुस्स जहा चुत्ताणुभासए । न हेउं से वियाणाइ भासियं तऽणुभासए ॥ १५ ॥

॥ ४२ ॥ एवमन्नाणिया नाणं वयन्ता वि सयं सयं । निच्छयत्यं ण जाणन्ति
मिलक्खु व्व अवोहिया ॥ १६ ॥ ४३ ॥ अन्नाणियाणं वीमंसा अन्नाणे न नियच्छइ ।
अप्पणो य परं नालं कुतो अन्नाणुसासिडं ॥ १७ ॥ ४४ ॥ वणे मूढे जहा जन्तू
मूढे नेयाणुगामिए । दो वि एए अकोविया तिव्वं सोयं नियच्छई ॥ १८ ॥ ४५ ॥
अन्धो अन्धं पहं नेन्तो दूरमद्वाणुगच्छइ । आवजे उप्पहं जन्तू अदु वा पन्थाणु-
गामिए ॥ १९ ॥ ४६ ॥ एवमेगे नियागट्ठी धम्ममाराहगा वयं । अदु वा अहम्म-
मावजे न ते सव्वज्जुयं वए ॥ २० ॥ ४७ ॥ एवमेगे वियक्काहिं नो अन्नं पज्जु-
वासिया । अप्पणो य वियक्काहिं अयमञ्जू हि दुम्मई ॥ २१ ॥ ४८ ॥ एवं तक्काइ
साहेन्ता धम्माधम्मे अकोविया । दुक्खं ते नाइतुट्ठेन्ति सउणी पञ्जरं जहा ॥ २२ ॥
॥ ४९ ॥ सयं सयं पसंसन्ता गरहन्ता परं वयं । जे उ तत्थ विउस्सन्ति संसारं ते
विउस्सिया ॥ २३ ॥ ५० ॥ अहावरं पुरक्खायं किरियावाइदरिसणं । कम्मचिन्ता-
पणट्ठाणं संसारस्स पवड्डगं ॥ २४ ॥ ५१ ॥ जाणं काएणऽणाउट्ठी अबुहो जं च
हिंसइ । पुट्ठो संवेयइ परं अवियत्तं खु सावज्जं ॥ २५ ॥ ५२ ॥ सन्तिमे तउ
आयाणा जेहिं कीरइ पावगं । अभिकम्मा य पेसा य मणसा अणुजाणिया
॥ २६ ॥ ५३ ॥ एए उ तउ आयाणा जेहिं कीरइ पावगं । एवं भावविसोहीए
निव्वाणमभिगच्छई ॥ २७ ॥ ५४ ॥ पुत्तं पिया समारब्भ आहारेज्ज असंजए ।
भुज्जमाणो य मेहावी कम्मुणा नोवलिप्पई ॥ २८ ॥ ५५ ॥ मणसा जे
पउस्सन्ति चित्तं तेसिं न विज्जइ । अणवज्जमतहं तेसिं न ते संवुडचारिणो ॥ २९ ॥
॥ ५६ ॥ इच्चेयाहि य दिट्ठीहि सायागारवनिस्सिया । सरणं ति मञ्जमाणा सेवन्ती
पावगं जणा ॥ ३० ॥ ५७ ॥ जहा अस्साविणिं नावं जाइअन्धो दुरूहिया । इच्छई
पारमागन्तुं अन्तरा य विसीयई ॥ ३१ ॥ ५८ ॥ एवं तु समणा एगे मिच्छदिट्ठी
अणारिया । संसारपारकंखी ते संसारं अणुपरियट्ठन्ति ॥ ३२ ॥ ५९ ॥ त्ति वेमि ॥
समयज्झयणे विइयुद्देसो ॥

जं किंचि उ पूडकडं सद्धीमागन्तुमीहियं । सहस्सन्तरियं भुजे दुपक्खं चेव
सेवई ॥ १ ॥ ६० ॥ तमेव अवियाणन्ता विसमंसि अकोविया । मच्छा वेसालिया
चेव उदगस्सभियागमे ॥ २ ॥ ६१ ॥ उदगस्स पहावेणं सुक्कं सिग्धं तमेन्ति उ ।
ढक्केहि य क्केहि य आमिसत्थेहि ते दुही ॥ ३ ॥ ६२ ॥ एवं तु समणा एगे
वट्ठमाणसुहेसिणो । मच्छा वेसालिया चेव घायमेस्सन्ति णन्तसो ॥ ४ ॥ ६३ ॥
इणमन्नं तु अन्नाणं इहमेगेसिमाहियं । देवउत्ते अयं लोए बम्भउत्ते इ आवरे ॥ ५ ॥
॥ ६४ ॥ ईसरेण कडे लोए पहाणाइ तहावरे । जीवाजीवसमाउत्ते सुहदुक्खसम-

न्निए ॥ ६ ॥ ६५ ॥ सयंभुणा कडे लोए इइ वुत्तं महेसिणा । मारेण संथुया माया
 तेण लोए असासए ॥ ७ ॥ ६६ ॥ माहणा समणा एगे आह अण्डकडे जए ।
 असो तत्तमकासी य अयाणन्ता मुसं वए ॥ ८ ॥ ६७ ॥ सएहिं परियाएहिं लोगं
 वूया कडे ति य । तत्तं ते न वियाणन्ति न विणासी कयाइ वि ॥ ९ ॥ ६८ ॥
 अमणुन्नसमुप्पायं दुक्खमेव वियाणिया । समुप्पायमयाणन्ता कहं नायन्ति संवरं
 ॥ १० ॥ ६९ ॥ सुद्धे अपावए आया इहमेगेसिमाहियं । पुणो किट्ठापदोसेगं सो
 तत्थ अवरज्झई ॥ ११ ॥ ७० ॥ इह संवुडे मुणी जाए पच्छा होइ अपावए ।
 वियडम्बु जहा भुज्जो नीरयं सरयं तहा ॥ १२ ॥ ७१ ॥ एयाणुवीइ मेहावी वम्म-
 चेरेण ते वसे । पुढो पावाउया सव्वे अक्खायारो सयं सयं ॥ १३ ॥ ७२ ॥ सए
 सए उवट्ठाणे सिद्धिमेव न अन्नहा । अहे इहेव वसवत्ती सव्वकामसमप्पिए ॥ १४ ॥
 ॥ ७३ ॥ सिद्धा य ते अरोगे य इहमेगेसिमाहियं । सिद्धिमेव पुरो काउं सासए
 गडिया नरा ॥ १५ ॥ ७४ ॥ असंवुडा अणाईयं भमिहिन्ति पुणो पुणो । कप्प-
 कालमुवज्जन्ति ठाणा आसुरकिन्विसिय ॥ १६ ॥ ७५ ॥ ति वेमि ॥ **समय-
 ज्झयणे तइयुद्देसो ॥**

एए जिया भो न सरणं बाला पण्डियमाणिणो । हिच्चा णं पुव्वसंजोयं सिया
 किच्चोवएसगा ॥ १ ॥ ७६ ॥ तं च भिक्खू परिन्नाय वियं तेसु न मुच्छए । अणु-
 कस्से अप्पलीणे मज्झेण मुणि जावए ॥ २ ॥ ७७ ॥ सपरिग्गहा य सारम्भा
 इहमेगेसिमाहियं । अपरिग्गहा अणारम्भा भिक्खू ताणं परिव्वए ॥ ३ ॥ ७८ ॥
 कडेसु घासमेसेज्जा विऊ दत्तेसणं चरे । अगिद्धो विप्पमुक्को य ओमाणं परिवज्जए
 ॥ ४ ॥ ७९ ॥ लोगवायं निसामेज्जा इहमेगेसिमाहियं । विवरीयपन्नसंभूयं अन्नउत्तं
 तयाणुयं ॥ ५ ॥ ८० ॥ अणन्ते निइए लोए सासए न विणस्सई । अन्तवं निइए
 लोए इइ धीरोऽतिपासई ॥ ६ ॥ ८१ ॥ अपरिमाणं वियाणाइ इहमेगेसिमाहियं ।
 सव्वत्थ सपरिमाणं इइ धीरोऽतिपासई ॥ ७ ॥ ८२ ॥ जे केइ तसा पाणा चिट्ठन्ति
 अदु थावरा । परियाए अत्थि से अज्जु जेण ते तसथावरा ॥ ८ ॥ ८३ ॥ उरालं
 जगओ जोगं विवजासं पलेन्ति य । सव्वे अक्कन्तदुक्खा य अओ सव्वे अहिसिया
 ॥ ९ ॥ ८४ ॥ एयं खु नाणिणो सारं जं न हिंसइ किंचण । अहिंसासमयं चेव
 एयावन्तं वियाणिया ॥ १० ॥ ८५ ॥ वुसिए य विगयगेही आयाणं सम्म रक्खए ।
 चरियासणसेज्जासु भत्तपाणे य अन्तसो ॥ ११ ॥ ८६ ॥ एएहिं तिहि ठाणेहिं संजए
 सययं मुणी । उक्कसं जलणं नूमं मज्झत्थं च विगिच्चए ॥ १२ ॥ ८७ ॥ समिए उ
 सया साहू पच्चसंवरसंवुडे । सिएहि असिए भिक्खू आमोक्खाए परिव्वएज्जासि
 ॥ १३ ॥ ८८ ॥ ति वेमि ॥ **समयज्झयणं पढमं ॥**

वेयालियज्झयणे विइए

संवुज्जह किं न बुज्जह संवोही खलु पेच्च दुल्लहा । नो हूवणमन्ति राइयो नो
सुलभं पुणरावि जीवियं ॥ १ ॥ ८९ ॥ डहरा बुद्धा य पासह गब्भत्या वि चयन्ति
माणवा । सेणे जह वट्ठयं हरे एवं आउखयम्मि तुट्ठई ॥ २ ॥ ९० ॥ मायाहि पियाहि
लुप्पई नो सुलहा सुगई य पेच्चओ । एयाइ भयाइ पेहिया आरम्भा विरमेज्ज सुव्वए
॥ ३ ॥ ९१ ॥ जमिणं जगई पुढो जगा कम्मोहिं लुप्पन्ति पाणिणो । सयमेव कडेहि
गाहई नो तस्स मुच्चेज्जऽपुट्ठयं ॥ ४ ॥ ९२ ॥ देवा गन्धव्वरक्खसा असुरा भूमिचरा
सरीसिवा । राया नरसेट्ठिमाहणा ठाणा ते वि चयन्ति दुक्खिया ॥ ५ ॥ ९३ ॥
कामेहि य संथवेहि गिद्धा कम्मसहा कालेण जन्तवो । ताले जह बन्धणञ्जुए एवं
आउखयम्मि तुट्ठई ॥ ६ ॥ ९४ ॥ जे यावि बहुस्सुए सिया धम्मिय माहण भिक्खुए
सिया । अभिनूमकडेहि मुच्छिए तिव्वं ते कम्मोहि किच्चई ॥ ७ ॥ ९५ ॥ अह
पास विवेगमुट्ठिए अविट्ठिणे इह भासई धुवं । नाहिसि आरं कओ परं वेहासे
कम्मोहि किच्चई ॥ ८ ॥ ९६ ॥ जइ वि य नगिणे किसे चरे जइ वि य भुज्जिय
मासमन्तसो । जे इह मायाहि मिज्जई आगन्ता गब्भाय णन्तसो ॥ ९ ॥ ९७ ॥
पुरिसोरम पावकम्मणा पलियन्तं मणुयाण जीवियं । सन्ना इह काममुच्छिया मोहं
जन्ति नरा असंवुडा ॥ १० ॥ ९८ ॥ जययं विहराहि जोगवं अणुपाणा पन्था
दुरुत्तरा । अणुसासणमेव पक्कमे वीरेहिं सम्मं पवेइयं ॥ ११ ॥ ९९ ॥ विरया
वीरा समुट्ठिया कोहकायरियाइपीसणा । पाणे न हणन्ति सव्वसो पावाओ विरया-
ऽभिनिव्वुडा ॥ १२ ॥ १०० ॥ न वि ता अहमेव लुप्पए लुप्पन्ती लोगंसि पाणिणो ।
एवं सहिएहि पासए अणिहे से पुट्ठेऽहियासए ॥ १३ ॥ १०१ ॥ धुणिया कुलियं
व लेववं किसए देहमणासणाइहिं । अविहिंसामेव पव्वए अणुधम्मो मुणिणा पवेइयो
॥ १४ ॥ १०२ ॥ सउणी जह पंसुगुण्डिया विहुणिय धंसयई सियं रयं । एवं
दविओवहाणवं कम्मं खवइ तवस्सि माहणे ॥ १५ ॥ १०३ ॥ उट्ठियमणगारमेसणं
समगं ठाण्ठियं तवस्सिणं । डहरा बुद्धा य पत्थए अवि सुस्से न य तं लभेज्ज नो
॥ १६ ॥ १०४ ॥ जइ कालुणियाणि कासिया जइ रोयन्ति य पुत्तकारणा । दवियं
भिक्खुं समुट्ठियं नो लब्भन्ति न संठवित्तए ॥ १७ ॥ १०५ ॥ जइ वि य कामेहि
लाविया जइ नेज्जाहि ण बन्धिउं घरं । जइ जीविय नावकह्वए नो लब्भन्ति न
संठवित्तए ॥ १८ ॥ १०६ ॥ सेहन्ति य णं ममाइणो मायं पिया य सुया य
भारिया । पोसाहि ण पासओ तुमं लोग परं पि जहासि पोसणो ॥ १९ ॥ १०७ ॥
अन्ने अन्नेहि मुच्छिया मोहं जन्ति नरा असंवुडा । विसमं विसमेहि गाहिया ते

पावेहि पुणो पगन्धिया ॥ २० ॥ १०८ ॥ तम्हा दवि इक्ख पण्डिए पावाओ
विरएऽभिनिव्वुडे । पणए वीरं महाविहिं सिद्धिपहं नेयाउयं धुवं ॥ २१ ॥ १०९ ॥
वैयालियमग्गमागओ मणवयसा काएण निव्वुडो । चिच्चा वित्तं च नायओ आरम्भं
च सुसंवुडं चरे ॥ २२ ॥ ११० ॥ त्ति बेमि वैयालियज्झयणे पढमुद्देसो ॥

तयसं व जहाइ से रयं इइ संखाय मुणी न मज्जई । गोयन्नतरेण माहणे
अहसैयकरी अनेसि इंखिणी ॥ १ ॥ १११ ॥ जो परिभवई परं जणं संसारे परि-
वत्तई महं । अदु इंखिणिया उ पाविंया इइ संखाय मुणी न मज्जई ॥ २ ॥ ११२ ॥
जे यावि अणायगे सिया जे वि य पेसगपेसगे सिया । जे मोणपयं उवट्टिए नो
लजे समयं सया चरे ॥ ३ ॥ ११३ ॥ सम अन्नयरम्मि संजमे संसुद्धे समणे
परिव्वए । जे आवकहा समाहिए दविए कालमकासि पण्डिए ॥ ४ ॥ ११४ ॥
दूरं अणुपस्सिया मुणी तीयं धम्ममणागयं तहा । पुट्ठे फस्सेहि माहणे अवि हण्णू
समयम्मि रीयइ ॥ ५ ॥ ११५ ॥ पन्नसमत्ते सया जए समताधम्ममुदाहरे मुणी ।
सुहुमे उ सया अल्लसए नो कुज्झे नो माणि माहणे ॥ ६ ॥ ११६ ॥ बहुजणन-
मणम्मि संवुडो सव्वट्ठेहि नरे अणिस्सिए । हरए व सया अणाविले धम्मं पादुर-
कासि कासवं ॥ ७ ॥ ११७ ॥ बहुवे पाणा पुढो सिया पत्तेयं समयं समीहिया ।
जे मोणपयं उवट्टिए विरइं तत्थ अकासि पण्डिए ॥ ८ ॥ ११८ ॥ धम्मस्स य
पारगे मुणी आरम्भस्स य अन्तए ठिए । सोयन्ति य णं ममाइणो नो लब्भन्ति
नियं परिग्गहं ॥ ९ ॥ ११९ ॥ इहलोगदुहावहं विऊ परलोगे य दुहं दुहावहं ।
विद्धंसणधम्ममेव तं इइ विज्जं को गारमावसे ॥ १० ॥ १२० ॥ महयं पल्लिगोव
जाणिया जां वि य वंदणपूयणा इहं । सुहुमे सल्ले दुरुद्धरे विउमंता पयहिज्ज संथवं
॥ ११ ॥ १२१ ॥ एगे चर ठाणमासणे सयणे एग समार्हिए सिया । भिक्खु
उवहाणवीरिए वइगुत्ते अज्झत्तसंवुडो ॥ १२ ॥ १२२ ॥ नो पीहे न यावपंगुणे दारं
सुन्नघरस्स संजए । पुट्ठे न उदाहरे वयं न समुच्छे नो संथरे तणं ॥ १३ ॥ १२३ ॥
जत्थत्थमिए अणाउले समविसमाइं मुणी हियासए । चरगा अदु वा वि भेरवा अदु
वा तत्थ सरीसिवा सिया ॥ १४ ॥ १२४ ॥ तिरिया मणुया य दिव्वगा उवसग्गा
तिविहा हियासिया । लोमादीयं न हारिसे सुन्नागारगओ महामुणी ॥ १५ ॥ १२५ ॥
नो अभिक्रंखेज्ज जीवियं नो वि य पूयणपत्थए सिया । अब्भत्थमुवेन्ति भेरवा
सुन्नागारगयस्स भिक्खुणो ॥ १६ ॥ १२६ ॥ उवणीयतरस्स ताइणो भयमाणस्स
विविक्कमासगं । सामाइयमाहु तस्स जं जो अप्पाण भए न दंसए ॥ १७ ॥ १२७ ॥
उत्तिणोदगतत्तभोइणो धम्मठियस्स मुणिस्स हीमतो । संसग्गे असीहु राइहिं

असमाही उ तहागयस्स वि ॥ १८ ॥ १२८ ॥ अहिगरणकडस्स भिक्खुणो
 वयमाणस्स पसज्ज दासणं । अट्ठे परिहायई बहू अहिगरणं न करेज्ज पण्डिए
 ॥ १९ ॥ १२९ ॥ सीओदग पडि दुगुंछिणो अपडिन्नस्स लवावसप्पिणो । सामाइ-
 यमाहु तस्स जं जो गिहिमत्तेऽसणं न भुज्जई ॥ २० ॥ १३० ॥ न य संखयमाहु
 जीवियं तह वि य वालजणो पगब्भई । वाले पावेहि मिज्जई इइ संखाय मुणी न
 मज्जई ॥ २१ ॥ १३१ ॥ छंदेण पले इमा पया बहुमाया मोहेण पावुडा । वियडेण
 पलेन्ति माहणे सीउण्हं वयसा हियासए ॥ २२ ॥ १३२ ॥ कुजए अपराजिए जहा
 अक्खेहिं कुसलेहिं दीवयं । कडमेव गहाय नो कल्लिं नो तीयं नो चेव दावरं
 ॥ २३ ॥ १३३ ॥ एवं लोगम्मि ताइणा वुइए जे धम्मे अणुत्तरे । तं गिण्ह हियं
 ति उत्तमं कडमिव सेसऽवहाय पण्डिए ॥ २४ ॥ १३४ ॥ उत्तर मणुयाण आहिया
 गामधम्म इइ मे अणुस्सुयं । जंसी विरया समुट्ठिया कासवस्स अणुधम्मचारिणो
 ॥ २५ ॥ १३५ ॥ जे एय चरन्ति आहियं नाएणं महया महेसिणा । ते उट्ठिय ते
 समुट्ठिया अन्नोन्नं सारेन्ति धम्मओ ॥ २६ ॥ १३६ ॥ मा पेह पुरा पणामए
 अभिकंखे उवहिं धुणित्तए । जे दूमण तेहि नो नया ते जाणन्ति समाहिमाहियं
 ॥ २७ ॥ १३७ ॥ नो काहिँ होज्ज संजए पासणिए न य संपसारए । नच्चा धम्मं
 अणुत्तरं कयकिरिए न यावि मामए ॥ २८ ॥ १३८ ॥ छन्नं च पसंस नो करे न
 य उक्कोसं पगास माहणे । तेसिं सुविवेगमाहिए पणया जेहि सुजोसियं धुयं ॥ २९ ॥
 ॥ १३९ ॥ अनिहे सहिए सुसंवुडे धम्मट्ठी उवहाणवीरिए । विहरेज्ज समाहिइंदिए
 अत्तहियं खु दुहेण लब्भइ ॥ ३० ॥ १४० ॥ न हि नूण पुरा अणुस्सुयं अदु वा
 तं तह नो समुट्ठियं । मुणिणा सामाइ आहियं नाएणं जगसव्वदंसिणा ॥ ३१ ॥ १४१ ॥
 एवं मत्ता महन्तरं धम्ममिणं सहिया बहू जणा । गुरुणो छंदाणुवत्तगा विरया तिण्ण
 महोघमाहियं ॥ ३२ ॥ १४२ ॥ ति वेमि ॥ **वेयालियज्झयणम्मि विइयुद्देसो ॥**

संवुडकम्मस्स भिक्खुणो जं दुक्खं पुट्ठं अवोहिए । तं संजमओऽवचिज्जई मरणं
 हेच्च वयन्ति पण्डिया ॥ १ ॥ १४३ ॥ जे विन्नवणाहिजोसिया संतिण्णेहि समं वियाहिया ।
 तम्हा उट्ठं ति पासहा अदक्खु कामाई रोगवं ॥ २ ॥ १४४ ॥ अगं वणिएहि
 आहियं धारेन्ती राइणिया इहं । एवं परमा महव्वया अक्खाया उ सराइभोयणा
 ॥ ३ ॥ १४५ ॥ जे इह सायाणुगा नरा अज्झोववन्ना कामेहि मुच्छिया । किवणेण
 समं पगब्भिया न वि जाणन्ति समाहिमाहियं ॥ ४ ॥ १४६ ॥ वाहेण जहा व
 विच्छए अबले होइ गवं पचोइए । से अन्तसो अप्पयामए नाइवहे अबले विसीयइ
 ॥ ५ ॥ १४७ ॥ एवं क्रमेसणं विऊ अज्ज सुए पयहेज्ज संथवं । कामी कामे न

कामए लद्धे वा वि अलद्ध कण्हुई ॥ ६ ॥ १४८ ॥ मा पच्छ असाहुया भवे अचेही
अणुसास अप्पगं । अहियं च असाहु सोयई से थणई परिदेवई वहुं ॥ ७ ॥ १४९ ॥
इह जीवियमेव पासहा तरुणे वा ससयस्स तुट्ठई । इत्तरवासे य वुज्झह गिद्ध नरा
कामेसु मुच्छिया ॥ ८ ॥ १५० ॥ जे इह आरम्भनिस्सिया आयदण्ड एगन्तल्लसगा ।
गन्ता ते पावलोगयं चिररायं आसुरियं दिसं ॥ ९ ॥ १५१ ॥ न य संखयमाहु
जीवियं तह वि य बालजणो पगम्भई ॥ पच्चुप्पन्नेण कारियं को दट्ठुं परलोगमागए
॥ १० ॥ १५२ ॥ अदक्खुव दक्खुवाहियं तं सद्दहसु अदक्खुदंसणा । हंदि हु
सुनिरुद्धदंसणे मोहणिण कडेण कम्मणा ॥ ११ ॥ १५३ ॥ दुक्खी मोहे पुणो पुणो
निव्विन्देज्ज सिलोगपूयणं । एवं सहिए हिपासए आयतुलं पाणेहि संजए ॥ १२ ॥
॥ १५४ ॥ गारं पि य आवसे नरे अणुपुव्वं पाणेहि संजए । समया सव्वतथ सुव्वए
देवाणं गच्छे सलोगयं ॥ १३ ॥ १५५ ॥ सोच्चा भगवाणुसासणं सच्चे तत्थ करेज्जु-
वक्कमं । सव्वतथ विणीयमच्छरे उज्जं भिक्खु विसुद्धमाहरे ॥ १४ ॥ १५६ ॥ सव्वं
नच्चा अहिट्ठए धम्मट्ठी उवहाणवीरिए । गुत्ते जुत्ते सया जए आयपरे परमायतट्ठिए
॥ १५ ॥ १५७ ॥ वित्तं पसवो य नाइओ तं वाले सरणं ति मन्नई । एए मम तेसु
वी अहं नो ताणं सरणं न विज्जई ॥ १६ ॥ १५८ ॥ अब्भागमियम्मि वा दुहे
अहवा उक्कमिए भवन्तिए । एगस्स गई य आगई विदुमन्ता सरणं न मन्नई
॥ १७ ॥ १५९ ॥ सव्वे सयकम्मकप्पिया अवियत्तेण दुहेण पाणिणो । हिण्डन्ति
भयाउला सढा जाइजरामरणेहिऽभिद्दुया ॥ १८ ॥ १६० ॥ इणमेव खणं वियाणिया
नो सुलभं बोहिं च आहियं । एवं सहिए हिपासए आह जिणे इणमेव सेसगा
॥ १९ ॥ १६१ ॥ अभविंसु पुरा वि भिक्खुवो आएसा वि भवन्ति सुव्वया ।
एयाई गुणाई आहु ते कासवस्स अणुधम्मचारिणो ॥ २० ॥ १६२ ॥ तिविहेण वि
पाण मा हणे आयहिए अणियाण संवुडे । एवं सिद्धा अणन्तसो संपइ जे य
अणागयावरे ॥ २१ ॥ १६३ ॥ एवं से उदाहु अणुत्तरनाणी अणुत्तरदंसी अणुत्तर-
नाणदंसणधरे । अरहा नायपुत्ते भगवं वेसालिए वियाहिए ॥ २२ ॥ १६४ ॥ त्ति
वेमि ॥ वेयालियज्झयणं विइयं ॥

उवसग्गज्झयणे तइए

सूरं मन्नइ अप्पाणं जाव जेयं न पस्सई । जुज्झन्तं दढधम्माणं सिसुपालो व
महारहं ॥ १ ॥ १६५ ॥ पयाया सूरा रणसीसे संगामम्मि उवट्ठिए । माया पुत्तं

न जाणाइ जेएण परिविच्छए ॥ २ ॥ १६६ ॥ एवं सेहे वि अप्पुट्टे भिक्खायरिया-
 अकोविए । सूरं मन्नइ अप्पाणं जाव ल्हं न सेवए ॥ ३ ॥ १६७ ॥ जया हेमन्त-
 मासम्मि सीयं फुसइ सव्वगं । तत्थ मन्दा विसीयन्ति रज्जहीणा व खत्तिया ॥ ४ ॥
 ॥ १६८ ॥ पुट्टे गिम्हाहितावेणं विमणे सुपिवासिए । तत्थ मन्दा विसीयन्ति मच्छा
 अप्पोदए जहा ॥ ५ ॥ १६९ ॥ सया दत्तेसणा दुक्खा जायणा दुप्पणोल्लिया ।
 कम्मत्ता दुव्वभा चेव इच्चाहंसु पुढोजणा ॥ ६ ॥ १७० ॥ एए सहे अचायन्ता गामेसु
 नगरेसु वा । तत्थ मन्दा विसीयन्ति संगामम्मि व भीरया ॥ ७ ॥ १७१ ॥ अप्पेगे
 खुहियं भिक्खुं सुणी ङंसइ लूसए । तत्थ मन्दा विसीयन्ति तेउपुट्ठा व पाणिणो
 ॥ ८ ॥ १७२ ॥ अप्पेगे पडिभासन्ति पडिपन्नियमागया । पडियारगया एए जे
 एए एवजीविणो ॥ ९ ॥ १७३ ॥ अप्पेगे वइ जुज्जन्ति नगिणा पिण्डोलगाहमा ।
 मुण्डा कण्डूविणट्ठजा उज्जल्ला असमाहिया ॥ १० ॥ १७४ ॥ एवं विप्पडिवन्नेगे
 अप्पणा उ अजाणया । तमाओ ते तमं जन्ति मन्दा मोहेण पावुडा ॥ ११ ॥ १७५ ॥
 पुट्टो य दंसमसगेहिं तणफासमचाइया । न मे दिट्ठे परे लोए जइ परं मरणं सिया
 ॥ १२ ॥ १७६ ॥ संतत्ता केसलोएणं वम्भचेरपराइया । तत्थ मन्दा विसीयन्ति
 मच्छा विट्ठा व केयणे ॥ १३ ॥ १७७ ॥ आयदण्डसमायारे मिच्छासंठियभावणा ।
 हरिसप्पओसमावन्ना केई लूसन्तिऽनारिया ॥ १४ ॥ १७८ ॥ अप्पेगे पलियन्तेसिं
 चारो चोरो त्ति सुव्वयं । वन्धन्ति भिक्खुयं वाला कसायवयणेहि य ॥ १५ ॥ १७९ ॥
 तत्थ दण्डेण संवीते मुट्ठिणा अदु फलेण वा । नाईणं सरई वाले इत्थी वा कुद्धगा-
 सिणी ॥ १६ ॥ १८० ॥ एए भो कसिणा फासा फरसा दुरहियासया । हत्थी वा
 सरसंवित्ता कीवावस गया गिहं ॥ १७ ॥ १८१ ॥ ति वेमि ॥ उवसग्गज्झयणे
 पढमुहेसे ॥

अहिमे सुहुमा संग्गा भिक्खूणं जे दुरुत्तरा । जत्थ एगे विसीयन्ति न चयन्ति
 जवित्तए ॥ १ ॥ १८२ ॥ अप्पेगे नायओ दिस्स रोयन्ति परिवारिया । पोस णे
 ताय पुट्टो सि कस्स ताय जहासि णे ॥ २ ॥ १८३ ॥ पिया ते थेरओ ताय ससा
 ते खुड्डिया इमा । भायरो ते सगा ताय सोयरा किं जहासि णे ॥ ३ ॥ १८४ ॥
 मायरं पियरं पोस एवं लोगो भविस्सइ । एवं खु लोइयं ताय जे पालेन्ति य मायरं
 ॥ ४ ॥ १८५ ॥ उत्तरा महुल्लावा पुत्ता ते ताय खुड्डया । भारिया ते नवा ताय
 मा सा अन्नं जणं गमे ॥ ५ ॥ १८६ ॥ एहि ताय घरं जामो मा य कम्मे सहा
 वयं । विइयं पि ताय पासामो जामु ताव सयं गिहं ॥ ६ ॥ १८७ ॥ गन्तुं ताय पुणो
 गच्छे न तेणा समणो सिया । अकामगं परिकम्मं को ते वारिउमरिहइ ॥ ७ ॥ १८८ ॥

जं किंचि अणगं ताय तं पि सव्वं समीकरं । हिरणं ववहाराइ तं पि दाहामु ते वयं
 ॥८॥१८९॥ इच्चैव णं सुसेहन्ति कालुणीयसमुट्ठिया । विवद्धो नाइसंगेहिं तओऽगारं
 पहावइ ॥ ९ ॥ १९० ॥ जहा रुक्खं वणे जायं मालुया पडिवन्धइ । एवं णं पडि-
 वन्धन्ति नाइओ असमाहिणा ॥ १० ॥ १९१ ॥ विवद्धो नाइसंगेहिं हत्थी वा वि-
 नवग्गहे । पिट्ठओ परिसप्पन्ति सुय गो व्व अदूरए ॥ ११ ॥ १९२ ॥ एए संगं
 मणूसाणं पायाला व अतारिमा । कीवा जत्थ य किस्सन्ति नाइसंगेहिं मुच्छिया
 ॥ १२ ॥ १९३ ॥ तं च भिक्खू परिजाय सव्वे संगं महासवा । जीवियं नावकं
 खिज्जा सोच्चा धम्ममणुत्तरं ॥ १३ ॥ १९४ ॥ अहिमे सन्ति आवट्ठा कासवेणं
 पवेइया । बुद्धा जत्थावसप्पन्ति सीयन्ति अबुहा जहिं ॥ १४ ॥ १९५ ॥ रायाणो
 रायऽमच्चा य माहणा अदु व खत्तिया । निमन्तयन्ति भोगेहिं भिक्खुयं साहुजीविणं
 ॥ १५ ॥ १९६ ॥ हत्थस्सरहजाणेहिं विहारगमणेहि य । भुज्ज भोगे इमे सग्घे
 महरिसी पूजयासु तं ॥ १६ ॥ १९७ ॥ वत्थगन्धमलंकारं इत्थीओ सयणाणि य ।
 भुज्जाहिमाई भोगाई आउसो पूजयासु तं ॥ १७ ॥ १९८ ॥ जो तुमे नियमो चिण्णो
 भिक्खु भावम्मि सुव्वया । अगारमावसन्तस्स सव्वो संविज्जए तहा ॥ १८॥१९९॥
 चिरं दूइजमाणस्स दोसो दाणि कुओ तव । इच्चैव णं निमन्तेन्ति नीवारेण व सूरं
 ॥ १९ ॥ २०० ॥ चोइया भिक्खचरियाए अचयन्ता जवित्तए । तत्थ मन्दा
 विसीयन्ति उज्जाणंसि व दुब्बला ॥ २० ॥ २०१ ॥ अचयन्ता व लूहेणं उवहाणेण
 तज्जिया । तत्थ मन्दा विसीयन्ति उज्जाणंसि जरग्गवा ॥ २१ ॥ २०२ ॥ एवं
 निमन्तणं लद्धं मुच्छिया गिद्ध इत्थिसु । अज्झोववन्ना कामेहिं चोइज्जन्ता गया गिहं
 ॥ २२ ॥ २०३ ॥ ति बेमि ॥ **उवसग्गज्झयणे विइयुद्देसे ॥**

जहा संगमकालम्मि पिट्ठओ भीरु वेहइ । वलयं गहणं नूमं को जाणइ पराजयं
 ॥ १ ॥ २०४ ॥ मुहुत्ताणं मुहुत्तस्स मुहुत्तो होइ तारिसो । पराजियाऽवसप्पामो
 इइ भीरु उवेहई ॥ २ ॥ २०५ ॥ एवं उ समणा एगे अवलं नच्चाण अप्पगं ।
 अणागयं भयं दिस्स अवकप्पन्तिमं सुयं ॥ ३ ॥ २०६ ॥ को जाणइ विज्जवायं
 इत्थीओ उदगाउ वा । चोइज्जन्ता पवक्खामो न नो अत्थि पक्कप्पियं ॥ ४ ॥ २०७ ॥
 इच्चैव पडिलेहन्ति वलया पडिलेहिणो । वित्तिगिच्छसमावन्ना पन्थाणं च अकोविया
 ॥ ५ ॥ २०८ ॥ जे उ संगमकालम्मि नाया सूरपुरंगमा । नो ते पिट्ठमुवेहिन्ति
 किं परं मरणं सिया ॥ ६ ॥ २०९ ॥ एवं समुट्ठिए भिक्खू वोसिज्जा गारबन्धणं ।
 आरम्भं तिरियं कट्ठु अत्तताए परिव्वए ॥ ७ ॥ २१० ॥ तमेगे परिभासन्ति
 भिक्खुयं साहुजीविणं । जे एवं परिभासन्ति अन्तए ते समाहिए ॥ ८ ॥ २११ ॥

संबद्धसमकप्पा उ अन्नमन्नेसु मुच्छिया । पिण्डवायं गिलाणस्स जं सारेह दलाह य
 ॥ ९ ॥ २१२ ॥ एवं तुब्भे सरागत्या अन्नमन्नमणुंक्वसा । नट्टसप्पहसब्भावा
 संसारस्स अपारणा ॥ १० ॥ २१३ ॥ अह ते परिभासेज्जा भिक्खु मोक्ख-
 विसारए । एवं तुब्भे पभासन्ता दुपक्खं चेव सेवह ॥ ११ ॥ २१४ ॥ तुब्भे
 भुञ्जह पाएसु गिलाणो अभिहडम्मि य । तं च बीओदगं भोच्चा तमुद्दिस्सादि जं
 कडं ॥ १२ ॥ २१५ ॥ लिता तिच्चाभितावेणं उज्झिया असमाहिया । नाइक्कण्डूइयं
 सेयं अरुयस्सावरज्जई ॥ १३ ॥ २१६ ॥ तत्तेण अणुसिट्ठा ते अपडिन्नेण
 जाणया । न एस नियए मग्गे असमिक्खा वई किई ॥ १४ ॥ २१७ ॥ एरिसा
 जा वई एसा अग्गवेणु व्व करिसिया । गिहिणो अभिहडं सेयं भुज्जितं न उ भिक्खुणं
 ॥ १५ ॥ २१८ ॥ धम्मपन्नवणा जा सा सारम्भा न विसोहिया । न उ एयाहि
 दिट्ठीहिं पुव्वमासिं पगप्पियं ॥ १६ ॥ २१९ ॥ सव्वाहिं अणुजुत्तीहिं अचयन्ता
 जवित्ताए । तओ वायं निराकिच्चा ते भुज्जो वि पगव्विभया ॥ १७ ॥ २२० ॥ राग-
 दोसाभिभूयप्पा मिच्छत्तेण अभिहुया । आउस्से सरणं जन्ति टंकणा इव पव्वयं
 ॥ १८ ॥ २२१ ॥ बहुगुणप्पगप्पाइं कुज्जा अत्तसमाहिए । जेणन्ने न विरुज्जेज्जा
 तेणं तं तं समायरे ॥ १९ ॥ २२२ ॥ इमं च धम्ममायाय कासवेण पवेइयं । कुज्जा
 भिक्खु गिलाणस्स अगिलाए समाहिंए ॥ २० ॥ २२३ ॥ संखाय-पेसलं धम्मं
 दिट्ठिमं परिनिव्वुडे । उवसग्गे नियामित्ता आमोक्खाए परिव्वएज्जासि ॥ २१ ॥ २२४ ॥
 ति वेमि ॥ उवसग्गज्झयणे तइयुद्देसे ॥

आहंसु महापुरिसा पुर्व्वि तत्ततवोधणा । उदएण सिद्धिमावन्ना तत्थ मन्दो
 विसीयइ ॥ १ ॥ २२५ ॥ अभुज्जिया नमी विदेही रामगुत्ते य भुज्जिया । बाहुए उदगं
 भोच्चा तहा नारायणे रिसी ॥ २ ॥ २२६ ॥ आसिले देविले चेव दीवायण महारिसी ।
 पारासरे दगं भोच्चा बीयाणि हरियाणि य ॥ ३ ॥ २२७ ॥ एए पुव्वं महापुरिसा
 आहिया इह संमया । भोच्चा बीयोदगं सिद्धा इइ मेयमणुस्सुयं ॥ ४ ॥ २२८ ॥ तत्थ
 मन्दा विसीयन्ति वाहच्छिन्ना व गद्दभा । पिट्ठओ परिसप्पन्ति पिट्ठसप्पी य संभमे
 ॥ ५ ॥ २२९ ॥ इहमेगे उ भासन्ति सायं साएण विज्जई । जे तत्थ आरियं मग्गं
 परमं च समाहियं ॥ ६ ॥ २३० ॥ मा एयं अवमन्नन्ता अप्पेणं लुम्पहा बहुं ।
 एयस्स उ अमोक्खाए अयोहारि व्व जूरह ॥ ७ ॥ २३१ ॥ पाणाइवाए वट्ठन्ता
 सुसावाए असंजया । अदिज्जादाणे वट्ठन्ता मेहुणे य परिग्गहे ॥ ८ ॥ २३२ ॥
 एवमेगे उ पासत्था पन्नवन्ति अणारिया । इत्थीवसं गया बाला जिणसासणपरमुहा
 ॥ ९ ॥ २३३ ॥ जहा गण्डं पिलागं वा परिपीलेज्ज मुहुत्तगं । एवं विज्जवणित्थीसु

दोसो तत्थ कओ सिया ॥ १० ॥ २३४ ॥ जहा मन्वादणे नाम थिमियं भुज्जई
 दगं । एवं विन्नवणित्थीसु दोसो तत्थ कओ सिया ॥ ११ ॥ २३५ ॥ जहा विहंगमा
 पिन्ना थिमियं भुज्जई दगं । एवं विन्नवणित्थीसु दोसो तत्थ कओ सिया ॥ १२ ॥ २३६ ॥
 एवमेगे उ पासत्था मिच्छदिट्ठी अणारिया । अज्जोववन्ना कामेहिं पूयणा इव तरुणए
 ॥ १३ ॥ २३७ ॥ अणागयमपस्सन्ता पच्चप्पन्नगवेसगा । ते पच्छा परितप्पंति
 स्त्रीणे आउम्मि जोव्वणे ॥ १४ ॥ २३८ ॥ जेहिं काले परिकन्तं न पच्छा परित-
 प्पए । ते धीरा बंधणुम्ममुक्का नावकंखन्ति जीवियं ॥ १५ ॥ २३९ ॥ जहा नई
 वेयरणी दुत्तरा इह संमया । एवं लोगंसि नारीओ दुत्तरा अमईमया ॥ १६ ॥ २४० ॥
 जेहिं नारीण संजोगा पूयणा पिट्ठओ कया । सव्वमेयं निराकिच्चा ते ठिया सुसमा-
 हिए ॥ १७ ॥ २४१ ॥ एए ओघं तरिस्सन्ति समुदं ववहारिणो । जत्थ पाणा विस-
 न्नासि किच्चन्ती सयकम्मणा ॥ १८ ॥ २४२ ॥ तं च भिक्खू परिन्नाय सुव्वए
 समिए चरे । मुसावायं च वज्जिजा अदिन्नादाणं च वोसिरे ॥ १९ ॥ २४३ ॥
 उद्धमहे तिरियं वा जे केई तसथावरा । सव्वत्थ विरइं कुज्जा सन्ति निव्वणमाहियं
 ॥ २० ॥ २४४ ॥ इमं च धम्ममायाय कासवेण पवेइयं । कुज्जा भिक्खू गिलाणस्स
 अगिलाए समाहिए ॥ २१ ॥ २४५ ॥ संखाय पेसलं धम्मं दिट्ठिमं परिनिव्वुडे ।
 उवसग्गे नियामित्ता आमोक्खाए परिव्वएज्जासि ॥ २२ ॥ २४६ ॥ त्ति वेमि ॥
 उवसग्गज्झयणं तइयं ॥

इत्थिपरिन्नज्झयणे चउत्थे

जे मायरं च पियरं च विप्पजहाय पुव्वसंजोगं । एगे सहिए चरिस्सामि आर-
 यमेहुणो विवित्तेसु ॥ १ ॥ २४७ ॥ सुहुमेणं तं परिकम्म छन्नपएण इत्थिओ मन्दा ।
 उव्वायं पि ताउ जाणंसु जहा लिस्सन्ति भिक्खुणो एगे ॥ २ ॥ २४८ ॥ पासे भिसं
 निसीयन्ति अभिक्खणं पोसवत्थं परिहन्ति । कायं अहे वि दंसन्ति बाहू उद्धट्ठु
 कक्खमणुव्वए ॥ ३ ॥ २४९ ॥ सयणासणेहिं जोगेहिं इत्थियो-एगया निमन्तेन्ति ।
 एयाणि चेव से जाणे पासाणि विरुवरूवाणि ॥ ४ ॥ २५० ॥ नो तासु चक्खु-संधेज्जा
 नो वि य साहसं समभिजाणे । नो सहियं पि विहरेज्जा एवमप्पा सुरक्खिओ होइ
 ॥ ५ ॥ २५१ ॥ आमन्तिय उस्सविया भिक्खुं आयसा निमन्तेन्ति । एयाणि चेव
 से जाणे सद्दाणि विरुवरूवाणि ॥ ६ ॥ २५२ ॥ मणबन्धणेहिं गेगेहिं कलुणविणीय-
 सुवगसित्ताणं । अटु मज्जुलाई भासन्ति आणवयन्ति भिन्नकहाहिं ॥ ७ ॥ २५३ ॥

सीहं जहा व कुणिमेणं निब्भयमेगच्चरं ति पासेणं । एवित्थियाउ वन्धन्ति संवुडं
एगइयमणगारं ॥ ८ ॥ २५४ ॥ अह तत्थ पुणो नमयन्ती रहकारो व नेमि आणुपु-
व्वीए । वद्धो मिए व पासेणं फन्दन्ते वि न मुच्चए ताहे ॥ ९ ॥ २५५ ॥ अह
सेऽणुतप्पई पच्छा भोच्चा पायसं व विसमिस्सं । एवं विवेगमायाय संवासो न वि
कप्पए दविए ॥ १० ॥ २५६ ॥ तम्हा उ वज्जए इत्थी विसलित्तं व कण्ठगं नच्चा ।
ओए कुलाणि वसवत्ती आघाए न से वि निगगन्थे ॥ ११ ॥ २५७ ॥ जे एयं उज्जं
अणुगिद्धा अन्नयरा होन्ति कुसीलाणं । सुतवस्सिए वि से भिक्खू नो विहरे सह णमि-
त्थीसु ॥ १२ ॥ २५८ ॥ अवि धूयराहि मुण्हाहिं धाईहिं अदुव दासीहिं । महईहि वा
कुमारीहिं संथवं से न कुज्जा अणगारे ॥ १३ ॥ २५९ ॥ अदु नाइणं च सुहीणं वा
अप्पियं दट्ठु एगया होइ । गिद्धा सत्ता कामेहिं रक्खणपोसणे मणुस्सोऽसि ॥ १४ ॥
॥ २६० ॥ समणं पि दट्ठुदासीणं तत्थ वि ताव एगे कुप्पन्ति । अदु वा भोयणेहिं
नत्थेहिं इत्थीदोसं संकिणो होन्ति ॥ १५ ॥ २६१ ॥ कुव्वन्ति संथवं ताहिं पब्भट्ठा
समाहिजोगेहिं । तम्हा समणा न समेन्ति आयहियाए संनिसेज्जाओ ॥ १६ ॥ २६२ ॥
बहवे गिहाई अवहट्ठु मिस्सीभावं पत्थुया य एगे । धुवमग्गमेव पवयन्ति वायावीरियं
कुसीलाणं ॥ १७ ॥ २६३ ॥ सुद्धं रवइ परिसाए अह रहस्सम्मि दुक्कडं करेन्ति ।
जाणन्ति य णं तहाविऊ माइल्ले महासढेऽयं ति ॥ १८ ॥ २६४ ॥ सयं दुक्कडं च
न वयइ आइट्ठो वि पकत्थइ वाले । वेयाणुवीइ मा कासी चोइज्जन्तो गिलाइ से
भुज्जो ॥ १९ ॥ २६५ ॥ ओसिया वि इत्थिपोसेसु पुरिसा इत्थिवेयखेयन्ना । पन्नास-
मन्निया वेगे नारीणं वसं उवकसन्ति ॥ २० ॥ २६६ ॥ अवि हत्थपायछेयाए अदु वा
वद्धमंसउक्कन्ते । अवि तेयसाभितावणाणि तच्छिय खारसिंचणाई य ॥ २१ ॥ २६७ ॥
अदु कण्णनासछेयं कण्ठच्छेयणं तिइक्खन्ती । इइ एत्थ पावसंतत्ता न वेन्ति पुणो
न काहिनति ॥ २२ ॥ २६८ ॥ सुयमेयमेवमेगोसिं इत्थीवेय ति हु सुयक्खायं । एयं
पि ता वइत्ताणं अदु वा कम्मणा अवकरेन्ति ॥ २३ ॥ २६९ ॥ अन्नं मणेण
चिन्तेन्ति वाया अन्नं च कम्मणा अन्नं । तम्हा न सद्दहे भिक्खू बहुमायाओ इत्थिओ
नच्चा ॥ २४ ॥ २७० ॥ जुवई समणं वूया विचित्तलंकारवत्थगाणि परिहित्ता ।
विरया चरिस्सहं स्वखं धम्ममाइक्ख णे भयन्तारो ॥ २५ ॥ २७१ ॥ अदु सावि-
यापवाणं अहमंसि साहम्मिणी य समणाणं । जउकुम्मे जहा उवज्जोई संवासे विऊ
विसीएज्जा ॥ २६ ॥ २७२ ॥ जउकुम्मे जोइउवगूढे आसुभितत्ते नासमुवयाइ ।
एवित्थियाहि अणगारा संवासेण नासमुवयन्ति ॥ २७ ॥ २७३ ॥ कुव्वन्ति पावगं
कम्मं पुट्ठा वेगेवमाहिंसु । नो हं करेमि पावं ति अंकेसाइणी ममेस ति ॥ २८ ॥ २७४ ॥

वालस्स मन्दयं वीयं जं च कडं अवजाणइ भुज्जो । दुगुणं करेइ से पावं पूयणकामो
विसन्नेसी ॥ २९ ॥ २७५ ॥ संलोकणिज्जमणगारं आयययं निमन्तणेणाहंसु । वत्थं
च ताइ पायं वा अन्नं पाणं पडिग्गाहे ॥ ३० ॥ २७६ ॥ नीवारमेवं वुज्जेजा नो
इच्छे अगारमागन्तुं । बद्धे विसयपासेहिं मोहमावज्जइ पुणो मन्दे ॥ ३१ ॥ २७७ ॥
त्ति वेमि ॥ इत्थिपरिन्नज्झयणे पढमुद्देसे ॥

ओए सया न रजेजा भोगकामी पुणो विरजेजा । भोगे समणाण सुणेह जह
भुज्जन्ति भिक्खुणो एगे ॥ १ ॥ २७८ ॥ अह तं तु मेयमावन्नं मुच्छियं भिक्खुं
काममइवट्ठं । पलिभिन्दिया णं तो पच्छा पादुद्धट्ठु मुद्धि पहणन्ति ॥ २ ॥ २७९ ॥
जइ केसिया णं मए भिक्खु नो विहरे सह णमित्थीए । केसाणवि हं लुच्चिस्सं नन्नत्थ
मए चरेज्जासि ॥ ३ ॥ २८० ॥ अह णं से होइ उवलद्धो तो पेसन्ति तहाभूएहिं ।
अलाउच्छेयं पेहेहि वग्गुफलाई आहराहिं त्ति ॥ ४ ॥ २८१ ॥ दाहणि सागपागाए
पज्जोओ वा भविस्सई राओ । पायाणि य मे रयावेहि एहि ता मे पिट्ठओमदे ॥ ५ ॥
॥ २८२ ॥ वत्थाणि य मे पडिलेहेहि अन्नं पाणं च आहराहिं त्ति । गन्धं च
रओहरणं च कासवगं च मे समणुजाणाहि ॥ ६ ॥ २८३ ॥ अदु अज्झणिं अलंकारं
कुक्कययं मे पयच्छाहि । लोद्धं च लोद्धकुसुमं च वेणुपलासियं च गुलियं च ॥ ७ ॥
॥ २८४ ॥ कुट्ठं तगरं च अगरं संपिट्ठं सम्मं उसिरेणं । तेहं मुहभिंजाए वेणुफलाई
संनिहाणाए ॥ ८ ॥ २८५ ॥ नन्दीचुण्णगाइं पाहराहि छत्तोवाणहं च जाणाहि ।
सत्थं च सूवच्छेज्जाए आणीलं च वत्थयं रयावेहि ॥ ९ ॥ २८६ ॥ सुफणि च
सागपागाए आमलगाइं दगाहरणं च । तिलगकरणिमज्जणसलागं घिसु मे विहूणयं
विजाणेहि ॥ १० ॥ २८७ ॥ संडासगं च फणिहं च सीहलिपासगं च आणाहि ।
आदंसगं च पयच्छाहि दन्तपक्खालगं पवेसाहि ॥ ११ ॥ २८८ ॥ पूगफलं तंबोल्लयं सूइ
सुत्तगं च जाणाहि । कोसं च मोयमेहाए सुप्पुक्खलगं च खारगालगं च ॥ १२ ॥
॥ २८९ ॥ चन्दालगं च करगं च वच्चघरं च आउसो खणाहि । सरपाययं च
जायाए गोरहगं च सामणेराए ॥ १३ ॥ २९० ॥ घडिगं च सडिण्डिमयं च चेल-
गोलं कुमारभूयाए । वासं समभिआवणं आवसहं च जाण भत्तं च ॥ १४ ॥ २९१ ॥
आसन्दियं च नवसुत्तं पाउल्लाई संकमट्ठाए । अदु पुत्तदोहलट्ठाए आणप्पा हवन्ति
दासा वा ॥ १५ ॥ २९२ ॥ जाए फले समुप्पन्ने गेण्हसु वा णं अहवा जहाहि ।
अह पुत्तपोसिणो एगे भारवहा हवन्ति उट्ठा वा ॥ १६ ॥ २९३ ॥ राओ वि
उट्ठिया सन्ता दारगं च संठवन्ति धाई वा । सुहिरामणा वि ते सन्ता वत्थधोवा
हवन्ति हंसा वा ॥ १७ ॥ २९४ ॥ एवं बहुहिं कयपुव्वं भोगत्थाए जेऽभियावन्ना ।

दासे मिए व पेसे व पसुभूए वा से न वा केई ॥ १८ ॥ २९५ ॥ एवं खु तासु
 विन्नप्यं संयवं संवासं च वज्जेजा । तज्जातिया इमे कामा वज्जकरा य एवमक्खाए
 ॥ १९ ॥ २९६ ॥ एयं भयं न सेयाए इइ से अप्पगं निरुम्भित्ता । नो इत्थिं नो
 पसुं भिक्खु नो सयं पाणिणा निलिज्जेजा ॥ २० ॥ २९७ ॥ सुविसुद्धलेसे मेहावी
 परकिरियं च वज्जए नाणी । मणसा वयसा काएणं सव्वफाससहे अणगारे ॥ २१ ॥
 ॥ २९८ ॥ इच्चेवमाहु से वीरे धुरए धुरमोहे से भिक्खु । तम्हा अज्झत्तविसुद्धे
 सुविमुक्के आमोक्खाए परिव्वएजासि ॥ २२ ॥ २९९ ॥ त्ति वेमि ॥ इत्थिपरि-
 न्नज्झयणं चउत्थं ॥

निरयविभत्तियज्झयणे पञ्चमे

पुच्छिस्सहं केवलियं महेसिं कहां भितावा नरगा पुरत्था । अजाणओ भे मुणि
 बूहि जाणं कहिं नु बाला नरगं उवेन्ति ॥ १ ॥ ३०० ॥ एवं मए पुट्ठे महाणुभावे
 इणमोऽव्ववी कासवे आसुपन्ने । पवेयइस्सं दुहमट्ठदुगं आईणियं दुक्कडिणं पुरत्था
 ॥ २ ॥ ३०१ ॥ जे केइ बाला इह जीवियट्ठी पावाई कम्माईं करेन्ति रुहा । ते
 घोररुवे तमिसन्धयारे तिक्वाभितावे नरगे पडन्ति ॥ ३ ॥ ३०२ ॥ तिक्वं तसे
 पाणिणो थावरे य जे हिंसई आयसुहं पडुच्चा । जे लूसए होइ अदत्तहारी न सिक्खई
 सेयवियस्स किंचि ॥ ४ ॥ ३०३ ॥ पागब्भि पाणे बहुणं तिवाई अनिव्वुए घायमु-
 वेइ वाले । निहो निसं गच्छइ अन्तकाले अहोसिरं कट्ठु उवेइ दुगं ॥ ५ ॥ ३०४ ॥
 हण छिन्दह भिन्दह णं दहेति सदे सुणेन्ता परधम्मियाणं । ते नारगाओ भयभिन्न-
 सन्ना कंखन्ति कं नाम दिसं वयामो ॥ ६ ॥ ३०५ ॥ इज्जालरासिं जलियं सजोईं
 तत्तोवमं भूमिमणुक्कमन्ता । ते डज्जमाणा कल्लुणं थणन्ति अरहस्सरा तत्थ चिरट्ठि-
 ईया ॥ ७ ॥ ३०६ ॥ जइ ते सुया वेयरणी भिदुग्गा निसिओ जहा खुर इव
 तिक्खसोया । तरन्ति ते वेयरणिं भिदुग्गं उखुचोइया सत्तिसु हम्ममाणा ॥ ८ ॥
 ॥ ३०७ ॥ कीलेहि विज्जन्ति असाहुक्कम्मा नावं उवेन्ते सइविप्पहूणा । अन्ने उ
 सलाहि तिसुलियाहिं वीहाहि विदूण अहे करेन्ति ॥ ९ ॥ ३०८ ॥ केसि च
 वन्धिउ गले सिलाओ उदगंसि वोलेन्ति महालयंसि । कलंबुयावालुयमुम्मुरे य
 लोलन्ति पचन्ति य तत्थ अन्ने ॥ १० ॥ ३०९ ॥ आसूरियं नाम महाभितावं
 अन्ध्रंतमं दुप्पतरं महन्तं । उड्ढं अहे यं तिरियं दिसासु समाहिओ जत्थगणी जियाइ
 ॥ ११ ॥ ३१० ॥ जंसी गुहाए जलणेऽतिउट्ठे अविजाणओ डज्जइ लुत्तपन्नो । सया
 य कल्लुणं पुण घम्मठाणं गाढोवणीयं अइदुक्खधम्मं ॥ १२ ॥ ३११ ॥ चत्तारि

अगणीओ समारभेत्ता जहिं कूरकम्मा भितवेन्ति बालं । ते तत्थ चिट्ठन्तभितप्प-
 माणा मच्छा व जीवन्तो व जोइपत्ता ॥ १३ ॥ ३१२ ॥ संतच्छणं नाम महाभितावं
 ते नारगा जत्थ असाहुकम्मा । हत्थेहि पाएहि य बन्धिऊणं फलणं व तच्छन्ति
 कुहाडहत्था ॥ १४ ॥ ३१३ ॥ रुहिरे पुणो वच्चसमुस्सियंगे भिन्नुत्तमंगे परिवत्तयन्ता ।
 पयन्ति णं नेरइए फुरन्ते सजीवमच्छे व अयोक्वळे ॥ १५ ॥ ३१४ ॥ नो चेव ते
 तत्थ मसीभवन्ति न मिज्जई तिब्बभिवेयणाए । तमाणुभागं अणुवेययन्ता दुक्खन्ति
 दुक्खी इह दुक्खेणं ॥ १६ ॥ ३१५ ॥ तहि च ते लोलणसंपगाढे गाढं सुतत्तं
 अगणिं वयन्ति । न तत्थ सायं लहई भिदुग्गे अरहियाभितावा तह वी तवेन्ति
 ॥ १७ ॥ ३१६ ॥ से सुच्चई नगरवहे व सदे दुहोवणीयाणि पयाणि तत्थ ।
 उदिण्णकम्माण उदिण्णकम्मा पुणो पुणो ते सरहं दुहेन्ति ॥ १८ ॥ ३१७ ॥ पाणेहि
 णं पाव वियोजयन्ति तं भे पक्खामि जहातहेणं । दण्डेहि तत्था सरयन्ति बाला
 सव्वेहि दण्डेहि पुराकएहिं ॥ १९ ॥ ३१८ ॥ ते हम्ममाणा नरगे पडन्ति पुण्णे
 दुरुवस्स महाभितावे । ते तत्थ चिट्ठन्ति दुरुवभक्खी तुट्ठन्ति कम्मोवगया किमीहिं
 ॥ २० ॥ ३१९ ॥ सया कसिणं पुण घम्मठाणं गाढोवणीयं अइदुक्खधम्मं । अन्दूसु
 पक्खिप्प विहत्तु देहं वेहेण सीसं सेऽभितावयन्ति ॥ २१ ॥ ३२० ॥ छिन्दन्ति
 वालस्स खुरेण नक्कं ओट्टे वि छिन्दन्ति दुवे वि कण्णे । जिब्भं विणिक्कस्स विहत्थि-
 मेत्तं तिक्खाहि सूलाहि भितावयन्ति ॥ २२ ॥ ३२१ ॥ ते तिप्पमाणा तलसंपुडं व
 राइंदियं तत्थ थणन्ति वाला । गलन्ति ते सोणियपूयमंसं पज्जोइया खारपइद्धियंगा
 ॥ २३ ॥ ३२२ ॥ जइ ते सुया लोहियपूयपाई बालागणी तेअगुणा परेणं । कुम्भी
 महन्ताहियरोस्सीया समूसिया लोहियपूयपुण्णा ॥ २४ ॥ ३२३ ॥ पक्खिप्प तासुं
 पययन्ति वाले अट्टस्सरे ते कलुणं रसन्ते । तण्हाइया ते तउतम्बतत्तं पज्जिज्जमाण-
 द्यर रसन्ति ॥ २५ ॥ ३२४ ॥ अप्पेण अप्पं इह वच्चइत्ता भवाहमे पुव्वसए
 सहस्से । चिट्ठन्ति तत्था बहुकूरकम्मा जहा कडं कम्म तहासि भारे ॥ २६ ॥ ३२५ ॥
 समज्जिणिता कलुसं अणज्जा इट्टेहि कन्तेहि य विप्पहूणा । ते दुब्भिगन्धे कसिणे य
 फासे कम्मोवगा कुणिमे आवसन्ति ॥ २७ ॥ ३२६ ॥ त्ति वेमि निरयविभत्तिय-
 ज्जयणे पढसुहेस्से ॥

अहावरं सासयदुक्खधम्मं तं भे पक्खामि जहातहेणं । बाला जहा दुक्ख-
 धम्मकारी वेयन्ति कम्माई पुरेकडाई ॥ १ ॥ ३२७ ॥ हत्थेहि पाएहि य बन्धिऊणं
 उयरं तिक्कन्ति खुरासिएहिं । निप्पित्तु वालस्स विहत्तु देहं वद्धं थिरं पिट्ठउ
 उद्धरन्ति ॥ २ ॥ ३२८ ॥ वाहू पक्कन्ति य मूलओ से थूलं वियासं मुहे आड-

हन्ति । रहंसि जुत्तं सरयन्ति बालं आरुस्स विज्जन्ति तुदेण पिट्ठे ॥ ३ ॥ ३२९ ॥
अयं व तत्तं जलियं सजोइ तऊवमं भूमिमणुक्कमन्ता । ते डज्जमाणा कलुणं थणन्ति
उसुचोइया तत्तजुगेसु जुत्ता ॥ ४ ॥ ३३० ॥ बाला बला भूमिमणुक्कमन्ता पविज्जलं
लोहपहं च तत्तं । जंसी भिदुग्गंसि पवज्जमाणा पेसे व दण्डेहि पुरा करेन्ति ॥ ५ ॥
॥ ३३१ ॥ ते संपगाढंसि पवज्जमाणा सिलाहि हम्मन्ति निपातिणीहिं । संतावणी
नाम चिरट्ठिईया संतप्पई जत्थ असाहुकम्मा ॥ ६ ॥ ३३२ ॥ कन्दूसु पक्खिप्प
पयन्ति बालं तओ वि दङ्घा पुण उप्पयन्ति । ते उड्ढकाएहि पक्खज्जमाणा अवरेहि
खज्जन्ति सणप्फएहिं ॥ ७ ॥ ३३३ ॥ समूसियं नाम विधूमठाणं जं सोयतत्ता
कलुणं थणन्ति । अहोसिरं कट्ठु विगत्तिऊणं अयं व सत्थेहि समोसवेन्ति ॥ ८ ॥
॥ ३३४ ॥ समूसिया तत्थ विसूणियंगा पक्खीहिं खज्जन्ति अयोमुहेहिं । संजीवणी
नाम चिरट्ठिईया जंसी पया हम्मइ पावचेया ॥ ९ ॥ ३३५ ॥ तिक्खाहि सूलाहि
निवाययन्ति वसोगयं सावययं व लद्धं । ते सूलविद्धा कलुणं थणन्ति एगन्तदुक्खं
दुहओ गिलाणा ॥ १० ॥ ३३६ ॥ सया जलं नाम निहं महन्तं जंसी जलन्तो
अगणी अकट्ठो । चिट्ठन्ति बद्धा बहुकूरकम्मा अरहस्सरा केइ चिरट्ठिईया ॥ ११ ॥
॥ ३३७ ॥ चिया महन्तीउ समारभित्ता छुब्भन्ति ते तं कलुणं रसन्ति । आवट्ठई
तत्थ असाहुकम्मा सप्पी जहा पडियं जोइमज्जे ॥ १२ ॥ ३३८ ॥ सया कसिणं
पुण घम्मठाणं गाढोवणीयं अइदुक्खधम्मं । हत्थेहि पाएहि य वन्धिऊणं सत्तु-
व्वदण्डेहि समारभन्ति ॥ १३ ॥ ३३९ ॥ भज्जन्ति बालस्स वहेण पुट्ठी सीसं पि
भिन्दन्ति अयोघणेहिं । ते भिन्नदेहा फलगं व तच्छा तत्ताहि आराहि नियोजयन्ति
॥ १४ ॥ ३४० ॥ अभिजुंजिया रुद्ध असाहुकम्मा उसुचोइया हत्थिवहं वहन्ति ।
एगं दुरुहित्तु दुवे तओ वा आरुस्स विज्जन्ति ककाणओ से ॥ १५ ॥ ३४१ ॥ बाला
बला भूमिमणुक्कमन्ता पविज्जलं कण्टइलं महन्तं । विवद्धतप्पेहि विवण्णचित्ते समी-
रिया कोट्ठवल्लिं करेन्ति ॥ १६ ॥ ३४२ ॥ वेयालिए नाम महाभितावे एगायए
पव्वयमन्तलिकखे । हम्मन्ति तत्था बहुकूरकम्मा परं सहस्साण मुहुत्तगाणं ॥ १७ ॥
॥ ३४३ ॥ संवाहिया दुक्कडिणो थणन्ति अहो य राओ परितप्पमाणा । एगन्तकूडे
नरगे महन्ते कूडेण तत्था विसमे हया उ ॥ १८ ॥ ३४४ ॥ भज्जन्ति णं पुव्वमरी
सरोसं समुग्गरे ते मुसले गहेउं । ते भिन्नदेहा रुहिरं वमन्ता ओमुद्धगा धरणितले
पडन्ति ॥ १९ ॥ ३४५ ॥ अणासिया नाम महासियाला पागम्भिणो तत्थ
सयावकोवा । खज्जन्ति तत्था बहुकूरकम्मा अदूरगा संखलियाहि बद्धा ॥ २० ॥
॥ ३४६ ॥ सयाजला नाम नई भिदुग्गा पविज्जलं लोहविलीणतत्ता । जंसी भिदु-

गंसि पवज्जमाणा एगायताणुक्कमणं करेन्ति ॥ २१ ॥ ३४७ ॥ एयाई फासाई
 फुसन्ति बालं निरन्तरं तत्थ चिरट्ठिईयं । न हम्ममाणस्स उ होइ ताणं एगो सयं
 पच्चणुहोइ दुक्खं ॥ २२ ॥ ३४८ ॥ जं जारिसं पुव्वमकासि कम्मं तमेव आगच्छइ
 संपराए । एगन्तदुक्खं भवमज्जणित्ता वेयन्ति दुक्खी तमणन्तदुक्खं ॥ २३ ॥
 ॥ ३४९ ॥ एयाणि सोच्चा नरगाणि धीरे न हिंसए किंचण सव्वलोए । एगन्तदिट्ठी
 अपरिग्गहे उ वुज्झिज्ज लोगस्स वसं न गच्छे ॥ २४ ॥ ३५० ॥ एवं तिरिक्खे
 मणुयामरेसुं चउरन्तणन्तं तयणुव्विवागं । स सव्वमेयं इइ वेयइत्ता कंखेज्ज कालं
 धुयमायरेज्ज ॥ २५ ॥ ३५१ ॥ त्ति बेमि ॥ निरयविभत्तियज्झयणं पञ्चमं ॥

सिरिवीरत्थुइयज्झयणे छट्ठे

पुच्छिस्सु णं सेमणा माहणा य अगारिणो या परतित्थिया य । से केइ नेगंतहिंयं
 धम्ममाहु अणेलिसं साहुसमिक्खयाए ॥ १ ॥ ३५२ ॥ कहं च नाणं कह दंसणं से
 सीलं कहं नायसुयस्स आसि । जाणासि णं भिक्खु जहातहेणं अहासुयं बूहि जहा
 निसन्तं ॥ २ ॥ ३५३ ॥ खेयन्नए से कुसलासुपन्ने अणन्तनाणी य अणन्तदंसी ।
 जसंसिणो चक्खुपहे ठियस्स जाणाहि धम्मं च धिइं च पेहि ॥ ३ ॥ ३५४ ॥
 उट्ठं अहे यं तिरियं दिसासु तसा य जे थावर जे य पाणा । से निच्चनिच्चेहि समिक्ख
 पन्ने दीवे व धम्म समियं उदाहु ॥ ४ ॥ ३५५ ॥ से सव्वदंसी अभिभूयनाणी
 निरामगन्धे धिइमं ठियप्पा । अणुत्तरे सव्वजगंसि विज्जं गन्था अईए अभए अणाऊ
 ॥ ५ ॥ ३५६ ॥ से भूइपन्ने अणिएअचारी ओहंतरे धीरे अणन्तचक्खु । अणुत्तरं
 तप्पइ सूरिए वा वइरोयणिन्दे व तमं पगासे ॥ ६ ॥ ३५७ ॥ अणुत्तरं धम्ममिणं
 जिणाणं नेया मुणी कासव आसुपन्ने । इन्दे व देवाण महाणुभावे सहस्सणेया दिवि
 णं विसिट्ठे ॥ ७ ॥ ३५८ ॥ से पन्नया अक्खयसागरे वा महोदही वा वि अणन्त-
 पारे । अणाविले वा अकसाइ मुक्के सक्के व देवाहिर्वई जुईमं ॥ ८ ॥ ३५९ ॥ से
 वीरिएणं पडिपुण्णवीरिए सुदंसणे वा नगसव्वसेट्ठे । सुरालए वा सि मुदागरे से
 विरायए नेगगुगोववेए ॥ ९ ॥ ३६० ॥ सयं सहस्साण उ जोयणाणं तिकण्डगे
 पण्डगवेजयन्ते । से जोयणे नवनवते सहस्से उट्ठुस्सियो हेट्ठ सहस्समेगं ॥ १० ॥
 ॥ ३६१ ॥ पुट्ठे नमे चिट्ठइ भूमिवट्ठिए जं सूरिया अणुपरिवट्ठयन्ति । से हेमवण्णे
 चहुनन्दणे य जंसी रई वेययई महिन्दा ॥ ११ ॥ ३६२ ॥ से पव्वए सहमहप्पगासे
 विरायई कवणमट्ठवण्णे । अणुत्तरे गिरिसु य पव्वदुग्गे गिरीवरे से जलिए व भोमे

॥ १२ ॥ ३६३ ॥ महीइ मज्झम्मि ठिए नगिन्दे पन्नायए सूरियसुद्धलेसे । एवं
 सिरीए उ स भूरिवण्णे मणोरमे जोयइ अच्चिमाली ॥ १३ ॥ ३६४ ॥ सुदंसणस्सेव
 जसो गिरिस्स पवुच्चई महओ पव्वयस्स । एओवमे समणे नायपुत्ते जाईजसोदंसण-
 नाणसीले ॥ १४ ॥ ३६५ ॥ गिरीवरे वा निसहाययागं रुयए व सेट्ठे वलयाययाणं ।
 तओवमे से जगभूइपन्ने मुणीण मज्झे तमुदाहु पन्ने ॥ १५ ॥ ३६६ ॥ अणुत्तरं
 धम्ममुईरइत्ता अणुत्तरं ज्ञाणवरं झियाइ । सुसुक्कसुक्कं अपगण्डसुक्कं संखिन्दुएगन्तव-
 दायसुक्कं ॥ १६ ॥ ३६७ ॥ अणुत्तरगं परमं महेसी असेसकम्मं स विसोहइत्ता ।
 सिद्धिं गए साइमणन्तपत्ते नाणेण सीलेण य दंसणेण ॥ १७ ॥ ३६८ ॥ रुक्खेसु
 णाए जह सामली वा जस्सि रइं वेययई सुवण्णा । वणेषु वा नन्दणमाहु सेट्ठं नाणेण
 सीलेण य भूइपन्ने ॥ १८ ॥ ३६९ ॥ थणियं व सद्दाण अणुत्तरे उ चन्दो व ताराण
 महाणुभावे । गन्धेसु वा चन्दणमाहु सेट्ठं एवं मुणीणं अपडिन्नमाहु ॥ १९ ॥ ३७० ॥
 जहा सयंभू उदहीण सेट्ठे नागेषु वा धरणिन्दमाहु सेट्ठं । खोओदए वा रस वेजयन्ते
 तवोवहाणे मुणि वेजयन्ते ॥ २० ॥ ३७१ ॥ हत्थीसु एरावणमाहु नाए सीहो मिगाणं
 सलिलाण गज्जा । पक्खीसु वा गरुळे वेणुदेवो निव्वाणवादीणिह नायपुत्ते ॥ २१ ॥
 ॥ ३७२ ॥ जोहेसु नाए जह वीससेणे पुप्फेसु वा जह अरविन्दमाहु । खत्तीण सेट्ठे
 जह दन्तवक्के इसीण सेट्ठे तह वद्धमाणे ॥ २२ ॥ ३७३ ॥ दाणाण सेट्ठं अभयप्प-
 याणं सच्चेसु वा अणवज्जं वयन्ति । तवेसु वा उत्तमं वम्मचैरं लोगुत्तमे समणे नाय-
 पुत्ते ॥ २३ ॥ ३७४ ॥ ठिईण सेट्ठा लवसत्तमा वा सभा सुहम्मा व सभाण सेट्ठा ।
 निव्वाणसेट्ठा जह सव्वधम्मा न नायपुत्ता परमत्थि नाणी ॥ २४ ॥ ३७५ ॥
 पुढोवमे धुणइ विगयगेही न संनिहिं कुव्वइ आसुपन्ने । तरिउं समुद्धं व महाभवोधं
 अभयंकरे वीर अणन्तचक्खू ॥ २५ ॥ ३७६ ॥ कोहं च माणं च तहेव मायं लोभं
 चउत्थं अज्झत्तदोसा । एयाणि वन्ता अरहा महेसी न कुव्वई पाव न कारवेइ
 ॥ २६ ॥ ३७७ ॥ किरियाकिरियं वेणइयाणुवायं अन्नाणियाणं पडियच्च ठाणं । से
 सव्ववायं इइ वेयइत्ता उवट्ठिए संजमदीहरायं ॥ २७ ॥ ३७८ ॥ से वारिया इत्थि
 सराइभत्तं उवहाणवं दुक्खखयट्ठयाए । लोगं विदित्ता आरं परं च सव्वं पभू वारिय
 सव्ववारं ॥ २८ ॥ ३७९ ॥ सोच्चा य धम्मं अरहन्तभासियं समाहियं अट्ठपदोव-
 सुद्धं । तं सद्दाणा य जणा अणाऊ इन्दा व देवाहिव आगमिस्सन्ति ॥ २९ ॥ ३८० ॥
 त्ति वेमि ॥ सिरिवीरत्थुइज्जयणं छट्ठं ॥

कुसीलपरिभासियज्झयणे सत्तमे

पुढवी य आऊ अगणी य वाऊ तण स्क्ख बीया य तसा य पाणा । जे अण्डया
जे य जराउ पाणा संसेयया जे रसयाभिहाणा ॥ १ ॥ ३८१ ॥ एयाई कायाई
पवेइयाई एएसु जाणे पडिलेह सायं । एएण काएण य आयदण्डे एएसु या विप्परि-
यासुवेन्ति ॥ २ ॥ ३८२ ॥ जाईपहं अणुपरिवट्टमाणे तसथावरेहिं विणिघायमेइ ।
से जाइ जाई बहुकूरकम्मे जं कुव्वई मिज्जइ तेण बाले ॥ ३ ॥ ३८३ ॥ अस्सि च
लोए अदु वा परत्था सयग्गसो वा तह अन्नहा वा । संसारमावन्न परं परं ते बन्धन्ति
वेयन्ति य दुन्नियाणि ॥ ४ ॥ ३८४ ॥ जे मायरं वा पियरं च हिच्चा समणव्वए
अगणि समारभिज्जा । अहाहु से लोए कुसीलधम्ममे भूयाई जे हिंसइ आयसाए ॥ ५ ॥
॥ ३८५ ॥ उज्जालओ पाण निवायएज्जा निव्वावओ अगणिं निवायवेज्जा । तम्हा उ
मेहावि समिक्ख धम्मं न पण्डिए अगणिं समारभिज्जा ॥ ६ ॥ ३८६ ॥ पुढवी वि
जीवा आऊ वि जीवा पाणा य संपाइम संपयन्ति । संसेयया कट्टसमस्सिया य एए
दहे अगणिं समारभन्ते ॥ ७ ॥ ३८७ ॥ हरियाणि भूयाणि विलम्बगाणि आहार
देहा य पुढो सियाइ । जे छिन्दई आयसुहं पडुच्च पागब्भि पाणे बहुणं तिवाई
॥ ८ ॥ ३८८ ॥ जाई च वुड्ढिं च विणासयन्ते बीयाइ अस्संजय आयदण्डे ।
अहाहु से लोए अणज्जधम्ममे बीयाइ से हिंसइ आयसाए ॥ ९ ॥ ३८९ ॥ गब्भाइ
मिज्जन्ति वुयावुयाणा नरा परे पञ्चसिहा कुमारा । जुवाणगा मज्झिम थेरगा य
चयन्ति ते आउखए पलीणा ॥ १० ॥ ३९० ॥ संबुज्झहा जन्तवो माणुसत्तं दट्ठुं
भयं वालिसेणं अलम्भो । एगन्तदुक्खे जरिए व लोए सकम्मुणा विप्परियासुवेइ
॥ ११ ॥ ३९१ ॥ इहेग मूढा पवयन्ति मोक्खं आहारसंपज्जणवज्जणेणं । एगे य
सीओदगसेवणेणं हुएण एगे पवयन्ति मोक्खं ॥ १२ ॥ ३९२ ॥ पाओसिणाणाइसु
नत्थि मोक्खो खारस्स लोणस्स अणासणेणं । ते मज्जमंसं लसुणं च भोच्चा अन्नत्थ
वासं परिकप्पयन्ति ॥ १३ ॥ ३९३ ॥ उदगेण जे सिद्धिमुदाहरन्ति सायं च पायं
उदगं फुसन्ता । उदगस्स फासेण सिया य सिद्धी सिज्झिसु पाणा वहवे दगंसि
॥ १४ ॥ ३९४ ॥ मच्छा य कुम्मा य सिरीसिवा य मग्गू य उट्ठा दगरक्खसा य ।
अट्ठाणमेयं कुसला वयन्ति उदगेण जे सिद्धिमुदाहरन्ति ॥ १५ ॥ ३९५ ॥ उदगं
जई कम्ममलं हरेज्जा एवं सुहं इच्छामित्तमेव । अन्धं व नेयारमणुस्सरित्ता पाणाणि
चेवं विणिहन्ति मन्दा ॥ १६ ॥ ३९६ ॥ पावाई कम्माई पकुव्वओ हि सिओदगं
ऊ जइ तं हरेज्जा । सिज्झिसु एगे दगसत्तघाई सुसं वथन्ते जलसिद्धिमाहु ॥ १७ ॥
॥ ३९७ ॥ हुएण जे सिद्धिमुदाहरन्ति सायं च पायं अगणि फुसन्ता । एवं सिया

सिद्धि हवेज्ज तम्हा अगणि फुसन्ताण कुक्कम्मिणं पि ॥ १८ ॥ ३९८ ॥ अपरिक्ख
दिट्ठं न हु एव सिद्धी एहिन्ति ते घायमवुज्जमाणा । भूएहि जाणं पडिलेह सायं
विज्जं गहायं तसथावरेहिं ॥ १९ ॥ ३९९ ॥ थणन्ति लुप्पन्ति तसन्ति कम्मी पुढो
जगा परिसंखाय भिक्खू । तम्हा विऊ विरओ आयगुत्ते दट्ठुं तसे या पडिसंहरेज्जा
॥ २० ॥ ४०० ॥ जे धम्मलद्धं विणिहाय भुज्जे वियडेण साहट्ठु य जे सिणाई । जे
धोवई लूसयई व वत्थं अहाहु ते नागणियस्स दूरे ॥ २१ ॥ ४०१ ॥ कम्मं परिन्नाय
दगंसि धीरे वियडेण जीवेज्ज य आदिमोक्खं । से वीयकन्दाइ अभुज्जमाणे विरए
सिणाणाइसु इत्थियासु ॥ २२ ॥ ४०२ ॥ जे मायरं च पियरं च हिंत्ता गारं तहा
पुत्तपसुं धणं च । कुलाई जे धावइ साउगाई अहाहु से सामणियस्स दूरे ॥ २३ ॥
॥ ४०३ ॥ कुलाई जे धावइ साउगाई आघाइ धम्मं उयराणुगिद्धे । अहाहु से
आयरियाण सयंसे जे लावएज्जा असणस्स हेऊ ॥ २४ ॥ ४०४ ॥ निक्खम्म दीणे
परभोयणम्मि मुहमङ्गलीए उयराणुगिद्धे । नीवारगिद्धे व महावराहे अदूरए एहिइ
घायमेव ॥ २५ ॥ ४०५ ॥ अन्नस्स पाणस्सिहलोइयस्स अणुप्पियं भासइ सेवमाणे ।
पासत्थयं चेव कुसीलयं च निस्सारए होइ जहा पुलाए ॥ २६ ॥ ४०६ ॥ अन्नाय-
पिण्डेण हियासएज्जा नो पूयणं तवसा आवहेज्जा । सहेहि रुवेहि असज्जमाणं सव्वेहि
कामेहि विणीय गेहिं ॥ २७ ॥ ४०७ ॥ सव्वाई संग्गाई अइच्च धीरे सव्वाई
दुक्खाई तितिक्खमाणे । अखिले अगिद्धे अणिएयचारी अभयंकरे भिक्खु अणा-
विलप्पा ॥ २८ ॥ ४०८ ॥ भारस्स जाआ मुणि भुज्जएज्जा कंखेज्ज पावस्स विवेग
भिक्खू । दुक्खेण पुट्ठे धुयमाइएज्जा संगामसीसे व परं दमेज्जा ॥ २९ ॥ ४०९ ॥
अवि हम्ममाणे फलगावतट्ठी समागमं कंखइ अन्तगस्स । निधूय कम्मं न पवञ्चुवेइ
अक्खक्खए वा सगडं ति बेमि ॥ ३० ॥ ४१० ॥ कुसीलपरिभासियज्झयणं
सत्तमं ॥

वीरियज्झयणे अट्ठमे

दुहा वेयं सुयक्खायं वीरियं ति पवुच्चई । किं नु वीरस्स वीरत्तं कहं चेयं पवुच्चई
॥ १ ॥ ४११ ॥ कम्ममेगे पवेदेन्ति अकम्मं वा वि सुव्वया । एएहिं दोहि ठाणेहिं
जेहिं दीसन्ति मच्चिया ॥ २ ॥ ४१२ ॥ पमायं कम्ममाहंसु अप्पमायं तहावरं ।
तव्भावादेसओ वा वि वालं पण्डियमेव वा ॥ ३ ॥ ४१३ ॥ सत्थमेगे तु सिक्खन्ता
अइवायाय पाणिणं । एगे मन्ते अहिज्जन्ति पाणभूयविहेडिणो ॥ ४ ॥ ४१४ ॥
मायिणो कट्ठु माया य कामभोगे समारभे । हन्ता छेत्ता पगम्भित्ता आयसायाणु-

गामिणो ॥ ५ ॥ ४१५ ॥ मणसा वयसा चैव कायसा चैव अन्तसो । आरओ परओ
 वा वि दुहा वि य असंजया ॥ ६ ॥ ४१६ ॥ वेराइं कुव्वई वेरी तओ वेरेहि रज्जई ।
 पावोवगा य आरम्भा दुक्खफासा य अन्तसो ॥ ७ ॥ ४१७ ॥ संपरायं नियच्छन्ति
 अत्तदुक्कडकारिणो । रागदोसस्सिया बाला पावं कुव्वन्ति ते बहं ॥ ८ ॥ ४१८ ॥ एवं
 सकम्मविरियं बालाणं तु पवेइयं । इत्तो अकम्मविरियं पण्डियाणं सुणेह मे ॥ ९ ॥
 ॥ ४१९ ॥ दविए वन्धणुम्मुक्के सव्वओ छिन्नवन्धणे । पणोल्ल पावगं कम्मं सल्लं
 कंतइ अन्तसो ॥ १० ॥ ४२० ॥ नेयाउयं सुयक्खायं उवायाय समीहए । भुज्जो
 भुज्जो दुहावासं असुहत्तं तहा तहा ॥ ११ ॥ ४२१ ॥ ठाणी विविहठाणाणि चइ-
 स्सन्ति न संसओ । अणियए अयं वासे नायएहि सुहीहि य ॥ १२ ॥ ४२२ ॥
 एवमायाय मेहावी अप्पणो गिद्धिमुद्धरे । आरियं उवसंपजे सव्वधम्ममकोवियं
 ॥ १३ ॥ ४२३ ॥ सहसंसंइए नच्चा धम्मसारं सुणेत्तु वा । समुवट्टिए उ अणगारे
 पच्चक्खायपावए ॥ १४ ॥ ४२४ ॥ जं किंचुवक्कमं जाणे आउक्खेमस्स अप्पणो ।
 तस्सेव अन्तरा खिप्पं सिक्खं सिक्खेज्ज पण्डिए ॥ १५ ॥ ४२५ ॥ जहा कुम्मे
 सअज्जाइं सए देहे समाहरे । एवं पावाइं मेहावी अज्जप्पेण समाहरे ॥ १६ ॥
 ॥ ४२६ ॥ साहरे हत्यपाए य मगं पच्चिन्दियाणि य । पावगं च परीणमं भासा-
 दोसं च तारिसं ॥ १७ ॥ ४२७ ॥ अणु माणं च मायं च तं परिन्नाय पण्डिए ।
 सायागारवणिहुए उवसन्ते निहे चरे ॥ १८ ॥ ४२८ ॥ पाणे य नाइवाएज्जा
 अदिन्नं पि य नायए । साइयं न मुसं बूया एस धम्मे वुसीमओ ॥ १९ ॥ ४२९ ॥
 अइक्कम्मन्ति वायाए मणसा वि न पत्यए । सव्वओ संवुडे दन्ते आयाणं सुसमाहरे
 ॥ २० ॥ ४३० ॥ कडं च कज्जमाणं च आगमिस्सं च पावगं । सव्वं तं नाणु-
 जाणन्ति आयगुत्ता जिइन्दिया ॥ २१ ॥ ४३१ ॥ जे याऽवुद्धा महाभागा वीरा
 असमत्तदंसिणो । असुद्धं तेसि परक्कन्तं सफलं होइ सव्वसो ॥ २२ ॥ ४३२ ॥ जे
 य वुद्धा महाभागा वीरा सम्मत्तदंसिणो । सुद्धं तेसिं परक्कन्तं अफलं होइ सव्वसो
 ॥ २३ ॥ ४३३ ॥ तेसिं पि न तवो सुद्धो निक्खन्ता जे महाकुला । जं नेवन्ने
 वियाणन्ति न सिलोगं पवेज्जए ॥ २४ ॥ ४३४ ॥ अप्पपिण्डासि पाणासि अप्पं
 भासेज्ज मुव्वए । खन्ते भिनिवुडे दन्ते वीयगिद्धी सया जए ॥ २५ ॥ ४३५ ॥
 ज्ञाणजोगं समाहट्ठु कायं विउसेज्ज सव्वसो । तितिक्खं परमं नच्चा आमोक्खाए
 परिव्वएजासि ॥ २६ ॥ ४३६ ॥ त्ति वेस्मि ॥ वीरियज्झयणं अट्ठमं ॥

धम्मज्झयणे नवमे

१ कयरे धम्मे अक्खाए माहणेण मईमया । अञ्जु धम्मं जहातच्चं जिणाणं तं सुणेह मे ॥ १ ॥ ४३७ ॥ माहणा खत्तिया वेस्सा चण्डाला अदु वोक्कसा । एसिया वेसिया सुहा जे य आरम्भनिस्सिया ॥ २ ॥ ४३८ ॥ परिग्गहनिविट्ठाणं पावं तेसि पवद्धई । आरम्भसंभिया कामा न ते दुक्खविमोयगा ॥ ३ ॥ ४३९ ॥ आघायकिच्चमाहेउं नाइओ विसएसिणो । अन्ने हरन्ति तं वित्तं कम्मी कम्मेहि किच्चई ॥ ४ ॥ ४४० ॥ माया पिया ण्हसा भाया भज्जा पुत्ता य ओरसा । नालं ते तव ताणाय लुप्पन्तस्स सकम्मुणा ॥ ५ ॥ ४४१ ॥ एयमट्ठं सपेहाए परमट्ठा-
शुगामियं । निम्ममो निरहंकारो चरे भिक्खू जिणाहियं ॥ ६ ॥ ४४२ ॥ चिच्चा वित्तं च पुत्ते य नाइओ य परिग्गहं । चिच्चा णं अन्तगं सोयं निरवेक्खो परिव्वए ॥ ७ ॥ ४४३ ॥ पुढवी अगणी वाळ तणरुक्ख सवीयगा । अण्डया पोयजराळ रससंसेयउब्भिया ॥ ८ ॥ ४४४ ॥ एएहिं छहिं काएहिं तं विज्जं परिजाणिया । मणसा कायक्केणं नारम्मी न परिग्गही ॥ ९ ॥ ४४५ ॥ मुसावायं बहिद्धं च उग्गहं च अजाइया । सत्थादाणाइ लोगंसि तं विज्जं परिजाणिया ॥ १० ॥ ४४६ ॥ पलिउच्चणं च भयणं च थण्डिल्लुस्सयणाणि य । धूणादाणाइ लोगंसि तं विज्जं परिजाणिया ॥ ११ ॥ ४४७ ॥ धोयणं रयणं चेव वत्थीकम्मं विरेयणं । वमणज्ज-
णपलीमंथं तं विज्जं परिजाणिया ॥ १२ ॥ ४४८ ॥ गन्धमल्लसिणाणं च दन्त-
पक्खालणं तहा । परिग्गहित्थिकम्मं च तं विज्जं परिजाणिया ॥ १३ ॥ ४४९ ॥ उद्देसियं कीयगडं पामिच्चं चेव आहडं । पूयं अणेसणिज्जं च तं विज्जं परिजाणिया ॥ १४ ॥ ४५० ॥ आसूणिमक्खिराणं च गिद्धुवघायकम्मगं । उच्छोलणं च कक्कं च तं विज्जं परिजाणिया ॥ १५ ॥ ४५१ ॥ संपसारी कयकिरिए पसिणाययणाणि य । सागारिय च पिण्डं च तं विज्जं परिजाणिया ॥ १६ ॥ ४५२ ॥ अट्ठावयं न सिक्खिज्जा वेहाईयं च नो वए । हत्थकम्मं विवायं च तं विज्जं परिजाणिया ॥ १७ ॥ ४५३ ॥ पाणहाओ य छत्तं च नालीयं वालवीयणं । परकिरियं अन्नमन्नं च तं विज्जं परिजाणिया ॥ १८ ॥ ४५४ ॥ उच्चारं पासवणं हरिएसु न करे मुणी । वियडेण वा वि साहट्ठु नावमज्जे कयाइ वि ॥ १९ ॥ ४५५ ॥ परमत्ते अन्नपाणं न भुज्जेज्ज कयाइ वि । परवत्थं अचेलो वि तं विज्जं परिजाणिया ॥ २० ॥ ४५६ ॥ आसन्दी पलियङ्गे य निसिज्जं च गिहन्तरे । संपुच्छणं सरणं वा तं विज्जं परिजा-
णिया ॥ २१ ॥ ४५७ ॥ जसं कित्तिं सिलोगं च जा य वन्दणपूयणा । सव्वलो-
यंसि जे कामा तं विज्जं परिजाणिया ॥ २२ ॥ ४५८ ॥ जेणेहं निव्वहे भिक्खू

अन्नपाणं तहाविहं । अणुप्पयाणमन्नेसि तं विज्जं परिजाणिया ॥ २३ ॥ ४५९ ॥
 एवं उदाहु निग्गन्थे महावीरे महामुणी । अणन्तनाणदंसी से धम्मं, देसितवं सुयं
 ॥ २४ ॥ ४६० ॥ भासमाणो न भासेज्जा नेव वम्फेज्ज मम्मयं । माइट्ठाणं विव-
 ज्जेज्जा अणुचिन्तिय वियागरे ॥ २५ ॥ ४६१ ॥ तत्थिमा तइया भासा जं वइत्ता-
 णुतप्पई । जं छन्नं तं न वत्तवं एसा आणा नियण्ठिया ॥ २६ ॥ ४६२ ॥
 होलावायं सहीवायं गोयावायं च नो वए । तुमं तुमं ति अमणुन्नं सव्वसो तं न
 वत्तए ॥ २७ ॥ ४६३ ॥ अकुसीले सया भिक्खू नेव संसग्गियं भए । सुहरूवा
 तत्थुवस्सग्गा पडिवुज्जेज्ज ते विऊ ॥ २८ ॥ ४६४ ॥ नन्नत्थ अन्तराएणं परगेहे
 न निसीयए । गामकुमारियं किड्डं नाइवेलं हसे मुणी ॥ २९ ॥ ४६५ ॥ अणुस्सुओ
 उरालेसु जयमाणो परिव्वए । चरियाए अप्पमतो पुट्ठो तत्थ हियासए ॥ ३० ॥
 ॥ ४६६ ॥ हम्ममाणो न कुप्पेज्ज वुच्चमाणो न संजले । सुमणे अहियासेज्जा न य
 कोलाहलं करे ॥ ३१ ॥ ४६७ ॥ लद्धे कामे न पत्थेज्जा विवेगे एवमाहिए ।
 आयरियाइं सिक्खेज्जा गुरुणं अन्तिए सया ॥ ३२ ॥ ४६८ ॥ सुस्सूसमाणो उवा-
 सेज्जा सुप्पन्नं सुतवस्सियं । वीरा जे अत्तपन्नेसी धिइमन्ता जिइन्दिया ॥ ३३ ॥
 ॥ ४६९ ॥ गिहे दीवमपासन्ता पुरिसादाणिया नरा । ते वीरा बन्धणुम्मुक्का
 नावकंखन्ति जीवियं ॥ ३४ ॥ ४७० ॥ अगिद्धे सद्दफासेसु आरम्भेसु अनिस्सिए ।
 सव्वं तं समयातीयं जमेयं लवियं बहु ॥ ३५ ॥ ४७१ ॥ अइमाणं च मायं च तं
 परिन्नाय पण्डिए । गारवाणि य सव्वाणि निव्वाणं संधए मुणि ॥ ३६ ॥ ४७२ ॥
 त्ति वेमि ॥ धम्मज्झयणं नवमं ॥

समाहियज्झयणे दसमे

आघं मईमं अणुवीइ धम्मं अज्जू समाहिं तमिमं सुणेह । अपडिन्न भिक्खू उ
 समाहिपत्ते अणियाण भूएसु परिव्वएज्जा ॥ १ ॥ ४७३ ॥ उट्ठं अहे यं तिरियं
 दिमासु तसा य जे थावर जे य पाणा । हत्थेहि पाएहि य संजमित्ता अदिन्नमन्नेसु
 य नो गहेज्जा ॥ २ ॥ ४७४ ॥ सुयक्खायधम्मे वित्तिगिच्छतिण्णे लाढे चरे आय-
 तुले पयासु । आयं न कुज्जा इह जीवियट्ठी चयं न कुज्जा सुतवस्सि भिक्खू ॥ ३ ॥
 ॥ ४७५ ॥ सव्विन्दियाभिनिव्वुडे पयासु चरे मुणी सव्वउ विप्पमुक्के । पासाहि
 पाणे य पुट्ठो वि सत्ते दुक्खेण अट्ठे परितप्पमाणे ॥ ४ ॥ ४७६ ॥ एएसु बाले य
 पमुव्वमाणे आवट्ठई कम्मसु पावएसु । अइवायओ कीरइ पावकम्मं निउज्जमाणे उ
 करेउ कम्मं ॥ ५ ॥ ४७७ ॥ आदीणविती व करेइ पावं मन्ता उ एगन्तसमाहि-
 माहु । बुद्धे समाहीय रए विवेगे पाणाइवाया विरए ठियप्पा ॥ ६ ॥ ४७८ ॥

सव्वं जगं तू समयाणुपेही पियमप्पियं करस्स वि नो करेज्जा । उट्ठाय दीणो य
 पुणो विसण्णो संपूयणं चेव सिलोयकामी ॥ ७ ॥ ४७९ ॥ आहाकडं चेव निकाम-
 मीणे नियामचारी य विसण्णमेसी । इत्थीसु सत्ते य पुढो य वाले परिग्गहं चेव
 पकुव्वमाणे ॥ ८ ॥ ४८० ॥ वेराणुगिद्धे निचयं करेइ इओ चुए से इहमट्ठदुग्गं ।
 तम्हा उ मेहावि समिक्ख धम्मं चरे मुणि सव्वउ विप्पमुक्के ॥ ९ ॥ ४८१ ॥ आयं
 न कुज्जा इह जीवियट्ठी असज्जमाणो य परिव्वएज्जा । निसम्मभासी य विणीय
 गिद्धि हिंसन्नियं वा न कहं करेज्जा ॥ १० ॥ ४८२ ॥ आहाकडं वा न निकामएज्जा
 निकामयन्ते य न संथवेज्जा । धुणे उरालं अणुवेहमाणे चिच्चा न सोयं अणवेक्ख-
 माणो ॥ ११ ॥ ४८३ ॥ एगत्तमेयं अभिपत्यएज्जा एवं पमोक्खो न मुसं ति पासं ।
 एसप्पमोक्खो अमुसे वरे वि अकोहणे सच्चरणे तवस्सी ॥ १२ ॥ ४८४ ॥ इत्थीसु
 या आरय मेहुणाओ परिग्गहं चेव अकुव्वमाणे । उच्चावएसुं विसएसु ताई निस्संसयं
 भिक्खु समाहिपत्ते ॥ १३ ॥ ४८५ ॥ अरइं रइं च अभिभूय भिक्खू तणाइफासं
 तह सीयफासं । उण्हं च दंसं चऽहियासएज्जा सुव्विं व दुव्विं व तित्तिक्खएज्जा
 ॥ १४ ॥ ४८६ ॥ गुत्तो वईए य समाहिपत्तो लेसं समाहट्ठ परिव्वएज्जा । गिहं न
 छाए न वि छायाएज्जा संमिस्सभावं पयहे पयासु ॥ १५ ॥ ४८७ ॥ जे केइ
 लोगम्मि उ अकिरियआया अन्नेण पुट्ठा धुयमादिसन्ति । आरम्भसत्ता गढिया य
 लोए धम्मं न जाणन्ति विमोक्खहेउं ॥ १६ ॥ ४८८ ॥ पुढो य छन्दा इह माणवा
 उ किरियाकिरीयं च पुढो य वायं । जायस्स वालस्स पकुव्व देहं पवट्ठई वैरम-
 संजयस्स ॥ १७ ॥ ४८९ ॥ आउक्खयं चेव अवुज्जमाणे ममाइ से साहसकारि
 मन्दे । अहो य राओ परितप्पमाणे अट्ठेसु मूढे अजरामरे व्व ॥ १८ ॥ ४९० ॥
 जहाहि वित्तं पसवो य सव्वं जे वन्धवा जे य पिया य मित्ता । लालप्पई से वि य
 एइ मोहं अन्ने जणा तंसि हरन्ति वित्तं ॥ १९ ॥ ४९१ ॥ सीहं जहा खुडुमिगा
 चरन्ता दूरे चरन्ति परिसंक्रमाणा । एवं तु मेहावि समिक्ख धम्मं दूरेण पावं
 परिवज्जएज्जा ॥ २० ॥ ४९२ ॥ संवुज्जमाणे उ नरे मईमं पावाउ अप्पाण निवट्ठ-
 एज्जा । हिंसप्पसूयाई दुहाई मत्ता वेराणुवन्धीणि महब्भयाणि ॥ २१ ॥ ४९३ ॥
 मुसं न वूया मुणि अत्तगामी निव्वाणमेयं कसिणं समाहिं । सयं न कुज्जा न य
 कारवेज्जा करन्तमन्नं पि य नाणुजाणे ॥ २२ ॥ ४९४ ॥ सुद्धे सिया जाएं न दूस्-
 एज्जा अमुच्छिण्णं न य अज्झोववन्ने । धिइमं विमुक्के न य पूयणट्ठी न सिलोयगामी
 य परिव्वएज्जा ॥ २३ ॥ ४९५ ॥ निक्खम्म गेहाउ निरावकंखी कायं विउस्सेज्ज
 नियाणच्छिन्ने । नो जीवियं नो मरणाभिकंखी चरेज्ज भिक्खू वलया विमुक्के ॥ २४ ॥
 ॥ ४९६ ॥ त्ति वेमिं ॥ समाहियज्झयणं दसमं ॥

मग्गज्झयणे एयारहमे

कयरे मग्गे अक्खाए माहणेणं मईमया । जं मग्गं उज्जु पावित्ता ओहं तरइ
 दुत्तरं ॥ १ ॥ ४९७ ॥ जं मग्गं पुत्तरं सुद्धं सब्बदुक्खविमोक्खणं । जाणासि णं
 जहा भिक्खू तं णो बूहि महासुणी ॥ २ ॥ ४९८ ॥ जइ णो केइ पुच्छिज्जा देवा
 अदुव माणुसा । तेसि तु कयरं मग्गं आइक्खेज्ज कहाहि णो ॥ ३ ॥ ४९९ ॥ जइ
 वो केइ पुच्छिज्जा देवा अदुव माणुसा । तेसिमं पडिसाहेज्जा मग्गसारं सुणेह मे
 ॥ ४ ॥ ५०० ॥ अणुपुव्वेण महाघोरं कासवेण पवेइयं । जमायाय इओ पुव्वं समुद्धं
 ववहारिणो ॥ ५ ॥ ५०१ ॥ अतरिसु तरन्तेगे तरिस्सन्ति अणागया । तं सोच्चा
 पडिवक्खामि जन्तवो तं सुणेह मे ॥ ६ ॥ ५०२ ॥ पुढवीजीवा पुढो सत्ता आउ-
 जीवा तहागणी । वाउजीवा पुढो सत्ता तणस्सुक्खा सवीयगा ॥ ७ ॥ ५०३ ॥
 अहावरा तसा पाणा एवं छक्काय आहिया । एयावए जीवकाए नावरे कोइ विजई
 ॥ ८ ॥ ५०४ ॥ सब्बाहिं अणुजुत्तीहिं मइमं पडिलेहिया । सब्बे अक्कन्तदुक्खा य
 अओ सब्बे न हिंसया ॥ ९ ॥ ५०५ ॥ एयं खु नाणिणो सारं जं न हिंसइ कंचण ।
 अहिंसा समयं चेव एयावन्तं वियाणिंया ॥ १० ॥ ५०६ ॥ उड्डं अहे य तिरियं जे
 केइ तसथावरा । सब्बत्थ विरइं विज्जा सन्ति निव्वाणसाहियं ॥ ११ ॥ ५०७ ॥
 पभू दोसे निराकिच्चा न विरुज्जेज्ज केण वि । मणसा वयसा चेव कायसा चेव
 अन्तसो ॥ १२ ॥ ५०८ ॥ संवुडे से महापत्ते धीरे दत्तेसणं चरे । एसणासमिण
 निच्चं वज्जयन्ते अणेसणं ॥ १३ ॥ ५०९ ॥ भूयाइं च समारम्भ तमुद्दिस्सा य जं
 कडं । तारिसं तु न गिण्हेज्जा अन्नपाणं सुसंजए ॥ १४ ॥ ५१० ॥ पूईकम्मं न
 सेवेज्जा एस धम्मे वुसीमओ । जं किंचि अभिकंखेज्जा सब्बसो तं न कप्पए ॥ १५ ॥
 ॥ ५११ ॥ हणन्तं नाणुजाणेज्जा आयगुत्ते जिइन्दिए । ठाणाई सन्ति सद्धीणं गामेसु
 नगरेसु वा ॥ १६ ॥ ५१२ ॥ तहा गिरं समारब्भ अत्थि पुण्णं ति नो वए ।
 अहवा नत्थि पुण्णं ति एवमेयं महब्भयं ॥ १७ ॥ ५१३ ॥ दाणट्ठया य जे पाणा
 हम्मन्ति तसथावरा । तेसि सारक्खणट्ठाए तम्हा अत्थि ति नो वए ॥ १८ ॥ ५१४ ॥
 जेसिं तं उवकप्पन्ति अन्नपाणं तहाविहं । तेसिं लाभन्तरायं ति तम्हा नत्थि ति नो
 वए ॥ १९ ॥ ५१५ ॥ जे य दाणं पसंसन्ति वहमिच्छन्ति पाणिणं । जे य णं
 पडिसेहन्ति वित्तिच्छेयं करन्ति ते ॥ २० ॥ ५१६ ॥ दुहओ वि ते न भासन्ति
 अत्थि वा नत्थि वा पुणो । आयं रयस्स हेच्चा णं निव्वाणं पाउणन्ति ते ॥ २१ ॥
 ॥ ५१७ ॥ निव्वाणं परमं बुद्धा नक्खत्ताण व चन्दिमा । तम्हा सया जए दन्ते
 निव्वाणं सधए मुणी ॥ २२ ॥ ५१८ ॥ वुज्जमाणाण पाणाणं किच्चन्ताण सकम्मुणा ।

आघाइ साहु तं दीवं पइट्टेसा पवुचई ॥ २३ ॥ ५१९ ॥ आयगुत्ते सया दन्ते
छिन्नसोए अणासवे । जे धम्मं सुद्धमक्खाइ पडिपुण्णमणोलिसं ॥ २४ ॥ ५२० ॥
तमेव अविद्याणन्ता अवुद्धा बुद्धमाणिणो । बुद्धा सो त्ति य मन्नन्ता अन्त एए समा-
हिए ॥ २५ ॥ ५२१ ॥ ते य वीयोदगं चेव तमुद्दिस्सा य जं कडं । भोच्चा द्वाणं
झियायन्ति अखेयन्नासमाहिया ॥ २६ ॥ ५२२ ॥ जहा ढंका य कंका य कुल्ला
मग्गुका सिही । मच्छेसणं झियायन्ति द्वाणं ते कल्लसाधमं ॥ २७ ॥ ५२३ ॥ एवं
तु समणा एगे मिच्छदिट्ठी अणारिया । विसएसणं झियायन्ति कंका वा कल्लसाहमा
॥ २८ ॥ ५२४ ॥ सुद्धं मग्गं विराहित्ता इहमेगे उ दुम्मई । उम्मग्गगया दुक्खं
घायमेसन्ति तं तहा ॥ २९ ॥ ५२५ ॥ जहा आसाविणिं नावं जाइअन्धो दुरुहिया ।
इच्छई पारमागन्तुं अन्तरा य विसीयइ ॥ ३० ॥ ५२६ ॥ एवं तु समणा एगे
मिच्छदिट्ठी अणारिया । सोयं कसिणमावन्ना आगन्तारो महब्भयं ॥ ३१ ॥ ५२७ ॥
इमं च धम्ममायाय कासवेण पवेइयं । तरे सोयं महाघोरं अत्तत्ताए परिव्वए
॥ ३२ ॥ ५२८ ॥ विरए गामधम्मोहिं जे केइ जगई जगा । तेसिं अत्तुवमायाए
थामं कुव्वं परिव्वए ॥ ३३ ॥ ५२९ ॥ अइमाणं च मायं च तं परिन्नाय पण्डिए ।
सव्वमेयं निराकिच्चा निव्वाणं संधए मुणी ॥ ३४ ॥ ५३० ॥ संधए साहुधम्मं
च पावधम्मं निराकरे । उवहाणवीरिए भिक्खू कोहं माणं न पत्थए ॥ ३५ ॥ ५३१ ॥
जे य बुद्धा अतिकन्ता जे य बुद्धा अणागया । सन्ति तेसिं पइट्ठाणं भूयाणं जगई
जहा ॥ ३६ ॥ ५३२ ॥ अह णं वयमावन्नं फासा उच्चावया फुसे । न तेसु विणि-
हण्णेज्जा वाएण व महागिरी ॥ ३७ ॥ ५३३ ॥ संवुडे से महापन्ने धीरे दत्तेसणं
चरे । निव्वुडे कालमाकंखी एवं केवल्लिणो मयं ॥ ३८ ॥ ५३४ ॥ ति वेमि ॥
मग्गज्झयणं एयारहमं ॥

समोसरणज्झयणे बारहमे

चत्तारि समोसरणाणिमाणि पावाडुया जाई पुढो वयन्ति । किरियं अकिरियं
विणयं ति तइयं अन्नाणमाहंसु चउत्थमेव ॥ १ ॥ ५३५ ॥ अन्नाणिया ता कुसला
वि सन्ता असंथुया नो वित्तिगिच्छतिण्णा । अकोविया आहु अकोवियेहिं अणाणु-
वीइत्तु मुसं वयन्ति ॥ २ ॥ ५३६ ॥ सच्चं असच्चं इति चिन्तयन्ता असाहु साहु
त्ति उदाहरन्ता । जेमे जणा वेणइया अणेगे पुट्ठा वि भावं विणइंसु नाम ॥ ३ ॥
॥ ५३७ ॥ अणोवसंखा इइ ते उदाहु अट्टे स ओभासइ अम्ह एवं । लवावसंकी

य अणागएहिं नो किरियमाहंसु अकिरियवाई ॥ ४ ॥ ५३८ ॥ संमिस्सभावं च
 गिरा गहीए से मुम्मुई होइ अणाणुवाई । इमं दुपक्खं इममेगपक्खं आहंसु
 छलाययणं च कम्मं ॥ ५ ॥ ५३९ ॥ ते एवमक्खन्ति अवुज्जमाणा विरुवस्सुवाणि
 अकिरियवाई । जे मायइत्ता वहवे मणूसा भमन्ति संसारमणोवदगं ॥ ६ ॥
 ॥ ५४० ॥ नाइच्चो उदेइ न अत्यमेइ न चन्दिमा वड्डइ हायई वा । सलिला न
 सन्दन्ति न वन्ति वाया वञ्छो नियओ कसिणे हु लोए ॥ ७ ॥ ५४१ ॥ जहा हि
 अन्ये सह जोइणा वि रूवाई नो पस्सइ हीणनेत्ते । सन्तं पि ते एवमकिरियवाई
 किरियं न पस्सन्ति निरुद्धपन्ना ॥ ८ ॥ ५४२ ॥ संवच्छरं सुविगं लक्खणं च
 निमित्तदेहं च उप्पाइयं च । अट्ठङ्गमेयं वहवे अहिता लोगंसि जाणन्ति अणागयाई
 ॥ ९ ॥ ५४३ ॥ केई निमित्ता तहिया भवन्ति केसिंचि तं विप्पडिएइ नागं । ते
 विज्जभावं अणहिज्जमाणा आहंसु विज्जा परिमोक्खमेव ॥ १० ॥ ५४४ ॥ ते एवम-
 क्खन्ति समिच्च लोगं तहा तहा समणा माहणा य । सयंकडं नन्नकडं च दुक्खं
 आहंसु विज्जाचरणं पमोक्खं ॥ ११ ॥ ५४५ ॥ ते चक्खु लोगंसिह नायगां उ
 मग्गाणुसासन्ति हियं पयाणं । तहा तहा सासयमाहु लोए जंसी पया माणव संप-
 गाढा ॥ १२ ॥ ५४६ ॥ जे रक्खसा वा जमलोइया वा जे वा सुरा गंधव्वा य
 काया । आगासगामी य पुढोसिया जे पुगो पुगो विप्परियासुवेन्ति ॥ १३ ॥
 ॥ ५४७ ॥ जमाहु ओहं सलिलं अपारगं जाणाहि णं भवगहणं दुमोक्खं । जंसी
 विसण्णा विसयङ्गणाहिं दुहओ वि लोयं अणुसंचरन्ति ॥ १४ ॥ ५४८ ॥ न
 कम्मणा कम्म खवेन्ति वाला अकम्मणा कम्म खवेन्ति धीरा । मेहाविणो लोभ-
 भयावईया संतोसिणो नो पकरेन्ति पावं ॥ १५ ॥ ५४९ ॥ ते तीयउप्पन्नमणा-
 गयाई लोगस्स जाणन्ति तहागयाई । नेयारो अन्नेसि अणन्ननेया बुद्धा हु ते अन्त-
 कडा भवन्ति ॥ १६ ॥ ५५० ॥ ते नेव कुव्वन्ति न कारवेन्ति भूयाहिसंकाइ
 दुगुञ्छमाणा । सया जया विप्पगमन्ति धीरा विण्णत्ति धीरा य हवन्ति एगे
 ॥ १७ ॥ ५५१ ॥ डहरे य पाणे बुद्धे य पाणे ते अत्तओ पासइ सव्वलोए ।
 उव्वेहई लोगमिगं महन्तं बुद्धेपमत्तेसु परिव्वएज्जा ॥ १८ ॥ ५५२ ॥ जे आयओ
 परओ वा वि नच्चा अलमप्पणो होन्ति अलं परेसि । तं जोइभूयं च सयावसेज्जा
 जे पाउकुज्जा अणुवीइ धम्मं ॥ १९ ॥ ५५३ ॥ अत्ताण जो जाणइ जो य लोगं
 गइं च जो जाणइ नागइं च । जो सासयं जाण असासयं च जाइं च मरणं च
 जगोववायं ॥ २० ॥ ५५४ ॥ अहो वि सत्ताण विउट्ठणं च जो आसवं जाणइ
 संवरं च । दुक्खं च जो जाणइ निज्जरं च सो भासिउमरिहइ किरियवायं ॥ २१ ॥

॥ ५५५ ॥ सद्देसु रुवेसु असज्जमाणे गन्धेसु रसेसु अदुस्समाणे । नो जीवियं नो मरणाहिकंखी आयाणगुत्ते वलया विमुक्के ॥ २२ ॥ ५५६ ॥ त्ति वेमि ॥ समो-सरणज्झयणं वारहमं ॥

आहत्तहीयज्झयणे तेरहमे

आहत्तहीयं तु पवेयइस्सं नाणप्पकारं पुरिसस्स जायं । सओ य धम्मं असओ अंसीलं सन्ति असन्ति करिस्सामि पाउं ॥ १ ॥ ५५७ ॥ अहो य राओ य समुट्ठिएहिं तहागएहिं पडिलब्भ धम्मं । समाहिमाघायमजोसयन्ता सत्थारमेवं फरुसं वयन्ति ॥ २ ॥ ५५८ ॥ विसोहियं ते अणुकाहयन्ते जे आयभावेण विया-गरेज्जा । अट्ठाणिए होइ वहुगुणणं जे नाणसंकाइ सुसं वएज्जा ॥ ३ ॥ ५५९ ॥ जे यावि पुट्ठा पलिउच्चयन्ति आयाणमट्ठं खलु वच्चइत्ता । असाहुणो ते इह साहु-माणी मायणि एस्सन्ति अणन्तघायं ॥ ४ ॥ ५६० ॥ जे कोहणे होइ जयट्ठभासी विओसियं जे उ उदीरएज्जा । अन्धे व से दण्डपहं गहाय अविओसिए धासइ पावकम्मी ॥ ५ ॥ ५६१ ॥ जे विग्गहीए अन्नायभासी न से समे होइ अझञ्झ-पत्ते । ओवायकारी य हिरीमणे य एगन्तदिट्ठी य अमाइरुवे ॥ ६ ॥ ५६२ ॥ से पेसले सुहुमे पुरिसजाए जच्चनिए चेव सुउज्जुयारे । वहुं पि अणुसासिए जे तहच्चा समे हु से होइ अझञ्झपत्ते ॥ ७ ॥ ५६३ ॥ जे यावि अप्पं वसुमं ति मत्ता संखाय वायं अपरिक्ख कुज्जा । तवेण वाहं सहिउ त्ति मत्ता अन्नं जणं पस्सइ विम्बभूयं ॥ ८ ॥ ५६४ ॥ एगन्तकूडेण उ से पलेइ न विज्जई मोणपयंसि गोत्ते । जे माणणट्ठेण विउक्कसेज्जा वसुमन्नतरेण अवुज्झमाणे ॥ ९ ॥ ५६५ ॥ जे माहणे खत्तियजायए वा तहुग्गपुत्ते तह लेच्छई वा । जे पव्वईए परदत्तभोई गोत्ते न जे थब्भइ माणबद्धे ॥ १० ॥ ५६६ ॥ न तस्स जाई व कुलं व ताणं नन्नत्थ विज्जा-चरणं सुचिणं । निक्खम्म से सेवइऽगारिकम्मं न से पारए होइ विमोयणाए ॥ ११ ॥ ५६७ ॥ निक्किंचणे भिक्खु सुल्लहजीवी जे गारवं होइ सिलोक्कामी । आजीवमेयं तु अवुज्झमाणो पुणो पुणो विप्परियासुवेन्ति ॥ १२ ॥ ५६८ ॥ जे भासवं भिक्खु सुसाहुवाई पडिहाणवं होइ विसारए य । आगाढपन्ने सुविभावियप्पा अन्नं जणं पन्नया परिहवेज्जा ॥ १३ ॥ ५६९ ॥ एवं न से होइ समाहिपत्ते जे पन्नवं भिक्खु विउक्कसेज्जा । अहवा वि जे लाहमयावलित्ते अन्नं जणं खिसइ वाल-पन्ने ॥ १४ ॥ ५७० ॥ पन्नामयं चेव तवोमयं च निजामए गोयमयं च भिक्खु ।

आजीवगं चेव चउत्थमाहु से पण्डिए उत्तमपोग्गले से ॥ १५ ॥ ५७१ ॥ मयाई
 एयाई विगिच्च धीरा न ताणि सेवन्ति सुधीरधम्मा । ते सव्वगोत्तावगया महेसी
 उच्चं अगोत्तं च गतिं वयन्ति ॥ १६ ॥ ५७२ ॥ भिक्खू मुयच्चे तह दिट्ठधम्मे
 गामं च नगरं च अणुप्पविस्सा । से एसणं जाणमणेसणं च अन्नस्स पाणस्स
 अणाणुगिद्धे ॥ १७ ॥ ५७३ ॥ अरइं रइं च अभिभूय भिक्खू बहूजणे वा तह
 एगचारी । एगन्तमोणेण वियागरेज्जा एगस्स जन्तो गइरागई य ॥ १८ ॥
 ॥ ५७४ ॥ सयं समेच्चा अदुवा वि सोच्चा भासेज्ज धम्मं हिययं पयाणं । जे गर-
 हिया सणियाणप्पओगा न ताणि सेवन्ति सुधीरधम्मा ॥ १९ ॥ ५७५ ॥ केसिंचि
 तक्काइ अबुज्झ भावं खुदं पि गच्छेज्ज असद्दहाणे । आउस्स कालाइयारं वघाए
 लद्धाणुमाणे य परेसु अट्ठे ॥ २० ॥ ५७६ ॥ कम्मं च छन्दं च विगिच्च धीरे
 विणइज्ज ऊ सव्वउ आयभावं । रुवेहिं लुप्पन्ति भयावहेहिं विजं गहाया तसथाव-
 रेहिं ॥ २१ ॥ ५७७ ॥ न पूयणं चेव सिलोयकामी पियमप्पियं कस्सइ नो
 करेज्जा । सव्वे अणट्ठे परिवज्जयन्ते अणाउले या अकसाइ भिक्खू ॥ २२ ॥
 ॥ ५७८ ॥ आहत्तहीयं समुपेहमाणे सव्वेहिं पाणेहिं निहाय दण्डं । नो जीवियं
 नो मरणाहिकंखी परिव्वएज्जा वलया विमुक्के ॥ २३ ॥ ५७९ ॥ त्ति वेमि ॥
 आहत्तहीयज्झयणं तेरहमं ॥

गन्थज्झयणे चोदहमे

गन्थं विहाय इह सिक्खमाणो उट्ठाय सुवम्भचेरं वसेज्जा । ओवायकारी विणयं
 सुसिक्खे जे छेय से विप्पमायं न कुज्जा ॥ १ ॥ ५८० ॥ जहा दियापोयमपत्तजायं
 सावासगा पविउं मज्जमाणं । तमच्चाइयं तरुणमपत्तजायं ढंकाइ अव्वत्तगमं हरेज्जा
 ॥ २ ॥ ५८१ ॥ एवं तु सेहं पि अपुट्ठधम्मं निस्सारियं वुसिमं मज्जमाणा । दियस्स
 छायं व अपत्तजायं हरिसु णं पावधम्मा अणेगे ॥ ३ ॥ ५८२ ॥ ओसाणमिच्छे
 मणुए समाहिं अणोसिए णन्तकरिं ति नच्चा । ओभासमाणे दवियस्स वित्तं न निक्कसे
 वहिया आसुपज्जो ॥ ४ ॥ ५८३ ॥ जे ठाणओ य सयणासणे य परक्कमे यावि
 सुसाहुजुत्ते । समिईसु गुत्तीसु य आयपन्ने वियागरिं ते य पुढो वएज्जा ॥ ५ ॥ ५८४ ॥
 सद्दाणि सोच्चा अदु भेरवाणि अणासवे तेसु परिव्वएज्जा । निदं च भिक्खू न पमाय
 कुज्जा कहंकहं वा वितिगिच्छतिण्णे ॥ ६ ॥ ५८५ ॥ डहरेण वुट्ठेणऽणुसासिए उ
 राइणिएणावि समव्वएणं । सम्मं तयं थिरओ नाभिगच्छे निज्जन्तए वावि अपारए
 से ॥ ७ ॥ ५८६ ॥ विउट्ठिएणं समयाणुसिट्ठे डहरेण वुट्ठेण उ चोइए य । अञ्चुट्ठि-

याए घडदासिए वा अगारिणं वा समयाणुसिट्ठे ॥ ८ ॥ ५८७ ॥ न तेसु कुज्झे न
 य पव्वहेज्जा न यावि किंची फरुसं वएज्जा । तहा करिस्सं ति पडिस्सुणेज्जा सेयं खु
 मेयं न पमाय कुज्जा ॥ ९ ॥ ५८८ ॥ वणंसि मूढस्स जहा अमूढा मग्गाणुसासन्ति
 हियं पयाणं । तेणेव मज्झं इणमेव सेयं जं मे बुहा समणुसासयन्ति ॥ १० ॥ ५८९ ॥
 अह तेण मूढेण अमूढगस्स कायव्व पूया सविसेसजुत्ता । एओवमं तत्थ
 उदाहु वीरे अणुगम्म अत्थं उवणेइ सम्मं ॥ ११ ॥ ५९० ॥ नेया जहा अन्ध-
 कारंसि राओ मग्गं न जाणाइ अपस्समाणे । से सूरियस्स अब्भुग्गमेणं मग्गं
 वियाणाइ पगासियंसि ॥ १२ ॥ ५९१ ॥ एवं तु सेहे वि अपुट्ठधम्मे धम्मं न
 जाणाइ अबुज्झमाणे । से कोविए जिणवयणेण पच्छा सूरुदए पासइ चक्खुणेव
 ॥ १३ ॥ ५९२ ॥ उड्ढं अहे यं तिरियं दिसासु तसा य जे थावर जे य पाणा ।
 सया जए तेसु परिव्वएज्जा मणप्पओसं अविकम्पमाणे ॥ १४ ॥ ५९३ ॥ कालेण
 पुच्छे समियं पयासु आइक्खमाणो दवियस्स वित्तं । तं सोयकारी य पुढो पवेसे
 सेखा इमं केवलियं समाहिं ॥ १५ ॥ ५९४ ॥ अस्सि सुठिच्चा तिविहेण तायी
 एएसु या सन्ति निरोहमाहु । ते एवमक्खन्ति तिलोगदंसी न भुज्जमेयन्ति पमाय-
 संगं ॥ १६ ॥ ५९५ ॥ निसम्म से भिक्खु समीहियद्वं पडिमाणवं होइ विसारए य ।
 आयाणअट्ठी वोदाणमोणं उवेच्च सुद्वेण उवेइ मोक्खं ॥ १७ ॥ ५९६ ॥ संखाइ
 धम्मं च वियागरन्ति बुद्धा हु ते अन्तकरा भवन्ति । ते पारगा दोण्ह वि मोयणाए
 संसोधियं पण्हमुदाहरन्ति ॥ १८ ॥ ५९७ ॥ नो छायाए नो वि य लूसएज्जा माणं
 न सेवेज्ज पगासणं च । न यावि पन्ने परिहास कुज्जा न याऽऽसियावाय वियागरेज्जा
 ॥ १९ ॥ ५९८ ॥ भूयाभिसंकाइ दुगुच्छमाणे न निव्वहे मन्तपएण गोयं । न
 किंचिमिच्छे मणुए पयासुं असाहुधम्माणि न संवएज्जा ॥ २० ॥ ५९९ ॥ हासं पि
 नो संधइ पावधम्मे ओए तहीयं फरुसं वियाणे । नो तुच्छए नो य विकंथइज्जा
 अणाइले या अकसाइ भिक्खू ॥ २१ ॥ ६०० ॥ संकेज्ज याऽसंकियभाव भिक्खू
 विभज्जवायं च वियागरेज्जा । भासादुयं धम्मसमुट्ठिएहिं वियागरेज्जा समयासुपन्ने
 ॥ २२ ॥ ६०१ ॥ अणुगच्छमाणे वितहं विजाणे तहा तहा साहु अकक्सेणं । न
 कत्थई भास विहिंसइज्जा निरुद्धगं वावि न दीहइज्जा ॥ २३ ॥ ६०२ ॥ समालवेज्जा
 पडिपुण्णभासी निसामिया समियाअट्ठदंसी । आणाइ सुद्धं वयणं भिउज्जे अभिसंधए
 पावविवेग भिक्खू ॥ २४ ॥ ६०३ ॥ अहावुइयाइं सुसिक्खएज्जा जइज्जया नाइवेलं
 वएज्जा । से दिट्ठिमं दिट्ठि न लूसएज्जा से जाणइ भासिउं तं समाहिं ॥ २५ ॥ ६०४ ॥
 अलूसए नो पच्छन्नभासी नो सुत्तमत्थं च करेज्ज ताई । सत्थारभत्ती अणुवीइ वायं

सुयं च सम्मं पडिवाययन्ति ॥ २६ ॥ ६०५ ॥ से सुद्धसुत्ते उवहाणवं च धम्मं च
जे विन्दइ तत्थ तत्थ । आएज्जवक्के कुसले वियत्ते स अरिहइ भासिउं तं समाहिं
॥ २७ ॥ ६०६ ॥ ति वेमि ॥ गन्थज्झयणं चोदहमं ॥

आयाणियज्झयणे पण्णरहमे

जमईअं पडुप्पंनं आगमिस्सं च नायओ । सव्वं मन्नइ तं ताई दंसणावरणन्तए
॥ १ ॥ ६०७ ॥ अन्तए वितिगिच्छाए से जाणइ अणेलिसं । अणेलिसस्स अक्खाया
न से होइ तहिं तहिं ॥ २ ॥ ६०८ ॥ तहिं तहिं सुयक्खायं से य सच्चे सुआहिए ।
सया सच्चेण संपन्ने मेत्तिं भूएहि कप्पए ॥ ३ ॥ ६०९ ॥ भूएहि न विरुज्झेज्जा एस
धम्मो वुसीमओ । वुसिमं जगं परिन्नाय अस्सि जीवियभावणा ॥ ४ ॥ ६१० ॥
भावणाजोगसुद्धप्पा जले नावा व आहिया । नावा व तीरसंपन्ना सव्वदुक्खा तिउ-
इइ ॥ ५ ॥ ६११ ॥ तिउइइ उ मेहावी जाणं लोगंसि पावगं । तुट्ठन्ति पावकम्माणि
नवं कम्ममकुव्वओ ॥ ६ ॥ ६१२ ॥ अकुव्वओ नवं नत्थि कम्मं नाम विजाणइ ।
विन्नाय से महावीरे जेण जाई न मिज्जई ॥ ७ ॥ ६१३ ॥ न मिज्जई महावीरे
जस्स नत्थि पुरेकडं । वाउ व्व जालमच्चेइ पिया लोगंसि इत्थियो ॥ ८ ॥ ६१४ ॥
इत्थियो जे न सेवन्ति आइमोक्खा हु ते जणा । ते जणा बन्धणुम्मक्का नावकंखन्ति
जीवियं ॥ ९ ॥ ६१५ ॥ जीवियं पिट्ठओ किच्चा अन्तं पावन्ति कम्मुणं । कम्मुणा
संमुहीभूया जे मग्गमणुसासई ॥ १० ॥ ६१६ ॥ अणुसासणं पुढो पाणी वसुमं
पूयणासु ते । अणासए जए दन्ते दढे आरयमेहुणे ॥ ११ ॥ ६१७ ॥ नीवारे
व न लीएज्जा छिन्नसोए अणाविले । अणाइले सया दन्ते संधिं पत्ते अणेलिसं ॥ १२ ॥
॥ ६१८ ॥ अणेलिसस्स खेयन्ने न विरुज्झेज्ज केणइ । मणसा वयसा चेव कायसा चेव
चक्खुमं ॥ १३ ॥ ६१९ ॥ से हु चक्खू मणुस्साणं जे कंखाए य अन्तए । अन्तेण
खुरो वहई चक्कं अन्तेण लोद्धई ॥ १४ ॥ ६२० ॥ अन्ताणि धीरा सेवन्ति तेण
अन्तकरा इह । इह माणुस्सए ठाणे धम्ममाराहिउं नरा ॥ १५ ॥ ६२१ ॥ निट्ठि-
यट्ठा व देवा वा उत्तरीए इयं सुयं । सुयं च मेयमेगेसिं अमणुस्सेसु नो तहा ॥ १६ ॥
॥ ६२२ ॥ अन्तं करन्ति दुक्खाणं इहमेगेसिमाहियं । आघायं पुण एगेसिं दुल्लभेइयं
समुस्सए ॥ १७ ॥ ६२३ ॥ इओ विद्धंसमाणस्स पुणो संवोहि दुल्लहा । दुल्लहाओ
तहच्चाओ जे धम्मद्वं वियागरे ॥ १८ ॥ ६२४ ॥ जे धम्मं सुद्धमक्खन्ति पडिपु-
ण्णमणेलिसं । अणेलिसस्स जं ठाणं तस्स जम्मकहा कओ ॥ १९ ॥ ६२५ ॥ कओ
कयाइ मेहावी उप्पज्जन्ति तहागया । तहागया अप्पडिन्ना चक्खू लोगस्सणुत्तरा

॥ २० ॥ ६२६ ॥ अणुत्तरे य ठाणे से कासवेण पवेइए । जं किच्चा निव्वुडा एगे
 निट्ठं प्रावन्ति पण्डिया ॥ २१ ॥ ६२७ ॥ पण्डिए वीरियं लद्धं निग्घायाय पवत्तगं
 धुणे पुव्वकडं कम्मं नवं वा वि न कुव्वई ॥ २२ ॥ ६२८ ॥ न कुव्वई महावीरे
 अणुपुव्वकडं रयं । रयसा संमुहीभूया कम्मं हेच्चाण जं मयं ॥ २३ ॥ ६२९ ॥ जं
 मयं सव्वसाहूणं तं मयं सल्लगतणं । साहइत्ताण तं तिण्णा देवा वा अभविस्सु ते
 ॥ २४ ॥ ६३० ॥ अभविस्सु पुरा धीरा आगमिस्सा वि सुव्वया । दुच्चिवोहस्स मग्गस्स
 अन्तं पाउकरा तिण्णे ॥ २५ ॥ ६३१ ॥ ति वेमि ॥ आयाणियज्झयणं पण्णरहमं ॥

गाहज्झयणे सोळसमे

अहाह भगवं—एवं से दन्ते दविए वोसट्टकाए ति वच्चे माहणे ति वा १ समणे
 ति वा २ भिक्खु ति वा ३ निग्गन्थे ति वा ४ । पडिआह—भन्ते कहां नु दन्ते
 दविए वोसट्टकाए ति वच्चे माहणे ति वा समणे ति वा भिक्खु ति वा निग्गन्थे ति
 वा । तं नो ब्रूहि महामुणी ॥ इति विरए सव्वपावकम्मोहिं पिज्जदोसकलह० अब्भ-
 क्खाण० पैसुज्ज० परपरिवाय० अरइरइ० मायामोस० मिच्छादंसणसल्लविरए समिए
 सहिए सया जए नो कुज्जे नो माणी माहणे ति वच्चे ॥ १ ॥ ६३२ ॥ एत्थ वि
 समणे अनिस्सिए अणियाणे आयाणं च अइवायं च मुसावायं च वहिद्वं च कोहं च
 माणं च मायं च लोहं च पिज्जं च दोसं च इच्चेव जओ जओ आयाणं अप्पणो
 पटोसहेऊ तओ तओ आयाणाओ पुव्वं पडिविरए पाणाइवाया सिआ दन्ते दविए
 वोसट्टकाए समणे ति वच्चे ॥ २ ॥ ६३३ ॥ एत्थ वि भिक्खू अणुजए विणीए नामए
 दन्ते दविए वोसट्टकाए संविधुणीय विरुवरुवे परीसहोवसग्गे अज्झप्पजोगसुद्धादाने
 उवट्ठिए ठिअप्पा संखाए परदत्तभोई भिक्खु ति वच्चे ॥ ३ ॥ ६३४ ॥ एत्थ वि
 निग्गन्थे एगे एगविऊ बुद्धे संछिन्नसोए सुसंजए सुसमिए सुसामाइए आयवायपत्ते
 विऊ दुहओ वि सोयपलिच्छिन्ने णो पूयणसक्कारलाभट्ठी धम्मट्ठी धम्मविऊ नियाग
 पडिवज्जे समियं चरे दन्ते दविए वोसट्टकाए निग्गन्थे ति वच्चे ॥ ४ ॥ ६३५ ॥
 से एवमेव जाणह जमहं भयन्तारो ॥ ति वेमि ॥ गाहज्झयणं सोळसमं,
 पढमे सुयक्खन्धे समत्ते ॥

पोण्डरियज्झयणे पढमे

सुयं मे आउसं तेणं भगवया एवमक्खायं । इह खलु पोण्डरीए नामज्झयणे

तस्स णं अयमद्वे पन्नत्ते । से जहानामए पुक्खरिणी सिया बहुउदगा बहुसेया बहु-
 पुक्खला लद्धा पुण्डरिकिणी पासादिया दरिसणिया अभिरुवा पडिरुवा । तीसे णं
 पुक्खरिणीए तत्थ तत्थ देसे देसे तहिं तहिं बहवे पउमवरपोण्डरीया बुइया, अणु-
 पुव्वुट्ठिया ऊसिया रुइला वण्णमन्ता गन्धमन्ता रसमन्ता फासमन्ता पासादिया
 दरिसणिया अभिरुवा पडिरुवा । तीसे णं पुक्खरिणीए बहुमज्झदेसभाए एगे महं
 पउमवरपोण्डरीए बुइए, अणुपुव्वुट्ठिए ऊसिए रुइले वण्णमन्ते गन्धमन्ते रसमन्ते
 फासमन्ते पासादीए जाव पडिरुवे । सव्वावन्ति च णं तीसे पुक्खरिणीए तत्थ तत्थ
 देसे देसे तहिं तहिं बहवे पउमवरपोण्डरीया बुइया अणुपुव्वुट्ठिया ऊसिया रुइला
 जाव पडिरुवा । सव्वावन्ति च णं तीसे णं पुक्खरिणीए बहुमज्झदेसभाए एगे महं
 पउमवरपोण्डरीए बुइए अणुपुव्वुट्ठिए जाव पडिरुवे ॥ १ ॥ ६३६ ॥ अह पुरिसे
 पुरित्थिमाओ दिसाओ आगम्म तं पुक्खरिणि तीसे पुक्खरिणीए तीरे ठिच्चा पासइ
 तं महं एगं पउमवरपोण्डरीयं अणुपुव्वुट्ठियं ऊसियं जाव पडिरुवं । तए णं से पुरिसे
 एवं वयासी-अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे
 मग्गविऊ मग्गस्स गइपरिक्कमन्नू । अहमेयं पउमवरपोण्डरीयं उन्निक्खिस्सामि त्ति
 कट्ठु इइ बुया से पुरिसे अभिक्कमेइ तं पुक्खरिणि । जावं जावं च णं अभिक्कमेइ
 तावं तावं च णं महन्ते उदए महन्ते सेए पहीणे तीरं अपत्ते पउमवरपोण्डरीयं
 नो हव्वाए नो पाराए अन्तरा पुक्खरिणीए सेयंसि निसण्णे पढमे पुरिसजाए
 ॥ २ ॥ ६३७ ॥ अहावरे दोच्चे पुरिसजाए । अह पुरिसे दक्खिणाओ दिसाओ
 आगम्म तं पुक्खरिणि तीसे पुक्खरिणीए तीरे ठिच्चा पासइ तं महं एगं पउमवर-
 पोण्डरीयं अणुपुव्वुट्ठियं पासादीयं जाव पडिरुवं । तं च एत्थ एगं पुरिसजायं पासइ
 पहीणतीरं अपत्तपउमवरपोण्डरीयं नो हव्वाए नो पाराए अन्तरा पुक्खरिणीए सेयंसि
 निसण्णं । तए णं से पुरिसे तं पुरिसं एवं वयासी-अहो णं इमे पुरिसे अखेयन्ने
 अकुसले अपण्डिए अवियत्ते अमेहावी वाले नो मग्गट्ठ नो मग्गविऊ नो मग्गस्स
 गइपरिक्कमन्नू जं णं एस पुरिसे । अहमंसि खेयन्ने कुसले जाव पउमवरपोण्डरीयं
 उन्निक्खिस्सामि । नो य खलु एयं पउमवरपोण्डरीयं एवं उन्निक्खेयव्वं जहा णं एस
 पुरिसे मजे । अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे
 मग्गविऊ मग्गस्स गइपरिक्कमन्नू, अहमेयं पउमवरपोण्डरीयं उन्निक्खिस्सामि त्ति कट्ठु
 इइ बुया से पुरिसे अभिक्कमे तं पुक्खरिणि । जावं जावं च णं अभिक्कमेइ तावं तावं
 च णं महन्ते उदए महन्ते सेए पहीणे तीरं अपत्ते पउमवरपोण्डरीयं नो हव्वाए
 नो पाराए अन्तरा पुक्खरिणीए सेयंसि निसण्णे दोच्चे पुरिसजाए ॥ ३ ॥ ६३८ ॥

अहावरे तच्चे पुरिसजाए । अह पुरिसे पच्चत्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं एगं महं पउमवरपोण्डरीयं अणुपुव्वुट्ठियं जाव पडिरुवं । ते तत्थ दोणिण पुरिसजाए पासइ पहीणे तीरं अपत्ते पउमवरपोण्डरीयं नो हव्वाए नो पाराए जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना अकुसला अपण्डिया अवियत्ता अमेहावी वाला नो मग्गट्ठा नो मग्गविऊ नो मग्गस्स गइपरिक्कमन्नू जं णं एए पुरिसा एवं मन्ने-अम्हे एयं पउमवरपोण्डरीयं उन्निक्खिस्सामो नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि पुरिसे खेयन्ने कुसले पण्डिए वियत्ते मेहावी अवाले मग्गट्ठे मग्गविऊ मग्गस्स गइपरिक्कमन्नू अहमेयं पउमवरपोण्डरीयं उन्निक्खिस्सामि ति कट्ठु इति वुच्चा से पुरिसे अभिक्कमे तं पुक्खरिणिं । जावं जावं च णं अभिक्कमे तावं तावं च णं महन्ते उदए महन्ते सेए जाव अन्तरा पुक्खरिणीए सेयंसि निसण्णे तच्चे पुरिसजाए ॥ ४ ॥ ६३९ ॥ अहावरे चउत्थे पुरिसजाए । अह पुरिसे उत्तराओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्ठियं जाव पडिरुवं । ते तत्थ तिणिण पुरिसजाए पासइ पहीणे तीरं अपत्ते जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना जाव नो मग्गस्स गइपरिक्कमन्नू जं णं एए पुरिसा एवं मन्ने-अम्हे एयं पउमवरपोण्डरीयं उन्निक्खिस्सामो नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि पुरिसे खेयन्ने जाव मग्गस्स गइपरिक्कमन्नू, अहमेयं पउमवरपोण्डरीयं एवं उन्निक्खिस्सामि ति कट्ठु इति वुच्चा से पुरिसे अभिक्कमे तं पुक्खरिणिं । जावं जावं च णं अभिक्कमे तावं तावं च णं महन्ते उदए महन्ते सेए जाव निसण्णे चउत्थे पुरिसजाए ॥ ५ ॥ ६४० ॥ अह भिक्खू ल्हहे तीरट्ठी खेयन्ने जाव गइपरिक्कमन्नू अन्नयराओ दिसाओ वा अणुदिसाओ वा आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं जाव पडिरुवं । ते तत्थ चत्तारि पुरिसजाए पासइ पहीणे तीरं अपत्ते जाव पउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णे । तए णं से भिक्खू एवं वयासी-अहो णं इमे पुरिसा अखेयन्ना जाव नो मग्गस्स गइपरिक्कमन्नू जं एए पुरिसा एवं मन्ने अम्हे एयं पउमवरपोण्डरीयं उन्निक्खिस्सामो, नो य खलु एयं पउमवरपोण्डरीयं एवं उन्निक्खेयव्वं जहा णं एए पुरिसा मन्ने । अहमंसि भिक्खू ल्हहे तीरट्ठी खेयन्ने जाव गइपरिक्कमन्नू अहमेयं पउमवरपोण्डरीयं उन्निक्खिस्सामि ति कट्ठु इति वुच्चा से भिक्खू

नो अभिक्कमे तं पुक्खरिणि तीसे पुक्खरिणीए तीरे ठिच्चा सद्दं कुज्जा-उप्पयाहि
 खलु भो पउमवरपोण्डरीया उप्पयाहि । अह उप्पइए से पउमवरपोण्डरीए ॥ ६ ॥
 ॥ ६४१ ॥ किट्टिए नाए समणाउसो, अट्ठे पुण से जाणियंवे भवइ । भन्ते त्ति समणं
 भगवं महावीरं निग्गन्था य निग्गन्थीओ य वन्दन्ति नमंसन्ति वन्दित्ता नमंसित्ता
 एवं वयासी-किट्टिए नाए समणाउसो, अट्ठं पुण से न जाणामो समणाउसो त्ति ।
 समणे भगवं महावीरे ते य बहवे निग्गन्थे य निग्गन्थीओ य आमन्तेत्ता एवं
 वयासी-हन्त समणाउसो आइक्खामि विभावेमि कित्तेमि पवेएमि सअट्ठं सहेउं
 सनिमित्तं भुज्जो भुज्जो उवदंसेमि । से वेमि ॥ ७ ॥ ६४२ ॥ लोयं च खलु मए
 अप्पाहट्ठु समणाउसो पुक्खरिणी बुइया । कम्मं च खलु मए अप्पाहट्ठु समणाउसो
 से उदए बुइए । कामभोगे य खलु मए अप्पाहट्ठु समणाउसो से सेए बुइए । जण-
 जाणवयं च खलु मए अप्पाहट्ठु समणाउसो ते बहवे पउमवरपोण्डरीए बुइए ।
 रायाणं च खलु मए अप्पाहट्ठु समणाउसो से एगे महं पउमवरपोण्डरीए बुइए ।
 अन्नतित्थिया य खलु मए अप्पाहट्ठु समणाउसो ते चत्तारि पुरिसजाया बुइया ।
 धम्मं च खलु मए अप्पाहट्ठु समणाउसो से भिक्खू बुइए । धम्मतित्थं च खलु
 मए अप्पाहट्ठु समणाउसो से तीरे बुइए । धम्मकहं च खलु मए अप्पाहट्ठु सम-
 णाउसो से सहे बुइए । निव्वणं च खलु मए अप्पाहट्ठु समणाउसो से उप्पाए
 बुइए । एवमेयं च मए अप्पाहट्ठु समणाउसो से एवमेयं बुइयं ॥ ८ ॥ ६४३ ॥
 इह खलु पाईणं वा पडीणं वा उदीणं वा दाहिणं वा सन्तेगइया मणुस्सा भवन्ति
 अणुपुव्वेणं लोणं उववन्ना । तंजहा-आरिया वेगे अणारिया वेगे उच्चागोत्ता वेगे
 णीयागोया वेगे कायमन्ता वेगे रहस्समन्ता वेगे सुवण्णा वेगे दुव्वण्णा वेगे सुरूवा
 वेगे दुरूवा वेगे । तेसि च णं मणुयाणं एगे राया भवइ महया हिमवन्तमलयमन्दर-
 महिन्दसारे अचन्तविसुद्धरायकुलवंसप्पसूए निरन्तररायलक्खणविराइयङ्गमङ्गे बहु-
 जणवहुमाणपूइए सव्वगुणसमिद्धे खत्तिए मुदिए मुद्धाभिसित्ते माउपिउसुजाए दय-
 प्पिए सीमंकरे सीमंधरे खेमंकरे खेमंधरे मणुस्सिदे जणवयपिया जणवयपुरोहिए
 सेउकरे केउकरे नरपवरे पुरिसपवरे पुरिससीहे पुरिसआसीविसे पुरिसवरपोण्डरीए
 पुरिसवरगंधहत्थी अट्ठे दित्ते वित्ते वित्थिण्णविउलभवणसयंणासणजाणवाहणाइण्णे
 बहुधणवहुजायलवरयए आओगपओगसंपउत्ते विच्छड्डियपउरभत्तपाणे बहुदासीदास-
 गोमहिसगवेलगप्पभूए पडिपुण्णजंतकोसकोट्ठागाराउहागारे वलवं दुव्वलंपच्चामित्ते
 ओहयकण्टयं निहयकण्टयं मलियकण्टयं उद्धियकण्टयं अकण्टयं ओहयसत्तू निहयसत्तू
 मलियसत्तू उद्धियसत्तू निजियसत्तू पराइयसत्तू ववगयदुब्बिभक्खमारिभयविप्पमुक्कं

(रायवण्णओ जहा ओववाइए) जाव पसंतडिम्बडमरं रज्जं पसाहेमाणे विहरइ । तस्स णं रज्जो परिसा भवइ उग्गा उग्गपुत्ता भोगा भोगपुत्ता इक्खागाइ इक्खागाइ-पुत्ता नाया नायपुत्ता कोरव्वा कोरव्वपुत्ता भट्ठा भट्टपुत्ता माहणा माहणपुत्ता लेच्छइ लेच्छइपुत्ता पसत्थारो पसत्थपुत्ता सेणावई सेणावइपुत्ता । तेसि च णं एगइए सद्धी भवइ कामं तं समणा वा माहणा वा संपहारिंसु गमणाए । तत्थ अन्नयरेणं धम्मणेणं पन्नत्तारो वयं इमेणं धम्मणेणं पन्नवइस्सामो से एवमायाणह भयंतारो जहा मए एस धम्मो सुयक्खाए सुपन्नते भवइ । तं जहा-उड्डं पायतला अहे केसग्गमतथया तिरियं तयपरियंते जीवे एस आयापज्जवे कसिणे एस जीवे जीवइ, एस मए नो जीवइ, सरीरे धरमाणे धरइ विणट्ठम्मि य नो धरइ । एयं तं जीवियं भवइ, आदहणाए परेहिं निज्जइ, अगणिद्दामिए सरीरे कवोयवण्णाणि अट्ठीणि भवंति, आसंदीपन्नमा पुरिसा गामं पच्चागच्छंति, एवं असंते असंविज्जमाणे । जेसिं तं असंते असंविज्जमाणे तेसिं तं सुयक्खायं भवइ-अन्नो भवइ जीवो अन्नं सरीरं, तम्हा ते एवं नो विपडिवे-दंति-अयमाउसो आया दीहे त्ति वा हस्से त्ति वा परिमण्डले त्ति वा वट्ठे त्ति वा तंसे त्ति वा चउरंसे त्ति वा आयए त्ति वा छलंसिए त्ति वा अट्ठंसे त्ति वा किण्हे त्ति वा नीले त्ति वा लोहियहालिदे त्ति वा सुक्खिले त्ति वा सुब्भिगंधे त्ति वा दुब्भिगंधे त्ति वा तित्ते त्ति वा कडुए त्ति वा कसाए त्ति वा अम्बिले त्ति वा महुरे त्ति वा कक्खडे त्ति वा मउए त्ति वा गुरुए त्ति वा लहुए त्ति वा सीए त्ति वा उसिणे, त्ति वा निद्धे त्ति वा लुक्खे त्ति वा । एवं असंते असंविज्जमाणे । जेसिं तं सुयक्खायं भवइ-अन्नो जीवो अन्नं सरीरं, तम्हां ते नो एवं उवलब्भंति । से जहानामए-केइ पुरिसे कोसीओ अस्सिं अभिनिव्वट्ठित्ता णं उवदंसेज्जा अयमाउसो असी अयं कोसी, एवमेव नत्थि केइ पुरिसे अभिनिव्वट्ठित्ता णं उवदंसेत्तारो अयमाउसो आया इयं सरीरं । से जहानामए केइ पुरिसे मुज्जाओ इसियं अभिनिव्वट्ठित्ता णं उवदंसेज्जा अयमाउसो मुजे इयं इसियं, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे मंसाओ अट्ठिं अभिनिव्वट्ठित्ता णं उवदंसेज्जा अयमाउसो मंसे अयं अट्ठी, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे करयलाओ आमलकं अभिनिव्वट्ठित्ता णं उवदं-सेज्जा अयमाउसो करयले अयं आमलए, एवमेव नत्थि केइ पुरिसे उवदंसेत्तारो अय-माउसो आया इयं सरीरं । से जहानामए-केइ पुरिसे दहीओ नवणीयं अभिनिव्व-ट्ठित्ता णं उवदंसेज्जा अयमाउसो नवणीयं अयं तु दही, एवमेव नत्थि केइ पुरिसे जाव सरीरं । से जहानामए-केइ पुरिसे तिलेहिंतो तेलं अभिनिव्वट्ठित्ता णं उवदंसेज्जा

अयमाउसो तेल्लं अयं पिण्णाए, एवमेव जाव सरीरं । से जहानामए-केइ पुरिसे इक्खूओ खोयरसं अभिनिव्वट्ठिता णं उवदंसेज्जा अयमाउसो खोयरसे अयं छोए, एवमेव जाव सरीरं । से जहानामए-केइ पुरिसे अरणीओ अग्गि अभिनिव्वट्ठिता णं उवदंसेज्जा अयमाउसो अरणी अयं अग्गी, एवमेव जाव सरीरं । एवं असंते असंविज्जमाणे । जेसिं तं सुयक्खायं भवइ तं जहा-अन्नो जीवो अन्नं सरीरं । तम्हा ते मिच्छा ॥ से हंता तं हणह खणह छणह डहह पयह आलुम्पह विलुम्पह सह-सक्कारेह विपरासुसह, एयावया जीवे नत्थि परलोए । ते नो एवं विप्पडिंवेदेंति, तं जहा-किरियां इ वा अकिरिया इ वा सुक्कडे इ वा दुक्कडे इ वा कल्लाणे इ वा पावए इ वा साहु इ वा असाहु इ वा सिद्धी इ वा असिद्धी इ वा निरए इ वा अणिरए इ वा । एवं ते विरुवरुवेहिं कम्मसमारंभेहिं विरुवरुवाइं कामभोगां समारभन्ति भोयणाए ॥ एवं एगे पागब्भिया निक्खम्म मामगं धम्मं पन्नवेति । तं सदहमाणा तं पत्तियमाणा तं रोएमाणा साहु सुयक्खाए समणे त्ति वा माहणे त्ति वा कामं खलु आउसो तुमं पूययामि, तं जहा-असणेण वा पाणेण वा खाइमेण वा साइमेण वा वत्थेण वा पडिग्गहेण वा कम्बलेण वा पायपुञ्छणेण वा । तत्थेगे पूयणाए समा-उट्ठिसु तत्थेगे पूयणाए निकाइंसु ॥ पुव्वमेव तेसिं नायं भवइ-समणा भविस्सामो अणगारा अकिंचणा अपुत्ता अपसू परदत्तभोइणो भिक्खुणो पावं कम्मं नो करि-स्सामो समुट्ठाए । ते अप्पणा अप्पडिविरया भवंति, सयमाइयंति अन्ने वि आइयावेति अन्नं पि आययंतं समणुजाणंति एवमेव ते इत्थिकामभोगेहिं मुच्छिया गिद्धा गढिया अज्झोववशा लुद्धा रागदोसवसट्ठा । ते नो अप्पाणं समुच्छेदेंति ते नो परं समुच्छे-देंति ते नो अन्नाइं पाणाइं भूयाइं जीवाइं सत्ताइं समुच्छेदेति, पहीणा पुव्वसंजोगं आयरियं मग्गं असंपत्ता इति ते नो हव्वाए नो पाराए अंतरा कामभोगेसु विसण्णा । इति पढमे पुरिसजाए तज्जीवतच्छरीरए त्ति आहिए ॥ ९ ॥ ६४४ ॥

अहावरे दोच्चे पुरिसजाए पच्चमहव्वभूइए त्ति आहिज्जइ । इह खलु पाईणं वा ६ सन्तेगइया मणुस्सा भवन्ति अणुपुव्वेण लोयं उववन्ना, तं जहा-आरिया वेगे अणारिया वेगे एवं जाव दुरूवा वेगे । तेसिं च णं महं एगे राया भवइ महया एवं चेव निरवसेसं जाव सेणावइपुत्ता । तेसिं च णं एगइए सद्धी भवति कामं तं समणा य माहणा य पहारिंसु गमणाए । तत्थ अन्नयरेणं धम्मणेणं पन्नत्तारो वयं इमेणं धम्मणेणं पन्नवइस्सामो से एवमायाणह भयन्तारो जहा मए एस धम्मो सुअक्खाए सुपन्नते भवइ । इह खलु पच्चमहव्वभूया जेहिं नो विज्जइ किरिय त्ति वा अकिरिय त्ति वा सुक्कडे त्ति वा दुक्कडे त्ति वा कल्लाणे त्ति वा पावए त्ति वा साहु त्ति वा असाहु त्ति

वा सिद्धि ति वा असिद्धि ति वा निरए ति वा अनिरए ति वा अवि अन्तसो
तणमायमवि ॥ तं च पिहुद्देसेणं पुढोभूयसमवायं जाणेज्जा । तं जहा पुढवी एगे
महब्भूए, आऊ दुच्चे महब्भूए, तेऊ तच्चे महब्भूए, वाऊ चउत्थे महब्भूए, आगासे
पञ्चमे महब्भूए । इच्चेए पञ्च महब्भूया अनिम्मिया अनिम्माविया अकडा नो
कित्तिमा नो कडगा अणाइया अणिहणा अवञ्जा अपुरोहिया सतंता सासया
आयछट्ठा । पुण एगे एवमाहु-सओ नत्थि विणासो असओ नत्थि संभवो । एयावया
व जीवकाए एयावया व अत्थिकाए एयावया व सव्वलोए, एयं मुहं लोगस्स करण-
याए, अवि अन्तसो तणमायमवि । से किणं किणावेमाणे हणं घायमाणे पयं पया-
वेमाणे अवि अन्तसो पुरिसमवि कीणिता घायइत्ता एत्थं पि जाणाहि नत्थित्थ दोसो ।
ते नो एवं विप्पडिवेदेति । तं जहा-किरिया इ वा जाव अनिरए इ वा । एवं ते
विरुवरुवेहिं कम्मसमारंभेहिं विरुवरुवाईं कामभोगाइं समारभंति भोयणाए । एव-
मेव ते अणारिया विप्पडिवन्ना तं सदहमाणा तं पत्तियमाणा जाव ते नो हव्वाए
नो पाराए अंतरा कामभोगेसु विसण्णा । दोच्चे पुरिसजाए पञ्चमहब्भूइए ति
आहिण्ण ॥ १० ॥ ६४५ ॥ अहावरे तच्चे पुरिसजाए ईसरकारणिण्ण ति आहिज्जइ ।
इह खलु पाईणं वा ६ संतेगइया मणुस्सा भवंति अणुपुव्वेणं लोयं उव्वन्ना । तं
जहा-आरिया वेगे जाव तेसिं च णं महंते एगे राया भवइ जाव सेणावइपुत्ता ।
तेसिं च णं एगइए सङ्गी भवइ, कामं तं समणा य माहणा य पहारिंसु गमणाए
जाव जहा मए एस धम्मे सुयक्खाए सुपन्नत्ते भवइ । इह खलु धम्मा पुरिसादिया
पुरिसोत्तरिया पुरिसप्पणीया पुरिससंभूया पुरिसपज्जोइया पुरिसमभिसमन्नागया
पुरिसमेव अभिभूय चिट्ठंति । से जहानामए-गण्डे सिया सरीरे जाए सरीरे संवुद्धे
सरीरे अभिसमन्नागए सरीरमेव अभिभूय चिट्ठइ, एवमेव धम्मा पुरिसादिया जाव
पुरिसमेव अभिभूय चिट्ठंति । से जहानामए-अरई सिया सरीरे जाया सरीरे
संवुद्धा सरीरे अभिसमन्नागया सरीरमेव अभिभूय चिट्ठइ, एवमेव धम्मा वि पुरि-
सादिया जाव पुरिसमेव अभिभूय चिट्ठंति से जहानामए-वम्मिए सिया पुढविजाए
पुढविसंवुद्धे पुढविअभिसमन्नागए पुढविमेव अभिभूय चिट्ठइ, एवमेव धम्मा वि
पुरिसादिया जाव पुरिसमेव अभिभूय चिट्ठंति, से जहानामए-रुक्खे सिया पुढविजाए
पुढविसंवुद्धे पुढविअभिसमन्नागए पुढविमेव अभिभूय चिट्ठइ, एवमेव धम्मा वि
पुरिसादिया जाव पुरिसमेव अभिभूय चिट्ठंति । से जहानामए-पुक्खरिणी सिया
पुढविजाया जाव पुढविमेव अभिभूय चिट्ठइ, एवमेव धम्मा वि पुरिसादिया जाव
पुरिसमेव अभिभूय चिट्ठंति । से जहानामए-उदगपुक्खले सिया उदगजाए जाव

उदगमेव अभिभूय चिद्धइ, एवमेव धम्मा वि पुरिसादिया जाव पुरिसमेव अभिभूय चिद्धंति । से जहानामए-उदगबुब्बुए सिया उदगजाए जाव उदगमेव अभिभूय चिद्धइ, एवमेव धम्मा वि पुरिसादिया जाव पुरिसमेव अभिभूय चिद्धंति । जं पि य इमं समणाणं निगंथाणं उद्धिं पणीयं वियज्जियं दुवालसङ्गं गणिपिडगं, तं जहा-आयारो सूयगढो जाव दिट्ठिवाओ, सव्वमेवं मिच्छा, न एयं तहियं न एयं आहातहियं, इमं सच्चं इमं तहियं इमं आहातहियं । ते एवं सन्नं कुव्वंति, ते एवं सन्नं संठवेंति, ते एवं सन्नं सोवद्धवन्ति । तमेवं ते तज्जाइयं दुक्खं नाइउद्धंति सउणी पञ्जरं जहा । ते नो एवं विप्पडिवेदेंति तं जहा-किरिया इ वा जाव अणिरए इ वा, एवामेव ते विरुवरुवेहिं कम्मसमारम्भेहिं विरुवरुवाइं कामभोगाइं समारम्भंति भोयणाए । एवामेव ते अणारिया विप्पडिवन्ना एवं सद्दहमाणा जाव इति ते नो हव्वाए नो पाराए, अंतरा कामभोगेसु विसण्णे त्ति, तच्चे पुरिसजाए ईसरकारणिए त्ति आहिए ॥ ११ ॥ ६४६ ॥ अहावरे चउत्थे पुरिसजाए नियइवाइए त्ति आहिज्जइ । इह खलु पाईणं वा ६ तहेव जाव सेणावइपुत्ता वा । तेसिं च णं एगइए सद्धी भवइ, कामं तं समणा य माहणा य संपहारिंसु गमणाए जाव मए एस धम्मे सुअक्खाए सुपन्नते भवइ । इह खलु दुवे पुरिसा भवंति-एगे पुरिसे किरियमाइक्खइ एगे पुरिसे नोकिरिय माइक्खइ । जे य पुरिसे किरियमाइक्खइ जे य पुरिसे नोकिरियमाइक्खइ दो वि ते पुरिसा तुल्ला एगद्धा कारणमावन्ना । बाले पुण एवं विप्पडिवेदेंति कारण-मावन्ने-अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा अहमेयमकासि, परो वा जं दुक्खइ वा सोयइ वा जूरइ वा तिप्पइ वा पीडइ वा परितप्पइ वा परो एवमकासि । एवं से बाले सकारणं वा परकारणं वा एवं विप्पडिवेदेंति कारणमावन्ने । मेहावी पुण एवं विप्पडिवेदेंति कारण-मावन्ने-अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा, नो अहं एवमकासि । परो वा जं दुक्खइ वा जाव परितप्पइ वा नो परो एवमकासि, एवं से मेहावी सकारणं वा परकारणं वा एवं विप्पडिवेदेंति कारणमावन्ने । से वेमि पाईणं वा ६ जे तसेथावरा पाणा ते एवं संघायमागच्छंति ते एवं विप्परियासमावज्जंति ते एवं विवेगमागच्छंति ते एवं विहाणमागच्छंति ते एवं संगइयन्ति उवेहाए ! नो एवं विप्पडिवेदेंति, तं जहा-किरिया इ वा जाव निरए इ वा अनिरए इ वा । एवं ते विरुवरुवेहिं कम्मसमारम्भेहिं विरुवरुवाइं कामभोगाइं समारम्भंति भोयणाए । एवमेव ते अणारिया विप्पडिवन्ना तं सद्दह-माणा जाव इति ते नो हव्वाए नो पाराए अंतरा कामभोगेसु विसण्णा । चउत्थे

पुरिसजाए नियइवाइए त्ति आहिए ॥ इच्चेए चत्तारि पुरिसजाया नाणापन्ना नाना-
छंदा नाणासीला नाणादिट्ठी नाणारुई नाणारम्भा नाणाअज्झवसाणसंजुत्ता पहीण-
पुव्वसंजोगा आरियं मगं असंपत्ता इति ते नो हव्वाए नो पाराए अंतरा काम-
भोगेसु विसण्णा ॥ १२ ॥ ६४७ ॥ से वेमि पाईणं वा ६ सन्तेगइया मणुस्सा
भवन्ति । तं जहा-आरिया वेगे अणारिया वेगे उच्चागोया वेगे नीयागोया वेगे
कायमन्ता वेगे हस्समन्ता वेगे सुवण्णा वेगे दुवण्णा वेगे सुख्वा वेगे दुख्वा वेगे ।
तेसिं च णं खेत्तवत्थूणि परिग्गहियाणि भवन्ति, तं जहा अप्पयरो वा भुज्जयरो वा ।
तेसिं च णं जणजाणवयाइं परिग्गहियाइं भवन्ति, तं जहा अप्पयरा भुज्जयरा वा ।
तहप्पगारेहिं कुलेहिं आगम्म अभिभूय एगे भिक्खायरियाए समुट्ठिया । सओ वा वि
एगे नायओ (अणायओ) य उवगरणं च विप्पजहाय भिक्खायरियाए समुट्ठिया ।
असओ वा वि एगे नायओ (अणायओ) य उवगरणं च विप्पजहाय भिक्खाय-
रियाए समुट्ठिया । [जे ते सओ वा असओ वा नायओ य अणायओ य उवगरणं
च विप्पजहाय भिक्खायरियाए समुट्ठिया] पुव्वमेवं तेहिं नायं भवइ । तं जहा-
इह खलु पुरिसे अन्नमन्नं ममट्ठाए एवं विप्पडिवेदेति । तं जहा-खेत्तं मे वत्थू मे
हिरण्णं मे सुवण्णं मे धणं मे धन्नं मे कंसं मे दूसं मे विपुलधणकणगरयणमणिमो-
त्तियसंखसिलप्पवालरत्तरयणसंतसारसावएयं मे । सहा मे रूवा मे गंधा मे रसा मे
फासा मे । एए खलु मे कामभोगा अहमवि एएसिं । से मेहावी पुव्वामेव अप्पणो
एवं समभिजाणेज्जा । तं जहा-इह खलु मम अन्नयरे दुक्खे रोगायंके समुप्पजेज्जा
अणिट्ठे अकंते अप्पिए असुभे अमणुजे अमणामे दुक्खे नो सुहे । से हंता भयंतारो
कामभोगाइं ममे अन्नयरं दुक्खं रोगायंके परियाइयह अणिट्ठं अकंतं अप्पियं असुभं
अमणुजं अमणामं दुक्खं नो सुहं । ता अहं दुक्खामि वा सोयामि वा जूरामि वा
तिप्पामि वा पीडामि वा परितप्पामि वा इमाओ मे अन्नयराओ दुक्खाओ रोगायंकाओ
पडिमोयह अणिट्ठाओ अकंताओ अप्पियाओ असुभाओ अमणुजाओ अमणामाओ
दुक्खाओ नो सुहाओ । एवमेव नो लद्धपुव्वं भवइ । इह खलु कामभोगा नो ताणाए
वा नो सरणाए वा । पुरिसे वा एगया पुव्वि कामभोगे विप्पजहइ, कामभोगा वा
एगया पुव्वि पुरिसं विप्पजहन्ति । अजे खलु कामभोगा अन्नो अहमंति । से किमंग
पुण वयं अन्नमन्नेहिं कामभोगेहिं मुच्छामो । इति संखाए णं वयं च कामभोगेहिं
विप्पजहिस्सामो । से मेहावी जाणेज्जा वहिरज्जमेयं इणमेव उवणीययरां । तं जहा-
माया मे पिया मे भाया मे भगिणी मे भज्जा मे पुत्ता मे धूया मे पेसा मे नत्ता मे
सुण्हा मे सुहा मे पिया मे सहा मे सयणसंगंथसंयुया मे । एए खलु मम नायओ

अहमवि एएसिं । एवं से मेहावी पुन्वामेव अप्पणा एवं समभिजाणेज्जा । इह खलु मम अन्नयरे दुक्खे रोगायंके समुप्पजेज्जा अणिट्ठे जाव दुक्खे नो सुहे । से हंता भयंतारो नायओ इमं मम अन्नयरं दुक्खं रोगायंके परियाइयह अणिट्ठं जाव नो सुहं । ता अहं दुक्खामि वा सोयामि वा जाव परितप्पामि वा, इमाओ मे अन्नयराओ दुक्खाओ रोगायंकाओ परिमोएह अणिट्ठाओ जाव नो सुहाओ, एवमेव नो लद्धपुव्वं भवइ । तेसिं वा वि भयंताराणं मम नाययाणं अन्नयरे दुक्खे रोगायंके समुप्पजेज्जा अणिट्ठे जाव नो सुहे, से हंता अहमेएसिं भयंताराणं नाययाणं इमं अन्नयरं दुक्खं रोगायंके परियाइयामि अणिट्ठं जाव नो सुहे, मा मे दुक्खंतु वा जाव मा मे परितप्पंतु वा, इमाओ णं अन्नयराओ दुक्खाओ रोगायंकाओ परिमो-
 एमि अणिट्ठाओ जाव नो सुहाओ, एवमेव नो लद्धपुव्वं भवइ । अन्नस्स दुक्खं अन्नो न परियाइयइ अन्नेण कडं अन्नो नो पडिसंवेदेइ पत्तेयं जायइ पत्तेयं मरइ पत्तेयं चयइ पत्तेयं उववज्जइ पत्तेयं झंझा पत्तेयं सन्ना पत्तेयं मन्ना एवं विन्नू वेयणा । इह खलु नाइसंजोगा नो ताणाए वा नो सरणाए वा । पुरिसे वा एगया पुव्वि नाइसंजोगे विप्पजहइ, नाइसंजोगा वा एगया पुव्वि पुरिसं विप्पजहन्ति, अन्ने खलु नाइसंजोगा अन्नो अहमंसि, से किमंग पुण वयं अन्नमन्नेहिं नाइसंजोगेहिं मुच्छामो, इति संखाए णं वयं नाइसंजोगं विप्पजहिस्सामो । से मेहावी जाणेज्जा बहिरङ्गमेयं, इणमेव उवणीययरंगं । तं जहा-हत्था मे पाया मे वाहा मे उरू मे उयरं मे सीसं मे सीलं मे आऊ मे बलं मे वण्णो मे तया मे छाया मे सोयं मे चक्खू मे घाणं मे जिन्मा मे फासा मे ममाइज्जइ, वयाउ पडिजूरइ । तं जहा-आउओ बलाओ वण्णाओ तयाओ छायाओ सोयाओ जाव फासाओ । सुसंधिओ संधी विसंधीभवइ, वलियतरंगे गाए भवइ, किण्हा केसा पलिया भवन्ति । तं जहा-जं पि य इमं सरीरगं उरालं आहारोवइयं एयं पि य अणुपुव्वेणं विप्पजहियव्वं भविस्सइ । एयं संखाए से भिक्खू भिक्खायरियाए समुट्ठिए दुहओ लोगं जाणेज्जा, तं जहा-जीवा चेव अजीवा चेव, तसा चेव थावरा चेव ॥ १३ ॥ ६४८ ॥ इह खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, जे इमे तसा थावरा पाणा ते सयं समारभन्ति अन्नेण वि समारम्भावेति अन्नं पि समारभंतं समणुजाणन्ति । इह खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, जे इमे कामभोगा सच्चित्ता वा अचित्ता वा ते सयं परिणिहन्ति अन्नेण वि परिणिह्णावेन्ति अन्नं पि परिणिहंतं समणु-
 जागंति । इह खलु गारत्था सारम्भा सपरिग्गहा, संतेगइया समणा माहणा वि

सारम्भा सपरिग्गहा, अहं खलु अणारम्भे अपरिग्गहे जे खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, एएसिं चेव निस्साए बम्मचेरवासं वसिस्सामो । कस्स णं तं हेउं ? जहा पुवं तहा अवरं जहा अवरं तहा पुवं, अझू एए अणुवरया अणुवट्ठिया पुणरवि तारिसगा चेव । जे खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, दुहओ पावाइं कुव्वंति इति संखाए दोहि वि अंतेहिं अदिस्समाणो इति भिक्खू रीएज्जा । से वेमि पाईणं वा ६ जाव एवं से परिज्जायकम्मे, एवं से ववेयकम्मे, एवं से विअंतकारए भवइ ति-मक्खायं ॥ १४ ॥ ६४९ ॥ तत्थ खलु भगवया छज्जीवनिकायहेऊ पन्नत्ता । तं जहा-पुढवीकाए जाव तसकाए । से जहानामए-मम असायं दण्डेण वा मुट्ठीण वा लेल्लण वा क्वालेण वा आउट्टिजमाणस्स वा हम्ममाणस्स वा तज्जिज्जमाणस्स वा ताडिज्जमाणस्स वा परियाविज्जमाणस्स वा किलामिज्जमाणस्स वा उद्दविज्जमाणस्स वा जाव लोमुक्खणणमायमवि हिंसाकारगं दुक्खं भयं पडिसंवेदेमि, इच्चं जाण सव्वे जीवा सव्वे भूया सव्वे पाणा सव्वे सत्ता दण्डेण वा जाव क्वालेण वा आउट्टिजमाणा वा हम्ममाणा वा तज्जिज्जमाणा वा ताडिज्जमाणा वा परियाविज्जमाणा वा किलामिज्जमाणा वा उद्दविज्जमाणा वा जाव लोमुक्खणणमायमवि हिंसाकारगं दुक्खं भयं पडिसंवेदंति । एवं नच्चा सव्वे पाणा जाव सत्ता न हंतव्वा न अज्जावेयव्वा न परिधेयव्वा न परितावेयव्वा न उद्दवेयव्वा । से वेमि जे य अईया जे य पडुप्पज्ञा जे य आगमिस्सा अरिहंता भगवंता सव्वे ते एवमाइक्खंति एवं भासंति एवं पन्नवेंति एवं परूवेंति सव्वे पाणा जाव सत्ता न हंतव्वा न परिधेयव्वा न अज्जावेयव्वा न परितावेयव्वा न उद्दवेयव्वा । एस धम्मे ध्रुवे नीइए सासए समिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव विरए परिग्गहाओ नो दंतपक्खालणेणं दंते पक्खालेज्जा नो अज्जणं नो वमणं नो धूवणे नो तं परिआवि-एज्जा ॥ से भिक्खू अक्रिए अल्लसए अकोहे अमाणे अमाए अलोहे उवसंते परि-निव्वुडे नो आसंसं पुरओ करेज्जा इमेणं मे दिट्ठेण वा सुएण वा मएण वा विज्जाएण वा इमेण वा सुचरियतवनियमवम्मभचेरवासेण इमेण वा जायामायवुत्तिएणं धम्मेणं इओ चुए पेच्चा देवे सिया कामभोगाण वसवत्ती सिद्धे वा अदुक्खमसुभे एत्थ वि सिया एत्थ वि नो सिया । से भिक्खू सदेहिं अमुच्छिए रुवेहिं अमुच्छिए गंधेहिं अमुच्छिए रसेहिं अमुच्छिए फासेहिं अमुच्छिए विरए कोहाओ माणाओ मायाओ लोभाओ पेज्जाओ दोसाओ कलहाओ अब्भक्खाणाओ पेसुज्जाओ परपरिवायाओ

अरइरईओ मायामोसाओ मिच्छादंसणसत्ताओ इति से महओ आयाणाओ उवसंते उवट्टिए पडिविरए से भिक्खू । जे इमे तसथावरा पाणा भवंति ते नो सयं समारम्भइ नो वनेहिं समारम्भावेइ अन्ने समारम्भंते वि न समणुजाणइ इति से महओ आयाणाओ उवसंते उवट्टिए पडिविरए से भिक्खू जे इमे कामभोगा सचित्ता वा अचित्ता वा ते णो सयं परिगिण्हंति णो अण्णेणं परिगिण्हवेंति अन्नं परिगिण्हंतंति न समणुजाणंति इति से महओ आयाणाओ उवसंते उवट्टिए पडिविरओ से भिक्खू । जं पि य. इमं संपराइयं कम्मं किज्जइ, नो तं सयं करेइ नो अन्नाणं कारवेइ अन्नं पि करेत्तं न समणुजाणइ, इति से महओ आयाणाओ उवसंते उवट्टिए पडिविरए । से भिक्खू जाणेज्जा असणं वा ४ अस्सिं पडियाए एगं साहम्मियं समुद्दिस्स पाणाइं भूयाइं जीवाइं सत्ताइं समारम्भ समुद्दिस्स कीयं पामिच्चं अच्छिज्जं अनिसट्ठं अभिहडं आहट्ठुद्देसियं तं चेइयं सिया तं नो सयं भुज्जइ नो अन्नेणं भुज्जावेइ अन्नं पि भुज्जंतं न समणुजाणइ, इति से महओ आयाणाओ उवसंते उवट्टिए पडिविरए से भिक्खू अह पुणं एवं जाणेज्जा तं विज्जइ तेसिं परक्कमे । (जस्सट्ठा ते वेइयं सिया तंजहा अप्पणो पुत्ताइणट्ठाए जाव आएसाए पुढो पहेणाए सामासाए पायरासाए संनिहिसं- निचओ किज्जइ इह एएसिं माणवाणं भोयणाए) तत्थ भिक्खू परकडं परनिट्ठियमु- ग्गमुप्पायणेसणासुद्धं सत्थाइयं सत्थपरिणामियं अविहिसियं एसियं वेसियं सामुदाणियं पत्तमसणं कारणट्ठा पमाणजुत्तं अक्खोवज्जणवणलेवणभूयं संजमजायामायावत्तियं विलमिव पन्नगभूएणं अप्पाणेणं आहारं आहारेज्जा अन्नं अन्नकाले पाणं पाणकाले वत्थं वत्थकाले लेणं लेणकाले सयणं सयणकाले । से भिक्खू मायन्ने अन्नयरं दिसं अणुदिसं वा पडिवन्ने धम्मं आइक्खे विभए किट्ठे उवट्टिएसु वा अणुवट्टिएसु वा सुस्सूसमाणेसु पवेयए, संतिविरइं उवसमं निव्वाणं सोयवियं अज्जवियं मद्दवियं लाघवियं अणइवाइयं सव्वेसिं पाणाणं सव्वेसिं भूयाणं जाव सत्ताणं अणुवाइं किट्ठए धम्मं । से भिक्खू धम्मं किट्ठमाणे नो अन्नस्स हेउं धम्ममाइक्खेज्जा, नो पाणस्स हेउं धम्ममाइक्खेज्जा, नो वत्थस्स हेउं धम्ममाइक्खेज्जा, नो लेणस्स हेउं धम्म- माइक्खेज्जा, नो सयणस्स हेउं धम्ममाइक्खेज्जा, नो अन्नेसिं विरुवरूवाणं कामभो- गाणं हेउं धम्ममाइक्खेज्जा, अगिलाए धम्ममाइक्खेज्जा, नन्नत्थ कम्मनिज्जरट्ठाए धम्ममाइक्खेज्जा । इह खलु तस्स भिक्खुस्स अंतिए धम्मं सोच्चा निसम्म उट्ठा- णेणं उट्ठाय वीरा अस्सिं धम्मो समुट्ठिया । जे तस्स भिक्खुस्स अंतिए धम्मं सोच्चा निसम्म सम्मं उट्ठाणेणं उट्ठाय वीरा अस्सिं धम्मो समुट्ठिया ते एवं सव्वोवगया ते एवं सव्वोवरया ते एवं सव्वोवसंता ते एवं सव्वत्ताए परिणिव्वुडे त्ति बेमि । एवं

से भिक्खू धम्मट्ठी धम्मविऊ नियागपडिवन्ने से जहेयं वुइयं अदुवा पत्ते पउमवर-
पोण्डरीयं अदुवा अपत्ते पउमवरपोण्डरीयं, एवं से भिक्खू परिन्नायकम्मि परिन्नाय
संगे परिन्नायगेहवासे उवसंते समिए सहिए सयांजए । सेयं वयणिज्जे तं जहा-
समणे त्ति वा माहणे त्ति वा खंते त्ति वा दंते त्ति वा गुत्ते त्ति वा मुत्ते त्ति वा
इसि त्ति वा मुणि त्ति वा कइ त्ति वा विउ त्ति वा भिक्खु त्ति वा ल्हें त्ति वा तीरट्ठि
त्ति वा चरणकरणपारविउ त्ति वेमि ॥ १५ ॥ ६५० ॥ पोण्डरियज्झयणं
पढमं समत्तं ॥

किरियाठाणज्झयणे विइये

सुयं मे आउसं ! तेणं भगवया एवमक्खायं । इह खलु किरियाठाणे नामज्झयणे
पन्नत्ते, तस्स णं अयमट्ठे । इह खलु संजूहेणं दुवे ठाणे एवमाहिज्जंति । तं जहा ।
धम्मि चेव अधम्मि चेव उवसंते चेव अणुवसंते चेव । तत्थ णं जे से पढमस्स
ठाणस्स अहम्मपक्खस्स विभङ्गे तस्स णं अयमट्ठे पन्नत्ते । इह खलु पाईणं वा ६
संतेगइया मणुस्सा भवंति । तं जहा-आरिया वेगे अणारिया वेगे उच्चागोया वेगे
नीयागोया वेगे कायमंता वेगे हस्समंता वेगे सुवण्णा वेगे दुव्वण्णा वेगे सुरुवा
वेगे दुरुवा वेगे । तेसिं च णं इमं एयारुवं दण्डसमादाणं संपेहाए । तं जहा-नेरइ-
एसुं वा तिरिक्खजोणिएसु वा मणुस्सेसु वा देवेसु वा जे यावन्ने तहप्पगारा पाणा
विन्नू वेयणं वेयंति ॥ तेसिं पि य णं इमाइं तेरस्स किरियाठाणाइं भवंतीतिमक्खायं ।
तं जहा-अट्ठादण्डे १, अणट्ठादण्डे २, हिंसादण्डे ३, अकम्हादण्डे ४, दिट्ठिविपरि-
यासियादण्डे ५, मोसवत्तिए ६, अदिन्नादाणवत्तिए ७, अज्झत्थवत्तिए ८, माणवत्तिए
९, मित्तदोसंवत्तिए १०, मायावत्तिए ११, लोभवत्तिए १२, इरियावहिए १३
॥ १॥ ६५१ ॥ पढमे दण्डसमादाणे अट्ठादण्डवत्तिए त्ति आहिज्जइ । से जहानामए-केइ
पुरिसे आयहेउं वा नाइहेउं वा अगारहेउं वा परिवारहेउं वा मित्तहेउं वा नागहेउं
वा भूयहेउं वा जक्खहेउं वा तं दण्डं तसथावरेहिं पाणेहिं सयमेव निसिरइ अन्नेण
वि निसिरावेइ अन्नं पि निसिरंतं समणुयाणइ, एवं खलु तस्स तप्पत्तियं सावज्जं त्ति
आहिज्जइ । पढमे दण्डसमादाणे अट्ठादण्डवत्तिए त्ति आहिए ॥ २ ॥ ६५२ ॥
अहांवरे दोच्चे दण्डसमादाणे अणट्ठादण्डवत्तिए त्ति आहिज्जइ । से जहानामए-
केइ पुरिसे जे इमे तसा पाणा भवंति ते नो अच्चाए नो अजिणाए नो मंसाए नो
सोणियाए एवं हिययाए पित्ताए वसाए पिच्छाए पुच्छाए वालाए सिंगाए विसाणाए
१० सुत्ता०

दंताए दाढाए नहाए ण्हाणिए अट्टीए अट्टिमज्जाए नो हिंसिंसु मे त्ति नो हिंसंति
मे त्ति नो हिंसिस्संति मे त्ति नो पुत्तपोसणाए नो पसुपोसणाए नो अगारपरिवूहण-
याए नो समणमाहणवत्तणाहेउं नो तस्स सरीरगस्स किंचि विप्परियाइत्ता भवंति ।
से हंता छेत्ता भेत्ता लुम्पइत्ता विलुम्पइत्ता उद्वइत्ता उज्झिउं बाले वेरस्स आभागी
भवइ अणट्ठादण्डे । से जहानामए केइ पुरिसे जे इमे थावरा पाणा भवंति । तं
जहा-इक्कडा इ वा कडिणा इ वा जंतुगा इ वा परगा इ वा मोक्खा इ वा तणा
इ वा कुसा इ वा कुच्छगा इ वा पव्वगा इ वा पलाला इ वा, ते नो पुत्तपोसणाए
नो पसुपोसणाए नो अगारपरिवूहणयाए नो समणमाहणपोसणयाए नो तस्स सरीर-
गस्स किंचि विपरियाइत्ता भवंति । से हंता छेत्ता भेत्ता लुम्पइत्ता विलुम्पइत्ता
उद्वइत्ता उज्झिउं बाले वेरस्स आभागी भवइ अणट्ठादण्डे ॥ से जहानामए केइ
पुरिसे कच्छंसि वा दहंसि वा उदगंसि वा दवियंसि वा वलयंसि वा नूमंसि वा
गहणंसि वा गहणविदुगंसि वा वणंसि वा वणविदुगंसि वा पव्वयंसि वा पव्वय-
विदुगंसि वा तणाइं ऊसविय ऊसविय सयमेव अगणिकायं निसिरइ अन्नेण वि
अगणिकायं निसिरावेइ अन्नं पि अगणिकायं निसिरंतं समणुजाणइ अणट्ठादण्डे ।
एवं खलु तस्स तप्पत्तियं सावज्जं ति आहिज्जइ । दोच्चे दण्डसमादाणे अणट्ठादण्ड-
वत्तिए त्ति आहिए ॥ ३ ॥ ६५३ ॥ अहावरे तच्चे दण्डसमादाणे हिंसादण्डवत्तिए
त्ति आहिज्जइ । से जहानामए-केइ पुरिसे ममं वा ममिं वा अन्नं वा अन्नि वा हिंसिंसु
वा हिंसइ वा हिंसिस्सइ वा तं दण्डं तसथावरेहिं पाणेहिं सयमेव निसिरइ अन्नेण
वि निसिरावेइ अन्नं पि निसिरंतं समणुजाणइ हिंसादण्डे, एवं खलु तस्स तप्पत्तियं
सावज्जं ति आहिज्जइ । तच्चे दण्डसमादाणे हिंसादण्डवत्तिए त्ति आहिए ॥ ४ ॥ ६५४ ॥
अहावरे चउत्थे दण्डसमादाणे अकम्हादण्डवत्तिए त्ति आहिज्जइ । से जहाना-
मए-केइ पुरिसे कच्छंसि वा जाव वणविदुगंसि वा मियवत्तिए मियसंकप्पे मियपणि-
हाणे मियवहाए गंता एए मिय त्ति काउं अन्नयरस्स मियस्स वहाए उयुं आयामेत्ता
णं निसिरेज्जा, स मियं वहिस्सामि त्ति कट्ठु तित्तिरं वा वट्ठगं वा चडगं वा लावगं
वा कवोयगं वा कविं वा कविंजलं वा विंधित्ता भवइ, इह खलु से अन्नस्स अट्ठाए
अन्नं फुसइ अकम्हादण्डे । से जहानामए केइ पुरिसे सालीणि वा वीहीणि वा कोइ-
वाणि वा कंगूणि वा परगाणि वा रालाणि वा निलिज्जमाणे अन्नयरस्स तणस्स वहाए
सत्यं निसिरेज्जा, से सामगं तणगं कुमुदुगं वीहीऊसियं कलेसुयं तणं छिन्दिस्सामि
त्ति कट्ठु सालिं वा वीहिं वा कोइवं वा कंगुं वा परगं वा रालयं वा छिन्दिता भवइ ।
एनि खलु से अन्नस्स अट्ठाए अन्नं फुसइ अकम्हादण्डे । एवं खलु तस्स तप्पत्तियं

सावज्जं आहिज्जइ । चउत्थे दण्डसमादाणे अकम्हादण्डवत्तिए आहिए ॥५॥६५५॥
 अहावरे पच्चमे दण्डसमादाणे दिट्ठिविपरियासियादण्डवत्तिए ति आहिज्जइ । से
 जहानामए-केइ पुरिसे माईहिं वा पिईहिं वा भाईहिं वा भगिणीहिं वा भज्जाहिं वा
 पुत्तेहिं वा धूयाहिं वा सुण्हाहिं वा सद्धिं संवसमाणे मित्तं अमित्तमेव मन्नमाणे मित्ते
 हयपुव्वे भवइ दिट्ठिविपरियासियादण्डे । से जहानामए-केइ पुरिसे गामघायंसि वा
 नगरघायंसि वा खेडघायंसि कब्बडघायंसि मडंबघायंसि वा दोणमुहघायंसि वा
 पट्टणघायंसि वा आसमघायंसि वा संनिवेसघायंसि वा निग्गमघायंसि वा रायहाणि-
 घायंसि वा अतेणं तेणमिति मन्नमाणे अतेणे हयपुव्वे भवइ दिट्ठिविपरियासियादण्डे ।
 एवं खलु तस्स तप्पत्तियं सावज्जं ति आहिज्जइ । पच्चमे दण्डसमादाणे दिट्ठिविपरि-
 यासियादण्डवत्तिए ति आहिए ॥ ६ ॥ ६५६ ॥ अहावरे छट्ठे किरियट्ठाणे मोसावत्तिए
 ति आहिज्जइ । से जहानामए-केइ पुरिसे आयहेउं वा नाइहेउं वा अगारहेउं वा
 परिवारहेउं वा सयमेव मुसं वयइ अण्णेण वि मुसं वाएइ मुसं वयन्तं पि अन्नं समणु-
 जाणइ, एवं खलु तस्स तप्पत्तियं सावज्जं ति आहिज्जइ । छट्ठे किरियट्ठाणे मोसावत्तिए
 ति आहिए ॥७॥६५७॥ अहावरे सत्तमे किरियट्ठाणे अदिच्चादाणवत्तिए ति आहिज्जइ ।
 से जहानामए-केइ पुरिसे आयहेउं वा जाव परिवारहेउं वा सयमेव अदिन्नं आदियइ
 अन्नेणं वि अदिन्नं आदियावेइ अदिन्नं आदियन्तं अन्नं समणुजाणइ, एवं खलु तस्स
 तप्पत्तियं सावज्जं ति आहिज्जइ । सत्तमे किरियट्ठाणे अदिच्चादाणवत्तिए ति आहिए
 ॥८॥६५८॥ अहावरे अट्ठमे किरियट्ठाणे अज्झत्थवत्तिए ति आहिज्जइ । से जहानामए-
 केइ पुरिसे नत्थि णं केइ किंचि विसंवादेइ सयमेव हीणे दीणे दुट्ठे दुम्मणे ओहयमण-
 संकप्पे चिन्तासोगसागरसंपविट्ठे करयलपल्हत्थमुहे अट्ठज्झाणोवगए भूमिगयदिट्ठिए
 झियाइ, तस्स णं अज्झत्थया आसंसइया चत्तारे ठाणा एवमाहिज्जन्ति । तं जहा-
 कोहे माणे माया लोहे । अज्झत्थमेव कोहमाणमायालोहे । एवं खलु तस्स तप्प-
 त्तियं सावज्जं ति आहिज्जइ । अट्ठमे किरियट्ठाणे अज्झत्थवत्तिए ति आहिए ॥९॥६५९॥
 अहावरे नवमे किरियट्ठाणे माणवत्तिए ति आहिज्जइ । से जहानामए-केइ पुरिसे
 जाइमएण वा कुलमएण वा वलमएण वा रुवमएण वा तवमएण वा सुयमएण वा
 लाभमएण वा इस्सरियमएण वा पन्नामएण वा अन्नयरेण वा मयट्ठाणेणं मत्ते समाणे
 परं हीलेइ निन्देइ खिसइ गरहइ परिभवइ अवमन्नेइ, इत्तरिए अयं, अहमंसि पुण
 विसिट्ठजाइकुलबलाइगुणोववेए । एवं अप्पाणं समुक्कस्से, देहच्चुए कम्मविइए अवसे
 पयाइ । तं जहा-गब्भाओ गब्भं ४ जम्माओ जम्मं माराओ मारं नरगाओ नरगं
 चण्डे थडे चवले माणी यावि भवइ । एवं खलु तस्स तप्पत्तियं सावज्जं

ति आहिज्जइ । नवमे किरियट्ठाणे माणवत्तिए त्ति आहिए ॥ १० ॥ ६६० ॥
 अहावरे दसमे किरियट्ठाणे मित्तदोसवत्तिए त्ति आहिज्जइ । से जहानामए-केइ
 पुरिसे माईहिं वा पिईहिं वा भाईहिं वा भइणीहिं वा भज्जाहिं वा धूयाहिं वा पुत्तेहिं
 वा सुण्हाहिं वा सद्धिं संवसमाणे तेसि अन्नयरंसि अहालहुगंसि अवराहंसि सयमेव
 गस्यं दण्डं निवत्तेइ । तं जहा-सीओदगवियडंसि वा कायं उच्छोलित्ता भवइ,
 उसिणोदगवियडेण वा कायं ओसिञ्चित्ता भवइ, अगणिकायेणं कायं उवडहिता भवइ,
 जोत्तेण वा वेत्तेण वा नेत्तेण वा तयाइ वा [कण्णेण वा छियाए वा] लयाए वा
 (अन्नयरेण वा दवरएण) पासाइं उद्दालित्ता भवइ, दण्डेण वा अट्ठीण वा मुट्ठीण
 वा लेळूण वा कवालेण वा कायं आउट्ठित्ता भवइ । तहप्पगारे पुरिसजाए संवस-
 माणे दुम्मणा भवइ, पवसमाणे सुमणा भवइ, तहप्पगारे पुरिसजाए दण्डपासी
 दण्डगुरुए दण्डपुरक्कडे अहिए इमंसि लोगंसि अहिए परंसि लोगंसि संजलणे कोहणे
 पिट्ठिमंसी यावि भवइ । एवं खलु तस्स तप्पत्तियं सावज्जं ति आहिज्जइ ।
 दसमे किरियट्ठाणे मित्तदोसवत्तिए त्ति आहिए ॥ ११ ॥ ६६१ ॥ अहावरे
 एक्कारसमे किरियट्ठाणे मायावत्तिए त्ति आहिज्जइ । जे इमे भवन्ति-गूढायारा
 तमोकसिया उलुगपत्तलहुया पव्वयगुरुया ते आरिया वि सन्ता अणारियाओ
 भासाओ वि पउज्जन्ति, अन्नहासन्तं अप्पाणं अन्नहा मज्जन्ति, अन्नं पुट्ठा अन्नं
 वागरंति, अन्नं आइक्खियव्वं अन्नं आइक्खंति । से जहानामए केइ पुरिसे अंतो-
 सल्ले तं सल्लं नो सयं निहरइ नो अन्नेण निहरावेइ नो पडिविद्धंसेइ, एवमेव निण्हवेइ,
 अविउट्ठमाणे अंतोअंतो रियइ, एवमेव माई मायं कट्ठु नो आलोएइ नो पडिक्कमेइ
 नो निन्दइ नो गरहइ नो विउट्ठइ नो विसोहेइ नो अकरणाए अब्भुट्ठेइ नो अहारिहं
 तवोकम्मं पायच्छित्तं पडिवज्जइ, माई अस्सि लोए पच्चायाइ माई परंसि लोए पुणो
 पुणो पच्चायाइ निन्दइ गरहइ पसंसइ निच्चरइ न नियंइइ निसिरियं दण्डं छांइइ,
 माइ असमाहडसुहलेस्से यावि भवइ । एवं खलु तस्स तप्पत्तियं सावज्जं ति
 आहिज्जइ । एक्कारसमे किरियट्ठाणे मायावत्तिए त्ति आहिए ॥ १२ ॥ ६६२ ॥
 अहावरे वारसमे किरियट्ठाणे लोभवत्तिए त्ति आहिज्जइ । जे इमे भवन्ति, तं
 जहा-आरणिया आवसहिया गामन्तिया कण्हुईरहसिया नो बहुसंजया नो बहु-
 पडिविरया सव्वपाणभूयजीवसत्तेहिं ते अप्पणो सच्चासोसाइं एवं विउज्जंति । अहं
 न हन्तव्वो अन्ने हन्तव्वा, अहं न अज्जावेयव्वो अन्ने अज्जावेयव्वा, अहं न परि-
 घेयव्वो अन्ने परिघेयव्वा, अहं न परितावेयव्वो, अन्ने परितावेयव्वा, अहं न उद्द-
 वेयव्वो अन्ने उद्दवेयव्वा, एवमेव ते इत्थिकामेहिं मुच्छिया गिद्धा गढिया गरहिया

अज्जोववन्ना जाव वासाइं चउपन्नमाइं छद्दसमाइं अप्पयरो वा भुज्जयरो वा भुज्जित्तु
भोगभोगाइं कालमासे कालं किच्चा अन्नयरेसु, आसुरिएसु किच्चिसिएसु ठाणेसु उव-
वत्तारो भवन्ति । तओ विप्पमुच्चमाणे भुज्जो भुज्जो एलमूयत्ताए तमूयत्ताए जाइमूय-
त्ताए पच्चायन्ति । एवं खलु तस्स तप्पत्तियं सावज्जं ति आहिज्जइ । दुवालसमे
किरियट्ठाणे लोभवत्तिए ति आहिए । इच्चेयाइं दुवालस किरियट्ठाणाइं दविण्णं
समणेण वा मांहणेण वा असम्मं सुपरिजाणियव्वाइं भवन्ति ॥ १३ ॥ ६६३ ॥
अद्दावरे तेरसमे किरियट्ठाणे इरियावहिंए ति आहिज्जइ । इह खलु अत्तत्ताए
संवुडस्स अणगारस्स इरियासमियस्स भासासमियस्स एसणासमियस्स आयाणभण्ड-
मत्तनिक्खेवणासमियस्स उच्चारपासवणखेलसिंघाणजल्लपारिट्ठावणियासमियस्स मणस-
मियस्स वयसमियस्स कायसमियस्स मणगुत्तस्स वयगुत्तस्स कायगुत्तस्स गुत्तिन्दि-
यस्स गुत्तवम्भयारिस्स आउत्तं चिट्ठमाणस्स आउत्तं निसीयमाणस्स आउत्तं तुयट्ठमा-
णस्स आउत्तं भुज्जमाणस्स आउत्तं गच्छमाणस्स आउत्तं भांसमाणस्स आउत्तं वत्थं
पडिग्गहं कम्बलं पायपुच्छं गिण्हमाणस्स वा निक्खिक्खमाणस्स वा जाव चक्खु-
पम्हनिवायमवि अत्थि विमाया सुहुमा किरिया इरियावहिंया नाम कज्जइ । सा पढ-
मसमए वद्धा पुट्ठा त्रिइयसमए वेइया तइयसमए निज्जिण्णा सा वद्धा पुट्ठा उदीरिया
वेइया निज्जिण्णा सेयकाले अकम्मे यावि भवइ । एवं खलु तस्स तप्पत्तियं सावज्जं
ति आहिज्जइ, तेरसमे किरियट्ठाणे इरियावहिंए ति आहिज्जइ । से वेमि, जे य अइया
जे य पडुप्पन्ना जे य आगमिस्सा अरिहन्ता भगवन्ता सव्वे ते एयाइं चेव तेरस
किरियट्ठाणाइं भासिंसु वा भासेन्ति, वा भासिस्सन्ति वा पन्नविंसु वा पन्नवेन्ति वा
पन्नविस्सन्ति वा, एवं चेव तेरसमं किरियट्ठाणं सेविंसु वा सेवन्ति वा सेविस्सन्ति
वा ॥ १४ ॥ ६६४ ॥ अदुत्तरं च णं पुरिसविजयं विभज्जमाइक्खिस्सामि । इह खलु
नाणापन्नाणं नाणाछन्दाणं नाणासीलाणं नाणादिट्ठीणं नाणारुइणं नाणारम्भाणं
नाणाज्जवसाणसंजुत्ताणं नाणाविहपावसुयज्जयणं एवं भवइ । तं जहा-भोसं उप्पायं
सुविणं अन्तलिक्खं अङ्गं सरं लक्खणं वज्जणं इत्थिलक्खणं पुरिसलक्खणं हयलक्खणं
गयलक्खणं गोणलक्खणं मेण्डलक्खणं कुक्कुडलक्खणं तित्तिरलक्खणं वट्ठगलक्खणं
लावयलक्खणं चक्कलक्खणं छत्तलक्खणं चम्मलक्खणं दण्डलक्खणं असिलक्खणं
मणिलक्खणं कागिणिलक्खणं सुभगाकरं दुब्भगाकरं गब्भगाकरं मोहणकरं आहव्वणिं
पागसासणिं दव्वहोमं खत्तियविज्जं चन्दचरियं सूरचरियं सुक्कचरियं वहस्सइचरियं
उक्कापायं दिसादाहं मियच्चक्कं वायसपरिमण्डलं पंसुवुट्ठिं केसवुट्ठिं मंसवुट्ठिं सहिरवुट्ठिं
वेयालिं अद्दवेयालिं ओसोवणिं तालुग्घाडणिं सोवाणिं सोवारिं दामिलिं कालिज्जिं

गोरिं गन्धारिं ओवयणिं उप्पयणिं जम्भणिं थम्भणिं लेसणिं आमयकरणिं विसल्ल-
 करणिं पक्कमणिं अन्तद्धाणिं आयमिणिं, एवमाइयाओ विज्जाओ अन्नस्स हेउं
 पउज्जन्ति पाणस्स हेउं पउज्जन्ति वत्थस्स हेउं पउज्जन्ति लेणस्स हेउं पउज्जन्ति
 सयणस्स हेउं पउज्जन्ति, अन्नैसिं वा विरूवरूवाणं कामभोगाणं हेउं पउज्जन्ति ।
 तिरिच्छं ते विज्जं सेवन्ति, ते अणारिया विप्पडिवन्ना कालमासे कालं किच्चा अन्न-
 यराइं आसुरियाइं किब्बिसयाइं ठाणाइं उववत्तारो भवन्ति । तओ वि विप्पमुच्चमाणा
 भुज्जो एलमूययाए तमअन्धयाए पच्चायन्ति ॥ १५ ॥ ६६५ ॥ से एगइओ
 आयहेउं वा नायहेउं वा सयणहेउं वा अगारहेउं वा परिवारहेउं वा नायगं वा
 सहवासियं वा निस्साए अदुवा अणुगामिए १ अदुवा उवचरए २ अदुवा पडिपहिए
 ३ अदुवा संधिच्छेयए ४ अदुवा गण्ठिच्छेयए ५ अदुवा उरब्भिए ६ अदुवा
 सोवरिए ७ अदुवा वागुरिए ८ अदुवा साउणिए ९ अदुवा मच्छिए १० अदुवा
 गोघायए ११ अदुवा गोवालए १२ अदुवा सोवणिए १३ अदुवा सोवणियंतिए १४ ।
 एगइओ आणुगामियभावं पडिसंधाय तमेव अणुगामियाणुगामियं हन्ता छेत्ता भेत्ता
 लुम्पइत्ता विलुम्पइत्ता उद्वइत्ता आहारं आहारेइ, इति से महया पावेहिं कम्मेहिं
 अत्ताणं उवक्खाइत्ता भवइ । से एगइओ उवचरयभावं पडिसंधाय तमेव उवचरियं
 हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारेइ । इति से महया
 पावेहिं कम्मेहिं अत्ताणं उवक्खाइत्ता भवइ । से एगइओ पाडिपहियभावं पडिसंधाय
 तमेव पडिपहे ठिच्चा हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं
 आहारेइ, इति से महया पावेहिं कम्मेहिं अत्ताणं उवक्खाइत्ता भवइ । से एगइओ
 संधिच्छेदगभावं पडिसंधाय तमेव संधिं छेत्ता भेत्ता जाव इति से महया पावेहिं
 कम्मेहिं अत्ताणं उवक्खाइत्ता भवइ । से एगइओ गण्ठिच्छेदगभावं पडिसंधाय तमेव
 गण्ठिं छेत्ता भेत्ता जाव इति से महया पावेहिं कम्मेहिं अत्ताणं उवक्खाइत्ता भवइ ।
 से एगइओ उरब्भियभावं पडिसंधाय उरब्भं वा अन्नयरं वा तसं पाणं हन्ता जाव
 उवक्खाइत्ता भवइ । (एसो अभिलावो सन्वत्थ) से एगइओ सोयरियभावं पडि-
 संधाय महिसं वा अन्नयरं वा तसं पाणं हन्ता जाव उवक्खाइत्ता भवइ । से एगइओ
 वागुरियभावं पडिसंधाय मियं वा अन्नयरं वा तसं पाणं हन्ता जाव उवक्खाइत्ता
 भवइ । से एगइओ सउणियभावं पडिसंधाय सउणिं वा अन्नयरं वा तसं पाणं हन्ता
 जाव उवक्खाइत्ता भवइ । से एगइओ मच्छियभावं पडिसंधाय मच्छं वा अन्नयरं
 वा तसं पाणं हन्ता जाव उवक्खाइत्ता भवइ । से एगइओ गोघायभावं पडिसंधाय
 तमेव गोणं वा अन्नयरं वा तसं पाणं हन्ता जाव उवक्खाइत्ता भवइ । से एगइओ

गोवालंभावं पडिसंधाय तमेव गोवालं वा परिजविय परिजविय हन्ता जाव उव-
 क्खाइत्ता भवइ । से एगइओ सोवणियभावं पडिसंधाय तमेव सुणगं वा अन्नयरं
 चां तसं पाणं हन्ता जाव उवक्खाइत्ता भवइ । से एगइओ सोवणियन्तियभावं
 पडिसंधाय तमेव मणुस्सं वा अन्नयरं वा तसं पाणं हन्ता जाव आहारं आहारेइ
 इति से महया पावेहिं कम्मोहिं अत्ताणं उवक्खाइत्ता भवइ ॥ १६ ॥ ६६६ ॥
 से एगइओ परिसामज्जाओ उट्ठिता अहमेयं हणामि त्ति कट्ठु तित्तिरं वा वट्ठगं वा
 लावगं वा कवोयगं वा कविञ्जलं वा अन्नयरं वा तसं वा पाणं हन्ता जाव उवक्खा-
 इत्ता भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा
 सुराथालएणं गाहावईणं वा गाहावइपुत्ताणं वा सयमेव अगणिकाएणं सस्साइं ज्ञामेइ
 अन्नेण वि अगणिकाएणं सस्साइं ज्ञामावेइ अगणिकाएणं सस्साइं ज्ञामन्तं पि अन्नं
 समणुजाणइ, इति से महया पावकम्मोहिं अत्ताणं उवक्खाइत्ता भवइ । से एगइओ
 केणइ आयाणेणं विरुद्धे समाणे अदुवा खलदाणेणं अदुवा सुराथालएणं गाहावईणं वा
 गाहावइपुत्ताणं वा उट्ठाणं वा गोणाणं वा घोडगाणं वा गद्दमाणं वा सयमेव घूराओ
 कप्पेइ अन्नेण वि कप्पावेइ कप्पन्तं पि अन्नं समणुजाणइ, इति से महया जाव
 भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुरा-
 थालएणं गाहावईणं वा गाहावइपुत्ताणं वा उट्ठसालाओ वा गोणसालाओ वा घोड-
 गसालाओ वा गद्दभसालाओ वा कण्टकवोदियाए पडिपेहिता सयमेव अगणिकाएणं
 ज्ञामेइ अन्नेण वि ज्ञामावेइ ज्ञामन्तं पि अन्नं समणुजाणइ, इति से महया जाव
 भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुरा-
 थालएणं गाहावईणं वा गाहावइपुत्ताणं वा कुण्डलं वा मणिं वा मोत्तियं वा सयमेव
 अवहरइ अन्नेण वि अवहरावेइ अवहरन्तं पि अन्नं समणुजाणइ इति से महया जाव
 भवइ ॥ से एगइओ केणइ वि आयाणेणं विरुद्धे समाणे अदुवा खलदाणेणं अदुवा
 सुराथालएणं समणाणं वा माहणाणं वा छत्तगं वा दण्डगं वा भण्डगं वा मत्तगं वा
 लट्ठिं वा भिसिगं वा चेलगं वा चिलिर्मिलिगं वा चम्मयं वा छेयणं वा चम्मको-
 सियं वा सयमेव अवहरइ जाव समणुजाणइ, इति से महया जाव उवक्खाइत्ता
 भवइ ॥ से एगइओ नो वितिगिञ्छइ । तं जहा-गाहावईणं वा गाहावइपुत्ताणं वा
 सयमेव अगणिकाएणं ओसहीओ ज्ञामेइ जाव अन्नं पि ज्ञामन्तं समणुजाणइ, इति
 से महया जाव उवक्खाइत्ता भवइ । से एगइओ नो वितिगिञ्छइ, तं जहा-गाहा-
 वईणं वा गाहावइपुत्ताणं वा उट्ठाणं वा गोणाणं वा घोडगाणं वा गद्दमाणं वा सय-
 मेव घूराओ कप्पेइ अन्नेण वि कप्पावेइ अन्नं पि कप्पन्तं समणुजाणइ । से एगइओ

नो वितिगिञ्छइ, तं जहा-गाहावईण वा गाहावइपुत्ताण वा उट्टसालाओ वा जाव गद्भसालाओ वा कण्टकवोंदियाहिं पडिपेहिता सयमेव अगणिकाएणं ज्ञामेइ जाव समणुजाणइ । से एगइओ नो वितिगिञ्छइ, तं जहा-गाहावईण वा गाहावइपुत्ताण वा जाव मोत्तियं वा सयमेव अवहरइ जाव समणुजाणइ । से एगइओ नो वितिगि-
 ञ्छइ तं जहा-समणाण वा माहणाण वा छत्तगं वा दण्डगं वा जाव चम्मछेयणगं वा सयमेव अवहरइ जाव समणुजाणइ । इति से महया जाव-उवक्खाइत्ता भवइ । से एगइओ समणं वा माहणं वा दिस्सा नाणाविहेहिं पावकम्मैहिं अत्ताणं उवक्खा-
 इत्ता भवइ, अदुवा णं अच्छराए आफालित्ता भवइ, अदुवा णं फरुसं वदिता भवइ, कालेण वि से अणुपविट्ठस्स असणं वा पाणं वा जाव नो दवावेत्ता भवइ, जे इमे भवन्ति वोणमन्ता भारक्कन्ता अलसगा वसलगा किवणगा समणगा निउज्जमा वणगा पव्वयन्ति ते इणमेव जीवियं धिज्जीवियं संपडिबूहेन्ति, नाइ ते परलोगस्स अट्ठाए किंचि वि-सिलीसन्ति, ते दुक्खन्ति ते सोयन्ति ते जूरन्ति ते तिप्पन्ति ते पिट्ठन्ति ते परितप्पन्ति ते दुक्खणजूरणसोयणतिप्पणपिट्ठणपरितिप्पणवहबन्धणपरि-
 किलेसाओ अप्पडिविरया भवन्ति । ते महया आरम्भेण ते महया समारम्भेण ते महया आरम्भसमारम्भेण विरुवरुवेहिं पावकम्मकिच्चेहिं उरालाई माणुस्सगाई भोगभोगाई भुजित्तारो भवन्ति । तं जहा-अन्नं अन्नकाले पाणं पाणकाले वत्थं वत्थकाले लेणं लेणकाले सयणं सयणकाले सपुव्वावरं च णं ण्हाए कण्ठेमालाकडे आविद्धमणिसुवण्णे कप्पियमालामउली पडिबद्धसरीरे वग्घारियसोणिसुत्तगमल्लदाम-
 कलावे अहयवत्थपरिहिए चन्दणोक्खित्तगायसरीरे महइमहालियाए कूडागार-
 सालाए महइमहालयंसि सीहासणंसि इत्थीगुम्मसंपरिवुडे सव्वराइएणं जोइणा झियायमाणेणं महयाहयनट्ठगीयवाइयतन्तीतलतालतुडियघणमुइंगपडुप्पवाइयरवेणं उरालाई माणुस्सगाई भोगभोगाई भुजमाणे विहरइ । तस्स णं एगमवि आणवेमाणस्स जाव-चत्तारि-पच्च जणा अवुत्ता चेव अब्भुट्ठन्ति । भणह देवाणुप्पिया किं करेमो ? किं आहरेमो ? किं उवणेमो ? किं आचिट्ठामो ? किं भे हियं इच्छियं ? किं भे आसगस्स सयइ ? तमेव पासित्ता अणारिया एवं वयन्ति-
 देवे खलु अयं पुरिसे, देवसिणाए खलु अयं पुरिसे, देवजीवणिज्जे खलु अयं पुरिसे, अन्ने वि य णं उवजीवन्ति । तमेव पासित्ता आरिया वयन्ति-
 अभिकन्तकूरकम्मे खलु अयं पुरिसे अइधुए अइयायरक्खे दाहिणगामिए नेरइए कण्ठपक्खिए आगमिस्साणं दुल्लहवोहियाए यावि भविस्सइ । इच्चेयस्स ठाणस्स उट्ठिया वेगे अभिगिज्जन्ति अणुट्ठिया वेगे अभिगिज्जन्ति अभिज्जंझाउरो अभि-

गिज्झन्ति । एस ठाणे अणारिए अकेवले अप्पडिपुणो अणेयाउए असंसुद्धे असह-
 गत्तणे असिद्धिमग्गे अमुत्तिमग्गे अनिक्काणमग्गे अनिज्जाणमग्गे असव्वदुक्खपहीण-
 मग्गे एगन्तमिच्छे असाहु । एस खलु पढमस्स ठाणस्स अधम्मपक्खस्स विभङ्गे एव-
 माहिज्झइ ॥ १७ ॥ ६६७ ॥ अहावरे दोच्चस्स ठाणस्स धम्मपक्खस्स विभङ्गे एव-
 माहिज्झइ । इह खलु पाईणं वा पडीणं वा उदीणं वा दाहिणं वा सन्तेगइया मणुस्सा
 भवन्ति । तं जहा-आरिया वेगे अणारिया वेगे उच्चागोयां वेगे नीयागोया वेगे काय-
 मन्ता वेगे हस्समन्ता वेगे सुवण्णा वेगे दुवण्णा वेगे सुरुवा वेगे दुरुवा वेगे । तेसि
 च णं खेतवत्थूणि परिग्गाहियाइं भवन्ति, एसो आलावगो जहा पोण्डरीए तहा
 नेयव्वो, तेणेव अभिलावेण जाव सव्वोवसन्ता सव्वत्ताए परिनिव्वुडे ति वेमि ॥ एस
 ठाणे आरिए केवले जाव सव्वदुक्खप्पहीणमग्गे एगन्तसम्मो साहु । दोच्चस्स ठाणस्स
 धम्मपक्खस्स विभङ्गे एवमाहिज्झइ ॥ १८ ॥ ६६८ ॥ अहावरे तच्चस्स ठाणस्स मिस्सगस्स
 विभङ्गे एवमाहिज्झइ । जे इमे भवन्ति आरणिंया आवसहिया गामणियन्तिंया
 कण्हुईरहस्सिया जाव ते तओ विप्पमुच्चमाणा भुज्जो एल्लमूयाए तमूयत्ताए पच्चा-
 यन्ति । एस ठाणे अणारिए अकेवले जाव असव्वदुक्खपहीणमग्गे एगन्तमिच्छे
 असाहु । एस खलु तच्चस्स ठाणस्स मिस्सगस्स विभङ्गे एवमाहिज्झइ ॥ १९ ॥ ६६९ ॥
 अहावरे पढमस्स ठाणस्स अधम्मपक्खस्स विभङ्गे एवमाहिज्झइ । इह खलु
 पाईणं वा ४ सन्तेगइया मणुस्सा भवन्ति-गिहत्था महिच्छा महारम्भा महापरि-
 ग्गहा अधम्मिया अधम्माणुया अधम्मिट्ठा अधम्मक्खाई अधम्मपायजीविणो अध-
 म्मपलोई अधम्मपलज्जणा अधम्मसीलसमुदायारा अधम्मणेणं चेव विर्त्तिं कप्पेमाणा
 विहरन्ति । हण छिन्द भिन्द विगत्तगा लोहियपाणी चण्डा रुद्धा खुद्धा साहस्सिया
 उक्कुच्चणवच्चणमायानियडिकूडकवडसाइसंपओगवहुला दुस्सीला दुव्वया दुप्पडिया-
 णन्दा असाहु सव्वाओ पाणाइवायाओ अप्पडिविरयां जावजीवाए जाव सव्वाओ
 परिग्गहाओ अप्पडिविरया जावजीवाए सव्वाओ कोहाओ जाव मिच्छादंसणसल्लाओ
 अप्पडिविरया, सव्वाओ ण्हाणुम्महणवण्णगन्धविलेवणसद्दफरिसरसरुवगन्धमल्ला-
 लंकाराओ अप्पडिविरया जावजीवाए सव्वाओ सगडरहजागजुग्गगिह्मिथिल्लिसिया-
 संदमाणियासंयणासणजाणवाहणंभोगभोर्यणपवित्थुरविहीओ अप्पडिविरया जावजी-
 वाए सव्वाओ कयविकयमासद्धमासरुवगसंववहाराओ अप्पडिविरया, जावजीवाए,
 सव्वाओ हिरण्णसुवण्णधणधन्नमणिमोत्तियसंखसिलप्पवालाओ अप्पडिविरया जाव-
 जीवाए सव्वाओ कूडतुलकूडमाणाओ अप्पडिविरया जावजीवाए सव्वाओ आरम्भ-
 समारम्भाओ अप्पडिविरया जावजीवाए सव्वाओ करणकारावणाओ अप्पडिविरया

जावजीवाए सव्वाओ पयणपयावणाओ अप्पडिविरया जावजीवाए सव्वाओ
 कुट्टणपिट्ठणतज्जगताडणवहबन्धपरिकिलेसाओ अप्पडिविरया जावजीवाए । जे
 यावण्णे तहप्पगारा सावज्जा अबोहिया कम्मन्ता परपाणपरियावणकरा जे अणा-
 रिएहिं कज्जन्ति तओ अप्पडिविरया जावजीवाए । से जहानामए केइ पुरिसे
 कलममसूरतिलमुग्गमासनिप्फावकुलत्थआलिसन्दगपलिमन्थगमादिएहिं अयन्ते कूरे
 मिच्छादण्डं पउज्जन्ति, एवमेव तहप्पगारे पुरिसजाए तित्तिरवट्ठगलावगकवोयकविज्ज-
 लसियमहिसवराहगाहगोहकुम्मसिरिसिवमादिएहिं अयन्ते कूरे मिच्छादण्डं पउज्जन्ति
 जा वि य से बाहिरिया परिसा भवइ, तं जहा-दासे इ वा पेसे इ वा भयए इ वा
 भाइल्ले इ वा कम्मकरए इ वा भोगपुरिसे इ वा तेसिं पि य णं अन्नयरंसि अहाल-
 हुगंसि अवराहंसि सयमेव गरुयं दण्डं निवत्तेइ । तं जहा-इमं दण्डेह इमं मुण्डेह इमं
 तज्जेह इमं तालेह इमं अदुयबन्धणं करेह इमं नियलबन्धणं करेह इमं हड्डिबन्धणं
 करेह इमं चारगबन्धणं करेह इमं नियलजुयलसंकोचियमोडियं करेह इमं हत्थच्छिन्नयं
 करेह इमं पायच्छिन्नयं करेह इमं कण्णच्छिन्नयं करेह इमं नक्कओट्टसीसमुहच्छिन्नयं करेह
 वेंयगच्छहियं अङ्गच्छहियं पक्खाफोडियं करेह इमं नयणुप्पाडियं करेह इमं दंसणु-
 प्पाडियं वसणुप्पाडियं जिब्भुप्पाडियं ओलम्बियं करेह घसियं करेह घोलियं करेह
 सूलाइयं करेह सूलाभिन्नयं करेह खारवत्तियं करेह वज्जवत्तियं करेह सीहपुच्छियं
 करेह वसभपुच्छियं करेह दवग्गिदड्डयङ्गं कागणिमंसखावियङ्गं भत्तपाणनिरुद्धं
 इमं जावजीवं वहबन्धणं करेह इमं अन्नयरेण असुभेणं कुमारेणं मारेह । जा वि य
 से अब्भिन्तरिया परिसा भवइ, तं जहा-माया इ वा पिया इ वा भाया इ वा
 भगिणी इ वा भज्जा इ वा पुत्ता इ वा धूया इ वा सुण्हा इ वा, तेसिं पि य णं
 अन्नयरंसि अहालहुगंसि अवराहंसि सयमेव गरुयं दण्डं निवत्तेइ, सीओदगवियडंसि
 उच्छोलित्ता भवइ जहा मित्तदोसवत्तिए जाव अहिंए परंसि लोगंसि । ते दुक्खन्ति
 सोयन्ति जूरन्ति तिप्पन्ति पिट्ठन्ति परितप्पन्ति ते दुक्खणसोयणजूरणतिप्पणपिट्ठण-
 परितप्पणवहबन्धणपरिकिलेसाओ अप्पडिविरया भवन्ति । एवमेव ते इत्थिकामेहिं
 मुच्छिया गिद्धा गढिया अज्झोववन्ना जाव वासाइं चउपच्चमाइं छद्दसमाइं वा अप्प-
 यरो वा भुज्जयरो वा कालं भुज्जित्तु भोगभोगां पविइत्ता वेराययणां संचिणिता
 वहइं पावाइं कम्माइं उस्सन्नाइं संभारकडेण कम्मुणा से जहानामए अयगोले इ वा
 सेलगोले इ वा उदगंसि पक्खित्ते समाणे उदगयलमइवत्ता अहे धरणियलपइट्ठणे
 भवइ, एवमेव तहप्पगारे पुरिसजाए वज्जवहुले धूयवहुले पङ्कवहुले वेरवहुले अप्पत्तिय-
 वहुले दम्मवहुले नियडिवहुले साइवहुले अयसवहुले उस्सन्नतसपाणघाई कालमासे

कालं किञ्चा धरणियलमइवइता अहे नरंगयलपइट्ठाणे भवइ ॥ २० ॥ ६७० ॥ ते णं
 नरगा अन्तो वट्ठा बाहिं चउरंसा अहे खुरप्पसंठाणसंठिया निच्चन्धकारतमसा
 चवगयगहचन्दसूरनक्खत्तजोइसप्पहा मेदवसामंसरुहिरपूयपडलचिक्खिल्ललित्ता-
 गुलेवणयला असुई वीसा परमदुब्बिभगन्धा कण्हा अगणिवण्णाभा कक्खडफासा
 दुरहियासा असुभा नरगा असुभा नरएसु वेयणाओ ॥ नो चेव नरएसु नेरइया
 निहायन्ति वा पयलायन्ति वा सुइं वा रइं वा धिइं वा मइं वा उवलभन्ते । ते णं
 तत्थ उज्जलं विउलं पगाढं कडुयं कक्कसं चण्डं दुक्खं दुग्गं तिब्बं दुरहियासं नेरइया
 वेयणं पच्चणुभवमाणा विहरन्ति ॥ २१ ॥ ६७१ ॥ से जहानामए रुक्खे सिया
 पव्वयग्गे जाए मूले छिन्ने अग्गे गरुए जओ निणं जओ विसमं जओ दुग्गं तओ
 पवडइ, एवामेव तहप्पगारे पुरिसजाए गब्भाओ गब्भं जम्माओ जम्मं माराओ
 मारं नरगाओ नरगं दुक्खाओ दुक्खं दाहिणगामिए नेरइए कण्हपक्खिए आग-
 मिस्साणं दुल्लहबोहिए यावि भवइ । एस ठाणे अणारिए अकेवले जाव असव्वदुक्ख-
 पहीणमग्गे एगन्तमिच्छे असाहू । पढमस्स ठाणस्स अधम्मपक्खस्स विभङ्गे एव-
 माहिए ॥ २२ ॥ ६७२ ॥ अहावरे दोच्चस्स ठाणस्स धम्मपक्खस्स विभङ्गे एव-
 माहिज्जइ । इह खलु पाईणं वा ४ सन्तेगइया मणुस्सा भवन्ति । तं जहा-अणारम्भा
 अपरिग्गहा धम्मिया धम्माणुगा धम्मिट्ठा जाव धम्मेणं चेव वित्तिं कप्पेमाणा
 विहरन्ति, सुसीला सुव्वया सुप्पडियाणन्दा सुसाहू सव्वाओ पाणाइवायाओ पडि-
 विरया जावजीवाए जाव जे यावन्ने तहप्पगारा सावज्जा अवोहिया कम्मन्ता
 परपाणपरियावणकरा कज्जन्ति तओ वि पडिविरया जावजीवाए ॥ से जहानामए-
 अणगारा भगवन्तो इरियासमिया भासासमिया एसणासमिया आयाणभण्डमत्त-
 निक्खेवणसमिया उच्चारपासवणखेलसिंघाणजल्लपरिट्ठावणियासमिया मणसमिया वय-
 समिया कायसमिया मणगुत्ता वयगुत्ता कायगुत्ता गुत्ता गुत्तिन्दिया गुत्तवम्भयारी
 अकोहा अमाणा अमाया अलोभा सन्ता पसन्ता उवसन्ता परिनिव्वुडा अणासंवा
 अगगन्था छिन्नसोया निरुव्वेवा कंसपाइ व्व मुक्कतोया संखो इव निरज्जणा जीव इव
 अपडिहयगई गगणतलं पिव निरालम्बणा वाउरिव अपडिवद्धा सारदसलिलं व
 सुद्धहियया पुक्खरपत्तं व निरुव्वेवा कुम्मो इव गुत्तिन्दिया विहग इव विप्पमुक्का
 खग्गिविसाणं व एगजाया भारुण्डपक्खी व अप्पमत्ता कुज्जरो इव सोण्डीरा वसभो
 इव जायत्थोमा सीहो इव दुद्धरिसा मन्दरो इव अप्पकम्पा सागरो इव गम्भीरा
 चन्दो इव सोमलेसा सूर्रो इव दित्ततेया जच्चकच्चणगं व जायरूवा वसुंधरा इव
 सव्वफासविसहा सुहुयहुयासणो विय तेयसा जलन्ता । नत्थि णं तेसिं भगवन्ताणं

कथं वि पडिवन्धे भवइ । से पडिवन्धे चउव्विहे पन्नत्ते । तं जहा-अण्डए इ वा
 पोयए इ वा उग्गहे इ वा पग्गहे इ वा जं णं जं णं दिसं इच्छन्ति तं णं तं णं दिसं
 अपडिवद्धा सुइभूया लहुभूया अप्पगगन्था संजमेणं तवसा अप्पाणं भावेमाणा
 विहरन्ति ॥ तेसिं णं भगवन्ताणं इमा एयारुवा जायामायावित्ती होत्था । तं जहां-
 चउन्धे भत्ते छट्ठे भत्ते अट्ठमे भत्ते दसमे भत्ते दुवालसमे भत्ते चउदसमे भत्ते अद्ध-
 मासिए भत्ते मासिए भत्ते दोमासिए तिमासिए चाउम्मासिए पच्चमासिए छम्मासिए
 अदुत्तरं च णं उक्खित्तचरया निक्खित्तचरया उक्खित्तनिक्खित्तचरया अन्तचरगा
 पन्तचरगा ल्हचरगा समुदाणचरगा संसट्ठचरगा असंसट्ठचरगा तज्जायसंसट्ठचरगा
 दिट्ठलाभिया अदिट्ठलाभिया पुट्ठलाभिया अपुट्ठलाभिया भिक्खलाभिया अभिक्खला-
 भिया अजायचरगा उवनिहिया संखादत्तिया परिमियपिण्डवाइया सुद्धेसणिया अन्ता-
 हारा पन्ताहारा अरसाहारा विरसाहारा ल्हहाहारा तुच्छाहारा अन्तजीवी पन्तजीवी
 आयम्बिलिया पुरिमद्धिया निव्विगइया अमज्जमंसासिणो नो नियामरसभोई ठाणाइया
 पडिमाठाणाइया उक्कडुआसणिया नेसजिया वीरासणिया दण्डायइया लगडसाणो
 अप्पाउडा अगत्तया अकण्डुया अणिट्ठुहा (एवं जहोववाइए-) धुयकेसमंसुरोमनहा
 सव्वगायपडिकम्मविप्पमुक्का चिट्ठन्ति । ते णं एएणं विहारेणं विहरमाणा बहूई
 वासाईं सामन्नपरियागं पाउणन्ति २ बहुवहु आवाहंसि उप्पन्नंसि वा अणुप्पन्नंसि वा
 बहूईं भत्ताईं पच्चक्खन्ति पच्चक्खाइत्ता बहूईं भत्ताईं अणसणाए छेदेन्ति, अणसणाए
 छेदित्ता जस्सट्ठाए कीरइ थेरकप्पभावे जिणकप्पभावे मुण्डभावे अण्हाणभावे
 अदन्तवण्णे अछत्तए अगोवाहणए भूमिसेज्जां फलगसेज्जा कट्ठसेज्जा केसलोए बम्भ-
 चेरवासे परवरपवेसे लद्धावलद्धे माणावमाणणाओ हीलणाओ निन्दणाओ खिसणाओ
 गरहणाओ तज्जणाओ तालणाओ उच्चावया गामकण्टगा वावीसं परीसहोवसग्गा
 अहियासिज्जन्ति तमट्ठं आराहेन्ति तमट्ठं आराहिता चरमेहिं उरसासनिस्सासेहिं
 अणन्तं अणुत्तरं निव्वाघायं निरावरणं कसिणं पडिपुण्णं केवलवरणाणदंसणं समु-
 प्पादेन्ति, समुप्पाडित्ता तओ पच्छा सिज्जन्ति वुज्जन्ति मुच्चन्ति परिणिव्वायन्ति
 सव्वदुक्खाणं अन्तं करन्ति । एगच्चाए पुण एगे भयन्तारो भवन्ति, अवरे पुण
 पुव्वकम्मावसेसेणं कालमासे कालं किच्चा अजयरेसु देवलोएसु देवताए उववत्तारो
 भवन्ति । तं जहा-महद्धिएसु महज्जुइएसु महापरक्कमेसु महाजसेसु महाबलेसु महाणु-
 भावेसु महामुक्खेसु । ते णं तत्थ देवा भवन्ति महद्धिया महज्जुइया जाव महासुक्खा
 हारविराइयवच्छा कडगतुडियथम्भियभुया अज्जयकुण्डलमट्ठगण्डयलकण्णपीढधारी
 विचित्तहत्थाभरणा विचित्तमालामउलिमउडा कल्लाणगन्धपवरवत्थपरिहिया कल्लाणग-

पवरमल्लणुलेवणधरा भासुरवोदी पलम्बवणमालाधरा दिव्वेणं रुवेणं दिव्वेणं वण्णेणं
 दिव्वेणं गन्धेणं दिव्वेणं फासेणं दिव्वेणं संचाएणं दिव्वेणं संठाणेणं दिव्वाए इड्डीए
 दिव्वाए जुईए दिव्वाए पभाए दिव्वाए छायाए दिव्वाए अच्चाए दिव्वेणं तेएणं
 दिव्वाए लेसाए दस दिसाओ उज्जोवेमाणा पभासेमाणा गइक्कल्लाणा ठिइक्कल्लाणा
 आगमेसिभइया यावि भवन्ति । एस ठाणे आरिए जाव सव्वदुक्खपहीणमग्गे एग-
 न्तसम्मं सुसाहू । दोच्चस्स ठाणस्स धम्मपक्खस्स विभङ्गे एवमाहिण्ण ॥ २३ ॥ ६७३ ॥
 अहावरे तच्चस्स ठाणस्स मीसगस्सविभङ्गे एवमाहिज्जइ । इह खलु पाईणं वा ४
 सन्तेगइया मणुस्सा भवन्ति । तं जहां-अप्पिच्छा अप्पारम्भा अप्पपरिग्गहा
 धम्मिया धम्माणुया जाव धम्मेणं चेव वित्तिं कप्पेमाणा विहरन्ति सुसीला सुव्वया
 सुप्पडियाणन्दा साहू एगच्चाओ पाणाइवायाओ पडिविरया जावजीवाए एगच्चाओ
 अप्पडिविरया जाव जे यावन्ते तहप्पगारा सावज्जा अवोहिया कम्मन्ता परपाणपरि-
 तावणकरा कज्जन्ति तओ वि एगच्चाओ अप्पडिविरया । से जहानामए समणोवासंगा
 भवन्ति अभिगयजीवाजीवा उवलद्धपुण्णपावा आसवसंवरवेयणानिज्जराकिरियाहिग-
 रणबन्धमोक्खकूसला असहेज्जदेवासुरनागसुव्वणजक्खरक्खसकिंनरकिंपुरिसगसल्लग-
 न्धव्वमहोरगाइएहिं देवगणेहिं निग्गन्याओ पावयणाओ अणंइक्कमणिज्जा, इणमेव
 निग्गन्थे पावयणे निस्संकिया निक्कंखिया निव्विइग्गिच्छा लद्धट्ठा गहिंयट्ठा पुच्छियट्ठा
 विणिच्छियट्ठा अभिगयट्ठा अट्ठिमिज्जपेम्माणुरागरत्ता । अयमाउसो निग्गन्थे पावयणे
 अट्ठे अयं परमट्ठे सेसे अणट्ठे उतियफलिहा अवंगुयंदुवाराअच्चियत्तन्तेउरपरघरपवेसा
 चाउइसट्ठमुदिट्ठपुण्णिमासिणीसु पडिपुण्णं पोसहं सम्मं अणुपालेमाणा समणे निग्गन्थे
 फासुंएसणिज्जेणं असणपाणखाइमसाइमेणं वत्थेपडिग्गहकम्बलपायपुञ्छणेणं ओसह-
 भेसंज्जेणं पीठफलगसेज्जासन्थारएणं पडिलभेमाणा बहूहिं सीलव्वयगुणवेरमणपच्च-
 क्खाणपोसहोववासेहिं अहापरिग्गहिण्णं तवोकम्मंहिं अप्पाणं भावेमाणा विहरन्ति ॥
 ते णं एयारूवेणं विहारेणं विहरमाणा बहूइं वासाइं समणोवासगपरियागं पाउणंति
 पाउणित्ता आवाहंसि उप्पणंसि वा, अणुप्पणंसि वा बहूइं भत्ताइं अणसणाए पच्च-
 क्खाएन्ति बहूइं भत्ताइं अणसणाए पच्चक्खाएत्ता बहूइं भत्ताइं अणसणाए छेदेन्ति
 बहूइं भत्ताइं अणसणाए छेइत्ता आलोइयपडिक्कंता समाहिपत्ता कालमासे कालं किच्चा
 अन्नयरेसु देवलोएसु देवताए उववत्तारो भवंति, तंजहा-महद्धिएसु महज्जुइएसु जाव
 महासोक्खेसु सेसं तहेव जाव एसट्ठाणे आयरिए जाव एगंतसम्मं साहू तच्चस्स
 ठाणस्स मीसगस्स विभंगे एवमाहिण्ण ॥ २४ ॥ ६७४ ॥ अविरइं पडुच्च वाले आहि-
 ज्जइ विरइं पडुच्च पंडिए आहिज्जइ विरयाविरइं पडुच्च वालपंडिए आहिज्जइ, तत्थं

जा सा सव्वओ अविरइ एसठाणे आरंभठाणे अणारिए जाव असव्वदुक्खप्पहीणमग्गे
 एगंतमिच्छे असाहू, तत्थणं जा सा सव्वओ विरइ एसठाणे अणारंभठाणे आरिए
 जाव सव्वदुक्खप्पहीणमग्गे एगंतसम्मि साहू, तत्थणं जा सा सव्वओ विरयाविरइ
 एसठाणे आरंभणोरंआभठाणे एसठाणे आरिए जाव सव्वदुक्खप्पहीणमग्गे एगंतसम्मि
 साहू ॥ २५ ॥ ६७५ ॥ एवमेव समणुगम्ममाणा इमेहिं चेव दोहिं ठाणेहिं समोअ-
 रंति, तंजहा-धम्मि चेव अधम्मि चेव, उवसंते चेव अणुवसंते चेव, तत्थणं जे से
 पढमठाणस्स अधम्मपक्खस्स विभंगे एवमाहिए तस्सणं इमाइं तिन्नि तेवठाइं पावा-
 दुयसयाइं भवंतीति मक्खायाइं, तंजहा-किरियावाईणं अकिरियावाईणं अन्नाणियवा-
 ईणं वेणइयवाईणं तेवि परिनिव्वाणमाहंसु तेवि परिमोक्खमाहंसु तेवि लवंति सावगा
 तेवि लवंति सावइत्तारो ॥ २६ ॥ ६७६ ॥ ते सव्वे पावाउया आइगरा धम्माणं
 णाणापन्ना णाणाछंदा णाणासीला णाणादिट्ठी णाणारुई णाणारंभा णाणाज्झवसाण-
 संजुता एगं सहं मंडलिवंधं किच्चा सव्वे एगओ चिट्ठंति ॥ २७ ॥ ६७७ ॥ पुरिसेय
 सागणियाणं इंगालाणं पाइं बहुपडिपुन्नं अओमएणं संडासएणं गहाय ते सव्वे
 पावाउए आइगरा धम्माणं णाणापन्ना जाव णाणाज्झवसाणसंजुत्ते एवं वयासी-हंभो
 पावाउया आइगरा धम्माणं णाणापन्ना जाव णाणाज्झवसाणसंजुत्ता इमं ताव तुब्भे
 सागणियाणं इंगालाणं पाइं बहुपडिपुन्नं गहाय मुहुत्तयं २ पाणिणा धरेह णो बहुसंडा-
 सगं संसारियं कुज्जा, णो बहुअग्गियंभणियं कुज्जा णो बहु साहम्मियवेयावडियं कुज्जा
 णो बहु परधम्मियवेयावडियं कुज्जा, उज्जुया णियागपडिवन्ना अमायं कुव्वमाणा पाणिं
 पसारेह इतिवुच्चा से पुरिसे तेसिं पावादुयाणं तं सागणियाणं इंगालाणं पाइं बहुप-
 डिपुन्नं अउमएणं संडासएणं गहाय पाणिंसु णिसिरति तएणं ते पावादुया आइगरा
 धम्माणं णाणापन्ना जाव णाणाज्झवसाणसंजुत्ता पाणिं पडिसाहरंति तएणं से पुरिसे
 ते सव्वे पावाउए आइगरे धम्माणं जाव णाणाज्झवसाणसंजुत्ता एवं वयासी हंभो !
 पावादुया आइगरा धम्माणं णाणापन्ना जाव णाणाज्झवसाणसंजुत्ता कम्हाणं तुब्भे
 पाणिं पडिसाहरह पाणिं णो डहिज्जा, दड्ढे किं भविस्सइ दुक्खं दुक्खं ति मण्णमाणा
 पडिसाहरह एस तुला एसप्पमाणे एस समोसरणे पत्तेयं तुला पत्तेयं पमाणे पत्तेयं
 समोसरणे तत्थणं जे ते समणा माहणा एवमाइक्खंति, जाव परुवेंति सव्वे पाणा
 जाव सत्ता हंतव्वा अज्जावेयव्वा परिघेतव्वा परियावेयव्वा किलामेयव्वा उद्देवेयव्वा
 ते आगंतु छेयाए ते आगंतु भेयाए जाव ते आगंतु जाइजरामरणजोणिजम्मणसं-
 सारपुणव्भवगव्भवासभवपवंचकलंकलीभागिणो भविस्संति, ते बहूणं दंडणाणं बहूणं
 मुंडणाणं तज्जगाणं तालणाणं अंदुवंधणाणं जाव धोलणाणं माइमरणाणं पिइमरणाणं

भाइमरणाणं भगिणीमरणाणं भज्जापुत्तधूयासुण्हामरणाणं दारिद्राणं दोहग्गाणं अप्पिय-
 संवासाणं पियविप्पओगाणं बहूणं दुक्खदोमणस्साणं आभागिणो भविस्सन्ति अणादियं
 च णं अणवयग्गं दीहमद्धं चाउरंतसंसारकंतारं भुज्जो भुज्जो अणुपरियट्ठिस्सन्ति ते णो
 सिज्झिस्सन्ति णो वुज्झिस्सन्ति जाव णो सव्वदुक्खाणमंतं करिस्सन्ति एस तुला एस
 पमाणे एस समोसरणे पत्तेयं तुला पत्तेयं पमाणे पत्तेयं समोसरणे । तत्थ णं जे ते
 समणा माहणा एवमाइक्खन्ति जाव परूवेन्ति । सव्वे पाणा सव्वे भूया सव्वे जीवा
 सव्वे सत्ता न हन्तव्वा न अज्जावेयव्वा न परिधेयव्वा न उद्देयव्वा ते नो आग-
 न्तुच्छेयाए ते नो आगन्तुभेयाए जाव जाइजरामरणजोणिजम्मणसंसारपुणब्भवग-
 ब्भवासभवपवंचकलंकलीभागिणो भविस्सन्ति, जाव अणाइयं च णं अणवयग्गं
 दीहमद्धं चाउरन्तसंसारकन्तारं भुज्जो भुज्जो नो अणुपरियट्ठिस्सन्ति, ते सिज्झिस्सन्ति
 जाव सव्वदुक्खाणं अन्तं करिस्सन्ति ॥ २८ ॥ ६७८ ॥ इच्चेएहिं बारसहिं किरिया-
 ठाणेहिं वट्ठमाणा जीवा नो सिज्झिस्सु नो वुज्झिस्सु नो मुच्चिस्सु नो परिणिव्वाइंसु जाव
 नो सव्वदुक्खाणं अन्तं करेसु वा नो करेन्ति वा नो करिस्सन्ति वा । एयंसि चेव
 तेरसमे किरियाठाणे वट्ठमाणा जीवा सिज्झिस्सु वुज्झिस्सु मुच्चिस्सु परिणिव्वाइंसु जाव
 सव्वदुक्खाणं अंतं करेसु वा करेन्ति वा करिस्सन्ति वा । एवं से भिक्खू आयट्ठी आय-
 हिए आयगुत्ते आयजोगे आयपरक्कमे आयरक्खिए आयाणुकम्पए आयणिप्फेडए
 आयाणमेव पडिसाहरेज्जासि त्ति वेमि किरियाट्ठाणज्झयणं बिइयं ॥ २९ ॥ ६७९ ॥

आहारपरिन्नज्झयणे तइये

सुयं मे आउसं ! तेणं भगवया एवमक्खायं । इह खलु आहारपरिन्ना नामज्झयणे
 तस्स णं अयमट्ठे । इह खलु पाईणं वा ४ सव्वओ सव्वावन्ति य णं लोगंसि चत्तारि
 बीयकाया एवमाहिज्जन्ति । तं जहा-अग्गबीया मूलबीया पोरबीया खंधवीया । तेसिं
 च णं अहाबीएणं अहावगासेणं इहेगइया सत्ता पुढवीजोणिया पुढवीसंभवा पुढवी-
 वुक्कमा तज्जोणिया तस्संभवा तदुवक्कमा कम्मोवगा कम्मनियणेणं तत्थवुक्कमा नाणा-
 विहजोणियासु पुढवीसु रुक्खत्ताए विउट्ठन्ति ॥ ते जीवा तेसिं नाणाविहजोणियाणं
 पुढवीणं सिणेहमाहारेंति । ते जीवा आहारेंति पुढवीसरीरं आउसरीरं तेउसरीरं
 वाउसरीरं वणस्सइसरीरं । नाणाविहाणं तसथावराणं पाणाणं सरीरं अचित्तं कुव्वन्ति
 परिविद्धत्थं । तं सरीरं पुव्वाहारियं तयाहारियं विपरिणयं सारुवियकडं संतं । अवरे
 वि य णं तेसिं पुढविजोणियाणं रुक्खाणं सरीरा नाणावण्णा नाणागंधा नाणारसा

नाणाफासा नाणासंठाणसंठिया नाणाविहसरीरपुग्गलविउव्विया ते जीवा कम्मोव-
 वज्जगा भवन्तीति मक्खायं ॥ १ ॥ ६८० ॥ अहावरं पुरक्खायं इहेगइया सत्ता रुक्ख-
 जोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्म-
 नियाणेणं तत्थवुक्कमा पुढवीजोणिएहिं रुक्खेहिं रुक्खत्ताए विउट्ठंति । ते जीवा तेसि
 पुढवीजोणियाणं रुक्खाणं सिणेहमाहारेंति, ते जीवा आहारेंति पुढवीसरीरं आउते-
 उवाउवणस्सइसरीरं नाणाविहाणं तसथावराणं पाणाणं सरीरं अचित्तं कुव्वंति परिवि-
 द्धत्थं । तं सरीरं पुव्वाहारियं तयाहारियं विप्परिणामियं सारुवियकडं सन्तं । अवरे
 वि य णं तेसिं रुक्खजोणियाणं रुक्खाणं सरीरा नाणावण्णा नाणागन्धा नाणारसा
 नाणाफासा नाणासंठाणसंठिया नाणाविहसरीरपुग्गलविउव्विया ते जीवा कम्मोव-
 वज्जगा भवन्तीति मक्खायं ॥ २ ॥ ६८१ ॥ अहावरं पुरक्खायं इहेगइया सत्ता
 रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा
 कम्मणियाणेणं तत्थवुक्कमा रुक्खजोणिएसु रुक्खत्ताए विउट्ठंति, ते जीवा तेसिं रुक्ख-
 जोणियाणं रुक्खाणं सिणेहमाहारेंति ते जीवा आहारेंति, पुढवीसरीरं आउतेउवा-
 उवणस्सइसरीरं तसथावराणं पाणाणं सरीरं अचित्तं कुव्वंति परिविद्धत्थं तं सरीरं
 पुव्वाहारियं तयाहारियं विपरिणामियं सारुवियकडं संतं अवरेवि य णं तेसिं रुक्ख-
 जोणियाणं रुक्खाणं सरीरा नाणावण्णा जाव ते जीवा कम्मोववज्जगा भवंति त्ति
 मक्खायं ॥ ३ ॥ ६८२ ॥ अहावरं पुरक्खायं इहेगइया सत्ता रुक्खजोणिया रुक्ख-
 संभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थ-
 वुक्कमा रुक्खजोणिएसु रुक्खेसु मूलत्ताए कंदत्ताए, खंधत्ताए तयत्ताए सालत्ताए पवा-
 लत्ताए पत्तत्ताए पुप्फत्ताए फलत्ताए बीयत्ताए विउट्ठंति ते जीवा तेसिं रुक्खजो-
 णियाणं रुक्खाणं सिणेहमाहारेंति ते जीवा आहारेंति पुढवीसरीरं आउतेउवाउ-
 वणस्सइं नाणाविहाणं तसथावराणं पाणाणं सरीरं अचित्तं कुव्वंति परिविद्धत्थं तं
 सरीरं जाव सारुवियकडं संतं अवरेवियणं तेसिं रुक्खजोणियाणं मूलाणं कंदाणं
 खंधाणं तयाणं सालाणं पवालाणं जाव बीयाणं सरीरा नाणावण्णा नाणागंधा जाव
 नाणाविहसरीरपुग्गलविउव्विया ते जीवा कम्मोववज्जगा भवंति त्ति मक्खायं
 ॥ ४ ॥ ६८३ ॥ अहावरं पुरक्खायं इहेगइया सत्ता रुक्खजोणिया रुक्खसंभवा
 रुक्खवुक्कमा तज्जोणिया तस्संभवा तदुवक्कमा कम्मोववज्जगा कम्मनियाणेणं तत्थवुक्कमा
 रुक्खजोणिएहिं रुक्खेहिं अज्जारोहत्ताए विउट्ठंति ते जीवा तेसिं रुक्खजोणियाणं
 रुक्खाणं सिणेहमाहारेंति ते जीवा आहारेंति पुढवीसरीरं जाव सारुवियकडं संतं
 अवरेवि य णं तेसिं रुक्खजोणियाणं अज्जारुहाणं सरीरा नाणावण्णा जाव मक्खायं

॥ ५ ॥ ६८४ ॥ अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्मनियानेणं तत्थ वुक्कमा रुक्खजोणिएसु अज्झारोहेसु अज्झारोहत्ताए विउट्ठंति ते जीवा तेसिं रुक्खजोणियाणं अज्झारोहाणं सिणेहमाहारेंति ते जीवा आहारेंति पुढवीसरीरं जाव सारुवियकडं संतं अवरेवि य णं तेसिं अज्झारोहजोणियाणं अज्झारोहाणं सरीरा णाणावण्णा जावमक्खायं ॥ ६ ॥ ६८५ ॥ अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्मनियानेणं तत्थ वुक्कमा अज्झारोहजोणिएसु अज्झारोहत्ताए विउट्ठंति ते जीवा तेसिं अज्झारोहजोणियाणं अज्झारोहाणं सिणेहमाहारेंति ते जीवा आहारेंति-पुढविसरीरं आउसरीरं जाव सारुवियकडं संतं अवरेवि य णं तेसिं अज्झारोहजोणियाणं अज्झारोहाणं सरीरा णाणावण्णा जावमक्खायं ॥ ७ ॥ ६८६ ॥ अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्मनियानेणं तत्थवुक्कमा अज्झारोहजोणिएसु अज्झारोहेसु मूलत्ताए जाव बीयत्ताए विउट्ठंति ते जीवा तेसिं अज्झारोहजोणियाणं अज्झारोहाणं सिणेहमाहारेंति जाव अवरेवि य णं तेसिं अज्झारोहजोणियाणं मूलानं जाव बीयानं सरीरा णाणावण्णा जावमक्खायं ॥ ८ ॥ ६८७ ॥ अहावरं पुरक्खायं इहेगइया सत्ता पुढविजोणिया पुढविसंभवा जाव णाणाविहजोणियासु पुढवीसु तणत्ताए विउट्ठंति ते जीवा तेसिं णाणाविहजोणियाणं पुढवीणं सिणेहमाहारेंति जाव ते जीवा कम्मोववच्चा भवंति त्ति मक्खायं-एवं पुढविजोणिएसु तणेसु तणत्ताए विउट्ठंति जाव मक्खायं-एवं तणजोणिएसु तणेसु तणत्ताए विउट्ठंति तणजोणियं तणसरीरं च आहारेंति, जावमक्खायं-एवं तणजोणिएसु तणेसु मूलत्ताए जाव बीयत्ताए विउट्ठंति ते जीवा जाव एवमक्खायं-एवं ओसहीणं वि चत्तारि आलावगा-एवं हरियाणवि चत्तारि आलावगा-॥ ९-१० ॥ ६८८-६८९ ॥ अहावरं पुरक्खायं इहेगइया सत्ता पुढविजोणिया पुढविसंभवा जाव कम्मनियानेणं तत्थवुक्कमा नाणाविहजोणियासु पुढवीसु आयत्ताए वायत्ताए कायत्ताए कूहणत्ताए कन्दुकत्ताए उव्वेहणियत्ताए निव्वेहणियत्ताए सछत्ताए छत्तगत्ताए वासाणियत्ताए कूरत्ताए विउट्ठन्ति । ते जीवा तेसिं नाणाविहजोणियाणं पुढवीणं सिणेहमाहारन्ति । ते वि जीवा आहारन्ति पुढविसरीरं जाव सन्तं । अवरे वि य णं तेसिं पुढविजोणियाणं आयत्ताणं जाव कूराणं सरीरा नाणावण्णा जाव मक्खायं । एगो चेव आलावगो सेसा तिण्णि नत्थि । अहावरं पुरक्खायं इहेगइया सत्ता उदगजोणिया उदगसंभवा जाव कम्मनियानेणं तत्थवुक्कमा नाणाविहजोणिएसु उदएसु रुक्खत्ताए विउट्ठन्ति । ते जीवा तेसिं नाणाविहजोणियाणं

उदगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि य णं तेसि उदगजोणियाणं रुक्खाणं सरीरा नाणावण्णा जाव मक्खायं । जहा पुढविजोणियाणं रुक्खाणं चत्तारि गमा अज्झारुहाण वि तहेव, तणाणं ओसहीणं हरियाणं चत्तारि आलावगा भाणियव्वा एक्केके, अहावरं पुरक्खायं इहेगइया सत्ता उदगजोणिया उदगसम्भवा जाव कम्मनियाणेणं तत्थवुक्कमा नाणाविहजोणिएसु उदएसु उदगत्ताए अवगत्ताए पणगत्ताए सेवालत्ताए कलम्बुगत्ताए हडत्ताए कसेरुगत्ताए कच्छभाणियत्ताए उप्पलत्ताए पउमत्ताए कुमुयत्ताए नल्लिणत्ताए सुभगत्ताए सोगन्धियत्ताए पोण्डरीयमहापोण्डरीयत्ताए सयपत्तत्ताए सहस्सपत्तत्ताए एवं कल्हारकोकणयत्ताए अरविन्दत्ताए तामरसत्ताए भिसभिसमुणालपुक्खलत्ताए पुक्खलच्छिभगत्ताए विउट्टन्ति । ते जीवा तेसि नाणाविहजोणियाणं उदगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि य णं तेसि उदगजोणियाणं उदगाणं जाव पुक्खलच्छिभगाणं सरीरा नाणावण्णा जाव मक्खायं । एगो चैव आलावगो ॥ ११ ॥ ६९० ॥ अहावरं पुरक्खायं इहेगइया सत्ता तेसि चैव पुढवीजोणिएहिं रुक्खेहि रुक्खजोणिएहिं रुक्खेहि रुक्खजोणिएहिं मूलेहिं जाव बीएहिं, रुक्खजोणिएहि अज्जारोहेहिं अज्जारोहजोणिएहिं अज्जारोहेहिं अज्जारोहजोणिएहिं मूलेहिं जाव बीएहिं, पुढविजोणिएहि तणेहिं तणजोणिएहिं तणेहि तणजोणिएहिं मूलेहिं जाव बीएहिं । एवं ओसहीहि वि तिण्णि आलावगा एवं हरिएहि वि तिण्णि आलावगा । पुढविजोणिएहि वि आएहिं काएहिं जाव कूरेहिं उदगजोणिएहि रुक्खेहिं रुक्खजोणिएहिं रुक्खेहिं रुक्खजोणिएहिं मूलेहिं जाव बीएहिं एवं अज्जारोहेहि वि तिण्णि । तणेहिं पि तिण्णि आलावगा । ओसहीहिं पि तिण्णि, हरिएहिं पि तिण्णि, उदगजोणिएहिं, उदएसुं अवएसुं जाव पुक्खलच्छिभएसुं तसपाणत्ताए विउट्टन्ति ॥ ते जीवा तेसि पुढवीजोणियाणं उदगजोणियाणं रुक्खजोणियाणं अज्जारोहजोणियाणं तणजोणियाणं ओसहीजोणियाणं हरियजोणियाणं रुक्खाणं अज्जारोहाणं तणाणं ओसहीणं हरियाणं मूलाणं जाव बीयाणं आयाणं कायाणं जाव कुरवाणं [कूराणं] उदगाणं अवगाणं जाव पुक्खलच्छिभगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि य णं तेसि रुक्खजोणियाणं अज्जारोहजोणियाणं तणजोणियाणं ओसहीजोणियाणं हरियजोणियाणं मूलजोणियाणं कन्दजोणियाणं जाव बीयजोणियाणं आयजोणियाणं कायजोणियाणं जाव कूरजोणियाणं उदगजोणियाणं अवगजोणियाणं जाव पुक्खलच्छिभगजोणियाणं तसपाणाणं सरीरा नाणावण्णा जाव मक्खायं ॥ १२ ॥ ६९१ ॥ अहावरं पुरक्खायं नाणाविहाणं मणुस्साणं । तं जहा-कम्मभूम-

गाणं अकम्मभूमगाणं अन्तरदीवगाणं आरियाणं मिलक्खुयाणं । तेसिं च णं अहा-
 वीएणं अहावगासेणं इत्थीए पुरिसस्स य कम्मकडाए जोणिए एत्थ णं मेहुणवत्तिआए
 (व) नामं संजोगे समुप्पज्जइ । ते दुहओ वि सिणेहं संचिणन्ति । तत्थ णं जीवा इत्थि-
 ताए पुरिसत्ताए नपुंसगत्ताए विउट्ठन्ति, ते जीवा माओउयं पिउसुक्कं तं तदुभयं संसट्ठं
 कल्लसं किव्विसं तं पढमत्ताए आहारमाहारेंति तओ पच्छा जं से माया णाणाविहाओ
 रसविहीओ आहारमाहारेंति तओ एगदेसेणं ओयमाहारेंति अणुपुव्वेण बुद्धा पलिपाग-
 मणुपवन्ना तओ कायाओ अभिनिवट्टमाणा इत्थि वेगया जणयंति पुरिसं वेगया जण-
 यंति, णपुंसगं वेगया जणयंति, ते जीवा डहरा समाणा माउक्खीरं सप्पि आहारेंति
 आणुपुव्वेणं बुद्धा ओयणं कुम्मासं तसथावरे य पाणे ते जीवा आहारेंति पुढविसरीरं
 जाव साहवियकडं संतं अवरेवि य णं तेसिं णाणाविहाणं मणुस्सगाणं कम्मभूमगाणं
 अकम्मभूमगाणं अन्तरदीवगाणं आरियाणं मिलक्खूणं सरीरा णाणावण्णा भवंति त्ति
 मक्खायं ॥ ६९२ ॥ अहावरं पुरक्खायं णाणाविहाणं जलचराणं पंचिंदियतिरिक्ख-
 जोणियाणं, तंजहा-मच्छाणं जाव सुंसुमाराणं तेसिं च णं अहावीएणं अहावगासेणं
 इत्थीए पुरिसस्स य कम्मकडा तहेव जाव तओ पच्छा एगदेसेणं ओयमाहारेंति
 आणुपुव्वेणं बुद्धा पलिपागमणुपवन्ना तओ कायाओ अभिनिवट्टमाणा अंडं वेगया
 जणयंति पोयं वेगया जणयंति, से अडे उब्भिज्जमाणे इत्थि वेगया जणयंति, पुरिसं
 वेगया जणयंति, णपुंसगं वेगया जणयंति, ते जीवा डहरा समाणा आउसिणेहमा-
 हारेंति, आणुपुव्वेणं बुद्धा वणस्सइकायं तसथावरे य पाणे ते जीवा आहारेंति
 पुढविसरीरं जाव संतं अवरेवि य णं तेसिं णाणाविहाणं जलचरपंचिंदियतिरिक्ख-
 जोणियाणं मच्छाणं सुंसुमाराणं सरीरा णाणावण्णा जावमक्खायं ॥ ६९३ ॥ अहावरं
 पुरक्खायं णाणाविहाणं चउप्पयथलयरपंचिंदियतिरिक्खजोणियाणं तंजहा एगखुराणं
 दुखुराणं गंडीपदाणं सणप्पयाणं तेसिं च णं अहावीएणं अहावगासेणं इत्थिपुरिसस्स य
 कम्म जाव मेहुणवत्तिए णामं संजोगे समुप्पज्जइ ते दुहओ सिणेहं संचिणंति तत्थणं
 जीवा इत्थिताए पुरिसत्ताए जाव विउट्ठंति ते जीवा माओउयं पिउसुक्कं एवं जहा
 माणुस्साणं इत्थि वेगया जणयंति पुरिसंपि नपुंसगंपि ते जीवा डहरा समाणा
 माउक्खीरं सप्पि आहारेंति आणुपुव्वेणं बुद्धा वणस्सइकायं तसथावरे य पाणे ते
 जीवा आहारेंति पुढविसरीरं जाव संतं अवरेवि य णं तेसिं णाणाविहाणं चउप्प-
 यथलयरपंचिंदियतिरिक्खजोणियाणं एगखुराणं जाव सणप्पयाणं सरीरा णाणावण्णा
 जावमक्खायं ॥ ६९४ ॥ अहावरं पुरक्खायं णाणाविहाणं उरपरिसप्पथलयरपंचि-
 दियतिरिक्खजोणियाणं तंजहा-अहीणं अयगराणं आसालियाणं महोरगाणं तेसिं च

णं अहावीएणं अहावगासेणं इत्थीए पुरिसस्स जाव एत्थणं मेहुणे एवं तं चेव नाणत्तं
अंडं वेगइया जणयंति पोयं वेगइया जणयंति से अंडे उब्भिज्जमाणे इत्थि वेगइया
जणयंति पुरिसंपि णपुंसगंपि, ते जीवा डहरा समाणा चाउकायमाहारेंति आणुपु-
व्वेणं बुद्धा वणस्सइकायं तसथावरपाणे ते जीवा आहारेंति पुढविसरीरं जाव संतं
अवरेवि य णं तेसिं णाणाविहाणं उरपरिसप्पथलयरपंचिदियतिरिक्ख० अहीणं जाव
महोरगाणं सरीरा णाणावण्णा णाणागंधा जावमक्खायं ॥ ६९५ ॥ अहावरं पुर-
क्खायं णाणाविहाणं भुयपरिसप्पथलयरपंचिदियतिरिक्खजोणियाणं, तंजहा—गोहाणं
नउलाणं सिहाणं सरडाणं सल्लाणं सरघाणं खराणं घरकोइलियाणं विस्संभराणं
मुसगाणं मंगुसाणं पयलाइयाणं विरालियाणं जोहाणं चउप्पाइयाणं तेसिं च णं
अहावीएणं अहावगासेणं इत्थीए पुरिसस्स य जहा उरपरिसप्पाणं तहा भाणियव्वं
जाव सारुवियकडं संतं अवरेवि य णं तेसिं णाणाविहाणं भुयपरिसप्पपंचिदियथलय-
रतिरिक्खाणं तं० गोहाणं जावमक्खायं ॥ ६९६ ॥ अहावरं पुरक्खायं णाणाविहाणं
खहचरपंचिदियतिरिक्खजोणियाणं, तंजहा—चम्मपक्खीणं लोमपक्खीणं समुग्ग-
पक्खीणं विततपक्खीणं तेसिं च णं अहावीएणं अहावगासेणं इत्थीए जहा
उरपरिसप्पाणं नाणत्तं ते जीवा डहरा समाणा माउगात्तसिणेहमाहारेंति आणुपुव्वेणं
बुद्धा वणस्सइकायं तसथावरे य पाणे ते जीवा आहारेंति पुढविसरीरं जाव संतं अवरे
वि य णं तेसिं नाणाविहाणं खहचरपञ्चिन्दियतिरिक्खजोणियाणं चम्मपक्खीणं जाव
मक्खायं ॥ १३ ॥ ६९७ ॥ अहावरं पुरक्खायं इहेगइया सत्ता नाणाविहजोणिया
नाणाविहसंभवा नाणाविहवुक्कमा तज्जोणिया तस्संभवा तदुवक्कमा कम्मोवगा कम्म-
नियमाणं तत्थवुक्कमा नाणाविहाणं तसथावराणं पोग्गलाणं सरीरेसु वा सचित्तेसु वा
अचित्तेसु वा अणुसूयगाए विउट्ठन्ति । ते जीवा तेसिं नाणाविहाणं तसथावराणं
पाणाणं सिणेहमाहारेन्ति । ते जीवा आहारेंति पुढविसरीरं जाव सन्तं । अवरे
वि य णं तेसिं तसथावरजोणियाणं अणुसूयगाणं सरीरा नाणावण्णा जाव मक्खायं ।
एवं एरदुगत्ताए ॥ १४ ॥ ६९८ ॥ अहावरं पुरक्खायं इहे-
गइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथा-
वराणं पाणाणं सरीरेसु वा अचित्तेसु वा तं सरीरं वायसंसिद्धं वा वाय-
संसिद्धं वा वायसंसिद्धादिं उट्ठवाणसु उट्ठभागी भवइ, अहेवाएसु अहेभागी भवइ,
विज्जवाणसु विज्जवाणी भवइ । तं जहा—ओसा हिमए महिया करए हरतणुए
सुत्तं ॥ ते जीवा तेसिं नाणाविहाणं तसथावराणं पाणाणं सिणेहमाहारेन्ति । ते
जीवा आहारेंति पुढविसरीरं जाव सन्तं । अवरे वि य णं तेसिं तसथावरजोणि-

याणं ओसाणं जाव सुद्धोदगाणं सरीरा नाणावण्णा जावमक्खायं । अहावरं पुरक्खायं इहेगइया सत्ता उदगजोणिया उदगसंभवा जाव कम्मनियाणेणं तत्थवुक्कमा तसथावरजोणिएसु उदएसु उदगत्ताए विउट्टन्ति । ते जीवा तेसिं तसथावरजोणियाणं उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं तसथावरजोणियाणं उदगाणं सरीरा नाणावण्णा जाव मक्खायं । अहावरं पुरक्खायं इहेगइया सत्ता उदगजोणियाणं जाव कम्मनियाणेणं तत्थवुक्कमा उदगजोणिएसु उदएसु उदगत्ताए विउट्टन्ति ते जीवा तेसिं उदगजोणियाणं उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं उदगजोणियाणं उदगाणं सरीरा नाणावण्णा जाव मक्खायं । अहावरं पुरक्खायं इहेगइया सत्ता उदगजोणियाणं जाव कम्मनियाणेणं तत्थवुक्कमा उदगजोणिएसु उदएसु तसपाणत्ताए विउट्टन्ति । ते जीवा तेसिं उदगजोणियाणं उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं उदगजोणियाणं तसपाणाणं सरीरा नाणावण्णा जाव मक्खायं ॥ १५ ॥ ६९९ ॥

अहावरं पुरक्खायं इहेगइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा अगणिकायत्ताए विउट्टन्ति । ते जीवा तेसिं नाणाविहाणं तसथावराणं पाणाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं तसथावरजोणियाणं अगणीणं सरीरा नाणावण्णा जावमक्खायं । सेसा तिण्णि आलावगा जहा उदगाणं । अहावरं पुरक्खायं इहेगइया सत्ता नाणाविहजोणियाणं जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा वाउक्कायत्ताए विउट्टन्ति । जहा अगणीणं तहा भाणियव्वा चत्तारि गमा ॥ १६ ॥

॥ ७०० ॥ अहावरं पुरक्खायं इहेगइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथावराणं पाणाणं सरीरेसु सचित्तेसु वा अचित्तेसु वा पुढवित्ताए सक्करत्ताए वालुयत्ताए । इमाओ गाहाओ अणुगन्तव्वाओ-पुढवी य सक्करा वालुया य उवले सिला य लोणूसे । अय तउय तम्भ सीसग रुप्प सुवण्णय वइरे य (१) हरियाले हिंगुलए, मणोसिला सासगंजणपवाले, अब्भंपंडलब्भंवा-लुय, वायरकाए मणिविहाणां (२) गोमेज्जए य रुयए, अंके फलिहे य लोहियक्खेय, मरगयमसारगळे भुयमोयगइंदनीले य (३) चंदणगेरुयहंसगव्भे, पुलए सोगंधिए य वोद्धव्वे, चंदप्पभवेरुलिए, जलकंते सूरकंते य (४) एयाओ एएसु भाणियव्वाओ गाहाओ जाव सूरकंतत्ताए विउट्टन्ति, ते जीवा तेसिं नाणाविहाणं तसथावराणं

पाणाणं सिणेहमाहारेंति, ते जीवा आहारेंति पुढविसरीरं जाव संतं अवरे वि य णं
 तेसिं तसथावरजोणियाणं पुढवीणं जाव सूरकंताणं सरीरा णाणावण्णा जावमक्खायं,
 सेसं तिणिण आलावगा जहा उदगाणं ॥ ७०१ ॥ अहावरं पुरक्खायं सव्वे पाणा
 सव्वे भूया, सव्वे जीवा, सव्वे सत्ता, णाणाविहजोणिया, णाणाविहसंभवा, णाणा-
 विहवुक्कमा, सरीरजोणिया, सरीरसंभवा, सरीरवुक्कमा, सरीराहारा, कम्मोवगा,
 कम्मनियाणा, कम्मगईया, कम्मठिईया, कम्मणा चेव विप्परियासमुवेंति ॥ ७०२ ॥
 सेएवमायाणह से एवमायाणित्ता आहारगुत्ते सहिए समिए सयाजए त्ति वेमि ॥ ७०३ ॥
 आहारपरिणयज्झयणं तइयं ॥

पच्चक्खाणकिरियज्झयणे चउत्थे

सुयं मे आउसं ! तेगं भगवया एवमक्खायं, इह खलु पच्चक्खाणकिरियाणा-
 मज्झयणे तस्सणं अयमठ्ठे पण्णत्ते, आया अपच्चक्खाणीयावि भवइ, आया अकिरिया
 कुसलेयावि भवइ, आया मिच्छासंठिएयावि भवइ, आया एगंतदंडेयावि भवइ, आया
 एगंतवालेयावि भवइ, आया एगंतसुत्तेयावि भवइ, आया अवियारमणवयणकायवक्के-
 यावि भवइ, आया अप्पडिहयपच्चक्खायपावकम्मेयावि भवइ, एस खलु भगवया
 अक्खाए, असंजए, अविरए, अप्पडिहयपच्चक्खायपावकम्मे, सकिरिए, असंबुडे,
 एगंतदंडे, एगंतवाले, एगंतसुत्ते से बाले, अवियारमणवयकायवक्के, सुविणमवि ण
 पस्सइ पावे य से कम्मे कज्जइ ॥ ७०४ ॥ तत्थ चोयए पन्नवगं एवं वयासी, असंत-
 एणं मणेणं पावएणं असंतियाए वईए पावियाए, असंतएणं काएणं पावएणं अह-
 णंतस्स अमणक्खस्स, अवियारमणवयकायवक्कस्स सुविणमवि अपस्सओ पावकम्मे
 णो कज्जइ कस्सणं तं हेउं चोयए एवं ववीइ अन्नयरेण मणेणं पावएणं मणवत्तिए
 पावे कम्मे कज्जइ, अन्नयरीए वईए पावियाए वतिवत्तिए पावे कम्मे कज्जइ, अन्न-
 यरेणं काएणं पावएणं कायवत्तिए पावेकम्मे कज्जइ, हणंतस्स समणक्खस्स सवियार-
 मणवयकायवक्कस्स सुविणमवि पासओ, एवं गुणजाईयस्स पावेकम्मे कज्जइ, पुणरवि
 चोयए, एव ववीइ तत्थणं जे ते एवमाहंसु असंतएणं मणेणं पावएणं असंतियाए
 वईए पावियाए, असंतएणं काएणं पावएणं अहणंतस्स अमणक्खस्स अवियारमण-
 वयकायवक्कस्स सुविणमवि अपस्सओ पावे कम्मे कज्जइ, तत्थ णं जे ते एवमाहंसु
 मिच्छो ते एवमाहंसु ॥ ७०५ ॥ तत्थ पन्नवए चोयगं एवं वयासी-तं सम्मं जं मए
 पुव्वं वुत्तं असंतएणं मणेणं पावएणं, असंतियाए वईए पावियाए, असंतएणं काएणं
 पावएणं, अहणंतस्स अमणक्खस्स अवियारमणवयकायवक्कस्स सुविणमवि अपस्सओ

चावे कम्मे कज्जइ, तं सम्मं कस्स णं तं हेउं? आयरिय आह, तत्थ खलु भगवया छजीवणिकायहेउ पण्णत्ता, तंजहा पुढविकाइया जाव तसकाइया इच्चेएहिं छहिं जीवणिकाएहिं आया अप्पडिहयेपच्चक्खायपावकम्मे, निच्चं पसढविउवातचित्तदण्डे, तंजहा-पाणाइवाए जाव परिग्गहे, कोहे जाव मिच्छादंसणसल्ले ॥ ७०६ ॥ आयरिय आह तत्थ खलु भगवया वहए दिट्ठन्ते पण्णत्ते । से जहानामए-वहए सिया गाहावइस्स वा गाहावइपुत्तस्स वा रण्णो वा रायपुरिसस्स वा खणं निद्दाय पविसिस्सामि खणं लद्धूणं वहिस्सामि संपहारेमाणे से किं नु हु नाम से वहए तस्स गाहावइस्स वा गाहावइपुत्तस्स वा रण्णो वा रायपुरिसस्स वा खणं निद्दाय पविसिस्सामि खणं लद्धूणं वहिस्सामि पहारेमाणे दिया वा राओ वा सुत्ते वा जागरमाणे वा अमित्तभूए मिच्छा-संठिए निच्चं पसढविउवायचित्तदण्डे भवइ? एवं वियागरेमाणे समियाए वियागरे चोयए-हंता भवइ । आयरिय आह-जहा से वहए तस्स गाहावइस्स वा तस्स गाहावइपुत्तस्स वा रण्णो वा रायपुरिसस्स वा खणं निद्दाय पविसिस्सामि खणं लद्धूणं वहिस्सामि ति पहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे, एवमेव वाले वि सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए मिच्छा-संठिए निच्चं पसढविउवायचित्तदण्डे । तं जहा-पाणाइवाए जाव मिच्छादंसणसल्ले । एवं खलु भगवया अक्खाए असंजए अविरए अप्पडिहयेपच्चक्खायपावकम्मे सकि-रिए असंजुडे एगन्तदण्डे एगन्तवाले एगन्तसुत्ते यावि भवइ । से वाले अवियारम-णवयणकायवक्के सुविणमवि न पेस्सइ पावे य से कम्मे कज्जइ । जहा से वहए तस्स वा गाहावइस्स जाव तस्स वा रायपुरिसस्स पत्तेयं पत्तेयं चित्तसमादाए दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे भवइ, एवमेव वाले सव्वेसिं पाणाणं जाव सव्वेसिं सत्ताणं पत्तेयं पत्तेयं चित्तसमादाए दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे भवइ ॥२॥७०७॥ नो इण्ठे सम्भे [चोयए] । इह खलु वहवे पाणा० जे इमेगं सरीरसमुस्सएणं नो दिट्ठा वा सुया वा नाभिमया वा विनाया वा जेसिं नो पत्तेयं पत्तेयं चित्तसमायाए दिया वा राओ वा सुत्ते वा जागर-माणे वा अमित्तभूए मिच्छासंठिए निच्चं पसढविउवायचित्तदण्डे । तं जहा पाणाइवाए जाव मिच्छादंसणसल्ले ॥३॥७०८॥ आयरिय आह-तत्थ खलु भगवया दुवे दिट्ठन्ता पण्णत्ता । तं जहा-सन्निदिट्ठन्ते य असन्निदिट्ठन्ते य । से किं तं सन्निदिट्ठन्ते? जे इमे सन्निपच्चिन्दिया पज्जत्तागा एएसिं णं छजीवनिकाए पडुच्च, तं जहा-पुढवी-

कायं जाव तसकायं । से एगइओ पुढवीकाएणं किच्चं करेइ वि कारवेइ वि । तस्स णं एवं भवइ-एवं खलु अहं पुढवीकाएणं किच्चं करेमि वि कारवेमि वि, नो चेव णं से एवं भवइ-इमेण वा इमेण वा से एएणं पुढवीकाएणं किच्चं करेइ वि कारवेइ वि । से णं तओ पुढवीकायाओ असंजयअविरयअप्पडिहयपच्चक्खायपावकम्मे यावि भवइ । एवं जाव तसकाए त्ति भाणियव्वं । से एगइओ छजीवनिकाएहिं किच्चं करेइ वि कारवेइ वि । तस्स णं एवं भवइ-एवं खलु छजीवनिकाएहिं किच्चं करेमि वि कारवेमि वि । नो चेव णं से एवं भवइ-इमेहिं वा २, से य तेहिं छहिं जीवनिका-एहिं जाव कारवेइ वि । से य तेहिं छहिं जीवनिकाएहिं असंजयअविरयअप्पडिहय-पच्चक्खायपावकम्मे, तं जहा-पाणाइवाए जाव मिच्छादंसणसल्ले । एस खलु भगवया अक्खाए असंजए अविरए अप्पडिहयपच्चक्खायपावकम्मे सुविणमवि अपस्सओ । पावे य से कम्मे कज्जइ । से तं सन्निदिट्ठन्ते ॥ से किं तं असन्निदिट्ठन्ते ? जे इमे असन्निणो पाणा, तं जहा-पुढवीकाइया जाव वणस्सइकाइया छट्ठा वेगइया तसा पाणा, जेसि नो तक्का इ वा सन्ना इ वा पन्ना इ वा मणा इ वा वई इ वा सयं वा करणाए अन्नेहि वा कारवेत्तए करन्तं वा समणुजाणित्तए, ते वि णं वाले सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्त-भूया मिच्छासंठिया निच्चं पसढविउवायचित्तदंडा तं० पाणाइवाए जाव मिच्छा-दंसणसल्ले । इच्चेव जाव नो चेव मणो नो चेव वई पाणाणं जाव सत्ताणं दुक्खण-याए सोयणयाए जूरणयाए तिप्पणयाए पिट्ठणयाए परितप्पणयाए । ते दुक्ख-णसोयण जाव परितप्पणवहवन्धणपरिकिलेसाओ अप्पडिविरया भवन्ति । इति खलु से असन्निणो वि सत्ता अहोनिंसिं पाणाइवाए उवक्खाइज्जन्ति जाव अहोनिंसिं परिग्गहे उवक्खाइज्जन्ति जाव मिच्छादंसणसल्ले उवक्खाइज्जन्ति [एवं भूयवाई] । सव्वजोणिया वि खलु सत्ता सन्निणो हुच्चा असन्निणो होन्ति असन्निणो हुच्चा सन्निणो होन्ति, होच्चा सन्नी अदुवा असन्नी, तत्थ से अविविचित्ता अविधूणिता असंमुच्छित्ता अणणुतावित्ता असन्निकायाओ वा सन्निकाए संकमन्ति सन्निकायाओ वा असन्निकायं संकमन्ति, सन्निकायाओ वा सन्निकायं संकमन्ति असन्निकायाओ वा असन्निकायं संकमन्ति । जे एए सन्नि वा असन्नि वा सव्वे ते मिच्छायारा निच्चं पसढविउवाय-चित्तदण्डा । तं जहा-पाणाइवाए जाव मिच्छादंसणसल्ले । एवं खलु भगवया अ-क्खाए असंजए अविरए अप्पडिहयपच्चक्खायपावकम्मे सकिरिए असंवुडे एगन्तदण्डे एगन्तवाले एगन्तसुत्ते से वाले अवियारमणवयणकायवक्के सुविणमवि न पासइ पावे य से कम्मे कज्जइ ॥ ४ ॥ ७०९ ॥ चोयए-से किं कुव्वं किं कारवं कहां संजयविर-

यप्पडिहयपच्चक्खायपावकम्मे भवइ? आयरिय आह-तत्थ खलु भगवया छज्जीव-
निकायहेऊ पन्नत्ता, तं जहा-पुढवीकाइया जाव तसकाइया । से जहानामए मम
अस्सायं दण्डेण वा अट्ठीण वा मुट्ठीण वा लेल्लण वा कवालेण वा आतोडिज्जमाणस्स
वा जाव उवद्दविज्जमाणस्स वा जाव लोमुक्खणणमायमवि हिंसाकारं दुक्खं भयं
पडिसंवेदेमि, इच्चेवं जाण सव्वे पाणा जाव सव्वे सत्ता दण्डेण वा जाव कवालेण वा
आतोडिज्जमाणे वा हम्ममाणे वा तज्जिज्जमाणे वा तालिज्जमाणे जाव उवद्दविज्जमाणे
वा जाव लोमुक्खणणमायमवि हिंसाकारं दुक्खं भयं पडिसंवेदेन्ति । एवं नच्चा सव्वे
पाणा जाव सव्वे सत्ता न हन्तव्वा जाव न उद्दवेयव्वा । एस धम्मे ध्रुवे निइए सासए
समिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव मिच्छा-
दंसणसङ्गाओ । से भिक्खू नो दन्तपक्खालणेणं दन्ते पक्खालेज्जा, नो अङ्गणं नो
वमणं नो ध्रुवणित्तं पि आइए । से भिक्खू अकिरिए अलूसए अकोहे जाव अलोभे
उवसन्ते परिनिव्वुडे । एस खलु भगवया अक्खाए संजयविरयपडिहयपच्चक्खाय-
पावकम्मे अकिरिए संवुडे एगन्तपण्डिए भवइ ति वेमि ॥ ५ ॥ ७१० ॥ पच्च-
क्खाणकिरियज्झयणं चउत्थं ॥

आयारसुयज्झयणे पञ्चमे

आदाय बम्मचेरं च आसुपन्ने इमं वइं । अस्सि धम्मे अणायारं नायरेज्ज कयाइ
वि ॥ १ ॥ ७११ ॥ अणाइयं परिज्जाय अणवदग्गे ति वा पुणो । सासयमसासए
वा इइ दिट्ठिं न धारए ॥ २ ॥ ७१२ ॥ एएहिं दोहिं ठाणेहिं ववहारो न विज्जई ।
एएहिं दोहिं ठाणेहिं अणायारं तु जाणए ॥ ३ ॥ ७१३ ॥ समुच्छिहन्ति सत्थारो
सव्वे पाणा अणेलिसा । गण्ठिगा वा भविस्सन्ति सासयं ति व नो वए ॥ ४ ॥
॥ ७१४ ॥ एएहिं दोहिं ठाणेहिं ववहारो न विज्जई । एएहिं दोहिं ठाणेहिं अणायारं
तु जाणए ॥ ५ ॥ ७१५ ॥ जे केइ खुद्दगा पाणा अदुवा सन्ति महालया । सरिसं
तेहिं वेरं ति असरिसं ति य नो वए ॥ ६ ॥ ७१६ ॥ एएहिं दोहिं ठाणेहिं ववहारो
न विज्जई । एएहिं दोहिं ठाणेहिं अणायारं तु जाणए ॥ ७ ॥ ७१७ ॥ अहाकम्माणि
भुज्जन्ति, अन्नमन्ने सकम्मुणा । उवलित्ते ति जाणिज्जा अणुवलित्ते ति वा पुणो
॥ ८ ॥ ७१८ ॥ एएहिं दोहिं ठाणेहिं ववहारो न विज्जई । एएहिं दोहिं ठाणेहिं
अणायारं तु जाणए ॥ ९ ॥ ७१९ ॥ जमिदं ओरालमाहारं कम्मगं च तहेव य ।
सव्वत्थ वीरियं अत्थि नत्थि सव्वत्थ वीरियं ॥ १० ॥ ७२० ॥ एएहिं दोहिं ठाणेहिं
ववहारो न विज्जई । एएहिं दोहिं ठाणेहिं अणायारं तु जाणए ॥ ११ ॥ ७२१ ॥

नत्थि लोए अलोए वा नेवं सन्नं निवेसए । अत्थि लोए अलोए वा एवं सन्नं निवेसए ॥ १२ ॥ ७२२ ॥ नत्थि जीवा अजीवा वा नेवं सन्नं निवेसए । अत्थि जीवा अजीवा वा एवं सन्नं निवेसए ॥ १३ ॥ ७२३ ॥ नत्थि धम्मो अधम्मो वा नेवं सन्नं निवेसए । अत्थि धम्मो अधम्मो वा एवं सन्नं निवेसए ॥ १४ ॥ ७२४ ॥ नत्थि बन्धे व मोक्खे वा नेवं सन्नं निवेसए । अत्थि बन्धे व मोक्खे वा एवं सन्नं निवेसए ॥ १५ ॥ ७२५ ॥ नत्थि पुण्णे व पावे वा नेवं सन्नं निवेसए । अत्थि पुण्णे व पावे वा एवं सन्नं निवेसए ॥ १६ ॥ ७२६ ॥ नत्थि आसवे संवरे वा नेवं सन्नं निवेसए । अत्थि आसवे संवरे वा एवं सन्नं निवेसए ॥ १७ ॥ ७२७ ॥ नत्थि वेयणा निज्जरा वा नेवं सन्नं निवेसए । अत्थि वेयणा निज्जरा वा एवं सन्नं निवेसए ॥ १८ ॥ ७२८ ॥ नत्थि किरिया अकिरिया वा नेवं सन्नं निवेसए । अत्थि किरिया अकिरिया वा एवं सन्नं निवेसए ॥ १९ ॥ ७२९ ॥ नत्थि कोहे व माणे वा नेवं सन्नं निवेसए । अत्थि कोहे व माणे वा एवं सन्नं निवेसए ॥ २० ॥ ७३० ॥ नत्थि माया व लोभे वा नेवं सन्नं निवेसए । अत्थि माया व लोभे वा एवं सन्नं निवेसए ॥ २१ ॥ ७३१ ॥ नत्थि पेज्जे व दोसे वा नेवं सन्नं निवेसए । अत्थि पेज्जे व दोसे वा एवं सन्नं निवेसए ॥ २२ ॥ ७३२ ॥ नत्थि चाउरन्ते संसारे नेवं सन्नं निवेसए । अत्थि चाउरन्ते संसारे एवं सन्नं निवेसए ॥ २३ ॥ ७३३ ॥ नत्थि देवो व देवी वा नेवं सन्नं निवेसए । अत्थि देवो व देवी वा एवं सन्नं निवेसए ॥ २४ ॥ ७३४ ॥ नत्थि सिद्धी असिद्धी वा नेवं सन्नं निवेसए । अत्थि सिद्धी असिद्धी वा एवं सन्नं निवेसए ॥ २५ ॥ ७३५ ॥ नत्थि सिद्धी नियं ठाणं नेवं सन्नं निवेसए । अत्थि सिद्धी नियं ठाणं एवं सन्नं निवेसए ॥ २६ ॥ ७३६ ॥ नत्थि साहू असाहू वा नेवं सन्नं निवेसए । अत्थि साहू असाहू वा एवं सन्नं निवेसए ॥ २७ ॥ ७३७ ॥ नत्थि कल्लण पावे वा नेवं सन्नं निवेसए । अत्थि कल्लण पावे वा एवं सन्नं निवेसए ॥ २८ ॥ ७३८ ॥ कल्लणे पावए वा वि ववहारो न विज्जइ । जं वेरं तं न जाणन्ति समणा वालपण्डिया ॥ २९ ॥ ७३९ ॥ असेसं अक्खयं वावि सव्वदुक्खे इ वा पुणो । वज्झा पाणा न वज्झ ति इइ वायं न नीसरे ॥ ३० ॥ ७४० ॥ दीसन्ति समियायारा भिक्खुगो साहुजीविणो । एए मिच्छोवजीवन्ति इइ दिट्ठिं न धारए ॥ ३१ ॥ ७४१ ॥ दक्खिणाए पडिलम्भो अत्थि वा नत्थि वा पुणो । न वियागरेज्ज मेहावी सन्तिमगं च वूहए ॥ ३२ ॥ ७४२ ॥ इच्चेएहिं ठाणेहिं जिणदिट्ठेहिं संजए । धारयन्ते उ अप्पाणं आ मोक्खाए परिव्वएज्जासि ॥ ३३ ॥ ७४३ ॥ ति त्थेमि ॥ आयारसुयज्झयणं पञ्चमं ॥

अदइज्जज्झयणे छट्ठे

पुराकडं अद्द इमं सुणेह मेगन्तयारी समणे पुरासी । से भिक्खुणो उवणेत्ता
 अणेगे आइक्खएण्हि पुढो वित्थरेणं ॥ १ ॥ ७४४ ॥ साऽऽजीविया पट्टवियाऽथिरेणं
 सभागओ गणओ भिक्खुमज्झे । आइक्खमाणो बहुज्जमत्थं न संधयाई अवरेण
 पुव्वं ॥ २ ॥ ७४५ ॥ एगन्तमेवं अदुवा वि एण्हि दोऽवन्नमन्नं न समेइ जम्हा ।
 पुव्वि च एण्हि च अणागयं वा एगन्तमेवं पडिसंधयाइ ॥ ३ ॥ ७४६ ॥ समिच्च
 लोगं तसथावराणं खेमंकरे समणे माहणे वा । आइक्खमाणो वि सहस्समज्झे एग-
 न्तयं सारयई तहच्चे ॥ ४ ॥ ७४७ ॥ धम्मं कहन्तस्स उ नत्थि दोसो खन्तस्स
 दन्तस्स जिइन्दियस्स । भासाय दोसे य विवज्जगस्स गुणे य भासाय निसेवगस्स
 ॥ ५ ॥ ७४८ ॥ महव्वए पच्च अणुव्वए य तहेव पच्चासव संवरे य । विरइं इह
 स्सामणियम्मि पण्णे लवावसक्की समणे त्ति वेमि ॥ ६ ॥ ७४९ ॥ सीओदगं सेवउ
 वीयकायं आहायकम्मं तह इत्थियाओ । एगन्तचारिस्सिह अम्ह धम्मं तवस्सिणो
 नाभिसमेइ पावं ॥ ७ ॥ ७५० ॥ सीओदगं वा तह वीयकायं आहायकम्मं तह
 इत्थियाओ । एयाइ जाणं पडिसेवमाणा अगारिणो अस्समणा भवन्ति ॥ ८ ॥
 ७५१ ॥ सिया य वीयोदगइत्थियाओ पडिसेवमाणा समणा भवन्तु । अगारिणो
 वि समणा भवन्तु सेवन्ति ऊ ते पि तहप्पगारं ॥ ९ ॥ ७५२ ॥ जे यावि वीयो-
 दगभोइ भिक्खू भिक्खं विहं जायइ जीवियट्ठी । ते नाइसंजोगमविप्पहाय कायोवगा
 नन्तकरा भवन्ति ॥ १० ॥ ७५३ ॥ इमं वयं तु तुमं पाउकुव्वं पावाइणो गरिहसि
 सव्व एव । पावाइणो पुढो किट्ठयन्तां सयं सयं दिट्ठि करेन्ति पाउ ॥ ११ ॥
 ७५४ ॥ ते अन्नमन्नस्स उ गरहमाणा अक्खन्ति भो समणा माहणा य । सओ
 य अत्थी असओ यं नत्थि गरहामु दिट्ठि न गरहामु किचि ॥ १२ ॥ ७५५ ॥ न
 किंचि रुवेणंऽभिधारयामो सदिट्ठिमग्गं तु करेमु पाउं । मग्गे इमे किट्ठिँ अरिएण्हि
 अणुत्तरे सप्पुरिसेहिं अज्झू ॥ १३ ॥ ७५६ ॥ उट्ठं अहे यं तिरियं दिसासु तसा य
 जे थावर जे य पाणा । भूयाहिंसंकाभिदुग्गुच्छमाणा नो गरहइ वुत्तिमं किंचि लोए
 ॥ १४ ॥ ७५७ ॥ आगन्तगारे आरामगारे समणे उ भीए न उवेइ वासे । दक्खा
 हु सन्ती बहवे मणुस्सा ऊणाइरित्ता य लवालवा य ॥ १५ ॥ ७५८ ॥ मेहाविणो
 सिक्खिय बुद्धिमन्ता सुत्तेहि अत्थेहि य निच्छयन्ता । पुच्छिं मा णे अणंगार अन्ने
 इइ संकमागो न उवेइ तत्थ ॥ १६ ॥ ७५९ ॥ नो कामकिच्चा नं य वालकिच्चा
 रायाभियोगेण कुओ भएणं । वियागरेज्ज पसिणं न वा वि सकामकिच्चेण्हि आरियाणं
 ॥ १७ ॥ ७६० ॥ गन्ता च तत्था अदुवा अगन्ता वियागरेज्जा समियासुपेजे ।

अणारिया दंसणओ परित्ता इइ संकमाणो न उवेइ तत्थ ॥ १८ ॥ ७६१ ॥ पणं
जहा वणिए उदयट्ठी आयस्स हेउं पगरेइ सङ्गं । तयोवमे समणे नायपुत्ते इच्चेव
मे होइ मई वियक्को ॥ १९ ॥ ७६२ ॥ नवं न कुज्जा विहुणे पुराणं चिच्चाऽमइं ताइ
य साह एवं । एयावया वम्भवइ त्ति वुत्ता तस्सोदयट्ठी समणे त्ति बेमि ॥ २० ॥
॥ ७६३ ॥ समारभन्ते वणिया भूयगामं परिग्गहं चेव ममायमाणा । ते नाइसं-
जोगमविप्पहाय आयस्स हेउं पगरेन्ति सङ्गं ॥ २१ ॥ ७६४ ॥ वित्तेसिणो मेहुण-
संपगाढा ते भोयणट्ठा वणिया वयन्ति । वयं तु कामेसु अज्झोववन्ना अणारिया
पेमरसेसु गिद्धा ॥ २२ ॥ ७६५ ॥ आरम्भगं चेव परिग्गहं च अविउस्सिया
निस्सिय आयदण्डा । तेसिं च से उदए जं वयासी चउरन्तणन्ताय दुहाय नेह
॥ २३ ॥ ७६६ ॥ नेगन्ति नच्चन्ति य ओदए सो वयन्ति ते दो वि गुणोदयम्मि ।
से उदए साइमणन्तपत्ते तमुदयं साहयइ ताइ नाई ॥ २४ ॥ ७६७ ॥ अहिंसयं
सव्वपयाणुकम्पी धम्मे ठियं कम्मविवेगहेउं । तमायदण्डेहि समायरन्ता अबोहिए
ते पडिरुवमेयं ॥ २५ ॥ ७६८ ॥ पिण्णागपिण्डीमवि विद्ध सूले केई पएज्जा पुरिसे
इमे त्ति । अलाउयं वा वि कुमारए त्ति स लिप्पई पाणिवहेण अम्हं ॥ २६ ॥ ७६९ ॥
अहवा वि विद्धूण मिलक्खु सूले पिण्णागबुद्धीइ नरं पएज्जा । कुमारगं वा वि अला-
वुयं त्ति न लिप्पई पाणिवहेण अम्हं ॥ २७ ॥ ७७० ॥ पुरिसं च विद्धूण कुमारगं
वा सूलंमि केई पए जायतेए । पिण्णागपिण्डं सइमारहेत्ता बुद्धाण तं कप्पइ पारणाए
॥ २८ ॥ ७७१ ॥ सिणायगाणं तु दुवे सहस्से जे भोयए नियए भिक्खुयाणं ।
ते पुण्णखन्धं सुमहं जिणित्ता भवन्ति आरोप्प महन्त सत्ता ॥ २९ ॥ ७७२ ॥
अजोगरुवं इह संजयाणं पावं तु पाणा ण पसज्ज काउं । अबोहिए दोण्ह वि तं
असाहु वयन्ति जे यावि पडिस्सुणन्ति ॥ ३० ॥ ७७३ ॥ उहुं अहे यं तिरियं
दिसासु विन्नाय लिङ्गं तसथावराणं । भूयाभिसंकाइ दुगुञ्छमाणे वए करेज्जा व कुओ
विहऽत्थि ॥ ३१ ॥ ७७४ ॥ पुरिसे त्ति विन्नत्ति न एवमत्थि अणारिए से पुरिसे तहा
हु । को संभवो पिण्णगपिण्डियाए वाया वि एसा बुइया असच्चा ॥ ३२ ॥ ७७५ ॥
वायाभियोगेण जमावहेज्जा नो तारिसं वायमुदाहरेज्जा । अट्ठाणमेयं वयणं गुणाणं
नो दिक्खिए वूयमुरालमेयं ॥ ३३ ॥ ७७६ ॥ लद्धे अट्ठे अहो एव तुब्भे जीवा-
णुभागे सुविचिन्तिए व । पुव्वं समुहं अवरं च पुट्ठे ओलोइए पाणितले ठिए वा
॥ ३४ ॥ ७७७ ॥ जीवाणुभागं सुविचिन्तयन्ता आहारिया अन्नविहीए सोहिं ।
न वियागरे छन्नपओपजीवी एसोऽणुधम्मो इह संजयाणं ॥ ३५ ॥ ७७८ ॥ सिणा-
गगाणं तु दुवे सहस्से जे भोयए नियए भिक्खुयाणं । असंजए लोहिंयपाणि से ऊ

नियच्छई गरिहमिहेव लोए ॥ ३६ ॥ ७७९ ॥ थूलं उरव्वं इह मारियाणं उद्धि-
 भत्तं च पगप्पएत्ता । तं लोणतेल्लेण उवक्खडेत्ता सपिप्पलीयं पगरन्ति मंसं ॥ ३७ ॥
 ॥ ७८० ॥ तं भुज्जमाणा पिसियं पभूयं नो ओवलिप्पामु वयं रएणं । इच्चैवमाहंसु
 अणज्जधम्मा अणारिया वाल रसेसु गिद्धा ॥ ३८ ॥ ७८१ ॥ जे यावि भुज्जन्ति
 तहप्पगारं सेवन्ति ते पावमजाणमाणा । मणं न एयं कुसला करेन्ति वाया वि
 एसा बुइया उ मिच्छा ॥ ३९ ॥ ७८२ ॥ सव्वेसि जीवाण दयद्वयाए सावज्जदोसं
 परिवज्जयन्ता । तस्संकिणो इसिणो **नायपुत्ता** उद्धिभत्तं परिवज्जयन्ति ॥ ४० ॥
 ॥ ७८३ ॥ भूयाभिसंकाए दुगुच्छमाणा सव्वेसि पाणाण निहाय दण्डं । तम्हा न
 भुज्जन्ति तहप्पगारं एसोऽणुधम्मो इह संजयाणं ॥ ४१ ॥ ७८४ ॥ निग्गन्थधम्मम्मि
 इमं समाहिं अस्सिं सुठिच्चा अणिहे चरेज्जा । बुद्धे मुणी सीलगुणोववेए अच्चत्थयं
 पाउणई सिलोगं ॥ ४२ ॥ ७८५ ॥ सिणायगाणं तु दुवे सहस्से जे भोयए नियए
 माहणाणं । ते पुण्णखन्धे सुमहऽज्जणित्ता भवन्ति देवा इइं वेयवाओ ॥ ४३ ॥ ७८६ ॥
 सिणायगाणं तु दुवे सहस्से जे भोयए नियए कुलालयाणं । से गच्छई लोलुवसंप-
 गाढे तिक्वाभितावी नरगाभिसेवी ॥ ४४ ॥ ७८७ ॥ दयावरं धम्मं दुगुच्छमाणा
 वहावहं धम्मं पसंसमाणा । एगं पि जे भोययई असीलं निवो निसं जाइ कुओऽसु-
 रेहिं ॥ ४५ ॥ ७८८ ॥ दुहओ वि धम्मम्मि समुट्ठियामो अस्सिं सुट्ठिच्चा तह एस-
 कालं । आयासीले बुइएह नाणी न संपरायम्मि विसेसमत्थि ॥ ४६ ॥ ७८९ ॥
 अव्वत्तरुवं पुरिसं महन्तं सणातणं अक्खयमव्वयं च । सव्वेसु भूएसु वि सव्वओ
 से चन्दो व ताराहि समत्तरुवे ॥ ४७ ॥ ७९० ॥ एवं न मिज्जन्ति न संसरन्ति न
 माहणा खत्तिय वेस पेसा । कीडा य पक्खी य सरीसिवा य नरा य सव्वे तह
 देवलोगा ॥ ४८ ॥ ७९१ ॥ लोगं अयाणित्तिह केवलेणं कहन्ति जे धम्ममजाण-
 माणा । नासन्ति अप्पाण परं च नट्टा संसार घोरम्मि अणोरपारे ॥ ४९ ॥ ७९२ ॥
 लोगं विजाणन्तिह केवलेणं पुण्णेण नाणेण समाहिजुत्ता । धम्मं समत्तं च कहन्ति
 जे उ तारन्ति अप्पाण परं च तिण्णा ॥ ५० ॥ ७९३ ॥ जे गरहियं ठाणमिहाव-
 सन्ति जे यावि लोए चरणोववेया । उदाहडं तं तु समं मईए अहाउसो विप्परिया-
 समेव ॥ ५१ ॥ ७९४ ॥ संवच्छरेणावि य एगमेगं वाणेण मारेउ महागयं तु ।
 सेसाण जीवाण दयद्वयाए वासं वयं वित्ति पक्कपयामो ॥ ५२ ॥ ७९५ ॥ संवच्छ-
 रेणावि य एगमेगं पाणं हणन्ता अणियत्तदोसा । सेसाण जीवाण वहेण लग्गा
 सिया य थोवं गिहिणो वि तम्हा ॥ ५३ ॥ ७९६ ॥ संवच्छरेणावि य एगमेगं पाणं
 हणन्ता समणव्वएसु । आयाहिए से पुरिसे अणजे न तारिसे केवलिणो भवन्ति

॥ ५४ ॥ ७९७ ॥ बुद्धस्स आणाए इमं समाहिं अस्सि सुठिच्चा तिविहेण ताई ।
तरिउं समुद्दं व महाभवोघं आयाणवं धम्ममुदाहरेज्ज ॥ ५५ ॥ ७९८ ॥ त्ति वेमि ॥
अद्दइज्जज्झयणं छुट्ठं ॥

नालन्दइज्जज्झयणे सत्तमे

तेणं कालेणं तेणं समएणं रायगिहे नामं नयरे होत्था रिद्धित्थिमियसमिद्धे
(वण्णओ) जाव पडिरूवे । तस्स णं रायगिहस्स नयरस्स वहिया उत्तरपुरत्थिमे
दिसिभाए एत्थ णं नालन्दा नामं बाहिरिया होत्था अणेगभवणसयसंनिविट्ठा जाव
पडिरूवा । तत्थ णं नालन्दाए बाहिरियाए लेवे नामं गाहावई होत्था अद्दे दित्ते
वित्ते वित्थिण्णविपुलभवणसयणासणजाणवाहणाइण्णे बहुधणवहुजायरुवरजए आओ-
गपओगसंपउत्ते विच्छड्डियपउरभत्तपाणे बहुदासीदासगोमहिसगवेलगप्पभूए बहु-
जणस्स अपरिभूए यावि होत्था ॥ १ ॥ ७९९ ॥ से णं लेवे नामं गाहावई समणो-
वासए यावि होत्था अभिगयजीवाजीवे जाव विहरइ निग्गन्थे पावयणे निस्संकिए
निकंखिए निव्विइगिच्छे, लद्धे गहियेइ पुच्छियेइ विणिच्छियेइ अभिगहियेइ अट्ठि-
मिज्जा पेमाणुरागरत्ते । अयमाउसो निग्गन्थे पावयणे, अयं अद्दे, अयं परमद्दे, सेसे
अणद्दे, उस्सियफलिहे अप्पावयदुवारे चियत्तन्तेउरप्पवेसे चाउद्दसट्ठमुद्दिट्ठपुण्णमासि-
णीसु पडिपुण्णं पोसहं सम्मं अणुपालेमाणे समणे निग्गन्थे तहाविहेणं एसणिज्जेणं
असणपाणखाइमसाइमेणं पडिलाभेमाणे बहूहिं सीलव्वयगुणविरमणपच्चक्खाणपोसहो-
ववासेहिं अप्पाणं भावेमाणे एवं च णं विहरइ ॥ २ ॥ ८०० ॥ तस्स णं लेवस्स
गाहावइस्स नालन्दाए बाहिरियाए उत्तरपुरत्थिमे दिसिभाए एत्थ णं सेसदविया
नामं उदगसाला होत्था अणेगखम्मसयसंनिविट्ठा पासादीया जाव पडिरूवा । तीसे
णं सेसदवियाए उदगसालाए उत्तरपुरत्थिमे दिसिभाए एत्थ णं हत्थिजामे नामं
वणसण्डे होत्था किण्हे (वण्णओ वणसण्डस्स) ॥ ३ ॥ ८०१ ॥ तस्सि च णं
गिहपदेसम्मि भगवं गोयमे विहरइ, भगवं च णं अहे आरामंसि । अहे णं उदए
पेढालपुत्ते भगवं पासावच्चिजे निग्गण्ठे मेयज्जे गोत्तेणं जेणेव भगवं गोयमे तेणेव
उवागच्छइ, उवागच्छित्ता भगवं गोयमं एवं वयासी-आउसंतो गोयमा, अत्थि खलु
मे केइ पदेसे पुच्छियव्वे, तं च आउसो अहासुयं अहादरिसियं मे वियागरेहिं
सवायं । भगवं गोयमे उदयं पेढालपुत्तं एवं वयासी-अवियाइ आउसो, सोच्चा
निसम्म जाणिस्सामो सवायं । उदए पेढालपुत्ते भगवं गोयमं एवं वयासी ॥ ४ ॥

॥ ८०२ ॥ आउसो गोयमा, अत्थि खलु कुमारपुत्तिया नाम समणा निग्गन्था तुम्हाणं पवयणं पवयमाणा गाहावइं समणोवासणं उवसंपन्नं एवं पच्चक्खावेन्ति । नन्नत्थ अभिओएणं गाहावइचोरग्गहणविमोक्खणयाए तसेहिं पाणेहिं निहाय दण्डं । एवं ण्हं पच्चक्खन्ताणं दुप्पच्चक्खायं भवइ । एवं ण्हं पच्चक्खावेमाणाणं दुप्पच्चक्खावियव्वं भवइ । एवं ते परं पच्चक्खावेमाणा अइयरन्ति सयं पइण्णं । कस्स णं तं हेउं ? संसारिया खलु पाणा, थावरा वि पाणा तसत्ताए पच्चायन्ति, तसा वि पाणा थावरत्ताए पच्चायन्ति, थावरकायाओ विप्पमुच्चमाणा तसकायंसि उववज्जन्ति, तसकायाओ विप्पमुच्चमाणा थावरकायंसि उववज्जन्ति । तेसिं च णं थावरकायंसि उववज्जणाणं ठाणमेयं घत्तं ॥ ५ ॥ ८०३ ॥ एवं ण्हं पच्चक्खन्ताणं सुपच्चक्खायं भवइ । एवं ण्हं पच्चक्खावेमाणाणं सुपच्चक्खावियं भवइ । एवं ते परं पच्चक्खावेमाणा नाइयरन्ति सयं पइण्णं नन्नत्थ अभियोगेणं गाहावइचोरग्गहणविमोक्खणयाए तसभूएहिं पाणेहिं निहाय दण्डं । एवमेव सइ भासाए परक्कमे विज्जमाणे जे ते कोहा वा लोहा वा परं पच्चक्खावेन्ति अयं पि नो उवएसे नो नेयाउए भवइ । अविद्याइ आउसो गोयमा तुब्भं पि एवं रोयइ ? ॥ ६ ॥ ८०४ ॥ सवायं भगवं गोयमे उदयं पेढालपुत्तं एवं वयासी-आउसन्तो उदगा, नो खलु अम्हे एवं रोयइ । जे ते समणा वा माहणा वा एवमाइक्खन्ति जाव पव्वेन्ति नो खलु ते समणा वा निग्गन्था भासं भासन्ति, अणुतावियं खलु ते भासं भासन्ति, अब्भाइक्खन्ति खलु ते समणे समणोवासए वा जेहिं पि अच्चेहिं जीवेहिं पाणेहिं भूएहिं सत्तेहिं संजमयन्ति ताण वि ते अब्भाइक्खन्ति । कस्स णं तं हेउं ? संसारिया खलु पाणा, तसा वि पाणा थावरत्ताए पच्चायन्ति थावरा वि वा पाणा तसत्ताए पच्चायन्ति तसकायाओ विप्पमुच्चमाणा थावरकायंसि उववज्जन्ति, थावरकायाओ विप्पमुच्चमाणा तसकायंसि उववज्जन्ति, तेसिं च णं तसकायंसि उववज्जणां ठाणमेयं अघत्तं ॥ ७ ॥ ८०५ ॥ सवायं उदए पेढालपुत्ते भगवं गोयमं एवं वयासी-कयरं खलु ते आउसन्तो गोयमा तुब्भे वयह तसा पाणा तसा आउ अन्नहा ? सवायं भगवं गोयमे उदयं पेढालपुत्तं एवं वयासी-आउसन्तो उदगा जे तुब्भे वयह तसभूया पाणा तसा ते वयं वयामो तसा पाणा, जे वयं वयामो तसा पाणा ते तुब्भे वयह तसभूया पाणा । एए सन्ति दुवे ठाणा तुल्ला एगट्ठा । किमाउसो इमे भे सुप्पणीयतराए भवइ तसभूया पाणा तसा, इमे भे दुप्पणीयतराए भवइ-तसा पाणा तसा । तओ एगमाउसो पडिक्कोसह एक्कं अभिनन्दह । अयं पि भेदो से नो नेयाउए भवइ । भगवं च णं उदाहु-सन्तेगइया मणुस्सा भवन्ति, तेसिं च णं एवं वुत्तपुव्वं भवइ-नो खलु वयं संचाएमो मुण्डा भवित्ता अगाराओ अणगारियं पव्वइत्ताए ।

सावयं ण्हं अणुपुव्वेणं गुत्तस्स लिसिस्सामो । ते एवं संखवेन्ति, ते एवं संखं ठवयन्ति
 ते एवं संखं ठवयन्ति नन्नत्थ अभिओएणं गाहावइचोरग्गहणविमोक्खणयाए तसेहिं
 पाणेहिं निहाय दण्डं । तं पि तेसिं कुसलमेव भवइ ॥८॥८०६॥ तसा वि वुच्चन्ति
 तसा तससंभारकडेणं कम्ममुणा नामं च णं अब्भुवगयं भवइ, तसाउयं च णं पलि-
 क्खीणं भवइ, तसकायट्ठिइया ते तओ आउयं विप्पजहन्ति । ते तओ आउयं
 विप्पजहिता थावरत्ताए पच्चायन्ति । थावरा वि वुच्चन्ति थावरा थावरसंभारकडेणं
 कम्ममुणा नामं च णं अब्भुवगयं भवइ थावराउयं च णं पलिक्खीणं भवइ । थावर-
 कायट्ठिइया ते तओ आउयं विप्पजहन्ति तओ आउयं विप्पजहिता भुजो परलो-
 इयत्ताए पच्चायन्ति । ते पाणा वि वुच्चन्ति, ते तसा वि वुच्चन्ति, ते महाकाया ते
 चिरट्ठिइया ॥ ९ ॥ ८०७ ॥ सवायं उदए पेढालपुत्ते भयवं गोयमं एवं वयासी-
 आउसन्तो गोयमा नत्थि णं से केइ परियाए जं णं समणोवासगरंस एगपाणाइ-
 वायविरए वि दण्डे निक्खित्ते । कस्स णं तं हेउं ? संसारिया खलु पाणा, थावरा
 वि पाणा तसत्ताए पच्चायन्ति, तसा वि पाणा थावरत्ताए पच्चायन्ति, थावरकायाओ
 विप्पमुच्चमाणा सव्वे तसकायंसि उववज्जन्ति, तसकायाओ विप्पमुच्चमाणा सव्वे
 थावरकायंसि उववज्जन्ति, तेसि च णं थावरकायंसि उववज्जणं ठाणमेयं घत्तं ।
 सवायं भगवं गोयमे उदयं पेढालपुत्तं एवं वयासी-नो खलु आउसो अम्हाकं वत्तव्व-
 एणं तुब्भं चेव अणुप्पवाएणं अत्थि णं से परियाए जे णं समणोवासगस्स सव्व-
 पाणेहिं सव्वभूएहिं सव्वजीवेहिं सव्वसत्तेहिं दण्डे निक्खित्ते भवइ । कस्स णं तं
 हेउं ? संसारिया खलु पाणा, तसा वि पाणा थावरत्ताए पच्चायन्ति, थावरा वि पाणा
 तसत्ताए पच्चायन्ति, तसकायाओ विप्पमुच्चमाणा सव्वे थावरकायंसि उववज्जन्ति,
 थावरकायाओ विप्पमुच्चमाणा सव्वे तसकायंसि उववज्जन्ति, तेसिं च णं तसकायंसि
 उववज्जणं ठाणमेयं अघत्तं । ते पाणा वि वुच्चन्ति, ते तसा वि वुच्चन्ति, ते महा-
 काया ते चिरट्ठिइया । ते बहुयरगा पाणा जेहिं समणोवासगस्स सुपच्चक्खायं
 भवइ । ते अप्परगा पाणा जेहिं समणोवासगस्स अपच्चक्खायं भवइ । से महया
 तसकायाओ उवसन्तस्स उवट्ठियस्स पडिविरयस्स जं णं तुब्भे वा अन्नो वा एवं
 वयह-नत्थि णं से केइ परियाए जंसि समणोवासगस्स एगपाणाए वि दण्डे
 निक्खित्ते । अयं पि भेदे से नो नेयाउए भवइ ॥ १० ॥ ८०८ ॥ भगवं च णं
 उदाहु नियण्ठा खलु पुच्छियव्वा । आउसन्तो नियण्ठा इह खलु सन्तेगइया मणुस्सा
 भवन्ति । तेसिं च एवं वुत्तपुव्वं भवइ-जे इमे मुण्डे भवित्ता अगाराओ अणगारियं
 पव्वइए एसिं च णं आमरणन्ताए दण्डे निक्खित्ते । जे इमे अगारमावसन्ति एएसिं

णं आमरणन्ताए दण्डे नो निक्खित्ते । केई च णं समणा जाव वासाइं चउपच्चमाइं छट्ठइसमाइं अप्पयरो वा भुज्जयरो वा देसं दूइज्जिता अगारमावसेज्जा ? हंता-
वसेज्जा । तस्स णं तं गारत्थं वहमाणस्स से पच्चक्खाणे भङ्गे भवइ ? नो इण्ठे
समट्ठे । एवमेव समणोवासगस्स वि तसेहिं पाणेहिं दण्डे निक्खित्ते, थावरेहिं पाणेहिं
दण्डे नो निक्खित्ते । तस्स णं तं थावरकायं वहमाणस्स से पच्चक्खाणे नो भङ्गे
भवइ । से एवमायाणह ? नियण्ठा । एवमायाणियव्वं ॥ भगवं च णं उदाहु नियण्ठा
खलु पुच्छियव्वा-आउसन्तो नियण्ठा इह खलु गाहावई वा गाहावइपुत्तो वा
तहप्पगारेहिं कुलेहिं आगम्म धम्मं सवणवत्तियं उवसंकमेज्जा ? हन्ता उवसंकमेज्जा ।
तेसिं च णं तहप्पगाराणं धम्मं आइक्खियव्वे ? हन्ता आइक्खियव्वे । किं ते
तहप्पगारं धम्मं सोच्चा निसम्म एवं वएज्जा इणमेव निग्गन्थं पावयणं सच्चं अणुत्तरं
केवल्लियं पडिपुणं संसुद्धं नेयाउयं सल्लकतणं सिद्धिमग्गं मुत्तिमग्गं निज्जाणमग्गं
निव्वाणमग्गं अवितहमसंदिद्धं सव्वदुक्खप्पहीणमग्गं । एत्थ ठिया जीवा सिज्जन्ति
वुज्जन्ति मुच्चन्ति परिणिव्वायन्ति सव्वदुक्खाणमन्तं करेन्ति । तमाणाए तहा
गच्छामो तहा चिट्ठामो तहा निसीयामो तहा तुयट्ठामो तहा भुज्जामो तहा भासामो
तहा अब्भुट्ठामो तहा उट्ठाए उट्ठेमो त्ति पाणाणं भूयाणं जीवाणं सत्ताणं संजमेणं
संजमामो त्ति वएज्जा ? हन्ता वएज्जा । किं ते तहप्पगारा कप्पन्ति पव्वावित्तए ?
हन्ता कप्पन्ति । किं ते तहप्पगारा कप्पन्ति मुण्डावित्तए ? हन्ता कप्पन्ति । किं
ते तहप्पगारा कप्पन्ति सिक्खावित्तए ? हन्ता कप्पन्ति । किं ते तहप्पगारा
कप्पन्ति उवट्ठावित्तए ? हन्ता कप्पन्ति । तेसिं च णं तहप्पगाराणं सव्वपाणेहिं
जाव सव्वसत्तेहिं दण्डे निक्खित्ते ? हंता निक्खित्ते । से णं एयारुवेणं विहारेणं
विहरमाणा जाव वासाइं चउपच्चमाइं छट्ठइसमाइं वा अप्पयरो वा भुज्जयरो वा देसं
दूइज्जिता अगारं वएज्जा ? हन्ता वएज्जा । तस्स णं सव्वपाणेहिं जाव सव्वसत्तेहिं
दण्डे नो निक्खित्ते ? नो इण्ठे समट्ठे । से जे से जीवे जस्स परेणं सव्वपाणेहिं
जाव सव्वसत्तेहिं दण्डे नो निक्खित्ते । से जे से जीवे जस्स आरेणं सव्वपाणेहिं
जाव सत्तेहिं दण्डे निक्खित्ते । से जे से जीवे जस्स इयाणिं सव्वपाणेहिं जाव सत्तेहिं
दण्डे नो निक्खित्ते भवइ, परेणं असंजए आरेणं संजए, इयाणिं असंजए, असंज-
यस्स णं सव्वपाणेहिं जाव सत्तेहिं दण्डे नो निक्खित्ते भवइ । से एवमायाणह ?
नियण्ठा से एवमायाणियव्वं ॥ भगवं च णं उदाहु नियण्ठा खलु पुच्छियव्वा-
आउसन्तो नियण्ठा इह खलु परिव्वाइया वा परिव्वाइयाओ वा अन्नयरेहितो
तित्थाययणेहितो आगम्म धम्मं सवणवत्तियं उवसंकमेज्जा ? हन्ता उवसंकमेज्जा ।

किं तेसिं तहप्पगारेणं धम्मे आइक्खियव्वे ? हन्ता आइक्खियव्वे । तं चेव उ-
 द्धावित्तए जाव कप्पन्ति ? हन्ता कप्पन्ति । किं ते तहप्पगारा कप्पन्ति संभुजित्तए ?
 हन्ता कप्पन्ति । ते णं एयारूवेणं विहारेणं विहरमाणा तं चेव जाव अगारं वएज्जा ?
 हन्ता वएज्जा । ते णं तहप्पगारा कप्पन्ति संभुजित्तए ? नो इणट्ठे समट्ठे । से जे से
 जीवे जे परेणं नो कप्पन्ति संभुजित्तए । से जे से जीवे आरेणं कप्पन्ति संभुजित्तए ।
 से जे से जीवे जे इयाणिं नो कप्पन्ति संभुजित्तए । परेणं अस्समणे आरेणं समणे,
 इयाणिं अस्समणे, अस्समणेणं सद्धिं नो कप्पन्ति समणाणं निगंथाणं संभुजित्तए ।
 से एवमायाणह ? नियण्ठा से एवमायाणियव्वं ॥ ११ ॥ ८०९ ॥ भगवं च णं
 उदाहु सन्तेगइया समणोवासगा भवन्ति । तेसिं च णं एवं वुत्तपुव्वं भवइ-नो खलु
 वयं संचाएमो मुण्डा भवित्ता अगाराओ अणगारियं पव्वइत्तए । वयं णं चाउइसट्ठ-
 मुद्धिपुण्णिमासिणीसु पडिपुण्णं पोसहं सम्मं अणुपालेमाणा विहरिस्सामो । थूलगं
 पाणाइवायं पच्चक्खाइस्सामो, एवं थूलगं मुसावायं थूलगं अदिन्नादाणं थूलगं मेहुणं
 थूलगं परिग्गहं पच्चक्खाइस्सामो । इच्छापरिमाणं करिस्सामो, दुविहं तिविहेणं ।
 मा खलु ममट्ठाए किंचि करेह वा करावेह वा तत्थ वि पच्चक्खाइस्सामो । ते णं
 अभोच्चा अपिच्चा असिणाइत्ता आसन्दीपेढियाओ पच्चोरुहिता, ते तहा कालगया
 किं वत्तव्वं सिया-सम्मं कालगय ति ? वत्तव्वं सिया । ते पाणा वि वुच्चन्ति ते
 तसा वि वुच्चन्ति ते महाकाया ते चिरट्ठिइया । ते बहुयरगा पाणा जेहिं समणो-
 वासगस्स सुपच्चक्खायं भवइ । ते अप्पयरगा पाणा जेहिं समणोवासगस्स अपच्च-
 क्खायं भवइ । इति से महयाओ जं णं तुब्भे वयह तं चेव जाव अयं पि भेदे से
 नो नेयाउए भवइ ॥ भगवं च णं उदाहु सन्तेगइया समणोवासगा भवन्ति । तेसिं
 च णं एवं वुत्तपुव्वं भवइ-नो खलु वयं संचाएमो मुण्डा भवित्ता अगाराओ जाव
 पव्वइत्तए । नो खलु वयं संचाएमो चाउइसट्ठमुद्धिपुण्णिमासिणीसु जाव अणुपाले-
 माणे विहरित्तए । वयं णं अपच्छिममारणन्तियं संलेहणाजूसणाजूसिया भत्तपाणं
 पडियाइक्खिया जाव कालं अणवकंखमाणा विहरिस्सामो । सव्वं पाणाइवायं पच्च-
 क्खाइस्सामो जाव सव्वं परिग्गहं पच्चक्खाइस्सामो तिविहं तिविहेणं मा खलु मम-
 ट्ठाए किंचि वि जाव आसन्दीपेढियाओ पच्चोरुहिता एए तहा कालगया, किं वत्तव्वं
 सिया सम्मं कालगय ति ? वत्तव्वं सिया । ते पाणा वि वुच्चन्ति जाव अयं पि
 भेदे से नो नेयाउए भवइ ॥ भगवं च णं उदाहु सन्तेगइया मणुस्सा भवन्ति । तं
 जहा-महइच्छा महारम्भा महापरिग्गहा अहम्मिया जाव दुप्पडियाणंदा जाव
 सव्वाओ परिग्गहाओ अप्पडिविरया जावजीवाए जेहिं समणोवासगस्स आयाणसो

आमरणन्ताए दण्डे निक्खित्ते ते तओ आउगं विप्पजहन्ति तओ भुज्जो सगमादाए दुग्गइगामिणो भवन्ति, ते पाणावि वुच्चन्ति ते तसावि वुच्चन्ति ते महाकाया ते चिर-
 ष्ठिइया ते बहुयरगा आयाणसो इति से महयाओ णं जणं तुब्भे वदह तं चेव
 अयंपि भेदे से णो नेयाउए भवइ-भगवं च णं उदाहु सन्तेगइया मणुस्सा भवन्ति ।
 तं जहा-अणारम्भा अपरिग्गहा धम्मिया धम्माणया जाव सव्वाओ परिग्गहाओ
 पडिविरया जावजीवाए, जेहिं समणोवासगस्स आयाणसो आमरणन्ताए दण्डे
 निक्खित्ते, ते तओ आउगं विप्पजहन्ति, ते तओ भुज्जो सगमायाए सोग्गइगामिणो
 भवन्ति । ते पाणा वि वुच्चन्ति जाव नो नेयाउए भवइ । भगवं च णं उदाहु
 सन्तेगइया मणुस्सा भवन्ति । तं जहा-अप्पिच्छा अप्पारम्भा अप्पपरिग्गहा
 धम्मिया धम्माणया जाव एग्गच्चाओ परिग्गहाओ अप्पडिविरया, जेहिं समणोवास-
 गस्स आयाणसो आमरणन्ताए दण्डे निक्खित्ते । ते तओ आउगं विप्पजहन्ति,
 तओ भुज्जो सगमादाए सोग्गइगामिणो भवन्ति । ते पाणा वि वुच्चन्ति जाव नो
 नेयाउए भवइ । भगवं च णं उदाहु सन्तेगइया मणुस्सा भवन्ति । तं जहा-
 आरणिण्या आवसहिया गामणियन्तिया कण्हुईरहस्सिया, जेहिं समणोवासगस्स
 आयाणसो आमरणन्ताए दण्डे निक्खित्ते भवइ । नो बहुसंजया नो बहुपडिविरया
 पाणभूयजीवसत्तेहिं अप्पणा सच्चामोसाइं एवं विप्पडिवेदेन्ति-अहं न हन्तव्वो
 अन्ने हन्तव्वा जाव कालमासे कालं किच्चा अन्नयराइं आसुरियाइं किव्विसियाइं
 जाव उववत्तारो भवन्ति, तओ विप्पमुच्चमाणा भुज्जो एलमुयत्ताए तमोवत्ताए
 पच्चायन्ति । ते पाणा वि वुच्चन्ति जाव नो नेयाउए भवइ । भगवं च णं उदाहु
 सन्तेगइया पाणा दीहाउया जेहिं समणोवासगस्स आयाणसो आमरणन्ताए जाव
 दण्डे निक्खित्ते भवइ । ते पुव्वामेव कालं करेन्ति करित्ता पारलोइयत्ताए पच्चा-
 यन्ति । ते पाणा वि वुच्चन्ति, ते तसा वि वुच्चन्ति । ते महाकाया ते चिरट्ठिइया
 ते दीहाउया ते बहुयरगा, पाणा जेहिं समणोवासगस्स सुपच्चक्खायं भवइ, जाव
 नो नेयाउए भवइ । भगवं च णं उदाहु सन्तेगइया पाणा समाउया, जेहिं समणो-
 वासगस्स आयाणसो आमरणन्ताए जाव दण्डे निक्खित्ते भवइ । ते सयमेव कालं
 करेन्ति, करित्ता पारलोइयत्ताए पच्चायन्ति । ते पाणा वि वुच्चन्ति, तसा वि वुच्चन्ति,
 ते महाकाया ते समाउया ते बहुयरगा जेहिं समणोवासगस्स सुपच्चक्खायं भवइ
 जाव नो नेयाउए भवइ । भगवं च णं उदाहु सन्तेगइया पाणा अप्पाउया, जेहिं
 समणोवासगस्स आयाणसो आमरणन्ताए जाव दण्डे निक्खित्ते भवइ । ते पुव्वामेव
 कालं करेन्ति, करित्ता पारलोइयत्ताए पच्चायन्ति । ते पाणा वि वुच्चन्ति, ते तसा वि

वुच्चन्ति, ते महाकाया ते अप्पाउया ते बहुयरगा पाणा जेहिं समणोवासगस्स सुप-
 च्चक्खायं भवइ, जाव नो नेयाउए भवइ । भगवं च णं उदाहु सन्तेगइया समणो-
 वासगा भवन्ति । तेसि च णं एवं वुत्तपुव्वं भवइ-नो खलु वयं संचाएमो मुण्डे
 भविता जाव पव्वइत्तए । नो खलु वयं संचाएमो चाउद्दसट्ठमुद्धिट्ठपुण्णमासिणीसु
 पडिपुण्णं पोसहं अणुपालित्तए । नो खलु वयं संचाएमो अपच्छिमं जाव विहरित्तए
 वयं च णं सामाइयं देसावगासियं पुरत्था पाईणं वा पडीणं वा दाहिणं वा उदीणं
 वा एयावया जाव सव्वपाणेहिं जाव सव्वसत्तेहिं दण्डे निक्खित्ते सव्वपाणभूय-
 जीवसत्तेहिं खेमंकरे अहमंसि । तत्थ आरेणं जे तसा पाणा जेहिं समणोवासगस्स
 आयाणसो आमरणन्ताए दण्डे निक्खित्ते । तओ आउं विप्पजहन्ति, विप्पजहिता तत्थ
 आरेणं चेव जे तसा पाणा जेहिं समणोवासगस्स आयाणसो जाव तेसु पच्चायन्ति,
 जेहिं समणोवासगस्स सुपच्चक्खायं भवइ । ते पाणा वि जाव अयं पि भेदे जाव नेया-
 उए भवइ ॥ ८१० ॥ तत्थ आरेणं जे तसा पाणा जेहिं समणोवासगस्स आया-
 णसो आमरणन्ताए दण्डे निक्खित्ते ते तओ आउं विप्पजहन्ति । विप्पजहिता
 तत्थ आरेणं चेव जाव थावरा पाणा जेहिं समणोवासगस्स अट्ठाए दण्डे अनि-
 क्खित्ते अणट्ठाए दण्डे निक्खित्ते तेसु पच्चायन्ति । तेहिं समणोवासगस्स अट्ठाए दण्डे
 अनिक्खित्ते अणट्ठाए दण्डे निक्खित्ते, ते पाणा वि वुच्चन्ति, ते तसा ते चिरट्ठिइया
 जाव अयं पि भेदे से... । तत्थ जे आरेणं तसा पाणा जेहिं समणोवासगस्स
 आयाणसो आमरणन्ताए...तओ आउं विप्पजहन्ति विप्पजहिता तत्थ परेणं
 जे तसा थावरा पाणा जेहिं समणोवासगस्स आयाणसो आमरणन्ताए...तेसु
 पच्चायन्ति, तेहिं समणोवासगस्स सुपच्चक्खायं भवइ, ते पाणा वि जाव अयं पि
 भेदे से... । तत्थ जे आरेणं थावरा पाणा जेहिं समणोवासगस्स अट्ठाए दण्डे
 अणिक्खित्ते अणट्ठाए निक्खित्ते ते तओ आउं विप्पजहन्ति, विप्पजहिता तत्थ
 आरेणं चेव जे तसा पाणा जेहिं समणोवासगस्स आयाणसो आमरणन्ताए...
 तेसु पच्चायन्ति, तेसु समणोवासगस्स सुपच्चक्खायं भवइ, ते पाणा वि जाव अयं
 पि भेदे से... । तत्थ जे ते आरेणं जे थावरा पाणा जेहिं समणोवासगस्स अट्ठाए
 दण्डे अणिक्खित्ते अणट्ठाए निक्खित्ते, ते तओ आउं विप्पजहन्ति विप्पजहिता
 ते तत्थ आरेणं चेव जे थावरा पाणा जेहिं समणोवासगस्स अट्ठाए दण्डे अणि-
 क्खित्ते अणट्ठाए निक्खित्ते तेसु पच्चायन्ति । तेहिं समणोवासगस्स अट्ठाए अणट्ठाए
 ते पाणा वि जाव अयं पि भेदे से नो... । तत्थ जे ते आरेणं थावरा पाणा जेहिं
 समणोवासगस्स अट्ठाए दण्डे अणिक्खित्ते, अणट्ठाए निक्खित्ते तओ आउं विप्पज-

हन्ति । विप्पजहिता तत्थ परेणं जे तसथावरा पाणा जेहिं समणोवासगस्स आयाणसो आमरणन्ताए० तेसु पच्चायन्ति । तेहिं समणोवासगस्स सुपच्चक्खायं भवइ । ते पाणा वि जाव अयं पि भेदे से नो नेयाउए भवइ । तत्थ जे ते परेणं तसथावरा पाणा जेहिं समणोवासगस्स आयाणसो आमरणन्ताए० ते तओ आउं विप्पजहन्ति, विप्पजहिता तत्थ आरेणं जे तसा पाणा जेहिं समणोवासगस्स आयाणसो आमरणन्ताए...तेसु पच्चायन्ति । तेहिं समणोवासगस्स सुपच्चक्खायं भवइ । ते पाणा वि जाव अयं पि भेदे से नो नेयाउए भवइ । तत्थ जे ते परेणं तसथावरा पाणा जेहिं समणोवासगस्स आयाणसो आमरणन्ताए...ते तओ आउं विप्पजहन्ति विप्पजहिता तत्थ आरेणं जे थावरा पाणा जेहिं समणोवासगस्स अट्ठाए दण्डे अणिक्खित्ते अणट्ठाए निक्खित्ते तेसु पच्चायन्ति, जेहिं समणोवासगस्स अट्ठाए अणिक्खित्ते, अणट्ठाए निक्खित्ते जाव ते पाणा वि जाव अयं पि भेदे से नो...। तत्थ जे ते परेणं तसथावरा पाणा जेहिं समणोवासगस्स आयाणसो आमरणन्ताए... ते तओ आउं विप्पजहन्ति । विप्पजहिता ते तत्थ परेणं चेव जे तसथावरा पाणा जेहिं समणोवासगस्स आयाणसो आमरणन्ताए० तेसु पच्चायन्ति, जेहिं समणोवासगस्स सुपच्चक्खायं भवइ । ते पाणा वि जाव अयं पि भेदे से नो...। भगवं च णं उदाहु न एयं भूयं न एयं भव्वं न एयं भविस्सइ जं णं तसा पाणा वोच्छिज्जिहन्ति थावरा पाणा भविस्सन्ति, थावरा पाणा वि वोच्छिज्जिहन्ति तसा पाणा भविस्सन्ति । अवोच्छिजेहिं तसथावरेहिं पाणेहिं जं णं तुब्भे वा अन्नो वा एवं वदहन्ति णं से केइ परियाए जाव नो नेयाउए भवइ ॥ ८११ ॥ भगवं च णं उदाहु आउसन्तो उदगा जे खलु समणं वा माहणं वा परिभासेइ मित्ति मन्नन्ति आगमिता नाणं आगमिता दंसणं आगमिता चरित्तं पावाणं कम्माणं अकरणयाए से खलु परलोगपलिमन्थताए चिट्ठइ, जे खलु समणं वा माहणं वा नो परिभासेइ मित्ति मन्नन्ति आगमिता नाणं आगमिता दंसणं आगमिता चरित्तं पावाणं कम्माणं अकरणयाए से खलु परलोगविसुद्धीए चिट्ठइ । तए णं से उदए पेढालपुत्ते भगवं गोयमं अणाढायमाणे जामेव दिसिं पाउब्भूए तामेव दिसिं पहारेत्थ गमणाए । भगवं च णं उदाहु आउसन्तो उदगा जे खलु तहाभूयस्स समणस्स वा माहणस्स वा अन्तिए एगमवि आरियं धम्मियं सुवयणं सोच्चा निसम्म अप्पणो चेव सुहुमाए पडिलेहाए अणुत्तरं जोगखेमपयं लम्भिए समाणे सो वि ताव तं आढाइ परिजाणेइ वन्दइ नमंसइ सक्कारेइ सम्माणेइ जाव कल्लणं मंगलं देवयं चेइयं पज्जुवासइ । तए णं से उदए पेढालपुत्ते भगवं गोयमं एवं वयासी-एएसिं णं भन्ते पदाणं पुव्वि

अन्नाण्याए असेवण्याए अवोहिए अणभिगमेणं अदिट्ठाणं असुयाणं अमुयाणं
 अविन्नायाणं अव्वोगडाणं अविग्गूढाणं अविच्छिन्नाणं अणिसिट्ठाणं अणिवूढाणं अणु-
 व्हारियाणं एयमट्ठं नो सदहियं नो पत्तियं नो रोइयं । एएसिं णं भन्ते पंदाणं एण्हिं
 जाणयाए सवणयाए वोहिए जावे उवहारण्याए एयमट्ठं सदहामि पत्तियामि रोएमि
 एवमेव से जहेयं तुब्भे वदह । तए णं भगवं गोयमे उदगं पेढालपुत्तं एवं वयासी
 सदहाहि णं अज्जो पत्तियाहि णं अज्जो रोएहि णं अज्जो एवमेयं जहा णं अम्हे
 वयामो । तए णं से उदए पेढालपुत्ते भगवं गोयमं एवं वयासी-इच्छामि णं भन्ते
 तुब्भं अन्तिए चाउज्जामाओ धम्माओ पच्चमहव्वइयं सपडिक्कमणं धम्मं उवसंप-
 ज्जिता णं विहरित्तए ॥ तए णं से भगवं गोयमे उदगं पेढालपुत्तं गहाय्यं जेणेवं
 समणे भगवं महावीरे तेणेव उवागच्छइ, उवागच्छितां तए णं से उदए पेढालपुत्ते
 समणं भगवं महावीरं तिव्वुत्तो आयाहिणं पयाहिणं करेइ, तिव्वुत्तो आयाहिणं
 पयाहिणं करित्ता वन्दइ नमंसइ वन्दिता नमंसित्ता एवं वयासी-इच्छामि णं भन्ते
 तुब्भं अन्तिए चाउज्जामाओ धम्माओ पच्चमहव्वइयं सपडिक्कमणं धम्मं उवसंप-
 ज्जिता णं विहरित्तए । तए णं समणे भगवं महावीरे उदगं एवं वयासी-अहाखुहं
 देवाणुप्पिया मा पडिबन्धं करेहि । तए णं से उदए पेढालपुत्ते समणस्स भगवओ
 महावीरस्स अन्तिए चाउज्जामाओ धम्माओ पच्चमहव्वइयं सपडिक्कमणं धम्मं उव-
 संपज्जिता णं विहरइ त्ति वेमि ॥ १४ ॥ ८१२ ॥ नालन्दइज्जज्जयणं सत्तमं ॥

सूर्यगडं समत्तं ॥



णमो त्थु णं समणंस्स भगवओ णायपुत्तं महावीरस्स

ठाणे

पढेमं ठाणं

सुयं मे आउसं ! तेणं भगवया एव मक्खायं, एगे आया ॥ १ ॥ एगे दंडे
 ॥ २ ॥ एगा किरिया ॥ ३ ॥ एगे लोए ॥ ४ ॥ एगे अलोए ॥ ५ ॥ एगे धम्मे
 ॥ ६ ॥ एगे अहम्मे ॥ ७ ॥ एगे वंधे ॥ ८ ॥ एगे मोक्खे ॥ ९ ॥ एगे पुण्णे
 ॥ १० ॥ एगे पावे ॥ ११ ॥ एगे आसवे ॥ १२ ॥ एगे संवरे ॥ १३ ॥ एगा
 वेयणा ॥ १४ ॥ एगा णिज्झरा ॥ १५ ॥ एगे जीवे पांडिक्कएणं सरीरएणं ॥ १६ ॥
 एगा जीवाणं अपरिआइत्ता विगुव्वणां ॥ १७ ॥ एगे मणे ॥ १८ ॥ एगा वई
 ॥ १९ ॥ एगे कायवायामे ॥ २० ॥ एगा उप्पा ॥ २१ ॥ एगा वियती ॥ २२ ॥
 एगा वियत्ता ॥ २३ ॥ एगा गई ॥ २४ ॥ एगा आंगई ॥ २५ ॥ एगे चयणे
 ॥ २६ ॥ एगे उव्वीए ॥ २७ ॥ एगा तक्का ॥ २८ ॥ एगा सन्ना ॥ २९ ॥ एगा
 मन्ना ॥ ३० ॥ एगा विद्धू ॥ ३१ ॥ एगा वेयणा ॥ ३२ ॥ एगा छेयणा ॥ ३३ ॥
 एगा भेयणा ॥ ३४ ॥ एगे मरणे अंतिमसारीरियाणं ॥ ३५ ॥ एगे संसुद्धे अहाभूते
 पत्ते ॥ ३६ ॥ एगे दुक्खे जीवाणं ॥ ३७ ॥ एगे भूए ॥ ३८ ॥ एगा अहम्मपडिमा
 जं से आया पडिकिलेसइ ॥ ३९ ॥ एगा धम्मपडिमा जं से आया पज्जवजाए
 ॥ ४० ॥ एगे मणे देवासुरमणुआणं तंसि तंसि समयंसि, एगा वई देवासुरमणुआणं
 तंसि तंसि समयंसि, एगे कायवायामे देवासुरमणुआणं तंसि तंसि समयंसि, एगे
 उट्ठुण्णकम्मवलवीरियापुरिसंकारिपरक्कमे देवासुरमणुआणं तंसि तंसि समयंसि ॥ ४१ ॥
 एगे नाणे ॥ ४२ ॥ एगे दंसणे ॥ ४३ ॥ एगे चरिसे ॥ ४४ ॥ एगे समं
 ॥ ४५ ॥ एगे पएसे ॥ ४६ ॥ एगे परमाणू ॥ ४७ ॥ एगा सिद्धी ॥ ४८ ॥ एगे
 सिद्धे ॥ ४९ ॥ एगे परिनिव्वाणे ॥ ५० ॥ एगे परिनिव्वुए ॥ ५१ ॥ एगे सदे
 ॥ ५२ ॥ एगे रूवे ॥ ५३ ॥ एगे गंधे ॥ ५४ ॥ एगे रसे ॥ ५५ ॥ एगे फासे
 ॥ ५६ ॥ एगे सुब्भिसदे, एगे दुब्भिसदे ॥ ५७ ॥ एगे सुरूवे एगे दुरूवे ॥ ५८ ॥
 एगे दीहे एगे हस्से ॥ ५९ ॥ एगे वट्ठे-एगे तंसे-एगे चंडरसे-एगे पिहुले-एगे
 परिमंडले ॥ ६० ॥ एगे किण्हे-एगे नीले-एगे लोहि-एगे हांलिहे-एगे सुक्किले
 ॥ ६१ ॥ एगे सुब्भिमगंधे-एगे दुब्भिमगंधे ॥ ६२ ॥ एगे तित्ते-एगे कडुए-एगे कसाए
 एगे अंबिले-एगे मंहुरे ॥ ६३ ॥ एगे कक्खडे-जाव एगे लुक्खे ॥ ६४ ॥ एगे

पाणाइवाए जाव एगे परिग्गहे ॥ एगे कोहे जाव लोहे, एगे पेजे, एगे दोसे, जाव
 एगे परपरिवाए, एगा अरइरइ, एगे मायामोसे एगे मिच्छादंसणसल्ले ॥ ६५ ॥ एगे
 पाणाइवायवेरमणे जाव परिग्गहवेरमणे, एगे कोहविवेगे, जाव मिच्छादंसणसल्लविवेगे
 ॥ ६६ ॥ एगा ओसप्पिणी एगा सुसमसुसमा जाव एगा दुसमदुसमा, एगा उस्सप्पिणी,
 एगा दुसमदुसमा जाव एगा सुसमसुसमा ॥ ६७ ॥ एगा णेरइयाणं वग्गणा,
 एगा असुरकुमाराणं वग्गणा, चउवीसदंडओ जाव एगा वेमाणियाणं वग्गणा
 ॥ ६८ ॥ एगा भवसिद्धियाणं वग्गणा, एगा अभवसिद्धियाणं वग्गणा, एगा भव-
 सिद्धियाणं णेरइयाणं वग्गणा, एगा अभवसिद्धियाणं णेरइयाणं वग्गणा, एवं जाव
 एगा भवसिद्धियाणं वेमाणियाणं वग्गणा एगा अभवसिद्धियाणं वेमाणियाणं वग्गणा
 ॥ ६९ ॥ एगा सम्मदिट्ठियाणं वग्गणा, एगा मिच्छदिट्ठियाणं वग्गणा, एगा सम्म-
 मिच्छदिट्ठियाणं वग्गणा, एगा सम्मदिट्ठियाणं णेरइयाणं वग्गणा, एगा मिच्छदिट्ठि-
 याणं णेरइयाणं वग्गणा, एगा सम्ममिच्छादिट्ठियाणं नेरइयाणं वग्गणा, एवं जाव
 थणियकुमाराणं, एगा मिच्छदिट्ठियाणं पुढवीकाइयाणं वग्गणा, एवं जाव वणस्सइ-
 काइयाणं, एगासम्मदिट्ठियाणं बेइंदियाणं वग्गणा, एगा मिच्छदिट्ठियाणं बेइंदियाणं
 वग्गणा, एवं तेइंदियाणं चउरिंदियाणं वि सेसा जहा नेरइयो, जाव एगा सम्म-
 मिच्छदिट्ठियाणं वेमाणियाणं वग्गणा ॥ ७० ॥ एगा कण्हपक्खियाणं वग्गणा, एगा
 सुक्कपक्खियाणं वग्गणा, एगा कण्हपक्खियाणं नेरइयाणं वग्गणा, एगा सुक्कपक्खियाणं
 णेरइयाणं वग्गणा, एवं चउवीसदंडओवि भाणियव्वो ॥ ७१ ॥ एगा कण्हलेस्साणं
 वग्गणा, एगा णीललेस्साणं वग्गणा, एवं जाव सुक्कलेस्साणं वग्गणा, एगा कण्हलेस्साणं
 नेरइयाणं वग्गणा, जाव काउलेस्साणं नेरइयाणं वग्गणा, एवं जस्स जति लेस्साओ,
 भवणवइवाणमंतरपुढविआउवणस्सइकाइयाणं च चत्तारि लेस्साओ तेऊवाउवेंदियते-
 इंदियचउरिंदियाणं तिन्निलेस्साओ पंचिंदियतिरिक्खजोणियाणं मणुस्साणं छल्लेस्साओ,
 जोइसियाणं एगा तेउलेस्सा, वेमाणियाणं तिन्निउवरिमलेस्साओ एगा कण्हलेस्साणं
 भवसिद्धियाणं वग्गणा, एगा कण्हलेस्साणं अभवसिद्धियाणं वग्गणा, एवं छसु वि
 लेस्सासु दो दो पयाणि भाणियव्वाणि, एगा कण्हलेस्साणं भवसिद्धियाणं नेरइयाणं
 वग्गणा, एगा कण्हलेस्साणं अभवसिद्धियाणं नेरइयाणं वग्गणा, एवं जस्स जति
 लेस्साओ तस्स तति भाणियव्वाओ, जाव वेमाणियाणं । एगा कण्हलेस्साणं समदिट्ठि-
 याणं वग्गणा, एगा कण्हलेस्साणं मिच्छादिट्ठियाणं वग्गणा, एगा कण्हलेस्साणं सम्म-
 मिच्छदिट्ठियाणं वग्गणा, एवं छसु वि लेस्सासु जाव वेमाणियाणं जेसिं जइ दिट्ठीओ,
 एगा कण्हलेस्साणं कण्हपक्खियाणं वग्गणा, एगा कण्हलेस्साणं सुक्कपक्खियाणं

वग्गणा, एवं जाव वेमाणियाणं, जस्स जइ लेस्साओ, एए अठ्ठ चउवीसदंडया ॥७२॥
 एगा तित्थसिद्धाणं वग्गणा, एगा अतित्थसिद्धाणं वग्गणा, एवं जाव एगा एगसिद्धाणं
 वग्गणा, एगा अणेगसिद्धाणं वग्गणा, एगा पढमसमयसिद्धाणं वग्गणा, एवं जाव
 अणंतसमयसिद्धाणं वग्गणा ॥ ७३ ॥ एगा परमाणुपोग्गलाणं वग्गणा, एवं जाव
 एगा अणंतपएसियाणं खंधाणं पोग्गलाणं वग्गणा, एगा एगपएसोगाढाणं पोग्गलाणं
 वग्गणा, जाव एगा असंखेज्जपएसोगाढाणं पोग्गलाणं वग्गणा, एगा एगसमय-
 ठिइयाणं पोग्गलाणं वग्गणा, जाव असंखेज्जसमयठिइयाणं पोग्गलाणं वग्गणा,
 एगा एगगुणकालयाणं पोग्गलाणं वग्गणा, जाव एगा असंखेज्ज एगा अणंतगुण-
 कालयाणं पोग्गलाणं वग्गणा, एवं वण्णगंधरसफासा भाणियव्वा जाव एगा अणंत-
 गुणलुक्खाणं पोग्गलाणं वग्गणा, एगा जहन्नपएसियाणं खंधाणं वग्गणा, एगा
 उक्कोसपएसियाणं खंधाणं वग्गणा, एगा अजहन्नक्कोसपएसियाणं खंधाणं वग्गणा,
 एवं जहन्नोगाहणगाणं, उक्कोसोगाहणगाणं, अजहन्नक्कोसोगाहणगाणं, जहन्नठिइयाणं,
 उक्कोसठिइयाणं, अजहन्नक्कोसठिइयाणं, जहन्नगुणकालगाणं, उक्कोसगुणकालगाणं,
 अजहन्नक्कोसगुणकालगाणं, एवं वण्णगंधरसफासाणं वग्गणा भाणियव्वा, जाव एगा
 अजहन्नक्कोसगुणलुक्खाणं पोग्गलाणं वग्गणा ॥ ७४ ॥ एगे जंवुद्दीवे २ सव्वदीव-
 समुद्दाणं जाव अद्वंगुलगं च किंचि विसेसाहिए परिकखेवेणं ॥-७५ ॥ एगे समणे
 भगवं महावीरे इमीसे ओसप्पिणीए चउवीसाए तित्थगराणं चरमतित्थयरे सिद्धे
 बुद्धे मुत्ते जाव सव्वदुक्खप्पहीणे ॥ ७६ ॥ अणुत्तरोववाइयाणं देवाणं एगा रयणी
 उद्धं उच्चत्तेणं पन्नत्ता ॥ ७७ ॥ अद्धानक्खत्ते एगतारे पन्नत्ते, चित्तानक्खत्ते एगतारे
 पन्नत्ते, साईनक्खत्ते एगतारे पन्नत्ते ॥ ७८ ॥ एगपएसोगाढा पोग्गला अणंता
 पन्नत्ता, एवमेगसमयठिइया, एगगुणकालगा पोग्गला अणंता पन्नत्ता, जाव एगगुण-
 लुक्खा पोग्गला अणंता पन्नत्ता ॥ ७९ ॥ **पढमं ठाणं समत्तं ॥**

जदत्थि णं लोए तं सव्वं दुपडोआरं, तंजहा-जीवा चेव अजीवा चेव, तसे चेव
 थावरे चेव, सजोणिया चेव अजोणिया चेव, साउया चेव अणाउया चेव, सईंदिया
 चेव अणिदिया चेव, सवेयगा चेव अवेयगा चेव, सरूवि चेव अरूवि चेव, सपो-
 गला चेव अपोग्गला चेव, संसारसमावन्नगा चेव असंसारसमावन्नगा चेव, सासया
 चेव असासया चेव, आगासे चेव नो आगासे चेव, धम्मे चेव अधम्ममे चेव, वंधे
 चेव मोक्खे चेव, पुण्णे चेव पावे चेव, आसवे चेव संवरे चेव, वेयणा चेव,
 णिज्जरा चेव ॥ ८० ॥ दो किरियाओ प० तंजहा-जीवकिरिया चेव अजीव-
 किरिया चेव, जीवकिरिया दुविहा पन्नत्ता, तंजहा-संम्मत्तकिरिया चेव मिच्छत्त-

किरिया चेव, अजीवकिरिया दुविहा पन्नत्ता, तंजहा-इरियावंहिया चेव संपराइया
 चेव ॥ ८१ ॥ दो किरियाओ पं० तंजहा-काइया चेव अहिगरणिया चेव,
 काइया किरिया दुविहा पन्नत्ता, तंजहा-अणुवरयकायकिरिया चेव, दुप्पउत्तकाय-
 किरिया चेव, अहिगरणियाकिरिया दुविहा पन्नत्ता, तंजहा-संजोयणाहिगरणिया
 चेव णिवत्तणाहिगरणिया चेव ॥ ८२ ॥ दो किरियाओ पं० तंजहा-पाउसिया
 चेव पारियावणिया चेव, पाउसिया किरिया दुविहा पन्नत्ता, तंजहा-जीवपाउसिया
 चेव अजीवपाउसिया चेव, पारियावणियाकिरिया दुविहा पन्नत्ता, तंजहा-सहत्थपारि-
 यावणिया चेव, परहत्थपारियावणिया चेव ॥ ८३ ॥ दो किरियाओ पं० तंजहा-
 पाणाइवायकिरिया चेव, अपच्चक्खाणकिरिया चेव, पाणाइवायकिरिया दुविहा
 पन्नत्ता, तंजहा-सहत्थपाणाइवायकिरिया चेव, परहत्थपाणाइवायकिरिया चेव,
 अपच्चक्खाणकिरिया दुविहा पन्नत्ता, तंजहा-जीवअपच्चक्खाणकिरिया चेव, अजीव-
 अपच्चक्खाणकिरिया चेव ॥ ८४ ॥ दो किरियाओ पं० तंजहा-आरंभिया चेव
 परिग्गहिया चेव, आरंभियाकिरिया दुविहा पन्नत्ता, तंजहा-जीवआरंभिया चेव
 अजीवआरंभिया चेव, एवं परिग्गहियावि ॥ ८५ ॥ दो किरियाओ पं० तंजहा-
 मायावत्तिआ चेव, मिच्छादंसणवत्तिआ चेव, मायावत्तिआकिरिया दुविहा पन्नत्ता,
 तंजहा-आयभाववंकणया चेव परभाववंकणया चेव, मिच्छादंसणवत्तिआकिरिया
 दुविहा पन्नत्ता, तंजहा-ऊणाइरित्तमिच्छादंसणवत्तिआ चेव तंजहाइरित्तमिच्छादंसण-
 वत्तिआ चेव ॥ ८६ ॥ दो किरियाओ पं० तंजहा-दिट्ठिया चेव पुट्ठिया चेव,
 दिट्ठियाकिरिया दुविहा पं० तंजहा-जीवदिट्ठिया चेव अजीवदिट्ठिया चेव, एवं
 पुट्ठियावि ॥ ८७ ॥ दो किरियाओ पं० तंजहा-पांडुच्चिया चेव सामंतोवणि-
 वाइया चेव, पांडुच्चियाकिरिया दुविहा पन्नत्ता, तंजहा-जीवपांडुच्चिया चेव अजीव-
 पांडुच्चिया चेव, एवं सामंतोवणिवाइयावि ॥ ८८ ॥ दो किरियाओ पं० तंजहा-
 साहत्थिया चेव, णेसत्थिया चेव, साहत्थियाकिरिया दुविहा पन्नत्ता, तंजहा-जीव-
 साहत्थिया चेव, अजीवसाहत्थिया चेव, एवं णेसत्थियावि ॥ ८९ ॥ दो किरियाओ
 पं० तंजहा-आणवणिया चेव वेयारणिया चेव, जहेव नेसत्थिया ॥ ९० ॥ दो
 किरियाओ पं० तंजहा-अणाभोगवत्तिया चेव अणवकंखवत्तिया चेव, अणाभोग-
 वत्तियाकिरिया दुविहा पन्नत्ता, तंजहा-अणाउत्तआइयणया चेव, अणाउत्तपमज्जणया
 चेव, अणवकंखवत्तिया किरिया दुविहा पन्नत्ता, तंजहा-आयसरीरअणवकंखवत्तिया
 चेव, परसरीरअणवकंखवत्तिया चेव ॥ ९१ ॥ दो किरियाओ पं० तंजहा-पेज-
 वत्तिया चेव, दोसवत्तिया चेव, पेजवत्तियाकिरिया दुविहा पन्नत्ता, तंजहा-माया-

वत्तिया चेव, लोहवत्तियां चेव, दोसवत्तियां किरिया दुविहा पन्नत्ता, तंजहा-कोहे
 चेव माणे चेव ॥ ९२ ॥ दुविहा गरिहा पन्नत्ता, तंजहा-मणसावेगे गरिहइ वयसा-
 वेगे गरिहइ, अहवा गरिहा दुविहा प० दीहं एगे अद्धं गरिहइ, रहस्सं एगे अद्धं
 गरिहइ ॥ ९३ ॥ दुविहे पच्चक्खाणे, मणसावेगे पच्चक्खाइ, वयसावेगे पच्चक्खाइ,
 अहवा पच्चक्खाणे दुविहे, वीहं एगे अद्धं पच्चक्खाइ, रहस्सं एगे अद्धं पच्चक्खाइ
 ॥ ९४ ॥ दोहिं ठाणेहिं अणगारे संपन्ने अणाइयं अणवंदगं दीहमद्धं चाउरंत-
 संसारकंतारं वीइवएज्जा, तंजहा-विज्जाए चेव, चरणेण चेव ॥ ९५ ॥ दो ठाणाई
 अपरियाणित्ता आया णो केवलिपन्नत्तं धम्मं लभेज्जा सवणयाए, तंजहा-आरंभे चेव
 परिग्गहे चेव, दो ठाणाई अपरिआणित्ता आया णो केवलं वोहिं बुज्झेज्जा तं०
 आरंभे चेव परिग्गहे चेव, दो ठाणाई अपरियाइत्ता आया णो केवलं मुंडे भवित्ता
 आगाराओ अणगारिअं पव्वइज्जा, तंजहा-आरंभे चेव परिग्गहे चेव, एवं णो केवलं
 बंभचेरवासमावसेज्जा णो केवलेणं संजमेणं संजमेज्जा, णो केवलेणं संवरेणं संवरेज्जा,
 णो केवलं आभिणिवोहियणाणं उप्पाडेज्जा, एवं सुअणाणं, ओहिणाणं, मण-
 पज्जवणाणं, केवलणाणं ॥ ९६ ॥ दो ठाणाई परियाइत्ता आया केवलीपन्नत्तं धम्मं
 लभेज्ज सवणयाए, तंजहा-आरंभे चेव परिग्गहे चेव, एवं जाव केवलणाणमुप्पा-
 डेज्जा ॥ ९७ ॥ दोहिं ठाणेहिं आया केवलिपन्नत्तं धम्मं लभेज्ज सवणयाए तंजहा
 सोच्चा चेव, अभिसमेच्चा चेव, जाव केवलणाणं उप्पाडेज्जा ॥ ९८ ॥ दो समाओ
 पन्नत्ताओ, तंजहा-उस्सप्पिणिसमा चेव, ओसप्पिणिसमा चेव ॥ ९९ ॥
 दुविहे उम्माए पन्नत्ते, तंजहा-जक्खावेसे चेव मोहणिज्जस्स चेव कम्मस्स उदएणं,
 तत्थणं जे से जक्खावेसे से णं सुहवेयतराए चेव सुहविमोयतराए चेव, तत्थणं जे से
 मोहणिज्जस्स कम्मस्स उदएणं, से णं दुहवेयतराए चेव दुहविमोयतराए चेव ॥ १०० ॥
 दो दंडा पन्नत्ता, तंजहा-अट्ठादंडे चेव, अणट्ठादंडे चेव, नेरइयाणं दो दंडा पन्नत्ता
 तंजहा-अट्ठादंडे चेव अणट्ठादंडे य एवं चंडवीसदंडओ जाव वेमाणियाणं ॥ १०१ ॥
 दुविहे दंसणे० सम्मदंसणे चेव, मिच्छादंसणे चेव, सम्मदंसणे दुविहे० णिसग्ग-
 सम्मदंसणे चेव, अभिगमसम्मदंसणे चेव, णिसग्गसम्मदंसणे दुविहे०, पडिवाई चेव,
 अपडिवाई चेव, अभिगमसम्मदंसणे दुविहे०, पडिवाई चेव, अपडिवाई चेव,
 मिच्छादंसणे दुविहे० तं जहा अभिग्गहियमिच्छादंसणे चेव, अणभिग्गहियमिच्छा-
 दंसणे चेव, अभिग्गहियमिच्छादंसणे दुविहे० सपज्जवसिए चेव, अपज्जवसिए चेव,
 एवमणभिग्गहियमिच्छादंसणेवि ॥ १०२ ॥ दुविहे नाणे० पच्चक्खे चेव, परोक्खे
 चेव, पच्चक्खनाणे दुविहे० केवलनाणे चेव, नो केवलनाणे चेव, केवलनाणे दुविहे०

भवत्थकेवलनाणे चेव सिद्धकेवलनाणे चेव, भवत्थकेवलनाणे दुविहे० सजोगिभवत्थ-
केवलनाणे चेव अजोगिभवत्थकेवलनाणे चेव, सजोगिभवत्थकेवलनाणे दुविहे०
पढमसमयसजोगिभवत्थकेवलनाणे चेव, अपढमसमयसजोगिभवत्थकेवलनाणे चेव,
अहवा, चरिमसमयसजोगिभवत्थकेवलनाणे चेव, अचरिमसमयसजोगिभवत्थकेवल-
नाणे चेव, एवं अजोगिभवत्थकेवलनाणे वि, सिद्धकेवलनाणे दुविहे०, अणंतर-
सिद्धकेवलनाणे चेव, परंपरसिद्धकेवलनाणे चेव, अणंतरसिद्धकेवलनाणे दुविहे०
एक्काणंतरसिद्धकेवलनाणे चेव, अणेक्काणंतरसिद्धकेवलनाणे चेव, परंपरसिद्धकेवल-
नाणे दुविहे० एक्कपरंपरसिद्धकेवलनाणे चेव, अणेक्कपरंपरसिद्धकेवलनाणे चेव, णो
केवलनाणे दुविहे० ओहिनाणे चेव, मणपज्जवनाणे चेव, ओहिनाणे दुविहे० भव-
पच्चइए चेव, खओवसमिए चेव, दोण्हं भवपच्चइए० देवाणं चेव, णेरइयाणं चेव,
दोण्हं खओवसमिए० मणुस्साणं चेव, पंचिदियतिरिक्खजोणियाणं चेव, मणपज्जव-
णाणे दुविहे० उज्जुमई चेव, विउलमई चेव, परोक्खणाणे दुविहे० आभिणिवोहिय-
णाणे चेव, सुअणाणे चेव, आभिणिवोहियणाणे दुविहे० सुयनिस्सिए चेव, असुय-
निस्सिए चेव, सुयनिस्सिए दुविहे० अत्थोग्गहे चेव, वंजणोग्गहे चेव, असुय-
निस्सिएवि एवमेव, सुयणाणे दुविहे० अंगपविट्ठे चेव, अंगवाहिरे चेव, अंगवाहिरे
दुविहे० आवस्सए चेव आवस्सयवइरित्ते चेव, आवस्सयवइरित्ते दुविहे० कालिए
चेव, उक्कालिए चेव ॥ १०३ ॥ दुविहे धम्मो० सुअधम्मो चेव, चरित्तधम्मो चेव,
सुअधम्मो दुविहे० सुत्तसुअधम्मो चेव, अत्थसुअधम्मो चेव, चरित्तधम्मो
दुविहे० अगारचरित्तधम्मो चेव, अणगारचरित्तधम्मो चेव, संजमे दुविहे०
सरागसंजमे चेव, वीयरगसंजमे चेव, सरागसंजमे दुविहे० सुहुमसंपराय-
सरागसंजमे चेव वादरसंपरायसरागसंजमे चेव, सुहुमसंपरायसरागसंजमे दुविहे०
पढमसमयसुहुमसंपरायसरागसंजमे चेव, अपढमसमयसुहुमसंपरायसरागसंजमे चेव,
अहवा चरिमसमयसुहुमसंपरायसरागसंजमे चेव, अचरिमसमयसुहुमसंपरायसराग-
संजमे चेव, अहवा सुहुमसंपरायसरागसंजमे दुविहे० संकिलेसमाणए चेव, विसुज्झ-
माणए चेव, वादरसंपरायसरागसंजमे दुविहे० पढमसमयवादरसंपरायसरागसंजमे,
अपढमसमयवादरसंपरायसरागसंजमे, अहवा चरिमसमयवादरसंपरायसरागसंजमे;
अचरिमसमयवादरसंपरायसरागसंजमे, अहवा वादरसंपरायसरागसंजमे दुविहे०
पडिवाइए चेव, अपडिवाइए चेव, वीयरगसंजमे दुविहे० उवसंतकसायवीयरग-
संजमे चेव, खीणकसायवीयरगसंजमे चेव, उवसंतकसायवीयरगसंजमे दुविहे०
पढमसमयउवसंतकसायवीयरगसंजमे चेव, अपढमसमयउवसंतकसायवीयरग-

संजमे चेव, अहवा चरिमसमयउवसंतकसायवीयरगसंजमे चेव, अचरिमसमय-
उवसंतकसायवीयरगसंजमे चेव, खीणकसायवीयरगसंजमे दुविहे० छउमत्थखीण-
कसायवीयरगसंजमे चेव, केवलिखीणकसायवीयरगसंजमे चेव, छउमत्थखीण-
कसायवीयरगसंजमे दुविहे० सयंबुद्धछउमत्थखीणकसायवीयरगसंजमे, बुद्धवोहिय-
छउमत्थखीणकसायवीयरगसंजमे, सयंबुद्धछउमत्थखीणकसायवीयरगसंजमे दुविहे०
पढमसमयसयंबुद्धछउमत्थखीणकसायवीयरगसंजमे, अपढमसमयसयंबुद्धछउमत्थ-
खीणकसायवीयरगसंजमे, अहवा चरिमसमयसयंबुद्धछउमत्थखीणकसायवीयरग-
संजमे, अचरिमसमयसयंबुद्धछउमत्थखीणकसायवीयरगसंजमे, बुद्धवोहियछउमत्थ-
खीणकसायवीयरगसंजमे दुविहे० पढमसमयबुद्धवोहियछउमत्थखीणकसायवीयरग-
संजमे, अपढमसमयबुद्धवोहियछउमत्थखीणकसायवीयरगसंजमे, अहवा चरिमसम-
यबुद्धवोहियछउमत्थखीणकसायवीयरगसंजमे अचरिमसमयबुद्धवोहियछउमत्थखीण-
कसायवीयरगसंजमे, केवलिखीणकसायवीयरगसंजमे दुविहे० सजोगिकेवलिखीणक-
सायवीयरगसंजमे, अजोगिकेवलिखीणकसायवीयरगसंजमे, सजोगिकेवलिखीणक-
सायवीयरगसंजमे दुविहे० पढमसमयसजोगिकेवलिखीणकसायवीयरगसंजमे अपढ-
मसमयसजोगिकेवलिखीणकसायवीयरगसंजमे, अहवा चरिमसमयसजोगिकेवलिखी-
णकसायवीयरगसंजमे, अचरिमसमयसजोगिकेवलिखीणकसायवीयरगसंजमे, अजो-
गिकेवलिखीणकसायवीयरगसंजमे दुविहे० पढमसमयअजोगिकेवलिखीणकसायवी-
यरगसंजमे, अपढमसमयअजोगिकेवलिखीणकसायवीयरगसंजमे, अहवा चरिमस-
मयअजोगिकेवलिखीणकसायवीयरगसंजमे, अचरिमसमयअजोगिकेवलिखीणकसाय-
वीयरगसंजमे ॥ १०४ ॥ दुविहा पुढविकाइया पन्नत्ता, तंजहा-सुहुमा चेव, बायरा
चेव, एवं जाव दुविहा वणस्सइकाइया पन्नत्ता तंजहा-सुहुमा चेव बायरा चेव,
दुविहा पुढविकाइया पन्नत्ता तंजहा-पज्जत्तगा चेव, अपज्जत्तगा चेव, एवं जाव
वणस्सइकाइया, दुविहा पुढविकाइया पन्नत्ता, तंजहा-परिणया चेव, अपरिणया
चेव, जाव वणस्सइकाइया, दुविहा दब्बा० परिणया चेव अपरिणया चेव, दुविहा
पुढविकाइया पन्नत्ता तंजहा-गइसमावन्नगा चेव अगइसमावन्नगा चेव, एवं जाव
वणस्सइकाइया, दुविहा दब्बा पन्नत्ता तंजहा-गइसमावन्नगा चेव अगइसमावन्नगा
चेव, दुविहा पुढविकाइया० अणंतरोगाढगा चेव परंपरोगाढगा चेव, जाव दब्बा
॥ १०५ ॥ दुविहे काले० ओसप्पिणीकाले चेव, उस्सप्पिणीकाले चेव ॥ १०६ ॥
दुविहे आगासे० लोगागासे चेव, अलोगागासे चेव ॥ १०७ ॥ णेरइयाणं दो
सरीरगा० अब्भंतरगे चेव, बाहिरगे चेव, अब्भंतरए कम्मए, बाहिरए वेउब्बिए,

एवं देवाणं भाणियव्वं, पुढविकाइयाणं दो सरीरगा० अब्भंतरगे चेव, बाहिरगे चेव, अब्भंतरए कम्मए, बाहिरगे उरालिए, जाव वणस्सइकाइयाणं, वेइंदियाणं दोसरीरगा० अब्भंतरए चेव बाहिरए चेव, अब्भंतरए कम्मए, अट्टिमंससोणित-बद्धे बाहिरए उरालिए, जाव चउरिंदियाणं, पंचेंदियतिरिक्खजोणियाणं दो सरी-रगा० अब्भंतरगे चेव, बाहिरगे चेव, अब्भंतरगे कम्मए, अट्टिमंससोणियण्हा-रुच्छिरावद्धे, बाहिरए उरालिए, मणुस्साणवि एवं चेव, विग्गहगतिसमावज्जगाणं णेरइयाणं दो सरीरगा० तेयए चेव कम्मए चेव, निरंतरं जाव वेमाणियाणं, नेरइ-याणं दोहिं ठाणेहिं सरीरुप्पत्ती सिया, तं० रागेणं चेव, दोसेणं चेव, जाव वेमाणियाणं, नेरइयाणं दुट्ठाणनिव्वत्तिए सरीरगे० रागनिव्वत्तिए चेव दोसनिव्वत्तिए चेव, जाव वेमाणियाणं ॥ १०८ ॥ दो काया० तसकाए चेव, थावरकाए चेव, तसकाए दुविहे पण्णत्ते० भवसिद्धिए चेव, अभवसिद्धिए चेव, एवं थावरकाए वि ॥ १०९ ॥ दो दिसाओ अभिगिज्झ कप्पइ णिग्गंथाणं वा, णिग्गंथीणं वा, पव्वावित्तए, पाईणं चेव, उदीणं चेव, एवं मुंडावित्तए सिक्खावित्तए, उवट्ठावित्तए, संभुंजित्तए, संवसित्तए, सज्झायं उद्दिसित्तए, सज्झायं समुद्दिसित्तए, सज्झायमणु-जाणित्तए, आलोइत्तए, पडिक्कमित्तए, निदित्तए, गारिहित्तए, विउट्ठित्तए, विसोहित्तए, अकरणयाए अब्भुट्ठित्तए, अहारिहं पायच्छित्तं तवोकम्मं पडिवज्जित्तए, दो दिसाओ अभिगिज्झ कप्पइ णिग्गंथाणं वा णिग्गंथीणं वा, अपच्छिममारणंतिए-संलेहणा-इल्लसणा इल्लसियाणं भत्तपाणपडियाइक्खियाणं पाओवगयाणं कालं अणवकंखमाणाणं विहरित्तए, तंजहा-पाईणं चेव उदीणं चेव ॥ ११० ॥ वीयट्ठाणस्स पढ-मोहेसो समत्तो ॥

जे देवा उट्ठोववण्णगा कप्पोववण्णगा, विमाणोववण्णगा, चारोववण्णगा, चारट्ठिइया, गइरइया, गइसमावण्णगा, तेसिं देवाणं सयासमियं जे पावे कम्मे कज्जइ तत्थगयावि एगइया वेयणं वेयंति अन्नत्थगयावि एगइया वेयणं वेयंति नेरइयाणं सयासमियं जे पावे कम्मे कज्जइ तत्थगयावि एगइया वेयणं वेयंति अन्नत्थगयावि एगइया वेयणं वेयंति, जाव पंचिंदियतिरिक्खजोणियाणं, मणुस्साणं सयासमियं जे पावे कम्मे कज्जइ, इहगयावि एगइया वेयणं वेयंति अन्नत्थगयावि एगइया वेयणं वेयंति, मणुस्सवज्जा सेसा एकगमा ॥ १११ ॥ नेरइया दुगइया दुयागइया प० तं० नेरइए नेरइएसु उववज्जमाणे मणुस्सेहिंतो वा पंचिंदिय-तिरिक्खजोणिएहिंतो वा उववज्जेज्जा, से चेव णं से नेरइए नेरइयत्तं विप्पज्जहमाणे मणुस्सत्ताए वा पंचिंदियतिरिक्खजोणियत्ताए वा गच्छेज्जा, एवं असुरकुमारावि,

णवरं से चैवणं से असुरकुमारतं विप्पजहमाणे मणुस्सत्ताए वा तिरिक्खजोणियत्ताए वा गच्छेज्जा, एवं सव्वदेवा, पुढविकाइया दुगइया दुयागइया प० तं०—पुढविकाइए पुढविकाइएसु उववज्जमाणे पुढविकाइएहिंतो वा णो पुढविकाइएहिंतो वा उववज्जेज्जा, से चैवणं से पुढविकाइयत्तं विप्पजहमाणे पुढविकाइयत्ताए वा णो पुढविकाइयत्ताए वा गच्छेज्जा, एवं जाव मणुस्सा ॥ ११२ ॥ दुविहा णेरइया प० तं० भवसिद्धिया चैव, अभवसिद्धिया चैव, जाव वेमाणिया, दुविहा णेरइया प० तं० अणंतरोववन्नगा चैव परंपरोववन्नगा चैव, जाव वेमाणिया, दुविहा णेरइया प० तं० गइसमावन्नगा चैव, अगइसमावन्नगा चैव, जाव वेमाणिया, दुविहा णेरइया प० तं० पढम-समयउववन्नगा चैव अपढमसमयउववन्नगा चैव, जाव वेमाणिया, दुविहा णेरइया प० तं० आहारगा चैव अणाहारगा चैव, एवं जाव वेमाणिया, दुविहा णेरइया पन्नत्ता तं०, उस्सासगा चैव नोउस्सासगा चैव, जाव वेमाणिया, दुविहा णेरइया प० तं० सइंदिया चैव, अणिंदिया चैव, जाव वेमाणिया, दुविहा णेरइया प० तं० पज्जत्तगा चैव, अपज्जत्तगा चैव, जाव वेमाणिया, दुविहा णेरइया प० तं० सन्नी चैव असन्नी चैव, एवं जाव पंचिंदिया सव्वे विगल्लिंदियवज्जा, जाव वाणमंतरा । दुविहा णेरइया प० तं० भासगा चैव अभासगा चैव, एवमेगेंदियवज्जा सव्वे, दुविहा णेरइया प० तं० समदिट्ठिया चैव मिच्छदिट्ठिया चैव, एगिंदियवज्जा सव्वे, दुविहा णेरइया प० तं० परित्तसंसारिया चैव, अणंतसंसारिया चैव, जाव वेमाणिया, दुविहा णेरइया प० तं० संखेज्जकालसमयट्ठिइया चैव असंखेज्जकालसमयट्ठिइया चैव, एवं पंचिंदिया, एगिंदिया विगल्लिंदियवज्जा जाव वाणमंतरा, दुविहा णेरइया प० तं० सुलभवोहिया य दुल्लभवोहिया य जाव वेमाणिया, दुविहा णेरइया प० तं० कण्हपक्खिया चैव सुक्कपक्खिया चैव, जाव वेमाणिया, दुविहा णेरइया प० तं० चरिमा चैव अचरिमा चैव, जाव वेमाणिया ॥ ११३ ॥ दोहिं ठाणेहिं आया अहे लोगं जाणइ पासइ, तं० समोहएणं चैव अप्पाणेणं आया अहे लोगं जाणइ पासइ, असमोहएणं चैव अप्पाणेणं आया अहे लोगं जाणइ पासइ, आधोहिं समोहया समोहएणं चैव अप्पाणेणं आया अहे लोगं जाणइ पासइ । एवं तिरियलोगं उट्ठ-लोगं केवलकप्पं लोगं । दोहिं ठाणेहिं आया अहे लोगं जाणइ पासइ, तंजहा-विउव्विएणं चैव अप्पाणेणं आया अहेलोगं जाणइ पासइ, अविउव्विएणं चैव अप्पाणेणं आया अहेलोगं जाणइ पासइ, आहोहिं विउव्वियाविउव्विएणं चैव अप्पाणेणं आया अहेलोगं जाणइ पासइ, एवंतिरियलोगं उट्ठलोगं केवलकप्पं लोगं ॥ ११४ ॥ दोहिं ठाणेहिं आया सदाइं सुणेइ, तंजहा-देसेणवि आया सदाइं सुणेइ,

सव्वेणवि आया सद्दाइं सुणेइ, एवं रुवाइं पासइ, गंधाइं आघायइ, रसाइं आसाएइ, फासाइं पडिसंवेएइ, दोहिं ठाणेहिं आया ओभासइ, तंजहा-देसेणवि आया ओभासइ, सव्वेण वि आया ओभासइ, एवं पभासइ, विउव्वइ, परियारेइ, भासं भासइ, आहारेइ, परिणामेइ, वेएइ, निज्जरेइ, दोहिं ठाणेहिं देवे सद्दाइं सुणेइ, तंजहा-देसेणवि देवे सद्दाइं सुणेइ, सव्वेण वि सद्दाइं सुणेइ, जाव णिज्जरेइ ॥ ११५ ॥ मरुया देवा दुविहा प० तं० एगसरीरी चेव विसरीरी चेव, एवं किन्नरा, किंपुरिसा, गंधव्वा, णागकुमारा, सुवन्नकुमारा अग्गि कुमारा, वाउकुमारा देवा दुविहा प० तं० एगसरीरी चेव विसरीरी चेव ॥ ११६ ॥ वीयंठाणस्स वीओदेसो समत्तो ॥

दुविहे सद्दे प० तं० भासासद्दे चेव नोभासासद्दे चेव । भासासद्दे दुविहे प० तं० अक्खरसंबद्धे चेव, नोअक्खरसंबद्धे चेव । णोभासासद्दे दुविहे प० तं० आउज्जसद्दे चेव, णोआउज्जसद्दे चेव, आउज्जसद्दे दुविहे प० तं० तते चेव, वितते चेव, तते दुविहे प० तं० घणे चेव, झुसिरे चेव, एवं विततेवि, णोआउज्जसद्दे दुविहे प० तं० भूसणसद्दे चेव, णोभूसणसद्दे चेव, णोभूसणसद्दे दुविहे प० तं० तालसद्दे चेव लत्तियासद्दे चेव, दोहिं ठाणेहिं सद्दुप्पाए सिया तंजहा-साहजंताणं चेव, पुग्गलाणं सद्दुप्पाए सिया भिज्जंताणं चेव पोग्गलाणं सद्दुप्पाए सिया ॥ ११७ ॥ दोहिं ठाणेहिं पोग्गला साहजंति, तंजहा-सयं वा पोग्गला साहजंति परेण वा पोग्गला साहजंति, दोहिं ठाणेहिं पोग्गला भिज्जंति, तंजहा-सयं वा पोग्गला भिज्जंति, परेण वा पोग्गला भिज्जंति, दोहिं ठाणेहिं पोग्गला परिसडंति, सयं वा पोग्गला परिसडंति, परेण वा पोग्गला परिसाडिज्जंति, एवं परिपडंति, विद्धंसंति ॥ ११८ ॥ दुविहा पोग्गला प० तं० भिन्ना चेव अभिन्ना चेव, दुविहा पोग्गला प० तं० भिउरधम्मा चेव नोभिउरधम्मा चेव, दुविहा पोग्गला प० तं० परमाणुपोग्गला चेव नोपरमाणुपोग्गला चेव, दुविहा पोग्गला प० तं० सुहुमा चेव बायरा चेव, दुविहा पोग्गला प० तं० बद्धपासपुट्ठा चेव नोबद्धपासपुट्ठा चेव, दुविहा पोग्गला प० तं० परियादितच्चेव, अपरियादित-च्चेव, दुविहा पोग्गला प० तं० अत्ताचेव अणत्ताचेव, दुविहा पोग्गला प० तं० इट्ठा चेव अणिट्ठा चेव, एवं कंता, पिया, मणुज्जा, मणामा । दुविहा सद्दा प० तं० अत्ता चेव, अणत्ता चेव एवं इट्ठा जाव मणामा, दुविहा रुवा प० तं० अत्ता चेव अणत्ता चेव, जाव मणामा । एवं गंधा, रसा, फासा, एवमिक्किक्के छआलावगा भाणियव्वा ॥ ११९ ॥ दुविहे आयारे प० तं० णागायारे चेव णो णाणायारे चेव, णोणाणायारे दुविहे प० तं० दंसणायारे चेव, णोदंसणायारे चेव, णोदंसणा-यारे दुविहे पण्णत्ते, चरित्तायारे चेव, णो चरित्तायारे चेव, णो चरित्तायारे दुविहे

प० तं० तवायारे चेव, वीरियायारे चेव ॥ १२० ॥ दो पडिमाओ प० तं०
 समाहिपडिमा चेव, उवहाणपडिमा चेव, दो पडिमाओ प० तं० विवेगपडिमा
 चेव, विउसग्गपडिमा चेव, दोपडिमाओ प० तं० भद्दा चेव, सुभद्दा चेव, दो पडि-
 माओ प० तं० महाभद्दा चेव सव्वतोभद्दा चेव, दो पडिमाओ प० तं० खुड्डिया चेव
 मोयपडिमा महल्लिया चेव मोयपडिमा, दोपडिमाओ प० तं० जवमज्झे चेव
 चंदपडिमा वड्ढरमज्झे चेव चंदपडिमा ॥ १२१ ॥ दुविहे सामाइए प० तं०
 आगारसामाइए चेव, अणगारसामाइए चेव ॥ १२२ ॥ दोण्हं उववाए
 प० तं० देवाणं चेव, नेरइयाणं चेव, दोण्हं उव्वट्ठणा प० तं० नेरइयाणं चेव,
 भवणवासीणं चेव, दोण्हं चयणे प० तं० जोइसियाणं चेव, वेमाणियाणं चेव,
 दोण्हं गव्वभवक्कंती प० तं० मणुस्साणं चेव, पंचिंदियतिरिक्खजोणियाणं चेव ।
 दोण्हं गव्वभत्थाणं आहारे प० तं० मणुस्साणं चेव पंचिंदियतिरिक्खजोणियाणं चेव
 दोण्हं गव्वभत्थाणं चुद्धी प० तं० मणुस्साणं चेव पंचिंदियतिरिक्खजोणियाणं चेव,
 एवं निव्वुद्धी विगुव्वणा गइपरियाए समुग्घाए कालसंजोगे आयाइ मरणे, दोण्हं
 छविपव्वा प० तं० मणुस्साणं चेव पंचिंदियतिरिक्खजोणियाणं चेव, दो सुक्कसोणि-
 असंभवा, प० तं० मणुस्सा चेव पंचिंदियतिरिक्खजोणिया चेव, दुविहा ठिई,
 कायट्ठिई चेव, भवट्ठिई चेव, दोण्हं कायट्ठिई, मणुस्साणं चेव पंचिंदियतिरिक्खजो-
 णियाणं चेव, दोण्हं भवट्ठिई, देवाणं चेव णेरइयाणं चेव, दुविहे आउए, अद्धाउए
 चेव, भवाउए चेव, दोण्हं अद्धाउए, मणुस्साणं चेव पंचिंदियतिरिक्खजोणियाणं
 चेव, दोण्हं भवाउए देवाणं चेव, णेरइयाणं चेव, दुविहे कम्ममे, पएसकम्ममे चेव,
 अणुभावकम्ममे चेव, दो अहाउयं पालेंति, देवच्चेव णेरइयच्चेव, दोण्हं आउयसंवट्ठए
 प० तं० मणुस्साण चेव पंचिंदियतिरिक्खजोणियाण चेव ॥ १२३ ॥ जंबुद्धीवे दीवे
 मंदरस्स पव्वयस्स उत्तरदाहिणेणं दोवासा बहुसमउल्ला अविसेसमणाणत्ता अन्नमणं
 णाइवट्ठंति, आयामविक्खंभसंठाणपरिणाहेणं, तंजहा-भरहे चेव, एरवए चेव,
 एवमेणं अहिलावेणं नेयव्वं, हेमवए चेव हेरण्णवए चेव, हरिवरिसे चेव,
 रम्मयवरिसे चेव ॥ १२४ ॥ जंबुद्धीवे दीवे मंदरस्स पव्वयस्स पुरच्छिमपच्चत्थिमेणं
 दो खित्ता, बहुसमउल्ला अविसेस जाव पुव्वविदेहे चेव अवरविदेहे चेव ॥ १२५ ॥
 जंबूमंदरस्स पव्वयस्स उत्तरदाहिणेणं दोकुराओ, बहुसमउल्लाओ अविसेसा जाव देव-
 कुरा चेव उत्तरकुरा चेव, तत्थ णं दो महइ महालया महादुमा, बहुसमउल्ला, अवि-
 सेसमणाणत्ता अन्नमन्नं णाइवट्ठंति, आयामविक्खंभुच्चतोव्वेहसंठाणपरिणाहेणं तंजहा
 कूडसामली चेव, जंबू चेव सुदंसणा, तत्थणं दो देवा महिद्धिया जाव महासोकखा,

पलिओवमठिइया परिवसंति, तंजहा-गरुले चेव वेणुदेवे अणाढिए चेव जंवूदीवाहिवई
 ॥ १२६ ॥ जंवूमंदरस्स पव्वयस्स उत्तरदाहिणेणं दोवासहरपव्वया, बहुसमउल्ला,
 अविसेसमणाणत्ता, अन्नमन्नं नाइवट्ठंति, आयामविक्खंभुच्चत्तोव्वेहसंठाणपरिणाहेणं,
 तंजहा-चुल्लहिमवंते चेव सिहरी चेव एवं महाहिमवंते चेव, रुप्पी चेव, एवं णिसढे
 चेव, णीलवंते चेव ॥ १२७ ॥ जंवूमंदरस्स पव्वयस्स उत्तरदाहिणेणं हेमवएरन्न-
 वएसु वासेसु दोवट्ठवेयड्डपव्वया, बहुसमउल्ला, अविसेसमणाणत्ता जाव सद्दावाई चेव
 वियडावाई चेव, तत्थणं दो देवा महिड्डिया जाव पलिओवमठिइया परिवसंति,
 तंजहा-साई चेव पभासे चेव ॥ १२८ ॥ जंवूमंदरस्स उत्तरदाहिणेणं हरिवासरम्म-
 एसु वासेसु दोवट्ठवेयड्डपव्वया, बहुसमउल्ला, जाव गंधावाई चेव, मालवंतपरियाए
 चेव, तत्थणं दोदेवा महिड्डिया, जाव पलिओवमठिइया परिवसंति, तंजहा-अरुणे चेव,
 पउमे चेव ॥ १२९ ॥ जंवूमंदरस्स पव्वयस्स दाहिणेणं देवकुराए पुव्वावरे पासे,
 एत्थणं आसक्खंधगसरिसा, अद्धचंदसंठाणसंठिया दोवक्खारपव्वया, बहुसमउल्ला
 जाव, सोमणसे चेव विज्जुप्पमे चेव, जंवूमंदरस्स उत्तरेणं उत्तरकुराए पुव्वावरे पासे
 एत्थणं आसक्खंधगसरिसा अद्धचंदसंठाणसंठिया दो वक्खारपव्वया प० तं० बहु०
 जाव, गंधमायणे चेव, मालवंते चेव ॥ जंवूमंदरस्स पव्वयस्स उत्तरदाहिणेणं
 दोदीहवेयड्डपव्वया, बहुसमउल्ला जाव भारहे चेव दीहवेयड्डे एरावए चेव दीह-
 वेयड्डे, भारहेणं दीहवेयड्डे दोगुहाओ, बहुसमउल्लाओ अविसेसमणाणत्ताओ अन्नमन्नं
 णाइवट्ठंति आयामविक्खंभुच्चत्तसंठाणपरिणाहेणं, तंजहा-तिमिसगुहा चेव, खंड-
 गप्पवायगुहा चेव, तत्थणं दोदेवा महिड्डिया, जाव पलिओवमठिइया परिवसंति,
 तंजहा-कयमालए चेव, णट्टमालए चेव, एरावएणं दीहवेयड्डे दोगुहा, जाव कयमाल-
 ए चेव णट्टमालए चेव ॥ १३० ॥ जंवूमंदरस्स पव्वयस्स दाहिणेणं चुल्लहिमवंते
 वासहरपव्वए दोकूडा, बहुसमउल्ला, जाव विक्खंभुच्चत्तसंठाणपरिणाहेणं, तंजहा-
 चुल्लहिमवंतकूडे चेव वेसमणकूडे चेव, जंवूमंदरस्स दाहिणेणं महाहिमवंते वास-
 हरपव्वए दोकूडा, बहुसमउल्ला जाव महाहिमवतकूडे चेव, वेरुलियकूडे चेव, एवं
 निसढे वासहरपव्वए दोकूडा, बहुसमउल्ला जाव० निसढकूडे चेव, रुयगप्पमे चेव,
 जंवूमंदरस्स उत्तरेणं नीलवंते वासहरपव्वए दोकूडा, बहुसमउल्ला जाव० नीलवंत-
 कूडे चेव, उवदंसणकूडे चेव, एवं रुप्पिमि वासहरपव्वए दोकूडा, बहुसमउल्ला
 जाव० तंजहा रुप्पिकूडे चेव, मणिकंचणकूडे चेव, एवं सिहरिमि वि वासहरपव्वए
 दोकूडा, बहुसमउल्ला तंजहा-सिहरिकूडे चेव, तिगिच्छिकूडे चेव ॥ १३१ ॥
 जंवूमंदरस्स उत्तरदाहिणेणं चुल्लहिमवंतसिहरीसु वासहरपव्वएसु दो महद्दा, बहुसम-

उल्ला, अविसेसमणाणत्ता अण्णमण्णं नाइवट्ठंति, आयामविक्खंभउव्वेहसंठाणपरिणा-
हेणं, तंजहा-पउमद्दहे चेव, पुंडरीयद्दहे चेव, तत्थणं दो देवयाओ महिद्धियाओ
जाव पलिओवमद्धिइयाओ परिवसंति, तं० सिरी चेव लच्छी चेव, एवं महाहिमवंत-
रूपीसु वासहरपव्वएसु दो महद्दहा प० बहुसमउल्ला जाव महापउमद्दहे चेव,
महापोंडरीयद्दहे चेव, देवताओ हिरिचेव वुद्धिचेव, एवं निसहनीलवंतेसु तिगि-
च्छिद्दहे चेव, केसरिद्दहे चेव, देवताओ धिई चेव किति चेव ॥ १३२ ॥
जंवूमंदरदाहिणेणं महाहिमवंताओ वासहरपव्वयाओ महापउमद्दहाओ दो महाणईओ
पवहंति तंजहा रोहियचेव हरिकंतचेव, एवं निसहाओ वासहरपव्वयाओ तिगिच्छि-
द्दहाओ दोमहानईओ पवहंति तं० हरिचेव, सीतोअचेव । जंवूमंदरस्स उत्तरेणं नीलवं-
ताओ वासहरपव्वयाओ केसरिद्दहाओ दो महाणईओ पवहंति तं० सीता चेव, नारि-
कंता चेव, एवं रुप्पिवासहरपव्वयाओ महापोंडरीयद्दहाओ दोमहाणईओ पवहंति,
तंजहा णरकंता चेव रुप्पकूला चेव । जंवूमंदरदाहिणेणं भारहेवासे दोपवायद्दहा प०
तं० बहुसमउल्ला जाव गंगप्पवायद्दहे चेव सिंधुप्पवायद्दहे चेव । एवं हेमवएवासे दोप-
वायद्दहा प० बहुसमउल्ला तं० रोहियप्पवायद्दहे चेव, रोहियंसप्पवायद्दहे चेव, जंवू-
मंदरदाहिणे णं हरिवासे वासे दोपवायद्दहा प० बहुसमउल्ला तं० हरिप्पवायद्दहे चेव हरि-
कंतप्पवायद्दहे चेव, जंवूमंदरउत्तरदाहिणेणं महाविदेहे वासे दोपवायद्दहा प० तं०
बहुसमउल्ला जाव० सीयप्पवायद्दहे चेव, सीओयप्पवायद्दहे चेव, जंवूमंदरउत्तरेणं
रम्मएवासे दोपवायद्दहा प० बहुसमउल्ला जाव नरकंतप्पवायद्दहे चेव णारिकंतप्प-
वायद्दहे चेव, एवं हेरन्नवएवासे दोपवायद्दहा प० बहुसमउल्ला जाव० सुवन्नकूलप्प-
वायद्दहे चेव, रुप्पकूलप्पवायद्दहे चेव, जंवूमंदरउत्तरेणं एरवएवासे दोपवायद्दहा, प०
बहुसमउल्ला जाव० रत्तप्पवायद्दहे चेव रत्तावइप्पवायद्दहे चेव, जंवूमंदरदाहिणेणं भर-
हेवासे दोमहानईओ प० बहुसमउल्ला गंगा चेव, सिंधू चेव, एवं जहा प्पवायद्दहा एवं
णईओ भाणियव्वाओ, जाव एरवए वासे दोमहानईओ प० बहुसमउल्लाओ जाव रत्ता
चेव रत्तवई चेव ॥ १३३ ॥ जंवुद्दीवे दीवे भरहेरवएसु वासेसुऽतीताए उस्सप्पिणीए सुस-
मदुसमाए समाए दो सागरोवमकोडाकोडीओ काले होत्था, एवमिमीसे ओसप्पिणीए
जाव प० एवं आगमिस्साए उस्सप्पिणीए जाव भविस्सइ । जंवुद्दीवे दीवे भरहेरवएसु
वासेसु तीयाए उस्सप्पिणीए सुसमाए समाए मणुया दोगाउयाइं उट्ठं उच्चतेणं होत्था,
दोण्णियपलिओवमाइं परमाउं पालइत्था एवमिमीसे ओसप्पिणीए जाव पालइत्था,
एवमागमिस्साए उस्सप्पिणीए जाव पालइस्संति ॥ १३४ ॥ जंवुद्दीवे दीवे भरहेर-
वएसु वासेसु एगसमाए एगजुगे दो अरहंतवंसा उप्पजिंसु वा उप्पजंति वा उप्पजि-

स्संति वा । एवं चक्कवट्ठिंसा, दसारवंसा, जंबूभरहैरवएसु एगसमए दोअरिहंता
उप्पजिसु वा उप्पज्जंति वा उप्पज्जिस्संति वा, एवं चक्कवट्ठिणो वलदेवा वासुदेवा,
जाव उपज्जिस्संति वा ॥ १३५ ॥ जंबू० दोसु कुरासु मणुया सया सुसमसुसमुत्तम-
मिद्धिं पत्ता पच्चणुभवमाणा विहरंति, तंजहा-देवकुराए चेव, उत्तरकुराए चेव,
जंबुदीवे दीवे दोसु वासेसु मणुया सया सुसमुत्तममिद्धिं पत्ता पच्चणुभवमाणा विहरंति
तंजहा-हरिवासे चेव रम्मगवासे चेव, जंबु० दोसु वासेसु मणुया सया सुसमदुस-
मुत्तममिद्धिं पत्ता पच्चणुभवमाणा विहरंति, तंजहा-हेमवए चेव एरन्नवए चेव, जंबु-
दीवे दीवे दोसु खित्तेसु मणुया सया दुसमसुसमुत्तममिद्धिं पत्ता पच्चणुभवमाणा विह-
रंति, तंजहा-पुव्वविदेहे चेव अवरविदेहे चेव, जंबुदीवे दीवे दोसु वासेसु मणुया
छव्विहंपिकालं पच्चणुभवमाणा विहरंति, तंजहा-भरहे चेव, एरवए चेव ॥ १३६ ॥
जंबुदीवे २ दोचंदा पभासिंसु वा, पभासंति वा, पभासिस्संति वा, दोसूरिया तवइंसु वा,
तवंति वा, तविस्संति वा, दो कत्तियाओ, दो रोहिणीओ दो मियसिराओ, दो अद्दाओ,
एवं भाणियव्वं ॥ कत्तियरोहिणिमियसिर अद्दा य पुणव्वसू य पुस्सो य । तत्तोवि
अस्सलेसा, महा य दो फग्गुणीओ य १ हत्थो चित्ता साई, विसाहा तह य होंति
अणुराहा, जेष्ठा मूलो पुव्वा य, आसाढा उत्तरा चेव २ अभिई सवण धणिष्ठा
सयभिसया दो य होंति भद्दवया, रेवइ अस्सिणि भरणी, णेयव्वा आणुपुव्वीए ३
एवं गाहानुसारेण णायव्वं जाव दो भरणीओ, दो अग्गी दो पयावई दोसोमा दोरुद्दा
दोअइई दोबहस्सई दोसप्पी दोपीई दोभगा दोअज्जमा दोसविया दोतट्ठा दोवाऊ
दोइंदग्गी दोमिक्का दोइंददा दोनिरई दोआऊ दोविस्सा दोबह्मा दोविण्हू दोवसू दोव-
रुणा दोअया दोविविद्धी दोपुस्सा दोअस्सा दोयमा दोइंगालगा दोवियालगा
दोलोहियक्खा दोसणिच्चरा दोआहुणिया दोपाहुणिया दोकणा दोकणगा दोकण-
कणगा दोकणगवियाणगा दोकणगसंताणगा दोसोमा दोसहिया दोआसासणा दोकज्जो-
वगा दोकब्बडगा दोअयकरगा दोदुंदुभगा दोसंखा दोसंखवन्ना दोसंखवन्नाभा
दोकंसा दोकंसवन्ना दोकंसवन्नाभा दोरुप्पी दोरुप्पाभासा दोनीला दोनीलोभासा
दोभासा दोभासरासी दोतिला दोतिलपुप्फवन्ना दोदगा दोदगपंचवन्ना दोकाका
दोक्कंधा दोइंदग्गीवा दोधूमकेऊ दोहरी दोपिंगला दोबुहा दोसुक्का दोबहस्सई
दोराहू दोअगत्थी दोमाणवगा दोकासा दोफासा दोधुरा दोपमुहा दोवियडा दोविसंधी
दोनियल्ला दोपइल्ला दोजडियाइलगा दोअरुणा दोअग्गिल्ला दोकाला दोमहाकालगा
दोसोत्थिया दोसोवत्थिया दोवद्धमाणगा दोपूसमाणगा दोअंकुसा दोपलंबा दोनिच्चा-
लोणा दोनिच्चुज्जोया दोसयंपभा दोओभासा दोसेयंकरा दोखेमंकरा दोआभंकरा

दोपभंकरा दोअपराजिता दोअरया दोअसोगा दोविगयसोगा दोविमला दोवि-
 तता दोवितत्था दोविसाला दोसाला दोसुव्वया दोअणियट्ठी दोएगजडी दोदुजडी
 दोकरकरिगा दोरायगला दोपुप्फकेऊ दोभावकेऊ ॥१३७॥ जंबुदीवस्स णं दीवस्स
 वेइआ दोगाउआई उड्डं उच्चत्तेणं प० लवणेणं समुदे दोजोयणसयसहस्साइं चक्कवा-
 लविक्खंभेण प० लवणस्सणं समुद्स्स वेइया दोगाउआई उड्डं उच्चत्तेणं प० ॥१३८॥
 धायईखंडेणं दीवे पुरत्थिमद्धेणं मंदरस्स पव्वयस्स उत्तरदाहिणेणं दोवासा, बहुसम-
 उल्ला जाव भरहे चेव, एरवए चेव, एवं जहा जंबूदीवे तथा एत्थ वि भाणियव्वं,
 जाव दोसु वासेसु मणुया छव्विहंपि कालं पच्चणुभवमाणा विहरंति, तंजहा-भरहे चेव
 एरवए चेव, णवरं कूडसामली चेव, धायईस्खे चेव, देवा गरुले चेव वेणुदेवे
 सुदंसणेचेव, धायईखंडदीवपच्चच्छिमद्धेणं मंदरस्स पव्वयस्स उत्तरदाहिणेणं दोवासा
 प० बहुसमउल्ला जाव भरहे चेव एरवए चेव, जाव छव्विहंपि कालं पच्चणुभवमाणा
 विहरंति, णवरं कूडसामली चेव महाधायईस्खे चेव, देवा गरुले चेव वेणुदेवे
 पियदंसणे चेव, धायईखंडेणं दीवे दोभरहाइं दोएरवयाइं दोहिमवंताइं दो
 हेरणवयाइं दोहरिवासाइं दोरम्मगवासाइं, दोपुव्वविदेहाइं दोअवरविदेहाइं
 दोदेवकुराओ दोदेवकुस्महादुमा, दोदेवकुस्महादुमावासी देवा दोउत्तरकुराओ
 दोउत्तरकुस्महादुमा दोउत्तरकुस्महादुमावासी देवा दोचुल्लहिमवंता दोमहाहिमवंता
 दोनिसहा दोनीलवंता दोरुप्पी दोसिहरी दोसद्दावाई दोसद्दावायवासी साई देवा,
 दोवियडावाई दोवियडावाईवासी पभासा देवा दोगंधावाई दोगंधावाईवासी
 अरुणादेवा दोमालवंतपरियागा दोमालवंतपरियागावासी पउमादेवा दोमालवंता
 दोचित्तकूडा दोपउमकूडा दोनलिनकूडा दोएगसेला दोतिकूडा दोवेसमणकूडा
 दोअंजणा दोमातंजणा दोसोमणसा दोविज्जुप्पभा दोअंकावई दोपम्हावई दोआसी-
 विसा दोसुहावहा दोचंदपव्वया दोसूरपव्वया दोणागपव्वया दोदेवपव्वया दोगंध-
 मायणा दोउसुगारपव्वया दोचुल्लहिमवंतकूडा दोवेसमणकूडा दोमहाहिमवंतकूडा दोवे-
 रलियकूडा दोनिसहकूडा दोस्यगकूडा दोनीलवंतकूडा दोउवदंसणकूडा दोरुप्पिकूडा
 दोमणिकंचणकूडा दोसिहरिकूडा दोतिगिच्छिकूडा दोपउमद्दहा, दोपउमद्दहासिणीओ
 सिरीदेवीओ दोमहापउमद्दहा दोमहापउमद्दहासिणीओ हिरीओ एवं जाव दोपुंड-
 रीयद्दहा दोपुंडरीयद्दहासिणीओ लच्छीओ देवीओ दोगंगप्पवायद्दहा जाव दोरत्त-
 वईप्पवायद्दहा दोरोहियाओ जाव दोरुप्पकूलाओ दोगाहावईओ दोदहवईओ दोपंकव-
 ईओ दोतत्तजलाओ दोमत्तजलाओ दोउम्मत्तजलाओ दोखीरोयाओ दोसीहसोयाओ
 दोअंतोवाहिणीओ दोउम्मिमालिणीओ दोफेणमालिणीओ दोगभीरमालिणीओ दोक-

च्छा दोसुकच्छा दोमहाकच्छा दोकच्छगावई दोआवत्ता दोमंगलावत्ता दोपुक्खला
 दोपुक्खलावई दोवच्छा दोसुवच्छा दोमहावच्छा दोवच्छगावई दोरम्मा दोरम्मगा
 दोरमणिजा दोमंगलावई दोपम्हा दोसुपम्हा दोमहापम्हा दोपम्हागावई दोसंखा दोण-
 लिणा दोकुमुया दोसलिलावई दोनलिणावई दोवप्पा दोसुवप्पा दोमहावप्पा दोवप्पगा-
 वई दोवग्गू दोसुवग्गू दोगंधिला दोगंधिलावई दोखेमाओ दोखेमपुरीओ दोरिद्धाओ
 दोरिद्धपुरीओ दोखग्गीओ दोमंजूसाओ दोओसहीओ दोपुण्डरीगिणीओ दोसुसीमाओ
 दोकुंडलाओ दोअपराईआओ दोप्पमंकराओ दोअंकावईओ दोपम्हावईओ दोसुभाओ
 दोरयणसंचयाओ दोआसपुराओ दोसीहपुराओ दोमहापुराओ दोविजयपुराओ दोअव-
 राजियाओ दोअवराओ दोअसोयाओ दोविगयसोयाओ दोविजयाओ दोवेजयंतीओ
 दोजयंतीओ दोअपराजियाओ दोचक्कपुराओ दोखग्गपुराओ दोअवज्झाओ दोअ-
 ओज्झाओ दोभद्दसालवणा दोणंदणवणा दोसोमणसवणा दोपंडगवणा दोपंडुकं-
 लसिलाओ दोअतिपंडुकंवलसिलाओ दोरत्तकंवलसिलाओ दोअइरत्तकंवलसिलाओ
 दोमंदरा दोमंदरचूलियाओ, धायइखंडस्सणं दीवस्स वेइया दोगाउयाइं उड्डं
 उच्चत्तेणं पन्नत्ता, कालोदस्सणं समुद्दस्स वेइया दोगाउयाइं उड्डं उच्चत्तेणं पन्नत्ता
 पुक्खरवरदीवद्धपुरच्छिमद्धेणं मंदरस्स पव्वयस्स उत्तरदाहिणेणं दोवासा प० बहु-
 समउल्ला जाव भरहे चैव एरवए चैव जाव दोकुराओ पण्णत्ताओ देवकुरा चैव उत्तर-
 कुरा चैव । तत्थणं दोमहइमहालया महहुमा प० तं० कूडसामली चैव, पउमरुक्खे
 चैव, देवा गरुले चैव वेणुदेवे पउमे चैव, जाव छव्विहंपि कालं पच्चणुब्भवमाणा
 विहरंति, पुक्खरवरदीवद्धपच्चत्थिमद्धेणं मंदरपव्वयस्स उत्तरदाहिणेणं दोवासा प० तं०
 तहेव णाणत्तं कूडसामली चैव, महापउमरुक्खे चैव, देवा गरुले चैव, वेणुदेवे
 पुंडरीए चैव, पुक्खरवरदीवद्धेणं दीवे दोभरहाइं दोएरवयाइं जाव दोमंदरा दोमंद-
 रचूलाओ, पुक्खरवरस्स णं दीवस्स वेइया दोगाउयाइं उड्डं उच्चत्तेणं प० सव्वेसिं पि
 णं दीवसमुद्दाणं वेइयाओ दोगाउयाइं उड्डं उच्चत्तेणं पण्णत्ताओ ॥ १३९ ॥ दो
 असुरकुमारिंदा प० तं० चमरे चैव बली चैव, दोनागकुमारिंदा प० तं० धरणे चैव
 भूयाणंदे चैव, दोसुवण्णकुमारिंदा प० तं० वेणुदेवे चैव वेणुदाली चैव, दोविज्जु-
 कुमारिंदा प० तं० हरी चैव हरिस्सहे चैव, दोअग्गिकुमारिंदा प० तं० अग्गिसिहे चैव
 अग्गिमाणवे चैव, दोदीवकुमारिंदा प० तं० पुण्णे चैव, विसिट्ठे चैव, दोउदधिकुमारिंदा
 प० तं० जलकंते चैव जलप्पभे चैव, दोदिसाकुमारिंदा प० तं० अमियगई चैव,
 अमियवाहणे चैव, दोवाउकुमारिंदा प० तं० वेलंबे चैव पभंजणे चैव, दोथणिय-
 कुमारिंदा प० तं० घोसे चैव महाघोसे चैव, दोपिसायइंदा प० तं० काले चैव महा-

काले चैव, दोभूयइंदा प० तं० सुरुवे चैव पडिरुवे चैव, दोजकिंखदा प० तं० पुण्ण-
भदे चैव माणिभदे चैव, दोरक्खसिंदा प० तं० भीमे चैव महाभीमे चैव, दोकि-
न्नरिंदा प० तं० किन्नरे चैव किंपुरिसे चैव, दोकिंपुरिसिंदा प० तं० सप्पुरिसे चैव
महापुरिसे चैव, दोमहोरगिंदा प० तं० अइकाये चैव महाकाये चैव, दोगंधव्विदा
प० तं० गीयरई चैव गीयजसे चैव, दोअणपण्णिदा प० तं० संनिहिए चैव, सामण्णे
चैव, दोपणपण्णिदा प० तं० धाए चैव विहाए चैव, दोइसिवाइंदा प० तं० इसि चैव
इसिवाए चैव, दोभूयवाइंदा प० तं० ईसरे चैव महिस्सरे चैव, दोकंदिंदा प०
तं० सुवच्छे चैव विसाले चैव, दोमहाकंदिंदा प० तं० हासे चैव हासरई चैव,
दोकुभंडिंदा प० तं० सेए चैव महासेए चैव, दोपयगिंदा प० तं० पयए चैव पयगवई
चैव, जोइसियाणं देवाणं दोइंदा प० तं० चंदे चैव सूरे चैव, सोहम्मीसाणेसु णं
कप्पेसु दोइंदा प० तं० सक्के चैव ईसाणे चैव, एवं सणकुमारमहिंदेसु कप्पेसु दोइंदा
प० तं० सणकुमारे चैव माहिंदे चैव, वंभलोयलंतगेसु णं दोइंदा प० तं० वंभे चैव
लंतए चैव, महासुक्कसहस्सारेसु णं कप्पेसु दोइंदा पन्नत्ता तंजहा-महासुक्के चैव
सहस्सारे चैव, आणयपाणयारणञ्जुएसु णं कप्पेसु दोइंदा प० तं० पाणए चैव, अञ्जुए
चैव ॥ १४० ॥ महासुक्कसहस्सारेसु णं कप्पेसु विमाणा दुवण्णा प० तं० हालिद्दा
चैव सुक्किल्ला चैव, गोविज्जगाणं देवाणं दोरयणीओ उड्डं उच्चतेणं पन्नत्ता ॥ १४१ ॥
वीयट्ठाणस्स तइओदेसो समत्तो ॥

समयाइ वा आवलियाइ वा, जीवाइ वा अजीवाइ वा पवुच्चइ, आणापाणूइ वा,
थोवाइ वा जीवाइ वा अजीवाइ वा पवुच्चइ, खणाइ वा लवाइ वा जीवाइ वा
अजीवाइ वा पवुच्चइ, एवं मुहुत्ताइ वा, अहोरत्ताइ वा, पक्खाइ वा, मासाइ वा,
उळुइ वा, अयणाइ वा, संवच्छराइ वा, जुगाइ वा, वाससयाइ वा, वाससहस्साइ
वा, वाससयसहस्साइ वा, वासकोडीइ वा, पुव्वंगाइ वा, पुव्वाइ वा, तुडियंगाइ
वा तुडियाइ वा अडडंगाइ वा, अडडाइ वा, अववंगाइ वा, अववाइ वा हूहूअंगाइ
वा, हूहूयाइ वा, उप्पलंगाइ वा, उप्पलाइ वा, पउमंगाइ वा, पउमाइ वा, णलिणं-
गाइ वा, णलिणाइ वा, अच्छणिउरंगाइ वा, अच्छणिउराइ वा, अउअंगाइ वा
अउआइ वा, णउअंगाइ वा, णउआइ वा पउअंगाइ वा, पउयाइ वा, चूलिअंगाइ
वा चूलियाइ वा, सीसप्पहेलिअंगाइ वा, सीसप्पहेलियाइ वा, पलिओवमाइ वा,
सागरोवमाइ वा उस्सप्पिणीइ वा, ओसप्पिणीइ वा, जीवाइ वा अजीवाइ वा
पवुच्चइ ॥ १४२ ॥ गामाइ वा, णगराइ वा, निगमाइ वा, रायहाणीइ वा, खेडाइ
वा, कव्वडाइ वा, मडंवाइ वा, दोणमुहाइ वा, पट्ठणाइ वा, आगराइ वा, आस-

माइ वा, संवाहाइ वा, संनिवेसाइ वा, घोसाइ वा, आरामाइ वा, उज्जाणाइ वा, वणाइ वा, वणखंडाइ वा, वावीइ वा, पुक्खरणीइ वा, सराइ वा, सरपंतीइ वा, अगडाइ वा, तडांगाइ वा, दहाइ वा, णदीइ वा, पुढवीइ वा, उदहीइ वा, वात-
 खंधाइ वा, उवासंतराइ वा, वलयाइ वा, विग्गहाइ वा, दीवाइ वा, समुदाइ वा, वेलाइ वा, वेइयाइ वा, दाराइ वा, तोरणाइ वा, णेरइयाइ वा, णेरइयावासाइ वा, जाव वेमाणियावासाइ वा, कप्पाइ वा, कप्पविमाणवासाइ वा, वासाइ वा, वा-
 सहरपव्वयाइ वा, कूडाइ वा, कूडागाराइ वा, विजयाइ वा, रायहाणीइ वा जीवाइ वा अजीवाइ वा पवुच्चइ ॥ १४३ ॥ छायाइ वा, आतवाइ वा, जोसिणाइ वा, अंधगाराइ वा, ओमाणाइ वा, पमाणाइ वा, उम्माणाइ वा, अतिताणगिहाइ वा, उज्जाणगिहाइ वा, अवलिम्बाइ वा, सणिप्पवायाइ वा जीवाइ वा अजीवाइ वा पवुच्चइ ॥ १४४ ॥ दोरासी प० तं० जीवरासी चेव, अजीवरासी चेव, दुविहे बंधे प० तं० पेज्जबंधे चेव, दोसबंधे चेव, जीवाणं दोहिं ठाणेहिं पावकम्मं बंधन्ति तं० रागेण चेव, दोसेण चेव, जीवाणं दोहिं ठाणेहिं पावकम्मं उदीरेन्ति तं० अन्भो-
 वगमियाए चेव वेयणाए उवक्कमियाए चेव वेयणाए एवं वेदेति एवं णिज्जरेंति अन्भो-
 वगमियाए चेव वेयणाए उवक्कमियाए चेव वेयणाए, दोहिं ठाणेहिं आया सरीरं फुसित्ताणं णिज्जाति तं० देसेणवि आया सरीरं फुसित्ताणं णिज्जाति सव्वेणवि आया सरीरं फुसित्ताणं णिज्जाति, एवं फुरित्ताणं एवं फुडित्ताणं एवं संवट्ठित्ताणं निव्वट्ठित्ताणं, दोहिं ठाणेहिं आया केवलपन्नत्तं धम्मं लभेज्जा सवणयाए तंजहा-खएण चेव उवसमेण चेव, एवं जाव मणपज्जवणाणं उप्पाडेज्जा तं० खएण चेव उवसमेण चेव ॥ १४५ ॥ दुविहे अद्धोवमिए प० तं० पलिओवमे चेव सागरोवमे चेव । से किं तं पलिओवमे ? पलिओवमे जं जोयणविच्छिन्नं पल्लं एगाहियप्परूढाणं होज्ज णिरं-
 तरणिच्चियं भरियं वालग्गकोडीणं १ वाससए वाससए एकेक्के, अवहडंमि जो कालो; सो कालो बोद्धव्वो, उवमा एगस्स पल्लस्स २ एतेसि पल्लाणं कोडाकोडी हवेज्ज दसगुणिया; तं सागरोवमस्स उ एगस्स भवे परीमाणं ३-॥ १४६ ॥ दुविहे कोहे प० तं० आयपइठिए चेव, परपइठिए चेव, एवं णेरइयाणं जाव वेमाणियाणं, एवं जाव मिच्छादंसणसल्ले ॥ १४७ ॥ दुविहा संसारसमावन्नगा जीवा प० तं० तसा चेव, थावरा चेव, दुविहा सव्वजीवा प० तं० सिद्धा चेव असिद्धा चेव । दुविहा सव्वजीवा प० तं० सइंदिया चेव, अणिदिया चेव, एवं एसा गाहा फासे-
 यव्वा जाव ससरीरी चेव असरीरी चेव; सिद्धसइंदियकाए, जोगे वेए कसायलेसा य, णाणुवओगाहारे भासगचरिमे य ससरीरी (१) ॥ १४८ ॥ दोमरणाइं समणेणं

भगवया महावीरेणं समणाणं णिग्गंथाणं णो णिच्चं वण्णियाइं कित्तियाइं णो णिच्चं
 वुइयाइं णो णिच्चं पसत्थाइं णो णिच्चं अब्भणुन्नायाइं भवंति तं० वलयमरणे चेव,
 वसद्धमरणे चेव, एवं णियाणमरणे चेव, तव्भवमरणे चेव, गिरिपडणे चेव, तरुपडणे
 चेव, जलप्पवेसे चेव, जलणप्पवेसे चेव, विसभक्खणे चेव, सत्थोवाडणे चेव,
 दोमरणाइं जाव णो णिच्चं अब्भणुन्नायाइं भवंति, कारणेणं पुण अप्पडिक्कुठाइं तंजहा-
 वेहाणसे चेव गिद्धपिट्ठे चेव ॥ १४९ ॥ दोमरणाइं समणेणं भगवया महावीरेणं
 समणाणं णिग्गंथाणं णिच्चं वण्णियाइं जाव अब्भणुन्नायाइं भवंति तं० पाओवगमणे
 चेव भत्तपच्चक्खाणे चेव, पाओवगमणे दुविहे प० तं० णीहारिमे चेव अणीहारिमे
 चेव, णियमं अप्पडिक्कमे, भत्तपच्चक्खाणे दुविहे प० तं० णीहारिमे चेव, अणीहा-
 रिमे चेव, णियमं सप्पडिक्कमे ॥ १५० ॥ के अयं लोए ? जीवच्चेव अजीवच्चेव, के
 अणंतालोए ? जीवच्चेव अजीवच्चेव, के सासया लोए ? जीवच्चेव अजीवच्चेव ॥ १५१ ॥
 दुविहा वोही, णाणवोही चेव, दंसणवोही चेव । दुविहा बुद्धा-णाणबुद्धा चेव दंसण-
 बुद्धा चेव, एवं मोहे मूढा ॥ १५२ ॥ णाणावरणिज्जे कम्मे दुविहे पञ्चत्ते तं० देस-
 णाणावरणिज्जे चेव, सब्बणाणावरणिज्जे चेव, दंसणावरणिज्जे कम्मे एवं चेव वेय-
 णिज्जे कम्मे दुविहे प० तं० सायावेयणिज्जे चेव असायावेयणिज्जे चेव मोहणिज्जे
 कम्मे दुविहे प० तं० दंसणमोहणिज्जे चेव चरित्तमोहणिज्जे चेव, आउकम्मे दुविहे
 प० तं० अद्धाउए चेव, भवाउए चेव, णामकम्मे दुविहे प० तं० सुभणामे चेव
 असुभणामे चेव, गोत्तकम्मे दुविहे प० तं० उच्चागोए चेव णीयागोए चेव, अंत-
 राइएकम्मे दुविहे प० तं० पडुप्पण्णविणासिए चेव पिहियआगामिपहं ॥ १५३ ॥
 दुविहा मुच्छा प० तं० पेज्जवत्तिया चेव, दोसवत्तिया चेव, पेज्जवत्तियामुच्छा
 दुविहा प० तं० माए चेव लोहे चेव, दोसवत्तियामुच्छा दुविहा प० तं० कोहे
 चेव माणे चेव ॥ १५४ ॥ दुविहा आराहणा प० तं० धम्मियाराहणा चेव केवलि-
 आराहणा चेव, धम्मियाराहणा दुविहा प० तं० सुयधम्माराहणा चेव चरित्त-
 धम्माराहणा चेव, केवलिआराहणा दुविहा प० तं० अंतकिरिया चेव कप्पवि-
 माणोववत्तिया चेव ॥ १५५ ॥ दोतित्थयरा नीलुप्पलसमावज्जेणं प० तं० मुणिसुव्वए
 चेव, अरिठ्ठणेमी चेव, दोतित्थयरा पियंगुसमावज्जेणं प० तं० मल्ली चेव पासे चेव,
 दोतित्थयरा पउमगोरा वण्णेणं, प० तं० पउमप्पहे चेव, वासुपुज्जे चेव, दोतित्थयरा
 चंदगोरा वण्णेणं प० तं० चंदप्पभे चेव पुप्फदंते चेव ॥ १५६ ॥ सच्चप्पवाय-
 पुव्वस्सणं दुवे वत्थू पञ्चत्ता, पुव्वभद्दवयानक्खत्ते दुतारे प० उत्तरभद्दवयानक्खत्ते
 दुतारे प०-एवं पुव्वफग्गुणी, उत्तरफग्गुणी ॥ १५७ ॥ अंतोणं मणुस्सखेत्तस्स दो

समुद्दा, प० तं० लवणे चेव कालोदे चेव, दोचक्कवट्टी अपरिचत्तकामभोगा काल-
 मासे कालं किच्चा अहे सत्तमाए पुढवीए अप्पइठ्ठाणनरए नेरइयत्ताए उववन्ना तं०
 सुभूमे चेव बंभदत्ते चेव ॥ १५८ ॥ असुरिंदवज्जियाणं भवणवासीणं देवाणं देसू-
 णाईं दोपलिओवमाईं ठिई प० सोहम्मं कप्पे देवाणं उक्कोसेणं दोसागरोवमाईं ठिई
 प० ईसाणे कप्पे देवाणं उक्कोसेणं साइरेगाईं दोसागरोवमाईं ठिई प० सणंकुमारे
 कप्पे देवाणं जहन्नेणं दोसागरोवमाईं ठिई प० माहिंदे कप्पे देवाणं जहन्नेणं
 साइरेगाईं दोसागरोवमाईं ठिई पन्नत्ता ॥ १५९ ॥ दोसु कप्पेसु कप्पत्थियाओ
 पण्णत्ताओ तं० सोहम्मं चेव ईसाणे चेव, दोसु कप्पेसु देवा तेउलेस्सा प० तं०
 सोहम्मं चेव ईसाणे चेव, दोसु कप्पेसु देवा कायपरियारगा प० तं० सोहम्मं चेव
 ईसाणे चेव, दोसु कप्पेसु देवा फासपरियारगा प० तं० सणंकुमारे चेव, माहिंदे
 चेव, दोसु कप्पेसु देवा रुवपरियारगा प० तं० बंभलोए चेव, लंतए चेव, दोसु
 कप्पेसु देवा सहपरियारगा प० तं० महासुक्के चेव, सहस्सारे चेव, दोइंदा मण-
 परियारगा, प० तं० पाणए चेव, अञ्जुए चेव ॥ १६० ॥ जीवाणं दोठ्ठाणनिव्वत्तिए
 पोग्गले पावकम्मत्ताए चिणिसु वा चिणंति वा चिणिस्संति वा तंजहा-तसकायनिव्व-
 त्तिए चेव, थावरकायनिव्वत्तिए चेव, एवं उवचिणिसु वा, उवचिणंति वा, उवचिणि-
 स्संति वा, बंधिसु वा, बंधंति वा, बंधिस्संति वा, उदीरिसु वा, उदीरेंति वा,
 उदीरिस्संति वा, वेदिंसु वा, वेदिंति वा, वेदिस्संति वा, णिज्जरिंसु वा, णिज्जरेंति
 वा, णिज्जरिस्संति वा ॥ १६१ ॥ दुप्पएसिया खंधा अणंता प० दुपएसोगाढा
 पोग्गला अणंता प० एवं जाव दुगुणलुक्खा पोग्गला अणंता पण्णत्ता ॥ १६२ ॥
 वीयट्ठाणस्स चउत्थोदेसो समत्तो, वीयं ठाणं समत्तं ॥

तइयट्ठाणं

तओ इंदा प० तं० णामिंदे-दव्विंदे-भाविंदे ॥ तओ इंदा प० तं० णाणिंदे-
 दंसणिंदे-चरित्तिंदे, तओ इंदा प० तं० देविंदे-असुरिंदे-मणुस्सिंदे ॥ १६३ ॥
 तिविहा विउव्वणा प० तं० बाहिरए पोग्गलए परियाइत्ता एगा विउव्वणा, बाहिरए
 पोग्गले अपरियाइत्ता एगाविउव्वणा, बाहिरए पोग्गले परियाइत्ता वि अपरियाइत्ता वि
 एगा विउव्वणा तिविहा विउव्वणा, प० तं० अब्भंतरए पोग्गले परियाइत्ता एगा
 विउव्वणा अब्भंतरए पोग्गले अपरियाइत्ता एगाविउव्वणा अब्भंतरए पोग्गले
 परियाइत्तावि अपरियाइत्तावि एगा विउव्वणा, तिविहा विउव्वणा प० तं० बाहिर-
 च्भंतरए पोग्गले परियाइत्ता एगा विउव्वणा बाहिरब्भंतरए पोग्गले अपरियाइत्ता

एगा विउव्वणा बाहिरब्भंतरए पोग्गले परियाइत्तावि अपरियाइत्तावि एगा विउव्वणा ॥ १६४ ॥ तिविहा नेरइया प० तं० कतिसंचिया, अकतिसंचिया अवत्तव्वगसंचिया एवमेगिंदियवज्जा जाव वेमाणिया ॥ १६५ ॥ तिविहा परियारणा प० तं० एगे देवे अन्ने देवे अन्नेसिं देवाणं देवीओ य अभिजुंजिय २ परियारेइ, अप्पणिज्जिआओ देवीओ अभिजुंजिय २ परियारेइ अप्पाणमेव अप्पणा विउव्विय २ परियारेइ एगे देवे णो अन्नेदेवे णो अन्नेसिं देवाणं देवीओ अभिजुंजिय २ परियारेइ अप्पणिज्जिआओ देवीओ अभिजुंजिय २ परियारेइ अप्पाणमेव अप्पणा विउव्विय २ परियारेइ । एगे देवे णो अन्नेदेवे णो अन्नेसिं देवाणं देवीओ अभिजुंजिय २ परियारेइ, णो अप्पणिज्जियाओ देवीओ अभिजुंजिय २ परियारेइ अप्पाणमेव अप्पाणं विउव्विय २ परियारेइ ॥ १६६ ॥ तिविहे मेहुणे प० तं० दिव्वे माणुस्सए तिरिक्खजोणिए, तओ मेहुणं गच्छंति तं० देवा मणुस्सा तिरिक्खजोणिया, तओ मेहुणं सेवंति तं० इत्थी पुरिसा णपुंसगा ॥ १६७ ॥ तिविहे जोगे प० तं० मणजोगे वयजोगे कायजोगे, एवं णेरइयाणं विगलिंदियवज्जाणं जाव वेमाणियाणं, तिविहे पओगे प० तं० मणपओगे, वयपओगे, कायपओगे; जहा जोगो विगलिंदियवज्जाणं जाव वेमाणियाणं तहा पओगेवि । तिविहे करणे प० तं० मणकरणे, वयकरणे, कायकरणे, एवं णेरइयाणं विगलिंदियवज्जाणं जाव वेमाणियाणं । तिविहे करणे पन्नत्ते तं० आरंभकरणे, संरंभकरणे समारंभकरणे, णिरंतरं जाव वेमाणियाणं ॥ १६८ ॥ तिहिं ठाणेहिं जीवा अप्पाउअत्ताए कम्मं पगरेंति तं० पाणे अइवाइत्ता भवइ, मुसंवइत्ता भवइ, तहारुवं समणं वा, णिग्गंथं वा, अफासुएणं अणेसणिज्जेणं असणपाणखाइमसाइमेणं पडिलाभित्ता भवइ, इच्चेएहिं तिहिं ठाणेहिं जीवा अप्पाउअत्ताए कम्मं पगरेंति । तिहिं ठाणेहिं जीवा दीहाउअत्ताए कम्मं पगरेंति तंजहा-णो पाणे अइवाइत्ता भवइ, णो मुसं वइत्ता भवइ, तहारुवं समणं णिग्गंथं वा फासुएसणिज्जेणं असणपाणखाइमसाइमेणं पडिलाभित्ता भवइ । इच्चेएहिं तिहिं ठाणेहिं जीवा दीहाउअत्ताए कम्मं पगरेंति ॥ १६९ ॥ तिहिं ठाणेहिं जीवा असुभदीहाउअत्ताए कम्मं पगरेंति तं० पाणे अइवाइत्ता भवइ, मुसं वइत्ता भवइ, तहारुवं समणं णिग्गंथं वा हीलेत्ता निंदेत्ता खिंसेत्ता गरिहित्ता अवमाणित्ता अन्नयरेणं अमणुत्तेणं अपीइकारएणं असणपाणखाइमसाइमेणं वा पडिलाभित्ता भवइ, इच्चेएहिं तिहिं ठाणेहिं जीवा असुभदीहाउअत्ताए कम्मं पगरेंति, तिहिं ठाणेहिं जीवा सुभदीहाउअत्ताए कम्मं पगरेंति, तंजहा-णो पाणे अइवाइत्ता भवइ, णो मुसं वइत्ता भवइ, तहारुवं समणं वा णिग्गंथं वा वंदित्ता नमंसित्ता सक्कारेत्ता सम्माणेत्ता कल्लणं मंगलं देवयं चेइयं पज्जुवासेत्ता

मणुज्जेणं पीइकारणं असणपाणखाइमसाइमेणं पडिलाभेत्ता भवइ, इच्चेएहिं तिहिं ठाणेहिं जीवा सुहदीहाउअत्ताए कम्मं पगरेंति ॥ १७० ॥ तओ गुत्तीओ पन्नत्ताओ तं० मणगुत्ती, वयगुत्ती, कायगुत्ती, संजयमणुस्साणं तओ गुत्तीओ प० तं० मण, वय, काय०। तओ अगुत्तीओ प० तं० मणअगुत्ती, वयअगुत्ती, कायअगुत्ती, एवं णेरइयाणं जाव० थणियकुमारणं पंचिंदियतिरिक्खजोणियाणं असंजयमणुस्साणं वाणमंतराणं जोइ- सियाणं वेमाणियाणं । तओ दंडा प० तं० मणदंडे, वयदंडे, कायदंडे, णेरइयाणं तओ दंडा प० मणदंडे, जाव कायदंडे विगल्लिंदियवजं जाव वेमाणियाणं ॥ १७१ ॥ तिविहा गरिहा प० तं० मणसावेगे गरहइ, वयसावेगे गरहइ, कायसावेगे गरहइ, पावाणं कम्माणं अकरणयाए । अहवां गरहा तिविहा प० तं० दीहंवेगे अद्धं गरहइ, रहस्सं वेगे अद्धं गरहइ, कायंवेगे पडिसाहरइ पावाणं कम्माणं अकरणयाए, तिविहे पच्चक्खाणे प० तं० मणसावेगे पच्चक्खाइ, वयसावेगे पच्चक्खाइ, कायसावेगे पच्चक्खाइ, एवं जहा गरहा तहा पच्चक्खाणेवि दो आलावगा भाणियव्वा ॥ १७२ ॥ तओ रुक्खा, प० तं० पत्तोवए, फलोवए, पुप्फोवए, एवामेव तओ पुरिसजाया प० तं० पत्तो वा रुक्खसमाणे, पुप्फो वा रुक्खसमाणे फलो वा रुक्खसमाणे ॥ तओ पुरिसजाया प० तं० णामपुरिसे, दव्वपुरिसे, भावपुरिसे, तओ पुरिसजाया प० तं० णाणपुरिसे, दंसणपुरिसे, चरित्तपुरिसे, तओ पुरिसजाया प० तं० वेदपुरिसे, विंधपुरिसे, अभिलावपुरिसे ॥ १७३ ॥ तिविहा पुरिसा प० तं० उत्तमपुरिसा, मज्झिमपुरिसा जहन्नपुरिसा, उत्तमपुरिसा तिविहा प० तं० धम्मपुरिसा, भोग- पुरिसा, कम्मपुरिसा, धम्मपुरिसा अरिहंता, भोगपुरिसा चक्कवट्ठी, कम्मपुरिसा वासुदेवा, मज्झिमपुरिसा तिविहा-उग्गा भोगा राइण्णा, जहन्नपुरिसा तिविहा, प० तं० दासा, भयगा, भाइल्ला ॥ १७४ ॥ तिविहा मच्छा प० तं० अंडया, पोयया, संमुच्छिमा, अंडया मच्छा तिविहा प० तं० इत्थी, पुरिसा, णपुंसगा; पोयया मच्छा तिविहा प० तं० इत्थी, पुरिसा, णपुंसगा ॥ १७५ ॥ तिविहा पक्खी प० तं० अंडया, पोयया, संमुच्छिमा, अंडया पक्खी तिविहा प० तं० इत्थी पुरिसा, णपुंसगा, पोयया पक्खी तिविहा प० तं० इत्थी, पुरिसा, णपुंसगा, एवमे- एणं अभिलावेणं उरपरिसप्पावि भाणियव्वा, भुजपरिसप्पा वि णेयव्वा, एवं चेव ॥ १७६ ॥ तिविहाओ इत्थीओ पन्नत्ताओ तं० तिरिक्खजोणित्थीओ, मणुस्सित्थीओ, देवित्थीओ, तिरिक्खजोणित्थीओ तिविहाओ प० तं० जलचरीओ, थलचरीओ, खहचरीओ, मणुस्सित्थीओ तिविहाओ पण्णत्ताओ, तं० कम्मभूमियाओ, अकम्म- भूमियाओ, अंतरदीवियाओ ॥ १७७ ॥ तिविहा पुरिसा तिरिक्खजोणियपुरिसा,

मणुस्सपुरिसा, देवपुरिसा, तिरिक्खजोणियपुरिसा तिविहा प० तं० जलयरा, थलयरा, खहयरा, मणुस्सपुरिसा तिविहा प० तं० कम्मभूमिया, अकम्मभूमिया अंतरदीवया ॥ १७८ ॥ तिविहा णपुंसगा, णेरइयणपुंसगा, तिरिक्खजोणियणपुंसगा मणुस्सणपुंसगा, तिरिक्खजोणियणपुंसगा तिविहा-जलयरा थलयरा खहयरा ॥ १७९ ॥ मणुस्सणपुंसगा तिविहा प० तं० कम्मभूमिया अकम्मभूमिया अंतरदीवगा, तिविहा तिरिक्खजोणिया, इत्थी पुरिसा णपुंसगा ॥ १८० ॥ णेरइयाणं तओ लेस्साओ प० तं० कण्हलेस्सा नीललेस्सा काउलेस्सा, असुरकुमाराणं तओ लेस्साओ संकिलिठ्ठाओ प० तं० कण्हलेस्सा नीललेस्सा काउलेस्सा एवं जांव थणियकुमाराणं । एवं पुढवि-काइयाणं आउवणस्सइकाइयाणं वि तेउवाउबेइंदियतेइंदियचउरिंदियाणं वि तओ लेस्सा जहा णेरइयाणं, पंचिंदियतिरिक्खजोणियाणं तओ लेस्साओ संकिलिठ्ठाओ प० तं० कण्हनीलकाउलेस्सा, पंचिंदियतिरिक्खजोणियाणं तओ लेस्साओ असंकिलिठ्ठाओ प० तं० तेउपम्हसुक्कलेस्सा एवं मणुस्साणवि वाणमंतराणं जहा असुरकुमाराणं, वेमाणियाणं तओ लेस्साओ प० तं० तेउपम्हसुक्कलेस्सा ॥ १८१ ॥ तिहिं ठाणेहिं तारारुवे चलेज्जा तं० विक्खवमाणे वा परियारेमाणे वा, ठाणाओ वा ठाणं संकममाणे तारारुवे चलेज्जा । तिहिं ठाणेहिं देवे विज्जुयारं करेज्जा तं० विउवमाणे वा परियारेमाणे वा तहारुवस्स समणस्स वा णिगंथस्स वा इड्ढिं जुइं जसं वलं वीरियं पुरिसक्कारपरक्कमं उवदंसेमाणे देवे विज्जुयारं करेज्जा, तिहिं ठाणेहिं देवे थणियसइं करेज्जा तं० विउवमाणे एवं जहा विज्जुयारं तहेव थणियसइंपि ॥ १८२ ॥ तिहिं ठाणेहिं लोगंधयारे सिया तंजहा-अरिहंतेहिं वोच्छिज्जमाणेहिं अरिहंतपण्णत्ते धम्मो वोच्छिज्जमाणे पुव्वगए वोच्छिज्जमाणे । तिहिं ठाणेहिं लोगुज्जोए सिया तं० अरिहंतेहिं जायमाणेहिं अरिहंतेसु पव्वयमाणेसु, अरिहंताणं णाणुप्पायमहिमासु । तिहिं ठाणेहिं देवंधयारे सिया तं० अरिहंतेहिं वोच्छिज्जमाणेहिं अरिहंतपण्णत्ते धम्मो वोच्छिज्जमाणे पुव्वगए वोच्छिज्जमाणे । तिहिं ठाणेहिं देवुज्जोए सिया तं० अरिहंतेहिं जायमाणेहिं, अरिहंतेहिं पव्वयमाणेहिं, अरिहंताणं णाणुप्पायमहिमासु । तिहिं ठाणेहिं देवसन्निवाए सिया तं० अरिहंतेहिं जायमाणेहिं अरिहंतेहिं पव्वयमाणेहिं अरिहंताणं णाणुप्पायमहिमासु । एवं देवुक्कलिया, देवकहकहए, तिहिं ठाणेहिं देविंदा माणुसं लोगं हव्वमागच्छंति तं० अरिहंतेहिं जायमाणेहिं अरिहंतेहिं पव्वयमाणेहिं अरिहंताणं णाणुप्पायमहिमासु, एवं सामाणिया, तायत्तीसगा लोगपाला देवा अग्गमहिस्सीओ देवीओ परिसोववज्जगा देवा, अणियाहिवई देवा, आयरक्खा देवा माणुसं लोगं हव्वमागच्छंति, तिहिं ठाणेहिं देवा अचुठ्ठेज्जा तं० अरिहंतेहिं जायमाणेहिं

जाव तं चेव । एवमासणाइं चलेज्जा, सीहणायं करेज्जा, चेलुक्खेवं करेज्जा । तिहिं
ठाणेहिं देवाणं रुक्खा चलेज्जा तं० अरिहंतेहिं जायमाणेहिं, जाव तं चेव । तिहिं
ठाणेहिं लोगंतिया देवा माणुसं लोगं हव्वमागच्छेज्जा तं० अरिहंतेहिं जायमाणेहिं,
अरिहंतेहिं पव्वयमाणेहिं, अरिहंताणं णाणुप्पायमहिमासु ॥ १८३ ॥ तिहं दुप्पडि-
यारं समणाउसो तंजहा-अम्मापिउणो भट्टिस्स धम्मायरियस्स, संपाओवि य णं केइ
पुरिसे अम्मापियरं सयपागसहस्सपागेहिं तिल्लेहिं अब्भंगेत्ता, सुरभिणा गंधदृणं
उव्वट्ठिता, तिहिं उदगेहिं मज्जावेत्ता, सव्वालंकारविभूसियं करेत्ता, मणुन्नं थालीपा-
गसुद्धं अट्ठारसवंजणाउलं भोअणं भोआवेत्ता जावज्जीवं पिठ्ठिवडिसियाए परिव-
हेज्जा, तेणावि तस्स अम्मापिउस्स दुप्पडियारं भवइ । अहेणं से तं अम्मापियरं
केवलिपन्नत्ते धम्मे आघवइत्ता पन्नवइत्ता परूवइत्ता ठावइत्ता भवइ तेणामेव तस्स
अम्मापिउस्स सुप्पडियारं भवइ । समणाउसो केइ महचे दरिइं समुक्कसेज्जा तएणं
से दरिइे समुक्किट्ठे समाणे पच्छा पुरं ज्व णं विउलभोगसमिइसमण्णागए या वि
विहरेज्जा, तएणं से महचे अन्नया कर्णइं दरिदी हूए समाणे तस्स दरिइस्स अंतिए
हव्वमागच्छेज्जा तएणं से दरिइे तस्स भट्टिस्स सव्वस्समवि दलयमाणे तेणावि तस्स
दुप्पडियारं भवइ, अहेणं से तं भट्टि केवलिपन्नत्ते धम्मे आघवइत्ता पण्णवइत्ता
परूवइत्ता ठावइत्ता भवइ तेणामेव तस्स भट्टिस्स सुप्पडियारं भवइ । केइ तहारूवस्स
समणस्स वा णिगंथस्स वा अंतियमेगमवि आरियं जिणभासियं धम्मं सुवयणं सोच्चा
निसम्म कालमासे कालं किच्चा अन्नयरेसु देवलोएसु देवत्ताए उव्वन्ने, तएणं से देवे
तं धम्मायरियं दुब्भिक्खाओ वा देसाओ सुभिक्खं देसं साहरेज्जा, कंताराओ वा
णिकंतारं करेज्जा, दीहकालिएणं वा रोआतंकेणं अभिभूयं समाणं विमोइज्जा, तेणावि
तस्स धम्मायरियस्स दुप्पडियारं भवइ, अहेणं से तं धम्मायरियं केवलिपन्नत्ताओ
धम्माओ भट्ठं समाणं भुज्जोवि केवलिपन्नत्ते धम्मे आघवइत्ता जाव ठावइत्ता भवइ
तेणामेव तस्स धम्मायरियस्स सुप्पडियारं भवइ ॥ १८४ ॥ तिहिं ठाणेहिं संपन्ने
अणगारे अणाइयं अणवदग्गं दीहमद्धं चाउरंतसंसारकंतारं वीइवएज्जा, तंजहा-
अणियाणयाए, दिट्ठिसंपन्नयाए, जोगवाहियाए ॥ १८५ ॥ तिविहा ओसप्पिणी प०
तं० उक्कोसा मज्झिमा जहन्ना, एवं छप्पिसमाओ भाणियव्वाओ जाव दुसमदुसमा,
तिविहा उस्सप्पिणी प० तं० उक्कोसा मज्झिमा जहन्ना एवं छप्पिसमाओ भाणिय-
व्वाओ, जाव सुसमसुसमा ॥ १८६ ॥ तिहिं ठाणेहिं अच्छिन्ने पोग्गले चलेज्जा तं०
आहारिज्जमाणे वा पोग्गले चलेज्जा, विउव्वमाणे वा पोग्गले चलेज्जा, ठाणाओ ठाणं
संकामेज्जमाणे वा पोग्गले चलेज्जा ॥ १८७ ॥ तिविहा उवही प० तं० कम्मोवही

सरीरोवही वाहिरभंडमत्तोवही, एवं असुरकुमाराणं भाणियव्वं, एवं एगिंदियनेरइय-
 वज्जं जाव वेमाणियाणं । अहवा तिविहा उवही प० तं० सचित्ता अचित्ता मीसिया ।
 एवं नेरइयाणं निरंतरं जाव वेमाणियाणं, तिविहे परिग्गहे प० तं० कम्मपरिग्गहे
 सरीरपरिग्गहे वाहिरभंडमत्तपरिग्गहे, एवं असुरकुमाराणं, एवं एगिंदियनेरइयवज्जं
 जाव वेमाणियाणं, अहवा तिविहे परिग्गहे प० तं० सचित्ते अचित्ते मीसए एवं
 णेरइयाणं निरंतरं जाव वेमाणियाणं ॥ १८८ ॥ तिविहे पणिहाणे प० तं० मणप-
 णिहाणे वयपणिहाणे कायपणिहाणे एवं पंचिंदियाणं जाव वेमाणियाणं । तिविहे सुप्प-
 णिहाणे प० तं० मणसुप्पणिहाणे वयसुप्पणिहाणे कायसुप्पणिहाणे, संजयमणुस्साणं
 तिविहे सुप्पणिहाणे प० तं० मणसुप्पणिहाणे वयसुप्पणिहाणे कायसुप्पणिहाणे, तिविहे
 दुप्पणिहाणे प० तं० मणदुप्पणिहाणे वयदुप्पणिहाणे कायदुप्पणिहाणे, एवं पंचिंदि-
 याणं जाव वेमाणियाणं ॥ १८९ ॥ तिविहा जोणी पणत्ता तंजहा-सीआ उसिणा
 सीओसिणा । एवमेगिंदियाणं विगलिंदियाणं तेउकाइयवज्जाणं संमुच्छिमपंचिंदियति-
 रिक्खजोणियाणं संमुच्छिममणुस्साणं य, तिविहा जोणी प० तं० सचित्ता अचित्ता
 मीसिया एवमेगिंदियाणं विगलिंदियाणं संमुच्छिमपंचिंदियतिरिक्खजोणियाणं संमु-
 च्छिममणुस्साणं य । तिविहा जोणी प० तं० संवुडा, वियडा संवुडवियडा । तिविहा
 जोणी प० तं० कुम्मुन्नया संखावत्ता वंसीवत्तिया, कुम्मुन्नयाणं जोणी उत्तमपुरिस-
 माऊणं, कुम्मुन्नयाणं जोणीए तिविहा उत्तमपुरिसा गब्भं वक्कमंति तं० अरिहंता
 चक्कवट्ठी वलदेववासुदेवा, संखावत्ता जोणी इत्थीरयणस्स संखावत्ताएणं जोणीए
 वहवे जीवा य पोग्गला य वक्कमंति विउक्कमंति चयंति उववज्जंति नो चेव णं णिप्पज्जंति ।
 वंसीपत्तियाणं जोणी पिहज्जणस्स वंसीवत्तियाएणं जोणीए वहवे पिहज्जणे गब्भं वक्क-
 मंति ॥ १९० ॥ तिविहा तणवणस्सइकाइया प० तं० संखेज्जजीविया असंखेज्जजी-
 विया अणंतजीविया ॥ १९१ ॥ जंबुद्दीवे दीवे भारहेवासे तओ तित्था प० तं०
 मागहे वरदामे पभासे एवं एरवएवि । जंबुद्दीवे दीवे महाविदेहवासे एगमेगे चक्क-
 वट्ठिविजए तओ तित्था प० तं० मागहे वरदामे पभासे । एवं धायइखंडे दीवे
 पुरच्छिमद्धेवि पच्चत्थिमद्धेवि पुक्खरवदीवड्डुपुरच्छिमद्धेवि पच्चत्थिमद्धेवि ॥ १९२ ॥
 जंबुद्दीवे दीवे भरहेरवएसु वासेसु तीआए उस्सप्पिणीए सुसमाए समाए तिन्निसागरो-
 वमकोडाकोडीओ कालो होत्था । एवं ओसप्पिणीए णवरं प० आगमेस्साए उस्स-
 प्पिणीए भविस्सइ । एवं धायइखंडे पुरच्छिमद्धेवि पच्चत्थिमद्धेवि । एवं पुक्खरव-
 रदीवड्डुपुरत्थिमद्धे पच्चत्थिमद्धेवि कालो भाणियव्वो ॥ १९३ ॥ जंबुद्दीवे दीवे भरहेर-
 वएसु वासेसु तीयाए उस्सप्पिणीए सुसमसुसमाए समाए मणुया तिन्नि गाउआई

उड्डं उच्चतेणं तिणिपलिओवमाइं परमाउं पालइत्था एवं इमीसे ओसप्पिणीए आग-
मेस्साए उस्सप्पिणीए । जंबुद्दीवे दीवे देवकुरुउत्तरकुरासु मणुया तिन्नि गाउआइं उड्डं
उच्चतेणं प० तिन्निपलिओवमाइं परमाउं पालयंति । एवं जाव पुक्खरवरदीवद्वपच्चत्थि-
मद्धे ॥ १९४ ॥ जंबुद्दीवे दीवे भरहेरवएसु वासेसु एगमेगाए ओसप्पिणिउस्सप्पिणीए
तओ वंसा उप्पज्जिमु वा उप्पज्जंति वा उप्पज्जिस्संति वा तं० अरिहंतवंसे चक्कवट्ठी-
वंसे दसारवंसे । एवं जाव पुक्खरवरदीवद्वपच्चत्थिमद्धे । जंबुद्दीवे दीवे भरहेरवएसु
वासेसु एगमेगाए ओसप्पिणीउस्सप्पिणीए तओ उत्तमपुरिसा उप्पज्जिमु वा उप्पज्जंति
वा उप्पज्जिस्संति वा तं० अरिहंता वा चक्कवट्ठी वा वलदेववासुदेवा । एवं जाव
पुक्खरवरदीवद्वपच्चत्थिमद्धे । तओ अहाउयं पालेंति तं० अरिहंता चक्कवट्ठी वलदेव-
वासुदेवा, तओ मज्झिममाउयं पालयंति तं० अरिहंता चक्कवट्ठी वलदेववासुदेवा
॥ १९५ ॥ बायरतेऊकाइयाणं उक्कोसेणं तिन्नि राइंदियाइं ठिई प० बायरवाउकाइ-
याणं उक्कोसेणं तिन्निवाससहस्साइं ठिई पन्नत्ता ॥ १९६ ॥ अह भंते सालीणं वीहीणं
गोधूमाणं जवाणं जवजवाणं एएसिणं धन्नाणं कोट्ठाउत्ताणं पल्लाउत्ताणं मंचाउत्ताणं
मालाउत्ताणं ओलित्ताणं लिताणं लंछियाणं मुद्दियाणं पिहियाणं केवइयं कालं जोणी
संचिठ्ठइ ? गोयमा ! जहन्नेणं अंतोमुहुत्तं उक्कोसेणं तिन्निसंवच्छराइं तेण परं जोणी
पमिलायइ पविद्धंसइ विद्धंसइ तेण परं वीए अवीए भवइ तेण परं जोणी वोच्छेदे
प० ॥ १९७ ॥ दोच्चाएणं सक्करप्पभाए पुढवीए नेरइयाणं उक्कोसेणं तिन्निसागरो-
वमाइं ठिई प० तच्चाएणं वालुयप्पभाए पुढवीए जहन्नेणं नेरइयाणं तिन्निसागरोव-
माइं ठिई प० । पंचमाए णं धूमप्पभाए पुढवीए तिन्निनिरयावाससयसहस्सा प०
तिसु णं पुढवीसु नेरइया उसिणं वेयणं पच्चणुभवमाणा विहरंति तं० पढमाए दोच्चाए
तच्चाए ॥ १९८ ॥ तओ लोणे समा सपक्खि सपडिदिसिं प० तं० अप्पइट्ठाणे णरए
जंबुद्दीवे दीवे सव्वट्ठसिद्धे महाविमाणे । तओ लोणे समा सपक्खि सपडिदिसिं प०
तं० सीमंतएणं णरए समयक्खेत्ते ईसिपब्भारापुढवी ॥ १९९ ॥ तओ समुद्दा पगईए
उदगरसेणं प० तं० कालोदे पुक्खरोदे सयंभुरमणे, तओ समुद्दा बहुमच्छकच्छभा-
इण्णा प० तं० लवणे कालोदे सयंभुरमणे ॥ २०० ॥ तओ लोणे णिस्सीला णिव्वया
णिग्गुणा णिम्मेरा णिपच्चक्खाणपोसहोववासा कालमासे कालं किच्चा अहे सत्तमाए
पुढवीए अप्पइट्ठाणे णरए नेरइयत्ताए उववज्जंति तं० रायाणो मंडलिया जे य महा-
रंभा कोडुंबी । तओ लोए सुसीला सुव्वया सगुणा सम्मेरा सपच्चक्खाणपोसहोव-
वासा कालमासे कालं किच्चा सव्वट्ठसिद्धे महाविमाणे देवत्ताए उववत्तारो भवंति
तं० रायाणो परिचत्तकामभोगा सेणावई पसत्थारो ॥ २०१ ॥ बंभलोगलंतएसु णं

कप्पेसु विमाणा तिवन्ना पन्नत्ता तं० किण्हा नीला लोहिया । आणयपाणयारणच्चुएसु
 णं कप्पेसु देवाणं भवधारणिज्जसरीरगा उक्कोसेणं तिन्नि रयणीओ उद्धं उच्चत्तेणं प०
 ॥ २०२ ॥ तओ पन्नत्तीओ कालेणं अहिज्जन्ति तं० चंदपन्नत्ती सूरपन्नत्ती दीवसागर-
 पन्नत्ती ॥ २०३ ॥ तइयट्ठाणस्स पढमोद्देसो समत्तो ॥

तिविहे लोगे पन्नत्ते तं० णामलोगे ठवणलोगे दव्वलोगे, तिविहे लोगे प० तं०
 णाणलोगे दंसणलोगे चरित्तलोगे, तिविहे लोगे प० तं० उद्धलोगे अहोलोगे तिरिय-
 लोगे ॥ २०४ ॥ चमरस्सणं असुरिंदस्स असुरकुमाररण्णो तओ परिसाओ पण्णत्ताओ
 तं० समिया चंडा जाया अब्भितरिया समिया मज्झमिया चंडा बाहिरया जाया,
 चमरस्स णं असुरिंदस्स असुरकुमाररण्णो सामाणियाणं देवाणं तओ परिसाओ
 पण्णत्ताओ तं० समिया जहेव चमरस्स । एवं तायत्तीसगाणवि लोगपालाणं तुंवा
 तुडिया पव्वा एवं अग्गमहिसीण वि । वल्लिस्स वि एवं चेव जाव अग्गमहिसीणं ।
 धरणस्स य सामाणियतायत्तीसगाणं च समिया चंडा जाया, लोगपालाणं अग्ग-
 महिसीणं ईसा तुडिया दढरहा, जहा धरणस्स तहा सेसाणं भवणवासीणं, काल-
 स्सणं पिसाईदस्स पिसायरन्नो तओ परिसाओ पन्नत्ताओ, तं० ईसा तुडिया दढरहा,
 एवं सामाणियअग्गमहिसीणं वि एवं जाव गीयरइ गीयजसाणं चंदस्स णं जोइसिंदस्स
 जोइसरण्णो तओ परिसाओ, तुंवा तुडिया पव्वा, एवं सामाणियअग्गमहिसीणं,
 एव सूरस्स वि, सक्कस्स णं देविंदस्स देवरण्णो तओ परिसाओ पन्नत्ताओ तं० समिया
 चंडा जाया, एवं जहा चमरस्स जाव अग्गमहिसीणं, एवं जाव अब्बुयस्स लोगपालाणं
 ॥ २०५ ॥ तओ जामा प० तं० पढमे जामे मज्झिमे जामे पच्छिमे जामे, तिहिं
 जामेहिं आया केवलिपन्नत्तं धम्मं लभेज्ज सवणयाए तं० पढमे जामे मज्झिमे
 जामे पच्छिमे जामे, एवं जाव केवलनाणं उप्पाडेज्जा पढमे जामे मज्झिमे जामे
 पच्छिमे जामे । तओ वया प० तं० पढमे वए मज्झिमे वए पच्छिमे वए, तिहिं
 वएहिं आया केवलिपन्नत्तं धम्मं लभेज्ज सवणयाए तं० पढमे वए मज्झिमे वए
 पच्छिमे वए, एसो चेव गमो णेयव्वो, जाव केवलनाणंति ॥ २०६ ॥ तिविहा वोही
 प० तं० णाणवोही दंसणवोही चरित्तवोही, तिविहा बुद्धा प० तं० णाणबुद्धा
 दंसणबुद्धा चरित्तबुद्धा, एवं मोहे मूढा ॥ २०७ ॥ तिविहा पव्वज्जा प० तं० इह-
 लोगपडिवद्धा, परलोगपडिवद्धा, दुहओ पडिवद्धा, तिविहा पव्वज्जा प० तं० पुरओ-
 पडिवद्धा, मग्गओपडिवद्धा, उभओपडिवद्धा, तिविहा पव्वज्जा प० तं० तुयावइत्ता
 पुयावइत्ता बुयावइत्ता, तिविहा पव्वज्जा पण्णत्ता तं० उवायपव्वज्जा अक्खाय-
 पव्वज्जा संगारपव्वज्जा ॥ २०८ ॥ तओ णियंठा णोसण्णोवत्ता प० तं० पुलाए

णियंठे सिणाए, तओ णियंठा सण्णणोसण्णोवउत्ता प० तं० वउसे पडिसेवणाकुसीले
 कसायकुसीले ॥ २०९ ॥ तओ सेहभूमीओ प० तं० उक्कोसा मज्झिमा जहण्णा
 उक्कोसा छम्मासा मज्झिमा चउमासा, जहन्ना सत्तराईदिया ॥ २१० ॥ तओ
 थेरभूमीओ पन्नत्ताओ तं० जाइथेरे सुयथेरे परियायथेरे । सट्ठिवासजाए समणे
 णिग्गंथे जाइथेरे, ठाणसमवायधरे णं समणे णिग्गंथे सुयथेरे, वीसवासपरियाए णं
 समणे णिग्गंथे परियायथेरे ॥ २११ ॥ तओ पुरिसजाया प० सुमणे दुम्मणे णो-
 सुमणेणोदुम्मणे, तओ पुरिसजाया प० गंताणामेगे सुमणे भवइ गंताणामेगे
 दुम्मणे भवइ गंताणामेगे णोसुमणेणोदुम्मणे भवइ, तओ पुरिसजाया प० तं०
 जामि एगे सुमणे भवइ, जामि एगे दुम्मणे भवइ, जामि एगे णोसुमणेणोदुम्मणे
 भवइ, एवं जाइस्सामि एगे सुमणे भवइ (३) तओ पुरिसजाया पण्णत्ता तं०
 अगंताणामेगे सुमणे भवइ (३) तओ पुरिसजाया प० तं० ण जामि एगे सुमणे
 भवइ (३) तओ पुरिसजाया प० तं० ण जाइस्सामि एगे सुमणे भवइ (३) एवं
 आगंताणामेगे सुमणे भवइ (३) एमि एगे सुमणे भवइ, एस्सामि एगे सुमणे भवइ (३)
 एवं एएणं अभिलावेणं गंता य अगंता य आगंता खलु तहा अणागंता । चिट्ठित्तम-
 चिट्ठित्ता, णिसिइत्ता चेव नो चेव १ हंता य अहंता य छिदित्ता खलु तहा अछिदित्ता,
 वूइत्ता अवूइत्ता, भासित्ता चेव णो चेव २ दच्चा य अदच्चा य, भुंजित्ता खलु
 तहा अभुंजित्ता, लंभित्ता अलंभित्ता, पिइत्ता चेव नो चेव ३ सुइत्ता असुइत्ता,
 जुज्झित्ता खलु तहा अजुज्झित्ता; जइत्ता अजइत्ता य, पराजिणित्ता चेव नो
 चेव ४ सद्दा रुवा गंधा, रसा य फासा तहेव ठाणा य; निस्सीलस्स गरहिया,
 पसत्था पुण सीलवंतस्स ५ एवमेक्केके तिञ्चित्तिञ्चिउ आलावगा भाणियव्वा । सई
 सुणेत्ताणामेगे सुमणे भवइ (३) एवं सुणेमिति (३) सुणेस्सामिति ३ एवं असुणे-
 ताणामेगे सुमणे भवइ (३) न सुणेमि ति ३ न सुणेस्सामिति ३ एवं रुवाईं गंधाईं
 रसाईं फासाईं इक्केके छल्ल आलावगा भाणियव्वा, एवं १२७ आलावगा भवंति
 ॥ २१२ ॥ तओ ठाणा णिस्सीलस्स णिव्वयस्स णिग्गुणस्स णिम्मेरस्स णिप्प-
 चक्खाणपोसहोववासस्स गरहिया भवंति तं० अस्सि लोगे गरहिए भवइ उववाए
 गरहिए भवइ आयाईं गरहिया भवइ । तओ ठाणा सुसीलस्स सुव्वयस्स सगुणस्स
 समेरस्स सपच्चक्खाणपोसहोववासस्स पसत्था भवंति तं० अस्सि लोगे पसत्थे
 भवइ उववाए पसत्थे भवइ आयाईं पसत्था भवइ ॥ २१३ ॥ तिविहा संसारसमा-
 वन्नगा जीवा प० तं० इत्थी पुरिसा णपुंसगा । तिविहा सव्वजीवा प० तं० सम्मदिट्ठी
 मिच्छदिट्ठी सम्ममिच्छदिट्ठी य । अहवा तिविहा सव्वजीवा प० तं० पज्जत्तगा

अपज्जत्तगा नोपज्जत्तगानोअपज्जत्तगा । एवं सम्मदिट्ठिपरित्तापज्जत्तगसुहुमसन्नि-
भविया य ॥ २१४ ॥ तिविहा लोमट्ठिई प० तं० आगासपइट्ठिए वाए वायपइट्ठिए
उदही उदहीपइट्ठिया पुढवी । तओ दिसाओ प० तं० उट्ठा अहा तिरिया, तिहिं
दिसाहिं जीवाणं गई पवत्तई तं० उट्ठाए अहाए तिरियाए, एवं आगई वक्कंती आहारे
वुट्ठी णिवुट्ठी गइपरियाए समुग्घाए कालसंजोगे दंसणाभिगमे णाणाभिगमे जीवाभि-
गमे । तिहिं दिसाहिं जीवाणं अजीवाभिगमे प० तं० उट्ठाए अहाए तिरियाए, एवं
पंचिदियतिरिक्खजोणियाणं । एवं मणुस्साणवि ॥ २१५ ॥ तिविहा तसा प० तं०
तेउकाइया, वाउकाइया उराला तसा पाणा, तिविहा थावरा प० तं० पुढविकाइया
आउकाइया वणस्सइकाइया ॥ २१६ ॥ तओ अच्छेज्जा प० तं० समए पएसे
परमाणू; एवमभेज्जा अडज्झा अगिज्झा अणट्ठा अमज्झा अपएसा । तओ अवि-
भाइसा प० तं० समए पएसे परमाणू ॥ २१७ ॥ अज्जोत्ति समणे भगवं महावीरे
गोयमाई समणे णिग्गंथे आमंतित्ता एवं वयासी । किं भया पाणा समणाउसो ?
गोयमाई समणा णिग्गंथा समणं भगवं महावीरं उवसंकमंति, उवसंकमित्ता वंदंति
नमंसंति वंदित्ता नमंसित्ता एवं वयासी णो खलु वयं देवाणुप्पिया ! एयमट्ठं जाणामो
वा पासामो वा तं जइणं देवाणुप्पिया ! एयमट्ठं नो गिलायंति परिकहेत्तए तमि-
च्छामो णं देवाणुप्पियाणं अंतिए एयमट्ठं जाणित्तए, अज्जोत्ति समणे भगवं महावीरे
गोयमाई समणे णिग्गंथे आमंतित्ता एवं वयासी, दुक्ख भया पाणा समणाउसो,
से णं भंते दुक्खे केण कडे ? जीवेण कडे पमाएणं, से णं भंते दुक्खे कहां वेइज्जति ?
अप्पमाएणं ॥ २१८ ॥ अण्णउत्थिया णं भंते एवमाइक्खन्ति, एवं भासेन्ति एवं
परुवेन्ति कहणं समणाणं निग्गंथाणं किरिया कज्जइ तत्थ जासा कडा कज्जइ णो
तं पुच्छंति, तत्थ जासा कडा नो कज्जइ णो तं पुच्छंति, तत्थ जासा अकडा नो
कज्जइ णो तं पुच्छंति, तत्थ जासा अकडा कज्जइ तं पुच्छंति, से एवं वत्तव्वं सिया
अकिच्चं दुक्खं अफुसं दुक्खं अकज्जमाणकडं दुक्खं अकट्ठु अकट्ठु पाणा भूया जीवा
सत्ता वेयणं वेयंति त्ति वत्तव्वं जे ते एवमाहंसु ते मिच्छा, अहं पुण एवमाइक्खामि,
एवं भासामि, एवं पन्नवेमि, एवं परुवेमि, किच्चं दुक्खं फुसं दुक्खं कज्जमाणं कडं
दुक्खं कट्ठु २ पाणा भूया जीवा सत्ता वेयणं वेयंति त्ति वत्तव्वं सिया ॥ २१९ ॥
तइयट्ठाणस्स वीओदेसो समत्तो ॥

तिहिं ठाणेहिं मायी मायं कट्ठु णो आलोएज्जा णो पडिक्कमेज्जा, णो णिदिज्जा णो गर-
हेज्जा णो विउट्ठेज्जा णो विसोहेज्जा णो अकरणयाए अब्भुट्ठेज्जा णो अहारिहं पायच्छित्तं
तवोक्कमं पडिवज्जिजा तं० अकरिंसु वाहं करेमि वाहं करिस्सामि वाहं ॥ २२० ॥

तिहिं ठाणेहिं मायी मायं कट्टु णो आलोएज्जा णो पडिक्कमेज्जा जाव णो पडिवज्जेज्जा
तं० अकित्ती वा मे सिया अवन्ने वा मे सिया अविणए वा मे सिया, तिहिं ठाणेहिं
मायी मायं कट्टु णो आलोएज्जा जाव णो पडिवज्जेज्जा तं० कित्ती वा मे परिहाइस्सइ
जसो वा मे परिहाइस्सइ पूयासक्कारे वा मे परिहाइस्सइ, तिहिं ठाणेहिं मायी मायं
कट्टु आलोएज्जा पडिक्कमेज्जा निदेज्जा जाव पडिवज्जेज्जा तंजहा मायिस्स णं अस्सि
लोगे गरहिए भवइ उववाए गरहिए भवइ आयाई गरहिया भवइ । तिहिं ठाणेहिं
मायी मायं कट्टु आलोएज्जा जाव पडिवज्जेज्जा तं० अमायिस्स णं अस्सि लोगे
पसत्थे भवइ, उववाए पसत्थे भवइ आयाई पसत्था भवइ; तिहिं ठाणेहिं मायी मायं
कट्टु आलोएज्जा जाव पडिवज्जेज्जा तं० णाणट्ठयाए दंसणट्ठयाए चरित्तट्ठयाए ॥२२१॥
तओ पुरिसजाया प० तं० सुत्तधरे अत्थधरे तदुभयधरे ॥२२२॥ कप्पइ निग्गंथाण
वा निग्गंथीण वा तओ वत्थाई धारित्तए वा परिहरित्तए वा तं० जंगिए साणिए
खोमिए । कप्पइ निग्गंथाणं वा निग्गंथीणं वा तओ पायाई धारित्तए वा परिहरित्तए
वा तं० लाउयपाए वा दारुपाए वा मट्ठियापाए वा, तिहिं ठाणेहिं वत्थं धरेज्जा तं०
हिरिवत्तियं दुगुंछावत्तियं परीसहवत्तियं ॥२२३॥ तओ आयरक्खा प० तं० धम्मियाए
पडिचोयणाए पडिचोएत्ता भवइ तुसिणीए वा सिया उट्ठित्ता वा आयाए एगंतमन्तम-
वक्कमेज्जा ॥ २२४ ॥ निग्गंथस्स णं गिलायमाणस्स कप्पंति तओ वियडदत्तीओ
पडिगाहित्तए तं० उक्कोसा मज्झिमा जहन्ना ॥ २२५ ॥ तिहिं ठाणेहिं समणे
निग्गंथे साहम्मियं संभोइयं विसंभोइयं करेमाणे णाइक्कमंइ तं० सयं वा दट्ठुं सट्ठस्स
वा निसम्म तच्चं मोसं आउट्ठइ चउत्थं नो आउट्ठइ ॥ २२६ ॥ तिविहा अणुत्ता प०
तं० आयरियत्ताए उवज्जायत्ताए गणित्ताए, तिविहा समणुत्ता प० तं० आयरियत्ताए
उवज्जायत्ताए गणित्ताए, एवं उवसंपया एवं विजहण्णा ॥ २२७ ॥ तिविहे वयणे
प० तं० तव्वयणे तदन्नवयणे णो अवयणे, तिविहे अवयणे प० तं० णो तव्वयणे
णो तदन्नवयणे अवयणे, तिविहे मणे प० तं० तम्मणे तयन्नमणे णो अमणे;
तिविहे अमणे णो तंमणे णो तयन्नमणे अमणे ॥ २२८ ॥ तिहिं ठाणेहिं अप्पवुट्ठि-
काए सिया तं० तस्सि च णं देसंसि वा पएसंसि वा णो बहवे उदगजोणिया जीवा
य पोग्गला य उदगत्ताए वक्कमंति विउक्कमंति चयंति उववज्जंति पडिलोमवाऊ समु-
ट्ठियं उदगपोग्गलं परिणयं वासिउक्कमं अण्णं देसं साहरइ, अब्भवहलंगं च
णं समुट्ठियं परिणयं वासिउक्कमं वाउकाए विहुणेइ इच्चेएहिं तिहिं ठाणेहिं अप्पवु-
ट्ठिकाये सिया । तिहिं ठाणेहिं महावुट्ठिकाए सिया तं० तंसि च णं देसंसि वा
पएसंसि वा बहवे उदगजोणिया जीवा य पोग्गला य उदगत्ताए वक्कमंति विउक्क-

मंति, चयंति उववज्जंति अणुलोमवाळु समुट्ठियं उदगपोग्गलं परिणयं वासिउकामं
तं देसं साहरति अन्भवहलंगं च णं समुट्ठियं परिणयं वासिउकामं णो वाउकाओ
विहुणेति, इच्चएहिं तिहिं ठाणेहिं महावुट्ठिकाए सिया ॥ २२९ ॥ तिहिं ठाणेहिं
अहुणोववन्ने देवे देवलोगेसु इच्छेज्जा माणुसं लोगं हव्वमागच्छित्तए, णो चेव णं
संचाएइ हव्वमागच्छित्तए तं० अहुणोववन्ने देवे देवलोगेसु दिव्वेसु कामभोगेसु
मुच्छिए गिद्धे गढिए अज्झोववन्ने से णं माणुरसए कामभोगे णो आढाइ णो
परियाणाइ णो अट्ठं वंधइ णो णियाणं पगरेइ, णो ठिइप्पकप्पं पकरेइ, अहुणोववन्ने
देवे देवलोगेसु दिव्वेसु कामभोगेसु मुच्छिए गिद्धे गढिए अज्झोववन्ने तस्स णं
माणुस्सए पेम्मे वोच्छिन्ने दिव्वे संकंते भवइ, अहुणोववन्ने देवे देवलोएसु
दिव्वेसु कामभोगेसु मुच्छिए जाव अज्झोववन्ने तस्स णमेवं भवइ इयण्हिं न गच्छं
मुहुतं गच्छं तेणं कालेम्मप्पाउयां मणुस्सा कालधम्मणा संजुत्ता भवंति इच्चएहिं
तिहिं ठाणेहिं अहुणोववन्ने देवे देवलोगेसु इच्छेज्जा माणुस्सं लोगं हव्वमागच्छित्तए नो
चेव णं संचाएइ हव्वमागच्छित्तए । तिहिं ठाणेहिं अहुणोववन्ने देवे देवलोएसु इच्छेज्जा
माणुस्सलोगं हव्वमागच्छित्तए संचाएइ हव्वमागच्छित्तए तं० अहुणोववन्ने देवे देव-
लोगेसु दिव्वेसु कामभोगेसु अमुच्छिए अगिद्धे अगढिए अणज्झोववन्णे तस्स णं एवं
भवइ अत्थि णं मम माणुस्सए भवे आयरिएइ वा, उवज्जाएइ वा पवत्तेइ वा थेरेइ वा,
गणीइ वा गणहरेइ वा गणावच्छेएइ वा जेसिं पभावेणं मए इमा एया रुवा दिव्वा
देविद्धी दिव्वा देवजुइ दिव्वे देवाणुभावे लद्धं पत्ते अभिसमण्णागए तं गच्छामि णं ते
भगवंते वंदामि णमंसामि सक्कारेमि सम्माणेमि कल्लाणं मंगलं देवयं जाव पज्जुवासामि
अहुणोववन्ने देवे देवलोगेसु दिव्वेसु कामभोगेसु अमुच्छिए जाव अणज्झोववन्ने
तस्स णं एवं भवइ, एसण माणुस्सए भवे णाणीइ वा, तवस्सीइ वा, अइदुक्कर-
दुक्करकारगे तं गच्छामि णं भगवंतं वंदामि णमंसामि जाव पज्जुवासामि अहुणोव-
वन्णे देवे देवलोगेसु जाव अणज्झोववन्ने तस्स णं एवं भवइ अत्थि णं मम माणुस्सए
भवे मायाइ वा जाव सुण्हाइ वा तं गच्छामि णं तेसिमंतियं पाउन्भवामि, पासंतु
ता मे इमं एयारुवं दिव्वं देविद्धिं, दिव्वं देवजुइ दिव्वं देवाणुभावं लद्धं पत्तं
अभिसमण्णागयं इच्चएहिं तिहिं ठाणेहिं अहुणोववन्ने देवे देवलोगेसु इच्छेज्जा माणुसं
लोगं हव्वमागच्छित्तए संचाएइ हव्वमागच्छित्तए ॥ २३० ॥ तओ ठाणाइं देवे
पीहेज्जा तं० माणुस्सगं भवं, आरिए खेत्ते जम्मं, सुकुलपच्चायाइ ॥ २३१ ॥ तिहिं
ठाणेहिं देवे परितप्पेज्जा तं० अहो णं मए संते वळे संते वीरिए संते पुरिसकार-
परक्कमे खेमंसि सुभिक्षंसि आयरियउवज्जाएहिं विज्जमाणेहिं कल्लसरीरेणं णो वहुए

सुए अहीए अहो णं मए इहलोगपडिबद्धेणं परलोगपरंमुहेणं विसयतिसिएणं णो
दीहे सामन्नपरियाए अणुपालिए । अहो णं मए इद्धिरससायगरुएणं भोगामिसगिद्धेणं
णो विसुद्धे चरित्ते फासिए इच्चेएहिं० ॥ २३२ ॥ तिहिं ठाणेहिं देवे चइस्सामीति
जाणइ, तं० विमाणाभरणाई णिप्पभाई पासित्ता, कप्परुक्खगं मिलायमाणं पासित्ता
अप्पणो तेयलेस्सं परिहायमाणं जाणित्ता, इच्चेएहिं०, तिहिं ठाणेहिं देवे उव्वेगमाग-
च्छेज्जा तं०-अहो णं मए इमाओ एयारूवाओ दिव्वाओ देविद्धीओ दिव्वाओ देव-
जुईओ, दिव्वाओ देवाणुभावाओ पत्ताओ लद्धाओ अभिसमण्णागयाओ चइयव्वं
भविस्सइ । अहो णं मए माउओयं पिउसुक्कं तं तदुभयसंसिद्धं तप्पढमयाए आहारो
आहारेयव्वो भविस्सइ । अहो णं मए कलमलजंवालाए असुईए उव्वेयणियाए
भीमाए गन्भवसहीए वसियव्वं भविस्सइ । इच्चेएहिं तिहिं ठाणेहिं० ॥ २३३ ॥
तिसंठिया विमाणा प० तं० वट्ठा तंसा चउरंसा । तत्थ णं जे ते वट्ठविमाणा ते णं
पुक्खरकणिया संठाणसंठिया सव्वओ समंता पागारपरिक्खित्ता एगदुवारा प० ।
तत्थ णं जे ते तंसविमाणा ते सिंघाडगसंठाणसंठिया दुहओ पागारपरिक्खित्ता
एगओ वेइया परिक्खित्ता तिदुवारा प० । तत्थ णं जे ते चउरंसविमाणा ते णं
अक्खाडगसंठाणसंठिया सव्वओ समंता वेइया परिक्खित्ता चउदुवारा प० ।
तिपइठिया विमाणा प० तं० घणोदहिपइठिया, घणवायपइठिया, उवासंतरपइठिया ।
तिविहा विमाणा प० तं० अवठिया वेउव्विया परिजाणिया ॥ २३४ ॥ तिविहा
णेरइया प० तं० सम्मदिट्ठी मिच्छादिट्ठी सम्मामिच्छादिट्ठी । एवं विगल्लिदियवजं
जाव वेमाणियाणं । तओ दुग्गईओ पणत्ताओ तं० णेरइयदुग्गई, तिरिक्खजोणिय-
दुग्गई मणुयदुग्गई । तओ सुगईओ प० तं० सिद्धिसोगई देवसोगई मणुस्स-
सोगई । तओ दुग्गया प० तं० णेरइयदुग्गया तिरिक्खजोणियदुग्गया, मणुस्स-
दुग्गया, तओ सुगया प० तं० सिद्धसुगया देवसुगया मणुस्ससुगया ॥ २३५ ॥
चउत्थमत्तियस्स णं भिक्खुस्स कप्पंति तओ पाणगाई पडिगाहित्तए तं० उस्सेइमे
संसेइमे चाउलघोवणे । छट्ठमत्तियस्स णं भिक्खुस्स कप्पंति तओ पाणगाई पडि-
गाहित्तए, तंजहा-तिलोदए तुसोदए जवोदए, अट्ठममत्तियस्स भिक्खुस्स कप्पंति
तओ पाणगाई पडिगाहित्तए तंजहा-आयामए सोवीरए सुद्धवियडे ॥ २३६ ॥
तिविहे उवहडे प० तं० फलिओवहडे सुद्धोवहडे संसट्ठोवहडे, तिविहे ओगहिए प०
तं० जं च ओगिण्हइ जं च साहरइ जं च आसगंसि पक्खिवइ ॥ २३७ ॥
तिविहा ओमोयरिया प० तं० उवगरणोमोयरिया, भत्तपाणोमोयरिया, भावोमोय-
रिया; उवगरणोमोयरिया तिविहा प० तं० एगे वत्थे, एगे पाये चियत्तोवहि-

साइज्जणया ॥ २३८ ॥ तओ ठाणा णिग्गंथाणं वा णिग्गंथीणं वा अहियाए असुहाए
अक्खमाए अणिस्सेयसाए अणाणुगामियत्ताए भवन्ति, तं० कूअणया, कक्करणया
अवज्जाणया, तओ ठाणा णिग्गंथाणं वा णिग्गंथीणं वा हियाए सुहाए खमाए
णिस्सेयसाए आणुगामियत्ताए भवन्ति, तं० अकूअणया अक्ककरणया अणवज्जाणया
॥ २३९ ॥ तओ सल्ला प० तं० मायासल्ले णियाणसल्ले मिच्छादंसणसल्ले ॥ २४० ॥
तिहिं ठाणेहिं समणे णिग्गंथे संखित्तविउलतेउल्लेस्से भवइ तं० आयावणयाए
खंतिखमाए अपाणगेणं तवोक्कम्मेणं ॥ २४१ ॥ तिमासियं णं भिक्खुपडिमं पडि-
वन्नस्स अणगारस्स कप्पंति तओ दत्तीओ भोयणस्स पडिगाहित्तए तओ पाणगस्स,
एगराइयं भिक्खुपडिमं सम्ममणुपालेमाणस्स अणगारस्स इमे तओ ठाणा अहि-
याए असुभाए अखमाए अणिस्सेयसाए अणाणुगामियत्ताए भवन्ति तं० उम्मायं वा
लभेज्जा, दीहकालियं वा रोयातकं पाउणेज्जा, केवलिपण्णत्ताओ धम्माओ भंसेज्जा ।
एगराइयं णं भिक्खुपडिमं सम्ममणुपालेमाणस्स अणगारस्स तओ ठाणा हियाए
सुभाए खमाए णिस्सेयसाए आणुगामियत्ताए भवन्ति तं० ओहिणाणे वा से समुप्प-
जेज्जा मणपज्जवणाणे वा से समुप्पजेज्जा, केवलणाणे वा से समुप्पजेज्जा ॥ २४२ ॥
जंवुद्दीवे दीवे तओ कम्मभूमीओ प० तं० भरहे, एरवए, महाविदेहे । एवं धायइ-
खंडे दीवे पुरच्छिमद्धे जाव पुक्खर-वर-दीवद्ध-पच्चत्थिमद्धे ॥ २४३ ॥ तिविहे दंसणे
सम्मदंसणे, मिच्छादंसणे, सम्ममिच्छादंसणे, तिविहा रुई प० तं० सम्मरुई,
मिच्छरुई, सम्ममिच्छरुई, तिविहे पओगे प० तं० सम्मप्पओगे, मिच्छप्पओगे,
सम्ममिच्छप्पओगे ॥ २४४ ॥ तिविहे ववसाए प० तं० धम्मिए ववसाए अहम्मिए
ववसाए, धम्मियाधम्मिए ववसाए, अहवा तिविहे ववसाए, प० तं० पच्चक्खे,
पच्चइए, आणुगामिए, अहवा तिविहे ववसाए प० तं० इहलोइए, परलोइए, इह-
लोइयपरलोइए, इहलोइए ववसाए तिविहे प० तं० लोइए वेइए सामइए, लोइए
ववसाए तिविहे प० तं० अत्ये धम्मे कामे, वेइए ववसाए तिविहे प० तं० रिउव्वेए
ज्जुव्वेए सामवेए, सामइए ववसाए तिविहे प० तं० णाणे दंसणे चरित्ते ॥ २४५ ॥
तिविहा अत्यजोणी प० तं० सामे दंडे भेए ॥ २४६ ॥ तिविहा पोगगला प० तं०
पओगपरिणया, मीसापरिणया, वीससापरिणया ॥ २४७ ॥ तिपइठ्ठिया णरगा प०
तं० पुढवीपइठ्ठिया आगासपइठ्ठिया आयपइठ्ठिया, नेगमसंगहववहारणं पुढवीप-
इठ्ठिया, उज्जुसुयस्स आगासपइठ्ठिया तिण्हं सद्दणयाणं आयपइठ्ठिया ॥ २४८ ॥
तिविहे मिच्छत्ते प० तं० अकिरिया अविणए अण्णाणे, अकिरिया तिविहा प०
तं० पओगकिरिया, समुदाणकिरिया अन्नाणकिरिया, पओगकिरिया तिविहा प०

तं० मणपओगकिरिया वइपओगकिरिया कायपओगकिरिया, समुदाणकिरिया तिविहा
 प० तं० अणंतरसमुदाणकिरिया, परंपरसमुदाणकिरिया तदुभयसमुदाणकिरिया,
 अण्णाणकिरिया तिविहा प० तं० मइअण्णाणकिरिया, सुयअण्णाणकिरिया, विभंग-
 अण्णाणकिरिया, अविणए तिविहे प० तं० देसच्चाई, णिरालंवणया, णाणापेज्जदोसे,
 अण्णाणे तिविहे प० तं० देसअण्णाणे, सव्वअण्णाणे, भावअण्णाणे ॥ २४९ ॥
 तिविहे धम्मे प० तं० सुयधम्मे, चरित्तधम्मे, अत्थिकायधम्मे, तिविहे उवक्कमे
 प० तं० धम्मिए उवक्कमे, अहम्मिए उवक्कमे, धम्मियाधम्मिए उवक्कमे, अहवा
 तिविहे उवक्कमे प० तं० आओवक्कमे, परोवक्कमे, तदुभयोवक्कमे, एवं वेयावच्चे,
 अणुगगहे, अणुसिद्धि, उवालंभं, एवमिक्केक्के तिन्नि २ आलावगा जहेव उवक्कमे
 ॥ २५० ॥ तिविहा कहा प० तं० अत्थकहा, धम्मकहा, कामकहा, तिविहे विणिच्छए
 प० तं० अत्थविणिच्छए धम्मविणिच्छए कामविणिच्छए ॥ २५१ ॥ तहाह्वं णं भंते
 समणं वा णिगंथं वा सेवमाणस्स किं फला सेवणया ? सवणफला, से णं भंते सवणे
 किं फले ? णाणफले, से णं भंते णाणे किं फले ? विण्णाण फले, एवमेएणं अभिलावेणं
 इमा गाहा अणुगंतव्वा—“सवणे णाणे य विण्णाणे, पच्चक्खाणे य संजमे । अण्हए
 तवे चेव, वोदाणे अकिरिय णिव्वाणे (१) जाव से णं भंते अकिरिया किं फला ?
 णिव्वाणफला, से णं भंते णिव्वाणे किं फले ? सिद्धिगइगमणपज्जवसाणफले पण्णत्ते
 समणाउसो ! ॥ २५२ ॥ तइओहेसो समत्तो ॥

पडिमापडिवण्णस्स णं अणगारस्स कप्पंति तओ उवस्सया पडिलेहित्तए तं०—
 अहे आगमणगिहंसि वा, अहे वियडगिहंसि वा, अहे रुक्खमूलगिहंसि वा, एव-
 मणुन्नवेत्तए, उवाइणित्तए, पडिमापडिवन्नस्स णं अणगारस्स कप्पंति तओ संथारगा
 पडिलेहित्तए तं० पुढवीसिला, कट्टसिला, अहासंथडमेव, एवमणुन्नवित्तए उवाइणि-
 त्तए ॥ २५३ ॥ तिविहे काले प० तं० तीए पडुप्पन्ने अणागए, तिविहे समए प०
 तं० तीए, पडुप्पन्ने, अणागए, एवं आवलिया, आणापाणू, थोवे लवे मुहुत्ते अहो-
 रत्ते, जाव वाससयसहस्से पुव्वंगे, पुव्वे, जाव ओसप्पिणी, तिविहे पोग्गलपरियट्ठे
 प० तं० तीते पडुप्पन्ने अणागए ॥ २५४ ॥ तिविहे वयणे प० तं०—एगवयणे,
 दुवयणे, बहुवयणे, अहवा तिविहे वयणे प० तं० इत्थिवयणे, पुंवयणे, णपुंसग-
 वयणे, अहवा तिविहे वयणे प० तं० तीतवयणे, पडुप्पण्वयणे, अणागयवयणे
 ॥ २५५ ॥ तिविहा पन्नवणा तं० णाणपण्वणा, दंसणपण्वणा, चरित्तपण्वणा,
 तिविहे सम्मे प० तं० णाणसम्मे, दंसणसम्मे, चरित्तसम्मे ॥ २५६ ॥ तिविहे
 उवघाए प० तं० उग्गमोवघाए, उप्पायणोवघाए, एसणोवघाए, एवं विसोही

॥ २५७ ॥ तिविहा आराहणा प० तं० णाणाराहणा, दंसणाराहणा, चरित्ताराहणा, णाणाराहणा तिविहा प० तं० उक्कोसा, मज्झिमा, जहन्ना, एवं दंसणाराहणावि, चरित्ताराहणावि, तिविहे संकिलेसे प० तं० णाणसंकिलेसे, दंसणसंकिलेसे, चरित्तसंकिलेसे, एवं असंकिलेसेवि, एवं अइक्कमे वि, वइक्कमे वि, अइयारे वि, अणायारे वि, तिण्हमइक्कमाणं आलोएज्जा, पडिक्कमेज्जा, णिंदेज्जा, गरहिज्जा जाव पडिवज्जिज्जा, तं० णाणाइक्कमस्स, दंसणाइक्कमस्स, चरित्ताइक्कमस्स, एवं वइक्कमाणं, अइयाराणं, अणायाराणं ॥ २५८ ॥ तिविहे पायच्छित्ते प० तं० आलोयणारिहे, पडिक्कमणारिहे, तडुभयारिहे ॥ २५९ ॥ जंवुदीवे दीवे मंदरस्स पव्वयस्स दाहिणेणं तओ अक्कम्मभूमीओ प० तं० हेमवए हरिवासे देवकुरा, जंवुदीवे दीवे मंदरस्स पव्वयस्स उत्तरेणं तओ अक्कम्मभूमीओ प० तं० उत्तरकुरा, रम्मगवासे, एरन्नवए, जंवुदीवे दीवे मंदरपव्वयस्स दाहिणेणं तओ वासा प० तं० भरहे, हेमवए, हरिवासे, जंवूमंदरस्स उत्तरेणं तओ वासा प० तं० रम्मगवासे, हेरन्नवए, एरवए, जंवूमंदरस्स दाहिणेणं तओ वासहरपव्वया प० तं० चुल्लहिमवंते, महाहिमवंते, णिसढे, जंवूमंदरस्स उत्तरेणं तओ वासहरपव्वया प० तं० णीलवंते, रूपी, सिहरी, जंवूमंदरस्स दाहिणेणं तओ महादहा प० तं० पउमद्दहे, महापउमद्दहे, तिगिच्छिद्दहे, तत्थ णं तओ देवयाओ महिद्धियाओ जाव पलिओवमट्ठिईयाओ परिवसंति तं० सिरी, हिरी, धिई । एवं उत्तरेण वि, णवरं केसरिद्दहे, महापोंडरीयद्दहे, पोंडरीयद्दहे, देवयाओ कित्ती, बुद्धी, लच्छी, जंवूमंदरस्स दाहिणेणं चुल्लहिमवंताओ वासहरपव्वयाओ पउमद्दहाओ महादहाओ तओ महाणईओ पव्हंति तं० गंगा सिन्धू रोहियंसा । जंवूमंदरस्स उत्तरेणं सिहरीओ वासहरपव्वयाओ पोंडरीयद्दहाओ महद्दहाओ तओ महाणदीओ पव्हंति तं० सुवन्नकूला रत्ता रत्तवई । जंवूमंदरस्स पुरच्छिमेणं सीयाए महाणईए उत्तरेणं तओ अंतरणईओ प० तं० गाहावई, दहवई, पंकवई, जंवूमंदरस्स पुरत्थिमेणं सीयाए महाणईए दाहिणेणं तओ अंतरणईओ प० तं० तत्तजला, मत्तजला, उम्मत्तजला, जंवूमंदरस्स पच्चत्थिमेणं सीओदाए महाणईए दाहिणेणं तओ अंतरणईओ प० तं० खीरोदा, सीहसोया, अंतोवाहिणी, जंवूमंदरस्स पच्चत्थिमेणं सीओदाए महाणईए उत्तरेणं तओ अंतरणईओ प० तं० उम्मिमालिणी, फेणमालिणी, गंभीरमालिणी, एवं धायईखडे दीवे पुरच्छिमद्देवि अक्कम्मभूमीओ आढवेत्ता जाव अंतरणईओत्ति, णिरवसेसं भाणियव्वं, जाव पुक्खरवरदीवद्धूपच्चत्थिमद्दे तहेव णिरवसेसं भाणियव्वं ॥ २६० ॥ तिहिं ठाणेहिं देसे पुढवीए चलेज्जा तंजहा-अहेणमिमीसे रयणप्पभाए पुढवीए

उराला पोगगला णिवतेज्जा, तएणं ते उराला पोगगला णिवयमाणा देसं पुढवीए चलेज्जा । महोरए वा महिद्धिए जाव महेसक्खे इमीसे रयणप्पभाए पुढवीए अहे उम्मज्जणिमज्जियं करेमाणे देसं पुढवीए चलेज्जा । णागसुवण्णाण वा संगमंसि वट्टमाणंसि देसं पुढवीए चलेज्जा, इच्चेएहिं तिहिं ठाणेहिं केवलकप्पा पुढवी चलेज्जा तं० अहेणं इमीसे रयणप्पभाए पुढवीए घणवाए गुप्पेज्जा, तएणं से घणवाए गुविए समाणे घणोदहिमेएज्जा, तएणं से घणोदही एइए समाणे केवलकप्पं पुढविं चालेज्जा । देवे वा महिद्धिए जाव महेसक्खे तहाखवस्स समणस्स णिग्गंधस्स वा इद्धि जुइं जसं वलं वीरियं पुरिसक्कारपरक्कमं उवदंसेमाणे केवलकप्पं पुढविं चालेज्जा । देवासुरसंगमंसि वा वट्टमाणंसि केवलकप्पा पुढवी चलेज्जा इच्चेएहिं तिहिं०

॥ २६१ ॥ तिविहा देवा किब्बिसिया प० तं० तिपलिओवमठ्ठिईया, तिसागरोवमठ्ठिईया, तेरससागरोवमठ्ठिईया, कहि णं भंते तिपलिओवमठ्ठिईया देवा किब्बिसिया परिवसंति ? उप्पि जोइसियाणं हिट्ठिं सोहम्मीसाणेसु कप्पेसु एत्थणं तिपलिओवमठ्ठिईया देवा किब्बिसिया परिवसंति, कहि णं भंते तिसागरोवमठ्ठिईया देवा किब्बिसिया परिवसंति ? उप्पि सोहम्मीसाणाणं कप्पाणं, हेट्ठिं सणकुमारमाहिंदकप्पेसु एत्थ णं तिसायरोवमठ्ठिईया देवा किब्बिसिया परिवसंति । कहि णं भंते तेरससागरोवमठ्ठिईया देवा किब्बिसिया परिवसंति ? उप्पि वंभलोयस्स कप्पस्स हिट्ठिं लंतगे कप्पे एत्थ णं तेरससागरोवमठ्ठिईया देवा किब्बिसिया परिवसंति

॥ २६२ ॥ सक्कस्स णं देविदस्स देवरण्णो बाहिरपरिसाए देवाणं तिन्निपलिओवमाइं ठिई प०—सक्कस्स णं देविदस्स देवरण्णो अब्भितरपरिसाए देवीणं तिन्निपलिओवमाइं ठिई प० ईसाणस्सणं देविंदस्स देवरण्णो बाहिरपरिसाए देवीणं तिन्निपलिओवमाइं ठिई प० ॥ २६३ ॥ तिविहे पायच्छित्ते प० तं० णाणपायच्छित्ते, दंसणपायच्छित्ते, चरित्तपायच्छित्ते । तओ अणुग्घाइमा प० तं० हत्थकम्मं करेमाणे, मेहुणं सेवेमाणे, राइभोयणं भुंजमाणे, तओ पारंचिया प० तं० दुट्ठे पारंचिए, पमत्ते पारंचिए, अण्णमण्णं करेमाणे पारंचिए, तओ अणवट्टप्पा प० तं० साहम्मियाणं तेणं करेमाणे, अण्णधम्मियाणं तेणं करेमाणे, हत्थतालं दलयमाणे, तओ णो कप्पंति पव्वावेत्तए, पंडए, वाइए, कीवे, एवं मुंडावेत्तए, सिक्खावेत्तए, उवठावेत्तए, संभुंजित्तए, संवासित्तए ॥ २६४ ॥ तओ अवायणिज्जा प० तं० अविणीए, विगइपडिवद्धे, अविओसियपाहुडे । तओ कप्पंति वाइत्तए तं० विणीए अविगइपडिवद्धे विओसियपाहुडे ॥ २६५ ॥ तओ दुसणप्पा प० तं० दुट्ठे मूढे चुग्गाहिए, तओ सुसन्नप्पा प० तं० अदुट्ठे अमूढे अचुग्गाहिए ॥ २६६ ॥ तओ

मंडलियपव्वया प० तं० माणुसुत्तरे कुंडलवरे रुयगवरे, तओ महइमहालया प०
तं० जंहुदीवे दीवे मंदरे मंदरेसु, सयंभुरमणसमुद्दे समुद्देसु, वंभलोए कप्पे कप्पेसु
॥ २६७ ॥ तिविहा कप्पठिई प० तं० सामाइयकप्पठिई छेदोवट्ठावणियकप्पठिई
निव्विसमाणकप्पठिई, अहवा तिविहा कप्पठिई प० तं० णिविट्ठकप्पठिई, जिण-
कप्पठिई, थेरकप्पठिई ॥ २६८ ॥ णेरइयाणं तओ सरीरगा प० तं० वेउव्विए,
तेयए, कम्मए, असुरकुमाराणं तओ सरीरगा, एवं चेव सव्वेसिं देवाणं, पुढवी-
काइयाणं तओ सरीरगा प० तं० ओरालिए, तेयए, कम्मए, एवं वाउकाइयवज्जाणं
जाव चउरिंदियाणं ॥ २६९ ॥ गुहं पडुच्च तओ पडिणीया प० तं० आयरियपडि-
णीए, उवज्झायपडिणीए, थेरपडिणीए, गइं पडुच्च तओ पडिणीया प० तं० इह-
लोयपडिणीए, परलोयपडिणीए, दुहओलोयपडिणीए । समूहं पडुच्च तओ पडिणीया
प० तं० कुलपडिणीए, गणपडिणीए, संघपडिणीए, अणुकंपं पडुच्च तओ पडिणीया
प० तं० तवस्सिपडिणीए, गिलाणपडिणीए, सेहपडिणीए, भावं पडुच्च तओ पडि-
णीया प० तं० णाणपडिणीए, दंसणपडिणीए, चरित्तपडिणीए, सुयं पडुच्च तओ
पडिणीया प० तं० सुत्तपडिणीए, अत्थपडिणीए, तदुभयपडिणीए ॥ २७० ॥
तओ पितियंगा प० तं० अट्ठी, अट्ठिमिंजा, केसमंसुरोमनहे । तओ माउयंगा प०
तं० मंसे, सोणिए, मत्थुल्लिगे ॥ २७१ ॥ तिहिं ठाणेहिं समणे णिग्गंथे महानिज्जरे
महापज्जवसाणे भवइ तं० कया णं अहं अप्पं वा वहुं वा सुयं अहिंजिस्सामि, कया
णं अहं एकल्लविहारपडिमं उवसंपज्जित्ताणं विहरिस्सामि, कया णं अहं अपच्छिम-
मारणंतियसंलेहणाइसणाइसिए भत्तपाणपडियाइक्खिए पाओवगए कालमणवकंख-
माणे विहरिस्सामि । एवं समणसा सवयसा सकायसा, पागडेमाणे निग्गंथे महा-
णिज्जरे महापज्जवसाणे भवइ ॥ २७२ ॥ तिहिं ठाणेहिं समणोवासए महानिज्जरे
महापज्जवसाणे भवइ तं० कयाणमहमणं वा, बहुअं वा परिग्गहं परिचइस्सामि,
कयाणमहं मुंडे भवित्ता आगाराओ अणगारियं पव्वइस्सामि, कयाणमपच्छिममारणं-
तियसंलेहणाइसणाइसिए भत्तपाणपडियाइक्खिए पाओवगए कालमणवकंखमाणे
विहरिस्सामि, एवं समणसा सवयसा सकायसा जागरमाणे समणोवासए महा-
णिज्जरे महापज्जवसाणे भवइ ॥ २७३ ॥ तिविहे पोग्गलपडिघाए प० तं० परमाणु-
पोग्गले परमाणुपोग्गलं पप्प पडिहण्णिज्जा, लुक्खत्ताए वा पडिहण्णिज्जा, लोगंते वा
पडिहण्णिज्जा ॥ २७४ ॥ तिविहे चक्खू प० तं० एगचक्खू, विचक्खू, तिचक्खू ;
छउमत्थेणं मणुस्से एगचक्खू, देवे विचक्खू, तहारुवे समणे वा णिग्गंथे वा
उप्पन्नणाणदंसणधरे से णं तिचक्खुत्ति वत्तव्वं सिया ॥ २७५ ॥ तिविहे अभि-

समागमे प० तं० उद्धं अहं तिरियं, जया णं तहाख्वस्स समणस्स वा णिगंथस्स
 वा अइसेसे णाणदंसणे समुप्पज्जइ सेणं तप्पढमयाए उद्धमभिसमेइ, तओ तिरियं
 तओ पच्छा अहे अहोलोगेणं दुरभिगमे प० समणाउसो ॥ २७६ ॥ तिविहा इद्धी
 प० तं० देविद्धी-राइद्धी-गणिद्धी, देविद्धी तिविहा प० तं० विमाणिद्धी, विगुव्विणिद्धी,
 परियारणिद्धी, अहवा देविद्धी तिविहा प० तं० सचित्ता, अचित्ता, मीसिया, राइद्धी
 तिविहा प० तं० रण्णो अइयाणिद्धी, रण्णो णिज्जाणिद्धी, रण्णो वलवाहणकोस-
 कोठागारिद्धी, अहवा राइद्धी तिविहा प० तं० सचित्ता, अचित्ता, मीसिया, गणिद्धी
 तिविहा प० तं० णाणिद्धी, दंसणिद्धी, चरित्तिद्धी, अहवा गणिद्धी तिविहा प० तं०
 सचित्ता अचित्ता मीसिया ॥ २७७ ॥ तओ गारवा प० तं० इद्धीगारवे, रसगारवे,
 सायागारवे । करणे तिविहे प० तं० धम्मिए करणे, अधम्मिए करणे, धम्मिया-
 धम्मिए करणे ॥ २७८ ॥ तिविहे भगवया धम्मे प० तं० सुअहिज्जिए, सुज्झाइए,
 सुतवस्सिए जया सुअहिज्जियं भवइ, तदा सुज्झाइयं भवइ, जया सुज्झाइयं भवइ
 तया सुतवस्सियं भवइ, से सुअहिज्जिए, सुज्झाइए, सुतवस्सिए, सुयक्खाएणं भग-
 वया धम्मे पन्नते ॥ २७९ ॥ तिविहा वावत्ती प० तं० जाणू, अजाणू, विति-
 निच्छा, एवमज्झोववज्जणा परियावज्जणा ॥ २८० ॥ तिविहे अंते प० तं०
 लोगंते, वेयंते, समयंते ॥ २८१ ॥ तओ जिणा प० तं० ओहिणाणजिणे, मण-
 पज्जवणाणजिणे, केवलणाणजिणे, तओ केवली प० तं० ओहिनाणकेवली, मण-
 पज्जवनाणकेवली, केवलनाणकेवली, तओ अरहा प० तं० ओहिनाणअरहा, मण-
 पज्जवणाणअरहा, केवलनाणअरहा ॥ २८२ ॥ तओ लेस्साओ दुब्भिगंधाओ प०
 तं० कण्हलेस्सा, नीललेस्सा, काउलेस्सा, तओ लेस्साओ सुब्भिगंधाओ प० तं०
 तेऊ पम्ह सुकलेस्सा । एवं तिदुग्गइगामिणीओ, तिसुग्गइगामिणीओ तओ
 संकिलिद्धाओ, असंकिलिद्धाओ, अमणुत्ताओ, मणुत्ताओ, अविमुद्धाओ, विमुद्धाओ,
 अप्पसत्थाओ, पसत्थाओ, सीअलुक्खाओ, णिद्धुण्हाओ ॥ २८३ ॥ तिविहे मरणे
 प० तं० बालमरणे, पंडियमरणे, बालपंडियमरणे, बालमरणे तिविहे प० तं०
 ठिअलेस्से, संकिलिठुलेस्से, पज्जवजायलेस्से । पंडियमरणे तिविहे प० तं० ठिअ-
 लेस्से, असंकिलिठुलेस्से, पज्जवजायलेस्से, बालपंडियमरणे तिविहे प० तं० ठिअ-
 लेस्से असंकिलिठुलेस्से अपज्जवजायलेस्से ॥ २८४ ॥ तओ ठाणा अण्ववसिअस्स
 अहियाए, असुभाए, अखमाए, अणिससेसाए, अणाणुगामियत्ताए भवंति तं० से णं
 मुंडे भवित्ता अगाराओ अणगारियं पव्वइए णिगंथे पावयणे संकिए कखिए विति-
 निच्छिए भेदसमावन्ने कलुससमावन्ने णिगंथं पावयणं णो सइहइ णो पत्तियइ, णो

रोएइ, तं परीसहा अभिजुंजिय अभिजुंजिय अभिभवन्ति, नो से परीसहे अभि-
जुंजिय अभिजुंजिय अभिभवइ, से णं मुंडे भविता आगाराओ अणगारियं पव्वइए,
पंचहिं महव्वएहिं संकिए जाव कलुससमावण्णे, पंचमहव्वयाइं णो सदहइ जाव नो
से परीसहे अभिजुंजिय २ अभिभवइ, से णं मुंडे भविता आगाराओ अणगारियं
पव्वइए छहिं जीवनिक्काएहिं जाव अभिभवइ, तओ ठाणा ववसिअस्स हियाए जाव
आणुगामियत्ताए भवन्ति तं० से णं मुंडे भविता आगाराओ अणगारियं पव्वइए
णिग्गंथे पावयणे णिस्संकिए णिक्कंखिए जाव णो कलुससमावण्णे णिग्गंथं पावयणं
सदहइ पत्तियइ रोएइ से परीसहे अभिजुंजिय २ अभिभवइ, णो तं परीसहा
अभिजुंजिय २ अभिभवन्ति, सेणं मुंडे भविता आगाराओ अणगारियं पव्वइए
समाणे पंचहिं महव्वएहिं णिरसंकिए-णिक्कंखिए जाव, परीसहे अभिजुंजिय २
अभिभवइ, णो तं परीसहा अभिजुंजिय २ अभिभवन्ति, से णं जाव छहिं जीव-
निक्काएहिं णिस्संकिए जाव परीसहे अभिजुंजिय २ अभिभवइ णो तं परीसहा
अभिजुंजिय २ अभिभवन्ति ॥ २८५ ॥ एगमेगाणं पुढवी तिहिं वलएहिं सव्वओ
समंता संपरेक्खिता तंजहा-घणोदहिंवलएणं, घणवायवलएणं, तणुवायवलएणं
॥ २८६ ॥ णेरइयाणं उक्कोसेणं तिसमइएणं विग्गहेणं उववज्जंति एगिंदियवज्जं जाव
वेमाणियाणं ॥ २८७ ॥ खीगमोहस्सणं अरहओ तओ कम्मंसा जुगवं खिज्जंति तं०
णाणावरणिज्जं, दंसणावरणिज्जं, अंतराइयं ॥ २८८ ॥ अभीइणक्खत्ते तितारे प० एवं
सवणे अस्सिणी भरणी मगसिरे पूसे जेठ्ठा ॥ २८९ ॥ धम्माओ णं अरहाओ संती
अरहा तिहिं सागरोवमेहिं तिचउवभागं पलिओवमऊणएहिं वीइक्कंतेहिं समुप्पन्ने ।
समणस्स णं भगवओ महावीरस्स जाव तच्चाओ पुरिसजुगाओ जुगंतकडभूमी, मल्लीणं
अरहा तिहिं पुरिससएहिं सद्धिं मुंडे भवेत्ता जाव पव्वइए, एवं पासेवि, समणस्स णं
भगवओ महावीरस्स तिज्जिसया चोद्दसपुव्वीणं अजिणाणं जिणसंकासाणं सव्वक्ख-
रसन्निवाईणं जिण इव अवितहवागरमाणं उक्कोसिया चोद्दसपुव्विसंपया होत्था,
तओ तितय्यरा चक्कवट्ठी होत्था तं० संती कुंथू अरो ॥ २९० ॥ तओ गेविज्ज-
विमाणपत्थडा प० तं० हिट्ठिमगेविज्जविमाणपत्थडे, मज्झिमगेविज्जविमाणपत्थडे,
उवरिमगेविज्जविमाणपत्थडे, हिट्ठिमगेविज्जविमाणपत्थडे तिविहे प० तं० हिट्ठिम-
हिट्ठिमगेविज्जविमाणपत्थडे, हिट्ठिममज्झिमगेविज्जविमाणपत्थडे हिट्ठिमउवरिम-
गेविज्जविमाणपत्थडे, मज्झिमगेविज्जविमाणपत्थडे, तिविहे प० तं० मज्झिमहिट्ठिम-
गेविज्जविमाणपत्थडे, मज्झिममज्झिमगेविज्जविमाणपत्थडे, मज्झिमउवरिमगेविज्ज-
विमाणपत्थडे, उवरिमगेविज्जविमाणपत्थडे तिविहे प० तं० उवरिमहिट्ठिमगेविज्ज-

विमाणपत्थडे, उवरिममज्झिमगेविज्जविमाणपत्थडे, उवरिमउवरिमगेविज्जविमाण-
पत्थडे ॥ २९१ ॥ जीवाणं तिठाणणिव्वत्तिए पोग्गले पावक्कम्मत्ताए चिणिंसु
वा चिणंति वा चिणिस्संति वा तंजहा-इत्थिणिव्वत्तिए, पुरिसणिव्वत्तिए, णपुंस-
गणिव्वत्तिए, एवं चिणउवचिणवंधउदीरवेय तह णिज्जरा चेव ॥ २९२ ॥ तिपए-
सिया खंधा अणंता पण्णत्ता, एवं जाव तिगुणलुक्खा पोग्गला अणंता पन्नत्ता
॥ २९३ ॥ तिठ्ठाणं समत्तं ॥

चउत्थट्ठाणं

चत्तारि अंतकिरियाओ प० तं० तत्थ खलु इमा पढमा अंतकिरिया,
अप्पक्कम्मपच्चायाए यावि भवइ, से णं मुंडे भवित्ता अगाराओ अणगारिअं पव्व-
इए, संजमवहुले संवरवहुले समाहिवहुले लहे तीरट्ठी उवहाणवं दुक्खक्खवे तवस्सी
तस्सणं णो तहप्पगारे तवे भवइ णो तहप्पगारा वेयणा भवइ, तहप्पगारे पुरि-
सजाए दीहेणं परियाएणं सिज्झइ, वुज्झइ मुच्चइ परिणिव्वाइ सव्वदुक्खाणमंतं करेइ,
जहा से भरहे राया चाउरंतचक्कवट्ठी पढमा अंतकिरिया, अहावरा दोच्चा अंत-
किरिया, महाक्कम्मपच्चायाए यावि भवइ से णं मुंडे भवित्ता अगाराओ अणगारिअं
पव्वइए, संजमवहुले संवरवहुले.....जाव उवहाणवं दुक्खक्खवे तवस्सी तस्स णं
तहप्पगारे तवे भवइ, तहप्पगारा वेयणा भवइ तहप्पगारे पुरिसजाए निरुद्धेणं
परियाएणं सिज्झइ० जाव अंतं करेइ जहा से गजसुमाले अणगारे, दोच्चा अंत-
किरिया, अहावरा तच्चा अंतकिरिया, महाक्कम्मपच्चायाएयावि भवइ, से णं मुंडे
भवित्ता अगाराओ अणगारियं पव्वइए जहा दोच्चा, णवरं दीहेणं परियाएणं
सिज्झइ जाव सव्वदुक्खाणमंतं करेइ, जहा से सणकुमारे राया चाउरंतचक्कवट्ठी
तच्चा अंतकिरिया, अहावरा चउत्था अंतकिरिया, अप्पक्कम्मपच्चायाएयावि
भवइ, से णं मुंडे भवित्ता जाव पव्वइए संजमवहुले जाव तस्स णं णो तहप्पगारे तवे
भवइ नो तहप्पगारा वेयणा भवइ तहप्पगारे पुरिसजाए निरुद्धेणं परियाएणं
सिज्झइ जाव सव्वदुक्खाणमंतं करेइ जहा सा मरुदेवा भगवई, चउत्था अंत-
किरिया ॥ २९४ ॥ चत्तारि रुक्खा प० तं० उन्नए णाममेगे उन्नए, उन्नए णाममेगे
पणए, पणए णाममेगे उन्नए, पणए णाममेगे पणए, एवामेव चत्तारि पुरिसजाया
प० तं० उन्नए णाममेगे उन्नए, तहेव जाव पणए णाममेगे पणए । चत्तारि रुक्खा
प० तं० उन्नए णाममेगे उन्नयपरिणए, उन्नए णाममेगे पणयपरिणए, पणए
णाममेगे उन्नयपरिणए, पणए णाममेगे पणयपरिणए । एवामेव चत्तारि पुरिसजाया
प० तं० उन्नए णाममेगे उन्नयपरिणए, चउभंगो । चत्तारि रुक्खा प० तं० उन्नए

णाममेगे उन्नए रुवे, तहेव चउभंगो, एवमेव चत्तारि पुरिसजाया प० तं० उन्नए
 णामं ४ । चत्तारि पुरिसजाया प० तं० उन्नए णाममेगे उन्नए मणे, उन्न० एवं संकप्पे-
 पन्ने-दिट्ठी-सीलाचारे-ववहारे-परक्कमे-एगे पुरिसजाए पडिवक्खो गत्थि ॥ २९५ ॥
 चत्तारि स्क्खा प० तं० उज्जुणाममेगे उज्जु, उज्जुणाममेगे वंके, चउभंगो । एवमेव
 चत्तारि पुरिसजाया, प० तं० उज्जुणाममेगे उज्जु ४ एवं जहा उन्नयपणएहिं गमो
 तद्वा उज्जुवंकेहिं वि भाणियव्वो, जाव परक्कमे ॥ २९६ ॥ पडिमापडिवन्नस्सणं
 अणगारस्स कप्पंति चत्तारि भासाओ भासित्तए तं० जायणी पुच्छणी अणुन्न-
 वणी पुठुस्स दागरणी । चत्तारिभासजाया प० तं० सच्चमेगं भासजायं,
 वीयं मोसं तइयं सच्चमोसं चउत्थं असच्चमोसं ॥ २९७ ॥ चत्तारि वत्था प०
 तं० सुद्धे णाममेगे सुद्धे, सुद्धे णाममेगे असुद्धे, असुद्धे णाममेगे सुद्धे, असुद्धे णाम-
 मेगे असुद्धे । एवामेव चत्तारि पुरिसजाया प० तं० सुद्धे णाममेगे सुद्धे चउभंगो ।
 एवं परिणयरुवे वत्था सपडिवक्खा ॥ २९८ ॥ चत्तारि पुरिसजाया प० तं० सुद्धे
 णाममेगे सुद्धमणे चउभंगो, एवं संकप्पे जाव परक्कमे ॥ २९९ ॥ चत्तारि सुया
 प० तं० अइजाए, अणुजाए, अवजाए, कुलिंगाले ॥ ३०० ॥ चत्तारि पुरिसजाया
 प० तं० सच्चे णाममेगे सच्चे, सच्चे णाममेगे असच्चे (४) एवं परिणए जाव पर-
 क्कमे ॥ ३०१ ॥ चत्तारि वत्था प० तं० सुई णाममेगे सुई, सुई णाममेगे असुई,
 चउभंगो, एवमेव चत्तारि पुरिसजाया प० तं० सुई णाममेगे सुई, चउभंगो । एवं
 जहेव सुद्धेणं वत्थेणं भाणियं, तहेव सुइणावि जाव परक्कमे ॥ ३०२ ॥ चत्तारि
 कोरवा प० तं० अंवपलंवकोरवे, तालपलंवकोरवे, वल्लिपलंवकोरवे, मिढ-
 विसाणकोरवे, एवमेव चत्तारि पुरिस जाया प० तं० अंवपलंवकोरवसमाणे,
 तालपलंवकोरवसमाणे, वल्लिपलंवकोरवसमाणे, मिढविसाणकोरवसमाणे
 ॥ ३०३ ॥ चत्तारं घुणा प० तं० तयक्खाए, छल्लिक्खाए, कठुक्खाए, सार-
 क्खाए, एवमेव चत्तारि भिक्खायरा प० तं० तयक्खायसमाणे, जाव सारक्खाय-
 समाणे, तयक्खायसमाणस्स णं भिक्खागस्स सारक्खायसमाणे तवे प० सारक्खाय-
 समाणस्सणं भिक्खागस्स तयक्खायसमाणे तवे पन्नत्ते, छल्लिक्खायसमाणस्स णं
 भिक्खागस्स कठुक्खायसमाणे तवे प० कठुक्खायसमाणस्स णं भिक्खागस्स
 छल्लिक्खायसमाणे तवे प० ॥ ३०४ ॥ चउव्विहा तणवणस्सइकाइया प० तं०
 अरगवीया मूलवीया पोरवीया खंधवीया ॥ ३०५ ॥ चउहि ठाणेहिं अहुणोववण्णे
 णेरइए णिरयलोगंसि इच्छेज्जा माणुसं लोगं हव्वमागच्छित्तए णो चेवणं संचाएइ
 हव्वमागच्छित्तए, अहुणोववण्णे णेरइए णिरयलोगंसि समुब्भूयं वेयणं वेयमाणे

इच्छेज्जा माणुसं लोगं हव्वमागच्छित्तए णो चेव णं संचाएइ हव्वमागच्छित्तए,
अहुणोववन्ने णेरइए णिरयलोगंसि णिरयपालेहिं भुज्जो भुज्जो अहिठ्ठिज्जमाणे इच्छेज्जा
माणुसं लोगं हव्वमागच्छित्तए, नो चेव णं संचाएइ हव्वमागच्छित्तए, अहुणोववन्ने
णेरइए णिरयवेयणिज्जंसि कम्मंसि अक्खीणंसि अवेइयंसि अणिजिणंसि इच्छेज्जा०
नो चेव णं संचाएइ, हव्वमागच्छित्तए, एवं णिरयाउअंसि कम्मंसि अक्खीणंसि,
जाव णो संचाएइ हव्वमागच्छित्तए इच्चेएहिं चउहिं ठाणेहिं अहुणोववन्ने नेरइए
जाव णो चेव णं संचाएइ हव्वमागच्छित्तए ॥ ३०६ ॥ कप्पंति णिगंथीणं चत्तारि
संवाडीओ धारित्तए वा परिहरेत्तए वा तं० एगं दुहत्यवित्थारं, दोतिहत्यवित्थाराओ,
एगं चउहत्यवित्थारं ॥ ३०७ ॥ चत्तारि ज्ञाणा प० तं० अट्टे ज्ञाणे, रोहे ज्ञाणे,
धम्मे ज्ञाणे, सुक्के ज्ञाणे, अट्टे ज्ञाणे चउव्विहे प० तं० अमणुन्नसंपओगसंपउत्ते
तस्स विप्पओगसतिसमण्णागए यावि भवइ, मणुन्नसंपओगसंपउत्ते तस्स अविप्प-
ओगसतिसमण्णागए यावि भवइ, आयंकसंपओगसंपउत्ते तस्स विप्पओगसति-
समण्णागए यावि भवइ, परिजुसियकामभोगसंपओगसंपउत्ते तस्स अविप्पओगसति-
समण्णागए यावि भवइ, अट्टस्सणं ज्ञाणस्स चत्तारि लक्खणा प० तं० कंदणया,
सोयणया, तिप्पणया परिदेवणया, रोहे ज्ञाणे चउव्विहे प० तं० हिंसाणुबंधि,
मोसाणुबंधि तेणाणुबंधि संरक्खणाणुबंधि । रोहस्स णं ज्ञाणस्स चत्तारि लक्खणा
प० तं० ओसन्नदोसे, बहुलदोसे, अन्नाणदोसे आमरणंतदोसे । धम्मे ज्ञाणे
चउव्विहे चउपडोयारे प० तं० आणाविजए, अवायविजए, विवागविजए, संठाण-
विजए । धम्मस्स णं ज्ञाणस्स चत्तारि लक्खणा प० तं० आणारुई, णिसग्गरुई,
सुत्तरुई, ओगाढरुई । धम्मस्स णं ज्ञाणस्स चत्तारि आलंबणा प० तं० वायणा,
पडिपुच्छणा, परियट्ठणा, अणुप्पेहा । धम्मस्स णं ज्ञाणस्स चत्तारि अणुप्पेहाओ
प० तं० एगाणुप्पेहां, अणिच्चाणुप्पेहा, असरणाणुप्पेहा, संसाराणुप्पेहा । सुक्के-
ज्ञाणे चउव्विहे चउप्पडोयारे प० तं० पुहुत्तवियक्केसवियारी, एगत्तवियक्के अवि-
यारी, सुहुमकिरिए अणियट्ठी, समुच्छिन्नकिरिए अपडिवाई । सुक्कस्स णं ज्ञाणस्स
चत्तारि लक्खणा प० तं० अव्वहे असम्मोहे विवेगे विउस्सग्गे, सुक्कस्स णं ज्ञाणस्स
चत्तारि आलंबणा प० तं० खंती मुत्ती मद्देवे अज्जवे, सुक्कस्स णं ज्ञाणस्स चत्तारि
अणुप्पेहाओ प० तं० अणंतवत्तिआणुप्पेहा, विपरिणामाणुप्पेहा, असुभाणुप्पेहा,
अवायाणुप्पेहा ॥ ३०८ ॥ चउव्विहा देवाणं ठिई प० तं० देवेगामेगे, देवसिणाए
णामेगे, देवपुरोहिए णामेगे, देवपज्जलणे णामेगे ॥ ३०९ ॥ चउव्विहे संवासं प०
तं० देवेणामेगे देवीए सद्धि संवासं गच्छेज्जा, देवेणामेगे छवीए सद्धि संवासं

गच्छेज्जा, छवीणाममेगे देवीए सद्धिं संवासं गच्छेज्जा, छवीणाममेगे छवीए सद्धिं
 संवासं गच्छेज्जा ॥ ३१० ॥ चत्तारि कसाया प० तं० कोहकसाए माणकसाए माया-
 कसाए लोभकसाए, एवं नेरइयाणं जाव वेमाणियाणं, चउप्पइठिए कोहे प० तं०
 आयपइठिए, परपइठिए, तदुभयपइठिए, अपइठिए, एवं नेरइयाणं जाव वेमाणि-
 याणं, एवं जाव लोभे वेमाणियाणं, चउहिं ठाणेहिं कोधुप्पत्ती सिया तं० खेत्त पडुच्च,
 वत्थुं पडुच्च, सरीरं पडुच्च, उवहिं पडुच्च, एवं नेरइयाणं जाव वेमाणियाणं, एवं जाव
 लोहे वेमाणियाणं, चउव्विहे कोहे प० तं० अणंताणुवंधिकोहे, अपच्चक्खाणकोहे,
 पच्चक्खाणावरणे कोहे, संजलणे कोहे, एवं नेरइयाणं जाव वेमाणियाणं, एवं जाव
 लोभे वेमाणियाणं, चउव्विहे कोहे पण्णत्ते, आभोगनिव्वत्तिए, अणाभोगनिव्वत्तिए,
 उवसंते, अणुवसंते, एवं नेरइयाणं, जाव वेमाणियाणं, एवं जाव लोभे, जाव
 वेमाणियाणं ॥ ३११ ॥ जीवा णं चउहिं ठाणेहिं अट्ठकम्मपगडीओ चिणिंसु तं०
 कोहेणं माणेणं मायाए लोभेणं, एवं जाव वेमाणियाणं, एवं चिणंति एस दंडओ ।
 एवं चिणिस्संति एस दंडओ, एवमेएणं तिञ्चि दंडगा, एवं उवचिणिंसु, उवचिणंति,
 उवचिणिस्संति, वंथिंसु ३ । उदीरिंसु ३ । वेदेंसु ३ । णिज्जरेंसु णिज्जरेंति
 णिज्जरिस्संति, जाव वेमाणियाणमेवमेक्किक्के पदे तिञ्चि २ दंडगा भाणियव्वा, जाव
 निज्जरिस्संति ॥ ३१२ ॥ चत्तारि पडिमाओ प० तं० समाहिपडिमा, उवहाण-
 पडिमा, विवेगपडिमा, विउस्सग्गपडिमा, चत्तारि पडिमाओ प० तं० भद्दा, सुभद्दा,
 महाभद्दा, सव्वओभद्दा, चत्तारि पडिमाओ प० तं० खुड्डियामोयपडिमा, महल्लिया-
 मोयपडिमा, जवमज्झा, वइरमज्झा ॥ ३१३ ॥ चत्तारि अत्थिकाया अजीवकाया
 प० तं० धम्मत्थिकाए, अधम्मत्थिकाए, आगासत्थिकाए, पोग्गलत्थिकाए, चत्तारि
 अत्थिकाया अरुविकाया प० तं० धम्मत्थिकाए, अधम्मत्थिकाए, आगासत्थिकाए,
 जीवत्थिकाए ॥ ३१४ ॥ चत्तारि फला प० तं० आमेणाममेगे आममहुरे, आमेणाम-
 मेगे पक्कमहुरे, पक्केणाममेगे आममहुरे, पक्केणाममेगे पक्कमहुरे, एवामेव चत्तारि पुरि-
 सजाया प० तं० आमेणाममेगे आममहुरफलसमाणे (४) ॥ ३१५ ॥ चउव्विहे
 स्सच्चे प० तं० काउज्जुयया, भासुज्जुयया, भावुज्जुयया, अविसंवायणाजोगे, चउ-
 व्विहे मोसे प० तं०-कायअणुज्जुयया, भासअणुज्जुयया, भावअणुज्जुयया, विसं-
 वादणाजोगे ॥ ३१६ ॥ चउव्विहे पणिहाणे प० तं० मणपणिहाणे, वइपणिहाणे,
 कायपणिहाणे, उवगरणपणिहाणे । एवं नेरइयाणं पंचिदियाणं जाव वेमाणियाणं,
 चउव्विहे सुप्पणिहाणे प० तं० मणसुप्पणिहाणे जाव उवगरणसुप्पणिहाणे, एवं
 संजयमणुस्साणवि, चउव्विहे दुप्पणिहाणे प० तं० मणदुप्पणिहाणे जाव उवगरण

दु० एवं पंचिदियाणं जाव वेमाणियाणं ॥ ३१७ ॥ चत्तारि पुरिसजाया प० तं०
 आवायभद्दए णाममेगे णो संवासभद्दए, संवासभद्दए णाममेगे णो आवायभद्दए, एगे
 आवायभद्दएवि संवासभद्दएवि, एगे णो आवायभद्दए णो संवासभद्दए, चत्तारि
 पुरिसजाया प० तं० अप्पणो णाममेगे वज्जं पासइ णो परस्स, परस्स णाममेगे वज्जं
 पासइ ४ । चत्तारि पुरिसजाया प० तं० अप्पणो णाममेगे वज्जं उदीरेति णो परस्स
 ४ । चत्तारि पुरिसजाया प० तं० अप्पणो णाममेगे वज्जं उवसामेइ णो परस्स ४ ।
 चत्तारि पुरिसजाया प० तं० अब्भुठ्ठेइ णाममेगे णो अब्भुठ्ठावेइ ४ । एवं वंदइ णाममेगे
 णो वंदावेइ ४ । एवं सक्कारेइ, सम्माणेइ ४ । पूएइ वाएइ पडिपुच्छइ पुच्छइ वाग-
 रेइ ४ । चत्तारि पुरिसजाया प० तं० सुत्तधरे णाममेगे णो अत्थधरे, अत्थधरे
 णाममेगे णो सुत्तधरे, एगे सुत्तधरेवि अत्थधरेवि, एगे णो सुत्तधरे णो अत्थधरे
 ॥ ३१८ ॥ चमरस्स णं असुरिदस्स असुरकुमाररत्तो चत्तारि लोगपाला प० तं०
 सोमे जमे वरुणे वेसमणे; एवं बलिस्सवि सोमे जमे वेसमणे वरुणे, धरणस्स काल-
 वाले कोलवाले सेलवाले संखवाले । एवं भूताणंदस्स कालवाले कोलवाले संखवाले सेल-
 वाले, वेणुदेवस्स चित्ते विचित्ते चित्तपक्खे विचित्तपक्खे, वेणुदालिस्स चित्ते विचित्ते
 विचित्तपक्खे चित्तपक्खे । हरिकंतस्स पभे सुप्पभे पभकंते सुप्पभकंते; हरिसहस्स पभे
 सुप्पभे सुप्पभकंते पभकंते; अग्गिसिहस्स तेऊ तेउसिहे तेउकंते तेउप्पभे, अग्गि-
 माणवस्स तेऊ तेउसिहे तेउप्पभे तेउकंते, पुन्नस्स रुए रुयंसे रुयकंते रुयप्पभे, विसि-
 ठस्स रुए रुयंसे रुयप्पभे रुयकंते । जलकंतस्स जले जलरए जलकंते जलप्पभे ।
 जलप्पभस्स जले जलरए जलप्पभे जलकंते । अमियगइस्स तुरियगई खिप्पगई
 सीहगई सीहविक्रमगई, अमियवाहणस्स तुरियगई खिप्पगई सीहविक्रमगई सीहगई;
 वेलंवस्स काले महाकाले अंजणे रिट्ठे । पभंजणस्स काले महाकाले रिट्ठे अंजणे ।
 घोसस्स आवत्ते वियावत्ते णंदियावत्ते महानंदियावत्ते । महाघोसस्स आवत्ते वियावत्ते
 महानंदियावत्ते णंदियावत्ते, सक्कस्स सोमे जमे वरुणे वेसमणे । ईसाणस्स सोमे जमे
 वेसमणे वरुणे, एवं एगंतरिया जाव अञ्जुयस्स ॥ ३१९ ॥ चउव्विहा वाउकुमारा
 प० तं० काले महाकाले वेलंबे पभंजणे, चउव्विहा देवा प० तं० भवणवासी
 वाणमंतरा जोइसिया विमाणवासी ॥ ३२० ॥ चउव्विहे पमाणे प० तं० दव्वप्प-
 माणे खेत्तप्पमाणे कालप्पमाणे भावप्पमाणे ॥ ३२१ ॥ चत्तारि दिसाकुमारिमहत्तरि-
 याओ प० तं० रुवा रुवंसा सुरुवा रुवावई । चत्तारि विज्जुकुमारिमहत्तरियाओ प०
 तं० चित्ता चित्तकण्णा सेयंसा सोयामणी ॥ ३२२ ॥ सक्कस्स णं देविदस्स देवरत्तो
 मज्झिमपरिसाए देवाणं चत्तारि पलिओवमाइं ठिई प०; ईसाणस्स णं देविदस्स देव-

रत्तो मज्झिमपरिसाए देवीणं चत्तारि पलिओवमाइं ठिई प० ॥ ३२३ ॥ चउव्विहे
 संसारे दव्वसंसारे खेत्तसंसारे कालसंसारे भावसंसारे ॥ ३२४ ॥ चउव्विहे
 दिट्ठिवाए प० तं० परिकम्मं सुत्ताइं पुव्वगए अणुजोगे ॥ ३२५ ॥ चउव्विहे
 पायच्छित्ते, णाणपायच्छित्ते दंसणपायच्छित्ते चरित्तपायच्छित्ते वियत्तकिच्चपाय-
 च्छित्ते, चउव्विहे पायच्छित्ते, पडिसेवणापायच्छित्ते संजोयणापायच्छित्ते, आरोवणापा-
 यच्छित्ते, पलिउंचणापायच्छित्ते ॥ ३२६ ॥ चउव्विहे क ले पमाणकाले अहाउयणि-
 व्वत्तिकाले मरणकाले अद्धाकाले ॥ ३२७ ॥ चउव्विहे पोग्गलपरिणामे, वण्णपरि-
 णामे गंधपरिणामे रसपरिणामे फासपरिणामे ॥ ३२८ ॥ भरहेरवएसु णं वासेसु
 पुरिमपच्छिमवज्जा मज्झिमगा वावीसं अरहंता भगवंता चाउज्जामं धम्मं पन्नविंति
 तं० सव्वाओ पाणाइवायाओ वेरमणं, एवं मुसावायाओ, अदिन्नादाणाओ, सव्वाओ
 वहिद्धादाणाओ वेरमणं । सव्वेसु णं महाविदेहेसु अरहंता भगवंता चाउज्जामं धम्मं
 पन्नवयंति तं० सव्वाओ पाणाइवायाओ वेरमणं जाव सव्वाओ वहिद्धादाणाओ
 वेरमणं ॥ ३२९ ॥ चत्तारि दुग्गईओ प० तं० णेरइयदुग्गई, तिरिक्खजोणियदुग्गई,
 मणुस्मदुग्गई, देवदुग्गई, चत्तारि सोग्गई प० तं० सिद्धसोग्गई, देवसोग्गई,
 मणुयसोग्गई, सुकुले पच्चायाई, चत्तारि दुग्गया प० तं० णेरइयदु० जाव देवदुग्गया,
 चत्तारि सुग्गया प० तं० सिद्धसुग्गया जाव सुकुलपच्चायाया ॥ ३३० ॥ पढमसमय-
 जिणस्स णं चत्तारि कम्मंसा खीणा भवंति तं० णाणावरणिज्जं, दरिसणावरणिज्जं,
 मोहणिज्जं, अंतराइयं । उप्पन्नणाणदंसणधरे णं अरहा जिणे केवली चत्तारि कम्मंसे
 वेदेति तं० वेयणिज्जं आउयं णामं गोयं । पढमसमयसिद्धस्स णं चत्तारि कम्मंसा
 जुगवं खिज्जंति तं० वेयणिज्जं आउयं णामं गोयं ॥ ३३१ ॥ चउहिं ठाणेहिं हासु-
 प्पत्ती सिया तं० पासेत्ता भासेत्ता सुणेत्ता संभरेत्ता ॥ ३३२ ॥ चउव्विहे अंतरे
 प० तं० कट्ठंतरे पम्हंतरे लोहतरे पत्थरंतरे । एवामेव इत्थीए वा पुरिसस्स वा,
 चउव्विहे अंतरे प० तं० कट्ठंतरसमाणे, पम्हंतरसमाणे, लोहतरसमाणे, पत्थरं-
 तरसमाणे ॥ ३३३ ॥ चत्तारि भयगा प० तं० दिवसभयए जत्ताभयए उच्चत्तभयए
 कव्वालभयए ॥ ३३४ ॥ चत्तारि पुरिसजाया प० तं० संपागडपडिसेवी णाममेगे
 णो पच्छण्णपडिसेवी, पच्छण्णपडिसेवी णाममेगे णो संपागडपडिसेवी, एगे संपागड-
 पडिसेवीवि पच्छण्णपडिसेवीवि, एगे णो संपागडपडिसेवी णो पच्छण्णपडिसेवी
 ॥ ३३५ ॥ चमरस्स णं असुरिंदस्स असुरकुमाररण्णे सोमस्स महारण्णे चत्तारि
 अग्गमहिंसीओ प० तं० कणगा कणगलया चित्तगुत्ता वसुंधरा, एवं जमस्स वरु-
 णस्म वेसमणस्स, वलिस्स णं वइरोयणिंदस्स वइरोयणरण्णे, सोमस्स महारण्णे
 चत्तारि अग्गमहिंसीओ प० तं० मित्तगा सुभद्दा विज्जुया असणी, एवं जमस्स वेस-

यणस्स वरुणस्स; धरणस्स णं णागकुमारिंदस्स णागकुमाररण्णो कालवालस्स महारण्णो
 चत्तारि अग्गमहिंसीओ प० तं० असोगा विमला सुप्पभा सुदंसणा, एवं जाव संख-
 वालस्स । भूयाणंदस्स णं णागकुमारिंदस्स णागकुमाररण्णो कालवालस्स महारण्णो
 चत्तारि अग्गमहिंसीओ प० तं० सुगंदा सुभद्दा सुजाया सुमणा । एवं जाव सेल-
 वालस्स जहा धरणस्स, एवं सव्वेसिं दाहिणिंदलोगपालाणं जाव घोसस्स जहा
 भूयाणंदस्स एवं जाव महाघोसस्स लोगपालाणं । कालस्स णं पिसाईंदस्स पिसाय-
 रण्णो चत्तारि अग्गमहिंसीओ प० तं० कमला कमलप्पभा उप्पला सुदंसणा, एवं
 महाकालस्स वि । सुरुवस्स णं भूइंदस्स भूयरण्णो चत्तारि अग्गमहिंसीओ प० तं०
 रुववई बहुरुवा सुरुवा सुभगा । एवं पडिरुवस्स वि, पुण्णभद्दस्स णं जक्खिंदस्स
 जक्खरण्णो चत्तारि, अग्गमहिंसीओ प० तं० पुत्ता बहुपुत्तिया उत्तमा तारगा, एवं
 माणिभद्दस्स वि । भीमस्स णं रक्खसिंदस्स रक्खसरण्णो चत्तारि अग्गमहिंसीओ
 प० तं० पउमा वसुमई कणगा रयणप्पभा । एवं महाभीमस्स वि किन्नरस्स णं
 किन्नरिंदस्स चत्तारि अग्गमहिंसीओ प० तं० वडिंसा केउमई रइसेणा रइप्पभा ।
 एवं किंपुरिसस्स वि सुपुरिसस्स णं किंपुरिसिंदस्स चत्तारि अग्गमहिंसीओ प० तं०
 रोहिणी णवमिया हिरी पुप्फवई । एवं महापुरिसस्स वि, अइकायस्स णं महोरणिंदस्स
 चत्तारि अग्गमहिंसीओ प० तं० भुयगा भुयगवई महाकच्छा फुडा, एवं महाकायस्स
 वि, गीयरइस्स णं गंधव्विंदस्स चत्तारि अग्गमहिंसीओ प० तं० सुघोसा विमला
 सुस्सरा सरस्सई, एवं गीयजसस्स वि, चंदस्स णं जोइसिंदस्स जोइसरण्णो चत्तारि
 अग्गमहिंसीओ प० तं० चंदप्पभा दोसिनाभा अच्चिमाली पभंकरा । एवं सूरस्स
 वि, णवरं सूरप्पभा दोसिणाभा अच्चिमाली पभंकरा । इंगालस्स णं महग्गहस्स चत्तारि
 अग्गमहिंसीओ प० तं० विजया वेजयंती जयंती अपराजिता । एवं सव्वेसि महग्ग-
 हाणं जाव भावकेउस्स । सक्कस्स णं देविंदस्स देवरण्णो सोमस्स महारण्णो चत्तारि
 अग्गमहिंसीओ प० तं० रोहिणी मयणा चित्ता सोमा, एवं जाव वेसमणस्स ईसाण-
 स्स णं देविंदस्स देवरण्णो सोमस्स महारण्णो चत्तारि अग्गमहिंसीओ प० तं०
 पुढवी राई रयणी विज्जू, एवं जाव वरुणस्स ॥ ३३६ ॥ चत्तारि गोरसविगईओ
 प० तं० खीरं दहिं सप्पि णवणीअं, चत्तारि सिणेहविगईओ प० तं० तेहं घयं
 वसा णवणीअं, चत्तारि महाविगईओ वज्जणीयाओ त०महुं मंसं मज्जं णवणीयं
 ॥ ३३७ ॥ चत्तारि कूडागारा प० तं० गुत्तेणाममेगे गुत्ते गुत्तेणाममेगे अगुत्ते अगुत्ते
 णाममेगे गुत्ते, अगुत्ते णाममेगे अगुत्ते । एवामेव चत्तारि पुरिसजाया प० तं० गुत्तेणाममेगे
 गुत्ते ४ । चत्तारि कूडागारसालाओ प० तं० गुत्ता णाममेगा गुत्तदुवारा, गुत्ताणाममेगा

अगुत्तदुवारा, अगुत्ता णाममेगा गुत्तदुवारा, अगुत्ता णाममेगा अगुत्तदुवारा, एवामेव चत्तारित्थीओ प० तं० गुत्ता णाममेगा गुत्तिदिया, गुत्ता णाममेगा अगुत्तिदिया ४ ।
 ॥ ३३८ ॥ चउव्विहा ओगाहणा प० तं० दव्वोगाहणा खेतोगाहणा कालो-
 गाहणा भावोगाहणा ॥ ३३९ ॥ चत्तारि पण्णत्तीओ अंगवाहिरियाओ प०
 तं० चंदपण्णत्ती सूरपण्णत्ती जंबुदीवपण्णत्ती, दीवसागरपण्णत्ती ॥ ३४० ॥
 चउट्ठाणस्स पढमोद्देसो समत्तो ॥

चत्तारि पडिसंलीणा प० तं० कोहपडिसंलीणे माणपडिसंलीणे मायापडिसंलीणे
 लोभपडिसंलीणे, चत्तारि अपडिसंलीणा प० तं० कोहअपडिसंलीणे जाव लोभ-
 अपडिसंलीणे । चत्तारि पडिसंलीणा प० तं० मणपडिसंलीणे, वइपडिसंलीणे, काय-
 पडिसंलीणे, इंदियपडिसंलीणे; चत्तारि अपडिसंलीणा प० तं० मणअपडिसंलीणे
 जाव इंदिय० ॥ ३४१ ॥ चत्तारि पुरिसजाया प० तं० दीणे णाममेगे दीणे, दीणे
 णाममेगे अदीणे, अदीणे णाममेगे दीणे, अदीणे णाममेगे अदीणे । चत्तारि पुरिसजाया
 प० तं० दीणे णाममेगे दीणपरिणए, दीणे णाममेगे अदीणपरिणए, अदीणे णाममेगे
 दीणपरिणए, अदीणे णाममेगे अदीणपरिणए, चत्तारि पुरिसजाया प० तं० दीणे
 णाममेगे दीणरूवे ४ । एवं दीणमणे दीणसंकप्पे दीणपण्णे दीणदिट्ठी दीणसीलायारे
 दीणववहारे ४ । चत्तारि पुरिसजाया प० तं० दीणे णाममेगे दीणपरक्कमे, दीणे णाममेगे
 अदीणपरक्कमे ४ । एवं सव्वेसिं चउभंगो भाणियव्वो । चत्तारि पुरिसजाया प०
 तं० दीणे णाममेगे दीणवित्ती ४ । एवं दीणजाई दीणभासी दीणोभासी, चत्तारि पुरिस-
 जाया पण्णत्ता प० तं० दीणे णाममेगे दीणसेवी ४ । एवं दीणे णाममेगे दीणपरियाए ४
 एवं दीणे णाममेगे दीणपरियाले ४ । सव्वत्थ चउभंगो ॥ ३४२ ॥ चत्तारि पुरिसजाया
 प० तं० अज्जे णाममेगे अज्जे ४ । चत्तारि पुरिसजाया प० तं० अज्जे णाममेगे अज्ज-
 परिणए ४ । एवं अजरूवे ४ । अज्जमणे ४ । अज्जसंकप्पे ४ । अज्जपण्णे ४ ।
 अज्जदिट्ठी ४ । अज्जसीलायारे ४ । अज्जववहारे ४ । अज्ज परक्कमे ४ । अज्ज-
 वित्ती ४ । अज्जजाई ४ । अज्जभासी ४ । अज्ज ओभासी ४ । अज्जसेवी ४ । एवं
 अज्जपरियाए ४ । अज्जपरियाले ४ । एवं सत्तरस आलावगा, जहा दीणेण भणिया
 तहा अज्जेणवि भाणियव्वा । चत्तारि पुरिसजाया प० तं० अज्जे णाममेगे अज्जभावे,
 अज्जे णाममेगे अणज्जभावे, अणज्जे णाममेगे अज्जभावे, अणज्जे णाममेगे अणज्जभावे
 ॥ ३४३ ॥ चत्तारि उसभा प० तं० जाइसंपन्ने कुलसंपन्ने वलसंपन्ने रुवसंपण्णे,
 एवामेव चत्तारि पुरिसजाया प० तं० जाइसंपन्ने कुलसंपन्ने वलसंपन्ने रुवसंपन्ने,
 चत्तारि उसभा प० तं० जाइसंपन्ने णाममेगे णो कुलसंपन्ने, कुलसंपन्ने णाममेगे णो

जाइसंपन्ने, एगे कुलसंपन्नेवि जाइसंपन्नेवि, एगे णो जाइसंपन्ने णो कुलसंपन्णे ।
 एवामेव चत्तारि पुरिसजाया प० तं० जाइसंपन्ने णाममेगे णो कुलसंपन्ने ४ ।
 चत्तारि उसभा प० तं० जाइसंपन्ने णाममेगे णो वलसंपन्ने ४ । एवामेव चत्तारि
 पुरिसजाया प० तं० जाइसंपन्ने णाममेगे णो वलसंपन्ने ४ । चत्तारि उसभा प० तं०
 जाइसंपन्ने णाममेगे णो रुवसंपन्ने ४ । एवामेव चत्तारि पुरिसजाया प० तं० जाइ-
 संपन्ने णाममेगे णो रुवसंपन्ने ४ । चत्तारि उसभा प० तं० कुलसंपन्ने णाममेगे णो
 वलसंपन्ने ४ । एवामेव चत्तारि पुरिसजाया प० तं० कुलसंपन्ने णाममेगे णो
 वलसंपन्ने ४ । चत्तारि उसभा प० तं० कुलसंपन्ने णाममेगे णो रुवसंपन्ने ४ ।
 एवामेव चत्तारि पुरिसजाया प० तं० कुलसंपन्ने णाममेगे णो रुवसंपन्ने ४ ।
 चत्तारि उसभा प० तं० वलसंपन्ने णाममेगे णो रुवसंपन्ने ४ । एवामेव चत्तारि
 पुरिसजाया प० तं० वलसंपन्ने णाममेगे णो रुवसंपन्ने ४ ॥ ३४४ ॥ चत्तारि
 हत्थी प० तं० भद्दे मंदे मिए संकिण्णे, एवामेव चत्तारि पुरिसजाया प० तं० भद्दे
 मंदे मिए संकिण्णे, चत्तारि हत्थी प० तं० भद्दे णाममेगे भद्दमणे, भद्दे णाममेगे
 मंदमणे, भद्दे णाममेगे मियमणे, भद्दे णाममेगे संकिण्णमणे, एवामेव चत्तारि पुरिस-
 जाया प० तं० भद्दे णाममेगे भद्दमणे, भद्दे णाममेगे मंदमणे, भद्दे णाममेगे मियमणे,
 भद्दे णाममेगे संकिण्णमणे, चत्तारि हत्थी प० तं० मंदे णाममेगे भद्दमणे, मंदे
 णाममेगे मंदमणे मंदे णाममेगे मियमणे, मंदे णाममेगे संकिण्णमणे, एवामेव चत्तारि
 पुरिसजाया प० तं० मंदे णाममेगे भद्दमणे, तं चेव । चत्तारि हत्थी प० तं० मिए
 णाममेगे भद्दमणे, मिए णाममेगे मंदमणे, मिए णाममेगे मियमणे, मिए णाममेगे
 संकिण्णमणे, एवामेव चत्तारि पुरिसजाया प० तं० मिए णाममेगे भद्दमणे, तं चेव ।
 चत्तारि हत्थी प० तं० संकिण्णे णाममेगे भद्दमणे, संकिण्णे णाममेगे मंदमणे,
 संकिण्णे णाममेगे मियमणे, संकिण्णे णाममेगे संकिण्णमणे । एवामेव चत्तारि पुरि-
 सजाया प० तं० संकिण्णे णाममेगे भद्दमणे, तं चेव जाव संकिण्णे णाममेगे
 संकिण्णमणे । गाथा=मधुगुलियपिगलक्खो, अणुपुव्वसुजायदीहलंगूलो; पुरओ
 उदग्गधीरो, सव्वंगसमाहिओ भद्दो ॥ ३४५ ॥ (१) चलवहलविसमचम्मो
 थूलसिरो थूलण पेण; थूलणहदंतवालो, हरिपिंगललोयणो मंदो ॥ ३४६ ॥
 (२) तणुओ तणुयग्गीवो, तणुयतओ तणुयदंतणहवालो; भीरु तत्थुव्विग्गो;
 तासी य भवे मिए णामं ॥ ३४७ ॥ (३) एएसिं हत्थीणं, थोवं थोवं तु जो
 अणुहरइ हत्थी; रुवेण व सीलेण व; सो संकिण्णो त्ति णायव्वो ॥ ३४८ ॥ (४)
 भद्दो मज्जइ सरए, मंदो उण मज्जए वसंतम्मि; मिउ मज्जइ हेमंते, संकिण्णो सव्व-

कालम्मि (५) ॥ ३४९ ॥ चत्तारि विकहाओ प० तं० इत्थिकहा भत्तकहा देसकहा रायकहा । इत्थिकहा चउव्विहा प० तं० इत्थीणं जाइकहा, इत्थीणं कुलकहा, इत्थीणं रूवकहा, इत्थीणं नेवत्थकहा, भत्तकहा चउव्विहा प० तं० भत्तस्स आवावकहा, भत्तस्स निव्वावकहा, भत्तस्स आरंभकहा, भत्तस्स णिठ्ठाणकहा । देसकहा चउव्विहा प० तं० देसविहिकहा, देसविकप्पकहा, देसच्छंदकहा, देसनेवत्थकहा, रायकहा चउव्विहा प० तं० रण्णो अइयाणकहा रण्णो निज्जाणकहा, रण्णो बलवाहणकहा, रण्णो कोसकोठ्ठागारकहा ॥ ३५० ॥ चउव्विहा धम्मकहा प० तं० अक्खेवणी विक्खेवणी संवेगणी णिव्वेगणी । अक्खेवणी कहा चउव्विहा प० तं० आयारऽक्खेवणी ववहारऽक्खेवणी पण्णत्तिऽक्खेवणी दिट्ठिवायअक्खेवणी । विक्खेवणी कहा चउव्विहा प० तं० ससमयं कहेइ, ससमयं कहेत्ता परसमयं कहेइ, परसमयं कहेत्ता ससमयं ठावित्ता भवइ, सम्मावायं कहेइ, सम्मावायं कहेत्ता मिच्छावायं कहेइ, मिच्छावायं कहेत्ता सम्मावायं ठावइत्ता भवइ । संवेगणी कहा चउव्विहा प० तं० इहलोगसंवेगणी परलोगसंवेगणी आयसरीरसंवेगणी परसरीरसंवेगणी । णिव्वेगणी कहा चउव्विहा प० तं० इहलोगे दुचिण्णा कम्मा इहलोगे दुहफलविवागसंजुत्ता भवंति, इहलोगे दुचिण्णा कम्मा परलोगे दुहफलविवागसंजुत्ता भवंति, परलोगे दुचिण्णा कम्मा इहलोगे दुहफलविवागसंजुत्ता भवंति । परलोगे दुचिण्णा कम्मा परलोगे दुहफलविवागसंजुत्ता भवंति । इहलोगे सुचिण्णाकम्मा इहलोगे सुहफलविवागसंजुत्ता भवंति, इहलोगे सुचिण्णा कम्मा परलोगे सुहफलविवागसंजुत्ता भवंति, एवं चउभंगो तहेव ॥ ३५१ ॥ चत्तारि पुरिसजाया प० तं० किसे णाममेगे किसे, किसे णाममेगे दढे, दढे णाममेगे किसे, दढे णाममेगे दढे । चत्तारि पुरिसजाया प० तं० किसे णाममेगे किससरीरे, किसे णाममेगे दढसरीरे, दढे णाममेगे किससरीरे, दढे णाममेगे दढसरीरे । चत्तारि पुरिसजाया प० तं० किससरीरस्स णाममेगस्स णाणदंसणे समुप्पज्जइ णो दढसरीरस्स, दढसरीरस्स णाममेगस्स णाणदंसणे समुप्पज्जइ णो किससरीरस्स, एगस्स किससरीरस्स वि णाणदंसणे समुप्पज्जइ दढसरीरस्स वि, एगस्स णो किससरीरस्स णाणदंसणे समुप्पज्जइ णो दढसरीरस्स ॥ ३५२ ॥ चउहिं ठाणेहिं णिग्गंथाण वा, णिग्गंथीण वा अस्सि समयंसि अइसेसे णाणदंसणे समुपज्जिउकामेवि णो समुप्पजेज्जा तं० अभिक्खणं अभिक्खण इत्थिकहं भत्तकहं देसकहं रायकहं कहेत्ता भवइ, विवेगेणं विउसग्गेणं णो सम्ममप्पाणं भावेत्ता भवइ, पुव्वरत्तावरत्तकालसमयंसि णो धम्मजागरियं जागरित्ता भवइ, फासुयस्स एसणिज्जस्स उब्बस्स सामुदाणियस्स णो सम्मं

गवेसइत्ता भवइ, इच्चेएहिं चउहिं ठाणेहिं णिग्गंथाण वा णिग्गंथीण वा जाव णो समुप्पजेज्जा, चउहिं ठाणेहिं णिग्गंथाण वा णिग्गंथीण वा अइसेसे णाणदंसणे समुप्पज्जिउकामे समुप्पजेज्जा तं० इत्थिकहं भत्तकहं देसकहं रायकहं णो कहेत्ता भवइ, विवेगेण विउसग्गेणं सम्ममप्पाणं भावेत्ता भवइ, पुव्वरत्तावरत्तकालसमयंसि धम्मजागरियं जागरित्ता भवइ, फासुयस्स एसणिज्जस्स उञ्छस्स सामुदाणियस्स सम्मं गवेसइत्ता भवइ, इच्चेएहिं चउहिं ठाणेहिं णिग्गंथाण वा णिग्गंथीण वा जाव समुप्पजेज्जा ॥ ३५३ ॥ णो कप्पइ णिग्गंथाण वा णिग्गंथीण वा चउहिं महापाडिवएहिं सज्झायं करेत्तए तं० आसाढपाडिवए इंदमहपाडिवए कत्तियपाडिवए सुणिम्हपाडिवए, णो कप्पइ णिग्गंथाण वा णिग्गंथीण वा चउहिं संझाहिं सज्झायं करेत्तए तं० पढमाए पच्छिमाए मज्झण्हे अद्धरत्ते । कप्पइ णिग्गंथाण वा णिग्गंथीण वा चाउक्कालं सज्झायं करेत्तए तं० पुव्वण्हे अवरण्हे पओसे पच्चूसे ॥ ३५४ ॥ चउव्विहा लोग्गिई प० तं० आगासपइठिए वाए, वायपइठिए उदही, उदहिपइठिया पुढवी, पुढविपइठिया तसा थावरा पाणा ॥ ३५५ ॥ चत्तारि पुरिसजाया प० तं० तहे णाममेगे णोतहे णाममेगे सोवत्थी णाममेगे पहाणे णाममेगे ॥ ३५६ ॥ चत्तारि पुरिसजाया प० तं० आयंतकरे णाममेगे णो परंतकरे, परंतकरे णाममेगे णो आयंतकरे, एगे आयंतकरेवि परंतकरेवि, एगे णो आयंतकरे णो परंतकरे, चत्तारि पुरिसजाया प० तं० आयंतमे णाममेगे णो परंतमे परंतमे णाममेगे णो आयंतमे ४ । चत्तारि पुरिसजाया प० तं० आयंदमे णाममेगे णो परंदमे, परंदमे णाममेगे णो आयंदमे, एगे आयंदमेवि परंदमेवि, एगे णो आयंदमे णो परंदमे ॥ ३५७ ॥ चउव्विहा गरहा प० तं० उवसंपज्जामित्ति एगा गरहा, वित्तिगिच्छामित्ति एगा गरहा, जं किंचिमिच्छामित्ति एगा गरहा, एवंपि पण्णत्ते एगा गरहा ॥ ३५८ ॥ चत्तारि पुरिसजाया प० तं० अप्पणो णाममेगे अलमंथू भवइ णो परस्स, परस्स णाममेगे अलमंथू भवइ णो अप्पणो, एगे अप्पणोवि अलमंथू भवइ परस्सवि, एगे णो अप्पणो अलमंथू भवइ णो परस्स ॥ ३५९ ॥ चत्तारि मग्गा प० तं० उज्जू णाममेगे उज्जू, उज्जू णाममेगे वंके, वंके णाममेगे उज्जू, वंके णाममेगे वंके । एवामेव चत्तारि पुरिसजाया प० तं० उज्जू णाममेगे उज्जू ४ । चत्तारि मग्गा प० तं० खेमे णाममेगे खेमे, खेमे णाममेगे अखेमे ४ । एवामेव चत्तारि पुरिसजाया प० तं० खेमे णाममेगे खेमे ४ । चत्तारि मग्गा प० तं० खेमे णाममेगे खेमरुवे, खेमे णाममेगे अखेमरुवे ४ । एवामेव चत्तारि पुरिसजाया प० तं० खेमे णाममेगे खेमरुवे ४ ॥ ३६० ॥ चत्तारि संवुक्का प० तं० वामे णाममेगे वामावत्ते, वामे णाममेगे दाहिणावत्ते,

दाहिणे णाममेगे वामावत्ते, दाहिणे णाममेगे दाहिणावत्ते, एवामेव चत्तारि पुरि-
सजाया प० तं० वामे णाममेगे वामावत्ते ४ । चत्तारि धूमसिहाओ प० तं० वामा
णाममेगा वामावत्ता ४ । एवामेव चत्तारित्थियाओ प० तं० वामा णाममेगा
वामावत्ता ४ । चत्तारि अग्गिसिहाओ प० तं० वामा णाममेगा वामावत्ता ४ ।
एवामेव चत्तारित्थियाओ प० तं० वामा णाममेगा वामावत्ता ४ । चत्तारि वाय-
मंडलिया, वामा णाममेगा वामावत्ता ४ । एवामेव चत्तारित्थियाओ प० तं०
वामा णाममेगा वामावत्ता ४ । चत्तारि वणखंडा प० तं० वामे णाममेगे वामावत्ते
४ । एवामेव चत्तारि पुरिसजाया प० तं० वामे णाममेगे वामावत्ते ४ ॥ ३६१ ॥
चउहिं ठणेहिं णिग्गंथे णिग्गंथि आलवमाणे वा संलवमाणे वा णाइक्कमइ, तं० पंथं
पुच्छमाणे वा पंथं देसमाणे वा असणं वा पाणं वा खाइमं वा साइमं वा दलयमाणे
वा, दलावेमाणे वा ॥ ३६२ ॥ तमुक्कायस्स णं चत्तारि णामधेज्जा प० तं० तमेइ वा,
तमुक्काएइ वा, अंधयारेइ वा, महंधयारेइ वा, तमुक्कायस्स णं चत्तारि णामधेज्जा
प० तं० लोगंधयारेइ वा, लोगतमसेइ वा, देवंधयारेइ वा, देवतमसेइ वा, तमु-
क्कायस्स णं चत्तारि णामधेज्जा प० तं० वायफलिहेइ वा, वायफलिहखोभेइ वा,
देवरणेइ वा, देववूहेइ वा, तमुक्काए णं चत्तारि कप्पे आवरित्ता चिठ्ठइ तं० सोहम्मि-
साणं सणंकुमारमाहिंदं ॥ ३६३ ॥ चत्तारि पुरिसजाया प० तं० संपागडपडिसेवी
णाममेगे, पच्छण्णपडिसेवी णाममेगे, पडुप्पण्णणंदी णाममेगे, णिस्सरणणंदी
णाममेगे ॥ ३६४ ॥ चत्तारि सेणाओ प० तं० जइत्ता णाममेगा णो पराजिणित्ता,
पराजिणित्ता णाममेगा णो जइत्ता, एगा जइत्ता वि पराजिणित्तावि, एगा णो जइत्ता
णो पराजिणित्ता । एवामेव चत्तारि पुरिसजाया प० तं० जइत्ता णाममेगे णो
पराजिणित्ता ४ । चत्तारि सेणाओ प० तं० जइत्ता णाममेगा जयइ, जइत्ता णाममेगा
पराजिणइ, पराजिणित्ता णाममेगा जयइ, पराजिणित्ता णाममेगा पराजिणइ, एवा-
मेव चत्तारि पुरिसजाया प० तं० जइत्ता णाममेगे जयइ ॥ ३६५ ॥ चत्तारि केअणा
प० तं० वंसीमूलकेअणए, मेंढविसाणकेअणए, गोमुत्तिकेअणए, अवलेहणियके-
अणए । एवामेव चउन्विहा माया प० तं० वंसीमूलकेअणासमाणा जाव अवलेहणि-
याकेअणासमाणा, वंसीमूलकेअणासमाणं मायं अणुप्पविट्ठे जीवे कालं करेइ णेरइएसु
उववज्जइ, मेंढविसाणकेअणासमाणं मायमणुप्पविट्ठे जीवे कालं करेइ तिरेक्ख-
जोणिएसु उववज्जइ, गोमुत्तिअं जाव कालं करेइ मणुस्सेसु उववज्जइ, अवलेहणिया
जाव देवेसु उववज्जइ ॥ ३६६ ॥ चत्तारि थंभा प० तं० सेलथंभे अठ्ठिथंभे दारु-
थंभे, तिणिसलयाथंभे; एवामेव चउन्विहे माणे प० तं० सेलथंभसमाणे जाव तिणि-

सलयाथंभसमाणे । सेलथंभसमाणं माणं अणुप्पविठ्ठे जीवे कालं करेइ णेरइएसु उववज्जइ, एवं जाव तिणिसलयाथंभसमाणं माणं अणुप्पविठ्ठे जीवे कालं करेइ देवेषु उववज्जइ ॥ ३६७ ॥ चत्तारि वत्था प० तं० किमिरागरत्ते कद्मरागरत्ते खंजणरागरत्ते हल्लिद्धरागरत्ते एवामेव चउव्विहे लोभे प० तं० किमिरागरत्तवत्थ-समाणे कद्मरागरत्तवत्थसमाणे खंजणरागरत्तवत्थसमाणे हल्लिद्धरागरत्तवत्थसमाणे, किमिरागरत्तवत्थसमाण लोभमणुप्पविठ्ठे जीवे कालं करेइ नेरइएसु उववज्जइ, तहेव जाव हल्लिद्धरागरत्तवत्थसमाणं लोभमणुप्पविठ्ठे जीवे कालं करेइ देवेषु उववज्जइ ॥ ३६८ ॥ चउव्विहे संसारे प० तं० णेरइयसंसारे जाव देवसंसारे, चउव्विहे आउए प० तं० णेरइयआउए जाव देवाउए, चउव्विहे भवे प० तं० णेरइयभवे जाव देवभवे ॥ ३६९ ॥ चउव्विहे आहारे प० तं० असणे पाणे खाइमे साइमे । चउव्विहे आहारे प० तं० उवक्खरसंपन्ने, उवक्खडसंपन्ने, सभावसंपन्ने, परि-जुसियसंपन्ने ॥ ३७० ॥ चउव्विहे बंधे प० तं० पगइबंधे ठिइबंधे अणुभावबंधे पएसबंधे, चउव्विहे उवक्कमे प० तं० बंधणोवक्कमे उदीरणोवक्कमे उवसमणोवक्कमे विप्परिणामणोवक्कमे, बंधणोवक्कमे चउव्विहे प० तं० पगइबंधणोवक्कमे ठिइबंधणो-वक्कमे अणुभावबंधणोवक्कमे पएसबंधणोवक्कमे, उदीरणोवक्कमे चउव्विहे प० तं० पगइउदीरणोवक्कमे ठिइउदीरणोवक्कमे अणुभागउदीरणोवक्कमे पएसउदीरणोवक्कमे, उवसामणोवक्कमे चउव्विहे प० तं० पगइउवसामणोवक्कमे ठिइअणुभावपएसउव-सामणोवक्कमे । विपरिणामणोवक्कमे चउव्विहे प० तं० पगइठिइअणुभावपएस-विपरिणामणोवक्कमे । चउव्विहे अप्पाबहुए प० तं० पगइअप्पाबहुए ठिइअणु-भावपएसअप्पाबहुए; चउव्विहे संकमे, पगइसंकमे ठिइअणुभावपएससंकमे । चउव्विहे निधत्ते प० तं० पगइनिधत्ते, ठिइअणुभावपएसनिधत्ते । चउव्विहे निगाइए प० तं० पगइनिगाइए, ठिइनिगाइए, अणुभावनिगाइए, पएसनिगाइए ॥ ३७१ ॥ चत्तारि एक्का प० तं० दविए एक्कए माउएक्कए पज्जएक्कए संगहएक्कए, चत्तारि कई प० तं० दवियकई माउयकई पज्जवकई संगहकई, चत्तारि सव्वा प० तं० णामसव्वए ठवणसव्वए आएससव्वए निरवसेससव्वए ॥ ३७२ ॥ माणुसुत्त-रस्स णं पव्वयस्स चउदिसि चत्तारि कूडा प० तं० रयणे रयणुच्चए सव्वरयणए रयणसंचए ॥ ३७३ ॥ जंबुद्दीवे २ भरहेरवएसु वासेसु तीयाए उस्सप्पिणीए सुसमसु-समाए समाए चत्तारि सागरोवमकोडाकोडीओ कालो होत्था, जंबुद्दीवे २ भरहेरवए इमीसे ओसप्पिणीए दुसमसुसमाए समाए जहण्णपए णं चत्तारि सागरोवमकोडाकोडीओ कालो होत्था । जंबुद्दीवे दीवे जाव आगमिस्साए उस्सप्पिणीए सुसमसुसमाए समाए

चत्तारि सागरोवमकोडाकोडीओ कालो भविस्सइ, जंबुद्दीवे दीवे देवकुरुत्तरकुरुव-
 ज्जाओ चत्तारि अकम्मभूमीओ प० तं० हेमवए एरण्णवए हरिवासे रम्मगवासे,
 चत्तारि वट्टवेयङ्गपव्वया प० तं० सद्दावई वियडावई गंधावई मालवंतपरियाए ।
 तत्थ णं चत्तारि देवा महिद्धिया जाव पलिओवमठिइया परिवसंति तं० साई पभासे
 अरुणे पडमे, जंबुद्दीवे दीवे महाविदेहेवासे चउव्विहे प० तं० पुव्वविदेहे,
 अवरविदेहे, देवकुरा, उत्तरकुरा, सव्वेवि णं णिसढणीलवंतवासहरपव्वया चत्तारि
 जोयणसयाइं उड्डं उच्चत्तेणं, चत्तारि गाउयसयाइं उव्वेहेणं प० । जंबुद्दीवे
 दीवे मंदरस्स पव्वयस्स पुरत्थिमेणं सीआए महाणईए उत्तरकूले चत्तारि वक्खा-
 रपव्वया प० तं० चित्तकूडे पम्हकूडे णल्लिणकूडे एगसेले, जंबूमंदरपुरत्थिमेणं
 सीआए महाणईए दाहिणकूले चत्तारि वक्खारपव्वया प० तं० तिवूडे वेसमणकूडे
 अंजणे मायंजणे, जंबूमंदरस्स पच्चत्थिमेणं सीओआए महाणईए दाहिणकूले चत्तारि
 वक्खारपव्वया प० तं० अंकावई पम्हावई आसीविसे सुहावहे । जंबूमंदरस्स
 पच्चत्थिमेणं सीओआए महाणईए उत्तरकूले चत्तारि वक्खारपव्वया प० तं० चंद-
 पव्वए सूरपव्वए देवपव्वए णागपव्वए, जंबुद्दीवे दीवे मंदरस्स पव्वयस्स चउसु
 विदिसासु चत्तारि वक्खारपव्वया प० तं० सोमणसे विज्जुप्पभे गंधमायणे माल-
 वंते, जंबुद्दीवे दीवे महाविदेहे वासे जहण्णपए चत्तारि अरिहंता, चत्तारि चक्रवट्ठी,
 चत्तारि बलदेवा, चत्तारि वासुदेवा, उप्पज्जिसु वा उप्पज्जंति वा उप्पज्जिस्संति
 वा, जंबुद्दीवे दीवे मंदरे पव्वए चत्तारि वणा प० तं० भद्दसालवणे, णंदणवणे,
 सोमणसवणे, पंडगवणे, जंबूमंदरपव्वयपंडगवणे चत्तारि अभिसेगसिलाओ प० तं०
 पंडुकंवलसिला, अतिपंडुकंवलसिला, रत्तकंवलसिला, अइरत्तकंवलसिला, मंदरचूलि-
 या णं उवरिं चत्तारि जोयणाइं विक्खंभेणं पण्णत्ता, एवं धायइखंडदीवपुरच्छिमद्धेवि
 कालं आइं करित्ता जाव मंदरचूलियत्ति । एवं जाव पुक्खरवरदीवपच्चत्थिमद्धे जाव
 मंदरचूलियत्ति, जंबूदीवगआवस्सगं तु कालाओ चूलिया जाव धायइखंडे पुक्खर-
 वरे य पुव्वावरे पासे । जंबूदीवस्स णं दीवस्स चत्तारि दारा प० तं० विजये वेजयंते
 जयते अपराजिए, ते णं दारा चत्तारि जोयणाइं विक्खंभेणं तावइयं चेव पवेसेणं
 प० तत्थ ण चत्तारि देवा महिद्धिया जाव पलिओवमठिइया परिवसंति तं० विजए
 वेजयंते जयंते अपराजिए ॥ ३७४ ॥ जंबुद्दीवे दीवे मंदरस्स पव्वयस्स दाहिणेणं
 चुल्लहिमवंतस्स वासहरपव्वयस्स चउसु विदिसासु लवणसमुद्द तिण्णि तिण्णि जोयण-
 सयाइं ओगाहेत्ता एत्थणं चत्तारि अंतरदीवा प० तं० एगरुयदीवे ओभासिअदीवे
 वेसाणियदीवे णंगोलियदीवे, तेसु णं दीवेषु चउव्विहा मणुस्सा परिवसंति, एगरुया

पन्नत्ते, तं जहा-दुहविवागे चेव सुहविवागे चेव । तत्थ णं दस दुहविवागाणि दस सुहविवागाणि । से किं तं दुहविवागाणि ? दुहविवागेसु णं दुहविवागाणं नगराई उज्जाणाई वणखंडा रायाणो अम्मापियरो समोसरणाई धम्मायरिया धम्मकहाओ नगरगमणाई संसारपबंधे दुहपरंपराओ य आघविज्जंति । से तं दुहविवागाणि । से किं तं सुहविवागाई ? सुहविवागेसु सुहविवागाणं णगराई उज्जाणाई वणखंडा रायाणो अम्मापियरो समोसरणाई धम्मायरिया धम्मकहाओ इहलोइयपरलोइयइड्ढिविसेसा भोगपरिच्चाया पव्वज्जाओ सुयपरिग्गहा तवोवहाणाई परियागा पडिमाओ संलेहणाओ भत्तपच्चक्खाणाई पाओवगमणाई देवलोगगमणाई सुकुलपच्चायाया पुण बोहिल्लाहा अंतकिरियाओ य आघविज्जंति । दुहविवागेसु णं पाणाइवायअलियवयणचोरि-
 ककरणपरदारमेहुणससंगयाए महतिव्वकसायइंदियप्पमायपावप्पओयअसुहज्जवसा-
 णसंचियाणं कम्माणं पावगाणं पावअणुभागफलविवागा णिरयगतितिरिक्खजोणिबहु-
 विहवसणसयपरंपरापवद्धाणं मणुयत्ते वि आगयाणं जहा पावकम्मसेसेण पावगा
 होति फलविवागा बहुवसणविणासनासाकबुट्टुंगुट्टुकरचरणनहच्छेयणजिबभच्छेअण-
 अंजणकडग्गिदाहगयचलणमलणफालणउल्लंवणसूललयालउडलट्ठिभंजणतउसीसगत-
 ततेल्लकलकलअहिसिंचणकुंभिपागककंपणथिरवंधणवेहवज्जकतणपतिभयकरकरपल्ली-
 वणादिदारुणाणि दुक्खाणि अगोवमाणि । बहुविहवपरंपराणुवद्धा ण मुच्चंति पावकम्म-
 वल्लीए, अवेयइत्ता हु णत्थि मोक्खो तवेण धिइधणियवद्धकच्छेण सोहणं तस्स वावि
 हुज्जा । एत्तो य सुहविवागेसु णं सीलसंजमणियमगुणतवोवहाणेसु साहूसु सुविहिएसु
 अणुकंपासयप्पओगतिकालमइविसुद्धभत्तपाणाई पययमणसा हियसुहनीसेसतिव्वपरि-
 णामनिच्छियमई पयच्छिऊणं पयोगसुद्धाई जह य निव्वत्तेति उ वोहिल्लभं जह
 य परितीकरेंति नरनरयतिरियसुरगमगविपुलपरियट्ठअरतिभयविसायसोगमिच्छत्तसे-
 लसंकडं अन्नाणतमंधकारं चिक्खिल्लसुदुत्तारं जरमरणजोणिसंखुभियचक्कवालं सोल-
 सकसायसावयपर्यडचंडं अणाइअं अणवदग्गं संसारसागरमिणं । जह य णिवंधंति
 आडगं सुरगणेसु जह य अणुभवन्ति सुरगणविमाणसोक्खाणि अगोवमाणि ततो य
 कालंतरे चुआगं इहेव नरलोगमागयाणं आउवपुपु(व)ण्णह्वजातिकुलजम्मआरोग-
 सुद्धिमेहाविसेसा मित्तजणसयणवणधण्णविभवसमिद्धसारसमुदयविसेसा बहुविहकाम
 भोगुवभावाण सोक्खाण सुहविवागोत्तमेसु अणुवरयपरंपराणुवद्धा असुभाणं सुभाणं चे
 कम्माणं भासिआ बहुविहा विवागा विवागसुयम्मि भगवया जिगवरेण संवेगकार
 गत्था अन्ने वि य एवमाइया बहुविहा वित्त्यरेणं अत्यपरुवणया आघविज्जंति । विवा
 गसुअस्स णं परित्ता वायगा संखेज्जा अणुओगदारा जाव संखेज्जाओ संगहणीओ

से णं अंगट्ठयाए एक्कारसमे अंगे वीसं अज्झयणा वीसं उद्देसणकाला वीसं समुद्देस-
णकाला । संखेज्जाइं पयसयसहस्साइं पयग्गेणं पन्नत्ता । संखेज्जाणि अक्खराणि
अणंता गमा अणंता पज्जवा जाव एवं चरणकरणपरूवणया आघविज्जंति । से तं
विवागसुए ॥ २२० ॥ से किं तं दिट्ठिवाए ? दिट्ठिवाए णं सव्वभावपरूवणया आघ-
विज्जंति । से समासओ पंचविहे पन्नत्ते, तं जहा-परिकम्मं, सुत्ताइं, पुव्वगयं, अणु-
ओगो, चूलिया । से किं तं परिकम्मं ? परिकम्मं सत्तविहे पन्नत्ते, तं जहा-सिद्धसेणि-
यापरिकम्मं, मणुस्ससेणियापरिकम्मं, पुट्ठसेणियापरिकम्मं, ओगाहणसेणियापरिकम्मं,
उवसंपज्जसेणियापरिकम्मं, विप्पजहसेणियापरिकम्मं, चुआचुअसेणियापरिकम्मं । से
किं तं सिद्धसेणियापरिकम्मं ? सिद्धसेणियापरिकम्मं चोद्दसविहे पन्नत्ते, तं जहा-माउ-
यापयाणि, एगट्ठियपयाणि, पादोट्ठपयाणि, आगासपयाणि, केउभूयं, रासिवद्धं,
एगगुणं, दुगुणं, तिगुणं, केउभूयं, पडिग्गहो, संसारपडिग्गहो, नंदावत्तं, सिद्धबद्धं, से
त्तं सिद्धसेणियापरिकम्मं । से किं तं मणुस्ससेणियापरिकम्मं ? मणुस्ससेणियापरिकम्मं
चोद्दसविहे पन्नत्ते, तं जहा-ताइं चेव माउआपयाणि जाव नंदावत्तं मणुस्सबद्धं, से
त्तं मणुस्ससेणियापरिकम्मं । अवसेसा परिकम्माइं पुट्ठाइयाइं एक्कारसविहाइं पन्न-
त्ताइं । इच्चेयाइं सत्त परिकम्माइं, छ ससमइयाइं सत्त आजीवियाइं, छ चउक्कण-
इयाइं सत्त तेरासियाइं, एवामेव सपुव्वावरेणं सत्त परिकम्माइं तेसीति भवंतीति
मक्खायाइं, से तं परिकम्माइं ॥ २२१ ॥ से किं तं सुत्ताइं ? सुत्ताइं अट्ठासीति
भवंतीति मक्खायाइं, तं जहा-उजुगं परिणयापरिणयं बहुभंगियं विप्पच्चइयं [विन
(ज)यचरियं] अणंतरं परंपरं समाणं संजुहं [मासाणं] संभिन्नं अहाच्चयं [अह-
व्वायं नन्दीए] सोवत्थि(वत्तं) यं णंदावत्तं बहुलं पुट्ठापुट्ठं वियावत्तं एवंभूय दुआवेत्तं
वत्तमाणपर्यं समभिरूढं सव्वओमहं पणामं [पस्सासं नन्दीए] दुपडिग्गहं इच्चेयाइं
वावीसं सुत्ताइं छिण्णत्तेअणइआइं ससमयसुत्तपरिवाडीए इच्चेयाइं वावीसं सुत्ताइं
अछिन्नत्तेअणइयाइं आजीवियसुत्तपरिवाडीए, इच्चेआइं वावीसं सुत्ताइं तिकणइयाइं
तेरासियसुत्तपरिवाडीए, इच्चेआइं वावीसं सुत्ताइं चउक्कणइयाइं ससमयसुत्तपरिवाडीए,
एवामेव सपुव्वावरेणं अट्ठासीति सुत्ताइं भवंतीति मक्खायाइं, से तं सुत्ताइं ॥ २२२ ॥
से किं तं पुव्वगयं ? पुव्वगयं चउद्दसविहं पन्नत्तं, तं जहा-उप्पायपुव्वं, अग्गेणीयं,
वीरियं, अत्थिणत्थिप्पवायं, नाणप्पवायं, सच्चप्पवायं, आयप्पवायं, कम्मप्पवायं,
पच्चक्खाणप्पवायं, विज्जाणुप्पवायं, अवंझं, पाणाऊ, किरियाविसालं, लोगविंदुसारं ।
उप्पायपुव्वरस णं दसवत्थू पन्नत्ता, चत्तारि चूलियावत्थू पन्नत्ता । अग्गेणियस्स णं
पुव्वस्स चोद्दसवत्थू प०, वारस चूलियावत्थू प० । वीरियप्पवायस्स णं पुव्वस्स

अट्ठ वत्थू प०, अट्ठ चूलियावत्थू प० । अत्थिणत्थिप्पवायस्स णं पुव्वस्स अट्ठारस वत्थू प०, दस चूलियावत्थू प० । नाणप्पवायस्स णं पुव्वस्स वारस वत्थू प० । सच्चप्पवायस्स णं पुव्वस्स दो वत्थू प० । आयप्पवायस्स णं पुव्वस्स सोलस वत्थू प० । कम्मप्पवायपुव्वस्स णं तीसं वत्थू प० । पच्चक्खाणस्स णं पुव्वस्स वीसं वत्थू प० । विज्जाणुप्पवायस्स णं पुव्वस्स पनरस वत्थू प० । अवञ्जस्स णं पुव्वस्स वारस वत्थू प० । पाणाउस्स णं पुव्वस्स तेरस वत्थू प० । किरियाविसालस्स णं पुव्वस्स तीसं वत्थू प० । लोगविदुसारस्स णं पुव्वस्स पणवीसं वत्थू प० । “दस चोद्दस अट्ठट्ठारसे व वारस दुवे य वत्थूणि । सोलस तीसा वीसा पन्नरस अणुप्पवायम्मि ॥ वारस एक्कारसमे, वारसमे तेरसेव वत्थूणि । तीसा पुण तेरसमे चउदसमे पन्नवीसाओ । चत्तारि दुवालस अट्ठ चेव दस चेव चूलवत्थूणि । आतिल्लिण चउण्हं, सेसाणं चूलिया णत्थि” से तं पुव्वगयं ॥ २२३ ॥ से किं तं अणुओगे ? अणुओगे दुविहे पन्नत्ते, तं जहा-मूलपढमाणुओगे य गंडियाणुओगे य । से किं तं मूलपढमाणुओगे ? एत्थ णं अरहंताणं भगवंताणं पुव्वभवा देवलोगगमणाणि आउं चवणाणि जम्मणाणि अ अभिसेया रायवरसिरीओ सीयाओ पव्वज्जाओ तवा य भत्ता केवलणाणुप्पाया अ तित्थपवत्तणाणि अ संघयणं संठाणं उच्चत्तं आउं वन्नविभागो सीसा गणा गणहरा य अज्जा पवत्तणीओ संघस्स चउव्विहस्स जं वावि परिमाणं जिणमणपज्जवओहिनाणसम्मत्तसुयनाणिणो य वाई अणुत्तरगई य जत्तिया सिद्धा पाओवगया य जे जहिं जत्तियाइं भत्ताइं छेअइत्ता अंतगडा मुणिवरुत्तमा तमरओघविप्पमुक्का सिद्धिपहमणुत्तरं च पत्ता, एए अत्ते य एवमाइया भावा मूलपढमाणुओगे कहिआ आघविज्जंति पण्णविज्जंति पुरुविज्जंति, से तं मूलपढमाणुओगे । से किं तं गंडियाणुओगे ? (गंडियाणुओगे) अणेगविहे पन्नत्ते, तं जहा-कुलगरगंडियाओ तित्थगरगंडियाओ गणहरगंडियाओ चक्कहरगंडियाओ दसारगंडियाओ वलदेवगंडियाओ वासुदेवगंडियाओ हरिवंसगंडियाओ भद्वाहुगंडियाओ तवोकम्मगंडियाओ चित्तंतरगंडियाओ उस्सप्पिणीगंडियाओ ओसप्पिणीगंडियाओ अमरनरतिरियनिरयगइगमणविविहपरियट्ठणाणुओगे, एवमाइयाओ गंडियाओ आघविज्जंति पण्णविज्जंति पुरुविज्जंति, से तं गंडियाणुओगे ॥ २२४ ॥ से किं तं चूलियाओ ? जण्णं आइल्लणं चउण्हं पुव्वाणं चूलियाओ सेसाइं पुव्वाइं अचूलियाइं, से तं चूलियाओ ॥ २२५ ॥ दिट्ठिवायस्स णं परित्ता वायणा, संखेज्जा अणुओगदारा संखेज्जाओ पडिवत्तीओ संखेज्जाओ निज्जुत्तीओ संखेज्जा सिलोगा संखेज्जाओ संगहणीओ, से णं अंगट्ठयाए वारसमे अगे एगे सुयक्खंधे चउद्दस पुव्वाइं संखेज्जा वत्थू संखेज्जा चूलवत्थू संखेज्जा

पाहुडा संखेज्जा पाहुडपाहुडा संखेज्जाओ पाहुडियाओ संखेज्जाओ पाहुडपाहुडियाओ
 संखेज्जाणि पयसयसहस्साणि पयग्गेणं पन्नत्ता, संखेज्जा अक्खरा अणंता गमा अणंता
 पज्जवा परिता तसा अणंता थावरा सासया कडा णिवद्धा णिकाइया जिणपण्णत्ता
 भावा आघविज्जंति पण्णविज्जंति पुरुविज्जंति दंसिज्जंति निदंसिज्जंति उवदंसिज्जंति, एवं
 णाया एवं विण्णाया एवं चरणकरणपुरुवणया आघविज्जंति, से तं दिट्ठिवाए, से तं
 दुवालसंगे गणिपिडगे ॥ २२६ ॥ इच्चेइयं दुवालसंगं गणिपिडगं अतीतकाले अणंता
 जीवा आणाए विराहिता चाउरंतसंसारकंतरं अणुपरियट्ठिसु, इच्चेइयं दुवालसंगं
 गणिपिडगं पडुप्पण्णे काले परिता जीवा आणाए विराहिता चाउरंतसंसारकंतरं
 अणुपरियट्ठंति, इच्चेइयं दुवालसंगं गणिपिडगं अणागए काले अणंता जीवा आणाए
 विराहिता चाउरंतसंसारकंतरं अणुपरियट्ठिस्संति, इच्चेइयं दुवालसंगं गणिपिडगं
 अतीतकाले अणंता जीवा आणाए आराहिता चाउरंतसंसारकंतरं वीईवईसु, एवं
 पडुप्पण्णेऽवि, एवं अणागएऽवि । दुवालसंगे णं गणिपिडगे ण कयावि णत्थि, ण
 कयाइ णासी, ण कयाइ ण भविस्सइ, भुवि च भवति य भविस्सति य (अयले)
 धुवे णितिए सासए अक्खए अव्वए अवट्ठिए णिच्चे, से जहा णामए पंच अत्थिकाया
 ण कयाइ ण आसि, ण कयाइ णत्थि, ण कयाइ ण भविस्सति, भुवि च भवति य
 भविस्सति य, (अयला) धुवा णितिया सासया अक्खया अव्वया अवट्ठिया णिच्चा,
 एवामेव दुवालसंगे गणिपिडगे ण कयाइ ण आसि, ण कयाइ णत्थि, ण कयाइ ण
 भविस्सइ, भुवि च भवति य भविस्सइ य, (अयले) धुवे जाव अवट्ठिए णिच्चे ।
 एत्थ णं दुवालसंगे गणिपिडगे अणंता भावा अणंता अभावा अणंता हेऊ अणंता
 अहेऊ अणंता कारणा अणंता अकारणा अणंता जीवा अणंता अजीवा अणंता भव-
 सिद्धिया अणंता अभवसिद्धिया अणंता सिद्धा अणंता असिद्धा आघविज्जंति पण्णवि-
 ज्जंति पुरुविज्जंति दंसिज्जंति निदंसिज्जंति उवदंसिज्जंति । एवं दुवालसंगं गणिपिडगं इति
 ॥ २२७ ॥ दुवे रासी प० तं जहा-जीवरासी अजीवरासी य । अजीवरासी दुविहा
 प० तं जहा-रूवी अजीवरासी अरूवी अजीवरासी य । से किं तं अरूवी अजीवरासी ?
 अरूवी अजीवरासी दसविहा प० तं जहा-धम्मत्थिकाए जाव अद्दासमए । रूवी
 अजीवरासी अणेगविहा प० । जाव से किं तं अणुत्तरोववाइआ ? अणुत्तरोववाइआ
 पंचविहा प० तं जहा-विजयवेजयंतजयंतअपराजितसव्वट्ठसिद्धिआ, से तं अणुत्तरो-
 ववाइआ, से तं पंचिदियसंसारसमावण्णजीवरासी । दुविहा णेरइया प० तं जहा-
 पज्जता य अपज्जता य, एवं दंडओ भाणियव्वो जाव वेमाणिय त्ति । इमीसे णं रयण-
 प्पभाए पुढवीए केवइयं खेतं ओगाहेत्ता केवइया गिरयावासा प० ?, गोयमा ! इमीसे

णं रयणप्पभाए पुढवीए असीउत्तरजोयणसयसहस्सवाहल्लाए उवरि एगं जोयणसहस्सं
 ओगाहेत्ता हेट्ठा चेगं जोयणसहस्सं वज्जेत्ता मज्झे अट्ठसत्तरि जोयणसयसहस्से एत्थ
 णं रयणप्पभाए पुढवीए णेरइयाणं तीसं णिरयावाससयसहस्सा भवंतीति मक्खाया ।
 ते णं णिरयावासा अंतो वट्ठा वाहिं चउरंसा जाव असुभा णिरया असुभाओ णिर-
 एसु वेयणाओ, एवं सत्त वि भाणियव्वाओ जं जासु जुज्जइ-आसीयं वत्तीसं अट्ठा-
 वीसं तहेव वीसं च । अट्ठारस सोलसगं अट्ठुत्तरमेव वाहलं ॥ १ ॥ तीसा य
 पण्णवीसा पन्नरस दसेव सयसहस्साइं । तिण्णेगं पंचूणं पंचेव अणुत्तरा नरगा ॥ २ ॥
 चउसट्ठी असुराणं चउरासीइं च होइ नागाणं । वावत्तरि सुवन्नाण वाउकुमाराण
 छण्णउइ ॥ ३ ॥ दीवदिसाउदहीणं विज्जुकुमारिदथणियमग्गीणं । छण्हं पि जुवलयाणं
 वावत्तरिमो य सयसहसा(स्सा) ॥ ४ ॥ वत्तीसट्ठावीसा वारस अड चउरो य सय-
 सहस्सा । पण्णा चत्तालीसा छच्च सहस्सा सहस्सारे ॥ ५ ॥ आणयपाणयकप्पे
 चत्तारि सयाऽऽरणच्चुए तिन्नि । सत्त विमाणसयाइं चउसु वि एएसु कप्पेसु ॥ ६ ॥
 एक्कारसुत्तरं हेट्ठिमेसु सत्तुत्तरं च मज्झिमए । सयमेगं उवरिमए पंचेव अणुत्तरविमाणा
 ॥ ७ ॥ दोच्चाए णं पुढवीए तच्चाए णं पुढवीए चउत्थीए पुढवीए पंचमीए पुढवीए
 छट्ठीए पुढवीए सत्तमीए पुढवीए गाहाहि भाणियव्वा । सत्तमाए पुढवीए पुच्छा,
 गोयमा ! सत्तमाए पुढवीए अट्ठुत्तरजोयणसयसहस्साइं वाहल्लाए उवरि अद्धतेवन्नं
 जोयणसहस्साइं ओगाहेत्ता हेट्ठा वि अद्धतेवन्नं जोयणसहस्साइं वज्जित्ता मज्झे तिसु
 जोयणसहस्सेसु एत्थ णं सत्तमाए पुढवीए नेरइयाणं पंच अणुत्तरा महइमहालया
 महानिरया प० तं जहा-काले महाकाले रोरुए महारोरुए अप्पइट्ठाणे नामं पंचमे ।
 ते णं निरया वट्ठे य तंसा य अहे खुरप्पसंठाणसंठिया जाव असुभा नरगा असु-
 भाओ नरएसु वेयणाओ ॥ २२८ ॥ केवइया णं भंते ! असुरकुमारावासा प० ?
 गोयमा ! इमीसे णं रयणप्पभाए पुढवीए असीउत्तरजोयणसयसहस्सवाहल्लाए उवरि
 एगं जोयणसहस्सं ओगाहेत्ता हेट्ठा चेगं जोयणसहस्सं वज्जित्ता मज्झे अट्ठहत्तरि
 जोयणसयसहस्से एत्थ णं रयणप्पभाए पुढवीए चउसट्ठि असुरकुमारावाससयसहस्सा
 प० । ते णं भवणा वाहिं वट्ठा अंतो चउरंसा अहे पोक्खरकण्णिआसंठाणसंठिया
 उक्किण्णंतरविउलगंभीरखायफलिहा अट्ठालयचरियदारगोउरकवाडतोरणपडिदुवारदेस-
 भागा जंतमुसलमुसंडिसयग्धिपरिवारिया अउज्झा अडयालकोट्टरइया अडयालकय-
 वणमाला लाउल्लोइयमहिया गोसीससरसरत्तचंदणदहरदिण्णपंचंगुलितला कालागुरु-
 पवरकुंदुस्कुतुरुक्कडज्जंतधूवमघमघेतगंधुद्धयाभिरामा सुगंधवरगंधिया गंधवट्ठिभूया
 अच्छा सण्हा लण्हा घट्ठा मट्ठा नीरया णिम्मला वितिमिरा विसुद्धा सप्पभा समि-

रीया सउज्जोआ पासाईया दरिसणिज्जा अभिरुवा पडिरुवा, एवं जं जस्स कमती
तं तस्स जं जं गाहाहिं भणियं तह चेव वण्णओ ॥ २२९ ॥ केवइया णं भंते !
पुढविकाइयावासा प० गोयमा ! असंखेज्जा पुढवीकाइयावासा प० एवं जाव मणुस्स
त्ति । केवइया णं भंते ! वाणमंतरावासा प० गोयमा ! इमीसे णं रयणप्पभाए पुढ-
वीए रयणामयस्स कंडस्स जोयणसहस्सवाहल्लस्स उवरिं एगं जोयणसयं ओगाहेत्तां
हेट्ठा चेगं जोयणसयं वजेत्ता मज्झे अट्ठसु जोयणसएसु एत्थ णं वाणमंतराणं देवाणं
तिरियमसंखेज्जा भोमेज्जा नेगरावाससयसहस्सा पन्नत्ता, ते णं भोमेज्जा नगरा वाहिं
वट्ठा अंतो चउरंसा, एवं जहा भवणवासीणं तहेव णेयव्वा, णवरं पडागमालाउला
सुरम्मा पासाईया दरिसणिज्जा अभिरुवा पडिरुवा ॥ २३० ॥ केवइया णं भंते !
जोइसियाणं विमाणावासा पन्नत्ता ? गोयमा ! इमीसे णं रयणप्पभाए पुढवीए बहु-
समरमणिज्जाओ भूमिभागाओ सत्तनउयाइं जोयणसयाइं उड्डं उप्पइत्ता एत्थ णं दसु-
त्तरं जोयणसयवाहल्ले तिरियं जोइसविसए जोइसियाणं देवाणं असंखेज्जा जोइसियवि-
माणावासा पन्नत्ता, ते णं जोइसियविमाणावासा अवभुग्गयमूसियपहसिया विविहर-
मणिरयणभत्तिचित्ता वाउड्डुयंविजयवेजयंतीपडागछत्ताइछत्तकलिया तुंगा गगणतल-
मणुलिहंतसिहरा जालंतररयणपञ्जरुम्मिलियव्व मणिकणगथूभियागां वियसियसयपत्त-
पुंडरीयतिलयरयणद्धचंदचित्ता अंतो वाहिं च सण्हा तवणिज्जवालुआपत्थडा सुहफासा
सस्सिरीयरुवा पासाईया दरिसणिज्जा ॥ २३१ ॥ केवइया णं भंते ! विमाणियावासा
पन्नत्ता ? गोयमा ! इमीसे णं रयणप्पभाए पुढवीए बहुसमरमणिज्जाओ भूमिभागाओ
उड्डं चंदिमसूरियगहगणनक्खत्तताराहंवाणं वीइवइत्ता वट्ठूणि जोयणाणि वट्ठूणि जोयण-
सयाणि वट्ठूणि जोयणसहस्साणि वट्ठूणि जोयणसयसहस्साणि बहुइओ जोयणकोडीओ
बहुइओ जोयणकोडाकोडीओ असंखेज्जाओ जोयणकोडाकोडीओ उड्डं दूरं वीइवइत्ता
एत्थ णं विमाणियाणं देवाणं सोहम्मीसाणसणंकुमारमाहिंदवंभलंतगसुक्कसहस्सार-
आणयपाणयआरणअञ्जुएसु गेवेज्जगमणुत्तरेसु य चउरासीइं विमाणावाससयसहस्सा
सत्ताणउइं च सहस्सा तेवीसं च विमाणा भवंतीति मक्खाया, ते णं विमाणा अच्चि-
मालिप्पभा भासरासिर्वण्णाभा अरया नीरया णिम्मला वितिमिरा विसुद्धा सव्वरयणा-
मया अच्छा सण्हा घट्ठा मट्ठा णिप्पंका णिकंकडच्छाया सप्पभा समरीया सउज्जोया
पासाईया दरिसणिज्जा अभिरुवा पडिरुवा । सोहम्मे णं भंते ! कप्पे केवइया विमाणा-
वासा प० ? गोयमा ! वत्तीसं विमाणावाससयसहस्सा प०, एवं ईसाणाइसु अट्ठावीस
वारस अट्ठ चत्तारि एयाइं सयसहस्साइं पण्णासं चत्तालीसं छ एयाइं सहस्साइं आणए
पाणए चत्तारि आरणञ्जुए तिन्नि एयाणि सयाणि, एवं गाहाहिं भाणियव्वं ॥ २३२ ॥

नेरइयाणं भंते ! केवइयं कालं ठिई पन्नत्ता ? गोयमा ! जहन्नेणं दस वाससहस्साइं
 उक्कोसेणं तेत्तीसं सागरोवमाइं ठिई प० । अपज्जत्तगाणं नेरइयाणं भंते ! केवइयं
 कालं ठिई प० ? गोयमा ! जहन्नेणं अंतोमुहुत्तं उक्कोसेण वि अंतोमुहुत्तं । पज्जत्त-
 गाणं जहन्नेणं दस वाससहस्साइं अंतोमुहुत्तूणाइं । उक्कोसेणं तेत्तीसं सागरोवमाइं
 अंतोमुहुत्तूणाइं । इमीसे णं रयणप्पभाए पुढवीए एवं जाव विजयवेजयंतजयंतअप-
 राजियाणं देवाणं केवइयं कालं ठिई प० ? गोयमा ! जहन्नेणं वत्तीसं सागरोवमाइं
 उक्कोसेणं तेत्तीसं सागरोवमाइं । सव्वट्ठे अजहण्णमणुक्कोसेणं तेत्तीसं सागरोवमाइं
 ठिई प० ॥ २३३ ॥ कति णं भंते सरीरा पन्नत्ता ? गोयमा ! पंच सरीरा प०, तं
 जहा-ओरालिए वेउव्विए आहारए तेयए कम्मए । ओरालियसरीरे णं भंते !
 कइविहे पन्नत्ते ? गोयमा ! पंचविहे पन्नत्ते, तं जहा-एगिंदियओरालियसरीरे जाव
 गब्भवक्कंतियमणुस्सपंचिंदियओरालियसरीरे य । ओरालियसरीरस्स णं भंते ! के
 महालिया सरीरोगाहणा प० ? गोयमा ! जहन्नेणं अंगुलअसंखेज्जतिभागं उक्कोसेणं
 साइरेगं जोयणसहस्सं, एवं जहा ओगाहणसंठाणे ओरालियपमाणं तहा निरवसेसं,
 एवं जाव मणुस्से त्ति उक्कोसेणं तिण्णि गाउयाइं । कइविहे णं भंते ! वेउव्वियसरीरे
 पन्नत्ते ? गोयमा ! दुविहे पन्नत्ते-एगिंदियवेउव्वियसरीरे य पंचिंदियवेउव्वियसरीरे
 य, एवं जाव सणकुमारे आढत्तं जाव अणुत्तराणं भवधारणिज्जा जाव तेसिं रयणी
 रयणी परिहायइ । आहारयसरीरे णं भंते ! कइविहे प० ? गोयमा ! एगाकारे प० ।
 जइ एगाकारे प० किं मणुस्सआहारयसरीरे अमणुस्सआहारयसरीरे ? गोयमा !
 मणुस्सआहारगसरीरे णो अमणुस्सआहारगसरीरे, एवं जइ मणुस्सआहारगसरीरे
 किं गब्भवक्कंतियमणुस्सआहारगसरीरे संमुच्छिममणुस्सआहारगसरीरे ? गोयमा !
 गब्भवक्कंतियमणुस्सआहारगसरीरे नो संमुच्छिममणुस्सआहारगसरीरे । जइ गब्भ-
 वक्कंतियमणुस्सआहारयसरीरे किं कम्मभूमिगा० अकम्मभूमिगा० ? गोयमा ! कम्म-
 भूमिगा० नो अकम्मभूमिगा० । जइ कम्मभूमिगा० किं संखेज्जवासाउय० असंखे-
 ज्जवासाउय० ? गोयमा ! संखेज्जवासाउय० नो असंखेज्जवासाउय० । जइ संखेज्ज-
 वासाउय० किं पज्जत्तय० अपज्जत्तय० ? गोयमा ! पज्जत्तय० नो अपज्जत्तय० । जइ
 पज्जत्तय० किं सम्मदिट्ठी० मिच्छदिट्ठी० सम्मामिच्छदिट्ठी० ? गोयमा ! सम्मदिट्ठी० नो
 मिच्छदिट्ठी० नो सम्मामिच्छदिट्ठी० । जइ सम्मदिट्ठी० किं संजय० असंजय० संजया-
 संजय० ? गोयमा ! संजय० नो असंजय० नो संजयासंजय० । जइ संजय० किं
 पमत्तसंजय० अपमत्तसंजय० ? गोयमा ! पमत्तसंजय० नो अपमत्तसंजय० । जइ
 पमत्तसंजय० किं इड्ढिपत्त० अणिड्ढिपत्त० ? गोयमा ! इड्ढिपत्त० नो अणिड्ढिपत्त०

चयणा विभाणियव्वा आहारयसरीरे समचउरंससंठाणसंठिए । आहारयसरीरस्स
के महालिया सरीरोगाहणा प० ? गोयमा ! जहन्नेणं देसूणा रयणी उक्कोसेणं पडि-
पुण्णा रयणी । तेआसरीरे णं भंते ! कतिविहे प० ? गोयमा ! पंचविहे पन्नत्ते-
एगिंदियतेयसरीरे वितिचउपंच० एवं जाव गेवेज्जस्स णं भंते ! देवस्स णं मार-
णंतियसमुग्घाएणं समोहयस्स समानस्स के महालिया सरीरोगाहणा प० ? गोयमा !
सरीरप्पमाणमेत्ता विक्खंभवहल्लेणं आयामेणं जहन्नेणं अहे जाव विज्जाहरसेढीओ
उक्कोसेणं जाव अहोलोइयग्गामाओ, उड्डं जाव सयाइं विमाणाइं, तिरियं जाव
मणुस्सखेतं, एवं जाव अणुत्तरोववाइया । एवं कम्मयसरीरं भाणियव्वं ॥ २३४ ॥
भेय विसयसंठाणे, अविमतर वाहिरे य देसोही । ओहिस्स बुद्धिहाणी, पडिवाइं
चेव अपडिवाइं ॥ १ ॥ २३५ ॥ कइविहे णं भंते ! ओही प० ? गोयमा ! दुविहा
प०-भवपच्चइए य खओवसमिए य, एवं सव्वं ओहिपदं भाणियव्वं ॥ २३६ ॥
सीया य दव्व सारीर साता तह वेयणा भवे दुक्खा । अन्वुवगमुवक्कमिया णीयाए
चेव अणियाए ॥ १ ॥ नेरइया णं भंते ! किं सीतं वेयणं वेयंति उस्सिणं वेयणं
वेयंति सीतोस्सिणं वेयणं वेयंति ? गोयमा ! नेरइया० एवं चेव वेयणापदं भाणियव्वं
॥ २३७ ॥ कइ णं भंते ! लेसाओ पन्नत्ताओ ? गोयमा ! छ लेसाओ पन्नत्ताओ, तं
जहा-किण्हा नीला काऊ तेऊ पम्हा सुक्का, एवं लेसापयं भाणियव्वं ॥ २३८ ॥
अणंतरा य आहारे, आहाराभोगणा इय । पोग्गला नेव जाणंति, अज्झवसाणे य
सम्मत्ते ॥ १ ॥ नेरइया णं भंते ! अणंतराहारा तओ निव्वत्तणया तओ परियाइय-
णया तओ परिणामणया तओ परियारणया तओ पच्छा विक्कुव्वणया ? हंता
गोयमा ! एवं आहारपदं भाणियव्वं ॥ २३९ ॥ कइविहे णं भंते ! आउगवंधे
प० ? गोयमा ! छव्विहे आउगवंधे प०, तं जहा-जाइनामनिहत्ताउए गतिनाम-
निहत्ताउए ठिइनामनिहत्ताउए पएसनामनिहत्ताउए अणुभागनामनिहत्ताउए ओगा-
हणानामनिहत्ताउए । नेरइयाणं भंते ! कइविहे आउगवंधे प० ? गोयमा ! छव्विहे
प०, तं जहा-जातिनामनिहत्ताउए गइनामनिहत्ताउए ठिइनामनिहत्ताउए पएस-
नामनिहत्ताउए अणुभागनामनिहत्ताउए ओगाहणानामनिहत्ताउए । एवं जाव वेमा-
णियाणं ॥ २४० ॥ निरयगई णं भंते ! केवइयं कालं विरहिया उववाएणं प० ?
गोयमा ! जहन्नेणं एक्कं समयं उक्कोसेणं वारस मुहुत्ते, एवं तिरियगई मणुस्सगई
देवगई । सिद्धिगई णं भंते ! केवइयं कालं विरहिया सिज्जणयाए प० ? गोयमा !
जहन्नेणं एक्कं समयं उक्कोसेणं छम्मासे, एवं सिद्धिवज्जा उव्वट्ठणा । इमीसे णं भंते !
रयणप्पमाए पुढवीए नेरइया केवइयं कालं विरहिया उववाएणं ? एवं उववायदंडओ

भाणियव्वो उव्वट्टणादंडओ य । नेरइया णं भंते ! जातिनामनिहत्ताउगं कति
 आगरिसेहिं पगरंति ? गोयमा ! सिय १ सिय २ सिय ३ सिय ४ सिय ५ सिय ६
 सिय ७ सिय अट्ठहिं, नो चेव णं नवहिं । एवं सेसाण वि आउगाणि जाव
 वेमाणिय त्ति ॥ २४१ ॥ कइविहे णं भंते ! संघयणे पन्नत्ते ? गोयमा ! छव्विहे
 संघयणे पन्नत्ते, तं जहा-वइरोसभनारायसंघयणे रिसभनारायसंघयणे नारायसंघयणे
 अद्धनारायसंघयणे कीलियासंघयणे छेवट्टसंघयणे । नेरइया णं भंते ! किंसंघयणी ?
 गोयमा ! छण्हं संघयणाणं असंघयणी णेव अट्ठि णेव छिरा णेव ण्हारु जे पोग्गला
 अणिट्ठा अकंता अप्पिया अणाएज्जा असुभा अमणुण्णा अमणामा अमणाभिरामा ते
 तेसिं असंघयणत्ताए परिणमंति । असुरकुमाराणं भंते ! किंसंघयणा प० ? गोयमा !
 छण्हं संघयणाणं असंघयणी णेवट्ठी णेव छिरा णेव ण्हारु जे पोग्गला इट्ठा कंता
 पिया मणुण्णा मणामा मणाभिरामा ते तेसिं असंघयणत्ताए परिणमंति, एवं जाव
 थणियकुमाराणं । पुढवीकाइया णं भंते ! किंसंघयणी प० ? गोयमा ! छेवट्टसंघयणी
 प०, एवं जाव संमुच्छिमपंचिंदियतिरिक्खजोणिय त्ति । गब्भवक्कंतिया छव्विहसंघ-
 यणी, संमुच्छिममणुस्सा छेवट्टसंघयणी, गब्भवक्कंतियमणुस्सा छव्विहे संघयणे प० ।
 जहा असुरकुमारा तहा वाणमंतरजोइसियवेमाणिया य ॥ २४२ ॥ कइविहे णं
 भंते ! संठाणे पन्नत्ते ? गोयमा ! छव्विहे संठाणे पन्नत्ते, तं जहा-समचउरंसे १
 णिग्गोहपरिमंडले २ साइए ३ वामणे ४ खुजे ५ हुंडे ६ । नेरइया णं भंते !
 किंसंठाणी प० ? गोयमा ! हुंडसंठाणी-प० । असुरकुमारा णं भंते ! किंसंठाणी
 प० ? गोयमा ! समचउरंसंठाणसंठिया प०, एवं जाव थणियकुमारा । पुढवी
 मसूरसंठाणा प०, आऊ थियुयसंठाणा प०, तेऊ सूइकलावसेंठाणा प०, वाऊ
 पडागासंठाणा-प०, वणस्सई नाणासंठाणसंठिया प०, वेइंदियतेइंदियचउरिंदिय-
 संमुच्छिमपंचिंदियतिरिक्खा हुंडसंठाणा प०, गब्भवक्कंतिया छव्विहसंठाणा प०,
 संमुच्छिममणुस्सा हुंडसंठाणसंठिया प०, गब्भवक्कंतियाणं मणुस्साणं छव्विहा
 संठाणा प० । जहा असुरकुमारा तहा वाणमंतरजोइसियवेमाणिया वि ॥ २४३ ॥
 कइविहे णं भंते ! वेए पन्नत्ते ? गोयमा ! तिविहे वेए प०, तं जहा-इत्थीवेए पुरि-
 सवेए नपुंसवेए । नेरइया णं भंते ! कि इत्थीवेया पुरिसवेया णपुंसगवेया प० ?
 गोयमा ! णो इत्थीवेए णो पुंवेए णपुंसगवेया प० । असुरकुमारा णं भंते ! किं
 इत्थीवेया पुरिसवेया नपुंसगवेया ? गोयमा ! इत्थीवेया पुरिसवेया णो णपुंसगवेया,
 जाव थणियकुमारा, पुढवी आऊ तेऊ वाऊ वणस्सई वित्तिचउरिंदियसंमुच्छिमपं-
 चिंदियतिरिक्खसंमुच्छिममणुस्सा णपुंसगवेया, गब्भवक्कंतियमणुस्सा पंचिंदियतिरिया

य तिवेया, जहा असुरकुमारा तहा वाणमंतरा जोइसियवेमाणिया वि ॥ २४४ ॥
 ते णं काले णं ते णं समए णं कप्पस्स समोसरणं णेयव्वं, जाव गणहरा सावच्चा
 निरवच्चा वोच्छिण्णा ॥ २४५ ॥ जंवुद्दीवे णं दीवे भारहे वासे तीआए उस्सप्पिणीए
 सत्त कुलगरा होत्था, तं जहा-मित्तदामे सुदामे य, सुपासे य सयंपमे । विमलघोसे
 सुघोसे य, महाघोसे य सत्तमे ॥ १ ॥ जंवुद्दीवे णं दीवे भारहे वासे तीआए ओस-
 प्पिणीए दस कुलगरा होत्था, तं जहा-सयंजले सयाऊ य, अजियसेणे अणंतसेणे
 य । कज्जसेणे भीमसेणे, महाभीमसेणे य सत्तमे ॥ २ ॥ दढरहे दसरहे सय-
 रहे ॥ जंवुद्दीवे णं दीवे भारहे वासे इमीसे ओसप्पिणीए समाए सत्त कुलगरा होत्था,
 तं जहा-पढमेत्थ विमलवाहण [चक्खुम जसमं चउत्थमभिचंदे । तत्तो य पसेणईए
 मरुदेवे चेव नाभी य ॥ ३ ॥] एतेसि णं सत्तण्हं कुलगराण सत्त भारिया होत्था,
 तं जहा-चंदजसा चंदकंता [सुरुव पडिरुव चक्खुकंता य । सिरिकंता मरुदेवी कुल-
 गरपत्तीण णामाई ॥ ४ ॥] २४६ ॥ जंवुद्दीवे णं दीवे भारहे वासे इमीसे णं ओस-
 प्पिणीए चउवीसं तित्थगराणं पियरो होत्था, तं जहा-णाभी य जियसत्तू य [जियारी
 संवरे इय । मेहे धरे पइट्ठे य महसेणे य खत्तिए ॥ ५ ॥ सुग्गीवे दढरहे विण्हू वसु-
 पुजे य खत्तिए । कयवम्मा सीहसेणे भाणू विस्ससेणे इय ॥ ६ ॥ सूरे सुदंसणे
 कुंभे, सुमित्तविजए समुद्विजए य । राया य आससेणे य सिद्धत्थेच्चिय खत्तिए
 ॥ ७ ॥] उदितोदियकुलवंसा विसुद्धवंसा गुणेहि उववेया । तित्थप्पवत्तयाणं एए
 पियरो जिणवराणं ॥ ८ ॥ जंवुद्दीवे णं दीवे भारहे वासे इमीसे ओसप्पिणीए चउ-
 वीसं तित्थगराणं मायरो होत्था, तं जहा-मरुदेवी विजया सेणा [सिद्धत्था मंगला
 सुसीमा य । पुहवी लखणा रामा नंदा विण्हू जया सामा ॥ ९ ॥ सुजसा सुव्वय
 अइरा सिरिया देवी पभावई पउमा । वप्पा सिवा य वामा तिसला देवी य जिण-
 माया ॥ १० ॥] २४७ ॥ जंवुद्दीवे णं दीवे भारहे वासे इमीसे ओसप्पिणीए चउ-
 वीसं तित्थगरा होत्था, तं जहा-उसभ अजिय सभव अभिन्नंदण सुमइ पउमप्पह
 सुपास चंदप्पभ सुविहि=पुप्फदंत सीयल सिज्जंस वासुपुज विमल अणंत धम्म संति
 कुंथु अर मल्लि मुणिसुव्वय णमि णेमि पास वड्डमाणो य ॥ २४८ ॥ एएसिं चउवी-
 साए तित्थगराणं चउव्वीसं पुव्वभवया णामधेया होत्था, तं जहा-पढमेत्थ वइर-
 णामे विमले तह विमलवाहणे चेव । तत्तो य धम्मसीहे सुमित्त तह धम्ममित्ते य
 ॥ ११ ॥ सुंदरवाहु तह दीहवाहु जुगवाहु लट्ठवाहु य । दिण्णे य इंददत्ते सुंदर
 माहिंदरे चेव ॥ १२ ॥ सीहरहे मेहरहे रुप्पी अ सुदंसणे य वोद्धव्वे । तत्तो य
 नंदणे खलु सीहगिरी चेव वीसइमे ॥ १३ ॥ अदीणसत्तु संखे सुदंसणे नंदणे य

वोद्धव्वे । ओसप्पिणीए एए तित्थकराणं तु पुव्वभवा ॥ १४ ॥ २४९ ॥ एएसि णं
 चउव्वीसाए तित्थगराणं चउव्वीसं सीयाओ होत्था, तं जहा-सीया सुदंसणा सुप्पभा
 य सिद्धत्थ सुप्पसिद्धा य । विजया य वेजयंती जयंती अपराजिया चेव ॥ १५ ॥
 अरुणप्पभ चंदप्पभ सूरप्पह अग्गि सुप्पभा चेव । विमला य पंचवण्णा सागरदत्ता
 य णागदत्ता य ॥ १६ ॥ अभयकर निव्वुड्ढकरा मणोरमा तह मणोहरा चेव । देव-
 कुरुत्तरकुरा विसाल चंदप्पभा सीया ॥ १७ ॥ एआओ सीआओ सव्वेसि चेव
 जिणवरिंदाणं । सव्वजगवच्छलाणं सव्वोडगसुभाए छायाए ॥ १८ ॥ पुव्वि
 ओक्खित्ता माणुसेहिं साहट्ठु(ट्ठ) रोमकूवेहिं । पच्छा वहंति सीअं असुरिंदसुरिंदना-
 गिंदा ॥ १९ ॥ चलचवलकुंडलधरा सच्छंदविउव्वियाभरणधारी । सुरअसुरवंदि-
 आणं वहंति सीअं जिणंदाणं ॥ २० ॥ पुरओ वहंति देवा नागा पुण दाहिणम्मि
 पासम्मि । पच्चच्छिमेण असुरा गरुला पुण उत्तरे पासे ॥ २१ ॥ उसभो अ
 विणीयाए वारवईए अरिद्धवरणेमी । अवसेसा तित्थयरा निक्खंता जम्मभूमीसु
 ॥ २२ ॥ सव्वे वि एगदूसेण [णिग्गया जिणवरा चउव्वीसं । ण य णाम अण्णलिंगे
 ण य गिहिलिंगे कुलिंगे य ॥ २३ ॥] एक्को भगवं वीरो [पासो मल्ली य तिहि
 तिहि सएहिं । भगवं पि वासुपुज्जो छहिं पुरिससएहिं निक्खंतो ॥ २४ ॥] उग्गाणं
 भोगाणं राइण्णाणं [च खत्तियाणं च । चउहिं सहस्सेहिं उसभो सेसा उ सहस्स-
 परिवारा ॥ २५ ॥] सुमइत्थ णिच्चभत्तेण[णिग्गओ वासुपुज्ज चोत्थेणं । पासो मल्ली य
 अट्ठमेण सेसा उ छट्ठेणं ॥ २६ ॥] एएसि णं चउव्वीसाए तित्थगराणं चउव्वीसं
 पढमभिक्षादायारो होत्था, तं जहा-सिज्जंस वंभदत्ते सुरिददत्ते य इंददत्ते य ।
 पउमे य सोमदेवे माहिंदे तह सोमदत्ते य । पुस्से पुणव्वसू पुण्णणंद सुणंदे जये य
 विजये य । तत्तो य धम्मसीहे सुमित्त तह वग्गसीहे अ ॥ २७ ॥ अपराजिय
 विस्ससेणे वीसइमे होइ उसभसेणे य । दिण्णे वरदत्ते धणे बहुले य आणुपुव्वीए
 ॥ २८ ॥ एए विमुद्धलेसा जिणवरभत्तीइ पंजलिउडा उ । तं कालं तं समयं
 पडिलाभेई जिणवरिंदे ॥ २९ ॥ संवच्छरेण भिक्षा लद्धा उसभेण लोयणाहेण ।
 सेसेहि वीयदिवसे लद्धाओ पढमभिक्षाओ ॥ ३० ॥ उसभस्स पढमभिक्षा
 खोयरसो आसि लोगणाहस्स । सेसाणं परमण्णं अमियरसरसोवमं आसि ॥ ३१ ॥
 सव्वेसिं पि जिणाणं जहियं लद्धाउ पढमभिक्षाउ । तहियं वसुधाराओ सरीरमेत्तीओ
 चुट्ठाओ ॥ ३२ ॥ २५० ॥ एएसिं चउव्वीसाए तित्थगराणं चउव्वीसं चेइयस्क्खा
 [वद्धपीढस्क्खा जेसिं अहे केवलाई उप्पण्णाइं ति] होत्था, तं जहा-णग्गोह सत्तिवण्णे
 साले पियए पियंगु छत्ताहे । सिरिसे य णागस्क्खे माली य पिलंक्खुस्क्खे य ॥ ३३ ॥

तिंदुग पाडल जंवू आसत्ये खलु तहेव दहिवण्णे । णंदीरुक्खे तिलए अंवयरुक्खे असोगे य ॥ ३४ ॥ चंपय वडले य तहा वेडसरुक्खे य धागईरुक्खे । साले य चहुमाणस्स चेइयरुक्खा जिणवराणं ॥ ३५ ॥ वत्तीसं धणुयाइं चेइयरुक्खो य चहुमाणस्स । णिच्चोउगो असोगो ओच्छण्णो सालरुक्खेणं ॥ ३६ ॥ तिण्णे व गाउआइं चेइयरुक्खो जिणस्स उसभस्स । सेसाणं पुण रुक्खा सरीरओ वारसगुणा उ ॥ ३७ ॥ सच्छत्ता सपडागा सवेइया तोरणेहिं उववेया । सुरअसुरगरुलमहिया चेइयरुक्खा जिणवराणं ॥ ३८ ॥ २५१ ॥ एएसिं चउवीसाए तित्थगराणं चउवीसं पढमसीसा होत्था, तं जहा-पढमेत्थ उसभसेणे वीइए पुण होइ सीहसेणे य । चारु य वज्जणाभे चमरे तह सुव्वय विदव्वे ॥ ३९ ॥ दिण्णे य वराहे पुण आणंदे गोयुभे सुहम्मं य । मंदर जसे अरिट्ठे चक्काह सयंभु कुंभे य ॥ ४० ॥ इंदे कुंभे य सुभे वरदत्ते दिण्ण इंदभूई य । उदितोदितकुलवंसा विसुद्धवंसा गुणेहिं उववेया । तित्थप्पवत्तयाणं पढमा सिस्सा जिणवराणं ॥ ४१ ॥ २५२ ॥ एएसिं णं चउवीसाए तित्थगराणं चउवीसं पढमसिस्सिणी होत्था, तं जहा-वंभी य फग्गु सामा अजिया कासवीरई सोमा । सुमणा वारुणि सुलसा धारणि धरणी य धरणिधरा ॥ ४२ ॥ पडमा सिवासुयी तह अंजुया भावियप्पा य रक्खी य । वंधुवती पुप्फवती अज्जा अमिला य अहिया य ॥ ४३ ॥ जक्खिणी पुप्फचूला य चंदणज्जा य आहियाउ । उदितोदितकुलवंसा विसुद्धवंसा गुणेहिं उववेया । तित्थप्पवत्तयाणं पढमा सिस्सी जिणवराणं ॥ ४४ ॥ २५३ ॥ जंबुद्दीवे णं दीवे भारहे वासे इमीसे ओसप्पिणीए वारह चक्कवट्ठिपियरो होत्था, तं जहा-उसमे सुमिते विजए समुद्दविजए य आससेणे य । विस्ससेणे य सूरं सुदंसणे कत्तवीरिए चेव ॥ ४५ ॥ पडमुत्तरे महाहरी विजए राया तहेव य । वंभे वारसमे उत्ते पिउनामा चक्कवट्ठीणं ॥ ४६ ॥ २५४ ॥ जंबुद्दीवे णं दीवे भारहे वासे इमीसे ओसप्पिणीए वारस चक्कवट्ठिमायरो होत्था, तं जहा-सुमंगला जसवती भद्दा सहदेवी अइरा सिरिदेवी । तारा जाला (जाला तारा) मेरा वप्पा चुल्लणि अपच्छिमा ॥ २५५ ॥ जंबुद्दीवे णं दीवे भारहे वासे इमीसे ओसप्पिणीए वारस चक्कवट्ठी होत्था, तं जहा-भरहो सगरो मघवं [सणकुमारो य रायसद्दूलो । संती कुंथू य अरो हवइ सुभूमो य कोरव्वो ॥ ४७ ॥ नवमो य महापडमो हरिसेणो चेव रायसद्दूलो । जयनामो य नरवई, वारसमो वंभदत्तो य ॥ ४८ ॥] एएसिं वारसण्हं चक्कवट्ठीणं वारस इत्थिरयणा होत्था, तं जहा-पढमा होइ सुभद्दा भद्द सुणंदा जया य विजया य । किण्हसिरी सूरसिरी पडमसिरी वसुंधरा देवी ॥ ४९ ॥ लच्छिमई कुस्मई इत्थिरयणाण नामाई ॥ २५६ ॥ जंबुद्दीवे णं दीवे

भारहे वासे इमीसे ओसप्पिणीए नववलदेवनववासुदेवपियरो होत्था, तं जहा-पया-
वई य वंभो [सोमो रुद्धो सिवो महसिवो य । अग्गिसिहो य दसरहो नवमो भणिओ
य वंसुदेवो ॥ ५० ॥] जंबुद्दीवे णं दीवे भारहे वासे इमीसे ओसप्पिणीए णव वासु-
देवमायरो होत्था, तं जहा-मियावई उमा चेव पुहवी सीया य अम्मया । लच्छि-
मई सेसमई केकई देवई तहा ॥ ५१ ॥ जंबुद्दीवे णं दीवे भारहे वासे इमीसे
ओसप्पिणीए णववलदेवमायरो होत्था, तं जहा-भद्दा तह सुभद्दा य सुप्पमा य
सुदंसणा । विजया वेजयंती य जयंती अपराजिया ॥ ५२ ॥ णवमीया रोहिणी य
वलदेवाण मायरो ॥ २५७ ॥ जंबुद्दीवे णं दीवे भारहे वासे इमीसे ओसप्पिणीए
नव दसारसंडला होत्था, तं जहा-उत्तमपुरिसा मज्झिमपुरिसा पहाणपुरिसा ओयंसी
तेयंसी वचंसी जसंसी छांयंसी कंता सोमा सुभगा पियदंसणा सुरुआ सुहसीलसुहाभि-
गमसव्वजणणयणकंता ओहवला अतिवला महावला अनिहता अपराइया सत्तुमहणा
रिपुसहस्समाणमहणा साणुक्कोसा अमच्छरा अचवला अचंडा मियमंजुलपलाव-
हसियगंभीरमधुरपडिपुण्णसच्चवयणा अब्भुवगयवच्छला सरण्णा लक्खणवंजणगुणो-
ववेआ माणुम्माणपमाणपडिपुण्णसुजायसव्वंगसुंदरंगा ससिसोमागारकंतपियदंसणा
अमरिसणा पयंडदंडप्पयारा(र)गंभीरदर(रि)सणिजा तालद्धओव्विद्धगरुलकेऊ महा-
धणुविकट्टया महासत्तसाअरा दुद्धरा धणुद्धरा धीरपुरिसा जुद्धकित्तिपुरिसा विउलकुल-
समुब्भवा महारयणविहाडगा अद्धभरहसामी सोमा रायकुलवंसतिलया अजिया
अजियरहा हलमुसलकणकपाणी संखचक्कगयसत्तिनंदगधरा पवरुजलसुक्कंतविमलगो-
त्थुभतिरीडधारी कुंडलउज्जोइयाणणा पुंडरीयणयणा एकावलिकंठलइयवच्छा सिरिव-
च्छसुलंछणा वरजसा सव्वोउयसुरभिकुसुमरचितपलंबसोभंतकंतविकसंतविचित्तवरमा-
लरइयवच्छा अट्ठसयविभत्तलक्खणपसत्थसुंदरविरइयंगमंगा मत्तगयवरिंदललियविक-
मविलसियगई सारयनवथणियमहुरगंभीरकुंचनिग्घोसदुंदुभिसरा कडिसुत्तगनीलपीय-
कोसेज्जवाससा पवरदित्ततेया नरसीहा नरवई नरिंदा नरवसहा मस्यवसभकप्पा
अब्भहियरायतेयलच्छीए दिप्पमाणा नीलगपीयगवसणा दुवे दुवे रामकेसवा भायरो
होत्था, तं जहा-तिविट्ठू जाव कण्हे अयले जाव रामे यावि अपच्छिमे ॥ ५३ ॥ २५८ ॥
एएसि णं णवण्हं वलदेववासुदेवाणं पुव्वभविआ नव नामधेज्जा होत्था, तं जहा-
विस्सभूर्इ पव्वयए धणदत्त समुद्दत्त इसिवाले । पियमित्त ललियमित्ते पुणव्वसू
गंगदत्ते य ॥ ५४ ॥ एयाइं नामाइं पुव्वभवे आसि वासुदेवाणं । एत्तो बलदेवाणं
जहक्कमं कित्तइस्सामि ॥ ५५ ॥ विसनंदी य सुवंधू सागरदत्ते असोगललिए य ।
वाराह धम्मसेणे अपराइय रायललिए य ॥ ५६ ॥ २५९ ॥ एएसि नवण्हं वलदेव-

वासुदेवाणं पुव्वमविया नव धम्मायरिया होत्था, तं जहा-संभूय सुभद् सुदंसणे य
 सेयंस कण्ह गंगदत्ते अ । सागरसमुद्दनामे दुमसेणे य णवमए ॥ ५७ ॥ एए धम्मा-
 यरिया किर्त्तापुरिसाण वासुदेवाणं । पुव्वमवे एआसिं जत्थ नियाणाइं कासी य
 ॥ ५८ ॥ २६० ॥ एएसिं नवण्हं वासुदेवाणं पुव्वमवे नव नियाणभूमिओ होत्था,
 तं जहा-महुरा य० हत्थिणाउरं च ॥ ५९ ॥ २६१ ॥ एएसिं णं नवण्हं वासुदेवाणं
 नव नियाणकारणा होत्था, तं जहा-गावी जुवे जाव माउआ ॥ ६० ॥ २६२ ॥
 एएसिं नवण्हं वासुदेवाणं नव पडिसत्तू होत्था, तं जहा-अस्सग्गीवे जाव जरासंधे
 ॥ ६१ ॥ एए खलु पडिसत्तू जाव सच्चक्केहिं ॥ ६२ ॥ एक्को य सत्तमीए पंच य
 छट्ठीए पंचनी एक्को । एक्को य चउत्थीए कण्हो पुण तच्चपुढवीए ॥ ६३ ॥ अणिदा-
 णकडा रामा [सव्वे वि य केसवा नियाणकडा । उड्डंगामी रामा केसव सव्वे अहो-
 गामी ॥ ६४ ॥] अट्ठंतकडा रामा एगो पुण वंभल्लोकप्पम्मि । एक्का से गम्भव-
 सही सिज्झिस्सइ आगमिस्सेणं ॥ ६५ ॥ २६३ ॥ जंबुद्दीवे णं दीवे एरवए वासे
 इमीसे ओसप्पिणीए चउव्वीसं तित्थयरा होत्था, तं जहा-चंदाणणं सुचंदं अग्गीसेणं
 च नंदिसेणं च । इसिदिण्णं वइ(व)हारिं वंदिमो सोमचंदं च ॥ ६६ ॥ वंदामि जुत्तिसेणं
 अजियसेणं तहेव तिवसेणं । वुद्धं च देवसम्मं सययं निक्खित्तसत्थं च ॥ ६७ ॥
 असंजलं जिणवसहं वंदे य अणंतयं अमियणाणि । उवसंतं च धुरययं वंदे खलु
 गुत्तिसेणं च ॥ ६८ ॥ अतिपासं च सुपासं देवेसरवंदियं च मरुदेवं । निव्वाणगयं
 च व(व)रं खीणवुहं सामकोट्टं च ॥ ६९ ॥ जियरागमग्गिसेणं वंदे खीणरायमग्गिउत्तं
 च । वोक्कसियपिज्जदोसं वारिसेणं गयं सिद्धिं ॥ ७० ॥ २६४ ॥ जंबुद्दीवे णं दीवे
 आगमिस्साए उस्सप्पिणीए भारहे वासे सत्त कुलगरा भविस्संति, तं जहा-मिय-
 वाहणे सुभूमे य सुप्पमे य सयंपमे । दत्ते सुहुमे सुवंधू य आगमिस्साण होक्खति
 ॥ ७१ ॥ ॥ २६५ ॥ जंबुद्दीवे णं दीवे आगमिस्साए उस्सप्पिणीए एरवए वासे
 दस कुलगरा भविस्संति, तं जहा-विमलवाहणे सीमंकरे सीमंधरे खेमंकरे खेमंधरे
 दढधणू दसधणू सयधणू पडिसूईं सुमइ त्ति ॥ २६६ ॥ जंबुद्दीवे णं दीवे भारहे
 वासे आगमिस्साए उस्सप्पिणीए चउवीसं तित्थगरा भविस्संति, तं जहा-महापउमे
 सूरदेवे, सुपासे य सयंपमे । सव्वाणुभूईं अरहा, देवस्सुए य होक्खई ॥ ७२ ॥
 उदए पैडालपुत्ते य, पोढिले सत्त(त्त)कित्ति य । मुणिसुव्वए य अरहा, सव्वभावविऊ
 जिणे ॥ ७३ ॥ अममे णिक्कसाए य, निप्पुलाए य निम्ममे । चित्तउत्ते समाही य,
 आगमिस्सेण होक्खई ॥ ७४ ॥ संवरे (जसोहरे) अणियट्ठी य, विजए विमलेति य ।
 देवोववाए अरहा, अणंतविजए इय ॥ ७५ ॥ एए वुत्ता चउव्वीसं, भरहे वासम्मि

केवली । आगमिस्सेण होक्खंति, धम्मतित्थस्स देसगा ॥ ७६ ॥ २६७ ॥ एएसि
णं चउव्वीसाए तित्थकराणं पुव्वभविआ चउव्वीसं नामधेज्जा भविस्संति, तं जहा-
सेणिय सुपास उदए पोद्धिळ्ळ अणगार तह दढाळ्ळ य । कत्तिय संखे य तहा नंद
सुनंदे य सतए य ॥ ७७ ॥ वोद्धव्वा देवई य सच्चइ तह वासुदेव वलदेवे ।
रोहिणि सुलसा चेव तत्तो खलु रेवई चेव ॥ ७८ ॥ ततो हवइ सयाली वोद्धव्वे
खलु तहा भयाली य । दीवायणे य कण्हे तत्तो खलु नारए चेव ॥ ७९ ॥ अंवड
दारुमडे य साईवुद्धे य होइ वोद्धव्वे । भावीतित्थगराणं णामाई पुव्वभविआई
॥ ८० ॥ २६८ ॥ एएसि णं चउव्वीसाए तित्थगराणं चउव्वीसं पियरो भवि-
स्संति, चउव्वीसं मायरो भविस्संति, चउव्वीसं पढमसीसा भविस्संति, चउव्वीसं
पढमसिस्सणीओ भविस्संति, चउव्वीसं पढमभिक्षादायगा भविस्संति, चउव्वीसं
चेइयक्खवा भविस्संति ॥ २६९ ॥ जंबुद्दीवे णं दीवे भारहे वासे आगमिस्साए
उस्सप्पिणीए वारस चक्खवट्ठिणो भविस्संति, तं जहा-भरहे य दीहदंते गूढदंते य
सुद्धदंते य । सिरिउत्ते सिरिभूई सिरिसोमे य सत्तमे ॥ ८१ ॥ पउमे य महापउमे
विमलवाहणे विपुलवाहणे चेव । वरिट्ठे वारसमे वुत्ते आगमिसा भरहाहिवा ॥ ८२ ॥
एएसि णं वारसणं चक्खवट्ठीणं वारस पियरो भविस्संति वारस मायरो भविस्संति
वारस इत्थीरयणा भविस्संति ॥ २७० ॥ जंबुद्दीवे णं दीवे भारहे वासे आगमि-
स्साए उस्सप्पिणीए नव वलदेववासुदेवपियरो भविस्संति, नव वासुदेवमायरो
भविस्संति, नव वलदेवमायरो भविस्संति, नव दसारमंडला भविस्संति, तं जहा-
उत्तमपुरिसा मज्झिमपुरिसा पहाणपुरिसा ओयंसी तेयंसी एवं सो चेव वण्णओ
भाणियव्वो जाव नीलगपीतगवसणा दुवे दुवे रामकेसवा भायरो भविस्संति, तं
जहा-नंदे य नंदमित्ते दीहवाहू तहा महावाहू । अइवळे महावळे बलभदे य सत्तमे
॥ ८३ ॥ दुविट्ठू य तिविट्ठू य आगमिस्साण विण्हुणो । जयंते विजये भदे सुप्पमे य
सुदंसणे । आणंदे नंदणे पउमे संकरिसणे य अपच्छिमे ॥ ८४ ॥ २७१ ॥ एएसि
णं नवणं वलदेववासुदेवाणं पुव्वभविआ णव नामधेज्जा भविस्संति, नव धम्माय-
रिया भविस्संति, नव नियाणभूमीओ भविस्संति, नव नियाणकारणा भविस्संति,
नव पडिसत्तू भविस्संति, तं जहा-तिलए य लोहजंघे वइरजंघे य केसरी पहराए ।
अपराइए य भीमे महाभीमे य सुग्गीवे ॥ ८५ ॥ एए खलु पडिसत्तू कित्तीपुरिसाण
वासुदेवाणं । सव्वे वि चक्खजोही हम्मिहंति सचक्केहिं ॥ ८६ ॥ २७२ ॥ जंबुद्दीवे
णं दीवे एरवए वासे आगमिस्साए उस्सप्पिणीए चउव्वीसं तित्थगरा भविस्संति,
तं जहा-सुमंगले अ सिद्धत्थे, निव्वाणे य महाजसे । धम्मज्झए य अरहा, आग-

मिस्साण होक्खई ॥ ८७ ॥ तिरिचंदे पुप्फकेऊ, महाचंदे य केवली । सुयसायरे
य अरहा, आगमिस्साण होक्खई ॥ ८८ ॥ सिद्धत्थे पुण्णघोसे य, महाघोसे य
केवली । सच्चसेणे य अरहा, आगमिस्साण होक्खई ॥ ८९ ॥ सूरसेणे य अरहा,
महासेणे य केवली । सव्वाणंदे य अरहा, देवउत्ते य होक्खई ॥ ९० ॥ सुपासे
सुव्वए अरहा, अरहे य सुकोसले । अरहा अणंतविजए, आगमिस्साण होक्खई
॥ ९१ ॥ विमले उत्तरे अरहा, अरहा य महावले । देवाणंदे य अरहा, आगमि-
स्साण होक्खई ॥ ९२ ॥ एए बुत्ता चउव्वीसं, एरवयंमि केवली । आगमिस्साण
होक्खंति, धम्मतिथ्यस्स देसगा ॥ ९३ ॥ २७३ ॥ वारस चक्कवट्ठिणो भविस्संति,
वारस चक्कवट्ठिपियरो भविस्संति, वारस चक्कवट्ठिमायरो भविस्संति, वारस इत्थी-
रयणा भविस्संति ॥ नव वलदेववासुदेवपियरो भविस्संति, णव वासुदेवमायरो
भविस्संति, णव वलदेवमायरो भविस्संति, णव दसारमंडला भविस्संति, तं जहा-
उत्तमपुरिसा मज्झिमपुरिसा पहाणपुरिसा जाव दुवे दुवे रामकेसवा भायरो भवि-
स्संति, णव पडिसत्तू भविस्संति, नव पुव्वभवणामथेज्जा, नव धम्मायरिया, णव
णियाणभूमीओ, णव णियाणकारणा, आयाए एरवए आगमिस्साए भाणियव्वा ।
एवं दोसु वि आगमिस्साए भाणियव्वा ॥ २७४ ॥ इच्चेयं एवमाहिज्जंति, तं जहा-
कुलगरवंसेइ य एवं तिथ्यगरवंसेइ य चक्कवट्ठिवंसेइ य दसारवंसेइ य गणधरवंसेइ य
इसिवंसेइ य जइवंसेइ य मुणिवंसेइ य । सुएइ वा सुअंगेइ वा सुयसमासेइ वा सुय-
खंधेइ वा समवाएइ वा संखेइ वा सम्मत्तमंगमक्खायं अज्जयणं ति वेमि ॥ २७५ ॥

समवायं चउत्थमंगं समत्तं ॥



णमोऽत्थु णं समणस्स भगवओ णायपुत्तमहावीरस्स

भगवई-विवाहपण्णत्ती

णमो अरिहंताणं णमो सिद्धाणं णमो आयरियाणं णमो उवज्झायाणं णमो लोए
सव्वसाहूणं ॥ १ ॥ णमो वंभीयस्स लिवीयस्स ॥ २ ॥ णमो सुयस्स ॥ ३ ॥ ते
णं काले णं ते णं समए णं रायगिहे नामं णयरे होत्था, वण्णओ, तस्स णं रायगि-
हस्स णगरस्स बहिया उत्तरपुरच्छिमे दिसीभाए गुणसिलए णामं उज्जाणे होत्था,
सेणिए राया, चिल्लणा देवी ॥ ४ ॥ ते णं काले णं ते णं समए णं समणे भगवं
महावीरे आइगरे तित्थगरे सहसंबुद्धे पुरिसुत्तमे पुरिससीहे पुरिसवरपुंडरीए पुरिस-
वरगंधहत्थीए लोगुत्तमे लोगनाहे लोगप्पदीवे लोगपज्जोयगरे अभयदए चक्खुदए
मग्गदए सरणदए [धम्मदए] धम्मदेसए धम्मसारहीए धम्मवरचाउरंतचक्खवट्ठी
अप्पडिहयवरनाणदंसणधरे वियट्ठउमे जिणे जाणए बुद्धे वोहए मुत्ते मोयए सव्वन्नू
सव्वदरिसी सिवमयलमस्यमणंतमक्खयमव्वावाहमपुणरावत्तयं सिद्धिगइनामधेयं ठाणं
संपाविउकामे जाव समोसरणं ॥ ५ ॥ परिसा निग्गया, धम्मो कहिओ, परिसा
पडिगया ॥ ६ ॥ तेणं कालेणं तेणं समएणं समणस्स भगवओ महावीरस्स जेट्ठे
अंतेवासी इंदभूती नामं अणगारे गोयमसगोत्तेणं सत्तुस्सेहे समचउरंससंठाणसंठिए
वज्जरिसहनारायसंधयणे कणगपुलगणिघसपम्हगोरे उग्गतवे दित्ततवे तत्ततवे महातवे
ओराले घोरे घोरगुणे घोरतवस्सी घोरबंभचेरवासी उच्छूढसरीरे संखित्तविउलतेय-
ल्लेसे चोइसपुव्वी चउनाणोवगए सव्वक्खरसन्निवाई समणस्स भगवओ महावीरस्स
अदूरसामंते उड्डंजाणू अहोसिरे ज्ञाणकोट्ठोवगए संजमेणं तवसा अप्पाणं भावेमाणे
विहरइ ॥ ७ ॥ तए णं से भगवं गोयमे जायसद्धे जायसंसए जायकोउहल्ले उप्पन्न-
सद्धे उप्पन्नसंसए उप्पन्नकोउहल्ले संजायसद्धे संजायसंसए संजायकोउहल्ले समुप्पन्न-
सद्धे समुप्पन्नसंसए समुप्पन्नकोउहल्ले उट्ठाए उट्ठेइ उट्ठाए उट्ठेत्ता जेणेव समणे भगवं
महावीरे तेणेव उवागच्छइ उवागच्छित्ता समणं भगवं महावीरं तिक्खुत्तो आया-
हिणपयाहिणं करेइ २ ता वंदइ नमंसइ २ ता णच्चासन्ने णाइदूरे सुस्ससमाणे णमं-
समाणे अभिमुहे विणएणं पंजलिउडे पज्जुवासमाणे एवं वयासी-से नूणं भंते ! चल-
माणे चलिए १, उदीरिज्जमाणे उदीरिए २, वेइज्जमाणे वेइए ३, पहिज्जमाणे पहीणे

१ रायगिह चलण दुक्खे कंखपओसे य पगइ पुढवीओ, जावंते नेरइए वाले
गुरुए य चलणाओ ॥ १ ॥

४, छिज्जमाणे छिन्ने ५, भिज्जमाणे भिन्ने ६, दद्ध (डज्ज) माणे दद्धे ७, मिज्जमाणे मए ८, निज्जरिज्जमाणे निज्जिन्ने ९, हंता गोयमा ! चलमाणे चलिए जाव णिज्ज-
 रिज्जमाणे णिज्जिण्णे ॥ एए णं भंते ! नव पया किं एगट्ठा णाणाघोसा नाणावंजणा
 उदाहु नाणट्ठा नाणाघोसा नाणावंजणा ?, गोयमा ! चलमाणे चलिए १ उदीरिज्ज-
 माणे उदीरिए २ वेइज्जमाणे वेइए ३ पहिज्जमाणे पहीणे ४ ते एए णं चत्तारि पया
 एगट्ठा नाणाघोसा नाणावंजणा उप्पन्नपक्खस्स, छिज्जमाणे छिन्ने भिज्जमाणे भिन्ने
 दद्ध-(डज्ज)-माणे दद्धे मिज्जमाणे मडे निज्जरिज्जमाणे निज्जिण्णे एए णं पंच पया
 णाणट्ठा नाणाघोसा नाणावंजणा विगयपक्खस्स ॥ ८ ॥ नेरइयाणं भंते ! केवइकालं
 ठिई पन्नत्ता ? गोयमा ! जहन्नेणं दस वाससहस्साइं उक्कोसेणं तेत्तीसं सागरोवमाइं
 ठिई प० १ । नेरइयाणं भंते ! केवइकालस्स आणमंति वा पाणमंति वा ऊससंति
 वा णीससंति वा ?, जहा ऊसासपए २ । नेरइया णं भंते आहारट्ठी ?, जहा पन्न-
 वणाए पढमए आहारुद्देसए तहा भाणियव्वं ३ । ठिइ उस्सासाहारे किं वाऽऽहा-
 रेंति ३६ सव्वओ वावि ३७ । कतिभारं ? ३८ सव्वाणि व ३९ कीस व भुज्जो
 परिणमंति ? ४० ॥ १ ॥ ९ ॥ नेरइयाणं भंते ! पुव्वाहारिया पोग्गला परिणया १ ?
 आहारिया आहारिज्जमाणा पोग्गला परिणया २ ?, अणाहारिया आहारिज्जिस्समाणा
 पोग्गला परिणया ३ ?, अणाहारिया अणाहारिज्जिस्समाणा पोग्गला परिणया ४ ?,
 गोयमा ! नेरइयाणं पुव्वाहारिया पोग्गला परिणया १, आहारिया आहारिज्जमाणा
 पोग्गला परिणया परिणमंति य २, अणाहारिया आहारिज्जिस्समाणा पोग्गला नो
 परिणया परिणमिस्संति ३, अणाहारिया अणाहारिज्जिस्समाणा पोग्गला नो परिणता
 णो परिणमिस्संति ४ ॥ १० ॥ नेरइयाणं भंते ! पुव्वाहारिया पोग्गला चिया पुच्छा,
 जहा परिणया तहा चियावि, एवं चिया उवचिया उदीरिया वेइया निज्जिन्ना, गाहा-
 प्ररिणय चिया उवचिय उदीरिया वेइया य निज्जिन्ना । एक्केकंमि पदंमि(मी) चउ-
 व्विहा पोग्गला होंति ॥ १ ॥ ११ ॥ नेरइयाणं भंते ! कइविहा पोग्गला भिज्जंति ?,
 गोयमा ! कम्मदव्ववग्गणमहिक्किच्च दुविहा पोग्गला भिज्जति, तंजहा-अणू चेव
 वायरा चेव १ । नेरइयाणं भंते ! कतिविहा पोग्गला चिज्जंति ?, गोयमा ! आहार-
 दव्ववग्गणमहिक्किच्च दुविहा पोग्गला चिज्जंति, तंजहा-अणू चेव वायरा चेव २ ।
 एवं उवचिज्जंति ३ । नेर० क० पो० उदीरेंति ?, गोयमा ! कम्मदव्ववग्गणमहि-
 किच्च दुविहे पोग्गले उदीरेंति, तंजहा-अणू चेव वायरा चेव, सेसावि एवं चेव
 भाणियव्वा, एवं वेदेंति ५ निज्जरेंति ६ उयट्ठिं ७ उव्वट्ठेंति ८ उव्वट्ठिस्संति ९
 संकामिं १० संकामेंति ११ संकामिस्संति १२ निहत्तिं १३ निहत्तेंति १४ निह-

तिस्संति १५ निकायंसु १६ निकायंति १७ निकाइस्संति १८, सव्वेसुवि कम्मद-
 व्ववग्गणमहिक्किच्च गाहा-भेइयचिया उवचिया उदीरिया वेइया य निज्जिन्ना । उय-
 द्दणसंकायणनिहत्तणनिकायणे तिविह कालो ॥ १ ॥ १२ ॥ नेरइयाणं भंते ! जे
 पोग्गले तेयाकम्मत्ताए गेण्हंति ते किं तीतकालसमए गेण्हंति ? पडुप्पन्नकालसमए
 गेण्हंति ? अणा० का० समए गेण्हंति ?, गोयमा ! नो तीयकालसमए गेण्हंति पडु-
 प्पन्नकालसमए गेण्हंति नो अणा० समए गिण्हंति १ । नेरइयाणं भंते ! जे पोग्गला
 तेयाकम्मत्ताए गहिए उदीरेंति ते किं तीयकालसमयगहिए पोग्गले उदीरेंति पडु-
 प्पन्नकालसमए घेप्पमाणे पोग्गले उदीरेंति गहणसमयपुरक्खडे पोग्गले उदीरेंति ?,
 गोयमा ! अतीयकालसमयगहिए पोग्गले उदीरेंति नो पडुप्पन्नकालसमए घेप्पमाणे
 पोग्गले उदीरेंति नो गहणसमयपुरक्खडे पोग्गले उदीरेंति २, एवं वेदेंति ३
 निज्जरेति ॥ १३ ॥ नेरइयाणं भंते ! जीवाओ किं चलियं कम्मं वंधंति अचलियं
 कम्मं वंधंति ?, गोयमा ! नो चलियं कम्मं वंधंति अचलियं कम्मं वंधंति १ ।
 नेरइयाणं भंते ! जीवाओ किं चलियं कम्मं उदीरेंति अचलियं कम्मं उदीरेंति ?,
 गोयमा ! नो चलियं कम्मं उदीरेंति अचलियं कम्मं उदीरेंति २ । एवं वेदेंति ३
 उयद्वेंति ४ संकामेंति ५ निहत्तेति ६ निकायेंति ७, सव्वेसु अचलियं नो चलियं ।
 नेरइयाणं भंते ! जीवाओ किं चलियं कम्मं निज्जरेति अचलियं कम्मं निज्जरेति ?,
 गोयमा ! चलियं कम्मं निज्जरेति नो अचलियं कम्मं निज्जरेति ८, गाहा-बंधोदय-
 वेदोयद्वसंकमे तह निहत्तणनिकाये । अचलियं कम्मं तु भवे चलियं जीवाउ निज्जरए
 ॥ १ ॥ १४ ॥ एवं ठिई आहारो य भाणियव्वो, ठिती-जहा ठितिपदे तहा
 भाणियव्वा, सव्वजीवाणं आहारोऽवि जहा पन्नवणाए पढमे आहारुद्देसए तहा
 भाणियव्वो, एत्तो आढत्तो-नेरइयाणं भंते ! आहारद्वी ? जाव दुक्खत्ताए भुज्जो
 भुज्जो परिणमंति, गोयमा ! ० । असुरकुमाराणं भंते ! केवइयं कालं ठिई प० ?,
 जहन्नेणं दस वाससहस्साइं उक्कोसेणं सातिरेगं सागरोवमं, असुरकुमाराणं भंते !
 केवइयं कालस्स आणमंति वा पाणमंति वा ?, गोयमा ! जहन्नेणं सत्तण्हं थोवाणं
 उक्कोसेणं साइरेगस्स पक्खस्स आणमंति वा पाणमंति वा, असुरकुमाराणं भंते !
 आहारद्वी ?, हंता आहारद्वी, असुरकुमाराणं भंते ! केवइकालस्स आहारद्वे समु-
 प्पज्जइ ?, गोयमा ! असुरकुमाराणं दुविहे आहारे पन्नत्ते, तंजहा-आभोगनिव्वत्तिए
 य अणाभोगनिव्वत्तिए य, तत्थ णं जे से अणाभोगनिव्वत्तिए से अणुसमयं अविर-
 हिए आहारद्वे समुप्पज्जइ, तत्थ णं जे से आभोगनिव्वत्तिए से जहन्नेणं चउत्थ-
 भत्तस्स उक्कोसेणं साइरेगस्स वाससहस्सस्स आहारद्वे समुप्पज्जइ, असुरकुमाराणं

भंते ! किमाहारमाहारंति ? , गोयमा ! दव्वओ अणंतपएसियाइं दव्वाइं खित्तकाल-
भावपन्नवणागमेणं सेसं -जहा नेरइयाणं जाव तेणं तेसिं पोग्गला कीसत्ताए भुज्जो
भुज्जो परिणमंति ? , गोयमा ! सोइंदियत्ताए सुरुवत्ताए सुवन्नत्ताए ४ इट्ठत्ताए इच्छि-
यत्ताए भिज्जियत्ताए उट्ठत्ताए णो अहत्ताए सुहत्ताए णो दुहत्ताए भुज्जो भुज्जो परिण-
मंति, असुरकुमारा णं पुव्वाहारिया पुग्गला परिणया असुरकुमाराभिलावेण जहा
नेरइयाणं जाव नो अचलियं कम्मं निज्जरंति । नागकुमाराणं भंते ! केवइयं कालं
ठिती प० ? , गोयमा ! जहन्नेणं दस वाससहस्साइं उक्कोसेणं देसूणाइं दो पलिओव-
माइं, नागकुमाराणं भंते ! केवइकालस्स आणमंति वा पा० ? , गोयमा ! जहन्नेणं
सत्तण्हं थोवाणं उक्कोसेणं मुहुत्तपुहुत्तस्स आणमंति वा पा०, नागकुमाराणं आहा-
रट्ठी ? , हंता आहारट्ठी, नागकुमाराणं भंते ! केवइकालस्स आहारट्ठे समुप्पज्जइ ? ,
गोयमा ! नागकुमाराणं दुविहे आहारे पन्नत्ते, तंजहा-आभोगनिव्वत्तिए य अणा-
भोगनिव्वत्तिए य, तत्थ णं जे से अणाभोगनिव्वत्तिए से अणुसमयमविरहिए
आहारट्ठे समुप्पज्जइ, तत्थ णं जे से आभोगनिव्वत्तिए से जहन्नेणं चउत्थमत्तस्स
उक्कोसेणं दिवसपुहुत्तस्स आहारट्ठे समुप्पज्जइ, सेसं जहा असुरकुमाराणं जाव नो
अचलियं कम्मं निज्जरंति । एवं सुवन्नकुमारावि जाव थणियकुमाराणंति । पुढविका-
इयाणं भंते ! केवइयं कालं ठिई प० ? , गोयमा ! जहन्नेणं अंतोमुहुत्तं उक्कोसेणं
वावीसं वाससहस्साइं, पुढविकाइया केवइकालस्स आणमंति वा पा० ? , गो०
वेमाय० आणमंति वा पा० ? पुढविकाइयाणं आहारट्ठी ? , हंता आहारट्ठी, पुढ-
विकाइयाणं केवइकालस्स आहारट्ठे समुप्पज्जइ ? , गोयमा ! अणुसमयं अविरहिए
आहारट्ठे समुप्पज्जइ, पुढविकाइया किमाहारंति ! , गोयमा ! दव्वओ जहा नेरइयाणं
जाव निव्वाघाएणं छद्दिसिं वाघायं पडुच्च सिय तिदिसि सिय चउद्दिसि सिय पंच-
दिसिं, वन्नओ कालनीलपीतलोहियहालिद्दुक्खिक्खाणि, गंधओ सुरभिगंध २ -रसओ
तित्त ५ फासओ कक्खड ८ सेसं तहेव, णाणत्तं कइभागं आहारंति ? कइभागं
फासाइंति ? , गोयमा ! असंखिज्जइभागं आहारेन्ति अणंतभागं फासाइंति जाव
तेसिं पोग्गला कीसत्ताए भुज्जो भुज्जो परिणमंति ? , गोयमा ! फासिंदियवेमायत्ताए
भुज्जो भुज्जो परिणमंति, सेसं जहा नेरइयाणं जाव नो अचलियं कम्मं निज्जरंति ।
एवं जाव वणस्सइकाइयाणं, नवरं ठिती वन्नेयव्वा जाव (इया) जस्स, उस्तासो
वेमायाए । वेइंदियाणं ठिई भाणियव्वा ऊस्तासो वेमायाए, वेइंदियाणं आहारे
पुच्छा, गोयमा ! आभोगनिव्वत्तिए य अणाभोगनिव्वत्तिए य तहेव, तत्थ णं जे
से आभोगनिव्वत्तिए से णं असंखेज्जसमए अंतोमुहुत्तिए वेमायाए आहारट्ठे समु-

पप्पज्जइ, सेसं तहेव जाव अणंतभागं आसायंति, बेइंदियाणं भंते ! जे पोग्गले आहारत्ताए गेण्हंति ते किं सव्वे आहारेंति णो सव्वे आहारेंति ?, गोयमा ! बेइंदियाणं दुविहे आहारे पन्नत्ते, तंजहा-लोमाहारे पक्खेवाहारे य, जे पोग्गले लोमाहारत्ताए गिण्हंति ते सव्वे अपरिसेसिए आहारेंति, जे पोग्गले पक्खेवाहारत्ताए गिण्हंति तेसिणं पोग्गलाणं असंखिज्जइभागं आहारेंति अणेगाइं च णं भागसहस्साइं अणासाइज्जमाणाइं अफासिज्जमाणाइं विद्धंसमागच्छंति, एएसि णं भंते ! पोग्गलाणं अणासाइज्जमाणाणं अफासाइज्जमाणाणं य कयरे कयरे अप्पा वा वहुया वा तुल्ला वा विसेसाहिया वा ?, गोयमा ! सव्वत्थोवा पुग्गला अणासाइज्जमाणा अफासाइज्जमाणा अणंतगुणा, बेइंदियाणं भंते ! जे पोग्गला आहारत्ताए गिण्हंति ते णं तेसिं पुग्गला कीसत्ताए भुज्जो भुज्जो परिणमंति ?, गोयमा ! जिब्भिंदियफासिंदियवेमायत्ताए भुज्जो भुज्जो परिणमंति, बेइंदियाणं भंते ! पुव्वाहारिया पुग्गला परिणया तहेव जाव चलियं कम्मं निज्जरंति । तेइंदियचउरिंदियाणं णाणत्तं ठिइए जाव नेगाइं च णं भागसहस्साइं अणाघाइज्जमाणाइं अणासाइज्जमाणाइं अफासाइज्जमाणाइं विद्धंसमागच्छंति, एएसिणं भंते ! पोग्गलाणं अणाघाइज्जमाणाइं ३ पुच्छा, गोयमा ! सव्वत्थोवा पोग्गला अणाघाइज्जमाणा अणासाइज्जमाणा अणंतगुणा अफासाइज्जमाणा अणंतगुणा, तेइंदियाणं घाणिंदियजिब्भिंदियफासिंदियवेमायाए भुज्जो २ परिणमंति, चउरिंदियाणं चक्खिंदियघाणिंदियजिब्भिंदियफासिंदियत्ताए भुज्जो भुज्जो परिणमंति । पंचिंदियतिरिक्खजोणियाणं ठिई भणिऊणं ऊसासो वेमायाए, आहारो अणाभोगनिव्वत्तिए अणुसमयं अविरहिओ, आभोगनिव्वत्तओ जहन्नेणं अंतोमुहुत्तस्स उक्कोसेणं अट्ठमत्तस्स, सेसं जहा चउरिंदियाणं जाव चलियं कम्मं निज्जरेंति । एवं मणुस्साणवि, नवरं आभोगनिव्वत्तिए जहन्नेणं अंतोमुहुत्तं उक्कोसेणं अट्ठमत्तस्स सोइंदियवेमायत्ताए भुज्जो भुज्जो परिणमंति सेसं जहा चउरिंदियाणं, तहेव जाव निज्जरेंति । वाणमंतराणं ठिईए नाणत्तं, परिणमंति अवसेसं जहा नागकुमारणं, एवं जोइसियाणवि, नवरं उस्सासो जहन्नेणं मुहुत्तपुहुत्तस्स उक्कोसेणवि मुहुत्तपुहुत्तस्स, आहारो जहन्नेणं दिवसपुहुत्तस्स उक्कोसेणवि दिवसपुहुत्तस्स सेसं तहेव । वेमाणियाणं ठिई भाणियव्वा ओहिया, ऊसासो जहन्नेणं मुहुत्तपुहुत्तस्स उक्कोसेणं तेत्तीसाए पक्खाणं, आहारो आभोगनिव्वत्तिओ जहन्नेणं दिवसपुहुत्तस्स उक्कोसेणं तेत्तीसाए वाससहस्साणं, सेसं चलियाइयं तहेव जाव निज्जरेंति ॥ १५ ॥ जीवा णं भंते ! किं आयारंभा परारंभा तदुभयारंभा अनारम्भा ?, गोयमा ! अत्थेगइया जीवा आयारंभावि परारंभावि तदुभयारंभावि नो अणारंभा अत्थेगइया जीवा नो आयारंभा

नो परारंभा नो तदुभयारंभा अणारंभा ॥ से केणट्टेणं भंते ! एवं वुच्चइ-अत्ये-
गइया जीवा आयारंभावि ? एवं पड्डिउच्चारयेय्वं, गोयमा ! जीवा दुविहा पण्णत्ता,
तंजहा-संसारसमावन्नगा य असंसारसमावन्नगा य, तत्थ णं जे ते असंसार-
समावन्नगा ते णं सिद्धा, सिद्धा णं नो आयारंभा जाव अणारम्भा, तत्थ णं
जे ते संसारसमावन्नगा ते दुविहा पन्नत्ता, तंजहा-संजया य असंजया य, तत्थ
णं जे ते संजया ते दुविहा पण्णत्ता, तंजहा-पमत्तसंजया य अप्पमत्तसंजया य,
तत्थ णं जे ते अप्पमत्तसंजया ते णं नो आयारंभा नो परारंभा जाव अणारंभा,
तत्थ णं जे ते पमत्तसंजया ते सुहं जोगं पडुच्च नो आयारंभा नो परारंभा जाव
अणारंभा, असुभं जोगं पडुच्च आयारंभावि जाव नो अणारंभा, तत्थ णं जे ते
असंजया ते अविरतिं पडुच्च आयारंभावि जाव नो अणारंभा, से तेणट्टेणं गोयमा !
एवं वुच्चइ-अत्येगइया जीवा जाव अणारंभा ॥ नेरइयारणं भंते ! किं आयारंभा
परारंभा तदुभयारंभा अणारंभा ?, गोयमा ! नेरइया आयारंभावि जाव नो अणा-
रंभा, से केणट्टेणं भन्ते एवं वुच्चइ ?, गोयमा ! अविरतिं पडुच्च, से तेणट्टेणं जाव
नो अणारंभा, एवं जाव असुरकुमाराणवि जाव पंचिदियतिरिक्खजोणिया, मणुस्सा
जहा जीवा, नवरं सिद्धविरहिया भाणियव्वा, वाणमंतरा जाव वेमाणिया जहा नेर-
इया । सलेस्सा जहा ओहिया, कण्हलेसस्स नीललेसस्स काउलेसस्स जहा ओहिया
जीवा, नवरं पमत्तअप्पमत्ता न भाणियव्वा, तेउलेसस्स पम्हलेसस्स सुक्कलेसस्स
जहा ओहिया जीवा, नवरं सिद्धा न भाणियव्वा ॥ १६ ॥ इहभविए भंते ! नाणे
परभविए नाणे तदुभयभविए नाणे ?, गोयमा ! इहभविएवि नाणे परभविएवि नाणे
तदुभयभविएवि नाणे । दंसणंपि एवमेव । इहभविए भंते ! चरित्ते परभविए चरित्ते
तदुभयभविए चरित्ते ?, गोयमा ! इहभविए चरित्ते नो परभविए चरित्ते नो तदुभय-
भविए चरित्ते । एवं तवे संजमे ॥ १७ ॥ असंवुडे णं भंते ! अणगारे किं सिज्झइ
वुज्झइ मुच्चइ परिनिव्वाइ सव्वदुक्खाणमंतं करेइ ?, गोयमा ! नो इणट्टे समट्टे ।
से केणट्टेणं जाव नो अंतं करेइ ?, गोयमा ! असंवुडे अणगारे आउयवज्जाओ सत्त
कम्मपगडीओ सिद्धिलवंधणवद्धाओ धणियवंधणवद्धाओ पकरेइ हस्सकालठिइयाओ
दीहकालठिइयाओ पकरेइ मंदाणुभावाओ तिब्वाणुभावाओ पकरेइ अप्पपएसग्गाओ
वहुप्पएसग्गाओ पकरेइ आउयं च णं कम्मं सिय वंधइ सिय नो वंधइ अस्साया-
वेयणिज्जं च णं कम्मं भुज्जो भुज्जो उवचिणाइ अणाइयं च णं अणवदग्गं दीहमद्धं
चाउरंतसंसारकंतारं अणुपरियट्ठइ, से एण्णट्टेणं गोयमा ! असंवुडे अणगारे णो
सिज्झइ ५ । संवुडे णं भंते ! अणगारे सिज्झइ ५ ?, हंता सिज्झइ जाव अंतं

करेइ, से केणट्टेणं ?, गोयमा ! संवुडे अणगारे आउयवज्जाओ सत्त कम्मपगढीओ धणियबंधणवद्धाओ सिढिलबंधणवद्धाओ पकरेइ दीहकालठिईयाओ हस्सकालट्टिइयाओ पकरेइ तिन्वाणुभावाओ मंदाणुभावाओ पकरेइ बहुप्पएसग्गाओ अप्पएसग्गाओ पकरेइ, आउयं च णं कम्मं न वंधइ, अस्सायावेयणिज्जं च णं कम्मं नो भुज्जो भुज्जो उवचिणाइ, अणाइयं च णं अणवदग्गं दीहमद्धं चाउरंतसंसारकंतारं वीइवयइ, से एणट्टेणं गोयमा ! एवं वुच्चइ-संवुडे अणगारे सिज्जइ जाव अंतं करेइ ॥ १८ ॥ जीवे णं भंते ! अस्संजए अविरए अप्पडिहयपच्चक्खायपावकम्मे इओ चुए पेच्चा देवे सिया ?, गोयमा ! अत्थेगइए देवे सिया अत्थेगइए नो देवे सिया । से केणट्टेणं जाव इओ चुए पेच्चा अत्थेगइए देवे सिया अत्थेगइए नो देवे सिया ?, गोयमा ! जे इमे जीवा गामागरनगरनिगमरायहाणिखेडकब्बडमडंबदोणमुहपट्टणासमसन्निवेसेसु अकामतण्हाए अकामछुहाए अकामवंभचेरवासेणं अकामसीतातवदंसमसगअण्हाणगसेयजल्लमलपंकपरिदाहेणं अप्पतरं वा भुज्जतरं वा कालं अप्पाणं परिकिलेसंति अप्पाणं परिकिलेसित्ता कालमासे कालं किच्चा अन्नयरेसु वाणमंतरेसु देवलोगेसु देवत्ताए उववत्तारो भवंति ॥ केरिसाणं भंते ! तेसिं वाणमंतराणं देवाणं देवलोगा पण्णत्ता ?, गोयमा ! से जहानामए-इहं मणुस्सलोगंमि असोगवणे इ वा सत्तवन्नवणे इ वा चंपयवणे इ वा चूयवणे इ वा तिलगवणे इ वा लाउयवणे इ वा निग्गोहवणे इ वा छत्तोववणे इ वा असणवणे इ वा सणवणे इ वा अयसिवणे इ वा कुसुंभवणे इ वा सिद्धत्थवणे इ वा वंधुजीवगवणे इ वा णिच्चं कुसुमियमाइयलवइयथवइयगुलइयगुच्छियजमलियजुवलियविणमियपणमियसुविभत्तपिडिमंजरिवडेंसगधरे सिरीए अतीव अतीव उवसोभेमाणे उवसोभेमाणे चिद्धइ, एवामेव तेसिं वाणमंतराणं देवाणं देवलोगा जहन्नेणं दसवाससहस्सट्ठितीएहिं उक्कोसेणं पलिओवमट्ठितीएहिं वट्ठहिं वाणमंतरेहिं देवेहिं तद्देवीहि य आइण्णा वितिकिण्णा उवत्थंडा संथंडा फुडा अवगाढगाढसिरीए अतीव अतीव उवसोभेमाणा चिद्धंति, एरिसगाणं गोयमा ! तेसिं वाणमंतराणं देवाणं देवलोगा प०, से तेणट्टेणं गोयमा ! एवं वुच्चइ-जीवे णं असंजए जाव देवे सिया । सेवं भंते ! सेवं भंते ! त्ति भगवं गोयमे समणं भगवं महावीरं वंदति नमंसति वंदइत्ता नमंसइत्ता संजमेणं तवसा अप्पाणं भावेमाणे विहरति ॥ १९ ॥ पढमे सए पढमो उद्देसो समत्तो ॥

रायगिहे नगरे समोसरणं, परिसा निग्गया जाव एवं वयासी-जीवे णं भंते ! संयंकडं दुक्खं वेदेइ ?, गोयमा ! अत्थेगइयं वेएइ अत्थेगइयं नो वेएइ, से केणट्टेणं भंते ! एवं वुच्चइ-अत्थेगइयं वेदेइ अत्थेगइयं नो वेएइ ?, गोयमा ! उदिन्नं वेएइ

अणुदिन्नं नो वेएइ, से तेणट्ठेणं एवं वुच्चइ-अत्थेगइयं वेएइ अत्थेगतिं नो वेएइ, एवं चउव्वीसदंडएणं जाव वेमाणिए ॥ जीवा णं भंते ! सयंकडं दुक्खं वेएन्ति ?, गोयमा ! अत्थेगइयं वेयन्ति अत्थेगइयं णो वेयन्ति, से केणट्ठेणं ?, गोयमा ! उदिन्नं वेयन्ति नो अणुदिन्नं वेयन्ति, से तेणट्ठेणं, एवं जाव वेमाणिया ॥ जीवे णं भंते ! सयंकडं आउयं वेएइ ? गोयमा ! अत्थेगइयं वेएइ अत्थेगइयं नो वेएइ जहा दुक्खेणं दो दंडगा तहा आउएणावि दो दंडगा एगत्तपुहुत्तिया, एगत्तेणं जाव वेमाणिया पुहुत्तेणावि तहेव ॥ २० ॥ नेरइया णं भंते ! सव्वे समाहारा सव्वे समसरीरा सव्वे समुस्सासनीसासा ?, गोयमा ! नो इणट्ठे समट्ठे । से केणट्ठेणं भंते ! एवं वुच्चइ नेरइया नो सव्वे समाहारा नो सव्वे समसरीरा नो सव्वे समुस्सासनिस्सासा ?, गोयमा ! नेरइया दुविहा पन्नत्ता, तंजहा-महासरीरा य अप्पसरीरा य, तत्थ णं जे ते महासरीरा ते बहुतराए पोग्गले आहारेंति बहुतराए पोग्गले परिणामेंति बहुतराए पोग्गले उस्ससंति बहुतराए पोग्गले नीससंति अभिक्खणं आहारेंति अभिक्खणं परिणामेंति अभिक्खणं उस्ससंति अभिक्खणं नी०, तत्थ णं जे ते अप्पसरीरा ते णं अप्पतराए पुग्गले आहारेंति अप्पतराए पुग्गले परिणामेंति अप्पतराए पोग्गले उस्ससंति अप्पतराए पोग्गले नीससंति आहच्च आहारेंति आहच्च परिणामेंति आहच्च उस्ससंति आहच्च नीससंति, से तेणट्ठेणं गोयमा ! एवं वुच्चइ-नेरइया नो सव्वे समाहारा जाव नो सव्वे समुस्सासनिस्सासा ॥ नेरइया णं भंते ! सव्वे समक्कम्मा ?, गोयमा ! णो इणट्ठे समट्ठे, से केणट्ठेणं ?, गोयमा ! नेरइया दुविहा पण्णत्ता, तंजहा-पुव्वोववन्नगा य पच्छोववन्नगा य, तत्थ णं जे ते पुव्वोववन्नगा ते णं अप्पक्कम्मतरागा, तत्थ णं जे ते पच्छोववन्नगा ते णं महाक्कम्मतरागा, से तेणट्ठेणं गोयमा ! ० ॥ नेरइया णं भंते ! सव्वे समवन्ना ?, गोयमा ! नो इणट्ठे समट्ठे, से केणट्ठेणं तहेव ? गोयमा ! जे ते पुव्वोववन्नगा ते णं विसुद्धवन्नतरागा, तत्थ णं जे ते पच्छोववन्नगा ते णं अविमुद्धवन्नतरागा तहेव से तेणट्ठेणं एवं० ॥ नेरइया णं भंते ! सव्वे समलेस्सा ?, गोयमा ! नो इणट्ठे समट्ठे, से केणट्ठेणं जाव नो सव्वे समलेस्सा ?, गोयमा ! नेरइया दुविहा पण्णत्ता, तंजहा-पुव्वोववन्नगा य पच्छोववन्नगा य, तत्थ णं जे ते पुव्वोववन्नगा ते णं विसुद्धलेस्सतरागा, तत्थ णं जे ते पच्छोववन्नगा ते णं अविमुद्धलेस्सतरागा, से तेणट्ठेणं ० ॥ नेरइया णं भंते ! सव्वे समवेयणा ?, गोयमा ! नो इणट्ठे समट्ठे, से केणट्ठेणं ?, गोयमा ! नेरइया दुविहा पन्नत्ता, तंजहा-सन्निभूया य असन्निभूया य, तत्थ णं जे ते सन्निभूया ते णं महावेयणा, तत्थ णं जे ते असन्निभूया ते णं अप्पवेयणतरागा, से तेणट्ठेणं गोयमा ! ० ॥ नेरइया

सव्वे समकिरिया ?, गोयमा ! नो इणट्ठे समट्ठे, से केणट्ठेणं ?, गोयमा ! नेरइया तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी, तत्थ णं जे ते सम्मदिट्ठी तेसि णं चत्तारि किरियाओ पण्णत्ताओ, तंजहा—आरंभिया १ परि० २ माया० ३ अप्पच्च० ४, तत्थ णं जे ते मिच्छादिट्ठी तेसि णं पंच किरियाओ कज्जंति-आरंभिया जाव मिच्छादंसणवत्तिया, एवं सम्मामिच्छादिट्ठीणंपि, से तेणट्ठेणं गोयमा ! ० ॥ नेरइया णं भंते ! सव्वे समाउया सव्वे समोववन्नगा ?, गोयमा ! नो इणट्ठे समट्ठे, से केणट्ठेणं ?, गोयमा ! नेरइया चउव्विहा प०, तंजहा-अत्थेगइया समाउया समोववन्नगा १ अत्थेगइया समाउया विसमोववन्नगा २ अत्थेगइया विसमाउया समोववन्नगा ३ अत्थेगइया विसमाउया विसमोववन्नगा ४ से तेणट्ठेणं गोयमा ! ० ॥ असुरकुमारा णं भंते ! सव्वे समाहारा सव्वे समसरीरा, जहा नेरइया तहा भाणियव्वा, नवरं कम्मवन्नलेस्साओ परिवण्णोयव्वाओ, पुव्वोववन्नगा महा-कम्मतरागा अविसुद्धवन्नतरागा अविसुद्धलेसतरागा, पच्छोववन्नगा पसत्था, सेसं तहेव, एवं जाव थणियकुमाराणं । पुढविकाइयाणं आहारकम्मवन्नलेस्सा जहा नेरइयाणं ॥ पुढविकाइया णं भंते ! सव्वे समवेयणा ?, हंता समवेयणा, से केणट्ठेणं भंते ! समवेयणा ?, गोयमा ! पुढविकाइया सव्वे असन्नी असन्निभूया अणि-दाए वेयणं वेदंति से तेणट्ठेणं ॥ पुढविकाइया णं भंते ! सव्वे समकिरिया ? हंता समकिरिया, से केणट्ठेणं ?, गोयमा ! पुढविकाइया सव्वे माई मिच्छादिट्ठी ताणं णिययाओ पंच किरियाओ कज्जंति, तंजहा-आरंभिया जाव मिच्छादंसणवत्तिया, से तेणट्ठेणं समाउया समोववन्नगा, जहा नेरइया तहा भाणियव्वा, जहा पुढविकाइया तहा जाव चउरिदिया । पंचिदियतिरिक्खजोणिया जहा नेरइया नाणत्तं किरियाओ, पंचिदियतिरिक्खजोणिया णं भंते ! सव्वे समकिरिया ?, गो०, णो ति०, से केणट्ठेणं ? गो० पंचिदियतिरिक्खजोणिया तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी, तत्थ णं जे ते सम्मदिट्ठी ते दुविहा प०, तंजहा-अस्संजया य संजयासंजया य, तत्थ णं जे ते संजयासंजया तेसिणं तिन्नि किरियाओ कज्जंति, तंजहा-आरंभिया परिग्गहिया मायावत्तिया, असंजयाणं चत्तारि, मिच्छादिट्ठीणं पंच, सम्मामिच्छादिट्ठीणं पंच, मणुस्सा जहा नेरइया नाणत्तं जे महासरीरा ते बहुतराए पोग्गले आहारंति आहच्च आहारंति जे अप्पसरीरा ते अप्पतराए आहारंति अभिक्खणं आहारंति सेसं जहा नेरइयाणं जाव वेयणा । मणुस्सा णं भंते ! सव्वे समकिरिया ?, गोयमा ! णो तिणट्ठे समट्ठे, से केणट्ठेणं ?, गोयमा ! मणुस्सा तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी, तत्थ णं

जे ते सम्मदिट्ठी ते तिविहा प०, तंजहा-संजया अस्संजया संजयासंजया य, तत्थ
 णं जे ते संजया ते दुविहा प०, तंजहा-सरागसंजया य वीयरगसंजया य, तत्थ
 णं जे ते वीयरगसंजया ते णं अकिरिया, तत्थ णं जे ते सरागसंजया ते दुविहा
 प०, तंजहा-पमत्तसंजया य अपमत्तसंजया य, तत्थ णं जे ते अप्पमत्तसंजया तेसिणं
 एगा मायावत्तिया किरिया कज्जइ, तत्थ णं जे ते पमत्तसंजया तेसिणं दो किरियाओ
 कज्जंति, तं०-आरंभिया य मायावत्तिया य, तत्थ णं जे ते संजयासंजया तेसि णं
 आइत्ताओ तिन्नि किरियाओ कज्जंति, तंजहा-आरंभिया १ परिगहिया २ मायावत्तिया
 ३, अस्संजयाणं चत्तारि किरियाओ कज्जंति-आरं० १ परि० २ मायावत्तिया ३ अप्प-
 च्च० ४, मिच्छादिट्ठीगं पंच-आरंभि० १ परि० २ माया० ३ अप्पच्च० ४ मिच्छा-
 दंसण० ५, सम्मामिच्छादिट्ठीगं पंच ५ । वाणमंतरजोतिसवेमाणिया जहा असुरकु-
 मारा, नवरं वेयणाए नाणत्तं-मायिमिच्छादिट्ठीउववन्नगा य अप्पवेदणतरा अमायि-
 सम्मदिट्ठीउववन्नगा य महावेयणतरागा भाणियव्वा, जोतिसवेमाणिया ॥ सलेस्सा
 णं भंते ! नेरइया सव्वे समाहारगा ?, ओहिया णं सलेस्साणं सुक्कलेस्साणं, एएसि णं
 तिण्हं एक्को गमो, कण्हलेस्साणं नीललेस्साणंपि एक्को गमो नवरं वेदणाए मायिमि-
 च्छादिट्ठीउववन्नगा य अमायिसम्मदिट्ठीउवव० भाणियव्वा । मणुस्सा किरियासु
 सरागवीयरगपमत्तापमत्ता ण भाणियव्वा । काउलेसाएवि एसेव गमो, नवरं नेरइए
 जहा ओहिए दंडए तहा भाणियव्वा, तेउलेस्सा पम्हलेस्सा जस्स अत्थि जहा ओहिओ
 दंडओ तहा भाणियव्वा नवरं मणुस्सा सरागा वीयरगा य न भाणियव्वा, गाहा-
 दुक्खाउए उदिन्ने आहारं कम्मवन्नलेस्सा य । समवेयणसमकिरिया समाउए चेव
 बोद्धव्वा ॥ १॥ २१॥ कइ णं भंते ! लेस्साओ पन्नत्ताओ ?, गोयमा ! छल्लेसाओ पन्नत्ता,
 तंजहा-लेसाणं वीयओ उद्देसओ भाणियव्वो जाव इट्ठी ॥ २२ ॥ जीवस्स णं भंते !
 तीतद्धाए आदिट्ठस्स कइविहे संसारसंचिट्ठणकाले पण्णत्ते ?, गोयमा ! चउव्विहे संसा-
 रसंचिट्ठणकाले पण्णत्ते, तंजहा-णेरइयसंसारसंचिट्ठणकाले तिरिक्ख० मणुस्स० देवसं-
 सारसंचिट्ठणकाले य पण्णत्ते ॥ नेरइयसंसारसंचिट्ठणकाले णं भंते ! कतिविहे पण्णत्ते ?,
 गोयमा ! तिविहे पण्णत्ते, तंजहा-सुन्नकाले असुन्नकाले मिस्सकाले ॥ तिरिक्खजोणि-
 यसंसार पुच्छा, गोयमा ! दुविहे पन्नत्ते, तंजहा-असुन्नकाले य मिस्सकाले य, मणु-
 स्साण य देवाण य जहा नेरइयाणं ॥ एयस्स णं भंते ! नेरइयसंसारसंचिट्ठणका-
 लस्स सुन्नकालस्स असुन्नकालस्स मीसकालस्स य कयरेरहितो अप्पा वा वहुए वा
 तुल्ले वा विसेसाहिए वा ?, गोयमा ! सव्व० असुन्नकाले मिस्सकाले अणंतगुणे सुन्न-
 काले अणंतगुणे ॥ तिरि० जो० भंते ! सव्व० असुन्नकाले मिस्सकाले अणंतगुणे,

अणुस्सदेवाण य जहा नेरइयाणं ॥ एयस्स णं भंते ! नेरइयस्स संसारसंचिट्ठणका-
लस्स जाव देवसंसारसंचिट्ठण जाव विसेसाहिए वा ?, गोयमा ! सव्वत्थोवे मणुस्ससं-
सारसंचिट्ठणकाले, नेरइयसंसारसंचिट्ठणकाले असंखेज्जगुणे, देवसंसारसंचिट्ठणकाले
असंखेज्जगुणे, तिरिक्खजोणिए अणंतगुणे ॥ २३ ॥ जीवे णं भंते ! अंतकिरियं
करेज्जा ?, गोयमा ! अत्येगतिया करेज्जा अत्येगतिया नो करेज्जा, अंतकिरियापयं
नेयव्वं ॥ २४ ॥ अह भंते ! असंजयभवियदव्वदेवाणं १ अविराहियसंजमाणं २
विराहियसं० ३ अविराहियसंजमासंज० ४ विराहियसंजमासं० ५ असन्नीणं ६
त्तावसाणं ७ कंदप्पियाणं ८ चरगपरिव्वायगाणं ९ किव्विसियाणं १० तेरिच्छि-
याणं ११ आजीवियाणं १२ आभिओगियाणं १३ सल्लिगीणं दंसणवावन्नगाणं १४
एएसि णं देवलोगेसु उववज्जमाणाणं कस्स कहिं उववाए पण्णत्ते ?, गोयमा ! अस्सं-
जयभवियदव्वदेवाणं जहन्नेणं भवणवासीसु उक्कोसेणं उवरिमगेवेज्जएसु १, अविरा-
हियसंजमाणं जहन्नेणं सोहम्मे कप्पे उक्कोसेणं सव्वट्ठसिद्धे विमाणे २, विराहियसंज-
माणं जहन्नेणं भवणवासीसु उक्कोसेणं सोहम्मे कप्पे ३, अविराहियसंजमा० २ णं
जह० सोहम्मे कप्पे उक्कोसेणं अच्चुए कप्पे ४, विराहियसंजमासं० जहन्नेणं भवण-
वासीसु उक्कोसेणं जोतिसिएसु ५, असन्नीणं जहन्नेणं भवणवासीसु उक्कोसेणं वाणमंत-
रेसु ६, अवसेसा सव्वे जह० भवणवा० उक्कोसगं वोच्छामि-तावसाणं जोतिसिएसु,
कंदप्पियाणं सोहम्मे, चरगपरिव्वायगाणं वंभलोए कप्पे, किव्विसियाणं लंतगे कप्पे,
तेरिच्छियाणं सहस्सारे कप्पे, आजीवियाणं अच्चुए कप्पे, आभिओगियाणं अच्चुए
कप्पे, सल्लिगीणं दंसणवावन्नगाणं उवरिमगेवेज्जएसु १४ ॥ २५ ॥ कतिविहे णं भंते !
असन्निआउए पण्णत्ते ?, गोयमा ! चउव्विहे असन्निआउए पण्णत्ते, तंजहा-नेरइय-
असन्निआउए तिरिक्ख० मणुस्स० देव० । असन्नी णं भंते ! जीवे कि नेरइयाउयं
पकरेइ तिरि० मणु० देवाउयं पकरेइ ?, हंता गोयमा ! नेरइयाउयंपि पकरेइ तिरि०
मणु० देवाउयंपि पकरेइ, नेरइयाउयं पकरेमाणे जहन्नेणं दसवाससहस्साइं उक्कोसेणं
पलिओवमस्स असंखेज्जइभागं पकुरेति तिरिक्खजोणियाउयं पकरेमाणे जहन्नेणं
अंतोमुहुत्तं उक्कोसेणं पलिओवमस्स असंखेज्जइभागं पकरेइ, मणुस्साउएवि एवं चेव,
देवाउयं जहा नेरइया ॥ एयस्स णं भंते ! नेरइयअसन्निआउयस्स तिरि० मणु०
देवअसन्निआउयस्स कयरे कयरे जाव विसेसाहिए वा ?, गोयमा ! सव्वत्थोवे देव-
असन्निआउए, मणुस्स० असंखेज्जगुणे, तिरिय० असंखेज्जगुणे, नेरइए० असंखेज्ज-
गुणे । सेवं भंते ! सेवं भंते ! त्ति ॥ २६ ॥ वित्तिओ उद्देसओ समत्तो ॥
जीवाणं भंते ! कंखामोहणिज्जे कम्मे कडे ?, हंता कडे ॥ से भंते ! किं देसेणं

देसे कडे ? १ देसेणं सव्वे कडे ? २ सव्वेणं देसे कडे ? ३ सव्वेणं सव्वे कडे ?
 ४, गोयमा ! नो देसेणं देसे कडे १ नो देसेणं सव्वे कडे २ नो सव्वेणं देसे कडे
 ३ सव्वेणं सव्वे कडे ४ ॥ नेरइया णं भंते ! कंखामोहणिज्जे कम्मं कडे ?, हंता कडे,
 जाव सव्वेणं सव्वे कडे ४ । एवं जाव वेमाणियाणं दंडओ भाणियव्वो ॥ २७ ॥
 जीवा णं भंते ! कंखामोहणिज्जं कम्मं करिंसु ?, हंता करिंसु । तं भंते ! किं देसेणं
 देसं करिंसु ?, एएणं अभिलावेणं दंडओ भाणियव्वो जाव वेमाणियाणं, एवं करेति
 एत्थवि दंडओ जाव वेमाणियाणं, एवं करेस्संति, एत्थवि दंडओ जाव वेमाणियाणं ॥
 एवं चिए चिणिंसु चिणंति चिणिस्संति, उवचिए उवचिणिंसु उवचिणंति उवचिणि-
 स्संति, उदीरेंसु उदीरेंति उदीरेस्संति, वेदिंसु वेदंति वेदिस्संति, निज्जरेंसु निज्जरेति
 निज्जरेस्संति, गाहा-कडचिया उवचिया उदीरिया वेदिया य निज्जिज्ञा । आदितिए
 चउभेदा तियभेदा पच्छिमा तिज्जि ॥ १ ॥ २८ ॥ जीवा णं भंते ! कंखामोहणिज्जं
 कम्मं वेदेंति ?, हंता वेदेंति । कहञ्जं भंते ! जीवा कंखामोहणिज्जं कम्मं वेदेंति ?,
 गोयमा ! तेहिं तेहिं कारणेहिं संकिया कंखिया वितिगिच्छिया भेदसमावन्ना कलुस-
 समावन्ना, एवं खलु जीवा कंखामोहणिज्जं कम्मं वेदेंति ॥ २९ ॥ से नूणं भंते !
 तमेव सच्चं णीसंकं जं जिणेहिं पवेइयं ?, हंता गोयमा ! तमेव सच्चं णीसंकं जं
 जिणेहिं पवेदितं ॥ ३० ॥ से नूणं भंते ! एवं मणं धारेमाणे एवं पकरेमाणे एवं
 चिट्ठेमाणे एवं संवरेमाणे आणाए आराहए भवति ?, हंता गोयमा ! एवं मणं धारे-
 माणे जाव भवइ ॥ ३१ ॥ से नूणं भंते ! अत्थित्तं अत्थित्ते परिणमइ नत्थित्तं नत्थित्ते
 परिणमइ ?, हंता गोयमा ! जाव परिणमइ ॥ जण्णं भंते ! अत्थित्तं अत्थित्ते परिण-
 मइ नत्थित्तं नत्थित्ते परिणमइ तं किं पयोगसा वीससा ?, गोयमा ! पयोगसावि तं
 वीससावि तं, जहा ते भंते ! अत्थित्तं अत्थित्ते परिणमइ तहा ते नत्थित्तं नत्थित्ते
 परिणमइ ? जहा ते नत्थित्तं नत्थित्ते परिणमइ तहा ते अत्थित्तं अत्थित्ते परिणमइ ?,
 हंता गोयमा ! जहा मे अत्थित्तं अत्थित्ते परिणमइ तहा मे नत्थित्तं नत्थित्ते परिण-
 मइ, जहा मे नत्थित्तं नत्थित्ते परिणमइ तहा मे अत्थित्तं अत्थित्ते परिणमइ ॥ से
 णूणं भंते ! अत्थित्तं अत्थित्ते गमणिज्जं जहा परिणमइ दो आलावगा तहा ते इह
 गमणिज्जेणवि दो आलावगा भाणियव्वा जाव जहा मे अत्थित्तं अत्थित्ते गमणिज्जं
 ॥ ३२ ॥ जहा ते भंते ! एत्थ गमणिज्जं तहा ते इहं गमणिज्जं जहा ते इहं गमणिज्जं
 तहा ते एत्थं गमणिज्जं ?, हंता ! गोयमा !, जहा मे एत्थं गमणिज्जं जाव तहा
 मे एत्थं (इहं) गमणिज्जं ॥ ३३ ॥ जीवाणं भंते ! कंखामोहणिज्जं कम्मं वंधंति ?, हंता !
 वंधंति । कहं णं भंते ! जीवा कंखामोहणिज्जं कम्मं वंधंति ?, गोयमा ! पमादपच्चया

जोगनिमित्तं च ॥ से णं भंते ! पमाए किंपवहे ?, गोयमा ! जोगप्पवहे । से णं भंते !
जोए किंपवहे ?, गोयमा ! वीरियप्पवहे । से णं भंते वीरेए किंपवहे ?, गोयमा !
सरीरेप्पवहे । से णं भंते ! सरीरे किंपवहे ?, गोयमा ! जीवप्पवहे । एवं सति अत्थि
उट्ठाणे ति वा कम्मे ति वा वले इ वा वीरेए इ वा पुरिसक्कारपरक्कमे इ वा ॥ ३४ ॥
से णूणं भंते ! अप्पणा चेव उदीरेइ अप्पणा चेव गरहइ अप्पणा चेव संवरइ ?,
हंता ! गोयमा ! अप्पणा चेव तं चेव उच्चारयेय्वं ३ ॥ जं तं भंते ! अप्पणा चेव
उदीरेइ अप्पणा चेव गरहेइ अप्पणा चेव संवरेइ तं कि उदिन्नं उदीरेइ १ अणु-
दिन्नं उदीरेइ २ अणुदिन्नं उदीरणाभवियं कम्मं उदीरेइ ३ उदयाणंतरपच्छाकडं
कम्मं उदीरेइ ४ ?, गोयमा ! नो उदिण्णं उदीरेइ १ नो अणुदिन्नं उदीरेइ २ अणु-
दिन्नं उदीरणाभवियं कम्मं उदीरेइ ३ णो उदयाणंतरपच्छाकडं कम्मं उदीरेइ ४ ॥
जं तं भंते ! अणुदिन्नं उदीरणाभवियं कम्मं उदीरेइ तं कि उट्ठाणेणं कम्मेणं वलेणं
वीरेएणं पुरिसक्कारपरक्कमेणं अणुदिन्नं उदीरणाभवियं क० उदी० ? उदाहु तं
अणुट्ठाणेणं अक्कमेणं अवलेणं अवीरेएणं अपुरिसक्कारपरक्कमेणं अणुदिन्नं उदीरणा-
भवियं कम्मं उदी० ?, गोयमा ! तं० उट्ठाणेणवि कम्मे० वले० वीरेए० पुरि-
सक्कारपरक्कमेणवि अणुदिन्नं उदीरणाभवियं कम्मं उदीरेइ, णो तं अणुट्ठाणेणं अक्क-
म्मेणं अवलेणं अवीरेएणं अपुरिसक्कार० अणुदिन्नं उदी० भ० क० उदी०, एवं
सति अत्थि उट्ठाणे इ वा कम्मे इ वा वले इ वा वीरेए इ वा पुरिसक्कारपरक्कमे इ
वा ॥ से नूणं भंते ! अप्पणा चेव उवसामेइ अप्पणा चेव गरहइ अप्पणा चेव
संवरइ ?, हंता गोयमा ! एत्थ वि तहेव भाणियव्वं, नवरं अणुदिन्नं उवसामेइ सेसा
पडिसेहेयव्वा तिञ्चि ॥ जं तं भंते ! अणुदिन्नं उवसामेइ तं कि उट्ठाणेणं जाव पुरि-
सक्कारपरक्कमेति वा, से नूणं भंते ! अप्पणा चेव वेदेइ अप्पणा चेव गरहइ ?,
एत्थवि सच्चेव परिवाडी, नवरं उदिन्नं वेएइ नो अणुदिन्नं वेएइ, एवं जाव पुरि-
सक्कारपरक्कमे इ वा । से नूणं भंते ! अप्पणा चेव निज्जरेति अप्पणा चेव गरहइ,
एत्थवि सच्चेव परिवाडी नवरं उदयाणंतरपच्छाकडं कम्मं निज्जरेइ एवं जाव परिक-
मेइ वा ॥ ३५ ॥ नेरइयाणं भंते ! कंखामोहणिज्जं कम्मं वेएन्ति ?, जहा ओहिया
जीवा तहा नेरइया, जाव थणियकुमारा ॥ पुढविकाइयाणं भंते ! कंखामोहणिज्जं
कम्मं वेइंति, हंता वेइंति, कहण्णं भंते ! पुढविका० कंखामोहणिज्जं कम्मं वेदेति ?,
गोयमा ! तेसिणं जीवाणं णो एवं तक्का इ वा सण्णा इ वा पण्णा इ वा मणे इ वा
वइ ति वा—अम्हे णं कंखामोहणिज्जं कम्मं वेएसो, वेएंति पुंण ते । से णूणं भंते !
तमेव सच्चं नीसंकं जं जिणेहिं पवेइयं, सेसं तं चेव, जाव पुरिसक्कारपरक्कमेइ वा ।

एवं जाव चउरिदियाणं पंचिदियतिरिक्खजोणिया जाव वेमाणिया जहा ओहिया जीवा ॥ ३६ ॥ अत्थि णं भंते ! समणावि निग्गंथा कंखामोहणिज्जं कम्मं वेएन्ति ?, हंता अत्थि, कहं भंते ! समणा निग्गंथा कंखामोहणिज्जं कम्मं वेएन्ति ?, गोयमा तोहिं २ नाणंतरेहिं दंसणंतरेहिं चरित्तंतरेहिं लिंगंतरेहिं पवयणंतरेहिं पावयणंतरेहिं कप्पंतरेहिं मग्गंतरेहिं सतंतरेहिं भंगंतरेहिं णयंतरेहिं नियमंतरेहिं पमाणंतरेहिं संकिया कंखिया वित्तिगिच्छिया भेयसमावन्ना कल्लुससमावन्ना, एवं खलु समणा निग्गंथा कंखामोहणिज्जं कम्मं वेइति, से नूणं भंते ! तमेव सच्चं नीसंकं जं जिणेहिं पवेइयं, हंता गोयमा ! तमेव सच्चं नीसंकं, जाव पुरिसक्कारपरक्कमेइ वा सेवं भंते ! सेवं भंते ! ॥ ३७ ॥ पढमसए तत्तिओ उद्देसओ समत्तो ॥

क्रति णं भंते ! कम्मप्पगडीओ पण्णत्ताओ ? गोयमा ! अट्ट कम्मप्पगडीओ पण्णत्ताओ, कम्मप्पगडीए पढमो उद्देसो नेयव्वो जाव अणुभागो सम्मत्तो । गाहा-कइ पयडी कह वंधइ कइहि व ठाणेहि वंधइ पयडी । कइ वेदेइ य पयडी अणुभागो कइविहो कस्स ? ॥ १ ॥ ३८ ॥ जीवे णं भंते ! मोहणिज्जेणं कडेणं कम्मेणं उदिन्नेणं उवट्ठाएज्जा ? हंता उवट्ठाएज्जा । से भंते ! किं वीरियत्ताए उवट्ठाएज्जा अवीरियत्ताए उवट्ठाएज्जा ? गोयमा ! वीरियत्ताए उवट्ठाएज्जा नो अवीरियत्ताए उवट्ठाएज्जा, जइ वीरियत्ताए उवट्ठाएज्जा किं वालवीरियत्ताए उवट्ठाएज्जा पंडियवीरियत्ताए उवट्ठाएज्जा वालपंडियवीरियत्ताए उवट्ठाएज्जा ?, गोयमा ! वालवीरियत्ताए उवट्ठाएज्जा णो पंडियवीरियत्ताए उवट्ठाएज्जा णो वालपंडियवीरियत्ताए उवट्ठाएज्जा । जीवे णं भंते ! मोहणिज्जेणं कडेणं कम्मेणं उदिन्नेणं अवक्कमेज्जा ? हंता अवक्कमेज्जा, से भंते ! जाव वालपंडियवीरियत्ताए अवक्कमेज्जा ३?, गोयमा ! वालवीरियत्ताए अवक्कमेज्जा नो पंडियवीरियत्ताए अवक्कमेज्जा, सिय वालपंडियवीरियत्ताए अवक्कमेज्जा । जहा उदिन्नेणं दो आलावगा तहा उवसंतेणवि दो आलावगा भाणियव्वा, नवरं उवट्ठाएज्जा पंडियवीरियत्ताए अवक्कमेज्जा वालपंडियवीरियत्ताए ॥ से भंते ! किं आयाए अवक्कमइ ? अणायाए अवक्कमइ ? गोयमा ! आयाए अवक्कमइ णो अणायाए अवक्कमइ, मोहणिज्जं कम्मं वेएमाणे से कहमेयं भंते ! एवं ? गोयमा ! पुर्व्वि से एयं एवं रोयइ इयाणि से एयं एवं नो रोयइ एवं खलु एवं ॥ ३९ ॥ से नूणं भंते ! नेरइयस्स वा तिरिक्खजोणियस्स वा मणूसस्स वा देवस्स वा जे कडे पावे कम्मे नत्थि तस्स अवेइत्ता मोक्खो ?, हंता गोयमा ! नेरइयस्स वा तिरिक्ख० मणु० देवस्स वा जे कडे पावे कम्मे नत्थि तस्स अवेइत्ता मोक्खो । से केणट्ठेणं भंते ! एवं वुच्चति-नेरइयस्स वा जाव मोक्खो, एवं खलु मए गोयमा ! दुविहे कम्मे पण्णत्ते, तंजहा-पएसकम्मे य अणुभागकम्मे य,

तत्थ णं जं तं पएसकम्मं तं नियमा वेएइ, तत्थ णं जं तं अणुभागकम्मं तं अत्ये-
गइयं वेएइ अत्येगइयं नो वेएइ । णायमेयं अरहया सुयमेयं अरहया विनायमेयं
अरहया इमं कम्मं अयं जीवे अज्झोवगमियाए वेयणाए वेदिस्सइ इमं कम्मं अयं
जीवे उवक्कमियाए वेदणाए वेदिस्सइ, अहाकम्मं अहानिकरणं जहा जहा तं भग-
वया दिट्ठं तहा तहा तं विप्परिणमिस्सतीति, से तेणट्ठेणं गोयमा ! नेरइयस्स वा
४ जाव मोक्खो ॥ ४० ॥ एस णं भंते ! पोग्गले तीतमणंतं सासयं समयं भुवीति
वत्तव्वं सिया ?, हंता गोयमा ! एस णं पोग्गले अतीतमणंतं सासयं समयं भुवीति
वत्तव्वं सिया । एस णं भंते ! पोग्गले पडुप्पन्नसासयं समयं भवतीति वत्तव्वं
सिया ?, हंता गोयमा ! तं चेव उच्चारैयव्वं । एस णं भंते ! पोग्गले अणागयमणंतं
सासयं समयं भविस्सतीति वत्तव्वं सिया ?, हन्ता गोयमा ! तं चेव उच्चारैयव्वं ।
एवं खंधेणवि तिन्नि आलावगा, एवं जीवेणवि तिन्नि आलावगा भाणियव्वा ॥ ४१ ॥
छउमत्थे णं भंते ! मणूसे अतीतमणंतं सासयं समयं भुवीति केवलेणं संजमेणं केवलेणं
संवरेणं केवलेणं वंभचेरवासेणं केवलाहिं पवयणमाईहिं सिज्झिस्सु वुज्झिस्सु जाव सव्व-
दुक्खाणमंतं करिंस्सु ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ तं चेव
जाव अंतं करेंस्सु ? गोयमा ! जे केइ अंतकरा वा अंतिमसरीरिया वा सव्वदुक्खाण-
मंतं करेंस्सु वा करेति वा करिस्संति वा सव्वे ते उप्पन्नानाणदंसणधरा अरहा जिणे
केवली भविता तथो पच्छा सिज्झंति वुज्झंति मुच्चंति परिनिव्वायंति सव्वदुक्खाण-
मंतं करेंस्सु वा करेति वा करिस्संति वा, से तेणट्ठेणं गोयमा ! जाव सव्वदुक्खाण-
मंतं करेंस्सु, पडुप्पन्नेऽवि एवं चेव नवरं सिज्झंति भाणियव्वं, अणागएवि एवं चेव,
नवरं त्सिज्झिस्संति भाणियव्वं, जहा छउमत्थो तहा आहोहिओवि तहा परमाहोहि-
ओऽवि तिन्नि तिन्नि आलावगा भाणियव्वा । केवली णं भंते ! मणूसे तीतमणंतं
सासयं समयं जाव अंतं करेंस्सु ? हंता सिज्झिस्सु जाव अंतं करेंस्सु, एते तिन्नि आला-
वगा भाणियव्वा छउमत्थस्स जहा नवरं सिज्झिस्सु सिज्झंति सिज्झिस्संति । से णूणं
भंते ! तीतमणंतं सासयं समयं पडुप्पन्नं वा सासयं समयं अणागयमणंतं वा सासयं
समयं जे केइ अंतकरा वा अंतिमसरीरिया वा सव्वदुक्खाणमंतं करेंस्सु वा करेति वा
करिस्संति वा सव्वे ते उप्पन्नानाणदंसणधरा अरहा जिणे केवली भविता तथो पच्छा
सिज्झंति जाव अंतं करेस्संति वा ? हंता गोयमा ! तीतमणंतं सासयं समयं जाव
अंतं करेस्संति वा । से नूणं भंते ! उप्पन्नानाणदंसणधरे अरहा जिणे केवली अलम-
त्युत्ति वत्तव्वं सिया ? हंता गोयमा ! उप्पन्नानाणदंसणधरे अरहा जिणे केवली अलम-
त्युत्ति वत्तव्वं सिया । सेवं भंते ! सेवं भंते ! त्ति ॥ ४२ ॥ चउत्थो उद्देसो समत्तो ॥

कति णं भंते ! पुढवीओ पन्नत्ताओ ?, गोयमा ! सत्त पुढवीओ पन्नत्ताओ, तंजहा-
 रयणप्पभा जाव तमतमा ॥ इमीसे णं भंते ! रयणप्पभाए पुढवीए कति निरया-
 वाससयसहस्सा प० ?, गोयमा ! तीसं निरयावाससयसहस्सा प०, गाहा—तीसा
 य पन्नवीसा पन्नरस दसेव या सयसहस्सा । तिन्नेगं पंचूणं पंचेव अणुत्तरा निरया
 ॥ १ ॥ केवइया णं भंते ? असुरकुमारावाससयसहस्सा प० ?, एवं—चउसट्ठी
 असुराणं चउरासीई य होइ नागाणं । वावत्तरिं सुवन्नाण वाउकुमाराण छन्नउई
 ॥ १ ॥ दीवदिसाउदहीणं विज्जुकुमारिंदयणियमग्गीणं । छण्हं पि जुयलयाणं छावत्त-
 रिमो सयसहस्सा ॥ २ ॥ केवइया णं भंते ! पुढविकाइयावाससयसहस्सा प० ?,
 गोयमा ! असंखेज्जा पुढविकाइयावाससयसहस्सा प०, गोयमा ! जाव असंखिज्जा
 जोतिसियविमाणावाससयसहस्सा प० । सोहम्मे णं भंते ! कप्पे केवइया विमाणा-
 वाससयसहस्सा प० ?, गोयमा ! वत्तीसं विमाणावाससयसहस्सा प०, एवं—वत्ती-
 सट्ठावीसा वारस अट्ठ चउरो सयसहस्सा । पन्ना चत्तालीसा छच्च सहस्सा सह-
 स्सारे ॥ १ ॥ आणयपाणयकप्पे चत्तारि सयाऽऽरणञ्चुए तिन्नि । सत्त विमाणसयाई
 चउसुवि एएसु कप्पेसुं ॥ २ ॥ एकारसुत्तरं हेट्ठिमेसु सत्तुत्तरं सयं च मज्झिमए ।
 सयमेगं उवरिमए पंचेव अणुत्तरविमाणा ॥ ३ ॥ ४३ ॥ पुढवि द्विति ओगाहन-
 सरीरसंचयणमेव संठाणे । लेस्सा दिट्ठी णाणे जोगुवओगे य दस ठाणा ॥ १ ॥
 इमीसे णं भंते ! रयणप्पभाए पुढवीए तीसाए निरयावाससयसहस्सेसु एगमेगंसि
 निरयावासंसि नेरइयाणं केवइया ठितिठाणा प० ?, गोयमा ! असंखेज्जा ठितिठाणा
 प०, तंजहा—जहन्निया ठिती समयाहिया जहन्निया ठिई दुसमयाहिया जाव
 असंखेज्जसमयाहिया जहन्निया ठिई तप्पाउग्गुक्कोसिया ठिती ॥ इमीसे णं भंते
 रयणप्पभाए पुढवीए तीसाए निरयावाससयसहस्सेसु एगमेगंसि निरयावासंसि
 जहन्नियाए ठितीए वट्ठमाणा नेरइया किं कोहोवउत्ता माणोवउत्ता मायोवउत्ता
 लोभोवउत्ता ?, गोयमा ! सव्वेवि ताव होज्जा कोहोवउत्ता १, अहवा कोहोवउत्ता य
 माणोवउत्ते य २, अहवा कोहोवउत्ता य माणोवउत्ता य ३, अहवा कोहोवउत्ता य
 मायोवउत्ते य ४, अहवा कोहोवउत्ता य मायोवउत्ता य ५, अहवा कोहोवउत्ता य
 लोभोवउत्ते य ६, अहवा कोहोवउत्ता य लोभोवउत्ता य ७ । अहवा कोहोवउत्ता
 य माणोवउत्ते य मायोवउत्ते य १, कोहोवउत्ता य माणोवउत्ते य मायोवउत्ता य
 २, कोहोवउत्ता य माणोवउत्ता य मायोवउत्ते य ३, कोहोवउत्ता य माणोवउत्ता य
 मायोवउत्ता य ४ एवं कोहमाणलोभेणवि चउ ४, एवं कोहमायालोभेणवि चउ ४
 एवं १२, पच्छा माणेण मायाए लोभेण य कोहो भइयव्वो, ते कोहं असुंचता ८,

एवं सत्तावीसं भंगा णेयव्वा ॥ इमीसे णं भंते ! रयणप्पभाए पुढवीए तीसाए निरयावाससयसहस्सेसु एगमेगंसि निरयावासंसि समयाहियाए जहन्नट्ठितीए वट्टमाणा नेरइया किं कोहोवउत्ता माणोवउत्ता मायोवउत्ता लोभोवउत्ता ?, गोयमा ! कोहोवउत्ते य माणोवउत्ते य मायोवउत्ते य लोभोवउत्ते य, कोहोवउत्ता य माणोवउत्ता य मायोवउत्ता य लोभोवउत्ता य, अहवा कोहोवउत्ते य माणोवउत्ते य, अहवा कोहोवउत्ते य माणोवउत्ता य एवं असीति भंगा नेयव्वा, एवं जाव संखिज्जसमयाहिया ठिई असंखेज्जसमयाहियाए ठिईए तप्पाउग्गुक्कोसियाए ठिईए सत्तावीसं भंगा भाणियव्वा ॥ ४४ ॥ इमीसे णं भंते ! रयणप्पभाए पुढवीए तीसाए निरयावाससयसहस्सेसु एगमेगंसि निरयावासंसि नेरइयाणं केवइया ओगाहणाठाणा पन्नत्ता ?, गोयमा ! असंखेज्जा ओगाहणाठाणा पन्नत्ता, तंजहा-जहन्निया ओगाहणा अंगुलस्स असंखेज्जइभागं जहणिया ओगाहणा एगपदेसाहिया जहन्निया ओगाहणा, दुप्पएसहिया जहन्निया ओगाहणा, जाव असंखिज्जपएसहिया जहन्निया ओगाहणा, तप्पाउग्गुक्कोसिया ओगाहणा ॥ इमीसे णं भंते ! रयणप्पभाए पुढवीए तीसाए निरयावाससयसहस्सेसु एगमेगंसि निरयावासंसि जहन्नियाए ओगाहणाए वट्टमाणा नेरइया किं कोहोवउत्ता ?, असीइभंगा भाणियव्वा जाव संखिज्जपएसहिया जहन्निया ओगाहणा, असंखेज्जपएसहियाए जहन्नियाए ओगाहणाए वट्टमाणानं तप्पाउग्गुक्कोसियाए ओगाहणाए वट्टमाणानं नेरइयाणं दोसुवि सत्तावीसं भंगा ॥ इमीसे णं भंते ! रयण० जाव एगमेगंसि निरयावासंसि नेरइयाणं कइ सरीरया पणत्ता ?, गोयमा ! तिन्नि सरीरया पणत्ता, तंजहा-वेउव्विए तेयए कम्मए ॥ इमीसे णं भंते ! जाव वेउव्वियसरीरे वट्टमाणा नेरइया किं कोहोवउत्ता ? सत्तावीसं भंगा भाणियव्वा, एएणं गमएणं तिन्नि सरीरा भाणियव्वा ॥ इमीसे णं भंते ! रयणप्पभाए पुढवीए जाव नेरइयाणं सरीरया किं संघयणी पन्नत्ता ?, गोयमा ! छण्हं संघयणाणं अस्संघयणी, नेवट्ठी नेव छिरा नेव ण्हारुणि जे पोग्गला अणिट्ठा अकंता अप्पिया असुहा अमणुज्जा अमणामा, एतेसिं सरीरसंघायत्ताए परिणमंति ॥ इमीसे णं भंते ! जाव छण्हं संघयणाणं असंघयणे वट्टमाणानं नेरइया किं कोहोवउत्ता ? सत्तावीसं भंगा ॥ इमीसे णं भंते ! रयणप्पभा जाव सरीरिया किंसंठिया पन्नत्ता ?, गोयमा ! दुविहा पन्नत्ता, तंजहा-भवधारणिज्जा य उत्तरविउव्विया य, तत्थ णं जे ते भवधारणिज्जा ते हुंडसंठिया पणत्ता, तत्थ णं जे ते उत्तरवेउव्विया तेवि हुंडसंठिया पणत्ता । इमीसे णं जाव हुंडसंठाणे वट्टमाणा नेरइया किं कोहोवउत्ता ? सत्तावीसं भंगा ॥ इमीसे णं भंते ! रयणप्पभाए पुढवीए नेरइयाणं कति लेस्साओ पन्नत्ता ?, गोयमा !

एगा काउलेस्सा पणत्ता । इमीसे णं भंते ! रयणप्पभाए जाव काउलेस्साए वट्ट-
 माणा सत्तावीसं भंगा ॥ ४५ ॥ इमीसे णं जाव किं सम्मद्दिट्ठी मिच्छादिट्ठी सम्मा-
 मिच्छादिट्ठी ?, तिञ्चिवि । इमीसे णं जाव सम्मद्दंसणे वट्टमाणा नेरइया सत्तावीसं
 भंगा, एवं मिच्छादंसणेवि, सम्मामिच्छादंसणे असीति भंगा ॥ इमीसे णं भंते !
 जाव किं नाणी अन्नाणी ?, गोयमा ! नाणीवि अन्नाणीवि, तिञ्चि नाणाइं नियमा,
 तिञ्चि अन्नाणाइं भयणाए । इमीसे णं भंते ! जाव आभिणिबोहियनाणे वट्टमाणा
 सत्तावीसं भंगा, एवं तिञ्चि नाणाइं तिञ्चि अन्नाणाइं भाणियव्वाइं ॥ इमीसे णं जाव
 किं मणजोगी वइजोगी कायजोगी, ? तिञ्चिवि । इमीसे णं जाव मणजोए वट्टमाणा
 कोहोवउत्ता ?, सत्तावीसं भंगा । एवं वइजोए एवं कायजोए ॥ इमीसे णं जाव नेर-
 इया किं सागारोवउत्ता अणागारोवउत्ता ?, गोयमा ! सागारोवउत्तावि अणागारो-
 वउत्तावि । इमीसे णं जाव सागारोवओगे वट्टमाणा किं कोहोवउत्ता ?, सत्तावीसं
 भंगा । एवं अणागारोवउत्तावि सत्तावीसं भंगा ॥ एवं सत्तावि पुढवीओ नेयव्वाओ,
 णाणत्तं लेसासु गाहा—काऊ य दोसु तइयाए मीसिया नीलिया चउत्थीए । पंच-
 मियाए मीसा कग्हा तत्तो परमकग्हा ॥ १ ॥ ४६ ॥ चउसट्ठीए णं भंते ! असुर-
 कुमारावाससयसहस्सेसु एगमेगंसि असुरकुमारावासंसि असुरकुमाराणं केवइया ठिइ-
 ठाणा प० ?, गोयमा ! असंखेज्जा ठितिठाणा प०, जहन्निया ठिई जहा नेरइया
 तहा, नवरं पडिलोमा भंगा भाणियव्वा-सव्वेवि ताव होज्ज लोभोवउत्ता, अहवा
 लोभोवउत्ता य मायोवउत्ते य, अहवा लोभोवउत्ता य मायोवउत्ता य, एएणं गमेणं
 नेयव्वं जाव थणियकुमाराणं, नवरं णाणत्तं जार्णियव्वं ॥ ४७ ॥ असंखेज्जेसु णं
 भंते ! पुढविकाइयावाससयसहस्सेसु एगमेगंसि पुढविकाइयावासंसि पुढविकाइयाणं
 केवतिया ठितिठाणा प० ?, गोयमा ! असंखेज्जा ठितिठाणा प०, तंजहा-जहन्निया
 ठिई जाव तप्पाउग्गुक्कोसिया ठिई । असंखेज्जेसु णं भंते ! पुढविकाइयावाससयसह-
 स्सेसु एगमेगंसि पुढविकाइयावासंसि जहन्नियाए ठितीए वट्टमाणा पुढविकाइया किं
 कोहोवउत्ता मागोवउत्ता मायोवउत्ता लोभोवउत्ता ?, गोयमा ! कोहोवउत्तावि माणो-
 चउत्तावि मायोवउत्तावि लोभोवउत्तावि, एवं पुढविकाइयाणं सव्वेसुवि ठाणेसु अभं-
 गयं, नवरं तेउलेस्साए असीति भंगा, एवं आउक्काइयावि, तेउक्काइयाउक्काइयाणं
 सव्वेसुवि ठाणेसु अभंगयं ॥ वणस्सइकाइया जहा पुढविकाइया ॥ ४८ ॥ वेइंदिय-
 तेइंदियचउरिदियाणं जेहिं ठाणेहिं नेरइयाणं असीइभंगा तेहिं ठाणेहिं असीइं
 चेव, नवरं अब्भहिया सम्मत्ते आभिणिबोहियनाणे सुयनाणे य, एएहिं असीइभंगा,
 जेहिं ठाणेहिं नेरइयाणं सत्तावीसं भंगा तेसु ठाणेसु सव्वेसु अभंगयं ॥ पंचिदिय-

तिरिक्खजोणिया जहा नेरइया तहा भाणियव्वा, नवरं जेहिं सत्तावीसं भंगा तेहिं अभंगयं कायव्वं जत्थ असीति तत्थ असीतिं चेव ॥ मणुस्साणवि जेहि ठाणेहिं नेरइयाणं असीतिभंगा तेहिं ठाणेहिं मणुस्साणवि असीतिभंगा भाणियव्वा, जेनु ठाणेसु सत्तावीसा तेसु अभंगयं, नवरं मणुस्साणं अब्भहियं जहन्निया ठिई आहारए य असीति भंगा ॥ वाणमंतरजोइसवेमाणिया जहा भवणवासी, नवरं णाणत्तं जाणियव्वं जं जस्स, जाव अणुत्तरा, सेवं भंते ! सेवं भंते ! ति ॥ ४९ ॥

पढमसयस्स पंचमो उद्देसो समत्तो ॥

जावइयाओ य णं भंते ! उवासंतराओ उदयंते सूरिए चक्खुप्फासं हव्वमागच्छति अत्थमंतेविय णं सूरिए तावइयाओ चेव उवासंतराओ चक्खुप्फासं हव्वमागच्छति ?, हंता ! गोयमा ! जावइयाओ णं उवासंतराओ उदयंते सूरिए चक्खुप्फासं हव्वमागच्छति अत्थमंतेवि सूरिए जाव हव्वमागच्छति । जावइयणं भंते ! खित्तं उदयंते सूरिए आतावेणं सव्वओ समंता ओभासेइ उज्जोएइ तवेइ पभासेइ, अत्थमंतेविय णं सूरिए तावइयं चेव खित्तं आयावेणं सव्वओ समंता ओभासेइ उज्जोएइ तवेइ पभासेइ ?, हंता गोयमा ! जावतियणं खेत्तं जाव पभासेइ ॥ तं भंते ! किं पुट्ठं ओभासेइ अपुट्ठं ओभासेइ ?, जाव छद्दिसिं ओभासेति, एवं उज्जोवेइ तवेइ पभासेइ जाव नियमा छद्दिसि ॥ से नूणं भंते ! सव्वंति सव्वावंति फुसमाणकालसमयंसि जावतियं खेत्तं फुसइ तावतियं फुसमाणे पुट्ठेत्ति वत्तव्वं सिया ?, हंता ! गोयमा ! सव्वंति जाव वत्तव्वं सिया ॥ तं भंते ! किं पुट्ठं फुसइ अपुट्ठं फुसइ ? जाव नियमा छद्दिसि ॥ ५० ॥ लोयंते भंते ! अलोयंतं फुसइ अलोयंतेवि लोयंतं फुसइ ?, हंता गोयमा ! लोयंते अलोयंतं फुसइ अलोयंतेवि लोयंतं फुसइ ३ । तं भंते ! किं पुट्ठं फुसइ अपुट्ठं फुसइ ? जाव नियमा छद्दिसि फुसइ । दीवंते भंते ! सागरंतं फुसइ सागरंतेवि दीवंतं फुसइ ?, हंता जाव नियमा छद्दिसि फुसइ, एवं एएणं अभिलावेणं उदयंते पोयंतं फुसइ छिदंते दूसंतं छांयंते आयवंतं जाव नियमा छद्दिसिं फुसइ ॥ ५१ ॥ अत्थि णं भंते ! जीवाणं पाणाइवाएणं किरिया कज्जइ ?, हंता अत्थि । सा भंते ! किं पुट्ठा कज्जइ अपुट्ठा कज्जइ ?, जाव निव्वाधाएणं छद्दिसिं वाघायं पडुच्च सिय तिदिसिं सिय चउदिसि सिय पंचदिसि । सा भंते ! किं कडा कज्जइ अकडा कज्जइ ?, गोयमा ! कडा कज्जइ नो अकडा कज्जइ । सा भंते ! किं अत्तकडा कज्जइ परकडा कज्जइ तदुभयकडा कज्जइ ?, गोयमा ! अत्तकडा कज्जइ णो परकडा कज्जइ णो तदुभयकडा कज्जइ । सा भंते ! किं आणुपुव्वि कडा कज्जइ अणुपुव्वि कडा कज्जइ ?, गोयमा ! आणुपुव्वि कडा कज्जइ नो अणुपुव्वि कडा

कज्जइ, जा य कडा जा य कज्जइ जा य कज्जिस्सइ सव्वा सा अणुपुर्व्वि कडा नो अणुपुर्व्वि कडत्ति वत्तव्वं सिया । अत्थि णं भंते ! नेरइयाणं पाणाइवायकिरिया कज्जइ ?, हंता अत्थि । सा भंते ! किं पुट्ठा कज्जइ अपुट्ठा कज्जइ जाव नियमा छद्दिंसिं कज्जइ, सा भंते ! किं कडा कज्जइ अकडा कज्जइ ?, तं चेव जाव नो अणुपुर्व्वि कडत्ति वत्तव्वं सिया, जहा नेरइया तहा एगिंदियवज्जा भाणियव्वा, जाव वेमाणिया, एगिंदिया जहा जीवा तहा भाणियव्वा, जहा पाणाइवाए तहा मुसावाए तहा अदिन्नादाणे मेहुणे परिग्गहे कोहे जाव सिच्छादंसणसल्ले, एवं एए अट्ठारस, चउवीसं दंडगा भाणियव्वा, सेवं भंते ! सेवं भंते ! त्ति भगवं गोयमे समणं भगवं जाव विहरति ॥ ५२ ॥ तेणं कालेणं तेणं समएणं समणस्स भगवओ महावीरस्स अंतेवासी रोहे नामं अणगारे पगइभइए पगइमडए पगइविणीए पगइउवसंते पगइ-पयणुकोहमाणमायालोभे सिउमइवसंपन्ने अल्लीणे भइए विणीए समणस्स भगवओ महावीरस्स अदूरसामंते उड्डंजाणू अहोसिरे ज्ञाणकोट्टोवगए संजमेणं तवसा अप्पाणं भावेमाणे विहरइ, तए णं से रोहे नामं अणगारे जायसड्डे जाव पज्जुवासमाणे एवं वदासी-पुर्व्वि भंते ! लोए पच्छा अलोए पुर्व्वि अलोए पच्छा लोए ?, रोहा ! लोए य अलोए य पुर्व्विपेते पच्छापेते दोवि एए सासया भावा, अणुपुर्व्वी एसा रोहा ! । पुर्व्वि भंते ! जीवा पच्छा अजीवा पुर्व्वि अजीवा पच्छा जीवा ?, जहेव लोए य अलोए य तहेव जीवा य अजीवा य, एवं भवसिद्धिया य अभव-सिद्धिया य सिद्धी असिद्धी सिद्धा असिद्धा, पुर्व्वि भंते ! अंडए पच्छा कुकुडी पुर्व्वि कुकुडी पच्छा अंडए ?, रोहा ! से णं अंडए कओ ?, भयवं ! कुकुडीओ, सा णं कुकुडी कओ ?, भंते ! अंडयाओ, एवामेव रोहा ! से य अंडए सा य कुकुडी, पुर्व्विपेते पच्छापेते दुवेते सासया भावा, अणुपुर्व्वी एसा रोहा ! । पुर्व्वि भंते ! लोयंते पच्छा अलोयंते पुर्व्वि अलोयंते पच्छा लोयंते ?, रोहा ! लोयंते य अलो-यंते य जाव अणुपुर्व्वी एसा रोहा ! । पुर्व्वि भंते ! लोयंते पच्छा सत्तमे उवा-संतरे पुच्छा, रोहा ! लोयंते य सत्तमे उवासंतरे पुर्व्विपि दोवि एते जाव अणु-पुर्व्वी एसा रोहा ! । एवं लोयंते य सत्तमे य तणुवाए, एवं घणवाए घणोदही सत्तमा पुढवी, एवं लोयंते एक्केक्केणं संजोएयव्वे इमेहिं ठाणेहिं-तंजहा-ओवासवायवणउदहिं पुढवी दीवा य सागरा वासा । नेरइयाई अत्थिय समया कम्माई लेस्साओ ॥ १ ॥ दिट्ठी दंसण णाणा सन्न सरीरा य जोग उवओगे । दव्वपएसा पज्जव अट्ठा किं पुर्व्वि लोयंते ? ॥ २ ॥ पुर्व्वि भंते ! लोयंते पच्छा सव्वद्धा ? । जहा लोयंतेणं संजोइया सव्वे ठाणा एते एवं अलोयंतेणवि संजोएयव्वा सव्वे । पुर्व्वि भंते !

सत्तमे उवासंतरे पच्छा सत्तमे तणुवाए ?, एवं सत्तमं उवासंतरं सव्वेहिं समं संजोएयव्वं जाव सव्वद्धाए । पुर्व्वि भंते ! सत्तमे तणुवाए पच्छा सत्तमे घणवाए ?, एयंपि तहेव नेयव्वं जाव सव्वद्धा, एवं उवरिल्लं एक्केकं संजोयंतेणं जो जो हिट्ठियो तं तं छड्ढंतेणं नेयव्वं जाव अतीयअणागयद्धा पच्छा सव्वद्धा जाव अणाणुपुव्वी एसा रोहा ! सेवं भंते ! सेवं भंतेत्ति ! जाव विहरइ ॥ ५३ ॥ भंतेत्ति भगवं गोयमे समणं जाव एवं वयासी-कतिविहा णं भंते ! लोयट्ठिती प० ?, गोयमा ! अट्ठविहा लोयट्ठिती प०, तंजहा-आगासपइट्ठिए वाए १ वायपइट्ठिए उदही २ उदहीपइट्ठिया पुढवी ३ पुढविपइट्ठिया तसा थावरा पाणा ४ अजीवा जीवपइट्ठिया ५ जीवा कम्मपइट्ठिया ६ अजीवा जीवसंगहिआ ७ जीवा कम्मसंगहिआ ८ । से केणट्ठेणं भंते ! एवं वुच्चइ ?-अट्ठविहा जाव जीवा कम्मसंगहिआ ?, गोयमा ! से जहानामए-केइ पुरिसे वत्थिमाडोवेइ वत्थिमाडोवित्ता उप्पि सितं वंधइ २ मज्झेणं गंठिं वंधइ २ उवरिल्लं गंठिं सुयइ २ उवरिल्लं देसं वामेइ २ उवरिल्लं देसं वामेत्ता उवरिल्लं देसं आउयायस्स पूरेइ २ उप्पिसि तं वंधइ २ मज्झिल्लं गंठिं सुयइ । से नूणं गोयमा ! से आउयाए तस्स वाउयायस्स उप्पि उवरितले चिट्ठइ ?, हंता चिट्ठइ, से तेणट्ठेणं जाव जीवा कम्मसंगहिआ, से जहा वा केइ पुरिसे वत्थिमाडोवेइ २ कडीए वंधइ २ अत्थाहमतारमपोरसियंसि उदगंसि ओगाहेज्जा, से नूणं गोयमा ! से पुरिसे तस्स आउयायस्स उवरिमतले चिट्ठइ ?, हंता चिट्ठइ, एवं वा अट्ठविहा लोयट्ठिई पण्णत्ता जाव जीवा कम्मसंगहिआ ॥ ५४ ॥ अत्थि णं भंते ! जीवा य पोग्गला य अन्नमन्न-वद्धा अन्नमन्नपुट्ठा अन्नमन्नमोगाढा अन्नमन्नसिणेहपडिवद्धा अन्नमन्नघडत्ताए चिट्ठंति ?, हंता ! अत्थि । से केणट्ठेणं भंते ! जाव चिट्ठंति ?, गोयमा ! से जहानामए-हरदे सिया पुण्णे पुण्णप्पमाणे वोल्हमाणे वोसट्ठमाणे समभरघडत्ताए चिट्ठइ, अहे णं केइ पुरिसे तंसि हरदंसि एगं महं नावं सयासवं सयछिड्ढं ओगाहेज्जा, से नूणं गोयमा ! सा णावा तेहिं आसवदारेहिं आपूरमाणी २ पुण्णा पुण्णप्पमाणा वोल्हमाणा वोसट्ठमाणा समभरघडत्ताए चिट्ठइ ?, हंता चिट्ठइ, से तेणट्ठेणं गोयमा ! अत्थि णं जीवा य जाव चिट्ठंति ॥ ५५ ॥ अत्थि णं भंते ! सया समियं सुहुमे सिणेहकाए पवडइ ?, हंता अत्थि । से भंते ! किं उट्ठे पवडइ अहे पवडइ तिरिए पवडइ ?, गोयमा ! उट्ठेवि पवडइ अहे पवडइ तिरिएवि पवडइ, जहा से वादरे आउयाए अन्नमन्नसमाउत्ते चिरंपि दीहकालं चिट्ठइ तहा णं सेवि ?, नो इणट्ठे समट्ठे, से णं खिप्पामेव विद्धंस-मागच्छइ । सेवं भंते ! सेवं भंतेत्ति ! ॥ १ ॥ ५६ ॥ छट्ठो उद्देसो समत्तो ॥ नेरइए णं भंते ! नेरइएसु उववज्जमाणे किं देसेणं देसं उववज्जइ देसेणं सव्वं

उववज्जइ सव्वेणं देसं उववज्जइ सव्वेणं सव्वं उववज्जइ ?, गोयमा ! नो देसेणं देसं उववज्जइ नो देसेणं सव्वं उववज्जइ नो सव्वेण देसं उववज्जइ सव्वेणं सव्वं उववज्जइ, जहा नेरइए एवं जाव वेमाणिए ॥ १ ॥ ५७ ॥ नेरइए णं भंते ! नेरइए सु उववज्जमाणे कि देसेणं देसं आहारेइ १ देसेणं सव्वं आहारेइ २ सव्वेणं देसं आहारेइ ३ सव्वेणं सव्वं आहारेइ ? ४, गोयमा ! नो देसेणं देसं आहारेइ नो देसेणं सव्वं आहारेइ सव्वेण वा देसं आहारेइ सव्वेण वा सव्वं आहारेइ, एव जाव वेमाणिए २ । नेरइए णं भंते ! नेरइए हितो उववट्टमाणे किं देसेणं देसं उववट्टइ ? जहा उववज्जमाणे तहेव उववट्टमाणेऽवि दंडगो भाणियव्वो ३ । नेरइए णं भंते ! नेरइए हितो उववट्टमाणे कि देसेणं देसं आहारेइ तहेव जाव सव्वेण वा देसं आहारेइ ?, सव्वेण वा सव्वं आ० १, एवं जाव वेमाणिए ४ । नेरइ० भंते ! नेर० उववत्ते कि देसेणं देसं उववत्ते, एसोऽवि तहेव जाव सव्वेणं सव्वं उववत्ते ?, जहा उववज्जमाणे उववट्टमाणे य चत्तारि दंडगा तहा उववत्तेणं उववट्टेणावि चत्तारि दंडगा भाणियव्वा, सव्वेणं सव्वं उववत्ते सव्वेण वा देसं आहारेइ सव्वेण वा सव्वं आहारेइ, एएणं अभिलावेणं उववत्तेवि उववट्टेणेवि नेयव्वं ८ ॥ नेरइए णं भंते ! नेरइए सु उववज्जमाणे कि अट्ठेणं अट्ठं उववज्जइ ? १ अट्ठेणं सव्वं उववज्जइ ? २ सव्वेणं अट्ठं उववज्जइ ? ३ सव्वेणं सव्वं उववज्जइ० ? ४, जहा पढामिल्लेणं अट्ठ दंडगा तहा अट्ठेणवि अट्ठ दंडगा भाणियव्वा, नवरं जहिं देसेणं देसं उववज्जइ तहिं अट्ठेणं अट्ठं उववज्जइ इति भाणियव्वं, एवं णाणत्तं, एते सव्वेवि सोलसदंडगा भाणियव्वा ॥ ५८ ॥ जीवे णं भंते ! किं विग्गहगतिसमावन्नए अविग्गहगतिसमावन्नए ?, गोयमा ! सिय विग्गहगइसमावन्नए सिय अविग्गहगतिसमावन्नगे, एवं जाव वेमाणिए । जीवा णं भंते ! किं विग्गहगइसमावन्नया अविग्गहगइसमावन्नगा ?, गोयमा ! विग्गहगइसमावन्नगावि अविग्गहगइसमावन्नगावि । नेरइया णं भंते ! कि विग्गहगतिसमावन्नया अविग्गहगतिसमावन्नगा ?, गोयमा ! सव्वेवि ताव होज्जा अविग्गहगतिसमावन्नगा १ । अहवा अविग्गहगतिसमावन्नगा य विग्गहगतिसमावत्ते य २ अहवा अविग्गहगतिसमावन्नगा य विग्गहगइसमावन्नगा य ३ ॥ एवं जीवेणिं-दियवज्जो तियभंगो ॥ ५९ ॥ देवे णं भंते ! महिद्धिए महज्जुइए महब्बले महायसे महासुक्खे महाणुभावे अविलक्कंति यं चयमाणे किंचिविकालं हिरिवत्ति यं दुगुंछावत्ति यं परिसहवत्ति यं आहारं नो आहारेइ, अहे णं आहारेइ, आहारिज्जमाणे आहारिए परिणामिज्जमाणे परिणामिए पहीणे य आउए भवइ जत्थ उववज्जइ तमाउयं पडिसंवेएइ, तंजहा-तिरिक्खजोणियाउयं वा मणुस्साउयं वा ?, हंता गोयमा ! देवे णं महिद्धिए

जाव मणुस्साउयं वा ॥६०॥ जीवे णं भंते गब्भं वक्कममाणे किं सइंदिए वक्कमइ अणि-
 दिए वक्कमइ ?, गोयमा ! सिय सइंदिए वक्कमइ सिय अणिंदिए वक्कमइ, से केणट्ठेणं ?,
 गोयमा ! दव्विंदियाइं पडुच्च अणिंदिए वक्कमइ भाविंदियाइं पडुच्च सइंदिए वक्कमइ,
 से तेणट्ठेणं० । जीवे णं भंते ! गब्भं वक्कममाणे किं ससरीरी वक्कमइ असरीरी
 वक्कमइ ?, गोयमा ! सिय ससरीरी व० सिय असरीरी वक्कमइ, से केणट्ठेणं ?,
 गोयमा ! ओरालियवेउव्वियआहारयाइं पडुच्च असरीरी व० तेयाकम्मा० प० सस०
 वक्क० से तेणट्ठेणं गोयमा !० । जीवे णं भंते ! गब्भं वक्कममाणे तप्पढमयाए
 किमाहारमाहारेइ ?, गोयमा ! माउओयं पिउसुक्कं तं तदुभयसंसिद्धं कल्लसं किव्विसं
 तप्पढमयाए आहारमाहारेइ । जीवे णं भंते ! गब्भगए समाणे किमाहारमाहारेइ ?,
 गोयमा ! जं से माया नाणाविहाओ रसविगईओ आहारमाहारेइ तदेक्कदेसेणं ओय-
 माहारेइ । जीवस्स णं भंते ! गब्भगयस्स समाणस्स अत्थि उच्चारेइ वा पासवणेइ
 वा खेलेइ वा सिंघाणेइ वा वंतेइ वा पित्तेइ वा ?, णो इणट्ठे समट्ठे, से केणट्ठेणं ?,
 गोयमा ! जीवे णं गब्भगए समाणे जमाहारेइ तं चिणाइ तं सोइंदियत्ताए जाव
 फासिदियत्ताए अट्ठिअट्ठिमिजकेसमंसुरोमनहत्ताए, से तेणट्ठेणं० । जीवे णं भंते !
 गब्भगए समाणे पभू मुहेणं कावलियं आहारं आहारित्तए ?, गोयमा ! णो इणट्ठे
 समट्ठे, से केणट्ठेणं ?, गोयमा ! जीवे णं गब्भगए समाणे सव्वओ आहारेइ सव्वओ
 परिणामेइ सव्वओ उस्ससइ सव्वओ निस्ससइ अभिक्खणं आहारेइ अभिक्खणं
 परिणामेइ अभिक्खणं उस्ससइ अभिक्खणं निस्ससइ आहच्च आहारेइ आहच्च
 परिणामेइ आहच्च उस्ससइ आहच्च नीससइ ॥ माउजीवरसहरणी पुत्तजीवरसहरणी
 माउजीवपडिबद्धा पुत्तजीवं फुडा तम्हा आहारेइ तम्हा परिणामेइ, अवरावि य णं
 पुत्तजीवपडिबद्धा माउजीवफुडा तम्हा चिणाइ तम्हा उवचिणाइ से तेणट्ठेणं० जाव
 नो पभू मुहेणं कावलियं आहारं आहारित्तए ॥ कइ णं भंते ! माइअंगा प० ?,
 गोयमा ! तओ माइयंगा प०, तंजहा-मंसे सोणिए मत्थुलुंगे । कइ णं भंते ! पिइ-
 यंगा प० ?, गोयमा ! तओ पिइयंगा प०, तंजहा-अट्ठि अट्ठिमिजा केसमंसुरोमनहे ।
 अम्मापिइए णं भंते ! सरीरए केवइयं कालं संचिद्धइ ?, गोयमा ! जावइयं से कालं
 भवधारणिज्जे सरीरए अव्वावन्ने भवइ एवतियं कालं संचिद्धइ, अहे णं समए समए
 वोक्कसिज्जमाणे २ चरमकालसमयंसि वोच्छिज्जे भवइ ॥ ६१ ॥ जीवे णं भंते !
 गब्भगए समाणे नेरइएसु उववज्जेज्जा ?, गोयमा ! अत्थेगइए उववज्जेज्जा अत्थेगइए
 नो उववज्जेज्जा, से केणट्ठेणं ?, गोयमा ! से णं सन्नी पंचिंदिए सव्वाहिं पज्जत्तीहिं
 पज्जत्तए वीरियलद्धीए वेउव्वियलद्धीए पराणीएणं आगयं सोच्चा निसम्म पएसे

निच्छुभइ नि० २ वेंडव्वियसमुग्घाएणं समोहणइ समो० २ चाउरंगिणिं सेन्नं
 विउव्वइ चाउरंगिणीसेन्नं विउव्वेत्ता चाउरंगिणीए सेणाए पराणीएणं सद्धि संगमं
 संगामेइ, से णं जीवे अत्थकामए रज्जकामए भोगकामए कामकामए अत्थकंखिए
 रज्जकंखिए भोगकंखिए कामकंखिए अत्थपिवासिए रज्जपिवासिए भोगपिवासिए
 कामपिवासिए तच्चित्ते तम्मणे तल्लेसे तदज्झवसिए तत्तिव्वज्झवसाणे तदट्ठोवउत्ते
 तदप्पियकरणे तव्भावणाभाविए एयंसि णं अंतरंसि कालं करेज्ज नेरइएसु उववज्जइ,
 से तेणट्ठेणं गोयमा ' जाव अत्थेगइए उववजेज्जा अत्थेगइए नो उववजेज्जा । जीवे
 णं भंते ! गव्वभगए समाणे देवलोगेसु उववजेज्जा ?, गोयमा ! अत्थेगइए उववजेज्जा
 अत्थेगइए नो उववजेज्जा, से केणट्ठेणं ?, गोयमा ! से णं सन्नी पंचिदिए सव्वाहिं
 पज्जत्तीहिं पज्जतए तहाहवस्स समणस्स वा माहणस्स वा अंतिए एगमवि आयरियं
 धम्मियं सुवयणं सोच्चा निसम्म तओ भवइ संवेगजायसद्धे तिव्वधम्माणुरागरत्ते,
 से णं जीवे धम्मकामए पुण्णकामए सग्गकामए मोक्खकामए धम्मकंखिए पुण्ण-
 कंखिए सग्गमोक्खकं० धम्मपिवासिए पुण्णसग्गमोक्खपिवासिए तच्चित्ते तम्मणे
 तल्लेसे तदज्झवसिए तत्तिव्वज्झवसाणे तदट्ठोवउत्ते तदप्पियकरणे तव्भावणाभाविए
 एयंसि णं अंतरंसि कालं करे० देवलो० उव०, से तेणट्ठेणं गोयमा !० । जीवे णं
 भंते ! गव्वभगए समाणे उत्ताणए वा पासिल्लए वा अंवखुज्जए वा अच्छेज्ज वा चिट्ठेज्ज
 वा निसीएज्ज वा तुयट्ठेज्ज वा माऊए सुयमाणीए सुवइ जागरमाणीए जागरइ सुहि-
 याए सुहिए भवइ दुहियाए दुहिए भवइ ?, हंता गोयमा ! जीवे णं गव्वभगए समाणे
 जाव दुहियाए दुहिए भवइ, अहे णं पसवणकालसमयंसि सीसेण वा पाएहिं वा
 आगच्छइ सममागच्छइ तिरियमागच्छइ विणिहायमागच्छइ ॥ वण्णवज्झाणि य से
 कम्माइं वद्धाइं पुट्ठाइं निहत्ताइं कडाइं पट्ठवियाइं अभिनिविट्ठाइं अभिसमन्नागयाइं
 उदिच्चाइं नो उवसंताइं भवन्ति तओ भवइ दुरुवे दुव्वजे दुग्गंधे दुरसे दुप्फासे
 अणिट्ठे अकंते अप्पिए असुभे अमणुज्जे अमणामे हीणस्सरे दीणस्सरे अणिट्ठस्सरे
 अकंतस्सरे अप्पियस्सरे असुभस्सरे अमणुज्जस्सरे अमणामस्सरे अणाएज्जवयणे
 पच्चायाए यावि भवइ, वन्नवज्झाणि य से कम्माइं नो वद्धाइं पसत्थं नेयव्वं जाव
 आदेज्जवयणं पच्चायाए यावि भवइ, सेवं भंते ! सेवं भंते ! त्ति ॥६२॥ पढमसयस्स
 सत्तमो उदेसो समत्तो ॥

रायगिहे समोसरणं जाव एवं वयासी-एगंतवाले णं भंते ! मणूसे किं नेरइयाउयं
 पकरेइ तिरिक्ख० मणु० देवा० पक्र० ?, नेरइयाउयं किच्चा नेरइएसु उव० तिरि-
 याउयं कि० तिरिएसु उवव० मणुस्साउयं किच्चा मणुस्से० उव० देवाउ० कि० देव-

लोएसु उववज्जइ ?, गोयमा ! एगंतवाले णं मणुरसे नेरइयाउयंपि पकरेइ तिरि०
मणु० देवाउयंपि पकरेइ, नेरइयाउयंपि किच्चा नेरउणु उव० तिरि० मणु० देवा-
उयं किच्चा तिरि० मणु० देवलोएसु उववज्जइ ॥ ६३ ॥ एगंतपंडिए णं भंते ! मणुरसे
किं नेर० पकरेइ जाव देवाउयं किच्चा देवलोगु उवव० ?, गोयमा ! एगंतपंडिए
णं मणुरसे आउयं सिय पकरेइ सिय नो पकरेइ, जउ पकरेइ नो नेरइया० पकरेइ
नो तिरि० नो मणु० देवाउयं पकरेइ, नो नेरइयाउयं किच्चा नेर० उव० णो तिरि०
णो मणुस्स० देवाउयं किच्चा देवेसु उव०, से केणट्टेणं जाव देवा० किच्चा देवेसु
उववज्जइ ?, गोयमा ! एगंतपंडियस्स णं मणुस्सस्स केवलमेव दो गउओ पचांति,
तंजहा-अंतकिरिया चेव कप्पोववत्तिया चेव, से तेणट्टेण गोयमा ! जाव देवाउयं
किच्चा देवेसु उववज्जइ ॥ वालपंडिए णं भंते ! मणुरसे किं नेरइयाउयं पकरेइ जाव
देवाउयं किच्चा देवेसु उववज्जइ ?, गोयमा ! नो नेरइयाउयं पकरेइ जाव देवाउयं किच्चा
देवेसु उववज्जइ, से केणट्टेणं जाव देवाउयं किच्चा देवेसु उववज्जइ ?, गोयमा ! वाल-
पंडिए णं मणुस्से तहाहवस्स समणस्स वा माहणस्स वा अंतिए एगमवि आयरियं
धम्मियं सुवयणं सोच्चा निसम्म देसं उवरमइ देसं नो उवरमइ देसं पच्चक्खाट्ठेसं णो
पच्चक्खाइ, से तेणट्टेणं देसोवरमदेसपच्चक्खाणेणं नो नेरइयाउयं पकरेइ जाव देवाउयं
किच्चा देवेसु उववज्जइ, से तेणट्टेणं जाव देवेसु उववज्जइ ॥ ६४ ॥ पुरिसे णं भंते !
कच्छंसि वा १ दहंसि वा २ उदगंसि वा ३ दवियंसि वा ४ वलयंसि वा ५ नूमेसि
वा ६ गहणंसि वा ७ गहणविदुग्गंसि वा ८ पव्वयंसि ९ पव्वयविदुग्गंसि वा १०
वणंसि वा ११ वणविदुग्गंसि वा १२ मियवित्तीए मियसंकप्पे मियपणिहाणे मिय-
वहाए गंता एए मिएत्तिकाउं अजयरस्स मियस्स वहाए कूडपासं उद्दाइ, ततो णं
भंते ! से पुरिसे कतिकिरिए पण्णत्ते ?, गोयमा ! जावं च णं से पुरिसे कच्छंसि वा
१० (१२) जाव कूडपासं उद्दाइ तावं च णं से पुरिसे सिय तिकि० सिय चउ०
सिय पंच०, से केणट्टेणं सिय ति० सिय च० सिय पं० ?, गोयमा ! जे भविए
उद्दवणयाए णो वंधणयाए णो मारणयाए तावं च णं से पुरिसे काइयाए अहिगर-
णियाए पाउसियाए तिहिं किरियाहि पुट्टे, जे भविए उद्दवणयाएवि वंधणयाएवि णो
मारणयाए तावं च णं से पुरिसे काइयाए अहिगरणियाए पाउसियाए पारियावणि-
याए चउहिं किरियाहिं पुट्टे, जे भविए उद्दवणयाएवि वंधणयाएवि मारणयाएवि
तावं च णं से पुरिसे काइयाए अहिगरणियाए पाउसियाए जाव पंचहिं पुट्टे, से
तेणट्टेणं जाव पंचकिरिए ॥ ६५ ॥ पुरिसे णं भंते ! कच्छंसि वा जाव वणविदुग्गंसि
वा तणाइं ऊसविय २ अगणिकायं निस्सरइ तावं च णं से भंते ! से पुरिसे कति-

किरिए?, गोयमा! सिय तिकिरिए सिय चडकि० सिय पंच०, से केणट्टेणं?, गोयमा! जे भविए उस्सवणयाए तिहिं, उस्सवणयाएवि निस्सिरणयाएवि नो दहणयाए चडहिं, जे भविए उस्सवणयाएवि निस्सिरणयाएवि दहणयाएवि तावं च णं से पुरिसे काइयाए जाव पंचहिं किरियाहिं पुट्टे, से तेण० गोयमा! ॥ ६६ ॥ पुरिसे णं भंते! कच्छंसि वा जाव वणविदुग्गंसि वा मियवित्तीए मियसंकप्पे मियपणिहाणे मियवहाए गंता एए मिएत्तिकाउं अन्नयरस्स मियस्स वहाए उंसुं निसिरइ, ततो णं भंते! से पुरिसे कइकिरिए?, गोयमा! सिय तिकिरिए सिय चडकिरिए सिय पंचकिरिए, से केणट्टेणं?, गोयमा! जे भविए निस्सिरणयाए नो विद्धंसणयाएवि नो मारणयाए तिहि, जे भविए निस्सिरणयाएवि विद्धंसणयाएवि नो मारणयाए चडहिं, जे भविए निस्सिरणयाएवि वि० मा० तावं च णं से पुरिसे जाव पंचहिं किरियाहिं पुट्टे, से तेणट्टेणं गोयमा! सिय तिकिरिए सिय चडकिरिए सिय पंचकिरिए ॥ ६७ ॥ पुरिसे णं भंते! कच्छंसि वा जाव अन्नयरस्स मियस्स वहाए आययकन्नाययं उंसुं आयामेत्ता च्चिट्ठिज्जा, अन्नयरे पुरिसे मग्गओ आगम्म सयपाणिणा असिणा सीसं छिंदेज्जा से य उंसुं ताए चेव पुव्वायामणयाए तं विधेज्जा से णं भंते! पुरिसे किं मियवेरेणं पुट्टे पुरिसवेरेणं पुट्टे?, गोयमा! जे मियं मारेइ से मियवेरेणं पुट्टे, जे पुरिसं मारेइ से पुरिसवेरेणं पुट्टे, से केणट्टेणं भंते! एवं वुच्चइ जाव से पुरिसवेरेणं पुट्टे?, से नूणं गोयमा! कज्जमाणे कडे संधिज्जमाणे संधिए निव्वत्तिज्जमाणे निव्वत्तिए निसिरिज्जमाणे निसिट्ठेत्ति वत्तव्वं सिया?, हंता भगवं! कज्जमाणे कडे जाव निसिट्ठेत्ति वत्तव्वं सिया, से तेणट्टेणं गोयमा! जे मियं मारेइ से मियवेरेणं पुट्टे, जे पुरिसं मारेइ से पुरिसवेरेणं पुट्टे ॥ अंतो छण्हं मासाणं मरइ काइयाए जाव पंचहिं किरियाहिं पुट्टे, वाहिं छण्हं मासाणं मरइ काइयाए जाव पारियावणियाए चडहिं किरियाहिं पुट्टे ॥ ६८ ॥ पुरिसे णं भंते! पुरिसं सत्तीए समभिधंसेज्जा सयपाणिणा वा से असिणा सीसं छिंदेज्जा तओ णं भंते! से पुरिसे कतिकिरिए?, गोयमा! जावं च णं से पुरिसे तं पुरिसं सत्तीए अभिसंधेइ सयपाणिणा वा से असिणा सीसं छिंदइ तावं च णं से पुरिसे काइयाए अहिगरणि० जाव पाणाइवायकिरियाए पंचहिं किरियाहिं पुट्टे, आसन्नवहणं य अणवकंखवत्तिणं पुरिसवेरेणं पुट्टे ॥ ६९ ॥ दो भंते! पुरिसा सरिसया सरित्तया सरिव्वया सरिसभंडमत्तोवगरणा अन्नमत्तेणं सद्धि संगामं संगामेन्ति, तत्थ णं एगे पुरिसे पराइणइ एगे पुरिसे पराइज्जइ, से कहमेयं भंते! एवं?, गोयमा! सवीरिए पराइणइ अवीरिए पराइज्जइ, से केणट्टेणं जाव पराइज्जइ?, गोयमा! जस्स णं वीरियवज्झाईं कम्माईं णो वद्धाईं णो पुट्ठाईं जाव

नो अभिसमन्नागयाइं नो उदिन्नाइं उवसंताइं भवंति से णं पराटण्ड, जस्स णं वीरि-
यवज्जाइं कम्माइं वद्धाइं जाव उदिन्नाइं नो उवसंताइं भवंति से णं पुरिसे पराट-
ज्जइ, से तेणट्ठेणं गोयमा ! एवं चुच्चइ-सवीरिए पराइण्ड अवीरिए पराइज्जइ ॥ ७० ॥
जीवा णं भंते ! किं सवीरिया अवीरिया ?, गोयमा ! सवीरियावि अवीरियावि, से
केणट्ठेणं ?, गोयमा ! जीवा दुविहा पन्नत्ता, तंजहा-संसारसमावन्नगा य असंसार-
समावन्नगा य, तत्थ णं जे ते असंसारसमावन्नगा ते णं सिद्धा, सिद्धा णं अवीरिया,
तत्थ णं जे ते संसारसमावन्नगा ते दुविहा पन्नत्ता, तंजहा-सेलेसिपडिवन्नगा य
असेलेसिपडिवन्नगा य, तत्थ णं जे ते सेलेसिपडिवन्नगा ते णं लद्धिवीरिएणं सवी-
रिया करणवीरिएणं अवीरिया, तत्थ णं जे ते असेलेसिपडिवन्नगा ते णं लद्धिवीरि-
एणं सवीरिया करणवीरिएणं सवीरियावि अवीरियावि, से तेणट्ठेणं गोयमा ! एवं
चुच्चइ-जीवा दुविहा पणत्ता, तंजहा-सवीरियावि अवीरियावि । नेरइया णं भंते !
किं सवीरिया अवीरिया ?, गोयमा ! नेरइया लद्धिवीरिएणं सवीरिया करणवीरिएणं
सवीरियावि अवीरियावि, से केणट्ठेणं ?, गोयमा ! जेसि णं नेरइयाणं अत्थि उट्ठाणे
कम्मे वले वीरिए पुरिसक्कारपरक्कमे ते णं नेरइया लद्धिवीरिएणावि सवीरिया करण-
वीरिएणावि सवीरिया, जेसि णं नेरइयाणं नत्थि उट्ठाणे जाव परक्कमे ते णं नेरइया
लद्धिवीरिएणं सवीरिया करणवीरिएणं अवीरिया, से तेणट्ठेणं०, जहा नेरइया एवं
जाव पंचिदियतिरिक्खजोणिया, मणुस्सा जहा ओहिया जीवा, नवरं सिद्धवज्जा
भाणियव्वा, वाणमंतरजोइसवेमाणिया जहा नेरइया, सेवं भंते ! सेवं भंते ! त्ति
॥ ७१ ॥ पढमस्सए अट्ठमो उद्देसो समत्तो ॥

कहन्नं भंते ! जीवा गरुयत्तं हव्वमागच्छन्ति ?, गोयमा ! पाणाइवाएणं मुसा-
चाएणं अदिन्ना० मेहुण० परि० कोह० माण० माया० लोम० पे० दोस० कलह०
अव्वक्खाण० पेसुन्न० रतिअरति० परपरिवाय० मायामोसमिच्छादंसणसट्ठेणं, एवं
खलु गोयमा ! जीवा गरुयत्तं हव्वमागच्छन्ति । कहन्नं भंते ! जीवा लहुयत्तं हव्व-
मागच्छन्ति ?, गोयमा ! पाणाइवायवेरमणेणं जाव मिच्छादंसणसल्लवेरमणेणं एवं
खलु गोयमा ! जीवा लहुयत्तं हव्वमागच्छन्ति, एवं संसारं आउलीकरेंति एवं परि-
त्तीकरेंति दीहीकरेंति हस्सीकरेंति एवं अणुपरियट्ठंति एवं वीइवयंति-पसत्था चत्तारि
अप्पसत्था चत्तारि ॥ ७२ ॥ सत्तमे णं भंते ओवासंतरे किं गुरुए लहुए गुरुयलहुए
अगुरुयलहुए ?, गोयमा ! नो गुरुए नो लहुए नो गुरुयलहुए अगुरुयलहुए । सत्तमे
णं भंते ! तणुवाए किं गुरुए लहुए गुरुयलहुए अगुरुयलहुए ?, गोयमा ! नो गुरुए
नो लहुए गुरुयलहुए नो अगुरुयलहुए । एवं सत्तमे घणवाए सत्तमे घणोदही सत्तमा

पुढवी, उवासंतराई सव्वाइं जहा सत्तमे ओवासंतरे, (सेसा) जहा तणुवाए, एवं-
ओवासवायघणउदहि पुढवी दीवा य सागरा वासा । नेरइया णं भंते ! किं गुरुया
जाव अगुरुलहुया ?, गोयमा ! नो गुरुया नो लहुया गुरुयलहुयावि अगुरुलहुयावि,
से केणट्टेणं ?, गोयमा ! वेउव्वियतेयाइं पडुच्च नो गुरुया नो लहुया गुरुयलहुआ
नो अगुरुलहुया, जीवं च कम्मणं च पडुच्च नो गुरुया नो लहुया नो गुरुयलहुया
अगुरुयलहुया, से तेणट्टेणं जाव वेमाणिया, नवरं णाणत्तं जाणियव्वं सरीरेहिं ।
धम्मत्थिकाए जाव जीवत्थिकाए चउत्थपएणं । पोग्गलत्थिकाए णं भंते ! किं गुरुए
लहुए गुरुयलहुए अगुरुयलहुए ?, गोयमा ! णो गुरुए नो लहुए गुरुयलहुएवि अगुरु-
यलहुएवि, से केणट्टेणं ?, गोयमा ! गुरुयलहुयदव्वाइं पडुच्च नो गुरुए नो लहुए
गुरुयलहुए नो अगुरुयलहुए, अगुरुयलहुयदव्वाइं पडुच्च नो गुरुए नो लहुए नो गुरु-
यलहुए अगुरुयलहुए, समया कम्माणि य चउत्थपदेणं । कण्हलेसा णं भंते ! किं
गुरुया जाव अगुरुयलहुया ?, गोयमा ! नो गुरुया नो लहुया गुरुयलहुयावि अगु-
रुयलहुयावि, से केणट्टेणं ?, गोयमा ! दव्वलेसं पडुच्च ततियपदेणं भावलेसं पडुच्च
चउत्थपदेणं, एवं जाव सुक्कलेसा, दिट्ठीदंसणनाणअन्नाणसण्णा चउत्थपदेणं णेय-
व्वाओ, हेट्ठिल्ला चत्तारि सरीरा नायव्वा ततियपदेणं, कम्मं य चउत्थयपएणं, मण-
जोगो वइजोगो चउत्थएणं पदेणं, कायजोगो ततिएणं पदेणं, सागारोवओगो
अणागारोवओगो चउत्थपदेणं, सव्वपदेसा सव्वदव्वा सव्वपज्जवा जहा पोग्गल-
त्थिकाओ, तीतद्धा अणागयद्धा सव्वद्धा चउत्थएणं पदेणं ॥ ७३ ॥ से नूणं भंते !
लाघवियं अप्पिच्छा अमुच्छा अगेही अपडिबद्धया समणारं निग्गंथाणं पसत्थं ?,
हंता गोयमा ! लाघवियं जाव पसत्थं ॥ से नूणं भंते ! अकोहत्तं अमाणत्तं अमायत्तं
अलोभत्तं समणारं निग्गंथाणं पसत्थं ?, हंता गोयमा ! अकोहत्तं अमाणत्तं जाव
पसत्थं ॥ से नूणं भंते ! कंखापदोसे खीणे समणे निग्गंथे अंतकरे भवति अंतिम-
सारीरिए वा बहुमोहेवि य णं पुव्वि विहरित्ता अह पच्छा संवुडे कालं करेति तओ
पच्छा सिज्झति ३ जाव अंतं करेइ ?, हंता गोयमा ! कंखापदोसे खीणे जाव अंतं
करेति ॥ ७४ ॥ अण्णउत्थिया णं भंते ! एवमाइक्खंति एवं भासेति एवं पण्णवेंति
एवं परुवेंति-एवं खलु एगे जीवे एगेणं समएणं दो आउयाइं पकरेति, तंजहा-
इहभवियाउयं च परभवियाउयं च, जं समयं इहभवियाउयं पकरेति तं समयं
परभवियाउयं पकरेति, जं समयं परभवियाउयं पकरेति तं समयं इहभवियाउयं
पकरेति, इहभवियाउयस्स पकरणयाए परभवियाउयं पकरेइ, परभवियाउयस्स
पकरणयाए इहभवियाउयं पकरेति, एवं खलु एगे जीवे एगेणं समएणं दो आउयाइं

पकरेति, तं०-इहभविआउयं च परभविआउयं च, से कहमेवं भंते ! एवं?, खलु
 गोयमा ! जणं ते अण्णउत्थिया एवमाइक्खंति जाव परभविआउयं च, जे ते
 एवमाहंसु मिच्छं ते एवमाहंसु, अहं पुण गोयमा ! एवमाइक्खामि जाव पत्तवेमि-
 एवं खलु एगे जीवे एगेणं समएणं एगं आउयं पकरेति, तं०-इहभविआउयं वा
 परभविआउयं वा, जं समयं इहभविआउयं पकरेति णो तं समत्रं परभविआउयं
 पकरेति, जं समयं परभविआउयं पकरेइ णो तं समयं इहभविआउयं पकरेइ, इह-
 भविआउयस्स पकरणताए णो परभविआउयं पकरेति, परभविआउयस्स पकरणताए
 णो इहभविआउयं पकरेति, एवं खलु एगे जीवे एगेणं समएणं एगं आउयं पकरेति,
 तं०-इहभविआउयं वा परभविआउयं वा, सेवं भंते ! सेवं भंते ! त्ति भगवं गोयमे
 जाव विहरति ॥ ७५ ॥ तेणं कालेणं तेणं समएणं पासावच्चिजे कालासवेसियपुत्ते
 णामं अणगारे जेणेव थेरा भगवंतो तेणेव उवागच्छति २ ता थेरे भगवंते एवं
 वयासी-थेरा सामाइयं ण जाणंति थेरा सामाइयस्स अट्ठं ण याणंति थेरा पच्चक्खाणं
 ण याणंति थेरा पच्चक्खाणस्स अट्ठं ण याणंति थेरा संजमं ण याणंति थेरा संज-
 मस्स अट्ठं ण याणंति थेरा संवरं ण याणंति थेरा संवरस्स अट्ठं ण याणंति थेरा
 विवेगं ण याणंति थेरा विवेगस्स अट्ठं ण याणंति थेरा विउस्सग्गं ण याणंति थेरा
 विउस्सग्गस्स अट्ठं ण याणंति ६ । तए णं ते थेरा भगवंतो कालासवेसियपुत्तं
 अणगारं एवं वयासी-जाणामो णं अज्जो ! सामाइयं जाणामो णं अज्जो ! सामाइ-
 यस्स अट्ठं जाव जाणामो णं अज्जो ! विउस्सग्गस्स अट्ठं । तए णं से कालासवेसि-
 यपुत्ते अणगारे थेरे भगवंते एवं वयासी-जति णं अज्जो ! तुब्भे जाणह सामाइयं
 जाणह सामाइयस्स अट्ठं जाव जाणह विउस्सग्गस्स अट्ठं किं भे अज्जो ! सामाइए
 किं भे अज्जो सामाइयस्स अट्ठे ? जाव किं भे विउस्सग्गस्स अट्ठे ?, तए णं ते
 थेरा भगवंतो कालासवेसियपुत्तं अणगारं एवं वयासी-आया णे अज्जो ! सामाइए
 आया णे अज्जो ! सामाइयस्स अट्ठे जाव विउस्सग्गस्स अट्ठे । तए णं से कालासवे-
 सियपुत्ते अणगारे थेरे भगवंते एवं वयासी-जति भे अज्जो ! आया सामाइए
 आया सामाइयस्स अट्ठे एवं जाव आया विउस्सग्गस्स अट्ठे अवहट्ठु कोहमाणमाया-
 लोभे किमट्ठं अज्जो ! गरहह ?, कालास० संजमट्ठयाए, से भंते ! किं गरहा संजमे
 अगरहा संजमे ?, कालास० गरहा संजमे नो अगरहासंजमे, गरहावि य णं सव्वं
 दोसं पविणेति सव्वं बालियं परिण्णाए, एवं खु णे आया संजमे उवहिए भवति,
 एवं खु णे आया संजमे उवचिए भवति, एवं खु णे आया संजमे उवट्ठिए भवति,
 एत्थ णं से कालासवेसियपुत्ते अणगारे संबुद्धे थेरे भगवंते वंदति णमंसति २ एवं

वयासी-एएसि णं भंते ! पयाणं पुव्वि अण्णाणयाए असवणयाए अवोहियाए अण-
भिगमेणं अदिट्ठाणं अस्सुयाणं असुयाणं अविण्णायाणं अव्वोगडाणं अव्वोच्छिन्नाणं
अणिज्जूढाणं अप्पुवधारियाणं एयमट्ठं णो सद्दहिए णो पत्तिइए णो रोइए इयाणिं
भंते ! एतेसि पयाणं जाणणयाए सवणयाए वोहीए अभिगमेणं दिट्ठाणं सुयाणं मुयाणं
विण्णायाणं वोगडाणं वोच्छिन्नाणं णिज्जूढाणं उवधारियाणं एयमट्ठं सद्दहामि पत्ति-
यामि रोएमि एवमेयं से जहेयं तुब्भे वदह, तए णं ते थेरा भगवंतो कालासवेसि-
यपुत्तं अणगारं एवं वयासी-सद्दहाहि अज्जो ! पत्तियाहि अज्जो ! रोएहि अज्जो ! से
जहेयं अम्हे वदामो । तए णं से कालासवेसियपुत्ते अणगारे थेरे भगवंतो वंदइ
नमंसइ २ एवं वदासी-इच्छामि णं भंते ! तुब्भं अंतिए चाउज्जामाओ धम्माओ
पंचमहव्वइयं सपडिक्कमणं धम्मं उवसंपजित्ता णं विहरित्तए, अहासुहं देवाणुप्पिया !
मा पडिवंधं । तए णं से कालासवेसियपुत्ते अणगारे थेरे भगवंते वंदइ नमंसइ वंदित्ता
नमंसित्ता चाउज्जामाओ धम्माओ पंचमहव्वइयं सपडिक्कमणं धम्मं उवसंपजित्ता णं
विहरइ । तए णं से कालासवेसियपुत्ते अणगारे बहूणि वासाणि सामण्णपरियाणं
पाउणइ जस्सट्ठाए कीरइ थेरकप्पभावे जिणकप्पभावे मुंडभावे अण्हाणयं अदंतधु-
वणयं अच्छत्तयं अणोवाहणयं भूमिसेज्जा फलहसेज्जा कट्ठसेज्जा केसलोओ वंभचेर-
वासो परधरपवेसो लद्धावलद्धी उच्चावया गामकंटगा वावीसं परिसहोवसग्गा अहि-
यासिज्जंति तमट्ठं आराहेइ २ चरिमेहिं उस्सासनीसासेहिं सिद्धे बुद्धे मुक्के परिनिव्वुडे
सव्वदुक्खप्पहीणे ॥ ७६ ॥ भंतेति भगवं गोयमे समणं भगवं महावीरं वंदति नमं-
सति २ एवं वदासी-से नूणं भंते ! सेट्ठियस्स य तणुयस्स य किवणस्स य खत्ति-
यस्स य समं चेव अपच्चक्खाणकिरिया कज्जइ ?, हंता गोयमा ! सेट्ठियस्स य जाव
अपच्चक्खाणकिरिया कज्जइ, से केणट्ठेणं भंते ! ?, गोयमा ! अविरतिं पडुच्च से
तेण० गोयमा ! एवं वुच्चइ-सेट्ठियस्स य तणु० जाव कज्जइ ॥ ७७ ॥ आहाकम्मं
भुंजमाणे समणे निग्गंथे किं वंधइ किं पकरेइ किं चिणाइ कि उवचिणाइ ?, गोयमा !
आहाकम्मं णं भुंजमाणे आउयवज्जाओ सत्त कम्मप्पगडीओ सिढिलवंधणवद्धाओ
धणियवंधणवद्धाओ पकरेइ जाव अणुपरियइइ, से केणट्ठेणं जाव अणुपरियइइ ?,
गोयमा ! आहाकम्मं णं भुंजमाणे आयाए धम्मं अइक्कमइ आयाए धम्मं अइक्कम-
माणे पुढविक्कायं णावकंखइ जाव तसकायं णावकंखइ, जेसिंपि य णं जीवाणं सरी-
राइं आहारमाहारेइ तेवि जीवे नावकंखइ, से तेणट्ठेणं गोयमा ! एवं वुच्चइ-आहा-
कम्मं णं भुंजमाणे आउयवज्जाओ सत्त कम्मपगडीओ जाव अणुपरियइइ ॥ फासुए-
सणिज्जं भंते ! भुंजमाणे किं वंधइ जाव उवचिणाइ ?, गोयमा ! फासुएसणिज्जं णं

भुंजमाणे आउयवज्जाओ सत्त कम्मपयडीओ धणियवंधणवद्दाओ सिद्धिलवंधणवद्दाओ पकरेइ जहा संवुडे णं नवरं आउयं च णं कम्मं सिय वंधइ सिय नो वंधइ, सेसं तहेव जाव वीईवयइ, से केणट्टेणं जाव वीईवयइ?, गोयमा ! फासुएसणिज्जं भुंजमाणे समणे निग्गंथे आयाए धम्मं नो अइक्कमइ, आयाए धम्मं अणइक्कममाणे पुढ-विक्काइयं अवकंखति जाव तसकायं अवकंखइ, जेसिंपि य णं जीवाणं सरीराइं आहारेइ तेऽवि जीवे अवकंखति से तेणट्टेणं जाव वीईवयइ ॥ ७८ ॥ से नूणं भंते ! अथिरे पलोट्टइ नो थिरे पलोट्टति अथिरे भज्जइ नो थिरे भज्जइ सासए वालए वालियत्तं असासयं सासए पंडिए पंडियत्तं असासयं?, हंता गोयमा ! अथिरे पलोट्टइ जाव पंडियत्तं असासयं सेवं भंते ! सेवं भंतेति जाव विहरति ॥ ७९ ॥ पढमसए, नवमो उद्देसो समत्तो ॥

अन्नउत्थिया णं भंते ! एवमाइक्खंति जाव एवं पहरुंति-एवं खलु चलमाणे अचलिए जाव निज्जरिज्जमाणे अणिज्जिण्णे, दो परमाणुपोग्गला एगयओ न साहणंति, कम्हा दो परमाणुपोग्गला एगततो न साहणंति?, दोण्हं परमाणुपोग्गलाणं नत्थि सिणेहकाए, तम्हा दो परमाणुपोग्गला एगयओ न साहणंति, तिन्नि परमाणुपोग्गला एगयओ साहणंति, कम्हा ? तिन्नि परमाणुपोग्गला एगयओ साहणंति, तिण्हं परमाणुपोग्गलाणं अत्थि सिणेहकाए, तम्हा तिण्णि परमाणुपोग्गला एगयओ सा०, ते भिज्जमाणा दुहावि तिहावि कज्जंति, दुहा कज्जमाणा एगयओ दिवड्ढे परमाणुपोग्गले भवति एगयओवि दिवड्ढे पर० पो० भवति, तिहा कज्जमाणा तिण्णि परमाणुपोग्गला भवंति, एवं जाव चत्तारि पंचपरमाणुपो० एगयओ साहणंति, एगयओ साहणित्ता दुक्खत्ताए कज्जंति, दुक्खेवि य णं से सासए सया समियं उवचिज्जइ य अवचिज्जइ य पुव्वि भासा भासा भासिज्जमाणी भासा अभासा भासासमयवीतिक्रंतं च णं भासिया भासा, जा सा पुव्वि भासा भासा भासिज्जमाणी भासा अभासा भासासमयवीतिक्रंतं च णं भासिया भासा सा किं भासओ भासा अभासओ भासा?, अभासओ णं सा भासा नो खलु सा भासओ भासा । पुव्वि किरिया दुक्खा कज्जमाणी किरिया अदुक्खा किरियासमयवीतिक्रंतं च णं कडा किरिया दुक्खा, जा सा पुव्वि किरिया दुक्खा कज्जमाणी किरिया अदुक्खा किरियासमयवीतिक्रंतं च णं कडा किरिया दुक्खा सा किं करणओ दुक्खा अकरणओ दुक्खा?, अकरणओ णं सा दुक्खा णो खलु सा करणओ दुक्खा, सेवं वत्तव्वं सिया-अकिच्चं दुक्खं अफुसं दुक्खं अकज्जमाणकडं दुक्खं अकट्ठु अकट्ठु पाणभूयजीवसत्ता वेदणं वेदंतीति वत्तव्वं सिया ॥ से कहमेयं भंते ! एवं?, गोयमा ! जण्णं ते अण्णउत्थिया एवमातिक्खंति जाव वेदणं

वेदेंति, वत्तव्वं सिया, जे ते एवमाहंसु मिच्छा ते एवमाहंसु, अहं पुण गोयमा ।
 एवमातिक्खामि, एवं खलु चलमाणे चलिए जाव निज्जरिजमाणे निज्जिण्णे, दो
 परमाणुपोग्गला एगयओ साहणंति, कम्हा ? दो परमाणुपोग्गला एगयओ साह-
 णंति ?, दोण्हं परमाणुपोग्गलाणं अत्थि सिणेहकाए, तम्हा दो परमाणुपोग्गला
 एगयओ सा०, ते भिज्जमाणा दुहा कज्जंति, दुहा कज्जमाणे एगयओ पर० पोग्गले
 एगयओ प० पोग्गले भवंति, तिण्णि परमा० एगओ साह०, कम्हा ? तिन्नि परमा-
 णुपोग्गले एग० सा० ?, तिण्हं परमाणुपोग्गलाणं अत्थि सिणेहकाए, तम्हा तिण्णि
 परमाणुपोग्गला एगयओ साहणंति, ते भिज्जमाणा दुहावि तिहावि कज्जंति, दुहा
 कज्जमाणा एगयओ परमाणुपोग्गले एगयओ दुपदेसिए खंधे भवति, तिहा कज्जमाणा
 तिण्णि परमाणुपोग्गला भवंति, एवं जाव चत्तारिपंचपरमाणुपो० एगओ साहणित्ता
 २ खंधत्ताए कज्जंति, खंधेवि य णं से असासए सया समियं उवच्चिज्जइ य अवच्चि-
 ज्जइ य । पुर्वि भासा अभासा भासिज्जमाणी भासा २ भासासमयवीतिक्रंतं च णं
 भासिया भासा अभासा जा सा पुर्वि भासा अभासा भासिज्जमाणी भासा २
 भासासमयवीतिक्रंतं च णं भासिया भासा अभासा सा किं भासओ भासा अभा-
 सओ भासा ?, भासओ णं भासा नो खलु सा अभासओ भासा । पुर्वि किरिया
 अदुक्खा जहा भासा तहा भाणियव्वा, किरियावि जाव करणओ णं सा दुक्खा नो
 खलु सा अकरणओ दुक्खा, सेवं वत्तव्वं सिया-किच्चं फुसं दुक्खं कज्जमाणकडं कट्ठु
 २ पाणभूयजीवसत्ता वेदणं वेदेंतीति वत्तव्वं सिया ॥ ८० ॥ अण्णउत्थिया णं भंते !
 एवमाइक्खंति जाव-एवं खलु एगे जीवे एगेणं समएणं दो किरियाओ पकरेइ,
 तंजहा-इरियावहियं च संपराइयं च, [जं समयं इरियावहियं पकरेइ तं समयं संप-
 राइयं पकरेइ, जं समयं संपराइयं पकरेइ तं समयं इरियावहियं पकरेइ, इरियावहि-
 याए पकरणताए संपराइयं पकरेइ संपराइयपकरणयाए इरियावहियं पकरेइ, एवं
 खलु एगे जीवे एगेणं समएणं दो किरियाओ पकरेति, तंजहा-इरियावहियं च
 संपराइयं च । से कहमेयं भंते एवं ?, गोयमा ! जं णं ते अण्णउत्थिया एवमाइ-
 क्खंति तं चेव जाव जे ते एवमाहंसु मिच्छा ते एवमाहंसु, अहं पुण गोयमा !
 एवमाइक्खामि ४-एवं खलु एगे जीवे एगसमए एक्कं किरियं पकरेइ] परउत्थिय-
 वत्तव्वं णेयव्वं, ससमयवत्तव्वयाए नेयव्वं जाव इरियावहियं संपराइयं वा ॥ ८१ ॥
 निरयगई णं भंते ! केवतियं कालं विरहिया उववाएणं प० ?, गोयमा ! जह्जेणं
 एक्कं समयं उक्कोसेणं वारस मुहुत्ता, एवं वक्कंतीपयं भाणियव्वं निरवसेसं, सेवं भंते !
 सेवं भंते ति जाव विहरइ ॥ ८२ ॥ दसमो उद्देसओ ॥ पढमं सयं समत्तं ॥

गाहा—ऊसासखंदए वि य १ समुग्घाय २ पुढविं ३ दिय ४ अन्नउत्थिभासा
 ५ य । देवा य ६ चमरचंचा ७ समय ८ खित्त ९ त्तिकाय १० वीयसए ॥१॥८२॥
 तेणं कालेणं तेणं समएणं रायगिहे नामं नगरे होत्था, वण्णओ, सामी समोसठे
 परिसा निग्गया धम्मो कहिओ पडिगया परिसा । तेणं कालेणं २ जेद्धे अंतेवासी
 जाव पज्जुवासमाणे एवं वयासी—जे इमे भंते ! वेइंदिया तेइंदिया चउरिंदिया
 पंचेदिया जीवा एएसि णं आणामं वा पाणामं वा उस्सासं वा नीसासं वा जाणामो
 पासामो, जे इमे पुढविकाइया जाव वणस्सइकाइया एगिंदिया जीवा एएसि णं
 आणामं वा पाणामं वा उस्सासं वा निस्सासं वा ण यागामो ण-पासामो, एएसि णं
 भंते ! जीवा आणमंति वा पाणमंति वा उस्ससंति वा नीससंति वा ? हंता गोयमा !
 एएवि य णं जीवा आणमंति वा पाणमंति वा उस्ससंति वा नीससंति वा ॥ ८४ ॥
 किण्णं भंते ! जीवा आग० पा० उ० नी० ?, गोयमा ! दव्वओ णं अणंतपए-
 सियाइं दव्वाइं खेत्तओ णं असंखपएसोगाढाईं कालओ अन्नयरट्ठितीयाइं भावओ
 वण्णमंताइं गंधमंताइं रसमंताइं फासमंताइं आणमंति वा पाणमंति वा उस्ससंति
 वा नीससंति वा, जाइं भावओ वण्णमंताइं आण० पाण० उस्स० नीस० ताइं किं
 एगवण्णाइं आणमंति पाणमंति उस्स० नीस० ?, आहारगमो नेयव्वो जाव तिचउ-
 पंचदिसिं । किण्णं भंते ! नेरइया आ० पा० उ० नी० तं चेव जाव नियमा
 छद्दिसिं आ० पा० उ० नी० जीवा एगिंदिया वाघाया य निव्वाघाया य भाणियव्वा,
 सेसा नियमा छद्दिसिं ॥ वाउयाए णं भंते ! वाउयाए चेव आणमंति वा पाणमंति
 वा उस्ससंति वा नीससंति वा ?, हंता गोयमा ! वाउयाए णं जाव नीससंति वा
 ॥ ८५ ॥ वाउयाए णं भंते ! वाउयाए चेव अणेगसयसहस्सखुत्तो उद्दाइत्ता २
 तत्थेव भुज्जो भुज्जो पच्चायाति ?, हंता गोयमा ! जाव पच्चायाति । से भंते किं पुट्ठे
 उद्दाति अपुट्ठे उद्दाति ?, गोयमा ! पुट्ठे उद्दाइ नो अपुट्ठे उद्दाइ । से भंते ! कि सस-
 रीरी निक्खमइ असरीरी निक्खमइ ?, गोयमा ! सिय ससरीरी निक्खमइ सिय
 असरीरी निक्खमइ । से केगट्ठेणं भंते ! एवं वुच्चइ सिय ससरीरी निक्खमइ सिय
 असरीरी निक्खमइ ?, गोयमा ! वाउकायस्स णं चत्तारि सरीरया पन्नत्ता, तंजहा-
 ओरालिए वेउव्विए तेयए कम्मए, ओरालियवेउव्वियाइं विप्पजहाय तेयकम्मएहिं
 निक्खमति, से तेणट्ठेणं गोयमा ! एवं वुच्चइ—सिय ससरीरी सिय असरीरी निक्ख-
 मइ ॥ ८६ ॥ सडाईं णं भंते ! नियंठे नो निरुद्धमवे नो निरुद्धमवपवंचे णो पहीण-
 संसारे णो पहीणसंसारवेयणिज्जे णो वोच्छिग्गसंसारे णो वोच्छिग्गसंसारवेयणिज्जे
 नो निट्ठियट्ठे नो निट्ठियट्ठकरणिज्जे पुगरवि इत्थतं हव्वमागच्छति ?, हंता गोयमा !

मडाई णं नियंठे जाव पुणरवि इत्थत्तं हव्वमागच्छइ ॥ ८७ ॥ से णं भंते ! किं वत्तव्वं सिया ? गोयमा ! पाणेति वत्तव्वं सिया भूतेति वत्तव्वं सिया जीवेति वत्तव्वं सत्तेति वत्तव्वं विवृत्ति वत्तव्वं वेदेति वत्तव्वं सिया पाणे भूए जीवे सत्ते विवृत्ति वेएति वत्तव्वं सिया, से केणट्टेणं भंते ! पाणेति वत्तव्वं सिया जाव वेदेति वत्तव्वं सिया, गोयमा ! जम्हा आ० पा० उ० नी० तम्हा पाणेति वत्तव्वं सिया, जम्हा भूते भवति भविस्सति य तम्हा भूएति वत्तव्वं सिया, जम्हा जीवे जीवइ जीवत्तं आउयं च कम्मं उवजीवइ तम्हा जीवेति वत्तव्वं सिया, जम्हा सत्ते सुहासुहेहिं कम्मोहिं तम्हा सत्तेति वत्तव्वं सिया, जम्हा तित्तकडुयकसायअं विलमहुरे रसे जाणइ तम्हा विवृत्ति वत्तव्वं सिया, वेदेइ य सुहदुक्खं तम्हा वेदेति वत्तव्वं सिया, से तेणट्टेणं जाव पाणेति वत्तव्वं सिया जाव वेदेति वत्तव्वं सिया ॥ ८८ ॥ मडाई णं भंते ! नियंठे निरुद्धभवे निरुद्धभवपवंचे जाव निट्ठियट्ठकरणिजे णो पुणरवि इत्थत्तं हव्वमागच्छति ?, हंता गोयमा ! मडाई णं नियंठे जाव नो पुणरवि इत्थत्तं हव्वमागच्छति से णं भंते ! किंति वत्तव्वं सिया ?, गोयमा ! सिद्धेति वत्तव्वं सिया बुद्धेति वत्तव्वं सिया मुत्तेति वत्तव्वं पारगएति व० परंपरगएति व० सिद्धे बुद्धे मुत्ते परिनिव्वुडे अंतकडे सव्वदुक्खप्पहीणेति वत्तव्वं सिया, सेवं भंते ! सेवं भंते ! ति भगवं गोयमे समं भगवं महावीरं वंदइ नमंसइ २ संजमेणं तवसा अप्पाणं भावेमाणे विहरति ॥ ८९ ॥ तेणं कालेणं तेणं समएणं समणे भगवं महावीरे रायगिहाओ नगराओ गुणसिलाओ उज्जाणाओ पडिनिक्खमइ पडिनिक्खमिता वहिया जणवयविहारं विहरइ, तेणं कालेणं तेणं समएणं कयंगलानामं नगरी होत्था वण्णओ, तीसे णं कयंगलाए नगरीए वहिया उत्तरपुरच्छिमे दिस्सीभाए छत्तपलासए नामं उज्जाणे होत्था वण्णओ, तए णं समणे भगवं महावीरे उप्पण्णनाणदंसणधरे जाव समोसरणं परिसा निग्गच्छति, तीसे णं कयंगलाए नगरीए अदूरसामंते सावत्थी नामं नयरी होत्था वण्णओ, तत्थ णं, सावत्थीए नयरीए गह्मभालिस्स अंतेवासी खंदए नामं कच्चायणस्संगोत्ते परिव्वायगे परिवसइ रिउव्वेदजजुव्वेदसामवेदअहव्वणवेदइतिहासपंचमाणं निग्घंटुछट्ठाणं चउण्हं वेदाणं संगोवंगणं सरहस्साणं सारए वारए धारए पारए सडंगवी सट्ठितंतविसारए संखाणे सिक्खाकप्पे वागरणे छंदे निरुत्ते जोतिसामयणे अत्तेसु य बहूसु वंभण्णएसु परिव्वायएसु य नयेसु सुपरिनिट्ठिए यावि होत्था, तत्थ णं सावत्थीए नयरीए पिंगलए नामं नियंठे वेसालियसावए परिवसइ, तए णं से पिंगलए णामं नियंठे वेसालियसावए अण्णया कयाइ जेणेव

खंदए कच्चायणस्सगोत्ते तेणेव उवागच्छइ २ खंदगं कच्चायणस्सगोत्तं इणमक्खेवं पुच्छे-मागहा ! किं सअंते लोए अणंते लोए १ सअंते जीवे अणंते जीवे २ सअता सिद्धी अणंता सिद्धी ३ सअंते सिद्धे अणंते सिद्धे ४ केण वा मरणेणं मरमाणे जीवे वड्ढति वा हायति वा ५ ? एतावं ताव आयक्खाहि वुच्चमाणे एवं, तए णं से खंदए कच्चा० गोत्ते पिगलएणं णियंठेणं वेसालीसावएणं इणमक्खेवं पुच्छिए समाणे संकिए कंखिए वित्तिगिच्छिए भेदसमावन्ने कलुससमावन्ने णो संचाएइ पिंगलयस्स नियंठस्स वेसालियसावयस्स किंचिवि पमोक्खमक्खाइउं, तुसिणीए संचिट्ठइ, तए णं से पिंगले नियंठे वेसालीसावए खंदयं कच्चायणस्सगोत्तं दोच्चंपि तच्चंपि इणमक्खेवं पुच्छे-मागहा ! किं सअंते लोए जाव केण वा मरणेणं मरमाणे जीवे वड्ढइ वा हायति वा ? एतावं ताव आइक्खाहि वुच्चमाणे एवं, तते णं से खंदए कच्चा० गोत्ते पिंगलएणं नियंठेणं वेसालीसावएणं दोच्चंपि तच्चंपि इणमक्खेवं पुच्छिए समाणे संकिए कंखिए वित्तिगिच्छिए भेदसमावण्णे कलुसमावण्णे नो संचाएइ पिंगलयस्स नियंठस्स वेसालिसावयस्स किंचिवि पमोक्खमक्खाउं तुसिणीए संचिट्ठइ । तए णं सावत्थीए नयरीए सिंघाडग जाव महापहेसु महया जणसंमदे इ वा जणवूहे इ वा परिसा निग्गच्छइ । तए णं तस्स खंदयस्स कच्चायणस्सगोत्तस्स बहुजणस्स अंतिए एयमट्ठं सोच्चा निसम्म इमेयारुवे अब्भत्थिए चित्तिए पत्थिए मणोगए संकप्पे समुप्पज्जित्था- एवं खलु समणे भगवं महावीरे कयंगलाए नयरीए वहिया छत्तपलासए उज्जाणे संजमेणं तवसा अप्पाणं भावेमाणे विहरइ, तं गच्छामि णं समगं भगवं महावीरं वंदामि नमंसामि, सेयं खलु मे समणं भगवं महावीरं वंदित्ता णमंसित्ता सक्कारेत्ता सम्माणित्ता कल्लणं मंगलं देवयं चेइयं पज्जुवासित्ता इमाइं च णं एयारुवाइं अट्ठाइं हेऊइं पसिणाइं कारणाइं पुच्छित्तएत्ति कट्ठु एवं संपेहेइ २ जेणेव परिव्वायावसहे तेणेव उवागच्छइ २ ता तिदंडं च कुंडियं च कंचणियं च करोडियं च भिसियं च केसरियं च छन्नालयं च अंकुसयं च पवित्तयं च गणेत्तियं च छत्तयं च वाहणाओ य पाउयाओ य धाउरत्ताओ य गेण्हइ गेण्हइत्ता परिव्वायावसहीओ पडिनिक्खमइ पडिनिक्खमइत्ता तिदंडकुंडियकंचणियकरोडियभिसियकेसरियछन्नालयअंकुसयपवित्त- गणेत्तियहत्थगए छत्तोवाहणसंजुत्ते धाउरत्तवत्थपरिहिए सावत्थीए नगरीए मज्झं- मज्झेणं निग्गच्छइ निग्गच्छइत्ता जेणेव कयंगला नगरी जेणेव छत्तपलासए उज्जाणे जेणेव समणे भगवं महावीरे तेणेव पहारेत्थ गमणाए । गोयमाइ समणे भगवं महावीरे भगवं गोयमं एवं वयासी-दच्छिसि णं गोयमा ! पुव्वसंगतियं, कहं भंते ! ? खंदयं नाम, से काहं वा किहं वा केवच्चिरेण वा ? , एवं खलु गोयमा ! तेणं कालेणं

२ सावत्थीनामं नगरी होत्था वज्जओ, तत्थ णं सावत्थीए नगरीए गद्दमालिस्सं
अंतेवासी खंदए णामं कच्चायणस्सगोत्ते परिव्वायए परिवसइ तं चेव जाव जेणेव
ममं अंतिए तेणेव पहारेत्थ गमणाए, से तं अदूरागते बहुसंपत्ते अद्वाणपडिवण्णे
अंतरापहे वट्ठइ । अजेव णं दच्छिंति गोयमा !, मंतेत्ति भगवं गोयमे समणं भगवं
चंदइ नमंसइ २ एवं वदासी-पट्ट णं भंते ! खंदए कच्चायणस्सगोत्ते देवाणुप्पियाणं
अंतिए मुंडे भवित्ता अगाराओ अणगारियं पंक्वइत्तए ? , हंता पभू, जावं च णं
समणे भगवं महावीरे भगवओ गोयमस्स एयमट्ठं परिकहेइ तावं च णं से खंदए
कच्चायणस्सगोत्ते तं देसं हव्वमागते, तए णं भगवं गोयमे खंदयं कच्चायणस्सगोत्तं
अदूरआगयं जाणित्ता खिप्पामेव अब्भुट्ठेति खिप्पामेव पञ्चुवगच्छइ २ जेणेव खंदए
कच्चायणस्सगोत्ते तेणेव उवागच्छइ २ ता खंदयं कच्चायणस्सगोत्तं एवं वयासी-हे
खंदया ! सागयं खंदया ! सुसागयं खंदया ! अणुरागयं खंदया ! सागयमणुरागयं
खंदया ! से नूणं तुमं खंदया ! सावत्थीए नयरीए पिंगलएणं नियंठेणं वेसालिय-
सावएणं इणमक्खेवं पुच्छिए—मागहा ! किं सअंते लोके अणंते लोके ? एवं तं
चेव जेणेव इहं तेणेव हव्वमागए, से नूणं खंदया ! अट्ठे समट्ठे ? , हंता अत्थि, तए
णं से खंदए कच्चा० भगवं गोयमं एवं वयासी-से केणट्ठेणं गोयमा ! तहारुवे नाणी
वा तवस्सी वा जेणं तव एस अट्ठे मम ताव रहस्सकडे हव्वमक्खाए ? जओ णं
तुमं जाणसि, तए णं से भगवं गोयमे खंदयं कच्चायणस्सगोत्तं एवं वयासी-एवं खलु
खंदया ! मम धम्मायरिए धम्मोवएसए समणे भगवं महावीरे उप्पण्णणाणदंसणधरे
अरहा जिणे केवली तीयपञ्चुप्पन्नमणांगयवियाणए सव्वन्नू सव्वदरिसी जेणं ममं
एस अट्ठे तव ताव रहस्सकडे हव्वमक्खाए जओ णं अहं जाणामि खंदया !
तए णं से खंदए कच्चायणस्सगोत्ते भगवं गोयमं एवं वयासी—गच्छामो णं
गोयमा ! तव धम्मायरियं धम्मोवदेसयं समणं भगवं महावीरं वंदांमो णमंसांमो
जाव पञ्जुवासामो, अहासुहं देवाणुप्पिया ! मा पडिवंधं, तए णं से भगवं गोयमे
खंदएणं कच्चायणस्सगोत्तेणं सद्धिं जेणेव समणे भगवं महावीरे तेणेव पहारेत्थ गम-
णयाए । तेणं कालेणं २ समणे भगवं महावीरे वियडभोई यावि होत्था, तए णं
समणस्स भगवओ महावीरस्स वियट्ठभोईस्स सरीरं ओरालं सिंगारं कळ्ळणं सिवं
घण्णं मंगळं सस्सिरीयं अणलंक्रियविभूसियं लक्खणवंजणगुणोववेयं सिरीए अतीव
२ उवसोभेमाणे चिट्ठइ । तए णं से खंदए कच्चायणस्सगोत्ते समणस्स भगवओ महा-
वीरस्सं वियट्ठभोईस्स सरीरं ओरालं जाव अतीव २ उवसोभेमाणं पासइ २ ता
हट्ठुट्ठचित्तमाणंदिए पीडमणे परमसोमणेस्सिए हरिसवसविसप्पमाणहियए जेणेव

समणे भगवं महावीरे तेणेव उवागच्छइ २ ता समणं भगवं महावीरं तिक्रुत्तो
 आयाहिणप्पयाहिणं करेइ जाव पज्जुवासइ । खंदयाति समणे भगवं महावीरे खंदयं
 कच्चाय० एवं वयासी-से नूणं तुमं खंदया ! सावत्थीए नयरीए पिगलएणं गियंठेणं
 वेसालियसावएणं इणमक्खेवं पुच्छिए मागहा ! किं सअंते लोए अणंते लोए एवं तं
 जेणेव मम अंतिए तेणेव हव्वमागए, से नूणं खंदया ! अयमट्टे समट्टे ?, हंता
 अत्थि, जेविय ते खंदया ! अयमेयारूवे अब्भत्थिए चिंतिए पत्थिए मणोगए संकप्पे
 समुप्पज्जित्था-किं सअंते लोए अणंते लोए ? तस्सवि य णं अयमट्टे-एवं खलु मए
 खंदया ! चउव्विहे लोए पन्नत्ते, तंजहा-दव्वओ खेत्तओ कालओ भावओ । दव्वओ
 णं एगे लोए सअंते १, खेत्तओ णं लोए असंखेज्जाओ जोयणक्रोडाक्रोडीओ आयाम-
 विक्खंभेणं असंखेज्जाओ जोयणक्रोडाक्रोडीओ परिकखेवेणं प० अत्थि पुण सअंते २,
 कालओ णं लोए ण कयावि न आसी न कयावि न भवति न कयावि न भविस्सति
 भविसु य भवति य भविस्सइ य धुवे णितिए सासते अक्खए अव्वए अवट्ठिए
 णिच्चे, णत्थि पुण से अंते ३, भावओ णं लोए अणंता वण्णपज्जवा गंध० रस०
 फासपज्जवा अणंता संठाणपज्जवा अणंता गस्यलहुयपज्जवा अणंता अगस्यलहुय-
 पज्जवा, नत्थि पुण से अंते ४, सेत्तं खंदगा ! दव्वओ लोए सअंते खेत्तओ लोए
 सअंते कालतो लोए अणंते भावओ लोए अणंते । जेवि य ते खंदया ! जाव सअंते
 जीवे अणंते जीवे, तस्सवि य णं अयमट्टे-एवं खलु जाव दव्वओ णं एगे जीवे
 सअंते, खेत्तओ णं जीवे असंखेज्जपएत्थिए असंखेज्जपदेसोगाढे अत्थि पुण से अंते,
 कालओ णं जीवे न कयावि न आसि जाव निच्चे नत्थि पुण से अंते, भावओ णं
 जीवे अणंता णाणपज्जवा अणंता दंसणप० अणंता चरित्तप० अणंता अगुरुलहुयप०
 नत्थि पुण से अंते, सेत्तं दव्वओ जीवे सअंते खेत्तओ जीवे सअंते कालओ जीवे
 अणंते भावओ जीवे अणंते । जेवि य ते खंदया पुच्छा [इमेयारूवे चिंतिए जाव
 सअंता सिद्धी अणंता सिद्धी, तस्सवि य णं अयमट्टे खंदया !-मए एवं खलु चउ-
 व्विहा सिद्धी प०, तं०-दव्वओ ४, दव्वओ णं एगा सिद्धी सअंता खेत्तओ णं
 सिद्धी पणयालीसं जोयणसयसहस्साइं आयामविक्खंभेणं एगा जोयणक्रोडी वायालीसं
 च जोयणसयसहस्साइं तीसं च जोयणसहस्साइं दोन्नि य अउणापन्नजोयणसए
 किंचि विसेसाहिए परिकखेवेणं अत्थि पुण से अंते, कालओ णं सिद्धी न कयावि न
 आसि० भावओ य-जहा लोयस्स तहा भाणियव्वा, तत्थ दव्वओ सिद्धी सअंता
 खे० सिद्धी सअंता का० सिद्धी अणंता भावओ सिद्धी अणंता । जेवि य ते खंदया !
 जाव कि अणंते सिद्धे तं चेव जाव दव्वओ णं एगे सिद्धे सअंते, खे० सिद्धे असं-

खेजपएसिए असंखेजपदेसोगाढे, अत्थि पुण से अंते, कालओ णं सिद्धे साइए
 अपज्जवसिए नत्थि पुण से अंते, भा० सिद्धे अणंता णाणपज्जवा अणंता दंसणपज्जवा
 जाव अणंता अगुरुलहुयप० नत्थि पुण से अंते, सेत्तं दव्वओ सिद्धे सअंते खेत्तओ
 सिद्धे सअंते का० सिद्धे अणंते भा० सिद्धे अणंते । जेवि य ते खंदया ! इमेयारुवे
 अव्वमत्थिए चित्तिए जाव समुप्पज्जित्था-केण वा मरणेणं मरमाणे जीवे वड्ढति वा
 हायति वा ?, तस्सवि य णं अयमट्ठे एवं खलु खंदया ! मए दुविहे मरणे पण्णत्ते,
 तंजहा-वालमरणे य पंडियमरणे य, से किं तं वालमरणे ?, २ दुवालसविहे प०,
 तं० वलयमरणे वसट्ठमरणे अंतोसल्लमरणे तव्वभवमरणे गिरिपडणे तरुपडणे जलप्पवेसे
 जलणप्प० विसभक्खणे सत्थोवाडणे वेहाणसे गिद्धपट्ठे । इच्चेतेणं खंदया ! दुवाल-
 सविहेणं वालमरणेणं मरमाणे जीवे अणंतेहिं नेरइयभवग्गहणेहिं अप्पाणं संजोएइ
 तिरियमणुदेव० अणाइयं च णं अणवदगं दीहमद्धं चाउरंतसंसारकंतरं अणुपरि-
 यट्ठइ, सेत्तं मरमाणे वड्ढइ २, सेत्तं वालमरणे । से किं तं पंडियमरणे ?, २
 दुविहे प०, तं० पाओवगमणे य भत्तपच्चक्खाणे य । से किं तं पाओवगमणे ?,
 २ दुविहे प०, तं०-नीहारिमे य अनीहारिमे य नियमा अप्पडिक्कमे, सेत्तं
 पाओवगमणे । से किं तं भत्तपच्चक्खाणे ?, २ दुविहे प०, तं०-नीहारिमे
 य अनीहारिमे य, नियमा सपडिक्कमे, सेत्तं भत्तपच्चक्खाणे । इच्चेते खंदया ! दुवि-
 हेणं पंडियमरणेणं मरमाणे जीवे अणंतेहिं नेरइयभवग्गहणेहिं अप्पाणं विसंजोएइ
 जाव वीईवयति, सेत्तं मरमाणे हायइ, सेत्तं पंडियमरणे । इच्चेएणं खंदया !
 दुविहेणं मरणेणं मरमाणे जीवे वड्ढइ वा हायति वा ॥ ९० ॥ एत्थ णं से
 खंदए कच्चायणस्स गोत्ते संवुद्धे समणं भगवं महावीरं वंदइ नमंसइ २ एवं
 वदासी-इच्छामि णं भंते ! तुव्वं अंतिए केवल्लिपज्जत्तं धम्मं निसामेत्तए, अहासुहं
 देवाणुप्पिया ! मा पडिवंधं । तए णं समणे भगवं महावीरे खंदयस्स कच्चाय-
 णस्सगोत्तस्स तीसे महत्तिमहालियाए परिसाए धम्मं परिकहेइ, धम्मकहा भाणि-
 यव्वा । तए णं से खंदए कच्चायणस्सगोत्ते समणस्स भगवओ महावीरस्स अंतिए
 धम्मं सोच्चा निसम्म हट्ठतुट्ठे जाव हियए उट्ठाए उट्ठेइ २ समणं भगवं महावीरं
 तिकखुत्तो आयार्हिणं पयार्हिणं करेइ २ एवं वदासी-सद्दहामि णं भंते । निग्गंथं
 पावयणं, पत्तियामि णं भंते ! निग्गंथं पावयणं, रोएमि णं भंते ! निग्गंथं पावयणं,
 अव्वमुट्ठेमि णं भंते ! निग्गंथं पा०, एवमेयं भंते ! तहमेयं भंते ! अवितहमेयं भंते !
 असंदिद्धमेयं भंते ! इच्छियमेयं भंते ! पडिच्छियमेयं भंते ! इच्छियपडिच्छियमेयं
 भंते ! से जहेयं तुव्वे वदहत्ति कट्ठु समणं भगवं महावीरं वंदति नमंसति २ उत्तर-

पुरच्छिमं दिसीभायं अवक्कमइ २ तिदंडं च कुंडियं च जाव धाउरत्ताओ य एगंतं
एडेइ २ जेणेव समणे भगवं महावीरे तेणेव उवागच्छइ २ समणं भगवं महावीरं
तिक्खुतो आयाहिणं पयाहिणं करेइ करेइत्ता जाव नमंसित्ता एवं वदासी-आलित्ते
णं भंते ! लोए पलित्ते णं भंते ! लोए आ० प० भं० लो० जरामरणेण य, से
जहानामए-केइ गाहावती आगारंसि झियायमाणंसि जे से तत्थ भंडे भवइ अप्पभारे
मोह्मगरुए तं गहाय आयाए एगंतमंतं अवक्कमइत्ति, एस मे नित्थारिए समाणे पच्छा
पुरा हियाए सुहाए खमाए निस्सेसाए आणुगामियत्ताए भविस्सइ, एवामेव देवाणु-
प्पिया ! मज्झवि आया एगे भंडे इट्ठे कंते पिए मणुत्ते मणामे थेज्जे वेसासिए संमए
बहुमए, अणुमए भंडकरंडगसमाणे मा णं सीयं मा णं उण्हं मा णं खुहा मा णं पिवासा
मा णं चोरा मा णं वाला मा णं दंसा मा णं मसगा मा णं वाइयपित्तियसंभियसं-
निवाइयविविहा रोगायंका परीसहोवसग्गा फुसंतुत्ति कट्टु एस मे नित्थारिए समाणे
परलोयस्स हियाए सुहाए खमाए नीसेसाए अणुगामियत्ताए भविस्सइ, तं इच्छामि
णं देवाणुप्पिया ! सयमेव पव्वावियं, सयमेव भुंडावियं सयमेव सेहावियं सयमेव
सिक्खावियं सयमेव आयारगोयरं विणयवेणइयचरणकरणजायामायावत्तियं धम्म-
माइक्खिअं । तए णं समणे भगवं महावीरे खंदयं कच्चायणस्सगोत्तं सयमेव पव्वा-
वेइ जाव धम्ममातिक्खइ, एवं देवाणुप्पिया ! गंतव्वं एवं चिद्धियव्वं एवं निसीति-
यव्वं एवं तुयड्ढियव्वं एवं भुंजियव्वं एवं भासियव्वं एवं उट्ठाए पाणेहिं भूएहिं
जीवेहि सत्तेहि संजमेणं संजमियव्वं, अस्सि च णं अट्ठे णो किच्चिवि पमाइयव्वं ।
तए णं से खंदए कच्चायणस्सगोत्ते समणस्स भगवओ महावीरस्स इमं एयाह्वं
धम्मियं उवएसं सम्मं संपडिवज्जति तमाणाए तह गच्छइ तह त्रिट्ठइ तह निसीयति
तह तुयट्ठइ तह भुंजइ तह भासइ तह उट्ठाए २ पाणेहिं भूएहिं जीवेहिं सत्तेहिं
संजमेणं संजमियव्वमिति, अस्सि च णं अट्ठे णो पमायइ । तए णं से खंदए कच्चाय-
अणगारे जाते इरियासमिए भासासमिए एसणासमिए आयाणभंडमत्तनिक्खेवणा-
समिए उच्चारपासवणखेलसिंघाणजल्लप्रारिट्ठावणिासमिए मणसमिए वयसमिए काय-
समिए मणगुत्ते वइगुत्ते कायगुत्ते गुत्ते गुत्तिदिए गुत्तवंभयारी चाई लज्जू धण्णे खंति-
खमे जिइंदिए सोहिए अणियाणे अप्पुस्सुए अबहिंहेस्से सुसामण्णरए दंते इणमेव
णिग्गंथं पावयणं पुरओ काउं विहरइ ॥ ९१ ॥ तए णं समणे, भगवं महावीरे
कयंगलाओ नयरीओ छत्तपलासयाओ उज्जाणाओ पडिनिक्खमइ २ बहिया जणव-
यविहारं विहरति । तए णं से खंदए अणगारे समणस्स भगवओ महावीरस्स तहा-
रुवाणं थेराणं अंतिए सामाइयमाइयाई एकारस अंगाई अहिज्जइ, जेणेव समणे

भगवं महावीरे तेणेव उवागच्छइ २ समणं भगवं महावीरं वंदइ नमंसइ २ एवं वयासी-इच्छामि णं भंते । तुब्भेहिं अब्भणुण्णाए समाणे मासियं भिक्खुपडिमं उवसंपज्जिता णं विहरित्तए, अहासुहं देवाणुप्पिया । मा पडिवंधं । तए णं से खंदए अणगारे समणेणं भगवया महावीरेणं अब्भणुण्णाए समाणे हट्ठे जाव नमंसित्ता मासियं भिक्खुपडिमं उवसंपज्जिता णं विहरइ, तए णं से खंदए अणगारे मासिय-भिक्खुपडिमं अहासुत्तं अहाकप्पं अहामगं अहातच्चं अहासम्मं काएण फासेति पालेति सोभेति तीरेति पूरेति किट्ठेति अणुपालेड आणाए आराहेइ संमं काएण फासित्ता जाव आराहेत्ता जेणेव समणे भगवं महावीरे तेणेव उवागच्छइ २ समणं भगवं जाव नमंसित्ता एवं वयासी-इच्छामि णं भंते । तुब्भेहिं अब्भणुण्णाए समाणे दोमासियं भिक्खुपडिमं उवसंपज्जिता णं विहरित्तए अहासुहं देवाणुप्पिया ! मा पडिवंधं, तं चेव, एवं तेमासियं चाउम्मासियं पंचछसत्तमा०, पढमं सत्तराईदियं दोच्चं सत्तराईदियं तच्चं सत्तरातिंदियं, अहोरातिंदियं एगरा०, तए णं से खंदए अणगारे एगराईदियं भिक्खुपडिमं अहासुत्तं जाव आराहेत्ता जेणेव समणे० तेणेव उवागच्छति २ समणं भगवं म० जाव नमंसित्ता एवं वयासी-इच्छामि णं भंते । तुब्भेहिं अब्भणुण्णाए समाणे गुणरयणसंवच्छरं तवोकम्मं उवसंपज्जिता णं विहरित्तए, अहासुहं देवाणुप्पिया ! मा पडिवंधं । तए णं से खंदए अणगारे समणेणं भगवया महावीरेणं अब्भणुण्णाए समाणे जाव नमंसित्ता गुणरयणसंवच्छरं तवोकम्मं उवसंपज्जिता णं विहरति, तं०-पढमं मासं चउत्थं चउत्थेणं अनिक्खित्तेणं तवोकम्मेणं-दिया ठाणुकुडुए सूराभिमुहे आयावणभूमीए आयावेमाणे रत्तिं वीरासणेणं अवाउडेण य । एवं दोच्चं मासं छट्ठं छट्ठेणं एवं तच्चं मासं अट्ठमं अट्ठमेणं चउत्थं मासं दसमं दसमेणं पंचमं मासं वारसमं वारसमेणं छट्ठं मासं चोदसमं चोदसमेणं सत्तमं मासं सोलसमं २ अट्ठमं मासं अट्ठारसमं २ नवमं मासं वीसतिमं २ दसमं मासं वावीसं २ एक्कारसमं मासं चउव्वीसतिमं २ वारसमं मासं छव्वीसतिमं २ तेरसमं मासं अट्ठावीसतिमं २ चोदसमं मासं तीसइमं २ पन्नरसमं मासं वत्तीसतिमं २ सोलसमं मासं चोत्तीसइमं २ अनिक्खित्तेणं तवोकम्मेणं दिया ठाणुकुडुए सूराभिमुहे आयावणभूमीए आयावेमाणे रत्तिं वीरासणेणं अवाउडेणं, तए णं से खंदए अणगारे गुणरयणसंवच्छरं तवोकम्मं अहासुत्तं अहाकप्पं जाव आराहेत्ता जेणेव समणे भगवं महावीरे तेणेव उवागच्छइ २ समणं भगवं महावीरं वंदइ नमंसइ २ बहूहिं चउत्थं छट्ठमदसमदुवालसेहिं मासद्वमासखमणेहिं विचित्तेहिं तवोकम्मेहिं अप्पाणं भावेमाणे विहरति । तए णं से खंदए अणगारे तेणं ओरालेणं विउलेणं पयत्तेणं पग्ग-

हिण्णं कल्लणेणं सिवेणं धन्नेणं मंगल्लेणं सस्सिरीएणं उदग्गेणं उदत्तेणं उत्तमेणं उदा-
रेणं महाणुभागेणं तवोकम्मेणं सुक्के लुक्खे निम्मंसे अट्टिचम्मावणद्धे किडिकिडिया-
भूए किसे धमणिसंतए जाते यावि होत्था, जीवंजीवेण गच्छइ जीवंजीवेण चिट्ठइ
भासं भासित्तावि गिलाइ भासं भासमाणे गिलाति भासं भासिस्सामीति गिलायति,
से जहा नामए-कट्टसगडिया इ वा पत्तसगडिया इ वा पत्ततिलभंडगसगडिया इ वा
एरंडकट्टसगडिया इ वा इंगालसगडिया इ वा उण्हे दिण्णा सुक्का समाणी ससहं
गच्छइ ससहं चिट्ठइ एवामेव खंदएवि अणगारे ससहं गच्छइ ससहं चिट्ठइ उवचिते
तवेणं अवचिए मंससोणिएणं हुयात्तणेविव भासरासिपडिच्छन्ने तवेणं तेएणं तवते-
यसिरीए अतीव २ उवसोभेमाणे २ चिट्ठइ ॥ ९२ ॥ तेणं कालेणं २ रायगिहे नगरे
जाव समोसरणं जाव परिसा पडिगया, तए णं तस्स खंदयस्स अण० अण्णया
कयाइ पुव्वरत्तावरत्तकालसमयंसि धम्मजागरियं जागरमाणस्स इमेयारूवे अब्भत्थिए
चित्थिए जाव समुप्पज्जित्था-एवं खलु अहं इमेणं एयारूवेणं ओरालेणं जाव किसे
धमणिसंतए जाते जीवंजीवेणं गच्छामि जीवंजीवेणं चिट्ठामि जाव गिलामि जाव
एवामेव अहंपि ससहं गच्छामि ससहं चिट्ठामि तं अत्थि ता मे उट्ठाणे कम्मे वले
वीरिए पुरिसक्कारपरक्कमे तं जाव ता मे अत्थि उट्ठाणे कम्मे वले वीरिए पुरिसक्कार-
परक्कमे जाव य मे धम्मायरिए धम्मोवदेसए समणे भगवं महावीरे जिणे सुहत्थी
विहरइ ताव ता मे सेयं कल्लं पाउप्पभायाए रयणीए फुल्लुप्पलकमलकोमलुम्मिल्लि-
यंमि अहापांडुरे पभाए रत्तासोयप्पकासकिंसुयसुयमुहगुंजद्धरागसरिसे कमलागरसंड-
वोहए उट्ठियंमि सूरुं सहस्सरस्सिमि दिणयरे तेयसा जलंते समणं भगवं महावीरं
वंदिता जाव पज्जुवासित्ता समणेणं भगवया महावीरेणं अब्भणुण्णाए समाणे सयमेवं
पंच महव्वयाणि आरोवेत्ता समणा य समणीओ य खामेत्ता तहारूवेहि धेरेहिं
कडाईहिं सद्धिं विपुल पव्वयं सणियं २ दुरुहिता मेघघणसन्निगासं देवसन्निवातं
पुढवीसिलावट्ठयं पडिलेहिता दब्भसंथारयं संथरित्ता दब्भसंथारोवगयस्स संलेहणा-
जोसणाजूसियस्स भत्तपाणपडियाइक्खियस्स पाओवंगयस्स कालं अणवकंखमाणस्स
विहरित्तएत्ति कट्ठु एवं संपेहेइ २ ता कल्लं पाउप्पभायाए रयणीए जाव जलंते जेणेव
समणे भग० जाव पज्जुवासति, खंदयाइ समणे भगवं महावीरे खंदयं अणगारं एवं
वयासी-से नूणं तव खंदया ! पुव्वरत्तावरत्तकालस० जाव जागरमाणस्स इमेयारूवे
अब्भत्थिए जाव समुप्पज्जित्था-एवं खलु अहं इमेणं एयारूवेणं तवेणं ओरालेणं
विपुलेणं तं चेव जाव कालं अणवकंखमाणस्स विहरित्तएत्ति कट्ठु एवं संपेहेति २
कल्लं पाउप्पभाए जाव जलंते जेणेव मम अंतिए तेणेव हव्वमागए, से नूणं खंदया !

अट्टे समट्टे १, हंता अत्थि, अहासुहं देवाणुप्पिया ! मा पडिबंवं ॥ ९३ ॥ तए णं
 से खंदए अणगारे समणेणं भगवया महावीरेणं अब्भणुण्णाए समाणे हट्ठतुट्ठ जाव
 हयहियए उट्ठाए उट्ठेइ २ समणं भगवं महा० तिक्खुत्तो आयाहिणं पयाहिणं करेइ
 २ जाव नमंसित्ता सयमेव पंच महव्वयाइं आरुहेइ २ ता समणे य समणीओ य
 खामेइ २ ता तहारुवेहिं थेरेहिं कडाईहिं सद्धिं विपुलं पव्वयं सणियं २ दुरुहेइ
 मेहघणसन्निगासं देवसन्निवायं पुढविसिलावट्ठयं पडिलेहेइ २ उच्चारपासवणभूमि
 पडिलेहेइ २ दब्भसंथारयं संथरइ २ ता पुरत्थाभिमुहे संपलियं कनिसन्ने करयल-
 परिग्गहियं दसनहं सिरसावत्तं मत्थए अजलिं कट्ठु एवं वदासी-नमोऽत्थु णं अरहं-
 ताणं भगवंताणं जाव संपत्ताणं, नमोऽत्थु णं समणस्स भगवओ म० जाव संपा-
 विउकामस्स, वंदामि णं भगवंतं तत्थ गयं इहगते, पासउ मे भयवं तत्थगए इह-
 गयंति कट्ठु वदइ नमंसति २ एवं वदासी—पुव्विपि मए समणस्स भगवओ महा-
 वीरस्स अंतिए सव्वे पाणाइवाए पच्चक्खाए जावजीवाए जाव मिच्छादंसणसल्ले
 पच्चक्खाए जावजीवाए इयाणिपि य णं समणस्स भ० म० अंतिए सव्वं पाणाइ-
 वायं पच्चक्खामि जावजीवाए जाव मिच्छादंसणसल्लं पच्चक्खामि, एवं सव्वं असणं
 पाणं खा० सा० चउव्विहंपि आहारं पच्चक्खामि जावजीवाए, जंपि य इमं सरीरं
 इट्ठं कंतं पियं जाव फुसंतुत्तिकट्ठु एयंपि णं चरिमेहिं उरसासनीसासेहिं वोसिरा-
 मित्तिकट्ठु संलेहणाजूसणाजूसिए भत्तपाणपडियाइक्खिए पाओवगए कालं अणवकंख-
 माणे विहरति । तए णं से खंदए अण० समणस्स भ० म० तहारुवाणं थेराणं
 अंतिए सामाइयमाइयाइं इक्कारस अगाइं अहिजित्ता बहुपडिपुण्णाइं दुवालंसवासाइं
 सामन्नपरियाणं पाउणित्ता मासियाए संलेहणाए अत्ताणं झूसित्ता संट्ठि भत्ताइं अण-
 सणाए छेदेत्ता आलोइयपडिकंते समाहिपत्ते आणुपुव्वीए कालगए ॥ ९४ ॥ तए
 णं ते थेरा भगवंतो खंदयं अण० कालगयं जाणित्ता परिनिव्वाणवत्तिथं काउस्सग्गं
 करेति २ पत्तचीवराणि गिण्हंति २ विपुलाओ पव्वयाओ सणियं २ पच्चोसहंति २
 जेणेव समणे भगवं म० तेणेव उवा० समणं भगवं म० वंदंति नमंसति २ एवं
 वदासी—एवं खलु देवाणुप्पियाणं अंतेवासी खंदए नामं अणगारे पगइभइए पगति-
 विणीए पगतिउवसंते पगतिपयणुकोहमाणमायालोमे सिउमइवसंपन्ने अल्लीणे भइए
 विणीए, से णं देवाणुप्पिएहिं अब्भणुण्णाए समाणे सयमेव पंच महव्वयाणि आरो-
 वित्ता समणे य समणीओ य खामेत्ता अम्हेहिं सद्धिं विपुलं पव्वयं तं चेव निरव-
 सेसं जाव आणुपुव्वीए कालगए इमे य से आयारमंडए । अंते त्ति भगवं गोयमे
 समणं भगवं म० वंदंति नमंसति २ एवं वयासी—एवं खलु देवाणुप्पियाणं अंतेवासी

खंदए नामं अण० कालमासे कालं किच्चा कहिं गए ? कहिं उववण्णे ?, गोयमाइ समणे भगवं महा० भगवं गोयमं एवं वयासी-एवं खलु गोयमा ! मम अंतेवासी खंदए नामं अणगारे पगतिभ० जाव से णं मए अब्भणुण्णाए समाणे सयमेव पंच महव्वयाइं आसहेत्ता तं चेव सव्वं अविसेसियं नेयव्वं जाव आलोइयपडिक्कते समाहिपत्ते कालमासे कालं किच्चा अच्चुए कप्पे देवत्ताए उववण्णे, तत्थ णं अत्थेग-इयाणं देवाणं बावीसं सागरोवमाइं ठिती प०, तस्स णं खंदयस्सवि देवस्स बावीसं सागरोवमाइं ठिती प० । से णं भंते ' खंदए देवे ताओ देवलोगाओ आउक्खएणं भवक्खएणं ठिइक्खएणं अणंतरं चयं चइत्ता कहिं गच्छिहिति ? कहिं उववज्जिहिति ? गोयमा ! महाविदेहे वासे सिज्झिहिति वुज्झिहिति मुच्चिहिति परिनिव्वाहिति सव्व-दुक्खाणमंतं करेहिति ॥ ९५ ॥ **खंदओ समत्तो ॥ वितीयसयस्स पढमो ॥**

कति णं भंते ! समुग्घाया पणत्ता ?, गोयमा ! सत्त समुग्घाया पणत्ता, तंजहा-वेदणासमुग्घाए एवं समुग्घायपदं छाउमत्थियसमुग्घायवज्जं भाणियव्वं, जाव वेमा-णियाणं कसायसमुग्घाया अप्पावहुयं । अणगारस्स णं भंते ! भावियप्पणो केवलि-समुग्घाय जाव सासयमणागयद्धं चिट्ठंति, समुग्घायपदं नेयव्वं ॥ ९६ ॥ **वितीय-सए वितीयोद्देसो भाणियव्वो ॥**

कति णं भंते ! पुढवीओ पन्नत्ताओ ?, जीवाभिगमे नेरइयाणं जो वितिओ उद्देसो सो नेयव्वो, पुढविं ओगाहिता निरया संठाणमेव बाहल्लं । [विक्खंभपरिक्खेवो वण्णो गंधो य फासो य ॥ १ ॥] जाव किं सव्वपाणा उववण्णपुव्वा ?, हंता गोयमा ! असतिं अदुवा अणंतखुत्तो ॥ ९७ ॥ **पुढवी उद्देसो तइओ ॥**

कति णं भंते ! इंदिया पन्नत्ता ?, गोयमा ! पंचिंदिया पन्नत्ता, तंजहा-पढमिल्लो इंदियउद्देसो नेयव्वो, संठाणं बाहल्लं पोहत्तं जाव अलोगो ॥ ९८ ॥ **इंदियउद्देसो ॥**

अण्णउत्थिया णं भंते ! एवमाइक्खंति भासंति पन्नवेति परुवेति, तंजहा-एवं खलु नियंठे कालगए समाणे देवब्भूएणं अप्पाणेणं से णं तत्थ णो अन्ने देवे नो अन्नेसिं देवाणं देवीओ अहिजुंजिय २ परियारेइ १ णो अप्पणच्चियाओ देवीओ अभिजुंजिय २ परियारेइ २ अप्पणामेव अप्पाणं विउव्विय २ परियारेइ ३ एगेवि य णं जीवे एगेणं समएणं दो वेदे वेदेइ, तंजहा-इत्थिवेदं च पुरिसवेदं च, एवं परउ-त्थियवत्तव्वया नेयव्वा जाव इत्थिवेदं च पुरिसवेदं च । से कहमेयं भंते ! एवं ?, गोयमा ! जण्णं ते अन्नउत्थिया एवमाइक्खंति जाव इत्थिवेदं च पुरिसवेदं च, जे ते एवमाहंसु मिच्छं ते एवमाहंसु, अहं पुण गोयमा ! एवमात्तिक्खामि भा० प० परु०-एवं खलु नियंठे कालगए समाणे अन्नयरेसु देवलोएसु देवत्ताए उववत्तारो

भवन्ति महिद्धिएसु जाव महाणुभागेसु दूरगतीसु चिरद्वितीएसु, से णं तत्थ देवे भवति महिद्धिए जाव दस दिसाओ उज्जोवेमाणे पभासेमाणे जाव पडिह्वे । से णं तत्थ अन्ने देवे अन्नेसि देवाणं देवीओ अभिजुंजिय २ परियारेइ १ अप्पणच्चियाओ देवीओ अभिजुंजिय २ परियारेइ २ नो अप्पणामेव अप्पाणं विउव्विय २ परियारेइ ३, एगेविय णं जीवे एगेणं समएणं एगं वेदं वेदेइ, तंजहा-इत्थिवेदं वा पुरिसवेदं वा, जं समयं इत्थिवेदं वेदेइ णो तं समयं पुरिसवेयं वेएइ जं समयं पुरिसवेयं वेएइ नो तं समयं इत्थिवेयं वेदेइ, इत्थिवेयस्स उदएणं नो पुरिसवेदं वेएइ, पुरिसवेयस्स उदएणं नो इत्थिवेयं वेएइ, एवं खलु एगे जीवे एगेणं समएणं एगं वेदं वेदेइ, तंजहा-इत्थीवेयं वा पुरिसवेयं वा, इत्थी इत्थिवेएणं उदिन्नेणं पुरिसं पत्थेइ, पुरिसो पुरिसवेएणं उदिन्नेणं, इत्थि पत्थेइ, दोवि ते अन्नमन्नं पत्थेति, तंजहा-इत्थी वा पुरिसं पुरिसे वा इत्थि ॥ ९९ ॥ उदगगव्भे णं भंते ! उदगगव्भेति कालतो केवच्चिरं होइ ?, गोयमा ! जहन्नेणं एक्कं समयं उक्कोसेणं छम्मासा ॥ तिरिक्खजोणियगव्भे णं भंते ! तिरिक्खजोणियगव्भेति कालओ केवच्चिरं होति ?, गोयमा ! जहन्नेणं अंतोमुहुत्तं उक्कोसेणं अट्ठ संवच्छराइं ॥ मणुस्सीगव्भे णं भंते ! मणुस्सीगव्भेति कालओ केवच्चिरं होइ ?, गोयमा ! जहन्नेणं अंतोमुहुत्तं उक्कोसेणं वारस संवच्छराइं ॥ १०० ॥ कायभवत्थे णं भंते ! कायभवत्थेति कालओ केवच्चिरं होइ ?, गोयमा ! जहन्नेणं अंतोमुहुत्तं उक्कोसेणं चउव्वीसं संवच्छराइं ॥ १०१ ॥ मणुस्सपंचेदियतिरिक्खजोणियवीए णं भंते ! जोणियव्भूए केवतियं कालं संचिद्धइ ?, गोयमा ! जहन्नेणं अंतोमुहुत्तं उक्कोसेणं वारस मुहुत्ता ॥ १०२ ॥ एगर्जावे णं भंते ! जोणिए वीयव्भूए केवतियाणं पुत्तत्ताए हव्वमागच्छइ ?, गोयमा ! जहन्नेणं इक्कस्स वा दोहं वा तिण्हं वा, उक्कोसेणं सयपुहुत्तस्स जीवाणं पुत्तत्ताए हव्वमागच्छति ॥ १०३ ॥ एगर्जीवस्स णं भंते ! एगर्भवग्गहणेणं केवइया जीवा पुत्तत्ताए हव्वमागच्छंति ? गोयमा ! जहन्नेणं इक्को वा दो वा तिन्नि वा, उक्कोसेणं सयसहस्सपुहत्तं जीवा णं पुत्तत्ताए हव्वमागच्छंति, से केणट्ठेणं भंते ! एवं वुच्चइ-जाव हव्वमागच्छइ ?, गोयमा ! इत्थीए य पुरिसस्स य कम्मकडाए जोणीए मेहुणवत्तिए नामं संजोए समुप्पज्जइ, ते दुहओ सिणेहं संचिणंति २ तत्थ णं जहन्नेणं एक्को वा दो वा तिण्णि वा उक्कोसेणं सयसहस्सपुहत्तं जीवाणं पुत्तत्ताए हव्वमागच्छंति, से तेणट्ठेणं जाव हव्वमागच्छइ ॥ १०४ ॥ मेहुणे णं भंते ! सेवमाणस्स केरिसिए असंजमे कज्जइ ?, गोयमा ! से जहानामए केइ पुरिसे रुयनालियं वा वूरनालियं वा तत्तेणं कर्णएणं समभिधंसेज्जा एरिसए णं गोयमा ! मेहुणं सेवमाणस्स असंजमे कज्जइ, सेवं भंते ! सेवं भंते ! जाव विहरति ॥ १०५ ॥ तए णं

समणे भगवं महावीरे रायणिहाओ नगराओ गुणसिलाओ उज्जाणाओ पडिनिक्खमइ २
 बहिया जणवयविहारं विहरति । तेणं कालेणं २ तुंगिया नामं नगरी होत्था वण्णओ,
 तीसे णं तुंगियाए नगरीए बहिया उत्तरपुरच्छिमे दिसीभाए पुप्फवतिए नामं उज्जाणे
 होत्था, वण्णओ, तत्थ णं तुंगियाए नयरीए वहवे समणोवासया परिवसंति अद्धा
 दित्ता विच्छिण्णविपुलभवणसयणासणजाणवाहणाइण्णा बहुधणवहुजायरुवरयया
 आओगपओगसंपत्ता विच्छद्ध्यविपुलभत्तपाणा बहुदासीदासगोमहिंसगवेलयप्प-
 भूया बहुजणस्स अपरिभूया अभिगयजीवाजीवा उवलद्धपुण्णपावा आसवसंवरनिज्ज-
 रकिरियार्हिकरणबंधमोक्खकुसला असहेज्जदेवासुरनागसुवण्णजक्खरक्खसकिंनरकिं-
 पुरिसगरुल्लगंधंभवमहोरगाइएहिं देवगणेहिं निग्गंथाओ पावयणाओ अणत्तिकमणिज्जा
 णिग्गंथे पावयणे निस्संकिया निक्कंखिया निव्वितिगिच्छा लद्धट्ठा गहियट्ठा पुच्छियट्ठा
 अभिगयट्ठा विणिच्छियट्ठा अट्ठिमिजपेम्माणुरागरत्ता अयमाउसो ! निग्गंथे पावयणे
 अट्ठे अयं परमट्ठे सेसे अणट्ठे ऊसियफलिहं अवंगुयदुवारा चियत्तंतेउरघरप्पवेसा बहूहिं
 सीलव्वयगुणवेरमणपच्चक्खाणपोसहोववासेहिं, चाउइसट्ठमुद्धिट्ठपुण्णमासिणीसु पडिपुन्नं
 पोसहं सम्मं अणुपालेमाणा समणे निग्गंथे फासुएसणिज्जेणं असणपाणखाइमसाइमेणं
 वत्थपडिग्गहकंबलपायपुंछणेणं, पीढफलगसेज्जासंथारएणं ओसहमेसज्जेण य पडि-
 लाभेमाणा अहापडिग्गहिएहिं तवोक्कम्मेहिं अप्पाणं भावेमाणा विहरंति ॥ १०६ ॥
 तेणं कालिणं २ पासावच्चिज्जा थेरा भगवंतो जातिसंपन्ना कुलसंपन्ना बलसंपन्ना
 रुवसंपन्ना विणयसंपन्ना णाणसंपन्ना दंसणसंपन्ना चरित्तसंपन्ना लज्जासंपन्ना लाघव-
 संपन्ना ओयंसी तेयंसी वच्चंसी जसंसी जियकोहा जियमाणा जियलोभा जियनिद्दा
 जितिदिया जियपरीसहा जीवियासमरणभयविप्पमुक्का जाव कुत्तियावणभूता बहु-
 रसुया बहुपरिवारा पंचहिं अणगारसएहिं सद्धि संपरिवुडा अहाणुपुव्वि चरमाणा
 गामाणुगामं दूइज्जमाणा सुहंसुहेणं विहरमाणा जेणेव तुंगिया नगरी जेणेव पुप्फ-
 वतीए उज्जाणे तेणेव उवागच्छंति २ अहापडिरुवं उग्गहं उग्गिण्हित्ता णं संजमेणं
 तवसा अप्पाणं भावेमाणा विहरंति ॥ १०७ ॥ तए णं तुंगियाए नगरीए सिघाड-
 गतिगच्चउक्कच्चरमहापहपहेसु जाव एगदिसाभिमुहा णिज्जायंति, तए णं ते समणो-
 वासया इमीसे कहाए लद्धट्ठा समाणा हट्ठतुट्ठा जाव सहावेति २ एवं वदासी=एवं
 खलु देवाणुप्पिया ! पासावच्चेज्जा थेरा भगवंतो जातिसंपन्ना जाव अहापडिरुवं
 उग्गहं उग्गिण्हित्ता णं संजमेणं तवसा अप्पाणं भावेमाणा विहरंति, तं महाफलं
 खलु देवाणुप्पिया ! तहारुवाणं थेराणं भगवंताणं णामगोयस्सवि सवणयाए किमंग
 पुण अभिगमणवंदणनसंसणपडिपुच्छणपज्जुवासणयाए ? जाव गहणयाए ? तं

गच्छामो णं देवाणुप्पिया ! धेरे भगवंते वंदामो नमंसामो जाव पज्जुवासामो, एयं
 णं इह भवे वा परभवे वा जाव अणुगामियत्ताए भविस्सतीतिकहु अन्नमन्नस्स अंतिए
 एयमट्ठं पडिनुणंति २ जेणेव सयाइं २ गिहाइं तेणेव उवागच्छंति २ ण्हाया
 सुद्धप्पावेसाइं मंगलाइं वत्थाइं पवराइं परिहिया अप्पमहग्घाभरणालंकियसरीरा
 सएहिं २ गेहेहिंतो पडिनिक्खमंति २ ता एगयओ मेलायंति २ पायविहारचारेणं
 तुंगियाए नगरीए मज्झमज्झेणं णिग्गच्छंति २ जेणेव पुप्फवतीए उज्जाणे तेणेव
 उवागच्छंति २ धेरे भगवंते पंचविहेणं अभिगमेणं अभिगच्छंति, तंजहा-सच्चित्ताणं
 दब्बाणं विउसरण्याए १ अच्चित्ताणं दब्बाणं अविउसरण्याए २ एगसाडिएणं
 उत्तरासंगकरणेणं ३ चक्खुप्पासे अंजलिप्पग्गहेणं ४ मणसो एगत्तीकरणेणं ५ जेणेव
 थेरा भगवंतो तेणेव उवागच्छंति २ तिक्खुत्तो आयाहिणं पयाहिणं करेन्ति २ जाव
 तिविहाए पज्जुवासणाए पज्जुवासंति ॥ १०८ ॥ तए णं ते थेरा भगवंतो तेसिं
 समणोवासयाणं तीसे य महतिमहालियाए चाउज्जामं धम्मं परिकहेंति जहा केसि-
 सामिस्स जाव समणोवासियत्ताए आणाए आराहगे भवति जाव धम्मो कहिओ ।
 तए णं ते समणोवासया थेराणं भगवंताणं अतिए धम्मं सोच्चा निसम्म हट्ठ तुट्ठ
 जाव हयहियया तिक्खुत्तो आयाहिणप्पयाहिणं करेन्ति २ जाव तिविहाए पज्जुवास-
 णाए पज्जुवासंति २ एवं वदासी-संजमे णं भंते ! किफले ? तवे णं भंते ! किफले ?,
 तए णं ते थेरा भगवंतो ते समणोवासए एवं वदासी-संजमे णं अज्जो ! अण्हय-
 फले तवे वोदाणफले, तए णं ते समणोवासया थेरे भगवंते एवं वदासी-जति णं
 भंते ! संजमे अण्हयफले तवे वोदाणफले किंपत्तियं णं भंते ! देवा देवलोएसु
 उववज्जंति, तत्थ णं कालियपुत्ते नामं थेरे ते समणोवासए एवं वदासी-पुव्वतवेणं
 अज्जो ! देवा देवलोएसु उववज्जंति, तत्थ णं मेहिले नामं थेरे ते समणोवासए एवं
 वदासी-पुव्वसंजमेणं अज्जो ! देवा देवलोएसु उववज्जंति, तत्थ णं आणंदरक्खिवाए
 णामं थेरे ते समणोवासए एवं वदासी-कम्मियाए अज्जो ! देवा देवलोएसु उव-
 वज्जंति, तत्थ णं कासवे णामं थेरे ते समणोवासए एवं वदासी-संगियाए अज्जो !
 देवा देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो !
 देवा देवलोएसु उववज्जंति, सच्चे णं एस अट्ठे नो चेव णं आयभाववत्तव्वयाए,
 तए णं ते समणोवासया थेरेहिं भगवंतेहि इमाइं एयारुवाइं वागरणाइं वांग-
 रिया समांणा हट्ठतुट्ठा थेरे भगवंते वंदंति नमंसंति २ पसिणाइं पुच्छंति २ अट्ठाइं
 उवादियंति २ उट्ठाइ उट्ठेन्ति २ थेरे भगवंते तिक्खुत्तो वंदंति णमंसंति २ थेराणं
 भगवं० अंतियाओ पुप्फवतियाओ उज्जाणाओ पडिनिक्खमंति २ जामेव दिसिं

पाउब्भूया तामेव दिसि पडिगया ॥ तए णं ते थेरा अन्नया कयाई तुंगियाओ
 पुप्फवतिउज्जाणाओ पडिनिग्गच्छन्ति २ वहिया जणवयविहारं विहरन्ति ॥ १०९ ॥
 तेणं कालेणं २ रायगिहे नामं नगरे जाव परिसा पडिगया, तेणं कालेणं २ सम-
 णस्स भगवओ महावीरस्स जेठ्ठे अंतेवासी इंदभूतीनामं अणगारे जाव संखितवि-
 उलतेयलेस्से छट्ठंछट्ठेणं अनिक्खितेणं तवोक्कम्मेणं संजमेणं तवसा अप्पाणं भावे-
 माणे जाव विहरति । तए णं से भगवं गोयमे छट्ठक्खमणपारणगंसि पढमाए पोरि-
 सीए सज्जायं करेइ बीयाए पोरिसीए झाणं झियायइ तइयाए पोरिसीए अतुरियम-
 च्चवलमसंभंते मुहपोत्तियं पडिलेहेइ २ भायणाइं वत्थाइं पडिलेहेइ २ भायणाइं
 पमज्जइ २ भायणाइं उग्गाहेइ २ जेणेव समणे भगवं महावीरे तेणेव उवागच्छइ
 २ समणं भगवं महावीरं वंदइ नमंसइ २ एवं वदासी-इच्छामि णं भंते ! तुब्भेहिं
 अब्भणुन्नाए छट्ठक्खमणपारणगंसि रायगिहे नगरे उच्चनीयमज्झिमाइं कुलाइं घरस-
 मुदाणस्स भिक्खायरियाए अडित्तए, अहासुहं देवाणुप्पिया ! मा पडिवंधं, तए णं
 भगवं गोयमे समणेणं भगवया महावीरेणं अब्भणुन्नाए समाणे समणस्स भगवओ
 महावीरस्स अंतियाओ गुणसिलाओ उज्जाणाओ पडिनिक्खमइ २ अतुरियमच्चव-
 लमसंभंते जुगंतरपलोयणाए दिट्ठीए पुरओ रियं सोहेमाणे २ जेणेव रायगिहे नगरे
 तेणेव उवागच्छइ २ रायगिहे नगरे उच्चनीयमज्झिमाइं कुलाइं घरसमुदाणस्स
 भिक्खायरियं अडइ । तए णं से भगवं गोयमे रायगिहे न० जाव अडमाणे बहु-
 जणसइं निसामेइ-एवं खलु देवाणुप्पिया ! तुज्जियाए नगरीए वहिया पुप्फवतीए
 उज्जाणे पासावच्चिज्जा थेरा भगवंतो समणोवासएहिं इमाइं एयारूवाइं वागरणाइं
 पुच्छिया-संजमे णं भंते ! किफले ? तवे णं भंते ! किफले ?, तए णं ते थेरा भग-
 वंतो ते समणोवासए एवं वदासी-संजमे णं अज्जो ! अण्हयफले तवे वोदाणफले
 तं चेव जाव पुव्वतवेणं पुव्वसंजमेणं कम्मियाए संगियाए अज्जो ! देवा देवलोएसु
 उववज्जति, सच्चे णं एसमट्ठे णो चेव णं-आयभाववत्तव्वयाए ॥ से कहमेयं मण्णे
 एवं ?, तए णं समणे० गोयमे इमीसे कहाए लद्धेठ्ठे समाणे जायसट्ठे जाव समुप्प-
 न्नकोउहल्ले अहापज्जतं समुदाणं गेण्हइ २ रायगिहाओ नगराओ पडिनिक्खमइ २
 अतुरियं जाव सोहेमाणे जेणेव गुणसिलए उज्जाणे जेणेव समणे भगवं महावीरे
 तेणेव उवा० सम० भ० महावीरस्स अदूरसामंते गमणागमणए पडिक्कमइ एसण-
 मणेसणं आलोएइ २ भत्तप्राणं पडिदंसेइ २ समणं भ० महावीरं जाव एवं वयासी-
 एवं खलु भंते ! अहं तुब्भेहिं अब्भणुन्नाए समाणे रायगिहे नगरे उच्चनीयमज्झि-
 माणि कुलाणि घरसमुदाणस्स भिक्खायरियाए अडमाणे बहुजणसइं निसामेति(मि);

एवं खलु देवा० तुंगियाए नगरीए वहिया पुप्फेवईए उज्जाणे पासावञ्चिजा थेरा भगवंतो
समणोवासएहिं इमाई एयारुवाई वागरणाई पुच्छिया—संजमे णं भंते ! किंफले ?
तवे किफले ? तं चेव जाव सच्चे णं एसमट्ठे णो चेव णं आयभाववत्तव्वयाए, तं
पभू णं भंते ! ते थेरा भगवंतो तेसिं समणोवासयाणं इमाई एयारुवाई वागरणाई
वागरित्तए उदाहु अप्पभू ?, समिया णं भंते ! ते थेरा भगवंतो तेसिं समणोवास-
याणं इमाई एयारुवाई वागरणाई वागरित्तए उदाहु असमिया ? आउज्जिया णं भंते !
ते थेरा भगवंतो तेसिं समणोवासयाणं इमाई एयारुवाई वागरणाई वागरित्तए ?
उदाहु अणाउज्जिया ? पलिउज्जिया णं भंते ! ते थेरा भगवंतो तेसिं समणोवासयाणं
इमाई एयारुवाई वागरणाई वागरित्तए उदाहु अपलिउज्जिया ?, पुव्वतवेणं अज्जो !
देवा देवलोएसु उववज्जंति पुव्वसंजमेणं कम्मियाए संगियाए अज्जो ! देवा देव-
लोएसु उववज्जंति, सच्चे णं एसमट्ठे णो चेव णं आयभाववत्तव्वयाए, पभू णं गोयमा !
ते थेरा भगवंतो तेसिं समणोवासयाणं इमाई एयारुवाई वागरणाई वागरित्तए, णो
चेव णं अप्पभू, तह चेव नेयव्वं अवसेसियं जाव पभू समियं आउज्जिया पलिउ-
ज्जिया जाव सच्चे णं एसमट्ठे णो चेव णं आयभाववत्तव्वयाए, अहंपि णं गोयमा !
एवमाइक्खामि भासेमि पण्णवेमि परुवेमि पुव्वतवेणं देवा देवलोएसु उववज्जंति
पुव्वसंजमेणं देवा देवलोएसु उववज्जंति कम्मियाए देवा देवलोएसु उववज्जंति संगि-
याए देवा देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो !
देवा देवलोएसु उववज्जंति, सच्चे णं एसमट्ठे णो चेव णं आयभाववत्तव्वयाए ॥ ११० ॥
तहारुवं भंते ! समणं वा माहणं वा पज्जुवासमाणस्स किफला पज्जुवासणा ?,
गोयमा ! सवणफला, से णं भंते ! सवणे किफले ?, णाणफले, से णं भंते ! नाणे
किफले ?, विण्णाणफले, से णं भंते ! विन्नाणे किफले ?, पच्चक्खाणफले, से णं भंते !
पच्चक्खाणे किफले ?, संजमफले, से णं भंते ! संजमे किफले ?, अण्हयफले, एवं
अण्हए तवफले, तवे वोदाणफले, वोदाणे अकिरियाफले, से णं भंते ! अकिरिया
कि फला ?, सिद्धिपज्जवसाणफला पण्णत्ता गोयमा !, गाहा—सवणे णाणे य विण्णाणे
पच्चक्खाणे य संजमे । अण्हए तवे चेव वोदाणे अकिरिया सिद्धी ॥ ११ ॥ १११ ॥
अण्णउत्थिया णं भंते ! एवमातिक्खंति भासंति पण्णवेंति परुवेंति—एवं खलु राय-
गिहस्स नगरस्स वहिया वेभारस्स पव्वयस्स अहे एत्थ णं महं एगे हरए अघे
पन्नत्ते अण्णेगाई जोयणाई आयामविक्खंमेणं नाणादुमसंडमंडितउद्देसे सस्सिरीए
जाव पडिरुवे, तत्थ णं वहवे ओराला वलाहया संसेयंति सम्मुच्छित्ति वासंति
तव्वतिरित्ते य णं सया समिओ उस्सिणे २ आउकाए अभिनिस्सवइ । से कहमेयं

भंते ! एवं ? गोयमा ! जणं ते अण्णउत्थिया एवमातिक्खंति जाव जे ते एवं पऱु-
 वेंति मिच्छं ते एवमातिक्खंति जाव सव्वं नेयव्वं, जाव अहं पुण गोयमा ! एवमाति-
 क्खामि भा० प० प० एवं खलु रायगिहस्स नगरस्स बहिया वैभारपव्वयस्स
 अदूरसामंते, एत्थ णं महातवोवतीरप्पभवे नामं पासवणे पन्नत्ते पंचधणुसयाणि
 आयामविक्खंभेणं नाणादुमसंडमंडिउद्देसे सस्सिरीए पासाइए दरिसणिजे अभिहवे
 पडिहवे तत्थ णं वहवे उसिणजोणिया जीवा य पोग्गला य उदगत्ताए वक्कमंति
 विउक्कमंति चयंति उववज्जंति तव्वतिरित्तेवि य णं सया समियं उसिणे २ आउयाए
 अभिनिस्सवइ, एस णं गोयमा ! महातवोवतीरप्पभवे पासवणं एस णं गोयमा !
 महातवोवतीरप्पभवस्स पासवणस्स अट्ठे पन्नत्ते, सेवं भंते २ त्ति भगवं गोयमे
 समणं भगवं महावीरं वंदति नमंसति ॥ ११२ ॥ **वीए सए पंचमो उद्देसो ॥**

से णूणं भंते ! मण्णामीति ओहारिणी भासा, एवं भासापदं भाणियव्वं ॥ ११३ ॥
वीए सए छट्ठो उद्देसो समत्तो ॥

कतिविहा णं भंते ! देवा प० ? गोयमा ! चउव्विहा देवा प०, तंजहा-भव-
 णवइवाणमंतरजोतिसवेमाणिया । कहि णं भंते ! भवणवासीणं देवाणं ठाणा प० ?
 गोयमा ! इमीसे रयणप्पभाए पुढवीए जहा ठाणपदे देवाणं वत्तव्वया सा भाणि-
 यव्वा, नवरं भवणा प०, उववाएणं लोयस्स असंखेज्जइभागे, एवं सव्वं भाणियव्वं
 जाव सिद्धगंडिया समत्ता-कप्पाण पइट्ठाणं बाहुल्लुच्चत्तमेव संठाणं । जीवाभिगमे जाव
 वेमाणियउद्देसो भाणियव्वो सव्वो ॥ ११४ ॥ **वीए सए सत्तमो उद्देसो ॥**

कहि णं भंते ! चमरस्स असुरिदस्स असुरकुमाररज्जो सभा सुहम्मा प० ?
 गोयमा ! जंबुद्दीवे दीवे मंदरस्स पव्वयस्स दाहिणेणं तिरियमसंखेजे दीवसमुद्दे
 वीईवइत्ता अरुणवरस्स दीवस्स बाहिरिल्लओ वेइयंताओ अरुणोदयं समुद्दं बाया-
 लीसं जोयणसहस्साइं ओगाहिता एत्थ णं चमरस्स असुरिदस्स असुरकुमार-
 रण्णो तिगिच्छियकूडे नामं उप्पायपव्वए पण्णत्ते, सत्तरसएक्कवीसे जोयणसए उड्डं
 उच्चत्तेणं चत्तारि तीसे जोयणसए कोसं च उव्वेहेणं गोथूभस्स आवासपव्वयस्स
 पमाणेणं णेयव्वं नवरं उवरिल्लं पमाणं मज्झे भाणियव्वं [मूले दसवावीसे जोयणसए
 विक्खंभेणं मज्झे चत्तारि चउवीसे जोयणसते विक्खंभेणं उवरि सत्ततेवीसे जोयण-
 सते विक्खंभेणं मूले तिणिण जोयणसहस्साइं दोणिण य वत्तीसुत्तरे जोयणसते
 किचिविसेसूणे परिक्खेवेणं मज्झे एगं जोयणसहस्सं तिणिण य इगयाले जोयणसते
 किचिविसेसूणे परिक्खेवेणं उवरिं दोणिण य जोयणसहस्साइं दोणिण य छलसीते
 जोयणसते किचिविसेसाहिए परिक्खेवेणं] जाव मूले वित्थडे मज्झे संखित्ते उप्पि

विसाले मज्झे वरवइरविग्गहिण्ण महामउदसंठाणसंठिए सव्वरयणामए अच्छे जाव पडिरुवे, से णं एगाए पउमवरवेइयाए एगेणं वणसंडेण य सव्वओ समंता संपरि-
क्खित्ते, पउमवरवेइयाए वणसंडस्सं य वण्णओ, तस्स णं तिगिच्छिक्खूडस्स उप्पाय-
पव्वयस्स उप्पि बहुससरमणिज्जे भूमिभागे पण्णत्ते, वण्णओ, तस्स णं बहुससरमणि-
ज्जस्स भूमिभागस्स बहुमज्झदेसभागे एत्थ णं महं एगे पासायवडिसए पन्नत्ते, अट्ठा-
इज्जाइं जोयणसयाइं उट्ठं उच्चत्तेणं पणवीसं जोयणसयाइं विक्खंभेणं, पासायवण्णओ
उल्लोयभूमिवन्नओ अट्ठ जोयणाइं मणिपेढिया चमरस्स सीहासणं सपरिवारं भाणि-
यव्वं, तस्स णं तिगिच्छिक्खूडस्स दाहिणेणं छक्कोडिसए पणपन्नं च कोडीओ पणतीसं
च सयसहस्साइं पण्णासं च सहस्साइं अरुणोदे समुदे तिरियं वीइवइत्ता अहे रयण-
प्पभाए पुढवीए चत्तालीसं जोयणसहस्साइं ओगाहिता एत्थ णं चमरस्स असुरिदस्स
असुरकुमाररण्णो चमरचंचा नामं रायहाणी प० एगं जोयणसयसहस्सं आयाम-
विक्खंभेणं जंवुदीवप्पमाणं, पागारो दिवट्ठं जोयणसयं उट्ठं उच्चत्तेणं मूले पन्नासं जोय-
णाइं विक्खंभेणं उवरिं अद्धतेरसजोयणा कविसीसगा अद्धजोयणआयामं कोसं
विक्खंभेणं देसूणं अद्धजोयणं उट्ठं उच्चत्तेणं एगमेगाए वाहाए पंच २ दारसया अट्ठा-
इज्जाइं जोयणसयाइं २५० उट्ठं उच्चत्तेणं १२५ अद्धं विक्खंभेणं उवरियलेणं सोल-
सजोयणसहस्साइं आयामविक्खंभेणं पन्नासं जोयणसहस्साइं पंच य सत्ताणउयजोय-
णसए किंचिविसेसूणे परिकळेवेणं सव्वप्पमाणं वेमाणियप्पमाणस्स अद्धं नेयव्वं,
सभा सुहम्मा, तओ उववायसभा हरओ अभिसेय० अलंकारो जहा विजयस्स
अभिसेयविभूषणा य ववसाओ । चमरपरिवार इट्ठत्तं ॥ ११५ ॥ वीयसए
अट्ठमो उद्देसओ समत्तो ॥

किमिदं भंते ! समयखेत्तेति पवुच्चति ?, गोयमा ! अट्ठाइज्जा दीवा दो य समुदा
एस णं एवइए समयखेत्तेति पवुच्चति, तत्थ णं अयं जंवुदीवे २ सव्वदीवसमुदाणं
सव्वव्वभंतरे एवं जीवाभिगमवत्तव्वया (जोइसविहूणं) नेयव्वा जावं अट्ठिभत्तरं
पुक्खरद्धं जोइसविहूणं (इमा गाहा) ॥ ११६ ॥ वितीयस्स नवमो उद्देसो ॥

कति णं भंते ! अत्थिकाया प० ?, गोयमा ! पंच अत्थिकाया प०, तंजहा-
धम्मत्थिकाए अधम्मत्थिकाए आगासत्थिकाए जीवत्थिकाए पोगगलत्थिकाए ॥ धम्म-
त्थिकाए णं भंते ! कतिवन्ने कतिगंधे कतिरसे कतिफासे ?, गोयमा ! अवण्णे अगंधे
अरसे अफासे अरुवी अजीवे सासए अवट्ठिए लोगदव्वे, से समासओ पंचविहे
पन्नत्ते, तंजहा-दव्वओ खेत्तओ कालओ भावओ गुणओ, दव्वओ णं धम्मत्थिकाए
एगे दव्वे, खेत्तओ णं लोगप्पमाणमेत्ते, कालओ न कयावि न आसि न कयाइ

नत्थि जाव निच्चे, भावओ अवण्णे अगंधे अरसे अफासे, गुणओ गमणगुणे ।
 अहम्मत्थिकाएवि एवं चेव, नवरं गुणओ ठाणगुणे, आगासत्थिकाएवि एवं चेव,
 नवरं खेत्तओ णं आगासत्थिकाए लोयांलोयप्पमाणमेत्ते अणंते चेव जाव गुणओ
 अवगाहणागुणे । जीवत्थिकाए णं भंते ! कतिवन्ने कतिगंधे कतिरसे कइफासे ?,
 गोयमा ! अवण्णे जाव अरुवी जीवे सासए अवट्टिए लोगदव्वे, से समासओ पंच-
 विहे पण्णत्ते, तंजहा-दव्वओ जाव गुणओ, दव्वओ णं जीवत्थिकाए अणंताइं जीव-
 दव्वाइं, खेत्तओ लोगप्पमाणमेत्ते कालओ न कयाइ न आसि जाव निच्चे, भावओ
 पुण अवण्णे अगंधे अरसे अफासे, गुणओ उवओगगुणे । पोग्गलत्थिकाए णं भंते !
 कतिवण्णे कतिगंधे ० रसे ० फासे ?, गोयमा ! पंचवण्णे पंचरसे दुगंधे अट्टफासे रुवी
 अजीवे सासए अवट्टिए लोगदव्वे, से समासओ पंचविहे पण्णत्ते, तंजहा-दव्वओ
 खेत्तओ कालओ भावओ गुणओ, दव्वओ णं पोग्गलत्थिकाए अणंताइं दव्वाइं,
 खेत्तओ लोयप्पमाणमेत्ते, कालओ न कयाइ न आसि जाव निच्चे, भावओ वण्णमंते
 गंधं ० रसं ० फासमंते, गुणओ गहणगुणे ॥ ११७ ॥ एगे भंते ! धम्मत्थिकायपदेसे
 धम्मत्थिकाएत्ति वत्तव्वं सिया ?, गोयमा ! णो इणट्टे समट्टे, एवं दोञ्जिवि तिञ्जिवि
 चत्तारि पंच छ सत्त अट्ट नव दस संखेज्जा, असंखेज्जा भंते ! धम्मत्थिकायप्पएसा
 धम्मत्थिकाएत्ति वत्तव्वं सिया ?, गोयमा ! णो इणट्टे समट्टे, एगपदेसूणेवि य णं
 भंते ! धम्मत्थिकाए २ त्ति वत्तव्वं सिया ? णो तिणट्टे समट्टे, से केणट्टेणं भंते !
 एवं वुच्चइ ? एगे धम्मत्थिकायपदेसे नो धम्मत्थिकाएत्ति वत्तव्वं सिया जाव एग-
 पदेसूणेवि य णं धम्मत्थिकाए नो धम्मत्थिकाएत्ति वत्तव्वं सिया ?, से नूणं गोयमा !
 खंडे चक्के सगले चक्के ?, भगवं ! नो खंडे चक्के सकले चक्के, एवं छत्ते चम्मे दंडे
 दूसे आउ पहे मोयए, से तेणट्टेणं गोयमा ! एवं वुच्चइ-एगे धम्मत्थिकायपदेसे नो
 धम्मत्थिकाएत्ति वत्तव्वं सिया जाव एगपदेसूणेवि य णं धम्मत्थिकाए नो धम्मत्थि-
 काएत्ति वत्तव्वं सिया ॥ से किंखातिए णं भंते ! धम्मत्थिकाए त्ति वत्तव्वं
 सिया ?, गोयमा ! असंखेज्जा धम्मत्थिकायपएसा ते सव्वे कसिणा पडिपुण्णा
 निरवसेसा एगगहणगहिया एस णं गोयमा ! धम्मत्थिकाएत्ति वत्तव्वं सिया, एवं
 अहम्मत्थिकाएवि, आगासत्थिकाएवि, जीवत्थिकायपोग्गलत्थिकायावि एवं चेव,
 नवरं तिण्हंपि पदेसा अणंता भाणियव्वा, सेसं तं चेव ॥ ११८ ॥ जीवे
 णं भंते ! सउट्ठाणे सकम्मे सव्वे सवीरिए सपुरिसक्कारपरक्कमे आयभावेणं जीव-
 भावं उवदंसेतीति वत्तव्वं सिया ?, हंता गोयमा ! जीवे णं सउट्ठाणे जाव उव-
 दंसेतीति वत्तव्वं सिया । से केणट्टेणं जाव वत्तव्वं सिया ?, गोयमा ! जीवे णं अणं-

ताणं आभिणिबोहियनाणपज्जवाणं एवं सुयनाणपज्जवाणं ओहिनाणपज्जवाणं मणपज्ज-
वनाणप० केवलनाणप० मइअन्नाणप० सुयअन्नाणप० विभंगणाणपज्जवाणं चक्खु-
दंसणप० अचक्खुदंसणप० ओहिदंसणप० केवलदंसणप० उवओगं गच्छइ, उवओ-
गलक्खणे णं जीवे, से तेणट्ठेणं एवं वुच्चइ-गोयमा ! जीवे णं सउट्ठणे जाव वत्तव्वं
सिया ॥ ११९ ॥ कतिविहे णं भंते ! आगासे पण्णत्ते ?, गोयमा ! दुविहे आगासे
प०, तंजहा-लोयागासे य अलोयागासे य ॥ लोयागासे णं भंते ! कि जीवा जीव-
देसा जीवपदेसा अजीवा अजीवदेसा अजीवपएसा ?, गोयमा ! जीवावि जीवदे-
सावि जीवपदेसावि अजीवावि अजीवदेसावि अजीवपदेसावि जे जीवा ते नियमा
एणिंदिया वेंदिया तेइंदिया चउरिंदिया पंचेंदिया अणिंदिया, जे जीवदेसा ते नियमा
एणिंदियदेसा जाव अणिंदियदेसा, जे जीवपदेसा ते नियमा एणिंदियपदेसा जाव
अणिंदियपदेसा, जे अजीवा ते दुविहा पन्नत्ता, तंजहा-रूवी य अरूवी य, जे
रूवी ते चउव्विहा पण्णत्ता, तंजहा-खंधा खंधदेसा खंधपदेसा परमाणुपोग्गला, जे
अरूवी ते पंचविहा पण्णत्ता, तंजहा-धम्मत्थिकाए नो धम्मत्थिकायस्स देसे धम्म-
त्थिकायस्स पदेसा अधम्मत्थिकाए नो अधम्मत्थिकायस्स देसे अधम्मत्थिकायस्स
पदेसा अद्वासंमए ॥ १२० ॥ अलोगागासे णं भंते ! कि जीवा ? पुच्छा तह चेव,
गोयमा ! नो जीवा जाव नो अजीवप्पएसा एगे अजीवदव्वदेसे अगुस्यलहुए अणं-
तेहिं अगुस्यलहुयगुणेहिं संजुत्ते सव्वागासे अणंतभागूणे ॥ १२१ ॥ धम्मत्थिकाए
णं भंते ! कि (के) महालए पण्णत्ते ?, गोयमा ! लोए लोयमेत्ते लोयप्पमाणे लोयफुडे
लोयं चेव फुसित्ता णं चिट्ठइ, एवं अहम्मत्थिकाए लोयागासे जीवत्थिकाए पोरगल-
त्थिकाए पंचवि एक्काभिलावा ॥ १२२ ॥ अहेलोए णं भंते ! धम्मत्थिकायस्स
केवइयं फुसति ?, गोयमा ! सातिरेगं अद्धं फुसति । तिरियलोए णं भंते ! पुच्छा,
गोयमा ! असंखेज्जइभागं फुसइ । उड्डलोए णं भंते ! पुच्छा, गोयमा ! देसूणं अद्ध
फुसइ ॥ १२३ ॥ इमा णं भंते ! रयणप्पभापुढवी धम्मत्थिकायस्स किं संखेज्जइ-
भागं फुसति ? असंखेज्जइभागं फुसइ ? संखिजे भागे फुसति ? असंखेजे भागे
फुसति ? सव्वं फुसति ?, गोयमा ! णो संखेज्जइभागं फुसति असंखेज्जइभागं फुसइ
णो संखेजे णो असंखेजे नो सव्वं फुसति । इमीसे णं भंते ! रयणप्पभाए पुढवीए
उवासंतरे घणोदही धम्मत्थिकायस्स पुच्छा, किं संखेज्जइभागं फुसति ? जहा
रयणप्पभा तहा घणोदहिघणवायतणुवाया । इमीसे णं भंते ! रयणप्पभाए पुढवीए
उवासंतरे धम्मत्थिकायस्स किं संखेज्जतिभागं फुसति असंखेज्जइभागं फुसइ जाव
सव्वं फुसइ ?, गोयमा ! संखेज्जइभागं फुसइ णो असंखेज्जइभागं फुसइ नो संखेजे ०

नो असंखेजे० नो सव्वं फुसइ, उवासंतराईं सव्वाइं जहा रयणप्पभाए पुढवीए वत्तव्वया भणिया, एवं जाव अहेसत्तमाए, जंवुदीवाइया दीवा लवणसमुद्दाइया समुद्दा, एवं सोहम्मे कप्पे जाव ईसिपब्भारापुढवीए, एते सव्वेऽवि असंखेज्जतिभागं फुसति, सेसा पडिसेहेयव्वा । एवं अधम्मत्थिकाए, एवं लोयागासेवि, गाहा—
पुढवोदहीघणतणुकप्पा गेवेज्जणुत्तरा सिद्धी । संखेज्जतिभागं अंतरेसु सेसा असंखेज्जा ॥ १ ॥ १२४ ॥ **दसमो उद्देशो, वित्तियं सयं समत्तं ॥**

गाहा—केरिसविउव्वणा चमर किरिय जाणित्थि नगर पाला य । अहिंवइ इंदियगरिसा तत्तियम्मि सए दसुद्देशा ॥ १ ॥ तेणं कालेणं तेणं समएणं मोया नामं नगरी होत्था, वण्णओ, तीसे णं मोयाए नगरीए बहिया उत्तरपुरच्छिमे दिसीभागे णं नंदणे नामं उज्जाणे होत्था, वण्णओ, तेणं कालेणं २ सामी समोसढे, परिसा निग्गच्छइ पडिगया परिसा, तेणं कालेणं तेणं समएणं समणस्स भगवओ महावीरस्स दोच्चे अंतेवासी अग्गिभूती नामं अणगारे गोयमगोत्तेणं सत्तुस्सेहे जाव पज्जुवासमाणे एवं वदासी—चमरे णं भंते ! असुरिंदे असुरराया केमहिद्धिए ? केमहज्जुईए ? केमहाबले ? केमहायसे ? केमहासोक्खे ? केमहाणुभागे ? केवइयं च णं पभू विउव्वित्तए ?, गोयमा ! चमरे णं असुरिंदे असुरराया महिद्धिए जाव महाणुभागे से णं तत्थ चोत्तीसाए भवणावाससयसहस्साणं चउसट्ठीए सामाणियसाहस्सीणं तांयत्तीसाए तांयत्तीसगणं जाव विहरइ, एवंमहिद्धिए जाव महाणुभागे, एवत्तियं च णं पभू विउव्वित्तए से जहानामए—जुवइं जुवाणे हत्थेणं हत्थे गेण्हेज्जा चक्रस्स वा नाभी अरगाउत्ता सिया, एवामेव गोयमा ! चमरे असुरिंदे असुरराया वेउव्वियसमुग्घाएणं समोहणइ २ सखेज्जाइं जोयणाइं उड्डं दंडं निसिरइ, तंजहा—रयणाणं जाव रिट्ठाणं अहावायरे पोग्गले परिसाढेइ २ अहासुहुमे पोग्गले परियाएति २ दोच्चंपि वेउव्वियसमुग्घाएणं समोहणति २, पभू णं गोयमा ! चमरे असुरिंदे असुरराया केवलकप्पं जंवुदीवं २ बहूहिं असुरकुमारेहिं देवेहिं देवीहि य आइण्णं वित्तिकिण्णं उवत्थडं संथडं फुडं अवगाढाऽवगाढं करेतए । अदुत्तरं च णं गोयमा ! पभू चमरे असुरिंदे असुरराया तिरियमसंखेजे दीवसमुद्दे बहूहिं असुरकुमारेहिं देवेहिं देवीहि य आइण्णे वित्तिकिण्णे उवत्थडे संथडे फुडे अवगाढावगाढे करेतए, एस णं गोयमा ! चमरस्स असुरिदस्स असुररण्णो अयमेयारूवे विसए विसयमेत्ते बुइए णो चेव णं संपत्तीए विकुव्विसु वा विकुव्वति वा विकुव्विस्सति वा ॥ १२५ ॥ जति णं भंते ! चमरे असुरिंदे असुरराया एमहिद्धिए जाव एवइयं च णं पभू विकुव्वित्तए, चमरस्स णं भंते ! असुरिंदस्स असुररन्नो

सामाणिया देवा केमहिद्धिया जाव केवतियं च णं पभू विकुव्वित्तए ? , गोयमा !
चमरस्स असुरिदस्स असुररत्तो सामाणिया देवा महिद्धिया जाव महाणुभागा, ते
णं तत्थ साणं २ भवणाणं साणं २ सामाणियाणं साणं २ अगगमहिसीणं जाव
दिव्वाइं भोगभोगाईं भुंजमाणा विहरंति, एवंमहिद्धिया जाव एवइयं च णं पभू
विकुव्वित्तए, से जहानामि-जुवति जुवाणे हत्थेणे हत्थे गेण्हेजा चक्रस्स वा नाभी
अरयाउत्ता सिया एवामेव गोयमा ! चमरस्स असुरिदस्स असुररत्तो एगमेगे सामा-
णिए देवे वेउव्वियसमुग्घाएणं समोहणइ २ जाव दोच्चपि वेउव्वियसमुग्घाएणं
समोहणाति २ पभू णं गोयमा ! चमरस्स असुरिदस्स असुररत्तो एगमेगे सामाणिए
देवे केवलकप्पं जंबुदीवं २ बहूहिं असुरकुमारेहिं देवेहिं देवीहि य आइन्नं वित्तिकिन्नं
उवत्थडं संथडं फुडं अवगाढावगाढं करेत्तए, अदुत्तरं च णं गोयमा ! पभू चमरस्स
असुरिदस्स असुररत्तो एगमेगे सामाणियदेवे तिरियमसंखेज्जे दीवसमुद्दे बहूहिं असुर-
कुमारेहिं देवेहिं देवीहि य आइण्णे वित्तिकिण्णे उवत्थडे संथडे फुडे अवगाढावगाढे
करेत्तए, एस णं गोयमा ! चमरस्स असुरिदस्स असुररत्तो एगमेगस्स सामाणिय-
देवस्स अयमेयाहवे विसए विसयमेत्ते वुइए णो चेव णं संपत्तीए विकुव्विसु वा
विकुव्वति वा विकुव्विस्सति वा । जति णं भंते ! चमरस्स असुरिदस्स असुररत्तो
सामाणिया देवा एवंमहिद्धिया जाव एवतियं च णं पभू विकुव्वित्तए चमरस्स णं
भंते ! असुरिदस्स असुररत्तो तायत्तीसिया देवा केमहिद्धिया ? , तायत्तीसिया देवा
जहा सामाणिया तहा नेयव्वा, लोयपाला तहेव, नवरं सखेजा दीवसमुद्दा भाणि-
यव्वा, बहूहिं असुरकुमारेहिं २ आइन्ने जाव विउव्विस्संति वा । जति णं भंते !
चमरस्स असुरिदस्स असुररत्तो लोगपाला देवा एवंमहिद्धिया जाव एवतियं च णं
पभू विउव्वित्तए चमरस्स णं भंते ! असुरिदस्स असुररत्तो अगगमहिसीओ देवीओ
केमहिद्धियाओ जाव केवतियं च णं पभू विकुव्वित्तए ? , गोयमा ! चमरस्स णं
असुरिदस्स असुररत्तो अगगमहिसीओ महिद्धियाओ जाव महाणुभागाओ, ताओ णं
तत्थ साणं २ भवणाणं साणं २ सामाणियसाहस्सीणं साणं २ महत्तरियाणं साणं
२ परिसाणं जाव- एमहिद्धियाओ अन्नं जहा लोगपालाणं अपरिसेसं । सेवं भंते !
२ त्ति ॥ १२६ ॥ भगवं दोच्चे गोयमे समणं भगवं महावीरं वंदइ नमंसइ २ जेणेव
तच्चे गोयमे वायुभूतिअणगारे तेणेव उवागच्छति २ तच्च गोयमं वायुभूति अणगारं
एवं वदासी-एवं खलु गोयमा ! चमरे असुरिदे असुरराया एवंमहिद्धिए तं चेव
एवं सव्वं अपुट्ठवागरणं नेयव्वं अपरिसेसियं जाव अगगमहिसीणं वत्तव्वया समत्ता ।
तए णं से तच्चे गोयमे वायुभूती अणगारे दोच्चस्स गोयमस्स अग्गिभूइस्स अणगा-

रस्स एवमाइक्खमाणस्स भा० प० प६० एयमट्ठं नो सद्वहइ नो पत्तियइ नो रोयइ
 एयमट्ठं असद्वहमाणे अपत्तियमाणे अरोएमाणे उट्ठाए उट्ठेइ २ जेणेव समणे भगवं
 महावीरे तेणेव उवागच्छइ जाव पज्जुवासमाणे एवं वयासी-एवं खलु भंते ! दोच्चे
 गोयमे अग्गिभूतिअणगारे मम एवमातिक्खइ भासइ पन्नवेइ प६वेइ-एवं खलु
 गोयमा ! चमरे असुरिंदे असुरराया महिद्धिए जाव महाणुभावे से णं तत्थ चोत्ती-
 साए भवणावाससयसहस्साणं एवं तं चेव सव्वं अपरिसेसं भाणियव्वं जाव अग्ग-
 महिसीणं वत्तव्वया समत्ता, से कहमेयं भंते !, एवं ? गोयमादि समणे भगवं महा-
 वीरे तच्चं गोयमं वाउभूतिं अणगारं एवं वदासी-जणं गोयमा ! दोच्चे गो० अग्गि-
 भूइअणगारे तव एवमातिक्खइ ४-एवं खलु गोयमा ! चमरे ३ महिद्धिए एवं तं
 चेव सव्वं जाव अग्गमहिसीणं वत्तव्वया समत्ता, सच्चे णं एसमट्ठे, अहंपि णं
 गोयमा ! एवमातिक्खामि भा० प० प६०, एवं खलु गोयमा !-चमरे ३ जाव
 महिद्धिए सो चेव वित्तिओ गमो भाणियव्वो जाव अग्गमहिसीओ, सच्चे णं एसमट्ठे,
 सेवं भंते २, तच्चे गोयमे ! वायुभूती अणगारे समणं भगवं महावीरं वंदइ नमंसइ
 २ जेणेव दोच्चे गोयमे अग्गिभूती अणगारे तेणेव उवागच्छइ २ दोच्चं गो० अग्गि-
 भूतिं अणगारं वंदइ नमंसति-२ एयमट्ठं सम्मं विणएणं भुज्जो २ खामेति ॥ १२७ ॥
 तए णं से तच्चे गोयमे वाउभूती अणगारे दोच्चेणं गोयमेणं अग्गिभूतीणामेणं अण-
 गारेणं सद्धिं जेणेव समणे भगवं महावीरे जाव पज्जुवासमाणे एवं वयासी-जति
 णं भंते ! चमरे असुरिंदे असुरराया एवंमहिद्धिए जाव एवतियं च णं-पभू विकुव्वि-
 त्तए वली णं भंते ! वइरोयणिंदे वइरोयणराया केमहिद्धिए जाव केवइयं च णं पभू
 विकुव्वित्तए ?, गोयमा ! वली णं वइरोयणिंदे वइरोयणराया महिद्धिए जाव महाणु-
 भागे, से णं तत्थ तीसाए भवणावाससयसहस्साणं सट्ठीए सामाणियसाहस्सीणं सेसं
 जहा चमरस्स तहा वलियस्सवि णेयव्वं, णवरं सातिरेणं केवलकप्पं जंवुद्दीवंति
 भाणियव्वं, सेसं तं चेव णिरवसेसं णेयव्वं, णवरं णाणत्तं जाणियव्वं भवणेहिं सामा-
 णिएहिं, सेवं भंते २ त्ति तच्चे गोयमे वायुभूती जाव विहरति । भंते त्ति भगवं दोच्चे
 गोयमे अग्गिभूती अणगारे-समणं भगवं महावीरं वंदइ २ एवं वदासी-जइ णं
 भंते ! वली वइरोयणिंदे वइरोयणराया एमहिद्धिए जाव एवइयं च णं पभू विकु-
 व्वित्तए धरणे णं भंते ! नागकुमारिंदे नागकुमारराया केमहिद्धिए जाव केवतियं च
 णं पभू विकुव्वित्तए ?, गोयमा ! धरणे णं नागकुमारिंदे नागकुमारराया एमहिद्धिए
 जाव से णं तत्थ चोयालीसाए भवणावाससयसहस्साणं छण्हं सामाणियसाहस्सीणं
 तायत्तीसाए-तायत्तीसगाणं चउण्हं लोगपालाणं छण्हं अग्गमहिसीणं सपरिवाराणं

तिष्ठं परिसाणं सत्तण्हं अणियाणं सत्तण्हं अणियाहिर्वईणं चउवीसाए आयरक्खदे-
 वसाहस्सीणं अन्नेसि च जाव विहरइ, एवतियं च णं पभू विउव्वित्तए से जहाना-
 मए—जुवतिं जुवाणे जाव पभू केवलकप्पं जंबुदीवं २ जाव तिरियं संखेजे दीवसमुद्दे
 बहूहिं नागकुमारेहिं २ जाव विउव्विस्संति वा, सामाणिया तायत्तीसलोगपालगा महि-
 स्सीओ य तहेव, जहा चमरस्स एवं धरणे णं नागकुमारराया महिद्धिं जाव एवतियं
 जहा चमरे तहा धरणेणवि, नवरं संखेजे दीवसमुद्दे भाणियव्वं, एवं जाव थणिय-
 कुमारा वाणमंतरा जोइसियावि, नवरं दाहिणिल्ले सव्वे अग्गिभूती पुच्छति, उत्तरिल्ले
 सव्वे वाउभूती पुच्छइ, भंतेत्ति भगवं दोच्चे गोयमे अग्गिभूती अणगारे समणं
 भगवं म० वंदति नमंसति २ एवं वयासी-जति णं भंते ! जोइसिदे जोतिसराया
 एवंमहिद्धिं जाव एवतियं च णं पभू विकुव्वित्तए सक्के णं भंते ! देविंदे देवराया
 केमहिद्धिं जाव केवतियं च णं पभू विउव्वित्तए ?, गोयमा ! सक्के णं देविंदे देव-
 राया महिद्धिं जाव महाणुभागे, से णं तत्थ वत्तीसाए विमाणावाससयसहस्साणं
 चउरासीए सामाणियसाहस्सीणं जाव चउण्हं चउरासीणं आयरक्ख (देव) साह-
 स्सीणं अन्नेसि च जाव विहरइ, एवंमहिद्धिं जाव एवतियं च णं पभू विकुव्वित्तए,
 एवं जहेव चमरस्स तहेव भाणियव्वं, नवरं दो केवलकप्पे जंबुदीवे २ अवसेसं तं
 चेव, एस णं गोयमा ! सक्कस्स देविंदस्स देवरणो इमेयारुवे विसए विसयमेत्ते णं
 बुइए नो चेव णं संपत्तीए विउव्विसु वा विउव्वति वा विउव्विस्सति वा ॥ १२८ ॥
 जइ णं भंते ! सक्के देविंदे देवराया एमहिद्धिं जाव एवतियं च णं पभू विकुव्वि-
 त्तए ॥ एवं खल्ल देवाणुप्पियाणं अंतेवासी तीसए णामं अणगारे पंगतिभइए जाव
 विणीए छट्ठंछट्ठेणं अणिक्खित्तेणं तवोकम्मेणं अप्पाणं भावेमाणे बहुपडिपुण्णाइं अट्ठ
 संवच्छराइं सामण्णपरियागं पाउणित्ता मासियाए संलेहणाए अत्ताणं झूसेत्ता सट्ठिं
 भत्ताइं अणसणाए छेदेत्ता आलोइयपडिक्कंते समाहिपत्ते कालमासे कालं किच्चा
 सोहम्मे कप्पे सयंसि विमाणंसि उववायसभाए देवसयणिजंसि देवदूसंतरिए अंगु-
 लस्स असंखेज्जइभागमेत्ताए ओगाहणाए सक्कस्स देविदस्स देवरणो सामाणियदेव-
 त्ताए उववण्णे, तए णं तीसए देवे अहुणोववन्नमेत्ते समाणे पंचविहाए पज्जत्तीए
 पज्जत्तिभावं गच्छइ, तंजहा-आहारपज्जत्तीए सरीर० इंदिय० आणुपाणुपज्जत्तीए
 भासामणपज्जत्तीए, तए णं तं तीसयं देवं पंचविहाए पज्जत्तीए पज्जत्तिभावं गयं
 समानं सामाणियपरिसोववन्नया देवा करयलपरिगगहियं दसनहं सिरसावत्तं मत्थए
 अंजलिं कट्ठु जएणं विजएणं वद्धाविति २ एवं वदासी-अहो णं देवाणुप्पिए ! दिव्वा
 देविद्धी दिव्वा देवजुई दिव्वे देवाणुभावे लद्धे पत्ते अभिसमन्नागते, जारिसिया णं

देवाणुप्पिएहिं दिव्वा देविद्धी दिव्वा देवजुई दिव्वे देवाणुभावे लद्धे पत्ते अभि-
समन्नागते तारिसिया णं सक्केणं देविंदेणं देवरत्ता दिव्वा देविद्धी जाव अभिसमन्ना-
गया, जारिसिया णं (सक्केणं देविंदेणं देवरत्ता दिव्वा देविद्धी जाव अभिसमन्ना-
गया तारिसिया णं) देवाणुप्पिएहिं दिव्वा देविद्धी जाव अभिसमन्नागया । से णं
भंते ! तीसए देवे केमहिद्धिए जाव केवतियं च णं पभू विउव्वित्तए ?, गोयमा !
महिद्धिए जाव महाणुभागे, से णं तत्थ सयस्स विमाणस्स चउण्हं सामाणियसाह-
स्सीणं चउण्हं अग्गमहिसीणं सपरिवाराणं तिण्हं परिसाणं सत्तण्हं अणियाणं सत्तण्हं
अणियाहिवईणं सोलसण्हं आयरक्खदेवसाहस्सीणं अण्णेसिं च वहूणं वेमाणियाणं
देवाण य देवीण य जाव विहरति, एवंमहिद्धिए जाव एवइयं च णं पभू विउव्वित्तए,
से जहाणामए जुवतिं जुवाणे हत्थेणं हत्थे गेण्हेज्जा जहेव सक्कस्स तहेव जाव एस णं
गोयमा ! तीसयस्स देवस्स अयमेयारूवे विसए विसयमेत्ते वुइए नो चेव णं संपत्तीए
विउव्विसु वा ३ । जति णं भंते ! तीसए देवे महिद्धिए जाव एवइयं च णं पभू विउ-
व्वित्तए सक्कस्स णं भंते ! देविदस्स देवरत्तो अवसेसा सामाणिया देवा केमहिद्धिया
तहेव सव्वं जाव एस णं गोयमा ! सक्कस्स देविंदस्स देवरत्तो एगमेगस्स सामाणियस्स
देवस्स इमेयारूवे विसए विसयमेत्ते वुइए नो चेव णं संपत्तीए विउव्विसु वा विउव्विति
वा विउव्विस्संति वा तायत्तीसा य लोपलअग्गमहिसीणं जहेव चमरस्स नवरं दो
केवलकप्पे जंबूदीवे २ अण्णं तं चेव, सेवं भंते २ त्ति दोच्चे गोयमे जाव विहरति
॥ १२९ ॥ भंतेत्ति भगवं तच्चे गोयमे वाउभूती अण्णं दे समणं भगवं जाव एवं
वदासी-जति णं भंते ! सक्के देविंदे देवराया एमहिद्धिए जाव एवइयं च णं पभू
विउव्वित्तए ईसाणे णं भंते ! देविंदे देवराया केमहिद्धिए ? एवं तहेव, नवरं साहिए
दो केवलकप्पे जंबूदीवे २ अवसेसं तहेव ॥ १३० ॥ जति णं भंते ! ईसाणे देविंदे देव-
राया एमहिद्धिए जाव एवतियं च णं पभू विउव्वित्तए ॥ एवं खलु देवाणुप्पियाणं अंते-
वासी कुरुदत्तपुत्ते नामं पगतिभट्टए जाव विणीए अट्ठमंअट्ठमेणं अणिविक्खत्तेणं पारणए
आयंविपपरिग्गहिणं तवौक्कमेणं उट्ठं बाहाओ पणिज्झिय २ सूराभिमुहे आया-
वणभूमीए आयावेमाणे बहुपडिपुत्ते छम्मासे सामण्णपरियागं पाउणित्ता अद्धमासि-
याए संलेहणाए अत्ताणं जोसित्ता तीसं भत्ताइं अणसणाए छेदित्ता आलोइयपडिक्कंते
समाहिपत्ते कालमासे कालं किच्चा ईसाणे कप्पे सयंसि विमाणंसि जा चेव तीसए
वत्तव्वया ता सव्वेव अपरिसेसा कुरुदत्तपुत्तेवि, नवरं सातिरेगे दो केवलकप्पे
जंबूदीवे २, अवसेसं तं चेव, एवं सामाणियतायत्तीसलोगपालअग्गमहिसीणं जाव
एस णं गोयमा ! ईसाणस्स देविंदस्स देवरत्तो एवं एगमेगाए अग्गमहिसीए देवीए

अयमेयारुवे विसए विसयमेत्ते बुइए नो चैव णं संपत्तीए विउव्विसु वा ३ ॥१३१॥
 एवं सणकुमारेवि, नवरं चत्तारि केवलकप्पे जंबुद्दीवे दीवे अदुत्तरं च णं तिरियम-
 संखेज्जे, एवं सामाणियतायतीसलोगपालअगमहिस्सीणं असंखेज्जे दीवसमुद्दे सव्वे
 विउव्वन्ति, सणकुमाराओ आरद्धा उवरिल्ला लोगपाला सव्वेवि असंखेज्जे दीवसमुद्दे
 विउव्वन्ति, एवं माहिंदेवि, नवरं सातिरेगे चत्तारि केवलकप्पे जंबुद्दीवे २, एवं वंभ-
 लोएवि, नवरं अट्ठ केवलकप्पे, एवं लंतएवि, नवरं सातिरेगे अट्ठ केवलकप्पे, महा-
 सुक्के सोलस केवलकप्पे, सहस्सारे सातिरेगे सोलस, एवं पाणएवि, नवरं वत्तीसं
 केवल०, एव अच्चुएवि नवरं सातिरेगे वत्तीसं केवलकप्पे जंबुद्दीवे २ अन्नं तं चैव;
 सेवं भंते २ त्ति तच्च गोयमे वायुभूती अणगारे समणं भगवं महावीरं वंदइ नमंसति
 जाव विहरति । तए णं समणे भगवं महावीरे अन्नया कयाइ मोयाओ नगरीओ
 नंदणाओ उज्जाणाओ पडिनिक्खमइ २ वहिया जणवयविहारं विहरइ ॥ १३२ ॥
 तेणं कालेणं तेणं० रायगिहे नामं नगरे होत्था, वन्नओ, जाव परिसा पज्जुवा-
 सइ । तेणं कालेणं २ ईसाणे देविंदे देवराया सूलपाणी वसभवाहणे उत्तरङ्गुलोगा-
 हिवई अट्ठार्वीसविमाणावाससयसहस्साहिवई अयरंवरवत्थधरे आलइयमालमउडे
 नवहेमचारुचित्तचंचलकुंडलविलिहिज्जमाणगंडे जाव दस दिसाओ उज्जोवेमाणे पभा-
 सेमाणे ईसाणे कप्पे ईसाणवडिंसए विमाणे जहेव रायप्पसेणइज्जे जाव दिव्वं देविद्धिं
 जाव जामेव दिसिं पाउव्वभूए तामेव दिसिं पडिगए । भंतेत्ति भगवं गोयमे समणं
 भगवं महावीर वंदति णमंसति २ एवं वदासी-अहो णं भंते ! ईसाणे देविंदे देव-
 राया महिद्धिइ ईसाणस्स णं भंते ! सा दिव्वा देविद्धी कहिं गता कहिं अणुपविट्ठो ?,
 गोयमा ! सरीरं गता २, से केणट्ठेणं भंते ! एवं वुच्चति सरीरं गता ? २, गोयमा !
 से जहानामए-कूडागारसाला सिया दुहओ लिता गुत्ता गुत्तदुवारा णिवाया णिवाय-
 गंभीरा तीसे णं कूडागारे जाव कूडागारसालादिट्ठंतो भाणियव्वो । ईसाणेणं भंते !
 देविंदेणं देवरणा सा दिव्वा देविद्धी दिव्वा देवजुई दिव्वे देवाणुभागे किण्णा लद्धे
 किन्ना पत्ते किण्णा अभिसमन्नागए के वा एस आसि पुव्वभवे किण्णामए वा किंगोत्ते
 वा कयरंसि वा गामंसि वा नगरंसि वा जाव संनिवेसंसि वा किं वा सुच्चा कि वा
 दच्चा कि वा भोच्चा कि वा किच्चा कि वा समायरित्ता कस्स वा तहाव्वस्स समणस्स
 वा माहणस्स वा अंतिए एगमवि आयरियं धम्मियं सुवयणं सोच्चा निसम्म [जण्णं]
 ईसाणेणं देविंदेणं देवरणा सा दिव्वा देविद्धी जाव अभिसमन्नागया ?, एवं खलु
 गोयमा ! तेणं कालेणं २ इहेव जंबुद्दीवे २ भारहे वासे तामलिक्की नामं नगरी
 होत्था, वन्नओ, तत्थ णं तामलिक्कीए नगरीए तामली नामं मोरियपुत्ते गाहावती

होत्था, अद्धे दित्ते जाव बहुजणस्स अपरिभूए यावि होत्था, तए णं तस्स मोरिय-
 पुत्तस्स तामलित्तस्स गाहावइयस्स अण्णया कयाइ पुव्वरत्तावरत्तकालसमयंसि कुटुं-
 चजागरियं जागरमाणस्स इमेयारूवे अज्झत्थिए जाव समुप्पज्जित्था-अत्थि ता मे
 पुरा पोराणाणं सुचिन्नाणं सुपरिक्रंताणं सुभाणं कल्लाणाणं कडाणं कम्माणं कल्लाणफल-
 वित्तिविसेसो जेणाहं हिरण्णेणं वड्ढामि सुवन्नेणं वड्ढामि धणेणं वड्ढामि धन्नेणं वड्ढामि
 पुत्तेहिं वड्ढामि पसूहिं वड्ढामि विउलधणकणगरयणमणिमोत्तियसंखसिलप्पवालरत्तर-
 यणसंतसारसावएज्जेणं अतीव २ अभिवड्ढामि, तं किण्णं अहं पुण पोराणाणं सुचि-
 न्नाणं जाव कडाणं कम्माणं एगंतसोक्खयं उवेहेमाणे विहरामि ?, तं जाव ताव अहं
 हिरण्णेणं वड्ढामि जाव अतीव २ अभिवड्ढामि जावं च णं मे मित्तनातिनियंगसंव-
 धिपरियणो आढाति परियाणाइ सक्कारेइ सम्माणेइ कल्लाणं मंगलं देवयं चेइयं विणएणं
 पज्जुवासइ ताव ता मे सेयं कल्लं पाउप्पभायाए रयणीए जाव जलंते सयमेव दारु-
 मयं पडिग्गहियं करेत्ता विउलं असणं पाणं खातिमं सातिमं उवक्खडावेत्ता मित्तणा-
 तिनियंगसयणसंबंधिपरियणं आमंतेत्ता तं मित्तनाइनियंगसंबंधिपरियणं विउलेणं
 असणपाणखातिमसातिमेणं वत्थगंधमल्लालंकारेण य सक्कारेत्ता सम्माणेत्ता तस्सेव
 मित्तणाइनियंगसंबंधिपरियणस्स पुरतो जेट्ठपुत्तं कुटुंबे ठावेत्ता तं मित्तणातिणियंग-
 संबंधिपरियणं जेट्ठपुत्तं च आपुच्छित्ता सयमेव दारुमयं पडिग्गहं गहाय मुंडे भवित्ता
 पाणामाए पव्वजाए पव्वइत्तए, पव्वइएऽवि य णं समाणे इमं एयारूवं अभिग्गहं
 अभिगिण्हिस्सामि-कप्पइ मे जावजीवाए छट्ठंछट्ठेणं अणिविखत्तेणं तवोकम्मेणं उड्ढं-
 चाहाओ पगिज्झिय २ सूराभिमुहस्स आयावणभूमीए आयावेमाणस्स विहरित्तए,
 छट्ठस्सवि य णं पारणयंसि आयावणभूमीतो पच्चोरुभित्ता सयमेव दारुमयं पडिग्ग-
 हयं गहाय तामलितीए नगरीए उच्चनीयमज्झिमाइं कुलाइं घरसमुदाणस्स भिक्खा-
 यरियाए अडित्ता सुद्धोदणं पडिग्गाहेत्ता तं तिसत्तखुत्तो उदएणं पक्खालेत्ता तओ
 पच्छा आहारं आहारित्तएत्तिकट्ठु एवं संपेहेइ २ कल्लं पाउप्पभायाए जाव जलंते
 सयमेव दारुमयं पडिग्गहयं करेइ २ विउलं असणं पाणं खाइमं साइमं उवक्खडावेइ
 २ तओ पच्छा ण्हाए सुद्धप्पावेसाइं मंगल्लाइं वत्थाइं पवरपरिहिए अप्पमहग्घाभरणा-
 लकियसरीरे भोयणवेलाए भोयणमंडवंसि सुहासणवरगए तए णं मित्तणाइनियंगस-
 यणसंबंधिपरिजणेणं सद्धिं तं विउलं असणं पाणं खातिमं साइमं आसादेमाणे
 वीसाएमाणे परिभाएमाणे परिभुंजेमाणे विहरइ । जिमियभुत्तुत्तरागएऽवि य णं
 समाणे आयंते चोक्खे परमसुइभूए तं मित्तं जाव परियणं विउलेणं असणपाण
 ४-पुप्फवत्थगंधमल्लालंकारेण य सक्कारेइ २ तस्सेव मित्तणाइ जाव परियणस्स पुरओ

जेद्वं पुत्तं कुदुवे ठावेइ २ ता तस्सेव तं मित्तिनाइणियगसयणसंबंधिपरिजणं जेद्वपुत्तं
 च आपुच्छइ २ मुंडे भवित्ता पाणामाए पव्वज्जाए पव्वइए, पव्वइएवि य णं समाणे
 इमं एयाह्वं अभिगगहं अभिगिण्हइ-कप्पइ मे जावजीवाए छट्ठंछट्ठेणं जाव आहारि-
 त्तएत्तिकहु इमं एयाह्वं अभिगगहं अभिगिण्हइ २ ता जावजीवाए छट्ठंछट्ठेणं अणि-
 विक्खत्तेणं तवोकम्ममेणं उड्डं वाहाओ पगिज्झिय २ सूराभिमुहे आयावणभूमीए
 आयावेमाणे विहरइ, छट्ठस्सवि य णं पारणयंसि आयावणभूमीओ पच्चोसहइ २
 सयमेव दास्मयं-पडिग्गहं गहाय तामलिक्कीए नगरीए उच्चनीयमज्झिमाइं कुलाइं
 घरसमुदाणस्स भिक्खायरियाए अडइ २ सुद्धोयणं पडिग्गाहेइ २ तिसत्तखुत्तो
 उदएणं पक्खालेइ, तओ पच्छा आहारं आहारेइ । से केणट्ठेणं भंते ! एवं वुच्चइ-
 पाणामा पव्वज्जा २ ?, गोयमा ! पाणामाए णं पव्वज्जाए पव्वइए समाणे जं जत्थ
 पासइ इदं वा खंदं वा रुदं वा सिवं वा वेसमणं वा अज्जं वा कोट्टकिरियं वा रायं वा
 जावसत्थवाहं वा कागं वा साणं वा पाणं वा उच्चं पासइ उच्चं पणामं करेइ नीयं
 पासइ नीयं पणामं करेइ, जं जहा पासति तस्स तहा पणामं करेइ, से तेणट्ठेणं
 गोयमा ! एवं वुच्चइ—पाणामा जाव पव्वज्जा ॥ १३३ ॥ तए णं से तामली
 मोरियपुत्ते तेणं ओरालेणं विपुलेणं पयत्तेणं पग्गहिएणं वालतवोकम्ममेणं सुक्के भुक्खे
 जाव धमणिसंतए जाए यावि होत्था, तए णं तस्स तामलित्तस्स वालतवस्सिस्स
 अन्नया कयाइ पुव्वरत्तावरत्तकालसमयंसि अणिच्चजागरियं जागरमाणस्स इमेयाह्वे
 अज्जत्थिए चित्तिए जाव समुप्पज्जित्था-एवं खलु अहं इमेणं ओरालेणं विपुलेणं
 जाव उदग्गेणं उदत्तेणं उत्तमेणं महाणुभागेणं तवोकम्ममेणं सुक्के भुक्खे जाव धमणि-
 संतए जाए, तं अत्थि जा मे उट्ठाणे कम्ममे वले वीरिए पुरिसक्कारपरक्कमे ताव ता
 मे सेयं कलं जाव जलंते तामलिक्कीए नगरीए दिट्ठाभट्टे य पासंडत्थे य पुव्वसंगतिए
 य गिहत्थे य पच्छासंगतिए य परिआयसंगतिए य आपुच्छित्ता तामलिक्कीए नगरीए
 मज्झमज्जेणं निग्गच्छित्ता पाउग्गं कुंडियमादीयं उवकरणं दास्मयं च पडिग्गाहियं
 एगंते [एडेइ] एडित्ता तामलिक्कीए नगरीए उत्तरपुरच्छिमे दिसीभाए णियत्तणिय-
 मंडलं [आलिहइ] आलिहित्ता संलेहणाझूसणाझूसियस्स भत्तपाणपडियाइक्खियस्स
 पाओवगयस्स कालं अणवकंखमाणस्स विहरित्तएत्तिकहु एवं संपेहेइ एवं संपेहेत्ता
 कलं जाव जलंते जाव आपुच्छइ २ तामलिक्कीए [एगंते एडेइ] जाव जलंते जाव
 भत्तपाणपडियाइक्खिए पाओवगमणं निवत्ते । तेणं कालेणं २ वल्लिचंचारायहाणी
 अणिंदा अपुरोहिया यावि होत्था । तए णं ते वल्लिचंचारायहाणिवत्थव्वया वहवे
 असुरकुमारा देवा य देवीओ य तामलि वालतवस्सि ओहिणा आहोयंति २ अन्नमज्जं

सदावेति २ एवं वयासी-एवं खलु देवाणुप्पिया ! बलिचंचा रायहाणी अणिदा अपुरोहिया अम्हे णं देवाणुप्पिया ! इंदाहीणा इंदाधिद्विया इंदाहीणकज्जा अयं च णं देवाणुप्पिया । तामली बालतवस्सी तामलितीए नगरीए वहिया उत्तरपुरच्छिमे दिसीभाए नियत्तणियमंडलं आलिहिता संलेहणाझूसणाझूसिए भत्तपाणपडियाइक्खिए पाओवगमणं निवत्ते, तं सेयं खलु देवाणुप्पिया ! अम्हं तामलिं बालतवस्सि बलिचंचाए रायहाणीए ठितिपकप्पं पकरावेत्तएत्तिकट्ठु अन्नमन्नस्स अंतिए एयमट्ठं पडि-
सुणेंति २ बलिचंचाए रायहाणीए मज्झमज्झेणं निग्गच्छन्ति २ जेणेव रुयगिंदे उप्पायपव्वए तेणेव उवागच्छन्ति २ वेउव्वियसमुग्घाएणं समोहणंति जाव उत्तर-
वेउव्वियाइं रुवाइं विकुव्वंति, ताए उक्किट्ठाए तुरियाए चवलाए चंडाए जइणाए छेयाए सीहाए सिग्घाए दिव्वाए उद्धुयाए देवगतीए तिरियमसंखेज्जाणं दीवसमुद्दाणं मज्झमज्झेणं जेणेव जंबुद्वीवे २ जेणेव भारहे वासे जेणेव तामलिती[ए]नगरी[ए]जे-
णेव तामलिती मोरियपुत्ते तेणेव उवागच्छंति २ ता तामलिस्स बालतवस्सिस्स उप्पिं सपक्खि सपडिदिसिं ठिच्चा दिव्वं देविद्धि दिव्वं देवज्जुइं दिव्वं देवाणुभागं दिव्वं बत्तीसविहं नट्ठविहिं उवदंसंति २ तामलिं बालतवस्सिं तिक्खुत्तो आयाहिणं पयाहिणं करेंति वंदंति नमंसंति २ एवं वदासी-एवं खलु देवाणुप्पिया ! अम्हे बलिचंचारायहाणिवत्थव्वया बहवे असुरकुमारा देवा य देवीओ य देवाणुप्पियं वंदामो नमंसामो जाव पज्जुवासामो, अम्हाणं देवाणुप्पिया ! बलिचंचा रायहाणी अणिदा अपुरोहिया अम्हेऽवि य णं देवाणुप्पिया ! इंदाहीणा इंदाहिद्विया इंदा-
हीणकज्जा तं तुब्भे णं देवाणुप्पिया ! बलिचंचारायहाणिं आढाह परियाणह सुमरह अट्ठं बंधह निदानं पकरेह ठितिपकप्पं पकरेह, तते णं तुब्भे कालमासे कालं किच्चा बलिचंचारायहाणीए उव्वज्जिस्सह, तते णं तुब्भे अम्हं इंदा भविस्सह, तए णं तुब्भे अम्हेहिं सद्धिं दिव्वाइं भोगभोगाइं भुंजमाणा विहरिस्सह । तए णं से तामली बालतवस्सी तेहिं बलिचंचारायहाणिवत्थव्वेहिं बहूहि असुर-
कुमारेहिं देवेहिं देवीहि य एवं वुत्ते समाणे एयमट्ठं नो आढाइ नो परियाणेइ तुसिणीए संचिट्ठइ, तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिं मोरियपुत्तं दोच्चंपि तच्चपि तिक्खुत्तो आयाहिणप्पयाहिणं करेंति २ जाव अम्हं च णं देवाणुप्पिया ! बलिचंचारायहाणी अणिदा जाव ठितिप-
कप्पं पकरेह जाव दोच्चंपि तच्चंपि, एवं वुत्ते समाणे जाव तुसिणीए संचिट्ठइ, तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिणा बालतवस्सिणा अणाढाइज्जमाणा अपरियाणिज्जमाणा जामेव दिसिं पाउव्वभूया तामेव

दिसिं पडिगया ॥ १३४ ॥ तेणं कालेणं २ ईसाणे कप्पे अणिदे अपुरोहि ए यावि
होत्या, तत्ते णं से तामली बालतवस्सी बहुपडिपुन्नाइं सट्ठि वाससहस्साइं परियागं
पाउणित्ता दोमासियाए संलेहणाए अत्ताणं झूसित्ता सवीसं भत्तसयं अणसणाए छेदित्ता
कालमासे कालं किच्चा ईसाणे कप्पे ईसाणवडिसए विमाणे उववायसभाए देवसय-
णिज्जंसि देवदूसंतरिए अंगुलस्स असंखेजभागमेत्ताए ओगाहणाए ईसाणदेविंद-
विरहकालसमयंसि ईसाणदेविंदत्ताए उववण्णे, तए णं से ईसाणे देविंदे देवराया
अहुणोववन्ने पंचविहाए पज्जत्तीए पज्जत्तिभावं गच्छति, तंजहा-आहारप० जाव
भासामणपज्जत्तीए, तए णं ते वल्लिचंचारायहाणिवत्थव्वया वहवे असुरकुमारा देवा
य देवीओ य तामलिं बालतवस्सि कालगयं जाणित्ता ईसाणे य कप्पे देविंदत्ताए
उववण्णं पासित्ता आसुरुत्ता कुविया चंडिकिया मिसिमिसेमाणा वल्लिचंचाराय०
मज्झमज्जेणं निगगच्छंति २ ताए उक्किट्ठाए जाव जेणेव भारहे वासे जेणेव ताम-
लित्ती [ए] नयरी [ए] जेणेव तामलिस्स बालतवस्सिस्स सरीरए तेणेव उवागच्छंति
२ वामे पाए सुंवेणं वंधंति २ तिक्खुत्तो मुहे उट्ठहंति २ तामलित्तीए नगरीए
सिंघाडगतिगचउक्कचचरचउम्मुहमहापहपहेसु आकड्ढविकड्ढिं करेमाणा महया २
सहेणं उग्घोसेमाणा २ एवं वयासी-केस णं भो से तामली बालतव० सयंगहियल्लिगे
पाणामाए पव्वज्जाए पव्वइए ? केस णं भते (भो) ! ईसाणे कप्पे ईसाणे देविंदे
देवरायाइतिकट्ठु तामलिस्स बालतव० सरीरयं हीलंति निंदंति खिसति गरिहंति
अवमन्नंति तज्जंति तालंति परिवहेति पव्वहेति आकड्ढविकड्ढिं करंति हीलेत्ता जाव
आकड्ढविकड्ढिं करेत्ता एगंते एडेंति २ जामेव दिसिं पाउब्भूया तामेव दिसिं पडि-
गया ॥ १३५ ॥ तए णं ते ईसाणकप्पवासी वहवे वेमाणिया देवा य देवीओ य
वल्लिचंचारायहाणिवत्थव्वएहि असुरकुमारेहि देवेहिं देवीहि य तामलिस्स बालतव-
स्सिस्स सरीरयं हीलिजमाणं निदिजमाणं जाव आकड्ढविकड्ढिं कीरमाणं पासंति २
आसुरुत्ता जाव मिसिमिसेमाणा जेणेव ईसाणे देविंदे देवराया तेणेव उवागच्छंति
२ करयलपरिगहियं दसनहं सिरसावत्तं मत्थए अंजलि कट्ठु जएणं विजएणं वद्धावेंति
२ एवं वदासी-एवं खलु देवाणुप्पिया ! वल्लिचंचारायहाणिवत्थव्वया वहवे असुर-
कुमारा देवा य देवीओ-य देवाणुप्पिए कालगए जाणित्ता ईसाणे कप्पे इंदत्ताए
उववन्ने पासित्ता आसुरुत्ता जाव एगंते एडेंति २ जामेव दिसिं पाउब्भूया तामेव
दिसिं पडिगया । तए णं से ईसाणे देविंदे देवराया तेसि ईसाणकप्पवासीणं वट्ठुणं
वेमाणियाणं देवाग य देवीण य अंतिए एयमट्ठं सोच्चा निसम्म आसुरुत्ते जाव
मिसिमिसेमाणे तत्थेव सयणिज्जवरगए तिवलियं भिउडिं निडाले साहट्ठु वल्लिचंचा-

रायहाणि अहे सपक्खि सपडिदिसि समभिलोएइ, तए णं सा वलिचंचारायहाणी
 ईसाणेणं देविदेणं देवरत्ता अहे सपक्खि सपडिदिसि समभिलोइया समाणी तेणं
 दिव्वप्पभावेणं इंगालब्भूया मुम्मुरभूया छारियब्भूया तत्तक्वेळक्कम्भूया तत्ता सम-
 जोइभूया जाया यावि होत्था, तए णं ते वलिचंचारायहाणिवत्थव्वया वहवे असुर-
 कुमारा देवा य देवीओ य तं वलिचंचं रायहाणिं इंगालब्भूयं जाव समजोतिव्वयं
 पासंति २ भीया तत्था तसिया उव्विग्गा संजायभया सव्वओ समंता आधावेति परि-
 धावेंति २ अन्नमन्नस्स कायं समतुरंगेमाणा २ चिट्ठंति, तए णं ते वलिचंचारायहाणि-
 वत्थव्वया वहवे असुरकुमारा देवा य देवीओ य ईसाणं देविदं देवरायं परिकुवियं
 जाणित्ता ईसाणस्स देविदस्स देवरत्तो तं दिव्वं देविद्धि दिव्वं देवज्जुइं दिव्वं देवा-
 णुभागं दिव्वं तेयलेस्सं असहमाणा सव्वे सपक्खि सपडिदिसि ठिच्चा करयलपरि-
 ग्गहियं दसनहं सिरसावत्तं मत्थए अंजलि कट्ठु जएणं विजएणं वद्धावेंति २ एवं
 वयासी-अहो णं देवाणुप्पिएहिं दिव्वा देविद्धी जाव अभिसमन्नागता तं दिव्वा णं
 देवाणुप्पियाणं दिव्वा देविद्धी जाव लद्धा पत्ता अभिसमन्नागया तं खामेमि णं देवा-
 णुप्पिया ! खमंतु णं देवाणुप्पिया ! [खमंतु] मरिहंतु णं देवाणुप्पिया ! णाइ भुज्जो
 २ एवंकरणयाएत्तिकट्ठु एयमट्ठं सम्मं विणएणं भुज्जो २ खामेंति, तते णं से ईसाणे
 देविदे देवराया तेहिं वलिचंचारायहाणिवत्थव्वेहिं वहूहिं असुरकुमारेहि देवेहिं
 देवीहि य एयमट्ठं सम्मं विणएणं भुज्जो २ खामिए समाणे तं दिव्वं देविद्धि जाव
 तेयलेस्सं पडिसाहरइ, तप्पमिति च णं गोयमा !, ते वलिचंचारायहाणिवत्थव्वया
 वहवे असुरकुमारा देवा य देवीओ य ईसाणं देविदं देवरायं आढंति जाव पज्जुवा-
 संति, ईसाणरस देविदस्स देवरत्तो आणाउववायवयणनिदेसे चिट्ठंति, एवं खलु
 गोयमा ! ईसाणेणं देविदेणं देवरत्ता सा दिव्वा देविद्धी जाव अभिसमन्नागया ।
 ईसाणस्स णं भंते ! देविदस्स देवरत्तो केवतियं कालं ठिती पणत्ता ?, गोयमा !
 सातिरेगाइं दो सागरोवमाइं ठिती पत्तत्ता ईसाणे णं भंते ! देविदे देवराया
 ताओ देवलोगाओ आउक्खएणं जाव कहिं गच्छिहिति ? कहिं उववज्जि-
 हिति ?, गो० ! नहाविदेहे वासे सिज्जिहिति जाव अंतं काहेति ॥ १३६ ॥
 सक्कस्स णं भंते ! देविदस्स देवरत्तो विमाणेहिंतो ईसाणस्स देविदस्स देवरत्तो
 विमाणा ईसिं उच्चयरा चेव ईसिं उन्नयतरा चेव ईसाणस्स वा देविदस्स देवरत्तो
 विमाणेहिंतो सक्कस्स देविदस्स देवरत्तो विमाणा णीययरा चेव ईसिं निन्नयरा चेव ?,
 हंता ! गोयमा ! सक्कस्स तं चेव सव्वं नेयव्वं । से केणट्ठेणं ?, गोयमा ! से जहा-
 नामए-करयले सिया देसे उच्चे देसे उज्जए देसे णीए देसे निन्ने, से तेणट्ठेणं

गोयमा ! सक्कस्स देविंदस्स देवरत्तो जाव ईसिं निण्णतरा चेव ॥ १३७ ॥ पभू णं
 भंते ! सक्के देविदे देवराया ईसाणस्स देविंदस्स देवरत्तो अंतियं पाउब्भवित्तए ?,
 हंता पभू, से णं भंते ! किं आढायमाणे पभू अणाढायमाणे पभू ?, गोयमा !
 आढायमाणे पभू नो अणाढायमाणे पभू, पभू णं भंते ! ईसाणे देविदे देवराया
 सक्कस्स देविंदस्स देवरत्तो अंतियं पाउब्भवित्तए ?, हंता पभू, से भंते ! किं
 आढायमाणे पभू अणाढायमाणे पभू ?, गोयमा ! आढायमाणेवि पभू अणाढाय-
 माणेवि पभू । पभू णं भंते ! सक्के देविदे देवराया ईसाणं देविदं देवरायं सपक्खि
 सपडिदिसि समभिलोएत्तए जहा पादुब्भवणा तहा दोवि आलावगा नेयव्वा । पभू
 णं भंते ! सक्के देविदे देवराया ईसाणेणं देविदेणं देवरत्ता सद्धि आलावं वा
 संलावं वा करेत्तए ?, हंता ! पभू जहा पादुब्भवणा । अत्थि णं भंते ! तेसि
 सक्कीसाणाणं देविदाणं देवराईणं किच्चाइं करणिज्जाइं समुप्पज्जंति ?, हंता ! अत्थि, से
 कहमिदाणिं पकरेंति ?, गोयमा ! ताहे चेव णं से सक्के देविदे देवराया ईसाणस्स
 देविंदस्स देवरत्तो अंतियं पाउब्भवति, ईसाणे णं देविदे देवराया सक्कस्स देविंदस्स
 देवरायस्स अंतियं पाउब्भवइ, इति भो ! सक्का देविंदा देवराया दाहिणद्धूलोगाहि-
 वई, इति भो ! ईसाणा देविंदा देवराया उत्तरद्धूलोगाहिवई, इति भो ! इति भो त्ति
 ते अन्नमन्नस्स किच्चाइं करणिज्जाइं पच्चणुब्भवमाणा विहरंति ॥ १३८ ॥ अत्थि णं
 भंते ! तेसि सक्कीसाणाणं देविदाणं देवराईणं विवादा समुप्पज्जंति ?, हंता !
 अत्थि । से कहमिदाणिं पकरेंति ?, गोयमा ! ताहे चेव णं ते सक्कीसाणा देविंदा
 देवरायाणो सणंकुमारं देविदं देवरायं मणसीकरेंति, तए णं से सणंकुमारे देविदे
 देवराया तेहिं सक्कीसाणेहिं देविदेहिं देवराईहि मणसीकए समाणे खिप्पामेव
 सक्कीसाणाणं देविदाणं देवराईणं अंतिय पाउब्भवति, जं से वदइ तस्स आणाउ-
 ववायवयणनिद्देसे चिट्ठंति ॥ १३९ ॥ सणंकुमारे णं भंते ! देविदे देवराया किं
 भवसिद्धिए अभवमिद्धिए सम्महिट्ठी मिच्छदिट्ठी परित्तसंसारए अणंतससारए
 सुलभवोहिए दुलभवोहिए आराहए विराहए चरिमे अचरिमे ?, गोयमा ! सणंकुमारे
 णं देविदं देवराया भवसिद्धिए नो अभवसिद्धिए, एवं सम्महिट्ठी परित्तसंसारए
 सुलभवोहिए आराहए चरिमे पसत्थं नेयव्वं । से केणट्ठेणं भंते ! ?, गोयमा !
 सणंकुमारे देविदे देवराया बहूणं समणाणं बहूणं समणीणं बहूणं सावयाणं बहूणं
 सावियाणं हियकामए सुहकामए पत्थकामए आणुकंपिए निस्सेयसिए हियसुहनिस्से-
 सकामए, से तेणट्ठेणं गोयमा ! सणंकुमारे णं भवसिद्धिए जाव नो अचरिमे । सणं-
 कुमारस्स णं भंते ! देविंदस्स देवरत्तो केवतियं कालं ठिती पन्नत्ता ?, गोयमा !

सत्त सागरोवमाणि ठिती पन्नत्ता । से णं भंते । ताओ देवलोगाओ आउक्खएणं जाव कहिं उववज्जिहिति ? गोयमा ! महाविदेहे वासे सिज्झिहिति जाव अंतं करेहिति, सेवं भंते ! सेवं भंते ! २ । गाहाओ-छट्ठममासो अद्धमासो वासाइं अट्ठः छम्मासा । तीसगकुल्लदत्ताणं तवभत्तपरिण्णपरियाओ ॥ १ ॥ उच्चत्तविमाण्णं पाउब्भवं पेच्छणा य संलावे । किंचि विवाहुप्पत्ती सणकुमारे य भवियव्वं (त्तं) ॥ २ ॥ १४० ॥ **मोया समत्ता । तईयसए पढमो उद्देसो समत्तो ॥**

तेणं कालेणं तेणं समएणं रायगिहे नामं नगरे होत्था जाव परिसा पज्जुवासइ, तेणं कालेणं तेणं समएणं चमरे असुरिंदे असुरराया चमरचंचाए रायहाणीए सभाए सुहम्माए चमरंसि सीहासणंसि चउसट्ठीए सामाणियसाहस्सीहिं जाव नट्ट-विहिं उवदंसेत्ता जामेव दिसिं पाउब्भूए तामेव दिसिं पडिगए । भंतेत्ति भगवं गोयमे समणं भगवं महावीरं वंदति नमंसति २ एवं वदासी-अत्थि णं भंते ! इमीसे रयणप्पभाए पुढवीए अहे असुरकुमारा देवा परिवसंति ?, गोयमा ! नो इणट्ठे समट्ठे, जाव अहेसत्तमाए पुढवीए, सोहम्मस्स कप्पस्स अहे जाव अत्थि णं भंते ! ईसि-पब्भाराए पुढवीए अहे असुरकुमारा देवा परिवसंति ?, णो इणट्ठे समट्ठे । से कहिं खाइ णं भंते ! असुरकुमारा देवा परिवसंति ?, गोयमा ! इमीसे रयणप्पभाए पुढवीए असीउत्तरजोयणसयसहस्सवाहल्लाए, एवं असुरकुमारदेववत्तव्वया जाव दिव्वाइं भोगभोगाइं भुंजमाणा विहरंति । अत्थि णं भंते ! असुरकुमाराणं देवाणं अहे गतिविसए ?, हंता अत्थि, केवतियं च णं पभू ! ते असुरकुमाराणं देवाणं अहे गतिविसए पन्नत्ते ?, गोयमा ! जाव अहेसत्तमाए पुढवीए तच्चं पुण पुढवि गया य गमिस्संति य । किं पत्तियन्नं भंते ! असुरकुमारा देवा तच्चं पुढवि गया य गमिस्संति य ?, गोयमा ! पुव्ववेरियस्स वा वेदणउदीरणयाए पुव्वसंगइयस्स वा वेदणउवसा-मणयाए, एवं खलु असुरकुमारा देवा तच्चं पुढवि गया य गमिस्संति य । अत्थि णं भंते ! असुरकुमाराणं देवाणं तिरियं गतिविसए पन्नत्ते ?, हंता अत्थि, केवतियं च णं भंते ! असुरकुमाराणं देवाणं तिरियं गइविसए पन्नत्ते ?, गोयमा ! जाव असंखेज्जा दीवसमुदा नंदिस्सरवरं पुण दीवं गया य गमिस्संति य । किं पत्तियन्नं भंते ! असुरकुमारा देवा नंदीसरवरदीवं गया य गमिस्संति य ?, गोयमा जे इमे अरिहंता भगवंता एएसि णं जम्मणमहेसु वा निक्खमणमहेसु वा णाणुप्पायमहिमासु वा परि-निव्वाणमहिमासु वा, एवं खलु असुरकुमारा देवा नंदीसरवरदीवं गया य गमिस्संति य । अत्थि णं भंते ! असुरकुमाराणं देवाणं उड्डं गतिविसए ?, हंता ! अत्थि । केवतियं च णं भंते ! असुरकुमाराणं देवाणं उड्डं गतिविसए ?, गोयमा ! जावऽच्चुए

कप्पे सोहम्मं पुण कप्पं गया य गमिस्संति य । कि पत्तियण्णं भंते ! असुरकुमारा देवा सोहम्मं कप्पं गया य गमिस्संति य ?, गोयमा ! तेसि णं देवाणं भवपच्चइय-वेराणुवंधे, ते णं देवा विकुब्बेमाणा परियारेमाणा वा आयरक्खे देवे वित्तासेंति अहालहुस्सगाइं रयणाइं गहाय आयाए एगंतमंतं अवक्कमंति । अत्थि णं भंते ! तेसिं देवाणं अहालहुस्सगाइं रयणाइं ?, हंता अत्थि । से कहमियाणि पकरेंति ?, तओ से पच्छा कायं पव्वहंति । पभू णं भंते ! ते असुरकुमारा देवा तत्थ गया चेव समाणा ताहि अच्छराहिं सद्धि दिव्वाइं भोगभोगाइं भुंजमाणा विहरित्तए ?, णो तिण्ठे समट्ठे, ते णं तओ पडिनियत्तंति २ ता इहमागच्छंति २ जति णं ताओ अच्छराओ आढायंति परियाणंति । पभू णं ते असुरकुमारा देवा ताहि अच्छराहिं सद्धि दिव्वाइं भोगभोगाइं भुंजमाणा विहरित्तए अहन्नं ताओ अच्छराओ नो आढायंति नो परियाणंति णो णं पभू ते असुरकुमारा देवा ताहि अच्छराहिं सद्धि दिव्वाइं भोगभोगाइं भुंजमाणा विहरित्तए, एवं खलु गोयमा ! असुरकुमारा देवा सोहम्मं कप्पं गया य गमिस्संति य ॥ १४१ ॥ केवइकालस्स णं भंते ! असुरकुमारा देवा उट्ठं उप्पयंति जाव सोहम्मं कप्पं गया य गमिस्संति य ?, गोयमा ! अणंताहिं उस्सप्पिणीहिं अणंताहिं अवसप्पिणीहि समइक्कंताहिं, अत्थि णं एस भावे लोयच्छेरयभूए समुप्पज्जइ जन्नं असुरकुमारा देवा उट्ठं उप्पयंति जाव सोहम्मो कप्पो, कि निस्साए णं भंते ! असुरकुमारा देवा उट्ठं उप्पयंति जाव सोहम्मो कप्पो ?, गोयमा ! से जहानामए-इह सवरा इ वा वव्वरा इ वा टंकणा इ वा भुत्तुया इ वा पल्हया इ वा पुलिंदा इ वा एगं महं गड्ढं वा खड्ढं वा दुग्गं वा दरि वा विसमं वा पव्वयं वा णीसाए सुमहल्लमवि आसवलं वा हत्थिवलं वा जोहवलं वा यणुवलं वा आगलेंति, एवमेव असुरकुमारावि देवा, णण्णत्थ अरिहंतं वा अणगारे वा भावियप्पणो निस्साए उट्ठं उप्पयंति जाव सोहम्मो कप्पो । सव्वेवि णं भंते ! असुरकुमारा देवा उट्ठं उप्पयंति जाव सोहम्मो कप्पो ?, गोयमा ! णो इण्ठे समट्ठे, महिद्धिया णं असुरकुमारा देवा उट्ठं उप्पयंति जाव सोहम्मो कप्पो । एसवि णं भंते ! चमरे असुरिंदे असुरकुमारराया उट्ठं उप्पइयपुव्वि जाव सोहम्मो कप्पो ?, हंता गोयमा ! २ । अहो णं भंते ! चमरे असुरिंदे असुरकुमार-राया महिद्धिए महज्जुईए जाव कहिं पविट्ठा ?, कूडागारसालादिट्ठंतो भाणियव्वो ॥ १४२ ॥ चमरेणं भंते ! असुरिंदेणं असुररत्ता सा दिव्वा देविद्धी तं चेव जाव किन्ना लद्धा पत्ता अभिसमन्नागया, एवं खलु गोयमा ! तेणं कालेणं तेणं समएणं इहेव जंजुदीवे २ भारहे वासे विंजगिरिपायमूले वेमेले नामं संनिवेसे होत्था, वन्नओ,

तत्थ णं वेमेले सन्निवेसे पूरणे नामं गांहावई परिवसति अद्धे दित्ते जहा तामलिस्स
 चत्तव्वया तहा नेयव्वा, नवरं चउप्पुडयं दारुमयं पडिग्गहयं करेत्ता जाव विपुलं
 असणं पाणं खाइमं साइमं जाव सयमेव चउप्पुडयं दारुमयं पडिग्गहयं गहाय मुंडे
 भविता दाणामाए पव्वज्जाए पव्वइत्तए पव्वइएऽवि य णं समाणे तं चेव, जाव
 आयावणभूमीओ पच्चोरुभइ २ ता सयमेव चउप्पुडयं दारुमयं पडिग्गहियं गहाय
 वेमेले सन्निवेसे उच्चनीयमज्झिमाइं कुलाइं घरसमुदाणस्स भिक्खायरियाए अडेत्ता
 जं मे- पढमे पुडए पडइ कप्पइ मे तं पंथे पहियाणं दलइत्तए जं मे दोचे पुडए
 पडइ कप्पइ मे तं कागसुणयाणं दलइत्तए जं मे तच्चे पुडए पडइ कप्पइ मे तं
 मच्छकच्छभाणं दलइत्तए जं मे चउत्थे पुडए पडइ कप्पइ मे तं अप्पणा आहारि-
 त्तएत्तिकट्ठु एवं संपेहेइ २ कल्लं पाउप्पभायाए रयणीए तं चेव निरवसेसं जाव जं
 मे (से) चउत्थे पुडए पडइ तं अप्पणा आहारं आहारेइ, तए णं से पूरणे वालत-
 वस्सी तेणं ओरालेणं विउलेणं पयत्तेणं पग्गहिणं वालतवोकम्मणेणं तं चेव जाव
 वेमेलस्स सन्निवेसस्स मज्झमज्जेणं निग्गच्छति २ पाउयं कुंडियमादीयं उवगरणं
 चउप्पुडयं च दारुमयं पडिग्गहियं एगंतमंते एडेइ २ वेमेलस्स सन्निवेसस्स दाहि-
 णपुरच्छिमे दिसीभागे अद्धनियत्तणियमंडलं आलिहिता संलेहणाइसणाइसिए भत्त-
 पाणपडियाइक्खिए पाओवगमणं निवण्णे । तेणं कालेणं तेणं समएणं अहं गोयमा !
 छउमत्थकालियाए एक्कारसवासपरियाए छट्ठंछट्ठेणं अनिक्खित्तेणं तवोकम्मणेणं संज-
 मेणं तवसा अप्पणं भावेमाणे पुव्वाणुपुव्वि चरमाणे गामाणुगामं दूइज्जमाणे जेणेव
 सुंसमारपुरे नगरे जेणेव असोयवणसंडे उज्जाणे जेणेव असोयवरपायवे जेणेव
 पुढविसिलापट्टए तेणेव उवागच्छामि २ असोगवरपायवस्स हेट्ठा पुढविसिलापट्ट-
 यंसि अट्टमभत्तं परिणिण्हामि, दोवि पाए साहट्ठु वग्घारियपाणी एगपोग्गलनिविट्ठदिट्ठी
 अणिमिसनयणे ईसिंपब्भारगएणं काएणं अहापणिहिएहिं गत्तेहिं सव्विदिएहि गुत्तेहिं
 एगराइयं महापडिमं उवसंपज्जिता णं विहरामि । तेणं कालेणं तेणं समएणं चमर-
 चंचारायहाणी अणिदा अपुरोहिया यावि होत्था, तए णं से पूरणे वालतवस्सी
 बहुपडिपुन्नाइं दुवालसवासाइं परियागं पाउणित्ता मासियाए संलेहणाए अत्ताणं झूसेत्ता
 सट्ठिं भत्ताइं अणसणाए छेदेत्ता कालमासे कालं किच्चा चमरचंचाए रायहाणीए
 उववायसभाए जाव इंदत्ताए उववन्ने, तए णं से चमरे असुरिदे असुरराया अहुणो-
 ववन्ने पंचविहाए पज्जतीए पज्जत्तिभावं गच्छइ, तंजहा-आहारपज्जतीए जाव भासा-
 मणपज्जतीए, तए ण से चमरे असुरिदे असुरराया पंचविहाए पज्जतीए पज्जत्तिभावं
 गए समाणे उट्ठं वीससाए ओहिणा आभोएइ जाव सोहम्मो कप्पो, पासइ य तत्थ

सक्कं देविदं देवरायं भगवं पाकसासणं सयक्कतुं सहस्सक्खं वज्जपाणि पुरंदरं जाव
दस दिसाओ उज्जोवेमाणं पभासेमाणं सोहम्मे कप्पे सोहम्मवडेंसए विमाणे सक्कंसि
सीहासणंसि जाव दिव्वाइं भोगभोगाईं भुंजमाणं पासइ २ इमेयारूवे अज्झत्थिए
चित्थिए पत्थिए मणोगए संकप्पे समुप्पज्जित्था-केस णं एस अपत्थियपत्थए दुरंत-
'पंतलक्खणे हिरिसिरिपरिवज्जिए हीणपुत्रचाउद्दसे जन्नं ममं इमाए एयारूवाए दिव्वाए
देविद्धीए जाव दिव्वे देवाणुभावे लद्धे पत्ते अभिसमन्नागए उप्पि अप्पुस्सुए दिव्वाइं
भोगभोगाईं भुंजमाणे विहरइ, एवं संपेहेइ २ सामाणियपरिसोववन्नए देवे सद्दावेइ
२ एवं वयासी-केस णं एस देवाणुप्पिया अपत्थियपत्थए जाव भुंजमाणे विहरइ !,
तए णं ते सामाणियपरिसोववन्नगा देवा चमरेणं असुरिंदेणं असुररत्ता एवं सुत्ता
समाणा हट्ठुट्ठा जाव हयहियया करयलपरिग्गहियं दसनहं सिरसावत्तं मत्थए
अजलिं कट्ठु जएणं विजएणं वद्धावेंति २ एवं वयासी-एस णं देवाणुप्पिया ! सक्के
देविदे देवराया जाव विहरइ, तए णं से चमरे असुरिंदे असुरराया तेसिं सामाणि-
यपरिसोववन्नगाणं देवाणं अंतिए एयमट्ठं सोच्चा निसम्म आसुरुत्ते रुद्धे कुविए चंडि-
क्किए मिसिमिसेमाणे ते सामाणियपरिसोववन्नए देवे एवं वयासी-अन्ने खलु भो !
(से)सक्के देविदे देवराया अन्ने खलु भो ! से चमरे असुरिंदे असुरराया, महिद्धिए
खलु भो ! से सक्के देविदे देवराया, अप्पड्ढिए खलु भो ! से चमरे असुरिंदे असुरराया,
तं इच्छामि णं देवाणुप्पिया ! सक्कं देविदं देवरायं सयमेव अच्चासादेत्तएत्तिकट्ठु उसिणे
उसिणवभूए जाए यावि होत्था, तए णं से चमरे असुरिंदे असुरराया ओहिं पउंजइ
२ ममं ओहिणा आभोएइ २ इमेयारूवे अज्झत्थिए जाव समुप्पज्जित्था-एवं खलु
समणे भगवं महावीरे जंबुदीवे २ भारहे वासे सुंसमारपुरे नगरे असोगवणसंडे उज्जाणे
असोगवरपायवस्स अहे पुढाविसिलापट्टयंसि अट्ठमभत्तं पडिगिण्हित्ता एगराइयं महा-
पडिमं उवसंपज्जित्ता णं विहरति, तं सेयं खलु मे समणं भगवं महावीरं नीसाए सक्कं
देविदं देवरायं सयमेव अच्चासादेत्तएत्तिकट्ठु एवं संपेहेइ २ सयणिज्जाओ अब्भुट्ठेइ
२ ता देवदूसं परिहेइ २ उववायसभाए पुरच्छिमिल्लेणं दारेणं णिग्गच्छइ, जेणेव
सभा सुहम्मा जेणेव चोप्पाले पहरणकोसे तेणेव उवागच्छइ २ ता फलिहरयणं
परामुसइ २ एगे अवीए फलिहरयणमायाए महया अमरिसं वहमाणे चमरचंचाए
रायहाणीए मज्झंमज्झेणं निग्गच्छइ २ जेणेव तिगिच्छिक्कूडे उप्पायपव्वए तेणामेव
उवागच्छइ २ ता वेउव्वियसमुग्घाएणं समोहणइ २ ता संखेज्जाइं जोयणाइं जाव
उत्तरवेउव्वियह्वं विउव्वइ २ ता ताए उक्किट्ठाए जाव जेणेव पुढाविसिलापट्टए जेणेव
मम अंतिए तेणेव उवागच्छति २ मम तिव्वुत्तो आयाहिणं पयाहिणं करेति जाव

नमंसित्ता एवं वयासी-इच्छामि णं भंते ! तुब्भं नीसाए सक्कं देविदं देवरायं सयमेव
अच्चासादित्तएत्तिकहु उत्तरपुरच्छिमे दिसीभागे अवक्कमइ २ वंडव्वियसमुग्घाएणं
समोहणइ २ जाव दोच्चंपि वेडव्वियसमुग्घाएणं समोहणइ २ एगं महं घोरं घोरागारं
भीमं भीमागारं भासुरं भयाणीयं गंभीरं उत्तासणयं कालद्धरत्तमासरासिसंकासं जोय-
णसयसाहस्सीयं महाबोदि विउव्वइ २ अप्फोडेइ २ वग्गइ २ गज्जइ २ हयहेसियं
करेइ २ हत्थिगुलगुलाइयं करेइ २ रहघणघणाइयं करेइ २ पायदहरगं करेइ २
भूमिचवेडयं दलयइ २ सीहणादं नदइ २ उच्छोलेइ २ पच्छोलेइ २ तिपइं छिदइ
२ वामं भुयं ऊसवेइ २ दाहिणहत्थपदेसिणीए य अंगुट्ठणहेण य वितिरिच्छमुहं
विडंबेइ २ महया २ सहेणं कलकलरवं करेइ, एगे अबीए फलिहरयणमायाए
उड्डं वेहासं उप्पइए, खोभंते चेव अहेलोयं कंपेमाणे च मेयणितलं आकट्टं (साकट्टं)
तेव तिरियलोयं फोडेमाणेव अवरतलं कत्थइ गज्जंतो कत्थइ विज्जुयायंते कत्थइ वासं
वासमाणे कत्थइ रउग्घायं पकरेमाणे कत्थइ तमुक्कायं पकरेमाणे वाणमंतरदेवे वित्ता-
सेमाणे जोइसिए देवे दुहा विभयमाणे २ आयरक्खे देवे विपलायमाणे २ फलिहर-
यणं अंबरतलंसि वियट्टमाणे २ विउज्झाएमाणे २ ताए उक्किट्ठाए जाव तिरियमसं-
खेज्जाणं दीवसमुद्दाणं मज्झंमज्झेणं वीइवयमाणे २ जेणेव सोहम्मो कप्पे जेणेव
सोहम्मवडेसए विमाणे जेणेव सभा सुहम्मो तेणेव उवागच्छइ २ एगं पायं पउम-
वरवेइयाए करेइ एगं पायं सभाए सुहम्मो करेइ फलिहरयणेणं महया २ सहेणं
तिक्खुत्तो इंदकीलं आउडेइ २ एवं वयासी-कहि णं भो ! सक्के देविदे देवराया ?
कहि णं ताओ चउरासीइ सामाणियसाहस्सीओ ? जाव कहि णं ताओ चत्तारि चउ-
रासीओ आयरक्खदेवसाहस्सीओ ? कहि णं ताओ अणेगाओ अच्छराकोडीओ ?
अज्ज हणामि अज्ज महेमि अज्ज वहेमि अज्ज ममं अवसाओ अच्छराओ वसमुवण-
मंतुत्तिकहु तं अणिट्ठं अकंतं अप्पियं असुभं अमणुणं अमणामं फरुसं गिरं निसिरइ,
तए णं से सक्के देविदे देवराया तं अणिट्ठं जाव अमणामं अस्सुयपुव्वं फरुसं गिरं
सोचा निसम्म आसुरत्ते जाव मिसिमिसेमाणे तिवलियं भिउडि निडाले साहहु चमरं
असुरिंदं असुररायं एवं वदासी-हं भो चमरा ! असुरिंदा ! असुरराया ! अपत्थिय-
पत्थया ! जाव हीणपुन्नचाउइसा ! अज्जं न भवसि नाहि ते सुहमत्थीतिकहु तत्थेव
सीहासणवरगए वज्जं परामुसइ २ तं जलंतं फुडंतं तडतडंतं उक्कासहस्साइं विणि-
म्मुयमाणं जालासहस्साइं पमुंचमाणं इंगालसहस्साइं पविक्खिरमाणं २ फुलिग-
जालामालासहस्सेहि चक्खुविकखेवदिट्ठिपडिघायं पकरेमाणं हुयवहअइरेगतेयदिप्पंतं
जडणवेगं फुत्तकिसुयसमाणं महब्भयं भयंकरं चमरस्स असुरिदस्स असुररज्जो वहाए

वज्जं निसिरइ । तते णं से चमरे असुरिंदे असुरराया तं जलंतं जाव भयंकरं वज्ज-
मभिमुहं आवयमाणं पासइ पासइत्ता झियाति पिहांइ झियाइत्ता पिहांइत्ता तहेव
संभग्गमउडविडए सालंवहत्थाभरणे उड्ढंपाए अहोसिरे कक्खागयसेयंपि व विणि-
म्मुयमाणे २ ताए उक्किट्ठाए जाव तिरियमसंखेज्जाणं दीवसमुद्दाणं मज्झंमज्झेणं
वीईवयमाणे २ जेणेव जंवुद्दीवे २ जाव जेणेव असोगवरपायवे जेणेव मम अंतिए
तेणेव उवागच्छइ २ ता भीए भयगगरसरं भगवं सरणमिति वुयमाणे ममं दोण्हवि
पायाणं अंतरंसि व्रत्तिवेगेण समोवडिइ ॥ १४३ ॥ तए णं तस्स सक्कस्स देविंदस्स देव-
रत्तो इमेयारूवे अज्झत्थिए जाव समुप्पज्जित्था-नो खलु पभू चमरे असुरिदे
असुरराया नो खलु समत्थे चमरे असुरिंदे असुरराया नो खलु विसए चमरस्स
असुरिंदस्स असुररत्तो अप्पणो निस्साए उड्ढं उप्पइत्ता जाव सोहम्मो कप्पो गण्णत्थ
अरिहंते वा अणगारे वा भावियप्पणो णीसाए उड्ढं उप्पयति जाव सोहम्मो कप्पो,
तं महाडुक्खं खलु तहारूवाणं अरहंताणं भगवंताणं अणगाराण य अच्चासायणाए-
त्तिकहु ओहिं पउंजति २ ममं ओहिणा आभोएति २ हा हा अहो हतोऽहमंसित्तिकहु
ताए उक्किट्ठाए जाव दिव्वाए देवगतीए वज्जस्स वीहिं अणुगच्छमाणे २ तिरियम-
संखेज्जाणं दीवसमुद्दाणं मज्झंमज्झेणं जाव जेणेव असोगवरपायवे जेणेव ममं अंतिए
तेणेव उवागच्छइ २ ममं चउरंगुलमसंपत्तं वज्जं पडिसाहरइ ॥ १४४ ॥ अविद्याइं
मे गोयमा ! मुट्ठिवाएणं केसग्गे वीइत्था, तए णं से सक्के देविदे देवराया वज्जं
पडिसाहरित्ता ममं तिक्खुत्तो आयाहिणं पयाहिणं करेइ २ वंदइ नमंसइ २ एवं
वयासी-एवं खलु भंते ! अहं तुब्भं नीसाए चमरेणं असुरिंदेणं असुररत्ता सयमेव
अच्चासाइए, तए णं मए परिकुविएणं समाणेणं चमरस्स असुरिंदस्स असुररत्तो
चहाए वज्जे निसिंदे, तए णं मे इमेयारूवे अज्झत्थिए जाव समुप्पज्जित्था-नो खलु
पभू चमरे असुरिंदे असुरराया तहेव जाव ओहिं पउंजामि देवाणुप्पिए ओहिणा
आभोएमि हा हा अहो हतोमीतिकहु ताए उक्किट्ठाए जाव जेणेव देवाणुप्पिए तेणेव
उवागच्छामि देवाणुप्पियाणं चउरंगुलमसंपत्तं वज्जं पडिसाहरामि वज्जपडिसाहर-
णट्ठयाए णं इहमागए इह समोसडे इह संपत्ते इहेव अज्ज उवसंपज्जित्ता णं विहरामि,
तं खामेमि णं देवाणुप्पिया ! खमंतु णं देवाणुप्पिया ! [खमंतु] मरहंतु णं देवाणु-
प्पिया ! णाइभुज्जो एवं पकरण्याएत्तिकहु ममं वंदइ नमंसइ २ उत्तरपुरच्छिमं दिसी-
भागं अवक्कमइ २ वामेणं पादेणं तिक्खुत्तो भूमिं दलेइ २ चमरं असुरिंदं असुररायं
एवं वदासी-मुक्कोऽसि णं भो चमरा ! असुरिंदा ! असुरराया ! समणस्स भगवओ
महावीरस्स पभावेणं नाहि ते दाणिं ममाओ भयमत्थीतिकहु जामेव दिसिं पाउ-

ञ्भूए तामेव दिसि पडिगए ॥ १४५ ॥ भंतेति भगवं गोयमे तमणं भगवं मदावीरं
 वंदति २ एवं वदासी-देवे णं भंते ! महिद्धिए महत्तुतीए जाव मत्ताणुभागे पुब्बा-
 मेव पोग्गलं खिवित्ता पभू तमेव अणुपरियट्ठित्ता णं गेण्हित्ताए ?, तंता पभू ॥ से
 केणट्ठेणं भंते ! जाव गेण्हित्ताए ?, गोयमा ! पोग्गले निक्किगत्ते ममाणे पुच्चमेव
 सिग्गगती भवित्ता ततो पच्छा मंदगती भवति, देवे णं महिद्धिए पुब्बिमिय पच्छावि
 सीहे सीहगती चेव तुरिए तुरियगती चेव, से तेणट्ठेणं जाव पभू गेण्हित्ताए । जनि
 णं भंते ! देवे महिद्धिए जाव अणुपरियट्ठित्ता णं गेण्हित्ताए कम्हा णं भंते ! गणे-
 णं देविदेणं देवरत्ता (राया) चमरे असुरिदे असुरराया नो संचाएति साहत्थि
 गेण्हित्ताए ?, गोयमा ! असुरकुमाराणं देवाणं अहे गतिविसए सीहे २ चेव तुरिए
 २ चेव उट्ठं गतिविसए अप्पे २ चेव मंदं मंदं चेव वेमाणियाणं देवाणं उट्ठं गति-
 विसए सीहे २ चेव तुरिए २ चेव अहे गतिविसए अप्पे २ चेव मंदे २ चेव,
 जावतियं खेत्तं सक्के देविदे देवराया उट्ठं उप्पयति एक्केणं समएणं तं वजे दोहि, जं
 वजे दोहिं तं चमरे तिहिं, सव्वत्थोवे सक्कस्स देविदस्स देवरत्तो उट्ठं ओवयकंडए
 अहेलोयकंडए संखेज्जगुणे, जावतियं खेत्तं चमरे असुरिदे असुरराया अहे ओवयति
 एक्केणं समएणं तं सक्के दोहिं जं सक्के दोहि तं वजे तिहिं, सव्वत्थोवे चमरस्स
 असुरिदस्स असुररत्तो अहेलोयकंडए उट्ठं ओवयकंडए संखेज्जगुणे । एवं खलु गोयमा !
 सक्केणं देविदेणं देवरत्ता चमरे असुरिदे असुरराया नो संचाएति साहत्थि गेण्हि-
 त्ताए ॥ सक्कस्स णं भंते ! देविदस्स देवरत्तो उट्ठं अहे तिरियं च गतिविसयस्स
 कयरे २ हिंतो अप्पे वा बहुए वा तुल्ले वा विसेसाहिए वा ?, गोयमा ! सव्वत्थोवं
 खेत्तं सक्के देविदे देवराया अहे ओवयइ एक्केणं समएणं तिरियं संखेजे भागे गच्छइ
 उट्ठं संखेजे भागे गच्छइ । चमरस्स णं भंते ! असुरिदस्स असुररत्तो उट्ठं अहे
 तिरियं च गतिविसयस्स कयरे २ हिंतो अप्पे वा बहुए वा तुल्ले वा विसेसाहिए
 वा ?, गोयमा ! सव्वत्थोवं खेत्तं चमरे असुरिदे असुरराया उट्ठं उप्पयति एक्केणं
 समएणं तिरियं संखेजे भागे गच्छइ अहे संखेजे भागे गच्छइ, वज्जं जहा सक्कस्स
 देविदस्स तहेव नवरं विसेसाहियं कायव्वं ॥ सक्कस्स णं भंते ! देविदस्स देवरत्तो
 ओवयणकालस्स य उप्पयणकालस्स य कयरे २ हिंतो अप्पे वा बहुए वा तुल्ले वा
 विसेसाहिए वा ?, गोयमा ! सव्वत्थोवे सक्कस्स देविदस्स देवरत्तो उट्ठं उप्पयणकाले
 ओवयणकाले संखेज्जगुणे ॥ चमरस्सवि जहा सक्कस्स नवरं सव्वत्थोवे ओवयणकाले
 उप्पयणकाले संखेज्जगुणे ॥ वज्जस्स पुच्छा, गोयमा ! सव्वत्थोवे उप्पयणकाले
 ओवयणकाले विसेसाहिए ॥ एयस्स णं भंते ! वज्जस्स वज्जाहिवइस्स चमरस्स य

असुरिंदस्स असुररत्तो ओवयणकालस्स य उप्पयणकालस्स य कयरे २ हितो अप्पे वा ४?, गोयमा ! सक्कस्स य उप्पयणकाले चमरस्स य ओवयणकाले एए णं दोन्निवि तुल्ला सव्वत्थोवा, सक्कस्स य ओवयणकाले वज्जस्स य उप्पयणकाले एस णं दोण्हवि तुल्ले संखेज्जगुणे चमरस्स य उप्पयणकाले वज्जस्स य ओवयणकाले एस णं दोण्हवि तुल्ले विसेसाहिए ॥ १४६ ॥ तए णं से चमरे असुरिंदे असुरराया वज्जभय-विप्पमुक्के सक्केणं देविदेणं देवरत्ता महया अवमाणेणं अवमाणिए समाणे चमरचंचाए रायहाणीए सभाए सुहम्माए चमरंसि सीहासणंसि ओहयमणसंकप्पे चितासोयसागर-संपविट्ठे करयलपल्हत्थमुहे अट्टज्झाणोवगए भूमिगयदिट्ठीए झियाति, तते णं तं चमरं असुरिंदं असुररायं सामाणियपरिसोववन्नया देवा ओहयमणसंकप्पं जाव झियायमाणं पासंति २ करयल जाव एवं वयासी-किण्णं देवाणुप्पिया ! ओहयमण-संकप्पा जाव झियायह?, तए णं से चमरे असुरिंदे असुर० ते सामाणियपरिसोव-वन्नए देवे एवं वयासी-एवं खलु देवाणुप्पिया ! मए समणं भगवं महावीरं नीसाए सक्के देविदे देवराया सयमेव अच्चासादिए, तए णं तेणं परिकुविएणं समाणेणं ममं वहाए वज्जे निसिट्ठे तं भट्ठणं भवतु देवाणुप्पिया ! समणस्स भगवओ महावीरस्स जस्स मग्गिमनुपभावेण अक्किट्ठे अव्वहिए अंपरिताविएं इहमागए इह समोसढे इह संपत्ते इहेव अज्जं उवसंपज्जिता णं विहरामि, तं गच्छामो णं देवाणुप्पिया ! समणं भगवं महावीरं वंदामो णमंसामो जाव पज्जुवासामोत्तिकट्ठु चउसट्ठीए सामाणिय-साहस्सीहिं जाव सव्विट्ठीए जाव जेणेव असोगव्वरपायवे जेणेव मम अंतिए तेणेव उवागच्छइ २ ममं तिक्खुतो आयाहिणं पयाहिणं जाव नमंसित्ता एवं वदासी-एवं खलु भंते ! मए तुब्भं नीसाए सक्के देविदे देवराया सयमेव अच्चासादिए जाव तं भट्ठं णं भवतु देवाणुप्पियाणं मग्गि जस्स अणुपभावेण अक्किट्ठे जाव विहरामि तं खामेभि णं देवाणुप्पिया ! जाव उत्तरपुरच्छिमं दिसीभागं अवक्कमइ २ ता जाव बत्तीसइवद्धं नट्ठविहिं उवदंसेइ २ जामेव दिसिं पाउब्भूए तामेव दिसिं पडिगए, एवं खलु गोयमा ! चमरेणं असुरिदेणं असुररत्ता सा दिव्वा देविट्ठी लद्धा पत्ता जाव अभिसमन्नागया, ठिती सागरोवमं, महाविदेहे वासे सिज्झिहिति जाव अंतं काहिति ॥ १४७ ॥ किं पत्तिए णं भंते ! असुरकुमारा देवा उट्ठं उप्पयंति जाव सोहम्मो कप्पो?, गोयमा ! तेसि णं देवाणं अहुणोववन्नगाण वा चरिमभवत्थाण वा इमेयारुवे अज्झत्थिए जाव समुप्पज्जइ-अहो णं अम्हेहिं दिव्वा देविट्ठी लद्धा पत्ता जाव अभिसमन्नागया जारिसिया णं अम्हेहिं दिव्वा देविट्ठी जाव अभिसमन्नागया तारि-सिया णं सक्केणं देविदेणं देवरत्ता दिव्वा देविट्ठी जाव अभिसमन्नागया जारिसिया

णं सक्केणं देविंदेणं देवरत्ता जाव अभिसमन्नागया तारिसिया णं अम्हेहिवि जाव अभिसमन्नागया तं गच्छामो, णं सक्कस्स देविंदस्स देवरत्तो अंतियं पाउव्वमामो पासामो ताव सक्कस्स देविंदस्स देवरत्तो दिव्वं देविद्धिं जाव अभिसमन्नागयं पासतु ताव अम्हवि सक्के देविंदे देवराया दिव्वं देविद्धिं जाव अभिसमन्नागयं, तं जाणामो ताव सक्कस्स देविंदस्स देवरत्तो दिव्वं देविद्धिं जाव अभिसमन्नागयं जाणउ ताव अम्हवि सक्के देविंदे देवराया दिव्वं देविद्धिं जाव अभिसमन्नागयं, एवं खलु गोयमा ! असुरकुमारा देवा उद्धं उप्पयंति जाव सोहम्मो कप्पो । सेवं भंते ! सेवं भंते ! ति ॥ १४८ ॥ चमरो समत्तो ॥ तइयसए वीओ उद्देसओ समत्तो ॥

--तेणं कालेणं तेणं समएणं रायणिहे नामं नगरे होत्था जाव परिसा पडिगया । तेणं कालेणं तेणं समएणं जाव अतेवासी मंडियपुत्ते णामं अणगारे पगतिभद्दए जाव पज्जुवासमाणे एवं वदासी-कति णं भंते ! किरियाओ पण्णत्ताओ ?, मंडिय-पुत्ता ! पंच किरियाओ पण्णत्ताओ, तंजहा-काइयाअ हिगरणिया पाओसिया पारियावणिया पाणाइवायकिरिया । काइया णं भंते ! किरिया कतिविहा पण्णत्ता ?, मंडिय-पुत्ता ! दुविहा पण्णत्ता, तंजहा-अणुवरयकायकिरिया य दुप्पउत्तकायकिरिया य । अहिगरणिया णं भंते ! किरिया कतिविहा पण्णत्ता ?, मंडियपुत्ता ! दुविहा पण्णत्ता, तंजहा-संजोयणाहिगरणकिरिया य निव्वत्तणाहिगरणकिरिया य । पाओसिया णं भंते ! किरिया कतिविहा पण्णत्ता ?, मंडियपुत्ता ! दुविहा पण्णत्ता, तंजहा-जीवपाओसिया य अजीवपाओसिया य । पारियावणिया णं भंते ! किरिया कइविहा प० ?, मंडियपुत्ता ! दुविहा प०, तंजहा-सहत्थपारियावणिया य । परहत्थपारियावणिया य । पाणाइवायकिरिया णं भंते ! पुच्छा, पाणाइवायकिरिया कइविहा प० ?, मंडिय-पुत्ता ! दुविहा पण्णत्ता, तंजहा-सहत्थपा० परहत्थपा० किरिया य ॥ १४९ ॥ पुव्वि भंते ! किरिया पच्छा वेदणा पुव्वि वेदणा पच्छा किरिया ?, मंडियपुत्ता ! पुव्वि किरिया पच्छा वेदणा, णो पुव्वि वेदणा पच्छा किरिया ॥ १५० ॥ अत्थि णं भंते ! समण्णं निगंथाणं किरिया कज्जइ ?, हंता ! अत्थि । कइं णं भंते ! समण्णं निगंथाणं किरिया कज्जइ ?, मंडियपुत्ता ! पमायपच्चया जोगनिमित्तं च, एवं खलु समण्णं निगंथाणं किरिया कज्जति ॥ १५१ ॥ जीवे णं भंते ! सया समियं एयति, वेयति चलति फंदइ घट्टइ खुब्भइ उदीरइ तं तं भावं परिणमति ?, हन्ता ! मंडियपुत्ता ! जीवे णं सया समियं एयति जाव तं तं भावं परिणमइ । जावं च णं भंते ! से जीवे सया समितं जाव परिणमइ तावं च णं तस्स जीवस्स अंते अंतकिरिया भवति ?, णो तिण्ठे सम्ठे, से केण्ठेणं भंते ! एवं चुच्चइ-जावं च णं

से जीवे सया समितं जाव अंते अंतकिरिया न भवति ?, मंडियपुत्ता !
जावं च णं से जीवे सया समितं जाव परिणमति तावं च णं से जीवे
आरंभइ सारंभइ समारंभइ आरंभे वट्ठइ सारंभे वट्ठइ समारंभे वट्ठइ आरंभमाणे
सारंभमाणे समारंभमाणे आरंभे वट्ठमाणे सारंभे वट्ठमाणे समारंभे वट्ठमाणे वट्ठणं
पाणाणं भूयाणं जीवाणं सत्ताणं दुक्खावणयाए सोयावणयाए जूरावणयाए तिप्पावण-
याए पिट्ठावणयाए परियावणयाए वट्ठइ, से तेणट्ठेणं मंडियपुत्ता ! एवं वुच्चइ-जावं
च णं से जीवे सया समियं एयति जाव परिणमति तावं च णं तस्स जीवस्स अंते
अंतकिरिया न भवइ ॥ जीवे णं भंते ! सया समियं णो एयइ जाव नो तं तं भावं
परिणमइ ?, हंता मंडियपुत्ता ! जीवे णं सया समियं जाव नो परिणमति । जावं च
णं भंते ! से जीवे नो एयति जाव नो तं तं भावं परिणमति तावं च णं तस्स
जीवस्स अंते अंतकिरिया भवइ ? हंता ! जाव भवति । से केणट्ठेणं भंते ! जाव
भवति ?, मंडियपुत्ता ! जावं च णं से जीवे सया समियं णो एयति जाव णो परि-
णमइ तावं च णं से जीवे नो आरंभइ नो सारंभइ नो समारंभइ नो आरंभे वट्ठइ
णो सारंभे वट्ठइ णो समारंभे वट्ठइ अणारंभमाणे असारंभमाणे असमारंभमाणे
आरंभे अवट्ठमाणे सारंभे अवट्ठमाणे समारंभे अवट्ठमाणे वट्ठणं पाणाणं ४ अदुक्खा-
वणयाए जाव अपरियावणयाए वट्ठइ । से जहानामए केइ पुरिसे सुक्कं तणहत्थयं
जायतेयंसि पक्खिवेज्जा, से नूणं मंडियपुत्ता ! से सुक्के तणहत्थए जायतेयंसि पक्खित्ते
समाणे खिप्पामेव मसमसाविज्जइ ? हंता ! मसमसाविज्जइ, से जहानामए-केइ पुरिसे
तत्तंसि अयकवल्लंसि उदयविंदू पक्खिवेज्जा, से नूणं मंडियपुत्ता ! से उदयविंदू
तत्तंसि अयकवल्लंसि पक्खित्ते समाणे खिप्पामेव विद्धंसमागच्छइ ?, हंता ! विद्धंस-
मागच्छइ, से जहानामए हरए सिया पुण्णे पुण्णप्पमाणे वोलट्ठमाणे वोसट्ठमाणे सम-
भरंघडत्ताए चिट्ठति ?, हंता ! चिट्ठति, अहे णं केइ पुरिसे तंसि हरयंसि एगं महं
णावं सतासवं सयच्छिद्धं ओगाहेज्जा से नूणं मंडियपुत्ता ! सा नावा तेहि आसव-
दारेहिं-आपूरेमाणी २ पुण्णा पुण्णप्पमाणा वोलट्ठमाणा वोसट्ठमाणा समभरंघडत्ताए
चिट्ठति ? हंता ! चिट्ठति, अहे णं केइ पुरिसे तीसे नावाए सव्वतो समंता आसव-
दाराइं पिहेइ २ नावाउस्सिचणएणं उदयं उस्सिचिज्जा से नूणं मंडियपुत्ता ! सा नावा
तंसि उदयंसि उस्सिचिज्जंसि-समाणंसि खिप्पामेव उट्ठं उदाइ ?, हंता ! उदाइज्जा,
एवामेव मंडियपुत्ता ! अत्तत्तासंवुडस्स अणगारस्स इरियासमियस्स जाव गुत्तवंभ-
यारिस्स आउत्तं गच्छमाणस्स चिट्ठमाणस्स निसीयमाणस्स तुयट्ठमाणस्स आउत्तं
वत्थपडिग्गहकंवलपायपुंछणं गेण्हमाणस्स णिक्खिवमाणस्स जाव चक्खुपम्हनिवाय-

मवि वेमाया सुहुमा इरियावहिया किरिया कज्जइ, सा पढमसमयवद्धपुट्टा त्रितियस-
मयवेइया तइयसमयनिज्जरिया सा वद्धा पुट्टा उदीरिया चेदिया निज्जिण्णा सेय-
काले अकम्मं वावि भवति, से तेणट्ठेणं मंडियपुत्ता ! एवं वुच्चाते-जावं च णं से जीवे
सया समियं नो एयति जाव अंते अंतकिरिया भवति ॥ १५२ ॥ पमत्तमंजयस्स णं
भंते ! पमत्तसंजमे वट्टमाणस्स सव्वावि य णं पमत्तद्धा कालओ केवचिरं होइ ?,
मंडियपुत्ता ! एगजीवं पडुच्च जहन्नेणं एक्कं समयं उक्कोसेणं देसूणा पुव्वकोडी, णाणा-
जीवे पडुच्च सव्वद्धा ॥ अप्पमत्तसंजयस्स णं भंते ! अप्पमत्तरांजमे वट्टमाणस्स
सव्वावि य णं अप्पमत्तद्धा कालओ केवचिरं होइ ?, मंडियपुत्ता ! एगजीवं पडुच्च
जहन्नेणं अंतोमुहुत्तं उक्को० पुव्वकोडी देसूणा, णाणाजीवे पडुच्च सव्वद्धं, सेवं भंते !
२ ति भयवं मंडियपुत्ते अणगारे समणं भगवं महावीरं वंदइ नमंसइ २ सजमेणं
तवसा अप्पाणं भावेमाणे विहरइ ॥ १५३ ॥ भंते ! ति भगवं गोयमे समणं भगवं
महावीरं वंदइ नमंसइ २ ता एवं वयासी-कम्हा णं भंते ! लवणसमुद्दे चाउद्दसट्ट-
मुद्धिपुत्तमासिणीसु अतिरेयं वड्ढति वा हायति वा ?, जहा जीवाभिगमे लवणसमु-
द्दवत्तव्या नेयव्वा जाव लोयट्ठिती, जणं लवणसमुद्दे जंबुद्दीवं २ णो उप्पीलेति णो
चेव णं एगोदगं करेइ (लोयट्ठिई) लोयाणुभावे । सेवं भंते ! २ ति जाव विहरति ॥
किरिया समत्ता ॥ १५४ ॥ तइयस्स सयस्स तइओ उद्देसो समत्तो ॥

अणगारे णं भंते ! भावियप्पा देवं वेउव्वियसमुग्घाएणं समोहयं जाणरूवेणं जाय-
माणं जाणइ पासइ ? गोयमा ! अत्थेगइए देवं पासइ णो जाणं पासइ १ अत्थेगइए
जाणं पासइ नो देवं पासइ २ अत्थेगइए देवंपि पासइ जाणंपि पासइ ३ अत्थेगइए
नो देवं पासइ नो जाणं पासइ ४ ॥ अणगारे णं भंते ! भावियप्पा देविं वेउव्वियस-
मुग्घाएणं समोहयं जाणरूवेणं जायमाणं जाणइ पासइ ?, गोयमा ! एवं चेव ॥ अण-
गारे णं भंते ! भावियप्पा देवं सदेवीयं वेउव्वियसमुग्घाएणं समोहयं जाणरूवेणं
जायमाणं जाणइ पासइ ?, गोयमा ! अत्थेगइए देवं सदेवीयं पासइ नो जाणं पासइ,
एएणं अभिलावेणं चत्तारि भंगा ॥ अणगारे णं भंते ! भावियप्पा रुक्खस्स किं
अंतो पासइ बाहिं पासइ ? चउभंगो । एवं किं मूलं पासइ कंदं पा० ?, चउभंगो, मूलं
पा० खंधं पा० ? चउभंगो, एवं मूलेणं बीजं संजोएयव्वं, एवं कंदेणवि समं संजोएयव्वं
जाव बीय, एवं जाव पुप्फेण समं बीयं संजोएयव्वं ॥ अणगारे णं भंते ! भावियप्पा
रुक्खस्स किं फलं पा० बीयं पा० ?, चउभंगो ॥ १५५ ॥ पभूणं भंते ! वाउक्काए एगं महं
इत्थिरूवं वा पुरिसरूवं वा हत्थिरूवं वा जाणरूवं वा एवं जुगगिगिल्लिथिल्लिसीयसंदमा-
णियरूवं वा विउव्वित्तए ?, गोयमा ! णो तिणट्ठे समट्ठे, वाउक्काए णं विकुव्वमाणे एगं

महं पडागासंठियं रुवं विकुव्वइ । पभू णं भंते ! वाउकाए एगं महं पडागासंठियं
रुवं विउव्वित्ता अणेगाइं जोयणाइं गमित्तए ?, हंता ! पभू । से भंते ! कि आयड्डीए
गच्छइ परिड्डीए गच्छइ ?, गोयमा ! आयड्डीए ग० णो परिड्डीए ग० जहा आयड्डीए
एवं चेव आयकम्मुणावि आयप्पओगेणवि भाणियव्वं । से भंते ! कि ऊसिओदगं
गच्छइ पयोदगं ग० ?, गोयमा ! ऊसिओदयंपि ग० पयोदयंपि ग०, से भंते !
कि एगओपडागं गच्छइ दुहओपडागं गच्छइ ?, गोयमा ! एगओपडागं गच्छइ नो
दुहओपडागं गच्छइ, से णं भंते ! कि वाउकाए पडागा ?, गोयमा ! वाउकाए णं
से नो खलु सा पडागा ॥ १५६ ॥ पभू णं भंते ! वलाहगे एगं मह इत्थिरुवं वा जाव
संदमाणियरुवं वा परिणामेत्तए ?, हंता ! पभू । पभू णं भंते ! वलाहए एगं महं
इत्थिरुवं परिणामेत्ता अणेगाइं जोयणाइं गमित्तए ?, हंता ! पभू, से भंते ! कि
आयड्डीए गच्छइ परिड्डीए गच्छइ ?, गोयमा ! नो आयड्डीए गच्छति, परिड्डीए ग०
एवं नो आयकम्मुणा परकम्मुणा नो आयपओगेणं परप्पओगेणं ऊसितोदयं वा
गच्छइ पयोदयं वा गच्छइ, से भंते ! कि वलाहए इत्थी ?, गोयमा ! वलाहए णं
से णो खलु सा इत्थी, एवं पुरिसे आसे हत्थी ॥ पभू णं भंते ! वलाहए एगं महं
जाणरुवं परिणामेत्ता अणेगाइं जोयणाइं गमित्तए ? जहा इत्थिरुवं तहा भाणियव्वं,
णवरं एगओचक्कवालंपि दुहओचक्कवालंपि गच्छइ (त्ति) भाणियव्वं, जुग्गगिह्लि-
थिल्लिसीयासंदमाणियाणं तहेव ॥ १५७ ॥ जीवे णं भंते ! जे भविए नेरइएसु उव-
वज्जित्तए से णं भंते ! किंलेसेसु उववज्जति ?, गोयमा ! जल्लेसाइं दव्वाइं परियाइत्ता
कालं करेइ तल्लेसेसु उववज्जइ, तं०-कण्हलेसेसु वा नीललेसेसु वा काउलेसेसु वा,
एवं जस्स जा लेस्सा सा तस्स भाणियव्वा जाव जीवे णं भंते ! जे भविए
जोतिसिएसु उववज्जित्तए ? पुच्छा, गोयमा ! जल्लेसाइं दव्वाइं परियाइत्ता
कालं करेइ तल्लेसेसु उववज्जइ, तं०-तेउलेस्सेसु । जीवे णं भंते ! जे भविए वेमाणि-
एसु उववज्जित्तए से णं भंते ! किंलेस्सेसु उववज्जइ ?, गोयमा ! जल्लेसाइं दव्वाइं
परियाइत्ता कालं करेइ तल्लेसेसु उववज्जइ, तं०-तेउलेस्सेसु वा पम्हलेसेसु वा सुक्क-
लेसेसु वा ॥ १५८ ॥ अणगारे णं भंते ! भावियप्पा बाहिरए पोग्गले अपरियाइत्ता
पभू वेभारं पव्वयं उल्लंघेत्तए वा पलंघेत्तए वा ?, गोयमा ! णो तिणट्ठे समट्ठे । अण-
गारे णं भंते ! भावियप्पा बाहिरए पोग्गलै परियाइत्ता पभू वेभारं पव्वयं उल्लंघेत्तए
वा पलंघेत्तए वा ?, हंता ! पभू । अणगारे णं भंते ! भावियप्पा बाहिरए पोग्गले
अपरियाइत्ता जावइयाइं रायगिहे नुगरे रुवाइं एवइयाइं विकुव्वित्ता वेभारं पव्वयं
अंतो अणुप्पविसित्ता पभू समं वा विसमं करेत्तए विसमं वा समं करेत्तए ?, गोयमा !

णो इणट्ठे समट्ठे, एवं चेव वित्तिओऽपि आलावणो पयं परिणात्ता पभू ॥ ने भंते ! किं माई विकुब्बति अमाई विकुब्बइ ?, गोयमा ! माई विट्ठवड नो अमाई विकुब्बति, से केणट्ठेणं भंते ! एवं चुनइ जाव नो अमाई विकुब्बइ ?, गोयमा ! माइए पणीयं पाणभोयणं भोच्चा २ वामेति तरस्स णं तेणं पणीयणं पाणभोयणं अट्ठि अट्ठिमिजा वहलीभवन्ति पयणए मंसगोणिए भवन्ति, जेविय से अहावादरा पोग्गला तेविय से परिणमन्ति, तं जहा-सोनिदियत्ताए जाव भाविमिदियत्ताए अट्ठि अट्ठिमिजकेसमंसुरोमनहत्ताए सुक्ताए सोणियत्ताए, अमाई णं तस्स पाणभोयणं भोच्चा २ णो वामेइ, तस्स णं तेणं लहेणं पाणभोयणं अट्ठि अट्ठिमिजा पयण भवन्ति वहले मंससोणिए, जेविय से अहावादरा पोग्गला तेविय से परिणमन्ति, मंसज-उच्चारत्ताए पासवणत्ताए जाव सोणियत्ताए, से तेणट्ठेणं जाव नो अमाई विकुब्बइ ॥ माई णं तस्स ठाणस्स अणालोइयपडिक्कन्ते कालं करेइ नत्ति तरस्स आरात्ता ॥ अमाई णं तस्स ठाणस्स आलोइयपडिक्कन्ते कालं करेइ नत्ति तरस्स आरात्ता ॥ सेवं भंते ! सेवं भंते ! त्ति ॥ १५९ ॥ तइयसए चउत्थो उहेस्सो ममत्तो ॥

अणगारे णं भंते ! भावियप्पा वाहिए पोग्गले अवरियाइत्ता पभू एणं महं इत्थिरुवं वा जाव संदमाणियरुवं वा विउव्वित्तए ? णो ति०, अणगारे णं भंते ! भावियप्पा वाहिए पोग्गले परियाइत्ता पभू एणं महं इत्थिरुवं वा जाव संदमाणियरुवं वा विउव्वित्तए ?, हंता ! पभू, अणगारे णं भंते ! भावि० केवतियाइं पभू इत्थिरुवाइं-विकुब्बित्तए ?, गोयमा ! से जहानामए जुवटं जुवाणे हत्थेणं हत्थे गेण्हेज्जा चक्कस्स वा नाभी अरगाउत्ता सिंया एवामेव अणगारेवि भावियप्पा वेउ-व्वियसमुग्घाएणं समोहणइ जाव पभू णं गोयमा ! अणगारे णं भावियप्पा केवल-कृप्पं जंबुदीवं वहूहिं इत्थिरुवेहिं आइअं वित्तिकिअं जाव एस णं गोयमा ! अणगारस्स भावि० अयमेयारुवे विसए विसयमेत्ते वुच्चइ नो चेव णं संपत्तीए विकुब्बित्तु वा ३, एवं परिवाडीए नेयव्वं जाव संदमाणिया । से जहानामए केइ पुरिसे असि-चम्मपायं गहाय गच्छेज्जा एवामेव भावियप्पा अणगारेवि असिचम्मपायहत्थकिच्च-गएणं अप्पाणेणं उट्ठं वेहासं उप्पइज्जा ?, हंता ! उप्पइज्जा, अणगारे णं भंते ! भावि-यप्पा केवतियाइं पभू असिचम्मपायहत्थकिच्चगंयाइं रुवाइं विउव्वित्तए ?, गोयमा ! से जहानामए-जुवतिं जुवाणे हत्थेणं हत्थे गेण्हेज्जा तं चेव जाव विउव्वित्तु वा ३ । से जहानामए केइ पुरिसे एगओपडागं काउं गच्छेज्जा, एवामेव अणगारेवि भावि-यप्पा एगओपडागाहत्थकिच्चगएणं अप्पाणेणं उट्ठं वेहासं उप्पएज्जा ? हंता गोयमा ! उप्पएज्जा, अणगारे णं भंते ! भावियप्पा केवतियाइं पभू एगओपडागाहत्थकिच्चग-

याइं रुवाईं विउव्वित्तए ? एवं चेव जाव विकुव्विसु वा ३ । एवं दुहओपडागंपि । से जहानामए-केइ पुरिसे एगओजण्णोवइयं काउं गच्छेज्जा, एवामेव अण० भा० एगओजण्णोवइयकिच्चगएणं अप्पाणेणं उड्डं वेहासं उप्पएज्जा ? हंता ! उप्पएज्जा, अणगारे णं भंते ! भावियप्पा केवतियाइं पभू एगओजण्णोवइयकिच्चगयाइं रुवाईं विकुव्वित्तए ? तं चेव जाव विकुव्विसु वा ३, एवं दुहओजण्णोवइयंपि । से जहानामए-केइ पुरिसे एगओपल्हत्थियं काउं चिट्ठेज्जा, एवामेव अणगारेवि भावियप्पा एवं चेव जाव विकुव्विसु वा ३ एवं दुहओपलियंकं पि । अणगारे णं भंते ! भावियप्पा बाहिरए पोग्गले अपरियाइत्ता पभू एगं महं आसरुवं वा हत्थिरुवं वा सीहरुवं वा वग्गवग्गदीवियअच्छतरच्छपरासररुवं वा अभिजुंजित्तए ?, णो तिण्ठे समट्ठे, अणगारे णं एवं बाहिरए पोग्गले परियाइत्ता पभू । अणगारे णं भंते ! भा० एगं महं आसरुवं वा अभिजुंजित्ता अणेगाइं जोयणाइं गमित्तए ? हंता ! पभू, से भंते ! किं आयद्धीए गच्छति परिद्धीए गच्छति ?, गोयमा ! आयद्धीए गच्छइ नो परिद्धीए, एवं आयकम्मुणा नो परकम्मुणा आयप्पओगेणं नो परप्पओगेणं उस्सिओदयं वा गच्छइ पयोदगं वा गच्छइ । से णं भंते ! किं अणगारे आसे ?, गोयमा ! अणगारे णं से नो खलु से आसे, एवं जाव परासररुवं वा । से भंते ! किं माई विकुव्वति अमाई विकुव्वति ?, गोयमा ! माई विकुव्वति नो अमाई विकुव्वति, माई णं भंते ! तस्स ठाणस्स अणालोइयपडिक्कंते कालं करेइ कहिं उव्वज्जति ?, गोयमा ! अन्नयरेसु आभियोगेसु देवलोगेसु देवत्ताए उव्वज्जइ, अमाई णं तस्स ठाणस्स आलोइयपडिक्कंते कालं करेइ कहिं उव्वज्जति ?, गोयमा ! अन्नयरेसु अणाभियोगेसु देवलोगेसु देवत्ताए उव्वज्जइ, सेवं भंते २ त्ति, गाहा-इत्थीअसीपडागा जण्णोवइए य होइ, वोद्धव्वे । पल्हत्थियपलियंके अभिओगविकुव्वणा माई ॥ १ ॥ ॥ १६० ॥ तइए सए पंचमो उद्देशो समत्तो ॥

अणगारे णं भंते ! भावियप्पा माई मिच्छदिट्ठी वीरियलद्धीए वेउव्वियलद्धीए विभंगनाणलद्धीए वाणारसिं नगरिं समोहए समोहणित्ता, रायगिहे नगरे रुवाईं जाणति पासति ?, हंता ! जाणइ पासइ । से भंते ! किं तहाभावं जाणइ पासइ अन्नहाभावं जा० पा० ?, गोयमा ! णो तहाभावं जाणइ पा० अण्णहाभावं जा० पा० । से केणट्ठेणं भंते ! एवं बुच्चइ नो तहाभावं जा० पा० अन्नहाभावं जाणइ पा० ?, गोयमा ! तस्स णं एवं भवति-एवं खलु अहं रायगिहे नगरे समोहए समोहणित्ता वाणारसीए नगरीए रुवाईं जाणामि पासामि, से से दंसणे विवच्चासे भवति, से तेणट्ठेणं जाव पासति । अणगारे णं भंते ! भावियप्पा माई मिच्छदिट्ठी

जाव रायगिहे नगरे समोहए समोहणित्ता वाणारसीए नगरीए रुवाई जाणइ पासइ ?,
 हंता ! जाणइ पासइ, तं चेव जाव तस्स णं एवं होइ-एवं खलु अहं वाणारसीए नगरीए
 समोहए २ रायगिहे नगरे रुवाई जाणामि पासामि, से से दंसणे विवचासे भवति,
 से तेणट्ठेणं जाव अन्नहाभावं जाणइ पासइ ॥ अणगारे णं भंते ! भाविअप्पा माई
 मिच्छदिट्ठी वीरियलद्धीए वेउव्वियलद्धीए विभंगणाणलद्धीए वाणारसिं नगरिं रायगिहं
 च नगर अंतरा एगं महं जणवयवग्गं समोहए २ वाणारसिं नगरिं रायगिहं च नगरं
 अंतरा एगं महं जणवयवग्गं जाणति पासति ? हंता ! जाणइ पासइ, से भंते ! किं
 तहाभावं जाणइ पासइ अन्नहाभावं जाणइ पा० ?, गोयमा ! णो तहाभावं जाणति
 पासइ अन्नहाभावं जाणइ पासइ, से केणट्ठेणं जाव पासइ ?, गोयमा ! तस्स खलु एवं
 भवति एस खलु वाणारसी [ए] नगरी एस खलु रायगिहे नगरे एस खलु अंतरा
 एगे महं जणवयवग्गे नो खलु एस महं वीरियलद्धी वेउव्वियलद्धी विभंगणाणलद्धी
 इट्ठी जुई जसे वले वीरिए पुरिसक्कारपरक्कमे लद्धे पत्ते अभिसमण्णागए, से से दंसणे-
 विवचासे भवति, से तेणट्ठेणं जाव पासति ॥ अणगारे णं भंते ! भाविअप्पा अमाई
 सम्मदिट्ठी वीरियलद्धीए वेउव्वियलद्धीए ओहिनाणलद्धीए रायगिहे नगरे समोहए
 २ वाणारसीए नगरीए रुवाई जाणइ पासइ ?, हता !, से भंते ! किं तहाभावं जाणइ
 पासइ अन्नहाभावं जाणति पासति ?, गोयमा ! तहाभावं जाणति पासति नो
 अन्नहाभावं जाणति पासति, से केणट्ठेणं भंते ! एवं वुच्चइ ?, गोयमा ! तस्स णं
 एवं भवति-एवं खलु अहं रायगिहे नगरे समोहणित्ता वाणारसीए नगरीए रुवाई
 जाणामि पासामि, से से दंसणे अविवचासे भवति, से तेणट्ठेणं गोयमा ! एवं वुच्चति,
 वीओ आलावगो एवं चेव नवरं वाणारसीए नगरीए समोहणा नेयव्वा रायगिहे
 नगरे रुवाई जाणइ पासइ । अणगारे णं भंते ! भाविअप्पा अमाई सम्मदिट्ठी
 वीरियलद्धीए वेउव्वियलद्धीए ओहिनाणलद्धीए रायगिहं नगरं वाणारसिं नगरिं च
 अंतरा एगं महं जणवयवग्गं समोहए २ रायगिहं नगरं वाणारसिं च नगरिं तं च
 अंतरा एगं महं जणवयवग्गं जाणइ पासइ ?, हंता ! जा०पा०, से भंते ! किं तहा-
 भावं जाणइ पासइ अन्नहाभावं जाणइ पासइ ?, गोयमा ! तहाभावं जाणइ पा०,
 णो अन्नहाभावं जा०'पा०, से केणट्ठेणं ? गोयमा ! तस्स णं एवं भवति-नो खलु
 एस रायगिहे नगरे णो खलु एस वाणारसी नगरी नो खलु एस अंतरा एगे जण-
 वयवग्गे एस खलु ममं वीरियलद्धी वेउव्वियलद्धी ओहिनाणलद्धी इट्ठी जुई जसे
 वले वीरिए पुरिसक्कारपरक्कमे लद्धे पत्ते अभिसमण्णागए से से दंसणे अविवचासे
 भवति से तेणट्ठेणं गोयमा ! एवं वुच्चति तहाभावं जाणति पासति नो अन्नहाभावं

जाणति पासति । अणगारे णं भंते ! भावियप्पा वाहिए पोग्गले अपरियाइत्ता पभू एगं महं गामरुवं वा नगररुवं वा जाव सन्निवेसरुवं वा विकुव्वित्तए ? णो तिण्ठे समट्ठे, एवं वित्तिओवि आलावगो, णवरं वाहिए पोग्गले परियाइत्ता पभू । अणगारे णं भंते ! भावियप्पा केवतियाइं पभू गामरुवाइं विकुव्वित्तए ? गोयमा ! से जहानामए जुवत्ति जुवाणे हत्थेणं हत्थे गेण्हेज्जा तं चेव जाव विकुव्विसु वा ३ एवं जाव सन्निवेसरुवं वा ॥ १६१ ॥ चमरस्स णं भंते ! असुरिदस्स असुररत्तो कति आयरक्खदेवसाहस्सीओ पण्णत्ता ? गोयमा ! चत्तारि चउसट्ठीओ आयरक्खदेवसाहस्सीओ पण्णत्ताओ, ते णं आयरक्खा वण्णओ जहा रायप्पसेणइज्जे, एवं सव्वेसिं इंदानं जस्स जत्तिया आयरक्खा भाणियव्वा । सेवं भंते २ त्ति ॥ १६२ ॥ तइयसए छट्ठो उद्देसो समत्तो ॥

रायगिहे नगरे जाव पज्जुवासमाणे एवं वयासी-सक्कस्स णं भंते ! देविदस्स देवरत्तो कति लोगपाला पण्णत्ता ? गोयमा ! चत्तारि लोगपाला पण्णत्ता, तंजहा-सोमे जमे वरुणे वेसमणे । एएसि णं भंते ! चउण्हं लोगपालाणं कति विमाणा पण्णत्ता ? गोयमा ! चत्तारि विमाणा प०, तंजहा-संझप्पमे वरसिट्ठे सयंजले वग्गू । कहिं णं भंते ! सक्कस्स देविदस्स देवरण्णो सोमस्स महारत्तो संझप्पमे णामं महाविमाणे पण्णत्ते ? गोयमा ! जंबुद्दीवे २ मंदरस्स पव्वयस्स दाहिणेणं इमीसे रयणप्पभाए पुढवीए बहुसमरमणिज्जाओ भूमिभागाओ उट्ठं चंदिमसूरियगहगणणक्खत्त-तारारुवाणं वहुइं जोयणाइं जाव पंच वडिसया पण्णत्ता, तंजहा-असोयवडेसए सत्तवन्नवडिसए चंपयवडिसए अंववडिसए मज्झे सोहम्मवडिसए, तस्स णं सोहम्मवडेंसयस्स महाविमाणस्स पुरच्छिमेणं सोहम्मे कप्पे असंखेज्जाइं जोयणाइं वीइव-इत्ता एत्थ णं सक्कस्स देविदस्स देवरत्तो सोमस्स महारत्तो संझप्पमे नामं महाविमाणे पण्णत्ते अद्धतेरस जोयणसयसहस्साइं आयामविकखंमेणं उयालीसं जोयणसयसहस्साइं वावन्नं च सहस्साइं अट्ठ य अड्याले जोयणसए किंचिविसेसाहिए परिकखेवेणं प० जा सूरियाभविमाणस्स वत्तव्वया सा अपरिसेसा भाणियव्वा जाव अभिसेओ नवरं सोमे देवे ॥ संझप्पभस्स णं महाविमाणस्स अहे सपक्खि सपडि-दिसिं असंखेज्जाइं जोयणसयसहस्साइं ओगाहिता एत्थ णं सक्कस्स देविदस्स देवरत्तो सोमस्स महारत्तो सोमा नामं रायहाणी पण्णत्ता एगं जोयणसयसहस्सं आया-मविकखंमेणं जंबुद्दीवपमाणे (ण) वेमाणियाणं पमाणस्स अट्ठं नेयवं जाव उवरिय-लेणं सोलस जोयणसहस्साइं आयामविकखंमेणं पन्नासं जोयणसहस्साइं पंच य सत्ताणउए जोयणसते किंचिविसेसूणे परिकखेवेणं पण्णत्ते, पासायाणं चत्तारि परि-

वाडीओ नेयव्वाओ, सेसा नत्थि । सक्कस्स णं देविदस्स देवरत्तो सोमस्स महारत्तो इमे देवा आणाउववायवयणनिद्देसे चिट्ठंति, तंजहा-सोमकाइयाइ वा सोमदेवकाइ-याइ वा विज्जुकुमारा विज्जुकुमारीओ अग्गिकुमारा अग्गिकुमारीओ वाउकुमारा वाउकुमारीओ चंदा सूरा गहा णक्खत्ता ताराख्वा जे यावन्ने तहप्पगारा सव्वे ते तब्भत्तिगा तप्पक्खिया तब्भारिया सक्कस्स देविदस्स देवरत्तो सोमस्स महारत्तो आणाउववायवयणनिद्देसे चिट्ठंति । जंवुहीवे २ मंदरस्स पव्वयस्स दाहिणेणं जाई इमाई समुप्पज्जंति, तं जहा-गहदंडाइ वा गहमुसलाइ वा गहगज्जियाइ वा, एवं गहजुद्धाइ वा गहसिघाडगाइ वा गहावसव्वाइ वा अब्भाइ वा अब्भरुक्खाइ वा संभ्राइ वा गंधव्वनगराइ वा उक्कापायाइ वा दिसीदाहाइ वा गज्जियाइ वा विज्जुयाइ वा पंसुवुट्ठीइ वा जूवेत्ति वा जक्खालित्तयत्ति वा धूमियाइ वा महियाइ वा रउग्घायाइ वा चंदोवरागाइ वा सूरुवरागाइ वा चंदपरिवेसाइ वा सूरपरिवेसाइ वा पडिचंदाइ वा पडिसूराइ वा इंदधणूइ वा उदगमच्छकपिहसियअमोहापाईण-वायाइ वा पडीणवाताइ वा जाव संवट्टयवाताइ वा गामदाहाइ वा जाव सन्निवे-सदाहाइ वा पाणक्खया जणक्खया धणक्खया कुलक्खया वसणब्भूया अणारिया जे यावन्ने तहप्पगारा ण ते सक्कस्स देविदस्स देवरत्तो सोमस्स महारत्तो अण्णाया अदिट्ठा असुया अमुया अविण्णाया तेसि वा सोमकाइयाणं देवाणं, सक्कस्स णं देविदस्स देवरत्तो सोमस्स महारत्तो इमे अहावच्चा देवा अभिन्नाया होत्था, तं जहा-इंगालए वियालए लोहियक्खे सणिच्चरे चंदे सूरे सुक्के बुहे बहस्सती राहू ॥ सक्कस्स णं देविदस्स देवरत्तो सोमस्स महारत्तो सत्तिभागं पलिओवमं ठिती पण्णत्ता, अहा-वच्चाभिन्नायाणं देवाणं एगं पलिओवमं ठिई पण्णत्ता, एवमहिट्ठिए जाव महाणुभागे सोमे महाराया ॥ १६३ ॥ कर्हि णं भंते । सक्कस्स देविदस्स देवरत्तो जमस्स महारत्तो वरसिट्ठे णामं महाविमाणे पण्णत्ते ?, गोयमा ! सोहम्मवडिसयस्स महाविमा-णस्स दाहिणेणं सोहम्मे कप्पे असंखेज्जाई जोयणसहस्साई वीइवइत्ता एत्थ णं सक्कस्स देविदस्स देवरत्तो जमस्स महारत्तो वरसिट्ठे णामं महाविमाणे पण्णत्ते अद्ध-तेरस जोयणसयसहस्साई जहा सोमस्स विमाणे तहा जाव अभिसेओ रायहाणी तहेव जाव पासायपंतीओ ॥ सक्कस्स णं देविदस्स देवरत्तो जमस्स महारत्तो इमे देवा आणा० जाव चिट्ठंति, तं जहा-जमकाइयाइ वा जमदेवकाइयाइ वा पेयकाइया-इ वा पेयदेवकाइयाइ वा असुरकुमारा असुरकुमारीओ कंदप्पा निरयवाला आभि-ओगा जे यावन्ने तहप्पगारा सव्वे ते तब्भत्तिगा तप्पक्खिया तब्भारिया सक्कस्स देविदस्स देवरत्तो जमस्स महारत्तो आणाए जाव चिट्ठंति ॥ जंवुहीवे २ मंदरस्स

पव्वयस्स दाहिणेणं जाईं इमाईं समुप्पज्जंति, तंजहा-डिंवाइ वा डमराइ वा कल-
 हाइ वा वोलाइ वा खाराइ वा महाजुद्धाइ वा महासंगामाइ वा महासत्थनिव-
 डणाइ वा एवं पुरिसनिवडणाइ वा महारुधिरनिवडणाइ वा दुब्भूयाइ वा कुल-
 रोगाइ वा गामरोगाइ वा मंडलरोगाइ वा नगररोगाइ वा सीसवेयणाइ वा
 अच्छिवेयणाइ वा कन्नहदंतवेयणाइ वा इंदगाहाइ वा खंदगाहाइ वा कुमारगाह
 जक्खगाहा० भूयगाहा० एगाहियाइ वा वेआहियाइ वा तेयाहियाइ वा चाउत्थहियाइ
 वा उव्वेयगाइ वा कासा० सासाइ वा सोसेइ वा जराइ वा दाहा० कच्छकोहाइ वा
 अजीरया पंडुरगा हरिसाइ वा भगंदराइ वा हिययसूलाइ वा मत्थयसू० जोणिसू०
 पाससू० कुच्छिसू० गाममारीइ वा नगर० खेड० कब्बड० दोणमुह० मडंव० पट्टण०
 आसम० संवाह० संनिवेसमारीइ वा पाणक्खया धणक्खया जणक्खया कुलक्खया
 वसणव्वभूयमणारिया जे यावन्ने तहप्पगारा न ते सक्कस्स देविंदस्स देवरत्तो जमस्स
 महारत्तो अण्णाया०५, तेसिं वा जमकाइयाणं देवाणं ॥१६४॥ 'सक्कस्स णं देविंदस्स
 देवरत्तो जमस्स महारत्तो इमे देवा अहावच्चा अभिण्णाया होत्था, तंजहा-अंवे १ अं-
 रिसे चेव २, सीमे ३ सव्वेत्ति यावरे ४ । रुहो ५-वरेह ६ काले ७ य, महाकालेत्ति
 यावरे ८ ॥ १ ॥ असिपत्ते ९ धणू १० कुंभे ११ (असी य असिपत्ते कुंभे) वालू
 १२ वियरणीति य १३ । खरस्सरे १४ महाघोसे १५, एए पन्नरसाहिया ॥ २ ॥
 सक्कस्स णं देविंदस्स देवरत्तो जमस्स महारत्तो संत्तिभागं पलिओवमं ठिई प०,
 अहावच्चाभिण्णायाणं देवाणं एणं पलिओवमं ठिई पन्नत्ता, एवंमहिद्धिए जाव जमे
 महाराया २ ॥१६५॥ कहिं णं भंते ! सक्कस्स देविंदस्स देवरत्तो वरुणस्स महारत्तो
 सयंजले नामं महाविमाणे पन्नत्ते ? गोयमा । तस्स णं सोहम्मवडिसयस्स महावि-
 माणस्से पच्चत्थिमेणं सोहम्मं कप्पे असंखेजाइं जहा सोमस्स तहा विमाणरायहा-
 णीओ भाणियव्वा जाव पासायवडिसया नवरं नामणाणत्तं । सक्कस्स णं ३ वरुणस्स
 महारत्तो इमे देवा आणा० जाव चिट्ठंति, तं०-वरुणकाइयाइ वा वरुणदेवकाइ-
 याइ वा नागकुमारा नागकुमारीओ उदहिकुमारा उदहिकुमारीओ थणियकुमारा थणि-
 यकुमारीओ जे यावण्णे तहप्पगारा सव्वे ते तव्वत्तिया जाव चिट्ठंति ॥ जंबूदीवे २
 मंदरस्स पव्वयस्स दाहिणेणं जाईं इमाईं समुप्पज्जंति, तंजहा-अइवासाइ वा मंद-
 वासाइ वा सुवुट्ठीइ वा दुव्वुट्ठीइ वा उदम्मेयाइ वा उदप्पीलाइ वा उदवाहाइ
 वा पव्वाहाइ वा गामवाहाइ वा जाव सन्निवेसवाहाइ वा पाणक्खया जाव तेसिं
 वा वरुणकाइयाणं देवाणं, सक्कस्स णं देविंदस्स देवरत्तो वरुणस्स महारत्तो जाव
 अहावच्चाभिन्नाया होत्था, तंजहा-कक्कोडए कदमए अंजणे संखवाले पुंडे पलासे
 ३० सुत्ता०

मोएज्जए दहिमुहे अयंपुले कायरिए । सक्कस्स णं देविंदरस्स देवरत्तो वरुणस्स महारण्णो
 देसूणाइं दो पलिओवमाइं ठिई पण्णत्ता, अहावच्चाभिन्नायाणं देवाणं एगं पलिओ-
 वमं ठिई पण्णत्ता, एवमहिद्धिए जाव वरुणे महाराया ३ ॥ १६६ ॥ कहि णं भंते ।
 सक्कस्स देविदस्स देवरत्तो वेसमणस्स महारत्तो वग्गूणामं महाविमाणे पण्णत्ते ?,
 गोयमा ! तस्स णं सोहम्मवडिसयस्स महाविमाणस्स उत्तरेणं जहा सोमस्स विमा-
 णरायहाणिवत्तव्वया तेहा नेयव्वा जाव पासायवडिसया । सक्कस्स णं देविंदरस्स
 देवरत्तो वेसमणस्स महारत्तो इमे देवा आणाउववायवयणनिदेसे चिट्ठंति, तंजहा-
 वेसमणकाइयाइ वा वेसमणदेवकाइयाइ वा सुवन्नकुमारा सुवन्नकुमारीओ दीवकु-
 मारा दीवकुमारीओ दिसाकुमारा दिसाकुमारीओ वाणमंतरा वाणमंतरीओ जे यावने
 तहप्पगारा सव्वे ते तव्वमत्तिया जाव चिट्ठंति ॥ जंबूदीवे २ मंदरस्स पव्वयस्स
 दाहिणेणं जाइं इमाइं समुप्पज्जंति, तंजहा-अयागराइ वा तउयागराइ वा तंवयाग-
 राइ वा एवं सीसागराइ वा हिरन्ना० सुवन्न० रयण० वयरागराइ वा वसुहाराइ
 वा हिरन्नावासाइ वा सुवन्नवासाइ वा रयण० वड्ढं० आभरण० पत्त० पुप्फ०
 फल० बीय० मल्ल० वण्ण० चुन्न० गंध० वत्थवासाइ वा हिरन्नुट्ठीइ वा सु० रं०
 व० आ० प० पु० फ० बी० व० चुन्न० गंधवुट्ठी० वत्थवुट्ठीइ वा भायणवुट्ठीइ
 वा खीरवुट्ठीइ वा सुयालाइ वा दुक्कालाइ वा अप्पग्घाइ वा महग्घाइ वा सुभिक्खाइ
 वा दुभिक्खाइ वा कयविक्कयाइ वा सन्निहियाइ वा संनिचयाइ वा निहीइ वा
 णिहाणाइ वा चिरपोराणाइ पहीणसामियाइ वा पहीणसेउयाइ वा [पहीणमग्गाणि
 वा] पहीणगोत्तागराइ वा उच्छिन्नसामियाइ वा उच्छिन्नसेउयाइ वा उच्छिन्नगोत्ता-
 गाराइ वा सिघाडगतिगच्चउक्कच्चरचउम्मुहमहापहपहेसु नगरनिद्धमणेसु वा सुसाण-
 गिरिकंदरसंतिसेलोवट्ठाणभवणगिहेसु संनिक्खित्ताइं चिट्ठंति, एयाइं सक्कस्स देविंदरस्स
 देवरत्तो वेसमणस्स महारत्तो ण अण्णायाइं अदिट्ठाइं असुयाइं अविन्नायाइं तेसिं वा
 वेसमणकाइयाणं देवाणं, सक्कस्स णं देविदस्स देवरत्तो वेसमणस्स महारत्तो इमे
 देवा अहावच्चाभिन्नाया होत्थां, तंजहा-पुन्नभेदे माणिभेदे सालिभेदे सुमणभेदे चक्के
 रक्खे पुन्नरक्खे सव्वाणे [पव्वाणे] सव्वजसे सव्वकामे समिद्धे अमोहे असंगे,
 सक्कस्स णं देविदस्स देवरत्तो वेसमणस्स महारत्तो दो पलिओवमाणि ठिई पण्णत्ता,
 अहावच्चाभिन्नायाणं देवाणं एगं पलिओवमं ठिई पण्णत्ता, एमहिद्धिए जाव वेसमणे
 महाराया सेवं भंते ! २ ति ॥ १६७ ॥ तइए सए सत्तमो उद्देसओ समत्तो ॥
 रायगिहे नगरे जाव पज्जुवासमाणे एवं वदासी-असुरकुमाराणं भंते ! देवाणं
 कइ देवा आहेवच्चं जाव विहरंति ? , गोयमा ! दस देवा आहेवच्चं जाव विहरंति,

तंजहा-चमरे असुरिंदे असुरराया सोमे जमे वरुणे वेसमणे वली वइरोयणिंदे वइ-
 रोयणराया सोमे जमे वरुणे वेसमणे । नागकुमारारणं भंते ! पुच्छा, गोयमा ! दस
 देवा आहेवचं जाव विहरंति, तंजहा-धरणे नागकुमारिंदे नागकुमारराया कालवाले
 कोलवाले सेलवाले संखवाले भूयाणंदे नागकुमारिंदे नागकुमारराया कालवाले कोल-
 वाले संखवाले सेलवाले, जहा नागकुमारिंदाणं एयाए वत्तव्वयाए नेयव्वं एवं इमाणं
 नेयव्वं, सुवन्नकुमारारणं वेणुदेवे वेणुदाली चित्ते विचित्ते चित्तपक्खे विचित्तपक्खे,
 विज्जुकुमारारणं हरिक्कंते हरिस्सहे पमे १ सुप्पमे २ पभकंते ३ सुप्पभकंते ४, अग्गि-
 कुमारारणं अग्गिसीहे अग्गिमाणवे तेऊ तेउसीहे तेउकंते तेउप्पमे, दीवकुमारारणं पुण्ण-
 विसिद्धरुयसुरुयसुकंत(रुयंस, रुयसीह)रुयप्पभा, उदहिकुमारारणं जलकंतजलप्पभ-
 जलजलरुयजलकंतजलप्पभा, दिसाकुमारारणं अमियगई अमियवाहणे तुरियगई खिप्प-
 गई सीहगई सीहविक्रमगई, वाउकुमारारणं वेलंबपभंजणकालमहाकालअंजणरिट्ठा,
 थणियकुमारारणं घोसमहाघोसआवत्तवियावत्तनंदियावत्तमहानंदियावत्ता, एवं भाणियव्वं
 जहा असुरकुमारारणं । सो० १ का० २ चि० ३ प० ४ ते० ५ रु० ६ ज०
 ७ तु० ८ का० ९ आ० १० सोमे य महाकाले, चित्तप्पम तेउ तह रुप चेव ।
 जल तह तुरियगई य काले आउत्त पढमा उ । पिसांयकुमारारणं पुच्छा, गोयमा !
 दो देवा आहेवचं जाव विहरंति, तंजहा-काले य महाकाले सुरुवपडिरुव पुन्नभदे य ।
 अमरवइ माणिभदे भीमे य तहा महाभीमे ॥१॥ किंनरकिंपुरिसे खलु संपपुरिसे खलु
 तहा महापुरिसे । अइकाय महाकाए गीयरई चेव गीयजसे ॥ २ ॥ एए वाणंमंतरारणं
 देवाणं । जोइसियाणं देवाणं दो देवा आहेवचं जाव विहरंति, तंजहा-चंदे य सूरे
 य । सोहम्मीसाणेसु णं भंते ! कप्पेसु कइ देवा आहेवचं जाव विहरंति ? गोयमा !
 दस देवा जाव विहरंति, तंजहा-सक्के देविंदे देवराया सोमे जमे वरुणे वेसमणे,
 ईसाणे देविंदे देवराया सोमे जमे वरुणे वेसमणे, एसा वत्तव्वया सव्वेसुवि कप्पेसु,
 एए चेव भाणियव्वा, जे य इंदा ते य भाणियव्वा सेवं भंते ! २ त्ति ॥ १६८ ॥
 तइए सए अट्ठमो उद्देसओ समत्तो ॥

रायगिहे जाव एवं वंदासी-कइविहे णं भंते ! इंदियविसए पण्णत्ते ?, गोयमा !
 पंचविहे, इंदियविसए पण्णत्ते, तं०-सोतिंदियविसए० जीवाभिगमे जोइसियउद्देसो
 नेयव्वो अपरिसेसो, से० २ त्ति ॥ १६९ ॥ तइए सए नवमो उद्देसओ समत्तो ॥

रायगिहे जाव एवं वयासी-चमरस्स णं भंते ! असुरिंदस्स असुररओ कइ
 परिसाओ पण्णत्ताओ ?, गोयमा ! तओ परिसाओ पण्णत्ताओ, तंजहा-समिया चंडा
 जाया, एवं जहाणुपुव्वीए जावड्छुओ कप्पो, सेवं भंते ! २ त्ति ॥ १७० ॥ तइयसए
 दसमो उद्देसो समत्तो, तइय सयं समत्तं ॥

चत्तारि विमाणेहिं चत्तारि य होंति रायहाणीहिं । नेरइए लेस्साहि य दस उद्देसा
चउत्थसए ॥ १ ॥ रायगिहे नगरे जाव एवं वयासी-ईसाणस्स णं भंते ! देविदस्स
देवरण्णो कइ लोगपाला प० ?, गोयमा ! चत्तारि लोगपाला प०, तंजहा-सोमे
जमे वेसमणे वरुणे । एएसि णं भंते ! लोगपालाणं कइ विमाणा प० ?, गोयमा !
चत्तारि विमाणा प०, तंजहा-सुमणे सव्वओभदे वग्गू सुवग्गू । कहि णं भंते !
ईसाणस्स देविदस्स देवरत्तो सोमस्स महारत्तो सुमणे नामं महाविमाणे पण्णत्ते ?,
गोयमा ! जंबूदीवे २ मंदरस्स पव्वयस्स उत्तरेणं इमीसे रयणप्पभाए पुढवीए जाव
ईसाणे णामं कप्पे पण्णत्ते, तत्थ णं जाव पंचवडेंसया प०, तंजहा-अंकवडेंसए
फलिहवडिसए रयणवडेंसए जायहवडिसए मज्झे य तत्थ ईसाणवडेंसए, तस्स
णं ईसाणवडेसयस्स महाविमाणस्स पुरच्छिमेणं तिरियमसंखेजाइं जोयणसह-
स्साइं वीइवइत्ता एत्थ णं ईसाणस्स ३ सोमस्स २ सुमणे नामं महाविमाणे
पण्णत्ते अद्धतेरसजोयण जहा सक्कस्स वत्तव्वया तइयसए तहा ईसाणस्सवि ।
चउण्हवि लोगपालाणं विमाणे २ उद्देसओ, चउसु विमाणेसु चत्तारि उद्देसा
अपरिसेसा, नवरं ठिईए नाणत्तं-आदिदुय तिभागूणा पलिया धणयस्स होंति
दो चेव । दो सतिभागा वरुणे पलियमहावच्चदेवाणं १ ॥ १७१ ॥ चउत्थे सए
पढमविइयतइयचउत्था उद्देसा समत्ता ॥

रायहाणीसुवि चत्तारि उद्देसा भाणियव्वा जाव एवंमहिड्डिए जाव वरुणे महाराया
॥ १७२ ॥ चउत्थे सए पंचमछट्टुसत्तमट्टुमा उद्देसा समत्ता ॥

नेरइए णं भंते । नेरइएसु उववज्जइ अनेरइए नेरइएसु उववज्जइ ? पन्नवणाए
लेस्सापए तइओ उद्देसओ भाणियव्वो जाव नाणाइं ॥ १७३ ॥ चउत्थसए
नवमो उद्देसो समत्तो ॥

से नूणं भंते ! कण्हलेस्सा नीललेस्सं पप्प तारुवत्ताए तावण्णत्ताए एवं चउत्थो
उद्देसओ पन्नवणाए चेव लेस्सापदे नेयव्वो जाव-परिणामवण्णरसंगंधसुद्धअपसत्थ-
संकिलिडुण्हा । गइपरिणामपदेसोगाहिणवग्गणाठाणमप्पवहुं ॥ १ ॥ सेवं भंते ! २ त्ति
॥ १७४ ॥ चउत्थसए दसमो उद्देसो समत्तो ॥ चउत्थं सयं समत्तं ॥

चंप(चंपाए)रवि १ अनिल २ गंठिय ३ सहे ४ छउमाउ ५-६ एयण ७ णियंठे ८ ।
रायगिहं ९ चंपाचंदिमा १० य दस पंचमंमि सए ॥ १॥ तेणं कालेणं २ चंपा नामं
नगरी होत्था, वन्नओ, तीसे णं चंपाए नगरीए पुण्णभदे नामं उज्जाणि होत्था, वण्णओ,
सामी समोसडे जाव परिसा पडिगया । तेणं कालेणं २ समणस्स भगवओ महा-
वीरस्स जेद्वे अंतेवासी इंदभूई णामं अणगारे गोयमगोत्तेणं जाव एवं वदासी-जंबू-

दीवे णं भंते । दीवे सूरिया उदीणपाईणमुग्गच्छ पाईणदाहिणमागच्छंति, पाईण-
दाहिणमुग्गच्छ दाहिणपडीणमागच्छंति, दाहिणपडीणमुग्गच्छ पडीणउदीणमागच्छंति
पडीणउदीणं उग्गच्छ उदीचिपाईणमागच्छंति ?, हंता ! गोयमा ! जंबूदीवे णं
दीवे सूरिया उदीचिपाईणमुग्गच्छ जाव उदीचिपाईणमागच्छंति ॥ १७५ ॥
जया णं भंते ! जंबूदीवे २ दाहिणद्धे दिवसे भवइ तदा णं उत्तरद्धे दिवसे भवइ
जदा णं उत्तरद्धे दिवसे भवइ तदा णं जंबूदीवे २ मंदरस्स पव्वयस्स पुरच्छिम-
पच्चत्थिमेणं राई भवइ ?, हंता गोयमा ! जया णं जंबूदीवे २ दाहिणद्धे दिवसे
जाव राई भवइ । जदा णं भंते ! जंबू० मंदरस्स पव्वयस्स पुरच्छिमेणं दिवसे
भवइ तदा णं पच्चत्थिमेणवि दिवसे भवइ जया णं पच्चत्थिमेणं दिवसे भवइ तदा
णं जंबूदीवे २ मंदरस्स पव्वयस्स उत्तरदाहिणेणं राई भवइ ?, हंता गोयमा !
जदा णं जंबू० मंदरपुरच्छिमेणं दिवसे जाव राई भवइ, जदा णं भंते ! जंबूदीवे
२ दाहिणद्धे उक्कोसए अट्टारसमुहुत्ते दिवसे भवइ तदा णं उत्तरद्धे उक्कोसए अट्टा-
रसमुहुत्ते दिवसे भवइ जदा णं उत्तरद्धे उक्कोसए अट्टारसमुहुत्ते दिवसे भवइ तदा
णं जंबूदीवे २ मंदरस्स पुरच्छिमपच्चत्थिमेणं जहन्नियां दुवालसमुहुत्ता राई भवइ ?,
हंता गोयमा ! जदा णं जंबू० जाव दुवालसमुहुत्ता राई भवइ । जदा णं जंबू०
मंदरस्स पुरच्छिमेणं उक्कोसए अट्टारस जाव तदा णं जंबूदीवे २ पच्चत्थिमेणवि
उक्को० अट्टारसमुहुत्ते दिवसे भवइ जया णं पच्चत्थिमेणं उक्कोसए अट्टारसमुहुत्ते
दिवसे भवइ तदा णं भंते ! जंबूदीवे २ उत्तर० दुवालसमुहुत्ता जाव राई भवइ ?,
हंता गोयमा ! जाव भवइ । जया णं भंते ! जंबू० दाहिणद्धे अट्टारसमुहुत्ताणंतरे
दिवसे भवइ तदा णं उत्तरे अट्टारसमुहुत्ताणंतरे दिवसे भवइ जदा णं उत्तरे अट्टा-
रसमुहुत्ताणंतरे दिवसे भवइ तदा णं जंबू० मंदरस्स पव्वयस्स पुरच्छिमपच्चत्थिमेणं
सातिरेगा दुवालसमुहुत्ता राई भवइ ?, हंता गोयमा ! जदा णं जंबू० जाव राई
भवइ । जदा णं भंते ! जंबूदीवे २ पुरच्छिमेणं अट्टारसमुहुत्ताणंतरे दिवसे भवइ
तदा णं पच्चत्थिमेणं अट्टारसमुहुत्ताणंतरे दिवसे भवइ जदा णं पच्चत्थिमेणं अट्टार-
समुहुत्ताणंतरे दिवसे भवइ तदा णं जंबू० २ मंदरस्स पव्वयस्स दाहिणेणं साइ-
रेगा दुवालसमुहुत्ता राई भवइ ?, हंता गोयमा ! जाव भवइ ॥ एवं एणं क्रमेणं
उच्चारयव्वं सत्तरसमुहुत्ते दिवसे तेरसमुहुत्ता राई भवइ सत्तरसमुहुत्ताणंतरे दिवसे
सातिरेगा तेरसमुहुत्ता राई सोलसमुहुत्ते दिवसे चौदसमुहुत्ता राई सोलसमुहुत्ताणं-
तरे दिवसे सातिरेगा चौदसमुहुत्ता राई पन्नरसमुहुत्ते दिवसे पन्नरसमुहुत्ता राई
भवइ पन्नरसमुहुत्ताणंतरे दिवसे सातिरेगा पन्नरसमुहुत्ता राई चौदसमुहुत्ते

दिवसे सोलसमुहुत्ता राई चोदसमुहुत्ताणंतरे दिवसे सातिरेगा सोलसमुहुत्ता राई तेरसमुहुत्ते दिवसे सत्तरसमुहुत्ता राई तेरसमुहुत्ताणंतरे दिवसे सातिरेगा सत्तरसमुहुत्ता राई । जया णं जंबू० दाहिणद्धे जहण्णए दुवालसमुहुत्ते दिवसे भवइ तथा णं उत्तरद्धेवि, जया णं उत्तरद्धे तथा णं जंबूदीवे २ मंदरस्स पव्वयस्स पुरच्छिमेणं उक्कोसिया अट्टारसमुहुत्ता राई भवइ?, हंता गोयमा ! एवं चेव उच्चारेयव्वं जाव राई भवइ । जया णं भंते ! जंबू० मंदरस्स पव्वयस्स पुरच्छिमेणं जहण्णए दुवालसमुहुत्ते दिवसे भवइ तथा णं पच्चत्थिमेणवि० तथा णं जंबू० मंदरस्स उत्तरदाहिणेणं उक्कोसिया अट्टारसमुहुत्ता राई भवइ?, हंता गोयमा ! जाव राई भवइ ॥ १७६ ॥ जया णं भंते ! जंबू० दाहिणद्धे वासाणं पढमे समए पडिवज्जइ तथा णं उत्तरद्धेवि वासाणं पढमे समए पडिवज्जइ जया णं उत्तरद्धेवि वासाणं पढमे समए पडिवज्जइ तथा णं जंबूदीवे २ मंदरस्स पव्वयस्स पुरच्छिमपच्चत्थिमेणं अणंतरपुरक्खडसमयंसि वासाणं प० स० प०?, हंता गोयमा ! जया णं जंबू० २ दाहिणद्धे वासाणं प० स० पडिवज्जइ तह चेव जाव पडिवज्जइ । जया णं भंते ! जंबू० मंदरस्स० पुरच्छिमेणं वासाणं पढमे स० पडिवज्जइ तथा णं पच्चत्थिमेणवि वासाणं पढमे समए पडिवज्जइ, जया णं पच्चत्थिमेणवि वासाणं पढमे समए पडिवज्जइ तथा णं जाव मंदरस्स पव्वयस्स उत्तरदाहिणेणं अणंतरपच्छाकडसमयंसि वासाणं प० स० पडिवज्जे भवइ?, हंता गोयमा ! जया णं जंबू० मंदरस्स पव्वयस्स पुरच्छिमेणं, एवं चेव उच्चारेयव्वं जाव पडिवज्जे भवइ ॥ एवं जहा समएणं अभिलावो भाणियो वासाणं तहा आवलियाएवि २ भाणियव्वो, आणापाणुणावि ३ थोवेणवि ४ लवेणवि ५ मुहुत्तेणवि ६ अहोरेत्तेणवि ७ पक्खेणवि ८ मासेणवि ९ उउणावि १०, एएसिं सव्वेसि जहा समयस्स अभिलावो तहा भाणियव्वो । जया णं भंते ! जंबू० दाहिणद्धे हेमंताणं पढमे समए पडिवज्जइ जहेव वासाणं अभिलावो तहेव हेमंताणवि २० गिम्हाणवि ३० भाणियव्वो जाव उरु, एवं एए तिज्जिवि, एएसिं तीसं आलावगा भाणियव्वा । जया णं भंते ! जंबू० मंदरस्स पव्वयस्स दाहिणद्धे पढमे अयणे पडिवज्जइ तथा णं उत्तरद्धेवि पढमे अयणे पडिवज्जइ, जहा समएणं अभिलावो तहेव अयणेणवि भाणियव्वो जाव अणंतरपच्छाकडसमयंसि पढमे अयणे पडिवज्जे भवइ, जहा अयणेणं अभिलावो तहा संवच्छरेणवि भाणियव्वो जुएणवि वाससएणवि वाससहस्सेणवि वाससयसहस्सेणवि पुव्वगेणवि पुव्वेणवि तुडियगेणवि तुडिएणवि, एवं पुव्वे २ तुडिए २ अडडे २ अववे २ हूहूए २ उप्पले २ पउमे २ नलिणे २ अच्छ(अत्थि)णिउरे २ अउए २ णउए २ पउए २ चूलिया

२-सीसपहेलिया २ पलिओवमेणवि सांगरोवमेणवि भाणियव्वो । जया णं भंते !
जंबूदीवे २ दाहिणद्धे पढमा ओसप्पिणी पडिवज्जइ तया णं उत्तरद्धेवि पढमा ओसप्पिणी
पडिवज्जइ, जया णं उत्तरद्धेवि पडिवज्जइ तदा णं जंबूदीवे २ मंदरस्स पव्वयस्स
पुरच्छिमपच्चत्थिमेणवि नेवत्थि ओसप्पिणी नेवत्थि उस्सप्पिणी अवट्टिए णं तत्थ
काले पन्नते ? समणाउसो !, हंता गोयमा ! तं चेव उच्चारयेय्वं जाव समणाउसो !,
जहा ओसप्पिणीए आलावओ भणिओ एवं उस्सप्पिणीएवि भाणियव्वो ॥ १७७ ॥
लवणे णं भंते ! समुद्दे सूरिया उदीचिपाईणमुग्गच्छ जंचेव जंबूदीवस्स वत्तव्वया
भणिया सच्चेव सव्वा अपरिसेसिया लवणसमुद्दस्सवि भाणियव्वा, नवरं अभिलावो
इमो नेयव्वो-जया णं भंते ! लवणे समुद्दे दाहिणद्धे दिवसे भवइ तं चेव जाव
तदा णं लवणे समुद्दे पुरच्छिमपच्चत्थिमेणं राई भवइ, एएणं अभिलावेणं नेयव्वं ।
जदा णं भंते ! लवणसमुद्दे दाहिणद्धे पढमा ओसप्पिणी पडिवज्जइ तदा णं उत्तरद्धेवि
पढमा ओसप्पिणी पडिवज्जइ, जदा णं उत्तरद्धे पढमा ओसप्पिणी पडिवज्जइ तदा णं
लवणसमुद्दे पुरच्छिमपच्चत्थिमेणं नेवत्थि ओसप्पिणी २ समणाउसो !, हंता गोयमा !
जाव समणाउसो ! ॥ धायइसंडे णं भंते ! दीवे सूरिया उदीचिपाईणमुग्गच्छ जहेव
जंबूदीवस्स वत्तव्वया भणिया सच्चेव धायइसंडस्सवि भाणियव्वा, नवरं इमेणं अभि-
लावेणं सव्वे आलावगा भाणियव्वा । जया णं भंते ! धायइसंडे दीवे दाहिणद्धे
दिवसे भवइ तदा णं उत्तरद्धेवि जया णं उत्तरद्धेवि तदा णं धायइसंडे दीवे मंदराणं
पव्वयाणं पुरच्छिमपच्चत्थिमेणं राई भवइ ?, हंता गोयमा ! एवं चेव जाव राई
भवइ । जदा णं भंते ! धायइसंडे दीवे मंदराणं पव्वयाणं पुरच्छिमेण दिवसे
भवइ तदा णं पच्चत्थिमेणवि, जदा णं पच्चत्थिमेणवि तदा णं धायइसंडे दीवे मंद-
राणं पव्वयाणं उत्तरेणं दाहिणेणं राई भवइ ?, हंता गोयमा ! जाव भवइ, एवं
एएणं अभिलावेणं नेयव्वं जाव जया णं भंते ! दाहिणद्धे पढमा ओस० तया णं
उत्तरद्धे जया णं उत्तरद्धे तया णं धायइसंडे दीवे मंदराणं पव्वयाणं पुरच्छिम-
पच्चत्थिमेणं नत्थि ओस० जाव समणाउसो !, ? हंता गोयमा ! जाव समणाउसो !,
जहा लवणसमुद्दस्स वत्तव्वया तहा कालोदस्सवि भाणियव्वा, नवरं कालोदस्स
नामं भाणियव्वं । अविंभतरपुक्खरद्धे णं भंते ! सूरिया उदीचिपाईणमुग्गच्छ जहेव
धायइसंडस्स वत्तव्वया तहेव अविंभतरपुक्खरद्धस्सवि भाणियव्वा नवरं अभिलावो
जाव जाणेयव्वो जाव तया णं अविंभतरपुक्खरद्धे मंदराणं पुरच्छिमपच्चत्थिमेणं
नेवत्थि ओस० नेवत्थि उस्सप्पिणी अवट्टिए णं तत्थ काले पन्नते समणाउसो ! सेवं
भंते ! २ ति ॥ १७८ ॥ पंचमसए पढमो उद्देसो समत्तो ॥

रायगिहे नगरे जाव एवं वदासी-अत्थि णं भंते ! ईसिं पुरेवाया पत्थावाया
 मंदावाया महावाया वायंति ? हंता ! अत्थि, अत्थि णं भंते ! पुरच्छिमेणं ईसिं पुरेवाया
 पत्थावाया मंदावाया महावाया वायंति ? हंता ! अत्थि । एवं पच्चत्थिमेणं दाहिणेणं
 उत्तरेणं उत्तरपुरच्छिमेणं पुरच्छिमदाहिणेणं दाहिणपच्चत्थिमेणं पच्छिमउत्तरेणं ॥
 जया णं भंते ! पुरच्छिमेणं ईसिं पुरेवाया पत्थावाया मंदावाया महावाया वायंति
 तया णं पच्चत्थिमेणवि ईसिं पुरेवाया जया णं पच्चत्थिमेणं ईसिं पुरेवाया तया णं
 पुरच्छिमेणवि ?, हंता गोयमा ! जया णं पुरच्छिमेणं तया णं पच्चत्थिमेणवि ईसिं
 जया णं पच्चत्थिमेणवि ईसिं तया णं पुरच्छिमेणवि ईसिं, एवं दिसासु विदिसासु ॥
 अत्थि णं भंते ! दीविच्चया ईसिं ?, हंता ! अत्थि । अत्थि णं भंते ! सामुद्दया ईसिं ?,
 हंता ! अत्थि । जया णं भंते ! दीविच्चया ईसिं तया णं सामुद्दयावि ईसिं जया
 णं सामुद्दया ईसिं तया णं दीविच्चयावि ईसिं ?, णो इणट्ठे समट्ठे । से केणट्ठेणं भंते !
 एवं वुच्चइ जया णं दीविच्चया ईसिं णो णं तया सामुद्दया ईसिं जया णं सामुद्दया
 ईसिं णो-णं तया दीविच्चया ईसिं ?, गोयमा ! तेसिं णं वायाणं अन्नमन्नस्स विवच्चा-
 सेणं लवणे समुद्दे वेलं नाइक्कमइ से तेणट्ठेणं जाव वाया वायंति ॥ अत्थि णं भंते !
 ईसिं पुरेवाया पत्थावाया मंदावाया महावाया वायंति ?, हंता ! अत्थि । कया
 णं भंते ! ईसिं जाव वायंति ?, गोयमा ! जया णं वाउयाए अहारियं रियंति तया
 णं ईसिं जाव वायंति । अत्थि णं भंते ! ईसिं ? हंता ! अत्थि, कया णं भंते !
 ईसिं पुरेवाया पत्थां ?, गोयमा ! जया णं वाउयाए उत्तरकिरियं रियइ तया णं
 ईसिं जाव वायंति । अत्थि णं भंते ! ईसिं ?, हंता ! अत्थि, कया णं भंते ! ईसिं
 पुरेवाया पत्थां ?, गोयमा ! जया णं वाउकुमारा वाउकुमारीओ वा अप्पणो वा
 परस्स वा तदुभयस्स वा अट्ठाए वाउकायं उदीरेति तया णं ईसिं पुरेवाया जाव
 वायंति ॥ वाउकाए णं भंते ! वाउकायं चेव आणमंति पाणं जहा खंदए तहा
 चत्तारि आलावगा नेयव्वा अणेगसयसहस्सं पुट्ठे उद्दाइ वा, ससरीरी निक्खमइ
 ॥ १७९ ॥ अहं भंते ! ओदणे कुम्मासे सुरा एए-णं किंसरीराति वत्तव्वं सिया ?,
 गोयमा ! ओदणे कुम्मासे सुराए य जे घणे दव्वे एए णं पुव्वभावपन्नवणं पडुच्च-
 वणस्सइजीवसरीरा तओ पच्छा सत्थातीया सत्थपरिणामिआ अगणिज्झामिया अग-
 णिज्झसिया अगणिसेविया अगणिपरिणामिया अगणिजीवसरीराति वत्तव्वं सिया,
 सुराए य जे दवे दव्वे एए णं पुव्वभावपन्नवणं पडुच्च आउजीवसरीरा, तओ-पच्छा
 सत्थातीया जाव अगणिकायसरीराति वत्तव्वं सिया । अहं भंते ! अए तंवे तउए
 सीसए उवले कसद्विया एए णं किंसरीराइ वत्तव्वं सिया ? गोयमा ! अए-तंवे तउए-

सीसए उवले कसट्टिया, एए णं पुव्वभावपन्नवणं पडुच्च पुढविजीवसरीरा तओ पच्छा सत्थातीया जाव अगणिजीवसरीराति वत्तव्वं सिया । अहण्णं भंते ! अट्ठी अट्ठिज्झामे चम्मे चम्मज्झामे रोमे २ सिंगे २ खुरे २ नखे २ एए णं किंसरीराति वत्तव्वं सिया ?, गोयमा ! अट्ठी चम्मे रोमे सिंगे खुरे नहे एए णं तसपाणजीवसरीरा अट्ठिज्झामे चम्मज्झामे रोमज्झामे सिंग० खुर० णहज्झामे एए णं पुव्वभावपण्णवणं पडुच्च तसपाणजीवसरीरा तओ पच्छा सत्थातीया जाव अगणिजीव० ति वत्तव्वं सिया । अह भंते ! इंगाले छारिए भुसे गोमए एए णं किंसरीराइ वत्तव्वं सिया ?, गोयमा ! इंगाले छारिए भुसे गोमए एए णं पुव्वभावपण्णवणं पडुच्च एगिंदियजीवसरीरप्पओगपरिणामियावि जाव पंचिंदियजीवसरीरप्पओगपरिणामियावि तओ पच्छा सत्थातीया जाव अगणिजीवसरीराति वत्तव्वं सिया ॥ १८० ॥ लवणे णं भंते ! समुद्दे केवइयं चक्कवालविकखंमेणं पन्नत्ते ?, एवं नेयव्वं जाव लोगट्ठिई लोगाणुभावे, सेवं भंते ! २ ति भगवं जाव विहरइ ॥ १८१ ॥

पंचमे सए बीओ उद्देसो समत्तो ॥

अण्णउत्थिया णं भंते ! एवमाइक्खंति भा० प० एवं प० से जहानामए जाल-
गंठिया सिया आणुपुव्विगढिया अणंतरगढिया परंपरगढिया अन्नमन्नगढिया अन्न-
मन्नगुह्यत्ताए अन्नमन्नभारियत्ताए अन्नमन्नगुह्यसंभारियत्ताए अण्णमण्णघडत्ताए जाव
चिट्ठंति, एवामेव बहूणं जीवाणं बहूसु आजाइसयसहस्सेसु बहूई आउयसहस्साई
आणुपुव्विगढियाई जाव चिट्ठंति, एगेऽविय णं जीवे एगेणं समएणं दो आउयाई
पडिसंवेदेइ, तंजहा-इहभविआउयं च परभविआउयं च, जं समयं इहभविआउयं
पडिसंवेदेइ तं समयं परभविआउयं पडिसंवेदेइ जाव से कहमेयं भंते ! एवं ?,
गोयमा ! जन्नं ते अन्नउत्थिया तं चेव जाव परभविआउयं च, जे ते एवमाहंसु तं
मिच्छा, अहं पुण गोयमा ! एवमाइक्खामि जाव परूवेमि जाव अन्नमन्नघडत्ताए चिट्ठंति,
एवामेव एगमेगस्स जीवस्स बहूहि आजाइसहस्सेहिं बहूई आउयसहस्साई आणु-
पुव्विगढियाई जाव चिट्ठंति, एगेऽविय णं जीवे एगेणं समएणं एणं आउयं पडि-
संवेदेइ, तंजहा-इहभविआउयं वा परभविआउयं वा, जं समयं इहभविआउयं पडि-
संवेदेइ नो तं समयं पर० पडिसंवेदेइ जं समयं प० नो तं समयं इहभविआउयं
प०, इहभविआउयस्स पडिसंवेयणाए नो परभविआउयं पडिसंवेदेइ परभविआ-
उयस्स पडिसंवेयणाए नो इहभविआउयं पडिसंवेदेइ, एवं खलु एगे जीवे एगेणं
समएणं एणं आउयं प० तंजहा-इहभ० वा परभ० वा ॥ १८२ ॥ जीवे णं भंते !
जे भविए नेरइएसु उववज्जितए से णं भंते ! किं साउए संकमइ निराउए संकमइ ?,

गोयमा ! साउए संक्रमइ नो निराउए संक्रमइ । से णं भंते ! आउए कहिं कडे कहिं समाइण्णे ?, गोयमा ! पुरिमे भवे कडे पुरिमे भवे समाइण्णे, एवं जाव वेमाणियाणं दंडओ । से नूणं भंते ! जे जंभविए जोणिं उववज्जित्तए से तमाउयं पकरेइ, तंजहा-नेरइयाउयं वा जाव देवाउयं वा ?, हंता गोयमा ! जे जंभविए जोणिं उववज्जित्तए से तमाउयं पकरेइ, तंजहा-नेरइयाउयं वा तिरि० मणु० देवाउयं वा, नेरइयाउयं पकरेमाणे सत्तविहं पकरेइ, तंजहा-रयणप्पभापुढविनेरइयाउयं वा जाव अहेसत्तमापुढविनेरइयाउयं वा, तिरिक्खजोणियाउयं पकरेमाणे पंचविहं पकरेइ, तंजहा-एगिदियतिरिक्खजोणियाउयं वा, भेदो सव्वो भाणियव्वो, मणुस्साउयं दुविहं, देवाउयं चउव्विहं, सेवं भंते ! सेवं भंते ! त्ति ॥ १८३ ॥ पंचमे सए तइओ उद्देसो समत्तो ॥

छउमत्थे णं भंते ! मणुस्से आउडिज्जमाणाइं सद्दाइं सुणेइ, तंजहा-संखसद्दाणि वा सिगस० संखियस० खरमुहिस० पोयास० परिपिरियास० पणवस० पडहस० भंभास० होरंभस० भेरिसद्दाणि वा झल्लरिस० दुंदुहिस० तयाणि वा वित्तयाणि वा घणाणि वा झुत्तिराणि वा ?, हंता गोयमा ! छउमत्थे णं मणुस्से आउडिज्जमाणाइं सद्दाइं सुणेइ, तंजहा-संखसद्दाणि वा जाव झुत्तिराणि वा । ताइं भंते ! किं पुट्ठाइं सुणेइ अपुट्ठाइं सुणेइ ?, गोयमा ! पुट्ठाइं सुणेइ नो अपुट्ठाइं सुणेइ, जाव नियमा छदिसिं सुणेइ । छउमत्थे णं मणुस्से किं आरगयाइं सद्दाइं सुणेइ पारगयाइं सद्दाइं सुणेइ ?, गोयमा ! आरगयाइं सद्दाइं सुणेइ नो पारगयाइं सद्दाइं सुणेइ । जहा णं भंते ! छउमत्थे मणुस्से आरगयाइं सद्दाइं सुणेइ नो पारगयाइं सद्दाइं सुणेइ तथा णं भंते ! केवली मणुस्से किं आरगयाइं सद्दाइं सुणेइ पारगयाइं सद्दाइं सुणेइ ?, गोयमा ! केवली णं आरगयं वा पारगयं वा सव्वदूरमूलमणंतिं सद्दं जाणेइ पासइ, से केणट्ठेणं तं चेव केवली णं आरगयं वा पारगयं वा जाव पासइ ?, गोयमा ! केवली णं पुरच्छिमेणं मियंपि जाणइ अमियंपि जा० एवं दाहिणेणं पच्चत्थिमेणं उत्तरेणं उट्ठं अहे मियंपि जाणइ अमियंपि जा० सव्वं जाणइ केवली सव्वं पासइ केवली सव्वओ, जाणइ पासइ, सव्वकालं जा० पा० सव्वभावे जाणइ केवली सव्वभावे पासइ, केवली ॥ अणंते नाणे केवलिसस अणंते दंसणे केवलिसस निव्वुडे नाणे केवलिसस निव्वुडे दंसणे केवलिसस से तेणट्ठेणं जाव पासइ ॥ १८४ ॥ छउमत्थे णं भंते ! मणुस्से हसेज्ज वा उस्सुयाएज्ज वा ?, हंता ! हसेज्ज वा उस्सुयाएज्ज वा, जहा णं भंते ! छउमत्थे मणुस्से हसेज्ज जाव उस्सु० तथा णं केवलीवि हसेज्ज वा उस्सुयाएज्ज वा ?, गोयमा ! नो इणट्ठे समट्ठे, से केणट्ठेणं भंते ! जाव

नो णं तहा केवली हसेज्ज वा जाव उस्सुयाएज्ज वा ? गोयमा । जण्णं जीवा चरि-
 त्तमोहणिजस्स कम्मस्स उदएणं हसंति वा उस्सुयायंति वा से णं केवलस्स नत्थि,
 से तेणट्ठेणं जाव नो णं तहा केवली हसेज्ज वा उस्सुयाएज्ज वा । जीवे ण भंते !
 हसमाणे वा उस्सुयमाणे वा कइ कम्मपयडीओ बंधइ ? गोयमा ! सत्तविहवंधए वा
 अट्ठविहवंधए वा, णेरइएणं भंते ! हसमाणे वा उस्सुयमाणे वा कइ कम्मपयडीओ
 बंधइ ? गोयमा ! सत्तविहवंधए वा अट्ठविहवंधए वा, जीवा णं भंते ! हसमाणा वा
 उस्सुयायमाणा वा कइ कम्मपयडीओ बंधंति ? गोयमा ! सत्तविहवंधगा वा अट्ठविह-
 वंधगा वा, णेरइयाणं पुच्छा, गोयमा ! सव्वे वि ताव होज्जा सत्तविहवंधगा अहवां
 सत्तविहवंधगावि अट्ठविहवंधगावि, अदुवा सत्तविहवंधगा य अट्ठविहवंधगा य ।
 एवं जाव वेमाणिए, पोहत्तिएहिं जीवेगिदियवज्जो तियभंगो ॥ छउमत्थे णं भंते !
 मणूसे निदाएज्ज वा पयलाएज्ज वा ? हंता ! निदाएज्ज वा पयलाएज्ज वा, जहा
 हसेज्ज वा तहा नवरं दरिसणावरणिजस्स कम्मस्स उदएणं निदायंति वा पयलायंति
 वा, से णं केवलस्स नत्थि, अन्नं तं चेव । जीवे णं भंते ! निदायमाणे वा
 पयलायमाणे वा कइ कम्मपयडीओ बंधइ ? गोयमा ! सत्तविहवंधए वा अट्ठविहवंध-
 ए वा, एवं जाव वेमाणिए, पोहत्तिएसु जीवेगिदियवज्जो तियभंगो ॥ १८५ ॥
 हरीं णं भंते ! हरिणेगमेसी सक्कदूए इत्थीगब्भं संहरणमाणे, किं गब्भाओ
 गब्भं साहरइ १ गब्भाओ जोणिं साहरइ २ जोणीओ गब्भं साहरइ ३
 जोणीओ जोणिं साहरइ ४ ? गोयमा ! नो गब्भाओ गब्भं साहरइ नो
 गब्भाओ जोणिं साहरइ नो जोणीओ जोणिं साहरइ परामुसिय २ अव्वा-
 वाहेणं अव्वावाहं जोणीओ गब्भं साहरइ ॥ पभू णं भंते ! हरिणेगमेसी सक्कस्स
 णं दूए इत्थीगब्भं नहसिरंसि वा रोमकूवंसि वा साहरित्तए वा नीहरित्तए वा ?
 हंता ! पभू, नो चेव णं तस्स गब्भस्स किंचिवि आवाहं वा विवाहं वा उप्पाएज्जा
 छविच्छेदं पुणं करेज्जा, एसुहुमं च णं साहरिज्ज वा नीहरिज्ज वा ॥ १८६ ॥
 तेणं कालेणं तेणं समएणं समणस्स भगवओ महावीरस्स अंतेवासी अइमुत्ते णामं
 कुमारसमणे पगइभइए जाव विणीए, तए णं से अइमुत्ते कुमारसमणे अण्णया
 कयाइ महावुट्ठिकायंसि निवयमाणंसि कक्खपडिग्गहरयहरणमायाए बहिया संपट्टिए
 विहारिए, तए णं से अइमुत्ते कुमारसमणे वाहयं वहमाणं पासइ २ मट्ठियाए पालिं
 बंधइ २ णाविया मे २ नाविओवि वनावमयं पडिग्गहणं उदगंसि कट्ठु पव्वाहमाणे २
 अभिरमइ, तं च येरा अइक्खु, जेणेव समणे भगवं ० तेणेव उवागच्छंति २ एवं
 वदासी-एवं खलु देवाणुप्पियाणं अंतेवासी अइमुत्ते णामं कुमारसमणे से णं भंते !

अइमुत्ते कुमारसमणे कइहिं भवग्गहणेहिं सिज्झहिइ जाव अंतं करेहिइ ?, अज्जोत्ति
 समणे भगवं महावीरे ते थेरे एवं वयासी-एवं खलु अज्जो ! मम अंतेवासी अइमुत्ते
 णामं कुमारसमणे पगइभइए जाव विणीए से णं अइमुत्ते कुमारसमणे इमेणं चेव
 भवग्गहणेणं सिज्झहिइ जाव अंतं करेहिइ, तं मा णं अज्जो ! तुब्भे अइमुत्तं
 कुमारसमणं हीलेह निदह खिसह गरहह अवमन्नह, तुब्भे णं देवाणुप्पिया ! अइ-
 मुत्तं कुमारसमणं अगिलाए संगिण्हह अगिलाए उवगिण्हह अगिलाए भत्तेणं पाणेणं
 विणएणं वेयावडियं करेह, अइमुत्ते णं कुमारसमणे अंतकरे चेव अंतिमसरीरेए
 चेव, तए णं ते थेरा-भगवंतो समणेणं भगवया म० एवं वुत्ता समाणा-समणं भगवं
 महावीरं वंदंति नमंसंति अइमुत्तं कुमारसमणं अगिलाए संगिण्हंति जाव वेयाव-
 डियं करंति ॥ १८७ ॥ तेणं कालेणं २ महासुक्काओ कप्पाओ महासग्गाओ महावि-
 माणाओ दो देवा महिद्धिया जाव महाणुभागा समणस्स भगवओ महावीरस्स अंतियं
 पाउब्भूया, तए णं ते देवा-समणं भगवं महावीरं मणसा चेव वंदंति नमंसंति मणसा
 चेव इमं एयारुवं वागरणं पुच्छंति-कइ णं भंते ! देवाणुप्पियाणं अंतेवासिसयाइं
 सिज्झहिंति जाव अंतं करेहिंति ?, तए णं समणे भगवं महावीरे तेहिं देवेहिं मणसा
 पुट्ठे तेसि देवाणं मणसा चेव इमं एयारुवं वागरणं वागरेइ-एवं खलु देवाणुप्पिया !
 मम सत्त अंतेवासिसयाइं सिज्झहिंति जाव अंतं करेहिंति, तए णं ते देवा समणेणं
 भगवया महावीरेणं मणसां पुट्ठेणं मणसा चेव इमं एयारुवं वागरणं वागरिया
 समाणा हट्ठुट्ठा जाव हयहियया समणं भगवं महावीरं वंदंति णमंसंति २ तां मणसा
 चेव सुस्सूसमाणा णमंसमाणा अभिमुहंता जाव पज्जुवासंति । तेणं कालेणं २ सम-
 णस्स भगवओ महावीरस्स जेट्ठे अंतेवासी इंदभूई णामं अणगारे जाव अदूरसा-
 मंते उड्ढंजाणू जाव विहरइ, तए णं तस्स भगवओ गोयमस्स ज्ञाणंतरियाए वट्ठ-
 माणस्स इमेयारुवे अज्झत्थिए जाव समुप्पज्जित्था, एवं खलु दो देवा महिद्धिया
 जाव महाणुभागा समणस्स भगवओ महावीरस्स अंतियं पाउब्भूया तं नो खलु
 अहं ते देवे जाणामि कयराओ कप्पाओ वा सग्गाओ वा विमाणाओ वा कस्स वा
 अत्थस्स अट्ठाए इहं हव्वमागया ?, तं गच्छामि णं भगवं महावीरं वंदामि णमंसांमि
 जाव पज्जुवासामि इमाइं च णं एयारुवाइं वागरणाइं पुच्छिस्सामिति कहु एवं संपे-
 हेइ २ उट्ठाए उट्ठेइ २ जेणेव समणे भगवं महा० जाव पज्जुवांसइ, गोयमादिं
 समणे भगवं म० भगवं गोयमं एवं वदांसी-से णूणं तव गोयमा ! ज्ञाणंतरियाए
 वट्ठमाणस्स इमेयारुवे अज्झत्थिए जाव जेणेव मम अंतिए तेणेव हव्वमागए से णूणं
 गोयमा ! अत्थे समत्थे ?, हंता ! अत्थि, तं गच्छाहि णं गोयमा ! एए चेव देवा

इमाइ एयारुवाइ वागरणाइ वागरेहिंति, तए णं भगवं गोयमे समणेणं भगवया
महावीरेणं अब्भणुजाए समाणे समणं भगवं महावीरं वंदइ णमंसइ २ जेणेव ते
देवा तेणेव पहारैत्थ गमणाए, तए णं ते देवा भगवं गोयमं एज्जमाणं पासंति
२ हट्ठा जाव हयहियया खिप्पामेव अब्भुट्ठेति २ खिप्पामेव पच्चुवागच्छंति २ जेणेव
भगवं गोयमे तेणेव उवागच्छंति २ ता जाव णमंसित्ता एवं वयासी-एवं खलु
भंते । अम्हे महासुक्काओ कप्पाओ महासग्गाओ महाविमाणाओ दो देवा महिद्धिया
जाव पाउवभूआ तए णं अम्हे समणं भगवं महावीरं वंदामो णमंसामो २ मणसा
चेव इमाइ एयारुवाइ वागरणाइ पुच्छामो-कइ णं भंते ! देवाणुप्पियाणं अंतेवा-
सिसयाइ सिज्झिहिंति जाव अंतं करेहिंति ?, तए णं समणे भगवं महावीरे अम्हेहिं
मणसा पुट्ठे अम्हं मणसा चेव इमं एयारुवं वागरणं वागरेइ-एवं खलु देवाणु०
मम सत्त अंतेवासिसयाइ जाव अंतं करेहिंति, तए णं अम्हे समणेणं भगवया
महावीरेणं मणसा चेव पुट्ठेणं मणसा चेव इमं एयारुवं वागरणं वागरिया समाणा
समणं भगवं महावीरं वंदामो नमंसामो २ जाव पज्जुवासामोत्तिकहु भगवं गोयमं
वंदंति नमंसंति २ जामेव दिसि पाउ० तामेव दिसिं प० ॥ १८८ ॥ भंतेत्ति
भगवं गोयमे समणं जाव एवं वदासी-देवा णं भंते ! संजयाति वत्तव्वं सिया ?,
गोयमा ! णो तिणट्ठे समट्ठे, अब्भक्खाणमेयं, देवा णं भंते ! असंजयाइ
वत्तव्वं सिया ?, गोयमा ! णो तिणट्ठे०, णिट्ठुरवयणमेयं, देवा णं भंते ! संजया-
संजयाति वत्तव्वं सिया ?, गोयमा ! णो तिणट्ठे समट्ठे, असब्भूयमेयं देवाणं, से कि
खाइ णं भंते ! देवाति वत्तव्वं सिया ?, गोयमा ! देवा णं नोसंजयाति वत्तव्वं
सिया ॥ १८९ ॥ देवा णं भंते ! कयराए भासाए भासंति ?, कयरा वा भासा
भासिज्जमाणी विसिस्सइ ?, गोयमा ! देवा णं अद्धमागहाए भासाए भासंति, सावि
य णं अद्धमागहा भासा भासिज्जमाणी विसिस्सइ ॥ १९० ॥ केवली णं भंते !
अंतकरं वा अंतिमसरीरियं वा जाणइ पासइ ?, हंता ! गोयमा ! जाणइ पासइ ।
जहा णं भंते ! केवली अंतकरं वा अंतिमसरीरियं वा जाणति पासति तहा णं छउ-
मत्थेवि अंतकरं वा अंतिमसरीरियं वा जाणइ पासइ ?, गोयमा ! णो तिणट्ठे
समट्ठे, सोच्चा जाणइ पासइ, पमाणओ वा, से किं तं सोच्चा ?, सोच्चा णं केवलिस्स
वा केवलिसावयस्स वा केवलिसावियाए वा केवल्लिउवासगस्स वा केवल्लिउवासियाए
वा तप्पक्खियस्स वा तप्पक्खियसावगस्स वा तप्पक्खियसावियाए वा तप्पक्खिय-
उवासगस्स वा तप्पक्खियउवासियाए वा से तं सोच्चा ॥ १९१ ॥ से किं तं
पमाणे ?, पमाणे चउव्विहे प० तंजहा-पच्चक्खे अणुमाणे ओवम्मे आगमे, जहा

अणुओगदारे तहा णेयव्वं पमाणं जाव तेण परं नो अत्तागमे नो अणंतरागमे परं-
 परागमे ॥ १९२ ॥ केवली णं भंते ! चरिमकम्मं वा चरिमणिज्जरं वा जाणइ
 पासइ ?, हंता गोयमा ! जाणइ पासइ । जहा णं भंते ! केवली चरिमकम्मं वा
 जहा णं अंतकरेणं आलावगो तहा चरिमकम्मेणवि अपरिसेसिओ णेयव्वो ॥ १९३ ॥
 केवली णं भंते ! पणीयं मणं वा वइं वा धारेज्जा ?, हंता ! धारेज्जा, जहा णं भंते !
 केवली पणीयं मणं वा वइं वा धारेज्जा ते णं वेमाणिया देवा जाणंति पासंति ?,
 गोयमा ! अत्थेगइया जाणंति पा० अत्थेगइया न जाणंति न पा०, से केणट्ठेणं
 जाव ण जाणंति ण पासंति ?, गोयमा ! वेमाणिया देवा दुविहा पणत्ता, तंजहा-
 माइमिच्छादिट्ठिउववन्नगा य अमाइसम्मदिट्ठिउववन्नगा य, तत्थ णं जे ते माइमि-
 च्छादिट्ठिउववन्नगा ते न जाणंति न पासंति, तत्थ णं जे ते अमाइसम्मदिट्ठिउव-
 वन्नगा ते णं जाणंति पासंति, से केणट्ठेणं एवं वु० अमाई सम्मदिट्ठी जाव पा० ?,
 गोयमा ! अमाई सम्मदिट्ठी दुविहा पणत्ता-अणंतरोववन्नगा य परंपरोववन्नगा य,
 तत्थ अणंतरोववन्नगा न जा० परंपरोववन्नगा जाणंति, से केणट्ठेणं भंते ! एवं०
 परंपरोववन्नगा जाव जाणंति ?, गोयमा ! परंपरोववन्नगा दुविहा पणत्ता-पज्जत्तगा
 य अपज्जत्तगा य, पज्जत्ता जा० अपज्जत्ता न जा०, एवं अणंतरपरंपरपज्जत्तअप-
 ज्जत्ता य उवउत्ता अणुवउत्ता, तत्थ णं जे ते उवउत्ता ते जा० पा० से तेणट्ठेणं
 तं चेव ॥ १९४ ॥ पभू णं भंते ! अणुत्तरोववाइया देवा तत्थगया चेव समाणा
 इहगएणं केवलिणां सद्धि आलावं वा संलावं वा करेतए ?, हंता ! पभू, से केणट्ठेणं
 जाव पभू णं अणुत्तरोववाइया देवा जाव करेतए ?, गोयमा ! जण्णं अणुत्तरोववा-
 इया देवा तत्थगया चेव समाणा अट्ठं वा हेउं वा पसिणं वा वागरणं वा कारणं
 वा पुच्छंति तण्णं इहगए केवली अट्ठं वा जाव वागरणं वा वागरेइ से तेणट्ठेणं ।
 जणं भंते ! इहगए चेव केवली अट्ठं वा जाव वागरेइ तण्णं अणुत्तरोववाइया देवा
 तत्थगया चेव समाणा जा० पा० ?, हंता ! जाणंति पासंति, से केणट्ठेणं जाव
 पासंति ?, गोयमा ! तेसि णं देवाणं अणंताओ मणोदव्ववग्गणाओ लद्धाओ पत्ताओ
 अभिसमन्नागयाओ भवंति से तेणट्ठेणं जण्णं इहगए केवली जाव पा० ॥ १९५ ॥
 अणुत्तरोववाइया णं भंते ! देवा किं उदिन्नमोहा उवसंतमोहा खीणमोहा ?, गोयमा !
 नो उदिन्नमोहा उवसंतमोहा णो खीणमोहा ॥ १९६ ॥ केवली णं भंते ! अय्या-
 णेहिं जा० पा० ?, गोयमा ! णो तिणट्ठे स०, से केणट्ठेणं जाव केवली णं आया-
 णेहिं न जाणइ न पासइ ?, गोयमा ! केवली णं पुरच्छिमेणं मियंपि जाणइ
 अमियंपि जा० जाव निव्वुडे दंसणे केवलिस्स से तेण० ॥ १९७ ॥ केवली णं

भंते ! अस्सि समयंसि जेसु आगासपदेसेसु हत्थं वा पायं वा दाहुं वा ऊरुं वा ओगाहिता णं चिट्ठइ पभू णं भंते ! केवली सेयकालंसिवि तेसु चेव आगास-
पदेसेसु हत्थं वा जाव ओगाहिता णं चिट्ठित्तए ? गोयमा ! णो ति० ; से केणट्ठेणं
भंते ! जाव केवली णं अस्सि समयंसि जेसु आगासपदेसेसु हत्थं वा जाव चिट्ठइ
णो णं पभू केवली सेयकालंसिवि तेसु चेव आगासपदेसेसु हत्थं वा जाव चिट्ठित्तए ?
गो० ! केवलस्स णं वीरियसजोगसद्वय्याए चलाइं उवगरणाइं भवंति, चलोवग-
रणट्ठयाए य णं केवली अस्सि समयंसि जेसु आगासपदेसेसु हत्थं वा जाव चिट्ठइ
णो णं पभू केवली सेयकालंसिवि तेसु चेव जाव चिट्ठित्तए, से तेणट्ठेणं जाव वुच्चइ-
केवली णं अस्सि समयंसि जाव चिट्ठित्तए ॥ १९८ ॥ पभू णं भंते ! चोइसपुव्वी
वडाओ घडसहस्सं पडाओ पडसहस्सं कडाओ २ रहाओ २ छत्ताओ छत्तसहस्सं
दंडाओ दंडसहस्सं अभिनिव्वट्ठेत्ता उवदंसेत्तए ? हंता ! पभू, से केणट्ठेणं पभू
चोइसपुव्वी जाव उवदंसेत्तए ? गोयमा ! चउइसपुव्विस्स णं अणंताइं दव्वाइं उक्क-
रियामेएणं भिज्जमाणाइं लद्धाइं पत्ताइं अभिसमन्नागयाइं भवंति, से तेणट्ठेणं जाव
उवदंसेत्तए । सेवं भंते ! सेवं भंते ! ति ॥ १९९ ॥ **पंचमे सए चउत्थो उद्देसो ॥**

छउमत्थे णं भंते ! मणूसे तीयमणंतं सासयं समयं केवलेणं संजमेणं जहा पढ-
मसए चउत्थुद्देसे आलावगा तहा नेयव्वा जाव अलमत्थुत्ति वत्तव्वं सियो ॥ २०० ॥
अन्नउत्थिया णं भंते ! एवमाइक्खंति जाव परूवेति सव्वे पाणा सव्वे भूया सव्वे
जीवा सव्वे सत्ता एवंभूयं वेदणं वेदंति से कहमेयं भंते ! एवं ? गोयमा ! जणं
ते अन्नउत्थिया एवमाइक्खंति जाव वेदंति जे ते एवमाहंसु मिच्छा ते एवमा-
हंसु, अहं पुण गोयमा ! एवमाइक्खामि जाव परूवेमि अत्थेगइया पाणा भूया
जीवा सत्ता एवंभूयं वेदणं वेदंति अत्थेगइया पाणा भूया जीवा सत्ता अणेवंभूयं
वेदणं वेदंति, से केणट्ठेणं अत्थेगइया ? तं चेव उच्चारयव्वं, गोयमा ! जे णं पाणा
भूया जीवा सत्ता जहा कडा कम्मा तहा वेदणं वेदंति ते णं पाणा भूया जीवा सत्ता
एवंभूयं वेदणं वेदंति, जे णं पाणा भूया जीवा सत्ता जहा कडा कम्मा नो तहा
वेदणं वेदंति ते णं पाणा भूया जीवा सत्ता अणेवंभूयं वेदणं वेदंति, से तेणट्ठेणं तहेव ।
नेरइया णं भंते ! किं एवंभूयं वेदणं वेदंति अणेवंभूयं वेदणं वेदंति ? गोयमा ! नेर-
इया णं एवंभूयं वेदणं वेदंति अणेवंभूयंपि वेदणं वेदंति । से केणट्ठेणं तं चेव ?
गोयमा ! जे णं नेरइया जहा कडा कम्मा तहा वेयणं वेदंति ते णं नेरइया एवंभूयं
वेदणं वेदंति जे णं नेरइया जहा कडा कम्मा णो तहा वेदणं वेदंति ते णं नेरइया
अणेवंभूयं वेदणं वेदंति, से तेणट्ठेणं, एवं जाव वेमाणिया ससारमंडलं नेयव्वं

॥ २०१ ॥ जंबुद्वीवे णं भंते ! भारहे वासे इमीसे ओस० कइ कुलगरा होत्था ?, गोयमा ! सत्त एवं तित्थयर तित्थयरमायरो पियरो पढमा सिस्सिणीओ चक्कवट्ठी-
मायरो पियरो इत्थिरयणं वलदेवा वासुदेवा वासुदेवमायरो पियरो, एएसिं पडिसत्तू
जहा समवाए णामपरिवाडी तहा णेयव्वा, सेवं भंते ! २ ति जाव विहरइ ॥ २०२ ॥
पंचमसए पंचमो उद्देसओ समत्तो ॥

कहणं भंते ! जीवा अप्पाउयत्ताए कम्मं पकरेंति ?, गोयमा ! तिहिं ठाणेहिं,
तंजहा-पाणे अइवाएत्ता मुसं वइत्ता तहारुवं समणं वा माहणं वा अफासुएणं अणे-
सणिज्जेणं असणपाणखाइमसाइमेणं पडिलाभेत्ता, एवं खलु जीवा अप्पाउयत्ताए
कम्मं पकरेन्ति ॥ कहणं भंते ! जीवा दीहाउयत्ताए कम्मं पकरेंति ?, गोयमा ! तिहिं
ठाणेहिं-नो पाणे अइवाइत्ता नो मुसं वइत्ता तहारुवं समणं वा माहणं वा फासुए-
सणिज्जेणं असणपाणखाइमसाइमेणं पडिलाभेत्ता एवं खलु जीवा दीहाउयत्ताए कम्मं
पकरेंति ॥ कहन्नं भंते ! जीवा असुभदीहाउयत्ताए कम्मं पकरेंति ?, गोयमा ! पाणे
अइवाइत्ता मुसं वइत्ता तहारुवं समणं वा माहणं वा हीलित्ता निंदित्ता खिसित्ता
गरहित्ता अवमन्नित्ता अन्नयरेणं अमणुत्तेणं अपीइकारएणं असणपाणखाइमसाइमेणं
पडिलाभेत्ता एवं खलु जीवा असुभदीहाउयत्ताए कम्मं पकरेंति ॥ कहन्नं भंते !
जीवा सुभदीहाउयत्ताए कम्मं पकरेंति ?, गोयमा ! नो पाणे अइवाइत्ता नो मुसं
वइत्ता तहारुवं समणं वा माहणं वा वंदित्ता नमंसित्ता जाव पज्जुवासित्ता अन्नयरेणं
मणुत्तेणं पीइकारएणं असणपाणखाइमसाइमेणं पडिलाभेत्ता एवं खलु जीवा सुभ-
दीहाउयत्ताए कम्मं पकरेंति ॥ २०३ ॥ गाहावइस्स णं भंते ! भंडं विक्किणमाणस्स
केइ भंडं अवहरेज्जा तस्स णं भंते ! तं भंडं अणुगवेसमाणस्स कि आरंभिया
किरिया कज्जइ परिग्गहिया० माया० अप० मिच्छा० ?, गोयमा ! आरंभिया
किरिया कज्जइ परि० माया० अपच्च० मिच्छादंसणकिरिया सिय कज्जइ सिय नो
कज्जइ ॥ अह से भंडे अभिसमन्नागए भवइ, ताओ से पच्छा सव्वाओ ताओ
पयणुईभवन्ति ॥ गाहावइस्स णं भंते ! तं भंडं विक्किणमाणस्स कइए भंडं साइ-
जेज्जा भंडे य से अणुवणीए सिया, गाहावइस्स णं भंते ! ताओ भंडाओ किं
आरंभिया किरिया कज्जइ जाव मिच्छादंसणकिरिया कज्जइ ? कइयस्स वा ताओ
भंडाओ कि आरंभिया किरिया कज्जइ जाव मिच्छादंसणकिरिया कज्जइ ?, गोयमा !
गाहावइस्स ताओ भंडाओ आरंभिया किरिया कज्जइ जाव अपच्चक्खाणिया मिच्छा-
दंसणवत्तिया किरिया सिय कज्जइ सिय नो कज्जइ, कइयस्स णं ताओ सव्वाओ
पयणुईभवन्ति । गाहावइस्स णं भंते ! भंडं विक्किणमाणस्स जाव भंडे से उवणीए

सिया कइयस्स णं भंते ! ताओ भंडाओ किं आरंभिया किरिया कज्जइ ?, गाहावइस्स वा ताओ भंडाओ किं आरंभिया किरिया कज्जइ ?, गोयमा ! कइयस्स ताओ भंडाओ हेट्ठिह्माओ चत्तारि किरियाओ कज्जंति मिच्छादंसणकिरिया भयणाए गाहावइस्स णं ताओ, सव्वाओ पयणुईभवन्ति । गाहावइस्स णं भंते ! भंडं जाव धणे य से अणुवणीए सिया एवंपि जहा भंडे उवणीए तहा नेयव्वं चउत्थो आलावगो, धणे से उवणीए सिया जहा पढमो आलावगो भंडे य से अणुवणीए सिया तहा नेयव्वो पढमचउत्थाणं एक्को गमो विइयतइयाणं एक्को गमो ॥ अगणिकाए णं भंते ! अहुणोज्जलिए समाणे महाकम्मतराए चेव महाकिरियतराए चेव महासवतराए चेव महावेयणतराए चेव भवइ, अहे णं समए २ वोक्कसिज्जमाणे २ चरिमकालसमयंसि इंगालभूए मुम्मुरभूए छारियभूए तओ पच्छा अप्पकम्मतराए चेव अप्पकिरियतराए चेव अप्पासवतराए चेव अप्पवेयणतराए चेव भवइ ?, हंता गोयमा ! अगणिकाए णं अहुणोज्जलिए समाणे तं चेव ॥ २०४ ॥ पुरिसे णं भंते ! धणुं परामुसइ धणुं परामुसित्ता उंसुं परामुसइ २ ठाणं ठाइ ठाणं ठिच्चा आययकण्णाययं उंसुं करेइ आययकन्नाययं उंसुं करेत्ता उड्डं वेहासं उंसुं उव्विहइ २ तओ णं से उंसुं उड्डं वेहासं उव्विहिए समाणे जाइं तत्थ पाणाइं भूयाइं जीवाइं सत्ताइं अभिहणइ वत्तेइ लेस्सेइ संघाएइ संघट्टेइ परियावेइ किलामेइ ठाणाओ ठाणं संकामेइ जीवियाओ ववरोवेइ तए णं भंते ! से पुरिसे कइकिरिए ?, गोयमा ! जावं च णं से पुरिसे धणुं परामुसइ २ जाव उव्विहइ तावं च णं से पुरिसे काइयाए जाव पाणाइवायकिरियाए पंचहिं किरियाहिं पुट्टे, जेसिंपि य णं जीवाणं सरीरेहिं धणू निव्वत्तिए तेऽवि य णं जीवा काइयाए जाव पंचहिं किरियाहिं पुट्टे(ट्टा) एवं धणुपुट्टे पंचहिं किरियाहिं, जीवा पंचहिं, ण्हारु पंचहिं, उसू पंचहिं, सरे पत्तणे फले ण्हारु पंचहिं ॥ २०५ ॥ अहे णं से उंसुं अप्पगो गुर्यत्ताए भारियत्ताए गुर्यसंभारियत्ताए अहे वीससाए पच्चोवयमाणे जाइं तत्थ पाणाइं जाव जीवियाओ ववरोवेइ तावं च णं से पुरिसे कइकिरिए ?, गोयमा ! जावं च णं से उंसुं अप्पगो गुर्यत्ताए जाव ववरोवेइ तावं च णं से पुरिसे काइयाए जाव चउहिं किरियाहिं पुट्टे, जेसिंपि य णं जीवाणं सरीरेहिं धणू निव्वत्तिए तेवि जीवा चउहिं किरियाहिं, धणुपुट्टे चउहिं, जीवा चउहिं, ण्हारु चउहिं, उसू पंचहिं, सरे पत्तणे फले ण्हारु पंचहिं, जेवि य से जीवा अहे पच्चोवयमाणस्स उवग्गहे चिट्ठंति तेवि य णं जीवा काइयाए जाव पंचहिं किरियाहिं पुट्टा ॥ २०६ ॥ अण्णउत्थिया णं भंते ! एवमाइक्खंति जाव परुवेंति से जहानामए जुवइं जुवाणे हत्थेणं हत्थे गेण्हेज्जा

चक्रस्स वा नाभी अरगाउत्ता सिया एवामेव जाव चत्तारि पंच जोयणसयाइं बहु-
समाइने मणुयलोए मणुस्सेहिं, से कहमेयं भंते ! एवं ?, गोयमा ! जणं ते अण्ण-
उत्थिया जाव मणुस्सेहिं जे ते एवमाहंसु मिच्छा०, अहं पुण गोयमा ! एवमाइ-
क्खामि जाव एवामेव चत्तारि पंच जोयणसयाइं बहुसमाइण्णे निरयलोए नेरइएहिं
॥ २०७ ॥ नेरइया णं भंते ! किं एगत्तं पभू विउव्वित्तए पुहुत्तं पभू विउव्वित्तए ?,
जहा जीवाभिगमे आलावगो तहा नेयव्वो जाव दुरहियासे ॥ २०८ ॥ आहाकम्मं
अणवज्जेत्ति मणं पहारेत्ता भवइ, से णं तस्स ठाणस्स अणालोइयपडिक्कंते कालं
करेइ नत्थि तस्स आराहणा, से णं तस्स ठाणस्स आलोइयपडिक्कंते कालं करेइ
अत्थि तस्स आराहणा, एएणं गमेणं नेयव्वं-कीयगडं ठवियं रइयं कंतारभत्तं
दुब्बिक्खभत्तं वदलियाभत्तं गिलाणभत्तं सेज्जायरपिंडं रायपिंडं । आहाकम्मं अण-
वज्जेत्ति बहुजणमज्झे भासित्ता सयमेव परिभुंजित्ता भवइ से णं तस्स ठाणस्स
जाव अत्थि तस्स आराहणा, एयंपि तह चेव जाव रायपिंडं । आहाकम्मं अणव-
ज्जेत्ति सयं अन्नमन्नस्स अणुप्पदावेत्ता भवइ, से णं तस्स एयं तह चेव जाव
रायपिंडं । आहाकम्मं णं अणवज्जेत्ति बहुजणमज्झे पन्नवइत्ता भवइ से णं तस्स
जाव अत्थि आराहणा जाव रायपिंडं ॥ २०९ ॥ आयरियउवज्जाए णं भंते !
सविसयंसि गणं अगिलाए संगिण्हमाणे अगिलाए उवगिण्हमाणे कइहिं भवग्गह-
णेहिं सिज्झइ जाव अंतं करेइ ?, गोयमा ! अत्थेगइए तेणेव भवग्गहणेणं सिज्झइ
अत्थेगइए दोच्चेणं भवग्गहणेणं सिज्झइ तच्चं पुण भवग्गहणं णाइक्कमइ ॥ २१० ॥ जे
णं भंते ! परं अलिएणं असव्वभूएणं अव्वभक्खाणेणं अव्वभक्खाइ तस्स णं कहप्पगारा
कम्मा कज्जंति ?, गोयमा ! जे णं परं अलिएणं असंत(एणं)वयणेणं अव्वभक्खाणेणं
अव्वभक्खाइ तस्स णं तहप्पगारा चेव कम्मा कज्जंति, जत्थेव णं अभिसमा-
गच्छंति तत्थेव णं पडिसंवेदंति तओ से पच्छा वेदंति सेवं भंते ! २ ति ॥ २११ ॥
पंचमसए छट्ठो उद्देसो समत्तो ॥

परमाणुपोगगले णं भंते ! एयइ वेयइ जाव तं तं भावं परिणमइ ?, गोयमा !
सिय एयइ वेयइ जाव परिणमइ सिय णो एयइ जाव णो परिणमइ । दुपदेसिए
णं भंते ! खंधे एयइ जाव परिणमइ ?, गोयमा ! सिय एयइ जाव परिणमइ सिय
णो एयइ जाव णो परिणमइ, सिय देसे एयइ देसे नो एयइ । तिपएसिए णं
भंते ! खंधे एयइ० ?, गोयमा ! सिय एयइ सिय नो एयइ, सिय देसे एयइ नो
देसे एयइ सिय देसे एयइ नो देसा एयंति सिय देसा एयंति नो देसे एयइ । चउप्प-
एसिए णं भंते ! खंधे एयइ० ?, गोयमा ! सिय एयइ सिय नो एयइ सिय देसे

एयइ णो देसे एयइ सिय देसे एयइ णो देसा एयंति सिय देसा एयंति नो देसे
 एयइ सिय देसा एयंति नो देसा एयंति जहा चउप्पदेसिओ तहा पंचपदेसिओ
 तहा जाव अणंतपदेसिओ ॥ २१२ ॥ परमाणुपोग्गले णं भंते ! असिधारं वा खुर-
 धारं वा ओगाहेज्जा ?, हंता ! ओगाहेज्जा ! से णं भंते ! तत्थ छिजेज्ज वा भिजेज्ज
 वा ?, गोयमा ! णो तिण्हे समंहे, नो खलु तत्थ सत्थं कमइ, एवं जाव असंखेज्ज-
 पएसिओ । अणंतपदेसिए णं भंते ! खंधे असिधारं वा खुरधारं वा ओगाहेज्जा ?,
 हंता ! ओगाहेज्जा, से णं तत्थ छिजेज्ज वा भिजेज्ज वा ?, गोयमा ! अत्थेगइए
 छिजेज्ज वा भिजेज्ज वा अत्थेगइए नो छिजेज्ज वा नो भिजेज्ज वा, एवं अगाणि-
 कायस्स मज्झंमज्झेणं तहिं णवरं झियाएज्जा भाणियव्वं, एवं पुक्खलसंवट्ठगस्स
 महामेहस्स मज्झंमज्झेणं तहिं उल्ले सिया, एवं गंगाए महाणइए पडिसोयं हव्वमा-
 गच्छेज्जा, तहिं विणिहायमावजेज्जा, उदगावत्तं वा उदगविंदुं वा ओगाहेज्जा से णं
 तत्थ परियावजेज्जा ॥ २१३ ॥ परमाणुपोग्गले णं भंते ! किं सअद्धे समज्झे सप-
 एसे ? उदाहु अणद्धे अमज्झे अपएसे ?, गोयमा ! अणद्धे अमज्झे अपएसे नो सअद्धे
 नो समज्झे नो सपएसे ॥ दुपदेसिए णं भंते ! खंधे किं सअद्धे समज्झे सपदेसे उदाहु
 अणद्धे अमज्झे अपदेसे ?, गोयमा ! सअद्धे अमज्झे सपदेसे णो अणद्धे णो समज्झे
 णो अपदेसे । तिपदेसिए णं भंते ! खंधे पुच्छा, गोयमा ! अणद्धे समज्झे सपदेसे
 नो सअद्धे णो अमज्झे णो अपदेसे, जहा दुपदेसिओ तहा जे समा ते भाणियव्वा,
 जे विसमा ते जहा तिपएसिओ तहा भाणियव्वा । संखेज्जपदेसिए णं भंते ! खंधे किं
 सअद्धे ६ ? पुच्छा, गोयमा ! सिय सअद्धे अमज्झे सपदेसे सिय अणद्धे समज्झे सप-
 देसे जहा संखेज्जपदेसिओ तहा असंखेज्जपदेसिओऽवि अणंतपदेसिओऽवि ॥ २१४ ॥
 परमाणुपोग्गले णं भंते ! परमाणुपोग्गलं फुसमाणे किं देसेणं देसं फुसइ १ देसेणं
 देसे फुसइ २ देसेणं सव्वं फुसइ ३ देसेहिं देसं फुसइ ४ देसेहिं देसे फुसइ ५
 देसेहिं सव्वं फुसइ ६ सव्वेणं देसं फुसइ ७ सव्वेणं देसे फुसइ ८ सव्वेणं सव्वं
 फुसइ ९ ?, गोयमा ! णो देसेणं देसं फुसइ णो देसेणं देसे फुसइ णो देसेणं सव्वं
 फुसइ णो देसेहिं देसं फुसइ नो देसेहिं देसे फुसइ नो देसेहिं सव्वं फुसइ णो
 सव्वेणं देसं फुसइ णो सव्वेणं देसे फुसइ सव्वेणं सव्वं फुसइ, एवं परमाणुपोग्गले
 दुपदेसियं फुसमाणे सत्तमणवमेहिं फुसइ, परमाणुपोग्गले तिपएसियं फुसमाणे
 णिप्पच्छिमएहिं तिहिं फु०, जहा परमाणुपोग्गले तिपएसियं फुसाविओ एवं फुसावे-
 यव्वो जाव अणंतपएसिओ ॥ दुपएसिए णं भंते ! खंधे परमाणुपोग्गलं फुसमाणे
 पुच्छा, तइयनवमेहिं फुसइ, दुपदेसियं फुसमाणो पढमतइयसत्तमणवमेहिं फुसइ,

दुपदेसिओ तिपदेसियं फुसमाणो आदिहएहि य पच्छिहएहि य तिहिं फुसइ, मज्झि-
मएहिं तिहिं विपडिसेहेयव्वं, दुपदेसिओ जहा तिपदेसियं फुसाविओ एवं फुसावेयव्वो
जाव अणंतपएसियं । तिपएसिए णं भंते ! खंधे परमाणुपोग्गलं फुसमाणे पुच्छा,
तइयच्छट्ठणवमेहिं फुसइ, तिपएसिओ दुपएसियं फुसमाणो पढमएणं तडएणं चउ-
त्थच्छट्ठसत्तमणवमेहिं फुसइ, तिपएसिओ तिपएसियं फुसमाणो सव्वेसुवि ठाणेसु
फुसइ, जहा तिपएसिओ तिपदेसियं फुसाविओ एवं तिपदेसिओ जाव अणंतपएसि-
एणं संजोएयव्वो, जहा तिपएसिओ एवं जाव अणंतपएसिओ भाणियव्वो ॥२१५॥
परमाणुपोग्गले णं भंते ! कालओ केवच्चिरं होइ ?, गोयमा ! जहन्नेणं एगं समयं
उक्कोसेणं असंखेज्जं कालं, एवं जाव अणंतपएसिओ । एगपदेसोगाढे णं भंते !
पोग्गले सेए तम्मि वा ठाणे अन्नंमि वा ठाणे कालओ केवच्चिरं होइ ?, गोयमा !
जह० एगं समयं उक्को० आवलियाए असंखेज्जइभागं, एवं जाव असंखेज्जपदेसो-
गाढे । एगपदेसोगाढे णं भंते ! पोग्गले निरेए कालओ केवच्चिरं होइ ?, गोयमा !
जहन्नेणं एगं समयं उक्कोसेणं असंखेज्जं कालं, एवं जाव असंखेज्जपदेसोगाढे । एग-
गुणकाले णं भंते ! पोग्गले कालओ केवच्चिरं होइ ?, गोयमा ! जह० एगं समयं
उ० असंखेज्जं कालं एवं जाव अणंतगुणकाले, एवं वन्नगंधरसफास० जाव अणंत-
गुणलुक्खे, एवं सुहुमपरिणए पोग्गले एवं वायरपरिणए पोग्गले । सहपरिणए णं
भंते ! पोग्गले कालओ केवच्चिरं होइ ?, गोयमा ! ज० एगं समयं उ० आवलियाए
असंखेज्जइभागं, असहपरिणए जहा एगगुणकाले ॥ परमाणुपोग्गलस्स णं भंते !
अंतरं कालओ केवच्चिरं होइ ?, गोयमा ! जहन्नेणं एगं समयं उक्कोसेणं असंखेज्जं
कालं, दुपएसियस्स णं भंते ! खंधस्स अंतरं कालओ केवच्चिरं होइ ?, गोयमा !
जहन्नेणं एगं समयं उक्कोसेणं अणंतं कालं, एवं जाव अणंतपएसिओ । एगपएसो-
गाढस्स णं भंते ! पोग्गलस्स सेयस्स अंतरं कालओ केवच्चिरं होइ ?, गोयमा !
जहन्नेणं एगं समयं उक्कोसेणं असंखेज्जं कालं, एवं जाव असंखेज्जपएसोगाढे । एग-
पएसोगाढस्स णं भंते ! पोग्गलस्स निरेयस्स अंतरं कालओ केवच्चिरं होइ ?,
गोयमा ! जहन्नेणं एगं समयं उक्कोसेणं आवलियाए असंखेज्जइभागं, एवं जाव असं-
खेज्जपएसोगाढे । वन्नगंधरसफाससुहुमपरिणयवायरपरिणयागं एएसिं जं चेव संचि-
ट्ठणा तं चेव अंतरंपि भाणियव्वं । सहपरिणयस्स णं भंते ! पोग्गलस्स अंतरं
कालओ केवच्चिरं होइ ?, गोयमा ! जहन्नेणं एगं समयं उक्कोसेणं असंखेज्जं कालं ।
असहपरिणयस्स णं भंते ! पोग्गलस्स अंतरं कालओ केवच्चिरं होइ ?, गोयमा !
जहन्नेणं एगं समयं उक्कोसेणं आवलियाए असंखेज्जइभागं ॥ २१६ ॥ एयस्स णं

भंते ! दब्बट्टाणाउयस्स खैत्तट्टाणाउयस्स ओगाहणट्टाणाउयस्स भावट्टाणाउयस्स
 कयरे २ जाव विसेसाहिया वा ? गोयमा ! सव्वत्थोवे खैत्तट्टाणाउए ओगाहणट्टा-
 णाउए असंखेज्जगुणे दब्बट्टाणाउए असंखेज्जगुणे भावट्टाणाउए असंखेज्जगुणे-
 खैत्तोगाहणदब्बे भावट्टाणाउयं च अप्पवहुं । खैत्ते सव्वत्थोवे सेसा ठाणा असं-
 खेज्जा ॥ १ ॥ २१७ ॥ नेरइया णं भंते ! किं सारंभा सपरिग्गहा उदाहु अणारंभा
 अपरिग्गहा ? गोयमा ! नेरइया सारंभा सपरिग्गहा नो अणारंभा णो अपरि-
 ग्गहा । से केणट्ठेणं जाव अपरिग्गहा ? गोयमा ! नेरइया णं पुढविकायं समारंभंति
 जाव तसकायं समारंभंति सरीरा परिग्गहिया भवंति कम्मा परिग्गहिया भवंति
 सच्चित्ताचित्तमीसयाइं दब्बाइं परि० भ०, से तेणट्ठेणं तं चेव । असुरकुमारा णं
 भंते ! किं सारंभा ४ ? पुच्छा, गोयमा ! असुरकुमारा सारंभा सपरिग्गहा नो अणा-
 रंभा अप० । से केणट्ठेणं ? गोयमा ! असुरकुमारा णं पुढविकायं समारंभंति
 जाव तसकायं समारंभंति सरीरा परिग्गहिया भवंति कम्मा परिग्गहिया भवंति
 भवणा परि० भवंति देवा देवीओ मणुस्सा मणुस्सीओ तिरिक्खजोणिया तिरिक्ख-
 जोणिणीओ परिग्गहियाओ भवंति आसणसयणभंडमत्तोवगरणा परिग्गहिया भवंति
 सच्चित्ताचित्तमीसयाइं दब्बाइं परिग्गहियाइं भवंति से तेणट्ठेणं तहेव एवं जाव
 थणियकुमारा । एगिंदिया जहा नेरइया । वेइंदिया णं भंते ! किं सारंभा सपरि-
 ग्गहा तं चेव जाव सरीरा परिग्गहिया भवंति वाहिरिया भंडमत्तोवगरणा परि०
 भवंति सच्चित्ताचित्त० जाव भवंति एवं जाव चउरिदिया । पंचेदियतिरिक्खजोणिया
 णं भंते ! तं चेव जाव कम्मा परि० भवन्ति टंका कूडा सेला सिहरी, पब्भारा
 परिग्गहिया भवंति जलथलविलगुहालेणा परिग्गहिया भवंति उज्झरनिज्झरचिल्ल-
 पल्लवप्पिणा परिग्गहिया भवंति अगडतडागदहनईओ वाविपुक्खरिणीदीहिया
 गुंजालिया सरा सरपंतियाओ सरसरपंतियाओ विलपंतियाओ परिग्गहियाओ भवंति
 आरामुज्जाणा काणणा वणाइं वणसंडाइं वणराईओ परिग्गहियाओ भवन्ति देवउ-
 लसभापवाथूभाखाइयपरिखाओ परिग्गहियाओ भवंति पागाँरट्टालगचरियदारगो-
 पुरा परिग्गहिया भवंति पासायघरंसरणलेणआवणा परिग्गहिया भवंति सिंघाडगति-
 गचउक्कचच्चरचउम्मुहमहापहा परिग्गहिया भवंति सगडरहजाणजुग्गगिह्निथिह्निसी-
 यंसंदमाणियाओ परिग्गहियाओ भवंति लोहीलोहकंडाहकडुच्छुया परिग्गहिया
 भवंति भवणा परिग्गहिया भवंति देवा देवीओ मणुस्सा मणुस्सीओ तिरिक्खजो-
 णिया तिरिक्खजोणिणीओ आसणसयणखंभंडसच्चित्ताचित्तमीसयाइं दब्बाइं परि-
 ग्गहियाइं भवंति से तेणट्ठेणं०, (जहां) तिरिक्खजोणिया तहा मणुस्सावि

भाणियव्वा, वाणमंतरजोइसवेमाणिया जहा भवणवासी तहा नैयव्वा ॥ २१८ ॥
 पंच हेऊ पण्णत्ता, तंजहा-हेउं जाणइ हेउं पासइ हेउं वुज्झइ हेउं अभिसमाग-
 च्छइ हेउं छउमत्थमरणं मरइ ॥ पंच हेऊ प०, तंजहा-हेउणा जाणइ जाव
 हेउणा छउमत्थमरणं मरइ ॥ पंच हेऊ पण्णत्ता, तंजहा-हेउं न जाणइ जाव हेउं
 अन्नाणमरणं मरइ ॥ पंच हेऊ पण्णत्ता, तंजहा-हेउणा न जाणइ जाव हेउणा अण्णाण-
 मरणं मरइ ॥ पंच अहेऊ पण्णत्ता, तंजहा-अहेउं जाणइ जाव अहेउं केवल्लिमरणं
 मरइ ॥ पंच अहेऊ पण्णत्ता, तंजहा-अहेउणा जाणइ जाव अहेउणा केवल्लिमरणं
 मरइ ॥ पंच अहेऊ पण्णत्ता, तंजहा-अहेउं न जाणइ जाव अहेउं छउमत्थमरणं
 मरइ ॥ पंच अहेऊ पण्णत्ता, तंजहा-अहेउणा न जाणइ जाव अहेउणा छउमत्थमरणं
 मरइ । सेवं भंते ! २ त्ति ॥ २१९ ॥ पंचमे सए सत्तमो उद्देसो समत्तो ॥

तेणं कालेणं २ जाव परिसा पडिगया, तेणं कालेणं २ समणस्स ३ जाव अंते-
 वासी नारयपुत्ते नामं अणगारे पगइभइए जाव विहरइ, तेणं कालेणं २ समणस्स
 ३ जाव अंतेवासी नियंठिपुत्ते णामं अण० पगइभइए जाव विहरइ, तए णं से
 नियंठिपुत्ते अण० जेणामेव नारयपुत्ते अणगारे तेणेव उवागच्छइ २ नारयपुत्तं
 अण० एवं वयासी-सव्वा पोग्गला ते अज्जो ! किं सअड्ढा समज्झा सपएसा उदाहु
 अणड्ढा अमज्झा अपएसा ?, अज्जोत्ति नारयपुत्ते अणगारे नियंठिपुत्तं अणगारं एवं
 वयासी-सव्वपोग्गला मे अज्जो ! सअड्ढा समज्झा सपदेसा नो अणड्ढा अमज्झा
 अपएसा, तए णं से नियंठिपुत्ते अणगारे नारयपुत्तं अ० एवं वदासी-जइ णं
 ते अज्जो ! सव्वपोग्गला सअड्ढा समज्झा सपदेसा नो अणड्ढा अमज्झा अपदेसा
 किं दव्वादेसेणं अज्जो ! सव्वपोग्गला सअड्ढा समज्झा सपदेसा नो अणड्ढा अमज्झा
 अपदेसा ? खेत्तादेसेणं अज्जो ! सव्वपोग्गला सअड्ढा समज्झा सपएसा तहेव चेव,
 कालादेसेणं तं चेव, भावादेसेणं अज्जो ! तं चेव, तए णं से नारयपुत्ते अणगारे
 नियंठिपुत्तं अणगारं एवं वदासी-दव्वादेसेणवि मे अज्जो ! सव्वपोग्गला सअड्ढा
 समज्झा सपदेसा नो अणड्ढा अमज्झा अपदेसा खेत्ताएसेणवि सव्वे पोग्गला
 सअड्ढा तह चेव कालादेसेणवि, तं चेव भावादेसेण वि । तए णं से नियंठिपुत्ते
 अण० नारयपुत्तं अणगारं एवं वयासी-जइ णं अज्जो ! दव्वादेसेणं सव्वपोग्गला
 सअड्ढा समज्झा सपएसा नो अणड्ढा अमज्झा अपएसा, एवं ते परमाणुपोग्गलेवि
 सअड्ढे समज्झे सपएसे णो अणड्ढे अमज्झे अपएसे, जइ णं अज्जो ! खेत्तादेसेणवि
 सव्वपोग्गला सअ० ३ जाव एवं ते एगपएसोगाढेवि पोग्गले सअड्ढे समज्झे सप-
 एसे, जइ णं अज्जो ! कालादेसेणं सव्वपोग्गला सअड्ढा समज्झा सपएसा, एवं

ते एगसमयठिईएवि पोग्गले ३ तं चेव, -जइ णं अज्जो ! भावादेसेणं सव्वपोग्गला सअह्मा समज्झा सपएसा, एवं ते एगगुणकालएवि पोग्गले सअ० ३ तं चेव, अह ते एवं न भवइ तो जं वयसि दव्वादेसेणवि सव्वपोग्गला सअ० ३ नो अणह्मा अमज्झा अपदेसा एवं खेत्तादेसेणवि काला० भावादेसेणवि तन्नं मिच्छा, तए णं से नारयपुत्ते अणगारे नियंठिपुत्तं अ० एवं वयासी-नो खलु वयं देवा० एयमट्ठं जाणामो पासामो, जइ णं देवा० नो गिलायंति परिकहितए तं इच्छामि णं देवा० अंतिए एयमट्ठं सोच्चा निसम्म जाणित्तए, तए णं से नियंठिपुत्ते अणगारे नारयपुत्तं अणगारं एवं वयासी-दव्वादेसेणवि मे अज्जो सव्वे पोग्गला सपदेसावि अपदेसावि अणंता खेत्तादेसेणवि एवं चेव कालादेसेणवि भावादेसेणवि एवं चेव ॥ जे दव्वओ अपदेसे से खेत्तओ नियमा अपदेसे कालओ सिय सपदेसे सिय अपदेसे भावओ सिय सपदेसे सिय अपदेसे । जे खेत्तओ अपदेसे से दव्वओ सिय सपदेसे सिय अपदेसे कालओ भयणाए भावओ भयणाए । जहा खेत्तओ एवं कालओ भावओ ॥ जे दव्वओ सपदेसे से खेत्तओ सिय सपदेसे सिय अपदेसे; एवं कालओ भावओवि, जे खेत्तओ सपदेसे से दव्वओ नियमा सपदेसे कालओ भयणाए भावओ भयणाए जहा दव्वओ तहा कालओ भावओवि ॥ एएसि णं भंते ! पोग्गलाणं दव्वादेसेणं खेत्तादेसेणं कालादेसेणं भावादेसेणं सपदेसाणं य अपदेसाणं य कयरे २ जाव विसैसाहिया वा ?, नारयपुत्ता ! सव्वत्थोवा पोग्गला भावादेसेणं अपदेसा कालादेसेणं अपदेसा असंखेज्जगुणा दव्वादेसेणं अपदेसा असंखेज्जगुणा खेत्तादेसेणं अपदेसा असंखेज्जगुणा खेत्तादेसेणं चेव सपदेसा असंखेज्जगुणा दव्वादेसेणं सपदेसा विसैसाहिया कालादेसेणं सपदेसा विसैसाहिया भावादेसेणं सपदेसा विसैसाहिया । तए णं से नारयपुत्ते अणगारे नियंठिपुत्तं अणगारं वंदइ नमंसइ नियंठिपुत्तं अणगारं वंदित्ता णमंसित्ता एयमट्ठं सम्मं विणएणं भुज्जो २ खामेइ २ ता संजमेणं तवसा अप्पाणं भावेमाणे विहरइ ॥ २२० ॥ भन्तेति भगवं गोयमे जाव एवं वयासी-जीवा णं भंते ! किं वड्ढंति हायंति अवट्ठिया ?, गोयमा ! जीवा णो वड्ढंति नो हायंति अवट्ठिया । नेरइया णं भंते ! किं वड्ढंति हायंति अवट्ठिया ?, गोयमा ! नेरइया वड्ढंतिवि हायंतिवि अवट्ठियावि, जहा नेरइया एवं जाव वेमाणिया । सिद्धा णं भंते ! पुच्छा, गोयमा ! सिद्धा वड्ढंति नो हायंति अवट्ठियावि ॥ जीवा णं भंते ! केवइयं कालं अवट्ठिया [वि] ?, सव्वद्धं । नेरइया णं भंते ! केवइयं कालं वड्ढंति ?, गोयमा ! ज० एणं समयं उक्को० आवलियाए असंखेज्जइमाणं, एवं हायंति, नेरइया णं भंते ! केवइयं कालं अवट्ठिया ?,

गोयमा ! जहन्नेणं एगं समयं उक्को० चउव्वीसं मुहुत्ता, एवं सत्तसुवि पुढवीसु वड्ढंति हायंति भाणियव्वं, नवरं अवट्ठिएसु इमं नाणत्तं, तंजहा-रयणप्पभाए पुढवीए अडतालीसं मुहुत्ता सक्करं० चोइस राइंदियाइं वालु० मासं पंक० दो मासा धूम० चत्तारि मासा तमाए अट्ठ मासा तमतमाए बारस मासा । असुरकुमारावि वड्ढंति हायंति जहा नेरइया, अवट्ठिया जह० एगं समयं उक्को० अट्ठचत्तालीसं मुहुत्ता, एवं दसविहावि, एगिदिया वड्ढंतिवि हायंतिवि अवट्ठियावि, एएहिं तिहिंवि जहन्नेणं एक्कं समयं उक्को० आवलियाए असंखेज्जइभागं, बेइंदिया वड्ढंति हायंति तहेव, अवट्ठिया ज० एक्कं समयं उक्को० दो अंतोमुहुत्ता, एवं जाव चउरिंदिया, अवसेसा सव्वे वड्ढंति हायंति तहेव, अवट्ठियाणं णाणत्तं इमं, तं०-संमुच्छिमपंचिदियतिरिक्खजोणियाणं दो अंतोमुहुत्ता, गव्वभवक्कंतियाणं चउव्वीसं मुहुत्ता, संमुच्छिममणुस्साणं अट्ठचत्तालीसं मुहुत्ता, गव्वभवक्कंतियमणुस्साणं चउव्वीसं मुहुत्ता, वाणमंतरजोइससोहम्मीसाणेसु अट्ठचत्तालीसं मुहुत्ता, सणंकुमारे अट्ठारस राइंदियाइं चत्तालीस य मुहुत्ता, माहिंदे चउवीसं राइंदियाइं वीस य मु०, वंभलोए पंचचत्तालीसं राइंदियाइं, लंतए नउइ राइंदियाइं, महासुक्के सट्ठि राइंदियसयं, सहस्सारे दो राइंदियसयाइं, आणयपाणयाणं संखेज्जा मासा, आरणच्चुयाणं संखेज्जाइं वासाइं, एवं गेवेज्जदेवाणं विजयवेजयंतजयंतअपराजियाणं असंखेज्जाइं वाससंहस्साइं, सव्वट्ठसिद्धे य पलिओवमस्स असंखेज्जइभागो, एवं भाणियव्वं, वड्ढंति हायंति जह० एक्कं समयं उ० आवलियाए असंखेज्जइभागं, अवट्ठियाणं जं भणियं । सिद्धा णं भंते ! केवइयं कालं वड्ढंति ?, गोयमा ! जह० एक्कं समयं उक्को० अट्ठ समया, केवइयं कालं अवट्ठिया ?, गोयमा ! जह० एक्कसमयं उक्को० छम्मासा ॥ जीवा णं भंते ! किं सोवचया सावचया सोवचयसावचया निरुवचयनिरवचया ?, गोयमा ! जीवा णो सोवचया नो सावचया णो सोवचयसावचया निरुवचयनिरवचया । एगिंदिया तइयपए, सेसा जीवा चउहिंवि पएहिंवि भाणियव्वा, सिद्धा णं भंते ! पुच्छा, गोयमा ! सिद्धा सोवचया णो सावचया णो सोवचयसावचया निरुवचयनिरवचया । जीवा णं भंते ! केवइयं कालं निरुवचयनिरवचया ?, गोयमा ! सव्वद्धं, नेरइया णं भंते ! केवइयं कालं सोवचया ?, गोयमा ! जह० एक्कं समयं उ० आवलियाए असंखेज्जइभागं । केवइयं कालं सावचया ? एवं चेव । केवइयं कालं सोवचयसावचया ?, एवं चेव । केवइयं कालं निरुवचयनिरवचया ?, गोयमा ! ज० एक्कं समयं उक्को० बारसमु० एगिंदिया सव्वे सोवचयसावचया सव्वद्धं सेसा सव्वे सोवचयावि सावचयावि सोवचयसावचयावि निरुवचयनिरवचयावि जहन्नेणं

एगं समयं उक्कोसेणं आवलियाए असंखेज्जभागं अवट्ठिएहिं वक्कंतियकालो भाणियव्वो
सिद्धा णं भंते ! केवइयं कालं सोवचया ?, गोयमा ! जहं० एक्कं समयं उक्को० अट्ठ
समया, केवइयं कालं निरुवचयनिरवचया ?, जहं० एक्कं समयं उ० छम्मासा !
सेवं भंते ! २ ति ॥ २२१ ॥ पंचमसए अट्ठमो उद्देसो समत्तो ॥

तेणं कालेणं तेणं समएणं जाव एवं वयासी-किमिदं भंते ! नगरं रायगिहंति
पवुच्चइ ?, किं पुढवी नगरं रायगिहंति पवुच्चइ, आऊ नगरं रायगिहंति पवुच्चइ ?
जाव वणस्सइ ?, जहा एयणुद्देसए पंचिंदियतिरिक्खजोणियाणं वत्तव्वया तहा भाणि-
यव्वं जाव सच्चित्ताचित्तमीसियाइं दव्वाइं नगरं रायगिहंति पवुच्चइ ?, गोयमा ! पुढ-
वीवि नगरं रायगिहंति पवुच्चइ जाव सच्चित्ताचित्तमीसियाइं दव्वाइं नगरं रायगिहंति
पवुच्चइ । से केणट्ठेणं ?, गोयमा ! पुढवी जीवाइय अजीवाइय नगरं रायगिहंति
पवुच्चइ जाव सच्चित्ताचित्तमीसियाइं दव्वाइं जीवाइय अजीवाइय नगरं रायगिहंति
पवुच्चइ से तेणट्ठेणं तं चेव ॥ २२२ ॥ से नूणं भंते ! दिया उज्जोए राइं अंध-
यारे ?, हंता गोयमा ! जाव अंधयारे । से केणट्ठेणं० ?, गोयमा ! दिया सुभा
पोग्गला सुभे पोग्गलपरिणामे राइं असुभा पोग्गला असुभे पोग्गलपरिणामे से
तेणट्ठेणं० । नेरइयाणं भंते ! किं उज्जोए अंधयारे ?, गोयमा ! नेरइयाणं नो
उज्जोए अंधयारे, से केणट्ठेणं० ?, गोयमा ! नेरइयाणं असुहा पोग्गला असुभे पोग्ग-
लपरिणामे से तेणट्ठेणं० । असुरकुमाराणं भंते ! किं उज्जोए अंधयारे ?, गोयमा !
असुरकुमाराणं उज्जोए नो अंधयारे । से केणट्ठेणं ?, गोयमा ! असुरकुमाराणं सुभा
पोग्गला सुभे पोग्गलपरिणामे, से तेणट्ठेणं एवं वुच्चइ, एवं जाव थणियकुमाराणं,
पुढविकाइया जाव तेइंदिया जहा नेरइया । चउरिंदियाणं भंते ! किं उज्जोए अंध-
यारे ?, गोयमा ! उज्जोएवि अंधयारेवि, से तेणट्ठेणं० ?, गोयमा ! चउरिंदियाणं
सुभासुभा पोग्गला सुभासुभे पोग्गलपरिणामे, से तेणट्ठेणं एवं जाव मणुस्साणं ।
वाणमंतरजोइसवेमाणिया जहा असुरकुमारा ॥ २२३ ॥ अत्थि णं भंते ! नेरइयाणं
तत्थगयाणं एवं पन्नायइ-समयाइ-वा आवलियाइ वा जाव ओसप्पिणीइ वा
उस्सप्पिणीइ वा ?, णो तिणट्ठे समट्ठे । से केणट्ठेणं जाव समयाइ वा आवलियाइ
वा ओसप्पिणीइ वा उस्सप्पिणीइ वा ?, गोयमा ! इहं तेसिं माणं इहं तेसि पमाणं
इहं तेसि पण्णायइ, तंजहा-समयाइ वा जाव उस्सप्पिणीइ वा, से तेणट्ठेणं जाव
नो एवं पण्णायए, तंजहा-समयाइ वा जाव उस्सप्पिणीइ वा, एवं जाव पंचेदि-
यतिरिक्खजोणियाणं, अत्थि णं भंते ! मणुस्साणं इहगयाणं एवं पन्नायइ, तंजहा-
समयाइ वा जाव उस्सप्पिणीइ वा ?, हंता ! अत्थि । से केणट्ठेणं ? गोयमा !

इहं तेसिं माणं इहं चेव तेसि एवं पण्णायइ, तंजहा-समयाइ वा जाव उस्सप्पि-
णीइ वा से तेण० वाणमंतरजोइसवेमाणियाणं जहा नेरइयाणं ॥ २२४ ॥ तेणं
कालेणं २ पासावच्चिज्जा [ते] थेरा भगवंतो जेणेव समणे भगवं महावीरे तेणेव
उवागच्छंति २ समणस्स भगवओ महावीरस्स अदूरसामंते ठिच्चा एवं वदासी-से
नूणं भंते ! असंखेजे लोए अणंता राइंदिया उप्पज्जिसु वा उप्पज्जंति वा उप्पज्जि-
स्संति वा विगच्छिसु वा विगच्छंति वा विगच्छिस्संति वा परिता राइंदिया उप्प-
ज्जिसु वा ३ विगच्छिसु वा ३ ?; हंता अज्जो ! असंखेजे लोए अणंता राइंदिया तं
चेव, से केणट्ठेणं जाव विगच्छिस्संति वा ?; से नूणं भंते ! अज्जो ! पासेणं अरहया
पुरिसादाणिणं सासए लोए बुइए अणाइए अणवदग्गे परित्ते परिवुडे हेट्ठा
विच्छिण्णे मज्झे संखित्ते उप्पि विसाले अहे पलियंकसंठिए मज्झे वरवइरविग्गहिए
उप्पि उद्धमुइंगाकारसंठिए तेसिं च णं सासयंसि लोगंसि अणादियंसि अणवदग्गंसि
परित्तंसि परिवुडंसि हेट्ठा विच्छिन्नंसि मज्झे संखित्तंसि उप्पि विसालंसि अहे पलियं-
कसंठियंसि मज्झे वरवइरविग्गहियंसि उप्पि उद्धमुइंगाकारसंठियंसि अणंता जीव-
घणा उप्पज्जित्ता २ निलीयंति परित्ता जीवघणा उप्पज्जित्ता २ निलीयंति से नूणं भूए
उप्पन्ने विगए परिणए अजीवेहिं लोकइ पलोकइ, जे लोकइ से लोए ?; हंता भगवं
[ते] !, से तेणट्ठेणं अज्जो ! एवं वुच्चइ असंखेजे तं चेव । तप्पभिइं च णं ते
पासावच्चिज्जा थेरा भगवंतो समणं भगवं महावीरं पच्चभिजाणंति सव्वत्थुं सव्वदरिसिं
तए णं ते थेरा भगवंतो समणं भगवं महावीरं वंदंति नमंसंति २ एवं वदासी-
इच्छामि णं भंते ! तुब्भं अंतिए चाउज्जामाओ धम्माओ पंचमहव्वइयं सप्पडिक्कमणं
धम्मं उवसंपज्जित्ता णं विहरित्तए, अहासुहं देवाणुप्पिया ! मा पडिवंधं करेह, तए
णं ते पासावच्चिज्जा थेरा भगवंतो जाव चरिमेहि, उस्सासनिस्सासेहिं सिद्धा जाव
सव्वदुक्खप्पहीणा अत्थेगइया देवां देवलोएसु उववन्ना ॥ २२५ ॥ कइविहा णं
भंते ! देवलोगा पणत्ता ?, गोयमा ! चउव्विहा देवलोगा पणत्ता, तंजहां-भवण-
वासिवाणमंतरजोइसियवेमाणियभेएण, भवणवासी दसविहा वाणमंतरा अट्ठविहा
जोइसिया पंचविहा वेमाणिया दुविहा । गाहा-किमियं रायगिहंति य उज्जोए अंध-
यार समए य । पासंतिवासि पुच्छा राइंदिय देवलोगा य ॥ १ ॥ सेवं भंते ! २
त्ति ॥ २२६ ॥ पंचमे सए नवमो उद्देसो समत्तो ॥

तेणं कालेणं तेणं समएणं चंपा नामं नयरी जहा पढमिल्लो उद्देसओ तहा नेयव्वो
एसोवि, नवरं चंदिमा भाणियव्वा ॥ २२७ ॥ पंचमे सए दसमो उद्देसो
समत्तो ॥ पंचमं सयं समत्तं ॥

गाहा—वेयण १ आहार २ महस्सवे य ३ सपएस ४ तमुए य ५ भविए ।
 ६ साली ७ पुढवी ८ कम्म ९ अन्नउत्थि १० दस छट्ठगंमि सए ॥ १ ॥ से नूणं
 भंते ! जे महावेयणे से महानिज्जरे जे महानिज्जरे से महावेदणे, महावेदणस्स य
 अप्पवेदणस्स य से सेए जे पसत्थनिज्जराए ?, हंता गोयमा ! जे महावेदणे एवं
 चेव । छट्ठसत्तमासु णं भंते ! पुढवीसु नेरइया महावेयणा ?, हंता ! महावेयणा, ते
 णं भंते ! समणेहिंतो निग्गंथेहिंतो महानिज्जरतरा ?, गोयमा ! णो तिण्हे समट्ठे,
 से केणट्ठेणं भंते ! एवं वुच्चइ जे महावेदणे जाव पसत्थनिज्जराए ?, गोयमा ! से
 जहानामए—दुवे वत्था सिया, एगे वत्थे कद्दमरागरत्ते एगे वत्थे खंजणरागरत्ते एएसि
 णं गोयमा ! दोण्हं वत्थाणं कयरे वत्थे दुधोयतराए चेव दुवामतराए चेव दुपरिक-
 म्मतराए चेव कयरे वा वत्थे सुधोयतराए चेव सुवामतराए चेव सुपरिकम्मतराए
 चेव, जे वा से वत्थे कद्दमरागरत्ते जे वा से वत्थे खंजणरागरत्ते ?, भगवं ! तत्थं
 णं जे से वत्थे कद्दमरागरत्ते से णं वत्थे दुधोयतराए चेव दुवामतराए चेव दुपरि-
 कम्मतराए चेव, एवामेव गोयमा ! नेरइयाणं पावाइं कम्माइं गाढीकयाइं चिक्कणी-
 कयाइं (अ) सिढिलीकयाइं खिलीभूयाइं भवंति संपगाढं पि य णं ते वेयणं वेदेमाणा
 णो महानिज्जरा णो महापज्जवसाणा भवंति, से जहा वा केइ पुरिसे अहिगरणं
 आउडेमाणे महया २ सदेणं महया २ घोसेणं महया २ परंपराघाएणं णो संचाएइ
 तीसे अहिगरणीए अहावायरे पोग्गले परिसाडित्तए एवामेव गोयमा ! नेरइ-
 याणं पावाइं कम्माइं गाढीकयाइं जाव नो महापज्जवसाणा भवंति, भगवं ! तत्थं
 जे से वत्थे खंजणरागरत्ते से णं वत्थे सुधोयतराए चेव सुवामतराए चेव सुपरिक-
 म्मतराए चेव, एवामेव गोयमा ! समणाणं निग्गंथाणं अहावायराइं कम्माइं सिढि-
 लीकयाइं निट्ठियाइं कडाइं विप्परिणामियाइं खिप्पामेव विद्धत्थाइं भवंति, जावइयं
 तावइयं पि णं ते वेयणं वेदेमाणा महानिज्जरा महापज्जवसाणा भवंति, से जहाना-
 मए—केइ पुरिसे सुक्कतणहत्थयं जायतेयंसि पक्खिवेज्जा से नूणं गोयमा ! से सुक्के
 तणहत्थए जायतेयंसि पक्खित्ते समाणे खिप्पामेव मसमसाविज्जइ ?, हंता ! मसम-
 साविज्जइ, एवामेव गोयमा ! समणाणं निग्गंथाणं अहावायराइं कम्माइं जाव महा-
 पज्जवसाणा भवंति, से जहानामए केइ पुरिसे तत्तंसि अयकवहंसि उदगविदू जाव
 हंता ! विद्धंसमागच्छइ, एवामेव गोयमा ! समणाणं निग्गंथाणं जाव महापज्जवसाणा
 भवंति, से तेणट्ठेणं जे महावेदणे से महानिज्जरे जाव निज्जराए ॥ २२८ ॥ कइ-
 विहे णं भंते ! करणे पन्नत्ते ?, गोयमा ! चउव्विहे करणे पन्नत्ते, तंजहा—मणकरणे
 वइकरणे कायकरणे कम्मकरणे । नेरइयाणं भंते ! कइविहे करणे पन्नत्ते ?, गोयमा !

चउव्विहे पन्नत्ते, तंजहा—मणकरणे वइकरणे कायकरणे कम्मकरणे ४ [चउ०],
 एवं पंचिदियाणं सव्वेसि चउव्विहे करणे पन्नत्ते । एगिदियाणं दुव्विहे—कायकरणे य
 कम्मकरणे य, विगलेंदियाणं ३—वइकरणे कायकरणे कम्मकरणे । नेरइयाणं भंते !
 किं करणओ असायं वेयणं वेयंति अकरणओ असायं वेयणं वेदेंति ?, गोयमा !
 नेरइयाणं करणओ असायं वेयणं वेयंति नो अकरणओ असायं वेयणं वेयंति, से
 केणट्ठेणं०, ? गोयमा ! नेरइयाणं चउव्विहे करणे पन्नत्ते, तंजहा—मणकरणे वइकरणे
 कायकरणे कम्मकरणे, इच्चेएणं चउव्विहेणं असुभेणं करणेणं नेरइया करणओ असायं
 वेयणं वेयंति नो अकरणओ, से तेणट्ठेणं० । असुरकुमाराणं किं करणओ अकर-
 णओ?, गोयमा ! करणओ नो अकरणओ, से केणट्ठेणं० ?, गोयमा ! असुरकुमाराणं
 चउव्विहे करणे पणत्ते, तंजहा—मणकरणे वइकरणे कायकरणे कम्मकरणे, इच्चेएणं
 सुभेणं करणेणं असुरकुमाराणं करणओ सायं वेयणं वेयंति नो अकरणओ, एवं जाव
 थणियकुमाराणं । पुढविकाइयाणं एवामेव पुच्छा, नवरं इच्चेएणं सुभासुभेणं करणेणं
 पुढविकाइया करणओ वेमायाए वेयणं वेयंति नो अकरणओ, ओरालियसरीरा सव्वे
 सुभासुभेणं वेमायाए । देवा सुभेणं सायं वेयणं वेयन्ति ॥ २२९ ॥ जीवा णं भंते !
 किं महावेयणा महानिज्जरा १ महावेदणा अप्पनिज्जरा २ अप्पवेदणा महानिज्जरा
 ३ अप्पवेदणा अप्पनिज्जरा ४ ?, गोयमा ! अत्थेगइया जीवा महावेदणा महानिज्जरा
 १ अत्थेगइया जीवा महावेयणा अप्पनिज्जरा २ अत्थेगइया जीवा अप्पवेदणा
 महानिज्जरा ३ अत्थेगइया जीवा अप्पवेदणा अप्पनिज्जरा ४ । से केणट्ठेणं० ?,
 गोयमा ! पडिमापडिवन्नए अणगारे महावेदणे महानिज्जरे छट्ठसत्तमासु पुढवीसु
 नेरइया महावेदणा अप्पनिज्जरा सेलेसिं पडिवन्नए अणगारे अप्पवेदणे महानिज्जरे
 अणुत्तरोववाइया देवा अप्पवेदणा अप्पनिज्जरा, सेवं भंते ! २ ति ॥—महावेदणे य वत्थे
 कइमखंजणमए य अहिगरणी । तणहत्थे य कवळे करण महावेदणा जीवा ॥ १ ॥
 ॥ २३० ॥ सेवं भंते ! सेवं भंते ! ति ॥ छट्ठसयस्स पढमो उद्देसो समत्तो ॥
 रायगिहं नगरं जाव एवं वयासी—आहारुद्देसो जो पन्नवणाए सो सव्वो निरवसेसो
 नेयव्वो । सेवं भंते ! सेवं भंते ! ति ॥ २३१ ॥ छट्ठे सए वीओ उद्देसो समत्तो ॥
 बहुकम्मवत्थपोग्गलपयोगसावीससां य साईए । कम्मट्ठिईत्थिसंजय सम्मट्ठिटी
 य सत्ती य ॥ १ ॥ भविए दंसण पज्जत्ते भासअपरित्त नाणजोगे य । उवओगा-
 हारगसुहुमचरिमवंधी य अप्पवहुं ॥ २ ॥ से नूणं भंते ! महाकम्मस्स महाकिरि-
 यस्स महासवस्स महावेदणस्स सव्वओ पोग्गला वज्झंति सव्वओ पोग्गला
 चिज्जंति सव्वओ पोग्गला उवचिज्जंति सया समियं च णं पोग्गला वज्झंति सया

समियं पोग्गला चिज्जंति सया समियं पोग्गला उवचिज्जंति सया समियं च णं तस्स
 आया दुरुवत्ताए दुवत्ताए दुगंधत्ताए दुरसत्ताए दुफासत्ताए अणिट्ठत्ताए अकंतं
 अप्पियं० असुभं० अमणुजं० अमणामत्ताए अणिच्छियत्ताए अभिज्झियत्ताए अह-
 त्ताए नो उट्ठत्ताए दुक्खत्ताए नो सुहत्ताए भुज्जो २ परिणमंति ?, हंता गोयमा !
 महाकम्मस्स तं चेव । से केणट्ठेणं० ?, गोयमा ! से जहानामए-वत्थस्स अहयस्स
 वा धोयस्स वा तंतुगयस्स वा आणुपुव्वीए परिभुज्जमाणस्स सव्वओ पोग्गला
 वज्जंति, सव्वओ पोग्गला चिज्जंति जाव परिणमंति से तेणट्ठेणं० । से नूणं भंते !
 अप्पासवस्स अप्पकम्मस्स अप्पकिरियस्स अप्पवेदणस्स सव्वओ पोग्गला भिज्जंति
 सव्वओ पोग्गला छिज्जंति सव्वओ पोग्गला विद्धंसंति सव्वओ पोग्गला परिविद्धंसंति
 सया समियं पोग्गला भिज्जंति सव्वओ पोग्गला छिज्जंति विद्धंसंति परिविद्धंसंति
 सया समियं च णं तस्स आया दुरुवत्ताए पसत्थं नेयव्वं जाव सुहत्ताए नो दुक्ख-
 त्ताए भुज्जो २ परिणमंति ?, हंता गोयमा ! जाव परिणमंति । से केणट्ठेणं० ?,
 गोयमा ! से जहानामए-वत्थस्स जल्लियस्स वा पंकिरियस्स वा मइल्लियस्स वा रंइल्लि-
 यस्स वा आणुपुव्वीए परिकम्मिज्जमाणस्स सुद्धेणं वारिणा धोवेमाणस्स पोग्गला
 भिज्जंति जाव परिणमंति से तेणट्ठेणं० ॥ २३२ ॥ वत्थस्स णं भंते ! पोग्गलोवचए
 किं पओगसा वीससा ?, गोयमा ! पओगंसावि वीससावि । जहा णं भंते ! वत्थस्स
 णं पोग्गलोवचए पओगसावि वीससावि तहा णं जीवाणं कम्मोवचए किं पओगसा
 वीससा ?, गोयमा ! पओगसा नो वीससा, से केणट्ठेणं० ?, गोयमा ! जीवाणं
 तिविहे पओगे पणत्ते, तंजहा-मणप्पओगे वइ० का०, इच्चेएणं तिविहेणं पओगेणं
 जीवाणं कम्मोवचए पओगसा नो वीससा, एवं सव्वेसिं पंचेदियाणं तिविहे पओगे
 भाणियव्वे, पुढविकाइयाणं एगविहेणं पओगेणं एवं जीव वणस्सइकाइयाणं, विग-
 ल्दिद्याणं दुविहे पओगे पणत्ते, तंजहा-वइपओगे य कायप्पओगे य, इच्चेएणं
 दुविहेणं पओगेणं कम्मोवचए पओगसा नो वीससा, से एणट्ठेणं जाव नो वीससा
 एवं जस्स जो पओगो जाव वेमाणियाणं ॥ २३३ ॥ वत्थस्स णं भंते ! पोग्गलो-
 वचए किं साइए सपज्जवसिए १ साइए अपज्जवसिए २ अणाइए सपज्जं० ३
 अणा० अप० ४ ?, गोयमा ! वत्थस्स णं पोग्गलोवचए साइए सपज्जवसिए नो
 साइए अप० नो अणा० स० नो अणा० अप० । जहा णं भंते ! वत्थस्स
 पोग्गलोवचए साइए सपज्जं० नो साइए अप० नो अणा० सप० नो अणा०
 अप० तहा णं जीवाणं कम्मोवचए पुच्छा, गोयमा ! अत्थेगइयाणं जीवाणं कम्मो-
 वचए साइए सपज्जवसिए अत्थे० अणाइए सपज्जवसिए अत्थे० अणाइए अप-

ज्जवसिए नो चेव णं जीवाणं कम्मोवचए साइए अप० । से केण० ?, गोयमा !
 इरियावहियावंधयस्स कम्मोवचए साइए सप० भवसिद्धियस्स कम्मोवचए अणा-
 इए सपज्जवसिए अभवसिद्धियस्स कम्मोवचए अणाइए अपज्जवसिए, से तेणट्ठेणं
 गोयमा ! एवं वुच्चइ अत्थे० जीवाणं कम्मोवचए साइए नो चेव णं जीवाणं
 कम्मोवचए साइए अपज्जवसिए, वत्थे णं भंते ! किं साइए सपज्जवसिए चउ-
 भंगो ?, गोयमा ! वत्थे साइए सपज्जवसिए अवसेसा तिन्निवि पडिसेहेयव्वा । जहा
 णं भंते ! वत्थे साइए सपज्जवसिए नो साइए अपज्ज० नो अणाइए सप० नो
 अणाइए अपज्जवसिए तहा णं जीवाणं किं साइया सपज्जवसिया ? चउभंगो पुच्छा,
 गोयमा ! अत्थेगइया साइया सपज्जवसिया चत्तारिवि भाणियव्वा । से केणट्ठेणं० ?,
 गोयमा ! नेरइया तिरिक्खजोणिया मणुस्सा देवा गइरागइं पडुच्च साइया सप-
 ज्जवसिया सिद्धि (द्धा) गइं पडुच्च साइया अपज्जवसिया, भवसिद्धिया लद्धिं पडुच्च
 अणाइया सपज्जवसिया अभवसिद्धिया संसारं पडुच्च अणाइया अपज्जवसिया, से
 तेणट्ठेणं० ॥ २३४ ॥ कइ णं भंते ! कम्मप्पगडीओ पण्णत्ताओ ?, गोयमा ! अट्ठ
 कम्मप्पगडीओ प०, तंजहा-णाणावरणिज्जं दरिसणावरणिज्जं जाव अंतराइयं ।
 नाणावरणिज्जस्स णं भंते ! कम्मस्स केवइयं कालं वंधठिई प० ?, गोयमा ! जह०
 अंतोमुहुत्तं उक्को० तीसं सांगरोवमकोडाकोडीओ तिन्नि य वाससहस्साइं अवाहा
 अवाहूणिया कम्मट्ठिई कम्मनिसेओ, एवं दरिसणावरणिज्जंपि, वेदणिज्जं जह० दो
 समया उक्को० जहा नाणावरणिज्जं, मोहणिज्जं जह० अंतोमुहुत्तं उक्को० सत्तरि साग-
 रोवमकोडाकोडीओ, सत्त य वाससहस्साणि अवाहा, अवाहूणिया कम्मठिई कम्मनि-
 सेगो, आउगं जहन्नेणं अंतोमुहुत्तं उक्को० तेत्तीसं सांगरोवमाणि पुव्वकोडितिभाग-
 मव्वभेहियाणि, (पुव्वकोडितिभागो अवाहा, अवाहूणिया) कम्मट्ठिई कम्मनिसेओ,
 नामगोयाणं जह० अट्ठ मुहुत्ता उक्को० वीसं सांगरोवमकोडाकोडीओ दोणि य वास-
 सहस्साणि अवाहा, अवाहूणिया कम्मट्ठिई कम्मनिसेओ, अंतराइयं जहा नाणा-
 वरणिज्जं ॥ २३५ ॥ नाणावरणिज्जं णं भंते ! कम्मं किं इत्थी वंधइ पुरिसो वंधइ
 नपुंसओ वंधइ ? णोइत्थी नोपुरिसो नोनपुंसओ वंधइ ? गोयमा ! इत्थीवि वंधइ
 पुरिसोवि वंधइ नपुंसओवि वंधइ नोइत्थी नोपुरिसो नोनपुंसओ सिय वंधइ सिय
 नो वंधइ एवं आउगवज्जाओ सत्त कम्मप्पगडीओ ॥ आउगं णं भंते ! कम्मं किं
 इत्थी वंधइ पुरिसो वंधइ नपुंसओ वंधइ ? पुच्छा, गोयमा ! इत्थी सिय वंधइ
 सिय नो वंधइ, एवं तिन्निवि भाणियव्वा, नोइत्थी नोपुरिसो नोनपुंसओ न वंधइ ॥
 णाणावरणिज्जं णं भंते ! कम्मं किं संजए वंधइ असंजए० एवं संजयासंजए वंधइ

नोसंजएनोअसंजएनोसंजयासंजए वंधइ ?, गोयमा ! संजए सिय वंधइ सिय नो वंधइ असंजए वंधइ संजयासंजएवि वंधइ नोसंजएनोअसंजएनोसंजयासंजए न वंधइ, एवं आउगवज्जाओ सत्तवि, आउगे हेट्ठिल्ला तिन्नि भयणाए उवरिल्ले ण वंधइ ॥

णाणावरणिज्जं णं भंते ! कम्मं किं सम्मादिट्ठी वंधइ मिच्छादिट्ठी वंधइ सम्मामिच्छदिट्ठी वंधइ ?, गोयमा ! सम्मादिट्ठी सिय वंधइ सिय नो वंधइ, मिच्छदिट्ठी वंधइ सम्मामिच्छदिट्ठी वंधइ, एवं आउगवज्जाओ सत्तवि, आउए हेट्ठिल्ला दो भयणाए सम्मामिच्छदिट्ठी न वंधइ ॥

णाणावरणिज्जं किं सण्णी वंधइ असत्ती वंधइ नोसण्णी-नोअसण्णी वंधइ ?, गोयमा ! सत्ती सिय वंधइ सिय नो वंधइ असत्ती वंधइ नोसत्तीनोअसत्ती न वंधइ, एवं वेदणिज्जाउगवज्जाओ छ कम्मप्पगडीओ, वेदणिज्जं हेट्ठिल्ला दो वंधंति, उवरिल्ले भयणाए, आउगं हेट्ठिल्ला दो भयणाए, उवरिल्लो न वंधइ ॥

णाणावरणिज्जं कम्मं किं भवसिद्धिए वंधइ अभवसिद्धिए वंधइ नोभवसिद्धिएनोअभवसिद्धिए वंधइ ?, गोयमा ! भवसिद्धिए भयणाए अभवसिद्धिए वंधइ नोभवसिद्धिएनोअभवसिद्धिए न वंधइ, एवं आउगवज्जाओ सत्तवि, आउगं हेट्ठिल्ला दो भयणाए उवरिल्लो न वंधइ ॥

णाणावरणिज्जं किं चक्खुदंसणी वंधइ अचक्खुदंस० ओहिदंस० केवलदंस० ?, गोयमा ! हेट्ठिल्ला तिन्नि भयणाए उवरिल्ले ण वंधइ, एवं वेदणिज्जवज्जाओ सत्तवि, वेदणिज्जं हेट्ठिल्ला तिन्नि वंधंति केवलदंसणी भयणाए ॥

णाणावरणिज्जं कम्मं किं पज्जत्तओ वंधइ अपज्जत्तओ वंधइ नोपज्जत्तएनोअपज्जत्तए वंधइ ?, गोयमा ! पज्जत्तए भयणाए, अपज्जत्तए वंधइ, नोपज्जत्तएनोअपज्जत्तए न वंधइ, एवं आउगवज्जाओ, आउगं हेट्ठिल्ला दो भयणाए उवरिल्ले ण वंधइ ॥

णाणावरणिज्जं किं भासए वंधइ अभासए० ?, गोयमा ! दोवि भयणाए, एवं वेयणिज्जवज्जाओ सत्त, वेदणिज्जं भासए वंधइ अभासए भयणाए ॥

णाणावरणिज्जं किं परित्ते वंधइ अपरित्ते वंधइ नोपरित्तेनोअपरित्ते वंधइ ?, गोयमा ! परित्ते भयणाए अपरित्ते वंधइ नोपरित्तेनोअपरित्ते न वंधइ, एवं आउगवज्जाओ सत्त कम्मप्पगडीओ, आउए परित्तोवि अपरित्तोवि भयणाए, नोपरित्तोवि नोअपरित्तो न वंधइ ॥

णाणावरणिज्जं कम्मं किं आभिणिवोहियनाणी वंधइ सुयनाणी ओहिनाणी मणपज्जेवनाणी केवलनाणी वं० ?, गोयमा ! हेट्ठिल्ला चत्तारि भयणाए केवलनाणी न वंधइ, एवं वेदणिज्जवज्जाओ सत्तवि, वेदणिज्जं हेट्ठिल्ला चत्तारि वंधंति केवलनाणी भयणाए ॥

णाणावरणिज्जं किं मइअन्नाणी वंधइ सुय० विभंग० ?, गोयमा ! (सन्वेवि) आउगवज्जाओ सत्तवि वंधंति, आउगं भयणाए ॥

णाणावरणिज्जं किं मणजोगी वंधइ वय० काय० अजोगी वंधइ ?, गोयमा ! हेट्ठिल्ला तिन्नि भयणाए अजोगी न वंधइ, एवं वेदणिज्ज-

वज्जाओ, वेदणिज्जं हेट्ठिआ वंधंति अजोगी न वंधइ ॥ णाणावरणिज्जं किं सागारो-
 वउत्ते वंधइ अणागारोवउत्ते वंधइ ?, गोयमा ! अट्ठसुवि भयणाए ॥ णाणावरणिज्जं
 किं आहारए वंधइ अणाहारए वंधइ ?, गोयमा ! दोवि भयणाए, एवं वेदणिज्जा-
 उगवज्जाणं छण्हं, वेदणिज्जं आहारए वंधइ अणाहारए भयणाए, आउए आहा-
 रए भयणाए, अणाहारए न वंधइ ॥ णाणावरणिज्जं किं सुहुमे वंधइ वायरे वंधइ
 नोसुहुमेनोवादरे वंधइ ?, गोयमा ! सुहुमे वंधइ वायरे भयणाए नोसुहुमेनोवादरे न
 वंधइ, एवं आउगवज्जाओ संत्तवि, आउए सुहुमे वायरे भयणाए नोसुहुमेनोवायरे ण
 वंधइ ॥ णाणावरणिज्जं किं चरिमे अचरिमे वं० ?, गोयमा ! अट्ठवि भयणाए ॥ २३६ ॥
 एएसि णं भंते ! जीवाणं इत्थिवेदगाणं पुरिसवेदगाणं नपुंसगवेदगाणं अवेयगाण
 य कयरे, २ अप्पा वा ४ ?, गोयमा ! सव्वत्थोवा जीवा पुरिसवेदगा इत्थिवेदगा
 संखेज्जगुणा अवेदगा अणंतगुणा नपुंसगवेदगा अणंतगुणा ॥ एएसिं सव्वेसिं पदाणं
 अप्पवहुगाइं उच्चारयेव्वाइं जाव सव्वत्थोवा जीवा अचरिमा चरिमा अणंतगुणा ।
 सेवं भंते ! सेवं भंते ! ति ॥ २३७ ॥ छट्ठसए तइओ उद्देसो समत्तो ॥

जीवे णं भंते ! कालाएसेणं किं सपदेसे अपदेसे ?, गोयमा ! नियमा सपदेसे ।
 नेरइए णं भंते ! कालादेसेणं किं सपदेसे अपदेसे ?, गोयमा ! सिय सपदेसे सिय
 अपदेसे, एवं जाव सिद्धे । जीवा णं भंते ! कालादेसेणं किं सपदेसा अपदेसा ?,
 गोयमा ! नियमा सपदेसा । नेरइया णं भंते ! कालादेसेणं किं सपदेसा अपदेसा ?,
 गोयमा ! सव्वेवि ताव होज्जा सपदेसा १ अहवा सपएसा य अपदेसे य २ अहवा
 सपदेसा य अपदेसा य ३, एवं जाव थणियकुमारा ॥ पुढविकाइया णं भंते ! किं
 सपदेसा अपदेसा ?, गोयमा ! सपदेसावि अपदेसावि, एवं जाव वणप्फइकाइया,
 सेसा जहा नेरइया तहा जाव सिद्धा ॥ आहारगाणं जीवेगंदियवज्जो तियभंगो,
 अणाहारगाणं जीवेगंदियवज्जा छब्भंगा एवं भाणियव्वा-सपदेसा वा १ अपएसा
 वा २ अहवा सपदेसे य अपदेसे य ३ अहवा सपदेसे य अपदेसा य ४ अहवा
 सपदेसा य अपदेसे य ५ अहवा सपदेसा य अपदेसा य ६, सिद्धेहिं तियभंगो,
 भवरिद्धिया अभवसिद्धिया [भवसिद्धिया] जहा ओहिया, नोभवसिद्धिनोअभ-
 वसिद्धिया जीवसिद्धेहिं तियभंगो, सण्णीहिं जीवादिओ तियभंगो, असण्णीहिं एगिं-
 दियवज्जो तियभंगो, नेरइयदेवमणुएहिं छब्भंगो, नोसन्निनोअसन्निजीवमणुयसिद्धेहिं
 तियभंगो सलेसा जहा ओहिया ॥ कण्हलेस्सा नीललेस्सा काउलेस्सा जहा आहारओ
 नवरं जस्स अत्थि एयाओ, तेउलेस्साए जीवादिओ तियभंगो, नवरं पुढविकाइएसु
 आउवणप्फइसु छब्भंगा, पम्हलेससुकलेस्साए जीवादिओ तियभंगो, अलेसीहिं

जीवसिद्धेहिं तियभंगो मणुस्से(सु) छब्भंगा, सम्मदिट्ठीहिं जीवाइ(य)तियभंगो, विग-
लिंदिएसु छब्भंगा, मिच्छदिट्ठीहिं एगिंदियवज्जो तियभंगो, सम्मामिच्छदिट्ठीहिं छब्भंगा,
संजएहि जीवाइओ तियभंगो, असंजएहिं एगिंदियवज्जो तियभंगो, संजयासंजएहिं तिय-
भंगो जीवादिओ, नोसंजयनो असंजयनो संजयासंजयजीवसिद्धेहिं तियभंगो, सकसाईहिं
जीवादिओ तियभंगो, एगिंदिएसु अभंगयं, कोहकसाईहिं जीवएगिंदियवज्जो तियभंगो,
देवेहिं छब्भंगा, माणकसाई मायाकसाई जीवेगिंदियवज्जो तियभंगो, नेरइयदेवेहिं
छब्भंगा, लोभकसाईहिं जीवेगिंदियवज्जो तियभंगो, नेरइएसु छब्भंगा, अकसाईजी-
वमणुएहिं सिद्धेहिं तियभंगो, ओहियनाणे आभिणिवोहियनाणे सुयनाणे जीवादिओ
तियभंगो, विगलिंदिएहिं छब्भंगा, ओहिनाणे मण० केवलनाणे जीवादिओ तियभंगो,
ओहिए अजाणे मइअण्णाणे सुयअण्णाणे एगिंदियवज्जो तियभंगो, विभंगनाणे
जीवादिओ तियभंगो, सजोगी जहा ओहिओ, मणजोगी वयजोगी कायजोगी जीवा-
दिओ तियभंगो नवरं कायजोगी एगिंदिया तेसु अभंगयं, अजोगी जहा अलेसा,
सागारोवउत्ते अणागारोवउत्ते जीवएगिंदियवज्जो तियभंगो, सवेयगा य जहा सक-
साई, इत्थिवेयगपुरिसवेयगनपुंसगवेयगेसु जीवादिओ तियभंगो, नवरं नपुंसगवेदे
एगिंदिएसु अभंगयं, अवेयगा जहा अकसाई, ससरीरी जहा ओहिओ, ओरालियवे-
उव्वियसरीराणं जीवएगिंदियवज्जो तियभंगो, आहारगसरीरे जीवमणुएसु छब्भंगा,
तेयगकम्मगाणं जहा ओहिया, असरीरेहिं जीवसिद्धेहिं तियभंगो, आहारपज्जत्तीए
सरीरपज्जत्तीए इंदियपज्जत्तीए आणापाणुपज्जत्तीए जीवएगिंदियवज्जो तियभंगो, भासा-
मणपज्जत्तीए जहा सण्णी, आहारअपज्जत्तीए जहा अणाहारगा, सरीरअपज्जत्तीए
इंदियअपज्जत्तीए आणापाणअपज्जत्तीए जीवेगिंदियवज्जो तियभंगो, नेरइयदेवमणुएहिं
छब्भंगा, भासामणअपज्जत्तीए जीवादिओ तियभंगो, नेरइयदेवमणुएहिं छब्भंगा ॥
गाहा-सपदेसा आहारगभवियसन्निलेस्सा दिट्ठी संजयकसाए । णाणे जोगुवओगे वेदे
य सरीरपज्जत्ती ॥ १ ॥ २३८ ॥ जीवा णं भंते ! कि पच्चक्खाणी अपच्चक्खाणी
पच्चक्खाणापच्चक्खाणी ?, गोयमा ! जीवा पच्चक्खाणीवि अपच्चक्खाणीवि पच्चक्खा-
णापच्चक्खाणीवि । सव्वजीवाणं एवं पुच्छा, गोयमा ! नेरइया अपच्चक्खाणी जाव
चउरिंदिया, सेसा दो पडिसेहेयव्वा, पंचेदियतिरिक्खजोणिया नो पच्चक्खाणी अप-
च्चक्खाणीवि पच्चक्खाणापच्चक्खाणीवि, मणुस्सा तिञ्चिवि, सेसा जहा नेरइया ॥
जीवा णं भंते ! कि पच्चक्खाणं जाणंति अपच्चक्खाणं जाणंति पच्चक्खाणापच्चक्खाणं
जाणंति ?, गोयमा ! जे पंचेदिया ते तिञ्चिवि जाणंति अवसेसा पच्चक्खाणं न जाणंति
३॥ जीवा णं भंते ! कि पच्चक्खाणं कुव्वंति अपच्चक्खाणं कुव्वंति पच्चक्खाणापच्चक्खाणं

कुव्वंति ?, जहा ओहिया तहा कुव्वणा ॥ जीवा णं भंते ! किं पच्चक्खाणनिव्वत्ति-
याउया अपच्चक्खाणणि० पच्चक्खाणापच्चक्खाणनि० ?, गोयमा ! जीवा य वेमाणिया
य पच्चक्खाणनिव्वत्तियाउया तिन्निवि अवसेसा अपच्चक्खाणनिव्वत्तियाउया ॥ पच्च-
क्खाणं १ जाणइ २ कुव्वंति ३ तिन्ने(तेणे)व आउनिव्वत्ती ४ । सपदेमुद्देसंमि य
एमेए दंडगा चउरो ॥ १ ॥ २३९ ॥ सेवं भंते ! सेवं भंते ! त्ति ॥ छहे सए
चउत्थो उद्देसो समत्तो ॥

किमियं भंते ! तमुक्काएत्ति पवुचइ कि पुढवी तमुक्काएत्ति पवुचइ आऊ तमुक्काएत्ति
पवुचइ ? गोयमा ! नो पुढवी तमुक्काएत्ति पवुचइ आऊ तमुक्काएत्ति पवुचइ । से
केणट्ठेणं ?, गोयमा ! पुढविकाए णं अत्थेगइए सुमे देसं पकासेइ अत्थेगइए देसं
नो पकासेइ, से तेणट्ठेणं० । तमुक्काए णं भंते ! कहिं समुट्ठिए कहिं संनिट्ठिए ?,
गोयमा ! जंबुदीवस्स २ वहिया तिरियमसंखेजे दीवसमुद्दे वीईवइत्ता अरुणवरस्स
दीवस्स बाहिरिल्लाओ वेइयन्ताओ अरुणोदयं समुद्दं वायालीसं जोयणसहस्साणि
ओगाहिता उवरिल्लाओ जलंताओ एगपदेसियाए सेढीए इत्थ णं तमुक्काए समुट्ठिए,
सत्तरस एक्कवीसे जोयणसए उड्डं उप्पइत्ता तओ पच्छा तिरियं पवित्थरमाणे २ सोह-
म्मीसाणसणंकुमारमाहिदे चत्तारिवि कप्पे आवरित्ता णं उड्डंपि य णं जाव वंभलगे
कप्पे रिट्ठविमाणपत्थडं संपत्ते एत्थ णं तमुक्काए णं संनिट्ठिए ॥ तमुक्काए णं भंते !
किसंठिए पन्नत्ते ?, गोयमा ! अहे मल्लगमूलसंठिए उप्पि कुक्कडगपंजरगसंठिए
पण्णत्ते ॥ तमुक्काए णं भंते ! केवइयं विक्खंभेणं केवइयं परिकखेवेणं पण्णत्ते ?,
गोयमा ! दुविहे पण्णत्ते, तंजहा-संखेज्जवित्थडे य असंखेज्जवित्थडे य, तत्थ णं जे
से संखेज्जवित्थडे से णं संखेज्जाइं जोयणसहस्साइं विक्खंभेणं असंखेज्जाइं जोयण-
सहस्साइं परिकखेवेणं प०, तत्थ णं जे से असंखेज्जवित्थडे से णं असंखेज्जाइं जोय-
णसहस्साइं विक्खंभेणं असंखेज्जाइं जोयणसहस्साइं परिकखेवेणं प० । तमुक्काए
णं भंते ! केमहालए प० ?, गोयमा ! अयं णं जंबुदीवे २ सव्वदीवसमुद्दाणं सव्व-
व्भंतराए जाव परिकखेवेणं पण्णत्ते ॥ देवे णं महिद्धिए जाव महाणुभावे इणामेव २
त्तिकट्ठु केवलकप्पं जंबुदीवं २ तिहिं अच्छरानिवाएहि तिसत्तखुत्तो अणुपरियट्ठित्ता णं
हव्वमागच्छिज्जा से णं देवे ताए उक्किट्ठाए तुरियाए जाव देवगईए वीईवयमाणे २
जाव एगाहं वा दुयाहं वा तियाहं वा उक्कोसेणं छम्मासे वीईवएज्जा अत्थेगइए(यं)
तमुक्कायं वीईवएज्जा अत्थेगइए नो तमुक्कायं वीईवएज्जा, एमहालए णं गोयमा !
तमुक्काए पन्नत्ते । अत्थि णं भंते ! तमुक्काए गेहाइ वा गेहावणाइ वा ?, णो तिणट्ठे
समट्ठे, अत्थि णं भंते ! तमुक्काए गामाइ वा जाव संनिवेसाइ वा ?, णो तिणट्ठे

समद्वे । अत्थि णं भंते ! तमुक्काए ओराला वलाहया संसेयंति संमुच्छंति वासं वासंति वा ?, हंता ! अत्थि, तं भंते ! किं देवो पकरेइ असुरो पकरेइ नागो पकरेइ ?, गोयमा ! देवोवि पकरेइ असुरोवि पकरेइ नागोवि पकरेइ । अत्थि णं भंते ! तमुक्काए वादरे थणियसहे वायरे विज्जुए ?, हंता ! अत्थि, तं भंते ! किं देवो पकरेइ ३?, तिञ्चिवि पकरेन्ति, अत्थि णं भंते ! तमुक्काए वायरे पुढविकाए वादरे अगणिकाए ?, णो तिणद्वे समद्वे णण्णत्थ विग्गहगइसमावन्नएणं । अत्थि णं भंते ! तमुक्काए चंदिमसूरियगहगणणक्खत्ततारारूवा ?, णो तिणद्वे समद्वे, पलियस्सतो पुण अत्थि । अत्थि णं भंते ! तमुक्काए चंदाभाइ वा सूरामाइ वा ?, णो तिणद्वे समद्वे, कादूसणिया पुण सा । तमुक्काए णं भंते ! केरिसए वज्जेणं पण्णत्ते ?, गोयमा ! काले कालावभासे गंभीरलोमहरिसज्जणे भीमे उत्तासणए परमकिण्हे वज्जेणं पण्णत्ते, देवेवि णं अत्थेगइए जे णं तप्पढमयाए पासित्ता णं खुभाएज्जा अहे णं अभिसमागच्छेज्जा तओ पच्छा सीहं २ तुरियं २ खिप्पामेव वीईवएज्जा ॥ तमुक्कायस्स णं भंते ! कइ नामधेज्जा पण्णत्ता ?, गोयमा ! तेरस नामधेज्जा पण्णत्ता, तंजहा-तमेइ वा तमुक्काएइ वा अंधकारेइ वा महंधकारेइ वा लोगंधकारेइ वा लोगतमिस्सेइ वा देवंधकारेइ वा देवतमिस्सेइ वा देवारजेइ वा देववृहेइ वा देवफलिहेइ वा देवपडिक्खोभेइ वा अरुणोदएइ वा समुदे ॥ तमुक्काए णं भंते ! किं पुढविपरिणामे आउपरिणामे जीवपरिणामे पोग्गलपरिणामे ?, गोयमा ! नो पुढविपरिणामे आउपरिणामेवि जीवपरिणामेवि पोग्गलपरिणामेवि । तमुक्काए णं भंते ! सव्वे पाणा भूया जीवा सत्ता पुढविकाइयत्ताए जाव तसकाइयत्ताए उववन्नपुव्वा ?, हंता गोयमा ! असइं अदुवा अणंतखुत्तो णो चेव णं वादरपुढविकाइयत्ताए वादरअगणिकाइयत्ताए वा ॥ २४० ॥ कइ णं भंते ! कण्हराईओ पण्णत्ताओ ?, गोयमा अट्ठ कण्हराईओ पण्णत्ताओ । कहि णं भंते ! एयाओ अट्ठ कण्हराईओ पण्णत्ताओ ?, गोयमा ! उप्पि सणकुमारमाहिंदाणं कप्पाणं हिट्ठिं वंभलोए कप्पे रिट्ठे विमाणे पत्थडे, एत्थ णं अक्खाडगसमचउरंससंठाणसंठियाओ अट्ठ कण्हराईओ पण्णत्ताओ, तंजहा-पुरच्छिमेणं दो पच्चत्थिमेणं दो दाहिणेणं दो उत्तरेणं दो, पुरच्छिमव्भंतरा कण्हराई दाहिणं वाहिरं कण्हराई पुट्ठा दाहिणव्भंतरा कण्हराई पच्चत्थिमवाहिरं कण्हराई पुट्ठा पच्चत्थिमव्भंतरा कण्हराई उत्तरवाहिरं कण्हराई पुट्ठा उत्तरमव्भंतरा कण्हराई पुरच्छिमवाहिरं कण्हराई पुट्ठा, दो पुरच्छिमपच्चत्थिमाओ वाहिराओ कण्हराईओ छलंसाओ दो उत्तरदाहिणवाहिराओ कण्हराईओ तंसाओ दो पुरच्छिमपच्चत्थिमाओ अविमतराओ कण्हराईओ चउरंसाओ दो उत्तरदाहिणाओ अविमतराओ कण्हरा-

ईओ चउरंसाओ 'पुव्वावरा छलंसा तंसा पुण दाहिणुत्तरा वज्झा । अब्भंतर
(अवसेसा)चउरंसा सव्वावि य कण्हराईओ ॥ १ ॥' कण्हराईओ णं भंते ! केवइयं
आयामेणं केवइयं विक्खंभेणं केवइयं परिक्खेवेणं पण्णत्ता ? गोयमा ! असंखेज्जाइं
जोयणसहस्साइं आयामेणं असंखेज्जाइं जोयणसहस्साइं विक्खंभेणं असंखेज्जाइं
जोयणसहस्साइं परिक्खेवेणं पण्णत्ताओ । कण्हराईओ णं भंते ! केमहालियाओ
पण्णत्ता ? गोयमा ! अयण्णं जंबुद्दीवे २ जाव अ(ट्ठ)द्धमासं वीईवएज्जा अत्येगइयं
कण्हराइं वीईवएज्जा अत्येगइयं कण्हराइं णो वीईवएज्जा, एमहालियाओ णं गोयमा !
कण्हराईओ पण्णत्ताओ । अत्थि णं भंते ! कण्हराईसु गेहाइ वा गेहावणाइ वा ?, नो
तिणट्ठे समट्ठे । अत्थि णं भंते ! कण्हराईसु गामाइ वा० ?, णो तिणट्ठे समट्ठे ।
अत्थि णं भंते ! कण्ह० ओराला बलाहया संमुच्छंति ३ ?, हंता ! अत्थि, तं भंते !
किं देवो प० ३ ?, गो० देवो पकरेइ, नो सुरो नो नागो य । अत्थि णं भंते !
कण्हराईसु बादरे थणियसट्ठे जहा ओराला तहा । अत्थि णं भंते ! कण्हराईए बादरे
आउकाए बादरे अगणिकाए वायरे वणप्फइकाए ?, णो तिणट्ठे समट्ठे, पण्णत्थ
विग्गहगइसमावन्नएणं । अत्थि णं० चंदिमसूरिय ४ प० ?, णो तिण० । अत्थि णं
कण्ह० चंदाभाइ वा २ ?, णो तिणट्ठे समट्ठे । कण्हराईओ णं भंते ! केरिसियाओ
वन्नेणं पन्नत्ताओ ?, गोयमा ! कालाओ जाव खिप्पामेव वीईवएज्जा । कण्हराईओ
णं भंते ! कइ नामधेज्जा पण्णत्ता ? गोयमा ! अट्ठ नामधेज्जा पण्णत्ता, तंजहा-
कण्हराइत्ति० वा मेहराईइ वा मघावई(घे)इ वा माघवईइ वा वायफलिहेइ वा
वायपलिकखोभेइ वा देवफलिहेइ वा देवपलिकखोभेइ वा, कण्हराईओ णं भंते !
किं पुढविपरिणामाओ आउपरिणामाओ जीवपरिणामाओ पोग्गलपरिणामाओ ?,
गोयमा ! पुढविपरिणामाओ नो आउपरिणामाओ जीवपरिणामाओवि पोग्गलपरि-
णामाओवि । कण्हराईसु णं भंते ! सव्वे पाणा भूया जीवा सत्ता उववन्नपुव्वा ?,
हंता गोयमा ! असइं अदुवा अणंतखुत्तो नो चेव णं बादरआउकाइयत्ताए बादरअ-
गणिकाइयत्ताए वा बादरवणप्फइकाइयत्ताए वा ॥ २४१ ॥ एएसि णं अट्ठण्हं कण्ह-
राईणं अट्ठसु उवासंतरेसु अट्ठ लोगंतियविमाणा पण्णत्ता, तंजहा-१ अच्ची २ अच्चिमाली
३ वइरोयणे ४ पभंकरे ५ चंदाभे ६ सूराभे ७ सुक्काभे ८ सुपइट्ठाभे ९ मज्झे रिट्ठाभे ।
कहि णं भंते ! अच्चिविमाणे प० ?, गोयमा ! उत्तरपुरच्छिमेणं, कहि णं भंते ! अच्चि-
मालिविमाणे प० ?; गोयमा ! पुरच्छिमेणं, एवं परिवाडीए नेयव्वं जाव कहि णं
भंते ! रिट्ठे विमाणे पण्णत्ते ?, गोयमा ! बहुमज्जदेसभागे । एएसु णं अट्ठसु लोगंति-
यविमाणेसु अट्ठविहा लोगंतियदेवा परिवसंति, तंजहा-सारस्सयमाइच्चा वण्ही वरुणा

य गहतोया य । तुसिया अक्वावाहा अग्गिच्चा चेव रिट्ठा य ॥ १ ॥ कहि णं भंते ! सारस्सया देवा परिवसंति ?, गोयमा ! अच्चिविमाणे परिवसंति, कहि णं भंते ! आइच्चा देवा परिवसंति ?, गोयमा ! अच्चिमालिविमाणे, एवं नेयव्वं जहाणुपुव्वीए जाव कहि णं भंते ! रिट्ठा देवा परिवसंति ?, गोयमा ! रिट्ठविमाणे ॥ सारस्सयमा-
इच्चाणं भंते ! देवाणं कइ देवा कइ देवसया पण्णत्ता ?, गोयमा ! सत्त देवा सत्त देवसया परिवारो पण्णत्तो, वण्हीवरुणाणं देवाणं चउइस देवा चउइस देवसहस्सा परिवारो पण्णत्तो, गहतोयतुसियाणं देवाणं सत्त देवा सत्त देवसहस्सा पण्णत्ता, अव-
सेसाणं नव देवा नव देवसया पण्णत्ता—‘पढमजुगलम्मि सत्त उ सयाणि वीयंसि चोइससहस्सा । तइए सत्तसहस्सा नव चेव सयाणि सेसेसु ॥ १ ॥’ लोगंतियवि-
माणा णं भंते ! किपइट्ठिया पण्णत्ता ?, गोयमा ! वाउपइट्ठिया तदुभयपइट्ठिया प०,
एवं नेयव्वं—‘विमाणाणं पइट्ठाणं वाहल्लुच्चत्तमेव संठाणं ।’ वंभलोयवत्तव्वया नेयव्वा
[जहा जीवाभिगमे देवुइसए] जाव हंता गोयमा ! असइं अदुवा अणंतखुत्तो । नो
चेव णं देवित्ताए । लोगंतियविमाणेसु णं भंते ! केवइयं कालं ठिई पण्णत्ता ?, गोयमा !
अट्ठ सागरोवमाइं ठिई पण्णत्ता । लोगंतियविमाणेहिंतो णं भंते ! केवइयं अवाहाए
लोगंते पण्णत्ते ?, गोयमा ! असंखेज्जाइं जोयणसहस्साइं अवाहाए लोगंते पण्णत्ते ।
सेवं भंते ! सेवं भंते ! त्ति ॥ २४२ ॥ छट्ठसए पंचमो उद्देसओ समत्तो ॥

कइ णं भंते ! पुढवीओ पण्णत्ताओ ?, गोयमा ! सत्त पुढवीओ पण्णत्ताओ,
तंजहा—रयणप्पभा जाव तमतमा, रयणप्पभाईणं आवासा भाणियव्वा (जाव)
अहेसत्तमाए, एवं जे जत्तिया आवासा ते भाणियव्वा जाव कइ णं भंते ! अणुत्त-
रविमाणा पण्णत्ता ?, गोयमा ! पंच अणुत्तरविमाणा पण्णत्ता, तंजहा—विजए जाव
सव्वट्ठसिद्धे ॥ २४३ ॥ जीवे णं भंते ! मारणंतियसमुग्घाएणं समोहए समोहणित्ता
जे भविए इमीसे रयणप्पभाए पुढवीए तीसाए निरयावाससयसहस्सेसु अन्नयरंसि
निरयावासंसि नेरइयत्ताए उववज्जित्तए से णं भंते ! तत्थगए चेव आहारेज्ज वा
परिणामेज्ज वा सरीरं वा बंधेज्जा ?, गोयमा ! अत्थेगइए तत्थगए चेव आहारेज्ज
वा परिणामेज्ज वा सरीरं वा बंधेज्जा अत्थेगइए तओ पडिनियत्तइ, तओ
पडिनियत्तित्ता इहमागच्छइ २ दोच्चं पि मारणंतियसमुग्घाएणं समोहणइ २ इमीसे
रयणप्पभाए पुढवीए तीसाए निरयावाससयसहस्सेसु अन्नयरंसि निरयावासंसि नेर-
इयत्ताए उववज्जित्तए, तओ पच्छा आहारेज्ज वा परिणामेज्ज वा सरीरं वा बंधेज्जा
एवं जाव अहेसत्तमा पुढवी । जीवे णं भंते ! मारणंतियसमुग्घाएणं समोहए २ जे
भविए चउसट्ठीए असुरकुमारावाससयसहस्सेसु अन्नयरंसि असुरकुमारावासंसि असु-

रकुमारत्ताए उववज्जित्तए जहा नेरइया तहा भाणियव्वा जाव थणियकुमारा । जीवे णं भंते ! मारणंतियसमुग्घाएणं समोहए २ जे भविए असंखेज्जेसु पुढविकाइयावाससयसहस्सेसु अण्णयरंसि पुढविकाइयावासंसि पुढविकाइयत्ताए उववज्जित्तए से णं भंते ! मंदरस्स पव्वयरस पुरच्छिमेणं केवइयं गच्छेज्जा केवइयं पाउणेज्जा ?, गोयमा ! लोयंतं गच्छेज्जा लोयंतं पाउणिज्जा, से णं भंते ! तत्थगए चेव आहारेज्ज वा परिणामेज्ज वा सरीरं वा बंधेज्जा ?, गोयमा ! अत्थेगइए तत्थगए चेव आहारेज्ज वा परिणामेज्ज वा सरीरं वा बंधेज्जा अत्थेगइए तओ पडिनियत्तइ २ ता इह हव्वमागच्छइ २ ता दोच्चंपि मारणंतियसमुग्घाएणं समोहणइ २ ता मंदरस्स पव्वयस्स पुरच्छिमेणं अंगुलस्स असंखेज्जभागमेत्तं वा संखेज्जभागमेत्तं वा वालग्गं वा वालग्गपुहुत्तं वा एवं लिक्खं जूयं जवं अंगुलं जाव जोयणकोडि वा जोयणकोडाकोडिं वा संखेज्जेसु वा असंखेज्जेसु वा जोयणसहस्सेसु लोयंते वा एगपदेसियं सेडिं मोत्तूण असंखेज्जेसु पुढविकाइयावाससयसहस्सेसु अन्नयरंसि पुढविकाइयावासंसि पुढविकाइयत्ताए उववज्जेत्ता तओ पच्छा आहारेज्ज वा परिणामेज्ज वा सरीरं वा बंधेज्जा, जहा पुरच्छिमेणं मंदरस्स पव्वयस्स आलावओ भणिओ एवं दाहिणेणं पच्चत्थिमेणं उत्तरेणं उट्ठे अहे, जहा पुढविकाइया तहा एगिदियाणं सव्वेसि, एक्केक्कस्स छ आलावया भाणियव्वा । जीवे णं भंते ! मारणंतियसमुग्घाएणं समोहए २ ता जे भविए असंखेज्जेसु वेदियावाससयसहस्सेसु अण्णयरंसि वेदियावासंसि वेइंदियत्ताए उववज्जित्तए से णं भंते ! तत्थगए चेव जहा नेरइया, एवं जाव अणुत्तरोववाइया । जीवे णं भंते ! मारणंतियसमुग्घाएणं समोहए २ जे भविए एवं पंचसु अणुत्तरेसु महइमहालएसु महाविमाणेसु अन्नयरंसि अणुत्तरविमाणंसि अणुत्तरोववाइयदेवत्ताए उववज्जित्तए, से णं भंते ! तत्थगए चेव जाव आहारेज्ज वा परिणामेज्ज वा सरीरं वा बंधेज्जा ?० । सेवं भंते ! सेवं भंते ! त्ति ॥२४४॥ पुढविउद्देसो समत्तो । छट्ठसए छट्ठो उद्देसो समत्तो ॥

अह णं भंते ! सालीणं वीहीणं गोधूमाणं जवाणं जवजवाणं एएसि णं धन्नाणं कोट्ठाउत्ताणं पल्लाउत्ताणं मंचाउत्ताणं मालाउत्ताणं उल्लित्ताणं लित्ताणं पिहियाणं मुद्धियाणं लंछियाणं केवइयं कालं जोणी संचिट्ठइ ?, गोयमा ! जहन्नेणं अंतोमुहुत्तं उक्कोसेणं तिन्नि संवच्छराइं तेण परं जोणी पमिलायइ तेण परं जोणी पविद्धंसइ तेण परं वीए अवीए भवइ तेण परं जोणीवोच्छेदे पन्नत्ते समणाउसो ! । अह भंते ! कलायमसूरतिलमुग्गमासनिप्फावकुलत्थआलिसंदगसतीणपलिमंथगमाईणं एएसि णं धन्नाणं जहा सालीणं तहा एयाणिवि, नवरं पंच संवच्छराइं, सेसं तं चेव । अह

भंते ! अयसिकुसुंभगकोद्वकंगुवरगरालगकोदूसगसणसरिसवमूलगवीयमाईणं एएसि
णं धन्नाणं, एयाणिवि तहेव, नवरं सत्त संवच्छराइं, सेसं तं चेव ॥ २४५ ॥
एगमेगस्स णं भंते ! मुहुत्तस्स केवइया ऊसासद्धा वियाहिया ?, गोयमा ! असं-
खेज्जाणं समयाणं समुदयसमिइसमागमेणं सा एगा आवलियत्ति पवुच्चइ, संखेज्जा
आवलिया ऊसासो संखेज्जा आवलिया निस्सासो-हट्ठस्स अणवगल्लस्स, निरुवकिट्ठस्स
जंतुणो । एगे ऊसासनीसासे, एस पाणुत्ति वुच्चइ ॥ १ ॥ सत्त पाणूणि से थोवे,
सत्त थोवाइं से लवे । लवाणं सत्तहत्तरिए, एस मुहुत्ते वियाहिए ॥ २ ॥ तिन्नि
सहस्सा सत्त य सयाइं तेवत्तरिं च ऊसासा । एस मुहुत्तो दिट्ठो सव्वेहिं अणंत-
नाणीहिं ॥ ३ ॥ एएणं मुहुत्तपमाणेणं तीसमुहुत्तो अहोरत्तो, पन्नरस अहोरत्ता
पक्खो, दो पक्खा मासे, दो मासा उऊ, तिन्नि उउए अयणे, दो अयणे संवच्छरे,
पंचसंवच्छरिए जुगे, वीसं जुगाइं वाससयं, दस वाससयाइं वाससहस्सं, सयं वास-
सहस्साइं वाससयसहस्सं, चउरासीइ वाससयसहस्साणि से एगे पुव्वंगे, चउरासीइ
पुव्वंगसयसहस्साइं से एगे पुव्वे, [एवं पुव्वे] २ तुडिए २ अडडे २ अववे २
इहूए २ उप्पले २ पडमे २ नलिणे २ अच्छणिउरे २ अउए २ पउए य २ नउए
य २ चूलिया २ सीसपहेलिया २ एताव ताव गणिए एताव ताव गणियस्स विसए,
तेण परं ? ओवमिए । से किं तं ओवमिए ?, २ दुविहे पण्णत्ते तंजहा पलिओवमे
य सागरोवमे य, से किं तं पलिओवमे ? से किं तं सागरोवमे ? ॥ सत्थेण सुत्ति-
क्खेणवि छेतुं भेतुं च जं न किरं सक्का । तं परमाणुं सिद्धा वयंति आइं पमाणानं
॥ १ ॥ अणंताणं परमाणुपोग्गलाणं समुदयसमिइसमागमेणं सा एगा उस्सण्ह-
सण्हियाइ वा सण्हसण्हियाइ वा उड्डरेणूइ वा तसरेणूइ वा रहरेणूइ वा वाल-
ग्गेइ वा लिक्खाइ वा जूयाइ वा जवमज्जेइ वा अंगुलेइ वा, अट्ठ उस्सण्ह-
सण्हियाओ सा एगा सण्हसण्हिया, अट्ठ सण्हसण्हियाओ सा एगा उड्डरेणू, अट्ठ
उड्डरेणूओ सा एगा तसरेणू, अट्ठ तसरेणूओ सा एगा रहरेणू, अट्ठ रहरेणूओ से
एगे देवकुलउत्तरकुलगाणं मणूसाणं वालग्गे, एवं हरिन्नासरम्मगहेमवएरन्नवयाणं पुव्व-
विदेहाणं मणूसाणं अट्ठ वालग्गा सा एगा लिक्खा, अट्ठ लिक्खाओ सा एगा जूया,
अट्ठ जूयाओ से एगे जवमज्जे, अट्ठ जवमज्जाओ से एगे अंगुले, एएणं अंगुलपमा-
णेणं छ अंगुलाणि पाओ, वारस अंगुलाइं विहत्थी, चउन्वीसं अंगुलाइं रयणी, अडया-
लीसं अंगुलाइं कुच्छी, छन्नउइ अंगुलाणि से एगे दडेइ वा धणूइ वा जूएइ वा
नालियाइ वा अक्खेइ वा मुसलेइ वा, एएणं धणुप्पमाणेणं दो धणुसहस्साइं
गाउयं, चत्तारि गाउयाइं जोयणं, एएणं जोयणप्पमाणेणं जे पळे जोयणं आयाम-

विवखंभेणं जोयणं उड्डं उच्चतेणं तं तिउणं सविसेसं परिरएणं, से णं एगाहियवेया-
हियतेयाहिय उक्कोसं सत्तरत्तप्परूढाणं समट्ठे संनिच्चिए भरिए वालगगकोडीणं [ते],
से णं वालगगे नो अग्गी दहेज्जा नो वाऊ हरेज्जा नो कुत्थेज्जा नो परिविद्धंसेज्जा
नो पूइत्ताए हव्वमागच्छेज्जा, तओ णं वाससए २ एगमेगं वालगगं अवहाय जाव-
इएणं कालेणं से पळे खीणे नीरए निम्मले निट्ठिए निल्लेवे अवहडे विमुद्धे भवइ,
से तं पल्लिओवमे । गाहा-एएसि पल्लणं कोडाकोडी हवेज्ज दसगुणिया । तं साग-
रोवमस्स उ एक्कस्स भवे परिमाणं ॥ १ ॥ एएणं सागरोवमपमाणेणं चत्तारि साग-
रोवमकोडाकोडीओ कालो सुसमसुसमा १ तिञ्चि सागरोवमकोडाकोडीओ कालो
सुसमा २ दो सागरोवमकोडाकोडीओ कालो सुसमदुसमा ३ एगा सागरोवमकोडा-
कोडी वायालीसाए वाससहस्सेहिं ऊणिया कालो दुसमसुसमा ४ एक्कवीसं वाससह-
स्साइं कालो दुसमा ५ एक्कवीसं वाससहस्साइं कालो दुसमदुसमा ६ । पुणरवि
ओसप्पिणीए एक्कवीसं वाससहस्साइं कालो दुसमदुसमा १ एक्कवीसं वाससहस्साइं
जाव चत्तारि सागरोवमकोडाकोडीओ कालो सुसमसुसमा, दस सागरोवमकोडा-
कोडीओ कालो ओसप्पिणी दस सागरोवमकोडाकोडीओ कालो उस्सप्पिणी वीसं
सागरोवमकोडाकोडीओ कालो ओसप्पिणी य उस्सप्पिणी य ॥ २४६ ॥ जंवुद्दीवे णं
भंते । दीवे इमीसे ओसप्पिणीए सुसमसुसमाए समाए उत्तमट्ठपत्ताए भरहस्स
वासस्स केरिसए आगारभावपडोयारे होत्था ?, गोयमा ! बहुसमरमणिजे भूमिभागे
होत्था, से जहानामए-आलिंगपुक्खरेइ वा एवं उत्तरकुलवत्तव्वया नेयव्वा जाव
आसयंति सयंति, तीसे णं समाए भारहे वासे तत्थ २ देसे २ तहिं २ बहवे
ओराला कुद्दाला जाव कुसविकुसविमुद्धस्सखम्मूला जाव छव्विहा मणुस्सा अणुसज्जित्था
प०, तं०-पम्हगंधा १ मियगंधा २ अममा ३ तेयली ४ सहा ५ सणिचारी ६ ।
सेवं भंते ! सेवं भंते ! तिं ॥ २४७ ॥ छट्ठसए सत्तमो उद्देसओ समत्तो ॥

कइ णं भंते ! पुढवीओ पन्नत्ताओ ?, गोयमा ! अट्ठ पुढवीओ पण्णत्ताओ,
तंजहा-रयणप्पभा जाव ईसिप्पव्वभारा । अत्थि णं भंते ! इमीसे रयणप्पभाए पुढवीए
अहे गेहाइ वा गेहावणाइ वा ?, गोयमा ! णो तिणट्ठे समट्ठे । अत्थि णं भंते !
इमीसे रयणप्पभाए अहे गामाइ वा जाव संनिवेसाइ वा ? नो तिणट्ठे समट्ठे । अत्थि
णं भंते ! इमीसे रयणप्पभाए पुढवीए अहे उराला बलाहया संसेयंति संमुच्छंति
वासं वासंति ?, हंता ! अत्थि, तिञ्चिवि पकरेंति देवोवि पकरेइ असुरोवि प० नागोवि
प० । अत्थि णं भंते ! इमीसे रयण० वादरे थणियसेइ ?, हंता ! अत्थि, तिञ्चिवि
पकरेन्ति । अत्थि णं भंते ! इमीसे रयण० अहे वादरे अगणिकाए ?, गोयमा ! नो

तिण्टे समट्टे, नन्नत्थ विग्गहगडसमावन्नएणं । अत्थि णं भंते ! इमीसे रयण० अहे चंदिम जाव तारास्सुवा ? , नो तिण्टे समट्टे । अत्थि णं भंते ! इमीसे रयणप्पभाए पुढवीए चंदाभाइ वा २ ? , णो इण्टे समट्टे, एवं दोच्चाएवि पुढवीए भाणियव्वं, एवं तच्चाएवि भाणियव्वं, नवरं देवोवि पकरेइ असुरोवि पकरेइ णो णागो पकरेइ, चउत्थाएवि एवं नवरं देवो एक्को पकरेइ नो असुरो० नो नागो पकरेइ, एवं हेट्ठिस्सु सव्वासु देवो एक्को पकरेइ । अत्थि णं भंते ! सोहम्मीसाणाणं कप्पाणं अहे गेहाइ वा २ ? नो इण्टे समट्टे । अत्थि णं भंते ! उराला वलाहया ? हंता ! अत्थि, देवो पकरेइ असुरोवि पकरेइ नो नाओ पकरेइ, एवं थणियसद्देवि । अत्थि णं भंते ! वायरे पुढविकाए वादरे अगणिकाए ? , णो इण्टे समट्टे, नणत्थ विग्गहगडसमावन्नएणं । अत्थि णं भंते ! चंदिम० ? , णो तिण्टे समट्टे । अत्थि णं भंते ! गामाइ वा० ? , णो तिण्टे स० । अत्थि णं भंते ! चंदाभाइ वा २ ? , गोयमा ! णो तिण्टे समट्टे । एवं सणकुमारमाहिंदेसु नवरं देवो एगो पकरेइ । एवं वंभलोएवि । एवं वंभलोगस्स उवरिं सव्वहिं देवो पकरेइ, पुच्छियव्वो य, वायरे आउकाए वायरे अगणिकाए वायरे वणस्सइकाए अन्नं तं चेव ॥ गाहा—तमुकाए कप्पपणए अगणी पुढवी य अगणि पुढवीसु । आऊतेउवणस्सइ कप्पुवरिमकण्हराईसु ॥ १ ॥ ॥ २४८ ॥ कइविहे णं भंते ! आउयवंधए पन्नत्ते ? , गोयमा ! छव्विहा आउयवंधा पन्नत्ता, तंजहा—जाइनामनिहत्ताउए १ गइनामनिहत्ताउए २ ठिइनामनिहत्ताउए ३ ओगाहणानामनिहत्ताउए ४ पएसनामनिहत्ताउए ५ अणुभागनामनिहत्ताउए ६ दंडओ जाव वेमाणियाणं ॥ जीवा णं भंते ! किं जाइनामनिहत्ता जाव अणुभागनामनिहत्ता ? , गोयमा ! जाइनामनिहत्तावि जाव अणुभागनामनिहत्तावि, दंडओ जाव वेमाणियाणं । जीवा णं भंते ! किं जाइनामनिहत्ताउया जाव अणुभागनामनिहत्ताउया ? , गोयमा ! जाइनामनिहत्ताउयावि जाव अणुभागनामनिहत्ताउयावि, दंडओ जाव वेमाणियाणं । एवं एए दुवालस दंडगा भाणियव्वा । जीवा णं भंते ! किं जाइनामनिहत्ता १ जाइनामनिहत्ताउया २ ? , १२ । जीवा णं भंते ! किं जाइनामनिहत्ता ३ जाइनामनिहत्ताउया ४ जाइगोयनिहत्ता ५ जाइगोयनिहत्ताउया ६ जाइगोयनिहत्ता ७ जाइगोयनिहत्ताउया ८ जाइणामगोयनिहत्ता ९ जाइणामगोयनिहत्ताउया १० जाइणामगोयनिहत्ता ११ ? जीवा णं भंते ! किं जाइनामगोयनिहत्ताउया १२ जाव अणुभागनामगोयनिहत्ताउया ? , गोयमा ! जाइनामगोयनिहत्ताउयावि जाव अणुभागनामगोयनिहत्ताउयावि दंडओ जाव वेमाणियाणं ॥ २४९ ॥ लवणे णं भंते ! समुदे किं उस्सिओदए पत्थडोदए खुभियजले अखु-

भियजले ?, गोयमा ! लवणे णं समुद्दे ऊसिओदए नो पत्थडोदए खुभियजले नो
अखुभियजले एत्तो आढत्तं जहा जीवाभिगमे जाव से तेण० गोयमा ! वाहिरया णं
दीवसमुद्दा पुत्ता पुत्तप्पमाणा वोलट्टमाणा वोसट्टमाणा समभरघडत्ताए चिट्ठंति संठा-
णओ एगविहिविहाणा वित्थारओ अणेगविहिविहाणा दुगुणादुगुणप्पमाणाओ जाव
अस्सि तिरियलोए असंखेज्जा दीवसमुद्दा सयंभुरमणपज्जवसाणा पत्तत्ता समणाउसो ! ।
दीवसमुद्दा णं भंते ! केवइया नामधेज्जेहिं पत्तत्ता ?, गोयमा ! जावइया लोए
सुभा नामा सुभा रूवा सुभा गंधा सुभा रसा सुभा फासा एवइया णं दीवसमुद्दा
नामधेज्जेहिं पत्तत्ता, एवं नेयव्वा सुभा नामा उद्धारो परिणामो सव्वजीवाणं । सेवं
भंते ! सेवं भंते ! ति ॥ २५० ॥ छट्ठसयस्स अट्ठमो उद्देसो समत्तो ॥

जीवे णं भंते ! णाणावरणिज्जं कम्मं बंधमाणे कइ कम्मप्पगडीओ बंधइ ?,
गोयमा ! सत्तविहवंधए वा अट्ठविहवंधए वा छव्विहवंधए वा, बंधुद्देसो पन्नवणाए
नेयव्वो ॥ २५१ ॥ देवे णं भंते ! महिद्धिए जाव महाणुभागे वाहिरए पोग्गले
अपरियाइत्ता पभू एगवन्नं एगरूवं विउव्वित्तए ?, गोयमा ! नो तिण्ढे० । देवे णं
भंते ! वाहिरए पोग्गले परियाइत्ता पभू ? हंता ! पभू, से णं भंते ! किं इहगए पोग्गले
परियाइत्ता विउव्वइ तत्थगए पोग्गले परियाइत्ता विउव्वइ अन्नत्थगए पोग्गले परि-
याइत्ता विउव्वइ ?, गोयमा ! नो इहगए पोग्गले परियाइत्ता विउव्वइ, तत्थगए
पोग्गले परियाइत्ता विउव्वइ, नो अन्नत्थगए पोग्गले परियाइत्ता विउव्वइ, एवं
एएणं गमेणं जाव एगवन्नं एगरूवं १ एगवण्णं अणेगरूवं २ अणेगवन्नं एगरूवं ३
अणेगवन्नं अणेगरूवं ४ चउमंगो । देवे णं भंते ! महिद्धिए जाव महाणुभागे वाहि-
रए पोग्गले अपरियाइत्ता पभू कालयं पोग्गलं नीलगपोग्गलत्ताए परिणामेत्तए नीलगं
पोग्गलं वा कालगपोग्गलत्ताए परिणामेत्तए ?, गोयमा ! नो तिण्ढे समट्ठे, परिया-
इत्ता पभू । से णं भंते ! किं इहगए पोग्गले तं चेव नवरं परिणामेइत्ति भाणियव्वं,
एवं कालगपोग्गलं लोहियपोग्गलत्ताए, एवं कालएणं जाव सुक्किलं, एवं णीलएणं
जाव सुक्किलं, एवं लोहियपोग्गलं जाव सुक्किलत्ताए, एवं हालिइएणं जाव सुक्किलं,
तंजहा-एवं एयाए परिवाडीए गंधरसफास० कक्खडफासपोग्गलं मउयफासपोग्गल-
त्ताए २ एवं दो दो गस्यलहुय २ सीयउसिण २ णिड्डलुक्ख २, वंत्ताइ सव्वत्थ परि-
णामेइ, आलावगा य दो दो पोग्गले अपरियाइत्ता परियाइत्ता ॥ २५२ ॥ अविमुद्धलेसे
णं भंते ! देवे असमोहएणं अप्पाणएणं अविमुद्धलेसं देवं देविं अन्नयरं जाणइ
पासइ १ ? णो तिण्ढे समट्ठे, एवं अविमुद्धलेसे देवे असमोहएणं अप्पाणेणं विमुद्धलेसं
देवं ३, २ । अविमुद्धलेसे समोहएणं अप्पाणेणं अविमुद्धलेसं देवं ३, ३ । अवि-

सुद्धलेसे देवे समोहएणं अप्पाणेणं विसुद्धलेसं देवं ३, ४ । अविमुद्धलेसे समोहया-
समोहएणं अप्पाणेणं अविमुद्धलेस देवं ३, ५ । अविमुद्धलेसे समोहया० विसुद्धलेसं
देवं ३, ६ ॥ विसुद्धलेसे असमो० अविमुद्धलेसं देवं ३, १ । विसुद्धलेसे असमोहएणं
विसुद्धलेसं देवं ३, २ । विसुद्धलेसे णं भंते ! देवे समोहएणं अविमुद्धलेसं देवं ३
जाणइ०?, हंता ! जाणइ०, एवं विसुद्ध० समो० विसुद्धलेसं देवं ३ जाणइ ?, हंता !
जाणइ ४ । विसुद्धलेसे समोहयासमोहएणं अविमुद्धलेसं देवं ३, ५ । विसुद्धलेसे
समोहयासमोहएणं विसुद्धलेसं देवं ३, ६ । एवं हेट्ठिएहिं अट्ठहिं न जाणइ, न
पासइ उवरिल्लएहिं चउहिं जाणइ पासइ । सेवं भंते ! सेवं भंते ! त्ति ॥ २५३ ॥
छट्ठसए नवमो उद्देशो समत्तो ॥

अन्नउत्थिया णं भंते ! एवमाइक्खंति जाव परुवेति जावइया रायगिहे नयरे
जीवा एवइयाणं जीवाणं नो चक्किया केइ सुहं वा दुहं वा जाव कोलट्ठिगमायमवि
निष्फावमायमवि कलममायमवि मासमायमवि मुग्गमायमवि जूयामायमवि लिक्खा-
मायमवि अभिनिवेट्ठेता उवदंसित्तए, से कहमेयं भंते ! एवं ?, गोयमा ! जन्नं ते
अन्नउत्थिया एवमाइक्खंति जाव मिच्छं ते एवमाहंसु, अहं पुण गोयमा । एवमाइ-
क्खामि जाव परुवेमि सव्वलोएवि य णं सव्वजीवाणं णो चक्किया कोई सुहं वा तं
चेव जाव उवदंसित्तए । से केणट्ठेणं ?, गोयमा ! अयन्नं जंबुद्दीवे २ जाव विसेसाहिए
परिक्खेवेणं पन्नत्ते, देवे णं महिद्धिए जाव महानुभागे एगं महं सविलेवणं गंधसमुग्गगं
गहाय तं अवट्ठालेइ तं अवट्ठालेत्ता जाव इणामेव कट्ठु केवलकप्पं जंबुद्दीवं २ तिहिं
अच्छरानिवाएहिं तिसत्तखुत्तो अणुपरियट्ठित्ता णं हव्वमागच्छेज्जा, से नूणं गोयमा ! से
केवलकप्पे जंबुद्दीवे २ तेहिं घाणपोग्गलेहि फुडे?, हंता ! फुडे, चक्किया णं गोयमा !
केइ तेसिं घाणपोग्गलाणं कोलट्ठियामायमवि जाव उवदंसित्तए ?, णो तिणट्ठे समट्ठे,
से तेणट्ठेणं जाव उवदंसित्तए ॥ २५४ ॥ जीवे णं भंते ! जीवे २ जीवे ?, गोयमा !
जीवे ताव नियमा जीवे जीवेवि नियमा जीवे । जीवे णं भंते ! नेरइए नेरइए जीवे ?,
गोयमा ! नेरइए ताव नियमा जीवे जीवे पुण सिय नेरइए सिय अनेरइए, जीवे णं
भंते ! असुरकुमारे असुरकुमारे जीवे ?, गोयमा ! असुरकुमारे ताव नियमा जीवे जीवे
पुण सिय असुरकुमारे सिय णो असुरकुमारे, एवं दंडओ भाणियव्वो जाव वेमाणियाणं ।
जीवइ भंते ! जीवे जीवे जीवइ ?, गोयमा ! जीवइ ताव नियमा जीवे जीवे पुण
सिय जीवइ सिय नो जीवइ, जीवइ भंते ! नेरइए २ जीवइ ?, गोयमा ! नेरइए
ताव नियमा जीवइ २ पुण सिय नेरइए सिय अनेरइए, एवं दंडओ नेयव्वो जाव
वेमाणियाणं । भवसिद्धिए णं भंते ! नेरइए २ भवसिद्धिए ?, गोयमा ! भवसिद्धिए

सिय नेरइए सिय अनेरइए नेरइएऽविय सिय भवसिद्धिए सिय अभवसिद्धिए, एवं दंडओ जाव वेमाणियाणं ॥ २५५ ॥ अन्नउत्थिया णं भंते ! एवमाइक्खंति जाव परुवेंति एवं खलु सव्वे पाणा भूया जीवा सत्ता एगंतदुक्खं वेयणं वेयंति, से कहमेयं भंते ! एवं ?, गोयमा ! जन्नं ते अन्नउत्थिया जाव मिच्छं ते एवमाहंसु, अहं पुण गोयमा ! एवमाइक्खामि जाव परुवेमि अत्थेगइया पाणा भूया जीवा सत्ता एगंतदुक्खं वेयणं वेयंति आहच्च सायं, अत्थेगइया पाणा भूया जीवा सत्ता एगंतसायं वेयणं वेयंति आहच्च असायं, अत्थेगइया पाणा भूया जीवा सत्ता वेमायाए वेयणं वेयंति आहच्च सायमसायं । से केणट्ठेणं ० ?, गोयमा ! नेरइया एगंतदुक्खं वेयणं वेयंति [आहच्च सायमसायं] आहच्च सायं, भवणवइवाणमंतरजोइसवेमाणिया एगंतसायं वेयणं वेयंति आहच्च असायं, पुढविक्काइया जाव मणुस्सा वेमायाए वेयणं वेयंति आहच्च सायमसायं, से तेणट्ठेणं ० ॥ २५६ ॥ नेरइया णं भंते ! जे पोग्गले अत्तमायाए आहारेंति ते किं आयसरीरखेत्तोगाढे पोग्गले अत्तमायाए आहारेंति अणंतरखेत्तोगाढे पोग्गले अत्तमायाए आहारेंति परंपरखेत्तोगाढे पोग्गले अत्तमायाए आहारेंति ?, गोयमा ! आयसरीरखेत्तोगाढे पोग्गले अत्तमायाए आहारेंति नो अणंतरखेत्तोगाढे पोग्गले अत्तमायाए आहारेंति नो परंपरखेत्तोगाढे, जहा नेरइया तहा जाव वेमाणियाणं दंडओ ॥ २५७ ॥ केवली णं भंते ! आयाणेहिं जाणइ पासइ ?, गोयमा ! नो तिणट्ठे ० । से केणट्ठेणं ?, गोयमा ! केवली णं पुरच्छिमेणं मियंपि जाणइ अमियंपि जाणइ जाव निव्वुडे दंसणे केवलिस्स से तेणट्ठेणं ० । गाहा-जीवाणं सुहं दुक्खं जीवे जीवइ तहेव भविया य । एगंतदुक्खवेयणं अत्तमाया य केवली ॥ १ ॥ सेवं भंते ! सेवं भंते ! ति ॥ २५८ ॥ छट्ठं सयं समत्तं ॥

गाहा—आहार १ विरइ २ थावर ३ जीवा ४ पक्खी य ५ आउ ६ अणगारे ७ । छउमत्थ ८ असंबुड ९ अन्नउत्थि १० दस सत्तमंसि सए ॥ १ ॥ तेणं कालेणं तेणं समएणं जाव एवं वयासी-जीवे णं भंते ! कं समयमणाहारए भवइ ?, गोयमा ! पढमे समए सिय आहारए सिय अणाहारए बिइए समए सिय आहारए सिय अणाहारए तइए समए सिय आहारए सिय अणाहारए चउत्थे समए नियमा आहारए, एवं दंडओ, जीवा य एगिदिया य चउत्थे समए सेसा तइए समए ॥ जीवे णं भंते ! कं समयं सव्वप्पाहारए भवइ ?, गोयमा ! पढमसमयोववन्नए वा चरमसमए भवत्थे वा एत्थ णं जीवे णं सव्वप्पाहारए भवइ, दंडओ भाणियव्वो जाव वेमाणियाणं ॥ २५९ ॥ किंसंठिए णं भते ! लोए पन्नते ?, गोयमा ! सुपइट्ठगसंठिएलोए पन्नते, हेट्ठा विच्छिन्ने जाव उप्पि उट्ठमुइंगारसंठिए, तेसि च णं

सासयंसि लोमंसि हेट्ठा विच्छिन्नंसि जाव उप्पि उद्धमुइंगागारसंठियंसि उप्पन्नाना-
दंसणधरे अरहा जिणे केवली जीवेवि जाणइ पासइ अजीवेवि जाणइ पासइ तओ
पच्छा सिज्झइ जाव अंतं करेइ ॥ २६० ॥ समणोवासगस्स णं भंते ! सामाइय-
कडस्स समणोवासए अच्छमाणस्स तस्स णं भंते ! कि इरियावहिया किरिया
कज्जइ संपराइया किरिया कज्जइ ?, गोयमा ! समणोवासयस्स णं सामाइयकडस्स
समणोवासए अच्छमाणस्स आया अहिगरणीभवइ आयाहिगरणवत्तियं च णं तस्स
नो इरियावहिया किरिया कज्जइ संपराइया किरिया कज्जइ, से तेणट्ठेणं जाव संपरा-
इया० ॥ २६१ ॥ समणोवासगस्स णं भंते ! पुव्वामेव तसपाणसमारंभे पच्चक्खाए
भवइ पुढविसमारंभे अपच्चक्खाए भवइ से य पुढविं खणमाणेऽण्णयरं तसं पाणं
विहिंसेजा से णं भंते ! तं वयं अइचरइ ?, णो तिणट्ठे समट्ठे, नो खलु से तस्स
अइवायाए आउट्ठइ । समणोवासयस्स णं भंते ! पुव्वामेव वणस्सइसमारंभे पच्च-
क्खाए से य पुढविं खणमाणे अन्नयरस्स रुक्खस्स मूलं छिंदेजा से णं भंते ! तं
वयं अइचरइ ?, णो तिणट्ठे समट्ठे, नो खलु तस्स अइवायाए आउट्ठइ ॥ २६२ ॥
समणोवासए णं भंते ! तहारुवं समणं वा माहणं वा फासुएसणिज्जेणं असणपाण-
खाइमसाइमेणं पडिलाभेमाणे किं लब्भइ ?, गोयमा ! समणोवासए णं तहारुवं समणं
वा जाव पडिलाभेमाणे तहारुवस्स समणस्स वा माहणस्स वा समाहिं उप्पाएइ,
समाहिकारएणं तमेव समाहिं पडिलभइ । समणोवासए णं भंते ! तहारुवं समणं
वा जाव पडिलाभेमाणे किं चयइ ?, गोयमा ! जीवियं चयइ दुच्चयं चयइ दुक्करं
करेइ दुल्लहं लहइ वोहिं वुज्झइ तओ पच्छा सिज्झइ जाव अंतं करेइ ॥ २६३ ॥
अत्थि णं भंते ! अकम्मस्स गई पन्नायइ ?, हंता ! अत्थि ॥ कहन्नं भंते ! अक-
म्मस्स गई पन्नायइ ?, गोयमा ! निस्संगयाए निरंगणयाए गइपरिणामेणं वंधण-
छेयणयाए निरंधणयाए पुव्वप्पओगेणं अकम्मस्स गई प० ॥ कहन्नं भंते ! निस्संग-
याए निरंगणयाए गइपरिणामेणं वंधणछेयणयाए निरंधणयाए पुव्वप्पओगेणं अक-
म्मस्स गई पन्नायइ ?, से जहानामए-केइ पुरिसे सुक्कं तुवं निच्छिड्ढं निस्वहयंति
आणुपुव्वीए परिकम्मेमाणे २ दब्भेहि य कुसेहि य वेडेइ २ अट्ठहिं मट्ठियालेवेहिं
लिंपइ २ उण्हे दलयइ भूइं २ सुक्कं समाणं अत्थाहमतारमपोरसियंसि उदगंसि
पक्खिवेजा, से नूणं गोयमा ! से तुंवे तेसि अट्ठण्हं मट्ठियालेवेणं गुरुयत्ताए भारिय-
त्ताए गुरुसंभारियत्ताए सलिलतलमइवइत्ता अहे धरणितलपइट्ठाणे भवइ ?, हंता !
भवइ, अहे णं से तुंवे अट्ठण्हं मट्ठियालेवेणं परिक्खएणं धरणितलमइवइत्ता उप्पि
सलिलतलपइट्ठाणे भवइ ?, हंता ! भवइ, एवं खलु गोयमा ! निस्संगयाए निरंगण-

याए गइपरिणामेणं अकम्मस्स गई पन्नायइ । कहन्नें भंते ! वंधणछेयणयाए अक-
 म्मस्स गई प० ?, गोयमा ! से जहानामए-कलसिवलियाइ वा भुग्गसिवलियाइ वा
 माससिवलियाइ वा सिबलिसिवलियाइ वा एरंडमिंजियाइ वा उण्हे दिन्ना सुक्का-
 समानी फुडित्ता णं एगंतमंतं गच्छइ, एवं खलु गोयमा ! ० । कहन्नें भंते ! निरं-
 धणयाए अकम्मस्स गई प० ?, गोयमा ! से जहानामए-धूमस्स इंधणविप्पमुक्कस्स
 उड्डं वीससाए निव्वाघाएणं गई पवत्तइ, एवं खलु गोयमा ! ० । कहन्नें भंते !
 पुव्वप्पओगेणं अकम्मस्स गई प० ?, गोयमा ! से जहानामए कंडस्स कोदंडविप्प-
 मुक्कस्स लक्खाभिमुही निव्वाघाएणं गई पवत्तइ, एवं खलु गोयमा ! नीसंगयाए
 निरंगणयाए जाव पुव्वप्पओगेणं अकम्मस्स गई प० ॥ २६४ ॥ दुक्खी भंते !
 दुक्खेणं फुडे अदुक्खी दुक्खेणं फुडे ?, गोयमा ! दुक्खी दुक्खेणं फुडे नो अदुक्खी
 दुक्खेणं फुडे । दुक्खी णं भंते ! नेरइए दुक्खेणं फुडे अदुक्खी नेरइए दुक्खेणं
 फुडे ?, गोयमा ! दुक्खी नेरइए दुक्खेणं फुडे नो अदुक्खी नेरइए दुक्खेणं फुडे,
 एवं दंडओ जाव वेमाणियाणं, एवं पंच दंडगा नेयव्वा-दुक्खी दुक्खेणं फुडे १
 दुक्खी दुक्खं परियायइ २ दुक्खी दुक्खं उदीरेइ ३ दुक्खी दुक्खं वेदेइ ४ दुक्खी
 दुक्खं निजरेइ ५ ॥ २६५ ॥ अणगारस्स णं भंते ! अणाउत्तं गच्छमाणस्स वा
 चिट्ठमाणस्स वा निसीयमाणस्स (वा) तुयट्ठमाणस्स वा अणाउत्तं वत्थं पडिग्गहं
 कंवलं पायपुंछणं गेण्हमाणस्स वा निक्खिवमाणस्स वा तस्स णं भंते ! किं इरिया-
 वहिया किरिया कज्जइ ? संपराइया किरिया कज्जइ ?, गो० नो इरियावहिया किरिया
 कज्जइ संपराइया किरिया कज्जइ । से केणट्ठेणं० ?, गोयमा ! जस्स णं कोहमाण-
 मायालोभा वोच्छिन्ना भवंति तस्स णं इरियावहिया किरिया कज्जइ नो संपराइया
 किरिया कज्जइ, जस्स णं कोहमाणमायालोभा अवोच्छिन्ना भवंति तस्स णं संपराइया
 किरिया कज्जइ नो इरियावहिया, अहासुत्तं रीयमाणस्स इरियावहिया किरिया कज्जइ
 उस्सुत्तं रीयमाणस्स संपराइया किरिया कज्जइ, से णं उस्सुत्तमेव रियइ, से तेण-
 ट्ठेणं० ॥ २६६ ॥ अह भंते ! सइंगालस्स सधूमस्स संजोयणादोसदुट्ठस्स पाण-
 भोयणस्स के अट्ठे पण्णत्ते ?, गोयमा ! जे णं निग्गंथे वा निग्गंथी वा फासुएसणिज्जं
 असणपाण ४ पडिगाहिता मुच्छिणं गिद्धे गडिणं अज्झोववन्ने आहारं आहारेइ
 एस णं गोयमा ! सइंगाले पाणभोयणे, जे णं निग्गंथे वा निग्गंथी वा फासुएसणिज्जं
 असणपाण ४ पडिगाहिता महया २ अप्पत्तियकोहकिलामं करेमाणे आहारमाहारेइ
 एस णं गोयमा ! सधूमे पाणभोयणे, जे णं निग्गंथे वा २ जाव पडिगाहेत्ता गुण-
 पाप्यणहेउं अन्नदव्वेण सद्धिं संजोएत्ता आहारमाहारेइ एस णं गोयमा ! संजोयणा-

दोसदुट्टे पाणभोयणे, एस णं गोयमा ! सइंगालस्स सधूमस्स संजोयणादोसदुट्टस्स पाणभोयणस्स अट्टे पन्नत्ते । अह भंते ! वीतिगालस्स वीयधूमस्स संजोयणादोस-विप्पमुक्कस्स पाणभोयणस्स के अट्टे पन्नत्ते ?, गोयमा ! जे णं निग्गंथे वा जाव पडिगाहेत्ता अमुच्छिण्ण जाव आहारेइ एस णं गोयमा ! वीतिगाले पाणभोयणे, जे णं निग्गंथे वा निग्गंथी वा जाव पडिगाहेत्ता णो महया अप्पत्तिं जाव आहारेइ, एस णं गोयमा ! वीयधूमे पाणभोयणे, जे णं निग्गंथे वा निग्गंथी वा जाव पडिगाहेत्ता जहालद्धं तहा आहारमाहारेइ एस णं गोयमा ! संजोयणादोसविप्पमुक्के पाणभोयणे, एस णं गोयमा ! वीतिगालस्स वीयधूमस्स संजोयणादोसविप्पमुक्कस्स पाणभोयणस्स अट्टे पन्नत्ते ॥ २६७ ॥ अह भंते ! खेत्ताइक्कंतस्स कालाइक्कंतस्स मग्गाइक्कंतस्स पमाणाइक्कंतस्स पाणभोयणस्स के अट्टे पन्नत्ते ?, गो० जे णं निग्गंथे वा निग्गंथी वा फासुएसणिज्जं णं असणं ४ अणुग्गए सूरिए पडिगाहिता उग्गए सूरिए आहारमाहारेइ एस णं गोयमा ! खेत्ताइक्कंते पाणभोयणे, जे णं निग्गंथो वा २ जाव साइमं पढमाए पोरिसीए पडिगाहेत्ता पच्छिमं पोरिसिं उवायणावेत्ता आहारं आहारेइ एस णं गोयमा ! कालाइक्कंते पाणभोयणे, जे णं निग्गंथो वा २ जाव साइमं पडिगाहिता परं अद्धजोयणमेराए वीइक्कमावइत्ता आहारमाहारेइ एस णं गोयमा ! मग्गाइक्कंते पाणभोयणे, जे णं निग्गंथो वा निग्गंथी वा फासुएसणिज्जं जाव साइमं पडिगाहिता परं वत्तीसाए पमाणमेत्ताणं कवलणं आहारमाहारेइ एस णं गोयमा ! पमाणाइक्कंते पाणभोयणे, अट्टपमाणमेत्ते कवले आहारमाहारेमाणे अप्पाहारे दुवालसपमाणमेत्ते कवले आहारमाहारेमाणे अवद्धोमोयरिया सोलस-पमाणमेत्ते कवले आहारमाहारेमाणे दुभागपत्ते चउव्वीसं पमाणमेत्ते कवले आहारमाहारेमाणे ओमोयरिए वत्तीसं पमाणमेत्ते कवले (जत्तिओ जस्स पुरिसस्स आहारो तस्साहारस्स वत्तीसइमो भागो तप्पुरिसावेक्खाए कवले, इणमेव 'कवल' पमाणं ति,) आहारमाहारेमाणे पमाणपत्ते, एत्तो एक्केणवि गासेणं ऊणगं आहार-माहारेमाणे समणे निग्गंथे नो पकामरसभोईति वत्तव्वं सिया, एस णं गोयमा ! खेत्ताइक्कंतस्स कालाइक्कंतस्स मग्गाइक्कंतस्स पमाणाइक्कंतस्स पाणभोयणस्स अट्टे पन्नत्ते ॥ २६८ ॥ अह भंते ! सत्थाईयस्स सत्थपरिणामियस्स एसियस्स वेसियस्स समुदाणियस्स पाणभोयणस्स के अट्टे पन्नत्ते ?, गोयमा ! जे णं निग्गंथे वा निग्गंथी वा निक्खित्तसत्थमुसले ववंगयमालावन्नगविलेवणे ववगयचुयचइयचत्तदेहं जीवविप्पजडं अकयमकारियमसंकप्पियमणाहूयमकीयकडमणुद्धिदं नवकोडीपरिसुद्धं दसदोसविप्पमुक्कं उग्गमुप्पायणेषणासुपरिसुद्धं वीतिगालं वीयधूमं संजोयणादोसविप्पमुक्कं असुरसुरं

अचवचवं अदुयमविलंबियं अपरिसाडि अक्खोवंजणवणाणुलेवणभूयं संजमजायामा-
यावत्तियं संजमभारवहणट्टयाए विलमिव पन्नगभूएणं अप्पाणेणं आहारमाहारेइ एस
णं गोयमा ! सत्थाईयस्स सत्थपरिणामियस्स जाव पाणभोयणस्स अयमट्ठे पन्नत्ते ।
सेवं भंते ! सेवं भंते ! त्ति ॥ २६९ ॥ **सत्तमसए पढमो उद्देसो समत्तो ॥**
. से नूणं भंते ! सव्वपाणेहिं सव्वभूएहिं सव्वजीवेहिं सव्वसत्तेहिं पच्चक्खायमिति
वयमाणस्स सुपच्चक्खायं भवइ दुपच्चक्खायं भवइ ?, गोयमा ! सव्वपाणेहिं जाव
सव्वसत्तेहिं पच्चक्खायमिति वयमाणस्स सिय सुपच्चक्खायं भवइ सिय दुपच्चक्खायं
भवइ, से केणट्ठेणं भंते ! एवं वुच्चइ सव्वपाणेहिं जाव सिय दुपच्चक्खायं भवइ ?,
गोयमा ! जस्स णं सव्वपाणेहिं जाव सव्वसत्तेहिं पच्चक्खायमिति वयमाणस्स णो
एवं अभिसमन्नागयं भवइ इमे जीवा इमे अजीवा इमे तसा इमे थावरा तस्स णं
सव्वपाणेहिं जाव सव्वसत्तेहिं पच्चक्खायमिति वयमाणस्स नो सुपच्चक्खायं भवइ
दुपच्चक्खायं भवइ, एवं खलु से दुपच्चक्खाई सव्वपाणेहिं जाव सव्वसत्तेहिं पच्च-
क्खायमिति वयमाणो नो सच्चं भासं भासइ मोसं भासं भासइ, एवं खलु से मुसा-
वाई सव्वपाणेहिं जाव सव्वसत्तेहिं तिविहं तिविहेणं असंजयविरयपडिहयपच्चक्खा-
यपावकम्मे सकिरिए असंवुडे एगंतदंडे एगंतवाले यावि भवइ, जस्स णं सव्वपा-
णेहिं जाव सव्वसत्तेहिं पच्चक्खायमिति वयमाणस्स एवं अभिसमन्नागयं भवइ-इमे
जीवा इमे अजीवा इमे तसा इमे थावरा, तस्स णं सव्वपाणेहिं जाव सव्वसत्तेहिं
पच्चक्खायमिति वयमाणस्स सुपच्चक्खायं भवइ नो दुपच्चक्खायं भवइ, एवं खलु
से सुपच्चक्खाई सव्वपाणेहिं जाव सव्वसत्तेहिं पच्चक्खायमिति वयमाणे सच्चं भासं
भासइ नो मोसं भासं भासइ, एवं खलु से सच्चवाई सव्वपाणेहिं जाव सव्वसत्तेहिं
तिविहं तिविहेणं संजयविरयपडिहयपच्चक्खायपावकम्मे अकिरिए संवुडे एगंतपं-
डिए यावि भवइ, से तेणट्ठेणं गोयमा ! एवं वुच्चइ जाव सिय दुपच्चक्खायं भवइ
॥ २७० ॥ कइविहे णं भंते ! पच्चक्खाणे पन्नत्ते ?, गोयमा ! दुविहे पच्चक्खाणे
पन्नत्ते, तंजहा-मूलगुणपच्चक्खाणे य उत्तरगुणपच्चक्खाणे य । मूलगुणपच्चक्खाणे णं
भंते ! कइविहे पन्नत्ते ?, गोयमा ! दुविहे पन्नत्ते, तंजहा-सव्वमूलगुणपच्चक्खाणे य
देसमूलगुणपच्चक्खाणे य, सव्वमूलगुणपच्चक्खाणे णं भंते ! कइविहे पन्नत्ते ?,
गोयमा ! पंचविहे पन्नत्ते, तंजहा-सव्वाओ पाणाइवायाओ वेरमणं जाव सव्वाओ
परिग्गहाओ वेरमणं । देसमूलगुणपच्चक्खाणे णं भंते ! कइविहे पन्नत्ते ?, गोयमा !
पंचविहे पन्नत्ते, तंजहा-थूलाओ पाणाइवायाओ वेरमणं जाव थूलाओ परिग्गहाओ
वेरमणं । उत्तरगुणपच्चक्खाणे णं भंते ! कइविहे पन्नत्ते ? गोयमा ! दुविहे पन्नत्ते,

तंजहा-सव्वुत्तरगुणपच्चक्खाणे य देसुत्तरगुणपच्चक्खाणे य, सव्वुत्तरगुणपच्चक्खाणे
 णं भंते ! कइविहे पन्नत्ते ?, गोयमा ! दसविहे पन्नत्ते, तंजहा-अणागय १ मइक्कंतं
 २ कोडीसहियं ३ नियंटियं ४ चेव । सागार ५ मणागारं ६ परिमाणकडं ७ निर-
 वसेसं ८ ॥ १ ॥ सा(सं)केयं ९ चेव अद्वाए १० पच्चक्खाणं भवे दसहा । देसु-
 त्तरगुणपच्चक्खाणे णं भंते ! कइविहे पन्नत्ते ?, गोयमा ! सत्तविहे पन्नत्ते, तंजहा-
 दिसिक्खयं १ उवभोगपरिभोगपरिमाणं २ अणत्थदंडवेरमणं ३ सामाइयं ४ देसाव-
 गासियं ५ पोसहोववासो ६ अतिहिसंविभागो ७ अपच्छिममारणंतियसंलेहणाद्गसणा-
 राहणया ॥ २७१ ॥ जीवा णं भंते ! किं मूलगुणपच्चक्खाणी उत्तरगुणपच्चक्खाणी
 अपच्चक्खाणी ?, गोयमा ! जीवा मूलगुणपच्चक्खाणीवि उत्तरगुणपच्चक्खाणीवि अप-
 च्चक्खाणीवि । नेरइया णं भंते ! किं मूलगुणपच्चक्खाणी० पुच्छा, गोयमा ! नेरइया
 नो मूलगुणपच्चक्खाणी नो उत्तरगुणपच्चक्खाणी अपच्चक्खाणी, एवं जाव चउरिंदिया,
 पंचिंदियतिरिक्खजोणिया मणुस्सा य जहा जीवा, वाणमंतरजोइसियवेमाणिया जहा
 नेरइया ॥ एएसि णं भंते ! जीवाणं मूलगुणपच्चक्खाणीणं उत्तरगुणपच्चक्खाणीणं
 अपच्चक्खाणीण य कयरे २ हितो जाव विसेसाहिया वा ?, गोयमा ! सव्वत्थोवा
 जीवा मूलगुणपच्चक्खाणी उत्तरगुणपच्चक्खाणी असंखेज्जगुणा अपच्चक्खाणी अणंत-
 गुणा । एएसि णं भंते ! पंचिंदियतिरिक्खजोणियाणं पुच्छा, गोयमा ! सव्वत्थोवा
 जीवा पंचिंदियतिरिक्खजोणिया मूलगुणपच्चक्खाणी उत्तरगुणपच्चक्खाणी असंखेज्जगुणा
 अपच्चक्खाणी असंखेज्जगुणा । एएसि णं भंते ! मणुस्साणं मूलगुणपच्चक्खाणीणं०
 पुच्छा, गोयमा ! सव्वत्थोवा मणुस्सा मूलगुणपच्चक्खाणी उत्तरगुणपच्चक्खाणी संखे-
 ज्जगुणा अपच्चक्खाणी असंखेज्जगुणा । जीवा णं भंते ! किं सव्वमूलगुणपच्चक्खाणी
 देसमूलगुणपच्चक्खाणी अपच्चक्खाणी ?, गोयमा ! जीवा सव्वमूलगुणपच्चक्खाणीवि
 देसमूलगुणपच्चक्खाणीवि अपच्चक्खाणीवि । नेरइयाणं पुच्छा, गोयमा ! नेरइया नो
 सव्वमूलगुणपच्चक्खाणी नो देसमूलगुणपच्चक्खाणी अपच्चक्खाणी, एवं जाव चउरिं-
 दिया । पंचिंदियतिरिक्ख० पुच्छा, गोयमा ! पंचिंदियतिरिक्ख० नो सव्वमूलगुणप-
 च्चक्खाणी देसमूलगुणपच्चक्खाणीवि अपच्चक्खाणीवि, मणुस्सा जहा जीवा, वाणमंत-
 रजोइसियवेमाणिया जहा नेरइया । एएसि णं भंते ! जीवाणं सव्वमूलगुणपच्चक्खाणीणं
 देसमूलगुणपच्चक्खाणीणं अपच्चक्खाणीण य कयरे २ हितो जाव विसेसाहिया वा ?,
 गोयमा ! सव्वत्थोवा जीवा सव्वमूलगुणपच्चक्खाणी देसमूलगुणपच्चक्खाणी असंखे-
 ज्जगुणा अपच्चक्खाणी अणंतगुणा । एवं अप्पावहुगाणि तिन्निवि जहा पढमिहए दंडए,
 नवरं सव्वत्थोवा पंचिंदियतिरिक्खजोणिया देसमूलगुणपच्चक्खाणी अपच्चक्खाणी

असंखेज्जगुणा । जीवा णं भंते ! किं सव्वुत्तरगुणपच्चक्खाणी देसुत्तरगुणपच्चक्खाणी अपच्चक्खाणी ?, गोयमा ! जीवा सव्वुत्तरगुणपच्चक्खाणीवि तिन्निवि, पंचिंदियतिरिक्खजोणिया मणुस्सा य एवं चेव, सेसा अपच्चक्खाणी जाव वेमाणिया । एएसि णं भंते ! जीवाणं सव्वुत्तरगुणपच्चक्खाणीणं० अप्पावहुगाणि, तिन्निवि जहा पढमे दंडए जाव मणूसाणं ॥ जीवा णं भंते ! किं संजया असंजया संजयासंजया ? गोयमा ! जीवा संजयावि असंजयावि संजयासंजयावि, एवं जहेव पन्नवणाए तहेव भाणियव्वं जाव वेमाणिया, अप्पावहुगं तहेव तिण्हवि भाणियव्वं ॥ जीवा णं भंते ! किं पच्चक्खाणी अपच्चक्खाणी पच्चक्खाणापच्चक्खाणी ?, गोयमा ! जीवा पच्चक्खाणीवि एवं तिन्निवि, एवं मणुस्सावि तिन्निवि, पंचिंदियतिरिक्खजोणिया आइल्लविरहिया सेसा सव्वे अपच्चक्खाणी जाव वेमाणिया । एएसि णं भंते ! जीवाणं पच्चक्खाणीणं जाव विसेसाहिया वा ?, गोयमा ! सव्वत्थोवा जीवा पच्चक्खाणी पच्चक्खाणापच्चक्खाणी असंखेज्जगुणा अपच्चक्खाणी अणंतगुणा, पंचिंदियतिरिक्खजोणिया सव्वत्थोवा पच्चक्खाणापच्चक्खाणी अपच्चक्खाणी असंखेज्जगुणा, मणुस्सा सव्वत्थोवा पच्चक्खाणी पच्चक्खाणापच्चक्खाणी संखेज्जगुणा अपच्चक्खाणी असंखेज्जगुणा ॥२७२॥ जीवा णं भंते ! किं सासया असासया ?, गोयमा ! जीवा सिय सासया सिय असासया । से कैणट्ठेणं भंते ! एवं वुच्चइ-जीवा सिय सासया सिय असासया ?, गोयमा ! दव्वट्ठयाए सासया भावट्ठयाए असासया, से तेणट्ठेणं गोयमा ! एवं वुच्चइ-जाव सिय असासया । नेरइया णं भंते ! किं सासया असासया ?, एवं जहा जीवा तहा नेरइयावि, एवं जाव वेमाणिया जाव सिय सासया सिय असासया । सेवं भंते ! सेवं भंते ! त्ति ॥ २७३ ॥ सत्तमस्स विइओ उद्देसो समत्तो ॥

वणस्सइकाइया णं भंते ! किंकालं सव्वप्पाहारगा वा सव्वमहाहारगा वा भवंति ?, गोयमा ! पाउसवरिसारत्तेसु णं एत्थ णं वणस्सइकाइया सव्वमहाहारगा भवंति तयाणंतरे च णं सरए, तयाणंतरे च णं हेसंते, तयाणंतरे च णं वसंते, तयाणंतरे च णं गिम्हे, गिम्हासु णं वणस्सइकाइया सव्वप्पाहारगा भवंति, जइ णं भंते ! गिम्हासु वणस्सइकाइया सव्वप्पाहारगा भवंति, कम्हा णं भंते ! गिम्हासु बहवे वणस्सइकाइया पत्तिया पुप्फिया फलिया हरियगरेरिज्जमाणा सिरीए अईव अईव उवसोभेमाणा उवसोभेमाणा चिट्ठंति ?, गोयमा ! गिम्हासु णं बहवे उसिणजोणिया जीवा य पोग्गला य वणस्सइकाइयत्ताए वक्कमंति विउक्कमंति चयंति उववज्जंति, एवं खलु गोयमा ! गिम्हासु बहवे वणस्सइकाइया पत्तिया पुप्फिया जाव चिट्ठंति ॥ २७४ ॥ से नूणं भंते ! मूला मूलजीवफुडा कंदा कंदजीवफुडा जाव बीया बीय-

जीवफुडा ?, हंता गोयमा ! मूला मूलजीवफुडा जाव बीया वीयजीवफुडा । जइ णं भंते ! मूला मूलजीवफुडा जाव बीया वीयजीवफुडा कम्हा णं भंते ! वणस्सइ-काइया आहारेंति कम्हा परिणामेंति ?, गोयमा ! मूला मूलजीवफुडा पुढविजीव-पडिवद्धा तम्हा आहारेंति तम्हा परिणामेंति, कंदा कंदजीवफुडा मूलजीवपडिवद्धा तम्हा आहारेन्ति तम्हा परिणामेन्ति, एवं जाव बीया वीयजीवफुडा फलजीवपडिवद्धा तम्हा आहारेन्ति तम्हा परिणामेन्ति ॥ २७५ ॥ अह भंते ! आलुए मूलए सिंगवेरे हिरिली सिरिली सिस्सिरिली किट्टिया छिरिया छीरिविरालिया कण्हकंदे वज्जकंदे सूरणकंदे खेल्लडे अइए भइमुत्था पिंडहलिद्दा लोही णीहू थीहू थिरुगा मुग्गकन्नी अस्सकन्नी सीहकण्णी मुसुंढी जे यावन्ने तहप्पगारा सव्वे ते अणंतजीवा विविहसत्ता ?, हंता गोयमा ! आलुए मूलए जाव अणंतजीवा विविहसत्ता ॥ २७६ ॥ सिय भंते ! कण्हलेसे नेरइए अप्पकम्मतराए नीललेसे नेरइए महाकम्मतराए ?, हंता ! सिया, से केणट्टेणं भंते ! एवं वुच्चइ-कण्हलेसे नेरइए अप्पकम्मतराए नीललेसे नेरइए महा-कम्मतराए ?, गोयमा ! ठिइं पडुच्च, से तेणट्टेणं गोयमा ! जाव महाकम्मतराए । सिय भंते ! नीललेसे नेरइए अप्पकम्मतराए काउलेसे नेरइए महाकम्मतराए ? हंता ! सिया, से केणट्टेणं भंते ! एवं वुच्चइ-नीललेसे नेरइए अप्पकम्मतराए काउलेसे नेरइए महाकम्मतराए ?, गोयमा ! ठिइं पडुच्च, से तेणट्टेणं गोयमा ! जाव महाकम्म-तराए । एवं असुरकुमारेवि, नवरं तेउलेसा अब्भहिया एवं जाव वेमाणिया, जस्स जइ लेसाओ तस्स तत्तिया भाणियव्वाओ, जोइसियस्स न भन्नइ, जाव सिय भंते ! पम्हलेसे वेमाणिए अप्पकम्मतराए सुक्कलेसे वेमाणिए महाकम्मतराए ?, हंता ! सिया, से केणट्टेणं ? सेसं जहा नेरइयस्स जाव महाकम्मतराए ॥ २७७ ॥ से नूणं भंते ! जा वेयणा सा निज्जरा जा निज्जरा सा वेयणा ?, गोयमा ! णो तिणट्टे समट्टे, से केणट्टेणं भंते ! एवं वुच्चइ जा वेयणा न सा निज्जरा जा निज्जरा न सा वेयणा ?, गोयमा ! कम्म वेयणा णोकम्म निज्जरा, से तेणट्टेणं गोयमा ! जाव न सा वेयणा । नेरइयाणं भंते ! जा वेयणा सा निज्जरा जा निज्जरा सा वेयणा ?, गोयमा ! णो तिणट्टे समट्टे, से केणट्टेणं भंते ! एवं वुच्चइ नेरइयाणं जा वेयणा न सा निज्जरा जा निज्जरा न सा वेयणा ?, गोयमा ! नेरइयाणं कम्म वेयणा णोकम्म निज्जरा, से तेणट्टेणं गोयमा ! जाव न सा वेयणा, एवं जाव वेमाणियाणं । से नूणं भंते ! जं वेदेंसु तं निज्जरिंसु जं निज्जरिंसु तं वेदेंसु ?, णो तिणट्टे समट्टे, से केणट्टेणं भंते ! एवं वुच्चइ जं वेदेंसु नो तं निज्जरेंसु जं निज्जरेंसु नो तं वेदेंसु ?, गोयमा ! कम्मं वेदेंसु नोकम्मं निज्जरिंसु, से तेणट्टेणं गोयमा ! जाव नो तं वेदेंसु, नेरइया णं भंते !

जं वेदेंसु तं निज्जरिंसु ? एवं नेरइयावि एवं जाव वेमाणिया । से नृणं भंते ! जं वेदेंति तं निज्जरेंति जं निज्जरिति तं वेदेंति ?, गोयमा ! णो तिणट्ठे समट्ठे, से केणट्ठेणं भंते ! एवं बुच्चइ जाव नो तं वेदेंति ?, गोयमा ! कम्मं वेदेंति नो कम्मं निज्जरेंति, से तेणट्ठेणं गोयमा ! जाव नो तं वेदेंति, एवं नेरइयावि जाव वेमाणिया । से नृणं भंते ! जं वेदिस्संति तं निज्जरिस्संति जं निज्जरिस्संति तं वेदिस्संति ?, गोयमा ! णो तिणट्ठे समट्ठे, से केणट्ठेणं जाव णो तं वेदिस्संति ?, गोयमा ! कम्मं वेदिस्संति नो कम्मं निज्जरिस्संति, से तेणट्ठेणं जाव नो तं निज्जरिस्संति, एवं नेरइयावि जाव वेमाणिया । से णूणं भंते ! जे वेयणासमए से निज्जरानमए जे निज्जरासमए से वेयणासमए ?, नो तिणट्ठे समट्ठे, से केणट्ठेणं भंते ! एवं बुत्ताउ जे वेयणासमए न से निज्जरासमए जे निज्जरासमए न से वेयणासमए ?, गोयमा ! जं समयं वेदेंति नो तं समयं निज्जरेंति जं समयं निज्जरेंति नो तं समयं वेदेंति, अन्नम्मि समए वेदेंति अन्नम्मि समए निज्जरेंति अन्ने से वेयणासमए अन्ने से निज्जरासमए, से तेणट्ठेणं जाव न से वेयणासमए न से निज्जरासमए । नेरइयाणं भंते ! जे वेयणासमए से निज्जरासमए जे निज्जरासमए से वेयणासमए ?, गोयमा ! णो तिणट्ठे समट्ठे, से केणट्ठेणं भंते ! एवं बुच्चइ नेरइयाणं जे वेयणासमए न से निज्जरासमए जे निज्जरासमए न से वेयणासमए ?, गोयमा ! नेरइया णं जं समयं वेदेंति णो तं समयं निज्जरेंति जं समयं निज्जरेंति नो तं समयं वेदेंति अन्नम्मि समए वेदेंति अन्नम्मि समए निज्जरेंति अन्ने से वेयणासमए अन्ने से निज्जरासमए, से तेणट्ठेणं जाव न से वेयणासमए एवं जाव वेमाणिया ॥ २७८ ॥ नेरइया णं भंते ! किं सासया असासया ?, गोयमा ! सिय सासया सिय असासया, से केणट्ठेणं भंते ! एवं बुच्चइ नेरइया सिय सासया सिय असासया ?, गोयमा ! अव्वोच्छित्तिणयट्ठयाए सासया वोच्छित्तिणयट्ठयाए असासया, से तेणट्ठेणं जाव सिय सासया सिय असासया, एवं जाव वेमाणिया जाव सिय असासया । सेवं भंते ! सेवं भंते ! त्ति ॥ २७९ ॥

सत्तमे सए तइओ उद्देसो समत्तो ॥

रायगिहे नगरे जाव एवं वयासी-कइविहा णं भंते ! संसारसमावन्नगा जीवा पन्नत्ता ?, गोयमा ! छव्विहा संसारसमावन्नगा जीवा पन्नत्ता, तंजहा—पुढविकाइया एवं जहा जीवाभिगमे जाव सम्मत्तकिरियं वा मिच्छत्तकिरियं वा ॥ जीवा छव्विहा पुढवी जीवाण ठिई भवट्ठिई काए । निह्वेण अणगारे किरिया सम्मत्तमिच्छत्ता ॥ १ ॥ सेवं भंते ! सेवं भंते ! त्ति ॥ २८० ॥

सत्तमे सए चउत्थो उद्देसो समत्तो ॥

रायगिहे जाव एवं वयासी-खहयरणंचिदियतिरिक्खजोणियाणं भंते ! कइविहे

णं जोणीसंगहे पण्णत्ते ?, गोयमा ! तिविहे जोणीसंगहे पण्णत्ते, तंजहा-अंडया पोयया संमुच्छिमा, एवं जहा जीवाभिगमे जाव नो चेव णं ते विमाणे वीईव-एजा । एवंमहाल्याणं गोयमा ! ते विमाणा पन्नत्ता ॥ 'जोणीसंगह लेसा दिट्ठी नाणे य जोग उवओगे । उववायठिइसमुग्घायचवणजाईकुलविहीओ' ॥ १ ॥ सेवं भंते ! सेवं भंते ! त्ति ॥ २८१ ॥ सत्तमे सए पंचमो उद्देसो समत्तो ॥

रायगिहे जाव एवं वयासी-जीवे णं भंते ! जे भविए नेरइएसु उववज्जित्तए से णं भंते ! कि इहगए नेरइयाउयं पकरेइ उववज्जमाणे नेरइयाउयं पकरेइ उववन्ने नेरइयाउयं पकरेइ ?, गोयमा ! इहगए नेरइयाउयं पकरेइ नो उववज्जमाणे नेरइयाउयं पकरेइ नो उववन्ने नेरइयाउयं पकरेइ, एवं असुरकुमारेसुवि एवं जाव वेमाणिएसु । जीवे णं भंते ! जे भविए नेरइएसु उववज्जित्तए से णं भंते ! किं इहगए नेरइयाउयं पडिसंवेदेइ उववज्जमाणे नेरइयाउयं पडिसंवेदेइ उववन्ने नेरइयाउयं पडिसंवेदेइ ?, गोयमा ! णो इहगए नेरइयाउयं पडिसंवेदेइ उववज्जमाणे नेरइयाउयं पडिसंवेदेइ उववन्ने नेरइयाउयं पडिसंवेदेइ, एवं जाव वेमाणिएसु । जीवे णं भंते ! जे भविए नेरइएसु उववज्जित्तए से णं भंते ! किं इहगए महावेयणे उववज्जमाणे महावेयणे उववन्ने महावेयणे ?, गोयमा ! इहगए सिय महावेयणे सिय अप्पवेयणे उववज्जमाणे सिय महावेयणे सिय अप्पवेयणे अहे णं उववन्ने भवइ तओ पच्छा एगंतदुक्खं वेयणं वेयइ आहच्च सायं । जीवे णं भंते ! जे भविए असुरकुमारेसु उववज्जित्तए पुच्छा, गोयमा ! इहगए सिय महावेयणे सिय अप्पवेयणे उववज्जमाणे सिय महावेयणे सिय अप्पवेयणे अहे णं उववन्ने भवइ तओ पच्छा एगंतसायं वेयणं वेदेइ आहच्च असायं, एवं जाव थणियकुमारेसु । जीवे णं भंते ! जे भविए पुढाविकाइएसु उववज्जित्तए पुच्छा, गोयमा ! इहगए सिय महावेयणे सिय अप्पवेयणे, एवं उववज्जमाणेवि, अहे णं उववन्ने भवइ तओ पच्छा वेमायाए वेयणं वेयइ, एवं जाव मणुस्सेसु, वाणमंतरजोइसियवेमाणिएसु जहा असुरकुमारेसु ॥ २८२ ॥ जीवा णं भंते ! कि आभोगनिव्वत्तियाउया अणाभोगनिव्वत्तियाउया ?, गोयमा ! नो आभोगनिव्वत्तियाउया अणाभोगनिव्वत्तियाउया, एवं नेरइयावि, एवं जाव वेमाणिया ॥ २८३ ॥ अत्थि णं भंते ! जीवाणं कक्कसवेयणिज्जा कम्मा कज्जंति ?, [गोयमा !] हंता ! अत्थि, कहन्नं भंते ! जीवाणं कक्कसवेयणिज्जा कम्मा कज्जंति ?, गोयमा ! पाणाइवाएणं जाव मिच्छादंसणसंल्लेणं, एवं खलु गोयमा ! जीवाणं कक्कसवेयणिज्जा कम्मा कज्जंति । अत्थि णं भंते ! नेरइयाणं कक्कसवेयणिज्जा कम्मा कज्जंति ?, [एवं चेव] एवं जाव वेमाणियाणं । अत्थि णं भंते ! जीवाणं अक्कसवेयणिज्जा

कम्मा कज्जंति ?, हन्ता ! अत्थि, कहन्नं भंते ! जीवाणं अकक्खसवेयणिज्जा कम्मा कज्जंति ?, गोयमा ! पाणाइवायवेरमणेणं जाव परिग्गहवेरमणेणं कोहविवेगेणं जाव मिच्छादंसणसल्लविवेगेणं, एवं खलु गोयमा ! जीवाणं अकक्खसवेयणिज्जा कम्मा कज्जंति । अत्थि णं भंते ! नेरइयाणं अकक्खसवेयणिज्जा कम्मा कज्जंति ?, गोयमा ! णो तिण्हे समट्ठे, एवं जाव वेमाणिया, नवरं मणुस्साणं जहा जीवाणं ॥ २८४ ॥ अत्थि णं भंते ! जीवाणं सायावेयणिज्जा कम्मा कज्जंति ?, हन्ता ! अत्थि, कहन्नं भंते ! जीवाणं सायावेयणिज्जा कम्मा कज्जंति ?, गोयमा ! पाणाणुकंपाए भूयाणुकंपाए जीवाणुकंपाए सत्ताणुकंपाए बहूणं पाणाणं जाव सत्ताणं अदुक्खणयाए असोयणयाए अजूरणयाए अतिप्पणयाए अपिट्ठणयाए अपरियावणयाए एवं खलु गोयमा ! जीवाणं सायावेयणिज्जा कम्मा कज्जंति, एवं नेरइयाणवि, एवं जाव वेमाणियाणं । अत्थि णं भंते ! जीवाणं असायावेयणिज्जा कम्मा कज्जंति ?, हन्ता ! अत्थि । कहन्नं भंते ! जीवाणं असायावेयणिज्जा कम्मा कज्जंति ?, गोयमा ! परदुक्खणयाए परसोयणयाए परजूरणयाए परतिप्पणयाए परपिट्ठणयाए परपरियावणयाए बहूणं पाणाणं जाव सत्ताणं दुक्खणयाए सोयणयाए जाव परियावणयाए एवं खलु गोयमा ! जीवाणं असायावेयणिज्जा कम्मा कज्जंति, एवं नेरइयाणवि, एवं जाव वेमाणियाणं ॥ २८५ ॥ जंबुदीवे णं भंते ! दीवे भारहे वासे इमीसे ओसप्पिणीए दुसमदुसमाए समाए उत्तमकट्ठपत्ताए भारहस्स वासस्स केरिसए आगारभावपडोयारे भविस्सइ ?, गोयमा ! कालो भविस्सइ हाहाभूए भंभाभूए कोलाहलभूए समयाणुभावेण य णं खरफरुसधूलिमइला दुव्विसहा वाउला भयंकरा वाया संवट्ठगा य वाहिंति, इह अभिक्खं २ धूमाहिंति य दिसा सव्वओ समंता रउस्सला रेणुकलुसतमपडलनिरालोगा समयलुक्खयाए य णं अहियं चंदा सीयं मोच्छंति अहियं सूरिया तवइस्संति अदुत्तरं च णं अभिक्खणं वहवे अरसमेहा विरसमेहा खारमेहा खट्ठमेहा अग्गिमेहा विज्जुमेहा विसमेहा असणिमेहा अप्पवणिज्जोदगा (अजवणिज्जोदया) वाहिरोगवेयणोदीरणापरिणामसलिला अमणुजपाणियगा चंडानिलपहयतिक्खधारानिवायपउरवासं वासिहिंति । जे णं भारहे वासे गामागरनगरखेडकन्वडमडंबदोणमुहपट्ठणासमगयं जणवयं चउप्पयगवेलगाए खहयरे य पक्खिसंघे गामारन्नपयारनिरए तसे य पाणे बहुप्पगारे स्वखगुच्छगुम्मलयवल्लितणपव्वगहरियोसहिपवालंकुरमाइए य तणवणस्सइकाइए विद्धंसेहिंति, पव्वयगिरिडोंगरउच्छ(त्थ)लभट्ठिमाइए य वेयड्ढगिरिड्ढजे विराचेहिंति सलिलबिलगड्ढुगंगविसमं निणुजयाइं च गंगासिंधुवज्जाइं समीकरेहिंति ॥ तीसे णं भंते ! समाए भरहवासस्स भूमीए केरिसए आगारभावपडोयारे भविस्सइ ?, गोयमा ! भूमी भविस्सइ

इंगालभूया मुम्मुरभूया छारियभूया तत्तकवेल्लयभूया तत्तसमजोइभूया धूलिवहुला रेणु-
 वहुला पंकवहुला पणगवहुला च्लणिवहुला वहुणं धरणिगोयराणं सत्ताणं दुन्निकमा
 यावि भविस्सइ ॥ २८६ ॥ तीसे णं भंते ! समाए भारहे वासे मणुयाणं केरिसए
 आगारभावपडोयारे भविस्सइ ?, गोयमा ! मणुया भविस्संति दुरूवा दुवन्ना दुगंधा
 दुरसा दुफासा अणिट्ठा अकंता जाव अमणामा हीणस्सरा दीणस्सरा अणिट्ठस्सरा
 जाव अमणामस्सरा अणादेज्जवयणपच्चायाया निल्लजा कूडकवडकलहवहबंधवेरनिरया
 मज्जायाइक्कमप्पहाणा अकज्जनिच्चुज्जया गुरुनियोयविणयरहिया य विकलरूवा पण्ड-
 नहकेसमंसुरोमा काला खरफरुसझामवन्ना फुट्टसिरा कविलपलियकेसा बहुण्हार[णि]-
 संपिणद्धदुहंसणिज्जरूवा संकुडियवलितरंगपरिवेढियंगमंगा जरापरिणयव्व थेरगनरा
 पविरलपरिसडियदंतसेढी उब्भडघडमुहा विसमनयणा वंकनासा वंगवलिविगय-
 भेसणमुहा कच्छुकसराभिभूया खरतिक्खनहकंइइयविकखयतणू दद्दुकिडिभसिंझ-
 फुडियफरुसच्छवी चित्तलंगा टोलागइविसमसंधिवंधणउकुडुअट्टिगविभत्तदुब्बलकु-
 संघयणकुप्पमाणकुसंठिया कुरूवा कुठाणासणकुसेज्जकुभोइणो असुइणो अणेगवाहि-
 परिपीलियंगमंगा खलंतविब्भलगई निरुच्छाहा सत्तपरिवज्जिया विगयचिट्ठा नट्टतेया
 अभिक्खणं सीयउण्हखरफरुसवायविज्झडिया मलिणपंसुरयगुंडियंगमंगा बहुकोह-
 माणमाया बहुलोभा असुहदुक्खभोगी ओसन्नं धम्मसण्णसम्मत्तपरिब्भट्ठा उक्कोसेणं
 रयणिप्पमाणमेत्ता सोलसवीसइवासपरमाउसो पुत्तनत्तुपरियालपणयवहुला गंगा-
 सिंधूओ महानईओ वेयड्डं च पव्वयं निस्साए वावत्तरिं निओदा बीयं बीयामेत्ता
 विलवासिणो भविस्संति ॥ ते णं भंते ! मणुया किमाहारमाहारेहिंति ?, गोयमा ! ते
 णं काले णं ते णं समाए णं गंगसिंधूओ महानईओ रहपहवित्थराओ अक्खसोयप्प-
 माणमेत्तं जलं वोज्झिहिंति सेवि य णं जले बहुमच्छकच्छभाइन्ने णो चेव णं आउवहुले
 भविस्सइ, तए णं ते मणुया सूरुगमणमुहुत्तंसि य सूरुत्थमणमुहुत्तंसि य विलेहितो
 निद्धाहिंति निद्धाइत्ता मच्छकच्छभे थलाइं गाहेहिंति सीयायवतत्तएहिं मच्छकच्छ-
 एहिं एकवीसं वाससहस्साइं वित्तिं कप्पेमाणा विहरिस्संति ॥ ते णं भंते ! मणुया
 निस्सीला निग्गुणा निम्मेरा निप्पच्चक्खाणपोसहोववासा ओसण्णं मंसाहारा मच्छा-
 हारा खोदाहारा कुणिमाहारा कालमासे कालं किच्चा कहिं गच्छिहिंति कहिं उववज्जि-
 हिंति ?, गोयमा ! ओसन्नं नरगतिरिक्खजोणिएसु उववज्जिहिंति, ते णं भंते ! सीहा
 वग्घा वगा दीविया अच्छा तरच्छा परस्सरा निस्सीला तहेव जाव कहिं उववज्जि-
 हिंति ?, गोयमा ! ओसन्नं नरगतिरिक्खजोणिएसु उववज्जिहिंति, ते णं भंते ! ढंका
 कंका विलका मद्दुगा सिही निस्सीला तहेव जाव ओसन्नं नरगतिरिक्खजोणिएसु उव-
 वज्जिहिंति । सेवं भंते ! सेवं भंते ! त्ति ॥ २८७ ॥ सत्तमस्स छट्ठो उद्देसओ ॥

संवुडस्स णं भंते ! अणगारस्स आउत्तं गच्छमाणस्स जाव आउत्तं तुयट्ठमा-
 णस्स आउत्तं वत्थं पडिग्गहं कंवलं पायपुंछणं गेण्हमाणस्स वा निक्खिण्वमाणस्स वा
 तस्स णं भंते ! किं इरियावहिया किरिया कज्जइ संपराइया किरिया कज्जइ ?,
 गोयमा ! संवुडस्स णं अणगारस्स जाव तस्स णं इरियावहिया किरिया कज्जइ णो
 संपराइया किरिया कज्जइ । से केणट्ठेणं भंते ! एवं वुच्चइ-संवुडस्स णं जाव संप-
 राइया किरिया कज्जइ ?, गोयमा ! जस्स णं कोहमाणमायालोभा वोच्छिन्ना भवंति
 तस्स णं इरियावहिया किरिया कज्जइ, तहेव जाव उस्सुत्तं रीयमाणस्स संपराइया
 किरिया कज्जइ, से णं अहासुत्तमेव रीयइ, से तेणट्ठेणं गोयमा ! जाव नो संपराइया
 किरिया कज्जइ ॥ २८८ ॥ रूवी भंते ! कामा अरूवी कामा ? गोयमा ! रूवी कामा
 समणाउसो ! नो अरूवी कामा । सच्चित्ता भंते ! कामा अच्चित्ता कामा ?, गोयमा !
 सच्चित्तावि कामा अच्चित्तावि कामा । जीवा भंते ! कामा अजीवा कामा ?, गोयमा !
 जीवावि कामा अजीवावि कामा । जीवाणं भंते ! कामा अजीवाणं कामा ?, गोयमा !
 जीवाणं कामा नो अजीवाणं कामा, कइविहा णं भंते ! कामा पन्नत्ता ?, गोयमा !
 दुविहा कामा पन्नत्ता, तंजहा-सद्दा य रूवा य, रूवी भंते ! भोगा अरूवी भोगा ?,
 गोयमा ! रूवी भोगा नो अरूवी भोगा, सच्चित्ता भंते ! भोगा अच्चित्ता भोगा ?,
 गोयमा ! सच्चित्तावि भोगा अच्चित्तावि भोगा, जीवा भंते ! भोगा अजीवा भोगा ?,
 गोयमा ! जीवावि भोगा अजीवावि भोगा, जीवाणं भंते ! भोगा अजीवाणं भोगा ?,
 गोयमा ! जीवाणं भोगा नो अजीवाणं भोगा, कइविहा णं भंते ! भोगा पन्नत्ता ?,
 गोयमा ! तिविहा भोगा पन्नत्ता तंजहा-गंधा रसा फासा । कइविहा णं भंते !
 कामभोगा पन्नत्ता ?, गोयमा ! पंचविहा कामभोगा पन्नत्ता, तंजहा-सद्दा रूवा गंधा
 रसा फासा । जीवा णं भंते ! किं कामी भोगी ?, गोयमा ! जीवा कामीवि भोगीवि ।
 से केणट्ठेणं भंते ! एवं वुच्चइ जीवा कामीवि भोगीवि ?, गोयमा ! सोइंदियचक्खि-
 दियाइं पडुच्च कामी घाणिदियजिब्भदियफासिंदियाइं पडुच्च भोगी, से तेणट्ठेणं
 गोयमा ! जाव भोगीवि । नेरइया णं भंते ! किं कामी भोगी ?, एवं चेव एवं जाव
 थणियकुमारा । पुढविकाइयाणं पुच्छा, गोयमा ! पुढविकाइया नो कामी भोगी, से
 केणट्ठेणं जाव भोगी ?, गोयमा ! फासिदियं पडुच्च से तेणट्ठेणं जाव भोगी, एवं जाव
 वणस्सइकाइया, वेइंदिया एवं चेव नवरं जिब्भदियफासिंदियाइं पडुच्च भोगी,
 तेइंदियावि एवं चेव नवरं घाणिदियजिब्भदियफासिंदियाइं पडुच्च भोगी चउरिंदि-
 याणं पुच्छा, गोयमा ! चउरिंदिया कामीवि भोगीवि, से केणट्ठेणं जाव भोगीवि ?,
 गोयमा ! चक्खिदियं पडुच्च कामी घाणिदियजिब्भदियफासिंदियाइं पडुच्च भोगी,

से तेणट्टेणं जाव भोगीवि, अवसेसा जहा जीवा जाव वेमाणिया । एएसि णं भंते ! जीवाणं कामभोगीणं नोकामीणं नोभोगीणं भोगीणं य कयरे कयरेहिंतो जाव विसे-
साहिया वा ?, गोयमा ! सव्वत्थोवा जीवा कामभोगी नोकामीनोभोगी अणंतगुणा
भोगी अणंतगुणा ॥ २८९ ॥ छउमत्थे णं भंते ! मणूसे जे भविए अन्नयरेसु देव-
लोएसु देवत्ताए उववज्जित्तए, से नूणं भंते ! से खीणभोगी नो पभू उट्ठाणेणं कम्मणे
बलेणं वीरिएणं पुरिसक्कारपरक्कमेणं विउलाइं भोगभोगाइं भुंजमाणे विहरित्तए, से
नूणं भंते ! एयमट्ठं एवं वयह ?, गोयमा ! णो इणट्ठे समट्ठे, से केणट्ठेणं भंते ! एवं
वुच्चइ ? गोयमा ! पभू णं से उट्ठाणेणावि कम्मणावि बलेणावि वीरिएणावि पुरिसक्कारपर-
क्कमेणावि अन्नयराइं विपुलाइं भोगभोगाइं भुंजमाणे विहरित्तए, तम्हा भोगी भोगे
परिच्चयमाणे महानिज्जरे महापज्जवसाणे भवइ । आहोहिए णं भंते ! मणुस्से जे भविए
अन्नयरेसु देवलोएसु एवं चेव जहा छउमत्थे जाव महापज्जवसाणे भवइ । परमाहोहिए
णं भंते ! मणुस्से जे भविए तेणेव भवग्गहणेणं सिज्झित्तए जाव अंतं करेत्तए, से
नूणं भंते ! से खीणभोगी सेसं जहा छउमत्थस्स । केवली णं भंते ! मणुस्से जे भविए
तेणेव भवग्गहणेणं एवं जहा परमाहोहिए जाव महापज्जवसाणे भवइ ॥ २९० ॥
जे इमे भंते ! असन्निणो पाणा, तंजहा-पुढविकाइया जाव वणस्सइकाइया छट्ठा य
एगइया तसा, एए णं अंधा मूढा तमंपविट्ठा तमपडलमोहजालपडिच्छण्णा अकाम-
निकरणं वेयणं वेदंतीति वत्तव्वं सिया ?, हंता गोयमा ! जे इमे असन्निणो पाणा
पुढविकाइया जाव वणस्सइकाइया छट्ठा य जाव वेयणं वेदंतीति वत्तव्वं सिया ॥ अत्थि
णं भंते ! पभूवि-अकामनिकरणं वेयणं वेएइ ?, हंता गोयमा ! अत्थि, कहन्नं भंते !
पभूवि अकामनिकरणं वेयणं वेदेइ ?, गोयमा ! जे णं णो पभू विणा दीवेणं अंध-
कारंसि रूवाइं पासित्तए जे णं नो पभू पुरओ रूवाइं अणिज्झाइत्ता णं पासित्तए जे णं
नो पभू मग्गओ रूवाइं अणवयक्खित्ता णं पासित्तए [जे णं नो पभू पासओ रूवाइं
अणुलोइत्ता णं पासित्तए जे णं नो पभू उट्ठं रूवाइं अणालोएत्ता णं पासित्तए जे णं
नो पभू अहे रूवाइं अणालोएत्ता णं पासित्तए] एस णं गोयमा ! पभूवि अकाम-
निकरणं वेयणं वेदेइ ॥ अत्थि णं भंते ! पभूवि पकामनिकरणं वेयणं वेदेइ ?,
हंता ! अत्थि, कहन्नं भंते ! पभूवि पकामनिकरणं वेयणं वेदेइ ?, गोयमा ! जे णं
नो पभू समुद्दस्स पारं गमित्तए जे णं नो पभू समुद्दस्स पारगयाइं रूवाइं पासित्तए
जे णं नो पभू देवलोगं गमित्तए जे णं नो पभू देवलोगगयाइं रूवाइं पासित्तए एस
णं गोयमा ! पभूवि पकामनिकरणं वेयणं वेदेइ । सेवं भंते ! सेवं भंते ! त्ति
॥ २९१ ॥ सत्तमस्स सयस्स सत्तमो उद्देसओ समत्तो ॥

छउमत्थे णं भंते ! मणूसे तीयमणंतं सासयं समयं केवलेणं संजमेणं एवं जहा पढमसए चउत्थे उद्देसए तहा भाणियव्वं जाव अलमत्थु० ॥२९२॥ से णूणं भंते ! हत्थिस्स य कुंथुस्स य समे चेव जीवे ?, हंता गोयमा ! हत्थिस्स य कुंथुस्स य एवं जहा रायप्पसेणइजे जाव खुड्डियं वा महालियं वा से तेणट्ठेणं गोयमा ! जाव समे चेव जीवे ॥ २९३ ॥ नेरइयाणं भंते ! पावे कम्मे जे य कडे जे य कज्जइ जे य कज्जिस्सइ सव्वे से दुक्खे जे निज्जिन्ने से सुहे ?, हंता गोयमा ! नेरइयाणं पावे कम्मे जाव सुहे, एवं जाव वेमाणियाणं ॥ २९४ ॥ कइ णं भंते ! सन्नाओ पन्नत्ताओ ?, गोयमा ! दस सन्नाओ पन्नत्ताओ, तंजहा-आहारसन्ना १ भयसन्ना २ मेहुणसन्ना ३ परिग्गहसन्ना ४ कोहसन्ना ५ माणसन्ना ६ मायासन्ना ७ लोभसन्ना ८ लोगसन्ना ९ ओहसन्ना १०, एवं जाव वेमाणियाणं ॥ नेरइया दसविहं वेयणिज्जं पच्चणुभवमाणा विहरंति, तंजहा-सीयं उसिणं खुहं पिवासं कंडुं परज्झं जरं दाहं भयं सोगं ॥२९५॥ से नूणं भंते ! हत्थिस्स य कुंथुस्स य समा चेव अपच्चक्खाणकिरिया कज्जइ ?, हंता गोयमा ! हत्थिस्स य कुंथुस्स य जाव कज्जइ । से केणट्ठेणं भंते ! एवं वुच्चइ जाव कज्जइ ?, गोयमा ! अविरइं पडुच्च, से तेणट्ठेणं जाव कज्जइ ॥ २९६ ॥ आहा-कम्मणं भंते ! भुंजमाणे किं बंधइ ? किं पकरेइ ? किं चिणाइ ? किं उवचिणाइ ? एवं जहा पढमे सए नवमे उद्देसए तहा भाणियव्वं जाव सासए पंडिए पंडियत्तं असासयं, सेवं भंते ! सेवं भंते ! ति ॥२९७॥ सत्तमसयस्स अट्ठमो उद्देसो ॥

असंवुडे णं भंते ! अणगारे वाहिरए पोग्गले अपरियाइत्ता पभू एगवन्नं एगरूवं विउव्वित्तए ?, णो तिणट्ठे समट्ठे । असंवुडे णं भंते ! अणगारे वाहिरए पोग्गले परियाइत्ता पभू एगवन्नं एगरूवं जाव हंता ! पभू । से भंते ! किं इहगए पोग्गले परियाइत्ता विउव्वइ तत्थगए पोग्गले परियाइत्ता विउव्वइ अन्नत्थगए पोग्गले परियाइत्ता विउव्वइ ?, गोयमा ! इहगए पोग्गले परियाइत्ता विउव्वइ नो तत्थगए पोग्गले परियाइत्ता विउव्वइ नो अन्नत्थगए पोग्गले जाव विउव्वइ, एवं एगवन्नं अणेगरूवं चउभंगो जहा छट्ठसए नवमे उद्देसए तहा इहावि भाणियव्वं, नवरं अणगारे इहगए चेव पोग्गले परियाइत्ता विउव्वइ, सेसं तं चेव जाव लुक्खपोग्गलं निद्धपोग्गलत्ताए परिणामेत्तए ?, हंता । पभू, से भंते ! किं इहगए पोग्गले परियाइत्ता जाव नो अन्नत्थगए पोग्गले परियाइत्ता विउव्वइ ॥ २९८ ॥ णायमेयं अरहया सुयमेयं अरहया विन्नायमेयं अरहया महासिलाकंटए संगामे ॥ महासिलाकंटए णं भंते ! संगामे वट्ठमाणे के जइत्था के पराजइत्था ?, गोयमा ! वज्जी विदेहपुत्ते जइत्था, नवमल्लई नवलेच्छई कासीकोसलगा अट्टारसवि गणरायाणो पराजइत्था ॥

तए णं से कोणिए राया महासिलाकंटगं संगामं उवट्ठियं जाणित्ता कोडुंवियपुरिसे सद्दावेइ २ एवं वयासी-खिप्पामेव भो देवाणुप्पिया ! उदाइं हत्थिरायं पडिकप्पेह हयगयरहजोहकलियं चाउरंगिणिं सेणं सन्नाहेह २ ता मम एयमाणत्तियं खिप्पामेव पच्चप्पिणह । तए णं ते कोडुंवियपुरिसा कोणिएणं रत्ता एवं वुत्ता समाणा हट्ठ-तुट्ठ जाव अंजलिं कट्ठु एवं सामी ! तहत्ति आणाए विणएणं वयणं पडिसुणंति २ खिप्पामेव छेयायरियोवएसमइकप्पणाविकप्पेहिं सुनिउणेहिं एवं जहा उववाइए जाव भीमं संगामियं अउज्झं उदाइं हत्थिरायं पडिकप्पेति हयगय जाव सन्नाहेति २ जेणेव कूणिए राया तेणेव उवागच्छन्ति तेणेव उवागच्छित्ता करयल०कूणियस्सरत्तो तमाणत्तियं पच्चप्पिणंति, तए णं से कूणिए राया जेणेव मज्जणघरे तेणेव उवागच्छइ तेणेव उवागच्छित्ता मज्जणघरं अणुपविसइ मज्जणघरं अणुपविसित्ता ण्हाए सव्वालंकारविभूसिए सन्नद्धवद्धवम्मियक्कवए उप्पीलियसरासणपट्टिए ॥ पिणद्धगे-वेज्जे विमलवरवद्धचिंधपट्टे गहियाउहप्पंहरणे सकोरिंटमल्लदामेणं छत्तेणं धरिज्जमाणेणं चउचामरवालवीड्यंगे मंगलजयसइकयालोए एवं जहा उववाइए जाव उवागच्छित्ता उदाइं हत्थिरायं दुरुढे, तए णं से कूणिए राया हारोत्थयसुकयरइयवच्छे जहा उववाइए जाव सेयवरचामराहिं उद्धुववमाणीहिं उद्धुववमाणीहिं हयगयरहपवरजोहकलियाए चाउरंगिणीए सेणाए सद्धिं संपरिखुडे महया भडचडगरविदपरि-क्खित्ते जेणेव महासिलाकंटए संगामे तेणेव उवागच्छइ तेणेव उवागच्छित्ता महासिलाकंटयं संगामं ओयाए, पुरओ य से सक्के देविदे देवराया एगं महं अभेज्जकवयं वडरपडिरूवगं विउव्वित्ता णं चिट्ठइ, एवं खलु दो इंदा संगामं संगामेति, तंजहा-देविदे य मणुइंदे य, एगहत्थिणावि णं पभू कूणिए राया पराजिणित्तए, तए णं से कूणिए राया महासिलाकंटयं संगामं संगामेमाणे नव मल्लई नव लेच्छई कासीकोसलगा अट्टारसवि गणरायाणो हयमहियपवरवीरघांइयवियडियचिंधद्वयपडागे किच्छपाणगए दिसो दिसिं पडिसेहित्था ॥ से केणट्टेणं भंते ! एवं वुच्चइ महासिलाकंटए संगामे ?, गोयमा ! महासिलाकंटए णं संगामे वट्टमाणे जे तत्थ आसे वा हत्थी वा जोहे वा सारही वा तणेण वा पत्तेण वा कट्टेण वा सक्कराए वा अभिहम्मइ सव्वे से जाणइ महासिलाए अहं अभिहए म० २, से तेणट्टेणं गोयमा ! महासिलाकंटए संगामे । महासिलाकंटए णं भंते ! संगामे वट्टमाणे कइ जणसयसाहस्सीओ वहियाओ ?, गोयमा ! चउरासीइं जणसयसाहस्सीओ वहियाओ । ते णं भंते ! मणुया निस्सीला जाव निप्पच्चक्खाणपोसहोववासा रुट्ठा परिकुविया समरवहिया अणुवसंता कालमासे कालं किच्चा कहिं गया कहिं उववत्ता ?, गोयमा !

ओसन्नं नरगतिरिक्खजोणिएसु उववन्ना ॥ २९९ ॥ णायमेयं अरहया सुयमेयं
 अरहया विन्नायमेयं अरहया रहमुसले संगामे, रहमुसले णं भंते । संगामे वट्टमाणे
 के जइत्था के पराजइत्था ?, गोयमा ! वज्जी विदेहपुत्ते चमरे असुरिंदे असुरकुमार-
 राया जइत्था नव मल्लई नव लेच्छई पराजइत्था, तए णं से कूणिए राया रहमुसलं
 संगामं उवट्ठियं सेसं जहा महासिलाकंटए नवरं भूयाणंदे हत्थिराया जाव रहमुसलं
 संगामं ओयाए, पुरओ य से सक्के देविंदे देवराया, एवं तहेव जाव चिट्ठंति, मरगओ य
 से चमरे असुरिंदे असुरकुमारराया एणं महं आयसं किट्ठिणपडिस्सवणं विउव्वित्ता णं
 चिट्ठइ, एवं खलु तओ इंदा संगामं संगामेंति, तंजहा-देविंदे य मणुइंदे य असुरिंदे
 य, एगहत्थिणावि णं पभू कूणिए राया जइत्तए तहेव जाव दिसो दिसिं पडिसे-
 हित्था । से केणट्ठेणं भंते । एवं वुच्चइ रहमुसले संगामे ?, गोयमा ! रहमुसले णं
 संगामे वट्टमाणे एगे रहे अणासए असारहिए अणारोहए समुसले महया जणक्खयं
 जणवहं जणप्पमहं जणसंवट्ठकप्पं सहिरकहमं करेमाणे सव्वओ समंता परिधावित्था
 से तेणट्ठेणं जाव रहमुसले संगामे । रहमुसले णं भंते ! संगामे वट्टमाणे कइ जण-
 सयसाहस्सीओ वहियाओ ?, गोयमा ! छन्नउइं जणसयसाहस्सीओ वहियाओ । ते
 णं भंते । मणुया निस्सीला जाव उववन्ना ?, गोयमा ! तत्थ णं दस साहस्सीओ
 एगाए मच्छीए कुच्चिसि उववन्नाओ, एगे देवलोगेसु उववन्ने, एगे सुकुले पच्चायाए,
 अवसेसा ओसन्नं नरगतिरिक्खजोणिएसु उववन्ना ॥ ३०० ॥ कम्हा णं भंते ! सक्के
 देविंदे देवराया चमरे असुरिंदे असुरकुमारराया कूणियस्स रन्नो साहेज्जं दलइत्था ?,
 गोयमा ! सक्के देविंदे देवराया पुव्वसंगइए चमरे असुरिंदे असुरकुमारराया परि-
 यायसंगइए, एवं खलु गोयमा ! सक्के देविंदे देवराया चमरे य असुरिंदे असुरकु-
 मारराया कूणियस्स रन्नो साहिज्जं दलइत्था ॥ ३०१ ॥ बहुजणे णं भंते ! अन्नमन्नस्स
 एवमाइक्खइ जाव परुवेइ एवं खलु वहवे मणुस्सा अन्नयरेसु उच्चावएसु संगामेसु
 अभिमुहा चेव पहया समाणा कालमासे कालं किच्चा अन्नयरेसु देवलोएसु देवत्ताए
 उववत्तारो भवंति, से कहमेयं भंते ! एवं ?, गोयमा ! जणं से बहुजणो अन्नमन्नस्स
 एवं आइक्खइ जाव उववत्तारो भवंति जे ते एवमाहंसु मिच्छं ते एवमाहंसु, अहं
 पुण गोयमा ! एवमाइक्खामि जाव परुवेमि-एवं खलु गोयमा ! तेणं कालेणं तेणं
 समएणं वेसाली नामं नगरी होत्था, वण्णओ, तत्थ णं वेसालीए नगरीए वरुणे नामं
 णागनत्तुए परिवसइ अट्ठे जाव अपरिभूए समणोवासए अभिगयजीवाजीवे जाव
 पडिलाभेमाणे छट्ठंछट्ठेणं अनिक्खित्तेणं तवोकम्मेणं अप्पाणं भावेमाणे विहरइ,
 तए णं से वरुणे णागनत्तुए अन्नया कयाइ रायाभिओगेणं गणाभिओगेणं वलाभि-

ओगेणं रहमुसले संगामे आणत्ते समाणे छट्ठभत्तिए अट्ठमभत्तं अणुवट्ठे(ड्ढे)इ अट्ठमभत्तं
 अणुवट्ठेत्ता कोडुंवियपुरिसे सदावेइ २ एवं वयासी-खिप्पामेव भो देवाणुप्पिया !
 चाउग्घटं आसरहं जुत्तामेव उवट्ठावेह हयगयरहपवर जाव सन्नाहेत्ता मम एयमाण-
 त्तियं पच्चप्पिणह, तए णं ते कोडुंवियपुरिसा जाव पडिसुणेत्ता खिप्पामेव सच्छत्तं
 सज्झयं जाव उवट्ठावेति हयगयरह जाव सन्नाहेति २ जेणेव वरुणे नागनत्तुए
 जाव पच्चप्पिणंति, तए णं से वरुणे नागनत्तुए जेणेव मज्जणघरे तेणेव उवा-
 गच्छइ जहा कूणिओ सव्वालंकारविभूसिए सन्नद्धवद्धे सकोरेंटमल्लदामेणं जाव
 धरिज्जमाणेणं अणेगगणनायग जाव दूयसंधिवालसद्धिं संपरिवुडे मज्जणघराओ
 पडिनिक्खमइ पडिनिक्खमिता जेणेव बाहिरिया उवट्ठाणसाला जेणेव चाउग्घटे
 आसरहे तेणेव उवागच्छइ उवागच्छिता चाउग्घटं आसरहं दुरुहइ २ हयगयरह
 जाव संपरिवुडे महया भडचडगर० जाव परिक्खित्ते जेणेव रहमुसलं संगामे तेणेव
 उवागच्छइ २ ता रहमुसलं संगामं ओयाए, तए णं से वरुणे णागणत्तुए रहमुसलं
 संगामं ओयाए समाणे अयमेयारुवं अभिग्गहं अभिगिण्हइ-कप्पइ मे रहमुसलं
 संगामं संगामेमाणस्स जे पुर्विं पहणइ से पडिहणित्तए अवसेसे नो कप्पइ त्ति, अय-
 मेयारुवं अभिग्गहं अभिगेण्हइ अभिगेण्हित्ता रहमुसलं संगामं संगामेइ, तए णं
 तस्स वरुणस्स नागनत्तुयस्स रहमुसलं संगामं संगामेमाणस्स एणे पुरिसे सरिसए
 सरिसत्तए सरिसव्वए सरिसभंडमत्तोवगरणे रहेणं पडिरहं हव्वमागए, तए णं से
 पुरिसे वरुणं णागणत्तुयं एवं वयासी-पहण भो वरुणा ! णागणत्तुया ! प० २, तए
 णं से वरुणे णागणत्तुए तं पुरिसं एवं वयासी-नो खलु मे कप्पइ देवाणुप्पिया ! पुर्विं
 अहयस्स पहणित्तए, तुमं चेव णं पुर्विं पहणाहि, तए णं से पुरिसे वरुणेणं णागणत्तुएणं
 एवं वुत्ते समाणे आसुरुत्ते जाव मिसिमिसेमाणे धणुं परामुसइ २ उंसुं परामुसइ उंसुं
 परामुसित्ता ठाणं ठाइ ठाणं ठिच्चा आययकन्नाययं उंसुं करेइ आययकन्नाययं उंसुं
 करेत्ता वरुणं णागणत्तुयं गाढप्पहारी करेइ, तए णं से वरुणे नागनत्तुए तेणं पुरिसेणं
 गाढप्पहारीकए समाणे आसुरुत्ते जाव मिसिमिसेमाणे धणुं परामुसइ धणुं परामुसित्ता
 उंसुं परामुसइ उंसुं परामुसित्ता आययकन्नाययं उंसुं करेइ आययकन्नाययं० २ तं
 पुरिसं एगाहच्चं कूडाहच्चं जीवियाओ ववरोवेइ, तए णं से वरुणे नागणत्तुए तेणं पुरि-
 सेणं गाढप्पहारीकए समाणे अत्थामे अवले अवीरिए अपुरिसक्कारपरक्कमे आधारणि-
 ज्जमितिकट्ठु तुरए निगिण्हइ तुरए निगिण्हित्ता रहं परावत्तेइ रहं परावत्तित्ता रहमुस-
 लाओ संगामाओ पडिनिक्खमइ २ एगंतमंतं अवक्कमइ एगंतमंतं अवक्कमित्ता तुरए
 निगिण्हइ २ रहं ठवेइ २ ता रहाओ पच्चोरुहइ रहाओ २ रहाओ तुरए मोएइ

तुरए मोएत्ता तुरए विसज्जेइ २ ता दब्भसंथारगं संथरइ २ ता [पुरच्छा-
 भिमुहे दुरुहइ दब्भसं० २] पुरच्छाभिमुहे संपलियंक्रनिसन्ने करयल जाव कट्ठु
 एवं वयासी-नमोत्थु णं अरिहंताणं जाव संपत्ताणं नमोऽत्थु णं समणस्स भगवओ
 महावीरस्स आइगरस्स जाव संपाविउकामस्स मम धम्मायरियस्स धम्मोवएसगस्स
 वंदामि णं भगवन्तं तत्थगयं इहगए पासउ मे से भगवं तत्थगए जाव वंदइ नर्मसइ २
 एवं वयासी-पुव्विपि णं मए समणस्स भगवओ महावीरस्स अंतिए थूलए पाणाइवाए
 पच्चक्खाए जावजीवाए एवं जाव थूलए परिग्गहे पच्चक्खाए जावजीवाए, इयानिपि णं
 अहं तस्सेव अरिहंतस्स भगवओ महावीरस्स अंतियं सव्वं पाणाइवायं पच्चक्खामि
 जावजीवाए एवं जहा खंदओ जाव एयंपि णं चरमेहिं ऊसासनीसासेहिं वोसिरामित्ति-
 कट्ठु सन्नाहपट्टं मुयइ सन्नाहपट्टं मुइत्ता सल्लुद्धरणं करेइ सल्लुद्धरणं करेत्ता आलोइय-
 पडिक्कंते समाहिपत्ते आणुपुव्वीए कालगए, तए णं तस्स वरुणस्स णागनत्तुयस्स
 एगे पियवालवयंसए रहसुसलं संगामं संगामेमाणे एगेणं पुरिसेणं गाढप्पहारीकए
 समाणे अत्थामे अवले जाव आधारणिज्जमितिकट्ठु वरुणं णागनत्तुयं रहसुसलाओ
 संगामाओ पडिनिक्खममाणं पासइ पासित्ता तुरए निगेण्हइ तुरए निगेण्हित्ता जहा
 वरुणे जाव तुरए विसज्जेइ पडिसंथारगं दुरुहइ पडिसंथारगं दुरुहित्ता पुरत्थाभिमुहे
 जाव अंजलि कट्ठु एवं वयासी-जाइं णं मम पियवालवयस्सस्स वरुणस्स
 नागनत्तुयस्स सीलाइं वयाइं गुणाइं वेरमणाइं पच्चक्खाणपोसहोववासाइं ताइं णं
 ममंपि भवंतुत्तिकट्ठु सन्नाहपट्टं मुयइ २ सल्लुद्धरणं करेइ सल्लुद्धरणं करेत्ता आणुपु-
 व्वीए कालगए, तए णं तं वरुणं णागनत्तुयं कालगयं जाणित्ता अहासज्जिहिएहिं
 वाणमंतरेहिं देवेहिं दिव्वे सुरभिगंधोदगवासे वुट्ठे दसद्धवन्ने कुसुमे निवाडिए दिव्वे
 य गीयगंधव्वनिनाए कए यावि होत्था, तए णं तस्स वरुणस्स णागनत्तुयस्स तं
 दिव्वं देविट्ठि दिव्वं देवज्जुइं दिव्वं देवाणुभागं सुणित्ता य पासित्ता य बहुजणो
 अन्नमन्नस्स एवमाइक्खइ जाव परूवेइ-एवं खलु देवाणुप्पिया ! वहवे मणुस्सा
 जाव उववत्तारो भवंति ॥ ३०२ ॥ वरुणे णं भंते ! नागनत्तुए कालमासे कालं
 किच्चा कहिं गए कहिं उववन्ने ?, गोयमा ! सोहम्मे कप्पे अरुणासे विमाणे देवत्ताए
 उववन्ने, तत्थ णं अत्थेगइयाणं देवाणं चत्तारि पलिओवमाणि ठिई पन्नत्ता, तत्थ
 णं वरुणस्सवि देवस्स चत्तारि पलिओवमाइं ठिई पन्नत्ता । से णं भंते ! वरुणे देवे
 ताओ देवलोगाओ आउक्खएणं भवक्खएणं ठिइक्खएणं जाव महाविदेहे वासे
 सिज्झिहिइ जाव अंतं करेहिइ । वरुणस्स णं भंते ! णागनत्तुयस्स पियवालवयं-
 सए कालमासे कालं किच्चा कहिं गए कहिं उववन्ने ?, गोयमा ! सुकुले पच्चायाए ।

से णं भंते ! तओहिंतो अणंतं उव्वट्ठित्ता कहिं गच्छिहिइ कहिं उव्वज्जिहिइ ?,
 गोयमा ! महाविदेहे वासे सिज्जिहिइ जाव अंतं करेहिइ । सेवं भंते ! सेवं भंते !
 ति ॥ ३०३ ॥ सत्तमस्स सयस्स णवमो उद्देसो समत्तो ॥

तेणं कालेणं तेणं समएणं रायगिहे नामं नगरे होत्था वन्नओ, गुणसिलए
 उज्जाणे वन्नओ, जाव पुढविसिलापट्टए वण्णओ, तस्स णं गुणसिलयस्स उज्जाणस्स
 अदूरसामंते वहवे अन्नउत्थिया परिवसंति, तंजहा-कालोदाई सेलोदाई सेवालोदाई
 उदए नामुदए नमुदए अन्नवालए सेलवालए संखवालए सुहत्थी गाहावई, तए
 णं तेसि अन्नउत्थियाणं अन्नया कयाई एगयओ समुवागयाणं सन्नविट्ठाणं सन्नि-
 सन्नाणं अयमेयारुवे मिहो कहासमुल्लावे समुप्पज्जित्था-एवं खलु समणे नाय-
 पुत्ते पंच अत्थिकाए पन्नवेइ, तंजहा-धम्मत्थिकायं जाव आगासत्थिकायं, तत्थ णं
 समणे नायपुत्ते चत्तारि अत्थिकाए अजीवकाए पन्नवेइ, तंजहा-धम्मत्थिकायं अध-
 म्मत्थिकायं आगासत्थिकायं पोग्गलत्थिकायं, एगं च णं समणे णायपुत्ते जीवत्थिकायं
 अरुविकायं जीवकायं पन्नवेइ, तत्थ णं समणे नायपुत्ते चत्तारि अत्थिकाए अरुवि-
 काए पन्नवेइ, तंजहा-धम्मत्थिकायं अधम्मत्थिकायं आगासत्थिकायं जीवत्थिकायं,
 एगं च णं समणे णायपुत्ते पोग्गलत्थिकायं रूविकायं अजीवकायं पन्नवेइ, से कहमेयं
 मन्ने एवं ?, तेणं कालेणं तेणं समएणं समणे भगवं महावीरे जाव गुणसिलए उज्जाणे
 समोसढे जाव परिसा पडिगया, तेणं कालेणं तेणं समएणं समणस्स भगवओ महा-
 वीरस्स जेट्ठे अंतेवासी इंदभूई णामं अणगारे गोयमगोत्तेणं एवं जहा बिइयसए
 निर्यंठुद्देसए जाव भिक्खायरियाए अडमाणे अहापज्जत्तं भत्तपाणं पडिगाहिता राय-
 गिहाओ जाव अतुरियमच्चवलमसंभंतं जाव रियं सोहेमाणे सोहेमाणे तेसि अन्नउ-
 त्थियाणं अदूरसामंतेणं वीइवयइ, तए णं ते अन्नउत्थिया भगवं गोयमं अदूर-
 सामंतेणं वीइवयमाणं पासंति पासेत्तां अन्नमन्नं सद्दावेति अन्नमन्नं सद्दावेत्ता एवं
 वयासी-एवं खलु देवाणुप्पिया ! अम्हं इमा कहा आविप्पकडा अयं च णं गोयमे
 अम्हं अदूरसामंतेणं वीइवयइ तं सेयं खलु देवाणुप्पिया ! अम्हं गोयमं एयमट्ठं
 पुच्छित्तएत्तिकट्ठु अन्नमन्नस्स अंतिए एयमट्ठं पडिसुणेंति २ ता जेणेव भगवं गोयमे
 तेणेव उवागच्छंति तेणेव उवागच्छित्ता ते भगवं गोयमं एवं वयासी-एवं खलु
 गोयमा ! तव धम्मायरिए धम्मोवएसए समणे नायपुत्ते पंच अत्थिकाए पन्नवेइ,
 तंजहा-धम्मत्थिकायं जाव आगासत्थिकायं, तं चेव जाव रूविकायं अजीवकायं
 पन्नवेइ से कहमेयं भंते ! गोयमा ! एवं ?, तए णं से भगवं गोयमे ते अन्नउत्थिए
 एवं वयासी-नो खलु वयं देवाणुप्पिया ! अत्थिभावं नत्थित्ति वयासो नत्थिभावं

अत्थि वयामो, अम्हे णं देवाणुप्पिया ! सव्वं अत्थिमावं अत्थि वयामो सव्वं
 नत्थिमावं नत्थि वयामो, तं चेयसा खलु तुब्भे देवाणुप्पिया ! एयमट्ठं सयमेव
 पञ्चुवेक्खहत्तिकट्ठु ते अन्नउत्थिए एवं वयासी-एवं २, जेणेव गुणसिलए उज्जाणे
 जेणेव समणे भगवं महावीरे एवं जहा नियंउदेसए जाव भत्तपाणं पडिदंसेइ भत्त-
 पाणं पडिदंसेत्ता समणं भगवं महावीरं वंदइ नमंसइ २ नचासन्ने जाव पञ्चुवासइ ।
 तेणं कालेणं तेणं समएणं समणे भगवं महावीरे महाकहापडिवन्ने यावि होत्था,
 कालोदाई य तं देसं हव्वमागए, कालोदाईति समणे भगवं महावीरे कालोदाई
 एवं वयासी-से नूणं कालोदाई ! अन्नया कयाइ एगयओ सहियाणं समुवाग-
 याणं सन्निविट्ठाणं तहेव जाव से कहमेयं मन्ने एवं ?, से नूणं कालोदाई ! अट्ठे
 समट्ठे ?, हंता ! अत्थि, तं सच्चे णं एसमट्ठे कालोदाई ! अहं पंचत्थिकायं पन्नवेमि,
 तंजहा-धम्मत्थिकायं जाव पोग्गलत्थिकायं, तत्थ णं अहं चत्तारि अत्थिकाए अजी-
 वत्थिकाए अजीवत्ताए पण्णवेमि तहेव जाव एगं च णं अहं पोग्गलत्थिकायं रुविकायं
 पण्णवेमि, तए णं से कालोदाई समणं भगवं महावीरं एवं वयासी-एयंसि णं भंते !
 धम्मत्थिकायंसि अधम्मत्थिकायंसि आगासत्थिकायंसि अरुविकायंसि अजीवकायंसि
 चक्किया केइ आसइत्तए वा १ सइत्तए वा २ चिट्ठइत्तए वा ३ निसीइत्तए वा ४
 तुयट्ठित्तए वा ५ ?, णो तिणट्ठे०, कालोदाई ! एयंसि णं पोग्गलत्थिकायंसि रुविकायंसि
 अजीवकायंसि चक्किया केइ आसइत्तए वा सइत्तए वा जाव तुयट्ठित्तए वा, एयंसि
 णं भंते ! पोग्गलत्थिकायंसि रुविकायंसि अजीवकायंसि जीवाणं पावा कम्मा पाव-
 कम्मफलविवागसंजुत्ता कज्जंति ?, णो इणट्ठे समट्ठे कालोदाई !, एयंसि णं जीवत्थि-
 कायंसि अरुविकायंसि जीवाणं पावा कम्मा पावफलविवागसंजुत्ता कज्जंति ?, हंता !
 कज्जंति, एत्थ णं से कालोदाई संबुद्धे समणं भगवं महावीरं वंदइ नमंसइ वंदित्ता
 नमंसित्ता एवं वयासी-इच्छामि णं भंते ! तुब्भं अंतियं धम्मं निसामेत्तए एवं
 जहा खंदए तहेव पव्वइए तहेव एक्कारस अंगाई जाव विहरइ ॥ ३०४ ॥ तए णं
 समणे भगवं महावीरे अन्नया कयाइ रायगिहाओ नगराओ गुणसिलयाओ उज्जाणाओ
 पडिनिक्खमइ २ बहिया जणवयविहारं विहरइ, तेणं कालेणं तेणं समएणं रायगिहे
 नामं नगरे गुणसिलए णामं उज्जाणे होत्था, तए णं समणे भगवं महावीरे अन्नया
 कयाइ जाव समोसडे० परिसा पडिगया, तए णं से कालोदाई अणगारे अन्नया कयाइ
 जेणेव समणे भगवं महावीरे तेणेव उवागच्छइ २ समणं भगवं महावीरं वंदइ नमं-
 सइ वंदित्ता नमंसित्ता एवं वयासी अत्थि णं भंते ! जीवाणं पावा कम्मा पावफल-
 विवागसंजुत्ता कज्जंति ?, हंता ! अत्थि । कहणं भंते ! जीवाणं पावा कम्मा पावफ-

लविवागसंजुत्ता कज्जंति ?, कालोदाई ! से जहानामए केइ पुरिसे मणुन्नं थालीपागसुद्धं
 अट्टारसवंजणाउलं विससंमिस्सं भोयणं भुंजेज्जा, तस्स णं भोयणस्स आवाए भद्दए
 भवइ, तओ पच्छा परिणममाणे परि० दुखवत्ताए दुग्धवत्ताए जहा महासवए जाव
 भुज्जो २ परिणमइ, एवामेव कालोदाई ! जीवाणं पाणाइवाए जाव मिच्छादंसणसल्ले
 तस्स णं आवाए भद्दए भवइ तओ पच्छा परिणममाणे २ दुखवत्ताए जाव भुज्जो
 २ परिणमइ, एवं खलु कालोदाई ! जीवाणं पावा कम्मा पावफलविवागसंजुत्ता
 कज्जंति । अत्थि णं भंते ! जीवाणं कल्लाणा कम्मा कल्लाणफलविवागसंजुत्ता कज्जंति ?,
 हंता ! अत्थि, कहन्नं भंते ! जीवाणं कल्लाणा कम्मा जाव कज्जंति ?, कालोदाई ! से
 जहानामए केइ पुरिसे मणुन्नं थालीपागसुद्धं अट्टारसवंजणाउलं ओसहमिस्सं भोयणं
 भुंजेज्जा, तस्स णं भोयणस्स आवाए नो भद्दए भवइ, तओ पच्छा परिणममाणे २
 सुखवत्ताए सुवन्नत्ताए जाव सुहत्ताए नो दुक्खत्ताए भुज्जो २ परिणमइ, एवामेव
 कालोदाई ! जीवाणं पाणाइवायवेरमणे जाव परिग्गहवेरमणे कोहविवेगे जाव मिच्छा-
 दंसणसल्लविवेगे तस्स णं आवाए नो भद्दए भवइ, तओ पच्छा परिणममाणे २ सुख-
 वत्ताए जाव नो दुक्खत्ताए भुज्जो २ परिणमइ, एवं खलु कालोदाई ! जीवाणं कल्लाणा
 कम्मा जाव कज्जंति ॥ ३०५ ॥ दो भंते ! पुरिसा सरिसया जाव सरिसभंडमत्तोव-
 गरणा अन्नमन्नेणं सद्धिं अगणिकायं समारंभंति तत्थ णं एगे पुरिसे अगणिकायं उज्जा-
 लेइ एगे पुरिसे अगणिकायं निव्वावेइ, एएसिं णं भंते ! दोण्हं पुरिसाणं कयरे
 पुरिसे महाकम्मतराए चेव महाकिरियतराए चेव महासवतराए चेव महावेयण-
 तराए चेव कयरे वा पुरिसे अप्पकम्मतराए चेव जाव अप्पवेयणतराए चेव,
 जे वा से पुरिसे अगणिकायं उज्जालेइ जे वा से पुरिसे अगणिकायं निव्वावेइ ?,
 कालोदाई ! तत्थ णं जे से पुरिसे अगणिकायं उज्जालेइ से णं पुरिसे महाकम्म-
 तराए चेव जाव महावेयणतराए चेव, तत्थ णं जे से पुरिसे अगणिकायं निव्वावेइ से
 णं पुरिसे अप्पकम्मतराए चेव जाव अप्पवेयणतराए चेव । से केणट्ठेणं भंते !
 एवं वुच्चइ-तत्थ णं जे से पुरिसे जाव अप्पवेयणतराए चेव ?, कालोदाई ! तत्थ
 णं जे से पुरिसे अगणिकायं उज्जालेइ से णं पुरिसे बहुतराणं पुढविकायं समारंभइ
 बहुतराणं आउक्कायं समारंभइ अप्पतराणं तेउक्कायं समारंभइ बहुतराणं वाउक्कायं
 समारंभइ बहुतराणं वणस्सइक्कायं समारंभइ बहुतराणं तसक्कायं समारंभइ, तत्थ
 णं जे से पुरिसे अगणिकायं निव्वावेइ से णं पुरिसे अप्पतराणं पुढविकायं समारं-
 भइ अप्पतराणं आउक्कायं समारंभइ बहुतराणं तेउक्कायं समारंभइ अप्पतराणं वाउ-
 क्कायं समारंभइ अप्पतराणं वणस्सइक्कायं समारंभइ अप्पतराणं तसक्कायं समारंभइ,

से तेणट्ठेणं कालोदाई ! जाव अप्पवेयणतराए चेव ॥ ३०६ ॥ अत्थि णं भंते !
अचित्तावि पोग्गला ओभासंति उज्जोवेंति तवेंति पभासंति ?, हंता ! अत्थि । कयरे
णं भंते ! अचित्तावि पोग्गला ओभासंति जाव पभासंति ?, कालोदाई ! कुद्धस्स अण-
गारस्स तेयलेस्सा निसट्ठा समाणी दूरं गंता दूरं निवयइ देसं गंता देसं निवयइ
जहिं जहिं च णं सा निवयइ तहिं तहिं च णं ते अचित्तावि पोग्गला ओभासंति
जाव पभासंति, एएणं कालोदाई ! ते अचित्तावि पोग्गला ओभासंति जाव पभा-
संति, तए णं से कालोदाई अणगारे समणं भगवं महावीरं वंदइ नमंसइ २ बह्वहिं
चउत्थच्छट्ठम जाव अप्पाणं भावेमाणे जहा पढमसए कालासवेसियपुत्ते जाव सव्व-
दुक्खप्पहीणे । सेवं भंते ! सेवं भंते ! त्ति ॥ ३०७ ॥ सत्तमं सयं समत्तं ॥

गाहा—पोग्गल १ आसीविस २ रुक्ख ३ किरिय ४ आजीव ५ फासुग ६
मदत्ते ७ । पडिणीय ८ बंध ९ आराहणा यं १० दस अट्ठमंमि सए ॥ १ ॥ राय-
गिहे जाव एवं वयासी-कइविहा णं भंते ! पोग्गला पन्नत्ता ?, गोयमा ! तिर्विहा
पोग्गला पन्नत्ता, तंजहा—पओगपरिणया मीससापरिणया वीससापरिणया ॥ ३०८ ॥
पओगपरिणया णं भंते ! पोग्गला कइविहा पन्नत्ता ?, गोयमा ! पंचविहा पन्नत्ता,
तंजहा—एगिंदियपओगपरिणया बेइंदियपओगपरिणया जाव पंचिंदियपओगपरिणया ।
एगिंदियपओगपरिणया णं भंते ! पोग्गला कइविहा पन्नत्ता ?, गोयमा ! पंचविहा प०
तंजहा—पुढविकाइयएगिंदियपओगपरिणया जाव वणस्सइकाइयएगिंदियपओगपरे-
णया । पुढविकाइयएगिंदियपओगपरिणया णं भंते ! पोग्गला कइविहा पन्नत्ता ?,
गोयमा ! दुविहा पन्नत्ता, तंजहा—सुहुमपुढविकाइयएगिंदियपओगपरिणया वायरपुढवि-
काइयएगिंदियपओगपरिणया, आउकाइयएगिंदियपओगपरिणया एवं चेव, एवं दुयओ
मेओ जाव वणस्सइकाइयएगिंदियपओगपरिणया । बेइंदियपओगपरिणयाणं पुच्छा,
गोयमा ! अणेगविहा पन्नत्ता, एवं तेइंदियत्तउरिंदियपओगपरिणयावि । पंचिंदियपओ-
गपरिणयाणं पुच्छा, गोयमा ! चउव्विहा पन्नत्ता, तंजहा—नेरइयपंचिंदियपओगपरिणया
तिरिक्ख० एवं मणुस्स० देवपंचिंदिय०, नेरइयपंचिंदियपओगपरिणयाणं पुच्छा,
गोयमा ! सत्तविहा पन्नत्ता, तंजहा—रयणप्पभापुढविनेरइयपंचिंदियपओगपरिणया य
जाव अहेसत्तमपुढविनेरइयपंचिंदियपओगपरिणया य, तिरिक्खजोणियपंचिंदियपओ-
गपरिणयाणं पुच्छा, गोयमा ! तिर्विहा पन्नत्ता, तंजहा—जलयरतिरिक्खजोणियपंचि-
दिय० थलयरतिरिक्खजोणियपंचिंदिय० खहयरतिरिक्खजोणियपंचिंदिय०, जलयरति-
रिक्खजोणियपंचिंदियपओगपरिणयाणं पुच्छा, गोयमा ! दुविहा प०, तंजहा—संमुच्छि-
मजलयर०, गब्भवक्कंतियजलयर०, थलयरतिरिक्ख० पुच्छा, गोयमा ! दुविहा प०,

तंजहा-चउप्पयथलयर० परिसप्पथलयर०, चउप्पयथलयर० पुच्छा, गोयमा ! दुविहा
य०, तंजहा-संमुच्छिमचउप्पयथलयर० गव्भवक्कंतियचउप्पयथलयर०, एवं एएणं
अभिलावेणं परिसप्प० दुविहा प०, तंजहा-उरपरिसप्प० य भुयपरिसप्प० य, उर-
परिसप्प० दुविहा प०, तंजहा-संमुच्छिम० य गव्भवक्कंतिय० य, एवं भुयपरिसप्प०
वि, एवं खहयर० वि । मणुस्सपंचिंदियपओग० पुच्छा, गोयमा ! दुविहा प०, तंजहा-
संमुच्छिममणुस्स० गव्भवक्कंतियमणुस्स० । देवपंचिंदियपओग० पुच्छा, गोयमा !
चउव्विहा पन्नत्ता, तंजहा-भवणवासिदेवपंचिंदियपओग० एवं जाव वेमाणिय० ।
भवणवासिदेवपंचिंदिय० पुच्छा, गोयमा ! दसविहा प०; तंजहा-असुरकुमार० जाव
यणियकुमार०, एवं एएणं अभिलावेणं अट्ठविहा चाणमंतर० पिसाय० जाव गंधव्व०,
जोइसिय० पंचविहा प०, तंजहा-चंदविमाणजोइसिय० जाव ताराविमाणजोइसिय-
देव०, वेमाणिय० दुविहा पन्नत्ता, तंजहा-कप्पोववन्न० कप्पाईयगवेमाणिय०,
कप्पोववन्नग० दुवालसविहा पणत्ता, तंजहा-सोहम्मकप्पोववण्णग० जाव अञ्जुयक-
प्पोववण्णगवेमाणिय० । कप्पाईय० दुविहा पणत्ता, तंजहा-गेवेज्जकप्पातीयवे०
अणुत्तरोववाइयकप्पाईयवे०, गेवेज्जकप्पातीयग० नवविहा पणत्ता, तंजहा-हेट्ठिम
२ गेवेज्जकप्पातीयग० जाव उवरिम २ गेवेज्जगकप्पाईय० । अणुत्तरोववाइ-
यकप्पाईयगवेमाणियदेवपंचिंदियपओगपरिणया णं भंते ! पोग्गला कइविहा प० ?,
गोयमा ! पंचविहा पणत्ता, तंजहा-विजयअणुत्तरोववाइय जाव परिणया जाव
सव्वट्ठसिद्धअणुत्तरोववाइय० देवपंचिंदियपओगपरिणया ॥ सुहुमपुढविकाइयएगिंदिय-
पओगपरिणया णं भंते ! पोग्गला कइविहा पणत्ता ? गोयमा ! दुविहा पणत्ता, [केइ
अपज्जत्तगं पढमं भणंति पच्छा पज्जत्तगं] पज्जत्तगसुहुमपुढविकाइय जाव परिणया य
अपज्जत्तसुहुमपुढविकाइय जाव परिणया य, वायरपुढविकाइयएगिंदिय० वि एवं चेव,
एवं जाव वणस्सइकाइय०, एक्केक्का दुविहा पोग्गला-सुहुमा य वायरा य, पज्जत्तगा
य अपज्जत्तगा य भाणियव्वा । वेदियपओगपरिणयाणं पुच्छा, गोयमा ! दुविहा पन्नत्ता,
तंजहा-पज्जत्तगवेदियपओगपरिणया य अपज्जत्तग जाव परिणया य, एवं तेइंदिय० वि
एवं चउरिदिय० वि । रयणप्पभापुढविनेरइय० पुच्छा, गोयमा ! दुविहा प०, तंजहा-
मज्जत्तगरयणप्पभापुढवि जाव परिणया य अपज्जत्तग जाव परिणया य, एवं जाव
अहेसत्तम० । संमुच्छिमजलयरतिरिक्ख० पुच्छा, गोयमा ! दुविहा प०, तंजहा-पज्ज-
त्तग० अपज्जत्तग०, एवं गव्भवक्कंतिय० वि, संमुच्छिमचउप्पयथलयर० वि एवं चेव, एवं
गव्भवक्कंतिय० वि, एवं जाव संमुच्छिमखहयर० गव्भवक्कंतिय० य, एक्केक्के पज्जत्तगा य
अपज्जत्तगा य भाणियव्वा । संमुच्छिममणुस्सपंचिंदिय० पुच्छा, गोयमा ! एगविहा प०,

अपज्जत्तग० चेव । गब्भवक्कंतियमणुस्सपंचिंदिय० पुच्छा, गोयमा ! दुविहा प०, तंजहा-पज्जत्तगगब्भवक्कंतिय० अपज्जत्तगगब्भवक्कंतिय० । असुरकुमारभवणवासिदेव० पुच्छा, गोयमा ! दुविहा प०, तंजहा-पज्जत्तगअसुरकुमार० अपज्जत्तगअसुर०, एवं जाव पज्जत्तगथणियकुमार० एवं अपज्जत्तग० य, एवं एएणं अभिलावेणं दुयएणं भेएणं पिसाय० य जाव गंधव्व०, चंद० जाव ताराविमाण०, सोहम्मकप्पोववण्णग० जाव अच्चुय०, हिट्ठिमहिट्ठिमगेविज्जकप्पाईय० जाव उवरिमउवरिमगेविज्ज०, एवं विजय-अणुत्तरो० जाव अपराजिय०, सव्वट्ठसिद्धकप्पाईय० पुच्छा, गोयमा ! दुविहा प०, तंजहा-पज्जत्तगसव्वट्ठसिद्धअणुत्तरो० अपज्जत्तगसव्वट्ठ जाव परिणया य, २ दंडगा ॥

जे अपज्जत्ता सुहुमपुढविकाइयएगिदियपओगपरिणया ते ओरालियतेयाकम्मासरीर-प्पओगपरिणया जे पज्जत्ता सुहुम० जाव परिणया ते ओरालियतेयाकम्मासरीर-प्पओगपरिणया एवं जाव पज्जत्तगचउरिंदिय०, नवरं जे पज्जत्तवायरवाउकाइयएगि-दियपओगपरिणया ते ओरालियवेउव्वियतेयाकम्मासरीरपओगपरिणया, सेसं तं चेव, जे अपज्जत्तरयणप्पभापुढविनेरइयपंचिंदियपओगपरिणया ते वेउव्वियतेयाक-म्मासरीरप्पओगपरिणया, एवं पज्जत्तय० वि, एवं जाव अहेसत्तम० । जे अपज्जत्तगसंमु-च्छिमजलयर जाव परिणया ते ओरालियतेयाकम्मासरीरप्पओगपरिणया एवं पज्जत्त-ग० वि, अपज्जत्तगगब्भवक्कंतिय० वि एवं चेव, पज्जत्तय० वि एवं चेव नवरं सरीरगाणि चत्तारि जहा बायरवाउकाइयाणं पज्जत्तगाणं, एवं जहा जलयरेसु चत्तारि आलावगा भाणिया एवं चउप्पयउरपरिसप्पभुयपरिसप्पखहयरेसुवि चत्तारि आलावगा भाणि-यव्वा । जे संमुच्छिममणुस्सपंचिंदियपओगपरिणया ते ओरालियतेयाकम्मासरीर-प्पओगपरिणया, एवं गब्भवक्कंतियावि अपज्जत्तगा, पज्जत्तगावि एवं चेव, नवरं सरी-रगाणि पंच भाणियेव्वाणि, जे अपज्जत्ता असुरकुमारभवणवासि० जहा नेरइय० तहेव, एवं पज्जत्तगावि, एवं दुयएणं भेएणं जाव थणियकुमार०, एवं पिसाय० जाव गंधव्व०, चंद० जाव ताराविमाण०, एवं सोहम्मकप्पो० जाव अच्चुअ०, हेट्ठिम २ गेवेज्ज० जाव उवरिम२ गेवेज्ज०, विजयअणुत्तरोववाइय० जाव सव्वट्ठसिद्धअणु०, एक्केक्केणं दुयओ भेओ भाणियव्वो जाव जे पज्जत्तसव्वट्ठसिद्धअणुत्तरोववाइय जाव परिणया ते वेउव्विय-तेयाकम्मासरीरपओगपरिणया, दंडगा ३ ॥ जे अपज्जत्ता सुहुमपुढविकाइयएगिंदिय-पओगपरिणया ते फासिदियपओगपरिणया जे पज्जत्ता सुहुमपुढविकाइय० एवं चेव, जे अपज्जत्ता वादरपुढविकाइय० एवं चेव, एवं पज्जत्तगावि, एवं चउक्कएणं भेएणं जाव वणस्सइकाइय०, जे अपज्जत्ता वेइंदियपओगपरिणया ते जिब्भिदियफासिदियपओगप-रिणया जे पज्जत्ता वेइंदिय० एवं चेव, एवं जाव चउरिंदिय० नवरं एक्केक्कं इंदियं वड्ढे-

यव्वं । जे अपज्जत्ता रयणप्पभापुढविनेरइयपंचिंदियपओगपरिणया ते सोइंदियचक्खि-
दियघाणिदियजिर्विंदियफासिंदियपओगपरिणया, एवं पज्जत्तगावि, एवं सव्वे भाणि-
यव्वा, तिरिक्खजोणिय० मणुस्स० देव० जाव जे पज्जत्ता सव्वट्ठसिद्धअणुत्तरोववाइय
जाव परिणया ते सोइंदियचक्खिंदिय जाव परिणया ४ ॥ जे अपज्जत्ता सुहुमपुढविका-
इयएगिंदियओरालियतेयाकम्मासरीरप्पओगपरिणया ते फासिंदियपओगपरिणया जे
पज्जत्ता सुहु० एवं चेव, अपज्जत्तवायर० एवं चेव, एवं पज्जत्तगावि, एवं एएणं अभिलावेणं
जस्स जइ इंदियाणि सरीराणि य ताणि भाणियव्वाणि जाव जे य पज्जत्ता सव्वट्ठसिद्ध-
अणुत्तरोववाइय जाव देवपंचिंदियवेउव्वियतेयाकम्मासरीरपओगपरिणया ते सोइंदिय-
चक्खिंदिय जाव फासिंदियपओगपरिणया ५ ॥ जे अपज्जत्ता सुहुमपुढविकाइयएगिंदिय-
पओगपरिणया ते वन्नओ कालवन्नपरिणयावि नील० लोहिंय० हालिंद० सुक्किल्ल०,
गंधओ सुव्विगंधपरिणयावि दुव्विगंधपरिणयावि, रसओ तित्तरसपरिणयावि कडुयरस-
परिणयावि कंसायरसप० अंवलिरसप० मंहुररसप०, फासओ कक्खडफासपरि०
जाव लुक्खफासपरि०, संठाणओ परिमंडलसंठाणपरिणयावि वट्ठ० तंस० चउरंस०
आययसंठाणपरिणयावि, जे पज्जत्ता सुहुमपुढवि० एवं चेव, एवं जहाणुपुव्वीए नेयव्वं
जाव जे पज्जत्ता सव्वट्ठसिद्धअणुत्तरोववाइय जाव परिणया ते वन्नओ कालवन्न-
परिणयावि जाव आययसंठाणपरिणयावि ६ ॥ जे अपज्जत्ता सुहुमपुढवि० एगिं-
दियओरालियतेयाकम्मासरीरपओगपरिणया ते वन्नओ कालवन्नपरि० जाव आय-
यसंठाणपरि०, जे पज्जत्ता सुहुमपुढवि० एवं चेव, एवं जहाणुपुव्वीए नेयव्वं जस्स
जइ सरीराणि जाव जे पज्जत्ता सव्वट्ठसिद्धअणुत्तरोववाइय० देवपंचिंदियवेउव्वियते-
याकम्मासरीरप्पओगपरिणया ते वन्नओ कालवन्नपरिणयावि जाव आययसंठाण-
परिणयावि ७ ॥ जे अपज्जत्ता सुहुमपुढविकाइयएगिंदियफासिंदियपओगपरिणया ते
वन्नओ कालवन्नपरिणयावि जाव आययसंठाणपरिणयावि, जे पज्जत्ता सुहुमपुढवि०
एवं चेव, एवं जहाणुपुव्वीए जस्स जइ इंदियाणि तस्स तत्तियाणि भाणियव्वाणि
जाव जे पज्जत्ता सव्वट्ठसिद्धअणुत्तरो० देवपंचिंदियसोइंदिय जाव फासिंदियपओग-
परिणया ते वन्नओ कालवन्नपरिणयावि जाव आययसंठाणपरिणयावि ८ ॥ जे
अपज्जत्ता सुहुमपुढविकाइयएगिंदियओरालियतेयाकम्मासरीरफासिंदियपओगपरिणया
ते वन्नओ कालवन्नपरिणयावि जाव आययसंठाणप०, जे पज्जत्ता सुहुमपुढवि० एवं
चेव, एवं जहाणुपुव्वीए जस्स जइ सरीराणि इंदियाणि य तस्स तइ भाणियव्वाणि
जाव जे पज्जत्ता सव्वट्ठसिद्धअणुत्तरोववाइय जाव देवपंचिंदियवेउव्वियतेयाकम्मा-
सरीरसोइंदिय जाव फासिंदियपओगपरि० ते वन्नओ कालवन्नपरि० जाव आययसंठा-

णपरिणयावि, एवं एए नवे दंडगा ९ ॥ ३०९ ॥ मीसापरिणया णं भंते ! पोग्गला कइविहा पण्णत्ता ?, गोयमा ! पंचविहा पण्णत्ता, तंजहा-एगिंदियमीसापरिणया जाव पंचिदियमीसापरिणया, एगिंदियमीसापरिणया णं भंते ! पोग्गला कइविहा पण्णत्ता ?, एवं जहा पओगपरिणएहिं नव दंडगा भणिया एवं मीसापरिणएहिंवि नव दंडगा भाणियव्वा, तहेव सव्वं निरवसेसं, नवरं अभिलावो मीसापरिणया भाणियव्वो, सेसं तं चेव, जाव जे पज्जत्ता सव्वट्टसिद्धअणुत्तरो० जाव आययसंठाणपरिणयावि ॥ ३१० ॥ वीससापरिणया णं भंते ! पोग्गला कइविहा पण्णत्ता ?, गोयमा ! पंचविहा पण्णत्ता, तंजहा-वन्नपरिणया गंधपरिणया रसपरिणया फासपरिणया संठाणपरिणया, जे वन्नपरिणया ते पंचविहा पण्णत्ता, तंजहा-कालवन्नपरिणया जाव सुक्किळ्वन्नपरिणया, जे गंधपरिणया ते दुविहा पण्णत्ता, तंजहा-सुब्भिगंधपरिणयावि दुब्भिगंधपरिणयावि, एवं जहा पण्णवणापए तहेव निरवसेसं जाव जे संठाणओ आययसंठाणपरिणया ते वन्नओ कालवन्नपरिणयावि जाव लुक्खफासपरिणयावि ॥ ३११ ॥ एगे भंते ! दव्वे किं पओगपरिणए मीसापरिणए वीससापरिणए ?, गोयमा ! पओगपरिणए वा मीसापरिणए वा वीससापरिणए वा । जइ पओगपरिणए कि मणप्पओगपरिणए वइप्पओगपरिणए कायप्पओगपरिणए ?, गोयमा ! मणप्पओगपरिणए वा वइप्पओगपरिणए वा कायप्पओगपरिणए वा, जइ मणप्पओगपरिणए किं सच्चमणप्पओगपरिणए मोसमणप्पओग० सच्चामोसमणप्पओ० असच्चामोसमणप्पओ० ?, गोयमा ! सच्चमणप्पओगपरिणए वा मोसमणप्पओग० सच्चामोसमणप्प० असच्चामोसमणप्प०, जइ सच्चमणप्पओगप० किं आरंभसच्चमणप्पओ० अणारंभसच्चमणप्पओगपरि० सारंभसच्चमणप्पओग० असारंभसच्चमण० समारंभसच्चमणप्पओगपरि० असमारंभसच्चमणप्पओगपरिणए ?, गोयमा ! आरंभसच्चमणप्पओगपरिणए वा जाव असमारंभसच्चमणप्पओगपरिणए वा, जइ मोसमणप्पओगपरिणए कि आरंभमोसमणप्पओगपरिणए० ? एवं जहा सच्चेणं तहा मोसेणवि, एवं सच्चामोसमणप्पओगपरिणएवि, एवं असच्चामोसमणप्पओगेणवि । जइ वइप्पओगपरिणए किं सच्चवइप्पओगपरिणए मोसवइप्पओगपरिणए ? एवं जहा मणप्पओगपरिणए तहा वइप्पओगपरिणएवि जाव असमारंभवइप्पओगपरिणए वा । जइ कायप्पओगपरिणए कि ओरालियसरीरकायप्पओगपरिणए ओरालियमीसासरीरकायप्पओ० वेउव्वियसरीरकायप्प० वेउव्वियमीसासरीरकायप्पओगपरिणए आहारगसरीरकायप्पओगपरिणए आहारगमीसासरीरकायप्पओगपरिणए कम्मासरीरकायप्पओगपरिणए ?, गोयमा ! ओरालियसरीरकायप्पओगपरिणए वा जाव कम्मासरीरकायप्पओगपरिणए वा, जइ

ओरालियसरीरकायप्पओगपरिणए किं एगिदियओरालियसरीरकायप्पओगपरिणए एवं जाव पंचिदियओरालिय जाव परि० ?, गोयमा ! एगिदियओरालियसरीरकायप्पओगपरिणए वा वेदिय जाव परिणए वा जाव पंचिदिय जाव परिणए वा, जइ एगिदियओरालियसरीरकायप्पओगपरिणए किं पुढविकाइयएगिदिय जाव परिणए जाव वणस्सइकाइयएगिदियओरालियसरीरकायप्पओगपरिणए ?, गोयमा ! पुढविकाइयएगिदिय जाव परिणए वा जाव वणस्सइकाइयएगिदिय जाव परिणए वा, जइ पुढविकाइयएगिदियओरालियसरीर जाव परिणए किं सुहुमपुढविकाइय जाव परिणए वायरपुढविकाइयएगिदिय जाव परिणए ?, गोयमा ! सुहुमपुढविकाइयएगिदिय जाव परिणए वा वायरपुढविकाइय जाव परिणए वा, जइ सुहुमपुढविकाइय जाव परिणए किं पज्जत्तसुहुमपुढवि जाव परिणए अपज्जत्तसुहुमपुढवि जाव परिणए ?, गोयमा ! पज्जत्तसुहुमपुढविकाइय जाव परिणए वा अपज्जत्तसुहुमपुढविकाइय जाव परिणए वा, एवं वायरावि, एवं जाव वणस्सइकाइयागं चउक्कओ मेओ, वेइंदियतेइंदियचउरिंदियाणं दुयओ मेओ पज्जत्तगा य अपज्जत्तगा य । जइ पंचिदियओरालियसरीरकायप्पओगपरिणए किं तिरिक्खजोणियपंचिदियओरालियसरीरकायप्पओगपरिणए मणुस्सपंचिदिय जाव परिणए ?, गोयमा ! तिरिक्खजोणिय जाव परिणए वा मणुस्सपंचिदिय जाव परिणए वा, जइ तिरिक्खजोणिय जाव परिणए किं जलयरतिरिक्खजोणिय जाव परिणए थलयरखहयर० ? एवं चउक्कओ मेओ जाव खहयराणं । जइ मणुस्सपंचिदिय जाव परिणए किं संमुच्छिममणुस्सपंचिदिय जाव परिणए गव्भवक्कंतियमणुस्स जाव परिणए ?, गोयमा ! दोसुवि, जइ गव्भवक्कंतियमणुस्स जाव परिणए किं पज्जत्तगव्भवक्कंतिय जाव परिणए अपज्जत्तगव्भवक्कंतियमणुस्सपंचिदियओरालियसरीरकायप्पओगपरिणए ?, गोयमा ! पज्जत्तगव्भवक्कंतिय जाव परिणए वा अपज्जत्तगव्भवक्कंतिय जाव परिणए वा १ । जइ ओरालियमीसासरीरकायप्पओगपरिणए किं एगिदियओरालियमीसासरीरकायप्पओगपरिणए वेइंदिय जाव परिणए जाव पंचिदियओरालिय जाव परिणए ?, गोयमा ! एगिदियओरालिय जाव परिणए एवं जेहा ओरालियसरीरकायप्पओगपरिणएणं आलावगो भणिओ तहा ओरालियमीसासरीरकायप्पओगपरिणएवि आलावगो भाणियव्वो, नवरं वायरवाउक्काइयगव्भवक्कंतियपंचिदियतिरिक्खजोणियगव्भवक्कंतियमणुस्साणं एएसि णं पज्जत्तापज्जत्तगाणं सेसाणं अपज्जत्तगाणं २ । जइ वेउव्वियसरीरकायप्पओगपरिणए किं एगिदियवेउव्वियसरीरकायप्पओगपरिणए जाव पंचिदियवेउव्वियसरीर जाव परिणए ?, गोयमा ! एगिदिय जाव परिणए वा पंचिदिय जाव परिणए वा, जइ एगिदिय

जाव परिणए किं वाउक्काइयएगिंदिय जाव परिणए अवाउक्काइयएगिंदिय जाव परि-
णए ?, गोयमा ! वाउक्काइयएगिंदिय जाव परिणए नो-अवाउक्काइय जाव परिणए,
एवं एएणं अभिलावेणं जहा ओगाहणसंठाणे वेउव्वियसरीरं भाणियं तथा इहावि
भाणियव्वं जाव पज्जत्तसव्वट्टसिद्धअणुत्तरोववाइयकप्पाईयवेमाणियदेवपंचिदियवेउ-
व्वियसरीरकायप्पओगपरिणए वा अपज्जत्तसव्वट्टसिद्ध० कायप्पओगपरिणए वा ३ । जइ
वेउव्वियमीसासरीरकायप्पओगपरिणए किं एगिंदियमीसासरीरकायप्पओगपरिणए
जाव पंचिदियमीसासरीरकायप्पओगपरिणए ?, एवं जहा वेउव्वियं तथा वेउव्विय-
मीसगंपि, नवरं देवनेरइयाणं अपज्जत्तगाणं सेसाणं पज्जत्तगाणं तहेव जाव नो
पज्जत्तसव्वट्टसिद्धअणुत्तरो० जाव पओग० अपज्जत्तसव्वट्टसिद्धअणुत्तरोववाइयदेवपंचि-
दियवेउव्वियमीसासरीरकायप्पओगपरिणए ४ । जइ आहारगसरीरकायप्पओगपरि-
णए किं मणुस्साहारगसरीरकायप्पओगपरिणए अमणुस्साहारग जाव प० ?, एवं
जहां ओगाहणसंठाणे जाव इड्ढिपत्तपमत्तसंजयसम्मदिट्ठिपज्जत्तगसंखेज्जवासाउय जाव
परिणए नो अणिड्ढिपत्तपमत्तसंजयसम्मदिट्ठिपज्जत्तगसंखेज्जवासाउय जाव प० ५ ।
जइ आहारगमीसासरीरकायप्पओगप० कि मणुस्साहारगमीसासरीर० ? एवं जहा
आहारगं तहेव मीसगंपि निरवसेसं भाणियव्वं ६ । जइ कम्मासरीरकायप्पओगप०
कि एगिंदियकम्मासरीरकायप्पओगप० जाव पंचिदियकम्मासरीर जाव प० ?,
गोयमा ! एगिंदियकम्मासरीरकायप्पओ० एवं जहा ओगाहणसंठाणे कम्मगस्स
भेओ तहेव इहावि जाव पज्जत्तसव्वट्टसिद्धअणुत्तरोववाइय जाव देवपंचिदियकम्मास-
रीरकायप्पओगपरिणए वा अपज्जत्तसव्वट्टसिद्धअणु० जाव परिणए वा ७ ॥ जइ मीसा-
परिणए किं मणमीसापरिणए वइमीसापरिणए कायमीसापरिणए ? गोयमा ! मण-
मीसापरिणए वा वइमीसा० वा कायमीसापरिणए-वा, जइ मणमीसापरिणए किं
सच्चमणमीसापरिणए मोसमणमीसापरिणए ? जहा पओगपरिणए तथा मीसापरिणएवि
भाणियव्वं निरवसेसं जाव पज्जत्तसव्वट्टसिद्धअणुत्तरोववाइय जाव देवपंचिदियकम्मा-
सरीरमीसापरिणए वा अपज्जत्तसव्वट्टसिद्धअणु० जाव कम्मासरीरमीसापरिणए वा ।
जइ वीससापरिणए कि वन्नपरिणए गंधपरिणए-रसपरिणए-फासपरिणए-संठाणप-
रिणए ?, गोयमा ! वन्नपरिणए वा गंधपरिणए वा रसपरिणए वा-फासपरिणए वा
संठाणपरिणए वा, जइ वन्नपरिणए कि कालवन्नपरिणए नील जाव सुक्किल्लवन्नपरिणए ?,
गोयमा ! कालवन्नपरिणए वा जाव सुक्किल्लवन्नपरिणए वा, जइ गंधपरिणए कि सुब्भिगं-
धपरिणए दुब्भिगंधपरिणए ?, गोयमा ! सुब्भिगंधपरिणए वा दुब्भिगंधपरिणए वा, जइ
रसपरिणए कि तित्तरसपरिणए ५, पुच्छा, गोयमा ! तित्तरसपरिणए वा जाव महु-र-

रसपरिणए वा, जइ फासपरिणए कि कक्खडफासपरिणए जाव लुक्खफासपरिणए ?, गोयमा ! कक्खडफासपरिणए वा जाव लुक्खफासपरिणए वा, जइ संठाणपरिणए पुच्छा, गोयमा ! परिमंडलसंठाणपरिणए वा जाव आययसंठाणपरिणए वा ॥ ३१२ ॥ दो भंते ! दव्वा किं पओगपरिणया मीसापरिणया वीससापरिणया ?, गोयमा ! पओगपरिणया वा १ मीसापरिणया वा २ वीससापरिणया वा ३ अहवा एगे पओगपरिणए एगे मीसापरिणए ४ अहवेगे पओगप० एगे वीससापरि० ५ अहवा एगे मीसापरिणए एगे वीससापरिणए एवं ६ । जइ पओगपरिणया किं मणप्पओगपरिणया वइप्पओग० कायप्पओगपरिणया ?, गोयमा ! मणप्पओ० वइप्पओगप० कायप्पओगपरिणया वा अहवेगे मणप्पओगप० एगे वइप्पओगप०, अहवेगे मणप्पओगपरिणए एगे कायप०, अहवेगे वइप्पओगप० एगे कायप्पओगपरि०, जइ मणप्पओगप० किं सच्चमणप्पओगप० ४ ?, गोयमा ! सच्चमणप्पओगपरिणया वा जाव असच्चा मोसमणप्पओगप० वा १ अहवा एगे सच्चमणप्पओगपरिणए एगे मोसमणप्पओगपरिणए १ अहवा एगे सच्चमणप्पओगप० एगे सच्चा मोसमणप्पओगपरिणए २ अहवा एगे सच्चमणप्पओगपरिणए एगे असच्चा मोसमणप्पओगपरिणए ३ अहवा एगे मोसमणप्पओगप० एगे सच्चा मोसमणप्पओगप० ४ अहवा एगे मोसमणप्पओगप० एगे असच्चा मोसमणप्पओगप० ५ अहवा एगे सच्चा मोसमणप्पओगप० एगे असच्चा मोसमणप्पओगप० ६ । जइ सच्चमणप्पओगप० किं आरंभसच्चमणप्पओगपरिणया जाव असमारंभसच्चमणप्पओगप० ?, गोयमा ! आरंभसच्चमणप्पओगपरिणया वा जाव असमारंभसच्चमणप्पओगपरिणया वा, अहवा एगे आरंभसच्चमणप्पओगप० एगे अणारंभसच्चमणप्पओगप० एवं एएणं गमएणं दुयसंजोएणं नेयव्वं, सव्वे संजोगा जत्थ जत्ति या उट्ठेति ते भाणियव्वा जाव सव्वट्ठसिद्धगत्ति । जइ मीसाप० किं मणमीसापरि० ? एवं मीसापरि० वि । जइ वीससापरिणया किं वन्नपरिणया गंधप० ? एवं वीससापरिणया वि जाव अहवा एगे चउरंससंठाणपरि० एगे आययसंठाणपरिणए वा ॥ तिन्नि भंते ! दव्वा किं पओगपरिणया मीसाप० वीससाप० ?, गोयमा ! पओगपरिणया वा मीसापरिणया वा वीससापरिणया वा । अहवा एगे पओगपरिणए दो मीसाप० १ अहवेगे पओगपरिणए दो वीससाप० २ अहवा दो पओगपरिणया एगे मीससापरिणए ३ अहवा दो पओगप० एगे वीससाप० ४ अहवा एगे मीसापरिणए दो वीससाप० ५ अहवा दो मीससाप० एगे वीससाप० ६ अहवा एगे पओगप० एगे मीसापरि० एगे वीससाप० ७ । जइ पओगप० किं मणप्पओगपरिणया वइप्पओगप० कायप्पओगप० ?, गोयमा ! मणप्पओगपरिणया वा एवं एक्कगसंजोगो दुयासंजोगो तियासंजोगो भाणि-

यव्वो, जइ मणप्पओगपरि० किं सच्चमणप्पओगपरिणया ४?, गोयमा ! सच्चमणप्प-
 ओगपरिणया वा जाव असच्चामोसमणप्पओगपरिणया वा ४, अहवा एगे सच्चमण-
 प्पओगपरिणए दो मोसमणप्पओगपरिणया, एवं दुयासंजोगो तियासंजोगो भाणि-
 यव्वो, एत्थवि तहेव जाव अहवा एगे तंससंठाणपरिणए वा एगे चउरंससंठाण-
 परिणए वा एगे आययसंठाणपरिणए वा ॥ चत्तारि भंते ! दव्वा कि पओगपरिणया
 ३?, गोयमा ! पओगपरिणया वा मीसापरिणया वा वीससापरिणया वा, अहवा एगे
 पओगपरिणए तिन्नि मीसापरिणया १ अहवा एगे पओगपरिणए तिन्नि वीससापरि-
 णया २ अहवा दो पओगपरिणया दो मीसापरिणया ३ अहवा दो पओगपरिणया
 दो वीससापरिणया ४ अहवा तिन्नि पओगपरिणया एगे मीससापरिणए ५ अहवा
 तिन्नि पओगपरिणया एगे वीससापरिणए ६ अहवा एगे मीससापरिणए तिन्नि वीस-
 सापरिणया ७ अहवा दो मीसापरिणया दो वीससापरिणया ८ अहवा तिन्नि मीसा-
 परिणया एगे वीससापरिणए ९ अहवा एगे पओगपरिणए दो वीससापरिणया
 (एगे मीसापरिणए) १ अहवा एगे पओगपरिणए दो मीसापरिणया एगे वीससा-
 परिणए २ अहवा दो पओगपरिणया एगे मीसापरिणए एगे वीससापरिणए ३ । जइ
 पओगपरिणया किं मणप्पओगपरिणया ३? ॥ एवं एएणं कमेणं पंच छ सत्त जाव
 दस संखेज्जा असंखेज्जा अणंता य दव्वा भाणियव्वा (एकगसंजोगेणं) दुयासंजो-
 एणं तियासंजोएणं जाव दससंजोएणं वारससंजोएणं उवजुंजिऊणं जत्थ जत्तिया
 संजोगो उट्ठेति ते सव्वे भाणियव्वा, एए पुण जेहा नवमसए पवेसणए भणिहामि
 तहा उवजुज्जिऊण भाणियव्वा जाव असंखेज्जा अणंता एवं चेव, नेवरं एणं पयं
 अव्वभहियं, जाव अहवा अणंता परिमंडलसंठाणपरिणया जाव अणंता आययसंठा-
 णपरिणया ॥ ३१३ ॥ एएसि णं भंते ! पोग्गलाणं पओगपरिणयाणं मीसापरिणयाणं
 वीससापरिणयाणं य कंयरे २ हिंतो जाव विसंसाहिया वा?, गोयमा ! सव्वेत्थोवा
 पोग्गला पओगपरिणया मीसापरिणया अणंतगुणा वीससापरिणया अणन्तगुणा ।
 सेवं भंते ! सेवं भंते ! ति ॥ ३१४ ॥ अट्ठमसयस्स पढमो उद्देसो समत्तो ॥
 कइविहा णं भंते ! आसीविसा पन्नत्ता?, गोयमा ! दुविहा आसीविसा पन्नत्ता,
 तंजहा-जाइआसीविसा य कम्मआसीविसा य, जाइआसीविसा णं भंते ! कइविहो
 प०?, गोयमा ! चउव्विहा प०, तंजहा-विच्छुयजाइआसीविसे मंडुकजाइआसीविसे
 उरगजाइआसीविसे मणुस्सजाइआसीविसे, विच्छुयजाइआसीविसस्स णं भंते ! केव-
 इए विसए पन्नत्ते?, गोयमा ! पंभू णं विच्छुयजाइआसीविसे अद्धभरहप्पमाणमेत्तं
 वोदिं विसेणं विसपरिणयं विसट्ठमाणं पकरेत्तए, विसए से विसट्ठयाए नो चेव णं

संपत्तीए करेसु वा करेति वा करिस्संति वा १, मडुक्कजाइआसीविसंपुच्छा, गोयमा !
 पभूणं मडुक्कजाइआसीविसे भरहप्पमाणमेत्तं वोदि विसेणं विसपरिगयं सेसं तं चेव
 जाव करेस्संति वा २, एवं उरंगजाइआसीविसस्सवि नवरं जंबुद्दीवप्पमाणमेत्तं वोदि
 विसेणं विसपरिगयं सेसं तं चेव जाव करेस्संति वा ३, मणुस्सजाइआसीविसस्सवि
 एवं चेव नवरं समयखेत्तप्पमाणमेत्तं वोदि विसेणं विसपरिगयं सेसं तं चेव जाव करे-
 स्संति वा ४ । जइ कम्मआसीविसे कि नेरइयकम्मआसीविसे तिरिक्खजोणियकम्म-
 आसीविसे मणुस्सकम्मआसीविसे देवकम्मासीविसे ?, गोयमा ! नो नेरइयकम्मासी-
 विसे तिरिक्खजोणियकम्मासीविसेवि मणुस्सकम्मा ० देवकम्मासी ०, जइ तिरिक्खजो-
 णियकम्मासीविसे कि एगिंदियतिरिक्खजोणियकम्मासीविसे जाव पंचिंदियतिरिक्खजो-
 णियकम्मासीविसे ?, गोयमा ! नो एगिंदियतिरिक्खजोणियकम्मासीविसे जाव नो
 चउरिंदियतिरिक्खजोणियकम्मासीविसे, पंचिंदियतिरिक्खजोणियकम्मासीविसे, जइ
 पंचिंदियतिरिक्खजोणियकम्मासीविसे कि संमुच्छिमपंचेदियतिरिक्खजोणियकम्मासी-
 विसे गवभवक्कंतियपंचिंदियतिरिक्खजोणियकम्मासीविसे ?, एवं जहा वेउव्वियसरी-
 रस्स भेओ जाव पज्जत्तासंखेज्जवासाउयगवभवक्कंतियपंचिंदियतिरिक्खजोणियक-
 म्मासीविसे नो अपज्जत्तासंखेज्जवासाउय जाव कम्मासीविसे । जइ मणुस्सकम्मासीविसे
 कि संमुच्छिममणुस्सकम्मासीविसे गवभवक्कंतियमणुस्सकम्मासीविसे ?, गोयमा ! णो
 संमुच्छिममणुस्सकम्मासीविसे गवभवक्कंतियमणुस्सकम्मासीविसे एवं जहा वेउव्विय-
 सरीरं जाव पज्जत्तासंखेज्जवासाउयकम्मभूमियगवभवक्कंतियमणुस्सकम्मासीविसे नो अप-
 ज्जत्ता जाव कम्मासीविसे । जइ देवकम्मासीविसे कि भवणवासिदेवकम्मासीविसे
 जाव वेमाणियदेवकम्मासीविसे ?, गोयमा ! भवणवासिदेवकम्मासीविसेवि वाणमंतरं
 जोइसियं वेमाणियदेवकम्मासीविसेवि, जइ भवणवासिदेवकम्मासीविसे कि असुर-
 कुमारभवणवासिदेवकम्मासीविसे जाव थणियकुमार जाव कम्मासीविसे ?, गोयमा !
 असुरकुमारभवणवासिदेवकम्मासीविसेवि जाव थणियकुमार ० आसीविसेवि, जइ असुर-
 कुमार जाव कम्मासीविसे कि पज्जत्तअसुरकुमार जाव कम्मासीविसे अपज्जत्तअसुर-
 कुमारभवणवासिदेवकम्मासीविसे ? गोयमा ! नो पज्जत्तअसुरकुमार जाव कम्मासीविसे
 अपज्जत्तअसुरकुमारभवणवासिदेवकम्मासीविसे, एवं थणियकुमारं, जइ वाणमंत-
 रदेवकम्मासीविसे कि पिसायवाणमंतरं एवं सव्वेसिं पि अपज्जत्तगणं, जोइसियाणं
 सव्वेसिं अपज्जत्तगणं, जइ वेमाणियदेवकम्मासीविसे कि कप्पोववण्णगवेमाणिय-
 देवकम्मासीविसे कप्पाइयवेमाणियदेवकम्मासीविसे ?, गोयमा ! कप्पोववण्णगवेमा-
 णियदेवकम्मासीविसे नो कप्पातीयवेमाणियदेवकम्मासीविसे, जइ कप्पोववण्णगवे-

माणियदेवकम्मासीविसे किं सोहम्मकप्पोव० जाव कम्मासीविसे जाव अच्चयकप्पोवग जाव कम्मासीविसे ?, गोयमा ! सोहम्मकप्पोववण्णगवेमाणियदेवकम्मासीविसेवि जाव सहस्सारकप्पोववण्णगवेमाणियदेवकम्मासीविसेवि, नो आणयकप्पोववण्णग० जाव नो अच्चयकप्पोववण्णगवेमाणियदेव०, जइ सोहम्मकप्पोववण्णग जाव कम्मासी- विसे किं पज्जत्तसोहम्मकप्पोववण्णगवेमाणिय० अपज्जत्तगसोहम्मक० ?, गोयमा ! नो - पज्जत्तसोहम्मकप्पोववण्णगवेमाणिय० - अपज्जत्तसोहम्मकप्पोववण्णगवेमाणिय- देवकम्मासीविसे, एवं, जाव नो पज्जत्तसहस्सारकप्पोववण्णगवेमाणियदेवकम्मा- सीविसे, अपज्जत्तसहस्सारकप्पोववण्णग जाव कम्मासीविसे ॥ ३१५ ॥ दस ठाणाइं छउमत्थे सव्वभावेणं न जाणइ न पासइ, तंजहा-धम्मत्थिकायं १ अध- म्मत्थिकायं २ आगासत्थिकायं ३ जीवं असरीरपडिक्खं ४ परमाणुपोग्गलं ५ सइं ६ गंधं ७ वायं ८ अयं जिणे भविस्सइ णं वा भविस्सइ ९ अयं सव्वदुक्खाणं अंतं करिस्सइ न वा करेस्सइ १० ॥ एयाणि चेव उप्पन्ननाणदंसणधरे अरहा जिणे केवली सव्वभावेणं जाणइ पासइ, तंजहा-धम्मत्थिकायं जाव करेस्सइ न वा करेस्सइ ॥ ३१६ ॥ कइविहे णं भंते ! नाणे पन्नत्ते ?, गोयमा ! पंचविहे नाणे पन्नत्ते, तंजहा-आभिणिबोहियनाणे सुयनाणे ओहिनाणे मणपज्जवनाणे केवल- नाणे, से किं तं आभिणिबोहियनाणे ?, आभिणिबोहियनाणे चउव्विहे पन्नत्ते, तंजहा-उग्गहो-ईहा अवाओ धारणा, एवं जहा रायप्पसेणीए णाणानं भेओ तंहेव इहवि भाणियव्वो जाव सेतं केवलनाणे ॥ अन्नाणे णं भंते ! कइविहे पण्णत्ते ?, गोयमा ! तिविहे पण्णत्ते, तंजहा-मइअन्नाणे सुयअन्नाणे विभंगणाणे । से किं तं मइ- अन्नाणे ?, २ चउव्विहे पण्णत्ते, तंजहा-उग्गहो जाव धारणा । से किं तं उग्गहे ?, २ दुविहे पण्णत्ते, तंजहा-अत्थोग्गहे य वंजणोग्गहे य, एवं जहेव आभिणिबोहिय- नाणं तहेव, नवरं एगद्धियवज्जं जाव नोइंदियधारणा, सेतं धारणा, सेतं मइअन्नाणे । से किं तं सुयअन्नाणे ?, २ जं इमं अन्नाणिएहिं मिच्छद्दिट्ठिएहिं जहा नंदीए जाव चत्तारि वेया संगोवंगा, सेतं सुयअन्नाणे । से किं तं विभंगनाणे ?, २ अणेगविहे पण्णत्ते, तंजहा-गामसंठिए नगरसंठिए जाव संनिवेससंठिए दीवसंठिए समुदसंठिए वाससंठिए वासहरसंठिए पव्वयसंठिए स्वखसंठिए थूमसंठिए हयसंठिए गयसंठिए नरसंठिए किनरसंठिए किपुरिससंठिए महोरगसंठिए गंधव्वसंठिए उसभसंठिए पसुप- सयविहगवानरणाणासंठाणसंठिए पण्णत्ते ॥ जीवा णं भंते ! किं नाणी अन्नाणी ?, गोयमा ! जीवा नाणीवि अन्नाणीवि, जे नाणी ते अत्थेगइया दुन्नाणी अत्थेगइया तिन्नाणी अत्थेगइया चउनाणी अत्थेगइया एगनाणी, जे-दुन्नाणी ते आभिणि-

बोहियनाणी य-सुयनाणी य, जे तिन्नाणी ते आभिणिबोहियनाणी सुयनाणी ओहि-
नाणी अहवा । आभिणिबोहियनाणी सुयनाणी मणपज्जवनाणी, जे चउनाणी ते
आभिणिबोहियनाणी सुयनाणी ओहिनाणी मणपज्जवनाणी, जे एगनाणी ते नियमा
केवलनाणी, जे अन्नाणी ते अत्थेगइया दुअन्नाणी अत्थेगइया तिअन्नाणी, जे दुअ-
न्नाणी ते मइअन्नाणी य सुयअन्नाणी य, जे तियअन्नाणी ते मइअन्नाणी सुयअन्नाणी
विभंगनाणी । नेरइया णं भंते ! किं नाणी अन्नाणी ? गोयमा ! नाणीवि अन्नाणीवि,
जे नाणी ते नियमा तिन्नाणी, तंजहा-आभिणिबोहि० । सुयनाणी ओहिनाणी, जे
अन्नाणी ते अत्थेगइया दुअन्नाणी अत्थेगइया तिअन्नाणी, एवं तिन्नि अन्नाणाणि
भयणाए । असुरकुमारा णं भंते ! किं नाणी अन्नाणी ? जहेव नेरइया तहेव तिन्नि
नाणाणि नियमा, तिन्नि अन्नाणाणि भयणाए, एवं जाव थणियकुमारा । पुढविकाइया
णं भंते ! किं नाणी अन्नाणी ? गोयमा ! नो नाणी अन्नाणी, जे अन्नाणी ते नियमा
दुअन्नाणी-मइअन्नाणी य सुयअन्नाणी य, एवं जाव वणस्संइकाइया । वेइंदियाणं पुच्छा,
गोयमा ! णाणीवि अन्नाणीवि, जे नाणी ते नियमा दुअन्नाणी, तंजहा-आभिणि-
बोहियनाणी य सुयनाणी य, जे अन्नाणी ते नियमा दुअन्नाणी तं० आभिणिबोहिय-
अन्नाणी सुयअन्नाणी, एवं तेइंदियचउरिंदियावि, पंचिंदियतिरिक्खजो० पुच्छा,
गोयमा ! नाणीवि अन्नाणीवि, जे नाणी ते अत्थे० दुअन्नाणी अत्थे० तिन्नाणी
एवं तिन्नि नाणाणि तिन्नि अन्नाणाणि य भयणाए । मणुस्सा जहा जीवा
तहेव पंच नाणाणि तिन्नि अन्नाणाणि भयणाए । वाणमंतरा जहा ने०, जोइ-
सियवेमाणियाणं तिन्नि नाणाइं तिन्नि अन्नाणाइं नियमा । सिद्धा णं भंते !
पुच्छा, गोयमा ! णाणी नो अन्नाणी, नियमा एगनाणी केवलनाणी ॥ ३१७ ॥
निरयगइया णं भंते ! जीवा किं नाणी अन्नाणी ? गोयमा ! नाणीवि अन्नाणीवि,
तिन्नि नाणाइं नियमा तिन्नि अन्नाणाइं भयणाए । तिरियगइया णं भंते ! जीवा किं
नाणी अन्नाणी ? गोयमा ! दो नाणाइं दो अन्नाणाइं नियमा । मणुस्सगइया णं भंते !
जीवा किं नाणी अन्नाणी ? गोयमा ! तिन्नि नाणाइं भयणाए दो अन्नाणाइं नियमा,
देवगइया जहा निरयगइया । सिद्धगइया णं भंते ! जहा सिद्धा ॥ सइंदिया णं
भंते ! जीवा किं नाणी अन्नाणी ? गोयमा ! चत्तारि नाणाइं तिन्नि अन्नाणाइं भय-
णाए । एगिंदिया णं भंते ! जीवा किं नाणी० ? जहा पुढविकाइया, वेइंदियतेइंदि-
यचउरिंदियाणं दो नाणाइं दो अन्नाणाइं नियमा । पंचिंदिया जहा सइंदिया । आणि-
दिया णं भंते ! जीवा किं नाणी० ? जहा सिद्धा ॥ सकाइया णं भंते ! जीवा किं
नाणी अन्नाणी ? गोयमा ! पंच नाणाणि तिन्नि अन्नाणाइं भयणाए । पुढविकाइया

जाव वणस्सइकाइया नो नाणी अन्नाणी नियमा दुअन्नाणी, तंजहा-मइअन्नाणी य
सुयअन्नाणी य, तसकाइया जहा सकाइया । अकाइया णं भंते ! जीवा कि नाणी० ?,
जहा सिद्धा ३ ॥ सुहुमा णं भंते ! जीवा कि नाणी० ? जहा पुढविकाइया । वायरा
णं भंते ! जीवा कि नाणी० ? जहा सकाइया । नोसुहुमानोवायरा णं भंते ! जीवा०
जहा सिद्धा ४ ॥ पज्जत्ता णं भंते ! जीवा कि नाणी० ?, जहा सकाइया । पज्जत्ता
णं भंते ! नेरइया कि नाणी० ?, तिन्नि नाणा तिन्नि अन्नाणा नियमा जहा नेरइया
एवं जाव थणियकुमारा । पुढविकाइया जहा एगिंदिया, एवं जाव चउरिंदिया ।
पज्जत्ता णं भंते ! पंचिदियतिरेक्खजोणिया कि नाणी अन्नाणी ?, तिन्नि नाणा तिन्नि
अन्नाणा भयणाए । मणुस्सा जहा सकाइया । वाणमंतरा जोइसिया वेमाणिया जहा
नेरइया । अपज्जत्ता णं भंते ! जीवा कि नाणी० ?, तिन्नि नाणा तिन्नि अन्नाणा
भयणाए । अपज्जत्ता णं भंते ! नेरइया कि नाणी अन्नाणी ?, तिन्नि नाणा नियमा
तिन्नि अन्नाणा भयणाए, एवं जाव थणियकुमारा । पुढविकाइया जाव वणस्सइका-
इया जहा एगिंदिया । वेदियाणं पुच्छा, दो नाणा दो अन्नाणा णियमा, एवं जाव
पंचिदियतिरेक्खजोणियाणं । अपज्जत्ता णं भंते ! मणुस्सा कि नाणी अन्नाणी ?,
तिन्नि नाणाई भयणाए दो अन्नाणाई नियमा, वाणमंतरा जहा नेरइया, अपज्जत्ता
जोइसियवेमाणियाणं तिन्नि नाणा तिन्नि अन्नाणा नियमा । नोपज्जत्तगनोअप-
ज्जत्तगा णं भंते ! जीवा कि नाणी० ?, जहा सिद्धा ५ ॥ निरयभवत्था णं भंते !
जीवा कि नाणी अन्नाणी ?, जहा निरयगइया । निरयभवत्था णं भंते ! जीवा कि
नाणी अन्नाणी ?, तिन्नि नाणा तिन्नि अन्नाणा भयणाए । मणुस्सभवत्था णं० जहा
सकाइया । देवभवत्था णं भंते ! जहा निरयभवत्था । अभवत्था जहा सिद्धा ६ ॥
भवसिद्धिया णं भंते ! जीवा कि नाणी० ?, जहा सकाइया, अभवसिद्धियाणं
पुच्छा, गोयमा ! नो नाणी अन्नाणी तिन्नि अन्नाणाई भयणाए । नो भवसिद्धिया-
नोअभवसिद्धिया णं भंते ! जीवा० जहा सिद्धा ७ ॥ सत्तीणं पुच्छा जहा
सइंदिया, असत्ती जहा वेइंदिया, नोसत्तीनोअसत्ती जहा सिद्धा ८ ॥ ३१८ ॥
कइविहा णं भंते ! लद्धी पण्णत्ता ?, गोयमा ! दसविहा लद्धी ५०, तंजहा-नाण-
लद्धी ५ दंसणलद्धी २ चरित्तलद्धी ३ चरित्ताचरित्तलद्धी ४ दाणलद्धी ५ लाभलद्धी
६ भोगलद्धी ७ उवभोगलद्धी ८ वीरियलद्धी ९ इंदियलद्धी १० । णाणलद्धी णं
भंते ! कइविहा ५० ?, गोयमा ! पंचविहा ५०, तंजहा-आभिणिवोहियणाणलद्धी
जाव केवलणाणलद्धी ॥ अन्नाणलद्धी णं भंते ! कइविहा ५० ?, गोयमा ! तिविहा
५०, तंजहा-मइअन्नाणलद्धी सुयअन्नाणलद्धी विभंगनाणलद्धी ॥ दंसणलद्धी णं भंते !

कइविहा प० ?, गोयमा ! तिविहा प०, तंजहा-सम्मइंसणलद्धी मिच्छादंसणलद्धी
सम्मामिच्छादंसणलद्धी ॥ चरित्तलद्धी णं भंते ! कइविहा प० ?, गोयमा ! पंचविहा प०,
तंजहा-सामाइयचरित्तलद्धी छेदोवद्वावणियलद्धी परिहारविसुद्धचरित्तलद्धी सुहुमसंप-
रायचरित्तलद्धी अहक्खायचरित्तलद्धी ॥ चरित्ताचरित्तलद्धी णं भंते ! कइविहा प० ?,
गोयमा ! एगागारा प०, एवं जाव उवभोगलद्धी एगागारा प० ॥ वीरियलद्धी णं
भंते ! कइविहा प० ?, गोयमा ! तिविहा प०, तंजहा-वालवीरियलद्धी पंडियवीरि-
यलद्धी चालपंडियवीरियलद्धी । इंदियलद्धी णं भंते ! कइविहा प० ?, गोयमा !
पंचविहा प०, तंजहा-सोइंदियलद्धी जाव फासिंदियलद्धी ॥ नाणलद्धिया णं भंते ।
जीवा किं-नाणी अन्नाणी ?, गोयमा ! नाणी नो अन्नाणी, अत्थेगइया दुन्नाणी, एवं
पंच नाणाइं भयणाए । तस्स अलद्धिया णं भंते ! जीवा किं-नाणी अन्नाणी ?,
गोयमा ! नो नाणी अन्नाणी, अत्थेगइया दुअन्नाणी तिन्नि अन्नाणाणि भयणाए ।
आभिणिवोहियणाणलद्धिया णं भंते ! जीवा किं-नाणी अन्नाणी ?, गोयमा ! नाणी
नो अन्नाणी, अत्थेगइया दुन्नाणी तिनाणी, चत्तारि नाणाइं भयणाए । तस्स अलद्धिया
णं भंते ! जीवा किं-नाणी अन्नाणी ?, गोयमा ! नाणीवि अन्नाणीवि, जे नाणी ते
नियमा-एगणाणी-केवलनाणी, जे अन्नाणी ते अत्थेगइया दुअन्नाणी तिन्नि अन्ना-
णाइं भयणाए । एवं सुयनाणलद्धियावि, तस्स अलद्धियावि जहा आभिणिवोहिय-
नाणस्स-लद्धिया । ओहिनाणलद्धियाणं पुच्छा, गोयमा ! नाणी नो अन्नाणी,
अत्थेगइया तिन्नाणी, अत्थेगइया चउनाणी, जे तिन्नाणी ते आभिणिवोहियनाणी
सुयनाणी ओहिनाणी, जे चउनाणी ते आभिणिवोहियनाणी सुय० ओहि० मण-
पज्जवनाणी । तस्स अलद्धिया णं भंते ! जीवा किं-नाणी ?, गोयमा ! नाणीवि
अन्नाणीवि । एवं ओहिनाणवज्जाइं चत्तारि नाणाइं तिन्नि अन्नाणाइं भयणाए । मण-
पज्जवनाणलद्धियाणं पुच्छा, गोयमा ! नाणी नो अन्नाणी, अत्थेगइया तिन्नाणी
अत्थेगइया चउनाणी, जे तिन्नाणी ते आभिणिवोहियनाणी सुयणाणी मणपज्जव-
णाणी, जे चउनाणी ते आभिणिवोहियनाणी सुयनाणी ओहिनाणी मणपज्जवनाणी,
तस्स अलद्धियाणं पुच्छा, गोयमा ! नाणीवि अन्नाणीवि, मणपज्जवणाणवज्जाइं
चत्तारि नाणाइं, तिन्नि अन्नाणाइं भयणाए । केवलनाणलद्धिया णं भंते ! जीवा किं
नाणी अन्नाणी ?, गोयमा ! नाणी नो अन्नाणी, नियमा एगणाणी केवलनाणी,
तस्स अलद्धियाणं पुच्छा, गोयमा ! नाणीवि अन्नाणीवि, केवलनाणवज्जाइं चत्तारि
णाणाइं तिन्नि अन्नाणाइं भयणाए ॥ अन्नाणलद्धियाणं पुच्छा, गोयमा ! नो नाणी
अन्नाणी, तिन्नि अन्नाणाइं भयणाए, तस्स अलद्धियाणं पुच्छा, गोयमा ! नाणी नो

अन्नाणी, पंच नाणाई भयणाए जहा अन्नाणरस लद्धिया अलद्धिया य भणिया एवं
मइअन्नाणस्स सुयअन्नाणस्स य लद्धिया अलद्धिया य भाणियव्वा । विभंगनाण-
लद्धियाणं तिन्नि अन्नाणाई नियमा, तस्स अलद्धियाणं पंच नाणाई भयणाए दो
अन्नाणाई नियमा ॥ दंसणलद्धिया णं भंते ! जीवा कि नाणी अन्नाणी ?, गोयमा !
नाणीवि अन्नाणीवि, पंच नाणाई तिन्नि अन्नाणाई भयणाए, तस्स अलद्धिया णं भंते !
जीवा किं नाणी अन्नाणी ?, गोयमा ! तस्स अलद्धिया नत्थि । सम्मदंसणलद्धियाणं पंच
नाणाई भयणाए, तस्स अलद्धियाणं तिन्नि अन्नाणाई भयणाए, मिच्छादंसणलद्धिया
णं भंते ! पुच्छा, णो नाणी अण्णाणी, तिन्नि अन्नाणाई भयणाए, तस्स अलद्धियाणं
पंच नाणाई तिन्नि य अन्नाणाई भयणाए, सम्मामिच्छादंसणलद्धिया अलद्धिया य
जहा मिच्छादंसणलद्धिया अलद्धिया तहेव भाणियव्वा ॥ चरित्तलद्धिया णं भंते ! जीवा
किं नाणी अन्नाणी ?, गोयमा ! नाणी नो अण्णाणी पंच नाणाई भयणाए, तस्स अल-
द्धियाणं मणपज्जवणाणवज्जाई चत्तारि नाणाई तिन्नि य अन्नाणाई भयणाए, सामाइय-
चरित्तलद्धिया णं भंते ! जीवा किं नाणी अन्नाणी ?, गोयमा ! नाणी० केवलवज्जाई
चत्तारि नाणाई भयणाए, तस्स अलद्धियाणं पंच नाणाई तिन्नि य अन्नाणाई भयणाए, एवं
जहा सामाइयचरित्तलद्धिया अलद्धिया य भणिया एवं जाव अहक्खायचरित्तलद्धिया
अलद्धिया य भाणियव्वा, नवरं अहक्खायचरित्तलद्धियाणं पंच नाणाई भ०, चरित्ता-
चरित्तलद्धिया णं भंते ! जीवा कि नाणी अन्नाणी ?, गोयमा ! नाणी नो अन्नाणी,
अत्थेगइया दुण्णाणी अत्थेगइया तिन्नाणी, जे दुज्जाणी ते आभिणिवोहियेनाणी य
सुयनाणी य, जे तिन्नाणी ते आभि० सुयनाणी ओहिनाणी, तस्स अलद्धियाणं पंच
नाणाई तिन्नि अन्नाणाई भयणाए ४ ॥ दाणलद्धियाणं पंच नाणाई तिन्नि अन्नाणाई
भयणाए, तस्स अ० पुच्छा, गोयमा ! नाणी नो अन्नाणी, नियमा एगनाणी केवल-
नाणी । एवं जाव वीरियलद्धिया अलद्धिया य भाणियव्वा ॥ बालवीरियलद्धियाणं
तिन्नि नाणाई तिन्नि अन्नाणाई भयणाए, तस्स अलद्धियाणं पंच नाणाई भयणाए ।
पंडियवीरियलद्धियाणं पंच नाणाई भयणाए, तस्स अलद्धियाणं मणपज्जवणाणव-
ज्जाई नाणाई अन्नाणाणि तिन्नि य भयणाए । बालपंडियवीरियलद्धिया णं भंते !
जीवा० तिन्नि नाणाई भयणाए, तस्स अलद्धियाणं पंच नाणाई तिन्नि अन्नाणाई
भयणाए ॥ इंदियलद्धिया णं भंते ! जीवा किं नाणी अन्नाणी ?, गोयमा ! चत्तारि
णाणाई तिन्नि य अन्नाणाई भयणाए, तस्स अलद्धियाणं पुच्छा, गोयमा ! नाणी
नो अन्नाणी नियमा एगनाणी केवलनाणी, सोइंदियलद्धियाणं जहा इंदियलद्धिया,
तस्स अलद्धियाणं पुच्छा, गोयमा ! नाणीवि अन्नाणीवि, जे नाणी ते अत्थे-

गइया दुन्नाणी अत्थेगइया एगणाणी जे दुन्नाणी ते आभिणिवोहियनाणी सुयनाणी,
जे एगनाणी ते केवलनाणी, जे अन्नाणी ते नियमा दुअन्नाणी, तंजहा-मइअन्नाणी य
सुयअन्नाणी य, चक्खिंदियघाणिंदियलद्धियाणं अलद्धियाण य जहेव सोइदिय-
लद्धिया अलद्धिया य, जिब्भिंदियलद्धियाणं चत्तारि णाणाइं तिन्नि य अन्नाणाणि भय-
णाए, तस्स अलद्धियाणं पुच्छा, गोयमा ! नाणीवि अन्नाणीवि, जे नाणी ते नियमा
एगनाणी केवलनाणी, जे अन्नाणी ते नियमा दुअन्नाणी, तंजहा-मइअन्नाणी य
सुयअन्नाणी य, फासिंदियलद्धियाणं अलद्धियाणं जहा इंदियलद्धिया य अलद्धिया
य ॥ ३१९ ॥ सागारोवउत्ता णं भंते ! जीवा किं नाणी अन्नाणी ? पंच नाणाइं
तिन्नि अन्नाणाइं भयणाए ॥ आभिणिवोहियनाणसागारोवउत्ता णं भंते ! चत्तारि
णाणाइं भयणाए । एवं सुयनाणसागारोवउत्तावि । ओहिनाणसागारोवउत्ता जहा
ओहिनाणलद्धिया, मणपज्जवनाणसागारोवउत्ता जहा मणपज्जवनाणलद्धिया, केवल-
नाणसागारोवउत्ता जहा केवलनाणलद्धिया, मइअन्नाणसागारोवउत्ताणं तिन्नि अन्ना-
णाइं भयणाए, एवं सुयअन्नाणसागारोवउत्तावि, विभंगनाणसागारोवउत्ताणं तिन्नि
अन्नाणाइं नियमा ॥ अणागारोवउत्ता णं भंते ! जीवा किं नाणी अन्नाणी ? पंच
नाणाइं तिन्नि अन्नाणाइं भयणाए । एवं चक्खुदंसणअचक्खुदंसणअणागारोवउत्तावि,
नवरं चत्तारि णाणाइं तिन्नि अन्नाणाइं भयणाए, ओहिदंसणअणागारोवउत्ताणं
पुच्छा, गोयमा ! नाणीवि अन्नाणीवि, जे नाणी ते अत्थेगइया तिन्नाणी अत्थेगइया
चउनाणी, जे तिन्नाणी ते आभिणिवोहियनाणी सुयनाणी ओहिनाणी, जे चउनाणी
ते आभिणिवोहियनाणी जाव मणपज्जवनाणी, जे अन्नाणी ते नियमा तिअन्नाणी,
तंजहा-मइअन्नाणी सुयअन्नाणी विभंगनाणी, केवलदंसणअणागारोवउत्ता जहा केवल-
नाणलद्धिया ॥ सजोगी णं भंते ! जीवा किं नाणी० ? जहा सकाइया, एवं मणजोगी
चइजोगी कायजोगीवि, अजोगी जहा सिद्धा ॥ सलेस्सा णं भंते ! जीवा किं णाणी० ?
जहा सकाइया, कण्हलेस्सा णं भंते ! जहा सकाइया सइंदिया, एवं जाव पम्हलेसा, सुक्क-
लेस्सा जहा सलेस्सा, अलेस्सा जहा सिद्धा ॥ सकसाई णं भंते ! जहा सइंदिया, एवं
जाव लोहकसाई, अकसाई णं भंते ॥ पंच नाणाइं भयणाए ॥ सवेयगा णं
भंते ! जहा सइंदिया, एवं इत्थिवेयगावि, एवं पुरिसवेयगावि, एवं नपुंसगेवे०, अवेयगा
जहा अकसाई ॥ आहारगा णं भंते ! जीवा० ? जहा सकसाई, नवरं केवल-
नाणंपि, अणाहारगा णं भंते ! जीवा किं नाणी अन्नाणी ? मणपज्जवनाणवज्जाइं
नाणाइं अन्नाणाणि य तिन्नि भयणाए ॥ ३२० ॥ आभिणिवोहियनाणस्स णं भंते !
केवइए विसए पन्नते ? गोयमा ! से समासओ चउव्विहे प०, तंजहा-दव्वओ खेत्तओ

कालओ भावओ, दव्वओ णं आभिणिवोहियणाणी आएसेणं सव्वदव्वाइं जाणइ पासइ, खेत्तओ णं आभिणिवोहियणाणी आएसेणं सव्वखेत्तं जाणइ पासइ, एवं कालओवि, एवं भावओवि । सुयनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं सुयनाणी उवउत्ते सव्वदव्वाइं जाणइ पासइ, एवं खेत्तओवि कालओवि, भावओ णं सुयनाणी उवउत्ते सव्वभावे जाणइ पासइ । ओहिनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं ओहिनाणी रुविदव्वाइं जाणइ पासइ जहा नंदीए जाव भावओ । मणपज्जवनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं उज्जुमई अणंते अणंतपएसिए जहा नंदीए जाव भावओ । केवलनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ खेत्तओ कालओ भावओ, दव्वओ णं केवलनाणी सव्वदव्वाइं जाणइ पासइ एवं जाव भावओ ॥ मइअन्नाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ खेत्तओ कालओ भावओ, दव्वओ णं मइअन्नाणी मइअन्नाणपरिगयाइं दव्वाइं जाणइ पासइ, एवं जाव भावओ मइअन्नाणी मइअन्नाणपरिगए भावे जाणइ पासइ । सुयअन्नाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं सुयअन्नाणी सुयअन्नाणपरिगयाइं दव्वाइं आघवेइ पणवेइ परुवेइ, एवं खेत्तओ कालओ, भावओ णं सुयअन्नाणी सुयअन्नाणपरिगए भावे आघवेइ तं चेव । विभंगनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं विभंगनाणी विभंगनाणपरिगयाइं दव्वाइं जाणइ पासइ, एवं जाव भावओ णं विभंगनाणी विभंगनाणपरिगए भावे जाणइ पासइ ॥ ३२१ ॥ णाणी णं भंते ! णाणीति कालओ केवच्चिरं होइ ? गोयमा ! नाणी रुविहे पण्णत्ते, तंजहा-साइए वा अपज्जवसिए साइए वा सपज्जवसिए, तत्थ णं जे से साइए सपज्जवसिए से जहन्नेणं अंतोमुहुत्तं उक्कोसेणं छावट्ठि सागरोवमाइं साइरेगाइं । आभिणिवोहियणाणी णं भंते ! आभिणिवोहिय० एवं नाणी आभिणिवोहियणाणी जाव केवलनाणी । अन्नाणी मइअन्नाणी सुयअन्नाणी विभंगनाणी, एएसिं दसण्हवि संचिट्ठणा जहा कायठिईए ॥ अंतरं सव्वं जहा जीवाभिगमे ॥ अप्पावहुगाणि तिन्नि जहा बहुवत्तव्वयाए ॥ केवइया णं भंते ! आभिणिवोहियणाणपज्जवा पण्णत्ता ? गोयमा ! अणंता आभिणिवोहियणाणपज्जवा पण्णत्ता । केवइया णं भंते !

सुयनाणपज्जवा प० ? एवं चेव एवं जाव केवलनाणस्स । एवं मइअन्नाणस्स सुय-
अन्नाणस्स, केवइया णं भंते ! विभंगनाणपज्जवा प० ? गोयमा ! अणंता विभंग-
नाणपज्जवा प०, एएसि णं भंते ! आभिणिवोहियनाणपज्जवाणं सुयनाण० ओहि-
नाण० मणपज्जवनाण० केवलनाणपज्जवाण य कयरे २ जाव विसेसाहिया वा ?
गोयमा ! सव्वत्थोवा मणपज्जवनाणपज्जवा ओहिनाणपज्जवा अणंतगुणा सुयनाणप-
ज्जवा अणंतगुणा आभिणिवोहियनाणपज्जवा अणंतगुणा केवलनाणपज्जवा अणंत-
गुणा ॥ एएसि णं भंते ! मइअन्नाणपज्जवाणं सुयअन्नाण० विभंगनाणपज्जवाण य कयरे
२ जाव विसेसाहिया वा ? गोयमा ! सव्वत्थोवा विभंगनाणपज्जवा सुयअन्नाणपज्जवा
अणंतगुणा मइअन्नाणपज्जवा अणंतगुणा ॥ एएसि णं भंते ! आभिणिवोहि-
यणाणपज्जवाणं जाव केवलनाणप० मइअन्नाणप० सुयअन्नाणप० विभंगनाणप०
कयरे २ जाव विसेसाहिया वा ? गोयमा ! सव्वत्थोवा मणपज्जवनाणपज्जवा विभंग-
नाणपज्जवा अणंतगुणा ओहिणाणपज्जवा अणंतगुणा सुयअन्नाणपज्जवा अणंतगुणा
सुयनाणपज्जवा विसेसाहिया मइअन्नाणपज्जवा अणंतगुणा आभिणिवोहियनाणपज्जवा
विसेसाहिया केवलनाणपज्जवा अणंतगुणा । सेवं भंते ! सेवं भंते ! त्ति ॥ ३२२ ॥
अट्टमस्स सयस्स विइओ उद्देसो समत्तो ॥

कइविहा णं भंते ! रुक्खा पन्नत्ता ? गोयमा ! तिविहा रुक्खा प०, तंजहा-
संखेज्जजीविया असंखेज्जजीविया अणंतजीविया । से किं तं संखेज्जजीविया ? संखेज्ज०
अणेगविहा प०, तंजहा-ताले तमाले तक्कलि तेतलि जहा पन्नवणाए जाव नालि-
एरी, जे यावन्ने तहप्पगारा, सेत्तं संखेज्जजीविया । से किं तं असंखेज्जजीविया ?
असंखेज्जजीविया दुविहा प०, तंजहा-एगट्ठिया य बहुवीयगा य । से किं तं एग-
ट्ठिया ? २ अणेगविहा प०, तंजहा-निंवंबजंबू० एवं जहा पन्नवणाए जाव फला
बहुवीयगा, सेत्तं बहुवीयगा, सेत्तं असंखेज्जजीविया । से किं तं अणंतजीविया ?
अणंतजीविया अणेगविहा प०, तंजहा-आलुए मूलए सिंगवेरे, एवं जहा सत्तमसए
जाव सीउण्हे सिउंढी मुसुंढी, जे यावन्ने त०, सेत्तं अणंतजीविया ॥ ३२३ ॥ अह
भंते ! कुम्मे कुम्मावलिया गोहे गोहावलिया गोणे गोणावलिया मणुस्से मणुस्सा-
वलिया महिसे महिसावलिया एएसि णं दुहा वा तिहा वा संखेज्जहा वा छिन्नाणं जे
अंतरा तेवि णं तेहिं जीवपएसेहिं फुडा ? हंता ! फुडा । पुरिसे णं भंते ! (जं अंतरं)
ते अंतरे हत्थेण वा पाएण वा अंगुलियाए वा सलागाए वा कट्ठेण वा कलिंचेण
वा आमुसमाणे वा संमुसमाणे वा आलिहमाणे वा विलिहमाणे वा अन्नयरेण वा
तिक्खेण सत्थजाएणं आच्छिदमाणे वा विच्छिदमाणे वा अगणिकाएणं वा समोड-

हमाणे तेसिं जीवपएसाणं किंचि आबाहं वा विबाहं वा उप्पायइ छविच्छेदं वा करेइ ? णो तिण्ठे सम्भे, नो खलु तत्थ सत्थं संकमइ ॥ ३२४ ॥ कइ णं भंते ! पुढवीओ पण्णत्ताओ ? गोयमा ! अट्ठ पुढवीओ पन्नत्ताओ, तंजहा-रयणप्पभा जाव अहे सत्तमा पुढविईसिपव्भारां । इमा णं भंते ! रयणप्पभापुढवी कि चरिमा अचरिमा ? चरिमपयं निरवसेसं भाणियव्वं जाव वेमाणिया णं भंते ! फासचरिमेणं कि चरिमा अचरिमा ? गोयमा ! चरिमावि अचरिमावि । सेवं भंते ! २ ति भगवं गो० ॥ ३२५ ॥ अट्ठमसए तइओ उद्देसो समत्तो ॥

रायणिहे जाव एवं वयासी-कइ णं भंते ! किरियाओ पन्नत्ताओ ? गोयमा ! पंच किरियाओ पन्नत्ताओ, तंजहा-काइया अहिगरणिया, एवं किरियापयं निरवसेसं भाणियव्वं जाव मायावत्तियाओ किरियाओ विसेसाहियाओ, सेवं भंते ! सेवं भंते ! ति भगवं गोयमे० ॥ ३२६ ॥ अट्ठमसए चउत्थो उद्देसो समत्तो ॥

रायणिहे जाव एवं वयासी-आजीविया णं भंते ! थेरे भगवंते एवं वयासी-समणोवासगस्स णं भंते ! सामाइयकडस्स समणोवस्सए अच्छमाणस्स केइ भंडं अवहरेज्जा से णं भंते ! तं भंडं अणुगवेसमाणे किं सयं भंडं अणुगवेसइ परायगं भंडं अणुगवेसइ ? गोयमा ! सयं भंडं अणुगवेसइ नो परायगं भंडं अणुगवेसेइ, तस्स णं भंते ! तेहिं सीलव्वयगुणवेरमणपच्चक्खाणपोसहोववासेहिं से भंडे अभंडे भवइ ? हंता ! भवइ ॥ से केणं खाइ णं अट्ठेणं भंते ! एवं वुच्चइ सयं भंडं अणुगवेसइ नो परायगं भंडं अणुगवेसइ ? गोयमा ! तस्स णं एवं भवइ-णो मे हिरन्ने नो मे सुवन्ने नो मे कंसे नो मे दूसे नो मे विडलधणकणगरयणमणिमोत्तियसंख-तिलप्पवाल्तरयणमाइए संतसारसावएजे, ममत्तभावे पुण से अपरिण्णाए भवइ, से तेणट्ठेणं गोयमा ! एवं वुच्चइ-सयं भंडं अणुगवेसइ नो परायगं भंडं अणुगवेसइ ॥ समणोवासगस्स णं भंते ! सामाइयकडस्स समणोवस्सए अच्छमाणस्स केइ जायं चरेज्जा से णं भंते ! कि जायं चरइ अजायं चरइ ? गोयमा ! जायं चरइ नो अजायं चरइ, तस्स णं भंते ! तेहिं सीलव्वयगुणवेरमणपच्चक्खाणपोसहोववासेहिं सा जाया अजाया भवइ ? हंता ! भवइ, से केणं खाइ णं अट्ठेणं भंते ! एवं वुच्चइ-जायं चरइ नो अजायं चरइ ? गोयमा ! तस्स णं एवं भवइ-णो मे माया णो मे पिया णो मे भाया णो मे भणिणी णो मे भज्जा णो मे पुत्ता णो मे धूया नो मे नण्हा, पेज्जवंधणे पुण से अवोच्छिन्ने भवइ, से तेणट्ठेणं गोयमा ! जाव नो अजायं चरइ ॥ ३२७ ॥ समणोवासगस्स णं भंते ! पुव्वामेव थूलए पाणाइवाए अपच्च-क्खाण भवइ से णं भंते ! पच्छा पच्चाइक्खमाणे कि करेइ ? गोयमा ! तीयं पडिक्क-

मइ पडुप्पजं संवरेइ अणागयं पच्चक्खाइ ॥ तीयं पडिक्कममाणे किं तिविहं तिविहेणं
 पडिक्कमइ १ तिविहं दुविहेणं पडिक्कमइ २ तिविहं एगविहेणं पडिक्कमइ ३ दुविहं
 तिविहेणं पडिक्कमइ ४ दुविहं दुविहेणं पडिक्कमइ ५ दुविहं एगविहेणं पडिक्कमइ ६
 एक्कविहं तिविहेणं पडिक्कमइ ७ एक्कविहं दुविहेणं पडिक्कमइ ८ एक्कविहं एगविहेणं
 पडिक्कमइ ९? गोयमा ! तिविहं तिविहेणं पडिक्कमइ तिविहं दुविहेणं वा पडिक्कमइ
 तं चेव जाव एक्कविहं वा एक्कविहेणं पडिक्कमइ, तिविहं तिविहेणं पडिक्कममाणे
 न करेइ न कारवेइ करेतं णाणुजाणइ मणसा वयसा कायसा १, तिविहं दुविहेणं
 पडि० न क० न का० करेतं नाणुजाणइ मणसा वयसा २, अहवा न करेइ न
 का० करेतं नाणुजाणइ मणसा कायसा ३, अहवा न करेइ ३ वयसा कायसा ४,
 तिविहं एगविहेणं पडि० न करेइ ३ मणसा ५, अहवा न करेइ ३ वयसा ६,
 अहवा न करेइ ३ कायसा ७, दुविहं ति० प० न करेइ न का० मणसा वयसा
 कायसा ८, अहवा न करेइ करेतं नाणुजाणइ मणसा वयसा कायसा ९, अहवा न
 कारवेइ करेतं नाणुजाणइ मणसा वयसा कायसा १०, दु० दु० प० न क० न का०
 म० व० ११, अहवा न क० न का० म० कायसा १२, अहवा न क० न का०
 वयसा कायसा १३, अहवा न करेइ करेतं नाणुजाणइ मणसा वयसा १४, अहवा
 न करेइ करेतं नाणुजाणइ मणसा कायसा १५, अहवा न करेइ करेतं नाणुजाणइ
 वयसा कायसा १६, अहवा न कारवेइ करेतं नाणुजाणइ मणसा वयसा १७,
 अहवा न कारवेइ करेतं नाणुजाणइ मणसा कायसा १८, अहवा न कारवेइ करेतं
 नाणुजाणइ वयसा कायसा १९, दुविहं एक्कविहेणं पडिक्कममाणे न करेइ न कारवेइ
 मणसा २०, अहवा न करेइ न कारवेइ वयसा २१, अहवा न करेइ न कारवेइ
 कायसा २२, अहवा न करेइ करेतं नाणुजाणइ मणसा २३, अहवा न करेइ करेतं
 नाणुजाणइ वयसा २४, अहवा न करेइ करेतं नाणुजाणइ कायसा २५, अहवा न
 कारवेइ करेतं नाणुजाणइ मणसा २६, अहवा न कारवेइ करेतं नाणुजाणइ वयसा
 २७, अहवा न कारवेइ करेतं नाणुजाणइ कायसा २८, एगविहं तिविहेणं पडि०
 न करेइ मणसा वयसा कायसा २९, अहवा न कारवेइ मणसा वयसा कायसा ३०,
 अहवा करेतं नाणुजाणइ मणसा ३१३१, एक्कविहं दुविहेणं पडिक्कममाणे न करेइ
 मणसा वयसा ३२, अहवा न करेइ मणसा कायसा ३३, अहवा न करेइ वयसा
 कायसा ३४, अहवा न कारवेइ मणसा वयसा ३५, अहवा न कारवेइ मणसा
 कायसा ३६, अहवा न कारवेइ वयसा कायसा ३७, अहवा करेतं नाणुजाणइ मणसा
 वयसा ३८, अहवा करेतं नाणुजाणइ मणसा कायसा ३९, अहवा करेतं नाणुजाणइ

वयसा कायसा ४०, एक्कविहं एगविहेणं पडिक्कममाणे न करेइ मणसा ४१, अहवा न करेइ वयसा ४२, अहवा न करेइ कायसा ४३, अहवा न कारवेइ मणसा ४४, अहवा न कारवेइ वयसा ४५, अहवा न कारवेइ कायसा ४६, अहवा करेतं नाणुजाणइ मणसा ४७, अहवा करेतं नाणुजाणइ वयसा ४८, अहवा करेतं नाणुजाणइ कायसा ४९ । पडुप्पन्नं संवरेमाणे किं तिविहं तिविहेणं संवरेइ ? एवं जहा पडिक्कममाणेणं एगूणपन्नं भंगा भणिया एवं संवरमाणेणवि एगूणपन्नं भंगा भाणियव्वा । अणागयं पच्चक्खमाणे किं तिविहं तिविहेणं पच्चक्खाइ ? एवं ते चेव भंगा एगूणपणं भाणियव्वा जाव अहवा करेतं नाणुजाणइ कायसा ॥ समणोवासगस्स णं भंते ! पुव्वमेव थूलए मुसावाए अपच्चक्खाए भवइ से णं भंते ! पच्छा पच्चाइक्खमाणे एवं जहा पाणाइवायस्स सीयालं भंगसयं भणियं तहा मुसावायस्सवि भाणियव्वं । एवं अदिच्चादाणस्सवि, एवं थूलगस्स मेहुणस्सवि थूलगस्स परिग्गहस्सवि जाव अहवा करेतं नाणुजाणइ कायसा ॥ एए खलु एरिसगा समणोवासगा भवन्ति, नो खलु एरिसगा आजीवियोवासगा भवन्ति ॥ ३२८ ॥ आजीवियसमयस्स णं अयमद्वे पण्णत्ते अक्खीणपडिभोइणो सव्वे सत्ता से हंता छेत्ता भेत्ता लुंपित्ता विलुंपित्ता उद्दवत्ता आहारमाहारंति, तत्थ खलु इमे दुवालस आजीवियोवासगा भवन्ति, तंजहा-ताले, १ तालपलंवे, २ उव्विहे, ३ संविहे, ४ अवविहे, ५ उदए, ६ नामुदए, ७ णमुदए, ८ अणुवालए, ९ संखवालए, १० अयंपुळे, ११ कायरिए, १२, इच्चेए दुवालस आजीवियोवासगा अरिहंतदेवयागा अम्मापिउसुस्सूसागा पंचफलपडिक्कंता तंजहा उंवरेहिं, वडेहिं, बोरेहिं, सतरेहिं, पिलंखूहिं, पलंडुल्हस(सु)णकंदमूलविवज्जगा अणिल्लंछिएहिं अणक्कभिच्चेहिं गोणेहि तसपाणविवज्जिएहिं चि(वि)तेहिं विर्त्तिं कप्पेमाणा विहरन्ति एएवि ताव एवं इच्छन्ति, किमंग पुण जे इमे समणोवासगा भवन्ति जेसिं नो कप्पन्ति इमाइं पन्नरस कम्मादाणाइं सयं करेत्तए वा कारवेत्तए वा करेतं वा अन्नं समणुजाणेत्तए तंजहा-इंगालकम्मे, वणकम्मे, साडीकम्मे, भाडीकम्मे, फोडीकम्मे, दंतवाणिज्जे, लक्खवाणिज्जे, केसवाणिज्जे, रसवाणिज्जे, विसवाणिज्जे, जंतपीलणकम्मे, निल्लंछणकम्मे, दवग्गिदावणया, सरदहतलायपरिसोसणया, असईपोसणया, इच्चेए समणोवासगा सुक्का सुक्काभिजाइया भविया भवित्ता कालमासे कालं किच्चा अन्नयरसु देवलोएसु देवत्ताए उव्वत्तारो भवन्ति ॥ ३२९ ॥ कइविहा णं भंते ! [देवा] देवलोगा पण्णत्ता ? गोयमा ! चउव्विहा देवलोगा प०, तंजहा-भवणवासिवाणमंतरजोइसवेमाणिया, सेवं भंते ! २ त्ति ॥ ३३० ॥ अट्टमसयस्स पंचमो उद्देसो समत्तो ॥

समणोवासगस्स णं भंते ! तहाह्वं समणं वा माहणं वा फासुएसणिज्जेणं अस-
 णपाणखाइमसाइमेणं पडिलाभेमाणस्स किं कज्जइ ? गोयमा ! एगंतसो निजरा
 कज्जइ नत्थि य से पावे कम्मे कज्जइ । समणोवासगस्स णं भंते ! तहाह्वं समणं
 वा माहणं वा अफासुएणं अणेसणिज्जेणं असणपाण जाव पडिलाभेमाणस्स किं कज्जइ ?
 गोयमा ! बहुतरिया से निजरा कज्जइ अप्पतराए से पावे कम्मे कज्जइ । समणोवास-
 गस्स णं भंते ! तहाह्वं असंजयअविरयअपडिहयपच्चक्खायपावकम्मं फासुएण वा
 अफासुएण वा एसणिज्जेण वा अणेसणिज्जेण वा असणपाण जाव किं कज्जइ ? गोयमा !
 एगंतसो से पावे कम्मे कज्जइ नत्थि से काइ निजरा कज्जइ, [मोक्खत्थं जं दाणं, तं
 पइ एसो विही समक्खाओ । अणुकंपादाणं पुण, जिणेहिं न कयाइ पडिसिद्धं] ॥ ३३१ ॥
 निग्गंथं च णं गाहावइकुलं पिंडवायपडियाए अणुप्पविट्ठं केइ दोहिं पिंडेहिं उवनिमंते-
 ज्जा-एगं आउसो ! अप्पणा भुंजाहि एगं थेराणं दलयाहि, से य तं पिण्डं पडिग्गाहेज्जा,
 थेरा य से अणुगवेसियव्वा सिया जत्थेव अणुगवेसमाणे थेरे पासिज्ज तत्थेव अणुप्प-
 दायव्वे सिया नो चेव णं अणुगवेसमाणे थेरे पासिज्जा तं नो अप्पणा भुंजेज्जा नो अच्चेसि
 दावए एगंते अणावाए अचित्ते बहुफासुए थंडिल्ले पडिलेहेत्ता पमज्जित्ता परिट्ठावेयव्वे
 सिया । निग्गंथं च णं गाहावइकुलं पिंडवायपडियाए अणुप्पविट्ठं केइ तिहिं पिंडेहिं
 उवनिमंतेज्जा-एगं आउसो ! अप्पणा भुंजाहि दो थेराणं दलयाहि, से य तं पडि-
 ग्गाहेज्जा, थेरा य से अणुगवेसेयव्वा सेसं तं चेव जाव परिट्ठावेयव्वे सिया, एवं
 जाव दसहिं पिंडेहिं उवनिमंतेज्जा नवरं एगं आउसो ! अप्पणा भुंजाहि नव थेराणं
 दलयाहि सेसं तं चेव जाव परिट्ठावेयव्वे सिया । निग्गंथं च णं गाहावइकुलं जाव
 केइ दोहिं पडिग्गाहेहिं उवनिमंतेज्जा एगं आउसो ! अप्पणा पडिभुंजाहि एगं थेराणं
 दलयाहि, से य तं पडिग्गाहेज्जा, तहेवं जाव तं नो अप्पणा पडिभुंजेज्जा नो अच्चेसि
 दावए सेसं तं चेव जाव परिट्ठावेयव्वे सिया, एवं जाव दसहिं पडिग्गाहेहिं, एवं
 जहा पडिग्गाहवत्तव्वया भणिया एवं गोच्छगरयहरणचोलपट्टगकंवललट्टिसंथारगव-
 त्तव्वया य भाणियव्वा जाव दसहिं संथारएहिं उवनिमंतेज्जा जाव परिट्ठावेयव्वे
 सिया ॥ ३३२ ॥ निग्गंथेण य गाहावइकुलं पिंडवायपडियाए पविट्ठेणं अन्नयरे
 अकिच्चट्ठणे पडिसेविए, तस्स णं एवं भवइ-इहेव ताव अहं एयस्स ठणस्स आलो-
 एमि पडिक्कमामि निंदामि गरिहामि विउट्टामि विसोहेमि अकरणयाए अब्भुट्ठेमि
 अहारिहं पायच्छित्तं तवोकम्मं पडिवज्जामि, तओ पच्छा थेराणं अंतियं आलोए-
 स्सामि जाव तवोकम्मं पडिवज्जिस्सामि, से य संपट्टिए असंपत्ते थेरा य पुव्वामेव
 अमुहा सिया से णं भंते ! किं आराहए विराहए ? गोयमा ! आराहए नो विरा-

हए १ । से य संपट्टिए असंपत्ते अप्पणा य पुव्वामेव अमुहे सिया से णं भंते !
 कि आराहए विराहए ? गोयमा ! आराहए नो विराहए २, से य संपट्टिए
 असंपत्ते थेरा य कालं करेज्जा से णं भंते ! कि आराहए विराहए ? गोयमा !
 आराहए नो विराहए ३, से य संपट्टिए असंपत्ते अप्पणा य पुव्वामेव कालं
 करेज्जा से णं भंते ! कि आराहए विराहए ? गोयमा ! आराहए नो विराहए
 ४, से य संपट्टिए संपत्ते थेरा य अमुहा सिया से णं भंते ! कि आराहए विरा-
 हए ? गोयमा ! आराहए नो विराहए, से य संपट्टिए संपत्ते अप्पणा य० एवं संप-
 त्तेणवि चत्तारि आलावगा भाणियव्वा जहेव असंपत्तेणं । निग्गंथेण य वहिया
 वियारभूमिं वा विहारभूमि वा निक्खंतेणं अन्नयरे अकिच्चट्ठाणे पडिसेविए तस्स णं
 एवं भवइ-इहेव ताव अहं० एवं एत्थवि एए चेव अट्ठ आलावगा भाणियव्वा जाव
 नो विराहए । निग्गंथेण य गामाणुगामं दूइज्जमाणेणं अन्नयरे अकिच्चट्ठाणे पडिसे-
 विए तस्स णं एवं भवइ इहेव ताव अहं० एत्थवि ते चेव अट्ठ आलावगा भाणियव्वा
 जाव नो विराहए ॥ निग्गंथीए य गाहावडकुलं पिंडवायपडियाए अणुपविट्ठाए अन्न-
 यरे अकिच्चट्ठाणे पडिसेविए तीसे णं एवं भवइ इहेव ताव अहं एयस्स ठाणस्स
 ओलोएमि जाव तवोकम्मं पडिवज्जामि तओ पच्छा पवत्तिणीए अंतियं आलोएस्सामि
 जाव पडिवज्जिस्सामि, सा य संपट्टिया असंपत्ता पवत्तिणी य अमुहा सिया सा णं
 भंते ! कि आराहिया विराहिया ? गोयमा ! आराहिया नो विराहिया, सा य संप-
 ट्टिया जहा निग्गंथस्स तिन्निगमा भणिया एवं निग्गंथीएवि तिन्नि आलावगा भाणि-
 यव्वा जाव आराहिया नो विराहिया ॥ से केणट्ठेणं भंते ! एवं वुच्चइ-आराहए नो
 विराहए ? गोयमा ! से जहा नामए-केइ पुरिसे एणं मेहं उन्नालोमं वा गयलोमं
 वा सणलोमं वा कप्पासलोमं वा तणसूर्यं वा दुहा वा तिहा वा संखेज्जहा वा
 छिदिता अगणिकायंसि पक्खिवेज्जा से नूणं गोयमा ! छिज्जमाणे छिन्ने पक्खिप्प-
 माणे पक्खित्ते दज्जमाणे दट्ठेति वत्तव्वं सिया ? हंतो भगवं ! छिज्जमाणे छिन्ने
 जाव दट्ठेति वत्तव्वं सिया, से जहा वा केइ पुरिसे वत्थं अहयं वा धोयं वा तंतुग्गयं
 वा मंजिट्ठादोणीए पक्खिवेज्जा से नूणं गोयमा ! उक्खिप्पमाणे उक्खित्ते पक्खिप्प-
 माणे पक्खित्ते रज्जमाणे रत्तेति वत्तव्वं सिया ? हंता भगवं ! उक्खिप्पमाणे उक्खित्ते
 जाव रत्तेति वत्तव्वं सिया, से तेणट्ठेणं गोयमा ! एवं वुच्चइ-आराहए नो विराहए
 ॥ ३३३ ॥ पईवस्स णं भंते ! झियायमाणस्स किं पईवे झियाइ लट्ठी झियाइ
 वत्ती झियाइ तेहं झियाइ पईवचंपए झियाइ जोई झियाइ ? गोयमा ! नो पईवे
 झियाइ जाव नो पईवचंपए झियाइ, जोई झियाइ ॥ अंगारस्स णं भंते ! झियाय-

माणस्स किं अगारे झियाइ कुट्टा झियाइ कडणा झिं धारणा झि० वलहरणे
 झि० वंता० मत्ता झि० वग्गा झियाइ छित्तरा झियाइ छाणे झियाइ जोई झियाइ ?
 गोयमा ! नो अगारे झियाइ नो कुट्टा झियाइ जाव नो छाणे झियाइ, जोई झियाइ
 ॥ ३३४ ॥ जीवे णं भंते ! ओरालियसरीराओ कइकिरिए ? गोयमा ! सिय
 तिकिरिए सिय चउकिरिए सिय पंचकिरिए सिय अकिरिए ॥ नेरइए णं भंते !
 ओरालियसरीराओ कइकिरिए ? गोयमा ! सिय तिकिरिए सिय चउकिरिए
 सिय पंचकिरिए । अनुरुद्धुमारो णं भंते ! ओरालियसरीराओ कइकिरिए ? एव चेव,
 एवं जाव वेमाणिए, नवरं मणुस्से जहा जीवे । जीवे णं भंते ! ओरालियसरीरेहिंतो
 कइकिरिए ? गोयमा ! सिय तिकिरिए जाव सिय अकिरिए । नेरइए णं भंते !
 ओरालियसरीरेहिंतो कइकिरिए ? एवं एसो जहा पढमो दंडओ तहा इमोवि अपरिसेसो
 भाणियव्वो जाव वेमाणिए, नवरं मणुस्से जहा जीवे । जीवा णं भंते ! ओरालिय-
 सरीराओ कइकिरिया ? गोयमा ! सिय-तिकिरिया जाव सिय अकिरिया, नेरइया णं
 भंते ! ओरालियसरीराओ कइकिरिया ? एवं एसोवि जहा पढमो दंडओ तहा भाणि-
 यव्वो, जाव वेमाणिया, नवरं मणुस्सा जहा जीवा । जीवा णं भंते ! ओरालियसरी-
 रेहिंतो कइकिरिया ? गोयमा ! तिकिरियावि चउकिरियावि पंचकिरियावि अकिरि-
 यावि, नेरइया णं भंते ! ओरालियसरीरेहिंतो कइकिरिया ? गोयमा ! तिकिरियावि
 चउकिरियावि पंचकिरियावि एवं जाव वेमाणिया, नवरं मणुस्सा जहा जीवा ॥ जीवे
 णं भंते ! वेडव्वियसरीराओ कइकिरिए ? गोयमा ! सिय तिकिरिए सिय चउकिरिए
 सिय अकिरिए, नेरइए णं भंते ! वेडव्वियसरीराओ कइकिरिए ? गोयमा ! सिय
 तिकिरिए सिय चउकिरिए एवं जाव वेमाणिए, नवरं मणुस्से जहा जीवे, एवं जहा
 ओरालियसरीरेणं चत्तारि दंडगा तहा वेडव्वियसरीरेणवि चत्तारि दंडगा भाणियव्वो,
 नवरं पंचमकिरिया न भन्नइ, सेसं तं चेव, एवं जहा वेडव्वियं तहा आहारगंपि
 तेयगंपि कम्मगंपि भाणियव्वं, एक्केक्के चत्तारि दंडगा भाणियव्वो जाव वेमाणिया णं
 भंते ! कम्मगसरीरेहिंतो कइकिरिया ? गोयमा ! तिकिरियावि चउकिरियावि । सेवं
 भंते । सेवं भंते । त्ति ॥ ३३५ ॥ अट्टमसयस्स छट्ठो उद्देसओ समत्तो ॥

तेणं कालेणं २ रायगिहे नगरे वन्नओ, गुणसिलए उज्जाणे वन्नओ, जाव पुढवि-
 सिलापट्टए, तस्स णं गुणसिलयस्स उज्जाणस्स अदूरसामंते वहवे अन्नउत्थिया परि-
 वसंति, तेणं कालेणं २ समणे भगवं महावीरे आइगरे जाव समोसढे जाव परिसा
 पडिगया, तेणं कालेणं २ समणस्स भगवओ महावीरस्स वहवे अंतेवासी धेरा
 भगवंतो जाइसंपन्ना कुलसंपन्ना जहा विइयसए जाव जीवियासामरणभयविप्पमुक्का

समणस्स भगवओ महावीरस्स अदूरसामंते उड्ढंजाणू अहोसिरा ज्ञाणकोट्टोवगया संजमेणं तवसा अप्पाणं भावेमाणा विहरंति, तए णं ते अन्नउत्थिया जेणेव थेरा भगवंतो तेणेव उवागच्छंति २, ता ते थेरे भगवंते एवं वयासी-तुब्भे णं अज्जो ! तिविहं तिविहेणं असंजयअविरयअप्पडिहय जहा सत्तमसए विइए उद्देसए जाव एगंतवाला यावि भवह, तए णं ते थेरा भगवंतो ते अन्नउत्थिए एवं वयासी-केण कारणेणं अज्जो ! अम्हे तिविहं तिविहेणं असंजयअविरय जाव एगंतवाला यावि भवामो ?, तए णं ते अन्नउत्थिया ते थेरे भगवंते एवं वयासी-तुब्भे णं अज्जो ! अदिन्नं गेण्हह अदिन्नं भुंजह अदिन्नं साइज्जह, तए णं ते तुब्भे अदिन्नं गेण्हमाणा अदिन्नं भुंजमाणा अदिन्नं साइज्जमाणा तिविहं तिविहेणं असंजयअविरय जाव एगंतवाला यावि भवह, तए णं ते थेरा भगवतो ते अन्नउत्थिए एवं वयासी-केण कारणेणं अज्जो ! अम्हे अदिन्नं गेण्हामो अदिन्नं भुंजामो अदिन्नं साइज्जामो, जएणं अम्हे अदिन्नं गेण्हमाणा जाव अदिन्नं साइज्जमाणा तिविहं तिविहेणं असंजय जाव एगंतवाला यावि भवामो ?, तए णं ते अन्नउत्थिया ते थेरे भगवंते एवं वयासी-तुम्हे णं अज्जो ! दिज्जमाणे अदिन्ने पडिग्गाहेज्जमाणे अपडिग्गाहिए निसिरिज्जमाणे अणिसिद्धे, तुब्भे णं अज्जो ! दिज्जमाणं पडिग्गहगं असंपत्तं एत्थ णं अंतरा केइ अवहरिज्जा, गाहावइस्स णं तं भंते ! नो खलु तं तुब्भं, तए णं तुज्झे अदिन्नं गेण्हह जाव अदिन्नं साइज्जह, तए णं तुज्झे अदिन्नं गेण्हमाणा जाव एगंतवाला यावि भवह, तए णं ते थेरा भगवंतो ते अन्नउत्थिए एवं वयासी-नो खलु अज्जो ! अम्हे अदिन्नं गिण्हारो अदिन्नं भुंजामो अदिन्नं साइज्जामो अम्हे णं अज्जो ! दिन्नं गेण्हामो दिन्नं भुंजामो दिन्नं साइज्जामो, तएणं अम्हे दिन्नं गेण्हमाणा दिन्नं भुंजमाणा दिन्नं साइज्जमाणा तिविहं तिविहेणं संजयविरयपडिहय जहा सत्तमसए जाव एगंतपंडिया यावि भवामो, तएणं ते अन्नउत्थिया ते थेरे भगवंते एवं वयासी-केण कारणेणं अज्जो ! तुम्हे दिन्नं गेण्हह जाव दिन्नं साइज्जह, जएणं तुज्झे दिन्नं गेण्हमाणा जाव एगंतपंडिया यावि भवह ?, तएणं ते थेरा भगवंतो ते अन्नउत्थिए एवं वयासी-अम्हे णं अज्जो ! दिज्जमाणे दिन्ने पडिग्गाहेज्जमाणे पडिग्गाहिए निसिरिज्जमाणे निसिद्धे । अम्हे णं अज्जो ! दिज्जमाणं पडिग्गहगं असंपत्तं एत्थ णं अंतरा केइ अवहरेज्जा अम्हाणं तं णो खलु तं गाहावइस्स, जएणं अम्हे दिन्नं गेण्हामो दिन्नं भुंजामो दिन्नं साइज्जामो तएणं अम्हे दिन्नं गेण्हमाणा जाव दिन्नं साइज्जमाणा तिविहं तिविहेणं संजय जाव एगंतपंडिया यावि भवामो, तुज्झे णं अज्जो ! अप्पणा चेव तिविहं तिविहेणं असंजय जाव एगंतवाला यावि भवह, तए णं ते अन्नउत्थिया ते थेरे

भगवंते एवं वयासी-केण कारणेणं अज्जो ! अम्हे तिविहं जाव एगंतवाला यावि भवामो ?, तए णं ते थेरा भगवंतो ते अन्नउत्थिए एवं वयासी-तुज्झे णं अज्जो ! अदिन्नं गेण्हह ३, तए णं तु अज्जो ! तुब्भे अदिन्नं गे० जाव एगंत०, तए णं ते अन्नउत्थिया ते थेरे भगवंते एवं वयासी-केण कारणेणं अज्जो ! अम्हे अदिन्नं गेण्हामो जाव एगंतवा० ?, तए णं ते थेरा भगवंतो ते अन्नउत्थिए एवं वयासी-तुज्झे णं अज्जो ! दिज्जमाणे अदिन्ने तं चेव जाव गाहावइस्स णं णो खलु तं तुज्झे, तए णं तुज्झे अदिन्नं गेण्हह, तं चेव जाव एगंतवाला यावि भवह, तए णं ते अन्नउत्थिया ते थेरे भ० एवं व०-तुज्झे णं अज्जो ! तिविहं तिविहेणं असंजय जाव एगंतवा० भवह, तए णं ते थेरा भ० ते अन्नउत्थिए एवं वयासी-केण कारणेणं अम्हे तिविहं तिविहेणं जाव एगंतवाला यावि भवामो ?, तए णं ते अन्नउत्थिया ते थेरे भगवंते एवं वयासी-तुज्झे णं अज्जो ! रीयं रीयमाणा पुढविं पेच्चेह अभिहणह वत्तेह लेसेह संघाएह संघट्टेह परियावेह किलामेह उवद्देवह तएणं तुज्झे पुढविं पेच्चेमाणा जाव उवद्देवमाणा तिविहं तिविहेणं असंजयअविरय जाव एगंतवाला यावि भवह, तए णं ते थेरा भगवंतो ते अन्नउत्थिए एवं वयासी-नो खलु अज्जो ! अम्हे रीयं रीयमाणा पुढविं पेच्चेमो अभिहणामो जाव उवद्देवमो अम्हे णं अज्जो ! रीयं रीयमाणा कायं वा जोगं वा रीयं वा पडुच्च देसं देसेणं वयामो पएसं पएसेणं वयामो तेणं अम्हे देसं देसेणं वयमाणा पएसं पएसेणं वयमाणा नो पुढविं पेच्चेमो अभिहणामो जाव उवद्देवमो, तएणं अम्हे पुढविं अपेच्चेमाणा अणभिहणेमाणा जाव अणुवद्देवमाणा तिविहं तिविहेणं संजय जाव एगंतपंडिया यावि भवामो, तुज्झे णं अज्जो ! अप्पणा चेव तिविहं तिविहेणं असंजय जाव एगंत वाला यावि भवह, तए णं ते अन्नउत्थिया थेरे भगवंते एवं वयासी-केण कारणेणं अज्जो ! अम्हे तिविहं तिविहेणं जाव एगंतवाला यावि भवामो ?, तए णं ते थेरा भगवंतो ते अन्नउत्थिए एवं वयासी-तुज्झे णं अज्जो ! रीयं रीयमाणा पुढविं पेच्चेह जाव उवद्देवह, तए णं तुज्झे पुढविं पेच्चेमाणा जाव उवद्देवमाणा तिविहं तिविहेणं जाव एगंतवाला यावि भवह, तए णं ते अन्नउत्थिया ते थेरे भगवंते एवं वयासी-तुज्झे णं अज्जो ! गममाणे अगए वीइक्कमिज्जमाणे अवीइक्कंते रायगिहं नगरं संपाविउकामे असंपत्ते, तए ण ते थेरा भगवंतो ते अन्नउत्थिए एवं वयासी-नो खलु अज्जो ! अम्हे गममाणे अगए वीइक्कमिज्जमाणे अवीइक्कंते रायगिहं नगरं जाव असंपत्ते, अम्हे णं अज्जो ! गममाणे गए वीइक्कमिज्जमाणे वीइक्कंते रायगिहं नगरं संपाविउकामे संपत्ते, तुज्झे णं अप्पणा चेव गममाणे अगए वीइक्कमिज्जमाणे अवीइक्कंते रायगिहं नगरं जाव असंपत्ते, तए

णं ते थेरा भगवतो अन्नउत्थिए एवं पडिहणेन्ति पडिहणित्ता गइप्पवायनामं अज्झ-
यणं पन्नवइंसु ॥ ३३६ ॥ कइविहे णं भंते ! गइप्पवाए पण्णत्ते ? गोयमा ! पंचविहे
गइप्पवाए पण्णत्ते, तंजहा-पओगगई, ततगई, वंधणछेयणगई, उववायगई, विहाय-
गई, एत्तो आरब्भ पओगपयं निरवसेसं भाणियव्वं, जाव सेत्तं विहायगई । सेवं
भंते ! सेवं भंते ! त्ति ॥ ३३७ ॥ अट्टमसयस्स सत्तमो उद्देसो समत्तो ॥

रायणिहे नयरे जाव एवं वयासी-गुरूणं भंते ! पडुच्च कइ पडिणीया पण्णत्ता ?
गोयमा ! तओ पडिणीया पण्णत्ता, तंजहा-आयरियपडिणीए, उवज्झायपडिणीए,
थेरपडिणीए ॥ गइं णं भंते ! पडुच्च कइ पडिणीया पण्णत्ता ? गोयमा ! तओ पडिणीया
पण्णत्ता, तंजहा-इहलोगपडिणीए, परलोगपडिणीए, दुहओलोगपडिणीए ॥ समूहणं
भंते ! पडुच्च कइ पडिणीया पण्णत्ता ? गोयमा ! तओ पडिणीया पण्णत्ता, तंजहा-कुल-
पडिणीए, गणपडिणीए, संघपडिणीए ॥ अणुकंपं भंते ! पडुच्च पुच्छा, गोयमा !
तओ पडिणीया पण्णत्ता, तंजहा-तवस्सिपडिणीए, गिलाणपडिणीए, सेहपडिणीए ॥
सुयणं भते ! पडुच्च पुच्छा, गोयमा ! तओ पडिणीया पण्णत्ता, तंजहा-सुत्तपडिणीए,
अत्थपडिणीए, तदुभयपडिणीए । भावं णं भंते ! पडुच्च पुच्छा, गोयमा ! तओ
पडिणीया पण्णत्ता, तंजहा-नाणपडिणीए, दंसणपडिणीए, चरित्तपडिणीए ॥ ३३८ ॥
कइविहे णं भंते ! ववहारे पन्नत्ते ? गोयमा ! पंचविहे ववहारे पन्नत्ते, तंजहा-
आगमे, सुए, आणा, धारणा, जीए, जहा से तत्थ आगमे सिया आगमेणं ववहारं
पट्टवेज्जा, णो य से तत्थ आगमे सिया जहा से तत्थ सुए सिया सुएणं ववहारं
पट्टवेज्जा, णो य से तत्थ सुए सिया जहा से तत्थ आणा सिया आणाए ववहारं
पट्टवेज्जा, णो य से तत्थ आणा सिया जहा से तत्थ धारणा सिया धारणाए
ववहारं पट्टवेज्जा, णो य से तत्थ धारणा सिया जहा से तत्थ जीए सिया जीएणं
ववहारं पट्टवेज्जा, इच्चेएहि पंचहिं ववहारं पट्टवेज्जा, तंजहा-आगमेणं, सुएणं, आणाए,
धारणाए, जीएणं, जहा २ से आगमे सुए आणा धारणा जीए तहा २ ववहारं
पट्टवेज्जा ॥ से किमाहु भंते ! आगमबलिया समणा निग्गंथा इच्चेयं पंचविहं ववहारं
जहा २ जहि २ तहा २ तहिं २ अणिस्सिओवसियं सम्मं ववहरमाणे समणे निग्गंथे
आणाए आराहए भवइ ॥ ३३९ ॥ कइविहे णं भंते ! वंधे पण्णत्ते ? गोयमा !
दुविहे वंधे पन्नत्ते, तंजहा-इरियावहियवंधे य संपराइयवंधे य । इरियावहियणं
भंते ! कम्मं - कि नेरइओ वंधइ तिरिक्खजोणिओ वंधइ तिरिक्खजोणिणी वंधइ
मणुस्सो वंधइ मणुस्सी वंधइ देवो वंधइ देवी वंधइ ? गोयमा ! नो नेरइओ वंधइ
नो तिरिक्खजोणिओ वंधइ नो तिरिक्खजोणिणी वंधइ नो देवो वंधइ नो देवी वंधइ,

पुव्वपडिवन्नए पडुच्च मणुस्सा य मणुस्सीओ य वंधंति, पडिवज्जमाणए पडुच्च मणुस्सो वा वंधइ १ मणुस्सी वा वंधइ २ मणुस्सा वा वंधंति ३ मणुस्सीओ वा वंधंति ४ अहवा मणुस्सो य मणुस्सी य वंधइ ५ अहवा मणुस्सो य मणुस्सीओ य वंधन्ति ६ अहवा मणुस्सा य मणुस्सी य वंधइ ७ अहवा मणुस्सा य मणुस्सीओ य वंधंति ॥ तं भंते ! किं इत्थी वंधइ पुरिसो वंधइ नपुंसगो वंधइ, इत्थीओ वंधन्ति पुरिसा वंधंति नपुंसगा वंधन्ति, नोइत्थीनोपुरिसोनोनपुंसओ वंधइ ? गोयमा ! नो इत्थी वंधइ नो पुरिसो वंधइ जाव नो नपुंसगा वंधन्ति, पुव्वपडिवन्नए पडुच्च अवगयवेया वंधंति, पडिवज्जमाणए य पडुच्च अवगयवेओ वा वंधइ अवगयवेया वा वंधंति ॥ जइ भंते ! अवगयवेओ वा वंधइ अवगयवेया वा वंधंति तं भंते ! किं इत्थीपच्छाकडो वंधइ १ पुरिसपच्छाकडो वंधइ २ नपुंसगपच्छाकडो वंधइ ३ इत्थीपच्छाकडा वंधंति ४ पुरिसपच्छाकडा वंधंति ५ नपुंसगपच्छाकडा वंधंति ६ उदाहु इत्थिपच्छाकडो य पुरिसपच्छाकडो य वंधइ, उदाहु इत्थिपच्छाकडो य पुरिसपच्छाकडा य वंधंति, उदाहु इत्थिपच्छाकडा य पुरिसपच्छाकडो य वंधइ, उदाहु इत्थिपच्छाकडा य पुरिसपच्छाकडा य वंधंति, उदाहु इत्थीपच्छाकडो य नपुंसगपच्छाकडो य वंधइ ४ उदाहु पुरिसपच्छाकडो य नपुंसगपच्छाकडो य वंधइ ४ उदाहु इत्थिपच्छाकडो य पुरिसपच्छाकडो य नपुंसगपच्छाकडो य (वंधइ) भाणियव्वं ८, एवं एए छव्वीसं भंगा २६ जाव उदाहु इत्थीपच्छाकडा ये पुरिसप० नपुंसगप० वंधंति ? गोयमा ! इत्थिपच्छाकडोवि वंधइ १ पुरिसपच्छाकडोवि वंधइ २ नपुंसगपच्छाकडोवि वंधइ ३ इत्थीपच्छाकडावि वंधंति ४ पुरिसपच्छाकडावि वंधंति ५ नपुंसगपच्छाकडावि वंधंति ६ अहवा इत्थीपच्छाकडो पुरिसपच्छाकडो य वंधइ ७ एवं एए चेव छव्वीसं भंगा भाणियव्वा, जाव अहवा इत्थिपच्छाकडा य पुरिसपच्छाकडा य नपुंसगपच्छाकडा य वंधंति ॥ तं भंते ! किं वंधी वंधइ वंधिस्सइ १ वंधी वंधइ न वंधिस्सइ २ वंधी न वंधइ वंधिस्सइ ३ वंधी न वंधइ न वंधिस्सइ ४ न वंधी वंधइ वंधिस्सइ ५ न वंधी वंधइ न वंधिस्सइ ६ न वंधी न वंधइ वंधिस्सइ ७ न वंधी न वंधइ न वंधिस्सइ ८ ? गोयमा ! भवागरिसं पडुच्च अत्थेगइए वंधी वंधइ वंधिस्सइ अत्थेगइए वंधी वंधइ न वंधिस्सइ, एवं तं चेव सव्वं जाव अत्थेगइए न वंधी न वंधइ न वंधिस्सइ, गहणागरिसं पडुच्च अत्थेगइए वंधी वंधइ वंधिस्सइ एवं जाव अत्थेगइए न वंधी वंधइ वंधिस्सइ, णो चेव णं न वंधी वंधइ न वंधिस्सइ, अत्थेगइए न वंधी न वंधइ वंधिस्सइ अत्थेगइए न वंधी न वंधइ न वंधिस्सइ ॥ तं भंते ! किं साइयं सपज्जवसियं वंधइ साइयं अपज्जवसियं

वंधइ अणाइयं सपज्जवसियं वंधइ अणाइयं अपज्जवसियं वंधइ ? गोयमा ! साइयं
 सपज्जवसियं वंधइ नो साइयं अपज्जवसियं वंधइ नो अणाइयं सपज्जवसियं वंधइ
 नो अणाइयं अपज्जवसियं वंधइ ॥ तं भंते ! किं देसेणं देसं वंधइ देसेणं सव्वं
 वंधइ सव्वेणं देसं वंधइ सव्वेणं सव्वं वंधइ ? गोयमा ! नो देसेणं देसं वंधइ णो
 देसेणं सव्वं वंधइ नो सव्वेणं देसं वंधइ सव्वेणं सव्वं वंधइ ॥ ३४० ॥
 संपराइयणं भंते ! कम्मं किं नेरइओ वंधइ तिरिक्खजोणिओ वंधइ जाव देवी
 वंधइ ? गोयमा ! नेरइओवि वंधइ तिरिक्खजोणिओवि वंधइ तिरिक्खजोणिणीवि
 वंधइ मणुस्सोवि वंधइ मणुस्सीवि वंधइ देवोवि वंधइ देवीवि वंधइ ॥ तं भंते !
 किं इत्थी वंधइ पुरिसो वंधइ तहेव जाव नोइत्थीनोपुरिसोनोनपुंसओ वंधइ ?
 गोयमा ! इत्थीवि वंधइ पुरिसोवि वंधइ जाव नपुंसगावि वंधन्ति अहवेए य अवगय-
 वेओ य वंधइ अहवेए य अवगयवेया य वंधन्ति । जइ भंते ! अवगयवेओ य वंधइ
 अवगयवेया य वंधन्ति तं भंते ! किं इत्थीपच्छाकडो वंधइ पुरिसपच्छाकडो वंधइ ?
 एवं जहेव इरियावहियाबंधगस्स तहेव निरवसेसं जाव अहवा इत्थीपच्छाकडा य
 पुरिसपच्छाकडा य [बंधइ] नपुंसगपच्छाकडा य बंधन्ति ॥ तं भंते ! किं वंधी वंधइ
 वंधिस्सइ १ वंधी वंधइ न वंधिस्सइ २ वंधी न वंधइ वंधिस्सइ ३ वंधी न वंधइ
 न वंधिस्सइ ४ ? गोयमा ! अत्येगइए वंधी वंधइ वंधिस्सइ १ अत्येगइए वंधी
 वंधइ न वंधिस्सइ २ अत्येगइए वंधी न वंधइ वंधिस्सइ ३ अत्येगइए वंधी न
 वंधइ न वंधिस्सइ ॥ तं भंते ! किं साइयं सपज्जवसियं वंधइ ? पुच्छा तहेव,
 गोयमा ! साइयं वा सपज्जवसियं वंधइ अणाइयं वा सपज्जवसियं वंधइ अणाइयं वा
 अपज्जवसियं वंधइ णो चेव णं साइयं अपज्जवसियं वंधइ । तं भंते ! किं देसेणं देसं
 वंधइ ० एवं जहेव इरियावहियाबंधगस्स जाव सव्वेणं सव्वं वंधइ ॥ ३४१ ॥ कइ णं
 भंते ! कम्मपयडीओ पन्नत्ताओ ? गोयमा ! अट्ठ कम्मपयडीओ पन्नत्ताओ ?, तंजहा-
 णाणावरणिज्जं जाव अंतराइयं ॥ कइ णं भंते ! परीसहा पण्णत्ता ? गोयमा ! वावीसं
 परीसहा प०, तंजहा-दिगिंछापरीसहे, पिवासापरीसहे, जाव दंसणपरीसहे । एए णं
 भंते ! वावीसं परीसहा कइसु कम्मपगडीसु समोयरंति ? गोयमा ! चउसु कम्मपयडीसु
 समोयरंति, तंजहा-नाणावरणिजे, वेयणिजे, मोहणिजे, अंतराइए । नाणावरणिजे
 णं भंते ! कम्मे कइ परीसहा समोयरंति ? गोयमा ! दो परीसहा समोयरंति, तं०-
 पन्नापरीसहे अण्णाणपरीसहे य, वेयणिजे णं भंते ! कम्मे कइ परीसहा समोयरंति ?
 गोयमा ! एक्कारस परीसहा समोयरंति, तंजहा-पंचेव आणुपुव्वी चरिया सेज्जा वहे
 य रोगे य । तण्णफास जल्लमेव य एक्कारस वेयणिज्जंमि ॥ १ ॥ दंसणमोहणिजे णं

भंते ! कम्मे कइ परीसहा समोयरंति ? गोयमा ! एगे दंसणपरीसहे समोयरइ, चरित्तमोहणिज्जे णं भंते ! कम्मे कइ परीसहा समोयरंति ? गोयमा ! सत्त परीसहा समोयरंति, तंजहा-अरई अंचेल इत्थी निसीहिया जायणा य अक्कोसे । सक्कारपुर-क्कारे चरित्तमोहंमि सत्तेए ॥ १ ॥ अंतराइए णं भंते ! कम्मे कइ परीसहा समोय-
 ति ? गोयमा ! एगे अलाभपरीसहे समोयरइ ॥ सत्तविहबंधगस्स णं भंते ! कइरं परीसहा पण्णत्ता ? गोयमा ! वावीसं परीसहा पण्णत्ता, वीसं पुण वेदेइ, जं समयं सीयपरीसहं वेदेइ णो तं समयं उसिणपरीसहं वेदेइ जं समयं उसिणपरीसहं वेदेइ णो तं समयं सीयपरीसहं वेदेइ, जं समयं चरियापरीसहं वेदेइ णो तं समयं निसी-
 हियापरीसहं वेदेइ जं समयं निसीहियापरीसहं वेदेइ णो तं समयं चरियापरीसहं वेदेइ । अट्ठविहबंधगस्स णं भंते ! कइ परीसहा पण्णत्ता ? गोयमा ! वावीसं परी-
 सहा पण्णत्ता, तंजहा-छुहापरीसहे, पिवासापरीसहे, सीयप०, दंसमसगप० जाव अलाभप०, एवं अट्ठविहबंधगस्सवि सत्तविहबंधगस्सवि । छव्विहबंधगस्स णं भंते ! सरागछउमत्थस्स कइ परीसहा पण्णत्ता ? गोयमा ! चोइस परीसहा पण्णत्ता
 बारस पुण वेदेइ, जं समयं सीयपरीसहं वेदेइ णो तं समयं उसिणपरीसहं वेदेइ जं समयं उसिणपरीसहं वेदेइ नो तं समयं सीयपरीसहं वेदेइ, जं समयं चरियापरीसहं वेदेइ णो तं समयं सेज्जापरीसहं वेदेइ जं समयं सेज्जापरीसहं वेदेइ णो तं समयं चरियापरीसहं वेदेइ । एक्कविहबंधगस्स णं भंते ! वीयरगछउमत्थस्स कइ परीसहा पण्णत्ता ? गोयमा ! एवं चेव जहेव छव्विहबंधगस्स । एगविहबंधगस्स णं भंते ! सजोगिभवत्थकेवलस्स कइ परीसहा पण्णत्ता ? गोयमा ! एक्कारस परीसहा पण्णत्ता,
 नव पुण वेदेइ, सेसं जहा छव्विहबंधगस्स । अवंधगस्स णं भंते ! अजोगिभवत्थके-
 वलस्स कइ परीसहा पण्णत्ता ? गोयमा ! एक्कारस परीसहा पण्णत्ता, नव पुण वेदेइ, जं समयं सीयपरीसहं वेदेइ नो तं समयं उसिणपरीसहं वेदेइ जं समयं उसिणपरीसहं वेदेइ नो तं समयं सीयपरीसहं वेदेइ, जं समयं चरियापरीसहं वेदेइ नो तं समयं सेज्जा-
 परीसहं वेदेइ जं समयं सेज्जापरीसहं वेदेइ नो तं समयं चरियापरीसहं वेदेइ ॥ ३४२ ॥
 जंबुद्दीवे-णं भंते ! दीवे सूरिया उग्गमणमुहुत्तंसि दूरे य मूले य दीसंति मज्झंति-
 मुहुत्तंसि मूले य दूरे य दीसंति अत्थमणमुहुत्तंसि दूरे य मूले य दीसंति ? हंता गोयमा ! जंबुद्दीवे णं दीवे सूरिया उग्गमणमुहुत्तंसि दूरे य तं चेव जाव अत्थमण-
 मुहुत्तंसि दूरे य मूले य दीसंति, जंबुद्दीवे णं भंते ! दीवे सूरिया उग्गमण-
 मुहुत्तंसि मज्झंतिमुहुत्तंसि य अत्थमणमुहुत्तंसि य सव्वत्थ समा उच्चत्तेणं ? हंता गोयमा ! जंबुद्दीवे णं दीवे सूरिया उग्गमण जाव उच्चत्तेणं । जइ णं

भंते ! जंबुदीवे २ सूरिया उग्गमणमुहुत्तंसि य मज्झंतिय० अत्थमणमुहुत्तंसि मूले जाव उच्चतेणं से केणं खाइणं अट्टेणं भंते ! एवं वुच्चइ जंबुदीवे णं दीवे सूरिया उग्गमणमुहुत्तंसि दूरे य मूले य दीसंति जाव अत्थमणमुहुत्तंसि दूरे य मूले य दीसंति ? गोयमा ! लेसापडिघाएणं उग्गमणमुहुत्तंसि दूरे य मूले य दीसंति लेसाभितावेणं मज्झंतियमुहुत्तंसि मूले य दूरे य दीसंति लेसापडिघाएणं अत्थमणमुहुत्तंसि दूरे य मूले य दीसंति, से तेणट्टेणं गोयमा ! एवं वुच्चइ-जंबुदीवे णं दीवे सूरिया उग्गमणमुहुत्तंसि दूरे य मूले य दीसन्ति जाव अत्थमण जाव दीसंति । जंबुदीवे णं भंते ! दीवे सूरिया किं तीयं खेत्तं गच्छंति पडुप्पन्नं खेत्तं गच्छंति अणागयं खेत्तं गच्छंति ? गोयमा ! णो तीयं खेत्तं गच्छंति पडुप्पन्नं खेत्तं गच्छंति णो अणागयं खेत्तं गच्छंति, जंबुदीवे णं दीवे सूरिया किं तीयं खेत्तं ओभासंति पडुप्पन्नं खेत्तं ओभासंति अणागयं खेत्तं ओभासंति ? गोयमा ! नो तीयं खेत्तं ओभासंति पडुप्पन्नं खेत्तं ओभासंति नो अणागयं खेत्तं ओभासंति, तं भंते ! किं पुट्ठं ओभासंति अपुट्ठं ओभासेति ? गोयमा ! पुट्ठं ओभासंति नो अपुट्ठं ओभासंति जाव नियमा छद्दिसिं । जंबुदीवे णं भंते ! दीवे सूरिया किं तीयं खेत्तं उज्जोवेति एवं चेव जाव नियमा छद्दिसिं, एवं तवेति एवं भासेति जाव नियमा छद्दिसिं ॥ जंबुदीवे णं भंते ! दीवे सूरियाणं किं तीए खेत्ते किरिया कज्जइ पडुप्पन्ने खेत्ते किरिया कज्जइ अणागए खेत्ते किरिया कज्जइ ? गोयमा ! नो तीए खेत्ते किरिया कज्जइ पडुप्पन्ने खेत्ते किरिया कज्जइ णो अणागए खेत्ते किरिया कज्जइ, सा भंते ! किं पुट्ठा कज्जइ अपुट्ठा कज्जइ ? गोयमा ! पुट्ठा कज्जइ नो अपुट्ठा कज्जइ जाव नियमा छद्दिसिं । जंबुदीवे णं भंते ! दीवे सूरिया केवइयं खेत्तं उड्डं तवेति केवइयं खेत्तं अहे तवेति केवइयं खेत्तं तिरियं तवेति ? गोयमा ! एगं जोयणसयं उड्डं तवेति अट्टारस जोयणसयाइं अहे तवेति सीयालीसं जोयणसहस्साइं दोन्नि य तेवट्टे जोयणसए एकवीसं च सट्ठिभाए जोयणस्स तिरियं तवेति ॥ अंतो णं भंते ! माणुसुत्तरस्स पव्वयस्स जे चंदिमसूरियगहगणणक्खत्ततारारूवा ते णं भंते ! देवा किं उड्डोववन्नगा जहा जीवाभिगमे तहेव निरवसेसं जाव उक्कोसेणं छम्मासा । बहिया णं भंते ! माणुसुत्तरस्स जहा जीवाभिगमे जाव इंदट्ठाणे णं भंते ! केवइयं कालं उववाएणं विरहिए पन्नत्ते ? गोयमा ! जहन्नेणं एक्कं समयं उक्कोसेणं छम्मासा । सेवं भंते ! सेवं भंते ! त्ति ॥ ३४३ ॥ अट्ठमसए अट्ठमो उद्देसो समत्तो ॥

कइविहे णं भंते ! वंधे पण्णत्ते ? गोयमा ! दुविहे वंधे पण्णत्ते, तंजहा-पओगं वंधे य वीससावंधे य ॥ ३४४ ॥ वीससावंधे णं भंते ! कइविहे पण्णत्ते ? गोयमा !

दुविहे पण्णत्ते, तंजहा-साइयवीससावंधे य अणाइयवीससावंधे य । अणाइयवीससा-
 वंधे णं भंते ! कइविहे पण्णत्ते ? गोयमा ! तिविहे पण्णत्ते, तंजहा-धम्मत्थिकायअन्न-
 मन्नअणाइयवीससावंधे, अधम्मत्थिकायअन्नमन्नअणाइयवीससावंधे, आगासत्थि-
 कायअन्नमन्नअणाइयवीससावंधे । धम्मत्थिकायअन्नमन्नअणाइयवीससावंधे णं भंते !
 किं देसवंधे सव्ववंधे ? गोयमा ! देसवंधे नो सव्ववंधे, एवं अधम्मत्थिकायअन्न-
 मन्नअणाइयवीससावंधेवि, एवमागासत्थिकायअन्नमन्नअणाइयवीससावंधेवि । धम्म-
 त्थिकायअन्नमन्नअणाइयवीससावंधे णं भंते ! कालओ केवच्चिरं होइ ? गोयमा !
 सव्वद्धं, एवं अधम्मत्थिकाए, एवं आगासत्थिकाए । साइयवीससावंधे णं भंते !
 कइविहे पण्णत्ते ? गोयमा ! तिविहे पण्णत्ते, तंजहा-बंधणपच्चइए, भायणपच्चइए, परि-
 णामपच्चइए । से किं तं बंधणपच्चइए ? २ जन्नं परमाणुपोग्गला दुपएसिया तिपएसिया
 जाव दसपएसिया संखेजपएसिया असंखेजपएसिया, अणंतपएसियाणं खंधाणं वेमा-
 यनिद्धयाए वेमायलुक्खयाए वेमायनिद्धलुक्खयाए एवं बंधणपच्चइए णं वंधे समुप्पज्जइ
 जहन्नेणं एक्कं समयं उक्कोसेणं असंखेजं कालं, सेत्तं बंधणपच्चइए । से किं तं भायण-
 पच्चइए ? भायणपच्चइए जन्नं जुन्नसुराजुन्नगुलजुन्नतंदुलाणं भायणपच्चइएणं वंधे
 समुप्पज्जइ जहन्नेणं अंतोमुहुत्तं उक्कोसेणं संखेजं कालं, सेत्तं भायणपच्चइए । से किं तं
 परिणामपच्चइए ? परिणामपच्चइए जन्नं अवभाणं अवभरुक्खाणं जहा तइयसए जाव
 अमोहाणं परिणामपच्चइए णं वंधे समुप्पज्जइ जहन्नेणं एक्कं समयं उक्कोसेणं
 छम्मासा, सेत्तं परिणामपच्चइए, सेत्तं साइयवीससावंधे, सेत्तं वीससावंधे ॥ ३४५ ॥
 से किं तं पओग्गवंधे ? पओग्गवंधे तिविहे पण्णत्ते, तंजहा-अणाइए वा अपज्जवसिए,
 साइए वा अपज्जवसिए, साइए वा सपज्जवसिए, तत्थ णं जे से अणाइए अपज्जव-
 सिए से णं अट्ठण्हं जीवमज्जपएसणं ॥ तत्थवि णं तिण्हं २ अणाइए अपज्जवसिए
 सेसाणं साइए, तत्थ णं जे से साइए अपज्जवसिए से णं सिद्धाणं, तत्थ णं जे से
 साइए सपज्जवसिए से णं चउव्विहे पण्णत्ते, तंजहा-आलावणवंधे, अल्लियावणवंधे,
 सरीरवंधे, सरीरप्पओगवंधे ॥ से किं तं आलावणवंधे, आलावणवंधे, जण्णं तण-
 भाराण वा कट्ठभाराण वा पत्तभाराण वा पललभाराण वा वेल्लभाराण वा वेत्तल-
 यावागवरत्तरज्जुवल्लिकुसदब्भमाइएहिं आलावणवंधे समुप्पज्जइ जहन्नेणं अंतोमुहुत्तं
 उक्कोसेणं संखेजं कालं, सेत्तं आलावणवंधे । से किं तं अल्लियावणवंधे ? अल्लिया-
 वणवंधे चउव्विहे पण्णत्ते, तंजहा-लेसणावंधे, उच्चयवंधे, समुच्चयवंधे, साहणणावंधे,
 से किं तं लेसणावंधे ? लेसणावंधे जन्नं कुट्ठा(ट्ठा)णं कोट्ठिमाणं खंभाणं पासायाणं कट्ठाणं
 चम्माणं घडाणं पडाणं कडाणं छुहाचिक्खिल्लसिलेसलक्खमहुसित्थमाइएहिं लेसणएहिं

बंधे समुप्पज्जइ जहन्नेणं अंतोमुहुत्तं उक्कोसेणं संखेज्जं कालं, सेत्तं लेसणाबंधे, से किं तं उच्चयबंधे ? उच्चयबंधे जन्नं तणरासीण वा कट्टरासीण वा पत्तरासीण वा तुसरासीण वा भुसरासीण वा गोमयरासीण वा अवगररासीण वा उच्चएणं बंधे समुप्पज्जइ जहन्नेणं अंतोमुहुत्तं उक्कोसेणं संखेज्जं कालं, सेत्तं उच्चयबंधे, से किं तं समुच्चयबंधे ? समुच्चयबंधे जन्नं अगडतडागनईदहवावीपुक्खरिणीदीहियाणं गुंजालियाणं सराणं सरपंतिआणं सरसरपंतियाणं विलपंतियाणं देवकुलसभापव्वथूभखाइयाणं फरिहाणं पागारट्टालगच्चरियदारगोपुरतोरणाणं पासायघरसरणलेणआवणाणं सिघाडगतियचउक्कचच्चरचउम्मुहमहापहमाईणं छुहाचिक्खिल्लसिलेससमुच्चएणं बंधे समुप्पज्जइ जहन्नेणं अंतोमुहुत्तं उक्कोसेणं संखेज्जं कालं, सेत्तं समुच्चयबंधे, से किं तं साहणणाबंधे ? साहणणाबंधे दुविहे पन्नत्ते, तंजहा-देससाहणणाबंधे य सव्वसाहणणाबंधे य, से किं तं देससाहणणाबंधे ? देससाहणणाबंधे जन्नं सगडरहजाणजुग्गगिल्लिथिल्लिसीयसंदमाणियलोहीलोहकडाहकडुच्छुयआसणसयणखंभभंडमत्तोवगरणमाईणं देससाहणणाबंधे समुप्पज्जइ जहन्नेणं अंतोमुहुत्तं उक्कोसेणं संखेज्जं कालं, सेत्तं देससाहणणाबंधे, से किं तं सव्वसाहणणाबंधे ? सव्वसाहणणाबंधे सेणं खीरोदगमाईणं, सेत्तं सव्वसाहणणाबंधे, सेत्तं साहणणाबंधे, सेत्तं अल्लियावणबंधे ॥३४६॥ से किं तं सरीरबंधे ? सरीरबंधे दुविहे पण्णत्ते, तंजहा-पुव्वप्पओगपच्चइए य पडुप्पन्नपओगपच्चइए य, से किं तं पुव्वप्पओगपच्चइए ? पुव्वपओगपच्चइए जन्नं नेरइयाणं संसारत्थाणं सव्वजीवाणं तत्थ २ तेसु २ कारणेसु समोहणमाणाणं जीवप्पएसाणं बंधे समुप्पज्जइ सेत्तं पुव्वप्पओगपच्चइए, से किं तं पडुप्पन्नप्पओगपच्चइए ? २ जन्नं केवलनाणिस्स अणगारस्स केवलिसमुग्घाएणं समोहयस्स ताओ समुग्घायाओ पडिनियत्तेमाणस्स अंतरा मंथे वट्ठमाणस्स तेयोक्कम्माणं बंधे समुप्पज्जइ, किं कारणं ? ताहे से पएसा एगत्तीगया भवंतित्ति, सेत्तं पडुप्पन्नप्पओगपच्चइए, सेत्तं सरीरबंधे ॥ से किं तं सरीरप्पओगबंधे ? सरीरप्पओगबंधे पंचविहे पन्नत्ते, तंजहा-ओरालियसरीरप्पओगबंधे, वेडव्वियसरीरप्पओगबंधे, आहारगसरीरप्पओगबंधे, तेयासरीरप्पओगबंधे, कम्मासरीरप्पओगबंधे । ओरालियसरीरप्पओगबंधे णं भंते ! कइविहे पण्णत्ते ? गोयमा ! पंचविहे पन्नत्ते, तंजहा-एगिंदियओरालियसरीरप्पओगबंधे वेदियओ० जाव पंचिदियओरालियसरीरप्पओगबंधे । एगिंदियओरालियसरीरप्पओगबंधे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-पुढाविकाइयएगिंदिय० एवं एएणं अभिलावेणं भेओ जहा ओगाहणसंठाणे ओरालियसरीरस्स तहा भाणियव्वो जाव पज्जत्तगब्भवक्कंतियमणुस्सपंचिदियओरा-

लियसरीरप्पओगवंधे य अपज्जत्तगम्भवक्कंतियमणुस्स जाव वंधे य ॥ ओरालिय-
सरीरप्पओगवंधे णं भंते ! कस्स कम्मस्स उदएणं ? गोयमा ! वीरियसजोगसद्दव्व-
याए पमादपच्चया कम्मं च जोगं च भवं च आउयं च पडुच्च ओरालियसरीरप्प-
ओगनामाए कम्मस्स उदएणं ओरालियसरीरप्पओगवंधे ॥ एगिंदियओरालियसरीर-
प्पओगवंधे णं भंते ! कस्स कम्मस्स उदएणं ? एवं चेव, पुढविकाइयएगिंदियओरा-
लियसरीरप्पओगवंधेवि एवं चेव, एवं जाव वणस्सइकाइया, एवं वेइंदिया, एवं तेइंदिया,
एवं चउरिंदिया, तिरिक्खजोणियपंचिंदियओरालियसरीरप्पओगवंधे णं भंते ! कस्स
कम्मस्स उदएणं ? एवं चेव, मणुस्सपंचिंदियओरालियसरीरप्पओगवंधे णं भंते !
कस्स कम्मस्स उदएणं ? गोयमा ! वीरियसजोगसद्दव्वयाए पमादपच्चया जाव
आउयं च पडुच्च मणुस्सपंचिंदियओरालियसरीरप्पओगनामाए कम्मस्स उदएणं ॥
ओरालियसरीरप्पओगवंधे णं भंते ! कि देसवंधे सव्ववंधे ? गोयमा ! देसवंधेवि
सव्ववंधेवि, एगिंदियओरालियसरीरप्पओगवंधे णं भंते ! किं देसवंधे सव्ववंधे ?
एवं चेव, एवं पुढविकाइया, एवं जाव मणुस्सपंचिंदियओरालियसरीरप्पओगवंधे णं
भंते ! कि देसवंधे सव्ववंधे ? गोयमा ! देसवंधेवि सव्ववंधेवि ॥ ओरालियसरीर-
प्पओगवंधे णं भंते ! कालओ केवच्चिरं होइ ? गोयमा ! सव्ववंधे एक्कं समयं,
देसवंधे जहन्नेणं एक्कं समयं, उक्कोसेणं तिज्जि पलिओवमाइं समयऊणाइं, एगिंदिय-
ओरालियसरीरप्पओगवंधे णं भंते ! कालओ केवच्चिरं होइ ? गोयमा ! सव्ववंधे एक्कं
समयं, देसवंधे जहन्नेणं एक्कं समयं, उक्कोसेणं वावीसं वाससहस्साइं समयऊणाइं, पुढवि-
काइयएगिंदियपुच्छा, गोयमा ! सव्ववंधे एक्कं समयं, देसवंधे जहन्नेणं खुट्ठागं भवग्गहणं
तिसमयऊणं, उक्कोसेणं वावीसं वाससहस्साइं समयऊणाइं, एवं सव्वेसिं सव्ववंधो
एक्कं समयं, देसवंधो जेसि नत्थि वेउव्वियसरीरं तेसिं जहन्नेणं खुट्ठागं भवग्गहणं
तिसमयऊणं, उक्कोसेणं जा जस्स उक्कोसिया ठिई सा समयऊणा कायव्वा, जेसिं पुण
अत्थि वेउव्वियसरीरं तेसिं देसवंधो जहन्नेणं एक्कं समयं, उक्कोसेणं जा जस्स ठिई सा
समयऊणा कायव्वा जाव मणुस्साणं देसवंधे जहन्नेणं एक्कं समयं, उक्कोसेणं तिज्जि पलि-
ओवमाइं समयऊणाइं ॥ ओरालियसरीरप्पओगवंधंतरे णं भंते ! कालओ केवच्चिरं
होइ ? गोयमा ! सव्ववंधंतरं जहन्नेणं खुट्ठागं भवग्गहणं तिसमयऊणं, उक्कोसेणं तेत्तीसं
सांगरोवमाइं पुव्वकोडिसमयाहियाइं, देसवंधंतरं जहन्नेणं एक्कं समयं, उक्कोसेणं तेत्तीसं
सांगरोवमाइं तिसमयाहियाइं, एगिंदियओरालियपुच्छा, गोयमा ! सव्ववंधंतरं जह-
न्नेणं खुट्ठागं भवग्गहणं तिसमयऊणं, उक्कोसेणं वावीसं वाससहस्साइं समयाहियाइं,
देसवंधंतरं जहन्नेणं एक्कं समयं, उक्कोसेणं अंतोमुहुत्तं, पुढविकाइयएगिंदियपुच्छा

गोयमा ! सव्ववंधंतरं जहेव एगिंदियस्स तहेव भाणियव्वं, देसवंधंतरं जहन्नेणं एकं समयं, उक्कोसेणं तिन्निं समयं, जहा पुढविकाइयाणं एवं जाव चउरिंदियाणं वाउक्काइय-
चजाणं, नवरं सव्ववंधंतरं उक्कोसेणं जा जस्स ठिई सा समयाहिया कायव्वा, वाउ-
क्काइयाणं सव्ववंधंतरं जहन्नेणं खुड्ढागभवग्गहणं तिसमयऊणं, उक्कोसेणं तिन्निं वाससह-
स्साइं समयाहियाइं, देसवंधंतरं जहन्नेणं एकं समयं, उक्कोसेणं अंतोमुहुत्तं, पंचिंदिय-
तिरिक्खजोणियओरालियपुच्छा, गोयमा ! सव्ववंधंतरं जहन्नेणं खुड्ढागभवग्गहणं तिस-
मयऊणं, उक्कोसेणं पुव्वकोडी समयाहिया, देसवंधंतरं जहा एगिंदियाणं तहा पंचिंदिय-
तिरिक्खजोणियाणं, एवं मणुस्साणवि निरवसेसं भाणियव्वं जाव उक्कोसेणं अंतोमुहुत्तं ॥
जीवस्स णं भंते ! एगिंदियत्ते णोएगिंदियत्ते पुणरवि एगिंदियत्ते एगिंदियओरालियम-
रीरप्पओगवंधंतरं कालओ केवच्चिरं होइ ? गोयमा ! सव्ववंधंतरं जहन्नेणं दो खुड्ढा-
गभवग्गहणाइं तिसमयऊणाइं, उक्कोसेणं दो सागरोवमसहस्साइं संखेज्जवासमब्भहि-
याइं, देसवंधंतरं जहन्नेणं खुड्ढागं भवग्गहणं समयाहियं, उक्कोसेणं दो सागरोवमसह-
स्साइं संखेज्जवासमब्भहियाइं, जीवस्स णं भंते ! पुढविकाइयत्ते नोपुढविकाइयत्ते पुण-
रवि पुढविकाइयत्ते पुढविकाइयएगिंदियओरालियसरीरप्पओगवंधंतरं कालओ केवच्चिरं
होइ ? गोयमा ! सव्ववंधंतरं जहन्नेणं दो खुड्ढागभवग्गहणाइं तिसमयऊणाइं, उक्कोसेणं
अणंतं कालं अणंताओ उस्सप्पिणिओसप्पिणीओ कालओ, खेत्तओ अणंता लोगा
असंखेज्जा पोग्गलपरियट्ठा ते णं पोग्गलपरियट्ठा आवलियाए असंखेज्जइभागो, देस-
वंधंतरं जहन्नेणं खुड्ढागभवग्गहणं समयाहियं, उक्कोसेणं अणंतं कालं जाव आवलियाए
असंखेज्जइभागो, जहा पुढविकाइयाणं एवं वणस्सइकाइयवजाणं जाव मणुस्साणं,
वणस्सइकाइयाणं दोन्निं खुड्ढाइं, एवं चेव उक्कोसेणं असंखेज्जं कालं असंखेज्जाओ उस्स-
प्पिणिओसप्पिणीओ कालओ, खेत्तओ असंखेज्जा लोगा, एवं देसवंधंतरंपि उक्कोसेणं
पुढविकालो ॥ एएसि णं भंते ! जीवाणं ओरालियसरीरस्स देसवंधगाणं सव्ववंध-
गाणं अवंधगाणं य कयरे २ जाव विसेसाहिया वा ? गोयमा ! सव्वत्थोवा जीवा ओरा-
लियसरीरस्स सव्ववंधगा, अवंधगा विसेसाहिया, देसवंधगा असंखेज्जगुणा ॥ ३४७॥
वेउव्वियसरीरप्पओगवंधे णं भंते ! कइविहे पन्नत्ते ? गोयमा ! दुविहे पन्नत्ते, तंजहा-
एगिंदियवेउव्वियसरीरप्पओगवंधे य पंचिंदियवेउव्वियसरीरप्पओगवंधे य । जइ
एगिंदियवेउव्वियसरीरप्पओगवंधे कि वाउक्काइयएगिंदियवेउव्वियसरीरप्पओगवंधे
अवाउक्काइयएगिंदिय० एवं एएणं अभिलावेणं जहा ओगाहणसंठाणे वेउव्वियसरीर-
मेओ तहा भाणियव्वो जाव पज्जत्तसव्वट्ठसिद्धअणुत्तरोववाइयकप्पाइयवेमाणियदेव-
पंचिंदियवेउव्वियसरीरप्पओगवंधे य अपज्जत्तसव्वट्ठसिद्धअणुत्तरोववाइयं जाव पओ-

गवंधे य । वेउव्वियसरीरप्पओगवंधे णं भंते ! कस्स कम्मस्स उदएणं ? गोयमा ! वीरियसजोगसद्दव्वयाए जाव आउयं वा लद्धिं वा पडुच्च वेउव्वियसरीरप्पओगनामाए कम्मस्स उदएणं वेउव्वियसरीरप्पओगवंधे । वाउक्काइयएगिंदियवेउव्वियसरीरप्प-ओग० पुच्छा, गोयमा ! वीरियसजोगसद्दव्वयाए एवं चेव जाव लद्धिं च पडुच्च जाव वाउक्काइयएगिंदियवेउव्विय जाव वंधे । रयणप्पभापुढविनेरइयपंचिंदियवेउव्वियसरी-रप्पओगवंधे णं भंते ! कस्स कम्मस्स उदएणं ? गोयमा ! वीरियसजोगसद्दव्वयाए जाव आउयं वा पडुच्च रयणप्पभापुढवि जाव वंधे, एवं जाव अहेसत्तमाए । तिरिक्खजोणिय-पंचिंदियवेउव्वियसरीरपुच्छा, गोयमा ! वीरिय० जाव जहा वाउक्काइयाणं, मणुस्स-पंचिंदियवेउव्वियसरीरप्पओग० पुच्छा, एवं चेव, असुरकुमारभवणवासिदेवपंचिं-दियवेउव्विय जाव वंधे, जहा रयणप्पभापुढविनेरइयाणं एवं जाव थणियकुमारा, एवं वाणमंतरा, एवं जोइसिया, एवं सोहम्मकप्पोवगया वेमाणिया एवं जाव अच्चुयगेवेज्जग-कप्पाइयवेमाणिया णेयव्वा, अणुत्तरोववाइयकप्पाइयवेमाणिया एवं चेव । वेउव्विय-सरीरप्पओगवंधे णं भंते ! किं देसवंधे सव्ववंधे ? गोयमा ! देसवंधेवि सव्ववंधेवि, वाउक्काइयएगिंदिय० एवं चेव, रयणप्पभापुढविनेरइया एवं चेव, एवं जाव अणुत्तरोव-वाइया ॥ वेउव्वियसरीरप्पओगवंधे णं भंते ! कालओ केवच्चिरं होइ ? गोयमा ! सव्ववंधे जहन्नेणं एक्कं समयं, उक्कोसेणं दो समया, देसवंधे जहन्नेणं एक्कं समयं, उक्कोसेणं तेत्तीसं सागरोवमाइं समयऊणाइं ॥ वाउक्काइयएगिंदियवेउव्वियपुच्छा, गोयमा ! सव्ववंधे एक्कं समयं, देसवंधे जहन्नेणं एक्कं समयं, उक्कोसेणं अंतोमुहुत्तं ॥ रयणप्पभा-पुढविनेरइयपुच्छा, गोयमा ! सव्ववंधे एक्कं समयं, देसवंधे जहन्नेणं दसवाससहस्साइं तिसमयऊणाइं, उक्कोसेणं सागरोवमं समयऊणं, एवं जाव अहेसत्तमाए, नवरं देस-वंधे जस्स जा जहन्निया ठिई सा तिसमयऊणा कायव्वा जाव उक्कोसा समयऊणा ॥ पंचिंदियतिरिक्खजोणियाणं मणुस्साण य जहा वाउक्काइयाणं । असुरकुमारनाग-कुमार जाव अणुत्तरोववाइयाणं जहा नेरइयाणं नवरं जस्स जा ठिई सा भाणि-यव्वा जाव अणुत्तरोववाइयाणं सव्ववंधे एक्कं समयं, देसवंधे जहन्नेणं एकतीसं साग-रोवमाइं तिसमयऊणाइं, उक्कोसेणं तेत्तीसं सागरोवमाइं समयऊणाइं ॥ वेउव्वियसरी-रप्पओगवंधंतरे-णं भंते ! कालओ केवच्चिरं होइ ? गोयमा ! सव्ववंधंतरं जहन्नेणं एक्कं समयं, उक्कोसेणं अणंतं कालं अणंताओ जाव आवलियाए असंखेज्जइभागो, एवं देसवंधंतरंपि ॥ वाउक्काइयवेउव्वियसरीरपुच्छा, गोयमा ! सव्ववंधंतरं जहन्नेणं अंतोमुहुत्तं, उक्कोसेणं पलिओवमस्स असंखेज्जइभागं, एवं देसवंधंतरंपि ॥ तिरिक्ख-जोणियपंचिंदियवेउव्वियसरीरप्पओगवंधंतरं पुच्छा, गोयमा ! सव्ववंधंतरं जहन्नेणं

अंतोमुहुत्तं, उक्कोसेण पुव्वकोडिपुहुत्तं, एवं देसवंधंतरं पि, एवं मणुस्सास्सवि ॥ जीवस्स णं भंते ! वाउकाइयत्ते नोवाउकाइयत्ते पुणरवि वाउकाइयत्ते वाउकाइयत्ते एगिदियवेड-
व्वियपुच्छा, गोयमा ! सव्ववंधंतरं जहन्नेणं अंतोमुहुत्तं, उक्कोसेणं अणंतं कालं वण-
स्सइकालो, एवं देसवंधंतरं पि ॥ जीवस्स णं भंते ! रयणप्पभापुडविनेरइयाणं गौरय-
णप्पभापुडवि० पुच्छा, गोयमा ! सव्ववंधंतरं जहन्नेणं दस वानराहस्सार् अंतोमु-
हुत्तमब्भहियाइं, उक्कोसेणं वणस्सइकालो, देसवंधंतरं जहन्नेणं अंतोमुहुत्तं, उक्कोसेणं
अणंतं कालं वणस्सइकालो, एवं जाव अहेसत्तमाए, नवरं जा जस्स ठिई जहन्निआ
सा सव्ववंधंतरं जहन्नेणं अंतोमुहुत्तमब्भहिया कायव्वा, सेसं तं चेव, पंचिदियानि-
रिक्खजोणियमणुस्साण य जहा वाउकाइयाणं । अगुरकुमारनागकुमार जाव महस्सा-
रदेवाणं एएसिं जहा रयणप्पभापुडविनेरइयाणं नवरं सव्ववंधंतरं जस्स जा ठिई
जहन्निआ सा अंतोमुहुत्तमब्भहिया कायव्वा, सेसं तं चेव ॥ जीवस्स णं भंते ! आण-
यदेवत्ते नोआणयदेवत्तेपुच्छा, गोयमा ! सव्ववंधंतरं जहन्नेणं अट्टारस्स सागरोवमाइं
वासपुहुत्तमब्भहियाइं, उक्कोसेणं अणंतं कालं वणस्सइकालो, देसवंधंतरं जहन्नेणं
वासपुहुत्तं उक्कोसेणं अणंतं कालं वणस्सइकालो, एवं जाव अच्चुए नवरं जस्स जा
ठिई सा सव्ववंधंतरं जहन्नेणं वासपुहुत्तमब्भहिया कायव्वा सेसं तं चेव । गेवज-
कप्पातीयपुच्छा, गोयमा ! सव्ववंधंतरं जहन्नेणं वावीसं सागरोवमाइं वासपुहुत्त-
मब्भहियाइं, उक्कोसेणं अणंतं कालं वणस्सइकालो, देसवंधंतरं जहन्नेणं वानपुहुत्तं
उक्कोसेणं वणस्सइकालो ॥ जीवस्स णं भंते ! अणुत्तरोववाइयपुच्छा, गोयमा !
सव्ववंधंतरं जहन्नेणं एकतीसं सागरोवमाइं वासपुहुत्तमब्भहियाइं, उक्कोसेणं
संखेज्जाइं सागरोवमाइं, देसवंधंतरं जहन्नेणं वासपुहुत्तं, उक्कोसेणं संखेज्जाइं सागरो-
वमाइं ॥ एएसिं णं भंते ! जीवाणं वेउव्वियसरीरस्स देसवंधगाणं सव्ववंधगाणं
अवंधगाणं य कयरेरहितो जाव विसेसाहिया वा ? गोयमा ! सव्वत्थोवा जीवा
वेउव्वियसरीरस्स सव्ववंधगा, देसवंधगा असंखेज्जगुणा, अवंधगा अणंतगुणा ॥
आहारगसरीरप्पओगबंधे णं भंते ! कइविहे पण्णत्ते ? गोयमा ! एगागारे पण्णत्ते ।
जइ एगागारे पण्णत्ते किं मणुस्साहारगसरीरप्पओगबंधे अमणुस्साहारगसरीरप्प-
ओगबंधे ? गोयमा ! मणुस्साहारगसरीरप्पओगबंधे नो अमणुस्साहारगसरीरप्प-
ओगबंधे, एवं एणुं अभिलावेण जहा ओगाहणसंठाणे जाव इड्ढिपत्तपमत्तसंजयस-
म्मद्विट्ठिपत्तसंखेज्जवासाउयकम्मभूमियगब्भवक्कंतियमणुस्साहारगसरीरप्पओगबंधे,
णो अण्णिड्ढिपत्तपमत्त जाव आहारगसरीरप्पओगबंधे । आहारगसरीरप्पओगबंधे णं
भंते ! कस्स कम्मस्स उदएणं ? गोयमा ! वीरियसजोगसइव्वयाए जाव लद्धिं वा

पडुच्च आहारगसरीरप्पओगणामाए कम्मस्स उदएणं आहारगसरीरप्पओगवंधे ।
 आहारगसरीरप्पओगवंधे णं भंते ! किं देसवंधे सव्ववंधे ? गोयमा ! देसवंधेवि
 सव्ववंधेवि । आहारगसरीरप्पओगवंधे णं भंते ! कालओ केवच्चिरं होइ ? गोयमा !
 सव्ववंधे एकं समयं, देसवंधे जहन्नेणं अंतोमुहुत्तं उक्कोसेणवि अंतोमुहुत्तं ॥ आहार-
 गसरीरप्पओगवंधंतरे णं भंते ! कालओ केवच्चिरं होइ ? गोयमा ! सव्ववंधंतरं
 जहन्नेणं अंतोमुहुत्तं उक्कोसेणं अणंतं कालं अणंताओ ओसप्पिणिउस्सप्पिणीओ
 कालओ, खेत्तओ अणंता लोया अवड्ढं पोग्गलपरियट्ठं देसूणं, एवं देसवंधंतरंपि ॥
 एएसि णं भंते ! जीवाणं आहारगसरीरस्स देसवंधगाणं सव्ववंधगाणं अवंधगाण
 य कयरे २ हिंतो जाव विसेसाहिया वा ? गोयमा ! सव्वत्थोवा जीवा आहारगसरीरस्स
 सव्ववंधगा, देसवंधगा संखेज्जगुणा, अवंधगा अणंतगुणा ३ ॥३४८॥ तेयासरीर-
 प्पओगवंधे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-एगिंदिय-
 तेयासरीरप्पओगवंधे य वेइंदिय० तेइंदिय० जाव पंचिंदियतेयासरीरप्पओगवंधे य ।
 एगिंदियतेयासरीरप्पओगवंधे णं भंते ! कइविहे पण्णत्ते ? एवं एएणं अभिलावेणं
 भेओ जहा ओगाहणसंठाणे जाव पज्जत्तसव्वट्ठसिद्धअणुत्तरोववाइयकप्पातीयवेमाणि-
 यदेवपंचिंदियतेयासरीरप्पओगवंधे य अपज्जत्तसव्वट्ठसिद्धअणुत्तरोववाइय जाव वंधे
 य । तेयासरीरप्पओगवंधे णं भंते ! कस्स कम्मस्स उदएणं ? गोयमा ! वीरियस-
 जोगसहव्वयाए जाव आउयं च पडुच्च तेयासरीरप्पओगणामाए कम्मस्स उदएणं
 तेयासरीरप्पओगवंधे । तेयासरीरप्पओगवंधे णं भंते ! किं देसवंधे सव्ववंधे ?
 गोयमा ! देसवंधे नो सव्ववंधे ॥ तेयासरीरप्पओगवंधे णं भंते ! कालओ केवच्चिरं
 होइ ? गोयमा ! दुविहे पण्णत्ते, तंजहा-अणाइए वा अपज्जवसिए अणाइए वा सप-
 ज्जवसिए ॥ तेयासरीरप्पओगवंधंतरे णं भंते ! कालओ केवच्चिरं होइ ? गोयमा !
 अणाइयस्स अपज्जवसियस्स नत्थि अंतरं, अणाइयस्स सपज्जवसियस्स नत्थि अंतरं ॥
 एएसि णं भंते ! जीवाणं तेयासरीरस्स देसवंधगाणं अवंधगाण य कयरे २ हिंतो जाव
 विसेसाहिया वा ? गोयमा ! सव्वत्थोवा जीवा तेयासरीरस्स अवंधगा, देसवंधगा
 अणंतगुणा ४ ॥ ३४९ ॥ कम्मासरीरप्पओगवंधे णं भंते ! कइविहे पण्णत्ते ?
 गोयमा ! अट्ठविहे पण्णत्ते, तंजहा-नाणावरणिज्जकम्मासरीरप्पओगवंधे जाव अंतराइ-
 यकम्मासरीरप्पओगवंधे । नाणावरणिज्जकम्मासरीरप्पओगवंधे णं भंते ! कस्स कम्म-
 स्स उदएणं ? गोयमा ! नाणपडिणीययाए, नाणणिह्वणयाए, नाणंतराएणं, नाणप्प-
 ओसेणं, नाणच्चासायणाए, नाणविसंवायणाजोगेणं, नाणावरणिज्जकम्मासरीरप्पओग-
 नामाए कम्मस्स उदएणं नाणावरणिज्जकम्मासरीरप्पओगवंधे । दरिसणावरणिज्जक-

म्मासरीरप्पओगवंधे णं भंते ! कस्स कम्मस्स उदएणं ? गोयमा ! दंसणपडिणीय-
याए एवं जहा णाणावरणिज्जं नवरं दंसणनाम धेतव्वं जाव दंसणाविसंवायणाजोगेणं
दरिसणावरणिज्जकम्मासरीरप्पओगनामाए कम्मस्स उदएणं जाव पओगवंधे । साया-
वेयणिज्जकम्मासरीरप्पओगवंधे णं भंते ! कस्स कम्मस्स उदएणं ? गोयमा ! पाणा-
णुकंपयाए भूयाणुकंपयाए एवं जहा सत्तमसए दसमोद्देसए जाव अपरियावणयाए
सायावेयणिज्जकम्मासरीरप्पओगनामाए कम्मस्स उदएणं सायावेयणिज्जकम्मा जाव
वंधे । असायावेयणिज्जपुच्छा, गोयमा ! परदुक्खणयाए परसोयणयाए जहा सत्तमसए
दसमोद्देसए जाव परियावणयाए असायावेयणिज्जकम्मा जाव पओगवंधे । मोहणिज्ज-
कम्मासरीरप्पओगपुच्छा, गोयमा ! तिक्कहयाए, तिक्कमाणयाए, तिक्कमाययाए,
तिक्कलोहयाए, तिक्कदंसणमोहणिज्जयाए, तिक्कचरित्तमोहणिज्जयाए, मोहणिज्जकम्मास-
रीरप्पओग जाव पओगवंधे । नेरइयाउयकम्मासरीरप्पओगवंधे णं भंते ! पुच्छा,
गोयमा ! महारंभयाए, महापरिग्गहयाए, कुणिमाहारेणं, पंचिंदियवहेणं, नेरइयाउय-
कम्मासरीरप्पओगनामाए कम्मस्स उदएणं नेरइयाउयकम्मासरीर जाव पओगवंधे ।
तिरिक्खजोणियाउयकम्मासरीरप्पओगपुच्छा, गोयमा ! माइल्लयाए, नियडिल्लयाए,
अलियवयणेणं, कूडतुलकूडमाणेणं, तिरिक्खजोणियाउयकम्मासरीर जाव पओगवंधे ।
मणुस्सआउयकम्मासरीरपुच्छा, गोयमा ! पगइभइयाए, पगइविणीययाए, साणुक्को-
सयाए, अमच्छरियाए, मणुस्साउयकम्मा जाव पओगवंधे । देवाउयकम्मासरीर-
पुच्छा, गोयमा ! सरागसंजमेणं, संजमासंजमेणं, वालतवोकम्मणेणं, अकामनिज्जराए,
देवाउयकम्मासरीर जाव पओगवंधे ॥ सुभनामकम्मासरीरपुच्छा, गोयमा ! काय-
उज्जुययाए, भावुज्जुययाए, भासुज्जुययाए, अविसंवायणाजोगेणं, सुभनामकम्मासरीर
जाव पओगवंधे ॥ असुभनामकम्मासरीरपुच्छा, गोयमा ! कायअणुज्जुययाए, भाव-
अणुज्जुययाए, भासअणुज्जुययाए, विसंवायणाजोगेणं, असुभनामकम्मा जाव पओग-
वंधे । उच्चागोयकम्मासरीरपुच्छा, गोयमा ! जाइअमएणं, कुलअमएणं, बलअमएणं,
रुवअमएणं, तवअमएणं, सुयअमएणं, लाभअमएणं, इस्सरियअमएणं, उच्चागोय-
कम्मासरीर जाव पओगवंधे, नीयागोयकम्मासरीरपुच्छा, गोयमा ! जाइमएणं,
कुलमएणं, बलमएणं, जाव इस्सरियमएणं, नीयागोयकम्मासरीर जाव पओगवंधे ।
अंतराइयकम्मासरीरपुच्छा, गोयमा ! दाणंतराएणं, लाभंतराएणं, भोगंतराएणं,
उवभोगंतराएणं, वीरियंतराएणं, अंतराइयकम्मासरीरप्पओगनामाए कम्मस्स
उदएणं अंतराइयकम्मासरीरप्पओगवंधे ॥ णाणावरणिज्जकम्मासरीरप्पओगवंधे णं
भंते ! किं देसवंधे सव्ववंधे ? गोयमा ! देसवंधे णो सव्ववंधे, एवं जाव

अंतराइयकम्मा० । णाणावरणिज्जकम्मासरीरप्पओगवंधे णं भंते ! कालओ केवच्चिरं होइ ? गोयमा ! णाणा० दुविहे पण्णत्ते, तंजहा-अणाइए सपज्जवसिए अणाइए अपज्जवसिए, एवं जहा तेयगस्स संचिट्ठणा तहेव एवं जाव अंतराइयकम्मस्स । णाणावरणिज्जकम्मासरीरप्पओगवंधंतरे णं भंते ! कालओ केवच्चिरं होइ ? गोयमा ! अणाइयस्स एवं जहा तेयगसरीरस्स अंतरं तहेव एवं जाव अंतराइयस्स । एएनि णं भंते ! जीवाणं नाणावरणिज्जस्स कम्मस्स देसवंधगाणं अवंधगाणं य कयरे२, जाव अप्पावहुगं जहा तेयगस्स, एवं आउयवज्जं जाव अंतराइयं ॥ आउयस्स पुच्छा, गोयमा ! सव्वत्थोवा जीवा आउयस्स कम्मस्स देसवंधगा, अवंधगा संखेज्जगुणा ५ ॥ ३५० ॥ जस्स णं भंते ! ओरालियसरीरस्स सव्ववंधे से णं भंते ! वेउव्वियसरीरस्स किं वंधए अवंधए ? गोयमा ! नो वंधए अवंधए, आहारगसरीरस्स किं वंधए अवंधए ? गोयमा ! नो वंधए अवंधए, तेयासरीरस्स किं वंधए अवंधए ? गोयमा ! वंधए नो अवंधए, जइ वंधए किं देसवंधए सव्ववंधए ? गोयमा ! देसवंधए नो सव्ववंधए, कम्मासरीरस्स किं वंधए अवंधए ? जहेव तेयगस्स जाव देसवंधए नो सव्ववंधए ॥ जस्स णं भंते ! ओरालियसरीरस्स देसवंधे से णं भंते ! वेउव्वियसरीरस्स किं वंधए अवंधए ? गोयमा ! नो वंधए अवंधए, एवं जहेव सव्ववंधेणं भणियं तहेव देसवंधेणवि भाणियव्वं जाव कम्मगस्स । जस्स णं भंते ! वेउव्वियसरीरस्स सव्ववंधे से णं भंते ! ओरालियसरीरस्स किं वंधए अवंधए ? गोयमा ! नो वंधए अवंधए, आहारगसरीरस्स एवं चेव, तेयगस्स कम्मगस्स य जहेव ओरालिएणं समं भणियं तहेव भाणियव्वं जाव देसवंधए नो सव्ववंधए । जस्स णं भंते ! वेउव्वियसरीरस्स देसवंधे से णं भंते ! ओरालियसरीरस्स किं वंधए अवंधए ? गोयमा ! नो वंधए अवंधए, एवं जहा सव्ववंधेणं भणियं तहेव देसवंधेणवि भाणियव्वं जाव कम्मगस्स । जस्स णं भंते ! आहारगसरीरस्स सव्ववंधे से णं भंते ! ओरालियसरीरस्स किं वंधए अवंधए ? गोयमा ! नो वंधए अवंधए, एवं जहेव ओरालिएणं समं भणियं तहेव भाणियव्वं । जस्स णं भंते ! आहारगसरीरस्स देसवंधे से णं भंते ! ओरालियसरीरस्स एवं जहा आहारगसरीरस्स सव्ववंधेणं भणियं तहा देसवंधेणवि भाणियव्वं जाव कम्मगस्स । जस्स णं भंते ! तेयासरीरस्स देसवंधे से णं भंते ! ओरालियसरीरस्स किं वंधए अवंधए ? गोयमा ! वंधए वा अवंधए वा, जइ वंधए किं देसवंधए सव्ववंधए ? गोयमा ! देसवंधए वा सव्ववंधए वा, वेउव्वियसरीरस्स किं वंधए अवंधए ? एवं चेव, एवं आहारगसरीरस्सवि, कम्मगसरीरस्स किं वंधए

अबंधए ? गोयमा ! बंधए नो अबंधए, जइ बंधए किं देसबंधए सव्वबंधए ? गोयमा ! देसबंधए नो सव्वबंधए । जस्स णं भंते ! कम्मगसरीरस्स देसबंधे से णं भंते ! ओरालियत्तरीरस्स जहा तेयगस्स वत्तव्वया भणिया तहा कम्मगस्सवि भाणियव्वा जाव तेयासरीरस्स जाव देसबंधए नो सव्वबंधए ॥ ३५१ ॥ एएसि णं भंते ! सव्वजीवाणं ओरालियवेउव्वियआहारगतेयाकम्मासरीरगाणं देसबंधगाणं सव्वबंधगाणं अबंधगाण य कयरे २ जाव विसेसाहिया वा ? गोयमा ! सव्वत्थोवा जीवा आहारगसरीरस्स सव्वबंधगा १ तस्स चेव देसबंधगा संखेज्जगुणा २ वेउ-व्वियसरीरस्स सव्वबंधगा असंखेज्जगुणा ३ तस्स चेव देसबंधगा असंखेज्जगुणा ४ तेयाकम्मगाणं दुण्हवि तुल्ला अबंधगा अणंतगुणा ५ ओरालियसरीरस्स सव्वबंधगा अणंतगुणा ६ तस्स चेव अबंधगा विसेसाहिया ७ तस्स चेव देसबंधगा असंखेज्जगुणा ८ तेयाकम्मगाणं देसबंधगा विसेसाहिया ९ वेउव्वियसरीरस्स अबंधगा विसेसाहिया १० आहारगसरीरस्स अबंधगा विसेसाहिया ११ । सेवं भंते ! २ त्ति ॥ ३५२ ॥ अट्ठमसयस्स नवमो उद्देसओ समत्तो ॥

रायगिहे नगरे जाव एवं वयासी-अन्नउत्थिया णं भंते ! एवमाइक्खंति जाव एवं पुरुवेति-एवं खलु सीलं सेयं, सुयं सेयं, सुयं सेयं सीलं सेयं, से कहमेयं भंते ! एवं ? गोयमा ! जन्नं ते अन्नउत्थिया एवमाइक्खंति जाव जे ते एवमाहंसु मिच्छा ते एवमाहंसु, अहं पुण गोयमा ! एवमाइक्खामि जाव पुरुवेमि, एवं खलु मए चत्तारि पुरिसजाया पण्णत्ता, तंजहा-सीलसंपन्ने णामं एगे णो सुयसंपन्ने १ सुयसंपन्ने नामं एगे नो सीलसंपन्ने २ एगे सीलसंपन्नेवि सुयसंपन्नेवि ३ एगे णो सीलसंपन्ने नो सुयसंपन्ने ४, तत्थ णं जे से पढमे पुरिसजाए से णं पुरिसे सीलवं असुयवं, उवरए अविन्नायधम्मे, एस णं गोयमा ! मए पुरिसे देसाराहए पण्णत्ते, तत्थ णं जे से दोच्चे पुरिसजाए से णं पुरिसे असीलवं सुयवं, अणुवरए विन्नायधम्मे, एस णं गोयमा ! मए पुरिसे देसविराहए पण्णत्ते, तत्थ णं जे से तच्चे पुरिसजाए से णं पुरिसे सीलवं सुयवं, उवरए विन्नायधम्मे, एस णं गोयमा ! मए पुरिसे सव्वाराहए पण्णत्ते, तत्थ णं जे से चउत्थे पुरिसजाए से णं पुरिसे असीलवं असुयवं, अणुवरए अवि-ण्णायधम्मे, एस णं गोयमा ! मए पुरिसे सव्वविराहए पण्णत्ते ॥ ३५३ ॥ कइविहा णं भंते ! आराहणा पण्णत्ता ? गोयमा ! तिविहा आराहणा पण्णत्ता, तंजहा-नाणा-राहणा दंसणाराहणा चरित्ताराहणा । णाणाराहणा णं भंते ! कइविहा पण्णत्ता ? गोयमा ! तिविहा पण्णत्ता, तंजहा-उक्कोसिया मज्झिमा जहन्ना । दंसणाराहणा णं भंते ! कइविहा ५० ? एवं चेव तिविहावि । एवं चरित्ताराहणावि ॥ जस्स णं भंते !

उक्कोसिया णाणाराहणा तस्स उक्कोसिया दंसणाराहणा जस्स उक्कोसिया दंसणाराहणा तस्स उक्कोसिया णाणाराहणा ? गोयमा ! जस्स उक्कोसिया णाणाराहणा तस्स दंसणाराहणा उक्कोसिया वा अजहन्नउक्कोसिया वा, जस्स पुण उक्कोसिया दंसणाराहणा तस्स नाणाराहणा उक्कोसा वा जहन्ना वा अजहन्नमणुक्कोसा वा । जस्स णं भंते ! उक्कोसिया णाणाराहणा तस्स उक्कोसिया चरित्ताराहणा जस्सुक्कोसिया चरित्ताराहणा तस्सुक्कोसिया णाणाराहणा ? जहा उक्कोसिया णाणाराहणा य दंसणाराहणा य भणिया तहा उक्कोसिया नाणाराहणा य चरित्ताराहणा य भाणियव्वा ॥ जस्स णं भंते ! उक्कोसिया दंसणाराहणा तस्सुक्कोसिया चरित्ताराहणा जस्सुक्कोसिया चरित्ताराहणा तस्सुक्कोसिया दंसणाराहणा ? गोयमा ! जस्स उक्कोसिया दंसणाराहणा तस्स चरित्ताराहणा उक्कोसा वा जहन्ना वा अजहन्नमणुक्कोसा वा जस्स पुण उक्कोसिया चरित्ताराहणा तस्स दंसणाराहणा नियमा उक्कोसा ॥ उक्कोसियं णं भंते ! णाणाराहणं आराहेत्ता कइहिं भवग्गहणेहिं सिज्जइ जाव अंतं करेइ ? गोयमा ! अत्येगइए तेणेव भवग्गहणेणं सिज्जइ जाव अंतं करेइ अत्येगइए दोच्चेणं भवग्गहणेणं सिज्जइ जाव अंतं करेइ, अत्येगइए कप्पोवएसु वा कप्पातीयएसु वा उववज्जइ, उक्कोसियं णं भंते ! दंसणाराहणं आराहेत्ता कइहिं भवग्गहणेहिं० एवं चेव, उक्कोसियणं भंते ! चरित्ताराहणं आराहेत्ता० एवं चेव, नवरं अत्येगइए कप्पातीयएसु उववज्जइ । मज्झिमियं णं भंते ! णाणाराहणं आराहेत्ता कइहिं भवग्गहणेहिं सिज्जइ जाव अंतं करेइ ? गोयमा ! अत्येगइए दोच्चेणं भवग्गहणेणं सिज्जइ जाव अंतं करेइ तच्चं पुण भवग्गहणं नाइक्कमइ, मज्झिमियं णं भंते ! दंसणाराहणं आराहेत्ता० एवं चेव, एवं मज्झिमियं चरित्ताराहणंपि । जहन्नियन्नं भंते ! नाणाराहणं आराहेत्ता कइहिं भवग्गहणेहिं सिज्जइ जाव अंतं करेइ ? गोयमा ! अत्येगइए तच्चेणं भवग्गहणेणं सिज्जइ जाव अंतं करेइ सत्तट्ठभवग्गहणाई पुण नाइक्कमइ, एवं दंसणाराहणंपि, एवं चरित्ताराहणंपि ॥ ३५४ ॥ कइविहे णं भंते ! पोग्गलपरिणामे पण्णत्ते ? गोयमा ! पंचविहे पोग्गलपरिणामे पण्णत्ते, तंजहा-वन्नपरिणामे १ गंधप० २ रसप० ३ फासप० ४ संठाणप० ५, वन्नपरिणामे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-कालवन्नपरिणामे जाव सुक्किल्लवन्नपरिणामे, एवं एएणं अभिल्लवेणं गंधपरिणामे दुविहे, रसपरिणामे पंचविहे, फासपरिणामे अट्ठविहे, संठाणपरिणामे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-परिमंडलसंठाणपरिणामे जाव आययसंठाणपरिणामे ॥ ३५५ ॥ एगे भंते ! पोग्गलत्थिकायपएसं किं दव्वं १ दव्वदेसे २ दव्वाइं ३ दव्वदेसा ४ उदाहु दव्वं च दव्वदेसे य ५ उदाहु दव्वं च दव्वदेसा य ६ उदाहु दव्वाइं च

दव्वदेसे य ७ उदाहु दव्वाइं च दव्वदेसा य ८ ? गोयमा ! सिय दव्वं सिय दव्वदेसे नो दव्वाइं नो दव्वदेसा नो दव्वं च दव्वदेसे य जाव नो दव्वाइं च दव्वदेसा य ॥ दो भंते ! पोग्गलत्थिकायपएसा किं दव्वं दव्वदेसे ? पुच्छा तहेव, गोयमा ! सिय दव्वं १ सिय दव्वदेसे २ सिय दव्वाइं ३ सिय दव्वदेसा ४ सिय दव्वं च दव्वदेसे य ५ नो दव्वं च दव्वदेसा य ६ सेसा पडिसेहेयव्वा ॥ तिन्नि भंते ! पोग्गलत्थिकायपएसा किं दव्वं दव्वदेसे ० ? पुच्छा, गोयमा ! सिय दव्वं १ सिय दव्वदेसे २ एवं सत्त भंगा भाणियव्वा जाव सिय दव्वाइं च दव्वदेसे य नो दव्वाइं च दव्वदेसा य । चत्तारि भंते ! पोग्गलत्थिकायपएसा किं दव्वं ० ? पुच्छा, गोयमा ! सिय दव्वं १ सिय दव्वदेसे २ अट्ठवि भंगा भाणियव्वा जाव सिय दव्वाइं च दव्वदेसा य ८ । जहा चत्तारि भणिया एवं पंच छ सत्त जाव संखेज्जा असंखेज्जा । अणंता भंते ! पोग्गलत्थिकायपएसा किं दव्वं ० ? एवं चेव जाव सिय दव्वाइं च दव्वदेसा य ॥ ३५६ ॥ केवइया णं भंते ! लोयागासपएसा प० ? गोयमा ! असंखेज्जा लोयागासपएसा प० ॥ एगमेगस्स णं भंते ! जीवस्स केवइया जीवपएसा प० ? गोयमा ! जावइया लोयागासपएसा एगमेगस्स णं जीवस्स एवइया जीवपएसा पण्णत्ता ॥ ३५७ ॥ कइ णं भंते ! कम्मपगडीओ पण्णत्ताओ ? गोयमा ! अट्ठ कम्मपगडीओ पण्णत्ताओ, तंजहा-नाणावरणिज्जं जाव अंतराइयं, नेरइयाणं भंते ! कइ कम्मपगडीओ पण्णत्ताओ ? गोयमा ! अट्ठ, एवं सव्वजीवाणं अट्ठ कम्मपगडीओ ठावेयव्वाओ जाव वेमाणियाणं । नाणावरणिज्जस्स णं भंते ! कम्मस्स केवइया अविभागपलिच्छेया प० ? गोयमा ! अणंता अविभागपलिच्छेया प०, नेरइयाणं भंते ! नाणावरणिज्जस्स कम्मस्स केवइया अविभागपलिच्छेया प० ? गोयमा ! अणंता अविभागपलिच्छेया प०, एवं सव्वजीवाणं जाव वेमाणियाणं पुच्छा, गोयमा ! अणंता अविभागपलिच्छेया प०, एवं जहा नाणावरणिज्जस्स अविभागपलिच्छेया भणिया तहा अट्ठण्हवि कम्मपगडीणं भाणियव्वा जाव वेमाणियाणं अंतराइयस्स । एगमेगस्स णं भंते ! जीवस्स एगमेगे जीवपएसे नाणावरणिज्जस्स कम्मस्स केवइएहिं अविभागपलिच्छेएहिं आवेडिए परिवेडिए ? गोयमा ! सिय आवेडियपरिवेडिए सिय नो आवेडियपरिवेडिए, जइ आवेडियपरिवेडिए-नियमा-अणंतेहिं, एगमेगस्स णं भंते ! नेरइयस्स एगमेगे जीवपएसे नाणावरणिज्जस्स कम्मस्स केवइएहिं अविभागपलिच्छेएहिं आवेडिए परिवेडिए ? गोयमा !-नियमा अणंतेहिं, जहा नेरइयस्स एवं जाव वेमाणियस्स, नवरं मणूसस्स जहा जीवस्स । एगमेगस्स णं भंते ! जीवस्स एगमेगे जीवपएसे दरिसणावरणिज्जस्स कम्मस्स केवइएहिं ० एवं जहेव नाणावरणिज्जस्स

तहेव दंडगो भाणियव्वो जाव वेमाणियस्स, एवं जाव अंतराइयस्स भाणियव्वं, नवरं
 वेयणिजस्स आउयस्स णामस्स गोयस्स एएसिं चउण्हवि कम्माणं मणूसस्स जहा
 नेरइयस्स तहा भाणियव्वं सेसं तं चेव ॥ ३५८ ॥ जस्स णं भंते ! नाणावरणिज्जं
 तस्स दरिसणावरणिज्जं जस्स दंसणावरणिज्जं तस्स नाणावरणिज्जं ? गोयमा !
 जस्स नाणावरणिज्जं तस्स दंसणावरणिज्जं नियमा अत्थि, जस्स दरिसणावरणिज्जं
 तस्सवि नाणावरणिज्जं नियमा अत्थि । जस्स णं भंते ! नाणावरणिज्जं तस्स वेयणिज्जं
 जस्स वेयणिज्जं तस्स नाणावरणिज्जं ? गोयमा ! जस्स नाणावरणिज्जं तस्स वेय-
 णिज्जं नियमा अत्थि, जस्स पुण वेयणिज्जं तस्स नाणावरणिज्जं सिय अत्थि सिय
 नत्थि । जस्स णं भंते ! नाणावरणिज्जं तस्स मोहणिज्जं जस्स मोहणिज्जं तस्स
 नाणावरणिज्जं ? गोयमा ! जस्स नाणावरणिज्जं तस्स मोहणिज्जं सिय अत्थि सिय
 नत्थि, जस्स पुण मोहणिज्जं तस्स नाणावरणिज्जं नियमा अत्थि । जस्स णं भंते !
 नाणावरणिज्जं तस्स आउयं ? एवं जहा वेयणिज्जेण समं भणियं तहा आउएणावि
 समं भाणियव्वं, एवं नामेणवि एवं गोएणावि समं, अंतराइएण समं जहा दरिसणा-
 वरणिज्जेण समं तहेव नियमा परोप्परं भाणियव्वाणि १ ॥ जस्स णं भंते ! दरि-
 सणावरणिज्जं तस्स वेयणिज्जं जस्स वेयणिज्जं तस्स दरिसणावरणिज्जं ? जहा नाणा-
 वरणिज्जं उवरिमेहिं सत्तहिं कम्मेहिं समं भणियं तहा दरिसणावरणिज्जंपि उवरिमेहिं
 छहिं कम्मेहिं समं भाणियव्वं जाव अंतराइएणं २ । जस्स णं भंते ! वेयणिज्जं
 तस्स मोहणिज्जं जस्स मोहणिज्जं तस्स वेयणिज्जं ? गोयमा ! जस्स वेयणिज्जं तस्स
 मोहणिज्जं सिय अत्थि सिय नत्थि, जस्स पुण मोहणिज्जं तस्स वेयणिज्जं नियमा
 अत्थि । जस्स णं भंते ! वेयणिज्जं तस्स आउयं ? एवं एयाणि परोप्परं नियमा,
 जहा आउएण समं एवं नामेणवि गोएणावि समं भाणियव्वं । जस्स णं भंते ! वेय-
 णिज्जं तस्स अंतराइयं ? पुच्छा, गोयमा ! जस्स वेयणिज्जं तस्स अंतराइयं सिय
 अत्थि सिय नत्थि, जस्स पुण अंतराइयं तस्स वेयणिज्जं नियमा अत्थि ३ । जस्स
 णं भंते ! मोहणिज्जं तस्स आउयं जस्स आउयं तस्स मोहणिज्जं ? गोयमा ! जस्स
 मोहणिज्जं तस्स आउयं नियमा अत्थि, जस्स पुण आउयं तस्स मोहणिज्जं सिय
 अत्थि सिय नत्थि, एवं नामं गोयं अंतराइयं च भाणियव्वं ४, जस्स णं भंते !
 आउयं तस्स नामं ? पुच्छा, गोयमा ! दोवि परोप्परं नियमं, एवं गोत्तेणावि समं
 भाणियव्वं, जस्स णं भंते ! आउयं तस्स अंतराइयं ? पुच्छा, गोयमा ! जस्स
 आउयं तस्स अंतराइयं सिय अत्थि सिय नत्थि, जस्स पुण अंतराइयं तस्स आउयं
 नियमा अत्थि ५ । जस्स णं भंते ! नामं तस्स गोयं जस्स गोयं तस्स नामं ?

गोयमा ! जस्स णामं तस्स नियमा गोयं, जस्स गोयं तस्स नियमा नामं, गोयमा !
 दोवि एए परोप्परं नियमा, जस्स णं भंते ! णामं तस्स अंतराइयं ? पुच्छा,
 गोयमा ! जस्स नामं तस्स अंतराइयं सिय अत्थि सिय नत्थि, जस्स पुण अंतराइयं
 तस्स नामं नियमा अत्थि ६ । जस्स णं भंते ! गोयं तस्स अंतराइयं ? पुच्छा,
 गोयमा ! जस्स गोयं तस्स अंतराइयं सिय अत्थि सिय नत्थि, जस्स पुण अंत-
 राइयं तस्स गोयं नियमा अत्थि ७ ॥ ३५९ ॥ जीवे णं भंते ! किं पोग्गली पोग्गले ?
 गोयमा ! जीवे पोग्गलीवि पोग्गलेवि, से केणट्ठेणं भंते ! एवं वुच्चइ जीवे पोग्गलीवि
 पोग्गलेवि ? गोयमा ! से जहानासए छत्तेणं छत्ती, दंडेणं दंडी, घडेणं घडी, पडेणं
 पडी, करेणं करी, एवामेव गोयमा ! जीवेवि सोइंदियच्चक्खिंदियघाणिंदियजिठ्ठिम-
 दियफासिंदियाइं पडुच्च पोग्गली, जीवं पडुच्च पोग्गले, से तेणट्ठेणं गोयमा ! एवं
 वुच्चइ जीवे पोग्गलीवि पोग्गलेवि । नेरइए णं भंते ! किं पोग्गली ? एवं चेव, एवं
 जाव वेमाणिए नवरं जस्स जइ इदियाइं तस्स तइ भाणियव्वाइं । सिद्धे णं भंते !
 किं पोग्गली पोग्गले ? गोयमा ! नो पोग्गली पोग्गले, से केणट्ठेणं भंते ! एवं वुच्चइ
 जाव पोग्गले ? गोयमा ! जीवं पडुच्च, से तेणट्ठेणं गोयमा ! एवं वुच्चइ सिद्धे नो
 पोग्गली पोग्गले । सेवं भंते । सेवं भंते । त्ति ॥ ३६० ॥ अट्ठमसए दसमो
 उद्देसो समत्तो, अट्ठमं सयं समत्तं ॥

जंबुद्दीवे १ जोइस २ अंतरदीवा ३० असोच्च ३१ गंगेय ३२ । कुंडग्गामे ३३
 पुरिसे ३४ नवमंसि सए चउत्तीसा ॥ १ ॥ तेणं कालेणं तेणं समएणं मिहिला नामं
 नगरी होत्था वन्नओ, माणिभद्दे उज्जाणे वन्नओ, सामी तमोसढे परिसा निग्गया जाव
 भगवं गोयमे पज्जुवासमाणे एवं वयासी-कहिं णं भंते ! जंबुद्दीवे दीवे ? किसंठिए णं
 भंते ! जंबुद्दीवे दीवे ? एवं जंबुद्दीवपन्नत्ती भाणियव्वा जाव एवामेव सपुव्वावरेणं
 जंबुद्दीवे २ चोदस सलिला सयसहस्सा छप्पन्नं च सहस्सा भवंतीतिमक्खाया । सेवं
 भंते । सेवं भंते । त्ति ॥ ३६१ ॥ नवमसए पढमो उद्देसो समत्तो ॥

रायगिहे जाव एवं वयासी-जम्बुद्दीवे णं भंते ! दीवे केवइया चंदा पभासिंसु व
 पभासेति वा पभासिस्संति वा ? एवं जहा जीवाभिगमे जाव-‘एणं च सयसहस्स
 तेत्तीसं खलु भवे सहस्साइं । नव य सया पन्नासा तारागणकोडिकोडीणं ॥ १ ॥
 सोमं सोमिंसु सोमिति सोमिस्संति ॥ लवणे णं भंते ! समुद्दे केवइया चंदा पभासिं
 वा पभासिति वा पभासिस्संति वा ३ एवं जहा जीवाभिगमे जाव ताराओ ॥ धाय
 संडे कालोदे पुक्खरवरे अग्निभतरपुक्खरद्धे भणुस्सखेत्ते, एएसु सव्वेसु जहा जीव
 भिगमे जाव-‘एगससीपरिवारो तारागणकोडा(कोडि)कोडीणं-’ पुक्खरद्धे णं भंते

समुद्दे केवइया चंदा पभासिंसु वा ३ ? एवं सव्वेसु दीवसमुद्देसु जोइसियाणं भाणियव्वं
जाव सयंभुरमणे जाव सोभं सोभिंसु वा सोभंति वा सोभिस्संति वा । सेवं भंते !
सेवं भंते ! त्ति ॥ ३६२ ॥ **नवमसए वीओ उद्देसो समत्तो ॥**

रायगिहे जाव एवं वयासी-कहि णं भंते ! दाहिणिह्माणं एगो(गू)रुयमणुस्साणं
एगोरुयदीवे णामं दीवे पन्नत्ते ? गोयमा ! जंबुदीवे दीवे मंदरस्स पव्वयस्स दाहिणेणं
चुल्लहिमवंतस्स वासहरपव्वयस्स उत्तरपुरच्छिमिह्माओ चरिमंताओ लवणसमुदं उत्त-
रपुरच्छिमे णं तिन्नि जोयणसयाइं ओगाहिता एत्थ णं दाहिणिह्माणं एगोरुयमणुस्साणं
एगोरुयदीवे नामं दीवे पण्णत्ते, तं गोयमा ! तिन्नि जोयणसयाइं आयामविकखंभेणं
णवएगूणवण्णे जोयणसए किंचिविसे(साहिए)सूणे परिकखेवेणं पन्नत्ते, से णं एगाए
पउमवरवेइयाए एगेण य वणसंडेणं सव्वओ समंता संपरिकिखत्ते दोण्हवि पमाणं
वन्नओ य, एवं एएणं कमेणं जहा जीवाभिगमे जाव सुद्धदंतदीवे जाव देवलोगपरि-
ग्गहिया णं ते मणुया पण्णत्ता समणाउसो ! । एवं अट्ठावीसं अंतरदीवा सएणं २
आयामविकखंभेणं भाणियव्वा, नवरं दीवे २ उद्देसओ, एवं सव्वेवि अट्ठावीसं
उद्देसगा भाणियव्वा । सेवं भंते ! सेवं भंते ! त्ति ॥ ३६३ ॥ **नवमस्स सयस्स
तइयाइआ तीसंता उद्देसा समत्ता, तीसइमो उद्देसो समत्तो ॥**

रायगिहे जाव एवं वयासी-असोच्चा णं भंते ! केवलिस्स वा केवलिसावगस्स
वा केवलिसावियाए वा केवलिउवासगस्स वा केवलिउवासियाए वा तप्पक्खियस्स
वा तप्पक्खियसावगस्स वा तप्पक्खियसावियाए वा तप्पक्खियउवासगस्स वा
तप्पक्खियउवासियाए वा केवलिपन्नत्तं धम्मं लभेज्ज सवणयाए ? गोयमा ! असोच्चा
णं केवलिस्स वा जाव तप्पक्खियउवासियाए वा अत्थेगइए केवलिपन्नत्तं धम्मं
लभेज्ज सवणयाए, अत्थेगइए केवलिपन्नत्तं धम्मं नो लभेज्ज-सवणयाए ॥ से केण-
ट्ठेणं भंते ! एवं वुच्चइ-असोच्चा णं जाव नो लभेज्ज सवणयाए ? गोयमा ! जस्स णं
नाणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव
तप्पक्खियउवासियाए वा केवलिपन्नत्तं धम्मं लभेज्ज सवणयाए, जस्स णं नाणावर-
णिज्जाणं कम्माणं खओवसमे नो कडे भवइ से णं असोच्चा णं केवलिस्स वा जाव
तप्पक्खियउवासियाए वा केवलिपन्नत्तं धम्मं नो लभेज्ज सवणयाए, से तेणट्ठेणं गोयमा !
एवं वुच्चइ-तं चेव जाव नो लभेज्ज सवणयाए ॥ असोच्चा णं भंते ! केवलिस्स वा
जाव तप्पक्खियउवासियाए वा केवलं वोहि वुज्झेज्जा ? गोयमा ! असोच्चा णं केव-
लिस्स वा जाव अत्थेगइए केवलं वोहि वुज्झेज्जा, अत्थेगइए केवलं वोहि णो
वुज्झेज्जा ॥ से केणट्ठेणं भंते ! जाव नो वुज्झेज्जा ? गोयमा ! जस्स णं दरिसणाव-

रणिज्जाणं कम्माणं खओवसमे कडे भवइ से णं असोच्चा केवलिरस वा जाव केवलं वोहिं वुज्झेज्जा, जस्स णं दरिसणावरणिज्जाणं कम्माणं खओवसमे णो कडे भवइ से णं असोच्चा केवलिरस वा जाव केवलं वोहिं णो वुज्झेज्जा, से तेणट्ठेणं जाव णो वुज्झेज्जा ॥ असोच्चा णं भंते ! केवलिरस वा जाव तप्पक्खियउवासियाए वा केवलं मुंडे भवित्ता अगाराओ अणगारियं पव्वएज्जा ? गोयमा ! असोच्चा णं केवलिरस वा जाव उवासियाए वा अत्थेगइए केवलं मुंडे भवित्ता अगाराओ अणगारियं पव्वइज्जा, अत्थेगइए केवलं मुंडे भवित्ता अगाराओ अणगारियं नो पव्वएज्जा, से केणट्ठेणं जाव नो पव्वएज्जा ? गोयमा ! जस्स णं धम्मंतराइयाणं कम्माणं खओवसमे कडे भवइ से णं असोच्चा केवलिरस वा जाव केवलं मुंडे भवित्ता अगाराओ अणगारियं पव्वएज्जा, जस्स णं धम्मंतराइयाणं कम्माणं खओवसमे नो कडे भवइ से णं असोच्चा केवलिरस वा जाव मुंडे भवित्ता जाव णो पव्वएज्जा, से तेणट्ठेणं गोयमा ! जाव नो पव्वएज्जा । असोच्चा णं भंते ! केवलिरस वा जाव उवासियाए वा केवलं वंभचेरवासं आवसेज्जा ? गोयमा ! असोच्चा णं केवलिरस वा जाव उवासियाए वा अत्थेगइए केवलं वंभचेरवासं आवसेज्जा, अत्थेगइए केवलं वंभचेरवासं नो आवसेज्जा, से केणट्ठेणं भंते ! एवं वुच्चइ जाव नो आवसेज्जा ? गोयमा ! जरस णं चरित्तावरणिज्जाणं कम्माणं खओवसमे कडे भवइ से णं असोच्चा केवलिरस वा जाव केवलं वंभचेरवासं आवसेज्जा, जस्स णं चरित्तावरणिज्जाणं कम्माणं खओवसमे नो कडे भवइ से णं असोच्चा केवलिरस वा जाव नो आवसेज्जा, से तेणट्ठेणं जाव नो आवसेज्जा । असोच्चा णं भंते ! केवलिरस वा जाव केवलेणं संजमेणं संजमेज्जा ? गोयमा ! असोच्चा णं केवलिरस वा जाव उवासियाए वा जाव अत्थेगइए केवलेणं संजमेणं संजमेज्जा, अत्थेगइए केवलेणं संजमेणं नो संजमेज्जा, से केणट्ठेणं जाव नो संजमेज्जा ? गोयमा ! जस्स णं जयणावरणिज्जाणं कम्माणं खओवसमे कडे भवइ से णं असोच्चा णं केवलिरस वा जाव केवलेणं संजमेणं संजमेज्जा, जस्स णं जयणावरणिज्जाणं कम्माणं खओवसमे नो कडे भवइ से णं असोच्चा केवलिरस वा जाव नो संजमेज्जा, से तेणट्ठेणं गोयमा ! जाव अत्थेगइए नो संजमेज्जा । असोच्चा णं भंते ! केवलिरस वा जाव उवासियाए वा केवलेणं संवरेणं संवरेज्जा ? गोयमा ! असोच्चा णं केवलिरस वा जाव अत्थेगइए केवलेणं संवरेणं संवरेज्जा, अत्थेगइए केवलेणं जाव नो संवरेज्जा, से केणट्ठेणं जाव नो संवरेज्जा ? गोयमा ! जस्स णं अज्झवसाणावरणिज्जाणं कम्माणं खओवसमे कडे भवइ से णं असोच्चा केवलिरस वा जाव केवलेणं संवरेणं संवरेज्जा. जस्स णं अज्झवसाणावरणिज्जाणं कम्माणं खओवसमे

णो कडे भवइ से णं असोच्चा केवलिस्स वा जाव नो संवरेज्जा, से तेणट्ठेणं जाव नो संवरेज्जा । असोच्चा णं भंते ! केवलिस्स वा जाव केवलं आभिणिबोहियनाणं उप्पाडेज्जा ? गोयमा ! असोच्चा णं केवलिस्स वा जाव उवासियाए वा अत्येगइए केवलं आभिणिबोहियनाणं उप्पाडेज्जा, अत्येगइए केवलं आभिणिबोहियनाणं नो उप्पाडेज्जा, से केणट्ठेणं जाव नो उप्पाडेज्जा ? गोयमा ! जस्स णं आभिणिबोहियनाणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव केवलं आभिणिबोहियनाणं उप्पाडेज्जा, जस्स णं आभिणिबोहियनाणावरणिज्जाणं कम्माणं खओवसमे नो कडे भवइ से णं असोच्चा केवलिस्स वा जाव केवलं आभिणिबोहियनाणं नो उप्पाडेज्जा, से तेणट्ठेणं जाव नो उप्पाडेज्जा, असोच्चा णं भंते ! केवलिस्स वा जाव केवलं सुयनाणं उप्पाडेज्जा ? एवं जहा आभिणिबोहियनाणस्स वत्तव्वया भणिया तहा सुयनाणस्सवि भाणियव्वा, नवरं सुयनाणावरणिज्जाणं कम्माणं खओवसमे भाणियव्वे । एवं चेव केवलं ओहिनाणं भाणियव्वं, नवरं ओहिणाणावरणिज्जाणं कम्माणं खओवसमे भाणियव्वे, एवं केवलं मणपज्जवनानं उप्पाडेज्जा, नवरं मणपज्जवणाणावरणिज्जाणं कम्माणं खओवसमे भाणियव्वे, असोच्चा णं भंते ! केवलिस्स वा जाव तप्पक्खियउवासियाए वा केवलनाणं उप्पाडेज्जा ? एवं चेव नवरं केवलनाणावरणिज्जाणं कम्माणं खए भाणियव्वे, सेसं तं चेव, से तेणट्ठेणं गोयमा ! एवं वुच्चइ जाव केवलनाणं नो उप्पाडेज्जा । असोच्चा णं भंते ! केवलिस्स वा जाव तप्पक्खियउवासियाए वा केवलिपन्नत्तं धम्मं लभेज्ज सवणयाए केवलं वोहिं वुज्झेज्जा केवलं मुंडे भवित्ता अगाराओ अणगारियं पव्वएज्जा केवलं वंभचेरवासं आवसेज्जा केवलेणं संजमेणं संजमेज्जा केवलेणं संवरेणं संवरेज्जा केवलं आभिणिबोहियनाणं उप्पाडेज्जा जाव केवलं मणपज्जवनानं उप्पाडेज्जा केवलनाणं उप्पाडेज्जा ? गोयमा ! असोच्चा णं केवलिस्स वा जाव उवासियाए वा अत्येगइए केवलिपन्नत्तं धम्मं लभेज्ज सवणयाए, अत्येगइए केवलिपन्नत्तं धम्मं नो लभेज्ज सवणयाए, अत्येगइए केवलं वोहिं वुज्झेज्जा, अत्येगइए केवलं वोहिं णो वुज्झेज्जा, अत्येगइए केवलं मुंडे भवित्ता अगाराओ अणगारियं पव्वएज्जा, अत्येगइए जाव नो पव्वएज्जा, अत्येगइए केवलं वंभचेरवासं आवसेज्जा, अत्येगइए केवलं वंभचेरवासं नो आवसेज्जा, अत्येगइए केवलेणं संजमेणं संजमेज्जा, अत्येगइए केवलेणं संजमेणं नो संजमेज्जा, एवं संवरेणावि, अत्येगइए केवलं आभिणिबोहियनाणं उप्पाडेज्जा, अत्येगइए जाव नो उप्पाडेज्जा, एवं जाव मणपज्जवनानं, अत्येगइए केवलनाणं उप्पाडेज्जा, अत्येगइए केवलनाणं नो उप्पाडेज्जा । से केणट्ठेणं भंते ! एवं वुच्चइ असोच्चा णं तं चेव जाव अत्येगइए

केवलनाणं नो उप्पाडेज्जा ? गोयमा ! जस्स णं नाणावरणिज्जाणं कम्माणं खओवसमे नो कडे भवइ १ जस्स णं दरिसणावरणिज्जाणं कम्माणं खओवसमे नो कडे भवइ २ जस्स णं धम्मंतराइयाणं कम्माणं खओवसमे नो कडे भवइ ३ एवं चरितावरणिज्जाणं ४ जयणावरणिज्जाणं ५ अज्झवसाणावरणिज्जाणं ६ आभिणिबोहियनाणावरणिज्जाणं ७ जाव मणपज्जवनाणावरणिज्जाणं कम्माणं खओवसमे नो कडे भवइ १० जस्स णं केवलनाणावरणिज्जाणं जाव खए नो कडे भवइ ११ से णं असोच्चा केवलस्स वा जाव केवलिपन्नत्तं धम्मं नो लभेज्ज सवणयाए केवलं वोहिं नो वुज्झेज्जा जाव केवलनाणं नो उप्पाडेज्जा, जस्स णं नाणावरणिज्जाणं कम्माणं खओवसमे कडे भवइ जस्स णं दरिसणावरणिज्जाणं कम्माणं खओवसमे कडे भवइ जस्स णं धम्मंतराइयाणं एवं जाव जस्स णं केवलनाणावरणिज्जाणं कम्माणं खए कडे भवइ से णं असोच्चा केवलस्स वा जाव केवलिपन्नत्तं धम्मं लभेज्ज सवणयाए केवलं वोहिं वुज्झेज्जा जाव केवलनाणं उप्पाडेज्जा ॥ ३६४ ॥ तस्स णं भंते ! छट्ठंछट्ठेणं अनिक्खित्तेणं तवोकम्मेणं उट्ठं वाहाओ पगिज्झिय पगिज्झिय सूरामिमुहस्स आयावणभूमीए आयावेमाणस्स पगइभइयाए पगइउवसंतयाए पगइपर्यणकोहमाणमायालोभयाए मिउमइवसंपन्नयाए अल्लीवणयाए भइयाए विणीययाए अन्नया कयाइ सुभेणं अज्झवसाणेणं सुभेणं परिणामेणं लेस्साहिं विमुज्जमाणीहिं २ तयावरणिज्जाणं कम्माणं खओवसमेणं ईहापोहमग्गणगवेसणं करेमाणस्स विभंगे नामं अन्नाणे समुप्पज्जइ, से णं तेणं विभंगनाणेणं समुप्पन्नेणं जहन्नेणं अंगुलस्स असंखेज्जइभागं उक्कोसेणं असंखेज्जाइं जोयणसहस्साइं जाणइ पासइ, से णं तेणं विभंगनाणेणं समुप्पन्नेणं जीवेवि जाणइ अजीवेवि जाणइ पासंडत्थे सारंसे सपरिग्गहे संकिलिस्समाणेवि जाणइ विमुज्जमाणेवि जाणइ से णं पुवंवामेव सम्मत्तं पडिवज्जइ सम्मत्तं पडिवज्जिता समणधम्मं रोएइ समणधम्मं रोएत्ता चरित्तं पडिवज्जइ चरित्तं पडिवज्जिता लिंगं पडिवज्जइ, तस्स णं तेहिं मिच्छत्तपज्जवेहिं परिहायमाणेहिं २ सम्मइंसणपज्जवेहिं परिवड्ढमाणेहिं २ से विभंगे अन्नाणे सम्मत्तपरिग्गहिं खिप्पामेव ओही परावत्तइ ॥ ३६५ ॥ से णं भंते ! कइसु लेस्सासु होज्जा ? गोयमा ! तिसु विमुद्धलेस्सासु होज्जा, तंजहा-तेडलेस्साए पम्हलेस्साए सुक्कलेस्साए । से णं भंते ! कइसु णाणेसु होज्जा ? गोयमा ! तिसु आभिणिबोहियनाणसुयनाणओहिनाणेसु होज्जा । से णं भंते ! किं सजोगी होज्जा अजोगी होज्जा ? गोयमा ! सजोगी होज्जा नो अजोगी होज्जा, जइ सजोगी होज्जा किं मणजोगी होज्जा वइजोगी होज्जा कायजोगी होज्जा ? गोयमा ! मणजोगी वा होज्जा वइजोगी वा होज्जा कायजोगी वा होज्जा । से णं भंते ! किं सागारोवउत्ते

होज्जा अणागारोवउत्ते होज्जा ? गोयमा ! सागारोवउत्ते वा होज्जा अणागारोवउत्ते वा होज्जा । से णं भंते ! कयरंमि संघयणे होज्जा ? गोयमा ! वइरोसभनारायसंघयणे होज्जा । से णं भंते ! कयरंमि संठाणे होज्जा ? गोयमा ! छण्हं संठाणाणं अन्नयरे संठाणे होज्जा । से णं भंते ! कयरंमि उच्चते होज्जा ? गोयमा ! जहन्नेणं सत्त रयणी उक्कोसेणं पंचधणुसइए होज्जा । से णं भंते ! कयरंमि आउए होज्जा ? गोयमा ! जहन्नेणं साइरेगट्ठवासाउए उक्कोसेणं पुव्वकोडिआउए होज्जा । से णं भंते ! किं सवेदए होज्जा अवेदए होज्जा ? गोयमा ! सवेदए होज्जा नो अवेदए होज्जा, जइ सवेदए होज्जा किं इत्थिवेयए होज्जा पुरिसवेदए होज्जा नपुंसगवेदए होज्जा पुरिस-नपुंसगवेदए होज्जा ? गोयमा ! नो इत्थिवेदए होज्जा पुरिसवेदए वा होज्जा नो नपुंसगवेदए होज्जा पुरिसनपुंसगवेदए वा होज्जा । से णं भंते ! किं सकसाई होज्जा अंकसाई होज्जा ? गोयमा ! सकसाई होज्जा नो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु संजलणकोहमाणमाया-लोभेसु होज्जा । तस्स णं भंते ! केवइया अज्झवसाणा प० ? गोयमा ! असंखेज्जा अज्झवसाणा प०, ते णं भंते ! किं पसत्था अप्पसत्था ? गोयमा ! पसत्था नो अप्प-सत्था, से णं भंते ! तेहिं पसत्थेहिं अज्झवसाणेहिं वड्डमाणेहिं अणंतेहिं नेरइयभव-ग्गहणेहिंतो अप्पाणं विसंजोएइ अणंतेहिं तिरिक्खजोणिय जाव विसंजोएइ अणंतेहिं मणुस्सभवग्गहणेहिंतो अप्पाणं विसंजोएइ अणंतेहिं देवभवग्गहणेहिंतो अप्पाणं विसंजोएइ जाओवि य से इमाओ नेरइयतिरिक्खजोणियमणुस्सदेवगइनामाओ चत्तारि उत्तरपयडीओ तासिं च णं उवग्गहिंए अणंताणुवंधी कोहमाणमायालोभे खवेइ अणं० २ ता अपच्चक्खाणकसाए कोहमाणमायालोभे खवेइ अप० २ ता पच्चक्खाणावरणकोह-माणमायालोभे खवेइ पच्च० २ ता संजलणकोहमाणमायालोभे खवेइ संज० २ ता पंचविहं नाणावरणिज्जं नवविहं दरिसणावरणिज्जं पंचविहमंतराइयं तालमत्थकडं च णं मोहणिज्जं कट्ठु कम्मरयविकरणकरं अपुव्वकरणं अणुपविट्ठस्स अणंते अणुत्तरे निव्वाघाए निरा-वरणे कसिणे पडिपुत्ते केवलवरणाणदंसणे समुप्पज्जइ ॥ ३६६ ॥ से णं भंते ! केवलि-पन्नतं धम्मं आघवेज्ज वा पन्नवेज्ज वा परूवेज्ज वा ? नो तिणट्ठे समट्ठे, णण्णत्थ एग-णाएणं वा एगवागरणेण वा, से णं भंते ! पव्वावेज्ज वा मुंडावेज्ज वा ? णो तिणट्ठे समट्ठे, उवएसं पुण करेज्जा, से णं भंते ! किं तिसिज्झइ जाव अंतं करेइ ? हंता सिज्झइ जाव अंतं करेइ ॥ ३६७ ॥ से णं भंते ! किं उट्ठं होज्जा अहो होज्जा तिरियं होज्जा ? गोयमा ! उट्ठं वा होज्जा अहे वा होज्जा तिरियं वा होज्जा, उट्ठं होज्जमाणे सदावइ-वियडावइगंधावइमालवंतपरियाएसु वट्ठवेयड्डपव्वएसु होज्जा, साहरणं पडुच्च सोम-

णसवणे वा पंडगवणे वा होज्जा, अहे होज्जमाणे गट्टाए वा दरीए वा होज्जा, साह-
रणं पडुच्च पायाले वा भवणे वा होज्जा, तिरियं होज्जमाणे पन्नरससु कम्मभूमीसु
होज्जा, साहरणं पडुच्च अट्ठाइजे दीवसमुदे तदेकदेसभाए होज्जा, ते णं भंते ! एग-
समएणं केवइया होज्जा ? गोयमा ! जहन्नेणं एक्को वा दो वा तिसि वा उक्कोसेणं दस,
से तेणट्ठेणं गोयमा ! एवं वुच्चइ असोच्चा णं केवलिस्स वा जाव अत्येगइए केवलि-
पन्नत्तं धम्मं लभेज्ज सवणयाए, अत्येगइए असोच्चा णं केवलिस्स वा जाव नो लभेज्ज
सवणयाए जाव अत्येगइए केवलनाणं उप्पाडेज्जा, अत्येगइए केवलनाणं नो उप्पाडेज्जा
॥३६८॥ सोच्चा णं भंते ! केवलिस्स वा जाव तप्पक्खियउवासियाए वा केवलिपन्नत्तं
धम्मं लभेज्ज सवणयाए ? गोयमा ! सोच्चा णं केवलिस्स वा जाव अत्येगइए केवलि-
पन्नत्तं धम्मं एवं जा चेव असोच्चाए वत्तव्वया सा चेव सोच्चाएवि भाणियव्वा, नवरं
अभिलावो सोच्चत्ति, सेसं तं चेव निरवसेसं जाव जस्स णं मणपज्जवणाणावरणिज्जाणं
कम्माणं खओवसमे कडे भवइ जस्स णं केवलनाणावरणिज्जाणं कम्माणं खए कडे
भवइ से णं सोच्चा केवलिस्स वा जाव उवासियाए वा केवलिपन्नत्तं धम्मं लभेज्ज
सवणयाए केवलं वोहिं वुज्झेज्जा जाव केवलनाणं उप्पाडेज्जा, तस्स णं अट्ठमंअट्ठमेणं
अनिक्खित्तेणं तवोकम्मेणं अप्पाणं भावेमाणस्स पगइभइयाए तहेव जाव गवेसणं
करेमाणस्स ओहिणाणे समुप्पज्जइ, से णं तेणं ओहिणाणेणं समुप्पन्नेणं जहन्नेणं
अंगुलस्स असंखेज्जइभागं उक्कोसेणं असंखेज्जाइं अलोए लोयप्पमाणमेत्ताइं खण्डाइं
जाणइ पासइ ॥ से णं भंते ! कइसु लेस्सासु होज्जा ? गोयमा ! छसु लेस्सासु होज्जा,
तंजहा-कण्हलेसाए जाव सुक्कलेसाए । से णं भंते ! कइसु णाणेषु होज्जा ? गोयमा !
तिसु वा चउसु वा होज्जा, तिसु होज्जमाणे तिसु आभिणिवोहियनाणसुयनाणओहि-
नाणेषु होज्जा, चउसु होज्जमाणे आभि० सुय० ओहि० मणपज्जवणाणेषु होज्जा । से
णं भंते ! किं सजोगी होज्जा अजोगी होज्जा ? एवं जोगोवओगो संघयणं संठाणं उच्चत्तं
आउयं च, एयाणि सव्वाणि जहा असोच्चाए तहेव भाणियव्वाणि । से णं भंते !
किं सवेदए० ? पुच्छा, गोयमा ! सवेदए वा होज्जा अवेदए वा होज्जा, जइ अवेदए
होज्जा किं उवसंतवेयए होज्जा खीणवेयए होज्जा ? गोयमा ! नो उवसंतवेदए
होज्जा खीणवेदए होज्जा, जइ सवेदए होज्जा किं इत्थिवेदए होज्जा पुरिसवेदए
होज्जा नपुंसगवेदए होज्जा पुरिसनपुंसगवेदए होज्जा ? पुच्छा, गोयमा ! इत्थि-
वेदए वा होज्जा पुरिसवेदए वा होज्जा पुरिसनपुंसगवेदए वा होज्जा । से णं भंते !
किं सकसाई होज्जा अकसाई होज्जा ? गोयमा ! सकसाई वा होज्जा अकसाई वा
होज्जा, जइ अकसाई होज्जा किं उवसंतकसाई होज्जा खीणकसाई होज्जा ? गोयमा !

नो उवसंतकसाई होज्जा खीणकसाई होज्जा, जइ सकसाई होज्जा से णं भंते !
 कइसु कसाएसु होज्जा ? गोयमा ! चउसु वा तिसु वा दोसु वा एगंमि वा होज्जा,
 चउसु होज्जमाणे चउसु संजलणकोहमाणमायालोभेसु होज्जा, तिसु होज्जमाणे तिसु
 संजलणमाणमायालोभेसु होज्जा, दोसु होज्जमाणे दोसु संजलणमायालोभेसु होज्जा,
 एगंमि होज्जमाणे एगंमि संजलणे लोभे होज्जा । तस्स णं भंते ! केवइया अज्झ-
 वसाणा पण्णत्ता ? गोयमा ! असंखेज्जा, एवं जहा असोच्चाए तहेव जाव केवल-
 वरणाणदंसणे समुप्पज्जइ, से णं भंते ! केवलिपन्नत्तं धम्मं आघवेज्ज वा पन्नवेज्ज
 वा परूवेज्ज वा ? हंता गोयमा ! आघवेज्ज वा पन्नवेज्ज वा परूवेज्ज वा । से णं भंते !
 पव्वावेज्ज वा मुंडावेज्ज वा ? हंता गोयमा ! पव्वावेज्ज वा मुंडावेज्ज वा, तस्स णं
 भंते ! सिस्सावि पव्वावेज्ज वा मुंडावेज्ज वा ? हंता पव्वावेज्ज वा मुण्डावेज्ज वा,
 तस्स णं भंते ! पसिस्सावि पव्वावेज्ज वा मुंडावेज्ज वा ? हंता पव्वावेज्ज वा मुंडा-
 वेज्ज वा । से णं भंते ! सिज्झइ बुज्झइ जाव अंतं करेइ ? हंता सिज्झइ जाव
 अंतं करेइ, तस्स णं भंते ! सिस्सावि सिज्झंति जाव अंतं करेन्ति ? हंता सिज्झंति
 जाव अंतं करेन्ति, तस्स णं भंते ! पसिस्सावि सिज्झंति जाव अंतं करेन्ति ? एवं
 चेव जाव अंतं करेन्ति । से णं भंते ! किं उहुं होज्जा जहेव असोच्चाए जाव तदे-
 कदेसमाए होज्जा । ते णं भंते ! एगसमएणं केवइया होज्जा ? गोयमा ! जहन्नेणं
 एको वा दो वा तिज्जि वा उक्कोसेणं अट्ठसयं १०८, से तेणट्ठेणं गोयमा ! एवं वुच्चइ-
 सोच्चा णं केवलिस्स वा जाव केवलिउवासियाए वा जाव अत्थेगइए केवलनाणं
 उप्पाडेज्जा अत्थेगइए केवलनाणं नो उप्पाडेज्जा । सेवं भंते ! २ त्ति ॥ ३६९ ॥

नवमसयस्स इगतीसइमो उद्देसो समत्तो ॥

तेणं कालेणं तेणं समएणं वाणियगामे नगरे होत्था वन्नओ, दूइपलासे उज्जाणे
 सामी समोसढे, परिसा निगगया, धम्मो कहिओ, परिसा पडिगया, तेणं कालेणं
 तेणं समएणं पासावच्चिजे गंगेए नामं अणगारे जेणेव समणे भगवं महावीरे तेणेव
 उवागच्छइ तेणेव उवागच्छइत्ता समणस्स भगवओ महावीरस्स अदूरसामंते ठिच्चा
 समगं भगवं महावीरं एवं वयांसी-संतरं भंते ! नेरइया उववज्जंति निरंतरं नेरइया
 उववज्जंति ? गंगेया ! संतरंपि नेरइया उववज्जंति निरंतरंपि नेरइया उववज्जंति, संतरं
 भंते ! असुरकुमारा उववज्जंति निरंतरं असुरकुमारा उववज्जंति ? गंगेया ! संतरंपि
 असुरकुमारा उववज्जंति निरंतरंपि असुरकुमारा उववज्जंति, एवं जाव थणियकुमारा,
 संतरं भंते ! पुढविकाइया उववज्जंति निरंतरं पुढविकाइया उववज्जंति ? गंगेया ! नो
 संतरं पुढविकाइया उववज्जंति निरंतरं पुढविकाइया उववज्जंति, एवं जाव वणस्सइ-

काइया, बेइंदिया जाव वेमाणिया एए जहा णेरइया ॥ ३७० ॥ संतरं भंते ! नेर-
इया उववट्ठंति निरंतरं नेरइया उववट्ठंति ? गंगेया ! संतरंपि नेरइया उववट्ठंति निरं-
तरंपि नेरइया उववट्ठंति, एवं जाव थणियकुमारा, संतरं भंते ! पुढविकाइया उवव-
ट्ठंति० ? पुच्छा, गंगेया ! णो संतरं पुढविकाइया उववट्ठंति निरंतरं पुढविकाइया उवव-
ट्ठंति, एवं जावं वणस्सइकाइया नो संतरं निरंतरं उववट्ठंति, संतरं भंते ! बेइंदिया
उववट्ठंति निरंतरं बेदिया उववट्ठंति ? गंगेया ! संतरंपि बेइंदिया उववट्ठंति निरंतरंपि
बेइंदिया उववट्ठंति, एवं जाव वाणमंतरा, संतरं भंते ! जोइसिया चयंति० ? पुच्छा,
गंगेया ! संतरंपि जोइसिया चयंति निरंतरंपि जोइसिया चयंति, एवं जाव वेमाणिया
॥ ३७१ ॥ कइविहे णं भंते ! पवेसणए प० ? गंगेया ! चउव्विहे पवेसणए पन्नत्ते
तंजहा-नेरइयपवेसणए, तिरेक्खजोणियपवेसणए, मणुस्सपवेसणए, देवपवेसणए ।
नेरइयपवेसणए णं भंते ! कइविहे पन्नत्ते ? गंगेया ! सत्तविहे पन्नत्ते, तंजहा-रय-
णप्पभापुढविनेरइयपवेसणए जाव अहेसत्तमापुढविनेरइयपवेसणए ॥ एगे णं भंते !
नेरइए नेरइयपवेसणएणं पविसमाणे किं रयणप्पभाए होज्जा सक्करप्पभाए होज्जा
एवं जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए
वा होज्जा । दो भंते ! नेरइया नेरइयपवेसणएणं पविसमाणा किं रयणप्पभाए होज्जा
जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा
होज्जा, अहवा एगे रयणप्पभाए एगे सक्करप्पभाए होज्जा अहवा एगे रयणप्पभाए
एगे वालुयप्पभाए होज्जा जाव एगे रयणप्पभाए एगे अहेसत्तमाए होज्जा, अहवा
एगे सक्करप्पभाए एगे वालुयप्पभाए होज्जा जाव अहवा एगे सक्करप्पभाए एगे
अहेसत्तमाए होज्जा, अहवा एगे वालुयप्पभाए एगे पंक्कप्पभाए होज्जा एवं जाव
अहवा एगे वालुयप्पभाए एगे अहेसत्तमाए होज्जा, एवं एक्केक्का पुढवी छड्डयव्वा
जाव अहवा एगे तमाए एगे अहेसत्तमाए होज्जा ॥ तिन्नि भंते ! नेरइया नेरइय-
पवेसणएणं पविसमाणा किं रयणप्पभाए होज्जा जाव अहेसत्तमाए होज्जा ? गंगेया !
रयणप्पभाए वा होज्जा जाव अहेसत्तमाए वा होज्जा, अहवा एगे रयणप्पभाए दो
सक्करप्पभाए होज्जा जाव अहवा एगे रयणप्पभाए दो अहेसत्तमाए होज्जा ६ अहवा
दो रयणप्पभाए एगे सक्करप्पभाए होज्जा जाव अहवा दो रयणप्पभाए एगे अहे-
सत्तमाए होज्जा १२ अहवा एगे सक्करप्पभाए दो वालुयप्पभाए होज्जा जाव अहवा
एगे सक्करप्पभाए दो अहेसत्तमाए होज्जा १७ अहवा दो सक्करप्पभाए एगे वालुय-
प्पभाए होज्जा जाव अहवा दो सक्करप्पभाए एगे अहेसत्तमाए होज्जा २२ एवं जहा
सक्करप्पभाए वत्तव्या भणिया तहा सव्वपुढवीणं भाणियव्वा जाव अहवा दो

तमाए एगे अहेसत्तमाए होजा, ४-४-३-३-२-२-१-१ (४२) अहवा एगे
 रयणप्पभाए एगे सक्करप्पभाए एगे वालुयप्पभाए होजा १ अहवा एगे रयणप्पभाए
 एगे सक्करप्पभाए एगे पंकप्पभाए होजा २ जाव अहवा एगे रयणप्पभाए एगे
 सक्करप्पभाए एगे अहेसत्तमाए होजा ५ अहवा एगे रयणप्पभाए एगे वालुयप्पभाए
 एगे पंकप्पभाए होजा ६ अहवा एगे रयणप्पभाए एगे वालुयप्पभाए एगे धूमप्प-
 भाए होजा ७ एवं जाव अहवा एगे रयणप्पभाए एगे वालुयप्पभाए एगे अहेसत्तमाए
 होजा ९, अहवा एगे रयणप्पभाए एगे पंकप्पभाए एगे धूमप्पभाए होजा १० जाव
 अहवा एगे रयणप्पभाए एगे पंकप्पभाए एगे अहेसत्तमाए होजा १२ अहवा एगे
 रयणप्पभाए एगे धूमप्पभाए एगे तमाए होजा १३ अहवा एगे रयणप्पभाए एगे
 धूमप्पभाए एगे अहेसत्तमाए होजा १४ अहवा एगे रयणप्पभाए एगे तमाए एगे
 अहेसत्तमाए होजा १५ अहवा एगे सक्करप्पभाए एगे वालुयप्पभाए एगे पंकप्पभाए
 होजा १६ अहवा एगे सक्करप्पभाए एगे वालुयप्पभाए एगे धूमप्पभाए होजा १७
 जाव अहवा एगे सक्करप्पभाए एगे वालुयप्पभाए एगे अहेसत्तमाए होजा १९ अहवा
 एगे सक्करप्पभाए एगे पंकप्पभाए एगे धूमप्पभाए होजा २० जाव अहवा एगे सक्कर०
 एगे पंक० एगे अहेसत्तमाए होजा २२ अहवा एगे सक्करप्पभाए एगे धूमप्पभाए
 एगे तमाए होजा २३ अहवा एगे सक्करप्पभाए एगे धूमप्पभाए एगे अहेसत्तमाए होजा
 २४ अहवा एगे सक्करप्पभाए एगे तमाए एगे अहेसत्तमाए होजा २५ अहवा एगे
 वालुयप्पभाए एगे पंकप्पभाए एगे धूमप्पभाए होजा २६ अहवा एगे वालुयप्पभाए
 एगे पंकप्पभाए एगे तमाए होजा २७ अहवा एगे वालुयप्पभाए एगे पंकप्पभाए एगे
 अहेसत्तमाए होजा २८ अहवा एगे वालुयप्पभाए एगे धूमप्पभाए एगे तमाए होजा
 २९ अहवा एगे वालुयप्पभाए एगे धूमप्पभाए एगे अहेसत्तमाए होजा ३० अहवा
 एगे वालुयप्पभाए एगे तमाए एगे अहेसत्तमाए होजा ३१ अहवा एगे पंकप्पभाए
 एगे धूमप्पभाए एगे तमाए होजा ३२ अहवा एगे पंकप्पभाए एगे धूमप्पभाए एगे
 अहेसत्तमाए होजा ३३ अहवा एगे पंकप्पभाए एगे तमाए एगे अहेसत्तमाए होजा
 ३४ अहवा एगे धूमप्पभाए एगे तमाए एगे अहेसत्तमाए होजा ३५ ॥ चत्तारि भंते !
 नेरइया नेरइयपवेसणएणं पविसमाणा कि रयणप्पभाए होजा ० ? पुच्छा, गंगेया !
 रयणप्पभाए वा होजा जाव अहेसत्तमाए वा होजा ७, अहवा एगे रयणप्पभाए तिनि
 सक्करप्पभाए होजा अहवा एगे रयणप्पभाए तिनि वालुयप्पभाए होजा एवं जाव
 अहवा एगे रयणप्पभाए तिनि अहेसत्तमाए होजा ६ अहवा दो रयणप्पभाए दो
 सक्करप्पभाए होजा एवं जाव अहवा दो रयणप्पभाए दो अहेसत्तमाए होजा १२,

अहवा तिन्नि रयणप्पभाए एगे सक्करप्पभाए होज्जा, एवं जाव अहवा तिन्नि रयण-
 प्पभाए एगे अहेसत्तमाए होज्जा १८, अहवा एगे सक्करप्पभाए तिन्नि वालुयप्पभाए
 होज्जा, एवं जहेव रयणप्पभाए उवरिमाहिं समं संचारियं तहा सक्करप्पभाएवि उव-
 रिमाहिं समं संचारेयव्वं ५, एवं एक्केक्काए समं संचारियव्वं जाव अहवा तिन्नि तमाए
 एगे अहेसत्तमाए होज्जा १२-६-३-(६३) अहवा एगे रयणप्पभाए एगे सक्कर-
 प्पभाए दो वालुयप्पभाए होज्जा अहवा एगे रयणप्पभाए एगे सक्कर० दो पंक०
 होज्जा एवं जाव अहवा एगे रयणप्पभाए एगे सक्कर० दो अहेसत्तमाए होज्जा ५ अहवा
 एगे रयण० दो सक्कर० एगे वालुयप्पभाए होज्जा एवं जाव अहवा एगे रयण० दो
 सक्कर० एगे अहेसत्तमाए होज्जा १० अहवा दो रयण० एगे सक्कर० एगे वालुय-
 प्पभाए होज्जा, एवं जाव अहवा दो रयण० एगे सक्कर० एगे अहेसत्तमाए होज्जा
 १५ अहवा एगे रयण० एगे वालुय० दो पंकप्पभाए होज्जा एवं जाव अहवा एगे
 रयणप्पभाए एगे वालुय० दो अहेसत्तमाए होज्जा ४ एवं एणं गमएणं जहा तिण्हं
 तियसंजोगे तहा भाणियव्वो जाव अहवा दो धूमप्पभाए एगे तमाए एगे अहेसत्त-
 माए होज्जा १०५ अहवा एगे रयणप्पभाए एगे सक्करप्पभाए एगे वालुयप्पभाए
 एगे पंकप्पभाए होज्जा १ अहवा एगे रयणप्पभाए एगे सक्कर० एगे वालुय० एगे
 धूमप्पभाए होज्जा २ अहवा एगे रयण० एगे सक्कर० एगे वालुय० एगे तमाए
 होज्जा ३ अहवा एगे रयणप्पभाए एगे सक्करप्पभाए एगे वालुयप्पभाए एगे अहेसत्त-
 माए होज्जा ४ अहवा एगे रयण० एगे सक्कर० एगे पंक० एगे धूमप्पभाए होज्जा ५
 अहवा एगे रयण० एगे सक्कर० एगे पंकप्पभाए एगे तमाए होज्जा ६ अहवा एगे
 रयण० एगे सक्कर० एगे पंक० एगे अहेसत्तमाए होज्जा ७ अहवा एगे रयणप्पभाए
 एगे सक्कर० एगे धूम० एगे तमाए होज्जा ८ अहवा एगे रयण० एगे सक्कर० एगे
 धूम० एगे अहेसत्तमाए होज्जा ९ अहवा एगे रयण० एगे सक्करप्पभाए एगे तमाए
 एगे अहेसत्तमाए होज्जा १० अहवा एगे रयण० एगे वालुय० एगे पंक० एगे
 धूमप्पभाए होज्जा ११ अहवा एगे रयण० एगे वालुय० एगे पंक० एगे तमाए
 होज्जा १२ अहवा एगे रयण० एगे वालुय० एगे पंक० एगे अहेसत्तमाए होज्जा
 १३ अहवा एगे रयण० एगे वालुय० एगे धूम० एगे तमाए होज्जा १४ अहवा
 एगे रयणप्पभाए एगे वालुय० एगे धूम० एगे अहेसत्तमाए होज्जा १५ अहवा एगे
 रयण० एगे वालुय० एगे तमाए एगे अहेसत्तमाए होज्जा १६ अहवा एगे रयण०
 एगे पंक० एगे धूम० एगे तमाए होज्जा १७ अहवा एगे रयण० एगे पंक० एगे
 धूम० एगे अहेसत्तमाए होज्जा १८ अहवा एगे रयण० एगे पंक० एगे तमाए एगे

अहेसत्तमाए होज्जा १९ अहवा एगे रयण० एगे धूम० एगे तमाए एगे अहेसत्त-
माए होज्जा २० अहवा एगे सक्कर० एगे वालुय० एगे पंक० एगे धूमप्पभाए होज्जा
२१ एवं जहा रयणप्पभाए उवरिमाओ पुढवीओ संचारियाओ तहा सक्करप्पभाएवि
उवरिमाओ चा(उच्चा)रियव्वाओ जाव अहवा एगे सक्कर० एगे धूम० एगे तमाए एगे
अहेसत्तमाए होज्जा ३० अहवा एगे वालुय० एगे पंक० एगे धूम० एगे तमाए होज्जा
३१ अहवा एगे वालुय० एगे पंक० एगे धूमप्पभाए एगे अहेसत्तमाए होज्जा ३२
अहवा एगे वालुय० एगे पंक० एगे तमाए एगे अहेसत्तमाए होज्जा ३३ अहवा एगे
वालुय० एगे धूम० एगे तमाए एगे अहेसत्तमाए होज्जा ३४ अहवा एगे पंक० एगे
धूम० एगे तमाए एगे अहेसत्तमाए होज्जा ३५ ॥ पंच भंते ! नेरइया नेरइयप्पवे-
सणएणं पविसमाणा किं रयणप्पभाए होज्जा० ? पुच्छा, गंगेया ! रयणप्पभाए वा
होज्जा जाव अहेसत्तमाए वा होज्जा अहवा एगे रयण० चत्तारि सक्करप्पभाए होज्जा
जाव अहवा एगे रयण० चत्तारि अहेसत्तमाए होज्जा अहवा दो रयण० तिन्नि सक्क-
रप्पभाए होज्जा एवं जाव अहवा दो रयणप्पभाए तिन्नि अहेसत्तमाए होज्जा अहवा
तिन्नि रयण० दो सक्करप्पभाए होज्जा एवं जाव अहवा तिण्णि रयणप्पभाए दोण्णि
अहेसत्तमाए होज्जा अहवा चत्तारि रयण० एगे सक्करप्पभाए होज्जा एवं जाव अहवा
चत्तारि रयण० एगे अहेसत्तमाए होज्जा अहवा एगे सक्कर० चत्तारि वालुयप्पभाए
होज्जा एवं जहा रयणप्पभाए समं उवरिमपुढवीओ संचारियाओ तहा सक्करप्पभाएवि
समं चा(उच्चा)रेयव्वाओ जाव अहवा चत्तारि सक्करप्पभाए एगे अहेसत्तमाए होज्जा
एवं एक्केकाए समं चा(उच्चा)रेयव्वाओ जाव अहवा चत्तारि तमाए एगे अहेसत्तमाए
होज्जा अहवा एगे रयण० एगे सक्कर० तिन्नि वालुयप्पभाए होज्जा एवं जाव अहवा
एगे रयण० एगे सक्कर० तिन्नि अहेसत्तमाए होज्जा अहवा एगे रयण० दो सक्कर०
दो वालुयप्पभाए होज्जा एवं जाव अहवा एगे रयण० दो सक्कर० दो अहेसत्तमाए
होज्जा अहवा दो रयणप्पभाए एगे सक्करप्पभाए दो वालुयप्पभाए होज्जा एवं जाव
अहवा दो रयणप्पभाए एगे सक्करप्पभाए दो अहेसत्तमाए होज्जा अहवा एगे रयण०
तिन्नि सक्कर० एगे वालुयप्पभाए होज्जा एवं जाव अहवा एगे रयण० तिन्नि सक्कर०
एगे अहेसत्तमाए होज्जा अहवा दो रयण० दो सक्कर० एगे वालुयप्पभाए होज्जा एवं
जाव दो रयण० दो सक्कर० एगे अहेसत्तमाए होज्जा अहवा तिन्नि रयण० एगे सक्कर०
एगे वालुयप्पभाए होज्जा एवं जाव अहवा तिन्नि रयण० एगे सक्कर० एगे अहेस-
त्तमाए होज्जा अहवा एगे रयण० एगे वालुय० तिन्नि पंकप्पभाए होज्जा, एवं एएणं
कमेणं जहा चउण्हं तियासंजोगो भणिओ तहा पंचण्हवि तियासंजोगो भाणियव्वो

नवरं तत्थ एगो संचारिज्जइ इह दोन्नि सेसं तं चेव जाव अहवा तिन्नि धूमप्पभाए
 एगे तमाए एगे अहेसत्तमाए होज्जा अहवा एगे रयण० एगे सक्कर० एगे वालुय०
 दो पंकप्पभाए होज्जा एवं जाव अहवा एगे रयण० एगे सक्कर० एगे वालुय० दो
 अहेसत्तमाए होज्जा ४ अहवा एगे रयण० एगे सक्कर० दो वालुय० एगे पंकप्पभाए
 होज्जा एवं जाव अहवा एगे रयण० एगे सक्कर० दो वालुय० एगे अहेसत्तमाए
 होज्जा ८, अहवा एगे रयण० दो सक्करप्पभाए एगे वालुय० एगे पंकप्पभाए होज्जा
 एवं जाव अहवा एगे रयण० दो सक्कर० एगे वालुय० एगे अहेसत्तमाए होज्जा
 १२ अहवा दो रयण० एगे सक्कर० एगे वालुय० एगे पंकप्पभाए होज्जा एवं जाव
 अहवा दो रयण० एगे सक्कर० एगे वालुय० एगे अहेसत्तमाए होज्जा १६ अहवा,
 एगे रयण० एगे सक्कर० एगे पंक० दो धूमप्पभाए होज्जा एवं जहा चउण्हं चउ-
 क्संजोगो भणिओ तहा पंचण्हवि चउक्कसंजोगो भाणियव्वो, नवरं अब्भहियं एगो
 संचारेयव्वो, एवं जाव अहवा दो पंक० एगे धूम० एगे तमाए एगे अहेसत्तमाए
 होज्जा अहवा एगे रयण० एगे सक्कर० एगे वालुय० एगे पंक० एगे धूमप्पभाए
 होज्जा १ अहवा एगे रयण० एगे सक्कर० एगे वालुय० एगे पंक० एगे तमाए
 होज्जा २ अहवा एगे रयण० जाव एगे पंक० एगे अहेसत्तमाए होज्जा ३ अहवा
 एगे रयण० एगे सक्कर० एगे वालुयप्पभाए एगे धूमप्पभाए एगे तमाए होज्जा ४
 अहवा एगे रयण० एगे सक्कर० एगे वालुय० एगे धूमाए एगे अहेसत्तमाए होज्जा
 ५ अहवा एगे रयण० एगे सक्कर० एगे वालुय० एगे तमाए एगे अहेसत्तमाए
 होज्जा ६ अहवा एगे रयण० एगे सक्कर० एगे पंक० एगे धूम० एगे तमाए होज्जा
 ७ अहवा एगे रयण० एगे सक्कर० एगे पंक० एगे धूम० एगे अहेसत्तमाए होज्जा
 ८ अहवा एगे रयण० एगे सक्कर० एगे पंक० एगे तमाए एगे अहेसत्तमाए होज्जा
 ९ अहवा एगे रयण० एगे सक्कर० एगे धूम० एगे तमाए एगे अहेसत्तमाए होज्जा
 १० अहवा एगे रयण० एगे वालुय० एगे पंक० एगे धूम० एगे तमाए होज्जा ११
 अहवा एगे रयण० एगे वालुय० एगे पंक० एगे धूम० एगे अहेसत्तमाए होज्जा १२
 अहवा एगे रयण० एगे वालुय० एगे पंक० एगे तमाए एगे अहेसत्तमाए होज्जा १३
 अहवा एगे रयण० एगे वालुय० एगे धूम० एगे तमाए एगे अहेसत्तमाए होज्जा १४
 अहवा एगे रयण० एगे पंक० जाव एगे अहेसत्तमाए होज्जा १५ अहवा एगे सक्कर०
 एगे वालुय० जाव एगे तमाए होज्जा १६ अहवा एगे सक्कर० जाव एगे पंक० एगे
 धूम० एगे अहेसत्तमाए होज्जा १७ अहवा एगे सक्कर० जाव एगे पंक० एगे
 तमाए एगे अहेसत्तमाए होज्जा १८ अहवा एगे सक्कर० एगे वालुय० एगे धूम०

एगे तमाए एगे अहेसत्तमाए होज्जा १९ अहवा एगे सक्कर० एगे पंक० जाव एगे
 अहेसत्तमाए होज्जा २० अहवा एगे वालुय० जाव एगे अहे सत्तमाए होज्जा २१ ॥
 छब्भंते ! नेरइया नेरइयप्पवेसणएणं पविसमाणा किं रयणप्पभाए होज्जा ० ? पुच्छा,
 गंगेया ! रयणप्पभाए वा होज्जा जाव अहेसत्तमाए वा होज्जा ७ अहवा एगे रयण०
 पंच सक्करप्पभाए होज्जा अहवा एगे रयण० पंच वालुयप्पभाए होज्जा एवं जाव अहवा
 एगे रयण० पंच अहेसत्तमाए होज्जा अहवा दो रयण० चत्तारि सक्करप्पभाए होज्जा
 एवं जाव अहवा दो रयण० चत्तारि अहेसत्तमाए होज्जा अहवा तिन्नि रयण० तिन्नि सक्क-
 रप्पभाए होज्जा, एवं एएणं कमेणं जहा पंचण्हं दुयासंजोगो तहा छण्हवि भाणियव्वो
 नवरं एक्को अब्भहिओ संचारेयव्वो जाव अहवा पंच तमाए एगे अहेसत्तमाए
 होज्जा, अहवा एगे रयण० एगे सक्कर० चत्तारि वालुयप्पभाए होज्जा अहवा एगे
 रयण० एगे सक्कर० चत्तारि पंकप्पभाए होज्जा एवं जाव अहवा एगे रयण० एगे
 सक्कर० चत्तारि अहेसत्तमाए होज्जा अहवा एगे रयण० दो सक्कर० तिन्नि वालुय-
 प्पभाए होज्जा, एवं एएणं कमेणं जहा पंचण्हं तियासंजोगो भणिओ तहा छण्हवि
 भाणियव्वो णवरं एक्को अब्भहिओ उच्चारेयव्वो, सेसं तं चेव ३४, चउक्कसंजोगोवि
 तहेव, पंचगसंजोगोवि तहेव, नवरं एक्को अब्भहिओ संचारेयव्वो जाव पच्छिमो
 भंगो अहवा दो वालुय० एगे पंक० एगे धूम० एगे तमाए एगे अहेसत्तमाए होज्जा
 अहवा एगे रयण० एगे सक्कर० जाव एगे तमाए होज्जा १ अहवा एगे रयण०
 जाव एगे धूम० एगे अहेसत्तमाए होज्जा २ अहवा एगे रयण० जाव एगे पंक०
 एगे तमाए एगे अहेसत्तमाए होज्जा ३ अहवा एगे रयण० जाव एगे वालुय० एगे
 धूम० जाव एगे अहेसत्तमाए होज्जा ४ अहवा एगे रयण० एगे सक्कर० एगे पंक०
 जाव एगे अहेसत्तमाए होज्जा ५ अहवा एगे रयण० एगे वालुय० जाव एगे अहे-
 सत्तमाए होज्जा ६ अहवा एगे सक्करप्पभाए एगे वालुयप्पभाए जाव एगे अहेसत्तमाए
 होज्जा ७ ॥ सत्त भंते ! नेरइया नेरइयपवेसणएणं पविसमाणा ० पुच्छा, गंगेया !
 रयणप्पभाए वा होज्जा जाव अहे सत्तमाए वा होज्जा ७, अहवा एगे रयणप्पभाए छ
 सक्करप्पभाए होज्जा एवं एएणं कमेणं जहा छण्हं दुयासंजोगो तहा सत्तण्हवि भाणि-
 यव्वं नवरं एगो अब्भहिओ संचारिज्जइ, सेसं तं चेव, तियासंजोगो चउक्कसंजोगो
 पंचसंजोगो छक्कसंजोगो य छण्हं जहा तहा सत्तण्हवि भाणियव्वं, नवरं एक्केक्को
 अब्भहिओ संचारेयव्वो जाव छक्कगसंजोगो अहवा दो सक्कर० एगे वालुय० जाव एगे
 अहेसत्तमाए होज्जा अहवा एगे रयण० एगे सक्कर० जाव एगे अहेसत्तमाए होज्जा ॥
 अट्ठ भंते ! नेरइया नेरइयपवेसणएणं पविसमाणा ० पुच्छा, गंगेया ! रयणप्पभाए

वा होज्जा जाव अहेसत्तमाए वा होज्जा अहवा एगे रयण० सत्त सक्करप्पभाए होज्जा एवं दुयासंजोगो जाव छक्कसंजोगो य जहा सत्तण्हं भणि(यं)ओ तहा अट्ठण्हवि भाणि-यव्वं नवरं एक्केक्को अब्भहिओ संचारेयव्वो सेसं तं चेव जाव छक्कसंजोगस्स अहवा तिन्नि सक्कर० एगे वालुय० जाव एगे अहेसत्तमाए होज्जा अहवा एगे रयण० जाव एगे तमाए दो अहेसत्तमाए होज्जा अहवा एगे रयण० जाव दो तमाए एगे अहेसत्तमाए होज्जा एवं संचारेयव्वं जाव अहवा दो रयण० एगे सक्कर० जाव एगे अहेसत्तमाए होज्जा ॥ नव भंते ! नेरइया नेरइयपवेसणएणं पविसमाणा कि रयणप्पभाए होज्जा ० ? पुच्छा, गंगेया ! रयणप्पभाए वा होज्जा जाव अहेसत्तमाए वा होज्जा अहवा एगे रयण० अट्ठ सक्करप्पभाए होज्जा एवं दुयासंजोगो जाव सत्तगसंजोगो य जहा अट्ठण्हं भणियं तहा नवण्हंपि भाणियव्वं नवर एक्केक्को अब्भहिओ संचारेयव्वो, सेसं तं चेव पच्छिमो आलावगो अहवा तिन्नि रयण० एगे सक्कर० एगे वालुय० जाव एगे अहेसत्तमाए होज्जा ॥ दस भंते ! नेरइया नेरइयपवेसणएणं पविसमाणा० पुच्छा, गंगेया ! रयणप्पभाए वा होज्जा जाव अहेसत्तमाए वा होज्जा ७ अहवा एगे रयणप्पभाए नव सक्करप्पभाए होज्जा एवं दुयासंजोगो जाव सत्तसंजोगो य जहा नवण्हं नवरं एक्केक्को अब्भहिओ संचारेयव्वो सेसं तं चेव पच्छिमो आलावगो अहवा चत्तारि रयण० एगे सक्करप्पभाए जाव एगे अहेसत्तमाए होज्जा ॥ संखेज्जा भंते ! नेरइया नेरइयप्पवेसणएणं पविसमाणा० पुच्छा, गंगेया ! रयणप्पभाए वा होज्जा जाव अहेसत्तमाए वा होज्जा ७ अहवा एगे रयण० संखेज्जा सक्करप्पभाए होज्जा एवं जाव अहवा एगे रयण० संखेज्जा अहेसत्तमाए होज्जा अहवा दो रयण० संखेज्जा सक्करप्पभाए होज्जा एवं जाव अहवा दो रयण० संखेज्जा अहेसत्तमाए होज्जा अहवा तिन्नि रयण० संखेज्जा सक्करप्पभाए होज्जा एवं एएणं कमेणं एक्केक्को संचारेयव्वो जाव अहवा दस रयण० संखेज्जा सक्करप्पभाए होज्जा एवं जाव अहवा दस रयण० संखेज्जा अहेसत्तमाए होज्जा अहवा संखेज्जा रयण० संखेज्जा सक्करप्पभाए होज्जा जाव अहवा संखेज्जा रयणप्पभाए संखेज्जा अहेसत्तमाए होज्जा अहवा एगे सक्कर० संखेज्जा वालुयप्पभाए होज्जा एवं जहा रयणप्पभा उवरिमपुढवी(ए)हिं समं चारिया एवं सक्करप्पभा- (ए)वि उवरिमपुढवीहिं समं चारेयव्वा, एवं एक्केक्का पुढवी उवरिमपुढवी(ए)हिं समं चारेयव्वा जाव अहवा संखेज्जा तमाए संखेज्जा अहेसत्तमाए होज्जा अहवा एगे रयण० एगे सक्कर० संखेज्जा वालुयप्पभाए होज्जा अहवा एगे रयण० एगे सक्कर० संखेज्जा पंक्कप्पभाए होज्जा जाव अहवा एगे रयण० एगे सक्कर० संखेज्जा अहेसत्तमाए होज्जा अहवा एगे रयण० दो सक्कर० संखेज्जा वालुयप्पभाए होज्जा

जाव अहवा एगे रयण० दो सक्कर० संखेज्जा अहेसत्तमाए होज्जा अहवा एगे
रयण० तिन्नि सक्कर० संखेज्जा वालुयप्पमाए होज्जा, एवं एएणं कमेणं एक्केक्को संचा-
रेयव्वो जाव अहवा एगे रयण० संखेज्जा सक्कर० संखेज्जा वालुयप्पमाए होज्जा जाव
अहवा एगे रयण० संखेज्जा सक्कर० संखेज्जा अहेसत्तमाए होज्जा अहवा दो रयण०
संखेज्जा सक्कर० संखेज्जा वालुयप्पमाए होज्जा जाव अहवा दो रयण० संखेज्जा सक्कर०
संखेज्जा अहेसत्तमाए होज्जा अहवा तिन्नि रयण० संखेज्जा सक्कर० संखेज्जा वालुय-
प्पमाए होज्जा, एवं एएणं कमेणं एक्केक्को रयणप्पमाए संचारेयव्वो जाव अहवा
संखेज्जा रयण० संखेज्जा सक्कर० संखेज्जा वालुयप्पमाए होज्जा जाव अहवा
संखेज्जा रयण० संखेज्जा सक्कर० संखेज्जा अहेसत्तमाए होज्जा अहवा एगे रयण०
एगे वालुय० संखेज्जा पंकप्पमाए होज्जा जाव अहवा एगे रयण० एगे वालुय०
संखेज्जा अहेसत्तमाए होज्जा अहवा एगे रयण० दो वालुय० संखेज्जा पंकप्पमाए
होज्जा, एवं एएणं कमेणं तियासंजोगो चउक्कसंजोगो जाव सत्तगसंजोगो य जहा
दसण्हं तहेव भाणियव्वो पच्छिमो आलावगो सत्तसंजोगस्स अहवा संखेज्जा रयण०
संखेज्जा सक्कर० जाव संखेज्जा अहेसत्तमाए होज्जा ॥ असंखेज्जा भंते ! नेरइया
नेरइयपवेसणएणं पविसमांजा० पुच्छा, गंगेया ! रयणप्पमाए वा होज्जा जाव अहे-
सत्तमाए वा होज्जा, अहवा एगे रयण० असंखेज्जा सक्करप्पमाए होज्जा, एवं दुयासं-
जोगो जाव सत्तगसंजोगो य जहा संखेज्जाणं भाणिओ तहा असंखेज्जाणवि भाणि-
यव्वो, नवरं, असंखेज्जाओ अव्वमहिओ भाणियव्वो, सेसं तं चेव जाव सत्तगसंजो-
गस्स पच्छिमो आलावगो अहवा असंखेज्जा रयण० असंखेज्जा सक्कर० जाव असं-
खेज्जा अहेसत्तमाए होज्जा ॥ उक्कोसेणं भंते ! नेरइया नेरइयपवेसणएणं० पुच्छा,
गंगेया ! सव्वेवि ताव रयणप्पमाए होज्जा अहवा रयणप्पमाए य सक्करप्पमाए य
होज्जा अहवा रयणप्पमाए य वालुयप्पमाए य होज्जा जाव अहवा रयणप्पमाए य
अहेसत्तमाए य होज्जा अहवा रयणप्पमाए य सक्करप्पमाए य वालुयप्पमाए य होज्जा
एवं जाव अहवा रयण० य सक्करप्पमाए य अहेसत्तमाए य होज्जा ५ अहवा रयण०
य वालुय० य पंकप्पमाए य होज्जा जाव अहवा रयण० य वालुय० य अहेसत्तमाए
य होज्जा ४ अहवा रयण० य पंकप्पमाए य धूमाए य होज्जा एवं रयणप्पमे असुयं-
तेसु जहा तिण्हं तियासंजोगो भाणिओ तहा भाणियव्वं जाव अहवा रयण० य तमाए
य अहेसत्तमाए य होज्जा १५, अहवा रयणप्पमाए य सक्करप्पमाए य वालुय० य
पंकप्पमाए य होज्जा अहवा रयणप्पमाए य सक्करप्पमाए य वालुय० य धूमप्पमाए
य होज्जा जाव अहवा रयणप्पमाए य सक्करप्पमाए य वालुय० य अहेसत्तमाए य

होज्जा ४ अहवा रयण० य सकर० य पंक० य धूमप्पभाए य होज्जा एवं रयणप्पभं
अमुयंतेसु जहा चउण्हं चउक्कसंजोगो तहा भाणियव्वं जाव अहवा रयण० य धूम०
य तमाए य अहेसत्तमाए य होज्जा अहवा रयण० य सकर० य वालुय० य पंक०
य धूमप्पभाए य होज्जा १, अहवा रयणप्पभाए य जाव पंक० य तमाए य होज्जा २
अहवा रयण० य जाव पंकप्पभाए य अहेसत्तमाए य होज्जा ३ अहवा रयण० य सकर०
य वालुय० य धूम० य तमाए य होज्जा ४ एवं रयणप्पभं अमुयंतेसु जहा पंचण्हं
पच्चगसंजोगो तहा भाणियव्वं जाव अहवा रयण० य पंकप्पभाए य जाव अहेसत्तमाए य
होज्जा अहवा रयण० य सकर० य जाव धूमप्पभाए य तमाए य होज्जा १ अहवा
रयण० य जाव धूम० य अहेसत्तमाए य होज्जा २ अहवा रयण० य सकर० य जाव
पंक० य तमाए य अहेसत्तमाए य होज्जा ३ अहवा रयण० य सकर० य वालुय०
य धूमप्पभाए य तमाए य अहेसत्तमाए य होज्जा ४ अहवा रयण० य सकर० य
पंक० य जाव अहेसत्तमाए य होज्जा ५ अहवा रयण० य वालुय० य जाव अहे-
सत्तमाए य होज्जा ६ अहवा रयणप्पभाए य सकर० य जाव अहेसत्तमाए य होज्जा
७ ॥ एयस्स णं भंते ! रयणप्पभापुढविनेरइयपवेसणगस्स सकरप्पभापुढवि० जाव
अहेसत्तमापुढविनेरइयपवेसणगस्स य कयरे २ जाव विसेसाहिया वा ? गंगेया !
सव्वत्थोवे अहेसत्तमापुढविनेरइयपवेसणए, तमापुढविनेरइयपवेसणए असंखेज्जगुणे,
एवं पडिलोमगं जाव रयणप्पभापुढविनेरइयपवेसणए असंखेज्जगुणे ॥ ३७२ ॥
तिरिक्खजोणियपवेसणए, णं भंते ! कइविहे पन्नत्ते ? गंगेया ! पंचविहे पन्नत्ते,
तंजहा-एगिदियतिरिक्खजोणियपवेसणए जाव पंचेदियतिरिक्खजोणियपवेसणए ।
एगे भंते ! तिरिक्खजोणिए तिरिक्खजोणियपवेसणएणं पविसमाणे कि एगिंदिएसु
होज्जा जाव पंचिंदिएसु होज्जा ? गंगेया ! एगिंदिएसु वा होज्जा जाव पंचिंदिएसु वा
होज्जा । दो भंते ! तिरिक्खजोणिया० पुच्छा, गंगेया ! एगिंदिएसु वा होज्जा जाव
पंचिंदिएसु वा होज्जा, अहवा एगे एगिंदिएसु होज्जा एगे वेइंदिएसु होज्जा एवं जहा
नेरइयपवेसणए तहा तिरिक्खजोणियपवेसणएवि भाणियव्वे जाव असंखेज्जा ।
उक्कोसा भंते ! तिरिक्खजोणिया० पुच्छा, गंगेया ! सव्वेवि ताव एगिंदिएसु होज्जा
अहवा एगिंदिएसु य वेइंदिएसु य होज्जा, एवं जहा नेरइया संचारिया तहा तिरिक्ख-
जोणियावि संचारेयव्वा, एगिंदिया अमुयंतेसु दुयासंजोगो तियासंजोगो चउक्कसंजोगो
पंचसंजोगो उव(उज्जि)उंजिऊण भाणियव्वो जाव अहवा एगिंदिएसु य वेइंदिएसु
य जाव पंचिंदिएसु य होज्जा ॥ एयस्स णं भंते ! एगिंदियतिरिक्खजोणियपवेसण-
गस्स जाव पंचिंदियतिरिक्खजोणियपवेसणयस्स कयरे २ जाव विसेसाहिया वा ?

गंगेया । सव्वत्थोवे पंचिदियतिरिक्खजोणियपवेसणए, चउरिदियतिरिक्खजोणिय०
 विसेसाहिए, तेइंदिय० विसेसाहिए, वेइंदिय० विसेसाहिए, एगिंदियतिरिक्ख०
 विसेसाहिए ॥ ३७३ ॥ मणुस्सपवेसणए णं भंते ! कइविहे पन्नत्ते ? गंगेया ! दुविहे
 पन्नत्ते, तंजहा-संमुच्छिममणुस्सपवेसणए य गवभवक्कंतियमणुस्सपवेसणए य । एगे
 भंते ! मणुस्से मणुस्सपवेसणएणं पविसमाणे किं संमुच्छिममणुस्सेसु होज्जा गवभ-
 वक्कंतियमणुस्सेसु होज्जा ? गंगेया ! संमुच्छिममणुस्सेसु वा होज्जा गवभवक्कंतियमणु-
 स्सेसु वा होज्जा । दो भंते ! मणुस्सा० पुच्छा, गंगेया !, संमुच्छिममणुस्सेसु वा होज्जा
 गवभवक्कंतियमणुस्सेसु वा होज्जा अहवा एगे संमुच्छिममणुस्सेसु होज्जा एगे गवभ-
 वक्कंतियमणुस्सेसु होज्जा, एवं एएणं कमेणं जहा नेरइयपवेसणए तहा मणुस्सपवेसण-
 एवि-भाणियव्वे एवं जाव दस ॥ संखेज्जा भंते ! मणुस्सा० पुच्छा, गंगेया !
 संमुच्छिममणुस्सेसु वा होज्जा गवभवक्कंतियमणुस्सेसु वा होज्जा अहवा एगे संमुच्छि-
 ममणुस्सेसु होज्जा संखेज्जा गवभवक्कंतियमणुस्सेसु होज्जा अहवा दो संमुच्छिममणु-
 स्सेसु होज्जा संखेज्जा गवभवक्कंतियमणुस्सेसु होज्जा एवं एक्केक्कं उस्सारिते(रिए)सु जाव
 अहवा संखेज्जा संमुच्छिममणुस्सेसु होज्जा संखेज्जा गवभवक्कंतियमणुस्सेसु होज्जा ॥
 असंखेज्जा भंते ! मणुस्सा० पुच्छा, गंगेया ! सव्वेवि ताव संमुच्छिममणुस्सेसु होज्जा
 अहवा असंखेज्जा संमुच्छिममणुस्सेसु एगे गवभवक्कंतियमणुस्सेसु होज्जा अहवा असं-
 खेज्जा संमुच्छिममणुस्सेसु दो गवभवक्कंतियमणुस्सेसु होज्जा एवं जाव असंखेज्जा
 संमुच्छिममणुस्सेसु होज्जा संखेज्जा गवभवक्कंतियमणुस्सेसु होज्जा ॥ उक्कोसा भंते !
 मणुस्सा० पुच्छा, गंगेया ! सव्वेवि ताव संमुच्छिममणुस्सेसु होज्जा अहवा संमुच्छि-
 ममणुस्सेसु य गवभवक्कंतियमणुस्सेसु य होज्जा । एयस्स णं भंते ! संमुच्छिममणुस्स-
 पवेसणगस्स गवभवक्कंतियमणुस्सपवेसणगस्स य कयरे २ जाव विसेसाहिया वा ?
 गंगेया ! सव्वत्थोवे गवभवक्कंतियमणुस्सपवेसणए, संमुच्छिममणुस्सपवेसणए असं-
 खेज्जगुणे ॥ ३७४ ॥ देवपवेसणए णं भंते ! कइविहे पन्नत्ते ? गंगेया ! चउव्विहे
 पन्नत्ते, तंजहा-भवणवांसिदेवपवेसणए जाव वेमाणियदेवपवेसणए । एगे भंते ! देवे
 देवपवेसणएणं पविसमाणे किं भवणवासीसु होज्जा वाणमंतरजोइसियवेमाणिएसु
 होज्जा ? गंगेया ! भवणवासीसु वा होज्जा वाणमंतरजोइसियवेमाणिएसु वा होज्जा ।
 दो भंते ! देवा देवपवेसणएणं० पुच्छा, गंगेया ! भवणवासीसु वा होज्जा वाणमंतर-
 जोइसियवेमाणिएसु वा होज्जा अहवा एगे भवणवासीसु एगे वाणमंतरेसु होज्जा एवं
 जहा तिरिक्खजोणियपवेसणए तहा देवपवेसणएवि-भाणियव्वे जाव असंखेज्जत्ति ।
 उक्कोसा भंते ! पुच्छा, गंगेया ! सव्वेवि ताव जोइसिएसु होज्जा अहवा जोइसियभ-

वणवासीसु य होज्जा अहवा जोइसियवाणमंतरेसु य होज्जा अहवा जोइसियवेमाणि-
 एसु य होज्जा अहवा जोइसिएसु य भवणवासीसु य वाणमंतरेसु य होज्जा अहवा जोइ-
 सिएसु य भवणवासीसु य वेमाणिएसु य होज्जा अहवा जोइसिएसु य वाणमंतरेसु य
 वेमाणिएसु य होज्जा अहवा जोइसिएसु य भवणवासीसु य वाणमंतरेसु य वेमाणि-
 एसु य होज्जा । एयस्स णं भंते ! भवणवासिदेवपवेसणगस्स वाणमंतरदेवपवेसणगस्स
 जोइसियदेवपवेसणगस्स वेमाणियदेवपवेसणगस्स य कयरे २ जाव विसेसाहिया
 वा ? गंगेया ! सव्वत्थोवे वेमाणियदेवपवेसणए, भवणवासिदेवपवेसणए असंखेज्जगुणे,
 वाणमंतरदेवपवेसणए असंखेज्जगुणे, जोइसियदेवपवेसणए संखेज्जगुणे ॥ ३७५ ॥
 एयस्स णं भंते ! नेरइयपवेसणगस्स तिरिक्ख० मणुस्स० देवपवेसणगस्स कयरे कयरे
 जाव विसेसाहिया वा ? गंगेया ! सव्वत्थोवे मणुस्सपवेसणए, नेरइयपवेसणए असंखे-
 ज्जगुणे, देवपवेसणए असंखेज्जगुणे, तिरिक्खजोणियपवेसणए असंखेज्जगुणे ॥ ३७६ ॥
 संतरं भंते ! नेरइया उववज्जंति निरंतरं नेरइया उववज्जंति संतरं असुरकुमारा
 उववज्जंति निरंतरं असुरकुमारा उववज्जंति जाव संतरं वेमाणिया उववज्जंति निरंतरं
 वेमाणिया उववज्जंति संतरं नेरइया उववट्ठंति निरंतरं नेरइया उववट्ठंति जाव संतरं
 वाणमंतरा उववट्ठंति निरंतरं वाणमंतरा उववट्ठंति संतरं जोइसिया चयंति निरंतरं
 जोइसिया चयंति संतरं वेमाणिया चयंति निरंतरं वेमाणिया चयंति ? गंगेया ! संतरंपि
 नेरइया उववज्जंति निरंतरंपि नेरइया उववज्जंति जाव संतरंपि थणियकुमारा उववज्जंति
 निरंतरंपि थणियकुमारा उववज्जंति नो संतरं पुढविकाइया उववज्जंति निरंतरं पुढ-
 विकाइया उववज्जंति एवं जाव वणस्सइकाइया सेसा जहा नेरइया जाव संतरंपि
 वेमाणिया उववज्जंति निरंतरंपि वेमाणिया उववज्जंति, संतरंपि नेरइया उववट्ठंति
 निरंतरंपि नेरइया उववट्ठंति एवं जाव थणियकुमारा नो संतरं पुढविकाइया उव-
 वट्ठंति निरंतरं पुढविकाइया उववट्ठंति एवं जाव वणस्सइकाइया सेसा जहा नेरइया,
 नवरं जोइसियवेमाणिया चयंति अभिलावो, जाव संतरंपि वेमाणिया चयंति निरंतरंपि
 वेमाणिया चयंति ॥ सओ भंते ! नेरइया उववज्जंति असओ भंते ! नेरइया उव-
 वज्जंति ? गंगेया ! सओ नेरइया उववज्जंति नो असओ नेरइया उववज्जंति, एवं जाव
 वेमाणिया, सओ भंते ! नेरइया उववट्ठंति असओ नेरइया उववट्ठंति ? गंगेया !
 सओ नेरइया उववट्ठंति नो असओ नेरइया उववट्ठंति, एवं जाव वेमाणिया, नवरं
 जोइसियवेमाणिएसु चयंति भाणियव्वं । सओ भंते ! नेरइया उववज्जंति असओ
 भंते ! नेरइया उववज्जंति सओ असुरकुमारा उववज्जंति जाव सओ वेमाणिया उववज्जंति
 असओ वेमाणिया उववज्जंति सओ नेरइया उववट्ठंति असओ नेरइया उववट्ठंति

सओ असुरकुमारा उववज्जंति जाव सओ वेमाणिया चयंति असओ वेमाणिया चयंति ?
 गंगेया ! सओ नेरइया उववज्जंति नो असओ नेरइया उववज्जंति सओ असुरकुमारा
 उववज्जंति नो असओ असुरकुमारा उववज्जंति जाव सओ वेमाणिया उववज्जंति नो
 असओ वेमाणिया उववज्जंति, सओ नेरइया उववज्जंति नो असओ नेरइया उववज्जंति
 जाव सओ वेमाणिया चयंति नो असओ वेमाणिया चयंति, से केणट्ठेणं भंते । एवं
 बुच्चइ सओ नेरइया उववज्जंति नो असओ नेरइया उववज्जंति जाव सओ वेमाणिया
 चयंति नो असओ वेमाणिया चयंति ? से नूनं भो ! गंगेया ! पासेणं अरहया
 पुरिसादाणिणं, सासए लोए, वुइए अणाइए अणवयग्गे जहा पंचमसए जाव जे
 लोक्कइ से लोए, से तेणट्ठेणं गंगेया ! एवं बुच्चइ जाव सओ वेमाणिया चयंति नो
 असओ वेमाणिया चयंति ॥ सयं भंते । एए एवं जाणह उदाहु असयं, असोच्चा एए एवं
 जाणह उदाहु सोच्चा, सओ नेरइया उववज्जंति नो असओ नेरइया उववज्जंति जाव
 सओ वेमाणिया चयंति नो असओ वेमाणिया चयंति ? गंगेया ! सयं एए एव
 जाणामि नो असयं, असोच्चा एए एवं जाणामि नो सोच्चा सओ नेरइया उववज्जंति
 नो असओ नेरइया उववज्जंति जाव सओ वेमाणिया चयंति नो असओ वेमाणिया
 चयंति, से केणट्ठेणं भंते । एवं बुच्चइ तं चेव जाव नो असओ वेमाणिया चयंति ?
 गंगेया ! केवली णं पुरच्छिमेणं मियं पि जाणइ असियं पि जाणइ दाहिणेणं एवं जहा
 स(हु)गडुइसए जाव निव्वुडे नाणे केवलिस्स, से तेणट्ठेणं गंगेया ! एवं बुच्चइ तं चेव
 जाव नो असओ वेमाणिया चयंति ॥ सयं भंते ! नेरइया नेरइएसु उववज्जन्ति
 असयं नेरइया नेरइएसु उववज्जंति ? गंगेया ! सयं नेरइया नेरइएसु उववज्जंति नो
 असयं नेरइया नेरइएसु उववज्जंति, से केणट्ठेणं भंते ! एवं बुच्चइ जाव उववज्जंति ?
 गंगेया ! कम्मोदएणं कम्मगुरुयत्ताए कम्मभारियत्ताए कम्मगुरुयसंभारियत्ताए असुभाणं
 कम्माणं उदएणं असुभाणं कम्माणं विवागेणं असुभाणं कम्माणं फलविवागेणं सयं
 नेरइया नेरइएसु उववज्जंति नो असयं नेरइया नेरइएसु उववज्जंति, से तेणट्ठेणं
 गंगेया ! जाव उववज्जंति ॥ सयं भंते ! असुरकुमारा० पुच्छा, गंगेया ! सयं असुर-
 कुमारा जाव उववज्जंति नो असयं असुरकुमारा जाव उववज्जंति, से केणट्ठेणं तं
 चेव जाव उववज्जंति ? गंगेया ! कम्मोदएणं कम्मोवसमेणं कम्मविगईए कम्मविसो-
 हीए, कम्मविसुद्धीए सुभाणं कम्माणं उदएणं सुभाणं कम्माणं विवागेणं सुभाणं
 कम्माणं फलविवागेणं सयं असुरकुमारा असुरकुमारत्ताए जाव उववज्जंति नो असयं
 असुरकुमारा असुरकुमारत्ताए जाव उववज्जंति, से तेणट्ठेणं जाव उववज्जंति, एवं जाव
 थणियकुमारा ॥ सयं भंते ! पुढविकाइया० पुच्छा, गंगेया ! सयं पुढविकाइया जाव

उववज्जंति नो असयं जाव उववज्जंति, से केणट्ठेणं भंते ! एवं वुच्चइ जावं उववज्जंति ? गंगेया ! कम्मोदएणं कम्मगुह्यत्ताए कम्मभारियत्ताए कम्मगुह्यसंभारियत्ताए सुभा-
सुभाणं कम्माणं उदएणं सुभासुभाणं कम्माणं विवागेणं सुभासुभाणं कम्माणं फल-
विवागेणं सयं पुढविकाइया जाव उववज्जंति नो असयं पुढविकाइया जाव उववज्जंति,
से तेणट्ठेणं जाव उववज्जंति, एवं जाव मणुस्सा, वाणमंतरजोइसियवमाणिया
जहा असुरकुमारा, से तेणट्ठेणं गंगेया ! एवं वुच्चइ सयं वेमाणिया जाव उववज्जंति
नो असयं वेमाणिया जाव उववज्जंति ॥ ३७७ ॥ तप्पभिइं च णं से गंगेए अणगारे
समणं भगवं महावीरं पच्चभिजाणइ सव्वणू सव्वदरिसी, तए णं से गंगेए अणगारे
समणं भगवं महावीरं तिक्खुतो आयाहिणं पयाहिणं करेइ करेत्ता वंदइ नमंसइ
वंदिता नमंसित्ता एवं वयासी-इच्छामि णं भंते ! तुज्झं अंतियं चाउज्जामाओ
धम्माओ पंचमहव्वइयं एवं जहा कालासवेसियपुत्ते अणगारे तहेव भाणियव्वं जाव
सव्वदुक्खप्पहीणे ॥ सेवं भंते ! सेवं भंते ! त्ति ॥ ३७८ ॥ गंगेयो समत्तो ॥ १३२ ॥
तेणं कालेणं तेणं समएणं माहणकुंडग्गामे णामं नयरे होत्था वन्नओ, बहुसालए
उज्जाणे वन्नओ, तत्थ णं माहणकुंडग्गामे नयरे उंसंभदत्ते नामं माहणे परिवसइ अह्वे
दित्ते वित्ते जाव अपरिभूए रिउव्वेयज्जुव्वेयसामवेयअथव्वणवेय जहा खन्दओ जाव
अन्नेसुं य बहुसु वंभन्नएसु नएसु सुपरिनिट्ठिए समणोवासए अभिगयजीवाजीवे उव-
लद्धपुण्णपावे जाव अप्पाणं भावेमाणे विहरइ, तस्स णं उंसंभदत्तस्स माहणस्स देवा-
णंदा नामं माहणी होत्था, सुकुमालपाणिपाया जाव पियदंसणा सुह्वा समणोवासिया
अभिगयजीवाजीवा उवलद्धपुन्नपावां जाव विहरइ । तेणं कालेणं तेणं समएणं सामी
समोसढे, परिसा जाव पज्जुवासइ, तए णं से उंसंभदत्ते माहणे इमीसे क्हाए लद्धट्ठे
समाणे हट्ठ जाव हियए जेणेव देवाणंदा माहणी तेणेव उवागच्छइ २ ता देवाणंदं
माहणिं एवं वयासी-एवं खलु देवाणुप्पिए ! समणे भगवं महावीरे आइगरे जाव
सव्वन्न सव्वदरिसी आगासगएणं चक्केणं जाव सुहंसुहेणं विहरमाणे बहुसालए उज्जाणे
अहापडिरूवं उग्गहं जाव विहरइ, तं महाफलं खलु देवाणुप्पिए ! जाव तहारुवाणं
अरिहंताणं भगवंताणं नामगोयस्सवि सवणयाए किमंग पुणे अभिगमणवंदणं नमंसण-
पडिपुच्छणपज्जुवासणयाए, एंगस्सवि आ(य)रियस्स धम्मियस्स सुवयणस्स सवण-
याए किमंग पुण विउलस्स अट्ठस्स गहणयाए, तं गच्छामो णं देवाणुप्पिए ! समणं
भगवं महावीरं वंदामो नमंसामो जाव पज्जुवासामो, एयणं इहभवे य परभवे य
हियाए सुहाए खमाए निस्सेसाए आणुगामियत्ताए भविस्सइ । तए णं सा देवाणंदा
माहणी उंसंभदत्तेणं माहणेणं एवं वुत्तां समाणी हट्ठ जाव हियया करयल जाव कट्ठ

उसभदत्तस्स माहणस्स एयमट्ठं विणएणं पडिसुणेइ, तए णं से उसभदत्ते माहणे
 कोडुंबियपुरिसे सदावेइ कोडुंबियपुरिसे सदावेत्ता एवं वयासी-खिप्पामेव भो देवाणु-
 प्पिया ! लहुकरणजुत्तजोइयसमखुरवालिहाणसमलिहियसिंगेहिं जंबूणयामयकलावजुत्त-
 परिविसिद्धेहिं रययामयघंटसुत्तरजुयपवरकंचणनत्थपग्गहोग्गहियएहिं नीलुप्पलकयामे-
 लएहिं पवरगोणजुवाणएहिं नाणामणि(मय)रयणघंटियाजालपरिगयं सुजायजुग्गजोत्तर-
 जुयजुगपसत्थसुविरइयनिम्मियं पवरलक्खणोववेयं धम्मियं जाणप्पवरं जुत्तामेव उव-
 ट्ठवेइ २ ता मम एयमाणत्तियं पच्चप्पिणह, तए णं ते कोडुंबियपुरिसा उसभदत्तेणं
 माहणेणं एवं वुत्ता समाणा हट्ठ जाव हियया करयल जाव एवं सामी ! तहत्ति आणाए
 विणएणं वयणं जाव पडिसुणेत्ता खिप्पामेव लहुकरणजुत्त जाव धम्मियं जाणप्पवरं
 जुत्तामेव उवट्ठवेत्ता जाव तमाणत्तियं पच्चप्पिणंति, तए णं से उसभदत्ते माहणे ण्हाए
 जाव अप्पमहग्घाभरणालंकियसरीरे साओ गिहाओ पडिनिक्खमइ साओ गिहाओ
 पडिनिक्खमिता जेणेव बाहिरिया उवट्ठाणसाला जेणेव धम्मिए जाणप्पवरे तेणेव उवा-
 गच्छइ तेणेव उवागच्छिता धम्मियं जाणप्पवरं दुरुढे । तए णं सा देवाणंदा माहणी
 अंतो अंतेउरंसि ण्हाया किच्च वरपायपत्तनेउरमणिमेहलाहारविरइयउच्चियकडगखुड्ढा-
 (इ)यएगावलीकंठसुत्तउरत्थगेवेज्जसोणिसुत्तगनाणामणिरयणभूसणविराइयंगी चीणं-
 सुयवत्थपवरपरिहिया दुग्गलसुकुमालउत्तरिज्जा सव्वोउयसुरभिकुसुमव(ध)रियसिरया
 वरचंदणवंदिया वरा(भूसण)भरणभूसियंगी कालागु(ग)रूधूवधूविया सिरिसमाणवेसा
 जाव अप्पमहग्घाभरणालंकियसरीरा बट्ठहिं खुज्जाहिं चिलाइयाहिं वामणियाहिं वडहिं-
 याहिं बच्चरियाहिं पओसियाहिं ईसिगणियाहिं जोण्हियाहिं चार(वास)गणियाहिं पल्ह-
 वियाहिं ल्हासियाहिं लउसियाहिं आरवीहिं दमिलाहिं सिंघलीहिं पुलिंदीहिं पुक्खली-
 (पक्कणी)हिं वहलीहिं मुरुंडीहिं सबरीहिं पारसीहिं नाणादेसीहिं विदेसपरिपिडियाहिं
 इंगियचिंतियपत्थियवियाणियाहिं सदेसनेवत्थगहियवेसाहिं कुसलाहिं विणीयाहिं य
 चेडियाचक्कवालवरिसधरथेरकंचुइज्जमहत्तरगविंदपरिक्खित्ता अंतेउराओ निग्गच्छइ
 अंतेउराओ निग्गच्छिता जेणेव बाहिरिया उवट्ठाणसाला जेणेव धम्मिए जाणप्पवरे
 तेणेव उवागच्छइ तेणेव उवागच्छिता जाव धम्मियं जाणप्पवरं दुरुढा ॥ तए णं से
 उसभदत्ते माहणे देवाणंदाए माहणीए सद्धिं धम्मियं जाणप्पवरं दुरुढे समाणे णियग-
 परियालसंपरिवुडे माहणकुंडग्गामं नगरं मज्झमज्झेणं निग्गच्छइ निग्गच्छइत्ता जेणेव
 बहुसालए उज्जाणे तेणेव उवागच्छइ तेणेव उवागच्छइत्ता छत्ताइए तित्थयराइसए पा-
 सइ छ० २ ता धम्मियं जाणप्पवरं ठवेइ २ ता धम्मियाओ जाणप्पवराओ पच्चोरुहइ ध०
 २ ता समणं भगवं महावीरं पंचविहेणं अभिगमेणं अभि(समा)गच्छइ, तंजहा-सच्चित्तानं

दब्बाणं विउसरण्याए एवं जहा विइयसए जाव तिविहाए पज्जुवासण्याए पज्जुवासइ;
तए णं सा देवाणंदा माहणी धम्मियाओ जाणप्पवराओ पच्चोरुहइ धम्मियाओ जाण-
प्पवराओ पच्चोरुहितां वहूहिं खुज्जाहिं जाव महत्तरगवंदपरिक्खिता समणं भगवं
महावीरं पंचविहेणं अभिगमेणं अभिगच्छइ, तंजहा-सचित्ताणं दब्बाणं विउसरण-
याए, अर्चित्ताणं दब्बाणं अविमोयण्याए, विणयोगयाए गायलट्ठीए, चक्खुप्फासे
अंजलिपग्गहेणं, मणस्स एगत्तीभावकरणेणं जेणेव समणे भगवं महावीरे तेणेव उवा-
गच्छइ तेणेव उवागच्छिता समणं भगवं महावीरं तिविखुत्तो आयाहिणं पयाहिणं
करेइ २ ता वंदइ नमंसइ वंदित्ता नमंसित्ता उसभदत्तं माहणं पुरओ कट्ठु ठिया चेव
सपरिवारा सुस्सूसमाणी णमंसमाणी अभिमुहा विणएणं पंजलिउडा जाव पज्जुवासइ
॥३७९॥ तए णं सा देवाणंदा माहणी आगयपण्हया पप्फुयलोयणा संवरियवलयवाहा
कंचुयपरिक्खित्तिया धाराहयकलंवपुप्फगंपिव स(मुस्ससिय)मूसवियरोमकूवा समणं
भगवं महावीरं अणिमिसाए दिट्ठीए देहमाणी २ चिट्ठइ ॥ भंते ! त्ति भगवं गोयमे समणं
भगवं महावीरं वंदइ नमंसइ वंदित्ता नमंसित्ता एवं वयासी-किण्णं भंते ! एसा देवाणंदा
माहणी आगयपण्हया तं चेव जाव रोमकूवा देवाणुप्पिए अणिमिसाए दिट्ठीए देह-
माणी २ चिट्ठइ ? गोयमाइ समणे भगवं महावीरे भगवं गोयमं एवं वयासी-एवं खलु
गोयमा ! देवाणंदा माहणी मम अम्मगा, अहन्नं देवाणंदाए माहणीए अत्तए, तए
णं सा देवाणंदा माहणी तेणं पुव्वपुत्तसिणेहाणुराएणं आगयपण्हया जाव समूसवि-
यरोमकूवा ममं अणिमिसाए दिट्ठीए देहमाणी २ चिट्ठइ ॥ ३८० ॥ तए णं समणे
भगवं महावीरे उसभदत्तस्स माहणस्स देवाणंदाए माहणीए तीसे य महइमहालि-
याए इसिपरिसाए जाव परिसा पडिगया । तए णं से उसभदत्ते माहणे समणस्स भग-
वओ महावीरस्स अंतियं धम्मं सोच्चा निसम्म हट्ठुट्ठे उट्ठाए उट्ठेइ उट्ठाए उट्ठेत्ता समणं
भगवं महावीरं तिविखुत्तो जाव नमंसित्ता एवं वयासी-एवमेयं भंते ! तहमेयं भंते ! जहा
खंदओ जाव से जहेयं तुब्भे वदहत्ति कट्ठु उत्तरपुरच्छिमं दिसीभागं अवक्कमइ उत्तर-
पु० २ ता सयमेव आभरणमल्लालंकारं ओमुयइ सयमे० २ ता सयमेव पंचमुट्ठियं
लोयं करेइ सयमे० २ ता जेणेव समणे भगवं महावीरे तेणेव उवागच्छइ २ ता समणं
भगवं महावीरं तिविखुत्तो आयाहिणं पयाहिणं जाव नमंसित्ता एवं वयासी-आलित्ते
णं भंते ! लोए, पलित्ते णं भंते ! लोए, आलित्तपलित्ते णं भंते ! लोए जराए
मरणेण य, एवं एएणं कमेणं जहा खंदओ तहेव पव्वइओ जाव सामाइयमाइयाई
एकारस अंगाई अहिज्जइ जाव वहूहिं चउत्थच्छट्ठमदसम जाव विचित्तेहिं तवोकम्मेहिं
अप्पाणं भावेमाणे वहूई वासाई सामन्नपरियागं पाउणइ २ ता मासियाए संलेहणाए

अत्ताणं झुत्तेइ मासि० २ ता सट्ठि भत्ताइं अणसणाए छेदेइ सट्ठि० २ ता जस्सट्ठाए
कीरइ जिणकप्पभावे थेरकप्पभावे जाव तमट्ठं आराहेइ तमट्ठं आराहेता तए
णं सो जाव सव्वदुक्खप्पहीणे । तए णं सा देवाणंदा माहणी समणस्स भगवओ
महावीरस्स अंतियं धम्मं सोच्चा निसम्म हट्ठतुट्ठा समणं भगवं महावीरं तिक्खुतो
आयाहिणं पयाहिणं जाव नमंसित्ता एवं वयासी-एवमेयं भंते ! तहमेयं भंते ! एवं
जहाँ उसभदत्तो तहेव जाव धम्ममाइ(क्खइ)क्खियं । तए णं समणे भगवं महावीरे
देवाणंदं माहणिं सयमेव पव्वावेइ सय० २ ता सयमेव अज्जचंदणाए अज्जाए
सीसिणित्ताए दलयइ ॥ तए णं सा अज्जचंदणा अज्जा देवाणंदं माहणिं सयमेव
मुंडावेइ सयमेव सेहावेइ एवं जहेव उसभदत्तो तहेव अज्जचंदणाए अज्जाए इमं
एयांरुवं धम्मियं उवएसं सम्मं संपडिवज्जइ तमाणाए तह गच्छइ जाव संजमेणं
संजमेइ, तए णं सा देवाणंदा अज्जा अज्जचंदणाए अज्जाए अंतियं सामाइयमा-
इयाइं एकारस अंगाइं अहिज्जइ सेसं तं चेव जाव सव्वदुक्खप्पहीणा ॥ ३८१ ॥
तस्स णं माहणकुंडग्गामस्स नगरस्स पच्चत्थिमेणं एत्थि णं खत्तियकुंडग्गामे नामं
नगरे होत्था वन्नओ, तत्थि णं खत्तियकुंडग्गामे नयरे जमाली नामं खत्तियकुमारं
परिवसइ अट्ठे दित्ते जाव अपरिभूए उप्पि पासायवरगाए फुट्ठमाणेहि मुइंगमत्थएहिं
बत्तीसइव्वेहिं नाडएहिं णाणाविहवरतरुणीसंपउत्तेहिं उवनच्चिज्जमाणे उवनच्चिज्जमाणे
उवगिज्जमाणे २ उवलालिज्जमाणे २ पाउसवासारत्तसरयहेमतसिसिरवसंतगिम्हपज्जंते
छप्पिउळ जह विभवेणं माणमाणे २ कालं गालेमाणे इट्ठे सइफरिसरसरुवगंधे पंच-
विहे माणुस्सए कामभोगे पच्चणुब्भवमाणे विहरइ । तए णं खत्तियकुंडग्गामे नगरे
सिंघाडगतिचउक्कचच्चर जाव बहुजणसेइ वा जहा उववाइए जाव एवं पन्नवेइ एवं
परुवेइ-एवं खलु देवाणुप्पिया ! समणे भगवं महावीरे आइगरे जाव सव्वन्नू सव्व-
दरिसी माहणकुंडग्गामस्स नगरस्स वहिया बहुसालए उज्जाणे अहापडिरुवं जाव
विहरइ, तं महप्फलं खलु देवाणुप्पिया ! तहारुवाणं अरहंताणं भगवंताणं जहा उव-
वाइए जाव एगाभिमुहे खत्तियकुंडग्गामं नगरं मज्झमज्झेणं निग्गच्छइ निग्ग-
च्छित्ता जेणेव माहणकुंडग्गामे नगरे जेणेव बहुसालए उज्जाणे एवं जहा उववाइए
जाव तिविहाए पज्जुवासणाए पज्जुवासइ । तए णं तस्स जमालिस्स खत्तियकुमारस्स
तं महयां जणसई वा जाव जणसन्निवायं वा सुणमाणस्स वा पांसमाणस्स वा अय-
मेयारुवे अज्जत्थिए जाव समुप्पज्जित्था-किन्नं अज्ज खत्तियकुंडग्गामे नगरे इंदम-
हेइ वा खंदमहेइ वा मुगुंदमहेइ वा णागमहेइ वा जक्खमहेइ वा भूयमहेइ वा
क्खमहेइ वा तडागमहेइ वा नइमहेइ वा दहमहेइ वा पव्वयमहेइ वा रुक्खमहेइ वा

थूममहेइ वा जणं एए वहवे उग्गा भोगा राइन्ना इक्खागा णाया कोरव्वा खत्तिया
 खत्तियपुत्ता भडा भडपुत्ता० जहा उववाइए जाव सत्थवाहप्पभिइ(य)ओ ण्हाया
 जहा उववाइए जाव निग्गच्छंति ? एवं संपेहेइ एवं संपेहिता कंचुइज्जपुरिसं सद्दावेइ
 कंचु० २ ता एवं वयासी-किणं देवाणुप्पिया ! अज्ज खत्तियकुंडग्गामे नगरे इंदमहेइ
 वा जाव निग्गच्छंति ?, तए णं से कंचुइज्जपुरिसे जमालिणा खत्तियकुमारें एवं वुत्ते
 समाणे हट्ठुट्ठे समणस्स भगवओ महावीरस्स आगमणगहियविणिच्छए करयल०
 जमालिं खत्तियकुमारं जएणं विजएणं वद्धावेइ वद्धावेत्ता एवं वयासी-णो खलु देवा-
 णुप्पिया ! अज्ज खत्तियकुंडग्गामे नयरे इंदमहेइ वा जाव निग्गच्छन्ति, एवं खलु
 देवाणुप्पिया ! अज्ज समणे भगवं महावीरे जाव सव्वन्नू सव्वदरिसी माहणकुंडग्गा-
 मस्स नयरस्स बहिया बहुसालए उज्जाणे अहापडिरूवं उग्गहं जाव विहरइ, तए णं
 एए वहवे उग्गा भोगा जाव अप्पेगइया वंदणवत्तियं जाव निग्गच्छंति । तए णं से
 जमाली खत्तियकुमारे कंचुइज्जपुरिसस्स अंतिए एयमट्ठं सोच्चा निसम्म हट्ठुट्ठ०
 कोडुंबियपुरिसे सद्दावेइ कोडुंबियपुरिसे सद्दावइत्ता एवं वयासी-खिप्पामेव भो देवाणु-
 प्पिया ! चाउग्घटं आसरहं जुत्तामेव उवट्ठवेह उवट्ठवेत्ता मम एयमाणत्तियं पच्चप्पि-
 ण्ह, तए णं ते कोडुंबियपुरिसा जमालिणा खत्तियकुमारें एवं वुत्ता समाणा जाव
 पच्चप्पिणंति, तए णं से जमाली खत्तियकुमारे जेणेव मज्जणघरे तेणेव उवागच्छइ
 तेणेव उवागच्छित्ता ण्हाए जहा उववाइए परिसावन्नओ तहा भाणियव्वं जाव चंद(णु-
 किखत्त)णाकिन्नगायसरीरे सव्वालंकारविभूसिए मज्जणघराओ पडिनिक्खमइ मज्जणघ-
 राओ पडिनिक्खमिता जेणेव वाहिरिया उवट्ठाणसाला जेणेव चाउग्घटं आसरहे तेणेव
 उवागच्छइ तेणेव उवागच्छित्ता चाउग्घटं आसरहं दुरुहेइ चाउ० २ ता सकोरंट-
 मल्लदामेणं छत्तेणं धरिज्जमाणेणं महया भडचडगरपहकरवंदपरिक्खित्ते खत्तियकुंड-
 ग्गामं नगरं मज्झंमज्झेणं निग्गच्छइ निग्गच्छित्ता जेणेव माहणकुंडग्गामे नगरे
 जेणेव बहुसालए उज्जाणे तेणेव उवागच्छइ तेणेव उवागच्छित्ता तुरए निगिण्हेइ २
 ता रहं ठवेइ रहं ठवेत्ता रहाओ पच्चोरुहइ रहा० २ ता पुप्फतंवोलाउहमाइयं
 वा(णहा)हणाओ य विसज्जेइ २ ता एगसाडियं उत्तरासंगं करेइ उत्तरासंगं करेत्ता
 आयंते चोक्खे परमसुइब्भूए अंजलिमउलियहत्थे जेणेव समणे भगवं महावीरे तेणेव
 उवागच्छइ तेणेव उवागच्छित्ता समणं भगवं महावीरं तिव्खुत्तो आयाहिणं पया-
 हिणं करेइ २ ता जाव तिविहाए पज्जुवासणाए पज्जुवासइ । तए णं समणे
 भगवं महावीरे जमालिस्स खत्तियकुमारस्स तीसे य महइमहालियाए इसि० जाव
 धम्मकहा जाव परिसा पडिगया, तए णं से जमाली खत्तियकुमारे समणस्स भग-

वओ महावीरस्स अंतियं धम्मं सोच्चा निसम्म हट्ठ जाव हियए उट्ठाए उट्ठेइ उट्ठाए
उट्ठेता समणं भगवं महावीरं तिक्खुत्तो जाव नमंसित्ता एवं वयासी-सद्दहामि णं
भंते ! निग्गंथं पावयणं, पत्तियामि णं भंते ! निग्गंथं पावयणं, रोएमि णं भंते !
निग्गंथं पावयणं, अब्भुट्ठेमि णं भंते ! निग्गंथं पावयणं, एवमेयं भंते ! तहमेयं भंते !
अवित्तहमेयं भंते ! असंदिद्धमेयं भंते ! जाव से जहेयं तुब्भे वदह, जं नवरं देवाणु-
प्पिया ! अम्मापियरो आपुच्छामि । तए णं अहं देवाणुप्पियाणं अंतियं मुंडे भवित्ता
अंगाराओ अणगारियं पव्वयामि, अहासुहं देवाणुप्पिया ! मा प्रडिबंथं ॥ ३८२ ॥
तए णं से जमाली खत्तियकुमारे समणेणं भगवया महावीरेणं एवं वुत्ते समाणे हट्ठ-
तुट्ठे जाव समणं भगवं महावीरं तिक्खुत्तो जाव नमंसित्ता तमेव चाउग्घटं आसरहं
दुरुहेइ दुरुहिता समणस्स भगवओ महावीरस्स अंतियाओ बहुसालाओ उज्जाणाओ
प्रडिनिक्खमइ पडिनिक्खमित्ता सकोरंटं जाव धरिजमाणेणं महया भडचडगर जाव
परिक्खित्ते जेणेव खत्तियकुंडग्गामे नयरे, तेणेव उवागच्छइ तेणेव उवागच्छित्ता
खत्तियकुंडग्गामं नगरं मज्जमज्जेणं जेणेव सए गिहे जेणेव बाहिरिया उवट्ठाणसाला
तेणेव उवागच्छइ तेणेव उवागच्छित्ता तुरए निगिण्हइ तुरए निगिण्हित्ता रहं ठवेइ
रहं ठवेता रहाओ पच्चोरुहइ रहाओ पच्चोरुहिता जेणेव अब्भितरिया उवट्ठाणसाला
जेणेव अम्मापियरो तेणेव उवागच्छइ तेणेव उवागच्छित्ता अम्मापियरो जएणं
विजएणं वद्धावेइ वद्धावेत्ता एवं वयासी-एवं खलु अम्मताओ ! मए समणस्स भग-
वओ महावीरस्स अंतियं धम्मं निसंते, सेवि य मे धम्मं इच्छिए पडिच्छिए
अभिरुइए, तए णं तं जमालिं खत्तियकुमारं अम्मापियरो एवं वयासी-धञ्जेसि णं
तुमं जाया ! कयत्थेसि णं तुमं जाया ! कयपुत्तेसि णं तुमं जाया ! कयलक्खणेसि
णं तुमं जाया ! जन्नं तुमे समणस्स भगवओ महावीरस्स अंतियं धम्मं निसंते सेवि
य धम्मं इच्छिए पडिच्छिए अभिरुइए, तए णं से जमाली खत्तियकुमारे अम्मापियरो
दोच्चं पि एवं वयासी-एवं खलु मए अम्मताओ ! समणस्स भगवओ महावीरस्स
अंतिए धम्मं निसंते जाव अभिरुइए, तए णं अहं अम्मताओ ! संसारभयउव्विग्गे
भीए जम्मजरामरणेणं तं इच्छामि णं अम्म ! ताओ ! तुब्भेहिं अब्भणुत्ताए समाणे
समणस्स भगवओ महावीरस्स अंतिए मुंडे भवित्ता अंगाराओ अणगारियं पव्वइतए ।
तए णं सा जमालिस्स खत्तियकुमारस्स माया तं अणिट्ठं अकंतं अप्पियं अमणुत्तं
अमणामं असुयपुव्वं गिरं सोच्चा निसम्म सेयागयरोमकूवपगलंतविलीणगत्ता सोगेभर-
पवेविगंगी नित्तेया दीणविमणंवयणा करयलमलियव्व कर्मलमाला तक्खणओल्लुग-
दुब्बलसरीरलायन्नसुन्ननिच्छाया गयसिरीया पसिडिलभूसणप(डिय)डंतखुणियसंचु-

न्नियववल्वलयपव्वमट्टउत्तोरिज्जा मुच्छावसणट्टचेयगु(ग)रुई सुकुमालविकिन्नकेसहत्था
 पेरसुणियत्तव्व चंपगलया निव्वत्तमहे व्व इंदलट्ठी विमुक्कसंधिवंधणा कोट्ठिमत्तलंसि
 धसंति सव्वंगेहिं संनिवडियां, तए णं सा जमालिस्स खत्तियकुमारस्स माया ससंभ-
 मोयत्तियाए-तुरियं कंचणभिगारमुहविणिग्गयसीयलविमलजलधारपरिसिचमाणनि-
 व्वावियंगायलट्ठी उक्खेवयतालियंटवीयणगजणियवाएणं सफुसिएणं अंतेउरपरिजणेणं
 आसासिया समाणी रोयमाणी कंदमाणी सोयमाणी विलवमाणी जमालि खत्तिय-
 कुमारं एवं वयासी-तुमंसि णं जाया ! अम्मं एगे पुत्ते इट्ठे कंते पिए मणुजं मणामे
 थेजे वेसासिए संमए बहुमए अणुमए भंडकरंडगसमाणे रयणे रयणव्वभूए जीविऊस-
 विए हिययानंदिजणणे उंवरपुप्फमिव दुल्लहे सवणयाए- किमंग पुण प्रासणयाए, तं
 नो खलु जाया ! अम्महे इच्छामो तुज्जं खणमवि विप्पओगं, तं अच्छाहि ताव
 जाया !- जाव ताव अम्महे जीवामो, तओ पच्छा अम्महेहिं कालंगएहिं समाणेहिं
 परिणयवए वड्डियकुलवंसतंतुकज्जंमि- निरवयक्खे समणस्स भगवओ महावीरस्स
 अंतिए मुंडे भवित्ता अगाराओ अणगारियं पव्वइहिसि । तए णं से जमाली खत्तिय-
 कुमारे अम्मापियरो एवं वयासी-तहावि णं तं अम्म ! ताओ ! जणं तुब्भे ममं
 एवं वदह तुमंसि णं जाया ! अम्मं एगे पुत्ते इट्ठे कंते तं चेव जाव पव्वइहिसि,
 एवं खलु अम्म ! ताओ ! माणुस्सए भवे अणेगजाइजरासरणरोगं सारीरमाणसप-
 कामदुक्खवेयणवसणसओवद्वाभिभूए अधुवे अणिइए असासए संज्जव्वभरागसरिसे
 जलवुव्वुयसमाणे कुसग्गजलविंदुसन्निभे सुविणगदंसणोवमे विजुलयाचंचले अणिच्चे
 सडणपडणविद्धंसणधम्मो पुव्वि वा पच्छा वा अवस्सं विप्पजहियव्वे भविस्सइ, से
 केस णं जाणइ अम्म ! ताओ ! के पुव्वि गमणयाए के पच्छा गमणयाए, तं
 इच्छामि णं अम्मताओ ! तुब्भेहिं अब्भणुत्ताए समाणे समणस्स भगवओ महा-
 वीरस्स जाव पव्वइत्ताए । तए णं तं जमालि खत्तियकुमारं अम्मापियरो एवं
 वयासी—इमं च णं ते जाया ! सरीरगं पविसिट्ठरुवलक्खणवंजणगुणोववेयं उत्तम-
 वलवीरियसत्तजुत्तं विण्णाणवियक्खणं ससोहग्गगुणसमुस्सियं अभिजायमहक्खमं
 विविहवाहिरोगरहियं निरुवहयउदत्तलट्ठं पंचिदियपडुपढमजोव्वणत्थं अणेगउत्तम-
 गुणेहिं संजुत्तं तं अणुहोहि ताव जाव जाया ! नियगसरीररुवसोहग्गजोव्वणगुणे,
 तओ पच्छा अणुभूयनियगसरीररुवसोहग्गजोव्वणगुणे अम्महेहिं कालंगएहिं समाणेहिं
 परिणयवए वड्डियकुलवंसतंतुकज्जंमि- निरयक्खे समणस्स भगवओ महावीरस्स
 अंतियं मुंडे भवित्ता अगाराओ अणगारियं पव्वइहिसि, तए णं से जमाली खत्तिय-
 कुमारे अम्मापियरो एवं वयासी—तहावि णं तं अम्मताओ ! जन्नं तुब्भे ममं एवं

वदह-इमं च णं ते जाया । सरीरं तं चेव जाव पव्वइहिसि, एवं खलु अम्म-
ताओ ! माणुस्सं सरीरं दुक्खाययणं विविहवाहिसयसंनिकेयं अट्टियकट्टुट्टियं छिरा-
ण्हाण्णालोणद्धसपिणद्धं मट्टियमंडं व दुच्चलं असुइसंकिलिट्ठं अणिट्टवियसव्व-
कालसंठप्पयं जराकुणिमज्जरघरं व सडणपडणविद्धंसणधम्मं पुव्वि वा पच्छा वा
अवस्सं विप्पजहियव्वं भविस्सइ, से केसं णं जाणइ, अम्मताओ ! के पुव्वि तं चेव
जाव पव्वइत्तए । तए णं तं जमालिं खत्तियकुमारं अम्मापियरो एवं वयासी—
इमाओ य ते जाया । विउलकुलवालियाओ सरिसयाओ सरित्तयाओ सरिव्वयाओ
सणिसलावन्नस्वजोव्वणगुणोव्वेयाओ सरिसएहिंतो अ कुलेहिंतो आणिएल्लियाओ
कलाकुसलसव्वकाललालियसुहोचियाओ मद्दवगुणजुत्तनिउणविणओवयारपंडियविय-
क्खणाओ मंजुलमियमहुरभणियविहसियविप्पेक्खियगइविलासचिट्ठियविसारयाओ
अविकलकुलसीलसालिणीओ विसुद्धकुलवंससंताणतंतुवद्धणप्पग(ब्भु)ब्भव(य)प्प-भा-
विणीओ मणाणुकूलहियइच्छियाओ अट्ट तुज्झ गुणवल्लहाओ उत्तमाओ निच्चं भावाणु-
(रत्त)तरसव्वंगसुंदरीओ भारियाओ, तं भुंजाहि ताव जाव जाया ! एयाहिं सद्धि विउले
माणुस्सए कामभोगे, तओ पच्छा भुत्तभोगी विसयविगयवोच्छिन्नकोउहल्ले अम्हेहिं
कालगएहिं जाव पव्वइहिसि । तए णं से जमाली खत्तियकुमारे अम्मापियरो एवं
वयासी—तहावि णं तं अम्म ! ताओ ! जन्नं तुव्वे मम एवं वयह इमाओ य ते जाया !
विउलकुल जाव पव्वइहिसि, एवं खलु अम्म ! ताओ ! माणुस्सया कामभोगा असुइ
असासया वंतासवा पित्तासवा खेलासवा सुक्कासवा सोणियासवा उच्चारपासवणखे-
लसिंघाणगवंतपित्तपूयसुक्कसोणियसमुब्भवा अमणुन्नदुरुवमुत्तपूइयपुरीसपुत्ता मयगंधु-
स्सासअसुभनिस्सासउव्वेयणगा वीभच्छा अप्पकालिया लहूसगा कलमलाहिया सडु-
क्खवहुजणसाहारणा परिकिलेसकिच्छदुक्खसज्जा, अवुहजणणिसेविया सया साहुग-
रहणिज्जा अणंतसंसारवद्धणा कडुयफलविवागा चु(डु)डलिव्व अमुच्चमाणदुक्खाणु-
वंधिणो सिद्धिगमणविग्घा, से केसं णं जाणइ अम्मताओ ! के पुव्वि गमणयाए के
पच्छा गमणयाए, तं इच्छामि णं अम्मताओ ! जाव पव्वइत्तए । तए णं तं जमालिं
खत्तियकुमारं अम्मापियरो एवं वयासी—इमे य ते जाया । अज्जयपज्जयपिउपज्ज-
यागए बहु हिरन्ने य सुवन्ने य कंसे य दूसे र्थं विउलधणकणग जाव-संतसारंसावएज्जे
अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं
तं अणुहोहि ताव जाया ! विउले माणुस्सए इद्धिसक्कारसमुदए, तओ पच्छा अणुभूय-
क्खण्णे वट्ठियकुलवंसतंतु जाव पव्वइहिसि । तए णं से जमाली खत्तियकुमारे अम्मा-
पियरो एवं वयासी—तहावि णं तं अम्मताओ ! जन्नं तुज्झे ममं एवं वदह-इमं

च ते जाया ! अज्जयंपज्जय जाव पव्वइहिसि, एवं खलु अम्मताओ ! हिरन्ने य सुवन्ने
य जाव सावएज्जे अग्गिसाहिए चोरसाहिए रायसाहिए मच्चुसाहिए दाइयसाहिए
अग्गिसामन्ने जाव दाइयसामन्ने अधुवे अणिए असासए पुर्व्वि वा पच्छा वा
अवस्सं विप्पजहियव्वे भविस्सइ, से केस णं जाणइ तं चेव जाव पव्वइत्तए । तए
णं तं जमालिं खत्तियकुमारं अम्मताओ जाहे नो संचाएन्ति विसयाणुलोमाहिं बहूहिं
आघवणाहि य पन्नवणाहि य सन्नवणाहि य विन्नवणाहि य आघवेत्तए वा पन्नवेत्तए
वा सन्नवेत्तए वा विन्नवेत्तए वा ताहे विसयपडिकूलाहि संजमभयउव्वेयणकराहिं
पन्नवणाहिं पन्नवेमाणा एवं वयासी—एवं खलु जाया ! निग्गंथे पावयणे सच्चे अणु-
त्तरे केवले जहा आवस्सए जाव सव्वदुक्खाणमंतं करेंति अहीव एगंतदिट्ठीए खुरो
इव एगंतधाराए लोहमया जवा चावेयव्वा वालुयाकवले इव निस्सा(रे)ए गंगा वा
महानई पडिसोयगमण्याए महासमुद्वेव्व भुयाहिं दुत्तरो तिकखं कमियव्वं ग(गु)ह्यं
लंबेयव्वं असिधारणं वयं चरियव्वं, नो खलु कप्पइ जाया ! समणाणं निग्गंथाणं
आहाकम्मिए वा उद्देसिए वा मिस्सजाए वा अज्झोयरए वा पूइए वा कीए
वा पामिच्चेइ वा अच्छेज्जेइ वा अणिसिट्ठेइ वा अभिहड्ढेइ वा कंतारभत्तेइ वा दुब्बिक्ख-
भत्तेइ वा गिलाणभत्तेइ वा वदलियाभत्तेइ वा पाहुणगभत्तेइ वा सेज्जायरपिंडेइ वा
रायपिंडेइ वा मूलभोयणेइ वा कंदभोयणेइ वा फलभोयणेइ वा वीयभोयणेइ वा हरिय-
भोयणेइ वा भुत्तए वा पायए वा, तुमं च णं जाया ! सुहसमुच्चिए णो चेव णं दुह-
समुच्चिए नालं सीयं नालं उण्हं नालं खुहा नालं पिवासा नालं चोरा नालं वाला नालं
दंसा नालं मसगा नालं वाइयपित्तियसेंभियसन्निवाइए विविहे रोगायंके परीसहोवसग्गे
उदिन्ने अहियासेत्तए, तं नो खलु जाया ! अम्हे इच्छामो तुज्झं खणमवि विप्पओगं
तं अच्छाहि ताव जाया ! जाव ताव अम्हे जीवामो, तओ पच्छा अम्हेहि कालगएहिं
जाव पव्वइहिसि । तए णं से जमाली खत्तियकुमारे अम्मापियरो एवं वयासी-
तहावि णं तं अम्म ! ताओ ! जन्नं तुज्झे ममं एवं वयह—एवं खलु जाया ! निग्गंथे
पावयणे सच्चे अणुत्तरे केवले तं चेव जाव पव्वइहिसि, एवं खलु अम्मताओ ! निग्गंथे
पावयणे कीवाणं कायराणं कापुरिसाणं इहलोगपडिवद्धाणं परलोगपरंमुहाणं विसय-
तिसियाणं दुरणुचरे पागयजणस्स, धीरस्स निच्छियस्स ववसियस्स नो खलु एत्थं
किंचिवि दुक्करं करणयाए, तं इच्छामि णं अम्म ! ताओ ! तुब्भेहिं अब्भणुज्जाए समाणे
समणस्स भगवओ महावीरस्स जाव पव्वइत्तए । तए णं तं जमालिं खत्तियकुमारं
अम्मापियरो जाहे नो संचाएन्ति विसयाणुलोमाहि य विसयपडिकूलाहि य बहूहिं
आघवणाहि य पन्नवणाहि य ४ आघवेत्तए वा जाव विन्नवेत्तए वा ताहे अकामए

जेव जमालिस्स खत्तियकुमारस्स निक्खमणं अणुमञ्जित्था ॥ ३८३ ॥ तए णं तस्स जमालिस्स खत्तियकुमारस्स पिया कोडुंवियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया ! खत्तियकुंडग्गामं नगरं सन्निभतरवाहिरियं आसिय-संमज्जिओवलित्तं जहा उववाइए जाव पच्चप्पिणंति, तए णं से जमालिस्स खत्तिय-कुमारस्स पिया दोच्चं पि कोडुंवियपुरिसे सद्दावेइ सद्दावइत्ता एवं वयासी-खिप्पामेव भो देवाणुप्पिया ! जमालिस्स खत्तियकुमारस्स महत्तं महत्तं महरिहं विपुलं निक्खमणा-भिसेयं उवट्ठवेह, तए णं ते कोडुंवियपुरिसा तहेव जाव पच्चप्पिणंति, तए णं तं जमालिं खत्तियकुमारं अम्मापियरो सीहासणवरंसि पुरत्थाभिमुहं निसीयावेंति निसीयावेत्ता अट्ठसएणं सोवन्नियाणं कलसाणं एवं जहा रायप्पसेणइज्जे जाव अट्ठसएणं भोमेज्जाणं कलसाणं सव्विह्वीए जाव रवेणं महया महया निक्खमणाभिसेगेणं अभिसिंचन्ति निक्खमणाभिसेगेणं अभिसिंचित्ता करयल जाव जएणं विजएणं वद्धावेन्ति, जएणं विजएणं वद्धावेत्ता एवं वयासी-भण जाया ! कि देमो कि पयच्छामो किणा वा ते अट्ठो?, तए णं से जमाली खत्तियकुमारे अम्मापियरो एवं वयासी-इच्छामि णं अम्म ! ताओ ! कुत्तियावणाओ रयहरणं च पडिग्गहं च आणित्तं कासवगं च सद्दा-विडं, तए णं से जमालिस्स खत्तियकुमारस्स पिया कोडुंवियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया ! सिरिघराओ तिन्नि सयसहस्साइं गहाय दोहिं सयसहस्सेहिं कुत्तियावणाओ रयहरणं च पडिग्गहं च आणेह सयसहस्सेणं कासवगं च सद्दावेह, तए णं ते कोडुंवियपुरिसा जमालिस्स खत्तियकुमारस्स पिडणा एवं चुत्ता समाणा हट्ठतुट्ठा करयल जाव पडिसुणेत्ता खिप्पामेव सिरिघराओ तिन्नि सयसहस्साइं तहेव जाव कासवगं सद्दावेंति । तए णं से कासवए जमालिस्स खत्तियकुमारस्स पिडणा कोडुंवियपुरिसेहिं सद्दाविए समाणे- हट्ठे तुट्ठे ण्हाए जाव सरीरे जेणेव जमालिस्स खत्तियकुमारस्स पिया तेणेव उवागच्छइ तेणेव उवा-गच्छित्ता करयल० जमालिस्स खत्तियकुमारस्स पियरं जएणं विजएणं वद्धावेइ जएणं विजएणं वद्धावित्ता एवं वयासी-संदिसंतु णं देवाणुप्पिया ! जं मए करणिज्जं, तए णं से जमालिस्स खत्तियकुमारस्स पिया तं कासवगं एवं वयासी-तुमं देवाणुप्पिया ! जमालिस्स खत्तियकुमारस्स परेणं जत्तेणं चउरंगुलवज्जे निक्खमणपओगे अग्गकेसे (कप्पेह) पडिकप्पेहि, तए णं से कासवए जमालिस्स खत्तियकुमारस्स पिडणा एवं चुत्ते समाणे हट्ठतुट्ठे करयल जाव एवं सामी । तहत्ति आणाए विणएणं वयणं पडिसुणेइ २ ता सुरभिणा गंधोदएणं हत्थपाए पक्खालेइ सुरभिणा० २ ता सुद्धाए अट्ठपडलाए पोत्तीए मुहं वंधइ मुहं वंधित्ता जमालिस्स खत्तियकुमारस्स परेणं जत्तेणं चउ-

रंगुलवजे निक्खमणपओगे अग्गकेसे कप्पेइ । तए णं सा जमालिस्स खत्तियकुमा-
 रस्स माया हंसलक्खणेणं पडसाडएणं अग्गकेसे पडिच्छइ अग्गकेसे पडिच्छिता
 सुरभिणा गंधोदएणं पक्खालेइ सुरभिणा गंधोदएणं पक्खालेत्ता अग्गेहिं वरेहिं गंधेहिं
 मल्लेहिं अच्चेइ २ ता सुद्धवत्थेणं वंधेइ सुद्धवत्थेणं वंधित्ता रयणकरंउगंसि पक्खिवइ
 २ ता हारवारिधारसिंदुवारछिन्नमुत्तावलिप्पगासाइं सुयविओगदूसहाइं अंसइं
 विणिम्मुयमाणी २ एवं वयासी-एस णं अम्हं जमालिस्स खत्तियकुमारस्स वट्ठसु
 तिहीसु य पव्वणीसु य उस्सवेसु य जनेसु य छणेसु य अपच्छिमे दरिसणे भविस्स-
 तीतिकट्टु ओसीसगमूले ठवेइ, तए णं तस्स जमालिस्स खत्तियकुमारस्स अम्मापि-
 यरो दोच्चंपि उत्तरावक्कमणं सीहासणं रयावेति २ ता दोच्चंपि जमालिं खत्तियकुमारं
 सीयापीयएहिं कलसेहिं ण्हाणेंति सीयापीयएहिं कलसेहि ण्हावेत्ता पम्हलसुकुमालाए
 सुरभिएणं गंधकासाइएणं गायाइं ल्हेंति सुरभिएणं गंधकासाइएणं गायाइं ल्हेत्ता
 सरसेणं गोसीसचंदणेणं गायाइं अणुलिपन्ति गायाइं अणुलिपित्ता नासानिस्सासवा-
 यवोज्जं चक्खुहरं वन्नफरिसजुत्तं हयलालापेलवाइरेणं धवलं कणगखचियंतकम्मं
 महरिहं हंसलक्खणपडसाडगं परिहिति २ ता हारं पिणद्धेति २ ता अद्धहारं पिणद्धेति
 २ ता० एवं जहा सूरियाभस्स अलंकारो तहेव जाव चित्तं रयणसंकडुक्कडं मउडं
 पिणद्धेति, कि वहुणा गंथिमवेढिमपूरिमसंघाइमेणं चउव्विहेणं मल्लेणं कप्पस्सक्खगं पिव
 अलंकियविभूसियं करेंति । तए णं से जमालिस्स खत्तियकुमारस्स पिया कोडुंविय-
 पुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया ! अणेगखंभसय-
 सन्निविट्ठं लीलट्टियसालिभंजियागं जहा रायप्पसेणइजे विमाणवन्नओ जाव मणिरय-
 णघंटियाजालपरिक्खत्तं पुरिससहस्सवाहिणीयं सीयं उवट्ठवेहं उवट्ठवेत्ता मम एयमा-
 णत्तियं पच्चप्पिणह, तए णं ते कोडुंवियपुरिसा जाव पच्चप्पिणंति । तए णं से जमाली
 खत्तियकुमारे केसालंकारेणं वत्थालंकारेणं मल्लालंकारेणं आभरणालंकारेणं चउव्वि-
 हेणं अलंकारेणं अलंकारिए समाणे पडिपुत्तालंकारे सीहासणाओ अब्भुट्ठेइ सीहास-
 णाओ अब्भुट्ठेत्ता सीयं अणुप्पयाहिणीकरेमाणे सीयं दुरुहइ २ ता सीहासणवरंसि
 पुरत्थाभिमुहे सन्निसण्णे । तए णं तस्स जमालिस्स खत्तियकुमारस्स माया ण्हाया
 जाव सरीरा हंसलक्खणं पडसाडगं गहाय सीयं अणुप्पयाहिणीकरेमाणी सीयं
 दुरुहइ सीयं दुरुहित्ता जमालिस्स खत्तियकुमारस्स दाहिणे पासे भद्दासणवरंसि संनि-
 सन्ना, तए णं तस्स जमालिस्स खत्तियकुमारस्स अम्मधाई ण्हाया जाव सरीरा
 रयहरणं च पडिग्गहं च गहाय सीयं अणुप्पयाहिणी करेमाणी सीयं दुरुहइ सीयं
 दुरुहित्ता जमालिस्स खत्तियकुमारस्स वामे पासे भद्दासणवरंसि संनिसन्ना । तए णं

तस्स जमालिस्स खत्तियकुमारस्स पिट्ठो एगा वरतरुणी सिंगारागारचारुवेसा
संगयगय जाव त्वजोव्वणविलासकलिया सुंदरथण० हिमरययकुमुयकुंदेदुप्पगासं
सकोरेंदमहादामं थयलं आयवत्तं गहाय सलीलं उवरिं धारेमाणी २ चिट्ठइ, तए णं
तस्स जमालिस्स उभओपासिं दुवे वरतरुणीओ सिंगारागारचारु जाव कलियाओ
नाणामणिकगरयगविमलमहग्गिहत्तवणिज्जुजलविचिन्तदडाओ चिल्लियाओ संखं-
कुंददगरयअन्नयमहियफेणपुंजसुत्तिगानाओ थवलाओ चामराओ गहाय सलीलं
वीयमाणीओ वीयनाणीओ चिट्ठंति, तए णं तस्स जमालिस्स खत्तियकुमारस्स उत्तर-
पुरच्छिमेणं एगा वरतरुणी सिंगारागार जाव कलिया सेयरययामयं विमलसलिलपुणं
मत्तगयमहानुहाकिस्समाज भिंगार गहाय चिट्ठइ । तए णं तस्स जमालिस्स खत्तिय-
कुमारस्स दाहिगपुरच्छिमेणं एगा वरतरुणी सिंगारागार जाव कलिया चित्तकणगदंडं
तालवेंदं गहाय चिट्ठइ, तए णं तस्स जमालिस्स खत्तियकुमारस्स पिया कोडुंविय-
पुरिसे महावेत्त को० २ ता एवं वयासी-विप्पामेव भो-देवाणुप्पिया ! सरिसयं
सरित्तयं सरिव्वयं सरिल्ललवत्तवजोव्वणगुणोव्वेयं एगाभरणवसणगहियनिज्जोयं
कोडुंवियवत्तसहस्सं सदावेह, तए णं ते कोडुंवियपुरिसा जाव पडिमुणेतता
विप्पामेव सरिसयं सरित्तयं जाव महावेत्ति, तए णं ते कोडुंवियपुरिसा जमालिस्स
खत्तियकुमारस्स पिट्ठगा कोडुंवियपुरिसेहिं सदाविया समाणा हट्ठुट्ठ० ण्हाया
एगाभरणवसणगहियनिज्जोया जेणेव जमालिस्स खत्तियकुमारस्स पिया तेणेव उवा-
गच्छन्ति ते० २ ता करयल जाव वद्धावेत्ता एवं वयासी-सदिसंतु णं देवाणुप्पिया !
जं अम्हेहिं करणिज्जं, तए णं से जमालिस्स खत्तियकुमारस्स पिया तं कोडुंवियवर-
तरुणसहस्संपि एवं वयासी-तुब्बे णं देवाणुप्पिया ! ण्हाया जाव गहियनिज्जोया
जमालिस्स खत्तियकुमारस्स सीयं परिवहह । तए णं ते कोडुंवियपुरिसा जमालिस्स
खत्तियकुमारस्स जाव पडिमुणेतता ण्हाया जाव गहियनिज्जोया जमालिस्स खत्तिय-
कुमारस्स सीयं परिवहंति । तए णं तस्स जमालिस्स खत्तियकुमारस्स पुरिससहस्स-
वाहिणिं सीयं दुक्कस्स समाणस्स तप्पडमयाए इमे अट्ठमंगलगा पुरओ अहाणु-
पुव्वीए संपट्ठिया, त०-सोत्थिय सिरिवच्छ जाव दप्पणं, तयाणंतरे च णं पुञ्चल-
सभिगारं जहा उववाइए जाव गगगतलमणुलिहंती पुरओ अहाणुपुव्वीए संपट्ठिया,
एवं जहा उववाइए तहेव भाणियव्वं जाव आलोयं वा करेमाणा जय २ सद्दं च
पजंजमाणा पुरओ अहाणुपुव्वीए संपट्ठिया । तयाणंतरे च णं वहवे उग्गा भोगा जहा
उववाइए जाव महापुरिसवग्गुरापारिक्खत्ता जमालिस्स खत्तियकुमारस्स पुरओ य
मग्गओ य प्राप्तओ य अहाणुपुव्वीए संपट्ठिया । तए णं से जमालिस्स खत्तियकुमा-

रस्स पिआ ण्हाए जाव विभूसिए हत्थिखंधवरगए सकोरेंटमल्लदामेणं छत्तेणं धरिज्ज-
 माणेणं सेयवरचामराहिं उद्धुव्वमाणे २ हयगयरहपवरजोहकलियाए चाउरंगिणीए
 सेणाए सद्धि संपरिवुडे महया भडचंडगर जाव परिक्खित्ते जमालिस्स खत्तियकुमा-
 रस्स पिट्ठओ २ अणुगच्छइ । तए णं तस्स जमालिस्स खत्तियकुमारस्स पुरओ महं
 आसा आसवरा उभओ पासिं णागा णागवरा पिट्ठओ रहा रहसंगेल्ली । तए णं से
 जमाली खत्तियकुमारे अब्भुग्गयभिगारे परिग्गहियतालियंटे ऊसवियसेयछत्ते
 पबीइयसेयचामरवालवीयणीए सव्विद्धीए जाव णाइयरवेणं । तयाणंतरं च णं बहवे
 लट्ठिग्गाहा कुंतग्गाहा जाव पुत्थयग्गाहा जाव वीणग्गाहा, तयाणंतरं च णं अट्ठसयं
 गयाणं अट्ठसयं तुरयाणं अट्ठसयं रहाणं, तयाणंतरं च णं लउडअसिकोंतहत्थाणं, बहूणं
 पायत्ताणीणं पुरओ संपट्ठियं, तयाणंतरं च णं बहवे राईसरतलवर जाव सत्थवाहप्पभि-
 इओ पुरओ संपट्ठिया जाव णाइयरवेणं खत्तियकुंडग्गामं नगरं मज्झमज्जेणं जेणेव
 माहणकुंडग्गामे नयरे जेणेव बहुसालए उज्जाणे जेणेव समणे भगवं महावीरे तेणेव
 पहारेत्थ गमणाए । तए णं तस्स जमालिस्स खत्तियकुमारस्स खत्तियकुंडग्गामं नगरं
 मज्झमज्जेणं निग्गच्छमाणस्स सिंघाडगतियचउक्कं जाव पहेसु बहवे अत्थत्थिया जहा
 उववाइए जाव अभिनंदंता य अभित्थुणंता य एवं वय्मसी-जय जय णंदा धम्मेणं,
 जय जय णंदा तवेणं, जय जय णंदा । भइं ते अभग्गेहिं णाणंदंसणचरित्तमुत्तमेहिं
 अजियाइं जिणाहि इंदियाइं जियं च पालेहि समणधम्मं जियविग्घोऽवि य वसाहि तं
 देव । सिद्धिमज्जे णिहणाहि य रागदोसमल्ले तवेण विइधणियवद्धकच्छे मद्दाहि अट्ठ-
 कम्मसत्तू ज्ञाणेणं उत्तमेणं सुक्केणं अप्पमत्तो हराहि आराहणपडागं च धीर ! तेलो-
 क्करंगमज्जे पावय वित्तिमिरमणुत्तरं च केवलणाणं गच्छय मोक्खं परं पयं जिणव-
 रोवइट्ठेणं सिद्धिमग्गेणं अकुडिलेणं हंता परीसहचमूं अभिभविय गामकंटगोवसग्गाणं
 धम्मं ते अविग्घमत्थुत्तिकट्ठु अभिनंदंति य अभिधुणंति य । तए णं से जमाली खत्ति-
 यकुमारे नयणमालासहस्सेहिं पिच्छिज्जमाणे २ एवं जहा उववाइए कूणिओ जाव
 णिग्गच्छइ निग्गच्छिता जेणेव माहणकुंडग्गामे नयरे जेणेव बहुसालए उज्जाणे तेणेव
 उवागच्छइ तेणेव उवागच्छिता छत्ताइए तित्थगराइसए पासइ पासित्ता पुरिससह-
 स्सवाहिणिं सीयं ठवेइ २ ता पुरिससहस्सवाहिणीओ सीयाओ पच्चोरुइ, तए णं तं
 जमालि खत्तियकुमारं अम्मापियरो पुरओ काउं जेणेव समणे भगवं महावीरे तेणेव
 उवागच्छंति तेणेव उवागच्छिता समणं भगवं महावीरं तिव्वुत्तो जाव नमंसित्ता एवं
 चयासी-एवं खलु भंते ! जमाली खत्तियकुमारे अमहं एगे पुत्ते इट्ठे कंते जावं किमंग
 पुण पासण्याए, से जहानामए-उप्पलेइ वा पउमेइ वा जाव सहस्सपत्तेइ वा पंके

जाए जले संवुद्धे णोवलिप्पइ पंकरएणं णोवलिप्पइ जलरएणं एवामेव जमालीवि खत्ति-
यकुमारे कामेहिं जाए भोगेहिं संवुद्धे णोवलिप्पइ कामरएणं णोवलिप्पइ भोगरएणं
णोवलिप्पइ मित्तणाइनियगसयणसंबंधिपरिजणेणं, एस णं देवाणुप्पिया ! संसारभयउ-
व्विग्गे भीए जम्मजरामरणेणं इच्छइ देवाणुप्पियाणं अंतिए मुंडे भवित्ता अगाराओ
अणगारियं पव्वइत्तए, तं एयत्तं देवाणुप्पियाणं अम्हे सीसभिक्ष्वं दलयासो, पडिच्छंतु
णं देवाणुप्पिया ! सीसभिक्ष्वं, तए णं समणे० ३ तं जमालिं खत्तियकुमारं एवं
वयासी-अहासुहं देवाणुप्पिया ! मा पडिवंधं । तए णं से जमाली खत्तियकुमारे समणेणं
भगवया महावीरेणं एवं वुत्तं समाणे हट्टुत्ते समणं भगवं महावीरं तिक्खुत्तो जाव
नमंसित्ता उत्तरपुरच्छिमं दिस्सीभागं अवक्कमइ २ ता सयमेव आभरणमल्लालंकारं ओमु-
यइ, तए णं सा जमालिस्स खत्तियकुमारस्स माया हंसलक्खणेणं पडसाडएणं आभ-
रणमल्लालंकारं पडिच्छइ पडिच्छित्ता हारवारि जाव विणिम्मुयमाणी २ जमालिं
खत्तियकुमारं एवं वयासी-घडियव्वं जाया ! जइयव्वं जाया ! परक्कमियव्वं जाया !
अरिंस्स च णं अट्टे णो पमायेयव्वंति कट्ठु जमालिस्स खत्तियकुमारस्स अम्मापियरो
समणं भगवं महावीरं वंदन्ति णमंसन्ति वंदित्ता णमंसित्ता जामेव दिस्सि पाउब्भूया
तामेव दिस्सि पडिगया । तए णं से जमाली खत्तियकुमारे सयमेव पंचमुट्ठियं लोयं
करेइ २ ता जेणेव समणे भगवं महावीरे तेणेव उवागच्छइ तेणेव उवागच्छित्ता एवं
जहा उस्सभदत्तो तहेव पव्वइओ नवरं पंचहिं पुरिससएहिं सद्धिं तहेव जाव सव्वं
सामाइयमाइयाइं एक्कारस अंगाइं अहिज्जइ अहिजेत्ता वट्ठहिं चउत्थछट्ठम जाव
मांसदमासखमणेहिं विचित्तेहि तवोकम्मोहिं अप्पाणं भावेमाणे विहरइ ॥ ३८४ ॥
तए णं से जमाली अणगारे अन्नया कयाइं जेणेव समणे भगवं महावीरे तेणेव उवा-
गच्छइ तेणेव उवागच्छित्ता समणं भगवं महावीरं वंदइ नमंसइ वंदित्ता नमंसित्ता एवं
वयासी-इच्छामि णं भंते ! तुब्भेहिं अब्भणुन्नाए समाणे पंचहिं अणगारसएहिं
सद्धिं वहिया जणवयविहारं विहरित्तए, तए णं समणे भगवं महावीरे जमालिस्स
अणगारस्स एयमट्ठं णो आढाइ णो परिजाणाइ तुसिणीए संचिट्ठइ । तए णं से
जमाली अणगारे समणं भगवं महावीरं दोच्चंपि तच्चंपि एवं वयासी-इच्छामि णं
भंते ! तुब्भेहिं अब्भणुन्नाए समाणे पंचहिं अणगारसएहिं सद्धिं जाव विहरित्तए,
तए णं समणे भगवं महावीरे जमालिस्स अणगारस्स दोच्चंपि तच्चंपि एयमट्ठं णो
आढाइ जाव तुसिणीए संचिट्ठइ । तए णं से जमाली अणगारे समणं भगवं महावीरं
वंदइ णमंसइ वंदित्ता णमंसित्ता समणस्स भगवओ महावीरस्स अंतियाओ बहुसा-
लाओ उज्जाणाओ पडिनिक्खमइ पडिनिक्खमित्ता पंचहिं अणगारसएहिं सद्धिं वहिया

जणवयविहारं विहरइ, तेणं कालेणं तेणं समएणं सावत्थी तामं नयरी होत्था वन्नओ,
कोट्टए उज्जाणे वन्नओ जाव वणसंडस्स, तेणं कालेणं तेणं समएणं चंपा नामं
नयरी होत्था वन्नओ, पुन्नभेदे उज्जाणे वन्नओ जाव पुढविसिलपट्टए । तए णं से
जमाली अणगारे अन्नया कयाइ पंचहि अणगारसएहिं मद्धि संपरिवुडे पुव्वाणुपुव्वि
चरमाणे गामाणुगामं दूज्जमाणे जेणेव सावत्थी नयरी जेणेव कोट्टए उज्जाणे तेणेव
उवागच्छइ तेणेव उवागच्छिता अहापडिरुवं उग्गहं उग्गिण्हइ अहापडिरुवं उग्गहं
उग्गिण्हिता संजमेणं तवसा अप्पाणं भावेमाणे विहरइ । तए णं समणे भगवं
महावीरे अन्नया कयाइ पुव्वाणुपुव्वि चरमाणे जाव सुहंसहेणं विहरमाणे जेणेव
चंपानगरी जेणेव पुन्नभेदे उज्जाणे तेणेव उवागच्छइ तेणेव उवागच्छिता अहापडि-
रुवं उग्गहं उग्गिण्हइ अहा ० २ ता संजमेणं तवसा अप्पाणं भावेमाणे विहरइ ॥ तए
णं तस्स जमालिस्स अणगारस्स तेहिं अरसेहि य विरसेहि य अंतेहि य पंतेहि य
ल्लहेहि य तुच्छेहि य कालाइक्कंतेहि य पमाणाइक्कंतेहि य सीयएहि य पाणभोयणेहि
अन्नया कयाइ सरीरगंसि विउले रोगायंके पाउव्वभूए उज्जले विउले पगाढे कक्कसे कडुए
चंडे दुक्खे दुग्गे तिब्बे दुरहियासे पित्तज्जरपरिगयसरीरे दाहवक्कंतिए यावि विहरइ ।
तए णं से जमाली अणगारे-वेयणाए अभिभूए समाणे समणे निग्गंथे सद्दावेइ
सद्दावेत्ता एवं वयासी-तुव्वे णं देवाणुप्पिया ! मम सेज्जासंधारणं संधरेह, तए णं ते
समणा निग्गंथा जमालिस्स अणगारस्स एयमद्वं विणएणं पडिसुणेति पडिसुणेत्ता
जमालिस्स अणगारस्स सेज्जासंधारणं संधरेंति, तए णं से जमाली अणगारे वलिय-
तरं वेयणाए अभिभूए समाणे दोच्चं पि समणे निग्गंथे सद्दावेइ २ ता दोच्चं पि एवं
वयासी-ममणं देवाणुप्पिया ! सेज्जासंधारणं किं कडे कज्जइ ? (एवं वुत्ते समाणे समणा
निग्गंथा विंति-भो सामी ! - कीरइ) तए णं ते समणा निग्गंथा जमालिं अणगारं
एवं वयासी-णो खलु देवाणुप्पियाणं सेज्जासंधारणं कडे कज्जइ, तए णं तस्स जमा-
लिस्स अणगारस्स अयमेयारुवे अज्झत्थिए जाव समुप्पज्जित्था-जन्नं समणे भगवं
महावीरे एवं आइक्खइ जाव एवं पुरुवेइ-एवं खलु चलमाणे चलिए उदीरिज्जमाणे
उदीरिए जाव निज्जरिज्जमाणे णिज्जिन्ने तं णं मिच्छा इमं च णं पच्चक्खमेव दीसइ
सेज्जासंधारणं कज्जमाणे अकडे संधरिज्जमाणे असंधरिए जम्हा णं सेज्जासंधारणं कज्ज-
माणे अकडे संधरिज्जमाणे असंधरिए तम्हा चलमाणेवि अचलिए जाव निज्जरिज्ज-
माणेवि अणिज्जिन्ने, एवं संपेहेइ एवं संपेहेत्ता समणे निग्गंथे सद्दावेइ समणे निग्गंथे
सद्दावेत्ता एवं वयासी-जन्नं देवाणुप्पिया ! समणे भगवं महावीरे एवं आइक्खइ जाव
पुरुवेइ-एवं खलु चलमाणे चलिए तं चेवं सव्वं जाव णिज्जरिज्जमाणे अणिज्जिन्ने । तए

णं तस्स जमालिस्स अणगारस्स एवं आइक्खमाणस्स जाव पहवेमाणस्स अत्थेगइया समणा निग्गंथा एयमट्ठं सदहंति पत्तियंति रोयंति, अत्थेगइया समणा निग्गंथा एय-
मट्ठं णो सदहंति ३, तत्थ णं जे ते समणा निग्गंथा जमालिस्स अणगारस्स एय-
मट्ठं सदहंति ३ ते णं जमालिं चेव अणगारं उवसंपज्जिता णं विहरंति, तत्थ णं जे
ते समणा निग्गंथा जमालिस्स अणगारस्स एयमट्ठं णो सदहंति णो पत्तियंति णो
रोयंति ते णं जमालिस्स अणगारस्स अंतियाओ कोट्टयाओ उज्जाणाओ पडिनिक्ख-
मंति २ ता पुव्वाणुपुव्वि चरमाणा गामाणुगामं दूइज्जमाणा जेणेव चंपानयरी जेणेव
पुन्नभदे उज्जाणे जेणेव समणे भगवं महावीरे तेणेव उवागच्छन्ति २ ता समणं भगवं
महावीरं तिक्खुत्तो आयार्हिणं पयाहिणं करेति २ ता वंदंति णमंसंति २ ता समणं
भगवं महावीरं उवसंपज्जिता णं विहरंति ॥ ३८५ ॥ तए णं से जमाली अणगारे
अन्नया कयाइ ताओ रोगायंकाओ विप्पमुक्के हट्ठे तुट्ठे जाए अरोए वलियसरीरे
सावत्थीओ नयरीओ कोट्टयाओ उज्जाणाओ पडिनिक्खमइ २ ता पुव्वाणुपुव्वि चरमाणे
गामाणुगामं दूइज्जमाणे जेणेव चंपानयरी जेणेव पुन्नभदे उज्जाणे जेणेव समणे भगवं
महावीरे तेणेव उवागच्छइ २ ता समणस्स भगवओ महावीरस्स अदूरसामंते ठिच्चा
समणं भगवं महावीरं एवं वयासी-जहा णं देवाणुप्पियाणं वहवे अंतेवासी समणा
निग्गंथा छउमत्था भवेत्ता छउमत्थावक्कमणेणं अवक्कंता णो खलु अहं तहा चेव छउ-
मत्थे भविता छउमत्थावक्कमणेणं अवक्कमिए, अहन्नं उप्पन्नणाणदंसणधरे अरहा जिणे
केवली भविता केवलिअवक्कमणेणं अवक्कमिए, तए णं भगवं गोयमे जमालिं अणगारं
एवं वयासी-णो खलु जमाली ! केवलिस्स णाणे वा दंसणे वा सेलंसि वा थंभंसि
वा थूंभंसि वा आवरेज्जइ वा णिवारेज्जइ वा, जइ णं तुमं जमाली ! उप्पन्नणाणदं-
सणधरे अरहा जिणे केवली भविता केवलिअवक्कमणेणं अवक्कंते तो णं इमाइं दो
वागरणाइं वागरेहि-सासए लोए जमाली ! असासए लोए जमाली ? सासए जीवे
जमाली ! असासए जीवे जमाली ? तए णं से जमाली अणगारे भगवया गोयमेणं
एवं वुत्ते समाणे संकिए कंखिए जाव कलुससमावन्ने जाए यावि होत्था, णो संचाएइ
भगवओ गोयमस्स किंचिवि पमोक्खमाइक्खित्तए तुसिणीए संचिट्ठइ, जमालीति
समणे भगवं महावीरे जमालिं अणगारं एवं वयासी-अत्थि णं जमाली ! ममं वहवे अंते-
वासी समणा निग्गंथा छउमत्था जे णं पभू एयं वागरणं वागरित्तए जहा णं अहं, नो
चेव णं एयप्पगारं भासं भासित्तए जहा णं तुमं, सासए लोए जमाली ! जन्न कयाइ
णासि ण कयाइ ण भवइ ण कयाइ ण भविस्सइ भुवि च भवइ य भविस्सइ य धुवे
णिइए सासए अक्खए अव्वए अवट्टिए, णिच्चे, असासए लोए जमाली ! जओ

ओसप्पिणी भवित्ता उस्सप्पिणी भवइ उस्सप्पिणी भवित्ता ओसप्पिणी भवइ,
 सासए जीवे जमाली ! जं न कयाइ णासि जाव णिच्चे, असासए जीवे जमाली ! जं
 नेरइए भवित्ता तिरिक्खजोणिए भवइ तिरिक्खजोणिए भवित्ता मणुस्से भवइ मणुस्से
 भवित्ता देवे भवइ । तए णं से जमाली अणगारे समणस्स भगवओ महावीरस्स
 एवमाइक्खमाणस्स जाव एवं पुरुवेमाणस्स एयमट्ठं णो सदहइ णो पत्तियइ णो रोएइ
 एयमट्ठं असदहमाणे अपत्तियमाणे अरोएमाणे दोच्चंपि समणस्स भगवओ महावीरस्स
 अतियाओ आयाए अवक्कमइ दोच्चंपि आयाए अवक्कमित्ता वट्ठहिं असव्भावुवभावणाहिं
 मिच्छत्ताभिणिवेसेहि य अप्पाणं च परं च तदुभयं च वुग्गाहमाणे वुप्पाएमाणे वट्ठइं
 वासाइं सामन्नपरियागं पाउणइ २ ता अद्धमासियाए संलेहणाए अत्ताणं झुसेइ अ० २ ता
 तीसं भत्ताइं अणसणाए छेदेइ २ ता तस्स ठाणस्स अणालोइयपडिक्कंते कालमासे कालं
 किच्चा लंतए कप्पे तेरससागरोवमट्ठिइए सु देवकिव्विसिए सु देवे सु देवकिव्विसियत्ताए
 उववत्ते ॥ ३८६ ॥ तए णं से भगवं गोयमे जमालि अणगारं कालगयं जाणित्ता जेणेव
 समणे भगवं महावीरे तेणेव उवागच्छइ ते० २ ता समणं भगवं महावीरं वंदइ नमंसइ
 २ ता एवं वयासी-एवं खलु देवाणुप्पियाणं अंतेवासी कुसिस्से जमाली णामं अणगारे से
 णं भंते ! जमाली अणगारे कालमासे कालं किच्चा कहिं गए कहिं उववत्ते ? गोयमाइ
 समणे भगवं महावीरे भगवं गोयमं एवं वयासी-एवं खलु गोयमा ! ममं अंतेवासी
 कुसिस्से जमाली नामं अणगारे से णं तया मम एवं आइक्खमाणस्स ४ एयमट्ठं णो सद-
 हइ ३ एयमट्ठं असदहमाणे ३ दोच्चंपि ममं अंतियाओ आयाए अवक्कमइ २ ता वट्ठहिं
 असव्भावुवभावणाहि तं चेव जाव देवकिव्विसियत्ताए उववत्ते ॥ ३८७ ॥ कइविहा
 णं भंते ! देवकिव्विसिया प० ? गोयमा ! तिविहा देवकिव्विसिया प०, तंजहा-
 तिपलिओवमट्ठिइया तिसागरोवमट्ठिइया तेरससागरोवमट्ठिइया, कहि णं भंते !
 तिपलिओवमट्ठिइया देवकिव्विसिया परिवसंति ? गोयमा ! उप्पि जोइसियाणं हिट्ठिं
 सोहम्मीसाणे सु कप्पे सु एत्थ णं तिपलिओवमट्ठिइया देवकिव्विसिया परिवसंति ।
 कहि णं भंते ! तिसागरोवमट्ठिइया देवकिव्विसिया परिवसंति ? गोयमा ! उप्पि
 सोहम्मीसाणाणं कप्पाणं हिट्ठिं सणकुमारमाहिंदे सु कप्पे सु एत्थ णं तिसागरोवमट्ठि-
 इया देवकिव्विसिया परिवसंति, कहि णं भंते ! तेरससागरोवमट्ठिइया देवकिव्वि-
 सिया देवा परिवसंति ? गोयमा ! उप्पि वंभलोगस्स कप्पस्स हिट्ठिं लंतए कप्पे
 एत्थ णं तेरससागरोवमट्ठिइया देवकिव्विसिया देवा परिवसंति । देवकिव्विसिया
 णं भंते ! के सु कम्मादाणे सु देवकिव्विसियत्ताए उववत्तारो भवंति ? गोयमा ! जे
 इमे जीवा आयरियपडिणीया उवज्झायपडिणीया कुलपडिणीया गणपडिणीया संघ-

पडिणीया आयरियउवज्जायाणं अयसकरा अवन्नकरा अकित्तिकरा वहूहि अस-
 व्भावुवभावणाहिं मिच्छतांभिनिवेसेहि य अप्पाणं च ३ वुग्गाहेमाणा वुप्पाएमाणा
 वहूइं वासाइं सामन्नपरियारं पाउणंति २ ता तस्स ठाणस्स अणालोइयपडिक्कंता
 कालमासे कालं किच्चा अन्नयरेसु देवकिव्विसिएसु देवकिव्विसियत्ताए उववत्तारो
 भवंति, तंजहा-तिपलिओवमट्ठिइएसु वा तिसागरोवमट्ठिइएसु वा तेरससागरोव-
 मट्ठिइएसु वा । देवकिव्विसिया णं भंते ! ताओ देवलोगाओ आउक्खएणं भवक्खएणं
 ठिइक्खएणं अणंतरं चयं चइत्ता कहिं गच्छंति कहिं उववज्जंति ? गोयमा ! जाव
 चत्तारि पंच नेरइयतिरिक्खजोणियमणुस्सदेवभवग्गहणाइं संसारं अणुपरियट्ठिता
 तओ पच्छा सिज्जंति वुज्जंति जाव अंतं करेंति, अत्थेगइया अणाइयं अणवदग्गं
 दीहमद्धं चाउरंतसंसारकंतारं अणुपरियट्ठंति ॥ जमाली णं भंते ! अणगारे अरसाहारे
 विरसाहारे अंताहारे पंताहारे ल्हहाहारे तुच्छाहारे अरसजीवी विरसजीवी जाव तुच्छ-
 जीवी उवसंतजीवी पसंतजीवी विवित्तजीवी ? हंता गोयमा ! जमाली णं अणगारे
 अरसाहारे विरसाहारे जाव विवित्तजीवी । जइ णं भंते ! जमाली अणगारे अरसा-
 हारे विरसाहारे जाव विवित्तजीवी कम्हा णं भंते ! जमाली अणगारे कालमासे
 कालं किच्चा लंतए कप्पे तेरससागरोवमट्ठिइएसु देवकिव्विसिएसु देवेसु देवकिव्वि-
 सियत्ताए उववन्ने ? गोयमा ! जमाली णं अणगारे आयरियपडिणीए उवज्जाय-
 पडिणीए आयरियउवज्जायाणं अयसकारए जाव वुप्पाएमाणे वहूइं वासाइं सामन्न-
 परियारं पाउणित्ता अद्धमासियाए संलेहणाए तीसं भत्ताइं अणसणाए छेदेइ तीसं०
 २ ता तस्स ठाणस्स अणालोइयपडिक्कंते कालमासे कालं किच्चा लंतए कप्पे जाव
 उववन्ने ॥ ३८८ ॥ जमाली णं भंते ! देवे ताओ देवलोयाओ आउक्खएणं जाव
 कहिं उववज्जिहिइ ? गोयमा ! चत्तारि पंच तिरिक्खजोणियमणुस्सदेवभवग्गहणाइं
 संसारं अणुपरियट्ठिता तओ पच्छा सिज्जिहिइ जाव अंतं काहिइ । सेवं भंते !
 २ ति ॥ ३८९ ॥ **जमाली समत्तो ॥ नवमसए ३३ इमो उद्देसो समत्तो ॥**

तेणं कालेणं तेणं समएणं रायगिहे जाव एवं वयासी-पुरिसे णं भंते ! पुरिसं
 हणमाणे किं पुरिसं हणइ नोपुरिसं हणइ ? गोयमा ! पुरिसंपि हणइ नोपुरि(सेवि)संपि
 हणइ, से केणट्ठेणं भंते ! एवं वुच्चइ पुरिसंपि हणइ नोपुरिसंपि हणइ ? गोयमा !
 तस्स णं एवं भवइ एवं खलु अहं एगं पुरिसं हणामि से णं एगं पुरिसं हणमाणे अणे-
 गजीवा हणइ, से तेणट्ठेणं गोयमा ! एवं वुच्चइ पुरिसंपि हणइ नोपुरिसंपि हणइ ।
 पुरिसे णं भंते ! आसं हणमाणे किं आसं हणइ नोआसे हणइ ? गोयमा ! आसंपि
 हणइ नोआसेवि हणइ, से केणट्ठेणं अट्ठो तहैव, एवं हत्थि सीहं वग्गं जाव चिल्ल-

लगं । पुरिसे णं भंते ! अन्नयरं तसपाणं हणमाणे किं अन्नयरं तसपाणं हणइ नोअ-
 न्नयरे तसपाणे हणइ ? गोयमा ! अन्नयरंपि तसपाणं हणइ नोअन्नयरेवि तसे पाणे
 हणइ, से केणट्ठेणं भंते ! एवं वुच्चइ अन्नयरंपि तसं पाणं हणइ नोअन्नयरेवि तसे पाणे
 हणइ ? गोयमा ! तस्स णं एवं भवइ एवं खलु अहं एगं अन्नयरं तसं पाणं हणामि
 से णं एगं अन्नयरं तसं पाणं हणमाणे अणेगे जीवे हणइ, से तेणट्ठेणं गोयमा ! तं
 चेव, एए सव्वेवि एक्कगमा । पुरिसे णं भंते ! इसि हणमाणे किं इसिं हणइ नोइसिं
 हणइ ? गोयमा ! इसिंपि हणइ नोइसिंपि हणइ, से केणट्ठेणं भंते ! एवं वुच्चइ जाव
 नोइसिंपि हणइ ? गोयमा ! तस्स णं एवं भवइ एवं खलु अहं एगं इसिं हणामि, से
 णं एगं इसिं हणमाणे अणंते जीवे हणइ, से तेणट्ठेणं निक्खेवओ । पुरिसे णं भंते ! पुरिसं
 हणमाणे किं पुरिसवेरेणं पुट्ठे नोपुरिसवेरेणं पुट्ठे ? गोयमा ! नियमा ताव पुरिसवेरेणं
 पुट्ठे, अहवा पुरिसवेरेणं य णोपुरिसवेरेणं य पुट्ठे अहवा पुरिसवेरेणं य नोपुरिसवेरेहि
 य पुट्ठे, एवं आसं एवं जाव चिल्ललगं जाव अहवा चिल्ललगवेरेणं य णोचिल्ललगवेरेहि य
 पुट्ठे, पुरिसे णं भंते ! इसि हणमाणे किं इसिवेरेणं पुट्ठे नोइसिवेरेणं पुट्ठे ? गोयमा !
 नियमा इसिवेरेणं य नोइसिवेरेहि य पुट्ठे ॥३९०॥ पुढविकाइया णं भंते ! पुढविकाइयं
 चेव आणमंति वा पाणमंति वा ऊससंति वा नीससंति वा ? हंता गोयमा ! पुढवि-
 काइया पुढविकाइयं चेव आणमंति वा जाव नीससंति वा । पुढविकाइया णं भंते !
 आउक्काइयं आणमंति वा जाव नीससंति वा ? हंता गोयमा ! पुढविकाइया आउक्काइयं
 आणमंति वा जाव नीससंति वा, एवं तेउक्काइयं वाउक्काइयं एवं वणस्सइकाइयं ।
 आउक्काइया णं भंते ! पुढविकाइयं आणमंति वा पाणमंति वा० ? एवं चेव, आउ-
 क्काइया णं भंते ! आउक्काइयं चेव आणमंति वा० ? एवं चेव, एवं तेउवाउवणस्सइ-
 काइयं । तेउक्काइया णं भंते ! पुढविकाइयं आणमंति वा० ? एवं जाव वणस्सइकाइया
 णं भंते ! वणस्सइकाइयं चेव आणमंति वा० ? तहेव । पुढविकाइए णं भंते ! पुढविका-
 इयं चेव आणममाणे वा पाणममाणे वा ऊससमाणे वा नीससमाणे वा कइकिरिए ?
 गोयमा ! सिय तिकिरिए सिय चउकिरिए सिय पंचकिरिए, पुढविकाइए णं भंते ! आउ-
 क्काइयं आणममाणे वा० ? एवं चेव, एवं जाव वणस्सइकाइयं, एवं आउकाइएणवि सव्वे
 भाणियव्वा, एवं तेउक्काइएणवि, एवं वाउक्काइएणवि, जाव वणस्सइकाइए णं भंते ।
 वणस्सइकाइयं चेव आणममाणे वा० ? पुच्छा, गोयमा ! सिय तिकिरिए सिय चउ-
 किरिए सिय पंचकिरिए ॥३९१॥ वाउक्काइए णं भंते ! ख्खस्स मूलं पचालेमाणे वा
 पवाडेमाणे वा कइकिरिए ? गोयमा ! सिय तिकिरिए सिय चउकिरिए सिय पंचकि-
 रिए । एवं कंदं एवं जाव मूलं, बीयं पचालेमाणे वा० पुच्छा, गोयमा ! सिय तिकिरिए

सिय चउकिरिए सिय पंचकिरिए । सेवं भंते ! सेवं भंते ! त्ति ॥ ३९२ ॥ नवम-
सए चउत्तीसइमो उद्देसो समत्तो ॥ नवमं सयं समत्तं ॥

गाहा—दिसि १ संवुडअणगारे २ आइद्धी ३ सामहत्यि ४ देवि ५ सभा ६ ।
उत्तरअंतरदीवा २८ दसमंमि सयंमि चोत्तीसा ॥३४॥ रायगिहे जाव एवं वयासी-
किमियं भंते ! पाईणत्ति पवुच्चइ ? गोयमा । जीवा चेव अजीवा चेव, किमियं भंते !
पढीणत्ति पवुच्चइ ? गोयमा । एवं चेव, एवं दाहिणा, एवं उदीणा, एवं उद्धा, एवं
अहोवि । कइ णं भंते ! दिसाओ पण्णत्ताओ ? गोयमा । दस दिसाओ पण्णत्ताओ,
तंजहा-पुरच्छिमा १ पुरच्छिमदाहिणा २ दाहिणा ३ दाहिणपच्चत्थिमा ४ पच्चत्थिमा
५ पच्चत्थिमुत्तरा ६ उत्तरा ७ उत्तरपुरच्छिमा ८ उद्धा ९ अहो १० । एयासि णं
भंते ! दसण्हं दिसाणं कइ णामधेज्जा पण्णत्ता ? गोयमा । दस नामधेज्जा पण्णत्ता,
तंजहा-इंदा १ अग्गेई २ जमा य ३ नेरई ४ वारुणी य ५ वायव्वा ६, सोमा ७
ईसाणी य ८ विमला य ९ तमा य १० वोद्धव्वा । इंदा णं भंते ! दिसा किं जीवा
जीवदेसा जीवपएसा अजीवा अजीवदेसा अजीवपएसा ? गोयमा ! जीवावि ३ तं
चेव जाव अजीवपएसावि, जे जीवा ते नियमा एगिंदिया वेइंदिया जाव पंचिंदिया
अणिंदिया, जे जीवदेसा ते नियमा एगिंदियदेसा जाव अणिंदियदेसा, जे जीवपएसा
ते नियमा एगिंदियपएसा वेइंदियपएसा जाव अणिंदियपएसा, जे अजीवा ते दुविहा
पन्नत्ता, तंजहा-रूवी अजीवा य अरूवी अजीवा य, जे रूवी अजीवा ते चउव्विहा
पन्नत्ता, तंजहा-खंधा १ खंधदेसा २ खंधपएसा ३ परमाणुपोग्गला ४, जे अरूवी
अजीवा ते सत्तविहा पन्नत्ता, तंजहा-नोधम्मत्थिकाए धम्मत्थिकायस्स देसे, धम्म-
त्थिकायस्स पएसा, नोअधम्मत्थिकाए अधम्मत्थिकायस्स देसे, अधम्मत्थिकायस्स
पएसा, नोआगासत्थिकाए आगासत्थिकायस्स देसे, आगासत्थिकायस्स पएसा, अद्धा-
समए ॥ अग्गेई णं भंते ! दिसा किं जीवा जीवदेसा जीवपएसा ० ? पुच्छा, गोयमा !
णोजीवा जीवदेसावि १ जीवपएसावि २ अजीवावि १ अजीवदेसावि २ अजीवप-
एसावि ३, जे जीवदेसा ते नियमा एगिंदियदेसा अहवा एगिंदियदेसा य वेइंदि-
यस्स देसे १ अहवा एगिंदियदेसा य वेइंदियस्स देसा २ अहवा एगिंदियदेसा य
वेइंदियाण य देसा ३ अहवा एगिंदियदेसा तेइंदियस्स देसे एवं चेव तियभंगो
भाणियव्वो एवं जाव अणिंदियाणं तियभंगो, जे जीवपएसा ते नियमा एगिंदिय-
पएसा अहवा एगिंदियपएसा य वेइंदियस्स पएसा अहवा एगिंदियपएसा य
वेइंदियाण य पएसा एवं आइल्लविरहिओ जाव अणिंदियाणं, जे अजीवा ते दुविहा
पन्नत्ता, तंजहा-रूवी अजीवा य अरूवी अजीवा य, जे रूवी अजीवा ते चउव्विहा

पन्नत्ता, तंजहा-खंधा जाव परमाणुपोग्गला ४, जे अरुवी अजीवा ते सत्तविहा पन्नत्ता, तंजहा-नोधम्मत्थिकाए धम्मत्थिकायस्स देसे धम्मत्थिकायस्स पएसा एव अधम्मत्थिकायस्सवि जाव आगासत्थिकायस्स पएसा अद्धासमए । विदिसासु नत्थि जीवा देसे भंगो य होइ सव्वत्थ । जमा णं भंते ! दिसा किं जीवा० ? जहा इंदा तहेव निरवसेसा, नेरई य जहा अग्गेई, वारुणी जहा इंदा, वायव्वा जहा अग्गेई, सोमा जहा इंदा, ईसाणी जहा अग्गेई, विमलाए जीवा जहा अग्गेई, अजीवा जहा इंदा, एवं तमाएवि, नवरं अरुवी छव्विहा अद्धासमओ न भन्नइ ॥ ३९३ ॥ कइ णं भंते ! सरीरा पन्नत्ता ? गोयमा ! पंच सरीरा पन्नत्ता, तंजहा-ओरालिए जाव कम्मए । ओरालियसरीरे णं भंते ! कइविहे पन्नत्ते ? एवं ओगाहणसंठाणं निरवसेसं भाणियव्वं जाव अप्पावहुगंति । सेवं भंते ! सेवं भंते ! त्ति ॥ ३९४ ॥ दसमे सए पढमो उद्देसो समत्तो ॥

रायगिहे जाव एवं वयासी-संवुडस्स णं भंते ! अणगारस्स वीइपंधे ठिच्चा पुरओ रुवाईं निज्झायमाणस्स मग्गओ रुवाईं अवयक्खमाणस्स पासओ रुवाईं अवलोएमाणस्स उद्धं रुवाईं ओलोएमाणस्स अहे रुवाईं आलोएमाणस्स तस्स णं भंते ! किं इरियावहिया किरिया कज्जइ संपराइया किरिया कज्जइ ? गोयमा ! संवुडस्स णं अणगारस्स वीइपंधे ठिच्चा जाव तस्स णं णो इरियावहिया किरिया कज्जइ संपराइया किरिया कज्जइ, से केणट्ठेणं भंते ! एवं वुच्चइ संवुडस्स जाव संपराइया किरिया कज्जइ ? गोयमा ! जस्स णं कोहमाणमायालोभा एवं जहा सत्तमसए पढमोद्देसए जाव से णं उस्सुत्तमेव रीयइ, से तेणट्ठेणं जाव संपराइया किरिया कज्जइ । संवुडस्स णं भंते ! अणगारस्स अवीइपंधे ठिच्चा पुरओ रुवाईं निज्झायमाणस्स जाव तस्स णं भंते ! किं इरियावहिया किरिया कज्जइ० ? पुच्छा, गोयमा ! संवुड० जाव तस्स णं इरियावहिया किरिया कज्जइ नो संपराइया किरिया कज्जइ, से केणट्ठेणं भंते ! एवं वुच्चइ जहा सत्तमे सए पढमोद्देसए जाव से णं अहासुत्तमेव रीयइ से तेणट्ठेणं जाव नो संपराइया किरिया कज्जइ ॥ ३९५ ॥ कइविहा णं भंते ! जोणी प० ? गोयमा ! तिविहा जोणी प०, तंजहा-सीया उसिणा सीओसिणा, एवं जोणीपयं निरवसेसं भाणियव्वं ॥ ३९६ ॥ कइविहा णं भंते ! वेयणा प० ? गोयमा ! तिविहा वेयणा प०, तंजहा-सीया उसिणा सीओसिणा, एवं वेयणापयं निरवसेसं भाणियव्वं जाव नेरइया णं भंते ! किं दुक्खं वेयणं वेदंति सुहं वेयणं वेयंति अदुक्खमसुहं वेयणं वेयंति ? गोयमा ! दुक्खंपि वेयणं वेयंति सुहंपि वेयणं वेयंति अदुक्खमसुहंपि वेयणं वेयंति ॥ ३९७ ॥ मासियणं भंते ! भिक्खुपडिमं पडिवन्नस्स अणगारस्स

निचं वोसट्टकाए चियत्तदेहे, एवं मासिया भिक्खुपडिमा निरवसेसा भाणियव्वा
[जहा दसाहिं] जाव आराहिया भवइ ॥ ३९८ ॥ भिक्खू य अन्नयरं अकिच्चट्ठाणं
पडिसेवित्ता से णं तस्स ठाणस्स अणालोइयपडिक्कंते कालं करेइ नत्थि तस्स आरा-
हणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा,
भिक्खू य अन्नयरं अकिच्चट्ठाणं पडिसेवित्ता तरस णं एवं भवइ पच्छावि णं अहं
च(रि)रमकालसमयंसि एयस्स ठाणस्स आलोएस्सामि जाव पडिवज्जिस्सामि, से णं
तस्स ठाणस्स अणालोइयपडिक्कंते जाव नत्थि तस्स आराहणा, से णं तस्स ठाणस्स
आलोइयपडिक्कंते कालं करेइ अत्थि तस्स आराहणा, भिक्खू य अन्नयरं अकिच्चट्ठाणं
पडिसेवित्ता तस्स णं एवं भवइ—जइ ताव समणोवासगावि कालमासे कालं किच्चा
अन्नयरेसु देवलोएसु देवत्ताए उववत्तारो भवंति किमंग पुण अहं अन्नपन्नियदेवत्तणंपि
नो लभिस्सामित्ति कट्ठु से णं तस्स ठाणस्स अणालोइयपडिक्कंते कालं करेइ नत्थि तस्स
आराहणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा ।
सेवं भंते ! सेवं भंते ! त्ति ॥ ३९९ ॥ दस्समसयस्स वीओ उद्देसो समत्तो ॥

रायगिहे जाव एवं वयासी—आइट्ठीए णं भंते ! देवे जाव चत्तारि पंच देवावा-
संतराई वीइक्कंते तेण परं परिट्ठीए ? हंता गोयमा ! आइट्ठीए णं तं चेव, एवं असुर-
कुमारेवि, नवरं असुरकुमारावासंतराई सेसं तं चेव, एवं एएणं कमेणं जाव थणिय-
कुमारे, एवं वाणमंतरजोइसियवेमाणिए जाव तेण परं परिट्ठीए । अप्पिट्ठिए णं भंते !
देवे से महिद्धियस्स देवस्स मज्झंमज्झेणं वीइवएज्जा ? गोयमा ! णो इणट्ठे समट्ठे ।
समिट्ठिए णं भंते ! देवे समिट्ठियस्स देवस्स मज्झंमज्झेणं वीइवएज्जा ? णो इणट्ठे
समट्ठे, पमत्तं पुण वीइवएज्जा, से णं भंते ! कि विमोहिता पभू अविमोहिता पभू ?
गोयमा ! विमोहेत्ता पभू नो अविमोहेत्ता पभू । से भंते ! किं पुव्वि विमोहेत्ता
पच्छा वीइवएज्जा पुव्वि वीइवएत्ता पच्छा विमोहेज्जा ? गोयमा ! पुव्वि विमोहेत्ता
पच्छा वीइवएज्जा णो पुव्वि वीइवइत्ता पच्छा विमोहेज्जा । महिद्धिए णं भंते ! देवे
अप्पिट्ठियस्स देवस्स मज्झंमज्झेणं वीइवएज्जा ? हंता वीइवएज्जा, से णं भंते ! कि
विमोहिता पभू अविमोहेत्ता पभू ? गोयमा ! विमोहेत्तावि पभू अविमोहेत्तावि पभू,
से भंते ! कि पुव्वि विमोहेत्ता पच्छा वीइवइज्जा पुव्वि वीइवइत्ता पच्छा विमोहेज्जा ?
गोयमा ! पुव्वि वा विमोहेत्ता पच्छा वीइवएज्जा पुव्वि वा वीइवएत्ता पच्छा विमो-
हेज्जा । अप्पिट्ठिए णं भंते ! असुरकुमारे महिद्धियस्स असुरकुमारस्स मज्झंमज्झेणं
वीइवएज्जा ? णो इणट्ठे समट्ठे, एवं असुरकुमारेणवि तिज्जि आलावगा भाणियव्वा जहा
ओहिएणं देवेणं भणिया, एवं जाव थणियकुमा(रा)रेणं, वाणमंतरजोइसियवेमाणिएणं

एवं चेव । अप्पिड्डिया णं भंते ! देवे महिड्डियाए देवीए मज्झंमज्झेणं वीइवएज्जा ?
 णो इणट्ठे समट्ठे, समिड्डिए णं भंते ! देवे समिड्डियाए देवीए मज्झंमज्झेणं०; एवं
 तहेव देवेण य देवी(ण)ए यं दंडओ भाणियव्वो जाव वेमाणि(या)ए । अप्पिड्डिया णं
 भंते ! देवी महिड्डियस्स देवस्स मज्झंमज्झेणं एवं एसोवि तइओ दंडओ भाणियव्वो
 जाव महिड्डिया वेमाणिणी अप्पिड्डियस्स वेमाणियरस मज्झंमज्झेणं वीइवएज्जा ? हंता
 वीइवएज्जा । अप्पिड्डिया णं भंते ! देवी महिड्डियाए देवीए मज्झंमज्झेणं वीइवएज्जा ?
 णो इणट्ठे समट्ठे, एवं समिड्डिया देवी समिड्डियाए देवीए तहेव, महिड्डियावि देवी
 अप्पिड्डियाए देवीए तहेव, एवं एक्केक्के तिन्नि २ आलावगा भाणियव्वा जाव महि-
 ड्डिया णं भंते ! वेमाणिणी अप्पिड्डियाए वेमाणिणीए मज्झंमज्झेणं वीइवएज्जा ? हंता
 वीइवएज्जा, सा भंते ! किं विमोहिंत्ता पभू तहेव जाव पुव्वि वा वीइवइत्ता पच्छा
 विमोहेज्जा एए चत्तारि दंडगा ॥ ४०० ॥ आसस्स णं भंते ! धावमाणस्स किं
 खुखुत्ति करेइ ? गोयमा ! आसस्स णं धावमाणस्स हिययस्स य जगयस्स य अंतरा
 एत्थ णं क(क्क)व्वडए नामं वाए संमुच्छइ जे णं आसस्स धावमाणस्स खुखुत्ति करेइ
 ॥ ४०१ ॥ अह भंते ! आसइस्सामो सइस्सामो चिट्ठिस्सामो निसीइस्सामो तुयट्ठि-
 स्सामो, आमंतणि आणवणी जायणी तह पुच्छणी य पणवणी । पच्चवखाणी भासा
 भासा इच्छाणुलोमा य ॥ १ ॥ अणभिग्गहिंया भासा भासा य अभिग्गहंमि वोद्धव्वा ।
 संसयकरणी भासा वोयडमव्वोयडा चेव ॥ २ ॥ पन्नवणी णं एसा भासा न एसा
 भासा मोसा ? हंता गोयमा ! आसइस्सामो तं चेव जाव न एसा भासा मोसा ।
 सेवं भंते ! सेवं भंते ! ति ॥ ४०२ ॥ **दस्समे सए तइथो उद्देसो समत्तो ॥**

तेणं कालेणं तेणं समएणं वाणियगामे नामं नयरे होत्था वन्नओ, दूड्ढपलासए
 उज्जाणे, सामी समोसडे जाव परिसा पडिगया । तेणं कालेणं तेणं समएणं सम-
 णस्स भगवओ महावीरस्स जेट्ठे अंतेवासी इंदभूर्इ नामं अणगारे जाव उड्ढंजाणू
 जाव विहरइ । तेणं कालेणं तेणं समएणं समणस्स भगवओ महावीरस्स अंतेवासी
 सामहत्थी नामं अणगारे पगइभइए जहा रोहे जाव उड्ढंजाणू जाव विहरइ, तए णं
 से सामहत्थी अणगारे जायसड्ढे जाव उट्ठाए उट्ठेता जेणेव भगवं गोयमे तेणेव
 उवागच्छइ तेणेव उवागच्छित्ता भगवं गोयमं तिवखुत्तो जाव पज्जुवासमाणे एवं
 वयासी-अत्थि णं भंते ! चमरस्स असुरिदस्स असुरकुमाररण्णो तायत्तीसगा देवा ?
 हंता अत्थि, से केणट्ठेणं भंते ! एवं पुच्चइ चमरस्स असुरिदस्स असुरकुमाररण्णो
 तायत्तीसगा देवा २ ? एवं खलु सामहत्थी । तेणं कालेणं तेणं समएणं इहेव
 जंहुदीवे २ भारहे वासे कायंदी नामं नयरी होत्था वन्नओ, तत्थ णं कायंदीए नय-

रीए तायत्तीसं सहाया गाहावई समणोवासगा परिवसन्ति अद्धा जाव अपरिभूया
अभिगयजीवाजीवा उवलद्धपुण्णपावा जाव विहरन्ति, तए णं ते तायत्तीसं सहाया
गाहावई समणोवासगा पुव्वि उग्गा उग्गविहारी संविग्गा संविग्गविहारी भवित्ता
तओ पच्छा पासत्था पासत्थविहारी ओसन्ना ओसन्नविहारी कुसीला कुसीलविहारी
अहाछंदा अहाछंदविहारी बहूइं वासाइं समणोवासगपरियागं पाउणंति २ ता अद्ध-
मासियाए संलेहणाए अत्ताणं झूसेंति अत्ताणं झूसेत्ता तीसं भत्ताइं अणसणाए छेदेति
२ ता तस्सं ठाणस्स अणालोइयपडिक्कंता कालमासे कालं किच्चा चमरस्स असुरिंदस्स
असुरकुमाररन्नो तायत्तीसगदेवत्ताए उववन्ना, जप्पभिइं च णं भंते । कायंदगा
तायत्तीसं सहाया गाहावई समणोवासगा चमरस्स असुरिंदस्स असुरकुमाररन्नो ताय-
त्तीसगदेवत्ताए उववन्ना तप्पभिइं च णं भंते । एवं वुच्चइ चमरस्स असुरिंदस्स असु-
रकुमाररन्नो तायत्तीसगा देवा २ ? (तत्थ)तए णं भगवं गोयमे सामहत्थिणा अणगारेणं
एवं वुत्ते समाणे संकिए कंखिए वित्तिणिच्छिए उट्ठाए उट्ठेइ उट्ठाए उट्ठेत्ता सामह-
त्थिणा अणगारेणं सद्धिं जेणेव समणे भगवं महावीरे तेणेव उवागच्छइ तेणेव
उवागच्छित्ता समणं भगवं महावीरं वंदइ नमंसइ वंदित्ता नमंसित्ता एवं वयासी-
अत्थि णं भंते ! चमरस्स असुरिंदस्स असुररण्णो तायत्तीसगा देवा २ ? हंता
अत्थि, से केणट्ठेणं भंते ! एवं वुच्चइ ? एवं तं चेव सव्वं भाणियव्वं जाव तप्पभिइं
च णं एवं वुच्चइ चमरस्स असुरिंदस्स असुरकुमाररन्नो तायत्तीसगा देवा २ ? णो
इणट्ठे समट्ठे, एवं खलु गोयमा । चमरस्स णं असुरिंदस्स असुरकुमाररन्नो तायत्तीसगाणं
देवाणं सासए नामधेज्जे पण्णत्ते, जं न कयाइ नासी न कयाइ न भवइ ण कयाइ ण
भविस्सइ जाव निच्चे अव्वोच्छित्तिनयट्ठयाए अन्ने चयंति अन्ने उववज्जंति । अत्थि णं
भंते ! बलिस्स वइरोयणिदस्स वइरोयणरन्नो तायत्तीसगा देवा २ ? हंता अत्थि,
से केणट्ठेणं भंते ! एवं वुच्चइ बलिस्स वइरोयणिदस्स जाव तायत्तीसगा देवा २ ?
एवं खलु गोयमा । तेणं कालेणं तेणं समएणं इहेव जंवुदीवे २ भारहे वासे विभेले
णाम संनिवेसे होत्था वन्नओ, तत्थं णं विभेले संनिवेसे जहा चमरस्स जाव उव-
वन्ना, जप्पभिइं च णं भंते ! ते विभेलगा तायत्तीसं सहाया गाहावई समणोवा-
सगा बलिस्स वइरोयणिदस्स सेसं तं चेव जाव निच्चे अव्वोच्छित्तिणयट्ठयाए अन्ने
चयंति अन्ने उववज्जंति । अत्थि णं भंते ! धरणस्स नागकुमारिंदस्स नागकुमाररन्नो
तायत्तीसगा देवा २ ? हंता अत्थि, से केणट्ठेणं जाव तायत्तीसगा देवा २ ? गोयमा !
धरणस्स नागकुमारिंदस्स नागकुमाररन्नो तायत्तीसगाणं देवाणं सासए नामधेज्जे
पण्णत्ते जं न कयाइ नासी जाव अन्ने चयंति अन्ने उववज्जंति, एवं भूयाणंदस्सवि,

एवं जाव महाघोसस्स । अत्थि णं भंते ! सक्करस देविंदस्स देवरत्तो० पुच्छा, हंता अत्थि, से केणट्ठेणं भंते ! जाव तायत्तीसगा देवा २ ? एवं खलु गोयमा ! तेणं कालेणं तेणं समएणं इहेव जंबुदीवे दीवे भारहे वासे पालासए(वालाए) नामं संनिवेसे होत्था वन्नओ, तत्थ णं पालासए सन्निवेसे तायत्तीसं सहाया गाहावई समणोवासगा जहा चमरस्स जाव विहरंति, तए णं ते तायत्तीसं सहाया गाहावई समणोवासगा पुव्विपि पच्छावि उग्गा उग्गविहारी संविग्गा संविग्गविहारी बहूइं वासाइं समणोवासगपरि-यागं पाउणंति पाउणित्ता मासियाए संलेहणाए अत्ताणं झुसेन्ति झुसित्ता साट्ठिं भत्ताइं अणसणाए छेदेति २ ता आलोइयपडिक्कंता समाहिपत्ता कालमासे कालं किच्चा जाव उववन्ना, जप्पभिइं च णं भंते ! पालासिगा तायत्तीसं सहाया गाहावई समणोवासगा सेसं जहा चमरस्स जाव अण्णे उववज्जंति । अत्थि णं भंते ! ईसाणस्स ३ एवं जहा सक्करस्स नवरं चंपाए नयरीए जाव उववन्ना, जप्पभिइं च णं भंते ! चंपिज्जा ताय-त्तीसं सहाया० सेसं तं चेव जाव अन्ने उववज्जंति । अत्थि णं भंते ! सणंकुमारस्स देविंदस्स देवरत्तो० पुच्छा, हंता अत्थि, से केणट्ठेणं जहा धरणस्स तहेव एवं जाव प्राणयस्स एवं अञ्चुयस्स जाव अन्ने उववज्जंति । सेवं भंते ! सेवं भंते ! त्ति ॥४०३॥

दसमस्स सयस्स चउत्थो उद्देसओ समत्तो ॥

तेणं कालेणं तेणं समएणं रायगिहे नामं नगरे गुणसिलए उज्जाणे जाव परिता पडिगया, तेणं कालेणं तेणं समएणं समणस्स भगवओ महावीरस्स बहवे अतेवासी थेरा भगवंतो जाइसंपन्ना जहा अट्ठमे सए सत्तमुद्देसए जाव विहरंति । तए णं ते थेरा भगवंतो जायसद्धा जाव संसया जहा गोयमसामी जाव पज्जुवासमाणा एवं वयासी-चमरस्स णं भंते ! असुरिंदस्स असुरकुमाररत्तो कइ अग्गमहिंसीओ पन्न-त्ताओ ? अज्जो ! पंच अग्गमहिंसीओ पन्नत्ताओ, तंजहा-काली राई रयणी विज्जू मेहा, तत्थ णं एगमेगाए देवीए अट्ठट्ठ देविसहस्सा परिवारो पन्नत्तो, पभू णं भंते ! ताओ एगमेगा देवी अन्नाइं अट्ठट्ठदेवीसहस्साइं परि(या)वारं विउव्वित्तए ? एवामेव सपुव्वा-वरेणं चत्तालीसं देवीसहस्सा, से तं तुडिए, पभू णं भंते ! चमरे असुरिंदे असुरकुमा-रराया चमरचंचाए रायहाणीए सभाए सुहम्माए चमरंसि सीहासणंसि तुडिएणं सद्धि दिव्वाइं भोगभोगाइं भुजमाणे विहरित्तए ? नो इणट्ठे समट्ठे । पभू णं अज्जो ! चमरे असुरिंदे असुरकुमारराया चमरचंचाए रायहाणीए सभाए सुहम्माए चमरंसि सीहास-णंसि चउसट्ठीए सामाणियसाहस्सीहिं तायत्तीसाए जाव अन्नेहिं च बहूहिं असुरकुमारेहिं देवेहि य देवीहि य सद्धिं संपरिवुडे महयाहय जाव भुंजमाणे विहरित्तए० केवलं परि-यारिद्धीए नो चेव णं, मेहुणवत्तियं ॥ ४०४ ॥ चमरस्स णं भंते ! असुरिंदस्स असुर-

कुमाररन्नो सोमस्स महारन्नो कइ अग्गमहिंसीओ पन्नत्ताओ ? अज्जो ! चत्तारि अग्ग-
महिंसीओ पन्नत्ताओ, तंजहा-कणंगा कणगलया चित्तगुत्ता वसुंधरा, तत्थ णं एग-
मेगाए देवीए एगमेगं देविसहस्सं परिवारो पन्नत्तो, पभू णं ताओ एगमेगा(ए) देवी(ए)
अन्नं एगमेगं देविसहस्सं परियारं विउव्वित्तए, एवामेव सपुव्वावरेणं चत्तारि देवि-
सहस्सा, सेत्तं तुडिए, पभू णं भंते । चमरस्स असुरिदस्स असुरकुमाररन्नो सोमे
महाराया सोमाए रायहाणीए सभाए सुहम्माए सोमंसि सीहासणंसि तुडिएणं अवसेसं
जहा चमरस्से, नवरं परियारो जहा सूरियाभस्स, सेसं तं चेव, जाव णो चेव णं
मेहुणवत्तियं । चमरस्स णं भंते । जाव रन्नो जमस्स महारन्नो कइ अग्गमहिंसीओ ?
एवं चेव नवरं जमाए रायहाणीए सेसं जहा सोमस्स, एवं वरुणस्सवि, नवरं वरुणाए
रायहाणीए, एवं वेसमणस्सवि नवरं वेसमणाए रायहाणीए सेसं तं चेव जाव मेहु-
णवत्तियं । वलिस्स णं भंते । वइरोयणिदस्स पुच्छा, अज्जो ! पंच अग्गमहिंसीओ
पन्नत्ताओ, तंजहा-सुभा निसुंभा रंभा निरंभा मयणा, तत्थ णं एगमेगाए देवीए
अट्ठट्ठ सेसं जहा चमरस्स, नवरं वलिचंचाए रायहाणीए परिया(वा)रो जहा मोउदे-
सए, सेसं तं चेव जाव मेहुणवत्तियं । वलिस्स णं भंते । वइरोयणिदस्स वइरोय-
णरन्नो सोमस्स महारन्नो कइ अग्गमहिंसीओ पन्नत्ताओ ? अज्जो ! चत्तारि अग्गम-
हिंसीओ पन्नत्ताओ, तंजहा-मीणगा सुभद्दा वि(ज्जु)जया असणी, तत्थ णं एगमेगाए
देवीए सेसं जहा चमर(सोम)स्स, एवं जाव वेसमणस्स ॥ धरणस्स णं भंते । नाग-
कुमारिंदस्स नागकुमाररन्नो कइ अग्गमहिंसीओ पन्नत्ताओ ? अज्जो ! छ अग्गमहिंसीओ
पन्नत्ताओ, तंजहा-इ(अ)ला सु(स)क्का स(ते)दारा सोयामणी इंदा घणविज्जुया, तत्थ णं
एगमेगाए देवीए छ छ देविसहस्सा परिवारो पन्नत्तो, पभू णं भंते । ताओ एगमेगा(ए)
देवी(ए) अन्नाइं छ छ देविसहस्साइं परियार विउव्वित्तए एवामेव सपुव्वावरेणं छत्तीसं
देविसहस्साइं, सेत्तं तुडिए । पभू णं भंते । धरणे सेसं तं चेव, नवरं धरणाए राय-
हाणीए धरणंसि सीहासणंसि सओ परिवारो सेसं तं चेव । धरणस्स णं भंते । नागकु-
मारिंदस्स कालवालस्स लोगवालस्स महारन्नो कइ अग्गमहिंसीओ पन्नत्ताओ ? अज्जो !
चत्तारि अग्गमहिंसीओ पन्नत्ताओ, तंजहा-असोगा विमला सुप्पभा सुदंसणा, तत्थ णं
एगमेगाए देवीए अवसेसं जहा चमरस्स लोगपालाणं, एवं सेसाणं तिण्हवि । भूया-
णंदस्स णं भंते । पुच्छा, अज्जो ! छ अग्गमहिंसीओ पन्नत्ताओ, तंजहा-रूया रूयंसा
सुरूया रू(रू)यगावई रूयकंता रूयप्पभा, तत्थ णं एगमेगाए देवीए अवसेसं जहा धर-
णस्स, भूयाणंदस्स णं भंते । नागकुमारस्स वि(चि)त्तस्स पुच्छा, अज्जो ! चत्तारि
अग्गमहिंसीओ पण्णत्ताओ, तंजहा-सुणंदा सुभद्दा सुजाया सुमणा, तत्थ णं एगमेगाए

देवीए अवसेसं जहा चमरलोगपालाणं एवं सेसाणं तिण्हवि लोगपालाणं, जे दाहिणि-
 छाणिद्रा तेसि जहा धरणिंदस्स, लोगपालाणंपि तेसिं जहा धरणस्स लोगपालाणं,
 उत्तरिछाणं इंद्राणं जहा भूयाणंदस्स, लोगपालाणावि तेसिं जहा भूयाणंदस्स लोगपा-
 लाणं, नवरं इंद्राणं सव्वेसि रायहाणीओ सीहासणाणि य सरिसणामणाणि, परिवारो
 जहा तइयसए पढमे उद्देसए, लोगपालाणं सव्वेसि रायहाणीओ सीहासणाणि य सरि-
 सणामणाणि, परिवारो जहा चमरस्स लोगपालाणं । कालस्स णं भंते ! पिसादंदस्स
 पिसायरन्नो कइ अग्गमहिंसीओ पन्नत्ताओ ? अज्जो ! चत्तारि अग्गमहिंसीओ पन्न-
 त्ताओ, तंजहा-कमला कमलप्पभा उप्पला सुदंसणा, तत्थ णं एगमेगाए देवीए एग-
 मेगं देविसहस्सं सेसं जहा चमरलोगपालाणं, परिवारो तहेव, नवरं कालाए राय-
 हाणीए कालंसि सीहासणंसि, सेसं तं चेव, एवं महाकालस्सवि । सुत्तस्स णं भंते !
 भूइंदस्स भूयरन्नो पुच्छा, अज्जो ! चत्तारि अग्गमहिंसीओ पन्नत्ताओ, तंजहा-
 रुववई बहुरुवा सुरुवा सुभगा, तत्थ णं एगमेगा(ए) सेसं जहा कालस्स, एवं पडि-
 रुवस्सवि । पुन्नभदस्स णं भंते ! जक्खिंदस्स पुच्छा, अज्जो ! चत्तारि अग्गमहिंसीओ
 पन्नत्ताओ, तंजहा-पुन्ना बहुपुत्तिया उत्तमा तारया, तत्थ णं एगमेगाए सेसं जहा
 कालस्स, एवं माणिभदस्सवि । भीमस्स णं भंते ! रक्खसिंदस्स पुच्छा, अज्जो !
 चत्तारि अग्गमहिंसीओ पन्नत्ताओ, तंजहा-पडमा पडमावई कण्णा रयणप्पभा, तत्थ
 णं एगमेगा देवी सेसं जहा कालस्स । एवं महाभीमस्सवि । किन्नरस्स णं भंते ! पुच्छा,
 अज्जो ! चत्तारि अग्गमहिंसीओ पन्नत्ताओ, तंजहा-वडेंसा केउमई रइसेणा रइप्पिया,
 तत्थ णं सेसं तं चेव, एवं किंपुरिसस्सवि । स(सु)प्पुरिसस्स णं पुच्छा, अज्जो ! चत्तारि
 अग्गमहिंसीओ पन्नत्ताओ, तंजहा-रोहिणी नवमिया हिरी पुप्फवई, तत्थ णं एग-
 मेगा देवी सेसं तं चेव, एवं महापुरिसस्सवि । अइकायस्स णं पुच्छा, अज्जो ! चत्तारि
 अग्गमहिंसीओ प०, तंजहा-भु(य)यंगा भुयंगवई महाकच्छा फुडा, तत्थ णं०, सेसं तं
 चेव, एवं महाकायस्सवि । गीयरइस्स णं भंते ! पुच्छा, अज्जो ! चत्तारि अग्गमहिं-
 सीओ प०, तंजहा-सुधोसा विमला सुस्सरा सरस्सई, तत्थ णं०, सेसं तं चेव, एवं
 गीयजसस्सवि, सव्वेसिं एएसि जहा कालस्स, नवरं सरिसना(मगा)मियाओ रायहा-
 णीओ सीहासणाणि य, सेसं तं चेव । चंदस्स णं भंते ! जोइसिंदस्स जोइसरन्नो पुच्छा,
 अज्जो ! चत्तारि अग्गमहिंसीओ पन्नत्ताओ, तंजहा-चंदप्पभा दोसिणाभा अच्चिमाली
 पभंकरा, एवं जहा जीवाभिगमे जोइसियउद्देसए तहेव, सूरस्सवि सूरप्पभा आ(इच्चा)-
 यवाभा अच्चिमाली पभंकरा, सेसं तं चेव, जाव नो चेव णं मेहुणवत्तिंय । इंगालस्स
 णं भंते ! महग्गहस्स कइ अग्गमहिंसीओ पुच्छा, अज्जो ! चत्तारि अग्गमहिंसीओ

पन्नत्ताओ, तंजहा-विजया वेजयंती जयंती अपराजिया, तत्थ णं एगमेगाए देवीए
 सेसं तं चेव जहा चंदस्स, नवरं इंगालवडेंसए विमाणे इंगालगंसि सीहासणंसि सेसं
 तं चेव, एवं वियालगस्सवि, एवं अट्टासी(ई)एवि महागहाणं भाणियव्वं जाव
 भावकेउस्स, नवरं वडेसगा सीहासणाणि य सरिसनामगाणि, सेसं तं चेव । सक्कस्स
 णं भंते ! देविदस्स देवरत्तो पुच्छा, अज्जो ! अट्ट अग्गमहिंसीओ पन्नत्ताओ, तंजहा-
 पउमा सिवा से(वा)या अंजू अमला अच्छरा नवमिया रोहिणी, तत्थ णं एगमेगाए
 देवीए सोलस सोलस देविसहस्सा परिवारो पन्नत्तो, पभू णं ताओ एगमेगा देवी
 अन्नाइं सोलस २ देविसहस्सपरियारं विउव्वित्तए, एवामेव सपुव्वावरेणं अट्टावीसुत्तरं
 देविसयसहस्सं परियारं विउव्वित्तए, सेतं तुडिए । पभू णं भंते ! सक्के देविदे
 देवराया सोहम्मो कप्पे सोहम्मवडेसए विमाणे सभाए सुहम्माए सक्कंसि सीहास-
 णंसि तुडिएणं सद्धिं सेसं जहा चमरस्स नवरं परिवारो जहा मोउडेंसए । सक्कस्स
 णं भंते ! देविदस्स देवरत्तो सोमस्स महारत्तो कइ अग्गमहिंसीओ पुच्छा, अज्जो !
 चत्तारि अग्गमहिंसीओ पन्नत्ताओ, तंजहा-रोहिणी मयणा चित्ता सोमा, तत्थ णं एग-
 मेगा० सेसं जहा चमरलोगपालाणं, नवरं सयंपभे विमाणे सभाए सुहम्माए सोमंसि
 सीहासणंसि, सेसं तं चेव, एवं जाव वेसमणस्स, नवरं विमाणाइं जहा तइयसए ।
 ईसाणस्स णं भंते ! पुच्छा, अज्जो ! अट्ट अग्गमहिंसीओ प०, तंजहा-कण्हा कण्ह-
 राई रामा रामरत्निखया वसू वसुगुत्ता वसुमिक्ता वसुंधरा, तत्थ णं एगमेगाए० सेसं
 जहा सक्कस्स । ईसाणस्स णं भंते ! देविदस्स देवरत्तो सोमस्स महारत्तो कइ
 अग्गमहिंसीओ पुच्छा, अज्जो ! चत्तारि अग्गमहिंसीओ प०, तंजहा-पुढवी राई
 रयणी विजू, तत्थ णं०, सेसं जहा सक्कस्स लोगपालाणं, एवं जाव वरुणस्स, नवरं
 विमाणा जहा चउत्थसए, सेसं तं चेव, जाव नो चेव णं मेहुणवत्तिर्यं । सेवं भंते !
 सेवं भंते ! त्ति जाव विहरइ ॥४०५॥ **दसमसए पंचमो उद्देसो समत्तो ॥**

क्रहि णं भंते ! सक्कस्स देविदस्स देवरत्तो सभा सुहम्मा पन्नत्ता ? गोयमा !
 जंबुद्वीवे २ मंदरस्स पव्वयस्स दाहिणेणं इमीसे रयणप्पभाए पुढवीए एवं जहा
 रायप्पसेणइजे जाव पंच वडेंसगा पन्नत्ता, तंजहा-असोगवडेंसए जाव मज्जे सोह-
 म्मवडेंसए, से णं सोहम्मवडेंसए महाविमाणे अद्धतेरस जोयणसयसहस्साइं आयाम-
 विक्खंभेणं, -एवं जह सूरियाभे तहेव माणं तहेव उववाओ । सक्कस्स य अभिसेओ
 तहेव जह सूरियाभस्स ॥ १ ॥ अलंकारो तहेव जाव आयरक्खदेवत्ति, दो सागरो-
 वमाइं ठिई । सक्के णं भंते ! देविदे देवराया केमहिद्धिए जाव केम(हेस)हासोक्खे ?
 गोयमा ! महिद्धिए जाव महासोक्खे, से णं तत्थ वत्तीसाए विमाणावाससयसहस्साणं

जाव विहरइ, एवंमहिष्टिण जाव महासोक्खे सक्के देविदे देवराया । सेवं भंते ! सेवं भंते ! ति ॥ ४०६ ॥ **दसमसए छट्ठो उद्देसो समत्तो ॥**

कहिन्नं भंते ! उत्तरिल्लणं एगोस्यमणुस्साणं एगोस्यदीवे नामं दीवे पन्नत्ते ? एवं जहा जीवाभिगमे तहेव निरवसेसं जाव सुद्धदंतदीवोत्ति, एए अट्ठावीसं उद्देसगा भाणियव्वा । सेवं भंते ! सेवं भंते ! ति जाव विहरइ ॥ ४०७ ॥ **दसमसए चउत्तीसइमो उद्देसो समत्तो ॥ दसमं सयं समत्तं ॥**

उप्पल १ सालु २ पलासे ३ कुंभी ४ नाली य ५ पडम ६ कन्नी ७ य । नलि-
ण ८ सिव ९ लोग १० काला ११ लंभिय १२ दस दो य एक्कारे ॥ १ ॥ उववाओ
१ परिमाणं २ अवहारु ३ चत्त ४ वंध ५ वेए ६ य । उदए ७ उदीरणाए ८ लेसा
९ दिट्ठी १० य नाणे ११ य ॥ १ ॥ जोगु १२ वओगे १३ वन्न १४ ररामाई
१५ ऊसासगे १६ य आहारे १७ । विरई १८ किरिया १९ वंधे २० सन्न २१
कसायि २२ त्थि २३ वंधे २४ य ॥ २ ॥ सन्नि २५ दिय २६ अणुबंधे २७
संवेहा २८ हार २९ ठिइ ३० समुग्घाए ३१ । चयणं ३२ मूलाईसु य उववाओ
३३ सव्वजीवाणं ॥ ३ ॥ तेणं कालेणं तेणं समएणं रायगिहे जाव पज्जुवासमाणे
एवं वयासी-उप्पले णं भंते ! एगपत्तए किं एगजीवे अणेगजीवे ? गोयमा ! एगजीवे
नो अणेगजीवे, तेण परं जे अन्ने जीवा उववज्जंति ते णं णो एगजीवा अणेगजीवा ।
ते णं भंते ! जीवा कओहिंतो उववज्जंति किं नेरइएहिंतो उववज्जंति तिरिक्खमणुस्स-
देवेहिंतो उववज्जंति ? गोयमा ! नो नेरइएहिंतो उववज्जंति तिरिक्खजोणिएहिंतोवि
उववज्जन्ति मणुस्सेहिंतोवि उववज्जंति देवेहिंतोवि उववज्जंति, एवं उववाओ भाणियव्वो
जहा वक्कंतीए वणस्सइकाइयाणं जाव ईसाणेत्ति १ । ते णं भंते ! जीवा एगसम-
एणं केवइया उववज्जंति ? गोयमा ! जहन्नेणं एक्को दा दो वा तिन्नि वा उक्कोसेणं
सखेज्जा वा असंखेज्जा वा उववज्जंति २ । ते णं भंते ! जीवा समए २ अवहीरमाणा
२ केवइयकालेणं अवहीरंति ? गोयमा ! ते णं असंखेज्जा समए २ अवहीरमाणा
२ असंखेज्जाहिं उस्सप्पिणिओसप्पिणीहिं अवहीरंति नो चेव णं अवहिया सिया ३ ।
तेसि णं भंते ! जीवाणं केमहालिया सरीरोगाहणा पण्णत्ता ? गोयमा ! जहन्नेणं
अगुलस्स असंखेज्जभागं उक्कोसेणं साइरेणं जोयणसहस्सं ४ । ते णं भंते ! जीवा
णाणावरणिज्जस्स कम्मस्स किं बंधगा अवंधगा ? गोयमा ! नो अवंधगा बंधए वा
बंधगा वा एवं जाव अंतराइयस्स, नवरं आउयस्स पुच्छा, गोयमा ! बंधए वा
अबंधए वा बंधगा वा अवंधगा वा अहवा बंधए य अवंधए य अहवा बंधए य
अबंधगाय अहवा बंधगा य अवंधए य अहवा बंधगा य अवंधगा य ८ एए अट्ठ

भंगा ५ । ते णं भंते ! जीवा णाणावरणिजस्स कम्मस्स किं वेयगा अवेयगा ? गोयमा ! नो अवेयगा वेदए वा वेयगा वा एवं जाव अंतराइयस्स, ते णं भंते ! जीवा किं सायावेयगा असायावेयगा ? गोयमा ! सायावेयए वा असायावेयए वा अट्ठ भंगा ६ । ते णं भंते ! जीवा णाणावरणिजस्स कम्मस्स किं उदई अणुदई ? गोयमा ! नो अणुदई उदई वा उदइणो वा, एवं जाव अंतराइयस्स ७ ॥ ते णं भंते ! जीवा णाणावरणिजस्स कम्मस्स किं उदीरगा० ? गोयमा ! नो अणुदीरगा उदीरए वा उदीरगा वा, एवं जाव अंतराइयस्स, नवरं वेयणिज्जाउएसु अट्ठ भंगा ८ । ते णं भंते ! जीवा किं कण्हलेसा नीललेसा काउलेसा तेउलेसा ? गोयमा ! कण्हलेसे वा जाव तेउलेसे वा कण्हलेस्सा वा नीललेस्सा वा काउलेस्सा वा तेउलेसा वा अहवा कण्हलेसे य नीललेस्से य एवं एए दुयासंजोगतियासंजोगचउक्कसंजोगेणं असीइ भंगा भवंति ९ ॥ ते णं भंते ! जीवा किं सम्मदिट्ठी मिच्छादिट्ठी सम्मा-मिच्छादिट्ठी ? गोयमा ! नो सम्मदिट्ठी नो सम्मामिच्छादिट्ठी मिच्छादिट्ठी वा मिच्छा-दिट्ठिणो वा १० । ते णं भंते ! जीवा किं नाणी अन्नाणी ? गोयमा ! नो नाणी अण्णाणी वा अन्नाणिणो वा ११ । ते णं भंते ! जीवा किं मणजोगी वइजोगी कायजोगी ? गोयमा ! नो मणजोगी णो वइजोगी कायजोगी वा कायजोगिणो वा १२ । ते णं भंते ! जीवा किं सांगारोवउत्ता अणागारोवउत्ता ? गोयमा ! सागा-रोवउत्ते वा अणागारोवउत्ते वा अट्ठ भंगा १३ । तेसि णं भंते ! जीवाणं सरीरगा कइवन्ना कइगंधा कइरसा कइफासा प० ? गोयमा ! पंचवन्ना पंचरसा दुगंधा अट्ठ-फासा प०, ते पुण अप्पणा अवन्ना अगंधा अरसा अफासा प० १४-१५ ॥ ते णं भंते ! जीवा किं उस्सासा निस्सासा नो उस्सासनिस्सासा ? गोयमा ! उस्सासए वा १ निस्सासए वा २ नो उस्सासनिस्सासए वा ३ उस्सासगा वा ४ निस्सासगा वा ५ नो उस्सासनीसासगा वा ६, अहवा उस्सासए य निस्सासए य ४ अहवा उस्सासए य नो उस्सासनिस्सासए य ४ अहवा निस्सासए य नो उस्सासनीसासए य ४, अहवा उसासए य नीसासए य नो उस्सासनिस्सासए य अट्ठ भंगा, एए छव्वीसं भंगा भवंति ॥ १६ ॥ ते णं भंते ! जीवा किं आहारगा अणाहारगा ? गोयमा ! नो अणाहारगा आहारए वा अणाहारए वा एवं अट्ठ भंगा १७ । ते णं भंते ! जीवा किं विरया अविरया विरयाविरया ? गोयमा ! नो विरया नो विरयाविरया अविरए वा अविरया वा १८ । ते णं भंते ! जीवा किं सकिरिया अकिरिया ? गोयमा ! नो अकिरिया सकिरिए वा सकिरिया वा १९ । ते णं भंते ! जीवा किं सत्तविहवंधगा अट्ठविहवंधगा ? गोयमा ! सत्तविहवंधए वा अट्ठविहवंधए वा अट्ठ भंगा २० । ते

णं भंते ! जीवा किं आहारसन्नोवउत्ता भयसन्नोवउत्ता मेहुणसन्नोवउत्ता परिग्गहसन्नो-
वउत्ता ? गोयमा ! आहारसन्नोवउ(त्ते)त्ता वा असीइ भंगा २१ । ते णं भंते ! जीवा
किं कोहकसाई माणकसाई मायाकसाई लोभकसाई ? गोयमा ! कोहकसाई वा
असीइ भंगा २२ । ते णं भंते ! जीवा किं इत्थिवेदगा पुरिसवेदगा नपुंसगवेदगा ?
गोयमा ! नो इत्थिवेदगा नो पुरिसवेदगा नपुंसगवेदए वा नपुंसगवेदगा वा २३ ।
ते णं भंते ! जीवा किं इत्थिवेदवंधगा पुरिसवेदवंधगा नपुंसगवेदवंधगा ? गोयमा !
इत्थिवेदवंधए वा पुरिसवेदवंधए वा नपुंसगवेदवंधए वा, छव्वीसं भंगा २४ । ते
णं भंते ! जीवा किं सत्ती असत्ती ? गोयमा ! नो सत्ती असत्ती वा असत्तिणो वा
२५ । ते णं भंते ! जीवा किं सइंदिया अणिंदिया ? गोयमा ! नो अणिंदिया सइं-
दिए वा सइंदिया वा २६ । से णं भंते ! उप्पलजीवेत्ति कालओ केवच्चिरं होइ ?
गोयमा ! जहन्नेणं अंतोमुहुत्तं उक्कोसेणं असंखेज्जं कालं २७ । से णं भंते ! उप्पल-
जीवे पुढविजीवे पुणरवि उप्पलजीवेत्ति केवइयं कालं सेवेज्जा केवइयं कालं गइ-
रागइं करेज्जा ? गोयमा ! भवादेसेणं जहन्नेणं दो भवग्गहणाइं उक्कोसेणं असंखेज्जाइं
भवग्गहणाइं, कालादेसेणं जहन्नेणं दो अंतोमुहुत्ता उक्कोसेणं असंखेज्जं कालं, एवइयं
कालं सेवेज्जा एवइयं कालं गइरागइं करेज्जा, से णं भंते ! उप्पलजीवे आउजीवे
एवं चेव एवं जहा पुढविजीवे भणिए तहा जाव वाउजीवे भाणियव्वे, से णं भंते !
उप्पलजीवे से वणस्सइजीवे से पुणरवि उप्पलजीवेत्ति केवइयं कालं सेवेज्जा केवइयं
कालं गइरागइं करेज्जा ? गोयमा ! भवादेसेणं जहन्नेणं दो भवग्गहणाइं उक्कोसेणं
अणंताइं भवग्गहणाइं, कालादेसेणं जहन्नेणं दो अंतोमुहुत्ता उक्कोसेणं अणंतं कालं
तरुकालं एवइयं कालं सेवेज्जा एवइयं कालं गइरागइं करेज्जा, से णं भंते ! उप्पल-
जीवे बेइंदियजीवे पुणरवि उप्पलजीवेत्ति केवइयं कालं सेवेज्जा केवइयं कालं गइ-
रागइं करेज्जा ? गोयमा ! भवादेसेणं जहन्नेणं दो भवग्गहणाइं उक्कोसेणं संखेज्जाइं
भवग्गहणाइं, कालादेसेणं जहन्नेणं दो अंतोमुहुत्ता उक्कोसेणं संखेज्जं कालं एवइयं
कालं सेवेज्जा एवइयं कालं गइरागइं करेज्जा, एवं तेइंदियजीवि, एवं चउरिंदियजीवेवि,
से णं भंते ! उप्पलजीवे पंचेंदियतिरिक्खजोणियजीवे पुणरवि उप्पलजीवेत्ति पुच्छा,
गोयमा ! भवादेसेणं जहन्नेणं दो भवग्गहणाइं उक्कोसेणं अट्ठ भवग्गहणाइं काला-
देसेणं जहन्नेणं दो अंतोमुहुत्ताइं उक्कोसेणं पुव्वकोडिपुहुत्ताइं एवइयं कालं सेवेज्जा
एवइयं कालं गइरागइं करेज्जा, एवं मणुस्सेणवि समं जाव एवइयं कालं गइरागइं
करेज्जा २८ । ते णं भंते ! जीवा किमाहारमाहारेंति ? गोयमा ! दव्वओ अणंत-
पएसियाइं दव्वाइं एवं जहा आहारुद्दसए वणस्सइकाइयाणं आहारो तहेव जाव

सव्वप्पणयाए आहारमाहारैरंति नवरं निय(मं)मा छद्दिसि सेसं तं चेव-२९ । तेसि
णं भंते ! जीवाणं केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेणं दस
वाससहस्साइं ३० । तेसि णं भंते ! जीवाणं कइ समुग्घाया प० ? गोयमा ! तवो
समुग्घाया प०, तंजहा-वेयणासमुग्घाए, कसायसमुग्घाए, मारणंतियसमुग्घाए ३१ ।
ते णं भंते ! जीवा मारणंतियसमुग्घाएणं किं समोहया मरंति असमोहया मरंति ?
गोयमा ! समोहयावि मरंति असमोहयावि मरंति ३२ । ते णं भंते ! जीवा अणतरं
उव्वट्ठिता कहिं गच्छंति कहिं उव्वज्जंति किं नेरइएसु उव्वज्जंति तिरिक्खजोणिएसु
उव्वज्जंति एवं जहा वक्कंतीए उव्वट्ठणाए वणस्सइकाइयाणं तहा भाणियव्वं । अह
भंते ! सव्वपाणा सव्वभूया सव्वजीवा सव्वसत्ता उप्पलमूलत्ताए उप्पलकंदत्ताए
उप्पलनालत्ताए उप्पलपत्तत्ताए उप्पलकेसरत्ताए उप्पलकन्नियत्ताए उप्पलयिभुगत्ताए
उव्वन्नपुव्वा ? हंता गोयमा ! असइं अदुवा अणंतखुत्तो । सेवं भंते ! सेवं भंते ! ति
३३ ॥ ४०८ ॥ एक्कारस्समस्स सयस्स पढमो उप्पलुद्देसओ समत्तो ॥

साहुए णं भंते ! एगपत्तए किं एगजीवे अणेगजीवे ? गोयमा ! एगजीवे, एवं
उप्पलुद्देसगवत्तव्वया अपरिसेसा भाणियव्वा जाव अणंतखुत्तो, नवरं सरीरोगाहणा
जहन्नेणं अंगुलस्स असंखेज्जइभागं, उक्कोसेणं धणुपुहुत्तं, सेसं तं चेव । सेवं भंते !
सेवं भंते ! ति ॥ ४०९ ॥ ११-२ ॥ पलासे णं भंते ! एगपत्तए किं एगजीवे अणेग-
जीवे ? एवं उप्पलुद्देसगवत्तव्वया अपरिसेसा भाणियव्वा, नवरं सरीरोगाहणा जह-
न्नेणं अंगुलस्स असंखेज्जइभागं उक्कोसेणं गाउयपुहु(त्तं)त्ता, देवा एएसु न उव-
वज्जंति । लेसासु ते णं भंते ! जीवा किं कण्हलेसा नीललेसा काउलेसा० ? गोयमा !
कण्हलेस्से वा नीललेस्से वा काउलेस्से वा छव्वीसं भंगा, सेसं तं चेव । सेवं भंते !
२ ति ॥ ४१० ॥ ११-३ ॥ कुंभिए णं भंते एगपत्तए किं एगजीवे अणेगजीवे ?
एवं जहा पलासुद्देसए तहा भाणियव्वे, नवरं ठिई जहन्नेणं अंतोमुहुत्तं, उक्कोसेणं
वासपुहुत्तं, सेसं तं चेव । सेवं भंते ! सेवं भंते ! ति ॥ ४११ ॥ ११-४ ॥
नालिए णं भंते ! एगपत्तए किं एगजीवे अणेगजीवे ? एवं कुंभिउद्देसगवत्तव्वया
निरवसेसा भाणियव्वा । सेवं भंते ! सेवं भंते ! ति ॥ ४१२ ॥ ११-५ ॥ पउमे णं
भंते ! एगपत्तए किं एगजीवे अणेगजीवे ? एवं उप्पलुद्देसगवत्तव्वया निरवसेसा
भाणियव्वा । सेवं भंते ! सेवं भंते ! ति ॥ ४१३ ॥ ११-६ ॥ कन्निए णं भंते !
एगपत्तए किं एगजीवे० ? एवं चेव निरवसेसं भाणियव्वं । सेवं भंते ! सेवं भंते !
ति ॥ ४१४ ॥ ११-७ ॥ नल्लिणे णं भंते ! एगपत्तए किं एगजीवे अणेगजीवे ? एवं
चेव निरवसेसं जाव अणंतखुत्तो ॥ सेवं भंते ! सेवं भंते ! ति ॥ ४१५ ॥ एया-
रहमे सए अट्टमो उद्देसो समत्तो ॥

तेणं कालेणं तेणं समएणं हत्थिणापुरे नामं नयरे होन्वा वजओ, तम्म णं
हत्थिणापुरस्स नयरस्स वहिया उत्तरपुरच्छिमे दिसीभागे एत्थ णं सदसंबवणे
णामं उज्जाणे होत्था सव्वो उयपुप्फकलसमिद्धे म्मे णं दणवगसंनिगामे सुहमीयलच्छाए
मणोरमे साउफले अकंटए पासाईए जाव पडिस्से, तत्थ णं हत्थिणापुरं नयरे सिवे
नामं राया होत्था महयाहिमवंतं० वजओ, तम्म णं सिवस्स रत्तो धारिणां नामं देवी
होत्था सुकुमालपाणिपाया वजओ, तरस णं सिवस्स रत्तो पुत्ते भारगाए अमए सिव-
भदए नामं कुमारे होत्था सुकुमाल० जहा सूरियकंते जाव पव्वेक्कमाणे पव्वेक्कमाणे
विहरइ, तए णं तरस सिवस्स रत्तो अजया कयाइ पुव्वेक्कावरत्तजालममयंसि रत्तपुरं
चित्तेमाणस्स अयमेयारूवे अब्भत्थिए जाव रामुप्पजित्था-अत्थि ना मे पुग पोगणां
जहा तामलिस्स जाव पुत्तेहिं वट्ठामि पत्तहिं वट्ठामि म्जेणं वट्ठामि एतं रट्ठेणं वल्लेणं
वाहणेणं कोसेण कोट्टागारेणं पुरेणं अत्तेउरेणं वट्ठामि विपुलधणक्कणगरयण जाव
संतसारसावएजेणं अईव २ अभिवट्ठामि, तं किञ्च अहं पुरा पोगणां जाव एतंत-
सोम्वयं उव्वेहमाणे विहरामि ? तं जाव ताव अहं हिरस्सेणं वट्ठामि तं नेव जाव
अभिवट्ठामि जाव मे सामंतरायाणोवि वसे वट्ठंति ताव ता मे सेयं कटं पाउप्पभायाए
जाव जलंते सुवहुं लोहीलोहकडाहकडुच्छुयं तंवियं तावसभंउगं घडावेत्ता सिवभदं
कुमारं रज्जे ठावेत्ता तं सुवहुं लोहीलोहकडाहकडुच्छुयं तंवियं तावसभंउगं गहाय
जे इमे गंगाकूले वाणपत्था तावसा भवंति, तं०-होत्तिया पोत्तिया को(सो)त्तिया जन्नई
सद्धई थालई हुंवउट्ठा दंतुक्खलिया उम्मज्जगा संमज्जगा निम्मज्जगा संपत्तखाला
उद्धकंइयगा अहोक्कंइयगा दाहिणकूलगा उत्तरकूलगा संखधमगा कूलधमगा मियल-
द्धया हत्थितावसा जलाभिसेयक(कि)ट्ठिणगाया अंबुवासिणो वाउवासिणो जलवासिणो
वे(चे)लवासिणो अंबुभक्खिणो वाउभक्खिणो सेवालभक्खिणो मूलाहारा वंदाहारा
पत्ताहारा तथाहारा पुप्फाहारा फलाहारा वीयाहारा परिसडियकंदमूलतयपंडुपत्तपुप्फ-
फलाहारा उइंडगा स्वखमूलिया विलवासिणो वक्क(ल)वासिणो दिसापोकखिणो आयाव-
णाहिं पंचगितावेहि इंगालसोल्लियंपिव कटुसोल्लियंपिव कट्टसोल्लियंपिव जाव अप्पाणं
करेमाणा विहरंति ॥ तत्थ णं जे ते दिसापोकखियतावसा तेसिं अंतियं मुंडे भविता
दिसापोकखियतावसत्ताए पव्वइत्तए, पव्वइएवि य णं समाणे अयमेयारूवं अभिग्गहं
अभिणिहिस्सामि-कप्पइ मे जावजीवाए छट्ठंछट्ठेणं अनिक्खित्तेणं दिसाचक्कवालेणं
तवोक्कमेणं उट्ठं वाहाओ पगिज्झय २ जाव विहरित्तएत्तिकट्टु, एवं संपेहेइ संपेहेत्ता
कलं जाव जलंते सुवहुं लोहीलोह जाव घडावेत्ता कोट्टंविग्रपुरिसे सदावेइ सदावेत्ता
एवं वयासी-खिप्पामेव भो देवाणुप्पिया । हत्थिणाउरं नयरं सद्धिभतरवाहिरियं

आंसिय जाव तमांणत्तियं पच्चप्पिणंति, तए णं से सिवे राया दोच्चं पि कोडुंबियपुरिसे
सद्दावेइ २ ता एवं वयासी-खिप्पामेव भो देवाणुप्पिया ! सिवभद्दस्स कुमारस्स महत्थं
३ विउलं रायाभिसेयं उवट्ठवेह, तए णं ते कोडुंबियपुरिसा तहेव जाव उवट्ठवेति, तए
णं से सिवे राया अणेगगणनायगदंडनायग जाव संधिवाल सद्धिं संपरिवुडे सिवभद्दं
कुमारं सीहासणवरंसि पुरत्थाभिमुहं निसीयावे(न्ति)इ २ ता अट्ठसएणं सोवन्नियाणं कल-
साणं जाव अट्ठसएणं भोमेजाणं कलसाणं सव्विड्डीए जाव रवेणं महया २ रायाभिसेएणं
अभिसिंच(न्ति)इ २ ता पम्हलसुकुमालाए सुरभिए गंधकासाईए गायार्हं लहे(न्ति)इ
पम्ह० २ ता सरसेणं गोसीसेणं एवं जहेव जमालिस्स अलंकारो तहेव जाव कप्पस्स-
गंपिव अलंकियविभूसियं करंति २ ता करयल जाव कट्ठु सिवभद्दं कुमारं जएणं विजएणं
वद्धावेति जएणं विजएणं वद्धावेत्ता ताहिं इट्ठाहिं कंताहिं पियाहिं एवं जहा उववाइए
कोणियस्स जाव परमाउं पालयाहि इट्ठजणसंपरिवुडे हत्थिणापुरस्स नयरस्स अत्रेसिं
च वहुणं गामागरनगर जाव विहराहित्तिकट्ठु जयजयसदं पउंजंति, तए णं से सिवभद्दे
कुमारे राया जाए महया हिमवंत० वन्नओ जाव विहरइ, तए णं से सिवे राया अत्रया
क्याइं सोहणंसि तिहिकरणदिवसमुहुत्तनक्खंतंसि विपुलं असणं पाणं खाइमं साइमं
उवक्खडावेइ उवक्खडावेत्ता मित्तणाइनियग जाव परिजणं रायाणो खत्तिए य आमं-
तेइ आमंतेत्ता तओ पच्छा ण्हाए जाव सरीरे भोयणवेलाए भोयणमंडवंसि सुहासण-
वरगए तेणं मित्तणाइनियगसयण जाव परिजणेणं राएहि य खत्तिएहि य सद्धिं विपुलं
असणं पाणं खाइमं साइमं एवं जहा तामली जाव सक्कारेइ सम्माणेइ सक्कारेत्ता सम्मा-
णेत्ता तं मित्तणाइनियग जाव परिजणं रायाणो य खत्तिए य सिवभद्दं च रायाणं आपु-
च्छइ आपुच्छित्ता सुवहुं लोहीलोहकडाहकडुच्छुयं जाव भंडगं गहाय जे इमे गंगा-
कूलगा वाणपत्था तावसा भवंति तं चेव जाव तेसि अंतियं मुंडे भवित्ता दिसापोक्खि-
यतावसत्ताए पव्वइए, पव्वइएऽविय णं समाणे अयमेयारुवं अभिगगहं अभिगिण्हइ-
कप्पइ मे जावजीवाए छट्ठं तं चेव जाव अभिगगहं अभिगिण्हइ २ ता पढमं छट्ठक्खं-
मणं उवसंपज्जित्ता णं विहरइ । तए णं से सिवे रायरिसी पढमछट्ठक्खमणपारणगंसि
आयावणभूमीए पच्चोरुहइ आयावणभूमीए पच्चोरुहिता वागलवत्थनियत्थे जेणेव सए
उडए तेणेव उवागच्छइ तेणेव उवागच्छित्ता किडिणसंकाइयगं गिण्हइ गिण्हित्ता पुर-
च्छिमं दिसिं पोक्खेइ पुरच्छिमाए दिसाए सोमे महाराया पत्थाणे पत्थियं अभिर-
क्खउ सिवं रायरिसि अभि० २, जाणि य तत्थ कंदाणि य मूलाणि य तंयाणि य
पत्ताणि य पुप्फाणि य फलाणि य वीयाणि य हरियाणि य ताणि अणुजाणउत्ति कट्ठु
पुरच्छिमं दिसं पसरइ पुर० २ ता जाणि य तत्थ कंदाणि य जाव हरियाणि य तांइ

गेण्हइ २ ता किट्ठिणसंकाइयं भरेइ किट्ठि० २ ता दब्भे य कुसे य समिहाओ य पत्तामोडं
च गेण्हेइ २ ता जेणेव सए उडए तेणेव उवागच्छइ २ ता किट्ठिणसंकाइयगं ठवेइ
किट्ठि० २ ता वेइं वड्ढेइ २ ता उवलेवणसंमज्जणं करेइ उ० २ ता दब्भसगव्भकल-
साहत्थगए जेणेव गंगा महानई तेणेव उवागच्छइ गंगामहानई ओगाहेइ २ ता जल-
मज्जणं करेइ २ ता जलकीडं करेइ २ ता जलाभिसेयं करेइ २ ता आयंते चोक्खे पर-
मसुइभूए देवयपिइकयकज्जे दब्भसगव्भकलसाहत्थगए गंगाओ महानईओ पञ्चुत्तरइ
२ ता जेणेव सए उडए तेणेव उवागच्छइ तेणेव उवागच्छिता दब्भेहि य कुसेहि य
वाळुयाए य वेइं रएइ वेइं रएत्ता सरएणं अरणिं महेड सर० २ ता अग्गि पाडेइ २
ता अग्गि संधुक्केइ २ ता समिहाकट्ठाइं पक्खिवइ समिहाकट्ठाइं पक्खिवित्ता अग्गि
उज्जालेइ अग्गि उज्जालेत्ता-‘अग्गिस्स दाहिणे पासे, सत्तंगाइं समादहे । तं०-सकहं
वक्कलं ठाणं, सिज्जाभंडं कमंडलुं ॥ १॥ दंडदारुं त(हप्पा)हा पाणं अहेताइं समादहे ॥
महुणा य घएण य तंदुलेहि य अग्गि हुणइ, अग्गि हुणित्ता चरुं साहेइ, चरुं साहेत्ता
बलिं वइस्सदेवं करेइ बलिं वइस्सदेवं करेत्ता अतिहिपूयं करेइ अतिहिपूयं करेत्ता तओ
पच्छा अप्पणा आहारमाहारेइ, तए णं से सिवे रायरिसी दोच्चं छट्ठक्खमणं उवसं-
ज्जित्ताणं विहरइ, तए णं से सिवे रायरिसी दोच्चे छट्ठक्खमणपारणगंसि आयावणभू-
मीओ पच्चोरुहइ आयावण० २ ता एवं जहा पढमपारणगं नवरं दाहिणं दिसं पोक्खेइ
२ ता दाहिणाए दिसाए जमे महाराया पत्थाणे पत्थियं सेसं तं चेव जाव आहार-
माहारेइ, तए णं से सिवरायरिसी तच्चं छट्ठक्खमणं उवसंपज्जित्ता णं विहरइ, तए
णं से सिवे रायरिसी सेसं तं चेव नवरं पच्चत्थिमं दिसिं पोक्खेइ पच्चत्थिमाए
दिसाए वरुणे महाराया पत्थाणे पत्थियं सेसं तं चेव जाव आहारमाहारेइ, तए
णं से सिवे रायरिसी चउत्थं छट्ठक्खमणं उवसंपज्जित्ता णं विहरइ, तए णं से सिवे
रायरिसी चउत्थछट्ठक्खमण एवं तं चेव नवरं उत्तरं दिसं पोक्खेइ उत्तराए दिसाए
वैसमणे-महाराया पत्थाणे पत्थियं अभिरक्खउ सिवं० सेसं तं चेव जाव तओ पच्छा
अप्पणा आहारमाहारेइ ॥ ४१६ ॥ तए णं तस्स सिवस्स रायरिसिस्स छट्ठंछट्ठेणं
अनिक्खित्तेणं दिसाचक्खालेणं जाव आयावेमाणस्स पगइभइयाए जाव विणीययाए
अन्नया कयाइ तयावरणिज्जाणं कम्माणं खओवसमेणं ईहापोहमग्गणगवेसणं करेमा-
णस्स विभंगे नामं अन्नाणे समुप्पन्ने, से णं तेणं विभंगनाणेणं समुप्पन्नेणं पासइ
अस्सि लोए सत्त दीवे सत्त समुदे तेण परं न जाणइ न पासइ, तए णं तस्स
सिवस्स रायरिसिस्स अयमेयारुवे अब्भत्थिए जाव समुप्पज्जित्था-अत्थि णं ममं
अइसेसे नाणदंसणे समुप्पन्ने एवं खलु अस्सि लोए सत्त दीवा सत्त समुद्वा तेण परं

वोच्छिन्ना दीवा य समुद्रा य, एवं संपेहेइ २ ता आयावणभूमीओ पचोरुहइ
 आ० २ ता वागलवत्थनियत्थे जेणेव सए उडए तेणेव उवागच्छइ २ ता सुवहुं
 लोहीलोहकडाहकडुच्छुर्य जाव भंडगं किडिणसंक्राइयं च गेण्हइ २ ता जेणेव हत्थि-
 णापुणे नयरे जेणेव तावसावसहे तेणेव उवागच्छइ २ ता भंडनिकखेवं करेइ २
 ता हत्थिणापुरे नयरे सिंघाडगतिग जाव पहेसु बहुजणस्स एवमाइक्खइ जाव एवं
 परुवेइ-अत्थि णं देवाणुप्पिया ! ममं अइसेसे नाणदंसणे समुप्पन्ने, एवं खलु अस्सि
 लोए जाव दीवा य समुद्रा य, तए णं तस्स सिवस्स रायरिसिस्स अंतियं एयमट्ठं
 सोच्चा निसम्म हत्थिणापुरे नयरे सिंघाडगतिग जाव पहेसु बहुजणो अन्नमज्जस्स
 एवमाइक्खइ जाव परुवेइ-एवं खलु देवाणुप्पिया ! सिवे रायरिसी एवं आइक्खइ
 जाव परुवेइ-अत्थि णं देवाणुप्पिया ! ममं अइसेसे नाणदंसणे समुप्पणे जाव तेण
 परं वोच्छिन्ना दीवा य समुद्रा य, से कहमेयं मज्जे एवं ? । तेणं कालेणं तेणं सम-
 णं सामी समोसढे परिता जाव पडिगया । तेणं कालेणं तेणं समणं समणस्स
 भगवओ महावीरस्स जेट्ठे अंतेवासी जहा विइयसए नियंहुइसए जाव अडमाणे
 बहुजणसइं निसामेइ बहुजणो अन्नमज्जस्स एवं आइक्खइ जाव एवं परुवेइ-एवं
 खलु देवाणुप्पिया ! सिवे रायरिसी एवं आइक्खइ जाव परुवेइ-अत्थि णं देवाणु-
 प्पिया ! तं चेव जाव वोच्छिन्ना दीवा य समुद्रा य, से कहमेयं मज्जे एवं ? तए
 णं भगवं गोयमे बहुजणस्स अंतियं एयमट्ठं सोच्चा निसम्म जायसट्ठे जहा
 नियंहुइसए जाव तेण परं वोच्छिन्ना दीवा य समुद्रा य, से कहमेयं भंते ! एवं ?
 गोयमादि समणे भगवं महावीरे भगवं गोयमं एवं वयासी-जन्नं गोयमा ! से बहुजणे
 अन्नमज्जस्स एवमाइक्खइ तं चेव सव्वं भाणियव्वं जाव भंडनिकखेवं करेइ हत्थि-
 णापुणे नयरे सिंघाडग० तं चेव जाव वोच्छिन्ना दीवा य समुद्रा य, तए णं तस्स
 सिवस्स रायरिसिस्स अंतिए एयमट्ठं सोच्चा निसम्म तं चेव सव्वं भाणियव्वं जाव
 तेण परं वोच्छिन्ना दीवा य समुद्रा य तण्णं मिच्छा, अहं पुण गोयमा ! एवमाइ-
 क्खामि जाव परुवेमि-एवं खलु जंबुदीवाईया दीवा लवणाईया समुद्रा संठाणओ
 एगविहिविहाणा वित्थारओ अणेगविहिविहाणा एवं जहा जीवाभिगमे जाव सयंभूरमण-
 समुद्पज्जवसाणा अस्सि तिरियलोए असंखेज्जा दीवसमुद्रा पन्नत्ता समणाउसो ! ॥ अत्थि
 णं भंते ! जंबुदीवे दीवे दव्वाइं सवन्नाइंपि अवन्नाइंपि सगंधाइंपि अगंधाइंपि
 सरसाइंपि अरसाइंपि सफासाइंपि अफासाइंपि अन्नमज्जवद्धाइं अन्नमज्जपुट्ठाइं जाव
 षडत्ताए चिट्ठंति ? हंता अत्थि । अत्थि णं भंते ! लवणसमुदे दव्वाइं सवन्नाइंपि
 अवन्नाइंपि सगंधाइंपि अगंधाइंपि सरसाइंपि अरसाइंपि सफासाइंपि अफासाइंपि

अन्नमन्नवद्धाई अन्नमन्नपुट्टाई जाव घडत्ताए चिट्ठंति ? हंता अत्थि । अत्थि णं भंते ! धायइसंडे दीवे दब्बाई सवन्नाईपि० एवं चेव, एवं जाव सयंभूरमणसमुद्दे जाव हंता अत्थि । तए णं सा महइमहालिया महच्चपरिसा समणस्स भगवओ महावीरस्स अंतियं एयमट्ठं सोच्चा निसम्म हट्ठतुट्ठा समणं भगवं महावीरं वंदइ नमंसइ वंदित्ता नमंसित्ता जामेव दिसिं पाउब्भूया तामेव दिसिं पडिगया, तए णं हत्थिणापुरे नयरे सिंघाडग जाव पहेसु बहुजणो अन्नमन्नस्स एवमाइक्खइ जाव परुवेइ-जन्नं देवाणुप्पिया ! सिवे रायरिसी एवमाइक्खइ जाव परुवेइ-अत्थि णं देवाणुप्पिया ! ममं अइसेसे नाणंदसणे जाव समुद्दा य, तं नो इणट्ठे समट्ठे, समणे भगवं महावीरे-एवमाइक्खइ जाव परुवेइ-एवं खलु एयस्स सिवस्स रायरिसिस्स छट्ठंछट्ठेणं तं चेव जाव भंडनिकखेवं करेइ भंडनिकखेवं करेत्ता हत्थिणापुरे नयरे सिंघाडग जाव समुद्दा य, तए णं तस्स सिवस्स रायरिसिस्स अंतियं एयमट्ठं सोच्चा निसम्म जाव समुद्दा य, तण्णं मिच्छा, समणे भगवं महावीरे एवमाइक्खइ०-एवं खलु जंबुदीवाईया दीवा लवणाईया समुद्दा तं चेव जाव असंखेज्जा दीवसमुद्दा पन्नत्ता समणाउसो ! । तए णं से सिवे रायरिसी बहुजणस्स अंतियं एयमट्ठं सोच्चा निसम्म संकिए कंखिए वित्तिगिच्छिए भेदसमावन्ने कलुससमावन्ने जाए यावि होत्था, तए णं तस्स सिवस्स रायरिसिस्स संकियस्स कंखियस्स जाव कलुससमावन्नस्स से विभंगे अन्नाणे खिप्पामेव परिवडिए, तए णं तस्स सिवस्स रायरिसिस्स अयमेयारुवे अब्भत्थिए जाव संमुप्पज्जित्था-एवं खलु समणे भगवं महावीरे आइंगरे तित्थंगरे जाव सव्वन्नू सव्वदरिसी आगासगएणं चक्केणं जाव सहसंववणे उज्जाणे अहापडि-रुवं जाव विहरइ, तं महाफलं खलु तहारुवाणं अरहंताणं भगवंताणं नामगोयस्सं जहा उववाइए जाव गहणयाए, तं गच्छामि णं समणं भगवं महावीरं वंदामि जाव पज्जुवासामि, एयं णे इहभवे य परभवे य जाव भविस्सइत्तिकट्ठु एवं संपेहेइ एवं संपेहिता जेणेव तावसावसहे तेणेव उवागच्छइ तेणेव उवागच्छित्ता तावसावसहं अणुप्पविसइ २ ता सुवहुं लोहीलोहकडाह जाव किट्ठिणसंकाइगं च गेण्हइ गेण्हित्ता तावसावसहाओ पडिनिकखमइ ताव० २ ता परिवडियविभंगे हत्थिणापुरं नयरं मज्झमज्झेणं निगगच्छइ निगगच्छित्ता जेणेव सहसंववणे उज्जाणे जेणेव समणे भगवं महावीरे तेणेव उवागच्छइ तेणेव उवागच्छित्ता समणं भगवं महावीरं तिव्खुत्तो आयाहिणं पयाहिणं करेइ वंदइ नमंसइ वंदित्ता नमंसित्ता नच्चासन्ने नाइदूरे जाव पंजलिउडे पज्जुवासइ, तए णं समणे भगवं महावीरे सिवस्स रायरिसिस्स तीसे-य महइमहालियाए जाव आणाए आराहए भवइ, तए णं से सिवे रायरिसी समणस्स

भगवओ महावीरस्स अंतियं धम्मं सोच्चा निसम्म जहा खंदओ जाव उत्तरपुरच्छिमं
दिसीभागं अवक्कमइ २ ता सुवहुं लोहीलोहकडाह जाव किढिणसंकाइं च एगंते एडेइ
एडिता सयमेव पंचमुट्टियं लोयं करेइ सयमे० २ ता समणं भगवं महावीरं एवं जहेव
उसभदतो तहेव पव्वइओ तहेव एक्कारस अंगां अहिज्जइ तहेव सव्वं जाव सव्व-
दुक्खप्पहीणे ॥ ४१७ ॥ भंते ! ति भगवं गोयमे समणं भगवं महावीरं वंदइ नमंसइ
वंदिता नमंसिता एवं वयासी-जीवा णं भंते ! सिज्झमाणा कयरम्मि संघयणे सिज्झंति ?
गोयमा ! वइरोसभणारायसंघयणे सिज्झंति; एवं जहेव उववाइए तहेव संघयणं
संठाणं उच्चत्तं आउयं च परिवसणा, एवं सिद्धिगंडिया निरवसेसा भाणियव्वा जाव
अव्वाबाहं सोक्खं अणुहवं (हुंती) ति सास(यं)या सिद्धा । सेवं भंते ! २ ति ॥
॥ ४१८ ॥ सियो समत्तो ॥ एक्कारसमे सए नवमो उद्देसो समत्तो ॥

रायगिहे जाव एवं वयासी-कइविहे णं भंते ! लोए पन्नत्ते ? गोयमा ! चउव्विहे
लोए पन्नत्ते, तंजहा-दव्वलोए, खेत्तलोए, काललोए, भावलोए । खेत्तलोए णं भंते !
कइविहे पणत्ते ? गोयमा ! तिविहे पन्नत्ते, तंजहा-अहोलोयखेत्तलोए १ तिरियलो-
यखेत्तलोए २ उड्डूलोयखेत्तलोए ३ । अहोलोयखेत्तलोए णं भंते ! कइविहे पन्नत्ते ?
गोयमा ! सत्तविहे पन्नत्ते, तंजहा-रयणप्पभापुडविअहेलोयखेत्तलोए जाव अहेसत्त-
मापुडविअहेलोयखेत्तलोए । तिरियलोयखेत्तलोए णं भंते ! कइविहे पन्नत्ते ? गोयमा !
असंखेज्जविहे पन्नत्ते, तंजहा-जंवुहीवे २ तिरियलोयखेत्तलोए जाव सयंभूरमणसमुद्दे
तिरियलोयखेत्तलोए । उड्डूलोयखेत्तलोए णं भंते ! कइविहे पन्नत्ते ? गोयमा ! पन्नर-
सविहे पन्नत्ते, तंजहा-सोहम्मकप्पउड्डूलोयखेत्तलोए जाव अच्चुरूप्पउड्डूलोयखेत्तलोए
गेवेज्जविमाणउड्डूलोयखेत्तलोए अणुत्तरविमाणउड्डूलोयखेत्तलोए ईसिंपव्वभारपुडविउड्डु-
लोयखेत्तलोए । अहोलोयखेत्तलोए णं भंते ! किंसंठिए पन्नत्ते ? गोयमा ! तप्पागारसंठिए
पन्नत्ते । तिरियलोयखेत्तलोए णं भंते ! किंसंठिए पन्नत्ते ? गोयमा ! जल्लरिसंठिए पन्नत्ते ।
उड्डूलोयखेत्तलोय० पुच्छा, गोयमा ! उड्डुमुइंगागारसंठिए पन्नत्ते । लोए णं भंते ! किं-
संठिए पन्नत्ते ? गोयमा ! मुपइट्ठगसंठिए लोए पन्नत्ते, तंजहा-हेट्ठा विच्छिन्ने मज्झे संखित्ते
जहा सत्तमसए पढमोद्देसए जाव अंतं करेति । अलोए णं भंते ! किंसंठिए पन्नत्ते ?
गोयमा ! झुत्तिरगोलसंठिए पन्नत्ते ॥ अहेलोयखेत्तलोए णं भंते ! कि जीवा जीवदेसा जीव-
पएसा० ? एवं जहा इंदा दिसा तहेव निरवसेसं भाणियव्वं जाव अद्धासमए । तिरिय-
लोयखेत्तलोए णं भंते ! किं जीवा० ? एवं चेव, एवं उड्डूलोयखेत्तलोएवि, नवरं अरुवी
छव्विहा अद्धासमओ नत्थि ॥ लोए णं भंते ! किं जीवा० ? जहा विइयसए अत्थिउद्देसए
लोगागासे, नवरं अरुवी सत्तविहा जाव अहम्मत्थिकायस्स पएसा नो आगासत्थिकाए

आगासत्थिकायस्स देसे आगासत्थिकायस्स पएसा अद्दासमए, सेसं तं चेव ॥ अलोए णं भंते ! किं जीवा० ? एवं जहा अत्थिकायउद्दसए अलोगागासे तद्देव निरवसेसं जाव अणंतभागूणे ॥ अहेलोगखेत्तलोगस्स णं भंते ! एगंमि आगासपएसे किं जीवा जीवदेसा जीवप्पएसा अजीवा अजीवदेसा अर्जावपएसा ? गोयमा ! नो जीवा जीवदेसावि जीवपएसावि अर्जावावि अजीवदेसावि अर्जावपएसावि, जे जीवदेसा ते नियमा एगिदियदेसा १ अहवा एगिदियदेसा य वेइंदियस्स देसे २ अहवा एगिदियदेसा य वेइंदियाण य देसा ३ एवं मज्झिन्नविरहिओ जाव अणिदिएसु जाव अहवा एगिदियदेसा य अणिदियाणयदेसा, जे जीवपएसा ते नियमा एगिदियपएसा १ अहवा एगिदियपएसा य वेइंदियस्स पएसा २ अहवा एगिदियपएसा य वेइंदियाण य पएसा ३ एवं आइल्लविरहिओ जाव पंचिदिएसु अणिदिएसु तियभंगो, जे अर्जावा ते दुविहा पन्नत्ता, तंजहा-रूवी अजीवा य अरूवी अर्जावा य, रूवी तद्देव, जे अरूवी अजीवा ते पंचविहा पण्णत्ता, तंजहा-नो धम्मत्थिकाए धम्मत्थिकायस्स देसे १ धम्मत्थिकायस्स पएसे २ एवं अहम्मत्थिकायस्सवि ४ अद्दासमए ५ । तिरियलोगखेत्तलोगस्स णं भंते ! एगंमि आगासपएसे किं जीवा० ? एवं जहा अहेलोगखेत्तलोगस्स तद्देव, एवं उट्ठलोगखेत्तलोगस्सवि, नवरं अद्दासमओ नत्थि, अरूवी चउव्विहा लोएसस्स जहा अहेलोगखेत्तलोगस्स एगंमि आगासपएसे ॥ अलोएसस्स णं भंते ! एगंमि आगासपएसे० पुच्छा, गोयमा ! नो जीवा नो जीवदेसा तं चेव जाव अणंतेहिं अगुरुयलहुयगुणेहिं संजुत्ते सव्वागासस्स अणंतभागूणे ॥ दव्वओ णं अहेलोयखेत्तलोए अणंताइं जीवदव्वाइं अणंताइं अजीवदव्वाइं अणंता जीवाजीवदव्वा एवं तिरियलोयखेत्तलोएवि, एवं उट्ठलोयखेत्तलोएवि, दव्वओ णं अलोए नेवत्थि जीवदव्वा नेवत्थि अजीवदव्वा नेवत्थि जीवाजीवदव्वा एगे अजीवदव्वदेसे जाव सव्वागासस्स अणंतभागूणे । कालओ णं अहेलोयखेत्तलोए न कयाइ नासि जाव निच्चे एवं जाव अलोए । भावओ णं अहेलोयखेत्तलोए अणंता वन्नपज्जवा जहा खंदए जाव अणंता अगुरुयलहुयपज्जवा एवं जाव लोए, भावओ णं अलोए नेवत्थि वन्नपज्जवा जाव नेवत्थि अगुरुयलहुयपज्जवा एगे अजीवदव्वदेसे जाव अणंतभागूणे ॥ ४१९ ॥ लोए णं भंते ! केमहालए पन्नत्ते ? गोयमा ! अयन्नं जंबुदीवे २ सव्वदीव० जाव परिक्खेवेणं, तेणं कालेणं तेणं समएणं छ 'देवा महिद्धिया जाव महेसक्खा जंबुदीवे २ मंदरे पव्वए मंदरचूलियं सव्वओ समंता संपरिक्खित्ताणं चिद्देज्जा, अहे णं चत्तारि दिसाकुमारीओ महत्तरियाओ चत्तारि वलिपिंडे गहाय जंबुदीवस्स २ चउसुवि दिसासु वहियाभिमुहीओ ठिच्चा ते चत्तारि वलिपिंडे जमगसमगं

बहियाभिमुहे पक्खिवेज्जा, पभू णं गोयमा ! तओ एगमेगे देवे ते चत्तारि बलिपिंडे
 धरणितलमसंपत्ते खिप्पामेव पडिसाहरित्तए, ते णं गोयमा ! देवा ताए उक्किट्ठाए जाव
 देवगईए एगे देवे पुरच्छाभिमुहे पयाए एवं दाहिणाभिमुहे एवं पच्चत्थाभिमुहे एवं
 उत्तराभिमुहे एवं उट्ठाभिमुहे एगे देवे अहोभिमुहे पयाए, तेणं कालेणं तेणं समएणं
 वाससहस्साउए दारए पयाए, तए णं तस्स दारगस्स अम्मापियरो पहीणा भवन्ति
 णो चेव णं ते देवा लोगंतं संपाउणंति, तए णं तस्स दारगस्स आउए पहीणे भवइ
 णो चेव णं जाव संपाउणंति, तए णं तस्स दारगस्स अट्ठिमिजा पहीणा भवन्ति णो
 चेव णं ते देवा लोगंतं संपाउणंति, तए णं तस्स दारगस्स आसत्तमेवि कुलवंसे
 पहीणे भवइ णो चेव णं ते देवा लोगंतं संपाउणंति, तए णं तस्स दारगस्स नामगोएवि
 पहीणे भवइ णो चेव णं ते देवा लोगंतं संपाउणंति, तेसि णं भन्ते ! देवाणं किं गए
 बहुए अगए बहुए ? गोयमा ! गए बहुए नो अगए बहुए, गया(ओ)उ से अगए असंखे-
 ज्जइभागे अगयाउ से गए असंखेज्जगुणे, लोए णं गोयमा ! एमहालए पन्नत्ते ! अलोए
 णं भन्ते ! केमहालए पन्नत्ते ? गोयमा ! अयन्नं समयखेत्ते पणयालीस जोयणसयसह-
 स्साइं आयामविकखंभेणं जहा खंदए जाव परिकखेवेणं, तेणं कालेणं तेणं समएणं
 दस देवा महिद्धिया तहेव जाव संपरिकखित्ताणं संचिट्ठेज्जा, अहे णं अट्ठ दिसाकुमा-
 रीओ महत्तरियाओ अट्ठ बलिपिंडे गहाय माणुसुत्तरस्स पव्वयरस चउसुवि दिसासु
 चउसुवि विदिंसासु बहियाभिमुहीओ ठिच्चा अट्ठ बलिपिंडे जमगसमगं बहियाभिमु-
 हीओ पक्खिवेज्जा, पभू णं गोयमा ! तओ एगमेगे देवे ते अट्ठ बलिपिंडे धरणित-
 लमसंपत्ते खिप्पामेव पडिसाहरित्तए, ते णं गोयमा ! देवा ताए उक्किट्ठाए जाव देव-
 गईए लोगंतं ठिच्चा असव्भावपट्टवणाए एगे देवे पुरच्छाभिमुहे पयाए एगे देवे
 दाहिणपुरच्छाभिमुहे पयाए एवं जाव उत्तरपुरच्छाभिमुहे पयाए एगे देवे उट्ठाभिमुहे
 एगे देवे अहोभिमुहे पयाए, तेणं कालेणं तेणं समएणं वाससयसहस्साउए दारए
 पयाए, तए णं तस्स दारगस्स अम्मापियरो पहीणा भवन्ति नो चेव णं ते देवा अलोक्यंतं
 संपाउणंति, तं चेव जाव तेसि णं भन्ते ! देवाणं किं गए बहुए अगए बहुए ? गोयमा !
 नो गए बहुए अगए बहुए, गयाउ से अगए अणंतगुणे अगयाउ से गए अणंतभागे,
 अलोए णं गोयमा ! एमहालए पन्नत्ते ॥४२०॥ लोगस्स णं भन्ते ! एगंमि आगासप-
 एसे जे एगिंदियपएसा जाव पंचिंदियपएसा अगिंदियपएसा अन्नमन्नवद्धा अन्नमन्नपुट्ठा
 जाव अन्नमन्नसमभरघडत्ताए चिट्ठंति, अत्थि णं भन्ते ! अन्नमन्नस्स किञ्चि आवाहं वा
 वावाहं वा उप्पायंति छविच्छेदं वा करेति ? णो इणट्ठे समट्ठे, से केणट्ठेणं भन्ते !
 एवं वुच्चइ लोगस्स णं एगंमि आगासपएसे जे एगिंदियपएसा जाव चिट्ठंति णत्थि

णं अन्नमन्नस्स किञ्चि आवाहं वा जाव करंति ? गोयमा ! से जहानामए नट्टिया
 सिया सिगारागारचारुवेसा जाव कलिया रंगट्टाणंनि जगन्नयाउलंसि जणसय-
 सहस्साउलंसि वत्तीसइविहस्स नट्टस्स अन्नयरं नट्टविहि उवटंमेज्जा, से नणं
 गोयमा ! ते पेच्छंगा तं नट्टियं अणिमिसाए दिट्ठीए सव्वओ समंता नमभिलोएंति ?
 हंता भंते ! समभिलोएंति, ताओ णं गोयमा ! दिट्ठीओ तंनि नट्टियंसि सव्वओ नमंता
 सण्णिपडियाओ ? हंता सज्जि(घ)पडियाओ, अत्थि णं गोयमा ! ताओ दिट्ठीओ तीसे
 नट्टियाए किञ्चिवि आवाहं वा वावाहं वा उप्पाएंति छविच्छेदं वा करंति ? णो इणट्ठे
 समट्ठे, अहवा सा नट्टिया तासि दिट्ठीणं किञ्चि आवाहं वा वावाहं वा उप्पाएइ
 छविच्छेदं वा करेइ ? णो इणट्ठे समट्ठे, ताओ वा दिट्ठीओ अन्नमन्नाए दिट्ठीए किञ्चि
 आवाहं वा वावाहं वा उप्पाएंति छविच्छेदं वा करेन्ति ? णो इणट्ठे समट्ठे, से
 तेणट्ठेणं गोयमा ! एवं वुच्चइ तं चेव जाव छविच्छेदं वा करंति ॥ ४२१ ॥ लोगस्स
 णं भंते ! एगंमि आगांसपएसे जहन्नपए जीवपएसाणं उक्कोसपए जीवपएसाणं सव्व-
 जीवाणं ये कयरे २ जाव विसेसाहिया वा ? गोयमा ! सव्वत्थोवा लोगस्स एगंमि
 आगांसपएसे जहन्नपए जीवपएसा, सव्वजीवा असंखेज्जगुणा, उक्कोसपए जीवपएसा
 विसेसाहिया । सेवं भंते । सेवं भंते । त्ति ॥ ४२२ ॥ एक्कारस्समस्स सयस्स
 दसमो उट्ठेसो समत्तो ॥

- तेणं कालेणं तेणं समएणं वाणियगामे नामं नयरे होत्था वन्नओ, दूइपलासे
 उज्जाणे वन्नओ जाव पुढविसिलापट्ठओ, तत्थ णं वाणियगामे नयरे सुदंसणे नामं
 सेट्ठी परिवसइ अट्ठे जाव अपरिभूए समणोवासए अभिगयजीवार्जाने जाव विहरइ,
 सामी संमोसट्ठे जाव परिसा पज्जुवासइ, तए णं से सुदंसणे सेट्ठी इमासे कहाए लद्धट्ठे
 समाणे हट्ठतुट्ठे ण्हाए सव्वालंकारविभूसिए साओ गिहाओ पडिनिक्खमइ साओ
 गिहाओ पडिनिक्खमित्ता सकोरेंटमल्लदामेणं छत्तेणं धरिज्जमाणेणं पायविहारचारेणं
 मंहयां पुरिसवग्गुरापारिक्खित्ते वाणियगामं नयरं मज्झंमज्झेणं निग्गच्छइ निग्ग-
 च्छित्ता जेणेव दूइपलासे उज्जाणे जेणेव समणे भगवं महावीरे तेणेव उवागच्छइ
 तेणेव उवागच्छित्तां समणं भगवं महावीरं पंचविहेणं अभिगमेणं अभिगच्छइ, तं०-
 संचित्ताणं दव्वाणं । जहा उसभदत्तो जाव तिविहाए पज्जुवासणाए पज्जुवासइ । तए
 णं समणे भगवं महावीरे सुदंसणस्स सेट्ठिस्स तीसे यं महइमहालियाए जाव आरा-
 हए भवइ । तए णं से सुदंसणे सेट्ठी समणस्स भगवओ महावीरस्स अंतियं धम्मं
 सोच्चा निसम्म हट्ठतुट्ठे उट्ठाए उट्ठेइ २ तां समणं भगवं महावीरं तिविह्वत्तो जाव
 नमंसित्ता एवं वयांसी-कइविहे णं भंते ! काले पन्नत्ते ? सुदंसणा ! चउव्विहे काले

पन्नत्ते, तंजहा-पमाणकाले १ अहाउनिव्वत्तिकाले २ मरणकाले ३ अद्धाकाले ४, से
 किं तं पमाणकाले ? २ दुविहे पण्णत्ते, तंजहा-दिवसप्पमाणकाले य १ राइप्पमाणकाले
 य २, चउपोरिसिए दिवसे चउपोरिसिया राई भवइ ॥ ४२३ ॥ उक्कोसिया अद्धपं-
 चममुहुत्ता दिवसस्स वा राईए वा पोरिसी भवइ, जहन्निया तिमुहुत्ता दिवसस्स वा
 राईए वा पोरिसी भवइ, जया णं भंते ! उक्कोसिया अद्धपंचममुहुत्ता दिवसस्स वा
 राईए वा पोरिसी भवइ तथा णं कइभागमुहुत्तभागेणं परिहायमाणी २ जहन्निया
 तिमुहुत्ता दिवसस्स वा राईए वा पोरिसी भवइ तथा णं कइभागमुहुत्तभागेणं परि-
 वद्धमाणी २ उक्कोसिया अद्धपंचममुहुत्ता दिवसस्स वा राईए वा पोरिसी भवइ ?
 सुदंसणा ! जया णं उक्कोसिया अद्धपंचममुहुत्ता दिवसस्स वा राईए वा पोरिसी
 भवइ तथा णं वावीससयभागमुहुत्तभागेणं परिहायमाणी २ जहन्निया तिमुहुत्ता
 दिवसस्स वा राईए वा पोरिसी भवइ, जया णं जहन्निया तिमुहुत्ता दिवसस्स वा
 राईए वा पोरिसी भवइ तथा णं वावीससयभागमुहुत्तभागेणं परिवद्धमाणी परिवद्ध-
 माणी उक्कोसिया अद्धपंचममुहुत्ता दिवसस्स वा राईए वा पोरिसी भवइ । कया णं
 भंते ! उक्कोसिया अद्धपंचममुहुत्ता दिवसस्स वा राईए वा पोरिसी भवइ कया वा
 जहन्निया तिमुहुत्ता दिवसस्स वा राईए वा पोरिसी भवइ ? सुदंसणा ! जया णं
 उक्कोसिए अट्टारसमुहुत्ते दिवसे भवइ जहन्निया दुवालसमुहुत्ता राई भवइ तथा णं
 उक्कोसिया अद्धपंचममुहुत्ता दिवसस्स पोरिसी भवइ जहन्निया तिमुहुत्ता राईए
 पोरिसी भवइ, जया णं उक्कोसिया अट्टारसमुहुत्तिया राई भवइ जहन्निए दुवालस-
 मुहुत्ते दिवसे भवइ तथा णं उक्कोसिया अद्धपंचममुहुत्ता राईए पोरिसी भवइ जह-
 न्निया तिमुहुत्ता दिवसस्स पोरिसी भवइ । कया णं भंते ! उक्कोसिए अट्टारसमुहुत्ते
 दिवसे भवइ जहन्निया दुवालसमुहुत्ता राई भवइ कया वा उक्कोसिया अट्टारसमुहुत्ता
 राई भवइ जहन्निए दुवालसमुहुत्ते दिवसे भवइ ? सुदंसणा ! आसाढपुन्निमाए णं उक्कोसिए
 अट्टारसमुहुत्ते दिवसे भवइ जहन्निया दुवालसमुहुत्ता राई भवइ, पोसस्स पुन्निमाए
 णं उक्कोसिया अट्टारसमुहुत्ता राई भवइ जहन्निए दुवालसमुहुत्ते दिवसे भवइ ॥ अत्थि
 णं भंते ! दिवसा य राईओ य समा चेव भवन्ति ? हंता ! अत्थि, कया णं भंते !
 दिवसा य राईओ य समा चेव भवन्ति ? सुदंसणा ! चित्तासोयपुन्निमासु णं, एत्थ
 णं दिवसा य राईओ य समा चेव भवन्ति, पन्नरसमुहुत्ते दिवसे पन्नरसमुहुत्ता
 राई भवइ चउभागमुहुत्तभागूणा चउमुहुत्ता दिवसस्स वा राईए वा पोरिसी भवइ,
 सेत्तं पमाणकाले ॥ ४२४ ॥ से किं तं अहाउनिव्वत्तिकाले ? अहाउनिव्वत्तिकाले
 जन्नं जेणं नेरइण्ण वा तिरिक्खजोणिण्णं वा मणस्सेण वा देवेण वा अहाउयं

निव्वत्तिं सेत्तं पालेमाणे अहाउनिव्वत्तिकाले । से किं तं मरणकाले ? २ जीवो वा
 सरीराओ सरीर वा जीवाओ, सेत्तं मरणकाले ॥ से किं तं अद्धाकाले ? अद्धाकाले
 अणेगविहे पन्नत्ते, तं० समयट्टयाए आवलियट्टयाए जाव उस्सप्पिणीट्टयाए । एस णं
 सुदंसणा ! अद्धा दोहारच्छेयणेणं छिज्जमाणी जाहे विभागं नो हव्वमागच्छइ सेत्तं
 समए, समयट्टयाए असंखेज्जाणं समयाणं समुदयसमिइसमागमेणं सा एगा आवलि-
 यत्ति पवुच्चइ, संखेज्जाओ आवलियाओ जहा सालिउद्देसए जाव तं सागरोवमस्स उ
 एगस्स भवे परिमाणं । एएहि णं भंते ! पलिओवमसागरोवमेहि किं पओयणं ?
 सुदंसणा ! एएहिं पलिओवमसागरोवमेहिं नेरइयतिरिक्खजोणियमणुस्सदेवाणं आउ-
 याइं माविज्जंति ॥ ४२५ ॥ नेरइयाणं भंते ! केवइयं कालं ठिईं पन्नत्ता ? एवं ठिइपयं
 निरवसेसं भाणियव्वं जाव अजहन्नमणुक्कोसंणं तेत्तीसं सागरोवमाइं, ठिईं पन्नत्ता
 ॥ ४२६ ॥ अत्थि णं भंते ! एएसिं पलिओवमसागरोवमाणं खएइ वा अवचएइ
 वा ? हंता अत्थि, से केणट्ठेणं भंते ! एवं वुच्चइ अत्थि णं एएसिं णं पलिओवमसा-
 गरोवमाणं जाव अवचएइ वा ? । एवं खलु सुदंसणा ! तेणं कालेणं तेणं समएणं
 हत्थिणापुरे नामं नयरे होत्था वन्नओ, सहसंववणे उज्जाणे वन्नओ, तत्थि णं हत्थि-
 णापुरे नयरे बले नामं राया होत्था वन्नओ, तस्स णं बलस्स रत्तो पभावई नामं
 देवी होत्था सुकुमाल० वन्नओ जाव विहरइ । तए णं सा पभावई देवी अन्नया
 कयाइ तंसि तारिसगंसि वासघरंसि अर्विभतरओ सचित्तकम्मे वाहिरओ दूमियघट्ट-
 मट्ठे विचित्तउल्लोगचिल्लियतले मणिरयणपणासियंधयारे बहुसमसुविभत्तदेसभाए पंच-
 वन्नसरससुरभिमुक्कपुप्फपुंजोवयारकलिए कालागुरुपवरकुंदुरुक्कधूवमघमघंतगंधुडु
 याभिरामे सुगंधिवरगंधिए गंधवट्ठिभूए तंसि तारिसगंसि सयणिजंसि सालिंगणवट्ठिए
 उभओ विव्वोयणे दुहओ उन्नए मज्झेणयगंभीरे गंगापुल्लिणवालुयउद्दालसालिसए
 उवचियखोमियदुगुल्लपट्टपडिच्छायणे सुविरइयरयत्ताणे रत्तंसुयसंवुडे सुरम्मे आइणगरू-
 यवूरणवणीयतूलफासे सुगंधवरकुसुमचुन्नसयणोवयारकलिए अद्धरत्तकालसमयंसि सुत्ता-
 जागरा ओहीरमाणी २ अयमेयारूवं ओरालं कल्लणं सिवं धन्नं मंगलं सस्तिरीयं महा-
 सुविणं पासित्ता णं पडिवुद्धा तं० हाररययखीरसागरससंककिरणदगरयरययमहासेलपं-
 डुरतरोरुरमणिजपेच्छणिज्जं थिरलट्टपउट्टवट्टपीवरसुसिलिट्ठविसिट्ठतिक्खदाढाविडंवि-
 यमुहं परिकम्मियजच्चकमलकोमलमाइयसोहंतलट्टउट्टं रत्तुप्पलपत्तमउयसुकुमालता-
 लुजीहं मूमागयपवरकगगतावियआवत्तायंतवट्टतडिविमलसरिसनयणं विसालपीवरोरू-
 पडिपुन्नविउलखंधं मिउविसयसुहुमलक्खणपसत्यविच्छिन्नकेसरसडोवसोहियं ऊसिय-
 सुनिम्मियसुजायअप्फोडियलंगूलं सोमं सोमाकारं लीलायंतं जंभायंतं नहयलाओ

ओवयमाणं निययवयणमइवयंतं सीहं सुविणे पासित्ता णं पडिबुद्धा । तए णं सा पभावई देवी अयमेयारुवं ओरालं जाव सस्सिरीयं महासुविणं पासित्ता णं पडिबुद्धा समाणी हट्टेतुट्ठ जाव हियया धाराहयंकलंवपुप्फगंपिव समूससियरोमकूवा तं सुविणं ओगिण्हइ ओगिणिहत्ता सयणिज्जाओ अब्भुट्टेइ सयणिज्जाओ अब्भुट्टेता अतुरियमच-वलमसंभंताए अविलंबियाए रायहंससरिसीए गईए जेणेव बलस्स रत्तो सयणिजे तेणेव उवागच्छइ तेणेव उवागच्छित्ता बलं रायं ताहिं इट्ठाहिं कंताहिं पियाहि मणुत्ताहिं मणामाहिं ओरालाहिं कल्लाणाहिं सिवाहि धन्नाहिं मंगल्लाहिं सस्सिरीयाहिं मिउमहुरमंजुलाहिं गिराहिं संलवमाणी संलवमाणी पडिवोहेइ पडिवोहेत्ता बलेणं रत्ता अब्भणुत्ताया समाणी नाणामणिरयणभत्तिचित्तंसि भद्दासणंसि णिसीयइ णिसी-इत्ता आसत्था वीसत्था सुद्दासणवरगया बलं रायं ताहिं इट्ठाहिं कंताहिं जाव संलव-माणी २ एवं वयासी-एवं खलु अहं देवाणुप्पिया ! अज्ज तंसि तारिसगंसि सयणि-ज्जंसि सालिंगण० तं चेव जाव नियगवयणमइवयंतं सीहं सुविणे पासित्ता णं पडि-बुद्धा, तण्णं देवाणुप्पिया ! एयस्स ओरालस्स जाव महासुविणस्स के मन्ने वल्लाणे फलवित्तिविसेसे भविस्सइ ? तए णं से बले राया पभावईए देवीए अंतियं एयमट्ठं सोच्चा निसम्म हट्टेतुट्ठ जाव हयहियाए धाराहयनीवसुरभिकुसुमचंचुमालइयतणुयऊ-सवियरोमकूवे तं सुविणं ओगिण्हइ ओगिणिहत्ता ईहं पविसइ ईहं पविसित्ता अप्पणो साभाविणं मडपुव्वणं बुद्धिविन्नाणेणं तस्स सुविणस्स अत्थोग्गहणं करेइ तस्स० २ ता पभावई देविं ताहिं इट्ठाहिं कंताहिं जाव मंगल्लाहिं मिउमहुरसस्सिरीयाहिं संलव-माणे २ एवं वयासी-ओराले णं तुमे देवी ! सुविणे दिट्ठे, कल्लाणे णं तुमे देवी ! सुमिणे दिट्ठे जावं सस्सिरीए णं तुमे देवी ! सुविणे दिट्ठे, आरोग्गतुट्ठिदीहाउकल्लाणमंगल-कारेणं तुमे देवी ! सुविणे दिट्ठे, अत्थलाभो देवाणुप्पिए ! भोगलाभो देवाणु-प्पिए ! पुत्तलाभो देवाणुप्पिए ! रज्जलाभो देवाणुप्पिए !, एवं खलु तुमं देवाणुप्पिए ! णवण्हं मासाणं बहुपडिपुत्ताणं अद्धट्ठमाण राइंदियाणं वीइक्कंताणं अम्हं कुलकेउं कुलदीवं कुलपव्वयं कुलवडेंसयं कुलतिलगं कुलकित्तिकरं कुलनंदिकरं कुलजसकरं कुलाधारं कुलपायवं कुलविक्खणकरं सुकुमालपाणिपायं अहीणपडिपुण्णपंचिदिय-सरीरं जाव सस्सिसोमाकारं कंतं पियदंसणं सुरूवं देवकुमारसमप्पभं दारगं पया-हिसि । सेऽवि य णं दारए उम्मुक्कवालभावे विन्नायपरिणयमित्ते जोव्वणगमणुप्पत्ते हिसि । सरे वीरे विक्कंते वित्थिन्नविउलवलवाहणे रज्जवई राया भविस्सइ, तं उराले णं तुमे देवी ! सुमिणे दिट्ठे जाव आरोग्गतुट्ठि जाव मंगलकारेणं तुमे देवी ! सुविणे दिट्ठेत्तिकट्ठु पभावई देविं ताहिं इट्ठाहिं जाव वग्गूहिं दोच्चं पि तच्चं पि अणुवूहइ । तए

णं सा पभावई देवी बलरस रजो अंतियं एयगट्टं गोता निगन्म इट्ठाट्टं । ययवत्त
 जाव एवं वयासी-एवमेयं देवाणुपिया ! तद्धमेयं देवाणुपिया ! अतिगट्टमेयं देवाणु-
 पिया ! असंदिग्धमेयं देवाणुपिया ! इच्छियमेयं देवाणुपिया ! पडिच्छियमेयं
 देवाणुपिया ! इच्छियपडिच्छियमेयं देवाणुपिया ! ते जेणेयं इट्ठे वट्ठेयं पट्टेयं
 सुविणं सम्मं पडिच्छइ पटिच्छिता वल्लेगं रक्षा अचमणुजाना मगाणी पाणामणिअय-
 भत्तिचित्ताओ भद्दासणाओ अचमुट्टेइ अचमुट्टेता अनुरियमनयत्त जाव गट्टे जेणेयं नए
 सयणिजे तेणेव उवागच्छइ तेणेव उवागच्छिता सयणिजानि निसीयइ निसीरता एवं
 वयासी-मा मे से उत्तमे पट्टाणे मंगटे सुणिने अजेहि पावसुभिरिहिं पांटांमस्सदन्निट्टे
 देवगुरुजणसंवद्धाहि पसत्थाहि मंगटाहि भग्गियाहि कट्ठाहि सुणिजानासं पटिज-
 गरमाणी २ विहरइ । तए णं से वट्ठे राया कोडुंविउपुरिसे सदावेइ सदावेत्ता एवं
 वयासी-खिप्पामेव भो देवाणुपिया ! अज सविसेसं वाहिरियं उवट्ठागसालं गंती-
 दयसित्तसुइयसंमज्जिओवलित्तं सुगंधपवरपंचवन्नपुष्पोवयारकालियं नागागुदपजरुंदुग्ग
 जाव गंधवट्ठिभूयं करेह य करावेह य करेत्ता करावेत्ता सीहासणं रयावेह सीहानणं
 रयावेत्ता ममेयं जाव पच्चप्पिणह, तए णं ते कोडुंविउपुरिसा जाव पडिच्छेत्ता खिप्पा-
 मेव सविसेसं वाहिरियं उवट्ठागसालं जाव पच्चप्पिणंति, तए णं से वट्ठे राया पगुस-
 कालसमयंसि सयणिजाओ अचमुट्टेइ सयणिजाओ अचमुट्टेता पायपीटाओ पगोळुड
 पायपीटाओ पच्चोरुहित्ता जेणेव अट्टणसाला तेणेव उवागच्छइ २ ता अट्टणसालं अणु-
 पविसइ जहा उववाइए तहेव अट्टणसाला तहेव उज्जगवरे जाव नसिक्ख पियडंसणे
 नरवई मज्जगघराओ पडिनिक्खमइ पटिनिक्खमिता जेणेव वाहिरिया उवट्ठागसाला
 तेणेव उवागच्छइ तेणेव उवागच्छिता सीहासणवरंसि पुरच्छाभिनुहे निसीयइ निसी-
 इत्ता अप्पणो उत्तरपुरच्छिमे दिसीभाए अट्ट भद्दासणाइं सेयवत्थपच्चुत्तुयाइं सिद्धत्यग-
 कयमंगलोवयाराइं रयावेइ रयावेत्ता अप्पणो अदूरसामंते नाणामणिरयणमंडियं
 अहियपेच्छणिजं महग्गवरपट्टणुगयं सण्हपट्टवहुभत्तिसयचित्तताणं ईहामियउसभ
 जाव भत्तिचित्तं अब्भितरियं जवणियं अछावेइ अछावेत्ता नाणामणिरयणभत्तिचित्तं
 अत्थरयमउयमसूरगोच्छगं सेयवत्थपच्चुत्तुयं अंगसुहफासयं सुमउयं पभावईए देवीए
 भद्दासणं रयावेइ रयावेत्ता कोडुंविउपुरिसे सदावेइ सदावेत्ता एवं वयासी-खिप्पामेव
 भो देवाणुपिया ! अट्टंगमहानिमित्तसुत्तत्थधारए विविहसत्थकुसले सुविणलक्खणपाठए
 सदावेह, तए णं ते कोडुंविउपुरिसा जाव पडिसुणेत्ता वलस्स रजो अतियाओ पडि-
 निक्खमन्ति पडिनिक्खमिता सिग्घं तुरियं चवंलं चंडं वेइयं हत्थिणापुरं नयरं मज्झं-
 मज्झेणं निग्गच्छंति २ ता जेणेव तेसिं सुविणलक्खणपाठगाणं निहाइं तेणेव उवाग-

च्छन्ति तेणेव उवागच्छिता ते सुविणलक्खणपाढए सदावेति । तए णं ते सुविण-
लक्खणपाढगा वलस्स रत्तो कोडुंवियपुरिसेहिं सदाविया समाणा हट्टवुट्ठा प्हाया जाव
सरीरा सिद्धत्यगहरियालियाकयमंगलमुद्धाणां सएहिं २ गिहेहितो निग्गच्छंति स० २
ता हत्थिणापुर नयरं मज्झमज्झेणं जेणेव वलस्स रत्तो भवणवरवडेंसए-तेणेव उवा-
गच्छन्ति तेणेव उवागच्छिता भवणवरवडेंसगपडिदुवारसि एगओ मिलंति एगओ
मिलित्ता जेणेव वाहिरिया उवट्ठाणसाला जेणेव वले राया तेणेव उवागच्छन्ति तेणेव
उवागच्छिता करयल० वलं रायं जएणं विजएणं वद्धावेति । तए णं ते सुविणलक्खण-
पाढगा वल्लेगं रत्ता वंदियपूइयसक्कारियसम्माणिया समाणा पत्तेयं २ पुव्वन्नत्थेसु
भद्दासणेनु निसीयंति, तए जे से वले राया-पभावई देविं जवणियंतारियं ठावेइ ठावेत्ता
पुप्फफलपडिपुन्नहत्थे परेणं विणएणं ते सुविणलक्खणपाढए एवं वयासी-एवं खलु
देवाणुप्पिया । पभावई देवी अज्ज तंसि तारिसगंसि वासघरंसि जाव सीहं सुविणे
पासित्ता णं पडिबुट्ठा, तण्णं देवाणुप्पिया । एयस्स ओरालस्स जाव के मन्ने कन्नाणे
फलवित्तिविसेसे भविस्सइ ? तए णं ते सुविणलक्खणपाढगा वलस्स रत्तो अंतियं एय-
मट्ठं सोच्चा निसम्म हट्टवुट्ठ० तं सुविणं ओगिण्हन्ति २ ता ईहं अणुप्पविसन्ति अणुप्प-
विसित्ता तस्स सुविणस्स अत्थोगगहणं करेन्ति तस्स० २ ता अन्नमन्नेणं सद्धिं संचालेंति
२ ता तस्स सुविणस्स लद्धट्ठा गहियट्ठा पुच्छियट्ठा विणिच्छियट्ठा अभिगयट्ठा वलस्स
रत्तो पुरओ सुविणसत्थाई उच्चारमाणा २ एवं वयासी-एवं खलु देवाणुप्पिया ! अम्हं
सुविणसत्थंसि वायालीसं सुविणा तीसं महासुविणा वावत्तारिं सव्वसुविणा दिट्ठा, तत्थणं
देवाणुप्पिया ! तित्थगरमायरो वा चक्कवट्ठिमायरो वा तित्थगरंसि वा चक्कवट्ठिसि वा
गव्वं वक्कममाणंसि एएसिं तीसाए महासुविणाणं इमे चोइस महासुविणे पासित्ता णं
पडिबुज्जंति, तंजहा-गयवसहसीहअभिसेयदामससिदिणयरं झयं कुंभं । पडमसर-
सागरविमाणं भवणरयणुच्चयसिहिं च १४ ॥ १ ॥ वासुदेवमायरो वा वासुदेवंसि
गव्वं वक्कममाणंसि एएसिं चोइसण्हं महासुविणाणं अन्नयरे सत्त महासुविणे पासित्ता
णं पडिबुज्जंति, वलदेवमायरो वा वलदेवंसि गव्वं वक्कममाणंसि एएसिं चोइसण्हं
महासुविणाणं अन्नयरे चत्तारि महासुविणे पासित्ता णं पडिबुज्जंति, मंडलियमायरो
वा मंडलियंसि गव्वं वक्कममाणंसि एएसिं णं चउदसण्हं महासुविणाणं अन्नयरं एगं
महासुविणं पासित्ता णं पडिबुज्जन्ति, इमे य णं देवाणुप्पिया ! पभावईए देवीए एगे
महासुविणे दिट्ठे, तं ओराले णं देवाणुप्पिया ! पभावईए देवीए सुविणे दिट्ठे जाव
आरोगगुट्ठि जाव मंगलकारए णं देवाणुप्पिया ! पभावईए देवीए सुविणे दिट्ठे,
अत्थलाभो देवाणुप्पिया ! भोग० पुत्त० रज्जलाभो देवाणुप्पिया ! एवं खलु देवाणु-

षिण्या । पभावई देवी नवण्हं मासाणं बहुपडिपुञ्जाणं जाव वीडकंताणं तुम्हं कुलकैउं
 जाव दारणं पयाहिइ, सेऽविय णं दारए उम्मुक्कवालभावे जाव रज्जवई राया भविस्मइ
 अणगारे वा भावियप्पा, तं ओराले णं देवाणुषिया ! पभावईए देवीए सुविणे दिट्ठे
 जाव आरोग्गुट्ठिदीहाउयकळाण जाव दिट्ठे । तए णं से वले राया सुविणलक्खण-
 पाढगाणं अंतियं एयमट्ठं सोच्चा निसम्म हट्ठुट्ठ करयल जाव कट्ठु ते सुविण-
 लक्खणपाढगे एवं वयासी-एवमेयं देवाणुषिया । जाव ते जहेयं तुम्हे वदहत्तिकट्ठु
 तं सुविणं सम्मं पडिच्छइ तं २ ता सुविणलक्खणपाढए विउलेणं अनणपाणखाइम-
 साइमपुप्फवत्थगंधमल्लालंकारेणं सक्कारेड सम्माणेड सक्कारेत्ता नम्माणेत्ता विउलं जीवि-
 यारिहं पीइदाणं दलयइ २ ता पडिविसज्जेइ पडिविसज्जेत्ता सीहासणाओ अब्भुट्ठेइ
 अब्भुट्ठेत्ता जेणेव पभावई देवी तेणेव उवागच्छइ तेणेव उवागच्छित्ता पभावइं देवि
 ताहिं इट्ठाहिं कंताहिं जाव संलवमाणे संलवमाणे एवं वयासी-एवं खलु देवाणुषिए ।
 सुविणसत्थंसि वायालीसं सुविणा तीसं महासुविणा वावत्तरिं सव्वनुविणा दिट्ठा, तत्थ
 णं देवाणुषिए । तित्थगरमायरो वा चक्कवट्ठिमायरो वा तं चेव जाव अन्नयरं एणं
 महासुविणं पासित्ता णं पडिवुज्जंति, इमे य णं तुमे देवाणुषिए ! एगे महानुविणे
 दिट्ठे, तं ओराले णं तुमे देवी । सुविणे दिट्ठे जाव रज्जवई राया भविस्मइ अणगारे
 वा भावियप्पा, तं ओराले णं तुमे देवी ! सुविणे दिट्ठे जाव दिट्ठेत्तिकट्ठु पभावइं देवि
 ताहिं इट्ठाहिं कंताहिं जाव दोच्चंपि तच्चंपि अणुवूहइ, तए णं सा पभावई देवी बलस्स
 रत्तो अंतियं एयमट्ठं सोच्चा निसम्म हट्ठुट्ठ करयल जाव एवं वयासी-एवमेयं देवाणु-
 षिया ! जाव तं सुविणं सम्मं पडिच्छइ तं सुविणं सम्मं पडिच्छित्ता वलेणं रत्ता
 अब्भणुत्ताया समाणी नाणामणिरयणभत्तिचित्त जाव अब्भुट्ठेइ अतुरियमच्चल जाव
 गईए जेणेव सए भवणे तेणेव उवागच्छइ तेणेव उवागच्छित्ता सयं भवणमणुपविट्ठा ।
 तए णं सा पभावई देवी ण्हाया सव्वालंकारविभूसिया तं गव्वं णाइसीएहिं नाइ-
 उण्हेहिं नाइत्तिहेहिं नाइकडुएहिं नाइकसाएहिं नाइअविलेहिं नाइमहुरेहिं उउव्वमय-
 माणसुहेहिं भोयणच्छायणगंधमल्लेहिं जं तस्स गव्वस्स हियं मियं पत्थं गव्वमपोसणं
 तं देसे ये काले ये आहारमाहारेमाणी विवित्तमउएहिं सयणासणेहिं पइरिक्खसुहाए
 मण्णाणुकूलाए विहारभूमीए पसत्थदोहला संपुञ्जदोहला सम्माणियदोहला अवमाणिय-
 दोहला वोच्छिन्नदोहला विणीयदोहला ववगयरोगसोगमोहभयपरित्तासा तं गव्वं
 सुहंसुहेणं परिवहइ । तए णं सा पभावई देवी नवण्हं मासाणं बहुपडिपुञ्जाणं अद्ध-
 माण राईदियाणं वीडकंताणं सुकुमालपाणिपायं अहीणपडिपुञ्जपंचिदियसरीरं लक्खण-
 वंजणगुणोववेयं जाव सप्पिसोमाकारं कंतं पियदंसणं सुखं दारयं पयाया । तए णं

तीसे पभावईए देवीए अंगपडियारियाओ पभावईं देविं पंसूर्यं जाणेत्ता जेणेव वळे
 राया तेणेव उवागच्छन्ति तेणेव उवागच्छिता करयल जाव वलं रायं जएणं विजएणं
 चद्धावेंति जएणं विजएणं वद्धावेत्ता एवं वयासी-एवं खलु देवाणुप्पिया ! पभावईं
 देवी णवण्हं मासागं बहुपडिपुण्णणं जाव दारगं पयाया तं एयण्णं देवाणुप्पियाणं
 पियद्वयाए पियं निवेदेमो पियं भे भवउ । तए णं से वळे राया अंगपडिया-
 रियाणं अंतियं एयमट्ठं सोच्चा निसम्म हंहुनुट्ठ जाव धाराहयणीव जाव रोमकूवे
 तासिं अंगपडियारियाणं मउडवज्जं जहामालियं ओमोयं दलयइ २ ता सेयं
 रययामयं विमलसलिलपुत्रं भिंगारं च गिण्हइ गिण्हित्ता, मत्थए धोवइ मत्थए धोवित्ता
 विउलं जीवियारिहं पीइदाणं दलयइ पीइदाणं दलइत्ता सक्कारेइ सम्माणेइ स० २
 ता पडिविसजेइ ॥ ४२७ ॥ तए णं से वळे राया कोडुंविउपुरिसं सद्दावेइ सद्दावेत्ता
 एवं वयासी-खिप्पामेव भो देवाणुप्पिया ! हत्थिणापुरे नयरे चारगसोहणं करेह
 चारग० २ ता माणुम्माण(प्पमाण)वद्धुणं करेह मा० २ ता हत्थिणापुरं नयरं सच्चि-
 तरवाहिरियं आसियसंमज्जिओवलित्तं जाव करेह य कारवेह य करेत्ता य कारवेत्ता य
 जूयसहस्सं वा चक्रसहस्सं वा पूयामहामहिमसक्कारं वा उस्सवेह २ ता ममेयमाणत्तियं
 पच्चप्पिणह, तए णं ते कोडुंविउपुरिसा वलेणं रत्ता एवं वुत्ता समाणा जाव पच्चप्पि-
 णंति । तए णं से वळे राया जेणेव अट्ठणसाला तेणेव उवागच्छइ तेणेव उवाग-
 च्छित्ता तं चेव जाव मज्जणघराओ पडिनिक्खमइ पडिनिक्खमित्ता उस्सुक्कं उक्करं
 उक्किट्ठं अदिज्जं अमिज्जं अमडप्पवेसं अदंडकोदंडिमं अधरिमं गणियावरनाडइज्जक-
 लियं अणंगतालाचराणुचरियं अणुद्धुयमुइंगं अमिलायमल्लदामं पमुइयपक्कीलियं सपु-
 रजणजाणवयं दसदिवसे ठिइवडियं करेइ, तए णं से वळे राया दसाहियाए
 ठिइवडियाए वट्टमाणीए सइए य साहस्सिए य सयसाहस्सिए य जाए य दाए य
 भाए य दलमाणे य द्वावेमाणे य सइए य साहस्सिए य सयसाहस्सिए य लंभे-
 पडिच्छमाणे य पडिच्छावेमाणे य एवं विहरइ । तए णं तस्स दारगस्स अम्मापियरो-
 पडमे दिवसे ठिइवडियं करेन्ति, तइए दिवसे चंदसूरदंसणियं करेन्ति, छट्ठे दिवसे
 जागरियं करेन्ति, एक्कारसमे दिवसे वीइक्कंते निव्वत्ते असुइजायकम्मकरणे संपत्ते
 वारसाहदिवसे विउलं असणं पागं खाइमं साइमं उवक्खडावेंति २ ता जहा सियो
 जावं खत्तिए य आमंतेंति २ ता तओ पच्छा ण्हाया तं चेव जाव सक्कारेंति
 सम्माणेंति स० २ ता तस्सेव मित्तणाइ जाव राईण य खत्तियाण य पुरओ अज्जयपज्जय-
 पिउपज्जयागयं बहुपुरिसपरंपरप्परूढं कुलाणुरुवं कुलसरिसं कुलसंताणतंतुविवद्वणकरं
 अयमेयारूवं गोणं गुणनिप्फज्जं नामधेज्जं करेंति-जम्हा णं अम्हं इमे दारए वलस्स-

रन्नो पुत्ते पभावईए देवीए अत्तए तं होउ णं अम्हं एयस्स दारगस्स नामधेज्जे
महब्बले, तए णं तस्स दारगस्स अम्मापियरो नामधेज्जे करेंति महब्बलेत्ति । तए
णं से महब्बले दारए पंचधाईपरिग्गहिए, तंजहा-खीरधाईए एवं जहा दढप्पइजे
जाव निवायनिव्वाधायंसि सुहंसुहेणं परिवड्ढइ । तए णं तस्स महब्बलस्स दारगस्स
अम्मापियरो अणुपुव्वेणं ठिइवडियं वा चंदसूरदंसावणियं वा जागरियं वा नामकरणं
वा परंगामणं वा पयचंकामणं वा जेमा(म)वणं वा पिडवद्धणं वा पजंभावणं वा कण्ण-
वेहणं वा संवच्छरपडिलेहणं वा चोलेयणं च उवणयणं च अन्नानि य बहूणि
गम्भाहाणजम्मणमाइयाइं कोउयाइं करेंति । तए णं तं महब्बलं कुमारं अम्मापियरो
साइरेगट्ठवासणं जाणित्ता सोभणंसि तिहिकरणमुहुत्तंसि एवं जहा दढप्पइजे जाव
अलं भोगसमत्थे जाए यावि होत्था । तए णं तं महब्बलं कुमारं उम्मुक्कवालभारं
जाव अलं भोगसमत्थं विजाणित्ता अम्मापियरो अट्ठ पासायवडेंसए करेंति
अब्भुगयमूसियपहसिए इव वन्नओ जहा रायप्पसेणइजे जाव पडिरुवे, तेसि णं
पासायवडेंसगणं बहुमज्झदेसभाए एत्थ णं महेगं भवणं करेंति अणेगखंभसयसंति-
विट्ठं वन्नओ जहा रायप्पसेणइजे पेच्छाघरमंडवंसि जाव पडिरुवे ॥ ४२८ ॥ तए
णं तं महब्बलं कुमारं अम्मापियरो अन्नया कयाइ सोभणंसि तिहिकरणदिवसनक्ख-
त्तमुहुत्तंसि ण्हायं सव्वालंकारविभूसियं पमक्खणगण्हाणगीयवाइयपसाहणट्ठंगतिलग-
कंकणअविहववहुउवणीयं मंगलसुजंपिएहि य वरकोउयमंगलोवयारकयसंतिकम्मं सरि-
सियारणं सरित्तयारणं सरिव्वयारणं सरिसलावन्नरुवजोव्वगणुणोववेयारणं विणीयारणं सरि-
सएहिं रायकुलेहितो आणिल्लियारणं अट्ठणं रायवरकन्नाणं एगदिवसेणं पाणि गिण्हा-
विस्तु । तए णं तस्स महाबलस्स कुमारस्स अम्मापियरो अयमेयारुवं पीइदारं
दलयंति तं०-अट्ठ हिरन्नकोडीओ अट्ठ सुवन्नकोडीओ अट्ठ मउडे मउडप्पवरे अट्ठ
कुंडलजोए कुंडलजोयप्पवरे अट्ठ हारे हारप्पवरे अट्ठ अद्धहारे अद्धहारप्पवरे अट्ठ
एगावलीओ एगावलिप्पवरोओ एवं मुत्तावलीओ एवं कणगावलीओ एवं रयणावलीओ
अट्ठ कडगजोए कडगजोयप्पवरे एवं तुडियजोए अट्ठ खोमजुयलाइं खोमजुयलप्पव-
राइं एवं वडंगजुयलाइं एवं पट्टजुयलाइं एवं दुगुल्लजुयलाइं अट्ठ सिरीओ अट्ठ हिरीओ
एवं धिईओ किंतीओ बुद्धीओ लच्छीओ अट्ठ नंदाइं अट्ठ भद्दाइं अट्ठ तले तलप्पवरे
सव्वरयणामए णियगवरभवणंकेऊ अट्ठ झए झयप्पवरे अट्ठ वए वयप्पवरे दसगो-
साहस्सिएणं वएणं अट्ठ नाडगाइं नाडगप्पवराइं वत्तीसवद्धेणं नाडएणं अट्ठ आसे
आसेप्पवरे सव्वरयणामए सिरिधरपडिरुवए अट्ठ हत्थी हत्थिप्पवरे सव्वरयणामए
सिरिधरपडिरुवए अट्ठ जाणाइं जाणप्पवराइं अट्ठ जुग्गाइं जुग्गप्पवराइं एवं सिवियाओ

एवं संदमाणीओ एवं गिल्लीओ थिल्लीओ अट्ट वियडजाणाइं वियडजाणप्पवराइं अट्ट रहे पारिजाणिए अट्ट रहे संगामिए अट्ट आसे आसप्पवरे अट्ट हत्थी हत्थिप्पवरे अट्ट गामे गामप्पवरे दसकुलसाहस्सिएणं गामेणं अट्ट दासे दासप्पवरे एवं दासीओ एवं किंकरे एवं कंठुइजे एवं वरिसधरे एवं महत्तरए अट्ट सोवन्निए ओलंवनदीवे अट्ट रूपमए ओलंवनदीवे अट्ट सुवन्नरूपमए ओलंवनदीवे अट्ट सोवन्निए उक्कंचण-दीवे एवं चेव तिन्निवि, अट्ट सोवणिए पंजरदीवे एवं चेव तिण्णिवि, अट्ट सोवणिए थाले अट्ट रूपमए थाले अट्ट सुवन्नरूपमए थाले अट्ट सोवन्नियाओ पत्तीओ ३ अट्ट सोवन्नियाइं थासयाइं ३ अट्ट सोवन्नियाइं मंगल्ला(मल्ला)इं ३ अट्ट सोवन्नियाओ तलि-याओ ३ अट्ट सोवन्नियाओ कविच्चियाओ ३ अट्ट सोवन्निए अवएडए अट्ट सोवन्नियाओ अवयक्काओ ३ अट्ट सोवणिए पायपीडए ३ अट्ट सोवन्नियाओ भिसियाओ ३ अट्ट सोवन्नियाओ करोडियाओ ३ अट्ट सोवन्निए पल्लंके ३ अट्ट सोवन्नियाओ पडिसेजाओ ३ अट्ट हंसासणाइं अट्ट कोचासणाइं एवं गम्लासणाइं उन्नयासणाइं पणयासणाइं दीहामणाइं भद्दासणाइं पक्खासणाइं मगरासणाइं अट्ट पडमासणाइं अट्ट दिसा-सोवत्थियासणाइं अट्ट तेज्जसमुग्गे जहा रायप्पसेगइजे जाव अट्ट सरिसवसमुग्गे अट्ट खुज्जाओ जहा उववाइए जाव अट्ट पारिसीओ अट्ट छत्ते अट्ट छत्तधारीओ चेडीओ अट्ट चामराओ अट्ट चामरधारीओ चेडीओ अट्ट तालियंटे अट्ट तालियंट-धारीओ चेडीओ अट्ट करोडियाधारीओ चेडीओ अट्ट खीरधाईओ जाव अट्ट अक-धाईओ अट्ट अंगमदियाओ अट्ट उम्मदियाओ अट्ट ण्हावियाओ अट्ट पसाहियाओ अट्ट वन्नग(चंदण)पेसीओ अट्ट चुन्नगपेसीओ अट्ट कोट्टागारीओ अट्ट दवकारीओ अट्ट उवत्थाणियाओ अट्ट नाडइज्जाओ अट्ट कोडुंविणीओ अट्ट महाणसिणीओ अट्ट भंडा-गारिणीओ अट्ट अ(व्वा)ज्जाधारिणीओ अट्ट पुप्फधारिणीओ अट्ट पाणिधारिणीओ अट्ट बलिकारीओ अट्ट सेज्जाकारीओ अट्ट अब्भितरियाओ पडिहारीओ अट्ट वाहि-रियाओ पडिहारीओ अट्ट मालाकारीओ अट्ट पेसणकारीओ अन्नं च सुवहुं हिरन्नं वा सुवन्नं वा कंसं वा दूसं वा विडलधणकणग जाव संतसारसावएज्जं अलाहि जाव आसत्तमाओ कुलवंसाओ पक्कमं दाउं पक्कमं भोत्तुं पक्कमं परिभाएउं । तए णं से महव्वले कुमारे एगमेगाए भज्जाए एगमेगं हिरन्नकोडि दलयइ एगमेगं सुवन्नकोडि दलयइ एगमेगं मडडं मडडप्पवरं दलयइ एवं तं चेव सव्वं जाव एगमेगं पेसणकारिं दलयइ अन्नं च सुवहुं हिरन्नं वा सुवण्णं वा जाव परिभाएउं, तए णं से महव्वले कुमारे उप्पि पासायवरगए जहा जमाली जाव विहरइ ॥ ४२९ ॥ तेणं कालेणं तेणं समएणं विमलस्स अरहओ पओप्पए धम्मघोसे नामं अणगारे जाइसंपत्ते

घनओ जहा केसिसामिस्स जाव पंचहिं अणगारसएहिं सद्धिं संपरिवुडे पुव्वाणुपुंवि चरमाणे गामाणुगामं दूज्जमाणे जेणेव हत्थिणापुरे नयरे जेणेव सहसंववणे उज्जाणे तेणेव उवागच्छइ २ ता अहापडिरुवं उग्गहं ओगिण्हइ २ ता संजमेणं तवसा अप्पाणं भावेमाणे विहरइ । तए णं हत्थिणापुरे नयरे सिंघाडगतिय जाव परिसा पज्जुवासइ । तए णं तस्स महब्बलस्स कुमारस्स तं महया जणसहं वा जणवूहं वा एवं जहा जमाली तहेव चिंता तहेव कंचुइज्जपुरिसं सदावेइ, कंचुइज्जपुरिसोवि तहेव अक्खाइ, नवरं धम्मघोसस्स अणगारस्स आगमणगहियविणिच्छए करयल जाव, निग्गच्छइ, एवं खलु देवाणुप्पिया ! विमलस्स अरहओ पउप्पए धम्मघोसे नामं अणगारे सेसं तं चेव जाव सोवि तहेव रहवरेणं निग्गच्छइ, धम्मकहा जहा केसिसामिस्स, सोवि तहेव अम्मापियरो आपुच्छइ, नवरं धम्मघोसस्स अणगारस्स अंतिए मुंडे भवित्ता अगाराओ अणगारियं पव्वइत्ताए तहेव वुत्तपडिवुत्तया नवरं इमाओ य ते जाया विडलरायकुलवालियाओ कला० सेसं तं चेव जाव ताहे अकामाईं चेव महब्बलकुमारं एवं वयासी-तं इच्छामो ते जाया ! एगदिवसमवि रज्जसिरिं पासित्तए, तए णं से महब्बले कुमारे अम्मापियराण वयणमणुयत्तमाणे तुसिणीए संचिट्ठइ । तए णं से वंले राया कोडुंवियपुरिसे सदावेइ एवं जहा सिव-भइस्स तहेव रायाभिसेओ भाणियव्वो जाव अभिसिंचइ २ ता करयलपरिग्गहियं महब्बलं कुमारं जएणं विजएणं वद्धावेति जएणं विजएणं वद्धावित्ता एवं वयासी-भण जाया ! किं देमो किं पयच्छामो सेसं जहा जमालिस्स तहेव जाव तए णं से महब्बले अणगारे धम्मघोसरस अणगारस्स अंतियं सामाइयमाइयाईं चोइस पुव्वाईं अहिज्जइ २ ता वहुहिं चउत्थ जाव विचित्तेहिं तवोक्कमेहिं अप्पाणं भावेमाणे बहुपडिपुत्ताईं दुवालस वासाईं सामन्नपरियागं पाउणइ २ ता मासियाए संलेहणाए सद्धिं भत्ताईं अणसणाए छेदेइ २ ता आलोइयपडिक्कंते समाहिपत्ते कालमासे कालं किच्चा उड्ढं चंदिमसूरिय जहा अम्मडो जाव वंभलोए कप्पे देवत्ताए उववन्ने, तत्थ णं अत्थे-गइयाणं देवाणं दस सागरोवमाईं ठिई पण्णत्ता, तत्थ णं महब्बलस्सवि देवस्स दस सागरोवमाईं ठिई पन्नत्ता, से णं तुमं सुदंसणा ! वंभलोए कप्पे दस सागरोवमाईं दिव्वाईं भोगभोगाईं भुंजमाणे विहरित्ता ताओ चेव देवलोगाओ आउक्खएणं ३ अणंतरं चयं चइत्ता इहेव वाणियगामे नयरे सेट्टिकुलंसि पुत्तत्ताए पच्चायाए ॥४३०॥ तए णं तुमे सुदंसणा ! उम्मुक्कवालभावेणं विन्नायपरिणयमेत्तेणं जोव्वणगमणुप्पत्तेणं तहारुवाणं थेराणं अंतियं केवलिपन्नत्ते धम्मे निसंते, सेऽविय धम्मे इच्छिए पडि-च्छिए अभिरुइए तं सुट्ठु ण तुमं सुदंसणा ! इदाणिं पकरेसि । से तेणट्ठेणं सुदंसणा !

एवं वुच्चइ-अत्थि णं एएसिं पलिओवमसागरोवमाणं खएइ वा अवचएइ वा, तए णं तस्स सुदंसणस्स सेट्ठिस्स समणस्स भगवओ महावीरस्स अंतियं एयमट्ठं सोच्चा निसम्म सुभेणं अज्झवसाणेणं सुभेणं परिणामेणं लेसाहिं विसुज्जमाणीहिं तथावरणि-
ज्जाणं कम्माणं खओवसमेणं ईहापोहम्मग्गणगवेसणं करेमाणस्स सन्नीपुव्वजाईसरणे समुप्पन्ने एयमट्ठं सम्मं अभिसमेइ, तए णं से सुदंसणे सेट्ठी समणेणं भगवया महावीरेणं संभारियपुव्वभवे दुंगुणाणीयसङ्खसंवेगे आणंदंसुपुन्ननयणे समणं भगवं महावीरं तिव्खुत्तो आ० २ वंदइ नमंसइ वं० २ ता एवं वयासी-एवमेयं भंते ! जाव से जहेयं तुव्वे वदहत्तिकइ उत्तरपुरच्छिमं दिसीभागं अवक्कमइ सेसं जहा उसभदत्तस्स जाव सव्वदुक्खप्पहीणे, नवरं चोदस पुव्वाइं अहिज्जइ, बहुपडिपुच्चाइं दुवालस वासाइं सामन्नपरियागं पाउणइ, सेसं तं चेव, । सेवं भंते ! सेवं भंते ! त्ति ॥४३१॥

महव्वलो समत्तो ॥ एगारसमे सए एगारसमो उद्देसो समत्तो ॥

तेणं कालेणं तेणं समएणं आलंभिया नामं नयरी होत्था वन्नओ, संखवणे उज्जाणे वन्नओ, तत्थ णं आलंभियाए नयरीए वहवे इसिभद्दपुत्तपामोक्खा समणोवासगा परिवसंति, अट्ठा जाव अपरिभूया अभिगयजीवाजीवा जाव विहरंति । तए णं तेसि समणोवासयाणं अन्नया कयाइ एगयओ सहियाणं समुवागयाणं संनि(समु)विट्ठाणं सन्निसन्नाणं अयमेयाहवे मिहो कहासमुल्लावे, समुप्पज्जित्था-देवलोगेसु णं अज्जो ! देवाणं केवइयं कालं ठिई पण्णत्ता ? तए णं से इसिभद्दपुत्ते समणोवासए देवट्ठिइगहियट्ठे ते समणोवासए एवं वयासी-देवलोगेसु णं अज्जो ! देवाणं जहण्णेणं दसवाससहस्साइं ठिई पण्णत्ता, तेण परं समयाहिया दुसमयाहिया जाव दससमयाहिया संखेज्जसम-
याहिया असंखेज्जसमयाहिया उक्कोसेणं तेत्तीसं सागरोवमाइं ठिई पन्नत्ता, तेण परं वोच्छिन्ना देवा य देवलोगा य । तए णं ते समणोवासगा इसिभद्दपुत्तस्स समणो-
वासगास्स एवमाइक्खमाणस्स जाव एवं पखवेमाणस्स एयमट्ठं नो सदहंति नो पत्ति-
यंति नो रोयंति एयमट्ठं असदहमाणा अपत्तियमाणा अरोएमाणा जामेव दिशिं पाउब्भूया तामेव दिशिं पडिगया ॥ ४३२ ॥ तेणं कालेणं तेणं समएणं समणे भगवं महावीरे जाव समोसडे जाव परिसा पज्जुवासइ । तए णं ते समणोवासगा इमीसे कहाए लद्धट्ठा समाणा हट्ठतुट्ठा एवं जहा तुंगिउद्देसए जाव पज्जुवासंति । तए णं समणे भगवं महावीरे तेसिं समणोवासगाणं तीसे य महइ० धम्मकहा जाव आणाए आराहए भवइ । तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठतुट्ठा उट्ठाए उट्ठेन्ति उ० २ ता समणं भगवं महावीरं वंदन्ति नमंसन्ति वं० २ ता एवं वयासी-एवं खलु भंते ! इसिभद्दपुत्ते समणोवासए

अम्हं एवं आइक्खइ जाव पहवेइ-देवलोगेणु णं अज्जो ! देवाणं जहन्नेणं दग्ग वारान-
हस्साइं ठिई पन्नत्ता तेण परं समयाहिया जाव तेण परं वोच्छिन्ना देवा य देवलोगा
य, से कहमेयं भंते ! एवं ? अज्जोत्ति समणे भगवं महावीरे ने नमगोवासए एवं
धयासी-जन्नं अज्जो ! इसिभद्दपुत्ते समणोवासए तुब्भं एवं आइक्खइ जाव पहवेइ-
देवलोगेसु णं अज्जो ! देवाणं जहन्नेणं दग्ग वाससहस्साइं ठिई पन्नत्ता तेण परं सम-
याहिया जावे तेण परं वोच्छिन्ना देवा य देवलोगा य, सत्ते णं एत्तमट्ठे, अहं पुण
अज्जो ! एवमाइक्खामि जाव पहवेमि-देवलोगेणु णं अज्जो ! देवाणं जहन्नेणं दग्ग
वाससहस्साइं तं चेव जाव तेण परं वोच्छिन्ना देवा य देवलोगा य, सत्ते णं एत्तमट्ठे ।
तए णं ते समणोवासगा समणस्स भगवओ महावीरस्स अतियं एयमट्ठं मोया
निसम्म समणं भगवं महावीरं वंदन्ति नमंसन्ति वं० २ ता जेणेव इत्तमट्ठपुत्ते समणो-
वासए तेणेव उवागच्छन्ति २ ता इसिभद्दपुत्तं समणोवासगं वंदन्ति नमंसन्ति वं० २ ता
एयमट्ठं सम्मं विणएणं भुज्जो २ खामेति । तए णं ते समणोवासगा पत्तिणाइं पुच्छन्ति
२ ता अट्ठाइं परियादियन्ति अ० २ ता समणं भगवं महावीरं वंदन्ति नमंसन्ति वं०
२ ता जामेव दिस्सि पाउब्भूया तामेव दिस्सि पडिगया ॥ ४३३ ॥ भंतेत्ति भगवं
गोयमे समणं भगवं महावीरं वंदइ णमंसइ वं० २ ता एवं वयासी-पभू णं भंते !
इसिभद्दपुत्ते समणोवासए देवाणुप्पियाणं अंतियं मुंडे भवित्ता अगाराओ अगगारियं
पव्वइत्तए ? गोयमा ! णो इणट्ठे समट्ठे, गोयमा ! इसिभद्दपुत्ते णं समणोवासए बहूहिं
सीलव्वयगुणवयवेरमणपच्चक्खाणपोसहोववासेहिं अहापरिग्गहिणहिं तवोक्कम्मेहिं
अप्पाणं भावेमाणे बहूइं वासाइं समणोवासगपरियागं पाउणिहिइ व० २ ता मात्ति-
याए संलेहणाए अत्ताणं झूसेहिइ मा० २ ता सट्ठि भत्ताइं अणसणाए छेदेहिइ २ ता
आलोइयपडिक्कंते समाहिपत्ते कालमासे कालं किच्चा सोहम्मे कप्पे अरुणाभे विमाणे
देवत्ताए उववज्जिहिइ, तत्थं णं अत्थेगइयाणं देवाणं चत्तारि पलिओवमाइं ठिई प०,
तत्थं णं इसिभद्दपुत्तस्सवि देवस्स चत्तारि पलिओवमाइं ठिई भविरसइ । से णं भंते !
इसिभद्दपुत्ते देवे ताओ देवलोगाओ आउक्खएणं भवक्खएणं ठिइक्खएणं जाव कहिं
उववज्जिहिइ ? गोयमा ! महाविदेहे वासे सिज्झिहिइ जाव अंतं काहिइ । सेवं भंते !
सेवं भंते ! त्ति भगवं गोयमे जाव अप्पाणं भावेमाणे विहरइ ॥ ४३४ ॥ तए णं समणे
भगवं महावीरे अन्नया कयाइ आलंभियाओ नयरीओ संखवणाओ उज्जाणाओ पडि-
निक्खमइ पडिनिक्खमित्ता बहिंया जणवयविहारं विहरइ । तेणं कालेणं तेणं समएणं
आलंभिया नामं नयरी होत्था वन्नओ, तत्थं णं संखवणे णामं उज्जाणे होत्था वन्नओ,
तस्सं णं संखवणस्स उज्जाणस्स अदूरसामंते पोग्गले नामं परिव्वायए परिवसइ रिउ-

च्वेयजजुव्वेय जाव नएसु सुपरिनिट्टिए छट्ठंछट्ठेणं अणिक्खित्तेणं तवोक्कमेणं उट्ठं
 ब्राह्मो जाव आयावेमाणे विहरइ । तए णं तस्स पोग्गलस्स छट्ठंछट्ठेणं जाव
 आयावेमाणस्स पगइभइयाए जहा सिवस्स जाव विभंगे नामं अन्नाणे समुप्पन्ने, से
 णं तेणं विभंगेणं अण्णाणेणं समुप्पन्नेणं वंभलोए कप्पे देवाणं ठिई जाणइ पासइ । तए
 णं तस्स पोग्गलस्स परिव्वायगस्स अंयमेयारुवे अब्भत्थिए जाव समुप्पज्जित्था-
 अत्थि णं ममं अइसेसे नाणदंसणे समुप्पन्ने, देवलोएसु णं देवाणं जहन्नेणं दसवास-
 सहस्साई ठिई प०, तेण परं समयाहिया दुसमयाहिया जाव असंखेज्जसमयाहिया
 उक्कोसेणं दससागरोवमाई ठिई प०, तेण परं वोच्छिन्ना देवा य देवलोगा य, एवं
 संपेहेइ २ ता आयावणभूमीओ पच्चोसहइ आ० २ ता तिदंडकुंडिया जाव
 धाउरत्ताओ यं गेणहइ २ ता जेणेव आलंभिया नयरी जेणेव परिव्वायगावसहे
 तेणेव उवागच्छइ २ ता भंडनिकखेवं करेइ भं० २ ता आलंभियाए नयरीए
 सिंघाडग जाव पहेसु अन्नमन्नस्स एवमाइक्खइ जाव पहरुवेइ-अत्थि णं देवाणुप्पिया !
 ममं अइसेसे नाणदंसणे समुप्पन्ने, देवलोएसु णं देवाणं जहन्नेणं दसवाससहस्साई
 तहेव जाव वोच्छिन्ना देवा य देवलोगा य । तए णं आलंभियाए नयरीए एएणं
 अभिलावेणं जहा सिवस्स तं चेव जाव्र से कहमेयं मन्ने एवं ? सामी समोसठे जाव
 परिसा पडिगया, भगवं गोयमे-तहेव भिक्खायरियाए तहेव बहुजणसहं निसामेइ
 तहेव बहुजणसहं निसामेत्ता तहेव सव्वं भाणियव्वं जाव अहं पुण गोयमा ! एवं
 आइक्खामि एवं भासामि जाव पहरुवेमि-देवलोएसु णं देवाणं जहन्नेणं दस वास-
 सहस्साई ठिई पणत्ता, तेण परं समयाहिया दुसमयाहिया जाव उक्कोसेणं तेत्तीसं
 सागरोवमाई ठिई पणत्ता, तेण परं वोच्छिन्ना देवा य देवलोगा य । अत्थि णं
 भंते ! सोहम्मे कप्पे दव्वाइं सवन्नाइंपि अवन्नाइंपि तहेव जाव हंता अत्थि, एवं
 ईसाणेवि, एवं जाव अच्चुए, एवं गेवेज्जविमाणेसु अणुत्तरविमाणेसुवि, ईसिपव्वभाराएवि
 जाव हंता अत्थि, तए णं सां महइमहालिया जाव पडिगया, तए णं आलंभियाए
 नयरीए सिंघाडगतिय० अवसेसं जहा सिवस्स जाव सव्वदुक्खप्पहीणे नवरं तिदंड-
 कुंडियं जाव धाउरत्तवत्थपरिहिए परिवडियविभंगे आलंभियं नयरं मज्झंमज्झेणं
 निगगच्छइ जाव उत्तरपुरच्छिमं दिसीभागं अवक्कमइ २ ता तिदंडं कुंडियं च जहा
 खंदओ जाव पव्वइओ सेसं जहा सिवस्स जाव अव्वावाहं सोक्खं अणुभवन्ति सासयं
 सिद्धा । सेवं भंते ! २ ति ॥ ४३५ ॥ एक्कारसमे सए वारहमो उद्देसो
 समत्तो, एक्कारसमं सयं समत्तं ॥

संखे १ जयंति २ पुढवी ३ पोग्गल ४ अइवाय ५ राहु ६ लोणे य ७ । नाणे
 य ८ देव ९ आया १० वारसमसए दसुहेसा ॥ १ ॥ तेणं कालेणं तेणं समएणं
 सावत्थी नामं नयरी होत्था वन्नओ, कोट्टए उजाणे वन्नओ, तत्थ णं सावन्थीए
 नयरीए वहवे संखप्पामोक्खा समणोवासगा परिवसंति, अट्ठा जाव अपरिभूया
 अभिगयजीवाजीवा जाव विहरंति, तस्स णं संखस्स समणोवासगस्स उप्पला नामं
 भारिया होत्था, सुकुमाल जाव सुरुवा समणोवासिया अभिगयजीवार्जीवा जाव विह-
 रइ, तत्थ णं सावत्थीए नयरीए पोक्खली नामं समणोवासए परिवसइ अट्ठे अभि-
 गय जाव विहरइ, तेणं कालेणं तेणं समएणं सानी समोसढे परिसा निग्गया जाव
 पज्जुवासइ, तए णं ते समणोवासगा इमीसे कहाए जहा आलंभियाए जाव पज्जु-
 वासन्ति, तए णं समणे भगवं महावीरे तेसिं समणोवासगाणं तीसे य महइ०
 धम्मकहा जाव परिसा पडिगया, तए णं ते समणोवासगा समणस्स भगवओ
 महावीरस्स अंतियं धम्मं सोच्चा निसम्म हट्ठुट्ठा समणं भगवं महावीरं वंदंति
 नमसंति वं० २ ता पसिणाइं पुच्छंति २ ता अट्ठाइं परियादियंति अ० २ ता उट्ठाए
 उट्ठेति उ० २ ता समणस्स भगवओ महावीरस्स अंतियाओ कोट्टयाओ उजाणाओ
 पडिनिक्खमन्ति २ ता जेणेव सावत्थी नयरी तेणेव पहारेत्य गमणाए ॥ ४३६ ॥
 तए णं से संखे समणोवासए ते समणोवासए एवं वयात्ती-तुब्भे णं देवाणुप्पिया !
 विउलं असणं पाणं खाइमं साइमं उवक्खंडावेह, तए णं अम्हे तं विपुलं असणं
 पाणं खाइमं साइमं आसाएमाणा विस्साएमाणा परिभुंजेमाणा परिभाएमाणा पक्खियं
 पोसहं पडिजागरमाणा विहरिस्सामो, तए णं ते समणोवासगा संखस्स समणोवा-
 सगस्स एयमट्ठं विणएणं पडिसुणंति, तए णं तस्स संखस्स समणोवासगस्स अयमे-
 याहवे अव्वभत्थिए जाव समुप्पज्जित्था-नो खलु मे तेयं तं विउलं असणं जाव
 साइमं आसाएमाणस्स ४ पक्खियं पोसहं पडिजागरमाणस्स विहरित्तए, सेयं खलु
 मे पोसहसालाए पोसहियस्स वंभयारिस्स उम्मुक्कमणिसुवन्नस्स ववगयमालावन्नग-
 विलेवणस्स निक्खित्तसत्थमुसलस्स एगस्स अविइयस्स दब्भसंथारोवगयस्स पक्खियं
 पोसहं पडिजागरमाणस्स विहरित्तएत्तिकट्ठु एवं संपेहेइ २ ता जेणेव सावत्थी नयरी
 जेणेव सए गिहे जेणेव उप्पला समणोवासिया तेणेव उवागच्छइ २ ता उप्पलं
 समणोवासियं आपुच्छइ २ ता जेणेव पोसहसाला तेणेव उवागच्छइ २ ता पोस-
 हसालं अणुपविसइ २ ता पोसहसालं पमज्जइ पो० २ ता उच्चारपासवणभूमिं पडि-
 लेहेइ उ० २ ता दब्भसंथारगं संथरइ दब्भ० २ ता दब्भसंथारगं दुरुहइ २ ता
 पोसहसालाए पोसहिए वंभयारी जाव पक्खियं पोसहं पडिजागरमाणे विहरइ, तए

णं ते समणोवासगा जेणेव सावत्थी नयरी जेणेव साइं २ गिहाइं तेणेव उवागच्छंति
 २ ता विपुलं असणं पाणं खाइमं साइमं उवक्खडावेति २ ता अन्नमन्ने सद्दावेति
 अ० २ ता एवं वयासी-एवं खलु देवाणुप्पिया ! अम्हेहिं से विउले असणपाणखा-
 इमसाइमे उवक्खडाविए, संखे य णं समणोवासए नो हव्वमागच्छइ, तं सेयं खलु
 देवाणुप्पिया ! अम्हं संखं समणोवासगं सद्दावेत्तए । तए णं से पोक्खली समणो-
 वासए ते समणोवासए एवं वयासी-अच्छह णं तुब्भे देवाणुप्पिया ! सुनिव्वुया
 वीसत्था अहन्नं संखं समणोवासगं सद्दावेमित्तिकइ तेसिं समणोवासगाणं अंतियाओ
 पडिनिक्खमइ २ ता सावत्थीए नयरीए मज्झमज्झेणं जेणेव संखस्स समणोवास-
 गस्स गिहे तेणेव उवागच्छइ २ ता संखस्स समणोवासगस्स गिहं अणुपविट्ठे । तए
 णं सा उप्पला समणोवासिया पोक्खलिं समणोवासगं एजमाणं पासइ २ ता
 हट्ठतुट्ठा आसणाओ अवमुट्ठेइ २ ता सत्तट्ठपयाइं अणुगच्छइ २ ता पोक्खलिं
 समणोवासगं वंदइ नमंसइ वं० २ ता आसणेणं उवनिमंतेइ आ० २ ता एवं वयासी-
 संदिसंतु णं देवाणुप्पिया ! किमागमणप्पओयणं ? तए णं से पोक्खली समणो-
 वासए उप्पलं समणोवासियं एवं वयासी-कहिन्नं देवाणुप्पिए ! संखे समणोवासए ?
 तए णं सा उप्पला समणोवासिया पोक्खलिं समणोवासयं एवं वयासी-एवं खलु
 देवाणुप्पिया ! संखे समणोवासए पोसहसालाए पोसहिए वंभयारी जाव विहरइ ।
 तए णं से पोक्खली समणोवासए जेणेव पोसहसाला जेणेव संखे समणोवासए
 तेणेव उवागच्छइ २ ता गमणागमणाए पडिक्कमइ ग० २ ता संखं समणोवासगं
 वंदइ नमंसइ वं० २ ता एवं वयासी-एवं खलु देवाणुप्पिया ! अम्हेहिं से विउले
 असण जाव साइमे उवक्खडाविए तं गच्छामो णं देवाणुप्पिया ! तं विउलं
 असणं जाव साइमं आसाएमाणा जाव पडिजागरमाणा विहरामो, तए णं से
 संखे समणोवासए पोक्खलिं समणोवासगं एवं वयासी-णो खलु कप्पइ मे देवाणु-
 प्पिया ! तं विउलं असणं पाणं खाइमं साइमं आसाएमाणस्स जाव पडिजागरमा-
 णस्स विहरित्तए, कप्पइ मे पोसहसालाए पोसहियस्स जाव विहरित्तए, तं छंदेणं
 देवाणुप्पिया ! तुब्भे तं विउलं असणं पाणं खाइमं साइमं आसाएमाणा जाव
 विहरह, तए णं से पोक्खली समणोवासए संखस्स समणोवासगस्स अंतियाओ
 पोसहसालाओ पडिनिक्खमइ २ ता सावत्थी नयरी मज्झमज्झेणं जेणेव ते समणो-
 वासगा तेणेव उवागच्छइ २ ता ते समणोवासए एवं वयासी-एवं खलु देवाणुप्पिया !
 संखे समणोवासए पोसहसालाए पोसहिए जाव विहरइ, तं छंदेणं देवाणुप्पिया ।
 तुब्भे विउलं असणपाणखाइमसाइमं जाव विहरह, संखे णं समणोवासए नो

हव्वमागच्छइ । तए णं ते समणोवासमा तं विउलं असणं ४ आसाएमाणा जाव विहरंति । तए णं तस्स संखस्स समणोवासगस्स पुव्वरत्तावरत्तकालसमयंसि धम्मजागरियं जागरमाणस्स अयमेयाह्वे जाव समुप्पज्जित्था-सेयं खलु मे कल जाव जलंते समणं भगवं महावीरं वंदित्ता नमंसित्ता जाव पज्जुवासित्ता तओ पडिनिवत्तस्स पक्खियं पोसहं पारित्तएत्तिकट्टु एवं संपेहेइ २ ता कलं जाव जलंते पोसहसालाओ पडिनिक्खमइ २ ता सुद्धप्पावेसाइं मंगल्लाइं वत्थाइं पवरपरिहिए संयाओ गिहाओ पडिनिक्खमइ संयाओ गिहाओ पडिनिक्खमित्ता पायविहारचारेणं सावत्थि नयरिं मज्झमज्झेणं जाव पज्जुवासइ, अभिगमो नत्थि । तए णं ते समणो- वासगा कलं पाउप्पभायाए जाव जलंते ण्हाया जाव सरीरा सएहिं सएहिं गेहेहिंतो पडिनिक्खमंति २ ता एगयओ मिलायंति २ ता-सेसं जहा पढमं जाव पज्जुवासंति । तए णं समणे भगवं महावीरे तेसि समणोवासगाणं तीसे य धम्मकहा जाव आणाए आराहए भवइ । तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठुट्ठा उट्ठाए उट्ठेति २ ता समणं भगवं महावीरं वंदंति नमंसंति वं० २ ता जेणेव संखे समणोवासए तेणेव उवागच्छन्ति २ ता संखं समणोवासगं एवं वयासी-तुमं देवाणुप्पिया ! हिज्जो अम्हे अप्पणा चेव एवं वयासी- तुम्हे णं देवाणुप्पिया ! विउलं असणं जाव विहरिस्सामो, तए णं तुमं पोसहसालाए जाव विहरिए तं सुट्ठु णं तुमं देवाणुप्पिया ! अम्हं हीलसि, अज्जोत्ति समणे भगवं महावीरे ते समणोवासए एवं वयासी-मा णं अज्जो ! तुब्भे संखं समणोवासगं हीलह निंदह खिसह गरहह अवमन्नह, संखे णं समणोवासए पियधम्मे चेव दढधम्मे चेव सुदक्खुजागरियं जागरिए ॥४३७॥ भंतेत्ति भगवं सोयमे समणं भगवं महावीरं वंदइ नमंसइ वं० २ ता एवं वयासी-कइविहो णं भंते ! जागरिया प० ? गोयमा ! तिविहा जागरिया प०, तंजहा-बुद्धजागरिया, अबुद्धजागरिया, सुदक्खुजागरिया, से केणट्ठेणं भंते ! एवं वुच्चइ तिविहा जागरिया प० तंजहा-बुद्धजागरिया १ अबुद्धजागरिया २ सुदक्खुजागरिया ३ ? गोयमा ! जे इमे अरिहंता भगवंतो उप्पन्नणाणदंसणधरा जहा खंदए जाव सव्वन्नू सव्वदरिसी एए णं बुद्धा बुद्धजागरियं जागरंति, जे इमे अणगारा भगवंतो इरियासमिया भासासमिया जाव गुत्तवंभयारी एए णं अबुद्धा अबुद्धजागरियं जागरंति, जे इमे समणोवासगा अभिगयजीवाजीवा जाव विहरन्ति एए णं सुदक्खु- जागरियं जागरंति, से तेणट्ठेणं गोयमा ! एवं वुच्चइ तिविहा जागरिया जाव सुदक्खु- जागरिया ॥४३८॥ तए णं से संखे समणोवासए समणं भगवं महावीरं वंदइ नमंसइ वं० २ ता एवं वयासी-कोहवसट्ठे णं भंते ! जीवे किं बंधइ किं पकरेइ किं चिणाइ

किं उवचिणाइ ? संखा ! कोहवसट्टे णं जीवे आउयवज्जाओ संत्तं कम्मपगडीओ सिढिलवंधणवद्धाओ एवं जहा पढमसए असंबुडस्स अणगरिस्स जाव अणुपरियट्टइ । माणवसट्टे णं भंते ! जीवे एवं चेव । एवं मायावसट्टेवि, एवं लोभवसट्टेवि जाव अणुपरियट्टइ । तए णं ते समणोवासगा समणस्स भगवओ महावीरस्स अंतिय एयमट्ठं सोच्चा निसम्म भीया तत्था तसिया संसारमउव्विग्गा समणं भगवं महावीरं वंदंति नमंसंति वं० २ ता जेणेव संखे समणोवासए तेणेव उवागच्छंति २ ता संखं समणोवासगं वंदंति नमंसंति वं० २ ता एयमट्ठं सम्मं विणएणं भुज्जो २ खामेति । तए णं ते समणोवासगा सेसं जहा आलंभियाए जाव पडिगया, भंते ! त्ति भगवं गोयमे समणं भगवं महावीरं वंदइ नमंसइ वं० २ ता एवं वयासी-पभू णं भंते ! संखे समणोवासए देवाणुप्पियाणं अनियं सेसं जहा इसिभदुपुत्तस्स जाव अंतं काहिइ । सेव भंते ! सेव भंते ! त्ति जाव विहरइ ॥ ४३९ ॥ वारहमे सए पढमो उद्देसो समत्तो ॥

तेणं कालेणं तेणं समएणं कोसंबी नामं नयरी होत्था वन्नओ, चंदो(त्तराय)वतरणे उज्जाणे वन्नओ, तत्थ णं कोसंबीए नयरीए सहस्साणीयस्स रत्तो पोत्ते सयाणीयस्स रत्तो पुत्ते चेडगस्स रत्तो नत्तुए मिगावईए देवीए अत्तए जयंतीए समणोवासियाए भत्तिजए उदायणे नामं राया होत्था वन्नओ, तत्थ णं कोसंबीए नयरीए सहस्साणीयस्स रत्तो पुण्हा सयाणीयस्स रत्तो भज्जा चेडगस्स रत्तो धूया उदायणस्स रत्तो माया जयंतीए समणोवासियाए भाउज्जा मियावई नामं देवी होत्था वन्नओ सुकुमाल जाव सुहवा समणोवासिया जाव विहरइ, तत्थ णं कोसंबीए नयरीए सहस्साणीयस्स रत्तो धूया सयाणीयस्स रत्तो भगिणी उदायणस्स रत्तो पिउच्छा मिगावईए देवीए नणंदा वेसालीसावयाणं अरहंताणं पुव्वसिज्जायरी जयंती नामं समणोवासिया होत्था सुकुमाल जाव सुहवा अभिगय जाव विहरइ ॥ ४४० ॥ तेणं कालेणं तेणं समएणं सामी समोसढे जाव परिसा पज्जुवासइ । तए णं से उदायणे राया इमीसे कहाए लद्धट्ठे समाणे हट्ठुट्ठे कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! कोसंविं नयरिं सव्विभतरवाहिरियं एवं जहा कूणिओ तहेव सव्वं जाव पज्जुवासइ । तए णं सा जयंती समणोवासिया इमीसे कहाए लद्धट्ठा समाणी हट्ठुट्ठा जेणेव मिगावई देवी तेणेव उवागच्छइ २ ता मियावई देवि एवं वयासी-एवं जहा नवमसए उसभदत्तो जाव भविस्सइ । तए णं सा मियावई देवी जयंतीए समणोवासियाए जहा देवाणंदा जाव पडिउणेइ । तए णं सा मियावई देवी कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! लहुकरणजुत्तजोइय जाव धम्मियं जाणप्पवरं जुत्तामेव उवट्ठवेह जाव उवट्ठवेंति जाव पच्चप्पिणंति । तए णं सा मियावई देवी

जयंतीए समणोवासियाए सद्धि ण्हाया जाव सरीरा वहूहिं खुज्जाहिं जाव अंतेउराओ
 निग्गच्छइ २ ता जेणेव वाहिरिया उवट्ठाणसाला जेणेव धम्मिए जाणप्पवरे तेणेव
 उवागच्छइ २ ता जाव दुरुढा । तए णं सा मियावई देवी जयंतीए समणोवासियाए सद्धि
 धम्मियं जाणप्पवरं दुरुढा समाणी नियगपरियालगा जहा उसभदत्तो जाव धम्मि-
 याओ जाणप्पवराओ पच्चोरुहइ । तए णं सा मियावई देवी जयंतीए समणोवासियाए
 सद्धि वहूहिं खुज्जाहिं जहा देवाणंदा जाव वंदइ नमंसइ उदायणं रायं पुरओ कट्ठ
 ठिइया चेव जाव पज्जुवासइ । तए णं समणे भगवं महावीरे उदायणस्स रत्तो मिया-
 वईए देवीए जयंतीए समणोवासियाए तीसे य महइ ० जाव धम्मं परिकहेइ जाव परिसा
 पडिगया उदायणे पडिगए मियावई-देवीवि पडिगया ॥ ४४१ ॥ तए णं सा जयंती
 समणोवासिया समणस्स भगवओ महावीरस्स अंतियं धम्मं सोच्चा निसम्म हट्ठुट्ठा
 समणं भगवं महावीरं वंदइ नमंसइ वं ० २ ता एवं वयासी-कहन्नं भंते ! जीवा गरुयत्तं
 हव्वमागच्छन्ति ? जयंती ! पाणाइवाएणं जाव मिच्छादंसणसत्तेणं, एवं खलु जीवा
 गरुयत्तं हव्वमागच्छन्ति एवं जहा पढमसए जाव वीईवयंति । भवसिद्धियत्तणं भंते !
 जीवाणं किं सभावओ परिणामओ ? जयंती ! सभावओ नो परिणामओ । सव्वेवि णं
 भंते ! भवसिद्धिया जीवा सिज्झिस्संति ? हंता जयंती ! सव्वेवि णं भवसिद्धिया जीवा
 सिज्झिस्संति । जइ णं भंते ! सव्वेवि भवसिद्धिया जीवा सिज्झिस्संति तम्हा णं
 भवसिद्धियविरहिए लोए भविस्सइ ? णो इणट्ठे समट्ठे, से केणं खाइएणं अट्ठेणं भंते !
 एवं वुच्चइ सव्वेवि णं भवसिद्धिया जीवा सिज्झिस्संति नो चेव णं भवसिद्धियवि-
 रहिए लोए भविस्सइ ? जयंती ! से जहानामए सव्वागाससेढी सिया अणाइया
 अणवदग्गा परित्ता, परिवुडा सा णं परमाणुपोग्गलमेत्तेहि खंडेहिं समए २ अवहीर-
 माणी २ अणंताहिं, उस्सप्पिणीओसप्पिणीहि अवहीरइ नो चेव णं अवहिया
 सिया, से तेणट्ठेणं जयंती ! एवं वुच्चइ सव्वेवि णं भवसिद्धिया जीवा सिज्झिस्संति
 नो चेव णं भवसिद्धियविरहिए लोए भविस्सइ ॥ सुत्तत्तं भंते ! साहू जागरियत्तं
 साहू ? जयंती ! अत्थेगइयाणं जीवाणं सुत्तत्तं साहू अत्थेगइयाणं जीवाणं जागरियत्तं
 साहू, से केणट्ठेणं भंते ! एवं वुच्चइ अत्थेगइयाणं जाव साहू ? जयंती ! जे इमे
 जीवा अहम्मिया अहम्माणया अहम्मिद्धा अहम्मक्खाई अहम्मपलोई अहम्मपल-
 जमाणा अहम्मसमुदायारा अहम्मेणं चेव वित्ति कप्पेमाणा विहरंति एएसि-णं
 जीवाणं सुत्तत्तं साहू, एए णं जीवा सुत्ता समाणा नो बहूणं पाणभूयजीवसत्ताणं
 दुक्खणयाए सोयणयाए जाव परियावणयाए वट्ठंति, एए णं जीवा सुत्ता समाणा
 अप्पाणं वा परं वा तदुभयं वा नो वहूहिं अहम्मियाहि संजोयणाहि संजोएत्तारो

भवन्ति, एएसि जीवाणं सुत्तत्तं साहू, जयन्ती ! जे इमे जीवा धम्मिया धम्माणया जाव धम्मेणं चेव वित्ति कप्पेमाणा विहरन्ति एएसि णं जीवाणं जागरियत्तं साहू, एए णं जीवा जागरा समाणा वहूणं पाणाणं जाव सत्ताणं अदुक्खणयाए जाव अपरियावणयाए वट्ठन्ति, ते णं जीवा जागरमाणा अप्पाणं वा परं वा तदुभयं वा वहूहिं धम्मियाहिं संजोयणाहिं संजोएत्तारो भवन्ति, एए णं जीवा जागरमाणा धम्मजागरियाए अप्पाणं जागरइत्तारो भवन्ति, एएसि णं जीवाणं जागरियत्तं साहू, से तेणट्ठेणं जयन्ती ! एवं वुच्चइ अत्थेगइयाणं जीवाणं सुत्तत्तं साहू अत्थेगइयाणं जीवाणं जागरियत्तं साहू ॥ वलियत्तं भंते ! साहू दुव्वलियत्तं साहू ? जयन्ती ! अत्थेगइयाणं जीवाणं वलियत्तं साहू अत्थेगइयाणं जीवाणं दुव्वलियत्तं साहू, से केणट्ठेणं भंते ! एवं वुच्चइ जाव साहू ? जयन्ती ! जे इमे जीवा अहम्मिया जाव विहरन्ति एएसि णं जीवाणं दुव्वलियत्तं साहू, एए णं जीवा एवं जहा सुत्तस्स तहा दुव्वलियस्स वत्तव्वया भाणियव्वा, वलियस्स जहा जागरस्स तहा भाणियव्वं जाव संजोएत्तारो भवन्ति, एएसि णं जीवाणं वलियत्तं साहू, से तेणट्ठेणं जयन्ती ! एवं वुच्चइ तं चेव जाव साहू ॥ दक्खत्तं भंते ! साहू आलसियत्तं साहू ? जयन्ती ! अत्थेगइयाणं जीवाणं दक्खत्तं साहू अत्थेगइयाणं जीवाणं आलसियत्तं साहू, से केणट्ठेणं भंते ! एवं वुच्चइ तं चेव जाव साहू ? जयन्ती ! जे इमे जीवा अहम्मिया जाव विहरन्ति एएसि णं जीवाणं आलसियत्तं साहू, एए णं जीवा आलसा समाणा नो वहूणं जहा सुत्ता तहा आलसा भाणियव्वा, जहा जागरा तहा दक्खा भाणियव्वा जाव संजोएत्तारो भवन्ति, एए णं जीवा दक्खा समाणा वहूहिं आयरियवेयावच्चेहिं उवज्जाय० थेर० तवस्सि० गिलाणवेयावच्चेहिं सेहवेयावच्चेहिं कुलवेयावच्चेहिं गणवेयावच्चेहिं संघवेयावच्चेहिं साहम्मियवेयावच्चेहिं अत्ताणं संजोएत्तारो भवन्ति, एएसि णं जीवाणं दक्खत्तं साहू, से तेणट्ठेणं तं चेव जाव साहू ॥ सोइंदियवसट्ठे णं भंते ! जीवे किं वंघइ ? एवं जहा कोहवसट्ठे तहेव जाव अणुपरियट्ठइ । एवं चक्खिंदियवसट्ठेवि, एवं जाव फासिंदियवसट्ठेवि जाव अणुपरियट्ठइ । तए णं सा जयन्ती समणोवासिया समणस्स भगवओ महावीरस्स अंतियं एयमट्ठं सोच्चा निसम्म हट्ठुट्ठा सेसं जहा देवागंदाए तहेव पव्वइया जाव सव्वदुक्खप्पहीणा । सेवं भंते ! २ त्ति ॥ ४४२ ॥

वारहमे सए वीओ उहेसो समत्तो ॥

रायगिहे जाव एवं वयासी-कइ णं भंते ! पुढवीओ पन्नत्ताओ ? गोयमा ! सत्त पुढवीओ पण्णत्ताओ, तंजहा-पडमा दोच्चा जाव सत्तमा । पडमा णं भंते ! पुढवी किनामा किगोत्ता पण्णत्ता ? गोयमा ! धम्मा नामेणं रयणप्पभा गोत्तेणं, एवं जहा

जीवाभिगमे पढमो नेरइयउद्देसओ सो चेव निरवसेसो भाणियव्वो जाव अप्पावहु-
गंति । सेवं भंते ! सेवं भंते ! त्ति ॥४४३॥ वारहमे सए तइओ उद्देसो समत्तो ॥

रायगिहे जाव एवं वयासी-दो भंते ! परमाणुपोगगला एगयओ साहन्ति एग-
यओ साहणित्ता किं भवइ ? गोयमा ! दुप्पएसिए खंधे भवइ, से भिज्जमाणे दुहा
कज्जइ एगयओ परमाणुपोगगले एगयओ परमाणुपोगगले भवइ । तिन्नि भंते ! परमा-
णुपोगगला एगयओ साहन्ति २ ता किं भवइ ? गोयमा ! तिपएसिए खंधे भवइ, से
भिज्जमाणे दुहावि तिहावि कज्जइ, दुहा कज्जमाणे एगयओ परमाणुपोगगले एगयओ
दुपएसिए खंधे भवइ, तिहा कज्जमाणे तिण्णि परमाणुपोगगला भवन्ति । चत्तारि भंते !
परमाणुपोगगला एगयओ साहन्ति० पुच्छा, गोयमा ! चउपएसिए खंधे भवइ,
से भिज्जमाणे दुहावि तिहावि चउहावि कज्जइ, दुहा कज्जमाणे एगयओ परमाणु-
पोगगले एगयओ तिपएसिए खंधे भवइ, अहवा दो दुपएसिया खंधा भवन्ति, तिहा
कज्जमाणे एगयओ दो परमाणुपोगगला एगयओ दुप्पएसिए खंधे भवइ, चउहा कज्ज-
माणे चत्तारि परमाणुपोगगला भवन्ति । पंच भंते ! परमाणुपोगगला० पुच्छा, गोयमा !
पंचपएसिए खंधे भवइ, से भिज्जमाणे दुहावि तिहावि चउहावि पंचहावि कज्जइ,
दुहा कज्जमाणे एगयओ परमाणुपोगगले एगयओ चउपएसिए खंधे भवइ अहवा
एगयओ दुपएसिए खंधे भवइ एगयओ तिपएसिए खंधे भवइ, तिहा कज्जमाणे
एगयओ दो परमाणुपोगगला एगयओ तिप्पएसिए खंधे भवइ अहवा एगयओ परमा-
णुपोगगले एगयओ दो दुपएसिया खंधा भवन्ति, चउहा कज्जमाणे एगयओ तिन्नि
परमाणुपोगगला एगयओ दुप्पएसिए खंधे भवइ, पंचहा कज्जमाणे पंच परमाणुपो-
गगला भवन्ति । छब्भंते ! परमाणुपोगगला० पुच्छा, गोयमा ! छप्पएसिए खंधे भवइ,
से भिज्जमाणे दुहावि तिहावि जाव छव्विहावि कज्जइ, दुहा कज्जमाणे एगयओ पर-
माणुपोगगले एगयओ पंचपएसिए खंधे भवइ अहवा एगयओ दुप्पएसिए खंधे एग-
यओ चउपएसिए खंधे भवइ अहवा दो तिपएसिया खंधा भवन्ति, तिहा कज्जमाणे
एगयओ दो परमाणुपोगगला एगयओ चउपएसिए खंधे भवइ अहवा एगयओ पर-
माणुपोगगले एगयओ दुपएसिए खंधे एगयओ तिपएसिए खंधे भवइ अहवा तिन्नि
दुपएसिया खंधा भवन्ति, चउहा कज्जमाणे एगयओ तिन्नि परमाणुपोगगला एगयओ
तिपएसिए खंधे भवइ अहवा एगयओ दो परमाणुपोगगला भवन्ति एगयओ दो दुप्प-
एसिया खंधा भवन्ति, पंचहा कज्जमाणे एगयओ चत्तारि परमाणुपोगगला एगयओ
दुपएसिए खंधे भवइ, छहा कज्जमाणे छ परमाणुपोगगला भवन्ति । सत्त भंते ! पर-
माणुपोगगला० पुच्छा, गोयमा ! सत्तपएसिए खंधे भवइ, से भिज्जमाणे दुहावि जाव

सत्तहावि कज्जइ, दुहा कज्जमाणे एगयओ परमाणुपोग्गले एगयओ छापएसिए खंधे भवइ अहवा एगयओ दुप्पएसिए खंधे भवइ एगयओ पंचपएसिए खंधे भवइ अहवा एगयओ तिप्पएसिए खंधे एगयओ चउपएसिए खंधे भवइ, तिहा कज्जमाणे एगयओ दो परमाणुपोग्गला एगयओ पंचपएसिए खंधे भवइ अहवा एगयओ परमाणुपोग्गले एगयओ दुपएसिए खंधे एगयओ चउपएसिए खंधे भवइ अहवा एगयओ परमाणुपोग्गले एगयओ दो तिपएसिया खंधा भवन्ति अहवा एगयओ दो दुपएसिया खंधा भवन्ति एगयओ तिपएसिए खंधे भवइ, चउहा कज्जमाणे एगयओ तिन्नि परमाणुपोग्गला एगयओ चउप्पएसिए खंधे भवइ अहवा एगयओ दो परमाणुपोग्गला एगयओ दुपएसिए खंधे एगयओ तिपएसिए खंधे भवइ अहवा एगयओ परमाणुपोग्गले एगयओ तिन्नि दुपएसिया खंधा भवन्ति, पंचहा कज्जमाणे एगयओ चत्तारि परमाणुपोग्गला एगयओ तिपएसिए खंधे भवइ अहवा एगयओ तिन्नि परमाणुपोग्गला एगयओ दो दुपएसिया खंधा भवन्ति, छहा कज्जमाणे एगयओ पंच परमाणुपोग्गला एगयओ दुपएसिए खंधे भवइ, सत्तहा कज्जमाणे सत्त परमाणुपोग्गला भवन्ति । अट्ठ भन्ते ! परमाणुपोग्गला० पुच्छा, गोयमा ! अट्ठपएसिए खंधे भवइ जाव दुहा कज्जमाणे एगयओ परमाणुपोग्गले एगयओ सत्तपएसिए खंधे भवइ अहवा एगयओ दुपएसिए खंधे एगयओ छप्पएसिए खंधे भवइ अहवा एगयओ तिपएसिए खंधे एगयओ पंचपएसिए खंधे भवइ अहवा दो चउप्पएसिया खंधा भवन्ति, तिहा कज्जमाणे एगयओ दो परमाणुपोग्गला एगयओ छप्पएसिए खंधे भवइ अहवा एगयओ परमाणुपोग्गले एगयओ दुप्पएसिए खंधे एगयओ पंचपएसिए खंधे भवइ अहवा एगयओ परमाणुपोग्गले एगयओ तिपएसिए खंधे एगयओ चउपएसिए खंधे भवइ अहवा एगयओ दो दुपएसिया खंधा एगयओ चउप्पएसिए खंधे भवइ अहवा एगयओ दुपएसिए खंधे एगयओ दो तिपएसिया खंधा भवन्ति, चउहा कज्जमाणे एगयओ तिन्नि परमाणुपोग्गला एगयओ पंचपएसिए खंधे भवइ अहवा एगयओ दोन्नि परमाणुपोग्गला एगयओ दुपएसिए खंधे एगयओ चउप्पएसिए खंधे भवइ अहवा एगयओ दो परमाणुपोग्गला एगयओ दो तिपएसिया खंधा भवन्ति अहवा एगयओ परमाणुपोग्गले एगयओ दो दुपएसिया खंधा० एगयओ तिपएसिए खंधे भवइ अहवा चत्तारि एगयओ दो दुपएसिया खंधा भवन्ति, पंचहा कज्जमाणे एगयओ चत्तारि परमाणुपोग्गला एगयओ चउप्पएसिए खंधे भवइ अहवा एगयओ तिन्नि परमाणुपोग्गला एगयओ दुपएसिए खंधे एगयओ तिपएसिए खंधे भवइ अहवा एगयओ दो परमाणुपोग्गला एगयओ तिन्नि दुपएसिया खंधा भवन्ति, छहा कज्जमाणे एगयओ पंच परमाणुपोग्गला एगयओ तिपएस-

सिए खंधे भवइ अहवा एगयओ चत्तारि परमाणुपोग्गला एगयओ दो दुपएसिया खंधा भवन्ति, सत्तहा कज्जमाणे एगयओ छ परमाणुपोग्गला एगयओ दुपएसिए खंधे भवइ अट्ठहा कज्जमाणे अट्ठ परमाणुपोग्गला भवन्ति ॥ नव भंते ! परमाणुपोग्गला० पुच्छा, गोयमा ! जाव नवविहा कज्जति, दुहा कज्जमाणे एगयओ परमाणुपोग्गले एगयओ अट्ठ-पएसिए खंधे भवइ, एवं एक्केकं संचा(रिए)रेंतेहिं जाव अहवा एगयओ चउप्पएसिए खंधे एगयओ पंचपएसिए खंधे भवइ, तिहा कज्जमाणे एगयओ दो परमाणुपोग्गला एगयओ सत्तपएसिए खंधे भवइ अहवा एगयओ परमाणुपोग्गले एगयओ दुपएसिए खंधे एगयओ छप्पएसिए खंधे भवइ अहवा एगयओ परमाणुपोग्गले एगयओ तिपएसिए खंधे एगयओ पंचपएसिए खंधे भवइ अहवा एगयओ परमाणुपोग्गले एगयओ दो चउप्पएसिया खंधा भवन्ति अहवा एगयओ दुपएसिए खंधे एगयओ तिपएसिए खंधे एगयओ चउपएसिए खंधे भवइ अहवा तिन्नि तिपएसिया खंधा भवन्ति, चउहा कज्ज-माणे एगयओ तिन्नि परमाणुपोग्गला एगयओ छप्पएसिए खंधे भवइ अहवा एगयओ दो परमाणुपोग्गला एगयओ दुपएसिए खंधे एगयओ पंचपएसिए खंधे भवइ अहवा एगयओ दो परमाणुपोग्गला एगयओ तिपएसिए खंधे एगयओ चउप्पएसिए खंधे भवइ अहवा एगयओ परमाणुपोग्गले एगयओ दो दुपएसिया खंधा एगयओ चउप्पएसिए खंधे भवइ अहवा एगयओ परमाणुपोग्गले एगयओ दुपएसिए खंधे एगयओ दो तिप-सिया खंधा भवन्ति अहवा एगयओ तिन्नि दुप्पएसिया खंधा एगयओ तिपएसिए खंधे भवइ, पंचहा कज्जमाणे एगयओ चत्तारि परमाणुपोग्गला एगयओ पंचपएसिए खंधे भवइ अहवा एगयओ तिन्नि परमाणुपोग्गला एगयओ दुपएसिए खंधे एगयओ चउप्प-एसिए खंधे भवइ अहवा एगयओ तिन्नि परमाणुपोग्गला एगयओ दो तिपएसिया खंधा भवन्ति अहवा एगयओ दो परमाणुपोग्गला एगयओ दो दुपएसिया खंधा एगयओ तिपएसिए खंधे भवइ अहवा एगयओ परमाणुपोग्गले एगयओ चत्तारि दुपएसिया खंधा भवन्ति, छहा कज्जमाणे एगयओ पंच परमाणुपोग्गला एगयओ चउप्पएसिए खंधे भवइ अहवा एगयओ चत्तारि परमाणुपोग्गला एगयओ दुप्पएसिए खंधे एगयओ तिपएसिए खंधे भवइ अहवा एगयओ तिन्नि परमाणुपोग्गला एगयओ तिन्नि दुप्प-सिया खंधा भवन्ति, सत्तहा कज्जमाणे एगयओ छ परमाणुपोग्गला एगयओ तिप्प-एसिए खंधे भवइ अहवा एगयओ पंच परमाणुपोग्गला एगयओ दो दुपएसिया खंधा भवन्ति, अट्ठहा कज्जमाणे एगयओ सत्त परमाणुपोग्गला एगयओ दुपएसिए खंधे भवइ, नवहा कज्जमाणे नव परमाणुपोग्गला भवन्ति ॥ दस भंते ! परमाणु-पोग्गला० पुच्छा, गोयमा ! जाव दुहा कज्जमाणे एगयओ परमाणुपोग्गले एगयओ

नवपएसिए खंधे भवइ अहवा एगयओ दुपएसिए खंधे एगयओ अट्टपएसिए खंधे भवइ एवं एक्केकं संचारेयव्वंति जाव अहवा दो पंचपएसिया खंधा भवन्ति, तिहा कज्जमाणे एगयओ दो परमाणुपोग्गला एगयओ अट्टपएसिए खंधे भवइ अहवा एगयओ परमाणुपोग्गले एगयओ दुपएसिए खंधे, एगयओ सत्तपएसिए खंधे भवइ अहवा एगयओ परमाणुपोग्गले एगयओ तिपएसिए खंधे भवइ एगयओ छप्पएसिए खंधे भवइ अहवा एगयओ परमाणुपोग्गले एगयओ चउप्पएसिए० एगयओ पंचपएसिए खंधे भवइ अहवा एगयओ दुपएसिए खंधे एगयओ तिपएसिए खंधे एगयओ पंचपएसिए खंधे भवइ अहवा एगयओ दुपएसिए खंधे एगयओ दो चउप्पएसिया खंधा भवन्ति अहवा एगयओ दो तिपएसिया खंधा० एगयओ चउप्पएसिए खंधे भवइ, चउहा कज्जमाणे एगयओ तिन्नि परमाणुपोग्गला एगयओ सत्तपएसिए खंधे भवइ अहवा एगयओ दो परमाणुपोग्गला एगयओ दुपएसिए० एगयओ छप्पएसिए खंधे भवइ अहवा एगयओ दो परमाणुपोग्गला एगयओ तिप्पएसिए खंधे एगयओ पंचपएसिए खंधे भवइ अहवा एगयओ दो परमाणुपोग्गला एगयओ दो चउप्पएसिया खंधा भवन्ति अहवा एगयओ परमाणुपोग्गले एगयओ दुपएसिए० एगयओ तिपएसिए० एगयओ चउप्पएसिए खंधे भवइ अहवा एगयओ परमाणुपोग्गले एगयओ तिन्नि तिपएसिया खंधा भवन्ति अहवा एगयओ तिन्नि दुपएसिया खंधा० एगयओ चउपएसिए खंधे भवइ अहवा एगयओ दो दुपएसिया खंधा एगयओ दो तिपएसिया खंधा भवन्ति, पंचहा कज्जमाणे एगयओ चत्तारि परमाणुपोग्गला एगयओ छपएसिए खंधे भवइ अहवा एगयओ तिन्नि परमाणुपोग्गला एगयओ दुपएसिए खंधे एगयओ पंचपएसिए खंधे भवइ अहवा एगयओ तिन्नि परमाणुपोग्गला एगयओ तिपएसिए खंधे एगयओ चउपएसिए खंधे भवइ अहवा एगयओ दो परमाणु० एग० दो दुपएसिया खंधा एग० चउप्पएसिए खंधे भवइ अहवा एगयओ दो परमाणुपोग्गला एगयओ दुपएसिए खंधे० एगयओ दो तिपएसिया खंधा भवन्ति अहवा एगयओ परमाणुपोग्गले एगयओ तिन्नि दुपएसिया० एगयओ तिपएसिए खंधे भवइ अहवा पंच दुपएसिया खंधा भवन्ति, छहा कज्जमाणे एगयओ पंच परमाणुपोग्गला एगयओ पंचपएसिए खंधे भवइ अहवा एगयओ चत्तारि परमाणुपोग्गला एगयओ दुपएसिए० एगयओ चउपएसिए खंधे भवइ अहवा एगयओ चत्तारि परमाणुपोग्गला एगयओ दो तिपएसिया खंधा भवन्ति अहवा एगयओ तिन्नि परमाणुपोग्गला एगयओ दो दुपएसिया खंधा० एगयओ तिपएसिए खंधे भवइ अहवा एगयओ दो परमाणुपोग्गला एगयओ चत्तारि दुपएसिया खंधा भवन्ति, सत्तहा कज्जमाणे एगयओ छ परमाणुपोग्गला एगयओ चउप्पएसिए खंधे भवइ अहवा एगयओ पंच परमाणुपोग्गला एगयओ दुपएसिए०

एगयओ तिपएसिए खंधे भवइ अहवा एगयओ चत्तारि परमाणुपोगगला एगयओ तिन्नि दुपएसिया खंधा भवन्ति, अट्टहा कज्जमाणे एगयओ सत्त परमाणुपोगगला एगयओ तिपएसिए खंधे भवइ अहवा एगयओ छ परमाणुपोगगला एगयओ दो दुप-एसिया खंधा भवन्ति, नवहा कज्जमाणे एगयओ अट्ट परमाणुपोगगला एगयओ दुप-एसिए खंधे भवइ दसहा कज्जमाणे दस परमाणुपोगगला भवन्ति । संखेज्जा णं भन्ते । परमाणुपोगगला एगयओ साहज्जन्ति एगयओ साहणित्ता किं भवइ ? गोयमा ! संखेज्जपएसिए खंधे भवइ से भिज्जमाणे दुहावि जाव दसहावि संखेज्जहावि कज्जइ, दुहा कज्जमाणे एगयओ परमाणुपोगगले एगयओ संखेज्जपएसिए खंधे भवइ अहवा एगयओ दुपएसिए खंधे एगयओ संखेज्जपएसिए खंधे भवइ अहवा एगयओ तिप-एसिए खंधे एगयओ संखेज्जपएसिए खंधे भवइ एवं जाव अहवा एगयओ दसप-एसिए खंधे एगयओ संखेज्जपएसिए खंधे भवइ अहवा दो संखेज्जपएसिया खंधा भवन्ति, तिहा कज्जमाणे एगयओ दो परमाणुपोगगला एगयओ संखेज्जपएसिए खंधे भवइ अहवा एगयओ परमाणुपोगगले एगयओ दुपएसिए खंधे एगयओ संखेज्जपएसिए खंधे भवइ अहवा एगयओ परमाणुपोगगले एगयओ तिपएसिए खंधे एगयओ संखेज्जपएसिए खंधे भवइ एवं जाव अहवा एगयओ परमाणुपोगगले एगयओ दसपएसिए खंधे एगयओ संखेज्जपएसिए खंधे भवइ अहवा एगयओ परमाणुपोगगले एगयओ दो संखेज्जपएसिया खंधा भवन्ति अहवा एगयओ दुपएसिए खंधे एगयओ दो संखेज्जपएसिया खंधा भवन्ति, एवं जाव अहवा एगयओ दसपएसिए खंधे एगयओ दो संखेज्जपएसिया खंधा भवन्ति अहवा तिन्नि संखेज्जपएसिया खंधा भवन्ति, चउहा कज्जमाणे एगयओ तिन्नि परमाणुपोगगला एगयओ संखेज्जपएसिए खंधे भवइ अहवा एगयओ दो परमाणुपोगगला एगयओ दुपएसिए खंधे एगयओ संखेज्जपएसिए खंधे भवइ अहवा एगयओ दो परमाणुपोगगला एगयओ तिप्पएसिए० एगयओ संखेज्ज-पएसिए खंधे भवइ एवं जाव अहवा एगयओ दो परमाणुपोगगला एगयओ दसपएसिए० एगयओ संखेज्जपएसिए खंधे भवइ अहवा एगयओ दो परमाणुपोगगला एगयओ दो संखेज्जपएसिया खंधा भवन्ति अहवा एगयओ परमाणुपोगगले एगयओ दुपएसिए खंधे एगयओ दो संखेज्जपएसिया खंधा भवन्ति एवं जाव अहवा एगयओ परमाणुपोगगले एगयओ दसपएसिए खंधे एगयओ दो संखेज्जपएसिया खंधा भवन्ति अहवा एगयओ परमाणुपोगगले एगयओ तिन्नि संखेज्जपएसिया खंधा भवन्ति अहवा एगयओ दुपएसिए खंधे एगयओ तिन्नि संखेज्जपएसिया खंधा भवन्ति एवं जाव अहवा एगयओ दसपएसिए खंधे एगयओ तिन्नि संखेज्जपएसिया खंधा भवन्ति अहवा

चत्तारि संखेज्जपएसिया खंधा भवन्ति, एवं एएणं कमेणं पंचगसंजोगोवि भाणियव्वो जाव नवगसंजोगो, दसहा कज्जमाणे एगयओ नव परमाणुपोग्गला एगयओ संखेज्ज-पएसिए खंधे भवइ अहवा एगयओ अट्ठ परमाणुपोग्गला एगयओ दुपएसिए० एगयओ संखेज्जपएसिए खंधे भवइ, एवं एएणं कमेणं एक्केल्लो पूरेयव्वो जाव अहवा एगयओ दसपएसिए खंधे एगयओ नव संखेज्जपएसिया खंधा भवन्ति अहवा दस संखेज्जपएसिया खंधा भवन्ति, संखेज्जहा कज्जमाणे संखेज्जा परमाणुपोग्गला भवन्ति । असंखेज्जा णं भन्ते ! परमाणुपोग्गला एगयओ साहणन्ति एगयओ साहणित्ता किं भवइ ? गोयमा ! असंखेज्जपएसिए खंधे भवइ, से भिज्जमाणे दुहावि जाव दसहावि संखेज्जहावि असंखेज्जहावि कज्जइ, दुहा कज्जमाणे एगयओ परमाणुपोग्गले एगयओ असं-खेज्जपएसिए खंधे भवइ एवं जाव अहवा एगयओ दसपएसिए० एगयओ असंखेज्जप-एसिए खंधे भवइ अहवा एगयओ संखेज्जपएसिए खंधे एगयओ असंखेज्जपएसिए खंधे भवइ अहवा दो असंखेज्जपएसिया खंधा भवन्ति, तिहा कज्जमाणे एगयओ दो परमा-णुपोग्गला एगयओ असंखेज्जपएसिए खंधे भवइ अहवा एगयओ परमाणुपोग्गले एग-यओ दुपएसिए० एगयओ असंखेज्जपएसिए खंधे भवइ जाव अहवा एगयओ परमा-णुपोग्गले एगयओ दसपएसिए० एगयओ असंखेज्जपएसिए खंधे भवइ अहवा एग-यओ परमाणुपोग्गले एगयओ संखेज्जपएसिए० एगयओ असंखेज्जपएसिए खंधे भवइ अहवा एगयओ परमाणुपोग्गले एगयओ दो असंखेज्जपएसिया खंधा भवन्ति अहवा एगयओ दुपएसिए० एगयओ दो असंखेज्जपएसिया खंधा भवन्ति एवं जाव अहवा एग-यओ संखेज्जपएसिए खंधे भवइ एगयओ दो असंखेज्जपएसिया खंधा भवन्ति अहवा तिन्नि असंखेज्जपएसिया खंधा भवन्ति, चउहा कज्जमाणे एगयओ तिन्नि परमाणुपोग्गला एगयओ असंखेज्जपएसिए खंधे भवइ एवं चउक्कगसंजोगो जाव दसगसंजोगो ए(वं)ए जहेव संखेज्जपएसियस्स नवरं असंखेज्जयं एगं अहिगं भाणियव्वं जाव अहवा दस असंखेज्जपएसिया खंधा भवन्ति, संखेज्जहा कज्जमाणे एगयओ संखेज्जा परमाणुपोग्गला एगयओ असंखेज्जपएसिए खंधे भवइ अहवा एगयओ संखेज्जा दुपएसिया खंधा एगयओ असंखेज्जपएसिए खंधे भवइ एवं जाव अहवा एगयओ संखेज्जा दसपए-सिया खंधा एगयओ असंखेज्जपएसिए खंधे भवइ अहवा एगयओ संखेज्जा संखेज्ज-पएसिया खंधा एगयओ असंखेज्जपएसिए खंधे भवइ अहवा संखेज्जा असंखेज्जपए-सिया खंधा भवन्ति, असंखेज्जहा कज्जमाणे असंखेज्जा परमाणुपोग्गला भवन्ति । अणन्ता णं भन्ते ! परमाणुपोग्गला जाव किं भवन्ति ? गोयमा ! अणन्तपएसिए खंधे भवइ, से भिज्जमाणे दुहावि तिहावि जाव दसहावि संखेज्जहा असंखेज्जहा अणन्तहावि कज्जइ,

हुहा कज्जमाणे एगयओ परमाणुपोग्गले एगयओ अणंतपएसिए खंधे भवइ एवं जाव
अहवा दो अणंतपएसिया खंधा भवन्ति, तिहा कज्जमाणे एगयओ दो परमाणुपोग्गला
एगयओ अणंतपएसिए खंधे भवइ अहवा एगयओ परमाणुपोग्गले एगयओ दुपएसिए०
एगयओ अणंतपएसिए खंधे भवइ जाव अहवा एगयओ परमाणुपोग्गले एगयओ असं-
खेज्जपएसिए० एगयओ अणंतपएसिए खंधे भवइ अहवा एगयओ परमाणुपोग्गले एग-
यओ दो अणंतपएसिया खंधा भवन्ति अहवा एगयओ दुपएसिए० एगयओ दो अणंतप-
एसिया खंधा भवन्ति एवं जाव अहवा एगयओ दसपएसिए० एगयओ दो अणंतपए-
सिया खंधा भवन्ति अहवा एगयओ संखेज्जपएसिए० एगयओ दो अणंतपएसिया खंधा
भवन्ति अहवा एगयओ असंखेज्जपएसिए खंधे एगयओ दो अणंतपएसिया खंधा भवन्ति
अहवा तिन्नि अणंतपएसिया खंधा भवन्ति, चउहा कज्जमाणे एगयओ तिन्नि परमा-
णुपोग्गला एगयओ अणंतपएसिए खंधे भवइ एवं चउक्कसंजोगो जाव असंखेज्जग-
संजोगो, एए सव्वे जहेव असंखेज्जाणं भाणिया तहेव अणंताणवि भाणियव्वा नवरं
एक्कं अणंतगं अब्भहियं भाणियव्वं जाव अहवा एगयओ संखेज्जा संखेज्जपएसिया
खंधा एगयओ अणंतपएसिए खंधे भवइ अहवा एगयओ संखेज्जा असंखेज्जपएसिया
खंधा एगयओ अणंतपएसिए खंधे भवइ अहवा संखेज्जा अणंतपएसिया खंधा भवन्ति,
असंखेज्जहा कज्जमाणे एगयओ असंखेज्जा परमाणुपोग्गला एगयओ अणंतपएसिए
खंधे भवइ अहवा एगयओ असंखेज्जा दुपएसिया खंधा एगयओ अणंतपएसिए
खंधे भवइ जाव अहवा एगयओ असंखेज्जा संखेज्जपएसिया खंधा एगयओ अणंतप-
एसिए खंधे भवइ अहवा एगयओ असंखेज्जा असंखेज्जपएसिया खंधा एगयओ अणं-
तपएसिए खंधे भवइ अहवा असंखेज्जा अणंतपएसिया खंधा भवन्ति, अणंतहा कज्ज-
माणे अणंता परमाणुपोग्गला भवन्ति ॥ ४४४ ॥ एएसिं णं भंते ! परमाणुपोग्गलाणं
साहण्णाभेदाणुवाएणं अणंताणं पोग्गलपरियट्ठाणं अणंताणंता पोग्गलपरियट्ठा सम-
णुगंतव्वा भवन्तीति मक्खाया ? हंता गोयमा ! एएसिं णं परमाणुपोग्गलाणं साहण-
णाभेदाणु जाव मक्खाया ॥ कइविहे णं भंते ! पोग्गलपरियट्ठे पण्णत्ते ? गोयमा !
सत्तविहे पोग्गलपरियट्ठे पण्णत्ते, तंजहा-ओरालियपोग्गलपरियट्ठे वेउव्विय० तेयापो-
ग्गलपरियट्ठे कम्मापोग्गलपरियट्ठे मणपोग्गलपरियट्ठे वइपोग्गलपरियट्ठे आणापाणुपोग्ग-
लपरियट्ठे । नेरइयाणं भंते ! कइविहे पोग्गलपरियट्ठे पण्णत्ते ? गोयमा ! सत्तविहे पोग्ग-
लपरियट्ठे पण्णत्ते, तंजहा-ओरालियपोग्गलपरियट्ठे वेउव्वियपोग्गलपरियट्ठे जाव
आणापाणुपोग्गलपरियट्ठे, एवं जाव वेमाणियाणं ॥ एगमेगस्स णं भंते ! नेरइयस्स
केवइया ओरालियपोग्गलपरियट्ठा अतीया ? गोयमा ! अणंता, केवइया पुरक्खडा ?

गोयमा ! कस्सइ अत्थि कस्सइ नत्थि जस्सइत्थि जहन्नेणं एक्को वा दो वा तिन्नि वा उक्कोसेणं संखेज्जा वा असंखेज्जा वा अणंता वा । एगमेगस्स णं भंते ! असुरकुमारस्स केवइया ओरालियपोग्गलपरियट्ठा० ? एवं चेव, एवं जाव वेमाणियस्स । एगमेगस्स णं भंते ! नेरइयस्स केवइया वेउव्वियपोग्गलपरियट्ठा अतीया ? गोयमा ! अणंता, एवं जहेव ओरालियपोग्गलपरियट्ठा तहेव वेउव्वियपोग्गलपरियट्ठावि भाणियव्वा, एवं जाव वेमाणियस्स एवं जाव आणापाणुपोग्गलपरियट्ठा, एए एगत्ति(इ)या सत्त दंडगा भवंति । नेरइयाणं भंते ! केवइया ओरालियपोग्गलपरियट्ठा अतीया ? गोयमा ! अणंता, केवइया पुरक्खडा ? अणंता, एवं जाव वेमाणियाणं, एवं वेउव्वियपोग्गलपरियट्ठावि एवं जाव आणापाणुपोग्गलपरियट्ठावि जाव वेमाणियाणं, एवं एए पोहत्तिया सत्तचउव्वीसइ दंडगा ॥ एगमेगस्स णं भंते ! नेरइयस्स नेरइयत्ते केवइया ओरालियपोग्गलपरियट्ठा अतीया ? गोयमा ! नत्थि एक्कोवि, केवइया पुरक्खडा ? नत्थि एक्कोवि, एगमेगस्स णं भंते ! नेरइयस्स असुरकुमारत्ते केवइया ओरालियपोग्गलपरियट्ठा० ? एवं चेव, एवं जाव थणियकुमारत्ते जहा असुरकुमारत्ते । एगमेगस्स णं भंते ! नेरइयस्स पुढविकाइयत्ते केवइया ओरालियपोग्गलपरियट्ठा अतीया ? अणंता, केवइया पुरक्खडा ? कस्सइ अत्थि कस्सइ नत्थि जस्सत्थि तस्स जहन्नेणं एक्को वा दो वा तिन्नि वा उक्कोसेणं संखेज्जा वा असंखेज्जा वा अणंता वा एवं जाव मणुस्सत्ते, चाणमंतरजोइसियवेमाणियत्ते जहा असुरकुमारत्ते । एगमेगस्स णं भंते ! असुरकुमारस्स नेरइयत्ते केवइया अतीया ओरालियपोग्गलपरियट्ठा एवं जहा नेरइयस्स वत्तव्वया भाणिया तहा असुरकुमारस्सवि भाणियव्वा जाव वेमाणियत्ते, एवं जाव थणियकुमारस्स, एवं पुढविकाइयस्सवि, एवं जाव वेमाणियस्स, सव्वेसिं एक्को गमो । एगमेगस्स णं भंते ! नेरइयस्स नेरइयत्ते केवइया वेउव्वियपोग्गलपरियट्ठा अतीया ? अणंता, केवइया पुरक्खडा ? एगुत्तरिया जाव अणंता, एवं जाव थणियकुमारत्ते, पुढविकाइयत्ते पुच्छा, नत्थि एक्कोवि, केवइया पुरक्खडा ? नत्थि एक्कोवि, एवं जत्थ वेउव्वियसरीरं अत्थि तत्थ एगुत्तरि(या)ओ जत्थ नत्थि तत्थ जहा पुढविकाइयत्ते तहा भाणियव्वं जाव वेमाणियस्स वेमाणियत्ते । तेयापोग्गलपरियट्ठा कम्मापोग्गलपरियट्ठा य सव्वत्थ एगुत्तरिया भाणियव्वा, मणपोग्गलपरियट्ठा सव्वेसु पंचिदिएसु एगुत्तरिया, विगलिंदिएसु नत्थि, वइपोग्गलपरियट्ठा एवं चेव, नवरं एगिंदिएसु नत्थि भाणियव्वा । आणापाणुपोग्गलपरियट्ठा सव्वत्थ एगुत्तरिया एवं जाव वेमाणियस्स वेमाणियत्ते । नेरइयाणं भंते ! नेरइयत्ते केवइया ओरालियपोग्गलपरियट्ठा अतीया ? नत्थि एक्कोवि, केवइया पुरक्खडा ? नत्थि एक्कोवि, एवं जाव थणि-

यकुमारत्ते, पुढविकाइयत्ते पुच्छा, गोयमा ! अणंता, केवइया पुरक्खडा ? अणंता, एवं जाव मणुस्सत्ते, वाणमंतरजोइसियवेमाणियत्ते जहा नेरइयत्ते एवं जाव वेमाणियस्स वेमाणियत्ते, एवं सत्तवि पोग्गलपरियट्ठा भाणियव्वा, जत्थ अत्थि तत्थ अतीयावि पुरक्खडावि अणंता भाणियव्वा, जत्थ नत्थि तत्थ दोवि नत्थि भाणियव्वा जाव वेमाणियाणं वेमाणियत्ते केवइया आणापाणुपोग्गलपरियट्ठा अतीया ? अणंता, केवइया पुरक्खडा ? अणंता ॥ ४४५ ॥ से केणट्ठेणं भंते ! एवं वुच्चइ-ओरालिय-पोग्गलपरियट्ठे २ ? गोयमा ! जणं जीवेणं ओरालियसरीरे वट्ठमाणेणं ओरालिय-सरीरपाउग्गाइं दव्वाइं ओरालियसरीरत्ताए गहियाइं वट्ठाइं पुट्ठाइं कडाइं पट्ठवियाइं निविट्ठाइं अभिनिविट्ठाइं अभिसमन्नागयाइं परिया(ग)इयाइं परिणामियाइं निज्जिन्नाइं निसिरियाइं निसिट्ठाइं भवंति, से तेणट्ठेणं गोयमा ! एवं वुच्चइ ओरालियपोग्गलपरियट्ठे २, एवं वेउव्वियपोग्गलपरियट्ठेवि, नवरं वेउव्वियसरीरे वट्ठमाणेणं वेउव्विय-सरीरप्पाउग्गाइं सेसं तं चेव सव्वं एनं जाव आणापाणुपोग्गलपरियट्ठे, नवरं आणापाणुपाउग्गाइं सव्वदव्वाइं आणापाणुत्ताए सेसं तं चेव ॥ ओरालियपोग्गलपरियट्ठे णं भंते ! केवइकालस्स निव्वत्तिज्जइ ? गोयमा ! अणंताहि उरसप्पिणिओसप्पिणीहिं एवइकालस्स निव्वत्तिज्जइ, एवं वेउव्वियपोग्गलपरियट्ठेवि, एवं जाव आणापाणुपोग्गलपरियट्ठेवि ॥ एयस्स णं भंते ! ओरालियपोग्गलपरियट्ठनिव्वत्तणाकालस्स वेउव्वियपोग्गल० जाव आणापाणुपोग्गलपरियट्ठनिव्वत्तणाकालस्स कयरे कयरेहितो जाव विसेसाहिया वा ? गोयमा ! सव्वत्थोवे कम्मगपोग्गलपरियट्ठनिव्वत्तणाकाले, तेयापोग्गलपरियट्ठनिव्वत्तणाकाले अणंतगुणे, ओरालियपोग्गलपरियट्ठ० अणंतगुणे, आणापाणुपोग्गल० अणंतगुणे, मणपोग्गल० अणंतगुणे, वइपोग्गल० अणंतगुणे, वेउव्वियपोग्गलपरियट्ठनिव्वत्तणाकाले अणंतगुणे ॥ ४४६ ॥ एएसि णं भंते ! ओरालियपोग्गलपरियट्ठाणं जाव आणापाणुपोग्गलपरियट्ठाण य कयरे २ हितो जाव विसेसाहिया वा ? गोयमा ! सव्वत्थोवा वेउव्वियपोग्गलपरियट्ठा, वइपोग्गलपरियट्ठा अणंतगुणा, मणपोग्गलपरियट्ठा अणंतगुणा, आणापाणुपोग्गल० अणंतगुणा, ओरालियपोग्गल० अणंतगुणा, तेयापोग्गल० अणंतगुणा, कम्मगपोग्गल० अणंतगुणा । सेवं भंते ! सेवं भंते ! त्ति भगवं जाव विहरइ ॥ ४४७ ॥ वारहमे सए चउत्थो उडेसो समत्तो ॥

रायगिहे जाव एवं वयासी-अह भंते ! पाणाइवाए सुसावाए अदिण्णादाणे मेहुणे परिग्गहे, एस णं कइवन्ने कइग्गंथे कइरसे कइफासे पण्णत्ते ? गोयमा ! पंचवन्ने पंचरसे दुग्गंथे चउफासे पण्णत्ते ॥ अह भंते ! कोहे १ कोवे २ रोसे ३ दोसे ४ अख(मा)मे ५ संजलणे ६ कलहे ७ चंडिके ८ भंडणे ९ विवाए १०, एस णं कइवन्ने जाव कइफासे

पण्णत्ते ? गोयमा ! पंचवन्ने पंचरसे दुग्ंधे चउफासे पण्णत्ते ॥ अह भंते ! माणे मदे दप्पे थंभे गव्वे अ(णु)त्तुक्कोसे परपरिवाए उक्कासे अवक्कासे उन्नए उन्नामे दुन्नामे १२, एस णं कइवन्ने ४ प० ? गोयमा ! पंचवन्ने जहा कोहे तहेव । अह भंते ! माया उवही नियडी वलए गहणे णूमे कक्के कुरूए जिम्हे किव्विसे १० आयरण्या गूहण्या वंचण्या पल्लिउंचण्या साइजोगे य १५, एस णं कइवन्ने ४ प० ? गोयमा ! पंचवन्ने जहेव कोहे ॥ अह भंते ! लोभे इच्छा मुच्छा कंखा गेही तण्हा भिज्झा अभिज्झा आसा-सण्या पत्थण्या १० लालप्पण्या कामासा भोगासा जीवियासा मरणासा नंदिरागे १६, एस णं कइवन्ने ४ प० ? गोयमा ! जहेव कोहे । अह भंते ! पेजे दोसे कलहे जाव मिच्छादंसणसल्ले एस णं कइवन्ने ४ प० ? जहेव कोहे तहेव जाव चउफासे ॥ ४४८ ॥ अह भंते ! पाणाइवायवेरमणे जाव परिग्गहवेरमणे, कोहविवेगे जाव मिच्छादंसणसल्ल-विवेगे एस णं कइवन्ने जाव कइफासे पण्णत्ते ? गोयमा ! अवन्ने अगंधे अरसे अफासे पण्णत्ते ॥ अह भंते ! उप्पत्तिया वेणइया कम्मिया परिणामिया एस णं कइवन्ना ४ प० ? तं चेव जाव अफासा पन्नत्ता ॥ अह भंते ! उग्गहे ईहा अवाए धारणा एस णं कइवन्ना ४ प० ? एवं चेव जाव अफासा पन्नत्ता ॥ अह भंते ! उट्ठाणे कम्मे बले वीरिए पुरिसक्कारपरक्कमे एस णं कइवन्ने ४ प० ? तं चेव जाव अफासे पन्नत्ते । सत्तमे णं भंते । उवासंतरे कइवन्ने ४ प० ? एवं चेव जाव अफासे पन्नत्ते । सत्तमे णं भंते ! तणुवाए कइवन्ने ४ प० ? जहा पाणाइवाए, नवरं अट्ठफासे पण्णत्ते, एवं जहा सत्तमे, तणुवाए तहा सत्तमे घणवाए घणोदही पुढवी, छट्ठे उवासंतरे अवन्ने, तणुवाए जाव छट्ठी पुढवी एयाइं अट्ठ फासाइं, एवं जहा सत्तमाए पुढवीए वत्तव्वया भाणिया तहा जाव पढमाए पुढवीए भाणियव्वं, जंबुहीवे २ जाव सयंभुरमणे समुदे, सोहम्ममे कप्पे जाव ईसिपव्वभारा पुढवी, नेरइयावासा जाव वेमाणियावासा एयाणि सव्वाणि अट्ठफा-साणि । नेरइया णं भंते ! कइवन्ना जाव कइफासा पन्नत्ता ? गोयमा ! वेउव्वियतेयाइं पडुच्च पंचवन्ना पंचरसा दुग्ंधा अट्ठफासा पण्णत्ता, कम्मगं पडुच्च पंचवन्ना पंचरसा दुग्ंधा चउफासा पण्णत्ता, जीवं पडुच्च अवन्ना जावं अफासा पण्णत्ता, एवं जाव थणियकुमारा, पुढविकाइयाणं पुच्छा, गोयमा ! ओरालियतेयगाइं पडुच्च पंचवन्ना जाव अट्ठफासा पण्णत्ता, कम्मगं पडुच्च जहा नेरइयाणं, जीवं पडुच्च तहेव, एवं जाव चउरिंदिया, नवरं वाउक्काइया ओरालियवेउव्वियतेयगाइं पडुच्च पंचवन्ना जावं अट्ठफासा पण्णत्ता, सेसं जहा नेरइयाणं, पंचिदियतिरिक्खजोणिया जहां वाउक्काइया, मणुस्साणं पुच्छा, गोयमा ! ओरालियवेउव्वियआहारगतेयगाइं पडुच्च पंचवन्ना जाव अट्ठफासा पण्णत्ता, कम्मगं जीवं च पडुच्च जहा नेरइयाणं, वाणमंतरजोइसियवेमाणिया

जहा नेरइया, धम्मत्थिकाए जाव पोग्गलत्थिकाए एए सव्वे अवन्ना जाव अफासा, नवरं पोग्गलत्थिकाए पंचवन्ने पंचरसे दुगंधे अट्ठफासे पण्णत्ते, णाणावरणिज्जे जाव अंतराइए एयाणि जाव चउफासाणि, कण्हलेसा णं भंते ! कइवन्ना ४ प० ? गोयमा ! दव्वलेसं पडुच्च पंचवन्ना जाव अट्ठफासा पण्णत्ता, भावलेसं पडुच्च अवन्ना ४, एवं जाव सुक्कलेस्सा, सम्महिट्ठी ३ चक्खुहंसणे ४ आभिणिबोहियणाणे ५ जाव विभंगणाणे आहारसन्ना जाव परिग्गहसन्ना एयाणि अवन्नाणि ४, ओरालियसरीरे जाव तेयग-सरीरे एयाणि अट्ठफासाणि, कम्मगसरीरे चउफासे, मणजोगे य वइजोगे य चउफासे, कायजोगे अट्ठफासे, सागारोवओगे य अणागारोवओगे य अवन्ना । सव्वदव्वा णं भंते ! कइवन्ना ० पुच्छा, गोयमा ! अत्थेगइया सव्वदव्वा पंचवन्ना जाव अट्ठफासा पण्णत्ता, अत्थेगइया सव्वदव्वा पंचवन्ना जाव चउफासा पण्णत्ता, अत्थेगइया सव्वदव्वा एगगंधा एगवण्णा एगरसा दुफासा पन्नत्ता, अत्थेगइया सव्वदव्वा अवन्ना जाव अफासा पन्नत्ता, एवं सव्वपएसावि सव्वपज्जवावि, तीयद्धा अवन्ना जाव अफासा पण्णत्ता, एवं जाव अणागयद्धावि, एवं सव्वद्धावि ॥ ४४९ ॥ जीवे णं भंते ! गव्वं-वक्कममाणे कइवन्नं कइगंधं कइरसं कइफासं परिणामं परिणमइ ? गोयमा ! पंचवन्नं पंचरसं दुगंधं अट्ठफासं परिणामं परिणमइ ॥ ४५० ॥ कम्मओ णं भंते ! जीवे नो अकम्मओ विभत्तिभावं परिणमइ कम्मओ णं जए नो अकम्मओ विभत्तिभावं परिणमइ ? हंता गोयमा ! कम्मओ णं तं चेव जाव परिणमइ नो अकम्मओ विभत्तिभावं परिणमइ, सेवं भंते ! सेवं भंते ! त्ति ॥ ४५१ ॥ **वारहमे सए पञ्चमो उद्देसो समत्तो ॥**

रायगिहे जाव एवं वयासी-बहुजणे णं भंते ! अन्नमन्नस्स एवमाइक्खइ जाव एवं पुरुवेइ-एवं खलु राहू चंदं गेण्हइ एवं ० २, से कहमेयं भंते ! एवं ? गोयमा ! जन्नं से बहुजणे णं अन्नमन्नस्स जाव मिच्छं ते एव माहंसु, अहं पुण गोयमा ! एवमाइक्खामि जाव एवं पुरुवेमि-एवं खलु राहू देवे महिद्धिण जाव महेसक्खे चरवत्थधरे वरमल्लधरे वरगंधधरे वराभरणधारी, राहुस्स णं देवस्स नव नामधेज्जा प०, तंजहा-सिंघाडए १ जडिलए २ खंभए [खत्तए] ३ खरए ४ दहुरे ५ मगररे ६ मच्छे ७ कच्छमे ८ कण्हसप्पे ९, राहुस्स णं देवस्स विमाणा पंचवन्ना पण्णत्ता, तंजहा-किण्हा नीला लोहिया हालिद्धा सुक्किल्ला, अत्थि कालए राहुविमाणे खंजण-वन्नामे पण्णत्ते, अत्थि नीलए राहुविमाणे लाउयवन्नामे प०, अत्थि लोहिण राहुवि-माणे मंजिडवन्नामे प०, अत्थि पीयए राहुविमाणे हालिह्वन्नामे पन्नत्ते, अत्थि सुक्किल्लए राहुविमाणे भासरासिवन्नामे पन्नत्ते ॥ जया णं राहू आगच्छमाणे वा गच्छमाणे

चा विउव्वमाणे वा परियारेमाणे वा चंदलेस्सं पुरच्छिमेण आवरेत्ता णं पच्चच्छिमेण
 चीईवयइ, तथा णं पुरच्छिमेण चंदे उवदंसेइ पच्चच्छिमेण राहू, जया णं राहू आग-
 च्छमाणे वा गच्छमाणे वा विउव्वमाणे वा परियारेमाणे वा चंदलेस्सं पच्चच्छिमेण
 आवरेत्ताणं पुरच्छिमेण चीईवयइ, तथा णं पच्चच्छिमेण चंदे उवदंसेइ पुरच्छिमेण राहू,
 एवं जहा पुरच्छिमेण पच्चच्छिमेण य दो आलावगा भणिया तथा दाहिणेण उत्तरेण
 य दो आलावगा भाणियव्वा, एवं उत्तरपुरच्छिमेण दाहिणपच्चच्छिमेण य दो आलावगा
 भाणियव्वा, एवं दाहिणपुरच्छिमेण उत्तरपच्चच्छिमेण य दो आलावगा भाणियव्वा
 एवं चेव जाव तथा णं उत्तरपच्चच्छिमेण चंदे उवदंसेइ दाहिणपुरच्छिमेण राहू, जया
 णं राहू आगच्छमाणे वा गच्छमाणे वा विउव्वमाणे वा परियारेमाणे वा चंदलेस्सं
 आवरेमाणे २ चिट्ठइ, तथा णं मणुस्सलोए मणुस्सा वदंति-एवं खलु राहू चंदं गेण्हइ
 एवं०, जया णं राहू आगच्छमाणे वा ४ चंदस्स लेस्सं आवरेत्ताणं पासेणं चीईवयइ
 तथा णं मणुस्सलोए मणुस्सा वदंति-एवं खलु चंदेणं राहुस्स कुच्छी भिन्ना एवं०, जया
 णं राहू आगच्छमाणे वा ४ चंदस्स लेसं आवरेत्ताणं पच्चोसक्कइ तथा णं मणुस्सलोए
 मणुस्सा वदंति-एवं खलु राहुणा चंदे वंते एवं०, जया णं राहू आगच्छमाणे वा
 जाव परियारेमाणे वा चंदलेस्सं अहे सपक्खि सपडिदिसिं आवरेत्ताणं चिट्ठइ, तथा णं
 मणुस्सलोए मणुस्सा वदंति-एवं खलु राहुणा चंदे घत्थे एवं० ॥ कइविहे णं भंते ।
 राहू पन्नत्ते ? गोयमा ! दुविहे राहू पन्नत्ते, तंजहा-धुवराहू य पव्वराहू य, तत्थ णं
 जे से धुवराहू से णं बहुलपक्खस्स पाडिचए पन्नरसतिभागेणं पन्नरसभागं चंदस्स
 लेस्सं आवरेमाणे २ चिट्ठइ, तंजहा-पढमाए पढमं भागं विइयाए विइयं भागं जाव
 पन्नरसेसु पन्नरसमं भागं, चरिमसमए चंदे रत्ते भवइ अवसेसे समए चंदे रत्ते वा
 विरत्ते वा भवइ, तमेव सुक्कपक्खस्स उवदंसेमाणे २ चिट्ठइ तं० पढमाए पढमं
 भागं जाव पन्नरसेसु पन्नरसमं भागं, चरिमसमए चंदे विरत्ते भवइ अवसेसे समए
 चंदे रत्ते वा विरत्ते वा भवइ, तत्थ णं जे से पव्वराहू से जहत्तेणं छण्हं मासाणं
 उक्कोसेणं वायालीसाए मासाणं चंदस्स, अडयालीसाए संवच्छराणं सूरस्स ॥४५२॥
 से केणट्ठेणं भंते । एवं वुच्चइ-चंदे ससी २ ? गोयमा ! चंदस्स णं जोइसिंदस्स
 जोइसरत्तो मियंके विमाणे कंता देवा कंताओ देवीओ कंताइ आसणसयणखंभभंड-
 मत्तोवगरणाइं अप्पणोवि य णं चंदे जोइसिंदे जोइसराया सोमे कंते सुभगे पिय-
 दंसणे सुखवे से तेणट्ठेणं जाव ससी ॥ ४५३ ॥ से केणट्ठेणं भंते ! एवं वुच्चइ-सूरे
 आइच्चे सूरे० २ ? गोयमा ! सूराइया णं समयाइ वा आवलियाड वा जाव उस्सप्पि-
 णीइ वा अवसप्पिणीइ वा से तेणट्ठेणं गोयमा ! जाव आइच्चे० २ ॥४५४॥ चंदस्स णं

भंते ! जोइसिंदस्स जोइसरत्तो कइ अगमहिंसीओ पण्णत्ताओ ? जहा दसमसए जाव
 णो चेव णं मेहुणवत्तिं । सूरस्सवि तहेव । चंदिमसूरिया णं भंते ! जोइसिंदा जोइ-
 सरायाणो केरिसए कामभोगे पच्चणुब्भवमाणा विहरंति ? गोयमा ! से जहानामए
 केइ पुरिसे पढमजोव्वणुट्ठाणवलत्थे पढमजोव्वणुट्ठाणवलत्थाए भारियाए साद्धिं अचि-
 रवत्तविवाहकजे अत्थगवेसणयाए सोलसवासविप्पवासिए से णं तओ लद्धे कयकजे
 अणहसम(ए)स्से पुणरवि नियगणिहं हव्वमागए ण्हाए सव्वालंकारविभूतिए मणुन्नं
 थालीपागसुद्धं अट्टारसवंजणाउलं भोयणं भुत्ते समाणे तंसि तारिसगंसि वासघरंसि
 वन्नओ महब्बले जाव सयणोवयारकलिए ताए तारिसियाए भारियाए सिंगा-
 रागारचारुवेसाए जाव कलियाए अणुरत्ताए अविरत्ताए मणाणुकूलाए सद्धिं इट्ठे सहे
 फरिसे जाव पंचविहे माणुस्सए कामभोगे पच्चणुब्भवमाणे विहरइ, ता से णं गोयमा !
 पुरिसे विउसमणकालसमयंसि केरिसयं सायासोक्खं पच्चणुब्भवमाणे विहरइ ?
 ओरालं समणाउसो !, तस्स णं गोयमा ! पुरिस्स कामभोगेहिंतो वाणमंतराणं
 देवाणं एत्तो अणंतगुणविसिद्धतरा चेव कामभोगा, वाणमंतराणं देवाणं कामभोगेहिंतो
 असुरिंदवज्जियाणं भवणवासीणं देवाणं एत्तो अणंतगुणविसिद्धतरा चेव कामभोगा,
 असुरिंदवज्जियाणं भवणवासियाणं देवाणं कामभोगेहितो अनुरकुमाराणं देवाणं
 एत्तो अणंतगुणविसिद्धतरा चेव कामभोगा, असुरकुमाराणं देवाणं कामभोगेहितो
 गहगणनक्खत्ततारारुवाणं जोइसियाणं देवाणं एत्तो अणंतगुणविसिद्धतरा चेव
 कामभोगा, गहगणनक्खत्त० जाव कामभोगेहिंतो चंदिमसूरियाणं जोइसियाणं जोइ-
 सराईणं एत्तो अणंतगुणविसिद्धतरा चेव कामभोगा, चंदिमसूरिया णं गोयमा ! जोइ-
 सिंदा जोइसरायाणो एरिसए कामभोगे पच्चणुब्भवमाणा विहरंति । सेवं भंते ! सेवं
 भंते ! त्ति भगवं गोयमे समणं भगवं महावीरं जाव विहरइ ॥ ४५५ ॥ वारहमे
 सए छट्ठो उद्देसो समत्तो ॥

तेणं कालेणं तेणं समएणं जाव एवं वयासी-केमहालए णं भंते ! लोए पन्नत्ते ?
 गोयमा ! महइमहालए लोए पन्नत्ते, पुरच्छिमेणं असंखेज्जाओ जोयणकोडाकोडीओ
 दाहिणेणं असंखेज्जाओ एवं चेव, एवं पच्चच्छिमेणवि, एवं उत्तरेणवि, एवं उद्धंपि, अहे
 असंखेज्जाओ जोयणकोडाकोडीओ आयामविक्खंभेणं । एयंसि णं भंते ! एमहालयंसि
 लोगंसि अत्थि केइ परमाणुपोग्गलमेत्तेवि पएसे जत्थ णं अयं जीवे न जाए वा न
 मए वावि ? गोयमा ! नो इणट्ठे समट्ठे, से केणट्ठेणं भंते ! एवं वुच्चइ एयंसि णं
 एमहालयंसि लोगंसि नत्थि केइ परमाणुपोग्गलमेत्तेवि पएसे जत्थ णं अयं जीवे ण
 जाए वा न मए वावि ? गोयमा ! से जहानामए-केइ पुरिसे अयासयस्स एणं महं

अयावयं करेजा, से णं तत्थ जहन्नेणं एगं वा दो वा तिन्नि वा उक्कोसेणं अयास-
हस्सं पक्खिवेजा, ताओ णं तत्थ पउरगोयराओ पउरपाणियाओ जहन्नेणं एगाहं वा
दुयाहं वा तियाहं वा उक्कोसेणं छम्मासे परिवसेजा, अत्थि णं गोयमा ! तस्स
अयावयस्स केइ परमाणुपोग्गलमेत्तेवि पएसे जे णं तासिं अयाणं उच्चारणेण वा पास-
वणेण वा खेलेण वा सिंघाणएण वा वंतेण वा पित्तेण वा पूएण वा सुक्केण वा
सोणिएण वा चम्मेहिं वा रोमेहिं वा सिंगेहि वा खुरेहिं वा नहेहिं वा अणाकंतपुव्वे
भवइ ? भंगवं ! णो इण्ठे सम्भे, होज्जावि णं गोयमा ! तस्स अयावयस्स केइ
परमाणुपोग्गलमेत्तेवि पएसे जे णं तासिं अयाणं उच्चारणेण वा जाव णहेहि वा
अणकंतपुव्वे णो चेव णं एयंसि एमहालयंसि लोगंसि लोगस्स सासयं भावं
संसारस्स य अणाइभावं जीवस्स य णिच्चभावं कम्मवहुत्तं जम्मणमरणवाहुल्लं च
पडुच्च नत्थि केइ परमाणुपोग्गलमेत्तेवि पएसे जत्थ णं अयं जीवे न जाए वा न मए
वावि, से तेण्ठेणं तं चेव जाव न मए वावि ॥ ४५६ ॥ कइ णं भंते ! पुढवीओ
पण्णत्ताओ ? गोयमा ! सत्त पुढवीओ पण्णत्ताओ जहा पढमसए पंचमउद्देसए तहेव
आवासा ठावेयव्वा जाव अणुत्तरविमाणेति जाव अपराजिए सव्वट्टसिद्धे । अयन्नं
भंते ! जीवे इमीसे रयणप्पभाए पुढवीए तीसाए निरयावाससयसहस्सेसु एगमेगंसि
निरयावासंसि पुढविकाइयत्ताए जाव वणस्सइकाइयत्ताए नरगत्ताए नेरइयत्ताए उव-
वन्नपुव्वे ? हंता गोयमा ! असइं अदुवा अणंतखुत्तो, अयन्नं भंते ! जीवे सक्करप्प-
भाए पुढवीए पणवीसाए एवं जहा रयणप्पभाए तहेव दो आलावगा भाणियव्वा,
एवं जाव धूमप्पभाए । अयन्नं भंते ! जीवे तमाए पुढवीए पंचूणे निरयावाससयस-
हस्से एगमेगंसि सेसं तं चेव, अयन्नं भंते ! जीवे अहेसत्तमाए पुढवीए पंचसु
अणुत्तरेसु महइमहालएसु महानिरएसु एगमेगंसि निरयावाससि सेसं जहा रयणप्प-
भाए, अयन्नं भंते ! जीवे चोसट्ठीए असुरकुमारावाससयसहस्सेसु एगमेगंसि असुर-
कुमारावासंसि पुढविकाइयत्ताए जाव वणस्सइकाइयत्ताए देवत्ताए देवित्ताए आसण-
सयणभंडमत्तोवगरणत्ताए उववन्नपुव्वे ? हंता गोयमा ! जाव अणंतखुत्तो, सव्वजीवावि
णं भंते ! एवं चेव, एवं जाव थणियकुमारेसु, नाणत्तं आवासेसु, आवासा पुंव्वभणिया,
अयन्नं भंते ! जीवे असंखेज्जेसु पुढविकाइयावाससयसहरसेसु एगमेगंसि पुढविकाइ-
यावासंसि पुढविकाइयत्ताए जाव वणस्सइकाइयत्ताए उववन्नपुव्वे ? हंता गोयमा ! जाव
अणंतखुत्तो, एवं सव्वजीवावि, एवं जाव वणस्सइकाइएसु, अयण्णं भंते ! जीवे असंखे-
ज्जेसु वेदियावाससयसहस्सेसु एगमेगंसि वेदियावासंसि पुढविकाइयत्ताए जाव वणस्स-
इकाइयत्ताए वेइंदियत्ताए उववन्नपुव्वे ? हंता गोयमा ! जाव अणंतखुत्तो, सव्वजी-

वावि णं एवं चेव, एवं जाव मणस्सेसु, नवरं तेइंदिएसु जाव वणस्सइकाइयत्ताए तेइंदियत्ताए चउरिंदिएसु चउरिंदियत्ताए पंचिंदियतिरिक्खजोणिएसु पंचिंदियतिरिक्खजोणियत्ताए मणस्सेसु मणस्सत्ताए सेसं जहा वेदियाणं, वाणमंतरजोइसियसोहम्मीसाणेसु य जहा असुरकुमाराणं, अयणं भंते ! जीवे सणंकुमारे कप्पे वारससु विमाणावाससयसंहस्सेसु एगमेगंसि वेमाणियावासंसि पुढविकाइयत्ताए सेसं जहा असुरकुमाराणं जाव अणंतखुत्तो, नो चेव णं देवित्ताए, एवं सव्वजीवावि, एवं जाव आणयपाणएसु, एवं आरणच्चुएसुवि, अयन्नं भंते ! जीवे तिसुवि अट्टारसुत्तरेसु गेविज्जविमाणावाससएसु एवं चेव, अयन्नं भंते ! जीवे पंचसु अणुत्तरविमाणेसु एगमेगंसि अणुत्तरविमाणंसि पुढवि तहेव जाव अणंतखुत्तो, नो चेव णं देवित्ताए वा देवित्ताए चां एवं सव्वजीवावि । अयन्नं भंते ! जीवे सव्वजीवाणं माइत्ताए पियत्ताए भाइत्ताए भगिणित्ताए भज्जत्ताए पुत्तत्ताए धूयत्ताए सुण्हत्ताए उववन्नपुव्वे ? हंता गोयमा ! असइं अदुवा अणंतखुत्तो, सव्वजीवावि णं भंते ! इमस्स जीवस्स माइत्ताए जाव उववन्नपुव्वे ? हंता गोयमा ! जाव अणंतखुत्तो, अयणं भंते ! जीवे सव्वजीवाणं अरित्ताए वेरियत्ताए घायगत्ताए वहगत्ताए पडिणीयत्ताए पच्चामित्तत्ताए उववन्नपुव्वे ? हंता गोयमा ! जाव अणंतखुत्तो, सव्वजीवावि णं भंते ! एवं चेव, अयन्नं भंते ! जीवे सव्वजीवाणं रायत्ताए जुवरायत्ताए जाव सत्थवाहत्ताए उववन्नपुव्वे ? हंता गोयमा ! असइं जाव अणंतखुत्तो, सव्वजीवाणं एवं चेव । अयन्नं भंते ! जीवे सव्वजीवाणं दासत्ताए पेसत्ताए भयगत्ताए भाइल्लगत्ताए भोगपुरिसत्ताए सीसत्ताए वेसत्ताए उववन्नपुव्वे ? हंता गोयमा ! जाव अणंतखुत्तो, एवं सव्वजीवावि जाव अणंतखुत्तो । सेवं भंते ! सेवं भंते ! त्ति जाव विहरइ ॥ ४५७ ॥ वारहमे सए सत्तमो उद्देसो समत्तो ॥

तेणं कालेणं तेणं समएणं जाव एवं वयासी-देवे णं भंते ! महिद्धिए जाव महेसक्खे अणंतरं चयं चइत्ता विसरीरेसु नागेसु उववजेज्जा ? हंता गोयमा ! उववजेज्जा, से णं तत्थ अच्चियवंदियपूइयसकारियसम्माणिए दिव्वे सच्चे सच्चोवाए संनिहियपाडिहेरे यावि भवेज्जा ? हंता भवेज्जा, से णं भंते ! तओहिंतो अणंतरं उव्वट्ठित्ता सिज्झेज्जा वुज्झेज्जा जाव अंतं करेज्जा ? हंता सिज्झेज्जा जाव अंतं करेज्जा, देवे णं भंते ! महिद्धिए एवं चेव जाव विसरीरेसु मणीसु उववजेज्जा, एवं चेव जहा नागाणं, देवे णं भंते ! महिद्धिए जाव विसरीरेसु स्वक्खेसु उववजेज्जा ? हंता उववजेज्जा, एवं चेव, नवरं इमं नाणत्तं जाव सन्निहियपाडिहेरे लाउल्लोइयमहिए यावि भवेज्जा ? हंता भवेज्जा, सेसं तं चेव जाव अंतं करेज्जा ॥ ४५८ ॥ अह

भंते ! गोलंगूलवसभे कुकुडवसभे मंडुकवसभे एए णं निस्सीला निव्वया निग्गुण
निम्मेरा निप्पच्चक्खाणप्पेसहोववासा कालमासे कालं किच्चा इमीसे रयणप्पभाए
पुढवीए उक्कोसेणं सागरोवमट्टिइयंसि नरगंसि नेरइयत्ताए उववज्जेजा ? समणे भगवं
महावीरे वागरेइ-उववज्जमाणे उववज्जेति वत्तव्वं सिया । अह भंते ! सीहे वग्घे
जहा उस्सप्पिणीउद्देयए जाव परस्सरे एए णं निस्सीला एवं चेव जाव वत्तव्वं
सिया, अह भंते ! ढंके कंके विलए मग्गुए सिखीए, एए णं निस्सीला० सेसं तं
चेव जाव वत्तव्वं सिया । सेवं भंते ! सेवं भंते ! त्ति जाव विहरइ ॥ ४५९ ॥
वारहमे सए अट्ठमो उद्देसो समत्तो ॥

कइविहा णं भंते ! देवा पण्णत्ता ? गोयमा ! पंचविहा देवा पण्णत्ता, तंजहा-
भवियदव्वदेवा १ नरदेवा २ धम्मदेवा ३ देवा(इ)हिदेवा ४ भावदेवा ५, से केण-
ट्ठेणं भंते ! एवं वुच्चइ भवियदव्वदेवा भवियदव्वदेवा ? गोयमा ! जे भविए पंचि-
दियतिरिक्खजोणिए वा मणुस्से वा देवेसु उववज्जित्तए से तेणट्ठेणं गोयमा !
एवं वुच्चइ भवियदव्वदेवा २, से केणट्ठेणं भंते ! एवं वुच्चइ नरदेवा नरदेवा ?
गोयमा ! जे इमे रायाणो चाउरंतचक्कवट्ठी उप्पन्नसमत्तचक्करयणप्पहाणा नवनिहि-
पइणो समिद्धकोसा वत्तीस रायवरसहस्साणुजायमग्गा सागरवरमेहलाहिवइणो
मणुस्सिंदा से तेणट्ठेणं जाव नरदेवा २, से केणट्ठेणं भंते ! एवं वुच्चइ धम्मदेवा
धम्मदेवा ? गोयमा ! जे इमे अणगारा भगवंतो इरियासमिया जाव गुत्तवंभ-
यारी से तेणट्ठेणं जाव धम्मदेवा २, से केणट्ठेणं भंते ! एवं वुच्चइ देवाहिदेवा
देवाहिदेवा ? गोयमा ! जे इमे अरिहंता भगवंतो उप्पन्नानाणदंसणधरा जाव
सव्वदरिसी से तेणट्ठेणं जाव देवाहिदेवा २, से केणट्ठेणं भंते ! एवं वुच्चइ-
भावदेवा भावदेवा ? गोयमा ! जे इमे भवणवइवाणमंतरजोइसियवेमाणिया देवा
देवगइनामगोयाइं कम्माइं वेदंति से तेणट्ठेणं जाव भावदेवा ॥ ४६० ॥
भवियदव्वदेवा णं भंते ! कओहिंतो उववज्जंति किं नेरइएहितो उववज्जंति
तिरिक्ख० मणुस्स० देवेहिंतो उववज्जंति ? गोयमा ! नेरइएहिंतो उववज्जंति तिरि०
मणु० देवेहिंतोवि उववज्जंति, भेओ जहा वक्कंतीए सव्वेसु उववाएयव्वा जाव अणु-
त्तरोववाइयत्ति, नवरं असंखेज्जवासाउयअकम्मभूमियअंतरदीवगसव्वट्ठसिद्धवज्जं जाव
अपराजियदेवेहिंतोवि उववज्जंति, णो सव्वट्ठसिद्धदेवेहितो उववज्जंति । नरदेवा णं
भंते ! कओहिंतो उववज्जंति किं नेरइए० पुच्छा, गोयमा ! नेरइएहिंतो उव-
वज्जंति नो तिरि० नो मणु० देवेहिंतोवि उववज्जंति, जइ नेरइएहिंतो उववज्जंति किं
रयणप्पभापुढविनेरइएहितो उववज्जंति जाव अहेसत्तमापुढविनेरइएहिंतो उववज्जंति ?

गोयमा ! रयणप्पभापुढविनेरइएहिंतो उववज्जंति नो सक्कर जाव नो अहेसत्तमा-
 पुढविनेरइएहिंतो उववज्जंति, जइ देवेहिंतो उववज्जंति किं भवणवासिदेवेहिंतो उव-
 वज्जंति वाणमंतरं जोइसियं वेमाणियदेवेहिंतो उववज्जंति ? गोयमा ! भवण-
 वासिदेवेहिंतोवि उववज्जंति वाणमंतर एवं सव्वदेवेसु उववाएयव्वा वक्कंतीभेएणं जाव
 सव्वट्ठसिद्धत्ति, धम्मदेवा णं भंते ! कओहिंतो उववज्जंति किं नेरइएहिंतो ? एवं
 वक्कंतीभेएणं सव्वेसु उववाएयव्वा जाव सव्वट्ठसिद्धत्ति, नवरं तमा अहेसत्तमाए
 तेउवाउअसंखेज्जवासाउयअकम्मभूमियअंतरदीवगवज्जेसु, देवाहिदेवा णं भंते !
 कओहिंतो उववज्जंति किं नेरइएहिंतो उववज्जंति पुच्छा, गोयमा ! नेरइएहिंतो
 उववज्जंति नो तिरिं नो मणुं देवेहिंतोवि उववज्जंति, जइ नेरइएहिंतो एवं तिसु
 पुढवीसु उववज्जंति सेसाओ खोडेयव्वाओ, जइ देवेहिंतो वेमाणिएसु सव्वेसु
 उववज्जंति जाव सव्वट्ठसिद्धत्ति, सेसा खोडेयव्वा, भावदेवा णं भंते ! कओहिंतो
 उववज्जंति ? एवं जहा वक्कंतीए भवणवासीणं उववाओ तहा भाणियव्वं ॥ ४६१ ॥
 भवियदव्वदेवाणं भंते ! केवइयं कालं ठिई पं ? गोयमा ! जहन्नेणं अंतोमुहुत्तं
 उक्कोसेणं तिन्नि पल्लिओवमाइं, नरदेवाणं पुच्छा, गोयमा ! जहन्नेणं सत्त वाससयाइं
 उक्कोसेणं चउरासीइ पुव्वसयसहस्साइं, धम्मदेवाणं भंते ! पुच्छा, गोयमा ! जह-
 न्नेणं अंतोमुहुत्तं उक्कोसेणं देसूणा पुव्वकोडी, देवाहिदेवाणं पुच्छा, गोयमा ! जहन्नेणं
 वावत्तरिं वासाइं उक्कोसेणं चउरासीइ पुव्वसयसहस्साइं, भावदेवाणं पुच्छा, गोयमा !
 जहन्नेणं दस वाससहस्साइं उक्कोसेणं तेत्तीसं सागरोवमाइं ॥ ४६२ ॥ भवियदव्व-
 देवा णं भंते ! किं एगत्तं पभू विउव्वित्तए पुहुत्तं पभू विउव्वित्तए ? गोयमा ! एग-
 त्तंपि पभू विउव्वित्तए पुहुत्तंपि पभू विउव्वित्तए, एगत्तं विउव्वमाणे एगिदियह्वं वा
 जाव पंचिदियह्वं वा पुहुत्तं विउव्वमाणे एगिदियह्वणि वा जाव पंचिदियह्वणि
 वा ताइं सखेज्जाणि वा असंखेज्जाणि वा संवद्धाणि वा असंवद्धाणि वा सरिसाणि
 वा असरिसाणि वा विउव्वंति विउव्वित्ता तओ पच्छा अप्पणो जहिच्छियाइं कज्जाइं
 करेति, एवं नरदेवावि, एवं धम्मदेवावि, देवाहिदेवाणं पुच्छा, गोयमा ! एगत्तंपि
 पभू विउव्वित्तए पुहुत्तंपि पभू विउव्वित्तए, नो चेव णं संपत्तीए विउव्विसु वा विउ-
 व्वित्ति वा विउव्विस्संति वा । भावदेवाणं पुच्छा, जहा भवियदव्वदेवा ॥ ४६३ ॥
 भवियदव्वदेवाणं भंते ! अणंतरं उव्वट्ठित्ता कहिं गच्छंति कहिं उववज्जंति किं
 नेरइएसु उववज्जंति जाव देवेसु उववज्जंति ? गोयमा ! नो नेरइएसु उववज्जंति नो
 तिरिं नो मणुं देवेसु उववज्जंति, जइ देवेसु उववज्जंति सव्वदेवेसु उववज्जंति
 जाव सव्वट्ठसिद्धत्ति । नरदेवा णं भंते ! अणंतरं उव्वट्ठित्ता पुच्छा, गोयमा ! नेरइ-

एसु उववज्जंति नो तिरि० नो मणु० णो देवेसु उववज्जंति, जइ नेरइएसु उववज्जंति०
सत्तसुवि पुढवीसु उववज्जंति । धम्मदेवा णं भंते ! अणंतरं उव्वट्ठिता पुच्छा, गोयमा !
नो नेरइएसु उववज्जंति नो तिरि० नो मणु० देवेसु उववज्जंति, जइ देवेसु उववज्जंति
कि भवणवासि० पुच्छा, गोयमा ! नो भवणवासिदेवेसु उववज्जंति नो वाणमंतरं०
नो जोइसिय० वेमाणियदेवेसु उववज्जंति, सव्वेसु वेमाणिएसु उववज्जंति जाव सव्व-
ट्ठसिद्धअणुत्तरोववाइएसु उववज्जंति, अत्थेगइया सिज्झंति जाव अंतं करेंति । देवाहि-
देवा णं भंते ! अणंतरं उव्वट्ठिता कहिं गच्छंति कहिं उववज्जंति ? गोयमा ! सिज्झंति
जाव अंतं करेंति । भावदेवा णं भंते ! अणंतरं उव्वट्ठिता पुच्छा, जहा वक्कंतीए
असुरकुमाराणं उव्वट्ठणा तहा भाणियव्वा ॥ भवियदव्वदेवे णं भंते ! भवियदव्व-
देवेति कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणं तिग्धि
पलिओवमाइं, एवं जहेव ठिई सच्चैव संचिट्ठणावि जाव भावदेवस्स, नवरं धम्मदेवस्स
जहण्णेणं एकं समयं उक्कोसेणं देसूणा पुव्वकोडी ॥ भवियदव्वदेवस्स णं भंते !
केवइयं कालं अंतरं होइ ? गोयमा ! जहण्णेणं दसवाससहस्साइं अतोमुहुत्तमब्भहियाइं
उक्कोसेणं अणंतं कालं वणस्सइकालो । नरदेवाणं पुच्छा, गोयमा ! जहन्नेणं साइरेणं
सागरोवमं उक्कोसेणं अणंतं कालं अवड्ढं पोग्गलपरियट्ठं देसूणं । धम्मदेवस्स णं
पुच्छा, गोयमा ! जहन्नेणं पलिओवमपुहुत्तं उक्कोसेणं अणंतं कालं जाव अवड्ढं
पोग्गलपरियट्ठं देसूणं । देवाहिदेवाणं पुच्छा, गोयमा ! नत्थि अंतरं । भावदेवस्स
णं पुच्छा, गोयमा ! जहन्नेणं अंतोमुहुत्तं उक्कोसेणं अणंतं कालं वणस्सइकालो ॥
एएसि णं भंते ! भवियदव्वदेवाणं नरदेवाणं जाव भावदेवाण य कयरे २ जाव
विसेसाहिया वा ? गोयमा ! सव्वत्थोवा नरदेवा, देवाहिदेवा संखेज्जगुणा, धम्मदेवा
संखेज्जगुणा, भवियदव्वदेवा असंखेज्जगुणा, भावदेवा असंखेज्जगुणा ॥ ४६४ ॥ एएसि
णं भंते ! भावदेवाणं भवणवासीणं वाणमंतराणं जोइसियाणं वेमाणियाणं सोहम्म-
गाणं जाव अच्चुयगाणं गेवेज्जगाणं अणुत्तरोववाइयाण य कयरे २ जाव विसेसाहिया
वा ? गोयमा ! सव्वत्थोवा अणुत्तरोववाइया भावदेवा, उवरिमगेवेज्जा भावदेवा
संखेज्जगुणा, मज्झिमगेवेज्जा संखेज्जगुणा, हेट्ठिमगेवेज्जा संखेज्जगुणा, अच्चुए कप्पे
देवा संखेज्जगुणा जाव आणयकप्पे भावदेवा संखेज्जगुणा एवं जहा जीवाभिगमे
तिविहे देवपुरिसे अप्पावहुयं जाव जोइसिया भावदेवा असंखेज्जगुणा । सेवं भंते !
२ ति ॥ ४६५ ॥ वारहमस्स सयस्स नवमो उद्देसो समत्तो ॥

कइविहा णं भंते ! आया पणत्ता ? गोयमा ! अट्ठविहा आया पणत्ता, तंजहा-
दवियाया कसायाया जोगाया उवओगाया णाणाया दंसणाया चरित्ताया वीरियाया ॥

जस्स णं भंते ! दवियाया तस्स कसायाया जस्स कसायाया तस्स दवियाया ? गोयमा ! जस्स दवियाया तस्स कसायाया सिय अत्थि सिय नत्थि, जस्स पुण कसायाया तस्स दवियाया नियमं अत्थि । जस्स णं भंते ! दवियाया तस्स जोगाया ? एवं जहा दवियाया कसायाया भणिया तहा दवियाया जोगायावि भाणियव्वा । जस्स णं भंते ! दवियाया तस्स उवओगाया एवं सव्वत्थ पुच्छा भाणियव्वा, गोयमा ! जस्स दवियाया तस्स उवओगाया नियमं अत्थि, जस्सवि उवओगाया तस्सवि दवियाया नियमं अत्थि, जस्स दवियाया तस्स णाणाया भयणाए, जस्स पुण णाणाया तस्स दवियाया नियमं अत्थि, जस्स दवियाया तस्स दंसणाया नियमं अत्थि, जस्सवि दंसणाया तस्स दवियाया नियमं अत्थि, जस्स दवियाया तस्स चरित्ताया भयणाए, जस्स पुण चरित्ताया तस्स दवियाया नियमं अत्थि, एवं वीरियायाएवि समं । जस्स णं भंते ! कसायाया तस्स जोगाया पुच्छा, गोयमा ! जस्स कसायाया तस्स जोगाया नियमं अत्थि, जस्स पुण जोगाया तस्स कसायाया सिय अत्थि सिय नत्थि, एवं उवओगायाएवि समं कसायाया नेयव्वा, कसायाया य णाणाया य परोप्परं दोवि भइयव्वाओ, जहा कसायाया य उवओगाया य तहा कसायाया य दंसणाया य कसायाया य चरित्ताया य दोवि परोप्परं भइयव्वाओ, जहा कसायाया य जोगाया य तहा कसायाया य वीरियाया य भाणियव्वाओ, एवं जहा कसायायाए वत्तव्वया भणिया तहा जोगायाएवि उवरिमाहिं समं भाणियव्वा । जहा दवियायाए वत्तव्वया भणिया तहा उवओगायाएवि उवरिमाहिं समं भाणियव्वा । जस्स नाणाया तस्स दंसणाया नियमं अत्थि, जस्स पुण दंसणाया तस्स णाणाया भयणाए, जस्स नाणाया तस्स चरित्ताया सिय अत्थि सिय नत्थि, जस्स पुण चरित्ताया तस्स नाणाया नियमं अत्थि, णाणाया वीरियाया दोवि परोप्परं भयणाए । जस्स दंसणाया तस्स उवरिमाओ दोवि भयणाए, जस्स पुण ताओ तस्स दंसणाया नियमं अत्थि । जस्स चरित्ताया तस्स वीरियाया नियमं अत्थि, जस्स पुण वीरियाया तस्स चरित्ताया सिय अत्थि सिय नत्थि ॥ एयासि णं भंते ! दवियायाणं कसायायाणं जाव वीरियायाण य कयरे २ जाव विसेसाहिया वा ? गोयमा ! सव्वत्थोवाओ चरित्तायाओ, नाणायाओ अणंतगुणाओ, कसायायाओ अणंतगुणाओ, जोगायाओ विसेसाहियाओ, वीरियायाओ विसेसाहियाओ; उवओगदवियदंसणायाओ तिन्निवि तुल्लाओ विसेसाहियाओ ॥ ४६६ ॥ आया भंते ! नाणे अन्नाणे ? गोयमा ! आया सिय नाणे सिय अन्नाणे, णाणे पुण नियमं आया ॥ आया भंते ! नेरइयाणं नाणे अन्ने नेरइयाणं नाणे ? गोयमा ! आया नेरइयाणं

सिय नाणे सिय अन्नाणे, नाणे पुण से निर्यमं आया, एवं जाव थणियकुमाराणं, आया भंते ! पुढविकाइयाणं अन्नाणे अन्ने पुढविकाइयाणं अन्नाणे ? गोयमा ! आया पुढविकाइयाणं नियमं अन्नाणे अन्नाणेवि नियमं आया, एवं जाव वणस्सइ-
काइयाणं, वेइंदियतेइंदिय जाव वेमाणियाणं जहा नेरइयाणं । आया भंते ! दंसणे अन्ने दंसणे ? गोयमा ! आया नियमं दंसणे दंसणेवि नियमं आया ।
आया भंते ! नेरइयाणं दंसणे अण्णे नेरइयाणं दंसणे ? गोयमा ! आया नेरइयाणं
नियमं दंसणे दंसणेवि से नियमं आया, एवं जाव वेमाणियाणं निरंतरं दंडओ ॥४६७॥
आया भंते ! रयणप्पभापुढवी अन्ना रयणप्पभापुढवी ? गोयमा ! रयणप्पभापुढवी
सिय आया सिय नो आया सिय अवत्तव्वं आयाइ य नो आयाइ य, से केणट्ठेणं
भंते ! एवं चुच्चइ रयणप्पभापुढवी सिय आया सिय नो आया सिय अवत्तव्वं आयाइ य
नो आयाइ य ? गोयमा ! अप्पणो आइट्ठे आया, परस्स आइट्ठे नो आया, तदुभयस्स
आइट्ठे अवत्तव्वं रयणप्पभापुढवी आयाइ य नो आयाइ य, से तेणट्ठेणं तं चेव जाव
नो आयाइ य । आया भंते ! सक्करप्पभापुढवी जहा रयणप्पभापुढवी तहा सक्करप्प-
भा(ए)वि एवं जाव अहे सत्तमा(ए) । आया भंते ! सोहम्मकप्पे पुच्छा, गोयमा !
सोहम्मे कप्पे सिय आया सिय नो आया जाव नो आयाइ य, से केणट्ठेणं भंते ! जाव
नो आयाइ य ? गोयमा ! अप्पणो आइट्ठे आया, परस्स आइट्ठे नो आया, तदुभयस्स
आइट्ठे अवत्तव्वं आयाइ य नो आयाइ य, से तेणट्ठेणं गोयमा ! तं चेव जाव नो
आयाइ य, एवं जाव अच्चुए कप्पे । आया भंते ! गेविज्जविमाणे अन्ने गेविज्जविमाणे ?
एवं जहा रयणप्पभापुढवी तहेव, एवं अणुत्तरविमाणावि, एवं ईसिपव्भारावि । आया
भंते ! परमाणुपोग्गले अन्ने परमाणुपोग्गले ? एवं जहा सोहम्मे कप्पे तहा परमाणु-
पोग्गलेवि भाणियव्वे ॥ आया भंते ! दुपएसिए खंधे अन्ने दुपएसिए खंधे ? गोयमा !
दुपएसिए खंधे सिय आया १ सिय नो आया २ सिय अवत्तव्वं आयाइ य नो
आयाइ य ३ सिय आया य नो आया य ४ सिय आया य अवत्तव्वं आयाइ य नो
आयाइ य ५ सिय नो आया य अवत्तव्वं आयाइ य नो आयाइ य ६, से केणट्ठेणं
भंते ! एवं तं चेव जाव नो आया य अवत्तव्वं आयाइ य नो आयाइ य ? गोयमा !
अप्पणो आइट्ठे आया १ परस्स आइट्ठे नो आया २ तदुभयस्स आइट्ठे अवत्तव्वं
दुपएसिए खंधे आयाइ य नो आयाइ य ३ देसे आइट्ठे सव्भावपज्जवे देसे आइट्ठे
असव्भावपज्जवे दुप्पएसिए खंधे आया य नो आया य ४ देसे आइट्ठे सव्भाव-
पज्जवे देसे आइट्ठे तदुभयपज्जवे दुपएसिए खंधे आया य अवत्तव्वं आयाइ य नो
आयाइ य ५ देसे आइट्ठे असव्भावपज्जवे देसे आइट्ठे तदुभयपज्जवे दुपएसिए खंधे

नो आया य अवत्तव्वं आयाइ य नो आयाइ य ६, से तेणट्ठेणं तं चेव जाय नो
 आयाइ य ॥ आया भंते ! तिपएसिए खंधे अन्ने तिपएसिए खंधे ? गोयमा ! तिप-
 एसिए खंधे सिय आया १ सिय नो आया २ निय अवत्तव्वं आयाइ य नो आयाइ
 य ३ सिय आया य नो आया य ४ सिय आया य नो आयाओ य ५ निय
 आयाओ य नो आया य ६ सिय आया य अवत्तव्वं आयाइ य नो आयाइ य ७
 सिय आया य अवत्तव्वाइं आया(इ)ओ य नो आयाओ य ८ निय आयाओ य
 अवत्तव्व आयाइ य नो आयाइ य ९ सिय नो आया य अवत्तव्वं आयाइ य नो
 आयाइ य १० सिय(नो) आया य अवत्तव्वाइं आयाओ य नो आयाओ य ११ निय
 नो आयाओ य अवत्तव्वं आयाइ य नो आयाइ य १२ सिय आया य नो आया
 य अवत्तव्वं आयाइ य नो आयाइ य १३, से केणट्ठेणं भंते ! एवं वुचइ तिपएसिए
 खंधे सिय आया एवं चेव उच्चारयेव्वं जाव सिय आया य नो आया य अवत्तव्वं
 आयाइ य नो आयाइ य ? गोयमा ! अप्पणो आइट्ठे आया १ परस आइट्ठे नो
 आया २ तदुभयस्स आइट्ठे अवत्तव्वं आयाइ य नो आयाइ य ३ देसे आइट्ठे
 सव्भावपज्जवे देसे आइट्ठे असव्भावपज्जवे तिपएसिए खंधे आया य नो आया य
 ४ देसे आइट्ठे सव्भावपज्जवे देसा आइट्ठा असव्भावपज्जवा तिपएसिए खंधे आया
 य नो आयाओ य ५ देसा आइट्ठा सव्भावपज्जवा देसे आइट्ठे असव्भावपज्जवे
 तिपएसिए खंधे आयाओ य नो आया य ६ देसे आइट्ठे सव्भावपज्जवे देसे आइट्ठे
 तदुभयपज्जवे तिपएसिए खंधे आया य अवत्तव्वं आयाइ य नो आयाइ य ७ देसे
 आइट्ठे सव्भावपज्जवे देसा आइट्ठा तदुभयपज्जवा तिपएसिए खंधे आया य अवत्त-
 व्वाइं आयाओ य नो आयाओ य ८ देसा आइट्ठा सव्भावपज्जवा देसे आइट्ठे तदु-
 भयपज्जवे तिपएसिए खंधे आयाओ य अवत्तव्वं आयाइ य नो आयाइ य ९, ए
 तन्नि भंगा, देसे आइट्ठे असव्भावपज्जवे देसे आइट्ठे तदुभयपज्जवे तिपएसिए खंधे
 नो आया य अवत्तव्वं आयाइ य नो आयाइ य १० देसे आइट्ठे असव्भावपज्जवे
 देसा आइट्ठा तदुभयपज्जवा तिपएसिए खंधे नो आया य अवत्तव्वाइं आयाओ य
 नो आयाओ य ११ देसा आइट्ठा असव्भावपज्जवा देसे आइट्ठे तदुभयपज्जवे तिप-
 एसिए खंधे नो आयाओ य अवत्तव्वं आयाइ य नो आयाइ य १२ देसे आइट्ठे
 सव्भावपज्जवे देसे आइट्ठे असव्भावपज्जवे देसे आइट्ठे तदुभयपज्जवे तिपएसिए
 खंधे आया य नो आया य अवत्तव्वं आयाइ य नो आयाइ य १३, से तेणट्ठेणं
 गोयमा ! एवं वुच्चइ तिपएसिए खंधे सिय आया तं चेव जाव नो आयाइ य ॥
 आया भंते ! चउप्पएसिए खंधे अन्ने० पुच्छा, गोयमा ! चउप्पएसिए खंधे सिय

आया १ सिय नो आया २ सिय अवत्तव्वं आयाइ य नो आयाइ य ३ सिय
 आया य नो आया य ४ सिय आया य अवत्तव्वं ४ सिय नो आया य अवत्तव्वं
 ४ सिय आया य नो आया य अवत्तव्वं आयाइ य नो आयाइ य १६ सिय आया
 य नो आया य अवत्तव्वं आयाओ य नो आयाओ य १७ सिय आया य नो
 आयाओ य अवत्तव्वं आयाइ य नो आयाइ य १८ सिय आयाओ य नो आया
 य अवत्तव्वं आयाइ य नो आयाइ य १९ । से केणट्टेणं भंते ! एवं वुच्चइ चउप्प-
 एसिए खंधे सिय आया य नो आया य अवत्तव्वं तं चेव अट्टे पडिउच्चारैयव्वं,
 गोयमा ! अप्पणो आइट्टे आया १ परस्स आइट्टे नो आया २ तदुभयस्स आइट्टे
 अवत्तव्वं आयाइ य नो आयाइ य ३ देसे आइट्टे सव्भावपज्जवे देसे आइट्टे अस-
 व्भावपज्जवे चउभंगो, सव्भावपज्जवेणं तदुभएण य चउभंगो, असव्भावेणं तदु-
 भएण य चउभंगो, देसे आइट्टे सव्भावपज्जवे देसे आइट्टे असव्भावपज्जवे देसे
 आइट्टे तदुभयपज्जवे चउप्पएसिए खंधे आया य नो आया य अवत्तव्वं आयाइ य
 नो आयाइ य, देसे आइट्टे सव्भावपज्जवे देसे आइट्टे असव्भावपज्जवे देसा आइट्टा
 तदुभयपज्जवा चउप्पएसिए खंधे आया य नो आया य अवत्तव्वं आयाओ
 य नो आयाओ य १७ देसे आइट्टे सव्भावपज्जवे देसा आइट्टा असव्भावपज्जवा
 देसे आइट्टे तदुभयपज्जवे चउप्पएसिए खंधे आया य नो आयाओ य अवत्तव्वं
 आयाइ य नो आयाइ य १८ देसा आइट्टा सव्भावपज्जवा देसे आइट्टे असव्भावपज्जवे
 देसे आइट्टे तदुभयपज्जवे चउप्पएसिए खंधे आयाओ य नो आया य अवत्तव्वं
 आयाइ य नो आयाइ य १९, से तेणट्टेणं गोयमा ! एवं वुच्चइ चउप्पएसिए खंधे सिय
 आया सिय नो आया-सिय अवत्तव्वं निक्खेवे ते चेव भंगा उच्चारैयव्वं जाव नो
 आयाइ य ॥ आया भंते ! पंचपएसिए खंधे अन्ने पंचपएसिए खंधे ? गोयमा !
 पंचपएसिए खंधे सिय आया १ सिय नो आया २ सिय अवत्तव्वं आयाइ य नो
 आयाइ य ३ सिय आया य नो आया य ४ सिय अवत्तव्वं (४) आया य नो आया य
 ४ (नो आया य अवत्तव्वेण य ४) तियगसंजोगे एक्को ण पडइ, से केणट्टेणं भंते !
 तं चेव पडिउच्चारैयव्वं ? गोयमा ! अप्पणो आइट्टे आया १ परस्स आइट्टे नो आया
 २ तदुभयस्स आइट्टे अवत्तव्वं ३ देसे आइट्टे सव्भावपज्जवे देसे आइट्टे असव्भाव-
 पज्जवे एवं दुयगसंजोगे सव्वे पडंति तियगसंजोगे एक्को ण पडइ । छप्पएसियस्स
 सव्वे पडंति, जहा छप्पएसिए एवं जाव अणंतपएसिए । सेवं भंते ! सेवं भंते ! त्ति
 जाव विहरइ ॥ ४६८ ॥ दसमो उद्देशो समत्तो, वारसमं सयं समत्तं ॥
 पुढवी १ देव २ मणंतर ३ पुढवी ४ आहारमेव ५ उव्वाए ६ । भासा ७

कम्म ८ अणगारे केयाघडिया ९ समुग्घाए १० ॥ रायगिहे जाव एवं वयासी-कड
णं भंते ! पुढवीओ पन्नत्ताओ ? गोयमा ! सत्त पुढवीओ पन्नत्ताओ, तंजहा-रयण-
प्पभा जाव अहेसत्तमा । इमीसे णं भंते ! रयणप्पभाए पुढवीए केवइया निरया-
वाससयसहस्सा पण्णत्ता ? गोयमा ! तीसं निरयावाससयसहस्सा पन्नत्ता, ते णं
भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि असंखेज्ज-
वित्थडावि, इमीसे णं भंते ! रयणप्पभाए पुढवीए तीसाए निरयावाससयसहस्सेसु
संखेज्जवित्थडेसु नरएसु एगसमएणं केवइया नेरइया उववज्जंति १ ? केवइया काउ-
लेस्सा उववज्जंति २ ? केवइया कण्हपक्खिया उववज्जंति ३ ? केवइया सुक्कपक्खिया
उववज्जंति ४ ? केवइया सत्ती उववज्जंति ५ ? केवइया असत्ती उववज्जंति ६ ? केवइया
भवसिद्धिया जीवा उववज्जंति ७ ? केवइया अभवसिद्धिया जीवा उववज्जंति ८ ?
केवइया आभिणिवोहियनाणी उववज्जंति ९ ? केवइया सुयनाणी उववज्जंति १० ?
केवइया ओहिनाणी उववज्जंति ११ ? केवइया मइअन्नाणी उववज्जंति १२ ? केवइया
सुयअन्नाणी उववज्जंति १३ ? केवइया विभंगनाणी उववज्जंति १४ ? केवइया
चक्खुदंसणी उववज्जंति १५ ? केवइया अचक्खुदंसणी उववज्जंति १६ ? केवइया
ओहिदंसणी उववज्जंति १७ ? केवइया आहारसन्नोवउत्ता उववज्जंति १८ ? केवइया
भयसन्नोवउत्ता उववज्जंति १९ ? केवइया मेहुणसन्नोवउत्ता उववज्जंति २० ? केवइया
परिग्गहसन्नोवउत्ता उववज्जंति २१ ? केवइया इत्थिवेयगा उववज्जंति २२ ? केवइया
पुरिसवेयगा उववज्जंति २३ ? केवइया नपुंसगवेयगा उववज्जंति २४ ? केवइया
क्रोहकसाई उववज्जंति २५ जाव केवइया लोभकसाई उववज्जंति २६ ? केवइया
सोइदियउवउत्ता उववज्जंति २७ जाव केवइया फासिंदियोवउत्ता उववज्जंति २८ ?
केवइया नोइदियोवउत्ता उववज्जंति २९ ? केवइया मणजोगी उववज्जंति ३० ? केव-
इया वइजोगी उववज्जंति ३१ ? केवइया कायजोगी उववज्जंति ३२ ? केवइया सागा-
रोवउत्ता उववज्जंति ३३ ? केवइया अणागारोवउत्ता उववज्जंति ३४ ? गोयमा !
इमीसे णं रयणप्पभाए पुढवीए तीसाए निरयावाससयसहस्सेसु संखेज्जवित्थडेसु
नरएसु जहन्नेणं एक्को वा दो वा तिन्नि वा उक्कोसेणं संखेज्जा नेरइया उववज्जंति,
जहन्नेण एक्को वा दो वा तिन्नि वा उक्कोसेणं संखेज्जा काउलेस्सा उववज्जंति, जहन्नेणं
एक्को वा दो वा तिन्नि वा उक्कोसेणं संखेज्जा कण्हपक्खिया उववज्जंति, एवं सुक्कपक्खि-
यावि, एवं सत्तीवि एवं असत्तीवि, एवं भवसिद्धिया एवं अभवसिद्धिया, आभिणिवोहि-
यनाणी सुयनाणी ओहिनाणी मइअन्नाणी सुयअन्नाणी विभंगनाणी एवं चैव, चक्खु-
दंसणी ण उववज्जंति, जहन्नेणं एक्को वा दो वा तिन्नि वा उक्कोसेणं संखेज्जा अचक्खु-

दंसणी उववज्जंति, एवं ओहिदंसणीवि, एवं आहारसन्नोवउत्तावि जाव परिग्गहसन्नोव-
उत्तावि, इत्थीवेयगा न उववज्जंति पुरिसवेयगावि न उववज्जंति, जहन्नेणं एक्को वा दो वा
तिन्नि वा उक्कोसेणं संखेज्जा नपुंसगवेयगा उववज्जंति, एवं कोहकसाई जाव लोभकसाई,
सोइंदियउवउत्ता न उववज्जंति एवं जाव फासिंदिओवउत्ता न उववज्जंति, जहन्नेणं एक्को
वा दो वा तिन्नि वा उक्कोसेणं संखेज्जा नोइंदिओवउत्ता उववज्जंति, मणजोगी
ण उववज्जंति, एवं वइजोगीवि, जहन्नेणं एक्को वा दो वा तिन्नि वा उक्कोसेणं संखेज्जा
कायजोगी उववज्जंति, एवं सागारोवउत्तावि एवं अणागारोवउत्तावि ॥ इमीसे णं
भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु
एगसमएणं केवइया नेरइया उववट्ठंति, केवइया काउलेस्सा उववट्ठंति जाव
केवइया अणागारोवउत्ता उव्वट्ठंति ? गोयमा ! इमीसे णं रयणप्पभाए पुढवीए
तीसाए निरयावाससयसहस्सेसु संखेज्जवित्थडेसु नरएसु एगसमएणं जहन्नेणं एक्को
वा दो वा तिन्नि वा उक्कोसेणं संखेज्जा नेरइया उववट्ठंति, एवं जाव सन्नी, असन्नी
ण उव्वट्ठंति, जहन्नेणं एक्को वा दो वा तिन्नि वा उक्कोसेणं संखेज्जा भवसिद्धिया
उव्वट्ठंति एवं जाव सुयअन्नाणी विभंगनाणी ण उववट्ठंति, चक्खुदंसणी ण उव्वट्ठंति,
जहन्नेणं एक्को वा दो वा तिन्नि वा उक्कोसेणं संखेज्जा अचक्खुदंसणी उव्वट्ठंति, एवं
जाव लोभकसाई, सोइंदियउवउत्ता ण उव्वट्ठंति एवं जाव फासिंदियोवउत्ता न
उव्वट्ठंति, जहन्नेणं एक्को वा दो वा तिन्नि वा उक्कोसेणं संखेज्जा नोइंदियोवउत्ता
उव्वट्ठंति, मणजोगी न उव्वट्ठंति एवं वइजोगीवि, जहन्नेणं एक्को वा दो वा तिन्नि वा
उक्कोसेणं संखेज्जा कायजोगी उव्वट्ठंति, एवं सागारोवउत्तावि अणागारोवउत्तावि ॥ इमीसे
णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु
केवइया नेरइया पन्नत्ता ? केवइया काउलेस्सा प० जाव केवइया अणागारोवउत्ता
पन्नत्ता ? केवइया अणंतरोववन्नगा पन्नत्ता १ ? केवइया परंपरोववन्नगा पन्नत्ता २ ?
केवइया अणंतरोगाढा पन्नत्ता ३ ? केवइया परंपरोगाढा प० ४ ? केवइया अणंत-
राहारा प० ५ ? केवइया परंपराहारा प० ६ ? केवइया अणंतरपन्नत्ता प० ७ ? केव-
इया परंपरपन्नत्ता पन्नत्ता ८ ? केवइया चरिमा प० ९ ? केवइया अचरिमा प०
१० ? गोयमा ! इमीसे रयणप्पभाए पुढवीए तीसाए निरयावाससयसहस्सेसु संखेज्ज-
वित्थडेसु नरएसु संखेज्जा नेरइया प०, संखेज्जा काउलेस्सा प०, एवं जाव संखेज्जा सन्नी
प०, असन्नी सिय-अत्थि सिय-नत्थि जइ अत्थि जहन्नेणं एक्को वा दो वा तिन्नि वा
उक्कोसेणं संखेज्जा प०, संखेज्जा भवसिद्धिया प०, एवं जाव संखेज्जा परिग्गहसन्नोवउत्ता
प०, इत्थीवेयगा नत्थि पुरिसवेयगा नत्थि, संखेज्जा नपुंसगवेयगा प०, एवं कोहकसा-

ईवि, माणकसाई जहा असन्नी, एवं जाव लोभकसाई, संखेज्जा सोईंदियोवउत्ता प०, एवं जाव फासिंदियोवउत्ता, नोईंदियोवउत्ता जहा असन्नी, संखेज्जा मणजोगी प०, एवं जाव अणागारोवउत्ता, अणंतरोववन्नगा सिय अत्थि सिय नत्थि जइ अत्थि जहा असन्नी, संखेज्जा परंपरोववन्नगा प०, एवं जहा अणंतरोववन्नगा तहा अणंतरोगाढगा अणंतराहारगा अणंतरपज्जत्तगा चरिमा, परंपरोगाढगा जाव अचरिमा जहा परंपरोववन्नगा ॥ इमीसे णं भंते ! रयणप्पभाए पुढवीए तीसाए निरयावाससयसहस्सेसु असंखेज्ज-वित्थडेसु नरएसु एगसमएणं केवइया नेरइया उववज्जंति जाव केवइया अणागारोवउत्ता उववज्जंति ? गोयमा ! इमीसे णं रयणप्पभाए पुढवीए तीसाए निरयावाससयसहरसेसु असंखेज्जवित्थडेसु नरएसु एगसमएणं जहण्णेणं एक्को वा दो वा तिन्नि वा उक्कोसेणं असंखेज्जा नेरइया उववज्जंति, एवं जहेव संखेज्जवित्थडेसु तिन्नि गमगा तहा असंखेज्जवित्थडेसुवि तिन्नि गमगा, नवरं असंखेज्जा भाणियव्वा सेसं तं चेव जाव असंखेज्जा अचरिमा प०, नाणत्तं लेस्सासु लेसाओ जहा पढमसए नवरं संखेज्जवित्थडेसुवि असंखेज्जवित्थडेसुवि ओहिनाणी ओहिदंसणी य संखेज्जा उव्वट्ठावेयव्वा, सेसं तं चेव ॥ सक्करप्पभाए णं भंते ! पुढवीए केवइया निरयावास० पुच्छा, गोयमा ! पणवीसं निरयावाससयसहस्सा पणत्ता, ते णं भंते ! किं संखेज्जवित्थडा असंखेज्जवित्थडा ? एवं जहा रयणप्पभाए तहां सक्करप्पभाएवि, नवरं असन्नी तिसुवि गमएसु न भन्नइ, सेसं तं चेव । वालुयप्पभाए णं पुच्छा, गोयमा ! पन्नरसं निरयावाससयसहरसा प०, सेसं जहां सक्करप्पभाए नाणत्तं लेसासु लेसाओ जहा पढमसए ॥ पंकप्पभाए णं पुच्छा, गोयमा ! दंस निरयावाससयसहस्सा प०, एवं जहां सक्करप्पभाए नवरं ओहिनाणी ओहिदंसणी य न उव्वट्ठंति, सेसं तं चेव ॥ धूमप्पभाए णं पुच्छा, गोयमा ! तिन्नि निरयावाससयसहस्सा एवं जहा पंकप्पभाए ॥ तमाए णं भंते ! पुढवीए केवइया निरयावास० पुच्छा, गोयमा ! एगे पंचूणे निरयावाससयसहस्से पणत्ते, सेसं जहा पंकप्पभाए ॥ अहेसत्तमाए णं भंते ! पुढवीए कइ अणुत्तरा महइमहालया महानिरया पन्नत्ता ? गोयमा ! पंच अणुत्तरा जाव अपइट्ठाणे, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडे य असंखेज्जवित्थडा य, अहेसत्तमाए णं भंते ! पुढवीए पंचसु अणुत्तरेसु महइमहालया जाव महानिरएसु संखेज्जवित्थडे नरए एगसमएणं केवइया उववज्जंति ? एवं जहां पंकप्पभाए नवरं तिसु नाणेसु न उववज्जंति न उव्वट्ठंति, पन्नत्तेसु तहेव अत्थि, एवं असंखेज्जवित्थडेसुवि नवरं असंखेज्जा भाणियव्वा ॥ ४६९ ॥ इमीसे णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु किं सम्मदिट्ठी नेरइया उववज्जंति मिच्छ-

दिट्ठी नेरइया उववज्जंति सम्मामिच्छदिट्ठी नेरइया उववज्जंति ? गोयमा ! सम्मदिट्ठीवि नेरइया उववज्जंति, मिच्छादिट्ठीवि नेरइया उववज्जंति, नो सम्मामिच्छदिट्ठी नेरइया उववज्जंति । इमीसे णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु किं सम्मदिट्ठी नेरइया उववज्जंति ? एवं चेव । इमीसे णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडा नरगा किं सम्मदिट्ठीहिं नेरइएहिं अविरहिया मिच्छादिट्ठीहिं नेरइएहिं अविरहिया सम्मामिच्छदिट्ठीहिं नेरइएहिं अविरहिया ? गोयमा ! सम्मदिट्ठीहिवि नेरइएहिं अविरहिया मिच्छादिट्ठीहिवि नेरइएहिं अविरहिया, सम्मामिच्छादिट्ठीहिं नेरइएहिं अविरहिया विरहिया वा, एवं असंखेज्जवित्थडेसुवि तिन्नि गमगा भाणियंवा, एवं सक्करप्पभाएवि, एवं जाव तमाएवि । अहेसत्तमाए णं भंते ! पुढवीए पंचसु अणुत्तरेसु जाव संखेज्जवित्थडे नरए किं सम्मदिट्ठी नेरइया पुच्छा, गोयमा ! सम्मदिट्ठी नेरइया न उववज्जंति, मिच्छादिट्ठी नेरइया उववज्जंति, सम्मामिच्छदिट्ठी नेरइया न उववज्जंति, एवं उववज्जंतिवि, अविरहिए जहेव रयणप्पभाए, एवं असंखेज्जवित्थडेसुवि तिन्नि गमगा ॥ ४७० ॥ से नूणं भंते ! कण्हलेस्से नीललेस्से जाव सुक्कलेस्से भवित्ता कण्हलेस्सेसु नेरइएसु उववज्जंति ? हंता गोयमा ! कण्हलेस्से जाव उववज्जंति, से केणट्ठेणं भंते ! एवं वुच्चइ कण्हलेस्से जाव उववज्जंति ? गोयमा ! लेस्सट्ठानेसु संकिलिस्समाणेसु २ कण्हलेस्सं परिणमइ २ ता कण्हलेस्सेसु नेरइएसु उववज्जंति, से तेणट्ठेणं जाव उववज्जंति । से नूणं भंते ! कण्हलेस्से जाव सुक्कलेस्से भवित्ता नीललेस्सेसु नेरइएसु उववज्जंति ? हंता गोयमा ! जाव उववज्जंति, से केणट्ठेणं जाव उववज्जंति ? गोयमा ! लेस्सट्ठानेसु संकिलिस्समाणेसु वा विसुज्जमाणेसु नीललेस्सं परिणमइ २ ता नीललेस्सेसु नेरइएसु उववज्जंति, से तेणट्ठेणं गोयमा ! जाव उववज्जंति, से नूणं भंते ! कण्हलेस्से नीललेस्से जाव भवित्ता काउलेस्सेसु नेरइएसु उववज्जंति ? एवं जहा नीललेस्साए तहा काउलेस्सा(ए)वि भाणियंवा जाव से तेणट्ठेणं जाव उववज्जंति । सेवं भंते ! सेवं भंते ! ति ॥ ४७१ ॥ तेरहमे सए पढमो उद्देसो समत्तो ॥

कइविहा णं भंते ! देवा पण्णत्ता ? गोयमा ! चउव्विहा देवा पण्णत्ता, तंजहा-भवणवासी वाणमंतरा जोइसिया वेमाणिया । भवणवासी णं भंते ! देवा कइविहा पण्णत्ता ? गोयमा ! दसविहा पण्णत्ता, तंजहा-असुरकुमारा एवं भेओ जहा विइयसए देवुद्देसए जाव अपराजिया सव्वट्ठसिद्धगा । केवइयां णं भंते ! असुरकुमारावाससयसहस्सा पण्णत्ता ? गोयमा ! चोसट्ठि असुरकुमारावाससयसहस्सा पण्णत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि

असंखेज्जवित्थडावि, चोसट्ठीए णं भंते ! असुरकुमारावाससयसहस्सेसु संखेज्जवित्थडेसु असुरकुमारावासेसु एगसमएणं केवइया असुरकुमारा उववज्जंति केवइया तेउलेसा उववज्जंति केवइया कण्हपक्खिया उववज्जंति एवं जहा रयणप्पभाए तहेव पुच्छा, तहेव वागरणं, नवरं दोहिं धेदेहिं उववज्जंति, नपुंसगवेयगा न उववज्जंति, सेसं तं चेव, उव्वट्ठंतगावि तहेव नवरं असत्ती उव्वट्ठंति, ओहिनाणी ओहिदंसणी य ण उव्वट्ठंति, सेसं तं चेव, पन्नत्तएसु तहेव नवरं संखेज्जगा इत्थिवेदगा पण्णत्ता, एवं पुरिसवेदगावि, नपुंसगवेदगा नत्थि, कोहकसाई सिय अत्थि सिय नत्थि जइ अत्थि जहण्णेणं एक्को वा दो वा तिन्नि वा उक्कोसेणं संखेज्जा पण्णत्ता, एवं माण माया संखेज्जा लोभकसाई पण्णत्ता, सेसं तं चेव तिसुवि गमएसु संखेज्जवित्थडेसु चत्तारि लेस्साओ भाणियव्वाओ, एवं असंखेज्जवित्थडेसुवि नवरं तिसुवि गमएसु असंखेज्जा भाणियव्वा जाव असंखेज्जा अचरिमा पण्णत्ता । केवइया णं भंते ! नागकुमारावास० एवं जाव थणियकुमारावास नवरं जत्थ जत्तिया भवणा ॥ केवइया णं भंते ! वाणमंतरावाससयसहस्सा पन्नत्ता ? गोयमा ! असंखेज्जा वाणमंतरावाससयसहस्सा पन्नत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडा नो असंखेज्जवित्थडा, संखेज्जेसु णं भंते ! वाणमंतरावाससयसहस्सेसु एगसमएणं केवइया वाणमंतरा उववज्जंति ? एवं जहा असुरकुमाराणं संखेज्जवित्थडेसु तिन्नि गमगा तहेव भाणियव्वा वाणमंतराणवि तिन्नि गमगा । केवइया णं भंते ! जोइसियविमाणावाससयसहस्सा पण्णत्ता ? गोयमा ! असंखेज्जा जोइसियविमाणावाससयसहस्सा पण्णत्ता, ते णं भंते ! किं संखेज्जवित्थडा० ? एवं जहा वाणमंतराण तहा जोइसियाणवि तिन्नि गमगा भाणियव्वा नवरं एगा तेउलेस्सा, उववज्जंतेसु पन्नत्तेसु य असत्ती नत्थि, सेसं तं चेव ॥ सोहम्मे णं भंते ! कप्पे केवइया विमाणावाससयसहस्सा पन्नत्ता ? गोयमा ! बत्तीसं विमाणावाससयसहस्सा पण्णत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि असंखेज्जवित्थडावि, सोहम्मे णं भंते ! कप्पे बत्तीसाए विमाणावाससयसहस्सेसु संखेज्जवित्थडेसु विमाणेसु एगसमएणं केवइया सोहम्मगा देवा उववज्जंति, केवइया तेउलेसा उववज्जंति ? एवं जहा जोइसियाणं तिन्नि गमगा तहेव तिन्नि गमगा भाणियव्वा नवरं तिसुवि संखेज्जा भाणियव्वा, ओहिनाणी ओहिदंसणी य चयावेयव्वा, सेसं तं चेव । असंखेज्जवित्थडेसु एवं चेव तिन्नि गमगा नवरं तिसुवि गमएसु असंखेज्जा भाणियव्वा, ओहिनाणी य ओहिदंसणी य संखेज्जा चयंति, सेसं तं चेव, एवं जहा सोहम्मे वत्तव्वया भणिया तहा ईसाणेवि छ गमगा भाणियव्वा, सणंकुमारेवि एवं

चेव नवरं इत्थीवेयगा न उववज्जंति पन्नत्तेसु य न भण्णंति, असन्नी तिसुवि गमएसु न भण्णंति, सेसं तं चेव, एवं जाव सहस्सारे, नाणत्तं विमाणेसु लेस्सासु य, सेसं तं चेव ॥ आणयपाणएसु णं भंते ! कप्पेसु केवइया विमाणावाससया पण्णत्ता ? गोयमा ! चत्तारि विमाणावाससया पण्णत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि असंखेज्जवित्थडावि, एवं संखेज्जवित्थडेसु तिन्नि गमगा जहा सहस्सारे असंखेज्जवित्थडेसु उववज्जंतेसु य चयंतेसु य एवं चेव संखेज्जा भाणियव्वा पन्नत्तेसु असंखेज्जा नवरं नोइंदियोवउत्ता अणंतरोववन्नगा अणंतरो- गाढगा अणंतराहारगा अणंतरपज्जत्तगा य एएसिं जहन्नेणं एक्को वा दो वा तिन्नि वा उक्कोसेणं संखेज्जा प०, सेसा असंखेज्जा भाणियव्वा । आरण्णुएसु एवं चेव जहा आणयपाणएसु नाणत्तं विमाणेसु, एवं गेवेज्जगावि । कइ णं भंते ! अणुत्तर- विमाणा पन्नत्ता ? गोयमा ! पंच अणुत्तरविमाणा पन्नत्ता, ते णं भंते ! किं संखेज्ज- वित्थडा असंखेज्जवित्थडा ? गोयमा ! संखेज्जवित्थडे-य असंखेज्जवित्थडा य, पंचसु णं भंते ! अणुत्तरविमाणेसु संखेज्जवित्थडे विमाणे एगसमएणं केवइया अणुत्तरोववाइया देवा उववज्जंति केवइया- सुक्कलेस्सा उववज्जंति पुच्छा तहेव, गोयमा ! पंचसु णं अणुत्तरविमाणेसु संखेज्जवित्थडे अणुत्तरविमाणे एगसमएणं जहण्णेणं एक्को वा दो वा तिन्नि वा-उक्कोसेणं संखेज्जा अणुत्तरोववाइया देवा उववज्जंति, एवं जहा गेवेज्जवि- माणेसु संखेज्जवित्थडेसु नवरं किण्हपक्खिया अभवसिद्धिया तिसु अन्नाणेसु एए न उववज्जंति न चयंति नवि पन्नत्तएसु भाणियव्वा अचरिमावि खोडिज्जंति जाव संखेज्जा चरिमा प०, सेसं तं चेव, असंखेज्जवित्थडेसुवि एए न भन्तंति नवरं अचरिमा अत्थि, सेसं जहा गेवेज्जएसु असंखेज्जवित्थडेसु जाव असंखेज्जा अचरिमा प० । चोसट्ठीए णं भंते ! असुरकुमारावाससयसहस्सेसु संखेज्जवित्थडेसु असुरकुमारावासेसु किं सम्म- दिट्ठी असुरकुमारा उववज्जंति मिच्छादिट्ठी- एवं जहा रयणप्पभाए तिन्नि आलावगा भणिया तहा भाणियव्वा, एवं असंखेज्जवित्थडेसुवि तिन्नि गमगा, एवं जाव गेवेज्ज- विमाणेसु अणुत्तरविमाणेसु एवं चेव, नवरं तिसुवि आलावएसु मिच्छादिट्ठी सम्मामि- च्छादिट्ठी य न भन्तंति, सेसं तं चेव । से नूणं भंते । कण्हलेस्से नील जाव सुक्क- लेस्से भवित्ता कण्हलेस्सेसु देवेसु उववज्जंति ? हुंता गोयमा ! एवं जहेव नेरइएसु पढमे उद्देसए तहेव भाणियव्वं, नीललेसाएवि जहेव नेरइयाणं, जहा नीललेस्साए एवं जाव पम्हलेस्सेसु सुक्कलेस्सेसु एवं चेव, नवरं लेस्सट्ठाणेसु विसुज्जमाणेसु २ सुक्कलेस्सं परिणमइ २ ता सुक्कलेस्सेसु देवेसु उववज्जंति, से तेणट्ठेणं जाव उववज्जंति । सेवं भंते ! सेवं भंते ! ति ॥ ४७२ ॥ तेरहमे सए बीओ उद्देसो समत्तो ॥

नेरइया णं भंते ! अणंतराहारा तओ निव्वत्तणया एवं परियारणापयं निरव-
सेसं भाणियव्वं । सेवं भंते ! सेवं भंते ! त्ति ॥ ४७३ ॥ तेरहमे सए तइओ
उद्देसो समत्तो ॥

कइ णं भंते ! पुढवीओ पन्नत्ताओ ? गोयमा ! सत्त पुढवीओ पण्णत्ताओ,
तंजहा-रयणप्पभा जाव अहेसत्तमा, अहेसत्तमाए णं भंते ! पुढवीए पंच अणुत्तरा
महइमहालया जाव अपइट्ठाणे, ते णं नरगा छट्ठीए तमाए पुढवीए नरएहितो
महततरा चेव १ महाविच्छिन्नतरा चेव २ महावासतरा चेव ३ महापइरिक्कतरा
चेव ४, णो तंहा महापवेसणतरा चेव १ नो आइन्नतरा चेव २ नो आउलतरा
चेव ३ नो अणो(मा)यणतरा चेव ४, तेसु णं नरएसु नेरइया छट्ठीए तमाए पुढवीए
नेरइएहितो महाकम्मतरा चेव १ महाकिरियतरा चेव २ महासवतरा चेव ३
महवैयणतरा चेव ४ नो तहा अप्पकम्मतरा चेव १ नो अप्पकिरियतरा चेव २
नो अप्पासवतरा चेव ३ नो अप्पवेयणतरा चेव ४ अप्पिड्डियतरा चेव १ अप्प-
जुइयतरा चेव २ नो तहा महिड्डियतरा चेव १ नो महाजुइयतरा चेव २ । छट्ठीए
णं तमाए पुढवीए एणे पंचूणे निरयावाससयसहस्से पण्णत्ते, ते णं नरगा अहेसत्त-
माए पुढवीए नरएहितो नो तहा महत्तरा चेव महाविच्छिन्नतरा चेव ४, महप्पवेस-
णतरा चेव आइन्नतरा चेव ४, तेसु णं नरएसु नेरइया अहेसत्तमाए पुढवीए नेर-
इएहितो अप्पकम्मतरा चेव अप्पकिरियतरा चेव ४ नो तहा महाकम्मतरा चेव
महाकिरियतरा चेव ४ महिड्डियतरा चेव महाजुइयतरा चेव, नो तहा अप्पिड्डियतरा
चेव अप्पजुइयतरा चेव । छट्ठीए णं तमाए पुढवीए नरगा पंचमाए धूमप्पभाए पुढ-
वीए नरएहितो महत्तरा चेव ४ नो तहा महप्पवेसणतरा चेव ४, तेसु णं नरएसु
नेरइया पंचमाए धूमप्पभाए पुढवीए नेरइएहितो महाकम्मतरा चेव ४ नो तहा
अप्पकम्मतरा चेव ४ अप्पिड्डियतरा चेव २ नो तहा महिड्डियतरा चेव २, पंच-
माए णं धूमप्पभाए पुढवीए तिन्नि निरयावाससयसहस्सा पन्नत्ता, एवं जहा छट्ठीए
भाणिया एवं सत्तवि पुढवीओ परोप्परं भण्णंति जाव रयणप्पभत्ति जाव नो तहा
महिड्डियतरा चेव अप्पजुइयतरा चेव ॥ ४७४ ॥ रयणप्पभापुढविनेरइया णं भंते !
क्रेरिसयं पुढविफासं पच्चणुभवमाणा विहरंति ? गोयमा ! अणिट्ठं जाव अमणामं, एवं
जाव अहेसत्तमापुढविनेरइया, एवं आउफासं एवं जाव वणस्सइफासं ॥ ४७५ ॥ इमां
णं भंते ! रयणप्पभापुढवी दोच्चं सक्करप्पभं पुढवि पणिहाय सव्वमेहंतिया बाहल्लेणं
सव्वखुड्डिया सव्वंतेसु एवं जहा जीवाभिगमे बिइए नेरइयउद्देसए ॥ ४७६ ॥ इमीसे
णं भंते ! रयणप्पभाए पुढवीए णिरयपरिसामंतेसु जे पुढविकाइया एवं जहा नेरइ-

यउदेसए जाव अहेसत्तमाए ॥ ४७७ ॥ कहि णं भंते ! लोगस्स आयाममज्झे पण्णत्ते ? गोयमा ! इमीसे णं रयणप्पभाए उवासंतरस्स असंखेज्जइभाणं ओगाहेत्ता एत्थ णं लोगस्स आयाममज्झे पण्णत्ते । कहि णं भंते ! अहेलोगस्स आयाममज्झे पण्णत्ते ? गोयमा ! चउत्थीए पंकप्पभाए पुढवीए उवासंतरस्स साइरेणं अद्धं ओगाहेत्ता एत्थ णं अहेलोगस्स आयाममज्झे पण्णत्ते, कहि णं भंते ! उद्धलोगस्स आयाममज्झे पण्णत्ते ? गोयमा ! उप्पि सणंकुमारमाहिंदाणं कप्पाणं हेट्ठि वंभलोए कप्पे रिट्ठविमाणे पत्यडे एत्थ णं उद्धलोगस्स आयाममज्झे पण्णत्ते । कहि णं भंते ! तिरियलोगस्स आयाममज्झे पण्णत्ते ? गोयमा ! जंवूदीवे २ मंदरस्स पव्वयस्स बहुमज्जदेसभाए इमीसे रयणप्पभाए पुढवीए उवरिमहेट्ठिस्स खुट्ठगपयरेसु एत्थ णं तिरियलोगस्स मज्झे अट्ठपएसिए स्यए पण्णत्ते, जओ णं इमाओ दस दिसाओ पवहंति, तंजहा-पुरच्छिमा पुरच्छिमदाहिणा एवं जहा दसमसए नामधेज्जंति ॥ ४७८ ॥ इंदा णं भंते ! दिसा किमाइया किपवहा कइपएसाइया कइपएसुत्तरा कइपएसिया किपजवसिया किसंठिया पन्नत्ता ? गोयमा ! इंदा णं दिसा स्यगाइया स्यगप्पवहा दुपएसाइया दुपएसुत्तरा लोगं पडुच्च असंखेज्जपएसिया, अलोगं पडुच्च अणंतपएसिया, लोगं पडुच्च साइया सपजवसिया, अलोगं पडुच्च साइया अपजवसिया, लोगं पडुच्च मुरजसंठिया, अलोगं पडुच्च सगडुद्धिसंठियां पन्नत्ता । अग्गेई णं भंते ! दिसा किमाइया किपवहा कइपएसाइया कइपएसंविच्छिन्ना कइपएसिया किपजवसिया किसंठिया पन्नत्ता ? गोयमा ! अग्गेई णं दिसा स्यगाइया स्यगप्पवहा एगपएसाइया एगपएसविच्छिन्ना अणुत्तरा लोगं पडुच्च असंखेज्जपएसिया अलोगं पडुच्च अणंतपएसिया, लोगं पडुच्च साइया सपजवसिया अलोगं पडुच्च साइया अपजवसिया, छिन्नमुत्तावलिसंठिया पण्णत्ता । जमा जहा इंदा, नेरई जहा अग्गेई, एवं जहा इंदा तहां दिसाओ चत्तारि, जहा अग्गेई तहां चत्तारिवि विदिसाओ । विमला णं भंते ! दिसा किमाइया० पुच्छा जहा अग्गेईए, गोयमा ! विमला णं दिसा स्यगाइया स्यगप्पवहा चउप्पएसाइया दुपएसविच्छिन्ना अणुत्तरा लोगं पडुच्च ससं जहा अग्गेईए नवरं स्यगसंठिया पण्णत्ता, एवं तंमारि ॥ ४७९ ॥ किमियं भंते ! लोएत्ति पवुच्चइ ? गोयमा ! पंचत्थिकायां, एस णं एवइए लोएत्ति पवुच्चइ, तंजहा-धम्मत्थिकाए अहम्मत्थिकाए जाव पोग्गलत्थिकाए । धम्मत्थिकाएणं भंते ! जीवाणं कि पवत्तइ ? गोयमा ! धम्मत्थिकाएणं जीवाणं आगमणगमणभासुस्सेसमणजोगा वइ-जोगा कायजोगा जे यावन्ने तहप्पंगारा चला भावा सव्वे ते धम्मत्थिकाए पवत्तंति, गइलक्खणे णं धम्मत्थिकाए । अहम्मत्थिकाएणं भंते ! जीवाणं कि पवत्तइ ? गोयमा !

अहम्मत्थिकाएणं जीवाणं ठाणनिसीयणतुयट्ठण मणस्स य एगत्तीभावकरणया जे यावन्ने तहप्पगारा थिरा भावा सव्वे ते, अहम्मत्थिकाए पवत्तंति, ठाणलक्खणे णं अहम्मत्थिकाए ॥ आगासत्थिकाएणं भंते ! जीवाणं अजीवाण य किं पवत्तइ ? गोयमा ! आगासत्थिकाएणं जीवदव्वाण य अजीवदव्वाण य भायणभूए-एगेणवि से पुत्ते दोहिवि पुत्ते सयंपि माएज्जा । कोडिसएणवि पुत्ते कोडिसहस्संपि माएज्जा ॥ १ ॥ अवगाहणा-लक्खणे णं-आगासत्थिकाए ॥ जीवत्थिकाएणं भंते ! जीवाणं कि पवत्तइ ? गोयमा ! जीवत्थिकाएणं जीवे अणंताणं, आभिणिबोहियनाणपज्जवाणं अणंताणं सुयनाणपज्जवाणं एवं जहा-विइयसए अत्थिकायउद्देसए जाव उवओगं गच्छइ, उवओगलक्खणे णं जीवे ॥ पोग्गलत्थिकाए-णं पुच्छा, गोयमा ! पोग्गलत्थिकाएणं जीवाणं ओरालि-यवेउव्वियआहारगतेयाकम्मा सोइंदियचक्खिदियघाणिंदियजिब्भिदियफासिंदियम-णजोगवइजोगकायजोगआणापाणूणं च गहणं, पवत्तइ, गहणलक्खणे णं पोग्गलत्थिकाए ॥ ४८० ॥ एगे भंते ! धम्मत्थिकायपएसे केवइएहिं, धम्मत्थिकायपएसेहिं पुट्ठे ? गोयमा ! जहन्नपए तिहिं, उक्कोसपए छहिं । केवइएहिं अहम्मत्थिकायपएसेहिं पुट्ठे ? गोयमा ! जहन्नपए चउहिं उक्कोसपए सत्तहिं । केवइएहिं आगासत्थिकायपएसेहिं पुट्ठे ? गोयमा ! सत्तहिं । केवइएहिं जीवत्थिकायपएसेहिं पुट्ठे ? गोयमा ! अणंतेहिं । केवइएहिं पोग्गलत्थिकायपएसेहिं पुट्ठे ? गोयमा ! अणंतेहिं । केवइएहिं अद्धासम-एहिं पुट्ठे ? सिय पुट्ठे सिय नो पुट्ठे, जइ पुट्ठे नियमं अणंतेहिं ॥ एगे भंते ! अहम्मत्थिकायपएसे केवइएहिं धम्मत्थिकायपएसेहिं पुट्ठे ? गोयमा ! जहन्नपए चउहिं उक्को-सपए सत्तहिं । केवइएहिं अहम्मत्थिकायपएसेहिं पुट्ठे ? गोयमा ! जहन्नपए तिहिं उक्कोसपए छहिं, सेसं जहा धम्मत्थिकायस्स ॥ एगे भंते ! आगासत्थिकायपएसे केव-इएहिं धम्मत्थिकायपएसेहिं पुट्ठे ? गोयमा ! सिय पुट्ठे सिय नो पुट्ठे, जइ पुट्ठे जहन्नपए एकेण वा दोहिं-वा तिहिं वा चउहिं वा उक्कोसपए सत्तहिं, एवं अहम्मत्थिकायप्पएसे-हिवि । केवइएहिं आगासत्थिकाय० ? गोयमा ! छहिं, केवइएहिं जीवत्थिकायपएसेहिं पुट्ठे ? सिय पुट्ठे सिय नो पुट्ठे, जइ पुट्ठे नियम-अणंतेहिं । एवं पोग्गलत्थिकायपएसेहिवि अद्धासमएहिवि ॥ ४८१ ॥ एगे भंते ! जीवत्थिकायपएसे केवइएहिं धम्मत्थिकाय० पुच्छा, जहन्नपए चउहिं उक्कोसपए सत्तहिं, एवं अहम्मत्थिकायपएसेहिंवि । केवइएहिं आगासत्थिकाय० ? सत्तहिं । केवइएहिं जीवत्थि० ? सेसं जहा धम्मत्थिकायस्स ॥ एगे भंते ! पोग्गलत्थिकायपएसे केवइएहिं धम्मत्थिकायपएसेहिं० ? एवं जहेव जीव-त्थिकायस्स ॥ दो भंते ! पोग्गलत्थिकायप्पएसा केवइएहिं धम्मत्थिकायपएसेहिं पुट्ठा ? जहन्नपए छहिं उक्कोसपए वारसहिं, एवं अहम्मत्थिकायप्पएसेहिवि । केवइएहिं आगा-

संत्थिकाय० ? वारसहिं, सेसं जहा धम्मत्थिकायस्स ॥ तिन्नि भंते । पोग्गलत्थिका-
यपएसा केवइएहिं धम्मत्थिकाय० ? जहन्नपए अट्ठहिं उक्कोसपए सत्तरसहिं । एवं अह-
म्मत्थिकायपएसेहिवि । केवइएहिं आगासत्थि० ? सत्तरसहिं, सेसं जहा धम्मत्थि-
कायस्स । एवं एएणं गमेणं भाणियव्वं जाव दस, नवरं जहन्नपए दोन्नि पक्खिवि-
यव्वा उक्कोसपए पंच । चत्तारि पोग्गलत्थिकायपएसे० जहन्नपए दसहिं उक्कोसपए
वावीसाए, पंच पोग्गलत्थिकाय० जहण्णपए वारसहिं उक्कोसपए सत्तावीसाए, छ
पोग्गल० जहण्णपए चौदसहिं उक्कोसेणं वत्तीसाए, सत्त पोग्गल० जहन्नेणं सोलसहिं
उक्कोसपए सत्ततीसाए, अट्ठ पोग्गल० जहन्नपए अट्ठारसहिं उक्कोसेणं वायालीसाए, नव
पोग्गल० जहन्नपए वीसाए उक्कोसपए सीयालीसाए, दस पोग्गल० जहण्णपए वावी-
साए उक्कोसपए वावन्नाए । आगासत्थिकायस्स सव्वत्थ उक्कोसगं भाणियव्वं ॥
संखेज्जा णं भंते । पोग्गलत्थिकायपएसा केवइएहिं धम्मत्थिकायपएसेहिं पुट्ठा ? जहन्न-
पए तेणेव संखेज्जएणं दुगुणेणं दुरुवाहिएणं, उक्कोसपए तेणेव संखेज्जएणं पंचगुणेणं
दुरुवाहिएणं, केवइएहिं अधम्मत्थिकाएहिं ? एवं चेव, केवइएहिं आगासत्थिकाय०
तेणेव संखेज्जएणं पंचगुणेणं दुरुवाहिएणं, केवइएहिं जीवत्थिकाय० ? अणंतेहिं, केव-
इएहिं पोग्गलत्थिकाय० ? अणंतेहिं, केवइएहिं अद्धासमएहिं ? सिय पुट्ठे सिय नो पुट्ठे
जाव अणंतेहिं । असंखेज्जा भंते ! पोग्गलत्थिकायपएसा केवइएहिं धम्मत्थिकाय० ?
जहन्नपए तेणेव असंखेज्जएणं दुगुणेणं दुरुवाहिएणं, उक्कोसपए तेणेव असंखेज्जएणं
पंचगुणेणं दुरुवाहिएणं, सेसं जहा संखेज्जाणं जाव नियमं अणंतेहिं ॥ अणंता भंते !
पोग्गलत्थिकायपएसा केवइएहिं धम्मत्थिकाय० एवं जहा असंखेज्जा तहा अणंतावि
निरवसेसं ॥ एगे भंते ! अद्धासमए केवइएहिं धम्मत्थिकायपएसेहिं पुट्ठे ? सत्तेहिं,
केवइएहिं अहम्मत्थि० ? एवं चेव, एवं आगासत्थिकायपएसेहिंवि, केवइएहिं जीव-
त्थिकाय० ? अणंतेहिं, एवं जाव अद्धासमएहिं ॥ धम्मत्थिकाए णं भंते ! केवइएहिं
धम्मत्थिकायपएसेहिं पुट्ठे ? नत्थि एक्केणवि, केवइएहिं अधम्मत्थिकायपएसेहिं ?
असंखेजेहिं, केवइएहिं आगासत्थिकायप० ? असंखेजेहिं, केवइएहिं जीवत्थिका-
यपएसेहिं ? अणंतेहिं, केवइएहिं पोग्गलत्थिकायपएसेहिं० ? अणंतेहिं, केवइएहिं अद्धा-
समएहिं ? सिय पुट्ठे सिय नो पुट्ठे, जइ पुट्ठे नियमा अणंतेहिं । अहम्मत्थिकाए णं
भंते ! केवइएहिं धम्मत्थिकाय० ? असंखेजेहिं, केवइएहिं अहम्मत्थि० ? णत्थि एक्के-
णवि, सेसं जहा धम्मत्थिकायस्स, एवं एएणं गमएणं सव्वेवि सट्ठाणए नत्थि एक्के-
णवि पुट्ठा, परट्ठाणए आइलएहिं तिहिं असंखेजेहिं भाणियव्वं, पच्छिण्णए सु तिसु
अणंता भाणियव्वा जाव अद्धासमओत्ति जाव केवइएहिं अद्धासमएहिं पुट्ठे ? नत्थि

एक्केणवि ॥ जत्थ णं भंते ! एगे धम्मत्थिकायपएसे ओगाढे तत्थ केवइया धम्मत्थिकायप्पएसा ओगाढा ? नत्थि एक्कोवि, केवइया अहम्मत्थिकायप्पएसा ओगाढा ? एक्को, केवइया आगासत्थिकाय० ? एक्को, केवइया जीवत्थिकाय० ? अणंता, केवइया पोग्गलत्थिकाय० ? अणंता, केवइया अद्दासमया ? सिय ओगाढा सिय नो ओगाढा जइ ओगाढा, अणंता । जत्थ णं भंते ! एगे अहम्मत्थिकायपएसे ओगाढे तत्थ केवइया धम्मत्थिकाय० ? एक्को, केवइया अहम्मत्थि० ? नत्थि एक्कोवि, सेसं जहा धम्मत्थिकायस्स । जत्थ णं भंते ! एगे आगासत्थिकायपएसे ओगाढे तत्थ केवइया धम्मत्थिकाय० ? सिय ओगाढा सिय नो ओगाढा, जइ ओगाढा एक्को, एवं अहम्मत्थिकायपएसावि, केवइया आगासत्थिकाय० ? नत्थि एक्कोवि, केवइया जीवत्थि० ? सिय ओगाढा सिय नो ओगाढा, जइ ओगाढा-अणंता, एवं जाव अद्दासमया । जत्थ णं भंते ! एगे जीवत्थिकायपएसे ओगाढे तत्थ केवइया धम्मत्थिकाय० ? एक्को, एवं अहम्मत्थिकायपएसावि, एवं आगासत्थिकायपएसावि, केवइया जीवत्थिकाय० ? अणंता, सेसं जहा धम्मत्थिकायस्स । जत्थ णं भंते ! एगे पोग्गलत्थिकायपएसे ओगाढे तत्थ केवइया धम्मत्थिकाय० ? एवं जहा जीवत्थिकायपएसे तहेव निरवसेसं । जत्थ णं भंते ! दो पोग्गलत्थिकायपएसा ओगाढा तत्थ केवइया धम्मत्थिकाय० ? सिय एक्को सिय दोन्नि, एवं अहम्मत्थिकायस्सवि, एवं आगासत्थिकायस्सवि, सेसं जहा धम्मत्थिकायस्स । जत्थ णं भंते ! तिन्नि पोग्गलत्थिकायपएसा ओगाढा तत्थ केवइया धम्मत्थिकाय० ? सिय एक्को सिय दोन्नि सिय तिन्नि, एवं अहम्मत्थिकायस्सवि, एवं आगासत्थिकायस्सवि, सेसं जहेव दोण्हं, एवं एक्केको वड्ढियव्वो पएसो आइल्लएहिं तिहि अत्थिकाएहिं, सेसं जहेव दोण्हं जाव दसण्हं सिय एक्को सिय दोन्नि सिय तिन्नि जाव सिय दस, संखेज्जाणं सिय एक्को सिय दोन्नि जाव सिय दस सिय संखेज्जा, असंखेज्जाणं सिय एक्को जाव सिय संखेज्जा सिय असंखेज्जा, जहा असंखेज्जा एवं अणंतावि । जत्थ णं भंते ! एगे अद्दासमए ओगाढे तत्थ केवइया धम्मत्थिकाय० ? एक्को, केवइया अहम्मत्थिकाय० ? एक्को, केवइया आगासत्थिकाय० ? एक्को, केवइया जीवत्थि० ? अणंता, एवं जाव अद्दासमया । जत्थ णं भंते ! धम्मत्थिकाए ओगाढे तत्थ केवइया धम्मत्थिकायपएसा ओगाढा ? नत्थि एक्कोवि, केवइया अहम्मत्थिकाय० ? असंखेज्जा, केवइया आगासत्थि० ? असंखेज्जा, केवइया जीवत्थिकाय० ? अणंता, एवं जाव अद्दासमया । जत्थ णं भंते ! अहम्मत्थिकाए ओगाढे तत्थ केवइया धम्मत्थिकाय० ? असंखेज्जा, केवइया अहम्मत्थिकाय० ? नत्थि एक्कोवि, सेसं जहा धम्मत्थिकायस्स, एवं सव्वे सट्ठाणे नत्थि एक्कोवि

भाणियव्वं, परट्ठाणे आइल्लगा तिन्नि, असंखेज्जा भाणियव्वा, पच्छिल्लगा तिन्नि अणंता
 भाणियव्वा जाव अद्दासमओत्ति जाव केवइया अद्दासमया ओगाढा ? नत्थि एक्कोवि
 ॥ ४८२ ॥ जत्थ णं भंते ! एगे पुढविकाइए ओगाढे तत्थ णं केवइया पुढविकाइया
 ओगाढा ? असंखेज्जा, केवइया आउकाइया ओगाढा ? असंखेज्जा, केवइया तेउका-
 इया ओगाढा ? असंखेज्जा, केवइया वाउकाइया ओगाढा ? असंखेज्जा, केवइया वण-
 स्सइकाइया ओगाढा ? अणंता, जत्थ णं भंते ! एगे आउकाइए ओगाढे तत्थ णं
 केवइया पुढवि० ? असंखेज्जा, केवइया आउ० ? असंखेज्जा, एवं जहेव पुढविका-
 इयाणं वत्तव्वया तहेव सव्वेसिं निरवसेसं भाणियव्वं जाव वणस्सइकाइयाणं जाव
 केवइया वणस्सइकाइया ओगाढा ? अणंता ॥ ४८३ ॥ एयंसि णं भंते ! धम्मत्थिकाय०
 अधम्मत्थिकाय० आगासत्थिकायंसि चक्किया केइ आसइत्तए वा सुइत्तए वा चिट्ठित्तए
 वा निसीइत्तए वा तुयट्ठित्तए वा ? नो इणट्ठे समट्ठे, अणंता पुण तत्थ जीवा ओगाढा,
 से केणट्ठेणं भंते ! एवं वुच्चइ एयंसि णं धम्मत्थि० जाव आगासत्थिकायंसि णो
 चक्किया केइ आसइत्तए वा जाव ओगाढा ? गोयमा ! से जहा नामए-कूडागारसाला
 सिया दुहओ लित्ता गुत्ता गुत्तदुवारा जहा रायप्पसेणइज्जे जाव दुवारवयणाइं पिहेइ
 दु० २ ता तीसे कूडागारसालाए बहुमज्झदेसभाए जहन्नेणं एक्को वा दो वा तिन्नि
 वा उक्कोसेणं पईवसहस्सं पलीवेज्जा, से नूणं गोयमा ! ताओ पईवलेस्साओ अन्नम-
 न्नसंवद्धाओ अन्नमन्नपुट्ठाओ जाव अन्नमन्नघडत्ताए चिट्ठंति ? हंता चिट्ठंति, चक्किया
 णं गोयमा ! केइ तासु पईवलेस्सासु आसइत्तए वा जाव तुयट्ठित्तए वा ? भगवं ! णो
 इणट्ठे समट्ठे, अणंता पुण तत्थ जीवा ओगाढा, से तेणट्ठेणं गोयमा ! एवं वुच्चइ जाव
 ओगाढा ॥ ४८४ ॥ कहि णं भंते ! लोए बहुसमे, कहि णं भंते ! लोए सव्वविग्गहिए
 पण्णत्ते ? गोयमा ! इमीसे रयणप्पभाए पुढवीए-उवरिमहेट्ठिल्लेसु खुड्ढगपयरेसु एत्थ
 णं लोए बहुसमे एत्थ णं लोए सव्वविग्गहिए पण्णत्ते । कहि णं भंते ! विग्गहविग्ग-
 हिए लोए पण्णत्ते ? गोयमा ! विग्गहकंडए-एत्थ णं विग्गहविग्गहिए लोए पण्णत्ते
 ॥ ४८५ ॥ किंसंठिए णं भंते ! लोए पण्णत्ते ? गोयमा ! सुपइट्ठियसंठिए लोए पण्णत्ते,
 हेट्ठा विच्छिन्ने मज्झे संखित्ते जहा सत्तमसए पढमुद्देसए जाव अत्तं करेइ-॥ एयस्स णं
 भंते ! अहेलोगस्स तिरियलोगस्स उड्डलोगस्स य कयरे २-हिंतो जाव विसेसाहिया
 वा ? गोयमा ! सव्वत्थोवे तिरियलोए, उड्डलोए असंखेज्जगुणे, अहेलोए विसेसाहिए ।
 सेवं भंते ! सेवं भंते ! त्ति ॥ ४८६ ॥ तेरहमे सए चउत्थो उद्देसो समत्तो ॥
 नेरइया णं भंते ! कि सच्चित्ताहारा अचित्ताहारा मीसाहारा ? गोयमा ! नो
 सच्चित्ताहारा अचित्ताहारा नो-मीसाहारा, एवं असुरकुमारा पढमो नेरइयउद्देसओ

निरवसेसो भाणियव्वो ॥ सेवं भंते ! सेवं भंते ! त्ति ॥ ४८७ ॥ तेरहमे सए पञ्चमो उद्देसो समत्तो ॥

रायगिहे जाव एवं वयासी-संतरं भंते ! नेरइया उववज्जंति, निरंतरं नेरइया उववज्जंति ? गोयमा ! संतरंपि नेरइया उववज्जंति, निरंतरंपि नेरइया उववज्जंति, एवं असुरकुमारोवि, एवं जहा गंगेए तहेव दो दंडगा जाव संतरंपि वेमाणिया चयंति निरंतरंपि वेमाणिया चयंति ॥ ४८८ ॥ कहिन्नं भंते ! चमरस्स असुरिदस्स असुररत्तो चमरचंचा नामं आवासे पण्णत्ते ? गोयमा ! जंबुद्दीवे २ मंदरस्स पव्वयस्स दाहिणेणं तिरियमसंखेजे दीवसमुद्दे एवं जहा बिइयसए सभाए उद्देसए वत्तव्वया सच्चैव अपरिसेसा नेयव्वा, नवरं इमं नाणत्तं जाव तिगिच्छिक्खूडस्स उप्पायपव्वयस्स चमरचंचाए रायहाणीए चमरचंचस्स आवासपव्वयस्स अन्नेसिं च वहूणं सेसं तं चेव जाव तेरस य अंगुलाइं अद्धंगुलं च किंचिविसेसाहिया परिक्खेवेणं, तीसें णं चमरचंचाए रायहाणीए दाहिणपच्चच्छिमेणं छक्कोडिसए पणपन्नं च कोडीओ पणतीसें च सयसहस्साइं पन्नासें च सहस्साइं अरुणोदगसमुद्दं तिरियं वीईवइत्ता एत्थ णं चमरस्स असुरिदस्स असुरकुमाररत्तो चमरचंचे नामं आवासे पण्णत्ते, चउरासीइं जोयणसहस्साइं आयामविक्खंभेणं दो जोयणसयसहस्सा पन्नट्ठिं च सहस्साइं छच्चवत्तीसे जोयणसए किंचिविसेसाहिए परिक्खेवेणं, से णं एगेणं पागारेणं सव्वओ समंता संपरिक्खित्ते, से णं पागारे दिवद्धं जोयणसयं उद्धं उच्चत्तेणं, एवं चमरचंचाए रायहाणीए वत्तव्वया भाणियव्वा सभाविहूणा जाव चत्तारि पासायपंतीओ । चमरे णं भंते ! असुरिदे असुरकुमारराया चमरचंचे आवासे वसहि उवेइ ? नो इण्ठे समट्ठे, से केणं खाइ णं अट्ठेणं भंते ! एवं वुच्चइ चमरचंचे आवासे २ ? गोयमा ! से जहानामए-इहं मणुस्सलोगंसि उवगारियलेणाइ वा उज्जाणियलेणाइ वा णिज्जाणियलेणाइ वा वारिधारियलेणाइ वा तत्थ णं बहवे मणुस्सा य मणुस्सीओ य आसयंति सयंति जहा रायप्पसेणइजे जाव कल्लणफलवित्तिविसेसं पच्चणुब्भवमाणा विहरंति, अन्नत्थ पुण वसहिं उवेति, एवामेव गोयमा ! चमरस्स असुरिदस्स असुरकुमाररत्तो चमरचंचे आवासे केवलं किङ्कारइपत्तिं अन्नत्थ पुण वसहिं उवेइ, से तेणट्ठेणं जाव आवासे, सेवं भंते ! सेवं भंते ! त्ति जाव विहरइ ॥ ४८९ ॥ तए णं समणे भगवं महावीरे अन्नया कयाइ रायगिहाओ नयराओ गुणसिलाओ जाव विहरइ । तेणं कालेणं तेणं समएणं चंपा नामं नयरी होत्था वन्नओ, पुन्नभद्दे उज्जाणे वन्नओ, तए णं समणे भगवं महावीरे अन्नया कयाइ पुव्वाणुपुव्वि चरमाणे जाव विहरमाणे जेणेव चंपा नयरी जेणेव पुन्नभद्दे उज्जाणे तेणेव उवागच्छइ २ ता

जाव विहरइ, तेणं कालेणं तेणं समणं सिंधुसोवीरेसु जणवएसु वीइभए नामं नयरे
 होत्था वन्नओ, तस्स णं वीइभयस्स नयरस्स वहिया उत्तरपुरच्छिमे दिसीभाए एत्थ
 णं मियवणे नामं उज्जाणे होत्था सव्वोउय० वन्नओ; तत्थ णं वीइभए नयरे उदायणे
 नामं राया होत्था महया वन्नओ, तस्स णं उदायणस्स रत्तो प(उमा)भावई नामं देवी
 होत्था सुकुमाल० वन्नओ, तस्स णं उदायणस्स रत्तो पुत्ते पभावईए देवीए अत्तए
 अमीइनामं कुमारे होत्था सुकुमाल जहा सिवभेदे जाव पच्चवेक्खमाणे विहरइ, तस्स णं
 उदायणस्स रत्तो नियए भायणेज्जे केसीनामं कुमारे होत्था सुकुमाल जाव सुरुवे,
 से णं उदायणे राया सिंधुसोवीरप्पामोक्खाणं सोल्लसण्हं जणवयाणं, वीइभयप्पामो-
 क्खाणं तिण्हं तेसट्ठीणं नगरागरसयाणं, महसेणप्पामोक्खाणं दसण्हं राईणं बद्धम-
 उडाणं विइन्नछत्तचामरवालवीयणाणं अन्नेसिं च बहूणं राईसरतलवर जाव सत्थवा-
 हप्पभिईणं आहेवच्चं पोरेवच्चं जाव कारेमाणे पालेमाणे समणोवासए अभिगयजीवा-
 जीवे जाव विहरइ । तए णं से उदायणे राया अन्नया कयाइ जेणेव पोसहसाला तेणेव
 उवागच्छइ २ ता जहा संखे जाव विहरइ । तए णं तस्स उदायणस्स रत्तो पुव्वरत्तावर-
 त्तकालसमयंसि धम्मजागरियं जागरमाणस्स अयमेयारुवे अज्झत्थिए जाव समुप्प-
 जित्था-धन्ना णं ते गामागरनगरखेडकव्वडमडंवदोणमुहपट्टणासमसंवाहसन्निवेसा
 जत्थ णं समणे भगवं महावीरे विहरइ, धन्ना णं ते राईसरतलवर जाव सत्थवाहप्प-
 भिईओ जे णं समणं भगवं महावीरं वंदंति नमंसंति जाव पज्जुवासंति, जइ णं
 समणे भगवं महावीरे पुव्वाणुपुव्वि चरमाणे गामाणुगामं जाव विहरमाणे इहमाग-
 च्छेज्जा इह समोसरेज्जा, इहेव वीइभयस्स नयरस्स वहिया मियवणे उज्जाणे अहा-
 पडिरुवं उग्गहं उग्गिण्हित्ता संजमेणं तवसा जाव विहरेज्जा, तो णं अहं समणं भगवं
 महावीरं वंदेज्जा नमंसेज्जा जाव पज्जुवासेज्जा, तए णं समणे भगवं महावीरे उदाय-
 णस्स रत्तो अयमेयारुवं अज्झत्थियं जावं समुप्पन्नं विजाणित्ता चंपाओ नयरीओ
 पुन्नभदाओ उज्जाणाओ पडिनिक्खमइ २ ता पुव्वाणुपुव्वि चरमाणे गामाणुगामं जाव
 विहरमाणे जेणेव सिंधुसोवीरे जणवए जेणेव वीइभए नयरे जेणेव मियवणे उज्जाणे
 तेणेव उवागच्छइ २ ता जाव विहरइ । तए णं वीइभए नयरे सिंघाडग जाव परिसा
 पज्जुवासइ । तए णं से उदायणे राया इमीसे कंहाए लद्धट्ठे समाणे हट्ठतुट्ठ० कोडुं-
 वियपुरिसे सद्दावेइ २ ता एवं वयासी-खिप्पामेव भो देवाणुप्पिया ! वीइभयं नयरं
 सन्निभतरबाहिरियं जहा कूणिओ उववाइए जाव पज्जुवासइ, पभावईपामोक्खाओ
 देवीओ तहेव जाव वज्जुवासंति, धम्मकहा । तए णं से उदायणे राया समणस्स
 भगवओ महावीरस्स अंतियं धम्मं सोच्चा निसम्म हट्ठतुट्ठे उट्ठाए उट्ठेइ २ ता समणं

भगवं महावीरं तिव्खुत्तो जाव नमंसित्ता एवं वयासी-एवमेयं भंते । तहमेयं भंते ! जाव से जहेयं तुब्भे वदहत्तिकट्ठु जं नवरं देवाणुप्पिया ! अभीइकुमारं रज्जे ठावेमि, तए णं अहं देवाणुप्पियाणं अंतिए मुंडे भवित्ता जाव पव्वयामि, अहामुहं देवाणुप्पिया ! मा पडिवंधं । तए णं से उदायणे राया समणेणं भगवया महावीरेणं एवं वुत्ते समाणे हट्ठतुट्ठे समणं भगवं महावीरं वंदइ नमंसइ वं० २ ता तमेव आभिसेक्कं हत्थि दुरुहइ २ ता समणस्स भगवओ महावीरस्स अंतियाओ मियवणाओ उज्जाणाओ पडिनिक्खमइ २ ता जेणेव वीइभए नयरे तेणेव पहारेत्थ गमणाए । तए णं तस्स उदायणस्स रत्तो अयमेयारूवे अज्झत्थिए जाव समुप्पज्जित्था-एवं खलु अभीइकुमारे ममं एगे पुत्ते इट्ठे कंते जाव किमंग पुण पासण्याए, तं जइ णं अहं अभीइकुमारं रज्जे ठावेत्ता समणस्स भगवओ महावीरस्स अंतियं मुंडे भवित्ता जाव पव्वयामि तो णं अभीइकुमारे रज्जे य रट्ठे य जाव जणवए य माणुस्सएसु य कामभोगेसु मुच्छिए गिद्धे गडिए अज्झोववत्ते अणाइयं अणवदग्गं दीहमद्धं चाउरंतसंसारकंतारं अणुपरियट्ठिस्सइ, तं नो खलु मे सेयं अभीइकुमारं रज्जे ठावेत्ता समणस्स भगवओ महावीरस्स जाव पव्वइत्तए, सेयं खलु मे णियगं भाइणेज्जं केसिकुमारं रज्जे ठावेत्ता समणस्स भगवओ महावीरस्स जाव पव्वइत्तए, एवं संपेहेइ २ ता जेणेव वीइभए नयरे तेणेव उवागच्छइ २ ता वीइभयं नयरं मज्झंमज्झेणं जेणेव सए गेहे जेणेव बार्हिरिया उवट्ठाणसाला तेणेव उवागच्छइ २ ता आभिसेक्कं हत्थि ठवेइ आभि० २ ता आभिसेक्काओ हत्थीओ पच्चोरुहइ २ ता जेणेव सीहासणे तेणेव उवागच्छइ २ ता सीहासणवरंसि पुरत्थाभिमुहे निसीयइ २ ता कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! वीइभयं नयरं सन्निभतरवाहिरियं जाव पच्चप्पिणंति, तए णं से उदायणे राया दोच्चंपि कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! केसिस्स कुमारस्स सहत्थं ३ एवं रायाभिसेओ जहा सिवभइस्स कुमारस्स तहेव भाणियव्वो जाव परमाउं पालयाहि इट्ठजणसंपरिवुडे सिधुसोवीरपामोक्खाणं सोलसण्हं जणवयाणं, वीइभयपामोक्खाणं तिणिण तेसट्ठीणं नगरागरसयाणं, महसेणपामोक्खाणं दसण्हं राईणं अत्तेसि च वहूणं राईसर जाव कारेमाणे पालेमाणे विहराहित्तिकट्ठु जयजयसदं पउंजंति । तए णं से केसीकुमारे राया जाए महया जाव विहरइ । तए णं से उदायणे राया केसिं रायाणं आपुच्छइ, तए णं से केसीराया कोडुंवियपुरिसे सद्दावेइ एवं जहा जमालिस्स तहेव सन्निभतरवाहिरियं तहेव जाव निक्खमणाभिसेयं उवट्ठवेइ, तए णं से केसीराया अणेगगणणायग जाव संपरिवुडे उदायणं रायं सीहासणवरंसि पुरत्थाभिमुहे निसी-

यावेइ २ ता अट्टसएणं सोवन्नियाणं एवं जहा जमालिस्स जाव एवं वयासी-भण
 सामी ! किं देमो किं पयच्छामो किणा वा ते अट्टो ? तए णं से उदायणे राया केसिं
 रायं एवं वयासी-इच्छामि णं देवाणुप्पिया ! कुत्तियावणाओ एवं जहा जमालिस्स णवरं
 पडमावई अगगकेसे पडिच्छइ पियविप्पओगदूस(णा)हा, तए णं से केसी राया दोच्चं पि
 उत्तरावक्कमणं सीहासणं रयावेइ दो० २ ता उदायणं रायं सेयापीयएहिं कलसेहि सेसं
 जहा जमालिस्स जाव सन्निसत्ते, तहेव अम्मधाई नवरं पडमावई हंसलक्खणं
 षडसाडगं गहाय सेसं तं चेव जाव सीयाओ पच्चोरुहइ २ ता जेणेव समणे भगवं
 महावीरे तेणेव उवागच्छइ २ ता समणं भगवं महावीरं तिकखुत्तो जाव वंदइ नमंसइ
 वंदित्ता नमंसित्ता उत्तरपुरच्छिमं दिसीभागं अवक्कमइ २ ता सयमेव आभरणमल्लालंकारं
 तं चेव जाव पडमावई पडिच्छइ जाव घडियव्वं सामी ! जाव नो पमाएयव्वंतिकहु
 केसी राया पडमावई य समणं भगवं महावीरं वंदंति नमंसंति वं० २ ता जाव पडि-
 गया । तए णं से उदायणे राया सयमेव पंचमुट्ठियं लोयं सेसं जहा उसभदत्तस्स जाव
 सव्वदुक्खप्पहीणे ॥ ४९० ॥ तए णं तस्स अभीइकुमारस्स अन्नया कयाइ पुव्व-
 रत्तावरत्तकालसमयंसि कुडुंवजागरियं जागरमाणस्स अयमेयारूवे अज्झत्थिए जाव
 समुप्पजित्था-एवं खलु अहं उदायणस्स पुत्ते पभावईए देवीए अत्तए, तए णं से
 उदायणे राया ममं अवहाय नियगं भायणिज्जं केसिकुमारं रज्जे ठावेत्ता समणस्स
 भगवओ महावीरस्स जाव पव्वइए, इमेणं एयारूवेणं महया अप्पत्तिएणं मणोमाण-
 सिएणं दुक्खेणं अभिभूए समाणे अंतैउरपरियालसंपरिवुडे सभंडमत्तोवगरणमायाए
 वीइभयाओ नयराओ निगगच्छइ २ ता पुव्वाणुपुर्वि चरमाणे गामाणुगामं दूज्जमाणे
 जेणेव चंपा नयरी जेणेव कूणिए राया तेणेव उवागच्छइ २ ता कूणियं रायं उवसंप-
 जित्ताणं, विहरइ, तत्थवि णं से विउलभोगसमिइसमंजागए यावि होत्था, तए णं से
 अभीइकुमारे समणोवासए यावि होत्था, अभिगय जाव विहरइ, उदायणंमि रायरि-
 सिंमि समणुवद्धवेरे यावि होत्था, तेणं कालेणं तेणं समएणं इमीसे रयणप्पभाए पुढवीए
 निरयपरिसामंतेसु चो(य)सट्ठिं असुरकुमारावाससयसहस्सा पन्नत्ता, तए णं से अभीइ-
 कुमारे वहुई वासाइं समणोवासगपरियागं पाउणइ २ ता अद्धमासियाए संलेहणाए तीसं
 भत्ताइं अणसणाए छेदेइ २ ता तस्स ठाणस्स अणालोइयपडिक्कंते कालमासे कालं किच्चा
 इमीसे रयणप्पभाए पुढवीए तीसाए निरयपरिसामंतेसु चोयट्ठीए आयावा जाव सह-
 स्सेसु अन्नयरंसि आयावा असुरकुमारा(आया)वाससि असुरकुमारदेवत्ताए उववण्णे,
 तत्थ णं अत्येगइयाणं आयावगाणं असुरकुमाराणं देवाणं एगं पलिओवमं ठिई प०,
 तस्स णं अभीइस्सवि देवस्स एगं पलिओवमं ठिई पण्णत्ता । से णं भंते ! अभीइदेवे

ताओ देवलोगाओ आउक्खएणं ३ अणंतरं उव्वट्ठिता कहिं गच्छिहिइ कहिं उव्वज्जिहिइ ? गोयमा ! सहाविदेहे वासे सिज्जिहिइ जाव अंतं काहिइ, सेवं भंते ! सेवं भंते ! ति ॥ ४९१ ॥ तेरहमे सए छट्ठो उद्देसो समत्तो ॥

रायगिहे जाव एवं वयासी-आया भंते ! भासा अन्ना भासा ? गोयमा ! नो आया भासा अन्ना भासा, रु(वि)वी भंते ! भासा अरूवी भासा ? गोयमा ! रुवी भासा नो अरूवी भासा, सच्चित्ता भंते ! भासा अचित्ता भासा ? गोयमा ! नो सच्चित्ता भासा अचित्ता भासा, जीवा भंते ! भासा अजीवा भासा ? गोयमा ! नो जीवा भासा अजीवा भासा । जीवाणं भंते ! भासा अजीवाणं भासा ? गोयमा ! जीवाणं भासा नो अजीवाणं भासा, पुव्वि भंते ! भासा भासिज्जमाणी भासा भासासमयवीइक्कंता भासा ? गोयमा ! नो पुव्वि भासा भासिज्जमाणी भासा णो भासासमयवीइक्कंता भासा, पुव्वि भंते ! भासा भिज्जइ, भासिज्जमाणी भासा भिज्जइ, भासासमयवीइक्कंता भासा भिज्जइ ? गोयमा ! नो पुव्वि भासा भिज्जइ, भासिज्जमाणी भासा भिज्जइ, नो भासासमयवीइक्कंता भासा भिज्जइ । कइविहा णं भंते ! भासा पण्णत्ता ? गोयमा ! चउव्विहा भासा पण्णत्ता, तंजहा-सच्चा, मोसा, सच्चामोसा, असच्चामोसा ॥ ४९२ ॥ आया भंते ! मणे अन्ने मणे ? गोयमा ! नो आया मणे अन्ने मणे, जहा भासा तहा मणेवि जाव नो अजीवाणं मणे, पुव्वि भंते ! मणे मणिज्जमाणे मणे ० ? एवं जहेव भासा, पुव्वि भंते ! मणे भिज्जइ, मणिज्जमाणे मणे भिज्जइ, मणसमयवीइक्कंते मणे भिज्जइ ? एवं जहेव भासा । कइविहे णं भंते ! मणे पण्णत्ते ? गोयमा ! चउव्विहे मणे पन्नत्ते, तंजहा-सच्चे जाव असच्चामोसे ॥ ४९३ ॥ आया भंते ! काए अन्ने काए ? गोयमा ! आयावि काए अन्नेवि काए, रुवी भंते ! काए अरूवी काए ? गोयमा ! रुवीवि काए अरूवीवि काए, एवं एक्केक्के पुच्छा, गोयमा ! सच्चित्तेवि काए अचित्तेवि काए, जीवेवि काए अजीवेवि काए, जीवाणवि काए अजीवाणवि काए, पुव्वि भंते ! काए पुच्छा, गोयमा ! पुव्विपि काए काइज्जमाणेवि काए कायसमयवीइक्कंतेवि काए, पुव्वि भंते ! काए भिज्जइ पुच्छा, गोयमा ! पुव्विपि काए भिज्जइ काइज्जमाणेवि काए भिज्जइ, कायसमयवीइक्कंतेविकाए भिज्जइ ॥ कइविहे णं भंते ! काए पन्नत्ते ? गोयमा ! सत्तविहे काए पन्नत्ते, तंजहा-ओरालिए ओरालियमीसए वेउव्विए वेउव्वियमीसए आहारए आहारगमीसए कम्मए ॥ ४९४ ॥ कइविहे णं भंते ! मरणे पन्नत्ते ? गोयमा ! पंचविहे मरणे पण्णत्ते, तंजहा-आवीचियमरणे ओहिमरणे आइंतियमरणे वालमरणे पंडियमरणे । आवीचियमरणे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-दव्वा-

वीचियमरणे खेत्तावीचियमरणे कालावीचियमरणे भवावीचियमरणे भावावीचिय-
मरणे, दव्वावीचियमरणे णं भंते ! कइविहे पण्णत्ते ? गोयमा ! चउव्विहे पण्णत्ते,
तंजहा-नेरइयदव्वावीचियमरणे, तिरिक्खजोणियदव्वावीचियमरणे, मणुस्सदव्वा-
वीचियमरणे, देवदव्वावीचियमरणे, से केणट्ठेणं भंते ! एवं वुच्चइ नेरइयदव्वावीचिय-
मरणे नेरइयदव्वावीचियमरणे ? गोयमा ! जण्णं नेरइया नेरइयदव्वे वट्ठमाणा जाइं
दव्वाइं नेरइयाउयत्ताए गहियाइं वद्धाइं पुट्ठाइं कडाइं पट्ठवियाइं निविट्ठाइं अभि-
निविट्ठाइं अभिसमन्नागयाइं भवंति ताइं दव्वाइं आवी(चियं)ची अणुसमयं निरंतरं
मरंतित्तिकट्ठु से तेणट्ठेणं गोयमा ! एवं वुच्चइ नेरइयदव्वावीचियमरणे, एवं जाव देव-
दव्वावीचियमरणे । खेत्तावीचियमरणे णं भंते ! कइविहे पण्णत्ते ? गोयमा ! चउव्विहे
पण्णत्ते, तंजहा-नेरइयखेत्तावीचियमरणे जाव देवखेत्तावीचियमरणे, से केणट्ठेणं भंते !
एवं वुच्चइ नेरइयखेत्तावीचियमरणे २ ? गोयमा ! जण्णं नेरइया नेरइयखेत्ते वट्ठमाणा
जाइं दव्वाइं नेरइयाउयत्ताए एवं जहेव दव्वावीचियमरणे तहेव खेत्तावीचिय-
मरणेवि, एवं जाव भावावीचियमरणे । ओहिमरणे णं भंते ! कइविहे पण्णत्ते ?
गोयमा ! पंचविहे पण्णत्ते, तंजहा-दव्वोहिमरणे खेत्तोहिमरणे जाव भावोहिमरणे ।
दव्वोहिमरणे णं भंते ! कइविहे पण्णत्ते ? गोयमा ! चउव्विहे पण्णत्ते, तंजहा-नेर-
इयदव्वोहिमरणे जाव देवदव्वोहिमरणे, से केणट्ठेणं भंते ! एव वुच्चइ नेरइयदव्वोहि-
मरणे २ ? गोयमा ! जण्णं नेरइया नेरइयदव्वे वट्ठमाणा जाइं दव्वाइं संपयं मरंति
जण्णं नेरइया ताइं दव्वाइं अणागए काले पुणोवि मरिस्संति, से तेणट्ठेणं गोयमा !
जाव दव्वोहिमरणे, एवं तिरिक्खजोणिय० मणुस्स० देवदव्वोहिमरणेवि, एवं एएणं
गमेणं खेत्तोहिमरणेवि कालोहिमरणेवि भवोहिमरणेवि भावोहिमरणेवि । आइंतिय-
मरणे णं भंते ! पुच्छा, गोयमा ! पंचविहे पंचत्ते, तं०-दव्वाइंतियमरणे खेत्ताइंतिय-
मरणे जाव भावाइंतियमरणे, दव्वाइंतियमरणे णं भंते ! कइविहे प० ? गोयमा !
चउव्विहे प० तं०-नेरइयदव्वाइंतियमरणे जाव देवदव्वाइंतियमरणे, से केणट्ठेणं
भंते ! एवं वुच्चइ नेरइयदव्वाइंतियमरणे २ ? गोयमा ! जण्णं नेरइया नेरइयदव्वे
वट्ठमाणा जाइं दव्वाइं संपयं मरंति जे णं नेरइया ताइं दव्वाइ अणागए काले नो
पुणोवि मरिस्संति, से तेणट्ठेणं जाव मरणे, एवं तिरिक्ख० मणुस्स० देवाइंतियमरणे,
एवं खेत्ताइंतियमरणेवि, एवं जाव भावाइंतियमरणेवि । वालमरणे णं भंते ! कइविहे
प० ? गोयमा ! दुवालसविहे प० तं०-वलयमरणे जहा खंदए जाव गिद्धपिट्ठे ॥
पंडियमरणे णं भंते ! कइविहे पण्णत्ते ? गोयमा ! दुविहे पण्णत्ते, तंजहा-पाओव-
गमणे य भत्तपच्चक्खाणे य । पाओवगमणे णं भंते ! कइविहे प० ? गोयमा ! दुविहे

प०, तं०-णीहारिमे य अनीहारिमे य जाव नियमं अपडि(कमे)कम्मे । भत्तपच्चक्खाणे
णं भंते ! कइविहे प० ? एवं तं चेव नवरं नियमं सपडिकम्मे । सेवं भंते ! २ त्ति
॥ ४९५ ॥ तेरहमे सए सत्तमो उद्देसो समत्तो ॥

कइ णं भंते ! कम्मपगडीओ पण्णत्ताओ ? गोयमा ! अट्ट कम्मपगडीओ पण्ण-
त्ताओ, एवं वंधट्ठिउद्देसो भाणियव्वो निरवसेसो जहा पन्नवणाए । सेवं भंते ! सेवं
भंते ! त्ति ॥ ४९६ ॥ तेरहमे सए अट्टमो उद्देसो समत्तो ॥

रायगिहे जाव एवं वयासी-से जहानामए-केइ पुरिसे केयाघडियं गहाय गच्छेज्जा,
एवामेव अणगारेवि भावियप्पा केयाघडियाकिच्चहत्थगएणं अप्पाणेणं उट्ठं वेहासं
उप्पएज्जा ? हंता गोयमा ! जाव समुप्पएज्जा, अणगारे णं भंते ! भावियप्पा केवइ-
याइं पभू केयाघडियाकिच्चहत्थगयाइं रुवाइं विउव्वित्तए ? गोयमा ! से जहानामए-
जुवइं जुवाणे हत्थेणं हत्थे एवं जहा तइयसए पंचमुद्देसए जाव नो चेव णं संपत्तीए
विउव्विसु वा विउव्विति वा विउव्विस्संति वा, से जहानामए-केइ पुरिसे हिरन्न-
पे(डि)लं गहाय गच्छेज्जा, एवामेव अणगारेवि भावियप्पा हिरण्णपेलहत्थकिच्चगएणं
अप्पाणेणं सेसं तं चेव, एवं सुवन्नपेलं, एवं रयणपेलं वइ(य)रपेलं वत्थपेलं आभरणपेलं,
एवं वियलकि(डं)डुं सुवकिडुं चम्मकिडुं कंबलकिडुं, एवं अयभारं तंबभारं तउयभारं
सीसंगभारं हिरन्नभारं सुवन्नभारं वइरभारं, से जहानामए-वग्गुली सिंया दोवि पाए
उल्लंबिय २ उट्ठपाया अहोसिरा चिट्ठेज्जा, एवामेव अणगारेवि भावियप्पा वग्गुलीकि-
च्चगएणं अप्पाणेणं उट्ठं वेहासं एवं जन्नोवइयवत्तव्वया भाणियव्वो जाव विउव्विस्संति
वा, से जहानामए-जलोया सिया उदगंसि कायं उव्विहिय २ गच्छेज्जा, एवामेव
सेसं जहा वग्गुलीए, से जहाणामए-वीयंवीयगसउणे सिया दोवि पाए समतुरंगेमाणे
२ गच्छेज्जा, एवामेव अणगारे सेसं तं चेव, से जहाणामए-पक्खिविरालए सिया
रुक्खाओ रुक्खं डेवेमाणे गच्छेज्जा, एवामेव अणगारे सेसं तं चेव, से जहानामए-
जीवंजीवगसउणे सिया दोवि पाए समतुरंगेमाणे २ गच्छेज्जा, एवामेव अणगारे
सेसं तं चेव, से जहाणामए-हंसे सिया तीराओ तीरं अभिरममाणे २ गच्छेज्जा,
एवामेव अणगारे हंसकिच्चगएणं अप्पाणेणं सेसं तं चेव, से जहानामए-समुद्द-
वायसए सिया वीईओ वीई-डेवेमाणे गच्छेज्जा, एवामेव तहेव, से जहानामए-केइ
पुरिसे चक्कं गहाय गच्छेज्जा, एवामेव अणगारेवि भावियप्पा चक्ककिच्चहत्थगएणं
अप्पाणेणं सेसं जहा केयाघडियाए, एवं छत्तं, एवं चामरं, से जहानामए-केइ पुरिसे
रयणं गहाय गच्छेज्जा, एवं चेव, एवं वइरं वेरुलियं जाव रिट्ठं, एवं उप्पलहत्थगं
पउमहत्थगं कुमुदहत्थगं, एवं जाव से जहानामए-केइ पुरिसे-सहस्सपत्तगं

गहाय गच्छेज्जा, एवं चेव, से जहानामए-कैइ पुरिसे भिसं अवहालिय २ गच्छेज्जा, एवामेव अणगारेवि-भिसकिच्चगएणं अप्पाणेणं तं चेव, से जहानामए-मुणालिया सिया उदगंसि कायं उम्मज्जिय २ विट्ठिज्जा, एवामेव सेसं जहा वग्गुलीए, से जहानामए-वण(खं)संडे सिया किण्हे किण्होभासे जाव निकुसंवभूए पासादीए ४, एवामेव अणगारेवि भावियप्पा वगसंडकिच्चगएणं अप्पाणेणं उट्ठं वेहांसं उप्पएज्जा, सेसं तं चेव, से जहानामए-पुक्खरिणी सिया चउक्कोणा समतीरा अणुपुव्वसुजाय जावसहु-न्नइयमहुरसरणाइया पासाईया ४, एवामेव अणगारेवि भावियप्पा पोक्खरिणीकिच्चगएणं अप्पाणेणं उट्ठं वेहांसं उप्पएज्जा ? हंतां उप्पएज्जा, अणगारे णं भंते ! भावियप्पा केवइयाइं पभू पोक्खरिणीकिच्चगयाइं रुवाइं विउव्वित्तए, सेसं तं चेव जाव विउव्विस्संतिं वा । से भंते ! किं माई विउव्वइ अमाई विउव्वइ ? गोयमा ! माई विउव्वइ नो अमाई विउव्वइ, माई णं तस्स ठाणस्स अणालोइय० एवं जहा तइयसए चउत्थुद्देसए जाव अत्थि तस्स आराहणा । सेवं भंते ! सेवं भंते ! त्ति जाव विहरइ ॥ ४९७ ॥ **तेरहमे सए नवमो उद्देसो समत्तो ॥**

कइ णं भंते ! छाउमत्थियसमुग्घाया पन्नत्ता ? गोयमा ! छ छाउमत्थिया समुग्घाया पन्नत्ता, तंजहा-वेयणासमुग्घाए एवं छाउमत्थियसमुग्घाया नेयव्वा जहा पन्नवणाए जाव आहारगसमुग्घाएत्ति । सेवं भंते ! सेवं भंते ! त्ति जाव विहरइ ॥ ४९८ ॥ **तेरहमे सए दसमो उद्देसो समत्तो, तेरसमं सयं समत्तं ॥**

चर १ उम्माय २ सरीरे ३ पोग्गल ४ अगणी ५ तहा किमाहारे ६ । संसिट्ठ ७ मंतरे खलु ८ अणगारे ९ केवली चेव १० ॥ १ ॥ रायगिहे जाव एवं वयासी-अणगारे णं भंते ! भावियप्पा चरमं देवावासं वीइक्कंते परमं देवावासमसंपत्ते एत्थ णं अंतरा कालं करेज्जा, तस्स णं भंते ! कहिं गई कहि उववाए पन्नत्ते ? गोयमा ! जे से तत्थ परि(य)स्सओ तल्लेसा देवावासा तहिं तस्स गई तहिं तस्स उववाए पन्नत्ते, से य तत्थगए विराहेज्जा कम्मलेस्सांमेव पडि(म)वडइ, से य तत्थ गए नो विराहेज्जा तामेव लेस्सं उवसंपज्जित्ताणं विहरइ ॥ अणगारे णं भंते ! भावियप्पा चरमं असुरकुमारा-वासं वीइक्कंते परमं असुरकुमारा० एवं चेव, एवं जाव थणियकुमारावासं जोइसिया-वासं, एवं वेमाणियावासं जाव विहरइ ॥ ४९९ ॥ नेरइयाणं भंते ! कहं सीहा गई कहं सीहे गइविसए पण्णत्ते ? गोयमा ! से जहानामए-कैइ पुरिसे तरुणे वल्लवं जुगवं जाव निउणसिप्पोवगए आउंटियं बाहं पसारेज्जा पसारियं वा बाहं आउंटिज्जा, विक्खिण्णं वा मुट्ठिं साहरेज्जा साहरियं वा मुट्ठिं विक्खिरेज्जा, उम्मिसियं वा अट्ठिं निम्मिसेज्जा-निम्मिसियं वा अट्ठिं उम्मिसेज्जा, भवे एयारुवे ? णो इण्ठे

समष्टे, नेरइया णं एगसमएण वा दुसमएण वा तिसमएण वा विग्गहेणं उववज्जंति,
 नेरइयाणं गोयमा ! तहा सीहा गई तहा सीहे गइविसए पण्णत्ते, एवं जाव वेमाणि-
 याणं, नवरं एगिदियाणं चउसमइए विग्गहे भाणियव्वे, सेसं तं चेव ॥ ५०० ॥
 नेरइया णं भंते ! किं अणंतरोववन्नगा परंपरोववन्नगा अणंतरपरंपरअणुववन्नगा ?
 गोयमा ! नेरइया णं अणंतरोववन्नगावि परंपरोववन्नगावि अणंतरपरंपरअणुववन्नगावि,
 से केणट्ठेणं भंते ! एवं वुच्चइ जाव अणंतरपरंपरअणुववन्नगावि ? गोयमा ! जे णं
 नेरइया पुढमसमयोववन्नगा ते णं नेरइया अणंतरोववन्नगा, जे णं नेरइया अपढम-
 समयोववन्नगा ते णं नेरइया परंपरोववन्नगा, जे णं नेरइया विग्गहगइसमावन्नगा ते
 णं नेरइया अणंतरपरंपरअणुववन्नगा, से तेणट्ठेणं जाव अणुववन्नगावि, एवं निरंतरं
 जाव वेमाणिया १ । अणंतरोववन्नगा णं भंते ! नेरइया किं नेरइयाउयं पकरेंति,
 तिरिक्ख० मणुस्स० देवाउयं पकरेंति ? गोयमा ! नो नेरइयाउयं पकरेंति जाव नो
 देवाउयं पकरेंति । परंपरोववन्नगा णं भंते ! नेरइया किं नेरइयाउयं पकरेंति जाव
 देवाउयं पकरेंति ? गोयमा ! नो नेरइयाउयं पकरेंति, तिरिक्खजोणियाउयं पकरेंति,
 मणुस्साउयंपि पकरेंति, नो देवाउयं पकरेंति । अणंतरपरंपरअणुववन्नगा णं भंते !
 नेरइया किं नेरइयाउयं पकरेंति पुच्छा, गोयमा ! नो नेरइयाउयं पकरेंति जाव नो
 देवाउयं पकरेन्ति, एवं जाव वेमाणियाणं, नवरं पंचिदियतिरिक्खजोणिया मणुस्सा य
 परंपरोववन्नगा चत्तारिवि आउयाइं पकरें(वंधं)ति, सेसं तं चेव २ ॥ नेरइया णं भंते ! किं
 अणंतरनिग्गया परंपरनिग्गया अणंतरपरंपरअणिग्गया ? गोयमा ! नेरइया णं अणंतर-
 निग्गयावि जाव अणंतरपरंपरअणिग्गयावि, से केणट्ठेणं भंते ! जाव अणिग्गयावि ?
 गोयमा ! जे णं नेरइया पढमसमयणिग्गया ते णं नेरइया अणंतरणिग्गया, जे णं नेरइया
 अपढमसमयणिग्गया ते णं नेरइया परंपरणिग्गया, जे णं नेरइया विग्गहगइसमा-
 वन्नगा ते णं नेरइया अणंतरपरंपरअणिग्गया, से तेणट्ठेणं गोयमा ! जाव अणिग्ग-
 यावि, एवं जाव वेमाणिया ३ ॥ अणंतरणिग्गया णं भंते ! नेरइया किं नेरइया-
 उयं पकरेंति जाव देवाउयं पकरेंति ? गोयमा ! नो नेरइयाउयं पकरेंति जाव नो
 देवाउयं पकरेंति । परंपरणिग्गया णं भंते ! नेरइया किं नेरइयाउयं० पुच्छा,
 गोयमा ! नेरइयाउयंपि पकरेंति जाव देवाउयंपि पकरेंति । अणंतरपरंपरअणिग्गया
 णं भंते ! नेरइया पुच्छा, गोयमा ! नो नेरइयाउयं पकरेंति जाव नो देवाउयं
 पकरेंति, एवं निरवसेसं जाव वेमाणिया ४ ॥ नेरइया णं भंते ! किं अणंतर-
 खेदोववन्नगा परंपरखेदोववन्नगा अणंतरपरंपरखेदाणुववन्नगा ? गोयमा ! नेरइया०
 एवं एएणं अभिल्लवेणं तं चेव चत्तारि दंडगा भाणियव्वा । सेवं भंते । सेवं
 भंते ! त्ति जाव विहरइ ॥ ५०१ ॥ चोद्दसमसयस्स पढमो उद्देसो समत्तो ॥

कइविहे णं भंते ! उम्माए पण्णत्ते ? गोयमा ! दुविहे उम्माए पण्णत्ते, तंजहा-
जक्खावेसे य मोहणिज्जस्स य कम्मस्स उदएणं, तत्थ णं जे से जक्खावेसे से णं
सुहवेयणतराए चेव सुहविमोयणतराए चेवं, तत्थ णं जे से मोहणिज्जस्स कम्मस्स
उदएणं से णं दुहवेयणतराए चेव दुहविमोयणतराए चेव ॥ नेरइयाणं भंते !
कइविहे उम्माए पण्णत्ते ? गोयमा ! दुविहे उम्माए पण्णत्ते, तंजहा-जक्खावेसे य
मोहणिज्जस्स य कम्मस्स उदएणं, से केणट्ठेणं भंते ! एवं वुच्चइ नेरइयाणं दुविहे
उम्माए पण्णत्ते, तंजहा-जक्खावेसे य मोहणिज्जस्स कम्मस्स उदएणं ? गोयमा !
देवे वा से असुभे पोग्गले पक्खिवेज्जा, से णं तेसिं असुभाणं पोग्गलाणं पक्खिवण-
याए जक्खावेसं उम्मायं पाउणेज्जा, मोहणिज्जस्स वा कम्मस्स उदएणं मोहणिज्जं
उम्मायं पाउणेज्जा, से तेणट्ठेणं जाव उदएणं । असुरकुमाराणं भंते ! कइविहे
उम्माए पण्णत्ते ? एवं जहेव नेरइयाणं नवरं देवे वा से महिद्धियतराए चेव असुभे
पोग्गले पक्खिवेज्जा, से णं तेसिं असुभाणं पोग्गलाणं पक्खिवणयाए जक्खा(ए)वेसं
उम्मायं पाउणेज्जा, मोहणिज्जस्स वा सेसं तं चेव, से तेणट्ठेणं जाव उदएणं,
एवं जाव थणियकुमाराणं, पुढविकाइयाणं जाव मणुस्साणं एएसिं जहा नेरइयाणं,
वाणमंतरजोइसियवेमाणियाणं जहा असुरकुमाराणं ॥ ५०२ ॥ अत्थि णं भंते !
पज्जे कालवासी वुट्ठिकायं पकरेइ ? हंता अत्थि ॥ जाहे णं भंते ! सक्के देविंदे
देवराया वुट्ठिकायं काउंकामे भवइ से कहमियाणि पकरेइ ? गोयमा ! ताहे चेव णं
से सक्के देविंदे देवराया अविभतरपरि(सा)सए देवे सद्दावेइ, तए णं ते अविभतरपरि-
सगा देवा सद्दाविया समाणा मज्झिमपरिसए देवे सद्दावेति, तए णं ते मज्झिमप-
रिसगा देवा सद्दाविया समाणा बाहिरंपरिसए देवे सद्दावेति, तए णं ते बाहिरपरि-
सगा देवा सद्दाविया समाणा बाहिरंवाहिरगा देवा सद्दावेति, तए णं ते बाहिरवाहि-
रगा देवा सद्दाविया समाणा आभिओगिए देवे सद्दावेति, तए णं ते जाव सद्दाविया
समाणा वुट्ठिकाइए देवे सद्दावेति, तए णं ते वुट्ठिकाइया देवा सद्दाविया समाणा
वुट्ठिकायं पकरेति, एवं खलु गोयमा ! सक्के देविंदे देवराया वुट्ठिकायं पकरेइ ॥
अत्थि णं भंते ! असुरकुमारावि देवा वुट्ठिकायं पकरेति ? हंता अत्थि, किं पत्तियन्नं
भंते ! असुरकुमारा देवा वुट्ठिकायं पकरेति ? गोयमा ! जे इमे अरहंता भगवंता
एएसिं णं जम्मणमहिमासु वा, निक्खमणमहिमासु वा, णाणुप्पायमहिमासु वा,
परिनिव्वाणमहिमासु वा, एवं खलु गोयमा ! असुरकुमारावि देवा वुट्ठिकायं पकरेति,
एवं नागकुमारावि, एवं जाव थणियकुमारा, वाणमंतरजोइसियवेमाणिया एवं चेव
॥ ५०३ ॥ जाहे णं भंते ! ईसाणे देविंदे देवराया तमुक्कायं काउंकामे भवइ से

कहमियाणिं पकरेइ ? गोयमा ! ताहे चेव णं से ईसाणे देविदे देवराया अब्भित-
रपरिसए देवे सदावेइ, तए णं ते अब्भितरपरिसगा देवा सदाविया समाणा एवं
जहेव सक्कस्स जाव तए णं ते आभिओगिया, देवा सदाविया समाणा तमुक्काइए
देवे सदावेति, तए णं ते तमुक्काइया देवा सदाविया समाणा तमुक्कायं पकरेंति,
एवं खलु गोयमा ! ईसाणे देविदे देवराया तमुक्कायं पकरेइ ॥ अत्थि णं भंते !
असुरकुमारावि देवा तमुक्कायं पकरेंति ? हंता अत्थि । किं पत्तियन्नं भंते ! असुर-
कुमारा देवा तमुक्कायं पकरेंति ? गोयमा ! किङ्कारइपत्तियं वा पडिणीयविमोहणट्टयाए
वा गुत्तीसंरक्खणहेउं वा अप्पणो वा सरीरपच्छायणट्टयाए, एवं खलु गोयमा !
असुरकुमारावि देवा तमुक्कायं पकरेंति, एवं जाव वेमाणिया । सेवं भंते ! २ ति
जाव विहरइ ॥ ५०४ ॥ चोद्दसमसयस्स वीथो उद्देसो समत्तो ॥

देवे णं भंते ! महाकाए महासरीरे अणगारस्स भावियप्पणो मज्झंमज्झेणं
वीईवएज्जा ? गोयमा ! अत्थेगइए वीईवएज्जा अत्थेगइए नो वीईवएज्जा, से केणट्ठेणं
भंते ! एवं वुच्चइ अत्थेगइए वीईवएज्जा अत्थेगइए नो वीईवएज्जा ? गोयमा ! देवा
दुविहा पण्णत्ता, तंजहा-माइमिच्छादिट्ठिउववन्नगा य अमाइसम्मदिट्ठिउववन्नगा य,
तत्थ णं जे से माइमिच्छादिट्ठिउववन्नए देवे से णं अणगारं भावियप्पाणं पासइ २
त्ता नो वंदइ नो नमंसइ नो सक्कारेइ नो सम्माणेइ नो कल्लाणं मंगलं देवयं जाव पज्जु-
वासइ, से णं अणगारस्स भावियप्पणो मज्झंमज्झेणं वीईवएज्जा, तत्थ णं जे से अमाइ
सम्मदिट्ठिउववन्नए देवे से णं अणगारं भावियप्पाणं पासइ पासित्ता वंदइ नमंसइ
जाव पज्जुवासइ, से णं अणगारस्स भावियप्पणो मज्झंमज्झेणं नो वीईवएज्जा, से
तेणट्ठेणं गोयमा ! एवं वुच्चइ जाव नो वीईवएज्जा । असुरकुमारे णं भंते ! महाकाए
महासरीरे एवं चेव, एवं देवदंडओ भाणियव्वो जाव वेमाणिए ॥ ५०५ ॥ अत्थि
णं भंते ! नेरइयाणं सक्कारेइ वा सम्माणेइ वा किइक्कम्मेइ वा अब्भुट्ठाणेइ वा अंज-
लिपग्गहेइ वा आसणाभिग्गहेइ वा आसणाणुप्पदाणेइ वा इंतस्स पञ्चुग्गच्छणया
ठियस्स पज्जुवासणया गच्छंतस्स पडिसंसाहणया ? नो इणट्ठे समट्ठे । अत्थि णं
भंते ! असुरकुमाराणं सक्कारेइ वा सम्माणेइ वा जाव पडिसंसाहणया ? हंता
अत्थि, एवं जाव थणियकुमाराणं, पुढाविकाइयाणं, जाव चउरिंदियाणं एएसि जहा
नेरइयाणं, अत्थि णं भंते ! पंचिंदियतिरिक्खजोणियाणं सक्कारेइ वा जाव पडिसं-
साहणया ? हंता अत्थि, नो चेव णं आसणाभिग्गहेइ वा आसणाणुप्पदाणेइ वा,
मणुस्साणं जाव वेमाणियाणं जहा असुरकुमाराणं ॥ ५०६ ॥ अप्पिड्ढिए णं भंते !
देवे माहिड्ढियस्स देवस्स मज्झंमज्झेणं वीईवएज्जा ? नो, इणट्ठे समट्ठे, समिड्ढिए

णं भंते ! देवे समिद्धियस्स देवस्स मज्झमज्जेणं वीईवएज्जा ? णो ईणट्ठे समट्ठे, पमत्तं पुण वीईवएज्जा, से णं भंते ! किं सत्थेणं अक्कमित्ता पभू अणक्कमित्ता पभू ? गोयमा ! अक्कमित्ता पभू नो अणक्कमित्ता पभू, से णं भंते ! किं पुर्व्वि सत्थेणं अक्कमित्ता पच्छा वीईवएज्जा, पुर्व्वि वीईवएज्जा पच्छा सत्थेणं अक्कमेज्जा ? एवं एएणं अभिलावेणं जहा दसमसए आइड्डिउद्देसए तहेव निरवसेसं चत्तारि दंडगा भाणियव्वा जाव महिद्धिया वेमाणिणी अप्पिद्धियाए वेमाणिणीए ॥ ५०७ ॥ रयणप्पभापुढविनेरइया णं भंते ! केरिसयं पोग्गलपरिणामं पच्चणुवभवमाणा विहरंति ? गोयमा ! अणिट्ठं जाव अमणामं, एवं जाव अहेसत्तमापुढविनेरइया, एवं वेयणापरिणामं, एव जहा जीवाभिगमे विइए नेरइयउद्देसए जाव अहेसत्तमापुढविनेरइया णं भंते ! केरिसयं परिग्गहसत्तापरिणामं पच्चणुवभवमाणा विहरंति ? गोयमा ! अणिट्ठं जाव अमणामं । सेवं भंते ! २ त्ति ॥ ५०८ ॥ चोद्दसमसयस्स तइओ उद्देसो समत्तो ॥

एस णं भंते ! पोग्गले तीतमणंतं सासयं समयं लुक्खी समयं अलुक्खी समयं लुक्खी वा अलुक्खी वा, पुर्व्वि च णं करणेणं अणेगवन्नं अणेगरुवं परिणामं परिणमइ, अह से परिणामे निज्जिन्ने भवइ तओ पच्छा एगवन्ने एगरुवे सिया ? हंता गोयमा ! एस णं पोग्गले तीतं तं चेव जाव एगरुवे सिया ॥ एस णं भंते ! पोग्गले पडुप्पन्नं सासयं समयं ? एवं चेव, एवं अणागयमणंतं पि ॥ एस णं भंते ! खंधे तीतमणंतं ? एवं चेव, खंधेवि जहा पोग्गले ॥ ५०९ ॥ एस णं भंते ! जीवं तीतमणंतं सासयं समयं दुक्खी समयं अदुक्खी समयं दुक्खी वा अदुक्खी वा, पुर्व्वि च णं करणेणं अणेगभावं अणेगभूयं परिणामं परिणमइ, अह से वेयणिज्जे निज्जिन्ने भवइ तओ पच्छा एगभावे एगभूए सिया ? हंता गोयमा ! एस णं जीवे जाव एगभूए सिया, एवं पडुप्पन्नं सासयं समयं, एवं अणागयमणंतं सासयं समयं ॥ ५१० ॥ परमाणुपोग्गले णं भंते ! किं सासए असासए ? गोयमा ! सिय सासए सिय असासए, से केणट्ठेणं भंते ! एवं वुच्चइ सिय सासए सिय असासए ? गोयमा ! दव्वट्ठयाए सासए, वन्नपज्जवेहिं जाव फासपज्जवेहिं असासए, से तेणट्ठेणं जाव सिय सासए सिय असासए ॥ ५११ ॥ परमाणुपोग्गले णं भंते ! किं चरिमे अचरिमे ? गोयमा ! दव्वादेसेणं नो चरिमे अचरिमे, खेत्तादेसेणं सिय चरिमे सिय अचरिमे, कालादेसेणं सिय चरिमे सिय अचरिमे, भावादेसेणं सिय चरिमे सिय अचरिमे ॥ ५१२ ॥ कइविहे णं भंते ! परिणामे पण्णत्ते ? गोयमा ! दुविहे परिणामे पण्णत्ते, तंजहा-जीवपरिणामे य अजीवपरिणामे य, एवं परिणामपयं निरवसेसं भाणियव्वं । सेवं भंते ! २ त्ति जाव विहरइ ॥ ५१३ ॥ चोद्दसमसयस्स चउत्थो उद्देसो समत्तो ॥

नेरइए णं भंते । अगणिकायस्स मज्झंमज्झेणं वीईवएज्जा ? गोयमा ! अत्थेगइए वीईवएज्जा अत्थेगइए नो वीईवएज्जा, से केणट्ठेणं भंते । एवं वुच्चइ अत्थेगइए वीईवएज्जा अत्थेगइए नो वीईवएज्जा ? गोयमा ! नेरइया दुविहा पण्णत्ता, तंजहा-विग्गहगइसमावन्नगा य अविग्गहगइसमावन्नगा य, तत्थ णं जे से विग्गहगइसमावन्नए नेरइए से णं अगणिकायस्स मज्झंमज्झेणं वीईवएज्जा, से णं तत्थ झियाएज्जा ? णो इणट्ठे समट्ठे, नो खलु तत्थ सत्थं कमइ, तत्थ णं जे से अविग्गहगइसमावन्नए नेरइए से णं अगणिकायस्स मज्झंमज्झेणं णो वीईवएज्जा, से तेणट्ठेणं जाव नो वीईवएज्जा ॥ असुरकुमारे णं भंते ! अगणिकायस्स० पुच्छा, गोयमा ! अत्थेगइए वीईवएज्जा अत्थेगइए नो वीईवएज्जा से केणट्ठेणं जाव नो वीईवएज्जा ? गोयमा ! असुरकुमारा दुविहा पण्णत्ता, तंजहा-विग्गहगइसमावन्नगा य अविग्गहगइसमावन्नगा य, तत्थ णं जे से विग्गहगइसमावन्नए असुरकुमारे से णं एवं जहेव नेरइए जाव कमइ, तत्थ णं जे से अविग्गहगइसमावन्नए असुरकुमारे से णं अत्थेगइए अगणिकायस्स मज्झंमज्झेणं वीईवएज्जा, अत्थेगइए नो वीईवएज्जा, जे णं वीईवएज्जा से णं तत्थ झियाएज्जा ? नो इणट्ठे समट्ठे, नो खलु तत्थ सत्थं कमइ, से तेणट्ठेणं एवं जाव थणियकुमारे, एगिंदिया जहा नेरइया । बेइंदिए णं भंते ! अगणिकायस्स मज्झंमज्झेणं जहा असुरकुमारे तहा बेइंदिएवि, नवरं जे णं वीईवएज्जा से णं तत्थ झियाएज्जा ? हंता झियाएज्जा, सेसं तं चेव एवं जाव चउरिंदिए ॥ पंचिदियतिरिक्खजोणिए णं भंते ! अगणिकाय० पुच्छा, गोयमा ! अत्थेगइए वीईवएज्जा अत्थेगइए नो वीईवएज्जा, से केणट्ठेणं० ? गोयमा ! पंचिदियतिरिक्खजोणिया दुविहा - पण्णत्ता, तंजहा-विग्गहगइसमावन्नगा य अविग्गहगइसमावन्नगा य, विग्गहगइसमावन्नए जहेव नेरइए जाव नो खलु तत्थ सत्थं कमइ, अविग्गहगइसमावन्नगा पंचिदियतिरिक्खजोणिया दुविहा पण्णत्ता, तंजहा-इड्ढिप्पत्ता य अणिड्ढिप्पत्ता य, तत्थ णं जे से इड्ढिप्पत्ते पंचिदियतिरिक्खजोणिए से णं अत्थेगइए अगणिकायस्स मज्झंमज्झेणं वीईवएज्जा अत्थेगइए नो वीईवएज्जा, जे णं वीईवएज्जा से णं तत्थ झियाएज्जा ? नो इणट्ठे समट्ठे, नो खलु तत्थ सत्थं कमइ, तत्थ णं जे से अणिड्ढिप्पत्ते पंचिदियतिरिक्खजोणिए से णं अत्थेगइए अगणिकायस्स मज्झंमज्झेणं वीईवएज्जा अत्थेगइए नो वीईवएज्जा, जे णं वीईवएज्जा से णं तत्थ झियाएज्जा ? हंता झियाएज्जा, से तेणट्ठेणं जाव नो वीईव- (झिया)एज्जा, एवं मणुस्सेवि, वाणमंतरजोइसियवेमाणिए जहा असुरकुमारे ॥५१४॥ नेरइया दस ठाणां पच्चणुब्भवमाणा विहरंति, तंजहा-अणिट्ठा सहा अणिट्ठा रुवा

अणिट्ठा गंधा अणिट्ठा रसा अणिट्ठा फासा अणिट्ठा गई अणिट्ठा ठिई अणिट्ठे लायन्ने
अणिट्ठे जसोकित्ती अणिट्ठे उट्ठाणकम्मवलवीरियपुरिसक्कारपरक्कमे । असुरकुमारा
दस ठाणां पच्चणुब्भवमाणा विहरंति, तंजहा-इट्ठा सद्दा इट्ठा रूवा जाव इट्ठे
उट्ठाणकम्मवलवीरियपुरिसक्कारपरक्कमे, एवं जाव थणियकुमारा ॥ पुढविकाइया
छट्ठाणां पच्चणुब्भवमाणा विहरंति, तं-इट्ठाणिट्ठा फासा इट्ठाणिट्ठा गई एवं जाव
परक्कमे, एवं जाव वणस्सइकाइया । वेइंदिया सत्तट्ठाणां पच्चणुब्भवमाणा विहरंति,
तंजहा-इट्ठाणिट्ठा रसा सेसं जहा एगिंदियाणं, तेइंदिया णं अट्ठट्ठाणां पच्चणुब्भव-
माणा विहरंति, तं-इट्ठाणिट्ठा गंधा सेसं जहा वेइंदियाणं, चउरिंदिया णं नवट्ठाणां
पच्चणुब्भवमाणा विहरंति, तं-इट्ठाणिट्ठा रूवा सेस जहा तेइंदियाणं, पंचिदियतिरि-
क्खजोणिया दस ठाणां पच्चणुब्भवमाणा विहरंति, तंजहा-इट्ठाणिट्ठा सद्दा जाव
परक्कमे, एवं मणुस्सावि, वाणमंतरजोइसियवेमाणिया जहा असुरकुमारा ॥ ५१५ ॥
देवे णं भंते । महिद्धिए जाव महेसक्खे बाहिरए पोग्गले अपरियाइत्ता पभू
तिरियपव्वयं वा तिरियभित्ति वा उल्लंघेतए वा पल्लंघेतए वा ? गोयमा ! णो- इणट्ठे
समट्ठे । देवे णं भंते । महिद्धिए जाव महेसक्खे बाहिरए पोग्गले परियाइत्ता
पभू तिरिय जाव पल्लंघेतए वा ? हंता पभू । सेवं भंते ! सेवं भंते ! त्ति ॥ ५१६ ॥
चोहसमे सए पञ्चमो उद्देशो समत्तो ॥

रायगिहे जाव एवं वयासी-नेरइया णं भंते ! किमाहारा किपरिणामा किंजो-
णिया किठिईया पणत्ता ? गोयमा ! नेरइया णं पोग्गलाहारा पोग्गलपरिणामा
पोग्गलजोणिया पोग्गलट्ठिईया कम्मोवगा कम्मनियाणा कम्मट्ठिईया कम्मुणा(चे)मेव
विप्परियासमेंति, एवं जाव वेमाणिया ॥ ५१७ ॥ नेरइया णं भंते ! कि वीचिदव्वाइं
आहारेंति अवीचिदव्वाइं आहारेंति ? गोयमा ! नेरइया वीचिदव्वाइंपि आहारेंति
अवीचिदव्वाइंपि आहारेंति, से केणट्ठेणं भंते ! एवं वुच्चइ नेरइया वीचि० तं चेव
जाव आहारेंति ? गोयमा ! जे णं नेरइया एगपएसूणाइंपि दव्वाइं आहारेंति ते णं
नेरइया वीचिदव्वाइं आहारेंति, जे णं नेरइया पडिपुच्चाइं दव्वाइं आहारेंति ते णं
नेरइया अवीचिदव्वाइं आहारेंति, से तेणट्ठेणं गोयमा ! एवं वुच्चइ जाव आहारेंति,
एवं जाव वेमाणिया आहारेंति ॥ ५१८ ॥ जाहे णं भंते ! सक्के देविंदे देवराया
दिव्वाइं भोगभोगां भुंजिउंक्रमे भवइ से कहमियाणिं पकरेइ ? गोयमा ! ताहे
चेव णं से सक्के देविंदे देवराया एगं मह नेमिपडिरूवगं विउव्वइ, एगं जोयणसय-
सहस्सं आयामविकखंभेणं तिन्नि जोयणसयसहस्साइं जाव अट्ठंगुलं च किचिविसे-
साहियं परिकखेवेणं, तस्स णं नेमिपडिरूवस्स उवरिं बहुसमरमणिजे भूमिभागे पञ्चते

जाव मणीणं फासे, तस्स णं नेमिपडिरुवगस्स बहुमज्जदेसभागे तत्थ णं महं एगं
 पासायवडिसगं विउव्वइ पंच जोयणसयाइं उड्ढं उच्चत्तेणं, अट्ठाइज्जाइं जोयणसयाइं
 विक्खंभेणं, अब्भुग्गयमूसियवन्नओ जाव पडिरुवं, तस्स णं पासायवडिसगस्स उल्लोए
 पउमल्लयभत्तिचित्ते जाव पडिरुवे, तस्स णं पासायवडिसगस्स अंतो बहुसमरमणिजे
 भूमिभाए जाव मणीणं फासो, मणिपेडिया अट्ठजोयणिया जहा वेमाणियाणं, तीसे णं
 मणिपेडियाए उवरि महं एगे देवसयणिज्जे विउव्वइ सयणिज्जवन्नओ जाव पडिरुवे,
 तत्थ णं से सक्के देविदे देवराया अट्ठहिं अग्गमहिस्सीहिं सपरिवाराहिं दोहि य
 अणिएहिं तं०-नट्ठाणिण य गंधव्वाणिण य सद्धिं महयाहयनट्ठ जाव दिव्वाइं भोग-
 भोगाइं भुंजमाणे विहरइ ॥ जाहे णं ईसाणे देविदे देवराया दिव्वाइं जहा सक्के तथा
 ईसाणेवि निरवसेसं, एवं सणकुमारेवि, नवरं पासायवडिसओ छ जोयणसयाइं उड्ढं
 उच्चत्तेणं तिन्नि जोयणसयाइं विक्खंभेणं, मणिपेडिया तहेव अट्ठजोयणिया, तीसे
 णं मणिपेडियाए उवरि एत्थ णं महेगं सीहासणं विउव्वइ सपरिवारं भाणियव्वं,
 तत्थ णं सणकुमारे देविदे देवराया वावत्तरीए सामाणियसाहस्सीहिं जाव चउहिं
 चावत्तरीहिं आयरक्खदेवसाहस्सीहि य बहूहि सणकुमारकप्पवासीहिं वेमाणिएहि
 देवेहि य देवीहि य सद्धिं संपरिवुडे महया जाव विहरइ । एवं जहा सणकुमारे
 तथा जाव पाणओ अच्चुओ, नवरं जो जस्स परिवारो सो तस्स भाणियव्वो, पासा-
 यउच्चत्तं जं सएसु २ कप्पेसु विमाणणं उच्चत्तं अट्ठद्धं वित्थारो जाव अच्चुयस्स
 नवजोयणसयाइं उड्ढं उच्चत्तेणं अट्ठपंचमाइं जोयणसयाइं विक्खंभेणं, तत्थ णं
 गोयमा ! अच्चुए देविदे देवराया दसहिं सामाणियसाहस्सीहि जाव विहरइ, सेवं
 भंते ! २ ति ॥ ५१९ ॥ **चोइसमे सए छट्ठो उइसो समत्तो ॥**

रायगिहे जाव परिसा पडिगया, गोयमाइ समणे भगवं महावीरे भगवं गोयमं
 आमंतेत्ता एवं वयासी-चिरसंसिद्धोऽसि मे गोयमा ! चिरसंधुओऽसि मे गोयमा !
 चिरपरिचिओऽसि मे गोयमा ! चिरजुसिओऽसि मे गोयमा ! चिराणुगओऽसि मे
 गोयमा ! चिराणुवत्तीसि मे गोयमा ! अणंतरं देवलोए अणंतरं माणुस्सए भवे किं
 परं मरणा कायस्स भेदा इओ चुया दोवि तुल्ला एगट्ठा अविसेसमणाणत्ता भावि-
 स्सामो ॥ ५२० ॥ जहा णं भंते ! वयं एयमट्ठं जाणामो पासामो तथा णं अणुत्तरो-
 च्चाइया देवावि एयमट्ठं जाणंति पासंति ? हंता गोयमा ! जहा णं वयं एयमट्ठं
 जाणामो पासामो तथा णं अणुत्तरोववाइया देवावि एयमट्ठं जाणंति पासंति, से
 केणट्ठेणं जाव पासंति ? गोयमा ! अणुत्तरोववाइयाणं अणंताओ मणोदव्ववग्गणाओ
 रुद्धाओ पत्ताओ अभिसमन्नागयाओ भवंति, से तेणट्ठेणं गोयमा ! एवं वुच्चइ जाव

पासंति ॥ ५२१ ॥ कळविहे णं भंते । तुल्लए पण्णत्ते ? गोयमा । छव्विहे तुल्लए पण्णत्ते, तंजहा-दव्वतुल्लए, खेत्ततुल्लए, कालतुल्लए, भवतुल्लए, भावतुल्लए, संठाणतुल्लए, से केणट्ठेणं भंते । एवं वुच्चइ दव्वतुल्लए २ ? गोयमा । परमाणुपोग्गले परमाणुपोग्गलस्स दव्वओ तुल्ले, परमाणुपोग्गले परमाणुपोग्गलवइरित्तस्स दव्वओ णो तुल्ले, दुपएसिए खंधे दुपएसियस्स खंधस्स दव्वओ तुल्ले, दुपएसिए खंधे दुपएसियवइरित्तस्स खंधस्स दव्वओ णो तुल्ले, एवं जाव दसपएसिए, तुल्लसंखेजपएसिए खंधे तुल्लसंखेजपएसियस्स खंधस्स दव्वओ तुल्ले, तुल्लसंखेजपएसिए खंधे तुल्लसंखेजपएसियवइरित्तस्स खंधस्स दव्वओ णो तुल्ले, एवं तुल्लअसंखेजपएसिएवि, एवं तुल्लअणंतपएसिएवि, से तेणट्ठेणं गोयमा । एवं वुच्चइ दव्वतुल्लए । से केणट्ठेणं भंते । एवं वुच्चइ खेत्ततुल्लए २ ? गोयमा । एगपएसोगाढे पोग्गले एगपएसोगाढस्स पोग्गलस्स खेत्तओ तुल्ले, एगपएसोगाढे पोग्गले एगपएसोगाढवइरित्तस्स पोग्गलस्स खेत्तओ णो तुल्ले, एव जाव दसपएसोगाढे, तुल्लसंखेजपएसोगाढेवि एवं चैव, एवं तुल्लअसंखेजपएसोगाढेवि, से तेणट्ठेणं जाव खेत्ततुल्लए । से केणट्ठेणं भंते । एवं वुच्चइ कालतुल्लए २ ? गोयमा । एगसमयठिईए पोग्गले एगसमयठिईयस्स पोग्गलस्स कालओ तुल्ले, एगसमयठिईए पोग्गले एगसमयठिईयवइरित्तस्स पोग्गलस्स कालओ णो तुल्ले, एवं जाव दससमयठिईए, तुल्लसंखेजसमयठिईए एवं चैव, एवं तुल्लअसंखेजसमयठिईएवि, से तेणट्ठेणं जाव कालतुल्लए । से केणट्ठेणं भंते । एवं वुच्चइ भवतुल्लए २ ? गोयमा । नेरइए नेरइयस्स भवट्ठयाए तुल्ले, नेरइए नेरइयवइरित्तस्स भवट्ठयाए नो तुल्ले, तिरिक्खजोणिए एवं चैव, एवं मणस्सेवि, एवं देवेवि, से तेणट्ठेणं जाव भवतुल्लए । से केणट्ठेणं भंते । एवं वुच्चइ भावतुल्लए भावतुल्लए ? गोयमा । एगगुणकालए पोग्गले एगगुणकालयस्स पोग्गलस्स भावओ तुल्ले, एगगुणकालए पोग्गले एगगुणकालवइरित्तस्स पोग्गलस्स भावओ णो तुल्ले, एवं जाव दसगुणकालए, एवं तुल्लसंखेजगुणकालए पोग्गले, एवं तुल्लअसंखेजगुणकालएवि, एवं तुल्लअणंतगुणकालएवि, जहा कालए एवं नीलए लोहियए हालिइए सुक्खिलए, एवं सुव्विभगंधे, एवं दुव्विभगंधे, एवं तित्ते जाव सहुरे, एवं कक्खडे जाव लुक्खे, उदइए भावे उदइयस्स भावस्स भावओ तुल्ले, उदइए भावे उदइयभाववइरित्तस्स भावस्स भावओ नो तुल्ले, एवं उवसमिएवि, खइए० खओवसमिए० पारिणामिए० संनिवाइए भावे संनिवाइयरस भावस्स, से तेणट्ठेणं गोयमा । एवं वुच्चइ भावतुल्लए २ । से केणट्ठेणं भंते । एवं वुच्चइ संठाणतुल्लए २ ? गोयमा । परिमंडले संठाणे परिमंडलस्स संठाणस्स संठाणओ तुल्ले, परिमंडलसंठाणे परिमंडलसंठाणवइरित्तस्स संठाणस्स संठाणओ नो तुल्ले, एवं, वट्ठे तंसे चउरंसे आयए, समचउरंसंठाणे सम-

चउरंसस्स संठाणस्स संठाणओ तुल्ले, समचउरंसे संठाणे समचउरंससंठाणवइरित्तस्स संठाणस्स संठाणओ नो तुल्ले, एवं परिमंडले, एवं जाव हुंडे, से तेणट्ठेणं जाव संठाणतुल्लए २ ॥ ५२२ ॥ भत्तपच्चक्खायए णं भंते ! अणगारे मुच्छिए जाव अज्जोववन्ने आहारमाहारेइ अहे णं वीससाए कालं करेइ तओ पच्छा अमुच्छिए अगिद्धे जाव अणज्जोववन्ने आहारमाहारेइ ? हता गोयमा ! भत्तपच्चक्खायए णं अणगारे तं चेव, से केणट्ठेणं भन्ते ! एवं वुच्चइ भत्तपच्चक्खायए णं तं चेव, गोयमा ! भत्तपच्चक्खायए णं अणगारे मुच्छिए जाव अज्जोववन्ने आहारे भवइ, अहे णं वीससाए कालं करेइ तओ पच्छा अमुच्छिए जाव आहारे भवइ, से तेणट्ठेणं गोयमा ! जाव आहारमाहारेइ ॥ ५२३ ॥ अत्थि णं भंते ! लवसत्तमा देवा २ ? हंता अत्थि, से केणट्ठेणं भन्ते ! एवं वुच्चइ लवसत्तमा देवा २ ? गोयमा ! से जहानामए-केइ पुरिसे तरुणे जाव निउणसिप्पोवगए सालीण वा वीहीण वा गोधूमाण वा जवाण वा जवजवाण वा प(पि)क्काणं परियाताणं हरियाणं हरियकंडाणं तिकखेणं णवपज्जणएणं असिअएणं पडिसाहरिया २ पडिसंखिविया २ जाव इणामेव (२) त्तिकट्ठु सत्तलवए लुएज्जा, जइ णं गोयमा ! तेसिं देवाणं एवंइयं कालं आउए पहुप्पए तो णं ते देवा तेणं चेव भवग्गहणेणं सिज्झं(ता)ति जाव अंतं करंति, से तेणट्ठेणं जाव लवसत्तमा देवा लवसत्तमा देवा ॥ ५२४ ॥ अत्थि णं भंते ! अणुत्तरोववाइया देवा २ ? हंता अत्थि, से केणट्ठेणं भंते ! एवं वुच्चइ अणुत्तरोववाइया देवा २ ? गोयमा ! अणुत्तरोववाइयाणं देवाणं अणुत्तरा सद्दा अणुत्तरा रुवा जाव अणुत्तरा फासा, से तेणट्ठेणं गोयमा ! एवं वुच्चइ जाव अणुत्तरोववाइया देवा २ । अणुत्तरोववाइया णं भंते ! देवा केवइएणं कम्मावसेसेणं अणुत्तरोववाइयदेवत्ताए उववन्ना ? गोयमा ! जावइयं छट्ठभत्तिए समणे निग्गंथे कम्मं निज्जरेइ एवंइएणं कम्मावसेसेणं अणुत्तरोववाइया देवा देवत्ताए उववन्ना । सेवं भंते ! २ ति ॥ ५२५ ॥ **चोइसमे सए सत्तमो उद्देसो समत्तो ॥**

इमीसे णं भंते ! रयणप्पभाए पुढवीए सक्करप्पभाए य पुढवीए केवइयं अवाहाए अंतरे पण्णत्ते ? गोयमा ! असंखेज्जाइं जोयणसहस्साइं अवाहाए अंतरे पण्णत्ते, सक्करप्पभाए णं भंते ! पुढवीए वालुयप्पभाए य पुढवीए केवइयं ० ? एवं चेव, एवं जाव तमाए अहेसत्तमाए य, अहेसत्तमाए णं भंते ! पुढवीए अलोगस्स य केवइयं अवाहाए अंतरे पण्णत्ते ? गोयमा ! असंखेज्जाइं जोयणसहस्साइं अवाहाए अंतरे पण्णत्ते । इमीसे णं भंते ! रयणप्पभाए पुढवीए जोइसियस्स य केवइयं पुच्छा, गोयमा ! सत्तनउए जोयणसए अवाहाए अंतरे पण्णत्ते, जोइसियस्स णं भंते ! सोहम्मीसाणाण य कप्पाणं केवइयं पुच्छा, गोयमा ! असंखेज्जाइं जोयण जाव

अंतरे पण्णत्ते, सोहम्मीसाणाणं भंते ! सणकुमारमाहिंदाणं य केवइयं० ? एवं चेव,
सणकुमारमाहिंदाणं भंते ! वंभलोगस्स य कप्पस्स केवइयं० ? एवं चेव, वंभलोगस्स
णं भंते ! लंतगस्स य कप्पस्स केवइयं० ? एवं चेव, लंतगस्स णं भंते ! महासुक्कस्स
य कप्पस्स केवइयं० ? एवं चेव, एवं महासुक्कस्स य कप्पस्स सहस्सारस्स य, एवं
सहस्सारस्स आणयपाणयकप्पाणं, एवं आणयपाणयाण य कप्पाणं आरणच्चुयाण
य कप्पाणं, एवं आरणच्चुयाणं गेविज्जविमाणाण य, एवं गेविज्जविमाणाणं
अणुत्तरविमाणाण य । अणुत्तरविमाणाणं भंते ! ईसिप्पवभाराए य पुढवीए केवइयं०
पुच्छा, गोयमा ! दुवालसजोयणे अवाहाए अंतरे पण्णत्ते, ईसिप्पवभाराए णं भंते !
पुढवीए अलोगस्स य केवइए अवाहाए० पुच्छा, गोयमा ! देसूणं जोयणं अवाहाए
अंतरे पण्णत्ते ॥ ५२६ ॥ एस णं भंते ! सालस्खवे उण्हाभिहए तण्हाभिहए दवगिजा-
लाभिहए कालमासे कालं किच्चा कहिं गच्छिहिइ कहिं उववज्जिहिइ ? गोयमा ! इहेव
रायगिहे नयरे सालस्खत्ताए पच्चायाहिइ, से णं तत्थ अच्चियवंदियपूइयसकारियस-
म्माणिए दिव्वे सच्चे सच्चोवाए सन्निहियपाडिहेरे लाउल्लोइयमहिए यावि भविस्सइ, से
णं भंते ! तओहिंतो अणंतरं उव्वट्ठित्ता कहिं गमिहिइ कहिं उववज्जिहिइ ? गोयमा !
महाविदेहे वासे सिज्जिहिइ जाव अंतं काहिइ ॥ एस णं भंते ! साललट्ठिया उण्हाभिहया
तण्हाभिहया दवगिजालाभिहया कालमासे कालं किच्चा जाव कहिं उववज्जिहिइ ?
गोयमा ! इहेव जंबुदीवे २ भारहे वासे विव्झगिरिपायमूले महेस्सरीए नयरीए
सामलिस्खत्ताए पच्चायाहिइ, सा णं तत्थ अच्चियवंदियपूइय जाव लाउल्लोइय-
महिया यावि भविस्सइ, से णं भंते ! तओहिंतो अणंतरं उव्वट्ठित्ता सेसं जहा
सालस्खस्स जाव अंतं काहिइ । एस णं भंते ! उंवरलट्ठिया उण्हाभिहया ३
कालमासे कालं किच्चा जाव कहिं उववज्जिहिइ ? गोयमा ! इहेव जंबुदीवे २ भारहे
वासे पाडलिपुत्ते नयरे पाडलिस्खत्ताए पच्चायाहिइ, से णं तत्थ अच्चियवंदिय
जाव भविस्सइ, से णं भंते ! अणंतरं उव्वट्ठित्ता सेसं तं चेव जाव अंतं
काहिइ ॥ ५२७ ॥ तेणं कोलेणं तेणं समएणं अम्मडस्स परिव्वायगस्स सत्त
अंतेवासीसया गिम्हकालसमयंसि एवं जहा उववाइए जाव आराहगा ॥ ५२८ ॥
बहुजणे णं भंते ! अन्नमन्नस्स एवमाइक्खइ ४ एवं खलु अम्मडे परिव्वायगे कं पिळपुरे
नयरे घरसए एवं जहा उववाइए अम्मडस्स वत्तव्वया जाव दढप्पइण्णो अंतं
काहिइ ॥ ५२९ ॥ अत्थि णं भंते ! अव्वावाहा देवा अव्वावाहा देवा ? हंता
अत्थि, से केणट्ठेणं भंते ! एवं वुच्चइ अव्वावाहा देवा २ ? गोयमा ! पभू णं
एगमेगे अव्वावाहे देवे एगमेगस्स पुरिसस्स एगमेगंसि अच्छिपंतंसि दिव्वं

देविद्धि दिव्वं देवजुइं दिव्वं देवाणुभा(वं)गं दिव्वं बत्तीसइविहं नट्टविहिं उवदंसेतए,
 णो चेव णं तस्स पुरिसस्स किंचि आवाहं वा वावाहं वा उप्पाएइ छविच्छेदं
 वा करेइ, एसुहुमं च णं उवदंसेज्जा, से तेणट्ठेणं जाव अन्वावाहा देवा २ ॥५३०॥
 पभू णं भंते ! सक्के देविंदे देवराया पुरिसस्स सीसं सपाणिणा असिणा छिंदित्ता
 कमंडलुंमि पक्खिवित्तए ? हंता पभू, से कहमिदाणिं पकरेइ ? गोयमा ! छिंदिया
 छिंदिया च णं वा पक्खिवेज्जा, भिंदिया भिंदिया च णं वा पक्खिवेज्जा, कुट्टिया कुट्टिया
 च णं वा पक्खिवेज्जा, चुन्निया चुन्निया च णं वा पक्खिवेज्जा, तओ पच्छा खिप्पामेव
 पडिसंघाएज्जा, नो चेव णं तस्स पुरिसस्स किंचिवि आवाहं वा वावाहं वा उप्पाएज्जा,
 छविच्छेदं पुण करेइ, एसुहुमं च णं पक्खिवेज्जा ॥५३१॥ अत्थि णं भंते ! जंभया
 देवा जंभया देवा ? हंता अत्थि, से केणट्ठेणं भंते ! एवं वुच्चइ जंभया देवा
 जंभया देवा ? गोयमा ! जंभगा णं देवा निच्चं पमुइयपक्कीलिया कंदप्परइमोहण-
 सीला जे णं ते देवे कुद्धे पासेज्जा से णं पुरिसे महंतं अयसं पाउणिज्जा, जे णं ते
 देवे तुट्ठे पासेज्जा से णं महंतं जसं पाउणेज्जा, से तेणट्ठेणं गोयमा ! जंभगा देवा
 २ ॥ कइविहा णं भंते ! जंभगा देवा पण्णत्ता ? गोयमा ! दसविहा पण्णत्ता,
 तंजहा-अन्नजंभगा पाणजंभगा वत्थजंभगा लेणजंभगा सयणजंभगा पुप्फजंभगा
 फलजंभगा-पुप्फफलजंभगा विज्जाजंभगा अवियत्तजंभगा, जंभगा णं भंते ! देवा
 कहिं वसहिं उवेंति ? गोयमा ! सव्वेसु चेव दीहवेयड्ढेसु चित्तविचित्तजमगपव्वएसु
 कंचणपव्वएसु य एत्थ णं जंभगा देवा वसहिं उवेंति । जंभगाणं भंते ! देवाणं
 केवइयं कालं ठिई पण्णत्ता ? गोयमा ! एगं पलिओवमं ठिई पण्णत्ता । सेवं भंते ! सेवं
 भंते ! ति जाव विहरइ ॥५३२॥ चोइसमे सए अट्टमो उद्देसो समत्तो ॥
 अणगारे णं भंते ! भावियप्पा अप्पणो कम्मलेस्सं न जाणइ न-पासइ तं पुण
 जीवं सहुविं सकम्मलेस्सं जाणइ, पासइ ? हंता गोयमा ! अणगारे णं भावियप्पा
 अप्पणो जाव पासइ ॥ अत्थि णं भंते ! सहु(वी)वि सकम्मलेस्सा पोग्गला ओभासंति
 ४ ? हंता अत्थि ॥ कयरे णं भंते ! सहुवी सकम्मलेस्सा पोग्गला ओभासंति जाव
 पभासेंति ? गोयमा ! जाओ इमाओ चंदिमसूरियाणं देवाणं विमाणेहिंतो लेस्साओ
 बहिया अभिनिस्सडाओ ताओ ओभासेंति जाव पभासेति एवं एएणं गोयमा ! ते
 सहुवी सकम्मलेस्सा-पोग्गला ओभासेति ४ ॥ ५३३ ॥ नेरइयाणं भंते ! किं अत्ता
 पोग्गला अणत्ता पोग्गला ? गोयमा ! नो-अत्ता-पोग्गला अणत्ता पोग्गला, असुरकुमाराणं
 भंते ! किं अत्ता पोग्गला-अणत्ता-पोग्गला ? गोयमा ! अत्ता पोग्गला णो अणत्ता-
 पोग्गला, एवं जाव थणियकुमाराणं, पुढविकाइयाणं पुच्छा, गोयमा ! अत्तावि पोग्गला-

अणत्तावि पोग्गला, एवं जाव मणुस्साणं, वाणमंतरजोइसियवेमाणियाणं जहा असुरं-
कुमाराणं, नेरइयाणं भंते ! किं इट्ठा पोग्गला अणिट्ठा पोग्गला ? गोयमा ! नो इट्ठा
पोग्गला अणिट्ठा पोग्गला, जहा अत्ता भणिया एवं इट्ठावि कंतावि पियावि मणुत्तावि
भाणियव्वा ए(वं)ए पंच दंडगा ॥ देवे णं भंते ! महिद्धिए जाव महेसक्खे रुवसहस्सं
विउव्वित्ता पभू भासासहस्सं भासित्तए ? हंता पभू, सा णं भंते ! किं एगा भासा
भासासहस्सं ? गोयमा ! एगा णं सा भासा णो खलु तं भासासहस्सं ॥ ५३४ ॥
तेणं कालेणं तेणं समएणं भगवं गोयमे अचिरुगयं, वालसूरियं जासुमणाकुसुमपुंजप्प-
गासं लोहितगं पासइ पासित्ता जायसद्धे जाव समुप्पन्नकोउहल्ले जेणेव समणे भगवं
महावीरे तेणेव उवागच्छइ २ ता जाव नमंसित्ता एवं वयासी-किमिदं भंते ! सूरिए
किमिदं भंते ! सूरियस्स अट्ठे ? गोयमा ! सुभे सूरिए सुभे सूरियस्स अट्ठे । किमिदं
भंते ! सूरिए किमिदं भंते ! सूरियस्स पभा ? एवं चेव, एवं छाया, एवं लेस्सा ॥ ५३५ ॥
जे इमे भंते ! अज्जत्ताए समणा निग्गंथा विहरंति एए णं कस्स ते(उ)यलेस्सं वीई-
वयंति ? गोयमा ! मासपरियाए समणे निग्गंथे वाणमंतराणं देवाणं तेयलेस्सं वीइवयइ,
हुमासपरियाए समणे निग्गंथे असुरिंदवज्जियाणं भवणवासीणं देवाणं तेयलेस्सं वीइ-
वयइ, एवं एएणं अभिलावेणं तिमासपरियाए समणे निग्गंथे असुरकुमाराणं देवाणं
तेयलेस्सं वीइवयइ, चउम्मासपरियाए समणे निग्गंथे गहगणनक्खत्तताराहवाणं जोइ-
सियाणं देवाणं तेयलेस्सं वीइवयइ, पंचमासपरियाए समणे निग्गंथे त्रंदिमसूरियाणं जोइ-
सिंदाणं जोइसरायाणं तेयलेस्सं वीइवयइ, छम्मासपरियाए समणे निग्गंथे सोहम्मीसा-
णाणं देवाणं ० सत्तमासपरियाए ० सणंकुमारमाहिंदाणं देवाणं ० अट्ठमासपरियाए समणे
निग्गंथे वंभलोगलंतगाणं देवाणं तेयलेस्सं वीइवयइ, नवमासपरियाए समणे निग्गंथे
महासुक्कसहस्साराणं देवाणं तेयलेस्सं वीइवयइ, दसमासपरियाए समणे निग्गंथे आणय-
पाणयआरणञ्जुयाणं देवाणं ० एक्कारसमासपरियाए समणे निग्गंथे गेवेज्जगाणं देवाणं ०
वारसमासपरियाए समणे निग्गंथे अणुत्तरोववाइयाणं देवाणं तेयलेस्सं वीइवयइ, तेण
परं सुक्के सुक्काभिजाए भवित्ता तओ पच्छा सिज्झइ जाव अंतं करेइ । सेवं भंते ! सेवं
भंते ! त्ति जाव विहरइ ॥ ५३६ ॥ **चोइसमे सए नवमो उद्देसो समत्तो ॥**

केवली णं भंते ! छउमत्थं जाणइ पासइ ? हंता जाणइ पासइ, जहा णं भंते !
केवली छउमत्थं जाणइ पासइ तहा णं सिद्धेवि छउमत्थं जाणइ पासइ ? हंता
जाणइ पासइ, केवली णं भंते ! आहोहियं जाणइ पासइ ? एवं चेव, एवं परमाहो-
हियं, एवं केवलं एवं सिद्धं जाव जहा णं भंते ! केवली सिद्धं जाणइ पासइ तहां
णं सिद्धेवि सिद्धं जाणइ पासइ ? हंता जाणइ पासइ । केवली णं भंते ! भासेज्ज वा

वागरेज वा ? हंता भासेज वा वागरेज वा, जहा णं भंते ! केवली भासेज वा वागरेज वा तहा णं सिद्धेवि भासेज वा वागरेज वा ? णो इणट्टे समट्टे, से केण-ट्टेणं भंते ! एवं वुच्चइ जहा णं केवली भासेज वा वागरेज वा णो तहा णं सिद्धे भासेज वा वागरेज वा ? गोयमा ! केवली णं सउट्टाणे सकम्मे सवले सवीरिए सपुरिसक्कारपरक्कमे, सिद्धे णं अणुट्टाणे जाव अपुरिसक्कारपरक्कमे, से तेणट्टेणं जाव नो वागरेज वा, केवली णं भंते ! उम्मिसेज वा निम्मिसेज वा ? हंता गोयमा ! उम्मिसेज वा निम्मिसेज वा एवं चेव, एवं आउट्टेज वा पसारेज वा, एवं ठाणं वा सेजं वा निसीहियं वा चेएज्जा, केवली णं भंते ! इमं रयणप्पभं पुढविं रयणप्पभापुढवीति जाणइ पासइ ? हंता गोयमा ! जाणइ पासइ, जहा णं भंते ! केवली इमं रयणप्पभं पुढविं रयणप्पभापुढवीति जाणइ पासइ तहा णं सिद्धेवि इमं रयणप्पभं पुढविं रयणप्पभापुढवीति जाणइ पासइ ? हंता जाणइ पासइ, केवली णं भंते ! सक्करप्पभं पुढविं सक्करप्पभापुढवीति जाणइ पासइ ? एवं चेव, एवं जाव अहेसत्तमं, केवली णं भंते ! सोहम्मं कप्पं सोहम्मकप्पेति जाणइ पासइ ? हंता जाणइ पासइ, एवं ईसाणं एवं जाव अच्चुयं, केवली णं भंते ! गेवेज्जविमाणं गेवेज्जविमाणेति जाणइ पासइ ? एवं चेव, एवं अणुत्तरविमाणेवि, केवली णं भंते ! ईसिप्पब्भारं पुढविं ईसिप्पब्भारपुढवीति जाणइ पासइ ? एवं चेव, केवली णं भंते ! परमाणुपोग्गलं परमाणुपोग्गलेति जाणइ पासइ ? एवं चेव, एवं दुपएसियं खंधं एवं जाव जहा णं भंते ! केवली अणंतपएसियं खंधं अणंतपएसिए खंधेति जाणइ पासइ तहो णं सिद्धेवि अणंतपएसियं खंधं जाव पासइ ? हंता जाणइ पासइ । सेवं भंते ! सेवं भंते ! त्ति ॥ ५३७ ॥

चोदसमे सए दसमो उद्देसो समत्तो ॥ चोदसमं सयं समत्तं ॥

नमो सुयदेवयाए भगवईए । तेणं कालेणं तेणं समएणं सावत्थी नामं नयरी होत्था वन्नओ, तीसे णं सार्वत्थीए नयरीए वहिया उत्तरपुरच्छिमे दिसीभाए तत्थ णं कोट्टए नामं उज्जाणे होत्था वन्नओ, तत्थ णं सावत्थीए नयरीए हालाहला नामं कुंभकारी आर्जावियोवासिया परिवसइ, अट्ठा जाव अपरिभूया आजीवियसमयंसि लद्धट्ठा गहियट्ठा पुच्छियट्ठा विणिच्छियट्ठा अट्ठिमिजपेम्माणुरागरत्ता अयमाउसो ! आजीवियसमए अट्टे अयं परमट्टे सेसे अणट्टेति आजीवियसमएणं अप्पाणं भावेमाणी विहरइ । तेणं कालेणं तेणं समएणं गोसाले मंखलिपुत्ते चउव्वीसवासपरियाए हालाहलाए कुंभकारीए कुंभकारावणंसि आजीवियसंधसंपरिवुडे आजीवियसमएणं अप्पाणं भावेमाणे विहरइ, तए णं तस्स गोसालस्स मंखलिपुत्तस्स अन्नया कयाइ इमे छ दिसाचरा अंतियं पाउब्भवित्था, तंजहासाणे क(णं)लंदे

कणियारे अच्छिद्दे अग्गिवेसायणे अज्जुणे गोमायुपुत्ते, तए णं ते छ दिसाचरा
अट्टविहं पुव्वगयं मग्गदसमं सएहिं २ मइदंसणेहिं निज्जूहंति स० २ ता गोसालं
मंखलिपुत्ते उवट्ठाइंसु, तए णं से गोसाले मंखलिपुत्ते तेणं अट्ठंगस्स महानिमित्तस्स
केणइ उल्लोयमेत्तेणं सव्वेसिं पाणाणं भूयाणं जीवाणं सत्ताणं इमाइं छ अणइक्क-
मणिज्जाइं वागंरणाइं वागंरेइ, तं०-लाभं अलाभं सुहं दुक्खं जीवियं मरणं तथा ।
तए णं से गोसाले मंखलिपुत्ते तेणं अट्ठंगस्स महानिमित्तस्स केणइ उल्लोयमेत्तेणं
सावत्थीए नयरीए अजिणे जिणप्पलावी अणरहा अरहप्पलावी अकेवली केवलि-
प्पलावी असव्वन्नं सव्वन्नप्पलावी अजिणे जिणसइं पगासेमाणे विहरइ ॥ ५३८ ॥
तए णं सावत्थीए नयरीए सिंघाडग जाव पहेसु बहुजणो अन्नमन्नस्स एवमाइक्खइ
जाव एवं पहरुवेइ-एवं खलु देवाणुप्पिया ! गोसाले मंखलिपुत्ते जिणे जिणप्पलावी
जाव पगासेमाणे विहरइ, से कहमेयं मन्ने एवं ?, तेणं कालेणं तेणं समएणं सामी
समोसडे जाव परिसा पडिगया, तेणं कालेणं तेणं समएणं समणस्स भगवओ महा-
वीरस्स जेट्ठे अंतेवासी इंदभूई णामं अणगारे गोयमगोत्तेणं जाव छट्ठंछट्ठेणं एवं जहा
विइयसए नियंठेइए जाव अडमाणे बहुजणसइं निसामेइ, बहुजणो अन्नमन्नस्स
एवमाइक्खइ ४-एवं खलु देवाणुप्पिया ! गोसाले मंखलिपुत्ते जिणे जिणप्पलावी
जाव पगासेमाणे विहरइ, से कहमेयं मन्ने एवं ?, तए णं भगवं गोयमे बहुजणस्स
अंतियं एयमट्ठं सोच्चा निसम्म जाव जायसद्धे जाव भत्तपाणं पडिदंसेइ जाव
पज्जुवासमाणे एवं वयासी-एवं खलु अहं भंते ! छट्ठं तं चेव जाव जिणसइं पगासेमाणे
विहरइ, से कहमेयं भंते ! एवं ? तं इच्छामि णं भंते ! गोसालस्स मंखलिपुत्तस्स
उट्ठाणपरियाणियं परिक्हियं, गोयमादि समणे भगवं महावीरे भगवं गोयमं एवं
वयासी-जण्णं गोयमा ! से बहुजणे अन्नमन्नस्स एवमाइक्खइ ४-एवं खलु गोसाले
मंखलिपुत्ते जिणे जिणप्पलावी जाव पगासेमाणे विहरइ, तण्णं मिच्छा, अहं पुण
गोयमा ! एवमाइक्खामि जाव पहरुवेमि-एवं खलु एयस्स गोसालस्स मंखलिपुत्तस्स
मंखलिनामं मंखे पिया होत्था, तस्स णं मंखलिस्स मंखस्स भद्दा नामं भारिया
होत्था सुकुमाल जाव पडिरुवा, तए णं सा भद्दा भारिया अन्नया कयाइ गुव्विणी
यावि होत्था, तेणं कालेणं तेणं समएणं सरवणे नामं सन्निवेसे होत्था रिद्धत्थिमिय
जाव सन्निभप्पगासे प्रासाईए ४, तत्थ णं सरवणे सन्निवेसे गोवहुले नामं माहणे
परिवसइ, अट्ठे जाव अपरिभूए रिउव्वेय जाव सुपरिनिट्ठिए यावि होत्था, तस्स णं
गोवहुलस्स माहणस्स गोसाला यावि होत्था, तए णं से मंखलीमंखे नामं अन्नया
कयाइ भद्दाए भारियाए गुव्विणीए सद्धिं चित्तफलगहत्थगए मंखत्तणेणं अप्पाण

भावेमाणे पुव्वाणुपुव्वि चरमाणे गामाणुगामं दूइज्जमाणे जेणेव सरवणे सन्निवेशे जेणेव गोवहुलस्स माहणस्स गोसाला तेणेव उवागच्छइ २ ता गोवहुलस्स माहणस्स गोसालाए एगदेसंसि भंडनिकखेवं करेइ भंड० २ ता सरवणे सन्निवेशे उच्चनीय-मज्झिमाई कुलाई घरसमुदाणस्स भिक्खायरियाए अउमाणे वसहीए सव्वओ समंता मग्गणगवेसणं करेइ, वसहीए सव्वओ समंता मग्गणगवेसणं करेमाणे अन्नत्थ चसहि अलभमाणे तस्सेव गोवहुलस्स माहणस्स गोसालाए एगदेसंसि वासावासं उवागए, तए णं सा भद्दा भारिया नवण्हं मासाणं बहुपडिपुज्जाणं अद्धट्टमाण राइंदियाणं वीइक्कंताणं सुकुमाल जाव पडिरुवं दारगं पयाथा, तए णं तस्स दारगस्स अम्मापियरो एक्कारसमे दिवसे वीइक्कंते जाव वारसाहे दिवसे अयमेयाह्वं गोणं गुण-निप्फन्नं नामधेज्जं करैति-जम्हा णं अम्हं इमे दारए गोवहुलस्स माहणस्स गोसालाए जाए, तं होउ णं अम्हं इमस्स दारगस्स नामधेज्जं गोसाले गोसालेत्ति, तए णं तस्स दारगस्स अम्मापियरो नामधेज्जं करैति गोसालेत्ति, तए णं से गोसाले दारए उम्मुक्कवालभावे विण्णायपरिणयमेत्ते जोव्वणगमणुप्पत्ते सयमेव पाडिएक्कं चित्तफलं करेइ २ ता चित्तफलगहत्थगए मंखत्तणेणं अप्पाणं भावेमाणे विहरइ ॥ ५३९ ॥

तेणं कालेणं तेणं समएणं अहं गोयमा ! तीसं वासाइं अगारवासमज्झे वसित्ता अम्मापिईहिं देवत्तगएहिं एवं जहा भावणाए जाव एगं देवदूसमादाय मुंडे भवित्ता अगाराओ अणगारियं पव्वइत्तए, तए णं अहं गोयमा ! पढमं वासं अद्धमासं-अद्धमासेणं खममाणे अट्ठियगामं निस्साए पढमं अंतरावासं वासावासं उवागए, दोच्चं वासं मासंमासेणं खममाणे पुव्वाणुपुव्वि चरमाणे गामाणुगामं दूइज्जमाणे जेणेव रायगिहे नयरे जेणेव नालिंदा बाहिरिया जेणेव तंतुवायसाला तेणेव उवा-गच्छामि ते० २ ता अहापडिरुवं उगहं ओगिण्हामि अहा० २ ता तंतुवायसालाए एगदेसंसि वासावासं-उवागए, तए णं अहं गोयमा ! पढमं मासक्खमणं उवसंप-ज्जिताणं विहरामि । तए णं से गोसाले मंखलिंपुत्ते चित्तफलगहत्थगए मंखत्तणेणं अप्पाणं भावेमाणे पुव्वाणुपुव्वि चरमाणे जाव दूइज्जमाणे जेणेव रायगिहे नयरे जेणेव नालिंदा बाहिरिया जेणेव तंतुवायसाला तेणेव उवागच्छइ ते० २ ता तंतुवायसालाए एगदेसंसि भंडनिकखेवं करेइ भं० २ ता रायगिहे नयरे उच्चनीय जाव अन्नत्थ कंथवि वसहि अलभमाणे तीसे य तंतुवायसालाए एगदेसंसि वासा-वासं उवागए जत्थेव णं अहं गोयमा !, तए णं अहं गोयमा ! पढममासक्ख-मणपारणगंसि तंतुवायसालाओ पडिनिकखमामि तंतु० २ ता णालिंदाबाहिरियं मज्झंमज्झेणं जेणेव रायगिहे नयरे तेणेव उवागच्छामि २ ता रायगिहे नयरे

उच्चनीयं जाव अडमाणे विजयस्स गाहावइस्स गिहं अणुप्पविट्ठे, तए णं से विजए
गाहावई ममं एजमाणं पासइ २ ता हट्ठतुट्ठं खिप्पामेव आसणाओ अब्भुट्ठेइ खि०
२ ता पायपीडाओ पच्चोरुहं २ ता पाउयाओ ओमुयइ पा० २ ता एगसाडियं
उत्तरासंगं करेइ २ ता अंजलिमउलियहत्थे ममं सत्तट्ठपयाइं अणुगच्छइ २ ता ममं
तिक्खुत्तो आयाहिणं पयाहिणं करेइ २ ता ममं वंदइ नमंसइ वं० २ ता ममं विउलेणं
असणपाणखाइमसाइमेणं पडिलाभिस्सामित्तिकट्ठु तुट्ठे पडिलाभेमाणेवि तुट्ठे पडिला-
भिएवि तुट्ठे, तए णं तस्स विजयस्स गाहावइस्स तेणं दव्वसुद्धेणं दायगसुद्धेणं
[तवस्सिविसुद्धेणं तिकरणसुद्धेणं] पडिगाहंगसुद्धेणं तिविहेणं तिकरणसुद्धेणं दाणेणं
मए पडिलाभिए समाणे देवाउए निवद्धे संसारे परित्तीकए गिहंसि य से इमाइं पंच
दिव्वाइं पाउब्भूयाइं, तंजहा-वसुहारा वुट्ठा १ दसद्धवन्ने कुसुमे निवाइए २ चेलु-
क्खेवे कए ३ आहयाओ देवहुंदुभीओ ४ अंतरावि य णं आगासे अहो दाणे २ ति
घुट्ठे ५, तए णं रायगिहे नयरे सिंघाडग जाव पहेसु बहुजणो अन्नमन्नस्स एवमा-
इक्खइ जाव एवं पत्तवेइ-धन्ने णं देवाणुप्पिया ! विजए गाहावई, कयत्थे णं देवाणु-
प्पिया ! विजए गाहावई, कयपुन्ने णं देवाणुप्पिया ! विजए गाहावई, कयलक्खणे
णं देवाणुप्पिया ! विजए गाहावई, कया णं लोया देवाणुप्पिया ! विजयस्स गाहाव-
इस्स, सुलद्धे णं देवाणुप्पिया ! माणुस्सए जम्मजीवियफले विजयस्स गाहावइस्स
जस्स णं गिहंसि तहारुवे सोट्ठ साहुरुवे पडिलाभिए समाणे इमाइं पंच दिव्वाइं पाउ-
ब्भूयाइं, तंजहा-वसुहारा वुट्ठा जाव अहो दाणे २ घुट्ठे, तं धन्नेणं० कयत्थे० कयपुन्ने०
कयलक्खणे० कया णं लोया० सुलद्धे माणुस्सए जम्मजीवियफले विजयस्स गाहाव-
इस्स विजयं० २ । तए णं से गोसाले मंखलिपुत्ते बहुजणस्स अतिए एयमट्ठं सोच्चा
निसम्म समुप्पन्नसंसए समुप्पन्नकोउहल्ले जेणेव विजयस्स गाहावइस्स गिहे तेणेव
उवागच्छइ २ ता पासइ विजयस्स गाहावइस्स गिहंसि वसुहारं वुट्ठं दसद्धवन्नं
कुसुमं निवडियं ममं च णं विजयस्स गाहावइस्स गिहाओ पडिनिक्खममाणं पासइ
२ ता हट्ठतुट्ठं जेणेव ममं अतिए तेणेव उवागच्छइ २ ता ममं तिक्खुत्तो आया-
हिणं पयाहिणं करेइ २ ता ममं वंदइ नमंसइ वं० २ ता ममं एवं वयासी-तुब्भेणं
भंते ! ममं धम्मंयरिया अहन्नं तुब्भं धम्मंतेवासी, तए णं अहं गोयमा ! गोसा-
लस्स मंखलिपुत्तस्स एयमट्ठं नो आढामि नो परिजाणामि तुसिणीए संचिट्ठामि, तए
णं अहं गोयमा ! रायगिहाओ नयराओ पडिनिक्खमामि २ ता णालंदं वाहिरियं
मज्झमज्झेणं जेणेव तंतुवायसाला तेणेव उवागच्छामि २ ता दोच्चं मासक्खमणं
उवसंपज्जित्ताणं विहरामि, तए णं अहं गोयमा ! दोच्चं मासक्खमणंपारणंसि

तंतुवायसालाओ पडिनिक्खमामि तं० २ ता नालंदं वाहिरियं मज्झमज्झेणं जेणेव
 रायगिहे नयरे जाव अडमाणे आणंदस्स गाहावइस्स गिहं अणुप्पविट्ठे, तए णं से
 आणंदे गाहावई ममं एज्जमाणं पासइ २ ता एवं जहेव विजयस्स, नवरं ममं विउलाए
 खज्जगविहीए पडिलाभेस्सामीति तुट्ठे सेसं तं चेव जाव तच्चं मासक्खमणं उवसंप-
 जित्ताणं विहरामि, तए णं अहं गोयमा ! तच्चं मासक्खमणपारणगंसि तंतुवायसालाओ
 पडिनिक्खमामि तं० २ ता तहेव जाव अडमाणे सुणंदस्स गाहावइस्स गिहं अणुप्प-
 विट्ठे, तए णं से सु(दंसणे)णंदे गाहावई एवं जहेव विजयगाहावई, नवरं ममं सव्व-
 कामगुणिएणं भोयणेणं पडिलाभेइ सेसं तं चेव जाव चउत्थं मासक्खमणं उवसंपजि-
 त्ताणं विहरामि, तीसे णं नालंदाए वाहिरियाए अदूरसामंते एत्थ णं कोल्लाए नामं
 सन्निवेसे होत्था सन्निवेस० वन्नओ, तत्थ णं कोल्लाए- संनिवेसे बहुले नामं माहणे
 परिवसइ, अट्ठे जाव अपरिभूए रिउव्वेय जाव सुपरिनिट्ठिए यावि होत्था, तए णं
 से बहुले माहणे- कत्तियचाउम्मासियपाडिवयंसि विउलेणं महुघयसंजुत्तेणं परमण्णेणं
 माहणे आयामेत्था, तए णं अहं गोयमा ! चउत्थमासक्खमणपारणगंसि तंतुवाय-
 सालाओ पडिनिक्खमामि २ ता णालंदं वाहिरियं मज्झमज्झेणं निग्गच्छामि २
 ता जेणेव कोल्लाए संनिवेसे तेणेव उवागच्छामि २ ता कोल्लाए सन्निवेसे उच्चनीय
 जाव अडमाणे बहुलस्स माहणस्स गिहं अणुप्पविट्ठे, तए णं से बहुले माहणे ममं
 एज्जमाणं- तहेव जाव ममं विउलेणं- महुघयसंजुत्तेणं परमन्नेणं पडिलाभेस्सामीति
 तुट्ठे सेसं जहा विजयस्स जाव बहुले माहणे बहु०-२ । तए णं से गोसाले मंखलिपुत्ते
 ममं तंतुवायसालाए-अपासमाणे रायगिहे नयरे सव्विभतरवाहिरियाए ममं सव्वओ
 समंता-मग्गणगवेसणं- करेइ, ममं कत्थवि सुइं वा खुइं वा पवित्तिं वा अलभमाणे
 जेणेव तंतुवायसाला-तेणेव उवागच्छइ २ ता साडियाओ य पाडियाओ य कुंडियाओ
 य पाहणा(वाणहा)ओ य चित्तफलं च माहणे आयामेइ आयामेत्ता सउत्तरोट्ठं मुंडं
 करेइ-स० २ ता-तंतुवायसालाओ पडिनिक्खमइ तं० २-ता णालंदं-वाहिरियं
 मज्झमज्झेणं निग्गच्छइ निग्गच्छित्ता जेणेव-कोल्लागसन्निवेसे तेणेव उवागच्छइ,
 तए णं-तस्स कोल्लागस्स-संनिवेसस्स-बहिया-बहुजणो अन्नमन्नस्स एवमाइक्खइ
 जाव परुवेइ-धन्ने णं देवाणुप्पिया ! बहुले माहणे तं-चेव जाव जीवियफले बहु-
 लस्स माहणस्स व० ३, तए-णं तस्स गोसालस्स-मंखलिपुत्तस्स बहुजणस्स
 अंतियं-एयमट्ठं-सोच्चा निसम्म-अयमेयारुवे-अज्झत्थिए जाव समुप्पजित्था-जारि-
 सिया णं मम धम्मायरियस्स-धम्मोवएसगस्स-समणस्स भगवओ महावीरस्स इद्धी
 जु(त्ती)ई जसे बले वीरिए पुरिसकारपरक्कमे लद्धे प्रत्ते अभिसमंजागए, नो खलु अत्थि

तारिसिया णं अन्नस्स कस्स(वि)इ तहाखवस्स समणस्स वा माहणस्स वा इही जुई
जाव परक्कमे लद्धे पत्ते अभिसमन्नागए, तं निस्संदिद्धं च णं एत्थ ममं धम्मायरिए
धम्मोवएसए समणे भगवं महावीरे भविस्सतीतिकट्टु कोल्लागसन्निवेसे सद्धिभूतरवा-
हिरिए ममं सव्वओ समंता मग्गणगवेसणं करेइ, ममं सव्वओ जाव करेमाणे
कोल्लागसंनिवेसस्स वहिया पणियभूमीए मए सद्धि अभिसमन्नागए, तए णं से
गोसाले मंखलिपुत्ते हट्टुट्टे ममं तिक्खुत्तो आयाहिणं पयाहिणं जाव
नमंसित्ता एवं वयासी-तुब्भे णं भंते ! ममं धम्मायरिया अहन्नं तुब्भं अंतेवासी,
तए णं अहं गोयमा ! गोसालस्स मंखलिपुत्तस्स एयमट्ठं पडिखुणेमि, तए णं
अहं गोयमा ! गोसालेणं मंखलिपुत्तेणं सद्धि पणियभूमीए छव्वासाइं लाभं अलाभं
सुहं दुक्खं सक्कारमसक्कारं पच्चणुव्वभवमाणे अणिच्चजागरियं विहरित्था ॥ ५४० ॥
तए णं अहं गोयमा ! अन्नया कयाइ पढमसरदकालसमयंसि अप्पवुट्ठिकार्यंसि
गोसालेणं मंखलिपुत्तेणं सद्धि सिद्धत्थगामाओ नयराओ कुम्मारागामं नयरं संपट्टिए
विहाराए, तस्स णं सिद्धत्थगामस्स नयरस्स कु(म्म)म्मारागामस्स नयरस्स य
अंतरा एत्थ णं महं एगे तिलथंभए पत्तिए पुप्फिए हरियगरेरिजमाणे सिरीए अईव
२ उवसोभेमाणे २ चिट्ठइ, तए णं से गोसाले मंखलिपुत्ते तं तिलथंभगं पासइ २ ता
ममं वंदइ नमंसइ वं० २ ता एवं वयासी-एस णं भंते ! तिलथंभए कि निप्फजि-
स्सइ नो निप्फजिस्सइ, एए य सत्तं तिलपुप्फजीवां उद्दाइत्ता २ कहि गच्छिहिंति
कहि उववज्जिहिंति ?, तए णं अहं गोयमा ! गोसालं मंखलिपुत्तं एवं वयासी-
गोसाला ! एस णं तिलथंभए निप्फजिस्सइ नो न, निप्फजिस्सइ, एए य सत्तं
तिलपुप्फजीवा उद्दाइत्ता २ एयस्स चेव तिलथंभगस्स एगाए तिलसं(गु)गलियाए सत्तं
तिला पच्चायाइरसंति, तए णं से गोसाले मंखलिपुत्ते ममं एवं आइक्खमाणस्स
एयमट्ठं नो सद्धइ नो पत्तियइ नो रोएइ, एयमट्ठं असद्धमाणे अपत्तियमाणे
अरोएमाणे ममं पणिहाय अयण्णं मिच्छावाई भवउत्तिकट्टु ममं अंतियाओ सणियं
२ पच्चोसक्कइ २ ता जेणेव से तिलथंभए तेणेव उवागच्छइ २ ता तं तिलथंभगं
सल्लेहुयायं चेव उप्पाडेइ २ ता एगंते एडेइ, तक्खणमेत्तं च णं गोयमा ! दिव्वे
अव्वभवद्दलए पाउव्वभूए, तए णं से दिव्वे अव्वभवद्दलए खिप्पामेव पतणतणा(य)ए-इ
२ ता खिप्पामेव पविज्जुयाइ २ ता खिप्पामेव नच्चोदगं णाइमइयिं पविरलपप्फुसियं
रयरएणुविणासणं दिव्वं सलिलोदगं वासं वासइ, जेणं से तिलथंभए आसत्थे वीसत्थए
पच्चायाए तत्थेव वद्धमूले तत्थेव पइट्टिए, ते य सत्तं तिलपुप्फजीवा उद्दाइत्ता २ तस्सेव
तिलथंभगस्स एगाए तिलसंगलियाए सत्तं तिला पच्चायाया ॥ ५४१ ॥ तए णं

अहं गोयमा ! गोसालेणं मंखलिपुत्तेणं सद्धि जेणेव कुंडग्गामे नयरे तेणेव उवा-
गच्छामि, तए णं तस्स कुंडग्गामस्स नयरस्स वहिया वेसियायणे नामं बालतवस्सी
छट्ठंछट्ठेणं अणिक्खित्तेणं तवोक्कमेणं उट्ठं वाहाओ पगिज्झिय २ सूरभिमुहे
आयावणभूमीए आयावेमाणे विहरइ, आइच्चतेयतवियाओ य से छप्पदीओ सव्वओ
समंता अभिनिस्सवंति पाणभूयजीवसत्तदयट्ठयाए च णं पडियाओ २ तत्थेव २
भुज्जो २ पच्चोरुहेइ, तए णं से गोसाले मंखलिपुत्ते वेसियायणं बालतवस्सि पासइ
२ ता ममं अंतियाओ सणियं २ पच्चोसक्कइ ममं ० २ ता जेणेव वेसियायणे बालत-
वस्सी तेणेव उवागच्छइ २ ता वेसियायणं बालतवस्सि एवं वयासी-किं भवं
मुणी मुणिए उदाहु जूयासेजायरए ?, तए णं से वेसियायणे बालतवस्सी गोसालस्स
मंखलिपुत्तस्स एयमट्ठं णो आढाइ नो परिजाणाइ तुसिणीए संचिट्ठइ, तए णं से
गोसाले मंखलिपुत्ते वेसियायणं बालतवस्सि दोच्चंपि तच्चंपि एवं वयासी-किं भवं
मुणी मुणिए जाव सेजायरए ?, तए णं से वेसियायणे बालतवस्सी गोसालेणं मंखलि-
पुत्तेणं दोच्चंपि तच्चंपि एवं वुत्ते समाणे आसुस्ते जाव मिसिमिसेमाणे आयावणभूमीओ
पच्चोरुहइ आ ० २ ता तेयासमुग्घाएणं समोहणइ तेयासमुग्घाएणं समोहणित्ता
सत्तट्ठपयाइ पच्चोसक्कइ स ० २ ता गोसालस्स मंखलिपुत्तस्स बहाए सरीरगंसि तेयं
निसिरइ, तए णं अहं गोयमा ! गोसालस्स मंखलिपुत्तस्स अणुकंपणट्ठयाए वेसियायणस्स
बालतवस्सिस्स सीओसिणतेयलेस्सा-(तेय)पडिसाहरणट्ठयाए एत्थ णं अंतरा अहं
सीयलियं तेयलेस्सं निसिरामि, जाए सा ममं सीयलियाए तेयलेस्साए वेसियायणस्स
बालतवस्सिस्स सीओ(सा-उ)सिणा तेयलेस्सा पडिहया, तए णं से वेसियायणे बालत-
वस्सी ममं सीयलियाए तेयलेस्साए सीओसिणं तेयलेस्सं पडिहयं जाणित्ता गोसालस्स
य मंखलिपुत्तस्स सरीरगस्स किंचि आवाहं वा वावाहं वा छविच्छेदं वा अकीरमाणं
पासित्ता सीओसिणं तेयलेस्सं पडिसाहरइ सीओ ० २ ता ममं एवं वयासी-से
गयमेयं भगवं ! गयगयमेयं भगवं !, तए णं से गोसाले मंखलिपुत्ते ममं एवं वयासी-
किण्णं भंते ! एस जूयासिजायरए तुब्भे एवं वयासी-से गयमेयं भगवं ! गयगयमेयं
भगवं !, तए णं अहं गोयमा ! गोसालं मंखलिपुत्तं एवं वयासी-तुमं णं गोसाला !
वेसियायणं बालतवस्सि पास(इ)सि पासित्ता ममं अंतियाओ सणियं २ पच्चोसक्कसि
जेणेव वेसियायणे बालतवस्सी तेणेव उवागच्छसि ते ० २ ता वेसियायणं बालत-
वस्सि एवं वयासी-किं भवं मुणी मुणिए उदाहु जूयासेजायरए ?, तए णं से
वेसियायणे बालतवस्सी तव एयमट्ठं नो आढाइ नो परिजाणाइ तुसिणीए संचिट्ठइ,
तए णं तुमं गोसाला ! वेसियायणं बालतवस्सि दोच्चंपि तच्चंपि एवं वयासी-किं भवं

मुणी मुणिए जाव' जूयासेजायरए ? , तए णं से वेसियायणे वालतवंस्सीं तुमं दोच्चपि
तच्चपि एवं वुत्ते समाने आसुरुत्ते जाव पच्चोसक्कइ २ ता तव वहाए सरीरगं(सि)
तेयलेस्सं निस्सिरइ, तए णं अहं गोसाला ! तव अणुकंपणट्ठयाए वेसियायणस्स
वालतवस्सिस्स सीयतेयलेस्सापडिसाहरणट्ठयाए एत्थ णं अंतरा सीयलियं तेयलेस्सं
निसिरामि जाव पडिहयं जाणित्ता तव य सरीरगरस किञ्चि आवाहं वा वावाहं वा
छविच्छेदं वा अकीरमाणं पासित्ता सीओसिणं तेयलेस्सं पडिसाहरइ सी० २ ता ममं
एवं वयासी-से गयमेयं भगवं ! गयगयमेयं भगवं !, तए णं से गोसाले मंखलिपुत्ते
ममं अंतियाओ एयमट्ठं सोच्चा निसम्म भीए जाव संजायभए ममं वंदइ नमंसइ
मनं वं० २ ता एवं वयासी-कहन्नं भंते ! संखित्तविउलतेयलेस्से भवइ ? , तए णं अहं
गोयमा ! गोसालं मंखलिपुत्तं एवं वयासी-जे णं गोसाला ! एगाए सणहाए कुम्मास-
पिंडियाए एगेण य वियडासएणं छट्ठंछट्ठेणं अणिकिखत्तेणं तवोकम्मेणं उड्डं वाहाओ
पणिज्झिय २ जाव विहरइ, से णं अंतो छण्हं मासाणं संखित्तविउलतेयलेस्से भवइ,
तए णं से गोसाले मंखलिपुत्ते ममं एयमट्ठं सम्मं विणएणं पडिसुणेइ ॥ ५४२ ॥
तए णं अहं गोयमा ! अन्नया कयाइ गोसालेणं मंखलिपुत्तेणं सद्धिं कुम्मगामाओ
नयराओ सिद्धत्थगामं नयरं संपट्टिए विहाराए, जाहे य मो तं देसं हव्वमागया
जत्थ णं से तिलथंभए, तए णं से गोसाले मंखलिपुत्ते ममं एवं वयासी-तु(ज्झे)ब्भे णं
भंते ! तया ममं एवं आइक्खह जाव एवं परूवेह-गोसाला ! एस णं तिलथंभए
निप्फज्जिस्सइ नो नो निप्पज्जिस्सइ तं चेव जाव पच्चायाइस्संति तण्णं मिच्छा, इमं
च णं पच्चक्खमेव दीसइ एस णं से तिलथंभए णो निप्फज्जे अनिप्फन्नमेव ते य
सत्त तिलपुप्फजीवा उद्दाइत्ता २ नो एयस्स चेव तिलथंभगस्स एगाए तिलसंगलि-
यांए सत्त तिला पच्चायायां, तए णं अहं गोयमा ! गोसालं मंखलिपुत्तं एवं वयासी-
तुमं णं गोसाला ! तदा ममं एवं आइक्खमाणस्स जाव एवं परूवेमाणस्स एयमट्ठं
नो सइहसि नो पत्तियसि नो रोयसि, एयमट्ठं असइहमाणे अपत्तियमाणे अरोएमाणे
ममं पणिहा(ए)य अयन्नं मिच्छावाइ भवउत्तिकट्ठ ममं अतियाओ सणियं २ पच्चोस-
क्कसि २ ता जेणेवं से तिलथंभए तेणेव उवागच्छसि २ ता जाव एगंतमंते एडेसि,
तक्खणमेत्तं गोसाला ! दिव्वे अब्भवइलए पाउब्भूए, तए-णं से दिव्वे अब्भवइलए
खिप्पामेव तं चेव जाव तस्स चेव तिलथंभगस्स एगाए तिलसंगलियाए सत्त तिला
पच्चायाया, तं एस णं गोसाला ! से तिलथंभए निप्फज्जे णो अनिप्फन्नमेव, ते य
सत्त तिलपुप्फजीवा उद्दाइत्ता २ एयस्स चेव तिलथंभगस्स एगाए तिलसंगलियाए
सत्त तिला पच्चायाया, एवं खलु गोसाला ! वणस्सइकाइया पउट्टपरिहारं परिहरंति,

तए णं से गोसाले मंखलिपुत्ते ममं एवमाइक्खमाणस्स जाव पल्लवेमाणस्स एयमट्ठं
नो सद्वहइ ३ एयमट्ठं अमद्वहमाणे जाव अरोएमाणे जेणेव ने तिलथंभए तेणेव उवा-
गच्छइ २ ता ताओ तिलथंभयाओ तं तिलमंगलियं गृह्ण सुत्तिता करयन्ति सत्त
तिले पप्फोडेइ, तए णं तस्स गोसालस्स मंखलिपुत्तस्स तं सत्त तिले गणमाणस्स
अयमेयारुवे अज्जत्थिए जाव समुप्पज्जित्था-एवं खलु सब्बजीवावि पट्टपरिहारं
परिहरंति, एस णं गोयमा ! गोसालस्स मंखलिपुत्तरय पट्टेइ, एस णं गोयमा !
गोसालस्स मंखलिपुत्तस्स ममं अंतियाओ आया(ओ)ए अवप्पमणे प० ॥ ५४३ ॥
तए णं से गोसाले मंखलिपुत्ते एगाए सणहाए कुम्मायपिंडियाए एगेण य नियडा-
सएणं छट्ठंछट्ठेणं अणिक्खित्तेणं तवोक्कमेणं उट्ठं वाहाओ पगिज्झय २ जाव विहरइ,
तए णं से गोसाले मंखलिपुत्ते अंतो छट्ठं मासाणं संजित्तविउल्लतेयलेस्से जाए
॥ ५४४ ॥ तए णं तस्स गोसालस्स मंखलिपुत्तस्स अन्नया कयाट उमे छट्ठिसान्हरा
अंतियं पाउब्भवित्था तं-साणे तं चेव सब्बं जाव अजिणे जिणसइ पगासेमाणे
विहरइ, तं नो खलु गोयमा ! गोसाले मंखलिपुत्ते जिणे जिणप्पलावी जाव जिणनइ
पगासेमाणे विहरइ, गोसाले णं मंखलिपुत्ते अजिणे जिणप्पलावी जाव पगासेमाणे
विहरइ, तए णं सा महडमहालिया महच्चपरिसा जहा सिवे जाव पडिगयां । तए णं
सावत्थीए नयरीए सिंघाडग जाव बहुजणो अन्नमन्नस्स जाव पल्लवेइ-जन्नं देवाणु-
प्पिया ! गोसाले मंखलिपुत्ते जिणे जिणप्पलावी जाव विहरइ तं णं मिच्छा, समणे
भगवं महावीरे एवं आइक्खइ जाव पल्लवेइ-एवं खलु तस्स गोसालस्स मंखलि-
पुत्तस्स मंखली मामं मंखे पिया होत्था, तए णं तस्स मंखलिस्स एवं तं चेव सब्बं
भाणियव्वं जाव अजिणे जिणप्पलावी जिणसइ पगासेमाणे विहरइ, तं नो खलु
गोसाले मंखलिपुत्ते जिणे जिणप्पलावी जाव विहरइ, गोसाले णं मंखलिपुत्ते अजिणे
जिणप्पलावी जाव विहरइ, समणे भगवं महावीरे जिणे जिणप्पलावी जाव जिणसइ
पगासेमाणे विहरइ, तए णं से गोसाले मंखलिपुत्ते बहुजणस्स अंतियं एयमट्ठं सोच्चा
निसम्म आसुरुत्ते जाव मिसिमिसेमाणे आयावणभूमीओ पच्चोरुहइ आयावणभूमीओ
पच्चोरुहइत्ता सावत्थि नयरिं मज्झंमज्झेणं जेणेव हालाहलाए कुंभकारीए कुंभकारावणे
तेणेव उवागच्छइ उवागच्छित्ता हालाहलाए कुंभकारीए कुंभकारावणंसि आजीविय-
संघसंपरिवुडे मय्यां अमरिसं वहमाणे एवं वावि विहरइ ॥ ५४५ ॥ तेणं कालेणं तेणं
समएणं समणस्स भगवओ महावीरस्स अंतवासी आणंदे नामं थेरे पगइभइए जाव
विणीए छट्ठंछट्ठेणं अणिक्खित्तेणं तवोक्कमेणं संजमेणं तवसा अप्पाणं भावेमाणे
विहरइ, तए णं से आणंदे थेरे छट्ठक्खमणपारणगंसि पढमाए पोरिसीए एवं जहा

गोयमसामी तहेव आपुच्छइ, तहेव जाव उच्चनीयमंज्जिम जाव अडमाणे हालाहलाए कुंभकारीए कुंभकारावणस्स अदूरसामंतेणं वीईवयइ, तए णं से गोसाले मंखलिपुत्ते आणंदं थेरं हालाहलाए कुंभकारीए कुंभकारावणस्स अदूरसामंतेणं वीईवयमाणं पासइ २ ता एवं वयासी-एहि ताव आणंदा ! इओ एगं महं उवमियं निसामेहि; तए णं से आणंदे थेरे गोसालेणं मंखलिपुत्तेणं एवं वुत्ते समाणे जेणेव, हालाहलाए कुंभकारीए कुंभकारावणे जेणेव गोसाले मंखलिपुत्ते तेणेव उवागच्छइ, तए णं से गोसाले मंखलिपुत्ते आणंदं थेरं एवं वयासी-एवं खलु आणंदा ! इओ चिरा(ती)ईयाए अड्डाए केइ उच्चावया वणिया अत्यथी अत्यलुद्धा अत्यगवेसी अत्यकंखिया अत्य-पिवासिया अत्यगवेसणयाए णाणाविहविंदलपणियभंडमायाय सगढीसागेडेणं सुवहुं भत्तपाणपत्ययणं गहाय एगं महं अगामियं अणोहियं छिन्नावायं दीहमद्धं अडवि अणुप्पविट्ठा, तए णं तेसिं वणियाणं तीसे अगामियाए अणोहियाए छिन्नावायाए दीहमद्धाए अडवीए किंचि देसं अणुप्पत्ताणं समाणाणं से पुव्वगहिए उदए अणुपुव्वेणं परि(भुञ्ज)भुंजेमाणे २ खीणे, तए णं ते वणिया खीणोदगा समाणा तण्हाए परिब्भवं-माणा अन्नमन्ने सद्दवेंति अन्न० २ ता एवं वयासी-एवं खलु देवाणुप्पिया ! अम्हं इमीसे अगामियाए जाव अडवीए किंचि देसं अणुप्पत्ताणं समाणाणं से पुव्वगहिए उदए अणुपुव्वेणं परिभुंजेमाणे २ खीणे, तं सेयं खलु देवाणुप्पिया ! अम्हं इमीसे अगामियाए जाव अडवीए उदगस्स सव्वओ समंता मग्गणगवेसणं करेतएत्तिकट्ठु अन्नमन्नस्स अंतिए एयमट्ठं पडिसुणेंति अन्न० २ ता तीसे अगामियाए जाव अडवीए उदगस्स सव्वओ समंता मग्गणगवेसणं करेंति, उदगस्स सव्वओ समंता मग्गणगवेसणं करेमाणा एगं महं वणसंडं आसादेंति, किण्हं किण्होभासं जाव निकुरं-(रुं)वभूयं पासाईयं जाव पडिह्वं, तस्स णं वणसंडस्स बहुमज्जदेसभाए एत्थ णं महेगं वम्मीयं आसादेंति, तस्स णं वम्मीयस्स-चत्तारि वप्पुओ अब्भुग्गयाओ अभि-निसं(डा)ढाओ तिरियं सुसंपग्गहियाओ अहे पन्नगद्धरुवाओ पन्नगद्धसंठाणसंठियाओ पासाईयाओ जाव पडिह्वंओ, तए णं ते वणिया हट्ठुट्ठा अन्नमन्नं सद्दवेंति अ० २ ता एवं वयासी-एवं खलु देवाणुप्पिया ! अम्हं इमीसे अगामियाए जाव सव्वओ समंता मग्गणगवेसणं करेमाणेहिं इमे वणसंडे आसादिए किण्हं किण्होभासे० इमस्स णं वणसंडस्स बहुमज्जदेसभाए इमे वम्मीए आसादिए, इमस्स णं वम्मीयस्स चत्तारि वप्पुओ अब्भुग्गयाओ जाव पडिह्वंओ, तं सेयं खलु देवाणुप्पिया ! अम्हं इमस्स वम्मीयस्स पढमं वप्पि भिन्दित्तए, अवि याई ओरालं उदगरंयणं अस्सादे-स्सामो, तए णं ते वणिया अन्नमन्नस्स अंतियं एयमट्ठं पडिसुणेंति २ ता तस्स

वम्मीयस्स पढमं वप्पि भिंदंति, ते णं तत्थ अच्छं पत्थं जच्चं तणुयं फालियवन्नाभिं
उरालं उदगरयणं आसादेंति, तए णं ते वणिग्या हट्ठतुट्ठा पाणियं पिवंति २ ता
वाहणाइं पजेति वा० २ ता भायणाइं भरेंति भा० २ ता दोच्चंपि अन्नमन्नं
एवं वयासी-एवं खलु देवाणुप्पिया ! अम्हेहिं इमस्स वम्मीयस्स पढमाए वप्पाए
भिन्नाए ओराले उदगरयणे अस्सादिए, तं सेयं खलु देवाणुप्पिया ! अम्हं इमस्स
वम्मीयस्स दोच्चंपि वप्पि भिंदित्तए, अवि याइं एत्थ ओरालं सुवन्नरयणं अस्सादे-
स्सामो, तए णं ते वणिग्या अन्नमन्नस्स अंतियं एयमट्ठं पडिसुणेंति अ० २ ता
तस्स वम्मीयस्स दोच्चंपि वप्पि भिंदंति, ते णं तत्थ अच्छं जच्चं तावणिज्जं महत्थं
महग्घं महरिहं ओरालं सुवन्नरयणं अस्सादेंति, तए णं ते वणिग्या हट्ठतुट्ठा भाय-
णाइं भरेंति २ ता पवहणाइं भरेंति २ ता तच्चंपि अन्नमन्नं एवं वयासी-एवं खलु
देवाणुप्पिया ! अम्हे इमस्स वम्मीयस्स पढमाए वप्पाए भिन्नाए ओराले उदगरयणे
अस्सादिए, दोच्चाए वप्पाए भिन्नाए ओराले सुवन्नरयणे अस्सादिए, तं सेयं खलु
देवाणुप्पिया ! अम्हं इमस्स वम्मीयस्स तच्चंपि व(प्पं)प्पि भिंदित्तए, अवि याइं एत्थं
ओरालं मणिरयणं अस्सादेस्सामो, तए णं ते वणिग्या अन्नमन्नस्स अंतियं एयमट्ठं
पडिसुणेंति अ० २ ता तस्स वम्मीयस्स तच्चंपि वप्पि भिंदंति, ते णं तत्थ विमलं
निम्मलं नित्तलं निक्कलं महत्थं महग्घं महरिहं ओरालं मणिरयणं अस्सादेंति, तए
णं ते वणिग्या हट्ठतुट्ठा भायणाइं भरेंति भा० २ ता पवहणाइं भरेंति २ ता
चउत्थंपि अन्नमन्नं एवं वयासी-एवं खलु देवाणुप्पिया ! अम्हे इमस्स वम्मीयस्स
पढमाए वप्पाए भिन्नाए ओराले उदगरयणे अस्सादिए, दोच्चाए वप्पाए भिन्नाए
ओराले सुवन्नरयणे अस्सादिए, तच्चाए वप्पाए भिन्नाए ओराले मणिरयणे अस्सादिए,
तं सेयं खलु देवाणुप्पिया ! अम्हं इमस्स वम्मीयस्स चउत्थंपि वप्पि भिंदित्तए, अवि
याइं इत्थं उत्तमं महग्घं महत्थं महरिहं ओरालं वडररयणं अस्सादेस्सामो, तए णं
तेसिं वणिग्याणं एगे वणिए हियकामए सुहकामए पत्थकामए आणुकंपिए निस्सेयसिए
हियसुहनिस्सेसकामए ते वणिए एवं वयासी-एवं खलु देवाणुप्पिया ! अम्हे इमस्स
वम्मीयस्स पढमाए वप्पाए भिन्नाए ओराले उदगरयणे जाव तच्चाए वप्पाए
भिन्नाए ओराले मणिरयणे अस्सादिए, तं होउ अलाहि पज्जत्तं णे एसा चउत्थी वप्पा
मा भिज्जउ, चउत्थी णं वप्पा सउवसग्गा यांवि हो(त्था)ज्जा, तए णं ते वणिग्या तस्स
वणिग्यस्स हियकामगस्स सुहकामगस्स जाव हियसुहनिस्सेसकामगस्स एवमाइक्खमा-
णस्स जाव परुवेमाणस्स एयमट्ठं नो सइहंति जाव नो रोयंति, एयमट्ठं असइहमाणा
जाव अरोएमाणा तस्स वम्मीयस्स चउत्थंपि वप्पि भिंदंति, ते णं तत्थ उग्गविसं

चंडविसं घोरविसं महाविसं अइकायमहाकायं मसिमूसाकालं नयणविसरोसपुत्रं
अंजणपुंजनिगरप्पगासं रत्तच्छं, जमलजुयलचंचलचलंतजीहं धरणितलवेणिभूयं
उक्कडफुडकुडिलजडुलकक्खडविकडफडाडोवकरणदच्छं लोहागरधम्ममाणधमधमे-
तघोसं अणागलियचंडतिव्वरोसं समुहिं तुरियं चवलं धमंतं दिट्ठिविसं सप्पं संघट्ठेति,
तए णं से दिट्ठिविसे सप्पे तेहिं वणिएहिं संघट्ठिए समाणे आसुस्ते जाव मिसिमिसे-
माणे सणियं २ उट्ठेइ २ ता सरसरसरस्स वम्मीयस्स सिहरतलं दुरुहइ सि० २
ता आइच्चं णिज्जाइ आ० २ ता ते वणिए अणिमिसाए दिट्ठीए सव्वओ समंता
समभिलोएइ, तए णं ते वणिया तेणं दिट्ठिविसेणं सप्पेणं अणिमिसाए दिट्ठीए
सव्वओ समंता समभिलोइया समाणा खिप्पामेव सभंडमतोवगरणमायाए एगाहच्चं
कूडाहच्चं भासरासी कया यावि होत्था, तत्थ णं जे से वणिए तेसिं वणियाणं हिय-
कामए जाव हियसुहनिस्सेसकामए से णं अणुकं(प)पियाए देवयाए सभंडमतोवगर-
णमायाए नियगं नयरं साहिए, एवामेव आणंदा ! तववि धम्मायरिएणं धम्मोवए-
सएणं समणेणं नायपुत्तेणं ओराले परियाए अस्सादिए, ओराला कित्तिवन्नसइसिलोगा
सदेवमणुयासुरे लोए पुव्वंति गुवंति, थुवंति इति खलु समणे भगवं महावीरे
इति० २, तं जइ मे से अज्ज किंचिवि वदइ, तो णं तवेणं तेएणं एगाहच्चं
कूडाहच्चं भासरासिं करेमि जहा वा वालेणं ते वणिया, तुमं च णं आणंदा !
सारक्खामि संगोवयामि जहा वा से वणिए तेसिं वणियाणं हियकामए जाव निस्सेस-
कामए अणुकंपियाए देवयाए सभंडमतोव० जाव साहिए, तं गच्छह णं तुमं
आणंदा ! तव धम्मायरियस्स धम्मोवएसगस्स समणस्स नायपुत्तेस्स एयमट्ठं
परिकहेहि । तए णं से आणंदे थेरे गोसालेणं मंखलिपुत्तेणं एवं वुत्ते समाणे भीए
जाव, संजायभाए गोसालस्स मंखलिपुत्तस्स अंतियाओ हालाहलाए कुंभकारीए
कुंभकारावणाओ, पडिनिक्खमइ २-ता सिग्घं तुरियं सावत्थि नयरिं, मज्झमज्झेणं
निगगच्छइ २ ता जेणेव कोट्टए उज्जाणे जेणेव समणे भगवं महावीरे तेणेव उवा-
गच्छइ २ ता समणं भगवं महावीरं तिक्खुत्तो आयाहिणं पयाहिण करेइ २ ता वंदइ
नमंसइ वं० २ ता एवं वयासी-एवं खलु अहं भंते ! छट्ठक्खमणपारणगंसि तुब्भेहिं
अव्वभणुत्ताए समाणे सावत्थीए नयरीए उच्चनीय जाव, अडमाणे हालाहलाए
कुंभकारीए जाव वीईवयामि, तए णं गोसाले मंखलिपुत्ते ममं हालाहलाए जाव
पासित्ता एवं वयासी-एहि ताव आणंदा ! इओ एणं महं उवमियं निसामेहि, तए
णं अहं गोसालेणं मंखलिपुत्तेणं एवं वुत्ते समाणे जेणेव हालाहलाए कुंभकारीए
कुंभकारावणे जेणेव गोसाले मंखलिपुत्ते तेणेव उवागच्छामि, तए णं से गोसाले

मंखलिपुत्ते ममं एवं वयासी-एवं खलु आणंदा ! इओ चिराईयाए अद्दाए केइ उच्चावया
 वणिग्या एवं तं चेव सव्वं निरवसेसं भाणियव्वं जाव नियगं नयरं साहिए तं गच्छहं
 णं तुमं आणंदा ! तव धम्मयारियस्स धम्मोवएसगस्स जाव परिकहेहि ॥ ५४६ ॥
 तं पभू णं भंते ! गोसाले मंखलिपुत्ते तवेणं तेएणं एगाहच्चं कूडाहच्चं भासरासिं
 करेत्तए, विसए णं भंते ! गोसालस्स मंखलिपुत्तस्स जाव करेत्तए; समत्थे णं भंते !
 गोसाले मंखलिपुत्ते तवेणं जाव करेत्तए ? पभू णं आणंदा ! गोसाले मंखलिपुत्ते तवेणं
 जाव करेत्तए, विसए णं आणंदा ! गोसाले जाव करेत्तए, समत्थे णं आणंदा ! गोसाले
 जाव करेत्तए, नो चेव णं अरिहंते भगवंते, परियावणियं पुण करेज्जा, जावइएणं
 आणंदा ! गोसालस्स मंखलिपुत्तस्स तवतेए एत्तो अणंतगुणविसिद्धतराए चेव तवतेए
 अणगाराणं भगवंताणं, खंतिखमा पुण अणगारा भगवंतो, जावइएणं आणंदा !
 अणगाराणं भगवंताणं तवतेए एत्तो अणंतगुणविसिद्धतराए चेव तवतेए थेराणं
 भगवंताणं, खंतिखमा पुण थेरा भगवंतो, जावइएणं आणंदा ! थेराणं भगवंताणं
 तवतेए एत्तो अणंतगुणविसिद्धतराए चेव तवतेए अरिहंताणं भगवंताणं, खंति-
 खमा पुण अरहंता भगवंतो, तं पभू णं आणंदा ! गोसाले मंखलिपुत्ते तवेणं
 तेएणं जाव करेत्तए, विसए णं आणंदा ! जाव करेत्तए, समत्थे णं आणंदा ! जाव
 करेत्तए, नो चेव णं अरिहंते भगवंते, पारियावणियं पुण करेज्जा ॥ ५४७ ॥ तं
 गच्छ णं तुमं आणंदा ! गोयमाईणं समणाणं निग्गंथाणं एयमट्ठं परिकहेहि-मा णं
 अज्जो ! तुब्भं केइ गोसालं मंखलिपुत्तं धम्मियाए पडिचोयणाए पडिचोएउ,
 धम्मियाए पडिसारणाए पडिसारेउ, धम्मिएणं पडोयारेणं पडोयारेउ, गोसाले णं
 मंखलिपुत्ते समणेहिं निग्गंथेहिं मिच्छं विप्पडिवन्ने, तए णं से आणंदे थेरे समणेणं
 भगवया महावीरेणं एवं वुत्ते समणे समणं भगवं महावीरं वंदइ नमंसइ वं० २ तां
 जेणेव गोयमाइसमणा निग्गंथा तेणेव उवागच्छइ २ ता गोयमाइसमणे निग्गंथे
 आमंतेइ २ ता एवं वयासी-एवं खलु अज्जो ! छट्ठक्खमणपारणगंसि समणेणं भगवया
 महावीरेणं अब्भणुज्जाए समाणे सावत्थीए नयरीए उच्चनीय तं चेव सव्वं जाव
 णायपुत्तस्स एयमट्ठं परिकहेहि, तं मा णं अज्जो ! तुब्भं केइ गोसालं मंखलिपुत्तं
 धम्मियाए पडिचोयणाए पडिचोएउ जाव मिच्छं विप्पडिवन्ने ॥ ५४८ ॥ जाव
 च णं आणंदे थेरे गोयमाईणं समणाणं निग्गंथाणं एयमट्ठं परिकहेइ ताव च णं से
 गोसाले मंखलिपुत्ते हालाहलाए कुंभकारीए कुंभकारावणाओ पडिनिक्खमइ पडिनि-
 क्खमिता आज्जीवियसंघसंपरिवुडे महया अमरिसं वहमाणे सिग्गं तुरियं जाव सावत्थि
 नयरिं मज्झमज्जेणं निग्गच्छइ २ ता जेणेव कोट्टए उज्जाणे जेणेव समणे भगवं

महावीरे तेणेव उवागच्छइ ते० २ ता समणस्स भगवओ महावीरस्स अदूरसामंते
ठिच्चा समणं भगवं महावीरं एवं वयासी-सुहु णं आउसो ! कासवा ! ममं एवं
वयासी साहु णं आउसो ! कासवा ! ममं एवं वयासी-गोसाले मंखलिपुत्ते ममं
धम्मंतेवासी गोसाले० २, जे णं गोसाले मंखलिपुत्ते तव धम्मंतेवासी से णं सुक्के
सुक्काभिजाइए भवित्ता कालमासे कालं किच्चा अन्नयरेसु देवलोएसु देवत्ताए उववजे,
अहण्णं उदाई नामं कुंडियायणीए अज्जुणस्स गोयमपुत्तस्स सरीरगं विप्पजहामि
अं० २ ता गोसालस्स मंखलिपुत्तस्स सरीरगं अणुप्पविसामि गो० २ ता इमं सत्तमं
पउट्टपरिहारं परिहरामि, जेवि आ(या)इं आउसो ! कासवा ! अम्हं समयंसि केइ
सिज्झिंस्सु वा सिज्झंति वा सिज्झिंस्संति वा सव्वे ते चउरासीइ महाक्कप्पसयसह-
स्साइं सत्त दिव्वे सत्त संजूहे सत्त सण्णिगम्भे सत्त पउट्टपरिहारे पंच कम्मणि-
सयसहस्साइं सट्ठि च सहस्साइं छच्च सए तिन्नि य कम्मसे अणुपुव्वेणं खवइत्ता
त्तओ पच्छा सिज्झंति वुज्झंति मुच्चंति परिनिव्वाइंति सव्वदुक्खाणमंतं करिंस्सु वा
करंति वा करिंस्संति वा, से जहा वा गंगा महानइ जओ पवूडा जहिं वा पज्जुव-
त्थिया एस णं अद्धपंचजोयणंसयाइं आयामेणं अद्धजोयणं विक्खंमेणं पंच धणुहसयाइं
उव्वेहेणं एएणं गंगापमाणेणं सत्त गंगाओ सा एगा महागंगा, सत्त महागंगाओ सा
एगा साईणगंगा, सत्त साईणगंगाओ सा एगा मच्चुगंगा, सत्त मच्चुगंगाओ सा एगा
लोहियगंगा, सत्त लोहियगंगाओ सा एगा आवईगंगा, सत्त आवईगंगाओ सा एगा
परमावई, एवामेव सपुव्वावरेणं एगं गंगासयसहस्सं सत्तरस य सहस्सा छच्चगुणपंच-
गंगासया भवंतीति मंक्खाया, तासिं दुविहे उद्धारे पण्णत्ते, तंजहा-सुहुमवोदिकलेवरे
चेव वायरवोदिकलेवरे चेव, तत्थ णं जे से सुहुमवोदिकलेवरे से ठप्पे, तत्थ णं जे
से वायरवोदिकलेवरे तओ णं वाससए २ गए २ एगमेगं गंगावालुर्यं अवहाय
जावइएणं कालेणं से कोट्टे खीणे णी(र)रेए निल्लेवे निट्टिए भवइ, सेतं सरे सरप्पमाणे,
एएणं सरप्पमाणेणं तिन्नि सरसयसाहस्सीओ से एगे महाक्कप्पे, चउरासीइ महीक्कप्प-
सयसहस्साइं से एगे महामाणसे, अणंताओ संजूहाओ जीवे चयं चइत्ता उवरिल्ले
माणसे संजूहे देवे उववज्जइ, से णं तत्थ दिव्वाइं भोगभोगां भुंजमाणे विहरइ
विहरित्ता ताओ देवलोगाओ आउक्खएणं भवक्खएणं ठिइक्खएणं अणंतरं चयं
चइत्ता पढमे सन्निगम्भे जीवे पच्चायाइ, से णं तओहिंतो अणंतरं उव्वट्ठित्ता मज्झिल्ले
माणसे संजूहे देवे उववज्जइ, से णं तत्थ दिव्वाइं भोगभोगां जाव विहरित्ता ताओ
देवलोगाओ आउक्खएणं ३ जाव चइत्ता दोचे सन्निगम्भे जीवे पच्चायाइ, से णं
तओहिंतो अणंतरं उव्वट्ठित्ता हेट्ठिल्ले माणसे संजूहे देवे उववज्जइ, से णं तत्थ

दिव्वाइं जाव चइत्ता तच्चे सन्निगब्भे जीवे पच्चायाइ, से णं तओहिंतो जाव उव्व-
 ट्ठित्ता उवरिल्ले माणुसुत्तरे संजूहे देवे उव्वज्जइ, से णं तत्थ दिव्वाइं भोग जाव
 चइत्ता चउत्थे सन्निगब्भे जीवे पच्चायाइ, से णं तओहिंतो अणंतरं उव्वट्ठित्ता
 मज्झिल्ले माणुसुत्तरे संजूहे देवे उव्वज्जइ, से णं तत्थ दिव्वाइं भोग जाव चइत्ता
 पंचमे सन्निगब्भे जीवे पच्चायाइ, से णं तओहिंतो अणंतरं उव्वट्ठित्ता त्तिट्ठिं माणु-
 सुत्तरे संजूहे देवे उव्वज्जइ, से णं तत्थ दिव्वाइं भोग जाव चइत्ता छट्ठे सन्निगब्भे
 जीवे पच्चायाइ, से णं तओहिंतो अणंतरं उव्वट्ठित्ता कंभलोगे नागं मे कप्पे पज्जे,
 पाईणपडीणायए उदीणदाहिणविच्छिन्ने जहा ठाणपए जाव पंच वडेंसत्ता प०,
 तंजहा-असोगवडेंसए जाव पडिरुवा, से णं तत्थ देवे उव्वज्जइ, से णं तत्थ दस
 सागरोवमाइं दिव्वाइं भोग जाव चइत्ता सत्तमे सन्निगब्भे जीवे पच्चायाइ, से णं
 तत्थ नवण्हं मासाणं बहुपडिपुत्ताणं अद्धट्ठमाण जाव बीइक्कंताणं सुकुमालगभइलए
 मिउकुंडलकुंचियकेसए मट्ठगंडतलकजपीडए देवकुमारस(म)प्पभए दारए पया(ए)-
 यइ, से णं अहं कासवा । ते (तए)णं अहं आउसो । कासवा । कोमारियाए पव्वज्जाए
 कोमारएणं वंभचेरवासेणं अविद्धकन्नए चेव संखाणं पडिलभामि सं० २ ता इमे सत्त
 पउट्टपरिहारे परिहरामि, तंजहा-एणेज्जगस्स, मल्लरामस्स, मंडियस्स, रोहस्स, भार-
 द्वाइस्स, अज्जुणस्स गोयमपुत्तस्स, गोसालस्स मंखलिपुत्तस्स, तत्थ णं जे से पढमे
 पउट्टपरिहारे से णं रायगिहस्स नयरस्स वहिया मंडियकुच्छिसि उज्जाणंसि उदा(यण)-
 इस्स कुंडियायणस्स सरीरं विप्पजहामि उदा० २ ता एणेज्जगस्स सरीरं अणुप्प-
 विसामि एणे० २ ता वावीसं वासाइं पढमं पउट्टपरिहारं परिहरामि, तत्थ णं जे
 से दोच्चे पउट्टपरिहारे से णं उइंदपुरस्स नयरस्स वहिया चंदोयरणंसि उज्जाणंसि
 एणेज्जगस्स सरीरं विप्पजहामि २ ता मल्लरामस्स सरीरं अणुप्पविसामि
 मल्ल० २ ता एगवीसं वासाइं दोच्चं पउट्टपरिहारं परिहरामि, तत्थ णं जे से तच्चे
 पउट्टपरिहारे से णं चंपाए नयरीए वहिया अंगमंदिरंमि उज्जाणंसि मल्लरामस्स
 सरीरं विप्पजहामि मल्ल० २ ता मंडियस्स सरीरं अणुप्पविसामि मंडि० २ ता
 वीसं वासाइं तच्चं पउट्टपरिहारं परिहरामि, तत्थ णं जे से चउत्थे पउट्टपरिहारे से
 णं वाणारसीए नयरीए वहिया काममहावणंसि उज्जाणंसि मंडियस्स सरीरं विप्प-
 जहामि मंडि०-२ ता रोहस्स सरीरं अणुप्पविसामि रोह० २ ता एगूणवीसं
 वासाइं चउत्थं पउट्टपरिहारं परिहरामि, तत्थ णं जे से पंचमे पउट्टपरिहारे से
 णं आलंभियाए नयरीए वहिया पत्तकालगंसि उज्जाणंसि रोहस्स सरीरं विप्पज-
 हामि रोह०-२ ता भारद्वाइस्स सरीरं अणुप्पविसामि भा० २ ता अट्ठारस्स

वासाइं पंचमं पउट्टपरिहारं परिहरामि, तत्थ णं जे से छट्ठे पउट्टपरिहारे से णं वेसालीए नयरीए बहिया कों(कं)डियायणंसि उज्जाणंसि भारद्वाइस्स सरीरगं विप्पज-
हामि भा० २ ता अज्जुणगस्स गोयमपुत्तस्स सरीरगं अणुप्पविसामि अ० २ ता
सत्तरस वासाइं छट्ठं पउट्टपरिहारं परिहरामि, तत्थ णं जे से सत्तमे पउट्टपरिहारे से
णं इहेव सावत्थीए नयरीए हालाहलाए कुंभकारीए कुंभकारावणंसि अज्जुणगस्स
गोयमपुत्तस्स सरीरगं विप्पजहामि अज्जुणगस्स० २ ता गोसालस्स मंखलिपुत्तस्स
सरीरगं अलं थिरं धुवं धारणिज्जं सीयसहं उण्हसहं खुहासहं विविहदंसमसग-
परीसहोवसग्गसहं थिरसंघयणंतिकट्ठु तं अणुप्पविसामि २ ता तं सोलस
वासाइं इमं सत्तमं पउट्टपरिहारं परिहरामि, एवामेव आउसो ! कासवा !
एगेणं तेत्तीसेणं वाससएणं सत्त पउट्टपरिहारा परिहरिया भवंतीति मक्खाया,
तं सुट्ठु णं आउसो ! कासवा ! ममं एवं वयासी साहु णं आउसो ! कासवा !
ममं एवं वयासी-गोसाले मंखलिपुत्ते ममं धम्मंतेवासित्ति गोसाले० २ ॥ ५४९ ॥
तए णं समणे भगवं महावीरे गोसालं मंखलिपुत्तं एवं वयासी-गोसाला ! से जहा-
नामए तेणए सिया गामेल्लएहि परब्भ(व)माणे २ कत्थ(वि)इ ग(त्तं)डुं वा दरिं वा दुग्गं
वा निन्नं वा पव्वयं वा विसमं वा अणस्सादेमाणे एगेण महं उन्नालोमेण वा सणलोमेण
वा कप्पासपम्हेण वा तणसूएण वा अत्ताणं आवरेत्ताणं चिट्ठेज्जा, से णं अणावरिए
आवरियमिति अप्पाणं मन्नइ, अपच्छण्णे य पच्छणमिति अप्पाणं मन्नइ, अ(ण)णि-
ल्लक्के णिल्लक्कमिति अप्पाणं मन्नइ, अपलायए पलायमिति अप्पाणं मन्नइ, एवामेव तुसंमि
गोसाला ! अणन्ने संते अन्नमिति अप्पाणं उपलभसि, तं मा एवं गोसाला ! नारिहसि
गोसाला ! सच्चेव ते सा छाया नो अन्ना ॥ ५५० ॥ तए णं से गोसाले मंखलिपुत्ते
समणेणं भगवया महावीरेणं एवं वुत्ते समाणे आसुस्ते ५ समणं भगवं महावीरं
उच्चावयाहिं आउसणाहिं आउसइ उच्चा० २ ता उच्चावयाहिं उद्धंसणाहिं उद्धंसेइ
उद्धंसेत्ता उच्चावयाहिं निब्भंछणाहिं निब्भंछेइ उ० २ ता उच्चावयाहिं निच्छोडणाहिं
निच्छोडेइ उ० २ ता एवं वयासी-नट्टेसि कयाइ, विणट्टेसि कयाइ, भट्टेसि कयाइ,
नट्टविणट्टभट्टेसि कयाइ, अज्ज न भवसि नाहि ते ममाहिंतो सुहमत्थि ॥ ५५१ ॥
तेणं कालेणं तेणं समएणं समणस्स भगवओ महावीरस्स अंतेवासी पाईणजाणवए
सव्वाणुभूई णामं अणगारे पगइभइए जाव विणीए धम्मायरियाणुरागेणं एयमट्ठ
असइहमाणे उट्ठाए उट्टेइ उ० २ ता जेणेव गोसाले मंखलिपुत्ते तेणेव उवागच्छइ २
ता गोसालं मंखलिपुत्तं एवं वयासी-जेवि ताव गोसाला ! तहारूवस्स समणस्स वा
माहणस्स वा अंतियं एगमवि आ(य)रियं धम्मियं सुवयणं निसामेइ सेवि ताव तं

वंदइ नमंसइ जाव कट्ठाणं मंगलं देवयं चेइयं पज्जुवासइ, किमंग पुण तुमं गोसाला ।
 भगवया चेव पव्वाविए, भगवया चेव मुंडाविए, भगवया चेव सेहाविए, भगवया
 चेव सिक्खाविए, भगवया चेव बहुस्सुईकए, भगवओ चेव मिच्छं विप्पडिवन्ने, तं
 मा एवं गोसाला ! नारिहसि गोसाला ! सच्चेव ते सा छाया नो अन्ना, तए णं से
 गोसाले मंखलिपुत्ते सव्वाणुभूइणामेणं अणगारेणं एवं वुत्ते समाणे आसुरस्ते
 ५ सव्वाणुभूइं अणगारं तवेणं तेएणं एगाहचं कूडाहचं जाव भासरासिं करेइ, तए
 णं से गोसाले मंखलिपुत्ते सव्वाणुभूइं अणगारं तवेणं तेएणं एगाहचं कूडाहचं जाव
 भासरासिं करेत्ता दोच्चंपि समणं भगवं महावीरं उच्चावयाहिं आउराणाहिं आउसइ
 जाव सुहं नत्थि । तेणं कालेणं तेणं समएणं समणस्स भगवओ महावीरस्स
 अंतेवासी कोसलजाणवए सुणक्खत्ते णामं अणगारे पगइभइए जाव विणीए धम्मायरे-
 याणुरागेणं जहा सव्वाणुभूइं तहेव जाव सच्चेव ते सा छाया नो अन्ना । तए णं से
 गोसाले मंखलिपुत्ते सुणक्खत्तेणं अणगारेणं एवं वुत्ते समाणे आसुरस्ते ५ सुनक्खत्तं
 अणगारं तवेणं तेएणं परितावेइ, तए णं से सुनक्खत्ते अणगारे गोसालेणं मंखलि-
 पुत्तेणं तवेणं तेएणं परिताविए समाणे जेणेव समणे भगवं महावीरे तेणेव उवागच्छइ
 २ ता समणं भगवं महावीरं तिक्खुंतो आयाहिणं पयाहिणं करेइ २ ता वंदइ
 नमंसइ वं० २ ता सयमेव पंच महव्वयाइं आरुहेइ स० २ ता समणा य समणीओ य
 खामेइ सम० २ ता आलोइयपडिक्कंते समाहिपत्ते आणुपुव्वीए कालगए । तए णं से
 गोसाले मंखलिपुत्ते सुनक्खत्तं अणगारं तवेणं तेएणं परितावेत्ता तच्चंपि समणं
 भगवं महावीरं उच्चावयाहिं आउसणाहिं आउसइ सव्वं तं चेव जाव सुहं नत्थि ।
 तए णं समणे भगवं महावीरे गोसालं मंखलिपुत्तं एवं वयासी-जेवि ताव गोसाला !
 तहारुवस्स समणस्स वा माहणस्स वा तं चेव जाव पज्जुवासइ, किमंग पुण
 गोसाला ! तुमं मए चेव पव्वाविए जाव मए चेव बहुस्सुईकए ममं चेव मिच्छं
 विप्पडिवन्ने, तं मा एवं गोसाला ! जाव नो अन्ना, तए णं से गोसाले मंखलिपुत्ते
 समणेणं भगवया महावीरेणं एवं वुत्ते समाणे आसुरस्ते ५ तेयासमुग्घाएणं समोहणइ
 तेया० २ ता सत्तट्ठपयाइं पच्चोसक्कइ २ ता समणस्स भगवओ महावीरस्स वहाए
 सरीरगंसि तेयं निसिरइ, से जहानामए वाउक्कलियाइ वा वायमंडलियाइ वा सेलंसि
 वा कुडंसि वा थंभंसि वा थूभंसि वा आवारेज्जमा(णा)णी वा निवारिज्जमाणी वा
 सा णं तत्थ णो कमइ नो पक्कमइ, एवामेव गोसालस्सवि मंखलिपुत्तस्स तवे तेए
 समणस्स भगवओ महावीरस्स वहाए सरीरगंसि निसिद्धे समाणे से णं तत्थ नो
 कमइ नो पक्कमइ, अंचियंचिं करेइ अंचि० २ ता आयाहिणं पयाहिणं करेइ आ०

२ ता उद्धं वेहासं उप्पइए, से णं तओ पडिहए पडिनियत्ते समाणे त(स्से)मेव गोसालस्स मंखलिपुत्तस्स सरीरगं अणुडहमाणे २ अंतो २ अणुप्पविट्ठे, तए णं से गोसाले मंखलिपुत्ते सएणं तेएणं अन्नाइट्ठे समाणे समणं भगवं महावीरं एवं वयासी-
तुमं णं आउसो ! कासवा ! ममं तवेणं तेएणं अन्नाइट्ठे समाणे अंतो छण्हं मासाणं पित्तजरपरिगयसरीरे दाहवक्कंतीए छउमत्थे चेव कालं करिस्ससि, तए णं समणे भगवं महावीरे गोसालं मंखलिपुत्तं एवं वयासी-नो खलु अहं गोसाला ! तव तवेणं तेएणं अन्नाइट्ठे समाणे अंतो छण्हं मासाणं जाव कालं करिस्सामि, अहन्नं अन्नाइं सोल-
सवासाइं जिणे सुहत्थी विहरिस्सामि, तुमं णं गोसाला ! अप्पणा चेव सएणं तवेणं तेएणं अन्नाइट्ठे समाणे अंतो सत्तरत्तस्स पित्तजरपरिगयसरीरे जाव छउमत्थे चेव कालं करिस्ससि, तए णं सावत्थीए नयरीए सिंघाडग जाव पहेसु बहुजणो अन्नमन्नस्स एवमाइक्खइ जाव एवं परूवेइ-एवं खलु देवाणुप्पिया ! सावत्थीए नयरीए वहिया कोट्टए उज्जाणे दुवे जिणा संलवंति, एगे एवं वदंति-तुमं पुब्बि कालं करिस्ससि एगे एवं वदंति तुमं पुब्बि कालं करिस्ससि, तत्थ णं के पुण सम्मावाइं के पुण मिच्छावाइं ? तत्थ णं जे से अहप्पहाणे जणे से वदइ-समणे भगवं महावीरे सम्मावाइं गोसाले मंखलिपुत्ते मिच्छावाइं, अज्जोत्ति समणे भगवं महावीरे समणे निगंथे आमंतेत्ता एवं वयासी-अज्जो ! से जहानामए तणरासीइ वा कट्ठरासीइ वा पत्तरासीइ वा तयारासीइ वा तुसरासीइ वा भुसरासीइ वा गोमयरासीइ वा अवकररासीइ वा अगणिज्जामिए अगणिज्झूसिए अगणिपरिणामिए हयतेए गयतेए नट्ठतेए भट्ठतेए लुत्ततेए विणट्ठतेए जाव एवामेव गोसाले मंखलिपुत्ते ममं वहाए सरीरगंसि तेयं निसिरित्ता हयतेए गयतेए जाव विणट्ठतेए जाए, तं छंदेणं अज्जो ! तुव्भे गोसालं मंखलिपुत्तं धम्मियाए पडिचोयणाए पडिचोएह धम्मि० २ ता धम्मियाए पडिसा-
रणाए पडिसारेह धम्मि० २ ता धम्मिएणं पडोयारेणं पडोयारेह धम्मि० २ ता अट्ठेहि य हेऊहि य पसिणेहि य वागरणेहि य कारणेहि य निप्पट्ठपसिणवागरणं करेह, तए णं ते समणा निगंथा समणेणं भगवया महावीरेणं एवं वुत्ता समाणा समणं भगवं महावीरं वंदंति नमंसंति वंदित्ता नमंसित्ता जेणेव गोसाले मंखलिपुत्ते तेणेव उवागच्छंति तेणेव उवागच्छित्ता गोसालं मंखलिपुत्तं धम्मियाए पडिचोयणाए पडिचोएंति ध० २ ता धम्मियाए पडिसा(ह)रणाए पडिसारेंति ध० २ ता धम्मिएणं पडोयारेणं पडोयारेंति ध० २ ता अट्ठेहि य हेऊहि य कारणेहि य जाव वागरणं क(वाग)रेंति । तए णं से गोसाले मंखलिपुत्ते समणेहिं निगंथेहिं धम्मियाए पडिचोयणाए पडिचोइजमाणे जाव निप्पट्ठपसिणवागरणे कीरमाणे आसुरुत्ते जाव

मिसिमिसेमाणे नो संचाएइ समणाणं निग्गंथाणं सरीरगस्स किंचि आवाहं वा वावाहं वा उप्पाएत्तए छविच्छेदं वा करेत्तए, तए णं ते आजीविया थेरा गोसालं मंखलिपुत्तं समणेहिं निग्गंथेहिं धम्मियाए पडिचोयणाए पडिचोएज्जमाणं धम्मियाए पडिसारणाए पडिसारिज्जमाणं धम्मिएणं पडोयारेणं पडोयारिज्जमाणं अट्ठेहि य हेऊंहि य जाव कीरमाणं आसुरुत्तं जाव मिसिमिसेमाणं समणाणं निग्गंथाणं सरीर-
 गस्स किंचि आवाहं वा वावाहं वा छविच्छेदं वा अकरेमाणं पासंति २ ता गोसा-
 लस्स मंखलिपुत्तस्स अंतियाओ आयाए अवक्कमंति आयाए अवक्कमिता जेणेव
 समणे भगवं महावीरे तेणेव उवागच्छंति ते० २ ता समणं भगवं महावीरं तिव्खुत्तो
 आयाहिणं पयाहिणं० वंदंति नमंसंति वं० २ ता समणं भगवं महावीरं उवसंपज्जित्ताणं
 विहरंते, अत्थेगइया आजीविया थेरा गोसालं चैव मंखलिपुत्तं उवसंपज्जित्ताणं
 विहरंति । तए णं से गोसाले मंखलिपुत्ते जस्सट्ठाए हव्वमागए तमट्ठं असाहेमाणे
 रुंदाइं पलोएमाणे दीहुण्हाइं नी(स)सासमाणे दाढियाए लोमा(इं)ए लुंचमाणे अवट्ठं
 कंठूयमाणे पुयलिं पप्फोडेमाणे हत्थे विणिद्धुणमाणे दोहिवि प्राएहिं भूमिं कोट्टेमाणे
 हाहा अहो ! हओऽहमस्सीतिकट्ठु समणस्स भगवओ महावीरस्स अंतियाओ
 कोट्टयाओ उज्जाणाओ पडिनिक्खमइ २ ता जेणेव सावत्थी नयरी जेणेव हालाहलाए
 कुंभकारीए कुंभकारावणे तेणेव उवागच्छइ ते० २ ता हालाहलाए कुंभकारीए कुंभ-
 कारावणंसि अंबकूणगहत्थगए मज्जपाणगं पियमाणे अभिक्खणं गायमाणे अभि-
 क्खणं नच्चमाणे अभिक्खणं हालाहलाए कुंभकारीए अंजलिकम्मं करेमाणे सीयल-
 एणं मट्ठियापाणएणं आयंचणिउदएणं गायाइं परिसिंचमाणे विहरइ ॥ ५५२ ॥
 अज्जोत्ति समणे भगवं महावीरे समणे निग्गंथे आमंतेत्ता एवं वयासी-जावइएणं
 अज्जो ! गोसालेणं मंखलिपुत्तेणं ममं वहाए सरीरगंसि तेए-निसट्ठे से णं अलाहि
 पज्जंते सोलसण्हं जणवयाणं, तं०-अंगाणं वंगाणं मगहाणं मलयाणं मालवगाणं
 अ(च्छा)त्थाणं वत्थाणं कोत्थाणं पाढाणं लाढाणं वज्जीणं मोलीणं कासीणं कोसलगाणं
 अवाहाणं सुंभुत्तराणं घायाए वहाए उच्छादणट्ठयाए भासीकरणयाए, जंपि य अज्जो !
 गोसाले मंखलिपुत्ते हालाहलाए कुंभकारीए कुंभकारावणंसि अंबकूणगहत्थगए
 मज्जपाणं पियमाणे अभिक्खणं जाव अंजलिकम्मं करेमाणे विहरइ, तस्सवि य णं
 वज्जस्स पच्छादणट्ठयाए इमाइं अट्ठं चरिमाइं पन्नवेइ, तंजहा-चरिमे प्राणे, चरिमे
 गोए, चरिमे नट्टे, चरिमे अंजलिकम्मे, चरिमे पोक्खलसंवट्टए महामेहे, चरिमे सेयणए
 गंधहत्थी, चरिमे महासिलाकंटए संगामे, अहं च णं इमीसे ओसप्पिणीए चउवीसाए
 तित्थंकराणं चरिमे तित्थंकरे सिज्झिस्सं जाव अंतं करेस्सं ति, जंपि य अज्जो !

गोसाले मंखलिपुत्ते सीयलएणं मट्टियापाणएणं आयंचणिउदएणं गायार्इ परिसिंचमाणे विहरइ, तस्सवि य णं वज्जस्स पच्छादेणट्ठयाए इमार्इ चत्तारि पाणगांइ चत्तारि अपाणगांइ पन्नवेइ, से किं तं पाणए ? पाणए चउव्विहे पन्नत्ते, तंजहा-गोपुट्टए, हत्थमे-दियए, आयवत्तए, सिलापब्भट्टए, सेत्तं पाणए, से किं तं अपाणए ? अपाणए चउव्विहे पण्णत्ते, तंजहा-थालपाणए, तयापाणए, सिंवलिपाणए, सुद्धपाणए, से किं तं थाल-पाणए ? २ जणं (जेणं) दाथालगं वा दावारगं वा दाकुंभगं वा दाकलसं वा सीयलगं (वा) उल्लगं हत्थेहिं परामुसइ न य पाणियं पियइ, सेत्तं थालपाणए, से किं तं तयापा-णए ? २ जणं अंवं वा अंवाडगं वा जहा पओगपए जाव वोरं वा तिंदुर्यं वा [तुर्यं] वा तरुणगं वा आमगं वा आसगंसि आवीलेइ वा पवीलेइ वा न य पाणियं पियइ, सेत्तं तयापाणए, से किं तं सिंवलिपाणए ? २ जणं कलसंगलियं वा मुग्गसंगलियं वा माससंगलियं वा सिंवलिसंगलियं वा तरुणियं आमियं आसगंसि आवीलेइ वा पवीलेइ वा न य पाणियं पिवइ, सेत्तं सिंवलिपाणए, से किं तं सुद्धपाणए ? सुद्धपा-णए जणं छम्मासे सुद्धखाइमं खाइ दो मासे पुढविसंथारोवगए दो मासे कट्ठ-संथारोवगए दो मासे दब्भसंथारोवगए, तस्स णं बहुपडिपुत्ताणं छण्हं मासाणं अंतिमराइए इमे दो देवा महिद्धिया जाव महेसक्खा अंतियं पाउब्भवंति, तं०-पुन्नभदे य माणिभदे य, तए णं ते देवा सीयलएहिं उल्लएहिं हत्थेहिं गायार्इ परा-मुसंति, जे णं ते देवे साइज्जइ से णं आसीविसत्ताए कम्मं पकरेइ, जे णं ते देवे नो साइज्जइ तस्स णं संसि सरीरगंसि अगणिकाए संभवइ, से णं सएणं तेएणं सरीरगं झामेइ स० २ ता तओ पच्छा सिज्झइ जाव अंतं करेइ, सेत्तं सुद्धपाणए । तत्थ णं सावत्थीए नयरीए अयंपुले णामं आजीवियोवासए परिवसइ अट्ठे जाव अपरिभूए जहा हालाहला जाव आजीवियसमएणं अप्पाणं भावेमाणे विह-रइ, तए णं तस्स अयंपुलस्स आजीवियोवासगस्स अन्नया कयाइ पुव्वर-त्तावरत्तकालसमयंसि कुडुंवजागरियं जागरमाणस्स अयमेयारूवे अज्झत्थिए जाव समुप्पज्जित्था-किंसठिया हल्ला पण्णत्ता ?, तए णं तस्स अयंपुलस्स आजी-योवासगस्स दोचंपि अयमेयारूवे अज्झत्थिए जाव समुप्पज्जित्था-एवं खलु मम धम्मायरिए धम्मोवएसए गोसाले मंखलिपुत्ते उप्पन्ननाणदंसणधरे जाव सव्वन्नू सव्वदरिसी इहेव सावत्थीए नयरीए हालाहलाए कुंभकारीए कुंभकारावणंसि आजीवियसंघसंपरिवुडे आजीवियसमएणं अप्पाणं भावेमाणे विहरइ, तं सेयं खलु मे कल्लं जाव जलंते गोसालं मंखलिपुत्तं वंदित्ता जाव पज्जुवासित्ता इमं एया(णु)स्त्वं वागरणं वागरित्तएत्तिकट्ठु एवं संपेहेइ संपेहित्ता कल्लं जाव जलंते ण्हाए जाव

अप्पमहग्घाभरणाळंकियसरीरे साओ गिहाओ पडिनिक्खमई सा० २ ता पाय-
विहारचारेणं सावत्थि नयरिं मज्झमज्झेणं जेणेव हालाहलाए कुंभकारीए कुंभकारा-
वणे तेणेव उवागच्छइ २ ता पासइ गोसालं मंखलिपुत्तं हालाहलाए कुंभकारीए
कुंभकारावणंसि अंबकूणगहत्थगयं जाव अंजलिकम्मं करेमाणं सीयलयाएणं मट्टिया
जाव गायाइं परिसिंचमाणं पासइ २ ता लज्जिए विलिए विड्डे सणियं २ पच्चोसकइ,
तए णं ते आजीविया थेरा अयंपुलं आजीवियोवासगं लज्जियं जाव पच्चोसकमाणं
पासेंति २ ता एवं वयासी-एहि ताव अयंपुला । एत(इ)ओ, तए णं से अयंपुले
आजीवियोवासए आजीवियथेरेहिं एवं वुत्ते समाणे जेणेव आजीविया थेरा तेणेव
उवागच्छइ उवागच्छिता आजीविए थेरे वंदइ नमंसइ वं० २ ता नच्चासन्ने जाव
पज्जुवासइ, अयंपुलाइ आजीविया थेरा अयंपुलं आजीवियोवासगं एवं वयासी-से
नूणं ते(भे) अयंपुला । पुव्वरत्तावरत्तकालसमयंसि जाव किंसंठिया हल्ला पणत्ता ?,
तए णं तव अयंपुला ! दोच्चंपि अयमेया० तं चेव सव्वं भाणियव्वं जाव सावत्थि
नयरिं मज्झमज्झेणं जेणेव हालाहलाए कुंभकारीए कुंभकारावणे जेणेव इहं तेणेव
हव्वमागए, से नूणं ते अयंपुला ! अट्ठे समट्ठे ? हंता अत्थि, जंपि य अयंपुला !
तव धम्मायरिए धम्मोवएसए गोसाले मंखलिपुत्ते हालाहलाए कुंभकारीए
कुंभकारावणंसि अंबकूणगहत्थगए जाव अंजलिं करेमाणे विहरइ, तत्थवि णं भगवं
इमाइं अट्ठ चरिमाइं पन्नवेइ, तं०-चरिमे पाणे जाव अंतं करेस्सइ, जेवि य
अयंपुला ! तव धम्मायरिए धम्मोवएसए गोसाले मंखलिपुत्ते सीयलयाएणं मट्टिया
जाव विहरइ, तत्थवि णं भगवं इमाइं चत्तारि पाणगाइं चत्तारि अपाणगाइं पन्नवेइ, से
किं तं पाणए ? पाणए जाव तओ पच्छा सिज्झ(न्ति)इ जाव अंतं करे(न्ति)इ, तं गच्छ-
ह णं तुमं अयंपुला ! एस चेव तव धम्मायरिए धम्मोवएसए गोसाले मंखलिपुत्ते इमं
एयारूवं वागरणं वाग(रेही)रित्तएत्ति, तए णं से अयंपुले आजीवियोवासए आजीविएहिं
थेरेहिं एवं वुत्ते समाणे हट्ठतुट्ठ० उट्ठाए उट्ठेइ उ० २ ता जेणेव गोसाले मंखलिपुत्ते
तेणेव पहारेत्थ गमणाए, तए णं ते आजीविया थेरा गोसालस्स मंखलिपुत्तस्स
अंबकूणगप(ए)डावणट्ठयाए एगंतमंते संगारं कुव्वंति, तए णं से गोसाले मंखलिपुत्ते
आजीवियाणं थेराणं संगारं पडिच्छइ २ ता अंबकूणगं एगंतमंते एडेइ, तए णं से
अयंपुले आजीवियोवासए जेणेव गोसाले मंखलिपुत्ते तेणेव उवागच्छइ उवागच्छि-
त्ता गोसालं मंखलिपुत्तं तिक्खुत्तो जाव पज्जुवासइ, अयंपुलाइ गोसाले मंखलिपुत्ते
अयंपुलं आजीवियोवासगं एवं वयासी-से नूणं अयंपुला ! पुव्वरत्तावरत्तकालसमयंसि
जाव जेणेव ममं अंतियं तेणेव हव्वमागए, से नूणं अयंपुला ! अट्ठे समट्ठे ? हंता-

अत्थि, तं नो खलु एस अंवकूणए अंवचोयए णं एसे, किंसंठिया हल्ला पन्नं, वंसीमूलसंठिया हल्ला पण्णत्ता, वीणं वाएहि रे वीरगा वी० २, तए णं से अयंपुले आजीवियोवासए गोसालेणं मंखलिपुत्तेणं इमं एयारूवं वागरणं वागरिए समाणे हट्ठतुट्ठ जाव हियए गोसालं मंखलिपुत्तं वंदइ नमंसइ वं० २ ता पसिणाइं पुच्छइ २ ता अट्ठाइं परियादियइ अ० २ ता उट्ठाए उट्ठेइ उ० २ ता गोसालं मंखलिपुत्तं वंदइ नमंसइ वं० २ ता जाव पडिगए । तए णं से गोसाले मंखलिपुत्ते अप्पणो मरणं आभोएइ २ ता आजीविए थेरे सद्दावेइ आ० २ ता एवं वयासी-तुब्भे णं देवाणुप्पिया ! ममं कालगयं जाणिता सुरभिणा गंधोदएणं ण्हाणेह सु० २ ता पम्हलसुकुमालाए गंधकासाईए गायाइं लहेह गा० २ ता सरसेणं गोसीसचंदणेणं गायाइं अणुलिंपह स० २ ता महरिहं हंसलक्खणं पाडसाडगं नियंसेह मह० २ ता सव्वालंकार-विभूसियं करेह स० २ ता पुरिससहस्सवाहिणिं सीयं दुरुहेह पुरि० २ ता सावत्थीए नयरीए सिंघाडग जाव पहेसु महया-महया सदेणं उग्घोसेमाणा २ एवं वदह-एवं खलु देवाणुप्पिया ! गोसाले मंखलिपुत्ते जिणे जिणप्पलावी जाव जिणसहं पगासेमाणे विहरित्ता इमीसे ओसप्पिणीए चउवीसाए तित्थयराणं चरिमे तित्थयरे सिद्धे जाव सव्वदुक्खप्पहीणे, इट्ठीसक्कारसमुदएणं ममं सरीरगस्स णीहरणं करेह, तए णं ते आजीविया थेरा गोसालस्स मंखलिपुत्तस्स एयमट्ठं विणएणं पडिस्सुणेंति ॥ ५५३ ॥ तए णं तस्स गोसालस्स मंखलिपुत्तस्स सत्तरत्तंसि परिणम-माणंसि पडिलद्धसम्मत्तस्स अयमेयारूवे अज्झत्थिए जाव समुप्पज्जित्था-णो खलु अहं जिणे जिणप्पलावी जाव जिणसहं पगासेमाणे विहरइ, अहं णं गोसाले चेव मंखलिपुत्ते समणघायए समणमारए समणपडिणीए आयरियउवज्झायाणं अयस-कारए अवन्नकारए अकित्तिकारए बहूहिं असब्भावुब्भावणाहिं मिच्छत्ताभिनिवेसेहिं य, अप्पाणं वा परं वा तदुभयं वा वुग्गाहेमाणे वुप्पाएमाणे विहरित्ता सएणं तेएणं अन्नाइट्ठे समाणे अंतो सत्तरत्तस्स पित्तज्जरपरिगयसरीरे दाहवक्कंतीए छउमत्थे चेव कालं करेस्सं, समणे भगवं महावीरे जिणे जिणप्पलावी जाव जिणसहं पगासेमाणे विहरइ, एवं संपेहेइ एवं संपेहिता आजीविए थेरे सद्दावेइ आ० २ ता उच्चावय-सवहसाविए करेइ उच्चा० २ ता एवं वयासी-नो खलु अहं जिणे जिणप्पलावी जाव पगासेमाणे विहरइ, अहन्नं गोसाले मंखलिपुत्ते समणघायए जाव छउमत्थे चेव कालं करेस्सं, समणे भगवं महावीरे जिणे जिणप्पलावी जाव जिणसहं पगा-सेमाणे विहरइ, तं तुब्भे णं देवाणुप्पिया ! ममं कालगयं जाणिता वामे पाए सुंवेणं वंधह वा० २ ता तिव्खुत्तो मुहे उट्ठुमह ति० २ ता सावत्थीए नयरीए सिंघाडग

अप्पपहेसु आकड्ढविकड्ढि करेमाणा महया २ सदेणं उग्घोसेमाणा २ एवं वदह-नो
 खलु देवाणुप्पिया ! गोसाले मंखलिपुत्ते जिणे जिणप्पलावी जाव विह(रइ)रिए, एस
 णं गोसाले चेव मंखलिपुत्ते समणघायए जाव छउमत्थे चेव कालगए, समणे
 भगवं महावीरे जिणे जिणप्पलावी जाव विहरइ, अणिद्धीअसक्कारसमुदएणं ममं
 सरीरगंस्स नीहरणं करेज्जाह, एवं वदित्ता कालगए ॥५५४॥ तए णं ते आजीविया
 थेरा गोसालं मंखलिपुत्तं कालगयं जाणित्ता हालाहलाए कुंभकारीए कुंभकारावणस्स
 दुवाराइं पिहेति दु० २ ता हालाहलाए कुंभकारीए कुंभकारावणस्स बहुमज्झदेस-
 भाए सावत्थि नयरिं आलिहंति सा० २ ता गोसालस्स मंखलिपुत्तस्स सरीरगं
 चामे पाए सुंबेणं बंधंति वा० २ ता तिक्खुत्तो मुहे उट्ठुभंति २ ता सावत्थीए
 नयरीए सिंघाडग जाव पहेसु आकड्ढविकड्ढि करेमाणा णीयं २ सदेणं उग्घोसेमाणा
 २ एवं वयासी-नो खलु देवाणुप्पिया ! गोसाले मंखलिपुत्ते जिणे जिणप्पलावी
 जाव विहरिए, एस णं गोसाले चेव मंखलिपुत्ते समणघायए जाव छउमत्थे चेव
 कालगए, समणे भगवं महावीरे जिणे जिणप्पलावी जाव विहरइ, सवहपडिमोक्ख-
 णगं करेति स० २ ता दोच्चंपि पूयासक्कारथिरीकरणट्ठयां गोसालस्स मंखलिपुत्तस्स
 चामाओ पायाओ सुवं मुयंति सु० २ ता हालाहलाए कुंभकारीए कुंभकारावणस्स
 दुवारवयणाइं अवगुणंति २ ता गोसालस्स मंखलिपुत्तस्स सरीरगं सुरभिणा
 गंधोदएणं ण्हाणेति तं चेव जाव महया २ इद्धीसक्कारसमुदएणं गोसालस्स मंखलिपु-
 त्तस्स सरीरगस्स नीहरणं करेति ॥ ५५५ ॥ तए णं समणे भगवं महावीरे अन्नया
 कयाइ सावत्थीओ नयरीओ कोट्टयाओ उज्जाणाओ पडिनिक्खमइ २ ता बहिया
 जणवयविहारं विहरइ । तेणं कालेणं तेणं समएणं मिंढियगामे नामं नयरे होत्था
 वन्नओ, तस्स णं मेंढियगामस्स नयरस्स बहिया उत्तरपुरच्छिमे दिसीभाए एत्थ णं
 सालकोट्टए नामं उज्जाणे होत्था वन्नओ जाव पुढविसिलापट्टओ, तस्स णं सालको-
 ट्टगस्स उज्जाणस्स अदूरसामंते एत्थ णं महेगे मालुयाकच्छए यावि होत्था
 किण्हे किण्होभासे जाव निक्कुंभभूए पत्तिए पुप्फिए फल्लिए हरियगरेरिज्जमाणे
 सिरीए अईव २ उवसोभमाणे २ चिट्ठइ, तत्थ णं मेंढियगामे नयरे रेवई नामं
 गाहावड्ढी परिवसइ अट्ठा जाव अपरिभूया, तए णं समणे भगवं महावीरे अन्नया
 कयाइ पुंवाणुपुंवि चरमाणे जाव जेणेव मेंढियगामे नयरे जेणेव साण(ल)कोट्टए
 उज्जाणे जाव परिसा पडिगया । तए णं समणस्स भगवओ महावीरस्स सरीरगंसिं
 विउले रोगायंके पोउब्भूए उज्जले जाव दुरहियासे पित्तज्जरपरिगयसरीरे दाहवक्कं-
 तीए यावि विहरइ, अवियाइं लोहियवचाइंपि पकरेइ, चाउव्वन्नं वागरेइ-एवं खलु

समणे भगवं महावीरे गोसालस्स मंखलिपुत्तस्स तवेणं तेणं अन्नाइट्ठे स०
 अंतो छण्हं मासाणं पित्तज्जरपरिगयसरीरे दाहवक्कंतीए छउमत्थे चेव कालं करि-
 स्सइ । तेणं कालेणं तेणं समएणं समणस्स भगवओ महावीरस्स अंतेवासी सीहे
 नामं अणगारे पगइभइए जाव विणीए मालुयाकच्छगस्स अदूरसामंते छट्ठंछट्ठेणं
 अनिक्खित्तेणं तवोकम्मेणं उट्ठं वाहाओ जाव विहरइ, तए णं तस्स सीहस्स अणगारस्स
 ज्ञाणंतरियाए वट्ठमाणस्स अयमेयारुवे जाव समुप्पज्जित्था-एवं खलु मम धम्माय-
 रियस्स धम्मोवएसगस्स समणस्स भगवओ महावीरस्स सरीरगंसि विउले रोगायंके
 पाउब्भूए उज्जले जाव छउमत्थे चेव कालं करेस्सइ, वदिस्संति य णं अन्नउत्थिया
 छउमत्थे चेव कालगए, इमेणं एयारुवेणं महया मणोमाणसिएणं दुक्खेणं अभिभूए
 समाणे आयावणभूमीओ पच्चोरुहइ आया० २ ता जेणेव मालुयाकच्छए तेणेव
 उवागच्छइ २ ता मालुयाकच्छयं अंतो २ अणुप्पविसइ मालुया० २ ता महया-२
 सेट्ठं कुहुकुहुस्स परुत्ते । अज्जोत्ति समणे भगवं महावीरे समणे निग्गंथे आमंतेइ
 २ ता एवं वयासी-एवं खलु अज्जो । ममं अंतेवासी सीहे नामं अणगारे पगइभइए
 तं चेव सव्वं भाणियव्वं जाव परुत्ते, तं गच्छह णं अज्जो ! तुब्भे सीहं अणगारं
 सदह, तए णं ते समणा निग्गंथा समणेणं भगवया महावीरेणं एवं वुत्ता समाणा
 समणं भगवं महावीरं वंदंति नमंसंति वं० २ ता समणस्स भगवओ महावीरस्स
 अंतियाओ सालकोट्टयाओ उज्जाणाओ पडिनिक्खमंति सा० २ ता जेणेव
 मालुयाकच्छए जेणेव सीहे अणगारे तेणेव उवागच्छन्ति २ ता सीहं अणगारं
 एवं वयासी-सीहा ! तव धम्मायरिया सहावेति, तए णं से सीहे अणगारे समणेहिं
 निग्गंथेहिं सद्धिं मालुयाकच्छयाओ पडिनिक्खमइ २ ता जेणेव सालकोट्टए
 उज्जाणे जेणेव समणे भगवं महावीरे तेणेव उवागच्छइ २ ता समणं भगवं महा-
 चीरं तिक्खुत्तो आयाहिणं २ जाव पज्जुवासइ, सीहादि समणे भगवं महावीरे सीहं
 अणगारं एवं वयासी-से नूणं ते सीहा ! ज्ञाणंतरियाए वट्ठमाणस्स अयमेयारुवे जाव
 परुत्ते, से नूणं ते सीहा ! अट्ठे समट्ठे ? हंता अत्थि, तं नो खलु अहं सीहा ! गोसा-
 लस्स मंखलिपुत्तस्स तवेणं तेणं अन्नाइट्ठे समाणे अंतो छण्हं मासाणं जाव कालं
 करेस्सं, अहन्नं अन्नाइं अद्धसोलसवासाइं जिणे सुहत्थी विहरिस्सामि, तं गच्छह णं
 तुमं सीहा ! भेंडियगामं नयरं रेवईए गाहावइणीए गिहे, तत्थ णं रेवईए गाहावइणीए
 ममं अट्ठाए दुवे (कोहंडफला) उवक्खडिया तेहिं नो अट्ठो, अत्थि से अज्जे पारियासिएं
 [फासुए वीयऊरए] तमाहराहि तेणं अट्ठो, तए णं से सीहे अणगारे समणेणं भगवया म-
 हावीरेणं एवं वुत्ते समाणे हट्ठतुट्ठ जाव हियए समणं भगवं महावीरं वंदइ नमंसइ वंदित्ता

मसंभंतं मुहपोत्तियं पडिलेहेइ मु० २ ता जहा गोयमसामी

७२ नण भगवं महावीरे तेणेव उवागच्छइ २ ता समणं भगवं महावीरं

१२ नमंसइ वं० २ ता समणस्स भगवओ महावीरस्स अंतियाओ सालकोट्टयाओ

उज्जाणाओ पडिनिक्खमइ २ ता अतुरिय जाव जेणेव मेंढियगामे नयरे तेणेव

उवागच्छइ २ ता मेंढियगामं नयरं मज्झमज्झेणं जेणेव रेवईए गाहावइणीए गिहे

तेणेव उवागच्छइ २ ता रेवईए गाहावइणीए गिहं अणुप्पविट्ठे, तए णं सा रेवई

गाहावइणी सीहं अणगारं एज्जमाणं पासइ २ ता हट्ठतुट्ठ० खिप्पामेव आसणाओ

अब्भुट्ठेइ २ ता सीहं अणगारं सत्तट्ठपयाइ अणुगच्छइ स० २ ता तिक्खुत्तो

आयाहिणं पयाहिणं० वंदइ नमंसइ वं० २ ता एवं वयासी-संदिसंतु णं देवाणुप्पिया !

किमागमणप्पओयणं ?, तए णं से सीहे अणगारे रेवई गाहावइणि एवं वयासी-एवं

खलु तुमे देवाणुप्पिए ! समणस्स भगवओ महावीरस्स अट्ठाए दुवे [कोहंडफला] उव-

क्खडिया तेहिं नो अट्ठो, अत्थि ते अत्थे पारियासिए (फासुए वीयऊरए) तमाहराहि

तेणं अट्ठो, तए णं सा रेवई गाहावइणी सीहं अणगारं एवं वयासी-केस णं

सीहा ! से णाणी वा तवस्सी वा जेणं तव एस अट्ठे मम ताव रहस्सकडे

हव्वमक्खाए जओ णं तुमं जाणासि ? एवं जहा खंदए जाव जओ णं

अहं जाणामि, तए णं सा रेवई गाहावइणी सीहस्स अणगारस्स अंतियं एयमट्ठं

सोच्चा निसम्म हट्ठतुट्ठा जेणेव भत्तघरे तेणेव उवागच्छइ २ ता पत्तगं मोएइ-

पत्तगं मोएत्ता जेणेव सीहे अणगारे तेणेव उवागच्छइ २ ता सीहस्स अणगारस्स

पडिग्गहगंसि तं सव्वं सम्म निस्सिरइ, तए णं तीए रेवईए गाहावइणीए-तेणं दव्व-

सुद्धेणं जाव दाणेणं सीहे अणगारे पडिलाभिए समाणे देवाउए निवट्ठे जहा विजयस्स

जाव जम्मजीवियफले रेवईए गाहावइणीए रेवईए गाहावइणीए, तए णं से सीहे

अणगारे रेवईए गाहावइणीए गिहाओ पडिनिक्खमइ २ ता मेंढियगामं नयरं

मज्झमज्झेणं निग्गच्छइ निग्गच्छइत्ता जहा गोयमसामी जाव भत्तपाणं पडिदंसेइ

२ ता समणस्स भगवओ महावीरस्स पाणिंसि तं सव्वं सम्म निस्सिरइ, तए णं

समणे भगवं महावीरे अमुच्छिए जाव अणज्झोववत्थे विलमिव पन्नगभूएणं

अप्पाणेणं तमाहारं सरीरकोट्ठगंसि पक्खिवइ, तए णं समणस्स भगवओ महा-

वीरस्स तमाहारं आहारियस्स समाणस्स से विउले रोगायंके खिप्पामेव उवसमं पत्ते

हट्ठे जाए आरोग्गे बलियसरीरे तुट्ठा समणा तुट्ठाओ समणीओ तुट्ठा सावया तुट्ठाओ

सावियाओ तुट्ठा देवा तुट्ठाओ देवीओ सदेवमणुयासुरे लोए तुट्ठे हट्ठे जाए

समणे भगवं महावीरे हट्ठे० २ ॥ ५५६ ॥ भंतेत्ति भगवं गोयमे समणं भगवं

महावीरं वंदइ नमंसइ वं० २ ता एवं वयासी-एवं, खलु देवाणुप्पियाणं अंतेवासी
 पाईणजाणवए सव्वाणुभूई नामं अणगारे पगइभइए जाव विणीए, से णं भंते !
 तथा गोसालेणं मंखलिपुत्तेणं तवेणं तेएणं भासरासीकए समाणे कहिं गए कहिं
 उववन्ने ? एवं खलु गोयमा ! ममं अतेवासी पाईणजाणवए सव्वाणुभूई नामं अणगारे
 पगइभइए जाव विणीए, से णं तथा गोसालेणं मंखलिपुत्तेणं तवेणं तेएणं भासारसीकए
 समाणे उड्डं चंदिमसूरिय जाव वंभलंतगमहासुक्के कप्पे वीईवइत्ता सहस्सारे कप्पे
 देवत्ताए उववन्ने, तत्थ णं अत्थेगइयाणं देवाणं अट्टारस सागरोवमाइं ठिई पन्नत्ता,
 तत्थ णं सव्वाणुभूइस्सवि देवस्स अट्टारस सागरोवमाइं ठिई पन्नत्ता, से णं सव्वा-
 णुभूई देवे ताओ देवलोगाओ आउक्खएणं भवक्खएणं ठिइक्खएणं जाव महा-
 विदेहे वासे सिज्जिहिइ जाव अंतं करेहिइ । एवं खलु देवाणुप्पियाणं अंतेवासी
 कोसलजाणवए सुनक्खत्ते नामं अणगारे पगइभइए जाव विणीए, से णं भंते !
 तथा गोसालेणं मंखलिपुत्तेणं तवेणं तेएणं परिताविए समाणे कालमासे कालं किच्चा
 कहिं गए कहिं उववन्ने ? एवं खलु गोयमा ! ममं अंतेवासी सुनक्खत्ते नामं
 अणगारे पगइभइए जाव विणीए, से णं तथा गोसालेणं मंखलिपुत्तेणं तवेणं तेएणं
 परिताविए समाणे जेणेव ममं अंतिए तेणेव उवागच्छइ २ ता वंदइ नमंसइ वं०
 २ ता सयमेव पंच महव्वयाइं आरुहेइ सयमेव पंच महव्वयाइं आरुहेत्ता समणा
 य समणीओ य खामेइ २ ता आलोइयपडिक्कंते समाहिपत्ते कालमासे कालं किच्चा
 उड्डं चंदिमसूरिय जाव आणयपाणयारणकप्पे वीईवइत्ता-अच्चुए कप्पे देवत्ताए
 उववन्ने, तत्थ णं अत्थेगइयाणं देवाणं वावीसं सागरोवमाइं ठिई पण्णत्ता, तत्थ णं
 सुनक्खत्तस्सवि देवस्स वावीसं सागरोवमाइं सेसं जहा सव्वाणुभूइस्स जाव अंतं
 काहिइ ॥ ५५७ ॥ एवं खलु देवाणुप्पियाणं अंतेवासी कुसिस्से गोसाले नामं
 मंखलिपुत्ते से णं भंते ! गोसाले मंखलिपुत्ते कालमासे कालं किच्चा कहिं गए कहिं
 उववन्ने ? एवं खलु गोयमा ! ममं अतेवासी कुसिस्से गोसाले नामं मंखलिपुत्ते
 समणघायए जाव छउमत्थे चेव कालमासे कालं किच्चा उड्डं चंदिमसूरिय जाव अच्चुए
 कप्पे देवत्ताए उववन्ने, तत्थ णं अत्थेगइयाणं देवाणं वावीसं सागरोवमाइं ठिई प०,
 तत्थ णं गोसालस्सवि देवस्स वावीसं सागरोवमाइं ठिई प० । से णं भंते !
 गोसाले देवे ताओ देवलोगाओ आउक्खएणं ३ जाव कहिं उववज्जिहिइ ? गोयमा !
 इहेव जंबूदीवे २ भारहे वासे विंझगिरिपायमूले पुंडेसु जणवएसु सयदुवारे नयरे
 संमु(सुम)इस्स रत्तो भइए भारियाए कुच्छिसि पुत्तत्ताए पच्चायाहिइ, से णं तत्थ नवण्हं
 मासाणं बहुपडिपुन्नाणं जाव वीइक्कंताणं जाव सुरुवे दारए पयाहिइ, जं रयणिं च णं से

दारए जाइ(पया)हिइ तं रयाणि च णं सयदुवारे नयरे सविंभतरवाहिरिए भारगसो
 य कुंभगसो य पउमवासे य रयणवासे य वासे वासिहिइ, तए णं तस्स दारगस्स
 अम्मापियरो एक्कारसमे दिवसे वीइक्कंते जाव संपत्ते वारसाहदिवसे अयमेयारुव
 गोणं गुणनिप्फन्नं नामधेज्जं काहिंति-जम्हा णं अम्हं इमंसि दारगंसि जायंसि
 समाणंसि सयदुवारे नयरे सविंभतरवाहिरिए जाव रयणवासे य वासे वुट्ठे, तं होउ णं
 अम्हं इमस्स दारगस्स नामधेज्जं महापउमे महापउमे, तए णं तस्स दारगस्स
 अम्मापियरो नामधेज्जं करेहिंति महापउमेत्ति, तए णं तं महापउमं दारगं
 अम्मापियरो साइरेगट्ठवासजायगं जाणिता सोहणंसि तिहिकरणदिवसनक्खत्तमुहुत्तंसि
 महया २ रायाभिसेगेणं अभिसिंचेहिंति, से णं तत्थ राया भविस्सइ महया
 हिमवंतमहंत० वन्नओ जाव विहरिस्सइ, तए णं तस्स महापउमस्स रन्नो अन्नया
 कयाइ दो देवा महिद्धिया जाव महेसक्खा सेणाकम्मं काहिंति, तं०-पुन्नभदे
 य माणिभदे य, तए णं सयदुवारे नयरे बहवे राईसरतलवर जाव
 सत्थवाहप्पभिईओ अन्नमंजं सदावेहिंति अ० २ ता एवं वदेहिंति-जम्हा णं
 देवाणुप्पिया ! अम्हं महापउमस्स रन्नो दो देवा महिद्धिया जाव सेणाकम्मं करेति
 तं०-पुन्नभदे य माणिभदे य, तं होउ णं देवाणुप्पिया ! अम्हं महापउमस्स रन्नो
 दोच्चेवि नामधेजे देवसेणे २, तए णं तस्स महापउमस्स रन्नो दोच्चेवि नामधेजे
 भविस्सइ देवसेणेति, तए णं तस्स देवसेणस्स रन्नो अन्नया कयाइ सेए संख-
 तलविमलसन्निगासे चउदंतं हत्थिरयणे समुप्पज्जिस्सइ, तए णं से देवसेणे राया
 तं सेयं संखतलविमलसन्निगासं चउदंतं हत्थिरयणं दुरुढे समणे सयदुवारं नयरं
 मज्झमज्झेणं अभिक्खणं २ अ(भि)इजाहिइ य निज्जाहिइ य, तए णं सयदुवारे नयरे
 बहवे राईसर जाव पभिईओ अन्नमंजं सदावेहिंति अ० २ ता वदेहिंति-जम्हा णं
 देवाणुप्पिया ! अम्हं देवसेणस्स रन्नो सेए संखतलसन्निगासे चउदंतं हत्थिरयणे
 समुप्पजे, तं होउ णं देवाणुप्पिया ! अम्हं देवसेणस्स रन्नो तच्चेवि नामधेजे विम-
 लवाहणे २, तए णं तस्स देवसेणस्स रन्नो तच्चेवि नामधेजे भविस्सइ विमलवाह-
 नेत्ति । तए णं से विमलवाहणे राया अन्नया कयाइ समणेहिं निगंथेहिं मिच्छं
 विप्पडिवज्जिहिइ, अ(त्थे)प्पेगइए आउसेहिइ, अप्पेगइए अ(उ)वहसिहिइ, अप्पेगइए
 निच्छोडेहिइ, अप्पेगइए निब्भच्छेहिइ, अप्पेगइए बंधेहिइ, अप्पेगइए णिरुंभेहिइ, अप्पे-
 गइयाणं छविच्छेइं करेहिइ, अप्पेगइए पमारेहिइ, अप्पेगइयाणं उद्दवेहिइ, अप्पेगइयाणं
 वत्थं पडिग्गहं कंबलं पायपुंछणं आच्छिदिहिइ विच्छिदिहिइ भिंदिहिइ अवहरिहिइ,
 अप्पेगइयाणं भत्तपाणं वोच्छिदिहिइ, अप्पेगइ(याणं)ए णिन्नगरे करेहिइ, अप्पेगइए

निव्विसए करेहि(न्ति)इ, तए णं सयदुवारे नयरे वहवे राईसर जाव वदिहिंति-एवं
 खलु देवाणुप्पिया ! विमलवाहणे राया समणेहिं निग्गंथेहिं मिच्छं विप्पडिवन्ने, अप्पेगइए
 आउसइ जाव निव्विसए करेइ, तं नो खलु देवाणुप्पिया ! एयं अम्हं सेयं, नो
 खलु एयं विमलवाहणस्स रत्तो सेयं, नो खलु एयं रज्जस्स वा रट्ठस्स वा वलस्स वा
 वाहणस्स वा पुरस्स वा अंतेउरस्स वा जणवयस्स वा सेयं जणं विमलवाहणे
 राया समणेहिं निग्गंथेहिं मिच्छं विप्पडिवन्ने, तं सेयं खलु देवाणुप्पिया ! अम्हं
 विमलवाहणं रायं एयमट्ठं विन्नवित्तएत्तिकट्ठु अन्नमन्नस्स अंतियं एयमट्ठं पडिसुणेति
 अ० २ ता जेणेव विमलवाहणे राया तेणेव उवागच्छंति २ ता करयलपरिग्गहियं
 विमलवाहणं रायं जणं विजणं वद्धावेति ज० २ ता एवं वयासी-एवं खलु
 देवाणुप्पिया ! समणेहिं निग्गंथेहिं मिच्छं विप्पडिवन्ना, अप्पेगइए आउरस्संति जाव
 अप्पेगइए निव्विसए करंति, तं नो खलु एयं देवाणुप्पियाणं सेयं, नो खलु एयं
 अम्हं सेयं, नो खलु एयं रज्जस्स वा जाव जणवयस्स वा सेयं जं णं देवाणुप्पिया !
 समणेहिं निग्गंथेहिं मिच्छं विप्पडिवन्ना, तं विरमंतु णं देवाणुप्पिया ! एयस्स अट्ठस्स
 अकरणयाए, तए णं से विमलवाहणे राया तेहिं वह्महिं राईसर जाव सत्यवाहप्प-
 भिईहिं एयमट्ठं विज्जेते समाणे नो धम्मोत्ति नो तवोत्ति मिच्छाविणएणं एयमट्ठं
 पडिसुणेहिइ, तस्स णं सयदुवारस्स नयरस्स वहिया उत्तरपुरच्छिमे दिसीभाए
 एत्थं णं सुभूमिभागे नामं उज्जाणे भविस्सइ सव्वोउय० वन्नओ । तेणं कालेणं तेणं
 समएणं विमलस्स अरहओ पउप्पए सुमंगले नामं अणगारे जाइसंपन्ने जहा धम्म-
 घोसस्स वन्नओ जाव संखित्तविउलतेयलेस्से तिन्नाणोवगए सुभूमिभागस्स उज्जाणस्स
 अदूरसामंते छट्ठंछट्ठेणं अणिव्वित्तेणं जाव आयावेमाणे विहरिस्सइ । तए णं से
 विमलवाहणे राया अन्नया कयाइ रहचरियं काउं निज्जाहिइ, तए णं से विमल-
 वाहणे राया सुभूमिभागस्स उज्जाणस्स अदूरसामंते रहचरियं करेमाणे सुमंगलं
 अणगारं छट्ठंछट्ठेणं जाव आयावेमाणं पासिहिइ २ ता आसुरते जाव मिसिमिसेमाणे
 सुमंगलं अणगारं रहसिरेणं णोल्लावेहिइ, तए णं से सुमंगले अणगारे विमलवाहणेणं
 रत्ता रहसिरेणं णोल्लाविए समाणे सणियं २ उट्ठेहिइ २ ता दोच्चपि उट्ठं वाहाओ
 पणिज्झिय २ जाव आयावेमाणे विहरिस्सइ, तए णं से विमलवाहणे राया सुमंगलं
 अणगारं दोच्चपि रहसिरेणं णोल्लावेहिइ, तए णं से सुमंगले अणगारे विमलवाहणेणं
 रत्ता दोच्चपि रहसिरेणं णोल्लाविए समाणे सणियं २ उट्ठेहिइ २ ता ओहिं पउंजेहिइ
 २ ता विमलवाहणस्स रण्णो तीतद्धं ओहिणा आभोएहिइ, २ ता विमलवाहणं रायं
 एवं वदिहिइ-नो खलु तुमं विमलवाहणे राया, नो खलु तुमं देवसेणे राया, नो खलु

सुमं महापउमे राया, तुमणं इओ तच्चे भवगहणे गोसाले नामं मंखलिपुत्ते होत्था,
 समणघायए जाव छउमत्थे चेव कालगए, तं जइ ते तया सव्वाणुभूइणा अणगारेणं
 पभुणावि होऊणं सम्मं सहियं खमियं तितिविखियं अहियासियं, जइ ते तया सुनक्ख-
 त्तेणं अणगारेणं पभुणावि होऊणं जाव अहियासियं, जइ ते तया समणेणं भगवया महा-
 वीरेणं पभुणावि जाव अहियासियं, तं नो खलु अहं ते तहा सम्मं सहिस्सं जाव अहिया-
 सिस्सं, अहं ते नवरं सहयं सरहं ससारहियं तवेणं तेएणं एगाहच्चं कूडाहच्चं भास-
 रासिं करेज्जामि, तए णं से विमलवाहणे राया सुमंगलेण अणगारेणं एवं वुत्ते समाणे
 आसुरुत्ते जाव मिसिमिसेमाणे सुमंगलं अणगारं तच्चपि रहसिरेणं णोल्लावेहिइ, तए
 णं से सुमंगले अणगारे विमलवाहणेणं रण्णा तच्चपि रहसिरेणं णोल्लाविए समाणे
 आसुरुत्ते जाव मिसिमिसेमाणे आयावणभूमीओ पच्चोरुहइ आ० २ ता तेयासमु-
 न्घाएणं समोहणिहिइ तेया० २ ता सत्तट्ठपयाइं पच्चोसक्किहिइ सत्तट्ठ० २ ता
 विमलवाहण रायं सहयं सरहं ससारहियं तवेणं तेएणं जाव भासरासिं करेहिइ ।
 सुमंगले णं भंते ! अणगारे विमलवाहणं रायं सहयं जाव भासरासिं करेत्ता कहिं
 गच्छिहिइ कहिं उववज्जिहिइ ? गोयमा ! सुमंगले णं अणगारे विमलवाहणं रायं
 सहयं जाव भासरासिं करेत्ता बहूहिं चउत्थछट्ठमदसमदुवालस जाव विचित्तेहिं
 तवोक्कमेहिं अप्पाणं भावेमाणे बहूइं वासाइं सामन्नपरियागं पाउणिहिइ बहू० २ ता
 भासियाए संलेहणाए सट्ठिं भत्ताइं अणसणाए जाव छेदेत्ता आलोइयपडिक्कंते समाहि-
 पत्ते उड्ढं चंदिमसूरिय जाव गोविज्जविमाणावाससयं वीईवइत्ता सव्वट्ठसिद्धे महाविमाणे
 देवत्ताए उववज्जिहिइ, तत्थ णं देवाणं अजहन्नमणुक्कोसेणं तेत्तीसं सागरोवमाइं ठिई
 प०, तत्थ णं सुमंगलस्सवि देवस्स अजहन्नमणुक्कोसेणं तेत्तीसं सागरोवमाइं ठिई
 प० । से णं भंते ! सुमंगले देवे ताओ देवलोगाओ जाव महाविदेहे वासे सिज्झिहिइ
 जाव अंतं करेहिइ ॥ ५५८ ॥ विमलवाहणे णं भंते ! राया सुमंगलेणं अणगारेणं सहए
 जाव भासरासीकए समाणे कहिं गच्छिहिइ कहिं उववज्जिहिइ ? गोयमा ! विमलवाहणे
 णं राया सुमंगलेणं अणगारेणं सहए जाव भासरासीकए समाणे अहे सत्तमाए पुढवीए
 उक्कोसकालट्ठिइयंसि नरयंसि नेरइयत्ताए उववज्जिहिइ, से णं तओ अणंतं उव्वट्ठित्ता
 मच्छेसु उववज्जिहिइ, तत्थवि णं सत्थवज्जे दाहवक्कंतीए कालमासे कालं किच्चा
 दोच्चपि अहे सत्तमाए पुढवीए उक्कोसकालट्ठिइयंसि नरयंसि नेरइयत्ताए उववज्जिहिइ,
 से णं तओ अणंतं उव्वट्ठित्ता दोच्चपि मच्छेसु उववज्जिहिइ, तत्थवि णं सत्थवज्जे
 जाव किच्चा छट्ठीए तमाए पुढवीए उक्कोसकालट्ठिइयंसि नरयंसि नेरइयत्ताए उवव-
 ज्जिहिइ, से णं तओहिंता जाव उव्वट्ठित्ता इत्थियासु उववज्जिहिइ, तत्थवि णं

सत्थवज्झे दाह जाव दोच्चंपि छट्ठीए तमाए पुढवीए उक्कोसकाल जाव उव्वट्ठिता
 दोच्चंपि इत्थियासु उव्वज्जिहिइ, तत्थवि णं सत्थवज्झे जाव किच्चा पंचमाए धूमप्प-
 भाए पुढवीए उक्कोसकालट्ठिइयंसि जाव उव्वट्ठिता उरएसु उव्वज्जिहिइ, तत्थवि णं
 सत्थवज्झे जाव किच्चा दोच्चंपि पंचमाए जाव उव्वट्ठिता दोच्चंपि उरएसु उव्वज्जिहिइ
 जाव किच्चा चउत्थीए पंकप्पभाए पुढवीए उक्कोसकालट्ठिइयंसि जाव उव्वट्ठिता सीहेसु
 उव्वज्जिहिइ, तत्थवि णं सत्थवज्झे तहेव जाव कालं किच्चा दोच्चंपि चउत्थीए पंक-
 प्पभाए जाव उव्वट्ठिता दोच्चंपि सीहेसु उव्वज्जिहिइ जाव किच्चा तच्चाए वालयप्पभाए
 पुढवीए उक्कोसकाल जाव उव्वट्ठिता पक्खीसु उव्वज्जिहिइ, तत्थवि णं सत्थवज्झे जाव
 किच्चा दोच्चंपि तच्चाए वालय० जाव उव्वट्ठिता दोच्चंपि पक्खीसु उव्वज्जिहिइ जाव
 किच्चा दोच्चाए सक्करप्पभाए जाव उव्वट्ठिता सिरीसवेसु उव्वज्जिहिइ, तत्थवि णं
 सत्थवज्झे जाव किच्चा दोच्चंपि दोच्चाए सक्करप्पभाए जाव उव्वट्ठिता दोच्चंपि सिरीसवेसु
 उव्वज्जिहिइ जाव किच्चा इमीसे रयणप्पभाए पुढवीए उक्कोसकालट्ठिइयंसि नरयंसि
 नेरइयत्ताए उव्वज्जिहिइ जाव उव्वट्ठिता सण्णीसु उव्वज्जिहिइ, तत्थवि णं सत्थवज्झे
 जाव किच्चा असन्नीसु उव्वज्जिहिइ, तत्थवि णं सत्थवज्झे जाव किच्चा दोच्चंपि इमीसे
 रयणप्पभाए पुढवीए पलिओवमस्स असंखेज्जिभागट्ठिइयंसि नरयंसि नेरइयत्ताए
 उव्वज्जिहिइ, से णं तओ जाव उव्वट्ठिता जाइं इमाइं खहचरविहाणाइं भवंति, तं०-
 चम्मपक्खीणं, लोमपक्खीणं, समुग्गपक्खीणं, विययपक्खीणं, तेसु अणेगसयसहस्स-
 खुत्तो उद्दाइत्ता २ तत्थेव २ भुज्जो २ पच्चायाहिइ, सव्वत्थवि णं सत्थवज्झे दाहवक्कंतीए
 कालमासे कालं किच्चा जाइं इमाइं भुयपरिसप्पविहाणाइं भवंति, तंजहा-गोहाणं
 नउलाणं जहा पन्नवणापए जाव जाहगाणं, तेसु अणेगसयसहस्सखुत्तो सेसं जहा
 'खहचराणं जाव किच्चा जाइं इमाइं उरपरिसप्पविहाणाइं भवंति, तं०-अहीणं अय-
 गराणं आसालियाणं महोरगाणं, तेसु अणेगसयसहस्सखुत्तो जाव किच्चा जाइं इमाइं
 चउप्पयविहाणाइं भवंति, तं०-एगखुराणं दुखुराणं गंडीपयाणं सणहपयाणं, तेसु
 अणेगसयसहस्स जाव किच्चा जाइं इमाइं जलचरविहाणाइं भवंति, तं०-मच्छाणं
 कच्छभाणं जाव सुंसुमाराणं, तेसु अणेगसयसहस्स जाव किच्चा जाइं इमाइं चउरिं-
 दियविहाणाइं भवंति, तं०-अंधियाणं पोत्तियाणं जहा पन्नवणापए जाव गोमय-
 कीडाणं, तेसु अणेगसयसहस्स जाव किच्चा जाइं इमाइं तेइंदियविहाणाइं भवंति,
 तं०-उ(ओ)वचियाणं जाव हत्थिसोडाणं, तेसु अणेग जाव किच्चा जाइं इमाइं वेइं-
 दियविहाणाइं भवंति, तं०-पुलाकिमियाणं जाव समुदल्लिक्खाणं, तेसु अणेगसय जाव
 किच्चा जाइं इमाइं वणस्सइविहाणाइं भवंति, तं०-ख्खाणं गुच्छाणं जाव कुह(हु)णाणं,

तेसु अणेगसय जाव पच्चायाइस्सइ, उस्सन्नं च णं कडुयस्सखेसु कडुयवल्लीसु सव्व-
 त्थवि णं सत्थवज्झे जाव किच्चा जाइं इमाइं वाउक्काइयविहाणाइं भवंति, तंजहा-
 पाईणवायाणं जाव सुद्धवायाणं, तेसु अणेगसयसहस्स जाव किच्चा जाइं इमाइं
 तेउक्काइयविहाणाइं भवंति, तं०-इंगालाणं जाव सूरियकंतमणिनिसियाणं, तेसु अणे-
 गसयसहस्स जाव किच्चा जाइं इमाइं आउक्काइयविहाणाइं भवंति, तं०-उस्साणं
 जाव खातोदगाणं, तेसु अणेगसयसहस्स जाव पच्चायाइस्सइ, उस्सण्णं च णं
 खारोदएसु खातोदएसु, सव्वत्थवि णं सत्थवज्झे जाव किच्चा जाइं इमाइं पुढविका-
 इयविहाणाइं भवंति, तं०-पुढवीणं सक्कराणं जाव सूरकंताणं, तेसु अणेगसय जाव
 पच्चायाहिइ, उस्सन्नं च णं खरवायरपुढविकाइएसु, सव्वत्थवि णं सत्थवज्झे जाव
 किच्चा रायगिहे नयरे बाहिं खरियत्ताए उववज्जिहिइ, तत्थवि णं सत्थवज्झे जाव
 किच्चा दोच्चंपि रायगिहे नयरे अंतो खरियत्ताए उववज्जिहिइ, तत्थवि णं सत्थ-
 वज्झे जाव किच्चा इहेव जंबुदीये दीवे भारहे वासे विंझगिरिपायमूले विभेले
 सन्निवेसे माहणकुलंसि दारियत्ताए पच्चायाहिइ । तए णं तं दारियं अम्मापियरो
 उम्मुक्कवालभावं जोव्वणगमणुप्पत्तं पडिरुवएणं सुक्केणं पडिरुवएणं विणएणं पडि-
 रुवियस्स भत्तारस्स भारियत्ताए दलइस्संति, सा णं तस्स भारिया भविस्सइ इट्ठा
 कंता जाव अणुमया भंडकरंडगसमाणा तेल्लकेला इव सुसंगोविया चेलपे(ला)डा इव
 सुसंपरिगगहिया रयणकरंडओविव सुसारक्खिया सुसंगोविया मा णं सीयं मा णं उण्हं
 जाव परिस्सहोवसग्गा फुसंतु । तए णं सा दारिया अन्नया कयाइ गुव्विणी ससुरकु-
 लाओ कुलघरं निज्जमाणी अंतरा दवग्गिजालाभिहया कालमासे कालं किच्चा दाहिणि-
 ल्लेसु अग्गिकुमारेसु देवेसु देवत्ताए उववज्जिहिइ, से णं तओहिंतो अणंतरं उव्वट्ठित्ता
 माणुस्सं विग्गहं लभिहिइ माणुस्सं० २ ता केवलं वोहिं वुज्झिहिइ के० २ ता केवलं
 मुंडे भवित्ता अगाराओ अणगारियं पव्वइहिइ, तत्थविय णं विराहियसामन्ने कालमासे
 कालं किच्चा दाहिणिल्लेसु असुरकुमारेसु देवेसु देवत्ताए उववज्जिहिइ, से णं तओहितो
 जाव उव्वट्ठित्ता माणुस्सं विग्गहं तं चेव जाव तत्थवि णं विराहियसामन्ने कालमासे
 कालं किच्चा दाहिणिल्लेसु नागकुमारेसु देवेसु देवत्ताए उववज्जिहिइ, से णं तओहिंतो
 अणंतरं उव्वट्ठित्ता एवं एएणं अभिलावेणं दाहिणिल्लेसु सुवन्नकुमारेसु एवं विज्जुकुमारेसु
 एवं अग्गिकुमारवज्जं जाव दाहिणिल्लेसु थणियकुमारेसु से णं तओ जाव उव्वट्ठित्ता
 माणुस्सं विग्गहं लभिहिइ जाव विराहियसामन्ने जोइसिएसु देवेसु उववज्जिहिइ, से
 णं तओ अणंतरं चयं चइत्ता माणुस्सं विग्गहं, लभिहिइ जाव अविराहियसामन्ने
 कालमासे कालं किच्चा सोहम्मे कप्पे देवत्ताए उववज्जिहिइ, से णं तओहिंतो अणंतरं

चयं चइत्ता माणुस्सं विग्गहं लभिहिइ, केवलं वोहिं बुज्झिहिइ, तत्थवि णं अवि-
 राहियसामन्ने कालमासे कालं किच्चा ईसाणे कप्पे देवत्ताए उववज्झिहिइ, से णं तओ०
 चइत्ता माणुस्सं विग्गहं लभिहिइ० तत्थवि णं अविराहियसामन्ने कालमासे कालं
 किच्चा सणकुमारे कप्पे देवत्ताए उववज्झिहिइ, से णं तओहिंतो एवं जहा सणकुमारे
 तहा वंभलोए महासुक्के आणए आरणे, से णं तओ जाव अविराहियसामन्ने काल-
 मासे कालं किच्चा सव्वट्ठसिद्धे महाविमाणे देवत्ताए उववज्झिहिइ, से णं तओहिंतो
 अणंतरं चयं चइत्ता महाविदेहे वासे जाइं इमाइं कुलाइं भवंति-अट्ठाइं जाव
 अपरिभूयाइं, तहप्पगारेसु कुलेसु पुत्तत्ताए पच्चायाहिइ, एवं जहा उववाइए दढप्प-
 इन्नवन्नव्वया सच्चव वत्तव्वया निरवसेसा भाणियव्वा जाव केवलवरनाणदंसणे
 समुप्पज्झिहिइ, तए णं से दढप्पइन्ने केवली अप्पणो तीतद्धं आभोएहिइ अप्प०
 २ ता समणे निग्गंथे सद्दावेहिइ सम० २ ता एवं वदिहिइ-एवं खलु अहं अज्जो !
 इओ चिरातीयाए अट्ठाए गोसाले नामं मंखलिपुत्ते होत्था समणघायए जाव छउमत्थे
 चेव कालगए, तम्मूलगं च णं अहं अज्जो ! अणादीयं अणवदग्गं दीहमद्धं चाउरंत-
 संसारकंतारं अणुपरियट्ठिए, तं मा णं अज्जो ! तुव्भंपि केइ भवउ आयरियपडिणीए
 उवज्जायपडिणीए आयरियउवज्जायाणं अयसकारए अवन्नकारए अकित्तिकारए,
 मा णं सेऽवि एवं चेव अणादीयं अणवदग्गं जाव संसारकंतारं अणुपरियट्ठिहिइ जहा
 णं अहं । तए णं ते समणा निग्गंथा दढप्पइन्नस्स केवलिस्स अंतियं एयमट्ठं
 सोच्चा निसम्म भीया तत्था तसिया संसारभयउव्विग्गा दढप्पइन्नं केवलं वंदिहंति
 नमंसिहंति वं० २ ता तस्स ठाणस्स आलोइएहिति निदिहंति जाव पडिवज्झिहंति,
 तए णं से दढप्पइन्ने केवली बहूइं वासाइं केवलपरियागं पाउणिहिइ बहूइं० २ ता
 अप्पणो आउसेसं जाणित्ता भत्तं पच्चक्खाहिइ, एवं जहा उववाइए जाव सव्वदुक्खाण-
 मंतं काहिइ । सेवं भंते ! २ त्ति जाव विहरइ ॥ ५५९ ॥ तेयनिसग्गो समत्तो
 (अद्धेणं) ॥ समत्तं च पन्नरसमं सयं एक्कसरयं ॥

अहिगरणि जरा कम्मे जावइयं गंगदत्त सुमिणे य । उवओग लोग वलि ओहि दीव
 उदही दिसा यणिया ॥ १ ॥ चउद्दस० सोलसमे ॥ तेणं कालेणं तेणं समएणं रायगिहे
 जाव पज्जुवासमाणे एवं वयासी-अत्थि णं भंते ! अहिगरणिसि वाउयाए वक्कमइ ?
 हंता अत्थि, से भंते ! किं पुट्ठे उद्दाइ, अपुट्ठे उद्दाइ ? गोयमा ! पुट्ठे उद्दाइ नो अपुट्ठे
 उद्दाइ, से भंते ! किं ससरीरी निक्खमइ असरीरी निक्खमइ ? एवं जहा खंदए जाव
 से तेणट्ठेणं जाव नो असरीरी निक्खमइ ॥ ५६० ॥ इंगालकारियाए णं भंते ! अगणि-
 काए केवइयं कालं संचिद्धइ ? गोयमा ! जहन्नेणं अंतोमुहुत्तं उक्कोसेणं तिन्नि राइंदियाइं,

अन्नेवि तत्थ वाउयाए वक्कमइ, न विणा वाउयाएणं अगणिकाए उज्जलइ ॥ ५६१ ॥
 पुरिसे णं भंते ! अयं अयकोट्टंसि अयोमएणं संडासएणं उव्विहमाणे वा पव्विहमाणे
 वा कइकिरिए ? गोयमा ! जावं च णं से पुरिसे अयं अयकोट्टंसि अयोमएणं संडा-
 सएणं उव्विहिइ वा पव्विहिइ वा तावं च णं से पुरिसे काइयाए जाव पाणाइवाय-
 किरियाए पंचहिं किरियाहिं पुट्ठे, जेसिंपिय णं जीवाणं सरीरेहिंतो अए निव्वत्तिए
 अयकोट्ठे निव्वत्तिए संडासए निव्वत्तिए इंगाला निव्वत्तिया इंगालकट्ठिणी निव्व-
 त्तिया भत्था निव्वत्तिया तेवि णं जीवा काइयाए जाव पंचहिं किरियाहिं पुट्ठा ।
 पुरिसे णं भंते ! अयं अयकोट्ठाओ अयोमएणं संडासएणं गहाय अहिगरणिसि
 उक्खिवमाणे वा निक्खिवमाणे वा कइकिरिए ? गोयमा ! जावं च णं से पुरिसे
 अयं अयकोट्ठाओ जाव निक्खिवइ वा तावं च णं से पुरिसे काइयाए जाव
 पाणाइवायकिरियाए पंचहिं किरियाहिं पुट्ठे, जेसिंपिय णं जीवाणं सरीरेहिंतो अए
 निव्वत्तिए संडासए निव्वत्तिए चम्मेट्ठे निव्वत्तिए मुट्ठिए निव्वत्तिए अहिगरणी
 निव्वत्ति(ए)या अहिगरणिखोडी णिव्वत्तिया उदगदोणी णिव्वत्तिया अहिगरणसाला
 निव्वत्तिया तेविय णं जीवा काइयाए जाव पंचहिं किरियाहिं पुट्ठा ॥ ५६२ ॥ जीवे
 णं भंते ! किं अहिगरणी अहिगरणं ? गोयमा ! जीवे अहिगरणीवि अहिगरणंपि,
 से केणट्ठेणं भंते ! एवं वुच्चइ जीवे अहिगरणीवि अहिगरणंपि ? गोयमा ! अविरइं
 पडुच्च, से तेणट्ठेणं जाव अहिगरणंपि ॥ नेरइए णं भंते ! किं अधिगरणी अधिग-
 रणं ? गोयमा ! अहिगरणीवि अहिगरणंपि, एवं जहेव जीवे तहेव नेरइएवि, एवं
 निरंतरं जाव वेमाणिए ॥ जीवे णं भंते ! किं साहिगरणी निरहिगरणी ? गोयमा !
 साहिगरणी नो निरहिगरणी, से केणट्ठेणं पुच्छा, गोयमा ! अविरइं पडुच्च, से
 तेणट्ठेणं जाव नो निरहिगरणी, एवं जाव वेमाणिए ॥ जीवे णं भंते ! किं आया-
 हिगरणी पराहिगरणी तदुभयाहिगरणी ? गोयमा ! आयाहिगरणीवि पराहिगरणीवि
 तदुभयाहिगरणीवि, से केणट्ठेणं भंते ! एवं वुच्चइ जाव तदुभयाहिगरणीवि ?
 गोयमा ! अविरइं पडुच्च, से तेणट्ठेणं जाव तदुभयाहिगरणीवि, एवं जाव वेमा-
 णिए ॥ जीवाणं भंते ! अहिगरणे किं आयप्पओगनिव्वत्तिए परप्पओगनिव्वत्तिए
 तदुभयप्पओगनिव्वत्तिए ? गोयमा ! आयप्पओगनिव्वत्तिएवि परप्पओगनिव्वत्ति-
 एवि तदुभयप्पओगनिव्वत्तिएवि, से केणट्ठेणं भंते ! एवं वुच्चइ० ? गोयमा ! अविरइं
 पडुच्च, से तेणट्ठेणं जाव तदुभयप्पओगनिव्वत्तिएवि, एवं जाव वेमाणियाणं ॥ ५६३ ॥
 कइ णं भंते ! सरीरगा पण्णत्ता ? गोयमा ! पंच सरीरगा पण्णत्ता, तंजहा-ओरालिए
 जाव कम्मए । कइ णं भंते ! इंदिया पण्णत्ता ? गोयमा ! पंच इंदिया पण्णत्ता,

तंजहा-सोइंदिए जाव फासिंदिए, कइविहे णं भंते ! जोए पण्णत्ते ? गोयमा ! तिविहे जोए पण्णत्ते, तंजहा-मणजोए वइजोए कायजोए ॥ जीवे णं भंते ! ओरालियसरीरं निव्वत्तेमाणे किं अहिगरणी अहिगरणं ? गोयमा ! अहिगरणीवि अहिगरणंपि, से केणट्टेणं भंते ! एवं वुच्चइ अहिगरणीवि अहिगरणंपि ? गोयमा ! अविरइं पडुच्च, से तेणट्टेणं जाव अहिगरणंपि, पुढविकाइए णं भंते ! ओरालियसरीरं निव्वत्तेमाणे किं अहिगरणी अहिगरणं ? एवं चेव, एवं जाव मणुस्से । एवं वेउव्वियसरीरंपि, नवरं जस्स अत्थि । जीवे णं भंते ! आहारगसरीरं निव्वत्तेमाणे किं अहिगरणी० पुच्छा, गोयमा ! अहिगरणीवि अहिगरणंपि, से केणट्टेणं जाव अहिगरणंपि ? गोयमा ! पमायं पडुच्च, से तेणट्टेणं जाव अहिगरणंपि, एवं मणुस्सेवि, तेयासरीरं जहा ओरालियं, नवरं सव्वजीवाणं भाणियव्वं, एवं कम्मगसरीरंपि । जीवे णं भंते ! सोइंदियं निव्वत्तेमाणे किं अहिगरणी अहिगरणं ? एवं जहेव ओरालिय-सरीरं तहेव सोइंदियंपि भाणियव्वं, नवरं जस्स अत्थि सोइंदियं, एवं चर्विखदिय-घाणिंदियजिर्विभदियफासिंदियाणवि, नवरं जाणियव्वं जस्स जं अत्थि । जीवे णं भंते ! मणजोगं निव्वत्तेमाणे किं अहिगरणी अहिगरणं ? एवं जहेव सोइंदियं तहेव निरवसेसं, वइजोगो एवं चेव, नवरं एणिंदियवज्जाणं, एवं कायजोगोवि, नवरं सव्वजीवाणं जाव वेमाणिए । सेवं भंते ! २ त्ति ॥ ५६४ ॥ सोलसमस्स सयस्स पढमो उद्देसो समत्तो ॥

रायगिहे जाव एवं वयासी-जीवाणं भंते ! किं जरा सोगे ? गोयमा ! जीवाणं जरावि सोगेवि, से केणट्टेणं भंते ! एवं वुच्चइ जाव सोगेवि ? गोयमा ! जे णं जीवा सारीरं वेयणं वेदेंति तेसि णं जीवाणं जरा, जे णं जीवा माणसं वेयणं वेदेंति तेसि णं जीवाणं सोगे, से तेणट्टेणं जाव सोगेवि, एवं नेरइयाणवि, एवं जाव थणियकुमा-राणं, पुढविकाइयाणं भंते ! किं जरा सोगे ? गोयमा ! पुढविकाइयाणं जरा नो सोगे, से केणट्टेणं जाव नो सोगे ? गोयमा ! पुढविकाइया णं सारीरं वेयणं वेदेंति नो माणसं वेयणं वेदेंति, से तेणट्टेणं जाव नो सोगे, एवं जाव चउरिंदियाणं, सेसाणं जहा जीवाणं जाव वेमाणियाणं, सेवं भंते ! २ त्ति जाव पज्जुवासइ ॥ ५६५ ॥ तेणं कालेणं तेणं समएणं सक्के देविंदे देवराया वज्जपाणी पुरंदरे जाव भुंजमाणे विहरइ, इमं च णं केवलकप्पं जंबुदीवं २ विउल्लेणं ओहिणा आभोएमाणे २ पासइ समणं भगवं महावीरं जंबुदीवे दीवे एवं जहा ईसाणे तइयसए तहेव सक्कोवि नवरं आभिओगे ण सद्दावेइ हरी पायत्ताणियाहिवई, सुघोसा घंटा, पालओ विमाणकारी पालगं विमाणं, उत्तरिल्ले निज्जाणमग्गे, दाहिणपुरच्छिमिल्ले रइकरगपव्वए सेसं तं चेव

जाव नामंगं सावेत्ता पज्जुवासइ, धम्मकहा जाव परिसा पडिगया, तए णं से सक्के देविंदे देवराया समणस्स भगवओ महावीरस्स अंतियं धम्मं सोच्चा निसम्म हट्ठ-
तुट्ठ० समणं भगवं महावीरं वंदइ नमंसइ वं० २ ता एवं वयासी-कइविहे णं भंते !
उग्गहे पन्नते ? सक्का ! पंचविहे उग्गहे पण्णत्ते, तंजहा-देविंदोग्गहे, रायोग्गहे,
गाहावइउग्गहे, सागारियउग्गहे, साहम्मियउग्गहे ॥ जे इमे भंते ! अज्जत्ताए समणा
निगंगांथा विहरंति, एएसि णं अहं उग्गहं अणुजाणामीतिकट्ठु समणं भगवं महावीरं
वंदइ नमंसइ वं० २ ता तमेव दिव्वं जाणविमाणं दुरुहइ २ ता जामेव दिसिं पाउव्भूए
तामेव दिसि पडिगए । भंते ! त्ति भगवं गोयमे समणं भगवं महावीरं वंदइ नमंसइ
वं० २ ता एवं वयासी-जं णं भंते ! सक्के देविंदे देवराया तुव्वे एवं वदइ सच्चे णं
एसमट्ठे ? हंता सच्चे ॥ ५६६ ॥ सक्के णं भंते ! देविंदे देवराया किं सम्मावाई
मिच्छावाई ? गोयमा ! सम्मावाई नो मिच्छावाई ॥ सक्के णं भंते ! देविंदे देव-
राया किं सच्चं भासं भासइ, मोसं भासं भासइ, सच्चामोसं भासं भासइ, असच्चामोसं
भासं भासइ ? गोयमा ! सच्चंपि भासं भासइ जाव असच्चामोसंपि भासं भासइ ॥
सक्के णं भंते ! देविंदे देवराया किं सावज्जं भासं भासइ अणवज्जं भासं भासइ ?
गोयमा ! सावज्जंपि भासं भासइ अणवज्जंपि भासं भासइ, से केणट्ठेणं भंते ! एवं
चुच्चइ-सावज्जंपि जाव अणवज्जंपि भासं भासइ ? गोयमा ! जाहे णं सक्के देविंदे
देवराया सुहुमकायं अणिजूहिताणं भासं भासइ ताहे णं सक्के देविंदे देवराया
सावज्जं भासं भासइ, जाहे णं सक्के देविंदे देवराया सुहुमकायं निजूहिताणं भासं
भासइ ताहे णं सक्के देविंदे देवराया अणवज्जं भासं भासइ, से तेणट्ठेणं जाव
भासइ, सक्के णं भंते ! देविंदे देवराया किं भवसिद्धिए अभवसिद्धिए सम्मद्विट्ठिए
मिच्छादिट्ठिए एवं जहा मोउद्देसए सणंकुमारे जाव नो अचरिमे ॥ ५६७ ॥ जीवाणं भंते !
किं चेयकडा कम्मा कज्जंति अचेयकडा कम्मा कज्जंति ? गोयमा ! जीवाणं चेयकडा
कम्मा कज्जंति नो अचेयकडा कम्मा कज्जंति, से केणट्ठेणं भंते ! एवं वुच्चइ जाव
कज्जंति ? गोयमा ! जीवाण आहारोवचिया पोग्गलां, बोदिचिया पोग्गला, क(डे)लेवर-
चिया पोग्गला तहा २ णं ते पोग्गला परिणमंति नत्थि अचेयकडा कम्मा समणा-
उसो !, दुट्ठाणेषु दुसेज्जासु दुत्तिसीहियासु तहा २ णं ते पोग्गला परिणमंति नत्थि
अचेयकडा कम्मा समणाउसो !, आयंके से वहाए होइ संकप्पे से वहाए होइ मर-
णंते से वहाए होइ तहा २ णं ते पोग्गला परिणमंति नत्थि अचेयकडा कम्मा
समणाउसो !, से तेणट्ठेणं जाव कम्मा कज्जंति, एवं नेरइयाणवि एवं जाव वेमाणि-
याणं । सेवं भंते ! सेवं भंते ! त्ति जाव विहरइ ॥ ५६८ ॥ सोलसमस्स
सयस्स बीओ उद्देसो समत्तो ॥

रायगिहे जाव एवं वयासी-कइ णं भंते ! कम्मपगडीओ पण्णत्ताओ ? गोयमा ! अट्ट कम्मपगडीओ पण्णत्ताओ, तंजहा-नाणावरणिज्जं जाव अंतराइयं, एवं जाव वेमाणियाणं । जीवे णं भंते ! नाणावरणिज्जं कम्मं वेदेमाणे कइ कम्मपगडीओ वेदेइ ? गोयमा ! अट्ट कम्मपगडीओ, एवं जहा पन्नवणाए वेयावेउद्देसओ सो चेव निरवसेसो भाणियव्वो, वेदावंधोवि तहेव, वंधावेदोवि तहेव, वंधाबंधोवि तहेव भाणियव्वो जाव वेमाणियाणंति । सेवं भंते । २ त्ति जाव विहरइ ॥ ५६९ ॥

तए णं समणे भगवं महावीरे अन्नया कयाइ रायगिहाओ नयराओ गुणसिलाओ उज्जाणाओ पडिनिक्खमइ २ ता बहिया जणवयविहारं विहरइ, तेणं कालेणं तेणं समएणं उल्लुयातीरे नामं नयरे होत्था वन्नओ, तस्स णं उल्लुयातीरस्स नयरस्स बहिया उत्तरपुरच्छिमे दिसीभाए एत्थ णं एगजंवुए नामं उज्जाणे होत्था वन्नओ, तए णं समणे भगवं महावीरे अन्नया कयाइ पुंवाणुपुर्व्वि चरमाणे जाव एगजंवुए समोसडे जाव परिसा पडिगया, भंते ! त्ति भगवं गोयमे समणं भगवं महावीर वंदइ नमंसइ वंदित्ता नमंसित्ता एवं वयासी-अणगारस्स णं भंते ! भावियप्पणो छट्ठंछट्ठेणं अणिक्खित्तेणं जाव आयावेमाणस्स तस्स णं पुरच्छिमेणं अवड्ढं दिवसं नो कप्पइ हत्थं वा पायं वा वाहं वा ऊरुं वा आउंटावेत्तए वा पसारेत्तए वा, पच्चच्छिमेणं से अवड्ढं दिवसं कप्पइ हत्थं वा पायं वा जाव ऊरुं वा आउंटावेत्तए वा पसारेत्तए वा, तस्स णं अंसियाओ लंबंति, तं च वेजे अदक्खु इ(ई)सिं पाडेइ २ ता अंसियाओ छिंदेज्जा, से नूणं भंते ! जे छिंदइ तस्स किरिया कज्जइ, जस्स छिज्जइ नो तस्स किरिया कज्जइ णण्णत्थेगेणं धम्मंतराइएणं ? हंता गोयमा ! जे छिंदइ जाव धम्मंतराइएणं । सेवं भंते ! सेवं भंते ! त्ति ॥ ५७० ॥ सोलसमस्स सयस्स तइओ उद्देसो समत्तो ॥

रायगिहे जाव एवं वयासी-जावइयन्नं भंते ! अन्नगिलायए समणे निगगंथे कम्मं निज्जरेइ एवइयं कम्मं नरएसु नेरइयाणं वासेण वा वासेहिं वा वाससए(ण)हिं वा खवयंति ? णो इणट्ठे समट्ठे, जावइयणं भंते ! चउत्थमत्तिए समणे निगगंथे कम्मं निज्जरेइ एवइयं कम्मं नरएसु नेरइया वाससएण वा वाससएहिं वा वाससहस्से(ण)हिं वा वाससयसहस्से(ण)हिं वा खवयंति ? णो इणट्ठे समट्ठे, जावइयन्नं भंते ! छट्ठमत्तिए समणे निगगंथे कम्मं निज्जरेइ एवइयं कम्मं नरएसु नेरइया वाससहस्सेण वा वाससहस्सेहिं वा वाससयसहस्से(हि)ण वा खवयंति ? णो इणट्ठे समट्ठे, जावइयन्नं भंते ! अट्ठमत्तिए समणे निगगंथे कम्मं निज्जरेइ एवइयं कम्मं नरएसु नेरइया वाससयसहस्सेण वा वाससयसहस्सेहिं वा वासकोडीए वा खवयंति ? नो

इण्ठे समट्ठे, जावइयन्नं भंते ! दसमभत्तिए समणे निग्गंथे कम्मं निज्जरेइ एवइयं कम्मं नरएसु नेरइया वासकोडीए वा वासकोडीहिं वा वासकोडाकोडीए वा खवयंति ? नो इण्ठे समट्ठे, से केणट्ठेणं भंते ! एवं वुच्चइ जावइयं अन्न(इ)गिलायए समणे निग्गंथे कम्मं निज्जरेइ एवइयं कम्मं नरएसु नेरइया वासेण वा वासेहिं वा वाससएण वा (जाव) वास-(सय) सहस्सेण वा नो खवयंति, जावइयं चउत्थभत्तिए एवं तं चेव पुव्वभणियं उच्चारैयव्वं जाव वासकोडाकोडीए वा नो खवयंति ? गोयमा ! से जहानामए-केइ पुरिसे जुत्ते जराजज्जरियदेहे सिद्धिलतयावलितरंगसंपिणद्धगत्ते पविरलपरिसडियदंतसेढी उण्हाभिहए तण्हाभिहए आउरे झुंझिए पिवासिए दुव्वले किलंते एगं महं कोसंबगंडियं सुक्कं जडिलं गंठिं चिक्कण वाइद्धं अपत्तियं मुंडेण परसुणा अक्कमेज्जा, तए णं से पुरिसे महंताइं २ सद्दाइं करेइ नो महंताइं २ दलाइं अवद्दालेइ, एवामेव गोयमा ! नेरइयाणं पावाइं कम्माइं गाढीक्याइं चिक्कणीक्याइं एवं जहा छट्ठसए जाव नो महापज्जवसाणा भवंति, से जहानामए-केइ पुरिसे अहिगरणिं आउडेमाणे महया जाव नो महापज्जवसाणा भवंति, से जहानामए-केइ पुरिसे तरुणे वलवं जाव मेहावी निउणसिप्पोवगए एगं महं सामलिंगंडियं उल्लं अजडिलं अगंठिल्लं अचिक्कणं अवाइद्धं सपत्तियं अइतिकखेण परसुणा अक्कमेज्जा, तए णं से पुरिसे नो महंताइं २ सद्दाइं करेइ, महंताइं २ दलाइं अवद्दालेइ, एवामेव गोयमा ! समणाणं निग्गंथाणं अहावायराइं कम्माइं सिद्धिलीक्याइं णिट्ठियाइं क्याइं जाव खिप्पामेव परिविद्धत्थाइं भवंति, जावइयं तावइयं जाव महापज्जवसाणा भवंति, से जहा वा केइ पुरिसे सुक्कतणहत्थगं जायतेयंसि पक्खिवेज्जा, एवं जहा छट्ठसए तहा अयोक्खलेवि जाव महापज्जवसाणा भवंति, से तेणट्ठेणं गोयमा ! एवं वुच्चइ जावइयं अन्नगिलायए समणे निग्गंथे कम्मं निज्जरेइ तं चेव जाव वासकोडाकोडीए वा नो खवयंति ॥ सेवं भंते ! सेवं भंते ! त्ति जाव विहरइ ॥ ५७१ ॥ सोलसमस्स सयस्स चउत्थो उद्देसो समत्तो ॥

तेणं कालेणं तेणं समएणं उल्लुयातीरे नामं नयरे होत्था वन्नओ, एगजंबुए उज्जाणे वन्नओ, तेणं कालेणं तेणं समएणं सामी समोसढे जाव परिसा पज्जुवासइ, तेणं कालेणं तेणं समएणं सक्के देविंदे देवराया वज्जपाणी एवं जहेव बिइए उद्देसए तहेव दिव्वेणं जाणविमाणेणं आगओ जाव जेणेव समणे भगवं महावीरे तेणेव उवागच्छइ २ त्ता जाव नमंसित्ता एवं वयासी—देवे णं भंते ! महिद्धिए जाव महेसक्खे बाहिरए पोग्गले अपरियाइत्ता पभू आगमित्तए ? नो इण्ठे समट्ठे, देवे णं भंते ! महिद्धिए जाव महेसक्खे बाहिरए पोग्गले परियाइत्ता पभू आग-

मित्तए ? हंता पभू, देवे णं भंते ! महिद्धिए एवं एएणं अभिलावेणं गमित्तए
 २, एवं भासित्तए वा वा(विया)गरित्तए वा ३, उम्मिसावेत्तए वा निम्मिसावेत्तए वा ४,
 आउंटावेत्तए वा पसारेत्तए वा ५, ठाणं वा सेज्जं वा निसीहियं वा चेइत्तए वा ६, एवं
 विउव्वित्तए वा ७, एवं परियारावेत्तए वा ८ जाव हंता पभू, इमाइं अट्ट उक्खि-
 त्तपसिणवागरणाइं पुच्छइ इमाइं० २ ता संभंतियवंदणएणं वंदइ संभंतिय० २ ता
 तमेव दिव्वं जाणविमाणं दुरूहइ २ ता जामेव दिसिं पाउब्भूए तामेव दिसिं पडिगए
 ॥५७२॥ भंते ! त्ति भगवं गोयमे समणं भगवं महावीरं वंदइ नमंसइ वं० २ ता एवं
 वयासी-अन्नया णं भंते ! सक्के देविंदे देवराया देवाणुप्पियं वंदइ नमंसइ सक्कारेइ
 जाव पज्जुवासइ, किणं भंते ! अज्ज सक्के देविंदे देवराया देवाणुप्पियं अट्ट उक्खि-
 त्तपसिणवागरणाइं पुच्छइ २ ता संभंतियवंदणएणं वंदइ णमंसइ वं० २ ता जाव
 पडिगए ? गोयमादि समणे भगवं महावीरे भगवं गोयमं एवं वयासी-एवं खलु
 गोयमा ! तेणं कालेणं तेणं समएणं महासक्के कप्पे महासामाणे विमाणे दो देवा
 महिद्धिया जाव महेसक्खा एगविमाणंसि देवत्ताए उववन्ना, तं०-माइमिच्छदिट्ठि-
 उववन्नए य अमाइसम्मदिट्ठिउववन्नए य, तए णं से माइमिच्छादिट्ठिउववन्नए देवे तं
 अमाइसम्मदिट्ठिउववन्नं देवं एवं वयासी-परिणममाणा पोग्गला नो परिणया अप-
 रिणया, परिणमंतीति पोग्गला नो परिणया अपरिणया, तए णं से अमाइसम्मदिट्ठि-
 उववन्नए देवे तं माइमिच्छदिट्ठिउववन्नं देवं एवं वयासी-परिणममाणा पोग्गला
 परिणया नो अपरिणया, परिणमंतीति पोग्गला परिणया नो अपरिणया, तं माइमि-
 च्छदिट्ठिउववन्नं देवं एवं पडिहणइ २ ता ओहिं पउंजइ २ ता ममं ओहिणा आभोएइ
 ममं० २ ता अयमेयारूवे जाव समुप्पज्जित्था-एवं खलु समणे भगवं महावीरे
 जंबुदीवे २ जेणेव भारहे वासे जेणेव उल्लुयातीरे नयरे जेणेव एगजंबुए उज्जाणे अहा-
 पडिरूवं जाव विहरइ, तं सेयं खलु मे समणं भगवं महावीरं वंदित्ता जाव पज्जुवा-
 सित्ता इमं एयारूवं वागरणं पुच्छित्तएत्तिकट्टु एवं संपेहेइ एवं संपेहित्ता चउहिवि
 सामाणियसाहस्सीहि परियारो जहा सूरियाभस्स जाव निग्घोसनाइयरवेणं जेणेव
 जंबुदीवे २ जेणेव भारहे वासे जेणेव उल्लुयातीरे नयरे जेणेव एगजंबुए उज्जाणे
 जेणेव ममं अंतिए तेणेव पहारेत्थ गमणाए, तए णं से सक्के देविंदे देवराया तस्स
 देवस्स तं दिव्वं देविद्धिं दिव्वं देवजुइं दिव्वं देवाणुभा(वं)गं दिव्वं तेयलेस्स असहमाणे
 ममं अट्ट उक्खित्तपसिणवागरणाइं पुच्छइ २ ता संभंतिय जाव पडिगए ॥५७३॥ जावं
 च णं समणे भगवं महावीरे भगवओ गोयमस्स एयमट्ठं परिकहेइ तावं च णं से
 देवे तं देसं हव्वमागए, तए णं से देवे समणं भगवं महावीरं तिक्खुत्तो वंदइ

नमंसइ वं० २ ता एवं वयासी-एवं खलु भंते ! महासुक्के कप्पे महासामाणे विमाणे एगे माइमिच्छादिट्ठिउववन्नए देवे ममं एवं वयासी-परिणममाणा पोग्गला नो परिणया अपरिणया, परिणमंतीति पोग्गला नो परिणया अपरिणया, तए णं अहं तं माइमिच्छदिट्ठिउववन्नगं देवं एवं वयासी-परिणममाणा पोग्गला परिणया नो अपरिणया, परिणमंतीति पोग्गला परिणया णो अपरिणया, से कहमेयं भंते ! एवं ? गंगदत्तादि समणे भगवं महावीरे गंगदत्तं देवं एवं वयासी-अहंपि णं गंगदत्ता ! एवमाइक्खामि ४-परिणममाणा पोग्गला जाव नो अपरिणया सच्चमेसे अट्ठे, तए णं से गंगदत्ते देवे समणस्स भगवओ महावीरस्स अंतियं एयमट्ठं सोच्चा निसम्म हट्ठतुट्ठं समणं भगवं महावीरं वंदइ नमंसइ वं० २ ता नच्चासन्ने जाव पज्जुवासइ, तए णं समणे भगवं महावीरे गंगदत्तस्स देवस्स तीसे य जाव धम्मं परिकहेइ जाव आराहए भवइ, तए णं से गंगदत्ते देवे समणस्स भगवओ महावीरस्स अंतिए धम्मं सोच्चा निसम्म हट्ठतुट्ठे उट्ठाए उट्ठेइ उ० २ ता समणं भगवं महावीरं वंदइ नमंसइ वं० २ ता एवं वयासी-अहण्णं भंते ! गंगदत्ते देवे कि भवसिद्धिए अभवसिद्धिए ? एवं जहा सूरियाभो जाव वत्तीसइविहं नट्ठविहं उवदंसेइ २ ता जाव तामेव दिसिं पडिगए ॥ ५७४ ॥ भंते ! ति भगवं गोयमे समणं भगवं महावीरं जाव एवं वयासी-गंगदत्तस्स णं भंते ! देवस्स सा दिव्वा देविट्ठी दिव्वा देवजुई जाव अणुप्पविट्ठा ? गोयमा ! सरीरं गया सरीरं अणुप्पविट्ठा कूडागारसालादिट्ठंतो जाव सरीरं अणुप्पविट्ठा । अहो णं भंते ! गंगदत्ते देवे महिद्धिए जाव महेसक्खे, गंगदत्तेणं भंते ! देवेणं सा दिव्वा देविट्ठी दिव्वा देवजुई किण्णा लद्धा जाव जं णं गंगदत्तेणं देवेणं सा दिव्वा देविट्ठी जाव अभिसमन्नागया ? गोयमादि समणे भगवं महावीरे भगवं गोयमं एवं वयासी-एवं खलु गोयमा ! तेणं कालेणं तेणं समएणं इहेव जंवुदीवे २ भारहे वासे हत्थिणापुरे नामं नयरे होत्था वन्नओ, सहसंबवणे उज्जाणे वन्नओ, तत्थ णं हत्थिणापुरे नयरे गंगदत्ते नामं गाहावई परिवसइ अट्ठे जाव अपरिभूए, तेणं कालेणं तेणं समएणं मुणिसुव्वए अरहा आइगरे जाव सव्वशू सव्वदरिसी आगासगएणं चक्केणं जावं पकड्ढिज्जमाणेणं २ सीसगणसंपरिवुडे पुव्वाणुपुव्वि चरमाणे गामाणुगामं जाव जेणेव सहसंबवणे उज्जाणे जाव विहरइ, परिसा निग्गया जाव पज्जुवासइ, तए णं से गंगदत्ते गाहावई इमीसे कहाए लद्धट्ठे समाणे हट्ठतुट्ठ जाव सरीरे साओ गिहाओ पडिनिक्खमइ २ ता पायविहारचारेणं हत्थिणाउरं नयरं मज्झमज्झेणं निग्गच्छइ २ ता जेणेव सहसंबवणे उज्जाणे जेणेव मुणिसुव्वए अरहा तेणेव उवागच्छइ २ ता मुणिसुव्वयं अरहं तिक्खुत्तो

आयाहिणं पयाहिणं जाव तिविहाए पज्जुवासणाए पज्जुवासइ, तए णं मुणिसुव्वए अरहा गंगदत्तस्स गाहावइस्स तीसे य महइ जाव परिसा पडिगया, तए णं से गंगदत्ते गाहावई मुणिसुव्वयस्स अरहओ अंतियं धम्मं सोच्चा निसम्म हट्ठतुट्ठ० उट्ठाए उट्ठेइ २ ता मुणिसुव्वयं अरहं वंदइ नमंसइ वंदित्ता नमंसित्ता एवं वयासी-सद्दहामि णं भंते ! निग्गंथं पावयणं जाव से जहेयं तुब्भे वदह, जं नवरं देवाणुप्पिया ! जेट्ठपुत्त कुडुंवे ठावेमि, तए णं अहं देवाणुप्पियाणं अंतियं मुंढे जाव पव्वयामि, अहासुहं देवाणु-प्पिया ! मा पडिवंधं, तए णं से गंगदत्ते गाहावई मुणिसुव्वएणं अरहयां एवं वुत्ते समाणे हट्ठतुट्ठ० मुणिसुव्वयं अरहं वंदइ नमंसइ वं० २ ता मुणिसुव्वयस्स अरहओ अंतियाओ सहसंववणाओ उज्जाणाओ पडिनिक्खमइ २ ता जेणेव हत्थिणापुरे नयरे जेणेव सए गिहे तेणेव उवागच्छइ २ ता विउलं असणं पाणं जाव उवक्खडावेइ २ ता मित्तणाइनियगं जाव आमंतेइ आमंतेत्ता तओ पच्छा ण्हाए जहा पूरणे जाव जेट्ठपुत्तं कुडुंवे ठावेइ, तं मित्तणाइ जाव जेट्ठपुत्तं च आपुच्छइ २ ता पुरिससहस्स-वाहिणिं सीयं दुरुहइ पुरिससह० २ ता मित्तणाइनियगं जाव परिजणेणं जेट्ठपुत्तेण य समणुग्गम्ममाणमग्गे सव्विद्धीए जाव णाइयरवेणं हत्थिणापुरं नयरं मज्झंमज्जेणं निग्गच्छइ २ ता जेणेव सहसंववणे उज्जाणे तेणेव उवागच्छइ २ ता छत्ताइए तित्थगराइसए पासइ एवं जहा उदायणे जाव सयमेव आभरणं उमुयइ स० २ ता सयमेव पंचमुट्ठियं लोयं करेइ स० २ ता जेणेव मुणिसुव्वए अरहा एवं जहेव उदायणे तहेव पव्वइए, तहेव एकारस अंगाई अहिज्जइ जाव मासियाए संलेहणाए सट्ठिं भत्ताई अणसणाए (जाव) छेदेइ सट्ठिं भत्ताई० २ ता आलोइयपडिक्कंते समाहिपत्ते कालमासे कालं किच्चा महासुक्के कप्पे महासामाणे विमाणे उववायसभाए देवसयणिज्जंसि जाव गंगदत्तदेवत्ताए उववन्ने, तए णं से गंगदत्ते देवे अहुणोववन्न-मेत्तए समाणे पंचविहाए पज्जत्तीए पज्जत्तिभावं गच्छइ, तंजहा-आहारपज्जत्तीए जाव भासामणपज्जत्तीए, एवं खलु गोयमा ! गंगदत्तेणं देवेणं सा दिव्वा देविद्धी जाव अभिसमन्नागया । गंगदत्तस्स णं भंते ! देवस्स केवइयं कालं ठिई पज्जत्ता ? गोयमा ! सत्तर ससागरोवमाई ठिई प०, गंगदत्ते णं भंते ! देवे ताओ देवलोगाओ आउक्खएणं जाव महाविदेहे वासे सिज्जिहिइ जाव अतं काहिइ ॥ सेवं भंते ! २ त्ति ॥ ५७५ ॥ सोलसमस्स सयस्स पञ्चमो उद्देसो समत्तो ॥

कइविहे णं भंते ! सुविणदंसणे पण्णत्ते ? गोयमा ! पंचविहे सुविणदंसणे पण्णत्ते, तंजहा-अहातच्चे पयाणे चिंतासुविणे तव्विवरीए अव्वत्तदंसणे ॥ सुत्ते णं भंते ! सुविणं पासइ, जागरे सुविणं पासइ, सुत्तजागरे सुविणं पासइ ? गोयमा ! नो सुत्ते सुविणं पासइ,

नो जागरे सुविणं पासइ, सुत्ताजागरे सुविणं पासइ ॥ जीवा णं भंते ! किं सुत्ता जागरा सुत्ताजागरा ? गोयमा ! जीवा सुत्तावि जागरावि सुत्ताजागरावि, नेरइया णं भंते ! किं सुत्ता० पुच्छा, गोयमा ! नेरइया सुत्ता नो जागरा नो सुत्ताजागरा, एवं जाव च्छ-
 रिंदिया, पंविंदियतिरेक्खजोणिया णं भंते ! किं सुत्ता० पुच्छा, गोयमा ! सुत्ता नो जागरा सुत्ताजागरावि, मणुस्सा जहा जीवा, वाणमंतरजोइसियवेमाणिया जहा नेरइया ॥ ५७६ ॥ संवुडे णं, भंते ! सुविणं पासइ, असंवुडे सुविणं पासइ, संवुडासंवुडे सुविणं पासइ ? गोयमा ! संवुडेवि सुविणं पासइ, असंवुडेवि सुविणं पासइ, संवुडासंवुडेवि सुविणं पासइ, संवुडे सुविणं पासइ अहातचं पासइ, असंवुडे सुविणं पासइ तहा वा तं होज्जा अजहा वा तं होज्जा, संवुडासंवुडे सुविणं पासइ एवं चेव ॥ जीवा णं भंते ! किं संवुडा असंवुडा संवुडासंवुडा ? गोयमा ! जीवा संवुडावि असंवुडावि संवुडासंवुडावि, एवं जहेव सुत्ताणं दंडओ तहेव भाणियव्वो ॥ कइ णं भंते ! सुविणा पणत्ता ? गोयमा ! वायालीसं सुविणा पणत्ता, कइ णं भंते ! महासुविणा पणत्ता ? गोयमा ! तीसं महासुविणा पणत्ता, कइ णं भंते ! सव्वसुविणा पणत्ता ? गोयमा ! वावत्तारिं सव्वसुविणा पणत्ता । तित्थगरमायरो णं भंते ! तित्थगरंसि गव्वं वक्कममाणंसि कइ महासुविणे पासित्ताणं पडिवुज्झंति ? गोयमा ! तित्थगरमायरो णं तित्थगरंसि गव्वं वक्कममाणंसि एएसिं तीसाए महासुविणाणं इमे चोइस महासुविणे पासित्ताणं पडिवुज्झंति, तं०-गयउसभसीहअभिसेय जाव सिहिं च । चक्कवट्ठिमायरो णं भंते ! चक्कवट्ठिसि गव्वं वक्कममाणंसि कइ महासुमिणे पासित्ताणं पडिवुज्झंति ? गोयमा ! चक्कवट्ठिमायरो चक्कवट्ठिसि जाव वक्कममाणंसि एएसिं तीसाए महासुविणाणं एवं जहा तित्थगरमायरो जाव सिहिं च । वासुदेवमायरो णं पुच्छा, गोयमा ! वासुदेवमायरो जाव वक्कममाणंसि एएसिं चोइसण्हं महासुविणाणं अन्नयरे सत्त महासुविणे पासित्ताणं पडिवुज्झंति । वलदेवमायरो णं पुच्छा, गोयमा ! वलदेवमायरो जाव एएसिं चोइसण्हं महासुविणाणं अन्नयरे चत्तारे महासुविणे पासित्ताणं पडिवुज्झंति । मंडलियमायरो णं भंते ! पुच्छा, गोयमा ! मंडलियमायरो जाव एएसिं चोइसण्हं महासुविणाणं अन्नयरं एणं महासुविणं जाव पडिवुज्झंति ॥ ५७७ ॥ समणे भगवं महावीरे छउमत्थकालियाए अंतिमराइयंसि इमे दस महासुविणे पासित्ताणं पडिवुद्धे, तं०-एणं च णं महं घोररूवदित्तधरं तालपिसायं सुविणे पराजियं पासित्ताणं पडिवुद्धे १, एणं च णं महं सुक्किल्लपक्खगं पुंसकोइलं सुविणे पासित्ताणं पडिवुद्धे २, एणं च णं महं चित्तविचित्तपक्खगं पुंसकोइलं सुविणे पासित्ताणं पडिवुद्धे ३, एणं च णं महं दामदुगं सव्वरयणामयं सुविणे पासित्ताणं

पडिवुद्धे ४, एगं च णं महं सेयं गोवग्गं सुविणे पासित्ताणं पडिवुद्धे ५, एगं च णं महं पउमसरं सव्वओ समंता कुसुमियं सुविणे पासित्ताणं पडिवुद्धे ६, एगं च णं महं सागरं उम्मीवीईसहस्सकलियं भुयाहिं तिन्नं सुविणे पासित्ताणं पडिवुद्धे ७, एगं च णं महं दिणयरं तेयसा जलंतं सुविणे पासित्ताणं पडिवुद्धे ८, एगं च णं महं हरिवैरुलियवन्नाभेणं नियगेणं अतेणं माणुसुत्तरं पव्वयं सव्वओ समंता आवेढियं परिवेढियं सुविणे पासित्ताणं पडिवुद्धे ९, एगं च णं महं मंदरे पव्वए मंदरचूलियाए उवरिं सीहासणवरगयं अप्पाणं सुविणे पासित्ताणं पडिवुद्धे १० । जण्ण समणे भगवं महावीरे एगं महं घोररुवदित्तधरं तालपिसायं सुविणे पराजियं पासित्ताणं पडिवुद्धे, तण्णं समणेणं भगवया महावीरेणं मोहणिज्जे कम्मे मूलाओ उग्घाइए १, जन्नं समणे भगवं महावीरे एगं महं सुक्किल्ल जाव पडिवुद्धे, तण्णं समणे भगवं महावीरे सुक्कज्झाणोवगए विहरइ २, जण्णं समणे भगवं महावीरे एगं महं चित्तविचित्त जाव पडिवुद्धे, तण्णं समणे भगवं महावीरे विचित्तं ससमयपरसमइयं दुवालसंगं गणिपिडगं आघवेइ पन्नवेइ पुरुवेइ दंसेइ निदंसेइ उवदंसेइ, तंजहा-आयारं सूयगडं जाव दिट्ठिवायं ३, जण्णं समणे भगवं महावीरे एगं महं दामदुगं सव्वरयणामयं सुविणे पासित्ताणं पडिवुद्धे, तण्णं समणे भगवं महावीरे दुविहं धम्मं पन्नवेइ, तं०-आगारधम्मं वा अणागारधम्मं वा ४, जण्णं समणे भगवं महावीरे एगं महं सेयगोवग्गं जाव पडिवुद्धे, तण्णं समणस्स भगवओ महावीरस्स चाउव्वण्णाइन्ने समणसंघे प०, तं०-समणा समणीओ सावया सावियाओ ५, जण्णं समणे भगवं महावीरे एगं महं पउमसरं जाव पडिवुद्धे, तण्णं समणे भगवं महावीरे चउव्विहे देवे पन्नवेइ, तं०-भवणवासी वाणमंतरे जोइसिए वेमाणिए ६, जन्नं समणे भगवं महावीरे एगं महं सागरं जाव पडिवुद्धे, तन्नं समणेणं भगवया महावीरेणं अणादीए अणवदग्गे जाव संसारकंतारे तिन्ने ७, जन्नं समणे भगवं महावीरे एगं महं दिणयरं जाव पडिवुद्धे, तन्नं समणस्स भगवओ महावीरस्स अणंते अणुत्तरे निव्वाघाए निरावरणे कसिणे पडिपुत्ते केवलवरनानाणदंसणे समुप्पन्ने ८, जण्णं समणे जाव वीरे एगं महं हरिवैरुलिय जाव पडिवुद्धे, तण्णं समणस्स भगवओ महावीरस्स ओरांला कित्तिवन्नसहसिलोया सदेवमणुयासुरे लोगे परिभ(वं)मंति-इति खलु समणे भगवं महावीरे इति खलु समणे भगवं महावीरे ९, जन्नं समणे भगवं महावीरे मंदरे पव्वए मंदरचूलियाए जाव पडिवुद्धे, तण्णं समणे भगवं महावीरे सदेवमणुयासुराए परिसाए मज्झगए केवलीपन्नत्तं धम्मं आघवेइ जाव उवदंसेइ ॥५७८॥ इत्थी वा पुरिसे वा सुविणंते एगं महं हयपंतिं वा गयपंतिं वा जाव उवदंसेइ वा पासमाणे पासइ, दुरुहमाणे दुरुहइ, दुरुहमिति अप्पाणं मन्नइ,

तक्खणामेव बुज्झइ, तेणेव भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं दामिणिं पाईणपढीणाययं दुहओ समुद्दे पुट्टं पासमाणे पासइ, संवेदमाणे संवेद्लेइ, संवेद्लियमिति अप्पाणं मन्नइ, तक्खणामेव बुज्झइ, तेणेव भवग्गहणेणं जाव अंतं करेइ । इत्थी वा पुरिसे वा सुविणंते एगं महं रज्जुं पाईणपढीणाययं दुहओ लोगंते पुट्टं पासमाणे पासइ, छिंदमाणे छिंदइ, छिन्नमिति अप्पाणं मन्नइ, तक्खणामेव जाव अंतं करेइ । इत्थी वा पुरिसे वा सुविणंते एगं महं किण्हसुत्तगं वा जाव सुक्किट्सुत्तगं वा पासमाणे पासइ, उग्गोवेमाणे उग्गोवेइ, उग्गोवियमिति अप्पाणं मन्नइ, तक्खणामेव जाव अंतं करेइ । इत्थी वा पुरिसे वा सुविणंते एगं महं अयरारिं वा तंवरारिं वा तउयरारिं वा सीसगरारिं वा पासमाणे पासइ, दुरूहमाणे दुरूहइ, दुरूढमिति अप्पाणं मन्नइ, तक्खणामेव बुज्झइ, दोच्चेणं भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं हिरन्नरारिं वा सुवन्नरारिं वा रयणरारिं वा वइररारिं वा पासमाणे पासइ, दुरूहमाणे दुरूहइ, दुरूढमिति अप्पाणं मन्नइ, तक्खणामेव बुज्झइ, तेणेव भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं तणरारिं वा जहा तेयनिसग्गे जाव अवकरारिं वा पासमाणे पासइ, विक्खिरमाणे विक्खिरइ, विक्किणमिति अप्पाणं मन्नइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं सरथंभं वा वीरिणथंभं वा वंसीमूलथंभं वा वल्लीमूलथंभं वा पासमाणे पासइ, उम्मूलेमाणे उम्मूलेइ, उम्मूळियमिति अप्पाणं मन्नइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं खीरकुंभं वा दहिकुंभं वा घयकुंभं वा महुकुंभं वा पासमाणे पासइ, उप्पाडेमाणे उप्पाडेइ, उप्पाडियमिति अप्पाणं मन्नइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं सुरावियडकुंभं वा सोवीर-वियडकुंभं वा तेळकुंभं वा वसाकुंभं वा पासमाणे पासइ, भिदमाणे भिदइ, भिन्नमिति अप्पाणं मन्नइ, तक्खणामेव बुज्झइ, दोच्चेणं भवग्गहणेणं जाव अंतं करेइ । इत्थी वा पुरिसे वा सुविणंते एगं महं पउमसरं कुंसुमियं पासमाणे पासइ, ओगाहेमाणे ओगाहेइ, ओगाढमिति अप्पाणं मन्नइ, तक्खणामेव बुज्झइ, तेणेव जाव अंतं करेइ । इत्थी वा जाव सुविणंते एगं महं सागरं उम्मीवीई जाव कलियं पासमाणे पासइ, तरमाणे तरइ, तिन्नमिति अप्पाणं मन्नइ, तक्खणामेव बुज्झइ, तेणेव जाव अंतं करेइ । इत्थी वा जाव सुविणंते एगं महं भवणं सव्वरयणामयं पासमाणे पासइ, [दुरूहमाणे दुरूहइ, दुरूढमिति अप्पाणं मण्णइ,] अणुप्पविसमाणे अणुप्पविसइ, अणुप्पविट्ठमिति अप्पाणं मन्नइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा

सुविणंते एगं महं विमाणं सव्वरयणामयं पासमाणे पासइ, दुरुहमाणे दुरुहइ, दुरुढ-
मिति अप्पाणं मन्नइ, तक्खणामेव वुज्जइ, तेणेव जाव अंतं करेइ ॥ ५७९ ॥ अह
भंते ! कोट्टपुडाण वा जाव केयईपुडाण वा अणुवायंसि उब्भिज्जमाणाण वा जाव
ठाणाओ वा ठाणं संकामिज्जमाणाणं कि कोट्टे वाइ जाव केयई वाइ ? गोयमा ! नो
कोट्टे वाइ जाव नो केयई वाइ, घाणसहगया पोग्गला वाइ । सेवं भंते ! २ त्ति
॥ ५८० ॥ सोलसमस्स सयस्स छट्ठो उद्देसो समत्तो ॥

कइविहे णं भंते ! उवओगे पन्नत्ते ? गोयमा ! दुविहे उवओगे पन्नत्ते, एवं जहा
उवओगपयं पन्नवणाए तहेव निरवसेसं भाणियव्वं, पासणयापयं च निरवसेसं
नेयव्व । सेवं भंते ! सेवं भंते ! त्ति ॥ ५८१ ॥ सोलसमस्स सयस्स सत्तमो
उद्देसो समत्तो ॥

केमहालए णं भंते ! लोए पन्नत्ते ? गोयमा ! महइमहालए जहा वारसमसए
तहेव जाव असंखेज्जाओ जोयणकोडाकोडीओ परिक्खेवेणं, लोगस्स णं भंते ! पुर-
च्छिमिल्ले चरिमंते कि जीवा जीवदेसा जीवप्पएसा अजीवा अजीवदेसा अजीव-
प्पएसा ? गोयमा ! नो जीवा जीवदेसावि जीवप्पएसावि अजीवावि अजीवदेसावि
अजीवप्पएसावि ॥ जे जीवदेसा ते नियमं एगिदियदेसा अहवा एगिदियदेसा य
वेइंदियस्स य देसे एवं जहा दसमसए अग्गेईदिसा तहेव, नवरं देसेसु अणिदियाणं
आइल्लविरहिओ । जे अत्थी अजीवा ते छव्विहा, अद्धासमओ नत्थि, सेसं तं चेव
सव्वं निरवसेसं । लोगस्स णं भंते ! दाहिणिल्ले चरिमंते कि जीवा० ? एवं चेव,
एवं पच्चच्छिमिल्लेवि, एवं उत्तरिल्लेवि, लोगस्स णं भंते ! उवरिल्ले चरिमंते कि जीवा०
पुच्छा, गोयमा ! नो जीवा जीवदेसावि जीवप्पएसावि जाव अजीवप्पएसावि । जे
जीवदेसा ते नियमं एगिदियदेसा य अणिदियदेसा य अहवा एगिदियदेसा य
अणिदियदेसा य वेइंदियस्स य देसे, अहवा एगिदियदेसा य अणिदियदेसा य
वेइंदियाण य देसा, एवं मज्झिल्लविरहिओ जाव पंचिदियाणं, जे जीवप्पएसा ते
नियमं एगिदियप्पएसा य अणिदियप्पएसा य अहवा एगिदियप्पएसा य अणिदिय-
प्पएसा य वेइंदियस्स पएसा य अहवा एगिदियप्पएसा य अणिदियप्पएसा य वेइं-
दियाण य पएसा, एवं आइल्लविरहिओ जाव पंचिदियाणं, अजीवा जहा दसमसए
तमाए तहेव निरवसेसं भाणियव्वं ॥ लोगस्स णं भंते ! हेट्ठिल्ले चरिमंते कि जीवा०
पुच्छा, गोयमा ! नो जीवा जीवदेसावि जीवप्पएसावि जाव अजीवप्पएसावि, जे
जीवदेसा ते नियमं एगिदियदेसा अहवा एगिदियदेसा य वेइंदियस्स देसे अहवा
एगिदियदेसा वेइंदियाण य देसा, एवं मज्झिल्लविरहिओ जाव अणिदियाण पएसा,

आइलविरहिओ सव्वेसिं जहा पुरच्छिमिल्ले चरिमंते तहेव, अजीवा जहेव उवरिल्ले चरिमंते तहेव ॥ इमीसे णं भंते ! रयणप्पभाए पुढवीए पुरच्छिमिल्ले चरिमंते किं जीवा० पुच्छा, गोयमा ! नो जीवा एवं जहेव लोगस्स तहेव चत्तारिवि चरिमंता जाव उत्तरिल्ले, उवरिल्ले तहेव जहा दसमसए विमला दिसा तहेव निरवसेसं, हेट्ठिल्ले चरिमंते जहेव लोगस्स हेट्ठिल्ले चरिमंते तहेव, नवरं देसे पंचिदिएसु तियभंगोत्ति सेसं तं चेव, एवं जहा रयणप्पभाए चत्तारि चरिमंता भणिया एवं सक्करप्पभाएवि उवरिमहेट्ठिल्ला जहा रयणप्पभाए हेट्ठिल्ले, एवं जाव अहे सत्तमाए, एवं सोहम्मस्सवि जाव अच्चुयस्स, गेविज्जविमाणणं एवं चेव, नवरं उवरिमहेट्ठिल्लेसु चरिमंतं देसेनु पंचिदियाणवि मज्झिल्लविरहिओ सेसं तहेव, एवं जहा गेवेज्जविमाणा तद्वा अणुत्तरविमाणावि, ईसिप्पब्भारावि ॥५८२॥ परमाणुपोग्गले णं भंते ! लोगस्स पुरच्छिमिल्लाओ चरिमंताओ पच्चच्छिमिल्लं चरिमंतं एगसमएणं गच्छइ, पच्चच्छिमिल्लाओ चरिमंताओ पुरच्छिमिल्लं चरिमंतं एगसमएणं गच्छइ, दाहिणिल्लाओ चरिमंताओ उत्तरिल्लं जाव गच्छइ, उत्तरिल्लाओ चरिमंताओ दाहिणिल्लं चरिमंतं जाव गच्छइ, उवरिल्लाओ चरिमंताओ हेट्ठिल्लं चरिमंतं जाव गच्छइ, हेट्ठिल्लाओ चरिमंताओ उवरिल्लं चरिमंतं एगसमएणं गच्छइ ? हंता गोयमा ! परमाणुपोग्गले णं लोगस्स पुरच्छिमिल्लं तं चेव जाव उवरिल्लं चरिमंतं गच्छइ ॥ ५८३ ॥ पुरिसे णं भंते ! वासं वासइ नो वासइत्ति हत्थं वा पायं वा बाहुं वा ऊरुं वा आउंटावेमाणे वा पसारेमाणे वा कइकिरिए ? गोयमा ! जावं च णं से पुरिसे वासं वासइ वासं नो वासतीत्ति हत्थं वा जाव ऊरुं वा आउंटावेइ वा पसारेइ वा तावं च णं से पुरिसे काइयाए जाव पंचहि किरियाहिं पुट्ठे ॥५८४॥ देवे णं भंते ! महिद्धिए जाव महेसक्खे लोगंते ठिच्चा पभू अलोगंत्ति हत्थं वा जाव ऊरुं वा आउंटावेत्तए वा पसारेत्तए वा ? णो इण्ठे समट्ठे, से केण्ठे-जं भंते ! एवं वुच्चइ देवे णं महिद्धिए जाव महेसक्खे लोगंते ठिच्चा णो पभू अलोगंत्ति हत्थं वा जाव पसारेत्तए वा ? गोयमा ! जीवाणं आहारोवचिया पोग्गला वोदिचिया पोग्गला कलेवरचिया पोग्गला पोग्गला(चे)मेव पप्प जीवाण य अजीवाण य गइपरियाए आहिज्जइ, अलोए णं नेवत्थि जीवा नेवत्थि पोग्गला से तेण्ठेणं जाव पसारेत्तए वा ॥ सेवं भंते ! २ त्ति ॥५८५॥ सोलसमे सए अट्ठमो उद्देसो समत्तो ॥

कहिन्नं भंते ! बलिस्स वइरोयणिंदस्स वइरोयणरन्नो सभा सुहम्मा प० ? गोयमा ! इहेव जंबुदीवे दीवे मंदरस्स पव्वयस्स उत्तरेणं तिरियमसंखेजे जहेव चमरस्स जाव बायालीसं जोयणसहस्साइं ओगाहिता एत्थ णं बलिस्स वइरोयणिंदस्स वइरोयणरन्नो रुयगिंदे नामं उप्पायपव्वए पन्नत्ते, सत्तरस एकवीसे जोयणसए एवं

परिमाणं जहेव तिगिच्छिकूडस्स पासायवडिसगस्सवि तं चेव पमाणं सीहासणं सपरिवारं वलिस्स परि(वा)यारेणं अट्ठो तहेव, नवरं स्यगिदप्पभाइं ३ सेसं तं चेव जाव वलिचंचाए रायहाणीए अत्तेसिं च जाव (णिच्चे) स्यगिदस्स णं उप्पायपव्वयस्स उत्तरेणं छक्कोडिसए तहेव जाव चत्तालीसं जोयणसहस्साइं ओगाहिता एत्थ णं वलिस्स वडरोयणिंदस्स वडरोयणरत्तो वलिचंचा नामं रायहाणी प० एणं जोयणसयसहस्सं पमाणं तहेव उववाओ जाव आयरक्खा सव्वं तहेव निरवसेसं, नवरं साइरेणं सागरोवमं ठिई प०, सेसं तं चेव जाव वली वडरोयणिदे वली० २ ॥ सेवं भंते ! २ ति जाव विहरइ ॥ ५८६ ॥ सोलसमस्स सयस्स नवमो उद्देसो समत्तो ॥

कइविहे णं भंते ! ओही पन्नत्ते ? गोयमा ! दुविहा ओही प०, तं०-ओहीपयं निरवसेसं भाणियव्वं ॥ सेवं भंते ! सेवं भंते ! ति जाव विहरइ ॥ ५८७ ॥ सोलसमस्स सयस्स दसमो उद्देसो समत्तो ॥

दीवकुमारा णं भंते ! सव्वे समाहारा सव्वे समुस्सासनिस्सासा ? णो इण्ठे समट्ठे, एवं जहा पढमसए विइयउद्देसए दीवकुमाराणं वत्तव्वया तहेव जाव समाउया समुस्सासनिस्सासा । एवं नागावि, दीवकुमाराणं भंते ! कइ लेस्साओ पन्नत्ताओ ? गोयमा ! चत्तारि लेस्साओ पन्नत्ताओ, तंजहा-कण्हलेस्सा जाव तेउलेस्सा । एएसि णं भंते ! दीवकुमाराणं कण्हलेस्साणं जाव तेउलेस्साण य कयरे कयरेहिंतो जाव विसेसाहिया वा ? गोयमा ! सव्वत्थोवा दीवकुमारा तेउलेस्सा, काउलेस्सा असंखेज्जगुणा, नीललेस्सा विसेसाहिया, कण्हलेस्सा विसेसाहिया । एएसि णं भंते ! दीवकुमाराणं कण्हलेस्साणं जाव तेउलेस्साण य कयरे कयरेहितो अप्पिद्धिया वा महिद्धिया वा ? गोयमा ! कण्हलेस्साहिंतो नीललेस्सा महिद्धिया जाव सव्वमहिद्धिया तेउलेस्सा । सेवं भंते ! सेवं भंते ! ति जाव विहरइ ॥ १६ ॥ ११ ॥ उदहिकुमारा णं भंते ! सव्वे समाहारा० एवं चेव, सेवं भंते ! २ ति ॥ १६ ॥ १२ ॥ एवं दिसाकुमारावि सेवं भंते ! ३ ति ॥ १६ ॥ १३ ॥ एवं थणियकुमारावि, सेवं भंते ! सेवं भंते ! ति जाव विहरइ ॥ ५८८ ॥ सोलसमस्स सयस्स चउद्दसमो उद्देसो समत्तो ॥ सोलसमं सयं समत्तं ॥

नमो सुयदेवयाए भगवईए ॥ कुंजर १ संजय २ सेलेसि ३ किरिय ४ ईसाण ५ पुढवि ६-७ दग्ग ८-९ वाळ १०-११ । एगिंदिय १२ नाग १३ सुवन्न १४ विज्जु १५ वाउ १६-डग्गि १७ सत्तरसे ॥ १ ॥ रायगिहे जाव एवं वयासी-उद्दाई णं भंते ! हत्थिराया कओहितो अणंतरं उव्वट्ठिता उद्दाइहत्थिरायत्ताए उव्वत्ते ? गोयमा ! असुरकुमारेहितो देवेहितो अणंतरं उव्वट्ठिता उद्दाइहत्थिरा-

यत्ताए उववजे, उदाई णं भंते । हत्थिराया कालमासे कालं किच्चा कहिं गच्छिहिइ
 कहिं उववज्जिहिइ ? गोयमा ! इमीसे णं रयणप्पमाए पुढवीए उक्कोससागरोवमट्ठि-
 इयंसि निरयावासंसि नेरइयत्ताए उववज्जिहिइ, से णं भंते । तओहितो अणंतरं
 उव्वट्ठित्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्जिहिइ
 जाव अंतं काहिइ ॥ भूयाणंदे णं भंते । हत्थिराया कओहितो अणंतरं उव्वट्ठित्ता
 भूयाणंदे हत्थिरायत्ताए एवं जहेव उदाई जाव अंतं काहिइ ॥ ५८९ ॥ पुरिसे णं
 भंते ! तालमारुहइ ता० २ ता तालाओ तालफलं पचालेमाणे वा पवाडेमाणे वा
 कइकिरिए ? गोयमा ! जावं च णं से पुरिसे तालमारुहइ तालमारुहिता तालाओ
 तालफलं पचालेइ वा पवाडेइ वा तावं च णं से पुरिसे काइयाए जाव पंचहिं किरि-
 याहिं पुट्ठे, जेसिपिय णं जीवाणं सरीरेहितो तले निव्वत्तिए तालफले निव्वत्तिए
 तेवि णं जीवा काइयाए जाव पंचहिं किरियाहिं पुट्ठा ॥ अहे णं भंते ! से ताल-
 फले अप्पणो गस्यत्ताए जाव पच्चोवयमाणे जाइं तत्थ पाणाइं जाव जीवियाओ
 ववरोवेइ तए णं भंते ! से पुरिसे कइकिरिए ? गोयमा ! जावं च णं से पुरिसे
 तालप्फले अप्पणो ग(गु)स्यत्ताए जाव जीवियाओ ववरोवेइ तावं च णं से पुरिसे
 काइयाए जाव चउहिं किरियाहिं पुट्ठे, जेसिपिय णं जीवाणं सरीरेहितो तले निव्वत्तिए
 तेवि णं जीवा काइयाए जाव चउहिं किरियाहिं पुट्ठा, जेसिपिय णं जीवाणं सरीरे-
 हितो तालप्फले निव्वत्तिए तेवि णं जीवा काइयाए जाव पंचहिं किरियाहिं पुट्ठा,
 जेविय से जीवा अहे वीससाए पच्चोवयमाणस्स उवग्गहे वट्ठंति तेविय णं जीवा
 काइयाए जाव पंचहिं किरियाहिं पुट्ठा ॥ पुरिसे णं भंते ! रुक्खस्स मूलं पचालेमाणे
 वा पवाडेमाणे वा कइकिरिए ? गोयमा ! जावं च णं से पुरिसे रुक्खस्स मूलं
 पचालेइ वा पवाडेइ वा तावं च णं से पुरिसे काइयाए जाव पंचहिं किरियाहिं
 पुट्ठे, जेसिपिय णं जीवाणं सरीरेहितो मूले निव्वत्तिए जाव वीए निव्वत्तिए तेविय
 णं जीवा काइयाए जाव पंचहिं किरियाहिं पुट्ठा, अहे णं भंते ! से मूले अप्पणो
 गस्यत्ताए जाव जीवियाओ ववरोवेइ तओ णं भंते ! से पुरिसे कइकिरिए ? गोयमा !
 जावं च णं से मूले अप्पणो जाव ववरोवेइ तावं च णं से पुरिसे काइयाए
 जाव चउहिं किरियाहिं पुट्ठे, जेसिपिय णं जीवाणं सरीरेहितो कंदे निव्वत्तिए जाव
 वीए निव्वत्तिए तेवि णं जीवा काइयाए जाव चउहिं किरियाहिं पुट्ठा, जेसिपिय
 णं जीवाणं सरीरेहितो मूले निव्वत्तिए तेवि णं जीवा काइयाए जाव पंचहिं
 किरियाहिं पुट्ठा, जेविय णं से जीवा अहे वीससाए पच्चोवयमाणस्स उवग्गहे वट्ठंति
 तेवि णं जीवा काइयाए जाव पंचहिं किरियाहिं पुट्ठा ॥ पुरिसे णं भंते ! रुक्खस्स

कंदं पंचाले० ? गोयमा ! जावं च णं से पुरिसे जाव पंचहिं किरियाहिं पुट्टे, जेसिपिय
 णं जीवाणं सरीरेहिंतो मूले निव्वत्तिए जाव बीए निव्वत्तिए तेवि णं जीवा जाव
 पंचहिं किरियाहिं पुट्टा, अहे णं भंते ! से कंदे अप्पणो जाव चउहिं किरियाहिं पुट्टे,
 जेसिपिय णं जीवाणं सरीरेहिंतो मूले निव्वत्तिए खंधे निव्वत्तिए जाव चउहिं पुट्टा,
 जेसिपिय णं जीवाणं सरीरेहिंतो कंदे निव्वत्तिए तेवि णं जीवा जाव पंचहिं किरियाहिं
 पुट्टा, जेवि य से जीवा अहे वीससाए पच्चोवयमाणस्स जाव पंचहिं पुट्टा जहा (कंदे)
 खंधो एवं जाव वीयं ॥५९०॥ कइ णं भंते ! सरीरगा पण्णत्ता ? गोयमा ! पंच सरीरगा
 पन्नत्ता, तंजहा-ओरालिए जाव कम्मए । कइ णं भंते ! इंदिया प० ? गोयमा !
 पंच इंदिया प०, तं०-सोइंदिए जाव फासिंदिए । कइविहे णं भंते ! जोए प० ?
 गोयमा ! तिविहे जोए प०, तं०-मणजोए वइजोए कायजोए । जीवे णं भंते !
 ओरालियसरीरं निव्वत्तेमाणे कइकिरिए ? गोयमा ! सिय तिकिरिए सिय चउकिरिए
 सिय पंचकिरिए, एवं पुढविक्काइएवि, एवं जाव मणुस्से । जीवा णं भंते ! ओरालि-
 यसरीरं निव्वत्तेमाणा कइकिरिया ? गोयमा ! तिकिरियावि चउकिरियावि पंचकि-
 रियावि, एवं पुढविक्काइयावि, एवं जाव मणुस्सा, एवं वेउव्वियसरीरेणवि दो दंडगा
 नवरं जस्स अत्थि वेउव्वियं, एवं जाव कम्मगसरीरं, एवं सोइंदियं जाव फासिंदियं,
 एवं मणजोगं वइजोगं कायजोगं जस्स जं अत्थि तं भाणियव्वं, एए एगत्तपुहुत्तेणं
 छव्वीसं दंडगा ॥ ५९१ ॥ कइविहे णं भंते ! भावे पण्णत्ते ? गोयमा ! छव्विहे
 भावे प०, तं०-उदइए उवसमिए जाव सन्निवाइए, से किं तं उदइए भावे ? उदइए
 भावे दुविहे पण्णत्ते, तंजहा-उदइए य उदयनिप्पन्ने य, एवं एएणं अभिलावेणं जहा
 अणुओगदारे छन्नामं तहेव निरवसेसं भाणियव्वं जावे से तं सन्निवाइए भावे ॥
 सेवं भंते ! सेवं भंते ! ति ॥५९२॥ सत्तरसमे सए पढमो उद्देसो समत्तो ॥

से नूणं भंते ! संजयविरयपडिहयपच्चक्खायपावकम्मे धम्मे ठिए, असंजयअवि-
 रयअपडिहयपच्चक्खायपावकम्मे अहम्मे ठिए, संजयांसंजए धम्माधम्मे ठिए ? हंता
 गोयमा ! संजयविरय जाव धम्माधम्मे ठिए, एएसि णं भंते ! धम्मंसि वा अह-
 म्मंसि वा धम्माधम्मंसि वा चक्किया केइ आसइत्तए वा जाव तुयट्ठित्तए वा ?
 गोयमा ! णो इण्ठे समट्ठे, से केणं खाइ अट्ठेणं भंते ! एवं वुच्चइ जाव धम्माधम्मे
 ठिए ? गोयमा ! संजयविरये जाव पावकम्मे धम्मे ठिए धम्मं चेव उवसंपजित्ताणं
 विहरइ, असंजय जाव पावकम्मे अहम्मे ठिए अहम्मं चेव उवसंपजित्ताणं विहरइ,
 संजयासंजए धम्माधम्मे ठिए धम्माधम्मं उवसंपजित्ताणं विहरइ, से तेणट्ठेणं गोयमा !
 जावं ठिए ॥ जीवा णं भंते ! किं धम्मे ठिया अहम्मे ठिया धम्माधम्मे ठिया ?

गोयमा ! जीवा धम्मेवि ठिया अहम्मेवि ठिया धम्माधम्मेवि ठिया, नेरइयाणं भंते ! पुच्छा, गोयमा ! नेरइया णो धम्मे ठिया, अहम्मे ठिया, णो धम्माधम्मे ठिया, एवं जाव चउरिंदियाणं, पंचिंदियतिरिक्खजोणियाणं पुच्छा, गोयमा ! पंचिंदियतिरिक्खजोणिया नो धम्मे ठिया, अहम्मे ठिया, धम्माधम्मेवि ठिया, मणुस्सा जहा जीवा, वाणमंतरजोइसियवेमाणिया जहा नेरइया ॥ ५९३ ॥ अन्नउत्थिया णं भंते ! एवमाइक्खंति जाव परुवेंति-एवं खलु समणा पंडिया समणोवासगा वालपंडिया, जस्स णं एगपाणाएवि दंडे अणिक्खित्ते से णं एगंतवालेत्ति वत्तव्वं सिया, से कहमेयं भंते ! एवं ? गोयमा ! जणं ते अन्नउत्थिया एवमाइक्खंति जाव वत्तव्वं सिया, जे ते एवमाहंसु मिच्छं ते एवमाहंसु, अहं पुण गोयमा ! एवमाइक्खामि जाव परुवेमि-एवं खलु समणा पंडिया, समणोवासगा वालपंडिया, जस्स णं एगपाणाएवि दंडे निक्खित्ते से णं नो एगंतवालेत्ति वत्तव्वं सिया ॥ जीवा णं भंते ! किं बाला पंडिया वालपंडिया ? गोयमा ! जीवा बालावि पंडियावि वालपंडियावि, नेरइयाणं पुच्छा, गोयमा ! नेरइया बाला नो पंडिया नो वालपंडिया, एवं जाव चउरिंदियाणं । पंचिंदियतिरिक्खजोणियाणं पुच्छा, गोयमा ! पंचिंदियतिरिक्खजोणिया बाला नो पंडिया वालपंडियावि, मणुस्सा जहा जीवा, वाणमंतरजोइसियवेमाणिया जहा नेरइया ॥ ५९४ ॥ अन्नउत्थिया णं भंते ! एवमाइक्खंति जाव परुवेंति-एवं खलु पाणाइवाए मुसावाए जाव मिच्छादंसणसल्ले वट्टमाणस्स अन्ने जीवे अन्ने जीवाया, पाणाइवायवेरमणे जाव परिग्गहवेरमणे कोह्विवेगे जाव मिच्छादंसणसल्लविवेगे वट्टमाणस्स अन्ने जीवे अन्ने जीवाया, उप्पत्तियाए जाव पारिणामियाए वट्टमाणस्स अन्ने जीवे अन्ने जीवाया, उग्गहे ईहा अवाए धारणाए वट्टमाणस्स जाव जीवाया, उट्ठाणे जाव परक्कमे वट्टमाणस्स जाव जीवाया, नेरइयत्ते तिरिक्खमणुस्सदेवत्ते वट्टमाणस्स जाव जीवाया, नाणावरणिजे जाव अंतराइए वट्टमाणस्स जाव जीवाया, एवं कण्हलेस्साए जाव सुक्कलेस्साए, सम्महिट्ठीए ३, एवं चक्खुदंसणे ४, आभिणिबोहियनाणे ५, मइअन्नाणे ३, आहारसन्नाए ४, एवं ओरालियसरीरे ५, एवं मणजोए ३, सागारोवओगे अणागारोवओगे वट्टमाणस्स अण्णे जीवे अन्ने जीवाया, से कहमेयं भंते ! एवं ? गोयमा ! जणं ते अन्नउत्थिया एवमाइक्खंति जाव मिच्छं ते एवमाहंसु, अहं पुण गोयमा ! एवमाइक्खामि जाव परुवेमि-एवं खलु पाणाइवाए जाव मिच्छादंसणसल्ले वट्टमाणस्स सच्चेव जीवे सच्चेव जीवाया जाव अणागारोवओगे वट्टमाणस्स सच्चेव जीवे सच्चेव जीवाया ॥ ५९५ ॥ देवे, णं भंते ! महिड्ढिए जाव महेसक्खे पुव्वामेव रुवी भवित्ता पभू अहवि विउ-

वित्ताणं चिट्ठित्तए ? णो इणट्ठे समट्ठे, से केणट्ठेणं भंते ! एवं वुच्चइ देवे णं जाव नो पभू अरुविं विउव्वित्ताणं चिट्ठित्तए ? गोयमा ! अहमेयं जाणामि, अहमेयं पासामि, अहमेयं वुज्झामि, अहमेयं अभिसमन्नागच्छामि, मए एयं नायं, मए एयं दिट्ठं, मए एयं वुद्धं, मए एयं अभिसमन्नागयं-जणं तहागयस्स जीवस्स सल्लविस्स सकम्मस्स सरागस्स सवेयस्स समोहस्स सेल्लेसस्स ससरीरस्स ताओ सरीराओ अविप्पमुक्कस्स एवं पन्नायइ, तंजहा-कालत्ते वा जाव सुक्खित्ते वा, सुव्विभगंधत्ते वा दुव्विभगंधत्ते वा, तित्तत्ते वा जाव महरत्ते वा, कक्खडत्ते वा जाव लुक्खत्ते वा, से तेणट्ठेणं गोयमा ! जाव चिट्ठित्तए ॥ सच्चैव णं भंते ! से जीवे पुव्वामेव अरुवी भवित्ता पभू रूविं विउव्वित्ताणं चिट्ठित्तए ? णो इणट्ठे समट्ठे, से केणट्ठेणं जाव चिट्ठित्तए ? गोयमा ! अहमेयं जाणामि जाव जज्ञं तहागयस्स जीवस्स अल्लविस्स अकम्मस्स अरागस्स अवेयस्स अमोहस्स अल्लेसस्स असरीरस्स ताओ सरीराओ विप्पमुक्कस्स णो एवं पन्नायइ, तं०-कालत्ते वा जाव लुक्खत्ते वा, से तेणट्ठेणं जाव चिट्ठित्तए वा ॥ सेवं भंते ! २ त्ति ॥ ५९६ ॥ सत्तरसमस्स सयस्स वीओ उद्देशो समत्तो ॥

सेल्लेसं पडिवज्जए णं भंते ! अणगारे सया समियं एयइ वेयइ जाव तं तं भावं परिणमइ ? णो इणट्ठे समट्ठे, गण्णत्थेगेणं परप्पओगेणं ॥ कइविहा णं भंते ! एयणा प० ? गोयमा ! पंचविहा एयणा प०, तंजहा-दव्वेयणा खेत्तेयणा कालेयणा भवेयणा भावेयणा, दव्वेयणा णं भंते ! कइविहा प० ? गोयमा ! चउव्विहा प०, तंजहा-नेरइयदव्वेयणा, तिरिक्खदव्वेयणा, मणुस्सदव्वेयणा, देवदव्वेयणा, से केणट्ठेणं भंते ! एवं वुच्चइ-नेरइयदव्वेयणा २ ? गोयमा ! जज्ञं नेरइया नेरइयदव्वे वट्ठिसु वा वट्ठंति वा वट्ठिस्संति वा ते णं तत्थ नेरइया नेरइयदव्वे वट्ठमाणा नेरइयदव्वेयणं एइंसु वा एयंति वा एइस्संति वा, से तेणट्ठेणं जाव दव्वेयणा, से केणट्ठेणं भंते ! एवं वुच्चइ तिरिक्खजोणियदव्वेयणा २ ? एवं चेव, नवरं तिरिक्खजोणियदव्वे० भाणियव्वं, सेसं तं चेव, एवं जाव देवदव्वेयणा । खेत्तेयणा णं भंते ! कइविहा प० ? गोयमा ! चउव्विहा प०, तं०-नेरइयखेत्तेयणा जाव देवखेत्तेयणा, से केणट्ठेणं भंते ! एवं वुच्चइ नेरइयखेत्तेयणा २ ? एवं चेव, नवरं नेरइयखेत्तेयणा भाणियव्वा, एवं जाव देवखेत्तेयणा, एवं कालेयणावि, एवं भवेयणावि, एवं जाव देवभावेयणावि ॥ ५९७ ॥ कइविहा णं भंते ! चलणा प० ? गोयमा ! तिविहा चलणा प०, तं०-सरीरचलणा इंदियचलणा जोगचलणा, सरीरचलणा णं भंते ! कइविहा प० ? गोयमा ! पंचविहा प०, तं०-ओरालियसरीरचलणा जाव कम्मगसरीरचलणा, इंदियचलणा णं भंते ! कइविहा प० ? गोयमा ! पंचविहा प०, तंजहा—

सोइंदियचलणा जाव फासिंदियचलणा, जोगचलणा णं भंते ! कइविहा प० ? गोयमा ! तिविहा प०, तं०—मणजोगचलणा वइजोगचलणा कायजोगचलणा, से केणट्टेणं भंते ! एवं वुच्चइ ओरालियसरीरचलणा २ ? गोयमा ! जं णं जीवा ओरालियसरीरे वट्टमाणा ओरालियसरीरप्पाओगाइं दव्वाइं ओरालियसरीरत्ताए परिणामेमाणा ओरालियसरीरचलणं चलिंसु वा चलंति वा चलिस्संति वा से तेणट्टेणं जाव ओरालियसरीरचलणा २, से केणट्टेणं भंते ! एवं वुच्चइ वेउव्वियसरीरचलणा २ ? एवं चेव, नवरं वेउव्वियसरीरे वट्टमाणा एवं जाव कम्मगसरीरचलणा, से केणट्टेणं भंते ! एवं वुच्चइ सोइंदियचलणा २ ? गोयमा ! जन्नं जीवा सोइंदिए वट्टमाणा सोइंदियप्पाओगाइं दव्वाइं सोइंदियत्ताए परिणामेमाणा सोइंदियचलणं चलिंसु वा चलंति वा चलिस्संति वा से तेणट्टेणं जाव सोइंदियचलणा २, एवं जाव फासिंदियचलणा, से केणट्टेणं भंते ! एवं वुच्चइ मणजोगचलणा २ ? गोयमा ! जण्णं जीवा मणजोए वट्टमाणा मणजोगप्पाओगाइं दव्वाइं मणजोगत्ताए परिणामेमाणा मणजोगचलणं चलिंसु वा चलंति वा चलिस्संति वा से तेणट्टेणं जाव मणजोगचलणा २, एवं वइजोगचलणावि, एवं कायजोगचलणावि ॥ ५९८ ॥ अह भंते ! संवेगे निव्वे(गे)ए गुरुसाहम्मियसुस्सूसणया आलोयणया निदणया गरहणया खमावणया सुयसहायया विउसमणया भावे अप्पडिक्खया विणिक्खणया विवित्तसयणासणसेवणया सोइंदियसंवरे जाव फासिंदियसंवरे जोगपच्चक्खाणे सरीरपच्चक्खाणे कसायपच्चक्खाणे संभोगपच्चक्खाणे उवहिपच्चक्खाणे भत्तपच्चक्खाणे खया विरागया भावसच्चे जोगसच्चे करणसच्चे मणसमण्णाहरणया वइसमन्नाहरणया कायसमन्नाहरणया कोहविवेगे जाव मिच्छादंसणसल्लविवेगे णाणसंपन्नया दंसणसंपन्नया चरित्तसंपन्नया वेयणअहियासणया मारणंतियअहियासणया एए णं भन्ते ! पया किंपज्जवसाणफला पण्णत्ता ? समणाउसो ! गोयमा ! संवेगे निव्वेए जाव मारणंतियअहियासणया एए णं सिद्धिपज्जवसाणफला प० समणाउसो ! ॥ सेवं भंते ! २ ति जाव विहरइ ॥ ५९९ ॥ सत्तरसमस्स सयस्स तइओ उद्देसो समत्तो ॥

तेणं कालेणं तेणं समएणं रायगिहे नयरे जाव एवं वयासी-अत्थि णं भंते ! जीवाणं पाणाइवाएणं किरिया कज्जइ ? हंता अत्थि, सा भंते ! किं पुट्ठा कज्जइ अपुट्ठा कज्जइ ? गोयमा ! पुट्ठा कज्जइ नो अपुट्ठा कज्जइ, एवं जहा पढमसए छट्ठेइसए जाव नो अणाणुपुव्विकडत्ति वत्तव्वं सिया, एवं जाव वेमाणियाणं, नवरं जीवाणं एगिदियाण य निव्वाघाएणं छद्दिसि वाघायं पडुच्च सिय त्तिदिसि सिय चउदिसि सिय पंचदिसि सेसाणं नियमं छद्दिसि । अत्थि णं भंते ! जीवाणं मुसा-

वाएणं किरिया कज्जइ ? हंता अत्थि, सा भंते ! कि पुट्ठा कज्जइ अपुट्ठा कज्जइ ? जहा पाणाइवाएणं दंडओ एवं मुसावाएणवि, एवं अदिन्नादाणेणवि मेहुणेणवि परिग्गहेणवि, एवं एए पंच दंडगा ५ । जंसमयन्नं भंते ! जीवाणं पाणाइवाएणं किरिया कज्जइ सा भंते ! कि पुट्ठा कज्जइ अपुट्ठा कज्जइ ? एवं तहेव जाव वत्तव्वं सिया जाव वेमाणियाणं, एवं जाव परिग्गहेणं, एवं एएवि पंच दंडगा १० । जदेसेणं भंते ! जीवाणं पाणाइवाएणं किरिया कज्जइ एवं चेव जाव परिग्गहेणं, एवं एएवि पंच दंडगा १५ । जंपएसन्नं भंते ! जीवाणं पाणाइवाएणं किरिया कज्जइ सा भंते ! कि पुट्ठा कज्जइ एवं तहेव दण्डओ, एवं जाव परिग्गहेणं २०, एवं एए वीसं दंडगा ॥ ६०० ॥ जीवाणं भंते ! कि अत्तकडे दुक्खे, परकडे दुक्खे, तदुभयकडे दुक्खे ? गोयमा ! अत्तकडे दुक्खे, नो परकडे दुक्खे, नो तदुभयकडे दुक्खे, एवं जाव वेमाणियाणं, जीवा णं भंते ! कि अत्तकडं दुक्खं वेदेंति, परकडं दुक्खं वेदेंति, तदुभयकडं दुक्खं वेदेंति ? गोयमा ! अत्तकडं दुक्खं वेदेंति, नो परकडं दुक्खं वेदेंति, नो तदुभयकडं दुक्खं वेदेंति, एवं जाव वेमाणियाणं । जीवाणं भंते ! कि अत्तकडा वेयणा, परकडा वेयणा, तदुभयकडा वेयणा ? गोयमा ! अत्तकडा वेयणा, णो परकडा वेयणा, णो तदुभयकडा वेयणा, एवं जाव वेमाणियाणं, जीवा णं भंते ! कि अत्तकडं वेयणं वेदेंति, परकडं वेयणं वेदेंति, तदुभयकडं वेयणं वेदेंति ? गोयमा ! जीवा अत्तकडं वेयणं वेदेंति, नो परकडं वेयणं वेदेंति, नो तदुभयकडं वेयणं वेदेंति, एवं जाव वेमाणियाणं । सेवं भंते ! सेवं भंते ! त्ति ॥ ६०१ ॥ सत्तरस्समे स्सए चउत्थो उद्देसो समत्तो ॥

कहि णं भंते ! ईसाणस्स देविंदस्स देवरत्तो मभा सुहम्मा पण्णत्ता ? गोयमा ! जंबुद्वीवे २ मंदरस्स पव्वयरस उत्तरेणं इमीसे णं रयगप्पभाए पुढवीए बहुसमरमणिज्जाओ भूसिभागाओ उट्ठं चंदिमसूरिय जहा ठाणपाए जाव मज्झे ईनाणवडिसए महाविमाणे से णं ईसाणवडिसए महाविमाणे अद्धतेरसजोयणमयसहस्साडं० एवं जहा दसमसए सक्खविमाणवत्तव्वया सा इहवि ईमाणरस निरवसेया भाणियव्वा जाव आयरक्खत्ति, ठिई साइरेगाईं दो सागरोवमाईं, सेस तं चेव जाव इपाणे देविंदे देवराया २, सेवं भंते ! सेवं भंते ! त्ति ॥ ६०२ ॥ सत्तरस्समे स्स । पंचमो उद्देसो समत्तो ॥

पुढविकाइए णं भंते ! इमीसे रयगप्पभाए पुढवीए समोहए २ ता जे भविए सोहम्मे कप्पे पुढविकाइयत्ताए उववज्जितए से भंते ! कि पुव्वि उववज्जित्ता पच्छा संपाउणेज्जा, पुव्वि वा संपाउणित्ता पच्छा उववज्जेज्जा ? गोयमा ! पुव्वि वा उववज्जित्ता पच्छा संपाउणेज्जा, पुव्वि वा संपाउणित्ता पच्छा उववज्जेज्जा, से केणट्ठेणं जाव पच्छा उववज्जेज्जा ? गोयमा ! पुढविकाइयाणं तओ समुग्घाया ५०, तं०-

वेयणासमुग्घाए कसायसमुग्घाए मारणंतियसमुग्घाए, मारणंतियसमुग्घाएणं समो-
हणमाणे देसेणं वा समोहणइ सव्वेण वा समोहणइ, देसेणं समोहणमाणे पुव्वि
संपाउणित्ता पच्छा उववज्जिजा, सव्वेणं समोहणमाणे पुव्वि उववज्जित्ता पच्छा
संपाउणेज्जा, से तेणट्ठेणं जाव उववजेज्जा । पुढविकाइए णं भंते ! इमीसे रयणप्प-
भाए पुढवीए जाव समोहए २ ता जे भविए ईसाणे कप्पे पुढवि० एवं चेव ईसाणेवि,
एवं जाव अच्चुयगेविज्जविमाणे, अणुत्तरविमाणे ईसिप्पब्भाराए य एवं चेव । पुढविकाइए
णं भंते ! सक्करप्पभाए पुढवीए समोहए २ ता जे भविए सोहम्मे कप्पे पुढवि० एवं
जहा रयणप्पभाए पुढविकाइओ उववाइओ एवं सक्करप्पभाएवि पुढविकाइओ उववा-
एयव्वो जाव ईसिप्पब्भाराए, एवं जहा रयणप्पभाए वत्तव्वया भणिया एवं जाव अहे
सत्तमाए समोहए ईसिप्पब्भाराए उववाएयव्वो । सेवं भंते ! २ त्ति (१७-६) ॥६०३॥
पुढविकाइए णं भंते ! सोहम्मे कप्पे समोहए समोहणित्ता जे भविए इमीसे रयण-
प्पभाए पुढवीए पुढविकाइयत्ताए उववज्जित्ताए से णं भंते ! कि पुव्वि सेसं तं चेव
जहा रयणप्पभाए पुढविकाइओ सव्वकप्पेसु जाव ईसिप्पब्भाराए ताव उववाइओ एवं
सोहम्मपुढविकाइओवि सत्तसुवि पुढवीसु उववाएयव्वो जाव अहे सत्तमाए, एवं जहा
सोहम्मपुढविकाइओ सव्वपुढवीसु उववाइओ एवं जाव ईसिप्पब्भारापुढविकाइओ
सव्वपुढवीसु उववाएयव्वो जाव अहे सत्तमाए, सेवं भंते ! २ त्ति (१७-७) ॥६०४॥
आउक्काइए णं भंते ! इमीसे रयणप्पभाए पुढवीए समोहए २ ता जे भविए सोहम्मे
कप्पे आउकाइयत्ताए उववज्जित्ताए एवं जहा पुढविकाइओ तहा आउकाइओवि
सव्वकप्पेसु जाव ईसिप्पब्भाराए तहेव उववाएयव्वो, एवं जहा रयणप्पभाआउ-
काइओ उववाइओ तहा जाव अहेसत्तमापुढविआउकाइओ उववाएयव्वो जाव ईसिप्प-
ब्भाराए, सेवं भंते ! २ त्ति (१७-८) ॥६०५॥ आउकाइए णं भंते ! सोहम्मे कप्पे
समोहए समोहणित्ता जे भविए इमीसे रयणप्पभाए पुढवीए घणोदहिवल्लएसु आउ-
काइयत्ताए उववज्जित्ताए से णं भंते ! सेसं तं चेव एवं जाव अहे सत्तमाए जहा सोहम्म-
आउकाइओ एवं जाव ईसिप्पब्भाराआउकाइओ जाव अहे सत्तमाए उववाएयव्वो,
सेवं भंते ! २ त्ति (१७-९) ॥६०६॥ वाउक्काइए णं भंते ! इमीसे रयणप्पभाए पुढवीए
जाव जे भविए सोहम्मे कप्पे वाउकाइयत्ताए उववज्जित्ताए से णं जहा पुढविकाइओ
तहा वाउकाइओवि नवरं वाउकाइयाणं चत्तारि समुग्घाया प०, तं०-वेयणासमु-
ग्घाए जाव वेउव्वियसमुग्घाए, मारणंतियसमुग्घाएणं समोहणमाणे देसेण वा समो०
सेसं तं चेव जाव अहे सत्तमाए समोहओ ईसिप्पब्भाराए उववाएयव्वो, सेवं भंते !
२ त्ति (१७-१०) ॥ ६०७ ॥ वाउक्काइए णं भंते ! सोहम्मे कप्पे समोहए २ ता जे

भविण् इमीसे रयणप्पभाए पुढवीए घणवाए तणुवाए घणवायवलएसु तणुवायवलएसु
वाउक्काइयत्ताए उववज्जित्तए से णं भंते ! ससं तं चेव एवं जहा सोहम्मकप्पवाउकाइओ
सत्तसुवि पुढवीसु उववाइओ एवं जाव ईसिप्पव्भाराए वाउक्काइओ अहे सत्तमाए जाव
उववाएयव्वो, सेवं भंते ! २ त्ति (१७-११) ॥ ६०८ ॥ एगिदिया णं भंते ! सव्वे
समाहारा सव्वे (समसरीरा) समुस्सासणीसासा एवं जहा पढमसए विइयउद्देसए
पुढविकाइयाणं वत्तव्वया भाणिया सा चेव एगिदियाणं इह भाणियव्वा जाव समाउया
समोववन्नगा । एगिदियाणं भंते ! कइ लेस्साओ प० ? गोयमा ! चत्तारि लेस्साओ प०,
तं०-कण्हलेस्सा जाव तेउलेस्सा । एएसि णं भंते ! एगिदियाणं कण्हलेस्साणं जाव
विसेसाहिया वा ? गोयमा ! सव्वत्थोवा एगिदियाणं तेउलेस्सा, काउलेस्सा अणंतगुणा,
णीललेस्सा विसेसाहिया, कण्हलेस्सा विसेसाहिया । एएसि णं भंते ! एगिदियाणं
कण्हलेस्सा इद्धी जहेव दीवकुमाराणं, सेवं भंते ! २ त्ति (१७-१२) ॥ ६०९ ॥
नागकुमाराणं भंते ! सव्वे समाहारा जहा सोलसमसए दीवकुमासुद्देसए तहेव निरवसेसं
भाणियव्वं जाव इद्धीति, सेवं भंते ! २ त्ति जाव विहरइ (१७-१३) ॥ ६१० ॥
सुवन्नकुमारा णं भंते ! सव्वे समाहारा० एवं चेव, सेवं भंते ! २ त्ति (१७-१४)
॥ ६११ ॥ विज्जुकुमारा णं भंते ! सव्वे समाहारा० एवं चेव, सेवं भंते ! २ त्ति
(१७-१५) ॥ ६१२ ॥ वाउकुमारा णं भंते ! सव्वे समाहारा० एवं चेव, सेवं
भंते ! २ त्ति (१७-१६) ॥ ६१३ ॥ अग्गिकुमारा णं भंते ! सव्वे समाहारा०
एवं चेव, सेवं भंते ! २ त्ति ॥ ६१४ ॥ सत्तरस्समस्स सयस्स सत्तरस्समो
उद्देसो समत्तो ॥ सत्तरस्समं सयं समत्तं ॥

पढमे १ विसाह २ मायंदिए य ३ पाणाइवाय ४ असुरे य ५ । गुल ६ केवल्लि
७ अणगारे ८ भविण् ९ तह सोमिलऽट्टारसे १० ॥ १ ॥ तेणं कालेणं तेणं सम-
एणं रायगिहे जाव एवं वयासी-जीवे णं भंते ! जीवभावेणं किं पढमे अपढमे ?
गोयमा ! नो पढमे अपढमे, एवं नेरइए जाव वेमाणिए । सिद्धे णं भंते ! सिद्ध-
भावेणं किं पढमे अपढमे ? गोयमा ! पढमे नो अपढमे, जीवा णं भंते ! जीवभावेणं
किं पढमा अपढमा ? गोयमा ! नो पढमा अपढमा, एवं जाव वेमाणियाणं १ ॥
सिद्धाणं पुच्छा, गोयमा ! पढमा नो अपढमा ॥ आहारए णं भंते ! जीवे आहार-
भावेणं किं पढमे अपढमे ? गोयमा ! नो पढमे अपढमे, एवं जाव वेमाणिए,
पोहत्तिएवि एवं चेव । अणाहारए णं भंते ! जीवे अणाहारभावेणं पुच्छा, गोयमा !
सिय पढमे सिय अपढमे । नेरइए णं भंते ! एवं नेरइए जाव वेमाणिए नो पढमे
अपढमे, सिद्धे पढमे नो अपढमे । अणाहारगा णं भंते ! जीवा अणाहारभावेणं

पुच्छा, गोयमा ! पढमावि अपढमावि, नेरइया जाव वेमाणिया णो पढमा अपढमा, सिद्धा पढमा नो अपढमा, एक्केक्के पुच्छा भाणियव्वा २ ॥ भवसिद्धिए एगत्तपुहुत्तेणं जहा आहारए, एवं अभवसिद्धिएवि, नोभवसिद्धियनोअभवसिद्धिए णं भंते ! जीवे नोभव० पुच्छा, गोयमा ! पढमे नो अपढमे, णोभवसिद्धिय नोअभवसिद्धिया णं भंते ! सिद्धा नोभ० अभव०, एवं चेव पुहुत्तेणवि दोण्हवि ॥ सन्नी णं भंते ! जीवे सण्णिभावेणं किं पढमे पुच्छा, गोयमा ! नो पढमे अपढमे, एवं विगल्लिदियवज्जं जाव वेमाणिए, एवं पुहुत्तेणवि ३ ॥ असन्नी एवं चेव एगत्तपुहुत्तेणं नवरं जाव वाणमंतरा, नोसन्नीनोअसन्नी जीवे मणुस्से सिद्धे पढमे नो अपढमे, एवं पुहुत्तेणवि ४ ॥ सलेस्से णं भंते ! पुच्छा, गोयमा ! जहा आहारए एवं पुहुत्तेणवि, कण्हलेस्सा जाव सुक्कलेस्सा एवं चेव नवरं जस्स जा लेस्सा अत्थि । अलेस्से णं जीवमणुस्ससिद्धे जहा नोसन्नीनोअसन्नी ५ ॥ सम्मदिट्ठिए णं भंते ! जीवे सम्मदिट्ठिभावेणं किं पढमे पुच्छा, गोयमा ! सिय पढमे सिय अपढमे, एवं एगिदियवज्जं जाव वेमाणिए, सिद्धे पढमे नो अपढमे, पुहुत्तिया जीवा पढमावि अपढमावि, एवं जाव वेमाणिया, सिद्धा पढमा नो अपढमा, मिच्छादिट्ठिए एगत्तपुहुत्तेणं जहा आहारगा, सम्मामिच्छादिट्ठिए एगत्तपुहुत्तेणं जहा सम्मदिट्ठी, नवरं जस्स अत्थि सम्मामिच्छत्तं ६ ॥ संजए जीवे मणुस्से य एगत्तपुहुत्तेणं जहा सम्मदिट्ठी, असंजए जहा आहारए, संजयासंजए जीवे पंचिदियतिरिक्खजोणियमणुस्सा एगत्तपुहुत्तेणं जहा सम्मदिट्ठी, नोसंजएनोअसंजएनोसंजयासंजए जीवे सिद्धे य एगत्तपुहुत्तेणं पढमे नो अपढमे ७ ॥ सकसाई कोहकसाई जाव लोभकसाई एए एगत्तपुहुत्तेणं जहा आहारए, अकसाई जीवे सिय पढमे सिय अपढमे, एवं मणुस्सेवि, सिद्धे पढमे नो अपढमे, पुहुत्तेणं जीवा मणुस्सा पढमावि अपढमावि, सिद्धा पढमा नो अपढमा ८ ॥ णाणी एगत्तपुहुत्तेणं जहा सम्मदिट्ठी, आभिणिबोहियनाणी जाव मणपज्जवनाणी एगत्तपुहुत्तेणं एवं चेव, नवरं जस्स जं अत्थि, केवलनाणी जीवे मणुस्से सिद्धे य एगत्तपुहुत्तेणं पढसा नो अपढमा । अन्नाणी मइअन्नाणी सुयअन्नाणी विभंगनाणी एगत्तपुहुत्तेणं जहा आहारए ९ ॥ सजोगी मणजोगी वइजोगी कायजोगी एगत्तपुहुत्तेणं जहा आहारए, नवरं जस्स जो जोगो अत्थि, अजोगी जीवमणुस्ससिद्धा एगत्तपुहुत्तेणं पढसा नो अपढमा १० ॥ सागारोवउत्ता अणागारोवउत्ता एगत्तपुहुत्तेणं जहा अणाहारए ११ ॥ सवेदगो जाव नपुंसगवेदगो एगत्तपुहुत्तेणं जहा आहारए नवरं जस्स जो वेदो अत्थि, अवेदओ एगत्तपुहुत्तेणं तिसुवि पएसु जहा अकसाई १२ ॥ ससरीरी जहा आहारए, एवं जाव कम्मगसरीरी जस्स जं अत्थि

सरीरं, नवरं आहारगसरीरी एगत्तपुहुत्तेणं जहा सम्मद्दिट्ठी, असरीरी जीवो सिद्धो
 एगत्तपुहुत्तेणं पढमो नो अपढमो १३ ॥ पंचहिं पज्जतीहि पंचहिं अपज्जतीहिं एग-
 त्तपुहुत्तेणं जहा आहारए, नवरं जस्स जा अत्थि जाव वेमाणिया नो पढमा अपढमा
 १४ ॥ इमा लक्खणगाहा—जो जेण पत्तपुव्वो भावो सो तेण अपढमो होइ ।
 सेसेसु होइ पढमो अपत्तपुव्वेसु भावेसु ॥ १ ॥ जीवे णं भंते ! जीवभावेणं किं
 चरिमे अचरिमे ? गोयमा ! नो चरिमे अचरिमे । नेरइए णं भंते ! नेरइयभावेणं
 पुच्छा, गोयमा ! सिय चरिमे सिय अचरिमे, एवं जाव वेमाणिए, सिद्धे जहा
 जीवे । जीवाणं पुच्छा, गोयमा ! जीवा नो चरिमा अचरिमा, नेरइया चरिमावि
 अचरिमावि, एवं जाव वेमाणिया, सिद्धा जहा जीवा १ ॥ आहारए सव्वत्थ एगत्तेणं
 सिय चरिमे सिय अचरिमे, पुहुत्तेणं चरिमावि अचरिमावि, अणाहारओ जीवो सिद्धो
 य एगत्तेणवि पुहुत्तेणवि नो चरिमो अचरिमो, सेसट्ठाणेषु एगत्तपुहुत्तेणं जहा आहा-
 रओ २ ॥ भवसिद्धीओ जीवपए एगत्तपुहुत्तेणं चरिमे नो अचरिमे, सेसट्ठाणेषु जहा
 आहारओ । अभवसिद्धीओ सव्वत्थ एगत्तपुहुत्तेणं नो चरिमे अचरिमे, नोभवसि-
 द्धीयनोअभवसिद्धीय जीवा सिद्धा य एगत्तपुहुत्तेणं जहा अभवसिद्धीओ ३ ॥ सन्नी
 जहा आहारओ, एवं असन्नीवि, नोसन्नीनोअसन्नी जीवपए सिद्धपए य अचरिमो,
 मणुस्सपए चरिमो एगत्तपुहुत्तेणं ४ ॥ सलेस्सो जाव सुक्कलेस्सो जहा आहारओ नवरं
 जस्स जा अत्थि, अलेस्सो जहा नोसन्नीनोअसन्नी ५ ॥ सम्मद्दिट्ठी जहा अणा-
 हारओ, मिच्छादिट्ठी जहा आहारओ, सम्मामिच्छादिट्ठी एगिदियविगलियवज्जं
 सिय चरिमे सिय अचरिमे, पुहुत्तेणं चरिमावि अचरिमावि ६ ॥ संजओ जीवो
 मणुस्सो य जहा आहारओ, असंजओवि तहेव, सजयासजओवि तहेव, नवरं जस्स
 जं अत्थि, नोसंजयनोअसंजयनोसंजयासंजय जहा नोभवसिद्धीयनोअभवसिद्धीओ
 ७ ॥ सकसाई जाव लोक्कसाई सव्वट्ठाणेषु जहा आहारओ, अकसाई जीवपए
 सिद्धपए य नो चरिमो अचरिमो, मणुस्सपए सिय चरिमो सिय अचरिमो ८ ॥ णाणी
 जहा सम्मद्दिट्ठी सव्वत्थ आभिणिवोहियणाणी जाव मणपन्नवणाणी जहा आहारओ
 नवरं जस्स जं अत्थि, केवलणाणी जहा नोसन्नीनोअसन्नी, अच्चाणी जाव विभंगणाणी
 जहा आहारओ ९ ॥ सजोगी जाव कायजोगी जहा आहारओ जस्स जो जोगो
 अत्थि, अजोगी जहा नोसन्नीनोअसन्नी १० ॥ सागारोवउत्तो अणागारोवउत्तो य
 जहा अणाहारओ ११ ॥ सवेदओ जाव नपुंसगवेदओ जहा आहारओ, अवेदओ
 जहा अकसाई १२ ॥ ससरीरी जाव कम्मगसरीरी जहा आहारओ नवरं जस्स जं
 अत्थि, असरीरी जहा नोभवसिद्धीयनोअभवसिद्धीय १३ ॥ पंचहिं पज्जतीहि पंचहिं

अपज्जतीहिं जहा आहारओ सव्वत्थ एगणपुद्गलेणं दंठगा भाणियव्वा १५ ॥ उमा
लक्खणगाहा—जो जं पाविहिइ पुणो भावं मो तेण अचम्मो मोद । अगंनविओगो
जस्स जेण भावेण सो चरिमो ॥ १ ॥ सेवं भंते ! २ त्ति जाव विहर ॥ ६१५ ॥
अट्टारसमस्स सयस्स पढमो उट्ठेप्पो सन्नत्तो ॥

तेणं कालेणं तेणं समएणं विसाहा नामं नयरी होत्था वज्जओ, वज्जुपुणिए उज्जाणे
वज्जओ, सामी समोसढे जाव पज्जुवासइ, तेणं कालेणं तेणं नगणं सत्ते देविदे
देवराथा वज्जपाणी पुरंदरे एवं जहा सोल्लमसए विट्ठउट्ठेण तहेव दिव्वेणं
जाणविमाणेणं आगओ नवरं एत्थ आभिओगा(वि)इ अत्थि जाव वत्तीराज्वितं नट्टविहिं
उवदंसेइ २ ता जाव पडिगए । भंते । त्ति भगवं गोयमे नमनं भगवं नट्टावीर जाव
एवं वयासी—जहा तइयसए ईमाणस्स तहेव कूजगारनालाट्टित्तो तहेव पुव्वमव-
पुच्छा जाव अभिसमन्नागया ? गोयमादि सगणे भगवं गट्टावीरे भगवं गोयणं एवं
वयासी—एवं खलु गोयसा । तेणं कालेणं तेणं समएणं उट्ठेव जंजुईवे २ भारहे वासे
हत्थिणाउरे नामं नयरे होत्था वज्जओ, नहसंववणे उज्जाणे वज्जओ, तत्थ णं
हत्थिणाउरे नयरे कत्तिए नामं सेट्ठी परिवसइ अट्ठे जाव अपरिमूए णेगमपडमा-
सणिए णेगमट्टसहस्सस्स वहुत्तु कज्जेत्तु य कारणेत्तु य काहुंदेत्तु य एवं जहा राय-
प्पसेणइजे चित्ते जाव चक्खुभूए णेगमट्टसहस्सस्स स(सी)यरस य कुहुंवस्स आहेवचं
जाव कारेमाणे पालेमाणे य समणोवासए अभिगयजीवाजीवे जाव विहरइ । तेणं
कालेणं तेणं समएणं मुणिसुव्वए अरहा आइगरे जहा सोल्लसमसए तहेव जाव
समोसढे जाव परिसा पज्जुवासइ, तए णं से कत्तिए सेट्ठी इमीसे कहाए लद्धे
समाणे हट्टतुट्ट० एवं जहा एक्कारसमसए सुदंसणे तहेव निग्गओ जाव पज्जुवासइ,
तए णं मुणिसुव्वए अरहा कत्तियरस सेट्ठिस्स धम्मकहा जाव परिसा पडिगया, तए
णं से कत्तिए सेट्ठी मुणिसुव्वयस्स जाव निसम्म हट्टतुट्ट० उट्ठाए उट्ठेइ उ० २ ता मुणि-
सुव्वयं जाव एवं वयासी—एवमेयं भंते ! जाव से जहेयं तुज्जे वदह, जं नवरं देवाणु-
प्पिया ! नेगमट्टसहस्सं आपुच्छामि जेहपुत्तं च कुहुंवे ठावेमि, तए णं अहं देवाणु-
प्पियाणं अंतियं पव्वयामि, अहासुहं जाव मा पडिवंधं, तए णं से कत्तिए सेट्ठी जाव
पडिनिक्खमइ २ ता जेणेव हत्थिणापुरे नयरे जेणेव सए गेहे तेणेव उवागच्छइ
२ ता णेगमट्टसहस्सं सहावेइ २ ता एवं वयासी—एवं खलु देवाणुप्पिया ! मए
मुणिसुव्वयस्स अरहओ अंतियं धम्मं निसन्ते सेविय मे धम्मं इच्छिए पडिच्छिए
अभिरुइए, तए णं अहं देवाणुप्पिया ! संसारभयउव्विग्गे जाव पव्वयामि, तं तुब्भे णं
देवाणुप्पिया ! किं करेह किं ववसह किं भे हियइच्छिए किं भे सामत्थे ?, तए णं

तं नेगमट्टसहस्सं पि तं कत्तियं सेट्ठि एवं वयासी-जइ णं देवाणुप्पिया ! संसारभय-
उव्विग्गा भीया जाव पव्वइस्संति अम्हं देवाणुप्पिया ! कि अन्ने आलं वणे वा आहारं
वा पडिवंवे वा ? अम्हेवि णं देवाणुप्पिया ! संसारभयउव्विग्गा भीया जम्मणमरणाणं
देवाणुप्पिएहिं सद्धिं मुणिसुव्वयस्स अरहओ अंतियं मुं(डे)डा भवित्ता अगाराओ
जाव पव्वयामो, तए णं से कत्तिए सेट्ठी तं नेगमट्टसहस्सं एवं वयासी-जइ णं देवाणु-
प्पिया ! संसारभयउव्विग्गा भीया जम्मणमरणाणं मए सद्धिं मुणिसुव्वय जाव पव्वयह
तं गच्छह णं तुम्हे देवाणुप्पिया ! सएसु २ गिहेसु विउलं असणं जाव उवक्खडावेह
मित्तणाइ जाव पुरओ जेट्ठपुत्ते कुडुंवे ठावेह जेट्ठ० २ ता तं मित्तणाइ जाव जेट्ठपुत्ते
आपुच्छह २ ता पुरिससहस्सवाहिणीओ सीयाओ दुरुहह पु० २ ता मित्तणाइ जाव
परिजणेणं जेट्ठपुत्तेहि य समणुगम्ममाणमग्गा सव्विद्धीए जाव रवेणं अकालपरिहीणं
चेव ममं अंतियं पाउव्वभवह, तए णं ते नेगमट्टसहस्सं पि कत्तियस्स सेट्ठिस्स एय-
मट्ठं विणएणं पडिसुणंति २ ता जेणेव साइं साइं गिहाइं तेणेव उवागच्छंति २ ता
विपुलं असणं जाव उवक्खडावेति २ ता मित्तणाइ जाव तस्सेव मित्तणाइ जाव
पुरओ जेट्ठपुत्ते कुडुंवे ठावेति जेट्ठपुत्ते० २ ता तं मित्तणाइ जाव जेट्ठपुत्ते य
आपुच्छंति जेट्ठ० २ ता पुरिससहस्सवाहिणीओ सीयाओ दुरुहंति २ ता मित्तणाइ
जाव परिजणेणं जेट्ठपुत्तेहि य समणुगम्ममाणमग्गा सव्विद्धीए जाव रवेणं अकाल-
परिहीणं चेव कत्तियस्स सेट्ठिस्स अंतियं पाउव्वभवंति, तए णं से कत्तिए सेट्ठी विपुलं
असणं ४ जहा गंगदत्तो जाव मित्तणाइ जाव परिजणेणं जेट्ठपुत्तेणं नेगमट्टसहस्सेण
य समणुगम्ममाणमग्गे सव्विद्धीए जाव रवेणं हत्थिणापुरं नयरं मज्झंमज्झेणं जहा
गंगदत्तो जाव आलित्ते णं भंते ! लोए पलित्ते णं भंते ! लोए आलित्तपलित्ते णं भंते !
लोए जाव आणुगामियत्ताए भविस्सइ, तं इच्छामि णं भंते ! नेगमट्टसहस्सेणं सद्धिं
सयमेव पव्वावियं सयमेव मुंडावियं जाव धम्ममाइक्खियं, तए णं मुणिसुव्वए अरहा
कत्तियं सेट्ठि नेगमट्टसहस्सेणं सद्धिं सयमेव पव्वावेइ जाव धम्ममाइक्खइ, एवं देवाणु-
प्पिया ! गंतव्वं एवं चिद्धियव्वं जाव संजमियव्वं, तए णं से कत्तिए सेट्ठी नेगमट्टसह-
स्सेणं सद्धिं मुणिसुव्वयस्स अरहओ इमं एयारुवं धम्मियं उवएसं सम्मं संपडिवज्जइ,
तमाणाए तहा गच्छइ जाव संजमेइ, तए णं से कत्तिए सेट्ठी नेगमट्टसहस्सेणं सद्धिं
अणगारे जाए इरियासमिए जाव गुत्तवंभयारी, तए णं से कत्तिए अणगारे मुणि-
सुव्वयस्स-अरहओ तहारुवाणं थेराणं अंतियं सामाइयमाइयाइं चोइस पुव्वाइं
अहिज्जइ सा० २ ता वहुहि चउत्थच्छट्ठम जाव अप्पाणं भावेमाणे वहुपडिपुन्नाइं
दुवालसत्तासाइं सामन्नपरियागं पाउणइ २ ता मासियाए-संलेहणाए अत्ताणं शोसेइ

मा० २ ता सट्ठि भत्ताइं अणसणाए छेदेइ स० २ ता आलोइयपडिक्कंते जाव कालं किच्चा सोहम्मे कप्पे सोहम्मवडिंसए विमाणे उववायसभाए देवसयणिज्जंसि जाव सक्के देविंदत्ताए उववन्ने, तए णं से सक्के देविंदे देवराया अहुणोववण्णे सेसं जहा गंगदत्तस्स जाव अंतं काहिइ, नवरं ठिई दो सागरोवमाइं प० सेसं तं चेव । सेवं भंते ! २ त्ति ॥ ६१६ ॥ अट्टारसमस्स सयस्स वीओ उद्देसो समत्तो ॥

तेणं कालेणं तेणं समएणं रायणिहे नामं नयरे होत्था वन्नओ, गुणसिलए उज्जाणे वन्नओ जाव परिसा पडिगया, तेणं कालेणं तेणं समएणं समणस्स भगवओ महावीरस्स जाव अंतेवासी मागंदियपुत्ते नामं अणगारे पगइभइए जहा मंडियपुत्ते जाव पज्जुवासमाणे एवं वयासी-से नूणं भंते ! काउलेस्से पुढविकाइए काउलेस्से-हिंतो पुढविकाइएहिंतो अणंतरं उव्वट्ठित्ता माणुसं विग्गहं लभइ मा० २ ता केवलं वोहिं वुज्झइ के० २ ता तओ पच्छा सिज्झइ जाव अंतं करेइ ? हंता मागंदियपुत्ता ! काउलेस्से पुढविकाइए जाव अंतं करेइ । से नूणं भंते ! काउलेस्से आउकाइए काउलेस्सेहिंतो आउकाइएहिंतो अणंतरं उव्वट्ठित्ता माणुसं विग्गहं लभइ मा० २ ता केवलं वोहिं वुज्झइ जाव अंतं करेइ ? हंता मागंदियपुत्ता ! जाव अंतं करेइ । से नूणं भंते ! काउलेस्से वणस्सइकाइए एवं चेव जाव अंतं करेइ, सेवं भंते ! २ त्ति मागंदियपुत्ते अणगारे समणं भगवं महावीरं जाव नमंसित्ता जेणेव समणे निग्गंधे तेणेव उवागच्छइ २ ता समणे निग्गंधे एवं वयासी-एवं खलु अज्जो ! काउलेस्से पुढविकाइए तहेव जाव अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं खलु अज्जो ! काउलेस्से वणस्सइकाइए जाव अंतं करेइ, तए णं ते समणा निग्गंधा मा(कं)गंदियपुत्तस्स अणगारस्स एवमाइक्खमाणस्स जाव एवं परूवेमाणस्स एयमट्ठं नो सदहंति ३ एयमट्ठं असदहमाणा ३ जेणेव समणे भगवं महावीरे तेणेव उवागच्छंति २ ता समणं भगवं महावीरं वंदंति नमंसंति वं० २ ता एवं वयासी-एवं खलु भंते ! मागंदियपुत्ते अणगारे अम्हं एवमाइक्खइ जाव परूवेइ-एवं खलु अज्जो ! काउलेस्से पुढविकाइए जाव अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं खलु० वणस्सइकाइएवि जाव अंतं करेइ, से कहमेयं भंते ! एवं ? अज्जोत्ति समणे भगवं महावीरे ते समणे निग्गंधे आमंतेत्ता एवं वयासी-जणं अज्जो ! मागंदियपुत्ते अणगारे तुज्झे एवं आइक्खइ जाव परूवेइ-एवं खलु अज्जो ! काउलेस्से पुढवीकाइए जाव अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं खलु अज्जो ! काउलेस्से वणस्सइकाइएवि जाव अंतं करेइ, सच्चे णं एसमट्ठे, अहंपि णं अज्जो ! एवमाइक्खामि ४-एवं खलु

अज्जो ! कण्हलेस्से पुढविकाइए कण्हलेस्सेहिंतो पुढविकाइएहिंतो जाव अंतं करेइ, एवं खल्लु अज्जो ! नीललेस्से पुढविकाइए जाव अंतं करेइ, एवं काउलेस्सेवि जहा पुढविकाइए जाव अंतं करेइ, एवं आउकाइएवि, एवं वणस्सइकाइएवि, सच्चे णं एसमट्ठे ॥ सेवं भंते ! २ त्ति समणा निग्गंथा समणं भगवं महावीरं वंदंति नमंसंति वं० २ ता जेणेव मागंदियपुत्ते अणगारे तेणेव उवागच्छंति २ ता मागंदियपुत्तं अणगारं वंदंति नमंसंति वं० २ ता एयमट्ठं सम्मं विणएणं भुज्जो २ खामेंति ॥६१७॥ तए णं से मागंदियपुत्ते अणगारे उट्ठाए उट्ठेइ २ ता जेणेव समणे भगवं महावीरे तेणेव उवागच्छइ ते० २ ता समणं भगवं महावीरं वंदइ नमंसइ वं० २ ता एवं वयासी-अणगारस्स णं भंते ! भावियप्पणो सव्वं कम्मं वेदेमाणस्स सव्वं कम्मं निज्जरेमाणस्स सव्वं मारं मरमाणस्स सव्वं सरीरं विप्पजहमाणस्स चरिमं कम्मं वेदेमाणस्स चरिमं कम्मं निज्जरेमाणस्स चरिमं मार मरमाणस्स चरिमं सरीरं विप्पजहमाणस्स मारणंतियं कम्मं वेदेमाणस्स मारणंतियं कम्मं निज्जरेमाणस्स मारणंतियं मारं मरमाणस्स मारणंतियं सरीरं विप्पजहमाणस्स जे चरिमा निज्जरापोग्गला सुहुमा णं ते पोग्गला प०, समणाउसो ! सव्वं लोणं पिणं ते उग्गाहिताणं चिट्ठंति ? हंता मागंदियपुत्ता ! अणगारस्स णं भावियप्पणो जाव ओगाहिताणं चिट्ठंति, छउमत्थे णं भंते ! मणुस्से तेसिं निज्जरापोग्गलाणं किञ्चि आणत्तं वा णाणत्तं वा एवं जहा इंदियउद्देसए पढमे जाव वेमाणिया जाव तत्थ णं जे ते उवउत्ता ते जाणंति पासंति आहारेंति, से तेणट्ठेणं निक्खेवो भाणियव्वोत्ति न पासंति आहारेंति, नेरइया णं भंते ! निज्जरापोग्गला न जाणंति न पासंति आहारेंति, एवं जाव पंचिदियतिरिक्खजोणियाणं, मणुस्सा णं भंते ! निज्जरापोग्गले कि जाणंति पासंति आहारेंति उदाहु न जाणंति न पासंति न आहारेंति ? गोयमा ! अत्थेगइया जाणंति ३ अत्थेगइया न जाणंति न पासंति आहारेंति, से केणट्ठेणं भंते ! एवं वुच्चइ अत्थेगइया जाणंति पासंति आहारेंति, अत्थेगइया न जाणंति न पासंति आहारेंति ? गोयमा ! मणुस्सा दुविहा प०, तंजहा-सन्निभूया य असन्निभूया य, तत्थ णं जे ते असन्निभूया ते न जाणंति न पासंति आहारेंति, तत्थ णं जे ते सन्निभूया ते दुविहा प०, तं-उवउत्ता य अणुवउत्ता य, तत्थ णं जे ते अणुवउत्ता ते न जाणंति न पासंति आहारेंति, तत्थ णं जे ते उवउत्ता ते जाणंति ३, से तेणट्ठेणं गोयमा ! एवं वुच्चइ अत्थेगइया न जाणंति २ आहारेंति, अत्थेगइया जाणंति ३, वाणमंतरजोइसिया जहा नेरइया । वेमाणिया णं भंते ! ते निज्जरापोग्गले कि जाणंति ६ ? गोयमा ! जहा मणुस्सा नवरं वेमाणिया दुविहा प०, तं-माइमिच्छदिट्ठिउववज्जगा य अमा-

इस्म्महिट्टिउववन्नगा य, तत्थ णं जे ते माइस्म्महिट्टिउववन्नगा ते णं न जाणंति
न पासंति आहारेंति, तत्थ णं जे ते अमाइस्म्महिट्टिउववन्नगा ते दुविहा प०, तं०-
अणंतरोववन्नगा य परंपरोववन्नगा य, तत्थ णं जे ते अणंतरोववन्नगा ते णं न
जाणंति न पासंति आहारेंति, तत्थ णं जे ते परंपरोववन्नगा ते दुविहा प०, तं०-
पज्जत्तगा य अपज्जत्तगा य, तत्थ णं जे ते अपज्जत्तगा ते णं न जाणंति न पासंति
आहारेंति, तत्थ णं जे ते पज्जत्तगा ते दुविहा प०, तं०-उवउत्ता य अणुवउत्ता
य, तत्थ णं जे ते अणुवउत्ता ते णं न जाणंति २ आहारेंति ॥६१८॥ कइविहे णं
भन्ते ! बंधे प० ? मागंदियपुत्ता ! दुविहे बंधे प०, तं०-दव्वबंधे य भावबंधे य,
दव्वबंधे णं भन्ते ! कइविहे प० ? मागंदियपुत्ता ! दुविहे प०, तं०-पओगबंधे य
वीससाबंधे य, वीससाबंधे णं भन्ते ! कइविहे प० ? मागंदियपुत्ता ! दुविहे प०,
तं०-साईयवीससाबंधे य अणाईयवीससाबंधे य, पओगबंधे णं भन्ते ! कइविहे प० ?
मागंदियपुत्ता ! दुविहे प०, तं०-सिढिलबंधणबन्धे य धणियबंधणबन्धे य, भाव-
बंधे णं भन्ते ! कइविहे प० ? मागंदियपुत्ता ! दुविहे प०, तं०-मूलपगडिबंधे य
उत्तरपगडिबंधे य, नेरइयाणं भन्ते ! कइविहे भावबंधे प० ? मागंदियपुत्ता ! दुविहे
भावबंधे प०, तं०-मूलपगडिबंधे य उत्तरपगडिबंधे य, एवं जाव वेमाणियाणं,
नाणावरणिज्जस्स णं भन्ते ! कम्मस्स कइविहे भावबंधे प० ? मागंदियपुत्ता ! दुविहे
भावबंधे प०, तं०-मूलपगडिबंधे य उत्तरपगडिबंधे य, नेरइयाणं भन्ते ! नाणावर-
णिज्जस्स कम्मस्स कइविहे भावबंधे प० ? मागंदियपुत्ता ! दुविहे भावबंधे प०, तं०-
मूलपगडिबंधे य उत्तरपगडिबंधे य, एवं जाव वेमाणियाणं, जहा नाणावरणिज्जेणं
दंडओ भणिओ एवं जाव अंतराइएणं भाणियव्वो ॥ ६१९ ॥ जीवाणं भन्ते ! पावे
कम्मे जे य कडे जाव जे य कज्जिस्सइ अत्थि याइ तस्स केइ णाणत्ते ? हंता अत्थि,
से केणट्टेणं भन्ते ! एवं वुच्चइ जीवाणं पावे कम्मे जे य कडे जाव जे य कज्जिस्सइ
अत्थि याइ तस्स णाणत्ते ? मागंदियपुत्ता ! से जहानामए-केइ पुरिसे धणं परामुसइ
२ ता उंसुं परामुसइ २ ता ठाणं ठाइ २ ता आययकन्नाययं उंसुं करेइ आ० २-ता
उड्डं वेहासं उव्विहइ से नूणं मागंदियपुत्ता ! तस्स उंसुस्स उड्डं वेहासं उव्विहस्स
समाणस्स एयइवि णाणत्तं जाव तं तं भावं परिणमइवि णाणत्तं ? हंता भगवं !
एयइवि णाणत्तं जाव परिणमइवि णाणत्तं, से तेणट्टेणं मागंदियपुत्ता ! एवं वुच्चइ जाव
तं तं भावं परिणमइवि णाणत्तं, नेरइयाणं भन्ते ! पावे कम्मे जे य कडे एवं चेव, एवं
जाव वेमाणियाणं ॥ ६२० ॥ नेरइया णं भन्ते ! जे पोगगळे आहारत्ताए गेण्हंति
तेसि णं भन्ते ! पोगगलाणं सेयकालंसि कइभागं आहारेंति, कइभागं निज्जुरेंति ?

मागंदियपुत्ता ! असंखेज्झभागं आहारंति अणंतभागं निज्जरंति, चक्किया णं भंते !
केइ तेसु निज्जरापोग्गलेसु आसइत्ताए वा जाव तुयट्ठित्ताए वा ? णो इणट्ठे समट्ठे,
अणाहरणमेयं बुइयं समणाउसो ! एवं जाव वेमाणियाणं । सेवं भंते ! सेवं भंते !
त्ति ॥ ६२१ ॥ अट्टारसमस्स सयस्स तइओ उद्देसो समत्तो ॥

तेणं कालेणं तेणं समएणं रायगिहे जाव भगवं गोयमे एवं वयासी-अह भंते !
पाणाइवाए मुसावाए जाव मिच्छादंसणसल्ले, पाणाइवायवेरमणे मुसावाय० जाव
मिच्छादंसणसल्लवेरमणे, पुढाविकाइए जाव वणस्सइकाइए, धम्मत्थिकाए अधम्मत्थि-
काए आगासत्थिकाए जीवे असरीरपडिवद्धे परमाणुपोग्गले सेलेसिं पडिवन्नए अणगारे
सव्वे य वायरवोदिधरा कलेवरा एए णं दुविहा जीवदव्वा य अजीवदव्वा य जीवाणं
परिभोगत्ताए हव्वमागच्छंति ? गोयमा ! पाणाइवाए जाव एए णं दुविहा जीवदव्वा
य अजीवदव्वा य अत्येगइया जीवाणं परिभोगत्ताए हव्वमागच्छंति, अत्येगइया
जीवाणं जाव नो हव्वमागच्छंति, से केणट्ठेणं भंते ! एवं बुच्चइ पाणाइवाए जाव नो
हव्वमागच्छंति ? गोयमा ! पाणाइवाए जाव मिच्छादंसणसल्ले, पुढाविकाइए जाव
वणस्सइकाइए, सव्वे य वायरवोदिधरा कलेवरा एए णं दुविहा जीवदव्वा य अजी-
वदव्वा य जीवाणं परिभोगत्ताए हव्वमागच्छंति, पाणाइवायवेरमणे जाव मिच्छा-
दंसणसल्लविवेगे, धम्मत्थिकाए अधम्मत्थिकाए जाव परमाणुपोग्गले सेलेसिं पडिवन्नए
अणगारे एए णं दुविहा जीवदव्वा य अजीवदव्वा य जीवाणं परिभोगत्ताए नो
हव्वमागच्छन्ति, से तेणट्ठेणं जाव नो हव्वमागच्छंति ॥ ६२२ ॥ कइ णं भंते !
कसाया पन्नत्ता ? गोयमा ! चत्तारि कसाया प०, तं०-कसायपयं निरवसेसं भाणि-
यव्वं जाव निजरिस्संति लोभेणं ॥ कइ णं भंते ! जुम्मा पन्नत्ता ? गोयमा !
चत्तारि जुम्मा पन्नत्ता, तं०-कडजुम्मे तेओगे दावरजुम्मे कलिओगे, से केणट्ठेणं भंते !
एवं बुच्चइ जाव कलिओगे ? गोयमा ! जे णं रासी चउक्कएणं अवहारेणं अवहीरमाणे
चउपज्जवसिए सेत्तं कडजुम्मे, जे णं रासी चउक्कएणं अवहारेणं अवहीरमाणे तिप-
ज्जवसिए सेत्तं तेओगे, जे णं रासी चउक्कएणं अवहारेणं अवहीरमाणे (२) दुपज्जव-
सिए सेत्तं दावरजुम्मे, जे णं रासी चउक्कएणं अवहारेणं अवहीरमाणे एगपज्जवसिए
सेत्तं कलिओगे, से तेणट्ठेणं गोयमा ! एवं बुच्चइ जाव कलिओगे ॥ नेरइया णं भंते !
कि कडजुम्मा तेओगा दावरजुम्मा कलिओगा ? गोयमा ! जहन्नपए कडजुम्मा,
उक्कोसपए तेओगा, अजहण्णमणुक्कोसपए सिय कडजुम्मा जाव सिय कलिओगा, एवं
जाव थणियकुमारा । वणस्सइकाइयाणं पुच्छा, गोयमा ! जहन्नपए अपया उक्कोस-
पए य अपया अजहण्णमणुक्कोसपए सिय कडजुम्मा जाव सिय कलिओगा । वेइंदि-

याणं पुच्छा, गोयमा ! जहन्नपए कडजुम्मा, उक्कोसपए दावरजुम्मा, अजहन्नमणु-
क्कोसपए सिय कडजुम्मा जाव सिय कलिओगा, एवं जाव चउरिंदिया, सेसा एगि-
दिया जहा बेइंदिया, पंचिंदियतिरिक्खजोणिया जाव वेमाणिया जहा नेरइया, सिद्धा
जहा वणस्सइकाइया । इत्थीओ णं भंते ! किं कडजुम्माओ० पुच्छा, गोयमा !
जहन्नपए कडजुम्माओ, उक्कोसपए कडजुम्माओ, अजहन्नमणुक्कोसपए सिय कडजु-
म्माओ जाव सिय कलिओगाओ, एवं असुरकुमारइत्थीओवि जाव थणियकुमारइ-
त्थीओवि, एवं तिरिक्खजोणियइत्थीओवि, एवं मणुस्सइत्थीओवि, एवं वाणमं-
तरजोइसियवेमाणियदेवइत्थीओवि ॥ ६२३ ॥ जावइयाणं भंते ! वरा अंधगवण्हिणो
जीवा तावइया परा अंधगवण्हिणो जीवा ? हंता गोयमा ! जावइया वरा अंधग-
वण्हिणो जीवा तावइया परा अंधगवण्हिणो जीवा । सेवं भंते ! २ त्ति ॥ ६२४ ॥
अट्टारसमस्स सयस्स चउत्थो उद्देसो समत्तो ॥

दो भंते ! असुरकुमारा एगंसि असुरकुमारावासंसि असुरकुमारदेवत्ताए उववन्ना,
तत्थ णं एगे असुरकुमारे देवे पासादीए दरिसणिज्जे अभिरुवे पडिरुवे, एगे असुर-
कुमारे देवे से णं नो पासादीए नो दरिसणिज्जे नो अभिरुवे नो पडिरुवे, से कहमेयं
भंते ! एवं ? गोयमा ! असुरकुमारा देवा दुविहा प०, तं०-वेउव्वियसरीरा य अवे-
उव्वियसरीरा य, तत्थ णं जे से वेउव्वियसरीरे असुरकुमारे देवे से णं पासादीए
जाव पडिरुवे, तत्थ णं जे से अवेउव्वियसरीरे असुरकुमारे देवे से णं नो पासादीए
जाव नो पडिरुवे, से केणट्ठेणं भंते ! एवं बुच्चइ-तत्थ णं जे से वेउव्वियसरीरे तं
चेव जाव णो पडिरुवे ? गोयमा ! से जहानामए-इहं मणुस्सलोगंसि दुवे पुरिसा
भवन्ति, एगे पुरिसे अलंकियविभूसिए, एगे पुरिसे अणलंकियविभूसिए, एएसि णं
गोयमा ! दोहं पुरिसाणं कयरे पुरिसे पासादीए-जाव पडिरुवे, कयरे पुरिसे नो
पासादीए जाव नो पडिरुवे, जे वा से पुरिसे अलंकियविभूसिए जे वा से पुरिसे
अणलंकियविभूसिए ? भगवं ! तत्थ जे से पुरिसे अलंकियविभूसिए से णं पुरिसे
पासादीए जाव पडिरुवे, तत्थ णं जे से पुरिसे अणलंकियविभूसिए से णं पुरिसे नो
पासादीए जाव नो पडिरुवे, से तेणट्ठेणं जाव नो पडिरुवे । दो भंते ! नागकुमारा
देवा एगंसि नागकुमारावासंसि एवं चेव, एवं जाव थणियकुमारा, वाणमंतरजोइसिय-
वेमाणिया एवं चेव ॥ ६२५ ॥ दो भंते ! नेरइया एगंसि नेरइयावासंसि नेरइयत्ताए
उववन्ना, तत्थ णं एगे नेरइए महाकम्मतराए चेव जाव महावेयणतराए चेव, एगे
नेरइए अप्पकम्मतराए चेव जाव अप्पवेयणतराए चेव, से कहमेयं भंते ! एवं ?
गोयमा ! नेरइया दुविहा प०, तं०-माइमिच्छादिट्ठिउववन्ना य अमाइसम्मदिट्ठि-

उववन्नगा य, तत्थ णं जे से माइमिच्छादिट्ठिउववन्नए नेरइए से णं महाकम्मतराए
 चेव जाव महावेयणतराए चेव, तत्थ णं जे से अमाइसम्मदिट्ठिउववन्नए नेरइए
 से णं अप्पकम्मतराए चेव जाव अप्पवेयणतराए चेव, दो भंते ! असुरकुमारा एवं
 चेव, एवं एगिंदियविगलिंदियवज्जं जाव वेमाणिया ॥ ६२६ ॥ नेरइ(या)ए णं भंते !
 अणंतरं उव्वट्ठिता जे भविए पंचिंदियतिरेक्खजोणिएसु उववज्जित्तए, से णं भंते !
 कयरं आउयं पडिसंवेदेइ ? गोयमा ! नेरइयाउयं पडिसंवेदेइ, पंचिंदियतिरेक्ख-
 जोणियाउए से पुरओ कडे चिट्ठइ, एवं मणुस्सेवि, नवरं मणुस्साउए से पुरओ
 कडे चिट्ठइ । असुरकुमारा णं भंते ! अणंतरं उव्वट्ठिता जे भविए पुढविकाइएसु
 उववज्जित्तए पुच्छा, गोयमा ! असुरकुमाराउयं पडिसंवेदेइ, पुढविकाइयाउए से
 पुरओ कडे चिट्ठइ, एवं जो जहिं भविओ उववज्जित्तए तस्स तं पुरओ कडं चिट्ठइ,
 जत्थ ठिओ तं पडिसंवेदेइ जाव वेमाणिए, नवरं पुढविकाइए पुढविकाइएसु उव-
 वज्जइ पुढविकाइयाउयं पडिसंवेदेइ, अन्ने य से पुढविकाइयाउए पुरओ कडे चिट्ठइ,
 एवं जाव मणुस्सो सट्ठाणे उववाएयव्वो परट्ठाणे तहेव ॥ ६२७ ॥ दो भंते ! असुर-
 कुमारा एगंसि असुरकुमारावासंसि असुरकुमारदेवताए उववन्ना, तत्थ णं एगे असुर-
 कुमारे देवे उज्जुयं विउव्विस्सामित्ति उज्जुयं विउव्वइ, वंकं विउव्विस्सामित्ति वंकं
 विउव्वइ, जं जहा इच्छइ तं तहा विउव्वइ, एगे असुरकुमारे देवे उज्जुयं विउव्वि-
 स्सामित्ति वंकं विउव्वइ, वंकं विउव्विस्सामित्ति उज्जुयं विउव्वइ, जं जहा इच्छइ णो
 तं तहा विउव्वइ, से कहमेयं भंते ! एवं ? गोयमा ! असुरकुमारा देवा दुविहा प०,
 तं०-माइमिच्छादिट्ठिउववन्नगा य अमाइसम्मदिट्ठिउववन्नगा य, तत्थ णं जे से माइ-
 मिच्छादिट्ठिउववन्नए असुरकुमारे देवे से णं उज्जुयं विउव्विस्सामित्ति वंकं विउव्वइ
 जाव णो तं तहा विउव्वइ, तत्थ णं जे से अमाइसम्मदिट्ठिउववन्नए असुरकुमारे देवे
 से णं उज्जुयं विउव्विस्सामीति उज्जुयं विउव्वइ जाव तं तहा विउव्वइ । दो भंते !
 नागकुमारा एवं चेव, एवं जाव थणियकुमारा, वाणमंतरजोइसियवेमाणिया एवं चेव ॥
 सेवं भंते ! २ त्ति ॥ ६२८ ॥ अट्ठारसमस्स सयस्स पंचमो उद्देसो समत्तो ॥

फाणियगुले णं भंते ! कइवन्ने कइगंधे कइरसे कइफासे पण्णत्ते ? गोयमा ! एत्थ
 णं दो नया भवन्ति, तं०-निच्छइयनए य वावहारियनए य, वावहारियनयस्स गोट्ठे
 फाणियगुले, नेच्छइयनयस्स पंचवन्ने दुगंधे पंचरसे अट्ठफासे प० । भमरे णं भंते !
 कइवन्ने० पुच्छा, गोयमा ! एत्थ णं दो नया भवन्ति, तं०-निच्छइयनए य वाव-
 हारियनए य, वावहारियनयस्स कालए भमरे, नेच्छइयनयस्स पंचवन्ने जाव अट्ठ-
 फासे प० । सुयपिच्छे णं भंते ! कइवन्ने० प० ? एवं चेव, नवरं वावहारियनयस्स

नीलए सुयपिच्छे, नेच्छइयनयस्स पंचवण्णे सेसं तं चेव, एवं एएणं अभिलावेणं लोहि-
 (ति)या मंजिड्डिया, पीतिया हालिदा, सुक्खिए संखे, सुब्भिगंधे कोट्ठे, दुब्भिगंधे मियग-
 सरीरे, तित्ते निवे, कडुया सुंठी, कसाए कविट्ठे, अंवा अंबिलिया, महुरे खंडे, कक्खडे
 वइरे, मउए नवणीए, गुरुए अए, लहुए उल्लयपत्ते, सीए हिमे, उसिणे अगणिकाए,
 णिद्धे तेहे । छारिया णं भंते ! पुच्छा, गोयमा ! एत्थ णं दो नया भवन्ति, तं०-निच्छ-
 इयनए य वावहारियनए य, वावहारियनयस्स लुक्खा छारिया, नेच्छइयनयस्स पंच-
 वन्ना जाव अट्ठफासा प० ॥ ६२९ ॥ परमाणुपोग्गले णं भंते ! कइवन्ने जाव कइ-
 फासे पन्नत्ते ? गोयमा ! एगवन्ने एगगंधे एगरसे दुफासे पन्नत्ते ॥ दुपएसिए णं भंते !
 खंधे कइवन्ने० पुच्छा, गोयमा ! सिय एगवन्ने सिय दुवन्ने, सिय एगगंधे सिय दुगंधे,
 सिय एगरसे सिय दुरसे, सिय दुफासे सिय तिफासे सिय चउफासे पन्नत्ते, एवं तिप-
 एसिएवि, नवरं सिय एगवन्ने सिय दुवन्ने सिय तिवन्ने, एवं रसेसुवि, सेसं जहा
 दुपएसियस्स, एवं चउप्पएसिएवि, नवरं सिय एगवन्ने जाव सिय चउवन्ने, एवं रसे-
 सुवि, सेसं तं चेव, एवं पंचपएसिएवि, नवरं सिय एगवन्ने जाव सिय पंचवन्ने, एवं
 रसेसुवि, गंधफासा तहेव, जहा पंचपएसिओ एवं जाव असंखेज्जपएसिओ ॥ सुहुम-
 परिणए णं भंते ! अणंतपएसिए खंधे कइवन्ने० ? जहा पंचपएसिए तहेव निरवसेसं,
 वायरपरिणए णं भंते ! अणंतपएसिए खंधे कइवन्ने० पुच्छा, गोयमा ! सिय एगवन्ने
 जाव सिय पंचवन्ने, सिय एगगंधे सिय दुगंधे, सिय एगरसे जाव सिय पंचरसे, सिय
 चउफासे जाव सिय अट्ठफासे प० ॥ सेवं भंते ! सेवं भंते ! त्ति ॥ ६३० ॥
अट्ठारसमस्स सयस्स छट्ठो उद्देसो समत्तो ॥

रायगिहे जाव एवं वयासी-अन्नउत्थिया णं भंते ! एवमाइक्खंति जाव पल-
 वेंति-एवं खलु केवली जक्खाएसेणं आइस्सइ, एवं खलु केवली जक्खाएसेणं आइट्ठे
 समाणे आहच्च दो भासाओ भासइ, तं०-मोसं वा सच्चामोसं वा, से कहमेयं भंते !
 एवं ? गोयमा ! जणं ते अन्नउत्थिया जाव जे ते एवमाहंसु मिच्छं ते एवमाहंसु,
 अहं पुण गोयमा ! एवमाइक्खामि ४-नो खलु केवली जक्खाएसेणं आइस्सइ, नो
 खलु केवली जक्खाएसेणं आइट्ठे समाणे आहच्च दो भासाओ भासइ, तं०-मोसं
 वा सच्चामोसं वा, केवली णं असावज्जाओ अपरोवघाइयाओ आहच्च दो भासाओ
 भासइ, तं०-सच्चं वा असच्चामोसं वा ॥ ६३१ ॥ कइविहे णं भंते ! उवही
 पण्णत्ते ? गोयमा ! तिविहे उवही प०, तं०-कम्मोवही, सरीरोवही, बाहिरभंडमत्तो-
 वगरणोवही, नेरइयाणं भंते ! पुच्छा, गोयमा ! दुविहे उवही प०, तं०-कम्मोवही य
 सरीरोवही य, सेसाणं तिविहे उवही एगिदियवज्जाणं जाव वेमाणियाणं, एगिदियाणं

दुविहे उवही प०, तंजहा-कम्मोवही य सरीरोवही य, कइविहे णं भंते ! उवही प० ? गोयमा ! तिविहे उवही प०, तंजहा-सचित्ते, अचित्ते, मीसए, एवं नेरइयाणवि, एवं निरवसे(सा)सं जाव वेमाणियाणं । कइविहे णं भंते ! परिग्गहे प० ? गोयमा ! तिविहे परिग्गहे प०, तं०-कम्मपरिग्गहे, सरीरपरिग्गहे, बाहिरभंडमत्तोवगरण-परिग्गहे, नेरइयाणं भंते ! एवं जहा उवहिणा दो दंडगा भणियां तहेव परिग्गहेणवि दो दंडगा भाणियव्वा, कइविहे णं भंते ! पणिहाणे प० ? गोयमा ! तिविहे पणिहाणे प०, तं०-मणपणिहाणे, वइपणिहाणे, कायपणिहाणे, नेरइयाणं भंते ! कइविहे पणिहाणे प० ? एवं चेव, एवं जाव थणियकुमाराणं, पुढविकाइयाणं पुच्छा, गोयमा ! एगे कायपणिहाणे प०, एवं जाव वणस्सइकाइयाणं, वेइंदियाणं पुच्छा, गोयमा ! दुविहे पणिहाणे प०, तं०-वइपणिहाणे य कायपणिहाणे य, एवं जाव चउरिदियाणं, सेनाणं तिविहेवि जाव वेमाणियाणं । कइविहे णं भंते ! दुप्पणिहाणे प० ? गोयमा ! तिविहे दुप्पणिहाणे प०, तं०-मणदुप्पणिहाणे, वइदुप्पणिहाणे, कायदुप्पणिहाणे, जहेव पणिहाणेणं दंडगो भणिओ तहेव दुप्पणिहाणेणवि भाणियव्वो । कइविहे णं भंते ! सुप्पणिहाणे प० ? गोयमा ! तिविहे सुप्पणिहाणे प०, तंजहा-मणसुप्पणिहाणे, वइसुप्पणिहाणे, कायसुप्पणिहाणे, मणुस्साणं भंते ! कइविहे सुप्पणिहाणे प० ? एवं चेव जाव वेमाणियाणं, सेवं भंते ! २ त्ति जाव विहरइ ॥ तए णं समणे भगवं महावीरे जाव वहिया जणवयविहारं विहरइ ॥ ६३२ ॥ तेणं कालेणं तेणं समएणं रायगिहे नामं नयरे गुणसिलए उज्जाणे वन्नओ जाव पुढविसिला-पट्टओ, तस्स णं गुणसिलयस्स उज्जाणस्स अदूरसामंते वहवे अन्नउत्थिया परिवसति, तं०-कालोदाई सेलोदाई एवं जहा सत्तमसए अन्नउत्थिउद्देसए जाव से कहमेयं मन्ने एवं ? तत्थ णं रायगिहे नयरे महुए नामं समणोवासए परिवसइ, अद्धे जाव अपरि-भूए अभिगयजीवाजीवे जाव विहरइ, तए णं समणे भगवं महावीरे अन्नया क्याइ पुव्वाणुपुण्वि चरमाणे जाव समोसढे, परिसा जाव पज्जुवासइ, तए णं म(हु)-हुए समणोवासए इमीसे कहाए लद्धट्ठे समाणे हट्टुट्ट जाव हियए ण्हाए जाव सरीरे सयाओ गिहाओ पडिनिक्खमइ स० २ ता पायविहारचारेणं रायगिहं नयरं जाव निग्गच्छइ २ ता तेसिं अन्नउत्थियाणं अदूरसामंतेणं वीईवयइ, तए णं ते अन्नउत्थिया महुयं समणोवासयं अदूरसामंतेणं वीईवयमाणं पासंति २ ता अन्नमन्नं सद्दावेंति २ ता एवं वयासी-एवं खलु देवाणुप्पिया ! अम्हं इमा कहा अविउप्पकडा इमं च णं महुए समणोवासए अम्हं अदूरसामंतेणं वीईवयइ, तं सेयं खलु देवाणु-प्पिया ! अम्हं महुयं समणोवासगं एयमट्ठं पुच्छित्तएत्तिकट्ठ अन्नमन्नस्स अंतियं

एयमट्ठं पडिसुणोति अन्नमन्नस्स० २ ता जेणेव महुए समणोवासए तेणेव उवा-
गच्छंति २ ता महुयं समणोवासगं एवं वयासी-एवं खलु महु(मंडु)या ! तव धम्मायरिए
धम्मोवएसए समणे णायपुत्ते पंच अत्थिकाए पन्नवेइ जहा सत्तमे सए अन्नउत्थिय-
उद्देसए जाव से कहमेयं महुया ! एवं ?, तए णं से महुए समणोवासए ते अन्नउत्थिए
एवं वयासी-जइ कज्जं कज्जइ जाणामो पासामो, अह कज्जं न कज्जइ न जाणामो न
पासामो, तए णं ते अन्नउत्थिया महुयं समणोवासयं एवं वयासी-केस णं तुमं
महुया ! समणोवासगाणं भवसि, जे णं तुमं एयमट्ठं न जाणसि न पाससि ?, तए णं
से महुए समणोवासए ते अन्नउत्थिए एवं वयासी-अत्थि णं आउसो ! वाउयाए
वाइ ? हंता महुया ! वाइ, तु(ज्झे)ब्भे णं आउसो ! वाउयायस्स वायमाणस्स रुवं
पासह ? णो इणट्ठे समट्ठे, अत्थि णं आउसो ! घाणसहगया पोगगला ? हंता अत्थि,
तुब्भे णं आउसो ! घाणसहगयाणं पोगगलाणं रुवं पासह ? णो इणट्ठे समट्ठे, अत्थि
णं आउसो ! अरणिसहगए अगणिकाए ? हंता अत्थि, तुब्भे णं आउसो !
अरणिसहगयस्स अगणिकायस्स रुवं पासह ? णो इणट्ठे समट्ठे, अत्थि णं आउसो !
समुद्दस्स पारगयाइं रुवाइं ? हंता अत्थि, तुब्भे णं आउसो ! समुद्दस्स पारगयाइं
रुवाइं पासह ? णो इणट्ठे समट्ठे, अत्थि णं आउसो ! देवलोगगयाइं रुवाइं ?
हंता अत्थि, तुब्भे णं आउसो ! देवलोगगयाइं रुवाइं पासह ? णो इणट्ठे समट्ठे,
एवामेव आउसो ! अहं वा तुब्भे वा अन्नो वा छउमत्थो जइ जो जं न जाणइ न
पासइ तं सव्वं न भवइ एवं मे सुवहुए लोए ण भविस्सतीतिकट्ठु ते अन्नउत्थिए
एवं पडिहणइ एवं पडिहणित्ता जेणेव गुणसिलए उज्जाणे जेणेव समणे भगवं महावीरे
तेणेव उवागच्छइ-२ ता समणं भगवं महावीरं पंचविहेणं अभिगमेणं अभि० जाव
पज्जुवासइ । महुयादि ! समणे भगवं महावीरे महुयं समणोवासयं एवं वयासी-सुट्ठु णं
महुया ! तुमं ते अन्नउत्थिए एवं वयासी, साहु णं महुया ! तुमं ते अन्नउत्थिए एवं
वयासी, जे णं महुया ! अट्ठं वा हेउं वा पसिणं वा वागरणं वा अन्नायं अदिट्ठं
अस्सुयं अमयं अविण्णायं बहुजणमज्झे आघवेइ पन्नवेइ जाव उवदंसेइ, से णं
अरिहंताणं आसायणाए वट्ठइ, अरिहंतपन्नत्तस्स धम्मस्स आसायणाए वट्ठइ, केवलीणं
आसायणाए वट्ठइ, केवलिपन्नत्तस्स धम्मस्स आसायणाए वट्ठइ, तं सुट्ठु णं तुमं महुया !
ते अन्नउत्थिए एवं वयासी, साहु णं तुमं महुया ! जाव एवं वयासी, तए णं महुए
समणोवासए समणेणं भगवया महावीरेणं एवं वुत्ते समाणे हट्ठतुट्ठे समणं भगवं
महावीरं वंदइ नमंसइ वं० २ ता णच्चासन्ने जाव पज्जुवासइ, तए णं समणे भगवं
महावीरे महुयस्स समणोवासगस्स तीसे य जाव परिसा पडिगया, तए णं महुए

समणोवासए समणस्स भगवओ महावीरस्स जाव निसग्गम हट्ठुट्ठे पसिणाइं (वागर-
णाइं) पुच्छइ प० २ ता अट्ठाइं परियादियइ २ ता उट्ठाए उट्ठेइ २ ता समणं भगवं
महावीरं वंदइ नमंसइ वं० २ ता जाव पडिगए । भंते ! त्ति भगवं गोयमे समणं भगवं
महावीरं वंदइ नमंसइ वं० २ ता एवं वयासी-पभू णं भंते ! महुए समणोवासए देवाणु-
प्पियाणं अंतियं जाव पव्वइत्ताए ? णो इणट्ठे समट्ठे, एवं जहेव संखे तहेव अरुणाभे
जाव अंतं करे(का)हिइ ॥ ६३३ ॥ देवे णं भंते ! महिद्धिए जाव महेसक्खे रुवसहस्स
विउव्वित्ता पभू अन्नमज्जेणं सद्धिं संगामं संगामेत्ताए ? हंता पभू । ताओ णं भंते !
वोदीओ कि एगर्जावफुडाओ अणेगजीवफुडाओ ? गोयमा ! एगजीवफुडाओ णो
अणेगजीवफुडाओ, तेसि णं भंते ! वोदीणं अंतरा किं एगजीवफुडा अणेगजीव-
फुडा ? गोयमा ! एगजीवफुडा नो अणेगजीवफुडा । पुरिसे णं भंते ! अंतरेणं
हत्थेण वा एवं जहा अट्ठमसए तइए उट्ठेसए जाव नो खलु तत्थ सत्थं कमइ
॥ ६३४ ॥ अत्थि णं भंते ! देवासुराणं संगामे २ ? हंता अत्थि, देवासुरेसु णं
भंते ! संगामेसु वट्ठमाणेसु किञ्चं तेसिं देवाणं पहरणरयणत्ताए परिणमइ ? गोयमा !
जञ्चं ते देवा तणं वा कट्ठं वा पत्तं वा सक्करं वा परामुसंति तं (णं) तं तेसि देवाणं
पहरणरयणत्ताए परिणमइ, जहेव देवाणं तहेव असुरकुमाराणं ? णो इणट्ठे समट्ठे,
असुरकुमाराणं देवाणं निच्चं विउव्विया पहरणरयणा प० ॥ ६३५ ॥ देवे णं भंते !
महिद्धिए जाव महेसक्खे पभू लवणसमुदं अणुपरियट्ठित्ताणं हव्वमागच्छित्ताए ?
हंता पभू, देवे णं भंते ! महिद्धिए एवं धायइसंडं दीवं जाव हंता पभू, एवं जाव
रुयगवरं दीवं जाव हंता पभू, ते णं पर वीईवएज्जा नो चेव णं अणुपरियट्ठेज्जा
॥ ६३६ ॥ अत्थि णं भंते ! देवा जे अणंते कम्मंसे जहन्नेणं एक्केण वा दोहि वा
तिहिं वा उक्कोसेणं पंचहिं वाससएहि खवयंति ? हंता अत्थि, अत्थि णं भंते !
देवा जे अणंते कम्मंसे जहन्नेणं एक्केण वा दोहि वा तिहि वा उक्कोसेणं पंचहिं वास
सहस्सेहि खवयंति ? हंता अत्थि, अत्थि णं भंते ! ते देवा जे अणंते कम्मंसे जहन्नेणं
एक्केण वा दोहिं वा तिहि वा उक्कोसेणं पंचहिं वाससयसहस्सेहि खवयंति ? हंता अत्थि,
कयरे णं भंते ! ते देवा जे अणंते कम्मंसे जहन्नेणं एक्केण वा दोहिं वा तिहि वा जाव
पंचहिं वाससएहिं खवयंति, कयरे णं भंते ! ते देवा जाव पंचहिं वाससहस्सेहिं
खवयंति, कयरे णं भंते ! ते देवा जाव पंचहिं वाससयसहस्सेहिं खवयंति ?
गोयमा ! वाणमंतरा देवा अणंते कम्मंसे एगेणं वाससएणं खवयंति, असुरिदव-
ज्जिया णं भवणवासी देवा अणंते कम्मंसे दोहि वाससएहिं खवयति, असुरकुमारा णं
देवा अणंते कम्मंसे ति(ती)हिं वाससएहिं खवयंति, गहगणनक्खत्तताराहवा जोइसिय

देवा अणंते कम्मंसे चउहिं वास जाव खवयंति, चंदिमसूरिया जोइसिंदा जोइसरा-
याणो अणंते कम्मंसे पंचहिं वाससएहिं खवयंति, सोहम्मीसाणगा देवा अणंते
कम्मंसे एणेणं वाससहस्सेणं (जाव) खवयंति, सणंकुमारमाहिंदगा देवा अणंते कम्मंसे
दोहिं वाससहस्सेहिं खवयंति, एवं एएणं अभिलावेणं वंभलोगलंतगा देवा अणंते
कम्मंसे तिहिं वाससहस्सेहिं खवयंति, महासुकसहस्सारगा देवा अणंते कम्मंसे चउहिं
वाससहस्सेहिं खवयंति, आणयपाणयआरणअच्चुयगा देवा अणंते कम्मंसे पंचहिं वास-
सहस्सेहिं खवयंति, हेट्टिमगेवेज्जगा देवा अणंते कम्मंसे एणेणं वाससयसहस्सेणं खव-
यंति, मज्झिमगेवेज्जगा देवा अणंते कम्मंसे दोहिं वाससयसहस्सेहिं खवयंति, उवरि-
मगेवेज्जगा देवा अणंते कम्मंसे तिहिं वाससयसहस्सेहिं खवयंति, विजयवेजयंतजयं-
तअपराजियगा देवा अणंते कम्मंसे चउहिं वाससयसहस्सेहिं खवयंति, सव्वट्टसिद्धगा
देवा अणंते कम्मंसे पंचहिं वाससयसहस्सेहिं खवयंति, एएणं गोयमा ! ते देवा जे
अणंते कम्मंसे जहन्नेणं एकेण वा दोहिं वा तिहिं वा उक्कोसेणं पंचहिं वाससएहिं खवयंति,
एएणं गोयमा ! ते देवा जाव पंचहिं वाससहस्सेहिं खवयंति, एएणट्टेणं गोयमा ! ते
देवा जाव पंचहिं वाससयसहस्सेहिं खवयंति । सेवं भंते ! सेवं भंते ! त्ति ॥ ६३७ ॥

अट्टारसमस्स सयस्स सत्तमो उद्देसो समत्तो ॥

रायगिहे जाव एवं वयासी-अणगारस्स णं भंते ! भावियप्पणो पुरओ दुहओ
जुगमायाए पेहाए रीयं रीयमाणस्स पायस्स अहे कुकुडपोए वा वट्टापोए वा कुलिं-
गच्छाए वा परियावज्जेजा, तस्स णं भंते ! कि इरियावहिया किरिया कज्जइ, संप-
राइया किरिया कज्जइ ? गोयमा ! अणगारस्स णं भावियप्पणो जाव तस्स णं इरि-
यावहिया किरिया कज्जइ, नो संपराइया किरिया कज्जइ, से केणट्टेणं भंते ! एवं
वुच्चइ० ? जहा सत्तमसए संवुडुद्देसए जाव अट्टो निक्खित्तो । सेवं भंते ! सेवं भंते !
त्ति जाव विहरइ ॥ तए णं समणे भगवं महावीरे बहिया जाव विहरइ ॥ ६३८ ॥
तेणं कालेणं तेणं समएणं रायगिहे जाव पुढाविसिलापट्टए, तस्स णं गुणसिलयस्स
उज्जाणस्स अदूरसामंते बहवे अन्नउत्थिया परिवसंति, तए णं समणे भगवं महावीरे
जाव समोसढे जाव परिसा पडिगया, तेणं कालेणं तेणं समएणं समणस्स भगवओ
महावीरस्स जेट्ठे अंतेवासी इंदभूई नामं अणगारे जाव उड्डं जाणू जाव विहरइ, तए
णं ते अन्नउत्थिया जेणेव भगवं गोयमे तेणेव उवागच्छन्ति उवागच्छइत्ता भगवं
गोयमं एवं वयासी-तुब्भे णं अज्जो ! तिविहं तिविहेणं असंजय जाव एगंतबाला यावि
भवह, तए णं भगवं गोयमे ते अन्नउत्थिए एवं वयासी-से केणं कारणेणं अज्जो !
अम्हे तिविहं तिविहेणं असंजय जाव एगंतबाला यावि भवामो ?, तए णं ते अन्न-

उत्थिया भगवं गोयमं एवं वयासी-तुब्भे णं अज्जो ! रीयं रीयमाणा पाणे पेच्चैह
अभिहणह जाव उ(व)द्देवह, तए णं तुब्भे पाणे पेच्चैमाणा जाव उद्देवमाणा तिविहं
तिविहेणं जाव एगंतवाला यावि भवह, तए णं भगवं गोयमे ते अन्नउत्थिए एवं
वयासी-नो खलु अज्जो ! अम्हे रीयं रीयमाणा पाणे पेच्चैमो जाव उद्देवमो, अम्हे
णं अज्जो ! रीयं रीयमाणा कायं च जोयं च रीयं च पडुच्च दिस्सा २ पदिस्सा २
वयामो, तए णं अम्हे दिस्सा दिस्सा वयमाणा पदिस्सा पदिस्सा वयमाणा णो पाणे
पेच्चैमो जाव णो उद्देवमो, तए णं अम्हे पाणे अपेच्चैमाणा जाव अणोद्देवमाणा तिविहं
तिविहेणं जाव एगंतपंडिया यावि भवामो, तुब्भे णं अज्जो ! अप्पणा चेव तिविहं
तिविहेणं जाव एगंतवाला यावि भवह, तए णं ते अन्नउत्थिया भगवं गोयमं एवं
वयासी-केणं कारणेणं अज्जो ! अम्हे तिविहं तिविहेणं जाव भवामो ?, तए णं भगवं
गोयमे ते अन्नउत्थिए एवं वयासी-तु(ज्झे)ब्भे णं अज्जो ! रीयं रीयमाणा पाणे पेच्चैह
जाव उद्देवह, तए णं तुब्भे पाणे पेच्चैमाणा जाव उद्देवमाणा तिविहं जाव एगंत-
वाला यावि भवह, तए णं भगवं गोयमे ते अन्नउत्थिए एवं पडिहणइ एवं पडिहणित्ता
जेणेव समणे भगवं महावीरे तेणेव उवागच्छइ २ ता समणं भगवं महावीरं वंदइ
नमंसइ वंदित्ता नमंसित्ता णच्चासन्ने जाव पज्जुवासइ, गोयमादि । समणे भगवं महा-
वीरे भगवं गोयमं एवं वयासी-सुट्ठु णं तुमं गोयमा ! ते अन्नउत्थिए एवं वयासी,
साहु णं तुमं गोयमा ! ते अन्नउत्थिए एवं वयासी, अत्थि णं गोयमा ! ममं वहवे
अंतेवासी समणा निगंथा छउमत्थे जे णं नो पभू एयं वागरणं वागरेत्तए जहा
णं तुमं, तं सुट्ठु णं तुमं गोयमा ! ते अन्नउत्थिए एवं वयासी, साहु णं तुमं गोयमा !
ते अन्नउत्थिए एवं वयासी ॥ ६३९ ॥ तए णं भगवं गोयमे समणेणं भगवया महा-
वीरेणं एवं वुत्ते समणे हट्ठुट्ठु० समणं भगवं महावीरं वंदइ नमंसइ वं० २ ता एवं
वयासी-छउमत्थे णं भंते ! मणुस्से परमाणुपोग्गलं कि जाणइ पासइ उदाहु न जाणइ
न पासइ ? गोयमा ! अत्थेगइए जाणइ पासइ, अत्थेगइए न जाणइ न पासइ, छउ-
मत्थे णं भंते ! मणूसे दुपएसियं खंवं किं जाणइ पासइ ? एवं चेव, एवं जाव असं-
खेज्जपएसियं, छउमत्थे णं भंते ! मणूसे अणंतपएसियं खंवं किं पुच्छा, गोयमा !
अत्थेगइए जाणइ पासइ १, अत्थेगइए जाणइ न पासइ २, अत्थेगइए न जाणइ
पासइ ३, अत्थेगइए न जाणइ न पासइ ४, आहोहिए णं भंते ! मणुस्से परमाणु-
पोग्गलं जहा छउमत्थे एवं आहोहिएवि जाव अणंतपएसियं, परमाहोहिए णं भंते !
मणूसे परमाणुपोग्गलं जं समयं जाणइ तं समयं पासइ, जं समयं पासइ तं समयं
जाणइ ? णो इणट्ठे समट्ठे, से केणट्ठेणं भंते ! एवं वुच्चइ परमाहोहिए णं मणूसे पर-

माणुपोग्गलं जं समयं जाणइ नो तं समयं पासइ, जं समयं पासइ नो तं समयं जाणइ ? गोयमा ! सागारे से नाणे भवइ, अणागारे से दंसणे भवइ, से तेणट्ठेणं जाव नो तं समयं जाणइ, एवं जाव अणंतपएसियं । केवली णं भंते ! मणुस्से परमाणुपोग्गलं जहा परमाहोहिए तहा केवलीवि जाव अणंतपएसियं ॥ सेवं भंते ! सेवं भंते ! त्ति ॥ ६४० ॥ **अट्टारसमस्स सयस्स अट्टमो उद्देसो समत्तो ॥**

रायगिहे जाव एवं वयासी-अत्थि णं भंते ! भवियदव्वनेरइया २ ? हंता अत्थि, से केणट्ठेणं भंते ! एवं वुच्चइ भवियदव्वनेरइया २ ? गोयमा ! जे भविए पंचिंदियतिरिक्खजोणिए वा मणुस्से वा नेरइएसु उववज्जितए से तेणट्ठेणं, एवं जाव थणियकुमारा, अत्थि णं भंते ! भवियदव्वपुढविकाइया २ ? हंता अत्थि, से केणट्ठेणं भंते ! एवं ० ? गोयमा ! जे भविए तिरिक्खजोणिए वा मणुस्से वा देवे वा पुढविकाइएसु उववज्जितए से तेणट्ठेणं, आउक्काइयवणस्सइकाइयाणं एवं चेव उववाओ, तेउवाउबेइंदियतेइंदियचउरिदियाण य जे भविए तिरिक्खजोणिए वा मणुस्से वा पंचिंदियतिरिक्खजोणियाणं जे भविए नेरइए वा तिरिक्खजोणिए वा मणुस्से वा देवे वा पंचिंदियतिरिक्खाजोणिए(वा)सु उववज्जितए एवं मणुस्सावि, वाणमंतरजोइसियवेमाणियाणं जहा नेरइयाणं ॥ भवियदव्वनेरइयस्स णं भंते ! केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेणं पुव्वकोडी, भवियदव्वअसुरकुमारस्स णं भंते ! केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेणं तिज्जि पलिओवमाइं, एवं जाव थणियकुमारस्स । भवियदव्वपुढविकाइयस्स णं पुच्छा, गोयमा ! जहन्नेणं अंतोमुहुत्तं उक्कोसेणं साइरेगाइं दो सागरोवमाइं, एवं आउक्काइयस्सवि, तेउवाऊ जहा नेरइयस्स, वणस्सइकाइयस्स जहा पुढविकाइयस्स, बेइंदियस्स तेइंदियस्स चउरिदियस्स जहा नेरइयस्स, पंचिंदियतिरिक्खजोणियस्स - जहन्नेणं अंतोमुहुत्तं उक्कोसेणं तेत्तीसं सागरोवमाइं, एवं मणुस्सावि, वाणमंतरजोइसियवेमाणियस्स जहा असुरकुमारस्स ॥ सेवं भंते ! सेवं भंते ! त्ति ॥ ६४१ ॥ **अट्टारसमस्स सयस्स नवमो उद्देसो समत्तो ॥**

रायगिहे जाव एवं वयासी-अणगारे णं भंते ! भवियप्पा असिधारं वा खुरधारं वा ओगाहेज्जा ? हंता ओगाहेज्जा, से णं तत्थ छिज्जेज्ज वा भिज्जेज्ज वा ? णो इणट्ठे समट्ठे, णो खलु तत्थ सत्थं कमइ, एवं जहा पंचमसए परमाणुपोग्गलवत्तव्वया जाव अणगारे णं भंते ! भवियप्पा उदावत्तं वा जाव नो खलु तत्थ सत्थं कमइ ॥ ६४२ ॥ परमाणुपोग्गले णं भंते ! वाउयाएणं फुडे वाउयाए वा परमाणुपोग्गलेणं फुडे ? गोयमा ! परमाणुपोग्गले वाउयाएणं फुडे नो वाउयाए परमाणुपोग्गलेणं

फुडे । दुपएसिए णं भंते ! खंधे वाउयाएणं एवं चेव, एवं जाव असंखेज्जपएसिए ॥
अणंतपएसिए णं भंते ! खंधे वाउयाए० पुच्छा, गोयमा ! अणंतपएसिए खंधे वाउया-
एणं फुडे वाउयाए अणंतपएसिएणं खंधेणं सिय फुडे सिय नो फुडे ॥ वत्थी णं भंते !
वाउयाएणं फुडे वाउयाए वत्थिणा फुडे ? गोयमा ! वत्थी वाउयाएणं फुडे नो
वाउयाए वत्थिणा फुडे ॥६४३॥ अत्थि णं भंते ! इमीसे रयणप्पभाए पुढवीए अहे-
दव्वाइं वन्नओ कालनीललोहियहालिदुक्खिळाइं, गंधओ सुब्भिगंधाइं दुब्भिगंधाइं,
रसओ तित्तकडुयकसायअंविममहुराइं, फासओ कक्खडमउयगुरुयलहुयसीयउसिण-
निद्धलुक्खाइं, अन्नमन्नवद्धाइं अन्नमन्नपुट्ठाइं जाव अन्नमन्नघडत्ताए चिट्ठंति ? हंता
अत्थि, एवं जाव अहेसत्तमाए । अत्थि णं भंते ! सोहम्मस्स कप्पस्स अहे० एवं
चेव, एवं जाव ईसिप्पब्भाराए पुढवीए । सेवं भंते ! २ त्ति जाव विहरइ । तए णं
समणे भगवं महावीरे जाव वहिया जणवयविहारं विहरइ ॥६४४॥ तेणं कालेणं तेणं
समएणं वाणियगामे नामं नयरे होत्था वन्नओ, दूइपलासए उज्जाणे वन्नओ, तत्थ
णं वाणियगामे नयरे सोमिले नामं माहणे परिवसइ, अट्ठे जाव अपरिभूए, रिउव्वेय
जाव सुपरिनिट्ठिए पंचण्हं खंडियसयाणं सयस्स कुडुंवस्स आहेवच्चं जाव विहरइ,
तए णं समणे भगवं महावीरे जाव समोसडे जाव परिसा पज्जुवासइ, तए णं तस्स
सोमिलस्स माहणस्स इमीसे कहाए लद्धट्ठस्स समाणस्स अयमेयारुवे जाव समुप्प-
ज्जित्था-एवं खलु समणे णायपुत्ते पुव्वाणुपुव्वि चरमाणे गामाणुगामं दूइजमाणे
सुहंसुहेणं जाव इहमागए जाव दूइपलासए उज्जाणे अहापडिरुवं जाव विहरइ, तं
गच्छामि णं समणस्स नायपुत्तस्स अंतियं पाउब्भवामि, इमाइं च णं एयारुवाइं
अट्ठाइं जाव वागरणाइं पुच्छिस्सामि, तं जइ मे से इमाइं एयारुवाइं अट्ठाइं जाव वागर-
णाइं वागरेहिइ तओ णं वं(दी)दिहामि नमं(सी)सिहामि जाव पज्जुवासिहामि, अहमेयं
से इमाइं अट्ठाइं जाव वागरणाइं नो वागरेहिइ तो णं एएहि चेव अट्ठेहि य जाव
वागरणेहि य निप्पट्ठपसिणवागरणं करेस्सामित्तिकट्ठु एवं सपेहेइ २ ता ण्हाए जाव
सरीरे साओ गिहाओ पडिनिक्खमइ २ ता पायविहारचारेणं एगेणं खंडियसएण
सद्धिं संपरिवुडे वाणियगामं नयरं मज्झमज्झेणं निग्गच्छइ २ ता जेणेव दूइपलासए
उज्जाणे जेणेव समणे भगवं महावीरे तेणेव उवागच्छइ २ ता समणस्स भगवओ
महावीरस्स अदूरसामंते ठिच्चा समणं भगवं महावीरं एवं वयासी-जत्ता ते भंते !
जवणिज्जं ते भंते ! अव्वावाहं ते भंते ! फासुयविहारं ते भंते ! ? सोमिला ! जत्तावि मे,
जवणिज्जं पि मे, अव्वावाहं पि मे, फासुयविहारं पि मे, कि ते भंते ! जत्ता ? सोमिला !
जं मे तवनियमसंजमसज्झायज्झाणावस्सयमाइएसु जोगेसु जयणा सेत्तं जत्ता, कि ते

भंते ! जवणिजं ? सोमिला ! जवणिजे दुविहे प०, तं०—इंदियजवणिजे य नोइंदिय-
जवणिजे य, से कि तं इंदियजवणिजे ? इंदियजवणिजे जं मे सोइंदियचर्किखदियघाणि-
दियजिब्भदियफासिदियाइं निरुवहयाइं वसे वटंति सेत्तं इंदियजवणिजे, से किं तं
नोइंदियजवणिजे ? २ जं मे कोहमाणमायालोभा वोच्छिन्ना नो उदीरेति सेत्तं नोइंदिय-
जवणिजे, सेत्तं जवणिजे, से किं ते भंते ! अवावाहं ? सोमिला ! जं मे वाइयपित्ति-
यसिंभियसन्निवाइया विविहा रोगायंका सरीरगया दोसा उवसंता नो उदीरेति सेत्तं
अवावाहं, किं ते भंते ! फासुयविहारं ? सोमिला ! जन्नं आरामेसु उज्जाणेषु देवकुलेसु
सभासु पवासु इत्थीपसुपंडगविवज्जियासु वसहीसु फासुएसणिजं पीढफलगसेज्जासंथा-
रगं उवसंपज्जिताणं विहरामि सेत्तं फासुयविहारं ॥ सरिसवा ते भंते ! किं भक्खेया
अभक्खेया ? सोमिला ! सरिसवा भक्खेयावि अभक्खेयावि, से केणट्ठेणं भंते !
एवं वुच्चइ सरिसवा भक्खेयावि अभक्खेयावि ? से नूणं ते सोमिला ! वंभन्नएसु
नएसु दुविहा सरिसवा पन्नत्ता, तंजहा—मित्तसरिसवा य धन्नसरिसवा य, तत्थ णं
जे ते मित्तसरिसवा ते तिविहा प०, तं०—सहजायया सहवट्ठि(य)या सहपंसुकीलि-
(य)या, ते णं समणाणं निग्गंथाणं अभक्खेया, तत्थ णं जे ते धन्नसरिसवा ते
दुविहा प०, तं०—सत्थपरिणया य असत्थपरिणया य, तत्थ णं जे ते असत्थपरि-
णया ते णं समणाणं निग्गंथाणं अभक्खेया, तत्थ णं जे ते सत्थपरिणया ते
दुविहा प०, तं०—एसणिज्जा य अणेसणिज्जा य, तत्थ णं जे ते अणेसणिज्जा ते
समणाणं निग्गंथाणं अभक्खेया, तत्थ णं जे ते एसणिज्जा ते दुविहा प०, तं०—
जाइया य अजाइया य, तत्थ णं जे ते अजाइया ते णं समणाणं निग्गंथाणं अभ-
क्खेया, तत्थ णं जे ते जाइया ते दुविहा प०, तं०—लद्धा य अलद्धा य, तत्थ
णं जे ते अलद्धा ते णं समणाणं निग्गंथाणं अभक्खेया, तत्थ णं जे ते लद्धा ते
णं समणाणं निग्गंथाणं भक्खेया, से तेणट्ठेणं सोमिला ! एवं वुच्चइ जाव अभक्खे-
यावि । मासा ते भंते ! किं भक्खेया अभक्खेया ? सोमिला ! मासा मे भक्खेयावि
अभक्खेयावि, से केणट्ठेणं भंते ! जाव अभक्खेयावि ? से नूणं ते सोमिला !
वंभन्नएसु नएसु दुविहा मासा प०, तं०—दव्वमासा य कालमासा य, तत्थ णं जे ते
कालमासा ते णं सावणादीया आसाढपज्जवसाणा दुवालस प०, तं०—सावणे भद्दव
आसोए कत्तिए मग्गसिरे पोसे माहे फागुणे चेत्ते वइसाहे जेट्ठामूले आसाढे, ते णं
समणाणं निग्गंथाणं अभक्खेया, तत्थ णं जे ते दव्वमासा ते दुविहा प०, तं०—
अत्यमासा य धण्णमासा य, तत्थ णं जे ते अत्यमासा ते दुविहा प०, तं०—
सुवन्नमासा य रुपमासा य, ते णं समणाणं निग्गंथाणं अभक्खेया, तत्थ णं जे ते

धन्नमासा ते दुविहा प०, तं०-सत्थपरिणया य अर्सत्थपरिणया य, एवं जहा धन्न-
सरिसवा जाव से तेणट्ठेणं जाव अभक्खेयावि । कुलत्था ते भंते ! किं भक्खेया-
अभक्खेया ? सोमिला ! कुलत्था मे भक्खेयावि अभक्खेयावि, से केणट्ठेणं जाव
अभक्खेयावि ? से नूणं ते सोमिला ! वंभन्नएसु नएसु दुविहा कुलत्था प०, तं०-
इत्थिकुलत्था य धन्नकुलत्था य, तत्थ णं जे ते इत्थिकुलत्था ते तिविहा प०, तंजहा-
कुलकन्नयाइ वा कुलवहू(धू)याइ वा कुलमाउयाइ वा, ते णं समणाणं निग्गं-
थाणं अभक्खेया, तत्थ णं जे ते धन्नकुलत्था एवं जहा धन्नसरिसवा, से तेणट्ठेणं
जाव अभक्खेयावि ॥ ६४५ ॥ एगे भवं दुवे भवं अक्खए भवं अव्वए भवं अव-
ट्ठिए भवं अणेगभूयभावभविए भवं ? सोमिला ! एगेवि अहं जाव अणेगभूयभाव-
भविएवि अहं, से केणट्ठेणं भंते ! एवं वुच्चइ जाव भविएवि अहं ? सोमिला ! द्व-
ट्ठयाए एगे अहं, नाणदंसणट्ठयाए दुविहे अहं, पएसट्ठयाए अक्खएवि अहं अव्वएवि-
अहं अवट्ठिएवि अहं, उवओगट्ठयाए अणेगभूयभावभविएवि अहं, से तेणट्ठेणं जाव
भविएवि अहं, एत्थ णं से सोमिले माहणे संबुद्धे, तए णं से समणं भगवं महावीरं जहा
खंदओ जाव से जहेयं तुब्भे वदह जहा णं देवाणुप्पियाणं अंतियं वहवे राईसर
एवं जहा रायप्पसेणइजे चित्तो जाव दुवालसविहं सावगधम्मं पडिवज्जइ पडिवज्जिता
समणं भगवं महावीरं वंदइ नमंसइ वं० २ ता जाव पडिगए, तए णं से सोमिले माहणे
समणोवासए जाए अभिगयजीवा जाव विहरइ । भंते ! त्ति भगवं गोयमे समणं भगवं
महावीरं वंदइ नमंसइ वं० २ ता एवं वयासी-पभू णं भंते ! सोमिले माहणे
देवाणुप्पियाणं अंतिए मुंडे भविता जहेव संखे तहेव निरवसेसं जाव अतं काहिइ ।
सेवं भंते ! २ त्ति जाव विहरइ ॥ ६४६ ॥ अट्टारसमस्स सयस्स दसमो
उद्देसो समत्तो ॥ अट्टारसमं सयं समत्तं ॥

लेस्सा य १ गम्भ २ पुढवी ३ महासवा ४ चरम ५ दीव ६ भवणा ७ य ।
निव्वत्ति ८ करण ९ वणचरसुरा य १० एगूणवीसइमे ॥ १ ॥ रायगिहे जाव एवं
वयासी-कइ णं भंते ! लेस्साओ पन्नत्ताओ ? गोयमा ! छल्लेसाओ पन्नत्ताओ, तंजहा-
एवं जहा पन्नवणाए चउत्थो लेसुद्देसओ भाणियव्वो निरवसेसो । सेवं भंते ! २ त्ति
॥ ६४७ ॥ एगूणवीसइमस्स सयस्स पढमो उद्देसो समत्तो ॥

कइ णं भंते ! लेस्साओ प० ? एवं जहा पन्नवणाए गम्भुद्देसो सो चेव निरवसेसो
भाणियव्वो । सेवं भंते ! सेवं भंते ! त्ति (१९-२) ॥ ६४८ ॥ रायगिहे जाव एवं
वयासी-सिय भंते ! जाव चत्तारि पंच पुढविकाइया एगयओ साहारणसरीरं वंधति
एग० २ ता तओ पच्छा आहारंति वा परिणामंति वा सरीरं वा वंधंति ? नो इणट्ठे

न्समट्टे, पुढविकाइयाणं पत्तेयाहारां पत्तेयपरिणामा पत्तेयं सरीरं बंधंति प० २ ता
 त्तओ पच्छा आहारेंति वा परिणामेंति वा सरीरं वा बंधंति १, तेसि णं भंते !
 जीवाणं कइ लेस्साओ प० ? गोयमा ! चत्तारि लेस्साओ प०, तं०-कण्हलेस्सा,
 नीललेस्सा, काउलेस्सा, तेउलेस्सा २, ते णं भंते ! जीवा किं सम्मद्दिट्ठी मिच्छादिट्ठी
 सम्मामिच्छादिट्ठी ? गोयमा ! मिच्छादिट्ठी नो सम्मद्दिट्ठी नो सम्मामिच्छादिट्ठी ३,
 ते णं भंते ! जीवा किं नाणी अन्नाणी ? गोयमा ! नो नाणी अन्नाणी, नियमा
 दुअन्नाणी, तं०-मइअन्नाणी य सुयअन्नाणी य ४, ते णं भंते ! जीवा किं मणजोगी
 वइजोगी कायजोगी ? गोयमा ! नो मणजोगी, नो वइजोगी, कायजोगी ५, ते णं
 भंते ! जीवा किं सागारोवउत्ता अणागारोवउत्ता ? गोयमा ! सागारोवउत्तावि अणा-
 गारोवउत्तावि ६, ते णं भंते ! जीवा किमाहारमाहारेंति ? गोयमा ! दव्वओ णं
 अंगंतपएसियाइं दव्वाइं एवं जहा पन्नवणाए पढमे आहारहेसए जाव सव्वप्पण्याए
 आहारमाहारेंति ७, ते णं भन्ते ! जीवा जमाहारेंति तं चिज्जंति, जं नो आहारेंति
 तं नो चिज्जंति, चिन्ने वा से उद्दाइ पलिसप्पइ वा ? हंता गोयमा ! ते णं जीवा
 जमाहारेंति तं चिज्जंति, जं नो जाव पलिसप्पइ वा ८, तेसि णं भंते ! जीवाणं एवं
 सन्नाइ वा पन्नाइ वा मणोइ वा वईइ वा अम्हे णं आहारमाहारेमो ? णो इणट्टे
 समट्टे, आहारेंति पुण ते ९, तेसि णं भंते ! जीवाणं एवं सन्नाइ वा जाव वईइ वा
 अम्हे णं इट्ठाणिट्टे फासेयरे वेदेमो पडिसंवेदेमो ? णो इणट्टे समट्टे, पडिसंवेदेंति पुण
 ते १०, ते णं भंते ! जीवा किं पाणाइवाए उवक्खाइज्जंति, मुसावाए अदिन्नादाणे
 जाव मिच्छादंसणसल्ले उवक्खाइज्जंति ? गोयमा ! पाणाइवाएवि उवक्खाइज्जंति जाव
 मिच्छादंसणसल्लेवि उवक्खाइज्जंति, जेसिपिय णं जीवाणं ते जीवा एवमाहिज्जंति
 तेसिपिय णं जीवाणं नो वि(ण्णा)ज्जाए नाणत्ते ११ ॥ ते णं भंते ! जीवा कओहिंतो
 उववज्जंति किं नेरइएहिंतो उववज्जंति ? एवं जहा वक्कंतीए पुढविकाइयाणं उववाओ तहा
 भाणियव्वो १२ । तेसि णं भंते ! जीवाणं केवइयं कालं ठिई प० ? गोयमा ! जह-
 नेणं अतोमुहुत्तं उक्कोसेणं वावीसं वाससहस्साइं १३ ॥ तेसि णं भंते ! जीवाणं कइ
 समुग्घाया प० ? गोयमा ! तओ समुग्घाया प०, तं०-वेयणासमुग्घाए, कसायसमु-
 ग्घाए, मारणंतियसमुग्घाए । ते णं भंते ! जीवा मारणंतियसमुग्घाएणं किं समोहया
 मरंति असमोहया मरंति ? गोयमा ! समोहयावि मरंति, असमोहयावि मरंति ॥ ते
 णं भंते ! जीवा अणंतरं उव्वट्ठिता कहिं गच्छंति कहिं उववज्जंति ? एवं उव्वट्ठणा
 जहा वक्कंतीए १४ । सिय भंते ! जाव चत्तारि पंच आउक्काइया एगयओ साहा-
 रणं सरीरं बंधंति २ ता तओ पच्छा आहारेंति एवं जो पुढविकाइयाणं गमो

सो चेव भाणियव्वो जाव उव्वट्ठंति, नवरं ठिई सत्तवाससहस्साइं उक्कोसेणं सेसं तं चेव । सिय भंते ! जाव चत्तारि पंच तेउक्काइया एवं चेव नवरं उववाओ ठिई उव्वट्ठणा य जहा पन्नवणाए सेसं तं चेव । वाउकाइयाणं एवं चेव नाणत्तं नवरं चत्तारि समुग्घाया । सिय भंते ! जाव चत्तारि पंच वणस्सइकाइया पुच्छा, गोयमा ! णो इण्टे समट्ठे, अणंता वणस्सइकाइया एगयओ साहारणसरीरं वंधंति एग० २ त्ता तओ पच्छा अहारेति वा परिणामेति वा सेसं जहा तेउकाइयाणं जाव उव्वट्ठंति, नवरं आहारो नियमं छद्दिंति, ठिई जहन्नेणं अंतोमुहुत्तं उक्कोसेणवि अंतोमुहुत्तं, सेसं तं चेव ॥ ६४९ ॥ एएसि णं भंते ! पुढविकाइयाणं आउतेउवाउवणस्सइकाइयाणं सुहुमाणं वायरणं पज्जत्तगाणं अपज्जत्तगाणं जाव जहन्नुक्कोसियाए ओगाहणाए कयरे २ जाव विसेसाहिया वा ? गोयमा ! सव्वत्थोवा सुहुमनिगोयस्स अपज्जत्तगस्स जहन्निया ओगाहणा १, सुहुमवाउकाइयस्स अपज्जत्तगस्स जहन्निया ओगाहणा असंखेज्जगुणा २, सुहुमतेउअपज्जत्तगस्स जहणिया ओगाहणा असंखेज्जगुणा ३, सुहुमआउअपज्जत्तगस्स जहणिया ओगाहणा असंखेज्जगुणा ४, सुहुमपुढविअपज्जत्तगस्स जहन्निया ओगाहणा असंखेज्जगुणा ५, वायरवाउकाइयस्स अपज्जत्तगस्स जहन्निया ओगाहणा असंखेज्जगुणा ६, वायरतेउअपज्जत्तगस्स जहन्निया ओगाहणा असंखेज्जगुणा ७, वायरआउअपज्जत्तगस्स जहन्निया ओगाहणा असंखेज्जगुणा ८, वायरपुढविकाइयअपज्जत्तगस्स जहन्निया ओगाहणा असंखेज्जगुणा ९, पत्तेयसरीरवायरवणस्सइकाइयस्स वायरनिगोयस्स एएसि णं पज्जत्तगाणं एएसि णं अपज्जत्तगाणं जहन्निया ओगाहणा दोण्हवि तुल्ला असंखेज्जगुणा १०-११, सुहुमनिओयस्स पज्जत्तगस्स जहन्निया ओगाहणा असंखेज्जगुणा १२, तस्स चेव अपज्जत्तगस्स उक्कोसिया ओगाहणा विसेसाहिया १३, तस्स चेव पज्जत्तगस्स उक्कोसिया ओगाहणा विसेसाहिया १४, सुहुमवाउकाइयस्स पज्जत्तगस्स जहणिया ओगाहणा असंखेज्जगुणा १५, तस्स चेव अपज्जत्तगस्स उक्कोसिया ओगाहणा विसेसाहिया १६, तस्स चेव पज्जत्तगस्स उक्कोसिया ओगाहणा विसेसाहिया १७, एवं सुहुमतेउकाइयस्स विसे० १८।१९।२०। एवं सुहुमआउकाइयस्सवि २१।२२।२३। एवं सुहुमपुढविकाइयस्स विसेसाहिया २४।२५।२६। एवं वायरवाउकाइयस्स विसेसाहिया २७।२८। २९। एवं वायरतेउकाइयस्स विसेसाहिया ३०।३१।३२। एवं वायरआउकाइयस्स विसेसाहिया ३३।३४।३५। एवं वायरपुढविकाइयस्स विसेसाहिया ३६।३७।३८। सव्वेसिं तिविहेणं गमेणं भाणियव्वं, वायरनिगोयस्स पज्जत्तगस्स जहन्निया ओगाहणा असंखेज्जगुणा ३९, तस्स चेव अपज्जत्तगस्स उक्कोसिया ओगाहणा विसेसा-

हिया ४०, तस्स चेव पज्जत्तगस्स उक्कोसिया ओगाहणा विसेसाहिया ४१, पत्ते-
यसरीरवायरवणस्सइकाइयस्स पज्जत्तगस्स जहणिया ओगाहणा असंखेज्जगुणा ४२,
तस्स चेव अपज्जत्तगस्स उक्कोसिया ओगाहणा असंखेज्जगुणा ४३, तस्स चेव
पज्जत्तगस्स उक्कोसिया ओगाहणा असंखेज्जगुणा ४४ ॥ ६५० ॥ एयस्स णं भंते !
पुढविकाइयस्स आउक्काइयस्स तेउकाइयस्स वाउकाइयस्स वणस्सइकाइयस्स
कयरे काए सव्वसुहुमे कयरे काए सव्वसुहुमतराए ? गोयमा ! वणस्सइकाइए
सव्वसुहुमे वणस्सइकाइए सव्वसुहुमतराए १, एयस्स णं भंते ! पुढविकाइयस्स
आउक्काइयस्स तेउकाइयस्स वाउक्काइयस्स कयरे काए सव्वसुहुमे कयरे काए
सव्वसुहुमतराए ? गोयमा ! वाउकाइए सव्वसुहुमे वाउकाइए सव्वसुहुमतराए
२, एयस्स णं भंते ! पुढविकाइयस्स आउक्काइयस्स तेउकाइयस्स कयरे काए
सव्वसुहुमे कयरे काए सव्वसुहुमतराए ? गोयमा ! तेउकाइए सव्वसुहुमे तेउकाइए
सव्वसुहुमतराए ३, एयस्स णं भंते ! पुढविकाइयस्स आउक्काइयस्स कयरे काए
सव्वसुहुमे कयरे काए सव्वसुहुमतराए ? गोयमा ! आउक्काइए सव्वसुहुमे आउक्काइए
सव्वसुहुमतराए ४ ॥ एयस्स णं भंते ! पुढविकाइयस्स आउक्काइयस्स तेउकाइयस्स
वाउक्काइयस्स वणस्सइकाइयस्स कयरे काए सव्ववादरे कयरे काए सव्ववादरत-
राए ? गोयमा ! वणस्सइकाइए सव्ववादरे वणस्सइकाइए सव्ववादरतराए १, एयस्स
णं भंते ! पुढविकाइयस्स आउक्काइयस्स तेउकाइयस्स वाउक्काइयस्स कयरे काए
सव्ववादरे कयरे काए सव्ववादरतराए ? गोयमा ! पुढविकाइए सव्ववादरे पुढविकाइए
सव्ववादरतराए २, एयस्स णं भंते ! आउक्काइयस्स तेउकाइयस्स वाउक्काइयस्स
कयरे काए सव्ववादरे कयरे काए सव्ववादरतराए ? गोयमा ! आउक्काइए सव्ववादरे
आउक्काइए सव्ववादरतराए ३, एयस्स णं भंते ! तेउकाइयस्स वाउक्काइयस्स कयरे
काए सव्ववादरे कयरे काए सव्ववादरतराए ? गोयमा ! तेउकाइए सव्ववादरे तेउकाइए
सव्ववादरतराए ४ ॥ केमहालए णं भंते ! पुढविसरीरे पन्नत्ते ? गोयमा ! अणंताणं
सुहुमवणस्सइकाइयाणं जावइया सरीरा से एगे सुहुमवाउसरीरे, असंखेज्जाणं सुहुम-
वाउसरीराणं जावइया सरीरा से एगे सुहुमतेउसरीरे, असंखेज्जाणं सुहुमतेउकाइय-
सरीराणं जावइया सरीरा से एगे सुहुमआउसरीरे, असंखेज्जाणं सुहुमआउक्काइय-
सरीराणं जावइया सरीरा से एगे सुहुमपुढविसरीरे, असंखेज्जाणं सुहुमपुढविकाइय-
सरीराणं जावइया सरीरा से एगे वायरवाउसरीरे, असंखेज्जाणं वायरवाउक्काइयाणं
जावइया सरीरा से एगे वायरतेउसरीरे, असंखेज्जाणं वायरतेउकाइयाणं जावइया
सरीरा से एगे वायरआउसरीरे, असंखेज्जाणं वायरआउक्काइयाणं जावइया सरीरा

से एगे वायरपुढविसरीरे, एमहालए णं गोयमा । पुढविसरीरे पन्नत्ते ॥ ६५१ ॥
 पुढविकाइयस्स णं भंते ! केमहालिया सरीरोगाहणा प० ? गोयमा ! से जहानामए
 रत्तो चाउरंतचक्कवट्टिस्स वन्नगपेसिया तरुणी वलवं जुगवं जुवाणी अप्पायंका
 वन्नओ जाव निउणसिप्पोवगया नवरं चम्मेट्टुदुहणमुट्ठियसमाहयणिचियगतकाया न
 भण्णइ सैसं तं चेव जाव निउणसिप्पोवगया तिक्खाए वडरामईए सण्हकरणीए
 तिक्खेणं वडरामएणं वट्ठावरएणं एगं महं पुढविकाइयं जउगोलासमाणं गहाय पडि-
 साहरिय २ पडिसंखिविय २ जाव इणामेवत्तिकट्टु तिसत्तखुत्तो उप्पीसेज्जा, तत्थ णं
 गोयमा ! अत्थेगइया पुढविकाइया आलिद्धा, अत्थेगइया पुढविकाइया नो आलिद्धा,
 अत्थेगइया सघट्टि(ट्टि)या, अत्थेगइया नो संघट्टि(ट्टि)या, अत्थेगइया परियाविया,
 अत्थेगइया नो परियाविया, अत्थेगइया उद्विया, अत्थेगइया नो उद्विया, अत्थेगइया
 पिट्ठा, अत्थेगइया नो पिट्ठा, पुढविकाइयस्स णं गोयमा ! एमहालिया सरीरोगाहणा
 प० ॥ पुढविकाइए णं भंते ! अक्कंते समाणे केरिसियं वेयणं पच्चणुब्भवमाणे विह-
 रइ ? गोयमा ! से जहानामए-केइ पुरिसे तरुणे वलवं जाव निउणसिप्पोवगए एगं
 पुरिसं जुन्नं जराजजरियदेहं जाव दुव्वलं किलंतं जमलपाणिणा मुद्धाणंसि अभिह-
 णिज्जा, से णं गोयमा ! पुरिसे तेणं पुरिसेणं जमलपाणिणा मुद्धाणंसि अभिहए समाणे
 केरिसियं वेयणं पच्चणुब्भवमाणे विहरइ ? अणिट्ठं समणाउसो !, तस्स णं गोयमा !
 पुरिसस्स वेयणाहिंतो पुढविकाइए अक्कंते समाणे एत्तो अणिट्ठतरियं चेव अकंततरियं
 चेव जाव अमणामतरियं चेव वेयणं पच्चणुब्भवमाणे विहरइ । आउयाए णं भंते !
 संघट्टिए समाणे केरिसियं वेयणं पच्चणुब्भवमाणे विहरइ ? गोयमा ! जहा पुढविकाइए
 एवं आउकाएवि, एवं तेउकाएवि, एवं वाउकाएवि, एवं वणस्सइकाएवि जाव विहरइ,
 सेवं भंते ! २ त्ति ॥ ६५२ ॥ एगूणवीसइमे सए तइओ उद्देसो समत्तो ॥

सिय भंते ! नेरइया महासवा महाकिरिया महावेयणा महानिज्जरा ? गोयमा !
 णो इणट्ठे समट्ठे १, सिय भंते ! नेरइया महासवा महाकिरिया महावेयणा अप्प-
 निज्जरा ? हंता सिया २, सिय भंते ! नेरइया महासवा महाकिरिया अप्पवेयणा
 महानिज्जरा ? गोयमा ! णो इणट्ठे समट्ठे ३, सिय भंते ! नेरइया महासवा महा-
 किरिया अप्पवेयणा अप्पनिज्जरा ? गोयमा ! णो इणट्ठे समट्ठे ४, सिय भंते !
 नेरइया महासवा अप्पकिरिया महावेयणा महानिज्जरा ? गोयमा ! णो इणट्ठे समट्ठे
 ५, सिय भंते ! नेरइया महासवा अप्पकिरिया महावेयणा अप्पनिज्जरा ? गोयमा !
 नो इणट्ठे समट्ठे ६, सिय भंते ! नेरइया महासवा अप्पकिरिया अप्पवेयणा
 महानिज्जरा ? नो इणट्ठे समट्ठे ७, सिय भंते ! नेरइया महासवा अप्पकिरिया

अप्पवेयणा अप्पनिज्जरा ? णो इण्ठे सम्भे ८, सिय भंते ! नेरइया अप्पासवा
 महाकिरिया महावेयणा महानिज्जरा ? नो इण्ठे सम्भे ९, सिय भंते ! नेरइया
 अप्पासवा महाकिरिया महावेयणा अप्पनिज्जरा ? नो इण्ठे सम्भे १०, सिय भंते !
 नेरइया अप्पासवा महाकिरिया अप्पवेयणा महानिज्जरा ? नो इण्ठे सम्भे ११,
 सिय भंते ! नेरइया अप्पासवा महाकिरिया अप्पवेयणा अप्पनिज्जरा ? णो इण्ठे
 सम्भे १२, सिय भंते ! नेरइया अप्पासवा अप्पकिरिया महावेयणा महानिज्जरा ?
 नो इण्ठे सम्भे १३, सिय भंते ! नेरइया अप्पासवा अप्पकिरिया महावेयणा
 अप्पनिज्जरा ? नो इण्ठे सम्भे १४, सिय भंते ! नेरइया अप्पासवा अप्पकिरिया
 अप्पवेयणा महानिज्जरा ? नो इण्ठे सम्भे १५, सिय भंते ! नेरइया अप्पासवा
 अप्पकिरिया अप्पवेयणा अप्पनिज्जरा ? णो इण्ठे सम्भे १६, एए सोलस भंगा ।
 सिय भंते ! असुरकुमारा महासवा महाकिरिया महावेयणा महानिज्जरा ? णो
 इण्ठे सम्भे, एवं चउत्थो भंगो भाणियव्वो, सेसा पन्नरस भंगा खोडेयव्वा, एवं
 जाव थणियकुमारा, सिय भंते ! पुढविकाइया महासवा महाकिरिया महावेयणा
 महानिज्जरा ? हंता सिया, एवं जाव सिय भंते ! पुढविकाइया अप्पासवा अप्पकिरिया
 अप्पवेयणा अप्पनिज्जरा ? हंता सिया, एवं जाव मणुस्सा, वाणमंतरजोइसिय-
 वेमाणिया जहा असुरकुमारा, सेवं भंते ! सेवं भंते ! त्ति ॥ ६५३ ॥ एगूणवी-
 सइमस्स सयस्स चउत्थो उद्देसो समत्तो ॥

अत्थि णं भंते ! चरिमावि नेरइया परमावि नेरइया ? हंता अत्थि, से नूणं भंते !
 चरिमेहिंतो नेरइएहिंतो परमा नेरइया महाकम्मतराए चेव महाकिरियतराए चेव
 महासवतराए चेव महावेयणतराए चेव, परमेहिंतो वा नेरइएहिंतो चरमा नेरइया
 अप्पकम्मतराए चेव अप्पकिरियतराए चेव अप्पासवतराए चेव अप्पवेयणतराए
 चेव ? हंता गोयमा ! चरमेहिंतो नेरइएहिंतो परमा जाव महावेयणतराए चेव,
 परमेहिंतो नेरइएहिंतो चरमा नेरइया जाव अप्पवेयणतरा चेव, से केण्ठेणं भंते ! एवं
 वुच्चइ जाव अप्पवेयणतरा चेव ? गोयमा ! ठिइं पडुच्च, से तेण्ठेणं गोयमा ! एवं
 वुच्चइ जाव अप्पवेयणतरा चेव । अत्थि णं भंते ! चरमावि असुरकुमारा परमावि
 असुरकुमारा ? एवं चेव, नवरं विवरीयं भाणियव्वं, परमा अप्पकम्मा, चरमा
 महाकम्मा, सेसं तं चेव जाव थणियकुमारा ताव एवमेव, पुढविकाइया जाव
 मणुस्सा एए जहा नेरइया, वाणमंतरजोइसियवेमाणिया जहा असुरकुमारा ॥ ६५४ ॥
 कइविहा णं भंते ! वेयणा प० ? गोयमा ! दुविहा वेयणा प०, तं०—निदा य अनिदा
 य । नेरइया णं भंते ! किं निदायं वेयणं वेदंति अनिदायं वेयणं वेदंति ? जहा पन्न-

वणाए जाव वेमाणियत्ति । सेवं भंते ! सेवं भंते ! त्ति ॥ ६५५ ॥ एगूणवीसइ-
मस्स सयस्स पंचमो उद्देसो समत्तो ॥

कहिं णं भंते ! दीवसमुद्दा, केवइया णं भंते ! दीवसमुद्दा, किंसंठिया णं भंते !
दीवसमुद्दा ? एवं जहा जीवाभिगमे दीवसमुद्देसो सो चेव इहवि जोइसियमंडि-
उद्देसगवज्जो भाणियव्वो जाव परिणामो जीवउववाओ जाव अणंतखुत्तो, सेवं भंते !
२ त्ति ॥ ६५६ ॥ एगूणवीसइमस्स सयस्स छट्ठो उद्देसो समत्तो ॥

केवइया णं भंते ! असुरकुमारभवणावाससयसहस्सा प० ? गोयमा ! चउसट्ठिं
असुरकुमारभवणावाससयसहस्सा प०, ते णं भंते ! किमया प० ? गोयमा !
सव्वरयणामया अच्छा सण्हा जाव पडिहवा, तत्थ णं वहवे जीवा य पोग्गला य
वक्कमंति विउक्कमंति चयंति उववज्जंति, सासया णं ते भवणा दव्वट्ठयाए, वन्नपज्जवेहिं
जाव फासपज्जवेहिं असासया, एवं जाव थणियकुमारावासा, केवइया णं भंते !
चाणमंतरभोमेज्जनयरावाससयसहस्सा प० ? गोयमा ! असंखेज्जा चाणमंतरभोमे-
ज्जनयरावाससयसहस्सा प०, ते णं भंते ! किमया प० ? सेसं तं चेव, केवइया णं
भंते ! जोइसियविमाणावाससयसहस्सा पुच्छा, गोयमा ! असंखेज्जा जोइसिय-
विमाणावाससयसहस्सा प०, ते णं भंते ! किमया प० ? गोयमा ! सव्वफालिहा-
मया अच्छा सेसं तं चेव, सोहम्मो णं भंते ! कप्पे केवइया विमाणावाससयसहस्सा
प० ? गोयमा ! वत्तीसं विमाणावाससयसहस्सा प०, ते णं भंते ! किमया प० ?
गोयमा ! सव्वरयणामया अच्छा सेसं तं चेव, एवं जाव अणुत्तरविमाणा, नवरं
जाणियव्वा जत्थ जत्तिया भवणा विमाणा वा । सेवं भंते ! २ त्ति ॥ ६५७ ॥
एगूणवीसइमस्स सयस्स सत्तमो उद्देसो समत्तो ॥

कइविहा णं भंते ! जीवनिव्वत्ती प० ? गोयमा ! पंचविहा जीवनिव्वत्ती प०,
तं०-एगिंदियजीवनिव्वत्ती जाव पंचिंदियजीवनिव्वत्ती, एगिंदियजीवनिव्वत्ती णं भंते !
कइविहा प० ? गोयमा ! पंचविहा प०, तं०-पुढविकाइयएगिंदियजीवनिव्वत्ती जाव
चणस्सइकाइयएगिंदियजीवनिव्वत्ती, पुढविकाइयएगिंदियजीवनिव्वत्ती णं भंते ! कइ-
विहा प० ? गोयमा ! दुविहा प०, तं०-सुहुमपुढविकाइयएगिंदियजीवनिव्वत्ती य वाय-
रपुढवीकाइयएगिंदियजीवनिव्वत्ती य, एवं एएणं अभिलावेणं भेओ जहा वड्डगवंघो
तेयगसरीरस्स जाव सव्वट्ठसिद्धअणुत्तरोववाइयकप्पातीतवेमाणियदेवपंचिंदियजीव-
निव्वत्ती णं भंते ! कइविहा प० ? गोयमा ! दुविहा प०, तं०-पज्जत्तगसव्वट्ठसिद्धअ-
णुत्तरोववाइय जाव देवपंचिंदियजीवनिव्वत्ती य अपज्जत्तगसव्वट्ठसिद्धअणुत्तरोववाइय
जाव देवपंचिंदियजीवनिव्वत्ती य । कइविहा णं भंते ! कम्मनिव्वत्ती प० ? गोयमा !

अट्टविहा कम्मनिव्वत्ती प०, तं०-नाणावरणिज्जकम्मनिव्वत्ती जाव अंतराइयक-
 म्मनिव्वत्ती, नेरइयाणं भंते ! कइविहा कम्मनिव्वत्ती प० ? गोयमा ! अट्टविहा
 कम्मनिव्वत्ती प०, तं०-नाणावरणिज्जकम्मनिव्वत्ती जाव अंतराइयकम्मनिव्वत्ती,
 एवं जाव वेमाणियाणं । कइविहा णं भंते ! सरीरनिव्वत्ती प० ? गोयमा ! पंच-
 विहा सरीरनिव्वत्ती प०, तं०-ओरालियसरीरनिव्वत्ती जाव कम्मगसरीरनिव्वत्ती ।
 नेरइयाणं भंते ! एवं चेव, एवं जाव वेमाणियाणं, नवरं नायव्वं जस्स जइ सरी-
 राणि । कइविहा णं भंते ! सव्विदियनिव्वत्ती प० ? गोयमा ! पंचविहा सव्वि-
 दियनिव्वत्ती प०, तं०-सोइंदियनिव्वत्ती जाव फासिदियनिव्वत्ती, एवं (जाव) नेरइया
 जाव थणियकुमारा णं, पुढविकाइयाणं पुच्छा, गोयमा ! एगा फासिंदियनिव्वत्ती
 प०, एवं जस्स जइ इंदियाणि जाव वेमाणियाणं । कइविहा णं भंते ! भासानि-
 व्वत्ती प० ? गोयमा ! चउव्विहा भासानिव्वत्ती प०, तं०-सच्चाभासानिव्वत्ती,
 मोसाभासानिव्वत्ती, सच्चाभोसभासानिव्वत्ती, असच्चाभोसभासानिव्वत्ती, एवं एग्गि-
 दियवज्जं जस्स जा भासा जाव वेमाणियाणं, कइविहा णं भंते ! मणनिव्वत्ती प० ?
 गोयमा ! चउव्विहा मणनिव्वत्ती प०, तं०-सच्चमणनिव्वत्ती जाव असच्चाभोसम-
 णनिव्वत्ती, एवं एग्गिदियविगल्लिंदियवज्जं जाव वेमाणियाणं । कइविहा णं भंते !
 कसायनिव्वत्ती प० ? गोयमा ! चउव्विहा कसायनिव्वत्ती प०, तं०-कोहकसाय-
 निव्वत्ती जाव लोभकसायनिव्वत्ती, एवं जाव वेमाणियाणं । कइविहा णं भंते !
 वन्ननिव्वत्ती प० ? गोयमा ! पंचविहा वन्ननिव्वत्ती प०, तं०-कालवन्ननिव्वत्ती
 जाव सुक्किल्लवन्ननिव्वत्ती, एवं निरवसेसं जाव वेमाणियाणं, एवं गंधनिव्वत्ती दुविहा
 जाव वेमाणियाणं, रसनिव्वत्ती पंचविहा जाव वेमाणियाणं, फासनिव्वत्ती अट्टविहा
 जाव वेमाणियाणं । कइविहा णं भंते ! संठाणनिव्वत्ती प० ? गोयमा ! छव्विहा
 संठाणनिव्वत्ती प०, तं०-समचउरंससंठाणनिव्वत्ती जाव हुंडसंठाणनिव्वत्ती, नेर-
 इयाणं पुच्छा, गोयमा ! एगा हुंडसंठाणनिव्वत्ती प०, असुरकुमाराणं पुच्छा,
 गोयमा ! एगा समचउरंससंठाणनिव्वत्ती प०, एवं जाव थणियकुमाराणं, पुढवि-
 काइयाणं पुच्छा, गोयमा ! एगा मसूरचंदसंठाणनिव्वत्ती प०, एवं जस्स जं संठाणं
 जाव वेमाणियाणं, कइविहा णं भंते ! सन्नानिव्वत्ती प० ? गोयमा ! चउव्विहा
 सन्ना निव्वत्ती प०, तं०-आहारसन्नानिव्वत्ती जाव परिग्गहसन्नानिव्वत्ती, एवं जाव
 वेमाणियाणं, कइविहा णं भंते ! लेस्सानिव्वत्ती प० ? गोयमा ! छव्विहा लेस्सा-
 निव्वत्ती प०, तं०-कण्हलेस्सानिव्वत्ती जाव सुक्कलेस्सानिव्वत्ती, एवं जाव वेमाणि-
 याणं जस्स जइ लेस्साओ तस्स तत्तिया भाणियव्वा । कइविहा णं भंते ! दिट्ठिनिव्वत्ती

प० ? गोयमा ! तिविहा दिट्ठिनिव्वत्ती प०, तंजहा-सम्मादिट्ठिनिव्वत्ती, मिच्छादिट्ठिनिव्वत्ती, सम्मामिच्छादिट्ठिनिव्वत्ती, एवं जाव वेमाणियाणं जस्स जइविहा दिट्ठी । कइविहा णं भंते ! णाणनिव्वत्ती पन्नत्ता ? गोयमा ! पंचविहा णाणनिव्वत्ती प०, तं०-आभिणिवोहियणाणनिव्वत्ती जाव केवलनाणनिव्वत्ती, एवं एगिंदियवज्जं जाव वेमाणियाणं जस्स जइ णाणाइं । कइविहा णं भंते ! अन्नाणनिव्वत्ती प० ? गोयमा ! तिविहा अन्नाणनिव्वत्ती प०, तं०-मइअन्नाणनिव्वत्ती, सुयअण्णाणनिव्वत्ती, विभंगनाणनिव्वत्ती, एवं जस्स जइ अन्नाणा जाव वेमाणियाणं । कइविहा णं भंते ! जोगनिव्वत्ती प० ? गोयमा ! तिविहा जोगनिव्वत्ती प०, तं०-मणजोगनिव्वत्ती, वइजोगनिव्वत्ती, कायजोगनिव्वत्ती, एवं जाव वेमाणियाणं जस्स जइविहो जोगो । कइविहा णं भंते ! उवओगनिव्वत्ती प० ? गोयमा ! दुविहा उवओगनिव्वत्ती प०, तं०-सागारोवओगनिव्वत्ती अणागारोवओगनिव्वत्ती, एवं जाव वेमाणियाणं, संगहगाहा-जीवाणं निव्वत्ती कम्मप्पगडी सरीरनिव्वत्ती । सव्विदियनिव्वत्ती भासा य मणे कसाया य ॥ १ ॥ चन्ने गंधे रसे फासे संठाणविही य होइ वोद्धव्वो । लेस्सा दिट्ठी णाणे उवओगे चव जोगे य ॥ २ ॥ सेवं भंते ! सेवं भंते ! त्ति ॥ ६५८ ॥ एगूणवीसइमस्स सयस्स अट्ठमो उद्देसो समत्तो ॥

कइविहे णं भंते ! करणे पणत्ते ? गोयमा ! पंचविहे करणे पन्नत्ते, तंजहा-दव्वकरणे, खेत्तकरणे, कालकरणे, भवकरणे, भावकरणे, नेरइयाणं भंते ! कइविहे करणे प० ? गोयमा ! पंचविहे करणे प०, तं०-दव्वकरणे, जाव भावकरणे, एवं जाव वेमाणियाणं, कइविहे णं भंते ! सरीरकरणे प० ? गोयमा ! पंचविहे सरीरकरणे पन्नत्ते, तंजहा-ओरालियसरीरकरणे जाव कम्मगसरीरकरणे, एवं जाव वेमाणियाणं जस्स जइ सरीराणि । कइविहे णं भंते ! इंदियकरणे प० ? गोयमा ! पंचविहे इंदियकरणे प०, तंजहा-सोइंदियकरणे जाव फासिंदियकरणे, एवं जाव वेमाणियाणं जस्स जइ इंदियाइं, एवं एएणं कमेणं भासाकरणे चउव्विहे, मणकरणे चउव्विहे, कसायकरणे चउव्विहे, समुग्घायकरणे सत्तविहे, सन्नाकरणे चउव्विहे, लेस्साकरणे छव्विहे, दिट्ठिकरणे तिविहे, वेयकरणे तिविहे पन्नत्ते, तंजहा-इत्थिवेयकरणे, पुरिसवेयकरणे, नपुंसगवेयकरणे, एए सव्वे नेरइयादिइंडगा जाव वेमाणियाणं जस्स जं अत्थि तं तस्स सव्वं भाणियव्वं । कइविहे णं भंते ! पाणाइवायकरणे प० ? गोयमा ! पंचविहे पाणाइवायकरणे प०, तं०-एगिंदियपाणाइवायकरणे जाव पंचिंदियपाणाइवायकरणे, एवं निरवसेसं जाव वेमाणियाणं । कइविहे णं भंते ! योगलकरणे प० ? गोयमा ! पंचविहे योगलकरणे प०, तं०-वन्नकरणे, गंधकरणे,

रसकरणे, फासकरणे, संठाणकरणे, वन्नकरणे णं भंते ! कइविहे प० ? गोयमा ! पंचविहे प०, तंजहा-कालवन्नकरणे जाव सुक्किल्लवन्नकरणे, एवं भेदो, गंधकरणे दुविहे, रसकरणे पंचविहे, फासकरणे अट्ठविहे, संठाणकरणे णं भंते ! कइविहे प० ? गोयमा ! पंचविहे प०, तंजहा-परिमंडलसंठाणकरणे जाव आययसंठाणकरणे, सेवं भंते ! सेवं भंते ! त्ति जाव विहरइ ॥ ६५९ ॥ एगूणवीसइमस्स सयस्स नवमो उद्देसो समत्तो ॥

वाणमंतराणं भंते ! सव्वे समाहारा एवं जहा सोलसमसए दीवकुमारुद्देसए जाव अप्पिड्ढियत्ति, सेवं भंते ! २ त्ति ॥ ६६० ॥ एगूणवीसइमे सए दसमो उद्देसो समत्तो ॥ एगूणवीसइमं सयं समत्तं ॥ १९ ॥

बेइंदिय १ मागासे २ पाणवहे ३ उवचए ४ य परमाणू ५ । अंतर ६ वंवे ७ भूमी ८ चारण ९ सोवक्कमा जीवा १० ॥ १ ॥ रायगिहे जाव एवं वयासी-सिय भंते ! जाव चत्तारि पंच बेइंदिया एगयओ साहारणसरीरं वंधंति २ ता तओ पच्छा आहारेंति वा परिणामेंति वा सरीरं वा वंधंति ? णो इणट्ठे समट्ठे, बेइंदिया णं पत्तेयाहारा पत्तेयपरिणामा पत्तेयसरीरं वंधंति प० २ ता तओ पच्छा आहारेंति वा परिणामेति वा सरीरं वा वंधंति, तेसि णं भंते ! जीवाणं कइ लेरसाओ प० ? गोयमा ! तओ लेस्साओ प०, तं०-कण्हलेस्सा नीललेस्सा काउलेस्सा, एवं जहा एगूणवीसइमे सए तेउकाइयाणं जाव उव्वट्ठंति, नवरं सम्मद्दिट्ठीवि मिच्छद्दिट्ठीवि, नो सम्मामिच्छादिट्ठी, दो नाणा दो अन्नाणा नियमं, नो मणजोगी, वइजोगीवि कायजोगीवि, आहारो नियमं छद्दिसि, तेसि णं भंते ! जीवाणं एवं सन्नाइ वा पन्नाइ वा मणेइ वा वईइ वा अम्हे णं इट्ठाणिट्ठे रसे इट्ठाणिट्ठे फासे पडिसंवेदेमो ? णो इणट्ठे समट्ठे, पडिसंवेदेंति पुण ते, ठिई जहन्नेणं अंतोमुहुत्तं उक्कोसेणं वारस-संवच्छराइं, सेसं तं चेव, एवं तेइंदिया(ण)वि, एवं चउरिदियावि, नाणत्तं इंदिएउ ठिईए य सेसं तं चेव ठिई जहा पन्नवणाए । सिय भंते ! जाव चत्तारि पंच पंचिदिया एगयओ साहारणसरीरं एवं जहा बेइंदियाणं नवरं छल्लेस्साओ, दिट्ठी तिविहावि, चत्तारि नाणा, तिन्नि अन्नाणा भयणाए, तिविहा जोगा, तेसि णं भंते ! जीवाणं एवं सन्नाइ वा पन्नाइ वा जाव वईइ वा अम्हे णं आहारमाहारैमो ? गोयमा ! अत्थेगइयाणं एवं सन्नाइ वा पन्नाइ वा मणोइ वा वईइ वा अम्हे णं आहारमाहा-रेमो, अत्थेगइयाणं नो एवं सन्नाइ वा जाव वईइ वा अम्हे णं आहारमाहारैमो, आहारेंति पुण ते, तेसि णं भंते ! जीवाणं एवं सन्नाइ वा जाव वईइ वा अम्हे णं इट्ठाणिट्ठे सद्दे, इट्ठाणिट्ठे रुवे, इट्ठाणिट्ठे गंधे, इट्ठाणिट्ठे रसे, इट्ठाणिट्ठे फासे पडिसं-

वेदेमो ? गोयमा ! अत्येगइयाणं एवं सन्नाइ वा जाव वईइ वा अम्हे णं इट्ठाणिट्ठे सदे जाव इट्ठाणिट्ठे फासे पडिसंवेदेमो, अत्येगइयाणं नो एवं सन्नाइ वा पण्णाइ वा जाव वईइ वा अम्हे णं इट्ठाणिट्ठे सदे जाव इट्ठाणिट्ठे फासे पडिसंवेदेमो, पडिसंवेदेंति पुण ते, ते णं भंते ! जीवा किं पाणाइवाए उवक्खाइज्जंति० ? गोयमा ! अत्येगइया पाणाइवाएवि उवक्खाइज्जंति जाव मिच्छादंसणसल्लेवि उवक्खाइज्जंति, अत्येगइया नो पाणाइवाए उवक्खाइज्जंति नो मुसावाए उवक्खाइज्जंति जाव नो मिच्छादंसणसल्ले उवक्खाइज्जंति, जेसिंपिय णं जीवाणं ते जीवा एवमाहिज्जंति तेसिपि णं जीवाणं अत्येगइयाणं विन्नाए नाणत्ते, अत्येगइयाणं नो विण्णाए नाणत्ते, उववाओ सव्वओ जाव सव्वट्ठसिद्धाओ, ठिई जहन्नेणं अंतोमुहुत्तं उक्कोसेणं तेत्तीसं सागरोवमाई, छस्स-मुग्घाया केवलिवज्जा, उव्वट्ठणा सव्वत्थ गच्छंति जाव सव्वट्ठसिद्धंति, सेसं जहा वेइंदियाणं । एएसि णं भंते ! वेइंदियाणं जाव पंचिदियाणय कयरे २ जाव विसे-साहिया वा ? गोयमा ! सव्वत्थोवा पंचिदिया, चउरिंदिया विसेसाहिया, तेइंदिया विसेसाहिया, वेइंदिया विसेसाहिया । सेवं भंते ! सेवं भंते ! त्ति जाव विहरइ ॥ ६६१ ॥ वीसइमस्स सयस्स पढमो उद्देसो समत्तो ॥

कइविट्ठे णं भंते ! आगासे प० ? गोयमा ! दुविहे आगासे प०, तं०-लोयागासे य अलोयागासे य, लोयागासे णं भंते ! किं जीवा जीवदेसा० ? एवं जहा विइयसए अत्थिउद्देसए तह चेव इहवि भाणियव्वं, नवरं अभिलावो जाव धम्मत्थिकाए णं भंते ! केमहालए प० ? गोयमा ! लोए लोयमेत्ते लोयप्पमाणे लोयफुडे लोयं चेव ओगाहिताणं चिट्ठइ, एवं जाव पोग्गलत्थिकाए । अहेलोए णं भंते ! धम्मत्थिका-यस्स केवइयं ओगाढे ? गोयमा ! साइरेगं अद्धं ओगाढे, एवं एएणं अभिलावेणं जहा विइयसए जाव ईसिप्पवभारा णं भंते ! पुढवी लोयागासस्स कि संखेज्जइभागं ओगाढा० पुच्छा, गोयमा ! नो संखेज्जइभागं ओगाढा, असंखेज्जइभागं ओगाढा, नो संखेज्जे भागे ओगाढा, नो असंखेज्जे भागे ओगाढा, नो सव्वलोयं ओगाढा, सेसं तं चेव ॥ ६६२ ॥ धम्मत्थिकायस्स णं भंते ! केवइया अभिवयणा प० ? गोयमा ! अणेगा अभिवयणा प०, तंजहा-धम्मेइ वा धम्मत्थिकाएइ वा पाणाइवायवेरमणेइ वा मुसावायवेरमणेइ वा एवं जाव परिग्गहवेरमणेइ वा कोहविवेगेइ वा जाव मिच्छा-दंसणसल्लविवेगेइ वा इरियासमि(ए)ईइ वा भासासमिईइ वा एसणासमिईइ वा आया-णभंडमत्तनिक्खेवणासमिईइ वा उच्चारपासवणखेलजल्लसिंघाणपारिट्ठावणियासमिईइ वा मणगुत्तीइ वा वइगुत्तीइ वा कायगुत्तीइ वा जे यावन्ने तहप्पगारा सव्वे ते धम्म-त्थिकायस्स अभिवयणा, अहम्मत्थिकायस्स णं भंते ! केवइया अभिवयणा प० ?

गोयमा ! अणेगा अभिवयणा प०, तं०-अवम्मेइ वा अधम्मत्थिकाएइ वा पाणाइ-
 वाएइ वा जाव मिच्छादंसणसल्लेइ वा इरियाअसमिईइ वा जाव उच्चारपासवण
 जाव पारिट्ठावणियाअसमिईइ वा मणअगुत्तीइ वा वइअगुत्तीइ वा कायअगुत्तीइ वा
 जे यावन्ने तहप्पगारा सव्वे ते अहम्मत्थिकायस्स अभिवयणा, आगासत्थिकायस्स
 णं पुच्छा, गोयमा ! अणेगा अभिवयणा प०, तं०-आगासेइ वा आगासत्थिकाएइ
 वा गगणेइ वा नभेइ वा समेइ वा विसमेइ वा खहेइ वा विहेइ वा वीईइ वा
 विवरेइ वा अंवरेइ वा अंवरसेइ वा छिडेइ वा झुसिरेइ वा मग्गेइ वा विमुहेइ वा
 अ(ट्ठे)हेइ वा विय(ट्ठे)हेइ वा आधारेइ वा वोमेइ वा भायणेइ वा अंतरिक्खेइ वा सामेइ
 वा उवासंतरेइ वा अगमेइ वा फलिहेइ वा अणंतरेइ वा जे यावन्ने तहप्पगारा सव्वे
 ते आगासत्थिकायस्स अभिवयणा प०। जीवत्थिकायस्स णं भंते ! केवइया अभिवयणा
 प० ? गोयमा ! अणेगा अभिवयणा प०, तं०-जीवेइ वा जीवत्थिकाएइ वा पाणेइ
 वा भूएइ वा सत्तेइ वा विन्नूइ वा चेयाइ वा जेयाइ वा आयाइ वा रंगणेइ वा
 हिंडुएइ वा पोग्गलेइ वा माणवेइ वा कत्ताइ वा विकत्ताइ वा जएइ वा जंतूइ वा
 जोणीइ वा सयंभूइ वा ससरीरीइ वा नायएइ वा अंतरप्पाइ वा जे यावन्ने तहप्प-
 गारा सव्वे ते जीवअभिवयणा प०। पोग्गलत्थिकायस्स णं भंते ! पुच्छा, गोयमा !
 अणेगा अभिवयणा प०, तं०-पोग्गलेइ वा पोग्गलत्थिकाएइ वा परमाणुपोग्गलेइ
 वा दुप्पएसिएइ वा तिप्पएसिएइ वा जाव असंखेज्जप्पएसिएइ वा अणंतप्पएसिएइ वा
 (खंधे) जे यावन्ने तहप्पगारा सव्वे ते पोग्गलत्थिकायस्स अभिवयणा प०। सेवं
 भंते ! २ ति ॥ ६६३ ॥ **वीसइमस्स सयस्स वीओ उद्देसो समत्तो ॥**

अह भंते ! पाणाइवाए मुसावाए जाव मिच्छादंसणसल्ले, पाणाइवायवेरमणे जाव
 मिच्छादंसणसल्लविवेगे, उप्पत्तिया जाव पारिणामिया, उग्गहे जाव धारणा, उट्ठाणे
 कम्मे बले वीरिए पुरिसक्कारपरक्कमे, नेरइयत्ते असुरकुमारत्ते जाव वेमाणियत्ते, नाणा-
 वरणिजे जाव अंतराइए, कण्हलेस्सा जाव सुक्कलेस्सा, सम्महिट्ठी ३, चक्खुदंसणे ४,
 आभिणिबोहियणाणे जाव विभंगनाणे, आहारसन्ना ४, ओरालियसरीरे ५, मणजोगे
 ३, सागारोवओगे अणागारोवओगे जे यावन्ने तहप्पगारा सव्वे ते णण्णत्थ आयाए
 परिणमंति ? हंता गोयमा ! पाणाइवाए जाव सव्वे ते णण्णत्थ आयाए परिणमंति
 ॥ ६६४ ॥ जीवे णं भंते ! गब्भं वक्कममाणे कइवन्नं कइगंधं एवं जहा बारसमसए
 पंचमुद्देसए जाव कम्मओ णं जए णो अकम्मओ विभत्तिभावं परिणमइ । सेवं भंते !
 २ ति जाव विहरइ ॥ ६६५ ॥ **वीसइमे सए तइओ उद्देसो समत्तो ॥**

कइविहे णं भंते ! इंदियउवचए पन्नत्ते ? गोयमा ! पंचविहे इंदियउवचए प०,

तं०—सोइंदियउवचए एवं विइओ इंदियउद्देसओ निरवसेसो भाणियव्वो जहा पन्नव-
णाए । सेवं भंते ! सेवं भंते ! त्ति भगवं गोयमे जाव विहरइ ॥ ६६६ ॥
वीसइमस्स सयस्स चउत्थो उद्देसो समत्तो ॥

परमाणुपोग्गले णं भंते ! कइवन्ने कइगंधे कइरसे कइफासे पन्नत्ते ? गोयमा !
एगवन्ने एगगंधे एगरसे दुफासे पन्नत्ते, तंजहा—जइ एगवन्ने सिय कालए सिय नीलए
सिय लोहिए सिय हालिद्दए सिय सुक्किळए, जइ एगगंधे सिय सुव्विभगंधे सिय दुव्विभ-
गंधे, जइ एगरसे सिय तित्ते सिय कडुए सिय कसाए सिय अंविले सिय महुरे, जइ
दुफासे सिय सीए य निद्धे य १, सिय सीए य लुक्खे य २, सिय उसिणे य निद्धे
य ३, सिय उसिणे य लुक्खे य ४ ॥ दुपएसिए णं भंते ! खंवे कइवन्ने० ? एवं जहा
अट्टारसमसए छट्ठुद्देसए जाव सिय चउफासे पन्नत्ते । जइ एगवन्ने सिय कालए जाव
सिय सुक्किळए, जइ दुवन्ने सिय कालए य नीलए य १, सिय कालए य लोहिए य २,
सिय कालए य हालिद्दए य ३, सिय कालए य सुक्किळए य ४, सिय नीलए य लोहिए
य ५, सिय नीलए य हालिद्दए य ६, सिय नीलए य सुक्किळए य ७, सिय लोहिए य
हालिद्दए य ८, सिय लोहिए य सुक्किळए य ९, सिय हालिद्दए य सुक्किळए य १०, एवं
एए दुयासंजोगे दस भंगा । जइ एगगंधे सिय सुव्विभगंधे सिय दुव्विभगंधे । जइ
दुगंधे सुव्विभगंधे य दुव्विभगंधे य, रसेसु जहा वन्नेसु, जइ दुफासे सिय सीए य
निद्धे य एवं जहेव परमाणुपोग्गले ४, जइ तिफासे सव्वे सीए देसे निद्धे देसे लुक्खे
१, सव्वे उसिणे देसे निद्धे देसे लुक्खे २, सव्वे निद्धे देसे सीए देसे उसिणे ३, सव्वे
लुक्खे देसे सीए देसे उसिणे ४, जइ चउफासे देसे सीए देसे उसिणे देसे निद्धे देसे
लुक्खे १, एए नव भंगा फासेसु ॥ तिपएसिए णं भंते ! खंवे कइवन्ने० जहा अट्टार-
समसए छट्ठुद्देसे जाव चउफासे प०, जइ एगवन्ने सिय कालए जाव सुक्किळए ५, जइ
दुवन्ने सिय कालए य सिय नीलए य १, सिय कालए य नीलगा य २, सिय कालगा
य नीलए य ३, सिय कालए य लोहिए य १, सिय कालए य लोहिएगा य २, सिय
कालगा य लोहिए य ३, एवं हालिद्दएणवि समं भंगा ३, एवं सुक्किळएणवि समं ३,
सिय नीलए य लोहिए य एत्थंपि भंगा ३, एवं हालिद्दएणवि समं भंगा ३, एवं
सुक्किळएणवि समं भंगा ३, सिय लोहिए य हालिद्दए य भज्जा ३, एवं सुक्किळएणवि समं
भंगा ३, सिय हालिद्दए य सुक्किळए य भंगा ३, एवं सव्वेते दस दुयासंजोगा भंगा
तीसं भवंति, जइ तिवन्ने सिय कालए य नीलए य लोहिए य १, सिय कालए य
नीलए य हालिद्दए य २, सिय कालए य नीलए य सुक्किळए य ३, सिय कालए य
लोहिए य हालिद्दए य ४, सिय कालए य लोहिए य सुक्किळए य ५, सिय कालए

य हालिद् ए य सुक्लिद् ए य ६, सिय नील ए य लोहिय ए य हालिद् ए य ७, सिय नील ए य लोहिय ए य सुक्लिद् ए य ८, सिय नील ए य हालिद् ए य सुक्लिद् ए य ९, सिय लोहिय ए य हालिद् ए य सुक्लिद् ए य १०, एवं एए दस तियासंजोगा । जइ एगगंधे सिय सुब्भिगंधे सिय दुब्भिगंधे, जइ दुगंधे सुब्भिगंधे य दुब्भिगंधे य भंगा ३ । रसा जहा वज्ञा । जइ दुफासे सिय सीए य निद्धे य एवं जहेव दुपएसियस्स तहेव चत्तारि भंगा, जइ तिफासे सव्वे सीए देसे निद्धे देसे लुक्खे १, सव्वे सीए देसे निद्धे देसा लुक्खा २, सव्वे सीए देसा निद्धा देसे लुक्खे ३, सव्वे उसिणे देसे निद्धे देसे लुक्खे एत्थवि भंगा तिन्नि ६, सव्वे निद्धे देसे सीए देसे उसिणे भंगा तिन्नि ९, सव्वे लुक्खे देसे सीए देसे उसिणे भंगा तिन्नि एवं १२, जइ चउफासे देसे सीए देसे उसिणे देसे निद्धे देसे लुक्खे १, देसे सीए देसे उसिणे देसे निद्धे देसा लुक्खा २, देसे सीए देसे उसिणे देसा निद्धा देसे लुक्खे ३, देसे सीए देसा उसिणा देसे निद्धे देसे लुक्खे ४, देसे सीए देसा उसिणा देसे निद्धे देसा लुक्खा ५, देसे सीए देसा उसिणा देसा निद्धा देसे लुक्खे ६, देसा सीया देसे उसिणे देसे निद्धे देसे लुक्खे ७, देसा सीया देसे उसिणे देसे निद्धे देसा लुक्खा ८, देसा सीया देसे उसिणे देसा निद्धा देसे लुक्खे ९, एवं एए तिपएसिए फासेसु पणवीसं भंगा ॥ चउप्पएसिए णं भंते ! खंधे कइवन्ने ० जहा अट्टारसमसए जाव सिय चउफासे पन्नत्ते, जइ एगवन्ने सिय काल ए य जाव सुक्लिद् ए य ५, जइ दुवन्ने सिय काल ए य नील ए य १, सिय काल ए य नीलगा य २, सिय कालगा य नील ए य ३, सिय कालगा य नीलगा य ४, सिय काल ए य लोहिय ए य एत्थवि चत्तारि भंगा ४, सिय काल ए य हालिद् ए य ४, सिय काल ए य सुक्लिद् ए य ४, सिय नील ए य लोहिय ए य ४, सिय नील ए य हालिद् ए य ४, सिय नील ए य सुक्लिद् ए य ४, सिय लोहिय ए य हालिद् ए य ४, सिय लोहिय ए य सुक्लिद् ए य ४, सिय हालिद् ए य सुक्लिद् ए य ४, एवं एए दस दुयासंजोगा भंगा पुण चत्तालीसं ४०, जइ तिवन्ने सिय काल ए य नील ए य लोहिय ए य १, सिय काल ए य नील ए य लोहियगा य २, सिय काल(ए)गा य नीलगा य लोहिय ए य ३, सिय कालगा य नील ए य लोहिय ए य, एए णं चत्तारि भंगा, एवं कालनीलहालिद् एहिं भंगा ४, कालनील-सुक्लिद् ० ४, काललोहियहालिद् ० ४, काललोहियसुक्लिद् ० ४, कालहालिद्सुक्लिद् ० ४, नीललोहियहालिद्गाणं भंगा ४, नीललोहियसुक्लिद् ० ४, नीलहालिद्सुक्लिद् ० ४, लोहिय-हालिद्सुक्लिद्गाणं भंगा ४, एवं एए दसतियासंजोगा एक्केक्के संजोए चत्तारि भंगा सव्वे ते चत्तालीसं भंगा ४०, जइ चउवन्ने सिय काल ए य नील ए य लोहिय ए य हालिद् ए

य १, सिय कालए य नीलए य लोहियए य सुक्किल्लए य २, सिय कालए य नीलए य
 हालिद्दए य सुक्किल्लए य ३, सिय कालए य लोहियए य हालिद्दए य सुक्किल्लए य ४, सिय
 नीलए य लोहियए य हालिद्दए य सुक्किल्लए य ५, एवमेए चउक्कगसंजोए पंच भंगा, एए
 सव्वे नउइभंगा, जइ एगगंधे सिय सुव्विभगंधे सिय दुव्विभगंधे, जइ दुगंधे सुव्विभगंधे
 य दुव्विभगंधे य । रसा जहा वन्ना । जइ दुफासे जहेव परमाणुपोग्गले ४, जइ
 तिफासे सव्वे सीए देसे निद्धे देसे लुक्खे १, सव्वे सीए देसे निद्धे देसा लुक्खा २,
 सव्वे सीए देसा निद्धा देसे लुक्खे ३, सव्वे सीए देसा निद्धा देसा लुक्खा ४, सव्वे
 उसिणे देसे निद्धे देसे लुक्खे एवं भंगा ४, सव्वे निद्धे देसे सीए देसे उसिणे ४,
 सव्वे लुक्खे देसे सीए देसे उसिणे ४, एए तिफासे सोलस भंगा, जइ चउफासे देसे
 सीए देसे उसिणे देसे निद्धे देसे लुक्खे १, देसे सीए देसे उसिणे देसे निद्धे देसा
 लुक्खा २, देसे सीए देसे उसिणे देसा निद्धा देसे लुक्खे ३, देसे सीए देसे उसिणे
 देसा निद्धा देसा लुक्खा ४, देसे सीए देसा उसिणा देसे निद्धे देसे लुक्खे ५, देसे
 सीए देसा उसिणा देसे निद्धे देसा लुक्खा ६, देसे सीए देसा उसिणा देसा निद्धा
 देसे लुक्खे ७, देसे सीए देसा उसिणा देसा निद्धा देसा लुक्खा ८, देसा सीया
 देसे उसिणे देसे निद्धे देसे लुक्खे ९, एवं एए चउफासे सोलस भंगा भाणियव्वा
 जाव देसा सीया देसा उसिणा देसा निद्धा देसा लुक्खा, सव्वे एए फासेसु छत्तीसं
 भंगा ॥ पंचपएसिए णं भंते ! खंधे कइवन्ने० जहा अट्टारसमसए जाव सिय चउफासे
 प०, जइ एगवन्ने एगवन्नदुवन्ना जहेव चउप्पएसिए, जइ तिवन्ने सिय कालए य नीलए
 य लोहियए य १, सिय कालए य नीलए य लोहियगा य २, सिय कालए य नीलगा य
 लोहियए य ३, सिय कालए य नीलगा य लोहियगा य ४, सिय काल(गा)ए य नीलए य
 लोहियए य ५, सिय कालगा य नीलए य लोहियगा य ६, सिय कालगा य नीलगा
 य लोहियए य ७, सिय कालए य नीलए य हालिद्दए य एत्थवि सत्त भंगा ७, एवं काल-
 गनीलगसुक्किल्लएसु सत्त भंगा ७, कालगलोहियहालिद्देसु ७, कालगलोहियसुक्किल्लेसु ७,
 कालगहालिद्दसुक्किल्लेसु ७, नीलगलोहियहालिद्देसु ७, नीलगलोहियसुक्किल्लेसु सत्त भंगा
 ७, नीलगहालिद्दसुक्किल्लेसु ७, लोहियहालिद्दसुक्किल्लेसुवि सत्त भंगा ७, एवमेए तियासं-
 जोएणं सत्तरि भंगा, जइ चउवन्ने सिय कालए य नीलए य लोहियए य हालिद्दए य
 १, सिय कालए य नीलए य लोहियए य हालिद्दगा य २, सिय कालए य नीलए
 य लोहियगा य हालिद्दगे य ३, सिय कालए य नीलगा य लोहियगे य हालिद्दगे य
 ४, सिय कालगा य नीलए य लोहियगे य हालिद्दगे य ५, एए पंच भंगा, सिय
 कालए य नीलए य लोहियए य सुक्किल्लए य एत्थवि पंच भंगा, एवं कालगनीलग-

हालिद्सुक्लिहसुवि पंच भंगा, कालगलोहियहालिद्सुक्लिहसुवि पंच भंगा ५, नीलग-
लोहियहालिद्सुक्लिहसुवि पंच भंगा, एवमेए चउक्कगसंजोएणं पणवीसं भंगा, जइ पंच-
वन्नेकालए य नीलए य लोहियए य हालिद्ए य सुक्लिहए य सव्वमेए एक्कगदुयगतिय-
गचउक्कपंचगसंजोएणं ईयालं भंगसयं भवइ । गंधा जहा चउप्पएसियस्स । रसा जहा
वन्ना । फासा जहा चउप्पएसियस्स ॥ छप्पएसिए णं भंते ! खंधे कइवन्ने० ? एवं
जहा पंचपएसिए जाव सिय चउफासे पन्नत्ते, जइ एगवन्ने एगवन्नदुवन्ना जहा
पंचपएसियस्स, जइ तिवन्ने सिय कालए य नीलए य लोहियए य एवं जहेव
पंचपएसियस्स सत्त भंगा जाव सिय कालगा य नीलगा य लोहियए य ७, सिय
कालगा य नीलगा य लोहियगा य ८, एए अट्ठ भन्ना, एवमेए दस तियगसंजोगा
एक्केक्कए संजोगे अट्ठ भंगा, एवं सव्वेवि तियगसंजोगे असीइ भंगा, जइ चउवन्ने
सिय कालए य नीलए य लोहियए य हालिद्ए य १, सिय कालए य नीलए य
लोहियए य हालिद्गा य २, सिय कालए य नीलए य लोहियगा य हालिद्ए य ३,
सिय कालए य नीलए य लोहियगा य हालिद्गा य ४, सिय कालए य नीलगा य
लोहियए य हालिद्ए य ५, सिय कालए य नीलगा य लोहियए य हालिद्गा य ६,
सिय कालए य नीलगा य लोहियगा य हालिद्ए य ७, सिय कालगा य नीलए य
लोहियए य हालिद्ए य ८, सिय कालगा य नीलए य लोहियए य हालिद्गा य ९,
सिय कालगा य नीलए य लोहियगा य हालिद्ए य १०, सिय कालगा य नीलगा य
लोहियए य हालिद्ए य ११, एए एक्कारस भंगा, एवमेए पंचचउक्कासंजोगा कायव्वा,
एक्केक्कसंजोए एक्कारस भंगा, सव्वेते चउक्कगसंजोएणं पणपन्नं भंगा, जइ पंचवन्ने
सिय कालए य नीलए य लोहियए य हालिद्ए य सुक्लिहए य १, सिय कालए य
नीलए य लोहियए य हालिद्ए य सुक्लिहगा य २, सिय कालए य नीलए य लोहियगे
य हालिद्गा य सुक्लिहगे य ३, सिय कालए य नीलए य लोहियगा य हालिद्ए य
सुक्लिहए य ४, सिय कालए य नीलगा य लोहियए य हालिद्ए य सुक्लिहए य ५,
सिय कालगा य नीलए य लोहियए य हालिद्ए य सुक्लिहए य ६, एवं एए छब्भंगा
भाणियव्वा, एवमेए सव्वेवि एक्कगदुयगतियगचउक्कगपंचगसंजोगेसु छासीयं भंगसयं
भवइ । गंधा जहा पंचपएसियस्स । रसा जहा एयस्स चेव वन्ना, फासा जहा चउ-
प्पएसियस्स ॥ सत्तपएसिए णं भंते ! खंधे कइवन्ने० ? जहा पंचपएसिए जाव सिय
चउफासे प०, जइ एगवन्ने एवं एगवन्नदुवण्णतिवन्ना जहा छप्पएसियस्स, जइ चउ-
वन्ने सिय कालए य नीलए य लोहियए य हालिद्ए य १, सिय कालए य नीलए
य लोहियए य हालिद्गा य २, सिय कालए य नीलए य लोहियगा य हालिद्ए य

३, एवमेते चउक्कसंजोगेणं पन्नरस भंगा भाणियव्वा जाव सिय कालगा य नीलगा य लोहियगा य हालिद्दए य १५, एवमेए पंचचउक्कसंजोगा नेयव्वा एक्केक्के संजोए पन्नरस भंगा, सव्वमेए पंचसत्तरिं भंगा भवंति । जइ पंचवन्ने सिय कालए य नीलए य लोहियए य हालिद्दए य सुक्किळए य १, सिय कालए य नीलए य लोहियए य हालिद्दए य सुक्किळगा य २, सिय कालए य नीलए य लोहियए य हालिद्दगा य सुक्किळए य ३, सिय कालए य नीलए य लोहियए य हालिद्दगा य सुक्किळगा य ४, सिय कालए य नीलए य लोहियगा य हालिद्दए य सुक्किळए य ५, सिय कालए य नीलए य लोहियगा य हालिद्दए य सुक्किळगा य ६, सिय कालए य नीलए य लोहियगा य हालिद्दगा य सुक्किळए य ७, सिय कालए य नीलगा य लोहियए य हालिद्दए य सुक्किळए य ८, सिय कालए य नीलगा य लोहियए य हालिद्दए य सुक्किळगा य ९, सिय कालगे य नीलगा य लोहियए य हालिद्दगा य सुक्किळगे य १०, सिय कालए य नीलगा य लोहियगा य हालिद्दए य सुक्किळए य ११, सिय कालगा य नीलए य लोहियए य हालिद्दए य सुक्किळए य १२, सिय कालगा य नीलए य लोहियए य हालिद्दए य सुक्किळगा य १३, सिय कालगा य नीलए य लोहियए य हालिद्दगा य सुक्किळए य १४, सिय कालगा य नीलए य लोहियगा य हालिद्दए य सुक्किळए य १५, सिय कालगा य नीलगा य लोहियए य हालिद्दए य सुक्किळए य १६, एए सोलस भंगा, एवं सव्वमेए एक्कगदुयगतियगचउक्कगपंचगसंजोगेणं दो सोलस भंगसया भवंति, गंधा जहा चउप्पएसियस्स, रसा जहा एयस्स चेव वन्ना, फासा जहा चउप्पएसियस्स ॥ अट्ठपएसिए णं भंते ! खंधे० पुच्छा, गोयमा । सिय एगवन्ने जहा सत्तपएसियरस जाव सिय चउफासे ५०, जइ एगवन्ने एवं एगवन्नदुवन्नतिवन्ना जहेव सत्तपएसिए, जइ चउवन्ने सिय कालए य नीलए य लोहियए य हालिद्दए य १, सिय कालए य नीलए य लोहियए य हालिद्दगा य २, एवं जहेव सत्तपएसिए जाव सिय कालगा य नीलगा य लोहियगा य हालिद्दगे य १५, सिय कालगा य नीलगा य लोहियगा य हालिद्दगा य १६, एए सोलस भंगा, एवमेए पंच चउक्कसंजोगा, एवमेए असीइ भंगा ८०, जइ पंचवन्ने सिय कालए य नीलए य लोहियए य हालिद्दए य सुक्किळए य १, सिय कालए य नीलए य लोहियए य हालिद्दए य सुक्किळगा य २, एवं एएणं कमेणं भंगा चा(उच्चा)रेयव्वा जाव सिय कालए य नीलगा य लोहियगा य हालिद्दगा य सुक्किळए य १५, एसो पन्नरसमो भंगो, सिय कालगा य नीलगे य लोहियए य हालिद्दए य सुक्किळए य १६, सिय कालगा य नीलगे य लोहियए य हालिद्दए य सुक्किळगा य

१७, सिय कालगा य नीलए य लोहियए य हालिद्गा य सुक्लिङ्गे य १८, सिय कालगा य नीलगे य लोहियगे य हालिद्गा य सुक्लिङ्गा य १९, सिय कालगा य नीलगे य लोहियगा य हालिद्ए य सुक्लिङ्ए य २०, सिय कालगा य नीलगे य लोहियगा य हालिद्ए य सुक्लिङ्गा य २१, सिय कालगा य नीलगे य लोहियगा य हालिद्गा य सुक्लिङ्गे य २२, सिय कालगा य नीलगा य लोहियए य हालिद्ए य सुक्लिङ्ए य २३, सिय कालगा य नीलगा य लोहियगे य हालिद्ए य सुक्लिङ्गा य २४, सिय कालगा य नीलगा य लोहियगे य हालिद्गा य सुक्लिङ्ए य २५, सिय कालगा य नीलगा य लोहियगा य हालिद्ए य सुक्लिङ्ए य २६, एए पंचसंजोएणं छव्वीसं भंगा भवंति, एवमेव सपुव्वावरेणं एकगदुयगतियगचउक्कगपंचगसंजोगेहिं दो एकतीसं भंगसया भवंति, गंधा जहा सत्तपएसियस्स, रसा जहा एयस्स चव वन्ना, फासा जहा चउप्पएसियस्स ॥ नवपएसियस्स पुच्छा, गोयमा ! सिय एगवन्ने जहा अट्टपएसिए जाव सिय चउफासे प०, जइ एगवन्ने एगवन्नदुवन्नतिवन्नचउवन्ना जहेव अट्टपएसियस्स, जइ पंचवन्ने सिय कालए य नीलए य लोहियए य हालिद्ए य सुक्लिङ्ए य १, सिय कालए य नीलए य लोहियए य हालिद्ए य सुक्लिङ्गा य २, एवं परिवाडीए एकतीसं भंगा भाणियव्वा जाव सिय कालगा य नीलगा य लोहियगा य हालिद्गा य सुक्लिङ्ए य ३१, एवं एकगदुयगतियगचउक्कगपंचगसंजोगेहिं दो छत्तीसा भंगसया भवंति, गंधा जहा अट्टपएसियस्स, रसा जहा एयस्स चव वन्ना, फासा जहा चउप्पएसियस्स । दसपएसिए णं भंते ! खंधे० पुच्छा, गोयमा ! सिय एगवन्ने जहा नवपएसिए जाव सिय चउफासे पन्नत्ते, जइ एगवन्ने एगवन्नदुवन्नतिवन्नचउवन्ना जहेव नवपएसियस्स, पंचवन्नेवि तहेव नवरं वत्तीसइमोवि भंगो भन्नइ, एवमेए एकगदुयगतियगचउक्कगपंचगसंजोएसु दोन्नि सत्तती(सं)सा भंगसया भवंति, गंधा जहा नवपएसियस्स, रसा जहा एयस्स चव वन्ना, फासा जहा चउप्पएसियस्स । जहा दसपएसिओ एवं संखेज्जपएसिओवि, एवं असंखेज्जपएसिओवि, सुहुमपरिणओवि अणंतपएसिओवि एवं चव ॥ ६६७ ॥ वायरपरिणए णं भंते ! अणंतपएसिए खंधे कइवन्ने० ? एवं जहा अट्टारसमसए जाव सिय अट्टफासे पन्नत्ते, वन्नगंधरसा जहा दसपएसियस्स, जइ चउफासे सव्वे कक्खडे सव्वे गुरुए सव्वे सीए सव्वे निद्धे १, सव्वे कक्खडे सव्वे गुरुए सव्वे सीए सव्वे लुक्खे २, सव्वे कक्खडे सव्वे गुरुए सव्वे उसिणे सव्वे निद्धे ३, सव्वे कक्खडे सव्वे गुरुए सव्वे उसिणे सव्वे लुक्खे ४, सव्वे कक्खडे सव्वे लहुए सव्वे सीए सव्वे णिद्धे ५, सव्वे कक्खडे सव्वे लहुए सव्वे सीए सव्वे लुक्खे ६, सव्वे कक्खडे सव्वे लहुए सव्वे

उत्तिणे सव्वे निद्धे ७, सव्वे कक्खडे सव्वे लहुए सव्वे उत्तिणे सव्वे लुक्खे ८, सव्वे मउए सव्वे गुरुए सव्वे सीए सव्वे निद्धे ९, सव्वे मउए सव्वे गुरुए सव्वे सीए सव्वे लुक्खे १०, सव्वे मउए सव्वे गुरुए सव्वे उत्तिणे सव्वे निद्धे ११, सव्वे मउए सव्वे गुरुए सव्वे उत्तिणे सव्वे लुक्खे १२, सव्वे मउए सव्वे लहुए सव्वे सीए सव्वे निद्धे १३, सव्वे मउए सव्वे लहुए सव्वे सीए सव्वे लुक्खे १४, सव्वे मउए सव्वे लहुए सव्वे उत्तिणे सव्वे निद्धे १५, सव्वे मउए सव्वे लहुए सव्वे उत्तिणे सव्वे लुक्खे १६, एए सोलस भंगा ॥ जइ पंचफासे सव्वे कक्खडे सव्वे गुरुए सव्वे सीए देसे निद्धे देसे लुक्खे १, सव्वे कक्खडे सव्वे गुरुए सव्वे सीए देसे निद्धे देसा लुक्खा २, सव्वे कक्खडे सव्वे गुरुए सव्वे सीए देसा निद्धा दे(सा)से लुक्खे ३, सव्वे कक्खडे सव्वे गुरुए सव्वे सीए देसा निद्धा देसा लुक्खा ४, सव्वे कक्खडे सव्वे गुरुए सव्वे उत्तिणे देसे निद्धे देसे लुक्खे ४, सव्वे कक्खडे सव्वे लहुए सव्वे सीए देसे निद्धे देसे लुक्खे ४, सव्वे कक्खडे सव्वे लहुए सव्वे उत्तिणे देसे निद्धे देसे लुक्खे । ४ । एवं एए कक्खडेणं सोलस भंगा । सव्वे मउए सव्वे गुरुए सव्वे सीए देसे निद्धे देसे लुक्खे ४, एवं मउएणवि समं सोलस भंगा, एवं वत्तीसं भंगा । सव्वे कक्खडे सव्वे गुरुए सव्वे निद्धे देसे सीए देसे उत्तिणे ४, सव्वे कक्खडे सव्वे गुरुए सव्वे लुक्खे देसे सीए देसे उत्तिणे ४, एए वत्तीसं भंगा, सव्वे कक्खडे सव्वे सीए सव्वे निद्धे देसे गुरुए देसे लहुए ४, एत्थवि वत्तीसं भंगा, सव्वे गुरुए सव्वे सीए सव्वे निद्धे देसे कक्खडे देसे मउए ४, एत्थवि वत्तीसं भंगा, एवं सव्वेते पंचफासे अट्ठावीसं भंगसयं भवइ । जइ छप्फासे सव्वे कक्खडे सव्वे गुरुए देसे सीए देसे उत्तिणे देसे निद्धे देसे लुक्खे १, सव्वे कक्खडे सव्वे गुरुए देसे सीए देसे उत्तिणे देसे निद्धे देसा लुक्खा २, एवं जाव सव्वे कक्खडे सव्वे गुरुए देसा सीया देसा उत्तिणा देसा निद्धा देसा लुक्खा १६, एए सोलस भंगा । सव्वे कक्खडे सव्वे लहुए देसे सीए देसे उत्तिणे देसे निद्धे देसे लुक्खे एत्थवि सोलस भंगा, सव्वे मउए सव्वे गुरुए देसे सीए देसे उत्तिणे देसे निद्धे देसे लुक्खे एत्थवि सोलस भंगा, सव्वे मउए सव्वे लहुए देसे सीए देसे उत्तिणे देसे निद्धे देसे लुक्खे एत्थवि सोलस भंगा, एए चउसट्ठिं भंगा, सव्वे कक्खडे सव्वे सीए देसे गुरुए देसे लहुए देसे निद्धे देसे लुक्खे एवं जाव सव्वे मउए सव्वे उत्तिणे देसा गुरुया देसा लहुया देसा निद्धा देसा लुक्खा एत्थवि चउसट्ठिं भंगा, सव्वे कक्खडे सव्वे निद्धे देसे गुरुए देसे लहुए देसे सीए देसे उत्तिणे जाव सव्वे मउए सव्वे लुक्खे देसा गुरुया देसा लहुया देसा सीया देसा उत्तिणा

१६, एए चउसट्ठि भंगा, सव्वे गुरुए सव्वे सीए देसे कक्खडे देसे मउए देसे निद्धे देसे लुक्खे एवं जाव सव्वे लहुए सव्वे उसिणे देसा कक्खडा देसा निद्धा देसा मउया देसा लुक्खा, एए चउसट्ठि भंगा, सव्वे गुरुए सव्वे निद्धे देसे कक्खडे देसे मउए देसे सीए देसे उसिणे जाव सव्वे लहुए सव्वे लुक्खे देसा कक्खडा देसा मउया देसा सीया देसा उसिणा, एए चउसट्ठि भंगा, सव्वे सीए सव्वे निद्धे देसे कक्खडे देसे मउए देसे गुरुए देसे लहुए जाव सव्वे उसिणे सव्वे लुक्खे देसा कक्खडा देसा मउया देसा गुरुया देसा लहुया, एवमेए चउसट्ठि भंगा, सव्वे ते छप्पासे तिन्निचउरासीया भंगसया भवंति ३८४ । जइ सत्तफासे सव्वे कक्खडे देसे गुरुए देसे लहुए देसे सीए देसे उसिणे देसे निद्धे देसे लुक्खे १, सव्वे कक्खडे देसे गुरुए देसे लहुए देसे सीए देसे उसिणे देसा निद्धा देसा लुक्खा ४, सव्वे कक्खडे देसे गुरुए देसे लहुए देसे सीए देसा उसिणा देसे निद्धे दे(से)सा लुक्खा ४, सव्वे कक्खडे देसे गुरुए देसे लहुए देसा सीया देसे उसिणे देसे निद्धे देसे लुक्खे ४, सव्वे कक्खडे देसे गुरुए देसे लहुए देसा सीया देसा उसिणा देसे निद्धे देसे लुक्खे, सव्वेए सोलस भंगा भाणियव्वा, सव्वे कक्खडे देसे गुरुए देसा लहुया देसे सीए देसे उसिणे देसे निद्धे देसे लुक्खे, एवं गुरुएणं एगत्तेणं लहुएणं पुहुत्तेणं एएवि सोलस भंगा, सव्वे कक्खडे देसा गुरुया देसे लहुए देसे सीए देसे उसिणे देसे निद्धे देसे लुक्खे एएवि सोलस भंगा भाणियव्वा, सव्वे कक्खडे देसा गुरुया देसा लहुया देसे सीए देसे उसिणे देसे निद्धे देसे लुक्खे एएवि सोलस भंगा भाणियव्वा, एवमेए चउसट्ठि भंगा कक्खडेण समं, सव्वे मउए देसे गुरुए देसे लहुए देसे सीए देसे उसिणे देसे निद्धे देसे लुक्खे । एवं मउएणवि समं चउसट्ठि भंगा भाणियव्वा, सव्वे गुरुए देसे कक्खडे देसे मउए देसे सीए देसे उसिणे देसे निद्धे देसे लुक्खे एवं गुरुएणवि समं चउसट्ठि भंगा कायव्वा, सव्वे लहुए देसे कक्खडे देसे मउए देसे सीए देसे उसिणे देसे निद्धे देसे लुक्खे एवं लहुएणवि समं चउसट्ठि भंगा कायव्वा, सव्वे सीए देसे कक्खडे देसे मउए देसे गुरुए देसे लहुए देसे निद्धे देसे लुक्खे एवं सीएणवि समं चउसट्ठि भंगा कायव्वा, सव्वे उसिणे देसे कक्खडे देसे मउए देसे गुरुए देसे लहुए देसे निद्धे देसे लुक्खे एवं उसिणेणवि समं चउसट्ठि भंगा कायव्वा, सव्वे निद्धे देसे कक्खडे देसे मउए देसे गुरुए देसे लहुए देसे सीए देसे उसिणे एवं निद्धेणवि समं चउसट्ठि भंगा कायव्वा, सव्वे लुक्खे देसे कक्खडे देसे मउए देसे गुरुए देसे लहुए देसे सीए देसे उसिणे एवं लुक्खेणवि समं चउसट्ठि भंगा कायव्वा जाव सव्वे लुक्खे देसा कक्खडा देसा

मउया देसा गुरुया देसा लहुया देसा सीया देसा उसिणा, एवं सत्तफासे पंचवार-
सुत्तरा भंगसया भवंति । जइ अट्टफासे देसे कक्खडे देसे मउए देसे गुरुए देसे
लहुए देसे सीए देसे उसिणे देसे निद्धे देसे लुक्खे ४, देसे कक्खडे देसे मउए देसे
गुरुए देसे लहुए देसे सीए देसा उसिणा देसे निद्धे देसे लुक्खे ४, देसे कक्खडे देसे
मउए देसे गुरुए देसे लहुए देसा सीया दे(सा)से उसिणे देसे निद्धे देसे लुक्खे ४,
देसे कक्खडे देसे मउए देसे गुरुए देसे लहुए देसा सीया देसा उसिणा देसे निद्धे
देसे लुक्खे ४, एए चत्तारि चउक्का सोलस भंगा, देसे कक्खडे देसे मउए देसे
गुरुए देसा लहुया देसे सीए देसे उसिणे देसे निद्धे देसे लुक्खे, एवं एए गुरुएणं
एगत्तएणं लहुएणं पोहत्तएणं सोलस भंगा कायव्वा, देसे कक्खडे देसे मउए देसा
गुरुया देसे लहुए देसे सीए देसे उसिणे देसे निद्धे देसे लुक्खे एएवि सोलस
भंगा कायव्वा, देसे कक्खडे देसे मउए देसा गुरुया देसा लहुया देसे सीए देसे
उसिणे देसे निद्धे देसे लुक्खे एएवि सोलस भंगा कायव्वा, सव्वेऽवि ते चउसट्ठिं
भंगा कक्खडमउएहिं एगत्तएहिं, ताहे कक्खडेणं एगत्तएणं मउएणं पुहत्तेणं एए चेव
चउसट्ठिं भंगा कायव्वा, ताहे कक्खडेणं पुहत्तएणं मउएणं एगत्तएणं चउसट्ठिं भंगा
कायव्वा, ताहे एएहिं चेव दोहिवि पुहुत्तेहि चउसट्ठिं भंगा कायव्वा जाव देसा
कक्खडा देसा मउया देसा गुरुया देसा लहुया देसा सीया देसा उसिणा देसा
निद्धा देसा लुक्खा एसो अपच्छिमो भंगो, सव्वेते अट्टफासे दो छप्पन्ना भंगसया
भवंति । एवं एए वायरपरिणए अणंतपएसिए खंधे सव्वेसु संजोएसु वारस छन्नउया
भंगसया भवंति ॥ ६६८ ॥ कइविहे णं भंते ! परमाणू प० ? गोयमा ! चउव्विहे
परमाणू प०, तं०-दव्वपरमाणू, खेत्तपरमाणू, कालपरमाणू, भावपरमाणू, दव्व-
परमाणू णं भंते ! कइविहे प० ? गोयमा ! चउव्विहे प०, तं०-अच्छेज्जे, अभेज्जे,
अडज्जे, अगेज्जे, खेत्तपरमाणू णं भंते ! कइविहे प० ? गोयमा ! चउव्विहे प०,
तं०-अणद्धे, अमज्जे, अपएसे, अविभाइमे, कालपरमाणू पुच्छा, गोयमा ! चउव्विहे
प०, तं०-अवज्जे, अगंधे, अरसे, अफासे, भावपरमाणू णं भंते ! कइविहे प० ?
गोयमा ! चउव्विहे प०, तं०-वन्नमंते, गंधमंते, रसमंते, फासमंते । सेवं भंते । २
ति जाव विहरइ ॥ ६६९ ॥ वीसइमस्स सयस्स पंचमो उद्देसो समत्तो ॥

पुढविकाइए णं भंते ! इमीसे रयणप्पभाए य सक्करप्पभाए य अतरा समोहए
समोहणित्ता जे भविए सोहम्मे कप्पे पुढविकाइयत्ताए उववज्जितए से णं भंते ! कि
पुव्वि उववज्जित्ता पच्छा आहारेज्जा पुव्वि आहारित्ता पच्छा उववज्जेज्जा ? गोयमा !
पुव्वि वा उववज्जित्ता एवं जहा सत्तरसमसए छट्ठुद्देसए जाव से तेणट्ठेणं गोयमा !

एवं वुच्चइ पुर्वि वा जाव उववज्जेजा नवरं तहिं संपाउणेजा इमेहिं आहारो भन्नइ
 सेसं तं चेव । पुढविकाइए णं भंते ! इमीसे रयणप्पभाए पुढवीए सक्करप्पभाए पुढवीए
 अंतरा समोहए जे भविए ईसाणे कप्पे पुढविकाइयत्ताए उववज्जित्तए एवं चेव, एवं
 जाव ईसिप्पब्भाराए उववाएयव्वो । पुढविकाइए णं भंते ! सक्करप्पभाए पुढवीए
 वालुयप्पभाए पुढवीए अंतरा समोहए २ ता जे भविए सोहम्मे जाव ईसिप्पब्भाराए,
 एवं एएणं कमेणं जाव तमाए अहेसत्तमाए य पुढवीए अंतरा समोहए २ ता जे
 भविए सोहम्मे कप्पे जाव ईसिप्पब्भाराए उववाएयव्वो । पुढविकाइए णं भंते !
 सोहम्मीसाणाणं सणंकुमारमाहिंदाण य कप्पाणं अंतरा समोहए २ ता जे भविए
 इमीसे रयणप्पभाए पुढवीए पुढविकाइयत्ताए उववज्जित्तए से णं भंते ! पुर्वि उव-
 वज्जिता पच्छा आहारेजा सेसं तं चेव जाव से तेणट्ठेणं जाव णिक्खेवओ । पुढ-
 विकाइए णं भंते ! सोहम्मीसाणाणं सणंकुमारमाहिंदाण य कप्पाणं अंतरा समोहए
 २ ता जे भविए सक्करप्पभाए पुढवीए पुढविकाइयत्ताए उववज्जित्तए एव चेव, एवं
 जाव अहेसत्तमाए उववाएयव्वो, एवं सणंकुमारमाहिंदाणं वंभलोगस्स कप्पस्स
 अंतरा समोहए समोहणित्ता पुणरवि जाव अहेसत्तमाए उववाएयव्वो, एवं वंभलो-
 गस्स लंतगस्स य कप्पस्स अंतरा समोहए पुणरवि जाव अहेसत्तमाए, एवं लंत-
 गस्से महासुक्कस्स कप्पस्स य अंतरा समोहए पुणरवि जाव अहेसत्तमाए, एवं
 महासुक्कस्स सहस्सारस्स य कप्पस्स अंतरा पुणरवि जाव अहेसत्तमाए, एवं सह-
 स्सारस्स आणयपाणयकप्पाणं अंतरा पुणरवि जाव अहेसत्तमाए, एवं आणयपाण-
 याणं आरणअञ्जुयाण य कप्पाणं अंतरा पुणरवि जाव अहेसत्तमाए, एवं आरणअञ्जु-
 याणं गेवेज्जविमाणाण य अंतरा पुणरवि जाव अहेसत्तमाए, एवं गेवेज्जविमाणाणं
 अणुत्तरविमाणाण य अंतरा पुणरवि जाव अहेसत्तमाए, एवं अणुत्तरविमाणाणं ईसि-
 प्पब्भाराए य पुणरवि जाव अहेसत्तमाए उववाएयव्वो ॥ ६७० ॥ आउक्काइए णं
 भंते ! इमीसे रयणप्पभाए य सक्करप्पभाए य पुढवीए अंतरा समोहए समोहणित्ता
 जे भविए सोहम्मे कप्पे आउक्काइयत्ताए उववज्जित्तए सेसं जहा पुढविकाइयस्स
 जाव से तेणट्ठेणं, एवं पढमादोच्चाणं अंतरा समोहओ जाव ईसिप्पब्भाराए उववाए-
 यव्वो, एवं एएणं कमेणं जाव तमाए अहेसत्तमाए य पुढवीए अंतरा समोहए २
 ता जाव ईसिप्पब्भाराए उववाएयव्वो आउक्काइयत्ताए, आउक्काइए णं भंते ! सोह-
 म्मीसाणाणं सणंकुमारमाहिंदाण य कप्पाणं अंतरा समोहए समोहणित्ता जे भविए
 इमीसे रयणप्पभाए पुढवीए घणोदहि(२)-वलएसु आउक्काइयत्ताए उववज्जित्तए सेसं
 तं चेव एवं एएहिं चेव अंतरा समोहए जाव अहेसत्तमाए पुढवीए घणोदहिवलएसु

आउक्काइयत्ताए उववाएयव्वो, एवं जाव अणुत्तरविमाणानं ईसिप्पव्वभाराए पुढवीए अंतरा समोहए जाव अहेसत्तमाए घणोदहिवलएसु उववाएयव्वो ॥ ६७१ ॥ वाउक्काइए णं भंते ! इमीसे रयणप्पभाए पुढवीए सक्करप्पभाए पुढवीए अंतरा समोहए समोहणित्ता जे भविए सोहम्ममे कप्पे वाउक्काइयत्ताए उववज्जित्तए एवं जहा सत्तरसमसए वाउक्काइयउद्देसए तहा इद्वि, नवरं अंतरेसु समोहणा नेयव्वा सेसं तं चेव जाव अणुत्तरविमाणानं ईसिप्पव्वभाराए य पुढवीए अंतरा समोहए समोहणित्ता जे भविए घणवायतणुवाए घणवायतणुवायवलएसु वाउक्काइयत्ताए उववज्जित्तए सेसं तं चेव जाव से तेणट्ठेणं जाव उववज्जेज्जा । सेवं भंते ! २ त्ति ॥ ६७२ ॥ वीसइमस्स सयस्स छट्ठो उद्देसो समत्तो ॥

कइविहे णं भंते ! वंधे प० ? गोयमा ! तिविहे वंधे प०, तं०-जीवप्पओगवंधे, अणंतरवंधे, परंपरवंधे । नेरइयाणं भंते ! कइविहे वंधे प० ? एवं चेव, एवं जाव वेमाणियाणं । नाणावरणिज्जस्स णं भंते ! कम्मस्स कइविहे वंधे प० ? गोयमा ! तिविहे वंधे प०, तं०-जीवप्पओगवंधे, अणंतरवंधे, परंपरवंधे, नेरइयाणं भंते ! नाणावरणिज्जस्स कम्मस्स कइविहे वंधे प० ? एवं चेव, एवं जाव वेमाणियाणं, एवं जाव अंतराइयस्स । नाणावरणिज्जोदयस्स णं भंते ! कम्मस्स कइविहे वंधे प० ? गोयमा ! तिविहे वंधे प० एवं चेव, एवं नेरइयाणवि एवं जाव वेमाणियाणं, एवं जाव अतराइयउदयस्स, इत्थीवेयस्स णं भंते ! कइविहे वंधे प० ? गोयमा ! तिविहे वंधे प० एवं चेव, असुरकुमाराणं भंते ! इत्थीवेयस्स कइविहे वंधे प० ? गोयमा ! तिविहे वंधे प० एवं चेव, एवं जाव वेमाणियाणं, नवरं जस्स इत्थिवेदो अत्थि, एवं पुरिसवेयस्सवि, एवं नपुंसगवेयस्सवि जाव वेमाणियाण, नवरं जस्स जो अत्थि वेदो, दंसणमोहणिज्जस्स णं भंते ! कम्मस्स कइविहे वंधे प० ? एवं चेव निरंतरं जाव वेमाणियाणं, एवं चरित्तमोहणिज्जस्सवि जाव वेमाणियाणं, एवं एएणं क्रमेणं ओरालियसरीरस्स जाव कम्मगसरीरस्स, आहारसन्नाए जाव परिग्गहसण्णाए, कण्हलेस्साए जाव सुक्कलेस्साए, सम्मदिट्ठीए मिच्छादिट्ठीए सम्मामिच्छादिट्ठीए, आभिणिवोहियणाणस्स जाव केवलनाणस्स, मइअन्नाणस्स सुयअन्नाणस्स विभंगनाणस्स, एवं आभिणिवोहियणाणविसयस्स णं भंते ! कइविहे वंधे प० जाव केवलनाणविसयस्स मइअन्नाणविसयरस सुयअन्नाणविसयस्स विभंगणाणविसयस्स एएसिं सव्वेसिं पयाणं तिविहे वंधे प०, सव्वेते चउव्वीस दंडगा भाणियव्वा, नवर जाणियव्व जस्स जइ अत्थि जाव वेमाणियाणं भंते ! विभंगणाणविसयस्स कइविहे वंधे प० ? गोयमा ! तिविहे वंधे प०, तं०-जीवप्पओगवंधे, अणंतरवंधे, परंपरवंधे, सेवं भंते ! २ त्ति जाव विहरइ ॥ ६७३ ॥ वीसइमस्स सयस्स सत्तमो उद्देसो समत्तो ॥

कइ णं भंते ! कम्मभूमीओ प० ? गोयमा ! पन्नरस कम्मभूमीओ प०, तं०-पंच
भरहाइं, पंच एरवयाइं, पंच महाविदेहाइं, कइ णं भंते ! अकम्मभूमीओ प० ?
गोयमा ! तीसं अकम्मभूमीओ प०, तं०-पंच हेमवयाइं, पंच हे(ए)रन्नवयाइं, पंच हरि-
वासाइं, पंच रम्मगवासाइं, पंच देवकुराइं, पंच उत्तरकुराइं, एयासु णं भंते ! तीसासु
अकम्मभूमीसु अत्थि उस्सप्पिणीइ वा ओसप्पिणीइ वा ? णो इणट्ठे समट्ठे, एएसु
णं भंते ! पंचसु भरहेसु पंचसु एरवएसु अत्थि उस्सप्पिणीइ वा ओसप्पिणीइ वा ?
हंता अत्थि, एएसु णं पंचसु महाविदेहेसु०, णेवत्थि उस्सप्पिणी नेवत्थि ओस-
प्पिणी अवट्ठिए णं तत्थ काले प० समणाउसो ! ॥ ६७४ ॥ एएसु णं भंते ! पंचसु
महाविदेहेसु अरिहंता भगवंतो पंचमहव्वइयं सपडिक्कमणं धम्मं पन्नवयंति ? णो
इणट्ठे समट्ठे, एएसु णं पंचसु भरहेसु पंचसु एरवएसु पु(रिम)रच्छिमप(च्च)च्छिमगा
दुवे अरिहंता भगवंतो पंचमहव्वइयं पंचाणुव्वइयं सपडिक्कमणं धम्मं पन्न(वे)वयंति,
अवसेसा णं अरिहंता भगवंतो चाउज्जामं धम्मं पन्नवयंति, एएसु णं पंचसु महावि-
देहेसु अरिहंता भगवंतो चाउज्जामं धम्मं पन्नवयंति । जंबुद्दीवे णं भंते ! दीवे भारहे
वासे इमीसे ओसप्पिणीए कइ तित्थगरा पन्नत्ता ? गोयमा ! चउव्वीसं तित्थगरा
पन्नत्ता, तंजहा-उसभअजियसंभवअभिनंदणसुमइसुप्पभसुपासससिपुप्फदंतसीयलसे-
ज्जंसवासुपुज्जविमलअणंतधम्मसंतिकुंथुअरमल्लिमुणिसुव्वयनमिनेमिपासवद्धमाणा २४
॥ ६७५ ॥ एएसि णं भंते ! चउवीसाए तित्थगराणं कइ जिणंतरा प० ? गोयमा !
तेवीसं जिणंतरा प० । एएसु णं भंते ! तेवीसाए जिणंतरेसु कस्स कहिं कालिय-
सुयस्स वोच्छेदे प० ? गोयमा ! एएसु णं तेवीसाए जिणंतरेसु पुरिमपच्छिमएसु
अट्ठसु २ जिणंतरेसु एत्थ णं कालियसुयस्स अवोच्छेदे प०, मज्झिमएसु सत्तसु
जिणंतरेसु एत्थ णं कालियसुयस्स वोच्छेदे प०, सव्वत्थावे णं वोच्छिन्ने दिट्ठिवाए
॥ ६७६ ॥ जंबुद्दीवे णं भंते ! दीवे भारहे वासे इमीसे ओसप्पिणीए देवाणुप्पियाणं
केवइयं कालं पुव्वगए अणु(सि)सज्जिस्सइ ? गोयमा ! जंबुद्दीवे णं दीवे भारहे वासे
इमीसे ओसप्पिणीए ममं एगं वाससहस्सं पुव्वगए अणुसज्जिस्सइ, जहा णं भंते !
जंबुद्दीवे दीवे भारहे वासे इमीसे ओसप्पिणीए देवाणुप्पियाणं एगं वाससहस्सं पुव्वगए
अणुसज्जिस्सइ तथा णं भंते ! जंबुद्दीवे दीवे भारहे वासे इमीसे ओसप्पिणीए अवसे-
साणं तित्थगराणं केवइयं कालं पुव्वगए अणुसज्जित्था ? गोयमा ! अत्थेगइयाणं
संखेज्जं कालं अत्थेगइयाणं असंखेज्जं कालं ॥ ६७७ ॥ जंबुद्दीवे णं भंते ! दीवे
भारहे वासे इमीसे ओसप्पिणीए देवाणुप्पियाणं केवइयं कालं तित्थे अणुसज्जिस्सइ ?
गोयमा ! जंबुद्दीवे दीवे भारहे वासे इमीसे ओसप्पिणीए ममं एगवीसं वाससहस्साइं

तित्थे अणुसज्जिस्सइ ॥ ६७८ ॥ जहा णं भंते । जंबुदीवे दीवे भारहे वासे इमीसे ओसप्पिणीए देवानुप्पियाणं एकवीसं वाससहस्साइं तित्थे अणुसज्जिस्सइ तहा णं भंते । जंबुदीवे दीवे भारहे वासे आगमेस्साणं चरिमतिथगरस्स केवइयं कालं तित्थे अणुसज्जिस्सइ ? गोयमा ! जावइए णं उसभस्स अरहओ कोसलियस्स जिणपरियाए एवइयाइं संखेज्जाइं आगमेस्साणं चरिमतिथगरस्स तित्थे अणुसज्जिस्सइ ॥ ६७९ ॥ तित्थं भंते ! ति(त्थे)त्थं तित्थगरे तित्थं ? गोयमा ! अरहा ताव नियमं तित्थगरे, तित्थं पुण चाउवन्नाइन्ने समणसघे, तं०-समणा समणीओ सावगा सावियाओ ॥ ६८० ॥ पवयणं भंते ! पवयणं पावयणी पवयणं ? गोयमा ! अरहा ताव नियमं पावयणी, पवयणं पुण दुवालसंगे गणिपिडगे, तं०-आयारो जाव दिट्ठिवाओ ॥ जे इमे भंते ! उग्गा भोगा राइन्ना इक्खागा नाया कोरव्वा एए णं अस्सि धम्मे ओगाहंति अस्सि० २ ता अट्ठविहं कम्मरयमलं पवाहंति पवाहिता तओ पच्छा सिज्जंति जाव अंतं करेंति ? हंता गोयमा ! जे इमे उग्गा भोगा तं चेव जाव अंतं करेंति, अत्थेगइया अन्नयरेसु देवलोएसु देवत्ताए उववत्तारो भवंति । कइविहा णं भंते ! देवलोया प० ? गोयमा ! चउव्विहा देवलोया प०, तं०-भवणवासी, वाणमंतरा, जोइसिया, वेमाणिया । सेवं भंते ! २ ति ॥ ६८१ ॥ वीसइमे सए अट्ठमो उद्देसो समत्तो ॥

कइविहा णं भंते ! चारणा प० ? गोयमा ! दुविहा चारणा प०, तंजहा-विज्ञा-चारणा य जंवाचारणा य, से केणट्ठेणं भंते ! एवं वुच्चइ विज्ञाचारणा विज्ञाचारणा ? गोयमा ! तस्स णं छट्ठंलट्ठेणं अनिक्खित्तेणं तवोकम्मेणं विज्ञाए उत्तरगुणलद्धिं खममाणस्स विज्ञाचारणलद्धी नामं लद्धी समुप्पज्जइ, से तेणट्ठेणं जाव विज्ञाचारणा २, विज्ञाचारणस्स णं भंते ! कहां सीहा गई कहां सीहे गइविसए पण्णत्ते ? गोयमा ! अयन्नं जंबूदीवे दीवे जाव किंचिविसेसाहिए परिक्खेवेणं देवे णं महिद्धिए जाव महेसक्खे जाव इणामेवत्तिकट्ठु केवलकप्पं जंबुदीवं दीवं तिहिं अच्छरानिवाएहिं तिकखुत्तो अणुपरियट्ठित्ताणं हव्वमागच्छेज्जा, विज्ञाचारणस्स णं गोयमा ! तहा सीहा गई तहा सीहे गइविसए पण्णत्ते । विज्ञाचारणस्स णं भंते ! तिरियं केवइए गइविसए पण्णत्ते ? गोयमा ! से णं इओ एगेणं उप्पाएणं माणुसुत्तरे पव्वए समोसरणं करेइ करेत्ता विइएणं उप्पाएणं नंदीसरवरे दीवे समोसरणं करेइ करेत्ता तओ पडिनियत्तइ २ ता इहमागच्छइ, विज्ञाचारणस्स णं गोयमा ! तिरियं एवइए गइविसए पण्णत्ते, विज्ञाचारणस्स णं भंते ! उट्ठं केवइए गइविसए पण्णत्ते ? गोयमा ! से णं इओ एगेणं उप्पाएणं नंदणवणे समोसरणं करेइ करेत्ता विइएणं उप्पाएणं पंडगवणे समोसरणं करेइ करेत्ता तओ पडिनियत्तइ २ ता इहमागच्छइ,

विज्जाचारणस्स णं गोयमा ! उद्धं एवइए गइविसए पण्णत्ते, से णं तस्स ठाणस्स अणालोइयपडिक्कंते कालं करेइ नत्थि तस्स आराहणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा ॥६८२॥ से केणट्ठेणं भंते ! एवं वुच्चइ जंघाचार(णे)णा २ ? गोयमा ! तस्स णं अट्ठमंअट्ठमेणं अनिक्खित्तेणं तवोक्कमेणं अप्पाणं भावेमाणस्स जंघाचारणलद्धी नामं लद्धी समुप्पज्जइ, से तेणट्ठेणं जाव जंघाचारणा २, जंघाचारणस्स णं भंते ! कहं सीहा गई कहं सीहे गइविसए पण्णत्ते ? गोयमा ! अयन्नं जंबुद्दीवे दीवे एवं जहेव विज्जाचारणस्स नवरं तिसत्तखुत्तो अणुपरियट्ठित्ताणं हव्वमागच्छेज्जा, जंघाचारणस्स णं गोयमा ! तहा सीहा गई तहा सीहे गइविसए पण्णत्ते सेसं तं चेव । जंघाचारणस्स णं भंते ! तिरियं केवइए गइविसए पण्णत्ते ? गोयमा ! से णं इओ एगेणं उप्पाएणं रुयगवरे दीवे समोसरणं करेइ करेत्ता तओ पडिनियत्तमाणे विइएणं उप्पाएणं नंदीसरवर-दीवे समोसरणं करेइ करेत्ता इह(हव्व)मागच्छइ । जंघाचारणस्स णं गोयमा ! तिरियं एवइए गइविसए पण्णत्ते, जंघाचारणस्स णं भंते ! उद्धं केवइए गइविसए पण्णत्ते ? गोयमा ! से णं इओ एगेणं उप्पाएणं पंडगवणे समोसरणं करेइ करेत्ता तओ पडिनियत्तमाणे विइएणं उप्पाएणं नंदणवणे समोसरणं करेइ २ ता इहमागच्छइ, जंघा-चारणस्स णं गोयमा ! उद्धं एवइए गइविसए पण्णत्ते, से णं तस्स ठाणस्स अणालोइयपडिक्कंते कालं करेइ नत्थि तस्स आराहणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा, सेवं भंते ! सेवं भंते ! त्ति जाव विहरइ ॥ ६८३ ॥ वीसइमे सए नवमो उद्देसो समत्तो ॥

जीवा णं भंते ! किं सोवक्कमाउया निरुक्कमाउया ? गोयमा ! जीवा सोवक्कमाउयावि निरुक्कमाउयावि, नेरइयाणं पुच्छा, गोयमा ! नेरइया नो सोवक्कमाउया निरुक्कमाउया, एवं जाव थणियकुमारा, पुढविकाइया जहा जीवा, एवं जाव मणुस्सा, वाणमंतरजोइसियवेमाणिया जहा नेरइया ॥६८४॥ नेरइया णं भंते ! किं आओवक्कमेणं उववज्जंति, परोवक्कमेणं उववज्जंति, निरुक्कमेणं उववज्जंति ? गोयमा ! आओवक्कमेणवि उववज्जंति, परोवक्कमेणवि उववज्जंति, निरुक्कमेणवि उववज्जंति, एवं जाव वेमाणिया णं । नेरइया णं भंते ! किं आओवक्कमेणं उववट्ठंति, परोवक्कमेण उववट्ठंति, निरुक्कमेणं उववट्ठंति ? गोयमा ! नो आओवक्कमेणं उव्वट्ठंति, नो परोवक्कमेणं उववट्ठंति, निरुक्कमेणं उव्वट्ठंति, एवं जाव थणियकुमारा, पुढविकाइया जाव मणुस्सा तिसु उव्वट्ठंति, सेसा जहा नेरइया नवरं जोइसियवेमाणिया चयंति ॥ नेरइया णं भंते ! किं आ(य)इद्धीए उववज्जंति परिद्धीए उववज्जंति ? गोयमा ! आइद्धीए

उववज्जंति नो परिद्धीए उववज्जंति, एवं जाव वेमाणिया णं । नेरइया णं भंते ! किं आइद्धीए उववट्ठंति परिद्धीए उववट्ठंति ? गोयमा ! आइद्धीए उववट्ठंति नो परिद्धीए उववट्ठंति, एवं जाव वेमाणिया, नवरं जोइसियवेमाणिया चयंतीति अभिलावो । नेरइया णं भंते ! किं आयकम्मुणा उववज्जंति परकम्मुणा उववज्जंति ? गोयमा ! आयकम्मुणा उववज्जंति नो परकम्मुणा उववज्जति, एवं जाव वेमाणिया, एवं उववट्ठणादडओवि । नेरइया णं भंते ! किं आयप्पओगेणं उववज्जंति परप्पओगेणं उववज्जंति ? गोयमा ! आयप्पओगेणं उववज्जंति नो परप्पओगेणं उववज्जंति, एवं जाव वेमाणिया, एवं उववट्ठणादंडओवि ॥ ६८५ ॥ नेरइया णं भंते ! किं कइसंचिया अकइसंचिया अव्वत्त(व)गसंचिया ? गोयमा ! नेरइया कइसंचियावि अकइसंचियावि अव्वत्तगसंचियावि, से केणट्ठेणं जाव अव्वत्तगसंचियावि ? गोयमा ! जे णं नेरइया संखेज्जएणं पवेसणएणं पविसंति ते णं नेरइया कइसंचिया, जे णं नेरइया असंखेज्जएणं पवेसणएणं पविसंति ते णं नेरइया अकइसंचिया, जे णं नेरइया एक्कएणं पवेसणएणं पविसंति ते णं नेरइया अव्वत्तगसंचिया, से तेणट्ठेणं गोयमा ! जाव अव्वत्तगसंचियावि, एवं जाव थणियकुमारा, पुढविकाइयाणं पुच्छा, गोयमा ! पुढविकाइया नो कइसंचिया अकइसंचिया नो अव्वत्तगसंचिया, से केणट्ठेणं भंते ! एवं वुच्चइ जाव नो अव्वत्तगसंचिया ? गोयमा ! पुढविकाइया असंखेज्जएणं पवेसणएणं पविसंति से तेणट्ठेणं जाव नो अव्वत्तगसंचिया, एवं जाव वणस्सइकाइया, वेइंदिया जाव वेमाणिया जहा नेरइया, सिद्धाणं पुच्छा, गोयमा ! सिद्धा कइसंचिया नो अकइसंचिया अव्वत्त(व)गसंचियावि, से केणट्ठेणं भंते ! जाव अव्वत्तगसंचियावि ? गोयमा ! जे णं सिद्धा संखेज्जएणं पवेसणएणं पविसंति ते णं सिद्धा कइसंचिया, जे णं सिद्धा एक्कएणं पवेसणएणं पविसंति ते णं सिद्धा अव्वत्तगसंचिया, से तेणट्ठेणं गोयमा ! जाव अव्वत्तगसंचियावि ॥ एएसि णं भंते ! नेरइयाणं कइसंचियाणं अकइसंचियाणं अव्वत्तगसंचियाणं य कयरे २ जाव विसेसाहिया वा ? गोयमा ! सव्वत्थोवा नेरइया अव्वत्तगसंचिया, कइसंचिया संखेज्जगुणा, अकइसंचिया असंखेज्जगुणा, एवं एगिंदियवज्जाणं जाव वेमाणियाणं अप्पावहुगं, एगिंदियाणं नत्थि अप्पावहुगं । एएसि णं भंते ! सिद्धाणं कइसंचियाणं अव्वत्तगसंचियाणं य कयरे २ जाव विसेसाहिया वा ? गोयमा ! सव्वत्थोवा सिद्धा कइसंचिया, अव्वत्तगसंचिया संखेज्जगुणा ॥ नेरइया णं भंते ! किं छक्कसमज्जिया १, नोछक्कसमज्जिया २, छक्केण य नोछक्केण य समज्जिया ३, छक्केहि य समज्जिया ४, छक्केहि य नोछक्केण य समज्जिया ५ ? गोयमा ! नेरइया छक्कसमज्जियावि १, नोछक्कसमज्जियावि २, छक्केण य नोछक्केण य समज्जियावि ३,

छक्केहिं समज्जियावि ४, छक्केहि य नोछक्केण य समज्जियावि ५, से केणट्टेणं भंते ! एवं वुच्चइ नेरइया छक्कसमज्जियावि जाव छक्केहि य नोछक्केण य समज्जियावि ? गोयमा ! जे णं नेरइया छक्कएणं पवेसणएणं पविसंति ते णं नेरइया छक्कसमज्जिया १, जे णं नेरइया जहन्नेणं एक्केण वा दोहिं वा ति(ती)हिं वा उक्कोसेणं पंचएणं पवेसणएणं पविसंति ते णं नेरइया नोछक्कसमज्जिया २, जे णं नेरइया एगेणं छक्कएणं अन्नेण य जहन्नेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं नेरइया छक्केण य नोछक्केण य समज्जिया ३, जे णं नेरइया अणेगेहिं छक्केहिं पवेसणएणं पविसंति ते णं नेरइया छक्केहिं समज्जिया ४, जे णं नेरइया अणेगेहिं छक्केहिं अण्णेण य जहन्नेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं नेरइया छक्केहि य नोछक्केण य समज्जिया ५, से तेणट्टेणं तं चव जाव समज्जियावि, एवं जाव थणियकुमारा । पुढविकाइयाणं पुच्छा, गोयमा ! पुढविकाइया नो छक्कसमज्जिया १, नो नोछक्कसमज्जिया २, णो छक्केण य नोछक्केण य समज्जिया ३, छक्केहिं समज्जियावि ४, छक्केहि य नोछक्केण य समज्जियावि ५, से केणट्टेणं भंते ! जाव समज्जियावि ? गोयमा ! जे णं पुढविकाइया णेगेहिं छक्कएहिं पवेसणं पविसंति ते णं पुढविकाइया छक्केहिं समज्जिया, जे णं पुढविकाइया णेगेहिं छक्कएहिं अन्नेण य जहन्नेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं पुढविकाइया छक्केहि य नोछक्केण य समज्जिया, से तेणट्टेणं जाव समज्जियावि, एवं जाव वणस्सइकाइया, वेइंदिया जाव वेमाणिया सिद्धा एए जहा नेरइया । एएसि णं भंते ! नेरइयाणं छक्कसमज्जियाणं नोछक्कसमज्जियाणं छक्केण य नोछक्केण य समज्जियाणं छक्केहिं य समज्जियाणं छक्केहि य नोछक्केण य समज्जियाण य कयरे २ जाव विसेसाहिया वा ? गोयमा ! सव्वत्थोवा नेरइया छक्कसमज्जिया, नोछक्कसमज्जिया संखेज्जगुणा, छक्केण य नोछक्केण य समज्जिया संखेज्जगुणा, छक्केहि य समज्जिया असंखेज्जगुणा, छक्केहि य नोछक्केण य समज्जिया संखेज्जगुणा, एवं जाव थणियकुमारा । एएसि णं भंते ! पुढविकाइयाणं छक्केहिं समज्जियाणं छक्केहि य नोछक्केण य समज्जियाणं कयरे २ जाव विसेसाहिया वा ? गोयमा ! सव्वत्थोवा पुढविकाइया छक्केहिं समज्जिया, छक्केहि य नोछक्केण य समज्जिया संखेज्जगुणा, एवं जाव वणस्सइकाइयाणं, वेइंदियाणं जाव वेमाणियाणं जहा नेरइयाणं । एएसि णं भंते ! सिद्धाणं छक्कसमज्जियाणं नोछक्कसमज्जियाणं जाव छक्केहि य नोछक्केण य समज्जियाण य कयरे २ जाव विसेसाहिया वा ? गोयमा ! सव्वत्थोवा सिद्धा छक्केहि य नोछक्केण य समज्जिया, छक्केहिं समज्जिया संखेज्जगुणा, छक्केण य नोछक्केण य सम-

जिज्या संखेज्जगुणा, छक्कसमजिज्या संखेज्जगुणा, नोछक्कसमजिज्या संखेज्जगुणा । नेर-
इया णं भंते । कि वारससमजिज्या १, नोवारससमजिज्या २, वारसएण य नोवारस-
एण य समजिज्या ३, वारसएहिं समजिज्या ४, वारसएहि य नोवारसएण य समजिज्या
५ ? गोयमा ! नेरइया वारससमजिज्यावि जाव वारसएहि य नोवारसएण य सम-
जिज्यावि, से केणट्ठेणं भंते । एवं जाव समजिज्यावि ? गोयमा ! जे णं नेरइया वार-
सएणं पवेसणएणं पविसंति ते णं नेरइया वारससमजिज्या १, जे णं नेरइया जह-
न्नेणं एक्केण वा दोहिं वा तिहिं वा उक्कोसेणं एक्कारसएणं पवेसणएणं पविसंति ते णं
नेरइया नोवारससमजिज्या २, जे णं नेरइया वारसएणं पवेसणएणं अन्नेण य जह-
न्नेणं एक्केण वा दोहिं वा तिहिं वा उक्कोसेणं एक्कारसएणं पवेसणएणं पविसंति ते णं
नेरइया वारसएण य नोवारसएण य समजिज्या ३, जे णं नेरइया णेगेहिं वारसएहिं
पवेसणं पविसंति ते णं नेरइया वारसएहिं समजिज्या ४, जे णं नेरइया णेगेहिं
वारसएहिं अन्नेण य जहन्नेणं एक्केण वा दोहिं वा तिहिं वा उक्कोसेणं एक्कारसएणं
पवेसणएणं पविसंति ते णं नेरइया वारसएहि य नोवारसएण य समजिज्या ५, से
तेणट्ठेणं जाव समजिज्यावि, एवं जाव थणियकुमारा, पुढविकाइयाणं पुच्छा,
गोयमा ! पुढविकाइया नो वारससमजिज्या १, नो नोवारससमजिज्या २, नो वारस-
एण य नोवारसएण य समजिज्या ३, वारसएहिं समजिज्या ४, वारसएहि य नो वार-
सएण य समजिज्यावि ५, से केणट्ठेणं भंते । जाव समजिज्यावि ? गोयमा ! जे णं पुढ-
विकाइया णेगेहि वारसएहिं पवेसणं पविसंति ते णं पुढविकाइया वारसएहिं सम-
जिज्या, जे णं पुढविकाइया णेगेहिं वारसएहिं अन्नेण य जहन्नेणं एक्केण वा दोहिं वा
तिहिं वा उक्कोसेणं एक्कारसएणं पवेसणएणं पविसंति ते णं पुढविकाइया वारसएहि य
नोवारसएण य समजिज्या, से तेणट्ठेणं जाव समजिज्यावि, एवं जाव वणस्सइकाइया,
वेइंदिया जाव सिद्धा जहा नेरइया । एएसि णं भंते ! नेरइयाणं वारससमजिज्याणं०
सव्वेसिं अप्पावहुगं जहा छक्कसमजिज्याणं नवरं वारसाभिलावो सेसं तं चेव । नेर-
इया णं भंते ! कि चुलसीइसमजिज्या १, नोचुलसीइसमजिज्या २, चुलसीईए य
नोचुलसीईए य समजिज्या ३, चुलसीईहिं समजिज्या ४, चुलसीईहि य नोचुलसीईए
य समजिज्या ५ ? गोयमा ! नेरइया चुलसीइसमजिज्यावि जाव चुलसीईहिं य
नोचुलसीईए य समजिज्यावि, से केणट्ठेणं भंते ! एवं वुच्चइ जाव समजिज्यावि ?
गोयमा ! जे णं नेरइया चुलसी(ई)इएणं पवेसणएणं पविसंति ते णं नेरइया चुलसीइ-
समजिज्या १, जे णं नेरइया जहन्नेणं एक्केण वा दोहिं वा तिहिं वा उक्कोसेणं तेसीइ-
पवेसणएणं पविसंति ते णं नेरइया नोचुलसीइसमजिज्या २, जे णं नेरइया चुलसी-

इएणं अन्नेण य जहन्नेणं एक्केण वा दोहिं वा तिहिं वा उक्कोसेणं तेसीइएणं पवे-
 सणएणं पविसंति ते णं नेरइया चुलसीईए य नोचुलसीईए य समज्जिया ३, जे णं
 नेरइया णेगेहिं चुलसीइएहिं पवेसणं पविसंति ते णं नेरइया चुलसीई(ए)हिं सम-
 ज्जिया ४, जे णं नेरइया णेगेहिं चुलसीइएहिं अन्नेण य जहन्नेणं एक्केण वा जाव
 उक्कोसेणं तेसीइएणं जाव पविसंति ते णं नेरइया चुलसीईहि य नोचुलसीईए य
 समज्जिया ५, से तेणट्ठेणं जाव समज्जियावि, एवं जाव थणियकुमारा, पुढाविक्काइया
 तहेव पच्छिळएहिं दोहि २ नवरं अभिलावो चुलसीइओ भंगो एवं जाव वणस्सइ-
 काइया, बेइंदिया जाव वेमाणिया जहा नेरइया । सिद्धाणं पुच्छा, गोयमा ! सिद्धा
 चुलसीइसमज्जियावि १, नोचुलसीइसमज्जियावि २, चुलसीईए य नोचुलसीईए य
 समज्जियावि ३, नो चुलसीईहिं समज्जिया ४, नो चुलसीईहि य नोचुलसीईए य सम-
 ज्जिया ५, से केणट्ठेणं भंते ! जाव समज्जिया ? गोयमा ! जे णं सिद्धा चुलसीइएणं
 पवेसणएणं पविसंति ते णं सिद्धा चुलसीइसमज्जिया, जे णं सिद्धा जहन्नेणं एक्केण वा
 दोहिं वा तिहिं वा उक्कोसेणं तेसीइएणं पवेसणएणं पविसंति ते णं सिद्धा नोचुलसी-
 इसमज्जिया, जे णं सिद्धा चुलसीइएणं अन्नेण य जहन्नेणं एक्केण वा दोहिं वा तिहिं
 वा उक्कोसेणं तेसीइएणं पवेसणएणं पविसंति ते णं सिद्धा चुलसीईए य नोचुलसीईए
 य समज्जिया, से तेणट्ठेणं जाव समज्जिया । एएसि णं भंते ! नेरइयाणं चुलसीइस-
 मज्जियाणं नोचुलसीइसमज्जियाणं० सव्वेसि अप्पावहुगं जहा छक्कसमज्जियाणं जाव
 वेमाणियाणं, नवरं अभिलावो चुलसीइओ । एएसि णं भंते ! सिद्धाणं चुलसीइसम-
 ज्जियाणं नोचुलसीइसमज्जियाणं चुलसीईए य नोचुलसीईए य समज्जियाणं कयरे २
 जाव विसेसाहिंया वा ? गोयमा ! सव्वत्थोवा सिद्धा चुलसीईए य नोचुलसीईए य
 समज्जिया, चुलसीइसमज्जिया अणंतगुणा, नोचुलसीइसमज्जिया अणंतगुणा । सेवं
 भंते । २ त्ति जाव विहरइ ॥ ६८६ ॥ वीसइमस्स सयस्स दसमो उद्देसो
 समत्तो ॥ वीसइमं सयं समत्तं ॥ २० ॥

सालि कल अयसि वंसे इक्खू दब्भे य अब्भ तुलसी य । अट्ठेए दस वग्गा
 असीइं पुण होति उद्देसा ॥ १ ॥ रायणिहे जाव एवं वयासी-अह भंते ! साली वीही
 गोधूम जाव जवजवाणं एएसि णं भंते ! जे जीवा मूलत्ताए वक्कमंति ते णं भंते ! जीवा
 कओहितो उववज्जंति किं नेरइएहितो उववज्जंति तिरि० मणु० देवेहिंतो० जहा
 वक्कंतीए तहेव उववाओ नवरं देववज्जं, ते णं भंते ! जीवा एगसमएणं केवइया उव-
 वज्जति ? गोयमा ! जहन्नेणं एक्को वा दो वा तिन्नि वा उक्कोसेणं संखेज्जा वा असंखेज्जा
 वा उववज्जंति, अवहारो जहा उप्पलुद्देसए, तेसि णं भंते ! जीवाणं केमहालिया सरी-

रोगाहणा प० ? गोयमा ! जहन्नेणं अंगुलस्स असंखेज्जइभागं उक्कोसेणं धणुहपुहुत्तं, ते णं भंते ! जीवा नाणावरणिज्जस्स कम्मस्स किं बंधगा अवंधगा ? तहेव जहा उप्पलुद्देसए, एवं वेदेवि उदएवि उदीरणाएवि । ते णं भंते ! जीवा किं कण्हलेस्सा नीललेस्सा काउलेस्सा छव्वीसं भंगा, दिट्ठी जाव इंदिया जहा उप्पलुद्देसए, ते णं भंते ! साली वीही गोधूम जाव जवजवगमूलगजीवे कालओ केवच्चिरं होइ ? गोयमा ! जहण्णेणं अंतोमुहुत्तं उक्कोसेणं असंखेज्जं कालं ॥ से णं भंते ! साली वीही गोधूम जाव जवजवगमूलगजीवे पुढवीजीवे पुणरवि साली वीही जाव जवजवगमूलगजीवेत्ति केवइयं कालं सेवेज्जा केवइयं कालं गइरागइ करेज्जा ? एवं जहा उप्पलुद्देसए, एएणं अभिलावेणं जाव मणुस्सजीवे, आहारो जहा उप्पलुद्देसे ठिई जहण्णेणं अंतोमुहुत्तं उक्कोसेणं वासपुहुत्तं, समुग्घायसमोहया उव्वट्टणा य जहा उप्पलुद्देसे । अह भते ! सव्वपाणा जाव सव्वसत्ता साली वीही जाव जवजवगमूलगजीवत्ताए उव्वन्नपुव्वा ? हंता गोयमा ! असइं अदुवा अणंतखुत्तो । सेवं भंते ! २ त्ति ॥ ६८७ ॥ **एगवीसइमे सए पढमवग्गस्स पढमो उद्देसो समत्तो ॥२१-१-१ ॥**

अह भंते ! साली वीही जाव जवजवाणं एएसि णं जे जीवा कंदत्ताए वक्कमंति ते णं भंते ! जीवा कओहितो उव्वज्जंति एवं कंदाहिगारेण सो चेव मूलुद्देसो अपरिसेसो भाणियव्वो जाव असइं अदुवा अणंतखुत्तो, सेवं भंते ! २ त्ति (२१-१-२) एवं खधेवि उद्देसओ णेयव्वो (२१-१-३) एवं तयाएवि उद्देसो भाणियव्वो (२१-१-४) सालेवि उद्देसो भाणियव्वो (२१-१-५) पवालेवि उद्देसो भाणियव्वो (२१-१-६) पत्तेवि उद्देसो भाणियव्वो (२१-१-७) एए सत्तवि उद्देसगा अपरिसेसं जहा मूले तहा णेयव्वा । एवं पुप्फेवि उद्देसओ णवरं देवो उव्वज्जइ जहा उप्पलुद्देसे चत्तारि लेस्साओ असीइ भंगा ओगाहणा जहण्णेणं अंगुलस्स असंखेज्जइभागं उक्कोसेणं अंगुलपुहुत्तं सेसं तं चेव, सेवं भंते ! २ त्ति (२१-१-८) जहा पुप्फे एवं फलेवि उद्देसओ अपरिसेसो भाणियव्वो (२१-१-९) एवं वीएवि उद्देसओ (२१-१-१०) एए दस उद्देसगा ॥ पढमो वग्गो समत्तो ॥ २१-१ ॥ अह भंते ! कलायमसूरतिलमुग्गमासनिष्कावकुलत्थआलिसंदगसइणंपलिमंथगाणं एएसि णं जे जीवा मूलत्ताए वक्कमंति ते णं भंते ! जीवा कओहितो उव्वज्जंति ? एवं मूलादीया दस उद्देसगा भाणियव्वा जहेव सालीणं णिरवसेसं तहेव ॥ विइओ वग्गो समत्तो ॥ २१-२ ॥ अह भंते ! अयसिकुसुंमकोद्दवकंगुरालगतुवरीकोदूसासणसरिसवमूलगवीयाणं एएसि णं जे जीवा मूलत्ताए वक्कमंति ते णं भंते ! जीवा कओहितो उव्वज्जंति ? एवं एत्थवि मूलादीया दस उद्देसगा जहेव सालीणं णिरवसेसं तहेव भाणि-

यव्वं ॥ तइओ वग्गो समत्तो ॥ २१-३ ॥ अह भंते ! वंसवेणुकणगकक्कावंसवारुवंस-
 दंडाकुडाविमान्वंडावेणुयाकल्लाणीणं एएसि णं जे जीवा मूलत्ताए वक्कमंति एवं एत्थवि
 मूलादीया दस उद्देसगा जहेव सालीणं, णवरं देवो सव्वत्थवि न उववज्जइ, तिण्णि
 लेस्साओ, सव्वत्थवि छव्वीसं भंगा सेसं तं चेव ॥ चउत्थो वग्गो समत्तो ॥ २१-४ ॥
 अह भंते ! उक्खुइक्खुवाडियावीरणाइक्कडभमाससुंठिसत्तवेत्ततिमिरसयपोरगनलाण
 एएसि णं जे जीवा मूलत्ताए वक्कमंति एवं जहेव वंसवग्गो तहेव एत्थवि मूलादीया
 दस उद्देसगा, णवरं खंधुद्देसे देवा उववज्जंति, चत्तारि लेस्साओ ५०, सेसं तं चेव ॥ पंचमो
 वग्गो समत्तो ॥ २१-५ ॥ अह भंते ! सेडियभंडियदब्भकोतियदब्भकुसदब्भगयो-
 इदलअंजुलआसाढगरोहियंसमुतवखीरभुसएरिंडकुरुभकुंदकरवरसुंठविभंगुमहुवयणथु-
 रगसिप्पियसुंकलितणाणं एएसि णं जे जीवा मूलत्ताए वक्कमंति एवं एत्थवि दस उद्दे-
 सगा निरवसेसं जहेव वंस(वग्गो)स्स ॥ छट्ठो वग्गो समत्तो ॥ २१-६ ॥ अह भंते ! अब्भ-
 रुहवोयाणहरितगतंदुळेजगतणवत्थुलचोरगमज्जारयाईचिल्लियालक्कदगपिप्पलियदव्वि-
 सोत्थिकसायमंडुक्किमूलगसरिसवअंबिलसागजिवंतगाणं एएसि णं जे जीवा मूलत्ताए
 वक्कमंति एवं एत्थवि दस उद्देसगा जहेव वंसस्स ॥ सत्तमो वग्गो समत्तो ॥ २१-७ ॥
 अह भंते ! तुलसीकण्हदलफणेज्जाअज्जाचूयणाचोराजीरादमणामरुयाइंदीवरसय-
 पुप्फाणं एएसि णं जे जीवा मूलत्ताए वक्कमंति एत्थवि दस उद्देसगा निरवसेसं जहा
 वंसाणं ॥ अट्ठमो वग्गो समत्तो ॥ २१-८ ॥ एवं एएसु अट्ठसु वग्गेषु असीइं उद्देसगा
 भवंति ॥ ६८८ ॥ **एक्कवीसइमं सयं समत्तं ॥**

तालेगट्टियबहुवीयगा य गुच्छा य गुम्म वल्ली य । छद्दस वग्गा एए सट्ठि पुण
 होंति उद्देसा ॥ १ ॥ रायगिहे जाव एवं वयासी-अह-भंते ! तालतमालतक्कलिते-
 तलिसालसरलासारगल्लाणं जाव केयतिकदलचम्मरुक्खगुंतरुक्खाहिं गुरुक्खलवंगरुक्ख-
 पूयफलखज्जूरिनालिएरीणं एएसि णं जे जीवा मूलत्ताए वक्कमंति ते णं भंते ! जीवा
 कओहिंतो उववज्जंति ? एवं एत्थवि मूलादीया दस उद्देसगा कायव्वा जहेव सालीणं-
 णवरं इमं णाणत्तं मूले कंदे खंधे तयाए साले य एएसु पंचसु उद्देसएसु देवो न उव-
 वज्जइ, तिण्णि लेस्साओ, ठिई जहण्णेणं अंतोमुहुत्तं उक्कोसेणं दसवाससहस्साइं, उव,
 रिल्लेसु पंचसु उद्देसएसु देवो उववज्जइ, चत्तारि लेस्साओ, ठिई जहण्णेणं अंतोमुहुत्तं
 उक्कोसेणं वासपुहुत्तं, ओगाहणा मूले कंदे धणुहपुहुत्तं, खंधे तयाय साले य गाउय-
 पुहुत्तं, पवाले पत्ते धणुहपुहुत्तं, पुप्फे हत्थपुहुत्तं, फले बीए य अंगुलपुहुत्तं, सव्वेसिं
 जहण्णेणं अंगुलस्स असंखेज्जभागं सेसं-जहा सालीणं, एवं एए दस उद्देसगा ॥
 पढमो वग्गो समत्तो ॥ २२-१ ॥ अह भंते ! निबंबजंवुकोसंबतालअंकोलपीलुसेलुस-

ल्लइमोयइमालयचउलपलासकरंजपुत्तंजीवगरिद्ववहेडगहरियगभल्लायउंवरियखीरणिधा-
यइपियालपूइयणिवायगसेण्हयपासियसीसवअयसिपुण्णागनागरुक्खसीवण्णअसोगाणं
एएसि णं जे जीवा मूलत्ताए वक्कमंति एवं मूलादीया दस उद्देसगा कायव्वा निरव-
सेसं जहा तालवग्गो ॥ विइओ वग्गो समत्तो ॥ २२-२ ॥ अह भंते ! अत्थियातिदु-
यवोरकविद्वअंवाडगमाउल्लिगबिल्लआमलगफणसदाडिमआसत्थउंवरवडणग्गोहनंदिरु-
क्खपिप्पलिसतरपिलक्खुरुक्खकाउंवरियकुच्छुंभरियदेवदालितिलगलउयछत्तोहसिरी-
ससत्तवण्णदहिवण्णलोद्धवचंदणअज्जुणणीवकुडुगकलंबाणं एएसि णं जे जीवा मूल-
त्ताए वक्कमंति ते णं भंते ! एवं एत्थवि मूलादीया दस उद्देसगा तालवग्गसरिसा णेयव्वा
जाव वीयं ॥ तइओ वग्गो समत्तो ॥ २२-३ ॥ अह भंते ! वाइंगणिअल्लइपोडइ एवं
जहा पण्णवणाए गाहाणुसारेणं णेयव्वं जाव गंजपाडलावासिअंकोल्लणं एएसि णं जे
जीवा मूलत्ताए वक्कमंति एवं एत्थवि मूलादीया दस उद्देसगा तालवग्गसरिसा णेयव्वा
जाव वीयंति निरवसेसं जहा वंसवग्गो ॥ चउत्थो वग्गो समत्तो ॥ २२-४ ॥ अह
भंते ! सिरियकाणवनालियकोरंटगवंधुजीवगमणोज्जा जहा पण्णवणाए पढमपए गाहा-
णुसारेणं जाव नलणी य कुंदमहाजार्इणं एएसि णं जे जीवा मूलत्ताए वक्कमंति एवं
एत्थवि मूलादीया दस उद्देसगा निरवसेसं जहा सालीणं ॥ पंचमो वग्गो समत्तो ॥
॥ २२-५ ॥ अह भंते ! पूसफलिकालिंगीतुंवीतउसीएलावालुंकी एवं पयाणि छिदिय-
व्वाणि पण्णवणागाहाणुसारेणं जहा तालवग्गे जाव दधिफोल्लइकाकलिसोक्कलिअक्क-
वोंदीणं एएसि णं जे जीवा मूलत्ताए वक्कमंति एवं मूलादीया दस उद्देसगा कायव्वा
जहा तालवग्गो, णवरं फलउद्देसे ओगाहणा जहण्णेणं अंगुलस्स असंखेज्जइभागं
उक्कोसेणं धणुहुपुहुत्तं, ठिई सव्वत्थ जहण्णेणं अंतोमुहुत्तं उक्कोसेणं वासपुहुत्तं सेसं
तं चेव ॥ छट्ठो वग्गो समत्तो ॥ २२-६ ॥ एवं छसुवि वग्गेसु सट्ठि उद्देसगा भवंति
॥ ६८९ ॥ बावीसइमं सयं समत्तं ॥

णमो सुयदेवयाए भगवईए । आलुयलोही अवया पाढी तह मासवण्णिवल्ली य ।
पंचेते दसवग्गा पण्णासं होति उद्देसा ॥ १ ॥ रायगिहे जाव एवं वयासी-अह भंते !
आलुयमूलगसिंगवेरहालिदुरुक्खकंडरियजारुच्छीरबिरालिकिद्विकुंदुकण्हकडडसुमहुप-
यलइमहुसिंगिणिरुहासप्पसुगंधाछिण्णरुहावीयरुहाणं एएसि णं जे जीवा मूलत्ताए
वक्कमंति एवं मूलादीया दस उद्देसगा कायव्वा वंसवग्गसरिसा णवरं परिमाणं जह-
ण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा अणंता वा
उववज्जंति, अवहारो गोयमा ! ते णं अणंता समए २ अवहीरमाणा २ अणंताहि
ओसप्पिणीहिं उरुसप्पिणीहि एवइयकालेणं अवहीरंति णो चेव णं अवहरिया सिया,

ठिई जहण्णेणवि उक्कोसेणवि अंतोमुहुत्तं, सेसं तं चेव ॥ पढमो वग्गो समत्तो ॥ २३-१ ॥ अह भंते ! लोहीणीहूथीहूथिवगाअस्सकण्णीसीहकण्णीसीउंडीमुसंडीणं एएसि णं जे जीवा मूलत्ताए वक्कमंति एवं एत्थवि दस उद्देसगा जहेव आलुयवग्गे, णवरं ओगाहणा तालवग्गसरिसा, सेसं तं चेव, सेवं भंते ! २ त्ति ॥ विइओ वग्गो समत्तो ॥ २३-२ ॥ अह भंते ! आयकायकुहुणकुंदुस्सउव्वेहलियासफासज्जाछत्तावं-साणियकुमाराणं एएसि णं जे जीवा मूलत्ताए एवं एत्थवि मूलादीया दस उद्देसगा निरवसेसं जहा आलुवग्गो णवरं ओगाहणा तालवग्गसरिसा, सेसं तं चेव, सेवं भंते ! २ त्ति ॥ तइओ वग्गो समत्तो ॥ २३-३ ॥ अह भंते ! पाढामियवालुंकि-महुररसारावल्लिपउमामोढरिद्वंतिचंडीणं एएसि णं जे जीवा मूल० एवं एत्थवि मूलो-दीया दस उद्देसगा आलुयवग्गसरिसा णवरं ओगाहणा जहा वल्लीणं, सेसं तं चेव, सेवं भंते ! २ त्ति ॥ चउत्थो वग्गो समत्तो ॥ २३-४ ॥ अह भंते ! मासपण्णीमु-ग्गपण्णीजीवसरिसवकएणुयकाओलिखीरकाकोलिभंगिणहिंसिरासिभद्दमुच्छणंगलइ-पओयकिंणापउलपाढेहरेणुयालोहीणं एएसि णं जे जीवा मूल० एवं एत्थवि दस उद्देसगा निरवसेसं आलुयवग्गसरिसा ॥ पंचमो वग्गो समत्तो ॥ २३-५ ॥

एवं एत्थ पंचसुवि वग्गेसु पन्नासं उद्देसगा भाणियव्वा सव्वत्थ देवा ण उववज्जंति, तिज्जि लेस्साओ । सेवं भंते ! २ त्ति ॥ ६९० ॥ **तेवीसइमं सयं समत्तं ॥**

उववायपरीमाणं संघयणुच्चत्तमेव संठाणं । लेस्सा दिट्ठी णाणे अन्नाणे जोग उव-ओगे ॥ १ ॥ सन्नाकसायइंदियसमुग्घाया वेयणा य वेदे य । आउं अज्जवसाणा अणुवंधो कायसंवेहो ॥ २ ॥ जीवपदे जीवपदे जीवाणं दंडगंमि उद्देसो । चउवीस-इमंमि सए चउवीसं होंति उद्देसा ॥ ३ ॥ रायगिहे जाव एवं वयासी-णेरइया णं भंते ! कओहितो उववज्जंति, कि नेरइएहितो उववज्जंति, तिरिक्खजोणिएहितो उववज्जंति, मणुस्सेहितो उववज्जंति, देवेहितो उववज्जंति ? गोयमा ! णो नेरइएहितो उववज्जंति, तिरिक्खजोणिएहितोवि उववज्जंति, मणुस्सेहितोवि उववज्जंति, णो देवेहितो उववज्जंति, जइ तिरिक्खजोणिएहितो उववज्जंति कि एगिदियतिरिक्खजोणिएहितो उववज्जंति, बेइ-दियतिरिक्खजोणिएहितो० तेइंदियतिरिक्खजोणिएहितो० चउरिदियतिरिक्खजोणिए-हितो० पंचिंदियतिरिक्खजोणिएहितो उववज्जंति ? गोयमा ! नो एगिदियतिरिक्खजो-णिएहितो उववज्जंति, णो बेइंदिय० णो तेइंदिय० णो चउरिदिय० पंचिंदियतिरिक्ख-जोणिएहितो उववज्जंति, जइ पंचिंदियतिरिक्खजोणिएहितो उववज्जंति कि सण्णिपंचि-दियतिरिक्खजोणिएहितो उववज्जंति असण्णिपंचिंदियतिरिक्खजोणिएहितो उववज्जंति ? गोयमा ! सन्निपंचिंदियतिरिक्खजोणिएहितो उववज्जंति असन्निपंचिंदियतिरिक्खजोणि

एहिंतोवि उववज्जंति, जइ सन्निपंचिदियतिरिक्खजोणिएहिंतो उववज्जंति कि जलचरे-
 हितो उववज्जंति थलचरेहिंतो उववज्जति खहचरेहिंतो उववज्जंति ? गोयमा ! जलच-
 रेहितो उववज्जंति, थलचरेहिंतोवि उववज्जंति, खहचरेहितोवि उववज्जंति, जइ जल-
 चरे० थलचरे० खहचरेहितो उववज्जंति कि पज्जत्तएहिंतो उववज्जंति अपज्जत्तएहिंतो
 उववज्जंति ? गोयमा ! पज्जत्तएहिंतो उववज्जंति णो अपज्जत्तएहिंतो उववज्जंति,
 पज्जत्तअसन्निपंचिदियतिरिक्खजोणिए णं भंते ! जे भविए नेरइएसु उववज्जित्तए से
 णं भंते ! कइसु पुढवीसु उववज्जेज्जा ? गोयमा ! एगाए रयणप्पभाए पुढवीए
 उववज्जेज्जा, पज्जत्तअसन्निपंचिदियतिरिक्खजोणिए णं भंते ! जे भविए रयणप्पभाए
 पुढवीए नेरइएसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा !
 जहन्नेणं दसवाससहस्सट्ठिईएसु उक्कोसेणं पलिओवमस्स असंखेज्जइभागट्ठिईएसु
 उववज्जेज्जा १, ते णं भंते ! जीवा एगसमएणं केवइया उववज्जंति ? गोयमा !
 जहन्नेणं एकको वा दो वा तिन्नि वा उक्कोसेणं संखेज्जा वा असंखेज्जा वा उववज्जंति
 २, तेसि णं भंते ! जीवाणं सरीरगा किसंघयणी पन्नत्ता ? गोयमा ! छेवट्ठसंघयणी
 प० ३, तेसि णं भंते ! जीवाणं केमहालिया सरीरोगाहणा पन्नत्ता ? गोयमा !
 जहन्नेणं अंगुलस्स असंखेज्जइभागं उक्कोसेणं जोयणसहस्सं ४, तेसि णं भंते !
 जीवाणं सरीरगा किंसंठिया पन्नत्ता ? गोयमा ! हुंडसठाणसठिया पन्नत्ता ५, तेसि
 णं भंते ! जीवाणं कइ लेस्साओ प० ? गोयमा ! तिन्नि लेस्साओ प०, तं०-कण्हलेस्सा
 नीललेस्सा काउलेस्सा ६, ते णं भंते ! जीवा किं सम्मदिट्ठी मिच्छादिट्ठी सम्मा-
 मिच्छादिट्ठी ? गोयमा ! णो सम्मदिट्ठी मिच्छादिट्ठी णो सम्मामिच्छादिट्ठी ७, ते णं
 भंते ! जीवा कि णाणी अन्नाणी ? गोयमा ! णो णाणी अन्नाणी नियमा दुअन्नाणी
 तं०-मइअन्नाणी य सुयअन्नाणी य ८-९, ते णं भंते ! जीवा कि मणजोगी वइ-
 जोगी कायजोगी ? गोयमा ! णो मणजोगी वइजोगीवि कायजोगीवि १०, ते णं
 भंते ! जीवा किं सागारोवउत्ता अणागारोवउत्ता ? गोयमा ! सागारोवउत्तावि
 अणागारोवउत्तावि ११, तेसि णं भंते ! जीवाणं कइ सन्नाओ पन्नत्ताओ ?
 गोयमा ! चत्तारि सन्नाओ प०, तं०-आहारसन्ना भयसन्ना मेहुणसन्ना परिग्गहसन्ना
 १२, तेसि णं भंते ! जीवाणं कइ कसाया प० ? गोयमा ! चत्तारि कसाया प०,
 तं०-कोहकसाए माणकसाए मायाकसाए लोभकसाए १३, तेसि णं भंते ! जीवाणं
 कइ इंदिया प० ? गोयमा ! पंचिदिया प०, तं०-सोइंदिए चक्खिंदिए जाव
 फासिंदिए १४, तेसि णं भंते ! जीवाणं कइ समुग्घाया प० ? गोयमा ! तओ
 समुग्घाया प०, तं०-वेयणासमुग्घाए कसायसमुग्घाए मारणंतियसमुग्घाए १५,

ते णं भंते ! जीवा किं सायावेयगा आसायावेयगा ? गोयमा ! सायावेयगावि
 असायावेयगावि १६, ते णं भंते ! जीवा किं इत्थीवेयगा पुरिसवेयगा नपुंसग-
 वेयगा ? गोयमा ! णो इत्थीवेयगा णो पुरिसवेयगा नपुंसगवेयगा १७, तेसि णं
 भंते ! जीवाणं केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेणं
 पुव्वकोडी १८, तेसि णं भंते ! जीवाणं केवइया अज्झवसाणा प० ? गोयमा !
 असंखेज्जा अज्झवसाणा प०, ते णं भंते ! किं पसत्था अप्पसत्था ? गोयमा !
 पसत्थावि अप्पसत्थावि १९, से णं भंते ! पज्जत्तअसन्निपंचिदियतिरिक्खजोणिएत्ति
 कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणं पुव्वकोडी २०,
 से णं भंते ! पज्जत्तअसन्निपंचिदियतिरिक्खजोणिए रयणप्पभापुढवीणेइए
 पुणरवि पज्जत्तअसन्निपंचिदियतिरिक्खजोणिएत्ति केवइयं कालं सेवेज्जा केवइयं कालं
 गइरागइं करेज्जा ? गोयमा ! भवादेसेणं दो भवग्गहणाइं, कालादेसेणं जहन्नेणं दस-
 वाससहस्साइं अंतोमुहुत्तमब्भहियाइं उक्कोसेणं पलिओवमस्स असंखेज्जइभागं
 पुव्वकोडिमब्भहियं एवइयं कालं सेवेज्जा एवइयं कालं गइरागइं करेज्जा २१ ।
 पज्जत्तअसन्निपंचिदियतिरिक्खजोणिए णं भंते ! जे भविए जहन्नकालट्ठिईएसु रयण-
 प्पभापुढविनेइएसु उववज्जित्तए से णं भंते ! केवइयकालट्ठिईएसु उववजेज्जा ?
 गोयमा ! जहन्नेणं दसवाससहस्सट्ठिईएसु उक्कोसेणावि दसवाससहस्सट्ठिईएसु उवव-
 जेज्जा, ते णं भंते ! जीवा एगसमएणं केवइया उववज्जांति ? एवं सच्चैव वत्तव्वया
 निरवसेसा भाणियव्वा जाव अणुबंधोत्ति, से णं भंते ! पज्जत्तअसन्निपंचिदियति-
 रिक्खजोणिए जहन्नकालट्ठिईयरयणप्पभापुढविणेइए जहन्नकाल० २ पुणरवि
 पज्जत्तअसन्नि जाव गइरागइं करेज्जा ? गोयमा ! भवादेसेणं दो भवग्गहणाइं, काला-
 देसेणं जहन्नेणं दसवाससहस्साइं अंतोमुहुत्तमब्भहियाइं उक्कोसेणं पुव्वकोडी दसहिं
 वाससहस्सेहिं अब्भहिया एवइयं कालं सेवेज्जा एवइयं कालं गइरागइं करेज्जा २ ।
 पज्जत्तअसन्निपंचिदियतिरिक्खजोणिए णं भंते ! जे भविए उक्कोसकालट्ठिईएसु रयणप्प-
 भापुढविनेइएसु उववज्जित्तए से णं भंते ! केवइयकालट्ठिईएसु उववजेज्जा ? गोयमा !
 जहन्नेणं पलिओवमस्स असंखेज्जइभागट्ठिईएसु उववजेज्जा, उक्कोसेणावि पलिओवमस्स
 असंखेज्जइभागट्ठिईएसु उववजेज्जा, ते णं भंते ! जीवा अवसेसं तं चेव जाव अणु-
 बंधो । से णं भंते ! पज्जत्तअसन्निपंचिदियतिरिक्खजोणिए उक्कोसकालट्ठिईयरयण-
 प्पभापुढविनेइए उक्कोस पुणरवि पज्जत्त जाव करेज्जा ? गोयमा ! भवादेसेणं दो भव-
 ग्गहणाइं, कालादेसेणं जहन्नेणं पलिओवमस्स असंखेज्जइभागं अंतोमुहुत्तमब्भहियं
 उक्कोसेणं पलिओवमस्स असंखेज्जइभागं पुव्वकोडिअब्भहियं एवइयं कालं सेवेज्जा

एवइयं कालं गइरागइं करेज्जा ३ । जहन्नकालट्ठिईयपज्जत्तअसन्निपंचिंदियतिरिक्ख-
जोणिए णं भंते ! जे भविए रयणप्पभापुढविनेरइएसु उववज्जित्तए से णं भंते !
केवइयकालट्ठिईएसु उववजेज्जा ? गोयमा ! जहन्नेणं दसवाससहस्सट्ठिईएसु उक्कोसेणं
पलिओवमस्स असंखेज्जइभागट्ठिईएसु उववजेज्जा, ते णं भंते ! जीवा एगसमएणं
केवइया अवसेसं तं चेव णवरं इमाइं तिन्नि णाणत्ताइं आउं अज्झवसाणा अणुवंधो
य, जहन्नेणं ठिई अंतोमुहुत्तं उक्कोसेणवि अंतोमुहुत्तं, तेसि णं भंते ! जीवाणं केवइया
अज्झवसाणा प० ? गोयमा ! असंखेज्जा अज्झवसाणा प०, ते णं भंते ! कि
पसत्था अप्पसत्था ? गोयमा ! णो पसत्था अप्पसत्था, अणुवंधो अंतोमुहुत्तं सेसं
तं चेव । से णं भंते ! जहन्नकालट्ठिईयपज्जत्तअसन्निपंचिंदिय० रयणप्पभा जाव
करेज्जा ? गोयमा ! भवादेसेणं दो भवग्गहणाइं, कालादेसेणं जहन्नेणं दसवाससह-
स्साइं अंतोमुहुत्तमब्भहियाइं उक्कोसेणं पलिओवमस्स असंखेज्जइभागं अंतोमुहु-
त्तमब्भहियं एवइयं कालं सेवेज्जा जाव गइरागइं करेज्जा ४ । जहन्नकालट्ठिईयप-
ज्जत्तअसन्निपंचिंदियतिरिक्खजोणिए णं भंते ! जे भविए जहन्नकालट्ठिईएसु रयण-
प्पभापुढविनेरइएसु उववज्जित्तए से णं भंते ! केवइयकालट्ठिईएसु उववजेज्जा ?
गोयमा ! जहन्नेणं दसवाससहस्सट्ठिईएसु उक्कोसेणवि दसवाससहस्सट्ठिईएसु उव-
वजेज्जा, ते णं भंते ! जीवा सेसं तं चेव ताइं चेव तिन्नि णाणत्ताइं जाव से णं
भंते ! जहन्नकालट्ठिईयपज्जत्त जाव जोणिए जहन्नकालट्ठिईयरयणप्पभा पुणरवि
जाव गोयमा ! भवादेसेणं दो भवग्गहणाइं, कालादेसेणं जहन्नेणं दसवाससहस्साइं
अंतोमुहुत्तमब्भहियाइं उक्कोसेणवि दसवाससहस्साइं अंतोमुहुत्तमब्भहियाइं एवइयं
कालं सेवेज्जा जाव करेज्जा ५ । जहन्नकालट्ठिईयपज्जत्त जाव तिरिक्खजोणियाणं
भंते ! जे भविए उक्कोसकालट्ठिईएसु रयणप्पभापुढविनेरइएसु उववज्जित्तए से णं भंते !
केवइयकालट्ठिईएसु उववजेज्जा ? गोयमा ! जहन्नेणं पलिओवमस्स असंखेज्जइभा-
गट्ठिईएसु उक्कोसेणवि पलिओवमस्स असंखेज्जइभागट्ठि(इ)ईएसु उववजेज्जा, ते णं
भंते ! जीवा अवसेसं तं चेव ताइं चेव तिन्नि णाणत्ताइं जाव से णं भंते ! जह-
न्नकालट्ठिईयपज्जत्त जाव तिरिक्खजोणिए उक्कोसकालट्ठिईयरयणप्पभा जाव करेज्जा ?
गोयमा ! भवादेसेणं दो भवग्गहणाइं, कालादेसेणं जहन्नेणं पलिओवमस्स असंखे-
ज्जइभागं अंतोमुहुत्तमब्भहियं उक्कोसेणवि पलिओवमस्स असंखेज्जइभागं अंतोमुहुत्त-
मब्भहियं एवइयं कालं जाव करेज्जा ६ । उक्कोसकालट्ठिईयपज्जत्तअसन्निपंचिंदिय-
तिरिक्खजोणिए णं भंते ! जे भविए रयणप्पभापुढविनेरइएसु उववज्जित्तए से णं
भंते ! केवइयकाल(ट्ठिई)स्स जाव उववजेज्जा ? गोयमा ! जहन्नेणं दसवाससहस्सट्ठि-

ईएसु उक्कोसेणं पलिओवमस्स असंखेज्जइभागट्ठिईएसु उववजेज्जा, ते णं भंते ! जीवा एगसमएणं अवसेसं जहेव ओहियगमएणं तहेव अणुगंतव्वं, नवरं (जान) इमाइं दोन्नि नाणत्ताइं-ठिई जहन्नेणं पुव्वकोडी उक्कोसेणवि पुव्वकोडी, एवं अणुबंधोवि, अवसेसं तं चेव, से णं भंते ! उक्कोसकालट्ठिईयपज्जत्तअसन्नि जाव तिरिक्खजोणिए रयणप्पभा जाव गोयमा ! भवादेसेणं दो भवग्गहणाइं, कालादेसेणं जहन्नेणं पुव्वकोडी दसहिं वाससहरसेहिं अब्भहिया उक्कोसेणं पलिओवमस्स असंखेज्जइभागं पुव्वकोडीए अब्भहियं एवइयं जाव करेज्जा ७ । उक्कोसकालट्ठिईयपज्जत्त-तिरिक्खजोणिए णं भंते ! जे भविए जहन्नकालट्ठिईएसु रयणप्पभा जाव उववज्जितए से णं भंते ! केवइ जाव उववजेज्जा ? गोयमा ! जहण्णेणं दसवामसहरस्सट्ठिईएसु उक्कोसेणवि दसवाससहरस्सट्ठिईएसु उववजेज्जा, ते णं भंते ! सेसं तं चेव जहा सत्तमगमए जाव से णं भंते ! उक्कोसकालट्ठिई जाव तिरिक्खजोणिए जहन्नकालट्ठिईयरयणप्पभा जाव करेज्जा ? गोयमा ! भवादेसेणं दो भवग्गहणाइं, कालादेसेणं जहण्णेणं पुव्वकोडी दसहिं वाससहरसेहिं अब्भहिया उक्कोसेणवि पुव्वकोडी दसहिं वाससहरसेहिं अब्भहिया एवइयं जाव करेज्जा ८ । उक्कोसकालट्ठिईयपज्जत्त जाव तिरिक्खजोणिए णं भंते ! जे भविए उक्कोसकालट्ठिईएसु रयणप्पभा जाव उववज्जितए से णं भंते ! केवइयकाल जाव उववजेज्जा ? गोयमा ! जहन्नेणं पलिओवमस्स असंखेज्जइभागट्ठिईएसु उक्कोसेणवि पलिओवमस्स असंखेज्जइभागट्ठिईएसु उववजेज्जा, ते णं भंते ! जीवा एगसमएणं सेसं जहा सत्तमगमए जाव से णं भंते ! उक्कोसकालट्ठिईयपज्जत्त जाव तिरिक्खजोणिए उक्कोसकालट्ठिईयरयणप्पभा जाव करेज्जा ? गोयमा ! भवादेसेणं दो भवग्गहणाइं, कालादेसेणं जहन्नेणं पलिओवमस्स असंखेज्जइभागं पुव्वकोडीए अब्भहियं उक्कोसेणवि पलिओवमस्स असंखेज्जइभागं पुव्वकोडीए अब्भहियं एवइयं कालं सेवेज्जा जाव गइरागइं करेज्जा ९ । एवं एए ओहिया तिन्नि गमगा ३, जहन्नकालट्ठिईएसु तिन्नि गमगा ६, उक्कोसकालट्ठिईएसु तिन्नि गमगा ९, सव्वेते णव गमगा भवंति ॥ ६९१-२ ॥ जइ सन्निपंचिदियतिरिक्खजोणिएहितो उववज्जंति कि संखेज्जवासाउयसन्निपंचिदिय-तिरिक्खजोणिएहितो उववज्जंति असंखेज्जवासाउयसन्निपंचिदियतिरिक्ख जाव उववज्जंति ? गोयमा ! संखेज्जवासाउयसन्निपंचिदियतिरिक्खजोणिएहितो उववज्जंति णो असंखेज्जवासाउयसन्निपंचिदिय जाव उववज्जंति, जइ संखेज्जवासाउयसन्निपंचिदिय जाव उववज्जंति किं जलचरेहितो उववज्जंति पुच्छा, गोयमा ! जलचरेहितो उववज्जंति जहा असन्नी जाव पज्जत्तएहितो उववज्जंति णो अपज्जत्तएहितो उववज्जंति,

पज्जत्तसंखेज्जवासाउयसन्निपंचिदियतिरिक्खजोणिए णं भंते ! जे भविए णेरइएसु उववज्जित्तए से णं भंते ! कइसु पुढवीसु उववज्जेज्जा ? गोयमा ! सत्तसु पुढवीसु उववज्जेज्जा, तंजहा-रयणप्पभाए जाव अहेसत्तमाए, पज्जत्तसंखेज्जवासाउयसन्निपंचि-दियतिरिक्खजोणिए णं भंते ! जे भविए रयणप्पभापुढविनेरइएसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहन्नेणं दसवाससहस्सट्ठिई-एसु उक्कोसेणं सागरोवमट्ठिईएसु उववज्जेज्जा, ते णं भंते ! जीवा एगसमएणं केव-इया उववज्जंति ? जहेव असन्नी, तेसि णं भंते ! जीवाणं सरीरगा किंसंघयणी प० ? गोयमा ! छव्विहसंघयणी प०, तं०-वइरोसभनारायसंघयणी उसभनाराय-संघयणी जाव छेवट्ठसंघयणी, सरीरोगाहणा जहेव असन्नीणं जहन्नेणं अंगुलस्स असंखेज्जइभागं उक्कोसेणं जोयणसहस्सं, तेसि णं भंते ! जीवाणं सरीरगा किंसंठिया प० ? गोयमा ! छव्विहसंठिया प०, तंजहा-समचउरंस० णग्गोह० जाव हुंड०, तेसि णं भंते ! जीवाणं कइ लेस्साओ प० ? गोयमा ! छलेस्साओ पन्नत्ताओ, तंजहा-कण्हलेस्सा जाव सुक्कलेस्सा, दिट्ठी तिविहावि, तिन्नि नाणा तिन्नि अन्नाणा भयणाए, जोगो तिविहोवि सेसं जहा असन्नीणं जाव अणुवंधो, नवरं पंच समुग्घाया प० आइल्लगा, वेदो तिविहोवि, अवसेसं तं चेव जाव से णं भंते ! पज्जत्तसंखेज्जवासाउय जाव तिरिक्खजोणिए रयणप्पभा जाव करेज्जा ? गोयमा ! भवादेसेणं जहन्नेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जहन्नेणं दसवाससहस्साइं अंतोमुहुत्तमव्वहियाइं उक्कोसेण चत्तारि सागरोवमाइं चउहिं पुव्वकोडीहि अव्वहियाइं एवइयं कालं सेवेज्जा जाव करेज्जा १ । पज्जत्तसंखेज्जवासाउय जाव जे भविए जहन्नकाल जाव से णं भंते ! केवइयकालट्ठिईएसु उववज्जेज्जा ? गोयमा ! जहण्णेणं दसवाससहस्सट्ठिईएसु उक्कोसेणवि दसवाससहस्सट्ठिईएसु उववज्जेज्जा, ते णं भंते ! जीवा एवं सो चेव पढमो गमओ निरवसेसो भाणियव्वो जाव कालादेसेणं जहन्नेणं दसवाससहस्साइं अंतोमुहुत्तमव्वहियाइं उक्कोसेणं चत्तारि पुव्वकोडीओ चत्तालीसाए वाससहस्सेहिं अव्वहियाओ एवइयं कालं सेवेज्जा एवइयं कालं गइ-रागइं करेज्जा २, सो चेव उक्कोसकालट्ठिईएसु उववज्जो जहन्नेणं सागरोवमट्ठिईएसु उक्कोसेणवि सागरोवमट्ठिईएसु उववज्जेज्जा, अवसेसो परि(णामा)माणादीओ भवादेसप-ज्जवसाणो सो चेव पढमगमगो णेयव्वो जाव कालादेसेणं जहन्नेणं सागरोवमं अंतोमुहु-त्तमव्वहियं उक्कोसेणं चत्तारि सागरोवमाइं चउहिं पुव्वकोडीहि अव्वहियाइं एवइयं कालं सेवेज्जा जाव करेज्जा ३, जहन्नकालट्ठिईयपज्जत्तसंखेज्जवासाउयसन्निपंचिदिय-तिरिक्खजोणिए णं भंते ! जे भविए रयणप्पभापुढवि जाव उववज्जित्तए से णं भंते !

केवइयकालट्टिईएसु उववजेज्जा ? गोयमा ! जहन्नेणं दसवाससहस्सट्टिईएसु उक्कोसेणं सागरोवमट्टिईएसु उववजेज्जा, ते णं भंते ! जीवा अवसेसो सो चेव गमओ नवरं इमाइं अट्ठ णाणत्ताइं-सरीरोगाहणा जहन्नेणं अंगुलस्स असंखेज्जइभागं उक्कोसेणं धणुहपुहुत्तं, लेस्साओ तिन्नि आदिल्लाओ, णो सम्मदिट्ठी मिच्छादिट्ठी णो सम्मा-मिच्छादिट्ठी, णो णाणी दो अन्नाणा णियमं, समुग्घाया आदिल्ला तिन्नि, आउं अज्झवसाणा अणुबंधो य जहेव असन्नीणं अवसेसं जहा पढमगमए जाव काला-देसेणं जहन्नेणं दसवाससहस्साइं अंतोमुहुत्तमब्भहियाइं उक्कोसेणं चत्तारि सागरोव-माइं चउहिं अंतोमुहुत्तेहिं अब्भहियाइं एवइयं कालं जाव करेज्जा ४, सो चेव जहन्नकालट्टिईएसु उववन्नो जहन्नेणं दसवाससहस्सट्टिईएसु उक्कोसेणवि दसवाससह-स्सट्टिईएसु उववजेज्जा, ते णं भंते ! एवं सो चेव चउत्थो गमओ निरवसेसो भाणियव्वो जाव कालादेसेणं जहन्नेणं दसवाससहस्साइं अंतोमुहुत्तमब्भहियाइं उक्कोसेणं चत्तालीसं वाससहस्साइं चउहिं अंतोमुहुत्तेहिं अब्भहियाइं एवइयं जाव करेज्जा ५ । सो चेव उक्कोसकालट्टिईएसु उववन्नो जहन्नेणं सागरोवमट्टिईएसु उक्कोसेणवि सागरोवमट्टिईएसु उववजेज्जा, ते णं भंते ! एवं सो चेव चउत्थो गमओ निरवसेसो भाणियव्वो जाव कालादेसेणं जहन्नेणं साग-रोवमं अंतोमुहुत्तमब्भहियं उक्कोसेणं चत्तारि सागरोवमाइं चउहिं अंतोमुहुत्तेहिं अब्भहियाइं एवइयं जाव करेज्जा ६ । उक्कोसकालट्टिईयपज्जत्तसंखेज्जवासाउय जाव तिरिक्खजोणिए णं भंते ! जे भविए रयणप्पभापुढविनेरइएसु उववज्जित्तए से णं भंते ! केवइयकालट्टिईएसु उववजेज्जा ? गोयमा ! जहन्नेणं दसवाससहस्सट्टिईएसु उक्कोसेणं सागरोवमट्टिईएसु उववजेज्जा, ते णं भंते ! जीवा अवसेसो परिमाणादीओ भवादेसपज्जवसाणो एसि चेव पढमो गमओ णेयव्वो नवरं ठिई जहन्नेणं पुव्वकोडी उक्कोसेणवि पुव्वकोडी, एवं अणुबंधोवि, सेसं तं चेव, कालादेसेणं जहन्नेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं कालं जाव करेज्जा ७ । सो चेव जहन्नकालट्टिईएसु उववन्नो जहन्नेणं दसवाससहस्सट्टिईएसु उक्कोसेणवि दसवाससहस्सट्टिईएसु उवव-जेज्जा, ते णं भंते ! जीवा सो चेव सत्तमो गमओ निरवसेसो भाणियव्वो जाव भवा-देसोत्ति, कालादेसेणं जहन्नेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एवइयं जाव करेज्जा ८, उक्कोसकालट्टिईयपज्जत्त जाव तिरिक्खजोणिए णं भंते ! जे भविए उक्कोसकालट्टिईय जाव उववज्जित्तए से णं भंते ! केवइयकालट्टिईएसु उववजेज्जा ? गोयमा ! जहन्नेणं

सागरोवमट्टिईएसु उक्कोसेणवि सागरोवमट्टिईएसु उववज्जेजा, ते णं भंते ! जीवा सो चेव सत्तमो गमओ निरवसेसो भाणियव्वो जाव भवादेसोत्ति, कालादेसेणं जहन्नेणं सागरोवमं पुव्वकोडीए अब्भहियं उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं जाव करेज्जा ९ । एवं एए णव गमगा उक्खेवनिकखेवओ नवसुवि जहेव असत्तीणं ॥ ६९३ ॥ पज्जत्तसंखेज्जवासाउयसन्निपंचिदियतिरिक्ख-जोणिए णं भंते ! जे भविए सक्करप्पभाए पुढवीए णेरइएसु उववज्जित्तए से णं भंते ! केवइयकालट्टिईएसु उववज्जेजा ? गोयमा ! जहन्नेणं सागरोवमट्टिईएसु उववज्जेजा, उक्कोसेणं तिसागरोवमट्टिईएसु उववज्जेजा, ते णं भंते ! जीवा एगसमएणं एवं जहेव रयणप्पभाए उववज्जंत(गम)गस्स लद्धी सच्चेव निरवसेसा भाणियव्वा जाव भवादेसोत्ति, कालादेसेणं जहन्नेणं सागरोवमं अंतोमुहुत्तमब्भहियं उक्कोसेणं बार-ससागरोवमाइं चउहिं पुव्वकोडीहिं अब्भहियाइं एवइयं जाव करेज्जा १, एवं रयणप्पभापुढविगमगसरिसा णववि गमगा भाणियव्वा नवरं सब्बगमएसुवि नेरइय-ट्टिई(य)संवेहेसु सागरोवमा भाणियव्वा एवं जाव छट्ठीपुढवित्ति, णवरं नेरइयठिई जा जत्थ पुढवीए जहन्नुकोसिया सा तेणं चेव कमेणं चउग्गुणा कायव्वा, वालुयप्पभाए पुढवीए अट्ठावीसं सागरोवमा चउग्गुणिया भवंति, पंकप्पभाए चत्तालीसं, धूमप्प-भाए अट्ठसट्ठिं, तमाए अट्ठासीइं, संघयणाइं वालुयप्पभाए पंचविहसंघयणी तं०-वइ-रोसभनारायसंघयणी जाव कीलियासंघयणी, पंकप्पभाए चउव्विहसंघयणी, धूमप्प-भाए तिविहसंघयणी, तमाए दुविहसंघयणी तं०-वइरोसभनारायसंघयणी य उसभनारायसंघयणी य, सेसं तं चेव ॥ पज्जत्तसंखेज्जवासाउय जाव तिरिक्ख-जोणिए णं भंते ! जे भविए अहेसत्तमाए पुढवीए नेरइएसु उववज्जित्तए से णं भंते ! केवइयकालट्टिईएसु उववज्जेजा ? गोयमा ! जहन्नेणं बावीससागरोवमट्टिईएसु उक्को-सेणं तेत्तीससागरोवमट्टिईएसु उववज्जेजा, ते णं भंते ! जीवा एवं जहेव रयणप्प-भाए णव गमगा लद्धीवि सच्चेव णवरं वइरोसभनारायसंघयणी, इत्थिवेदगा न उववज्जंति सेसं तं चेव जाव अणुवंधोत्ति, संवेहो भवादेसेणं जहन्नेणं तिन्नि भवग्गहणाइं उक्कोसेणं सत्त भवग्गहणाइं, कालादेसेणं जहन्नेणं बावीसं सागरोवमाइं दोहिं अतोमुहुत्तेहि अब्भहियाइं उक्कोसेणं छावट्ठिं सागरोवमाइं चउहिं पुव्वकोडीहिं अब्भहियाइं एवइयं जाव करेज्जा १, सो चेव जहन्नकालट्टिईएसु उववन्नो सच्चेव वत्तव्वया जाव भवादेसोत्ति, कालादेसेणं जहन्नेणं कालादेसोवि तहेव जाव चउहिं पुव्वकोडीहिं अब्भहियाइं एवइयं जाव करेज्जा २, सो चेव उक्कोसकालट्टिईएसु उववण्णो सच्चेव लद्धी जाव अणुवंधोत्ति, भवादेसेणं जहन्नेणं तिन्नि भवग्गहणाइं

ઉક્કોસેણં પંચ ભવગ્ગહણાઈ, કાલાદેસેણં જહણ્ણેણં તેત્તીસં સાગરોવમાઈં દોહિં અંતો-
 મુહુત્તેહિ અબ્ભહિયાઈં ઉક્કોસેણં છાવટ્ઠિં સાગરોવમાઈં તિહિં પુવ્વકોડીહિં અબ્ભહિયાઈં
 એવડયં જાવ કરેજ્ઞા ૩, સો ચેવ અપ્પણા જહન્નકાલટ્ઠિઈંઓ જાઓ સચ્ચેવ રયણપ્પમા-
 પુઠવિજહન્નકાલટ્ઠિઈંયવત્તવ્વયા ભાણિયવ્વા જાવ ભવાદેસોત્તિ, નવરં પઠમસંઘયણં ણો
 ઇત્થિવેદગા, ભવાદેસેણં જહન્નેણં તિન્નિ ભવગ્ગહણાઈં ઉક્કોસેણં સત્ત ભવગ્ગહણાઈં, કાલા-
 દેસેણં જહન્નેણં બાવીસં સાગરોવમાઈં દોહિં અંતોમુહુત્તેહિં અબ્ભહિયાઈં ઉક્કોસેણં છાવટ્ઠિં
 સાગરોવમાઈં ચઠ્ઠિં અંતોમુહુત્તેહિં અબ્ભહિયાઈં એવડય જાવ કરેજ્ઞા ૪ । સો ચેવ
 જહન્નકાલટ્ઠિઈંએસુ ઉવવન્નો એવં સો ચેવ ચઠ્ઠથો ગમઓ નિરવસેસો ભાણિયવ્વો
 જાવ કાલાદેસોત્તિ ૫ । સો ચેવ ઉક્કોસકાલટ્ઠિઈંએસુ ઉવવન્નો સચ્ચેવ લહ્હી જાવ
 અણુબંધોત્તિ, ભવાદેસેણં જહન્નેણં તિન્નિ ભવગ્ગહણાઈં ઉક્કોસેણં પંચ ભવગ્ગહણાઈં,
 કાલાદેસેણં જહન્નેણં તેત્તીસં સાગરોવમાઈં દોહિં અંતોમુહુત્તેહિં અબ્ભહિયાઈં ઉક્કોસેણં
 છાવટ્ઠિ સાગરોવમાઈં તિહિં અંતોમુહુત્તેહિં અબ્ભહિયાઈં એવડયં કાલં જાવ કરેજ્ઞા ૬ । સો
 ચેવ અપ્પણા ઉક્કોસકાલટ્ઠિઈંઓ જાઓ જહન્નેણં બાવીસસાગરોવમટ્ઠિઈંએસુ ઉક્કોસેણં
 તેત્તીસસાગરોવમટ્ઠિઈંએસુ ઉવવજ્ઞેજ્ઞા, તે ણં ભતે ! અવસેસા સચ્ચેવ સત્તમપુઠાવિપઠ-
 મગમગવત્તવ્વયા ભાણિયવ્વા જાવ ભવાદેસોત્તિ, નવરં ઠિઈં અણુબંધો ય જહન્નેણં
 પુવ્વકોડી ઉક્કોસેણાવિ પુવ્વકોડી સેસં તં ચેવ, કાલાદેસેણં જહન્નેણં બાવીસં સાગરો-
 વમાઈં દોહિં પુવ્વકોડીહિં અબ્ભહિયાઈં ઉક્કોસેણં છાવટ્ઠિ સાગરોવમાઈં ચઠ્ઠિં
 પુવ્વકોડીહિં અબ્ભહિયાઈં એવડયં જાવ કરેજ્ઞા ૭ । સો ચેવ જહન્નકાલટ્ઠિઈંએસુ
 ઉવવન્નો સચ્ચેવ લહ્હી સંવેહોવિ તહેવ સત્તમગમગસરિસો ૮ । સો ચેવ ઉક્કોસકાલ-
 ટ્ઠિઈંએસુ ઉવવન્નો સચ્ચેવ લહ્હી જાવ અણુબંધોત્તિ, ભવાદેસેણં જહન્નેણં તિન્નિ
 ભવગ્ગહણાઈં ઉક્કોસેણં પંચ ભવગ્ગહણાઈં, કાલાદેસેણં જહન્નેણં તેત્તીસં સાગરોવમાઈં
 દોહિં પુવ્વકોડીહિં અબ્ભહિયાઈં ઉક્કોસેણં છાવટ્ઠિ સાગરોવમાઈં તિહિં પુવ્વકોડીહિં
 અબ્ભહિયાઈં એવડયં કાલં સેવેજ્ઞા જાવ કરેજ્ઞા ॥ ૬૯૪ ॥ જઈ મણુસ્સેહિંતો
 ઉવવજ્ઞંતિ કિં સન્નિમણુસ્સેહિંતો ઉવવજ્ઞંતિ અસણ્ણિમણુસ્સેહિંતો ઉવવજ્ઞંતિ ? ગોયમા !
 સન્નિમણુસ્સેહિંતો ઉવવજ્ઞંતિ ણો અસણ્ણિમણુસ્સેહિંતો ઉવવજ્ઞંતિ, જઈ સન્નિમણુસ્સેહિંતો
 ઉવવજ્ઞન્તિ કિં સંખેજ્ઞવાસાઉયસન્નિમણુસ્સેહિંતો ઉવવજ્ઞંતિ અસંખેજ્ઞવાસાઉય જાવ
 ઉવવજ્ઞંતિ ? ગોયમા ! સંખેજ્ઞવાસાઉયસન્નિમણુસ્સેહિંતો ઉવવજ્ઞંતિ અસંખેજ્ઞવાસાઉય
 જાવ ઉવવજ્ઞન્તિ, જઈ સંખેજ્ઞવાસાઉય જાવ ઉવવજ્ઞન્તિ કિં પજ્જત્તસંખેજ્ઞવાસાઉય
 જાવ ઉવવજ્ઞતિ અપજ્જત્ત જાવ ઉવવજ્ઞંતિ ? ગોયમા ! પજ્જત્તસંખેજ્ઞવાસાઉય જાવ
 ઉવવજ્ઞંતિ નો અપજ્જત્તસંખેજ્ઞવાસાઉય જાવ ઉવવજ્ઞંતિ, પજ્જત્તસંખેજ્ઞવાસાઉયસન્નિ-

मणुस्से णं भंते ! जे भविए नेरइएसु उववज्जितए से णं भंते ! कइसु पुढवीसु उव-
 वजेजा ? गोयमा ! सत्तसु पुढवीसु उववजेजा, तं०-रयणप्पभाए जाव^१अहेसत्तमाए,
 पज्जनसंखेज्जासाउयसन्निमणुस्से णं भंते ! जे भविए रयणप्पभाए पुढवीए
 नेरइएसु उववज्जितए से णं भंते ! केवइयकालट्ठिइएसु उववजेजा ? गोयमा ! जह-
 ण्णेणं दसवाससहस्सट्ठिइएसु उक्कोसेणं सागरोवमट्ठिइएसु उववजेजा, ते णं भंते !
 जीवा एगसमएणं केवइया उववज्जंति ? गोयमा ! जहन्नेणं एक्को वा दो वा तिन्नि वा
 उक्कोसेणं सखेजा (वा) उववज्जंति, संघयणा छ, सरीरोगाहणा जहन्नेणं अंगुलपुहुत्तं
 उक्कोसेणं पंचयणुहसयाइं, एवं सेसं जहा सन्निपंचिदियतिरिक्खजोणियाणं जाव भवा-
 देसोत्ति, नवरं चत्तारि णाणा तिन्नि अन्नाणा भयणाए, छ समुग्घाया केवलिवज्जा,
 ठिइ अणुवंधो य जहन्नेणं मासपुहुत्तं उक्कोसेणं पुव्वकोडी सेसं तं चेव, कालादेसेणं
 जहन्नेणं दसवाससहस्साइं मासपुहुत्तमव्वहियाइं उक्कोसेणं चत्तारि सागरोवमाइं
 चउहिं पुव्वकोडीहिं अव्वहियाइं एवइयं जाव करेजा १, सो चेव जहन्नकालट्ठि-
 इएसु उववन्नो सा चेव वत्तव्वया नवरं कालादेसेणं जहन्नेणं दसवाससहस्साइं मास-
 पुहुत्तमव्वहियाइं उक्कोसेणं चत्तारि पुव्वकोडीओ चत्तालीसाए वाससहस्सेहिं अव्वहि-
 याओ एवइयं जाव करेजा २, सो चेव उक्कोसकालट्ठिइएसु उववन्नो एस चेव
 वत्तव्वया नवरं कालादेसेणं जहन्नेणं सागरोवमं मासपुहुत्तमव्वहियं उक्कोसेणं चत्तारि
 सागरोवमाइं चउहिं पुव्वकोडीहिं अव्वहियाइं एवइयं जाव करेजा ३, सो चेव
 अप्पणा जहन्नकालट्ठिइओ जाओ एस चेव वत्तव्वया नवरं इमाइं पंच नाणत्ताइं-
 सरीरोगाहणा जहन्नेणं अंगुलपुहुत्तं उक्कोसेणवि अंगुलपुहुत्तं, तिन्नि नाणा तिन्नि अन्ना-
 णा भयणाए, पंच समुग्घाया आइल्ला, ठिइ अणुवंधो य जहन्नेणं मासपुहुत्तं उक्को-
 सेणवि मासपुहुत्तं सेसं तं चेव जाव भवादेसोत्ति, कालादेसेणं जहन्नेणं दसवासस-
 हस्साइं मासपुहुत्तमव्वहियाइं उक्कोसेणं चत्तारि सागरोवमाइं चउहिं मासपुहुत्तेहिं
 अव्वहियाइं एवइयं जाव करेजा ४ । सो चेव जहन्नकालट्ठिइएसु उववन्नो एस
 चेव वत्तव्वया चउत्थगमगसरिसा णेयव्वा नवरं कालादेसेणं जहन्नेणं दसवाससह-
 स्साइं मासपुहुत्तमव्वहियाइं उक्कोसेणं चत्तालीसं वाससहस्साइं चउहिं मासपुहुत्तेहिं
 अव्वहियाइं एवइयं जाव करेजा ५ । सो चेव उक्कोसकालट्ठिइएसु उववन्नो एस
 चेव गमगो नवरं कालादेसेणं जहन्नेणं सागरोवमं मासपुहुत्तमव्वहियं उक्कोसेणं
 चत्तारि सागरोवमाइं चउहिं मासपुहुत्तेहिं अव्वहियाइं एवइयं जाव करेजा ६ ।
 सो चेव अप्पणा उक्कोसकालट्ठिइओ जाओ सो चेव पढमगमओ णेयव्वो नवरं
 सरीरोगाहणा जहन्नेणं पंचधणुहसयाइं उक्कोसेणवि पंचधणुहसयाइं, ठिइ जहन्नेणं

उक्कोसेणं पंच भवग्गहणाइं, कालादेसेणं जहण्णेणं तेत्तीसं सागरोवमाइं दोहिं अंतो-
मुहुत्तेहिं अब्भहियाइं उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं
एवइयं जाव करेज्जा ३, सो चेव अप्पणा जहन्नकालट्ठिइंओ जाओ सच्चेव रयणप्पभा-
पुढविजहन्नकालट्ठिइंयवत्तव्वया भाणियव्वा जाव भवादेसोत्ति, नवरं पढमसघयणं णो
इत्थिवेदगा, भवादेसेणं जहन्नेणं तिन्नि भवग्गहणाइं उक्कोसेणं सत्त भवग्गहणाइं, काला-
देसेणं जहन्नेणं वावीसं सागरोवमाइं दोहिं अंतोमुहुत्तेहिं अब्भहियाइं उक्कोसेणं छावट्ठिं
सागरोवमाइं चउहिं अंतोमुहुत्तेहिं अब्भहियाइं एवइयं जाव करेज्जा ४ । सो चेव
जहन्नकालट्ठिइंएसु उववन्नो एवं सो चेव चउत्थो गमओ निरवसेसो भाणियव्वो
जाव कालादेसोत्ति ५ । सो चेव उक्कोसकालट्ठिइंएसु उववन्नो सच्चेव लद्धी जाव
अणुवंधोत्ति, भवादेसेणं जहन्नेणं तिन्नि भवग्गहणाइं उक्कोसेणं पंच भवग्गहणाइं,
कालादेसेणं जहन्नेणं तेत्तीसं सागरोवमाइं दोहिं अंतोमुहुत्तेहिं अब्भहियाइं उक्कोसेणं
छावट्ठिं सागरोवमाइं तिहिं अंतोमुहुत्तेहिं अब्भहियाइं एवइयं कालं जाव करेज्जा ६ । सो
चेव अप्पणा उक्कोसकालट्ठिइंओ जाओ जहन्नेणं वावीससागरोवमट्ठिइंएसु उक्कोसेणं
तेत्तीससागरोवमट्ठिइंएसु उववज्जेज्जा, ते णं भते । अवसेसा सच्चेव सत्तमपुढविपढ-
मगमगवत्तव्वया भाणियव्वा जाव भवादेसोत्ति, नवरं ठिइं अणुवंधो य जहन्नेणं
पुव्वकोडी उक्कोसेणवि पुव्वकोडी सेसं तं चेव, कालादेसेणं जहन्नेणं वावीसं सागरो-
वमाइं दोहि पुव्वकोडीहिं अब्भहियाइं उक्कोसेणं छावट्ठिं सागरोवमाइं चउहिं
पुव्वकोडीहिं अब्भहियाइं एवइयं जाव करेज्जा ७ । सो चेव जहन्नकालट्ठिइंएसु
उववन्नो सच्चेव लद्धी संवेहोवि तहेव सत्तमगमगसरिसो ८ । सो चेव उक्कोसकाल-
ट्ठिइंएसु उववन्नो सच्चेव लद्धी जाव अणुवंधोत्ति, भवादेसेणं जहन्नेणं तिन्नि
भवग्गहणाइं उक्कोसेणं पंच भवग्गहणाइं, कालादेसेणं जहन्नेणं तेत्तीसं सागरोवमाइं
दोहिं पुव्वकोडीहिं अब्भहियाइं उक्कोसेणं छावट्ठिं सागरोवमाइं तिहि पुव्वकोडीहिं
अब्भहियाइं एवइयं कालं सेवेज्जा जाव करेज्जा ॥ ६९४ ॥ जइ मणुस्सेहिंतो
उववज्जंति किं सन्निमणुस्सेहिंतो उववज्जंति असण्णिमणुस्सेहिंतो उववज्जंति ? गोयमा !
सन्निमणुस्सेहिंतो उववज्जंति णो असण्णिमणुस्सेहिंतो उववज्जंति, जइ सन्निमणुस्सेहिंतो
उववज्जन्ति किं संखेज्जवासाउयसन्निमणुस्सेहिंतो उववज्जंति असंखेज्जवासाउय जाव
उववज्जंति ? गोयमा ! संखेज्जवासाउयसन्निमणुस्सेहिंतो उ० णो असंखेज्जवासाउय
जाव उववज्जन्ति, जइ संखेज्जवासाउय जाव उववज्जन्ति किं पज्जत्तसंखेज्जवासाउय
जाव उववज्जंति अपज्जत्त जाव उववज्जंति ? गोयमा ! पज्जत्तसंखेज्जवासाउय जाव
उववज्जन्ति नो अपज्जत्तसंखेज्जवासाउय जाव उववज्जंति, पज्जत्तसंखेज्जवासाउयसन्नि-

मणुस्से णं भंते ! जे भविए नेरइएसु उववज्जितए से णं भंते ! कइसु पुढवीसु उव-
चजेज्जा ? गोयमा ! सत्तसु पुढवीसु उववजेज्जा, तं०-रयणप्पभाए जावअहेसत्तमाए,
पज्जतसंखेज्जवासाउयसन्निमणुस्से णं भंते ! जे भविए रयणप्पभाए पुढवीए
नेरइएसु उववज्जितए से णं भंते ! केवइयकालट्ठिईएसु उववजेज्जा ? गोयमा ! जह-
ण्णेणं दसवाससहस्सट्ठिईएसु उक्कोसेणं सागरोवमट्ठिईएसु उववजेज्जा, ते णं भंते !
जीवा एगसमएणं केवइया उववज्जंति ? गोयमा ! जहन्नेणं एक्को वा दो वा तिन्नि वा
उक्कोसेणं संखेज्जा (वा) उववज्जंति, संघयणा छ, सरीरोगाहणा जहन्नेणं अंगुलपुहुत्तं
उक्कोसेणं पंचधणुहसयाइं, एवं सेसं जहा सन्निपंचिदियतिरिक्खजोणियाणं जाव भवा-
देसोत्ति, नवरं चत्तारि णाणा तिन्नि अन्नाणा भयणाए, छ समुग्घाया केवलिवज्जा,
ठिई अणुवंधो य जहन्नेणं मासपुहुत्तं उक्कोसेणं पुव्वकोडी सेसं तं चेव, कालादेसेणं
जहन्नेणं दसवाससहस्साइं मासपुहुत्तमब्भहियाइं उक्कोसेणं चत्तारि सागरोवमाइं
चउहिं पुव्वकोडीहिं अब्भहियाइं एवइयं जाव करेज्जा १, सो चेव जहन्नकालट्ठि-
ईएसु उववन्नो सा चेव वत्तव्वया नवरं कालादेसेणं जहन्नेणं दसवाससहस्साइं मास-
पुहुत्तमब्भहियाइं उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहि-
याओ एवइयं जाव करेज्जा २, सो चेव उक्कोसकालट्ठिईएसु उववन्नो एस चेव
वत्तव्वया नवरं कालादेसेणं जहन्नेणं सागरोवमं मासपुहुत्तमब्भहियं उक्कोसेणं चत्तारि
सागरोवमाइं चउहिं पुव्वकोडीहिं अब्भहियाइं एवइयं जाव करेज्जा ३, सो चेव
अप्पणा जहन्नकालट्ठिईओ जाओ एस चेव वत्तव्वया नवरं इमाइं पंच नाणत्ताइं-
सरीरोगाहणा जहन्नेणं अंगुलपुहुत्तं उक्कोसेणवि अंगुलपुहुत्तं, तिन्नि नाणा तिन्नि अन्ना-
णा भयणाए, पंच समुग्घाया आइल्ला, ठिई अणुवंधो य जहन्नेणं मासपुहुत्तं उक्को-
सेणवि मासपुहुत्तं सेसं तं चेव जाव भवादेसोत्ति, कालादेसेण जहन्नेणं दसवासस-
हस्साइं मासपुहुत्तमब्भहियाइं उक्कोसेणं चत्तारि सागरोवमाइं चउहिं मासपुहुत्तेहिं
अब्भहियाइं एवइयं जाव करेज्जा ४ । सो चेव जहन्नकालट्ठिईएसु उववन्नो एस
चेव वत्तव्वया चउत्थगमगसरिसा णेयव्वा नवरं कालादेसेणं जहन्नेणं दसवाससह-
स्साइं मासपुहुत्तमब्भहियाइं उक्कोसेणं चत्तालीसं वाससहस्साइं चउहिं मासपुहुत्तेहिं
अब्भहियाइं एवइयं जाव करेज्जा ५ । सो चेव उक्कोसकालट्ठिईएसु उववन्नो एस
चेव गमगो नवरं कालादेसेणं जहन्नेणं सागरोवमं मासपुहुत्तमब्भहियं उक्कोसेणं
चत्तारि सागरोवमाइं चउहिं मासपुहुत्तेहिं अब्भहियाइं एवइयं जाव करेज्जा ६ ।
सो चेव अप्पणा उक्कोसकालट्ठिईओ जाओ सो चेव पढमगमओ णेयव्वो नवरं
सरीरोगाहणा जहन्नेणं पंचधणुहसयाइं उक्कोसेणवि पंचधणुहसयाइं, ठिई जहन्नेणं

पुव्वकोडी उक्कोसेणवि पुव्वकोडी, एवं अणुवंधोवि, कालादेसेणं जहन्नेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं कालं जाव करेज्जा ७ । सो चेव जहन्नकालट्ठिइएसु उववन्नो सचेव सत्तमगमगवत्तव्वया नवरं कालादेसेणं जहन्नेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एवइयं कालं जाव करेज्जा ८ । सो चेव उक्कोसकालट्ठिइएसु उववन्नो सा चेव सत्तमगमगवत्तव्वया नवरं कालादेसेणं जहन्नेणं एणं सागरोवमं पुव्वकोडीए अब्भहियं उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं कालं जाव करेज्जा ९ ॥ ६९५ ॥ पज्जनसंखेज्जवासाउयसन्निमणुस्से णं भंते ! जे भविए सक्करप्पभाए पुडवीए नेरइएसु जाव उववज्जितए से णं भंते ! केवइयकाल जाव उववजेज्जा ? गोयमा ! जहन्नेणं सागरोवमट्ठिइएसु उक्कोसेणं तिसागरोवमट्ठिइएसु उववजेज्जा, ते णं भंते ! एवं सो चेव रयणप्पभापुडविगमओ णेयव्वो नवरं सरीरोगाहणा जहन्नेणं रयणिपुहुत्तं उक्कोसेणं पंचवण्हसयाइं, ठिइ जहन्नेणं वासपुहुत्तं उक्कोसेणं पुव्वकोडी, एवं अणुवंधोवि, सेसं तं चेव जाव भवादेसोत्ति, कालादेसेणं जहन्नेणं सागरोवमं वासपुहुत्तमब्भहियं उक्कोसेणं वास सागरोवमाइं चउहिं पुव्वकोडीहिं अब्भहियाइं एवइयं जाव करेज्जा १, एवं एसा ओहिएसु तिसु गमएसु मणूसस्स लद्धी नाणत्तं नेरइयट्ठिइ कालादेसेणं संवेहं च जाणेज्जा ३, सो चेव अप्पणा जहन्नकालट्ठिइओ जाओ तिसुवि गमएसु एस चेव लद्धी नवरं सरीरोगाहणा जहन्नेणं रयणिपुहुत्तं उक्कोसेणवि रयणिपुहुत्तं, ठिइ जहन्नेणं वासपुहुत्तं उक्कोसेणवि वासपुहुत्तं एवं अणुवंधोवि, सेसं जहा ओहियाणं संवेहो सव्वो उव(जुज्जि)जुंजिऊण भाणियव्वो ४-५-६, सो चेव अप्पणा उक्कोसकालट्ठिइओ जाओ तस्सवि तिसुवि गमएसु इमं णाणत्तं-सरीरोगाहणा जहन्नेणं पंचवण्हसयाइं उक्कोसेणवि पंचवण्हसयाइं, ठिइ जहन्नेणं पुव्वकोडी उक्कोसेणवि पुव्वकोडी एवं अणुवंधोवि, सेसं जहा पढमगमए नवरं नेरइयठि(ई) इं कायसंवेहं च जाणेज्जा ९, एवं जाव छट्ठपुडवी नवरं तच्चाए आढवेत्ता एक्केक्कं संघयणं परिहायइ जहेव तिरिक्खजोणियाणं कालादेसोवि तहेव नवरं मणुस्सट्ठिइ भाणियव्वा ॥ पज्जनसंखेज्जवासाउयसन्निमणुस्से णं भंते ! जे भविए अहेसत्तमापुडविनेरइएसु उववज्जितए से णं भंते ! केवइयकालट्ठिइएसु उववजेज्जा ? गोयमा ! जहन्नेणं वावीसं सागरोवमट्ठिइएसु उक्कोसेणं तेत्तीसं सागरोवमट्ठिइएसु उववजेज्जा, ते णं भंते ! जीवा एगसमएणं अवसेसो सो चेव सक्करप्पभापुडविगमओ णेयव्वो नवरं पढमं संघयणं इत्थि-वेयगा न उववज्जति सेसं तं चेव जाव अणुवंधोत्ति, भवादेसेणं दो भवग्गहणाइं

कालादेसेणं जहन्नेणं बावीसं सागरोवमाइं वासपुहुत्तमब्भहियाइं उक्कोसेणं तेत्तीसं सागरोवमाइं पुव्वकोडीए अब्भहियाइ एवइयं जाव करेज्जा १, सो चेव जहन्नकालट्ठिईएसु उववन्नो एस चेव वत्तव्वया नवरं नेरइयट्ठिईं संवेहं च जाणेज्जा २, सो चेव उक्कोसकालट्ठिईएसु उववन्नो एस चेव वत्तव्वया नवरं संवेहं च जाणेज्जा ३, सो चेव अप्पणा जहन्नकालट्ठिईओ जाओ तस्सवि तिसुवि गमएसु एस चेव वत्तव्वया नवरं सरीरोगाहणा जहन्नेणं रयणिपुहुत्तं उक्कोसेणवि रयणिपुहुत्तं, ठिई जहन्नेणं वासपुहुत्तं उक्कोसेणवि वासपुहुत्तं एवं अणुबंधोवि, संवेहो उवउंजिऊण भाणियव्वो ६ । सो चेव अप्पणा उक्कोसकालट्ठिईओ जाओ तस्सवि तिसुवि गमएसु एस चेव वत्तव्वया नवरं सरीरोगाहणा जहन्नेणं पंचधणुहसयाइं उक्कोसेणवि पंचधणुहसयाइं, ठिई जहन्नेणं पुव्वकोडी उक्कोसेणवि पुव्वकोडी एवं अणुबंधोवि णवसुवि एसु गमएसु नेरइयट्ठि(ईं)ईं संवेहं च जाणेज्जा, सव्वत्थ भवग्गहणाइं दोन्नि जाव णवमगमए कालादेसेणं जहन्नेणं तेत्तीसं सागरोवमाइं पुव्वकोडीए अब्भहियाइं उक्कोसेणवि तेत्तीसं सागरोवमाइं पुव्वकोडीए अब्भहियाइं एवइयं कालं सेवेज्जा एवइयं कालं गइरागइं करेज्जा ९ । सेवं भंते ! २ ति जाव विहरइ ॥ ६९६ ॥ **चउवीसइमस्स सयस्स पढमो उद्देसो समत्तो ॥**

रायगिहे जाव एवं वयासी-असुरकुमारा णं भंते ! कओहिंतो उववज्जंति किं नेरइ-एहिंतो उववज्जंति तिरिक्ख० मणुस्से० देवेहितो उववज्जंति ? गोयमा ! णो नेरइएहिंतो उववज्जंति तिरिक्ख० मणुस्सेहिंतो उववज्जंति नो देवेहितो उववज्जंति, एवं जहेव नेरइय-उद्देसए जाव पज्जत्तअसन्निपंचिदियतिरिक्खजोणिए णं भंते ! जे भविए असुरकुमारेसु उववज्जितए से णं भंते ! केवइयकालट्ठिईएसु उववजेज्जा ? गोयमा ! जहन्नेणं दसवास-सहस्सट्ठिईएसु उक्कोसेणं पलिओवमस्स असंखेज्जइभागट्ठिईएसु उववजेज्जा, ते णं भंते ! जीवा एवं रयणप्पभागमगसरिसा णववि गमा भाणियव्वा नवरं जाहे अप्पणा जहन्न-कालट्ठिईओ भवइ ताहे अज्झवसाणा पसत्था णो अप्पसत्था तिसुवि गमएसु अवसेसं तं चेव ९॥ जइ सन्निपंचिदियतिरिक्खजोणिएहिंतो उववज्जंति किं संखेज्जवासाउय-सन्निपंचिदिय जाव उववज्जंति असंखेज्जवासाउय जाव उववज्जंति ? गोयमा ! संखेज्ज-वासाउय जाव उववज्जंति असंखेज्जवासाउय जाव उववज्जंति, असंखेज्जवासाउय-सन्निपंचिदियतिरिक्खजोणिए णं भंते ! जे भविए असुरकुमारेसु उववज्जितए से णं भंते ! केवइयकालट्ठिईएसु उववजेज्जा ? गोयमा ! जहन्नेणं दसवाससहस्सट्ठिईएसु उववजेज्जा उक्कोसेणं तिपलिओवमट्ठिईएसु उववजेज्जा, ते णं भंते ! जीवा एगसमएणं पुच्छा, गोयमा ! जहन्नेणं एक्को वा दो वा तिन्नि वा उक्कोसेणं संखेज्जा

उववज्जंति, वड्ढोसभनारायसंवयणी, ओगाहणा जहण्णेणं धणुहपुहुत्तं उक्कोसेणं छ
गाउयाइं, समच्चउरंससंठाणसंठिया प०, चत्तारि लेस्साओ आइल्लाओ, णो सम्मदिट्ठी
मिच्छादिट्ठी णो सम्मामिच्छादिट्ठी, णो णाणी अन्नाणी नियमं दुअन्नाणी मइअन्नार्णा य
सुयअन्नाणी य, जोगो तिविहोवि, उवओगो दुविहोवि, चत्तारि सन्नाओ, चत्तारि
कसाया, पंच इंदिया, तिन्नि समुग्घाया आइल्लागा, समोहयावि मरंति असमोहयावि
मरंति, वेयणा दुविहावि सायावेयगावि असायावेयगावि, वेदो दुविहोवि इत्थिवेयगावि
पुरिसवेयगावि णो नपुंसगवेयगा, ठिई जहन्नेणं साइरेगा पुव्वकोडी उक्कोसेण तिन्नि
पलिओवमाइं, अज्जवसाणा पसत्त्यावि अप्पसत्त्यावि, अणुवंधो जहेव ठिई, कायसंवेहो
भवादेसेणं दो भवग्गहणाइं, कालादेसेणं जहन्नेणं साइरेगा पुव्वकोडी दसहिं वास-
सहस्सेहिं अब्भहिया उक्कोसेणं छप्पलिओवमाइं एवइयं जाव करेज्जा १, सो चेव
जहन्नकालट्ठिईएसु उववन्नो एस चेव वत्तव्वया नवरं असुरकुमारट्ठि(ई)ई संवेहं च
जाणेज्जा २, सो चेव उक्कोसकालट्ठिईएसु उववन्नो जहन्नेणं तिपलिओवमट्ठिईएसु
उक्कोसेणवि तिपलिओवमट्ठिईएसु उववज्जेज्जा एस चेव वत्तव्वया नवरं ठिई से
जहन्नेणं तिन्नि पलिओवमाइं उक्कोसेणवि तिन्नि पलिओवमाइं एवं अणुवंधोवि,
कालादेसेणं जहण्णेणं छप्पलिओवमाइं उक्कोसेणवि छप्पलिओवमाइं एवइयं सेसं तं
चेव ३, सो चेव अप्पणा जहन्नकालट्ठिईओ जाओ जहन्नेणं दसवाससहस्सट्ठिईएसु
उक्कोसेणं साइरेगं पुव्वकोडीआउएसु उववज्जेज्जा, ते णं मंते ! अवसेसं तं
चेव जाव भवादेसोत्ति, नवरं ओगाहणा जहन्नेणं धणुहपुहुत्तं उक्कोसेणं माडरेगं
धणुहसहस्सं, ठिई जहन्नेणं साइरेगा पुव्वकोडी उक्कोसेणवि साइरेगा पुव्वकोडी एवं
अणुवंधोवि, कालादेसेणं जहन्नेणं साइरेगा पुव्वकोडी दसहिं वाससहस्सेहिं अब्भहिया
उक्कोसेणं साइरेगाओ दो पुव्वकोडीओ एवइयं ० ४, सो चेव अप्पणा जहन्नकालट्ठिई-
एसु उववण्णो एस चेव वत्तव्वया नवरं असुरकुमारट्ठिई संवेहं च जाणेज्जा ५, सो चेव
उक्कोसकालट्ठिईएसु उववण्णो जहण्णेणं साइरेगपुव्वकोडिआउएसु उक्कोसेणवि साइरे-
गपुव्वकोडीआउएसु उववज्जेज्जा सेसं तं चेव, नवरं कालादेसेणं जहण्णेणं साइरेगाओ दो
पुव्वकोडीओ उक्कोसेणवि साइरेगाओ दो पुव्वकोडीओ एवइयं कालं सेवेज्जा ० ६, सो
चेव अप्पणा उक्कोसकालट्ठिईओ जाओ सो चेव पढमगमगो भाणियव्वो नवरं ठिई
जहन्नेणं तिन्नि पलिओवमाइं उक्कोसेणवि तिन्नि पलिओवमाइं एवं अणुवंधोवि,
कालादेसेणं जहण्णेणं तिन्नि पलिओवमाइं दसहिं वाससहस्सेहिं अब्भहियाइं उक्को-
सेणं छ पलिओवमाइं एवइयं ० ७, सो चेव जहन्नकालट्ठिईएसु उववन्नो एस चेव वत्त-
व्वया नवरं असुरकुमारट्ठिई संवेहं च जाणेज्जा ८, सो चेव उक्कोसकालट्ठिईएसु उववन्नो

जहण्णेणं तिपलिओव० उक्कोसेणवि तिपलिओव० एस चेव वत्तव्वया नवरं कालादेसेणं जहण्णेणं छप्पलिओवमाइं उक्कोसेणवि छप्पलिओवमाइं एवइयं० ९ ॥ जइ संखेज्जवासाउयसन्निपंचिंदिय जाव उववज्जंति किं जलचर० एवं जाव पज्जत्तसंखेज्जवासाउयसन्निपंचिंदियतिरिक्खजोणिएणं भंते ! जे भविए असुरकुमारेसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहण्णेणं दसवाससहस्सट्ठिईएसु उक्कोसेणं साइरेगसागरोवमट्ठिईएसु उववज्जेज्जा, ते णं भंते ! जीवा एगसमएणं एवं एएसिं रयणप्पभपुढविगमगसरिसा नव गमगा णेयव्वा, नवरं जाहे अप्पणा जहन्नकालट्ठिईओ भवइ ताहे तिसुवि गमएसु इमं णाणत्तं चत्तारि लेस्साओ अज्झवसाणा पसत्था नो अप्पसत्था सेसं तं चेव संवेहो साइरेगेण सागरोवमेण कायव्वो ९ ॥ जइ मणुस्सेहिंतो उववज्जंति किं सन्निमणुस्सेहिंतो उ० असन्निमणुस्सेहिंतो उ० ? गोयमा ! सन्निमणुस्सेहिंतो उ० नो असन्निमणुस्सेहिंतो उववज्जंति, जइ सन्निमणुस्सेहिंतो उववज्जंति किं संखेज्जवासाउयसन्निमणुस्सेहिंतो उववज्जंति असंखेज्जवासाउयसन्निमणुस्सेहिंतो उववज्जंति ? गोयमा ! संखेज्जवासाउय जाव उववज्जंति असंखेज्जवासाउय जाव उववज्जंति, असंखेज्जवासाउयसन्निमणुस्से णं भंते ! जे भविए असुरकुमारेसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहण्णेणं दसवाससहस्सट्ठिईएसु उक्कोसेणं तिपलिओवमट्ठिईएसु उववज्जेज्जा, एवं असंखेज्जवासाउयतिरिक्खजोणियसरिसा आइल्ला तिन्नि गमगा नेयव्वा, नवरं सरीरोगाहणा पढमविइएसु गमएसु जहन्नेणं साइरेगाइं पंचधणुहसयाइं उक्कोसेणं तिन्नि गाउयाइं सेसं तं चेव, तइयगमे ओगाहणा जहन्नेणं तिन्नि गाउयाइं उक्कोसेणवि तिन्नि गाउयाइं सेसं जहेव तिरिक्खजोणियाणं ३, सो चेव अप्पणा जहन्नकालट्ठिईओ जाओ तस्सवि जहन्नकालट्ठिईयतिरिक्खजोणियसरिसा तिन्नि गमगा भाणियव्वा, नवरं सरीरोगाहणा तिसुवि गमएसु जहण्णेणं साइरेगाइं पंचधणुहसयाइं उक्कोसेणवि साइरेगाइं पंचधणुहसयाइं सेसं तं चेव ६, सो चेव अप्पणा उक्कोसकालट्ठिईओ जाओ तस्सवि ते चेव पच्छिल्ला तिन्नि गमगा भाणियव्वा नवरं सरीरोगाहणा तिसुवि गमएसु जहन्नेणं तिन्नि गाउयाइं उक्कोसेणवि तिन्नि गाउयाइं अवसेसं तं चेव ९ ॥ जइ संखेज्जवासाउयसन्निमणुस्सेहिंतो उववज्जंति किं पज्जत्तसंखेज्जवासाउय० अपज्जत्तसंखेज्ज जाव उववज्जंति ? गोयमा ! पज्जत्तसंखेज्ज० णो अपज्जत्तसंखेज्ज०, पज्जत्तसंखेज्जवासाउयसन्निमणुस्से णं भंते ! जे भविए असुरकुमारेसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहन्नेणं दसवाससहस्सट्ठिईएसु उक्कोसेणं साइरेगसागरोवमट्ठिईएसु उववज्जेज्जा, ते णं भंते ! जीवा एवं जहेव

एएसिं रयणप्पभाए उववज्जमाणं णव गमगा तहेव इहवि णव गमगा भाणियव्वा
णवरं संवेहो साइरेगेण सागरोवमेण कायव्वो सेसं तं चेव ९, सेवं भंते । २ ति
॥ ६९७ ॥ चउवीसइमे सए वीओ उद्देसो समत्तो ॥

रायगिहे जाव एवं वयासी-नागकुमारा णं भंते । कओहिंतो उववज्जंति कि
नेरइएहितो उववज्जंति तिरि० मणु० देवेहिंतो उववज्जंति ? गोयमा । णो णेरइएहितो
उववज्जंति तिरिक्खजोणिएहितो उ० मणुस्सेहिंतो उववज्जंति नो देवेहिंतो उववज्जंति,
जइ तिरिक्खजोणि० एवं जहा असुरकुमाराणं वत्तव्वया तहा एएसिंपि जाव अस-
णित्ति, जइ सन्निपंचिदियतिरिक्खजोणिएहितो उ० किं संखेज्जवासाउय० असंखेज्जवा-
साउय० ? गोयमा ! संखेज्जवासाउय० असंखेज्जवासाउय जाव उववज्जंति, असंखे-
ज्जवासाउयसन्निपंचिदियतिरिक्खजोणिए णं भंते । जे भविए नागकुमारेसु उववज्जि-
त्तए से णं भंते ! केवइकालट्ठिई० ? गोयमा ! जहन्नेणंदस वाससहस्सट्ठिईएसु उक्को-
सेणं देसूणदुपलिओवमट्ठिईएसु उववज्जेज्जा, ते णं भंते । जीवा अवसेसो सो चेव अ-
रकुमारेसु उववज्जमाणस्स गमगो भाणियव्वो जाव भवादेसोत्ति, कालादेसेणं जहन्नेणं
साइरेगा पुव्वकोडी दसहिं वाससहस्सेहि अव्वभहिया उक्कोसेणं देसूणाइं पंच पलि-
ओवमाइं एवइयं जाव करेज्जा १, सो चेव जहन्नकालट्ठिईएसु उववज्जो एस चेव वत्त-
व्वया नवरं णागकुमारट्ठिईं संवेहं च जाणेज्जा २, सो चेव उक्कोसकालट्ठिईएसु उववज्जो
तस्सवि एस चेव वत्तव्वया नवरं ठिई जहन्नेणं देसूणाइं दो पलिओवमाइं उक्कोसेणं
तिन्नि पलिओवमाइं सेसं तं चेव जाव भवादेसोत्ति, कालादेसेणं जहन्नेणं देसूणाइं
चत्तारि पलिओवमाइं उक्कोसेणं देसूणाइं पंच पलिओवमाइं एवइयं कालं० ३, सो चेव
अप्पणा जहन्नकालट्ठिईओ जाओ तस्सवि तिसुवि गमएसु जहेव असुरकुमारेसु उव-
वज्जमाणस्स जहन्नकालट्ठिईयस्स तहेव निरवसेसं ६, सो चेव अप्पणा उक्कोसकाल-
ट्ठिईओ जाओ तस्सवि तहेव तिन्नि गमगा जहा असुरकुमारेसु उववज्जमाणस्स नवरं
नागकुमारट्ठिईं संवेहं च जाणेज्जा सेसं तं चेव ९ ॥ जइ संखेज्जवासाउयसन्निपंचिदिय
जाव किं पज्जत्तसंखेज्जवासाउय० अपज्जत्तसंखेज्ज० ? गोयमा ! पज्जत्तसंखेज्जवासाउय०
णो अपज्जत्तसंखेज्जवासाउय०, पज्जत्तसंखेज्जवासाउय जाव जे भविए नागकुमारेसु
उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहण्णेणं दसवा-
ससहस्सट्ठि० उक्कोसेणं देसूणदोपलिओवमट्ठि० एवं जहेव असुरकुमारेसु उववज्जमाणस्स
वत्तव्वया तहेव इहवि णवसुवि गमएसु, णवरं नागकुमारट्ठिईं संवेहं च जाणेज्जा, सेसं
तं चेव ९ ॥ जइ मणुस्सेहिंतो उववज्जंति कि सन्निमणु० असणिमणु० ? गोयमा !
सन्निमणु० णो असन्निमणुस्से० जहा असुरकुमारेसु उववज्जमाणस्स जाव असंखेज्जवा-

साउयसन्निमणुस्से णं भंते ! जे भविए णागकुमारेसु उववज्जित्तए से णं भंते ! केवइयकालट्ठिईएसु उववज्जइ ? गोयमा ! जहन्नेणं दसवाससहस्सट्ठिईएसु उक्कोसेणं देसूणदोपलिओवमट्ठिईएसु एवं जहेव असंखेज्जवासाउयाणं तिरिक्खज्जोणियाणं नागकुमारेसु आइल्ला तिन्नि गमगा तहेव इमस्सवि, नवरं पढमविइएसु गमएसु सरीरोगाहणा जहन्नेणं साइरेगाइं पंचधणुहसयाइं उक्कोसेणं तिन्नि गाउयाइं, तइयगमे ओगाहणा जहन्नेणं देसूणाइं दो गाउयाइं उक्कोसेणं तिन्नि गाउयाइं सेसं तं चेव ३, सो चेव अप्पणा जहन्नकालट्ठिईओ जाओ तस्स तिसुवि गमएसु जहा तस्स चेव असुरकुमारेसु उववज्जमाणस्स तहेव निरवसेसं ६, सो चेव अप्पणा उक्कोसकालट्ठिईओ जाओ तस्स तिसुवि गमएसु जहा तस्स चेव उक्कोसकालट्ठिईयस्स असुरकुमारेसु उववज्जमाणस्स नवरं णागकुमारट्ठिई संवेहं च जाणेज्जा, सेसं तं चेव ९ ॥ जइ संखेज्जवासाउयसन्निमणु० किं पज्जत्तसंखेज्ज० अपज्जत्तसंखेज्ज० ? गोयमा ! पज्जत्तसंखेज्ज० णो अपज्जत्तसंखेज्ज०, पज्जत्तसंखेज्जवासाउयसन्निमणुस्से णं भंते ! जे भविए णागकुमारेसु उववज्जित्तए से णं भंते ! केवइ० ? गोयमा ! जहन्नेणं दसवाससहस्सट्ठिईएसु उक्कोसेणं देसूणदोपलिओवमट्ठिईएसु उ० एवं जहेव असुरकुमारेसु उववज्जमाणस्स सच्चेव लद्धी निरवसेसा नवसु गमएसु णवरं णागकुमारट्ठिई संवेहं च जाणेज्जा, सेवं भंते ! २ ति ॥ ६९८ ॥ चउवीसइमस्स सयस्स तइओ उद्देसो समत्तो ॥

अवसेसा सुवन्नकुमाराइं जाव थणियकुमारा एएवि अट्ठ उद्देसगा जहेव नागकुमाराणं तहेव निरवसेसा भाणियव्वा, सेवं भंते ! सेवं भंते ! ति ॥ ६९९ ॥ चउवीसइमस्स सयस्स एक्कारसमो उद्देसो समत्तो ॥

पुढविकाइया णं भंते ! कओहितो उववज्जंति कि नेरइएहितो उववज्जंति तिरिक्ख० मणु० देवेहिंतो उववज्जंति ? गोयमा ! णो नेरइएहितो उववज्जंति तिरिक्ख० मणु० देवेहितोवि उववज्जंति, जइ तिरिक्खज्जोणिएहितो उ० कि एगिंदियतिरिक्खज्जोणिए० एवं जहा वक्कंतीए उववाओ जाव जइ वायरपुढविकाइयाएगिंदियतिरिक्खज्जोणिएहितो उववज्जंति कि पज्जत्तवादर जाव उववज्जंति अपज्जत्तवादरपुढवि जाव उ० ? गोयमा ! पज्जत्तवादरपुढवि० अपज्जत्तवादरपुढवि जाव उववज्जंति, पुढविकाइए णं भंते ! जे भविए पुढविकाइएसु उववज्जित्तए से णं भंते ! केवइयकालट्ठिईएसु उववज्जेज्जा ? गोयमा ! जहन्नेणं अतोमुहुत्तट्ठिईएसु उक्कोसेणं वावीसवाससहस्सट्ठिईएसु उववज्जेज्जा, ते णं भंते ! जीवा एगसमएणं पुच्छा, गोयमा ! अणुसमयं अविरहिया असंखेज्जा उववज्जंति, छेवट्ठसंघयणी, सरीरोगाहणा जहन्नेणं अंगुलस्स असंखेज्जइभागं उक्कोसेणवि अंगुलस्स असंखेज्जइभागं, मसूरचंदसंठिया, चत्तारि छेस्साओ, णो

सम्मदिट्ठी मिच्छादिट्ठी णो सम्मामिच्छादिट्ठी, णो णाणी अन्नाणी दो अन्नाणा नियमं,
 णो मणजोगी णो वड्जोगी कायजोगी, उवओगो दुविहोवि, चत्तारि सन्नाओ, चत्तारि
 कसाया, एगे फासिंदिए पन्नत्ते, तिन्नि समुग्घाया, वेयणा दुविहा, णो इत्थिवेदगा
 णो पुरिसवेदगा नपुंसगवेदगा, ठिई जहन्नेणं अंतोमुहुत्तं उक्कोसेणं वावीसं वास-
 सहस्साई, अज्जवसाणा पसत्थावि अप्पसत्थावि अणुवंधो जहा ठिई १, से णं
 भंते ! पुढविकाइए पुणरवि पुढविकाइएत्ति केवइयं कालं सेवेज्जा केवइयं कालं
 गइरागईं करेज्जा ? गोयमा ! भवादेसेणं जहन्नेणं दो भवग्गहणाईं उक्कोसेणं असं-
 खेज्जाईं भवग्गहणाईं, कालादेसेणं जहन्नेणं दो अंतोमुहुत्ता उक्कोसेणं असंखेज्जं कालं
 एवइयं जाव करेज्जा १, सो चेव जहन्नकालट्ठिईएसु उववन्नो जहन्नेणं अंतोमुहुत्त-
 ट्ठिईएसु उक्कोसेणवि अंतोमुहुत्तट्ठिईएसु एवं चेव वत्तव्वया निरवसेसा २, सो चेव
 उक्कोसकालट्ठिईएसु उववन्नो जहन्नेणं वावीसवाससहस्सट्ठिईएसु उक्कोसेणवि वावीस-
 वाससहस्सट्ठिईएसु सेसं तं चेव जाव अणुवंधोत्ति, णवरं जहन्नेणं एक्को वा दो वा
 तिन्नि वा उक्कोसेणं संखेज्जा वा असंखेज्जा वा उववज्जेज्जा, भवादेसेणं जहन्नेणं दो
 भवग्गहणाईं उक्कोसेणं अट्ठ भवग्गहणाईं, कालादेसेणं जहन्नेणं वावीसं वाससह-
 स्साईं अंतोमुहुत्तमव्वभहियाईं उक्कोसेणं छावत्तारिं वाससहस्सुत्तरं सयसहस्सं एवइयं
 कालं जाव करेज्जा ३, सो चेव अप्पणा जहन्नकालट्ठिईओ जाओ सो चेव पढमि-
 ह्ठओ गमओ भाणियव्वो नवरं लेस्साओ तिन्नि, ठिई जहन्नेणं अंतोमुहुत्तं उक्कोसेणवि
 अंतोमुहुत्तं, अप्पसत्था अज्जवसाणा, अणुवंधो जहा ठिई सेसं तं चेव ४, सो चेव
 जहन्नकालट्ठिईएसु उववन्नो सच्चेव चउत्थगमगवत्तव्वया भाणियव्वा ५, सो
 चेव उक्कोसकालट्ठिईएसु उववन्नो एस चेव वत्तव्वया नवरं जहन्नेणं एक्को वा दो वा
 तिन्नि वा उक्कोसेणं संखेज्जा वा असंखेज्जा वा जाव भवादेसेणं जहन्नेणं दो भवग्गहणाईं
 उक्कोसेणं अट्ठ भवग्गहणाईं, कालादेसेणं जहन्नेणं वावीसं वाससहस्साईं अंतोमुहुत्त-
 मव्वभहियाईं उक्कोसेणं अट्ठासीईं वाससहस्साईं चउहिं अंतोमुहुत्तेहि अव्वभहियाईं
 एवइयं ० ६, सो चेव अप्पणा उक्कोसकालट्ठिईओ जाओ एवं तडयगमगसरिसो
 निरवसेसो भाणियव्वो नवरं अप्पणा से ठिई जहन्नेणं वावीसं वाससहस्साईं उक्कोसे-
 णवि वावीसं वाससहस्साईं ७, सो चेव जहन्नकालट्ठिईएसु उववन्नो जहन्नेणं अंतो-
 मुहुत्तं उक्कोसेणवि अंतोमुहुत्तं, एव जहा सत्तमगमगो जाव भवादेसो, कालादेसेणं
 जहन्नेणं वावीस वाससहस्साईं अंतोमुहुत्तमव्वभहियाईं उक्कोसेणं अट्ठासीईं वाससह-
 स्साईं चउहिं अंतोमुहुत्तेहि अव्वभहियाईं एवइयं ० ८, सो चेव उक्कोसकालट्ठिईएसु
 उववन्नो जहन्नेणं वावीस वाससहस्सट्ठिईएसु उक्कोसेणवि वावीसं वाससहस्सट्ठिईएसु एस

चेव सत्तमगमगवत्तव्वया जाणियव्वा जाव भवादेसोत्ति, कालादेसेणं जहण्णेणं चोयालीसं वाससहस्साइं उक्कोसेणं छावत्तरिवाससहस्सुत्तरं सयसहस्सं एवइयं० ९ ॥ जइ आउक्काइयएगिंदियतिरिक्खजोणिएहितो उववज्जंति किं सुहुमआउ० वादर-
आउ० एवं चउक्कओ भेदो भाणियव्वो जहा पुढविकाइयाणं, आउक्काइयाणं भंते ! जे भविए पुढविकाइएसु उववज्जितए से णं भंते ! केवइयकालट्ठिईएसु उववज्जेज्जा ? गोयमा । जहन्नेणं अंतोमुहुत्तट्ठिईएसु उक्कोसेणं वावीसं वाससहस्सट्ठिईएसु उववज्जेज्जा, एवं पुढविकाइयगमगरिसा नव गमगा भाणियव्वा ९, नवरं थिबुगर्बिंदुसंठिए, ठिई जहन्नेण अंतोमुहुत्तं उक्कोसेणं सत्त वाससहस्साइं, एवं अणुबंधोवि एवं तिसुवि गमएसु, ठिई संवेहो तइयच्छट्ठसत्तमट्ठमणवमगमएसु भवादेसेणं जहण्णेणं दो भवग्गहणाइं उक्कोसेणं अट्ठ भवग्गहणाइं, सेसेसु चउसु गमएसु जहण्णेणं दो भवग्गहणाइं उक्कोसेणं असंखेज्जाइं भवग्गहणाइं, तइयगमए कालादेसेण जहन्नेणं वावीसं वाससहस्साइं अंतोमुहुत्तमव्वभहियाइं उक्कोसेणं सोलसुत्तर वाससयसहस्सं एवइयं०, छट्ठे गमए कालादेसेणं जहन्नेणं वावीसं वाससहस्साइं अंतोमुहुत्तमव्वभहियाइं उक्कोसेणं अट्ठासीइं वाससहस्साइं चउहिं अंतोमुहुत्तेहिं अव्वभहियाइं एवइयं०, सत्तमे गमए कालादेसेण जहन्नेणं सत्त वाससहस्साइं अंतोमुहुत्तमव्वभहियाइं उक्कोसेणं सोलसुत्तर वाससयसहस्सं एवइयं०, अट्ठमे गमए कालादेसेणं जहन्नेणं सत्त वाससहस्साइं अंतोमुहुत्तमव्वभहियाइं उक्कोसेणं अट्ठावीसं वाससहस्साइं चउहिं अंतोमुहुत्तेहिं अव्वभहियाइं एवइयं०, णवमे गमए भवादेसेणं जहन्नेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जहन्नेणं एगूणतीस वाससहस्साइं उक्कोसेणं सोलसुत्तरं वाससयसहस्सं एवइयं०, एवं णवसुवि गमएसु आउक्काइयठिई जाणियव्वा ९ ॥ जइ तेउक्काइएहितो उववज्जंति तेउक्काइयाणवि एस चेव वत्तव्वया नवरं नवसुवि गमएसु तिन्नि लेस्साओ तेउक्काइयाणं सु(सू)ईकलावसंठिया ठिई जाणियव्वा तइयगमए कालादेसेणं जहण्णेणं वावीसं वाससहस्साइं अंतोमुहुत्तमव्वभहियाइं उक्कोसेणं अट्ठासीइं वाससहस्साइं वारसहिं राइंदिएहिं अव्वभहियाइं एवइयं एवं संवेहो उवजुंजिऊण भाणियव्वो ९ ॥ जइ वाउक्काइएहितो उववज्जंति वाउक्काइयाणवि एवं चेव णव गमगा जहेव तेउक्काइयाणं णवरं पडागासंठिया प० संवेहो वाससहस्सेहिं कायव्वो तइयगमए कालादेसेणं जहण्णेणं वावीसं वाससहस्साइं अंतोमुहुत्तमव्वभहियाइं उक्कोसेणं एगं वाससयसहस्सं एवं संवेहो उवजुंजिऊण भाणियव्वो ॥ जइ वणस्सइकाइएहितो उववज्जंति वणस्सइकाइयाणं आउक्काइयगमगरिसा णव गमगा भाणियव्वा नवरं णाणासंठिया सरीरोगाहणा प० पढमएसु पच्छिइएसु

य तिसु गमएसु जहण्णेणं अंगुलस्स असंखेज्जइभागं उक्कोसेणं साइरेणं जोयणसहस्सं मज्झिअएसु तिसु तहेव जहा पुढविकाइयाणं संवेहो ठिई य जाणियव्वा तइयगमए कालादेसेणं जहन्नेणं वावीसं वाससहस्साइं अंतोमुहुत्तमव्वमहियाइं उक्कोसेणं अट्ठावीसुत्तरं वाससयसहस्सं एवइयं एवं संवेहो उवजुंजिऊण भाणियव्वो ॥ ७०० ॥

जइ वेइंदिएहिंतो उववजंति किं पज्जत्तवेइंदिएहिंतो उववजंति अपज्जत्तवेइंदिएहिंतो उववजंति ? गोयमा ! पज्जत्तवेइंदिएहिंतो उववजंति अपज्जत्तवेइंदिएहिंतोवि उववजंति, वेइंदिए णं भंते ! जे भविए पुढविकाइएसु उववजित्तए से णं भंते ! केवइ-काल० ? गोयमा ! जहण्णेणं अंतोमुहुत्तट्ठिईएसु उक्कोसेणं वावीसं वाससहस्सट्ठिईएसु, ते णं भंते ! जीवा एगसमएणं० ? गोयमा ! जहन्नेणं एक्को वा दो वा तिन्नि वा उक्कोसेणं संखेज्जा वा असंखेज्जा वा उववजंति, छेवट्ठसंघयणी, ओगाहणा जहन्नेणं अंगुलस्स असंखेज्जइभागं उक्कोसेणं वारस जोयणाइं, हुंडसंठिया, तिन्नि लेस्साओ, सम्मदिट्ठीवि मिच्छादिट्ठीवि नो सम्मामिच्छादिट्ठी, दो णाणा दो अन्नाणा नियमं, णो मणजोगी वइजोगीवि कायजोगीवि, उवओगो दुविहोवि, चत्तारि सन्नाओ, चत्तारि कसाया, दो इंदिया ५०, तं०-जिंमिदिए य फासिदिए य, तिन्नि समुग्घाया सेसं जहा पुढविकाइयाणं णवरं ठिई जहन्नेणं अंतोमुहुत्तं उक्कोसेणं वारस संवच्छराइं एवं अणुवंधोवि, सेसं तं चेव, भवादेसेणं जहण्णेणं दो भवग्गहणाइं उक्कोसेणं संखेज्जाइं भवग्गहणाइं, कालादेसेणं जहन्नेणं दो अंतोमुहुत्ता उक्कोसेणं संखेज्जं कालं एवइयं० १, सो चेव जहन्नकालट्ठिईएसु उववन्नो एस चेव वत्तव्वया सव्वा २, सो चेव उक्कोसकालट्ठिईएसु उववन्नो एसा चेव वेइंदियस्स लद्धी नवरं भवादेसेणं जहण्णेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जहण्णेणं वावीसं वाससहस्साइं अंतोमुहुत्तमव्वमहियाइं उक्कोसेणं अट्ठासीइं वाससहस्साइं अडयालीसाए संवच्छरेहिं अव्वमहियाइं एवइयं० ३, सो चेव अप्पणा जहन्नकालट्ठिईओ जाओ तस्सवि एस चेव वत्तव्वया तिसुवि गमएसु नवरं इमाइं सत्त णाणत्ताइं सरीरोगाहणा जहा पुढविकाइयाणं, णो सम्मदिट्ठी मिच्छादिट्ठी णो सम्मामिच्छादिट्ठी, दो अन्नाणा नियमं, णो मणजोगी णो वइजोगी कायजोगी, ठिई जहन्नेणं अंतोमुहुत्तं उक्कोसेणवि अंतोमुहुत्तं, अज्जवसाणा अप्पसत्था, अणुवंधो जहा ठिई, संवेहो तहेव आइल्लेसु दोसु गमएसु तइयगमए भवादेसो तहेव अट्ठ भवग्गहणाइं कालादेसेणं जहन्नेणं वावीसं वाससहस्साइं अंतोमुहुत्तमव्वमहियाइं उक्कोसेणं अट्ठासीइं वाससहस्साइं चउहिं अंतोमुहुत्तेहिं अव्वमहियाइं ६, सो चेव अप्पणा उक्कोसकालट्ठिईओ जाओ एयस्सवि ओहियगमगसरिस्ता तिन्नि गमगा भाणियव्वा नवरं तिसुवि गमएसु ठिई जहन्नेणं

वारस संवच्छराइं उक्कोसेणवि वारस संवच्छराइं, एवं अणुवंधोवि, भवादेसेणं जहण्णेणं
दो भवग्गहणाइं उक्कोसेणं अट्ठ भवग्गहणाइं, कालादेसेणं उवजुंजिऊण भाणियव्वं
जाव णवमे गमए जहन्नेणं वावीसं वाससहस्साइं वारसहिं संवच्छरेहिं अब्भहियाइं
उक्कोसेणं अट्ठासीइ वाससहस्साइं अडयालीसाए संवच्छरेहिं अब्भहियाइं एवइयं०
९ ॥ जइ तेइदिंएहिंतो पुढाविकाइएसु उववज्जन्ति एवं चेव नव गमगा भाणियव्वा
नवरं आइल्लेसु तिसुवि गमएसु सरीरोगाहणा जहन्नेणं अंगुलस्स असंखेज्जइभागं
उक्कोसेणं तिन्नि गाडयाइं, तिन्नि इंदियाइं, ठिई जहन्नेणं अंतोमुहुत्तं उक्कोसेणं एगूण-
पन्नं राइंदियाइं, तइयगमए कालादेसेणं जहन्नेणं वावीसं वाससहस्साइं अंतोमुहुत्त-
मब्भहियाइं उक्कोसेणं अट्ठासीइं वाससहस्साइं छन्नउइं राइंदियसयमब्भहियाइं
एवइयं०, मज्झिमगा तिन्नि गमगा तहेव पच्छिमगावि तिन्नि गमगा तहेव नवरं ठिई
जहन्नेणं एगूणपन्नं राइंदियाइं उक्कोसेणवि एगूणपन्नं राइंदियाइं संवेहो उवजुंजिऊण
भाणियव्वो ९ ॥ जइ चउरिदिंएहिंतो उववज्जन्ति एवं चेव चउरिंदियाणावि नव गमगा
भाणियव्वा नवरं एएसु चेव ठाणेषु नाणत्ता भाणियव्वा सरीरोगाहणा जहन्नेणं
अंगुलस्स असंखेज्जइभागं उक्कोसेणं चत्तारि गाडयाइं, ठिई जहन्नेणं अंतोमुहुत्तं
उक्कोसेणं छम्मासा एवं अणुवंधोवि, चत्तारि इंदियाइं सेसं तं चेव जाव नवमगमए
कालादेसेणं जहण्णेणं वावीसं वाससहस्साइं छहिं मासेहिं अब्भहियाइं उक्कोसेणं अट्ठा-
सीइं वाससहस्साइं चउवीसाए मासेहिं अब्भहियाइं एवइयं० ९ ॥ जइ पंचिंदियतिरि-
क्खजोणिंएहिंतो उववज्जन्ति कि सन्निपंचिंदियतिरिक्खजोणिंएहिंतो उववज्जन्ति असन्निपं-
चिंदियतिरिक्खजोणिंए०? गोयमा ! सन्निपंचिंदिय०, असण्णिपंचिंदिय०, जइ असण्णि-
पंचिंदिय जाव उ० किं जलचरेहिंतो उववज्जन्ति जाव कि पज्जतएहिंतो उववज्जन्ति अप-
ज्जतएहिंतो उववज्जन्ति ? गोयमा ! पज्जतएहिंतोवि उववज्जन्ति अपज्जतएहिंतोवि उवव-
ज्जन्ति, असन्निपंचिंदियतिरिक्खजोणिंए णं भंते ! जे भविए पुढाविकाइएसु उववज्जितए
से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं वावीसं वाससहस्साइं, ते
णं भंते ! जीवा एवं जहेव वेइंदियस्स ओहियगमए लद्धी तहेव नवरं सरीरोगाहणा
जहण्णेणं अंगुलस्स असंखेज्जइभागं उक्कोसेणं जोयणसहस्सं, पंचिंदिया, ठिई अणुवंधो
य जहण्णेणं अंतोमुहुत्तं उक्कोसेणं पुव्वकोडी सेसं तं चेव, भवादेसेणं जहण्णेणं दो भव-
ग्गहणाइं उक्कोसेणं अट्ठ भवग्गहणाइं, कालादेसेणं जहण्णेणं दो अंतोमुहुत्ता उक्कोसेणं
चत्तारि पुव्वकोडीओ अट्ठासीइए वाससहस्सेहिं अब्भहियाओ एवइयं० णवसुवि
गमएसु कायसंवेहो भवादेसेणं जहन्नेणं दो भवग्गहणाइं उक्कोसेणं अट्ठ भवग्गहणाइं
कालादेसेणं उवजुंजिऊण भाणियव्वं, नवरं मज्झिमएसु तिसु गमएसु जहेव वेइंदियस्स

मज्झिमएसु तिसु गमएसु पच्छिज्जएसु तिसु गमएसु जहा एयस्स चेव पढमगमए,
नवरं ठिई अणुबंधो जहन्नेणं पुव्वकोडी उक्कोसेणवि पुव्वकोडी, सेसं तं चेव जाव
नवम गमए जह्णणेणं पुव्वकोडी वावीसाए वाससहस्सेहि अब्भहिया उक्कोसेणं चत्तारि
पुव्वकोडीओ अट्ठासीईए वाससहस्सेहिं अब्भहियाओ एवइयं कालं सेवेज्जा० ९ ॥ जइ
सन्निपंचिदियतिरिक्खजोणि जाव उ० किं संखेज्जवासाउय० असंखेज्जवासाउय० ?
गोयमा ! संखेज्जवासाउय० णो असंखेज्जवासाउय जाव उ०, जइ संखेज्जवासाउय जाव
उ० किं जलचरेहिंतो सेसं जहा असन्नीणं जाव ते णं भंते ! जीवा एगसमएणं केवइय्य
उववज्जंति एवं जहा रयणप्पभाए उववज्जमाणस्स सन्निपंचिदियस्स तहेव इहवि, नवरं
ओगाहणा जहन्नेणं अंगुलस्स असंखेज्जइभागं उक्कोसेणं जोयणसहस्सं सेसं तहेव
जाव कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ अट्ठासीईए
वाससहस्सेहिं अब्भहियाओ एवइयं०, एवं संवेहो णवसुवि गमएसु जहा असन्नीणं
तहेव निरवसेसं लद्धी से आइज्जएसु तिसुवि गमएसु एस चेव मज्झिमएसुवि तिसु गम-
एसु एस चेव नवरं इमाइं नव णाणत्ताइं ओगाहणा जहन्नेणं अंगुलस्स असंखेज्जइभागं
उक्कोसेणवि अंगुलस्स असंखेज्जइभागं, तिन्नि लेस्साओ, मिच्छादिट्ठी, दो अन्नाणा,
कायजोगी, तिन्नि समुग्घायां, ठिई जहन्नेणं अंतोमुहुत्तं उक्कोसेणवि अंतोमुहुत्तं,
अप्पसत्था अज्झवसाणा, अणुबंधो जहा ठिई सेसं तं चेव, पच्छिज्जएसु तिसुवि गम-
एसु जहेव पढमगमए णवरं ठिई अणुबंधो जहन्नेणं पुव्वकोडी उक्कोसेणवि पुव्वकोडी,
सेसं तं चेव ९ ॥ ७०१ ॥ जइ मणुस्सेहिंतो उववज्जंति किं सण्णिमणुस्सेहिंतो उववज्जंति
असण्णिमणुस्सेहितो उ० ? गोयमा ! सण्णिमणुस्सेहिंतो उववज्जंति असण्णिमणुस्से-
हिंतोवि उववज्जंति, असन्निमणुस्से णं भंते ! जे भविए पुढविकाइएसु० से णं भंते !
केवइय्यकालट्ठिईएसु एवं जहा असण्णिपंचिदियतिरिक्खजोणियस्स जहन्नकालट्ठिई-
यस्स तिन्नि गमगा तहा एयस्सवि ओहिया तिन्नि गमगा भाणियव्वा तहेव निरवसेसा
सेसा छ न भण्णंति १ ॥ जइ सन्निमणुस्सेहिंतो उववज्जंति किं संखेज्जवासाउय०
असंखेज्जवासाउय जाव उ० ? गोयमा ! संखेज्जवासाउय० णो असंखेज्जवासाउय
जाव उ०, जइ संखेज्जवासाउय जाव उ० किं पज्जत्त० अपज्जत्त० ? गोयमा !
पज्जत्तसंखेज्जवासाउय० अपज्जत्तसंखेज्जवासा जाव उ०, सन्निमणुस्से णं भंते ! जे
भविए पुढविकाइएसु उववज्जित्तए से णं भंते ! केवइकाल० ? गोयमा ! जह्णणेणं
अंतोमुहुत्तं उक्कोसेणं वावीसं वाससहस्सट्ठिईएसु, ते णं भंते ! जीवा एवं जहेव
रयणप्पभाए उववज्जमाणस्स तहेव तिसुवि गमएसु लद्धी नवरं ओगाहणा जह्णणेणं
अंगुलस्स असंखेज्जइभागं उक्कोसेणं पंचधणुहसयाइं, ठिई जह्णणेणं अंतोमुहुत्तं उक्को-

सेणं पुव्वकोडी एवं अणुबंधोवि, संवेहो नवसु गमएसु जहेव सन्निपंचिदियस्स मज्झि-
 लएसु तिसु गमएसु लद्धी जहेव सन्निपंचिदियस्स म० सेसं तं चेव निरवसेसं, पच्छिल्ला
 तिन्नि गमगा जहा एयस्स चेव ओहिया गमगा नवरं ओगाहणा जहण्णेणं पंचध-
 णुहसयाइं उक्कोसेणावि पंच धणुहसयाइं, ठिई अणुबंधो जहण्णेणं पुव्वकोडी उक्कोसेणावि
 पुव्वकोडी सेसं तहेव नवरं पच्छिल्लाएसु गमएसु संखेज्जा उववज्जंति नो असंखेज्जा
 उववज्जंति ॥ जइ देवेहिंतो उववज्जंति कि भवणवासिदेवेहिंतो उववज्जंति वाणमं-
 तर० जोइसियदेवेहिंतो उववज्जंति वेमाणियदेवेहिंतो उववज्जंति ? गोयमा ! भवण-
 वासिदेवेहिंतोवि उववज्जंति जाव वेमाणियदेवेहिंतोवि उववज्जंति, जइ भवणवासिदे-
 वेहिंतो उववज्जंति कि असुरकुमारभवणवासिदेवेहिंतो उववज्जंति जाव थणियकुमा-
 रभवणवासिदेवेहिंतो उ० ? गोयमा ! असुरकुमारभवणवासिदेवेहिंतो उववज्जंति जाव
 थणियकुमारभवणवासिदेवेहिंतो उववज्जंति, असुरकुमारे णं भंते ! जे भविए पुढवि-
 क्काइएसु उववज्जित्तए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं
 वावीसं वाससहस्साइं ठिई, ते णं भंते ! जीवा पुच्छा, गोयमा ! जहण्णेणं एक्को
 वा दो वा तिन्नि वा उक्कोसेणं संखेज्जा वा असंखेज्जा वा उववज्जंति, तेसि णं भंते !
 जीवाणं सरीरगा किंसंघयणी प० ? गोयमा ! छण्हं संघयणाणं असंघयणी जाव
 परिणमंति, तेसि णं भंते ! जीवाणं केमहालिया सरीरोगाहणा ? गोयमा ! दुविहा
 प०, तं०-भवधारणिज्जा य उत्तरवेउव्विया य, तत्थ णं जा सा भवधारणिज्जा सा
 जहन्नेणं अंगुलस्स असंखेज्जइभागं उक्कोसेणं सत्त रयणीओ, तत्थ णं जा सा उत्तर-
 वेउव्विया सा जहन्नेणं अंगुलस्स असंखेज्जइभागं उक्कोसेणं जोयणसयसहस्सं,
 तेसि णं भंते ! जीवाणं सरीरगा किंसंठिया प० ? गोयमा ! दुविहा प०, तं०-
 भवधारणिज्जा य उत्तरवेउव्विया य, तत्थ णं जे ते भवधारणिज्जा ते समचउरंस-
 संठाणसंठिया प०, तत्थ णं जे ते उत्तरवेउव्विया ते णाणासंठाणसंठिया प०, लेस्साओ
 चत्तारि, दिट्ठी तिविहावि, तिन्नि णाणा नियमं, तिन्नि अन्नाणा भयणाए, जोगो तिविहोवि,
 उवओगो दुविहोवि, चत्तारि सन्नाओ, चत्तारि कसाया, पंच इंदिया, पंच समुग्घाया,
 वेयणा दुविहावि, इत्थिवेदगावि पुरिसवेदगावि णो णपुंसगवेदगा, ठिई जहन्नेणं
 दसवाससहस्साइं उक्कोसेणं साइरेगं सागरोवमं, अज्झवसाणा असंखेज्जा पसत्थावि
 अप्पसत्थावि, अणुबंधो जहा ठिई, भवादेसेणं दो भवग्गहणाइं, कालादेसेणं जहण्णेणं
 दसवाससहस्साइं अंतोमुहुत्तमव्वहियाइं उक्कोसेणं साइरेगं सागरोवमं वावीसाए
 वाससहस्सेहिं अव्वहियं एवइयं०, एवं णववि गमा णेयव्वा नवरं मज्झिल्लाएसु
 पच्छिल्लाएसु तिसु गमएसु असुरकुमाराणं ठिइविसेसो जाणियव्वो सेसा ओहिया चेव

लद्धी कायसंवेहं च जाणेज्जा, सव्वत्थ दो भवग्गहणाइं जाव णवमगमए कालादेसेणं जहण्णेणं साइरेगं सागरोवमं वावीसाए वाससहस्सेहिं अब्भहियं उक्कोसेणवि साइरेगं सागरोवमं वावीसाए वाससहस्सेहिं अब्भहियं एवइयं० ९ ॥ णागकुमारा णं भंते ! जे भविए पुढविकाइए एस चेव वत्तव्वया जाव भवादेसोत्ति, णवरं ठिई जहण्णेणं दसवाससहस्साइं उक्कोसेणं देसूणाइं दो पलिओवमाइं, एवं अणुवंधोवि, कालादे-
 सेणं जहण्णेणं दसवाससहस्साइं अंतोमुहुत्तमव्वभहियाइं उक्कोसेणं देसूणाइं दो पलि-
 ओवमाइं वावीसाए वाससहस्सेहिं अब्भहियाइं, एवं णववि गमगा असुरकुमारगमग-
 सरिसा नवरं ठिई कालादेसं च जाणेज्जा, एवं जाव थणियकुमारणं ॥ जइ वाणमंतरदे-
 वेहिंतो उव्वजंति किं पिसायवाणमंतरं० जाव गंधव्ववाणमंतरं० ? गोयमा ! पिसाय-
 वाणमंतरं० जाव गंधव्ववाणमंतरं०, वाणमंतरदेवे णं भंते ! जे भविए पुढविकाइए
 एएसिंपि असुरकुमारगमगसरिसा नव गमगा भाणियव्वा, नवरं ठिई कालादेसं च
 जाणेज्जा, ठिई जहण्णेणं दसवाससहस्साइं उक्कोसेणं पलिओवमं सेसं तहेव ॥ जइ
 जोइसियदेवेहिंतो उव्वजंति किं चंदविमाणजोइसियदेवेहिंतो उव्वजंति जाव तारा-
 विमाणजोइसियदेवेहिंतो उ० ? गोयमा ! चंदविमाण जाव उ० जाव ताराविमाण जाव
 उ०, जोइसियदेवे णं भंते ! जे भविए पुढविकाइए लद्धी जहा असुरकुमारणं णवरं एगा
 तेउळेस्सा प०, तिन्नि णाणा तिन्नि अन्नाणा णियमं, ठिई जहण्णेणं अट्टभागपलिओवमं
 उक्कोसेणं पलिओवमं वाससयसहस्समव्वभहियं एवं अणुवंधोवि, कालादेसेणं जहण्णेणं
 अट्टभागपलिओवमं अंतोमुहुत्तमव्वभहियं उक्कोसेणं पलिओवमं वाससयसहस्सेगं वावी-
 साए वाससहस्सेहिं अब्भहियं एवइयं०, एवं सेसावि अट्ट गमगा भाणियव्वा नवरं ठिई
 कालादेसं च जाणेज्जा ॥ जइ वेमाणियदेवेहिंतो उव्वजंति किं कप्पोववण्णगवेमाणिय०
 कप्पातीयवेमाणिएहिंतो उ० ? गोयमा ! कप्पोववण्णगवेमाणिय जाव उ० णो कप्पाती-
 तवेमाणिय जाव उ०, जइ कप्पोववण्ण जाव उ० किं सोहम्मकप्पोववण्णगवेमाणिय०
 जाव अञ्चुयकप्पोववण्णगवेमाणिय जाव उ० ? गोयमा ! सोहम्मकप्पोववण्णगवेमाणिय०
 ईसाणकप्पोववण्णगवेमाणिय जाव उ०, णो सणकुमार जाव णो अञ्चुयकप्पोववण्णगवे-
 माणिय जाव उ०, सोहम्मगदेवे णं भंते ! जे भविए पुढविकाइए उव्वजित्तए से णं
 भंते ! केवइयं० एवं जहा जोइसियस्स गमगो णवरं ठिई अणुवंधो य जहण्णेणं पलि-
 ओवमं उक्कोसेणं दो सागरोवमाइं, कालादेसेणं जहण्णेणं पलिओवमं अंतोमुहुत्तमव्व-
 हियं उक्कोसेणं दो सागरोवमाइं वावीसाए वाससहस्सेहिं अब्भहियाइं एवइयं कालं०,
 एवं सेसावि अट्ट गमगा भाणियव्वा, णवरं ठिई कालादेसं च जाणेज्जा । ईसाणदेवे णं
 भंते ! जे भविए एवं ईसाणदेवेणवि णव गमगा भाणियव्वा नवरं ठिई अणुवंधो जहण्णेणं

साइरेगं पलिओवमं उक्कोसेणं साइरेगाइं दो सागरोवमाइं सेसं तं चेव । सेवं भंते ! २ ति जाव विहरइ ॥ ७०२ ॥ **चउवीसइमे सए वारहमो उद्देसो समत्तो ॥**

आउक्काइया णं भंते ! कओहिंतो उववज्जंति ? एवं जहेव पुढविकाइयउद्देसए जाव पुढविकाइए णं भंते ! जे भविए आउक्काइएसु उववज्जित्तए से णं भंते ! केवइ० ? गोयमा ! जहजेणं अंतोमुहुत्तं उक्कोसेणं सत्तवाससहस्सट्ठिइएसु उववजेज्जा, एवं पुढविकाइयउद्देसगसरिसो भाणियव्वो णवरं ठिइं संवेहं च जाणेज्जा, सेसं तहेव, सेवं भंते ! २ ति ॥ ७०३ ॥ **चउवीसइमे सए तेरहमो उद्देसो समत्तो ॥**

तेउक्काइया णं भंते ! कओहिंतो उववज्जंति ? एवं (णवरं) पुढविकाइयउद्देसगसरिसो उद्देसो भाणियव्वो नवरं ठिइं संवेहं च जाणेज्जा, देवेहिंतो ण उववज्जंति, सेसं तं चेव । सेवं भंते ! २ ति जाव विहरइ ॥ ७०४ ॥ **चउवीसइमस्स सयस्स चउदसमो उद्देसो समत्तो ॥**

चाउक्काइया णं भंते ! कओहिंतो उववज्जंति ? एवं जहेव तेउक्काइयउद्देसओ तहेव नवरं ठिइं संवेहं च जाणेज्जा । सेवं भंते ! २ ति ॥ ७०५ ॥ **चउवीसइमे सए पण्णरहमो उद्देसो समत्तो ॥**

वणस्सइकाइया णं भंते ! कओहिंतो उववज्जंति ? एवं पुढविकाइयसरिसो उद्देसो नवरं जाहे वणस्सइकाइया वणस्सइकाइएसु उववज्जन्ति ताहे पढमविइयचउत्थपंचमेसु गमएसु परिमाणं अणुसमयं अविरहियं अणंता उववज्जंति, भवादेसेणं जहण्णेणं दो भवग्गहणाइं उक्कोसेणं अणंताइं भवग्गहणाइं, कालादेसेणं जहण्णेणं दो अंतोमुहुत्ता उक्कोसेणं अणंतं कालं एवइयं०, सेसा पंच गमा अट्ठभवग्गहणिया तहेव नवरं ठिइं संवेहं च जाणेज्जा । सेवं भंते ! २ ति ॥ ७०६ ॥ **चउवीसइमस्स सयस्स सोलहमो उद्देसो समत्तो ॥**

वेइंदिया णं भंते ! कओहिंतो उववज्जंति जाव पुढविकाइए णं भंते ! जे भविए वेइंदिएसु उववज्जित्तए से णं भंते ! केवइ० सच्चेव पुढविकाइयस्स लद्धी जाव कालादेसेणं जहजेणं दो अंतोमुहुत्ता उक्कोसेणं संखेज्जाइं भवग्गहणाइं एवइयं०, एवं तेसु चेव चउसु गमएसु संवेहो सेसेसु पंचसु गमएसु तहेव अट्ठ भवा । एवं जाव चउरिंदिएणं समं चउसु संखेज्जा भवा, पंचसु अट्ठ भवा, पंचिंदियतिरिक्खजोणियमणुस्सेसु समं तहेव अट्ठ भवा, देवे चेव न उववज्जंति, ठिइं संवेहं च जाणेज्जा । सेवं भंते ! २ ति ॥ ७०७ ॥ २४-१७ ॥ तेइंदिया णं भंते ! कओहिंतो उववज्जंति ? एवं तेइंदियाणं जहेव वेइंदियाणं उद्देसो नवरं ठिइं संवेहं च जाणेज्जा, तेउक्काइएसु समं तइयगमो उक्कोसेणं अट्ठत्तराइं वेराइंदियसयाइं वेइंदिएहिं समं तइयगमे

उक्कोसेणं अडयालीसं संवच्छराइं छन्नउयराइंदियसयमव्वमहियाइं तेइंदिएहिं समं तइयगमे उक्कोसेणं वाणउयाइं तिन्नि राइंदियसयाइं एवं सव्वत्थ जाणेज्जा जाव सन्निमणुस्सत्ति, सेवं भंते ! २ त्ति ॥ ७०८ ॥ २४-१८ ॥ चउरिंदिया णं भंते ! कओहिंतो उव्वज्जंति ? जहा तेइंदियाणं उद्देसओ तहेव चउरिंदियाणवि नवरं ठिइं संवेहं च जाणेज्जा । सेवं भंते ! सेवं भंते ! त्ति ॥ ७०९ ॥ २४-१९ ॥ पंचिंदिय-तिरिक्खजोणिया णं भंते ! कओहिंतो उव्वज्जंति कि नेरइ० तिरिक्ख० मणु० देवेहिंतो उव्वज्जंति ? गोयमा ! नेरइएहिंतोवि उव्वज्जंति तिरिक्ख० मणुस्सेहिंतोवि उ० देवेहिंतोवि उव्वज्जंति, जइ नेरइएहिंतो उव्वज्जंति किं रयणप्पभापुढविनेरइएहिंतो उव्वज्जंति ज्जाव अहेसत्तमापुढविनेरइएहिंतो उव्वज्जंति ? गोयमा ! रयणप्पभापुढविनेरइएहिंतो उव्वज्जंति जाव अहेसत्तमापुढविनेरइएहिंतोवि उव्वज्जंति, रयणप्पभापुढविनेरइए णं भंते ! जे भविए पंचिंदियतिरिक्खजोणिएसु उव्वज्जित्तए से णं भंते ! केवइकालट्ठिईएसु उव्वज्जेज्जा ? गोयमा ! जहन्नेणं अंतोमुहुत्तट्ठिईएसु उक्कोसेणं पुव्वकोडिआउएसु उव्वज्जेज्जा, ते णं भंते ! जीवा एगसमएणं केवइया उव्वज्जंति ? एवं जहा असुरकुमाराणं वत्तव्वया नवरं संघयणे पोगगला अणिट्ठा अकंता जाव परिणमंति, ओगाहणा दुविहा प०, तं०-भवधारणिज्जा य उत्तरवेउव्विया य, तत्थ णं जा सा भवधारणिज्जा सा जहण्णेणं अंगुलस्स असंखेज्जइभागं उक्कोसेणं सत्त धणूइं तिन्नि रयणीओ छच्चंगुलाइं, तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं उक्कोसेणं पन्नरस धणूइं अट्ठाइज्जाओ रयणीओ, तेसि णं भंते ! जीवाणं सरीरगा किंसंठिया प० ? गोयमा ! दुविहा प०, तं०-भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंडसंठिया प०, तत्थ णं जे ते उत्तरवेउव्विया तेवि हुंडसंठिया प०, एगा काउलेस्सा प०, समुग्घाया चत्तारि, णो इत्थिवेदगा णो पुरिसवेदगा णपुंसगवेदगा, ठिई जहन्नेणं दसवाससहस्साइं उक्कोसेणं सागरोवमं एवं अणुवंधोवि, सेसं तहेव, भवादेसेणं जहण्णेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जहन्नेणं दसवाससहस्साइं अंतोमुहुत्तमव्वमहियाइं उक्कोसेणं चत्तारि सागरोवमाइं चउहिं पुव्वकोडीहिं अव्वमहियाइं एवइयं०, सो चेव जहन्नकालट्ठिईएसु उव्वज्जो जहन्नेणं अंतोमुहुत्तट्ठिईएसु उव्वज्जेज्जा, उक्कोसेणवि अंतोमुहुत्तट्ठिईएसु अवसेसं तहेव, नवरं कालादेसेणं जहन्नेणं तहेव उक्कोसेणं चत्तारि सागरोवमाइं चउहिं अंतोमुहुत्तेहिं अव्वमहियाइं एवइयं कालं० २, एवं सेसावि सत्त गमगा भाणियव्वा जहेव नेरइयउद्देसए सन्निपंचिंदिए(णं)हिं समं णेरइयाणं मज्झिमएसु य तिसुवि गमएसु पच्छिमएसु तिसुवि गमएसु ठिइणाणत्तं

भवइ, सेसं तं चेव सव्वत्थं ठिइं संवेहं च जाणेज्जा ९ ॥ सक्करप्पभापुढविनेरइएणं भंते ! जे भविए एवं जहा रयणप्पभाए णव गमगा तहेव सक्करप्पभाएवि, नवरं सरी-
रोगाहणा जहा ओगाहणासंठाणे, तिन्नि णाणा तिन्नि अन्नाणां नियमं, ठिइं अणुबंधो यं पुव्वभणिया, एवं णववि गमगा उवजुंजिऊणं भाणियव्वा, एवं जावं छट्ठपुढवी,
नवरं ओगाहणा लेस्सा ठिइं अणुबंधो संवेहो यं जाणियव्वा, अहेसत्तमापुढवी-
नेरइएणं भंते ! जे भविए एवं चेव णव गमगा, णवरं ओगाहणां लेस्सा ठिइं
अणुबंधा जाणियव्वा, संवेहो भवादेसेणं जहण्णेणं दो भवग्गहणाइं उक्कोसेणं छब्भव-
ग्गहणाइं, कालादेसेणं जहण्णेणं वावीसं सागरोवमाइं अंतोमुहुत्तमब्भहियाइं उक्कोसेणं
छावट्ठिं सागरोवमाइं तिहिं पुव्वकोडीहिं अब्भहियाइं एवइयं०, आइल्लएसु छसुवि गम-
एसु जहन्नेणं दो भवग्गहणाइं उक्कोसेणं छ भवग्गहणाइं, पच्चिच्छएसु तिसुं गमएसु जह-
न्नेणं दो भवग्गहणाइं उक्कोसेणं चत्तारिं भवग्गहणाइं, लद्धी नवसुवि गमएसु जहा
पढमगमए नवरं ठिइंविसेसो कालादे(सेणं)सो यं विइयगमए जहन्नेणं वावीसं
सागरोवमाइं अंतोमुहुत्तमब्भहियाइं उक्कोसेणं छावट्ठिं सागरोवमाइं तिहिं अंतोमुहुत्तेहिं
अब्भहियाइं एवइयं कालं०, तइयगमए जहन्नेणं वावीसं सागरोवमाइं पुव्वकोडीए
अब्भहियाइं उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं, चउ-
त्थगमए जहन्नेणं वावीसं सागरोवमाइं अंतोमुहुत्तमब्भहियाइं उक्कोसेणं छावट्ठिं
सागरोवमाइं तिहिं पुव्वकोडीहिं अब्भहियाइं, पंचमगमए जहन्नेणं वावीसं सागरोव-
माइं अंतोमुहुत्तमब्भहियाइं उक्कोसेणं छावट्ठिं सागरोवमाइं तिहिं अंतोमुहुत्तेहिं
अब्भहियाइं, छट्ठमगमए जहन्नेणं वावीसं सागरोवमाइं पुव्वकोडीहिं अब्भहियाइं
उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं, सत्तमगमए जहन्नेणं
तेत्तीसं सागरोवमाइं अंतोमुहुत्तमब्भहियाइं उक्कोसेणं छावट्ठिं सागरोवमाइं दोहिं
(अंतोमुहुत्तेहिं) पुव्वकोडीहिं अब्भहियाइं, अट्ठमगमए जहण्णेणं तेत्तीसं सागरोवमाइं
अंतोमुहुत्तमब्भहियाइं उक्कोसेणं छावट्ठिं सागरोवमाइं दोहिं अंतोमुहुत्तेहिं अब्भहियाइं,
णवमगमए जहन्नेणं तेत्तीसं सागरोवमाइं पुव्वकोडीए अब्भहियाइं उक्कोसेणं छावट्ठिं
सागरोवमाइं दोहिं पुव्वकोडीहिं अब्भहियाइं एवइयं० ९ ॥ जइ तिरिक्खजोणिएहिंतो
उववज्जंति किं एगिंदियतिरिक्खजोणिएहिंतो उ० एवं उववाओ जहा पुढविकाइयउद्देसए
जाव पुढविकाइए णं भंते ! जे भविए पंचिंदियतिरिक्खजोणिएसु उववज्जितए से
णं भंते ! केवइ० ? गोयमा ! जहन्नेणं अंतोमुहुत्तट्ठिइंएसु उक्कोसेणं पुव्वकोडीआउ-
एसु उववजेज्जा, ते णं भंते ! जीवा एवं परिमाणादीया अणुबंधपज्जवसाणां जचेव
अप्पणो सट्ठाणे वत्तव्वया सचेव पंचिंदियतिरिक्खजोणिएसुवि उववज्जमाणस्स

भाणियव्वा णवरं णवसुवि गमएसु परिमाणो जहन्नेणं एक्को वा दो वा तिन्नि वा उक्कोसेणं संखेज्जा वा असंखेज्जा वा उववज्जंति, भवादेसेणवि णवसुवि गमएसु जहन्नेणं दो भवग्गहणाइं उक्कोसेणं अट्ठ भवग्गहणाइं, सेसं तं चेव, कालादेसेणं उभओ ठि(ई)ई पकरेज्जा । जइ आउक्काइएहिंतो उववज्जन्ति एवं आउक्काइ(ए)याणवि एवं जाव चउरिंदिया उववाएयव्वा, नवरं सव्वत्थ अप्पणो लद्धी भाणियव्वा, णवसुवि गमएसु भवादेसेणं जहन्नेणं दो भवग्गहणाइं उक्कोसेणं अट्ठ भवग्गहणाइं, कालादेसेणं उभओ ठिईं करेज्जा सव्वेसिं सव्वगमएसु, जहेव पुढविकाइएसु उववज्जमाणं लद्धी तहेव सव्वत्थ ठिईं संवेहं च जाणेज्जा ॥ जइ पंचिंदियतिरिक्खजोणिएहिंतो उववज्जंति किं सन्निपंचिंदियतिरिक्खजोणिएहिंतो उववज्जंति असन्निपंचिंदियतिरिक्खजोणिएहिंतो उववज्जंति ? गोयमा ! सन्निपंचिंदिय० असन्निपंचिंदिय०, भेदो जहेव पुढविकाइएसु उववज्जमाणस्स जाव असन्निपंचिंदियतिरिक्खजोणिए णं भंते ! जे भविए पंचिंदियतिरिक्खजोणिएसु उववज्जितए से णं भंते ! केवइकाल० ? गोयमा ! जहन्नेणं अंतोमुहुत्तं उक्कोसेणं पलिओवमस्स असंखेज्जइभागट्ठिईएसु उवव०, ते णं भंते ! अवसेसं जहेव पुढविकाइएसु उववज्जमाणस्स असन्निस्स तहेव निरवसेसं जाव भवादेसोत्ति, कालादेसेणं जहन्नेणं दो अंतोमुहुत्ता उक्कोसेणं पलिओवमस्स असंखेज्जइभागं पुव्वकोडिपुहुत्तमव्वहियं एवइयं० १, विइयगमए एस चेव लद्धी नवरं कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तेहिं अव्वहियाओ एवइयं० २, सो चेव उक्कोसकालट्ठिईएसु उववन्नो जहन्नेणं पलिओवमस्स असंखेज्जइभागट्ठिईएसु उक्कोसेणवि पलिओवमस्स असंखेज्जइभागट्ठिईएसु उववज्जइ, ते णं भंते ! जीवा एवं जहा रयणप्पभाए उववज्जमाणस्स असन्निस्स तहेव निरवसेसं जाव कालादेसोत्ति, नवरं परिमाणं जहन्नेणं एक्को वा दो वा तिन्नि वा उक्कोसेणं संखेज्जा उववज्जंति, सेसं तं चेव ३, सो चेव अप्पणा जहन्नकालट्ठिईओ जाओ जहन्नेणं अंतोमुहुत्तट्ठिईएसु उक्कोसेणं पुव्वकोडिआउएसु उववजेज्जा, ते णं भंते ! अवसेसं जहा एयस्स पुढविकाइएसु उववज्जमाणस्स मज्झिमेसु तिसु गमएसु तहा इहवि मज्झिमेसु तिसु गमएसु जाव अणुवंधोत्ति, भवादेसेणं जहन्नेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तेहिं अव्वहियाओ ४, सो चेव जहन्नकालट्ठिईएसु उववन्नो एस चेव वत्तव्वया नवरं कालादेसेणं जहन्नेणं दो अंतोमुहुत्ता उक्कोसेणं अट्ठ अंतोमुहुत्ता एवइयं० ५, सो चेव उक्कोसकालट्ठिईएसु उववण्णो जहन्नेणं पुव्वकोडिआउएसु उक्कोसेणवि पुव्वकोडिआउएसु उववजेज्जा, एस चेव वत्तव्वया नवरं कालादेसेणं जाणेज्जा ६, सो चेव

अप्पणा उक्कोसकालट्टिईओ जाओ सच्चैव पढमगमगवत्तव्वया नवरं ठिई जहण्णेणं पुव्वकोडी उक्कोसेणवि पुव्वकोडी सेसं तं चेव, कालादेसेणं जहण्णेणं पुव्वकोडी अंतोमुहुत्तमव्वहिया उक्कोसेणं पलिओवमस्स असंखेज्जइभागं पुव्वकोडिपुहुत्तमव्वहियं एवइयं० ७, सो चेव जहन्नकालट्टिईएसु उववन्नो एस चेव वत्तव्वया जहा सत्तमगमए नवरं कालादेसेणं जहन्नेणं पुव्वकोडी अंतोमुहुत्तमव्वहिया उक्कोसेणं चत्तारि पुव्वकोडीओ चउहिं अंतोमुहुत्तेहिं अव्वहियाओ एवइयं० ८, सो चेव उक्कोसकालट्टिईएसु उववन्नो जहन्नेणं पलिओवमस्स असंखेज्जइभागं उक्कोसेणवि पलिओवमस्स असंखेज्जइभागं, एवं जहा रयणप्पभाए उववज्जमाणस्स असन्निस्स नवमगमए तहेव निरवसेसं जाव कालादेसोत्ति, नवरं परिमाणं जहा एयस्सेव तइयगमे सेसं तं चेव ९॥ जइ सन्निपंचिदियतिरिक्खजोणिएहिंतो उववज्जति कि संखेज्जवासा० असंखेज्जवासा० ? गोयमा ! संखेज्ज० णो असंखेज्ज०, जइ संखेज्जवासाउयं जाव कि पज्जत्तसंखेज्ज० अपज्जत्तसंखेज्ज० ? दोसुवि, संखेज्जवासाउयसन्निपंचिदियतिरिक्खजोणिए णं भंते ! जे भविए पंचिदियतिरिक्खजोणिएसु उववज्जितए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं तिपलिओवमट्टिईएसु उववजेज्जा, ते णं भंते ! अवसेसं जहा एयस्स चेव सन्निस्स रयणप्पभाए उववज्जमाणस्स पढमगमए, नवरं ओगाहणा जहन्नेणं अंगुलस्स असंखेज्जइभागं उक्कोसेणं जोअणसहस्सं सेसं तं चेव जाव भवादेसोत्ति, कालादेसेणं जहन्नेणं दो अंतोमुहुत्ता उक्कोसेणं तिन्नि पलिओवमाइं पुव्वकोडीपुहुत्तमव्वहियाइं एवइयं० १, सो चेव जहन्नकालट्टिईएसु उववन्नो एस चेव वत्तव्वया नवरं कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तेहिं अव्वहियाओ २, सो चेव उक्कोसकालट्टिईएसु उववण्णो जहण्णेणं तिपलिओवमट्टिईएसु उक्कोसेणवि तिपलिओवमट्टिईएसु उववजेज्जा, एस चेव वत्तव्वया नवरं परिमाणं जहन्नेणं एक्को वा दो वा तिन्नि वा उक्कोसेणं संखेज्जा उववज्जति, ओगाहणा जहन्नेणं अंगुलस्स असंखेज्जइभागं उक्कोसेणं जोयणसहस्सं सेसं तं चेव जाव अणुवंधोत्ति, भवादेसेणं दो भवग्गहणाइं, कालादेसेणं जहन्नेणं तिन्नि पलिओवमाइं अंतोमुहुत्तमव्वहियाइं उक्कोसेणं तिन्नि पलिओवमाइं पुव्वकोडीए अव्वहियाइं ३, सो चेव अप्पणा जहन्नकालट्टिईओ जाओ जहण्णेणं अंतोमुहुत्तं उक्कोसेणं पुव्वकोडिआउएसु उववजेज्जा, लद्धी से जहा एयस्स चेव सन्निपंचिदियस्स पुढविकाइएसु उववज्जमाणस्स मज्झिन्नएसु तिसु गमएसु सच्चैव इहवि मज्झिमेसु तिसु गमएसु कायव्वा, संवेहो जहेव एत्थ चेव असन्निस्स मज्झिमेसु तिसु गमएसु, सो चेव अप्पणा उक्कोसकालट्टिईओ जाओ जहा पढमगमए नवरं

ठिई अणुबंधो जहन्नेणं पुव्वकोडी उक्कोसेगवि पुव्वकोडी, कालादेसेणं जहन्नेणं पुव्वकोडी अंतोमुहुत्तमव्वहिया उक्कोसेणं तिन्नि पलिओवमाई पुव्वकोडीपुहुत्तमव्वहियाई ७, सो चेव जहन्नकालट्ठिईएसु उव्वन्नो एस चेव वत्तव्वया नवरं कालादेसेणं जहन्नेणं पुव्वकोडी अंतोमुहुत्तमव्वहिया उक्कोसेणं चत्तारि पुव्वकोडीओ चउहिं अंतोमुहुत्तेहिं अव्वहियाओ ८, सो चेव उक्कोसकालट्ठिईएसु उव्वन्नो जहन्नेणं तिपलिओवमट्ठिईएसु उक्कोसेगवि तिपलिओवमट्ठिईएसु अव्वसेसं तं चेव, नवरं परिमाणं ओगाहणा य जहा एयस्सेव तइयगमए, भवादेसेणं दो भवग्गहणाई, कालादेसेणं जहन्नेणं तिन्नि पलिओवमाई पुव्वकोडीए अव्वहियाई उक्कोसेणवि तिन्नि पलिओवमाई पुव्वकोडीए अव्वहियाई एवइयं० ९॥ जइ मणुस्सेहिंतो उव्वज्जंति किं सन्निमणु० असन्निमणु० ? गोयमा ! सन्निमणु० असन्निमणु०, असन्निमणुस्से णं भंते ! जे भविए पंचिंदियतिरिक्खजोणिएसु उव्वज्जित्तए से णं भंते ! केवइकाल० ? गोयमा ! जहन्नेणं अंतोमुहुत्तं उक्कोसेणं पुव्वकोडीआउएसु उव्वज्जंति, लद्धी से तिसुवि गमएसु जहा पुढविकाइएसु उव्वज्जमाणस्स संवेहो जहा एत्थ चेव असन्निपंचिंदियस्स मज्झिमेसु तिसु गमएसु तहेव निरव्वसेसो भाणियव्वो, जइ सन्निमणुस्स० किं संखेज्जवासाउयसन्निमणुस्स० असंखेज्जवासाउयसन्निमणुस्स० ? गोयमा ! संखेज्जवासाउय० नो असंखेज्जवासाउय०, जइ संखेज्ज० किं पज्जत० अपज्जत० ? गोयमा ! पज्जत० अपज्जत० संखेज्जवासाउय०, सन्निमणुस्से णं भंते ! जे भविए पंचिंदियतिरिक्खजोणिएसु उव्वज्जित्तए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं तिपलिओवमट्ठिईएसु उव्वज्जेजा, ते णं भंते ! लद्धी से जहा एयस्सेव सन्निमणुस्सस्स पुढविकाइएसु उव्वज्जमाणस्स पढमगमए जाव भवादेसोत्ति, कालादेसेणं जहन्नेणं दो अंतोमुहुत्ता उक्कोसेणं तिन्नि पलिओवमाई पुव्वकोडिपुहुत्तमव्वहियाई १, सो चेव जहन्नकालट्ठिईएसु उव्वन्नो एस चेव वत्तव्वया नवरं कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तेहिं अव्वहियाओ २, सो चेव उक्कोसकालट्ठिईएसु उव्वन्नो जहन्नेणं ति(ण्णि)पलिओवमट्ठिईएसु उक्कोसेगवि तिपलिओवमट्ठिईएसु सच्चेव वत्तव्वया नवरं ओगाहणा जहन्नेणं अंगुलपुहुत्तं उक्कोसेणं पंच यणुहसयाई, ठिई जहन्नेणं मासपुहुत्तं उक्कोसेणं पुव्वकोडी एवं अणुबंधोवि, भवादेसेणं दो भवग्गहणाई, कालादेसेणं जहन्नेणं तिन्नि पलिओवमाई मासपुहुत्तमव्वहियाई उक्कोसेणं तिन्नि पलिओवमाई पुव्वकोडीए अव्वहियाई एवइयं० ३, सो चेव अप्पणा जहन्नकालट्ठिईओ जाओ जहा सन्निपंचिंदियतिरिक्खजोणियस्स पंचिंदियतिरिक्खजोणिएसु उव्वज्जमाणस्स मज्झिमेसु तिसु गमएसु वत्तव्वया भाणिया सच्चेव

एयस्सवि मज्झिमेसु तिसु गमएसु निरवसेसा भाणियव्वा, नवरं परिमाणं उक्कोसेणं संखेज्जा उववज्जंति, सेसं तं चेव ६, सो चेव अप्पणा उक्कोसकालट्ठिईओ जाओ सचेव पढमगमगवत्तव्वया नवरं ओगाहणा जहण्णेणं पंच धणुहसयाइं उक्कोसेणवि पंच धणुहसयाइं, ठिई अणुवंधो जहण्णेणं पुव्वकोडी उक्कोसेणवि पुव्वकोडी, सेसं तहेव जाव भवादेसोत्ति, कालादेसेणं जहण्णेणं पुव्वकोडी अंतोमुहुत्तमव्वहिया उक्कोसेणं तिन्नि पलिओवमाइं पुव्वकोडिपुहुत्तमव्वहियाइं एवइयं० ७, सो चेव जहन्नकालट्ठिईएसु उववन्नो एस चेव वत्तव्वया नवरं कालादेसेणं जहण्णेणं पुव्वकोडी अंतोमुहुत्तमव्वहिया उक्कोसेणं चत्तारि पुव्वकोडीओ चउहि अंतोमुहुत्तेहिं अव्वहियाओ ८, सो चेव उक्कोसकालट्ठिईएसु उववन्नो जहण्णेणं तिन्नि पलिओवमाइं उक्कोसेणवि तिन्नि पलिओवमाइं, एस चेव लद्धी जहेव सत्तमगमए, भवादेसेणं दो भवग्गहणाइं, कालादेसेणं जहन्नेणं तिन्नि पलिओवमाइं पुव्वकोडीए अव्वहियाइं उक्कोसेणवि तिन्नि पलिओवमाइं पुव्वकोडीए अव्वहियाइं एवइयं० ९ ॥ जइ देवेहिंतो उववज्जंति किं भवणवासिदेवेहिंतो उववज्जंति वाणमंतरं० जोइसियं० वेमाणियदेवेहिंतो उ० ? गोयमा ! भवणवासिदेवेहिंतो उ० जाव वेमाणियदेवेहिंतोवि उ०, जइ भवणवासि जाव उ० किं असुरकुमारभवणं० जाव थणियकुमारभवणं ? गोयमा ! असुरकुमारं० जाव थणियकुमारभवणं०, असुरकुमारेणं भंते ! जे भविए पंचिंदियतिरिक्खजोणिएसु उववज्जित्तए सेणं भंते ! केवइयं० ? गोयमा ! जहन्नेणं अंतोमुहुत्तट्ठिईएसु उक्कोसेणं पुव्वकोडिआउएसु उववजेज्जा, असुरकुमाराणं लद्धी णवसुवि गमएसु जहा पुढविकाइएसु उववज्जमाणस्स एवं जाव ईसाणदेवस्स तहेव लद्धी भवादेसेणं सव्वत्थ अट्ठ भवग्गहणाइं उक्कोसेणं जहण्णेणं दोन्नि, भवट्ठिईं सवेहं च सव्वत्थ जाणेज्जा ९॥ नागकुमाराणं भंते ! जे भविए एस चेव वत्तव्वया नवरं ठिईं संवेहं च जाणेज्जा, एवं जाव थणियकुमारे ९। जइ वाणमंतरेहितो उ० किं पिसायं० तहेव जाव वाणमंतरेणं भंते ! जे भविए पंचिंदियतिरिक्खं० एवं चेव नवरं ठिईं संवेहं च जाणेज्जा ९, जइ जोइसियं० उववाओ तहेव जाव जोइसिएणं भंते ! जे भविए पंचिंदियतिरिक्खं० एस चेव वत्तव्वया जहा पुढविकाइयउद्देसए भवग्गहणाइं णवसुवि गमएसु अट्ठ जाव कालादेसेणं जहन्नेणं अट्ठ भागपलिओवमं अंतोमुहुत्तमव्वहियं उक्कोसेणं चत्तारि पलिओवमाइं चउहि पुव्वकोडीहिं चउहि य वाससयसहस्सेहिं अव्वहियाइं एवइयं०, एवं नवसुवि गमएसु नवरं ठिईं संवेहं च जाणेज्जा ९॥ जइ वेमाणियदेवे० किं कप्पोववन्नं० कप्पातीतवेमाणियं० ? गोयमा ! कप्पोववण्णगवेमाणियं० नो कप्पातीतवेमाणियं०, जइ कप्पोववण्णगं० जाव सहस्सारकप्पोववण्णगवेमाणियदेवेहिंतोवि उववज्जंति, नो आणय जाव णो

अञ्जुयकप्पोववण्णगवेमाणिय०, सोहम्मगदेवे णं भंते ! जे भविए पंचिंदियतिरिक्ख-
जोणिएसु उववज्जितए से णं भंते ! केवइ० ? गोयमा ! जहण्णेणं अंतोमुहुत्त०
उक्कोसेणं पुव्वकोडिआउएसु सेसं जहेव पुढविकाइयउद्देसए नवसुवि गमएसु नवरं
नवसुवि गमएसु जहन्नेणं दो भवग्गहणाइं उक्कोसेणं अट्ठ भवग्गहणाइं, ठिइं काला-
देसं च जाणेज्जा, एवं ईसाणदेवेवि, एवं एएणं कमेणं अवसेसावि जाव सहस्सार-
देवेषु उववाएयव्वा नवरं ओगाहणा जहा ओगाहणासंठाणे, लेस्सा सणकुमार-
माहिंदवंभलोएसु एगा पम्हलेस्सा सेसाणं एगा सुक्कलेस्सा, वेदे नो इत्थिवेदगा
पुरिसवेदगा णो नपुंसगवेदगा, आउअणुवंधा जहा ठिइपदे सेसं जहेव ईसाणगाणं
कायसंवेहं च जाणेज्जा । सेवं भंते ! सेवं भंते ! त्ति ॥ ७१० ॥ चउवीसइमे सए
वीसइमो उद्देसो समत्तो ॥

मणुस्सा णं भंते ! कओहिंतो उववज्जंति किं नेरइएहिंतो उववज्जंति जाव
देवेहिंतो उववज्जंति ? गोयमा ! नेरइएहिंतोवि उववज्जंति जाव देवेहिंतोवि उवव-
ज्जंति, एवं उववाओ जहा पंचिंदियतिरिक्खजोणियउद्देसए जाव तमापुढविनेरइएहिं-
तोवि उववज्जंति णो अहेसत्तमापुढविनेरइएहिंतो उववज्जंति, रयणप्पभापुढविनेरइए
णं भंते ! जे भविए मणुस्सेसु उववज्जितए से णं भंते ! केवइकाल० ? गोयमा !
जहण्णेणं मासपुहुत्तट्ठिईएसु उक्कोसेणं पुव्वकोडीआउएसु अवसेसा वत्तव्वया जहा
पंचिंदियतिरिक्खजोणिए उववज्जंतस्स तहेव नवरं परिमाणे जहण्णेणं एक्को वा दो
वा तिन्नि वा उक्कोसेणं संखेज्जा उववज्जंति, जहा ताहि अंतोमुहुत्तेहिं तहा इहं मास-
पुहुत्तेहिं संवेहं करेज्जा सेसं तं चेव ९ ॥ जहा रयणप्पभाए वत्तव्वया तहा सक्कर-
प्पभाएवि वत्तव्वया नवरं जहन्नेणं वासपुहुत्तट्ठिईएसु उक्कोसेणं पुव्वकोडि०, ओगा-
हणालेस्साणाणट्ठिइअणुवंधसंवेहं णाणत्तं च जाणेज्जा जहेव तिरिक्खजोणियउद्देसए
एवं जाव तमापुढविनेरइए ९ ॥ जइ तिरिक्खजोणिएहिंतो उववज्जंति किं एगिंदि-
यतिरिक्खजोणिएहिंतो उववज्जंति जाव पंचिंदियतिरिक्खजोणियउद्देसए नवरं
तेउवाळ पडिसेहेयव्वा, सेसं तं चेव जाव पुढविकाइए णं भंते ! जे भविए
मणुस्सेसु उववज्जितए से णं भंते ! केवइ० ? गोयमा ! जहन्नेणं अंतोमुहुत्तट्ठिईएसु
उक्कोसेणं पुव्वकोडीआउएसु उववज्जेज्जा, ते णं भंते ! जीवा एवं जच्चेव पंचिंदियति-
रिक्खजोणिएसु उववज्जमाणस्स पुढविकाइयस्स वत्तव्वया सा चेव इहावि उववज्ज-
माणस्स भाणियव्वा णवसुवि गमएसु, नवरं तइयछट्ठणवमेसु गमएसु परिमाणं
जहन्नेणं एक्को वा दो वा तिन्नि वा उक्कोसेणं संखेज्जा उववज्जंति, जाहे अप्पणा

जहन्नकालट्टिईओ भवइ ताहे पढमगमए अज्जवसाणा पसत्थावि अप्पसत्थावि,
विइयगमए अप्पसत्था, तइयगमए पसत्था भवन्ति सेसं तं चेव निरवसेसं ९ ॥ जइ
आउकाइए एवं आउकाइयाणवि, एवं वणस्सइकाइयाणवि, एवं जाव चउरिंदिया-
णवि, असन्निपंचिंदियतिरिक्खजोणिया सन्निपंचिंदियतिरिक्खजोणिया असन्निमणुस्सा
सन्निमणुस्सा य एए सव्वेवि जहा पंचिंदियतिरिक्खजोणियउद्देसए तहेव भाणि-
यव्वा, नवरं एयाणि चेव परिमाणअज्जवसाणणाणत्ताणि जाणिज्जा, पुढविकाइयस्स
एत्थ चेव उद्देसए भणियाणि सेसं तहेव निरवसेसं ॥ जइ देवेहिंतो उववज्जंति किं
भवणवासिदेवेहिंतो उववज्जंति वाणमंतरं० जोइसिय० वेमाणियदेवेहिंतो उवव-
ज्जंति ? गोयमा ! भवणवासि० जाव वेमाणिय जाव उ०, जइ भवण० किं असुर०
जाव थणिय० ? गोयमा ! असुर० जाव थणिय०, असुरकुमारे णं भंते ! जे भविए
मणुस्सेसु उववज्जित्तए से णं भंते ! केवइ० ? गोयमा ! जहण्णेणं मासपुहुत्तट्टिईएसु
उक्कोसेणं पुव्वकोडिआउएसु उववज्जेज्जा, एवं जच्चेव पंचिंदियतिरिक्खजोणियउद्देसए
वत्तव्वया सच्चेव एत्थवि भाणियव्वा, नवरं जहा तहिं जहन्नगं अंतोमुहुत्तट्टिईएसु
तहा इहं मासपुहुत्तट्टिईएसु, परिमाणं जहन्नेणं एक्को वा दो वा तिन्नि वा उक्कोसेणं
संखेज्जा उववज्जंति, सेसं तं चेव, एवं जाव ईसाणदेवोत्ति, एयाणि चेव णाणत्ताणि
सणकुमारादीया जाव सहस्सारोत्ति जहेव पंचिंदियतिरिक्खजोणियउद्देसए, नवरं
परिमाणं जहण्णेणं एक्को वा दो वा तिन्नि वा उक्कोसेणं संखेज्जा उववज्जंति, उववाओ
जहन्नेणं वासपुहुत्तट्टिईएसु उक्कोसेणं पुव्वकोडिआउएसु उववज्जंति, सेसं तं चेव संवेहं
वा(मा)सपुहुत्तपुव्वकोडीसु करेज्जा ॥ सणकुमारे ठिई चउगुणिया अट्ठावीसं साग-
रोवमा भवन्ति, माहिंदे ताणि चेव साइरेगाणि, वंभलोए चत्तालीसं, लंतए छप्पन्नं,
महासुक्के अट्ठसट्ठिं, सहस्सारे वावत्तरिं सागरोवमाइं एसा उक्कोसा ठिई भाणियव्वा
जहन्नट्टिईपि चउ गुणेज्जा ९ ॥ आणयदेवे णं भंते ! जे भविए मणुस्सेसु उववज्जि-
त्तए से णं भंते ! केवइ० ? गोयमा ! जहन्नेणं वासपुहुत्तट्टिईएसु उववज्जेज्जा उक्को-
सेणं पुव्वकोडिठिईएसु, ते णं भंते ! एवं जहेव सहस्सारदेवाणं वत्तव्वया नवरं
ओगाहणां ठिई अणुवंधो य जाणेज्जा, सेसं तं चेव, भवादेसेणं जहन्नेणं दो भवग्ग-
हणाइं उक्कोसेणं छ भवग्गहणाइं, कालादेसेणं जहन्नेणं अट्ठारसं सागरोवमाइं
वासपुहुत्तमव्वहियाइं उक्कोसेणं सत्तावन्नं सागरोवमाइं तिहिं पुव्वकोडीहिं अव्वहि-
याइं एवइयं कालं०, एवं णववि गमगा, नवरं ठिई अणुवंधं संवेहं च जाणेज्जा, एवं
जाव अञ्जयदेवो, नवरं ठिई अणुवंधं संवेहं च जाणेज्जा, पाणयदेवस्स ठिई तिगुणिया
सट्ठिं सागरोवमाइं, आरणगस्स तेवट्ठिं सागरोवमाइं, अञ्जयदेवस्स छावट्ठिं सागरो-

वेमाइं ॥ जइ कप्पातीतवेमाणियदेवेहिंतो उववज्जंति किं गेवेज्जकप्पातीत० अणुत्त-
 रोववाइयकप्पातीत जाव उ० ? गोयमा ! गेवेज्ज० अणुत्तरोववाइय०, जइ गेवेज्ज० किं
 हेट्ठिम २ गेवेज्जगकप्पातीत० जाव उवरिम २ गेवेज्ज० ? गोयमा ! हेट्ठिम २ गेवेज्ज०
 जाव उवरिम २ गेवेज्ज०, गेवेज्जगदेवे णं भंते ! जे भविए मणुस्सेसु उववज्जित्तए से णं
 भंते ! केवइकाल० ? गोयमा ! जहण्णेणं वासपुहुत्तट्ठिईएसु उक्कोसेणं पुव्वकोडिआउएसु
 उ० अवसेसं जहा आणयदेवस्स वत्तव्वया नवरं ओगाहणा० गोयमा ! एगे भवधा-
 रणिज्जे सरीरए से जहन्नेणं अंगुलस्स असंखेज्जइभागं उक्कोसेणं दो रयणीओ, संठाणं,
 गोयमा ! एगे भवधारणिज्जे सरीरए से समचउरंससंठाणसंठिए प०, पंच समुग्घाया
 प०, तं०- वेयणासमुग्घाए जाव तेयगसमुग्घाए णो चेव णं वेउव्वियतेयगसमुग्घा-
 एहिंतो समोहणिसु वा समोहणंति वा समोहणिस्संति वा, ठिई अणुवंधो जहन्नेणं
 वावीसं सागरोवमाइं उक्कोसेणं एकत्तीसं सागरोवमाइं, सेसं तं चेव, कालादेसेणं जहण्णेणं
 वावीसं सागरोवमाइं वासपुहुत्तमव्वभहियाइं उक्कोसेणं तेणउइं सागरोवमाइं तिहिं पुव्व-
 कोडीहिं अव्वभहियाइं एवइयं०, एवं सेसेसुवि अट्ठगमएसु नवरं ठिई संवेहं च जाणेज्जा
 ९॥ जइ अणुत्तरोववाइयकप्पातीतवेमाणिय जाव उ० किं विजयअणुत्तरोववाइय०
 वेजयंतअणुत्तरोववाइय० जाव सव्वट्ठसिद्ध० ? गोयमा ! विजयअणुत्तरोववाइय०
 जाव सव्वट्ठसिद्धअणुत्तरोववाइय०, विजयवेजयंतजयंतअपराजियदेवे णं भंते ! जे
 भविए मणुस्सेसु उववज्जित्तए से णं भंते ! केवइ० ? एवं जहेव गेवेज्जगदेवाणं नवरं
 ओगाहणा जहण्णेणं अंगुलस्स असंखेज्जइभागं उक्कोसेणं एगा रयणी, सम्मदिट्ठी
 णो मिच्छादिट्ठी णो सम्मामिच्छादिट्ठी, णाणी णो अन्नाणी नियमं तिन्नाणी तं०-
 आभिणिवोहियनाणी सुयनाणी ओहिणाणी, ठिई जहन्नेणं एकत्तीसं सागरोवमाइं
 उक्कोसेणं तेत्तीसं सागरोवमाइं, सेसं तहेव, भवादेसेणं जहण्णेणं दो भवग्गहणाइं
 उक्कोसेणं चत्तारि भवग्गहणाइं, कालादेसेणं जहण्णेणं एकत्तीसं सागरोवमाइं वास-
 पुहुत्तमव्वभहियाइं उक्कोसेणं छावट्ठिं सागरोवमाइं दोहिं पुव्वकोडीहिं अव्वभहियाइं
 एवइयं०, एवं सेसावि अट्ठगमगा भाणियव्वा नवरं ठिई अणुवंधं संवेहं च जाणेज्जा
 सेसं तं चेव ॥ सव्वट्ठसिद्धगदेवे णं भंते ! जे भविए मणुस्सेसु उववज्जित्तए सा
 चेव विजयादिदेववत्तव्वया भाणियव्वा णवरं ठिई अजहन्नमणुक्कोसेणं तेत्तीसं साग-
 रोवमाइं एवं अणुवंधोवि, सेसं तं चेव, भवादेसेणं दो भवग्गहणाइं, कालादेसेणं
 जहन्नेणं तेत्तीसं सागरोवमाइं वासपुहुत्तमव्वभहियाइं उक्कोसेणं तेत्तीसं सागरोवमाइं
 पुव्वकोडीए अव्वभहियाइं एवइयं० १॥ सो चेव जहन्नकालट्ठिईएसु उववन्नो एस चेव
 वत्तव्वया नवरं कालादेसेणं जहन्नेणं तेत्तीसं सागरोवमाइं वासपुहुत्तमव्वभहियाइं

उक्कोसेणवि तेत्तीसं सागरोवमाइं वासपुहुत्तमव्वभहियाइं एवइयं० २ । सो चेव उक्कोसकालट्ठिइएसु उववन्नो एस चेव वत्तव्वया, नवरं कालादेसेणं जहण्णेणं तेत्तीसं सागरोवमाइं पुव्वकोडीए अव्वभहियाइं उक्कोसेणवि तेत्तीसं सागरोवमाइं पुव्वकोडीए अव्वभहियाइं एवइयं० ३, एए चेव तिन्नि गमगा सेसा न भण्णंति । सेवं भंते ! २ ति ॥ ७११ ॥ चउवीसइमे सए एकवीसइमो उद्देसो समत्तो ॥

वाणमन्तरा णं भंते ! कओहिंतो उववज्जंति किं नेरइएहिंतो उववज्जंति तिरिक्ख० एवं जहेव णागकुमारउद्देसए असन्नी तहेव निरवसेसं । जइ सन्निपंचिदिय० जाव असंखेज्जवासाउयसन्निपंचिदिय० जे भविए वाणमंतर० से णं भंते ! केवइ० ? गोयमा ! जहन्नेणं दसवाससहस्सट्ठिइएसु उक्कोसेणं पलिओवमट्ठिइएसु सेसं तं चेव जहा नागकुमारउद्देसए जाव कालादेसेणं जहण्णेणं साइरेगा पुव्वकोडी दसहिं वाससहस्सेहि अव्वभहिया उक्कोसेणं चत्तारि पलिओवमाइं एवइयं०, सो चेव जहन्नकालट्ठिइएसु उववन्नो जहेव णागकुमाराणं विइयगमे वत्तव्वया २, सो चेव उक्कोसकालट्ठिइएसु उववण्णो जहण्णेणं पलिओवमट्ठिइएसु उक्कोसेणवि पलिओवमट्ठिइएसु एस चेव वत्तव्वया नवरं ठिइं से जहण्णेणं पलिओवमं उक्कोसेणं तिन्नि पलिओवमाइं, संवेहो जहण्णेणं दो पलिओवमाइं उक्कोसेणं चत्तारि पलिओवमाइं एवइयं० ३, मज्झिमगमगा तिन्निवि जहेव नागकुमारेसु पच्छिमेसु तिसु गमएसु तं चेव जहा नागकुमारुद्देसए नवरं ठिइं संवेहं च जाणेज्जा, संखेज्जवासाउय तहेव नवरं ठिइं अणुबंधो संवेहं च उभओ ठिइंएसु जाणेज्जा, जइ मणुस्स० असंखेज्जवासाउयाणं जहेव नागकुमाराणं उद्देसए तहेव वत्तव्वया नवरं तइयगमए ठिइं जहन्नेणं पलिओवमं उक्कोसेणं तिन्नि पलिओवमाइं, ओगाहणा जहण्णेणं गाउयं उक्कोसेणं तिन्नि गाउयाइं सेसं तं चेव, संवेहो से जहा एत्थ चेव उद्देसए असंखेज्जवासाउयसन्निपंचिदियाणं, संखेज्जवासाउयसन्निमणुस्से जहेव नागकुमारुद्देसए नवरं वाणमंतरे ठिइं संवेहं च जाणेज्जा । सेवं भंते ! २ ति ॥ ७१२ ॥ चउवीसइमे सए वावीसइमो उद्देसो समत्तो ॥

जोइसिया णं भंते ! कओहिंतो उववज्जंति किं नेरइए० भेदो जाव सन्निपंचिदियतिरिक्खजोणिएहिंतो उववज्जंति नो असन्निपंचिदियतिरिक्ख०, जइ सन्नि० किं संखेज्ज० असंखेज्ज० ? गोयमा ! संखेज्जवासाउय० असंखेज्जवासाउय जाव उ०, असंखेज्जवासाउयसन्निपंचिदियतिरिक्खजोणिए णं भंते ! जे भविए जोइसिएसु उववज्जितए से णं भंते ! केवइ० ? गोयमा ! जहन्नेणं अट्ठभागपलिओवमट्ठिइएसु उक्कोसेणं पलिओवमवाससयसहस्समव्वभहियट्ठिइएसु उववज्जेज्जा, अवसेसं जहा असुरकुमारुद्देसए नवरं ठिइं जहन्नेणं अट्ठभागपलिओवमं उक्कोसेणं तिन्नि पलिओवमाइं एवं अणुबंधोवि सेसं

तहेव, नवरं कालादेसेणं जहण्णेणं दो अट्ठभागपलिओवमाई उक्कोसेणं चत्तारि पलिओ-
 चमाई वाससयसहस्समब्भहियाई एवइयं० १, सो चेव जहन्नकालट्ठिईएसु उववन्नो
 जहण्णेणं अट्ठभागपलिओवमट्ठिईएसु उक्कोसेणवि अट्ठभागपलिओवमट्ठिईएसु उ०, एस
 चेव वत्तव्वया नवरं कालादेसं जाणेज्जा २, सो चेव उक्कोसकालट्ठिईएसु उववण्णो एस
 चेव वत्तव्वया णवरं ठिई जहण्णेणं पलिओवमं वाससयसहस्समब्भहियं उक्कोसेणं
 तिन्नि पलिओवमाई, एवं अणुवंधोवि, कालादेसेणं जहण्णेणं दो पलिओवमाई दोहिं वास-
 सयसहस्सेहिं अब्भहियाई उक्कोसेणं चत्तारि पलिओवमाई वाससयसहस्समब्भहियाई
 ३, सो चेव अप्पणा जहन्नकालट्ठिईओ जाओ जहन्नेणं अट्ठभागपलिओवमट्ठिईएसु
 उववजेज्जा उक्कोसेणवि अट्ठभागपलिओवमट्ठिईएसु उववजेज्जा, ते णं भंते ! जीवा
 एगसमए एस चेव वत्तव्वया नवरं ओगाहणा जहन्नेणं धणुहपुहुत्तं उक्कोसेणं साइरेगाई
 अट्ठारसधणुहसयाई, ठिई जहन्नेणं अट्ठभागपलिओवमं उक्कोसेणवि अट्ठभागपलि-
 ओवमं, एवं अणुवंधोवि सेसं तहेव, कालादेसेणं जहण्णेणं दो अट्ठभागपलिओवमाई
 उक्कोसेणवि दो अट्ठभागपलिओवमाई एवइयं० जहन्नकालट्ठिईयस्स एस चेव एक्को गमो
 ६, सो चेव अप्पणा उक्कोसकालट्ठिईओ जाओ सा चेव ओहिया वत्तव्वया नवरं ठिई
 जहन्नेणं तिन्नि पलिओवमाई उक्कोसेणवि तिन्नि पलिओवमाई एवं अणुवंधोवि, सेसं
 तं चेव, एवं पच्छिमा तिन्नि गमगा णेयव्वा नवरं ठिई संवेहं च जाणेज्जा, एए सत्त
 गमगा । जइ संखेज्जवासाउयसन्निपंचिदिय० संखेज्जवासाउयाणं जहेव असुरकुमा-
 रेसु उववज्जमाणानं तहेव नववि गमा भाणियव्वा नवरं जोइसियठिई संवेहं च
 जाणेज्जा, सेस तहेव निरवसेसं भाणियव्वं, जइ मणुस्सेहिंतो उववज्जंति भेदो तहेव
 जाव असंखेज्जवासाउयसन्निमणुस्से णं भंते ! जे भविए जोइसिएसु उववज्जितए से
 णं भंते ! एवं जहा असंखेज्जवासाउयसन्निपंचिदियस्स जोइसिएसु चेव उववज्ज-
 माणस्स सत्त गमगा तहेव मणुस्साणावि नवरं ओगाहणाविसेसो पढमेसु तिसु गमएसु
 ओगाहणा जहन्नेणं साइरेगाई नव धणुहसयाई उक्कोसेणं तिन्नि गाडयाई, मज्झिमग-
 मए जहण्णेणं साइरेगाई नव धणुहसयाई उक्कोसेणवि साइरेगाई नव धणुहसयाई,
 पच्छिमेसु तिसुवि गमएसु जहण्णेणं तिन्नि गाडयाइ उक्कोसेणवि तिन्नि गाडयाई, सेसं
 तहेव निरवसेसं जाव संवेहोत्ति, जइ संखेज्जवासाउयसन्निमणुस्से० संखेज्जवासा-
 उयाणं जहेव असुरकुमारेसु उववज्जमाणानं तहेव नव गमगा भाणियव्वा, नवरं
 ओरणिवाठिई संवेहं च जाणेज्जा, नेसं तं चेव निरवसेस । सेवं भंते ! २ त्ति ॥ ७१३ ॥
 चउवीसइमे सण तेवीसइमो उहेसो समत्तो ॥

गोहम्मगएवा णं भंते ! कओहिंतो उववज्जंति कि नेरइएहिंतो उववज्जंति० ? भेदो

जहा जोइसियउद्देसए, असंखेज्जवासाउयसन्निपंचिदियतिरिक्खजोणिए णं भंते ! जे भविए सोहम्मगदेवेसु उववज्जितए से णं भंते ! केवइकाल० ? गोयमा ! जहण्णेणं पलिओवमट्ठिईएसु उ० उक्कोसेणं तिपलिओवमट्ठिईएसु उववज्जेज्जा, ते णं भंते ! अव-
सेसं जहा जोइसिएसु उववज्जमाणस्स नवरं सम्महिट्ठीवि मिच्छादिट्ठीवि णो सम्मामि-
च्छादिट्ठी, णाणीवि अन्नाणीवि दो णाणा दो अन्नाणा नियमं, ठिई जहण्णेणं पलिओवमं
उक्कोसेणं तिणिण पलिओवमाइं एवं अणुबंधोवि सेसं तहेव, कालादेसेणं जहण्णेणं दो
पलिओवमाइं उक्कोसेणं छप्पलिओवमाइं एवइयं० १, सो चेव जहन्नकालट्ठिईएसु उव-
वन्नो एस चेव वत्तव्वया नवरं कालादेसेणं जहन्नेणं दो पलिओवमाइं उक्कोसेणं चत्तारि
पलिओवमाइं एवइयं० २, सो चेव उक्कोसकालट्ठिईएसु उववन्नो जहन्नेणं तिपलिओ-
व० उक्कोसेणवि तिपलिओव० एस चेव वत्तव्वया नवरं ठिई जहन्नेणं तिन्नि पलिओ-
वमाइं उक्कोसेणवि तिन्नि पलिओवमाइं सेसं तं चेव, कालादेसेणं जहण्णेणं छप्पलिओव-
माइं उक्कोसेणवि छप्पलिओवमाइं एवइयं० ३, सो चेव अप्पणा जहन्नकालट्ठिईओ
जाओ जहण्णेणं पलिओवमट्ठिईएसु उक्कोसेणवि पलिओवमट्ठिईएसु एस चेव वत्तव्वया
नवरं ओगाहणा जहण्णेणं धणुहपुहुत्तं उक्कोसेणं दो गाउयाइं, ठिई जहन्नेणं पलिओवमं
उक्कोसेणवि पलिओवमं सेसं तहेव, कालादेसेणं जहण्णेणं दो पलिओवमाइं उक्कोसेणं पि
दो पलिओवमाइं एवइयं० ६, सो चेव अप्पणा उक्कोसकालट्ठिईओ जाओ आइल्लगमग-
सरिसा तिन्नि गमगा णेयव्वा नवरं ठिई कालादेसं च जाणेज्जा ९ ॥ जइ संखेज्जवा-
साउयसन्निपंचिदिय० संखेज्जवासाउयस्स जहेव असुरकुमारेसु उववज्जमाणस्स तहेव
नववि गमगा, नवरं ठिईं संवेहं च जाणेज्जा, जाहे य अप्पणा जहन्नकालट्ठिईओ भवइ
ताहे तिसुवि गमएसु सम्महिट्ठीवि मिच्छादिट्ठीवि णो सम्मामिच्छादिट्ठी, दो नाणा दो
अन्नाणा नियमं सेसं तं चेव ॥ जइ मणुस्सेहितो उववज्जंति भेदो जहेव जोइसिएसु
उववज्जमाणस्स जाव असंखेज्जवासाउयसन्निमणुस्से णं भंते ! जे भविए सोहम्मे कप्पे
देवत्ताए उववज्जितए एवं जहेव असंखेज्जवासाउयस्स सन्निपंचिदियतिरिक्खजोणियस्स
सोहम्मे कप्पे उववज्जमाणस्स तहेव सत्त गमगा नवरं आइल्लएसु दोसु गमएसु ओगा-
हणा जहन्नेणं गाउयं उक्कोसेणं तिन्नि गाउयाइं, तइयगमे जहन्नेणं तिन्नि गाउयाइं
उक्कोसेणवि तिन्नि गाउयाइं, चउत्थगमए जहन्नेणं गाउयं उक्कोसेणवि गाउयं, पच्छि-
मएसु तिसु गमएसु जहण्णेणं तिन्नि गाउयाइं उक्कोसेणवि तिन्नि गाउयाइं सेसं तहेव
निरवसेसं ९ ॥ जइ संखेज्जवासाउयसन्निमणुस्सेहितो० एवं संखेज्जवासाउयसन्निमणु-
स्साणं जहेव असुरकुमारेसु उववज्जमाणं तहेव णव गमगा भाणियव्वा नवरं सोह-
म्मगदेवट्ठिईं संवेहं च जाणेज्जा, सेसं तं चेव ९ ॥ ईसाणदेवा णं भंते ! कओहितो

उववज्जंति० ईसाणदेवाणं एस चेव सोहम्मगदेवसरिसा वत्तव्वया नवरं असंखेज्जवा-
 साउयसन्निपंचिदियतिरिक्खजोणियस्स जेसु ठाणेषु सोहम्मे उववज्जमाणस्स पलिओ-
 वमट्ठिई तेसु ठाणेषु इहं साइरेगं पलिओवमं कायव्वं, चउत्थगमे ओगाहणा जहन्नेणं
 धणुहपुहुत्तं उक्कोसेणं साइरेगाइं दो गाउयाइं सेसं तं चेव ९ ॥ असंखेज्जवासाउयस-
 न्निमणुस्सस्सवि तहेव ठिई जहा पंचिदियतिरिक्खजोणियस्स असंखेज्जवासाउयस्स
 ओगाहणावि जेसु ठाणेषु गाउयं तेसु ठाणेषु इहं साइरेगं गाउयं सेसं तहेव ९ ॥
 संखेज्जवासाउयाणं तिरिक्खजोणियाणं मणुस्साण य जहेव सोहम्मेसु उववज्जमाणं
 तहेव निरवसेसं णववि गमगा नवरं ईसाणट्ठिई संवेहं च जाणेज्जा ९ ॥ सणंकुमार-
 गदेवा णं भंते ! कओहिंतो उववज्जंति० उववाओ जहा सक्करप्पभापुढविनेरइयाणं जाव
 पज्जत्तसंखेज्जवासाउयसन्निपंचिदियतिरिक्खजोणिए णं भंते ! जे भविए सणंकुमारग-
 देवेषु उववज्जित्तए अवसेसा परिमाणादीया भवादेसपज्जवसाणा सच्चेव वत्तव्वया
 भाणियव्वा जहा सोहम्मे उववज्जमाणस्स नवरं सणंकुमारट्ठिई संवेहं च जाणेज्जा,
 जाहे य अप्पणा जहन्नकालट्ठिईओ भवइ ताहे तिसुवि गमएसु पंच लेस्साओ आइ-
 ल्लाओ कायव्वाओ सेसं तं चेव ९ ॥ जइ मणुस्सेहिंतो उववज्जंति मणुस्साणं जहेव
 सक्करप्पभाए उववज्जमाणं तहेव णववि गमा भाणियव्वा नवरं सणंकुमारट्ठिई संवेहं
 च जाणेज्जा ९ ॥ माहिंदगदेवा णं भंते ! कओहिंतो उववज्जंति० जहा सणंकुमार-
 देवाणं वत्तव्वया तहा माहिंदगदेवाणवि भाणियव्वा, नवरं माहिंदगदेवाणं ठिई साइ-
 रेगा जा(भा)णियव्वा सा चेव, एवं वंभलोगदेवाणवि वत्तव्वया नवरं वंभलोगट्ठिई
 संवेहं च जाणेज्जा, एवं जाव सहस्सारो, णवरं ठिई संवेहं च जाणेज्जा, लंतगाईणं
 जहन्नकालट्ठिईयस्स तिरिक्खजोणियस्स तिसुवि गमएसु छप्पि लेस्साओ कायव्वाओ,
 संघयणाइं वंभलोगलंतएसु पंच आइल्लाणाणि, महासुक्कसहस्सारेसु चत्तारि, तिरिक्ख-
 जोणियाणवि मणुस्साणवि, सेसं तं चेव ९ ॥ आणयदेवा णं भंते ! कओहिंतो उव-
 वज्जंति० उववाओ जहा सहस्सारे देवाणं णवरं तिरिक्खजोणिया खोडेयव्वा जाव
 पज्जत्तसंखेज्जवासाउयसन्निमणु(स्सा)स्से णं भंते ! जे भविए आणयदेवेषु उववज्जित्तए
 मणुस्साणं वत्तव्वया जहेव सहस्सारेसु उववज्जमाणं णवरं तिन्नि संघयणाणि सेसं
 तहेव जाव अणुवंधो भवादेसेणं जहन्नेणं तिन्नि भवग्गहणाइं उक्कोसेणं सत्त भवग्ग-
 हणाइं, कालादेसेणं जहन्नेणं अट्टारस सागरोवमाइं दोहिं वासपुहुत्तेहिं अब्भहियाइं
 उक्कोसेणं सत्तावन्नं सागरोवमाइं चउहिं पुव्वकोडीहिं अब्भहियाइं एवइयं०, एवं
 सेसावि अट्ट गमगा भाणियव्वा नवरं ठिई संवेहं च जाणेज्जा, सेसं तहेव ९ ॥
 एवं जाव अच्चयदेवा, नवरं ठिई संवेहं च जाणेज्जा ९ ॥ चउसुवि संघयणा तिन्नि

आणयाईसु । गेवेज्जगदेवा णं भंते ! कओहिंतो उववज्जंति० एस चेव वत्तव्वया नवरं दो संघयणा, ठिइं संवेहं च जाणेज्जा । विजयवेज्जयंतजयंतअपराजियदेवा णं भंते ! कओहिंतो उववज्जंति० एस चेव वत्तव्वया निरवसेसा जाव अणुबंधोत्ति, नवरं पढमं संघयणं, सेसं तहेव, भवादेसेणं जह्णेणं तिन्नि भवग्गहणाइं उक्कोसेणं पंच भवग्गहणाइं, कालादेसेणं जह्णेणं एक्कतीसं सागरोवमाइं दोहिं वासपुहुत्तेहिं अब्भहियाइं उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं एवइयं०, एवं सेसावि अट्ठ गमगा भाणियव्वा, नवरं ठिइं संवेहं च जाणेज्जा, मणूसे लद्धी णवसुवि गमएसु जहा गेवेज्जेसु उववज्जमाणस्स नवरं पढमं संघयणं । सव्वट्ठसिद्धगदेवा णं भंते ! कओहिंतो उववज्जंति० उववाओ जहेव विजयाईणं जाव से णं भंते ! केवइयकालट्ठिइंएसु उववज्जेज्जा ? गोयमा ! जह्णेणं तेत्तीसं सागरोवमट्ठिइंएसु उक्कोसेणवि तेत्तीसं सागरोवमट्ठिइंएसु उववज्जेज्जा, अवसेसा जहा विजयाईसु उववज्जंताणं नवरं भवादेसेणं तिन्नि भवग्गहणाइं, कालादेसेणं जह्णेणं तेत्तीसं सागरोवमाइं दोहिं वासपुहुत्तेहिं अब्भहियाइं उक्कोसेणवि तेत्तीसं सागरोवमाइं दोहिं पुव्वकोडीहिं अब्भहियाइं एवइयं० ९ ॥ सो चेव अप्पणा जहन्नकालट्ठिइंओ जाओ एस चेव वत्तव्वया नवरं ओगाहणाठिइंओ रयणिपुहुत्तवासपुहुत्ताणि सेसं तहेव संवेहं च जाणेज्जा ९ ॥ सो चेव अप्पणा उक्कोसकालट्ठिइंओ जाओ एस चेव वत्तव्वया नवरं ओगाहणा जह्णेणं पंच धणुहसयाइं उक्कोसेणवि पंचवणुहसयाइं, ठिइं जह्णेणं पुव्वकोडी उक्कोसेणवि पुव्वकोडी, सेसं तहेव जाव भवादेसोत्ति, कालादेसेणं जह्णेणं तेत्तीसं सागरोवमाइं दोहिं पुव्वकोडीहिं अब्भहियाइं उक्कोसेणवि तेत्तीसं सागरोवमाइं दोहिं पुव्वकोडीहिं अब्भहियाइं एवइयं कालं सेवेज्जा एवइयं कालं गइरागइं करेज्जा, एए तिन्नि गमगा सव्वट्ठसिद्धगदेवाणं । सेवं भंते ! २ ति भगवं गोयमे जाव विहरइ ॥७१४॥ चउवीसइमस्स सयस्स चउवीसइमो उद्देसो समत्तो ॥ चउवीसइमं सयं समत्तं ॥

लेस्सा य १ दव्व २ संठाण ३ जुम्म ४ पज्जव ५ नियंठ ६ समणा य ७ ओहे ८ भविआ ९ भविए १० सम्मा ११ मिच्छे य १२ उद्देसा ॥१॥ तेणं कालेणं तेणं समएणं रायगिहे जाव एवं वयासी-कइ णं भंते ! लेस्साओ प०? गोयमा । छल्लेस्साओ प०, तं०-कण्हलेस्सा जहा पढमसए विइए उद्देसए तहेव लेस्साविभागो अप्पावहुगं च जाव चउव्विहाणं देवाणं चउव्विहाणं देवीणं मीसगं अप्पावहुगंति ॥ ७१५ ॥ कइविहा णं भंते ! संसारसमावन्नगा जीवा पन्नत्ता ? गोयमा । चउइसविहा संसारसमावन्नगा जीवा प०, तं०-सुहुमअपज्जत्तगा १, सुहुमपज्जत्तगा २, बायरअपज्जत्तगा ३, बायरपज्जत्तगा ४, बेइंदिया अपज्जत्तगा ५, बेइंदिया पज्जत्तगा ६, एवं तेई-

दिया ८, एवं चउरिंदिया १०, असन्निपंचिंदिया अपजत्तगा ११, असन्निपंचिंदिया पजत्तगा १२, सन्निपंचिंदिया अपजत्तगा १३, सन्निपंचिंदिया पजत्तगा १४। एएसि णं भंते ! चउहसविहाणं संसारसमावन्नगाणं जीवाणं जहन्नुक्कोसगस्स जोगस्स कयरे २ जाव विसेसाहिया वा ? गोयमा ! सव्वत्थोवे सुहुमस्स अपजत्तगस्स जहन्नाए जोए १, वायरस्स अपजत्तगस्स जहन्नाए जोए असंखेज्जगुणे २, वेइंदियस्स अपजत्तगस्स जहन्नाए जोए असंखेज्जगुणे ३, एवं तेइंदियस्स ४, एवं चउरिंदियस्स ५, असन्निपंचिंदियस्स अपजत्तगस्स जहन्नाए जोए असंखेज्जगुणे ६, सन्निपंचिंदियस्स अपजत्तगस्स जहन्नाए जोए असंखेज्जगुणे ७, सुहुमस्स पजत्तगस्स जहन्नाए जोए असंखेज्जगुणे ८, वायरस्स पजत्तगस्स जहन्नाए जोए असंखेज्जगुणे ९, सुहुमस्स अपजत्तगस्स उक्कोसए जोए असंखेज्जगुणे १०, वायरस्स अपजत्तगस्स उक्कोसए जोए असंखेज्जगुणे ११, सुहुमस्स पजत्तगस्स उक्कोसए जोए असंखेज्जगुणे १२, वायरस्स पजत्तगस्स उक्कोसए जोए असंखेज्जगुणे १३, वेइंदियस्स पजत्तगस्स जहन्नाए जोए असंखेज्जगुणे १४, एवं तेइंदियस्सवि १५, एवं जाव सन्निपंचिंदियस्स पजत्तगस्स जहन्नाए जोए असंखेज्जगुणे १८, वेइंदियस्स अपजत्तगस्स उक्कोसए जोए असंखेज्जगुणे १९, एवं तेइंदियस्सवि २०, एवं चउरिंदियस्सवि २१, एवं जाव सन्निपंचिंदियस्स अपजत्तगस्स उक्कोसए जोए असंखेज्जगुणे २३, वेइंदियस्स पजत्तगस्स उक्कोसए जोए असंखेज्जगुणे २४, एवं तेइंदियस्सवि पजत्तगस्स उक्कोसए जोए असंखेज्जगुणे २५, चउरिंदियस्स पजत्तगस्स उक्कोसए जोए असंखेज्जगुणे २६, असन्निपंचिंदियपजत्तगस्स उक्कोसए जोए असंखेज्जगुणे २७, एवं सन्निपंचिंदियस्स पजत्तगस्स उक्कोसए जोए असंखेज्जगुणे ॥ २८ ॥ ७१६ ॥ दो भंते ! नेरइया पढमसमयोववन्नगा किं समजोगी किं विसमजोगी ? गोयमा ! सिय समजोगी सिय विसमजोगी, से केणट्ठेणं भंते ! एवं वुच्चइ सिय समजोगी सिय विसमजोगी ? गोयमा ! आहारयाओ वा से अणाहारए अणाहारयाओ वा से आहारए सिय हीणे सिय तुल्ले सिय अव्वहिए, जइ हीणे असंखेज्जइभागहीणे वा संखेज्जइभागहीणे वा संखेज्जगुणहीणे वा असंखेज्जगुणहीणे वा, अहं अव्वहिए असंखेज्जइभागमव्वहिए वा संखेज्जइभागमव्वहिए वा संखेज्जगुणमव्वहिए वा असंखेज्जगुणमव्वहिए वा, से तेणट्ठेणं जाव सिय समजोगी सिय विसमजोगी, एवं जाव वेमाणियानं ॥ ७१७ ॥ कइविहे णं भंते ! जोए प० ? गोयमा ! पन्नरसविहे जोए प०, तं०-सच्चमणजोए मोसमणजोए सच्चामोसमणजोए असच्चामोसमणजोए सच्चवइजोए मोसवइजोए सच्चामोसवइजोए असच्चामोसवइजोए ओरालियसरीरकायजोए ओरालि-

यमीसासरीरकायजोए वेडव्वियसरीरकायजोए वेडव्वियमीसासरीरकायजोए आहार-
गसरीरकायजोए आहारगमीसासरीरकायजोए कम्मसरीरकायजोए १५ ॥ एयस्स णं
भंते ! पन्नरसविहस्स जहन्नुक्कोसगस्स कयरे २ जाव विसेसाहिया वा ? गोयमा ! सव्व-
त्थोवे कम्मगसरीरस्स जहन्नाए जोए १, ओरालियमीसगस्स जहन्नाए जोए असंखेज्ज-
गुणे २, वेडव्वियमीसगस्स जहन्नाए जोए असंखेज्जगुणे ३, ओरालियसरीरस्स जहन्नाए
जोए असंखेज्जगुणे ४, वेडव्वियसरीरस्स जहन्नाए जोए असंखेज्जगुणे ५, कम्मगसरीरस्स
उक्कोसए जोए असंखेज्जगुणे ६, आहारगमीसगस्स जहन्नाए जोए असंखेज्जगुणे ७,
आहारगमीसगस्स उक्कोसए जोए असंखेज्जगुणे ८, ओरालियमीसगस्स वेडव्वियमी-
सगस्स एएत्ति णं उक्कोसए जोए दोण्हवि तुल्ले असंखेज्जगुणे ९-१०, असच्चासोसमण-
जोगस्स जहन्नाए जोए असंखेज्जगुणे ११, आहारगसरीरस्स जहन्नाए जोए असंखेज्ज-
गुणे १२, तिविहस्स मणजोगस्स चडव्विहस्स वड्ढजोगस्स एएसि णं सत्तण्हवि तुल्ले
जहन्नाए जोए असंखेज्जगुणे १९, आहारगसरीरस्स उक्कोसए जोए असंखेज्जगुणे २०,
ओरालियसरीरस्स वेडव्वियसरीरस्स चडव्विहस्स य मणजोगस्स चडव्विहस्स य
वड्ढजोगस्स एएसि णं दसण्हवि तुल्ले उक्कोसए जोए असंखेज्जगुणे ३०, सेवं भंते ! २
त्ति ॥ ७१८ ॥ पणवीसइमस्स सयस्स पढमो उद्देसो समत्तो ॥

कइविहा णं भंते ! दव्वा पज्जत्ता ? गोयमा ! दुविहा दव्वा प०, तं०-जीवदव्वा
य अजीवदव्वा य, अजीवदव्वा णं भंते ! कइविहा प० ? गोयमा ! दुविहा प०,
तंजहा-रुविअजीवदव्वा य अरुविअजीवदव्वा य, एवं एएणं अभिलावेणं जहा
अजीवपज्जवा जाव से तेणट्ठेणं गोयमा ! एवं वुच्चइ ते णं नो संखेज्जा नो असंखेज्जा
अणंता । जीवदव्वा णं भंते ! किं संखेज्जा असंखेज्जा अणंता ? गोयमा ! नो संखेज्जा
नो असंखेज्जा अणंता, से केणट्ठेणं भंते ! एवं वुच्चइ जीवदव्वा णं नो संखेज्जा नो
असंखेज्जा अणंता ? गोयमा ! असंखेज्जा नेरइया जाव असंखेज्जा वाउक्काइया, वणस्स-
इकाइया अणंता, असंखेज्जा वेइंदिया एवं जाव वेमाणिया, अणंता सिद्धा, से तेणट्ठेणं
जाव अणंता ॥ ७१९ ॥ जीवदव्वाणं भंते ! अजीवदव्वा परिभोगत्ताए हव्वमागच्छंति
अजीवदव्वाणं जीवदव्वा परिभोगत्ताए हव्वमागच्छंति ? गोयमा ! जीवदव्वाणं
अजीवदव्वा परिभोगत्ताए हव्वमागच्छंति नो अजीवदव्वाणं जीवदव्वा परिभोगत्ताए
हव्वमागच्छंति, से केणट्ठेणं भंते ! एवं वुच्चइ जाव हव्वमागच्छंति ? गोयमा ! जीव-
दव्वा णं अजीवदव्वे परियादियंति अजीव० २ ता ओरालियं वेडव्वियं आहारगं तेयगं
कम्मगं सोइंदियं जाव फासिंदियं मणजोगं वड्ढजोगं कायजोगं आणापाणुत्तं च निव्व-
(त्त)त्तियंति, से तेणट्ठेणं जाव हव्वमागच्छंति, नेरइयाणं भंते ! अजीवदव्वा परिभोग-

त्ताए हव्वमागच्छंति अजीवदव्वाणं नेरइया परिभोगत्ताए हव्वमागच्छंति ? गोयमा ! नेरइयाणं अजीवदव्वा परिभोगत्ताए हव्वमागच्छंति नो अजीवदव्वाणं नेरइया जाव हव्वमागच्छंति, से केणट्ठेणं ० ? गोयमा ! नेरइया णं अजीवदव्वे परियादियंति अ० २ त्ता वेउव्वियं तेयगं कम्मगं सोइंदियं जाव फासिंदियं आणापाणुत्तं च निव्वत्तियंति, से तेणट्ठेणं गोयमा ! एवं वुच्चइ०, एवं जाव वेमाणिया नवरं सरीरइंदियजोगा भाणियव्वा जस्स जे अत्थि ॥ ७२० ॥ से नूणं भंते ! असंखेजे लोए अणंताइं दव्वाइं आगासे भइयव्वाइं ? हंता गोयमा ! असंखेजे लोए जाव भइयव्वाइं ॥ लोगस्स णं भंते ! एगंमि आगासपएसे कइदिसिं पोग्गला चिज्जंति ? गोयमा ! निव्वाघाएणं छद्दिसिं वाघायं पडुच्च सिय तिदिसिं सिय चउदिसिं सिय पंचदिसिं, लोगस्स णं भंते ! एगंमि आगासपएसे कइदिसिं पोग्गला छिज्जंति ? एवं चेव, एवं उवचिज्जंति एवं अवचिज्जंति ॥ ७२१ ॥ जीवे णं भंते ! जाइं दव्वाइं ओरालियसरीरत्ताए गेण्हइ ताइं कि ठियाइं गेण्हइ अठियाइं गेण्हइ ? गोयमा ! ठियाइंपि गेण्हइ अठियाइंपि गेण्हइ, ताइं भंते ! कि दव्वओ गेण्हइ खेत्तओ गेण्हइ कालओ गेण्हइ भावओ गेण्हइ ? गोयमा ! दव्वओवि गेण्हइ खेत्तओवि गेण्हइ कालओवि गेण्हइ भावओवि गेण्हइ, ताइं दव्वओ अणंतपएसियाइं दव्वाइं खेत्तओ असंखेजपएसोगा-डाइं एवं जहा पन्नवणाए पढमे आहारुद्देसए जाव निव्वाघाएणं छद्दिसिं वाघायं पडुच्च सिय तिदिसिं सिय चउदिसिं सिय पंचदिसिं ॥ जीवे णं भंते ! जाइं दव्वाइं वेउ-व्वियसरीरत्ताए गेण्हइ ताइं कि ठियाइं गेण्हइ अठियाइं गेण्हइ ? एवं चेव नवरं नियमं छद्दिसि, एवं आहारगसरीरत्ताएवि ॥ जीवे णं भंते ! जाइं दव्वाइं तेयग-सरीरत्ताए गिण्हइ पुच्छा, गोयमा ! ठियाइं गेण्हइ नो अठियाइं गेण्हइ सेसं जहा ओरालियसरीरस्स कम्मगसरीरे एवं चेव एवं जाव भावओवि गेण्हइ, जाइं दव्वाइं दव्वओ गेण्हइ ताइं कि एगपएसियाइं गेण्हइ दुपएसियाइं गेण्हइ ? एवं जहा भासापए जाव आणुपुव्वि गेण्हइ नो अणाणुपुव्वि गेण्हइ, ताइं भंते ! कइदिसिं गेण्हइ ? गोयमा ! निव्वाघाएणं जहा ओरालियस्स ॥ जीवे णं भंते ! जाइं दव्वाइं सोइंदियत्ताए गेण्हइ जहा वेउव्वियसरीरं एवं जाव जिर्विभदियत्ताए फासिंदियत्ताए जहा ओरालियसरीरं मणजोगत्ताए जहा कम्मगसरीरं नवरं नियमं छद्दिसिं एवं वइजोगत्ताएवि कायजोगत्ताएवि जहा ओरालियसरीरस्स । जीवे णं भंते ! जाइं दव्वाइं आणापाणुत्ताए गेण्हइ जहेव ओरालियसरीरत्ताए जाव सिय पंचदिसिं । सेवं भंते ! २ त्ति । केइ चउवीसदंडएणं एयाणि पयाणि भन्नंति जस्स जं अत्थि ॥ ७२२ ॥ पणवीसइमस्स सयस्स वीओ उद्देसो समत्तो ॥

कइ णं भंते ! संठाणा प० ? गोयमा ! छ संठाणा प०, तं०-परिमंडले वट्टे तंसे चउ-
रंसे आयए अणित्थंथे, परिमंडला णं भंते ! संठाणा दव्वट्टयाए किं संखेज्जा असंखेज्जा
अणंता ? गोयमा ! नो संखेज्जा नो असंखेज्जा अणंता, वट्टा णं भंते ! संठाणा० एवं चेव,
एवं जाव अणित्थंथा, एवं पएसट्टयाएवि, एवं दव्वट्टपएसट्टयाएवि, एएसि णं भंते !
परिमंडलवट्टतंसचउरंसआययअणित्थंथाणं संठाणाणं दव्वट्टयाए पएसट्टयाए दव्वट्ट-
पएसट्टयाए कयरे २ हिंतो जाव विसेसाहिया वा ? गोयमा ! सव्वत्थोवा परिमंडला
संठाणा दव्वट्टयाए, वट्टा संठाणा दव्वट्टयाए संखेज्जगुणा, चउरंसा संठाणा दव्वट्टयाए
संखेज्जगुणा, तंसा संठाणा दव्वट्टयाए संखेज्जगुणा, आययसंठाणा दव्वट्टयाए संखेज्ज-
गुणा, अणित्थंथा संठाणा दव्वट्टयाए असंखेज्जगुणा, पएसट्टयाए-सव्वत्थोवा परि-
मंडला संठाणा पएसट्टयाए, वट्टा संठाणा पएसट्टयाए संखेज्जगुणा, जहा दव्वट्टयाए
तहा पएसट्टयाएवि जाव अणित्थंथा संठाणा पएसट्टयाए असंखेज्जगुणा, दव्वट्टपएस-
ट्टयाए सव्वत्थोवा परिमंडला संठाणा दव्वट्टयाए सो चेव गमओ भाणियव्वो जाव
अणित्थंथा संठाणा दव्वट्टयाए असंखेज्जगुणा, अणित्थंथेहिंतो संठाणेहिंतो दव्वट्टयाए
(हिंतो) परिमंडला संठाणा पएसट्टयाए असंखेज्जगुणा, वट्टा संठाणा पएसट्टयाए
संखेज्जगुणा, सो चेव पएसट्टयाए गमओ भाणियव्वो जाव अणित्थंथा संठाणा पएस-
ट्टयाए असंखेज्जगुणा ॥७२३॥ कइ णं भंते ! संठाणा पन्नत्ता ? गोयमा ! पंच संठाणा
प०, तं०-परिमंडले जाव आयए । परिमंडला णं भंते ! संठाणा किं संखेज्जा असंखेज्जा
अणंता ? गोयमा ! नो संखेज्जा नो असंखेज्जा अणंता, वट्टा णं भंते ! संठाणा किं
संखेज्जा० ? एवं चेव, एवं जाव आयया । इमीसे णं भंते ! रयणप्पभाए पुढवीए परि-
मंडला संठाणा किं संखेज्जा असंखेज्जा अणंता ? गोयमा ! नो संखेज्जा नो असंखेज्जा
अणंता, वट्टा णं भंते ! संठाणा किं संखेज्जा असंखेज्जा० ? एवं चेव, एवं जाव आयया ।
सक्करप्पभाए णं भंते ! पुढवीए परिमंडला संठाणा एवं चेव, एवं जाव आयया,
एवं जाव अहेसत्तमाए । सोहम्मो णं भंते ! कप्पे परिमंडला संठाणा एवं चेव, एवं जाव
अञ्जुए, गेवेज्जगविमाणणं भंते ! परिमंडलसंठाणा एवं चेव, एवं अणुत्तरविमाणेसुवि, एवं
ईसिप्पव्वभाराएवि ॥ जत्थ णं भंते ! एगे परिमंडले संठाणे जवमज्झे तत्थ परिमंडला
संठाणा किं संखेज्जा असंखेज्जा अणंता ? गोयमा ! नो संखेज्जा नो असंखेज्जा अणंता ।
वट्टा णं भंते ! संठाणा किं संखेज्जा असंखेज्जा अणंता ? एवं चेव, एवं जाव
आयया । जत्थ णं भंते ! एगे वट्टे संठाणे जवमज्झे तत्थ परिमंडला संठाणा एवं चेव,
वट्टा संठाणा एवं चेव, एवं जाव आयया, एवं एक्केक्केणं संठाणेणं पंचवि चारेयव्वा,
जत्थ णं भंते ! इमीसे रयणप्पभाए पुढवीए एगे परिमंडले संठाणे जवमज्झे तत्थ

णं परिमंडलसंठाणा किं संखेज्जा० पुच्छा, गोयमा ! नो संखेज्जा नो असंखेज्जा
अणंता, वट्ठा णं भंते ! संठाणा किं संखेज्जा० पुच्छा, गोयमा ! नो संखेज्जा नो
असंखेज्जा अणंता, एवं (चेव) जाव आयया, जत्थ णं भंते ! इमीसे रयणप्पभाए
पुढवीए एगे वट्ठे संठाणे जवमज्जे तत्थ णं परिमंडला संठाणा किं संखेज्जा० पुच्छा,
गोयमा ! नो संखेज्जा नो असंखेज्जा अणंता, वट्ठा संठाणा एवं चेव, एवं जाव
आयया, एवं पुणरवि एक्केक्केणं संठाणेणं पंचवि चारेयव्वा जहेव हेट्ठिआ जाव
आय(ए)याणं, एवं जाव अहेसत्तमाए, एवं कप्पेसुवि जाव ईसिप्पव्भाराए पुढवीए
॥ ७२४ ॥ वट्ठे णं भंते ! संठाणे कइपएसिए कइपएसोगाढे प० ? गोयमा ! वट्ठे
संठाणे दुविहे प०, तं०-घणवट्ठे य पयरवट्ठे य, तत्थ णं जे से पयरवट्ठे से दुविहे प०,
तं०-ओयपएसिए य जुम्मपएसिए य, तत्थ णं जे से ओयपएसिए पयरवट्ठे से जहन्नेणं
पंचपएसिए पंचपएसोगाढे उक्कोसेणं अणंतपएसिए असंखेज्जपएसोगाढे, तत्थ णं जे
से जुम्मपएसिए से जहन्नेणं वारसपएसिए वारसपएसोगाढे उक्कोसेणं अणंतपएसिए
असंखेज्जपएसोगाढे, तत्थ णं जे से घणवट्ठे से दुविहे प०, तं०-ओयपएसिए य जुम्म-
पएसिए य, तत्थ णं जे से ओयपएसिए से जहन्नेणं सत्तपएसिए सत्तपएसोगाढे प०,
उक्कोसेणं अणंतपएसिए असंखेज्जपएसोगाढे प०, तत्थ णं जे से जुम्मपएसिए से
जहन्नेणं वत्तीसपएसिए वत्तीसपएसोगाढे प०, उक्कोसेणं अणंतपएसिए असंखेज्जप-
एसोगाढे प० ॥ तंसे णं भंते ! संठाणे कइपएसिए कइपएसोगाढे प० ? गोयमा ! तंसे
णं संठाणे दुविहे प०, तं०-घणतंसे य पयरतंसे य, तत्थ णं जे से पयरतंसे से
दुविहे प०, तं०-ओयपएसिए य जुम्मपएसिए य, तत्थ णं जे से ओयपएसिए से जह-
न्नेणं तिपएसिए तिपएसोगाढे प०, उक्कोसेणं अणंतपएसिए असंखेज्जपएसोगाढे प०,
तत्थ णं जे से जुम्मपएसिए से जहन्नेणं छप्पएसिए छप्पएसोगाढे प०, उक्कोसेणं
अणंतपएसिए असंखेज्जपएसोगाढे प०, तत्थ णं जे से घणतंसे से दुविहे प०,
तं०-ओयपएसिए य जुम्मपएसिए य, तत्थ णं जे से ओयपएसिए से जहन्नेणं पण-
तीसपएसिए पणतीसपएसोगाढे प०, उक्कोसेणं अणंतपएसिए तं चेव, तत्थ णं जे से
जुम्मपएसिए से जहन्नेणं चउप्पएसिए चउप्पएसोगाढे प०, उक्कोसेणं अणंतपएसिए
तं चेव ॥ चउरंसे णं भंते ! संठाणे कइपएसिए पुच्छा, गोयमा ! चउरंसे संठाणे
दुविहे प०, भेदो जहेव वट्ठस्स जाव तत्थ णं जे से ओयपएसिए से जहन्नेणं
नवपएसिए नवपएसोगाढे प०, उक्कोसेणं अणंतपएसिए असंखेज्जपएसोगाढे प०,
तत्थ णं जे से जुम्मपएसिए से जहन्नेणं चउप्पएसिए चउप्पएसोगाढे प०, उक्कोसेणं
अणंतपएसिए तं चेव, तत्थ णं जे से घणचउरंसे से दुविहे प०, तंजहा-ओयपएसिए

य जुम्मपएसिए य, तत्थ णं जे से ओयपएसिए से जहन्नेणं सत्तावीसइपएसिए सत्ता-
 वीसइपएसोगाढे उक्कोसेणं अणंतपएसिए तहेव, तत्थ णं जे से जुम्मपएसिए से जह-
 न्नेणं अट्ठपएसिए अट्ठपएसोगाढे प०, उक्कोसेणं अणंतपएसिए तहेव ॥ आयए णं
 भंते ! संठाणे कइपएसिए कइपएसोगाढे प० ? गोयमा ! आयए णं संठाणे तिविहे
 प०, तं०-सेढिआयए पयरायए घणायए, तत्थ णं जे से सेढिआयए से दुविहे प०,
 तं०-ओयपएसिए य जुम्मपएसिए य, तत्थ णं जेसे ओयपएसिए से जहण्णेणं तिप-
 एसिए तिपएसोगाढे उक्कोसेणं अणंतपएसिए तं चेव, तत्थ णं जे से जुम्मपएसिए से
 जहण्णेणं दुपएसिए दुपएसोगाढे उक्कोसेणं अणंतपएसिए तं चेव, तत्थ णं जे से पयरा-
 यए से दुविहे प०, तं०-ओयपएसिए य जुम्मपएसिए य, तत्थ णं जे से ओयपएसिए
 से जहन्नेणं पन्नरसपएसिए पन्नरसपएसोगाढे उक्कोसेणं अणंत० तहेव, तत्थ णं जे से
 जुम्मपएसिए से जहन्नेणं छप्पएसिए छप्पएसोगाढे उक्कोसेणं अणंत० तहेव, तत्थ णं
 जे से घणायए से दुविहे प०, तं०-ओयपएसिए य जुम्मपएसिए य, तत्थ णं जे से
 ओयपएसिए से जहन्नेणं पणयालीसपएसिए पणयालीसपएसोगाढे प०, उक्कोसेणं अणं-
 त० तहेव, तत्थ णं जे से जुम्मपएसिए से जहण्णेण बारसपएसिए बारसपएसोगाढे
 प०, उक्कोसेणं अणंत० तहेव ॥ परिमंडले णं भंते ! संठाणे कइपएसिए० पुच्छा,
 गोयमा ! परिमंडले णं संठाणे दुविहे प०, तं०-घणपरिमंडले य पयरपरिमंडले य,
 तत्थ णं जे से पयरपरिमंडले से जहन्नेणं वीसइपएसिए वीसइपएसोगाढे उक्कोसेणं
 अणंतपएसिए तहेव, तत्थ णं जे से घणपरिमंडले से जहन्नेणं चत्तालीसपएसिए
 चत्तालीसपएसोगाढे प०, उक्कोसेणं अणंतपएसिए असंखेज्जपएसोगाढे पन्नते
 ॥ ७२५ ॥ परिमंडले णं भंते ! संठाणे दव्वट्ठयाए किं कडजुम्मे तेओए दावर-
 जुम्मे कलिओए ? गोयमा ! नो कडजुम्मे णो तेओए णो दावरजुम्मे कलिओए,
 वट्ठे णं भंते ! संठाणे दव्वट्ठयाए एवं चेव, एवं जाव आयए ॥ परिमंडला णं भंते !
 संठाणा दव्वट्ठयाए किं कडजुम्मा तेओगा दावरजुम्मा कलिओगा पुच्छा, गोयमा !
 ओघादेसेणं सिय कडजुम्मा सिय तेओगा सिय दावरजुम्मा सिय कलिओगा,
 विहाणादेसेणं नो कडजुम्मा नो तेओगा नो दावरजुम्मा कलिओगा, एवं जाव
 आयया ॥ परिमंडले णं भंते ! संठाणे पएसट्ठयाए किं कडजुम्मे० पुच्छा,
 गोयमा ! सिय कडजुम्मे सिय तेओगे सिय दावरजुम्मे सिय कलिओगे, एवं जाव
 आयए, परिमंडला णं भंते ! संठाणा पएसट्ठयाए किं कडजुम्मा० पुच्छा, गोयमा !
 ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि
 तेओगावि दावरजुम्मावि कलिओगावि, एवं जाव आयया ॥ परिमंडले णं

भंते ! संठाणे किं कडजुम्मपएसोगाडे जाव कलिओगपएसोगाडे ? गोयमा ! कड-
जुम्मपएसोगाडे णो तेओगपएसोगाडे नो दावरजुम्मपएसोगाडे नो कलिओगपए-
सोगाडे ॥ वट्ठे णं भंते ! संठाणे किं कडजुम्म० पुच्छा, गोयमा ! सिय कडजुम्म-
पएसोगाडे सिय तेओगपएसोगाडे नो दावरजुम्मपएसोगाडे सिय कलिओगपएसो-
गाडे ॥ तंसे णं भंते ! संठाणे पुच्छा, गोयमा ! सिय कडजुम्मपएसोगाडे सिय
तेओगपएसोगाडे सिय दावरजुम्मपएसोगाडे नो कलिओगपएसोगाडे । चउरंसे णं
भंते ! संठाणे जहा वट्ठे तहा चउरंसेवि । आयए णं भंते ! पुच्छा, गोयमा ! सिय
कडजुम्मपएसोगाडे जाव सिय कलिओगपएसोगाडे । परिमंडला णं भंते ! संठाणा
किं कडजुम्मपएसोगाडा तेओगपएसोगाडा० पुच्छा, गोयमा ! ओघादेसेणवि विहा-
णादेसेणवि कडजुम्मपएसोगाडा णो तेओगपएसोगाडा नो दावरजुम्मपएसोगाडा
नो कलिओगपएसोगाडा । वट्ठा णं भंते ! संठाणा किं कडजुम्मपएसोगाडा० पुच्छा,
गोयमा ! ओघादेसेणं कडजुम्मपएसोगाडा नो तेओग० नो दावरजुम्म० नो कलि-
ओग०, विहाणादेसेणं कडजुम्मपएसोगाडावि तेओगपएसोगाडावि णो दावरजुम्म-
पएसोगाडा कलिओगपएसोगाडावि, तंसा णं भंते ! संठाणा किं कडजुम्मा० पुच्छा,
गोयमा ! ओघादेसेणं कडजुम्मपएसोगाडा नो तेओग० नो दावरजुम्म० नो कलि-
ओगपएसोगाडा, विहाणादेसेणं कडजुम्मपएसोगाडावि तेओगपएसोगाडावि (नो)
दावरजुम्मपएसोगाडा नो कलिओगपएसोगाडा । चउरंसा जहा वट्ठा, आयया णं
भंते ! संठाणा पुच्छा, गोयमा ! ओघादेसेणं कडजुम्मपएसोगाडा नो तेओगपए-
सोगाडा नो दावरजुम्मपएसोगाडा नो कलिओगपएसोगाडा, विहाणादेसेणं कड-
जुम्मपएसोगाडावि जाव कलिओगपएसोगाडावि ॥ परिमंडले णं भंते ! संठाणे किं
कडजुम्मसमयठिईए तेओगसमयठिईए दावरजुम्मसमयठिईए कलिओगसमयठि-
ईए ? गोयमा ! सिय कडजुम्मसमयठिईए जाव सिय कलिओगसमयठिईए, एवं जाव
आयए । परिमंडला णं भंते ! संठाणा किं कडजुम्मसमयठिईया० पुच्छा, गोयमा !
ओघादेसेणं सिय कडजुम्मसमयठिईया जाव सिय कलिओगसमयठिईया, विहाणादेसेणं
कडजुम्मसमयठिईयावि जाव कलिओगसमयठिईयावि, एवं जाव आयया ॥
परिमंडले णं भंते ! संठाणे कालवन्नपजवेहिं किं कडजुम्मे जाव कलिओगे ?
गोयमा ! सिय कडजुम्मे एवं एएणं अभिलावेणं जहेव ठिईए एवं नीलवन्नपजवेहिं,
एवं पंचहिं ववेहिं, दोहिं गंवेहिं, पंचहिं रसेहिं, अट्ठहिं फासेहिं जाव लुक्खफासपजवेहिं
॥ ७२६ ॥ सेढीओ णं भंते ! दच्चट्टयाए किं संखेजाओ असंखेजाओ अणंताओ ?
गोयमा ! नो संखेजाओ नो असंखेजाओ अणंताओ, पाइणपडीणाययाओ णं भंते !

सेढीओ दव्वट्टयाए किं संखेज्जाओ ३ एवं चेव, एवं दाहिणुत्तराययाओवि, एवं उड्डु-
महाययाओवि । लोगागाससेढीओ णं भंते ! दव्वट्टयाए किं संखेज्जाओ असंखेज्जाओ
अणंताओ ? गोयमा ! नो संखेज्जाओ असंखेज्जाओ नो अणंताओ, पाईणपडीणाय-
याओ णं भंते ! लोगागाससेढीओ दव्वट्टयाए किं संखेज्जाओ० एवं चेव, एवं
दाहिणुत्तराययाओवि, एवं उड्डुमहाययाओवि । अलोगागाससेढीओ णं भंते !
दव्वट्टयाए किं संखेज्जाओ असंखेज्जाओ अणंताओ ? गोयमा ! नो संखेज्जाओ नो
असंखेज्जाओ अणंताओ, एवं पाईणपडीणाययाओवि, एवं दाहिणुत्तराययाओवि, एवं
उड्डुमहाययाओवि । सेढीओ णं भंते ! पएसट्टयाए किं संखेज्जाओ० जहा दव्वट्टयाए
तहा पएसट्टयाएवि जाव उड्डुमहाययाओवि सव्वाओ अणंताओ । लोगागाससेढीओ
णं भंते ! पएसट्टयाए किं संखेज्जाओ० पुच्छा, गोयमा ! सिय संखेज्जाओ सिय असं-
खेज्जाओ नो अणंताओ, एवं पाईणपडीणाययाओवि, एवं दाहिणुत्तराययाओवि, एवं चेव
उड्डुमहाययाओवि नो संखेज्जाओ असंखेज्जाओ नो अणंताओ ॥ अलोगागाससेढीओ
णं भंते ! पएसट्टयाए पुच्छा, गोयमा ! सिय संखेज्जाओ सिय असंखेज्जाओ सिय
अणंताओ, पाईणपडीणाययाओ णं भंते ! अलोया० पुच्छा, गोयमा ! नो संखे-
ज्जाओ नो असंखेज्जाओ अणंताओ, एवं दाहिणुत्तराययाओवि, उड्डुमहाययाओ
पुच्छा, गोयमा ! सिय संखेज्जाओ सिय असंखेज्जाओ सिय अणंताओ ॥ ७२७ ॥
सेढीओ णं भंते ! किं साइयाओ सपज्जवसियाओ १, साइयाओ अपज्जवसियाओ २,
अणाइयाओ सपज्जवसियाओ ३, अणाइयाओ अपज्जवसियाओ ४ ? गोयमा ! नो
साइयाओ सपज्जवसियाओ, नो साइयाओ अपज्जवसियाओ, णो अणाइयाओ सपज्ज-
वसियाओ, अणाइयाओ अपज्जवसियाओ, एवं जाव उड्डुमहाययाओ, लोगागाससेढीओ
णं भंते ! किं साइयाओ सपज्जवसियाओ० पुच्छा, गोयमा ! साइयाओ सपज्जव-
सियाओ, नो साइयाओ अपज्जवसियाओ, नो अणाइयाओ सपज्जवसियाओ, नो अणा-
इयाओ अपज्जवसियाओ, एवं जाव उड्डुमहाययाओ । अलोगागाससेढीओ णं भंते !
किं साइयाओ सपज्जवसियाओ० पुच्छा, गोयमा ! सिय साइयाओ सपज्जवसियाओ
१, सिय साइयाओ अपज्जवसियाओ २, सिय अणाइयाओ सपज्जवसियाओ ३, सिय
अणाइयाओ अपज्जवसियाओ ४, पाईणपडीणाययाओ दाहिणुत्तराययाओ य एवं
चेव, नवरं नो साइयाओ सपज्जवसियाओ सिय साइयाओ अपज्जवसियाओ सेसं तं
चेव, उड्डुमहाययाओ जहा ओहियाओ तहेव चउभंगो । सेढीओ णं भंते ! दव्वट्ट-
याए किं कडजुम्माओ तेओयाओ० पुच्छा, गोयमा ! कडजुम्माओ नो तेओगाओ
नो दावरजुम्माओ नो कलिओगाओ, एवं जाव उड्डुमहाययाओ, लोगागाससेढीओ

एवं चेव, एवं अलोगागाससेढीओवि । सेढीओ णं भंते । पएसट्ठयाए किं कडजुम्माओ० पुच्छा, एवं चेव, एवं जाव उड्डमहाययाओ । लोगागाससेढीओ णं भंते । पएसट्ठयाए पुच्छा, गोयमा ! सिय कडजुम्माओ नो तेओगाओ सिय दावरजुम्माओ नो कलिओगाओ, एवं पाईणपडीगाययाओवि दाहिणुत्तराययाओवि, उड्डमहाययाओ णं पुच्छा, गोयमा ! कडजुम्माओ नो तेओगाओ नो दावरजुम्माओ नो कलिओगाओ । अलोगागाससेढीओ णं भंते । पएसट्ठयाए पुच्छा, गोयमा ! सिय कडजुम्माओ जाव सिय कलिओगाओ, एवं पाईणपडीगाययाओवि, एवं दाहिणुत्तराययाओवि, उड्डमहाययाओवि एवं चेव, नवरं नो कलिओगाओ सेसं तं चेव ॥ ७२८ ॥ कइ णं भंते ! सेढीओ प० ? गोयमा ! सत्त सेढीओ पन्नत्ताओ, तंजहा-उज्जुआयया एगओवंका दुहओवंका एगओखहा दुहओखहा चक्कवाला अद्धचक्कवाला ॥ परमाणु-पोरगलाणं भंते ! किं अणुसेढिं(ढी) गई पवत्तइ विसेढिं गई पवत्तइ ? गोयमा ! अणु-सेढिं गई पवत्तइ नो विसेढिं गई पवत्तइ । दुपएसियाणं भंते ! खंघाणं अणुसेढिं गई पवत्तइ विसेढिं गई पवत्तइ ? एवं चेव, एवं जाव अणंतपएसियाणं खंघाणं । नेरइयाणं भंते ! किं अणुसेढिं गई पवत्तइ विसेढिं गई पवत्तइ ? एवं चेव, एवं जाव वेमाणियाणं ॥ ७२९ ॥ इमीसे णं भंते ! रयणप्पमाए पुडवीए केवइया निरयावाससयसहस्सा प० ? गोयमा ! तीसं निरयावाससयसहस्सा प०, एवं जहा पढमसए पंचमुइसए जाव अणुत्तरविमाणत्ति ॥ ७३० ॥ कइविहे णं भंते ! गणिपिडए प० ? गोयमा ! दुवालसंगे गणिपिडए प०, तं०-आयारो जाव दिट्ठिवाओ, से किं तं आयारो ? आयारे णं समणाणं निर्गंथाणं आयारगोयर० एवं अंगपरुवणा भाणियव्वा जहा नंदीए जाव सुत्तथो खलु पढमो वीओ निजुत्तिमीसिओ भणिओ । तइओ य निर-चसेसो एस विही होइ अणुओगे ॥ १ ॥ ७३१ ॥ एएसि णं भंते ! नेरइयाणं जाव देवाणं सिद्धाणं य पंचगइसमासेणं कयरे २ हितो० पुच्छा, गोयमा ! अप्पावहुयं जहा बहुवत्तव्वयाए अट्ठगइसमासअप्पावहुगं च । एएसि णं भंते ! सइंदियाणं एणि-दियाणं जाव अणिदियाणं य कयरे० ? एयंपि जहा बहुवत्तव्वयाए तहेव ओहियं पयं भाणियव्वं, सकाइयअप्पावहुगं तहेव ओहियं भाणियव्वं ॥ एएसि णं भंते ! जीवाणं पोरगलाणं जाव सव्वपज्जवाणं य कयरे २ जाव बहुवत्तव्वयाए एएसि णं भंते ! जीवाणं आउयस्स कम्मस्स वंधगाणं अवंधगाणं जहा बहुवत्तव्वयाए जाव आउयस्स कम्मस्स अवंधगा विसेसाहिया । सेवं भंते ! सेवं भंते ! त्ति ॥ ७३२ ॥ पणवीसइमस्स सयस्स तइओ उहेसो समत्तो ॥

कइ णं भंते ! जुम्मा पन्नत्ता ? गोयमा ! चत्तारि जुम्मा प०, तं०-कडजुम्मे जाव

कलिओगे, से केणट्टेणं भंते ! एवं वुच्चइ चत्तारि जुम्मा प० कडजुम्मे जाव कलिओगे
 एवं जहा अट्टारसमसए चउत्थे उद्देसए तहेव जाव से तेणट्टेणं गोयमा ! एवं वुच्चइ ।
 नेरइयाणं भंते ! कइ जुम्मा प० ? गोयमा ! चत्तारि जुम्मा प०, तंजहा-कडजुम्मे जाव
 कलिओगे, से केणट्टेणं भंते ! एवं वुच्चइ नेरइयाणं चत्तारि जुम्मा प०, तं०-कडजुम्मे
 अट्टो तहेव, एवं जाव वाउकाइयाणं, वणस्सइकाइयाणं पुच्छा, गोयमा ! वणस्स-
 इकाइया सिय कडजुम्मा सिय तेओया सिय दावरजुम्मा सिय कलिओया, से केणट्टेणं
 भंते ! एवं वुच्चइ वणस्सइकाइया जाव कलिओगा ? गोयमा ! उववार्यं पडुच्च, से
 तेणट्टेणं तं चेव, वेइंदियाणं जहा नेरइयाणं, एवं जाव वेमाणियाणं, सिद्धाणं जहा
 वणस्सइकाइयाणं ॥ कइविहा णं भंते ! सव्वदव्वा प० ? गोयमा ! छव्विहा सव्वदव्वा
 प०, तंजहा-धम्मत्थिकाए अधम्मत्थिकाए जाव अट्टासमए । धम्मत्थिकाए णं भंते !
 दव्वट्ठयाए किं कडजुम्मे जाव कलिओगे ? गोयमा ! नो कडजुम्मे नो तेओगे नो
 दावरजुम्मे कलिओगे, एवं अहम्मत्थिकाएवि, एवं आगासत्थिकाएवि, जीवत्थिकाए
 णं भंते ! पुच्छा, गोयमा ! कडजुम्मे नो तेओए नो दावरजुम्मे नो कलिओए,
 पोगलत्थिकाए णं भंते ! पुच्छा, गोयमा ! सिय कडजुम्मे जाव सिय कलिओगे,
 अट्टासमए जहा जीवत्थिकाए ॥ धम्मत्थिकाए णं भंते ! पएसट्ठयाए किं कडजुम्मे०
 पुच्छा, गोयमा ! कडजुम्मे नो तेओए नो दावरजुम्मे नो कलिओए, एवं जाव
 अट्टासमए ॥ एएसि णं भंते ! धम्मत्थिकायअहम्मत्थिकाय जाव अट्टासमयाणं
 दव्वट्ठयाए० एएसि णं अप्पावहुगं जहा बहुवत्तव्वयाए तहेव निरवसेसं ॥ धम्म-
 त्थिकाए णं भंते ! कि ओगाढे अणोगाढे ? गोयमा ! ओगाढे नो अणोगाढे, जइ
 ओगाढे कि संखेज्जपएसोगाढे असंखेज्जपएसोगाढे अणंतपएसोगाढे ? गोयमा ! नो
 संखेज्जपएसोगाढे असंखेज्जपएसोगाढे नो अणंतपएसोगाढे, जइ असंखेज्जपएसोगाढे
 किं कडजुम्मपएसोगाढे० पुच्छा, गोयमा ! कडजुम्मपएसोगाढे नो तेओग० नो
 दावरजुम्म० नो कलिओगपएसोगाढे, एवं अहम्मत्थिकाएवि, एवं आगासत्थिकाएवि,
 जीवत्थिकाए पोगलत्थिकाए अट्टासमए एवं चेव ॥ इमा णं भंते ! रयणप्पभ
 पुढवी कि ओगाढा अणोगाढा जहेव धम्मत्थिकाए एवं जाव अहेसत्तमा, सोहम्मे
 एवं चेव, एवं जाव ईसिप्पभारापुढवी ॥ ७३३ ॥ जीवे णं भंते ! दव्वट्ठयाए कि
 कडजुम्मे० पुच्छा, गोयमा ! नो कडजुम्मे नो तेओगे नो दावरजुम्मे कलिओगे,
 एवं नेरइएवि, एवं जाव सिद्धे । जीवा णं भंते ! दव्वट्ठयाए कि कडजुम्मा० पुच्छा
 गोयमा ! ओघादेसेणं कडजुम्मा नो तेओगा नो दावरजुम्मा नो कलिओगा, विहाणा
 देसेणं नो कडजुम्मा नो तेओगा नो दावरजुम्मा कलिओगा, नेरइया णं भंते

द्व्वट्टयाए पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं णो कडजुम्मा णो तेओगा णो दावरजुम्मा कलिओगा, एवं जाव सिद्धा ॥ जीवे णं भंते ! पएसट्टयाए किं कडजुम्मे० पुच्छा, गोयमा ! जीवपएसे पडुच्च कडजुम्मे नो तेओगे नो दावरजुम्मे नो कलिओगे, सरीरपएसे पडुच्च सिय कडजुम्मे जाव सिय कलिओगे, एवं जाव वेमाणिए । सिद्धे णं भंते ! पएसट्टयाए किं कडजुम्मे० पुच्छा, गोयमा ! कडजुम्मे नो तेओगे नो दावरजुम्मे नो कलिओगे । जीवा णं भंते ! पएसट्टयाए किं कडजुम्मा० पुच्छा, गोयमा ! जीवपएसे पडुच्च ओघादेसेणवि विहाणादेसेणवि कडजुम्मा नो तेओगा नो दावरजुम्मा नो कलिओगा, सरीरपएसे पडुच्च ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि जाव कलिओगावि, एवं नेरइयावि, एवं जाव वेमाणिया । सिद्धा णं भंते ! पुच्छा, गोयमा ! ओघादेसेणवि विहाणादेसेणवि कडजुम्मा नो तेओगा नो दावरजुम्मा नो कलिओगा ॥ ७३४ ॥ जीवे णं भंते ! किं कडजुम्मपएसोगाडे० पुच्छा, गोयमा ! सिय कडजुम्मपएसोगाडे जाव सिय कलिओगपएसोगाडे, एवं जाव सिद्धे । जीवा णं भंते ! किं कडजुम्मपएसोगाडा० पुच्छा, गोयमा ! ओघादेसेणं कडजुम्मपएसोगाडा नो तेओग० नो दावर० नो कलिओगपएसोगाडा, विहाणादेसेणं कडजुम्मपएसोगाडावि जाव कलिओगपएसोगाडावि, नेरइया णं भंते ! पुच्छा, गोयमा ! ओघादेसेणं सिय कडजुम्मपएसोगाडा जाव सिय कलिओगपएसोगाडा, विहाणादेसेणं कडजुम्मपएसोगाडावि जाव कलिओगपएसोगाडावि, एवं एगिंदियसिद्धवज्जा (जाव वेमाणिया) सव्वेवि, सिद्धा एगिंदिया य जहा जीवा । जीवे णं भंते ! किं कडजुम्मसमयट्ठिईए० पुच्छा, गोयमा ! कडजुम्मसमयट्ठिईए नो तेओग० नो दावर० नो कलिओगसमयट्ठिईए । नेरइए णं भंते ! पुच्छा, गोयमा ! सिय कडजुम्मसमयट्ठिईए जाव सिय कलिओगसमयट्ठिईए, एवं जाव वेमाणिए, सिद्धे जहा जीवे । जीवा णं भंते ! पुच्छा, गोयमा ! ओघादेसेणवि विहाणादेसेणवि कडजुम्मसमयट्ठिईया नो तेओग० नो दावरजुम्म० नो कलिओगसमयट्ठिईया, नेरइयाणं पुच्छा, गोयमा ! ओघादेसेणं सिय कडजुम्मसमयट्ठिईया जाव सिय कलिओगसमयट्ठिईया, विहाणादेसेणं कडजुम्मसमयट्ठिईयावि जाव कलिओगसमयट्ठिईयावि, एवं जाव वेमाणिया, सिद्धा जहा जीवा ॥ ७३५ ॥ जीवे णं भंते ! कालवन्नपज्जवेहिं किं कडजुम्मे० पुच्छा, गोयमा ! जीवपएसे पडुच्च णो कडजुम्मे जाव णो कलिओगे, सरीरपएसे पडुच्च सिय कडजुम्मे जाव सिय कलिओगे, एवं जाव वेमाणिए, सिद्धो चेव न पुच्छजइ ।

जीवा णं भंते ! कालवन्नपज्जवेहिं० पुच्छा, गोयमा ! जीवपएसे पडुच्च ओघादेसेणवि विहाणादेसेणवि णो कडजुम्मा जाव णो कलिओगा, सरिरपएसे पडुच्च ओघादेसेण सिय कडजुम्मा जाव सिय कलिओगा, विहाणादेसेण कडजुम्मावि जाव कलिओगावि, एवं जाव वेमाणिया, एवं नीलवन्नपज्जवेहिं दंडओ भाणियव्वो एगत्तपुहत्तेणं एवं जाव लुक्खफासपज्जवेहिं ॥ जीवे णं भंते ! आभिणिबोहियणाणपज्जवेहिं कि कडजुम्मे० पुच्छा, गोयमा ! सिय कडजुम्मे जाव सिय कलिओगे, एवं एगिदियवज्जं जाव वेमाणिए । जीवा णं भंते ! आभिणिबोहियणाणपज्जवेहिं० पुच्छा, गोयमा ! ओघादेसेण सिय कडजुम्मा जाव सिय कलिओगा, विहाणादेसेण कडजुम्मावि जाव कलिओगावि, एवं एगिदियवज्जं जाव वेमाणिया, एवं सुयणाणपज्जवेहिवि, ओहिणाणपज्जवेहिवि एवं चेव, नवरं विगालिंदियाणं नत्थि ओहिनाणं, मणपज्जवनानंपि एवं चेव, नवरं जीवानं मणुस्साण य, सेसाणं नत्थि, जीवे णं भंते ! केवलनाणपज्जवेहिं किं कडजुम्मे० पुच्छा, गोयमा ! कडजुम्मे णो तेओगे णो दावरजुम्मे णो कलिओगे, एवं मणुस्सेवि, एवं सिद्धेवि, जीवा णं भंते ! केवलनाण० पुच्छा, गोयमा ! ओघादेसेणवि विहाणादेसेणवि कडजुम्मा नो तेओगा नो दावरजुम्मा णो कलिओगा, एवं मणुस्सावि, एवं सिद्धावि । जीवे णं भंते ! मइअन्नाणपज्जवेहिं किं कडजुम्मे० ? जहा आभिणिबोहियणाणपज्जवेहिं तहेव दो दंडगा, एवं सुयअन्नाणपज्जवेहिवि, एवं विभंगनाणपज्जवेहिवि । चक्खुदंसणअचक्खुदंसणओहिदंसणपज्जवेहिवि एवं चेव, नवरं जस्स जं अत्थि तस्स तं भाणियव्वं, केवलदंसणपज्जवेहिं जहा केवलनाणपज्जवेहिं ॥ ७३६ ॥ कइ णं भंते ! सरीरगा प० ? गोयमा ! पंच सरीरगा प०, तं०-ओरालिए जाव कम्मए, एत्थं सरीरपदं निरवसेसं भाणियव्वं जहा पन्नवणाए ॥ ७३७ ॥ जीवा णं भंते ! किं सेया निरेया ? गोयमा ! जीवा सेयावि निरेयावि, से केणट्ठेणं भंते ! एवं बुच्चइ जीवा सेयावि निरेयावि ? गोयमा ! जीवा दुविहा प०, तंजहा-संसारसमावन्नगा य असंसारसमावन्नगा य, तत्थ णं जे ते असंसारसमावन्नगा ते णं सिद्धा, सिद्धा णं दुविहा प०, तंजहा-अणंतरसिद्धा य परंपरसिद्धा य, तत्थ णं जे ते परंपरसिद्धा ते णं निरेया, तत्थ णं जे ते अणंतरसिद्धा ते णं सेया, ते णं भंते ! किं देसेया सव्वेया ? गोयमा ! णो देसेया सव्वेया, तत्थ णं जे ते संसारसमावन्नगा ते दुविहा प०, तंजहा-सेलेसिपडिवन्नगा य असेलेसिपडिवन्नगा य, तत्थ णं जे ते सेलेसीपडिवन्नगा ते णं निरेया, तत्थ णं जे ते असेलेसीपडिवन्नगा ते णं सेया, ते णं भंते ! किं देसेया सव्वेया ? गोयमा ! देसेयावि सव्वेयावि, से तेणट्ठेणं जाव निरेयावि । नेरइया णं भंते ! किं देसेया सव्वेया ? गोयमा ! देसे-

यावि सव्वेयावि, से केणट्टेणं जाव सव्वेयावि ? गोयमा ! नेरइया दुविहा प०,
तं०-विग्गहगइसमावज्जगा य अविग्गहगइसमावज्जगा य, तत्थ णं जे ते विग्गह-
गइसमावज्जगा ते णं सव्वेया, तत्थ णं जे ते अविग्गहगइसमावज्जगा ते णं देसेया,
से तेणट्टेणं जाव सव्वेयावि, एवं जाव वेमाणिया ॥ ७३८ ॥ परमाणुपोग्गला णं
भंते ! किं संखेज्जा असंखेज्जा अणंता ? गोयमा ! नो संखेज्जा नो असंखेज्जा अणंता,
एवं जाव अणंतपएसिया खंधा । एगपएसोगाढा णं भंते ! पोग्गला किं संखेज्जा
असंखेज्जा अणंता ? एवं चेव, एवं जाव असंखेज्जपएसोगाढा । एगसमयट्ठिइया णं
भंते ! पोग्गला किं संखेज्जा० ? एवं चेव, एवं जाव असंखेज्जसमयट्ठिइया । एगगुण-
कालगा णं भंते ! पोग्गला किं संखेज्जा० ? एवं चेव, एवं जाव अणंतगुणकालगा,
एवं अवसेसावि वण्णगंधरसफासा णेयव्वा जाव अणंतगुणलुक्खत्ति । एएसि णं भंते !
परमाणुपोग्गलानं दुपएसियाण य खंधाणं दव्वट्ठयाए कयरे २ हितो अप्पा वा बहुया वा
तुल्ला वा विसेसाहिया वा ? गोयमा ! दुपएसिएहितो खंधेहितो परमाणुपोग्गला दव्वट्ठयाए
वहुया, एएसि णं भंते ! दुपएसियाणं तिपएसियाण य खंधाणं दव्वट्ठयाए कयरे २ हितो
वहुया ? गोयमा ! तिपएसिएहितो खंधेहितो दुपएसिया खंधा दव्वट्ठयाए बहुया, एवं
एएणं गमएणं जाव दसपएसिएहितो खंधेहितो नवपएसिया खंधा दव्वट्ठयाए बहुया ।
एएसि णं भंते ! दसपएसि० पुच्छा, गोयमा ! दसपएसिएहितो खंधेहितो संखेज्जपए-
सिया खंधा दव्वट्ठयाए बहुया, एएसि णं भंते ! संखेज्ज० पुच्छा, गोयमा ! संखेज्ज-
पएसिएहितो खंधेहितो असंखेज्जपएसिया खंधा दव्वट्ठयाए बहुया, एएसि णं भंते !
असंखेज्जपएसि० पुच्छा, गोयमा ! अ(संखेज्ज)णंतपएसिएहितो खंधेहितो अ(णंत)
संखेज्जपएसिया खंधा दव्वट्ठयाए बहुया, एएसि णं भंते ! परमाणुपोग्गलानं दुपए-
सियाण य खंधाणं पएसट्ठयाए कयरे २ हितो बहुया ? गोयमा ! परमाणुपोग्गलेहितो
दुपएसिया खंधा पएसट्ठयाए बहुया, एवं एएणं गमएणं जाव नवपएसिएहितो खंधेहितो
दसपएसिया खंधा पएसट्ठयाए बहुया, एवं सव्वत्थ पुच्छियव्वं, दसपए-
सिएहितो खंधेहितो संखेज्जपएसिया खंधा पएसट्ठयाए बहुया, संखेज्जपएसिएहितो
खंधेहितो असंखेज्जपएसिया खंधा पएसट्ठयाए बहुया, एएसि णं भंते ! असंखेज्ज-
पएसियाणं पुच्छा, गोयमा ! अणंतपएसिएहितो खंधेहितो असंखेज्जपएसिया खंधा
पएसट्ठयाए बहुया ॥ एएसि णं भंते ! एगपएसोगाढाणं दुपएसोगाढाण य पोग्गलानं
दव्वट्ठयाए कयरे २ हितो जाव विसेसाहिया वा ? गोयमा ! दुपएसोगाढेहितो पोग्गले-
हितो एगपएसोगाढा पोग्गला दव्वट्ठयाए विसेसाहिया, एवं एएणं गमएणं तिपएसो-
गाढेहितो पोग्गलेहितो दुपएसोगाढा पोग्गला दव्वट्ठयाए विसेसाहिया जाव दसपए-

सोगाढेहितो पोग्गलेहितो नवपएसोगाढा पोग्गला दव्वट्टयाए विसेसाहिया, एएसि णं भंते ! दसपए० पुच्छा, गोयमा ! दसपएसोगाढेहितो पोग्गलेहितो संखेज्जपएसोगाढा पोग्गला दव्वट्टयाए बहुया, संखेज्जपएसोगाढेहितो पोग्गलेहितो असंखेज्जपएसोगाढा पोग्गला दव्वट्टयाए बहुया, पुच्छा सव्वत्थ भाणियव्वा । एएसि णं भंते ! एगपएसोगाढाणं दुपएसोगाढाणं य पोग्गलाणं पएसट्टयाए कयरे २ हितो जाव विसेसाहिया वा ? गोयमा ! एगपएसोगाढेहितो पोग्गलेहितो दुपएसोगाढा पोग्गला पएसट्टयाए विसेसाहिया, एवं जाव नवपएसोगाढेहितो पोग्गलेहितो दसपएसोगाढा पोग्गला पएसट्टयाए विसेसाहिया, दसपएसोगाढेहितो पोग्गलेहितो संखेज्जपएसोगाढा पोग्गला पएसट्टयाए बहुया, संखेज्जपएसोगाढेहितो पोग्गलेहितो असंखेज्जपएसोगाढा पोग्गला पएसट्टयाए बहुया । एएसि णं भंते ! एगसमयट्ठिइयाणं दुसमयट्ठिइयाणं य पोग्गलाणं दव्वट्टयाए जहा ओगाहणाए वत्तव्वया एवं ठिईएवि । एएसि णं भंते ! एगगुणकालयाणं दुगुणकालयाणं य पोग्गलाणं दव्वट्टयाए एएसि णं जहा परमाणुपोग्गलाइणं तहेव वत्तव्वया निरवसेसा, एवं सव्वेसिं वन्नगंधरसाणं, एएसि णं भंते ! एगगुणकक्खडाणं दुगुणकक्खडाणं य पोग्गलाणं दव्वट्टयाए कयरे २ हितो जाव विसेसाहिया वा ? गोयमा ! एगगुणकक्खडेहितो पोग्गलेहितो दुगुणकक्खडा पोग्गला दव्वट्टयाए विसेसाहिया, एवं जाव नवगुणकक्खडेहितो पोग्गलेहितो दसगुणकक्खडा पोग्गला दव्वट्टयाए विसेसाहिया, दसगुणकक्खडेहितो पोग्गलेहितो संखेज्जगुणकक्खडा पोग्गला दव्वट्टयाए बहुया, संखेज्जगुणकक्खडेहितो पोग्गलेहितो असंखेज्जगुणकक्खडा पोग्गला दव्वट्टयाए बहुया, असंखेज्जगुणकक्खडेहितो पोग्गलेहितो अणंतगुणकक्खडा पोग्गला दव्वट्टयाए बहुया, एवं पएसट्टयाए सव्वत्थ पुच्छा भाणियव्वा, जहा कक्खडा एवं मउयगुसयलहुयावि, सीयउसिणनिद्धलुक्खा जहा चच्चा ॥ ७३९ ॥ एएसि णं भंते ! परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाणं य खंधाणं दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा अणंतपएसिया खंधा दव्वट्टयाए, परमाणुपोग्गला दव्वट्टयाए अणंतगुणा, संखेज्जपएसिया खंधा दव्वट्टयाए संखेज्जगुणा, असंखेज्जपएसिया खंधा दव्वट्टयाए असंखेज्जगुणा, पएसट्टयाए-सव्वत्थोवा अणंतपएसिया खंधा पएसट्टयाए, परमाणुपोग्गला अपएसट्टयाए अणंतगुणा, संखेज्जपएसिया खंधा पएसट्टयाए संखेज्जगुणा, असंखेज्जपएसिया खंधा पएसट्टयाए असंखेज्जगुणा, दव्वट्टपएसट्टयाए-सव्वत्थोवा अणंतपएसिया खंधा दव्वट्टयाए ते चेव पएसट्टयाए अणंतगुणा, परमाणुपोग्गला दव्वट्टयाए अपएसट्टयाए

अणंतगुणा, संखेजपएसिया खंधा दव्वट्टयाए संखेजगुणा ते चेव पएसट्टयाए संखेजगुणा, असंखेजपएसिया खंधा दव्वट्टयाए असंखेजगुणा ते चेव पएसट्टयाए असंखेजगुणा । एएसि णं भंते ! एगपएसोगाढाणं संखेजपएसोगाढाणं असंखेजपएसोगाढाणं य पोग्गलाणं दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा एगपएसोगाढा पोग्गला दव्वट्टयाए, संखेजपएसोगाढा पोग्गला दव्वट्टयाए संखेजगुणा, असंखेजपएसोगाढा पोग्गला दव्वट्टयाए असंखेजगुणा, पएसट्टयाए-सव्वत्थोवा एगपएसोगाढा पोग्गला(अ)पएसट्टयाए, संखेजपएसोगाढा पोग्गला पएसट्टयाए(अ)संखेजगुणा, असंखेजपएसोगाढा पोग्गला पएसट्टयाए असंखेजगुणा, दव्वट्टपएसट्टयाए-सव्वत्थोवा एगपएसोगाढा पोग्गला दव्वट्टपएसट्टयाए, संखेजपएसोगाढा पोग्गला दव्वट्टयाए संखेजगुणा ते चेव पएसट्टयाए संखेजगुणा, असंखेजपएसोगाढा पोग्गला दव्वट्टयाए असंखेजगुणा ते चेव पएसट्टयाए असंखेजगुणा । एएसि णं भंते ! एगसमयट्ठिईयाणं संखेजसमयट्ठिईयाणं असंखेजसमयट्ठिईयाणं य पोग्गलाणं जहा ओगाहणाए तहा ठिईएवि भाणियव्वं अप्पावहुगं । एएसि णं भंते ! एगगुणकालगाणं संखेजगुणकालगाणं असंखेजगुणकालगाणं अणंतगुणकालगाणं य पोग्गलाणं दव्वट्टयाए पएसट्टयाए दव्वट्टपएसट्टयाए एएसि णं जहा परमाणुपोग्गलाणं अप्पावहुगं तहा एएसिपि अप्पावहुगं, एवं सेसाणवि वन्नगंधरसाणं । एएसि णं भंते ! एगगुणकक्खडाणं संखेजगुणकक्खडाणं असंखेजगुणकक्खडाणं अणंतगुणकक्खडाणं य पोग्गलाणं दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा एगगुणकक्खडा पोग्गला दव्वट्टयाए, संखेजगुणकक्खडा पोग्गला दव्वट्टयाए संखेजगुणा, असंखेजगुणकक्खडा पोग्गला दव्वट्टयाए असंखेजगुणा, अणंतगुणकक्खडा पोग्गला दव्वट्टयाए अणंतगुणा, पएसट्टयाए एवं चेव नवरं संखेजगुणकक्खडा पोग्गला पएसट्टयाए असंखेजगुणा सेसं तं चेव, दव्वट्टपएसट्टयाए सव्वत्थोवा एगगुणकक्खडा पोग्गला दव्वट्टपएसट्टयाए, संखेजगुणकक्खडा पोग्गला दव्वट्टयाए संखेजगुणा ते चेव पएसट्टयाए संखेजगुणा, असंखेजगुणकक्खडा पो० दव्वट्टयाए असंखेजगुणा ते चेव पएसट्टयाए असंखेजगुणा, अणंतगुणकक्खडा पो० दव्वट्टयाए अणंतगुणा ते चेव पएसट्टयाए अ(संखेज) णंतगुणा, एवं मउयगुरुयलहुयाणवि अप्पावहुगं, सीयउसिणनिद्धलुक्खाणं जहा वन्नाणं तहेव ॥ ७४० ॥ परमाणुपोग्गले णं भंते ! दव्वट्टयाए कि कडजुम्मे तेओए दावरजुम्मे कलिओए ? गोयमा ! नो कडजुम्मे नो तेओए नो दावरजुम्मे कलिओए, एवं जाव अणंतपएसिए

खंधे । परमाणुपोग्गला णं भंते ! दब्बट्ठयाए किं कडजुम्मा० पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं नो कडजुम्मा नो तेओगा नो दावरजुम्मा कलिओगा, एवं जाव अणंतपएसिया खंधा । परमाणु-
 पोग्गले णं भंते ! पएसट्ठयाए किं कडजुम्मे० पुच्छा, गोयमा ! नो कडजुम्मे नो तेओए नो दावरजुम्मे कलिओए, दुपएसिए पुच्छा, गोयमा ! नो कडजुम्मे नो तेओए दावरजुम्मे नो कलिओए, तिपएसिए पुच्छा, गोयमा ! नो कडजुम्मे तेओए नो दावरजुम्मे नो कलिओए, चउप्पएसिए पुच्छा, गोयमा ! कडजुम्मे नो तेओए नो दावरजुम्मे नो कलिओए, पंचपएसिए जहा परमाणुपोग्गले, छप्पएसिए जहा दुपएसिए, सत्तपएसिए जहा तिपएसिए, अट्ठपएसिए जहा चउप्पएसिए, नवपएसिए जहा परमाणुपोग्गले, दसपएसिए जहा दुपएसिए, संखेज्जपएसिए णं भंते ! पोग्गले पुच्छा, गोयमा ! सिय कडजुम्मे जाव सिय कलिओगे, एवं असंखेज्जपएसिएवि, एवं अणंतपएसिएवि । परमाणुपोग्गला णं भंते ! पएसट्ठयाए किं कडजुम्मा० पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं नो कडजुम्मा नो तेओगा नो दावरजुम्मा कलिओगा, दुपएसियाणं पुच्छा, गोयमा ! ओघादेसेणं सिय कडजुम्मा नो तेओगा सिय दावरजुम्मा नो कलिओगा, विहाणा-
 देसेणं नो कडजुम्मा नो तेओगा दावरजुम्मा नो कलिओगा, तिपएसियाणं पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं नो कडजुम्मा तेओगा नो दावरजुम्मा नो कलिओगा, चउप्पएसियाणं पुच्छा, गोयमा ! ओघादेसेणवि विहाणादेसेणवि कडजुम्मा नो तेओगा नो दावरजुम्मा नो कलिओगा, पंचपएसिया जहा परमाणुपोग्गला, छप्पएसिया जहा दुपएसिया, सत्तपएसिया जहा तिपएसिया, अट्ठपएसिया जहा चउप्पएसिया, नवपएसिया जहा परमाणु-
 पोग्गला, दसपएसिया जहा दुपएसिया, संखेज्जपएसियाणं पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि जाव कलिओगावि, एवं असंखेज्जपएसियावि अणंतपएसियावि ॥ परमाणुपोग्गले णं भंते ! किं कडजुम्मपएसोगाढे० पुच्छा, गोयमा ! (णो) कडजुम्मपएसोगाढे नो तेओग० नो दावरजुम्म० कलिओगपएसोगाढे । दुपएसिए णं पुच्छा, गोयमा ! नो कडजुम्म-
 पएसोगाढे णो तेओग० सिय दावरजुम्मपएसोगाढे सिय कलिओगपएसोगाढे । तिपएसिए णं पुच्छा, गोयमा ! णो कडजुम्मपएसोगाढे सिय तेओगपएसोगाढे सिय दावरजुम्मपएसोगाढे सिय कलिओगपएसोगाढे ३ । चउप्पएसिए णं पुच्छा, गोयमा ! सिय कडजुम्मपएसोगाढे जाव सिय कलिओगपएसोगाढे ४, एवं जाव

अणंतपएसिए ॥ परमाणुपोगला णं भंते ! कि कडजुम्मपएसोगाटा० पुच्छा, गोयमा ! ओघादेसेणं कडजुम्मपएसोगाटा णो तेओग० नो दावर० नो कलिओग०, विहाणादेसेणं नो कडजुम्मपएसोगाटा णो तेओग० नो दावर० कलिओगपएसोगाटा । दुपएसियाणं पुच्छा, गोयमा ! ओघादेसेणं कडजुम्मपएसोगाटा नो तेओग० नो दावर० नो कलिओगपएसोगाटा, विहाणादेसेणं नो कडजुम्मपएसोगाटा नो तेओगपएसोगाटा दावरजुम्मपएसोगाटावि कलिओगपएसोगाटावि । तिपएसियाणं पुच्छा, गोयमा ! ओघादेसेणं कडजुम्मपएसोगाटा नो तेओग० नो दावर० नो कलिओगपएसोगाटा, विहाणादेसेणं नो कडजुम्मपएसोगाटा तेओगपएसोगाटावि दावरजुम्मपएसोगाटावि कलिओगपएसोगाटावि ३ । चउप्पएसियाणं पुच्छा, गोयमा ! ओघादेसेणं कडजुम्मपएसोगाटा नो तेओग० नो दावर० नो कलिओगपएसोगाटा, विहाणादेसेणं कडजुम्मपएसोगाटावि जाव कलिओगपएसोगाटावि, एवं जाव अणंतपएसिया ॥ परमाणुपोगले णं भंते ! कि कडजुम्मसमयट्ठिईए० पुच्छा, गोयमा ! सिय कडजुम्मसमयट्ठिईए जाव सिय कलिओगसमयट्ठिईए, एवं जाव अणंतपएसिए । परमाणुपोगला णं भंते ! कि कडजुम्मसमयठिईया० पुच्छा, गोयमा ! ओघादेसेणं सिय कडजुम्मसमयट्ठिईया जाव सिय कलिओगसमयट्ठिईया ४, विहाणादेसेणं कडजुम्मसमयट्ठिईयावि जाव कलिओगसमयट्ठिईयावि ४, एवं जाव अणंतपएसिया । परमाणुपोगले णं भंते ! कालवन्नपज्जवेहिं किं कडजुम्मे तेओगे० जहा ठिईए वत्तव्वया एवं वत्तेसुवि सव्वेसु गंधेसुवि एवं चेव रसेसुवि जाव मङ्गुरो रसोत्ति, अणंतपएसिए णं भंते ! खंधे कक्खड्ढासपज्जवेहिं कि कडजुम्मे० पुच्छा, गोयमा ! सिय कडजुम्मे जाव सिय कलिओगे । अणंतपएसिया णं भंते ! खंवा कक्खड्ढासपज्जवेहिं कि कडजुम्मा० पुच्छा, गोयमा ! ओघादेसेणं सिय कडजुम्मा जाव सिय कलिओगा ४, विहाणादेसेणं कडजुम्मावि जाव कलिओगावि ४, एवं मउयगुरुयलहुयावि भाणियव्वा, सीयउत्तिणिद्धलुक्खा जहा वन्ना ॥ ७४१ ॥ परमाणुपोगले णं भंते ! कि स(अ)ट्ठे अणट्ठे ? गोयमा ! नो सट्ठे अणट्ठे । दुपएसिए णं पुच्छा, गोयमा ! सट्ठे नो अणट्ठे, तिपएसिए जहा परमाणुपोगले, चउप्पएसिए जहा दुपएसिए, पंचपएसिए जहा तिपएसिए, छप्पएसिए जहा दुपएसिए, सत्तपएसिए जहा तिपएसिए, अट्ठपएसिए जहा दुपएसिए, नवपएसिए जहा तिपएसिए, दसपएसिए जहा दुपएसिए, संखेज्जपएसिए णं भंते ! खंधे पुच्छा, गोयमा ! सिय सट्ठे सिय अणट्ठे, एवं असंखेज्जपएसिएवि, एवं अणंतपएसिएवि । परमाणुपोगला णं भंते ! कि सट्ठा अणट्ठा ?

गोयमा ! सद्धा वा अणद्धा वा, एवं जाव अणंतपएसिया ॥ ७४२ ॥
 परमाणुपोग्गले णं भंते ! किं सेए निरेए ? गोयमा ! सिय सेए सिय निरेए, एवं
 जाव अणंतपएसिए । परमाणुपोग्गला णं भंते ! किं सेया निरेया ? गोयमा !
 सेयावि निरेयावि, एवं जाव अणंतपएसिया ॥ परमाणुपोग्गले णं भंते ! सेए कालओ
 केवच्चिरं होइ ? गोयमा ! जहण्णेणं एकं समयं उक्कोसेणं आवलियाए असंखेज्जइभागं,
 परमाणुपोग्गले णं भंते ! निरेए कालओ केवच्चिरं होइ ? गोयमा ! जहण्णेणं एकं
 समयं उक्कोसेणं असंखेज्जं कालं, एवं जाव अणंतपएसिए, परमाणुपोग्गला णं भंते !
 सेया कालओ केवच्चिरं हो(इ)न्ति ? गोयमा ! सव्वद्धं, परमाणुपोग्गला णं भंते ! निरेया
 कालओ केवच्चिरं होन्ति ? गोयमा ! सव्वद्धं, एवं जाव अणंतपएसिया ॥ परमाणु-
 पोग्गलस्स णं भंते ! सेयस्स केवइयं कालं अंतरं होइ ? गोयमा ! सट्ठाणंतरं पडुच्च
 जहन्नेणं एकं समयं उक्कोसेणं असंखेज्जं कालं, परट्ठाणंतरं पडुच्च जहन्नेणं एकं समयं
 उक्कोसेणं असंखेज्जं कालं । निरेयस्स केवइयं कालं अंतरं होइ ? गोयमा ! सट्ठाण-
 तरं पडुच्च जहन्नेणं एकं समयं उक्कोसेणं आवलियाए असंखेज्जइभागं, परट्ठाणंतरं
 पडुच्च जहन्नेणं एकं समयं उक्कोसेणं असंखे(ज्ज)ज्जं कालं । दुपएसियस्स णं भंते !
 खंधस्स सेयस्स पुच्छा, गोयमा ! सट्ठाणंतरं पडुच्च जहन्नेणं एकं समयं उक्कोसेणं
 असंखेज्जं कालं, परट्ठाणंतरं पडुच्च जहण्णेणं एकं समयं उक्कोसेणं अणंतं कालं ।
 निरेयस्स केवइयं कालं अंतरं होइ ? गोयमा ! सट्ठाणंतरं पडुच्च जहन्नेणं एकं समयं
 उक्कोसेणं आवलियाए असंखेज्जइभागं, परट्ठाणंतरं पडुच्च जहन्नेणं एकं समयं
 उक्कोसेणं अणंतं कालं, एवं जाव अणंतपएसियस्स । परमाणुपोग्गलाणं भंते !
 सेयाणं केवइयं कालं अंतरं होइ ? गोयमा ! नत्थि अंतरं, निरेयाणं केवइयं
 कालं अंतरं होइ ? गोयमा ! नत्थि अंतरं, एवं जाव अणंतपएसियाणं
 खंधाणं ॥ एएसि णं भंते ! परमाणुपोग्गलाणं सेयाणं निरेयाण य कयरे २ हितो
 जाव विसेसाहिया वा ? गोयमा ! सव्वत्थोवा परमाणुपोग्गला सेया, निरेया असं-
 खेज्जगुणा एवं जाव असंखेज्जपएसियाणं खंधाणं । एएसि णं भंते ! अणंतपएसि-
 याणं खंधाणं सेयाणं निरेयाण य कयरे २ जाव विसेसाहिया वा ? गोयमा !
 सव्वत्थोवा अणंतपएसिया खंधा निरेया, सेया अणंतगुणा ॥ एएसि णं भंते !
 परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाण य खंधाणं
 सेयाणं निरेयाण य दव्वट्ठयाए पएसट्ठयाए दव्वट्ठपएसट्ठयाए कयरे २ जाव विसे-
 साहिया वा ? गोयमा ! सव्वत्थोवा अणंतपएसिया खंधा निरेया दव्वट्ठयाए १,
 अणंतपएसिया खंधा सेया दव्वट्ठयाए अणंतगुणा २, परमाणुपोग्गला सेया दव्व-

द्वयाए अणंतगुणा ३, संखेजपएसिया खंधा सेया दव्वद्वयाए असंखेजगुणा ४, असंखेजपएसिया खंधा सेया दव्वद्वयाए असंखेजगुणा ५, परमाणुपोग्गला निरेया दव्वद्वयाए असंखेजगुणा ६, संखेजपएसिया खंधा निरेया दव्वद्वयाए संखेजगुणा ७, असंखेजपएसिया खंधा निरेया दव्वद्वयाए असंखेजगुणा ८, पएसद्वयाए एवं चेव नवरं परमाणुपोग्गला अपएसद्वयाए भाणियव्वा, संखेजपएसिया खंधा निरेया पएसद्वयाए असंखेजगुणा सेसं तं चेव, दव्वद्वपएसद्वयाए-सव्वत्थोवा अणंतपएसिया खंधा निरेया दव्वद्वयाए १, ते चेव पएसद्वयाए अणंतगुणा २, अणंतपएसिया खंधा सेया दव्वद्वयाए अणंतगुणा ३, ते चेव पएसद्वयाए अणंतगुणा ४, परमाणुपोग्गला सेया दव्वद्वयाए अपएसद्वयाए अणंतगुणा ५, संखेजपएसिया खंधा सेया दव्वद्वयाए असंखेजगुणा ६, ते चेव पएसद्वयाए (अ)संखेजगुणा ७, असंखेजपएसिया खंधा सेया दव्वद्वयाए असंखेजगुणा ८, ते चेव पएसद्वयाए असंखेजगुणा ९, परमाणुपोग्गला निरेया दव्वद्वयाए अपएसद्वयाए असंखेजगुणा १०, संखेजपएसिया खंधा निरेया दव्वद्वयाए असंखेजगुणा ११, ते चेव पएसद्वयाए (अ)संखेजगुणा १२, असंखेजपएसिया खंधा निरेया दव्वद्वयाए असंखेजगुणा १३, ते चेव पएसद्वयाए असंखेजगुणा १४ । परमाणुपोग्गले णं भंते ! किं देसेए सव्वेए निरेए ? गोयमा ! नो देसेए सिय सव्वेए सिय निरेए, दुपएसिए णं भंते ! खंधे पुच्छा, गोयमा ! सिय देसेए सिय सव्वेए सिय निरेए, एवं जाव अणंतपएसिए । परमाणुपोग्गला णं भंते ! किं देसेया सव्वेया निरेया ? गोयमा ! नो देसेया सव्वेयावि निरेयावि, दुपएसिया णं भंते ! खंधा पुच्छा, गोयमा ! देसेयावि सव्वेयावि निरेयावि, एवं जाव अणंतपएसिया । परमाणुपोग्गले णं भंते ! सव्वेए कालओ केवच्चिरं होइ ? गोयमा ! जहन्नेणं एकं समयं उक्कोसेणं आवलियाए असंखेजइभागं, निरेए कालओ केवच्चिरं होइ ? गोयमा ! जहन्नेणं एकं समयं उक्कोसेणं असंखेजं कालं । दुपएसिए णं भंते ! खंधे देसेए कालओ केव(चि)च्चिरं होइ ? गोयमा ! जहन्नेणं एकं समयं उक्कोसेणं आवलियाए असंखेजइभागं, सव्वेए कालओ केवच्चिरं होइ ? गोयमा ! जहन्नेणं एकं समयं उक्कोसेणं आवलियाए असंखेजइभागं, निरेए कालओ केवच्चिरं होइ ? गोयमा ! जहन्नेणं एकं समयं उक्कोसेणं असंखेजं कालं, एवं जाव अणंतपएसिए । परमाणुपोग्गला णं भंते ! सव्वेया कालओ केवच्चिरं होंति ? गोयमा ! सव्वद्वं, निरेया कालओ केवच्चिरं हो(न्ति)इ ? गोयमा ! सव्वद्वं । दुपएसिया णं भंते ! खंधा देसेया कालओ केवच्चिरं होंति ? गोयमा ! सव्वद्वं, सव्वेया कालओ केवच्चिरं होंति ? सव्वद्वं, निरेया कालओ केवच्चिरं होंति ? सव्वद्वं, एवं जाव अणंतपएसिया । परमाणुपोग्ग-

लस्स णं भंते ! सव्वेयस्स केवइयं कालं अंतरं होइ ? गोयमा ! सट्ठाणंतरं पडुच्च जह-
 नेणं एकं समयं उक्कोसेणं असंखेज्जं कालं, परट्ठाणंतरं पडुच्च जहनेणं एकं समयं उक्को-
 सेणं असंखेज्जं कालं । निरेयस्स केवइयं कालं अंतरं होइ ? सट्ठाणंतरं पडुच्च जहणेणं
 एकं समयं उक्कोसेणं आवलियाए असंखेज्जइभागं, परट्ठाणंतरं पडुच्च जहनेणं एकं
 समयं उक्कोसेणं असंखेज्जं कालं । दुपएसियस्स णं भंते ! खंधस्स देसेयस्स केवइयं
 कालं अंतरं होइ ? गोयमा ! सट्ठाणंतरं पडुच्च जहनेणं एकं समयं उक्कोसेणं असंखेज्जं
 कालं, परट्ठाणंतरं पडुच्च जहनेणं एकं समयं उक्कोसेणं अणंतं कालं, सव्वेयस्स केवइयं
 कालं० ? एवं चेव जहा देसेयस्स, निरेयस्स केवइयं कालं० ? सट्ठाणंतरं पडुच्च
 जहनेणं एकं समयं उक्कोसेणं आवलियाए असंखेज्जइभागं, परट्ठाणंतरं पडुच्च जहनेणं
 एकं समयं उक्कोसेणं अणंतं कालं, एवं जाव अणंतपएसियस्स ॥ परमाणुपोग्गलाणं
 भंते ! सव्वेयाणं केवइयं कालं अंतरं होइ ? गोयमा ! नत्थि अंतरं, निरेयाणं केव-
 इयं० ? नत्थि अंतरं, दुपएसियाणं भंते ! खंधाणं देसेयाणं केवइयं कालं० ? नत्थि
 अंतरं, सव्वेयाणं केवइयं कालं० ? नत्थि अंतरं, निरेयाणं केवइयं कालं० ? नत्थि
 अंतरं, एवं जाव अणंतपएसियाणं । एएसि णं भंते ! परमाणुपोग्गलाणं सव्वेयाणं
 निरेयाणं य कयरे २ जाव विसेसाहिया वा ? गोयमा ! सव्वत्थोवा परमाणुपोग्गला
 सव्वेया, निरेया असंखेज्जगुणा । एएसि णं भंते ! दुपएसियाणं खंधाणं देसेयाणं
 सव्वेयाणं निरेयाणं य कयरे २ जाव विसेसाहिया वा ? गोयमा ! सव्वत्थोवा दुपए-
 सिया खंधा सव्वेया, देसेया असंखेज्जगुणा, निरेया असंखेज्जगुणा, एवं जाव असं-
 खेज्जपएसियाणं खंधाणं । एएसि णं भंते ! अणंतपएसियाणं खंधाणं देसेयाणं सव्वे-
 याणं निरेयाणं य कयरे २ जाव विसेसाहिया वा ? गोयमा ! सव्वत्थोवा अणंतप-
 एसिया खंधा सव्वेया, निरेया अणंतगुणा, देसेया अणंतगुणा । एएसि णं भंते !
 परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाणं य खंधाणं
 देसेयाणं सव्वेयाणं निरेयाणं दव्वट्ठयाए पएसट्ठयाए दव्वट्ठपएसट्ठयाए कयरे २ जाव
 विसेसाहिया वा ? गोयमा ! सव्वत्थोवा अणंतपएसिया खंधा सव्वेया दव्वट्ठयाए १,
 अणंतपएसिया खंधा निरेया दव्वट्ठयाए अणंतगुणा २, अणंतपएसिया खंधा देसेया
 दव्वट्ठयाए अणंतगुणा ३, असंखेज्जपएसिया खंधा सव्वेया दव्वट्ठयाए अ(णंत)संखेज्ज-
 गुणा ४, संखेज्जपएसिया खंधा सव्वेया दव्वट्ठयाए असंखेज्जगुणा ५, परमाणुपोग्गला
 सव्वेया दव्वट्ठयाए असंखेज्जगुणा ६, संखेज्जपएसिया खंधा देसेया दव्वट्ठयाए असं-
 खेज्जगुणा ७, असंखेज्जपएसिया खंधा देसेया दव्वट्ठयाए असंखेज्जगुणा ८, परमाणु-
 पोग्गला निरेया दव्वट्ठयाए असंखेज्जगुणा ९, संखेज्जपएसिया खंधा निरेया दव्व-

द्वयाए संखेज्जगुणा १०, असंखेज्जपएसिया खंधा निरेया दव्वद्वयाए असंखेज्जगुणा ११, पएसद्वयाए-सव्वत्थोवा अणंतपएसिया खंधा पएसद्वयाए एवं पएसद्वयाएवि नवरं परमाणुपोग्गला अपएसद्वयाए भाणियव्वा, संखेज्जपएसिया खंधा निरेया पएसद्वयाए असंखेज्जगुणा सेसं तं चेव, दव्वद्वपएसद्वयाए सव्वत्थोवा अणंतपएसिया खंधा सव्वेया दव्वद्वयाए १, ते चेव पएसद्वयाए अणंतगुणा २, अणंतपएसिया खंधा निरेया दव्वद्वयाए अणंतगुणा ३, ते चेव पएसद्वयाए अणंतगुणा ४, अणंतपएसिया खंधा देसेया दव्वद्वयाए अणंतगुणा ५, ते चेव पएसद्वयाए अणंतगुणा ६, असंखेज्जपएसिया खंधा सव्वेया दव्वद्वयाए अणंतगुणा ७, ते चेव पएसद्वयाए असंखेज्जगुणा ८, संखेज्जपएसिया खंधा सव्वेया दव्वद्वयाए असंखेज्जगुणा ९, ते चेव पएसद्वयाए (अ)संखेज्जगुणा १०, परमाणुपोग्गला सव्वेया दव्वद्वअपएसद्वयाए असंखेज्जगुणा ११, संखेज्जपएसिया खंधा देसेया दव्वद्वयाए असंखेज्जगुणा १२, ते चेव पएसद्वयाए (अ)संखेज्जगुणा १३, असंखेज्जपएसिया खंधा देसेया दव्वद्वयाए असंखेज्जगुणा १४, ते चेव पएसद्वयाए असंखेज्जगुणा १५, परमाणुपोग्गला निरेया दव्वद्वअपएसद्वयाए असंखेज्जगुणा १६, संखेज्जपएसिया खंधा निरेया दव्वद्वयाए संखेज्जगुणा १७, ते चेव पएसद्वयाए संखेज्जगुणा १८, असंखेज्जपएसिया निरेया दव्वद्वयाए असंखेज्जगुणा १९, ते चेव पएसद्वयाए असंखेज्जगुणा २० ॥ ७४३ ॥

कइ णं भंते ! धम्मत्थिकायस्स मज्झपएसो प० ? गोयमा ! अट्ठ धम्मत्थिकायस्स मज्झपएसो प० । कइ णं भंते ! अहम्मत्थिकायस्स मज्झपएसो प० ? गोयमा ! एवं चेव, कइ णं भंते ! आगासत्थिकायस्स मज्झपएसो प० ? एवं चेव । कइ णं भंते ! जीवत्थिकायस्स मज्झपएसो प० ? गोयमा ! अट्ठ जीवत्थिकायस्स मज्झपएसो प०, एए णं भंते ! अट्ठ जीवत्थिकायस्स मज्झपएसो कइत्तु आगासपएसोत्तु ओगा-
हंति ? गोयमा ! जहन्नेणं एक्कंसि वा दोहिं वा तिहिं वा चउहिं वा पंचहिं वा छहिं वा उक्कोसेणं अट्ठसु, नो चेव णं सत्तसु । सेवं भंते ! २ ति ॥ ७४४ ॥ पणवी-
सइमस्स सयस्स चउत्थो उद्देसो समत्तो ॥

कइविहा णं भंते ! पज्जवा पन्नत्ता ? गोयमा ! दुविहा पज्जवा प०, तं०-जीव-
पज्जवा य अजीवपज्जवा य, पज्जवपयं निरवसेसं भाणियव्वं जहा पन्नवणाए ॥ ७४५ ॥
आवलियाणं भंते ! किं संखेज्जा समया असंखेज्जा समया अणंता समया ?
गोयमा ! नो संखेज्जा समया असंखेज्जा समया नो अणंता समया, आणापाणूणं
भंते ! किं संखेज्जा० ? एवं चेव, थोवे णं भंते ! किं संखेज्जा० ? एवं चेव, एवं लवेवि
सुहुत्तेवि, एवं अहोरत्तेवि, एवं पक्खे मासे उ(ऊ)इ अयणे संवच्छरे जुगे वाससए

वाससहस्से वाससयसहस्से पुव्वंगे पुव्वे तुडियंगे तुडिए अडडंगे अडडे अववंगे
 अववे हुहुअंगे हुहुए उप्पलंगे उप्पले पडमंगे पडमे नल्लिङ्गे नल्लिणे अच्छिणि(उ)-
 पूरंगे अच्छिणि(उ)पूरे अउयंगे अउए नउयंगे नउए पउयंगे पउए चूलियंगे चूलि(या)ए
 सीसपहेलियंगे सीसपहेलिया पलिओवमे सागरोवमे ओसप्पिणी एवं उस्सप्पिणीवि,
 पोग्गलपरियट्ठे णं भंते ! किं संखेज्जा समया असंखेज्जा समया अणंता समया ?
 गोयमा ! नो संखेज्जा समया नो असंखेज्जा समया अणंता समया, एवं तीयद्धा
 अणागयद्धा सव्वद्धा ॥ आवलियाओ णं भंते ! किं संखेज्जा समया० पुच्छा,
 गोयमा ! नो संखेज्जा समया सिय असंखेज्जा समया सिय अणंता समया, आणापा-
 णूणं भंते ! किं संखेज्जा समया० पुच्छा, एवं चेव, थोवाणं भंते ! किं संखेज्जा समया
 ३ ? एवं चेव एवं जाव उस्सप्पिणीओत्ति, पोग्गलपरियट्ठाणं भंते ! किं संखेज्जा
 समया० पुच्छा, गोयमा ! णो संखेज्जा समया णो असंखेज्जा समया अणंता
 समया, आणापाणूणं भंते ! किं संखेज्जाओ आवलियाओ० पुच्छा, गोयमा ! संखे-
 ज्जाओ आवलियाओ णो असंखेज्जाओ आवलियाओ नो अणंताओ आवलियाओ,
 एवं थोवेवि, एवं जाव सीसप्पहेलियत्ति । पलिओवमे णं भंते ! किं संखेज्जा०
 पुच्छा, गोयमा ! णो संखेज्जाओ आवलियाओ असंखेज्जाओ आवलियाओ नो
 अणंताओ आवलियाओ, एवं सागरोवमेवि, एवं ओसप्पिणीवि उस्सप्पिणीवि,
 पोग्गलपरियट्ठे पुच्छा, गोयमा ! नो संखेज्जाओ आवलियाओ णो असंखेज्जाओ
 आवलियाओ अणंताओ आवलियाओ, एवं जाव सव्वद्धा । आणापाणूणं भंते !
 किं संखेज्जाओ आवलियाओ० पुच्छा, गोयमा ! सिय संखेज्जाओ आवलियाओ
 सिय असंखेज्जाओ सिय अणंताओ, एवं जाव सीसप्पहेलियाओ, पलिओवमाणं
 पुच्छा, गोयमा ! णो संखेज्जाओ आवलियाओ सिय असंखेज्जाओ आवलियाओ सिय
 अणंताओ आवलियाओ, एवं जाव उस्सप्पिणीओत्ति, पोग्गलपरियट्ठाणं पुच्छा,
 गोयमा ! णो संखेज्जाओ आवलियाओ णो असंखेज्जाओ आवलियाओ अणंताओ
 आवलियाओ । थोवे णं भंते ! किं संखेज्जाओ आणापाणूओ असंखेज्जाओ जहा आव-
 लियाए वत्तव्वया एवं आणापाणूओवि निरवसेसा, एवं एएणं गमएणं जाव सीसप्पहे-
 लिया भाणियव्वा । सागरोवमे णं भंते ! किं संखेज्जा पलिओवमा० पुच्छा, गोयमा !
 संखेज्जा पलिओवमा णो असंखेज्जा पलिओवमा णो अणंता पलिओवमा, एवं ओस-
 प्पिणीएवि उस्सप्पिणीएवि, पोग्गलपरियट्ठे णं भंते ! पुच्छा, गोयमा ! णो संखेज्जा
 पलिओवमा णो असंखेज्जा पलिओवमा अणंता पलिओवमा, एवं जाव सव्वद्धा ।
 सागरोवमाणं भंते ! किं संखेज्जा पलिओवमा० पुच्छा, गोयमा ! सिय संखेज्जा

पलिओवमा सिय असंखेज्जा पलिओवमा सिय अणंता पलिओवमा, एवं जाव ओसप्पिणी(ओ)वि उस्सप्पिणीवि । पोग्गलपरियट्ठाणं पुच्छा, गोयमा ! णो संखेज्जा पलिओवमा णो असंखेज्जा पलिओवमा अणंता पलिओवमा । ओसप्पिणी णं भंते ! किं संखेज्जा सागरोवमा जहा पलिओवमस्स वत्तव्वया तहा सागरोवमस्सवि, पोग्गलपरियट्ठे णं भंते ! किं संखेज्जाओ ओसप्पिणीओ० पुच्छा, गोयमा ! णो संखेज्जाओ ओसप्पिणीओ णो असंखेज्जाओ अणंताओ ओसप्पिणीओ, पोग्गलपरियट्ठाणं भंते ! किं संखेज्जाओ ओसप्पिणीओ० पुच्छा, गोयमा ! नो संखेज्जाओ नो असंखेज्जाओ अणंताओ, पोग्गलपरियट्ठे णं भंते ! किं संखेज्जाओ ओसप्पिणिउस्सप्पिणीओ० पुच्छा, गोयमा ! णो संखेज्जाओ ओसप्पिणिउस्सप्पिणीओ णो असंखेज्जाओ अणंताओ ओसप्पिणिउस्सप्पिणीओ, एवं जाव सव्वद्धा, पोग्गलपरियट्ठाणं भंते ! किं संखेज्जाओ ओसप्पिणिउस्सप्पिणीओ० पुच्छा, गोयमा ! णो संखेज्जाओ ओसप्पिणिउस्सप्पिणीओ णो असंखेज्जाओ अणंताओ ओसप्पिणिउस्सप्पिणीओ । तीतद्धाणं भंते ! किं संखेज्जा पोग्गलपरियट्ठा० पुच्छा, गोयमा ! नो संखेज्जा पोग्गलपरियट्ठा नो असंखेज्जा अणंता पोग्गलपरियट्ठा, एवं अणागयद्धावि, एवं सव्वद्धावि ॥७४६॥ अणागयद्धाणं भंते ! किं संखेज्जाओ तीतद्धाओ असंखेज्जाओ० अणंताओ० ? गोयमा ! णो संखेज्जाओ तीतद्धाओ णो असंखेज्जाओ तीतद्धाओ णो अणंताओ तीतद्धाओ, अणागयद्धा णं तीतद्धाओ समयाहिया, तीतद्धा णं अणागयद्धाओ समयऊणा । सव्वद्धाणं भंते ! किं संखेज्जाओ तीतद्धाओ० पुच्छा, गोयमा ! णो संखेज्जाओ तीतद्धाओ णो असंखेज्जाओ तीतद्धाओ णो अणंताओ तीतद्धाओ, सव्वद्धा णं तीतद्धाओ साइरेगदुगुणा तीतद्धा णं सव्वद्धाओ थोवूणए अद्धे, सव्वद्धाणं भन्ते ! किं संखेज्जाओ अणागयद्धाओ० पुच्छा, गोयमा ! णो संखेज्जाओ अणागयद्धाओ णो असंखेज्जाओ अणागयद्धाओ णो अणंताओ अणागयद्धाओ, सव्वद्धा णं अणागयद्धाओ थोवूणगदुगुणा अणागयद्धा णं सव्वद्धाओ साइरेगे अद्धे ॥ ७४७ ॥ कइविहा णं भंते ! णिओदा प० ? गोयमा ! दुविहा णिओदा प०, तं०-णिओ(य)गा य णिओयजीवा य, णिओदा णं भंते ! कइविहा प० ? गोयमा ! दुविहा प०, तंजहा-सुहुमनिओदा य वायरनिओ(दा)गा य, एवं निओदा भाणियव्वा जहा जीवाभिगमे तहेव निरवसेसं ॥ ७४८ ॥ कइविहे णं भंते ! णामे पन्नत्ते ? गोयमा ! छव्विहे णामे पन्नत्ते, तंजहा-उदइए जाव सन्निवाइए । से किं तं उदइए णामे ? उदइए णामे दुविहे प०, तं०-उद(ड)ए य उदयनिप्फन्ने य, एवं जहा सत्तरसमसए पढमे उद्देसए भावो तहेव इहवि, नवरं इमं नामणाणत्तं, सेसं तहेव जाव सन्निवाइए । सेवं भंते ! २ त्ति ॥ ७४९ ॥ पणवीसइमे सए पंचमो उद्देसो समत्तो ॥

पन्नवण १ वेय २ रागे ३ कप्प ४ चरित्त ५ पडिसेवणा ६ णाणे ७ । तित्थे
 ८ लिंग ९ सरीरे १० खेत्ते ११ काले १२ गइ १३ संजम १४ निगासे १५
 ॥ १ ॥ जोगु १६ वओग १७ कसाए १८ लेसा १९ परिणाम २० बंध २१ वेदे
 य २२ । कम्मोदीरण २३ उवसंपजहन्न २४ सन्ना य २५ आहारे २६ ॥ २ ॥
 भव २७ आगरिसे २८ कालं २९ तरे य ३० समुग्घाय ३१ खेत्त ३२ फुसणा य
 ३३ । भावे ३४ परि(माणे)णामे ३५ (खलु)विय अप्पावहुयं ३६ नियंठाणं ३७ ॥ ३ ॥
 रायगिहे जाव एवं वयासी-कइ णं भंते ! णियंठा पन्नत्ता ? गोयमा ! पंच णियंठा
 पन्नत्ता, तंजहा-पुलाए वउसे कुसीले णियंठे सिणाए ॥ पुलाए णं भंते ! कइविहे
 पन्नत्ते ? गोयमा ! पंचविहे प०, तं०-नाणपुलाए दंसणपुलाए चरित्तपुलाए लिंगपु-
 लाए अहासुहुमपुलाए णामं पंचमे । वउसे णं भंते ! कइविहे प० ? गोयमा !
 पंचविहे प०, तं०-आभोगवउसे अणाभोगवउसे संवुडवउसे असंवुडवउसे अहा-
 सुहुमवउसे णामं पंचमे । कुसीले णं भंते ! कइविहे प० ? गोयमा ! दुविहे प०,
 तं०-पडिसेवणाकुसीले य कसायकुसीले य, पडिसेवणाकुसीले णं भंते ! कइविहे
 पन्नत्ते ? गोयमा ! पंचविहे प०, तंजहा-नाणपडिसेवणाकुसीले दंसणपडिसेवणा-
 कुसीले चरित्तपडिसेवणाकुसीले लिंगपडिसेवणाकुसीले अहासुहुमपडिसेवणाकुसीले
 णामं पंचमे, कसायकुसीले णं भंते ! कइविहे पन्नत्ते ? गोयमा ! पंचविहे प०, तं०-
 नाणकसायकुसीले दंसणकसायकुसीले चरित्तकसायकुसीले लिंगकसायकुसीले अहासु-
 हुमकसायकुसीले णामं पंचमे । नियंठे णं भंते ! कइविहे प० ? गोयमा ! पंचविहे
 प०, तंजहा-पढमसमयनियंठे अपढमसमयनियंठे चरिमसमयनियंठे अचरिमसमय-
 नियंठे अहासुहुमनियंठे णामं पंचमे । सिणाए णं भंते ! कइविहे प० ? गोयमा !
 पंचविहे प०, तं०-अच्छवी १, असवले २, अकम्मसे ३, संसुद्धणाणदंसणधरे अरहा
 जिणे केवली ४, अपरिस्सावी ५।१। पुलाए णं भंते ! कि सवेयए होज्जा अवेयए
 होज्जा ? गोयमा ! सवेयए होज्जा णो अवेयए होज्जा, जइ सवेयए होज्जा कि
 इत्थिवेयए होज्जा पुरिसवेयए होज्जा पुरिसनपुंसगवेयए होज्जा ? गोयमा ! नो
 इत्थिवेयए होज्जा पुरिसवेयए होज्जा पुरिसनपुंसगवेयए वा होज्जा । वउसे णं भंते !
 किं सवेयए होज्जा अवेयए होज्जा ? गोयमा ! सवेयए होज्जा णो अवेयए होज्जा, जइ
 सवेयए होज्जा कि इत्थिवेयए होज्जा पुरिसवेयए होज्जा पुरिसनपुंसगवेयए होज्जा ?
 गोयमा ! इत्थिवेयए वा होज्जा पुरिसवेयए वा होज्जा पुरिसनपुंसगवेयए वा होज्जा,
 एवं पडिसेवणाकुसीलेवि, कसायकुसीले णं भंते ! किं सवेयए होज्जा० पुच्छा, गोयमा !
 सवेयए वा होज्जा अवेयए वा होज्जा, जइ अवेदए होज्जा कि उवसंतवेदए होज्जा

खीणवेदए होजा ? गोयमा ! उवसंतवेदए वा होजा खीणवेदए वा होजा, जइ
 सवेदए होजा किं इत्थिवेदए होजा० पुच्छा, गोयमा ! तिसुवि जहा वउसे । नियंठे णं
 भंते ! किं सवेदए० पुच्छा, गोयमा ! णो सवेदए होजा अवेदए होजा, जइ अवेदए
 होजा कि उवसंत० पुच्छा, गोयमा ! उवसंतवेदए वा होजा खीणवेदए वा होजा ।
 सिणाए णं भंते ! किं सवेयए होजा० ? जहा नियंठे तहा सिणाएवि, नवरं
 णो उवसंतवेयए होजा खीणवेयए होजा २ ॥ ७५० ॥ पुलाए णं भंते ! किं
 सरागे होजा वीयरगे होजा ? गोयमा ! सरागे होजा णो वीयरगे होजा, एवं
 जाव कसायकुसीले । नियंठे णं भंते ! किं सरागे होजा० पुच्छा, गोयमा ! णो सरागे
 होजा वीयरगे होजा, जइ वीयरगे होजा कि उवसंतकसायवीयरगे होजा खीण-
 कसायवीयरगे होजा ? गोयमा ! उवसंतकसायवीयरगे वा होजा खीणकसायवीयरगे
 वा होजा, सिणाए एवं चेव, नवरं णो उवसंतकसायवीयरगे होजा खीणकसायवीयरगे
 होजा ३ ॥ ७५१ ॥ पुलाए णं भंते ! किं ठियकप्पे होजा अट्ठियकप्पे होजा ?
 गोयमा ! ठियकप्पे वा होजा अट्ठियकप्पे वा होजा, एवं जाव सिणाए । पुलाए णं
 भंते ! किं जिणकप्पे होजा थेरकप्पे होजा कप्पातीते होजा ? गोयमा ! नो जिणकप्पे
 होजा थेरकप्पे होजा णो कप्पातीते होजा । वउसे णं भंते ! पुच्छा, गोयमा !
 जिणकप्पे वा होजा थेरकप्पे वा होजा नो कप्पातीते होजा, एवं पडिसेवणाकु-
 सीलेवि । कसायकुसीले णं पुच्छा, गोयमा ! जिणकप्पे वा होजा थेरकप्पे वा होजा
 कप्पातीते वा होजा । नियंठे णं पुच्छा, गोयमा ! नो जिणकप्पे होजा नो थेरकप्पे
 होजा कप्पातीते होजा, एवं सिणाएवि ४ ॥ ७५२ ॥ पुलाए णं भंते ! किं सामाइय-
 संजमे होजा छेओवट्ठावणियसंजमे होजा परिहारविसुद्धियसंजमे होजा सुहुमसंपराय-
 संजमे होजा अहक्खायसंजमे होजा ? गोयमा ! सामाइयसंजमे वा होजा
 छेओवट्ठावणियसंजमे वा होजा णो परिहारविसुद्धियसंजमे होजा णो सुहुमसंपराय-
 संजमे होजा णो अहक्खायसंजमे होजा, एवं वउसेवि, एवं पडिसेवणाकुसीलेवि,
 कसायकुसीले णं पुच्छा, गोयमा ! सामाइयसंजमे वा होजा जाव सुहुमसंपराय-
 संजमे वा होजा णो अहक्खायसंजमे होजा । नियंठे णं पुच्छा, गोयमा ! णो
 सामाइयसंजमे होजा जाव णो सुहुमसंपरायसंजमे होजा अहक्खायसंजमे होजा,
 एवं सिणाएवि ५ ॥ ७५३ ॥ पुलाए णं भंते ! किं पडिसेवए होजा अपडिसेवए
 होजा ? गोयमा ! पडिसेवए होजा णो अपडिसेवए होजा, जइ पडिसेवए होजा
 कि मूलगुणपडिसेवए होजा उत्तरगुणपडिसेवए होजा ? गोयमा ! मूलगुणपडिसेवए
 वा होजा उत्तरगुणपडिसेवए वा होजा, मूलगुणपडिसेवमाणे पंचग्हं अणासवाणं

अन्नयरं पडिसेवेज्जा, उत्तरगुणपडिसेवमाणे दसविहस्स पच्चक्खाणस्स अन्नयरं पडिसेवेज्जा । वउसे णं पुच्छा, गोयमा ! पडिसेवए होज्जा णो अपडिसेवए होज्जा, जइ पडिसेवए होज्जा कि मूलगुणपडिसेवए होज्जा उत्तरगुणपडिसेवए होज्जा ? गोयमा ! णो मूलगुणपडिसेवए होज्जा उत्तरगुणपडिसेवए होज्जा, उत्तरगुणपडिसेवमाणे दसविहस्स पच्चक्खाणस्स अन्नयरं पडिसेवेज्जा, पडिसेवणाकुसीले जहा पुलाए । कसायकुसीले णं पुच्छा, गोयमा ! णो पडिसेवए होज्जा अपडिसेवए होज्जा, एवं नियंठेवि, एवं सिणाएवि ६ ॥ ७५४ ॥ पुलाए णं भंते ! कइसु नाणेषु होज्जा ? गोयमा ! दोसु वा तिसु वा होज्जा, दोसु होज्जमाणे दोसु आभिणिबोहियनाणे सुअनाणे होज्जा, तिसु होज्जमाणे तिसु आभिणिबोहियनाणे सुयनाणे ओहिनाणे होज्जा, एवं वउसेवि, एवं पडिसेवणाकुसीलेवि, कसायकुसीले णं पुच्छा, गोयमा ! दोसु वा तिसु वा चउसु वा होज्जा, दोसु होज्जमाणे दोसु आभिणिबोहियनाणे सुयनाणे होज्जा, तिसु होज्जमाणे तिसु आभिणिबोहियनाणसुयनाणओहिनाणेषु होज्जा अहवा तिसु होज्जमाणे आभिणिबोहियनाणसुयनाणमणपज्जवनाणेषु होज्जा, चउसु होज्जमाणे चउसु आभिणिबोहियनाणसुयनाणओहिनाणमणपज्जवनाणेषु होज्जा, एवं नियंठेवि । सिणाए णं पुच्छा, गोयमा ! एगंमि केवलनाणे होज्जा ॥ ७५५ ॥ पुलाए णं भंते ! केवइयं सुयं अहिजेज्जा ? गोयमा ! जहन्नेणं नवमस्स पुव्वस्स तइयं आयारवत्थुं, उक्कोसेणं नव पुव्वाइं अहिजेज्जा । वउसे णं पुच्छा, गोयमा ! जहन्नेणं अट्ठ पवयणमायाओ उक्कोसेणं दस पुव्वाइं अहिजेज्जा । एवं पडिसेवणाकुसीलेवि । कसायकुसीले णं पुच्छा, गोयमा ! जहन्नेणं अट्ठ पवयणमायाओ उक्कोसेणं चउदस पुव्वाइं अहिजेज्जा, एवं नियंठेवि । सिणाए णं पुच्छा, गोयमा ! सुयवइरित्ते होज्जा ७॥७५६॥ पुलाए णं भंते ! किं तित्थे होज्जा अतित्थे होज्जा ? गोयमा ! तित्थे होज्जा णो अतित्थे होज्जा, एवं वउसेवि, एवं पडिसेवणाकुसीलेवि । कसायकुसीले पुच्छा, गोयमा ! तित्थे वा होज्जा अतित्थे वा होज्जा, जइ अतित्थे होज्जा किं तित्थयरे होज्जा पत्तेयबुद्धे होज्जा ? गोयमा ! तित्थगरे वा होज्जा पत्तेयबुद्धे वा होज्जा, एवं नियंठेवि, एवं सिणाएवि ८॥७५७॥ पुलाए णं भंते ! किं सल्लिगे होज्जा अन्नल्लिगे होज्जा गिहिल्लिगे होज्जा ? गोयमा ! दव्वल्लिगं पडुच्च सल्लिगे वा होज्जा अन्नल्लिगे वा होज्जा गिहिल्लिगे वा होज्जा, भावल्लिगं पडुच्च निय(मं)मा सल्लिगे होज्जा, एवं जाव सिणाए ९॥७५८॥ पुलाए णं भंते ! कइसु सरीरेसु होज्जा ? गोयमा ! तिसु ओरालियतेयाकम्मएसु होज्जा, वउसे णं भंते ! पुच्छा, गोयमा ! तिसु वा चउसु वा होज्जा, तिसु होज्जमाणे तिसु ओरालियतेयाकम्मएसु होज्जा, चउसु होज्जमाणे चउसु ओरालिय-

वेडव्वियतेयाकम्मएसु होजा, एवं पडिसेवणाकुसीलेवि । कसायकुसीले पुच्छा, गोयमा ! तिसु वा चउसु वा पंचसु वा होजा, तिसु होजमाणे तिसु ओरालियतेया-
 कम्मएसु होजा, चउसु होजमाणे चउसु ओरालियवेडव्वियतेयाकम्मएसु होजा, पंचसु
 होजमाणे पंचसु ओरालियवेडव्वियआहारगतेयाकम्मएसु होजा, णियंटो सिणाओ
 य जहा पुलाओ ॥ १० ॥ ७५९ ॥ पुलाए णं भंते ! किं कम्मभूमी(सु)ए होजा अकम्म-
 भूमीए होजा ? गोयमा ! जम्मणसंतिभावं पडुच्च कम्मभूमीए होजा णो अकम्मभूमीए
 होजा, वउसे णं पुच्छा, गोयमा ! जम्मणसंतिभावं पडुच्च कम्मभूमीए होजा
 णो अकम्मभूमीए होजा, साहरणं पडुच्च कम्मभूमीए वा होजा अकम्मभूमीए वा
 होजा, एवं जाव सिणाए ॥ ११ ॥ ७६० ॥ पुंलाए णं भंते ! कि ओसप्पिणिकाले
 होजा उस्सप्पिणिकाले होजा णोओसप्पिणिणोउस्सप्पिणिकाले होजा ? गोयमा !
 ओसप्पिणिकाले वा होजा उस्सप्पिणिकाले वा होजा नोओसप्पिणिनोउस्स-
 प्पिणिकाले वा होजा, जइ ओसप्पिणिकाले होजा कि सुसमसुसमाकाले होजा
 १, सुसमाकाले होजा २, सुसमदूसमाकाले होजा ३, दूसमसुसमाकाले होजा
 ४, दूसमाकाले होजा ५, दूसमदूसमाकाले होजा ६ ? गोयमा ! जम्मणं पडुच्च णो
 सुसमसुसमाकाले होजा १, णो सुसमाकाले होजा २, सुसमदूसमाकाले वा होजा ३,
 दूसमसुसमाकाले वा होजा ४, णो दूसमाकाले होजा ५, णो दूसमदूसमाकाले होजा ६,
 संतिभावं पडुच्च णो सुसमसुसमाकाले होजा णो सुसमाकाले होजा सुसमदूसमाकाले
 वा होजा दूसमसुसमाकाले वा होजा दूसमाकाले वा होजा णो दूसमदूसमाकाले
 होजा, जइ उस्सप्पिणिकाले होजा कि दूसमदूसमाकाले होजा दूसमाकाले होजा
 दूसमसुसमाकाले होजा सुसमदूसमाकाले होजा सुसमाकाले होजा सुसमसुसमाकाले
 होजा ? गोयमा ! जम्मणं पडुच्च णो दूसमदूसमाकाले होजा १, दूसमाकाले वा
 होजा २, दूसमसुसमाकाले वा होजा ३, सुसमदूसमाकाले वा होजा ४, णो सुसमा-
 काले होजा ५, णो सुसमसुसमाकाले होजा ६, संतिभावं पडुच्च णो दूसमदूसमाकाले
 होजा १, (नो)दूसमाकाले होजा २, दूसमसुसमाकाले वा होजा ३, सुसमदूसमाकाले
 वा होजा ४, णो सुसमाकाले होजा ५, णो सुसमसुसमाकाले होजा ६ । जइ णोओस-
 प्पिणिनोउस्सप्पिणिकाले होजा कि सुसमसुसमापलिभागे होजा सुसमापलिभागे
 होजा सुसमदूसमापलिभागे होजा दूसमसुसमापलिभागे होजा ? गोयमा ! जम्मणं
 संतिभावं च पडुच्च णो सुसमसुसमापलिभागे होजा णो सुसमापलिभागे होजा णो दू(सु)
 समदूसमापलिभागे होजा दूसमसुसमापलिभागे होजा । वउसे णं भंते ! पुच्छा,
 गोयमा ! ओसप्पिणिकाले वा होजा उस्सप्पिणिकाले वा होजा नोओसप्पिणिनोउस्स-

पिणिकाले वा होजा, जइ ओसपिणिकाले होजा कि सुसमसुसमाकाले० पुच्छा, गोयमा ! जम्मणं संतिभावं च पडुच्च णो सुसमसुसमाकाले होजा णो सुसमाकाले होजा सुसमदूसमाकाले वा होजा दुस्समसुसमाकाले वा होजा दूसमाकाले वा होजा णो दसमदूसमाकाले होजा, साहरणं पडुच्च अन्नयरे समाकाले होजा । जइ उस्सपिणिकाले होजा कि दूसमदूसमाकाले होजा ६ पुच्छा, गोयमा ! जम्मणं पडुच्च णो दुस्समदुस्समाकाले होजा जहेव पुलाए, संतिभावं पडुच्च णो दूसमदूसमाकाले होजा णो दूसमाकाले होजा एवं संतिभावेणवि जहा पुलाए जाव णो सुसमसुसमाकाले होजा, साहरणं पडुच्च अन्नयरे समाकाले होजा । जइ नोओसपिणि-नोउस्सपिणिकाले होजा० पुच्छा, गोयमा ! जम्मणसंतिभावं पडुच्च णो सुसमसुसमापलिभागे होजा जहेव पुलाए जाव दूसमसुसमापलिभागे होजा, साहरणं पडुच्च अन्नयरे पलिभागे होजा, जहा वउसे एवं पडिसेवणाकुसीलेवि, एवं कसायकुसीलेवि, नियंठो सिणाओ य जहा पुलाओ, नवरं एएसिं अब्भहियं साहरणं भाणियव्वं, सेसं तं चेव १२ ॥ ७६१ ॥ पुलाए णं भंते ! कालगए समाणे (कि)कं गइं गच्छइ ? गोयमा ! देवगइं गच्छइ, देवगइं गच्छमाणे कि भवणवासीसु उववजेजा वाणमंतरेसु उववजेजा जोइसियवेमाणिएसु उववजेजा ? गोयमा ! णो भवणवासीसु उ० णो वाणमंतरेसु उ० णो जोइसिएसु उ० वेमाणिएसु उववजेजा, वेमाणिएसु उववज्जमाणे जहण्णेणं सोहम्मं कप्पे उक्कोसेणं सहस्सारे कप्पे उववजेजा, वउसे णं एवं चेव नवरं उक्कोसेणं अच्चुए कप्पे, पडिसेवणाकुसीले जहा वउसे, कसायकुसीले जहा पुलाए, नवरं उक्कोसेणं अणुत्तरविमाणेसु उववजेजा, नियंठे णं भंते ! एवं चेव, एवं जाव वेमाणिएसु उववज्जमाणे अजहन्नमणुक्कोसेणं अणुत्तरविमाणेसु उववजेजा, सिणाए णं भंते ! कालगए समाणे कं गइं गच्छइ ? गोयमा ! सिद्धिगइं गच्छइ । पुलाए णं भंते ! देवेसु उववज्जमाणे कि इंदत्ताए उववजेजा सामाणियत्ताए उववजेजा तायत्तीसगत्ताए उववजेजा लोगपालत्ताए उववजेजा अहमिदत्ताए उववजेजा ? गोयमा ! अविराहणं पडुच्च इंदत्ताए उववजेजा सामाणियत्ताए उववजेजा लोगपालत्ताए वा उववजेजा तायत्तीसगत्ताए वा उववजेजां नो अहमिदत्ताए उववजेजा, विराहणं पडुच्च अन्नयरेसु उववजेजा, एवं वउसेवि, एवं पडिसेवणाकुसीलेवि, कसायकुसीले पुच्छा, गोयमा ! अविराहणं पडुच्च इंदत्ताए वा उववजेजा जाव अहमिदत्ताए उववजेजा, विराहणं पडुच्च अन्नयरेसु उववजेजा, नियंठे पुच्छा, गोयमा अविराहणं पडुच्च णो इंदत्ताए उववजेजा जाव णो लोगपालत्ताए उववजेजा अहमिदत्ताए उववजेजा, विराहणं पडुच्च अन्नयरेसु उववजेजा ॥ पुलागस्स णं भंते ! देवलोगेसु उववज्जमाणस्स

केवइयं कालं ठिई प० ? गोयमा ! जहन्नेणं पलिओवमपुहुत्तं उक्कोसेणं अट्टारस-
 सागरोवमाई, वडसस्स णं पुच्छा, गोयमा ! जहन्नेणं पलिओवमपुहुत्तं उक्कोसेणं
 बावीसं सागरोवमाई, एवं पडिसेवणाकुसीलस्सवि, कसायकुसीलस्स पुच्छा, गोयमा !
 जहन्नेणं पलिओवमपुहुत्तं उक्कोसेणं तेत्तीसं सागरोवमाई, गियंठस्स पुच्छा, गोयमा !
 अजहन्नमणुक्कोसेणं तेत्तीसं सागरोवमाई १३ ॥ ७६२ ॥ पुलागस्स णं भंते !
 केवइया संजमट्ठाणा प० ? गोयमा ! असंखेज्जा संजमट्ठाणा प०, एवं जावे कसाय-
 कुसीलस्स । नियंठस्स णं भंते ! केवइया संजमट्ठाणा प० ? गोयमा ! एगे अजहन्नम-
 णुक्कोसए संजमट्ठाणे प०, एवं सिणायस्सवि, एएसि णं भंते ! पुलागवडसपडिसेवणाक-
 सायकुसीलनियंठसिणायानं संजमट्ठाणानं कयरे २ जाव विसेसाहिया वा ? गोयमा !
 सव्वत्थोवे नियंठस्स सिणायस्स य एगे अजहन्नमणुक्कोसए संजमट्ठाणे, पुलागस्स
 संजमट्ठाणा असंखेज्जगुणा, वडसस्स संजमट्ठाणा असंखेज्जगुणा, पडिसेवणाकुसीलस्स
 संजमट्ठाणा असंखेज्जगुणा, कसायकुसीलस्स संजमट्ठाणा असंखेज्जगुणा १४ ॥ ७६३ ॥
 पुलागस्स णं भंते ! केवइया चरित्तपज्जवा प० ? गोयमा ! अणंता चरित्तपज्जवा
 प०, एवं जाव सिणायस्स । पुलाए णं भंते ! पुलागस्स सट्ठाणसन्निगासेणं
 चरित्तपज्जवेहिं किं हीणे तुल्ले अब्भहिए ? गोयमा ! सिय हीणे १, सिय तुल्ले २, सिय
 अब्भहिए ३, जइ हीणे अणंतभागहीणे वा असंखेज्जइभागहीणे वा संखेज्जइभागहीणे
 वा संखेज्जगुणहीणे वा असंखेज्जगुणहीणे वा अणंतगुणहीणे वा, अह अब्भहिए अणंत-
 भागमव्भहिए वा असंखेज्जइभागमव्भहिए वा संखेज्जइभागमव्भहिए वा संखेज्जगुण-
 मव्भहिए वा असंखेज्जगुणमव्भहिए वा अणंतगुणमव्भहिए वा ॥ पुलाए णं भंते !
 वडसस्स परट्ठाणसन्निगासेणं चरित्तपज्जवेहिं किं हीणे तुल्ले अब्भहिए ? गोयमा ! हीणे
 नो तुल्ले नो अब्भहिए, अणंतगुणहीणे, एवं पडिसेवणाकुसीलेवि, कसायकुसीलेण समं
 छट्ठाणवडिए जहेव सट्ठाणे, नियंठस्स जहा वडसस्स, एवं सिणायस्सवि ॥ वडसे णं
 भंते ! पुलागस्स परट्ठाणसन्निगासेणं चरित्तपज्जवेहिं किं हीणे तुल्ले अब्भहिए ?
 गोयमा ! णो हीणे णो तुल्ले अब्भहिए अणंतगुणमव्भहिए । वडसे णं भंते ! वडसस्स
 सट्ठाणसन्निगासेणं चरित्तपज्जवेहिं० पुच्छा, गोयमा ! सिय हीणे सिय तुल्ले सिय
 अब्भहिए, जइ हीणे छट्ठाणवडिए । वडसे णं भंते ! पडिसेवणाकुसीलस्स परट्ठाणस-
 न्निगासेणं चरित्तपज्जवेहिं किं हीणे० ? छट्ठाणवडिए, एवं कसायकुसीलस्सवि ॥
 वडसे णं भंते ! नियंठस्स परट्ठाणसन्निगासेणं चरित्तपज्जवेहिं० पुच्छा, गोयमा !
 हीणे णो तुल्ले णो अब्भहिए, अणंतगुणहीणे, एवं सिणायस्सवि, पडिसेवणाकुसीलस्स
 एस चेव वडसवत्तव्वया भाणियव्वा, कसायकुसीलस्स सण्णिगासेणं एस चेव

वउसवत्तव्वया नवरं पुलाएणवि समं छट्ठाणवडिए । णियंठे णं भंते ! पुलागस्स परट्ठाणसन्निगासेणं चरित्तपज्जवेहिं० पुच्छा, गोयमा ! णो हीणे णो तुल्ले अब्भहिंए अणंतगुणमव्भहिंए, एवं जाव कसायकुसीलस्स । णियंठे णं भंते ! णियंठस्स सट्ठाणसन्निगासेणं पुच्छा, गोयमा ! नो हीणे तुल्ले णो अब्भहिंए, एवं सिणाय-स्सवि । सिणाए णं भंते ! पुलागस्स परट्ठाणसण्णिगासेणं एवं जहा नियंठस्स वत्तव्वया तहा सिणायस्सवि भाणियव्वा जाव सिणाए णं भंते ! सिणायस्स सट्ठाणसन्निगासेणं पुच्छा, गोयमा ! णो हीणे तुल्ले णो अब्भहिंए ॥ एएसि णं भंते ! पुलागवउसप-डिसेवणाकुसीलकसायकुसीलनियंठसिणायणं जहन्नुक्कोसगाणं चरित्तपज्जवाणं कयरे २ जाव विसेसाहिया वा ? गोयमा ! पुलागस्स कसायकुसीलस्स य एएसि णं जहन्नागा चरित्तपज्जवा दोण्हवि तुल्ला सव्वत्थोवा, पुलागस्स उक्कोसगा चरित्तपज्जवा अणंतगुणा, वउसस्स पडिसेवणाकुसीलस्स य एएसि णं जहन्नागा चरित्तपज्जवा दोण्हवि तुल्ला अणंतगुणा, वउसस्स उक्कोसगा चरित्तपज्जवा अणंतगुणा, पडिसेवणा-कुसीलस्स उक्कोसगा चरित्तपज्जवा अणंतगुणा, कसायकुसीलस्स उक्कोसगा चरित्त-पज्जवा अणंतगुणा, णियंठस्स सिणायस्स य एएसि णं अजहन्नामणुक्कोसगा चरित्त-पज्जवा दोण्हवि तुल्ला अणंतगुणा १५ ॥ ७६४ ॥ पुलाए णं भंते ! किं सजोगी होज्जा अजोगी होज्जा ? गोयमा ! सजोगी होज्जा नो अजोगी होज्जा, जइ सजोगी होज्जा किं मणजोगी होज्जा वइजोगी होज्जा कायजोगी होज्जा ? गोयमा ! मणजोगी वा होज्जा वइजोगी वा होज्जा कायजोगी वा होज्जा, एवं जाव नियंठे । सिणाए णं भंते ! पुच्छा, गोयमा ! सजोगी वा होज्जा अजोगी वा होज्जा, जइ सजोगी होज्जा किं मणजोगी होज्जा सेसं जहा पुलागस्स १६ ॥ ७६५ ॥ पुलाए णं भंते ! किं सागारोवउत्ते होज्जा अणागारोवउत्ते होज्जा ? गोयमा ! सागारोवउत्ते वा होज्जा अणागारोवउत्ते वा होज्जा, एवं जाव सिणाए १७ ॥ ७६६ ॥ पुलाए णं भंते ! किं सकसाई होज्जा अकसाई होज्जा ? गोयमा ! सकसाई होज्जा णो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु कोहमाणमाया-लोमेसु होज्जा, एवं वउसेवि, एवं पडिसेवणाकुसीलेवि, कसायकुसीले णं पुच्छा, गोयमा ! सकसाई होज्जा णो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु वा तिसु वा दोसु वा एगम्मि वा होज्जा, चउसु होज्जमाणे चउसु संजलणकोहमाणमायालोमेसु होज्जा, तिसु होज्जमाणे तिसु संजल-णमाणमायालोमेसु होज्जा, दोसु होज्जमाणे दोसु संजलणमायालोमेसु होज्जा, एगम्मि होज्जमाणे एगम्मि संजलणलोमे होज्जा, नियंठे णं पुच्छा, गोयमा ! णो सकसाई

होजा अकसाई होजा, जइ अकसाई होजा किं उवसंतकसाई होजा खीणकसाई होजा ? गोयमा ! उवसंतकसाई वा होजा खीणकसाई वा होजा, सिणाए एवं चेव, नवरं णो उवसंतकसाई होजा, खीणकसाई होजा १८ ॥ ७६७ ॥ पुलए णं भंते ! किं सलेस्से होजा अलेस्से होजा ? गोयमा ! सलेस्से होजा णो अलेस्से होजा, जइ सलेस्से होजा से णं भंते ! कइसु लेस्सासु होजा ? गोयमा ! तिसु विसुद्धलेस्सासु होजा, तं०-तेउलेस्साए पम्हलेस्साए सुक्कलेस्साए, एवं वउसस्तवि, एवं पडिसेवणाकुसीलेवि, कसायकुसीले पुच्छा, गोयमा ! सलेस्से होजा णो अलेस्से होजा, जइ सलेस्से होजा से णं भंते ! कइसु लेस्सासु होजा ? गोयमा ! छसु लेस्सासु होजा, तं०-कण्हलेस्साए जाव सुक्कलेस्साए, नियंठे णं भंते ! पुच्छा, गोयमा ! सलेस्से होजा णो अलेस्से होजा, जइ सलेस्से होजा से णं भंते ! कइसु लेस्सासु होजा ? गोयमा ! एगाए सुक्कलेस्साए होजा, सिणाए पुच्छा, गोयमा ! सलेस्से वा होजा अलेस्से वा होजा, जइ सलेस्से होजा से णं भंते ! कइसु लेस्सासु होजा ? गोयमा ! एगाए परमसुक्कलेस्साए होजा १९ ॥ ७६८ ॥ पुलए णं भंते ! किं वड्डमाणपरिणामे होजा ही(हा)यमाणपरिणामे होजा अवट्ठियपरिणामे होजा ? गोयमा ! वड्डमाणपरिणामे वा होजा हीयमाणपरिणामे वा होजा अवट्ठियपरिणामे वा होजा, एवं जाव कसायकुसीले । नियंठे णं पुच्छा, गोयमा ! वड्डमाणपरिणामे होजा, णो हीयमाणपरिणामे होजा, अवट्ठियपरिणामे वा होजा, एवं सिणाएवि ॥ पुलए णं भंते ! केवइयं कालं वड्डमाणपरिणामे होजा ? गोयमा ! जहन्नेणं एक्कं समयं उक्कोसेणं अंतोमुहुत्तं, केवइयं कालं हीयमाणपरिणामे होजा ? गोयमा ! जहन्नेणं एक्कं समयं उक्कोसेणं अंतोमुहुत्तं, केवइयं कालं अवट्ठियपरिणामे होजा ? गोयमा ! जहन्नेणं एक्कं समयं उक्कोसेणं सत्त समया, एवं जाव कसायकुसीले । नियंठे णं भंते ! केवइयं कालं वड्डमाणपरिणामे होजा ? गोयमा ! जहन्नेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्ठियपरिणामे होजा ? गोयमा ! जहन्नेणं एक्कं समयं उक्कोसेणं अंतोमुहुत्तं । सिणाए णं भंते ! केवइयं कालं वड्डमाणपरिणामे होजा ? गोयमा ! जहन्नेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्ठियपरिणामे होजा ? गोयमा ! जहन्नेणं अंतोमुहुत्तं उक्कोसेणं देसूणा पुव्वकोडी २० ॥ ७६९ ॥ पुलए णं भंते ! कइ कम्मप्पगडीओ वंधइ ? गोयमा ! आउयवज्जाओ सत्त कम्मप्पगडीओ वंधइ । वउसे पुच्छा, गोयमा ! सत्तविहवंधए वा अट्ठविहवंधए वा, सत्त वंधमाणे आउयवज्जाओ सत्त कम्मप्पगडीओ वंधइ, अट्ठ वंधमाणे पडिपुच्चाओ अट्ठ कम्मप्पगडीओ वंधइ, एवं पडिसेवणाकुसीलेवि, कसायकुसीले णं पुच्छा, गोयमा !

सत्तविहवंधए वा अट्टविहवंधए वा छव्विहवंधए वा, सत्त वंधमाणे आउयवज्जाओ
सत्त कम्मप्पगडीओ वंधइ, अट्ट वंधमाणे पडिपुत्ताओ अट्ट कम्मप्पगडीओ वंधइ,
छ वंधमाणे आउयमोहणिज्जवज्जाओ छक्कम्मप्पगडीओ वंधइ । नियंठे णं पुच्छा,
गोयमा ! एगं वेयणिज्जं कम्मं वंधइ । सिणाए णं पुच्छा, गोयमा ! एगविहवंधए वा
अवंधए वा, एगं वंधमाणे एगं वेयणिज्जं कम्मं वंधइ २१ ॥ ७७० ॥ पुलाए णं
भंते ! कइ कम्मप्पगडीओ वेदेइ ? गोयमा ! नियसं अट्ट कम्मप्पगडीओ वेदेइ, एवं
जाव कसायकुसीले, नियंठे णं पुच्छा, गोयमा ! मोहणिज्जवज्जाओ सत्त कम्मप्पग-
डीओ वेदेइ । सिणाए णं पुच्छा, गोयमा ! वेयणिज्जआउयनामगोयाओ चत्तारि
कम्मप्पगडीओ वेदेइ २२ ॥ ७७१ ॥ पुलाए णं भंते ! कइ कम्मप्पगडीओ उदीरेइ ?
गोयमा ! आउयवेयणिज्जवज्जाओ छ कम्मप्पगडीओ उदीरेइ । वउसे णं पुच्छा,
गोयमा ! सत्तविहउदीरेए वा अट्टविहउदीरेए वा छव्विहउदीरेए वा, सत्त उदीरेमाणे
आउयवज्जाओ सत्त कम्मप्पगडीओ उदीरेइ, अट्ट उदीरेमाणे पडिपुत्ताओ अट्ट
कम्मप्पगडीओ उदीरेइ, छ उदीरेमाणे आउयवेयणिज्जवज्जाओ छ कम्मप्पगडीओ
उदीरेइ, पडिसेवणाकुसीले एवं चेव, कसायकुसीले णं पुच्छा, गोयमा ! सत्तविह-
उदीरेए वा अट्टविहउदीरेए वा छव्विहउदीरेए वा पंचविहउदीरेए वा, सत्त उदीरे-
माणे आउयवज्जाओ सत्त कम्मप्पगडीओ उदीरेइ, अट्ट उदीरेमाणे पडिपुत्ताओ
अट्ट कम्मप्पगडीओ उदीरेइ, छ उदीरेमाणे आउयवेयणिज्जवज्जाओ छ कम्मप्पग-
डीओ उदीरेइ, पंच उदीरेमाणे आउयवेयणिज्जमोहणिज्जवज्जाओ पंच कम्मप्पगडीओ
उदीरेइ । नियंठे णं पुच्छा, गोयमा ! पंचविहउदीरेए वा दुविहउदीरेए वा, पंच
उदीरेमाणे आउयवेयणिज्जमोहणिज्जवज्जाओ पंच कम्मप्पगडीओ उदीरेइ, दो उदी-
रेमाणे णामं च गोयं च उदीरेइ । सिणाए णं पुच्छा, गोयमा ! दुविहउदीरेए वा
अणुदीरेए वा, दो उदीरेमाणे णामं च गोयं च उदीरेइ २३ ॥ ७७२ ॥ पुलाए
णं भंते ! पुलायत्तं जहमाणे किं जहइ किं उवसंपज्जइ ? गोयमा ! पुलायत्तं जहइ
कसायकुसीलं वा अरसंजमं वा उवसंपज्जइ, वउसे णं भंते ! वउसत्तं जहमाणे किं
जहइ किं उवसंपज्जइ ? गोयमा ! वउसत्तं जहइ पडिसेवणाकुसीलं वा कसायकुसीलं
वा अस्संजमं वा संजमासंजमं वा उवसंपज्जइ, पडिसेवणाकुसीले णं भंते ! पडि-
सेवणाकुसीलत्तं० पुच्छा, गोयमा ! पडिसेवणाकुसीलत्तं जहइ वउसं वा कसायकुसीलं
वा अस्संजमं वा संजमासंजमं वा उवसंपज्जइ, कसायकुसीले पुच्छा, गोयमा !
कसायकुसीलत्तं जहइ पुलायं वा वउसं वा पडिसेवणाकुसीलं वा णियंठं वा अस्संजमं
वा संजमासंजमं वा उवसंपज्जइ, णियंठे णं पुच्छा, गोयमा ! नियंठत्तं जहइ कसाय-

कुसीलं वा सिणायं वा अस्संजमं वा उवसंपज्जइ । सिणाए णं पुच्छा, गोयमा ! सिणा-
यत्तं जहइ सिद्धिगइं उवसंपज्जइ २४ ॥ ७७३ ॥ पुलाए णं भंते ! किं सन्नोवउत्ते
होज्जा नोसन्नोवउत्ते होज्जा ? गोयमा ! णो सन्नोवउत्ते होज्जा नोसन्नोवउत्ते होज्जा ।
वउसे णं भंते ! पुच्छा, गोयमा ! सन्नोवउत्ते वा होज्जा नोसन्नोवउत्ते वा होज्जा,
एवं पडिसेवणाकुसीलेवि, एवं कसायकुसीलेवि, नियंठे सिणाए य जहा पुलाए
२५ ॥ ७७४ ॥ पुलाए णं भंते ! किं आहारए होज्जा अणाहारए होज्जा ? गोयमा !
आहारए होज्जा णो अणाहारए होज्जा, एवं जाव नियंठे । सिणाए णं पुच्छा,
गोयमा ! आहारए वा होज्जा अणाहारए वा होज्जा २६ ॥ ७७५ ॥ पुलाए णं
भंते ! कइ भवग्गहणाइं होज्जा ? गोयमा ! जहन्नेणं एक्कं उक्कोसेणं तिन्नि । वउसे णं
पुच्छा, गोयमा ! जहण्णेणं एक्कं उक्कोसेणं अट्ठ, एवं पडिसेवणाकुसीलेवि, एवं कसा-
यकुसीलेवि, नियंठे जहा पुलाए । सिणाए णं पुच्छा, गोयमा ! एक्कं २७ ॥ ७७६ ॥
पुलागस्स णं भंते ! एगभवग्गहणिया केवइया आगरिसा प० ? गोयमा ! जहन्नेणं
एक्को उक्कोसेणं तिन्नि । वउसस्स णं पुच्छा, गोयमा ! जहन्नेणं एक्को उक्कोसेणं सयग्गसो,
एवं पडिसेवणाकुसीलेवि, कसायकुसीले एवं चेव । णियंठस्स णं पुच्छा, गोयमा !
जहन्नेणं एक्को उक्कोसेणं दोन्नि । सिणायस्स णं पुच्छा, गोयमा ! एक्को ॥ पुलागस्स
णं भंते ! नाणाभवग्गहणिया केवइया आगरिसा प० ? गोयमा ! जहन्नेणं दोन्नि
उक्कोसेणं सत्त । वउसस्स णं पुच्छा, गोयमा ! जहन्नेणं दोन्नि उक्कोसेणं सहस्सग्गसो,
एवं जाव कसायकुसीलस्स । नियंठस्स णं पुच्छा, गोयमा ! जहन्नेणं दोन्नि उक्कोसेणं
पंच । सिणायस्स णं पुच्छा, गोयमा ! नत्थि एक्कोवि २८ ॥ ७७७ ॥ पुलाए णं भंते !
कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणावि अंतोमुहुत्तं । वउसे
णं पुच्छा, गोयमा ! जहण्णेणं एक्कं समयं उक्कोसेणं देसूणा पुव्वकोडी, एवं पडिसेवणा-
कुसीलेवि, कसायकुसीलेवि एवं चेव । नियंठे णं पुच्छा, गोयमा ! जहण्णेणं एक्कं समयं
उक्कोसेणं अंतोमुहुत्तं । सिणाए णं पुच्छा, गोयमा ! जहन्नेणं अंतोमुहुत्तं उक्कोसेणं देसूणा
पुव्वकोडी ॥ पुलागा णं भंते ! कालओ केवच्चिरं होइ ? गोयमा ! जहन्नेणं एक्कं समयं
उक्कोसेणं अंतोमुहुत्तं । वउसा णं भंते ! पुच्छा, गोयमा ! सव्वद्धं, एवं जाव कसाय-
कुसीला, नियंठा जहा पुलागा, सिणाया जहा वउसा २९ ॥ ७७८ ॥ पुलागस्स
णं भंते ! केवइयं कालं अंतरं होइ ? गोयमा ! जहण्णेणं अंतोमुहुत्तं उक्कोसेणं अणंतं
कालं अणंताओ ओसप्पिणिउस्सप्पिणीओ कालओ, खेत्ताओ अवद्धं पोग्गलपरियट्ठं
देसूणं, एवं जाव नियंठस्स । सिणायस्स णं पुच्छा, गोयमा ! नत्थि अंतरं ॥ पुलागाणं
भंते ! केवइयं कालं अंतरं होइ ? गोयमा ! जहण्णेणं एक्कं समयं उक्कोसेणं संखे-

ज्जाइं वासाइं । वउसाणं भंते ! पुच्छा, गोयमा ! नत्थि अंतरं, एवं जाव कसाय-
कुसीलाणं । नियंठाणं पुच्छा, गोयमा ! जहण्णेणं एक्को समयं उक्कोसेणं छम्मासा,
सिणायारणं जहा वउसाणं ३० ॥ ७७९ ॥ पुलागस्स णं भंते ! कइ समुग्घाया
प० ? गोयमा ! तिन्नि समुग्घाया प०, तं०-वेयणासमुग्घाए कसायसमुग्घाए मारणं-
तियसमुग्घाए, वउसस्स णं भंते ! पुच्छा, गोयमा ! पंच समुग्घाया प०, तं०-
वेयणासमुग्घाए जाव तेयासमुग्घाए, एवं पडिसेवणाकुसीलेवि, कसायकुसीलस्स
पुच्छा, गोयमा ! छ समुग्घाया प०, तं०-वेयणासमुग्घाए जाव आहारगसमुग्घाए,
नियंठस्स णं पुच्छा, गोयमा ! नत्थि एक्कोवि, सिणायस्स णं पुच्छा, गोयमा ! एगे
केवलिसमुग्घाए प० ३१ ॥ ७८० ॥ पुलाए णं भंते ! लोगस्स किं संखेज्जइभागे
होज्जा १, असंखेज्जइभागे होज्जा २, संखेज्जेसु भागेषु होज्जा ३, असंखेज्जेसु भागेषु
होज्जा ४, सव्वलोए होज्जा ५ ? गोयमा ! णो संखेज्जइभागे होज्जा, असंखेज्जइभागे
होज्जा, णो संखेज्जेसु भागेषु होज्जा, (णो) असंखेज्जेसु भागेषु होज्जा, णो सव्वलोए
होज्जा, एवं जाव नियंठे । सिणाए णं पुच्छा, गोयमा ! णो संखेज्जइभागे होज्जा
असंखेज्जइभागे होज्जा णो संखेज्जेसु भागेषु होज्जा असंखेज्जेसु भागेषु होज्जा सव्व-
लोए वा होज्जा ३२ ॥ ७८१ ॥ पुलाए णं भंते ! लोगस्स किं संखेज्जइभागं फुसइ
असंखेज्जइभागं फुसइ० ? एवं जहा ओगाहणा भणिया तहा फुसणावि भाणियव्वा
जाव सिणाए ३३ ॥ ७८२ ॥ पुलाए णं भंते ! कयरम्मि भावे होज्जा ? गोयमा !
खओवसमिए भावे होज्जा, एवं जाव कसायकुसीले । नियंठे पुच्छा, गोयमा !
उवसमिए वा भावे होज्जा खइए वा भावे होज्जा । सिणाए पुच्छा, गोयमा ! खइए
भावे होज्जा ३४ ॥ ७८३ ॥ पुलाया णं भंते ! एगसमएणं केवइया होज्जा ?
गोयमा ! पडिवज्जमाणए पडुच्च सिय अत्थि सिय नत्थि, जइ अत्थि जहन्नेणं एक्को
वा दो वा तिन्नि वा उक्कोसेणं सयपुहुत्तं, पुव्वपडिवन्नए पडुच्च सिय अत्थि सिय
नत्थि, जइ अत्थि जहन्नेणं एक्को वा दो वा तिन्नि वा उक्कोसेणं सहस्सपुहुत्तं । वउसा
णं भंते ! एगसमएणं० पुच्छा, गोयमा ! पडिवज्जमाणए पडुच्च सिय अत्थि सिय
नत्थि, जइ अत्थि जहन्नेणं एक्को वा दो वा तिन्नि वा उक्कोसेणं सयपुहुत्तं, पुव्वपडि-
वन्नए पडुच्च जहन्नेणं कोडिसयपुहुत्तं उक्कोसेणवि कोडिसयपुहुत्तं, एवं पडिसेवणा-
कुसीलेवि । कसायकुसीलाणं पुच्छा, गोयमा ! पडिवज्जमाणए पडुच्च सिय अत्थि सिय
नत्थि, जइ अत्थि जहन्नेणं एक्को वा दो वा तिन्नि वा उक्कोसेणं (कोडि)सहस्सपुहुत्तं,
पुव्वपडिवन्नए पडुच्च जहन्नेणं कोडिसहस्सपुहुत्तं उक्कोसेणवि कोडिसहस्सपुहुत्तं ।
नियंठाणं पुच्छा, गोयमा ! पडिवज्जमाणए पडुच्च सिय अत्थि सिय नत्थि, जइ

अत्थि जहन्नेणं एक्को वा दो वा तिन्नि वा उक्कोसेणं वावट्ठं सयं, अट्ठसयं खवगाणं चउप्पन्नं उव(स)सामगाणं, पुव्वपडिवन्नए पडुच्च सिय अत्थि सिय नत्थि, जइ अत्थि जहन्नेणं एक्को वा दो वा तिन्नि वा उक्कोसेणं सयपुहुत्तं । सिणायाणं पुच्छा, गोयमा ! पडिवज्जमाणए पडुच्च सिय अत्थि सिय नत्थि, जइ अत्थि जहन्नेणं एक्को वा दो वा तिन्नि वा उक्कोसेणं अट्ठसयं, पुव्वपडिवन्नए पडुच्च जहन्नेणं कोडिपुहुत्तं उक्कोसेणवि कोडिपुहुत्तं ॥ एएसि णं भंते ! पुलगवउसपडिसेवणाकुसीलकसायकुसीलनियंठ-सिणायाणं कयरे २ जाव विसेसाहिया वा ? गोयमा ! सव्वत्थोवा नियंठा, पुलगा संखेज्जगुणा, सिणाया संखेज्जगुणा, वउसा संखेज्जगुणा, पडिसेवणाकुसीला संखेज्जगुणा, कसायकुसीला संखेज्जगुणा । सेवं भंते ! सेवं भंते ! त्ति जाव विहरइ ॥ ७८४ ॥

पणवीसइमस्स सयस्स छट्ठो उद्देसो समत्तो ॥

कइ णं भंते ! संजया प० ? गोयमा ! पंच संजया प०, तं०—सामाइयसंजए छेओवट्ठावणियसंजए परिहारविमुद्धियसंजए सुहुमसंपरायसंजए अहक्खायसंजए, सामाइयसंजए णं भंते ! कइविहे पन्नत्ते ? गोयमा ! दुविहे पन्नत्ते, तंजहा—इत्तरिए य आवकहिए य, छेओवट्ठावणियसंजए णं पुच्छा, गोयमा ! दुविहे प०, तं०—साइयारे य निरइयारे य, परिहारविमुद्धियसंजए पुच्छा, गोयमा ! दुविहे प०, तं०—णिव्विसमाणए य निव्विट्ठकाइए य, सुहुमसंपराय० पुच्छा, गोयमा ! दुविहे प०, तं०—संकिलिस्समाणए य विमुद्धमाणए य, अहक्खायसंजए पुच्छा, गोयमा ! दुविहे प०, तं०—छउमत्थे य केवली य ॥ गाहाओ—सामाइयंमि उ कए चाउज्जामं अणुत्तरं धम्मं । तिविहेण फासयंतो सामाइयसंजओ स खलु ॥ १ ॥ छेत्तण उ परियाणं पोराणं जो ठवेइ अप्पाणं । धम्मंमि पंचजामे छेओवट्ठावणो स खलु ॥ २ ॥ परिहरइ जो विमुद्धं तु पंचजामं अणुत्तरं धम्मं । तिविहेण फासयंतो परिहारियसंजओ स खलु ॥ ३ ॥ लोभाणु वेययंतो जो खलु उवसामओ व खवओ वा । सो सुहुमसंपराओ अहक्खाया ऊणओ किचि ॥ ४ ॥ उवसंते खीणंमि व जो खलु कम्मंमि मोहणिज्जंमि । छउमत्थो व जिणो वा अहक्खाओ संजओ स खलु ॥ ५ ॥ ७८५ ॥ सामाइयसंजए णं भंते ! कि सवेदए होज्जा अवेदए होज्जा ? गोयमा ! सवेदए वा होज्जा अवेदए वा होज्जा, जइ सवेदए होज्जा० एवं जहा कसायकुसीले तहेव निरवसेसं, एवं छेओवट्ठावणियसंजएवि, परिहारविमुद्धियसंजओ जहा पुलओ, सुहुमसंपरायसंजओ अहक्खायसंजओ य जहा नियंठो २ । सामाइयसंजए णं भंते ! कि सरागे होज्जा वीयरगे होज्जा ? गोयमा ! सरागे होज्जा नो वीयरगे होज्जा, एवं जाव सुहुमसंपरायसंजए, अहक्खायसंजए जहा नियंठे ३ ॥ सामाइयसंजए णं भंते ! किं

ठियकप्पे होज्जा अट्ठियकप्पे होज्जा ? गोयमा ! ठियकप्पे वा होज्जा अट्ठियकप्पे वा होज्जा, छेदोवट्ठावणियसंजए पुच्छा, गोयमा ! ठियकप्पे होज्जा नो अट्ठियकप्पे होज्जा, एवं परिहारविसुद्धियसंजएवि, सेसा जहा सामाइयसंजए । सामाइयसंजए णं भंते ! किं जिणकप्पे होज्जा थेरकप्पे होज्जा कप्पातीते होज्जा ? गोयमा ! जिणकप्पे वा होज्जा जहा कसायकुसीले तहेव निरवसेसं, छेदोवट्ठावणिओ परिहार-विसुद्धिओ य जहा वउसो, सेसा जहा नियंठे ४ ॥ ७८६ ॥ सामाइयसंजए णं भंते ! किं पुलाए होज्जा वउसे जाव सिणाए होज्जा ? गोयमा ! पुलाए वा होज्जा वउसे जाव कसायकुसीले वा होज्जा, नो नियंठे होज्जा नो सिणाए होज्जा, एवं छेदो-वट्ठावणिएवि, परिहारविसुद्धियसंजए णं भंते ! पुच्छा, गोयमा ! नो पुलाए नो वउसे नो पडिसेवणाकुसीले होज्जा, कसायकुसीले होज्जा, नो नियंठे होज्जा नो सिणाए होज्जा, एवं सुहुमसंपराएवि, अहक्खायसंजए पुच्छा, गोयमा ! नो पुलाए होज्जा जाव नो कसायकुसीले होज्जा, नियंठे वा होज्जा सिणाए वा होज्जा ५ ॥ सामाइय-संजए णं भंते ! किं पडिसेवए होज्जा अपडिसेवए होज्जा ? गोयमा ! पडिसेवए वा होज्जा अपडिसेवए वा होज्जा, जइ पडिसेवए होज्जा किं मूलगुणपडिसेवए होज्जा० सेसं जहा पुलागस्स, जहा सामाइयसंजए एवं छेदोवट्ठावणिएवि, परिहारविसुद्धिय-संजए पुच्छा, गोयमा ! नो पडिसेवए होज्जा अपडिसेवए होज्जा, एवं जाव अह-क्खायसंजए ६ ॥ सामाइयसंजए णं भंते ! कइसु नाणेषु होज्जा ? गोयमा ! दोसु वा तिसु वा चउसु वा नाणेषु होज्जा, एवं जहा कसायकुसीलस्स तहेव चत्तारि नाणाइं भयणाए, एवं जाव सुहुमसंपरा(इ)ए, अहक्खायसंजयस्स पंच नाणाइं भय-णाए जहा नाणुद्देसए । सामाइयसंजए णं भंते ! केवइयं सुयं अहिज्जेज्जा ? गोयमा ! जहन्नेणं अट्ठ पवयणमायाओ जहा कसायकुसीले, एवं छेदोवट्ठावणिएवि, परिहार-विसुद्धियसंजए पुच्छा, गोयमा ! जहन्नेणं नवमस्स पुव्वस्स तइयं आयारवत्थुं उक्कोसेणं असंपुन्नाइं दस पुव्वाइं अहिज्जेज्जा, सुहुमसंपरायसंजए जहा सामाइयसंजए, अहक्खायसंजए पुच्छा, गोयमा ! जहन्नेणं अट्ठ पवयणमायाओ उक्कोसेणं चउद्दस पुव्वाइं अहिज्जेज्जा सुयवइरित्ते वा होज्जा ७ । सामाइयसंजए णं भंते ! किं तित्थे होज्जा अतित्थे होज्जा ? गोयमा ! तित्थे वा होज्जा अतित्थे वा होज्जा जहा कसाय-कुसीले, छेदोवट्ठावणिए परिहारविसुद्धिए (सुहुमसंपराए) य जहा पुलाए, सेसा जहा सामाइयसंजए ८ । सामाइयसंजए णं भंते ! किं सल्लिगे होज्जा अन्नल्लिगे होज्जा गिहि-ल्लिगे होज्जा ? जहा पुलाए, एवं छेदोवट्ठावणिएवि, परिहारविसुद्धियसंजए णं भंते ! किं० पुच्छा, गोयमा ! दव्वल्लिगं पि भावल्लिगं पि पडुच्च सल्लिगे होज्जा नो अन्नल्लिगे

होज्जा नो गिहिलिंगे होज्जा, सेसा जहा सामाइयसंजए ९ । सामाइयसंजए णं भंते ! कइसु सरीरेसु होज्जा ? गोयमा ! तिसु वा चउसु वा पंचसु वा होज्जा जहा कसाय-कुसीले, एवं छेओवट्ठावणिएवि, सेसा जहा पुलाए १० । सामाइयसंजए णं भंते ! किं कम्मभूमीए होज्जा अकम्मभूमीए होज्जा ? गोयमा ! जम्मणं संतिभावं च पडुच्च कम्मभूमीए होज्जा नो अकम्मभूमीए जहा वउसे, एवं छेओवट्ठावणिएवि, परिहारवि-सुद्धिए य जहा पुलाए, सेसा जहा सामाइयसंजए ११ ॥ ७८७ ॥ सामाइयसंजए णं भंते ! किं ओसप्पिणीकाले होज्जा उस्सप्पिणीकाले होज्जा नोओसप्पिणिनोउस्सप्पि-णिनाकाले होज्जा ? गोयमा ! ओसप्पिणीकाले जहा वउसे, एवं छेओवट्ठावणिएवि, नवरं जम्मणं संतिभावं (च) पडुच्च चउसुवि पलिभागेसु नत्थि, साहरणं पडुच्च अन्नयरे पलिभागे होज्जा, सेसं तं चेव, परिहारविसुद्धिए पुच्छा, गोयमा ! ओस-प्पिणिकाले वा होज्जा उस्सप्पिणिकाले वा होज्जा नोओसप्पिणिनोउस्सप्पिणिकाले वा होज्जा, जइ ओसप्पिणिकाले होज्जा जहा पुलाओ, उस्सप्पिणिकालेवि जहा पुलाओ, सुहुमसंपरा(इ)ओ जहा नियंठो, एवं अहक्खाओवि १२ ॥ ७८८ ॥ सामा-इयसंजए णं भंते ! कालगए समाणे किं गइं गच्छइ ? गोयमा ! देवगइं गच्छइ, देवगइं गच्छमाणे किं भवणवासीसु उववज्जेज्जा वाणमंतरेसु उववज्जेज्जा जोइसिएसु उववज्जेज्जा वेमाणिएसु उववज्जेज्जा ? गोयमा ! णो भवणवासीसु उववज्जेज्जा जहा कसायकुसीले, एवं छेओवट्ठावणिएवि, परिहारविसुद्धिए जहा पुलाए, सुहुमसंपराए जहा नियंठो, अहक्खाए पुच्छा, गोयमा ! एवं अहक्खायसंजएवि जाव अजहन्नम-णुक्कोसेणं अणुत्तरविमाणेसु उववज्जेज्जा, अत्थेगइ(या)ए सिज्झ(न्ति)इ जाव अंतं करे-(न्ति)इ ॥ सामाइयसंजए णं भंते ! देवलोगेसु उववज्जमाणे किं इंदत्ताए उववज्जइ पुच्छा, गोयमा ! अविराहणं पडुच्च एवं जहा कसायकुसीले, एवं छेओवट्ठावणिएवि, परिहारविसुद्धिए जहा पुलाए, सेसा जहा नियंठो । सामाइयसंजयस्स णं भंते ! देव-लोगेसु उववज्जमाणस्स केवइयं कालं ठिई प० ? गोयमा ! जहन्नेणं दो पलिओवमाइं उक्कोसेणं तेत्तीसं सागरोवमाइं, एवं छेओवट्ठावणिएवि, परिहारविसुद्धियस्स पुच्छा, गोयमा ! जहन्नेणं दो पलिओवमाइं उक्कोसेणं अट्ठारसं सागरोवमाइं, सेसाणं जहा नियंठस्स १३ ॥ ७८९ ॥ सामाइयसंजयस्स णं भंते ! केवइया संजमट्ठाणा प० ? गोयमा ! असंखेज्जा संजमट्ठाणा प०, एवं जाव परिहारविसुद्धियस्स, सुहुमसंपराय-संजयस्स पुच्छा, गोयमा ! असंखेज्जा अंतोमुहुत्तिया संजमट्ठाणा प०, अहक्खाय-संजयस्स पुच्छा, गोयमा ! एगे अजहन्नमणुक्कोसए संजमट्ठाणे प० । एएसि णं भंते ! सामाइयछेओवट्ठावणियपरिहारविसुद्धियसुहुमसंपरायअहक्खायसंजयाणं संजमट्ठाणाणं

कयरे २ जाव विसेसाहिया वा ? गोयमा ! सव्वत्थोवे अहक्खायसंजयस्स एणे
 अजहन्नमणुक्कोसए संजमट्ठाणे, सुहुमसंपरायसंजयस्स अंतोमुहुत्तिया संजमट्ठाणा
 असंखेज्जगुणा, परिहारविसुद्धियसंजयस्स संजमट्ठाणा असंखेज्जगुणा, सामाइयसंजयस्स
 छेदोवट्ठावणियसंजयस्स य एएसि णं संजमट्ठाणा दोण्हवि तुल्ला असंखेज्जगुणा १४
 ॥ ७९० ॥ सामाइयसंजयस्स णं भंते ! केवइया चरित्तपज्जवा प० ? गोयमा !
 अणंता चरित्तपज्जवा प०, एवं जाव अहक्खायसंजयस्स ॥ सामाइयसंजए णं भंते !
 सामाइयसंजयस्स सट्ठाणसन्निगासेणं चरित्तपज्जवेहिं किं हीणे तुल्ले अब्भहिए ?
 गोयमा ! सिय हीणे छट्ठाणवडिए, सामाइयसंजए णं भंते ! छेदोवट्ठावणियसंजयस्स
 परट्ठाणसन्निगासेणं चरित्तपज्जवेहिं० पुच्छा, गोयमा ! सिय हीणे छट्ठाणवडिए, एवं
 परिहारविसुद्धियस्सवि, सामाइयसंजए णं भंते ! सुहुमसंपरायसंजयस्स परट्ठाण-
 सन्निगासेणं चरित्तपज्जवे० पुच्छा, गोयमा ! हीणे नो तुल्ले नो अब्भहिए, अणंतगुण-
 हीणे, एवं अहक्खायसंजयस्सवि, एवं छेदोवट्ठावणिएवि, हेट्ठिल्लेसु तिसुवि समं
 छट्ठाणवडिए, उवरिल्लेसु दोसुवि तहेव हीणे, जहा छेदोवट्ठावणिए तथा परिहारविसुद्धि-
 एवि, सुहुमसंपरायसंजए णं भंते ! सामाइयसंजयस्स परट्ठाण० पुच्छा, गोयमा ! नो
 हीणे नो तुल्ले अब्भहिए अणंतगुणमब्भहिए, एवं छेदोवट्ठावणियपरिहारविसुद्धिएसुवि
 समं सट्ठाणे सिय हीणे नो (सिय)तुल्ले सिय अब्भहिए, जइ हीणे अणंतगुणहीणे, अह
 (जइ) अब्भहिए अणंतगुणमब्भहिए, सुहुमसंपरायसंजयस्स अहक्खायसंजयस्स पर-
 ट्ठाण० पुच्छा, गोयमा ! हीणे नो तुल्ले नो अब्भहिए, अणंतगुणहीणे, अहक्खाए हेट्ठि-
 ल्लणं चउण्हवि नो हीणे नो तुल्ले अब्भहिए अणंतगुणमब्भहिए, सट्ठाणे नो हीणे तुल्ले
 नो अब्भहिए । एएसि णं भंते ! सामाइयछेदोवट्ठावणियपरिहारविसुद्धियसुहुमसंपराय-
 अहक्खायसंजयाणं जहन्नक्कोसगाणं चरित्तपज्जवाणं कयरे २ जाव विसेसाहिया
 वा ? गोयमा ! सामाइयसंजयस्स छेदोवट्ठावणियसंजयस्स य एएसि णं जहन्नगा
 चरित्तपज्जवा दोण्हवि तुल्ला सव्वत्थोवा, परिहारविसुद्धियसंजयस्स जहन्नगा चरित्त-
 पज्जवा अणंतगुणा तस्स चेव उक्कोसगा चरित्तपज्जवा अणंतगुणा, सामाइयसंजयस्स
 छेदोवट्ठावणियसंजयस्स य एएसि णं उक्कोसगा चरित्तपज्जवा दोण्हवि तुल्ला अणंत-
 गुणा, सुहुमसंपरायसंजयस्स जहन्नगा चरित्तपज्जवा अणंतगुणा तस्स चेव उक्कोसगा
 चरित्तपज्जवा अणंतगुणा, अहक्खायसंजयस्स अजहन्नमणुक्कोसगा चरित्तपज्जवा
 अणंतगुणा १५ ॥ सामाइयसंजए णं भंते ! कि सजोगी होज्जा अजोगी होज्जा ?
 गोयमा ! सजोगी जहा पुलाए, एवं जाव सुहुमसंपरायसंजए, अहक्खाए जहा
 सिणाए १६ ॥ सामाइयसंजए णं भंते ! कि सागारोवउत्ते होज्जा अगागारोवउत्ते

होज्जा ? गोयमा ! सागारोवउत्ते जहा पुलाए, एवं जाव अहक्खाए, नवरं सुहुमसंपराए सागारोवउत्ते होज्जा नो अणागारोवउत्ते होज्जा १७ ॥ सामाइयसंजए णं भंते ! किं सकसाई होज्जा अकसाई होज्जा ? गोयमा ! सकसाई होज्जा नो अकसाई होज्जा, जहा कसायकुसीले, एवं छेदोवद्वावणिएवि, परिहारविमुद्धिए जहा पुलाए, सुहुमसंपरायसंजए पुच्छा, गोयमा ! सकसाई होज्जा नो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! एगम्मि संजलणलोभे होज्जा, अहक्खायसंजए जहा नियंठे १८ ॥ सामाइयसंजए णं भंते ! किं सलेस्से होज्जा अलेस्से होज्जा ? गोयमा ! सलेस्से होज्जा जहा कसायकुसीले, एवं छेदोवद्वावणिएवि, परिहारविमुद्धिए जहा पुलाए, सुहुमसंपराए जहा नियंठे, अहक्खाए जहा सिणाए, नवरं जइ सलेस्से होज्जा एगाए सुक्कलेस्साए होज्जा १९ ॥ ७९१ ॥ सामाइयसंजए णं भंते ! किं बड्डमाणपरिणामे होज्जा हीयमाणपरिणामे होज्जा अवट्ठियपरिणामे होज्जा ? गोयमा ! बड्डमाणपरिणामे होज्जा जहा पुलाए, एवं जाव परिहारविमुद्धिए, सुहुमसंपराय० पुच्छा, गोयमा ! बड्डमाणपरिणामे वा होज्जा हीयमाणपरिणामे वा होज्जा नो अवट्ठियपरिणामे होज्जा, अहक्खाए जहा नियंठे । सामाइयसंजए णं भंते ! केवइयं कालं बड्डमाणपरिणामे होज्जा ? गोयमा ! जहण्णेणं एकं समयं जहा पुलाए, एवं जाव परिहारविमुद्धिए, सुहुमसंपरायसंजए णं भंते ! केवइयं कालं बड्डमाणपरिणामे होज्जा ? गोयमा ! जहण्णेणं एकं समयं उक्कोसेणं अंतोमुहुत्तं, केवइयं कालं हीयमाणपरिणामे होज्जा एवं चेव, अहक्खायसंजए णं भंते ! केवइयं कालं बड्डमाणपरिणामे होज्जा ? गोयमा ! जहण्णेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्ठियपरिणामे होज्जा ? गोयमा ! जहण्णेणं एकं समयं उक्कोसेणं देसूणा पुच्चक्कोडी २० ॥ ७९२ ॥ सामाइयसंजए णं भंते ! कइ कम्मप्पगडीओ वंधइ ? गोयमा ! सत्तविहवंधए वा अट्ठविहवंधए वा एवं जहा वउसे, एवं जाव परिहारविमुद्धिए, सुहुमसंपरायसंजए पुच्छा, गोयमा ! आउयमोहणिज्वज्जाओ छ कम्मप्पगडीओ वंधइ, अहक्खायसंजए जहा सिणाए २१ ॥ सामाइयसंजए णं भंते ! कइ कम्मप्पगडीओ वेदेइ ? गोयमा ! नियमं अट्ठ कम्मप्पगडीओ वेदेइ, एवं जाव सुहुमसंपराए, अहक्खाए पुच्छा, गोयमा ! सत्तविहवेदए वा चउव्विहवेदए वा, सत्त वेदेमाणे मोहणिज्वज्जाओ सत्त कम्मप्पगडीओ वेदेइ, चत्तारि वेदेमाणे वेयणिज्जाउयनामगोयाओ चत्तारि कम्मप्पगडीओ वेदेइ २२ ॥ सामाइयसंजए णं भंते ! कइ कम्मप्पगडीओ उदीरेइ ? गोयमा ! सत्तविह० जहा वउसे, एवं जाव परिहारविमुद्धिए, सुहुमसंपराए पुच्छा, गोयमा ! छव्विहउदीरेण वा पंचविहउदीरेण वा, छ उदीरेमाणे आउयवेयणिज्व-

ज्जाओ छ कम्मप्पगडीओ उदीरेइ, पंच उदीरेमाणे आउयवेयणिज्जमोहणिज्जवज्जाओ
 पंच कम्मप्पगडीओ उदीरेइ, अहक्खायसंजए पुच्छा, गोयमा ! पंचविहउदीरेए वा
 दुविहउदीरेए वा अणुदीरेए वा, पंच उदीरेमाणे आउय० सेसं जहा नियंठस्स २३
 ॥ ७९३ ॥ सामाइयसंजए णं भंते ! सामाइयसंजयत्तं जहमाणे किं जहइ किं उवसं-
 पज्जइ ? गोयमा ! सामाइयसंजयत्तं जहइ छेदोवट्ठावणियसंज(यं)मं वा सुहुमसंपराय-
 संज(यं)मं वा असंजमं वा संजमासंजमं वा उवसंपज्जइ, छेदोवट्ठावणिय० पुच्छा,
 गोयमा ! छेदोवट्ठावणियसंजयत्तं जहइ सामाइयसंजमं वा परिहारविसुद्धियसंजमं वा
 सुहुमसंपरायसंजमं वा असंजमं वा संजमासंजमं वा उवसंपज्जइ, परिहारविसुद्धिए
 पुच्छा, गोयमा ! परिहारविसुद्धियसंजयत्तं जहइ छेदोवट्ठावणियसंज(यं)मं वा असंजमं
 वा उवसंपज्जइ, सुहुमसंपराए पुच्छा, गोयमा ! सुहुमसंपरायसंजयत्तं जहइ सामाइय-
 संज(यं)मं वा छेदोवट्ठावणियसंज(यं)मं वा अहक्खायसंज(यं)मं वा असंजमं वा उवसं-
 पज्जइ, अहक्खायसंजए णं पुच्छा, गोयमा ! अहक्खायसंजयत्तं जहइ सुहुमसंपरायसं-
 ज(यं)मं वा असंजमं वा सिद्धिगइं वा उवसंपज्जइ २४ ॥ ७९४ ॥ सामाइयसंजए णं
 भंते ! किं सन्नोवउत्ते होज्जा नोसन्नोवउत्ते होज्जा ? गोयमा ! सन्नोवउत्ते होज्जा जहा
 वउसे, एवं जाव परिहारविसुद्धिए, सुहुमसंपराए अहक्खाए य जहा पुलाए २५ ॥
 सामाइयसंजए णं भंते ! किं आहारए होज्जा अणाहारए होज्जा ? जहा पुलाए, एवं जाव
 सुहुमसंपराए, अहक्खायसंजए जहा सिणाए २६ ॥ सामाइयसंजए णं भंते ! कइ भवग्ग-
 हणाइं होज्जा ? गोयमा ! जहण्णेणं एकं (समयं) उक्कोसेणं अट्ठ, एवं छेदोवट्ठावणिएवि,
 परिहारविसुद्धिए पुच्छा, गोयमा ! जहण्णेणं एकं उक्कोसेणं तिन्नि, एवं जाव अहक्खाए
 २७ ॥ ७९५ ॥ सामाइयसंजयस्स णं भंते ! एगभवग्गहणिया केवइया आगरिसा
 प० ? गोयमा ! जहन्नेणं जहा वउसस्स, छेदोवट्ठावणियस्स पुच्छा, गोयमा ! जहन्नेणं
 एकं उक्कोसेणं वीसपुहुत्तं, परिहारविसुद्धियस्स पुच्छा, गोयमा ! जहन्नेणं एकं उक्को-
 सेणं तिन्नि, सुहुमसंपरायस्स पुच्छा, गोयमा ! जहन्नेणं ए(क्को)कं उक्कोसेणं चत्तारि,
 अहक्खायस्स पुच्छा, गोयमा ! जहन्नेणं एकं उक्कोसेणं दोन्नि । सामाइयसंजयस्स
 णं भंते ! नाणाभवग्गहणिया केवइया आगरिसा प० ? गोयमा ! जहा वउसे, छेदो-
 वट्ठावणियस्स पुच्छा, गोयमा ! जहन्नेणं दोन्नि उक्कोसेणं उवरिं नवणं सयाणं अंतो
 सहस्सरस, परिहारविसुद्धियस्स जहन्नेणं दोन्नि उक्कोसेणं सत्त, सुहुमसंपरायरस जह-
 न्नेणं दोन्नि उक्कोसेणं नव, अहक्खायरस जहन्नेणं दोन्नि उक्कोसेणं पंच २८ ॥ ७९६ ॥
 सामाइयसंजए णं भंते ! कालओ केवच्चिरं होइ ? गोयमा ! जहन्नेणं एकं समयं
 उक्कोसेणं देसूणएहिं नवहिं वासेहिं रुणिया पुव्वकोडी, एवं छेदोवट्ठावणिएवि,

परिहारविबुद्धिए जहन्नेणं एकं समयं उक्कोसेणं देसूणएहिं एगूणतीसाए वासेहिं
 ऊणिया पुव्वकोडी, सुहुमसंपराए जहा नियंटे, अहक्खाए जहा सामाइयसंजए ।
 सामाइयसंजया णं भंते । कालओ केवचिरं होइ ? गोयमा ! सव्व(द्धं)द्धा, छेदोवट्ठा-
 वणिय० पुच्छा, गोयमा ! जहन्नेणं अट्ठाइज्जाइं वाससयाइं उक्कोसेणं पन्नासं सागरो-
 वमकोडिसयसहस्साइं, परिहारविबुद्धिए पुच्छा, गोयमा ! जहन्नेणं देसूणाइं दो वास-
 सयाइं उक्कोसेणं देसूणाओ दो पुव्वकोडीओ, सुहुमसंपरायसंजया णं भंते । पुच्छा,
 गोयमा ! जहन्नेणं एकं समयं उक्कोसेणं अंतोमुहुत्तं, अहक्खायसंजया जहा सामाइ-
 यसंजया २९ ॥ सामाइयसंजयस्स णं भंते ! केवइयं कालं अंतरं होइ ? गोयमा !
 जहन्नेणं जहा पुलागस्स एवं जाव अहक्खायसंजयस्स, सामाइयसंजयाणं भंते !
 पुच्छा, गोयमा ! नत्थि अंतरं, छेदोवट्ठावणिय० पुच्छा, गोयमा ! जहन्नेणं तेवट्ठिं
 वाससहस्साइं उक्कोसेणं अट्ठारस सागरोवमकोडाकोडीओ, परिहारविबुद्धियस्स पुच्छा,
 गोयमा ! जहन्नेणं चउरासीइं वाससहस्साइं उक्कोसेणं अट्ठारस सागरोवमकोडाको-
 डीओ, सुहुमसंपरायाणं जहा नियंठाणं, अहक्खायाणं जहा सामाइयसंजयाणं ३० ॥
 सामाइयसंजयस्स णं भंते ! कइ समुग्घाया पन्नत्ता ? गोयमा ! छ समुग्घाया
 पन्नत्ता, जहा कसायकुसीलस्स, एवं छेदोवट्ठावणियस्सवि, परिहारविबुद्धियस्स
 जहा पुलागस्स, सुहुमसंपरायस्स जहा नियंठस्स, अहक्खायस्स जहा सिणायस्स
 ३१ ॥ सामाइयसंजए णं भंते ! लोगस्स कि संखेज्जइभागे होज्जा असंखेज्जइभागे०
 पुच्छा, गोयमा ! नो संखेज्जइ० जहा पुलाए, एवं जाव सुहुमसंपराए । अहक्खाय-
 संजए जहा सिणाए ३२ ॥ सामाइयसंजए णं भंते ! लोगस्स किं संखेज्जइभागं
 फुसइ जहेव होज्जा तहेव फुसइ ३३ ॥ सामाइयसंजए णं भंते ! कयरम्मि भावे
 होज्जा ? गोयमा ! उ(खओ)वसमिए भावे होज्जा, एवं जाव सुहुमसंपराए, अहक्खाय-
 संजए पुच्छा, गोयमा ! उवसमिए वा खइए वा भावे होज्जा ३४ । सामाइय-
 संजया णं भंते ! एगसमएणं केवइया होज्जा ? गोयमा ! पडिवज्जमाणए पडुच्च जहा
 कसायकुसीला तहेव निरवसेसं, छेदोवट्ठावणिया पुच्छा, गोयमा ! पडिवज्जमाणए
 पडुच्च सिय अत्थि सिय नत्थि, जइ अत्थि जहन्नेणं एक्को वा दो वा तिन्नि वा उक्कोसेणं
 सयपुहुत्तं, पुव्वपडिवन्नए पडुच्च सिय अत्थि सिय नत्थि, जइ अत्थि जहन्नेणं कोडि-
 सयपुहुत्तं उक्कोसेणवि कोडिसयपुहुत्तं, परिहारविबुद्धिया जहा पुलागा, सुहुमसंपराया
 जहा नियंठा, अहक्खायसंजयाणं पुच्छा, गोयमा ! पडिवज्जमाणए पडुच्च सिय अत्थि
 सिय नत्थि, जइ अत्थि जहन्नेणं एक्को वा दो वा तिन्नि वा उक्कोसेणं वावट्ठसयं अट्ठु-
 त्तरसयं खवगाणं चउप्पन्नं उवसामगाणं, पुव्वपडिवन्नए पडुच्च जहन्नेणं कोडिपुहुत्तं

उक्कोसेणवि कोडिपुहुत्तं ॥ एएसि णं भंते ! सामाइयछेदोवट्ठावणियपरिहारविसुद्धियसु-
हुमसंपरायअहक्खायसंजयाणं कयरे २ जाव विसेसाहिया वा ? गोयमा ! सव्वत्थोवा
सुहुमसंपरायसंजया, परिहारविसुद्धियसंजया संखेज्जगुणा, अहक्खायसंजया संखेज्ज-
गुणा, छेदोवट्ठावणियसंजया संखेज्जगुणा, सामाइयसंजया संखेज्जगुणा ३६ ॥ ७९७ ॥
पडिसेवण दोसालोयणा य आलोयणारिहे चेव । तत्तो सामायारी पायच्छित्ते तवे चेव
॥ १ ॥ कइविहा णं भंते ! पडिसेवणा प० ? गोयमा ! दसविहा पडिसेवणा प०, तं०—
दप्प १ प्पमाद २ ऽणाभोगे ३, आउरे ४ आवती ५ ति य । संकिन्ने ६ सहसक्कारे,
७ भय ८ प्पओसा ९ य वीमंसा १० ॥ १ ॥ दस आलोयणादोसा प०, तंजहा—
आकंपइत्ता १ अणुमाणइत्ता २ जं दिट्ठं ३ वायरं च ४ सुहुमं (च) वा ५ । छन्नं ६ सद्दा-
उलयं ७ बहुजण ८ अव्वत्त ९ तस्सेवी १० ॥ २ ॥ दसहिं ठाणेहिं संपन्ने अणगारे
अरिहइ अत्तदोसं आलोइत्तए, तंजहा—जाइसंपन्ने १, कुलसंपन्ने २, विणयसंपन्ने ३,
णाणसंपन्ने ४, दंसणसंपन्ने ५, चरित्तसंपन्ने ६, खंते ७, दंते ८, अमाई ९, अपच्छा-
णुतावी १० । अट्ठहिं ठाणेहिं संपन्ने अणगारे अरिहइ आलोयणं पडिच्छित्तए, तंजहा—
आयारवं १, आहारवं २, ववहारवं ३, उव्वीलए ४, पकुव्वए ५, अपरिस्सावी ६,
निज्जवए ७, अवायदंसी ८ ॥ ७९८ ॥ दसविहा सामायारी प०, तं०—इच्छा १
मिच्छा २ तहक्कारे ३, आवस्सिया य ४ निसीहिया ५ । आपुच्छणा य ६ पडिपुच्छा
७, छंदणा य ८ निमंतणा ९ ॥ १ ॥ उवसंपया १० य काले, सामायारी भवे दसहा
॥ ७९९ ॥ दसविहे पायच्छित्ते प०, तं०—आलोयणारिहे पडिक्कमणारिहे तदुभयारिहे
विवेगारिहे विउसग्गारिहे तवारिहे छेदारिहे मूलारिहे अणवट्ठप्पारिहे पारंचियारिहे
॥ ८०० ॥ दुविहे तवे पन्नत्ते, तंजहा—वाहि(रि)रए य अब्भित्तरए य, से किं तं वाहि-
रए तवे ? वाहिरए तवे छव्विहे प०, तं०—अणसण ऊणोयरिया भिक्खायरिया य
रसपरिच्चाओ । कायकिलेसो पडिसंलीणया (वज्झो तवो होइ) ॥ १ ॥ से किं तं
अणसणे ? अणसणे दुविहे प०, तं०—इत्तरिए य आवकहिए य, से किं तं इत्तरिए ?
इत्तरिए अणेगविहे पन्नत्ते, तंजहा—चउत्थे भत्ते छट्ठे भत्ते अट्ठमे भत्ते दसमे भत्ते
दुवालसमे भत्ते चउइसमे भत्ते अट्ठमासिए भत्ते मासिए भत्ते दोमासिए भत्ते
ते(ति)मासिए भत्ते जाव छम्मासिए भत्ते, सेत्तं इत्तरिए । से किं तं आवकहिए ?
आवकहिए दुविहे प०, तं०—पाओवगमणे य भत्तपच्चक्खाणे य, से किं तं पाओवगमणे ?
पाओवगमणे दुविहे प०, तं०—नीहारिमे य अणीहारिमे य निय(मा)सं अपडिक्कमे, से
तं पाओवगमणे, से किं तं भत्तपच्चक्खाणे ? भत्तपच्चक्खाणे दुविहे प०, तं०—नीहारिमे
य अनीहारिमे य नियमं सपडिक्कमे, सेत्तं भत्तपच्चक्खाणे, सेत्तं आवकहिए, सेत्तं

अणसणे । से किं तं ओमोयरिया ? ओमोयरिया दुविहा प०, तं०—द्वोमोयरिया य
 आवोमोयरिया य, से किं तं द्वोमोयरिया ? द्वोमोयरिया दुविहा प०, तं०—
 उवगरणद्वोमोयरिया य भत्तपाणद्वोमोयरिया य, से किं तं उवगरणद्वोमोय-
 रिया ? उवगरणद्वोमोयरिया एगे वत्थे एगे पाए चियत्तोवगरणसाङ्गजगया, सेत्तं
 उवगरणद्वोमोयरिया, से किं तं भत्तपाणद्वोमोयरिया ? भत्तपाणद्वोमोयरिया
 अट्ठकवले आहारं आहारेमा(णे)णस्स अप्पाहारे दुवालस० जहा सत्तमसए पढमोद्दे-
 सए जाव नो पक्कामरसभोईति वत्तव्वं सिया, सेत्तं भत्तपाणद्वोमोयरिया, सेत्तं द्वो-
 मोयरिया, से किं तं भावोमोयरिया ? भावोमोयरिया अणेगविहा प०, तं०—अप्पकोहे
 जाव अप्पलोभे अप्पसद्दे अप्पन्नञ्जे अप्पतुमंतुमे, सेत्तं भावोमोयरिया, सेत्तं ओमोय-
 रिया । से किं तं भिक्खायरिया ? भिक्खायरिया अणेगविहा प०, तं०—द्वोभि-
 रगहचरणे जहा उववाइए जाव सुद्धेसणिए संखादत्तिए, सेत्तं भिक्खायरिया । से किं
 तं रसपरिच्चाए ? रसपरिच्चाए अणेगविहे प०, तं०—निव्विगइए पणीयरसविवज्जए जहा
 उववाइए जाव ल्हाहारे, सेत्तं रसपरिच्चाए । से किं तं कायकिलेसे ? कायकिलेसे अणेग-
 विहे प०, तं०—ठाणाइए उक्कुडुयासणिए जहा उववाइए जाव सव्वगायपडिकम्मवि-
 प्पमुक्के, सेत्तं कायकिलेसे । से किं तं पडिसंलीणया ? पडिसंलीणया चउव्विहा प०, तं०—
 इंदियपडिसंलीणया कसायपडिसंलीणया जोगपडिसंलीणया विवित्तसयणासणसेव-
 णया । से किं तं इंदियपडिसंलीणया ? इंदियपडिसंलीणया पंचविहा प०, तं०—सोइंदिय-
 विसयप्पयारणिरोहो वा सोइंदियविसयप्पत्तेसु वा अत्थेसु रागदोसविणिग्गहो चक्खिदि-
 यविसय० एवं जाव फासिंदियविसयप्पयारणिरोहो वा फासिंदियविसयप्पत्तेसु वा अत्थेसु
 रागदोसविणिग्गहो, सेत्तं इंदियपडिसंलीणया, से किं तं कसायपडिसंलीणया ? कसाय-
 पडिसंलीणया चउव्विहा प०, तं जहा—कोहोदयनिरोहो वा उदयप्पत्तस्स वा कोहस्स
 विफलीकरणं एवं जाव लोभोदयनिरोहो वा उदयप्पत्तस्स वा लोभस्स विफलीकरणं,
 सेत्तं कसायपडिसंलीणया, से किं तं जोगपडिसंलीणया ? जोगपडिसंलीणया तिविहा
 प०, तं०—मणजोगप० वड्जजोगप० कायजोगपडिसंलीणया, से किं तं मणजोगपडि-
 संलीणया ? २ तिविहा प०, तं०—अकुसलमणनिरोहो वा कुसलमणउद्दीरणं वा मणस्स
 वा एगत्तीभावकरणं, से किं तं वड्जजोगपडिसंलीणया ? २ तिविहा प०, तं०—अकुसल-
 वड्जनिरोहो वा कुसलवड्जउद्दीरणं वा वड्जए वा एगत्तीभावकरणं, से किं तं कायपडि-
 संलीणया ? कायपडिसंलीणया जन्नं सुसमाहियपसंतसाहरियपाणिपाए कुम्मो इव
 शुत्तिदिए अल्लीणे पल्लीणे चिट्ठइ, सेत्तं कायपडिसंलीणया, सेत्तं जोगपडिसंलीणया,
 से किं तं विवित्तसयगत्तणसेवणया ? विवित्तसयगासणसेवणया जन्नं आरामेसु

चा उज्जाणेषु वा जहा सोमिलुद्देसए जाव सेज्जासंथारगं उवसंपज्जित्ताणं विहरइ, सेत्तं विवित्तसयणासणसेवणया, सेत्तं पडिसंलीणया, सेत्तं बाहिरए तवे १ ॥ से किं तं अन्भितरए तवे ? अन्भितरए तवे छव्विहे प०, तं०-पायच्छित्तं विणओ वेयावच्चं तहेव सज्जाओ । ज्ञाणं विउसग्गो । से किं तं पायच्छित्ते ? पायच्छित्ते दसविहे प०, तं०-आलोयणारिहे जाव पारंन्वियारिहे, सेत्तं पायच्छित्ते । से किं तं विणए ? विणए सत्तविहे पन्नत्ते, तंजहा-नाणविणए दंसणविणए चरित्तविणए मणविणए वइविणए कायविणए लोगोवय्यारविणए, से किं तं नाणविणए ? नाणविणए पंचविहे प०, तं०-आभिणिवोहियनाणविणए जाव केवलनाणविणए, सेत्तं नाणविणए, से किं तं दंसणविणए ? दंसणविणए दुविहे प०, तं०-सुस्सूसणाविणए य अणच्चासायणाविणए य, से किं तं सुस्सूसणाविणए ? सुस्सूसणाविणए अणेगविहे प०, तं०-सक्कारेइ वा सम्माणेइ वा जहा चउद्दसमसए तइए उद्देसए जाव पडिसंसाह(र)णया, सेत्तं सुस्सूसणाविणए, से किं तं अणच्चासायणाविणए ? अणच्चासायणाविणए पणयालीसइविहे प०, तं०-अरिहंताणं अणच्चासायणया अरिहंतपन्नत्तस्स धम्मस्स अणच्चासायणया आयरियाणं अणच्चासायणया उवज्झायाणं अणच्चासायणया थेराणं अणच्चासायणया कुलस्स अणच्चासायणया गणस्स अणच्चासायणया संघस्स अणच्चासायणया किरियाए अणच्चासायणया संभोगस्स अणच्चासायणया आभिणिवोहियनाणस्स अणच्चासायणया जाव केवलनाणस्स अणच्चासायणया १५, एएसिं चेव भत्तिवहुमाणेणं एएसिं चेव वन्नसंजलणया, सेत्तं अणच्चासायणयाविणए, सेत्तं दंसणविणए, से किं तं चरित्तविणए ? चरित्तविणए पंचविहे प०, तं०-सामाइयचरित्तविणए जाव अहक्खायचरित्तविणए, सेत्तं चरित्तविणए, से किं तं मणविणए ? मणविणए दुविहे प०, तं०-पसत्थमणविणए य अपसत्थमणविणए य, से किं तं पसत्थमणविणए ? पसत्थमणविणए सत्तविहे प०, तंजहा-अपावए असावज्जे अकिरिए निह्वक्केसे अण्हयकरे अच्छविकरे अभूयाभिसंक्के, सेत्तं पसत्थमणविणए, से किं तं अपसत्थमणविणए ? अपसत्थमणविणए सत्तविहे प०, तं०-पावए सावज्जे सकिरिए सउवक्केसे अण्हयकरे छविकरे भूयाभिसंक्के, सेत्तं अपसत्थमणविणए, सेत्तं मणविणए, से किं तं वइविणए ? वइविणए दुविहे प०, तं०-पसत्थवइविणए य अपसत्थवइविणए य, से किं तं पसत्थवइविणए ? पसत्थवइविणए सत्तविहे प०, तं०-अपावए जाव अभूयाभिसंक्के, सेत्तं पसत्थवइविणए, से किं तं अपसत्थवइविणए ? अपसत्थवइविणए सत्तविहे प०, तं०-पावए सावज्जे जाव भूयाभिसंक्के, सेत्तं अपसत्थवइविणए, से तं वइविणए, से किं तं कायविणए ? कायविणए दुविहे प०, तं०-पसत्थकायविणए य अपसत्थकायविणए

य, से किं तं पसत्थकायविणए ? पसत्थकायविणए सत्तविहे प०, तंजहा-आउत्तं गमणं आउत्तं ठाणं आउत्तं निसीयणं आउत्तं तुयट्ठणं आउत्तं उल्लंघणं आउत्तं पळ्ळं घणं आउत्तं सव्विदियजोगजुंजणया, सेत्तं पसत्थकायविणए, से किं तं अप्पसत्थकायविणए ? अप्पसत्थकायविणए सत्तविहे पन्नत्ते, तंजहा-अणाउत्तं गमणं जाव अणाउत्तं सव्विदियजोगजुंजणया, सेत्तं अप्पसत्थकायविणए, सेत्तं कायविणए, से किं तं लोगोवयारविणए ? लोगोवयारविणए सत्तविहे प०, तं०-अव्भासवत्तियं परच्छं-दाणुवत्तियं कज्जहेऊं कयपडिकिइया अत्तगवेसणया देसकालण्णया सव्वत्थेसु अप्पडिलोमया, सेत्तं लोगोवयारविणए, सेत्तं विणए । से किं तं वेयावच्चे ? वेयावच्चे दसविहे प०, तं०-आयरियवेयावच्चे उवज्झायवेयावच्चे थेरवेयावच्चे तवस्सिवेयावच्चे गिलाणवेयावच्चे सेहवेयावच्चे कुलवेयावच्चे गणवेयावच्चे संघवेयावच्चे साहम्मियवेयावच्चे, सेत्तं वेयावच्चे । से किं तं सज्जाए ? सज्जाए पंचविहे पन्नत्ते, तं०-वायणा पडिपुच्छणा परियट्ठणा अणुप्पेहा धम्मकहा, सेत्तं सज्जाए ॥ ८०१ ॥ से किं तं ज्ञाणे ? ज्ञाणे चउव्विहे पन्नत्ते, तंजहा-अट्ठे ज्ञाणे रोद्धे ज्ञाणे धम्मे ज्ञाणे सुक्के ज्ञाणे, अट्ठे ज्ञाणे चउव्विहे पन्नत्ते, तंजहा-अमणुन्नसंपओगसंपउत्ते तस्स विप्पओगसइ-समन्नागए यावि भवइ १, मणुन्नसंपओगसंपउत्ते तस्स अविप्पओगसइसमन्नागए यावि भवइ २, आर्यकंसंपओगसंपउत्ते तस्स विप्पओगसइसमन्नागए यावि भवइ ३, परिजुसियकामभोगसंपओगसंपउत्ते तस्स अविप्पओगसइसमन्नागए यावि भवइ ४, अट्ठस्स णं ज्ञाणस्स चत्तारि लक्खणा प०, तं०-कंदणया सोयणया तिप्पणया परिदेवणया १ । रोद्धज्जाणे चउव्विहे प०, तं०-हिंसाणुवंधी मोसाणुवंधी तेयाणुवंधी सारक्खणाणुवंधी, रोद्धस्स णं ज्ञाणस्स चत्तारि लक्खणा प०, तं०-ओसन्न-दोसे बहुलदोसे अण्णाणदोसे आमरणांतदोसे २ । धम्मे ज्ञाणे चउव्विहे चउप्पडो-यारे प०, तं०-आणाविजए अवायविजए विवागविजए संठाणविजए, धम्मस्स णं ज्ञाणस्स चत्तारि लक्खणा प०, तं०-आणारुई निसग्गरुई सुत्तरुई ओगाडरुई, धम्मस्स णं ज्ञाणस्स चत्तारि आलंवणा प०, तं०-वायणा पडिपुच्छणा परियट्ठणा धम्मकहा, धम्मस्स णं ज्ञाणस्स चत्तारि अणुप्पेहाओ प०, तं०-एगत्ताणुप्पेहा अणिच्चाणुप्पेहा असरणाणुप्पेहा संसाराणुप्पेहा ३ । सुक्के ज्ञाणे चउव्विहे चउप्पडोयारे प०, तं०-पुहुत्तवियक्के सवियारी १, एगंतवियक्के अवियारी २, सुहुमकिरिए अनियट्ठी ३, समुच्छिन्नकिरिए अप्पडिवाई ४, सुक्कस्स णं ज्ञाणस्स चत्तारि लक्खणा प०, तं०-खंती मुत्ती अज्जवे मद्दवे, सुक्कस्स णं ज्ञाणस्स चत्तारि आलंवणा प०, तं०-अव्वहे असंमोहे विवेगे विउसग्गे, सुक्कस्स णं ज्ञाणस्स चत्तारि

अणुप्पेहाओ प०, तं०—अणंतवत्तियाणुप्पेहा विप्परिणामाणुप्पेहा असुभाणुप्पेहा
 अवायाणुप्पेहा ४, सेत्तं ज्ञाणे ॥ ८०२ ॥ से किं तं विउसग्गे ? विउसग्गे दुविहे
 प०, तं०—दब्बविउसग्गे य भावविउसग्गे य, से किं तं दब्बविउसग्गे ? दब्ब-
 विउसग्गे चउव्विहे प०, तं०—गणविउसग्गे सरीरविउसग्गे उवहिविउसग्गे
 भत्तपाणविउसग्गे, सेत्तं दब्बविउसग्गे, से किं तं भावविउसग्गे ? भावविउसग्गे
 तिविहे प०, तं०—कसायविउसग्गे संसारविउसग्गे कम्मविउसग्गे, से किं तं
 कसायविउसग्गे ? कसायविउसग्गे चउव्विहे प०, तंजहा—कोहविउसग्गे माणवि-
 उसग्गे मायाविउसग्गे लोभविउसग्गे, सेत्तं कसायविउसग्गे, से किं तं संसारविउ-
 सग्गे ? संसारविउसग्गे चउव्विहे पञ्चत्ते, तंजहा—नेरइयसंसारविउसग्गे जाव
 देवसंसारविउसग्गे, सेत्तं संसारविउसग्गे, से किं तं कम्मविउसग्गे ? कम्मविउसग्गे
 अट्ठविहे प०, तंजहा—णाणावरणिज्जकम्मविउसग्गे जाव अंतराइयकम्मविउसग्गे,
 सेत्तं कम्मविउसग्गे, सेत्तं भावविउसग्गे, सेत्तं अब्भित(र)रिए तवे । सेवं भंते ! २
 त्ति ॥ ८०३ ॥ पणवीसइमंस्स सयस्स सत्तमो उद्देसो समत्तो ॥

रायणिहे जाव एवं वयासी—नेरइया णं भंते ! कहं उववज्जंति ? गोयमा ! से
 जहानामए पवए पवमाणे अज्झवसाणनिव्वत्तिएणं करणोवाएणं सेयकाले तं ठाणं
 विप्पजहिता पुरिमं ठाणं उवसंपज्जित्ताणं विहरइ एवामेव एए(ते)वि जीवा पवओविव
 पवमाणा अज्झवसाणनिव्वत्तिएणं करणोवाएणं सेयकाले तं भवं विप्पजहिता पुरिमं
 भवं उवसंपज्जित्ताणं विहरन्ति । तेसि णं भंते ! जीवाणं कहं सीहा गई कहं सीहे
 गइविसए प० ? गोयमा ! से जहानामए—केइ पुरिसे तरुणे बलवं एवं जहा चउइसम-
 सए पढमुद्देसए जाव तिसमएण वा विग्गहेणं उववज्जंति, तेसि णं जीवाणं तहा
 सीहा गई तहा सीहे गइविसए प० । ते णं भंते ! जीवा कहं परभवियाउयं पक-
 रेंति ? गोयमा ! अज्झवसाण(जोग)निव्वत्तिएणं करणोवाएणं एवं खलु ते जीवा पर-
 भवियाउयं पकरेन्ति, तेसि णं भंते ! जीवाणं कहं गई पवत्तइ ? गोयमा ! आउ-
 क्खएणं भवक्खएणं ठिइक्खएणं, एवं खलु तेसि जीवाणं गई पवत्तइ, ते णं भंते !
 जीवा किं आइड्ढीए उववज्जंति परिड्ढीए उववज्जंति ? गोयमा ! आइड्ढीए उववज्जंति
 नो परिड्ढीए उववज्जंति । ते णं भंते ! जीवा किं आयकम्मणा उववज्जंति परकम्मणा
 उववज्जंति ? गोयमा ! आयकम्मणा उववज्जंति नो परकम्मणा उववज्जंति, ते णं
 भंते ! जीवा किं आयप्पओगेणं उववज्जंति परप्पओगेणं उववज्जंति ? गोयमा !
 आयप्पओगेणं उववज्जंति नो परप्पओगेणं उववज्जंति । असुरकुमारा णं भंते ! कहं
 उववज्जंति ? जहा नेरइया तहेव निरवसेसं जाव नो परप्पओगेणं उववज्जंति, एवं

एगिंदियवजा जाव वेमाणिया, एगिंदिया तं (एवं) चेव नवरं चउसमइओ विग्गहो,
 सेसं तं चेव, सेवं भंते ! २ ति जाव विहरइ ॥ ८०४ ॥ २५ । ८ ॥ भवसिद्धिय-
 नेरइया णं भंते ! कहं उववज्जंति ? गोयमा ! से जहानामए पवए पवमाणे अवसेसं
 तं चेव जाव वेमाणिए, सेवं भंते ! २ ति ॥ ८०५ ॥ २५ । ९ ॥ अभवसिद्धिय-
 नेरइया णं भंते ! कहं उववज्जंति ? गोयमा ! से जहानामए पवए पवमाणे अवसेसं
 तं चेव एवं जाव वेमाणि(ए)या, सेवं भंते ! २ ति ॥ ८०६ ॥ २५।१० ॥ सम्मदिट्ठि-
 नेरइया णं भंते ! कहं उववज्जंति ? गोयमा ! से जहानामए पवए पवमाणे अवसेसं
 तं चेव एवं एगिंदियवज्जं जाव वेमाणि(ए)या, सेवं भंते ! २ ति ॥ ८०७ ॥ २५।११ ॥
 मिच्छादिट्ठिनेरइया णं भंते ! कहं उववज्जंति ? गोयमा ! से जहानामए-पवए पवमाणे
 अवसेसं तं चेव एवं जाव वेमाणिए, सेवं भंते ! २ ति जाव विहरइ ॥ ८०८ ॥
 २५।१२ ॥ पणवीसइमस्स सयस्स वारहमो उद्देसो समत्तो ॥ पण-
 वीसइमं सयं समत्तं ॥

नमो सुयदेवयाए भगवईए । जीवा १ य लेस्स २ पक्खिय ३ दिट्ठी ४ अज्ञाण ५ नाण
 ६ सन्नाओ ७ । वेय ८ कसा(य)ए ९ उवओ(गे)ग १० जोग ११ एक्कार(स)वि ठाणा
 ॥ १ ॥ तेणं कालेणं तेणं समएणं रायगिहे जाव एवं वयासी-जीवे णं भंते ! पावं
 कम्मं किं वंधी वंधइ वंधिस्सइ १, वंधी वंधइ ण वंधिस्सइ २, वंधी न वंधइ
 वंधिस्सइ ३, वंधी न वंधइ न वंधिस्सइ ४ ? गोयमा ! अत्येगइए (जीवे) वंधी वंधइ
 वंधिस्सइ १, अत्येगइए वंधी वंधइ ण वंधिस्सइ २, अत्येगइए वंधी ण वंधइ
 वंधिस्सइ ३, अत्येगइए वंधी ण वंधइ ण वंधिस्सइ ४-१ ॥ सलेस्से णं भंते !
 जीवे पावं कम्मं किं वंधी वंधइ वंधिस्सइ, वंधी वंधइ ण वंधिस्सइ० पुच्छा,
 गोयमा ! अत्येगइए वंधी वंधइ वंधिस्सइ, अत्येगइए एवं चउभंगो । कण्हलेस्से
 णं भंते ! जीवे पावं कम्मं किं वंधी० पुच्छा, गोयमा ! अत्येगइए वंधी वंधइ वंधि-
 स्सइ अत्येगइए वंधी वंधइ न वंधिस्सइ एवं जाव पम्हलेस्से सव्वत्थ पढमविइया
 भंगा, सुक्कलेस्से जहा सलेस्से तहेव चउभंगो । अलेस्से णं भंते ! जीवे पावं कम्मं
 किं वंधी० पुच्छा, गोयमा ! वंधी न वंधइ न वंधिस्सइ २ ॥ कण्हपक्खिए णं
 भंते ! जीवे पावं कम्मं० पुच्छा, गोयमा ! अत्येगइए वंधी पढमविइया भंगा ।
 सुक्कपक्खिए णं भंते ! जीवे पुच्छा, गोयमा ! चउभंगो भाणियव्वो ॥ ८०९ ॥
 सम्मदिट्ठीणं चत्तारि भंगा, मिच्छादिट्ठीणं पढमविइया भंगा, सम्मामिच्छादिट्ठीणं
 एवं चेव । नाणीणं चत्तारि भंगा, आभिणिवोहियणाणीणं जाव मणपज्जवणाणीणं
 चत्तारि भंगा, केवलनाणीणं चरिमो भंगो जहा अलेस्साणं ५, अज्ञाणीणं पढमविइया,

एवं मइअन्नाणीणं सुयअन्नाणीणं विभंगणाणीणवि ६ । आहारसन्नोवउत्ताणं जाव
परिग्गहसन्नोवउत्ताणं पढमविइया नोसन्नोवउत्ताणं चत्तारि ७ । सवेदगाणं पढम-
विइया, एवं इत्थिवेदगाणं पुरिसवेदगाणं नपुंसगवेदगाणवि, अवेदगाणं चत्तारि भंगा ॥
सकसाईणं चत्तारि, कोहकसाईणं पढमविइया भंगा, एवं माणकसा(य)इस्सवि माया-
कसाइस्सवि लोभकसाइस्सवि चत्तारि भंगा, अकसाई णं भंते ! जीवे पावं कम्मं
किं वंधी० पुच्छा, गोयमा ! अत्थेगइए वंधी न वंधइ वंधिस्सइ ३, अत्थेगइए
बंधी ण वंधइ ण वंधिस्सइ ४ । सजोगिस्स चउभंगो, एवं मणजो(ग)गिस्सवि वइ-
जोगिस्सवि कायजोगिस्सवि, अजोगिस्स चरिमो, सागारोवउत्ते चत्तारि, अणागारो-
वउत्तेवि चत्तारि भंगा ११ ॥ ८१० ॥ नेरइए णं भंते ! पावं कम्मं किं वंधी
बंधइ वंधिस्सइ० पुच्छा, गोयमा ! अत्थेगइए वंधी पढमविइया १, सलेस्से णं भंते !
नेरइए पावं कम्मं० एवं चेव, एवं कण्हलेस्सेवि नीललेस्सेवि काउलेस्सेवि, एवं कण्हप-
क्खिए(वि) सुक्कपक्खिए(वि), सम्मदिट्ठी मिच्छादिट्ठी सम्मामिच्छादिट्ठी, णाणी आभि-
णिवोहियनाणी सुयनाणी ओहिणाणी अन्नाणी मइअन्नाणी सुयअन्नाणी विभंगनाणी
आहारसन्नोवउत्ते जाव परिग्गहसन्नोवउत्ते, सवेदए जाव नपुंसगवेदए, सकसाई जाव
लोभकसाई, सजोगी मणजोगी वइजोगी कायजोगी, सागारोवउत्ते अणागारोवउत्ते,
एएसु सव्वेसु एसु पढमविइया भंगा भाणियव्वा, एवं असुरकुमारस्सवि वत्तव्वया
भाणियव्वा नवरं तेउलेस्सा इत्थिवेयगा पुरिसवेयगा य अब्भहिया नपुंसगवेदगा न
भञ्जंति सेसं तं चेव सव्वत्थ पढमविइया भंगा, एवं जाव थणियकुमारस्स, एवं पुढ-
विकाइयस्सवि आउकाइयस्सवि जाव पंचिदियतिरिक्खजोणियस्सवि सव्वत्थवि पढम-
विइया भंगा नवरं जस्स जा लेस्सा दिट्ठी णाणं अन्नाणं वेदो जोगो य जं जस्स
अत्थि तं तस्स भाणियव्वं सेसं तहेव, मणूसस्स जच्चेव जीवपदे वत्तव्वया सच्चेव
निरवसेसा भाणियव्वा, वाणमंतरस्स जहा असुरकुमारस्स, जोइसियस्स वेमाणियस्स
एवं चेव नवरं लेस्साओ जाणियव्वाओ, सेसं तहेव भाणियव्वं ॥ ८११ ॥
जीवे णं भंते ! नाणावरणिज्जं कम्मं किं वंधी वंधइ वंधिस्सइ एवं जहेव पावकम्मस्स
वत्तव्वया भाणिया तहेव नाणावरणिजस्सवि वत्तव्वया भाणियव्वा नवरं जीवपदे
मणुस्सपदे य सकसाई जाव लोभकसाईमि य पढमविइया भंगा अवसेसं तं चेव
जाव वेमाणिए, एवं दरिसणावरणिज्जेणवि दंडगो भाणियव्वो निरवसेसो ॥ जीवे
णं भंते ! वेयणिज्जं कम्मं किं वंधी० पुच्छा, गोयमा ! अत्थेगइए वंधी वंधइ वंधि-
स्सइ १, अत्थेगइए वंधी वंधइ न वंधिस्सइ २, अत्थेगइए वंधी न वंधइ न वंधि-
स्सइ ४, सलेस्सेवि एवं चेव तइयविहूणा भंगा, कण्हलेस्से जाव पम्हलेस्से पढम-

विइया भंगा, सुक्कलेस्से तइयविहूणा भंगा, अलेस्से चरिमो भंगो, कण्हपक्खिए पढमविइया भंगा, सुक्कपक्खिया तइयविहूणा, एवं सम्मदिट्ठिस्सवि, मिच्छादिट्ठिस्स सम्मामिच्छादिट्ठिस्स य पढमविइया, णा(ण)णिस्स तइयविहूणा, आभिणिवोहियनाणी जाव मणपज्जवणाणी पढमविइया, केवलनाणी तइयविहूणा, एवं नोसन्नोवउत्ते अवेदए अकसाई सागारोवउत्ते अणागारोवउत्ते एएसु तइयविहूणा, अजोगिम्मि य चरिमो, सेसेसु पढमविइया । नेरइए णं भंते ! वेयणिज्जं कम्मं किं वंधी वंधइ वंधिस्सइ० एवं नेरइया(दीया) जाव वेमाणियत्ति जस्स जं अत्थि सव्वत्थवि पढमविइया, नवरं मणुस्से(सु) जहा जीवे, जीवे णं भंते ! मोहणिज्जं कम्मं किं वंधी वंधइ० जहेव पावं कम्मं तहेव मोहणिज्जंपि निरवसेसं जाव वेमाणिए ॥ ८१२ ॥ जीवे णं भंते ! आउयं कम्मं किं वंधी वंधइ० पुच्छा, गोयमा ! अत्थेगइए वंधी चउभंगो, सलेस्से जाव सुक्कलेस्से चत्तारि भंगा, अलेस्से चरिमो भंगो । कण्हपक्खिए णं पुच्छा, गोयमा ! अत्थेगइए वंधी वंधइ वंधिस्सइ अत्थेगइए वंधी न वंधइ वंधिस्सइ, सुक्कपक्खिए सम्मदिट्ठि मिच्छादिट्ठि चत्तारि भंगा, सम्मामिच्छादिट्ठि पुच्छा, गोयमा ! अत्थेगइए वंधी न वंधइ वंधिस्सइ अत्थेगइए वंधी न वंधइ न वंधिस्सइ, नाणी जाव ओहिनाणी चत्तारि भंगा, मणपज्जवणाणी पुच्छा, गोयमा ! अत्थेगइए वंधी वंधइ वंधिस्सइ, अत्थेगइए वंधी न वंधइ वंधिस्सइ, अत्थेगइए वंधी न वंधइ न वंधिस्सइ, केवलना(णी)णे चरिमो भंगो, एवं एएणं कमेणं नोसन्नोवउत्ते विइयविहूणा जहेव मणपज्जवणाणे, अवेदए अकसाई य तइयचउत्था जहेव सम्मामिच्छंते, अजोगिम्मि चरिमो, सेसेसु पदेसु चत्तारि भंगा जाव अणागारोवउत्ते ॥ नेरइए णं भंते ! आउयं कम्मं किं वंधी० पुच्छा, गोयमा ! अत्थेगइए चत्तारि भंगा एवं सव्वत्थवि नेरइयाणं चत्तारि भंगा नवरं कण्हलेस्से कण्हपक्खिए य पढमतइया भंगा, सम्मामिच्छंते तइयचउत्था, असुरकुमारे एवं चेव, नवरं कण्हलेस्से(सु)वि चत्तारि भंगा भाणियव्वा सेसं जहा नेरइयाणं एवं जाव थणियकुमाराणं, पुढविक्काइयाणं सव्वत्थवि चत्तारि भंगा, नवरं कण्हपक्खिए पढमतइया भंगा, तेउलेस्से पुच्छा, गोयमा ! वंधी न वंधइ वंधिस्सइ, सेसेसु सव्वत्थ चत्तारि भंगा, एवं आउक्काइयवणस्सइक्काइयाणवि निरवसेसं, तेउक्काइयवाउक्काइयाणं सव्वत्थवि पढमतइया भंगा, वेइंदियतेइंदियचउरिंदियाणंपि सव्वत्थवि पढमतइया भंगा, नवरं सम्मत्ते नाणे आभिणिवोहियनाणे सुयनाणे तइओ भंगो । पंचिंदियतिरिक्खजोणियाणं कण्हपक्खिए पढमतइया भंगा, सम्मामिच्छंते तइयचउत्था भंगा, सम्मत्ते नाणे आभिणिवोहियनाणे सुयनाणे ओहिनाणे एएसु पंचसुवि पदेसु विइयविहूणा भंगा, सेसेसु चत्तारि भंगा, मणुस्साणं

जहा जीवाणं, नवरं सम्मत्ते ओहिए नाणे आभिणिबोहियनाणे सुयनाणे ओहिनाणे
एएसु विइयविहूणा भंगा, सेसं तं चेव, वाणमंतरजोइसियवेमाणिया जहा असुर-
कुमारा, नामं गोयं अंतरा(इ)यं च एयाणि जहा नाणावरणिज्जं । सेवं भंते ! २ त्ति
जावे विहरइ ॥ ८१३ ॥ बंधिसयस्स पढमो उद्देसो समत्तो ॥

अणंतरोववन्नए णं भंते ! नेरइए पावं कम्मं किं बंधी० पुच्छा तहेव, गोयमा !
अत्येगइए बंधी पढमविइया भंगा । सलेस्से णं भंते ! अणंतरोववन्नए नेरइए पावं
कम्मं किं बंधी० पुच्छा, गोयमा ! पढमविइया भंगा, एवं खलु सव्वत्थ पढमविइया
भंगा, नवरं सम्मामिच्छत्तं मणजोगो वइजोगो य न पुच्छिज्जइ, एवं जाव थणिय-
कुमाराणं, बेइंदियतेइंदियचउरिंदियाणं वइजोगो न भन्नइ, पंचिंदियतिरिक्खजोणि-
याणंपि सम्मामिच्छत्तं ओहिनाणं विभंगनाणं मणजोगो वइजोगो एयाणि पंच पदाणि
ण भन्नंति । मणुस्साणं अलेस्ससम्मामिच्छत्तमणपज्जवणाणकेवलनाणविभंगनाण-
नोसन्नोवउत्तअवेदगअकसाईमणजो(गि)गवइजोगअजोगी एयाणि एक्कारस पयाणि
ण भन्नंति, वाणमंतरजोइसियवेमाणियाणं जहा नेरइयाणं तहेव ते तिन्नि न भन्नंति
सव्वेसिं, जाणि सेसाणि ठाणाणि सव्वत्थ पढमविइया भंगा, एगिंदियाणं सव्वत्थ
पढमविइया भंगा, जहा पावे एवं नाणावरणिज्जेगवि दंडओ, एवं आउयवज्जेसु
जाव अंतराइए दंडओ ॥ अणंतरोववन्नए णं भंते ! नेरइए आउयं कम्मं किं बंधी०
पुच्छा, गोयमा ! बंधी न वंवइ वंधिस्सइ । सलेस्से णं भंते ! अणंतरोववन्नए
नेरइए आउयं कम्मं किं बंधी० ? एवं चेव तइओ भंगो, एवं जाव अणागारोवउत्ते,
सव्वत्थवि तइओ भंगो, एवं मणुस्सवज्जं जाव वेमाणियाणं, मणुस्साणं सव्वत्थ
तइयचउत्था भंगा, नवरं कण्हपक्खिएसु तइओ भंगो सव्वेसि नाणत्ताइं ताइं चेव ।
सेवं भंते ! २ त्ति ॥ ८१४ ॥ बंधिसयस्स विइओ उद्देसो समत्तो ॥

परंपरोववन्नए णं भंते ! नेरइए पावं कम्मं किं बंधी० पुच्छा, गोयमा ! अत्येग-
इए पढमविइया, एवं जहेव पढमो उद्देसओ तहेव परंपरोववन्नएहिवि उद्देसओ
भाणियव्वो नेरइयाइओ तहेव नवदंडगसंगहिओ, अट्टण्हवि कम्मप्पगडीणं जा जस्स
कम्मस्स वत्तव्वया सा तस्स अहीणमइरित्ता नेयव्वा जाव वेमाणिया अणागारो-
वउत्ता । सेवं भंते ! २ त्ति ॥ ८१५ ॥ बंधिसयस्स तइओ उद्देसो समत्तो ॥

अणंतरोगाढए णं भंते ! नेरइए पावं कम्मं किं बंधी० पुच्छा, गोयमा ! अत्ये-
गइए० एवं जहेव अणंतरोववन्नएहिं नवदंडगसंगहिओ उद्देसओ भणिओ तहेव
अणंतरोगाढएहिवि अहीणमइरित्तो भाणियव्वो नेरइयाइए जाव वेमाणिए । सेवं
भंते ! २ त्ति ॥ २६-४ ॥ परंपरोगाढए णं भंते ! नेरइए पावं कम्मं किं बंधी० जहेव

परंपरोववन्नएहिं उद्देसो सो चेव निरवसेसो भाणियव्वो । सेवं भंते ! २ ति ॥ २६-५ ॥
अणंतराहारए णं भंते ! नेरइए पावं कम्मं किं वंधी० पुच्छा, गोयमा ! एवं जहेव
अणंतरोववन्नएहिं उद्देसो तहेव निरवसे(सो)सं । सेवं भंते ! २ ति ॥ २६-६ ॥
परंपराहारए णं भंते ! नेरइए पावं कम्मं किं वंधी० पुच्छा, गोयमा ! एवं जहेव
परंपरोववन्नएहिं उद्देसो तहेव निरवसेसो भाणियव्वो । सेवं भंते ! सेवं भंते ! ति
॥ २६-७ ॥ अणंतरपज्जत्तए णं भंते ! नेरइए पावं कम्मं किं वंधी० पुच्छा,
गोयमा ! एवं जहेव अणंतरोववन्नएहिं उद्देसो तहेव निरवसेसं । सेवं भंते ! २ ति
॥ २६-८ ॥ परंपरपज्जत्तए णं भंते ! नेरइए पावं कम्मं किं वंधी० पुच्छा,
गोयमा ! एवं जहेव परंपरोववन्नएहिं उद्देसो तहेव निरवसेसो भाणियव्वो । सेवं
भंते ! २ ति जाव विहरइ ॥ २६-९ ॥ चरिमे णं भंते ! नेरइए पावं कम्मं किं
बंधी० पुच्छा, गोयमा ! एवं जहेव परंपरोववन्नएहिं उद्देसो तहेव चरिमेहिं निरव-
से(सं)सो । सेवं भंते ! २ ति जाव विहरइ ॥ २६-१० ॥ अचरिमे णं भंते ! नेरइए
पावं कम्मं किं वंधी० पुच्छा, गोयमा ! अत्येगइए एवं जहेव पढमोद्देसए तहेव पढ-
मविइया भंगा भाणियव्वा सव्वत्थ जाव पंचिदियतिरिक्खजोणियाणं । अचरिमे णं
भंते ! मणुस्से पावं कम्मं किं वंधी० पुच्छा, गोयमा ! अत्येगइए वंधी वंधइ वंधि-
स्सइ, अत्येगइए वंधी वंधइ न वंधिस्सइ, अत्येगइए वंधी न वंधइ(न) वंधिस्सइ ।
सलेस्से णं भंते ! अचरिमे मणुस्से पावं कम्मं किं वंधी० ? एवं चेव तिन्नि भंगा चरि-
मविहूणा भाणियव्वा एवं जहेव पढमुद्देसे, नवरं जेसु तत्थ वीससु पदेसु चत्तारि भंगा
तेसु इह आदिह्मा तिन्नि भंगा भाणियव्वा चरिमभंगवज्जा, अलेस्से केवलनाणी य
अजोगी य एए तिन्निवि न पुच्छिज्जंति, सेसं तहेव, वाणमंतरजोइसियवेमाणि(ए)या
जहा नेरइए । अचरिमे णं भंते ! नेरइए नाणावरणिज्जं कम्मं किं वंधी० पुच्छा,
गोयमा ! एवं जहेव पावं नवरं मणुस्सेसु सकसाईसु लोभकसाईसु य पढमविइया
भंगा, सेसा अट्टारस चरिमविहूणा सेसं तहेव जाव वेमाणियाणं, दरिसणावरणिज्जं
एवं चेव निरवसेसं, वेयणिज्जे सव्वत्थवि पढमविइया भंगा जाव वेमाणियाणं नवरं
मणुस्सेसु अलेस्से केवली अजोगी य नत्थि । अचरिमे णं भंते ! नेरइए मोहणिज्जं
कम्मं किं वंधी० पुच्छा, गोयमा ! जहेव पावं तहेव निरवसेसं जाव वेमाणिए ॥
अचरिमे णं भंते ! नेरइए आउयं कम्मं किं वंधी० पुच्छा, गोयमा ! पढमवि(त)-
इया भंगा, एवं सव्वपदेसुवि, नेरइयाणं पढमतइया भंगा नवरं सम्मामिच्छते तइओ
भंगो, एवं जाव थणियकुमाराणं, पुढविकाइयआउकाइयवणस्सइकाइयाणं तेउलेस्साए
तइओ भंगो सेसेसु पदेसु सव्वत्थ पढमतइया भंगा, तेउकाइयवाउकाइयाणं सव्वत्थ

पढमतइया भंगो, बेइंदियतेइंदियचउरिंदियाणं एवं चेव नवरं सम्मत्ते ओहिनाणे आभिणिबोहियनाणे सुयनाणे एएसु चउसुवि ठाणेसु तइओ भंगो, पंचिंदियतिरिक्ख-जोणियाणं सम्मामिच्छत्ते तइओ भंगो, सेसेसु पदेसु सव्वत्थ पढमतइया भंगा, मणुस्साणं सम्मामिच्छत्ते अवेदए अकसाइम्मि य तइओ भंगो, अलेस्स केवलनाण अजोगी य न पुच्छिजंति, सेसपदेसु सव्वत्थ पढमतइया भंगा, वाणमंतरजोइसिय-वेमाणिया जहा नेरइया । नामं गोयं अंतराइयं च जहेव नाणावरणिजं तहेव निरवसेसं । सेवं भंते ! २ ति जाव विहरइ ॥ ८१६ ॥ छव्वीसइमे वंधिसए एयारहमो उद्देसो समत्तो ॥ छव्वीसइमं वंधिसयं समत्तं ॥

जीवा णं भंते ! पावं कम्मं किं करिंसु करेन्ति करिस्संति १, करिंसु करेन्ति न करिस्संति २, करिंसु न करेन्ति करिस्संति ३, करिंसु न करेन्ति न करिस्संति ४ ? गोयमा ! अत्थेगइए करिंसु करेन्ति करिस्संति १, अत्थेगइए करिंसु करेन्ति न करि-स्संति २, अत्थेगइए करिंसु न करेन्ति करिस्संति ३, अत्थेगइए करिंसु न करेन्ति न करिस्संति ४ । सलेस्से णं भंते ! जीवे पावं कम्मं एवं एएणं अभिलावेणं जच्चेव वंधिसए वत्तव्वया सच्चेव निरवसेसा भाणियव्वा, तहेव नवदंडगसंगहिया एक्कारस उद्देसगा भाणियव्वा ॥ ८१७ ॥ सत्तावीसइमं करिंसुगसयं समत्तं ॥

जीवा णं भंते ! पावं कम्मं कहिं समज्जिणिंसु कहिं समायरिंसु ? गोयमा ! सव्वेवि ताव तिरिक्खजोणिएसु होज्जा १ अहवा तिरिक्खजोणिएसु य नेरइएसु य होज्जा २ अहवा तिरिक्खजोणिएसु य मणुस्सेसु य होज्जा ३ अहवा तिरिक्खजोणि-एसु य देवेसु य होज्जा ४ अहवा तिरिक्खजोणिएसु य नेरइएसु य मणुस्सेसु य होज्जा ५ अहवा तिरिक्खजोणिएसु य नेरइएसु य देवेसु य होज्जा ६ अहवा तिरिक्खजो-णिएसु य मणुस्सेसु य देवेसु य होज्जा ७ अहवा तिरिक्खजोणिएसु य नेरइएसु य मणुस्सेसु य देवेसु य होज्जा ८ । सलेस्सा णं भंते ! जीवा पावं कम्मं कहिं समज्जिणिंसु कहिं समायरिंसु ? एवं चेव, एवं कण्हलेस्सा जाव अलेस्सा, कण्हपक्खिया सुक्कप-क्खिया एवं जाव अणागारोवउत्ता । नेरइया णं भंते ! पावं कम्मं कहिं समज्जिणिंसु कहिं समायरिंसु ? गोयमा ! सव्वेवि ताव तिरिक्खजोणिएसु होज्जति एवं चेव अट्ठ भंगा भाणियव्वा, एवं सव्वत्थ अट्ठ भंगा, एवं जाव अणागारोवउत्तावि, एवं जाव वेमाणियाणं, एवं नाणावरणिज्जेणवि दंडओ, एवं जाव अंतराइएणं, एवं एए जीवादीयां वेमाणियपज्जवसाणा नव दंडगा भवंति । सेवं भंते ! २ ति जाव विह-रइ ॥ ८१८ ॥ २८११ ॥ अणंतरोववन्नगा णं भंते ! नेरइया पावं कम्मं कहिं समज्जिणिंसु कहिं समायरिंसु ? गोयमा ! सव्वेवि ताव तिरिक्खजोणिएसु होज्जा,

एवं एत्यवि अट्ट भंगा, एवं अणंतरोववन्नगाणं नेरइयाईणं जस्स जं अत्थि लेस्सा-
दीयं अणागारोवओगपज्जवसाणं तं सव्वं एयाए भयणाए भाणियव्वं जाव वेमा-
णियाणं, नवरं अणंतरेसु जे परिहरियव्वा ते जहा वंधिसए तहा इहंपि, एवं
नाणावरणिज्जेणवि दंडओ एवं जाव अंतराइएणं निरवसेसं एसोवि नवदंडगसंग-
हिओ उद्देसओ भाणियव्वो । सेवं भंते ! २ त्ति ॥ ८१९ ॥ २८।२ ॥ एवं एएणं
क्रमेणं जहेव वंधिसए उद्देसगाणं परिवाडी तहेव इहंपि अट्टसु भंगेसु नेयव्वा नवरं
जाणियव्वं जं जस्स अत्थि तं तस्स भाणियव्वं जाव (अ)चरिमुद्देसो । सव्वेवि एए
एक्कारस उद्देसगा । सेवं भंते ! २ त्ति जाव विहरइ ॥ ८२० ॥ अट्ठावीसइमं
कम्मसमज्जणणसयं समत्तं ॥

जीवा णं भंते ! पावं कम्मं किं समायं पट्ठविंसु समायं निट्ठविंसु १, समायं
पट्ठविंसु विसमायं निट्ठविंसु २, विसमायं पट्ठविंसु समायं निट्ठविंसु ३, विसमायं
पट्ठविंसु विसमायं निट्ठविंसु ४ ? गोयमा । अत्येगइया समायं पट्ठविंसु समायं निट्ठविंसु
जाव अत्येगइया विसमायं पट्ठविंसु विसमायं निट्ठविंसु, से केणट्ठेणं भंते ! एवं बुच्चइ
अत्येगइया समायं पट्ठविंसु समायं निट्ठविंसु ? तं चेव, गोयमा ! जीवा चउव्विहा
पन्नता, तंजहा-अत्येगइया समाउया समोववन्नगा १, अत्येगइया समाउया
विसमोववन्नगा २, अत्येगइया विसमाउया समोववन्नगा ३, अत्येगइया विसमाउया
विसमोववन्नगा ४, तत्थ णं जे ते समाउया समोववन्नगा ते णं पावं कम्मं समायं
पट्ठविंसु समायं निट्ठविंसु, तत्थ णं जे ते समाउया विसमोववन्नगा ते णं पावं कम्मं
समायं पट्ठविंसु विसमायं निट्ठविंसु, तत्थ णं जे ते विसमाउया समोववन्नगा ते णं
पावं कम्मं विसमायं पट्ठविंसु समायं निट्ठविंसु, तत्थ णं जे ते विसमाउया विसमो-
ववन्नगा ते णं पावं कम्मं विसमायं पट्ठविंसु विसमायं निट्ठविंसु, से तेणट्ठेणं गोयमा ।
तं चेव । सलेस्सा णं भंते ! जीवा पावं कम्मं एवं चेव, एवं सव्वट्ठाणेषुवि जाव
अणागारोवउत्ता, एए सव्वेवि पया एयाए वत्तव्वयाए भाणियव्वा । नेरइया णं
भंते ! पावं कम्मं किं समायं पट्ठविंसु समायं निट्ठविंसु० पुच्छा, गोयमा ! अत्येगइया
समायं पट्ठविंसु एवं जहेव जीवाणं तहेव भाणियव्वं जाव अणागारोवउत्ता, एवं जाव
वेमाणियाणं जस्स जं अत्थि तं एएणं चेव क्रमेणं भाणियव्वं जहा पावेण कम्मेण
दंडओ, एवं एएणं क्रमेणं अट्टसुवि कम्मप्पगवीसु अट्ट दंडगा भाणियव्वा जीवादीया
वेमाणियपज्जवसाणा एसो नवदंडगसंगहिओ पढमो उद्देसओ भाणियव्वो । सेवं भंते !
२ त्ति ॥ ८२१ ॥ एगूणतीसइमे सए पढमो उद्देसो समत्तो ॥

अणंतरोववन्नगा णं भंते ! नेरइया पावं कम्मं किं समायं पट्ठविंसु समायं

निट्ठविंसु० पुच्छा, गोयमा ! अत्थेगइया समायं पट्ठविंसु समायं निट्ठविंसु अत्थेग-
इया समायं पट्ठविंसु विसमायं निट्ठविंसु, से केणट्ठेणं भंते ! एवं चुच्चइ अत्थेगइया
समायं पट्ठविंसु तं चेव, गोयमा ! अणंतरोववन्नगा नेरइया दुविहा प०, तं०—
अत्थेगइया समाउया समोववन्नगा अत्थेगइया समाउया विसमोववन्नगा, तत्थ णं
जे ते समाउया समोववन्नगा ते णं पावं कम्मं समायं पट्ठविंसु समायं निट्ठविंसु, तत्थ
णं जे ते समाउया विसमोववन्नगा ते णं पावं कम्मं समायं पट्ठविंसु विसमायं निट्ठ-
विंसु, से तेणट्ठेणं तं चेव । सलेस्सा णं भंते ! अणंतरोववन्नगा नेरइया पावं कम्मं
एवं चेव, एवं जाव अणागारोवउत्ता, एवं असुरकुमारावि एवं जाव वेमाणिया नवरं
जं जस्स अत्थि तं तस्स भाणियव्वं, एवं नाणावरणिज्जेणवि दंडओ, एवं निरवसेसं
जाव अंतराइएणं । सेवं भंते ! २ त्ति जाव विहरइ ॥ २५।२ ॥ एवं एएणं गमएणं
जचेव वंधिसए उद्देसगपरिवाडी सचेव इहवि भाणियव्वा जाव अचरिमोत्ति, अणं-
त्तरउद्देसगाणं चउण्हवि एक्का वत्तव्वया सेसाणं सत्तहं एक्का वत्तव्वया ॥ ८२२ ॥
एगूणतीसइमं कम्मपट्ठवणसयं समत्तं ॥

कइ णं भंते ! समोसरणा प० ? गोयमा ! चत्तारि (चउव्विहा) समोसरणा प०,
त्तंजहा—किरियावाई अकिरियावाई अन्नाणियवाई वेणइयवाई, जीवा णं भंते ! किं
किरियावाई अकिरियावाई अन्नाणियवाई वेणइयवाई ? गोयमा ! जीवा किरियावाईवि
अकिरियावाईवि अन्नाणियवाईवि वेणइयवाईवि, सलेस्सा णं भंते ! जीवा किं
किरियावाई० पुच्छा, गोयमा ! किरियावाईवि अकिरियावाईवि अन्नाणियवाईवि
वेणइयवाईवि, एवं जाव सुक्कलेस्सा, अलेस्सा णं भंते ! जीवा पुच्छा, गोयमा !
किरियावाई नो अकिरियावाई नो अन्नाणियवाई नो वेणइयवाई । कण्हपक्खिया
णं भंते ! जीवा किं किरियावाई० पुच्छा, गोयमा ! नो किरियावाई अकिरियावाई
अन्नाणियवाईवि वेणइयवाईवि, सुक्कपक्खिया जहा सलेस्सा, सम्मादिट्ठी जहा
अलेस्सा, मिच्छादिट्ठी जहा कण्हपक्खिया, सम्मामिच्छादिट्ठीणं पुच्छा, गोयमा !
नो किरियावाई नो अकिरियावाई अन्नाणियवाईवि वेणइयवाईवि, णाणी जाव
केवलनाणी जहा अलेस्सा, अन्नाणी जाव विभंगनाणी जहा कण्हपक्खिया, आहा-
रसन्नोवउत्ता जाव परिगहसन्नोवउत्ता जहा सलेस्सा, नोसन्नोवउत्ता जहा अलेस्सा,
सवेदगा जाव नपुंसगवेदगा जहा सलेस्सा, अवेदगा जहा अलेस्सा, सकसाई
जाव लोभकसाई जहा सलेस्सा, अकसाई जहा अलेस्सा, सजोगी जाव कायजोगी
जहा सलेस्सा, अजोगी जहा अलेस्सा, सागारोवउत्ता अणागारोवउत्ता जहा
सलेस्सा । नेरइया णं भंते ! किं किरियावाई० पुच्छा, गोयमा ! किरियावाईवि

जाव वेणइयवाईवि, सलेस्सा णं भंते ! नेरइया किं किरियावाई० ? एवं चेव, एवं जाव काउलेस्सा, कण्हपक्खिया किरियाविवज्जिया, एवं एएणं कमेणं जच्चेव जीवाणं वत्तव्वया सच्चेव नेरइयाणवि वत्तव्वया जाव अणागारोवउत्ता नवरं जं अत्थि तं भाणियव्वं सेसं न भण्णइ, जहा नेरइया एवं जाव थणियकुमारा ॥ पुढविकाइया णं भंते ! किं किरियावाई० पुच्छा, गोयमा ! नो किरियावाई अकिरियावाईवि अन्नाणियवाईवि नो वेणइयवाई, एवं पुढविकाइयाणं जं अत्थि तत्थ सव्वत्थवि एयाइं दो मज्झिंल्लाईं समोसरणाइं जाव अणागारोवउत्तावि, एवं जाव चउरिंदियाणं सव्वट्ठाणेषु एयाइं चेव मज्झिंल्लागाइं दो समोसरणाइं, सम्मत्तनाणेहिवि एयाणि चेव मज्झिंल्लागाइं दो समोसरणाइं, पंचिंदियतिरिक्खजोणिया जहा जीवा नवरं जं अत्थि तं भाणियव्वं, मणुस्सा जहा जीवा तहेव निरवसेसं, वाणमंतरजोइसिय-वेमाणिया जहा असुरकुमारा ॥ किरियावाई णं भंते ! जीवा किं नेरइयाउयं पकरेन्ति तिरिक्खजोणियाउयं पकरेन्ति मणुस्साउयं पकरेन्ति देवाउयं पकरेन्ति ? गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयंपि पकरेन्ति देवाउयंपि पकरेन्ति, जइ देवाउयं पकरेन्ति कि भवणवासिदेवाउयं पकरेन्ति जाव वेमाणियदेवाउयं पकरेन्ति ? गोयमा ! नो भवणवासिदेवाउयं पकरेन्ति नो वाणमंतरदेवाउयं पकरेन्ति नो जोइसियदेवाउयं पकरेन्ति वेमाणियदेवाउयं पकरेन्ति । अकिरियावाई णं भंते ! जीवा किं नेरइयाउयं पकरेन्ति तिरिक्ख० पुच्छा, गोयमा ! नेरइयाउयंपि पकरेन्ति जाव देवाउयंपि पकरेन्ति, एवं अन्नाणियवाईवि वेणइयवाईवि । सलेस्सा णं भंते ! जीवा किरियावाई कि नेरइयाउयं पकरेन्ति० पुच्छा, गोयमा ! नो नेरइयाउयं एवं जहेव जीवा तहेव सलेस्सावि चउहिवि समोसरणेहिं भाणियव्वां, कण्हलेस्सा णं भंते ! जीवा किरियावाई किं नेरइयाउयं पकरेन्ति० पुच्छा, गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयं पकरेन्ति नो देवाउयं पकरेन्ति, अकिरियावाई अन्नाणियवाई वेणइयवाई य चत्तारिवि आउयाइं पकरेन्ति, एवं नीललेस्सावि काउलेस्सावि, तेउलेस्सा णं भंते ! जीवा किरियावाई कि नेरइयाउयं पकरेन्ति० पुच्छा, गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयंपि पकरेन्ति देवाउयंपि पकरेन्ति, जइ देवाउयं पकरेन्ति तहेव, तेउलेस्सा णं भंते ! जीवा अकिरियावाई कि नेरइयाउयं० पुच्छा, गोयमा ! नो नेरइयाउयं पकरेन्ति तिरिक्खजोणियाउयंपि पकरेन्ति मणुस्साउयंपि पकरेन्ति देवाउयंपि पकरेन्ति, एवं अन्नाणियवाईवि वेणइयवाईवि, जहा तेउलेस्सा एवं पम्हलेस्सावि रुक्कलेस्सावि नेयव्वा ॥ अलेस्सा णं भंते ! जीवा किरियावाई किं

नेरइयाउयं पकरेंति० पुच्छा, गोयमा ! नो नेरइयाउयं पकरेंति नो तिरिक्ख० नो मणुस्स० नो देवाउयं पकरेंति, कण्हपक्खिया णं भंते ! जीवा अकिरियावाई किं नेरइयाउयं० पुच्छा, गोयमा ! नेरइयाउयंपि पकरेन्ति एवं चउव्विहंपि, एवं अन्नाणियवाईवि वेणइयवाईवि, सुक्कपक्खिया जहा सलेस्सा, सम्महिट्ठी णं भंते ! जीवा किरियावाई किं नेरइयाउयं० पुच्छा, गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयंपि पकरेन्ति देवाउयंपि पकरेन्ति, मिच्छादिट्ठी जहा कण्हपक्खिया, सम्मामिच्छादिट्ठी णं भंते ! जीवा अन्नाणियवाई किं नेरइयाउयं० जहा अलेस्सा, एवं वेणइयवाईवि, णाणी आभिणिवोहियनाणी य सुयनाणी य ओहिनाणी य जहा सम्महिट्ठी, मणपज्जवणाणी णं भंते ! किं० पुच्छा, गोयमा ! नो नेरइयाउयं पकरेन्ति नो तिरिक्ख० नो मणुस्साउयं पकरेंति देवाउयं पकरेन्ति, जइ देवाउयं पकरेन्ति किं भवणवासि० पुच्छा, गोयमा ! नो भवणवासिदेवाउयं पकरेन्ति नो वाणमंतर० नो जोइसिय० वेमाणियदेवाउयं पकरेन्ति, केवलनाणी जहा अलेस्सा, अन्नाणी जाव विभंगनाणी जहा कण्हपक्खिया, सन्नासु चउसुवि जहा सलेस्सा, नोसन्नोवउत्ता जहा मणपज्जवनाणी, सवेदगा जाव नपुंसगवेदगा जहा सलेस्सा, अवेदगा जहा अलेस्सा, सकसाई जाव लोभकसाई जहा सलेस्सा, अकसाई जहा अलेस्सा, सजोगी जाव कायजोगी जहा सलेस्सा, अजोगी जहा अलेस्सा, सागारोवउत्ता य अणागारोवउत्ता य जहा सलेस्सा ॥ ८२३ ॥ किरियावाई णं भंते ! नेरइया किं नेरइयाउयं० पुच्छा, गोयमा ! नो नेरइयाउयं पकरे(इ)न्ति नो तिरिक्खजोणियाउयं पकरेंति मणुस्साउयं पकरेन्ति नो देवाउयं पकरेन्ति, अकिरियावाई णं भंते ! नेरइया पुच्छा, गोयमा ! नो नेरइयाउयं पकरे(इ)न्ति तिरिक्खजोणियाउयंपि पकरेन्ति मणुस्साउयंपि पकरेन्ति नो देवाउयं पकरेन्ति, एवं अन्नाणियवाईवि वेणइयवाईवि । सलेस्सा णं भंते ! नेरइया किरियावाई किं नेरइयाउयं० एवं सव्वेवि नेरइया जे किरियावाई ते मणुस्साउयं एगं पकरेन्ति, जे अकिरियावाई अन्नाणियवाई वेणइयवाई ते सव्वट्ठाणेषुवि नो नेरइयाउयं पकरेन्ति तिरिक्खजोणियाउयंपि पकरेन्ति मणुस्साउयंपि पकरेन्ति नो देवाउयं पकरेन्ति, नवरं सम्मामिच्छत्ते उवरिल्लेहिं दोहिवि समोसरणेहिं न किंचिवि पकरेन्ति जहेव जीवपए, एवं जाव थणियकुमारा जहेव नेरइया । अकिरियावाई णं भंते ! पुढविकाइया पुच्छा, गोयमा ! नो नेरइयाउयं पकरे(इ)न्ति तिरिक्खजोणियाउयं पकरेन्ति मणुस्साउयं पकरेन्ति नो देवाउयं पकरेन्ति, एवं अन्नाणियवाईवि । सलेस्सा णं भंते ! एवं जं जं पदं अत्थि पुढविकाइयाणं तहिं २ मज्झिमेसु दोसु समोसरणेषु एवं चेव दुविहं आउयं पकरेन्ति नवरं तेउलेस्साए न किपि पकरेन्ति,

एवं आउक्काइयाणवि, एवं वणस्सइकाइयाणवि, तेउकाइया वाउकाइया सव्वट्ठाणेषु मज्झिमेसु दोसु समोसरणेसु नो नेरइयाउयं पकरे(इ)न्ति तिरिक्खजोणियाउयं पकरेन्ति नो मणुस्साउयं पकरेन्ति नो देवाउयं पकरेन्ति, वेइंदियतेइंदियचउरिंदियाणं जहा पुढविकाइयाणं नवरं सम्मत्तनाणेसु न एकंपि आउयं पकरेन्ति ॥ किरियावाई णं भंते ! पंचिंदियतिरिक्खजोणिया किं नेरइयाउयं पकरेन्ति० पुच्छा, गोयमा ! जहा मणपज्जवनाणी, अकिरियावाई अन्नाणियवाई वेणइयवाई य चउव्विहंपि पकरेन्ति, जहा ओहिया तहा सलेस्सावि । कण्हलेस्सा णं भंते ! किरियावाई पंचिंदियतिरिक्खजोणिया किं नेरइयाउयं० पुच्छा, गोयमा ! नो नेरइयाउयं पकरेन्ति णो तिरिक्ख० नो मणुस्साउयं पकरेन्ति नो देवाउयं पकरेन्ति, अकिरियावाई अन्नाणियवाई वेणइयवाई चउव्विहंपि पकरेन्ति, जहा कण्हलेस्सा एवं नीललेस्सावि काउलेस्सावि, तेउलेस्सा जहा सलेस्सा, नवरं अकिरियावाई अन्नाणियवाई वेणइयवाई य णो नेरइयाउयं पकरेन्ति तिरिक्खजोणियाउयंपि पकरेन्ति मणुस्साउयंपि पकरेन्ति देवाउयंपि पकरेन्ति, एवं पम्हलेस्सावि, एवं सुक्कलेस्सावि भाणियव्वा, कण्हपक्खिया तिहिं समोसरणेहिं चउव्विहंपि आउयं पकरेन्ति, सुक्कपक्खिया जहा सलेस्सा, सम्मदिट्ठी जहा मणपज्जवनाणी तहेव वेमाणियाउयं पकरेन्ति, मिच्छादिट्ठी जहा कण्हपक्खिया, सम्मामिच्छादिट्ठी ण य एकंपि आउयं पकरेन्ति जहेव नेरइया, णाणी जाव ओहिनाणी जहा सम्मदिट्ठी, अन्नाणी जाव विभंगनाणी जहा कण्हपक्खिया, सेसा जाव अणागारोवउत्ता सव्वे जहा सलेस्सा तहा चेव भाणियव्वा, जहा पंचिंदियतिरिक्खजोणियाणं वत्तव्वया भणिया एवं मणुस्साणवि वत्तव्वया भाणियव्वा, नवरं मणपज्जवनाणी नोसन्नोवउत्ता य जहा सम्मदिट्ठी तिरिक्खजोणिया तहेव भाणियव्वा, अलेस्सा केवलनाणी अवेदगा अकसाई अजोगी य एए एकंपि आउयं न पकरेन्ति जहा ओहिया जीवा सेसं तं चेव, चाणमंतरजोइसियवेमाणिया जहा असुरकुमारा ॥ किरियावाई णं भंते ! जीवा किं भवसिद्धिया अभवसिद्धिया ? गोयमा ! भवसिद्धिया नो अभवसिद्धिया । अकिरियावाई णं भंते ! जीवा किं भवसिद्धिया पुच्छा, गोयमा ! भवसिद्धियावि अभवसिद्धियावि, एवं अन्नाणियवाईवि, वेणइयवाईवि । सलेस्सा णं भंते ! जीवा किरियावाई किं भवसिद्धिया पुच्छा, गोयमा ! भवसिद्धिया नो अभवसिद्धिया । सलेस्सा णं भंते ! जीवा अकिरियावाई किं भवसिद्धिया पुच्छा, गोयमा ! भवसिद्धियावि अभवसिद्धियावि, एवं अन्नाणियवाईवि वेणइयवाईवि जहा सलेस्सा, एवं जाव सुक्कलेस्सा, अलेस्सा णं भंते ! जीवा किरियावाई किं भवसिद्धिया पुच्छा, गोयमा ! भवसिद्धिया नो अभवसिद्धिया, एवं एएणं अभिलावेणं कण्हपक्खिया

तिसुवि समोसरणेसु भयणाए, सुक्कपक्खिया चउसुवि समोसरणेसु भवसिद्धिया नो अभवसिद्धिया, सम्महिट्ठी जहा अलेस्सा, मिच्छादिट्ठी जहा कण्हपक्खिया, सम्मा-
मिच्छादिट्ठी दोसुवि समोसरणेसु जहा अलेस्सा, नाणी जाव केवलनाणी भवसि-
द्धिया नो अभवसिद्धिया, अन्नाणी जाव विभंगनाणी जहा कण्हपक्खिया, सन्नासु
चउसुवि जहा सलेस्सा, नोसन्नोवउत्ता जहा सम्महिट्ठी, सवेदगा जाव नपुंसग-
वेदगा जहा सलेस्सा, अवेदगा जहा सम्महिट्ठी, सकसाई जाव लोभकसाई जहा
सलेस्सा, अकसाई जहा सम्महिट्ठी, सजोगी जाव कायजोगी जहा सलेस्सा,
अजोगी जहा सम्महिट्ठी, सागारोवउत्ता अणागारोवउत्ता जहा सलेस्सा, एवं नेरइ-
यावि भाणियव्वा नवरं नायव्वं जं अत्थि, एवं असुरकुमारावि जाव थणियकुमारा,
पुढाविकाइया सव्वट्ठाणेसुवि मज्झिमेसु दोसुवि समोसरणेसु भवसिद्धियावि अभव-
सिद्धियावि एवं जाव वणस्सइकाइया, वेइंदियतेइंदियचउरिंदिया एवं चेव नवरं
सम्मत्ते ओहिनाणे आभिणिवोहियनाणे सुयनाणे एएसु चेव दोसु मज्झिमेसु समोस-
रणेसु भवसिद्धिया नो अभवसिद्धिया, सेसं तं चेव, पंचिंदियतिरिक्खजोणिया जहा
नेरइया नवरं नायव्वं जं अत्थि, मणुस्सा जहा ओहिया जीवा, वाणमंतरजोइसिय-
वेमाणिया जहा असुरकुमारा । सेवं भंते ! २ त्ति ॥ ८२४ ॥ तीसइमस्स
सयस्स पढन्तो उद्देसो समत्तो ॥

अणंतरोववन्नगां णं भंते ! नेरइया किं किरियावाई० पुच्छा, गोयमा ! किरि-
यावाईवि जाव वेणइयवाईवि, सलेस्सा णं भंते ! अणंतरोववन्नगा नेरइया किं
किरियावाई० एवं चेव, एवं जहेव पढमुद्देसे नेरइयाणं वत्तव्वया तहेव इहवि भाणि-
यव्वा, नवरं जं जस्स अत्थि अणंतरोववन्नगाणं नेरइयाणं तं तस्स भाणियव्वं,
एवं सव्वजीवाणं जाव वेमाणियाणं, नवरं अणंतरोववन्नगाणं जं जहिं अत्थि तं
तहिं भाणियव्वं । किरियावाई णं भंते ! अणंतरोववन्नगा नेरइया किं नेरइयाउयं
पकरेन्ति० पुच्छा, गोयमा ! नो नेरइयाउयं पकरेन्ति नो तिरि० नो मणु० नो देवा-
उयं पकरेन्ति, एवं अकिरियावाईवि अन्नाणियवाईवि वेणइयवाईवि । सलेस्सा णं
भंते ! किरियावाई अणंतरोववन्नगा नेरइया किं नेरइयाउयं० पुच्छा, गोयमा ! नो
नेरइयाउयं पकरेन्ति जाव नो देवाउयं पकरेन्ति, एवं जाव वेमाणिया, एवं सव्वट्ठाणे-
सुवि अणंतरोववन्नगा नेरइया न किंचिवि आउयं पकरेन्ति जाव अणागारोवउत्तत्ति,
एवं जाव वेमाणिया नवरं जं जस्स अत्थि तं तस्स भाणियव्वं । किरियावाई णं
भंते ! अणंतरोववन्नगा नेरइया किं भवसिद्धिया अभवसिद्धिया ? गोयमा ! भव-
सिद्धिया नो अभवसिद्धिया । अकिरियावाईणं पुच्छा, गोयमा ! भवसिद्धियावि

अभवसिद्धियावि, एवं अन्नाणियवाईवि वेणइयवाईवि । सलेस्सा णं भंते ! किरिया-
वाई अणंतरोववन्नगा नेरइया किं भवसिद्धिया अभवसिद्धिया ? गोयमा ! भव-
सिद्धिया नो अभवसिद्धिया, एवं एएणं अभिलावेणं जहेव ओहिए उद्देसए नेरइयाणं
वत्तव्वया भाणिया तहेव इहवि भाणियव्वा जाव अणागारोवउत्तत्ति, एवं जाव
वेमाणियाणं नवरं जं जस्स अत्थि तं तस्स भाणियव्वं, इमं से लक्खणं-जे
किरियावाई सुक्कपक्खिया सम्मामिच्छादिट्ठिया एए सव्वे भवसिद्धिया नो अभव-
सिद्धिया, सेसा सव्वे भवसिद्धियावि अभवसिद्धियावि । सेवं भंते ! २ त्ति ॥ ८२५ ॥
॥ ३०१२ ॥ परंपरोववन्नगा णं भंते ! नेरइया किं किरियावाई० एवं जहेव ओहिओ
उद्देसओ तहेव परंपरोववन्नएसुवि नेरइयाईओ तहेव निरवसेसं भाणियव्वं तहेव
तियदंडगसंगहिओ । सेवं भंते ! २ त्ति जाव विहरइ ॥ ८२६ ॥ ३०१३ ॥ एवं
एएणं कमेणं जच्चेव वंघिसए उद्देसगाणं परिवाडी सच्चेव इहंपि जाव अचरिमो
उद्देसओ, नवरं अणंतरा चत्तारिवि एक्कगमगा, परंपरा चत्तारिवि एक्कगमएणं, एवं
चरिमावि, अचरिमावि एवं चेव नवरं अलेस्सो केवली अजोगी न भन्नइ, सेसं
तहेव । सेवं भंते ! २ त्ति । एए एक्कारसवि उद्देसगा ॥ ८२७ ॥ तीसइमं समो-
स्सरणसयं समत्तं ॥

रायगिहे जाव एवं वयासी-कइ णं भंते ! खुट्ठा(ग) जुम्मा प० ? गोयमा !
चत्तारि खुट्ठा(ग) जुम्मा प०, तं०-कडजुम्मे १, तेओगे २, दावरजुम्मे ३, कलिओगे
४, से केणट्ठेणं भंते ! एवं वुच्चइ चत्तारि खुट्ठा(ग) जुम्मा प० तं०-कडजुम्मे जाव
कलिओगे ? गोयमा ! जे णं रासी चउक्कएणं अवहारेणं अवहीरमाणे चउपज्जवसिए
सेत्तं खुट्ठागकडजुम्मे, जे णं रासी चउक्कएणं अवहारेणं अवहीरमाणे तिपज्जवसिए सेत्तं
खुट्ठागतेओगे, जे णं रासी चउक्कएणं अवहारेणं अवहीरमाणे दुपज्जवसिए सेत्तं खुट्ठाग-
दावरजुम्मे, जे णं रासी चउक्कएणं अवहारेणं अवहीरमाणे एगपज्जवसिए सेत्तं
खुट्ठागकलिओगे, से तेणट्ठेणं जाव कलिओगे । खुट्ठागकडजुम्मेनेरइया णं भंते !
कओ उववज्जंति किं नेरइएहिंतो उववज्जंति तिरिक्ख० पुच्छा, गोयमा ! नो नेरइए-
हिंतो उववज्जंति एवं नेरइयाणं उववाओ जहा वक्कंतीए तहा भाणियव्वो । ते णं
भंते ! जीवा एगसमएणं केवइया उववज्जंति ? गोयमा ! चत्तारि वा अट्ठ वा बारस
वा सोलस वा संखेज्जा वा असंखेज्जा वा उववज्जंति । ते णं भंते ! जीवा कइं
उववज्जंति ? गोयमा ! से जहानामए पवए पवमाणे अज्झवसाण० एवं जहा पंच-
वीसइमे सए अट्ठमुद्देसए नेरइयाणं वत्तव्वया तहेव इहवि भाणियव्वा जाव आय-
प्पओगेणं उववज्जंति नो परप्पओगेणं उववज्जंति । रयणप्पभापुढविखुट्ठागकडजुम्मे-

नेरइया णं भंते ! कओ उववज्जंति० ? एवं जहा ओहियनेरइयाणं वत्तव्वया सच्चैव
 रयणप्पभाएवि भाणियव्वा जाव नो परप्पओगेणं उववज्जंति, एवं सक्करप्पभाएवि,
 एवं जाव अहेसत्तमाए, एवं उववाओ जहा वक्कंतीए, असन्नी खलु पढमं दोच्चं व
 सरीसवा तइय पक्खी । गाहाए उववाएयव्वा, सेसं तहेव । खुड्ढागतेओग-
 नेरइया णं भंते ! कओ उववज्जंति किं नेरइएहिंतो० ? उववाओ जहा वक्कंतीए,
 ते णं भंते ! जीवा एगसमएणं केवइया उववज्जंति ? गोयमा ! तिन्नि वा सत्त
 वा एक्कारस वा पन्नरस वा संखेज्जा वा असंखेज्जा वा उववज्जंति, सेसं जहा
 कडजुम्मस्स, एवं जाव अहेसत्तमाए । खुड्ढागदावरजुम्मनेरइया णं भंते ! कओ
 उववज्जंति० ? एवं जहेव खुड्ढागकडजुम्मे नवरं परिमाणं दो वा छ वा दस वा चउद्दस
 वा संखेज्जा वा असंखेज्जा वा सेसं तं चेव, एवं जाव अहेसत्तमाए । खुड्ढागकलिओग-
 नेरइया णं भंते ! कओ उववज्जंति० ? एवं जहेव खुड्ढागकडजुम्मे नवरं परिमाणं
 एक्को वा पंच वा नव वा तेरस वा संखेज्जा वा असंखेज्जा वा उववज्जंति, सेसं तं
 चेव, एवं जाव अहेसत्तमाए । सेवं भंते ! २ त्ति जाव विहरइ ॥ ८२८ ॥ ३१।१ ॥
 कण्हलेस्सखुड्ढागकडजुम्मनेरइया णं भंते ! कओ उववज्जंति० ? एवं चेव जहा ओहि-
 यगमो जाव नो परप्पओगेणं उववज्जंति, नवरं उववाओ जहा वक्कंतीए, धूमप्पभा-
 पुढविनेरइया णं सेसं तहेव, धूमप्पभापुढविकण्हलेस्सखुड्ढागकडजुम्मनेरइया णं
 भंते ! कओ उववज्जंति० ? एवं चेव निरवसेसं, एवं तमाएवि एवं अहेसत्तमाएवि,
 नवरं उववाओ सव्वत्थ जहा वक्कंतीए । कण्हलेस्सखुड्ढागतेओगनेरइया णं भंते ! कओ
 उववज्जंति० ? एवं चेव नवरं तिन्नि वा सत्त वा एक्कारस वा पन्नरस वा संखेज्जा वा
 असंखेज्जा वा सेसं तहेव एवं जाव अहेसत्तमाएवि । कण्हलेस्सखुड्ढागदावरजुम्म-
 नेरइया णं भंते ! कओ उववज्जंति० ? एवं चेव नवरं दो वा छ वा दस वा चउद्दस
 वा सेसं तं चेव, एवं धूमप्पभाएवि जाव अहेसत्तमाएवि । कण्हलेस्सखुड्ढागकलिओग-
 नेरइया णं भंते ! कओ उववज्जंति० ? एवं चेव नवरं एक्को वा पंच वा नव वा तेरस
 वा संखेज्जा वा असंखेज्जा वा सेसं तं चेव, एवं धूमप्पभाएवि तमाएवि अहेसत्त-
 माएवि । सेवं भंते ! २ त्ति ॥ ८२९ ॥ ३१।२ ॥ नीललेस्सखुड्ढागकडजुम्मनेरइया
 णं भंते ! कओ उववज्जंति० एवं जहेव कण्हलेस्सखुड्ढागकडजुम्मा नवरं उववाओ
 जो वालुयप्पभाए सेसं तं चेव, वालुयप्पभापुढविनीललेस्सखुड्ढागकडजुम्मनेरइया
 एवं चेव, एवं पंकप्पभाएवि, एवं धूमप्पभाएवि, एवं चउसुवि जुम्मेसु नवरं परिमाणं
 जाणियव्वं, परिमाणं जहा कण्हलेस्सउद्देसए । सेसं तहेव । सेवं भंते ! सेवं भंते ! त्ति
 ॥ ८३० ॥ ३१।३ ॥ काउलेस्सखुड्ढागकडजुम्मनेरइया णं भंते ! कओ उववज्जंति० ?

एवं जहेव कण्हलेस्सखुट्ठागकडजुम्मनेरइया नवरं उववाओ जो रयणप्पभाए सेसं तहेव । रयणप्पभापुढविकाउलेस्सखुट्ठागकडजुम्मनेरइया णं भंते । कओ उववज्जंति० ? एवं चेव, एवं सक्करप्पभाएवि, एवं वालयप्पभाएवि, एवं चउसुवि जुम्मेसु, नवरं परिमाणं जाणियव्वं, परिमाणं जहा कण्हलेस्सउद्देसए सेसं तं चेव, सेवं भंते । २ त्ति ॥ ८३१ ॥ ३१।४ ॥ भवसिद्धियखुट्ठागकडजुम्मनेरइया णं भंते । कओ उववज्जंति किं नेरइए० ? एवं जहेव ओहिओ गमओ तहेव निरवसेसं जाव नो परप्पओगेणं उववज्जंति । रयणप्पभापुढविभवसिद्धियखुट्ठागकडजुम्मनेरइया णं भंते । एवं चेव निरवसेसं, एवं जाव अहेसत्तमाए, एवं भवसिद्धियखुट्ठागतेओगनेरइयावि एवं जाव कलिओगत्ति, नवरं परिमाणं जाणियव्वं, परिमाणं पुव्वभणियं जहा पढमुद्देसए । सेवं भंते । २ त्ति ॥ ८३२ ॥ ३१।५ ॥ कण्हलेस्सभवसिद्धियखुट्ठागकडजुम्मनेरइया णं भंते । कओ उववज्जंति० ? एवं जहेव ओहिओ कण्हलेस्सउद्देसओ तहेव निरवसेसं चउसुवि जुम्मेसु भाणियव्वो जाव अहेसत्तमपुढविकण्हलेस्सभवसिद्धियखुट्ठागकलिओगनेरइया णं भंते । कओ उववज्जंति० ? तहेव । सेवं भंते । २ त्ति ॥ ८३३ ॥ ३१।६ ॥ नीललेस्सभवसिद्धिया चउसुवि जुम्मेसु तहेव भाणियव्वा जहा ओहिए नीललेस्सउद्देसए । सेवं भंते । सेवं भंते । त्ति जाव विहरइ ॥ ८३४ ॥ ३१।७ ॥ काउलेस्सभवसिद्धिया चउसुवि जुम्मेसु तहेव उववाएयव्वा जहेव ओहिए काउलेस्सउद्देसए । सेवं भंते । २ त्ति जाव विहरइ ॥ ८३५ ॥ ३१।८ ॥ जहा भवसिद्धिएहिं चत्तारि उद्देसगा भणिया एवं अभवसिद्धिएहिवि चत्तारि उद्देसगा भाणियव्वा जाव काउलेस्साउद्देसओत्ति । सेवं भंते । २ त्ति ॥ ८३६ ॥ ३१।१२ ॥ एवं सम्महिट्ठीहिवि लेस्सासंजुत्तेहिं चत्तारि उद्देसगा कायव्वा, नवरं सम्महिट्ठी पढमविइएसु दोसुवि उद्देसएसु अहेसत्तमापुढवीए न उववाएयव्वो, सेसं तं चेव । सेवं भंते । सेवं भंते । त्ति ॥ ८३७ ॥ ३१।१६ ॥ मिच्छादिट्ठीहिवि चत्तारि उद्देसगा कायव्वा जहा भवसिद्धियाणं । सेवं भंते । २ त्ति ॥ ८३८ ॥ ३१।२० ॥ एवं कण्हपक्खिएहिवि लेस्सासंजुत्तेहिं चत्तारि उद्देसगा कायव्वा जहेव भवसिद्धिएहिं । सेवं भंते । सेवं भंते । त्ति ॥ ८३९ ॥ ३१।२४ ॥ सुक्कपक्खिएहिं एवं चेव चत्तारि उद्देसगा भाणियव्वा जाव वालयप्पभापुढविकाउलेस्ससुक्कपक्खियखुट्ठागकलिओगनेरइया णं भंते । कओ उववज्जंति० ? तहेव जाव नो परप्पओगेणं उववज्जंति । सेवं भंते । २ त्ति ॥ ८४० ॥ ३१ ॥ २८ ॥ सव्वेवि एए अट्ठावीसं उद्देसगा ॥ एकतीसइमं उववायसयं समत्तं ॥

खुट्ठागकडजुम्मनेरइया णं भंते ! अणंतरं उव्वट्ठिता कहिं गच्छंति कहिं उवव-

जंति कि नेरइएसु उववजंति तिरिक्खजोणिएसु उववजंति० उव्वट्टणा जहा वक्कं-
तीए । ते णं भंते ! जीवा एगसमएणं केवइया उव्वट्टंति ? गोयमा ! चत्तारि वा
अट्ट वा वारस वा सोलस वा सखेज्जा वा असंखेज्जा वा उव्वट्टंति, ते णं भंते !
जीवा कहां उव्वट्टंति ? गोयमा ! से जहानामए पवए एवं तहेव, एवं सो चेव
गमओ जाव आयप्पओगेण उव्वट्टंति नो परप्पओगेणं उव्वट्टंति, रयणप्पभापुढवि-
(नेरइए) खुट्ठागकडजुम्म० एव रयणप्पभाएवि एवं जाव अहेसत्तमाएवि, एवं खुट्ठाग-
तेओगखुट्ठागदावरजुम्मखुट्ठागकलिओगा नवरं परिमाणं जाणियव्वं, सेसं तं चेव ।
सेवं भंते ! २ त्ति ॥ ८४१ ॥ ३२।१ ॥ कण्हलेस्सकडजुम्मनेरइया एव एएणं कमेणं
जहेव उववायसए अट्ठावीसं उद्देसगा भणिया तहेव उव्वट्टणासएवि अट्ठावीसं उद्देसगा
भाणियव्वा निरवसेसा नवरं उव्वट्टंतित्ति अभिलावो भाणियव्वो, सेसं तं चेव ।
सेवं भंते ! २ त्ति जाव विहरइ ॥ ८४२ ॥ **घत्तीसइमं उववट्टणासयं समत्तं ॥**

कइविहा णं भंते ! एगिंदिया प० ? गोयमा ! पंचविहा एगिंदिया प०, तं०-
पुढविकाइया जाव वणरसइकाइया, पुढविकाइया णं भंते ! कइविहा प० ? गोयमा !
दुविहा प०, तं०-सुहुमपुढविकाइया य वायरपुढविकाइया य, सुहुमपुढविकाइया णं
भंते ! कइविहा प० ? गोयमा ! दुविहा प०, तंजहा-पज्जत्तसुहुमपुढविकाइया
य अपज्जत्तसुहुमपुढविकाइया य, वायरपुढविकाइया णं भंते ! कइविहा प० ?
गोयमा ! एवं चेव, एवं आउक्काइयावि चउक्कएणं भेदेणं भाणियव्वा एवं जाव
वणस्सइकाइया(णं) । अपज्जत्तसुहुमपुढविकाइयाणं भंते ! कइ कम्मप्पगडीओ प० ?
गोयमा ! अट्ट कम्मप्पगडीओ प०, तं०-नाणावरणिज्जं जाव अंतराइयं, पज्जत्त-
सुहुमपुढविकाइयाणं भंते ! कइ कम्मप्पगडीओ प० ? गोयमा ! अट्ट कम्मप्पगडीओ
प०, तंजहा-नाणावरणिज्जं जाव अंतराइयं । अपज्जत्तवायरपुढविकाइयाणं भंते !
कइ कम्मप्पगडीओ प० ? गोयमा ! एवं चेव ८, पज्जत्तवायरपुढविकाइयाणं भंते !
कइ कम्मप्पगडीओ प० ? एवं चेव ८, एवं एएणं कमेण जाव वायरवणस्सइकाइयाणं
पज्जत्तगाणंति । अपज्जत्तसुहुमपुढविकाइया णं भंते ! कइ कम्मप्पगडीओ वंधंति ?
गोयमा ! सत्तविहवंधगावि अट्टविहवंधगावि सत्त वंधमाणा आउयवज्जाओ सत्त
कम्मप्पगडीओ वंधंति अट्ट वंधमाणा पडिपुन्नाओ अट्ट कम्मप्पगडीओ वंधंति,
पज्जत्तसुहुमपुढविकाइया णं भंते ! कइ कम्मप्पगडीओ वंधंति ? एवं चेव, एवं सव्वे
जाव पज्जत्तवायरवणस्सइकाइया णं भंते ! कइ कम्मप्पगडीओ वंधंति ? एवं चेव ।
अपज्जत्तसुहुमपुढविकाइया णं भंते ! कइ कम्मप्पगडीओ वेदंति ? गोयमा ! चउइस
कम्मप्पगडीओ वेदंति, तं०-नाणावरणिज्जं जाव अंतराइयं, सोइंदियवज्जं चक्खि-

दियवज्जं घाणिंदियवज्जं जिर्विमदियवज्जं इत्थिवेयवज्जं पुरिसवेयवज्जं, एवं चउक्कएणं भेदेणं जाव पज्जत्तवायरवणस्सइकाइया णं भंते ! कइ कम्मप्पगढीओ वेदंति ? गोयमा ! एवं चेव चउद्दस कम्मप्पगढीओ वेदंति । सेवं भंते ! २ त्ति ॥ ८४३ ॥ ३३-१-१ ॥ कइविहा णं भंते ! अणंतरोववन्नगा एगिंदिया प० ? गोयमा ! पंचविहा अणंतरोववन्नगा एगिंदिया प०, तं०-पुढविकाइया जाव वणस्सइकाइया, अणंतरोववन्नगा णं भंते ! पुढविकाइया कइविहा प० ? गोयमा ! दुविहा पन्नत्ता, तंजहा-सुहुमपुढविकाइया य वायरपुढविकाइया य, एवं दुपएणं भेदेणं जाव वणस्सइकाइया । अणंतरोववन्नगसुहुमपुढविकाइयाणं भंते ! कइ कम्मप्पगढीओ प० ? गोयमा ! अट्ठ कम्मप्पगढीओ प०, तं०-नाणावरणिज्जं जाव अंतराइयं, अणंतरोववन्नगवायरपुढविकाइयाणं भंते ! कइ कम्मप्पगढीओ प० ? गोयमा ! अट्ठ कम्मप्पगढीओ प०, तं०-नाणावरणिज्जं जाव अंतराइयं, एवं(चेव) जाव अणंतरोववन्नगवायरवणस्सइकाइयाणंति, अणंतरोववन्नगसुहुमपुढविकाइया णं भंते ! कइ कम्मप्पगढीओ वधंति ? गोयमा ! आउयवज्जाओ सत्त कम्मप्पगढीओ वधंति, एवं जाव अणंतरोववन्नगवायरवणस्सइकाइयत्ति । अणंतरोववन्नगसुहुमपुढविकाइया णं भंते ! कइ कम्मप्पगढीओ वेदेति ? गोयमा ! चउद्दस कम्मप्पगढीओ वेदेति, तं०-नाणावरणिज्जं तहेव जाव पुरिसवेयवज्जं, एवं जाव अणंतरोववन्नगवायरवणस्सइकाइयत्ति । सेवं भंते ! सेवं भंते ! त्ति ॥ ८४४ ॥ ३३-१-२ ॥ कइविहा णं भंते ! परंपरोववन्नगा एगिंदिया प० ? गोयमा ! पंचविहा परंपरोववन्नगा एगिंदिया प०, तं०-पुढविकाइया एवं चउक्कओ भेदो जहा ओहि(य)उद्देसए । परंपरोववन्नगअपज्जत्तसुहुमपुढविकाइयाणं भंते ! कइ कम्मप्पगढीओ प० ? एवं एएणं अभिलावेणं जहा ओहि(य)उद्देसए तहेव निरवसेसं भाणियव्वं जाव चउद्दस वेदंति । सेवं भंते ! २ त्ति ॥ ८४५ ॥ ॥ ३३-१-३ ॥ अणंतरोगाढा जहा अणंतरोववन्नगा ४ ॥ परंपरोगाढा जहा परंपरोववन्नगा ५ ॥ अणंतराहारगा जहा अणंतरोववन्नगा ६ ॥ परंपराहारगा जहा परंपरोववन्नगा ७ ॥ अणंतरपज्जत्तगा जहा अणंतरोववन्नगा ८ ॥ परंपरपज्जत्तगा जहा परंपरोववन्नगा ९ ॥ चरिमावि जहा परंपरोववन्नगा तहेव १० ॥ एवं अचरिमावि ११ ॥ एवं एएएक्कारस उद्देसगा । सेवं भंते ! २ त्ति जाव विहरइ ॥ ८४६ ॥ पढमं एगिंदियसयं समत्तं ॥ १ ॥ कइविहा णं भंते ! कण्हलेस्सा एगिंदिया प० ? गोयमा ! पंचविहा कण्हलेस्सा एगिंदिया प०, तं०-पुढविकाइया जाव वणस्सइकाइया । कण्हलेस्सा णं भंते ! पुढविकाइया कइविहा प० ? गोयमा ! दुविहा प०, तं०-सुहुमपुढविकाइया य वायरपुढविकाइया य, कण्हलेस्सा णं भंते ! सुहुमपुढविकाइया कइविहा

प० ? गोयमा ! एवं एएणं अभिलावेणं चउक्कभेदो जहेव ओहिए उद्देसए जाव वण-
स्सइकाइयत्ति, (अणंतरोववन्नग) कण्हलेस्सअपज्जत्तसुहुमपुढविकाइयाणं भंते ! कइ
कम्मप्पगडीओ प० ? एवं चेव एएणं अभिलावेणं जहेव ओहि (ओ अणंतरोववण्णग)
उद्देस(ओ)ए तहेव पन्नत्ताओ तहेव वंधंति तहेव वेदेति । सेवं भंते ! २ ति ॥ कइविहा
णं भंते ! अणतरोववन्नगा कण्हलेस्सा एगिंदिया पन्नत्ता ? गोयमा ! पंचविहा अणंतरो-
ववन्नगा कण्हलेस्सा एगिंदिया एवं एएणं अभिलावेणं तहेव दुपओ भेदो जाव
चणस्सइकाइयत्ति, अणंतरोववन्नगकण्हलेस्ससुहुमपुढविकाइयाणं भंते ! कइ कम्मप्प-
गडीओ प० ? एवं एएणं अभिलावेणं जहा ओहिओ अणंतरोववन्नगाणं उद्देसओ
तहेव जाव वेदेति । सेवं भंते ! सेवं भंते ! ति ॥ कइविहा णं भंते ! परंपरोवव-
न्नगा कण्हलेस्सा एगिंदिया प० ? गोयमा ! पंचविहा परंपरोववन्नगा कण्हलेस्सा
एगिंदिया पन्नत्ता, तंजहा-पुढविकाइया एवं एएणं अभिलावेणं तहेव चउक्कओ
भेदो जाव वणरसइकाइयत्ति, परंपरोववन्नगकण्हलेस्सअपज्जत्तसुहुमपुढविकाइयाणं
भंते ! कइ कम्मप्पगडीओ प० ? एवं एएणं अभिलावेणं जहेव ओहिओ परंपरो-
ववन्नगउद्देसओ तहेव जाव वेदेति, एवं एएणं अभिलावेणं जहेव ओहिएगिदियसए
एकारस उद्देसगा भणिया तहेव कण्हलेस्ससएवि भाणियव्वा जाव अचरिमचरिम-
कण्हलेस्सा एगिंदिया ॥ ८४७ ॥ विइयं एगिदियसयं समत्तं ॥ २ ॥ जहा कण्हले-
स्सेहि भणियं एवं नीललेस्सेहिवि सयं भाणियव्वं । सेवं भंते ! २ ति ॥ तइयं एगिं-
दियसयं समत्तं ॥ ३ ॥ एवं काउलेस्सेहिवि सयं भाणियव्वं नवरं काउलेस्सेत्ति
अभिलावो भाणियव्वो ॥ चउत्थं एगिदियसयं समत्तं ॥ ४ ॥ कइविहा णं भंते !
भवसिद्धिया एगिंदिया प० ? गोयमा ! पंचविहा भवसिद्धिया एगिंदिया प०, तं०-
पुढविकाइया जाव वणस्सइकाइया भेदो चउक्कओ जाव वणस्सइकाइयत्ति ।
भवसिद्धियअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं एएणं
अभिलावेणं जहेव पढमिल्लगं एगिंदियसयं तहेव भवसिद्धियसयंपि भाणियव्वं,
उद्देसगपरिवाडी तहेव जाव अचरिमोत्ति । सेवं भंते ! २ ति ॥ पंचमं एगिंदियसयं
समत्तं ॥ ५ ॥ कइविहा णं भंते ! कण्हलेस्सा भवसिद्धिया एगिंदिया प० ? गोयमा !
पंचविहा कण्हलेस्सा भवसिद्धिया एगिंदिया प०, तं०-पुढविकाइया जाव वणस्सइ-
काइया, कण्हलेस्सभवसिद्धियपुढविकाइया णं भंते ! कइविहा प० ? गोयमा !
दुविहा प०, तं०-सुहुमपुढविकाइया य वायरपुढविकाइया य, कण्हलेस्सभवसिद्धिय-
सुहुमपुढविकाइया णं भंते ! कइविहा प० ? गोयमा ! दुविहा प०, तंजहा-पज्जत्ता
य अपज्जत्ता य, एवं वायरावि, एवं एएणं अभिलावेणं तहेव चउक्कओ भेदो भाणि-

यव्वो, कण्हलेस्सभवसिद्धियअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं एएणं अभिलावेणं जहेव ओहिउद्देसए तहेव जाव वेदेंति । कइविहा णं भंते ! अणंतरोववन्नगा कण्हलेस्सा भवसिद्धिया एगिंदिया प० ? गोयमा ! पंचविहा अणंतरोववन्नगा जाव वणस्सइकाइया, अणंतरोववन्नगकण्हलेस्सभवसिद्धियपुढविकाइया णं भंते ! कइविहा प० ? गोयमा ! दुविहा प०, तं०—सुहुमपुढविकाइया (य वायरपुढविकाइया य)एवं दुपओ भेदो । अणंतरोववन्नगकण्हलेस्सभवसिद्धियसुहुमपुढविकाइयाणं भंते ! कइ कम्मपगडीओ प० ? एवं एएणं अभिलावेणं जहेव ओहिओ अणंतरोववन्नगउद्देसओ तहेव जाव वेदेंति, एवं एएणं अभिलावेणं एक्कारसवि उद्देसगा तहेव भाणियव्वा जहा ओहियसए जाव अचरिमोत्ति ॥ छट्ठं एगिंदियसयं समत्तं ॥ ६ ॥ जहा कण्हलेस्सभवसिद्धिएहिं सयं भणियं एवं नीललेस्सभवसिद्धिएहिवि सयं भाणियव्वं ॥ सत्तमं एगिंदियसयं समत्तं ॥ ७ ॥ एवं काउलेस्सभवसिद्धिएहिवि सयं ॥ अट्ठमं एगिंदियसयं समत्तं ॥ ८ ॥ कइविहा णं भंते ! अभवसिद्धिया एगिंदिया प० ? गोयमा ! पंचविहा अभवसिद्धिया एगिंदिया प०, तं०—पुढविकाइया जाव वणस्सइकाइया एवं जहेव भवसिद्धियसयं भणियं नवरं नव उद्देसगा चरिमअचरिमउद्देसगवज्जा सेसं तहेव ॥ नवमं एगिंदियसयं समत्तं ॥ ९ ॥ एवं कण्हलेस्सअभवसिद्धियएगिंदियसयंपि ॥ दसमं एगिंदियसयं समत्तं ॥ १० ॥ नीललेस्सअभवसिद्धियएगिंदिएहिवि सयं ॥ ११ ॥ काउलेस्सअभवसिद्धियसयं, एवं चत्तारिवि अभवसिद्धियसयाणि णव २ उद्देसगा भवंति, एवं एयाणि वारस एगिंदियसयाणि भवंति ॥ ८४८ ॥ तेत्तीसइमं सयं समत्तं ॥

कइविहा णं भंते ! एगिंदिया प० ? गोयमा ! पंचविहा एगिंदिया प०, तं०—पुढविकाइया जाव वणस्सइकाइया, एवं एएणं चेव चउक्कएणं भेदेणं भाणियव्वा जाव वणस्सइकाइया, अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरच्छिमिल्ले चरिमंते समोहए समोहउत्ता जे भविए इमीसे रयणप्पभाए पुढवीए पच्चच्छिमिल्ले चरिमंते अपज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा ! एगसमइएण वा दुसमइएण वा तिसमइएण वा विग्गहेणं उववज्जेज्जा, से केणट्ठेणं भंते ! एवं चुच्चइ एगसमइएण वा दुसमइएण वा जाव उववज्जेज्जा ? एवं खलु गोयमा ! मए सत्त सेढीओ प०, तं०—उज्जुआयया सेढी एगओवंका दुहओवंका एगओखहा दुहओखहा चक्कवाला अद्धचक्कवाला ७, उज्जुआययाए सेढीए उववज्जमाणे एगसमइएणं विग्गहेणं उववज्जेज्जा, एगओवंकाए सेढीए उववज्जमाणे दुसमइएणं विग्गहेणं उववज्जेज्जा, दुहओवंकाए

सेढीए उववज्जमाणे तिसमइएणं विग्गहेणं उववज्जेज्जा, से तेणट्ठेणं गोयमा । जाव उववज्जेज्जा । अपज्जत्तसुहुमपुढविकाइए ण भंते । इमीसे रयणप्पभाए पुढवीए पुरच्छिमिल्ले चरिमंते समोहए २ ता जे भविए इमीसे रयणप्पभाए पुढवीए पच्चच्छिमिल्ले चरिमंते पज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेण उववज्जेज्जा ? गोयमा ! एगसमइएण वा दुसमइएण वा सेसं तं चेव जाव से तेणट्ठेणं जाव विग्गहेणं उववज्जेज्जा, एवं अपज्जत्तसुहुमपुढविकाइओ पुर(त्थि)च्छिमिल्ले चरिमंते समोहणावेत्ता पच्चच्छिमिल्ले चरिमंते वायरपुढविकाइएसु अपज्जत्तएसु उववाएयव्वो, ताहे तेसु चेव पज्जत्तएसु ४, एवं आउक्काइएसुवि चत्तारि आलावगा सुहुमेहिं अपज्जत्तएहिं ताहे पज्जत्तएहिं वायरेहिं अपज्जत्तएहिं ताहे पज्जत्तएहिं उववाएयव्वो ४, एवं चेव सुहुमतेउक्काइएहिवि अपज्जत्तएहिं १ ताहे पज्जत्तएहिं उववाएयव्वो २, अपज्जत्तसुहुमपुढविकाइए णं भंते । इमीसे रयणप्पभाए पुढवीए पुरच्छिमिल्ले चरिमंते समोहए समोहइत्ता जे भविए मणुस्सखेत्ते अपज्जत्तवायरतेउक्काइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा ? सेसं तं चेव, एवं पज्जत्तवायरतेउक्काइयत्ताए उववाएयव्वो ४, वाउक्काइए(सु) सुहुमवायरेसु जहा आउक्काइएसु उववाइओ तहा उववाएयव्वो ४, एवं वणस्सइक्काइएसुवि २०, पज्जत्तसुहुमपुढविकाइए णं भंते ! इमीसे रयणप्पभाए पुढवीए एवं पज्जत्तसुहुमपुढविकाइओवि पुरच्छिमिल्ले चरिमंते समोहणावेत्ता एएणं चेव कमेणं एएसु चेव वी(साए)ससु ठाणेसु उववाएयव्वो जाव वायरवणस्सइक्काइएसु पज्जत्तएसुवि ४०, एवं अपज्जत्तवायरपुढविकाइओवि ६०, एवं पज्जत्तवायरपुढविकाइओवि ८०, एवं आउक्काइओवि चउसुवि गमएसु पुरच्छिमिल्ले चरिमंते समोहए एयाए चेव वत्तव्वयाए एएसु चेव वीसइठाणेसु उववाएयव्वो १६०, सुहुमतेउक्काइओवि अपज्जत्तओ पज्जत्तओ य एएसु चेव वीससु ठाणेसु उववाएयव्वो, अपज्जत्तवायरतेउक्काइए णं भंते ! मणुस्सखेत्ते समोहए २ ता जे भविए इमीसे रयणप्पभाए पुढवीए पच्चच्छिमिल्ले चरिमंते अपज्जत्तसुहुमपुढविकाइयत्ताए उववज्जित्तए से णं भंते ! कइसमइएणं विग्गहेणं उववज्जेज्जा सेसं तहेव जाव से तेणट्ठेणं० एवं पुढविकाइएसु चउव्विहेसुवि उववाएयव्वो, एवं आउक्काइएसु चउव्विहेसुवि, तेउक्काइएसु सुहुमेसु अपज्जत्तएसु पज्जत्तएसु य एवं चेव उववाएयव्वो, अपज्जत्तवायरतेउक्काइए णं भंते ! मणुस्सखेत्ते समोहए २ ता जे भविए मणुस्सखेत्ते अपज्जत्तवायरतेउक्काइयत्ताए उववज्जित्तए से णं भंते ! कइसमइएणं० सेसं तं चेव, एवं पज्जत्तवायरतेउक्काइयत्ताएवि उववाएयव्वो, वाउक्काइयत्ताए य वणस्सइक्काइयत्ताए य जहा पुढविकाइएसु तहेव चउक्कएणं भेदेणं

ઉવવાણ્યવ્વો, एवं पज्जत्तवायरतेउक्काइओवि समयखेत्ते समोहणावेत्ता एणसु चेव
 वीसाए ठाणेसु उववाण्यव્वो जहेव अपज्जत्तओ उववाइओ, एवं सव्वत्यवि वायर-
 तेउक्काइया अपज्जत्तगा य पज्जत्तगा य समयखेत्ते उववाण्यव्वा समोहणावेयव्वावि
 २४०, वाउक्काइया वणस्सइक्काइया य जहा पुढविकाइया तहेव चउक्कएणं भेदेणं
 उववाण्यव्वा जाव पज्जत्ता ४०० ॥ वायरवणस्सइक्काइए णं भंते ! इमीसे रयण-
 प्पभाए पुढवीए पुरच्छिमिल्ले चरिमंते समोहए समोहएत्ता जे भविए इमीसे रय-
 णप्पभाए पुढवीए पच्चच्छिमिल्ले चरिमंते पज्जत्तवायरवणस्सइक्काइयाए उववज्जित्तए
 से णं भंते ! कइसमइएणं० सेसं तहेव जाव से तेणद्वेणं०, अपज्जत्तसुहुमपुढविका-
 इए णं भंते ! इमीसे रयणप्पभाए पुढवीए पच्चच्छिमिल्ले चरिमंते समोहए २ ता
 जे भविए इमीसे रयणप्पभाए पुढवीए पुरच्छिमिल्ले चरिमंते अपज्जत्तसुहुमपुढविकाइ-
 यत्ताए उववज्जित्तए से णं भंते ! कइसम(इ)एणं० सेसं तहेव निरवसेसं, एवं जहेव
 पुरच्छिमिल्ले चरिमंते सव्वपएसुवि समोहया पच्चच्छिमिल्ले चरिमंते समयखेत्ते य
 उववाइया जे य समयखेत्ते समोहया पच्चच्छिमिल्ले चरिमंते समयखेत्ते य उववाइया
 एवं एएणं चेव क्रमेणं पच्चच्छिमिल्ले चरिमंते समयखेत्ते य समोहया पुरच्छिमिल्ले
 चरिमंते समयखेत्ते य उववाण्यव्वा तेणेव गमएणं, एवं एएणं गमएणं दाहिणिल्ले
 चरिमंते (समयखेत्ते य) समोहयाणं उत्तरिल्ले चरिमंते समयखेत्ते य उववाओ एव चेव
 उत्तरिल्ले चरिमंते समयखेत्ते य समोहया दाहिणिल्ले चरिमंते समयखेत्ते य उववाण्यव्वा
 तेणेव गमएणं, अपज्जत्तसुहुमपुढविकाइए णं भंते ! सक्करप्पभाए पुढवीए पुरच्छि-
 मिल्ले चरिमंते समोहए २ ता जे भविए सक्करप्पभाए पुढवीए पच्चच्छिमिल्ले
 चरिमंते अपज्जत्तसुहुमपुढविकाइयाए उववज्जित्तए एवं जहेव रयणप्पभाए जाव से
 तेणद्वेणं० एवं एएणं क्रमेणं जाव पज्जत्तएसु सुहुमतेउक्काइएसु, अपज्जत्तसुहुमपुढवि-
 काइए णं भंते ! सक्करप्पभाए पुढवीए पुरच्छिमिल्ले चरिमंते समोहए समोहइत्ता जे
 भविए समयखेत्ते अपज्जत्तवायरतेउक्काइयाए उववज्जित्तए से णं भंते ! कइसम-
 इएणं पुच्छा, गोयमा ! दुसमइएण वा तिसमइएण वा विग्गहेणं उववजेज्जा, से केण-
 द्वेणं भंते ! ०पुच्छा, एवं खलु गोयमा ! मए सत्त सेढीओ प०, तं०—उज्जुआयया जाव
 अद्धचक्कवाला, एगओवंकाए सेढीए उववज्जमाणे दुसमइएणं विग्गहेणं उववजेज्जा
 दुहओवंकाए सेढीए उववज्जमाणे तिसमइएणं विग्गहेणं उववजेज्जा से तेणद्वेणं०,
 एवं पज्जत्तएसुवि वायरतेउक्काइएसु, सेसं जहा रयणप्पभाए, जेऽवि वायरतेउक्काइया
 अपज्जत्तगा य पज्जत्तगा य समयखेत्ते समोहणित्ता दोच्चाए पुढवीए पच्चच्छिमिल्ले
 चरिमंते पुढविकाइएसु चउव्विहेसु आउक्काइएसु चउव्विहेसु तेउक्काइएसु दुविहेसु

वाउकाइएसु चउव्विहेसु वणस्सइकाइएसु चउव्विहेसु उववज्जंति तेऽवि एवं चेव
दुसमइएण वा तिसमइएण वा विग्गहेणं उववाएयव्वा, वायरतेउकाइया अपज्जत्तगा
य पज्जत्तगा य जाहे तेसु चेव उववज्जंति ताहे जहेव रयणप्पभाए तहेव एगसमइय-
दुसमइयतिसमइयविग्गहा भाणियव्वा सेसं जहा रयणप्पभाए तहेव निरवसेसं, जहा
सक्करप्पभाए वत्तव्वया भणिया एवं जाव अहेसत्तमाए भाणियव्वा ॥ ८४९ ॥
अपज्जत्तसुहुमपुढविकाइए णं भंते । अहोलोयखेत्तनालीए वाहिरिल्ले खेत्ते समोहए २
त्ता जे भविए उड्डलोयखेत्तनालीए वाहिरिल्ले खेत्ते अपज्जत्तसुहुमपुढविकाइयत्ताए
उववज्जित्तए से णं भंते । कइसमइएणं विग्गहेणं उववज्जेज्जा ? गोयमा ! तिसमइएण
वा चउसमइएण वा विग्गहेणं उववज्जेज्जा, से केणट्ठेणं भंते ! एवं वुच्चइ तिसमइएण
वा चउसमइएण वा विग्गहेणं उववज्जेज्जा ? गोयमा ! अपज्जत्तसुहुमपुढविकाइए णं
अहोलोयखेत्तनालीए वाहिरिल्ले खेत्ते समोहए २ ता जे भविए उड्डलोयखेत्तनालीए
वाहिरिल्ले खेत्ते अपज्जत्तसुहुमपुढविकाइयत्ताए एगपयरंसि अणुसेढीए उववज्जित्तए
से णं तिसमइएणं विग्गहेणं उववज्जेज्जा जे भविए विसेढीए उववज्जित्तए से णं
चउसमइएणं विग्गहेणं उववज्जेज्जा, से तेणट्ठेणं जाव उववज्जेज्जा, एवं पज्जत्तसुहुम-
पुढविकाइयत्ताएवि, एवं जाव पज्जत्तसुहुमतेउकाइयत्ताए, अपज्जत्तसुहुमपुढविकाइए
णं भंते ! अहोलोग जाव समोहणित्ता जे भविए समयखेत्ते अपज्जत्तवायरतेउकाइय-
त्ताए उववज्जित्तए से णं भंते ! कइसमइएणं विग्गहेणं उववज्जेज्जा ? गोयमा !
दुसमइएण वा तिसमइएण वा विग्गहेणं उववज्जेज्जा, से केणट्ठेणं० ? एवं खल्ल
गोयमा ! मए सत्त सेढीओ प०, तं०-उज्जुआयया जाव अद्धचक्कवाला, एगओवं-
काए सेढीए उववज्जमाणे दुसमइएणं विग्गहेणं उववज्जेज्जा दुहओवंकाए सेढीए
उववज्जमाणे तिसमइएणं विग्गहेणं उववज्जेज्जा से तेणट्ठेणं०, एवं पज्जत्तएसुवि
वायरतेउकाइएसुवि उववाएयव्वो, वाउकाइयवणस्सइकाइयत्ताए चउक्कएणं भेदेणं
जहा आउकाइयत्ताए तहेव उववाएयव्वो २०, एवं जहा अपज्जत्तसुहुमपुढविकाइयस्स
गमओ भणिओ एवं पज्जत्तसुहुमपुढविकाइयस्सवि भाणियव्वो तहेव वीसाए ठाणेसु
उववाएयव्वो ४०, अहोलोयखेत्तनालीए वाहिरिल्ले खेत्ते समोहए समोहएत्ता एवं
वायरपुढविकाइयस्सवि अपज्जत्तगस्स पज्जत्तगस्स य भाणियव्वं ८०, एवं आउ-
क्काइयस्स चउव्विहस्सवि भाणियव्वं १६०, सुहुमतेउकाइयस्स दुविहस्सवि एवं
चेव २००, अपज्जत्तवायरतेउकाइए णं भंते ! समयखेत्ते समोहए २ ता जे भविए
उड्डलोगखेत्तनालीए वाहिरिल्ले खेत्ते अपज्जत्तसुहुमपुढविकाइयत्ताए उववज्जित्तए से णं
भंते ! कइसमइएणं विग्गहेणं उववज्जेज्जा ? गोयमा ! दुसमइएण वा तिसमइएण

વા ચડસમઇણ વા વિગ્ગહેણં ઉવવજ્જેજ્ઞા, સે કેળટ્ટેણં ૦ અટ્ઠો જહેવ રયગપ્પમાણ તહેવ સત્ત સેઢીઓ એવં જાવ અપજ્જતવાયરતેઠ્ઠાકાઇણં ણં મંતે ! સમયખેત્તે સમોહણ ૨ ત્તા જે ભવિણ ઉઢ્ઢલોગખેત્તનાલીણ વાહિરિલ્લે ખેત્તે (અ)-પજ્જતસુહુમતેઠ્ઠાકાઇયત્તાણ ઉવવજ્જિત્તણ સે ણં મંતે ! સેસં તં ચેવ, અપજ્જતવાયરતેઠ્ઠાકાઇણં ણં મંતે ! સમયખેત્તે સમોહણ ૨ ત્તા જે ભવિણ સમયખેત્તે અપજ્જતવાયરતેઠ્ઠાકાઇયત્તાણ ઉવવજ્જિત્તણ સે ણં મંતે ! કઠ્ઠસમઇણં વિગ્ગહેણં ઉવવજ્જેજ્ઞા ? ગોયમા ! ઇગસમઇણ વા દુસમઇણ વા તિસમઇણ વા વિગ્ગહેણં ઉવવજ્જેજ્ઞા, સે કેળટ્ટેણં ૦ અટ્ઠો જહેવ રયગપ્પમાણ તહેવ સત્ત સેઢીઓ, એવં પજ્જતવાયરતેઠ્ઠાકાઇયત્તાણવિ, વાઠ્ઠાકાઇણ વળસ્સઠ્ઠાકાઇણસુ ય જહા પુઢવિકાઇણસુ ઉવવાઇઓ તહેવ ચડકકણં મેદેણં ઉવવાઇયવ્વો, એવં પજ્જતવાયરતેઠ્ઠાકાઇઓવિ ઇણસુ ચેવ ઠાણેસુ ઉવવાઇયવ્વો, વાઠ્ઠાકાઇયવળસ્સઠ્ઠાકાઇયાણં જહેવ પુઢવિકાઇ(ઓ)યત્તે ઉવવા(ઇ)ઓ તહેવ માણિયવ્વો । અપજ્જતસુહુમપુઢવિકાઇણં ણં મંતે ! ઉઢ્ઢલોગખેત્તનાલીણ વાહિરિલ્લે ખેત્તે સમોહણ સમોહણિત્તા જે ભવિણ અહેલોગખેત્તનાલીણ વાહિરિલ્લે ખેત્તે અપજ્જતસુહુમપુઢવિકાઇયત્તાણ ઉવવજ્જિત્તણ સે ણં મંતે ! કઠ્ઠસમઇણં ૦ ? એવં ઉઢ્ઢલોગખેત્તનાલીણ વાહિરિલ્લે ખેત્તે સમોહયાણં અહેલોગખેત્તનાલીણ વાહિરિલ્લે ખેત્તે ઉવવજ્જયાણં સો ચેવ ગમઓ નિરવસેસો માણિયવ્વો જાવ વાયરવળસ્સઠ્ઠાકાઇઓ પજ્જતઓ વાયરવળસ્સઠ્ઠાકાઇણસુ પજ્જતણસુ ઉવવાઇઓ । અપજ્જતસુહુમપુઢવિકાઇણં ણં મંતે ! લોગસ્સ પુરચ્છિમિલ્લે ચરિમંતે સમોહણ ૨ ત્તા જે ભવિણ લોગસ્સ પુરચ્છિમિલ્લે ચેવ ચરિમંતે અપજ્જતસુહુમપુઢવિકાઇયત્તાણ ઉવવજ્જિત્તણ સે ણં મંતે ! કઠ્ઠસમઇણં વિગ્ગહેણં ઉવવજ્જેજ્ઞા ? ગોયમા ! ઇગસમઇણ વા દુસમઇણ વા તિસમઇણ વા ચડસમઇણ વા વિગ્ગહેણં ઉવવજ્જેજ્ઞા, સે કેળટ્ટેણં મંતે ! એવં વુચ્છઇ ઇગસમઇણ વા જાવ ઉવવજ્જેજ્ઞા ? એવં સ્સલુ ગોયમા ! મણ સત્ત સેઢીઓ ૫૦, તંજહા—ઉજ્જુઆયયા જાવ અદ્ધચક્કવાલા, ઉજ્જુઆયયાણ સેઢીણ ઉવવજ્જમાણે ઇગસમઇણં વિગ્ગહેણં ઉવવજ્જેજ્ઞા, ઇગઓવંકાણ સેઢીણ ઉવવજ્જમાણે દુસમઇણં વિગ્ગહેણં ઉવવજ્જેજ્ઞા, દુહઓવંકાણ સેઢીણ ઉવવજ્જમાણે જે ભવિણ ઇગપયરસિ અણુસેઢી(ણ) ઉવવજ્જિત્તણ સે ણં તિસમઇણં વિગ્ગહેણં ઉવવજ્જેજ્ઞા જે ભવિણ વિસે(ઢીણ)ઠિ ઉવવજ્જિત્તણ સે ણં ચડસમઇણં વિગ્ગહેણં ઉવવજ્જેજ્ઞા, સે તેળટ્ટેણં જાવ ઉવવજ્જેજ્ઞા, એવં અપજ્જતસુહુમપુઢવિકાઇઓ લોગસ્સ પુરચ્છિમિલ્લે ચરિમંતે સમોહણ ૨ ત્તા લોગસ્સ પુરચ્છિમિલ્લે ચેવ ચરિમંતે અપજ્જતણસુ પજ્જતણસુ ય સુહુમપુઢવિકાઇણસુ સુહુમઆઠ્ઠાકાઇણસુ અપજ્જતણસુ પજ્જતણસુ ય સુહુમતેઠ્ઠાકાઇણસુ અપજ્જતણસુ પજ્જતણસુ ય સુહુમવાઠ્ઠાકાઇણસુ અપજ્જતણસુ પજ્જતણસુ ય વાયરવાઠ્ઠાકાઇણસુ અપજ્જતણસુ

पज्जत्तएसु य सुहुमवणस्सइकाइएसु अपज्जत्तएसु पज्जत्तएसु य वारससुवि ठाणेषु एएणं
 चेव कमेणं भाणियव्वो, सुहुमपुढविकाइओ (अ)पज्जत्तओ एवं चेव निरवसेसो वारस-
 सुवि ठाणेषु उववाएयव्वो २४, एवं एएणं गमएणं जाव सुहुमवणस्सइकाइओ पज्ज-
 त्तओ सुहुमवणस्सइकाइएसु पज्जत्तएसु चेव भाणियव्वो ॥ अपज्जत्तसुहुमपुढविकाइए
 णं भंते ! लोगस्स पुरच्छिमिल्ले चरिमते समोहए २ ता जे भविए लोगस्स दाहिणिल्ले
 चरिमंते अपज्जत्तसुहुमपुढविकाइएसु उववज्जित्तए से णं भंते ! कइसमइएणं विग्गहेणं
 उववजेज्जा ? गोयमा ! दुसमइएण वा तिसमइएण वा चउसमइएण वा विग्गहेणं
 उववजेज्जा, से केणट्ठेणं भते ! एवं वुच्चइ० ? एवं खलु गोयमा ! मए सत्त सेढीओ
 पन्नत्ताओ, तंजहा—उज्जुआयया जाव अद्धचक्कवाला, एगओवंकाए सेढीए उववज्ज-
 माणे दुसमइएणं विग्गहेणं उववजेज्जा दुहओवकाए सेढीए उववज्जमाणे जे भविए
 एगपयरंति अणुसेढी(ए)ओ उववज्जित्तए से णं तिसमइएणं विग्गहेणं उववजेज्जा जे
 भविए विसे(ढीओ)ढिं उववज्जित्तए से णं चउसमइएणं विग्गहेणं उववजेज्जा से तेणट्ठेणं
 गोयमा ! ०, एवं एएण गमएणं पुरच्छिमिल्ले चरिमते समोहए दाहिणिल्ले चरिमंते
 उववाएयव्वो जाव सुहुमवणस्सइकाइओ पज्जत्तओ सुहुमवणस्सइकाइएसु पज्जत्तएसु
 चेव, सव्वेसिं दुसमइओ तिसमइओ चउसमइओ विग्गहो भाणियव्वो । अपज्जत्त-
 सुहुमपुढविकाइए णं भंते ! लोगस्स पुरच्छिमिल्ले चरिमते समोहए २ ता जे भविए
 लोगस्स पच्चच्छिमिल्ले चरिमंते अपज्जत्तसुहुमपुढविकाइयत्ताए उववज्जित्तए से णं
 भंते ! कइसमइएणं विग्गहेणं उववजेज्जा ? गोयमा ! एगसमइएण वा दुसमइएण
 वा तिसमइएण वा चउसमइएण वा विग्गहेणं उववजेज्जा, से केणट्ठेणं ० ? एवं
 जहेव पुरच्छिमिल्ले चरिमंते समोहया पुरच्छिमिल्ले चेव चरिमंते उववाइया तहेव
 पुरच्छिमिल्ले चरिमंते समोहया पच्चच्छिमिल्ले चरिमंते उववाएयव्वा सव्वे, अपज्जत्त-
 सुहुमपुढविकाइए णं भंते ! लोगस्स पुरच्छिमिल्ले चरिमंते समोहए २ ता जे भविए
 लोगस्स उत्तरिल्ले चरिमंते अपज्जत्तसुहुमपुढविकाइयत्ताए उववज्जित्तए से णं भंते !
 एवं जहा पुरच्छिमिल्ले चरिमंते समोहओ दाहिणिल्ले चरिमंते उववाइओ तहा
 पुरच्छिमिल्ले चरिमंते समोहओ उत्तरिल्ले चरिमंते उववाएयव्वो, अपज्जत्तसुहुमपुढ-
 विकाइए णं भंते ! लोगस्स दाहिणिल्ले चरिमते समोहए समोहणित्ता जे भविए
 लोगस्स दाहिणिल्ले चेव चरिमंते अपज्जत्तसुहुमपुढविकाइयत्ताए उववज्जित्तए एवं
 जहा पुरच्छिमिल्ले समोहओ पुरच्छिमिल्ले चेव उववाइओ तहेव दाहिणिल्ले समोहओ
 दाहिणिल्ले चेव उववाएयव्वो, तहेव निरवसेसं जाव सुहुमवणस्सइकाइओ पज्जत्तओ
 सुहुमवणस्सइकाइएसु चेव पज्जत्तएसु दाहिणिल्ले चरिमंते उववाइओ एवं दाहिणिल्ले

समोहओ पच्चच्छिमिल्ले चरिमंते उववाएयव्वो नवरं दुसमइयतिसमइयचउसमइय-
विग्गहो सेसं तहेव, दाहिणिल्ले समोहओ उत्तरिल्ले चरिमंते उववाएयव्वो जहेव
सट्ठाणे तहेव एगसमइयदुसमइयतिसमइयचउसमइयविग्गहो, पुरच्छिमिल्ले जहा
पच्चच्छिमिल्ले तहेव दुसमइयतिसमइयचउसमइयविग्गहो, पच्चच्छिमिल्ले चरिमंते
समोहयाणं पच्चच्छिमिल्ले चेव उववज्जमाणाणं जहा सट्ठाणे, उत्तरिल्ले उववज्जमाणाणं
एगसमइओ विग्गहो नत्थि, सेसं तहेव, पुरच्छिमिल्ले जहा सट्ठाणे, दाहिणिल्ले
एगसमइओ विग्गहो नत्थि, सेसं तहेव, उत्तरिल्ले समोहयाणं उत्तरिल्ले चेव उवव-
ज्जमाणाणं जहेव सट्ठाणे, उत्तरिल्ले समोहयाणं पुरच्छिमिल्ले उववज्जमाणाणं एवं
चेव, नवरं एगसमइओ विग्गहो नत्थि, उत्तरिल्ले समोहयाणं दाहिणिल्ले उववज्जमा-
णाणं जहा सट्ठाणे, उत्तरिल्ले समोहयाणं पच्चच्छिमिल्ले उववज्जमाणाणं एगसमइओ
विग्गहो नत्थि, सेसं तहेव जाव सुहुमवणस्सइकाइओ पज्जत्तओ सुहुमवणस्सइकाइ-
एसु पज्जत्तएसु चेव ॥ कहिन्नं भंते ! वायरपुढविकाइयाणं पज्जत्तगाणं ठाणा प० ?
गोयमा ! सट्ठाणेणं अट्ठसु पुढवीसु जहा ठाणपए जाव सुहुमवणस्सइकाइया जे य
पज्जत्तगा जे य अपज्जत्तगा ते सव्वे एगविहा अविसेसमगाणत्ता सव्वलोगपरिया-
वन्ना प० समगाउसो ! । अपज्जत्तसुहुमपुढविकाइयाणं भंते ! कइ कम्मप्पगडीओ
पज्जत्ताओ ? गोयमा ! अट्ठ कम्मप्पगडीओ प०, तं०—नाणावरणिज्जं जाव अंतराइयं,
एवं चउक्कएणं भेदेण जहेव एगिंदियसएसु जाव वायरवणस्सइकाइयाणं पज्जत्त-
गाण, अपज्जत्तसुहुमपुढविकाइया णं भंते ! कइ कम्मप्पगडीओ वंधंति ? गोयमा !
सत्तविहवंधगावि अट्ठविहवंधगावि जहा एगिंदियमएसु जाव पज्जत्ता वायरवणस्स-
इकाइया । अपज्जत्तसुहुमपुढविकाइया णं भंते ! कइ कम्मप्पगडीओ वेदंति ?
गोयमा ! चउद्दस कम्मप्पगडीओ वेदंति, तंजहा—नाणावरणिज्जं जहा एगिंदियसएसु
जाव पुरिसवेयवज्जं एवं जाव वायरवणस्सइकाइयाणं पज्जत्तगाणं, एगिंदिया णं
भंते ! कओ उववज्जंति कि नेरइएहितो उववज्जति० ? जहा वक्कीए पुढविकाइयाणं
उववाओ, एगिंदियाणं भंते ! कइ समुग्घाया प० ? गोयमा ! चत्तारि समुग्घाया
प०, तंजहा—वेयणासमुग्घाए जाव वेउव्वियसमुग्घाए ॥ एगिंदिया णं भंते ! किं
तुट्ठट्ठिइया तुल्लविसेसाहियं कम्मं पकरंति तुल्लट्ठिइया वेमायविसेसाहियं कम्मं
पकरंति वेमायट्ठिइया तुल्लविसेसाहियं कम्मं पकरेति वेमायट्ठिइया वेमायविसेसाहियं
कम्मं पकरंति ? गोयमा ! अत्थेगइया तुल्लट्ठिइया तुल्लविसेसाहियं कम्मं पकरंति
अत्थेगइया तुल्लट्ठिइया वेमायविसेसाहियं कम्मं पकरंति अत्थेगइया वेमायट्ठिइया
तुल्लविसेसाहियं कम्मं पकरंति अत्थेगइया वेमायट्ठिइया वेमायविसेसाहियं कम्मं

पकरेंति, से केणट्टेणं भंते ! एवं तुच्चइ अत्थेगइया तुल्लट्ठिईया जाव वेमायविसेसा-
हियं कम्मं पकरेंति ? गोयमा ! एगिंदिया चउव्विहा पन्नत्ता, तंजहा-अत्थेगइया
समाउया समोववन्नगा १, अत्थेगइया समाउया विसमोववन्नगा २, अत्थेगइया
विसमाउया समोववन्नगा ३, अत्थेगइया विसमाउया विसमोववन्नगा ४ । तत्थ णं
जे ते समाउया समोववन्नगा ते णं तुल्लट्ठिईया तुल्लविसेसाहियं कम्मं पकरेंति १,
तत्थ णं जे ते समाउया विसमोववन्नगा ते णं तुल्लट्ठिईया वेमायविसेसाहियं कम्मं
पकरेंति २, तत्थ णं जे ते विसमाउया समोववन्नगा ते णं वेमायट्ठिईया तुल्लविसे-
साहियं कम्मं पकरेंति ३, तत्थ णं जे ते विसमाउया विसमोववन्नगा ते णं वेमाय-
ट्ठिईया वेमायविसेसाहियं कम्मं पकरेंति ४ । से तेणट्टेणं गोयमा ! जाव वेमायवि-
सेसाहियं कम्मं पकरेति ॥ सेवं भंते ! २ त्ति जाव विहरइ ॥ ८५० ॥ ३४-१-१ ॥
कइविहा णं भंते ! अणंतरोववन्नगा एगिंदिया प० ? गोयमा ! पंचविहा अणं-
तरोववन्नगा एगिंदिया प०, तंजहा-पुढविकाइया दुयाभेदो जहा एगिंदियसएसु
जाव वायरवणस्सइकाइया य, कहिन्नं भंते ! अणंतरोववन्नगाणं वायरपुढविकाइ-
याणं ठाणा प० ? गोयमा ! सट्ठाणेणं अट्ठसु पुढवीसु, तं०-रयणप्पभाए जहा
ठाणपए जाव दीवेषु समुद्देषु एत्थ णं अणंतरोववन्नगाणं वायरपुढविकाइयाणं ठाणा
प०, उववाएणं सव्वलोए समुग्घाएणं सव्वलोए सट्ठाणेणं लोगस्स असंखेज्जइभागे,
अणंतरोववन्नगसुहुमपुढविकाइया णं एगविहा अविसेसमणाणत्ता सव्वलोए परियावन्ना
प० समणाउसो !, एवं एएणं कमेणं सव्वे एगिंदिया भाणियव्वा, सट्ठा(णेणं)णाई
सव्वेसि जहा ठाणपए तेसिं पज्जत्तगाणं वायराणं उववायसमुग्घायसट्ठाणाणि जहा
तेसिं चेव अपज्जत्तगाणं, वायराणं सुहुमाणं सव्वेसि जहा पुढविकाइयाणं भणिया तहेव
भाणियव्वा जाव वणस्सइकाइयत्ति । अणंतरोववन्नगसुहुमपुढविकाइयाणं भंते !
कइ कम्मप्पगडीओ प० ? गोयमा ! अट्ठ कम्मप्पगडीओ पन्नत्ताओ एवं जहा एगिं-
दियसएसु अणंतरोववन्नगउद्देसए तहेव पन्नत्ताओ तहेव वंधंति तहेव वेदेंति जाव
अणंतरोववन्नगा वायरवणस्सइकाइया । अणंतरोववन्नगएगिंदिया णं भंते ! कओ
उववज्जंति० ? जहेव ओहिए उद्देसओ भणिओ तहेव । अणंतरोववन्नगएगिंदियाणं
भंते ! कइ समुग्घाया प० ? गोयमा ! दोन्नि समुग्घाया प०, तं०-वेयणासमुग्घाए
य कसायसमुग्घाए य । अणंतरोववन्नगएगिंदिया णं भंते ! किं तुल्लट्ठिईया तुल्लविसे-
साहियं कम्मं पकरेंति पुच्छा तहेव, गोयमा ! अत्थेगइया तुल्लट्ठिईया तुल्लविसेसा-
हियं कम्मं पकरेति अत्थेगइया तुल्लट्ठिईया वेमायविसेसाहियं कम्मं पकरेति, से केण-
ट्टेणं भंते ! जाव वेमायविसेसाहियं कम्मं पकरेंति ? गोयमा ! अणंतरोववन्नगा एगिं-

दिया दुविहा प०, तं०-अत्थेगइया समाउया समोववन्नगा अत्थेगइया समाउया
 विसमोववन्नगा, तत्थ णं जे ते समाउया समोववन्नगा ते णं तुल्लट्ठिईया तुल्लविसे-
 साहियं कम्मं पकरेंति, तत्थ णं जे ते समाउया विसमोववन्नगा ते णं तुल्लट्ठिईया
 वेमायविसेसाहियं कम्मं पकरेंति, से तेणट्ठेणं जाव वेमायविसेसाहियं कम्मं पकरेंति ।
 सेवं भंते ! २ त्ति ॥ ८५१ ॥ ३४-१-२ ॥ कइविहा णं भंते ! परंपरोववन्नगा एगि-
 दिया प० ? गोयमा ! पंचविहा परंपरोववन्नगा एगिदिया प०, तं०-पुढविकाइया
 भेदो चउक्कओ जाव वणस्सइकाइयत्ति । परंपरोववन्नगअपज्जत्तसुहुमपुढविकाइए णं
 भंते ! इमीसे रयणप्पभाए पुढवीए पुरच्छिमिल्ले चरिमंते समोहए २ ता जे भविए
 इमीसे रयणप्पभाए पुढवीए जाव पच्चच्छिमिल्ले चरिमंते अपज्जत्तसुहुमपुढविकाइय-
 ताए उववज्जित्तए एवं एएणं अभिलावेणं जहेव पढमो उद्देसओ जाव लोगचरिमं-
 तोत्ति । कहिन्नं भंते ! परंपरोववन्नगपज्जत्तगवायरपुढविकाइयाणं ठाणा प० ? गोयमा !
 सट्ठण्णेणं अट्ठसु पुढवीसु एवं एएणं अभिलावेण जहा पढमे उद्देसए जाव तुल्लट्ठिई-
 यत्ति । सेवं भंते ! २ त्ति ॥ ३४-१-३ ॥ एवं सेसावि अट्ठ उद्देसगा जाव अचरिमोत्ति,
 नवरं अणंतरा अणंतरसरिसा परंपरा परंपरसरिसा चरिमा य अचरिमा य एवं चेव,
 एवं एए एक्कारस उद्देसगा ॥ ८५२ ॥ ३४-१-११ ॥ पढमं एगिदियसेढिसयं समत्तं ॥
 कइविहा णं भंते ! कण्हलेस्सा एगिदिया प० ? गोयमा ! पंचविहा कण्हलेस्सा
 एगिदिया प० भेदो चउक्कओ जहा कण्हलेस्सएगिदियसए जाव वणस्सइकाइयत्ति ।
 कण्हलेस्सअपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरच्छि-
 मिल्ले एवं एएणं अभिलावेणं जहेव ओहिउद्देसओ जाव लोगचरिमंतेत्ति सव्वत्थ कण्हले-
 स्सेसु चेव उववाएयव्वो । कहिन्नं भंते ! कण्हलेस्सअपज्जत्तगवायरपुढविकाइयाणं ठाणा
 प० ? गोयमा ! एवं एएणं अभिलावेणं जहा ओहि(य)उद्देसओ जाव तुल्लट्ठिईयत्ति ।
 सेवं भंते ! २ त्ति ॥ एवं एएणं अभिलावेणं जहेव पढम सेढिसय तहेव एक्कारस उद्दे-
 सगा भाणियव्वा ॥ ३४-२-११ ॥ विइयं एगिदियसेढिसयं समत्तं ॥ एवं नीललेस्सेहिवि
 तइयं सयं । काउलेस्सेहिवि सयं, एवं चेव चउत्थं सय । भविसिद्धियएगिदिहिवि
 सयं पंचमं समत्तं ॥ कइविहा णं भंते ! कण्हलेस्सभवसिद्धियएगिदिया प० ? एवं
 जहेव ओहियउद्देसओ, कइविहा णं भंते ! अणंतरोववन्नगा कण्हलेस्सा भवसिद्धिया
 एगिदिया प० जहेव अणंतरोववन्नगउद्देसओ ओहिओ तहेव ॥ कइविहा णं भंते ! परं-
 परोववन्नगकण्हलेस्सभवसिद्धिया एगिदिया प० ? गोयमा ! पंचविहा परंपरोववन्नग-
 कण्हलेस्सभवसिद्धियएगिदिया प० ओहिओ भेदो चउक्कओ जाव वणस्सइकाइयत्ति ।
 परंपरोववन्नगकण्हलेस्सभवसिद्धियअपज्जत्तसुहुमपुढविकाइए णं भंते ! इमीसे रयणप्प-

भाए पुढवीए एवं एएणं अभिलावेणं जहेव ओहिओ उद्देसओ जाव लोयचरिमंतेत्ति,
सव्वत्थ कण्हलेस्सेसु भवसिद्धिएसु उववाएयव्वो । कहिन्नं भंते । परंपरोववन्नगकण्ह-
लेस्सभवसिद्धियपज्जत्तवायरपुढविकाइयाणं ठाणा प० एवं एएणं अभिलावेणं जहेव
ओहिओ उद्देसओ जाव तुल्लट्ठिईयत्ति, एवं एएणं अभिलावेणं कण्हलेस्सभवसिद्धिय-
एगिंदिएहिवि तहेव एक्कारसउद्देसगसंजुत्त सयं, छट्ठं सयं समत्तं ॥ नीललेस्सभव-
सिद्धियएगिंदिएसु सत्तमं सयं समत्तं । एवं काउलेस्सभवसिद्धियएगिंदिएहिवि सयं
अट्ठमं सयं । जहा भवसिद्धिएहिं चत्तारि सयाणि भणियाणि एव अभवसिद्धिएहिवि
चत्तारि सयाणि भाणियव्वाणि, नवरं चरिमअचरिमवज्जा नव उद्देसगा भाणियव्वा,
सेसं तं चेव, एवं एयाइं वारस एगिंदियसेढीसयाइं भाणियव्वाइं । सेवं भंते । २
त्ति जाव विहरइ ॥ ८५३ ॥ एगिंदियसेढीसयाइं समत्ताइं ॥ एगिंदिय-
सेढिसयं चउत्तीसइमं समत्तं ॥

कइ ण भंते ! महाजुम्मा पन्नत्ता ? गोयमा ! सोलस महाजुम्मा प०, तं०-
कडजुम्मकडजुम्मे १, कडजुम्मतेओगे २, कडजुम्मदावरजुम्मे ३, कडजुम्मकलिओगे
४, तेओगकडजुम्मे ५, तेओगतेओगे ६, तेओगदावरजुम्मे ७, तेओगकलिओगे
८, दावरजुम्मकडजुम्मे ९, दावरजुम्मतेओगे १०, दावरजुम्मदावरजुम्मे ११, दावर-
जुम्मकलिओगे १२, कलिओगकडजुम्मे १३, कलिओगतेओगे १४, कलिओगदावर-
जुम्मे १५, कलिओगकलिओगे १६ । से केणट्ठेणं भंते ! एवं चुच्चइ सोलस महाजुम्मा
प० तं०-कडजुम्मकडजुम्मे जाव कलिओगकलिओगे ? गोयमा ! जे णं रासी
चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहार-
समया तेऽवि कडजुम्मा सेत्तं कडजुम्मकडजुम्मे १, जे णं रासी चउक्कएणं अवहारेणं
अवहीरमाणे तिपज्जवसिए जे णं तस्स रासिस्स अवहारसमया कडजुम्मा सेत्तं
कडजुम्मतेओगे २, जे णं रासी चउक्कएणं अवहारेणं अवहीरमाणे दुपज्जवसिए जे
णं तस्स रासिस्स अवहारसमया कडजुम्मा सेत्तं कडजुम्मदावरजुम्मे ३, जे णं
रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अव-
हारसमया कडजुम्मा सेत्तं कडजुम्मकलिओगे ४, जे णं रासी चउक्कएणं अवहारेणं
अवहीरमाणे चउपज्जवसिए जे णं तस्स रासिस्स अवहारसमया तेओगा सेत्तं
तेओगकडजुम्मे ५, जे णं रासी चउक्कएणं अवहारेणं अवहीरमाणे तिपज्जवसिए जे
णं तस्स रासिस्स अवहारसमया तेओगा सेत्तं तेओगतेओगे ६, जे णं रासी
चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया
तेओगा सेत्तं तेओगदावरजुम्मे ७, जे णं रासी चउक्कएणं अवहारेणं अवहीरमाणे

एगपज्जवसिए जे णं तस्स रासिस्स अवहारसमया तेओगा सेत्तं तेओगकलिओगे ८, जे णं रासी चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मकडजुम्मे ९, जे णं रासी चउक्कएणं अवहारेणं अवहीरमाणे तिपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मतेओगे १०, जे णं रासी चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मदावरजुम्मे ११, जे णं रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अवहारसमया दावरजुम्मा सेत्तं दावरजुम्मकलिओगे १२, जे णं रासी चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहारसमया कलिओगा सेत्तं कलिओगकडजुम्मे १३, जे णं रासी चउक्कएणं अवहारेणं अवहीरमाणे तिपज्जवसिए जे णं तस्स रासिस्स अवहारसमया कलिओगा सेत्तं कलिओगतेओगे १४, जे णं रासी चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया कलिओगा सेत्तं कलिओगदावरजुम्मे १५, जे णं रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अवहारसमया कलिओगा सेत्तं कलिओगकलिओगे १६ । से तेणट्ठेणं जाव कलिओगकलिओगे ॥८५४॥ कडजुम्मकडजुम्मएगिंदिया णं भंते ! कओ उववजंति कि नेरइएहिंतो जहा उप्पलुद्देसए तहा उववाओ । ते णं भंते ! जीवा एगसमएणं केवइया उववजंति ? गोयमा ! सोलस वा संखेज्जा वा असंखेज्जा वा अणंता वा उववजंति, ते णं भंते ! जीवा समए समए० पुच्छा, गोयमा ! ते णं अणंता समए समए अवहीरमाणा २ अणंतहिं ओसप्पिणीउरुसप्पिणीहिं अवहीरंति णो चेव णं अवहिरिया सिया, उच्चत्तं जहा उप्पलुद्देसए, ते णं भंते ! जीवा नाणावरणिज्जस्स कम्मस्स कि वंधगा अवयगा ? गोयमा ! वंधगा नो अवंधगा, एवं सव्वेसिं आउयवज्जाणं, आउयस्स वंधगा वा अवंधगा वा, ते णं भंते ! जीवा नाणावरणिज्जस्स कम्मस्स वेदगा पुच्छा, गोयमा ! वेदगा नो अवेदगा, एवं सव्वेसिं, ते णं भंते ! जीवा कि सायावेदगा असायावेदगा पुच्छा, गोयमा ! सायावेदगा वा असायावेदगा वा, एवं (खलु) उप्पलुद्देसगपरिवाडी, सव्वेसिं कम्माणं उदई नो अणुदई, छण्हं कम्माणं उदीरगा नो अणुदीरगा, वेयणिज्जाउयाणं उदीरगा वा अणुदीरगा वा, ते णं भंते ! जीवा कि कण्हलेस्सा पुच्छा, गोयमा ! कण्हलेस्सा वा नीललेस्सा वा काउलेस्सा वा तेउलेस्सा वा, नो सम्मदिट्ठी नो सम्मामिच्छादिट्ठी मिच्छादिट्ठी, नो नाणी अन्नाणी निय(मा)मं दुअन्नाणी तं०-मइअन्नाणी य सुयअन्नाणी य, नो मणजोगी नो वइजोगी

कायजोगी, सागारोवउत्ता वा अणागारोवउत्ता वा, तेसि णं भंते ! जीवाणं सरीरा कइवण्णा जहा उप्पलुद्दसए सव्वत्थ पुच्छा, गोयमा ! जहा उप्पलुद्दसए ऊसासगा वा नीसासगा वा नो उस्सासनीसासगा वा, आहारगा वा अणाहारगा वा, नो विरया अविरया नो विरयाविरया, सकिरिया नो अकिरिया, सत्तविहवंधगा वा अट्ठविहवंधगा वा, आहारसन्नोवउत्ता वा जाव परिग्गहसन्नोवउत्ता वा, कोहकसाई वा जाव लोभकसाई वा, नो इत्थिवेदगा नो पुरिसवेदगा नपुंसगवेदगा, इत्थिवेद-
 वंधगा वा पुरिसवेदवंधगा वा नपुंसगवेदवन्धगा वा, नो सन्नी असन्नी, सइंदिया नो अणिदिया, ते णं भंते ! कडजुम्मकडजुम्मएगिंदियत्ति कालओ केवच्चिरं होइ ? गोयमा ! जहन्नेणं एक्कं समयं उक्कोसेणं अणंतं कालं अणंताओ ओसप्पिणिउस्सप्पिणीओ वणस्सइकाइयकालो, संवेहो न भन्नइ, आहारो जहा उप्पलुद्दसए नवरं निव्वाघाएणं छद्दिसिं वाघायं पडुच्च सिय तिदिंसिं सिय चउदिसिं सिय पंचदिसिं सेसं तहेव, ठिई जहन्नेणं (एक्कं समयं) अंतोमुहुत्तं उक्कोसेणं वावीसं वाससहस्साई, समुग्घाया आइल्ला चत्तारि, मारणंतियसमुग्घाएणं समोहयावि मरंति असमोहयावि मरंति, उव्वट्ठणा जहा उप्पलुद्दसए, अह भंते ! सव्वपाणा जाव सव्वसत्ता कडजुम्म २-
 एगिंदियत्ताए उव्वन्नपुव्वा ? हंता गोयमा ! असइं अदुवा अणंतखुत्तो, कडजुम्मते-
 ओगएगिंदिया णं भंते ! कओ उव्वज्जंति० ? उव्वाओ तहेव, ते णं भंते ! जीवा एगसमए० पुच्छा, गोयमा ! एगूणवीसा वा संखेज्जा वा असंखेज्जा वा अणंता वा उव्वज्जंति, सेसं जहा कडजुम्मकडजुम्माणं जाव अणंतखुत्तो, कडजुम्मदावरजुम्म-
 एगिंदिया णं भंते ! कओ उव्वज्जंति० ? उव्वाओ तहेव, ते णं भंते ! जीवा एगसमएणं पुच्छा, गोयमा ! अट्ठारस वा संखेज्जा वा असंखेज्जा वा अणंता वा उव्वज्जंति सेसं तहेव जाव अणंतखुत्तो, कडजुम्मकलिओगएगिंदिया णं भंते !
 कओ उव्वज्जंति० ? उव्वाओ तहेव परिमाणं सत्तरस वा संखेज्जा वा असंखेज्जा वा अणंता वा सेसं तहेव जाव अणंतखुत्तो, तेओगकडजुम्मएगिंदिया णं भंते ! कओ उव्वज्जंति० ? उव्वाओ तहेव परिमाणं वारस वा संखेज्जा वा असंखेज्जा वा अणंता वा उव्वज्जंति सेसं तहेव जाव अणंतखुत्तो, तेओगतेओगएगिंदिया णं भंते ! कओ उव्वज्जंति० ? उव्वाओ तहेव परिमाणं पन्नरस वा संखेज्जा वा असंखेज्जा वा अणंता वा सेसं तहेव जाव अणंतखुत्तो, एव एएसु सोलससु महाजुम्मेसु एक्को गमओ नवरं परिमाणे नाणत्तं तेओगदावरजुम्मेसु परिमाणं चउद्दस वा संखेज्जा वा असंखेज्जा वा अणंता वा उव्वज्जंति, तेओगकलिओगेसु तेरस वा संखेज्जा वा असंखेज्जा वा अणंता वा उव्वज्जंति, दावरजुम्मकडजुम्मेसु अट्ठ वा संखेज्जा वा असंखेज्जा वा

अणंता वा उववज्जंति, दावरजुम्मतेओगेसु एक्कारस वा संखेज्जा वा असंखेज्जा वा
अणंता वा उववज्जंति, दावरजुम्मदावरजुम्मेसु दस वा संखेज्जा वा असंखेज्जा वा
अणंता वा उववज्जंति, दावरजुम्मकलिओगेसु नव वा संखेज्जा वा असंखेज्जा वा
अणंता वा उववज्जंति, कलिओगकडजुम्मेसु चत्तारि वा संखेज्जा वा असंखेज्जा वा
अणंता वा उववज्जंति, कलिओगतेओगेसु सत्त वा संखेज्जा वा असंखेज्जा वा अणंता
वा उववज्जंति, कलिओगदावरजुम्मेसु छ वा संखेज्जा वा असंखेज्जा वा अणंता
वा उववज्जंति, कलिओगकलिओगएगिंदिया णं भंते ! कओ उववज्जंति० ? उववाओ
तहेव परिमाणं पंच वा संखेज्जा वा असंखेज्जा वा अणंता वा उववज्जंति सेसं
तहेव जाव अणंतखुत्तो । सेवं भंते ! सेवं भंते ! त्ति ॥ ८५५ ॥ ३५-१-१ ॥
पढमसमयकडजुम्म २ एगिंदिया णं भंते ! कओ उववज्जंति० ? गोयमा !
तहेव एवं जहेव पढमो उद्देसओ तहेव सोलसखुत्तो विइओवि भाणियव्वो, तहेव
सव्वं, नवरं इमाणि दस नाणत्ताणि-ओगाहणा जहन्नेणं अंगुलस्स असंखेज्जइ
भागं उक्कोसेणवि अंगुलस्स असंखेज्जइभागं, आउयकम्मस्स नो वंधगा अवंधगा
आउयस्स नो उदीरगा अणुदीरगा, नो उस्सासगा नो निस्सासगा नो उस्सास-
निस्सासगा, सत्तविहवंधगा नो अट्ठविहवंधगा । ते णं भंते ! पढमसमयकडजुम्म २-
एगिंदियत्ति कालओ केवच्चिरं होइ ? गोयमा ! एक्कं समयं, एवं ठिईएवि,
समुग्घाया आइल्ला दोन्नि, समोहया न पुच्छिज्जंति उव्वट्ठणा न पुच्छिज्जइ, सेसं
तहेव सव्वं निरवसेसं, सोलसखुवि गमएसु जाव अणंतखुत्तो । सेवं भंते ! २ त्ति
॥ ८५६ ॥ ३५-१-२ ॥ अपढमसमयकडजुम्म २ एगिंदिया णं भंते ! कओ
उववज्जंति० ? एसो जहा पढमुद्देसो सोलसहिवि जुम्मेसु तहेव नेयव्वो जाव कलिओ-
गकलिओगत्ताए जाव अणंतखुत्तो । सेवं भंते ! २ त्ति ॥ ३५-१-३ ॥ चरिमसमयकड-
जुम्म २ एगिंदिया णं भंते ! कओ उववज्जंति० ? एवं जहेव पढमसम-
यउद्देसओ नवरं देवा न उववज्जंति तेउलेस्सा न पुच्छिज्जंति, सेसं तहेव । सेवं
भंते ! सेवं भंते ! त्ति ॥ ३५-१-४ ॥ अचरिमसमयकडजुम्म २ एगिंदिया णं
भंते ! कओ उववज्जंति० ? जहा (अ) पढमसमयउद्देसो तहेव निरवसेसो भाणियव्वो ।
सेवं भंते ! २ त्ति ॥ ३५-१-५ ॥ पढमपढमसमयकडजुम्म २ एगिंदिया णं भंते !
कओ उववज्जंति० ? जहा पढमसमयउद्देसओ तहेव निरवसेसं । सेवं भंते ! २
त्ति जाव विहरइ ॥ ३५-१-६ ॥ पढमअपढमसमयकडजुम्म २ एगिंदिया णं
भंते ! कओ उववज्जंति० ? जहा पढमसमयउद्देसओ तहेव भाणियव्वो । सेवं भंते !
२ त्ति ॥ ३५-१-७ ॥ पढमचरिमसमयकडजुम्म २ एगिंदिया णं भंते ! कओ

उववज्जंति०? जहा चरिमुद्देसओ तहेव निरवसेसं । सेवं भंते ! २ ति ॥ ३५-१-८ ॥
 पढमअचरिमसमयकडजुम्म २ एगिंदिया णं भंते ! कओ उववज्जंति० ? जहा
 (पढमुद्देसओ) वीओ उद्देसओ तहेव निरवसेसं । सेवं भंते ! २ ति जाव विहरइ
 ॥ ३५-१-९ ॥ चरिम२समयकडजुम्म २ एगिंदिया णं भंते ! कओ उववज्जंति० ? जहा
 चउत्थो उद्देसओ तहेव । सेवं भंते ! सेव भंते ! ति ॥ ३५-१-१० ॥ चरिमअचरिम-
 समयकडजुम्म २ एगिंदिया णं भंते ! कओ उववज्जंति० ? जहा पढमसमयउद्देसओ
 तहेव निरवसेसं । सेवं भंते ! २ ति जाव विहरइ ॥ ३५-१-११ ॥ एवं एएणं
 कमेणं एक्कारस उद्देसगा, पढमो तइओ पंचमओ य सरिसगमगा सेसा अट्ठ
 सरिसगमगा, नवरं चउत्थे छट्ठे अट्ठमे दसमे य देवा न उववज्जति तेउलेस्सा नत्थि
 ॥ ८५७ ॥ पणतीसइमे सए पढम एगिंदियमहाजुम्मसयं समत्तं ॥ १ ॥

कण्हलेस्सकडजुम्म २ एगिंदिया णं भंते ! कओ उववज्जंति०? गोयमा ! उववाओ
 तहेव एवं जहा ओहियउद्देसए नवरं इमं नाणत्तं ते णं भंते ! जीवा कण्हलेस्सा ?
 इंता कण्हलेस्सा, ते णं भंते ! कण्हलेस्सकडजुम्म २ एगिंदियत्ति कालओ केवच्चिरं
 होइ ? गोयमा ! जहन्नणं एक्कं समयं उक्कोसेणं अंतोमुहुत्तं, एवं ठिईएवि, सेस तहेव
 जाव अणंतखुत्तो, एवं सोलसवि जुम्मा भाणियव्वा । सेवं भंते ! २ ति ॥ ३५-२-१ ॥
 पढमसमयकण्हलेस्सकडजुम्म २ एगिंदिया णं भंते ! कओ उववज्जंति०? जहा पढम-
 समयउद्देसओ नवर ते णं भंते ! जीवा कण्हलेस्सा ? हता कण्हलेस्सा, सेस तहेव ।
 सेवं भंते ! सेव भंते ! ति ॥ ३५-२-२ ॥ एवं जहा ओहियसए एक्कारस उद्देसगा
 भाणिया तहा कण्हलेस्ससएवि एक्कारस उद्देसगा भाणियव्वा, पढमो तइओ पंचमो
 य सरिसगमगा सेसा अट्ठवि सरिसगमगा नवरं चउत्थछट्ठअट्ठमदसमेसु उववाओ
 नत्थि देवस्म । सेवं भंते ! २ ति ॥ ३५ इमे सए विइयं एगिंदियमहाजुम्मसयं
 समत्तं ॥ २ ॥ एवं नीळलेस्सेहिवि सयं कण्हलेस्ससयसरिसं एक्कारस उद्देसगा तहेव ।
 सेवं भंते ! २ ति ॥ तइयं एगिंदियमहाजुम्मसयं समत्तं ॥ ३ ॥ एवं काउलेस्सेहिवि सयं
 कण्हलेस्ससयसरिसं । सेवं भंते ! २ ति ॥ चउत्थं एगिंदियमहाजुम्मसयं ॥ ४ ॥ भवसि-
 द्वियकडजुम्म २ एगिंदिया णं भंते ! कओ उववज्जति० ? जहा ओहियसयं तहेव नवरं
 एक्कारमसुवि उद्देसएसु, अह भंते ! सव्वपाणा जाव सव्वसत्ता भवसिद्वियकडजुम्म-
 एगिंदियत्ताए उववज्जपुव्वा ? गोयमा ! णो इणट्ठे समट्ठे, सेस तहेव । सेवं भंते ।
 २ ति ॥ पंचम एगिंदियमहाजुम्मसयं समत्तं ॥ ५ ॥ कण्हलेस्सभवसिद्वियकडजुम्म-
 एगिंदिया णं भंते ! कओ उववज्जंति० ? एवं कण्हलेस्सभवसिद्वियएगिंदिएहिवि
 सयं विइयसयकण्हलेस्ससरिसं भाणियव्वं । सेवं भंते ! सेवं भंते ! ति ॥ छट्ठं

एगिंदियमहाजुम्मसयं समत्तं ॥ ६ ॥ एवं नीललेस्सेभवसिद्धियएगिंदियएहिंवि सयं ।
 सेवं भंते ! सेवं भंते ! ति ॥ सत्तमं एगिंदियमहाजुम्मसयं समत्तं ॥ ७ ॥ एवं
 काउलेस्सेभवसिद्धियएगिंदियएहिंवि नहेव एक्कारसउद्देसगसंजुत्तं सयं, एवं एयाणि
 चत्तारि भवसिद्धियसयाणि, चउत्तुणि सएणु सव्वपाणा जाव उववज्जपुव्वा ? नो
 इणट्ठे समट्ठे । सेवं भंते ! सेवं भंते ! ति ॥ अट्ठमं एगिंदियमहाजुम्मसयं समत्तं
 ॥ ८ ॥ जहा भवसिद्धियएहिं चत्तारि नयाइं भणियाइं एवं अभवसिद्धियएहिंवि
 चत्तारि सयाणि लेस्सासंजुत्ताणि भाणियव्वाणि, सव्वपाणा नहेव नो ट्ठगट्ठे समट्ठे,
 एवं एयाइं वारस एगिंदियमहाजुम्मसयाइं भवंति । नेवं भंते ! सेवं भंते ! ति
 ॥ ८५८ ॥ पणतीसइमं सयं समत्तं ॥

कडजुम्मरवेइंदिया णं भंते ! कओ उववज्जंति० ? उववाओ जहा वक्कंतीए, परिमाणं
 सोलस वा संखेज्जा वा असंखेज्जा वा उववज्जंति, अवहारो जहा उप्प-
 लुद्देसए, ओगाहणा जह्जेणं अंगुलस्स असंखेज्जभागं उक्कोसेणं वारस जोयगाइं,
 एवं जहा एगिंदियमहाजुम्माणं पडमुद्देसए तहेव नवरं तिज्जि लेस्साओ देवा न
 उववज्जति सम्मद्दिट्ठी वा मिच्छादिट्ठी वा नो सम्मासिच्छादिट्ठी नाणी वा अन्नाणी
 वा नो मणजोगी वडजोगी वा कायजोगी वा, ते णं भंते ! कडजुम्मरवेइंदिया
 कालओ केवच्चिर होइ ? गोयमा ! जह्जेणं एकं समयं उक्कोसेणं संखेज्जं कालं, ठिई
 जह्जेणं एकं समयं उक्कोसेणं वारस संवच्छराइं, आहारो नियमं छहिसिं, तिज्जि
 समुग्घाया सेसं तहेव जाव अणंतखुत्तो, एवं सोलसमुवि जुम्मेसु । सेवं भंते ! २
 ति ॥ वेइंदियमहाजुम्मसए पडमो उद्देसो समत्तो ॥ ३६-१-१ ॥ पडमसमयकडजुम्मर-
 वेइंदिया णं भंते ! कओ उववज्जंति० ? एवं जहा एगिंदियमहाजुम्माणं पडमसमय-
 उद्देसए दस नाणत्ताइं ताइं चेव दस इहवि, एक्कारसमं इमं नाणत्तं-नो मणजोगी नो
 वडजोगी कायजोगी सेसं जहा वेइंदियाणं चेव पडमुद्देसए । सेवं भंते ! २ ति ॥ एवं
 एएवि जहा एगिंदियमहाजुम्मेसु एक्कारस उद्देसगा तहेव भाणियव्वा नवरं चउत्थच्छट्ठ-
 अट्ठमदसमेसु सम्मत्तनाणाणि न भण्णंति, जहेव एगिंदियसु पडमो तइओ पंचमो य
 एकगमा सेसा अट्ठ एकगमा ॥ ३६ इमे सए पडमं वेइंदियमहाजुम्मसयं समत्तं ॥ १ ॥
 कण्हलेस्सकडजुम्मरवेइंदिया णं भंते ! कओ उववज्जंति० ? एव चेव कण्हलेस्सेसुवि
 एक्कारसउद्देसगसंजुत्तं सयं, नवरं लेस्सा संचिट्ठणा ठिई जहा एगिंदियकण्हलेस्साणं ॥
 विइयं वेइंदियसयं समत्तं ॥ २ ॥ एवं नीललेस्सेहिवि सयं ॥ तइय सयं समत्तं ॥ ३ ॥
 एवं काउलेस्सेहिवि, सयं चउत्थं समत्तं ॥ ४ ॥ भवसिद्धियकडजुम्मरवेइंदिया णं भंते !
 एवं भवसिद्धियसयावि चत्तारि तेणेव पुव्वगमएणं नेयव्वा नवरं सव्वे पाणा० णो

इण्टे समट्टे, सेसं तहेव ओहियसयाणि चत्तारि । सेवं भंते । सेवं भंते । त्ति ॥
छत्तीसइमं सयं समत्तं ॥ ८ ॥ जहा भवसिद्धियसयाणि चत्तारि एवं
अभवसिद्धियसयाणि चत्तारि भाणियव्वाणि नवरं सम्मत्तनाणाणि (सव्वहा)
नत्थि, सेसं तं चेव, एवं एयाणि वारस बेइंदियमहाजुम्मसयाणि भवंति । सेवं
भंते । सेवं भंते । त्ति ॥ ८५९ ॥ बेइंदियमहाजुम्मसया समत्ता ॥ १२ ॥
छत्तीसइमं सयं समत्तं ॥

कडजुम्मरतेइंदिया णं भंते । कओ उववज्जंति० ? एवं तेइंदिएसुवि वारस सया
कायव्वा बेइंदियसयसरिसा नवरं ओगाहणा जहन्नेणं अंगुलस्स असखेज्जइभागं
उक्कोसेणं तिन्नि गाउयाइं, ठिई जहन्नेणं एक्कं समयं उक्कोसेणं एगूणपन्नं राइंदियाइं
सेसं तहेव । सेवं भंते । सेवं भंते । त्ति ॥ ८६० ॥ तेइंदियमहाजुम्मसया समत्ता
॥ १२ ॥ **सत्ततीसइमं सयं समत्तं ॥**

चउरिंदिएहि वि एवं चेव वारस सया कायव्वा नवरं ओगाहणा जहन्नेणं अंगु-
लस्स असखेज्जइभागं उक्कोसेणं चत्तारि गाउयाइं, ठिई जहन्नेणं एक्कं समयं उक्कोसेणं
छम्मासा सेस जहा बेइंदियाणं । सेवं भंते । २ त्ति ॥ ८६१ ॥ चउरिंदियमहा-
जुम्मसया समत्ता ॥ १२ ॥ **अट्टतीसइमं सयं समत्तं ॥**

कडजुम्मरअसन्निपंचिंदिया णं भंते । कओ उववज्जंति० ? जहा बेइन्दियाणं तहेव
असणिसुवि वारस सया कायव्वा नवरं ओगाहणा जहन्नेणं अंगुलस्स असखेज्जइ-
भागं उक्कोसेणं जोयणसहस्सं सच्चिट्ठगा जहन्नेणं एक्कं समयं उक्कोसेणं पुव्वकोडिपुहुत्तं
ठिई जहन्नेणं एक्कं समयं उक्कोसेणं पुव्वकोडी सेसं जहा बेइंदियाणं । सेवं भंते । २
त्ति ॥ ८६२ ॥ असणिपंचिंदियमहाजुम्मसया समत्ता ॥ १२ ॥ **एगूणयालीस-
इमं सयं समत्तं ॥** कडजुम्मरसन्निपंचिंदिया णं भंते । कओ उववज्जन्ति० ? उव-
वाओ चउसुवि गईसु, संखेज्जवासाउयअसंखेज्जवासाउयपज्जत्तअपज्जत्तएसु य न
कओवि पडिसेहो जाव अणुत्तरविमाणन्ति, परिमाणं अवहारो ओगाहणा य जहा
असन्निपंचिंदियाणं, वेयणिज्जवज्जाणं सत्तण्हं कम्मपगडीं वधगा वा अवंधगा वा, वेय-
णिज्जस्स वंधगा नो अवंधगा, मोहणिज्जस्स वेदगा वा अवेदगा वा सेसाणं सत्त-
ण्हवि वेदगा नो अवेदगा, सायावेदगा वा असायावेदगा वा, मोहणिज्जस्स उदई
वा अणुदई वा सेसाणं सत्तण्हवि उदई नो अणुदई, नामस्स गोयस्स य उदीरगा
नो अणुदीरगा सेसाणं छण्हवि उदीरगा वा अणुदीरगा वा, कण्हलेस्सा वा जाव
सुक्कलेस्सा वा, सम्महिट्ठी वा मिच्छादिट्ठी वा सम्मामिच्छादिट्ठी वा, णाणी वा
अन्नाणी वा, मणजोगी(वा) वइजोगी कायजोगी, उवओगो वन्नमाई उस्सासगा

(वा नीमासगा वा) आहारगा य जहा एगिंदियाग, विरया य अविरया य विरयाविरया य, सकिरिया नो अकिरिया । ते णं भंते ! जीवा कि सत्तविहवंधगा अट्ठविहवंधगा(वा) छविहवंधगा एगविहवंधगा ? गोयमा ! सत्तविहवधगा वा जाव एगविहवधगा वा, ते णं भंते ! जीवा कि आहारसन्नोवउत्ता जाव परिग्गहसन्नोवउत्ता नोसन्नोवउत्ता ? गोयमा ! आहारसन्नोवउत्ता वा जाव नोसन्नोवउत्ता वा, सव्वत्थ पुच्छा भाणियव्वा कोहकसाई वा जाव लोभकसाई वा अकसाई वा, इत्थीवेदगा वा पुरिसवेदगा वा नपुंसगवेदगा वा अवेदगा वा, इत्थीवेदवंधगा वा पुरिसवेदवंधगा वा नपुंसगवेदवंधगा वा अवंधगा वा, सन्नी नो असन्नी, सईंदिया नो अणिंदिया, सच्चिद्वणा जहन्नेणं एक्कं समयं उक्कोसेणं सागरोवमसयपुहुत्तं साइरेगं, आहारो तहेव जाव नियमं छद्दिसिं, ठिई जहन्नेणं एक्कं समय उक्कोसेण तेत्तीस सागरोवमाई, छ समुग्घाया आइल्लगा मारणंतियसमुग्घाएणं समोहयावि मरंति असमोहयावि मरति, उव्वट्ठणा जहेव उववाओ न कत्थइ पडिसेहो जाव अणुत्तरविमाणत्ति, अह भंते ! सव्वपाणा जाव अणंतखुत्तो, एवं सोलससुवि जुम्मेसु भाणियव्वं जाव अणंतखुत्तो, नवरं परिमाणं जहा वेइंदियाणं सेसं तहेव । सेवं भंते ! २ त्ति ॥ ४०-१-१ ॥ पढमसमयकडजुम्म२सन्निपंचिंदिया णं भंते ! कओ उववज्जन्ति० ? उववाओ परिमाणं आहारो जहा एएसिं चेव पढमोद्देसए ओगाहणा वंधो वेदो वेयणा उदई उदीरगा य जहा वेइन्दियाणं पढमसमइयाणं तहेव कग्गहलेस्सा वा जाव सुक्कलेस्सा वा, सेस जहा वेइन्दियाणं पढमसमइयाणं जाव अणंतखुत्तो नवरं इत्थिवेदगा वा पुरिसवेदगा वा नपुंसगवेदगा वा सन्निणो असण्णिणो सेस तहेव एवं सोलसुवि जुम्मेसु परिमाण तहेव सव्वं । सेवं भंते ! २ त्ति ॥ ४०-१-२ ॥ एवं एत्थवि एक्कारस उद्देसगा तहेव, पढमो तइओ पंचमो य सरिसगमगा सेसा अट्ठवि सरिसगमगा, चउत्थल्लट्ठअट्ठमदसमेसु नत्थि विसेसो (कोइवि) कायव्वो । सेवं भंते ! २ त्ति ॥ ८६३ ॥ चत्तालीसइमे सए पढमं सन्निपंचिंदियमहाजुम्मसयं समत्तं ॥ १ ॥

कग्गहलेस्सकडजुम्म २ सन्निपंचिंदिया णं भंते ! कओ उववज्जन्ति० ? तहेव जहा पढमुद्देमओ सन्नीणं, नवर वन्धो वेओ उदई उदीरणा लेस्सा वन्वगसन्ना कसायवेयवंधगा य एयाणि जहा वेइंदियाणं, कग्गहलेस्साण वेदो तिविहो अवेदगा नत्थि संचिद्वणा जहन्नेण एक्कं समयं उक्कोसेणं तेत्तीसं सागरोवमाई अंतोमुहुत्तमव्वमहिंयाई एवं ठिईएवि नवरं ठिईए अंतोमुहुत्तमव्वमहिंयाई न भन्ति सेसं जहा एएसिं चेव पढमे उद्देमए जाव अणंतखुत्तो । एवं सोलससुवि जुम्मेसु । सेवं भंते ! २ त्ति ॥ पढमसमयकग्गहलेस्सकडजुम्म२सन्निपंचिंदिया ण भते ! कओ उववज्जन्ति० ? जहा

सन्निपंचिदियपढमसमयउद्देसए तहेव निरवसेसं नवरं ते णं भंते ! जीवा कण्ह-
लेस्सा ? हंता कण्हलेस्सा सेसं तहेव, एवं सोलससुवि जुम्मेसु । सेवं भंते ! सेवं
भंते ! त्ति ॥ एवं एएवि एक्कारस उद्देसगा कण्हलेस्सासए, पढमतइयपंचमा
सरिसगमगा सेसा अट्टवि एक्क(सरिस)गमगा । सेव भंते । २ त्ति ॥ विइयं सयं समत्तं
॥ २ ॥ एवं नीललेस्सेसुवि सयं, नवरं संचिट्ठणा जहन्नेणं एक्कं समयं उक्कोसेणं
दस सागरोवमाइं पलिओवमस्स असंखेज्जइभागमब्भहियाइं, एवं ठिईएवि, एवं तिसु
उद्देसएसु, सेसं तहेव । सेवं भंते ! सेवं भंते ! त्ति ॥ तइयं सयं समत्तं ॥ ३ ॥
एवं काउलेस्ससयंपि, नवरं संचिट्ठणा जहन्नेणं एक्कं समयं उक्कोसेणं तिन्नि साग-
रोवमाइं पलिओवमस्स असंखेज्जइभागमब्भहियाइं, एवं ठिईएवि, एवं तिसुवि
उद्देसएसु, सेसं तहेव । सेवं भंते ! २ त्ति ॥ चउत्थं सयं ॥ ४ ॥ एवं तेउलेस्सेसुवि
सयं, नवरं संचिट्ठणा जहन्नेणं एक्कं समयं उक्कोसेणं दो सागरोवमाइं पलिओवमस्स
असंखेज्जइभागमब्भहियाइ एवं ठिईएवि नवरं नोसन्नोवउत्ता वा, एवं तिसुवि(गमएसु)
उद्देसएसु सेसं तं चेव । सेवं भंते ! २ त्ति ॥ पंचमं सयं ॥ ५ ॥ जहा तेउलेस्सा-
सयं तथा पम्हलेस्सासयपि नवरं संचिट्ठणा जहन्नेणं एक्कं समयं उक्कोसेणं दस
सागरोवमाइं अंतोमुहुत्तमब्भहियाइं, एवं ठिईएवि, नवरं अंतोमुहुत्तं न भन्नइ सेसं
तहेव, एवं एएसु पंचसु सएसु जहा कण्हलेस्सासए गमओ तथा नेयव्वो जाव
अणंतखुत्तो । सेवं भंते ! २ त्ति ॥ छट्ठं सयं समत्तं ॥ ६ ॥ सुक्कलेस्ससयं जहा
ओहियसयं नवरं संचिट्ठणा ठिई य जहा कण्हलेस्ससए सेसं तहेव जाव अणंतखुत्तो ।
सेवं भंते ! २ त्ति ॥ सत्तमं सयं समत्तं ॥ ७ ॥ भवसिद्धियकडजुम्म २ सन्निपं-
चिदिया णं भंते ! कओ उववज्जन्ति० ? जहा पढमं सन्निसयं तथा णेयव्वं भवसिद्धि-
याभिलावेणं नवरं सव्वपाणा० ? णो इणट्ठे समट्ठे, सेसं तं चेव, सेवं भंते ! २ त्ति ॥
अट्ठमं सयं समत्तं ॥ ८ ॥ कण्हलेस्सभवसिद्धियकडजुम्म २ सन्निपंचिदिया णं भंते !
कओ उववज्जन्ति० ? एवं एएणं अभिलावेणं जहा ओहियकण्हलेस्ससयं । सेवं भंते !
२ त्ति ॥ नवमं सयं ॥ ९ ॥ एवं नीललेस्सभवसिद्धिएवि सयं । सेवं भंते ! २ त्ति ॥
दसमं सयं ॥ १० ॥ एव जहा ओहियाणि सन्निपंचिदियाणं सत्त सयाणि भणियाणि एवं
भवसिद्धिएहिवि सत्त सयाणि कायव्वाणि, नवरं सत्तसुवि सएसु सव्वपाणा जाव
णो इणट्ठे समट्ठे, सेसं तं चेव । सेवं भंते ! २ त्ति ॥ भवसिद्धियसया समत्ता ॥
चउहसमं सयं समत्तं ॥ १४ ॥ अभवसिद्धियकडजुम्म २ सन्निपंचिदिया णं भंते !
कओ उववज्जन्ति० ? उववाओ तहेव अणुत्तरविमाणवज्जो परिमाणं अव(आ)हारो
उच्चत्तं वंधो वेदो वेदणं उदओ उदीरणा य जहा कण्हलेस्ससए कण्हलेस्सा वा जाव

सुक्कलेस्सा वा नो सम्महिट्ठी मिच्छादिट्ठी नो सम्मामिच्छादिट्ठी नो नाणी अजाणी एवं जहा कण्हलेस्ससए नवरं नो विरया अविरया नो विरयाविरया संचिट्ठणा ठिई य जहा ओहियउद्देसए समुग्घाया आइल्ला पंच उव्वट्ठणा तहेव अणुत्तरविमाणवज्जं सव्वपाणा० णो इण्टे समट्ठे सेसं जहा कण्हलेस्ससए जाव अणंतगुत्तो, एवं सोलस-सुवि जुम्मेसु । सेवं भंते ! २ ति ॥ पढमसमयअभवसिद्धियकडजुम्म २ सन्निपंचि-दिया णं भंते ! कओ उव्वज्जन्ति० ? जहा सन्नीणं पढमसमयउद्देसए तहेव नवरं सम्मतं सम्मामिच्छत्तं नाणं च सव्वत्थ नत्थि सेसं तहेव । सेवं भंते ! २ ति ॥ एवं एत्थवि एक्कारस उद्देसगा कायव्वा पढमनइयपंचमा एक्कगमा सेसा अट्ठवि एक्कगमा । सेवं भंते ! २ ति ॥ पढमं अभवसिद्धियमहाजुम्मसयं समत्तं ॥ चत्तालीसइमे सए पन्नरसमं सयं समत्तं ॥ १५ ॥ कण्हलेस्सअभवसिद्धियकडजुम्म २-सन्निपंचिदिया णं भंते ! कओ उव्वज्जन्ति० ? जहा एएसिं चेव ओहियसयं तहा कण्हलेस्ससयंपि नवरं ते णं भंते ! जीवा कण्हलेस्सा ? हंता कण्हलेस्सा, ठिई संचिट्ठणा य जहा कण्हलेस्ससए सेसं तं चेव । सेवं भंते ! २ ति ॥ विइयं अभव-सिद्धियमहाजुम्मसयं ॥ चत्तालीसइमे सए सोलसमं सयं समत्तं ॥ १६ ॥ एवं छहिवि लेस्साहिं छ सया कायव्वा जहा कण्हलेस्ससयं नवरं संचिट्ठणा ठिई य जहेव ओहियए तहेव भाणियव्वा, नवरं सुक्कलेस्साए उक्कोसेणं एक्कतीसं सागरोवमाइं अंतोमुहुत्तमव्वहियाइं, ठिई एवं चेव नवरं अतोमुहुत्तं नत्थि जहन्नगं तहेव सव्वत्थ सम्मतनाणाणि नत्थि विरई विरयाविरई अणुत्तरविमाणोववत्ति एयाणि नत्थि, सव्वपाणा० णो इण्टे समट्ठे । सेवं भंते ! सेवं भंते ! ति ॥ एवं एयाणि सत्त अभवसिद्धियमहाजुम्मसयाणि भवन्ति । सेवं भंते ! २ ति ॥ एवं एयाणि एक्कवीसं सन्निमहाजुम्मसयाणि । सव्वाणिवि एक्कासीइमहाजुम्मसया समत्ता ॥ ८६४ ॥ चत्तालीसइमं सयं समत्तं ॥

कइ णं भंते ! रासीजुम्मा पन्नत्ता ? गोयमा ! चत्तारि रासीजुम्मा पन्नत्ता, तंजहा—कडजुम्मे जाव कलिओगे, से केणट्ठेणं भंते ! एवं वुच्चइ चत्तारि रासीजुम्मा पन्नत्ता तंजहा—कडजुम्मे जाव कलिओगे ? गोयमा ! जे णं रासी चउक्कएणं अवहारेणं अवहीरमाणे चउपज्जवसिए सेत्तं रासीजुम्मकडजुम्मे, एवं जाव जे णं रासी चउक्कएणं अवहारेणं अवहीरमाणे एगपज्जवसिए सेत्तं रासीजुम्मकलिओगे, से तेणट्ठेणं जाव कलिओगे । रासीजुम्मकड-जुम्मेनेइया णं भंते ! कओ उव्वज्जन्ति० ? उववाओ जहा वक्कंतीए, ते णं भंते ! जीवा एगसमएणं केवइया उव्वज्जन्ति ? गोयमा ! चत्तारि वा अट्ठ वा

चारस वा सोलस वा संखेज्जा वा असंखेज्जा वा उववज्जंति, ते णं भंते ! जीवा किं संतरं उववज्जन्ति निरंतरं उववज्जन्ति ? गोयमा ! संतरंपि उववज्जन्ति निरंतरंपि उववज्जन्ति, संतरं उववज्जमाणा जहन्नेणं एक्कं समयं उक्कोसेणं, असंखेज्जा समया अंतरं कट्ठु उववज्जन्ति, निरंतरं उववज्जमाणा जहन्नेणं दो समया उक्कोसेणं असंखेज्जा समया अणुसमयं अविरहियं निरंतरं उववज्जन्ति, ते णं भते ! जीवा जंसमयं कडजुम्मा तंसमयं तेओगा जंसमयं तेओगा तंसमयं कडजुम्मा ? गोयमा ! णो इणट्ठे समट्ठे, जंसमयं कडजुम्मा तंसमयं दावरजुम्मा जंसमयं दावरजुम्मा तंसमयं कडजुम्मा ? नो इणट्ठे समट्ठे, जंसमयं कडजुम्मा तंसमयं कलिओगा जंसमयं कलिओगा तंसमयं कडजुम्मा ? णो इणट्ठे समट्ठे । ते णं भंते ! जीवा कहां उववज्जन्ति ? गोयमा ! से जहानामए पवए पवमाणे एवं जहा उववायसए जाव नो परप्पओगेणं उववज्जन्ति । ते णं भंते ! जीवा किं आयजसेणं उववज्जन्ति आयजसेणं उववज्जन्ति ? गोयमा ! नो आयजसेणं उववज्जन्ति आयजसेणं उववज्जन्ति, जइ आयजसेणं उववज्जन्ति किं आयजसं उवजीवंति आयजसं उवजीवंति ? गोयमा ! नो आयजसं उवजीवंति आयजसं उवजीवंति, जइ आयजसं उवजीवंति किं सलेस्सा अलेस्सा ? गोयमा ! सलेस्सा नो अलेस्सा, जइ सलेस्सा किं सकिरिया अकिरिया ? गोयमा ! सकिरिया नो अकिरिया, जइ सकिरिया तेणेव भवग्गहणेणं सिज्झंति जाव अंतं करेन्ति ? णो इणट्ठे समट्ठे । रासीजुम्मकडजुम्मअसुरकुमारा णं भंते ! कओ उववज्जन्ति० ? जहेव नेरइया तहेव निरवसेसं एवं जाव पंचिंदियतिरिक्खजोणिया नवरं वगस्सइकाइया जाव असंखेज्जा वा अगंता वा उववज्जंति सेसं तं चेव, मणुस्सावि एवं चेव जाव नो आयजसेणं उववज्जन्ति आयजसेणं उववज्जन्ति, जइ आयजसेणं उववज्जन्ति किं आयजसं उवजीवंति आयजसं उवजीवंति ? गोयमा ! आयजसपि उवजीवंति आयजसपि उवजीवंति, जइ आयजसं उवजीवंति किं सलेस्सा अलेस्सा ? गोयमा ! सलेस्सावि अलेस्सावि, जइ अलेस्सा किं सकिरिया अकिरिया ? गोयमा ! नो सकिरिया अकिरिया, जइ अकिरिया तेणेव भवग्गहणेणं सिज्झंति जाव अंतं करेन्ति ? हंता सिज्झंति जाव अंतं करेन्ति, जइ सलेस्सा किं सकिरिया अकिरिया ? गोयमा ! सकिरिया नो अकिरिया, जइ सकिरिया तेणेव भवग्गहणेणं सिज्झंति जाव अंतं करेन्ति ? गोयमा ! अत्थेगइया तेणेव भवग्गहणेणं सिज्झंति जाव अंतं करेन्ति अत्थेगइया नो तेणेव भवग्गहणेणं सिज्झंति जाव अंतं करेन्ति, जइ आयजसं उवजीवंति किं सलेस्सा अलेस्सा ? गोयमा ! सलेस्सा नो अलेस्सा, जइ सलेस्सा

कि सकिरिया अकिरिया ? गोयमा ! सकिरिया नो अकिरिया, जइ सकिरिया तेणेव भवग्गहणेणं सिज्जंति जाव अंनं करेंति ? गोयमा ! नो इग्गट्ठे समट्ठे । वाणमंतरजोडसिय-वेमाणिया जहा नेरइया । सेवं भंते ! सेवं भंते ! त्ति ॥ इक्कचत्तालीसइमे रासीजुम्मसए पडमो उद्देसो ॥ ४१।१ ॥ रासीजुम्मनेओगनेरइया णं भंते ! कओ उववज्जंति० ? एवं चेव उद्देसओ भाणियव्वो नवरं परिमाणं तिन्नि वा सत्त वा एक्कारस वा पत्तरस वा संखेज्जा वा असंखेज्जा वा उववज्जति संतरं तहेव, ते णं भंते ! जीवा जंसमयं तेओगा तंसमयं कडजुम्मा जंसमयं कडजुम्मा तंसमयं तेओगा ? गोयमा ! णो इणट्ठे समट्ठे, जंसमयं तेओगा तंसमयं दावरजुम्मा जंसमयं दावरजुम्मा तंसमयं तेओगा ? गोयमा ! णो इणट्ठे समट्ठे, एवं कलिओगेणवि समं, सेसं तं चेव जाव वेमाणिया नवरं उववाओ सव्वेसिं जहा वक्कंतीए । सेवं भंते ! सेवं भंते ! त्ति ॥ ४१।२ ॥ रासीजुम्मदावर-जुम्मनेरइया णं भंते ! कओ उववज्जन्ति० ? एवं चेव उद्देसओ नवरं परिमाणं दो वा छ वा दस वा संखेज्जा वा असंखेज्जा वा उववज्जंति संवेहो, ते णं भंते ! जीवा जंसमयं दावरजुम्मा तंसमयं कडजुम्मा जंसमयं कडजुम्मा तंसमयं दावरजुम्मा ? णो इणट्ठे समट्ठे, एवं तेओएणवि समं, एवं कलिओगेणवि समं, सेसं जहा पडमुद्देसए जाव वेमाणिया । सेवं भंते ! २ त्ति ॥ ४१।३ ॥ रासीजुम्मकलिओगनेरइया णं भंते ! कओ उववज्जंति० ? एव चेव नवरं परिमाणं एक्को वा पंच वा नव वा तेरस वा संखेज्जा वा असंखेज्जा वा उववज्जन्ति संवेहो, ते णं भंते ! जीवा जंसमयं कलिओगा तंसमयं कडजुम्मा जंसमयं कडजुम्मा तंसमयं कलिओगा ? नो इणट्ठे समट्ठे, एवं तेओगेणवि समं, एवं दावरजुम्मेणवि समं, सेसं जहा पडमुद्देसए एवं जाव वेमाणिया । सेवं भंते ! २ त्ति ॥ ४१।४ ॥ कण्हलेस्सरसीजुम्मकडजुम्मनेरइया णं भंते ! कओ उववज्जन्ति० ? उववाओ जहा धूमप्पभाए सेसं जहा पडमुद्देसए, असुरकुमाराणं तहेव एवं जाव वागमतराणं मणुस्साणवि जहेव नेरइयाणं आय-अजस उवजीवंति अलेस्सा अकिरिया तेणेव भवग्गहणेण सिज्जंति एवं (न) भाणि-यव्वं सेसं जहा पडमुद्देसए । सेवं भंते ! सेवं भंते ! त्ति ॥ ४१।५ ॥ कण्हलेस्सतेओ-गेहिवि एवं चेव उद्देसओ, सेवं भंते ! २ त्ति ॥ ४१।६ ॥ कण्हलेस्सदावरजुम्मेहिवि एवं चेव उद्देसओ । सेवं भंते ! २ त्ति ॥ ४१।७ ॥ कण्हलेस्सकलिओगेहिवि एवं चेव उद्देसओ परिमाणं संवेहो य जहा ओहिएसु उद्देसएसु । सेवं भंते ! २ त्ति ॥ ४१।८ ॥ जहा कण्हलेस्सेहिं एवं नीललेस्सेहिवि चत्तारि उद्देसगा भाणियव्वा निरव्वेसा, नवरं नेरइयाणं उववाओ जहा वालुयप्पभाए सेसं तं चेव । सेवं भंते !

सेवं भंते । त्ति ॥ ४१।१२ ॥ काउलेस्सेहिवि एवं चेव चत्तारि उद्देसगा कायव्वा नवरं नेरइयाणं उववाओ जहा रयणप्पभाए, सेसं तं चेव । सेवं भंते ! सेवं भंते ! त्ति ॥ ४१।१६ ॥ तेउलेस्सरासीजुम्मकडजुम्मअसुरकुमारा णं भंते ! कओ उववज्जन्ति० ? एवं चेव नवरं जेषु तेउलेस्सा अत्थि तेषु भाणियव्व, एवं एएवि कण्हलेस्ससरिसा चत्तारि उद्देसगा कायव्वा । सेवं भंते ! २ त्ति ॥ ४१।२० ॥ एवं पम्हलेस्साएवि चत्तारि उद्देसगा कायव्वा पंचिदियतिरिक्खजोणियाणं मणुस्साणं वेमाणियण य एएसिं पम्हलेस्सा सेसाणं नत्थि । सेवं भंते ! २ त्ति ॥ ४१।२४ ॥ जहा पम्हलेस्साए एवं सुक्कलेस्साएवि चत्तारि उद्देसगा कायव्वा नवरं मणुस्साणं गमओ जहा ओहियउद्देसएसु सेस तं चेव, एव एए छसु लेस्सासु चउव्वीसं उद्देसगा ओहिया चत्तारि, सव्वेते अट्ठावीस उद्देसगा भवंति । सेवं भंते ! २ त्ति ॥ ४१।२८ ॥ भवसिद्धियरासीजुम्मकडजुम्मनेरइया णं भंते ! कओ उववज्जन्ति० ? जहा ओहिया पढमगा चत्तारि उद्देसगा तहेव निरवसेसं एए चत्तारि उद्देसगा । सेवं भंते ! २ त्ति ॥ ४१।३२ ॥ कण्हलेस्सभवसिद्धियरासीजुम्मकडजुम्मनेरइया णं भंते ! - कओ उववज्जन्ति० ? जहा कण्हलेस्साए चत्तारि उद्देसगा भवंति तहा डमेवि भवसिद्धियकण्हलेस्सेहि चत्तारि उद्देसगा कायव्वा ॥ ४१।३६ ॥ एवं नीललेस्सभवसिद्धिएहिवि चत्तारि उद्देसगा कायव्वा ॥ ४१।४० ॥ एवं काउलेस्सेहिवि चत्तारि उद्देसगा ॥ ४१।४४ ॥ तेउलेस्सेहिवि चत्तारि उद्देसगा ओहियसरिसा ॥ ४१।४८ ॥ पम्हलेस्सेहिवि चत्तारि उद्देसगा ॥ ४१।५२ ॥ सुक्कलेस्सेहिवि चत्तारि उद्देसगा ओहियसरिसा, एवं एएवि भवसिद्धिएहिवि अट्ठावीसं उद्देसगा भवंति । सेव भंते ! सेवं भंते ! त्ति ॥ ४१।५६ ॥ अभवसिद्धियरासीजुम्मकडजुम्मनेरइया णं भंते ! कओ उववज्जन्ति० ? जहा पढमो उद्देसओ नवरं मणुस्सा नेरइया य सरिसा भाणियव्वा, सेस तहेव । सेव भंते ! २ त्ति । एवं चउसुवि जुम्मेसु चत्तारि उद्देसगा । कण्हलेस्सअभवसिद्धियरासीजुम्मकडजुम्मनेरइया णं भंते ! कओ उववज्जन्ति० ? एवं चेव चत्तारि उद्देसगा, एवं नीललेस्सअभवसिद्धिएहिवि चत्तारि उद्देसगा एवं काउलेस्सेहिवि चत्तारि उद्देसगा एवं तेउलेस्सेहिवि चत्तारि उद्देसगा पम्हलेस्सेहिवि चत्तारि उद्देसगा सुक्कलेस्सअभवसिद्धिएहिवि चत्तारि उद्देसगा, एवं एएसु अट्ठावीसाएवि अभवसिद्धियउद्देसएसु मणुस्सा नेरइयगमेणं नेयव्वा । सेव भंते ! २ त्ति । एवं एएवि अट्ठावीसं उद्देसगा ॥ ४१।८४ ॥ सम्महिट्ठीरासीजुम्मकडजुम्मनेरइया णं भंते ! कओ उववज्जन्ति० ? एवं जहा पढमो उद्देसओ एवं चउसुवि जुम्मेसु चत्तारि उद्देसगा भवसिद्धियसरिसा कायव्वा । सेवं भंते ! २ त्ति ॥ कण्हलेस्ससम्महिट्ठीरासीजुम्मकडजुम्मनेरइया णं भंते ! कओ

उववज्जंति० ? एएवि कण्हलेस्ममरिसा चत्तारिवि उद्देसगा कायव्वा, एवं सम्मद्दिट्ठी-
सुवि भवसिद्धियसरिसा अट्ठावीसं उद्देसगा कायव्वा । सेवं भंते ! सेवं भंते ! त्ति जाव
विहरइ ॥ ४१।११२ ॥ मिच्छादिट्ठीरासीजुम्मकडजुम्मनेरइया णं भंते ! कओ
उववज्जंति० ? एवं एत्थवि मिच्छादिट्ठिअभिलावेणं अभवसिद्धियसरिसा अट्ठावीसं
उद्देसगा कायव्वा । सेवं भंते ! सेव भंते ! त्ति ॥ ४१।१४० ॥ कण्हपक्खियरासीजुम्म-
कडजुम्मनेरइया णं भते ! कओ उववज्जंति० ? एवं एत्थवि अभवसिद्धियसरिसा
अट्ठावीसं उद्देसगा कायव्वा । सेवं भंते ! २ त्ति ॥ ४१।१६८ ॥ सुक्कपक्खियरासी-
जुम्मकडजुम्मनेरइया णं भंते ! कओ उववज्जंति० ? एवं एत्थवि भवसिद्धियसरिसा
अट्ठावीसं उद्देसगा भवंति, एवं एए सव्वेवि छन्नउयं उद्देसगसयं भवन्ति रासीजुम्म-
सयं ॥ ४१।१९६ ॥ जाव सुक्कलेस्सा सुक्कपक्खियरासीजुम्मकलिओगवेमाणिया
जाव जइ सकिरिया तेणेव भवग्गहणेणं सिज्जंति जाव अंतं करेति ? णो इण्ठे
समट्ठे, सेवं भंते ! २ त्ति ॥ ८६५ ॥ भगवं गोयमे समण भगवं महावीरं तिकुत्तो
आयाहिणं पयाहिणं करेइ २ ता वंदइ नमंसइ वंदित्ता नमंसित्ता एवं वयासी-एवमेयं
भंते ! तहमेयं भंते ! अवितहमेयं भंते ! असंदिद्धमेयं भंते ! इच्छियमेयं भंते !
पडिच्छियमेयं भंते ! इच्छियपडिच्छियमेयं भंते ! सच्चे णं एसमट्ठे जे णं तुब्भे
वदहत्तिकट्ठु अपूडवयणा खलु अरिहंता भगवंतो, समणं भगवं महावीरं वंदइ नमंसइ
वंदित्ता नमंसित्ता संजमेणं तवसा अप्पाणं भावेमाणे विहरइ ॥ ८६६ ॥ इक्कचत्ता-
लीसइमं रासीजुम्मसयं समत्तं ॥ सव्वाए भगवईए अट्ठतीसं सयं सयाणं
१३८ उद्देसगाणं १९२५ ॥ चुलसीयसयसहस्सा पयाण पवरवरणाणदसीहिं । भावा-
भावमणंता पन्नत्ता एत्थमंगंमि ॥ १ ॥ तवनियमविणयवेलो जयइ सया नाणविमल-
विउलजलो । हेउसयविउलवेगो संघसमुदो गुणविसालो ॥ २ ॥ णमो गोयसाईणं
गणहराणं, णमो भगवईए विवाहपन्नत्तीए, णमो दुवालसंगस्स गणिपिडगस्स ॥ गाहा-
[कुसुम] कुम्मसुसंठियचलणा, अमलियकोरंटवेटसंकासा । सुयदेवया भगवई मम
मडतिमिरं पणासेउ ॥ १ ॥ पन्नत्तीए आइमाणं अट्ठण्हं सयाणं दो दो उद्देसगा उद्दि-
सिज्जन्ति णवरं चउत्थे सए पढमदिवसे अट्ठ विइयदिवसे दो उद्देसगा उद्दिसिज्जंति,
(नवरं) नवमाओ सयाओ आरद्धं जावइयं जावइयं एइ तावइयं तावइयं एगदिवसेणं
उद्दिसिज्जइ उक्कोसेणं सयंपि एगदिवसेणं मज्झिमेणं दोहिं दिवसेहिं सयं जहन्नेणं
तिहिं दिवसेहिं सयं एवं जाव वीसइमं सयं, णवरं गोसालो एगदिवसेणं उद्दिसिज्जइ जइ
ठिओ एगेण चेव आयंविलेग अणुन्न(विज्जइ)जिहीइ अह ण ठिओ आयंविलेणं छट्ठेणं
अणुण्णवइ, एक्कवीसवावीसतेवीसइमाइं सयाइं एक्केकदिवसेणं उद्दिसिज्जन्ति, चउ-

वीसइमं सयं दोहिं दिवसेहिं छ छ उद्देसगा, पंचवीसइमं दोहिं दिवसेहिं छ छ उद्दे-
सगा, वधिसयाइ अट्टसयाइं एगेणं दिवसेणं सेढिसयाइं बारस एगेणं एगिंदियमहा-
जुम्मसयाइं बारस एगेणं एवं वेइंदियाणं बारस तेइंदियाणं बारस चउरिंदियाणं
बारस एगेण असन्निपंचिंदियाणं बारस सन्निपंचिंदियमहाजुम्मसयाइं एकवीसं एग-
दिवसेणं उद्दिसिज्जन्ति रासीजुम्मसयं एगदिवसेणं उद्दिसिज्जइ ॥ गाहाओ-वियसि-
यअरविंदकरा नासियतिमिरा सुयाहि(वा)या देवी । मज्झंप्पि देउ मेह बुहविबुहण-
भंसिया णिच्चं ॥ १ ॥ सुयदेवयाए पणमिमो जीए पसाएण सिक्खियं नाणं । अण्णं
पवयणदे(वि)वी संतिक(रिं)री तं (हं)नमंसामि ॥ २ ॥ सुयदेवया य जक्खो कुंभधरो
वंभसंति वेरोट्ठा । विज्जा य अंतहुंडी देउ अविग्घं लिहंतस्स ॥ ३ ॥ ८६७ ॥
सिरिविवाहपन्नत्ती समत्ता, पंचमं अंगं समत्तं ॥



णमोऽत्थु णं समणस्स भगवओ णायपुत्त-महावीरस्स

सुत्तागमे

तत्थ णं

॥ नायाधम्मकहाओ ॥

तेणं कालेणं तेणं समएणं चंपा नामं नयरी होत्था । वण्णओ ॥ १ ॥ तीसे णं चंपाए नयरीए वहिया उत्तरपुरच्छिमे दिसीभाए (एत्थ णं) पुण्णभेद्द नामं उज्जाणे होत्था । वण्णओ ॥ २ ॥ तत्थ णं चंपाए नयरीए कोणिए नामं राया होत्था । वण्णओ ॥ ३ ॥ तेणं कालेण तेणं समएणं समणस्स भगवओ महावीरस्स अंतेवासी अज्जसुहम्मस्स नामं थेरे जाइसंपन्ने कुलसंपन्ने वलहवविणयनाणदसणचरितलाघवसंपन्ने ओयंसी तेयंसी वच्चंसी जसंसी जियकोहे जियमाणे जियमाए जियलोहे जिइंदिए जियनिद्दे जियपरीसहे जीवियासामरणभयविप्पमुक्के तवप्पहाणे गुणप्पहाणे एवं करणचरण-निग्गहनिच्छयअज्जवमद्वलाघवखंतिगुत्तिमुत्तिविज्जामंतवंभ(चेर)वयनयनियमसच्च-सोयनाणदंसणचारित्तप्पहाणे उ(ओ)राले घोरे घोरव्वए घोरतवस्सी घोरवंभचेरवासी उच्छूढसरीरे सखित्तविउलते(य)उलेसे चोइसपुव्वी चउनाणोवगए पंचहिं अणगारस्स-एहिं सद्धि संपरिवुडे पुव्वाणुपुव्वि चरमाणे गामाणुगामं दूइज्जमाणे सुहंसुहेणं विहरमाणे जेणेव चंपा नयरी जेणेव पुण्णभेद्द उज्जाणे तेणामेव उवागच्छइ २ ता अहापडि-रूवं उग्गहं अंगिण्हइ ओगिणिहत्ता संजमेणं तवसा अप्पाणं भावेमाणे विहरइ ॥ ४ ॥ तए णं चंपाए नयरीए परिसा निग्गया । कोणिओ निग्गओ । धम्मो कहिओ । परिसा जामेव दिसि पाउब्भूया तामेव दिसि पडिगया । तेणं कालेणं तेणं समएणं अज्ज-सुहम्मस्स अणगारस्स जेट्ठे अंतेवासी अज्जजंबू नामं अणगारे कांसवगोत्तेगं सत्तु-स्सेहे जाव अज्जसुहम्मस्स थेरस्स अदूरसामंते उद्धंजाणू अहोसिरे ज्ञाणकोट्ठोवगए संजमेणं तवसा अप्पाणं भावेमाणे विहरइ । तए णं से अज्जजंबूनामे जायसद्धे जाय-संसए जायकोउहल्ले संजायसद्धु संजायससए संजायकोउहल्ले उप्पन्नसद्धे उप्पन्नसंसए उप्पन्नकोउहल्ले समुप्पन्नसद्धे समुप्पन्नसंसए समुप्पन्नकोउहल्ले उट्ठाए उट्ठेइ उट्ठाए उट्ठित्ता जेणामेव अज्जसुहम्मस्स थेरे तेणामेव उवागच्छइ २ ता अज्जसुहम्मस्स थेरे तिकखुत्तो आयाहिणं पयाहिणं करेइ २ ता वंदइ नमंसइ वंदित्ता नमंसित्ता अज्जसुहम्मस्स थेरस्स

नच्चासन्ने नाइदूरे सुस्सूसमाणे नमंसमाणे अभिमुहे पंजलिउडे विणएणं पज्जुवासमाणे एवं
वयासी-जइ णं भंते ! समणेणं भगवया महावीरेणं आइगरेणं तित्थगरेणं सयंसंबुद्धेणं
पुरिसुत्तमेणं पुरिससीहेणं पुरिस(वरपुंडरीएणं)वग्घेणं पुरिसवरगंधहत्थिणा लोगुत्तमेणं
लोगनाहेणं लोगहिएणं लोगपईवेणं लोगपज्जोयगरेणं अभयदएणं सरणदएणं चक्खुद-
एणं मग्गदएणं वोहिदएणं धम्मदएणं धम्मदेसएणं धम्मनायगेणं धम्मगारहिणा धम्म-
वरचाउरंतचक्कवट्ठिणा अप्पडिहयवरनाणदंसणधरेणं वियट्ठउमेणं जिणेणं जा(व)ण-
एणं तिण्णेणं तारएणं बुद्धेणं बोहएणं मुत्तेणं मोयगेणं सव्वण्णेणं सव्वदरिसिणा सिवमय-
लमह्यमणंतमक्खयमव्वावाहमपुणरावित्थियं सासयं ठाणमुवगएणं पंचमस्स अंगरस
अयमट्ठे पन्नत्ते, छट्ठस्स णं अंगस्स भंते ! नायाधम्मकहाणं के अट्ठे पन्नत्ते ? जंबु-
त्ति अज्जसुहम्मे थेरे अज्जजंबूनामं अणगारं एवं वयासी-एवं खलु जंबू ! समणेणं
भगवया महावीरेणं जाव संपत्तेणं छट्ठस्स अंगस्स दो सुयक्खंधा पन्नत्ता, तंजहा-
नायाणि य धम्मकहाओ य । जइ णं भंते ! समणेणं भगवया महावीरेणं जाव
संपत्तेणं छट्ठस्स अंगस्स दो सुयक्खंधा पन्नत्ता तंजहा-नायाणि य धम्मकहाओ
य, पढमस्स णं भंते ! सुयक्खंधस्स समणेणं जाव संपत्तेणं नायाणं कइ अज्ज-
यणा पन्नत्ता ? एवं खलु जंबू ! समणेणं जाव संपत्तेण नायाणं एगूणवीसं अज्जयणा
पन्नत्ता, तंजहा-उक्खित्तणाए सघाडे अडे कुम्मे य सेलगे । तुंवे य रोहिणी मल्ली
मायंदी चंदिमाइय ॥ १ ॥ दावद्दे उदगणाए मंडुक्के तेयली वि य । नंदीफले
अवरकंका आइन्ने सुसुमाइय ॥ २ ॥ अवरे य पुंडरीए नायए एगूणवीसइमे ॥ ५ ॥
जइ णं भंते ! समणेणं जाव संपत्तेणं नायाणं एगूणवीसं अज्जयणा पन्नत्ता तंजहा-
उक्खित्तणाए जाव पुंडरीए (त्ति) य, पढमस्स णं भंते ! अज्जयणस्स के अट्ठे पन्नत्ते ?
एवं खलु जंबू ! तेणं कालेणं तेणं समएणं इहेव जंबुद्दीवे दीवे भारहे वासे दाहिणद्धुभरहे
रायगिहे नामं नयरे होत्था । वण्णओ । गुणसिलए उज्जाणे । वण्णओ । तत्थ णं रायगिहे
नयरे सेणिए नामं राया होत्था । महया हिमवंत० वण्णओ । तस्स णं सेणियस्स रत्तो
नंदा नामं देवी होत्था सुकुमालपाणिपाया वण्णओ ॥ ६ ॥ तस्स णं सेणियस्स पुत्ते
नंदाए देवीए अत्तए अभए नामं कुमारं होत्था अहीणपंचिदियसरीरे जाव सुरुवे
सामदंडभेयउवप्पयाणनीइसुप्पउत्तनयविहिन्नु ईहापोहमग्गगणवेसणअत्यसत्थमइवि-
सारए उप्पत्तियाए वेणइयाए कम्मियाए पारिणामियाए चउव्विहाए बुद्धीए उववेए
सेणियस्स रत्तो बहुसु कज्जेसु य कुडुंबेसु य मतेसु य गुज्जेसु य रहस्सेसु य निच्छ-
एसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खू मेढीभूए
पमाणभूए आहारभूए आलंबणभूए चक्खुभूए सव्वकज्जेसु सव्वभूमियासु लद्धपच्चए

विङ्णवियारे रज्जधुरचित्तए यावि होत्था । सेणियस्स रत्तो रज्जं च रट्ठं च कोसं
च कोट्ठागारं च बलं च वाहणं च पुरं च अतेउरं च सयमेव समु(वे)पेक्खमाणे २
विहरइ ॥ ७ ॥ तस्स णं सेणियस्स रत्तो धारिणी नामं देवी होत्था जाव सेणियस्स रत्तो
इट्ठा जाव विहरइ ॥ ८ ॥ तए णं सा धारिणी देवी अन्नया कयाइ तंसि तारिसगंसि
छक्कट्ठगलट्ठमट्ठसंठियखंमुग्गयपवरवरसालभंजियउज्जलमणिकणगरयणथूभियविडंक्र-
जालद्धचंदनिज्जूहकंतरकणयालिचंदसालियाविभत्तिकलिए सरसच्छधाऊवलवण्णरइए
वाहिरओ दूमियघट्टमट्टे अब्भितरओ पसत्तसुविलिहियचित्तकम्मे नाणाविह-
पंचवण्णमणिरयणकोट्टिमतले पउमलयाफुल्लवल्लिवरपुप्फजाइउल्लोयचित्तियतले चं(वं)-
दणवरकणगकलससु(वि)णिम्मियपडिपुज्जियसरसपउमसोहंतदारभाए पयरग्गलं-
वंतमणिमुत्तदामसुविरइयदारसोहे सुगंधवरकुसुममउयपम्हलसयणोवयारमणहिययनि-
व्वुडयरे कप्पूरलवंगमलयचंदणकालागुरुपवरकुंदुरुक्कतुरुक्कधूवडज्जंतसुरभिमघमघंतगं-
धुद्धयाभिरामे सुगंधवरगंधिए गंधवट्ठिभूए मणिकिरणपणासियंधयारे किं बहुणा ? जुइ-
गुणेहि सुरवरविमाणवेलं(विय)ववरघरए तंसि तारिसगंसि सयणिज्जंसि सालिगणवट्टिए
उभओ विव्वोयणे दुहओ उन्नए मज्झे णयगंभीरे गंगापुलिणवालुयाउद्दालसालिसए
उयचियखोमदुगुल्लपट्टपडि(च्छण्णे)च्छायणे अत्थरयमलयनवतयकुसत्तलिंवसीहके-
सरपच्चुत्थए सुविरइययत्ताणे रत्तंसुयसंयुए सुरम्मे आइणगरुयवूरनवणीयतुल्लफासे
पुव्वरत्तावरत्तकालसमयंसि सुत्तजागरा ओहीरमाणी ओहीरमाणी एगं महं सत्तुस्सेहं
रययकूडसन्निहं नहयलंसि सोमं सोमागारं लीलायंतं जंभा(यंतं)यमाणं मुहमइगयं
गयं पासित्ता णं पडिवुद्धा । तए णं सा धारिणी देवी अयमेयारुवं उरालं कल्लाण सिवं
धज्जं मंगल्ल सस्सिरीयं महासुमिणं पासित्ता णं पडिवुद्धा समाणी हट्ठुट्ठा चित्तमाणंदिया
पीइमणा परमसोमणस्सिया हरिसवसविसप्पमाणहियया धाराहयकलंवपुप्फगं पिव
समूससियरोमकूवा तं सुमिणं ओणिण्हइ २ ता सयणिज्जाओ उट्ठेइ २ ता पायपीढाओ
पच्चोरुहइ २ ता अतुरियमचवलमसंभंताए अविलंवियाए रायहंससरिसीए गईए
जेणामेव से सेणिए राया तेणामेव उवागच्छइ २ ता सेणियं रायं ताहि इट्ठाहि
कंताहि पियाहि मणुज्जाहिं मणामाहिं उरालाहिं कल्लाणाहि सिवाहिं धज्जाहि मंगल्लाहि
सस्सिरीयाहि हिययगमणिज्जाहिं हिययपल्हायणिज्जाहिं मियमहुररिभियगंभीरसस्सि-
रीयाहिं गिराहिं सलवमाणी २ पडिवोहेइ २ ता सेणिएणं रत्ता अब्भणुज्जाया
समाणी नाणामणिकणगरयगभत्तिचित्तंसि भद्दासणंसि निसीयइ २ ता आसत्था
वीसत्था सुहासणवरगया करयलपरिग्गहियं सिरसावत्तं मत्थए अंजलिं कट्ठु सेणियं
रायं एवं वयासी-एवं खलु अहं देवाणुप्पिया । अज्ज तंसि तारिसगंसि सयणिज्जंसि

सालिंगगवट्टिए जाव नियगवयणमइवयंतं गयं सुमिणे पासित्ता णं पडिबुद्धा । तं
 एयस्स णं देवाणुप्पिया । उरालस्स जाव सुमिणस्स के मन्ने कल्लणे फलवित्तिविसेसे
 भविस्सइ ? ॥ ९ ॥ तए णं से सेणिए राया धारिणीए देवीए अंतिए एयमट्ठं सोच्चा
 निसम्म हट्ठतुट्ठ जाव हियए धाराहयनीत्रसुरभिकुसुमचंचुमालइयतणू ऊस(सि)वियरो-
 मकूवे तं सुमिणं उगिण्हइ २ ता ईहं पविसइ २ ता अप्पणो साभाविणं मडपुव्वएणं
 बुद्धिविज्ञाणेणं तस्म सुमिणस्स अत्योग्गहं करेइ २ ता धारिणिं देविं ताहिं जाव
 हिययपल्हायणिज्जाहि मि(उ)यमहुररिभियगंभीरसस्सिरीयाहिं वग्गूहिं अणुवूहेमाणे २
 एवं वयासी-उराले णं तुमे देवाणुप्पिए ! सुमिणे दिट्ठे, कल्लणे णं तुमे देवाणु-
 प्पिए ! सुमिणे दिट्ठे, सिवे धन्ने मंगले सस्सिरीए ण तुमे देवाणुप्पिए ! सुमिणे
 दिट्ठे, आरोग्गतुट्ठिदीहाउयकल्लणमंगल्लकारए णं तुमे देवी ! सुमिणे दिट्ठे, अत्थलाभो
 ते देवाणुप्पिए ! पुत्तलाभो ते देवाणुप्पिए ! रज्जलाभो भोगलाभो सोक्खलाभो ते
 देवाणुप्पिए ! एवं खलु तुमं देवाणुप्पिए ! नवण्हं मासाणं बहुपडिपुण्णाण अद्धमाण
 य राइदियाणं वीइक्कंताणं अम्हं कुलकेउं कुलदीव कुलपव्वयं कुलवडिंसयं कुलनि-
 लय कुलकित्तिकरं कुलवित्तिकरं कुलनंदिकरं कुलजसकरं कुलाधारं कुलपायव कुल-
 विवद्धणकरं सुकुमालपाणिपायं जाव दारयं पयाहिसि । से वि य णं दारए उम्मुक्क-
 वालभावे विज्ञायपरिणयमेत्ते जोव्वगगमणुप्पत्ते सूरे वीरे विक्कंते वित्थिणगविमुल-
 वलवाहणे रज्जवई राया भविस्सइ । तं उराले णं तुमे देवी ! सुमिणे दिट्ठे जाव
 आरोग्गतुट्ठिदीहाउकल्लणकारए णं तुमे देवी ! सुमिणे दिट्ठे त्ति कट्ठु भुज्जो २ अणुवूहेइ
 ॥ १० ॥ तए णं सा धारिणी देवी सेणिएणं रत्ता एवं बुत्ता समाणी हट्ठतुट्ठा जाव हियया
 करयलपरिगगहियं जाव अंजलिं कट्ठु एवं वयासी-एवमेयं देवाणुप्पिया । तहमेयं
 देवाणुप्पिया ! अवितहमेयं असदिद्धमेयं इच्छियमेयं (देवाणुप्पिया !) पडिच्छियमेयं
 इच्छियपडिच्छियमेयं सच्चे णं एसमट्ठे जं णं तुब्भे वयह त्ति कट्ठु तं सुमिण सम्मं
 पडिच्छइ २ ता सेणिएणं रत्ता अवमणुज्ञाया समाणी नाणामणिक्कणगरयणभत्ति-
 चित्ताओ भद्दासणाओ अब्भुट्ठेइ २ ता जेणेव सए सयणिज्जे तेणेव उवागच्छइ २ ता
 सयसि मयणिज्जसि निसीयइ २ ता एवं वयासी-मा मे से उत्तमे पहाणे मंगले सुमिणे
 अन्नेहि पावसुमिणेहि पडिहम्मिहिति कट्ठु देवयगुरुजणसंवद्धाहिं पमत्थाहिं धम्मि-
 याहिं कहाहि सुमिणजागरियं पडिजागरमाणी (२)विहरइ ॥ ११ ॥ तए णं से सेणिए
 राया पच्चसकालसमयंसि कोडुवियपुरिसे सद्दावेइ २ ता एवं वयासी-खिप्पामेव भो
 देवाणुप्पिया ! वाहिरियं उवट्ठाणसाल अज्ज सविसेसं परमरम्मं गंधोदगसित्तसुइय-
 सम्मज्जिओवलित्तं पचवण्णसरससुरभिमुक्कपुप्फपुंजोवयारकलियं कालागरुपवरकुंदुरुक्क-

तुस्कधूवडज्जंतमधमघंतगंधुद्धयाभिरामं सुगंधवरगंधियं गंधवट्टिभूयं करेह य कारवेह
 य करिता य कारवित्ता य ए(व)यमाणत्तियं पच्चप्पिणह । तए णं ते कोडुवियपुरिसा
 सेणिएणं रत्ता एवं वुत्ता समाणा हट्ठतुट्ठा जाव पच्चप्पिणंति । तए णं से सेणिए
 राया कल्लं पाउप्पभायाए रयणीए फुल्लुप्पलकमलक्रीमलुम्मिलियंमि अहापंडुरे पभाए
 रत्तासोगप्पगासकिसुयसुयमुहगुंजद्ध(राग)वंधुजीवगपारावयचलणनयणपरहुयसुरत्तलो-
 यणजासुमणकुसुमजलियजलणतवणिज्जकलसहिगुलयनिगरूवाइरेगरेहन्तसस्सिरीए
 दिवा(ग)यरे अहकमेण उदिए तस्स दिण(कर)करपरंपरावयारपारद्धंमि अधयारे
 चालायवकुकुमेण खइयव्व जीवलोए लोयणविसयाणुयासविगसंतविसददंसियंमि लोए
 कमलागरसडवोहए उट्ठियंमि सूरै सहस्सरस्सिमि दिणयरे तेयसा जलंते सयणिज्जाओ
 उट्ठेइ २ ता जेणेव अट्ठणसाला तेणेव उवागच्छइ २ ता अट्ठणसालं अणुपविसइ २
 ता अणेगवायामजोगवग्गणवामद्दणमल्लजुद्धकरणेहिं संते परिस्संते सयपागसहस्सपा-
 गेहिं सुगंधवरतेल्लमाइएहि पीणणिज्जेहिं दीवणिज्जेहिं दप्पणिज्जेहि मयणिज्जेहि विंहणि-
 ज्जेहिं सव्विदियगायपल्लहायणिज्जेहिं अब्भंगएहिं अब्भंगिए समाणे तेल्लचम्मंसि पडि-
 पुण्णपाणिपायसुकुमालक्रीमलतलेहिं पुरिसेहिं छेएहिं दक्खेहि पट्ठेहि कुसलेहिं मेहावीहिं
 निउणेहिं निउणसिप्पोवगएहि जियपरिरसमेहिं अब्भंगणपरिमद्दुप्पुव्वलणकरणगुणनि-
 म्माएहिं अट्ठिसुहाए मंससुहाए तयासुहाए रोमसुहाए चउव्विहाए सं(वा)वाहणाए
 संवाहिए समाणे अवगयपरिस्समे नरिंदे अट्ठणसालाओ पडिनिक्खमइ २ ता जेणेव
 मज्जणवरे तेणेव उवागच्छइ २ ता मज्जणघरं अणुपविसइ २ ता स(मु)म(न्त)तजाला-
 भिरामे विचित्तमणिरयणकोट्टिमतले रमणिज्जे ण्हाणमंडवंसि नाणामणिरयणभत्तिचित्तंसि
 ण्हाणपीढंसि सुहनिसण्णे सुहोदगेहिं पुप्फोदएहिं गंधोदएहिं सुद्धोदएहि य पुणो पुणो
 कल्लाणगपवरमज्जणविहीए मज्जिए तत्थ कोउयसएहिं बहुविहेहिं कल्लाणगपवरमज्जणा-
 वसाणे पम्हलसुकुमालगंधकासा(ई)यल्लहियंगे अहयसुमहग्घदूसरयणसुसंवुए सरससु-
 रभिगोसीसचंदणाणुलित्तगत्ते सुइमालावण्णगविलेवणे आविद्धमणिसुवण्णे कप्पियहार-
 द्दहारतिसरयपालंवपलंवमाणकडिसुत्तसुकयसोहे पि(ण)णिद्धगेविज्जे अंगुलेज्जगललियं-
 ग(य)ललियकयाभरणे नाणामणिकडगतुडियथंभियभुए अहियरुवसस्सिरीए कुंडलुज्जो-
 इयाणणे मउडदित्तसिरए हारोत्थयसुकयरइयवच्छे पालंवपलंवमाणसुकयपडउत्तरिज्जे
 मुदियापिगलंगुलीए नाणामणिकणगरयणविमलमहरिहनिउणोवियमिसिमिसंतविरइय-
 सुसिलिद्धविसिद्धलट्ठसंठियपसत्थआविद्धवीरवलए, कि बहुणा ? कप्पख्खए चेव सुअ-
 लंकियविभूसिए नरिंदे सकोरंटमल्लदामेणं छत्तेणं धरिज्जमाणेणं (उभओ)चउचामर-
 चालवीइयंगे मंगलजयसद्दकयालोए अणेगगणनायगदंडनायगराईसरतलवरमाडविय-

कोडुंवियमंतिमहामंतिगणगदोवारियअमच्चचेडपीढमद्दनगरनिगमसेट्ठिसेणावइसत्थवा-
हदूयसंधिवालसद्धिं संपरिवुडे धवलमहामेहनिग्गए विव गहगणदिप्पंतरीक्खताराग-
णाण मज्झे ससि व्व पियदंसणे नरवई मज्जणघराओ पडिनिक्खमइ २ ता जेणेव
वाहिरिया उवट्ठाणसाला तेणेव उवागच्छइ २ ता सीहासणवरगए पुरत्थाभिमुहे
सन्निसण्णे । तए णं से सेणिए राया अप्पणो अदूरसामंते उत्तरपुरच्छिमे दिसीभाए
अट्ठ भद्दासणाइं सेयवत्थपच्चत्थुयाइं सिद्धत्थमंगलोवयारकयसंतिक्कम्माइं रयावेइ २ ता
(अप्पणो अदूरसामंते) नाणामणिरयणमंडियं अहियपेच्छणिज्जरुवं महग्घवरपट्टण्णगयं
सण्हवहुभत्तिसयचित्त(ट्ठा)ठाणं ईहामियउसभतुरयनरमगरविहगवालगाकिन्नररुत्त-
रभच्चमरकुंजरवणलयपउमलयभत्तिचित्तं सुखचियवरक्कणगपवरपेरंतदेसभागं अविम-
तरियं जवणियं अंछावेइ २ ता अ(च्छ)त्थरगमउअमसूरगउच्छइयं धवलवत्थप-
च्चत्थुयं विसिट्ठं अंगसुहफासयं सुमउयं धारिणीए देवीए भद्दासणं रयावेइ २ ता
कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! अट्ठंगम-
हानिमित्तसुत्तत्थपाढए विविहसत्थकुसले सुमिणपाढए सद्दावेह २ ता एयमाणत्तियं
खिप्पामेव पच्चप्पिणह । तए णं ते कोडुंवियपुरिसा सेणिएणं रत्ता एवं वुत्ता संमाणा
हट्ठतुट्ठ जाव हियया करयलपरिग्गहिय दसनहं सिरसावत्तं मत्थए अंजलिं कट्ठु एवं
देवो तहत्ति आणाए विणएणं वयणं पडिसुणेंति २ ता सेणियस्स रत्तो अंतियाओ
पडिनिक्खमंति २ ता रायगिहस्स नयरस्स मज्झंमज्झेणं जेणेव सुमिणपाढगगिहाणि
तेणेव उवागच्छंति २ ता सुमिणपाढए सद्दावेति । तए णं ते सुमिणपाढगा सेणि-
यस्स रत्तो कोडुंवियपुरिसेहिं सद्दाविया समाणा हट्ठतुट्ठ जाव हियया ण्हाया अप्पमह-
ग्घाभरणालंक्रियसरीरा हरियालियसिद्धत्थयकयमुद्धाणा सएहिं सएहिं गिहेहिंतो पडि-
निक्खमंति २ ता रायगिहस्स नयरस्स मज्झंमज्झेणं जेणेव सेणियस्स रण्णो भवण-
व(डे)डिंसगदुवारे तेणेव उवागच्छंति २ ता एगयओ मि(ल)लायंति २ ता सेणियस्स
रत्तो भवणवडिंसगदुवारेणं अणुपविसंति २ ता जेणेव वाहिरिया उवट्ठाणसाला
जेणेव सेणिए राया तेणेव उवागच्छति २ ता सेणियं रायं जएणं विजएणं वद्धावेति,
सेणिएणं रत्ता अच्चियवंदियपूडयमाणियसक्कारियसम्माणिया समाणा पत्तेयं २ पुव्वन्न-
त्थेसु भद्दासणेसु निसीयंति । तए णं सेणिए राया जवणियंतरियं धारिणिं देविं ठवेइ
२ ता पुप्फफलपडिपुण्णहत्थे परेणं विणएणं ते सुमिणपाढए एवं वयासी-एवं खलु
देवाणुप्पिया ! धारिणी देवी अज्ज तंसि तारिसगंसि सयणिज्जस्ति जाव महानुमिणं
पात्तिता णं पडिवुद्धा, तं एयस्स णं देवाणुप्पिया ! उरालस्स जाव सत्तिसरीयस्स
महानुमिणस्स के मत्ते कट्ठाणे फलवित्तिविसेसे भविस्सइ ? । तए णं ते सुमिणपाढगा

सेणियस्स रत्तो अंतिए एयमट्ठं सोच्चा निसम्म हट्ठतुट्ठ जाव हियया तं सुमिणं सम्मं ओगिण्हंति २ ता ईहं अणुपविसंति २ ता अन्नमन्नेण सद्धि संचालेंति २ ता तस्स सुमिणस्स लद्धट्ठा गहियट्ठा पुच्छियट्ठा विणिच्छियट्ठा अभिगयट्ठा सेणियस्स रत्तो पुरओ सुमिणसत्थाइं उच्चारमाण्णा (२) एवं वयासी-एवं खलु अम्हं सामी ! सुमिणसत्थंसि वायालीसं सुमिणा तीसं महासुमिणा वावत्तरि सव्वसुमिणा दिट्ठा । तत्थ णं सामी ! अरहंतमायरो वा चक्कवट्ठिमायरो वा अरहंतंसि वा चक्कवट्ठिसि वा गब्भं वक्कममाणंसि एएसिं तीसाए महासुमिणाणं इमे चउद्दस महासुमिणे पासित्ता णं पडिबुज्झंति तंजहा-गयवसहसीहअभिसेयदामससिदिणयरं झयं कुंभं । पउमसरसागरविमाणभवणरयणुच्चय-सिहि च ॥ १ ॥ वासुदेवमायरो वा वासुदेवंसि गब्भं वक्कममाणंसि एएसिं चउद्दसण्हं महासुमिणाणं अन्नयरे सत्त महासुमिणे पासित्ता णं पडिबुज्झंति । वलदेवमायरो वा वलदेवंसि गब्भं वक्कममाणंसि एएसिं चउद्दसण्हं महासुमिणाणं अन्नयरे चत्तारि महासुमिणे पासित्ता णं पडिबुज्झंति । मंडलियमायरो वा मंडलियंसि गब्भं वक्कममाणंसि एएसिं चोद्दसण्हं महासुमिणाणं अन्नयरं एगं महासुमिणं पासित्ता णं पडिबुज्झंति । इमे य(णं) सामी ! धारिणीए देवीए एगे महासुमिणे दिट्ठे । तं उराळे णं सामी ! धारिणीए देवीए सुमिणे दिट्ठे जाव आरोगगतुट्ठिदीहाउक्कल्लणमंगल्लकारए णं सामी ! धारिणीए देवीए सुमिणे दिट्ठे । अत्थलाभो सामी ! सोक्खलाभो सामी ! भोगलाभो सामी ! पुत्तलाभो रज्जलाभो, एवं खलु सामी ! धारिणी देवी नवण्हं मासाणं बहुपडिपुण्णाणं जाव दारगं पयाहि(सि)इ । से वि य णं दारए उम्मुक्कवालभावे विन्नायपरिणयमित्ते जोव्वणगमणुप्पत्ते सूरे वीरे विकंतं वित्थिण्णविउलवलवाहणे रज्जवई राया भविस्सइ अणगारे वा भावियप्पा । तं उराळे णं सामी ! धारिणीए देवीए सुमिणे दिट्ठे जाव आरोगगतुट्ठि जाव दिट्ठे-त्तिकट्ठु भुज्जो २ अणु(वू)वूहेंति । तए णं सेणिए राया तेसिं सुमिणपाढगाणं अंतिए एयमट्ठं सोच्चा निसम्म हट्ठ जाव हियए करयल जाव एवं वयासी-एवमेयं देवाणुप्पिया ! जाव जं णं तुब्भे वयह-त्तिकट्ठु तं सुमिणं सम्मं पडिच्छइ २ ता ते सुमिणपाढए विउलेणं असणपाणखाइमसाइमेणं वत्थगंधमल्लालंकारेण य सक्कारेइ सम्माणेइ सक्कारित्ता सम्माणित्ता विउलं जीवियारिह पीइदाणं दलयइ २ ता पडिविसज्जेइ । तए णं से सेणिए राया सीहासणाओ अब्भुट्ठेइ २ ता जेणेव धारिणी देवी तेणेव उवागच्छइ २ ता धारि(णीदेवीं)णि देवि एवं वयासी-एवं खलु देवाणुप्पिए ! सुमिणसत्थंसि वायालीसं सुमिणा तीस महासुमिणा जाव एगं महासुमिणं जाव भुज्जो २ अणुवूहेइ । तए णं सा धारिणी देवी सेणियस्स रत्तो अंतिए एयमट्ठं सोच्चा निसम्म हट्ठ जाव हियया

तं सुमिणं सम्मं पडिच्छइ २ ता जेणेव सए वासघरे तेणेव उवागच्छइ २ ता ण्हाया
 अप्पमहग्घाभरणांक्रियसरीरा विपुलाइं जाव विहरइ ॥ १२ ॥ तए णं तीसे धारि-
 णीए देवीए दोसु मासेसु वीइक्कंतेसु तइए मासे वट्टमाणे तस्स गव्वमस्स दोहलकाल-
 समयंसि अयमेयाहवे अकालमेहेसु दोहले पाउव्वमवित्था-धन्नाओ णं ताओ अम्म-
 याओ सपुण्णाओ णं ताओ अम्मयाओ कयत्याओ (णं ताओ०) कयपुण्णाओ कय-
 लक्खणाओ कयविहवाओ सुलद्धे णं तारिं माणुस्सए जम्मजीवियफले जाओ णं मेहेसु
 अब्भुग्गएसु अब्भुजएसु अब्भुन्नएसु अब्भुट्ठिएसु सगज्जिएसु सविज्जुएसु सफुत्तिएसु
 सथणिएसु धंतधोयरुप्पपट्ठअंकसंखचंदकुंदसालिपिट्ठरात्तिसमप्पमेसु चिउरहरियालभे-
 यचंपगसणकोरंटसरिस(य)वपउमरयसमप्पमेसु लक्खारससरसरत्तकिंसुयजासुमणरत्त-
 वंधुजीवगजाइहिं गुलयसरसकुंभउरव्वमससरुहिरइंदगोवगसमप्पमेसु वरहिणनीलगु-
 लियासुगचासपिच्छभिगपत्तसासगनीलुप्पलनियरनवत्तिरीसकुसुमनवसदलसमप्पमेसु
 जच्चंजणभिगमेयरिट्ठगभमरावल्लिगवल्लुलियकज्जलसमप्पमेसु फुरंतविज्जुयसगज्जिएसु
 वायवसविपुलगगणचवलपरिसक्किरेसु निम्मलवरवारिधाराप(ग)यलियपयंडमात्तयस-
 माहयसमोत्तरंतउवरिउवरितुरियवासं पवासिएसु धारापहकरनिवायनिव्वावि(य)यं
 मेइणितले हरिय(ग)गणकंचुए पल्लविय पायवगणेसु वल्लिवियाणेसु पसरिएसु उन्नएसु
 सोहग्गमुवागएसु (नगेसु नएसु वा) वेभारगिरिप्पवायतडकडगाविमुक्केसु उज्जरेसु
 तुरियपहावियपल्लोद्वेफेणाउलं सकल्लसं जलं वहंतीसु गिरिनईसु सज्जुणनीवकुडय-
 कंदलसिल्लिधकल्लिएसु उववणेसु मेहरसियहट्ठतुट्ठिचिड्डियहरिमवसपमुक्ककंठकेकारवं
 सुयंतसेसु वरहिणेसु उउवसमयजणियतरुगसहयरिपणच्चिएसु नवसुरभिसिल्लिधकुडय-
 कंदलकलंवगंधद्वणिं सुयंतसेसु उववणेसु परहुयत्तरिभियसंकुलेसु उद्दा(यं)इंतरत्त-
 इंदगोवयथोवयकारुणाविलविएसु उन्न(ओण)यतणमंडिएसु द्दहुरपयंपिएसु सपिंडिय-
 दरियभमरमहुयरिपहकरपरिलित्तमत्तच्छप्पयकुसुमासवलोलमहुरगुंजंतदेसभाएसु उवव-
 णेसु परिसामियचदसूरगहगणपणट्ठनक्खत्ततारगपहे इंदोउहवद्धचिंधपट्ठंसि अंवरतले
 उट्ठीणवलागपंतिसोहंतमेहविन्दे कारंडगचक्कवायकलहंसउस्सुयकरे संपत्ते पाउसंमि
 काले ण्हायाओ कि ते वरपायपत्तनेउरमणिमेहलहाररइयउ(व)चियकडगखुड्डय-
 विचित्तवरवल्लयथंभियभुयाओ कुडलउज्जोवियाणणाओ रयणभूत्तियं(गा)गीओ
 नासानीसासवायवोज्जं चक्खुहरं वण्णफरिससंजुत्तं हयलालापेलवाइरेयं धवलक्कण-
 यखचियंतक्कम्मं आगासफलिहसरिसप्पमं अंसुयं पवरपरिहियाओ दुग्गल्लसुकुमाल-
 उत्तरिजाओ सव्वोउयसुरभिकुसुमपवरमल्लसोहियसिराओ कालागर(पवर)धूवधूवियाओ
 सिरीसमाणवेसाओ सेयणयगंधहत्थिरयणं दुल्लुआओ समाणीओ सकोरंटमल्लदामेणं

छत्तेण धरिज्जमाणेणं चंदप्पभवइरवेसलियविमलदंडसंखकुंददगरयअमयमहियफेण-
 पुंजसन्निगासचउचामरवालवीजियंगीओ सेणिएणं रत्ता सद्धिं हत्थिखंधवरगएणं
 पिट्ठओ (२) समणुगच्छमाणीओ चाउरंगिणीए सेणाए महया हयाणीएणं गयाणीएणं
 रहाणीएणं पायत्ताणीएणं सव्विद्धीए सव्वज्जुईए जाव निग्घोसनाइयरवेणं रायगिहं
 नयरं सिंघाडगति(य)गचउक्कचच्चरचउम्मुहमहापहपहेसु आसित्तसित्तसु(चि)इयसंम-
 जिओवलत्तं जाव सुगंधवरगंधियं गंधवट्ठिभूयं अवलोएमाणीओ नागरजणेणं अभिनं-
 दिज्जमाणीओ गुच्छलयासुक्खगुम्मवत्तिगुच्छओच्छाइयं सुरम्मं वेभारगिरिकडगपाय-
 मूलं सव्वओ समंता आहिडेमाणीओ २ दोहलं वि(णि)णयंति । तं जइ णं अहमवि
 मेहेसु अब्भु(व)ग्गाएसु जाव दोहलं विणिज्जामि ॥१३॥ तए णं सा धारिणी देवी तंसि
 डोहलंसि आविणिज्जमाणंसि असंप(ण्ण)त्तदोहला असंपुण्णदोहला असंमाणियदोहला
 सुक्का भुक्खा निम्मंसा ओलुग्गा ओलुग्गसरीरा पमइलदुब्बला किलंता ओमंथियवयण-
 नयणकमला पंडुइयमुही करयलमलियव्व चंपगमाला नित्तेया दीणविवण्णवयणा जहो-
 चियपुप्फगं वमल्ललंकारहारं अणभिलसमाणी कीडारमणकिरियं च परिहावेमाणी दीणा
 दुम्मणा निराणंदा भूमिगयदिट्ठीया ओहयमणसंकप्पा जाव झिया(य)इ । तए णं तीसे
 धारिणीए देवीए अंगपडियारियाओ अब्भितरियाओ दासचेडियाओ धारिणिं देवि
 ओलुग्गं जाव झियायमाणिं पासंति २ ता एवं वयासी-किन्नं तुमे देवाणुप्पिए ! ओलुग्गा
 ओलुग्गसरीरा जाव झियायसि ?, तए णं सा धारिणी देवी ताहि अंगपडियारियाहिं
 अब्भितरियाहिं दासचेडियाहि(य) एवं वुत्ता समाणी ताओ (दास)-चेडियाओ नो
 आढाइ नो(य) परियाणाइ अणाढायमाणी अपरियाणमाणी तुसिणीया संचिट्ठइ । तए णं
 ताओ अंगपडियारियाओ अब्भितरियाओ दासचे(डी)डियाओ धारिणिं देविं दोच्चं पि
 तच्चं पि एवं वयासी-किन्नं तुमे देवाणुप्पिए ! ओलुग्गा ओलुग्गसरीरा जाव झियायसि ?,
 तए णं सा धारिणी देवी ताहिं अंगपडियारियाहिं अब्भितरियाहिं (य) दासचे(डी)-
 डियाहिं दोच्चं पि तच्चं पि एवं वुत्ता समाणी नो आढाइ नो परियाणाइ अणाढायमाणी
 अपरियाणमाणी तुसिणीया संचिट्ठइ । तए णं ताओ अंगपडियारियाओ अब्भित-
 रियाओ दासचेडियाओ (य)धारिणीए देवीए अणाढाइज्जमाणीओ अपरि(याण)जा-
 णिज्जमाणीओ तहेव संभंताओ समाणीओ धारिणीए देवीए अंतियाओ पडिनिक्खमंति
 २ ता जेणेव सेणिए राया तेणेव उवागच्छंति २ ता करयलपरिग्गाहियं जाव कट्ठु
 जएणं विजएणं वद्धावेंति २ ता एवं वयासी-एवं खलु सामी ! किपि अज्ज धारिणी देवी
 ओलुग्गा ओलुग्गसरीरा जाव अट्ठज्झाणोवगया झियायइ । तए णं से सेणिए राया तासिं
 अंगपडियारियाणं अंतिए एयमट्ठं सोच्चा निसम्म तहेव संभंते समाणे सिग्घं तुरियं

चवल वेइयं जेणेव धारिणी देवी तेणेव उवागच्छइ २ ता धारिणिं देविं ओलुगं ओलु-
 ग्गसरीरं जाव अट्टज्जाणोवगयं झियायमाणं पासइ २ ता एवं वयासी-किन्नं तु(मे)मं
 देवाणुप्पिए ! ओलुग्गा ओलुग्गसरीरा जाव अट्टज्जाणोवगया झियायसि ?, तए णं सा
 धारिणी देवी सेणिएणं रत्ता एवं वुत्ता समाणी नो आढाइ जाव तुत्तिणीया संचिट्ठइ ।
 तए णं से सेणिए राया धारि(णीं)णिं दे(वी)विं दोच्चंपि तच्चंपि एवं वयासी-किन्नं तुमं
 देवाणुप्पिए ! ओलुग्गा जाव झियायसि ?, तए णं सा धारिणी देवी सेणिएणं रत्ता
 दोच्चंपि तच्चंपि एवं वुत्ता समाणी नो आढाइ नो परिजाणाइ तुत्तिणीया संचिट्ठइ । तए
 णं से सेणिए राया धारिणिं देविं सवहसावियं करेइ २ ता एवं वयासी-किं णं तुमं
 देवाणुप्पिए ! अहमेयस्स अट्टस्स अणरिहे सवणयाए ता णं तुमं ममं अयमेयारुवं
 मणोमाणसियं दुक्खं रहस्सीकरेसि ? । तए णं सा धारिणी देवी सेणिएणं रत्ता
 सवहसाविया समाणी सेणियं रायं एवं वयासी-एवं खलु सामी ! मम तस्स उरा-
 लस्स जाव महासुमिणस्स तिण्हं मासाणं बहुपडिपुण्णाणं अयमेयारुवे अकालमेहेसु
 डोहले पाउव्भूए—धन्नाओ णं ताओ अम्मवाओ कयत्थाओ णं ताओ अम्मयाओ
 जाव वेभारगिरिपायमूलं आहिडमाणीओ दोहलं विणिंति, तं जइ णं अहमवि जाव
 दोहलं विणिज्जामि । तए णं हं सामी ! अयमेयारुवंसि अकालदोहलंसि अविणिज्जमाणंसि
 ओलुग्गा जाव अट्टज्जाणोवगया झियायामि । एएणं अहं कारणेणं सामी ! ओलुग्गा
 जाव अट्टज्जाणोवगया झियायामि । तए णं से सेणिए राया धारिणीए देवीए अंतिए
 एयमट्ठं सोच्चा निसम्म धारिणिं देविं एवं वयासी-मा णं तुमं देवाणुप्पिए ! ओलुग्गा
 जाव झियाहि, अहं णं तहा करिस्सामि जहा णं तुव्वं अयमेयारुवस्स अकाल-
 दोहलस्स मणोरहसंपत्ती भविस्सइ-त्तिकट्ठु धारिणिं देविं इट्ठाहि कंताहिं पियाहिं
 मणुत्ताहिं मणामाहिं वग्गूहिं समासासेइ २ ता जेणेव वाहिरिया उवट्ठाणसाला तेणामेव
 उवागच्छइ २ ता सीहासणवरगए पुरत्थाभिमुहे सन्निसण्णे धारिणीए देवीए एयं
 अकालदोहलं वट्ठहिं आएहि य उवाएहि य उप्पत्तियाहि य वेणइयाहि य कम्मि-
 याहि य पा(प)रिणामियाहि य चउव्विहाहिं वुद्धीहिं अणुचितेमाणे २ तस्स दोहलस्स
 आयं वा उवायं वा ठिइं वा उप्पत्तिं वा अविंदमाणे ओहयमणसंकप्पे जाव झियायइ
 ॥ १४ ॥ तयाणंतरं च णं अभए कुमारे ण्हाए सव्वालंकारविभूसिए पायवंदए पहारेत्थ
 गमणाए । तए णं से अभयकुमारे जेणेव सेणिए राया तेणेव उवागच्छइ २ ता सेणियं
 रायं ओहयमणसंकप्पं जाव झियायमाणं पासइ २ ता अयमेयारुवे अ(व्व)ज्जत्थिए
 चित्तिए पत्थिए मणोगए संकप्पे समुप्पज्जित्था-अन्नया(य)ममं सेणिए राया एज्जमाणं
 पासइ पासित्ता आढाइ परिजाणाइ सक्कारेइ सम्माणेइ आलवइ संलवइ अट्ठासणेणं

उवनिमंतेइ मत्थयंसि अग्घाइ । इयाणि ममं सेणिए राया नो आढाइ नो परियाणइ
नो सक्कारेइ नो सम्माणेइ नो इट्ठाहिं कंताहिं पियाहि मणुज्जाहिं ओरालाहिं वग्गूहिं
आलवइ संलवइ नो अद्धासणेणं उवनिमंतेइ नो मत्थयंसि अग्घा(य)इ(य) किपि
ओहयमणसंकप्पे झियायइ । तं भवियव्वं णं एत्थ कारणेणं । तं सेयं खलु(मे) ममं
सेणियं रायं एयमट्ठं पुच्छित्तए । एवं संपेहेइ २ ता जेणामेव सेणिए राया तेणामेव
उवागच्छइ २ ता करयलपरिग्गहियं सिरसावत्तं मत्थए अजलिं कट्ठु जएणं विजएणं
वद्धावेइ २ ता एवं वयासी-तुब्भे णं ताओ ! अन्नया ममं एज्जमाणं पासित्ता आढाह
परिजाणह जाव मत्थयंसि अग्घायह आसणेणं उवनिमंतेह, इयाणि ताओ ! तुब्भे
ममं नो आढाह जाव नो आसणेणं उवनिमंतेह किंपि ओहयमणसंकप्पा जाव
झियायह, तं भवियव्वं ताओ ! एत्थ कारणेणं, तओ तुब्भे म(म)मं ताओ ! एयं कारणं
अग्गूहेमाणा असंकेमाणा अनिण्हवेमाणा अपच्छाएमाणा जहाभूयमवितहमसंदिद्धं
एयमट्ठं आइक्खह । तए णं हं तस्स कारणस्स अंतगमणं गमिस्सामि । तए णं
से सेणिए राया अभएणं कुमारेणं एवं वुत्ते समाणे अभयकुमारं एवं वयासी-एवं
खलु पुत्ता ! तव चुल्लमाउयाए धारिणीए देवीए तस्स गब्भस्स दोसु मासेसु अइक्कंतेसु
तइयमासे वट्ठमाणे दोहलकालसमयंसि अयमेयारूवे दोहले पाउब्भवित्था-धन्नाओ
णं ताओ अम्मयाओ तहेव निरवसेसं भाणियव्वं जाव विणित्ति । तए णं अहं पुत्ता !
धारिणीए देवीए तस्स अकालदोहलस्स वहुहिं आएहि य उवाएहि जाव उप्पत्तिं
अविंदमाणे ओहयमणसंकप्पे जाव झियायामि तुमं आगयंपि न याणामि, तं एएणं
कारणेणं अहं पुत्ता ! ओहयमणसंकप्पे जाव झियामि । तए णं से अभए कुमारे
सेणियस्स रण्णो अंतिए एयमट्ठं सोच्चा निसम्म हट्ठ जाव हियए सेणियं रायं एवं
वयासी-मा'णं तुब्भे ताओ ! ओहयमणसंकप्पा जाव झियायह । अहं णं तहा
करिस्सामि जहा णं मम चुल्लमाउयाए धारिणीए देवीए अयमेयारूवस्स अकालडो-
हलस्स मणोरहसंपत्ती भविस्सइ-त्तिकट्ठु सेणियं रायं ताहि इट्ठाहि कंताहि जाव
समासासेइ । तए णं सेणिए राया अभएणं कुमारेणं एवं वुत्ते समाणे हट्ठुट्ठे
जाव अभयं कुमारं सक्कारेइ सम्माणेइ सक्कारित्ता सम्माणित्ता पडिविसज्जेइ ॥ १५ ॥
तए णं से अभए कुमारे सक्कारिए सम्माणिए पडिविसज्जिए समाणे सेणियस्स रण्णो
अंतियाओ पडिनिक्खमइ २ ता जेणामेव सए भवणे तेणामेव उवागच्छइ २ ता
सीहासणे निसण्णे । तए णं तस्स अभयकुमारस्स अयमेयारूवे अज्झत्थिए जाव
समुप्पज्जित्था-नो खलु सक्का माणुस्सएणं उवाएणं मम चुल्लमाउयाए धारिणीए
देवीए अकालडोहलमणोरहसंपत्तिं करित्तए नन्नत्थ दिव्वेणं उवाएणं । अत्थि णं

मज्झ सोहम्मकप्पवासी पुव्वसंगइए देवे महिद्धिए जाव महासोक्खे । तं सेयं
 खलु मम पोसहसालाए पोसहियस्स वंभयारिस्स उम्मुक्कमणिसुवण्णस्स ववगय-
 मालावण्णगविलेवणस्स निक्खित्तसत्थमुसलस्स एगस्स अवीयस्स दब्भसंथारोवग-
 यस्स अट्ठमभत्तं प(रि)णिण्हित्ता पुव्वसंगइयं देवं मण(त्ति)सीकरेमाणस्स विहरित्तए ।
 तए णं पुव्वसंगइए देवे मम चुल्लमाउयाए धारिणीए देवीए अयमेयारू(वे)वं अकाल-
 मेहेसु डोहलं विणेहिइ । एवं संपेहेइ २ ता जेणेव पोसहसाला तेणामेव उवागच्छइ
 २ ता पोसहसालं पमज्जइ २ ता उच्चारपासवणभूमिं पडिलेहेइ २ ता दब्भसंथारगं
 पडिलेहेइ २ ता दब्भसंथारगं दुरुहइ २ ता अट्ठमभत्तं पणिण्हइ २ ता
 पोसहसालाए पोसहिए वंभयारी जाव पुव्वसंगइयं देवं मणसीकरेमाणे २ चिट्ठइ ।
 तए णं तस्स अभयकुमारस्स अट्ठमभत्ते परिणममाणे पुव्वसंगइयस्स देवस्स आसणं
 चलइ । तए णं पुव्वसंगइए सोहम्मकप्पवासी देवे आसणं चलियं पासइ २ ता
 ओहिं पउंजइ । तए णं तस्स पुव्वसंगइयस्स देवस्स अयमेयारूवे अज्जत्थिए जाव
 समुप्पजित्था-एवं खलु मम पुव्वसंगइए जंबुदीवे २ भारहे वासे दाहिणद्धुभरहे
 रायणिहे नयरे पोसहसालाए पोसहिए अभए नामं कुमारे अट्ठमभत्तं पणिण्हित्ता
 णं मम मणसीकरेमाणे २ चिट्ठइ । तं सेयं खलु मम अभयस्स कुमारस्स अंतिए
 पाउव्ववित्तए । एवं संपेहेइ २ ता उत्तरपुरच्छिमं दिसीभागं अवक्कमइ २ ता
 वेउव्वियसमुग्घाएणं समोहणइ २ ता संखेज्जाइं जोयणाइं दंडं निसिरइ । तंजहा-
 रयणाणं वयराणं वेरुलियाणं लोहियक्खाणं मसारगल्लाणं हंसगव्भाणं पुलगाणं
 सोगंधियाणं जोइरसाणं अंकाणं अंजणाणं रयणाणं जायरूवाणं अंजणपुलगाणं फलि-
 हाणं रिद्धाणं अहावायरे पोग्गले परिसाडेइ २ ता अहासुहुमे पोग्गले परिणिण्हइ २
 ता अभयकुमारमणुकंपमाणे देवे पुव्वभवजणियनेहपीइवहुमाणजायसोर्गे तओ विमा-
 णवरपुंडरीयाओ रयणुत्तमाओ धरणियलगमणतुरियसंजणियगमणपया(रो)रे वाघुणि-
 यविमलकणगपयरगवडिंसगमउडउक्कडाडोवदंसणि(ज्जो)जे अणेगमणिकणगरयणपह-
 करपरिमंडियभत्तिचित्तविणिउत्त(मणुगुण)गमणगजणियहरिसे पेंखोलमाणवरललियकुं-
 डलुज्जलियवयणगुणजणियसोमरूवे उदिओ विव कोमुदीनिसाए सणिच्छरंगारकुज्ज-
 लियमज्झभागत्थे नयणाणं(दो)दे सरयचंदे दिव्वोसहिपज्जलुज्जलियदंसणाभिरा(मो)मे
 उललच्छिसमत्तजायसोहे पड्डगंधुद्धुयाभिरामे मेसरिव नगव(रो)रे विउव्वियविचित्त-
 वेसे दीवसमुद्धानं असंखपरिमाणनामधेज्जाणं मज्झयारेणं वीइवयमा(णो)णे उज्जोयंतो
 पभाए विमलाए जीवलोयं रायणिहं पुरवरं च अभयस्स (य तस्स) पासं ओवयइ
 दिव्वस्वधारी ॥ १६ ॥ तए णं से देवे अंतलिक्खपडिवन्ने दसद्धवणाइं सखि-

खिणियाइं पवरवत्थाइं परिहिए । एक्को ताव एसो गमो । अन्नोऽवि गमो-ताए उक्किट्ठाए तुरियाए चवलाए चंडाए सीहाए उद्धुयाए ज(इ)यणाए छेयाए दिव्वाए देवगईए जेणामेव जंबुदीवे २ भारहे वासे जेणामेव दाहिणद्धभरहे रायगिहे नयरे पोसहसालाए अभए कुमारे तेणामेव उवागच्छइ २ ता अंत(रि)लिक्खपडिवन्ने दसद्धवण्णाइं सखिंखिणियाइं पवरवत्थाइं परिहिए अभयं कुमारं एवं वयासी-अहं णं देवाणुप्पिया । पुव्वसंगइए सोहम्मकप्पवासी देवे महद्धिए जं णं तुमं पोसहसालाए अट्टमभत्तं पणिण्हिता णं ममं मणसीकरेमाणे चिट्ठसि, तं एस णं देवाणुप्पिया ! अहं इहं हव्वमागए । संदिसाहि णं देवाणुप्पिया ! किं करेमि किं दलामि किं पयच्छामि किं वा ते हियइच्छियं ? । तए णं से अभए कुमारे तं पुव्व-संगइयं देवं अंतलिक्खपडिवन्नं पासइ २ ता हट्ठतुट्ठे पोसहं पारेइ २ ता करयल जाव अंजलिं कट्ठु एवं वयासी-एवं खलु देवाणुप्पिया ! मम चुल्लमाउयाए धारिणीए देवीए अयमेयारूवं अकालडोहले पाउब्भूए-धन्नाओ णं ताओ अम्मयाओ तहेव पुव्वगमेणं जाव विणिज्जामि । तं णं तुमं देवाणुप्पिया ! मम चुल्लमाउयाए धारिणीए देवीए अयमेयारूवं अकालडोहलं विणेहि । तए णं से देवे अभएणं कुमारेणं एवं वुत्ते समाणे हट्ठतुट्ठे अभयं कुमारं एवं वयासी-तुमं णं देवाणुप्पिया ! सुनिव्वुयवीसत्थे अच्छाहि, अहं णं तव चुल्लमाउयाए धारिणीए देवीए अयमेयारूवं डोहल विणेमि-त्तिकट्ठु अभयस्स कुमारस्स अंतियाओ पडिनिक्खमइ २ ता उत्तरपुरच्छिमे णं वेभारप-व्वए वेडव्वियसमुग्घाएणं समोहणइ २ ता संखेज्जाइं जोयणाइं दंडं निस्सरइ जाव दोच्चपि वेडव्वियसमुग्घाएणं समोहणइ २ ता खिप्पामेव सगज्जइयं सविज्जुयं सफुसियं (तं) पंचवण्णमेहणिणाओवसोहियं दिव्वं पाउससिरि विउव्वइ २ ता जेणेव अभए कुमारे तेणेव उवागच्छइ २ ता अभयं कुमारं एवं वयासी-एवं खलु देवाणुप्पिया ! मए तव पियट्ठयाए सगज्जिया सफुसिया सविज्जुया दिव्वा पाउससिरी विउव्विया, तं विणेउ णं देवाणुप्पिया ! तव चुल्लमाउया धारिणी देवी अयमेयारूवं अकाल(मेह)डोहलं । तए णं से अभए कुमारे तस्स पुव्वसंगइयस्स सोहम्मकप्पवासिस्स देवस्स अतिए एयमट्ठं सोच्चा निसम्म हट्ठतुट्ठे सयाओ भवणाओ पडिनिक्खमइ २ ता जेणामेव सेणिए राया तेणामेव उवागच्छइ २ ता करयल जाव अंजलिं कट्ठु एवं वयासी-एवं खलु ताओ । मम पुव्वसंगइएण सोहम्मकप्पवासिणा देवेणं खिप्पामेव सगज्जियसविज्जुय- (सफुसिय)पंचवण्णमेहणिणाओवसोभिया दिव्वा पाउससिरी विउव्विया । तं विणेउ णं मम चुल्लमाउया धारिणी देवी अकालदोहलं । तए णं से सेणिए राया अभयस्स कुमारस्स अंतिए एयमट्ठं सोच्चा निसम्म हट्ठतुट्ठ जाव कोडुंवियपुरिसे सद्दावेइ

२ ता एवं वयासी-खिप्पामेव भो देवाणुप्पिया ! रायगिहं नयरं सिंघाडगति-
गचउक्कचच्चर०आसित्तसित्त जाव सुगंधवरगंधियं गंधवट्ठिभूयं करेह य कारवेह य
करित्ता य करावित्ता य मम एयमाणत्तियं पच्चप्पिणह । तए णं ते कोडुंवियपुरिसा
जाव पच्चप्पिणंति । तए णं से सेणिए राया दोच्चं पि कोडुंवियपुरिसे सद्दावेइ २ ता
एवं वयासी-खिप्पामेव भो देवाणुप्पिया ! हयगयरहजोहपवरकलियं चाउरंगिणिं
से(ण्णं)णं सन्नाहेह सेयणयं च गंधहत्थि परिकप्पेह । तेवि तहेव जाव पच्चप्पिणंति ।
तए णं से सेणिए राया जेणेव धारिणी देवी तेणामेव उवागच्छइ २ ता
धारिणिं देवि एवं वयासी-एवं खलु देवाणुप्पिए ! सगजिया जाव पाउससिरी
पाउब्भूया, तं णं तुमं देवाणुप्पिए ! एयं अकालदोहलं विणेहि । तए णं
सा धारिणी देवी सेणिएणं रत्ता एवं वुत्ता समाणी हट्ठतुट्ठा जेणामेव
मज्जणघरे तेणेव उवागच्छइ २ ता मज्जणघरं अणुप्पविसइ २ ता अंतो अंतेउ-
रंसि ण्हाया कि ते वरपायपत्तनेउर जाव आगासफालियसमप्पभं अंसुयं नियत्था
सेयणयं गंधहत्थि दुरूडा समाणी अमयमहियफेणपुंजसन्निगासाहिं सेयचामरवाल-
वीयणीहिं वीइज्जमाणी २ संपत्थिया । तए णं से सेणिए राया ण्हाए सस्सिरीए
हत्थिखंधवरगए सकोरेंटमल्लदामेणं छत्तेणं धरिज्जमाणेणं चउचामराहिं वीइज्जमाणे
धारिणीदेवीं पिट्ठओ अणुगच्छइ । तए णं सा धारिणी देवी सेणिएणं रत्ता हत्थिखं-
धवरगएणं पिट्ठओ २ समणुगम्ममाणमग्गा हयगयरहजोहकलियाए चाउरंगिणीए
सेणाए सद्धिं संपरिवु(ए)डा महया भडचडगरवंदपरिक्खित्ता सव्विह्णीए सव्वज्जुईए
जाव दुंदुभिनिग्घोसनाइयरवेणं रायगिहे नयरे सिंघाडगतिगचउक्कचच्चर जाव महा-
पहेसु नागरजणेणं अभिनंदिज्जमा(णा)णी २ जेणामेव वेभारगिरिपव्वए तेणामेव
उवागच्छइ २ ता वेभारगिरिकडगतडपायमूले आरामेसु य उज्जाणेषु य काणणेषु य
वणेषु य वणसंडेसु य रुक्खेसु य गुच्छेसु य गुम्मेसु य लयासु य वल्लीसु य कंदरासु
य दरीसु य चुण्ठीसु य दहेसु य कच्छेसु य नईसु य संगमेसु य विवरएसु य
अच्छमाणी य पेच्छमाणी य मज्जमाणी य पत्ताणि य पुप्फाणि य फलाणि य
पल्लवाणि य गिण्हमाणी य माणेमाणी य अग्घायमाणी य परिभुंजमाणी य परि-
भाएमाणी य वेभारगिरिपायमूले दोहलं विणेमाणी सव्वओ समंता आहिंइइ ।
तए णं सा धारिणी देवी (तंसि अकालदोहलंसि विणीयंसि सम्माणियदोहला) विणी-
यदोहला संपुण्णदोहला संपन्नदोहला जाया यावि होत्था । तए णं सा धारिणी देवी
सेयणयंगंधहत्थि दुरूडा समाणी सेणिएणं हत्थिखंधवरगएणं पिट्ठओ २ समणुग-
म्ममाणमग्गा हयगय जाव र(हे)वेणं जेणेव रायगिहे नयरे तेणेव उवागच्छइ २ ता

रायगिहं नयरं मज्झमज्झेणं जेणामेव सए भवणे तेणामेव उवागच्छइ २ ता विउलाइं माणुस्सगाइं भोगभोगाइं जाव विहरइ ॥ १७ ॥ तए णं से अभए कुमारे जेणामेव पोसहसाला तेणामेव उवागच्छइ २ ता पुव्वसंगइय देवं सक्कारेइ सम्माणेइ स० २ ता पडिविसजेइ । तए णं से देवे सगज्जियं पंचवण्णमेहोवसोहियं दिव्वं पाउससिरिं पडिसाहरइ २ ता जामेव दिसि पाउब्भूए तामेव दिसिं पडिगए ॥ १८ ॥ तए णं सा धारिणी देवी तंसि अकालदोहलंसि विणीयंसि सम्माणियडोहला तस्स गब्भस्स अणुकंपणट्ठाए जयं चिट्ठइ जयं आस(य)इ जयं सुवइ आहारं पि य णं आहारेमाणी नाइतित्तं नाइकडुयं नाइकसायं नाइअंबिलं नाइमहुरं जं तस्स गब्भस्स हियं मियं पत्थयं देसे य काले य आहारं आहारेमाणी नाइचित्तं नाइसोगं (णाइदेणं)नाइमोहं नाइभयं नाइपरित्तासं ववगयच्चितासोयमोहभयपरित्तासा उउभयमाणसुहेहिं भोयणच्छायणगंधमल्लालंकारेहिं तं गब्भं सुहंसुहेणं परिवहइ ॥ १९ ॥ तए णं सा धारिणी देवी नवण्हं मासाणं बहुपडिपुण्णाणं अट्ठट्ठमाण य राइंदियाणं वीइकंताणं अट्ठरत्तकालसमयंसि सुकुमालपाणिपायं जाव सव्वंगसुंदरं(गं) दारगं पयाया । तए ण ताओ अगपडियारियाओ धारिणिं देविं नवण्हं मासाणं जाव दारगं पयायं पासंति २ ता सिग्घं तुरियं चवलं वेइयं जेणेव सेणिए राया तेणेव उवागच्छंति २ ता सेणियं रायं जएणं विजएणं वद्धावेति २ ता करयलपरिग्गहियं सिरसावत्तं मत्थए अंजलिं कट्ठु एवं वयासी-एवं खलु देवाणुप्पिया ! धारिणी देवी नवण्हं मासाणं जाव दारगं पयाया, तं णं अम्हे देवाणुप्पियाणं पियं निवेएमो पियं भे भवउ । तए ण से सेणिए राया तासि अगपडियारियाणं अंतिए एयमट्ठं सोच्चा निसम्म हट्ठुट्ठ० ताओ अंगपडियारियाओ महुरेहिं नयणेहिं विउलेण य पुप्फगंधमल्लालंकारेणं सक्कारेइ सम्माणेइ स० २ ता मत्थयधोयाओ करेइ पुत्ताणुपुत्तियं वित्तिं कप्पेइ २ ता पडिविसजेइ । तए णं से सेणिए राया (पच्चूसकालसमयंसि) कोडुंवियपुरिसे सहावेइ २ ता एवं वयासी-खिप्पामेव भो देवाणुप्पिया ! रायगिहं नयरं आसिय जाव परिगीयं करेह २ ता चारगपरिसोहणं करेह २ ता माणुम्माणवद्धणं करेह २ ता एयमाणत्तियं पच्चप्पिणह जाव पच्चप्पिणंति । तए णं से सेणिए राया अट्ठारससेणिप्पसेणीओ सहावेइ २ ता एवं वयासी-गच्छह णं तुब्भे देवाणुप्पिया ! रायगिहे नयरे अब्भितर-बाहिरिए उस्सुकं उक्करं अभडप्पवेसं अ(डं)दंडिमकुदंडिमं अधरिमं आधारणिज्जं अणु-द्धुयमुइंगं अमिलायमल्लदामं गणियावरनाडइज्जकलियं अणैगतालायराणुचरियं पमु-इयपक्कीलियाभिरामं जहारिहं ठिइवडियं दसदिवसियं करेह २ ता एयमाणत्तियं पच्च-प्पिणह तेवि करेति (२) तहेव पच्चप्पिणंति । तए णं से सेणिए राया बाहिरियाए

उवट्ठाणसालाए सीहासणवरगए पुरत्थाभिमुहे सन्निसण्णे स(य)इएहि य साहस्सिएहि य सयसाहस्सिएहि य जाए(हिं)हिं य दाएहि य भाएहि य दलयमाणे २ पडिच्छेमाणे २ एवं च णं विहरइ । तए णं तस्स अम्मापियरो पढमे दिवसे जायकम्मं करेति २ ता विइयदिवसे जागरियं करेति २ ता तइए दिवसे चंदसूरदंसणियं करेति २ ता एवामेव निव्वत्ते असुइजायकम्मकरणे संपत्ते वारसाहदिवसे विपुलं असणं पाणं खाइमं साइमं उवक्खडावेति २ ता मित्तनाइनियगसयणसंवंधिपरिजणं वलं च वहवे गणनायगदंड-
नायग जाव आमंतेति तओ पच्छा ण्हाया सव्वालंकारविभूसिया महइमहालयंसि भोयणमंडवंसि तं विपुलं असणं पाण खाइमं साइमं मित्तनाइ० गणनायग जाव सद्धिं आसाएमाणा विसाएमाणा परिभाएमाणा परिभुंजेमाणा एवं च णं विहरंति जिमिय-
भुत्तुत्तरागयावि य णं समाणा आयंता चोक्खा परमसुइभूया तं मित्तनाइनियगसयण-
संवंधिपरियणं वलं च वहवे गणनायग जाव विपुलेणं पुप्फवत्थगंधमल्लालंकारेणं सक्का-
रंति सम्माणेति स० २ ता एवं वयासी-जम्हा णं अम्हं इमस्स दारगस्स गव्भत्थस्स चेव समाणस्स अकालमेहेसु डोहले पाउवभूए तं होउ णं अम्हं दारए मेहे नामेणं मे(हकुमारे)हे । तस्स दारगस्स अम्मापियरो अयमेयाह्वं गोणं गुणनिप्फणं नामधेज्जं करेति मेहेइ । तए णं से मेहे कुमारे पंचधाईपरिगगहिए तंजहा-खीरधाईए मंडण-
धाईए मज्जणधाईए कीलावणधाईए अंकधाईए अन्नाहि य वहूहि खुजाहिं चिलाइयाहिं वामणिवडभिवव्वरिवउसिजोणि(याहिं)यपल्हवियईसिणि(य)धोरु(णि)गिणिलासियल-
उसियदमिलिसिंहलिआरविपुलिंदिपक्कणिवहलिमुसुंडिसवरिपारसीहिं नानादेसीहिं विदे-
सपरिमंडियाहिं इंगियचितियपत्थियवियाणियाहि सदेसनेवत्थगहियवेसाहिं निउण-
कुसलाहि विणीयाहि चेडियाचक्कवालवरिसधरकंचुइज्जमहयरगवंदपरिक्खत्ते हत्थाओ हत्थं सा(सं)हरिज्जमाणे अंकाओ अंक्रं परिभुज्जमाणे परिगिज्जमाणे उवला(चा)लिज्जमाणे रम्मंसि मणिकोट्टिमतलंसि परिमिज्जमाणे २ निव्वायनिव्वाघायंसि गिरिकंदरमल्लीणेव चंपगपायवे सुहंसुहेणं वड्डइ । तए णं तस्स मेहस्स कुमारस्स अम्मापियरो अणुपुव्वेगं नामकरणं च पजेमणगं च एवं चंकमणगं च चोलोवणयं च सहया २ इट्ठीसक्कारसमुदणं करिंसु । तए णं तं मेहं कुमारं अम्मापियरो साइरेगट्ठवासजायगं चेव गव्भट्ठमे वासे सोहणंसि तिहिकरणमुहुत्तंसि कलायरियस्स उवणेंति । तए णं से कलायरिए मेहं कुमारं लेहाइयाओ गणियप्पहाणाओ सउणरुयपज्जवसाणाओ वावत्तरिं कलाओ सुत्तओ य अत्थओ य करणओ य सेहावेइ सिक्खावेइ तंजहा-लेहं गणियं रुवं नट्टं गीयं वाइयं सरगयं पोक्खरगयं समतालं जूयं जणवायं पासयं अट्ठावयं पोरेकचं दगमट्ठियं अन्नविहि पाणविहिं वत्थविहिं विलेवणविहिं सयणविहिं

अज्जं पहेलियं मागहियं गाहं गीइयं सिलोयं हिरण्णजुत्तिं सुवण्णजुत्तिं चुण्णजुत्तिं आभर-
णविहिं तरुणीपडिकम्मं इत्थिलक्खणं पुरिसलक्खणं हयलक्खणं गयलक्खणं गोणल-
क्खणं कुकुडलक्खणं छत्तलक्खणं दंडलक्खणं असिलक्खणं मणिलक्खणं का(ग)गि-
णिलक्खणं वत्थुविज्जं खंधारमाणं नगरमाणं वूहं पडिवूहं चारं पडिचारं चक्कवूहं गरुलवूहं
सगडवूहं जुद्धं निजुद्धं जुद्धाइजुद्धं लट्ठिजुद्धं मुट्ठिजुद्धं बाहुजुद्धं लयाजुद्धं ईसत्थं
छरुप्पवायं धणुव्वेयं हिरण्णपागं सुवण्णपागं सुत्तखेडं वट्ठखेडं नालियाखेडं पत्तच्छेज्जं
कड(ग)च्छेज्जं सज्जीवं निज्जीवं सउणस्यं ति ॥ २० ॥ तए णं से कलायरिए मेहं
कुमारं लेहाइयाओ गणियप्पहाणाओ सउणस्यपज्जवसाणाओ वावत्तरिं कलाओ सुत्तओ
य अत्थओ य करणओ य सेहावेइ सिक्खावेइ सेहावित्ता सिक्खावित्ता अम्मापिऊणं
उवणेइ । तए णं मेहस्स कुमारस्स अम्मापियरो तं कलायरियं महुरेहि वयणेहिं
विउलेणं वत्थगंधमल्लालंकारेणं सक्कारेति सम्माणेति स० २ ता विउलं जीवियारिहं
पीइदाणं दलयंति २ ता पडिविसज्जेति ॥ २१ ॥ तए णं से मेहे कुमारं वावत्तरिकला-
पंडिए नवंगसुत्तपडिवोहिए अट्टारसविहिप्पगारदेसीभासाविसारए गी(इरई)यरइय-
गंधव्वनट्ठकुसले हयजोही गयजोही रहजोही बाहुजोही बाहुप्पमदी अलंभोगसमत्थे
साहसिए वियालचारी जाए यावि होत्था ॥ २२ ॥ तए णं तस्स मेहकुमारस्स अम्मापियरो
मेहं कुमारं वावत्तरिकलापंडियं जाव वियालचारिं जायं पासंति २ ता अट्ठ पासाय-
वडिसए का(क)रेति अब्भुग्गयमूसियपहसिए विव मणिकणगरयणभत्तिचित्ते वाउडुय-
विजयवेज्जंतीपडागाछत्ताइच्छत्तकलिए तुंगे गगणतलमभिलंघमाणसिहरे जालंतर-
रयणपंजरुम्मिद्धि(य)एव्व मणिकणगथूभियाए वियसियसयपत्तपुंडरीए तिलयरयण-
द्ध(य)चंदच्चिए नानामणिमयदामालंकिए अतो वहिं च सण्हे तवणिज्जरुइलवालुयापत्थरे
सुहफासे सस्सिरीयरूवे पासाईए जाव पडिरूवे । एगं च णं महं भवणं कारेति अणेग-
खंभसयसन्निविट्ठं लीलट्ठियसालभंजियागं अब्भुग्गयसुकयवइरवेइयातोरणवररइयसा-
लभंजियासुसिलिट्ठविसिट्ठलट्ठसंठियपसत्थवेरुलियखंभनाणामणिकणगरयणखच्चियउ-
ज्जलं बहुसमसुविभत्तानिचियरमणिज्जभूमिभागं ईहामिय जाव भत्तिचित्तं खंभुग्गयवय-
रवेइयापरिगयाभिरामं विज्जाहरजमलजुयलजंतजुत्तंपिव अच्चीसहस्समालणीयं रुवग-
सहस्सकलियं भिसमाणं भिब्भिसमाणं चक्खुल्लोयणलेसं सुहफासं सस्सिरीयरूवं कंच
णमणिरयणथूभियागं नाणाविहपंचवण्णवंटापडागपरिमंडियग्गसिहरं धवलमि(म)-
रीचिकवयं विणिम्मुयंतं लाउल्लोइयमहियं जाव गंधवट्ठिभूयं पासाईयं दरिसणिज्जं अभि-
रूवं पडिरूवं ॥ २३ ॥ तए णं तस्स मेहस्स कुमारस्स अम्मापियरो मेहं कुमारं सोह-
णंसि तिहिकरणनक्खत्तमुहुत्तंसि सरिसियाणं सरि(स)व्वयाणं सरि(स)त्तयाणं सरिस-

लावण्णरूवजोव्वणगुणोववेयाणं सरिसएहितो रायकुलेहिंतो आणि(अ)त्तियाणं पसाह-
णट्ठंगअविहववहुओवयणमंगलसुजंपिएहिं अट्ठहिं रायवरकन्नाहिं सद्धिं एगदिवसेणं
पाणिं गिण्हाविसु । तए णं तस्स मेहस्स अम्मापियरो इमं एयास्वं पीइदाणं दलयंति-
अट्ठ हिरण्णकोडीओ अट्ठ सुवण्णकोडीओ गाहाणुसारेण भा(वि)णियव्व जाव पेसणकारि-
याओ अन्नं च विपुलं धणक्कणगरयणमणिमोत्तियसंखसिलप्पवालरत्तरयणसंतसारसाव-
एज्जं अलाहि जाव आसत्तमाओ कुलवंसाओ पक्कमं दाउं पक्कमं भोत्तुं पक्कमं परि-
भाएउं । तए णं से मेहे कुमारे एगमेगाए भारियाए एगमेगं हिरण्णकोडिं दलयइ
एगमेगं सुवण्णकोडिं दलयइ जाव एगमेगं पेसणकारिं दलयइ अन्नं च विउलं धण-
क्कणग जाव परिभाएउं दलयइ । तए णं से मेहे कुमारे उप्पि पासायवरगए फुट्टमा-
णेहिं मुइंगमत्थएहिं वरतरुणिसंपउत्तेहि वत्तीसइवट्ठएहिं नाडएहिं उवगिज्जमाणे २
उवलालिज्जमाणे २ सद्दफरिसरसरूवगंधविउले माणुस्सए कामभोगे पच्चणुभवमाणे
विहरइ ॥ २४ ॥ तेणं कालेणं तेणं समएणं समणे भगवं महावीरे पुव्वाणुपुव्वि
चरमाणे गामाणुगामं दूइज्जमाणे सुहंसुहेणं विहरमाणे जेणामेव रायगिहे नयरे
गुणसिलए उज्जाणे जाव विहरइ । तए णं (से)रायगिहे नयरे सिंघाडगतिगचउक्कचच्चर-
महया बहुजणसद्देइ वा जाव बहवे उग्गा भोगा जाव रायगिहस्स नयरस्स
मज्झंमज्झेणं एगदिसिं एगाभिमुहा निग्गच्छंति, इमं च णं मेहे कुमारे उप्पि
पासायवरगए फुट्टमाणेहिं मुयंगमत्थएहिं जाव माणुस्सए कामभोगे भुंजमाणे
रायमग्गं च आलोएमाणे २ एवं च णं विहरइ । तए णं (से)मेहे कुमारे ते बहवे उग्गे
भोगे जाव एगदिसाभिमुहे निग्गच्छमाणे पासइ २ ता कंचुइज्जपुरिसं सद्दावेइ २
ता एवं वयासी-किन्नं भो देवाणुप्पिया ! अज्ज रायगिहे नयरे इंदमहेइ वा
खंदमहेइ वा एवं रुद्धसिववेसमणनागजक्खभूयनईतलायस्क्खपव्वयउज्जाणगिरिजत्ताइ
वा जओ णं बहवे उग्गा भोगा जाव एगदिसिं एगाभिमुहा निग्गच्छंति । तए णं
से कंचुइज्जपुरिसे समणस्स भगवओ महावीरस्स गहियागमणपवित्तीए मेहं कुमारं
एवं वयासी-नो खलु देवाणुप्पिया ! अज्ज रायगिहे नयरे इंदमहेइ वा जाव
गिरिजत्ताइ वा जं णं एए उग्गा जाव एगदिसिं एगाभिमुहा निग्गच्छंति, एवं
खलु देवाणुप्पिया ! समणे भगवं महावीरे आइगरे तित्थगरे इहमागए इह
संपत्ते इह समोसढे इह चेव रायगिहे नयरे गुणसिलए उज्जाणे अहापडिरुवं जाव
विहरइ ॥ २५ ॥ तए ण से मेहे कुमारे कंचुइज्जपुरिसस्स अतिए एयमट्ठं सोच्चा
निसम्म हट्ठतुट्ठे कोडुंवियपुरिसे सद्दावेइ २ ता एवं वयासी-खिप्पामेव भो देवाणु-
प्पिया ! चाउग्घटं आसरहं जुत्तामेव उवट्ठवेह (तहत्ति) जाव उवणेंति । तए णं से

मेहे ण्हाए सव्वालंकारविभूसिए चाउग्घंटं आसरहं दुरुढे समणे सकोरंटमल्लदामेणं
छत्तेणं धरिज्जमाणेणं महया भडचडगरविंदपरियालसंपरिवुडे रायगिहस्स नयरस्स
मज्झंमज्झेणं निग्गच्छइ २ ता जेणामेव गुणसिलए उज्जाणे तेणामेव उवागच्छइ
२ ता समणस्स भगवओ महावीरस्स छत्ताइच्छत्तं पडागाइपडागं विज्जाहरचारणे
जंभए य देवे ओवयमाणे उप्पयमाणे पासइ २ ता चाउग्घंटाओ आसरहाओ
पच्चोरुहइ २ ता समणं भगवं महावीरं पंचविहेणं अभिगमेणं अभिगच्छइ
तंजहा—सचित्ताणं दव्वाणं विउसरण्याए, अचित्ताणं दव्वाणं अविउसरण्याए,
एगसाडियं उत्तरासंगकरणेणं, चक्खुप्फासे अंजलिपग्गहेणं, मणसो एगत्तीकरणेणं ।
जेणामेव समणे भगवं महावीरे तेणामेव उवागच्छइ २ ता समणं भगवं
महावीरं तिक्खुत्तो आयाहिणं पयाहिणं करेइ २ ता वंदइ नमंसइ वं० २ ता
समणस्स भगवओ महावीरस्स नच्चासन्ने नाइदूरे सुस्सूसमाणे नमंसमाणे पं(अं)-
जलि(य)उडे अभिमुहे विणएणं पज्जुवासइ । तए णं समणे भगवं महावीरे मेहस्स
कुमारस्स तीसे य महइमहालियाए (महच्च)परिसाए मज्झगए विचित्तं धम्ममाइ-
क्खइ जहा जीवा वज्झंति मुच्चंति जह य संकिलिस्संति, धम्मकहा भाणियव्वा
जाव परिसा पडिगया ॥ २६ ॥ तए णं से मेहे कुमारे समणस्स भगवओ महा-
वीरस्स अंतिए धम्मं सोच्चा निसम्म हट्टतुट्ठे समणं भगवं महावीरं तिक्खुत्तो आया-
हिणं पयाहिणं करेइ २ ता वंदइ नमंसइ वं० २ ता एवं वयासी—सद्दहामि णं
भंते ! निग्गंथं पावयणं एवं पत्तियामि णं रोएमि णं अब्भुट्ठेमि णं भंते ! निग्गंथं
पावयणं, एवमेयं भंते ! तहमेयं अवितहमेयं इच्छियमेयं पडिच्छियमेयं भते !
इच्छियपडिच्छियमेयं भंते ! से जहेव तं तुब्भे वयह जं नवरं देवाणुप्पिया ! अम्मा-
पियरो आपुच्छामि तओ पच्छा मुंडे भवित्ता णं पव्वइस्सामि । अहासुहं देवाणुप्पिया !
मा पडिवंध करेह । तए णं से मेहे कुमारे समणं भगवं महावीरं वंदइ नमंसइ वं० २
ता जेणामेव चाउग्घंटे आसरहे तेणामेव उवागच्छइ २ ता चाउग्घंटं आसरहं दुरुहइ
२ ता महया भडचडगरपहकरेणं रायगिहस्स नगरस्स मज्झंमज्झेणं जेणामेव सए
भवणे तेणामेव उवागच्छइ २ ता चाउग्घंटाओ आसरहाओ पच्चोरुहइ २ ता जेणामेव
अम्मापियरो तेणामेव उवागच्छइ २ ता अम्मापिऊणं पायवडणं करेइ २ ता एवं
वयासी—एवं खलु अम्मयाओ ! मए समणस्स भगवओ महावीरस्स अतिए धम्मे
निसंते से वि य मे धम्मे इच्छिए पडिच्छिए अभिरुइए । तए णं तस्स मेहस्स अम्मा-
पियरो एवं वयासी—धन्नोसि तुमं जाया ! संपुण्णोसि० कयत्थोसि० कयलक्खणोसि
तुमं जाया ! जन्नं तुमे समणस्स भगवओ महावीरस्स अंतिए धम्मे निसंते, से वि

य ते धम्मे इच्छिए पडिच्छिए अभिस्सिए । तए णं से मेहे कुमारे अम्मापियरो दोच्चंपि तच्चंपि एवं वयासी-एवं खलु अम्मयाओ । मए समणस्स भगवओ महावीरस्स अंतिए धम्मे निसंते, से वि य मे धम्मे इच्छिए पडिच्छिए अभिस्सिए, तं इच्छामि णं अम्मयाओ । तुम्मेहिं अब्भणुज्जाए समाणे समणस्स भगवओ महावीरस्स अंतिए मुंडे भवित्ता णं अगाराओ अणगारियं पव्वइत्तए । तए णं सा धारिणी देवी तं अणिट्ठं अकंतं अप्पियं अमणुजं अमणामं असुयपुव्वं फरुसं गिरं सोच्चा निसम्म इमेणं एयारुवेणं मणोमाणसिएणं महया पुत्तदुक्खेणं अभिभूया समाणी सेयागयरोमकूवपगलंतविलीणगाया सोयभरपवेवियंगी नित्तेया दीणविमणवयणा करयलमलियव्व कमलमाला तक्खणओलुगगदुव्वलसरीरा लावण्णसुन्ननिच्छायगयसिरीया पसिडिलभूसणपडंतखुम्मियसंचुणियधवलवलयपव्वभट्टउत्तरिज्जा सूमालविकिण्णकेसहत्था मुच्छावसनट्टचेयगरुई परसुनियत्तव्व चंपगलया निव्वत्तम(हिमव्व)हे व इंदलट्ठी विमुक्कसधिवंधणा कोट्ठिमतलंसि सव्वंगेहिं धसत्ति पडिया । तए णं सा धारिणी देवी ससंभमोवत्तियाए तुरियं कंचगभिंंगारमुहविणिग्गयसीयलजलविमलधाराए परिसिंचमाणा निव्वावियगायलट्ठी उक्खेवणतालविट्ठीयणगजणियवाएणं सफुसिएणं अंतैउरपरियणेणं आसासिया समाणी मुत्तावलिसन्निगासपवडंतअंसुधाराहि सिंचमाणी पओहरे कल्लणविमणदीणा रोयमाणी कंदमाणी तिप्पमाणी सोयमाणी विलवमाणी मेहं कुमारं एवं वयासी-तुमं सि णं जाया ! अम्हं एगे पुत्ते इट्ठे कंते पिए मणुज्जे मणामे थेज्जे वेसासिए सम्मए बहुमए अणुमए भंडकरंडगसमाणे रयणे रयणभूए जीवियउस्सासए हिययाणंदजणणे उंवरपुप्फं पिव दुल्लहे सवणयाए किमंग पुण पासणयाए, नो खलु जाया ! अम्हे इच्छामो खणमवि विप्पओगं सहित्तए, तं भुंजाहि ताव जाया ! विपुले माणुस्सए कामभोगे जाव ताव वयं जीवामो, तओ पच्छा अम्हेहिं कालगएहि परिणयवए वड्डियकुलवंसतंतुक्कज्जमि निरावयक्खे समणस्स भगवओ महावीरस्स अंतिए मुंडे भवित्ता अगाराओ अणगारियं पव्वइस्ससि ॥ २७ ॥ तए णं से मेहे कुमारे अम्मापिऊहिं एवं पुत्ते समाणे अम्मापियरो एवं वयासी-तहेव णं तं अ(म्मो !)म्मताओ ! जहेव णं तुम्हे ममं एवं वयह-तुमं सि णं जाया ! अम्हं एगे पुत्ते तं चेव जाव निरावयक्खे समणस्स भगवओ महावीरस्स जाव पव्वइस्ससि, एवं खलु अम्मयाओ ! माणुस्सए भवे अधुवे अणियए असासए वसणसउवद्वाभिभूए विज्जुलयाचंचले अणिच्चे जलवुव्वुयसमाणे कुसग्गजलविंदुसन्निमे संव्वभरागसरिसे सुविणदंसणोवमे सडणपडणविदंसणधम्मे पच्छा पुर च णं अवस्सविप्पजहणिज्जे, से के णं जाणइ अम्मयाओ ! के पुव्वि गमणाए के पच्छा गमणाए ?

तं इच्छामि णं अम्मयाओ ! तुब्भेहिं अब्भणुजाए समाणे समणस्स भगवओ महा-
वीरस्स जाव पव्वइत्तए । तए णं तं मेहं कुमारं अम्मापियरो एवं वयासी-इमाओ ते
जाया ! सरिसियाओ सरि(स)त्तयाओ सरि(स)व्वयाओ सरिसलावण्णरुवजोव्वणगु-
णोववेयाओ सरिसेहितो रायकुलेहिंतो आणियल्लियाओ भारियाओ, तं भुंजाहि णं
जाया ! एयाहिं सद्धिं विउळे माणुस्सए कामभोगे, तओ पच्छा भुत्तभोगे समणस्स
भगवओ महावीरस्स जाव पव्वइस्ससि । तए णं से मेहे कुमारे अम्मापियरं एवं
वयासी-तहेव णं अम्मयाओ ! जं णं तुब्भे ममं एवं वयह-इमाओ ते जाया !
सरिसियाओ जाव पव्वइस्ससि, एवं खलु अम्मयाओ ! माणुस्सगा कामभोगा असुई
असासया वंतासवा पित्तासवा खेलासवा सुक्कासवा सोणियासवा दुस्ससासनीसा(स-
वा)सा दुरु(य)वमुत्तपुरीसपूयवहुपडिपुण्णा उच्चारपासवणखेलजल्लसिंघाणगवंतपित्तसु-
क्कसोणियसंभवा अधुवा अणि(इ)यया असासया सडणपडणविद्धंसणधम्मा पच्छा पुरं
च णं अवस्सविप्पजहणिज्जा, से के णं अम्मयाओ ! जाण(न्ति)इ के पुव्विं गमणाए के
पच्छा गमणाए ? त इच्छामि णं अम्मयाओ ! जाव पव्वइत्तए । तए णं तं मेहं कुमारं
अम्मापियरो एवं वयासी-इमे(य) ते जाया ! अज्जयपज्जयपिउपज्जयागए सुबहु हिरण्णे
य सुवण्णे य कंसे य दूसे य मणिमोत्ति(ए य)यसंखसिलप्पवालरत्तरयणसंतसारसाव-
एज्जे य अलाहि जाव आसत्तमाओ कुलवंसाओ पगामं दाउं पगामं भोत्तुं पगामं परि-
भाएउं, तं अणुहोहि ताव (जाव) जाया ! विपुलं माणुस्सगं इद्धिमक्कारसमुदयं, तओ
पच्छा अणुभूयकल्लणे समणस्स भगवओ महावीरस्स अंतिए जाव पव्वइस्ससि । तए
णं से मेहे कुमारे अम्मापियरं एवं वयासी-तहेव णं अम्मयाओ ! जं णं तं वयह-
इमे ते जाया ! अज्जगपज्जगपिउपज्जयागए जाव तओ पच्छा अणुभूयकल्लणे जाव
पव्वइस्ससि, एवं खलु अम्मयाओ ! हिरण्णे य सुवण्णे य जाव सावएज्जे अग्गिसा-
हिए चोरसाहिए रायसाहिए दाइयसाहिए मच्चुसाहिए अग्गिसामन्ने जाव मच्चुसामन्ने
सडणपडणविद्धंसणधम्मे पच्छा पुर च णं अवस्सविप्पजहणिज्जे, से के णं
जाणइ अम्मयाओ ! के पुव्विं जाव गमणाए ? तं इच्छामि णं जाव पव्वइत्तए ।
तए णं तस्स मेहस्स कुमारस्स अम्मापियरो जाहे नो संचाइंति मेहं कुमारं
वहूहि विसयाणुलोमाहिं आघवणाहि य पन्नवणाहि य सन्नवणाहि य विन्नवणाहि य
आघवित्तए वा पन्नवित्तए वा सन्नवित्तए वा विन्नवित्तए वा ताहे विसयपडिकूलाहि
संजमभउव्वेयकारियाहि पन्नवणाहि पन्नवेमाणा एवं वयासी-एस णं जाया !
निग्गंथे पावयणे सच्चे अणुत्तरे केवलिए पडिपुण्णे नेयाउए ससुद्धे सल्लगतणे सिद्धि-
मग्गे मुत्तिमग्गे निज्जाणमग्गे निव्वाणमग्गे सव्वदुक्खप्पहीणमग्गे अहीव एगंतदि-

द्वीए खुरो इव एगंतधाराए लोहमया इव जवा नायैयव्वा बालुयायवळे इव निर-
 रसाए गंगा इव महानई पडिमोयनमणाए गहाममुदो इव भुवाणिं दुनरे निवगं चंक्र-
 मियव्वं गरुअ लंवेयव्वं अभिभारव्वयं (सं)चरियव्वं । नो (ये)गल्ल कपट जाया ।
 समणाणं निगंथाणं आत्ताकम्मिए वा उदेसिए वा कीयगटे वा ठणियए वा रउयए
 वा दुव्विभक्खभक्ते वा कंतारभक्ते वा बह्ळिगभक्ते वा गिल्लागभक्ते वा गृध्भोयणे
 वा कंदभोयणे वा फलभोयणे वा व्रीथभोयणे वा हारियभोयणे वा भोतए वा पायए
 वा । तुमं च णं जाया । सुहसमुच्चिए नो चं व णं दुहसमुच्चिए नालं सीयं नालं उण्हं
 नालं खुह नालं पिवासं नालं वाडयपित्तिर्यानिभिययत्तिरायविनिहं रोगायंते उतावए
 गामकंटए वावीसं पगीसहोवसग्गे उदिण्णे सम्मं अहियासितए । भुंजाहि ताव जाया ।
 माणुस्मए कामभोगे, तओ पच्छा भुत्तभोगी समणस्स भगवओ महावीरस्स जाव
 पव्वडस्सत्ति । तए णं से मेहे कुमारे अम्मापिऊहिं एवं वुत्ते तमाणे अम्मापियरं एवं
 वयासी-तहेव णं तं अम्मयाओ । ज णं तुव्वे ममं एवं वयह-एग णं जाया । निगंथे
 पावयणे सच्चे अणुत्तरे पुणरवि तं चेव जाव तओ पच्छा भुत्तभोगी समणस्स भगवओ
 महावीरस्स जाव पव्वडस्सत्ति, एवं खलु अम्मयाओ । निगंथे पावयणे की(वा)वाणं
 कायरानं कापुरिसाणं इहलोगपडिबद्धाणं परलोगनिगिपवानाणं दुरणुचरे पाययजगस्स
 नो चेव णं धीरस्स निच्छियस्स ववसियस्स एत्थ कि दुक्कर करणयाए ? तं इच्छामि णं
 अम्मयाओ । तुव्वेहि अवभणुजाए समाणे समणस्स भगवओ महावीरस्स जाव पव्व-
 इत्तए ॥ २८ ॥ तए णं तं मेहं कुमार अम्मापियरो जाहे नो सचाइति बहूहि विसया-
 णुलोमाहि य विसयपडिकूलाहि य आघवणाहि य पन्नवणाहि य सन्नवणाहि य विन्नव-
 णाहि य आववित्तए वा पन्नवित्तए वा सन्नवित्तए वा विन्नवित्तए वा ताहे अक्का(मए)-
 माइं चेव मेह कुमारं एवं वयासी-इच्छामो ताव जाया । एगदिवसमवि ते रायसिरिं
 पासित्तए । तए णं से मेहे कुमारे अम्मापियरमणुवत्तमाणे तुल्लिणीए सच्चिट्ठइ । तए
 णं से सेणिए राया कोडुंवियपुरिसे सद्देवेइ २ ता एवं वयासी-खिप्पामेव भो देवा-
 णुप्पिया ! मेहस्स कुमारस्स महत्तं महग्घं महरिहं विउलं रायाभिसेय उवट्टवेह ।
 तए णं ते कोडुंवियपुरिसा जाव तेवि तहेव उवट्टवेति । तए णं से सेणिए राया
 बहूहि गणनायगदडनायगेहि य जाव संपरिवुडे मेहं कुमारं अट्टसएणं सोवणिण्याणं
 कलसाणं एवं रूपमयाणं कलसाणं सुवण्णरूपमयाणं कलसाणं मणिमयाणं कलसाणं
 सुवण्णमणिमयाणं कलसाणं रूपमणिमयाणं कलसाणं सुवण्णरूपमणिमयाणं कलसाणं
 भोमेजाणं कलसाणं सव्वोदएहि सव्वमट्ठियाहिं सव्वपुप्फेहि सव्वगंधेहि सव्वमल्लेहिं
 सव्वोसहीहि य सिद्धत्थएहि य सव्विद्धीए सव्वजुईए सव्ववलेणं जाव दुंदुभिनिग्घो-

सणाइयरवेणं महया २ रायाभिसेएणं अभिसिंचइ २ ता करयल जाव कट्टु एवं वयासी-जय २ नंदा ! जय २ भदा ! जय-नंदा ! भदं ते अजियं जि(णे)णाहि जियं पालयाहि जियमज्जे वसाहि अजियं जिणेहि सत्तुपक्खं जियं च पालेहि मित्तपक्खं जाव भरहो इव मणुयागं रायगिहस्स नगरस्स अन्नसिं च वहूणं जामागरनगर जाव सन्निवेसाणं आहेवच्चं जाव विहराहि तिकट्टु जयजयसदं पउंजंति । तए णं से मेहे राया जाए महया जाव विहरइ । तए णं तस्स मेहस्स रत्तो अम्मापियरो एवं वयासी-भण जाया ! किं दलयामो कि पयच्छामो कि वा ते हियइच्छिए सामत्थे(मंते) ? तए णं से मेहे राया अम्मापियरो एवं वयासी-इच्छामि णं अम्मयाओ ! कुत्तियावणाओ रयहरणं पडिग्ग(हगं)हं च (आणियं) उवणेह कासवयं च सदा(विउं)वेह । तए णं से सेणिए राया कोडुंवियपुरिसे सदावेइ २ ता एवं वयासी-गच्छह-णं तुब्भे देवाणुप्पिया ! सिरिधराओ तिन्नि सयसहस्साइं गहाय दोहिं सयसहस्सेहिं कुत्तियावणाओ रयहरणं पडिग्गहं च उवणेह सयसहस्सेणं कासवयं सदावेह । तए णं ते कोडुंवियपुरिसा सेणिएणं रत्ता एवं वुत्ता समाणा हट्ठतुट्ठा सिरिधराओ तिन्नि सयसहस्साइं गहाय कुत्तियावणाओ दोहि सयसहस्सेहि रयहरणं पडिग्गहं च उवणेति सयसहस्सेणं कासवयं सदावेति । तए णं से कासवए तेहिं कोडुंवियपुरिसेहि सदाविए समाणे हट्ठतुट्ठ जाव (हय)हियए ण्हाए सुद्धप्पावेसाइं (मंगल्लाइं)वत्थाइं पवरपरिहिए अप्पमहग्गघाभरणाळंकियसरीरे जेणेव सेणिए राया तेणेव उवागच्छइ २ ता सेणियं रायं करयलमजलि कट्टु एवं वयासी-संदिसह णं देवाणुप्पिया ! जं मए करणिजं । तए णं से सेणिए राया कासवयं एवं वयासी-गच्छाहि णं तुमं देवाणुप्पिया ! सुरभिणा गंधोदएणं निक्के हत्थपाए पक्खालेहि सेयाए चउप्फालाए पोत्तीए मुहं वधित्ता मेहस्स कुमारस्स चउरंगुलवज्जे निक्खमणपाउग्गे अग्गकेसे कप्पेहि । तए णं से कासवए सेणिएणं रत्ता एवं वुत्ते समाणे हट्ठतुट्ठ जाव हियए जाव पडिषुणेइ २ ता सुरभिणा गंधोदएणं हत्थपाए पक्खालेइ २ ता सुद्धवत्थेणं मुह वंधइ २ ता परेणं जत्तणं मेहस्स कुमारस्स चउरंगुलवज्जे निक्खमणपाउग्गे अग्गकेसे कप्पइ । तए णं तस्स मेहस्स कुमारस्स माया महरिहेणं हंसलक्खणेणं पडसाडएणं अग्गकेसे पडिच्छइ २ ता सुरभिणा गंधोदएणं पक्खालेइ २ ता सरसेणं गोसीसचंदणेणं चच्चाओ दलयइ २ ता सेयाए पोत्तीए वंधइ २ ता रयणसमुग्गयंसि पक्खिवइ २ ता मंजूमाए पक्खिवइ २ ता हारवारिधारसिंदुवारच्छिन्नमुत्तावलिप्पगासाइं अंसूइ विणिम्मुयमाणी २ रोयमाणी २ कदमाणी २ विलवमाणी २ एवं वयासी-एस णं अम्हं मेहस्स कुमारस्स अब्भुद-एसु य उस्सवेसु य पसवेसु य तिहीसु य छणेसु य जन्नेसु य पव्वणीसु य अपच्छिमे

दरिसणे भविस्सइ-त्तिकट्ट उस्सीसामूले ठवेड । तए णं तस्स मेहस्स कुमारस्स अम्मा-
 पियरो उत्तरावक्कमणं सीहासणं रयावेंति मेहं कुमारं दोच्चपि तच्चपि सेयापीयएहिं
 कलसेहिं ण्हावेंति २ ता पम्हलसुकुमालाए गंधकासाइयाए गायाइं ल्हेंति २ ता
 सरसेणं गोसीसचंदणेणं गायाइं अणुलिंपति २ ता नासानीसासवायवोज्झ जाव
 हंसलक्खणं पड(ग)साडगं नियंसेंति २ ता हारं पिणद्धेंति २ ता अद्धहारं पिणद्धेंति
 २ ता (एवं) एगावलिं (२) मुत्तावलिं (२) कणगावलिं (२) रयणावलिं (२) पालंवं (२)
 पायपलंवं कडगाइं (२) तुडिगाइं (२) केरुराइं (२) अंगयाइं (२) दसमुद्दिशणंतयं
 कडिसुत्तयं (२) कुंडलाइ चूडामणिं रयणुक्कडं मडडं पिणद्धेंति २ ता दिव्वं सुमणदामं
 पिणद्धेंति २ ता दहरमलयसुगंधिए गंधे पिणद्धेंति । तए णं तं मेहं कुमारं
 गंठिमवेढिमपूरिमसंधाइमेण चउव्विहेणं मल्लेणं कप्परुक्खगं पिव अलंकियविभूसियं
 करेंति । तए णं से सेणिए राया कोडुंवियपुरिसे सदावेइ २ ता एवं वयासी-
 खिप्पामेव भो देवाणुप्पिया ! अणेगखंभसयसन्निविट्ठं लीलद्वियसालभंजियागं
 ईहामियउसभतुरयनरमगरविहगवालगकिन्नररुसरभच्चमरकुंजरवणलयपडमलयभ-
 त्तिचित्तं घंटावलिमहुरमणहरसरं सुभकंतदरिसणिज्जं निउणो(चि)वियमित्तिमित्तम-
 णिरयणघंटियाजालपरिक्खित्तं खं (अव)भुग्गयवइरवेइयापरिगयाभिरामं विज्जाहर-
 जमलजंतजुत्तं पिव अच्चीसहस्समालणीयं रुवगसहस्सकलियं भिसमाणं भिच्चिसमाणं
 चक्खुल्लोयणलेस्सं सुहफासं सस्सिरीयरुवं सिग्घं तुरियं चवलं वेइयं पुरिससहस्स-
 वाहि(णीयं)णीं सीयं उवट्ठवेह । तए णं ते कोडुंवियपुरिसा हट्ठतुट्ठ जाव उवट्ठवेति ।
 तए णं से मेहे कुमारे सीयं दुरुहइ २ ता सीहासणवरगाए पुरत्थाभिमुहे
 सन्निसण्णे । तए णं तस्स मेहस्स कुमारस्स माया ण्हाया अप्पमहग्घाभरणालं-
 कियसरीरा सीयं दुरुहइ २ ता मेहस्स कुमारस्स दाहिणे पासे भद्दासणंसि निसीयइ ।
 तए णं तस्स मेहस्स कुमारस्स अंवधाइं रयहरणं च पडिग्गहगं च गहाय सीयं
 दु(रु)रुहइ २ ता मेहस्स कुमारस्स वामे पासे भद्दासणंसि निसीयइ । तए णं तस्स
 मेहस्स कुमारस्स पिट्ठओ एगा वरतरुणी सिंगारागारचारुवेसा संगयगयहसिय-
 भणियचेद्वियविलाससंलावुल्लावनिउणजुत्तोवयारकुसला आमेलगजमलजुयलवट्ठिय-
 अब्भुत्तयपीणरइयसंठियपओहरा हिमरययकुंदेंदुपगासं सकोरेंटमल्लदामधवलं
 आयवत्तं गहाय सलीलं ओहारेमाणी २ चिट्ठइ । तए णं तस्स मेहस्स कुमारस्स
 दुवे वरतरुणीओ सिंगारागारचारुवेसाओ जाव कुसलाओ सीयं दुरुहंति २ ता मेहस्स
 कुमारस्स उभओ पा(सिं)सं नानामणिक्कणगरयणमहरिहतवणिज्ज उज्जलविचित्तदंडाओ
 चिल्लियाओ सुहुमवरदीहवालाओ संखकुंददगरयअमयमहियफेणपुंजसन्निगासाओ

चामराओ गहाय सलीलं ओहारेमाणीओ २ चिद्वंति । तए णं तस्स मेहकुमारस्स एगा वरतरुणी सिगारा जाव कुसला सीयं जाव दुरुहइ २ ता मेहस्स कुमारस्स पुरओ पुरत्थिमेणं चंदप्पभवइरवेरुलियविमलदंडं ता(लवि)लियंटं गहाय चिद्वइ । तए णं तस्स मेहस्स कुमारस्स एगा वरतरुणी जाव सुखा सीयं दुरुहइ २ ता मेहस्स कुमारस्स पुव्वदक्खिणेण सेयं रययामयं विमलसलिलपुण्णं मत्तगयमहामुहाकिइसमाणं भिंगारं गहाय चिद्वइ । तए णं तस्स मेहस्स कुमारस्स पिया कोडुंबियपुरिसे सदावेइ २ ता एवं वयासी-खिप्पामेव भो देवाणुप्पिया ! सरिसयाणं सरि(स)त्तयाणं सरि(स)-व्वयाणं एगाभरणगहियनिज्जोयाणं कोडुंबियवरतरुणाणं सहस्सं सदावेह जाव सदा-वेति । तए णं (ते) कोडुंबियवरतरुणपुरिसा सेणियस्स रत्तो कोडुंबियपुरिसेहिं सदा-विया समाणा हट्ठा ण्हाया एगाभरणगहियणिज्जोया जेणामेव सेणिए राया तेणामेव उवागच्छंति २ ता सेणियं रायं एवं वयासी-संदिसह णं देवाणुप्पिया ! जं णं अम्हेहिं करणिज्जं । तए णं से सेणिए राया तं कोडुंबियवरतरुणसहस्सं एवं वयासी-गच्छह णं (तुम्हे)देवाणुप्पिया ! मेहस्स कुमारस्स पुरिससहस्सवाहिणिं सीयं परिव(हे)-हह । तए णं तं कोडुंबियवरतरुणसहस्सं सेणिएणं रत्ता एवं वुत्तं संतं हट्ठं तुट्ठ तस्स मेहस्स कुमारस्स पुरिससहस्सवाहिणिं सीयं परिवहइ । तए णं तस्स मेहस्स कुमारस्स पुरिससहस्सवाहिणिं सीयं दुरुहस्स समाणस्स इमे अट्ठट्ठमंगलया तप्पढमयाए पुरओ अहाणुपुव्वीए संपट्टिया, तंजहा-सोत्थिय सिरिवच्छ नंदियावन वद्धमाणग भद्दासण कलस मच्छ दप्पण जाव वहवे अत्थत्थिया जाव ताहिं इट्ठाहिं जाव अण-वरयं अभिनंदंता य अभियुगंता य एवं वयासी-जय २ नंदा ! जय २ भद्दा ! जयनंदा ! भद्दं ते अजि(य)याइं जिणाहि इंदियाइं जियं च पाळेहि समणधम्मं जियविग्घोऽविय वसाहि तं देव ! सिद्धिमज्जे निहणाहि रागदोसमल्ले तवेणं धिइ-धणियवद्धकच्छे मद्दाहि य अट्ठकम्मसत्तू ज्ञाणेणं उत्तमेणं सुक्केणं अप्पमत्तो पावय वितिमिरमणुत्तरं केवलं नाणं गच्छ य मोक्खं परमं पयं सासयं च अयलं हंता परीसहच(मुं)मूणं अभीओ परीसहोवसग्गाणं धम्मे ते अविग्घ भवउ-त्तिकट्ठ पुणो २ मंगलजय२सद्दं पडंजंति । तए णं से मेहे कुमारे रायणिहस्स नयरस्स मज्झमज्झेणं निग्गच्छइ २ ता जेणेव गुणसिलए उज्जाणे तेणेव उवागच्छइ २ ता पुरिससहस्सवाहिणीओ सीयाओ पच्चोरुहइ ॥ २९ ॥ तए णं तस्स मेहस्स कुमारस्स अम्मापियरो मेहं कुमारं पुरओ कट्ठु जेणामेव समणे भगवं महावीरे तेणामेव उवागच्छंति २ ता समणं भगवं महावीरं तिक्खुत्तो आयाहिणं पयाहिण करेति २ ता वंदंति नमंसंति वं० २ ता एवं वयासी-एस ण देवाणुप्पिया ! मेहे कुमारे अम्हं एगे

पुत्ते इट्ठे कंते जाव जीवियऊसासए हिययनंदिजणए उंवरपुफं पिव दुल्लहे सवगयाए किमंग पुण दरिसगयाए ? से जहानामए उप्पलेइ वा पउमेइ वा कुमुंदइ वा पंके जाए जले संबद्धिए नोवलिप्पइ पंकरएण नोवलिप्पइ जलरएणं एवामेव मेहे कुमारे कामेस जाए भोगेसु संवुद्धे नोवलिप्पइ कामरएणं नोवलिप्पइ भोगरएणं, एस णं देवाणुप्पिया ! संसारभउव्विग्गे भीए जन्मण(जर)मरणणं इच्छइ देवाणुप्पियाणं अंतिए मुंडे भविता अगाराओ अणगारिय पव्वइत्तए । अम्हे णं देवाणुप्पियाणं तिस्सभिकखं दलयामो । पडिच्छंतु णं देवाणुप्पिया ! तिस्सभिकखं । तए णं मे समणे भगवं महावीरे मेहस्स कुमारस्स अम्मापिऊहिं एवं वुत्तं समाणे एयमट्ठं सम्मं पडिबुणेइ । तए णं से मेहे कुमारे समगस्स भगवओ महावीरस्स अंतियाओ उत्तरपुरच्छिमं दिसीभागं अवक्कमइ २ ता सयमेव आभरणमल्लालंकारं ओनुयइ । तए-णं (से) तस्स मेहकुमारस्स माया हंसलक्खणेणं पडसाडएणं आभरणमल्लालंकारं पडिच्छइ २ ता हारवारिधारसिंदुवारछिन्नमुत्तावलिप्पगासाइं अंसूणि विगिम्सु-यमाणी २ रोयमाणी २ कंदमाणी २ विलवमाणी २ एवं वयासी-जडयव्वं जाया ! घडियव्वं जाया ! परक्कमियव्वं जाया ! अस्सि च णं अट्ठे नो पमाएयव्वं, अम्हंपि णं ए(मे)मेव मग्गे भवउ-त्तिकट्ठु मेहस्स कुमारस्स अम्मापियरो समणं भगवं महावीरं वंदंति नमसंति वं० २ ता जामेव दिस्सि पाउव्वभूया तामेव दिस्सि पडिगया ॥ ३० ॥ तए णं-से-मेहे कुमारे सयमेव पंचमुट्ठियं लोयं करेइ २ ता जेगामेव समणे भगवं महावीरे तेगामेव उवागच्छइ २ ता समणं भगवं महावीरं तिकखुत्तो आयाहिणं पयाहिणं करेइ २ ता वंदइ नमसइ वं० २ ता एवं वयासी-आलित्ते णं भंते ! लोए, पलित्ते णं भंते ! लोए, आलित्तपलित्ते णं भंते ! लोए जराए मरणेण य । से जहानामए केइ गाहावई अगारंति झियायनाणंसि जे तत्थ भडे भवइ अप्पभारे मोल्लगुरुए तं गहाय आयाए एगंतं अवक्कमइ-एस मे नित्यारिए समाणे पच्छा-पुरा (लोए)हियाए बुहाए खे(ख)माए निस्सेसाए आणुगामियत्ताए भविस्सइ-एवामेव समवि एगे आयाभंडे इट्ठे कंते पिए मणुत्ते मणामे एस मे नित्यारिए समाणे संसारवोच्छेयकरे भविस्सइ, तं इच्छामि णं देवाणुप्पि(या)एहिं सयमेव पव्वावियं सयमेव मुंडावियं सेहावियं सिक्खावियं सयमेव आयारगोयरविणयवेणइय-चरणकरणजायामायावत्तियं धम्ममाइक्खियं । तए णं समणे भगवं महावीरे मेहं कुमारं सयमेव पव्वावेइ सयमेव आयार जाव धम्ममाइक्खइ-एवं देवाणुप्पिया ! गंतव्वं चिद्धियव्वं निसीयव्वं तुयद्धियव्वं भुंजियव्वं भासियव्वं एवं उट्ठाए उट्ठाए पाणेहिं भूएहिं जीवेहिं सत्तेहिं संजमेणं संजमियव्वं अस्सि च णं अट्ठे नो

पमाएयव्वं । तए णं से मेहे कुमारे समणस्स भगवओ महावीरस्स अंतिए इमं
 एयाख्वं धम्मियं उवएसं निसम्म सम्मं पडिवज्जइ तमाणाए तह गच्छइ तह चिट्ठइ
 जाव उट्ठाए उट्ठाय पाणेहिं भूएहिं जीवेहिं सत्तेहि संजमइ ॥ ३१ ॥ जं दिवसं च णं
 मेहे कुमारे मुडे भवित्ता अ(आ)गाराओ अणगारियं पव्वइए तस्स णं दिवसस्स
 पच्चावरण्हकालसमयंसि समणाणं निग्गंथाणं अहाराइणियाए सेज्जासंथारएसु
 विभज्जमाणेसु मेहकुमारस्स दारमूले सेज्जासंथारए जाए यावि होत्था । तए
 णं समणा निग्गंथा पुव्वरत्तावरत्तकालसमयंसि वायणाए पुच्छणाए परियट्ठणाए
 धम्माणुजोगचिंताए य उच्चारस्स य पासवणस्स य अइगच्छमाणां य निग्गच्छमाणा
 य अप्पेगइया मेहं कुमारं हत्थेहिं संवट्ठेति एवं पाएहि सीसे पोट्टे कायंसि अप्पेगइया
 ओलंडेंति अप्पेगइया पोलंडेंति अप्पेगइया पायरयेणुगुंडियं करेति । एवं
 महालियं च णं रयणिं मेहे कुमारे नो संचाएइ खणमवि अ(च्छि)च्छी निमीलित्तए ।
 तए णं तस्स मेहस्स कुमारस्स अयमेयाख्वे अज्झत्थिए जाव समुप्पजित्था-एवं
 खलु अहं सेणियस्स रत्तो पुत्ते धारिणीए देवीए अत्तए मेहे जाव सवणयाए, तं
 जया णं अहं अगारमज्झे वसामि तया णं मम समणा निग्गंथा आढायंति परिजाणंति
 सक्कारेंति सम्माणेंति अट्ठाइ हेऊइं पसिणाइं कारणाइं वागरणाइं आइक्खंति इट्ठाहि
 कंताहिं वग्गूहिं आलवेंति संलवेंति, जप्पभिइं च णं अहं मुडे भवित्ता अगाराओ
 अणगारियं पव्वइए तप्पभिइं च णं म(म)मं समणा नो आढायंति जाव नो संलवेंति,
 अदुत्तरं च णं ममं समणा निग्गंथा राओ पुव्वरत्तावरत्तकालसमयंसि वायणाए पुच्छ-
 णाए जाव महालियं च णं रत्तिं नो संचाएमि अच्छि निमि(ला)ल्लवेत्तए, तं सेयं खलु
 मज्झ कल्लं पाउप्पभायाए रयणीए जाव तेयसा जलंते समणं भगवं महावीरं
 आपुच्छित्ता पुणरवि अगारमज्झे वसित्तए-त्तिकट्ठु एवं संपेहेइ २ ता अट्ठुहट्ठवसट्ठ-
 माणसगए निरयपडिहवियं च णं, तं रयणिं खवेइ २ ता कल्लं पाउप्पभायाए
 सुविमलाए रयणीए जाव तेयसा जलंते जेणामेव समणे भगवं महावीरे तेणामेव
 उवागच्छइ २ ता तिक्खुत्तो आयाहिणं पयाहिणं करेइ २ ता वंदइ नयंसइ वं०
 २ ता जाव पज्जुवासइ ॥ ३२ ॥ तए णं मेहाइ समणे भगवं, महावीरे मेहं
 कुमारं एवं वयासी-से नूणं तुमं मेहा ! राओ पुव्वरत्तावरत्तकालसमयंसि समणेहि
 निग्गंथेहिं वायणाए पुच्छणाए जाव महालियं च णं राइं नो संचाए(मि)सि मुहुत्तमवि
 अच्छि निमिल्लवेत्तए, तए णं तु(व्भं)व्भे मेहा ! इमे एयाख्वे अज्झत्थिए जाव समुप्प-
 जित्था-जया णं अहं अगारमज्झे वसामि तया णं मम समणा निग्गंथा आढायति
 जाव संलवेंति, जप्पभिइं च णं मुंडे भवित्ता अगाराओ अणगारियं पव्वयामि

तप्पभिइं च णं मम समणा नो आढायंति जाव नो (परियाणंति) संल्वेति अटुनरं
च णं मम समणा निग्गंथा राओ अप्पेगइया वायणाए जाव पायरयरेणुगुंडियं
करेंति, तं सेयं खलु मम कळं पाउप्पमायाए समणं भगवं महावीरं आपुच्छिता
पुणरवि अगारमज्जे आवसितए-त्तिरुहु एवं संपेहेसि २ ता अट्टुहट्टवसट्टमाणसे
जाव रयणिं खवेसि २ ता जेणामेव अहं तेणामेव हव्वमागए, से नूणं मेहा ! एस
अट्टे समट्टे ? हंता अट्टे समट्टे । एवं खलु मेहा ! तुमं इओ तच्चे अईए भवग्गहणे
वेयड्ढुगिरिपायमूले वणयरेहिं निव्वत्तियनामधेजे सेए संखदलउज्जलविमल-
निम्मलदहिघणगोखीरफेणरयणियर(दगरयरययनियर)प्पयासे सत्तुस्सेहे नवायए
दसपरिणाहे सत्तंगपड्डिए सोमे समिए सुल्लवे पुरओ इदग्गे समूत्तियसिरे सुहासणे
पिट्ठओ वराहे अइयाकुच्छी अच्छिइकुच्छी अलंवकुच्छी पलंवलंबोदराहरकरे
धणुपट्ठागिइविसिद्वपुट्टे अल्लीणपमाणजुत्तवट्टियपीवरगत्तावरे अल्लीणपमाणजुत्तपुच्छे
पडिपुण्णसुचारुकुम्मचलणे पंडुरसुविमुद्वनिद्वनिरुवहयविंसतिनहे छदंते सुमेरुप्पमे नामं
हत्थिराया होत्था । तत्थ णं तुमं मेहा ! वहूहि हत्थीहि य हत्थिणियाहि य लोट्टएहि य
लोट्टियाहि य कलमेहि य कलभियाहि य सद्धिं संपरिवुडे हत्थिसहस्सनायए देसए
पागट्ठी पट्टवए जूहवई वंदपरियट्टए अत्तेसि च वहूणं एकळाणं हत्थिकलभाणं आहेवच्चं
जाव विहरसि । तए णं तुमं मेहा ! निच्चप्पमत्ते सइं पललिए कंदप्परई मोहण-
सीले अवितण्हे कामभोगतिसिए वहूहि हन्थीहि य जाव संपरिवुडे वेयड्ढुगिरिपायमूले
गिरीसु य दरीसु य कुहरेसु य कंदरासु य उज्जरेसु य निज्जरेसु य वियरएसु य गद्दासु
य पल्लेसु य चिल्लेसु य कडगेसु य कडयपल्लेसु य तडीसु य वियडीसु य टंकेसु य
कूडेसु य सिहरेसु य पन्भारेसु य मंचेसु य मालेसु य काणणेसु य वणेसु य वणसंडेसु
य वणराईसु य नईसु य नईकच्छेसु य जूहेसु य संगमेसु य वावीसु य पोक्खारिणीसु
य दीहियासु य गुंजालियासु य सरेसु य सरपंतियासु य सरसरपंतियासु य वणयरेहिं
दिन्नवियारे वहूहिं हत्थीहि य जाव सद्धिं संपरिवुडे बहुविहतरुपल्लवपउरपाणियतणे
निब्भए निशब्बिग्गे सुहंसहेणं विहरसि । तए णं तुमं मेहा ! अन्नया कयाइ पाउस-
वरिसारत्तसरयहेमंतवसंतेसु क्रमेण पंचसु उऊसु समइक्कंतेसु गिम्हकालसमयंसि जेट्टामू-
लमासे पायवधंससमुट्टिएणं सुक्कतणपत्तकयवरमारुयसंजोगदीविएणं महाभयंकरेणं
हुयवहेणं वणदवजालासंपलित्तेसु वणंतेसु धूमाउलासु दिसासु महावायवगेणं संघट्टिएसु
छिन्नजालेसु आवयमाणेसु पोह्लख्वेसु अंनो अंतो झियायमाणेसु मयकुहियवि(णिवि)-
णट्टकिमियकह्मनईवियरग(जिण्ण)ज्झीणपाणीयतेसु वणंतेसु भिंगारकदीणकंदियर-
वेसु खरफरुसअणिट्टरिट्टवाहि(त)त्तविहुमग्गेसु दुमेसु तण्हावसमुक्कपक्खपयडियजिब्भ-

तालुयअसपुडियतुंडपक्खिसंघेसु ससंतेसु गिम्हउम्हउण्हवायखरफरुसचंडमारुय-
सुकुतणपत्तकयवरवाउलिभमंतदि(त्त)न्नसंभंतसावयाउलमिगतण्हाबद्धचिंधपट्टेसु गिरि-
वरेसु संवट्टिएसु तत्थमियपस(व)यमरीसिवेसु अवदालियवयणविवरनिळालियगजीहे
महंततुंवइयपुण्णकण्णे संकुचियथोरपीवरकरे ऊसियनं(लं)गूले पीणाइयविरसरडिय-
सदेण फोडयतेव अंबरतलं पायदहरएणं कंपयंतेव मेइणितलं विणिम्मुयमाणे य सीयारं
सव्वओ समंता वल्लिवियाणाइं छिंदमाणे रुक्खसहस्साइं तत्थ सुबहूणि नो(ल्ला)ल्लयंते
विणट्टरट्टेव्व नरवरिंदे वायाइद्वेव्व पोए मंडलवाएव्व परिब्भमंते अभिक्खण २
लिंडनियरं पमुंचमाणे २ बहूहिं हत्थीहि य जाव सद्धिं दिसोदिसिं विप्पलाइत्था ।
तत्थ णं तुमं मेहा ! जुण्णे जराजज्जरियदेहे आउरे झंझिए पिवासिए दुब्बले
किलंते नट्टसुइए मूढदिसाए सयाओ जूहाओ विप्पहूणे वणदवजालापारद्धे उण्हेण
य तण्हाए य छुहाए य परब्भाहए समाणे भीए तत्थे तसिए उव्विग्गे संजायभए
सव्वओ समंता आधावमाणे परिधावमाणे एणं च णं महं सरं अप्पोदयं पंकबहुलं
अति(त्थि)त्थेणं पाणियपाए (उइण्णे) ओइण्णे । तत्थ णं तुमं मेहा ! तीरमइगए पाणियं
असंपत्ते अतरा चेव सेयंसि विसण्णे । तत्थ णं तुमं मेहा ! पाणियं पाइस्सामि-त्तिकट्ठु
हत्थं पसारेसि, से वि य ते हत्थे उदगं न पावइ । तए णं तुमं मेहा ! पुणरवि
कायं पच्चुद्धरिस्सामि-त्तिकट्ठु बलियतरायं पंकंसि खुत्ते । तए णं तुमं मेहा ! अन्नया
कयाइ एगे चिरनिज्जुदे गयवरजुवाणए सगाओ जूहाओ करचरणदंतमुसलप्पहारेहिं
विप्परद्धे समाणे तं चेव महद्दहं पाणी(यं पाएउं)यपाए समोयरइ । तए णं से कलभए
तुमं पासइ २ ता तं पुव्ववेरं संमरइ २ ता आसुस्ते रुट्टे कुविए चंडिक्किए मिसिमिसेमाणे
जेणेव तुमं तेणेव उवागच्छइ २ ता तुमं तिक्खेहिं दंतमुसलेहिं तिक्खुतो पिट्टओ
उच्छुभइ २ ता पुव्ववेरं निज्जाएइ २ ता हट्टतुट्टे पाणियं पियइ २ ता जमेव
दिसिं पाउब्भूए तामेव दिसिं पडिगए । तए णं तव मेहा ! सरीरगंसि वेयणा
पाउब्भवित्था उज्जला विउला (तिउला) कक्खडा जाव दुरहियासा पित्तज्जरपरिगय-
सरीरे दाहवक्कंतीए यावि विहरित्था । तए ण तुमं मेहा ! तं उज्जलं जाव
दुरहियासं सत्तराइंदियं वेयगं वेदेसि सवीसं वाससयं परमाउं पालइत्ता
अट्टवसट्टदुहट्टे कालमासे कालं किच्चा इहेव जंबुदीवे २ भारहे वासे दाहिणद्धभरहे
गंगाए महानईए दाहिणे कूले विंझगिरिपायमूले एगेणं मत्तवरगंधहत्थिणा एगाए
गयवरकरेणूए कुच्छिसि गयकलभए जणिए । तए णं सा गयकलभिया नवण्हं
मासाणं वसंतमासम्मि तुमं पयाया । तए णं तुमं मेहा ! गम्भवासाओ विप्पमुक्के
समाणे गयकलभए यावि होत्था रत्तुप्पलरत्तसूमालए जासुमणारत्तपारिजत्तय-

लक्खारसरसकुंलुमसंज्ञवभरागवण्णे इहे नियगस्स जूहवडगो गणि(या)यारकणेह
 कोत्थहत्थी अणेगहत्थिसयसंपरिवुडे रम्मेसु गिरिकागणेषु सुहंसुहेणं विहरति ।
 तए णं तुमं मेहा ! उम्मुक्कवालभावे जोव्वणगमणुप्पत्ते जूहवडणा कालधम्मणा
 संजुत्तेणं तं जूहं सयमेव पडिवजसि । तए णं तुमं मेहा ! वणयोरोहिं
 निव्वत्तियनामथेजे जाव चउदंते मेरुप्पमे हत्थिरयणे होत्था । तत्थ णं तुमं मेहा !
 सत्तंगपइट्टिए तहेव जाव पडिह्वे । तत्थ णं तुमं मेहा ! नत्तसइयस्स जूहस्स
 आहेवच्च जाव अभिरमेत्था । तए णं तुम अन्नया कयाइ गिम्हकालसमयसि जेद्वामूले
 वणदवजालापलित्तेषु वगंतेसु(सु)धूमाउलासु दिसासु जाव मंडलवाएव्व परिव्व-
 मंते भीए तत्थे जाव संजायमए व्हूहिं हत्थीहि य जाव कलभियाहि य सद्धिं
 संपरिवुडे सव्वओ समंता दिसोदिसिं विप्पलाइत्था । तए णं तव मेहा ! तं वणदवं
 पासित्ता अयमेयारुवे अज्जत्तिए जाव समुप्पजित्था-कहिं णं मत्ते नए अयमेयारुवे
 अग्गिसंभवे अणुभूयपुव्वे?, तए णं तव मेहा ! लेस्साहिं विसुज्जमाणीहिं अज्ज-
 वसाणेणं सोहणेणं सुभेणं परिणामेणं तयावरणिजाणं कम्माणं खओवसमेणं ईहा-
 पोहमग्गणगवेसणं करेमाणस्स सन्निपुव्वे जा(ई)इसरणे समुप्पजित्था । तए णं तुमं
 मेहा ! एयमद्धं सम्मं अभिसमेसि-एवं खलु मया अईए दोच्चे भवग्गहणे इहेव
 जंबुईवे २ भारहे वासे वेयव्वगिरिपायमूले जाव (सुहंसुहेणं विहरइ)तत्थ णं
 महया अयमेयारुवे अग्गिसंभवे समणुभूए । तए णं तुमं मेहा ! तस्सेव दिवसस्स
 पच्चावरण्हकालसमयसि नियएणं जूहेणं सद्धिं समन्नागए यावि होत्था । तए णं
 तुमं मेहा ! सत्तुस्सेहे जाव सन्निजाइस्सरणे चउदंते मेरुप्पमे नामं हत्थी (राया)
 होत्था । तए णं तुज्जं मेहा ! अयमेयारुवे अज्जत्तिए जाव समुप्पजित्था-(तं)सेयं
 खलु मम ड्यागिं गंगाए महानईए दाहिणिळंसि कूलंसि विज्जगिरिपायमूले
 दवग्गिसं(ताण)जायकारणद्धा सएणं जूहेणं (महइ)महालयं मंडलं घाइत्तए-निकुट्टु
 एवं संपेहेसि २ ता सुहंसुहेणं विहरति । तए णं तुमं मेहा ! अन्नया कयाइं
 पढमपाउसंसि महानुट्टिकायंसि सन्निवड्यंसि गंगाए महानईए अदूरसामंते व्हूहिं
 हत्थीहिं जाव कलभियाहि य सत्तहि य हत्थिसएहिं संपरिवुडे एगं महं
 जोयणपरिमंडलं महइमहालयं मंडलं घाएसि जं तत्थ तणं वा पत्तं वा कट्टं वा
 कंटए वा लया वा वल्ली वा खाणुं वा रुक्खे वा खु(वे)वं वा तं सव्वं तिकखुत्तो आहु-
 णिय २ पाएणं उ(ड्वे)द्वरेसि हत्थेणं गेण्हसि एगंते ए(पा)डेसि । तए णं तुमं मेहा !
 तस्सेव मंडलस्स अदूरसामंते-गंगाए महानईए दाहिणिळे कूले विज्जगिरिपायमूले
 गिरीसु य जाव विहरति । तए णं तुमं मेहा ! अन्नया कयाइ मज्झिमए वरिसारत्तंसि

महाबुद्धिकायंसि सन्निवड्यंसि जेणेव से मंडले तेणेव उवागच्छसि २ ता दोचंपि मंडलं
घाएसि, एव चरिमवासारत्तंसि महाबुद्धिकायंसि सन्निव(इ)यमाणंसि जेणेव से मंडले
तेणेव उवागच्छसि २ ता तच्चंपि मंडलघायं करेसि जं तत्थ तणं वा जाव सुहंसुहेणं विह-
रसि । अह मेहा ! तुमं गइंदभावम्मि वट्टमा(णे)णो कमेणं नलिणिवणवि(वह)हवणगरे
हेमंते कुंदलोद्धउद्धुयनुसारपउरम्मि अइक्कंते अहिगवे गिम्हसमयंसि पत्ते वियट्टमा(णे)-
णो वणेषु वगकरेणुविविहदिन्नकयपसवघाओ तुमं उउयकुसुमकयचामरकण्णपूरपरिमंडि-
याभिरामो मयवसविगसंतकडतडकिलिन्नगंधमदवारिणा सुरभिजणियगंधो करेणुपरि-
वारिओ उउसमत्तजणियसोहो काले दिणयरकरपयडे परिसोसियतरुवरसि(रि)हरभीम-
तरदंसणिजे भिगाररवंतभेरवरवे नागाविहपत्तकट्टतणकयवसु(द्धे)द्धुयपइमा रुयाइद्धनह-
यलदुमंगणे वाउलि(या)दारुणतरे तण्हावसदोसदूसियभमंतविविहसावयसमाउले भी-
मदरिसणिजे वट्टंते दारुणम्मि गिम्हे मारुयवसपसरपसरियवियंभिएणं अब्भहियभीम-
भेरवरवप्पगारेणं महुधारापडियसित्तउद्धायमाण(धग)धगधगेंतसहु(द्धु)द्धएणं दित्त-
तरसफुल्लिगेणं धूममालाउलेणं सावयसयंतकरणेणं (अब्भहिये)वणदवेणं जालालो-
वियनिरुद्धधूमंधकारभीओ आयवालोयमहंततुंबइयपुण्णकण्णो आकुंचियथोरपीवरकरो
भयवसभयंतदित्तनयणो वेगेणं महामेहोव्व वाय(पव)णोल्लियमहल्लुवो जे(णेव)ण
कओ ते(ण) पुरा दवग्गिभयभीग्रहियएणं अवगयतणप्पएसरुक्खो रुक्खोद्देसो दवग्गि-
संताणकारणट्ठा (ए) जेणेव मंडले तेणेव पहारेत्थ गमणाए । एको ताव एस गमो ।
तए णं तुमं मेहा ! अत्रया कयाइं कमेणं पंचसु उउसु समंइक्कंतेसु गिम्हकालस-
मयंसि जेट्ठामूले मासे पायवसंधंससमुट्ठिणं जाव संवट्ठिएसु मियपसुपक्खिसरीसिवे(सु)
दिसोदिसि विप्पलायमाणेषु तेहिं वट्ठहिं हत्थीहिं य सद्धिं जेणेव (से) मंडले तेणेव
पहारेत्थ गमणाए । तत्थ णं अत्ते वहवे सीहा य वग्घा य विगा यं दीविया अच्छा
य तरच्छा य पारासरा य सरभा य सियाला विराला सुणहा कोला ससां कोकतिया
चिता चिल्ला पुव्वपविट्ठा अग्गिभयभिद्दुया एगयओ विलधम्मणे चिट्ठंति । तए
णं तुमं मेहा ! जेणेव से मंडले तेणेव उवागच्छसि २ ता तेहिं वट्ठहिं सीहेहिं जाव
चिल्लेहिं य एगयओ विलधम्मणे चिट्ठसि । तए णं तुमं मेहा ! पाएणं गत्तं
कंडुइस्सामीतिकट्टु पाए उक्खित्ते, तंसि च णं अंतरंसि अत्तेहिं वलवंतेहिं सत्तेहिं
पणो(लि)ल्लिज्जमाणे २ ससए अणुप्पविट्ठे । तए णं तुमं मेहा ! गायं कंडुइत्ता पुणरवि
पायं पडिनि(क्खमि)क्खेविस्सामि-त्तिकट्टु तं ससयं अणुपविट्ठं पाससि २ ता पाणाणु-
कंपयाए भूयाणुकंपयाए जीवाणुकंपयाए सत्ताणुकंपयाए से पाए अंतरा चेव संधारिए
नो चेव णं निक्खित्ते । तए णं तुमं मेहा ! ताए पाणाणुकंपयाए जाव सत्ताणुकंपयाए

संसारे परित्तीकए माणुस्साउए निबद्धे । तए णं से वणदवे अट्ठाडजाइं राइंदियाइं
तं वणं ज्ञामेइ २ ता निट्टिए उवरए उवसंते विज्जाए यावि होत्था । तए णं ते
वहवे सीहा य जाव चिल्ला य तं वणदवं निट्टियं जाव विज्जायं पासंति २ ता
अग्गिभयविप्पमुक्का तण्हाए यं छुहाए य परब्भाहया समाणा तओ)मंडलाओ
पडिनिक्खमंति २ ता सव्वओ समंता विप्पसरित्था । तए णं ते वहवे हत्थी जाव
छुहाए य परब्भाहया समाणा तओ मंडलाओ पडिनिक्खमंति २ ता दिसोदिसिं
विप्पसरित्था । तए णं तुमं मेहा ! जुण्णे जराजज्जरियदेहे सिढिलवलितयापिणिद्ध-
गते दुव्वले किलंते जुंजिए पिवासिए अत्यामे अवले अपरक्कमे अचक्रमणो वा
ठाणुखडे वेगेण विप्पसरिस्सामि-त्तिकट्ठु पाए पसारमाणे विज्जुहए विव रययगिरि-
पब्भारे धरणितलंसि सव्वगेहि सन्निवंइए । तए ण तव मेहा ! सरीरगसि वेयणा
पाउब्भूया उज्जला जाव दाहवक्कतिए यावि विहरसि । तए णं तुमं मेहा ! तं उज्जलं
जाव दुरहियासं तिन्नि राइंदियाइं वेयणं वेएमाणे विहरित्ता एगं वाससयं परमाउं
पालइत्ता इहेव जंबुदीवे २ भारहे वासे रायगिहे नयरे सेणियस्स रत्तो धारिणीए
देवीए कुच्छिसि कुमारत्ताए पच्चायाए ॥ ३३ ॥ तए णं तुमं मेहा ! आ(अ)णुपुव्वेणं
गव्वमासाओ निक्खंते समाणे उम्मुक्कवालभावे जोव्वणगमणुप्पत्ते मम अंतिए मुंडे
भविता अगाराओ अणगारियं पव्वइए । तं जइ ता(जा)व तुमे मेहा ! तिरिक्ख-
जोणियभावमुवगएणं अपडिलद्धसम्मत्तरयणलंभेणं से पाए पाणाणुकंपयाए जाव
अंतरा चेव संवारिए नो चेव णं निक्खित्ते किमंग पुण तुमं मेहा ! इयाणि विपुल-
कुलसमुव्ववेणं निरुवहयसरीर(दंत)पत्तलद्धपंचिदिएणं एव उट्ठाणवलवीरियपुरिस-
(क्का)गारपरक्कमसंजुत्तेण म(म)मं अंतिए मुंडे भविता अगाराओ अणगारियं पव्वइए
समाणे समणाणं निग्गंथाणं राओ पुव्वरत्तावरत्तकालसमयंसि वायणाए जाव धम्माण-
ओगचिताए य उच्चारस्स वा पासवणस्स वा अइगच्छमाणाण-य निग्गच्छमाणाण
य हत्थसंघट्टणाणि य पायसंघट्टणाणि य जाव रयरेणुगुंडणाणि य नो सम्मं सहसि
खमसि तितिक्खसि अहियासेसि ?, तए णं तस्स मेहस्स अणगारस्स समणस्स
भगवओ महावीरस्स अंतिए एयमट्ठं सोच्चा निसम्म सुभेहि परिणामेहि पसत्थेहि
अज्झवमाणेहि लेस्साहिं विसुज्जमाणीहि तयावरणिज्जाणं कम्माणं खओवसमेणं
ईहापोहमग्गणगवेसणं करेमाणस्स सन्निपुव्वे जाईसरणे समुप्पेजे एयमट्ठं सम्मं
अभिसमेइ । तए णं से मेहे कुमारे समणेणं भगवया महावीरेणं संभारियपुव्वजाई-
सरणे दुग्गुणाणीयसंवेगे आगंदयंसुपुण्णमुहे हरिसवसेणं धाराहयकयंवकं पिव
समूससियरोमकूवे-समणं भगवं महावीरं वंदइ नमंसइ वं० २ ता एवं वयासी-

अज्जप्पभिई णं भंते ! मम दो अच्छीणि मोत्तूणं अवसेसे काए समणाणं निगंथाणं
निसट्ठे-त्तिकट्ठु पुणरवि समण भगवं महावीरं वंदइ नमंसइ वं० २ ता एवं
वयासी-इच्छामि णं भंते ! इयाणिं दोच्चंपि सयमेव पव्वावियं सयमेव मुडावियं जाव
सयमेव आयारगोयरं जायामायावत्तियं धम्ममाइक्ख(ह)न्तु । तए णं समणे भगवं
महावीरे मेहं कुमारं सयमेव पव्वावेइ जाव जायामायावत्तियं धम्ममाइक्खइ-एवं
देवाणुप्पिया ! गंतव्वं एवं चिट्ठियव्वं एवं णिसीयव्वं एवं तुयट्ठियव्वं एवं भुंजियव्वं
एवं भासियव्वं उट्ठाय २ पाणाणं भूयाणं जीवाणं सत्ताणं संजमेणं संजमियव्वं । तए
णं से मेहे समणस्स भगवओ महावीरस्स अयमेयारूवं धम्मियं उवएसं सम्मं पडि-
(च्छइ)वज्जइ २ ता तह (चिट्ठइ) गच्छइ जाव संजमेणं संजमइ । तए णं से मेहे
अणगारे जाए इरियासमिए अणगारवण्णओ भाणियव्वो । तए णं से मेहे अणगारे
समणस्स भगवओ महावीरस्स अंतिए तहा(एया)रूवाणं थेराणं सामाइयमाइयाणि
एक्कारस अंगाइं अहिज्जइ २ ता वहूहि चउत्थछट्ठट्ठमदसमदुवालसेहि मासद्धमासख-
मणेहिं अप्पाणं भावेमाणे विहरइ । तए णं समणे भगवं महावीरे रायणिहाओ नय-
राओ गुणसिलयाओ उज्जाणाओ पडिनिक्खमइ २ ता वहिया जणवयविहारं विहरइ
॥ ३४ ॥ तए णं से मेहे अणगारे अन्नया कयाइ समणं भगवं महावीरं वंदइ नमं-
सइ वं० २ ता एवं वयासी-इच्छामि णं भंते ! तुब्भेहि अब्भणुत्ताए समाणे मासियं
भिक्खुपडिमं उवसंपज्जित्ताणं विहरित्तए । अहासुहं देवाणुप्पिया ! मा पडिवंधं करेह ।
तए णं से मेहे अणगारे समणेण भगवया महावीरेणं अब्भणुत्ताए समाणे मासियं
भिक्खुपडिमं उवसंपज्जित्ताणं विहरइ, मासियं भिक्खुपडिमं अहासुत्तं अहाकप्पं अहा-
मगं सम्मं काएणं फासेइ पालेइ सोभेइ तीरेइ किट्ठेइ सम्मं काएण फासेत्ता पालित्ता
सोभेत्ता तीरेत्ता किट्ठेत्ता पुणरवि समणं भगवं महावीरं वंदइ नमंसइ वं० २ ता एवं
वयासी-इच्छामि णं भंते ! तुब्भेहि अब्भणुत्ताए समाणे दोमासियं भिक्खुपडिमं उव-
संपज्जित्ताणं विहरित्तए । अहासुहं देवाणुप्पिया ! मा पडिवंधं करेह । जहा पढमाए
अभिलावो तहा दोच्चाए तच्चए चउत्थाए पंचमाए छम्मासियाए सत्तमासियाए पढ-
मसत्तरा(यं)इंदियाए दोच्चं सत्तराइदियाए तइयं सत्तराइंदियाए अहोराइंदियाएवि एग-
राइंदियाएवि । तए णं से मेहे अणगारे वारस भिक्खुपडिमाओ सम्मं काएणं फासेत्ता
पालेत्ता सोभेत्ता तीरेत्ता किट्ठेत्ता पुणरवि वंदइ नमंसइ वं० २ ता एवं वयासी-इच्छामि
णं भंते ! तुब्भेहिं अब्भणुत्ताए समाणे गुणरयणसंवच्छरं तवोकम्मं उवसंपज्जित्ताणं
विहरित्तए । अहासुहं देवाणुप्पिया ! मा पडिवंधं करेह । तए णं से मेहे अणगारे
पढमं मासं चउत्थं चउत्थेणं अणिक्खित्तेणं तवोकम्मेणं दिया ठाणुक्खुए सूरामिसुहे

आयावणभूमीए आयावेमाणे रत्ति वीरासणेणं अवाउडेणं । दोयं मासं छट्ठंछट्ठेणं० ।
तच्चं मासं अट्ठमंअट्ठमेणं० । चउत्तयं मासं दनमंदममेणं अणिक्वित्तणं तवोकम्ममेणं
दिया ठाणुकुट्टए सुराभिमुहे आयावणभूमीए आयावेमाणे रत्ति वीरासणेणं अवाउ-
डेणं । पंचमं मासं दुवाल्समंदुवाल्समेणं अणिक्वित्तणं तवोकम्ममेणं दिया ठाणुकुट्टए
सुराभिमुहे आयावणभूमीए आयावेमाणे रत्ति वीरासणेणं अवाउडेणं । एणं गालु
एएणं अभिलावेणं छट्ठे चोद्दमं २ सत्तमे सोलसमं २ अट्ठमे अट्ठासमं २ नवमे
वीसइमं २ दसमे वावीसइमं २ एकारसमे चउव्वीयइमं २ वारसमे छव्वीसइमं २
तेरसमे अट्ठावीसइमं २ चोद्दसमे तीमइमं २ पन्नर(पंचद)गमे वत्तीयइमं २ सोल-
समे(मासे) चउत्तीसइमं २ अणिक्वित्तणं तवोकम्ममेणं दिया ठाणुकुट्टए (णं) सुरा-
भिमुहे आयावणभूमीए आयावेमाणे रत्ति वीरासणेणं य अवाउउएणं य । तए णं
से मेहे अणगारे गुणरयणसंवच्छरं तवोकम्मं अहासुत्तं जाव सम्मं काएणं फासेड
पालेइ सोभेइ तीरेइ किट्ठेइ अहासुत्तं अहाकणं जाव किट्ठेत्ता समणं भगवं महावीरं
वंदइ नमंसइ वं० २ ता वट्ठहिं छट्ठमदसमदुवाल्सहेहिं मामद्धमासखमणेहिं विचि-
त्तेहिं तवोकम्ममेहिं अप्पाणं भावेमाणे विहरइ ॥ ३५ ॥ तए णं से मेहे अणगारे तेणं
उरालेणं विपुलेणं सस्सिरीएणं पयत्तणं पगगहिएणं कल्लणेणं मिवेणं धच्चगं मगद्धेणं
उदग्गेणं उदारएणं उत्तमेणं महाणुभावेणं तवोकम्ममेणं सुक्कं भुक्खे लुक्खे निम्मंसे
निरसोणिए किडिक्किडियाभूए अट्ठिचम्मावणद्धे किसे धमणिसंतए जाए यावि होत्था,
जीवंजीवेणं गच्छइ जीवंजीवेणं चिट्ठइ भासं भासित्ता गिला(य)इ भासं भासमाणे
गिलायइ भासं भासिस्सामित्ति गिलायइ । से जहानामए इंगालमगडियाइ वा कट्ट-
सगडियाइ वा पत्तसगडियाइ वा तिलसगडियाइ वा एरंडकट्टमगडियाइ वा उण्हे
दिन्ना सुक्का समाणी ससइं गच्छइ ससइं चिट्ठइ एवमेव मेहे अणगारे ससइ गच्छइ
ससइं चिट्ठइ उवचिए तवेणं अवचिए मंससोणिएणं हुयासणे इव भासरासिपरिच्छेत्ते
तवेणं तेएणं तवतेयसिरीए अईव २ उवसोभमाणे २ चिट्ठइ । तेणं कालेणं तेणं
समएणं समणे भगव महावीरे आइगरे तित्थगरे जाव पुव्वाणुपुव्वि चरमाणे गामा-
णुगामं दूइज्जमाणे सुहसुहेण विहरमाणे जेणामेव रायणिहे नयरे जेणामेव गुणसिलए
उज्जाणे तेणामेव उवागच्छइ २ ता अहापडिख्वं उग्गहं ओगिण्हित्ता संजमेणं तवसा
अप्पाणं भावेमाणे विहरइ । तए णं तस्स मेहस्स अणगारस्स राओ पुव्वरत्तावरत्त-
कालसमयंसि धम्मजागरियं जागरमाणस्स अयमेयाह्वे अज्झत्थिए जाव समुप्प-
ज्जित्था-एव खलु अह इमेणं उरालेणं तहेव जाव भासं भासिस्सामित्ति गिलामि, तं
अत्थि ता मे उट्ठाणे कम्मे वले वीरेए पुरिसक्कारपरक्कमे सद्धा धिइ संवेगे तं जाव

ता मे अत्थि उट्ठाणे कम्मे वले वीरिए पुरिसक्कारपरक्कमे सद्धा धिई संवेगे जाव य मे
धम्मायरिए धम्मोवएसए समणे भगवं महावीरे जिणे सुहत्थी विहरइ ताव(ताव)मे
सेयं कल्लं पाउप्पभायाए रयणीए जाव तेयसा जलंते (सूरे)समणं भगवं महावीरं
वंदिता नमंसित्ता समणेणं भगवया महावीरेणं अब्भणुञ्जायस्स समाणस्स सयमेव
पंच महव्वयाइं आ(रु)राहिता गोयमाइए समणे निगंथे निगंथीओ य खामेत्ता
तहारुवेहिं कडाईहिं थेरेहिं सद्धि विउलं पव्वयं सणियं २ दुरुहिता सयमेव मेहघ-
णसन्निगासं पुढविसिलापट्टयं पडिलेहिता संलेहणाइसणा(ए)इसियस्स भत्तपाणप-
डियाइक्खियस्स पाओवगयस्स कालं अणवकखमाणस्स विहरितए । एवं सपेहेइ २
ता कल्लं पाउप्पभायाए रयणीए जाव जलंते-जेणेव समणे भगवं महावीरे तेणेव
उवागच्छइ २ ता समणं भगवं महावीरं तिक्खुत्तो आयाहिणं पयाहिणं करेइ २ ता
वंदइ नमंसइ वं० २ ता नच्चासन्ने नाइदूरे सुस्ससमाणे नमंसमाणे अभिमुहे विणएणं
पंजलिउडे पज्जुवासइ । मे(हेत्ति)हाइ समणे भगवं महावीरे मेहं अणगार एवं
वयासी-से नूणं तव मेहा ! राओ पुव्वरत्तावरत्तकालसमयंसि धम्मजागरिय जागर-
माणस्स अयमेयारुवे अज्झत्थिए जाव रामुप्पज्जित्था-एवं खलु अहं इमेणं उरालेणं
जाव जेणेव अ(इ)हं तेणेव हव्वमागए । से नूणं मेहा ! अट्ठे समट्ठे ? हंता अत्थि ।
अहासुहं देवाणुप्पिया ! मा पडिबंधं करेह । तए णं से मेहे अणगारे समणेणं भग-
वया महावीरेणं अब्भणुञ्जाए समाणे हट्ठ जाव हियए उट्ठाए उट्ठेइ २ ता समणं
भगवं महावीरं तिक्खुत्तो आयाहिणं पयाहिणं करेइ २ ता वंदइ नमंसइ वं० २ ता
सयमेव पंच महव्वयाइं आरुहेइ २ ता गोयमाइ समणे निगंथे निगंथीओ य
खामेइ २ ता तहारुवेहिं कडाईहिं थेरेहिं सद्धि विपुलं पव्वयं सणियं २ दुरुहइ २
ता सयमेव मेहघणसन्निगास पुढविसिलापट्टयं पडिलेहेइ २ ता उच्चारपासवणभूमिं
पडिलेहेइ २ ता दब्भसंथारगं संथरइ २ ता दब्भसंथारगं दुरुहइ २ ता पुरत्याभि-
मुहे सपलियं कनिसण्णे करयलपरिग्गहियं सिरसावत्तं मत्थए अजलिं कट्ठु एवं वयासी-
नमोत्थु णं अरिहंताणं भगवंताणं जाव संपत्ताणं, नमोत्थु ण समणस्स भगवओ
महावीरस्स जाव संपाविउकामस्स मम धम्मायरियस्स । वंदामि णं भगवंतं तत्थ-
गयं इहगए पासउ मे भगवं तत्थगए इहगयं-तिकट्ठु वंदइ नमंसइ वं० २ ता एवं
वयासी-पुव्वि पि(य) णं मए समणस्स भगवओ महावीरस्स अंतिए सव्वे पाणाइ-
वाए पच्चक्खाए मुसावाए अदिन्नादाणे मेहुणे परिग्गहे कोहे माणे माया लोहे पेजे दोसे
कलहे अब्भक्खाणे पेसुन्ने परपरिवाए अरइइ मायामोसे सिच्छादंसणसल्ले पच्चक्खाए ।
इयाणि पि णं अहं तस्सेव अंतिए सव्वं पाणाइवायं पच्चक्खामि जाव सिच्छा-

दंसणसल्लं पच्चक्खामि सव्वं असणपाणखाडमसाइमं चउव्विहंपि आहारं पच्चक्खामि जावजीवाए । जंपि य इमं सरीरं इट्ठं कंतं पियं जाव विविहा रोगायंका परीसहो-
वसरंगा फुसंतीतिकट्ठु एयं पि य णं चरमेहिं ऊसासनीमासेहिं वोसिरामि-त्तिकट्ठु-
संलेहणाझूसणाझूसिए भत्तपाणपडियाइक्खिए पाओवगए कालं अणवकंखमाणे विह-
रइ । तए णं ते थेरा भगवतो मेहस्स अणगारस्स अगिलाए वेयावडियं करेंति ।
तए णं से मेहे अणगारे समणस्स भगवओ महावीरस्स तहारूवाणं थेराणं अंतिए
सामाइयमाइयाइं एक्कारस अंगाईं अहिज्जिता बहुपडिपुण्णाइं दुवालसवरिसाईं साम-
णपरियागं पाउणित्ता मासियाए संलेहणाए अप्पाणं ओसेत्ता सट्ठिं भत्ताइ अणसणाए
छेएत्ता आलोइयपडिक्कंते उद्धियसल्ले समाहिपत्ते आणुपुव्वेणं कालगए । तए णं(ते)
थेरा भगवंतो मेहं अणगारं आणुपुव्वेणं कालगयं पासंति २ ता परिनिव्वाणवत्तियं
काउस्सगं करेंति २ ता मेहस्स आयारभंडगं गेण्हंति २ ता विउलाओ पव्वयाओ
सणियं २ पच्चोरुहंति २ ता जेणामेव गुणसिलए उज्जाणे जेणामेव समणे भगवं महा-
वीरे तेणामेव उवागच्छंति २ ता समणं भगवं महावीरं वंदंति नमंसंति वं० २ ता
एवं वयासी-एवं खलु देवाणुप्पियाणं अंतेवासी मेहे नामं अणगारे पगइभइए जाव
विणीए । से ण देवाणुप्पिएहि अब्भणुत्ताए समाणे गोयमाइए समणे निगंथे निगं-
थीओ य खामेत्ता अम्हेहिं सट्ठिं विपुलं पव्वयं सणियं २ दुरुहइ २ ता सयमेव मेघ-
घणसन्निगासं पुढाविसिलं (पट्टयं)पडिलेहेइ २ ता भत्तपाणपडियाइक्खिए अणुपुव्वेणं
कालगए । एस णं देवाणुप्पिया । मेहस्स अणगारस्स आयारभंडए ॥ ३६ ॥ भंते !
त्ति भगवं गोयमे समणं भगवं महावीरं वंदइ नमंसइ वं० २ ता एवं वयासी-एवं
खलु देवाणुप्पियाणं अंतेवासी मेहे नामं अणगारे, से णं भंते ! मेहे अणगारे
कालमासे कालं किच्चा कहिं गए कहिं उववत्ते ? गोयमाइ समणे भगवं महावीरे
भगवं गोयमं एवं वयासी-एवं खलु गोयमा ! मम अंतेवासी मेहे नामं अणगारे
पगइभइए जाव विणीए, से णं तहारूवाणं थेराणं अंतिए सामाइयमाइयाइं एक्का-
रस अंगाईं अहिज्जइ २ ता वारस भिक्खुपडिमाओ गुणरयणसंवच्छरं तवोक्कम्मं
काएणं फासेत्ता जाव किट्ठेत्ता मए अब्भणुत्ताए समाणे गोयमाइ थेरे खामेइ २
ता तहारूवेहिं जाव विउलं पव्वयं दुरुहइ २ ता दव्वभसंथारगं संथरइ २ ता
दव्वभसथारोवगए सयमेव पंचमहव्वए उच्चारेइ वारस वासाईं सामणपरियागं
पाउणित्ता मासियाए संलेहणाए अप्पाण झूसित्ता सट्ठिं भत्ताइ अणसणाए छेदेत्ता
आलोइयपडिक्कंते उद्धियसल्ले समाहिपत्ते कालमासे कालं किच्चा उट्ठं चंदिमसूरग-
हणनक्खत्तताराहूवाणं वट्ठइं जोयणाइं वट्ठइं जोयणसयाइं वट्ठइं जोयणसहस्साइं

बहूइं जौयणसयसहस्साइं बहू(ई)इ जौयणकोडीओ बहूइ जौयणकोडाकोडीओ उहुं
 दूरं उप्पइत्ता सोहम्मीसाणसणकुमारमाहिंदवंभलंतगमहासुक्कसहस्साराणयपाणयार-
 णच्चुए तिण्णि य अट्टारसुत्तरे गेवेज्जविमा(ण)णावाससए वीइवइत्ता विजए महाविमाणे
 देवत्ताए उववन्ने । तत्थ णं अत्थेगइयाणं देवाणं ते(व)त्तीसं सागरोवमाइं ठिई
 पन्नत्ता । तत्थ णं मेहस्सवि देवस्स तेत्तीसं सागरोवमाइं ठिई पन्नत्ता । एस णं
 भंते ! मेहे देवे ताओ देवलोयाओ आउक्खएणं ठिइक्खएणं भवक्खएणं अणंतं
 चयं चइत्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्झि-
 हिइ बुज्झिहिइ मुच्चिहिइ परिनिव्वाहिइ सव्वदुक्खाणमंतं काहिइ । एवं खलु जंबू !
 समणेणं भगवया महावीरेणं आइगरेणं तित्थगरेणं जाव संपत्तेणं अप्पोपालंभ-
 निमित्तं पढमस्स नायज्झयणस्स अयमट्ठे पन्नत्ते त्तिबेमि ॥ ३७ ॥ गाहा-महुरेहिं
 निउणेहिं वयणेहिं चोययंति आयरिया । सीसे कहिंचि खलिए जह मेहमुणिं महावीरो
 ॥ १ ॥ पढमं अज्झयणं समत्तं ॥

जइ णं भंते ! समणेणं भगवया महावीरेणं जाव संपत्तेणं पढमस्स नायज्झयणस्स
 अयमट्ठे पन्नत्ते विइयस्स णं भंते ! नायज्झयणस्स के अट्ठे पन्नत्ते ? एवं खलु जंबू !
 तेणं कालेणं तेणं समएणं रायगिहे नामं नयरे होत्था वण्णओ । [तत्थ णं रायगिहे
 नयरे सेणिए नामं राया होत्था महया वण्णओ] त(त्थ)स्स णं रायगिहस्स नयरस्स
 बहिया उत्तरपुरच्छिमे दिसीभाए गुणसिलए नामं उज्जाणे होत्था वण्णओ । तस्स
 णं गुणसिलयस्स उज्जाणस्स अदूरसामंते एत्थ णं महं एगे (पडिय) जिण्णुज्जाणे यावि
 होत्था विणट्ठदेवउले परिसडियतोरणघरे नाणाविहुगुच्छगुम्मलयावल्लिवच्छच्छाइए
 अणेगवालसयसंकणिज्जे यावि होत्था । तस्स णं जिण्णुज्जाणस्स बहुमज्झदेसभाए
 एत्थ णं महं एगे भग्गकूवए यावि होत्था । तस्स णं भग्गकूवस्स अदूरसामंते एत्थ णं
 महं एगे मालुयाकच्छए यावि होत्था किण्हे किण्होभासे जाव रम्मे महामेहनिउरंवभूए
 बहूहिं रुक्खेहि य गुच्छेहि य गुम्मेहि य लयाहि य वल्लीहि य (तणेहि य) कुसेहि
 य खाणुएहि य संछन्ने पल्लिच्छन्ने अंतो झुसिरे वाहिं गंभीरे अणेगवालसयसंकणिज्जे
 यावि होत्था ॥ ३८ ॥ तत्थ ण रायगिहे नयरे ध(णे)ण्णे नामं सत्थवाहे अट्ठे दित्ते
 जाव विउलभत्तपाणे । तस्स णं धण्णस्म सत्थवाहस्स भद्दा नामं भारिया होत्था
 सुकुमालपाणिपाया अहीणपडिपुण्णपंचिंदियसरीरा लक्खणवंजणगुणोववेया माणु-
 म्माणप्पमाणपडिपुण्णसुजायसव्वंगसुंदरंगी ससिसोमागारा कंता पियदंसणा सुरूवा
 करयलपरिमियतिवलियमज्झा कुंडलुल्लिहियगंडलेहा कोमुइ(य)रयणियरपडिपुण्ण-
 सोमवयणा सिगारागारचारुवेसा जाव पडिरूवा वंझा अवियाउरी जाणुकोप्परमाया
 ६२ सुत्ता०

यावि होत्था ॥३९॥ तस्स णं धण्णस्स सत्थवाहस्स पंथए ना(म)मं दासचेडे होत्था
 सव्वंगसुंदरंगे मंसोवचिए बालकीलावणकुसले यावि होत्था । तए णं से धण्णे सत्थ-
 वाहे रायगिहे नयरे वहूणं नगरनिगमसेट्टिसत्थवाहाणं अट्टारसण्ह य सेणिप्पसेणीणं
 व(हु)हूसु कज्जेसु य कुडुंवेषु य (मंतेसु य) जाव चक्खुभूए यावि होत्था नियगस्स
 वि य णं कुडुंवस्स वहूसु(य) कज्जेसु जाव चक्खुभूए यावि होत्था ॥४०॥ तत्थ णं
 रायगिहे नयरे विजए नामं तक्करे होत्था पावे चंडालरूवे भीमतरसुद्धकम्मे आरुसिय-
 दित्तरत्तनयणे खरफरुसमहल्लविगयवीभ(त्थ)च्छदाडिए असंपुडियउट्टे उद्धुयपइण्णलं-
 वंतमुद्धए भमरराहुवण्णे निरणुक्कोसे निरणुतावे दारुणे पइभए निसंसइए निरणुकंपे
 अ(हिक्ख)हीव एगंतदि(ट्टि)ट्टीए खुरेव एगंतधाराए गिद्धेव आमिसतल्लिच्छे अग्गिमिव
 सव्वभ(क्खे)क्खी जलमिव सव्व(गा)ग्गाही उक्कंचगवंचणमायानियडिकूडकवडसाइ-
 संपओगवहुले चिरनगरविणट्टुडुडुसीलायारचरित्ते जूय(प)प्पसंगी मज्जप्पसंगी भोजप्प-
 संगी मंसप्पसंगी दारुणे हिययदारए साहसिए संधिच्छेयए उवहिए विस्संभवाई आली-
 यगतित्थमेयलहुहत्थसंपउत्ते परस्स दव्वहरणंसि निच्चं अणुवद्धे तिक्खवेरे रायगिहस्स
 नगरस्स वहूणि अइगमणाणि य निग्गमणाणि य वा(दा)राणि य अववाराणि य
 छिं(डि)डीओ य खंडीओ य नगरनिद्धमणाणि य संवट्टणाणि य निव्वट्टणाणि य जू(व)-
 यखलयाणि य पाणागाराणि य वेसागाराणि य (तट्टारट्टाणाणि य) तक्करट्टाणाणि य
 तक्करघराणि य सिं(गा)वाडगाणि य ति(या)गाणि य चउक्काणि य चच्चराणि य नागघ-
 राणि य भूयघराणि य जक्खदेउलाणि य सभाणि य पवाणि य पणियसालाणि य सुन्न-
 घराणि य आभोएमाणे (२) मग्गमाणे गवेसमाणे बहुजणस्स छिद्देषु य विसमेसु य विहु-
 रेसु य वसणेषु य अब्भुदएसु य उस्सवेसु य पसवेसु य तिहीसु य छणेषु य जन्नेसु य
 पव्वणीसु य मत्तपमत्तस्स य वक्खित्तस्स य वाउलस्स य सुहियस्स य दु(क्खि)हियस्स
 य विदेसत्थस्स य विप्पवसियस्स य मग्गं च छिद्दं च विरहं च अंतरं च मग्गमाणे
 गवेसमाणे एवं च णं विहरइ, वहिया वि य णं रायगिहस्स नगरस्स आरामेषु य उज्जा-
 णेषु य वाविपोक्खरणीदीहियाणुंजालिया(सरेसु य)सरपंति(सु य)यसरसरपंतियासु य
 जिण्णुज्जाणेषु य भग्गकूवएसु य मालुयाकच्छएसु य सुसाणेषु य गिरिकंदरलेणउवट्टा-
 णेषु य बहुजणस्स छिद्देषु य जाव एवं च णं विहरइ ॥ ४१ ॥ तए णं तीसे भद्दाए
 भारियाए अन्नया क्रयाइं पुव्वरत्तावरत्तकालसमयंसि कुडुंवजागरियं जागरमाणीए
 अयमेयारूवे अज्झत्थिए जाव समुप्पज्जित्था-अहं धण्णेणं सत्थवाहेगं सद्धिं वहूणि
 वासाणि सद्धफरिसरस(गंध)रूवाणि माणुस्सगाइं कामभोगाइं पच्चणुब्भवमाणी
 विहरामि नो चेव णं अहं दारगं वा दारि(गं)यं वा प(या)यामि । तं धन्नाओ णं ताओ.

अम्मयाओ जाव सुलद्धे णं माणुस्सए जम्मजीवियफळे तासिं अम्मयाणं जासिं मजे
 नियगकुच्छिसंभूयाइं थणदुद्धलुद्धयाइं महुरसमुल्लावगाइं मम्मणपयंपियाइं थणमू(ल)ला
 कक्खदेसभागं अभिसरमाणाइं मुद्धयाइं थणयं पि(वं)यंति तओ य कोमलकमलोव-
 मेहिं हत्थेहिं गिण्हिऊणं उच्छंगे निवेसियाइं देंति समुल्लावए पिए सुमहुरे पुणो २
 मंजुलप्पभणिए । (तं) अहं णं अधन्ना अपुण्णा अ[कय]लक्खणा (अकयपुण्णा) एत्तो
 एगमवि न पत्ता । तं सेयं मम कलं पाउप्पभायाए जाव जलंते धणं सत्थवाहं
 आपुच्छिता धण्णेणं सत्थवाहेणं अब्भणुन्नाया समाणी सुबहुं विपुलं असणं ४
 उवक्खडावेत्ता सुबहुं पुप्फ(वत्थ)गंधमल्लालंकारं गहाय बहूहिं मित्तनाइनियगसयण-
 संबंधिपरिजणमहिलाहिं सद्धि संपरिवुडा जाइं इमाइं रायगिहस्स नयरस्स बहिया
 नागाणि य भूयाणि य जक्खाणि य इंदाणि य खंदाणि य रुद्धाणि य सि(से)वाणि
 य वेसमणाणि य तत्थ णं बहूणं नागपडिमाण य जाव वेसमणपडिमाण य महरिहं
 पुप्फच्चणियं करेत्ता जल्लु(जाणु)पायपडियाए एवं वडत्तए-जइ णं अहं देवाणुप्पिया !
 दारगं वा दारिगं वा पयायामि तो णं अहं तुब्भं जायं च दायं च भायं च अक्ख-
 यणिहिं च अणुवड्ढेमि त्तिकहु उवाइयं उवाइत्तए । एवं संपेहेइ २ ता कलं जाव
 जलंते जेणामेव धण्णे सत्थवाहे तेणामेव उवागच्छइ २ ता एवं वयासी-एवं खलु
 अहं देवाणुप्पिया ! तुब्भेहिं सद्धि बहूइं वासाइं जाव देंति समुल्लावए सुमहुरे पुणो
 २ मंजुलप्पभणिए, तं णं अहं अहन्ना अपुण्णा अकयलक्खणा एत्तो एगमवि न पत्ता,
 तं इच्छामि णं देवाणुप्पिया ! तुब्भेहिं अब्भणुन्नाया समाणी विपुलं असणं ४ जाव
 अणुवड्ढेमि उवाइयं क(रे)रित्तए । तए णं धण्णे सत्थवाहे भइं भारियं एवं वयासी-
 ममं पि य णं (खलु)देवाणुप्पिए ! एस चेव मणोरहे-कहं णं तुमं दारगं वा दारियं वा
 पयाए(ज)जासि (?) भद्दाए सत्थवाहीए एयमट्ठं अणुजाणइ । तए णं सा भद्दा
 सत्थवाही धण्णेणं सत्थवाहेणं अब्भणुन्नाया समाणी हट्ठतुट्ठ जाव हयहियया विपुलं
 असणं ४ उवक्खडावेइ २ ता सुबहुं पुप्फगंध(वत्थ)मल्लालंकारं गेण्हइ २ ता सयाओ
 गिहाओ निगगच्छइ २ ता रायगिहं नयरं मज्झंमज्झेणं निगगच्छइ २ ता जेणेव
 पोक्खरिणी तेणेव उवागच्छइ २ ता पुक्खरिणीए तीरे सुबहुं पुप्फ जाव मल्लालंकारं
 ठवेइ २ ता पुक्खरिणि ओगाहेइ २ ता जलमज्जणं करेइ जल(कीडं)किडुं करेइ
 २ ता ण्हाया उल्लपडसाडिगा जाइं तत्थ उप्पलाइं जाव सहस्सपत्ताइं ताइं गिण्हइ
 २ ता पुक्खरिणीओ पच्चोरुहइ २ ता तं सुबहुं पुप्फ[वत्थ]गंधमल्लं गेण्हइ २ ता
 जेणामेव नागघरए (य) जाव वेसमणघरए य तेणामेव उवागच्छइ २ ता तत्थ णं
 नागपडिमाण य जाव वेसमणपडिमाण य आलोए पणामं करेइ ईसिं पच्चुवमइ

२ ता लोमहत्थेणं परासुसइ २ ता नागपडिमाओ य जाव वेसमणपडिमाओ य लोमहत्थेणं पमज्जइ उदगधाराए अब्भुक्खेइ २ ता पम्हलसुकुमालाए गंधकासा(ई)इए गायार्इ लहेइ २ ता महरिहं वत्थारुहणं च मल्लारुहणं च गंधारुहणं च चुण्णारुहणं च वण्णारुहणं च करेइ २ ता (जाव) धूवं डहइ २ ता जन्नुपायपडिया पंजलिउडा एवं वयासी-जइ णं अहं दारगं वा दारियं वा प(या)यामि तो णं अहं जायं च जाव अणु-वद्धेमि त्तिकट्टु उवाइयं करेइ २ ता जेणेव पोक्खरिणी तेणेव उवागच्छइ २ ता विपुलं असणं ४ आसाएमाणी जाव विहरइ जिमि(या)य जाव सुइभूया जेणेव सए गिहे तेणेव उवागया । अदुत्तरं च णं भद्दा सत्थवाही चाउद्दसट्टमुद्धिपुण्णमासिणीसु विपुलं असणं ४ उवक्खडेइ २ ता वहवे नागा (यणे) य जाव वेसमणा य उवायमाणी नमंसमाणी जाव एवं च णं विहरइ ॥ ४२ ॥ तए णं सा भद्दा सत्थवाही अन्नया कयाइ केणइ कालंतरेणं आवन्नसत्ता जाया यावि होत्था । तए णं तीसे भद्दाए सत्थवाहीए दोसु मासेसु वीइकंतेसु त(इ)ईए मासे वट्ठमाणे इमेयारूवे दोहले पाउब्भूए-धन्नाओ णं ताओ अम्म-याओ जाव कयलक्खणाओ (णं) ताओ अम्मयाओ जाओ णं विउलं असणं ४ सुवहुयं पुप्फ(वत्थ)गंधमल्लालंकारं गहाय मित्तनाइनियगसयणसंवंधिपरियणमहिलियाहि य सद्धिं संपरिवुडाओ रायगिहं नयरं मज्झमज्झेणं निग्गच्छंति २ ता जेणेव पुक्खरिणी तेणेव उवागच्छंति २ ता पोक्खरिणीं ओगाहंति २ ता ण्हायाओ सव्वालंकार-विभूसियाओ विपुलं असणं ४ आसाएमाणीओ जाव पडिभुंजेमाणीओ दोहलं विणेंति । एवं संपेहेइ २ ता कल्लं जाव जलंते जेणेव धण्णे सत्थवाहे तेणेव उवागच्छइ २ ता धण्णं सत्थवाहं एवं वयासी-एवं खलु देवाणुप्पिया ! मम तस्स गब्भस्स जाव विणेंति, तं इच्छामि णं देवाणुप्पिया ! तुब्भेहि अब्भणुन्नाया समाणी जाव विहरित्तए । अहासुहं देवाणुप्पि(ए)या ! मा पडिवंधं करेह । तए णं सा भद्दा सत्थवाही धण्णेणं सत्थवाहेणं अब्भणुन्नाया समाणी ह(द्धु)ट्ठा जाव विपुलं असणं ४ जाव ण्हाया उल्लपडसाडगा जेणेव नागघराए जाव धूवं ड(द)हइ २ ता पणामं करेइ २ ता जेणेव पोक्खरिणी तेणेव उवागच्छइ । तए णं ताओ मित्तनाइ जाव नगरमहिलाओ भद्दं सत्थवाहिं सव्वालंकारविभूसियं करंति । तए णं सा भद्दा सत्थवाही ताहिं मित्तनाइनियगसयणसंवंधिपरिजणनगरमहिलियाहिं सद्धिं तं विपुलं असणं ४ जाव परिभुं(ज)जेमाणी (य) दोहलं विणेइ २ ता जामेव दिसिं पाउब्भूया तामेव दिसिं पडिगया । तए णं सा भद्दा सत्थवाही संपुण्ण(जे)दोहला जाव तं गब्भं सुहंसुहेणं परिवहइ । तए णं सा भद्दा सत्थवाही नवण्हं मासाणं बहुपडिपुण्णाणं अद्धट्ठमाण य राइंदियाणं सुकुमालपाणिपायं जाव दारगं पयाया । तए णं तस्स

दारगस्स अम्मापियरो पढमे दिवसे जायकम्मं करेंति २ ता तहेव जाव विपुलं
 असणं ४ उवक्खडावेति २ ता तहेव मित्तनाइनियग० भोयावेत्ता अयमेयारुवं गोण्णं
 गुणनिप्फन्नं नामधेज्जं करेंति-जम्हा णं अम्हं इमे दारए बहूणं नागपडिमाण य
 जाव वेसमणपडिमाण य उवाइयलद्धे (णं) तं होउ णं अम्हं इमे दारए देवदिन्ने
 नामेणं । तए णं तस्स दारगस्स अम्मापियरो नामधेज्जं करेंति देवदिन्नेति । तए
 णं तस्स दारगस्स अम्मापियरो जायं च दायं च भायं च अक्खयनिहिं च
 अणुवड्ढेति ॥ ४३ ॥ तए णं से पंथए दासचेडए देवदिन्नस्स दारगस्स बालग्गाही
 जाए, देवदिन्नं दार(यं)गं कडीए गेण्हइ २ ता बहूहिं डिभएहि य डिभियाहि य
 दारएहि य दारियाहि य कुमारएहि य कुमारियाहि य सद्धि संपरिवुडे (अभिरममाणे)
 अभिरमइ । तए णं सा भद्दा सत्थवाही अन्नया कयाइं देवदिन्नं दारयं ण्हायं
 सव्वालंकारविभूसियं करेइ २ ता पंथयस्स दासचेडयस्स हत्थयंसि दलयइ । तए
 णं से पंथए दासचेडए भद्दाए सत्थवाहीए हत्थाओ देवदिन्नं दारगं कडीए गेण्हइ
 २ ता सयाओ गिहाओ पडिनिक्खमइ २ ता बहूहिं डिभएहि य डिभियाहि य जाव
 कुमारियाहि य सद्धि संपरिवुडे जेणेव रायमग्गे तेणेव उवागच्छइ २ ता देवदिन्नं
 दारगं एगंते ठावेइ २ ता बहूहिं डिभएहि य जाव कुमारियाहि य सद्धि संपरिवुडे
 पमत्ते यावि (होत्था) विहरइ । इमं च णं विजए तक्करे रायगिहस्स नयरस्स
 बहूणि वाराणि य अववाराणि य तहेव जाव आभोएमाणे मग्गेमाणे गवेसमाणे
 जेणेव देवदिन्ने दारए तेणेव उवागच्छइ २ ता देवदिन्नं दारगं सव्वालंकारविभूसियं
 पासइ २ ता देवदिन्नस्स दारगस्स आभरणालंकारेसु मुच्छिए गढिए गिद्धे अज्झोववन्ने
 पंथ(यं)गं दासचेडं पमत्तं पासइ २ ता दिसालोयं करेइ २ ता देवदिन्नं दारगं गेण्हइ २
 ता कक्खंसि अल्लियावेइ २ ता उत्तरिज्जेणं पिहेइ २ ता सिग्गं तुरियं चवलं वेइयं रायगि-
 हस्स नगरस्स अवदारेणं निग्गच्छइ २ ता जेणेव जिण्णुज्जाणे जेणेव भग्गकूवए तेणेव
 उवागच्छइ २ ता देवदिन्नं दारयं जीवियाओ ववरोवेइ २ ता आभरणालंकारं गेण्हइ
 २ ता देवदिन्नस्स दारगस्स सरी(रगं)रं निप्पाणं निच्चेट्ठं जी(विय)वविप्पजडं भग्गकूवए
 पक्खिवइ २ ता जेणेव मालुयाकच्छए तेणेव उवागच्छइ २ ता मालुयाकच्छयं अणुप्प-
 विसइ २ ता निच्चले निप्फंदे तुसिणीए दिवसं ख(खि)वेमाणे चिट्ठइ ॥ ४४ ॥ तए णं से
 पंथए दासचेडे तओ मुहुत्तंतरस्स जेणेव देवदिन्ने दारए ठविए तेणेव उवागच्छइ २ ता
 देवदिन्नं दारगं तंसि ठाणंसि अपासमाणे रोयमाणे कंदमाणे विलवमाणे देवदिन्नस्स
 दारगस्स सव्वओ समंता मग्गणगवेसणं करेइ २ ता देवदिन्नस्स दारगस्स कत्थइ खुइं
 वा खुइं वा पउत्ति वा अलभमाणे जेणेव सए गिहे जेणेव धण्णे सत्थवाहे तेणेव

उवागच्छइ २ ता धण्णं सत्थवाहं एवं वयासी-एवं खलु सामी ! भद्दा सत्थवाही देवदिन्नं दारयं ण्हायं स० मम ह(त्यंसि)त्ये दलयइ । तए णं अहं देवदिन्नं दारयं कडीए गिण्हामि जाव मग्गणगवेसणं करेमि । तं न नज्जइ णं सा(मि)मी ! देवदिन्ने दारए केणइ ह(णी)ए वा अवहिए वा अ(वखि)क्खित्ते वा पायवडिए धण्णस्स सन्थवाहस्स एयमट्ठं निवेदेइ । तए णं से धण्णे सत्थवाहे पंथयस्स दासचेडयस्स एयमट्ठं सोच्चा निसम्म तेण य महया पुत्तसोएणाभिभूए समाणे फ(प)रसुणियत्ते व चंपगपायवे धसत्ति धरणीयलंसि सव्वंगेहिं सन्निवइए । तए णं से धण्णे सत्थवाहे तओ मुहुत्तंतरस्स आसत्थे प(च्छा)च्चागयपाणे देवदिन्नस्स दारगस्स सव्वओ समंता मग्गणगवेसणं करेइ देवदिन्नस्स दारगस्स कथइ सुइं वा खुइं वा प(उ)वत्ति वा अलममाणे जेणेव सए गिहे तेणेव उवागच्छइ २ ता महत्थं पाहुडं गेण्हइ २ ता जेणेव नगरगुत्तिया तेणेव उवागच्छइ २ ता तं महत्थं पाहुडं उवणेइ २ ता एवं वयासी-एवं खलु देवाणुप्पिया ! मम पुत्ते भद्दाए भारियाए अत्तए देवदिन्ने नामं दारए इट्ठे जाव उंवरपुप्फंपिव दुल्लहे सवणयाए किमंग पुण पासणयाए (?) । तए णं सा भद्दा [भारिया] देवदिन्नं [दारगं] ण्हायं सव्वालंकारविभूसियं पंथगस्स हत्ये दलाइ जाव पायवडिए तं ममं निवेदेइ । तं इच्छामि णं देवाणुप्पिया ! देवदिन्नस्स दारगस्स सव्वओ समंता मग्गणगवेसणं करं । तए णं ते नगरगोत्तिया धण्णेणं सत्थवाहेणं एवं जुत्ता समाणा सन्नद्धवद्ध(वम्मिय)कंवया उप्पीलियसरासण(व)पट्टिया जाव गहियाउहपहरणा धण्णेणं सत्थवाहेणं सद्धिं रायगिहस्स नगरस्स वहुणि अइगमणाणि य जाव पवानु य मग्गणगवेसणं करेमाणा रायगिहाओ नगराओ पडिनिक्खमंति २ ता जेणेव जिण्णुज्जाणे जेणेव भग्गकूवए तेणेव उवागच्छंति २ ता देवदिन्नस्स दारगस्स सरीरगं निप्पाणं निच्चेट्ठं जीवविप्पजडं पासंति २ ता हा हा अहो अकज्जमितिकट्ठु देवदिन्नं दारगं भग्गकूवाओ उत्तारेंति २ ता धण्णस्स सत्थवाहस्स हत्ये(णं) दलयंति ॥४५॥ तए णं ते नगरगुत्तिया विजयस्स तक्करस्स पयमग्गमणुगच्छमाणा (२) जेणेव मालुयाकच्छए तेणेव उवागच्छंति २ ता मालुयाकच्छ(यं)गं अणुप्पविसंति २ ता विजयं तक्करं ससक्खं सहोडं सगेवेज्जं जीवग्गाहं गेण्हंति २ ता अट्ठिसुट्ठिजाणु-कोप्परपहारसंभग्गमहियगतं करेंति २ ता अव(उडा)ओडगवंधणं करेंति २ ता देवदिन्न(ग)स्स दारगस्स [सव्वं] आभरणं गेण्हंति २ ता विजयस्स तक्करस्स गीवाए वंधंति २ ता मालुयाकच्छगाओ पडिनिक्खमंति २ ता जेणेव रायगिहे नयरे तेणेव उवागच्छंति २ ता रायगिहं नयरं अणुप्पविसंति २ ता रायगिहे नयरे सिंघाडगतिगचउक्कचच्चरमहापहपहेसु कसप्पहारे य लयापहारे य छिवापहारे य

निवा(ए)यमाणा २ छारं च धूलि च कयवरं च उवरिं पक्किरमाणा २ महया २ सद्देणं उग्घोसेमाणा एवं वयंति-एस णं देवाणुप्पिया ! विजए नामं तक्करे जाव गिद्धे विव आमिसभक्खी वालघायए बालमारए, तं नो खलु देवाणुप्पिया ! एयस्स केइ राया वा (रायपुत्ते वा) रायमच्चे वा अवरज्झइ (एत्थहे) नन्नत्थ अप्पणो सयाइं कम्माइं अवरज्झंति-त्तिकु जेणामेव चारगसाला तेणामेव उवागच्छंति २ ता हडिवंधणं करेंति २ ता भत्तपाणनिरोहं करेंति २ ता तिसंझं कसप्पहारे य जाव निवाएमाणा २ विहरंति । तए णं से धण्णे सत्थवाहे मित्तनाइनियगसयणसंवंधिपरियणेणं सद्धिं रोयमाणे जाव विलवमाणे देवदिन्नस्स दारगस्स सरीरस्स महया इद्धीसक्कार-समुदएणं नी(नि)हरणं करे(न्ति)इ २ ता वहूइं लोइयाइं मय(ग)किच्चाइं करेइ २ ता केणइ कालंतरेणं अवगयसोए जाए यावि होत्था ॥ ४६ ॥ तए णं से धण्णे सत्थवाहे अन्नया कयाइं ल(हू)हुसर्यंसि रायावराहंसि संपलत्ते जाए यावि होत्था । तए णं ते नगरगुत्तिया धण्णं सत्थवाहं गेण्हंति २ ता जेणेव चार(गे)ए तेणेव उवागच्छंति २ ता चारगं अणुपवेसंति २ ता विजएणं तक्करेणं सद्धिं एगयओ हडिवंधणं करेंति । तए णं सा भद्दा भारिया कल्लं जाव जलंते विपुलं असणं ४ उवक्खडेइ २ ता भोयणपिंडए करेइ २ ता भो(भा)यणाइं पक्खिवइ २ ता लंछिय-मुद्धियं करेइ २ ता एगं च सुरभिवारिपडिपुण्णं दगवारयं करेइ २ ता पंथयं दासचेडं सद्दावेइ २ ता एवं वयासी-गच्छ(ह) णं तुमं देवाणुप्पिया ! इमं विपुलं असणं ४ गहाय चारगसालाए धण्णस्स सत्थवाहस्स उवणेहि । तए णं से पंथए भद्दाए सत्थवाहीए एवं वुत्ते समाणे हट्ठुट्ठे तं भोयणपिड(यं)गं तं च सुरभिवरवारिपडिपुण्णं दगवारयं गेण्हइ २ ता सयाओ गिहाओ पडिनिक्खमइ २ ता रायगिहं नगरं मज्झंमज्झेणं जेणेव चारगसाला जेणेव धण्णे सत्थवाहे तेणेव उवागच्छइ २ ता भोयणपि(डि)डयं ठावेइ २ ता उल्लंछेइ २ ता (भायणाइं) भोयणं गेण्हइ २ ता भायणाइं धोवेइ २ ता हत्थसोयं दलयइ २ ता धण्णं सत्थवाहं तेणं विपुलेणं असणेणं ४ परिवेसेइ । तए णं से विजए तक्करे धण्णं सत्थवाहं एवं वयासी-तु(मं)ब्भे णं देवाणुप्पिया ! म(म)मं एयाओ विपुलाओ असणाओ ४ संविभागं करेहि । तए णं से धण्णे सत्थवाहे विजयं तक्करं एवं वयासी-अवियाइं अहं विजया ! एवं विपुलं असणं ४ का(या)गाणं वा सुणगाणं वा दलएज्जा उक्कुडियाए वा णं छट्ठेज्जा नो चेव णं तव पुत्तघायगस्स पुत्तमारगस्स अरिस्सं वेरियस्स पडिणीयस्स पच्चामित्तस्स एत्तो विपुलाओ असणाओ ४ संविभागं करेज्जामि । तए णं से धण्णे सत्थवाहे तं विपुलं असणं ४ आहारेइ २ ता तं पंथगं पडिविसजेइ । तए णं से पंथए दासचे-

डे'तं भोयणपिडगं गिण्हइ २ ता जागेव दिसिं पाउब्भूए तामेव दिसिं पडिगए ।
 तए णं तस्स धण्णस्स सत्थवाहस्स तं विपुलं असणं ४ आहारियस्स समाणस्स
 उच्चारपासवणे णं उब्वाहित्था । तए णं से धण्णे सत्थवाहे विजयं तक्करं एवं
 वयासी-एहि ताव विजया ! एगंतमवक्कमामो जेणं अहं उच्चारपासवणं परिट्ठवेमि ।
 तए णं से विजए तक्करे धण्णं सत्थवाहं एवं वयासी-तुब्भं देवाणुप्पिया । विपुलं
 असणं ४ आहारियस्स अत्थि उच्चारे वा पासवणे वा, ममं णं देवाणुप्पिया । उमेहिं
 बह्महिं कसप्पहारेहि य जाव लयापहारेहि य तण्हाए य छुहाए य परब्भवमाणस्स
 नत्थि केइ उच्चारे वा पासवणे वा, तं छदेणं तुमं देवाणुप्पिया । एगंते अवक्कमिता
 उच्चारपासवणं परिट्ठवेहि । तए णं से धण्णे सत्थवाहे विजएणं तक्करेणं एवं वुत्ते
 समाणे तुसिणीए संचिट्ठइ । तए णं से धण्णे सत्थवाहे मुहुत्तंतरस्स बलियतराणं
 उच्चारपासवणेणं उब्वाहिज्जमाणे विजयं तक्करं एवं वयासी-एहि ताव विजया ।
 जाव अवक्कमामो । तए णं से विजए धण्णं सत्थवाहं एवं वयासी-जइ णं तुमं
 देवाणुप्पिया । ता(त)ओ विपुलाओ असणाओ ४ संविभागं करेहि तओ हं तु(मे)व्भेहिं
 सद्धिं एगंतं अवक्कमामि । तए णं से धण्णे सत्थवाहे विजयं एवं वयासी-अहं णं
 तुब्भं ताओ विपुलाओ असणाओ ४ संविभागं करिस्सामि । तए णं से विजए
 धण्णस्स सत्थवाहस्स एयमट्ठं पडिउणेइ । तए णं से विजए धण्णेणं सद्धिं एगंते
 अवक्क(मे)मइ उच्चारपासवणं परिट्ठवेइ आयंते चोक्खे परमसुइभूए तमेव ठाणं उव-
 संकमित्ताणं विहरइ । तए णं सा भद्दा कलं जाव जलंते विपुलं असणं ४ जाव
 परिवेसेइ । तए णं से धण्णे सत्थवाहे विजयस्स तक्करस्स ताओ विपुलाओ
 असणाओ ४ संविभागं करेइ । तए णं से धण्णे सत्थवाहे पंथगं दासचेडं विसज्जेइ ।
 तए णं से पंथए भोयणपिडयं गहाय चार(गा)गसालाओ पडिनिक्खमइ २ ता राय-
 गिहं नयरं मज्झंमज्झेणं जेणेव सए गि(गे)हे जेणेव भद्दा (भारिया) सत्थवाही तेणेव
 उवागच्छइ २ ता भद्दं सत्थवाहिणिं एवं वयासी-एवं खलु देवाणुप्पिए ! धण्णे सत्थवाहे
 तव पुत्तघायगस्स जाव पच्चामित्तस्स ताओ विपुलाओ असणाओ ४ संविभागं
 करेइ ॥ ४७ ॥ तए णं सा भद्दा सत्थवाही पंथगस्स दासचेडगस्स अंतिए
 एयमट्ठं सोच्चा आसुरत्ता रुट्ठा जाव मिसिमिसेमा(णा)णी धण्णस्स सत्थवाहस्स
 पओसमावज्जइ । तए णं से धण्णे सत्थवाहे अजया कयाइं मित्तनाइनियगसयण-
 संबंधिपरियणेणं सएण य अत्थसारेंणं रायकज्जाओ अप्पाणं मोयावेइ २ ता
 चारगसालाओ पडिनिक्खमइ २ ता जेणेव अलंकारियसभा तेणेव उवागच्छइ
 २ ता अलंकारियकम्मं क(रे)रावेइ २ ता जेणेव पुक्खरिणी तेणेव उवागच्छइ २ ता

अह धोयमट्टियं गेण्हइ २ ता पोक्खरिणीं ओगाहइ २ ता जलमज्जणं करेइ २ ता
 ण्हाए रायगिहं नगरं अणुप्पविसइ २ ता रायगिहस्स-नगरस्स मज्झंमज्झेणं
 जेणेव सए गिहे तेणेव पहारेत्थ गमणाए । तए णं (तं) धण्णं सत्थवाहं एज्जमाणं
 पासित्ता रायगिहे नयरे बहवे नियगसेट्ठिसत्थवाहपभि(त)इओ आढंति परिजाणंति
 सक्कारेति सम्माणेति अब्भुट्ठेति सरीरकुस(लं)लोदंतं सं-पुच्छंति । तए णं से धण्णे
 [सत्थवाहे] जेणेव सए गिहे तेणेव उवागच्छइ । जावि य से तत्थ बाहिरिया
 परिसा भवइ तंजहा-दासाइ वा पेस्साइ वा भियगाइ वा भाइल्लाइ वा (से) सा
 वि य णं धण्णं सत्थवाहं एज्ज(न्तं)माणं पासइ २ ता पायवडिया(ए) खेमकुसलं
 पुच्छ(न्ति)इ । जावि य से तत्थ अब्भितरिया, परिसा भवइ तंजहा-मायाइ वा पियाइ
 वा भायाइ वा भइणीइ वा सावि य णं धण्णं सत्थवाहं एज्जमाणं पासइ २ ता
 आसणाओ अब्भुट्ठेइ २ ता कंठाकंठियं अवयासिय बाह्णप्पमोक्खणं करेइ । तए णं
 से धण्णे सत्थवाहे जेणेव भद्दा भारिया तेणेव उवागच्छइ । तए णं सा भद्दा धण्णं
 सत्थवाहं एज्जमाणं पासइ २ ता नो आढाइ नो परियाणाइ अणाढायमाणी अपरि-
 याणमाणी तुसिणीया परम्मही संचिट्ठइ । तए णं से धण्णे सत्थवाहे भद्दं भारियं
 एवं वयासी-किं णं तुब्भं देवाणुप्पिए ! न तुट्ठी वा न हरिसे वा नाणंदे वा जं मए
 सएणं अत्थसारेणं रायकज्जाओ अप्पाणं विमोइए । तए णं सा भद्दा धण्णं सत्थवाहं
 एवं वयासी-कहं णं देवाणुप्पिया ! मम तुट्ठी वा जाव आणंदे वा भविस्सइ जेणं
 तुमं मम पुत्तघायगस्स जाव पच्चामित्तस्स ताओ विपुलाओ असणाओ ४ संविभागे
 करेसि । तए णं से धण्णे भद्दं [भारियं] एवं वयासी-नो खलु देवाणुप्पिए ! धम्मोत्ति
 वा तवोत्ति वा कयप्पडिक्कयाइ वा लोगजत्ताइ वा नायएइ वा [सं]घाडिइ वा सहा-
 एइ वा सुहिति वा ताओ विपुलाओ असणाओ ४ संविभागे कए नत्तत्थ सरीरर्चिताए ।
 तए णं सा भद्दा धण्णेणं सत्थवाहेणं एवं वुत्ता समाणी ह(ट्ठु)ट्ठा जाव आस-
 णाओ अब्भुट्ठेइ २ ता कंठाकंठिं अवयासेइ खेमकुसलं पुच्छइ २ ता ण्हाया विपु-
 लाइं भोगभोगाइं भुंजमाणी विहरइ । तए णं से विजए तक्करे चारगसालाए तेहि
 बंधेहिं वहेहिं कसप्पहारेहि य जाव तण्हाए य लुहाए य परब्भवमाणे कालमासे
 कालं किच्चा नरएसु नेरइयत्ताए उववन्ने । से णं तत्थ नेरइए जाए काले कालोभासे
 जाव वेयणं पच्चणुब्भवमाणे विहरइ । से णं तओ उव्वट्ठिता अणादीयं अणवदग्गं
 दीहमद्धं चाउरंतसंसारकंतारं अणुपरियट्ठिस्सइ । एवामेव जंवू । जे णं अम्हं निगंथो
 वा निगंथी वा आयरियउवज्झायाणं अंतिए मुंडे भविता अगाराओ अणगारियं
 षव्वइए समाणे विपुलमणि(मु)मोत्तियधणकणगरयणसारेणं लुब्भइ से वि(य) एवं चेव

॥ ४८ ॥ तेणं कालेणं तेणं समएणं धम्मघोसा नामं थेरा भगवंतो जाइसंपन्ना कुल-
 संपन्ना जाव पुव्वाणुपुव्वि चरमाणा जाव जेणेव रायगिहे नयरे जेणेव गुणसिलए
 उज्जाणे जाव अहापडिरुवं उग्गहं उग्गिण्हित्ता संजमेणं तवसा अप्पाणं भावेमाणा
 विहरंति । परिसा निग्गया धम्मो कहिओ । तए णं तस्स धण्णस्स सत्थवाहस्स
 बहुजणस्स अंतिए एयमट्ठं सोच्चा निसम्म इमेयारुवे अज्जत्थिए जाव समुप्पजित्था-
 एवं खलु थेरा भगवंतो जाइसंपन्ना इहमागया इह-संपत्ता, तं इच्छामि णं थेरे भगवंते
 वंदामि नमंsamि ण्हाए सुद्धप्पावेसाइं मज्झाइं वत्थाइं पवरपरिंहिए पायविहार-
 चारेणं जेणेव गुणसिलए उज्जाणे जेणेव थेरा भगवंतो तेणेव उवागच्छइ २ ता वंदइ
 नमंसइ । तए णं थेरा धण्णस्स विचित्तं धम्ममाइक्खंति । तए णं से धण्णे सत्थ-
 वाहे धम्मं सोच्चा एवं वयासी-सद्दहामि णं भंते ! निग्गंथे पावयणे जाव पव्वइए
 जाव वहुणि वासाणि सामण्णपरियागं पाउणित्ता भत्तं पच्चक्खाइत्ता मासियाए संले-
 हणाए सट्ठिं भत्ताइं अणसणाए छेदेइ २ ता कालमासे कालं किच्चा सोहम्मो कप्पे
 देवत्ताए उववन्ने । तत्थ णं अत्थेगइयाणं देवाणं चत्तारि पल्लिओवमाइं ठिई प० ।
 तत्थ णं धण्णस्सवि देवस्स चत्तारि पल्लिओवमाइं ठिई प० । से णं धण्णे देवे ताओ
 देवलोगाओ आउक्खएणं ठिइक्खएणं भवक्खएणं अणंतरं चयं चइत्ता महाविदेहे
 वासे सिज्जिहिइ जाव सव्वदुक्खाणमंतं करेहिइ ॥ ४९ ॥ जहा णं जंवू ! धण्णेणं
 सत्थवाहेणं नो धम्मोत्ति वा जाव विजयस्स तक्करस्स ताओ विपुलाओ असणाओ
 ४ संविभागे कए नन्नत्थ सरीरसारक्खणट्ठाए एवामेव जंवू ! जे णं अम्हं निग्गंथे
 वा २ जाव पव्वइए समाणे ववगयण्हाण(उम्म)द्गणुप्फणंधमल्लालंकारविभूसे इमस्स
 ओरालियसरीरस्स नो वण्णहेउं वा रुवहेउं वा (वल)विसयहेउं वा [तं विपुलं] असणं
 ४ आहारमाहारेइ नन्नत्थ नाणदंसणचरित्ताणं वहण(ट्ठ)याए से णं इहलोए चेव
 वहुणं समणाणं (वहुणं) समणीणं (वहुणं) सावगाण य सावियाण य अच्चणिजे जाव
 पज्जुवासणिजे भवइ । परलोए वि य णं नो (आगच्छइ) वहूणि हत्थच्छेयणाणि य
 कग्गच्छेयणाणि य नासाछेयणाणि य एवं हिय(य)उप्पायणाणि य वसणुप्पा(ड)यणाणि
 य उल्लंघणाणि य पाविहिइ अणाईयं च णं अणवदग्गं दीहमट्ठं जाव वीईवइस्सइ
 जहा व से धण्णे सत्थवाहे । एवं खलु जंवू ! समणेणं जाव संपत्तेणं दोच्चस्स नाय-
 ज्जयणस्स अयमट्ठे पन्नत्ते त्तिवेमि ॥ ५० ॥ गाहा-सिवसाहणेसु आहारविरहिओ
 जं न वट्ठए देहो । तम्हा धण्णोव्व विजयं साट्ठ तं तेण पोसेज्जा ॥ १ ॥ वीयं
 अज्झयणं समत्तं ॥

जइ णं भंते ! समणेणं ३ जाव संपत्तेणं दोच्चस्स अज्जयणस्स नायाधम्मकहाणं

अयमद्वे पन्नत्ते तइअस्स अज्झयणस्स के अद्वे पन्नत्ते ? एवं खलु जंबू ! तेणं कालेणं
तेणं समएणं चंपा नामं नयरी होत्था वण्णओ । तीसे णं चंपाए नयरीए वहिया
उत्तरपुरच्छिमे दिसीभाए सुभूमिभाए नामं उज्जाणे होत्था स(व्वो)व्वउयपुप्फफलसमिद्धे
सुरम्मे नंदणवणे इव सुहसुरभिसीयलच्छायाए समणुवद्धे । तस्स णं सुभूमिभागस्स
उज्जाणस्स उत्तर(ओ)पुरत्थिमे एगदेसंमि मालुयाकच्छए होत्था वण्णओ । तत्थ णं
एगा व(र)णम(यू)ऊरी दो पुट्टे परियागए पिड्डुंडीपंडुरे निव्वणे निरुवहए भिन्नमुट्ठिप्प-
माणे मऊरी-अंडए पसवइ २ ता सएणं पक्खवाएणं सारक्खमाणी संगोवेमाणी
सं(वि)चिद्धेमाणी विहरइ । तत्थ णं चंपाए नयरीए दुवे सत्थवाहदारगा परिवसंति
तंजहा-जिणदत्तपुत्ते य सागरदत्तपुत्ते य सहजायया सहवद्धियया सहपंसुकीलियया
सहदारदरिसी अन्नमन्नमणुर(त्तया)त्ता अन्नमन्नमणुव्व(य)या अन्नमन्नच्छंदाणुवत्तया
अन्नमन्नहियइच्छियकारया अन्नमन्नेसु गिहेसु(किच्चाइं) कम्माइं करणिजाइं पच्चणुब्भ-
वमाणा विहरंति ॥ ५१ ॥ तए णं तेसिं सत्थवाहदारगाणं अन्नया कयाइं एगयओ
सहियाणं समुवागयाणं सन्निसण्णाणं सन्निविट्ठाणं इमेयारूवे मिहोकहासमुल्लावे समु-
प्पजित्था-जन्नं देवाणुप्पिया ! अम्हं सुहं वा दु(क्खं)हं वा पव्वज्जा वा विदेसगमणं
वा समुप्पज्जइ तं णं अम्हेहिं एगयओ समेच्चा नित्थरियव्वं-तिकट्ठु अन्नमन्नमेयारूवं
संगारं पडिसुणेंति २ ता सकम्मसंपउत्ता जाया यावि होत्था ॥ ५२ ॥ तत्थ णं चंपाए
नयरीए देवदत्ता नामं गणिया परिवसइ अट्ठा जाव भत्तपाणा चउसट्ठिकलापंडिया
चउसट्ठिगणियागुणोववेया अउणत्ती(सं)सविसेसे रममाणी एकवीसरइगुणप्पहाणा
वत्तीसपुरिसोवयारकुसला नवंगसुत्तपडिवोहिया अट्ठारसदेसीभासाविसारया सिंगारा-
गारचारुवेसा संगयगयहसिय जाव ऊसिय(झ)ज्झया सहस्सलंभा विदिच्छत्तचामर-
वाल(वि)वीयणिया कण्णीरहप्पयाया(या) वि होत्था बहूणं गणियासहस्साणं आहेवच्चं
जाव विहरइ । तए णं तेसिं सत्थवाहदारगाणं अन्नया कयाइं पु(व्वरत्तावरत्त)व्वावरणह-
कालसमयंसि जिमियभुत्तुत्तरागयाणं समाणाणं आयन्ताणं चोक्खाणं परमसुइभूयाणं
सुहासणवरगयाणं इमेयारूवे मिहोकहासमुल्लावे समुप्पजित्था-(तं) सेयं खलु अम्हं
देवाणुप्पिया ! कल्लं जाव जलंते विपुलं असणं ४ उवक्खडावेत्ता तं विपुलं असणं ४
धूवपुप्फगंधवत्थं गहाय देवदत्ताए गणियाए सद्धिं सुभूमिभागस्स (उज्जाणस्स) उज्जा-
णसिरिं पच्चणुब्भवमाणाणं विहरित्तए-तिकट्ठु अन्नमन्नस्स एयमद्वं पडिसुणेंति २ ता
कल्लं पाउ(ब्भूए)प्पभायाए कोडुंबियपुरिसे सहावेंति २ ता एवं वयासी-गच्छह णं देवा-
णुप्पिया ! विपुलं असणं ४ उवक्ख(डे)डावेह २ ता तं विपुलं असणं ४ धूवपुप्फं गहाय
जेणेव सुभूमिभागे उज्जाणे जेणेव नंदापुक्खरिणी तेणामेव उवागच्छह २ ता नंदाए

पोक्खरिणीए अदूरसामंते थूणामंडवं आहणह २ ता आसियसम्मज्जिओवलित्तं सुगंध
जाव कलियं करेह २ ता अ(म्हे)म्हं पडिवालेमाणा २ चिट्ठह जाव चिट्ठंति । तए णं
[ते] सत्थवाहदारगा दोच्चं पि कोडुं वियपुरिसे सदावेंति २ ता एवं वयासी-त्विप्पामेव
लहुकरणजुत्तजोइयं समखुरवालिहाणं समलिहियतिक्खग्गसिं गएहिं रययामयघंटसुत्तर-
ज्जुपवरकंचणखचियनत्थपग्गहोवग्गहिं नीलुप्पलकयामेलएहिं पवरगोणजुवाणएहिं
नानामणिरयणकंचणघंटियाजालपरिक्खित्तं पवरलक्खणोववेयं जु(त्त)तामेव पवहणं
उवणेह । ते वि तहेव उवणेंति । तए णं ते सत्थवाहदारगा ण्हाया अप्पमहग्गामर-
णालंकिय सरीरा पवहणं दुरुहंति २ ता जेणेव देवदत्ताए गणियाए गिहे तेणेव
उवागच्छंति २ ता पवहणाओ पच्चोरुहंति २ ता देवदत्ताए गणियाए गिहं अणुप्प-
विसंति । तए णं सा देवदत्ता गणिया [ते] सत्थवाहदारए एजमाणे पासइ २ ता
हट्ठतुट्ठा आसणाओ अब्भुट्ठेइ २ ता सत्तट्ठ पयाइं अणुगच्छइ २ ता ते सत्थवाहदारए
एवं वयासी-संदिसंतु णं देवाणुप्पिया ! किमिहागमणप्पओयणं । तए णं ते सत्थवाह-
दारगा देवदत्तं गणियं एवं वयासी-इच्छामो णं देवाणुप्पिए ! तु(म्हे)व्मेहिं सद्धिं
सुभूमिभागस्स (उज्जाणस्स) उज्जाणसिरिं पच्चणुव्भवमाणा विहरित्तए । तए णं सा
देवदत्ता तेसिं सत्थवाहदारगाणं एयमट्ठं पडिसुणेइ २ ता ण्हाया कि ते पवर जाव
सिरिसमाणवेसा जेणेव सत्थवाहदारगा तेणेव उवा(समा)गया । तए णं ते सत्थ-
वाहदारगा देवदत्ताए गणियाए सद्धिं जाणं दुरुहंति २ ता चंपाए नयरीए मज्झ-
मज्झेणं जेणेव सुभूमिभागे उज्जाणे जेणेव नंदापोक्खरिणी तेणेव उवागच्छंति २ ता
पवहणाओ पच्चोरुहंति २ ता नंदापोक्खरिणीं ओगाहेंति २ ता जलमज्जनं करेंति जल-
किट्ठं करेंति ण्हाया देवदत्ताए सद्धिं पच्चुत्तरंति जेणेव थूणामंडवे तेणेव उवागच्छंति
२ ता थूणामंडवं अणुप्पविसंति २ ता सव्वालंकार(वि)भूसिया आसत्था वीसत्था
सुहासणवरगया देवदत्ताए सद्धिं तं विपुलं असणं ४ धूवपुप्फगंधवत्थं आसाएमाणा
वि(वी)साएमाणा (परिभाएमाणा) परिभुंजेमाणा एवं च णं विहरंति जिमियभुत्तुत्तरा-
गया वि य णं समाणा (आयंता) देवदत्ताए सद्धिं विपुलाइं माणुस्सगाइं कामभोगाइं
सुंजमाणा विहरंति ॥५३॥ तए णं ते सत्थवाहदारगा पुव्वावरण्हकालसमयंसि देव-
दत्ताए गणियाए सद्धिं थूणामंडवाओ पडिनिक्खमंति २ ता हत्थसंगेल्लीए सुभूमिभागे
चहूसु आलिघरएसु य कयलीघरएसु य लयाघरएसु य अच्छणघरएसु य पेच्छगघर-
एसु य पसाहणघरएसु य मोहणघरएसु य सालघरएसु य जालघरएसु य कुसुमघरएसु
य उज्जाणसिरिं पच्चणुव्भवमाणा विहरंति ॥ ५४ ॥ तए णं ते सत्थवाहदारया जेणेव
से मालुयाकच्छए तेणेव पहारेत्थ गमणाए । तए णं सा वृणमऊरी ते सत्थवाहदारए

एज्जमाणे पासइ २ ता भीया तत्था० महया २ सद्देणं केकारवं विणिम्मुयमाणी २ मालुयाकच्छाओ पडिनिक्खमइ २ ता एगंसि रुक्खडालयंसि ठिच्चा ते सत्थवाहदारए मालुयाकच्छं च अणिमिसाए दिट्ठीए पेहमाणी २ चिट्ठइ । तए णं ते सत्थवाहदारगा अन्नमन्नं सद्दावेंति २ ता एवं वयासी-जहा णं देवाणुप्पिया ! एसा वणमऊरी अम्हे एज्जमा(णा)णे पासित्ता भीया तत्था तसिया उव्विग्गा पलाया महया २ सद्देणं जाव अ(म्हे)म्हं मालुयाकच्छयं च पेच्छमाणी २ चिट्ठइ तं भवियव्वमेत्थ कारणेणं-तिकट्ठु मालुयाकच्छयं अंतो अणुप्पविसंति २ ता तत्थ णं दो पुट्ठे परियागए जाव पासित्ता अन्नमन्नं सद्दावेंति २ ता एवं वयासी-सेयं खलु देवाणुप्पिया ! अम्हं इमे वणमऊरी-अंडए साणं जाइमंताणं कुक्कुडियाणं अंडएसु (अ)पक्खिवावित्तए । तए णं ताओ जाइमं-ताओ कुक्कुडियाओ ए(ता)ए अंडए सए य अंडए सएणं पक्खिवाएणं सारक्खमाणीओ संगोवेमाणीओ विहरिस्संति । तए णं अम्हं ए(त्थं)त्थ दो कीलावणगा मऊरपोयगा भविस्संति-तिकट्ठु अन्नमन्नस्स एयमट्ठं पडिसुणेंति २ ता सए सए दासचेडए सद्दावेंति २ ता एवं वयासी-गच्छह णं तुब्भे देवाणुप्पिया ! इमे अंडए गहाय सगाणं जाइमंताणं कुक्कुडीणं अंडएसु पक्खिवह जाव ते (वि) पक्खिवेंति । तए णं ते सत्थवाहदारगा देवद-त्ताए गणियाए सद्धिं सुभूमिभागस्स (उज्जाणस्स) उज्जाणसि रिं पच्चणुब्भवमाणा विहरित्ता तमेव जाणं दुरुडा समाणा जेणेव चंपा नयरी जेणेव देवदत्ताए गणियाए गिहे तेणेव उवागच्छंति २ ता देवदत्ताए गिहं अणुप्पविसंति २ ता देवदत्ताए गणियाए विडलं जीवियारिहं पीइदाणं दलयंति २ ता सक्कारेंति सम्माणेंति स० २ ता देवदत्ताए गिहाओ पडिनिक्खमंति २ ता जेणेव सयाइं २ गिहाइं तेणेव उवागच्छंति २ ता सकम्मसंपउत्ता जाया यावि होत्था ॥५५॥ त(ए)त्थ णं जे से सागरदत्तपुत्ते सत्थवाहदारए से णं कट्ठं जाव जलंते जेणेव से वणमऊरीअंडए तेणेव उवागच्छइ २ ता तंसि मऊरीअंडयंसि संकिए कंखिए विइगिच्छसमावन्ने भेयसमावन्ने कलुससमावन्ने किन्नं ममं एत्थ कीलावणए मऊ(री)रपोयए भविस्सइ उदाहु नो भविस्सइ-तिकट्ठु तं मऊरीअंडयं अभिक्खणं २ उव्वत्तेइ परियत्तेइ आसारेइ संसारेइ चाळेइ फंटेइ घट्टेइ खोभेइ अभिक्खणं २ कण्णमूलंसि टिट्ठियावेइ । तए णं से वण-मऊरीअंडए अभिक्खणं २ उव्वत्तिज्जमाणे जाव टिट्ठियावेज्जमाणे पोच्चडे जाए यावि होत्था । तए णं से सागर-दत्तपुत्ते सत्थवाहदारए अन्नया कयाइं जेणेव से वणमऊरीअंडए तेणेव उवागच्छइ २ ता तं मऊरीअंडयं पोच्चडमेव पासइ २ ता अहो णं ममं (एस) एत्थ कीलावणए मऊ(री)रपोयए न जाए-तिकट्ठु ओहयमण जाव झियायइ । एवामेव समणाउसो । जे अम्हं निगंथो वा २ आयरियउवज्झायाणं अंतिए पव्वइए समाणे पंचमहव्वएसु जाव

छज्जीवनिकाएसु निगंगंथे पावयणे संकिए जाव कळुससमावजे से णं इह-भवे चेव
 बहूणं समणाणं बहूणं समणीणं बहूणं सावगाणं साविगाणं हीलणिज्जे निंदणिज्जे
 खिसणिज्जे गरहणिज्जे परिभवणिज्जे परलोए विय णं आगच्छइ बहूणि दंडणाणि य
 जाव अणपरियट्ठ(ए)इ ॥५६॥ तए णं से जिणदत्तपुत्ते जेणेव से मऊरीअंडए तेणेव
 उवागच्छइ २ ता तंसि मऊरीअंडयंसि निस्संकिए सुव्वत्तए णं मम एत्थ कीलावणए
 मऊ(री)रपोयए भविस्सइ-त्तिकट्ठु तं मऊरीअंडयं अभिक्खणं २ नो उव्वत्तेइ जाव
 नो टिट्ठियावेइ । तए णं से मऊरीअंडए अणुव्वत्तिज्जमाणे जाव अटिट्ठियाविज्जमाणे
 (तेणं) कालेणं (तेणं) समएणं उव्विण्णे मऊ(री)रपोयए एत्थ जाए । तए ण से
 जिणदत्तपुत्ते(तं) मऊरपोययं पासइ २ ता हट्ठुट्ठे मऊरपोसए सदावेइ २ ता एवं
 चयासी-तुब्भे णं देवाणुप्पिया ! इमं मऊरपोयगं बहूहिं मऊरपोसणपा(उ)ओग्गेहिं
 दव्वेहिं अणुपुव्वेणं सारक्खमाणा संगोवेमाणा संवट्ठेह नट्ठुल्लगं च सिक्खावेह । तए णं
 ते मऊरपोसगा जिणदत्तस्स पुत्तस्स एयमट्ठं पडिस्सुणेंति २ ता तं मऊरपोयगं गेण्हंति
 २ ता जेणेव सए गिहे तेणेव उवागच्छंति २ ता तं मऊरपोयगं जाव नट्ठुल्लगं सिक्खा-
 चेंति । तए णं से (वण)मऊरपोयए उम्मुक्कवालभावे विनायपरिणयमेत्ते जोव्वणगमणु-
 पत्ते लक्खणवज्जणगुगोव्वेए माणुम्माणप्पमाणपडिपुण्णपक्खपेहुणकलावे विचित्तिपि-
 च्छस(त्ति)तचंदए नीलकंठए नच्चणसीलए एगाए चप्पुडियाए कयाए समाणीए अणेगाइं
 नट्ठुल्लगसयाइं केकारवसयाणि य करेमाणे विहरइ । तए णं ते मऊरपोसगा तं मऊर-
 पोयगं उम्मुक्क जाव करेमाणं पासित्ता (२) णं तं मऊरपोयगं गेण्हंति २ ता जिणदत्तस्स
 पुत्तस्स उव्वणेंति । तए णं से जिणदत्तपुत्ते सत्यवाहदारए मऊरपोयगं उम्मुक्क जाव
 करेमाणं पासित्ता हट्ठुट्ठे तेसिं विपुलं जीवियारिहं पीइदाणं जाव पडिविसज्जेइ । तए णं
 से मऊरपोयगे जिणदत्तपुत्तेणं एगाए चप्पुडियाए कयाए समाणीए नंगोलाभंगसिरोधरे
 सेयावंगे ओरालि(अवयारि)यपइण्णपक्खे उक्खित्तचंदकाइयकलावे केक्काइयसयाणि
 विमु(च्च)वमाणे नच्चइ । तए णं से जिणदत्तपुत्ते तेणं मऊरपोयएणं चंपाए नयरीए
 सिंघाडग जाव पहेसु स(इ)एहिं य साहस्सिएहिं य सयसाहस्सिएहिं य पणिएहिं य
 जयं करेमाणे विहरइ । एवामेव समणाउसो ! जो अम्मं निगंगंथो वा २ पव्वइए
 समाणे पंच(सु)महव्वएसु छज्जीवनिकाएसु निगंगंथे पावयणे निस्संकिए निक्कंखिए
 निव्विइगिच्छे से णं इहभवे चेव बहूणं समणाणं जाव वीइवइस्सइ । एवं खलु जंबू !
 समणेणं ३ जाव संपत्तेणं नायाणं तच्चस्स अज्झयणस्स अयमट्ठे पन्नत्तेत्ति वेमि ॥५७॥
 गाहाओ-जिणवरभासियभावेसु भावसच्चेसु भावओ मइमं । नो कुज्जा संदेहं
 संदेहोऽणत्थहेउत्ति ॥ १ ॥ निस्संदेहत्तं पुण गुणहेउं जं तओ तयं कज्जं । एत्थं दो

सिद्धिसुया अंडयगाही उदाहरणं ॥ २ ॥ कथं इ मइदुब्बलेण तव्विहायरियविरहओ
चा वि । नेयगहणत्तणेणं नाणावरणोदएणं च ॥ ३ ॥ हेउदाहरणासंभवे य सइ
सुद्धुजं न वुज्झिज्जा । सव्वण्णुमयमवितहं तहावि इइ चित्तए मइमं ॥ ४ ॥
अणुवकयपराणुग्गहपरायणा जं जिणा जगप्पवरा । जियरागदोसमोहा य णण्ण-
हावाइणो तेण ॥ ५ ॥ तच्च नायज्झयणं समत्तं ॥

जइ णं भंते ! समणेणं ३ नायाणं तच्चस्स नायज्झयणस्स अयमट्ठे पन्नत्ते चउत्थस्स
णं नायाणं के अट्ठे पन्नत्ते ? एवं खलु जंबू ! तेणं कालेणं तेणं समएणं वाणारसी नामं
नयरी होत्था वण्णओ । तीसे णं वाणारसीए नयरीए (बहिया) उत्तरपुरच्छिमे दिसीभाए
गंगाए महानईए मयंगतीरइहे नामं दहे होत्था अणुपुव्वसुजायवप्पगंभीरसीयलजले
अच्छविमलसलिलपलिच्छन्ने संछन्नपत्तपुप्फपलासे बहुउप्पलपडमकुमुयनलिणसुभ-
गसोगंधियपुंडरीयमहापुंडरीयसयपत्तसहस्सपत्तकेसरपुप्फोवचिए पासाईए ४ । तत्थ
णं वहुणं मच्छाण य कच्छभाण य गाहाण य मगराण य सुंसुमाराण य स(इ)या(ण)णि
य (साहस्सियाण) सहस्साणि य सय(साहस्सियाण)सहस्साणि य जूहाइं निब्भयाइं
निरुव्विग्गाइं सुहंसुहेणं अभिरममाणाइं २ विहरंति । तस्स णं मयंगतीरइहस्स
अदूरसामंते एत्थ-णं महं एगे मालुयाकच्छए होत्था वण्णओ । तत्थ णं दुवे
पावसियालगा परिवसंति पावा चंडा रु(रो)द्वा तल्लिच्छा साहसिया लोहियपाणी
आमिसत्थी आमिसाहारा आमिसप्पिया आमिसलोला आमिसं गवेसमाणा रत्तिं
वियालचारिणो दिया पच्छन्नं(चा) वि चिट्ठंति । तए णं ताओ मयंगतीरइहाओ
अन्नया कयाइं सूरियंसि चिरत्थमियंसि लुलियाए संझाए पविरलमाणुसंसि
निसंतपडिनिसंतंसि समाणंसि दुवे कुम्मगा आहारत्थी आहारं गवेसमाणा सणियं
२ उत्तरंति तस्सेव मयंगतीरइहस्स परिपेरंतेणं सव्वओ समंता परिघोलेमाणा २
वित्तिं कप्पेमाणा विहरंति । त(य)याणंतरं च णं ते पावसियालगा आहारत्थी
जाव आहारं गवेसमाणा मालुयाकच्छ(या)गाओ पडिनिक्खमंति २ ता जेणेव
मयंगतीरइहे तेणेव उवागच्छंति २ ता तस्सेव मयंगतीरइहस्स परिपेरंतेणं
परिघोलेमाणा २ वित्तिं कप्पेमाणा विहरंति । तए णं ते पावसियाला ते कुम्मए
पासंति २ ता जेणेव ते कुम्मए तेणेव पहारेत्थ गमणाए । तए णं ते कुम्मगा(ते) पावसि-
यालए एज्जमाणे पासंति २ ता भीया तत्था तसिया उव्विग्गा संजायभया हत्थे य
पाए य गीवाए य सएहिं २ काएहि साहरंति २ ता निव्वला निष्फंदा तुसिणीया
संचिट्ठंति । तए णं ते पावसियाल(या)गा जेणेव ते कुम्मगा तेणेव उवागच्छंति २ ता
ते कुम्मगा सव्वओ समंता उव्वत्तेति परियत्तेति आसारंति संसारंति चालंते घट्टंति

फंदेति खोभेति नहेहिं आलुंपंति दंतेहिं य अक्खोडेति नो चेव णं संचाएंति
तेसिं कुम्मगाणं सरीरस्स आवाहं वा पवाहं वा वावाहं वा उप्पा(ए)इत्तए छविच्छेयं
वा क(रे)रित्तए । तए णं ते पावसियालगा (एए) ते कुम्मए दोच्चंपि तच्चंपि
सव्वओ समंता उव्वत्तेति जाव नो चेव णं संचाएंति करित्तए ताहे संता तंता
परितंता निव्विण्णा समाणा सणियं २ पच्चोस(क्के)कंति एगंतमवक्कमंति २ ता
निच्चला निप्फंदा तुसिणीया संचिद्धंति । तत्थ णं एगे कुम्म(गे)ए ते पावसियालए
चि(रं)रगए दूरंगए जाणित्ता सणियं २ एगं पायं निच्छुभइ । तए णं ते पावसि-
यालगा तेणं कुम्मएणं सणियं २ एगं पायं नीणियं पासंति २ ता (ताए उक्किट्ठाए
गईए) सिग्घं चवलं तुरियं चंडं जइणं वेगियं जेणेव से कुम्मए तेणेव उवागच्छंति
२ ता तस्स णं कुम्मगस्स तं पायं नखेहिं आलुंपंति दंतेहिं अक्खोडेति तओ
पच्छा मंसं च सोणियं च आहारेंति २ ता तं कुम्मगं सव्वओ समंता उव्वत्तेति
जाव नो चेव णं संचा(इं)एंति करित्तए ताहे दोच्चंपि अवक्कमंति एवं चत्तारि वि
पाया जाव सणियं २ गीवं नीणेइ । तए णं ते पावसियालगा तेणं कुम्मएणं
गीवं नीणियं पासंति २ ता सिग्घं चवलं ४ नहेहिं दंतेहिं (य) कवालं विहाडेति
२ ता तं कुम्मगं जीवियाओ ववरोवेति २ ता मंसं च सोणियं च आहारेंति । एवामेव
समणाउसो ! जो अम्हं निग्गंथो वा २ आयरियउवज्झायाणं अंतिए पव्वइए
समाणे पंच य से इंदिया (इं) अगुत्ता भवंति से णं इहभवे चेव बहूणं समणाणं ४
हीलणिजे परलो(गे)ए वि य णं आगच्छइ बहूणं दंडणाणं जाव अणुपरियट्ठइ
जहा (व) से कुम्मए अगुत्तिदिए । तए णं ते पावसियालगा जेणेव से दोच्चे कुम्मए
तेणेव उवागच्छंति २ ता तं कुम्मगं सव्वओ समंता उव्वत्तेति जाव दंतेहिं अक्खु-
डेति जाव करित्तए । तए णं ते पावसियालगा दोच्चंपि तच्चंपि जाव नो संचाएंति
तस्स कुम्मगस्स किंचि आवाहं वा विवाहं वा जाव छविच्छेयं वा करित्तए ताहे संता
तंता परितंता निव्विण्णा समाणा जामेव दिसि पाउब्भूया तामेव दिसिं पडिगया ।
तए णं से कुम्मए ते पावसियालए चिरगए दूरंगए जाणित्ता सणियं २ गीवं नेणेइ
२ ता दिसावलोयं करेइ २ ता जमगसमगं चत्तारि वि पाए नीणेइ २ ता ताए उक्किट्ठाए
कुम्मगईए वीईवयमाणे २ जेणेव मयंगतीरइहे तेणेव उवागच्छइ २ ता मित्तनाइ-
नियगसयणसंवंधिपरियणेणं सद्धि अभिसमन्नागए यावि होत्था । एवामेव समणाउसो !
जो अम्हं समणो वा समणी वा पंच (य) से (महव्वयाइं) इंदियाइं गुत्ताइं भवंति
जाव जहा(उ) व से कुम्मए गुत्तिदिए । एवं खलु जंबू ! समणेणं भगवया महावीरेणं
चउत्थस्स नायज्जयणस्स अयमट्ठे पन्नत्तेति वेमि ॥ ५८ ॥ गाहाउ-विसएख

इंदिआइं संभंता रागदोसनिम्मुक्का । पावति निव्वुइसुहं कुम्मुव्व मयंगदहसोक्खं
॥ १ ॥ अवरे उ अणत्थपरंपरा उ पावेति पावक्कम्मवसा । संसारसागरगया
गोमाउग्गसियकुम्मुव्व ॥ २ ॥ चउत्थं नायज्झयणं समत्तं ॥

जइ णं भंते ! समणेणं ३ जाव संपत्तेणं चउत्थस्स नायज्झयणस्स अयमद्वे पन्नत्ते
पंचमस्स णं भंते ! नायज्झयणस्स के अद्वे पन्नत्ते ? एवं खलु जंबू । तेणं कालेणं तेणं
समएणं बारवई नामं नयरी होत्था पाईणपडीणायया उदीणदाहिणवित्थिण्णा नवजो-
यणवित्थिण्णा हुवालसजोयणायामा धणवइमइनि(म्म)म्माया चामीयरपवरपागारा
नाणामणिपंचवण्णकविसीसगसोहिया अलयापुरिसंकासा पमुइयपक्कीलिया पच्चक्खं
देवलो(य)गभूया । तीसे णं बारवईए नयरीए बहिया उत्तरपुरच्छिमे दिसीभाए रेवयगे
ना(म)मं पव्वए होत्था तुगे गगणतलमणुलिहंतसिहरे नाणाविहगुच्छगुम्मलयावलि-
परिगए हंसमि(ग)यमयूरकोचसारसचक्कवायमयणसालकोइलकुलोववेए अणेगतडक-
डगवियरउज्जर(य)पवायपब्भारसिहरपउरे अच्छरगणदेवसंघचारणविज्जाहरमिहुण-
संविचिण्णे निच्चच्छणए दसारवरवीरपुरिसतेलोक्कवलवगाणं सोमे सुभगे पियदंसणे
सुरुवे पासाईए ४ । तस्स णं रेवयगस्स अदूरसामंते एत्थ णं नंदणवणे नामं
उज्जाणे होत्था सव्वउयपुप्फफलसमिद्धे रम्मे नंदणवणप्पगासे पासाईए ४ ।
तरस ण उज्जाणस्स बहुमज्झदेसभाए सुरप्पिए नामं जक्खाययणे होत्था वण्णओ ।
तत्थ णं बारवईए नयरीए कहे नामं वासुदेवे राया परिवसइ । से णं तत्थ
समुद्दविजयपामोक्खाणं दसण्हं दसाराणं बलदेवपामोक्खाणं पंचण्हं महावीराणं
उग्गसेणपामोक्खाणं सोलसण्हं राईसहस्साणं पज्जुन्नपामोक्खाणं अद्धुट्ठाणं
कुमारकोडीणं संवपामोक्खाणं सट्ठीए दुद्धतसाहस्सीणं वीरसेणपामोक्खाणं एकवीसाए
वीरसाहस्सीणं महासेणपामोक्खाणं छप्पन्नाए बलवगसाहस्सीणं रुपि(णी)णिप्पा-
मोक्खाणं वत्तीसाए महिलासाहस्सीणं अन्नैसि च बहूणं [रा]ईसरतलवर जाव
सत्थवाहपभिईणं वेयड्डुगिरिसा(य)गरपेरंतस्स य दाहिणद्धभरहस्स य बारवईए
नयरीए आहेवच्चं जाव पालेमाणे विहरइ ॥ ५९ ॥ त(स्स)त्थ णं बारवईए नयरीए
थावच्चा नामं गाहावइणी परिवसइ अद्धा जाव अपरिभूया । तीसे णं थावच्चाए
गाहावइणीए पुत्ते थावच्चापुत्ते नामं सत्थवाहदारए होत्था सुकुमालपाणिपाए
जाव सुरुवे । तए णं सा थावच्चा गाहावइणी तं दार(यं)गं साइरेगअट्ठवासजा(य)यं
जाणित्ता सोहणंसि तिहिकरणनक्खत्तमुहुत्तंसि कलायरियस्स उवणेइ जाव भोगसमत्थं
जाणित्ता वत्तीसाए इब्भकुलबालियाणं एगदिवसेणं पाणि गेण्हावेइ वत्तीसओ दाओ
जाव वत्तीसाए इब्भकुलबालियाहिं सद्धिं विपुळे सद्धफरिसरसरुववण्णगंधे जाव

भुंजमाणे विहरइ । तेणं कालेणं तेणं समएणं अरहा अरिद्धनेमी सो चेव वण्णओ दसधणुस्सेहे नीलुप्पलगवलगुलियअयसिकुसुमप्पगासे अट्टारसहिं समणसा-हस्सीहिं चत्तालीमाए अज्जियासाहस्सीहिं सद्धिं संपरिवुडे पुव्वाणुपुविं चरमाणे जाव जेणेव वारवई नगरी जेणेव रेवयगपव्वए जेणेव नंदणवणे उज्जाणे जेणेव सुरप्पियस्स जक्खस्स जक्खाययणे जेणेव असोगवरपायवे तेणेव उवागच्छइ २ ता अहापडिरूवं उग्गहं ओगिणिहत्तां संजमेणं तवसा अप्पाण भावेमाणे विहरइ । परिसा निग्गया धम्मो कहिओ । तए णं से कण्हे वासुदेवे इमीसे कहाए लद्धट्ठे समाणे कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! सभाए सुहम्माए मेघोघरसियं गंभी(रं)रमहुरसइं कोमुइयं भेरि तालेह । तए णं ते कोडुंवियपुरिसा कण्हेणं वासुदेवेणं एवं वुत्ता समाणा हट्टतुट्ठ जाव मत्थए अंजलिं कट्ठ एवं सामी ! तह त्ति जाव पडिसुणेंति २ ता कण्हस्स वासुदेवस्स अंतियाओ पडिनिक्खमंति २ ता जेणेव स(हा)भा सुहम्मा जेणेव कोमुइया भेरी तेणेव उवागच्छंति २ ता तं मेघोघरसि(यं)यगंभीरमहुरसइं कोमुइयं भेरिं तालेंति । तओ निद्धमहुर-गंभीरपडिसुएणं पिव सारइएणं वलाहएणं (पिव) अणुरसियं भेरीए । तए णं तीसे कोमुइयाए भे(रिया)रीए तालियाए समाणीए वारवईए नयरीए नवजोयणवित्थिण्णाए दुवालसजोयणायामाए सिंघाडगतियचउक्कचच्चरकदरदरी (य) विवरकुहरगिरिसिहरन-गरगोउरपासायदुवारभवणदेउलपडि(सु)स्सुयासयसहस्ससंकुलं(सइं) करेमाणे वारव- (इं)ईए नय(रिं)रीए सद्धिंभतरवाहिरियं सव्वओ समंता(से)सद्दे विप्पसरित्था । तए णं वारवईए नयरीए नवजोयणवित्थिण्णाए वारसजोयणायामाए समुद्विजयपा-मोक्खा दस दसारा जाव कोमुईयाए भेरीए सद्द सोच्चा निसम्म हट्टतुट्ठा जाव ण्हाया आविद्धवग्घारियमल्लदामकलावा अहयवत्थचंदणो(क्कि)क्खिन्नगायसरीरा अप्पेगइया हयगया एवं गयगया रहसीयासंदमाणीगया अप्पेगइया पायविहारचारेणं पुरिस-वग्गुरापरिक्खित्ता कण्हस्स वासुदेवस्स अंति(यं)ए पाउव्वभवित्था । तए णं से कण्हे वासुदेवे समुद्विजयपामोक्खे दस दसारे जाव अंतियं पाउव्वभवमाणे (पासइ) पासित्ता हट्टतुट्ठ जाव कोडुंवियपुरिसे सद्दावेइ २ ता एवं वयासी-खिप्पामेव भो देवाणुप्पिया । चाउरंगिणिं सेणं सज्जेह विजयं च गंधहत्थि उवट्ठवेह । तेवि (तहत्ति) तहेव उवट्ठवेंति जाव पज्जुवासंति ॥६०॥ थावच्चापुत्ते वि निग्गए जहा मेहे तहेव धम्म सोच्चा निसम्म जेणेव थावच्चा गाहावइणी तेणेव उवागच्छइ २ ता पायग्गहणं करेइ जहा मेहस्स तहा चेव नेवेयणा जाहे नो संचाएइ विसयाणुलोमाहि य विसय-पडिकूलाहि य वट्ठहिं आघवणाहि य पन्नवणाहि य सन्नवणाहि य विन्नवणाहि य

आधवित्तए वा ४ ताहे अकामिया चेव थावच्चापुत्त(दारग)स्स निक्खमणमणु-
मन्नित्था (णवरं निक्खमणाभिसेयं पासामो, तए णं से थावच्चापुत्ते तुत्तिणीए
सच्चिट्ठे) । तए णं सा थावच्चा आसणाओ अब्भुट्ठेइ २ ता महत्थं महग्घं महरिहं
रा(य)यारिहं पाहुडं गेण्हइ २ ता मित्त जाव संपरिवुडा जेणेव कण्हस्स वासुदेवस्स
भवणवरपडिदुवारदेसभाए तेणेव उवागच्छइ २ ता पडिहारदेसिएणं मग्गेणं जेणेव
कण्हे वासुदेवै तेणेव उवागच्छइ २ ता करयल जाव वद्धावेइ २ ता तं महत्थं ४ पाहुडं
उवणेइ २ ता एवं वयासी-एवं खलु देवाणुप्पिया ! मम एगे पुत्ते थावच्चापुत्ते नामं
दारए इट्ठे जाव (ने णं)संसारभउव्विग्गे (भीए) इच्छइ अरहओ अरिट्ठनेमिस्स जाव
पव्वडत्तए । अहं णं निक्खमणसक्कारं करेमि । इच्छामि णं देवाणुप्पिया ! थावच्चा-
पुत्तस्स निक्खममाणस्स छत्तमउडचामराओ य विदिन्नाओ । तए णं कण्हे वासुदेवे
थावच्चागाहावइणिं एवं वयासी-अच्छाहि णं तुमं देवाणुप्पिए ! सुनिव्वु(या)यवी-
सत्था । अहं णं सयमेव थावच्चापुत्तस्स दारगस्स निक्खमणसक्कारं करिस्सामि । तए
णं से कण्हे वासुदेवे चाउरगिणीए सेणाए विजयं हत्थिरयणं दुरुढे समाणे जेणेव
थावच्चाए गाहावइणीए भवणे तेणेव उवागच्छइ २ ता थावच्चापुत्तं एवं वयासी-मा
णं तु(मे)मं देवाणुप्पिया ! मुडे भवित्ता पव्वयाहि, भुंजाहि णं देवाणुप्पिया ! विउले
माणुस्सए कामभो(ए)गे मम वाहुच्छायापरिग्गहिए, केवलं देवाणुप्पियस्स (अहं)
नो संचाएमि वाउकायं उवरिमेणं गच्छमाणं निवारित्तए, अन्ने ण देवाणुप्पियस्स जं
क्किचि(वि) आवाह वा वि(वा)वाहं वा उप्पाएइ त सव्वं निवारेमि । तए णं से थावच्चा-
पुत्ते कण्हेणं वासुदेवेणं एवं वुत्ते समाणे कण्हं वासुदेवं एवं वयासी-जइ णं (तुमं)देवाणु-
प्पिया ! मम जीवियंतकरणं मच्चुं एज्जमाणं निवारिसि जरं वा सरीररूवविणा(सि)सणि
सरीरं अइवयमाणिं निवारिसि तए णं अहं तव वाहुच्छायापरिग्गहिए विउले माणुस्सए
कामभोगे भुंजमाणे विहरामि । तए णं से कण्हे वासुदेवे थावच्चापुत्तेणं एवं वुत्ते
समाणे थावच्चापुत्तं एवं वयासी-एए णं देवाणुप्पिया ! दुरइक्कमणिज्जा, नो खलु
सक्का सुवलिण्णावि देवेण वा दाणवेण वा निवारित्तए नन्नत्थ अप्पणो कम्मक्ख-
एणं । तए णं से थावच्चापुत्ते कण्हं वासुदेवं एवं वयासी-जइ णं एए दुरइक्कमणिज्जा
नो खलु सक्का सुवलिण्णावि देवेण वा दाणवेण वा निवारित्तए नन्नत्थ अप्पणो
कम्मक्खएणं तं इच्छामि णं देवाणुप्पिया ! अन्नाणमिच्छत्तअविरइकसायसच्चियस्स
अत्तणो कम्मक्खयं करित्तए । तए णं से कण्हे वासुदेवे थावच्चापुत्तेणं एवं वुत्ते समाणे
कोडुं वियपुरिसे सद्दावेइ २ ता एवं वयासी-गच्छह णं देवाणुप्पिया ! बारवईए नयरीए
सिंघाडगति(य)ग जाव पहेसु (य) हत्थिखंधवरगया महया २ सद्देणं उग्घोसेमाणा

२ उग्घोसणं करेह-एवं खलु देवाणुप्पिया । थावच्चापुत्ते संसारमउव्विग्गे भीए जम्मणमरणाणं इच्छइ अरहओ अरिट्ठनेमिस्स अंतिए मुंडे भविता पव्वइत्तए, तं जो खलु देवाणुप्पिया ! राया वा जुवराया वा देवी वा कुमारे वा ईमरे वा तलवरे वा कोडुंवियमाडंवियइव्वसेट्ठिसेणावइसत्थवाहे वा थावच्चापुत्तं पव्वयतमणुपव्वयइ तस्स ण कण्हे वासुदेवे अणुजाणइ पच्छाउरस्स वि य से मित्तनाइनियगसंवंधि-परिजणस्स जोग(खे क्वेम वट्ठमाणं पडिवहइ-त्तिकट्ठु घोसणं घोसेह जाव घोसंति । तए णं थावच्चापुत्तस्स अणुराएणं पुरिससहस्सं निक्खमणाभिमुहं ण्हायं सव्वा लंकारविभूसियं पत्तेयं २ पुरिससहस्सवाहिणीसु सिवियासु दुरुडं समाणं मित्तनाइ-परिवुडं थावच्चापुत्तस्स अंतियं पाउव्वभूयं । तए णं से कण्हे वासुदेवे पुरिससहस्सं अंतियं पाउव्वभवमाणं पासइ २ ता कोडुंवियपुरिसे सदावेइ २ ता एवं वयासी-जहा मेहस्स निक्खमणाभिसेओ तहेव सेयापीएहिं कलसेहिं ण्हावेइ जाव अरहओ अरिट्ठ-नेमिस्स छत्ताइच्छत्तं पडागाइपडागं पास(न्ति)इ २ ता विजाहरचारणे जाव पासित्ता सी(त्तिवि)याओ पच्चोरुहइ । तए णं से कण्हे वासुदेवे थावच्चापुत्तं पुरओ काउं जेणेव अ(रि)रहा अरिट्ठनेमी सव्वं तं चेव जाव आभर(णमल्लालंकारं)णं ओमुयइ । तए णं सा थावच्चा गाहावइणी हंसलक्खणेणं पड(ग)साडएणं आभरणमल्लालंका(रे)रं पडिच्छइ हारवारिधा(र)राछिन्नमुत्तावलिप्पगासाइं अंसूणि विणि(म्)मुंचमाणी २ एवं वयासी-जइयव्वं जाया ! घडियव्वं जाया ! प(रि)रक्कमियव्वं जाया ! अस्सि च णं अट्ठे नो पमाएयव्वं । जामेव दिसिं पाउव्वभूया तामेव दिसिं पडिगया । तए णं से थावच्चापुत्ते पुरिससहस्से(हिं)णं सद्धि सयमेव पंचमुट्ठियं लोयं करेइ जाव पव्वइए । तए णं से थावच्चापुत्ते अणगारे जाए इरियासमिए भासासमिए जाव विहरइ । तए णं से थावच्चापुत्ते अरहओ अरिट्ठनेमिस्स तहाल्लवाणं थेराणं अंतिए सामाइयमाइयाइं (इंकारस अंगाई) चोदसपुव्वाइं अहिज्जइ २ ता वट्ठहिं जाव चउत्थेणं विहरइ । तए णं अ(रि)रहा अरिट्ठनेमी थावच्चापुत्तस्स अणगारस्स तं इव्वमाइयं अणगार-सहस्स सीसत्ताए दलयइ । तए णं से थावच्चापुत्ते अन्नया कयाइं अरहं अरिट्ठनेमिं वंदइ नमंसइ वं० २ ता एवं वयासी-इच्छामि णं भंते ! तुव्वेहिं अव्वमणुत्ताए समाणे अणगारसहस्सेणं सद्धिं वहिया जणवयविहारं विहरित्तए । अहासुहं देवाणु-प्पिया ॥ तए णं से थावच्चापुत्ते अणगारसहस्सेणं सद्धिं तेणं उरालेणं उ(द)ग्गेणं पयत्तेणं पग्गहिणं वहिया जणवयविहारं विहरइ ॥ ६१ ॥ तेणं कालेणं तेण समएणं सेलगपुरे नामं नग(र)रे होत्था । सुभूमिभागे उज्जाणे । सेलए राया पउमावई देवी मंडुए कुमारे जुवराया । तस्स णं सेलगस्स पथगपामोक्खा (णं) पंच मंतिसया

होत्या उप्पत्तियाए ४ (चउव्विहाए बुद्धीए) उववेया (रज्जधुरचित्तयावि होत्या) रज्जधुरं चिंतयंति । (तए णं) थावच्चापुत्ते (णामं अणगारे सहस्सेणं अणगारेणं सद्धि जेणेव) सेलगपुरे (जेणेव सुभूमिभागे नामं उज्जाणे तेणेव) समोसढे । राया निग्गए (धम्मो कहिओ) धम्मरुहा । धम्मं सोच्चा जहा णं देवाणुप्पियाणं अंतिए बहवे उग्गा भोगा जाव चइत्ता हिरण्णं जाव पव्वइया तहा णं अहं नो सचाएमि पव्वइत्तए । अहं णं देवाणुप्पियाणं अंतिए पंचाणुव्वइयं जाव समणोवासए जा(व)ए अहिगयजीवाजीवे जाव अप्पाणं भावेमाणे विहरइ । पंयगपामोक्खा पंच मंतिसया य समणोवासया जाया । थावच्चापुत्ते वहिया जणवयविहारं विहरइ । तेणं कालेणं तेणं समएणं सोगंधिया नामं नयरी होत्या वण्णओ । नीलासोए उज्जाणे वण्णओ । तत्थ णं सोगंधियाए नयरीए सुदंसणे नामं नयरसेट्ठी परिवसइ अट्ठे जाव अपरिभूए । तेणं कालेणं तेणं समएणं सुए नामं परिव्वायए होत्या रिउव्वेयज(उ)जुव्वेयसामवे-यअथव्वणवेयसट्ठितंतकुसले संखसमए लद्धट्ठे पंच(जा)जमपंचनियमजुत्तं सोयमू- (लयं)लं दसप्पयार परिव्वायगधम्मं दाणधम्मं च-सोयधम्मं च तित्थाभिसेय च आववेमाणे पन्नवेमाणे (परुवेमाणे) धाउरत्तवत्थपवरपरिहिए तिदंडकुंडियछत्तछन्ना- (लि)लयअंकुमपवित्तयकेसरिहत्तगए परिव्वायगसहस्सेणं सद्धिं सपरिचुडे जेणेव सोगंधिया नयरी जेणेव परिव्वायगावसहे तेणेव उवागच्छइ २ ता परिव्वायगाव-सहंसि भंडगानिक्खेवं करेइ २ ता संखसमएणं अप्पाणं भावेमाणे विहरइ । तए णं सोगंधियाए नगरीए सिंघाडग जाव बहुजगो अन्नमन्नस्स एवमाइक्खइ-एवं खलु सुए परिव्वायए इह(हव्व)मागए जाव विहरइ । परिसा निग्गया । सुदंसणो वि निग्गए । तए णं से सुए परिव्वायए तीसे परिसाए सुदंसणस्स(य)अच्चेसिं च बहूणं संखाणं (धम्मं) परिकहेइ-एवं खलु सुदंसणा । अम्हं सोयमूलए धम्मे पन्नते । से वि य सोए (धम्मे) दुविहे पन्नते तंजहा-दव्वसोए य भावसोए य । दव्वसोए य उदएणं मट्ठियाए य । भावसोए दव्वमेहि य मंतेहि य । ज णं अम्हं देवाणुप्पिया ! किंचि असुई भवइ तं सव्वं स(ज्जो)ज्जपुढवीए आलि(प्पइ)म्पइ तओ पच्छा सुद्धेण वारिणा पक्खालिज्जइ तओ तं असुई सुई भवइ । एवं खलु जीवा जलाभिसेयपूयप्पाणो अविग्घेणं सगं गच्छंति । तए णं से सुदंसणे सुयस्स अंतिए धम्मं सोच्चा हट्ठे सुयस्स अंतियं सोयमूल्यं धम्मं गेण्हइ २ ता परिव्वायए विउलेणं असणेणं ४ वत्थ० पडिलाभेमाणे जाव विहरइ । तए णं से सुए परिव्वाय(गवसहाओ)गे सोगंधियाओ नयरीओ निग्गच्छइ २ ता वहिया जणवयविहारं विहरइ । तेणं कालेणं तेणं समएणं (थावच्चापुत्ते णामं अणगारे सहस्सेणं अणगारेणं सद्धिं पुव्वाणुपुर्व्वि चरमाणे गामाणु-

गामं दूइज्जमाणे सुहंसुहेणं विहरमाणे जेणेव सोगंधिया णयरी जेणेव णीलासोए उज्जाणे तेणेव समोसढे) थावच्चापुत्तस्स समोसरणं । परिसा निग्गया । सुदंसणो वि निग्ग(ए)ओ थावच्चापुत्तं (नामं अणगारं आ०) वंदइ नमंसइ वं० २ ता एवं वयासी-तुम्हाणं किमूलए धम्मे पन्नत्ते ? । तए णं [से] थावच्चापुत्ते सुदंसणेणं एवं वुत्ते समाणे सुदंसणं एवं वयासी-सुदंसणा ! विणयमूले धम्मे पन्नत्ते । से विय विणए दुविहे पन्नत्ते तंजहा-अगारविणए(य) अणगारविणए य । तत्थ णं जे से अगारविणए से णं पंच अणुव्वयाइं सत्त सिक्खावयाइं एक्कारस उवासगपडिमाओ । तत्थ णं जे से अणगारविणए से णं पंच महव्वयाइं तंजहा-सव्वाओ पाणाइवायाओ वेरमणं सव्वाओ मुसावायाओ वेरमणं सव्वाओ अदिन्नादाणाओ वेरमणं सव्वाओ मेहुणाओ वेरमणं सव्वाओ परिग्गहाओ वेरमणं सव्वाओ राइभोयणाओ वेरमणं जाव मिच्छादंसणसल्लाओ वेरमणं दसविहे पच्चक्खाणे बारस भिक्खुपडिमाओ इच्चेएणं दुविहेणं विणयमूलएणं धम्मेणं आणुपुव्वेणं अट्ठकम्मपगडीओ खवेत्ता लोयग्गपइट्ठा(णे)णा भवंति । तए णं थावच्चापुत्ते सुदंसणं एवं वयासी-तु(ब्भे)ब्भं णं सुदंसणा ! किमूलए धम्मे पन्नत्ते ? अम्हाणं देवाणुप्पिया ! सोयमू(ले)लए धम्मे पन्नत्ते जाव सग्गं गच्छंति । तए णं थावच्चापुत्ते सुदंसणं एवं वयासी-सुदंसणा ! से जहानामए केइ पुरिसे एगं महं रुहिरकयं वत्थं रुहिरेण चेव धोवेज्जा तए णं सुदंसणा ! तस्स रुहिरकयस्स वत्थस्स रुहिरेण (चेव) पक्खालिज्जमाणस्स अत्थि काइ सोही ? नो इणट्ठे समट्ठे । एवामेव सुदंसणा ! तुब्भं पि पाणाइवाएणं जाव मिच्छादंसणसल्लेणं नत्थि सोही जहा तस्स रुहिरकयस्स वत्थस्स रुहिरेणं चेव पक्खालिज्जमाणस्स नत्थि सोही । सुदंसणा ! से जहानामए केइ पुरिसे एगं महं रुहिरकयं वत्थं सज्जियाखारेणं अणुलिपइ २ ता पयणं आ(रु)रोहेइ २ ता उण्हं गाहेइ २ ता तओ पच्छा सुद्धेण वारिणा धोवेज्जा से नूणं सुदंसणा ! तस्स रुहिरकयस्स वत्थस्स सज्जियाखारेण अणुलित्तस्स पयणं आरोहियस्स उण्हं गाहियस्स सुद्धेणं वारिणा पक्खालिज्जमाणस्स सोही भवइ ? हंता भवइ । एवामेव सुदंसणा ! अम्हं पि पाणाइवायवेरमणेण जाव मिच्छादंसणसल्लवेरमणेणं अत्थि सोही जहा(वि) वा तस्स रुहिरकयस्स वत्थस्स जाव सुद्धेणं वारिणा पक्खालिज्जमाणस्स अत्थि सोही । तत्थ णं (से) सुदंसणे संवुद्धे थावच्चापुत्तं वंदइ नमंसइ वं० २ ता एवं वयासी-इच्छामि णं भंते ! धम्मं सोच्चा जाणित्तए जाव समणोवासए जाए अभिगयजीवाजीवे जाव पडिलाभेमाणे विहरइ । तए ण तस्स सुयस्स परिव्वायगस्स इमीसे कहाए लद्धट्ठस्स समागस्स अयमेयारुवे जाव समुप्पज्जित्था-एवं खलु सुदंसणेणं सोयधम्मं विप्पजहाय विणयमूले धम्मे पडिवन्ने । तं सेयं खलु मम

सुदंसणस्स दिट्ठिं वामेत्तए पुणरवि सोयमूलए धम्मे आघवित्तए-त्तिकट्ठु एवं संपेहेइ
 २ ता परिव्वायगसहस्सेणं सद्धिं जेणेव सोगंधिया नयरी जेणेव परिव्वायगावसहे
 तेणेव उवागच्छइ २ ता परिव्वायगावसहंसि भंडनिक्खेवं करेइ २ ता धाउरत्तव-
 र्थ[पवर]परिहिए पविरलपरिव्वायगेणं सद्धिं संपरिवुडे परिव्वायगावसहाओ पडिनि-
 क्खमइ २ ता सोगंधियाए नयरीए मज्झमज्झेणं जेणेव सुदंसणस्स गिहे जेणेव
 सुदंसणे तेणेव उवागच्छइ । तए णं से सुदंसणे तं सुयं एज्जमाणं पासइ २ ता नो
 अब्भुट्ठेइ नो पञ्चुग्गच्छइ नो आढाइ नो परियाणाइ नो वदइ तुसिणीए संचिट्ठइ ।
 तए णं से सुए परिव्वायए सुदंसणं अ(ण)णुब्भुट्ठियं पासित्ता एवं वयासी-तु(मं)ब्भे
 णं सुदंसणा ! अन्नया ममं एज्जमाणं पासित्ता अब्भुट्ठेसि जाव वंदसि, इयाणिं सुदंसणा !
 नुमं ममं एज्जमाणं पासित्ता जाव नो वंदसि, तं कस्स णं तुमे सुदंसणा ! इमेयारूवे
 विणयमू(ल)ले धम्मे पडिवन्ने ? । तए णं से सुदंसणे सुएणं परिव्वाय(ए)गेणं एवं वुत्ते
 समाणे आसणाओ अब्भुट्ठेइ २ ता करयल जाव सुयं परिव्वायगं एवं वयासी-एवं
 खलु देवाणुप्पिया ! अरहओ अरिट्ठनेमिस्स अंतेवासी थावच्चापुत्ते नामं अणगारे जाव
 इहमागए इह चेव नीलासोए उज्जाणे विहरइ, तस्स णं अंतिए विणयमूले धम्मे पडिवन्ने ।
 तए णं से सुए (परिव्वायए) सुदंसणं एवं वयासी-तं गच्छामो णं सुदंसणा ! तव
 धम्मायरियस्स थावच्चापुत्तस्स अंतियं पाउब्भवामो इमाइं च णं एयारूवाइं अट्ठाइं
 हेऊइं पसिणाइं कारणाइं वागरणाइं पुच्छामो । तं जइ(णं) मे से इमाइं अट्ठाइं जाव
 वागरइ त(ए)ओ णं (अहं) वंदामि नमंसामि । अह मे से इमाइं अट्ठाइं जाव नो से
 वागरेइ तओ णं अहं एएहिं चेव अट्ठेहि हेऊहिं निप्पट्ठपसिणवागरणं करिस्सामि । तए
 णं से सुए परिव्वायगसहस्सेणं सुदंसणेण य सेट्ठिणा सद्धिं जेणेव नीलासोए उज्जाणे
 जेणेव थावच्चापुत्ते अणगारे तेणेव उवागच्छइ २ ता थावच्चापुत्तं एवं वयासी-जत्ता ते
 भंते ! जवणिज्जं ते अवावाहं(पि ते) फासु(यं)यविहारं(ते)? । तए णं से थावच्चापुत्ते
 सुएणं (परिव्वायगेणं) एवं वुत्ते समाणे सुयं परिव्वायगं एव वयासी-सुया । जत्तावि मे
 जवणिज्जंपि मे अवावाहं(पि मे) फासु(यं)विहारं(पि मे) । तए णं (से) सुए थावच्चापुत्तं एवं
 वयासी-किं भंते ! जत्ता ? सुया । जं णं मम नाणदंसणचरित्तवसंसजममाइएहिं जोएहि
 जो(ज)यणा से तं जत्ता । से किं तं भंते ! जवणिज्जं ? सुया । जवणिजे दुविहे पन्नते
 तंजहा-इंदियजवणिजे य नोइंदियजवणिजे य । से किं तं इंदियजवणिज्जं ? सुया ।
 जं णं म(म)मं सोइंदियचक्खिंदियघाणिंदियजिब्भिंदियफासिंदियाइं निरुवहयाइं वसे
 वट्ठंति से तं इंदियजवणि(ज्जं)जे । से किं तं नोइंदियजवणिजे ? सुया । जं णं कोहमाण-
 मायालोभा खीणा उवसंता नो उदयंति से तं नोइंदियजवणिजे । से किं तं भंते !

अव्वावाहं? सुया । जं णं मम वाइयपित्तियसिभियसन्निवाइया विविहा रोगायंका नो उदीरेंति से तं अव्वावाहं । से किं तं भंते ! फासुयविहारं? सुया ! जं णं आरामेसु उज्जाणेषु दे(व)उल्लेषु सभासु प(व्वा)वासु इत्थीपसुपंडगविवज्जियासु वसहीसु पाडिहारियं पीढफलगसेज्जासंथारयं ओगिण्हित्ताणं विहरामि से तं फासुयविहारं । सरिसवया(ते) भंते ! किं भक्खेया अभक्खेया? सुया ! सरिसवया भक्खेयावि अभक्खेयावि । से केणट्ठेणं भंते ! एवं वुच्चइ सरिसवया भक्खेयावि अभक्खेयावि ? सुया ! सरिसवया दुविहा पन्नत्ता तंजहा-मित्तसरिसवया य धन्नसरिसवया य । तत्थ णं जे ते मित्तसरिसवया ते तिविहा पन्नत्ता तंजहा-सहजायया सहवड्ढियया सहपंसुकीलि(य)या य, ते णं समणाणं निग्गंथाणं अभक्खेया । तत्थ णं जे ते धन्नसरिसवया ते दुविहा पन्नत्ता तंजहा-सत्थपरिणया य असत्थपरिणया य । तत्थ णं जे ते असत्थपरिणया ते समणाणं निग्गंथाणं अभक्खेया । तत्थ णं जे ते सत्थपरिणया ते दुविहा पन्नत्ता तंजहा-फासु(गा)या य अफासुया य । अफासुया णं सुया ! नो भक्खेया । तत्थ णं जे ते फासुया ते दुविहा पन्नत्ता तंजहा-जाइया य अजाइया य । तत्थ णं जे ते अजाइया ते अभक्खेया । तत्थ णं जे ते जाइया ते दुविहा पन्नत्ता तंजहा-एसणिज्जा य अणेसणिज्जा य । तत्थ णं जे ते अणेसणिज्जा ते (णं) अभक्खेया । तत्थ णं जे ते एसणिज्जा ते दुविहा पन्नत्ता तंजहा-लद्धा य अलद्धा य । तत्थ णं जे ते अलद्धा ते अभक्खेया । तत्थ णं जे ते लद्धा ते निग्गंथाणं भक्खेया । एएणं अट्ठेणं सुया ! एवं वुच्चइ सरिसवया भक्खेयावि अभक्खेयावि । एवं कुलत्थावि भाणियव्वा नव(रि)रं इमं नाणत्तं-इत्थिकुलत्था य धन्नकुलत्था य । इत्थिकुलत्था तिविहा पन्नत्ता तंजहा-कुलव(हु)हूया य कुलमाउया इ य कुलधूया इ य । धन्नकुलत्था तहेव । एवं मासा वि नवर इमं नाणत्तं-मासा तिविहा पन्नत्ता तंजहा-कालमासा य अत्थमासा य धन्नमासा य । तत्थ णं जे ते कालमासा ते णं दुवाल्सविहा पन्नत्ता तंजहा-सावणे जाव आसाढे, ते णं [समणाणं २] अभक्खेया । अत्थमासा दुविहा प० तं०-रुप्प(हिरण्ण)मासा य सुवण्णमासा य, ते णं अभक्खेया । धन्नमासा तहेव । एगे भवं दुवे भवं अणेगे भवं अक्खए भवं अव्वए भवं अवट्ठिए भवं अणेगभूयभाव-भविएवि भवं? सुया ! एगेवि अहं दुवेवि अहं जाव अणेगभूयभावभविएवि अहं । से केणट्ठेणं भंते ! एगेवि अहं जाव सुया । दव्वट्ठयाए एगे[वि] अहं नाण-दंसणट्ठयाए दुवेवि अहं पएसट्ठयाए अक्खएवि अहं अव्वएवि अहं अवट्ठिएवि अहं उवओगट्ठयाए अणेगभूयभावभविएवि अहं । एत्थ णं से सुए सवुद्धे थावच्चापुत्तं वंदइ नमंसइ वं० २ ता एवं वयासी-इच्छामि णं भंते ! तु(ब्भे)ब्भं अंतिए केवलपन्नत्तं

धम्मं निसामित्तए । धम्मकहा भाणियव्वा । तए णं से सुए परिव्वायए थावच्चा-
 पुत्तस्स अंतिए धम्मं सोच्चा निसम्म एवं वयासी-इच्छामि णं भंते ! परिव्वाय-
 गसहस्सेणं सद्धिं संपरिवुडे देवाणुप्पियाणं अंतिए मुडे भवित्ता पव्वइत्तए । अहासुहं
 देवाणुप्पिया ! जाव उत्तरपुरच्छिमे दिसीभाए ति(डं)दंडयं जाव धाउरत्ताओ य एगंते
 एडेइ २ ता सयमेव सिहं उप्पाडेइ २ ता जेणेव थावच्चापुत्ते २ तेणेव उवागच्छइ
 जाव मुंडे भवित्ता जाव पव्वइए सामाइयमाइयाइं (इक्कारस अंगाइ) चोइसपुव्वाइं
 अहिज्जइ । तए णं थावच्चापुत्ते सुयस्स अणगार (स्म) महस्सं सीसत्ताए वियरइ ।
 तए णं थावच्चापुत्ते सोगंधियाओ (नयरीओ) नीलासोयाओ पडिनिक्खमइ २ ता बहिया
 जणवयविहार विहरइ । तए णं से थावच्चापुत्ते अणगारसहस्सेणं सद्धिं संपरिवुडे जेणेव
 पुंडरी(ए)यपव्वए तेणेव उवागच्छइ २ ता पुंडरीयं पव्वयं सणियं २ दुरुहइ २ ता
 मेघघणसन्निगासं देवसन्निवायं पुढविसिलापट्टयं जाव पाओवगमणं (कए)णुवण्णे ।
 तए णं से थावच्चापुत्ते वहुणि वासाणि सामण्णपरियागं पाउणित्ता मासियाए संलेहणाए
 सट्ठि भत्ताइं अणसणाए जाव केवलवरनाणदमणं समुप्पाडेत्ता तओ पच्छा सिद्धे जाव
 प्पहीणे ॥६२॥ तए णं से सुए अन्नया कयाइ जेणेव सेलगपुरे नगरे जेणेव सुभूमिभागे
 उज्जाणे (समोसरणं) तेणेव समोसरिए परिसा निग्गया सेलओ निग्गच्छइ धम्मं
 सोच्चा जं नवरं देवाणुप्पिया ! पंथग्गपामोक्खाइं पंच मंतिसयाइं आपुच्छामि मंडुयं
 च कुमारं रज्जे ठावेमि तओ पच्छा देवाणुप्पियाणं अन्तिए मुंडे भवित्ता अगाराओ
 अणगारियं पव्वयामि । अहासुहं । तए णं से सेलए राया सेलगपुरं नगरं अणुप्पविसइ
 २ ता जेणेव सए गिहे जेणेव वाहिरिया उवट्ठाणसाला तेणेव उवागच्छइ २ ता सीहा-
 स(णं)णे सन्निसण्णे । तए णं से सेलए राया पंथ(य)ग्गपामोक्खे पंच मंतिसए सद्दावेइ
 २ ता एवं वयासी-एवं खलु देवाणुप्पिया ! माए सुयस्स अंतिए धम्मं निसत्ते से वि
 य मे धम्मं इच्छिए पडिच्छिए अभिरुइए, अहं णं देवाणुप्पिया ! संसारभ(य)उव्विग्गे
 जाव पव्वयामि, तुब्भे णं देवाणुप्पिया ! कि करेह कि व(से)वसह किं वा (ते) मे
 हियडच्छिए सामत्थे ? । तए णं ते पंथग्गपामोक्खा सेलगं रायं एवं वयासी-जइ णं
 तुब्भे देवाणुप्पिया ! संसार जाव पव्वयह अम्हाणं देवाणुप्पिया ! (किमण्णे)को अन्ने
 आधारे वा आलंबे वा अम्हे वि य णं देवाणुप्पिया ! संसारभउव्विग्गा
 जाव पव्वयामो, जहा णं देवाणुप्पिया ! अम्हं बहुसु कज्जेसु य कारणेसु य
 जाव तहा णं पव्वइयाण वि समाणाण वहुसु जाव चक्खुभूए । तए णं से सेलगे
 पंथग्गपामोक्खे पंच मंतिसए एवं वयासी-जइ णं तुब्भे देवाणुप्पिया ! संसार जाव
 पव्वयह तं गच्छह णं देवाणुप्पिया ! सएसु २ कुडुंबेसु जे(ट्टे)ट्टपुत्ते कुडुंबमज्जे ठावेत्ता

पुरिसमहस्सवाहिणी[या]ओ सीयाओ दुरुढा समाणा मम अंतियं पाउव्वभवह(त्ति)। तेवि तहेव पाउव्वभवन्ति । तए णं से सेलए राया पंच मंतिसयाई पाउव्वभवमाणाई पासइ २ ता हट्ठुट्ठ कोडुंवियपुरिसे सदावेइ २ ता एवं वयासी-खिप्पामेव भो देवाणुप्पिया ! मंडुयस्स कुमारस्स महत्थं जाव रायाभिसेयं उवट्ठवेह जाव अभिसिंचइ जाव राया जाए (जाव) विहरइ । तए णं से सेलए मंडुयं रायं आपुच्छइ । तए णं (से) मंडुए राया कोडुंवियपुरिसे सदावेइ २ ता एवं वयासी-खिप्पामेव सेलगपुरं नयरं आसिय जाव गंध-वट्ठिभूयं करेह(य) कारवेह य क० २ ता ए(य)वमाणत्तियं पच्चप्पिणह । तए णं से मंडुए दोच्चपि कोडुंवियपुरिसे सदावेइ २ ता एवं वयासी-खिप्पामेव सेलगस्स रत्तो महत्थं जाव निक्खमणाभिसेयं जहेव मेहस्स तहेव नवरं पउमावई-देवी अगगकेसे पडिच्छइ सव्वेवि पडिग्गहं गहाय सीयं दुरुहंति अवसेसं तहेव जाव सामाइयमाइयाई एका-रस्स अंगाई अहिजइ २ ता वट्ठहिं चउत्थ जाव विहरइ । तए णं से सुए सेल(य)गस्स अणगारस्स ताई पंथगपामोक्खाई पंच अणगारसयाई सीसत्ताए वियरइ । तए णं से सुए अन्नया कयाई सेलगपुराओ नगराओ सुभूमिभागाओ उज्जाणाओ पडिनिक्खमइ २ ता वहिया जणवयविहारं विहरइ । तए णं से सुए अणगारे अन्नया कयाइ तेण अणगारसहस्सेणं सद्धिं संपरिवुडे पुव्वाणुपुव्वि चरमाणे गामाणुगामं विहरमाणे जेणेव पुं(पों)डरीयपव्वए तेणेव उवागच्छइ जाव सिद्धे ॥ ६३ ॥ तए णं तस्स सेलगस्स रायरिसिस्स तेहिं अंतेहिं य पंतोहिं य तुच्छेहिं य लहेहिं य अरसेहिं य विरसेहिं य सीएहिं य उण्हेहिं य कालाइक्कंतेहिं य पमाणाइक्कंतेहिं य निच्चं पाणभोयणेहिं य पयड-सुकुमाल(य)स्स य सुहोचियस्स सरीरगंसि वेयणा पाउव्वभूया उज्जला जाव दुरहियासा कंडु(य)दाहपित्तजरपरिगयसरीरे यावि विहरइ । तए णं से सेलए तेणं रो(गा)यायं-केणं सु(क्के)क्खे जाए यावि होत्था । तए णं [से] सेलए अन्नया कयाई पुव्वाणुपुव्वि चरमाणे जाव जेणेव सुभूमिभागे जाव विहरइ । परिस्ता निग्गया मंडुओऽवि निग्गयां सेल(यं)गं अणगारं (जाव) वंदइ जाव पज्जुवासइ । तए णं से मंडुए राया सेलगस्स अणगारस्स सरीर(यं)गं सुक्कं जाव सव्वावाहं सरोगं पासइ २ ता एवं वयासी-अहं णं भंते ! तुव्वं अहाप(वि)वत्तेहिं तिगिच्छिएहिं अहापवत्तेणं ओसहभेस(ज्जेणं)जम-त्तपाणेणं तिगिच्छं आउंटावेमि । तुव्वे णं भंते ! मम जाणसालासु समोसरह फासु-(अं)एसणिजं पीढफलगसेजासंथारगं ओगिण्हित्ताणं विहरह । तए णं से सेलए अणगारे मंडुयस्स रत्तो एयमट्ठं तहत्ति पडिमुणेइ । तए णं से मंडुए सेलगं वंदइ नमेमड वं० २ ता जामेव दिसिं पाउव्वभूए तामेव दिसिं पडिगए । तए णं से सेलए-क्कं जाव जलंते समंढमत्तोवगरणमायाए पंथगपामोक्खेहिं पंचहिं अणगारसएहिं

सद्धिं सेलगपुरमणुप्पविसइ २ ता जेणेव मंडुयस्स जाणसाला तेणेव उवागच्छइ
 २ ता फासुय पीढ जाव विहरइ । तए णं से मंडुए (राया) ति(च्चि)गिच्छिए सद्दावेइ
 २ ता एवं वयासी-नुब्भे णं देवाणुप्पिया । सेलगस्स फासुएसणिज्जेणं जाव
 ति(ते)गिच्छं आ(उट्ठे)उट्ठेह । तए णं तिगिच्छया मंडुएणं रत्ता एवं वुत्ता समाणा
 हट्ठवुट्ठा सेलगस्स (रायरिसिस्स) अहापवत्तेहिं ओसहभेसज्जभत्तपाणेहिं तिगिच्छं
 आउट्ठेति । तए णं तरस सेलगस्स अहापवत्तेहिं ओसहभेसज्जभत्तपाणेहिं से रोगायंके
 उवसंते जाए यावि होत्था हट्ठे (जाव) वलियसरीरे जाए ववगयरोगायंके । तए णं से
 सेलए तंसि रोयातंकंसि उवसंतंसि समाणंसि तंसि विपुलंसि असणंसि ४ मुच्छिए
 गडिए गिडे अज्जोववणे ओसजे ओसन्नविहारी एवं पासत्थे २ कुसीले २ पमत्ते २
 ससत्ते २ उउवद्धपीढफलगसेज्जासंथारए पमत्ते यावि विहरइ नो संचाएइ फासुए-
 सणिज्जं पीढं पच्चप्पिणित्ता मंडुयं च रायं आपुच्छित्ता वहिया जाव विहरित्तए ॥६४॥
 तए णं तेसिं पंथगवज्जाणं पंचण्हं अणगारसयाणं अन्नया कयाइ एगयओ सहियाणं
 जाव पुव्वरत्तावरत्तकालसमयंसि धम्मजागरियं जागरमाणाणं अयमेयाहवे अज्झ
 त्थिए जाव समुप्पज्जित्था-एवं खलु सेलए रायरिसी चइत्ता रज्जं जाव पव्वइए विउले
 (णं) असणे ४ मुच्छिए ४ नो संचाएइ चइउं जाव विहरित्तए । नो खलु कप्पइ
 देवाणुप्पिया । समणाणं जाव पमत्ताणं विहरित्तए । तं सेयं खलु देवाणुप्पिया । अम्हं
 कल्लं सेलगं रायरिसिं आपुच्छित्ता पाडिहारियं पीढफलगसेज्जासंथार(गं)यं पच्चप्पिणित्ता
 सेलगस्स अणगारस्स पंथयं अणगारं वेयावच्चकरं ठा(ठ)वेत्ता वहिया अब्भुज्जएणं जाव
 विहरित्तए । एवं संपेहेंति २ ता कल्लं जेणेव सेल(ए)गरायरिसी० आपुच्छित्ता पाडि-
 हारियं पीढफलग जाव पच्चप्पिणंति २ ता पंथयं अणगारं वेयावच्चकरं ठावेंति २ ता
 वहिया जाव विहरंति ॥६५॥ तए णं से पंथए सेलगस्स सेज्जासंथारउच्चारपासवणखेल्ल-
 सिंघाणमलाओ ओसहभेसज्जभत्तपाणएणं अगिलाए विणएणं वेयावडियं करेइ । तए
 णं से सेलए अन्नया कयाइ कत्तियचाउम्मासियंसि विउलं असणं ४ आहारमाहारिए
 पुव्वावरण्हकालसमयंसि सुहप्पसुत्ते । तए णं से पंथए कत्तियचाउम्मासियंसि कय-
 काउस्सग्गे देवसियं पडिक्कमणं पडिक्कंते चाउम्मासियं पडिक्कमि(उं)उकामे सेलगं
 रायरिसिं खामणट्ठयाए सीसेणं पाएसु संघट्ठेइ । तए णं से सेलए पंथएणं सीसेणं पाएसु
 संघट्ठिए समाणे आसुरत्ते जाव मिसिमिसेमाणे उट्ठेइ २ ता एवं वयासी-से केस णं भो
 एस अपत्थियपत्थिए जाव वज्जिए जे णं ममं सुहपसुत्तं पाएसु संघट्ठेइ ? तए णं से
 पंथए सेलएणं एवं वुत्ते समाणे भीए तत्थे तसिए करयल जाव कट्ठु एवं वयासी-
 अहं णं भंते ! पंथए कयकाउस्सग्गे देवसियं पडिक्कमणं पडिक्कंते (चाउम्मासियं

पडिक्कंते) चाउम्मासियं खामेमाणे देवाणुप्पियं वंदमाणे सीसेणं पाएसु संघट्टेमि । तं खामेमि णं तुब्भे देवाणुप्पिया ! खमन्तु मे अवराहं तुमं णं देवाणुप्पिया ! नाड्भुजो एवं करणयाए—त्तिकट्ठु सेलयं अणगारं एयमट्ठं सम्मं विणएणं भुजो २ खामेइ । तए णं तस्स सेलगस्स रायरिसिस्स पंथएणं एवं वुत्तस्स अयमेयारूवे जाव समुप्पज्जित्था—एवं खलु अहं रज्जं च जाव ओसन्नो जाव उडवद्धपीडं विहरामि । तं नो खलु कप्पइ समणाणं २ पासत्थाणं जाव विहरित्तए । तं सेयं खलु मे कल्ल मंडुयं रायं आपुच्छित्ता पाडिहारियं पीढफलगसेज्जासंथारणं पच्चप्पिणित्ता पंथएणं अणगारेणं सद्धिं वहिया अब्भुज्जएणं जाव जगवयविहारेणं विहरित्तए । एवं संपेहेइ २ ता कल्लं जाव विहरइ ॥ ६६ ॥ एवामेव समगाउसो ! जाव निग्गंथो वा २ ओसन्ने जाव संथारए पमत्ते विहरइ से णं इहलोए चेव वट्ठूणं समणाणं ४ हीलणिज्जे संसारो भाणियव्वो । तए णं ते पंथगवज्जा पंच अणगारसया इमासे कहाए लद्धट्ठा समाणा अन्नमन्नं सद्दावेति २ ता एवं वयासी—[एवं खलु] सेलए रायरिसी पंथएणं वहिया जाव विहरइ । तं सेयं खलु देवाणुप्पिया ! अम्हं सेलगं [रायरिसिं] उवसंपज्जित्ताणं विहरित्तए । एवं संपेहेति २ ता सेलगं रायरिसिं उवसंपज्जित्ताणं विहरंति ॥ ६७ ॥ तए णं (ते सेलयपामोक्खा) से सेलए रायरिसी पंथगपामोक्खा पंच अणगारसया वट्ठूणि वासाणि सामण्णपरियाणं पाडणित्ता जेणेव पुंडरीयपव्वए तेणेव उवागच्छति २ ता जहेव थावच्चापुत्ते तहेव सिद्धा ४ । एवामेव समगाउसो ! जो निग्गंथो वा २ जाव विहरिस्सइ । एवं खलु जंबू ! समणेणं भगवया महावीरेणं जाव संपत्तेणं पंचमस्स नायज्झयणस्स अयमट्ठे पन्नत्ते त्तिवेमि ॥ ६८ ॥ गाहा—सिढिलियसंजमकज्जावि होइउं उज्जमंति जइ पच्छा । संवेगाओ तो सेलउव्व आराहया होति ॥ १ ॥ पंचमं नायज्झयणं समत्तं ॥

जइ णं भंते ! समणेणं ३ जाव संपत्तेणं पंचमस्स नायज्झयणस्स अयमट्ठे पन्नत्ते छट्ठस्स णं भंते ! नायज्झयणस्स समणेणं जाव संपत्तेणं के अट्ठे पन्नत्ते ? एवं खलु जंबू ! तेणं कालेणं तेणं समएणं रायगिहे (णामं णयरे होत्था, तत्थ णं रायगिहे णयरे सेणिए नामं राया होत्था, तस्स णं रायगिहस्स वहिया उत्तरपुरच्छिमे दिसी-भाए एत्थ णं गुगसिलए णामं उज्जाणे होत्था, तेणं कालेणं तेणं समएणं समणे भगवं महावीरे पुव्वाणुपुव्वि चरमाणे जाव जेणेव रायगिहे णयरे जेणेव गुगसिलए उज्जाणे तेणेव समोसढे अहापडिहवं उग्गहं उग्गिण्हित्ता संजमेणं तवसा अप्पाणं भावेमाणे विहरइ) समोसरणं परिस्ता निग्गया (सेणिओ वि णिग्गओ धम्मो कहिओ परिस्ता पडिगया) । तेणं कालेणं तेणं समएणं समणस्स भगवओ महावीरस्स

जेद्वे अंतेवासी इंदभूई नामं अणगारे अदूरसामंते जाव सुक्कज्जाणोवगए विहरइ । तए णं से इंदभूई जायसइ जाव एवं वयासी-कहं णं भंते । जीवा ग(गु)रुयत्तं वा लहुयत्तं वा हव्वमागच्छंति ? गोयमा । से जहानामए केइ पुरिसे एगं महं सुक्कं तुवं निच्छि(ट्ठ)दं निरुवहयं दब्भे(हिं)हि य कुसेहि य वेढेइ २ ता मट्ठियालेवेणं लिपइ २ ता उण्हे दलयइ २ ता सुक्कं समाणं दोच्चं पि दब्भेहि य कुसेहि य वेढेइ २ ता मट्ठियालेवेणं लिपइ २ ता उण्हे दलयइ २ ता सु(क्कं)क्के समा(णं)णे तच्चपि दब्भेहि य कुसेहि य वेढेइ २ ता मट्ठियालेवेणं लिपइ । एवं खलु एएणं उवाएणं (सत्तरत्तं) अंतरा वेढेमाणे अंतरा लिप्प(लिप्पे)माणे अतरा सु(क्क)क्कावेमाणे जाव अट्ठहि मट्ठियालेवेहि आलिपइ २ ता अत्थाहमतारमपोरिसियंसि उदगंसि पक्खिवेज्जा । से नूणं गोयमा । से तुंवे तेसिं अट्ठण्हं मट्ठियालेवेणं गुरुययाए भारि(य)याए गुरुयभारिययाए उप्पि सलिलमइवइत्ता अहे धरणियलपडट्ठाणे भवइ । एवामेव गोयमा । जीवावि पाणाइवाएणं जाव मिच्छादंसणसल्लेणं अणुपुव्वेणं अट्ठकम्मपगडीओ समज्जि(णंति)णित्ता तासिं गुरुययाए भारिययाए गुरुयभारिययाए (एवामेव) कालमासे कालं किच्चा धरणियलमइवइत्ता अहे नरगतलपडट्ठाणा भवंति । एवं खलु गोयमा । जीवा गुरुयत्तं हव्वमागच्छंति । अहे णं गोयमा । से तुंवे तंसि पढमिल्लुगंसि मट्ठियालेवंसि तिञ्जंसि कुहियंसि परिसडियंसि ईसिं धरणियलाओ उप्पइत्ताणं चिट्ठइ । तयाणंतरे (च णं) दोच्चं पि मट्ठियालेवे जाव उप्पइत्ताणं चिट्ठइ । एवं खलु एएणं उवाएणं तेषु अट्ठसु मट्ठियालेवेसु तिञ्जेसु जाव विमुक्कवंधणे अहे-धरणियलमइवइत्ता उप्पि सलिलतलपडट्ठाणे भवइ । एवामेव गोयमा । जीवा पाणाइवायवेरमणेणं जाव मिच्छादंसणसल्लवेरमणेणं अणुपुव्वेणं अट्ठकम्मपगडीओ खवेत्ता गगगतलमुप्पइत्ता उप्पि लोयगगपडट्ठाणा भवंति । एवं खलु गोयमा । जीवा लहुयत्तं हव्वमागच्छंति । एवं खलु जंवू ! समणेणं जाव संपत्तेणं छट्ठस्स नायज्झयणस्स अयमट्ठे पन्नत्ते त्तिवेमि ॥ ६९ ॥ गाहाउ-जह मिउलेवालितं गरुयं तुवं अहो वयइ एवं । आसवकयकम्मगुरु जीवा वच्चंति अहरगइं ॥ १ ॥ तं चेव तव्विमुक्कं जलोवरिं ठाइ जायलहुभावं । जह तह कम्मविमुक्का लोयगगपडट्ठिया होति ॥ २ ॥ छट्ठं नायज्झयणं समत्तं ॥

जइ णं भंते । समणेणं जाव संपत्तेणं छट्ठस्स नायज्झयणस्स अयमट्ठे पन्नत्ते सत्तमस्स णं भते । नायज्झयणस्स के अट्ठे पन्नत्ते ? एवं खलु जंवू ! तेणं कालेणं तेणं समएणं रायगिहे नामं नयरे होत्था । (तत्थणं रायगिहे नयरे सेणिए नामं राया होत्था, तस्स णं रायगिहस्स नयरस्स बहिया उत्तरपुरिच्छमे दिसीभाए)

सुभूमिभागे उज्जाणे (होत्था) । तत्थ णं रायगिहे नयरे ध(णे)ण्णे नामं सत्थवाहे परिवसइ अहे जाव अपरिभूए । (तस्स णं धण्णस्स सत्थवाहरस) भद्दा (नामं) भारिया (होत्था) अहीगपंचिदियसरीरा जाव सुहवा । तस्स णं धण्णरम सत्थवाहस्स पुत्ता भद्दाए भारियाए अत्तया चत्तारि सत्थवाहदारगा होत्था तंजहा-धणपाले धणदेवे धणगोवे धणरक्खिए । तरस णं धण्णस्स सत्थवाहस्स चउण्हं पुत्ताणं भारियाओ चत्तारि सुण्हाओ होत्था तंजहा-उज्झिया भोगवइया रक्खइया रोहिणिया । तए णं तस्स धण्णस्स सत्थवाहस्स अत्तया कयाइं पुव्वरत्तावरत्तकाल-समयंसि इमेयारुत्ते अज्झत्थिए जाव समुप्पज्जित्था-एवं खलु अहं रायगिहे नयरे वहूणं राईसरत्तलवर जाव पभिईणं सयस्स कुडुंवस्स वहूसु कजेसु य कारणे(करणि-जे)सु य कोडुंवेषु य मंतणेषु य गुज्जेसु रहस्सेसु निच्छएसु ववहारेसु य आपुच्छ-णिजे पडिपुच्छणिजे मेढी पमा(णे)णं आहारे आलंवणे चक्खू मेढी-पमाणभूए सव्वकज्जव(ट्ठा)ट्ठावए । त न नज्जइ(जं) णं मए गयंसि वा चुयंसि वा मयंसि वा भगंसि वा लुगंसि वा सडियंसि वा पडियंसि वा विदेस(त्यंसि)गयंसि व विप्प-वसियंसि वा इमस्स कुडुंवस्स(कि) के मत्ते आहारे वा आलंवे वा पडिवंधे वा भविस्सइ । तं सेयं खलु मम कल्लं जाव जलंते विपुलं असणं ४ उवक्खडावेत्ता मित्तनाइ० चउण्ह य सुण्हाणं कुलघरवग्गं आमंतेत्ता तं मित्तनाइनियगसयण० चउण्ह य सुण्हाणं कुलघरवग्गं विपुलेणं असणेणं ४ धूवपुप्फवत्थगंध जाव सक्कारेत्ता सम्माणेत्ता तस्सेव मित्तनाइ चउण्ह य सुण्हाणं कुलघरवग्गस्स (य) पुरओ चउण्हं सुण्हाणं परिकखणट्ठयाए पंच २ सालिअक्खए दलइत्ता जाणामि ताव का कि(ह)ह वा सारक्खेइ वा संगोवेइ वा संवहेइ वा । एवं संपेहेइ २ ता कल्लं जाव मित्तनाइ० चउण्हं सुण्हाणं कुलघरवग्गं आमंतेइ २ ता विपुलं असणं ४ उवक्खडावेइ तओ पच्छा ण्हाए भोयणमंडवंसि सुहासणवरगए (तं) मित्तनाइ० चउण्ह य सुण्हाणं कुल-घरवग्गेणं सद्धि तं विपुलं असणं ४ जाव सक्कारेइ सम्माणेइ स० २ ता तस्सेव मित्तनाइ० चउण्ह य सुण्हाणं कुलघरवग्गस्स (य) पुरओ पंच सालिअक्खए गेण्हइ २ ता जे(ट्ठा)ट्ठं सु(ण्हा)ण्हं उज्झइ(या)यं (तं) सद्दावेइ २ ता एवं वयासी-तुमं णं पुत्ता ! मम हत्थाओ इमे पंच सालिअक्खए गेण्हाहि २ ता अणुपुव्वेणं सारक्ख-माणी संगोवेमाणी विहराहि । जया णं अहं पुत्ता ! तुमं इमे पंच सालिअक्खए जाएज्जा तया णं तुमं मम इमे पंच सालिअक्खए पडि(दि)नि जाएज्जासि-त्तिकट्ठु सुण्हाए हत्थे.दलयइ २ ता पडिविसजेइ । तए णं सा उज्झिया धण्णस्स तह ति एयमट्ठं पडिसुणेइ २ ता धण्णस्स सत्थवाहस्स हत्थाओ ते पंच सालिअक्खए

गेण्हइ २ ता एगंतमवक्कमइ एगंतमवक्कमियाए इमेयारुवे अज्झत्थिए जाव समुप्प-
ज्जित्था-एवं खलु तायाणं कोट्ठागारंसि बहवे पल्ला सालीणं पडिपुण्णा चिट्ठंति, तं
जया णं म(मं)म ताओ इमे पंच सालिअक्खए जाए(रु)सइ तया णं अहं पल्लंतराओ
अच्चे पच्च सालिअक्खए गहाय दाहामि-त्तिकट्ठु एवं संपेहेइ २ ता ते पंच सालिअ-
क्खए एगंते एडेइ २ ता सकम्मसंजुत्ता जाया यावि होत्था । एवं भोगवइयाए वि-
नवरं सा छो(ल्ले)ल्लइ २ ता अणुगिलइ २ ता सकम्मसंजुत्ता जाया यावि होत्था ।
एवं रक्खिया वि नवरं गेण्हइ २ ता इमेयारुवे अज्झत्थिए०-एवं खलु ममं ताओ
इमस्स मित्तनाइ० चउण्ह य सुण्हाणं कुलघरवग्गस्स य पुरओ सद्दावेत्ता एवं वयासी-
तुमं णं पुत्ता ! मम हत्थाओ जाव पडिनिज्जाएज्जासि-त्तिकट्ठु मम हत्थंसि पंच
सालिअक्खए दलयइ, तं भवियव्वं एत्थ कारणेणं-त्तिकट्ठु एवं संपेहेइ २ ता ते पंच
सालिअक्खए सुद्धे वत्थे बंधइ २ ता रयणकरंडियाए पक्खि(वे)वइ २ ता उ(ऊ)-
सीसामूले ठावेइ २ ता तिसंझं पडिजागरमाणी २ विहरइ । तए णं से धण्णे
सत्थवाहे त(स्से)हेव मित्त जाव चउत्थि रोहिणीयं सुण्हं सद्दावेइ २ ता जाव तं
भवियव्व एत्थ कारणेणं (तं) तिकट्ठु सेयं खलु मम एए पंच सालिअक्खए सारक्ख-
माणीए संगोवेमाणीए सवद्धेमाणीए-त्तिकट्ठु एवं संपेहेइ २ ता कुलघरपुरिसे सद्दावेइ
२ ता एवं वयासी-तुब्भे णं देवाणुप्पिया ! एए पंच सालिअक्खए गेण्हह २ ता
पढमपाउसंसि महावुट्ठिकायंसि निवइयंसि समाणंसि खुट्ठागं केयारं सुपरिक्कमियं करेह
२ ता इमे पंच सालिअक्खए वावेह २ ता दोच्चंपि तच्चंपि उक्खयनि(क्ख)हए करेह
२ ता वाडिपक्खेवं करेह २ ता सारक्खमाणा संगोवेमाणा आणुपुव्वेणं संवद्धेह ।
तए णं ते कोट्ठुंविया रोहिणीए एयमट्ठं पडिसुणेति (२ ता) ते पंच सालिअक्खए
गेण्हंति २ ता अणुपुव्वेणं सारक्खंति संगोविति (विहरंति) । तए णं ते कोट्ठुंविया
पढमपाउसंसि महावुट्ठिकायंसि निवइयंसि समाणंसि खुट्ठागं केयारं सुपरिक्कमियं
करंति २ ता ते पंच सालिअक्खए ववति २ ता दोच्चंपि तच्चपि उक्खयनिहए
करंति २ ता वाडिपरिक्खेवं करंति २ ता अणुपुव्वेणं सारक्खेमाणा संगोवेमाणा
सवद्धेमाणा विहरंति । तए णं ते साली (अक्खए) अणुपुव्वेणं सारक्खज्जमाणा
संगोविज्जमाणा संवद्धिज्जमाणा साला जाया किण्हा किण्होभासा जाव निउरंवभूया
पासाईया ४ । तए णं ते साली पत्तिया वत्तिया गब्भिया पसू[ड]या आगयगंधा
खीराइया वद्धफला पक्का परियागया सल्लइया पत्तइया हरियपव्वकंडा जाया यावि
होत्था । तए णं ते कोट्ठुंविया ते साली(ए) पत्तिए जाव सल्लड(ए)यपत्तइए जाणित्ता
तिक्खेहि नवपज्जणएहिं असि(य)एहिं लुणंति २ ता करयलमलिए करेति २ ता

पुणंति । तत्थ णं चोक्खाणं सू[इ]याणं अखंडाणं अ(फो)कुडियाणं छ(ट्ट)डछडा-
 पूयाणं सालीणं मागहए पत्थए जाए । तए णं ते कोडुंविया ते साली नवएसु घडएसु
 पक्खिवंति २ ता उ(पलिं)ल्लिंपंति २ ता लछियमुद्दिए करंति २ ता कोट्टागारस्स
 एगदेसंसि ठावेंति २ ता सारक्खमाणा संगोवेमाणा विहरंति । तए णं ते कोडुंविया
 दोच्चंसि वासारत्तंसि पढमपाउसंसि महावुट्ठिकायंसि निवइयंसि खुट्ठागं केयारं सुपरि-
 कम्मियं करंति २ ता ते साली ववंति दोच्चंपि (तच्चंपि) उक्खायणिहए जाव लुणंति
 जाव चलणतलमलिए- करंति २ ता पुणंति । तत्थ णं सालीणं वहवे कुडवा जाव
 एगदेसंसि ठावेंति २ ता सारक्खेमाणा संगोवेमाणा विहरंति । तए णं ते कोडुंविया
 तच्चंसि वासारत्तंसि महावुट्ठिकायंसि निवइयंसि वहवे केयारे सुपरिकम्मिए जाव
 लुणंति २ ता संवहंति २ ता खलयं करेति २ ता मलेंति जाव वहवे कुंभा जाया ।
 तए णं ते कोडुंविया साली कोट्टागारंसि प(क्खि)ल्लेवंति जाव विहरंति । चउत्थे
 वासारत्ते वहवे कुंभसया जाया । तए णं तस्स धण्णस्स पंचमयंसि सवच्छरंसि
 परिणममाणंसि पुव्वरत्तावरत्तकालसमयंसि इमेयाहवे अज्झत्थिए जाव समुप्प-
 जित्था-एवं खलु म(म)ए इओ अईए पंचमे सवच्छरे चउण्हं सुण्हाणं परिकख-
 णट्ठयाए ते पंच २ सालिअक्खया हत्थे दिशा, तं सेयं खलु मम कट्ठं जाव जलंते
 पंच सालिअक्खए परिजाइतए जाव जाणामि(ताव)काए किहसारक्खियावा संगोविया
 वा संवद्धिया (जाव त्तिकट्टु) वा एवं संपेहेइ २ ता कल्ल जाव जलंते विपुलं असणं
 ४ मित्तनाइनियग० चउण्ह य सुण्हाणं कुलघरवग्गं जाव सम्माणित्ता तस्सेव मित्त०
 चउण्ह य सुण्हाणं कुलघरवग्गस्स पुरओ जेठ्ठं उज्जि(य)यं सद्दावेइ २ ता एवं
 वयासी-एवं खलु अहं पुत्ता ! इओ अईए पंचमंसि सवच्छरंसि इमस्स मित्त०
 चउण्ह य सुण्हाणं कुलघरवग्गस्स य पुरओ तव हत्थंसि पंच सालिअक्खए दलयामि
 जया णं अहं पुत्ता ! एए पंच सालिअक्खए जाएजा तया णं तुमं मम इमे पंच
 सालिअक्खए पडिनिज्जाएसि-त्तिकट्टु (तं हत्थंसि दलयामि) । से नूणं पुत्ता ! अट्ठे
 समट्ठे ? हंता अत्थि । तं ण [तुमं] पुत्ता ! मम ते सालिअक्खए पडिनिज्जाए(हि)सि ।
 तए णं सा उज्जि (ड) या एयमट्ठं धण्णस्स पडिसुणेइ २ ता जेणेव कोट्टागारं तेणेव
 उवागच्छइ २ ता पल्लाओ पंच सालिअक्खए गेण्हइ २ ता जेणेव धण्णे सत्थवाहे
 तेणेव उवागच्छइ २ ता (धण्णं सत्थवाहं) एवं वयासी-एए णं ते पंच सालिअ-
 क्खए-त्तिकट्टु धण्णस्स हत्थंसि ते पंच सालिअक्खए दलयइ । तए णं धण्णे उज्जियं
 सवहसावियं करेइ २ ता एव वयासी-किं णं पुत्ता ! (एए) ते चेव पंच सालिअ-
 क्खए उदाहु अन्ने ? , तए णं उज्जिया धण्णं सत्थवाहं एवं वयासी-एवं खलु तुब्भे

ताओ ! इओ अईए पंचमे संवच्छरे इमस्स मित्तनाइ० चउण्ह य जाव विहराहि । तए णं अहं तुब्भं एयमट्ठं पडिखणेमि २ ता ते पंच सालिअक्खए गेण्हामि एगंतमवक्कमामि । तए णं मम इमेयारूवे अज्झत्थिए जाव समुप्पज्जित्था-एवं खलु तायाणं कोट्ठागारंसि जाव सकम्मसंजुत्ता, तं नो खलु ता(ओ)या ! ते चेव पंच सालिअक्खए एए णं अन्ने । तए णं से धण्णे उज्झि[इ]याए अंतिए एयमट्ठं सोच्चा निसम्म आसुरुत्ते जाव मिसिमिसेमाणे उज्झिइयं तस्स मित्तनाइ० चउण्हं सुण्हाणं कुलधरवग्गस्स य पुरओ तस्स कुलधरस्स छारुज्झियं च छाणुज्झियं च कयवरुज्झियं च संपु(समु)च्छियं च सम्मज्झिअं च पाउवदा(इं)इयं च ण्हाणोवदा(इं)इयं च वाहिरपेसणका(रि)रियं [च] ठावेइ । एवामेव समणाउसो ! जो अम्हं निगंथो वा २ जाव पव्वइए पंच य से महव्वयाइं उज्झियाइं भवंति से णं इहभवे चेव बहूणं समणाणं ४ हीलणिज्जे जाव अणुपरियट्ठइस्सइ जहा सा उज्झिया । एवं भोगवइयावि नवरं तस्स कुलधरस्स कंडितियं च कोट्ठंतियं च पीसंतियं च एवं रुच्चंतियं (च) रंधंतियं (च) परिवेसंतियं च परिभायंतियं च अर्ब्भितरियं च पेसणकारि महाणसिणि ठावेइ । एवामेव समणाउसो ! जो अम्हं समणो वा २ पंच य से महव्वयाइं फोडियाइं भवंति से णं इहभवे चेव बहूणं समणाणं ४ हीलणिज्जे ४ जाव जहा व सा भोगवइया । एवं रक्खिइयावि नवरं जेणेव वासघरे तेणेव उवागच्छइ २ ता मंजूसं विहाडेइ २ ता रयणकरडगाओ ते पंच सालिअक्खए गेण्हइ २ ता जेणेव धण्णे सत्थवाहे तेणेव उवागच्छइ २ ता पंच सालिअक्खए धण्णस्स हत्थे दलयइ । तए णं से धण्णे (स०) रक्खिइयं एवं वयासी-कि णं पुत्ता ! ते चेव एए पंच सालिअक्खए उदाहु अन्ने (त्ति) ? । तए णं रक्खिइया धण्णं (सत्थवाहं) एवं वयासी-ते चेव ताया । एए पंच सालिअक्खया नो अन्ने । कहं णं पुत्ता ! १ एवं खलु ताओ ! तुब्भे इओ पंचमंमि (संवच्छरे) जाव भवियव्वं एत्थ कारणेणं-तिकट्ठु ते पंच सालिअक्खए सुद्धे चत्थे जाव तिसंअं पडिजागरमाणी यावि विहरामि । ताओ एएणं कारणेणं ताओ ! ते चेव (ते) पंच सालिअक्खए नो अन्ने । तए णं से धण्णे रक्खिइयाए अंति(ए)यं एयमट्ठं सोच्चा हट्ठतुट्ठे तस्स कुलधरस्स हिरण्णस्स य कंसदूसविपुलधण जाव सावएज्जस्स य भंडागारिणि ठावेइ । एवामेव समणाउसो ! जाव पंच य से महव्वयाइं रक्खिइयाइं भवंति से णं इहभवे चेव बहूणं समणाणं ४ अच्चणिज्जे जाव जहा सा रक्खि[इ]या । रोहि(णि)णीयावि एवं चेव नवरं तुब्भे ताओ ! मम सुव-हुयं सगडीसागडं दला(हि)ह जा(जे)णं अहं तु(ब्भं)ब्भे ते पंच सालिअक्खए पडिनिजाएमि । तए णं से धण्णे (सत्थवाहे) रोहिणि एवं वयासी-कहं णं तुमं मम

पुत्ता ! ते पंच सालिअक्खए सगडसागडेणं निज्जा(इ)एस्ससि ? । तए णं सा रोहिणी धण्णं (सत्थवाहं) एवं वयासी-एवं खलु ताओ ! इओ तुव्भे पंचमे संवच्छरे इमस्स मित्त जाव बहवे कुंभसया जाया तेणेव कमेणं, एवं खलु ताओ ! तुव्भे ते पंच सालिअक्खए सग(ड)डीसागडेणं निज्जाएमि । तए णं से धण्णे सत्थवाहे रोहिणीयाए सुवहुयं सगडीसागडं दलयइ । तए णं रोहिणी सुवहुं सगडीसागडं गहाय जेणेव सए कुलघरे तेणेव उवागच्छइ (२ ता) कोट्ठागा(रे)रं विहाडेइ २ ता पल्ले उब्भिदइ २ ता सगडीसागडं भरेइ २ ता रायगिहं नगरं मज्झमज्झेणं जेणेव सए गिहे जेणेव धण्णे सत्थवाहे तेणेव उवागच्छइ । तए णं रायगिहे नयरे सिंघाडग जाव बहुजणो अन्नमन्नं एवमाइक्खइ ४-धन्ने णं देवाणुप्पिया ! धण्णे सत्थवाहे जस्स णं रोहिणीया सुण्हा (जीए ण) पंच सालिअक्खए सगडसागडेणं निज्जाएइ । तए णं से धण्णे सत्थवाहे ते पंच सालिअक्खए सगडसागडेणं निज्जा(ए)इए पासइ २ ता हट्ठ जाव पडिच्छइ २ ता तस्सेव मित्तनाइ० चउण्ह य सुण्हाणं कुलघर(वग्गस्स)पुरओ रोहिणीयं सुण्हं तस्स कुलघरस्स बहूसु कज्जेसु य जाव रहस्सेसु य आपुच्छणिज्जं जाव वट्ठावियं पमाणभूयं ठावेइ । एवामेव समणाउसो ! जाव पंच [से] महव्वयाइं संवद्धियाइं भवंति से णं इहभवे चेव बहूणं समणाणं जाव वीईवइस्सइ जहा व सा रोहिणीया । एवं खलु जंवू ! समणेणं भगवया महावीरेणं जाव संपत्तेणं सत्तमस्स नायज्जयणस्स अयमट्ठे पन्नत्ते त्तिवमि ॥ ७० ॥

गाहाओ-जह सेट्ठी तह गुरुणो जह णाइजणो तहा समणसंघो । जह वहुया तह भव्वा जह सालिकणा तह वयाइं ॥ १ ॥ जह सा उज्जियनामा उज्जियसाली जहत्यमभिहाणा । पेसणगारित्तेणं अस्संखदुक्खक्खणी जाया ॥ २ ॥ तह भव्वो जो कोई संघसमक्खं गुरुविदिण्णाइं । पडिवज्जिउं संमुज्जइ महव्वयाइं महामोहा ॥ ३ ॥ सो इह चेव भवंमी जणाण धिक्कारभायणं होइ । परलोए उ दुहत्तो णाणाजोणीसु संचरइ ॥ ४ ॥ जह वा सा भोगवई जहत्यनामोवभुत्तसालिकणा । पेसणविसेसकारित्तणेण पत्ता दुहं चेव ॥ ५ ॥ तह जो महव्वयाइं उवभुंजइ जीवियत्ति पालितो । आहाराइसु सत्तो चत्तो सिवसाहणिच्छाए ॥ ६ ॥ सो एत्थ जहिच्छाए पावइ आहारमाइ लिंगित्ति । विउसाण नाइपुज्जो परलोयम्मी दुही चेव ॥ ७ ॥ जह वा रक्खियवहुया रक्खियसालीकणा जहत्यक्खा । परिजणमण्णा जाया भोगसुहाइं च संपत्ता ॥ ८ ॥ तह जो जीवो सम्मं पडिवज्जित्ता महव्वए पंच । पालेइ निरइयारे पमायलेसंपि वज्जेतो ॥ ९ ॥ सो अप्पहिएक्करई इहलोयंमिवि विऊहि पणयपओ । एगंतसुही जायइ परम्मि मोक्खंपि पावेइ ॥ १० ॥ जह रोहिणी उ सुण्हा रोवियसाली जहत्यमभिहाणा ।

वड्डिता सालिकणे पत्ता सव्वस्स सामित्तं ॥ ११ ॥ तह जो भव्वो पाविय वयाई
पालेइ अप्पणा सम्मं । अण्णेसिवि भव्वाणं देइ अणेगेसिं हियहेउं ॥ १२ ॥ सो
इह संघपहाणो जुगप्पहाणेति लहइ संसहं । अप्पपरेसि कल्लणकारओ गोयमपहुव्व
॥ १३ ॥ तित्थस्स वुड्ढिकारी अक्खेवणओ कुतित्थियाईणं । विउसनरसेवियकमो
कमेण सिद्धिपि पावेइ ॥ १४ ॥ **सत्तमं नायज्झयणं समत्तं ॥**

जइ णं भंते ! समणेणं जाव संपत्तेणं सत्तमस्स नायज्झयणस्स अयमट्ठे पन्नत्ते
अट्ठमस्स णं भंते ! के अट्ठे पन्नत्ते ? एवं खलु जंबू ! तेणं कालेणं तेणं समएणं
इहेव जंबुद्वीवे २ महाविदेहे वासे मंदरस्स पव्वयस्स पच्चत्थिमेणं निसढस्स वास-
हरपव्वयस्स उत्तरेणं सीओयाए महानदीए दाहिणेणं सुहावहस्स वक्खारपव्वयस्स
पच्चत्थिमेणं पच्चत्थिमलवणसमुद्दस्स पुर(च्छि)त्थिमेणं एत्थ णं सलिलावई नामं
विजए पन्नत्ते । तत्थ णं सलिलावईविजए वीयसोगा नामं रायहाणी पन्नत्ता नवजोयण-
वित्थिण्णा जाव पच्चक्खं देवलोगभूया । तीसे णं वीयसोगाए रायहाणीए उत्तरपुरच्छिमे
दिसीभाए (एत्थ णं) इंदकुंभे नामं उज्जाणे (होत्था) । तत्थ णं वीयसोगाए रायहा-
णीए बले नामं राया (होत्था) । त(स्सेव)स्स धारिणीपामोक्खं दे(वि)वीसहस्सं
ओ(उत्र)रोहे होत्था । तए णं सा धारिणी देवी अन्नया कयाइ सीहं सुमिणे पासित्ताणं
पडिवुद्धा जाव महव्वले (नामं) दारए जाए उम्मुक्क जाव भोगसमत्थे । तए णं तं
महव्वलं अम्मापियरो सरिसियाणं कमलसि(री)रिपामोक्खाणं पंचण्हं रायवरकन्ना-
सयाणं एगदिवसेणं पाणिं गेण्हावेंति । पंच पासायसया पंचसओ दाओ जाव विह-
रइ । (तेणं कालेणं तेणं समएणं धम्मघोसा नामं थेरा पंचहिं अणगारसएहिं सद्धिं
संपरिवुद्धा पुव्वाणुपुवि चरमाणा गामाणुगामं दूइज्जमाणा सुहंसुहेणं विहरमाणा
जेणेव इंदकुंभे नामं उज्जाणे तेणेव समोसढा संजमेणं तवसा अप्पाणं भावेमाणा
विहरंति) थेरागमणं इंदकुंभे उज्जाणे समोसढे परिसा निग्गया बलो वि (राया)
निग्गओ धम्मं सोच्चा निसम्म जं नवरं महव्वलं कुमारं रज्जे ठावेइ जाव एकारसगवी
बहूणि वासाणि सामण्णपरियागं पाउणित्ता जेणेव चारुपव्वए मासिएणं भत्तेणं
(अपाणेणं केवलं पाउणित्ता जाव) सिद्धे । तए णं सा कमलसिरी अन्नया कयाइ
(जाव) सीहं सुमिणे (पासित्ताणं पडिवुद्धा) जाव बलभदो कुमारो जाओ जुवराया
यावि होत्था । तस्स णं महव्वलस्स रत्तो इमे छप्पियवालवयंसगा रायाणो होत्था
तंजहा-अयले धरणे पूरणे वसू वेसमणे अभिचंदे सहजा[य]या जाव सं(वड्डिया
ते)हिच्चाए नित्थरियव्वे-तिकट्ठु अन्नमन्नस्स एयमट्ठं पडिसुणेंति (सुहंसुहेणं विह-
रंति) । तेणं कालेणं तेणं समएणं (ध० थे० जे० इ० उ० ते० स०) इंदकुंभे

उज्जाणे थेरा समोसढा । परिसा निग्गया । (महव्वलोवि राया निग्गओ धम्मो कहिओ) महव्वले णं धम्मं सोच्चा जं नवरं (देवाणुप्पिया !) छप्पियवालवयंसए आपुच्छामि वलभद्दं च कुमारं रज्जे ठावेमि जाव छप्पियवालवयंसए आपुच्छइ । तए णं ते छप्पिय० महव्वलं रायं एवं वयासी-जइ णं देवाणुप्पिया ! तुव्वे पव्व-यह अम्हं के अन्ने आहारे वा जाव पव्वयामो । तए णं से महव्वले राया ते छप्पिय० एवं वयासी-जइ णं (देवाणुप्पिया !) तुव्वे मए सद्धिं जाव पव्वयह तो णं गच्छह जेट्ठे पुत्ते सएहिं २ रज्जेहि ठावेह पुरिससहस्सवाहिणीओ सीयाओ दुल्लढा जाव पाउब्भवंति । तए णं से महव्वले राया छप्पियवालवयंसए पाउब्भूए पासंइ २ ता हट्ठ जाव कोडुं वियपुरिसे (सद्दावेइ २ ता एवं वयासी-गच्छह णं तुव्वे देवा-णुप्पिया ! वलभद्दस्स कुमारस्स जाव तेवि तहेव जाव अभिसिंचइ०, तए णं से महव्वले वलभद्दं० आपुच्छइ)० वलभद्दस्स रायाभिसेओ जाव आपुच्छइ । तए णं से महव्वले जाव महया इड्डीए (छ० स०) पव्वइए एक्कारसअं(गाइं०)गवी वहूहिं चउत्थ जाव भावेमाणे विहरइ । तए णं तेसिं महव्वलपामोक्खाणं सत्तण्हं अणगा-राणं अन्नया कयाइ एगयओ सहियाणं इमेयाहवे मिहो-कहासमुल्लावे समुप्पज्जित्था-जं णं अम्हं देवाणुप्पिया ! ए(गं)गे तवोकम्मं उवसंपज्जित्ताणं विहरइ तं णं अम्हेहिं सव्वेहिं (सद्धिं) तवोकम्मं उवसंपज्जित्ताणं विहरित्तए-त्तिकट्ठु अन्नमन्नस्स एयमट्ठं षड्सुणेंति २ ता वहूहिं चउत्थ जाव विहरंति । तए णं से महव्वले अणगारे इमेणं कारणेणं इत्थिनामगोयं कम्मं निव्वत्तेसु-जइ णं ते महव्वलवज्जा छ अणगारा चउत्थं उवसंपज्जित्ताणं विहरंति तओ से महव्वले अणगारे छट्ठं उवसंपज्जित्ताणं विहरइ । जइ णं ते महव्वलवज्जा [छ] अणगारा छट्ठं उवसंपज्जित्ताणं विहरंति तओ से मह-व्वले अणगारे अट्ठमं उवसंपज्जित्ताणं विहरइ । एवं [अह] अट्ठमं तो दसमं अह दसमं तो दुवाल(सं)समं । इमेहि य णं वीसाएहि य कारणेहि आसेवियवहुलीक-एहिं तित्थयरनामगोयं कम्मं निव्वत्तिंसु तंजहा-अरहंतसिद्धपवयणगुत्थेरवहुस्सुए तवस्सीसुं । वच्छल्लया य तेसिं अभिक्ख नाणोवओ(गे)गा य ॥ १ ॥ दंसणविणए आवस्सए य सीलव्वए निरइया(रं)रो । खणलवतव(च्चि)चियाए वेयावच्चे समाही य ॥ २ ॥ अ(ए)पुव्वनाणगहणे सुयभत्ती पवयणे प(भा)हावणया । एएहिं कारणेहिं तित्थयरत्तं लहइ (जीओ) सो उ ॥ ३ ॥ तए णं ते महव्वलपामोक्खा सत्त अण-गारा मासियं भिक्खुपडिमं उवसंपज्जित्ताणं विहरंति जाव एगराइयं (भि० उव०) । तए णं ते महव्वलपामोक्खा सत्त अणगारा खुट्ठाणं सीहनिक्कीलियं तवोकम्मं उव-संपज्जित्ताणं विहरंति तजहा-चउत्थं करेंति २ ता सव्वकामगुणियं पारेंति २ ता

छट्ठं करेति २ ता चउत्थं करेति २ ता अट्ठमं करेति २ ता छट्ठं करेति २ ता दसमं करेति २ ता अट्ठमं करेति २ ता दुवालसमं करेति २ ता दसमं करेति २ ता चो(चाउ)दसमं करेति २ ता दुवालसमं करेति २ ता सोलसमं करेति २ ता चोदसमं करेति २ ता अट्ठारसमं करेति २ ता सोलसमं करेति २ ता वीसइमं करेति २ ता अट्ठारसमं करेति २ ता वीसइमं करेति २ ता सोलसमं करेति २ ता अट्ठारसमं करेति २ ता चोदसमं करेति २ ता सोलसमं करेति २ ता दुवालसमं करेति २ ता चोदसमं करेति २ ता दसमं करेति २ ता दुवालसमं करेति २ ता अट्ठमं करेति २ ता दसमं करेति २ ता छट्ठं करेति २ ता अट्ठमं करेति २ ता चउत्थं करेति २ ता छट्ठं करेति २ ता चउत्थं करेति सव्वत्थं सव्वकामगुणिएणं पारेंति । एवं खलु एसा खुट्ठागसीहनिक्कीलियस्स तवोकम्मस्स पढमा परिवाडी छहिं मासेहिं सत्तहि य अहोरत्तेहि य अहासु(त्ता)त्तं जाव आराहिया भवइ । तयाणंतंरं दोच्चाए परिवाडीए चउत्थं करेति नवरं विग(इ)यवज्जं पारेंति । एवं तच्चा-
[ए]वि परिवाडी[ए] नवरं पारणए अलेवाडं पारेंति । एवं चउत्थावि परिवाडी नवरं पारणए आयंविलेण पारेंति । तए णं ते महब्बलपामोक्खा सत्त अणगारा खुट्ठागं सीहनिक्कीलियं तवोकम्म दोहिं संवच्छरेहिं अट्ठावीसाए अहोरत्तेहिं अहासुत्तं जाव आणाए आराहेत्ता जेणेव थेरे भगवंते तेणेव उवागच्छंति २ ता थेरे भगवंते वंदंति नमंसंति वं० २ ता एवं वयासी-इच्छामो णं भंते ! महालयं सीहनिक्कीलियं (तवोकम्मं) तहेव जहा खुट्ठागं नवरं चोत्तीसइमाओ नियत्त(ए)इ एगाए परिवाडीए कालो एगेणं संवच्छरेणं छहिं मासेहिं अट्ठार(से)सहि य अहोरत्तेहिं समप्पेइ । सव्वंपि सीहनिक्कीलियं छहिं वासेहिं दो(हि य)हिं मासेहि वारसहि य अहोरत्तेहिं समप्पेइ । तए णं ते महब्बलपामोक्खा सत्त अणगारा महालयं सीहनिक्कीलियं अहासुत्तं जाव आरा(हे)हिता जेणेव थेरे भगवंते तेणेव उवागच्छंति २ ता थेरे भगवंते वंदंति नमंसंति वं० २ ता बहूणि चउत्थं जाव विहरति । तए णं ते महब्बलपामोक्खा सत्त अणगारा तेणं उ(ओ)रालेणं सुक्का भुक्खा जहा खंदओ नवरं थेरे आपुच्छित्ता चासु(वक्खार)पव्वयं [सणियं] दुरुहंति जाव दोमासियाए संलेहणाए सवीसं भत्तसयं (अणसणं) चउरासीइं वाससयसहस्साइं सामण्णपरियागं पाउणंति २ ता चुलसीइं पुव्वसयसहस्साइं सव्वाउयं पालइत्ता जयंते विमाणे देवत्ताए उववन्ना ॥ ७१ ॥ तत्थ णं अत्थेगइयाणं देवाणं वत्तीसं सागरोवमाइं ठिई पन्नत्ता । तत्थ णं महब्बलवज्जाणं छण्हं देवाणं देसूणाइं वत्तीसं सागरोवमाइं ठिई । महब्बलस्स देवस्स पडिपुण्णाइं वत्तीसं सागरोवमाइं ठिई(प०) । तए णं ते

महव्वल(देव)वज्जा छप्पि(य) देवा (जयं)ताओ देवलोगाओ आउक्खएणं जाव
अणंतरं चयं चइत्ता इहेव जंबुदीवे २ भारहे वासे विसुद्धपिइमाइवंसेसु रायकुलेसु
पत्तेयं २ कुमारत्ताए पच्चायाया(सी) तंजहा-पडिबुद्धी इक्खागराया, चंदच्छाए अंग-
राया, संखे कासिराया, रूपी कुणालाहिवई, अदीणसत्त कुरुराया, जियसत्त पंचाला-
हिवई । तए णं से महव्वले देवे तिहिं नाणेहिं समग्गे उच्चट्टाण(ट्टि)गएसु गहेसु
सोमासु दिसासु वितिमिरासु विसुद्धासु जडएसु सउणेसु पयाहिणाणुकूलंसि भूमिसप्पिसि
मारुयंसि पवायंसि निप्फन्नसस्समेइणीयंसि कालंसि पमुइयपक्कीलिएसु जणवएसु
अद्धरत्तकालसमयंसि अस्सिणीनक्खत्तेणं जोगमुवागएणं जे से हेमंताणं चउत्थे
मासे अट्ठमे पक्खे फग्गुणसुद्धे तस्स णं फग्गुणसुद्धस्स चउत्थिपक्खेणं जयंताओ
विमाणाओ वत्तीसं सागरोवमट्ठि(ई)इयाओ अणंतरं चयं चइत्ता इहेव जंबुदीवे २
भारहे वासे मिहिलाए रायहाणीए कुंभगस्स रत्तो पभावईए देवीए कुच्छिसि आहा-
रवक्कंतीए भववक्कंतीए सरीरवक्कंतीए गब्भत्ताए वक्कंते । तं रयणिं च णं चोइस
महासुमिणा वण्णओ । भत्तारकहणं सुमिणपाढगपुच्छा जाव विहरइ । तए णं तीसे
पभावईए देवीए तिण्हं मासाणं बहुपडिपुण्णाणं इमेयारुवे डोहले पाउब्भूए-
धन्नाओ णं ताओ अम्मयाओ जाओ णं जलथलयभासुरप्पभूएणं दसद्धवण्णेणं मल्लेणं
अत्थुयपच्चत्थुयंसि सयणिज्जंसि सन्निसण्णाओ संनिवन्नाओ य विहरंति एगं च महं
सि(री)रिदामगंडं पाडलमल्लियचंप(य)गअसोगपुन्नागनागमरुयगदमणगअणोज्जकोज्ज-
य(कोरंटपत्तवर)पउरं परमसुह(फास)दरिसणिज्जं महया गंधद्धणिं मुयंतं अग्घायमा-
णीओ डोहलं विणेति । तए णं ती(से)ए पभावईए देवीए इमं ए(इमे)यारुवं डोहलं
पाउब्भूयं पासित्ता अहासन्निहिया वाणमंतरा देवा खिप्पामेव जलथलय जाव दस-
द्धवण्णमल्लं कुंभगसो य भारग्गसो य कुंभगस्स रत्तो भवणंसि साहरंति एगं च णं महं
सिरिदामगंडं जाव (गंधद्धणिं) मुयंतं उवणेति । तए णं सा पभावई देवी जलथलय
जाव मल्लेणं दोहलं विणेइ । तए णं सा पभावई देवी पसत्थदोहला जाव विहरइ । तए
णं सा पभावई देवी नवण्हं मासाणं अद्धट्ठमाण य रायं(रत्तिं)दियाणं जे से हेमंता-
णं पढमे मासे दोच्चे पक्खे मग्गसिरसुद्धे तस्स णं (मग्गसिरसुद्धस्स) एक्कारसीए पुव्व
रत्तावरत्तकालसमयंसि अस्सिणीनक्खत्तेणं (जोगमुवागएणं) उच्चट्टाण जाव पमुइयप-
क्कीलिएसु जणवएसु आरोगारोगं एगूणवीसइमं तिथयरं पयाया ॥ ७२ ॥ तेणं कालेणं
तेणं समएणं अ(हो)हेलोगवत्थव्वाओ अट्ठ दिमाकुमारी(ओ)मयह(री)रियाओ जहा
जंबुदीवपन्नतीए जम्मणं सव्वं (भाणियव्वं) नवरं मिहिलाए (नयरीए) कुंभ(राय)-
गस्स (भवणंसि) पभावईए (देवीए) अभिलावो संजोएयव्वो जाव नंदीसरव(रे)र-

दीवे महिमा । तथा णं कुंभए राया बहूहिं भवणवईहिं ४ तित्थयर(जम्मणाभिसेयं)-
जायकम्मं जाव नामकरणं-जम्हा णं अ(म्हे)म्हं इमीए दारियाए (माउगब्भंसि
वक्कममाणंसि) माऊए मल्लसयणीयंसि डोहले विणीए तं होउ णं नामेणं मल्ली (नामं
ठवेइ) जहा महब्बले (नाम) जाव परिवट्ठिया-सा व(द्ध)द्धई भगवई दियल्लोयचुया
अणोवमसिरीया । दासीदासपरिवुडा परिकिण्णा पीढमदेहिं ॥ १॥ असियसिरया सुन-
यणा विवोद्धी धवलदंतपंतीया । वरकमलकोमलंगी फुल्लुप्पलगंधनीसासा ॥ २ ॥ ७३ ॥
तए णं सा मल्ली विदेहरायवरकन्ना उम्मुक्कबालभावा जाव रुवेण [य] जोव्वणेण य
लावणेण य अईव २ उक्किट्ठा उक्किट्ठसरीरा जाया(या)वि होत्था । तए णं सा मल्ली
(वि०) देसूणवाससयजाया ते छप्पि(य) रायाणो विउल्लेणं ओहिणा आभोएमाणी
२ विहरइ तंजहा-पडिबुद्धिं जाव जियसत्तुं पंचालाहिवइ । तए णं सा मल्ली(वि०)
कोडुंविण्यपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! असोग-
वणियाए एगं महं मोहणघरं करेह अणेगखंभसयसन्नविट्ठं । तस्स णं मोहणघरस्स
बहुमज्जदेसभाए छ गब्भघरए करेह । तेसि णं गब्भघरगाणं बहुमज्जदेसभाए
जालघरयं करेह । तस्स णं जालघरयस्स बहुमज्जदेसभाए मणिपेढियं करेह
(तेवि तहेव) जाव पच्चप्पिणंति । तए णं [सा] मल्ली मणिपेढियाए उवरिं अप्पणो
सरिसियं सरित्तयं सरिब्बयं सरिसलावणजोव्वणगुणोववेयं कणगम(इं)ग्रं मत्थय-
च्छिट्ठं पउमप्पलपिहाणं पडिमं करेइ २ ता जं विउलं असणं ४ आहारेइ तओ
मणुज्जाओ असणाओ ४ कल्लकल्लिं एगमेगं पिंडं गहाय तीसे कण(ग)गामईए मत्थ-
यच्छिट्ठाए जाव पडिमाए मत्थयंसि पक्खिवमाणी २ विहरइ । तए णं तीसे कणगा-
मईए जाव मत्थयच्छिट्ठाए पडिमाए एगमेगंसि पिंडे पक्खिप्पमाणे २ (पउमुप्पल-
पिहाणं पिहेइ) तओ गंधे पाउब्भवइ से जहानामए अहिमडेइ वा जाव एत्तो
अणिट्ठतराए अमणामतराए [चेव] ॥ ७४ ॥ तेणं कालेणं तेणं समएणं कोसला
नामं जणवए (होत्था) । तत्थ णं सागेए नामं नयरे । तस्स णं उत्तरपुरच्छिमे
दिसीभाए एत्थ णं (महं एगे) महेगे नागघरए होत्था । तत्थ णं सागेए नयरे पडि-
बुद्धी नामं इक्खा(गु)गराया परिवसइ पउमावई देवी सुबुद्धी अमचे सामदंड० ।
तए णं पउमावईए देवीए अन्नया कयाई नागजन्नए यावि होत्था । तए णं सा पउ-
मावई नागजन्नमुवट्ठियं जाणित्ता जेणेव पडिबुद्धी० करयल जाव एवं वयासी-एवं
खल्ल सामी ! मम कल्लं नागजन्नए (यावि) भविस्सइ, तं इच्छामि णं सामी !
तुब्भेहिं अब्भणुजाया समाणी नागजन्नयं गमित्तए, तुब्भेवि णं सामी ! मम नाग-
जन्नयंसि समोसरह । तए णं पडिबुद्धी पउमावईए (देवीए) एयमट्ठं पडिणुणेइ ।

तए णं पडमावई पडिवुद्धिणा रत्ता अवमणुत्ताया समानीं ह(ट्टु)ट्टा जाव कोहुं-
 वियपुरिसे सदावेइ २ ता एवं वयासी-एवं खलु देवाणुप्पिया ! मम कळं नागजन्तए
 भविस्सइ । तं तुव्वमे मालागारे सदावेह २ ता एवं वयह-एवं खलु पडमावईए
 देवीए कळं नागजन्तए भविस्सइ । तं तुव्वमे णं देवाणुप्पिया ! जलथलय(०)दमद्धवण्णं
 मल्लं नागघरयंसि साहरह एगं च णं महं सिरिदामगंडं उवणेह । तए णं जलथल-
 यदसद्धवण्णेणं मल्लेणं नाणाविहभत्तिसुविरड्यं (करेह तंसि भत्तिसि) हंसमियमयूर-
 कोंचसारसचक्कायमयणसालकोइलकुलोववेयं ईहामिय जाव भत्तिचित्तं महग्घं मह-
 रिहं विउलं पुप्फमंडवं विरएह । तस्स णं बहुमज्जदेसभाए एगं महं सिरिदामगंडं
 जाव गंधद्धणिं मुयंतं उल्लोयंसि आ(ओ)लंवेह २ ता पडमावईं देविं पडिवालेमाणा
 २ चिट्ठह । तए णं ते कोहुंविया जाव चिट्ठंति । तए णं सा पडमावईं देवी कळं०
 कोहुंवि(यपुरिसे)ए (सदावेइ २ ता) एवं वयासी-खिप्पामेव भो देवाणुप्पिया !
 सागेयं नयरं सत्तिभतरवाहिरियं आसियसम्मज्जिओवलित्तं जाव पच्चप्पिणंति । तए
 णं सा पडमावई (देवी) दोच्चं पि कोहुंविय जाव खिप्पामेव लहुकरणजुत्तं जाव
 जुत्तामेव (उवट्टवेह, तए णं तेवि तहेव) उव(ट्टा)ट्टवेंति । तए णं सा पडमावईं
 अंतो अंतेउरंसि ण्हाया सव्वालंकारविभूसिया धम्मियं जाणं दुल्लुडा । तए णं सा
 पडमावईं नियगपरि(वा)यालसंपरिवुडा सागेयं नयरं मज्जंमज्झेणं नि(ज)जाइ २
 ता जेणेव पुक्खरणी तेणेव उवागच्छइ २ ता पो(पु)क्खरणिं ओगा(ह)हेइ २ ता
 जलमज्जणं जाव परमसुइभूया उल्लपडसाडया जाइं तत्थ उप्पलाइं जाव गेण्हइ २
 ता जेणेव नागघरए तेणेव पहारेत्थ गमणाए । तए ण पडमावईए दासचेडीओ
 वहुओ पुप्फपडलगहत्यगयाओ धूवक(डु)डच्छु(ग)यहत्यगयाओ पिट्ठओ समणुग-
 च्छंति । तए णं पडमावईं सव्विद्धीए जेणेव नागघ(रे)ए तेणेव उवागच्छइ २
 ता नागघ(रयं)रं अणुप्पविसइ २ ता लोमहत्यगं जाव धूवं डहइ २ ता पडिवुद्धिं
 (रायं) पडिवालेमाणी २ चिट्ठइ । तए णं पडिवुद्धी(राया) ण्हाए हत्थिखंवरगए
 सकोरंट जाव सेयवरचामरा(हिं)हि य (महया)हयगयरह(जोह)महयाभडचडगर-
 पहकरेहिं सागेयं नगरं मज्जंमज्झेणं निग्गच्छइ २ ता जेणेव नागघरए तेणेव
 उवागच्छइ २ ता हत्थिखधाओ पच्चोरुहइ २ ता आलोए पणामं करेइ २ ता
 पुप्फमंडवं अणुपविसइ २ ता पासइ तं एगं महं सिरिदामगंडं । तए णं पडिवुद्धी
 तं सिरिदामगंडं सु(इ)चिरं कालं निरिक्खइ २ ता तंसि सिरिदामगंडंसि जायविम्हए
 सुवुद्धिं अमच्चं एवं वयासी-तुमं(णं) देवाणुप्पिया ! मम दोच्चेणं वहुणिं गामागर
 जाव सन्निवेसाइं आहिंडसि वहु(णि)ण य रा(य)ईसर जाव गिहाइं अणुपविससि,

तं अत्थि णं तुमे कहिंचि एरिसए सिरिदामगंडे दिट्ठपुव्वे जारिसए णं इमे पउमा-
वई(ए)देवीए सिरिदामगंडे ? । तए णं सुवुद्धी पडिवुद्धिं रायं एवं वयासी-एवं खलु
सामी ! अह अन्नया कयाइं तुब्भं दोच्चेणं मिहिलं रायहाणि गए । तत्थ णं मए
कुंभगस्स रत्तो धूयाए पभावईए देवीए अत्तयाए मल्लीए (विदेहरायवरकन्नाए)संव-
च्छरपडिलेहणगंसि दिव्वे सिरिदामगंडे दिट्ठपुव्वे । तस्स णं सिरिदामगंडस्स इमे
पउमावईए [देवीए] सिरिदामगंडे सयसहस्सइमंपि कलं न अग्घइ । तए णं पडि-
वुद्धी(राया) सुवुद्धिं अमच्चं एवं वयासी-केरिसिया णं देवाणुप्पिया ! मल्ली २ जस्स
णं संवच्छरपडिलेहणयंसि सिरिदामगंडस्स पउमावईए देवीए सिरिदामगंडे सयस-
हस्सइमंपि कलं न अग्घइ ? । तए णं सुवुद्धी (अमच्चे) पडिवुद्धिं इक्खागरायं एवं
वयासी-(एवं खलु सामी !) मल्ली विदेहरायवरकन्नागा सुपइट्ठियकुम्मुन्नयचारुचरणा
वण्णओ । तए णं पडिवुद्धी (राया) सुवुद्धिस्स अमच्चस्स अंतिए एयमट्ठं सोच्चा
निसम्म सिरिदामगंडजणियहासे दूयं सद्दावेइ २ ता एवं वयासी-गच्छाहि णं तुमं
देवाणुप्पिया ! मिहिलं रायहाणिं, तत्थ णं कुंभगस्स रत्तो धूयं पभावईए (देवीए)
अ(त्त)त्तियं मल्लिं २ मम भारियत्ताए वरेहिं जइ वि य णं सा सयं रज्जसुंका । तए
णं से दूए पडिवुद्धिणा रन्ना एवं वुत्ते समाणे हट्ठ जाव पडिसुणेइ २ ता जेणेव सए
गिहे जेणेव चाउग्घटं आसरहे तेणेव उवागच्छइ २ ता चाउग्घटं आसरहं पडि-
कप्पावेइ २ ता दुरुठे जाव हयगयमहयाभडचडगरेणं साएयाओ निग्गच्छइ २ ता
जेणेव विदेहजणवए जेणेव मिहिला रायहाणी तेणेव पहारेत्थ गमणाए (१)
॥ ७५ ॥ तेणं कालेणं तेणं समएणं अंग नाम जणवए होत्था । तत्थ णं चंपा नामं
नयरी होत्था । तत्थ णं चंपाए नयरीए चंदच्छाए अंगराया होत्था । तत्थ णं चंपाए
नयरीए अरहन्नगपामोक्खां बहवे संजत्तानावावाणियगा परिवसंति अट्ठा जाव
अपरिभूया । तए णं से अरहन्नगे समणोवासए यावि होत्था अहिगयजीवाजीवे
वण्णओ । तए णं तेसिं अरहन्नगपामोक्खाणं संजत्तानावावाणियगाणं अन्नया कयाइ
एगयओ सहियाणं इमे(ए)याखुवे मिहोक्कासमुल्ला(संला)वे समुप्पज्जित्था-सेयं खलु
अम्हं गणिमं(च) धरिमं च मेज्जं च प(पा)रिच्छेज्जं च भंडगं गहाय लवणसमुहं
पोयवहणेणं ओगाहितए-त्तिकट्ठु अन्नम(न्न)न्नस्स एयमट्ठं पडिसुणेति २ ता गणिमं
च ४ गेण्हंति २ ता सग(डि)डीसाग(डि)डयं (च) सज्जेति २ ता गणिमस्स ४
भंडगस्स सगडसागडियं भरेति २ ता सोहणंसि तिहिकरणनक्खत्तमुहुत्तंसि विउलं
असणं ४ उवक्खडावेति मित्तनाइ भोयणवेलाए भुंजावेति जाव आपुच्छंति २ ता
सगडीसागडियं जोयंति २ ता चंपाए नयरीए मज्झमज्जेणं निग्गच्छंति २ ता जेणेव

गंभीरए पोयपट्टणे तेणेव उवागच्छंति २ ता सगडीसागडियं मोयंति २ ता पोयवहणं
सज्जेति २ ता गणिमस्स(य) जाव चउविह(स्स)भंडगस्स भरेति तंदुलाण य समियस्स
य तेल्लस्स य घयस्स य गुलस्स य गोरसस्स य उदगस्स य उदयभायणाण य ओस-
हाण य भेसज्जाण य तणस्स य कट्टस्स य आवरणाण य पहरणाण य अन्नेसिं च
बहूणं पोयवहणपाउग्गाणं दव्वाणं पोयवहणं भरेति (२ ता) सोहणंसि तिहिकरण-
नक्खत्तमुहुत्तंसि विउलं असणं ४ उवक्खडावेति २ ता मित्तनाइ० आपुच्छंति २
ता जेणेव पोयट्टाणे तेणेव उवागच्छंति । तए णं तेसिं अरहन्नग जाव वाणियगाणं
परियणो जाव ता(रिसे)हिं इट्ठाहिं जाव वग्गूहिं अभिनंदंता य अभिसंथुणमाणा य
एवं वयासी-अज्ज ! ताय ! भाय ! माउल ! भाइणेज्ज ! भगवया समुद्देणं अभिर-
क्खिज्जमाणा २ चिरं जीवह भद्दं च भे पुणरवि लद्धट्ठे कयकजे अणहसमग्गे नियगं
घरं हव्वमागए पासामो-त्तिकट्टु ताहिं सोमाहिं निद्धाहिं दीहाहिं सप्पिवासाहिं पप्पु-
याहिं दिट्ठीहिं नि(री)रिक्खमाणा मुहुत्तमेत्तं संचिट्ठंति । तओ समाणिएसु पुप्फवलि-
कम्मेसु दिन्नेसु सरसरत्तचंदणदहरपंचंगुलितलेसु अणुक्खित्तंसि धूवंसि पूइएसु समुद्-
वाएसु संसारियासु वलयवाहासु ऊसिएसु सिएसु झयग्गेसु पडुप्पवाइएसु तूरेसु जइएसु
सव्वसउणेषु गहिएसु रायवरसासणेषु महया उक्किट्टसीहनाय जाव रवेणं पक्खुभिय-
महासमुद्भवभूयंपिव मेइणिं करेमाणा एगदिसिं जाव वाणियगा ना(वं)वाए दुरुढा ।
तओ पुस्समाणवो वक्कमुदाहु-हं भो ! सव्वेसिमवि अत्थसिद्धी उवट्ठियाइं कल्लाणाइं
पडिहयाइं सव्वपावाइं जुत्तो पूसो विजओ मुहुत्तो अयं देसकालो । तओ पुस्समा-
णएणं व(क्के)क्कमुदा(हि)हरिए हट्टुट्ठे कुच्छिधारकण्णधारगब्भ(ज)जसंजत्तानावा-
वाणियगा वावारिंसु तं नावं पुण्णच्छंगं पुण्णमुहि वंधणेहिंतो मुंचंति । तए णं सा
नावा विमुक्कबंधणा पवणबलसमाहया ऊसि(उस्सि)यसिया विततपंप(पक्)खा इव गरु-
(ड)लजुवई गंगासलिलतिक्खसोयवेगेहिं संखुब्भमाणी २ उम्मीतरंगमालासहस्साइं
समइच्छमाणी २ कइवएहिं अहोरेत्तेहिं लवणसमुद्दं अणेगाइं जोयणसयाइं ओगाढा ।
तए णं तेसिं अरहन्नगपामोक्खाणं संजत्तानावावाणियगाणं लवणसमुद्दं अणेगाइं
जोयणसयाइं ओगाढाणं समाणाणं बहूइं उप्पाइयसयाइं पाउब्भूयाइं तंजहा-अकाले
गज्जिए अकाले विज्जुए अकाले थणियसद्दे अभिक्खणं २ आगासे देवयाओ नच्चंति
एणं च णं महं पिसायरूवं पासंति तालजंधं दिवं-गयाहिं बाहाहिं मसिमूसगमहिस-
कालगं भरियमेहवण्ण लंबोद्धं निग्गयग्गदंतं निल्लालियजमलजुयलजीहं आऊसियव-
यणगंडदेसं चीणचि(पिट)मिढनासियं विगयभुग्गभग्गभुमयं खज्जोयगदित्तचक्खुराणं
उत्तासणगं विसालवच्छं विसालकुच्छिं पलंबकुच्छिं पहसियपयलियपयडियगत्तं पण-

चमाणं अप्फोडंतं अभिवयंतं अभिगज्जंतं बहुसो २ अट्टइहासे विणिम्मुयंतं नीलुप्प-
 लगवल्लुगुलियअयसिकुसुमप्पगासं खुरधारं असिं गहाय अभिमुहमावयमाणं पासंति ।
 तए णं ते अरहन्नगवज्जा संजत्तानावावाणियगा एणं च णं महं तालपिसायं (पासंति)
 पासित्ता तालजंघं दिवंगयाहिं वाहाहिं फुट्टसिरं भमरनिगरवरमासरासिमहिसकालं
 भरियमेहवणं सुप्पणहं, फालसरिसजीहं लंबोद्वं धवलवट्टअसिलिद्वतिक्खथिरपीणकु-
 डिलदाढोवगूढवयणं विकोसियधारासिजुयलसमसरिसतणुयचंचलगलतरसलोलच-
 वलफुरुफुरेंतनिहलियग्गजीहं अवयच्छियमहल्लविगयवीभच्छलालपगलंतरत्ततालुयं
 हिंगु(लु)लयसगव्भकंदरचिलं व अंजणगिरिस्स अग्गिजालुग्गिलंतवयणं आऊसिय-
 अक्खचम्मउड्डगंडदेसं चीणचि(पिड)मिडवंकभग्गनासं रोसागयधमधमेंतमास्य-
 निद्वुरखरफरुसञ्चुसिरं ओभुग्गनासियपुडं घ(घा)डउब्भडरइयभीसणमुहं उद्धमुहक-
 ण्णसक्कुलियमहतविगयलोमसंखालगलंवंतचलियकणं पिंगलदिप्पंतलोयणं मिउडित-
 डि(य)निडालं नरसिरमालपरिणद्धचिंधं विचित्तगोणससुवद्धपरिकरं अवहोलंतपु(प्फु)-
 प्फयायंतसप्पविच्छुयगोधुंदरनउलसरडविरइयविचित्तवेयच्छमालियागं भोगकूरकणह-
 सप्पधमधमेंतलंवंतकण्णपूरं मज्जारसियाललइयखंधं दित्त(घुघु)घूघूयंतघूयकयकुंतल-
 सिरं घंटारवेण भीमं भयंकरं कायरजणहिययफोडणं दित्तमट्टइहासं विणिम्मुयंतं वसा-
 रुहिरपूयमंसमलमलिणपोच्चडतणुं उत्तासणयं विसालवच्छं पेच्छंताभिन्ननहमुहनयण-
 कण्णवरवग्घचित्तकत्तीणि(व)यंसणं सरसरुहिरगयचम्मविययऊसवियवाहुजुयलं तार्हि
 य खरफरुसअसिणिद्धअणिद्वदित्तअसुभअप्पिय(अमणुन्न)अकंतवग्गूहि य तज्जयंतं
 पासंति तं तालपिसायरुवं एज्जमाणं पासंति २ ता भीया संजायभया अन्नमन्नस्स
 कायं समतुरंगेमाणा २ बहूणं इंदाण य खंदाण य रुदिसिवेसमणनागाणं भूयाण य
 जक्ख्खाण य अज्जकोट्टकिरियाण य बहूणि उवाइयसयाणि ओवाइयमाणा २ चिट्ठंति ।
 तए णं से अरहन्नए समणोवासए तं दिव्वं पिसायरुवं एज्जमाणं पासइ २ ता अभीए
 अतत्थे अचलिए असंभंते अणाउले अणुव्विग्गे अभिन्नमुहरागनयणवण्णे अदीणवि-
 मणमाणसे पोयवहणस्स एगदेसंसि वत्थंतेणं भूमिं पमज्जइ २ ता ठाणं ठाइ २ ता
 करयल(ओ) जाव एवं वयासी-नमोत्थु णं अरहंताणं जाव संपत्ताणं, जइ णं अहं
 एत्तो उवसग्गाओ मुंचामि तो मे कप्पइ पारित्तए, अहं णं एत्तो उवसग्गाओ न
 मुंचामि तो मे तहा पच्चक्खाएयव्वे-(त्ति)तिकट्ठु सागारं भत्तं पच्चक्खाइ । तए णं
 से पिसायरुवे जेणेव अरहन्न(ए)गे समणोवासए तेणेव उवागच्छइ २ ता अरहन्नं
 एवं वयासी-हं भो ! अरहन्नगा अपत्थियपत्थिया जाव परिवज्जिया [!] नो खल्ल
 कप्पइ तव सीलव्वयगुणवेरमणपच्चक्खा(णे)णपोसहोववासाइं चालित्तए वा एवं

खो(भे)मित्तए वा खंडित्तए वा भंजित्तए वा उज्जित्तए वा परिचइत्तए वा । तं जइ
णं तुमं सीलव्वयं जाव न परिचयसि तो ते अहं एयं पोयवहणं दोहिं अंगुलियाहिं
गेण्हामि २ ता सत्तट्ठतलप्पमाणमेत्ताइं उड्ढं वेहासं उव्विहामि (२ ता) अंतो-
जलंसि निच्छोलेमि जा(जे)णं तुमं अट्ठदुहट्ठवसट्ठे असमाहिपते अकाले चेव जीवि-
याओ ववरोविज्जसि । तए णं से अरहन्नगे समणोवासए तं देवं मणसा चेव एवं
वयासी-अहं णं देवाणुप्पिया । अरहन्नए नामं समणोवासए अहिगयजीवाजीवे, नो
खलु अहं सक्का केणइ देवेण वा जाव निगंगथाओ पावयणाओ चालित्तए वा खोभि-
त्तए वा विपरिणा(मे)मित्तए वा, तुमं णं जा सद्धा तं करेहि-त्तिकट्ठु अभीए जाव
अभिन्नमुहरागनयणवण्णे अदीणविमणमाणसे निच्चले निष्फंदे तुसिणीए धम्मज्जाणो-
वगए विहरइ । तए णं से दिव्वे पिसायरूवे अरहन्नगं समणोवासगं दोच्चंपि तच्चंपि
एवं वयासी-हं भो अरहन्नगा ! जाव (अदीणविमणमाणसे निच्चले निष्फंदे तुसिणीए)
धम्मज्जाणोवगए विहरइ । तए णं से दिव्वे पिसायरूवे अरहन्नगं धम्मज्जाणोवगयं
पासइ २ ता वलियतरागं आसुस्ते तं पोयवहणं दोहिं अंगुलियाहिं गिण्हइ २ ता
सत्तट्ठतलाइं जाव अरहन्नगं एवं वयासी-हं भो अरहन्नगा ! अपत्थियपत्थिया ! नो
खलु कप्पइ तव सीलव्वय तहेव जाव धम्मज्जाणोवगए विहरइ । तए णं से पिसा-
यरूवे अरहन्नगं जाहे नो संचाएइ निगंगथाओ० चालित्तए वा (०ताहे)तहेव (उव)-
संते जाव निव्विण्णे तं पोयवहणं सणियं २ उवरिं जलस्स ठवेइ २ ता तं दिव्वं
पिसायरूवं पडिसाह(र)रेइ २ ता दिव्वं देवरूवं विउव्वइ २ ता अंतलिक्खपडिवन्ने
सखिंखि(णि)णीयाइं जाव परिहिए अरहन्नगं समणोवासगं एवं वयासी-हं भो अर-
हन्नगा ! धन्नोसि णं तुमं देवाणुप्पिया ! जाव जीवियफले जस्स णं तव निगंगथे
पावयणे इमेयारूवा पडिवत्ती लद्धा पत्ता अभिसमन्नागया, एवं खलु देवाणुप्पिया !
सक्के देविंदे देवराया सोहम्मं कप्पे सोहम्मवडिसए विमाणे सभाए सुहम्माए वट्ठणं
देवाणं मज्झगए महया [२] सदेणं [एवं] आइक्खइ ४-एवं खलु जंबुदीवे २ भारहे वासे
चंपाए नयरीए अरहन्नए समणोवासए अभिगयजीवाजीवे नो खलु सक्का केणइ देवेण
वा (दाणवेण वा) ६ निगंगथाओ पावयणाओ चालित्तए वा जाव विपरिणामित्तए वा ।
तए णं अहं देवाणुप्पिया ! सक्कस्म (देविंदस्स) नो एयमट्ठं सद्धामि(०) । तए णं मम
इमेयारूवे अज्झत्थिए०-गच्छामि णं [अहं] अरहन्न(य)गस्स अंतियं पाउव्वमामि
जाणामि ताव अहं अरहन्नगं किं पियधम्मं नो पियधम्मं, दढधम्मं नो दढधम्मं,
सीलव्वयगुणे किं चालेइ जाव परिचयइ नो परिचयइ-त्तिकट्ठु एवं संपेहेमि २ ता
ओहिं पउजामि २ ता देवाणुप्पियं ओहिणा आभोएमि २ ता उत्तरपुरच्छिमं २

उत्तरवेउव्वियं० ताए उक्किट्ठाए(जाव)जेणेव लवणसमुद्दे जेणेव देवाणुप्पिया तेणेव उवागच्छामि २ ता देवाणुप्पि(याणं)यं उवसग्गं करेमि नो चेव णं देवाणुप्पिया भीया वा(०), तं जं णं सक्के ३ [एवं] वयइ सच्चे णं एसमट्ठे, तं दिट्ठे णं देवाणुप्पियाणं इट्ठी जाव परक्कमे लद्धे पत्ते अभिसमन्नागए । तं खामेमि णं देवाणुप्पिया ! खमतु मरहंतु णं देवाणुप्पिया ! नाइभुज्जो (२) एवंकरणयाए-त्तिकट्ठु पंज-लिउडे पायवडिए एयमट्ठं विणएणं भुज्जो २ खामेइ (२ ता) अरहन्नगस्स [य] दुवे कुंडलजुयले दलयइ २ ता जामेव दिसिं पाउब्भूए तामेव(दिसिं)पडिगए ॥ ७६ ॥

ताए णं से अरहन्नए निस्सवसग्गमितिकट्ठु पडिमं पारेइ । ताए णं ते अरहन्नगपा-मोक्खा जाव वाणियगा दक्खिणाणुकूलेणं वाएणं जेणेव गंभीरए पोय(पट्टणे)ट्ठाणे तेणेव उवागच्छंति २ ता पोयं लवेति २ ता सगडिसागडं सज्जेति (२ ता) तं गणिमं [च] ४ सगडि० संकामेति २ ता सगडी० जो(ए)विति २ ता जेणेव मिहि-ला(०) तेणेव उवागच्छंति २ ता मिहिलाए रायहाणीए वहिया अग्गुज्जाणंसि सग-डीसागडं मोएति २ ता (मिहिलाए रायहाणीए तं)महत्थं (महग्घं महरिहं) विउलं रायारिहं पाहुडं कुंडलजुयलं च गेण्हंति २ ता (मिहिलाए रायहाणीए) अणुप्पवि-संति २ ता जेणेव कुंभए(राया) तेणेव उवागच्छंति २ ता करयल जाव महत्थं दिव्वं कुंडलजुयलं उवणेति । ताए णं कुंभए(राया) तेसि संजत्तगाणं जाव पडि-च्छइ २ ता मल्लिं २ सद्दवेइ २ ता तं दिव्वं कुंडलजुयलं मल्लीए २ पिणद्धेइ २ ता पडिविसज्जेइ । ताए णं से कुंभए राया ते अरहन्नगपामोक्खे जाव वाणियगे विपु-लेणं (अस०) वत्थगंधमल्लालंकारेणं जाव उस्सुक्कं वियरइ २ ता रायमग्गमोगाढे- (इ)य आवासे वियरइ [२ ता] पडिविसज्जेइ । ताए णं अरहन्नगसंजत्तगा जेणेव रायमग्गमोगाढे आवासे तेणेव उवागच्छंति २ ता भंडववहरणं करेति (२ ता) पडिभं(डं)डे गेण्हंति २ ता सगडी० भरेति जेणेव गंभीरए पोयपट्टणे तेणेव उवा-गच्छंति २ ता पोयवहणं सज्जेति २ ता भंडं संकामेति दक्खिणाणु० जेणेव चंपा पोयट्ठाणे तेणेव पोयं लवेति २ ता सगडी० सज्जेति २ ता तं गणिमं ४ सगडी० संकामेति जाव महत्थं [महग्घं] पाहुडं दिव्वं च कुंडलजुयलं गेण्हंति २ ता जेणेव चंदच्छाए अंगराया तेणेव उवागच्छंति २ ता तं महत्थं जाव उवणेति । ताए णं चंदच्छाए अंगराया तं दिव्वं महत्थं(च) कुंडलजुयलं पडिच्छइ २ ता ते अरह-न्नगपामोक्खे एवं वयासी-तुब्भे णं देवाणुप्पिया ! वहूणि गामागर जाव आहिडह लवणसमुद्दं च अभिक्खणं २ पोयवहणेहि ओगाहेह, तं अत्थियाइं भे केइ कहिचि अच्छेए दिट्ठपुव्वे ? । ताए णं ते अरहन्नगपामोक्खा चंदच्छायं अंगरायं एवं

वयासी-एवं खलु सामी ! अम्हे इहेव चंपाए नयरीए अरहन्नगपामोक्खा वहवे संजत्तगानावावाणियगा परिवसामो । तए णं अम्हे अन्नया कयाइ गणिमं च ४ तहेव अहीण(म)अइरित्तं जाव कुंभगस्स रत्तो उवणेमो । तए णं से कुंभए मल्लीए २ तं दिव्वं कुंडलजुयलं पिण्ण्डेइ २ ता पडिविसज्जेइ । तं एस णं सामी ! अम्हेहिं कुंभ[ग]रायभवणंसि मल्ली २ अच्छेरए दिट्ठे । तं नो खलु अन्ना कावि तारिसिया देवकन्ना वा जाव जारिसिया णं मल्ली २ । तए णं चंदच्छाए(ते)अरहन्नगपामोक्खे सक्कारेइ सम्माणेइ स० २ ता [उस्सुंकं वियरइ] पडिविसज्जेइ । तए णं चंदच्छाए वाणियगजणियहासे दूयं सद्दावेइ जाव जइ वि य णं सा सयं रज्जसुक्का । तए णं से दूए हट्ठ जाव पहारेत्थ गमणाए (२) ॥ ७७ ॥ तेणं कालेणं तेणं समएणं कुणाला नामं जणवए होत्था । तत्थ णं सावत्थी नामं नयरी होत्था । तत्थ णं रुप्पी कुणालाहिवई नामं राया होत्था । तस्स णं रुप्पिस्स धूया धारिणीए देवीए अत्तया सुवा(हु)ह नामं दारिया होत्था सुकुमाल जाव रुवेण य जोव्वणे(णं)ण य लावण्णेण य उक्किट्ठा उक्किट्ठसरीरा जाया यावि होत्था । तीसे णं सुवाहूए दारियाए अन्नया चाउम्मासियमज्जणए जाए यावि होत्था । तए णं से रुप्पी कुणालाहिवई सुवाहुए दारियाए चाउम्मासियमज्जणयं उवट्ठियं जाणइ २ ता कोडुंबियपुरिसे सद्दावेइ २ ता एवं वयासी-एवं खलु देवाणुप्पिया ! सुवाहु(ए)दारियाए कल्लं चाउम्मासियमज्जणए भविस्सइ । तं(कल्लं)तुव्वमे णं रायमग्गमोगाढंसि(चउक्कंसि)मंडवंसि जलथलयदसद्धवण्णमल्लं साह(रे)रह जाव सिरिदामग(डे)डं ओलइंति । तए णं से रुप्पी कुणालाहिवई सुवण्णगारसेणिं सद्दावेइ २ ता एवं वयासी-खिप्पामेव भो देवाणुप्पिया ! रायमग्गमोगाढंसि पुप्फमंडवंसि नाणाविहपंचवण्णेहिं तंडुलेहिं नयरं आलिहह तस्स बहुमज्जदेसभाए पट्ठयं रएह जाव पच्चप्पिणंति । तए णं से रुप्पी कुणालाहिवई हत्थिखंधवरगए चाउरंगिणीए सेणाए महया भडचडगर जाव अंतैउरपरियालसंपरिवुडे सुवाहुं दारियं पुरओ कट्ठु जेणेव रायमग्गे जेणेव पुप्फमंडवे तेणेव उवागच्छइ २ ता हत्थिखंधाओ पच्चोरुहइ २ ता पुप्फमंड(वं)वे अणुप्पविसइ २ ता सीहासणवरगए पुरत्थाभिमुहे सन्निसण्णे । तए णं ताओ अंतैउरियाओ सुवाहुं दारियं पट्ठयंसि दुरुहेंति २ ता से(य)यापीयएहिं कलसेहिं ण्हाणेंति २ ता सव्वालंकारविभूसियं करेंति २ ता पिउणो पा(यं)यवंदि(उं)यं उवणेति । तए णं सुवाहू दारिया जेणेव रुप्पी राया तेणेव उवागच्छइ २ ता पायग्गहणं करेइ । तए णं से रुप्पी राया सुवाहुं दारियं 'अंके निवेसेइ २ ता सुवाहु(ए)दारियाए रुवेण य जोव्वणेण य लावण्णेण य (जाव विम्हिए) जायविम्हए वरिसधरं सद्दावेइ २ ता एवं वयासी-तुमं

णं देवाणुप्पिया ! मम दोच्चेणं वहूणि ग्रामागरनगरगिहाणि अणुप्पविससि, तं अत्थियाई ते कस्सइ रत्तो वा ईसरस्स वा कहिंन्वि एयारिसए मज्जणए दिट्ठपुब्बे जारिसए णं इमीसे सुवाहुदारियाए मज्जणए ? । तए णं से वरिसधरे रुप्पि करयल जाव वद्धावेत्ता एवं वयासी-एवं खलु सामी ! अहं अन्नया तु(ब्भेणं)ब्भं दोच्चेणं मिहिलं गए, तत्थ णं मए कुंभगस्स रत्तो धूयाए पभावईए देवीए अत्तयाए मल्लीए २ मज्जणए दिट्ठे, तस्स णं मज्जणगस्स इ(मे)मीए सुवाहु(ए)दारियाए मज्जणए सयसहस्सइमं पि कलं न अ(ग्घे)ग्घइ । तए णं से रुप्पी राया वरिसधरस्स अंति-(ए)यं एयमट्ठं सोच्चा निसम्म(सेसं तहेव) मज्जणगजणियहासे दूयं सद्दावेइ जाव जेणेव मिहिला नयरी तेणेव पहारेत्थ गमणाए (३) ॥ ७८ ॥ तेणं कालेणं तेणं समएणं कासी नामं जणवए होत्था । तत्थ णं वाणारसी नामं नयरी होत्था । तत्थ णं संखे नामं कासीराया होत्था । तए णं तीसे मल्लीए २ अन्नया कयाइ तस्स दिव्वस्स कुंडलजुयलस्स संधी विसंघडिए यावि होत्था । तए णं से कुंभए राया सुवण्णगारसेणिं सद्दावेइ २ ता एवं वयासी-तुब्भे णं देवाणुप्पिया ! इमस्स दिव्वस्स कुंडलजुयलस्स संधिं संघाडेह । तए णं सा सुवण्णगारसेणी एयमट्ठं तहत्ति पडिसुणेइ २ ता तं दिव्वं कुंडलजुयलं गेण्हइ २ ता जेणेव सुवण्णगारभिसियाओ तेणेव उवागच्छइ २ ता सुवण्णगारभिसियासु निवेसेइ २ ता वहूहिं आएहि य जाव परिणामे-माणा इच्छ(न्ति)इ तस्स दिव्वस्स कुंडलजुयलस्स संधिं घडित्तए नो चेव णं संचा-एइ (सं)घडित्तए । तए णं सा सुवण्णगारसेणी जेणेव कुंभए तेणेव उवागच्छइ २ ता करयल जाव वद्धावेत्ता एवं वयासी-एवं खलु सामी ! अज्ज तु(ब्भे)म्हे अम्हे सद्दावेह जाव संधिं संघाडेत्ता ए(य)वमा(णं)णत्तियं पच्चप्पिणह । तए णं अम्हे तं दिव्वं कुंडलजुयलं गेण्हामो जेणेव सुवण्णगारभिसियाओ जाव नो संचाएमो संघाडित्तए । तए णं अम्हे सामी ! एयस्स दिव्वस्स कुंडलस्स अन्न सरिसयं कुंडलजुयलं घडेमो । तए णं से कुंभए राया तीसे सुवण्णगारसेणीए अंतिए एयमट्ठं सोच्चा निसम्म आसुरुत्ते ४ तिवलियं भिउडिं निडाले साहट्ठु एवं वयासी-(से के)केस णं तुब्भे कलायाणं भवह (?) जे णं तुब्भे इमस्स [दिव्वस्स] कुंडलजुयलस्स नो संचाएह संधिं संघाडित्तए ? ते सुवण्णगारे निव्विसए आणवेइ । तए णं ते सुवण्णगारा कुं(भे)भगेणं रत्ता निव्विसया आणत्ता समाणा जेणेव साइं २ गिहाइं तेणेव उवागच्छंति २ ता समंडमतोवगर-णमाया(ओ)ए मिहिलाए रायहाणीए मज्झंमज्झेणं निक्खमंति २ ता विदेहस्स जणवयस्स मज्झंमज्झेणं जेणेव कासी जणवए जेणेव वाणारसी नयरी तेणेव उवागच्छंति २ ता अग्गुजाणंसि सगडीसागडं मोएंति २ ता महत्थं जाव पाहुडं गेण्हंति

२ ता वाणारसीए नयरीए मज्झमज्झेणं जेणेव संखे कासीराया तेणेव उवागच्छंति
 २ ता करयल जाव वद्धावेंति २ ता (पाहुडं पुरओ ठावेंति २ ता संखरायं) एवं
 वयासी-अम्हे णं सामी ! मिहिलाओ (नयरीओ) कुंभएणं रत्ता निव्विसया आणत्ता
 समाणा इ(हं)ह हव्वमागया, तं इच्छामो णं सामी ! तुव्वं वाहुच्छायापरिगहिया
 निव्वमया निरुव्विग्गा सुहंसुहेणं परिवसिडं । तए णं संखे कासीराया ते सुवण्णगारे
 एवं वयासी-किं णं तुव्वे देवाणुप्पिया ! कुंभएणं रत्ता निव्विसया आणत्ता ? । तए
 णं ते सुवण्णगारा संखं एवं वयासी-एवं खलु सानी ! कुंभगस्स रत्तो धूयाए पभा-
 वईए देवीए अत्तयाए मल्लीए कुंडलजुयलस्स संधी विसंघडिए । तए णं से कुंभए
 सुवण्णगारसेणिं सद्दावेइ जाव निव्विसया आणत्ता । तं एएणं कारणेणं सामी ! अम्हे
 कुंभएणं निव्विसया आणत्ता । तए णं से संखे सुवण्णगारे एवं वयासी-केरिसिया
 णं देवाणुप्पिया ! कुंभ(ग)स्स [रत्तो] धूया पभावईदेवीए अत्तया मल्ली विदेहराय-
 वरकत्ता ? । तए णं ते सुवण्णगारा सं(ख)खं रायं एवं वयासी-नो खलु सामी ! अत्ता
 का(ई)वि तारिसिया देवकत्ता वा गंधव्वकत्ता वा जाव जारिसिया णं मल्ली २ । तए णं
 से संखे कुंडल(जुअल)जणियहासे दूयं सद्दावेइ जाव तहेव पहारेत्थ गमणाए (४)
 ॥ ७९ ॥ तेणं कालेणं तेणं समएणं कुरुजणवए होत्था । हत्थिणाउरे नयरे । अदी-
 णसत्तू नामं राया होत्था जाव विहरइ । तत्थ णं मिहिलाए [तस्स णं] कुंभगस्स पुत्ते
 पभावईए अत्तए मल्लीए अणु[मग्ग]जायए मल्लदि(ण्णए)त्ते नामं कुमारे जाव जुवराया
 यावि होत्था । तए णं मल्लदित्ते कुमारे अन्नया कोडुंविपुुरिसे सद्दावेइ २ ता एवं
 वयासी-गच्छह णं तुव्वे मम पमदवणंसि एगं महं चित्तसभं करेह अणेग जाव
 पच्चप्पिणंसि । तए णं से मल्लदित्ते चित्तगरसेणिं सद्दावेइ २ ता एवं वयासी-तुव्वे णं
 देवाणुप्पिया ! चित्तसभं हावभावविलासविव्वोयकलिएहिं रुवेहिं चित्तेह जाव पच्च-
 प्पिणह । तए णं सा चित्तगरसेणी तहत्ति पड्डिसुणेइ २ ता जेणेव सयाइं गिहाइं
 तेणेव उवागच्छइ २ ता तूलियाओ वण्णए य गेण्हइ २ ता जेणेव चित्तसभा तेणेव
 (उवागच्छइ २ ता) अणुप्पविसइ २ ता भूमिभागे विरयइ २ ता भूमिं सज्जेइ २
 ता चित्तसभं हावभाव जाव चित्तेउं पयत्ता यावि होत्था । तए णं एगस्स चित्तग-
 रस्स इमेयाहवा चित्तगरलद्धी लद्धा पत्ता अभिसमन्नागया-जस्स णं दुपयस्स वा
 चउ(प)प्पयस्स वा अपयस्स वा एगदेसमवि पासइ तस्स णं देसाणुसारेणं तयाणु-
 रुवं [रत्तं] नि(व्व)वत्तेइ । तए णं से चित्तगर(दार)ए मल्लीए जवणियंतरियाए जालं-
 तरेण पायंगुट्ट पासइ । तए णं तस्स(णं) चित्तगरस्स इमेयाहवे अज्जत्थिए जाव
 समुप्पज्जित्था-सेयं खलु ममं मल्लीए २ पायंगुट्टाणुसारेणं सरिसगं जाव गुणोववेयं

रुवं निव्वत्तिह । एवं संपेहेइ २ ता भूमिभागं सज्जेइ (२ ता) मल्लीए २ पायंगुट्टा-
 णुसारेणं जाव निव्वत्तेइ । तए णं सा चित्तगरसेणी चित्तसभं जाव हावभा(वे)वं
 चित्तेइ २ ता जेणेव मल्लदिन्ने कुमारे तेणेव उवागच्छइ जाव ए(य)वमाणत्तियं पच्च-
 पिणइ । तए णं मल्लदिन्ने चित्तगरसेणिं सक्कारेइ २(०) विपुल जीवियारिहं पीइदाणं
 द(ले)लयइ २ ता पडिविसज्जेइ । तए णं मल्लदिन्न (कुमारे) अन्नया ण्हाए अंतेउ-
 रपरियालसंपरिवुडे अम्मथाईए सद्धिं जेणेव चित्तसभा तेणेव उवागच्छइ २ ता
 चित्तसभं अणुप्पविसइ २ ता हावभावविलास(वि)विब्वोयकलियाइं रुवाइ पासमाणे
 (२) जेणेव मल्लीए २ तयाणुरु(वे)वं निव्वत्तिह तेणेव पहारेत्थ गमणाए । तए णं
 से मल्लदिन्ने (कुमारे) मल्लीए २ तयाणुरुवं निव्वत्तियं पासइ २ ता इमेयारुवे अज्झत्थिए
 जाव समुप्पज्जित्था-एस णं मल्ली २ तिकट्टु लज्जिए वीडिए वि(अडे)इ सणियं २
 पच्चोसक्कइ । तए णं [तं] मल्लदिन्नं अम्मथाई [सणियं २] पच्चोसक्कंतं पासित्ता एवं
 वयासी-किन्नं तुमं पुत्ता । लज्जिए वीडिए विडुं सणियं २ पच्चोसक्कसि ? । तए णं से
 मल्लदिन्ने अम्मथाई एवं वयासी-जुत्तं णं अम्मो ! मम जेट्ठाए भगिणीए गुरुदेवय-
 भूयाए लज्जणिज्जाए मम चित्तगरणिव्वत्तियं सभं अणुपविसित्तिए ? । तए णं अम्म-
 थाई मल्लदिन्नं कुमारं एवं वयासी-नो खलु पुत्ता ! एस मल्ली, एस णं मल्लीए २
 चित्तगरणं तयाणुरुवे निव्वत्तिह । तए णं [से] मल्लदिन्ने अम्मथाईए एयमट्ट सोच्चा
 निसम्म आसुत्ते [४] एवं वयासी-केस णं भो (१) [से] चिन(य)गरए अपत्थियपत्थिए
 जाव परिवज्जिए जे णं मम जेट्ठाए भगिणीए गुरुदेवयभूयाए जाव निव्वत्तिह-तिकट्टु
 तं चित्तगरं वज्झं आणवेइ । तए णं सा चित्तगर(स्)मेणी इमीसे कहाए लद्धट्ठा समाना
 जेणेव मल्लदिन्ने कुमारे तेणेव उवागच्छइ २ ता करयलपरिगगहिय जाव वद्धावेत्ता
 एवं वयासी-एवं खलु सामी ! तस्स चित्तगरस्स इमेयारुवा चित्त(क)गरलद्धी लद्धा
 पत्ता अभिसमन्नागया-जस्स णं दुपयस्स वा जाव निव्वत्तेइ, तं मा णं सामी ! तुब्भे तं
 चित्तगरं वज्झ आणवेह, तं तुब्भे णं सामी ! तस्स चित्तगरस्स अन्नं तयाणुरुवं दंडं
 निव्वत्तह । तए णं से मल्लदिन्ने तस्स चित्तगरस्स संडासगं छिंदावेइ २ ता निव्वि-
 सयं आणवेइ । तए णं से चित्तगरए मल्लदिन्नेणं निव्विसए आणत्ते (समाणे) सभंड-
 मत्तोवगरणमायाए मिहिलाओ नयरीओ निक्खमइ २ ता विदेहं जगवयं मज्झम-
 ज्जेणं जेणेव कुरुजणवए जेणेव हत्थिणाउरं नयरे (जेणेव अदीणसत्तू राया) तेणेव
 उवागच्छइ २ ता भंडनिक्खेवं करेइ २ ता चित्तफलं सज्जेइ २ ता मल्लीए २
 पायंगुट्टाणुसारेण रुवं निव्वत्तेइ २ ता कक्खंतरंसि छुब्भइ २ ता महत्थं जाव पाहुडं
 नेण्हइ २ ता हत्थिणाउरं नयरं मज्झमज्जेणं जेणेव अदीणसत्तू राया तेणेव उवा-

गच्छइ २ ता तं करयल जाव वद्धावेइ २ ता पाहुडं उवणेइ २ ता एवं वयासी-
 एवं खलु अहं सामी ! मिहिलाओ रायहाणीओ कुंभगस्स रत्तो पुत्तेणं पभावईए
 देवीए अत्तएणं मल्लदिन्नेणं कुमारेणं निव्विसए आणत्ते समाणे इ(ह)हं हव्वमागए,
 तं इच्छासि णं सामी ! तुब्भं वाहुच्छायापरिगहिए जाव परिवसित्तए । तए णं
 से अदीगसत्तू राया तं चित्तगरदारयं एवं वयासी-किन्नं तुमं देवाणुप्पिया !
 मल्लदिन्नेणं निव्विसए आणत्ते ? । तए णं से चित्त(य)गरदारए अदीगस(त्तु)त्तुं रायं
 एवं वयासी-एवं खलु सामी ! मल्लदिन्ने कुमारे अन्नया कया(ई)इ चित्तगरसेणिं सद्दावेइ
 २ ता एवं वयासी-तुब्भे णं देवाणुप्पिया ! मम चित्तसभं तं चेव सव्वं भाणियव्वं
 जाव मम संडासगं छिंदावेइ २ ता निव्विसयं आणवेइ, तं एवं खलु [अहं] सामी !
 मल्लदिन्नेणं कुमारेणं निव्विसए आणत्ते । तए णं अदीगसत्तू राया तं चित्तगरं एवं
 वयासी-से केरिसए णं देवाणुप्पिया ! तुमे मल्लीए त(दा)हाणुरुवे (रुवे) निव्व-
 त्तिए ? । तए णं से चित्तगरे कक्खंतराओ चित्तफल(यं)गं नीणेइ २ ता अदीगसत्तुस्स
 उवणेइ २ ता एवं वयासी-एस णं सामी ! मल्लीए २ तयाणुरुवस्स रुवस्स केइ
 आगारभावपडोयारे निव्वत्तिए, नो खलु सक्का केणइ देवेण वा जाव मल्लीए २
 तयाणुरुवे रुवे निव्वत्तित्तए । तए णं [से] अदीगसत्तू (राया) पडिरुवजणियहासे दूयं
 सद्दावेइ २ ता एवं वयासी तहेव जाव पहारेत्थ गम(ण्या)णाए (५) ॥८०॥ तेणं
 कालेणं तेणं समएणं पंचाले जणवए कंपि(ल्ले)ल्लपुरे (नामं) नयरे (होत्था) । जिय-
 सत्तू नामं राया पंचालाहिवई । तस्स णं जियसत्तुस्स धारिणीपामोक्खं दे(वि)वीस-
 हस्सं ओरोहे होत्था । तत्थ णं मिहिलाए चोक्खा नामं परिव्वाइया रिउव्वेय जाव [सु]प-
 रिणिट्ठिया यावि होत्था । तए णं सा चोक्खा परिव्वाइया मिहिलाए बहूणं राईसर
 जाव सत्थवाहपभिईणं पुरओ दाणधम्मं च सोयधम्मं च तित्थाभिसेयं च आघवे-
 माणी पन्नवेमाणी पुरुवेमाणी उवदंसेमाणी विहरइ । तए णं सा चोक्खा (परिव्वा-
 इया) अन्नया कयाइं तिदंडं च कुंडियं च जाव धाउरत्ताओ (य) ४ गेण्हइ २ ता
 परिव्वाइगावसहाओ पडिनिक्खमइ २ ता पविरलपरिव्वाइयासद्धिं सपरिवुडा
 मिहिलं रायहाणिं मज्झंमज्झेणं जेणेव कुंभगस्स रत्तो भवणे जेणेव कन्नंतेउरे जेणेव
 मल्ली २ तेणेव उवागच्छइ २ ता उदयपरि(फा)फोसियाए दब्भोवरि पच्चत्थुयाए
 भिसियाए नि(सि)सीयइ २ ता मल्लीए २ पुरओ दाणधम्मं च जाव विहरइ । तए
 णं मल्ली २ चोक्खं परिव्वाइयं एवं वयासी-तुब्भे णं चोक्खे ! किमूलए धम्मे
 पन्नत्ते ? । तए णं सा चोक्खा परिव्वाइया मल्लिं २ एवं वयासी-अम्हं णं देवाणु-
 प्पिए ! सोयमूलए धम्मे पन्न(वेमि)त्ते, जं णं अम्हं किचि असुई भवइ तं णं उद-

एण य मट्ठियाए जाव अविग्घेणं सगं गच्छामो । तए णं मल्ली २ चोक्खं परिव्वा-
इय एवं वयासी-चोक्खा । से जहानामए के(ई)इ पुरिसे रुहिरकयं वत्थं रुहिरे(ण)णं
चेव धोवेज्जा अत्थि णं चोक्खा । तस्स रुहिरकयस्स वत्थस्स रुहिरेणं धोव्वमाणस्स
का(ई)इ सोही ? नो इणट्ठे समट्ठे । एवामेव चोक्खा । तुब्भे णं पाणाइवाएणं जाव
मिच्छादंसणसल्लेणं नत्थि काइ सोही जहा (व) वा तस्स रुहिरकयस्स वत्थस्स रुहि-
रेणं चेव धोव्वमाणस्स । तए णं सा चोक्खा परिव्वाइया मल्लीए २ एवं वुत्ता समा-
(णा)णी संकिया कंखिया विइगिच्छिया भेयसमावन्ना जाया(या)वि होत्था मल्लीए
नो संचाएइ किंचिवि पामोक्खमाइक्खित्तए तुसिणीया संचिट्ठइ । तए णं तं चोक्खं
मल्लीए २] व(हु)हूओ दासचेडीओ हीलेंति निंदंति खिसंति ग(र)रिहंति अप्पेगइया
[ओ] हेरुया(ल)लेंति अप्पेगइया मुहमक्कडियाओ करेंति अप्पेगइया वग्घाडीओ करेंति
अप्पेगइया त(ज्ज)जेमाणीओ (क० अ०) तालेमा(णि)णीओ (क० अ०) निच्छु(मं)
हंति । तए णं सा चोक्खा मल्लीए २ दासचेडियाहिं हीलिज्जमाणी जाव गरहिज्जमाणी
आसुरुत्ता जाव मिसिमिसेमाणी मल्लीए २ पओसमावज्जइ [२] भिसियं गेण्हइ २ ता
कन्नंतेउराओ पडिनिक्खमइ २ ता मिहिलाओ निगगच्छइ २ ता परिव्वाइयासंपरिवुडा
जेणेव पंचालजणवए जेणेव कंपिल्लपुरे तेणेव उवागच्छइ २ ता बहूणं राईसर जाव
पल्लवेमाणी विहरइ । तए णं से जियसत्तू अन्नया कयाइ अंतेउरपरियालसद्धि संप-
रिवुडे एवं जाव विहरइ । तए णं सा चोक्खा परिव्वाइयासंपरिवुडा जेणेव जिय-
सत्तुस्स रन्नो भवणे जेणेव जियसत्तू तेणेव (उवागच्छइ २ ता) अणुपविसइ २ ता
जियसत्तुं जएणं विजएणं वद्धावेइ । तए णं से जियसत्तू चोक्खं परिव्वाइयं एजमाणं
पासइ २ ता सीहासणाओ अब्भुट्ठेइ २ ता चोक्खं (परिव्वाइयं) सक्कारेइ २ (०) आस-
णेणं उवनिमंतेइ । तए णं सा चोक्खा उदगपरिफोसियाए जाव भिसियाए निविसइ
जियसत्तुं रायं रज्जे य जाव अंतेउरे य कुसलोदतं पुच्छइ । तए णं सा चोक्खा
जियसत्तुस्स रन्नो दाणधम्मं च जाव विहरइ । तए णं से जियसत्तू अप्पणो ओरो-
हंसि (जाव विम्भिए) जायविम्भए चोक्खं (परिव्वाइयं) एवं वयासी-तुमं णं देवा-
णुप्पिया ! बहूणि गामागर जाव (अडह) आहिंडसि बहूण य राईसरगिहाइं अणु-
प्पविस(सि)हि, तं अत्थियाइं ते कस्स(वि)इ रन्नो वा जाव एरिसए ओरोहे दिट्ठ-
पुव्वे जारिसए णं इमे म(ह)म ओ(उव)रोहे ? । तए णं सा चोक्खा परिव्वाइया
जियसत्तुं (रायं) एवं (वयासी-)ईसिं अवहसियं करेइ २ ता एवं वयासी-(एवं च)
सारिसए णं तुम देवाणुप्पिया ! तस्स अगडदहुस्स । केस णं देवाणुप्पिए ! से अग-
डदहुरे ? जियसत्तू ! से जहानामए अगडदहुरे सिया, से णं तत्थ जाए तत्थेव वु(ट्ठे)-

द्धिए अन्नं अगडं वा तलागं वा दहं वा सरं वा सागरं वा अपासमाणे (चेवं) मन्नइ-
अय चेव अगडे वा जाव सागरे वा । तए ण तं कूवं अन्ने सामुद्दए दद्दुरे हव्वमागए । तए
णं से कूवदद्दुरे तं स(सा)मुद्ददद्दुरं एवं वयासी-से केस णं तुमं देवाणुप्पिया ! कत्तो
वा इह हव्वमागए ? तए णं से सामुद्दए दद्दुरे तं कूवदद्दुरं एवं वयासी-एवं खलु
देवाणुप्पिया ! अहं सामुद्दए दद्दुरे । तए णं से कूवदद्दुरे तं सामुद्दयं दद्दुरं एवं
वयासी-क्रेमहालए ण देवाणुप्पिया ! से समुद्दे ? । तए णं से सामुद्दए दद्दुरे तं कूव-
दद्दुर एवं वयासी-महालए णं देवाणुप्पिया ! समुद्दे । तए णं से कूवदद्दुरे पाएणं लीहं
कद्धेइ २ ता एवं वयासी-एमहालए णं देवाणुप्पिया ! से समुद्दे ? नो इणट्ठे समट्ठे,
महालए णं से समुद्दे । तए णं से कूवदद्दुरे पुर(च्छि)त्थिमिल्लाओ तीराओ उप्पिडि-
त्ताणं [पच्चत्थिमिल्लं तीरं] गच्छइ २ ता एवं वयासी-एमहालए णं देवाणुप्पिया ! से
समुद्दे ? नो इणट्ठे (समट्ठे) तहेव । एवमेव तुमं पि जियसत्तू अन्नेसिं बहूणं राईसर जाव
सत्थवाह(प)प्पभिईणं भज्जवा भगिणिं वा धूयं वा सुण्हं वा अपासमाणे जा(णे)णसि
जारिसए मम चेन्न णं ओरोहे तारिसए नो अन्नस्स । तं एवं खलु जियसत्त ! मिहि-
लाए नयरीए कुंभगस्स धूया पभावईए अत्तिया मल्लीनामं(ति) २ रुवेणं य(जुव्वणेग)
जाव नो खलु अन्ना काइ देवकन्ना वा जारिसिया मल्ली । विदेहवररायकन्नाए छिन्नस्स
वि पायंगुट्ठगस्स इमे तव ओरोहे सयसहस्सइमं पि कलं न अग्घइ-त्तिकद्दु जामेव
दिसं पाउब्भूया तामेव दिसं पडिगया । तए णं से जियसत्तू परिव्वाइयाजणियहासे
दूयं सद्दावेइ जाव पहारेत्थ गमणाए (६) ॥ ८१ ॥ तए णं तेसिं जियस(त्तु)त्तूपामो-
क्खाणं छण्हं राईणं दूया जेणेव मिहिला तेणेव पहारेत्थ गमणाए । तए णं छप्पि
(य)दू(तका)यगा जेणेव मिहिला तेणेव उवागच्छंति २ ता मिहिलाए अग्गुजाणंसि
पत्तेयं २ खंधावारनिवेसं करेंति २ ता मिहिलं रायहाणिं अणुप्पविसंति २ ता
जेणेव कुंभए तेणेव उवागच्छंति २ ता पत्तयं (२) करयल जाव साणं २ राईणं वय-
णाइं निवेदंति । तए णं से कुंभए (राया) तेसिं दूयाणं (अंतिए) एयमट्ठं सोच्चा आसुस्ते
जाव तिवलियं भिउडिं (णिडाले साहट्ठु) एवं वयासी-न देमि णं अहं तुब्भ मल्लि २
तिकद्दु ते छप्पि दूए असक्कारिय असम्माणिय अवदारेणं निच्छुभावेइ । तए णं
जियसत्तुपामोक्खाणं छण्हं राईणं दूया कुंभएणं रत्ता असक्कारिया असम्माणिया
अवदारेण निच्छुभाविया समाणा जेणेव सगा २ ज(जा)णवया जेणेव सयाइं २
नगराइं जेणेव स(गा)या २ रायाणो तेणेव उवागच्छंति २ ता करयल जाव एवं
वयासी-एवं खलु सामी ! अम्हे जियस(त्तु)त्तुपामोक्खाणं छण्हं रा(ई)याणं दूया
जमगसमगं चेव जेणेव मिहिला जाव अवदारेणं निच्छुभावेइ । तं न देइ णं

सामी । कुंभए मल्लिं २ । साणं २ राईणं एयमट्ठं निवेदिति । तए णं ते जियसत्तु-
 पामोक्खा छप्पि रायाणो तेसिं दूयाणं अंतिए एयमट्ठं सोच्चा(निसम्म)आसुत्ता
 अन्नमन्नस्स दूयसंपेसणं करेति (०) एवं वयासी-एवं खलु देवाणुप्पिया ! अम्हं छण्हं
 राईणं दूया जमगसमगं चेव जाव निच्छूडा । त सेयं खलु देवाणुप्पिया ! (अम्हं)
 कुंभगस्स जतं गेण्हित्तए-त्तिकट्ठु अन्नमन्नस्स एयमट्ठं पडिसुणेति २ ता ण्हाया
 सन्नद्धा हत्थिखंधवरगया सको(रं)रिटमल्लदामा जाव सेयवरचामराहिं(०)महया-
 हयगयरहपवरजोहकलियाए चाउरंगिणीए सेणाए सद्धि संपरिवुडा सव्विह्वीए जाव
 रवेणं सएहि[नो] २ नगरेहिंनो जाव निग्गच्छंति २ ता एगयओ मिलायंति(२ता)
 जेणेव मिहिला तेणेव पहारेत्थ गमगाए । तए णं कुंभए राया इमीसे कहाए
 लद्धट्ठे समाणे बलवाउयं सद्दावेइ २ ता एवं वयासी-खिप्पामेव(भो देवाणुप्पिया !)
 हय जाव सेन्नं सन्नाहेह जाव पच्चप्पिणंति । तए णं कुंभए(राया)ण्हाए सन्नद्धे हत्थि-
 खंधवरगए जाव सेयवरचाम(राहि)रए महया (०) मिहिलं(रायहाणि)मज्झंमज्झेणं
 नि(ग्गच्छइ)जाइ २ ता विदे(हं)हजणवय मज्झंमज्झेणं जेणेव देसअंते तेणेव
 (उवागच्छइ २ ता)खंधावारनिवेस करेइ २ ता जियसत्तूपामोक्खा छप्पि य रायाणो
 पडिवालेमाणे जुज्झसजे पडिचिट्ठइ । तए णं ते जियसत्तूपामोक्खा छप्पि(य)
 रायाणो जेणेव कुंभए तेणेव उवागच्छंति २ ता कुंभएणं रत्ता सद्धिं संपलग्गा
 यावि होत्था । तए णं (ने) जियसत्तूपामोक्खा छप्पि रायाणो कुंभयं रायं हयमहिय-
 पवरवीरघाइय(नि)विवडियचिध(द्ध)धय(छत्त) पडागं किच्छप्पागेवगयं दिसोदि(सि)-
 सं पडिसे(हि)हंति । तए णं से कुंभए (राया)जियसत्तूपामोक्खेहिं छहि राईहि हय-
 महिय जाव पडिसेहिए समाणे अत्थामे अवल्ले अवीरिए जाव अधारणिजमिति कट्ठु
 सिग्घं तुरिय जाव वेइयं जेणेव मिहिला तेणेव उवागच्छइ २ ता मिहिलं अणुपवि-
 सइ २ ता मिहिलाए दुवाराइं पिहेइ २ ता रोहसजे चिट्ठइ । तए णं ते जिय-
 सत्तूपामोक्खा छप्पि रायाणो जेणेव मिहिला तेणेव उवागच्छंति २ ता मिहिलं
 रायहाणिं निस्संचारं निस्सचारं सव्वओ समंता ओसंभित्ताणं चिट्ठंति । तए ण से
 कुंभए(राया)मिहिलं रायहाणिं रुद्धं जाणिता अ(ब्भं)ब्भितरियाए उवट्ठाणसालाए
 सीहामणवरगए तेसिं जियसत्तूपामोक्खाणं छण्हं राईणं छिदाणि य विवराणि य
 मम्माणि य अलभमाणे बहूहि आए हे य उवाएहि य उप्पत्तियाहि य ४ बुद्धीहिं
 परिणामेमाणे २ किंचि आय वा उवायं वा अलभमाणे ओहयमणसंकप्पे जाव
 झियायइ । इमं च णं मल्ली ० ण्हाया सव्वालंकारविभूसिया बहूहिं खुज्जाहिं परि-
 वुडा जेणेव कुंभए तेणेव उवागच्छइ २ ता कुंभगस्स पायग्गहणं करेइ । तए णं

कुंभए(राया)मल्लिं २ नो आढाइ नो परियाणाइ तुसिणीए संचिद्धइ । तए णं मल्ली २ कुंभगं(रायं)एवं वयासी-तुब्भे णं ताओ ! अन्नया ममं एज्जमाणं जाव निवेसेह, किञ्चं तुब्भ अज्ज ओहय जाव झियायह ? । तए णं कुंभए मल्लिं २ एवं वयासी-एवं खलु पुत्ता ! तव कज्जे जियसत्तुपामोक्खेहिं छहिं राईहिं दूया संपेसिया । ते णं मए असक्कारिया जाव निच्छुडा । तए ण(ते)जियसत्तुपा(मु)मोक्खा तेसिं दूयाणं अंतिए एयमट्ठं सोच्चा परिकुविया समाणा मिहिल रायहाणि निस्संचारं जाव चिट्ठंति । तए णं अहं पुत्ता(१)तेसिं जियसत्तुपामोक्खाणं छण्हं राईणं अंतराणि अलभमाणे जाव झियामि । तए णं सा मल्ली २ कुंभ(यं)गं रायं एवं वयासी-माणं तुब्भे ताओ ! ओहयमणसंकप्पा जाव झियायह, तुब्भे णं ताओ ! तेसिं जियसत्तुपामोक्खाणं छण्हं राईणं पत्तेयं २ रह(सियं)रिसए दूयसंपेसे करेह एगमेगं एवं वयह-तव देमि मल्लिं २ तिकट्टु संज्ञाकालसमयंसि पविरलमणुस्संसि निसंत-पडिनिसंतंसि पत्तेयं २ मिहिलं रायहाणि अणुप्प(वे)विसेह २ ता गव्वघरएसु अणुप्पविसेह मिहिलाए रायहाणीए दुवाराइं पिहेह २ ता रोहसज्जे चिट्ठह । तए णं कुंभए(राया)एवं तं चेव जाव पवेसेइ रोहसज्जे चिट्ठइ । तए णं ते जियसत्तु-पामोक्खा छप्पि(य)रायाणो कल्लं(पाउब्भूया)जाव [जलंते] जालंतरेहिं कणगमयं मत्थयच्छिट्ठं पउमुप्पलपिहाणं पडिमं पासंति एस णं मल्ली २ तिकट्टु मल्लीए २ ख्वे य जोव्वणे य लावण्णे य मुच्छिया गिद्धा जाव अज्झोववन्ना अणिमिसाए दिट्ठीए येहमाणा २ चिट्ठंति । तए णं सा मल्ली २ ण्हाया सव्वालंकारविभूसिया वट्ठहिं खुज्जाहिं जाव परिक्खित्ता जेणेव जालघरए जेणेव कण(य)गपडिमा तेणेव उवागच्छइ २ ता तीसे कण पडिमाए मत्थयाओ तं पउमं अवणेइ । तए णं गंधे निद्धा(व)वेइ से जहानामए अहिमडेइ वा जाव असुभतराए चेव । तए णं ते जियसत्तुपामोक्खा तेणं असुभेगं गंधेणं अभिभूया समाणा सएहिं २ उत्तरि(जए)जेहिं आसाइं पिहेति २ ता परम्मुहा चिट्ठंति । तए णं सा मल्ली २ ते जियसत्तुपामोक्खे एव वयासी-किं णं तु(वमं)ब्भे देवाणुप्पिया ! सएहि २ उत्तरिजेहिं जाव परम्मुहा चिट्ठह ? । तए णं ते जियसत्तुपामोक्खा मल्लिं २ एवं वयंति-एवं खलु देवाणुप्पिए ! अम्हे इमेणं असुभेगं गंधेणं अभिभूया समाणा सएहिं २ जाव चिट्ठामो । तए णं मल्ली २ ते जियसत्तुपामोक्खे एवं वयासी-जइ ताव देवाणुप्पिया ! इमीसे कणग जाव पडिमाए कल्लकल्लिं ताओ मणुन्नाओ असणाओ ४ एगमेगे पिंडे पक्खिप्पमाणे २ इमेयाख्वे असुभे पोग्ग(ल)ले परिणामे इमस्स पुण ओरालियसरीरस्स खेलासवस्स वंतासवस्स पित्तासवस्स सु(क्क)क्कासवस्स सोणियपूयासवस्स दु(हव)ख्यउसासनीसा-

सस्स दुरयमुत्त(पु)पूइयपुरीसपुण्णस्स सडण जाव धम्मस्स केरिसए[य]परिणामे भवि-
 स्सइ ? तं मा णं तुब्भे देवाणुप्पिया ! माणुस्सएसु कामभोगेषु सज्जह रज्जह गिज्जह
 मुज्जह अज्जोववज्जह । एवं खलु देवाणुप्पिया ! (तुम्हे)अम्हे इ(माओ)मे तच्चे
 भवग्गहणे अवरविदेहवासे सलिलावईविजए वीयसोगाए रायहाणीए महव्वल-
 पामोक्खा सत्त(वि)पियवालवयंसया रायाणो होत्था सहजाया जाव पव्वइया । तए
 णं अह देवाणुप्पिया ! इमेणं कारणेणं इत्थीनामगोयं कम्मं निव्वत्तेमि-जइ णं
 तु(ब्भं)ब्भे चउ(चो)त्थं उवसंपज्जिताणं विहरह त(ए)ओ णं अहं छट्ठं उवसंपज्जि-
 ताणं विहरामि सेसं तहेव सव्वं । तए णं तुब्भे देवाणुप्पिया ! कालमासे कालं किच्चा
 जयंते विमाणे उववच्चा । तत्थ णं तु(ब्भे)ब्भं देसूणाइं वत्तीसाइं सागरोवमाइं
 ठिई । तए णं तुब्भे ताओ देवलो(या)गाओ अणंतरं चयं चइत्ता इहेव जंबुद्दीवे
 २ (जाव) साइं २ रज्जाइं उवसंपज्जिताणं विहरह । तए णं अहं(देवाणुप्पिया !)ताओ
 देवलोगाओ आउक्खएणं जाव दारियत्ताए पच्चायाया । किं(थ)च तयं पम्हुट्ठं जं
 थ तया भो जयंतपवरंमि । वुत्था समयनिवद्धं देवा तं संभरह जाइं ॥ १ ॥ तए
 णं तेसि जियसत्तुपामोक्खाण छण्हं रा(या)ईणं मल्लीए २ अंतिए एयमट्ठं सोच्चा २
 सुभेणं परिणामेणं पसत्थेणं अज्जवसाणेणं लेसाहि विसुज्जमाणीहि तयावरणिज्जाणं
 कम्माणं खओवसमेणं ईहा(वू)पूह जाव सन्निजाईसरणे समुप्पन्ने एयमट्ठं सम्मं
 अभिसमागच्छंति । तए णं मल्ली अरहा जियसत्तुपामोक्खे छप्पि रायाणो समु-
 प्पन्नजा(इ)ईसरणे जाणित्ता गब्भघराणं दाराइं विहा(डावे)डेइ । तए णं(ते)
 जियसत्तुपामोक्खा जेणेव मल्ली अरहा तेणेव उवागच्छंति । तए णं महव्वल-
 पामोक्खा सत्त पियवालवयंसा एगयओ अभिसमन्नागया(या)वि होत्था । तए णं
 मल्ली अरहा ते जियसत्तुपामोक्खे छप्पि(य)रायाणो एवं वयासी-एवं खलु अहं
 देवाणुप्पिया ! संसारभ(य)उव्विग्गा जाव पव्वयामि, तं तुब्भे णं कि करेह कि
 ववसह(जाव)किं भे हियसामत्थे ? । तए णं जियसत्तुपामोक्खा(छ० रा०)मल्लि
 अरहं एवं वयासी-जइ णं तुब्भे देवाणुप्पिया ! संसार जाव पव्वयह अम्हाणं
 देवाणुप्पिया ! के अन्ने आलवणे वा आहारे वा पडिवंधे वा ? जह चेव णं देवाणु-
 प्पिया ! तुब्भे अ(म्हे)म्हं इओ तच्चे भवग्गहणे वहुसु कज्जेसु य मेढी पमाणं जाव
 धम्मधुरा होत्था त(हा)ह चेव णं देवाणुप्पिया ! इण्हिपि जाव भविस्सह । अम्हे
 वि(य)णं देवाणुप्पिया ! संसारभउव्विग्गा जाव भीया जम्मगमरणाणं देवाणुप्पिया-
 (णं)मद्धि मुंडा भवित्ता जाव पव्वयामो । तए णं मल्ली अरहा ते जियसत्तुपामोक्खे
 एवं वयासी-(जं)जइ णं तुब्भे संसार जाव मए सद्धि पव्वयह तं गच्छह णं तुब्भे

देवाणुप्पिया ! सएहिं २ रज्जेहिं जे(ट्टे)ट्टुप्पुत्ते रज्जे ठावेह २ ता पुरिससहस्स-
वाहिणीओ सीयाओ दुरुहह(दुरुडा समाणा) २ ता मम अंतियं पाउब्भवह ।
तए णं ते जियसत्तुपामोक्खा मल्लिस्स अरहओ एयमट्ठं पडिमुणेंति । तए णं
मल्ली अरहा ते जियसत्तुपामो(क्खे)क्खा गहाय जेणेव कुंभए (राया) तेणेव
उवागच्छइ २ ता कुंभगस्स पाएसु पाडेइ । तए ण कुंभए (राया) ते जियमत्तु-
पामोक्खा विउलेणं असणेण ४ पुप्फवत्तगंधमल्लालंकारेणं सक्कारेइ जाव पडिवि-
सज्जेइ । तए णं ते जियसत्तुपामोक्खा कुंभएणं रत्ता विसज्जिया समाणा जेणेव
साइं २ रज्जाइं जेणेव नगराइ तेणेव उवागच्छंति २ ता सगाइं [२] रज्जाइं
उवसंपज्जिता[णं] विहरंति । तए णं मल्ली अरहा संवच्छरावसाणे निक्खमिस्सामिति
मणं पहारेइ ॥ ८२ ॥ तेणं कालेणं तेण समएणं सक्कस्स आसणं चलइ । तए णं
सक्के देविदे देवराया आसणं चलियं पासइ २ ता ओहिं पउंजइ २ ता मल्लिं अरहं
ओहिणा आभोएइ २ ता इमेयारुवे अज्झत्थिए जाव समुप्पज्जित्था-एवं खलु
जंबुद्दीवे २ भारहे वासे मिहिलाए कुंभगस्स रत्तो मल्ली अरहा निक्खमिस्सामिति
मणं पहारेइ । तं जीयमेयं तीयपञ्चुप्पन्नमगागयाणं सक्काणं (३) अरहताणं भगवं-
ताणं निक्खममाणाणं इमेयारुवं अत्थसंपयाणं द(लि)लइत्तए तंजहा-तिण्णेव य
कोडिसया अट्ठासीइं च हुं(हो)ति कोडीओ । असिइं च सयसहस्सा इंदा दलयति
अरहाणं ॥ ९ ॥ एवं संपेहेइ २ ता वेसमणं देवं सदावेइ २ ता एवं वयासी-एवं
खलु देवाणुप्पिया ! जंबुद्दीवे २ भारहे वासे जाव असीइं च सयसहस्साइं दलइत्तए,
तं गच्छह णं देवाणुप्पिया ! जंबुद्दीवे (दीवे) भारहे वासे मिहिलाए कुंभगभवणंसि
इमेयारुव अत्थसंपयाणं साहराहि २ ता खिप्पामेव मम एयमाणत्तियं पच्चप्पिणाहि । तए
णं से वेसमणे देवे सक्केणं देविदेणं(०) एव वुत्ते (समाणे) ह(०)ट्टे करयल जाव पडि-
मुणेइ २ ता जंभए देवे सदावेइ २ ता एवं वयासी-गच्छह णं तुब्भे देवाणुप्पिया ! जंबु-
द्दीवं २ भारहं वासं मिहिलं रायहाणिं कुंभगस्स रत्तो भवणंसि तिन्नेव य कोडिसया
अट्ठासीयं च कोडीओ अ(सि)सीयं च सयमहस्साइ अयमेयारुवं अत्थसंपयाणं साहरह
२ ता मम एयमागत्तियं पच्चप्पिणह । तए णं ते जभगा देवा वेसमणेण जाव मुणेत्ता
उत्तरपुरच्छिमं दिसीभागं अवक्कमति जाव उत्तरवेउव्वियाइं रुवाइ वि(इ)उव्वंति २ ता
ताए उक्किट्ठाए जाव वीइवयमाणा जेणेव जंबुद्दीवे २ भारहे वासे जेणेव मिहिला
रायहाणी जेणेव कुंभगस्स रत्तो भवणे तेणेव उवागच्छंति २ ता कुंभगस्स रत्तो
भवणंसि तिन्नि कोडिसया जाव साहरंति २ ता जेणेव वेसमणे देवे तेणेव उवागच्छंति
२ ता करयल जाव पच्चप्पिणंति । तए णं से वेसमणे देवे जेणेव सक्के ३ तेणेव

उवागच्छइ २ ता करयल जाव पच्चप्पिणइ । तए णं मल्ली अरहा कल्लकल्लिं जाव मागहओ पायरासो त्ति बहूणं सणाहाण य अणाहाण य पहियाण य पथियाण य करोडियाण य कप्पडियाण य एगमेगं हिरण्णकोडिं अट्ठ य अणूणाइं सयसहस्साइं इमेयाखुवं अत्थसंपयाणं दलयइ । तए णं (से)कुंभए (राया) मिहिलाए रायहाणीए तत्थ २ तहिं २ देसे २ बहूओ महाणससालाओ करेइ । तत्थ णं वहवे मणुया दिन्नभइ-भन्नवेयणा विउलं असणं ४ उवक्खडेंति (०) जे जहा आगच्छंति तजहा-पथिया वा पहिया वा करोडिया वा कप्पडिया वा पासंडत्था वा गिहत्था वा तस्स य तहा आसत्थस्स वीसत्थस्स सुहासणवरगयस्स तं विउलं असणं ४ परिभाएमाणा परिवे-सेमाणा विहरंति । तए णं मिहिलाए सिंघाडग जाव बहुजणो अन्नमन्नस्स एवमाइ-क्खइ-एवं खलु देवाणुप्पिया ! कुंभगस्स रन्नो भवणंसि सव्वकामगुणियं किमिच्छियं विपुलं असणं ४ बहूणं समणाण य जाव परिवेसिज्जइ । वरवरिया घोसिज्जइ किमि-च्छियं दिज्जए बहुविहीयं । सुरअसुरदेवदाणवनरिंदमहियाण निक्खमणे ॥ १ ॥ तए णं मल्ली अरहा सवच्छरेणं तिन्नि कोडिसया अट्ठासी(ति)यं च होति कोडीओ अ(सिति)सीयं च सयसहस्साइं इमेयाखुवं अत्थसंपयाणं दलइत्ता निक्खमामिति मणं पहारेइ ॥ ८३ ॥ तेणं कालेणं तेणं समएणं लोगंतिया देवा बंभलोए कप्पे रिट्ठे विमाणपत्थडे सएहिं २ विमाणेहिं सएहिं २ पासायवडिसएहि पत्तेयं २ चउहिं सामाणियसाहस्सीहि तिहि परिसाहिं सत्तहिं अणिएहि सत्तहिं अणियाहिवईहिं सोलसहिं आयरक्खदेवसाहस्सीहि अन्नाहि य बहूहिं लोगंतिएहिं देवेहि सद्धिं सपरि-चुडा महयाहयनट्ठगीयवाइय जाव रवेणं भुंजमाणा विहरंति तंजहा—सारस्सयमाइच्चा वण्ही वरुणा य गइतोया य । तुसिया अव्वावाहा अग्गिच्चा चेव रिट्ठा य ॥ १ ॥ तए णं तेसिं लो(यं)गंतियाणं देवाणं पत्तेयं २ आसणाइं चलति तहेव जाव अरहतानं निक्खममाणानं संबोहणं क(रे)रित्तए-त्ति तं गच्छामो णं अम्हे मल्लिस्स अरहओ संबोहणं करे(मि)मो-त्तिकट्ठु एव संपेहेति २ ता उत्तरपुरच्छिमं दिसीभा(यं०)गं वेउव्वियसमुग्धाएणं समोहणंति (०) सं(खि)खेज्जाइं जोयणाइं एवं जहा जंभगा जाव जेणेव मिहिला रायहाणी जेणेव कुंभगस्स रन्नो भवणे जेणेव मल्ली अरहा तेणेव उवागच्छंति २ ता अंतलिक्खपडिवन्ना सखिंखिणियाइं जाव वत्थाइं पवरपरिहिया करयल जाव ताहिं इट्ठाहिं (जाव) एवं वयासी-बुज्झाहि भगवं(1) लोग । हा ! पवत्तेहि धम्मतित्थं जीवाणं हियसुहनिस्सेयसकरं भविस्सइ-त्तिकट्ठु दोच्चपि तच्चपि एवं वयंति (०) मल्लिं अरहं वंदंति नमंसंति वं० २ ता जामेव दिसि पाउब्भू(आ)या तामेव दिसिं पडिगया । तए णं मल्ली अरहा तेहिं लोगंतिएहिं देवेहि संबोहिए समाणे जेणेव

अम्मापियरो तेणेव उवागच्छइ २ ता करयल जाव एवं वयासी-इच्छामि णं अम्म-
याओ ! तुब्भेहिं अब्भणुत्ताए मुंडे भवित्ता जाव पव्वइत्तए । अह्मासुहं देवाणुप्पिया !
मा पडिवंधं करे(हि)ह । तए णं कुंभए राया कोहुंवियपुरिसे सद्दावेइ २ ता एवं
वयासी-खिप्पामेव अट्टसहस्सं सोवणियाणं [कलसाणं] जाव भोमेजाणं (ति) अन्नं
च महत्थं जाव तित्थयराभिसेयं उवट्टवेह जाव उवट्टवेति । तेणं कालेणं तेणं
समएणं चमरे असुरिंदे जाव अच्चुयपजवसाणा आगया । तए णं सक्के (३)
आभिओगिए देवे सद्दावेइ २ ता एवं वयासी-खिप्पामेव अट्टसहस्सं सोवणियाणं
(कलसाणं) जाव अन्नं च तं विपुलं उवट्टवेह जाव उवट्टवेति । तेवि कलसा ते
चेव कलसे अणुपविट्ठा । तए णं से सक्के देविंदे देवराया कुंभए य राया मल्लिं
अरहं सीहासणंसि पुरत्थाभिमुहं निवेसेइ अट्टसहस्सेणं सोवणियाणं जाव अभि-
सिंचंति । तए णं मल्लिस्स भगवओ अभिसेए वट्टमाणे अप्पेगइया देवा मिहिल च
सर्विमत(रं)रवा(हिं)हिरं जाव सव्वओ समंता [सं]परिधावंति । तए णं कुंभए राया
दोच्चंपि उत्तरावक्कमणं जाव सव्वालंकारविभूसियं करेइ २ ता कोहुंवियपुरिसे सद्दावेइ
२ ता एवं वयासी-खिप्पामेव मणोरमं सीयं उवट्टवेह ते उवट्टवेति । तए णं सक्के
(३) आभिओगिए देवे सद्दावेइ २ ता एवं वयासी-खिप्पामेव अणेगखंभ जाव
(मणोरमं) सीयं उवट्टवेह जाव सावि सीया तं चेव सीयं अणुपविट्ठा । तए णं मल्ली
अरहा सीहासणाओ अब्भुट्टेइ २ ता जेणेव मणोरमा सीया तेणेव उवागच्छइ २ ता
मणोरमं सीयं अणुपयाहिणीकरेमाणा मणोरमं सीयं दुरुहइ २ ता सीहासणवरगए
पुरत्थाभिमुहे सन्निसण्णे । तए णं कुंभए (राया) अट्टारस सेणिप्पसेणीओ सद्दावेइ
२ ता एवं वयासी-तुब्भे णं देवाणुप्पिया ! ण्हाया सव्वालंकारविभूसिया मल्लिस्स सीयं
परिवहह जाव परिवहंति । तए णं सक्के ३ मणोरमाए [सीयाए] दक्खिणिल्लं उवरिल्लं
वाहं गेण्हइ । ईसाणे उत्तरिल्लं उवरिल्लं वाहं गेण्हइ । चमरे दाहिणिल्लं हेट्ठिल्लं वलां
उत्तरिल्लं हेट्ठिल्लं अवसेसा देवा जहारिहं मणोरमं सीयं परिवहंति-पुर्व्वि उक्खित्ता
माणु(स्)सेहिं (तो)सा हट्ठरोमकूवेहिं । पच्छा वहंति सीयं असुरिंदसुरिंदना(गें)गिंदा
॥१॥ चलचवलकुंडलधरा सच्छंदविउव्वियाभरणधारी । देविंददानविंदा वहंति सीयं
जिगिंदस्स ॥२॥ तए णं मल्लिस्स अरहओ मणोरमं सीयं दुरुहस्स इमे अट्टुमंगलगा
पुरओ अहाणुपु(व्वीए)व्वेणं एवं निग्गमो जहा जमालिस्स । तए णं मल्लिस्स अरहओ
निक्खममाणस्स अप्पेगइया देवा मिहिलं आसिय जाव अर्व्वितरवासविहिगाहा जाव
परिधावंति । तए णं मल्ली अरहा जेणेव सहस्संववणे उज्जाणे जेणेव असोगवरपायवे
तेणेव उवागच्छइ २ ता सीयाओ पच्चोर(म)हइ० आभरणालंकारं पभावई पडिच्छइ ।

तए णं मल्ली अरहा सयमेव पंचमुद्वियं लोयं करेइ । तए णं सक्के ३ मल्लिस्स केसे पडिच्छइ
 (२त्ता) खीरोदगसमुद्दे साहर(पक्खिव)इ । तए णं मल्ली अरहा नमो(ऽ)त्थु णं सिद्धाणं-
 तिकट्ठु सामाइय(च)चारित्त पडिवज्जइ । जं समयं च णं मल्ली अरहा चारित्तं पडिवज्जइ
 तं समयं च णं देवाणं [य]माणुसाण य निग्घोसे तु(रि)डिय(नि)णा(य)ए गीयवाइय-
 निग्घोसे य सक्क(स्स)वयणसंदेसेणं निलुक्के यावि होत्था । जं समयं च णं मल्ली अरहा
 सामाइ(यं)यचारित्तं पडिवज्जे तं समयं च णं मल्लिस्स अरहओ माणुसधम्मओ उत्तरिए
 मणपज्जवनाणे समुप्पन्ने । मल्ली णं अरहा जे से हेमंताणं दोच्चे मासे चउत्थे पक्खे
 पोससुद्धे तस्स णं पोससुद्धस्स एक्कारसीपक्खेणं पुव्वण्हकालसमयंसि अट्ठमेणं भत्तेणं
 अपाणएणं अस्सिणीहि नक्खत्तेणं जोगमुवागएणं तिहि इत्थीसएहि अब्भितरियाए
 परिसाए तिहिं पुरिससएहि बाहिरियाए परिसाए साद्धे मुंडे भावित्ता पव्वइए । मल्लिं
 अरहं इमे अट्ठ ना(रा)यकुमारा अणुपव्वइंसु तंजहा-नंदे य नदिमित्ते सुमित्तवलमित्त-
 भाणुमित्ते य । अमरवइ अमरसेणे महसेणे चेव अट्ठमए ॥ १ ॥ तए णं (सं) ते भव-
 णवई ४ मल्लिस्स अरहओ निक्खमणमहिंसं करेंति २ ता जेणेव नंदीस(रव)रे(०)
 अट्ठाहियं करेंति जाव पडिगया । तए णं मल्ली अरहा जं चेव दिवसं पव्वइए तस्सेव
 दिवसस्स पुव्वा(प०)वरण्हकालसमयंसि असोगवरपायवस्स अहे पुढविसिलापट्ठयंसि
 सुहासणवरगयस्स सुहेणं परिणामेण(पसत्थेहिं अज्झवसाणेहिं) पसत्थाहि लेसाहिं
 (विमुज्झमाणीहिं) तयावरणकम्मरयविकरणकरं अपुव्वकरणं अणुपविट्ठस्स अणंते
 जाव केवल[वर]नाणदंसणे समुप्पन्ने ॥ ८४ ॥ तेणं कालेणं तेणं समएणं सव्वदेवाणं आ-
 सणाइं च(लं)लेति समोसढा रुणेति अट्ठाहि(य)यं म(हिमा)हा० नंदीस(रे)रं [जाव]
 जामेव दिसिं पाउब्भूया तामेव (दिसिं) पडिगया । कुंभए वि निग्गच्छइ । तए णं
 ते जियसत्तुपामोक्खा छप्पि य रायाणो जेट्ठपुत्ते रज्जे ठावेत्ता पुरिससहस्सवाहिणी-
 याओ दुरुढा सव्विद्धीए जेणेव मल्ली अरहा जाव पज्जुवासंति । तए णं मल्ली अरहा
 तीसे महइमहालियाए कुंभगस्स (रण्णो) तेसिं च जियसत्तुपामोक्खाणं धम्मं
 [परि]कहेइ । परिसा जामेव दिसिं पाउब्भूया तामेव दिसिं पडिगया । कुंभए
 समणोवासए जाए पडिगए पभावई(य समणोवासिया जाया पडिगया) पि । तए
 णं जियसत्तुपामोक्खा छप्पि रायाणो धम्मं सोच्चा आलित्तए णं भंते ! जाव पव्वइया
 [जाव] चोदसपुव्विणो अणंते केव(ले)ली सिद्धा । तए णं मल्ली अरहा सहसंववणाओ
 [पडि]निक्खमइ २ ता बहिया जणवयविहारं विहरइ । मल्लिस्स णं (अरहओ) भिसग-
 (किसुय)पामोक्खा अट्ठावीसं गणा अट्ठावीसं गणहरा होत्था । मल्लिस्स णं अरहओ
 [अट्ठ]चत्तालीसं समणसाहस्सीओ उक्को० । वंधुम(ई)इपामोक्खाओ पणपन्नं अज्जिया-

साहस्सीओ उक्को० । सुव्वयपामोक्खा(मल्लिस्स ण अरह)ओ सावयाणं एगा सयसा-
हस्सी चुलसीइं (च) सहस्सा (०) सुगंदापामोक्खा(मल्लिस्स णं अरह)ओ सावियाणं
तिणि सयसाहस्सीओ पण्णाट्टि च सहस्सा (०) छ(स्)वसया चोद्दसपुव्वीणं [संपया ।]
वी(स)सं सया ओहिनाणीणं वत्तीसं सया केवलनाणीणं पणतीसं सया वेडव्वियाणं
अट्ठसया मणपज्जवनाणीणं चोद्दससया वाईगं वीसं सया अणुत्तरोववाइयाणं ।
मल्लिस्स [णं] अरहओ दुविहा अंतगडभूमी होत्या तंजहा-जु(यं)गंतकरभूमी परिया-
यंतकरभूमी य जाव वीसडमाओ पुरिसजुगाओ जुगंतकरभूमी दुवा[ल]सपरियाए
अंतमकासी । मल्ली णं अरहा पणवीसं धणू (०) उट्ठं उच्चत्तेणं वण्णेणं पियंगु(स)सामे
समच्चउरंससंठाणे वज्जरिसहनारायसंघयणे मज्जदेसे सुहंसुहेणं विहरिता जेणेव
सम्मए पव्वए तेणेव उवागच्छइ २ ता संमेयसेलसिहरे पाओवगमणुववन्ने । मल्ली
णं अरहा एगं वाससयं अगारवासमज्जे पणपन्नं वाससहस्साइं वाससयऊणाइं
केवलिपरियागं पाउणिता पणपन्नं वाससहस्साइं सव्वाउयं पालइता जे से गिम्हाणं
पढमे मासे दोच्चे पक्खे चे(चि)नसुद्धे तस्स णं चेतसुद्धस्स चउत्थीए भरणीए नक्खत्तेणं
अद्धरत्तकालसमयंसि पंचहिं अज्जियासएहिं अट्ठिमतारियाए परिसाए पंचहिं अणगार-
सएहिं वाहिरियाए परिसाए मासिएणं भत्तेणं अपाणएणं वग्घारियपाणी खीणे वेयणिजे
आउए ना(मे)मगोए सिद्धे । एत्वं परिनिव्वाणमहिमा भाणियव्वा जहा जंजुदीवपण्णत्तीए
नंदीसरे अट्ठाहियाओ पडिगयाओ । एवं खलु जंवू ! समणेणं ३ जाव संपत्तेणं
अट्ठमस्स नायज्जयणस्स अयमट्ठे पन्नत्ते-त्तिवेमि ॥ ८५ ॥ गाहाउ-उग्गतव-
संजमवओ पणिट्ठफलसाहगस्सवि जियस्स । धम्मविसएवि सुहुमावि होड माया
अणत्थाय ॥ १ ॥ जह मल्लिस्स महाबलमवंसि तित्थयरनामवधेऽवि । तवविसय-
थेवमाया जाया जुवइत्तहेउत्ति ॥ २ ॥ अट्ठमं नायज्जयणं समत्तं ॥

जइ णं भंते ! समणेणं भगवया महावीरेणं जाव सपत्तेणं अट्ठमस्स नायज्जय-
णस्स अयमट्ठे पन्नत्ते नवमस्स णं भंते ! नायज्जयणस्स समणेणं जाव संपत्तेणं के
अट्ठे पन्नत्ते ? एत्वं खलु जंवू ! तेणं कालेण तेणं समएण चंपा नामं नयरी होत्या ।
(तीसे णं चपाए नयरीए कोणिए नामं राया होत्या तत्तय णं चंपाए नयरीए वहिया
उत्तरपुरच्छिमे दिसीभाए) पुण्णभेद्दे(नामं) उज्जाणे(होत्या) । तत्तय णं माकंशी नामं
सत्थवाहे परिवसइ अट्ठे जाव अपरिभूए । तस्स णं भद्दा नामं भारिया होत्या ।
तीसे ण भद्दाए अत्तया दुवे सत्थवाहदारया होत्या तंजहा-जिणपालिए य जिगर-
क्खिए य । तए णं तेसि मागदियदारगाणं अन्नया कयाइ एगयओ इमेयारूवे
मिहोक्खासमुल्लावे समुप्पजित्था-एवं खलु अम्हे लवणसमुद्दं पोयवहणेणं एक्कारस

चारा ओगाढा सव्वत्थं वि य णं लद्धट्ठा कयकज्जा अणहसमग्गा पुणरवि निय(य)-
 गघरं हव्वमागया । तं सेयं खलु अम्हं देवाणुप्पिया ! दुवालसमंपि लवणसमुद्दं
 पोयवहणेणं ओगाहित्तए-त्तिकट्ठु अन्नमन्नस्स एयमट्ठ पडिसुणेंति २ ता जेणेव अम्मा-
 पियरो तेणेव उवागच्छंति २ ता एवं वयासी-एवं खलु अम्हे अम्मयाओ ! एक्कारस
 वारा तं चेव जाव निय(यं)गघरं हव्वमागया, तं इच्छामो णं अम्मयाओ !
 तुब्भेहिं अब्भणुन्नाया समाणा दुवालस(मं)लवणसमुद्दं पोयवहणेणं ओगाहित्तए ।
 तए णं ते मागंदियदारए अम्मापियरो एवं वयासी-इमे (ते) मे जाया ! अज्जग
 जाव परिभाएत्तए, तं अणुहोह ताव जाया ! विपुले माणुस्सए इट्ठीसक्कार-
 समुदए, कि मे सपच्चवाएणं निरालंबणेणं लवणसमुद्दोत्तारेणं ? एवं खलु पुत्ता !
 दुवालसमी जत्ता सोवसग्गा यावि भवइ, तं मा णं तुब्भे दुवे पुत्ता ! दुवालसमंपि
 लवण जाव ओगाहेह, मा हु तुब्भं सरीरस्स वावत्ती भविस्सइ । तए णं [ते]
 मा(गं)कंदियदारगा अम्मापियरो दोच्चंपि तच्चंपि एवं वयासी-एवं खलु अम्हे अम्म-
 याओ ! एक्कारस वारा लवण जाव ओगाहित्तए । तए णं ते मा(गदी)कंदियदारए
 अम्मापियरो जाहे नो संचाएति बहूहि आघवणाहि य पणवणाहि य (आघवित्तए
 वा पन्नवित्तए वा) ताहे अकामा चेव एयमट्ठं अणु(जाणि)मन्नित्था । तए ण ते
 माकंदियदारगा अम्मापिज्जहिं अब्भणुन्नाया समाणा गणिमं च धरिमं च मेज्जं च
 पारिच्छेज्जं च जहा अरहन्नगस्स जाव लवणसमुद्दं बहूइं जो(अ)यणसयाइं ओगाढा
 ॥ ८६ ॥ तए णं तेसिं माकंदियदारगाणं अणेगाइ जोयणसयाइं ओगाढाणं समा-
 णाणं अणेगाइं उप्पाइयसयाइं पाउब्भूयाइं तंजहा-अकाले गज्जियं जाव थणियसइ
 कालियवाए तत्थ समुट्ठिए । तए णं सा नावा तेणं कालियवाएणं आहुणिज्जमाणी
 २ संचालिज्जमाणी २ संखोभिज्जमाणी २ सलिलतिकखवेगेहिं अइव(आय)ट्ठिज्ज-
 माणी २ कोट्ठिमंसि करतलाहए विव तिं(ते)दूसए तत्थेव २ ओवयमाणी य उप्पयमाणी
 य उप्पयमाणी-विव धरणीयलाओ सिद्धविज्जा विज्जाहरकन्नगा ओवयमाणी विव
 गगणतलाओ भट्टविज्जा विज्जाहरकन्नगा विपलायमाणी विव महागरुलवेगवित्तासिया
 भुयगवरकन्नगा धावमाणी विव महाजणरसियसइवित्तत्था ठाणभट्टा आसकिसोरी
 निगुंजमाणी विव गुरुजणदिट्ठावराहा सु(य)जणकुलकन्नगा घुम्ममाणी विव वी(ची)-
 च्चिपहारसयतालिया गलियलंबणा विव गगणतलाओ रोयमाणी विव सलिल[भिन्न]-
 गंठिविप्पइरमाण(वो)थोरंसुवाएहिं नववहू उवरयमत्तुया विलवमाणी विव परचक्कराया-
 भिरोहिया परममहब्भयाभिद्धया महापुरवरी झायमाणी विव कवडच्छोम[ण]प्रओग-
 जुत्ता जोगपरिन्वाइया नीस(निसा)समाणी विव महाकंतारविणिग्गयपरिस्सत्ता

परिणयवया अम्मया सोयमाणी विव तवचरणखीणपरिभोगा च(य)वणकाले देव-
 रवहू संचुणियकट्टकूवरा भग्गमेढिमोडियसहस्समाला सल्लाइयवंकपरिमासा फलहं-
 तरतडतडेंतफुट्टंतसंधिवियलंतलोह(की)खीलिया सव्वंगवियंभिया परिसडियरज्जुवि-
 सरंतसव्वगत्ता आमगमल्लगभूया अकयपुण्णजगमणोरहो विव चित्तिजमागगुरुई
 हाहाकयकण्णधारनावियवाणियगजगकम्म(गा)करविलविथा नाणाविहरयणपणियसं-
 पुण्णा वहूहिं पुरिससएहिं रोयमाणेहिं कंदमाणेहिं सोयमाणेहिं तिप्पमाणेहिं विलव-
 माणेहिं एगं महं अंतोजलगयं गिरिसिहरमासा(य)इत्ता संभग्गकूवतोरणा मोडिय(झ)-
 ज्जयइंडा वलयसयखंडिया क(र)डंकडस्स तत्थेव विह्वं उवगया । तए णं तीए
 नावाए भिज्जमाणीए [ते] वहवे पुरिसा विपुलप(डि)णियभंडमायाए अंतोजलंमि निम-
 ज्जावि यावि होत्था । तए णं ते माकंदियदारगा छेया दक्खा पत्तट्ठा कुसला मेहावी
 निउणसिप्पोवगया बहुसु पोयवहणसंपराएसु कयर(ण)णा लद्धविजया अमूढा
 अमूढहत्था एगं महं फलगखंडं आसादेंति । जं(सिं)सि च णं पएसंसि से पोयवहणे
 विवन्ने तंसि च णं पएसंसि एगे महं रयण(दी)दीवे नामं दीवे होत्था अणेगाइं
 जोयणाइं आयामविकखंभेजं अणेगाइं जोयणाइं परिकखेवेणं नाणादुमसंडमंडिउहेसे
 सस्सिरीए पासाईए दरि(द)सणिजे अभिरुवे पडिरुवे । तस्स णं बहुमज्झदेमभाए
 ए(त)त्थणं महं एगे पासायवडेंसए होत्था अब्भुग्गयमूसि(य)ए जाव सस्सिरी(भू)यरुवे
 पासाईए ४ । तत्थ णं पासायवडेंसए रयणदीवदेवया नामं देवया परिवसइ पावा
 चंडा रुद्धा खुद्धा साहसिया । तस्स णं पासायव(डिं)डेंसयस्स चउ(हिं)दिसिं चत्तारि
 वणसंडा [पन्नत्ता] किण्हा किण्होभासा । तए णं ते माकंदियदारगा तेणं फलय-
 खंडेणं उवुज्जमाणा २ रयणदीवंतेणं संवुढा यावि होत्था । तए णं ते माकंदियदा-
 रगा थ'हं लभंति २ ता मुहुत्तंतरं आ(स)सासंति २ ता फलगखंडं विसज्जेति २ ता
 रयणदीवं उत्त(रं)रेंति २ ता फलाणं मग्गणगवेसणं करेंति २ ता फलाइं (गि(गे)ण्हंति
 २ ता) आहारेति २ ता नालि(ए)यरारणं मग्गणगवेसणं करेंति २ ता नालियराइं
 फोडेंति २ ता नालियरतेल्लेणं अन्नमन्नस्स गाया(गत्ता)इं अ(वभं)ब्भिगेति २ ता
 पोक्खरणीओ ओगा(हिं)हेंति २ ता जलमज्जणं करेंति २ ता जाव पच्चुत्तरंति २ ता पुढ-
 विसिलापट्टयंसि निसीयति २ ता आसत्था वीसत्था सुहासणवरगया चं(पा)पं नयरिं
 अम्मापिउआपुच्छणं च लवणसमुद्दोत्ता(रं)रणं च कालियवायसं(स)मु(त्थ)च्छणं च
 पोयवहणविवत्तिं च फलयखंड[य]स्स आसायणं च रयणदी(वु)वोत्तारं च अणुचित्ते-
 माणा २ ओहयमणसंकप्पा-जाव झिया(यें)यंति । तए णं सा रयणदीवदेवया ते माकं-
 दियदारए ओहिणा आभोएइ २ ता असिफलगवग्गहत्था सत्त[अ]ट्ठ(ता)तलप्पमाणं

उद्धं वेहासं उप्पयइ २ ता ताए उक्किट्ठाए जाव देवगईए वी(इ)ईवयमाणी २ जेणेव
 माकंदियदारए तेणेव उवागच्छइ २ ता आसुत्ता [ते] माकंदियदारए खरफहसनिट्ठुर-
 वयणेहिं एवं वयासी-हं भो माकंदियदारया ! (अपत्थियपत्थिया !) जइ णं तुब्भे
 मए सद्धि विउलाइं भोगभोगाईं भुंजमाणा विहरह तो भे अत्थि जीवि(अ)यं,
 अह(ण)णं तुब्भे मए सद्धि विउलाइं नो विहरह तो भे इमेणं नीलुप्पलगवलगुलिय
 जाव खुरधारेणं असिणा रत्तगंडमंसुयाइं माउ(या)आहिं उवसोहियाइ तालफला-
 (णी)णिव सीसाइं एगंते एडेमि । तए णं ते माकंदियदारगा रयणदीवदेवयाए अंतिए
 एयमट्ठं मोच्चा निसम्म भीया करयल जाव वद्धावेत्ता एवं वयासी—जन्नं देवाणु-
 प्पिया (!) वइस्सइ तस्स आणाउववायवयणनिद्देसे चिट्ठिस्सामो । तए णं सा रयणदीव-
 देवया ते माकंदियदारए गेण्हइ २ ता जेणेव, पासायवडेंसए तेणेव उवागच्छइ
 २ ता असुभपोग्गलावहारं करेइ २ ता सुभपोग्गलपक्खेवं करेइ २ ता [तओ] पच्छा
 तेहिं सद्धि विउलाइं भोगभोगाईं भुंजमाणी विहरइ कल्लाकल्लिं च अमयफलाइं
 उवणेइ ॥ ८७ ॥ तए णं सा रयणदीवदेवया सक्कवयणसंदेसेणं सुट्ठिएणं लवणाहि-
 वइणा लवणसमुद्दे तिसत्तखुत्तो अणुपरिय(ट्ठि)ट्ठेयव्वे ति जं किचि तत्थ तणं वा पत्तं
 वा कट्ठं वा कयवरं वा असु(ई)इ पू(ति)यं दुरभिगंधमचोक्खं तं सव्वं आहुणिय २
 तिसत्तखुत्तो एगंते एडेयव्वं—तिक्कट्ठु निउत्ता । तए णं सा रयणदीवदेवया ते माकं-
 दियदारए एवं वयासी—एवं खलु अहं देवाणुप्पिया ! सक्कवयणसंदेसेणं सुट्ठिए(णं)ण
 लवणाहिवइणा तं चेव जाव निउत्ता । तं जाव [ताव] अहं देवाणुप्पिया ! लवण-
 समुद्दे जाव एडेमि ताव तुब्भे इहेव पासायवडेंसए सुहंसुहेणं अभिरममाणा चिट्ठह ।
 जइ णं तुब्भे एयंसि अंतरंसि उव्विग्गा वा उस्सुया वा उप्पुया वा भवेज्जाह तो णं
 तुब्भे पुर(च्छि)त्थिमिल्लं वणसंडं गच्छेज्जाह । तत्थ णं दो उ(ऊ)ऊ सया साहीणा
 तंजहा—पाउसे य वासारत्ते य । तत्थ उ कंदलसिलिंधदंतो निउरवरपुप्फपीवरकरो ।
 कुडयज्जुणनीवसुरभिदाणो पाउसउऊ—गयवरो साहीणो ॥ १ ॥ तत्थ य—सुरगोवमणि-
 विचित्तो दहुरकुलरसियउज्झररवो । वरहिण(वि)वंदपरिणद्धसिहरो वासार(त्तो)त्तउ-
 ऊपव्वओ साहीणो ॥ २ ॥ तत्थ णं तुब्भे देवाणुप्पिया ! बहुसु वावीसु य जाव
 सरसरपंतियासु [य] ब(ह्म)हुसु आलीवरएसु य मालीवरएसु य जाव कुसुमघरएसु य
 सुहंसुहेणं अभिरममाणा [२] विह(रे)रिज्जाह । जइ णं तुब्भे त(ए)त्थ वि उव्विग्गा वा
 उस्सुया वा उप्पुया वा भवेज्जाह तो णं तुब्भे उत्तरिल्लं वणसंडं गच्छेज्जाह । तत्थ णं
 दो उऊ सया साहीणा तंजहा—सरदो य हेमंतो य । तत्थ उ सणस(त्त)त्तिवण्णकउ-
 (ओ)हो नीलुप्पलपउमनलिंगसिंगो । सारसच(क्कवा)क्कायरवियघोसो सरयउऊ—गोवई

साहीणो ॥ १ ॥ तत्थ य सियकुंदधवलजोण्हो कुसुमियलोद्धवगसंडमंडलतलो ।
 तुसारदगधारपीवरकरो हेमंतउऊससी सया साहीणो ॥ २ ॥ तत्थ णं तुब्भे
 देवाणुप्पिया ! वावीसु य जाव विहरेज्जाह । जइ णं तुब्भे तत्थ वि उव्विग्गा वा जाव
 उस्सुया वा भवेज्जाह तो णं तुब्भे अवरिल्लं वणसंड गच्छेज्जाह । तत्थ णं दो उऊ
 सया साहीगा तंजहा-वसंते य गिम्हे य । तत्थ उ सहकारचारुहारो किंसुयकण्णि-
 यारासोगमउडो । ऊसियतिलगव(उ)कुलायवत्तो वसंतउऊ-नरवई साहीणो ॥ १ ॥
 तत्थ य पाडलसिरीससलिलो म(लि)ल्लियावासंतियधवलवेलो सीयलसुरभिअनि-
 लमगरचरिओ गिम्हउऊसागरो साहीणो ॥ २ ॥ तत्थ णं वहूसु जाव विहरेज्जाह ।
 जइ णं तुब्भे देवाणुप्पिया ! तत्थ वि उव्विग्गा [वा] उस्सुया [वा उप्पुया वा] भवेज्जाह
 तओ तुब्भे जेणेव पासायवडेंसए तेणेव उवागच्छेज्जाह ममं पडिवालेमाणा २ चिट्ठे-
 ज्जाह । मा णं तुब्भे दक्खिणिळ्ळं वणसंडं गच्छेज्जाह । तत्थ णं महं एगे उग्गविसे
 चंडविसे घोरविसे महाविसे अइका(य)ए महाकाए जहा तेयनिसग्गे मसिमहि(सा)-
 समूसाकालए नयणविमरोसपुण्णे अंजगपुंजनियरप्पगासे रत्तच्छे जमलजुयलचंचल-
 चलंनजीहे धरणियलवेणिभूए उक्कडफुडकुडिलजडिलक्कखडवियडफडाडोवकरण-
 दच्छे लो(गाहा)हागरधम्ममाणधमवमेतघोसे अगागलियचंडतिव्वरोसे समु(हिं)हं
 तुरि(यं)यचवलं धमध(मं)मेतदिट्ठीविसे सप्पे (य) परिवसइ । मा णं तुब्भं
 सरीर(ग)स्स वावत्ती भविस्सइ । ते माकंदियदारए दोचंपि तच्चंपि एवं वयइ २ ता
 वेउव्वियसमुग्घाएणं समोह[ण]गइ २ ता ताए उक्किट्ठाए लवगसमुहं तिसत्तखुत्तो ।
 अणुपरियट्ठेउं पयत्ता यावि होत्था ॥ ८८ ॥ तए णं ते माकंदियदारया तओ मुहुत्तं-
 त्तरस्स पासायवडेंसए सइ वा रइ वा धिइ वा अलभमाणा अन्नमन्नं एवं वयासी-
 एवं खलु देवाणुप्पिया ! रयगदीवदेवया अम्हे एवं वयासी-एवं खलु अहं सक्कवय-
 गसदेसेणं सुट्ठिएणं लवगाहिवइणा जाव वावत्ती भविस्सइ । तं सेयं खलु अम्हं
 देवाणुप्पिया ! पुरत्थिमि(ल्ले)ळं वगसंडं गमितए । अन्नमन्नस्स (एयमट्ठं) पडिसुणेंति
 २ ता जेणेव पुरत्थिमिल्ले वगसंडे तेणेव उवागच्छंति २ ता तत्थ णं वावीसु य जाव
 आलीघरएसु य जाव विहरंति । तए णं ते माकंदियदारगा तत्थ वि सइ वा जाव
 अलभमाणा जेणेव उत्तरिल्ले वणसंडे तेणेव उवागच्छंति (२ ता) तत्थ णं वावीसु
 य जाव आलीघरएसु य विहरंति । तए णं ते माकंदियदार(या)गा तत्थ वि सइ वा
 जाव अलभमाणा जेणेव पच्चत्थिमिल्ले वणसंडे तेणेव उवागच्छंति २ ता जाव विहरंति ।
 तए णं ते माकंदियदारगा तत्थवि सइ वा जाव अलभमाणा अन्नमन्नं एवं वयासी-
 एवं खलु देवाणुप्पिया ! अम्हे रयगदीवदेवया एवं वयासी-एवं खलु अहं देवाणु-

पिया । सक(स्स)वयणसंदेसेणं सुट्टिए(ण)णं लवणाहिवड्ढा जाव मा णं तुम्भं सरी-
रस्स वावत्ती भविस्सइ । तं भवियव्व एत्थ कारणेणं । तं सेयं खलु अम्हं दक्खिणिहं
वणसंडं गमित्तए-त्तिकट्ठु अन्नमन्नस्स एयमट्ठं पडिस्सुणेंति २ ता जेणेव दक्खिणिहं
वणसंडे तेणेव पहारेत्थ गमणाए । त(ए)ओ णं गंधे निद्धाइ से जहानामए
अहिमडेइ वा जाव अणिट्ठतराए(चेव) । तए णं ते माकंदियदार(या)गा तेणं असु-
भेणं गंधेणं अभिभूया समाणा सएहिं २ उत्तरिजेहिं आसाइं पिहेंति २ ता जेणेव
दक्खिणिहं वणसंडे तेणेव उवागया । तत्थ णं महं एगं आ(घा)घयणं पासंति(०)
अट्ठियरासिसयसकुलं भीमदरिसणिज्जं एगं च तत्थ सूलाइ(त)यं पुरिसं कलुणाइं
कट्ठाइं विस्सराइं कुव्वमाणं पासंति(२ ता)भीया जाव संजायभया जेणेव से सूलाइ(य)-
ए पुरिसे तेणेव उवागच्छंति २ ता तं सूलाइयं पुरिसं एवं वयासी-एस णं देवाणुप्पिया !
कस्स आघयणे तुमं च णं के कओ वा इहं हव्वमागए केण वा इमेयारूवं आव(ति)यं
पाविए ? । तए णं से सूलाइए पुरिसे[ते]माकंदियदार(ए)गे एव वयासी-एस णं
देवाणुप्पिया ! रयणदीवदेवयाए आघयणे । अहं णं देवाणुप्पिया ! जंबुदीवाओ
दीवाओ भारहाओ वासाओ का(गंदी)कंदिए आसवाणियए विपुलं पणियभंडमायाए
पोयवहणेणं लवणसमुदं ओयाए । तए ण अहं पोयवहणविवत्तीए निव्वुड्ढभंडसारे
एगं फलगखंडं आसाएमि । तए णं अहं उवुज्झमाणे २ रयणदीवतेणं संवूढे ।
तए णं सा रयणदीवदेवया ममं (ओहिगा) पासइ २ ता ममं गेण्हइ २ ता मए सद्धिं
विउलाइं भोगभोगाइं भुंजमाणी विहरइ । तए णं सा रयणदीवदेवया अन्नयां
कयाइ अहालहुसगंसि अवराहंसि परिकुविया समाणी ममं एयारूवं आवयं पावेइं ।
तं न नजइ णं देवाणुप्पिया ! तु(म्हं)ब्भं पिं इमेसिं सरीरगाणं का मन्ने आवइं भवि-
स्सइ (?) । तए णं ते माकंदियदारगा तस्स सूलाइ(य)गस्स अंतिए एयमट्ठं सोच्चा
निसम्म बलियतरं भीया जाव संजायभया सूलाइयं पुरिसं एवं वयासी-कहं णं
देवाणुप्पिया ! अम्हे रयणदीवदेवयाए हत्थाओ साहत्थि नित्थरिज्जामो ? । तं ए
णं से सूलाइए पुरिसे ते माकंदियदारगे एवं वयासी-एस णं देवाणुप्पिया ! पुरत्थि-
मिहं वणसंडे सेलगस्स जक्खस्स जक्खा(य)यणे सेलए नामं आसरूवधारी जक्खे
परिवसइ । तए णं से सेलए जक्खे चाउ(चो)इसट्ठमुद्धिपुण्णमासिणीसु आगयसमए
पत्तसमए महया २ सदेणं एवं वदइ-कं तारयामि ? कं पालयामि ? तं गच्छह णं तुम्हं
देवाणुप्पिया ! पुगत्थिमिहं वणसंड सेलगस्स जक्खस्स महरिहं पुप्फचणियं करेहं
२ ता जञ्जुपायवडिया पंजलिउडा विणएणं पञ्जुवासमाणा विहर(चिट्ठ)ह । जाहे णं से
सेलए जक्खे आगयसमए पत्तसमए एवं वएज्जा-कं तारयामि ? कं पालयामि ? ताहे

तुव्वमे [एवं] वयह-अम्हे तारयाहि अम्हे पालयाहि । सेलए (भे) भो जक्खे परं
 रयणदीवदेवयाए हत्थाओ साहत्थि नित्थारेज्जा । अन्नहा भो न याणामि इमेसिं
 सरीरगाणं का मन्ने आवई भविस्सइ ॥ ८९ ॥ तए णं ते माकंदियदारगा तस्स सृत्ता-
 इयस्स अंतिए एयमट्ठं सोच्चा निसम्म सिग्गं चंडं चवलं तुरियं वेइयं जेणेव पुरत्थिमिहे
 वणसंडे जेणेव पोक्खारिणी तेणेव उवागच्छंति २ ता पोक्खारिणि ओगाहं(गाहं)ति
 २ ता जलमज्जणं करंति २ ता जाइं तत्थ उप्पलाइं जाव गेण्हंति २ ता जेणेव सेलगस्स
 जक्खस्स जक्खाययणे तेणेव उवागच्छंति २ ता आलोए पणामं करंति २ ता महारिहं
 पुप्फच्चणियं करंति २ ता जलुपायवडिया मुस्सूसमाणा नमंसमाणा पज्जुवासंति । तए णं
 से सेलए जक्खे आगयसमए पत्तसमए एवं वयासी-कं तारयामि ? कं पालयामि ? ।
 तए णं ते माकंदियदारगा उट्ठाए उट्ठेति करयल जाव वद्धावेत्ता एवं वयासी-अम्हे
 तारयाहि अम्हे पालयाहि । तए णं से सेलए जक्खे ते माकंदियदारए एवं वयासी-एवं
 खलु देवाणुप्पिया ! तुव्वं मए सद्धिं लवणसमु(द्वेणं)दं मज्झंमज्झेणं वीईवयमा(णि)णाणं
 सा रयणदीवदेवया पावा चंडा रुद्धा खुद्धा साहसिया वद्धाहि खरएहि य मउएहि य
 अणुलोमेहि य पडिलोमेहि य सिंगारेहि य कलुणेहि य उवसग्गेहि य उवसग्गं
 करेहिइ । तं जइ णं तुव्वमे देवाणुप्पिया ! रयणदीवदेवयाए एयमट्ठं आढाह वा
 परियाणह वा अव(ए)यक्खह वा तो मे अहं पिट्ठाओ वि(धु)ह्णामि । अह णं तुव्वमे
 रयणदीवदेवयाए एयमट्ठं नो आढाह नो परियाणह नो अवयक्खह तो मे रयण-
 दीवदेवया[ए] हत्थाओ साहत्थि नित्थारेमि । तए णं ते माकंदियदारगा सेलगं जक्खं
 एवं वयासी-जं णं देवाणुप्पिया(!)वइस्संति तस्स णं उववायवयणनिहेसे चिट्ठिस्सामो ।
 तए णं से सेलए जक्खे उत्तरपुर(च्छि)त्थिमं दिसीभागं अवक्कमइ २ ता वेउव्वियसमु-
 ग्घाएणं समोहणइ २ ता संखेज्जाइं जोयणाइं दंडं निस्सरइ दोचंपि(तच्चंपि)वेउव्विय-
 समुग्घाएणं समोहणइ २ ता एगं महं आसरुवं वे(वि)उव्वइ २ ता ते माकंदियदारए
 एवं वयासी-हं भो माकंदियदारया ! आरुह णं देवाणुप्पिया ! मम पिट्ठंति । तए णं ते
 माकंदियदारया हट्ठं सेलगस्स जक्खस्स पणामं करेति २ ता सेलगस्स पि(ट्ठि)ट्ठं
 दुरुढा- तए णं से सेलए ते माकंदियदारए दुरुढे जाणित्ता सत्त[अ]ट्ठतालप्पमाणमेत्ताइं
 उट्ठं, वेहासं उप्पयइ २ ता (य) ताए उक्किट्ठाए तुरियाए[चवलाए चंडाए दिव्वाए]
 देवयाए दे(दि०)वगईए लवणसमुदं मज्झंमज्झेणं जेणेव जंबुदीवे दीवे जेणेव भारहे
 वासे जेणेव चंपा नयरी तेणेव पहारेत्थ गमणाए ॥ ९० ॥ तए णं सा रयणदीवदेवया
 लवणसमुदं तिसत्तखुत्तो अणुपरियट्ठइ जं तत्थ तणं वा जाव एडेइ(२ ता)जेणेव पासा-
 यवडेंसए तेणेव उवागच्छइ २ ता ते माकंदियदारया पासायवडेंसए अपासमाणी

जेणेव पुरत्थिमिल्ले वणसंडे जाव सव्वओ समंता मग्गणगवेसणं करेइ २ ता तेसिं
 माकंदियदारगाणं कत्थइ सुइं वा ३ अलभमाणी जेणेव उत्तरिल्ले (वणसंडे) एवं चेव
 पच्चत्थिमिल्ले वि जाव अपासमाणी ओहिं पउंजइ (०) ते माकंदियदारए सेलएणं सद्धि
 लवणसमुदं मज्झंमज्झेणं वीईवयमाणे २ पासइ २ ता आसुरुत्ता असिखेडगं गेण्हइ
 २ ता सत्तट्ठ जाव उप्पयइ २ ता ताए उक्किट्ठाए जेणेव माकंदियदार(गा)या तेणेव उवा-
 गच्छइ २ ता एवं वयासी-हं भो माकंदियदारगा अपत्थियपत्थिया ! किण्णं तुब्भे
 जाणह विप्पजहाय सेलएणं जक्खेणं सद्धिं लवणसमुदं मज्झंमज्झेणं वीईवयमाणा ? तं
 ममं एवमवि गए जइ णं तुब्भे ममं अवयक्खह तो भे अत्थि जीवियं, अह णं नावय-
 क्खह तो भे इमेणं नीलुप्पलगवल जाव एडेमि । तए णं ते माकंदियदारगा रयण-
 दीवदेवयाए अंतिए एयमट्ठं सोच्चा निसम्म अभीया अतत्था अणुव्विग्गा अक्खुभिया
 असंभंता रयणदीवदेवयाए एयमट्ठं नो आढंति नो परियाणंति ना(णो अ)वयक्खंति
 अणाढायमाणा अपरियाणमाणा अणवयक्खमाणा[य]सेलए(ण)णं जक्खेणं सद्धिं
 लवणसमुदं मज्झंमज्झेणं वीईवयंति । तए णं सा रयणदीवदेवया ते माकंदि[यदार]या
 जाहे नो संचाएइ बहूहिं पडिलोमेहि य उवसग्गेहि य चालित्तए वा खोभित्तए वा
 विपरिणामित्तए वा (लोभित्तए वा) ताहे महुरे(हि)हिं[य]सिंगारेहि य कलुणेहि य उव-
 सग्गेहि य उवसग्गेउं पयत्ता यावि होत्था-हं भो माकंदियदारगा ! जइ णं तुब्भेहि
 देवाणुप्पिया ! मए सद्धिं हसियाणि य रमियाणि य ललियाणि य कीलियाणि य
 हिंडियाणि य मोहियाणि य ताहे णं तुब्भे सव्वाइं अगणेमाणा ममं विप्पजहाय
 सेलएणं सद्धिं लवणसमुदं मज्झंमज्झेणं वीईवयह । तए णं सा रयणदीवदेवया
 जिणरक्खियस्स मणं ओहिणा आभोएइ २ ता एवं वयासी-निच्चं पि य णं अहं जिण-
 पालियस्स अणिट्ठा ५ । निच्चं मम जिणपालिए अणिट्ठे ५ । निच्चं पि य णं अहं
 जिणरक्खियस्स इट्ठा ५ । निच्चं पि य णं ममं जिणरक्खिए इट्ठे ५ । जइ णं ममं
 जिणपालिए रोयमा(णीं)णिं कंदमाणिं सोयमाणिं तिप्पमाणिं विलवमाणिं नावयक्खइ
 किण्णं तुमं[पि]जिणरक्खिया ! ममं रोयमाणिं जाव नावयक्खसि ? तए णं—सा
 पवररयणदीवस्स देवया ओहिणा (उ) जिणरक्खियस्स मणं । नाऊ(ण)णं वधनि-
 मित्तं उव(रि)रिं माकंदियदारगा(णं)ण दोण्हंपि ॥ १ ॥ दोसकलिया स(ललि)लिलयं
 नाणाविहचुण्णवासमीसियं दिव्वं । घाणमणनिव्वुइकरं सव्वोउयसुरभिकुसुमवुट्ठिं
 पमुंचमाणी ॥ २ ॥ नाणामणिकणगरयणघंटियखिखिणिने(ऊ)उरमेहलभूसणरवेणं ।
 दिसाओ विदिसाओ पूरयंती वयणमिणं वेइ सा (स)कलुसा ॥ ३ ॥ होल वसुल
 गोल नाह दइय पिय रमण कंत सामिय निग्घिण नित्थक्क । थि(ळि)ण्ण निक्खि

अकय(लु)नुय सिदिलभाव निरुज्ज लुक्ख अकलुण जिणरक्खिय मज्झं हिययर-
 क्ख(गा)ग ॥ ४ ॥ न हु जुज्जसि एक्कियं अणाहं अवंधवं तुज्ज चलणओवायमारियं
 उज्जिउम(हे)धन्नं । गुणसंकर (! अ)हं तुमे विहूणा न समत्था (वि) जीविउं खणंपि
 ॥ ५ ॥ इमस्स उ अणेगन्नसमगरविधिवसावयसया(उ)कलघरस्स । रयणागरस्स
 मज्झे अप्पाणं वहेमि तुज्ज पुरओ एहि नियनाहि जइ सि कुविओ खमाहि
 ए(क्का)कावराहं मे ॥ ६ ॥ तुज्ज य विगयघणविमलसस्तिमंड(ल)लागारसत्तिरीयं
 सारयनवकमलकुमुदकुवलयविमलदलनिकरसरिसनि(भं)भनयणं । वयणं पिवासा-
 गयाए सद्धा मे पेच्छिउं जे अवलोएहि ता इओ ममं नाह जा ते पेच्छामि वयण-
 कमलं ॥ ७ ॥ एवं सप्पणयसरलमहुराई पुणो २ कलुणाई वयणाई जंपमाणी सा
 पावा मग्गओ समण्णेइ पावहियया ॥ ८ ॥ तए णं से जिणरक्खिए चलमणे तेणेव
 भूसणरवेणं कण्णसुहमणोहरेणं तेहि य सप्पणयसरलमहुरभणिएहि संजायविउण-
 [अणु]राए रयणदीवस्स देवयाए तीसे सुंदरयणजहणवयणकरचरणनयणलावग्गरुव-
 जोवणसिरिं च दिव्वं सरभसउवगूहियाई (जातिं)विच्चोयविलसियाणि य विहसियस-
 कडक्खदिट्ठिनिस्ससियमलियउवललिय(ठि)थियगमणपणयखिजिय(पा)पसाइयाणि य
 सरमाणे रागमोहियमई अवसे कम्मवसगाए अवयक्खइ मग्गओ सविलियं । तए णं
 जिणरक्खियं समुप्पन्नकलुणभावं मच्चगलत्थल्लणोल्लियमई अवयक्खंतं तहेव जक्खे (य)
 उ सेलए जाणिल्लण सणियं २ उव्विहइ नियगपिट्ठा(हि)हिं विगयस(त्थं)द्धे । तए णं
 सा रयणदीवदेवया निस्संसा कलुणं जिणरक्खियं सकलुसा सेलगपिट्ठाहिं ओ(उ)व-
 यंतं-दास ! मओसि त्ति जंपमाणी अ(ए)पत्तं सागरसलिलं गेण्हिय वाहाहिं आरसंतं
 उद्धु उव्विहइ अंवरतले ओवयमाणं च मंडलग्गेण पडिच्छित्ता नीलुप्पलगवल-
 अयसिप्पगासे(ण)णं अस्तिवरेणं खंडाखंडिं करेइ २ ता तत्थ विलवमाणं तस्स य
 सरसवहियस्स घेत्तूण अंगमंगाई सरुहिराई उक्खित्तवलिं चउद्दिसें करेइ सा पंजली
 प(हि)हट्ठा ॥ ९१ ॥ एवामेव समणाउसो ! जो अम्हं निग्गंथाण वा निग्गंथीण वा
 अतिए पव्वइए समाणे पुणरवि माणुस्सए कामभोगे आसायइ पत्ययइ पीहेइ
 अभिलसइ से णं इहभवे चेव वहुणं समणाणं वहुणं समणीणं वहुणं सावयाणं वहुणं
 सावियाणं जाव संसारं अणुपरियट्ठिस्सइ जहा (वा) व से जिणरक्खिए । छलिओ अवय-
 क्खंतो निरावयक्खो गओ अविग्घेणं । तम्हा पवयणसारे निरावयक्खेण भवियव्वं
 ॥ १ ॥ भोगे अवयक्खंता पडंति संसारसा(य)गरे घोरे । भोगेहिं [य] निरवयक्खा
 तरंति संसारकंतारं ॥ २ ॥ ९२ ॥ तए णं सा रयणदीवदेवया जेणेव जिणपालिए तेणेव
 उवागच्छइ २ ता वहुहिं अणुलेमेहि य पडिलोमेहि य खरम(हुर)उयसिगारे(हिं)हि

य कलुणेहि य उवसग्गेहि य जाहे नो संचाएइ चालितए वा खोभित्तए वा वि(ए)परि-
 णामित्तए वा ताहे संता तंता परितंता निव्विण्णा समा(णा)णी जामेव दिसि पाउब्भूया
 तामेव दि(सं)सि पडिगया । तए णं से सेलए जक्खे जिणपालिएण सद्धि लवणसमुद्दं
 मज्झमज्जेण वीईवयइ २ ता जेणेव चंपा नयरी तेणेव उवागच्छइ २ ता चपाए नयरीए
 अग्गुज्जाणंसि जिणपालियं प(पि)ट्ठाओ ओयारेइ २ ता एवं वयासी-एस णं देवाणु-
 णिया ! चंपा-नयरी दीसइ-त्तिकट्टु जिणपालियं आपुच्छइ २ ता जामेव दिसि
 पाउब्भूए तामेव दिसि पडिगए ॥ ९३ ॥ तए णं जिणपालिए चंपं अणुपविसइ
 २ ता जेणेव सए गिहे जेणेव अम्मापियरो तेणेव उवागच्छइ २ ता अम्मापिऊणं
 रोयमाणे जाव विलवमाणे जिणरक्खियवावत्ति निवेदेइ । तए णं जिणपालिए
 अम्मापियरो मित्तनाइ जाव परियणेणं सद्धि रोयमाणाइं वट्ठइं लोइयाइं मयकिच्चाइं
 करंति २ ता कालेणं विगयसोया जाया । तए णं जिणपालियं अन्नया कया(इ)इं
 सुहासणवरगयं अम्मापियरो एवं वयासी-कंहण पुत्ता ! जिणरक्खिए कालगए ? ।
 तए णं से जिणपालिए अम्मापिऊणं लवणसमुद्देत्तारणं च कालियवायसमुच्छणं [च]
 पोयवहणविवत्ति च फलहखंडआसायणं च रयणदीवुत्तारं च रयणदीवदेवया(गिहं)-
 गेण्हि च भोगविभूइं च रयणदीवदेवयाअप्पाहणं च सूलाइयपुरिसदरिसणं च
 सेलगजक्खआरुहणं च रयणदीवदेवयाउवसगं च जिणरक्खियविवत्ति च लवण-
 समुद्दत्तरणं च चंपागमणं च सेलगजक्खआपुच्छणं च जहाभूयमवितहमसंदिद्धं
 परिक्हेइ । तए णं जिणपालिए जाव अप्पसोगे जाव विउलाइं भोगभोगाइं भुंजमाणे
 विहरइ ॥ ९४ ॥ तेणं कालेणं तेणं समएणं समणे भगवं महावीरे (जाव जेणेव
 चंपा न(ग)यरी जेणेव पुण्णभेइ उज्जाणे तेणेव) समोसडे (परिसा णिगगया कूणिओ
 वि राया निग्गओ जिणपालिए) जाव धम्मं सोच्चा पव्वइए ए(क्का)गारसंग(विऊ)वी
 मासिएणं भत्तेणं जाव अत्ताणं झूसेत्ता सोहम्मे कप्पे दो सागरोवमाइं ठिई प० । ताओ
 आउक्खएणं ठिइक्खएणं भवक्खएणं अणंतरं चयं चइत्ता जेणेव महाविदेहे वासे
 सिज्झिहिइ जाव अंतं काहिइ । एवामेव समणाउसो ! जाव माणुस्सए कामभोगे
 नो पुणरवि आसाइ से णं जाव वीईवइस्सइ जहा व से जिणपालिए । एवं खलु
 जंबू ! समणेणं भगवया महावीरेणं जाव संपत्तेणं नवमस्स नायज्झयणस्स अयमट्ठे
 पन्नत्ते त्तिवेमि ॥ ९५ ॥ गाहाओ-जह रयणदीवदेवी तह एत्थं अविरई महापावा ।
 जह लाहत्थी वणिया तह सुहकामा इहं जीवा ॥ १ ॥ जह तेहि भीएहिं दिट्ठो
 आघायमंडले पुरिसो । संसारदुक्खभीया पासंति तहेव धम्मकहं ॥ २ ॥ जह
 तेण तेसि कहिया देवी दुक्खाण कारणं घोरं । तत्तो च्चिय नित्यारो सेलगजक्खाओ

नणत्तो ॥ ३ ॥ तह धम्मकही भव्वाण साहए दिट्ठअविरइसहावो । सयलदुहहेउभूओ विसया विरयंति जीवाणं ॥ ४ ॥ सत्ताणं दुहत्ताणं सरणं चरणं जिणिंदपण्णत्तं । आणंदरुवनिव्वाणसाहणं तह य देसेइ ॥ ५ ॥ जह तेसिं तरियव्वो रुदसमुदो तहेव संसारो । जह तेसिं सगिहगमणं निव्वाणगमो तहा एत्थं ॥ ६ ॥ जह सेलग-पिट्ठाओ भट्ठो देवीइ मोहियमईओ । सावयसहस्सपउरम्मि सायरे पाविओ निहणं ॥ ७ ॥ तह अविरईइ नडिओ चरणचुओ दुक्खसावयाइण्णे । निवडइ अपारसंसार-सायरे दारुणसरुवे ॥ ८ ॥ जह देवीए अक्खोहो पत्तो सट्ठाण जीवियसुहाइं । तह चरणट्ठिओ साहू अक्खोहो जाइ निव्वाणं ॥ ९ ॥ **नवमं नायज्जयणं समत्तं ॥**

जइ णं भंते ! समणेणं० नवमस्स नायज्जयणस्स अयमट्ठे पन्नत्ते दसमस्स(०) के अट्ठे पन्नत्ते ? एवं खलु जंबू ! तेणं कालेणं तेणं समएणं रायगिहे (नामं) नयरे (हो० तत्थ णं रा० न० से० णा० रा० हो० तस्स णं रा० न० व० उ० दि० एत्थ णं गु० णा० उ० हो० ते० का० ते० स० स० भ० म० पु० च० जाव जे० गु० उ० ते० स०) -सामी समोसडे (प० नि० सेणिओ वि रा० नि० धम्मं सोच्चा प० प० तए णं) गोय(मसामी)मो(समणं ३) एवं वयासी-कहणं भंते ! जीवा वड्ढंति वा हायंति वा ? गोयमा ! से जहानामए बहुलपक्खस्स पाडिवयाचंदे पुण्णि-माचंदं पणिहाय ही(णो)णे वण्णेणं हीणे सो(म)मयाए हीणे निद्वयाए हीणे कंतीए एवं दितीए जुतीए छायाए पभाए ओयाए ले(र)साए मंडलेणं । तयाणंतरं च णं बीया-चंदे प(पा)डिव(यं)याचंदं पणिहाय हीणतराए वण्णेणं जाव मंडलेणं । तयाणंतरं च णं तइयाचंदे बी(विति)याचंदं पणिहाय हीणतराए वण्णेणं जाव मंडलेणं । एवं खलु एएणं कमेणं परिहायमाणे २ जाव अमाव(र)साचंदे चाउद्दसिचंदं पणिहाय नट्ठे वण्णेणं जाव नट्ठे मंडलेणं । एवामेव समणाउसो ! जो अम्हं निग्गंथो वा निग्गंथी वा जाव पव्वइए समाणे हीणे खंतीए एवं मुत्तीए गुत्तीए अज्जवेणं मद्दवेणं लाघवेणं सच्चेणं तवेणं चियाए अकिंचणयाए वंभचेरवासेणं । तयाणंतरं च णं हीणे हीणतराए खंतीए जाव हीणतराए वंभचेरवासेणं । एवं खलु एएणं कमेणं परिहायमाणे २ नट्ठे खंतीए जाव नट्ठे वंभचेरवासेणं । से जहा वा सुक्कपक्खस्स पडिवयाचंदे अमावसा(ए)चंदं पणिहाय अहिए वण्णेणं जाव अहिए मंडलेणं । तयाणंतरं च णं बीयाचंदे पडिव-याचंदं पणिहाय अहिययराए वण्णेणं जाव अहिययराए मंडलेणं । एवं खलु एएणं कमेणं परि(वु)वड्ढेमाणे २ जाव पुण्णिमाचंदे चाउद्दसिं चंदं पणिहाय पडिपुण्णे चण्णेणं जाव पडिपुण्णे मंडलेणं । एवामेव समणाउसो ! जाव पव्वइए समाणे अहिए खंतीए जाव वंभचेरवासेणं । तयाणंतरं च णं अहिययराए खंतीए जाव

वंभचेरवासेणं । एवं खलु एएणं कमेणं परिवहेमाणे २ जाव पडिपुण्णे वंभचेरवा-
सेणं । एवं खलु जीवा वड्ढंति वा हायंति वा । एवं खलु जंवू ! समणेणं भगवया
महावीरेणं० दसमस्स नायज्जयणस्स अयमट्ठे पन्नत्ते त्ति वेमि ॥९६॥ गाहाओ-
जह चंदो तह साहू राहुवरोहो जहा तह पमाओ । वण्णार्ई गुणगणो जह तहा खमाई
समणधम्मो ॥ १ ॥ पुण्णो वि पइदिणं जह हायंतो सव्वहा ससी नस्से । तह
पुण्णचरित्तोऽवि हु कुसीलसंसग्गिमाईहिं ॥ २ ॥ जणियपमाओ साहू हायंतो
पइदिणं खमाईहिं । जायइ नट्ठचरित्तो तत्तो दुक्खाई पावेइ ॥ ३ ॥ हीणगुणो
वि हु होउं सुहगुरुजोगाइजणियसंवेगो । पुण्णसरूवो जायइ विवड्ढमाणो ससं-
हरोव्व ॥ ४ ॥ **दसमं नायज्जयणं समत्तं ॥**

जइ णं भंते ! समणेणं० दसमस्स नायज्जयणस्स अयमट्ठे पन्नत्ते एकारसमस्स(०)
के अट्ठे पन्नत्ते ? एवं खलु जंवू ! तेणं कालेणं तेणं समएणं रायगिहे जाव गोयमे
(समणं ३) एवं वयासी-कहं णं भंते ! जीवा आराहगा वा विराहगा वा भवंति ?
गोयमा ! से जहानामए एगंसि समुद्कूलंसि दावद्वा नामं रुक्खा पन्नत्ता किण्ह-
जाव निउ(रुं)रंवभूया पत्तिया पुप्फिया फलिया हरियगरेरिजमाणा सिरीए अईव
उवसोभेमाणा २ चिट्ठंति । जया णं दीविच्चगा ईसिं पुरेवाया पच्छावाया मंदावाया
महावाया वायंति तया णं वहवे दावद्वा रुक्खा पत्तिया जाव चिट्ठंति । अप्पेगइया
दावद्वा रुक्खा जुण्णा झोडा परिसडियपंडुपत्तपुप्फफला सुक्करुक्खओ विव मिला-
यमाणा २ चिट्ठंति । एवामेव समणाउसो ! (जे) जो अम्हं निगंथो वा २ जाव
पव्वइए समाणे वहूणं समणाणं ४ सम्मं सहइ जाव अहियासेइ वहूणं अन्नउत्थि-
याणं वहूणं गिहत्थाणं नो सम्मं सहइ जाव नो अहियासेइ एस णं मए पुरिसे
देसविराहए पन्नत्ते समणाउसो ! जया णं सामुद्गा ईसिं पुरेवाया पच्छावाया मंदा-
वाया महावाया वायंति तया णं वहवे दावद्वा रुक्खा जुण्णा झोडा जाव मिलाय-
माणा २ चिट्ठंति । अप्पेगइया दावद्वा रुक्खा पत्तिया पुप्फिया जाव उवसोभेमाणा
२ चिट्ठंति । एवामेव समणाउसो ! जो अम्हं निगंथो वा २ जाव पव्वइए समाणे
वहूणं अन्नउत्थि(याणं व०)यगिहत्थाणं सम्मं सहइ वहूणं समणाणं ४ नो सम्मं सहइ
एस णं मए पुरिसे देसाराहए पन्नत्ते समणाउसो ! जया णं नो दीविच्चगा नो सामु-
द्गा ईसिं (पुरेवाया) पच्छावाया जाव महावाया वायंति त(ए)या णं सव्वे दावद्वा
रुक्खा जुण्णा झोडा(०) । एवामेव समणाउसो ! जाव पव्वइए समाणे वहूणं समणाणं
४ वहूणं अन्नउत्थियगिहत्थाणं नो सम्मं सहइ एस णं मए पुरिसे सव्वविराहए पन्नत्ते
समणाउसो ! जया णं दीविच्चगा वि सामुद्गा वि ईसिं (पुरेवाया पच्छावाया) जाव

वायंति तथा णं सव्वे दावद्वा (रुक्खा) पत्तिया जाव चिट्ठंति । एवामेव समणाउसो । जो अम्हं पव्वइए समाणे बहूणं समणाणं ४ बहूणं अन्नउत्थियणिहत्थाणं सम्मं सहइ एस णं-मए पुरिसे सव्वआराहए पन्नत्ते (समणाउसो !) । एवं खलु गोयमा ! जीवा आराहगा वा विराहगा वा भवंति । एवं खलु जंबू ! समणेणं भगवया महावीरेणं जाव संपत्तेणं एक्कारसमस्स अयमट्ठे पन्नत्ते त्तिवेमि ॥ ९७ ॥ गाहाओ-जह दावद्वातस्वणमेवं साहू जहेव दीविच्चा । वाया तह समणाइयसपक्खवयणाइं दुसहाइं ॥ १ ॥ जह सामुद्दयवाया तहऽण्णतित्याइकडुयवयणाइं । कुसुमाइसंपया जह सिवमग्गाराहणा तह उ ॥ २ ॥ जह कुसुमाइविणासो सिवमग्गविराहणा तहा नेया । जह दीववाउजोगे बहु इड्ढी ईसि य अणिड्ढी ॥ ३ ॥ तह साहम्मियवयणाण सहमागाराहणा भवे बहुया । इयराणमसहणे पुण सिवमग्गविराहणा थोवा ॥ ४ ॥ जह जलहिवा-उजोगे थेविड्ढी बहुयरा यऽणिड्ढी य । तह परपक्खक्खमणे आराहणमीसि बहु य यरं ॥ ५ ॥ जह उभयवाउविरहे सव्वा तरुसंपया विणट्ठ त्ति । अनिमित्तोभयमच्छ-रुक्खे विराहणा तह य ॥ ६ ॥ जह उभयवाउजोगे सव्वसमिड्ढी वणस्स संजाया । तह उभयवयणसहणे सिवमग्गाराहणा वुत्ता ॥ ७ ॥ ता पुण्णसमणधम्माराहण-चित्तो सया महासत्तो । सव्वेण वि कीरंतं सहेज्ज सव्वं पि पडिकूलं ॥ ८ ॥

एक्कारसमं नायज्झयणं समत्तं ॥

जइणं भंते ! समणेणं जाव संपत्तेणं एक्कारसमस्स नायज्झयणस्स अयमट्ठे पन्नत्ते वारसमस्स णं (०) के अट्ठे पन्नत्ते ? एवं खलु जंबू ! तेणं कालेणं तेणं समएणं चंपा ना(मं)म नयरी । पुण्णभेदे उज्जाणे । जियसत्तू [नामं] राया (होत्था) । (तस्स णं जिय-सत्तुस्स रण्णो) धारिणी (नामं) देवी (होत्था अही० जाव सुहवा) । (तस्स णं जि० र० पुत्ते धारिणीए अत्तए) अदीणसत्तू नामं कुमारे जुवराया वि होत्था । सुवुद्धी [नामं] अमच्चे जाव रज्जधुराचिंतए [यावि होत्था जाव] समणोवासए (अ०) । तीसे णं चंपाए नयरीए बहिया उत्तरपुरत्थिमेणं एगे फरिहोदए यावि होत्था मेयवसारुहिरमं-सपूय-पडलपोच्चडे मयगकलेवरसंल्लेजे अमणुजे [णं] वण्णेणं जाव फासेणं से जहानामए अहिमडेइ वा गोमडेइ वा जाव मयकुहियविणट्ठकिमिणवावण्णदुरभिगंधे किमिजा-लाउले सिसत्ते असुइविगयवीभच्छदरिसणिज्जे । भवेयारुवे सिया ? नो इणट्ठे समट्ठे । एत्तो अणिट्ठतराए चेव जाव गंधेणं पन्नत्ते ॥ ९८ ॥ तए णं से जियसत्तू राया अन्नया कयाइ ण्हाए अप्पमहग्घाभरणालंकियसरीरे बहूहिं(रा)ईसर जाव सत्थ-वाहपभि(ति)ईहिं सद्धि[भोयणमंडवंसि]भोयणवेलाए सुहासणवरगए विउलं असणं ४ जाव विहरइ जिमियभुत्तुतरागए जाव सुइभूए तंसि विपुलंसि अस(ण)णंसि ४ जाव

जायविम्हए ते बहवे ईसर जाव पभिईए एवं वयासी-अहो णं देवाणुप्पिया ! इमे मणुञ्जे असणं ४ वण्णेणं उववेए जाव फासेणं उववेए अस्सायणिजे वि(र)सायणिजे पीणणिजे दीवणिजे दप्पणिजे मयणिजे विहणिजे सव्विदियगायपल्हायणिजे । तए णं ते बहवे ईसर जाव पभियओ जियसत्तुं एवं वयासी-तहेव णं सामी ! जण्णं तुब्भे वयह-अहो णं इमे मणुञ्जे अस(णं)णे ४ वण्णेणं उववेए जाव पल्हायणिजे । तए णं जियसत्त सुबुद्धि अमच्चं एवं वयासी-अहो णं सुबुद्धी ! इमे मणुञ्जे असणे ४ जाव पल्हायणिजे । तए णं सुबुद्धी जियसत्तुस्स [रञ्जो] एयमट्ठं नो आढाइ जाव तुत्तिणीए संचिद्धइ । [तए णं जियसत्तु सुबुद्धि दोच्चंपि तच्चंपि एवं वयासी-अहो णं सुबुद्धी ! इमे मणुञ्जे तं चेव जाव पल्हायणिजे ।] तए णं (जियसत्तुणा) से सुबुद्धी [अमच्चे] दोच्चंपि तच्चंपि एवं वुत्ते समाणे जियसत्तुं रायं एवं वयासी-नो खलु सामी ! अ(हं)म्हं एयंसि मणुञ्जंसि असणंसि ४ केइ विम्हए । एवं खलु सामी ! सु(विभ)रभिसद्दा वि पो(पु)ग्गला दुरभिसद्दाए परिणमंति दुरभिसद्दा वि पोग्गला सुरभिसद्दाए परिणमंति । सुरुवा वि पोग्गला दुरुवत्ताए परिणमंति दुरुवा वि पोग्गला सुरुवत्ताए परिणमंति । सुरभिगंधा वि पोग्गला दुरभिगंधत्ताए परिणमंति दुरभिगंधा वि पोग्गला सुरभिगंधत्ताए परिणमंति । सुरसा वि पोग्गला दुरसत्ताए परिणमंति दुरसा वि पोग्गला सुरसत्ताए परिणमंति । सुहफासा वि पोग्गला दुहफासत्ताए परिणमंति दुहफासा वि पोग्गला सुहफासत्ताए परिणमति । पओगवीससा-परिण्या वि य णं सामी ! पोग्गला पन्नत्ता । तए णं(से)जियसत्तु सुबुद्धिस्स अमच्चस्स एवमाइक्खमाणस्स ४ एयमट्ठं नो आढाइ नो परियाणइ तुत्तिणीए संचिद्धइ । तए णं से जियसत्तु अजया कयाइ ण्हाए आसखंधवरगए महया-भडच्चडगर(ह)आसवाहणियाए निजायमाणे तस्स फरिहोद(ग)यस्स अदूरसामंतेणं वीईवयइ । तए णं जियसत्तु (राया) तस्स फरिहोदगस्स असुभेणं गंधेणं अभिभूए समाणे सएणं उत्तरिज्ज(गे)एणं आसगं पिहेइ एगंतं अवक्कमइ (ते) २ ता बहवे ईसर जाव पभिइओ एवं वयासी-अहो णं देवाणुप्पिया ! इमे फरिहोदए अमणुञ्जे वण्णेणं ४ से जहानामए अहिमडेइ वा जाव अमणामतराए चेव । तए णं ते बहवे राईसर जाव पभियओ एवं वयासी-तहेव णं तं सामी ! जं णं तुब्भे एवं वयह-अहो णं इमे फरिहोदए अमणुञ्जे वण्णेणं ४ से जहानामए अहिमडेइ वा जाव अमणामतराए चेव । तए णं से जियसत्तु सुबुद्धि अमच्चं एवं वयासी-अहो णं सुबुद्धी ! इमे फरिहोदए अमणुञ्जे वण्णेणं ४ से जहानामए अहिमडेइ वा जाव अमणामतराए चेव । तए णं[से]सुबुद्धी अमच्चे जाव तुत्तिणीए संचिद्धइ । तए णं से जियसत्त राया सुबुद्धि अमच्चं दोच्चंपि तच्चंपि एवं वयासी-

अहो णं तं चेव । तए णं से सुवुद्धी अमच्चे जियसत्तुणा रत्ता दोच्चंपि तच्चंपि एवं
 चुत्ते समाणे एवं वयासी-नो खलु सामी ! अम्हं एयंसि फरिहोदगंसि केइ विम्हए ।
 एवं खलु सामी ! सुरभिसद्दा वि पोग्गला दुब्भिसदत्ताए परिणमंति तं चेव जाव
 पओगवीससापरिण्या वि य णं सामी ! पोग्गला पन्नत्ता । तए णं जियसत्तू(राया)
 सुवुद्धिं (अमच्चं) एवं वयासी-मा णं तुमं देवाणुप्पिया ! अप्पाणं च परं च तदुभयं
 च बहूहि य असव्भावुवभावणाहिं मिच्छत्ताभिनिवेसेण य वुग्गाहेमाणे वुप्पाएमाणे
 विहराहि । तए णं सुवुद्धिस्स इमेयारूवे अज्जत्थिए० समुप्पजित्था-अहो णं
 जियसत्तू संते तच्चे तहिए अवितहे सव्भूए जिणपन्नत्ते भावे नो उवलभइ । तं
 सेयं खलु मम जियसत्तुस्स रत्तो संताणं तच्चाणं तहियाणं अवितहाणं सव्भूयाणं
 जिणपन्नत्ताणं भावाणं अभिगमणट्ठयाए एयमट्ठं उवा(इ)यणावेत्तए । एवं संपेहेइ २
 ता पच्चइएहि पुरिसेहि सद्धिं अंतरावणाओ नवए घड(य)ए य पडए य(प)गेण्हइ
 २ ता संज्ञाकालसमयंसि पविरलमणुस्संसि निसंतपडिनिसंतंसि जेणेव फरिहोदए
 तेणेव उवाग(ए)च्छइ २ ता तं फरिहोदगं गेण्हावेइ २ ता नवएसु घडएसु गालावेइ
 २ ता नवएसु घडएसु पक्खिवावेइ २ ता [सज्जखारं पक्खिवावेइ] लंछियमुद्दिए
 का(क)रावेइ २ ता सत्तरत्तं परिवसावेइ २ ता दोच्चंपि नवएसु घडएसु गालावेइ २
 ता नवएसु घडएसु पक्खिवावेइ २ ता सज्ज(क्)खारं पक्खिवावेइ २ ता लंछियमुद्दिए
 का(र)रावेइ २ ता सत्तरत्तं परिवसावेइ २ ता तच्चंपि नवएसु घडएसु जाव संवसा-
 वेइ । एवं खलु एएणं उवाएणं अंतरा गा(ग)लावेमाणे अंतरा पक्खिवावेमाणे
 अंतरा य (विपरि)वसावेमाणे (२) सत्तसत्त[य]राइंदिया[इं](वि)परिवसावेइ । तए
 णं से फरिहोदए सत्त(म)मंसि सत्तयंसि परिणममाणंसि उदगरयणे जाए यावि होत्था
 अच्छे पत्थे जच्चे तणुए फालिय(फलिह)वण्णाभे वण्णेणं उववेए ४ आसायणिजे जाव
 सव्विदियगायपल्हायणिजे । तए णं सुवुद्धी(अमच्चे)जेणेव से उदगरयणे तेणेव उवा-
 गच्छइ २ ता करयलंसि आसादेइ २ ता तं उदगरयणं वण्णेणं उववेयं ४ आसा-
 यणि(जे)जं जाव सव्विदियगायपल्हायणिजं जाणित्ता हट्ठुट्ठे बहूहि उदगसंभा-
 रणिजेहिं दव्वेहि संभारेइ २ ता जियसत्तुस्स रत्तो पाणियघरियं सद्दावेइ २ ता
 एवं वयासी-तुमं (च) णं देवाणुप्पिया ! इमं उदगरयणं गेण्हाहि २ ता जियसत्तुस्स
 रत्तो भोयणवेलाए उवणेज्जासि । तए णं से पाणियघरिए सुवुद्धि(य)स्स एयमट्ठं
 पडिखुणेइ २ ता तं उदगरयणं गेण्ह(गिण्हा)इ २ ता जियसत्तुस्स रत्तो भोयणवेलाए
 उवट्ठवेइ । तए णं से जियसत्त राया तं विपुलं दसणं ४ आसाएमाणे जाव विहरइ
 जिमियभुत्तत्तरा(यया)गए वि य णं जाव परमसुद्धूए तंसि उदगरय(णे)णंसि जाय-

विम्हए ते बहवे राईसर जाव एवं वयासी-अहो णं देवाणुप्पिया ! इमे उदगरयणे
अच्छे जाव सच्चिदियगायपल्हायणिजे । तए णं [ते] बहवे राईसर जाव एवं वयासी-
तहेव णं सामी ! जणं तुब्भे वयह जाव एवं चेव पल्हायणिजे । तए णं जियसत्तू राया
पाणियघरियं सद्दावेइ २ ता एवं वयासी-एस णं तु(ब्भे)मे देवाणुप्पिया ! उदगरयणे
कओ आसाइए ? । तए णं से पाणियघरिए जियसत्तुं एवं वयासी-एस णं सामी !
मए उदगरयणे सुबुद्धिस्स अंतियाओ आसाइए । तए णं जियसत्तू (राया) सुबुद्धिं
अमच्चं सद्दावेइ २ ता एवं वयासी-अहो णं सुबुद्धी ! केणं कारणेणं अहं तव अणिट्ठे
५ जेणं तुमं मम कल्लकल्लिं भोयणवेलाए इमं उदगरयणं न उवट्ठवेसि ? तं एस(तए)
'यं तुमे देवाणुप्पिया ! उदगरयणे कओ उवलद्धे ? । तए णं सुबुद्धी जियसत्तुं एवं
वयासी-एस णं सामी ! से फरिहोदए । तए णं से जियसत्तू सुबुद्धि एवं वयासी-
केणं कारणेणं सुबुद्धी ! एस से फरिहोदए ? तए णं सुबुद्धी जियसत्तुं एवं वयासी-
एवं खलु सामी ! तु(म्हे)ब्भे तया मम एवमाइक्खमाणस्स ४ एयमट्ठं नो सद्दहह ।
तए णं मम इमेयारुवे अज्झत्थिए०-अहो णं जियसत्त संते जाव भावे नो सद्दहइ नो
पत्तियइ नो रोएइ । तं सेयं खलु म(मं)म जियसत्तुस्स रत्तो संताणं जाव सब्भूयाणं
जिणपन्नत्ताणं भावाणं अभिगमणट्ठयाए एयमट्ठं उवायणावेत्तए । एवं संपेहेमि २
ता तं चेव जाव पाणियघरियं सद्दावेमि २ ता एवं वदामि-तुमं णं देवाणुप्पिया !
उदगरयणं जियसत्तुस्स रत्तो भोयणवेलाए उवणेहि । तं एएणं कारणेणं सामी !
एस से फरिहोदए । तए णं जियसत्तू राया सुबुद्धिस्स(अमच्चस्स)एवमाइक्खमाणस्स
४ एयमट्ठं नो सद्दहइ ३ असद्दहमाणे अपत्तियमाणे अरो(य)एमाणे अब्भितर(ट्ठा)-
ठाणिजे पुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! अंतराव-
णाओ नव[ए]घडए पडए य गेण्हह जाव उदगसं(हा)भारणिज्जेहि दब्बेहिं संभारेह ।
तेवि तहेव सभारेंति २ ता जियसत्तुस्स उवणेति । तए णं से जियसत्तू राया
तं उदगरयणं करयलंसि आसाएइ आसायणिजं जाव सच्चिदियगायपल्हायणिजं
जाणित्ता सुबुद्धि अमच्चं सद्दावेइ २ ता एवं वयासी-सुबुद्धी ! एए णं तुमे संता तच्चा
जाव सब्भूया भावा कओ उवलद्धा ? । तए णं सुबुद्धी जियसत्तुं एवं वयासी-एए
णं सामी ! मए संता जाव भावा जिणवयणाओ उवलद्धा । तए णं जियसत्तू सुबुद्धिं
एवं वयासी-तं इच्छामि णं देवाणुप्पिया ! तव अंतिए जिणवयणं निसा(मे)मित्तए ।
तए णं सुबुद्धी जियसत्तुस्स विचित्तं केवलपन्नत्तं चाउज्जामं धम्मं परिकहेइ तमाड-
क्खइ जहा जीवा वज्झंति जाव पंचाणुव्वयाइं । तए णं जियसत्तू सुबुद्धिस्स अंतिए
धम्मं सोच्चा निसम्म हट्ठ० सुबुद्धिं अमच्चं एवं वयासी-सद्दहामि णं देवाणुप्पिया !

निगमं पावयणं ३ जाव मे जहेयं तुम्हे वयह । नं इच्छामि णं नव अंतिए पंचा-
 ण्वइयं सत्तसिक्खावइयं जाव उवमं पज्जिनाणं विहरिताए । अहामुहं देवाणुप्पिया ।
 मा पडिवंधं (करंह) । तए णं मे जियसत्तु सुवुद्धिस्स (अमच्चस्स) अंतिए पंचाण-
 वइयं जाव दुवालसविहं सावयवम्मं पडिवज्जइ । तए णं जियमत्तु नमणावानए जाए
 अ(मि)हिगयजीवार्जावे जाव पडिन्नामेमाणे विहरइ । तेणं कालेणं तेणं समएणं
 (थेरा जेणेव नंपा नयरी जेणेव पुण्णमंदं उज्जाणे तेणेव न०) थेरागमणं । जियसत्त
 राया सुवुद्धी य निगच्छइ । सुवुद्धी धम्मं सोच्चा जं नवरं जियमत्तुं आयुच्छामि
 जाव पव्वयामि । अहामुहं देवाणुप्पिया । । तए णं[मे]सुवुद्धी जेणेव जियमत्त तेणेव
 उवागच्छइ २ ता एवं वयासी-एवं खलु सामी ! मए थेरागं अंतिए धम्मं निमंते ।
 मे(ऽ)वि य धम्मं इच्छि(य)ए पडिच्छिए ३ । तए णं अहं सामी ! संनारमउव्विगे
 मीए जाव इच्छामि णं तुम्हेहं अचमणुत्ताए (स०) जाव पव्वइत्तए । तए णं
 जियसत्तु सुवुद्धिं एवं वयासी-अ(च्छा)च्छत्तु ताव देवाणुप्पिया ! कइवयाइं वासाइं
 उरालाइं जाव सुंजसागा । तओ पच्छा एगयओ थेराणं अंतिए सुंदं सांवत्ता जाव
 पव्वइस्सामो । तए णं सुवुद्धी जियसत्तुस्स रत्तो एयमट्ठं पडिसुणेइ । तए णं तस्स
 जियसत्तुस्स रत्तो सुवुद्धिणा सद्धिं विपुत्ताइं माणुस्सगाइं जाव पच्चणुचमवमाणस्स
 दुवालस वासाइं वाइक्कंताइं । तेणं कालेणं तेणं समएणं थेरागमणं । (तए णं) जिय-
 सत्त धम्मं सोच्चा एवं जं नवरं देवाणुप्पिया ! सुवुद्धिं आसंतेमि जेट्टपुत्तं रत्ते ठा(ठ)-
 वेमि तए णं तुम्हे [अंतिए] जाव पव्वयामि । अहामुहं देवाणुप्पिया । । तए णं
 जियमत्तु राया जेणेव नए गिहं तेणेव उवागच्छइ २ ता सुवुद्धिं महावेड २ ता
 एवं वयासी-एवं खलु मए थेरागं जाव पव्व(जा)यामि, तुमं णं किं करेसि ? । तए
 णं सुवुद्धी जियसत्तुं एवं वयासी जाव के अत्ते आ(दा)यारे वा जाव प(व्वया)व्वामि ।
 नं जइ णं देवाणुप्पिया ! जाव प(व्वयह)व्वहि । गच्छह णं देवाणुप्पिया ! जेट्टपुत्तं च
 कुट्टंवे ठावेहि २ ता सीयं दुगहिनाणं समं अंतिए सीया जाव पाउव्वम(वेति)वइ ।
 (त० सु० जाव पाउव्वमवड) तए णं जियमत्तु कोटुंविग्रपुरिसे महावेड २ ता एवं
 वयासी-गच्छह णं तुम्हे देवाणुप्पिया । अवीणमत्तुस्स कुमारस्स रायामिमेयं उव-
 ट्ठेह जाव अमिस्सिंत्ति जाव पव्वइए । तए णं जियसत्तु एक्कारम अंगाइं अहिज्जइ
 बट्टणि वासाणि परियाओ(पाउणिता)मासियाए संलेहणाए जाव सिद्धे । तए णं सुवुद्धी
 एक्कारम अंगाइं अहिज्जिता बट्टणि वासाणि जाव सिद्धे । एवं खलु जंवू ! समणेणं
 भगवया महावीरेणं जाव संपत्तेणं वारसमस्स नायज्जयणस्स अयमट्ठे पव्वत्ते ति
 वेमि ॥ ९९ ॥ गाहा-मिच्छन्मोहियमगा पावयसत्तावि पाणिणो विगुगा । फारिहो-
 दां व गुणिगो हवन्ति वरगुह्यसायाओ ॥ १ ॥ वारसमं नायज्जयणं समत्तं ॥

जइ णं भंते ! समणेणं जाव संपत्तेणं बारसमस्स (णा०) अयमट्ठे पन्नत्ते तैरस-
 मस्स (णं भंते ! नाय०) के अट्ठे पन्नत्ते ? एवं खलु जंबू ! तेणं कालेणं तेणं समएणं
 रायगिहे नयरे(०) गुणसिलए उज्जाणे (ते० का० ते० स० समणे ३ चउ(इ)दसहिं
 समणसाहस्सीहिं जाव सद्धि पु० च० जाव जे० गु० उ० ते० स० अ० उ० सं०
 त० अ० भा० विहरइ) समोसरणं परिसा निग्गया । तेणं कालेणं तेणं समएणं
 सोहम्मं कप्पे दहुरवडिसए विमाणे सभाए सुहम्माए दहुरंसि सीहासणंसि दहुरे देवे
 चउहिं सामाणियसाहस्सीहिं चउहिं अगमहिंसीहिं सपरिसाहिं एवं जहा सू(सु)रिया-
 (भो)भे जाव दिव्वाइं भोगभोगां भुंजमा(णो)णे विहरइ इमं च णं केवलकप्पं जंबु-
 द्वीवं दीवं विउलेणं ओहिणा आभोएमाणे २ जाव नट्ठविहिं उवदंसित्ता पडिगए जहा
 सूरियाभे । भंते(ति) ! त्ति भगवं गोयमे समणं ३ वंदइ नमंसइ वं० २ ता एव वयासी-
 अहो णं भंते ! दहुरे देवे महिद्धिए ६ । दहुरस्स णं भंते ! देवस्स सा दिव्वा
 देविद्धी ३ कहिं गया ? कहिं (अणु)पविट्ठा ? गोयमा ! सरीरं गया सरीर अणु-
 पविट्ठा कूडागारदिट्ठतो । दहुरेणं भते ! देवेणं सा दिव्वा देविद्धी ३ किन्ना लद्धा
 जाव अभिसमन्नागया ? एवं खलु गोयमा ! इहेव जंबुद्वीवे २ भारहे वासे रायगिहे
 गुणसिलए उज्जाणे सेणिए राया । तत्थ णं रायगिहे नंदे नामं मणियारसेट्ठी परिव-
 सइ अट्ठे दित्ते० । तेणं कालेणं तेणं समएणं अहं गोयमा ! समोस(ढे)ट्ठे परिसा
 निग्गया सेणिए वि (राया) निग्गए । तए णं से नंदे मणियारसेट्ठी इमीसे कहाए लद्धट्ठे
 समाणे ण्हाए पायचारेणं जाव पज्जुवासइ । नंदे धम्मं सोच्चा समणोवासए जाए ।
 तए णं अहं रायगिहाओ पडिनिक्खंते बहिया जणवयविहारं विहरामि । तए णं से
 नं(दे)दमणियारसेट्ठी अन्नया कयाइ असाहुदंसणेण य अपज्जुवासणाए य अणणुसा-
 णाए य असुस्सूणाए य सम्मत्तपज्जवेहिं परिहायमाणेहिं २ मिच्छत्तपज्जवेहिं परि-
 वद्धमाणेहिं २ मिच्छत्तं विप्पडिवन्ने जाए यावि होत्था । तए णं नंदे मणियारसेट्ठी
 अन्नया [कयाइ] गिम्हकालसमयंसि जेट्ठामूलंसि मासंसि अट्ठमभत्तं परिगेण्हइ २ ता
 पोसहसालाए जाव विहरइ । तए णं नंदस्स अट्ठमभत्तंसि परिणममाणंसि तण्हाए
 छुहाए य अभिभूयस्स समाणस्स इमेयारूवे अज्झत्थिए०-धन्ना ण ते जाव ईसर-
 पभियओ जेसिं ण रायगिहस्स बहिया बहूओ वावीओ पोक्ख(र)रिणीओ जाव सर-
 सरपंतियाओ जत्थ णं बहुजणो ण्हाइ य पियइ य पाणियं च संवहइ । तं सेयं खलु
 म(मं)म कलं (पाउ०) सेणियं रायं आपुच्छित्ता रायगिहस्स बहिया उत्तरपुरत्थिमे
 दिसीभा(ए)गे वे[व]भारपव्वयस्स अदूरसामंते वत्थुपाडगरोइयंसि भूमिभागंसि(जाव)
 नंदं पोक्खरिणिं खणावेत्तए-त्तिकट्ठु एवं संपेहेइ २ ता कलं जाव पोसहं पारेइ २ ता

ण्हाए मित्तनाइ जाव संपरिवुडे महत्थं जाव पाहुडं रायारिहं गेण्हइ २ ता जेणेव
 सेणिए राया तेणेव उवागच्छइ जाव पाहुडं उवट्टवेइ २ ता एवं वयासी-इच्छामि
 णं सामी ! तुब्भेहिं अब्भणुजाए समाणे रायगिहस्स वहिया जाव खणावेत्तए ।
 अहासुहं देवाणुप्पिया (!) । तए णं[से]नंदे सेणिएणं रत्ता अब्भणुजाए समाणे हट्टुट्टे
 रायगिहं [नगरं] मज्झंमज्झेणं निग्गच्छइ २ ता वत्थुपाढयरोइयंसि भूमिभागंसि नंदं
 पोक्खरणिं खणा(वि)वेउं पयत्ते यावि होत्था । तए णं सा नंदा पोक्खरणी अणुपु-
 व्वेणं ख(ण)म्ममाणा २ पोक्खरणी जाया यावि होत्था चाउक्कोणा समतीरा अणु-
 पु(व्व)व्वं सुजायवप्पसीयलजला संछन्नपत्त(वि)भिसमुणाला बहु[उ]प्पलपउमकुमुद-
 नलि(णि)णसुभगसोगंधियपुंडरीयमहापुंडरीयसयपत्तसहस्सपत्त(पफुल्ल)पुप्फफलकेस-
 रोववेया परिहत्थभमंतमत्तछप्पयअणेगसउणगणमिहुणवियरियस(हुन्न)दनइयमहुरस-
 रनाइया पासाइया ४ । तए णं से नंदे मणियारसेट्ठी नंदाए पोक्खरिणीए चउदिसिं
 चत्तारि वणसंडे रोवावेइ । तए णं ते वणसंडा अणुपुव्वेणं सारक्खिज्जमाणा संगो-
 विज्जमाणा (य) संवट्ठि(य)ज्जमाणा य (से) वणसंडा जाया किण्हा जाव नि(कु)उरंव-
 भूया पत्तिया पुप्फिया जाव उवसोभेमाणा २ चिट्ठंति । तए णं नंदे पुरत्थिमिल्ले
 वणसंडे एगं महं चित्तसभं करावेइ [२] अणेगखंभसयसंनिविट्ठं पासाइयं ४ । तत्थ
 णं बहूणि किण्हाणि य जाव सुक्किलाणि य कट्टकम्माणि य पोत्थकम्माणि य चित्त(०)-
 ले(लि)प्प(०)गंथिमवेडिमपूरिमसंघाइ(म०)माइं उवदंसिज्जमाणाइं २ चिट्ठंति । तत्थ
 णं बहूणि आसणाणि य सयणाणि य अत्थुयपच्चत्थुयाइं चिट्ठंति । तत्थ णं बहवे नडा-
 य नट्ठा य जाव दिन्नभइभत्तवेयणा तालायरकम्मं करेमाणा विहरंति । रायगिहवि-
 णिग्गओ(य) त(ज)त्थ [णं] ब(हू)हुजणो तेसु पुव्वन्नत्थेसु आसणसयणेसु संनिसण्णो
 य संतुयट्ठो य सुणमाणो य पेच्छमाणो य सा(सो)हेमाणो य सुहंसुहेणं विहरइ । तए
 णं नंदे दाहिणिल्ले वणसंडे एगं महं महाणससालं कारावेइ अणेगखंभ जाव रुवं । तत्थ
 णं बहवे पुरिसा दिन्नभइभत्तवेयणा विउलं असणं ४ उवक्खडेंति बहूणं समणमाहण-
 अति(ही)हिकिवणवणीमगाणं परिभाएमाणा २ विहरंति । तए णं नंदे मणियारसेट्ठी
 पच्चत्थिमिल्ले वणसंडे एगं महं ति(ते)गिच्छियसालं क(रे)रावेइ अणेगखंभसय जाव
 पडिरुवं । तत्थ णं बहवे वेज्जा य वेज्जपुत्ता य जाणुया य जाणुयपुत्ता य कुसला य
 कुसलपुत्ता य दिन्नभइभत्तवेयणा बहूणं वाहिया(णं)ण य गिलाणाण य रोगियाण य
 दुव्वलाण य तेइ(च्छं)च्छकम्मं करेमाणा विहरंति । अन्ने य त(ए)त्थ बहवे पुरिसा
 दिन्नभइ० तेसिं बहूणं वाहियाण य रोगि(०)यगिला(०)णदुव्वलाण य ओसहभेस-
 ज्जभत्तपाणेणं पडियारकम्मं करेमाणा विहरंति । तए णं नंदे उत्तरिल्ले वणसंडे एगं

महं अलंकारियसभं कारेइ अणेगखंभसय जाव पडिह्वं । तत्थ णं बहुवे अलंकारि-
य(पुरिसा)भणुस्सा दिन्नभइभत्त(वेय)पाणा बहूणं समणाण य [माहणाण य सनाहाण
य] अणाहाण य गिलाणाण य रोगियाण य दुब्बलाण य अलंकारियकम्मं करेमाणा
२ विहरंति । तए णं तीए नंदाए पोक्खरिणीए बहुवे सणाहा य अणाहा य पंथिया
य पहिया य करोडिया य (कारिया०) त(णा)णहारा पत्तहारा कट्टहारा अप्पेगइया
ण्हायंति अप्पेगइया पाणियं पियंति अप्पेगइया पाणियं संवहंति अप्पेगइया विस-
जियसेयजल्लमलपरिस्समनिदुखुप्पिवासा सुहंसुहेणं विहरंति । रायगिह(वि)निग्गओ
वि ए(ज)त्थ बहुजणो कि ते जलरमणविविहमज्जणकयलिलया(घ)हरयकुसुमसत्थर-
यअणेगसउणगण(रु)कयरिभियसंकुलेसु सुहंसुहेणं अभिरममाणो २ विहरइ । तए णं
नंदाए पोक्खरिणीए बहुजणो ण्हायमाणो य पीयमाणो य पाणियं च संवहमाणो य
अन्नमन्नं एवं वयासी-धन्ने णं देवाणुप्पिया ! नंदे मणियारसेट्ठी कयत्थे जाव जम्म-
जीवियफले जस्स णं इमेयारूवा नंदा पोक्खरिणी चाउक्कोणा जाव पडिह्वा जस्स
णं पुरत्थिमिल्ले तं चेव सव्वं चउसु वि वणसंडेसु जाव रायगिहविणिग्गओ जत्थ बहु-
जणो आसणेसु य सयणेसु य सन्निसण्णो य संतुयट्ठो य पेच्छमाणो य साहेमाणो य
सुहंसुहेणं विहरइ । तं धन्ने कयत्थे [कयलक्खणे] कयपुण्णे कया णं लोया(।) सुलद्धे
माणुस्सए जम्मजीवियफले नंदस्स मणियारस्स । तए णं रायगिहे सिं(सं)घाडग जाव
बहुजणो अन्नमन्नस्स एवमाइक्खइ ४-धन्ने णं देवाणुप्पिया ! नंदे मणियारे सो चेव
गमओ जाव सुहंसुहेणं विहरइ । तए णं से नंदे मणियारे बहुजणस्स अतिए एय-
मट्ठं सोच्चा निसम्म हट्ठुट्ठे धाराहयक(लं)यंव(गं)कं पिव समूस(सि)वियरोमकूके
परं सायासोक्खमणुभ(व)वेमाणे विहरइ ॥ १०० ॥ तए णं तस्स नंदस्स मणिया-
रसेट्ठिस्स अन्नया कयाइ सरीरगंसि सोलस रोयायंका पाउब्भूया तंजहा-सासे कासे
जरे दाहे कुच्छिसूले भगंदरे । अरिसा अजीरए दि(ट्ठि)ट्ठीमुद्धसूले अ(गा)कारए
॥ १ ॥ अच्छिवेयणा कण्णवेयणा कंहु दउदरे कोढे ॥ तए णं से नंदे मणियारसेट्ठी
सोलसहिं रोयायंकेहि अभिभूए समाणे कोडुंबियपुरिसे सद्दावेइ २ ता एवं वयासी-
गच्छह णं तुब्भे देवाणुप्पिया ! रायगिहे नयरे सिंघाडग जाव(म०)पहेसु महया [२]
सट्ठेणं उग्घोसेमाणा २ एवं वयह-एवं खलु देवाणुप्पिया ! नंदस्स मणियार(सेट्ठि)स्स
सरीरगंसि सोलस रोयायंका पाउब्भूया तंजहा-सासे जाव कोढे । तं जो णं इच्छइ
देवाणुप्पिया ! वि(वे)ज्जो वा विज्जपुत्तो वा जाणुओ वा २ कुसलो वा २ नंदस्स
मणियारस्स तेसिं च णं सोलसण्हं रोयायंकाणं एगमवि रोयायंकं उवसा(मे)मित्तए
तस्स णं (दे०।)नंदे मणियारे विउलं अत्थसंपयाणं दलयइ-त्तिकट्ठु दोचंपि तच्चंप्पि

घोसणं घोसेह २ ता एयमाणत्तिं पच्चप्पिणह तेवि तहेव पच्चप्पिणंति । तए णं
 रायगिहे इमेयारुवं घोसणं सोच्चा निसम्म बहवे वेज्जा य वेज्जपुत्ता य जाव कुसल-
 पुत्ता य सत्थकोसहत्यगया य (कोसगपायहत्यगया य) सिलियाहत्यगया य गुलि-
 याहत्यगया य ओसहभेसजहत्यगया य सएहिं २ गिहेहिंतो निक्खमंति २ ता
 रायगिहं मज्झंमज्झेणं जेणेव नंदस्स मणियारसेट्ठिस्स गिहे तेणेव उवागच्छंति २
 ता नंदस्स मणियारस्स सरी(रं)रगं पासंति [२] तेसिं रोयायंकाणं नियाणं पुच्छंति
 [२ ता] नंदस्स मणियारस्स बहूहिं उव्वलणेहि य उव्वट्टणेहि य सिणेहपाणेहि य
 वमणेहि य विरेयणेहि य सेयणेहि य अवदहणेहि य अवण्हा[व]णेहि य अणुवास(णे)-
 णाहि य व(व)त्थिकम्मेहि य निरुहेहि य सिरावेहेहि य तच्छणाहि य पच्छणाहि
 य सिरा(वेढे)वत्थीहि य तप्पणाहि य पु(ढ)डवाएहि य छल्लीहि य वल्लीहि य मूलेहि
 य कंदेहि य पत्तेहि य पुप्फेहि य फलेहि य वीएहि य सिलियाहि य गुलियाहि य
 ओसहेहि य भेसज्जेहि य इच्छंति तेसिं सोलसण्हं रोयायंकाणं एगमवि रोयायंकं
 उवसामित्तए नो चेव णं संचाएंति उवसामेत्तए । तए णं ते बहवे विज्जा य ६ जाहे
 नो संचाएंति तेसिं सोलसण्हं रो(गा)यायंकाणं एगमवि रोयायंकं उवसामित्तए ताहे
 संता तंता जाव पडिगया । तए णं नंदे [मणियारे] तेहिं सोलसेहिं रोयायंकेहिं अभि-
 भूए समाणे नंदा[ए] पु(पो)क्खरिणीए मुच्छिए ४ तिरिक्खजोणिएहिं निवद्धाउए
 चद्धपएसिए अट्टदुहट्टवसट्ठे कालमासे कालं किच्चा नंदाए पोक्खरिणीए दहुरीए कुच्छिंति
 दहुरत्ताए उववन्ने । तए णं नंदे दहुरे गव्भाओ वि(णिम्मु)प्पमुक्के समाणे उ(म्)मु-
 क्कवालभावे विज्जायपरिणयमित्ते जोव्वणगमणु[ए]पत्ते नंदाए पोक्खरिणीए अभिरममाणे
 २ विहरइ । तए णं नंदाए पोक्खरिणीए बहुज(णे)णो ण्हायमाणो य पिंय(माणो)इ
 य पाणियं च संवहमाणो(य)अन्नम(न्नस्स)न्नं एवमाइक्खइ ४-धन्ने णं देवाणुप्पिया !
 नंदे मणियारे जस्स णं इमेयारुवा नंदा पुक्खरिणी चाउक्कोणा जाव पडिरुवा जस्स
 णं पुरत्थिमिहे वणसंडे चित्तसमा अणेगखंभ(०)तहेव चत्तारि स(हा)भाओ जाव
 जम्मजीवियफले । तए णं तस्स दहुरस्स तं अभिक्खणं २ बहुजणस्स अंतिए एयमट्ठं
 सोच्चा निसम्म इमेयारुवे अज्झत्थिए० समुप्पज्जित्था-से कहिं मन्ने मए इमेयारुवे
 मदे निसंतपुव्वे-त्तिकट्ठु सुभेणं परिणामेणं जाव जाईसरणे समुप्पन्ने पुव्वजाइं सम्मं
 नमागच्छड । तए णं तस्स दहुरस्स इमेयारुवे अज्झत्थिए०-एवं खलु अहं इहेव
 रायगिहे नयरे नंदे नामं मणियारे अट्ठे० । तेणं कालेणं तेणं समएणं समणे भगवं
 महावीरे[इह]समोसट्ठे । तए णं[मए]समणस्स ३ अंतिए पंचाणुव्वइए सत्तसिक्खा-
 चडए जाव पडिवन्ने । तए णं अहं अन्नया कयाइ असाहुदंसणेण य जाव मिच्छत्तं

विप्पडिवन्ने । तए णं अहं अन्नया कया(ई)इं नि(म्हे)म्हकालसमयंसि जाव उवसंप-
ज्जिताणं विहरामि-एवं जहेव चिंता आपुच्छणा नंदापुक्खरिणी वणसंडा सहाओ तं
चेव सव्वं जाव नंदाए (पु(पो)क्ख०) दहुरत्ताए उववन्ने । तं अहो णं अहं अहन्ने
अपुण्णे अकयपुण्णे निगगंथाओ पावयणाओ नट्टे भट्टे परिब्भट्टे । तं सेयं खलु ममं
सयमेव पुव्वपडिवन्नाइं पंचाणुव्वयाइं (०) उवसंपज्जिताणं विहरित्तए । एवं संपेहेइ
२ ता पुव्वपडिवन्नाइं पंचाणुव्वयाइं जाव आरु(हे)हइ २ ता इमेयारूवं अभिगगहं
अभिगिण्हइ-कप्पइ मे जाव(जी)जीवं छट्ठंछट्टेणं अणिक्खित्तेणं अप्पाणं भावेमाणस्स
विहरित्तए । छट्ठस्स वि य णं पारणगंसि कप्पइ मे नंदाए पोक्खरिणीए परिपेरंतेसु
फासुएणं प्हाणोदएणं उम्मइ(णो)णालोलियाहि य वित्तिं कप्पेमाणस्स विहरित्तए ।
इमेयारूवं अभिगगहं अभिगेण्हइ जावजीवाए छट्ठंछट्टेणं जाव विहरइ । तेणं कालेणं
तेणं समएणं अहं गोयमा ! गुणसिलए समोसट्टे परिसा निगगया । तए णं नंदाए
पो(पु)क्खरिणीए बहुजणो प्हा(य०)इ ३ अन्नमन्नं (०) जाव समणे ३ इहेव गुणसि-
लए उज्जाणे समोसट्टे । तं गच्छामो णं देवाणुप्पिया ! समणं ३ वंदामो जाव पज्जुवा-
सामो । एयं (मे) णे इहभवे परभवे य हियाए जाव आ(अ)णुगामियत्ताए भविस्सइ ।
तए णं तस्स दहुरस्स बहुजणस्स अतिए एयमट्ठं सोच्चा निसम्म अयमेयारूवे अज्झ-
त्थिए० समुप्पज्जित्था-एवं खलु समणे ३ (०) समोसट्टे । तं गच्छामि णं वंदा-
मि (०) । एवं संपेहेइ २ ता नंदाओ पुक्खरिणीओ सणियं २ उत्तर(र)रेइ (२ ता)
जेणेव रायमग्गे तेणेव उवागच्छइ २ ता ताए उक्किट्ठाए ५ दहुरगईए वीईवयमाणे
जेणेव ममं अंतिए तेणेव पहारेत्थ गमणाए । इमं च णं सेणिए राया भिं(भं)भसारे
प्हाए सव्वालंकारविभूसिए हत्थिखंधवरगए सको(रं)रेंटमल्लदामेणं छत्तेणं धरिज्जमा-
णेणं सेयवरचाम(रा)रे० ह्यगयरह० महया भडचडगर(०)चाउरंगिणीए सेणाए
सद्धिं संपरिवुडे मम पायवंदए हव्वमागच्छइ । तए णं से दहुरे सेणियस्स रज्जो
एगेणं आसकिसोरएणं वामपाएणं अकंते समाणे अंतनिग्घाइए कए यावि होत्था ।
तए णं से दहुरे अ(र)थामे अवले अवीरिए अपुरिस(का)कारपरक्कमे आधारणिज्जमि-
तिकट्टु एगंतमवक्कमइ (०) करयल(परिग्गहियं तिखुत्तो सिरसावत्तं म० अं० कट्टु)
जाव एवं वयासी-नमोत्थु णं अ(र)रहंताणं (भगवंताणं) जाव संपत्ताणं । नमोत्थु णं
(समणस्स ३) मम धम्मायरियस्स जाव संपाविउकामस्स । पुव्विपि य णं मए
समणस्स ३ अंतिए थूलए पाणाइवाए पच्चक्खाए जाव थूलए परिग्गहे पच्चक्खाए ।
तं इयाणिपि तस्सेव अंतिए सव्वं पाणाइवायं पच्चक्खामि जाव सव्वं परिग्गहं पच्च-
क्खामि जावजीवं सव्वं असणं ४ पच्चक्खामि जावजीवं जंपि य इमं सरीरं इट्ठं

कंतं जाव मा फुसंतु एयंपि [य] णं चरिमेहिं ऊसासेहिं वोसिरामि-त्तिकट्ठु । तए णं
 से दहुरे कालमासे कालं किच्चा जाव सोहम्मे कप्पे दहुरवडिसए (विमाणे) उववा-
 यसभाए दहुरदेवत्ताए उववन्ने । एवं खलु गोयमा ! दहुरेणं सा दिव्वा देविद्धी
 लद्धा ३ । दहुरस्स णं भंते ! देवस्स केव(ति)इयं कालं ठिई पन्नत्ता ? गोयमा !
 चत्तारि पलिओवमाई ठिई पन्नत्ता । [दहुरे णं भंते ! देवे ताओ देवलोगाओ आउ-
 क्खएणं ठिइक्खएणं कहिं गच्छिहिइ कहिं उववज्जिहिइ ? गोयमा !] से णं दहुरे
 देवे (०) महाविदेहे वासे सिज्झिहिइ बुज्झिहिइ [मुच्चिहिइ] जाव अंतं करेहिइ ।
 एवं खलु [जंबू !] समणेणं भगवया महावीरेणं जाव संपत्तेणं तेरसमस्स नायज्झ-
 यणस्स अयमट्ठे पन्नत्ते त्ति वेमि ॥ १०१ ॥ गाहाउ-संपन्नगुणो वि जओ सुसा-
 हुसंसग्गिवज्जिओ पायं । पावइ गुणपरिहाणिं दहुरजीवोव्व मणियारो ॥ १ ॥ तित्थ-
 यरवंदणत्थं चलिओ भावेण पावए सगं । जह दहुरदेवेणं पत्तं वेमाणियसुरत्तं ॥ २ ॥
 तेरसमं नायज्झयणं समत्तं ॥

जइ णं भंते ! समणेणं जाव संपत्तेणं तेरसमस्स नायज्झयणस्स अयमट्ठे पन्नत्ते
 चोद्दसमस्स (०) के अट्ठे पन्नत्ते ? एवं खलु जंबू ! तेणं कालेणं तेणं समएणं तेय-
 लिपु(रे)रं ना(मं)म नय(रे)रं (होत्था) । (त० णं ते० व० उ० दि० एत्थ णं)
 पमयवणे (णामं) उज्जाणे (होत्था) । (तत्थ णं ते० णयरे) कणगरहे (णामं) राया
 (होत्था) । तस्स णं कणगरहस्स (रण्णो) पउमावई (णामं) देवी (होत्था) । तस्स
 णं कणगरहस्स रन्नो तेयलिपुत्ते नामं अमच्चे (होत्था) साम(दाम)दंडभेय(दंडे)-
 निउणे । तत्थ णं तेयलिपुरे कलादे नामं मूसियारदारए होत्था अट्ठे जाव अपरि-
 भूए । तस्स णं भद्दा नामं भारिया (होत्था) । तस्स णं कलायस्स मूसियारदार-
 (य)गस्स धूया भद्दाए अत्तया पोट्टिला नामं दारिया होत्था रुवेण य (जोव्वणेण य
 ला०) जाव उक्किट्ठा उक्किट्ठसरीरा । तए णं [सा] पोट्टिला दारिया अन्नया कयाइ
 ण्हाया सव्वालंकारविभूसिया चेडियाचक्कवालसंपरिवुडा उप्पि पासायवरगया आगा-
 सतलगंसि कणग(मएणं)तिंदूसएणं कीलमाणी २ विहरइ । इमं च णं तेयलिपुत्ते
 अमच्चे ण्हाए आसखंधवरगए महया भडचडगर[०] आसवाहणियाए निजायमाणे
 कलायस्स मूसियारदारगस्स गिहस्स अदूरसामंतेणं वीईवयइ । तए णं से तेयलि-
 पुत्ते [अमच्चे] मूसियारदारगगिहस्स अदूरसामंतेणं वीईवयमाणे २ पोट्टिलं दारियं
 उप्पि (पासायवरगयं) आगासतलगंसि कणगतिंदूसएणं कीलमाणी पासइ २ ता
 पोट्टिलाए दारियाए रुवे य (३) जाव अज्झोववन्ने कोडुंवियपुरिसे सद्दावेइ २ ता
 एवं वयासी-एस्स णं देवाणुप्पिया ! कस्स दारिया किनामधेज्जा [वा] ? । तए णं

कोडुंविपुलि(से)सा तेयलिपुत्तं एवं वयासी-एस णं सामी । कलायस्स मूसियारदा-
 रयस्स धूया भद्दाए अत्तया पोड्डिला नामं दारिया रुवेण य जाव [उक्किट्ठ]सरीरा ।
 तए णं से तेयलिपुत्ते आसवाहणियाओ पडिनियत्ते समाणे अब्भितर(ट्ठा)ठाणिज्जे
 पुरिसे सद्दावेइ २ ता एवं वयासी-गच्छह णं तुब्भे देवाणुप्पिया । कला(द)यस्स २
 धूयं भद्दाए अत्तयं पोड्डिलं दारियं मम भारियत्ताए वरेह । तए णं ते अब्भितरठा-
 णिज्जा पुरिसा तेयलिणा एवं वुत्ता (समाणा) हट्ठ० करयल० तहत्ति जेणेव कलायस्स
 २ गिहे तेणेव उवागया । तए णं से कलाए मूसियारदार[ए]ते पुरिसे एज्जमाणे
 पासइ २ ता हट्ठतुट्ठे आसणाओ अब्भुट्ठेइ २ ता सत्तट्ठपयाइं अणुगच्छइ २ ता आस-
 णेणं उवणिमंतेइ २ ता आसत्थे वीसत्थे सुहासणवरगाए एवं वयासी-संदिसंतु णं
 देवाणुप्पिया ! किमागमणपओयणं (?) । तए णं ते अब्भितरठाणिज्जा (पुरिसा)
 कलायं २ एवं वयासी-अम्हे णं देवाणुप्पिया । तव धूयं भद्दाए अत्तयं पोड्डिलं दारियं
 तेयलिपुत्तस्स भारियत्ताए वरेमो, तं जइ णं जाणसि देवाणुप्पिया । जुत्तं वा पत्तं वा
 सलाहणिज्जं वा सरिसो वा संजोगो ता दिज्जउ णं पोड्डिला दारिया तेयलिपुत्तस्स,
 (ता) तो भण देवाणुप्पिया ! किं दलामो सुक्कं (?) । तए णं कलाए २ ते अब्भितर-
 ठाणिज्जे पुरिसे एवं वयासी-एस चेव णं देवाणुप्पिया । मम सु(क्के)क्कं जन्नं तेयलिपुत्ते
 मम दारियानिमित्तेणं अणुग्गहं करेइ । ते ठाणिज्जे पुरिसे विपुलेणं अस(ण)णेणं ४
 पुप्फवत्थ जाव मल्लालंकारेणं सक्कारेइ सम्माणेइ (०) पडिविसज्जेइ । तए णं [ते
 पुरिसा] कलायस्स २ गिहाओ पडिनि(क्खमं)यत्तंति २ ता जेणेव तेयलिपुत्ते अमच्चे
 तेणेव उवागच्छंति २ ता तेयलिपुत्तं एयमट्ठं निवे(यं)इंति । तए णं कलाए २
 अन्नया कयाइं सोहणंसि तिहि[करण]नक्खत्तमुहुत्तंसि पोड्डिलं दारियं ण्हायं सव्वालं-
 कारविभूसियं सीयं (दुरुहइ) दुरु(हि)हेत्ता मित्तणाइसंपरिवुडे सया(सा)ओ गिहाओ
 पडिनिक्खमइ २ ता सव्विद्धीए [४] तेयलिपुरं [नयरं] मज्झंमज्जेणं जेणेव तेय-
 लिस्स गिहे तेणेव उवागच्छइ (०) पोड्डिलं दारियं तेयलिपुत्तस्स सयमेव भारियत्ताए
 दलयइ । तए णं तेयलिपुत्ते पोड्डिलं दारियं भारियत्ताए उवणीयं पासइ २ ता पोड्डिलाए
 सद्धिं पट्ठयं दुरुहइ २ ता सेयापी(त)एहिं कलसेहिं अप्पाणं मज्जावेइ २ ता अग्गि-
 होमं करेइ २ ता पाणिग्गहणं करेइ २ ता पोड्डिलाए भारियाए मित्तनाइ जाव परि-
 (ज)यणं विउलेणं असणपाणखाइमसाइमेणं पुप्फ[वत्थ] जाव पडिविसज्जेइ । तए णं
 से तेयलिपुत्ते पोड्डिलाए भारियाए अणुरत्ते अविरत्ते उरालाइं जाव विहरइ ॥ १०२ ॥
 तए णं से कणगरहे (राया) रज्जे य रट्ठे य बले य वाहणे य कोसे य कोट्टागारे य
 अंतेउरे य मुच्छिए ४ जाए २ पुत्ते वियंगेइ । अप्पेगइयाणं हत्थंगुलियाओ छिंदइ

अप्पेगइयाणं हत्थंगुट्टए छिंदइ । एवं पायंगुलियाओ पायंगुट्टए वि कण्ण(सकु)संकुली-
 (ए)याओ वि नासापुडाइं फालेइ अं(गमं)गोवंगाइं वियंगेइ । तए णं तीसे पडमाव-
 ईए देवीए अन्नया [कयाइ] पुव्वरत्तावरत्तकालसमयंसि अयमेयारूवे अज्जत्थिए ४
 समुप्पज्जित्था-एवं खलु कणगरहे राया रजे य जाव पुत्ते वियंगेइ जाव अंगमंगाइं
 वियंगेइ । तं जइ [णं] अहं दारयं प(या)यामि सेयं खलु म(मं)म तं दारगं कणगर-
 हस्स रहस्सि[य]यं चेव सारक्खमाणीए संगोवेमाणीए विहरित्तए-त्तिकट्टु एवं संपेहेइ
 २ ता तेयलिपुत्तं अमच्चं सद्दावेइ २ ता एवं वयासी-एवं खलु देवाणुप्पिया ! कण-
 गरहे राया रजे य जाव वियंगेइ । तं जइ णं अहं देवाणुप्पिया ! दारगं पयायामि
 तए णं तुमं कणगरहस्स रहस्सिययं चेव अणुपुव्वेणं सारक्खमाणे संगोवेमाणे संव-
 ड्ढेहि । तए णं से दारए उमुक्कवालभावे [जाव] जोव्वणगमणुप्पत्ते तव य मम य
 भिक्खाभायणे भविस्सइ । तए णं से तेयलिपुत्ते पडमावईए एयमट्ठं पडिसुणेइ २
 ता पडिगए । तए णं पडमावई (य) देवी पोट्टिला य अमच्ची सममेव गव्वं गेण्ह-
 (न्ति)इ सममेव (गव्वं) परिवहंति (सममेव गव्वं परिवड्ढंति) । तए णं सा पड-
 मावई नवण्हं मासाणं जाव पियदंसणं सुह्वं दारगं पयाया । जं रयणिं च णं पड-
 मावई (देवी) दारयं पयाया तं रयणिं च णं पोट्टिला वि अमच्ची नवण्हं मासाणं
 विणि(हा)घायमावन्नं दारियं पयाया । तए णं सा पडमावई देवी अम्मधाईं सद्दा-
 वेइ २ ता एवं वयासी-गच्छह णं तु(मे)मं अम्मो ! (तेयलि(पुत्त)गिहे) तेयलि-
 पुत्तं रहस्सिययं चेव सद्दावे(ह)हि । तए णं सा अम्मधाईं तहत्ति पडिसुणेइ २ ता
 अंतैउरस्स अव(द्दा)दारेणं निग्गच्छइ २ ता जेणेव तेयलिस्स गिहे जेणेव तेयलि-
 पुत्ते तेणेव उवागच्छइ २ ता करयल जाव एवं वयासी-एवं खलु देवाणुप्पिया !
 पडमावई देवी सद्दावेइ । तए णं तेयलिपुत्ते अम्मधाईए अंतिए एयमट्ठं सोच्चा
 (णिसम्म) हट्ठु(ट्ठ)ट्ठे अम्मधाईए सद्धिं सयाओ गिहाओ निग्गच्छइ २ ता अंतैउ-
 रस्स अवदारेणं रहस्सिययं चेव अणु[प]पविसइ २ ता जेणेव पडमावई (देवी) तेणेव
 उवागच्छइ (२ ता) करयल जाव एवं वयासी-संदिसंतु णं देवाणुप्पिया ! जं मए
 कायव्वं । तए णं पडमावई तेयलिपुत्तं एवं वयासी-एवं खलु कणगरहे राया जाव
 वियंगेइ । अहं च णं देवाणुप्पिया ! दारगं पयाया । तं तु(मं)व्वे णं देवाणुप्पिया !
 (तं) एयं दारगं गेण्हहि जाव तव मम य भिक्खाभायणे भविस्सइ-त्तिकट्टु तेय-
 लिपुत्तस्स हत्थे दलयइ । तए णं तेयलिपुत्ते पडमावईए हत्थाओ दारगं गेण्हइ उत्त-
 रिजेणं पिहेइ २ ता अंतैउरस्स रहस्सिययं अवदारेणं निग्गच्छइ २ ता जेणेव
 सए गिहे जेणेव पोट्टिला भारिया तेणेव उवागच्छइ २ ता पोट्टिलं एवं वयासी-एवं

खलु देवाणुप्पि(या)ए ! कणगरहे राया रज्जे य जाव वियंगेइ । अयं च णं दारए
 कणगरहस्स पुत्ते पउमावईए अत्तए । (तेणं) तन्नं तुमं देवाणुप्पिए ! इमं दारगं
 कणगरहस्स रहस्सिययं चेव अणुपुव्वेणं सारक्खाहि य संगोवेहि य संवड्ढेहि य ।
 तए णं एस दारए उमुक्कवालभावे तव य मम य पउमावईए य आहारे भविस्सइ-
 त्तिकहु पोट्टिलाए पासे निक्खिवइ [२] पोट्टिला(ओ)ए पासाओ तं विणिहायमाव-
 न्नियं दारियं गेण्हइ २ ता उत्तरिज्जेणं पिहेइ २ ता अंतैउरस्स अवदारेणं अणुप्प-
 विसइ २ ता जेणेव पउमावई देवी तेणेव उवागच्छइ २ ता पउमावईए देवीए पासे
 ठावेइ (०) जाव पडिनिग्गए । तए णं तीसे पउमावईए अंगपडियारियाओ पउ-
 मावई देविं विणिहायमावन्नियं (च) दारियं पयायं पासंति २ ता जेणेव कणगरहे
 राया तेणेव उवागच्छंति २ ता करयल जाव एवं वयासी-एवं खलु सामी । पउ-
 मावई देवी म(इ)एल्लियं दारियं पयाया । तए णं कणगरहे राया तीसे मएल्लियाए
 दारियाए [महया] नीहरणं करेइ बहू(णि)इं लो(इ)गियाइं मयकिच्चाइं करेइ [२]
 कालेणं विगयसोए जाए । तए णं से तेयलिपुत्ते क(ल्ले)ल्लं कोडुंवियपुरिसे सदावेइ २
 ता एवं वयासी-खिप्पामेव चारगसोहणं जाव ठिइपडियं जम्हा णं अम्हं एस दारए
 कणगरहस्स रज्जे जाए तं होउ णं दारए नामेणं कणगज्झए जाव अलंभोगसमत्थे
 जाए ॥ १०३ ॥ तए णं सा पोट्टिला अन्नया कयाइ तेयलिपुत्तस्स अणिट्ठा ५
 जाया यावि होत्था नेच्छइ (य) णं तेयलिपुत्ते पोट्टिलाए नामगो(त्त)यमवि सवणयाए
 किपुण दं(दरि)सणं वा परिभोगं वा (१) । तए णं तीसे पोट्टिलाए अन्नया कयाइं पुव्व-
 रत्तावरत्तकालसमयंसि इमेयारुवे अज्झत्थिए ४ जाव समुप्पज्जित्था-एवं खलु अहं
 तेयलिस्स पुव्वि इट्ठा ५ आसि इयाणिं अणिट्ठा ५ जाया । नेच्छइ णं तेयलिपुत्ते
 मम नामं जाव परिभोगं वा ओहयमणसंकप्पा जाव झियायइ । तए णं तेयलिपुत्ते
 पोट्टिलं ओहयमणसंकप्पं जाव झियायमाणं पासइ २ ता एवं वयासी-मा णं तुमं
 देवाणुप्पिए ! ओहयमणसंकप्पा जाव झियाहि, तुमं णं मम महाणसंसि विपुलं
 असणं ४ उवक्खडावेहि २ ता बहूणं समणमाहण जाव वणीमगाणं देयमाणी य
 द(दे)वावेमाणी य विहराहि । तए णं सा पोट्टिला तेयलिपुत्तेणं [अमच्चेणं] एवं वुत्ता
 समा(णा)णी हट्ठ० तेयलिपुत्तस्स एयमट्ठं पडिसुणेइ २ ता कल्लक(ल्लं)ल्लिं महाणसंसि
 विपुलं असणं ४ जाव दवावेमाणी विहरइ ॥ १०४ ॥ तेणं कालेणं तेणं समएणं
 सुव्वयाओ नामं अज्जाओ इ(ई)रियासमियाओ जाव गुत्तवंभ(या)चारिणीओ बहु-
 स्सुयाओ बहुपरिवाराओ पुव्वानुपुव्वि [चरमाणीओ] जेणामेव तेयलिपुरे नयरे तेणेव
 उवागच्छंति २ ता अहापडिरुवं उग्गहं ओगिण्हंति २ ता संजमे(ण)णं तवसा

अप्पाणं भावेमाणीओ विहरंति । तए णं तासिं सुव्वयाणं अज्जाणं एणे संधाडए पढमाए पोरिसीए सज्जायं करेइ जाव अडमाणीओ तेयलिस्स गिहं अणुपविट्ठाओ । तए णं सा पोट्टिला ताओ अज्जाओ एज्जमाणीओ पासइ २ ता हट्ठ० धासणाओ अब्भुट्ठेइ (०) वंदइ नमंसइ वं० २ ता विपु(लं)लेणं अस(णं)णेणं ४ पडिलाभेइ २ ता एवं वयासी-एवं खलु अहं अज्जाओ ! तेयलिपुत्तस्स पुर्व्वि इट्ठा ५ आसि इयाणिं अणिट्ठा ५ जाव दंसणं वा परिभोगं वा, तं तुव्वे णं अज्जाओ वहुनायाओ [वहु]सि-क्खियाओ बहुपडियाओ बहूणि गामागर जाव आहिंदइ बहूणं राईसर जाव गिह्हाइ अणुपविसह, तं अत्थि-याइं भे अज्जाओ ! केइ क(हं)हिंचि चुण्णजोए वा मंतजोगे वा कम्मणजोए वा हियउट्ठावणे वा काउट्ठावणे वा आभिओगिए वा वसीकरणे वा कोउयकम्मे वा भूइकम्मे वा मूले [वा] कंदे [वा] छल्ली वल्ली सिलिया वा गुलिया वा ओसहे वा भेसज्जे वा उवलद्धपुव्वे जेणाहं तेयलिपुत्तरस पुणरवि इट्ठा ५ भवे-ज्जामि [?] । तए णं ताओ अज्जाओ पोट्टिलाए एवं वुत्ताओ समाणीओ दोवि कण्णे [अंगुलियं] ठवें(ठाइं)ति २ ता पोट्टिलं एवं वयासी-अम्हे णं देवाणुप्पिए ! सम-णीओ निगंथीओ जाव गुत्तवंभचारिणीओ । नो खलु कप्पइ अम्हं एयप्प(या)गारं कण्णे(हि)हिं वि निसा(मे)मित्तए किमंग पुण उव(दि)दंसित्तए वा आयरित्तए वा (?) । अम्हे णं तव देवाणुप्पिया ! विचित्तं केवलपन्नत्तं धम्मं प(डि)रिकहिज्जामो । तए णं सा पोट्टिला ताओ अज्जाओ एवं वयासी-इच्छामि णं अज्जाओ ! तु(म्हं)व्वं अंतिए केवलपन्नत्तं धम्मं निसामित्तए । तए णं ताओ अज्जाओ पोट्टिलाए विचित्तं धम्मं परिकहेति । तए णं सा पोट्टिला धम्मं सोच्चा निसम्म हट्ठ० एवं वयासी-सद्दहामि णं अज्जाओ ! निगंथं पावयणं जाव से जहेयं तुव्वे वयह, इच्छामि णं अहं तुव्वं अंतिए पंचाणुव्व(याइं)इयं जाव धम्मं पडिवज्जित्तए । अहासुहं [देवाणुप्पिया] । तए णं सा पोट्टिला तासिं अज्जाणं अंतिए पंचाणुव्वइयं जाव धम्मं पडिवज्जइ ताओ अज्जाओ वंदइ नमंसइ वं० २ ता पडिविसज्जेइ । तए णं सा पोट्टिला समणोवासिया जाया जाव पडिलाभेमाणी विहरइ ॥ १०५ ॥ तए णं तीसे पोट्टिलाए अन्नया कयाइ पुव्वरत्तावरत्तकालसमयंसि कुडुंबजागरियं जागरमाणीए अयमेयारूवे अज्ज-त्थिए०-एवं खलु अहं तेयलिपुत्तस्स पुर्व्वि इट्ठा ५ आसि इयाणिं अणिट्ठा ५ जाव परिभोगं वा, तं सेयं खलु म(म)मं सुव्वयाणं अज्जाणं अंतिए पव्वइत्तए । एवं संपे-हेइ २ ता कलं (पाउ०) जेणेव तेयलिपुत्ते तेणेव उवागच्छइ २ ता करयल जाव एवं वयासी-एवं खलु देवाणुप्पिया ! मए सुव्वयाणं अज्जाणं अंतिए धम्मं निसंते जाव अब्भणुत्ताया पव्वइत्तए । तए णं तेयलिपुत्ते पोट्टिलं एवं वयासी-एवं खलु

तुमं देवाणुप्पिए ! मुंडा पव्वइया समाणी कालमासे कालं किच्चा अ(न्न)णंतरेसु देवलोएसु देवत्ताए उववज्जिहिसि, तं जइ णं तुमं देवाणुप्पिए ! ममं ताओ देवलो(या)गाओ आगम्म केवलपन्नत्ते धम्मो वो(हिं)हेहि तो हं विसज्जेमि, अहं णं तुमं ममं न संबोहेसि तो ते न विसज्जेमि । तए णं सा पोट्टिला तेयलिपुत्तस्स एयमट्ठं पडिसुणेइ । तए णं तेयलिपुत्ते विउलं असणं ४ उवक्खडावेइ २ ता मित्तनाइ जाव आमंतेइ (०) जाव सम्माणेइ २ पोट्टिलं ण्हायं स० पुरिससहस्सवा(ह)हिणीयं सीयं दुरुहिता मित्तनाइ जाव [सं]परिवुडे सव्वि(द्धि)ट्ठीए जाव रवेणं तेयलिपु(रस्स)रं मज्झंमज्झेणं जेणेव सुव्वयाणं उवस्सए तेणेव उवागच्छइ २ ता सीयाओ पच्चोरुहइ २ ता पोट्टिलं पुरओ-कट्ठु जेणेव सुव्वया अज्जा तेणेव उवागच्छइ २ ता वंदइ नमंसइ वं० २ ता एवं वयासी-एवं खलु देवाणुप्पि(ए)या ! मम पोट्टिला भारिया इट्ठा ५, एस णं संसारभउव्विग्गा जाव पव्वइत्तए, पडिच्छंतु णं देवाणुप्पिया ! सिस्सिणि-भिव्खं (दलयामि) । अहासुहं मा पडिवंधं (करेह) । तए णं सा पोट्टिला सुव्वयाहिं अज्जाहिं एवं वुत्ता समाणी हट्ठ० उत्तरपुर(च्छिमे)त्थिमं दिसीभा(ए)गं [अवक्कमइ २] सयमेव आभरणमल्लालंकारं ओमुयइ २ ता सयमेव पंचमुट्ठियं लोयं करेइ २ ता जेणेव सुव्वयाओ अज्जाओ तेणेव उवागच्छइ २ ता वंदइ नमंसइ वं० २ ता एवं वयासी-आलित्ते णं भंते ! लोए एवं जहा देवाणंदा जाव एक्कारस्स अंगाइं बहूणि वासाणि सामण्णपरियागं पाउणइ २ ता मासियाए संलेहणाए अत्ताणं झोसेत्ता सट्ठिं भत्ताइं अणस(णाइं)णेणं [छेएत्ता] आलोइयपडिकंता समाहिपत्ता कालमासे कालं किच्चा अन्नयरेसु देवलोएसु देवत्ताए उववच्चा ॥ १०६ ॥ तए णं से कणगरहे राया अन्नया कयाइ कालधम्मणा संजुत्ते यावि होत्था । तए णं [ते] राईसर जाव नीहरणं करंति २ ता अन्नमज्जं एवं वयासी-एवं खलु देवाणुप्पिया ! कणगरहे राया रज्जे य जाव पुत्ते वियंगित्था । अम्हे णं देवाणुप्पिया ! रायाहीणा रायाहिट्ठिया रायाहीण-कज्जा । अयं च णं तेयली अमच्चे कणगरहस्स रत्तो सव्वट्ठणेषु सव्वभूमियासु लद्धपच्चए दिन्नवियारे सव्वकज्जव(ट्ठा)ट्ठावए यावि होत्था । तं सेयं खलु अम्हं तेयलिपुत्तं अमच्चं कुमारं जाइत्तए-त्तिकट्ठु अन्नमज्जस्स एयमट्ठं पडिसुणेंति २ ता जेणेव तेयलिपुत्ते अमच्चे तेणेव उवागच्छंति २ ता तेयलिपुत्तं एवं वयासी-एवं खलु देवाणुप्पिया ! कणगरहे राया रज्जे य रट्ठे य जाव वियंगेइ, अम्हे (य) णं देवाणुप्पिया ! रायाहीणा जाव रायाहीणकज्जा, तुमं च णं देवाणुप्पिया ! कणगरहस्स रत्तो सव्व- (ट्ठा)ठाणेषु जाव रज्जधुराचितए [होत्था], तं जइ णं देवाणुप्पिया ! अत्थि केइ कुमारे रायलक्खणसंपन्ने अभिसेयारिहे तण्णं तुमं अम्हं दलाहि जण(जा)णं अम्हे

महया २ रायाभिसेएणं अभिसिंचामो । तए णं तेयलिपुत्ते तेसिं ईसर जाव एयमट्ठं पडिसुणेइ २ ता कणगज्झयं कुमारं ण्हायं सव्वालंकारविभूतियं सस्सिरीयं करेइ २ ता तेसिं ईसर जाव उवणेइ २ ता एवं वयासी-एस णं देवाणुप्पिया ! कणगरहस्स रत्तो पुत्ते पउमावईए देवीए अत्तए कणगज्झए नामं कुमारे अभिसेयारिहे रायल-क्खणसंपन्ने मए कणगरहस्स रत्तो रहस्सियं संवड्ढिए, एयं णं तुब्भे महया २ रायाभिसेएणं अभिसिंचह । सव्वं च तेसिं उट्ठाणपरियावणियं परिकहेइ । तए णं ते ईसर जाव कणगज्झयं कुमारं महया (२) रायाभिसेएणं अभिसिंचंति । तए णं से कणगज्झए कुमारे राया जाए महयाहिमवंत(मलय) वण्णओ जाव रज्जं पसा-(से)हेमाणे विहरइ । तए णं सा पउमावई देवी कणगज्झयं रायं सदावेइ २ ता एवं वयासी-एस णं पुत्ता ! तव रज्जे जाव अंतेउरे य तुमं च तेयलिपुत्तस्स [अम-च्चस्स] प(हा)भावेणं, तं तुमं णं तेयलिपुत्तं अमच्चं आढाहि परिजाणाहि सक्कारेहि सम्माणेहि इंतं अब्भुट्ठेहि ठियं पज्जुवासाहि वच्चंतं पडिसंसाहेहि अद्वासणेणं उव-णिमंतेहि भोगं च से अणुवड्ढेहि । तए णं से कणगज्झए पउमावईए (देवीए) तहत्ति [वयणं] पडिसुणेइ जाव भोगं च से [सं]वड्ढेइ ॥ १०७ ॥ तए णं से पोडिल्ले देवे तेयलिपुत्तं अभिक्खणं २ केवलपन्नत्ते धम्मो संवोहेइ नो चेव णं से तेयलि-पुत्ते संबुज्झइ । तए णं तस्स पोडिल्लदेवस्स इमेयारुवे अज्झत्थिए०-एवं खलु कण-गज्झए राया तेयलिपुत्तं आढाइ जाव भोगं च संवड्ढेइ । तए णं से तेय(ली)लि-पुत्ते अभिक्खणं २ संवोहिजमाणे वि धम्मो नो संबुज्झइ । तं सेयं खलु कणगज्झयं तेयलिपुत्ताओ विप्परिणा(मे)मित्तए-त्तिकड्डु एवं संपेहेइ २ ता कणगज्झयं तेयलिपु-त्ताओ विप्परिणामेइ । तए णं तेयलिपुत्ते कलं ण्हाए आसखंधवरगए वहूहिं पुरिसेहि [सद्धिं] संपरिवुडे सयाओ गिहाओ निग्गच्छइ २ ता जेणेव कणगज्झए राया तेणेव पहारेत्थ गमणाए । तए णं तेयलिपुत्तं अमच्चं जे जहा वहवे राईसरतलवर जाव पभियओ पासंति ते तहेव आढायंति परि(जा)याणंति अब्भुट्ठंति २ ता अंजलि-परिग्गहं करेंति इट्ठाहिं कंताहिं जाव वग्गूहि आल(वे)वमाणा य संलवमाणा य पुरओ य पिट्ठओ य पासओ य मग्गओ य समणुगच्छंति । तए णं से तेयलिपुत्ते जेणेव कणगज्झए तेणेव उवागच्छइ । तए णं [से] कणगज्झए तेयलिपुत्तं एज्ज-माणं पासइ २ ता नो आढाइ नो परियाणाइ नो अब्भुट्ठेइ अणाढायमाणे ३ पर-म्मुहे संचिट्ठइ । तए णं [से] तेयलिपुत्ते कणगज्झयस्स रत्तो अंजलिं करेइ । तए णं से कणगज्झए राया अणाढायमाणे तुसिणीए परम्मुहे संचिट्ठइ । तए णं तेयलि-पुत्ते कणगज्झयं [रायं] विप्परिणयं जाणिता भीए जाव संजायभए एवं वयासी-रुट्ठे

णं मम कणगज्झए राया । हीणे णं मम कणगज्झए राया । अवज्झाए णं कणग-
ज्झए (राया) । तं न नज्झइ णं मम केणइ कुमारेण मारेहिइ-त्तिकट्ठु भीए तत्थे
(य) जाव सणियं २ पच्चोस(क्के)कइ २ ता तमेव आसखंधं दुरु(हे)हइ २ ता तेय-
लिपुरं मज्झंमज्झेणं जेणेव सए गिहे तेणेव पहारेत्थ गमणाए । तए णं तेयलिपुत्तं
जे जहा ईसर जाव पासंति ते तहा नो आढायंति नो परियाणंति नो अब्भुट्ठेति
नो अंज(लि)लिं० इट्ठा(हिं)इं जाव नो संलवंति नो पुरओ य पिट्ठओ य पासओ
(य मग्गओ य)समणुगच्छंति । तए णं तेयलिपुत्ते जेणेव सए गिहे तेणेव उवाग-
(च्छइ)ए । जा वि य से तत्थ वाहिरिया परिसा भवइ तंजहा-दासेइ वा पेसेइ वा
भाइल्लएइ वा सा वि य णं नो आढाइ ३ । जा वि य से अब्भितरिया परिसा भवइ
तंजहा-पियाइ वा मायाइ वा जाव सुण्हाइ वा सा वि य णं नो आढाइ ३ । तए
णं से तेयलिपुत्ते जेणेव वासघरे जेणेव (सए) सयणिजे तेणेव उवागच्छइ २ ता
सयणिजंसि निसीयइ २ ता एवं वयासी-एवं खलु अहं सयाओ गिहाओ निग्गच्छामि
तं चेव जाव अब्भितरिया परिसा नो आढाइ नो परियाणाइ नो अब्भुट्ठेइ । तं
सेयं खलु मम अप्पाणं जीवियाओ ववरोवित्तए-त्तिकट्ठु एवं संपेहेइ २ ता तालउडं
विसं आसगंसि पक्खिवइ, से (य विसे) नो संकमइ । तए णं से तेयलिपुत्ते [अमच्चे]
नीलुप्पल जाव असिं खं(धे)धंसि ओहरइ, तत्थ वि य से धारा ओपल्ला । तए णं से
तेयलिपुत्ते जेणेव असोगवणिया तेणेव उवागच्छइ २ ता पासगं गीवाए बंधइ २ ता
रुक्खं दुरुहइ २ ता पा(सं)सगं रुक्खे बंधइ २ ता अप्पाणं मुयइ, तत्थ वि य से
रज्जू छिन्ना । तए णं से तेयलिपुत्ते महइमहा(ल)लियं सिलं गीवाए बंधइ २ ता
अत्थाहमतारमपोरि(सि)सीयंसि उदगंसि अप्पाणं मुयइ, तत्थ वि से थाहे जाए ।
तए णं से तेयलिपुत्ते सुक्कंसि तणकूडंसि अगणिकायं पक्खिवइ २ ता अप्पाणं मुयइ,
तत्थ वि य से अगणिकाए विज्जाए । तए णं से तेयलिपुत्ते एवं वयासी-सद्धेयं
खलु भो समणा वयंति, सद्धेयं खलु भो माहणा वयंति, सद्धेयं खलु भो समणा
माहणा वयंति, अहं एगो असद्धेयं वयामि, एवं खलु अहं सह पुत्तेहिं अपुत्ते, को
मेदं सदहिस्सइ ? सह मित्तेहिं अमित्ते, को मेदं सदहिस्सइ ? एवं अत्थेणं दारेणं
दासेहिं [पेसेहि] परिजणेणं । एवं खलु तेयलिपुत्तेणं अमच्चेणं कणगज्झएणं रत्ता अव-
ज्झाएणं समाणेणं तालपुडगे विसे आसगंसि पक्खित्ते, से वि य नो (सं)कमइ,
को मेयं सदहिस्सइ ? तेयलिपुत्ते नीलुप्पल जाव खंधंसि ओहरिए, तत्थ वि य से
धारा ओपल्ला, को मेदं सदहिस्सइ ? तेयलिपु(त्तस्स)त्ते पासगं गीवाए बंधं(धे)धित्ता
जाव रज्जू छिन्ना, को मे(दं)यं सदहिस्सइ ? तेयलिपुत्ते महा(सिल)लियं जाव बंधित्ता

अत्थाह जाव उदगंसि अप्पा[णं] मुक्के, तत्थ वि य णं थाहे जाए, को मेयं सह-
हिस्सइ ? तेयलिपुत्ते सुक्कंसि तणकूडे अग्गी विज्जाए, को मेयं सहहिस्सइ ?—ओह-
यमणसंक्रप्पे जाव झिया[य]इ । तए णं से पोट्टिले देवे पोट्टिलाह्वं विउव्वइ २ ता
तेयलिपुत्तस्स अदूरसामंते ठिच्चा एवं वयासी—हं भो तेयलिपुत्ता ! पुरओ पवाए
पिट्ठओ हत्थिभयं दुहओ अचक्खुफासे मज्झे सराणि पतं(वरिसयं)ति, गामे पलित्ते
रत्ते झियाइ रत्ते पलित्ते गामे झियाइ, आउसो (।) तेयलिपुत्ता ! कओ वयामो ? । तए
णं से तेयलिपुत्ते पोट्टिलं एवं वयासी—भीयस्स खलु भो ! पव्वज्जा सरणं, उक्कं(ठि)-
ट्टियस्स सदेसगमणं छुहियस्स अन्नं तिसियस्स पाणं आउरस्स मेसज्जं माइयस्स
रहस्सं अभिजुत्तस्स पच्चयकरणं अद्दाणपरिसंतस्स वाहणगमणं तरिउकामस्स पव-
ह(णं)णकिच्चं परं अभिओजिउकामस्स सहायकिच्चं, खंतस्स दंतस्स जिइंदियस्स
एत्तो एगमवि न भवइ । तए णं से पोट्टिले देवे तेयलिपुत्तं अमच्चं एवं वयासी—
सुट्ठु णं तुमं तेयलिपुत्ता ! एयमट्ठं आया(णि)णहि—त्तिकट्ठु दोच्चंपि [तच्चंपि] एवं वयइ
२ ता जामेव दि(सं)सिं पाउव्वूए तामेव दिसिं पडिगए ॥ १०८ ॥ तए णं तस्स
तेयलिपुत्तस्स सुमेणं परिणामेणं जाईसरणे समुप्पन्ने । तए णं (तस्स) तेयलिपुत्तस्स
अयमेयारूवे अज्झत्थिए ० समुप्पन्ने—एवं खलु अहं इहेव जंजुहीवे २ महाविदेहे
चासे पोक्खलावईविजए पोड(री)रिगिणीए रायहाणीए महापउमे नामं राया
होत्था । तए णं (अ)हं थेराणं अंतिए मुंडे भावित्ता जाव चोहस—पुव्वाइ (०) बहूणि
चासाणि सामण्णपरिया(ए)गं पाउणित्ता मासियाए संलेहणाए महासुक्के कप्पे देवे
(उववत्ते) । तए णं हं ताओ देवलोगाओ आउक्खएणं [भवक्खएणं ठिइक्खएणं
अणंतरं चयं चइत्ता] इहेव तेयलिपुरे तेयलिस्स अमच्चस्स भद्दाए भारियाए दार-
गत्ताए पच्चायाए । तं सेयं खलु मम पुव्वदिट्ठाइं महव्वयाइं सयमेव उवसंपजित्ताणं
विहरित्तए । एवं संपेहेइ २ ता सयमेव महव्वयाइं आरुहेइ २ ता जेणेव पमय-
वणे उज्जाणे तेणेव उवागच्छइ २ ता असोगवरपायवस्स अहे पुढाविसिलापट्टयंति
सुहनिसण्णस्स अणुच्चितेमाणस्स पुव्वाहीयाइं सामाइयमाइयाइं चोहसपुव्वाइं सय-
मेव अभिसमन्नागयाइं । तए णं तस्स तेयलिपुत्तस्स अणगारस्स सुमेणं परिणा-
मेणं जाव तयावरणिज्जाणं कम्ममाणं खओवसमेणं कम्मरयविकरणकरं अपुव्वकरणं
पविट्ठस्स केवलवरनाणदंसणे समुप्पन्ने ॥ १०९ ॥ तए णं तेयलिपुरे नयरे अहास-
न्निहिएहिं वाणमंतरेहिं देवेहिं देवीहि य देवदुंदु(भी)हीओ समाहयाओ दसद्धवण्णे
कुसुमे निवाइए दिव्वे गीयगंधव्वनिनाए कए यावि होत्था । तए णं से कणगज्जाए
राया इमीसे कहाए लद्धे समाने एवं वयासी—एवं खलु तेय(लिं)लिपुत्ते मए अव-

उज्जाए मुंडे भविता पव्वइए तं गच्छामि णं तेयलिपुत्तं अणगारं वंदामि नमंसांमि
 वं० २ ता एयमट्ठं विणएणं भुज्जो २ खामेमि । एवं संपेहेइ २ ता ण्हाए चाउरंगि-
 णीए सेणाए जेणेव पमयवणे उज्जाणे जेणेव तेयलिपुत्ते अणगारे तेणेव उवागच्छइ
 २ ता तेयलिपुत्तं (अणगारं) वंदइ नमंसइ वं० २ ता एयमट्ठं च [णं] विणएणं भुज्जो
 २ खामेइ [२] नचासन्ने जाव पज्जुवासइ । तए णं से तेयलिपुत्ते अणगारे कणगज्झ-
 यस्स रत्तो तीसे य महइमहालियाए परिसाए धम्मं परिकहेइ । तए णं से कणग-
 ज्जए राया तेयलिपुत्तस्स केवलस्स अंतिए धम्मं सोच्चा निसम्म पंचाणुव्वइयं
 सत्तसिक्खावइयं सावगधम्मं पडिवज्जइ २ ता समणोवासए जाए जाव अ(हि)भि-
 गयजीवाजीवे । तए णं तेयलिपुत्ते केवली बहूणि वासाणि केवलिपरियागं पाउणित्ता
 जाव सिद्धे । एवं खलु जंबू ! समणेणं भगवया महावीरेणं जाव संपत्तेणं चोइस-
 मस्स नायज्जयणस्स अयमट्ठे पन्नत्ते त्तिवेमि ॥ ११० ॥ गाहा-जाव न दुक्खं
 पत्ता माणव्भंसं च पाणिणो पायं । ताव न धम्मं गेण्हंति भावओ तेयलिसुउव्व
 ॥ १ ॥ चोइ(चउद)समं नाय(अ)ज्जयणं समत्तं ॥

जइ णं भंते ! समणेणं० चोइसमस्स नायज्जयणस्स अयमट्ठे पन्नत्ते पन्नरसमस्स
 णं (०) के अट्ठे पन्नत्ते ? एवं खलु जंबू ! तेणं कालेणं तेणं समएणं चंपा ना(मं)म
 नयरी होत्था पुण्णभेदे उज्जाणे जियसत्त राया । तत्थ णं चंपाए नयरीए ध(ण)णे
 नामं सत्थवाहे होत्था अट्ठे जाव अपरिभूए । तीसे णं चंपाए नयरीए उत्तरपुरत्थिमे
 दि(सि)सीभाए अहिच्छत्ता ना(मं)मं नयरी होत्था रिद्धत्थिमियसमिद्धा वण्णओ ।
 तत्थ णं अहिच्छत्ताए नयरीए कणगकेऊ नामं राया होत्था (महया) वण्णओ ।
 [तए णं] तस्स ध(ण)णस्स सत्थवाहस्स अन्नया कयाइ पुव्वरत्तावरत्तकालसमयंसि
 इमेयारूवे अज्झत्थिए चित्तिए पत्थिए मणोगए संकप्पे समुप्पज्जित्था-सेयं खलु
 मम विपुलं पणियभंडमायाए अहिच्छत्तं न(गरं)यरिं वाणिज्जाए गमित्तए । एवं संपे-
 हेइ २ ता गणिमं च ४ चउव्विहं भंडं गेण्हइ-(०) सगडीसागडं सज्जेइ २ ता
 सगडीसागडं भरेइ २ ता कोडुंवियपुरिसे सद्दावेइ २ ता एवं वयासी-गच्छह णं
 तुव्वे देवाणुप्पिया । चंपाए नयरीए सिंघाडग जाव पहे(सुं)सु [एवं वयह—] एवं
 खलु देवाणुप्पिया । धणे सत्थवाहे विपु(ले)लं पणि(य०)यं [आदाय] इच्छइ अहि-
 च्छत्तं नयरिं वाणिज्जाए गमित्तए । तं जो णं देवाणुप्पिया । चरए वा चीरिए वा चम्म-
 खंडिए वा भिच्छुंडे वा पं(डु)डरगे वा गोयमे वा गोव(ती)त्तिए वा (गिहिधम्मे वा)
 गिहिधम्मच्चित्तए वा अवरुद्धविरुद्धबुद्धसावगरत्तपडनिगंथप्पभिइपासंडत्थे वा गिहत्थे
 वा (तस्स णं) ध(ण)णेणं सद्धिं अहिच्छत्तं नयरिं गच्छइ तस्स णं धणे अच्छत्तगरस्स

छत्तगं दलाइ अणुवाहणस्स ओ(उ)वाहणा(उ)ओ दलयइ अकुंठियस्स कुंठियं दल-
यइ अपत्थयणस्स पत्थयणं दलयइ अपक्खेवगस्स पक्खेवं दलयइ अंतरा वि य से
पडियस्स वा भग्गलुग्ग[स्स] साहेजं दलयइ सुहंसुहेण य (णं) अदिच्छत्तं संपावेइ-
त्तिकट्टु दोच्चंपि तच्चंपि [घोसणं] घोसेह २ ता मम एयमाणत्तियं पच्चाप्पिगह । तए णं
ते कोटुंवियपुरिसा जाव एवं वयासी-हंदि सुणंतु भगवंतो चंपानयरीवत्थच्चा बहवे
चरगा (य) जाव पच्चप्पिणंति । तए णं (से) तेसिं कोटुंविय(घोस)पुरिसाणं [अंतिए
एयमट्ठं] सो(सु)च्चा चंपाए नयरीए वहवे चरगा य जाव गिहत्था य जेणेव धणे सत्थ-
वाहे तेणेव उवागच्छंति । तए णं धणे [सत्थवाहे] तेसिं चरगाण य जाव गिहत्थाण
य अच्छत्तगस्स छत्तं दलयइ जाव पत्थयणं दलाइ-गच्छह णं तुच्चे देवाणुप्पिया ।
चंपाए नयरीए वहिया अग्गुज्जाणंसि ममं पडिवालेमाणा चिट्ठह । तए णं [ते] चरगा
य० धणेणं सत्थवाहेणं एवं वुत्ता समाणा जाव चिट्ठंति । तए णं धणे सत्थवाहे
सोहणंसि तिहिकरणनक्खत्तंसि विउलं असगं ४ उवक्खडावेइ २ ता मित्ता(इ)इ
आमंतेइ २ ता भोयणं भोयावेइ २ ता आपुच्छड २ ता सगढीसागडं जोयावेइ २
ता चंपा[ओ] नयरीओ निग्गच्छइ (०) नाइविप्पगिट्ठेहिं अद्धाणेहिं वसमाणे २ सुहेहिं
वसहिपायरासेहि अंगं जणवयं मज्झमज्जेणं जेणेव देसगं तेणेव उवागच्छइ २
ता सगढीसागडं मोयावेइ (०) सत्थनिवेसं करेइ २ ता कोटुंवियपुरिसे सदावेइ २
ता एवं वयासी-तुच्चे णं देवाणुप्पिया । मम सत्थनिवेसंसि महया २ महेणं उग्घो-
सेमाणा २ एवं वयह-एवं खलु देवाणुप्पिया ! इमीसे आगामियाए छिन्नावायाए
दीहमद्धाए अडवीए बहुमज्जदेसभाए [एत्थ णं] वहवे नंदिफला नामं स्क्खा पक्कता
किण्हा जाव पत्तिया पुप्फिया फलिया हरिया रेरेज्जमाणा सिरीए अईव २ उवन्नो-
भेमाणा चिट्ठंति मणुत्ता वण्णेणं [४] जाव मणुत्ता फासेणं मणुत्ता छायाए । तं जो णं
देवाणुप्पिया ! तेसिं नंदिफलाणं स्क्खाणं मूलाणि वा कंद(०)तयपत्तपुप्फफलवी-
याणि वा हरियाणि वा आहारेइ छायाए वा वीसमइ तस्स णं आवाए भट्टए भवइ
तओ पच्छा परिणममाणा २ अंकाले चेव जीवियाओ ववरोवे(न्ति)इ । तं मा णं
देवाणुप्पिया ! केइ तेसिं नंदिफलाणं मूलाणि वा जाव छायाए वा वीसमउ मा णं
से(ऽ)वि अंकाले चेव जीवियाओ ववरोविजिस्सइ । तुच्चे णं देवाणुप्पिया ! अत्तेसिं
स्क्खाणं मूलाणि य जाव हरियाणि य आहारे(य)ह छायाए वीसमह ति घोसणं
घोसेह जाव पच्चप्पिणंति । तए णं धणे सत्थवाहे सगढीसागडं जोएइ २ ता जेणेव
नंदिफला स्क्खा तेणेव उवागच्छइ २ ता तेसिं नंदिफलाणं अदूरसामंते सत्थनिवेसं
करेइ २ ता दोच्चंपि तच्चंपि कोटुंवियपुरिसे-सदावेइ २ ता एवं वयासी-तुच्चे णं

देवाणुप्पिया ! मम सत्थनिवेसंसि महया [२] सद्देणं उग्घोसेमाणा २ एवं वयह-एए
 णं देवाणुप्पिया ! ते नंदिफला [रुक्खा] किण्हा जाव मणुन्ना छायाए । तं जो णं
 देवाणुप्पिया ! एएसि नंदिफलाणं रुक्खाणं मूलाणि वा कंद(०)पुप्फतयापत्तफलाणि
 जाव अकाले चेव जीवियाओ ववरोवेइ । तं मा णं तुब्भे जाव (दूरं दूरेणं परिहर-
 माणा) वीसमह मा णं अकाले [चेव] जीवियाओ ववरोविस्संति अन्नेसि रुक्खाणं
 मूलाणि य जाव वीसमह-त्तिकट्टु घोसणं [जाव] पच्चप्पिणंति । तत्थ णं अत्थेगइया
 पुरिसा धणस्स सत्थवाहस्स एयमट्ठं सद्दहंति जाव रोयंति एयमट्ठं सद्दहमाणा तेसिं
 नंदिफलाणं दूरंदूरेणं परिहरमाणा २ अन्नेसिं रुक्खाणं मूलाणि य जाव वीसमंति ।
 तेसि णं आवाए नो भद्दए भवइ तओ पच्छा परिणममाणा २ सु(ह)भरूवत्ताए ५
 भुज्जो २ परिणमंति । एवामेव समणाउसो ! जो अम्हं निग्गंथो वा २ जाव पंचसु
 कामगुणेषु नो स(ज्जे)जइ (नो रज्जेइ) से णं इहभवे चेव बहूणं समणाणं ४ अच-
 णिज्जे परलोए नो आगच्छइ जाव वीईवइस्सइ । तत्थ णं (जे से) अप्पेगइया
 पुरिसा धणस्स एयमट्ठं नो सद्दहंति ३ धणस्स एयमट्ठं असद्दहमाणा ३ जेणेव ते
 नंदिफला तेणेव उवागच्छंति २ ता तेसिं नंदिफलाणं मूलाणि य जाव वीसमंति
 तेसि णं आवाए भद्दए भवइ तओ पच्छा परिणममाणा जाव ववरोवेति । एवामेव
 समणाउसो ! जो अम्हं निग्गंथो वा २ पव्वइए पंचसु कामगुणेषु सज्जइ जाव अणु-
 परियट्ठिस्सइ जहा व ते पुरिसा । तए णं से धणे सगडीसागडं जोयावेइ २ ता
 जेणेव अहिच्छत्ता नयरी तेणेव उवागच्छइ २ ता अहिच्छत्ताए नयरीए वहिया
 अग्गुज्जाणे सत्थनिवेसं करेइ २ ता सगडीसागडं मोयावेइ । तए णं से धणे सत्थ-
 वाहे महत्थं ३ रायारिहं पाहुडं गेण्हइ २ ता बहुपुरिसेहिं सद्धिं संपरिवुडे अहि-
 च्छत्तं नय(रं)रिं मज्झंमज्जेणं अणुप्पविसइ २ ता जेणेव कणगकेऊ राया तेणेव
 उवागच्छइ २ ता करयल जाव वद्धावेइ २ ता तं महत्थं ३ पाहुडं उवणेइ । तए णं
 से कणगकेऊ राया हट्ठु(ट्ठ०)ट्ठे धणस्स सत्थवाहस्स तं महत्थं (३) जाव पडिच्छइ
 २ ता ध(णं)णं सत्थवाहं सक्कारेइ सम्माणेइ स० २ ता उस्सुकं वियरइ २ ता पडि-
 विसज्जेइ [२] भंडविणिमयं करेइ २ ता पडिभंडं गेण्हइ २ ता सुहंसुहेणं जेणेव चंपा
 नयरी तेणेव उवागच्छइ २ ता मित्तनाइअभिसमन्नागए विपुलाइं माणुस्सगाइं जाव
 विहरइ । तेणं कालेणं तेणं समएणं थेरागमणं ध० धम्मं सोच्चा जेट्ठपुत्तं कुडुंवे
 ठावेत्ता [जाव] पव्वइए सामा[इयमा]इयाइं एक्कारस अंगाइं वट्ठणि वासाणि जाव
 मासियाए (सं०) जाव अन्नयरेसु देवलोएसु देवत्ताए उववन्ने (से णं देवे ताओ देव-
 लोगाओ आउक्ख० चयं चइत्ता) महाविदेहे वासे सिज्झिहिइ जाव अंतं करेहिइ ।

एवं खलु जंवू ! समणेणं जाव संपत्तेणं पन्नरस[म]स्स नायज्जयणस्स अयमट्ठे पन्नत्ते
 त्तिवेमि ॥ १११ ॥ **गाहाओ**-चंपा इव मणुयगई धणो व्व भयवं जिणो दएकरसो ।
 अहिच्छतानयरिसमं इह निव्वाणं मुणेयव्वं ॥ १ ॥ घोसणया इव तित्थंकरस्स सिक्क-
 मग्गदेसणमहरघं । चरगाइणोव्व इत्थं सिवसुहकामा जिया वहवे ॥ २ ॥ नंदिफलाइ
 व्व इहं सिवपहपडिवण्णगाण विसया उ । तव्वक्खणाओ मरणं जह तह विसएहिं
 संसारो ॥ ३ ॥ तव्वज्जणेण जह इट्ठपुरगमो विसयवज्जणेण तहा । परमानंदनिव्व-
 णसिवपुरगमणं मुणेयव्वं ॥ ४ ॥ **पन्नरसमं नायज्जयणं समत्तं ॥**

जइ णं भंते ! समणेणं ३ जाव संपत्तेणं पन्नरसमस्स नायज्जयणस्स अयमट्ठे
 पन्नत्ते सोलसमस्स णं भंते ! नायज्जयणस्स (०) के अट्ठे पन्नत्ते ? एवं खलु जंवू !
 तेणं कालेणं तेणं समएणं चंपा नामं नयरी होत्था । तीसे णं चंपाए नयरीए वहिया
 उत्तरपुरत्थिमे दिसीभाए सुभूमिभागे नामं उज्जाणे होत्था । तत्थ णं चंपाए नयरीए
 तओ माहणा भायरो परिवसंति तंजहा-सोमे सोमदत्ते सोमभूई अट्ठा जाव [अपरि-
 भूया] रिउव्वेयजउव्वेयसामवेयअथव्वणवेय जाव सुपरिनिट्ठिया । ते(सि णं)सि
 माहणाणं तओ भारियाओ होत्था तंजहा-नागसिरी भूयसिरी जक्खसिरी सुकुमा-
 (ल)ला जाव तेसि णं माहणाणं इट्ठाओ वि(पु)उले माणुस्सए जाव विहरंति । तए णं
 तेसि माहणाणं अन्नया कयाइ एगयओ समुवागयाणं जाव इमेयारुवे मिहोकहासमु-
 ल्लावे समुप्पजित्था-एवं खलु देवाणुप्पिया ! अम्हं इमे विउले धणे जाव सावएज्जे
 अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं ।
 तं सेयं खलु अम्हं देवाणुप्पिया ! अन्नमन्नस्स गिहेसु कल्लकल्लिं विपुलं अस(णं)णपा-
 (णं)णखाइ(मं)मसाइमं उवक्खडेउं (२) परिभुं(ज)जेमाणाणं विहरित्तए । अन्नम-
 न्नस्स एयमट्ठं पडिसुणेंति कल्लकल्लिं अन्नमन्नस्स गिहेसु विपुलं असणं ४ उवक्खडा-
 वैति २ ता परिभुंजेमाणा विहरंति । तए णं तीसे नागसिरीए माहणीए अन्नया
 [कयाइ] भोयणवारए जाए यावि होत्था । तए णं सा नागसिरी [माहणी] विपुलं
 असणं ४ उवक्ख(डे)डावेइ २ ता एणं महं सालइयं ति(त्ता)तलाउ(अं)यं बहुसंभार-
 संजुतं नेहावगाढं उवक्खडावेइ एणं विंदुयं करयलंसि आसाएइ [२] तं खारं कडुयं
 अखज्जं (अभोज्जं) विस(व)भूयं जाणित्ता एवं वयासी-धिरत्थु णं मम नागसिरीए
 अ(ह)धन्नाए अपुण्णाए दूभगाए दूभगसत्ताए दूभगनिवोलियाए जा(जी)ए णं मए
 सालइए बहुसंभारसंभिए नेहावगाढे उवक्खडिए सुवहुदव्वक्खए(णं) नेहक्खए य
 कए । तं जइ णं ममं जाउयाओ जाणिस्संति तो णं मम खिसिस्संति । तं जाव-ताद
 ममं जाउयाओ न जाणंति ताव ममं सेयं एयं सालइयं ति(त्ता)तलाउ[यं] बहुसंभार-

नेहकयं एगंते गो(वे)वित्तए अन्नं सालइयं महु(रा)रलाउयं जाव नेहावगाढं उव-
 क्ख(डे)डित्तए । एवं संपेहेइ २ ता तं सालइयं जाव गोवेइ [२] अन्नं सालइयं महु-
 लाउयं उवक्खडेइ [२] तेसिं माहणाणं ण्हायाणं सुहासणवरगयाणं तं विपुलं असणं
 ४ परिवेसेइ । तए णं ते माहणा जिमियभुत्तुत्तरागया समाणा आयंता चोक्खा परम-
 सुइभूया सकम्मसंपउत्ता जाया यावि होत्था । तए णं ताओ माहणीओ ण्हायाओ
 सव्वालंकारविभूसियाओ तं विपुलं असणं ४ आहारेंति २ ता जेणेव सयाइं २ गि(गे)-
 हाइं तेणेव उवागच्छंति २ ता सकम्मसंपउत्ताओ जायाओ ॥ ११२ ॥ तेणं कालेणं
 तेणं समएणं धम्मघोसा ना(म)मं थेरा जाव बहुपरिवारा जेणेव चंपा (नामं) नयरी
 जेणेव सुभूमिभागे उज्जाणे तेणेव उवागच्छंति २ ता अहापडिह्वं जाव विहरंति ।
 परिसा निग्गया धम्मो कहिओ परिसा पडिगया । तए णं तेसिं धम्मघोसाणं थेराणं
 अंतेवासी धम्मरुई नामं अणगारे उ(ओ)राळे जाव ते(उ)यळेस्से मासंमासेणं खम-
 माणे विहरइ । तए णं से धम्मरुई अणगारे मासखमणपारणगंसि पढमाए पोरिसीए
 सज्जायं करेइ २ ता वीयाए पोरिसीए एवं जहा गोयमसामी तहेव उग्गाहेइ २ ता
 तहेव धम्मघोसं थेरं आपुच्छइ जाव चंपाए नयरीए उच्चनीयमज्झिमकुलाइं जाव
 अढमाणे जेणेव नागसिरीए माहणीए गिहे तेणेव अणुपविट्ठे । तए णं सा नाग-
 सिरी माहणी धम्मरुई एजमाणं पासइ २ ता तस्स सालइयस्स तित्तकडुयस्स बहु-
 (०)नेहावगाढस्स एड(निसिर)णट्टयाए हट्टतुट्ठा [उट्ठाए] उट्टेइ २ ता जेणेव भत्तघरे
 तेणेव उवागच्छइ २ ता तं सालइयं तित्तकडुयं च बहुने(हं)हावगाढं धम्मरुइस्स
 अणगारस्स पडिग्गहंसि सव्वमेव नि(सि)रिसरइ । तए णं से धम्मरुई अणगारे अहा-
 पज्जत्तमितिकट्टु नागसिरीए माहणीए गिहाओ पडिनिक्खमइ २ ता चंपाए नयरीए
 मज्झिमज्जेणं पडिनिक्खमइ २ ता जेणेव सुभूमिभागे उज्जाणे तेणेव उवागच्छइ २
 ता [जेणेव धम्मघोसा थेरा तेणेव उवागच्छइ २] धम्मघोसस्स अदूरसामंते अन्न-
 पाणं पडि(दंसे)लेहेइ २ ता अन्नपाणं करयलंसि पडिदंसेइ । तए णं (ते) धम्मघोसा
 थेरा तस्स सालइयस्स नेहावगाढस्स गंधेणं अभिभूया समाणा तओ सालइयाओ
 नेहावगाढाओ एगं विंदु(गं)यं गहाय करयलंसि आसा(दे)दित्ति ति(त्तगं)त्तं खारं
 कडुयं अखज्जं अभोज्जं विसभूयं जाणित्ता धम्मरुई अणगारं एवं वयासी-जइ णं तुमं
 देवाणुप्पिया ! एयं सालइयं जाव नेहावगाढं आहारेसि तो णं तुमं अकाले चेव जीवि-
 याओ ववरोविज्जंसि । तं मा णं तुमं देवाणुप्पिया ! इमं सालइयं जाव आहारेसि मा णं
 तुमं अकाले चेव जीवियाओ ववरोविज्जसि । तं गच्छ[ह] णं तुमं देवाणुप्पिया ! इमं
 सालइयं एगंतमणावाए अ(च्चि)चित्ते थंडि(ले)ले परिट्टवेहि २ ता अन्नं फासुयं एस-

णिज्जं असणं ४ पडिगाहेत्ता आहारं आहारेहि । तए णं से धम्मरुइ अणगारे धम्म-
घोसेणं थेरेणं एवं वुत्ते समाणे धम्मघोसस्स थेरस्स अंतियाओ पडिनिक्खमइ २ ता
सुभूमिभा(ग)गाओ उज्जाणाओ अदूरसामंते थंडिल्लं पडिलेहेइ २ ता ता(त)ओ साल-
इयाओ एगं विंदुगं ग(हेइ)हाय २ थंडि(लं)ल्लंसि निसिरइ । तए णं तस्स सालइयस्स
तित्तकडुयस्स बहुनेहावगाढस्स गंधेणं वहुणि पिपीलिगासहस्साणि पाउवभू० जा
जहा य णं पिपीलिगा आहारेइ सा [णं] तहा अकाले चेव जीवियाओ ववरोविज्जइ ।
तए णं तस्स धम्मरुइस्स अणगारस्स इमेयारुवे अज्झत्थिए०-जइ ताव इमस्स
सालइयस्स जाव एगंमि विंदु(गं)यंमि पक्खित्तंमि अणेगाइं पिपीलि(का)गासहस्ताइं
ववरोविज्जंति तं जइ णं अहं एयं सालइयं थंडिल्लंसि सव्वं निसिरामि (तए) तो णं
वहुणं पाणाणं ४ वहकरणं भविस्सइ । तं सेयं खलु मम एयं सालइयं जाव [नेहाव]-
गाढं सयमेव आहा(रे)रित्तए मम चेव एएणं सरी(रे)रणं निजाड-त्तिकट्टु एवं
संपेहेइ २ ता मुहपोत्तियं [२] पडिलेहेइ २ ता ससीसोवरियं कायं पमजेइ २ ता तं
सालइयं तित्तकडुयं बहुनेहावगाढं विलमिव पन्नगभूएणं अप्पा(णे)णएणं सव्वं सरी-
रको(ट्ठं)ट्ठगंसि पक्खिवइ । तए णं तस्स धम्मरुइ[य]स्स तं सालइयं जाव नेहावगाढं
आहारियस्स समाणस्स मुहुत्तंतरेणं परिणममाणंसि सरीरगंसि वेयणा पाउवभूया
उज्जला जाव दुरहियासा । तए णं से धम्मरु(ची)ई अणगारे अथामे अवले अवीरिए
अपुरिसक्कारपरक्कमे अधारणिज्जमित्तिकट्टु आयारभंडगं एगंते ठा(ठ)वेइ २ ता थंडिल्लं
पडिलेहेइ २ ता दब्भसंथारगं संथारेइ २ ता दब्भसंथारगं दुरुहइ २ ता पुरत्था-
भिमुहे संपलियंक्रनिसण्णे करयलपरिग्गहियं एवं वयासी-नमोत्थु णं अरहंताणं जाव
संपत्ताणं नमोत्थु णं धम्मघोसाणं थेराणं मम धम्मायरियाणं [मम] धम्मोवएसगाणं
पुर्व्वि पि णं मए धम्मघोसाणं थेराणं अंतिए सव्वे पाणाइवाए पच्चक्खाए जावजी-
वाए जाव परिग्गहे इयाणि पि णं अहं तेसिं चेव भगवंताणं अंति(यं)ए सव्वं
पाणाइवायं पच्चक्खामि जाव परिग्गहं पच्चक्खामि जाव(जी)जीवाए जहा खंदओ
जाव चरिमेहिं उस्सासेहिं वोसिरामि-त्तिकट्टु आलोइयपडिकंते समाहिपत्ते कालगए ।
तए णं ते धम्मघोसा थेरा धम्मरुइं अणगारं चि(रं)रगयं जाणित्ता समणे निग्गंथे
सद्दवेंति २ ता एवं वयासी-एवं खलु देवाणुप्पिया ! धम्मरुइस्स अणगारस्स मास-
[क्]खमणपारणगंसि सालइयस्स जाव [नेहाव]गाढस्स निसिरणट्ठयाए वहिया
निग्गए चिरा[वे]इ, तं गच्छह णं तुव्वे देवाणुप्पिया ! धम्मरुइस्स अणगारस्स
सव्वओ समंता मग्गणगवेसणं करेह । तए णं ते समणा निग्गंथा जाव पडिसुणेंति २
ता धम्मघोसाणं थेराणं अंतियाओ पडिनिक्खमंति २ ता धम्मरुइस्स अणगारस्स

सव्वओ समंता मग्गणगवेसणं करेमाणा जेणेव थंडिल्लं तेणेव उवागच्छंति २ ता धम्म-
 रुइयस्स अणगारस्स सरीरगं निप्पाणं निच्चेट्ठं जीवविप्पजडं पांसंति २ ता हा हा [१]
 अहो ! अकज्जमितिकट्टु धम्मरुइस्स अणगारस्स परिनिव्वाणवत्तिथं काउस्सगं करेति
 (०) धम्मरुइस्स आयारभंडगं गेण्हंति २ ता जेणेव धम्मघोसा थेरा तेणेव उवागच्छंति
 २ ता गमणागमणं पडिक्कमंति २ ता एवं वयासी-एवं खलु अम्हे तुब्भं अंतियाओ
 पडिनिक्खमामो २ ता सुभूमिभागस्स उज्जाणस्स परिपेरंतेणं धम्मरुइस्स अणगा-
 रस्स सव्वं जाव करेमा(णे)णा जेणेव थंडिल्ले तेणेव उवागच्छामो (०) जाव इहं
 इव्वमागया, तं कालगए णं भंते ! धम्मरुइ अणगारे इमे से आयारभंडए । तए णं
 (ते) धम्मघोसा थेरा पुव्वगए उवओगं गच्छंति २ ता समणे निग्गंथे निग्गंथीओ अ
 सद्दवेति २ ता एवं वयासी-एवं खलु अज्जो ! मम अंतेवासी धम्मरुइ ना(म)मं अण-
 गारे पगइभद्दए जाव विणीए मासंमासेणं अणिव्वित्तेणं तवोक्कम्मेणं जाव नाग-
 सिरीए माहणीए गि(हे)हं अणुपवि(ट्ठे)सइ । तए णं सा नागसिरी माहणी जाव
 निसिरइ । तए णं से धम्मरुइ अणगारे अहापज्जत्तमि(ति)त्तिकट्टु जाव कालं अणव-
 कंखमाणे विहरइ । से णं धम्मरुइ अणगारे बहूणि वासाणि सामण्णपरियागं पाउणिता
 आलोइयपडिक्कंते समाहिपत्ते कालमासे कालं किच्चा उड्डं सोह(म्म)म्मे जाव सव्वट्ठ-
 सिद्धे महाविमाणे देवत्ताए उववत्ते । तत्थ णं [अत्थेगइयाणं] (अ)जहज्जमणुक्कोसेणं
 तेत्तीसं सागरोवमाइं ठिई पन्नत्ता । तत्थ [णं] धम्मरुइस्स वि देवस्स तेत्तीसं सागरो-
 वमाइं ठिई पन्नत्ता । से णं धम्मरुइ देवे ताओ देवलोगाओ जाव महाविदेहे वासे
 सिज्झिहिइ ॥११३॥ तं धिरत्थु णं अज्जो ! नागसिरीए माहणीए अधन्नाए अपुण्णाए
 जाव निवोलियाए जाए णं तहारुवे साहू [साहुरुवे] धम्मरुइ अणगारे मासक्खमण-
 पारणगंसि सालइएणं जाव गाढेणं अकाले चेव जीवियाओ ववरोविए । तए णं ते
 समणा निग्गंथा धम्मघोसाणं थेराणं अंतिए एयमट्ठं सोच्चा निसम्म चंपाए सिंघाडग
 (तिग) जाव [पहेसु] बहुजणस्स एवमाइक्खंति [४]-धिरत्थु णं देवाणुप्पिया ! नाग-
 सिरीए (माहणीए) जाव निवोलियाए जाए णं तहारुवे साहू साहुरुवे सालइएणं
 जीवियाओ ववरो(वेइ)विए । तए णं तेसिं समणाणं अंतिए एयमट्ठं सोच्चा निसम्म
 बहुजणो अन्नमज्जस्स एवमाइक्खइ एवं भासइ-धिरत्थु णं नागसिरीए माहणीए जाव
 जीवियाओ ववरोविए । तए णं ते माहणा चंपाए नयरीए बहुजणस्स अंतिए एयमट्ठं
 सोच्चा निसम्म आसुरुत्ता जाव मिसिमिसेमाणा जेणेव नागसिरी माहणी तेणेव उवा-
 गच्छंति २ ता नागसि(री)रिं माह(णीं)णिं एवं वयासी-हं भो नागसिरी ! अपत्थियप-
 त्थिए [१] दुरंतपंतलक्खणे [१] हीणपुण्णचाउइसे [१] धिरत्थु णं तव अधन्नाए अपु-

ग्णाए (जाव) निवोलियाए जाए णं तुमे तहारुवे साहु साहुरुवे मासखमणपारणगंसि
 सालइणं जाव ववरोविए उच्चाव(ए)याहिं अक्कोसणाहिं अक्कोसंति उच्चावयाहिं उद्धंस-
 णाहिं उद्धंसंति उच्चावयाहिं निव्व(त्थ)च्छणाहिं निव्व(त्थं)च्छंति उच्चावयाहिं
 निच्छोडणाहिं निच्छोडंति तज्जेति तालेंति त(जि)जिता ता(ले)लित्ता सयाओ गिहाओ
 निच्छुभंति । तए णं सा नागसिरी सयाओ गिहाओ निच्छूढा समाणी चंपाए नयरीए
 सिंघाडगतियचउक्कचचरचउम्मुहमहापहपहेसु बहुजणेणं हीलिजमाणी खिसिजमाणी
 निदिजमाणी गरहिजमाणी तज्जिजमाणी पव्वहिजमाणी धिक्कारिजमाणी थुक्कारिज-
 माणी कत्थइ ठाणं वा निलयं वा अलभमाणी २ दंडीखंडनिवसणा खंडमल्लयखंडघड-
 गहत्थगया फुट्टहडाहडसीसा मच्छियाचडगरेणं अज्जिजमाणमग्गा नि(गे)हं(गे)नि-
 हेणं देहंवलियाए वित्तिं कप्पेमा(णी)गा विहरइ । तए णं तीसे नागसिरीए माहणीए
 तंभवंसि चेव सोलस रोयायंका पाउव्वभूया तंजहा-सासे कासे जोणिसूले जाव कोढे ।
 तए णं सा नागसिरी माहणी सोलसहिं रो(या)गायंकेहिं अभिभूया समाणी अट्टु-
 हंढवसंढा कालमासे कालं किच्चा छट्ठीए पुढवीए उक्को(सेणं)सं वावीससागरोवम(ठि-
 ती)ट्ठिइएसु नेरइ(नर)एसु नेरइयत्ताए उव्वज्जा । सा णं तओ(S)अणंतरं(त्ति) उव्व-
 ट्ठित्ता मच्छेसु उव्वज्जा । तत्थ णं सत्थवज्जा दाहवक्कंतीए कालमासे कालं किच्चा
 अहेसत्त(मी)माए पुढवीए उक्को(साए)स(त्तिती०)सागरोवमट्ठिइएसु [नरएसु] नेरइ-
 एसु उव्वज्जा । सा णं तओ(S)णंतरं उव्वट्ठित्ता दोच्चंपि मच्छेसु उव्वज्जइ । तत्थ वि य
 णं सत्थवज्जा दाहवक्कंतीए दोच्चंपि अहे सत्तमाए पुढवीए उक्को(सं)स(तेत्तीस)साग-
 रोवमट्ठिइएसु नेरइएसु उव्वज्जइ । सा णं तओहितो जाव उव्वट्ठित्ता तच्चंपि मच्छेसु
 उव्वज्जा । तत्थ वि य णं सत्थवज्जा जाव [कालमासे] कालं किच्चा दोच्चंपि छट्ठीए
 पुढवीए उक्कोसेणं (०) । तओणंतरं उव्वट्ठित्ता उरएसु एवं जहा गोसाले तहा नेयव्वं
 जाव रयणप्पभा(ए)ओ [पुढवीओ उव्वट्ठित्ता] स(त्त)नीसु उव्वज्जा । तओ उव्वट्ठित्ता
 जा(व)इं इमाइं खहयरविहाणाइं जाव अटुत्तरं च णं खरवायरपुढविकाइयत्ताए तेसु
 अणेगसयसहस्सखुत्तो ॥ ११४ ॥ सा णं तओणंतरं उव्वट्ठित्ता इहेव जंवुद्दीवे दीवे
 भारहे वासे चंपाए नयरीए सागरदत्तस्स सत्थवाहस्स भद्दाए भारियाए कुच्छिंसि
 दारियत्ताए पच्चायाया । तए णं सा भद्दा-सत्थवाही नवण्हं मासाणं दारियं पयाया
 सुकुमालकोमलियं गयतालुयसमाणं । तीसे [णं] दारियाए निव्व(त्ति)तवारसाहियाए
 अम्मापियरो इमं एयारुवं गोणं गुणनिप्फन्नं नामधेज्जं करेंति-जम्हा णं अम्हं एसा
 दारिया सुकुमाला गयतालुयसमाणा तं होउ णं अम्हं इमीसे दारियाए नामधे(जे)ज्जं
 सुकुमालिया [२] । तए णं तीसे दारियाए अम्मापियरो नामधेज्जं करेंति सुमालि-

यत्ति । तए णं सा सूमालिया दारिया पंचघाईपरिग्गहिया तंजहा-खीरघाईए जाव
गिरिकंदरमल्लीणा इव चंप(क)गलया नि(व)वा(ए)यनिव्वाघायंसि जाव परिवव्वइ ।
तए णं सा सूमालिया दारिया उम्मुक्कवालभावा जाव रुवेण य जोव्वणेण य लाव-
ण्णेण य उक्किट्ठा उक्किट्ठसरीरा जाया यावि होत्था ॥ ११५ ॥ तत्थ णं चंपाए नयरीए
जिणदत्ते ना(म)मं सत्थवाहे अट्ठे(०) । तस्स णं जिणदत्तस्स भद्दा भारिया सूमाला
इट्ठा (जाव) माणुस्सए कामभो(ए)गे पंचणुब्भवमाणा विहरइ । तस्स णं जिणदत्तस्स
पुत्ते भद्दाए भारियाए अत्तए सागरए नामं दारए सुकुमाले जाव सुरुवे । तए णं से जिण-
दत्ते सत्थवाहे अनया कयाइ सयाओ गिहाओ पडिनिक्खमइ २ ता सागरदत्तस्स
सत्थवाह(गिह)स्स अदूरसामंतेणं वीईवयइ । इमं च णं सूमालिया दारिया ण्हाया
चैडियासंघपरिवुडा उप्पि आगासतलगंसि कणग(तें)तिंदूसएणं कीलमाणी (२)
विहरइ । तए णं से जिणदत्ते सत्थवाहे सूमालियं दारियं पासइ २ ता सूमालियाए
दारियाए रुवे य ३ जायविम्हए कोडुंबियपुरिसे सदावेइ २ ता एवं वयासी-एस णं
देवाणुप्पिया ! कस्स दारिया किं वा नामधेज्जं से ? । तए णं ते कोडुंबियपुरिसा जिण-
दत्तेणं सत्थवाहेणं एवं वुत्ता समाणा ह० करयल जाव एवं वयासी-एस णं (देवा-
णुप्पिया !) सागरदत्तरस २ धूया भद्दाए अत्तया सूमालिया ना(म)मं दारिया सुकुमा-
लपाणिपाया जाव उक्किट्ठा । तए णं (से) जिणदत्ते सत्थवाहे तेसि कोडुंबियाणं अंतिए
एयमट्ठं सोच्चा जेणेव सए गिहे तेणेव उवागच्छइ २ ता ण्हाए स० मित्तनाइपरिवुडे चंपाए
नयरीए मज्झमज्झेणं जेणेव सागरदत्तस्स गिहे तेणेव उवाग(च्छइ)ए । तए णं [से]
सागरदत्ते २ जिणदत्तं २ एज्जमाणं पासइ २ ता आसणाओ अब्भुट्ठेइ २ ता आस-
णेणं उवनिमंतेइ २ ता आसत्थं वीसत्थं सुहासणवरगयं एवं वयासी-भण देवाणु-
प्पिया ! किमागमणपओयणं (?) । तए णं से जिणदत्ते (सत्थवाहे) सागरदत्तं (सत्थ-
वाहं) एवं वयासी-एवं खलु अहं देवाणुप्पिया ! तव धूर्यं भद्दाए अत्तिर्यं सूमालियं
सागरस्स भारियत्ताए वरेमि । जइ णं जाणह देवाणुप्पिया ! जुत्तं वा पत्तं वा सला-
हणिज्जं वा सरिसो वा संजोगो ता दिज्जउ णं सूमालिया सागर[दारग]स्स । तए णं
देवाणुप्पिया ! किं दलयामो सुंक्कं [च] सूमालियाए ? । तए णं से सागरदत्ते (तें) २
जिणदत्तं [२] एवं वयासी-एवं खलु देवाणुप्पिया ! सूमालिया दारिया (मम) एगा
एगजाया इट्ठा [५] जाव किमंग पुण पासण्याए । तं नो खलु अहं इच्छामि सूमा-
लियाए दारियाए खणमवि विप्पओगं । तं जइ णं देवाणुप्पिया ! सागर[ए] दारए
मम घरजामाउए भवइ तो णं अहं सागर(स्स)दारगस्स सूमालियं दलयामि । तए
णं से जिणदत्ते २ सागरदत्तेणं २ एवं वुत्ते समाणे जेणेव सए गिहे तेणेव उवाग-

च्छइ २ ता सागरदारगं सद्वावेइ २ ता एवं वयासी-एवं खलु पुत्ता । सागरदत्ते २ म(म)मं एवं वयासी-एवं खलु देवाणुप्पिया । सूमालिया दारिया इट्ठा तं चेव, तं जइ णं सागरदारए मम घरजामाउए भवइ ता[व] दलयामि । तए णं से सागरए दारए जिणदत्तेणं २ एवं वुत्ते समाणे तुत्तिणीए । तए णं जिणदत्ते २ अन्नया कयाइ सोहणंसि तिहिकरणे वि(उ)पुलं असणं ४ उवक्खडावेइ २ ता मित्तना(इं)इ आमंतेइ जाव [सक्कारेत्ता] सम्मा(णि)णेत्ता सागरं दारगं ण्हायं सव्वालंकारविभूसियं करेइ २ ता पुरिससहस्सवाहि(णि)णीयं सीयं दुरुहावेइ २ ता मित्तनाइ जाव संपरिवुडे सव्विह्वीए सयाओ गिहाओ निग्गच्छइ २ ता चं(पा)पं नयरिं मज्झंमज्झेणं जेणेव सागरदत्तस्स गिहे तेणेव उवागच्छइ २ ता सीयाओ पच्चोरुहइ २ ता साग(रगं)रं दारगं सागरदत्तस्स २ उवणेइ । तए णं [से] सागरदत्ते २ विपुलं असणं ४ उवक्खडावेइ २ ता जाव सम्माणेत्ता सागरं दारगं सूमालियाए दारियाए सद्धिं पट्ठयं[सि] दुरुहावेइ २ ता सेयापी(त)एहिं कलसेहिं मजावेइ २ ता [अग्गि]होमं करावेइ २ ता सागरं दारयं सूमालियाए दारियाए पाणिं गेण्हा(वित्ति)वेइ ॥ ११६ ॥ तए णं सागर(दार)ए सूमालियाए दारियाए इमं एयारुवं पाणिफासं (पडि)संवेदेइ से जहानामए अस्सिपत्तेइ वा जाव मुम्मुरेइ वा (इतो) एत्तो अणिट्ठतराए चेव पाणिफासं संवेदेइ । तए णं से सागरए अकामए अवस(व)वसे (तं) मुहुत्त(मि)मेत्तं संचिट्ठइ । तए णं (से) सागरदत्ते २ सागरस्स (दारगस्स) अम्मापियरो मित्तनाइ विपुलं असणं ४ पुप्फवत्थ जाव सम्माणेत्ता पडिविसज्जेइ । तए णं सागरए (दारए) सूमालियाए सद्धिं जेणेव वासधरे तेणेव उवागच्छइ २ ता सूमालियाए दारियाए सद्धिं तलि(गं)मंस्ति निवज्जइ । तए णं से सागरए दारए सूमालियाए दारियाए इमं एयारुवं अंगफासं पडिसंवेदेइ से जहानामए अस्सिपत्तेइ वा जाव अमणाम(य)तरागं चेव अंगफासं पच्चणुवभवमाणे विहरइ । तए णं से सागरए दारए [सूमालियाए दारियाए] अंगफासं असहमाणे अवसवसे मुहुत्तमेत्तं संचिट्ठइ । तए णं से सागरदारए सूमालियं (दारियं) सुहपसुत्तं जाणित्ता सूमालियाए दारियाए पासाओ उट्ठेइ २ ता जेणेव सए सयणिजे तेणेव उवागच्छइ २ ता सयणीयंसि निवज्जइ । तए णं सूमालिया दारिया तओ मुहुत्तंतरस्स पडिवुद्धा समाणी पइंवया पइमणुरत्ता पइं पासे अपस्समाणी तलिमा(उ)ओ उट्ठेइ २ ता जेणेव से सयणिजे तेणेव उवागच्छइ २ ता सागरस्स पासे णुवज्जइ । तए णं से सागरदारए सूमालियाए दारियाए दो(हु)वंपि इमं एयारुवं अंगफासं पडिसंवेदेइ जाव अकामए अवसवसे मुहुत्तमेत्तं संचिट्ठइ । तए णं (से) सागरदारए सूमालियं दारियं सुहपसुत्तं जाणित्ता सयणिजाओ उट्ठेइ २

ता वासधरस्स दारं विहाडेइ २ ता मारामुक्के विव काए जामेव दिसिं पाउब्भूए तामेव
दिसिं पडिगए ॥ ११७ ॥ तए णं सूमालिया दारिया तओ मुहुत्तंतरस्स पडिबुद्धा
पतिवया जाव अपासमाणी सयणिजाओ उट्टेइ सागरस्स दारगस्स सव्वओ समंता
मग्गणगवेसणं करेमाणी २ वासधरस्स दारं विहाडियं पासइ २ ता एवं वयासी-
गए [णं] से साग(रे)रए-त्तिकट्टु ओहयमणसंकप्पा जाव झियायइ । तए णं सा भद्दा
सत्यवाही कळं पाउप्पभा[या]ए दासचे(डियं)डिं सदावेइ २ ता एवं वयासी-गच्छह
णं तुमं देवाणुप्पिए ! व(हु)ह्वरस्स मुह(सोह)धोवणियं उवणेहि । तए णं सा दास-
चेडी भद्दाए एवं पुत्ता समाणी एयमट्ठं तहत्ति पडिमुणेइ [२] मुहधोवणियं गेण्हइ
२ ता जेणेव वासधरे तेणेव उवागच्छइ (०) सूमालियं दारियं जाव झियायमाणि
पासइ २ ता एवं वयासी-किञ्चं तु(मं)ब्भे देवाणुप्पिए)या ! ओहयणमणसंकप्पा जाव
झियाहि(सि) ? । तए णं सा सूमालिया दारिया तं दासचे(डी)डियं एवं वयासी-एवं
खलु देवाणुप्पिया ! सागरए दारए म(म)मं सुहपसुत्तं जाणित्ता मम पासाओ उट्टेइ २ ता
वासधरदुवारं अवगु(ण्ड)णेइ जाव पडिगए । तए णं [हं] तओ (अहं)मुहुत्तंतरस्स जाव
विहाडियं पासामि [२] गए णं से सागरए-त्तिकट्टु ओहयमणसंकप्पा जाव झिया-
यामि । तए णं सा दासचेडी सूमालियाए दारियाए एयमट्ठं सोच्चा जेणेव सागरदत्ते
[२] तेणेव उवागच्छइ २ ता सागरदत्तस्स एयमट्ठं निवे(ए)देइ । तए णं से साग-
रदत्ते दासचेडीए अंतिए एयमट्ठं सोच्चा निसम्म आसुरत्ते [४ जाव मिसिमिसेमाणे]
जेणेव जिणदत्त[स्स] २ गिहे तेणेव उवागच्छइ २ ता जिणदत्तं २ एवं वयासी-किञ्चं
देवाणुप्पिया ! ए(व)यं जुत्तं वा पत्तं वा कुलाणुरूवं वा कुलसरिसं वा जण्णं सागर[ए]
दारए सूमालियं दारियं अदिट्ठदो(सं)सवडियं पइवयं विप्पजहाय इहमाग(ओ)ए [१]
बह्वहिं खिज्जणियाहि य संटाणियाहि य उवा(ल)लंभइ । तए णं जिणदत्ते सागरदत्तस्स
[२] एयमट्ठं सोच्चा जेणेव सागरए (दारए) तेणेव उवागच्छइ २ ता साग(रयं)रं दारयं
एवं वयासी-दुट्ठु णं पुत्ता ! तुमे कयं सागरदत्तस्स गिहाओ इहं हव्वमाग(वे)च्छं-
तेणं, तं गच्छह णं तुमं पुत्ता ! एवमवि गए सागरदत्तस्स गिहे । तए णं से साग-
रए जिणदत्तं एवं वयासी-अवि-याइं अहं ताओ ! गिरिपडणं वा तरुपडणं वा मरु-
प्पवायं वा जलप्प(वेसं)वायं वा जलणप्पवेसं वा विसभक्खणं वा सत्योवाडणं वा
वि(वे)हाणसं वा गिद्ध(पि)पट्ठं वा पव्वज्जं वा विदेसगमणं वा अब्भुवग(च्छि)च्छे-
जा(मि) नो खलु अहं सागरदत्तस्स गिहं ग(च्छि)च्छेज्जा । तए णं से सागरदत्ते २
कुट्तंतिर[या]ए सागरस्स एयमट्ठं निसामेइ २ ता लजिए वि(लेपविट्ठे)लीए विट्ठे जिण-
दत्तस्स [२] गिहाओ पडिनिक्खमइ २ ता जेणेव सए गिहे तेणेव उवागच्छइ २ ता

सुकुमालियं दारियं सदावेइ २ ता अंके निवेसेइ २ ता एवं वयासी-किन्नं तव पुत्ता ! सागरएणं दारएणं (सुक्का) ? अहं णं तुमं तस्स दाहामि जस्स णं तुमं इट्ठा (जाव) मणामा भविस्ससि-त्ति सुमालियं दारियं ताहिं इट्ठाहिं [जाव] वग्गूहिं समासासेइ २ ता पडिविसज्जेइ । तए णं से सागरदत्ते २ अन्नया उप्पि आगासतलगंसि सुहनि-सण्णे रायमग्गं ओलोएमाणे २ चिट्ठइ । तए णं से सागरदत्ते एगं महं दमगपुरिसं पासइ दंडिखंडनिवसणं खंड(ग)मल्लगखंडघडगहत्थगयं मच्छिंयासहस्सेहिं जाव अज्जिजमाणमग्गं । तए णं से सागरदत्ते [सत्थवाहे] कोडुंवियपुरिसे सदावेइ २ ता एवं वयासी-तुब्भे णं देवाणुप्पिया ! एयं दमगपुरिसं विपुलेणं अस(ण)णेणं ४ प(लो)डि-लामेह (०) गिहं अणुप्प(वे)विसेह २ ता खंड(ग)मल्लगं खंडघडगं च से एगंते एडेह २ ता अलंकारियकम्मं कारेह २ ता ण्हायं सव्वालंकारविभूसियं करेह २ ता मणुजं असणं ४ भोयावेह (०) मम अंतियं उवणेह । तए णं [ते] कोडुंवियपुरिसा जाव पडिसुणेंति २ ता जेणेव से दमगपुरिसे तेणेव उवागच्छंति २ ता तं दम(गं)गपुरिसं अस(णं)णेणं ४ उवप्पलो(भं)भंति २ ता सयं गिहं अणुप्पवेसिति २ ता तं खंड(ग)-मल्लगं खंड(ग)घडगं च तस्स दमगपुरिसस्स एगंते एडेंति । तए णं से दम(गे)गपुरिसे तं[सि] खंडमल्लगंसि खंडघडगंसि य (एगंते) एडिज्जमाणंसि महया २ सद्देणं आरसइ । तए णं से सागरदत्ते तस्स दमगपुरिसस्स तं महया २ आरसियसइ सोच्चा निसम्म कोडुंवियपुरिसे एवं वयासी-किन्नं देवाणुप्पिया ! एस दमगपुरिसे महया २ सद्देणं आरसइ ? । तए णं ते कोडुंवियपुरिसा एवं वयासी-एस णं सामी ! तंसि खंडमल्ल-गंसि खंडघडगंसि (एगते) य एडिज्जमाणंसि महया २ सद्देणं आरसइ । तए णं से सागरदत्ते २ ते कोडुंवियपुरिसे एवं वयासी-मा णं तुब्भे देवाणुप्पिया ! एयस्स दमगस्स तं खंड जाव एडेह पासे [से] ठवेह जहा णं पत्तियं भवइ । ते(वि) तहेव ठावें(ठविं)ति (तए णं ते कोडुंवियपुरिसा) २ तस्स दमगस्स अलंकारियकम्मं करेंति २ ता सयपागसहस्सपागेहिं ते(ति)ल्लेहिं अ(ब्भं)ब्भिगेंति अब्भिगिए समाने सुर-भि[णा] गं(धुव्व)धवट्ठ(णे)एणं गायं उ(व्वट्ठिं)वट्ठेंति २ ता उसिणोद(ग)गेणं गंधोद-एणं [ण्हाणेंति] सीओदगेणं ण्हाणेंति (०) पम्हलसुकुमालगंधकासा(ई)इए गायाइं ल्ल(हं)हेंति २ ता हंसलक्खणं प(ट्ठ)डगसाडगं परि(हं)हेंति २ ता सव्वालंकारविभूसियं करेंति २ ता विपुलं असणं ४ भोयावेंति २ ता सागरदत्तस्स [समीवे] उवणेंति । तए णं [से] सागरदत्ते [२] सुमालियं दारियं ण्हायं सव्वालंकारविभूसियं क(रि)रेंता तं दमगपुरिसं एवं वयासी-एस णं देवाणुप्पिया ! मम धूया इट्ठा, एयं णं अहं तव भारियत्ताए द(ला)ल्यामि भदियाए भद्वो भ(वि)वेज्जासि । तए णं से दमगपुरिसे

सागरदत्तस्स एयमट्ठं पडिसुणेइ २ ता सूमालियाए दारियाए सद्धिं वासघरं अणुपवि-
 सइ सूमालियाए दारियाए सद्धिं तल्लिमंसि निवज्जइ । तए णं से दमगपुरिसे सूमालि-
 याए इमं एयारूवं अंगफासं पडिसंवेदेइ सेसं जहा सागरस्स जाव सयणिजाओ अब्भु-
 ट्ठेइ २ ता वासघराओ निग्गच्छइ २ ता खंडमल्लं खंडघ(डं)डगं च गहाय मारासुक्के
 विव काए जामेव दि(सं)सिं पाउब्भूए तामेव दिसिं पडिगए । तए णं सा सूमालिया
 जाव गए णं से दमगपुरिसे-त्तिकट्ठु ओहयमणसंकप्पा जाव झियायइ ॥ ११८ ॥ तए
 णं सा भद्दा कल्लं पाउप्पभायाए दासचेडिं सद्दावेइ (२ एवं वयासी) जाव सागरद-
 त्तस्स एयमट्ठं निवेदेइ । तए णं से सागरदत्ते तहेव संभंते समाने जेणेव वास(ह)घरे
 तेणेव उवागच्छइ २ ता सूमालियं दारियं अंके निवेसेइ २ ता एवं वयासी-अहो
 णं तुमं पुत्ता ! पुरापोराणाणं [कम्मणं] जाव पच्चणुब्भवमाणी विहरसि, तं मा णं
 तुमं पुत्ता ! ओहयमणसंकप्पा जाव झियाहि, तुमं णं पुत्ता ! मम महाणसंसि विपुलं
 असणं ४ जहा पो(पु)ट्टिला जाव परिभाएमाणी विहराहि । तए णं सा सूमालिया
 दारिया एयमट्ठं पडिसुणेइ २ ता महाणसंसि विपुलं असणं ४ जाव दलमाणी विह-
 रइ । तेणं कालेणं तेणं समएणं गोवालियाओ अज्जाओ बहुस्सुयाओ एवं जहेव तेय-
 लिणाए सुव्वयाओ तहेव समोस(ट्ठा)ढाओ तहेव संघाडओ जाव अणुपविट्ठे तहेव
 जाव सूमालिया पडिला(भि)भेत्ता एवं वयासी-एवं खलु अज्जाओ ! अहं सागरस्स
 अणिट्ठा जाव अमणामा, नेच्छइ णं सागरए [दारए] मम नामं वा जाव परिभोगं
 न्ना, जस्स जस्स वि य णं दे(दि)ज्जामि तस्स तस्स वि य णं अणिट्ठा जाव अम-
 णामा भवामि, तुब्भे य णं अज्जाओ ! वहुनायाओ एवं जहा पोट्टिला जाव उवलद्धे
 [णं] जेणं अहं सागरस्स दारगस्स इट्ठा कंता जाव भवेज्जामि । अज्जाओ तहेव
 भणंति तहेव साविया जाया तहेव चिंता तहेव सागरद(त्तं स०)त्तस्स आपुच्छइ
 जाव गोवालियाणं अंति(ए)यं पव्वइया । तए णं सा सूमालिया अज्जा जाया इ(ई)-
 रियासमिया जाव [गुत्त]वंभयारिणी वट्ठहिं चउत्थच्छट्ठम जाव विहरइ । तए णं सा
 सूमालिया अज्जा अन्नया कयाइ जेणेव गोवालियाओ अज्जाओ तेणेव उवागच्छइ २
 ता वंदइ नमंसइ वं० २ ता एवं वयासी-इच्छामि णं अज्जाओ ! तुब्भेहिं अब्भणु-
 ज्जाया समाणी चंपा(ओ)ए बाहिं सुभूमिभागस्स उज्जाणस्स अदूरसामंते छट्ठंछट्ठेणं
 अणिविखत्तेणं तवोकम्मेणं सूरामिमुही आयावेमाणी विहरित्तए । तए णं ताओ
 गोवालियाओ अज्जाओ सूमालियं एवं वयासी-अम्हे णं अ(ज्जे)जो ! समणीओ
 निग्गंथीओ इ(ई)रियासमियाओ जाव गुत्तवंभचारिणीओ, नो खलु अम्हं कप्पइ बहिया
 नामस्स [वा] जाव सन्निवेसस्स वा छट्ठंछट्ठेणं जाव विहरित्तए, कप्पइ णं अम्हं अंतो-

उवस्सयस्स वइपरिक्खित्तस्स संघाडिवद्धियाए णं समतलपइयाए आया(वि)वेत्तए ; तए णं सा सूमालिया गोवालियाए (अज्जाए) एयमट्ठं नो सदहइ नो पत्तियइ नो रोएइ एयमट्ठं असदहमा(णे)णी ३ सुभूमिभागस्स उज्जाणस्स अदूरसामंते छट्ठंछट्ठेणं जाव विहरइ ॥ ११९ ॥ तत्थ णं चंपाए (न०) ललिया नाम गोट्ठी परिवसइ नरवइदिअ- (वि)पयारा अम्मापिइनिययनिप्पिवासा वेसविहारकयनिकेया नाणाविहअविणयप्प- हाणा अट्ठा जाव अपरिभूया । तत्थ णं चंपाए (०) देवदत्ता नामं गणिया होत्था सू(सुकु)माला जहा अंडनाए । तए णं तीसे ललियाए गोट्ठीए अन्नया [कयाइ] पंच गोट्ठिल्लगपुरिसा देवदत्ताए गणियाए सद्धि सुभूमिभागस्स उज्जाणस्स उज्जाणसिरिं पच्चणुब्भवमाणा विहरंति । तत्थ णं एगे गोट्ठिल्लगपुरिसे देवदत्तं गणियं उच्छङ्गे थ(र)रेइ एगे पिट्ठओ आयवत्तं धरेइ एगे पुप्फपूर(यं)गं रएइ एगे पाए रएइ एगे चामसक्खेवं करेइ । तए णं सा सूमालिया अज्जा देवदत्तं गणियं तेहिं पंचहिं गोट्ठि- ल्लपुरिसेहिं सद्धि उरालाई माणुस्सगाई भोगभोगाई भुंजमा(णिं)णीं पासइ २ ता इमेयारुवे संकप्पे समुप्पज्जित्था-अहो णं इमा इत्थिया पुरापोराणाणं कम्माणं जाव विहरइ । तं जइ णं केइ इमस्स सुचरियस्स तवनियमवंभचेरवासस्स कञ्चणे फलवित्तिविसेसे अत्थि तो णं अहमवि आगमिस्सेणं भवग्गहणेणं इमेयारुवाइ उरा- लाइं जाव विहरिज्जामि-त्तिकट्ठु नियाणं करेइ २ ता आयावणभू(मिओ)मीए पच्चो- रु(ह)भइ ॥ १२० ॥ तए णं सा सूमालिया अज्जा सरीर(व)वाउसा जाया यावि होत्था अभिक्खणं २ हत्थे धोवेइ [अभिक्खणं २] पाए धोवेइ सीसं धोवेइ मुहं धोवेइ थणंतराई धोवेइ कक्खंतराई धोवेइ गु(गो)ज्जंतराई धोवेइ जत्थ [२] णं ठाणं वा सेज्जं वा निसीहियं वा चेएइ तत्थ वि य णं पुव्वामेव उदएणं अब्भु(क्ख- ड)क्खेत्ता तओ पच्छा ठाणं वा ३ चेएइ । तए णं ताओ गोवालियाओ अज्जाओ सूमालियं अज्जं एवं वयासी-एवं खलु (देवा० !) अज्जे ! अम्हे समणीओ निगंथीओ इरियासमियाओ जाव वंभचेरधारिणीओ, नो खलु कप्पइ अम्हं सरीरवाउसियाए होत्तए, तुमं च णं अज्जे ! सरीरवाउसिया अभिक्खणं २ हत्थे धो(व)वेसि जाव चे(दे)एसि, तं तुमं णं देवाणुप्पिए ! एय(त)स्स ठाणस्स आलोएहि जाव पडिवज्जाहि । तए णं सूमालिया गोवालियाणं अज्जाणं एयमट्ठं नो आढाइ नो परि(जाण)याणाइ अणाढायमाणी अपरि(जा)याणमाणी विहरइ । तए णं ताओ अज्जाओ सूमालियं अज्जं अभिक्खणं २ (अभि)ही(लं)लेंति जाव परिभवंति अभिक्खणं २ एयमट्ठं निवा- रेंति । तए णं तीसे सूमालियाए समणीहिं निगंथीहिं हीलिज्जमाणीए जाव वारि- ज्जमाणीए इमेयारुवे अज्जत्थिए जाव समुप्पज्जित्था-जया णं अहं अगारवासमज्जे-

वसामि तया णं अहं अप्पवसा । जया णं अहं सुं(डे)डा भविता पव्वइया तया णं
 अहं परवसा । पुब्बि च णं ममं समणीओ आढायंति इयाणि नो आ(ढं)ढायंति ।
 तं सेयं खलु मम कलं पाउप्पभावाए गोवालियाणं अंतियाओ पडिनिक्खमिता पाडि-
 एक्कं उवरस(गं)यं उवसंपज्जिताणं विहरित्ताए-त्तिकहु एवं संपेहेइ २ ता कलं(पा०)
 गोवालियाणं (अज्जाणं) अंतियाओ पडिनिक्खमइ २ ता पाडिएक्कं उवस्सयं उवसं-
 पज्जिताणं विहरइ । तए णं सा सूमालिया अज्जा अणोहट्टिया अनिवारिया सच्छंद-
 मइ अभिक्खणं २ हत्थे धोवेइ जाव चेएइ तत्थ वि य णं पासत्था पासत्थविहा-
 (री)रिणी ओसजा २ कुसीला २ संसत्ता २ बहूणि वासाणि सामण्णपरियागं पाउ-
 णइ [२] अद्धमासियाए संलेहणाए तरस ठाणरस अणालोइय(अ)पडिक्कंता काल-
 मासे कालं किच्चा ईसाणे कप्पे अन्नयरंसि विमाणंसि देवगणियत्ताए उववजा । तत्थे-
 गइयाणं देवीणं नव-पलिओवमाइं ठिई पज्जता । तत्थ णं सूमालियाए देवीए नवप-
 लिओवमाइं ठिई पज्जता ॥ १२१ ॥ तेणं कालेणं तेणं समएणं इहेव जंबुद्वीवे २
 भारहे वासे पंचालेसु जणवएसु कंपिल्लपुरे नामं नयरं होत्था वण्णओ । तत्थ णं
 दुवए नामं राया होत्था वण्णओ । तरस-णं चुलणी देवी धट्टज्जुणे कुमारे जुवराया ।
 तए णं सा सूमालिया देवी ताओ देवलोगाओ आउक्खएणं जाव चइत्ता इहेव जंबु-
 द्वीवे २ भारहे वासे पंचालेसु जणवएसु कंपिल्लपुरे नयरं दु(प)वयस्स रज्जो चुलणीए
 देवीए कुच्छिसि दारियत्ताए पच्चायाया । तए णं सा चुलणी देवी नवण्हं मासाणं
 जाव दारियं पयाया । तए णं तीसे दारियाए निव्वत्तवारसाहियाए इमं एयाह्वं (०)
 नामं (०)-जम्हा णं एसा दारिया दु(व)पयस्स रज्जो धूया चुलणीए देवीए अत्तया
 तं हो(उ)ऊ णं अम्हं इमीसे दारियाए नाम(धिज्जे)वेज्जं दोवई । तए णं तीसे अम्मा-
 पियरो इमं एयाह्वं गो(शु)ण्णं गुणनिप्फन्नं नामधेज्जं क(रि)रेंति दोवई । तए णं
 सा दोवई दारिया पंचधा(इ)ईपरिग्गहिया जाव गिरिकंदरमल्ली(ण)णा इव चंपगलया
 निवायनिव्वाधायंसि सुहंसुहेणं परिवड्ढइ । तए णं सा दोवई [देवी] रायवरकजा
 उम्मुक्कवालभावा जाव उक्किट्टसरीरा जाया यावि होत्था । तए णं तं दोवई राय-
 वरकज्जं अन्नया कयाइ अंतेउरियाओ ण्हायं सव्वालंकासविभूसियं करेंति २ ता
 दुवयस्स रज्जो पायवंदि(उं)यं पे(सं)सेति । तए णं सा दोवई २ जेणेव दुवए राया
 तेणेव उवागच्छइ २ ता दुवयस्स रज्जो पायग्गहणं करेइ । तए णं से दुवए राया
 दोवई दारियं अंके निवेसेइ २ ता दोवईए २ रुवे(ण) य ३ जायविम्हए दोवई
 २ एवं वयासी-जस्स णं अहं [तुमं] पुत्ता । रायस्स वा जुवरायस्स वा भारि-
 यत्ताए सयमेव दलइस्सामि तत्थ णं तुमं सुहिया वा दु(विख)हिया वा भ(वि)वे-

जासि । तए णं म(मं)म जावजीवाए हियय(डा)दाहे भविस्सइ । तं णं अहं तव पुत्ता ! अज्जयाए सयंवरं वि(रया)यरामि । अज्जयाए णं तुमं दिन्नं सयंवरा । (जे) जं णं तुमं सयमेव रायं वा जुवरायं वा वरेहिसि से णं तव भत्तारे भविस्सइ-
 त्तिकट्टु ताहिं इट्ठाहिं जाव आसासेइ २ ता पडिविसजेइ ॥ १२२ ॥ तए णं से दुवए राया दूयं सद्दावेइ २ ता एवं वयासी-गच्छह णं तुमं देवाणुप्पिया ! वारवई नयरिं । तत्थ णं तुमं कण्हं वासुदेवं समुद्विजयपामोक्खे दस दसारे बलदेवपा(मु)मोक्खे पंच महावीरे उग्गसेणपामोक्खे सोलस रायसहस्से पज्जुन्नपा(मु)मोक्खाओ अद्दुट्ठाओ कुम्मारकोडीओ संवपामोक्खाओ सट्ठिं दुइंतसाहस्सीओ वीरसेणपा(मु)मोक्खाओ ए-
 (इ)क्कवीसं [राय]वीरपुरिससाहस्सीओ म(ह)हासेणपामोक्खाओ छप्पन्नं बलवगसाह-
 स्सीओ अन्ने य वहवे राईसरतलवरमाडंबियकोडुंबियइव्वम(सि)सेट्ठिसेणावइसत्थवा-
 हपभिइओ करयलपरिग्गहियं दसनहं सिरसावत्तं मत्थए अंजलिं कट्टु जएणं विजएणं वद्धावेहि २ ता एवं वयाहि-एवं खलु देवाणुप्पिया ! कंपिल्लपुरे नयरे दुवयस्स रज्जो धूयाए चुलणीए (देवीए) अत्तयाए धट्टज्जुणकुमारस्स भ(गि)इणीए दोवईए २ सयं-
 वरे भविस्सइ । (तं) तए णं तुव्वे (देवा० !) दुवयं रायं अणुगिण्हेमाणा अकालपरि-
 हीणं चेव कंपिल्लपुरे नयरे समोसरह । तए णं से दूए करयल जाव कट्टु दुवयस्स रज्जो एयमट्ठं (विणएणं) पडिसुणेइ २ ता जेणेव सए गिहे तेणेव उवागच्छइ २ ता कोडुंबियपुरिसे सद्दावेइ २ ता एवं वयासी-खिप्पामेव भो देवाणुप्पिया ! चाउग्घटं आसरहं जुत्तामेव उवट्ठवेह जाव उवट्ठवेंति । तए णं से दूए ण्हाए अलंकार० सरीरे चाउग्घटं आसरहं दु(र)रुहइ २ ता वट्ठहिं पुरिसेहिं सन्नद्ध जाव गहिया(SS)उहपहरणेहिं सद्धिं संपरिवुडे कंपिल्लपुरं नयरं मज्झंमज्झेणं निग्गच्छइ (०) पंचालजणवयस्स मज्झं-
 मज्झेणं जेणेव देसप्पंते तेणेव उवागच्छइ २ ता सुरट्ठाजणवयस्स मज्झंमज्झेणं जेणेव वारवई नयरी तेणेव उवागच्छइ २ ता वारवई नयरिं मज्झंमज्झेणं अणुप्पविसइ २ ता जेणेव कण्हस्स वासुदेवस्स वाहिरिया उवट्ठाणसाला तेणेव उवागच्छइ २ ता चाउग्घटं आसरहं ठा(ठ)वेइ २ ता रहाओ पच्चोरुहइ २ ता मणुस्सवग्गुरापारि-
 क्खित्ते पायचारविहा(रचा)रेणं जेणेव कण्हे वासुदेवे तेणेव उवागच्छइ २ ता कण्हं वासुदेवं समुद्विजयपा(मु)मोक्खे य दस दसारे जाव बलवगसाहस्सीओ करयल तं चेव जाव समोसरह । तए णं से कण्हे वासुदेवे तस्स दूयस्स अंतिए एयमट्ठं सोच्चा निसम्म हट्ठ[उट्ठे] जाव हियए तं दूयं सक्कारेइ सम्माणेइ स० २ ता पडिविसजेइ । तए णं से कण्हे वासुदेवे कोडुंबियपुरि(सं)से सद्दावेइ २ ता एवं वयासी-गच्छह णं तुमं देवाणुप्पिया ! सभाए सुहम्माए सामुदाइयं भेरिं तालेहि । तए णं से कोडुंबियपु-

रिसे करयल जाव कण्हस्स वासुदेवस्स एयमट्ठं पडिसुणेइ २ ता जेणेव सभाए सुह-
म्माए सामुदाइया भेरी तेणेव उवागच्छइ २ ता सामुदाइयं भेरिं महया २ सहेणं
तालेइ । तए णं ताए सामुदाइयाए भेरीए तालियाए समाणीए समुद्विजयपामोक्खा
दस दसारा जाव महासेणपामोक्खाओ छप्पन्नं बलवगसाहस्सीओ ण्हाया सव्वालंकार-
विभूसिया जहाविभवइड्डिसक्कारसमुदएणं अप्पेगइया [हयगया] जाव [अप्पेगइया]
पाय(विहारचा) चारविहारेणं जेणेव कण्हे वासुदेवे तेणेव उवागच्छंति २ ता करयल
जाव कण्हं वासुदेवं जएणं विजएणं वद्धावेति । तए णं से कण्हे वासुदेवे कोडुंविजयपुरिसे
सद्दावेइ २ ता एवं वयासी-खिप्पामेव भो देवाणुप्पिया ! अभिसेक्कं हत्थिरयणं पडि-
कप्पेह हयगय जाव पच्चप्पिणंति । तए णं से कण्हे वासुदेवे जेणेव मज्जणघरे तेणेव
उवागच्छइ २ ता समुत्तजालाकुलाभिरामे जाव अंजणगिरिकूडसन्निभं गयवइं नरवइं
दुरुढे । तए णं से कण्हे वासुदेवे समुद्विजयपा(मु)मोक्खेहिं दसहिं दसारेहिं जाव म०
छ० ब० सद्धिं संपरिवुडे सव्विद्धीए जाव रवेणं वारव(इ)इं नयरिं मज्झंमज्झेणं निग्ग-
च्छइ २ ता सुरट्ठाजणवयस्स मज्झंमज्झेणं जेणेव देसप्पंते तेणेव उवागच्छइ २ ता
पंचालजणवयस्स मज्झंमज्झेणं जेणेव कंपिल्लपुरे नयरे तेणेव पहारेत्थ गमणाए । तए
णं से दुवए राया दोच्चं [पि] दूयं सद्दावेइ २ ता एवं वयासी-गच्छ[ह] णं तुमं देवाणु-
प्पिया ! हत्थिणाउरं नयरं, तत्थ णं तुमं पंडुरायं सपुत्तयं जुहिद्विल्लं भीमसेणं अज्जुणं
नउलं सहदेवं दुजोहणं भाइसयसमग्गं गंगेयं विदुरं दोणं जयद्दहं सउ(णीं)णिं कीचं
आसत्थामं करयल जाव कट्टु तहेव [जाव] समोसरह । तए णं से दूए एवं (व०-)
जहा वासुदेवे नवरं भेरी नत्थि जाव जेणेव कंपिल्लपुरे नयरे तेणेव पहारेत्थ गम-
णाए । एएणेव कमेणं तच्चं दूयं चं(पा)पं नयरि, तत्थ णं तुमं कण्हं अंगरायं स(से)ल्लं
नंदिरायं करयल तहेव जाव समोसरह । चउत्थं दूयं सुत्तिमइं नयरिं, तत्थ णं तुमं
सिसुपालं दमघोससुयं पंचभाइसयसंपरिवुडं करयल तहेव जाव समोसरह । पंचमगं
दूयं हत्थिसी(स)सं नय(रं)रि, तत्थ णं तुमं दमदंतं रायं करयल (तहेव) जाव
समोसरह । छट्ठं दूयं महुरं नयरिं, तत्थ णं तुमं धरं रायं करयल जाव समोसरह ।
सत्तमं दूयं रायगिहं नयरं, तत्थ णं तुमं सहदेवं जरा(सिंधु)संधसुयं करयल जाव
समोसरह । अट्ठमं दूयं कोडिणं नयरं । तत्थ णं तुमं रुपि मे(भे)सगसुयं करयल
तहेव जाव समोसरह । नवमं दूयं विरा(ड)टं नय(रं)रि, तत्थ णं तुमं की(कि)यगं
भाउसयसमग्गं करयल जाव समोसरह । दसमं दूयं अवसेसेसु (य) गामागरनगरेसु
अणेगाइं रायसहस्साइं जाव समोसरह । तए णं से दूए तहेव निग्गच्छइ जेणेव
यामागर [तहेव] जाव समोसरह । तए णं ताइं अणेगाइं रायसहस्साइं तस्स दूयस्स

अंति ए एयमट्ठं सोच्चा निसम्म हट्ठं तं दूयं सक्कारेति सम्माणेति स० २ ता पडिविस-
 (ज्जि)ज्जेति । तए णं ते वासुदेवपामोक्खा बहवे रायसहस्सा पत्तेयं २ ण्हाया सन्नद्ध-
 त्थिखंधवरगया महया हयगयरह(०)भडचडगरपहकर (०) सएहिं २ नगरेहिंतो
 अभिनिग्गच्छंति २ ता जेणेव पंचाले जणवए तेणेव पहारेत्थ गमणाए ॥१२३॥ तए
 णं से दुवए राया कोडुंवियपुरिसे सद्दावेइ २ ता एवं वयासी-गच्छह णं तुमं देवाणु-
 प्पिया ! कंपिलपुरे नयरे वहिया गंगाए महानईए अदूरसामंते एगं महं सयंवरमंडवं
 करेह अणेगखंभसयसन्नविट्ठं लीलट्ठियसा(ल)लिभंजि(आ)यागं जाव पच्चप्पिणंति ।
 तए णं से दुवए राया [दोच्चंपि] कोडुंवियपुरिसे सद्दावेइ २ ता एवं वयासी-खिप्पामेव
 भो देवाणुप्पिया ! वासुदेवपा(मु)मोक्खाणं बहूणं रायसहस्साणं आवासे करेह । ते वि
 करेत्ता पच्चप्पिणंति । तए णं [से] दुवए राया वासुदेवपा(०)मोक्खाणं बहूणं रायसह-
 स्साणं आग(मं)मणं जाणेत्ता पत्तेयं २ हत्थिखंध जाव परिवुडे अग्घं च पज्जं च
 गहाय सव्विद्धीए कंपिलपुराओ निग्गच्छइ २ ता जेणेव ते वासुदेवपा(मु)मोक्खा बहव
 रायसहस्सा तेणेव उवागच्छइ २ ता ताइं वासुदेवपा(मु)मोक्खाइं अग्घेण य पज्जेग य
 सक्कारेइ सम्माणेइ स० २ ता तेसिं वासुदेवपा(०)मोक्खाणं पत्तेयं २ आवासे वियरइ ।
 तए णं ते वासुदेवपामोक्खा जेणेव सया २ आवासा तेणेव उवागच्छंति २ ता हत्थि-
 खंध(धा)धेहिंतो पच्चोसहंति २ ता पत्तेयं [२] खंधावारनिवेसं करेति २ ता सए[सु] २
 आवासे[सु] अणु[८]पविसंति २ ता सएसु (२) आवासेसु [य] आसणेसु य सयणेसु य
 सन्निसण्णा य संतुयद्वा य बहूहिं गंधव्वेहि य नाडएहि य उवगिज्जमाणा य उवनच्चि-
 ज्जमाणा य विहरंति । तए णं से दुवए राया कंपिलपुरं नयरं अणुप्पविसइ २ ता
 विपुलं असणं ४ उवक्खडावेइ २ ता कोडुंवियपुरिसे सद्दावेइ २ ता एवं वयासी-
 गच्छह णं तुब्भे देवाणुप्पिया ! विपुलं असणं ४ सुवहुपुप्फवत्थगंधमल्लालंकारं च
 वासुदेवपामोक्खाणं रायसहस्साणं आवासेसु साहरह । ते वि साहरंति । तए णं ते
 वासुदेवपा(०)मोक्खा तं विपुलं अस(णं)णपा(णं)णखाइ(मं)मसाइमं आसाएमाणा ४
 विहरंति जिमियभुत्तुत्तरागया वि य णं समाणा आयंता [चोक्खा] जाव सुंहासणवर-
 गया बहूहिं गंधव्वेहिं जाव विहरंति । तए णं से दुवए राया पुव्वावरण्हकालसमयंसि
 कोडुंवियपुरिसे सद्दावेइ २ ता एवं वयासी-गच्छह णं तु(मे)ब्भे देवाणुप्पिया !
 कंपिलपुरे सिं(सं)घाडग जाव पहे[सु]वासुदेवपा(मु)मोक्खाणं य रायसहस्साणं आवा-
 सेसु हत्थिखंधवरगया महया २ सद्देणं जाव उग्घोसेमाणा २ एवं वयह-एवं खलु
 देवाणुप्पिया ! कळं पाउप्पभायाए दुवयस्स रत्तो धूयाए चुलणीए देवीए अ(त्ति)त्ति-
 याए धट्ठज्जु(ण)णस्स भणिणीए दोवईए २ सयंवरे भविस्सइ । तं तुब्भे णं देवाणु-

पिया । दुवयं रायाणं अणुणिहेमाणा ण्हाया सव्वालंकारविभूसिया हत्थिखंधव-
 रगया सको(रं)रेंट० सेयवरचामर० हयगयरह० महया भडच(र)डगरेणं जाव
 परिक्खिता जेणेव सयंव(र)रामंडवे तेणेव उवागच्छह २ ता पत्तेयं नामंकेसु आसणेसु
 निसीयह २ ता दोवई २ पडिवालेमाणा २ चिट्ठह घोसणं घोसेह [२] मम
 एयमाणत्तियं पच्चप्पिणह । तए णं ते कोडुंविया तहेव जाव पच्चप्पिणंति । तए णं
 से दुवए राया कोडुंवियपुरिसे सदावेइ २ ता एवं वयासी-गच्छह णं तुब्भे देवाणु-
 पिया । सयंवरमंड(पं)वं आसियसंमज्जिओवलित्तं सुगंधवरगंधियं पंचवण्णपु(प्फ-
 पुंजो)प्फोवयारकलियं कालागरुपवरकुंदुरुक्कतुरुक्क जाव गंधवट्ठिभूयं मंचाईमंचकलियं
 करेह कारवेह करेत्ता कारवेत्ता वासुदेवपा(०)मोक्खाणं बहूणं रायसहस्साणं पत्तेयं २
 नामंकाई आसणाई अत्थुय(सेयव०)पच्चत्थुयाई राएह २ ता एयमाणत्तियं पच्चप्पिणह
 (तेवि) जाव पच्चप्पिणंति । तए णं ते वासुदेवपा(०)मोक्खा बहवे रायसहस्सा कलं
 (पाउ०) ण्हाया सव्वालंकारविभूसिया हत्थिखंधवरगया सकोरेंट० सेयवरचामराहिं
 [महया] हयगय जाव परिवुडा सव्विड्डीए जाव रवेणं जेणेव सयंव(र)रामंडवे
 तेणेव उवागच्छंति २ ता अणुप्पविसंति २ ता पत्तेयं २ नामं(के)कएसु निसीयंति
 दोवई २ पडिवालेमाणा चिट्ठंति । तए णं से दुवए राया कलं ण्हाए सव्वालंकार-
 विभूसिए हत्थिखंधवरगए सकोरेंट० हयगय० कंपिल्लपुरं मज्झंमज्झेणं निग्गच्छइ
 (०) जेणेव सयंवरामंडवे जेणेव वासुदेवपा(०)मोक्खा बहवे रायसहस्सा तेणेव
 उवागच्छइ २ ता तेसिं वासुदेवपा(०)मोक्खाणं करयल जाव वद्धावेत्ता कण्हस्स
 वासुदेवस्स सेयवरचामरं गहाय उववीयमाणे चिट्ठइ ॥ १२४ ॥ तए णं सा दोवई
 २ [कलं जाव] जेणेव मज्जणघरे तेणेव उवागच्छइ २ ता [मज्जणघरं अणुपवि-
 सइ २ ता] ण्हाया सुद्धप्पावेसाई मंगलाई वत्थाई पवरपरिहिया मज्जणघराओ
 पडिनिक्खमइ २ ता जेणेव अंतेउरे तेणेव उवागच्छइ । तए णं तं दोवई २
 अंतेउरियाओ सव्वालंकारविभूसियं करेंति, किं ते ? वरपायपत्तनेउरा जाव
 चेडियाचक्कवालम(यह)हयरगविंदपरिक्खिता अंतेउराओ पडिनिक्खमइ २ ता
 जेणेव वाहिरिया उवट्ठाणसाला जेणेव चाउग्घंटे आसरहे तेणेव उवागच्छइ २ ता
 किट्ठावियाए लेहियाए सद्धिं चाउग्घंटे आसरहं दुरुहइ । तए णं से धट्ठज्जेणे कुमारै
 दोवईए क्काए सारत्थं करेइ । तए णं सा दोवई २ कंपिल्लपुरं (नयरं) मज्झंमज्झेणं
 जेणेव सयंव(र)रामंडवे तेणेव उवागच्छइ २ ता रहं ठावेइ रहाओ पच्चोर(ह)भइ २
 ता किट्ठावियाए लेहियाए (य) सद्धिं सयंवरमंडवं अणुपविसइ करयल [जाव] तेसिं
 वासुदेवपा(०)मोक्खाणं बहूणं रायवरसहस्साणं पणामं करेइ । तए णं सा दोवई २

एणं महं सिरिदामगंडं[०] किं ते ? पाडलमल्लियचंपय जाव सत्तच्छयाईहिं र्गंधद्वणिं
 मुयंतं परमसुहफासं दरिसणिज्जं गे(गि)ण्हइ । तए णं सा किह्वाविया (जाव) सुह्वा
 जाव वामहत्थेणं चिल्लगं दप्पणं गहेऊण सललियं दप्पणसंकंतविंवसंदंसिए य से
 दाहिणेणं हत्थेणं दरि(सि)सए पवररायसीहे फुडविसयविसुद्धरिभियगंभीरमहुरभ-
 णिया सा तेसिं सव्वेसिं पत्थिवाणं अम्मापि(ऊणं)उवंससत्तसामत्थगोत्तविक्रंतिकं-
 तिवहुविहआगममाहप्परुवजोव्वणगुणलावण्णकुलसीलजाणिया कित्तणं करेइ । पढमं
 ताव वणिहपुंगवाणं दसदसार[वर]वीरपुरि(साणं)स(ते)तिलोक्कवलवगाणं सत्तुसयस-
 हस्समाणावमद्गगाणं भवसिद्धिपवरपुंडरीयाणं चिल्लगाणं वलवीरियरुवजोव्वणगुणला-
 वण्णकित्तिया कित्तणं करेइ । तओ पु(णो)ण उग्गसेणमाईणं जायवाणं भणइ(य)-
 सोहग्गरुवकलिए वरेहि वरपुरिसगंधहत्थीणं जो हु ते [लोए] होइ हिययदइओ ॥
 तए णं सा दोवई रायवरकन्नगा वहुणं रायवरसहस्साणं मज्झमज्झेणं समइच्छ-
 माणी २ पुव्वकयनियानेणं चोइज्जमाणी २ जेणेव पंच पंडवा तेणेव उवागच्छइ
 २ ता ते पंच पंडवे तेणं दसद्ववण्णेणं कुसुमदामेणं आवेढियपरिवेढि(यं)ए करेइ
 २ ता एवं वयासी-एए णं मए पंच पंडवा वरिया । तए णं (तेसिं) ताई वासुदेव-
 पामोक्खा(णं)इं वहुणि रायसहस्साणि महया २ सद्देणं उग्गोसेमाणा[इं]२ एवं वयंति-
 सुवरियं खलु भो ! दोव(इ)ईए रायवरकन्नाए (२) त्तिकट्टु सयंवरसंडवाओ पडिनिक्ख-
 मंति २ ता जेणेव सया २ आवासा तेणेव उवागच्छंति । तए णं धट्टज्जु(ण्णे)णकुमारे
 पंच पंडवे दोवई[च] रायवरक(णं)न्नगं चाउग्गवंटं आसरहं दुरु(ह)हेइ २ ता कंपिल्ल-
 पुरं मज्झमज्झेणं जाव सयं भवणं अणुपविसइ । तए णं दुवए राया पंच-पंडवे दोवई
 २ पट्टयं दुरुहेइ २ ता सेयापी[य]एहिं कलसेहिं मज्जावेइ २ ता अग्गिहोमं
 करा(कार)वेइ पंचण्हं पंडवाणं दोवईए य पाणिग्गहणं करावेइ । तए णं से दुवए
 राया दोवईए २ इमं एयारुवं पीइदाणं दलय(ती)इ तंजहा-अट्ट हिरण्णकोडीओ जाव
 (अट्ट) पेसणकारीओ दासचेडीओ अन्नं च विपुलं धणकणग जाव दलयइ । तए
 णं से दुवए राया ताई वासुदेवपामोक्खाइं विपुलेणं असणपाणखाइमसाइमेणं
 वत्थगंध जाव पडिविसजेइ ॥ १२५ ॥ तए णं से पंडू राया तेसिं वासुदेवपा-
 मोक्खाणं वहुणं रायसहस्साणं करयल जाव एवं वयासी-एवं खलु देवाणुप्पिया !
 हत्थिणाउरे नयरे पंचण्हं पंडवाणं दोवईए य देवीए कळ्ळणकरे भाविस्सइ, तं
 तुब्भे णं देवाणुप्पिया ! ममं अणुणिहमाणा अकालपरिहीणं समोसरह । तए णं
 [ते] वासुदेवपामोक्खा पत्तेयं २ जाव पहारेत्थ गमणाए । तए णं से पं(डु)इ राया
 कोइवियपुरिसे सद्देवेइ २ ता एवं वयासी-गच्छह णं तुब्भे देवाणुप्पिया ! हत्थिणा-

उरे पंचहं पंडवाणं पंच पासायवडिसए कारे(ह)हि अब्भुग्गयमूसिय वण्णओ जाव पडिहवे । तए णं ते कोडुंवियपुरिसा पडिमुणेंति जाव कार(करा)वेंति । तए णं से पं(डुए)इ राया पंचहिं पंडवेहिं दोवईए देवीए सद्धिं हयगयसंपरिवुडे कंपिल्लपुराओ पडिनिक्खमइ २ ता जेणेव हत्थिणाउरे तेणेव उवागए । तए णं से पंडुराया तेसिं वासुदेवपामोक्खाणं आगमणं जाणित्ता कोडुंवियपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! हत्थिणाउरस्स नयरस्स बहिया वासुदेवपामोक्खाणं बहूणं रायसहस्साणं आवासे कारेह अणेग(खं)थंभसय तहेव जाव पच्चप्पिणंति । तए णं ते वासुदेवपामोक्खा बहवे रायसहस्सा जेणेव हत्थिणाउरे तेणेव उवाग-च्छंति । तए णं (से) पंडुराया ते(सिं) वासुदेवपामो(क्खाणं)क्खे [जाव] आग(म-णं)ए जाणित्ता हट्ठुट्ठे ण्हाए जहा दु(प)वए जाव जहारिहं आवासे दलयइ । तए णं ते वासुदेवपा(०)मोक्खा बहवे रायसहस्सा जेणेव सया(ईं) २ आवासा(ईं) तेणेव उवा-गच्छंति (०) तहेव जाव विहरंति । तए णं से पंडुराया हत्थिणाउरं नयरं अणुपविसइ २ ता कोडुंवियपुरिसे सद्दावेइ २ ता एवं वयासी-तुब्भे णं देवाणुप्पिया ! विपुलं असणं ४ तहेव जाव उवणेंति । तए णं ते वासुदेवपामोक्खा बहवे रा(या)यसहस्सा ण्हाया तं विपुलं असणं ४ तहेव जाव विहरंति । तए णं से पंडुराया [ते] पंचपंडवे दोवईं च देविं पट्ठयं दुरुहेइ २ ता सीयापीएहिं कलसेहिं ण्हावे(न्ति)इ २ ता कल्लाण(का)करं करेइ २ ता ते वासुदेवपामोक्खे बहवे रायसहस्से विपुलेणं अस(ण)णेणं ४ पुप्फवत्थेणं सक्कारेइ सम्माणेइ (०) जाव पडिविसजेइ । तए णं ताईं वासुदेवपामोक्खाईं बहू(हिं)ईं जाव पडिगयाईं ॥ १२६ ॥ तए णं ते पंच पंडवा दोवईए देवीए (सद्धिं अंतो अंते-उरपरियाल) सद्धिं कल्लाकल्लिं वारंवारेंणं उ(ओ)रालाईं भोगभोगाईं जाव विहरंति । तए णं से पंडू राया अन्नया कया(ईं)ईं पंचहिं पंडवेहिं कोंतीए देवीए दोवईए (देवीए) य सद्धिं अंतोअंतेउरपरियालसद्धिं संपरिवुडे सीहासणवरगए यावि विहरइ । इमं च णं कच्छुल्लनारए दंसणेणं अइमद्दए विणीए अंतो(२)य कल्लसहियए मज्झ(त्थो)त्थउवत्थिए य अल्लीणसोमपियदंसणे सुरुवे अमइलसगलपरिहिए कालमियचम्मउत्तरासंगरइयव- (त्थे)च्छे दण्डकमण्डलुहत्थे जडामउडदित्तसिरए जज्जोवइयगणेतियमुंजमेह(ल)लावा-गलधरे हत्थकयकच्छभीए पियगंधवे धरणिगोअरप्पहाणे संवरणावरणओवय(णउ)-णुप्पयणिलेसणीसु य संकामणि(अ)आभिओगपन्नत्तिगमणीयं(भ)भिणीसु य व(हु)हूसु विज्जाहरीसु विज्जासु विस्सुयजसे इट्ठे रामस्स य केसवस्स य पज्जुन्नपईवसंवअनिरुद्धनि-सडउम्मुयसारणगयसुमुहदुम्मुहाई(ण)णं जायवाणं अद्धुट्ठाण[य]कुमारकोडीणं हियय-दइए संथवए कलहजुद्धकीलाहलप्पिए भंडणाभिलासी बहूसु य सम(रेसु)रसयसंपराएह

ईसणए समंतओ कलहं सदक्खिणं अणुगवेसमाणे असमाहिकरे दसारवरवीरपुरि-
 -स(ति)तेलोकवलवगाणं आमंतेऊण तं भगव(ती)इं प(ए)कमणिं गगणगमणदच्छं
 उप्पइओ गगणमभिलंघयंतो गामागरनगरखेडकञ्जडमडंवदोणमुहपट्टणसं(वा)वाह-
 -सहस्समंडियं धिमियमेइणीतलं वसुहं ओलोइं(तो)ते रम्मं हत्थिणाउरं उवागए पंडु-
 -रायभवणंसि अइवेगेण समोवइए । तए णं से पंडू राया कच्छुल्लनारयं एजमाणं पासइ
 २ ता पंचहिं पंडवेहिं कुंतीए य देवीए सद्धिं आसणाओ अब्भुट्टेइ २ ता कच्छुल्लना-
 -रयं सत्तट्टपयाइं पञ्चुगच्छइ २ ता तिक्खुतो आयाहिणपयाहिणं करेइ २ ता वंदइ
 नमंसइ वं० २ ता महरिहेणं आसणेणं उवनिमंतेइ । तए णं से कच्छुल्लनारए उद-
 -यपरिफोसियाए दम्भोवरिप(च)च्चुत्थुयाए भिसियाए निसीयइ २ ता पंडुरायं रजे
 [य] जाव अंतोउरे य कुसलोदंतं पुच्छइ । तए णं से पंडूराया कोती [य] देवी पंच
 य पंडवा कच्छुल्लनारयं आडंति जाव पञ्जुवासंति । तए णं सा दोवई देवी कच्छुल्ल-
 नारयं अस्संज(यं)यअविर(यं)यअप्पडिहय[अ]पच्चखायपावकम्मं-तिकहु नो
 आढाइ नो परियाणइ नो अब्भुट्टेइ नो पञ्जुवासइ ॥ १२७ ॥ तए णं तस्स कच्छु-
 ल्लनारयस्स इमेयाहवे अज्झत्थिए चित्थिए पत्थिए मणोगए संकप्पे समुप्पज्जित्था-
 -अहो णं दोवई देवी हवे(णं)ण य जाव लावण्णेण य पंचहिं पंडवेहिं अ(णुव)वत्थिदा-
 -समाणी ममं नो आढाइ जाव नो पञ्जुवासइ । तं सेयं खलु मम दोवईए देवीए
 विप्पियं क(रि)रेत्तए-तिकहु एवं संपेहेइ २ ता पंडु(य)रायं आपुच्छइ २ ता उप्प-
 -यणिं विज्जं आवाहेइ २ ता ताए उक्किट्ठाए जाव विजाहरगईए लवणसमुहं मज्झं-
 -मज्झेणं पुरत्थाभिमुहे वी(इ)ईवइउं पयत्ते यावि होत्था । तेणं कालेणं तेणं समएणं
 धायइसंडे दीवे पुरत्थिमडदाहिणद्धुभरहवासे अ(म)वरकंका ना(म)मं रायहाणी
 होत्था । त(ए)त्थ णं अ(म)वरकंकाए रायहाणीए पउमनाभे नामं राया होत्था महया
 हिमवंत वण्णओ । तस्स णं पउमनाभस्स रत्तो सत्त देवीसयाइं ओरोहे होत्था ।
 तस्स णं पउमनाभस्स रत्तो सुनाभे नामं पुत्ते जुवराया(या)वि होत्था । तए णं से
 पउमनाभे राया अंतोअंतोउरंसि ओरोहसंपरिखुडे सी(सि)हासणवरगए विहरइ ।
 तए णं से कच्छुल्लनारए जेणेव अवरकंका रायहाणी जेणेव पउमना(ह)भस्स भवणे
 तेणेव उवागच्छइ २ ता पउमनाभस्स रत्तो भवणंसि ज(त्ति)त्ति वेगे(णं)ण समो-
 -वइए । तए णं से पउमनाभे(राया) कच्छु(ल्लं)ल्लनारयं एजमाणं पासइ २ ता आस-
 -णाओ अब्भुट्टेइ २ ता अग्घेणं जाव आसणेणं उवनिमंतेइ । तए णं से कच्छुल्लनारए
 उदयपरिफोसियाए दम्भोवरिपच्चत्थुयाए भिसियाए निसीयइ जाव कुसलोदंतं आपु-
 -च्छइ । तए णं से पउमनाभे राया नियगओरोहे जायविम्हए कच्छुल्लनारयं एवं

वयासी-तु(ब्भं)मं देवाणुप्पिया ! वहुणि गामाणि जाव गि(गे)हाइं अणुपविससि,
तं अत्थि-याइं ते कहिंवि देवाणुप्पिया ! एरिसए ओरोहे दिट्ठपुव्वे जारिसए णं मम
ओरोहे ? । तए णं से कच्छुल्लनारए पउमनाभेणं (रत्ता) एवं वुत्ते समाणे ईसिं विह-
सियं करेइ २ ता एवं वयासी-सरिसे णं तुमं पउम-नाभा ! तस्स अगडदहुरस्स ।
के णं देवाणुप्पिया ! से अगडदहुरे ? एवं जहा मल्लिणाए । एवं खलु देवाणुप्पिया !
जंबुदीवे २ भारहे वासे हत्थिणाउरे [नयरे] दुपयस्स रत्तो धूया चुलणीए देवीए
अत्तया पंडुस्स सुण्हा पंचण्हं पंडवाणं भारिया दोवई देवी रुवेण य जाव उक्किट्ठ-
सरीरा । दोवईए णं देवीए छिन्नस्सवि पायंगुट्ठ(य)स्स अयं तव ओरोहे स(तिमं)यं पि
कलं न अग्घइ-त्तिकट्ठ पउम-नाभं आपुच्छइ (०) जाव पडिगए । तए णं से
पउमनाभे राया कच्छुल्लनारयस्स अंतिए एयमट्ठं सोच्चा निसम्म दोवईए देवीए
रुवे य ३ मुच्छिए ४ (०) जेणेव पोसहसाला तेणेव उवागच्छइ २ ता पोसहसालं
जाव पुव्वसंगइयं देवं एवं वयासी-एवं खलु देवाणुप्पिया ! जंबुदीवे २ भारहे
वासे हत्थिणाउरे जाव [उक्किट्ठ]सरीरा, तं इच्छामि णं देवाणुप्पिया ! दोव(तीं)इं
देवीं इहमा(णि)णीयं । तए णं पुव्वसंगइए देवे पउमनाभं एवं वयासी-नो
खलु देवाणुप्पिया ! ए(यं)वं भूयं वा भव्वं वा भविस्सं वा ज-न्नं दोवई देवी
पंच-पंडवे मोत्तू(ण)णं अत्तेणं पुरिसेणं सद्धिं उ(ओ)रालाइं जाव विहरिस्सइ । तहावि
य णं अहं तव पियट्ठ(त)याए दोवई देविं इहं हव्वमाणेमि-त्तिकट्ठ पउम-नाभं
आपुच्छइ २ ता ताए उक्किट्ठाए जाव लवणसमुहं मज्झमज्झेणं जेणेव हत्थिणाउरे
नयरे तेणेव पहारेत्थ गमणाए । तेणं कालेणं तेणं समएणं हत्थिणाउरे [नयरे]
जुहिट्ठिल्ले राया दोवईए देवीए सद्धिं उंप्पि आगासत(लं)लगंसि सुह[प]पसुत्ते यावि
होत्था । तए णं से पुव्वसंगइए देवे जेणेव जुहिट्ठिल्ले राया जेणेव दोवई देवी तेणेव
उवागच्छइ २ ता दोवईए देवीए ओसोवणियं दलयइ २ ता दोवई देवि गिण्हइ २
ता ताए उक्किट्ठाए जाव जेणेव अ-वरकंका जेणेव पउम-नाभस्स भवणे तेणेव उवा-
गच्छइ २ ता पउम-नाभस्स भवणंसि असोगवणियाए दोवई देविं ठावेइ २ ता
ओसोवणिं अवहरइ २ ता जेणेव पउमनाभे तेणेव उवागच्छइ २ ता एवं वयासी-
एस णं देवाणुप्पिया ! मए हत्थिणाउराओ दोवई देवी इ(ह)हं 'हव्वमाणीया तव
असोगवणियाए चिट्ठइ । अओ परं तुमं जाणंसि-त्तिकट्ठ जामेव दिसि पाउब्भूए
तामेव दिसिं पडिगए । तए णं सा दोवई देवी तओ मुहुत्तंतरस्स पडिबुद्धा
समाणी तं भवणं असोगवणियं च अपच्चभिजाणमाणी एवं वयासी-नो खलु अम्हं
एसे सए भवणे नो खलु एसा अम्हं स(गा)या असोगवणिया । तं न नजइ णं अहं

केण(ई)इ देवेण वा दाणवेण वा किंपुरिसेण वा किन्नरेण वा महोरगेण वा गंधव्वेण
वा अन्नस्स र-न्नो असोगवणियं साहरिय-त्तिकट्टु ओहयमणसंकम्पा जाव झियायइ ।
तए णं से पउम-नामे राया ण्हाए सव्वालंकारविभूतिए अंतेउरपरियालसंपरिवुडे
जेणेव असोगवणिया जेणेव दोवई देवी तेणेव उवागच्छइ २ ता दोव(तीं)इं दे(वीं)विं
ओहय(०) जाव झियायमा(णीं)णिं पासइ २ ता एवं वयासी-कि-न्नं तुमं देवाणुप्पि-
(ए)या ! ओहय जाव झियाहि ? एवं खलु तुमं देवाणुप्पिए ! मम पुव्वसंगइएणं देवेणं
जंबुद्दीवाओ २ भारहाओ वासाओ हत्थिणा(पु)उराओ नयराओ जुहिट्ठिस्स र-न्नो
भवणाओ साहरिया, तं मा णं तुमं देवाणुप्पि-या ! ओहय-जाव झियाहि, तुमं [णं]
मए सद्धिं विपुलाइं भोगभोगाइं जाव विहराहि । तए णं सा दोवई (देवी) पउम-नामं
एवं वयासी-एवं खलु देवाणुप्पिया ! जंबुद्दीवे २ भारहे वासे वारव(ति)ईए नयरीए
कण्हे नामं वासुदेवे मम(प्पि)पियभाउए परिवसइ, तं जइ णं से छण्हं मासाणं
म(मं)म कूवं नो हव्वसागच्छइ तए णं अहं देवाणुप्पिया ! जं तुमं वदसि तस्स
आणाओवायवयणनिद्देसे चिट्ठिस्सामि । तए णं से पउ(मे)मनामे दोवईए एयमट्ठं
पडिस्सुणेइ २ ता दोवईं देविं क-न्नंतेउरे ठवेइ । तए णं सा दोवई देवी छट्ठंछट्ठेणं
अणिक्खित्तेणं आयंविलपरिग्गहिएणं तवोकम्मेणं अप्पाणं भावेमाणी विहरइ
॥ १२८ ॥ तए णं से जु(हु)हिट्ठिस्से राया तओ मुहुत्तंतरस्स पडिबुद्धे समाणे दोवईं
देविं पासे अपासमा(णो)णे सयणिज्जाओ उट्ठेइ २ ता दोवईए देवीए सव्वओ समंता
मग्गणगवेसणं करेइ २ ता दोवईए देवीए कत्थइ सुइं वा खुइं वा पवत्तिं वा अलभ-
माणे जेणेव पं-डूराया तेणेव उवागच्छइ २ ता पं-डूरायं एवं वयासी-एवं खलु ताओ !
म-म आगासतलगंसि [सुह]पसुत्तस्स पासाओ दोवई देवी न नज्जइ केणइ देवेण
वा दाणवेण वा [किंपुरिसेण वा] किन्नरेण वा महोरगेण वा गंधव्वेण वा हिया वा
नि(णी)या वा अ(व)क्खित्ता वा (?), [तं] इच्छामि णं ताओ ! दोवईए देवीए
सव्वओ समंता मग्गणगवेसणं क(यं)रितए । तए णं से पं डूराया कोडुंवियपुरिसे
सदावेइ २ ता एवं वयासी-गच्छह णं तुब्भे देवाणुप्पिया ! हत्थिणाउरे नयरे सिंघा-
डगति(य)गचउक्कचच्चरमहापहपहेसु महया २ सद्देणं उग्घोसेमाणा २ एवं वयह-एवं
खलु देवाणुप्पिया ! जुहिट्ठिस्स र-न्नो आगासतलगंसि सुहपसुत्तस्स पासाओ दोवईं
देवी न नज्जइ केणइ देवेण वा दाणवेण वा किंपुरिसेण वा किन्नरेण वा महोरगेण
वा गंधव्वेण वा हिया वा नि(नी)या वा अ-क्खित्ता वा, तं जो णं देवाणुप्पिया ! दोवईए
देवीए सुइं वा खुइं वा पवित्तिं वा परिकहेइ तस्स णं पं डूराया विउलं अत्यसंपयाणं
(दाणं)दलयइ-त्तिकट्टु घोसणं घोसावेह २ ता एयमाणत्तियं पच्चप्पिणह । तए णं ते

कोडुंवियपुरिसा जाव पच्चप्पिणंति । तए णं से पंडू-राया दोवईए देवीए कंथइ सुईं
वा जाव अलभमाणे कौंतीं देवीं सदावेइ २ ता एवं वयासी-गच्छह णं तुमं देवाणु-
प्पिया ! बारवईं नयरिं कण्हस्स वासुदेवस्स एयमट्ठं निवेदेहि । कण्हे णं परं वासुदेवे
दोवईए (देवीए) मग्गणगवेसणं करेज्जा अन्नहा न नज्जइ दोवईए देवीए सु(तीं)इं वा
खु(तीं)इं वा पव(तीं)तिं वा उवलभेज्जा । तए णं सा कौंती देवी पंडु(र)णा एवं
वुत्ता समाणी जाव पडिखुणेइ २ ता ण्हाया हत्थिखंधवरगया हत्थिणा(उ)पुरं नयरं
मज्झंमज्झेणं निग्गच्छइ २ ता कुरुजणवयं मज्झंमज्झेणं जेणेव सुर(ट्ठ)ट्ठाजणवए
जेणेव बारवईं नयरी जेणेव अग्गुज्जाणे तेणेव उवागच्छइ २ ता हत्थिखंधाओ
पच्चोरुहइ २ ता कोडुंवियपुरिसे सदावेइ २ ता एवं वयासी-गच्छह णं तुम्भे देवा-
णुप्पिया ! जेणेव (बारवईं ण०) बारवईं नयरिं अणुपविसह २ ता कण्हं वासुदेवं
करयल[०] एवं वयह-एवं खलु सामी ! तुम्भं पिउच्छा कौंती देवी हत्थिणाउराओ
नयराओ इ-हं हव्वमागया तुम्भं दंसणं कंखइ । तए णं ते कोडुंवियपुरिसा जाव
कहेति । तए णं कण्हे वासुदेवे कोडुंवियपुरिसाणं अंतिए [एयमट्ठं] सोच्चा निसम्म
[हट्टुट्टे] हत्थिखंधवरगए हयमय[०] बारवईए (य) नयरीए मज्झंमज्झेणं जेणेव कौंती
देवी तेणेव उवागच्छइ २ ता हत्थिखंधाओ पच्चोरुहइ २ ता कौंतीए देवीए पायग्ग-
हणं करेइ २ ता कौंतीए देवीए सद्धिं हत्थिखंधं दुरुहइ २ ता बारव(तीए)इं नय-
(रीए)रिं मज्झंमज्झेणं जेणेव सए गिहे तेणेव उवागच्छइ २ ता सयं गिहं अणु-
पविसइ । तए णं से कण्हे वासुदेवे कौं(तीं)तिं देविं ण्हायं जिमियभुत्ततरागयं जाव
सुहासणवरगयं एवं वयासी-संदिसउ णं पिउच्छा ! किमागमणपओयेणं (?) । तए
णं सा कौंती देवी कण्हं वासुदेवं एवं वयासी-एवं खलु पुत्ता ! हत्थिणाउरे नयरे
जुहिट्ठिस्स [रज्जो] आगासत(ले)लए सुह[८]पसुत्तस्स पासाओ दोवईं देवी न नज्जइ
केणइ अवहिया जाव अवक्खित्ता वा, तं इच्छामि णं पुत्ता ! दोवईए देवीए मग्ग-
णगवेसणं कयं । तए णं से कण्हे वासुदेवे कौं(तिं)तीपिउच्छि एवं वयासी-जं नवरं
पिउच्छा (१) दोवईए देवीए कथइ सुईं वा जाव लभामि तो णं अहं पायालाओ
वा भवणाओ वा अद्धभरहाओ वा समंतओ दोवईं [देविं] साहत्थि उवणेमि-त्तिकट्ठु
कौं(तीं)तीपिउ(त्थि)च्छि सक्कारेइ सम्माणेइ जाव पडिविसजेइ । तए णं सा कौंती देवी
कण्हेणं वासुदेवेणं पडिविसजिया समाणी जामेव दिसिं पाउब्भूया तामेव दिसिं
पडिगया । तए णं से कण्हे वासुदेवे कोडुंवियपुरिसे सदावेइ २ ता एवं वयासी-
गच्छह णं तुम्भे देवाणुप्पिया ! बारवईं नयरिं एवं जहा पंडू तहा घोसणं घोसा-
वेइ जाव पच्चप्पिणंति पंडुस्स जहा । तए णं से कण्हे वासुदेवे अनया अंतोअंते-

जरगए ओरोहे जाव विहरइ । इमं च णं कच्छुल्लए [नारए] जाव समोवइए जाव
 निसीइत्ता कण्हं वासुदेवं कुसलोदंतं पुच्छइ । तए णं से कण्हे वासुदेवे कच्छुल्लं
 नारयं एवं वयासी-तुमं णं देवाणुप्पिया । बह्वणि गामागर जाव अणुपविससि,
 तं अत्थि-याइं ते कहिं(वि)चि दोवईए देवीए सुई वा जाव उवलद्धा ? । तए णं से
 कच्छु(ल्लि)ल्लए (णारए) कण्हं वासुदेवं एवं वयासी-एवं खलु देवाणुप्पिया । अन्नया
 [क्याई] धायईसंडे दीवे पुरत्थिमद्धं दार्हिणद्धमरहवासं अवरकंकारायहाणि गए,
 तत्थ णं मए पउमनाभस्स रत्तो भवणंसि दोवई देवी जारिसिया दिट्ठपुव्वा यावि
 होत्था । तए णं कण्हे वासुदेवे कच्छुल्लं एवं वयासी-तुम्भं चेव णं देवाणुप्पिया ।
 ए(वं)यं पुव्वकम्मं । तए णं से कच्छुल्लनारए कण्हेणं वासुदेवेणं एवं वुत्ते समाणे उप्प-
 यणिं विज्जं आवाहेइ २ ता जामेव दिसिं पाउब्भूए तामेव दिसिं पडिगए । तए णं से
 कण्हे वासुदेवे दूयं सद्दावेइ २ ता एवं वयासी-गच्छह णं तुमं देवाणुप्पिया । हत्थिणाउरं
 पंडुस्स रत्तो एयमद्धं निवे(दे)एहि-एवं खलु देवाणुप्पिया । [दोवई देवी] धाय(इ)ई-
 सं(डे)डदीवे पुर(च्छि)त्थिमद्धे अवरकंकाए रायहाणीए पउम-नाभभवणंसि [साहिया]
 दोवईए देवीए पउत्ती उवलद्धा । तं गच्छंतु पंच पंडवा चाउरंगिणीए सेणाए सद्धि
 संपरिखुडा पुर-त्थिमवेयालीए ममं पडिवालेमाणा चिट्ठंतु । तए णं से दूए जाव भणइ
 [जाव] पडिवालेमाणा चिट्ठह । तेवि जाव चिट्ठंति । तए णं से कण्हे वासुदेवे कोडुं-
 वियपुरिसे सद्दावेइ २ ता एवं वयासी-गच्छह णं तुम्भे देवाणुप्पिया । सन्नाहियं भेरिं
 ता(डे)लेह । तेवि तालेंति । तए णं ती(से)ए सन्नाहियाए भेरीए सइं सोच्चा समुद्विज-
 यपामोक्खा दस दसारा जाव छप्प-न्नं बलव(य)गसाहस्सीओ सन्नद्धवद्ध जाव गहि-
 याउहपहरणा अप्पेगइया हयगया [अप्पेगइया] गयगया जाव [मणुस्स]वग्गुरापारि-
 त्तित्ता जेणेव सभा सु(ध)हम्मा जेणेव कण्हे वासुदेवे तेणेव उवागच्छंति २ ता
 करयल जाव वद्धावेंति । तए णं [से] कण्हे वासुदेवे हत्थिखंधवरगए सकोरेंटमल्लदा-
 मेणं छत्तेणं ध(धा)रिज्जमाणेणं सेयवर० हयगय(०) महया भडचडगरपहकरेणं
 वारवईए नयरीए मज्झमज्जेणं निग्गच्छइ (०) जेणेव पुर-त्थिमवेयाली तेणेव उवा-
 गच्छइ २ ता पंचहिं पंडवेहिं सद्धिं एगयओ मि(ल)लाइ २ ता खंधावार-निवेसं करेइ
 २ ता [पोसहसालं करेइ २ ता] पोसहसालं अणु-प्पविसइ २ ता सुद्धियं देवं मण(त्ति)-
 सीकरेमाणे २ चिट्ठइ । तए णं कण्हस्स वासुदेवस्स अट्ठमभेत्तंसि परिणममाणंसि
 सुद्धिओ जाव आगओ (,) [एवं वयइ-] भण देवाणुप्पिया ! जं मए कायव्वं । तए णं से
 कण्हे वासुदेवे सुद्धियं (देवं) एवं वयासी-एवं खलु देवाणुप्पिया । दोवई देवी जाव
 पउमनाभस्स भवणंसि सा(हारे)हिया, तण्णं तुमं देवाणुप्पिया । मम पंचहिं पंड-

वेहिं सद्धिं अप्पच्छट्ठस्स छण्हं रहाणं लवणसमुद्दे मग्गं विय(रे)राहि जा(जण)णं अहं-
अ-वरकंकारायहाणिं दोवईए कूवं गच्छामि । तए णं से सुट्ठिए देवे कण्हं वासुदेवं
एवं वयासी-किण(हं)णं देवाणुप्पिया ! जहा चेव पउम-नाभस्स रज्जो पुव्वसंगइएणं
देवेणं दोवई जाव साहि(संहरि)या तहा चेव दोवई देविं धायईसंडाओ दीवाओ
भारहाओ जाव हत्थिणाउरं साहरामि उदाहु पउम-नाभं रायं सपुरवलवाहणं
लवणसमुद्दे पक्खिवामि ? । तए णं [से] कण्हे वासुदेवे सुट्ठियं देवं एवं वयासी-
मा णं तुमं देवाणुप्पिया ! जाव साहराहि, तुमं णं देवाणुप्पिया ! [मम] लवण-
समुद्दे [पंचहिं पंडवेहिं सद्धिं] अप्पच्छट्ठस्स छण्हं रहाणं मग्गं वियराहि, सयमेव
णं अहं दोवईए कूवं गच्छामि । तए णं से सुट्ठिए देवे कण्हं वासुदेवं एवं वयासी-
एवं होउ [णं] । पंचहिं पंडवेहिं सद्धिं अप्पच्छट्ठस्स छण्हं रहाणं लवणसमुद्दे मग्गं
वियरइ । तए णं से कण्हे वासुदेवे चाउरंगि(णी)णिं सेणं पडिविसज्जेइ २ ता
पंचहिं पंडवेहिं सद्धिं अप्पच्छट्ठे छहि रहेहिं लवणसमुद्दं मज्झमज्झेणं वीईवयइ २
ता जेणेव अ-वरकंका रायहाणी जेणेव अ-वरकंकाए [रायहाणीए] अग्गुज्जाणे तेणेव
उवागच्छइ २ ता रहं ठा(ठ)वेइ २ ता दास्यं सारहिं सदावेइ २ ता एवं
वयासी-गच्छह णं तुमं देवाणुप्पिया ! अ-वरकंकारायहाणिं अणु-पविसाहि २ ता
पउम-नाभस्स र-ज्जो वामेणं पाएणं पायपीढं अ[व]क्कमिता कुंतग्गेणं लेहं पणामेहि
तिवलियं भिउडि निडाले साहडु आसुरुत्ते रुट्ठे कुट्ठे कुविए चंडिक्किए एवं व०-
हं भो पउम-ना(हा)भा ! अपत्थियपत्थिया दुरंतपंतलक्खणा हीणपु-ण्णचाउइसा
सि(री)रिहिरि(धी)धिइपरिवज्जिया [!] अज्ज न भवसि किञ्चं तुमं न याणासि
कण्हस्स वासुदेवस्स भगिणिं दोवई देविं इहं हव्वमा(ण)णेमा(णे)णं ? तं एयमवि गए
पच्चप्पिणाहि णं तुमं दोवई देवि कण्हस्स वासुदेवस्स अहव णं जुद्धसज्जे निग्ग-
च्छाहि, एस णं कण्हे वासुदेवे पंचहिं पंडवेहिं [सद्धिं] अप्पच्छट्ठे दोवई[ए] देवीए
कूवं हव्वमागए । तए णं से दासए सारही कण्हेणं वासुदेवेणं एवं वुत्ते समाणे
हट्ठतुट्ठे (जाव) पडिसुणेइ २ ता अ-वरकं(का)कं रायहाणिं अणुपविसइ २ ता
जेणेव पउमना(हे)भे तेणेव उवागच्छइ २ ता करयल जाव वद्धावेत्ता एवं
वयासी-एस णं सामी ! मम विणयपडिवत्ती इमा अज्जा मम सामिस्स समुहाणत्ति-
त्तिकडु आसुरुत्ते वामपाएणं पायपीढं अ(णु)वक्कमइ २ ता कुं(को)तग्गेणं लेहं पणा-
(म)मेइ (०) जाव कूवं हव्वमागए । तए णं से पउम-नाभे दासएणं सारहिणा एवं वुत्ते
समाणे आसुरुत्ते तिवलिं भिउडि निडाले साहडु एवं वयासी-(णो) न अप्पिणामि णं
अहं देवाणुप्पिया ! कण्हस्स वासुदेवस्स दोवई । एस णं अहं सयमेव जुज्झस(ज्जो) ।

जे निग्गच्छामि-त्तिकट्टु दास्यं सारहिं एवं वयासी-केवलं भो ! रायसत्थेसु दू(यि)ए अवज्जे-त्तिकट्टु असक्कारि(य)यं असम्माणि(य)यं अव-दारेणं निच्छुभावेइ । तए णं से दासए सारही पडम-नाभेणं असक्कारि-यं जाव निच(छ)छुडे समाणे जेणेव कण्हे वासुदेवे तेणेव उवागच्छइ २ ता करयल जाव कण्हं (जाव) एवं वयासी-एवं खलु अहं सामी ! तुब्भं वयणेणं जाव निच्छुभावेइ । तए णं से पडम-नाभे वल-वालयं सदावेइ २ ता एवं वयासी-खिप्पामेव भो देवाणुप्पिया ! आभिसेक्कं हत्थिर-यणं पडिकप्पेह । तयाणंतरं च णं छेयायरियउव(दे)एसमइविकप्पणा(विगप्पेहिं)हि जाव उव(णे)णेंति । तए णं से पडमनाहे सन्नद्ध० अभिसेयं दुरुहइ २ ता हयगय जेणेव कण्हे वासुदेवे तेणेव पहारेत्य गमणाए । तए णं से कण्हे वासुदेवे पडम-नाभं रायाणं एजमाणं पासइ २ ता ते पंच पंडवे एवं वयासी-हं भो दारगा ! किञ्चं तुब्भे पडम-नाभेणं सद्धिं जुज्झि(हि)हह उयाहु पिच्छह(पेच्छिहिं)ह ? । तए णं ते पंच-पंडवा कण्हं वासुदेवं एवं वयासी-अम्हे णं सामी ! जुज्झामो तुब्भे पेच्छह । तए णं पंच-पंड(वे)वा स-न्नद्ध जाव पहरणा रहे दुरुहंति २ ता जेणेव पडम-नाभे राया तेणेव उवागच्छंति २ ता एवं वयासी-अम्हे [वा] पडम-नाभे वा राय-त्तिकु पडमनाभेणं सद्धिं संपलग्गा यावि होत्था । तए णं से पडमनाभे राया ते पंच-पंडवे खिप्पामेव हयमहियपवरविवडियच्चिंध(द्ध)धयपडा(गा)ने जाव दिसोदिसिं पडिसेहेइ । तए णं ते पंच-पंडवा पडम-नाभेणं र-न्ना हयमहियपवरविव-डिय जाव पडिसेहिया समाणा अत्थामा जाव अधारणिज्ज[मि]त्तिकट्टु जेणेव कण्हे वासुदेवे तेणेव उवागच्छंति । तए णं से कण्हे वासुदेवे ते पंच-पंडवे एवं वयासी-कहण्णं तुब्भे देवाणुप्पिया ! पडम-नाभे(ण)णं रन्ना सद्धिं संपलग्गा ? । तए णं ते पंच-पंडवा कण्हं वासुदेवं एवं वयासी-एवं खलु देवाणुप्पिया ! अम्हे तुब्भेहिं अब्भणुन्नाया समाणा सन्नद्ध० रहे दुरुहामो २ ता जेणेव पडम-नाभे जाव पडि-सेहेइ । तए णं से कण्हे वासुदेवे ते पंच-पंडवे एवं वयासी-जइ णं तुब्भे देवाणु-प्पिया ! एवं वयंता-अम्हे नो पडम-नाभे रायत्तिकट्टु पडम-नाभेणं सद्धिं संपलग्गंता तो णं तुब्भे नो पडम-ना-भे हयमहियपवर जाव पडिसे(हंते)हित्था तं पेच्छह णं तुब्भे देवाणुप्पिया ! अहं नो पडम-नाभे रायत्तिकट्टु पडमनाभेणं रन्ना सद्धिं जुज्झामि रहं दुरुहइ २ ता जेणेव पडमनाभे राया तेणेव उवागच्छइ २ ता सेयं गोखी-रहारधवलं तणसोल्लियसिंदुवारकुंदेंदुसन्निगासं नियय[स्स] वलस्स हरिसजणणं रिउसे-न्नविणासकरं पंचज-न्नं संखं परामुसइ २ ता मुहवायपूरियं करेइ । तए णं तस्स पडम-ना(ह)भस्स तेणं संखसहेणं बलतिभाए हए जाव पडिसेहिए । तए णं से कण्हे

वासुदेवे धणुं परासुसइ वेढो धणुं पूरेइ २ ता-धणुसइं करेइ । तए णं तस्स पउम-नाभस्स दोव्हे बलतिभाए तेणं धणुसइणं हयमहिय जाव पडिसेहिए । तए णं से पउम-नाभे राया तिभागवलावसेसे अत्थामे अवळे अवीरिए अपुरि-सकारपरक्क(म्)मे आधारणिज्ज-मि-त्तिकट्ठु सिग्घं तुरियं जेणेव अ-वरकंका तेणेव उवा-गच्छइ २ ता अ-वरकं(कं)कारायहाणिं अणुपविसइ २ ता वा(दा)राइं पिहेइ २ ता रोहसज्जे चिद्धइ । तए णं से कण्हे वासुदेवे जेणेव अ-वरकंका तेणेव उवा-गच्छइ २ ता रहं ठा वेइ २ ता रहाओ पच्चोसहइ २ ता वैउव्वियसमुग्घाएणं समोह[ण]णइ(०) एगं महं नरसीहरूवं विउव्वइ २ ता महया २ सइणं पा(द)यदह-रियं करेइ । तए णं (से) कण्हेणं वासुदेवेणं महया २ सइणं पा-यदहरएणं कएणं समाणेणं अ-वरकंका रायहाणी संभग्गपागारगो(पु)उराट्ठालयचरियतोरणपलहत्थिय-पवरभवणसिरिधरा सर(स्)सरस्स धरणियळे सज्जिवइया । तए णं से पउम-नाभे राया अ-वरकंका रायहाणिं संभग्ग(ग)गं जाव पासित्ता भीए दोवइं देविं सरणं उवेइ । तए णं सा दोवइं देवी पउमनाभं रायं एवं वयासी-कि-न्नं तुमं देवाणु-प्पिया ! (न) जाणसि कण्हस्स वासुदेवस्स उत्तमपुरिसस्स विप्पियं करेमाणे (ममं इह हव्वमाणेसि) ? तं एवमवि गए गच्छह णं तुमं देवाणुप्पिया ! ण्हाए उल्लपडसाडए ओ(अव)चूलगवत्थ-नियत्थे अंतेउरपरियालसंपरिवुडे अग्गाइं वराइं रयणाइं गहाय ममं पुरओ-काउं कण्हं वासुदेवं करयल [जाव] पाय(प)वडिए सरणं उवेहि, पणिवइयवच्छला णं देवाणुप्पिया ! उत्तमपुरिसा । तए णं से पउमनाभे दोवइं देवीए एयमट्ठं पडिसुणेइ २ ता ण्हाए जाव सरणं उवेइ २ ता करयल जाव एवं वयासी-दिट्ठा णं देवाणुप्पियाणं इट्ठी जाव परक्कमे । तं खामेमि णं देवा-णुप्पिया ! जाव खमंतु णं जाव नाहं भुज्जो २ एवं करणयाए-त्तिकट्ठु पंजलि(वु)उडे पायवडिए कण्हस्स वासुदेवस्स दोवइं देविं साहत्थि उवणेइ । तए णं से कण्हे वासुदेवे पउम-नाभं एवं वयासी-हं भो पउम-नाभा ! अ(त्)पत्थियपत्थिया ४ कि-न्नं तुमं (ण) जाणसि मम भगिणिं दोवइं देविं इह हव्वमाणमाणे ? तं एवमवि गए नत्थि ते ममार्हितो इयाणिं भयमत्थि-त्तिकट्ठु पउम-नाभं पडिविसज्जेइ (०) दोवइं देविं गे(गि)ण्हइ २ ता रहं दुरूहेइ २ ता जेणेव पंच पंड-वा तेणेव उवागच्छइ २ ता पंचण्हं पंडवाणं दोवइं देविं साहत्थि उवणेइ । तए णं से कण्हे पंचाहिं पंडवेहिं सद्धि अप्पच्छे छहिं रहेहिं लवणसमुहं मज्झमज्झेणं जेणेव जंबुदीवे २ जेणेव भारहे वासे तेणेव पहारेत्थ गमणाए ॥ १२९ ॥ तेणं कालेणं तेणं समएणं धायइ-संडे दीवे पुर-त्थिमद्धे भारहे वासे चंपा नामं नयरी होत्था । पुण्णभदे उज्जाणे ।

तत्थ णं चंपाए नयरीए कविले नामं वासुदेवे राया होत्था (महया हिमवं०)
वण्णओ । तेणं कालेणं तेणं समएणं मुणिसुव्वए अरहा चंपाए पुण्णभेदे समोसठे ।
क(पि)विले वासुदेवे धम्मं सुणेइ । तए णं से कविले वासुदेवे मुणिसुव्वयस्स
अरहओ [अंतिए] धम्मं सुणेमाणे कण्हस्स वासुदेवस्स संखसइं सुणेइ । तए णं
तस्स कविलस्स वासुदेवस्स इमेयाहवे अ(व्म)ज्जत्थिए [४] समुप्पज्जित्या-किं मण्णे
घायइसंठे दीवे भारहे वासे दोव्वे वासुदेवे समुप्पजे (?) जस्स णं अयं संखसदे ममं
पिव मुहवायपूरिए वियंभइ (?) कविले वासुदे(वे)वा भ(स)द्वा(ति)इ (सुणेइ) मुणिसु-
व्वए अरहा कविलं वासुदेवं एवं वयासी-से नूणं (ते) कविला वासुदेवा ! म(म)मं
अंतिए धम्मं निसामेमाणस्स संखसइं आकण्णिता इमेयाहवे अ-ज्जत्थिए-किं मन्ने
जाव वियंभइ । से नूणं कविला वासुदेवा ! अ(यम)द्वे समद्वे ? हंता [!] अत्थि ।
[तं] नो खलु कविला ! एवं भूयं वा भ(वइ)व्वं वा भविस्(सइ)सं वा जन्नं ए(गे)-
गखेत्ते ए-गजुगे ए-गसमए [णं] दुवे अरहंता वा चक्कवट्ठी वा वलदेवा वा वासुदेवा
वा उप्पज्जिंनु वा उप्पज्जिति वा उप्पज्जिस्संति वा । एवं खलु वासुदेवा ! जंजुट्ठी-
वाओ २ भारहाओ वासाओ हत्थिणाउ(र)राओ नयराओ पंडुस्स र-ओ सुण्हा
पंचण्हं पंडवाणं भारिया दोवई देवी तव पउम-नाभस्स र-ओ पुव्वसंगइएणं देवेणं
अ-वरकं-कं-नयरिं साहरिया । तए णं से कण्हे वासुदेवे पंचहिं पंडवेहिं सद्धिं
अप्पच्छे छहिं रहेहिं अ-वरकं-कं रायहाणि दोवईए देवीए कूवं हव्वमागए । तए णं
तस्स कण्हस्स वासुदेवस्स पउम-नाभेणं र-ओ सद्धिं संगामं संगामेमाणस्स अयं संख-
सदे तव मुहवाया० (इव) इद्वे (कंते) इ(हे)व वियंभइ । तए णं से कविले वासुदेवे
मुणिसुव्वयं वंदइ नमंसइ वं० २ ता एवं वयासी-गच्छामि णं अहं भंते ! कण्हं
वासुदेवं उत्तमपुरिसं [मम] सरिसपुरिसं पासामि । तए णं मुणिसुव्वए अरहा
कविलं वासुदेवं एवं वयासी-नो खलु देवाणुप्पिया ! एवं भूयं वा ३ जण्णं अरहंता
वा अरहंतं पासंति चक्कवट्ठी वा चक्कवट्ठिं पासंति वलदेवा वा वलदेवं पासंति वासु-
देवा वा वासुदेवं पासंति । तहावि य णं तुमं कण्हस्स वासुदेवस्स लवणसमुदं
मज्जंमज्जेणं वी(ति)इवयमाणस्स सेयापीयाइं धयग्गाइं पासिहिसि । तए णं से कविले
वासुदेवे मुणिसुव्वयं वंदइ नमंसइ वं० २ ता हत्थिखंवं दुरुहइ २ ता सिग्घं २
जेणेव वेला(उ)कूले तेणेव उवागच्छइ २ ता कण्हस्स वासुदेवस्स लवणसमुदं
मज्जंमज्जेणं वी इवयमाणस्स सेयापीया(हिं)इं धयग्गाइं पासइ २ ता एवं वयइ-एस
णं मम सरिसपुरिसं उत्तमपुरिसं कण्हे वासुदेवे लवणसमुदं मज्जंमज्जेणं वीइवयइ-
सिग्घं पंचयन्नं संखं परामुसइ [२] मुहवायपूरियं करेइ । तए णं से कण्हे वासु-

देवे कविलस्स वासुदेवस्स संखसद्दं आय-ण्णेइ २ ता पंचयन्नं जाव पूरियं करेइ । तए णं दोवि वासुदेवा संखसद्द(सा)समायारिं करेति । तए णं से कविले वासुदेवे जेणेव अ-वरकंका तेणेव उवागच्छइ २ ता अ-वरकंका रायहाणिं संभग्गतोरणं जाव पासइ २ ता पउम नाभं एवं वयासी-किन्नं देवाणुप्पिया ! एसा अ-वरकंका संभग्ग जाव सन्निवइया ? । तए णं से पउम-ना-भे कविलं वासुदेवं एवं वयासी-एवं खलु सामी ! जंबुदीवाओ २ भारहाओ वासाओ इहं हव्वमागम्म कण्हेणं वासुदेवेणं तुब्भे परिभूय अ-वरकंका जाव सन्नि(वा)वडिया । तए णं से कविले वासुदेवे पउम-ना-भस्स अंतिए एयमट्ठं सोच्चा पउम-ना(हं)भं एवं वयासी-हं भो पउम-नाभा ! अप-त्थियपत्थिया [५.] किन्नं तुमं (न) जाणसि मम सरिसपुरिसस्स कण्हस्स वासुदेवस्स विप्पियं करेमाणे ? आसुरुत्ते जाव पउम-ना-भं निव्विसयं आणवेइ पउम-ना-भस्स पुत्तं अ-वरकंका[ए] रायहाणीए महया २ रायाभिसेएणं अभिसिचइ जाव पडिगए ॥ १३० ॥ तए णं से कण्हे वासुदेवे लवणसमुद्दं मज्झमज्जेणं वी-ईवयइ (गंगं उवागए) ते पंच-पंडवे एवं वयासी-गच्छह णं तुब्भे देवाणुप्पिया ! गं(गा)गं महान-न(दिं)इं उत्तरह जाव ताव अहं सुट्ठियं लवणाहिंवइं पासामि । तए णं ते पंच पंडवा कण्हेणं २ एवं वुत्ता समाणा जेणेव गंगा महानदी तेणेव उवागच्छंति २ ता एगट्ठियाए नावाए मग्गणगवेसणं करेति २ ता एगट्ठियाए नावाए गं-गं महान-इं उत्तरंति २ ता अ-न्नम-न्नं एवं वयंति-पहू णं देवाणुप्पिया ! कण्हे वासुदेवे गं-गं महान-इं वाहाहिं उत्तरित्तए उदाहु नो प(भू)ह उत्तरित्तए-त्तिकट्ठु एगट्ठियाओ (नावाओ) णूमेति २ ता कण्हं वासुदेवं पडिवालेमाणा २ चिट्ठंति । तए णं से कण्हे वासुदेवे सुट्ठियं लवणाहिंवइं पासइ २ ता जेणेव गंगा महान(दी)इं तेणेव उवागच्छइ २ ता एगट्ठियाए सव्वओ समंता मग्गणगवेसणं करेइ २ ता एगट्ठियं अपासमाणे एगाए वाहाए रहं सतुरगं ससारहिं गेण्हइ एगाए वाहाए गंगं महान-इं वासट्ठिं जोयणाइं अद्धजोयणं च वि(च्छि)त्थिण्णं उत्तरिउं पयत्ते यावि होत्था । तए णं से कण्हे वासुदेवे गंगा[ए] महान-ईए बहुमज्झदेसभा(गं)ए संपत्ते समाणे संते तंते परितंते वद्धसेए जाए यावि होत्था । तए णं [तस्स] कण्हस्स वासुदेवस्स इमे(ए)यारुवे अ-ज्झत्थिए (जाव समुप्पजित्था)-अहो णं पंच पंडवा महावलवगा जेहिं गंगामहान-इं वा(स)वट्ठिं जोयणाइं अद्धजोयणं च वि-त्थिण्णा वाहाहिं उत्तिण्णा, इच्छंतएहिं णं पंचहिं पंडवेहिं पउम-नाभे (राया) हयमहिय जाव नो पडिसेहिए । तए णं गंगा-देवी कण्हस्स वासुदेवस्स इमं एयारुवं अ-ज्झत्थियं जाव जाणित्ता थाहं वियरइ ! तए णं से कण्हे वासुदेवे मुहुत्तंतरं समासां(स)सेइ २ ता गं-गं महानदि वावट्ठिं जाव

उत्तरइ २ ता जेणेव पंच-पंडवा तेणेव उवागच्छइ (०) पंच पंडवे एवं वयासी-अहो
 णं तुब्भे देवाणुप्पिया ! महाबलवगा जे[हिं] णं तुब्भेहिं गंगामहान-ई वा-चट्ठिं जाव
 उत्तिण्णा, इच्छंतएहिं [णं] तुब्भेहिं पउम[नाहे] जाव नो पडिसेहिए । तए णं
 ते पंच पंडवा कण्हेणं वासुदेवेणं एवं वुत्ता समाणा कण्हं वासुदेवं एवं वयासी-
 एवं खलु देवाणुप्पिया ! अम्हे तुब्भेहिं विसज्जिया समाणा जेणेव गंगा
 महान-ई तेणेव उवागच्छामो २ ता एगट्ठियाए मग्गणगवेसणं तं चेव जाव णूमेमो
 तुब्भे पडिवालेमाणा चिद्धामो । तए णं से कण्हे वासुदेवे तेसिं पंच(ण्हं)पंडवाणं
 [अंतिए] एयमट्ठं सोच्चा निसम्म आसुरुत्ते जाव तिवलियं एवं वयासी-अहो णं
 जया मए लवणसमुदं दुवे जोयणसयसह(स्सा)स्सवि-त्थिणं वीईवइत्ता पउम-नाभं
 हयमहिं(य)यं जाव पडिसेहिता अ-वरकंका संभर(ग०)गा दोवई साहत्थि उवणीया
 तया णं तुब्भेहिं मम माहप्पं न वि-न्नायं इयाणिं जाणिस्सह-त्तिकट्ठु लोहदंडं परा-
 सुसइ पंचण्हं पंडवाणं रहे सुसू(चू)रेइ २ ता निव्विसए आणवेइ २ ता तत्थ णं रह-
 मइणे नासं कोट्टे निविट्ठे । तए णं से कण्हे वासुदेवे जेणेव सए खंधावारे तेणेव
 उवागच्छइ २ ता सएणं खंधावारेणं सद्धिं अभिसमन्नागए यावि होत्था । तए णं से
 कण्हे वासुदेवे जेणेव वारवई नयरी तेणेव उवागच्छइ २ ता अणु-प्पविसइ ॥ १३१॥
 तए णं ते पंच-पंडवा जेणेव हत्थिणाउरे (णयरे) तेणेव उवागच्छंति २ ता जेणेव
 पंडु [राया] तेणेव उवागच्छंति २ ता करयल जाव एवं वयासी-एवं खलु ताओ !
 अम्हे कण्हेणं निव्विसया आणत्ता । तए णं पंडूराया ते पंच-पंडवे एवं वयासी-कहण्णं
 पुत्ता ! तुब्भे कण्हेणं वासुदेवेणं निव्विसया आणत्ता ? । तए णं ते पंच-पंडवा पंडु(डु)डुं
 रायं एवं वयासी-एवं खलु ताओ ! अम्हे अ-वरकंकाओ पडि-नियत्ता लवणसमुदं दोन्नि
 जोयणसयसहस्साइ वीईवइ(ता)त्था । तए णं से कण्हे वासुदेवे अम्हे एवं व(या०)-
 यइ-गच्छह णं तुब्भे देवाणुप्पिया ! गं-गं महान-ई उत्तरह जाव (चिट्ठह) ताव अहं
 एवं तहेव जाव चिद्धामो । तए णं से कण्हे वासुदेवे सुट्ठियं लवणाहिवइं दट्ठूण तं चेव
 सव्वं नवरं कण्हस्स चिंता न वुज्झ(जुज्ज(वुच्च)इ जाव (अम्हे) निव्विसए आणवेइ । तए
 णं से पंडूराया ते पंच-पंडवे एवं वयासी-दुट्ठु णं [तुमं] पुत्ता ! कयं कण्हस्स वासुदे-
 वस्स विप्पियं करेमाणेहिं । तए णं से पंडू-राया कौंतिं देविं सद्दावेइ २ ता एवं
 वयासी-गच्छ[ह] णं तुमं देवाणुप्पिया ! वारवई कण्हस्स वासुदेवस्स निवे-एहि-एवं
 खलु देवाणुप्पिया ! तु(म्हे)मे पंच-पंडवा निव्विसया आणत्ता, तुमं च णं देवाणुप्पिया !
 दाहिणट्ठमरहस्स सामी, तं संदिसंतु णं देवाणुप्पिया ! ते पंच-पंडवा कयरं(दिसिं)
 देसं वा (वि)दिसिं वा गच्छंतु ? । तए णं सा कौंती पंडुणा एवं वुत्ता समाणी हत्थिखं

दुरुहइ (०) जहा हेट्टा जाव संदिसंतु णं पिउ(त्था)च्छा ! किमागमणंपओयणं- । तए णं सा कोती कण्हं वासुदेवं एवं वयासी-एवं खलु तुमे पुत्ता ! पंच-पंडवा निव्विसया आणत्ता तुमं च णं दाहिणद्धुभरह[स्स] जाव (वि)दि(सिं)सं वा गच्छंतु (?) । तए णं से कण्हे वासुदेवे कोत्तिं देविं एवं वयासी-अपू(ई)यवयणा णं पिउ-च्छा ! उत्तमपुरिसा वासुदेवा बलदेवा चक्कवट्ठी । तं गच्छंतु णं (देवाणु०!) पंच-पंडवा दाहिणि(ल्लं)ल्लवेयालिं तत्थ पंडुमहुरं निवेसंतु म-म अदिट्ठसेवगा भवंतु-त्तिकट्ठु कोत्तिं देविं सक्कारेइ सम्माणेइ जाव पडिविसज्जेइ । तए णं सा कोती (देवी) जाव पंडुस्स एयमट्ठं निवे-एइ । तए णं पंडु राया पंच पंडवे सद्दावेइ २ ता एवं वयासी-गच्छह णं तुब्भे पुत्ता ! दाहिणिं वेयालिं, तत्थ णं तुब्भे पंडुमहुरं निवेसेह । तए णं [ते] पंच-पंडवा पंडुस्स र-ओ जाव तहत्ति पडिसुणेंति २ ता सबलवाहणा हयग० हत्थिणाउराओ पडि-नि-क्खमंति २ ता जेणेव दक्खिणिं वेयाली तेणेव उवागच्छंति २ ता पंडुमहुरं [नाम] नग(रिं)रं निवे(से)संति (०) । तत्थ[वि] णं ते विपुलभोगसमिइसम-जागया यावि होत्था ॥१३२॥ तए णं सा दोवई देवी अन्नया कया(ई)इ आव-न्नसत्ता जाया(या)वि होत्था । तए णं सा दोवई देवी नवण्हं मासाणं जाव सुखं दारगं पयाया सूमालं निव्वत्तवारसाहस्स इमं एयारूवं-जम्हा णं अम्हं एस दारए पंचण्हं पंडवाणं पुत्ते दोवईए देवीए अत्तए तं हो(उ)ऊ (अम्हं) णं इमस्स दारगस्स नामधेज्जं पंडुसेणे[त्ति] । तए णं तस्स दारगस्स अम्मापियरो नामधेज्जं क(रेइ)रेंति पंडुसेणत्ति । वावत्तरिं कलाओ जाव [अलं]भोगसमत्थे जाए जुवराया जाव विहरइ । (तेणं कालेणं तेणं सम-एणं धम्मघोसा) थेरा समोसढा परिसा निग्गया । पंडवा निग्गया धम्मं सोच्चा एवं वयासी-जं नवरं देवाणुप्पिया ! दोवई देविं आपुच्छामो पंडुसेणं च कुमारं रज्जे ठावेमो तओ पच्छा देवाणुप्पियाणं अंतिए मुंडे भविता जाव पव्वयामो । अहासुहं देवाणुप्पिया ! । तए णं ते पंच-पंडवा जेणेव सए गिहे तेणेव उवागच्छंति २ ता दोवई देविं सद्दावेति २ ता एवं वयासी-एवं खलु देवाणुप्पिए ! अम्हेहिं थेराणं अंतिए धम्मे निसंते जाव पव्वयामो, तुमं [णं] देवाणुप्पिए ! किं करेसि ? । तए णं सा दोवई (देवी) ते पंच-पंडवे एवं वयासी-जइ णं तुब्भे देवाणुप्पिया ! संसार-भउव्विग्गा [जाव] पव्वयह म-म के अ-ज्जे आलंवे वा जाव भविस्सइ ? अहं पि य णं संसारभउव्विग्गा देवाणुप्पिएहिं सद्धिं पव्वइस्सामि । तए णं ते पंच-पंडवा पंडुसेणस्स अभिसेओ जाव राया जाए जाव रज्जं पसाहेमाणे विहरइ । तए णं ते पंच-पंडवा दोवई य देवी अन्नया कया-इ पंडुसेणं रायाणं आपुच्छंति । तए णं से पंडु-सेणे राया कोडुंबियपुरिसे, सद्दावेइ २ ता एवं वयासी-खिप्पामेव भो [!] देवाणुप्पिया !

निक्खमणाभिसेयं जाव उवट्टवेह पुरिससहस्सवा-हिणीओ सिवियाओ उवट्टवेह जाव
 पच्चोरुहंति जेणेव थेरा [भगवंतो] तेणेव उवागच्छंति जाव आलित्ते णं जाव समणा
 जाया चोह[र]स पुव्वाइं अहिज्जंति २ ता वट्ठूणि वासाणि छट्टट्टमदसमदुवालसेहिं
 मासद्धमासखमणेहिं अप्पाणं भावेमाणा विहरंति ॥ १३३ ॥ तए णं सा दोवइं देवी
 सीयाओ पच्चोरुहइ जाव पव्वडया सुव्वयाए अज्जाए सिस्सि(णी)णियनाए दलयइ
 ए(इ)क्कारस अंगाइं अहिज्जइ (०) वट्ठूणि वामाणि छट्टट्टमदसमदुवालसेहिं जाव विह-
 रइ ॥ १३४ ॥ तए णं थेरा भगवंतो अन्नया कया(ई)इ पंडुमहुराओ नयरीओ सहसंवव-
 णाओ उज्जाणाओ पडि-निक्खमंति २ ता वहिया जणवयविहारं विहरंति । तेणं कालेणं
 तेणं समएणं अ(रि)रहा अरिट्टनेमी जेणेव सुरट्टाजणवए तेणेव उवागच्छइ २ ता
 सुरट्टाजणवयंसि संजमेणं तवसा अप्पाणं भावेमाणे विहरइ । तए णं बहुजणो अन्नम-
 न्नस्स एवमाइक्खइ ४-एवं खलु देवाणुप्पिया । अ-रहा अरिट्टनेमी सुरट्टाजणवए जाव
 विहरइ । तए णं (से) ते जुहिट्टिल्लपामोक्खा पंच अणगारा बहुजणस्स अंतिए एय-
 मट्ठं सोच्चा अन्नमन्नं सदावेंति २ ता एवं वयासी-एवं खलु देवाणुप्पिया ! अरहा
 अरिट्टनेमी पुव्वाणुपुव्वि जाव विहरइ, तं सेयं खलु अम्हं थेरा आपुच्छित्ता अरहं
 अरिट्टनेमि वंदणाए गमित्तए । अन्नमन्नस्स एयमट्ठं पडिमुणेंति २ ता जेणेव थेरा भग-
 वंतो तेणेव उवागच्छंति २ ता थेरे भगवंते वंदंति नमंसंति वं० २ ता एवं वयासी-
 इच्छामो णं तुब्भेहिं अव्वभणुन्नाया समाणा अरहं अरिट्टनेमि जाव गमित्तए । अहानुहं
 देवाणुप्पिया ! । तए णं ते जुहिट्टिल्लपामोक्खा पंच अणगारा थेरेहिं अव्वभणुन्नाया
 समाणा थेरे भगवंते वंदंति नमंसंति वं० २ ता थेराणं अंतियाओ पडि-निक्खमंति
 (०) मासंमासेणं अणिक्खित्तेणं तवोकम्मेणं गामाणुगामं दू(ई)इज्जमाणा जाव जेणेव
 ह(त्थि)त्थकप्पे (नयरे) तेणेव उवागच्छंति (०) ह-त्थकप्पस्स वहिया सहसंववणे
 उज्जाणे जाव विहरंति । तए णं ते जुहिट्टिल्लवज्जा चत्तारि अणगारा मास-क्ख-
 मणपारणए पढमाए पो(र)रिसीए सज्झायं करेंति वीयाए एवं जहा गोयमसामी
 नवरं जुहिट्टिल्लं आपुच्छंति जाव अडमाणा बहुजणसदं निसामेंति । एवं खलु
 देवाणुप्पिया ! अरहा अरिट्टनेमी उ(ज्जि)जंतसेलसिहरे मासिएणं भत्तेणं अपाणएणं
 पंचहिं छत्तीसेहिं अणगारसएहिं सद्धिं कालगए जाव पहीणे । तए णं ते जुहि-
 ट्टिल्लवज्जा चत्तारि अणगारा बहुजणस्स अंतिए (एयमट्ठं) सोच्चा ह-त्थकप्पाओ
 पडि-निक्खमंति २ ता जेणेव सहसंववणे उज्जाणे जेणेव जुहिट्टिल्ले अणगारे तेणेव
 उवागच्छंति २ ता भत्तपाणं प(च्चुवे)चक्खंति २ ता गमणागमणस्स पडिक्कमंति २
 ता एसणमणेसणं आलोएंति २ ता भत्तपाणं पडिदंसंति २ ता एवं वयासी-एवं खलु

देवाणुप्पिया (!) जाव कांलगए । तं सेयं खलु अम्हं देवाणुप्पिया ! इमं पुव्वगहिंयं भत्तपाणं परिट्ठवेत्ता सेत्तुजं पव्वयं सणियं २ दु(रु)रुहित्तए संलेहण्ण(ए)झसणा[झो]-
 सियाणं कालं अण(वकंख)वेक्खमाणाणं विहरित्तए-त्तिकहु अ-जम-जस्स एयमट्ठं पडि-
 लुणेंति २ ता तं पुव्वगहिंयं भत्तपाणं एगंते परिट्ठवेंति २ ता जेणेव सेत्तुजे पव्वए
 तेणेव उवागच्छंति २ ता सेत्तुजं पव्वयं [सणियं २] दुह्हंति (०) जाव कालं अणवकं-
 खमाणा विहरंति । तए णं ते जुहिट्ठिल्लपामोक्खा पंच अणगारा सामाइयमाइयाइं
 चोइस-पुव्वाइं अहि(जित्ता)जंति बहूणि वासाणि (सामण्णपरियागं पाउणित्ता)
 दोमासियाए संलेहणाए अत्ताणं झो(सि)सेत्ता जस्सट्ठाए की(कि)रइ थेरकप्पभावे
 जिणकप्पभावे जाव तमट्ठमाराहेंति २ ता अणंते जाव केवलवर-नाणदंसणे समुप्प-न्ने
 जाव सिद्धा ॥ १३५ ॥ तए णं सा दोवई अज्जा सुव्वयाणं अज्जियाणं अंतिए
 सामाइयमाइयाइं एक्कारस अंगाइं अहिज्जइ २ ता बहूणि वासाणि (सा०) मासि-
 याए संलेहणाए आलोइयपडिक्कंता कालमासे कालं किच्चा वंभलोए उववन्ना । तत्थ
 णं अत्येगइयाणं देवाणं दस सागरोवमाइं ठिई पन्नत्ता । तत्थ णं दुव(ति)यस्स
 [वि] देवस्स दस-सागरोवमाइं ठिई प-न्नत्ता । से णं भंते ! दुवए देवे ता(त)ओ जाव
 महाविदेहे वासे जाव अंतं काहिइ । एवं खलु जंबू ! समणेणं भगवया महावीरेणं
 जाव संपत्तेणं सोलसमस्स नायज्झयणस्स अयमट्ठे पन्नत्ते त्तिवेमि ॥ १३६ ॥
गाहाउ—सुवहुं पि तवकिल्लेसो नियाणदोसेण दूसिओ संतो । न सिवाय दोवईए
 जह किल सुकुमालियाजम्मे ॥ १ ॥ अमणुजमभत्तीए पत्ते दाणं भवे अणत्थाय । जह
 कडुयतुंवदाणं नागसिरेभवंमि दोवइए ॥ २ ॥ **सोलसमं नायज्झयणं समत्तं ॥**
 जइ णं भंते ! समणेणं० सोलसमस्स नायज्झयणस्स अयमट्ठे प-न्नत्ते सत्तर-
 समस्स (०) नायज्झयणस्स के अट्ठे पन्नत्ते ? एवं खलु जंबू ! तेणं कालेणं तेणं सम-
 णं हत्थिसीसे नामं नयरे होत्था वण्णओ । तत्थ णं कणगकेऊ नामं राया होत्था
 वण्णओ । तत्थ णं हत्थिसीसे नयरे वहवे संजुत्ता-नावावाणियगा परिवसंति अट्ठा जाव
 ब(हू)हुजणस्स अपरिभूया यावि होत्था । तए णं तेसिं संजुत्तानावावाणियगाणं अन्नया
 कयाइ एगयओ (सहियाणं) जहा अरह-जओए जाव लवणसमुदं अणेगाइं जोयणस-
 याइं ओगाढा यावि होत्था । तए णं तेसिं जाव बहूणि उप्पा(ति)यसयाइं जहा मा-कं-
 दियदारगाणं जाव कालियवाए य तत्थ सं(स)मु(त्थि)च्छिण्ण । तए णं सा नावा तेणं
 कालियवाएणं आ(घोळि)घुणिज्जमाणी २ संचालिज्जमाणी २ संखोहिज्जमाणी २
 तत्थेव परिभमइ । तए णं से निज्जामए नट्टमईए नट्टसईए नट्टस-न्ने मूढदिसाभाए
 जाए यावि होत्था न जाणइ कयरं-(देसं वा) दिसं वा विदिसं वा पोयवहणे [अ]व-

हिए-त्तिकहु ओहयमणसंकप्पे जाव झियायइ । तए णं ते वहवे कुच्छिवारा य कण्णधारा य ग(ग्भि)ब्भेल्लागा य संजुत्ता-नावावाणियगा य जेणेव से निजामए तेणेव उवागच्छंति २ ता एवं वयासी-किञ्चं तुमं देवाणुप्पिया । ओहयमणसंक-
 (प्पा)प्पे (जाव) झियायसि ? । तए णं से निजामए ते वहवे कुच्छिवारा य ४ एवं वयासी-एवं खलु [अहं] देवाणुप्पिया । नट्टमईए जाव अवहिएत्तिकहु तओ ओहय-
 मणसंकप्पे (जाव झियासि) । तए णं ते कण्णधारा [य ४] तस्स निजामयस्संतिए एयमट्ठं सोच्चा निसम्म भीया० ण्हाया करयल [जाव] वहूणं ईदाण य खं(दा)वाण य जहा मल्लिनाए जाव उवायमाणा २ चिट्ठंति । तए णं से निजामए तओ मुहुत्तंतरस्स लद्धमईए ३ अमूढदिसाभाए जाए यावि होत्था । तए णं से निजामए ते वहवे कुच्छिवारा य ४ एवं वयासी-एवं खलु अहं देवाणुप्पिया । लद्धमईए जाव अमूढ-
 दिसाभाए जाए । अम्हे णं देवाणुप्पिया । कालियदीवंतेणं सं(वू)द्धा । एस णं कालियदीवे आलोक्कइ । तए णं ते कुच्छिवारा य ४ तस्स निजामगस्स अंतिए एय-
 मट्ठं सोच्चा हट्ठतुट्ठा पयक्खिणाणुकूलेणं वाएणं जेणेव का(ली)लियदीवे तेणेव उवाग-
 च्छंति २ ता पोयवहणं लंवेति २ ता एगट्ठियाहिं कालियदीवं उत्तरंति । तत्थ णं वहवे हिरण्णागरे य सुवण्णागरे य रयणागरे य वइरागरे य वहवे तत्थ आसे पासंति किं ते ? हरिरेणुसोणिसुत्त(गा)ग आ(ई)ङ्गवेढो । तए णं ते आसा(ते)ओ वाणियए पासंति (०) तेसिं गंधं आ(अग्)घायंति (०) भीया तत्था उच्चिग्गा उच्चि-
 ग्गमणा तओ अणेगाइं जोयणाइं उच्चमंति । ते णं तत्थ पडरगोयरा पडरतण-
 पाणिया निब्भया निरुच्चिग्गा सुहंसुहेणं विहरंति । तए णं [ते] संजुत्ता-नावावा-
 णियगा अन्नमन्नं एवं वयासी-कि(ण्हं)ञं अ(म्हे)म्हं देवाणुप्पिया । आसेहिं ? इमे णं वहवे हिरण्णागरा य सुवण्णागरा य रयणागरा य व(इ)यरागरा य । तं सेयं खलु अम्हं हिरण्णस्स य सुवण्णस्स य रयणस्स य व-यरस्स य पोयवहणं भरित्तए-
 त्तिकहु अन्नमन्नस्स एयमट्ठं पडिसुणेंति २ ता हिरण्णस्स य सुवण्णस्स य रयणस्स य व-यरस्स य तणस्स य कट्ठस्स य अ-न्नस्स य पाणियस्स य पोयवहणं भरेंति २ ता द(पय)क्खिणाणुकूलेणं वाएणं जेणेव गंभीरपोय(वहण)पट्ठे तेणेव उवाग-
 च्छंति २ ता पोयवहणं लंवेति २ ता सगढीसागडं सज्जेति २ ता तं हिरण्णं जाव वइरं च एगट्ठियाहिं पोयवहणाओ संचारेंति २ ता सगढीसागडं संजो(इं)एंति (०) जेणेव हत्थिसी(सए)से नयरं तेणेव उवागच्छंति २ ता हत्थिसीसयस्स नयरस्स बहिया अग्गुजाणे सत्थ-निवेसं करेंति २ ता सगढीसागडं मोएंति २ ता महत्थं जाव पाहुडं गेण्हंति २ ता हत्थिसीसं च न(ग)यरं अणु-प्पविसंति २ ता जेणेव [से] कण-

गकेऊ (राया) तेणेव उवागच्छंति २ ता जाव उवणेंति । तए णं से कणगकेऊ तेसिं संजुत्ता(णावा)वाणियगाणं तं महत्थं जाव पडिच्छइ [२] ते संजुत्ता-वाणियगा एवं वयासी-तुब्भे णं देवाणुप्पिया ! गामागर जाव आहिंडह लवणसमुदं च अभिक्खणं २ पोयवहणेणं ओगा(ह)हेह, तं अत्थि-या(इं)इ [त्थ] केइ भे कहिंचि अच्छेरए दिट्ठपुव्वे ? । तए णं ते संजुत्ता-वाणियगा कणगकेऊं (रायं) एवं वयासी-एवं खल्ल अम्हे देवाणुप्पिया ! इहेव हत्थिसीसे नयरे परिवसामो तं चेव जाव कालि(य)यं-दीवन्तेणं सं-लूढा । तत्थ णं बहवे हिरण्णागरा य जाव बहवे तत्थ आसे, किं ते ? हरिरेणु जाव अणेगाइं जोयणाइं उब्भमंति । तए णं सामी ! अम्हेहिं कालियदीवे ते आसा अच्छेरए दिट्ठपुव्वे । तए णं से कणगकेऊ तेसिं संजु(त्ता)ताणं अंतिए एयमट्ठं सोच्चा ते संजुत्तए एवं वयासी-गच्छह णं तुब्भे देवाणुप्पिया ! मम कोडुं-वियपुरिसेहिं सद्धिं कालियदीवाओ ते आसे आणेह । तए णं ते संजुत्तावाणियगा कणगकेऊं-एवं वयासी-एवं सामि-त्ति(कट्ठु) आणाए विणएणं वयणं पडिसुणेंति । तए णं [से] कणगकेऊ-कोडुंवियपुरिसे सद्देवेइ २ ता एवं वयासी-गच्छह णं तुब्भे देवाणुप्पिया ! संजुत्तएहिं [नावावाणियएहिं] सद्धिं कालियदीवाओ मम आसे आणेह । तेवि पडिसुणेंति । तए णं ते कोडुंवि(य०)या सगडीसागडं सज्जेति २ ता तत्थ णं बहूणं वीणाण य वल्लकीण य भामरीण य कच्छभीण य भंभाण य छब्भा-मरीण य विचित्तवीणाण य अन्नेसिं च बहूणं सो(त्ति)यंदियपाउग्गाणं दब्बाणं सग-डीसागडं भरेंति २ ता बहूणं किण्हाण य जाव सुक्किलाण य कट्ठकम्माण य ४ गंधिमाण य ४ जाव संघाइमाण य अन्नेसिं च बहूणं चक्खिदियपाउग्गाणं दब्बाणं सगडीसागडं भरेंति २ ता बहूणं कोट्ठपुडाण य केयइपुडाण य जाव अन्नेसिं च बहूणं घाणिंदियपाउग्गाणं दब्बाणं सगडीसागडं भरेंति २ ता बहुस्स खंडस्स य गुलस्स य सक्कराए य मच्छंडियाए य पुप्फुत्तरपउमुत्तर० अन्नेसिं च जिब्भिदिय-पाउग्गाणं दब्बाणं सगडीसागडं भरेंति २ ता [अन्नेसिं च] बहूणं कोय(वया)वाण य कंबलाण य पा(वरणा)वाराण य नवतयाण य मलयाण य मसूराण य सिलाव-ट्ठाण [य] जाव हंसगब्भाण य अन्नेसिं च फासिदियपाउग्गाणं दब्बाणं जाव भरेंति २ ता सगडीसागडं जो(ए)यंति २ ता जेणेव गंभीरए पोयट्ठाणे तेणेव उवागच्छंति (०) सगडीसागडं मो(ए)यंति २ ता पोयवहणं सज्जेति २ ता तेसिं उक्किट्ठाणं सद्ध-रिसरसरुवगंधाणं कट्ठस्स य तणस्स य पाणियस्स य तंदुलाण य समियस्स य गोरसस्स य जाव अन्नेसिं च बहूणं पोयवहणपाउग्गाणं पोयवहणं भरेंति २ ता दक्खिणाणुकूलेणं वाएणं जेणेव कालियदीवे तेणेव उवागच्छंति २ ता पोयवहणं

लंवेति २ ता ताई उक्किट्ठाई सदफरिसरसरुवगंधाई एगट्टियाहिं कालियदीवं उता-
 रेंति २ ता जहिं जहिं च णं ते आसा आसयंति वा सयंति वा चिट्ठंति वा तुयट्ठंति
 वा तहिं तहिं च णं ते कोडुंवियपुरिसा ताओ वीणाओ य जाव (वि)चित्तवीणाओ य
 अन्नाणि बहूणि सो(इं)यंदियपाउग्गाणि य दव्वाणि समु(दी)दीरेमाणा ठवें(चिट्ठं)ति
 तेसिं [च] परिपेरंतेणं पा(सए)से ठवेंति (०) निच्चला निप्फंदा तुसिणीया चिट्ठंति ।
 जत्थ जत्थ ते आसा आसयंति वा जाव तुयट्ठंति वा तत्थ तत्थ णं ते कोडुंवि-या
 बहूणि किण्हाणि य (५) कट्ठकम्माणि य जाव संघाइमाणि य अन्नाणि य बहूणि
 चक्खिंदियपाउग्गाणि य दव्वाणि ठवेंति तेसिं परिपेरंतेणं पासए ठवेंति २ ता
 निच्चला निप्फंदा तुसिणीया चिट्ठंति । जत्थ जत्थ ते आसा आसयंति (४) तत्थ तत्थ
 [ते] णं (ते कोडुंवियपुरिसा) तेसिं बहूणं कोट्टपुडाण य अन्नेसिं च घाणिंदियपाउग्गाणं
 दव्वाणं पुंजे य नियरे य करेंति २ ता तेसिं परिपेरंते जाव चिट्ठंति । जत्थ जत्थ णं ते
 आसा आसयंति ४ तत्थ तत्थ गुलस्स जाव अन्नेसिं च बहूणं जिर्विंदियपाउग्गाणं
 दव्वाणं पुंजे य नि(क)यरे य करेंति २ ता वियरए खणंति २ ता गुलपाणगस्स
 खंडपाणगस्स पा(पो)रपाणगस्स अन्नेसिं च बहूणं पाणगाणं विय(रे)रए भरेंति २
 ता तेसिं परिपेरंतेणं पासए ठवेंति जाव चिट्ठंति । जहिं जहिं च णं ते आसा
 (आस०) तहिं तहिं च ते बहवे कोयवया (य) जाव सिलावट्टया अ-न्नाणि य फासिंदि-
 यपाउग्गाई अत्युयपच्चत्युयाई ठवेंति २ ता तेसिं परिपेरंतेणं जाव चिट्ठंति । तए णं ते
 आसा जेणेव (ए)ते उक्किट्ठा सदफरिसरसरुवगंधा तेणेव उवागच्छंति (०) । तत्थ णं
 अत्येगइया आसा अपुव्वा णं इमे सदफरिसरसरुवगंधा (इ)तिकट्ठु तेसु उक्किट्ठेसु सद-
 फरिसरसरुवगंधेसु अमुच्छिया ४ तेसिं उक्किट्ठाणं सद जाव गंधाणं दूरंदूरेणं अव-
 क्कमंति [२] ते णं तत्थ पडरगोयरा पडरतणपाणिया निब्भया निरुव्विग्गा सुहंसु-
 हेणं विहरंति । एवामेव समणाउसो ! जो अम्हं निग्गंथो वा निग्गंथी वा सदफरिस्स
 (सरुवगंधा) जाव नो सज्जइ से णं इहलोए चेव बहूणं समणाणं ४ अच्चणिजे जाव
 वी-ईव(य)इस्सइ ॥ १३७ ॥ तत्थ णं अत्येगइया आसा जेणेव उक्कि(ट्ठ)ट्ठा सदफरि-
 सरसरुवगंधा तेणेव उवागच्छंति २ ता तेसु उक्किट्ठेसु स(इ०)देसु ५ मुच्छिया जाव
 अज्झोवव-न्ना आसेविउं पय(त्ते)ता यावि होत्था । तए णं ते आसा (एए) ते उक्किट्ठे
 स(इ)दे ५ आसेवमाणा तेहिं बहूहिं कूडेहि य पासेहि य गलएसु य पाएसु य
 वज्जंति । तए णं ते कोडुंविया (एए) ते आसे गिण्हंति २ ता एगट्टियाहिं पोयवहणे
 संचारेंति २ ता तणस्स [य] कट्ठस्स [य] जाव भरेंति । तए णं ते संजुत्ता(णावा-
 चाणियगा) दक्खिणाणुकूलेणं वाएणं जेणेव गंभीर[ए] पोयपट्टणे तेणेव उवागच्छंति

२ ता पोयवहणं लंवेति २ ता ते आसे उत्तारेंति २ ता जेणेव हत्थिसीसे नयरे जेणेव कणगकेऊ राया तेणेव उवागच्छंति २ ता करयल जाव वद्धावेंति (०) ते आसे उवणेंति । तए णं से कणगकेऊ (राया) तेसिं संजुत्तावाणियगाणं उस्सुक्कं विय-
रइ २ ता सक्कारेइ संमाणेइ स० २ ता पडिविसज्जेइ । तए णं से कणगकेऊ-कोडुं विय-
पुरिसे सद्दावेइ २ ता सक्कारेइ संमाणेइ स० २ ता पडिविसज्जेइ । तए णं से कणगकेऊ
राया आसमद्दए सद्दावेइ २ ता एवं वयासी-तुब्भे णं देवाणुप्पिया ! मम आसे
विणएह । तए णं ते आसमद्दगा तहत्ति पडिसुणेंति २ ता ते आसे बहूहिं मुह-
वंधेहि य कण्णवंधेहि य नासावंधेहि य वालवंधेहि य खुरवंधेहि य कडगवंधेहि य
खल्लिणवंधेहि य अहिला(णे)णवंधेहि य पडियाणेहि य अंकणाहि य (वेलप्पहारेहि
य) वि(चि)त्तप्पहारेहि य लयप्पहारेहि य कसप्पहारेहि य छिवप्पहारेहि य विण-
यंति (०) कणगकेउस्स रज्जो उवणेंति । तए णं से कणगकेऊ ते आसमद्दए सक्कारेइ
२ (०) पडिविसज्जेइ । तए णं ते आसा बहूहिं मुहवंधेहि य जाव छि(वप्)वापहारेहि
य बहूणि सारीरमाणसा(णि)इं दुक्खाइं पावेंति । एवामेव समणाउसो ! जो अम्हं
निग्गंथो वा निग्गंथी वा पव्वइए समाणे इट्ठेसु सद्दफरिसरसरूवगंधेसु सज्ज(न्ति)इ
रज्ज-इ गिज्ज-इ मुज्ज-इ अज्जोववज्ज-इ से णं इहलोए चेव बहूणं समणा(ण य)णं
[बहूणं समणीणं] जाव साविया(ण य)णं हीलणिज्जे जाव अणुपरिय(ट्ठिस्स)इइ ।
[गाहा]—कलरिभियमहुरतंतीतलतालवंसकउहाभिरामेसु । सद्देसु रज्जमाणा रमं-
(ती)ति सोइंदियवसट्ठा ॥ १ ॥ सोइंदियदुइंतत्तणस्स अह एत्तिओ हवइ दोसो ।
दीविगरुयमसहतो बहवंधं तित्तिरो पत्तो ॥ २ ॥ थणजहणवयणकरचरण-नयणगव्वि-
यविलासियग(ती)एसु । रुवेसु रज्जमाणा रमंति चर्क्खिदियवसट्ठा ॥ ३ ॥ चर्क्खिदिय-
दुइंतत्तणस्स अह एत्तिओ ह(भ)वइ दोसो । जं जलणंमि जलंते पडइ पयंगो अवुद्धीओ
॥ ४ ॥ अ(गु)गरुवरपवरधूवणउउयमल्लाणुलेवणविहीसु । गंधेसु रज्जमाणा रमंति
घाणिंदियवसट्ठा ॥ ५ ॥ घाणिंदियदुइंतत्तणस्स अह एत्तिओ हवइ दोसो । जं ओस-
हिगंधेणं विलाओ निद्धावई उरगो ॥ ६ ॥ तित्तकडुयं कसायं(ब) [अविरं] महुरं बहु-
खज्जपेज्जलेज्जेसु । आसायंमि उ गिद्धा रमंति जिब्भिंदियवसट्ठा ॥ ७ ॥ जिब्भिदि-
यदुइंतत्तणस्स अह एत्तिओ हवइ दोसो । जं गललगुक्खित्तो फुरइ थलवि(र)रेल्लिओ
मच्छो ॥ ८ ॥ उउभयमाणसुहे(सु)हि य सविभवहिययमणनिव्वुडकरे(सु)हिं । फासेसु
रज्जमाणा रमंति फासिंदियवसट्ठा ॥ ९ ॥ फासिंदियदुइंतत्तणस्स अह एत्तिओ हवइ
दोसो । जं खणइ मत्थयं कुंजरस्स लोहं कुसो तिकखो ॥ १० ॥ कलरिभियमहुरतं-
त्तीतलतालवंसकउहाभिरामेसु । सद्देसु जे न गिद्धा वसट्ठमरणं न ते मरए ॥ ११ ॥

थणजहणवयगकरचरणनयणगव्वियविलासियगइंनु । रुवेनु जे न रत्ता वसट्टमरणं न ते मरए ॥ १२ ॥ अगुरुवरपवरधूवणउउयमगणुलेवणविहीनु । गंधेनु जे न गिद्धा वसट्टमरणं न ते मरए ॥ १३ ॥ तित्तकडुयं कसायं-महुं[व]यन्ताज्जपेजाल्लजेनु । आसा(ए जे)यंमि न गिद्धा वसट्टमरणं न ते मरए ॥ १४ ॥ उउयमगागन्तंन य सविभवहिययमण-निव्वुड्करेनु । फासेनु जे न गिद्धा वसट्टमरणं न ते मरए ॥ १५ ॥ सहेसु य भद्दयपावएनु सोयविसयं उ(व)वागएनु । तुट्ठेण व रुट्ठेण व समणेण सया न होयव्वं ॥ १६ ॥ रुवेसु य भद्द(ग)यपावएनु चक्कुविनयं उवगएनु । तुट्ठेण व रुट्ठेण व समणेण सया न होयव्वं ॥ १७ ॥ गंधेसु य भद्दयपावएनु पागविन(यं उ)यमु-वगएनु । तुट्ठेण व रुट्ठेण व समणेण सया न होयव्वं ॥ १८ ॥ रसेसु य भद्दयपाव-एनु जिब्भविस-यमुवगएनु । तुट्ठेण व रुट्ठेण व समणेण सया न होयव्वं ॥ १९ ॥ फासेसु य भद्दयपावएनु कायविस-यमुवगएनु । तुट्ठेण व रुट्ठेण व समणेण सया न होयव्वं ॥ २० ॥ एवं खलु जंबू ! समणेणं भगवया महावीरेणं जाव संपणेणं सत्तरसमस्स नायज्जयणस्स अयमट्ठे पन्नत्ते त्तिवेमि ॥ १३८ ॥ गाहाओ—जह सो कालियदीवो अणुवमसोक्खो तहेव जइधम्मो । जह आसा तह साहू वगियव्व-डणुकूलकारिजणा ॥ १ ॥ जह सदाइअगिद्धा पत्ता नो पासवंधणं आसा । तह विस-एसु अगिद्धा वज्जंति न कम्मणा साहू ॥ २ ॥ जह सच्छंदविहारो आसाणं तह य इह वरमुणीणं । जरमरणाइं विवज्जिय संपत्ताणंदनिव्वाणं ॥ ३ ॥ जह सदाट्ठु गिद्धा वद्धा आसा तहेव विसयरया । पावेंति कम्मबंधं परमानुहकारणं वोरं ॥ ४ ॥ जह ते कालियदीवा णीया अन्नत्थ दुहगणं पत्ता । तह धम्मपरिवभट्ठा अधम्म-पत्ता इहं जीवा ॥ ५ ॥ पावेंति कम्मनरवइवसया संसारवाहयालीए । आसप्पमह-एहि व नेरडयाइहिं दुक्खाइं ॥ ६ ॥ सत्तरसमं नायज्जयणं समत्तं ॥

जइ णं भंते ! समणेणं० सत्तरसमस्स (णायज्जयणस्स) अयमट्ठे पन्नत्ते अट्ठार-समस्स के अट्ठे पन्नत्ते ? एवं खलु जंबू ! तेणं कालेणं तेणं समएणं रायगिहे नामं नयरे होत्था वण्णओ । तत्थ णं ध(ण)णे नामं सत्थवाहे (परिवसड) होत्था भद्दा भारिया । तस्स णं ध(ण)णस्स सत्थवाहस्स पुत्ता भद्दाए अत्तया पंच सत्थवाह-दारगा होत्था तंजहा-धणे धणपाले धणदेवे धणगोवे धणरक्खिए । तस्स णं धणस्स सत्थवाहस्स धूया भद्दाए अत्तया पंचण्हं पुत्ताणं अणुमग्गजा(ती)इया सुंसुमा नामं दारिया होत्था सूमालपाणिपाया । तस्स णं धणस्स सत्थवाहस्स चिलाए नामं दासचेडे होत्था अहीणपंचिदियसरीरे मंसोवचिए वालकीलावणकुसले यावि होत्था । तए णं से दासचेडे सुंसुमाए दारियाए वालग्गाहे जाए यावि होत्था सुंसुमं दारियं

कडीए गिण्हइ २ ता बहूहिं दारएहि य दारियाहि य डिंभएहि य डिंभियाहि य
 कुमारएहि य कुमारियाहि य सद्धिं अभिरममाणे २ विहरइ । तए णं से चिलाए
 दासचेडे तेसिं बहूणं दारयाण य ६ अप्पेगइयाणं खुल्लए अवहरइ एवं वट्टए आडो-
 लियाओ तिंदू(तेंडु)सए पोत्तुल्लए साडोल्लए, अप्पेगइयाणं आभरणमल्लालंकारं अव-
 हरइ अप्पेगइ(या)ए आउ(र)सइ एवं अवहसइ निच्छोडेइ निब्भच्छेइ तजेइ अप्पे-
 गइ-ए तालेइ । तए णं ते बहवे दारगा य ६ रोयमाणा य ५ साणं साणं अम्मापि-
 ऊणं निवेदेति । तए णं तेसिं बहूणं दारगाण य ६ अम्मापियरो जेणेव धणे सत्थ-
 वाहे तेणेव उवागच्छंति २ ता ध(ण)णं २ बहूहिं खि(खे)ज्ज(णा)णियाहि य रुं-
 णाहि य उ(व)पालंभणाहि य खिज्जमाणा य रुंमाणा य उ(व)वालं(भे)भमाणा य
 धणस्स [२] एयमट्ठं निवेदंति । तए णं [से] धणे २ चिलायं दासचेडं एयमट्ठं भुजो
 भुजो निवारि(न्ति)इ नो चेव णं चिलाए दासचेडे उवरमइ । तए णं से चिलाए दास-
 चेडे तेसिं बहूणं दारगाण य ६ अप्पेगइयाणं खुल्लए अवहरइ जाव तालेइ । तए णं ते
 बहवे दारगा य ६ रोयमाणा य जाव अम्मापिऊणं निवेदंति । तए णं ते आसुरुत्ता ५
 जेणेव धणे २ तेणेव उवागच्छंति २ ता बहूहिं खिज्जणाहि (य) जाव एयमट्ठं निवे-
 (दिं)दंति । तए णं से धणे २ बहूणं दारगाणं ६ अम्मापिऊणं अंतिए एयमट्ठ सोच्चा
 आसुरुत्ते चिलायं दासचेडं उच्चावयाहिं आउसणाहि आउसइ उद्धंसइ नि(ब्भच्छे)-
 विंभछइ निच्छोडेइ तजेइ उच्चावयाहिं तालणाहिं तालेइ साओ गिहाओ निच्छुभइ
 ॥ १३९ ॥ तए णं से चिलाए दासचेडे साओ गिहाओ निच्छूडे समणे रायगिहे
 नयरे सिंघाड(ए)ग जाव पहेसु देवकुलेसु य सभासु य पंवासु य जूयखलएसु य
 वेसाघ(रे)रएसु य पाणघरएसु य सुहंसुहेणं परिवट्ठइ । तए णं से चिलाए दास-
 चेडे अणोहट्टिए अणिवारिए सच्छंदमई सइरप्पयारी मज्ज-प्पसंगी चोज्ज-प्पसंगी
 (मंस०) जूयप्पसंगी वे(सा)सप्पसंगी परदारप्पसंगी जाए यावि होत्था । तए णं
 रायगिहस्स न-यरस्स अदूरसामंते दाहिणपुरत्थिमे दि-सीभाए सीहगुहा नामं चोर-
 पल्ली होत्था विसमगिरिकडगको(डं)लंबसञ्चिविट्ठा वंसीकलंकपागारपरिक्खित्ता छि-न्न-
 सेलविसमप्पवायफरिहोवगूढा एगदुवारा अणेगखंडी विदितजण-निग्गम[८]पवेसा
 अब्भितरपाणिया सुदुल्लभजलपेरंता सुबहुस्सवि कूवियवलस्स आगयस्स दुप्पहंसा
 यावि होत्था । तत्थ णं सीहगुहाए चोरपल्लीए विजए नामं चोरसेणावई परिवसइ
 अहम्मिए जाव अ(ध)हम्मकेऊ समुट्टिए बहु-नगर-निग्गयजसे सूरे [२] दढप्पहारी
 साह(सी)सिए सद्देहीं । से णं तत्थ सीहगुहाए चोरपल्लीए पंचणहं चोरसयाणं आहे-
 वच्चं जाव विहरइ । तए णं से विजए तक्करे (चोर)सेणावई बहूणं चोराण य पार-

दारियाण य गंठिमेयगाण य संधिन्हेयगाण य खन्तखगगाण य रायावगाणि य
अणवारगाण य बालघायगाण य वीसभघायगाण य जयगराण य नंदरकगाण य
अनेसिं च बहूणं छिन्नभिन्न(व)वाहिराहयाणं कुङ्गे यावि होत्था । तए णं नं विजए
(तक्करे) चोरसेगावई रायगिहस्स दाहिणपुर-त्थिमं जणवयं बहूहिं नामगएहि न
नगरघाएहि य गो(ग)गहणेहि य बंदिगहणेहि य पंचकट्टणंहि य गगगगगेहि य
उवीलेमाणे २ विद्धंसेमाणे • नित्याणं निद्धणं करेमाणे विहरइ । तए णं नं चिलाए
दासचे(डे)डए रायगिहे (णग्गे) बहूहिं अत्याभिसंकीहि य चो(रा)जाभिसंकीहि
य दाराभिसंकीहि य ध(णि)गएहि य जू(ड)यकरंहि य परच्चभवमाणे २ रायगिहाओ
नग(री)राओ निग्गच्छइ २ ता जेणेव सीहगु(फा)हा चोरपत्ती नेणेव उवागच्छइ
२ ता विजयं चोरसेगावई उवसंपज्जिताणं विहरइ । तए णं से चिलाए दासचेडे
विजयस्स चोरसेगावइस्स अग्गे असिल(ट्ट)ट्टिग्गाहे जाए यावि होत्था । जाहे वि
य णं से विजए चोरसेगावई नामघायं वा जाव पंचकोट्टि वा काउं वचइ ताहे वि य
णं से चिलाए दासचेडे सुवहुंपि (हु) कूवियवलं हयमहिय जाव पडिसेहेइ [२] पुण-
रवि लद्धट्टे कयकजे अणहसमग्गे सीहगुहं चोरपट्टि हव्वमागच्छइ । तए णं से
विजए चोरसेगावई चिलायं तक्करं बहू(इ)ओ चोरविजाओ य चोरमंते य चोरमा-
याओ य चोरनिगढीओ य सिक्खावेइ । तए णं से विजए चोरसेगावई अन्नया
कया(ई)इ कालवम्मणा सजुत्ते यावि होत्था । तए ण ताई पंच-चोरसयाइं विजयस्स
चोरसेगावइस्स महया २ इड्डीसक्कारसमुदएणं नीहरणं करंति २ ता बहूई लोड्याइं
मयकिच्चाइं करे(इ)न्ति २ ता जाव विगयसोया जाया यावि होत्था । तए णं ताई पंच-
चोरसयाइं अन्नमन्नं सदावेति २ ता एवं वयासी-एवं खलु अम्मं देवाणुप्पिया ! विजए
चोरसेगावई कालवम्मणा संजुत्ते । अयं च णं चिलाए तक्करे विजएणं चोरसेगाव-
इणा बहू-ओ चोरविजाओ य जाव सिक्खाविए । तं सेयं खलु अम्मं देवाणुप्पिया !
चिलायं तक्करं सीहगुहाए चोरपत्तीए चोरसेगावइत्ताए अभिसिंचित्तए-त्तिकट्टु अन्न-
मन्नस्स एयमट्ठं पडिखुणेंति २ ता चिलायं (तीए) सीहगुहाए [चोरपत्तीए] चोरसेगा-
वइत्ताए अभिसिंचंति । तए णं से चिलाए चोरसेगावई जाए अहम्मिए जाव विह-
रइ । तए णं से चिलाए चोरसेगावई चोर-नायगे जाव कुङ्गे यावि होत्था । से णं
तत्थ सीहगुहाए चोरपत्तीए पंचण्हं चोरसयाण य एवं जहा विजओ तहेव सव्वं जाव
रायगिहस्स [नयरस्स] दाहिणपुर-त्थिमिहं जणवयं जाव नित्याणं निद्धणं करेमाणे
विहरइ ॥ १४० ॥ तए णं से चिलाए चोरसेगावई अन्नया कयाइ विपुलं असणं ४
[उवक्खडावेइ] उवक्खडावेत्ता ते पंच चोरसए आमंतेइ तओ पच्छा ण्हाए भोयण-

मंडवंसि तेहिं पंचहिं चोरसएहिं सद्धिं विपुलं असणं ४ सुरं च मज्जं च मंसं च सीधुं च
 पस-न्नं च आमाएमाणे ४ विहरइ जिमियभुत्तुत्तरागए ते पंच चोरसए विपुलेणं धूवपु-
 प्फगंधमल्लालंकारेणं सक्कारेइ सम्माणेइ स० २ ता एवं वयासी-एवं खलु देवाणुप्पिया !
 रायगिहे नयरे धणे नामं सत्थवाहे अद्धे[०], तस्स णं धूया भद्दाए अत्तया पंचण्हं
 पुत्ताणं अणुमग्गजाइया सुंसुमा नामं दारिया (यावि) होत्था अहीणा जाव सुरूवा, तं
 गच्छामो णं देवाणुप्पिया ! धणस्स सत्थवाहस्स गिहं विलुंपामो, तुब्भं विपुले धण-
 कणग जाव सिलप्पवाले ममं सुंसुमा दारिया । तए णं ते पंच चोरसया चिलायस्स
 (०) पडिसुणेंति । तए णं से चिलाए चोरसेणावई तेहिं पंचहिं चोरसएहिं सद्धिं अल्ल-
 चम्मं दुरूहइ [२] पच्चावरण्हकालसमयंसि पंचहिं चोरसएहिं सद्धिं स-न्नद्ध जाव गहि-
 याउहपहरणा माइयगोमुहि(एहिं)फलएहिं नि(क)क्किट्ठाहिं असिलट्ठीहिं अंसगएहिं
 तोणेहिं स(जी)जीवेहिं धणूहिं समुक्खित्तेहिं सरेहिं समुल्लालियाहिं दीहाहिं ओसारियाहिं
 उरुधंटियाहिं छिप्पतूरेहिं वज्जमाणेहिं महया २ उक्किट्ठीसीह-नाय(चोरकलकलरवं) जाव
 समुदरवभूयं [पिव] करेमाणा सीहगुहाओ चोरपल्लीओ पडिनिक्खमंति २ ता जेणेव
 रायगिहे न-यरे तेणेव उवागच्छंति २ ता रायगिहस्स अदूरसामंते एगं महं गहणं
 अणु-प्पविसंति २ ता दिवसं खवेमाणा चिड्ढंति । तए णं से चिलाए चोरसेणावई अद्ध-
 रत्तकालसमयंसि निसंतपडिनिसंतंसि पंचहिं चोरसएहिं सद्धिं माइयगोमुहिएहिं फल-
 एहिं जाव मूइ(आ)याहिं उरुधंटियाहिं जेणेव रायगिहे [नयरे] पुर-त्थिमिल्ले दुवारे
 तेणेव उवागच्छइ (०) उदग(व)वत्थि परामुसइ (०) आयंते चोक्खे परमसुइभूए
 तालुग्गघाडणिविज्ज आवाहेइ २ ता रायगिहस्स दुवारकवाडे उदएणं अच्छोडेइ २
 ता कवाडं विहाडेइ २ ता रायगिहं अणु-प्पविसइ २ ता महया २ सदेणं उग्घोसे-
 माणे २ एवं वयासी-एवं खलु अहं देवाणुप्पिया ! चिलाए नामं चोरसेणावई पंचहिं
 चोरसएहिं सद्धिं सीहगुहाओ चोरपल्लीओ इ()हं हव्वमागए धणस्स सत्थवाहस्स
 गिहं घाउकामे । तं (जो) जे णं नवियाए माउयाए दुद्धं पाउकामे से णं नि(ग)गच्छउ-
 त्तिकट्ठु जेणेव धणस्स सत्थवाहस्स गिहे तेणेव उवागच्छइ २ ता धणस्स गिहं
 विहाडेइ । तए णं से धणे चिलाएणं चोरसेणावइणा पंचहिं चोरसएहिं सद्धिं
 गिहं घाइज्जमाण पासइ २ ता भीए तत्थे ४ पंचहिं पुत्तेहिं सद्धिं एगंतं अवक्कमइ ।
 तए णं से चिलाए चोरसेणावई धणस्स सत्थवाहस्स गिहं घाएइ २ ता सुवहुं
 धणक्कण(ग)गं जाव सावएज्जं सुंसुमं च दारियं गेण्हइ २ ता रायगिहाओ पडि-नि-
 क्खमइ २ ता जेणेव सीहगुहा तेणेव पहारेत्थ गमणाए ॥ १४१ ॥ तए णं से धणे
 सत्थवाहे जेणेव सए गिहे तेणेव उवागच्छइ २ ता सुवहुं धणक्कणं सुंसुमं च दारियं

गिण्हित्तए । से णं तओ पडिनियत्तइ २ ता जेणेव सा सुंसुमा बालि(दारि)या चिलाएणं जीवियाओव वरोवि(लि)या (तेणं)तेणेव उवागच्छइ २ ता सुंसुमं दारियं चिलाएणं जीवियाओ वरोवियं पासइ २ ता परसुनिय(न्तेव)तेव्व चंपगपायवे[०] । तए णं से धणे सत्थवाहे (पंचहिं पु०) अप्पछट्ठे आसत्थे कूवमाणे कंदमाणे विलवमाणे महया २ सहेणं कु(ह)हुकु-हु(सु)स्स परुत्ते सुचि(रं)रकालं वा(वा)ह[प्प]मोक्खं करेइ । तए णं से धणे [सत्थवाहे] पंचहिं पुत्तेहिं अप्पछट्ठे चिलायं तीसे आ-गामियाए सव्वओ समंता परिधाडेमा(णा)णे तण्हाए छुहाए य प(रि)रब्भं(रद्धं)ते समाणे तीसे आगामियाए अडवीए सव्वओ समंता उदगस्स मग्गणगवेसणं करे(न्ति)इ २ ता संते तते परितंते निव्विण्णे [समाणे] तीसे आगामियाए (अडवीए उदगस्स मग्गणगवेसणं करेमाणे नो चेव णं उदगं आसादेति तए णं) उदगं अणासाएमाणे जेणेव सुंसुमा जीवियाओ वरो(एलि)विया तेणेव उवागच्छइ २ ता जेट्ठं पुत्तं धणे (स०) सद्दावेइ २ ता एवं वयासी-एवं खलु पुत्ता ! सुंसुमाए दारियाए अट्ठाए चिलायं तक्करं सव्वओ समंता परिधाडेमाणा तण्हाए छुहाए य अभिभूया समाणा इमीसे आगामि-
याए अडवीए उदगस्स मग्गणगवेसणं करेमाणा नो चेव णं उदगं आसादेमो । तए णं उदगं अणासाएमाणा नो संचाएमो रायगिहं संपावित्तए । तण्णं तुब्भे ममं देवा-
णुप्पिया ! जीवियाओ वरोवेह [मम] मंसं च सोणियं च आहारेह (०) तेणं आहा-
रेणं अव(हिट्ठा)थद्धा समाणा तओ पच्छा इमं आगामियं अडविं नित्थरिहिह राय-
गिहं च संपावि(हि)हह मित्त-नाइ(य)० अभिसमागच्छि-हह अत्थस्स य धम्मस्स य पुण्णस्स य आभागी भविस्सह । तए णं से जे(ट्ठ)ट्ठे पुत्ते धणेणं सत्थवाहेणं एवं पुत्ते समाणे धणं २ एवं वयासी-तुब्भे णं ताओ ! अम्हं पिया गु(रु)रुज्ज(या)य-
देवयभूया ठावका पइ(ट्ठा)ट्ठवका संरक्खगा संगोवगा । तं कहण्णं अम्हे ताओ ! तुब्भे जीवियाओ वरोवेमो तुब्भं णं मंसं च सोणियं च आहारेमो ? तं तुब्भे णं ताओ ! ममं जीवियाओ वरोवेह मंसं च सोणियं च आहारेह आगामियं अडविं नित्थर[ह]ह तं चेव सव्वं भणइ जाव अत्थस्स जाव (पुण्णस्स) आभागी भवि-
स्सह । तए णं धणं सत्थवाहं दोच्चे पुत्ते एवं वयासी-मा णं ताओ ! अम्हे जेट्ठं भायरं गु(रुं)रुदेवयं जीवियाओ वरोवेमो, तुब्भे णं ताओ ! म-मं जीवियाओ वरोवेह जाव आभागी भविस्सह । एवं जाव पंचमे पुत्ते । तए णं से धणे सत्थवाहे पंचपुत्ताणं हियइच्छियं जाणित्ता ते पंच पुत्ते एवं वयासी-मा णं अम्हे पुत्ता ! एग-
मवि जीवियाओ वरोवेमो । एस णं सुंसुमाए दारियाए सरी(रए)रे निप्पाणे जाव जीवविप्पजडे । तं सेयं खलु पुत्ता ! अम्हं सुंसुमाए दारियाए मंसं च सोणियं च

आहारेत्तए । तए णं अम्हे तेणं आहारेणं अव(त्)थद्धा समाणा रायगिहं संपाउणि-
स्सामो । तए णं ते पंच-पुत्ता धणेणं सत्यवाहेणं एवं वुत्ता समाणा एयमट्ठं पडिमु-
णेंति । तए णं धणे सत्यवाहे पंचहिं पुत्तेहिं सद्धिं अरणिं करेइ २ ता सरगं (च)
करेइ २ ता सरएणं अरणिं महेइ २ ता अग्गि पाडेइ २ ता अग्गि संधुक्खेइ २ ता
दारया(ति)इं प(रि)क्खेवे)क्खिवइ २ ता अग्गि पज्जालेइ २ ता सुंसुमाए दारियाए
मंसं च (पइत्ता) सोणियं च आहारे(न्ति)इ । तेणं आहारेणं अव थद्धा समाणा राय-
गिहं नय(रिं)रं संपत्ता मित्त-ना(ई)इनियग० अभिसम-न्नागया तस्स य विउलस्स
धणक्कणगरयण जाव आभागी जाया(वि होत्था) । तए णं से धणे सत्यवाहे सुंसुमाए
दारियाए वहुइं लोइयाइं [मयकिच्चाइं] जाव विगयसोए जाए यावि होत्था ॥ १४२ ॥
तेणं कालेणं तेणं समएणं समणे भगवं महावीरे गुणत्तिलए उज्जाणे समोसडे । (से)
तए णं धणे सत्यवाहे सपु(संप)त्ते धम्मं सोच्चा पव्वइए एक्कारसंगवी मात्तियाए
संलेहणाए सोहम्मे उव्व(ण्णो)न्ने महाविदेहे वासे सिज्जिहिइ । जहा वि य णं जंवू !
धणेणं सत्यवाहेणं नो वण्णहेउं वा नो रुव्वहेउं वा नो वलहेउं वा नो विसयहेउं
वा सुंसुमाए दारियाए मंससोणिए आहारिए नन्नत्थ एगाए रायगिहं संपावणट्ठयाए
एवामेव समणाउसो । जो अम्हं निगंथो वा निगंथी वा इमस्स ओरालियसरी-
रस्स वंतासवस्स पित्तासवस्स सुक्कासवस्स सोणियासवस्स जाव अवस्(सं)सविप्प-
जहियव्वस्स नो वण्णहेउं वा नो रुव्वहेउं वा नो वलहेउं वा नो विसयहेउं वा
आहारं आहारेइ नन्नत्थ एगाए सिद्धिगमणसंपावणट्ठयाए से णं इह-भवे चेव वहुणं
समणाणं वहुणं समणीणं वहुणं सावयाणं वहुणं सावियाणं अच्चणिजे जाव वीईव-
इस्सइ । एवं खलु जंवू ! समणेणं भगवया महावीरेणं जाव संपत्तेणं अट्ठारसमस्स
(णायज्जयणस्स) अयमट्ठे प-न्नत्ते त्ति वेमि ॥ १४३ ॥ **गाहाओ**—जह सो चिला-
इपुत्तो सुंसुमगिद्धो अक्कज्जपडिवद्धो । धणपारद्धो पत्तो महाडविं वसणसयकलियं
॥ १ ॥ तह जीवो विसयसुहे लुद्धो काऊण पावकिरियाओ । कम्मवसेणं पावइ भवा-
डवीए महादुक्खं ॥ २ ॥ धणसेट्ठी—विव गुरुगो पुत्ता इव साहवो भवो अडवी ।
सुयमंसमिवाहारो रायगिहं इह सिवं नेयं ॥ ३ ॥ जह अडविनयरणित्थरणपावणत्थं
तएहिं सुयमंसं । भुत्तं तहेह साट्ठ गुरुण आणाए आहारं ॥ ४ ॥ भवलंघणसिवपाव-
णहेउं भुंजं(भुज्ज)ति ण उण गेहीए । वण्णवलरुव्वहेउं च भावियप्पा महासत्ता ॥ ५ ॥
अट्ठारसमं नायज्जयणं समत्तं ॥

जइ णं भंते ! समणेणं० अट्ठारसमस्स नायज्जयणस्स अयमट्ठे प-न्नत्ते एगूणवीस-
इमस्स (०) के अट्ठे पन्नत्ते ? एवं खलु जंवू ! तेणं कालेणं तेणं समएणं इहेव जंवुद्दीवे

दीवे पुव्वविदेहे सीयाए महान-ईए उत्तरिल्ले कूले नीलवंतस्स दाहिणेणं उत्तरिल्लस्स सीयामुहवणसंडस्स प(च्छि)च्चत्थिमेणं एगसेलगस्स वक्खारपव्वयस्स पुर-त्थिमेणं एत्थ णं पुक्खलावई नामं विजए प-न्नते । तत्थ णं पुंडरिगिणी नामं रायहाणी पन्नत्ता नवजोयणावि-त्थिण्णा दुवालसजोयणायामा जाव पच्चक्खं देवलो(य)गभूया पासाईया दरिसणीया अभिरूवा पडिरूवा । तीसे णं पुंडरिगिणीए नयरीए उत्तरपुर त्थिमे दि-सीभाए नलिणिवणे नामं उज्जाणे होत्था (वण्णओ) । तत्थ णं पुंडरिगिणीए राय-हाणीए महापउमे नामं राया होत्था । तस्स णं पउमावई नामं देवी होत्था । तस्स णं महापउमस्स रत्तो पुत्ता पउमावईए देवीए अत्तया दुवे कुमारा होत्था तं जहा-पुंडरीए य कंडरीए य सुकुमालपाणिपाया[०] । पुंडरीए जुवराया । तेणं कालेणं तेणं समएणं (धम्मघोसा थेरा पंचहिं अणगारसएहिं सद्धिं सं० पुव्वाणुपुव्वि चरमाणा जाव ण० उज्जाणे तेणेव सं०) थेरागमणं महापउमे राया निग्गए धम्मं सोच्चा पुं(पों)डरीयं रज्जे ठवेत्ता पव्वइए पुंडरीए राया जाए कंडरीए जुवराया । महापउमे अणगारे चोद्दस-पुव्वाइं अहिज्जइ । तए णं थेरा बहिया जणवयविहारं विहरंति । तए णं से महापउमे बहूणि वासाणि जाव सिद्धे ॥ १४४ ॥ तए णं थेरा अन्नया कया-इ पुणरवि पुंडरिगिणीए रायहाणीए नलिणिवणे उज्जाणे समोसठा । पुं-डरीए राया निग्गए । कंडरीए महाजणसदं सोच्चा जहा म(हब्)हावलो जाव पज्जुवासइ । थेरा धम्मं परिकर्हेति पुंडरीए समणोवासए जाए जाव पडिगए । तए णं कंडरीए उट्ठाए उट्ठेइ २ ता जाव से जहेयं तुब्भे वयह जं नवरं पुंडरीयं रायं आपुच्छामि तए णं जाव पव्वयामि । अहासुहं देवाणुप्पिया ! । तए णं से कंडरीए जाव थेरे वंदइ नमंसइ वं० २ ता [थेराणं] अंतियाओ पडिनिक्खमइ २ ता तमेव चाउ[३]घटं आसरहं दुरू-हइ जाव पच्चोरुहइ जेणेव पुंडरीए राया तेणेव उवार्गच्छइ (०) करयल जाव पुंड-रीयं [रायं] एवं वयासी-एवं खलु (देवा० !) मए थेराणं अंतिए (जाव) धम्मे निसंते से धम्मे अभिरुइए । तए णं (देवा० !) जाव पव्वइत्तए । तए णं से पुंडरीए कंडरीयं एवं वयासी—मा णं तुमं भाउ(देवाणुप्पि)या ! इ(दा)याणिं मुंडे जाव पव्वयाहि, अहं णं तुमं म(हया २)हारायाभिसेएणं अभिसिं(चया)चामि । तए णं से कंडरीए पुंडरीयस्स र-त्तो एयमट्ठं नो आढाइ जाव तुसिणीए सच्चिद्वइ । तए णं पुंडरीए राया कंडरीयं दोच्चंपि तच्चंपि एवं वयासी जाव तुसिणीए संचिद्वइ । तए णं पुंडरीए कंडरीयं कुमारं जाहे नो संचाएइ बहूहिं आघवणा(हिं)हि य प-न्नवणाहि य ४ ताहे अकामए चेव एयमट्ठं अणुमज्जित्था जाव निक्खमणाभिसेएणं अभिसिचइ जाव थेराणं सीसभिव्खं दलयइ पव्वइए अणगारे जाए एकारसंग-वी । तए णं थेरा

भगवंतो अन्नया कया-इ पुंड(री)रिगिणीओ नयरीओ नलि(णी)णिवणाओ उज्जाणाओ
 पडि-निक्खमंति २ ता वहिया जणवयविहारं विहरंति ॥ १४५ ॥ तए णं तस्स
 कंडरीयस्स अणगारस्स तेहिं अंतेहि य पंतेहि य जहा सेलगस्स जाव दाहवक्कं-
 तीए यावि विहरइ । तए णं थेरा अन्नया कया(ई)इ जेणेव पोंडरिगिणी तेणेव
 उवागच्छ(इ)न्ति २ ता नलि(णि)णीवणे समोसढा । पुं-डरीए निग्गए धम्मं सुणेइ ।
 तए णं पुंडरीए राया धम्मं सोच्चा जेणेव कंडरीए अणगारे तेणेव उवागच्छइ २ ता
 कंडरीयं वंदइ नमंसइ वं० २ ता कंडरीयस्स अणगारस्स सरीरगं सव्वावाहं सरो(यं)गं
 पासइ २ ता जेणेव थेरा भगवंतो तेणेव उवागच्छइ २ ता थेरे भगवंते वंदइ नमंसइ
 वं० २ ता एवं वयासी-अहण्णं भंते । कंडरीयस्स अणगारस्स अहापवत्तेहिं ओसह-
 मेसज्जेहिं जाव तिगि(तेइ)च्छं आ(उट्ठा)उंटामि, तं तुब्भे णं भंते । मम जाणसालासु
 समोसरह । तए णं थेरा भगवंतो पुंडरीयस्स पडिसुणेंति (०) जाव उवसंपज्जित्ताणं
 विहरंति । तए णं पुंडरीए (राया) जहा मंडुए सेलगस्स जाव बलियसरीरे जाए ।
 तए णं थेरा भगवंतो पुं-डरीयं रायं [आ]पुच्छंति २ ता वहिया जणवयविहारं विह-
 रंति । तए णं से कंडरीए ताओ रोयायंकाओ विप्पमुक्के समाने तंसि मणु-न्नंसि असण-
 पाणखाइमसाइमंसि मुच्छिए गिद्धे गडिए अज्झोवव-न्ने नो संचाएइ पुं डरीयं आपु-
 च्छित्ता वहिया अब्भुज्जएणं (जणवयविहारं) जाव विहरित्तए तत्थेव ओस-न्ने जाए ।
 तए णं से पुं-डरीए इमीसे कहाए लद्धे समाने ण्हाए अंतेउरपरियालसंपरिवुडे
 जेणेव कंडरीए अणगारे तेणेव उवागच्छइ २ ता कंडरीयं तिक्खुत्तो आयाहि(णं)ण-
 पयाहिणं करेइ २ ता वंदइ नमंसइ वं० २ ता एवं वयासी-धन्नेसि णं तुमं
 देवाणुप्पिया ! कयत्थे कयपु-ण्णे कयलक्खणे, सुलद्धे णं देवाणुप्पिया ! तव माणु-
 स्सए जम्मजीवियफले जे णं तुमं रज्जं च जाव अंतेउरं च [वि]ड्ड(ड्डइ)ड्डेत्ता विगो-
 वइत्ता जाव पव्वइए, अहण्णं अह-न्ने [अपुण्णे] अकयपु-ण्णे रज्जे [य] जाव
 अंतेउरे य माणुस्सएसु य कामभोगेसु मुच्छिए जाव अज्झोववन्ने नो सचाएमि
 जाव पव्वइत्तए, तं धन्नेसि णं तुमं देवाणुप्पिया ! जाव जीवियफले । तए णं से
 कंडरीए अणगारे पुंडरीयस्स एयमट्ठं नो आढाइ जाव संचिद्धइ । तए णं से
 कंडरीए पोडरीएणं दोच्चंपि तच्चंपि एवं वुत्ते समाने अकामए अव(स्)सवसे लज्जाए
 गारवेण य पुं-डरीयं (रायं) आपुच्छइ २ ता थेरेहिं सद्धिं वहिया जणवयविहारं
 विहरइ । तए णं से कंडरीए थेरेहि सद्धिं कं(कि)चि कालं उग्गंउग्गेणं विह(रति)रित्ता
 तओ पच्छा समणत्तणपरितंतंते समणत्तण-निव्वि(ण्णे) समणत्तण-निव्वभ(त्थि)च्छिए
 समणगुणमुक्कजोगी थेराणं अंतियाओ सणियं २ पच्चोसक्कइ २ ता जेणेव पुंडरिगिणी

नयरी जेणेव पुंडरीयस्स भवणे तेणेव उवागच्छइ २ ता असोगवणियाए असोगवर-
पायवस्स अहे पुढविसिलापट्टगंसि निसीयइ २ ता ओहयमणसंकप्पे जाव झियाय-
माणे संचिट्टइ । तए णं तस्स पौंडरीयस्स अंब(अम्म)धाई जेणेव असोगवणिया
तेणेव उवागच्छइ २ ता कंडरीयं अणगारं असोगवरपायवस्स अहे पुढविसिला(व)-
पट्टगंसि ओहयमणसंकप्पं जाव झियायमाणं पासइ २ ता जेणेव पुंडरीए राया तेणेव
उवागच्छइ २ ता पुंडरीयं रायं एवं वयासी-एवं खलु देवाणुप्पिया ! तव पि(उ)य-
भाउए कंडरीए अणगारे असोगवणियाए असोगवरपायवस्स अहे पुढविसिला-पट्टे
ओहयमणसंकप्पे जाव झियायइ । तए णं [से] पुंडरीए अम्मधा(इ)ईए एयमट्ठं सोच्चा
निसम्म तहेव संभंते समाणे उट्ठाए उट्ठेइ २ ता अंतेउरपरियालसंपरिवुडे जेणेव
असोगवणिया जाव कंडरीयं तिक्खुत्तो (०) एवं वयासी-ध-न्नेसि णं तुमं देवाणुप्पिया ।
जाव पव्वइए, अहं णं अध-न्ने[३] जाव [अ]पव्वइत्तए, तं धन्नेसि णं तुमं देवाणु-
प्पिया ! जाव जीवियफळे । तए णं कंडरीए पुंडरीएणं एवं वुत्ते समाणे तुसिणीए
संचिट्टइ दोच्चंपि तच्चंपि जाव चिट्ठइ । तए णं पुंडरीए कंडरीयं एवं वयासी-अट्ठो
भंते ! भोगेहिं ? हंता [१] अट्ठो । तए णं से पुंडरीए राया कोडुंबियपुरिसे सहावेइ २
ता एवं वयासी-खिप्पामेव भो देवाणुप्पिया ! कंडरीयस्स महत्थं जाव रायाभिसे-
(अ)यं उवट्ठवेह जाव रायाभिसेएणं अभिसिंचइ ॥ १४६ ॥ तए णं [से] पुंडरीए
सयमेव पंचमुट्ठियं लोयं करेइ सयमेव चाउज्जामं धम्मं पडिवज्जइ २ ता कंडरी-
यस्स संतियं आयारभंड(यं)गं गेण्हइ २ ता इमं एयारूवं अभिग्गहं अभिगिण्हइ-
कप्पइ मे थेरे वंदित्ता नमंसित्ता थेराणं अंतिए चाउज्जामं धम्मं उवसंपज्जित्ताणं
तओ पच्छा आहारं आहारित्तए-त्तिकट्ठु इमं (च) एयारूवं अभिग्गहं अभिगि(ण्हे)-
ण्हित्ताणं पुंड-रिगिणी(ए)ओ पडिनिक्खमइ २ ता पुव्वाणुपुर्व्वि चरमाणे गामाणुगामं
दूइज्जमाणे [जेणेव] थेरा भगवंतो तेणेव पहारेत्थ गमणाए ॥ १४७ ॥ तए णं
तस्स कंडरीयस्स र-न्नो तं पणीयं पाणभोयणं आहारियस्स समाणस्स अइजाग(रि)-
रण य अइभोयणप्पसंगेण य से आहारे नो सम्मं परिण(मइ)ए । तए णं तस्स
कंडरीयस्स र-न्नो तंसि आहारंसि अपरिणममाणंसि पुव्वरत्तावरत्तकालसमयंसि
सरी(रं)रगंसि वेयणा पाउब्भूया उज्जला विउला पगाढा जाव दुरहियासा पित्तज-
रपरिगयसरीरे दाहवक्कंतीए यावि विहरइ । तए णं से कंडरीए राया रज्जे य रट्ठे
य अंतेउरे य जाव अज्झोववन्ने अट्ठदुहट्ठवसट्ठे अकामए अव-सवसे कालमासे कालं
किच्चा अहे सत्तमाए पुढवीए उक्कोसकालट्ठिइयंसि नरयंसि नेरइयत्ताए उवव-न्ने ।
एवामेव समणाउसो ! जाव पव्वइए समाणे पुणरवि माणुस्सए कामभो(गे)ए आसा-

(इए)एइ जाव अणुपरियट्टिस्सइ जहा व से कंडरीए राया ॥१४८॥ तए णं से पुं-डरीए अणगारे जेणेव थेरा भगवंतो तेणेव उवागच्छइ २ ता थेरे भगवंते वंदड नमंसइ वं० २ ता थेराणं अंतिए दोच्चंपि चाउज्जामं धम्मं पडिवज्जइ छट्ठ[क्]खमणपारण-गंसि पढमाए पोरिसीए सज्जायं करेइ २ ता जाव अडमाणे सीयलुक्खं पाणभोयणं पडिगाहेइ २ ता अहापज्जत्तमितिकट्टु पडि-निय(त्त)तेइ जेणेव थेरा भगवंतो तेणेव उवागच्छइ २ ता भत्तपाणं पडिदंसेइ २ ता थेरोहिं भगवंतेहिं अब्भणुत्ताए समाणे अमुच्छिइ ४ विलमिव प-न्नगभूएणं अप्पाणेणं तं फासुएसणिज्जं असण ४ सरीरको-ट्टुगंसि पक्खिवइ । तए णं तस्स पुंडरीयस्स अणगारस्स तं कालाइकंतं अरसं विरसं सीयलुक्खं पाणभोयणं आहारियस्स समाणस्स पुव्वरत्तावरत्तकालसमयंसि धम्म-जागरियं जागरमाणस्स से आहारे नो सम्मं परिणमइ । तए णं तस्स पुंडरीयस्स अणगारस्स सरीरगंसि वेयणा पाउव्भूया उज्जला जाव दुरहियासा पित्तज्जरपरिणय-सरीरे दाहवक्कंतीए विहरइ । तए णं से पुंडरीए अणगारे अत्यामे अवले अवीरिए अपुरिसक्कारपरक्कमे करयल जाव एवं वयासी-नमो-त्थु णं अ(रि)रहंताणं [भगवंताणं] जाव संपत्ताणं । नमो-त्थु णं थेराणं भगवंताणं मम धम्मायरियाणं धम्मोवएसयाणं । पुव्वि पि य णं मए थेराणं अंतिए सव्वे पाणाइवाए पच्चक्खाए जाव सिच्छादंसण-सल्ले (णं) पच्चक्खाए जाव आलोइयपडिक्कंते कालमासे कालं किच्चा सव्वट्टुसिद्धे उव-वन्ने । तओ अणंतरे उव्वट्ठिता महाविदेहे वासे सिज्जिहिइ जाव सव्वदुक्खाणमंतं काहिइ । एवामेव समणाउसो ! जाव पव्वइए समाणे माणुस्सएहिं कामभोगेहिं नो सज्जइ नो रज्जइ जाव नो विप्पडिघायमावज्जइ से णं इहभवे चेव वट्ठूणं समणाणं वट्ठूणं समणीणं वट्ठूणं साव(या)गाणं वट्ठूणं सावियाणं अच्चणिज्जे वंदणिज्जे पूयणिज्जे सक्कारणिज्जे सम्माणणिज्जे कल्लाणं मंगलं देवयं चेइयं पज्जुवासणिज्जे-त्तिकट्टु परलोए वि य णं नो आगच्छइ वट्ठूणि दंडणाणि य मुंडणाणि य तज्जणाणि य ता(ड)ल-णाणि य जाव चाउरंतं संसारकंतारं जाव वीईवइस्सइ जहा व से पुं-डरीए अणगारे । एवं खलु जंवू ! समणेणं भगवया महावीरेणं आ(दि)इगरेणं तित्थगरेणं [सयंसंबुद्धेणं] जाव सिद्धिगइ-नामधेज्जं ठाणं संपत्तेणं एगूणवीसइमस्स नायज्जयणस्स अयमट्ठे पन्नत्ते । एवं खलु जंवू ! समणेणं भगवया महावीरेणं जाव सिद्धिगइ-नामधेज्जं ठाणं संपत्तेणं छट्ठस्स अंगस्स पढमस्स सुयक्खंधस्स अयमट्ठे प-न्नत्ते ति वेमि । तस्स णं सुयक्खंधस्स एगूणवीसं अज्जयणाणि ए(क्क)गासरगाणि एगूणवीसाए दिवसेसु सम-प्पंति ॥ १४९ ॥ गाहाउ—वाससहस्सं पि जई कारुणं संजमं सुविउलं पि ५ अंते किलिट्ठभावो न विमुज्झइ कंडरीउव्व ॥ १ ॥ अप्पेण वि कालेणं केइ जहा-

गहियसीलसामण्णा । साहिंति निययकज्जं पुंडरीयमहारिसिक्ख जहा ॥ २ ॥
 पगूणवीसइमं अज्झयणं समत्तं ॥ नायाधम्मकहाणं पढमो सुय-
 क्खंधो समत्तो ॥

तेणं कालेणं तेणं समएणं रायगिहे नामं नयरे होत्था वण्णओ । तस्स णं रायगिहस्स [नयरस्स] बहिया उत्तरपुर-त्थिमे दि-सीभाए तत्थ णं गुण(सी)सिलए नामं उज्जाणे होत्था वण्णओ । तेणं कालेणं तेणं समएणं समणस्स भगवओ महा-वीरस्स अंतेवासी अज्जसुहम्मा नामं थेरा भगवंतो जाइसंपन्ना कुलसंपन्ना जाव चो(चउ)इसपुव्वी चउ-नाणोवगया पंचहिं अणगारसएहिं सद्धिं संपरिवुडा पुव्वाणु-पुव्वि चरमाणा गामाणुगामं दू(दु)इज्जमाणा सुहंसुहेणं विहरमाणा जेणेव रायगिहे नयरे जेणेव गुण-सिलए उज्जाणे जाव संजमेणं तवसा अप्पाणं भावेमाणा विहरंति । परिसा निग्गया धम्मो कहिओ परिसा जामेव दि(सं)सिं पाउब्भूया तामेव दिसिं पडिगया । तेणं कालेणं तेण समएणं अज्जसुहम्मस्स (अणगारस्स) अंतेवासी अज्जजंबू नामं अणगारे जाव पज्जुवासमाणे एवं वयासी-जइ णं भंते ! समणेणं (३) जाव संपत्तेणं छट्ठस्स अंगस्स पढम[स्स] सुयक्खंधस्स ना(यसु)याण अयमट्ठे पन्नत्ते दोच्चस्स णं भंते ! सुयक्खंधस्स धम्मकहाणं समणेणं० के अट्ठे पन्नत्ते ? एवं खलु जंबू ! समणेणं० धम्मकहाणं दस वग्गा पन्नत्ता तंजहा-चमरस्स अग्गमहिसीणं पढमे वग्गे, वलिस्स वइरोयणिंदस्स वइरोयणरत्तो अग्गमहिसीणं वीए वग्गे, असु-रिंदवज्जियाणं दाहिणिज्जाणं इंदानं अग्गमहिसीणं त(इ)ईए वग्गे, उत्तरिल्लानं असु-रिंदवज्जियाणं भवणवासिइंदानं अग्गमहिसीणं चउत्थे वग्गे, दाहिणिज्जाणं वाणमं-तराणं इंदानं अग्गमहिसीणं पंचमे वग्गे, उत्तरिल्लानं वाणमंतराणं इंदानं अग्ग-महिसीणं छट्ठे वग्गे, चंदस्स अग्गमहिसीणं सत्तमे वग्गे, सूरस्स अग्गमहिसीणं अट्ठमे वग्गे, सक्कस्स अग्गमहिसीणं नवमे वग्गे, ईसाणस्स [य] अग्गमहिसीणं दसमे वग्गे । जइ णं भंते ! समणेणं० धम्मकहाणं दस वग्गा पन्नत्ता पढमस्स णं भंते ! वग्गस्स समणेणं० के अट्ठे पन्नत्ते ? एवं खलु जंबू ! समणेणं० पढमस्स वग्गस्स पंच अज्झयणा प-न्नत्ता तंजहा-काली राई रयणी विज्जू मेहा । जइ णं भंते ! समणेणं० पढमस्स वग्गस्स पंच अज्झयणा पन्नत्ता पढमस्स णं भंते ! अज्झयणस्स समणेणं० के अट्ठे पन्नत्ते ? एवं खलु जंबू ! तेणं कालेणं तेणं समएणं रायगिहे नयरे गुण-सिलए उज्जाणे सेणिए राया चे(ल)ल्लणा देवी सामी समोस- (रिए)ढे परिसा निग्गया जाव परिसा पज्जुवासइ । तेण कालेणं तेणं समएणं काली (नामं) देवी चमरचंचाए रायहाणीए कालव-डेंसगभवणे कालंसि सीहासणंसि चउहिं

सामाणियसाहस्सीहिं चउहिं मयहरियाहिं सपरिवाराहिं तिहिं परिमाहिं नत्तहिं
अणिएहिं सत्तहिं अणियाहिं वईहिं सोलसहिं आयरक्खदेवमाहस्सीहिं अन्ने(हिं)दि न
व(हुएहि य)हूहिं कालवडिसयभवगवासीहिं अनुरकुमारोहिं देवेहिं देवाहि य मत्ति
संपरिवुडा महयाहय जाव विहरइ इमं च णं केवलकप्पं जंबुद्वीवं २ पिउल्लेगं ओहिणा
आभोएमाणी २ पासइ ए(त)त्थ समणं भगवं महावीरं जंबुद्वीवं दीवे भारहे वासे
रायगिहे न-यरे गुणसिलए उज्जाणे अहापल्लिस्सं उग्गहं ओगि(उरिग)णिह्ता मंजमेणं
तवसा अप्पाणं भावेमाणं पासइ २ ता हट्ठुट्ठचित्तमाणंदिया पीटनगा जाव (हय)-
हियया सीहासणाओ अब्भुट्ठेइ २ ता पायपीटाओ पच्चोरुहइ २ ता पाउया ओमुचइ
२ ता तित्थगराभिमुही सत्तट्ठ पयाइं अणुगच्छइ २ ता वामं जाणुं अंचेइ २ ता
दाहिणं जाणुं धरणियलंसि निहट्ठु तिक्रुत्तु मुद्धानं धरणियलंसि निवेसेइ (०) ईसिं
पञ्च-न्नमइ २ ता कड(य)गनुडियंभियाओ भुयाओ साहरइ २ ता करयल जाव कट्ठु
एवं वयासी-नमो-त्थु णं अरहंताणं (भगवंताण) जाव संपत्ताणं । नमो-त्थु णं समगस्स
भगवओ महावीरस्स जाव संपाविउकामस्स । वंदामि णं भगवंतं तत्थगयं इहग(ए)-
या पासउ मे समणे ३ तत्थ-गए इह-गयं-तिक्रुत्तु वंदइ नमंसइ वं० २ ता सीहा-
सणवरंसि पुरत्याभिमुहा निसण्णा । तए णं तीसे कालीए देवीए इमेयाहवे जाव
समुप्पजित्था [तंजहा]-सेयं खलु मे समणं ३ वंदिता जाव पञ्जुवासित्तए-तिक्रुत्तु
एवं संपेहेइ २ ता आभिओगि(ए)या दे(वे)वा सहावेइ २ ता एवं वयासी-एवं खलु
देवाणुप्पिया ! समणे ३ एवं जहा सूरियाभो तहेव आणत्तियं देइ जाव दिव्वं सुर-
वराभिगमणजोग्गं करेह २ ता जाव पच्चप्पिणह । तेवि तहेव करेत्ता जाव पच्चप्पि-
णंति । नवरं जोयणसहस्सवि-त्थिण्णं जाणं सेसं तहेव । तहेव नामगोयं साहेइ तहेव
नट्ठविहि उवदंसेइ जाव पडिगया । भंते त्ति भगवं गोयमे समणं ३ वंदइ नमंसइ
वं० २ ता एवं वयासी-का(लि)लीए णं भंते ! देवीए सा दिव्वा देविद्धी ३ कहिं
गया ? कूडागारसालादिट्ठंतो । अहो णं भंते ! काली देवी महिद्धिया [३] । का-लीए
णं भंते ! देवीए सा दिव्वा देविद्धी ३ कि-ञ्चा लद्धा कि-ञ्चा पत्ता कि ञ्चा अभिसम-ञ्चा-
गया ? एवं जहा सूरियाभस्स जाव एवं खलु गोयमा ! तेणं कालेणं तेणं समएणं
इहेव जंबुद्वीवे २ भारहे वासे आमलकप्पा नामं नयरी होत्था वण्णओ । अंवसा-
लवणे उज्जाणे । जियसत्तू राया । तत्थ णं आमलकप्पाए नयरीए काले नामं गाहा-
वई होत्था अट्ठे जाव अपरिभूए । तस्स णं कालस्स गाहावइस्स कालसिरी नामं
भारिया होत्था लुकुमाल(पाणिपाया) जाव सुल्लवा । तस्स णं काल(ग)स्स गाहाव-
इस्स धूया कालसिरीए भारियाए अत्तया काली नामं दारिया होत्था वट्ठा वट्ठुमारी

जुण्णा जुण्णकुमारी पडियपुयत्थणी निव्विण्णवरा वरपरिवज्जिया वि होत्था । तेणं कालेणं तेणं समएणं पासे अरहा पुरिसादाणीए आइगरे जहा वद्धमाणसामी नवरं नवहत्युस्सेहे सोलसहिं समणसाहस्सीहिं अट्ठत्तीसाए अज्जियासाहस्सीहिं सद्धि संप-
 रिवुडे जाव अंबसालवणे समोसढे । परिसा निग्गया जाव पज्जुवासइ । तए ण सा काली दारिया इमीसे कहाए लद्धट्ठा समाणा हट्ठ जाव हियया जेणेव अम्मापियरो तेणेव उवागच्छइ २ ता करयल जाव एवं वयासी-एवं खलु अम्मयाओ । पासे अरहा पुरिसादाणीए आइगरे जाव विहरइ, तं इच्छामि णं अम्मयाओ । तुब्भेहिं अब्भणुजाया समाणी पासस्स [णं] अरहओ पुरिसादाणीयस्स पायवंदिया गमित्तए । अहासुहं देवाणुप्पिया । मा पडिवंधं करेहि । तए णं सा का(लिया)ली दारिया अम्मापिईहिं अब्भणुजाया समाणी हट्ठ जाव हियया ण्हाया सुद्ध(प)पावेसाइं मंगल्लाइं वत्थाइं पवर परिहिया अप्पमहग्घाभरणालंकियसरीरा चेडियाचक्कवालपरिकिण्णा साओ गिहाओ पडि-निक्खमइ २ ता जेणेव बाहिरिया उवट्ठाणसाला जेणेव धम्मिए जाणप्पवरे तेणेव उवागच्छइ २ ता धम्मियं जाणपवरं दुरुढा । तए णं सा काली दारिया धम्मियं जाण[प]पवरं एवं जहा दोवई (जाव) तहा पज्जुवासइ । तए णं पासे अरहा पुरिसादाणीए कालीए दारियाए तीसे य महइमहा(ल)लियाए परिसाए धम्मं कहेइ । तए णं सा काली दारिया पासस्स अरहओ पुरिसादाणीयस्स अंतिए धम्मं सोच्चा निसम्म हट्ठ जाव हियया पासं अरहं पुरिसादाणीयं तिक्खुत्तो वंदइ नमंसइ वं० २ ता एवं वयासी-सइहामि णं भंते ! निग्गयं पावयणं जाव से जहेयं तुब्भे वयह जं नवरं देवाणुप्पिया ! अम्मापियरो आपुच्छामि तए णं अहं देवाणु-
 प्पियाणं अंतिए जाव पव्वयामि । अहासुहं देवाणुप्पिए ! । तए णं सा काली दारिया पासेणं अरहया पुरिसादाणीएणं एवं वुत्ता समाणी हट्ठ जाव हियया पासं अरहं वंदइ नमंसइ वं० २ ता तमेव धम्मियं जाणप्पवरं दु-रुहइ २ ता पासस्स अरहओ पुरिसादाणीयस्स अंतियाओ अंबसालवणाओ उज्जाणाओ पडि-निक्खमइ २ ता जेणेव आमलकप्पा नयरी तेणेव उवागच्छइ २ ता आमलकप्पं नयरिं मज्झंमज्झेणं जेणेव बाहिरिया उवट्ठाणसाला तेणेव उवागच्छइ २ ता धम्मियं जाण प-पवरं ठवेइ २ ता धम्मियाओ जाणप्पवराओ पच्चोरुहइ २ ता जेणेव अम्मापियरो तेणेव उवा-
 गच्छइ २ ता करयल[परिग्गहियं] जाव एवं वयासी-एवं खलु अम्मयाओ । मए पासस्स अरहओ अंतिए धम्मे निसंते, से वि य धम्मे इच्छिए पडिच्छिए अभि-
 रुइए, तए णं अहं अम्मयाओ ! संसारभउव्विग्गा भीया जम्मणमरणणं इच्छामि णं तुब्भेहिं अब्भणुजाया समाणी पासस्स अरहओ अंतिए मुंडा भवित्ता आ-गा-

राओ अणगारियं पव्वइत्तए । अहासुहं देवाणुप्पि-ए ! मा पडिवंवं करे-हि । तए णं
 से काले गाहावई वि-उलं असणं ४ उवक्खडावेइ २ ता मित्त-नाइ-नियगसयणसंवंधि-
 परियणं आमंतेइ २ ता तओ पच्छा ण्हाए विपुलेणं पुप्फवत्थगंधमल्लालंकारेणं
 सक्कारे(ता)इ सम्माणे-इ [२] तस्सेव मित्त-नाइ-नियगसयणसंवंधिपरियणस्स पुरओ
 कालियं दारियं सेयापीएहिं कलसेहिं ण्हावेइ २ ता सव्वालंकारविभूसियं करेइ २
 ता पुरिससहस्सवाहि(णीय)णिं सीयं दु-रुहेइ २ ता मित्त-नाइ-नियगसयणसंवंधिपरि-
 यणेणं सद्धिं संपरिवु(डा)डे सव्विद्धीए जाव रवेणं आमलकणं नयरिं मज्झमज्झेणं
 निगच्छइ २ ता जेणेव अंवसालवणे उज्जाणे तेणेव उवागच्छइ २ ता छत्ताइए
 तित्थगराड(स)ए पासइ २ ता सीयं ठा-वेइ २ ता [कालियं दारियं सीयाओ पच्चोरुहइ ।
 तए णं तं] कालियं दारियं अम्मापियरो पुरओ काउं जेणेव पासे अरहा पुरिसादा-
 णीए तेणेव उवागच्छ(इ)न्ति २ ता वंद-न्तिति नमंस-न्तिति वं० २ ता एवं वयासी-
 एवं खलु देवाणुप्पिया ! काली दारिया अम्हं धूया इद्धा कंता जाव किमंग पुण पासण-
 याए ? एस णं देवाणुप्पिया ! संसारभउव्विग्गा इच्छइ देवाणुप्पियाणं अंतिए सुंडा
 भवित्ता (णं) जाव पव्वइत्तए, तं एयं णं देवाणुप्पियाणं सिस्सिणिभिक्षुं दलयामो,
 पडिच्छंतु णं देवाणुप्पिया ! सिस्सिणिभिक्षुं । अहासुहं देवाणुप्पिया ! मा पडिवंधं
 (करेह) । तए णं [सा] काली कुमारी पासं अरहं वंदइ नमंसइ वं० २ ता उत्तरपुर-
 त्थिमं दि-सीभागं अवक्कमइ २ ता सयमेव-आभरणमल्लालंकारं ओमुयइ २ ता सयमेव
 लोयं करेइ २ ता जेणेव पासे अरहा पुरिसादाणीए तेणेव उवागच्छइ २ ता पासं
 अरहं तिक्खुत्तो वदइ नमंसइ वं० २ ता एवं वयासी-आलित्ते णं भंते ! लोए एवं
 जहा देवाणंदा जाव सयमेव पव्वा(वि)वेडं । तए णं पासे अरहा पुरिसादाणीए
 का(लिं)लियं सयमेव पुप्फचूलाए अज्जाए सिस्सिणियत्ताए दलयइ । तए णं सा पुप्फ-
 चूला अज्जा कालिं कुमारिं सयमेव पव्वावेड जाव उवसंपज्जित्ताणं विहरइ । तए णं सा
 काली अज्जा जाया इ-रियासमिया जाव गुत्तवंभयारिणी । तए णं (सा) काली अज्जा
 पुप्फचूला[ए] अज्जाए अंतिए सामाइयमाइयाइं एक्कारस्स अंगाई अहिजइ वद्धहिं
 चउत्थ जाव विहरइ । तए णं सा काली अज्जा अन्नया कया(तिं)इ सरीरवाउसिया
 जाया(या)वि होत्था, अभिक्खणं २ हत्थे धो(व)वेइ पाए धो-वेइ सीसं धो-वेइ सुहं
 धो-वेइ थणंतरा(इं)णि धो-वेइ कक्खंतराणि धो-वेइ गुज्जंतरा(इं)णि धो-वेइ जत्थ जत्थ
 वि य णं ठाणं वा सेज्जं वा निसीहियं वा चेएइ तं पुव्वामेव अन्धु(क्खे)क्खित्ता
 तओ पच्छा आसयइ वा सयइ वा । तए णं सा पुप्फचूला अज्जा का-लियं अज्जं एवं
 वयासी-नो खलु कप्पइ देवाणुप्पिए ! समणीगं निगंथीणं सरीरवाउसियाणं होत्तए,

तुमं च णं देवाणुप्पिए ! संरीरवाउसिया जाया अभिक्खणं २ हत्थे धोवसि जाव आसयाहि वा सयाहि वा, तं तुमं देवाणुप्पिए ! एयस्स ठाणस्स आलोएहि जाव पायच्छित्तं पडिवज्जाहि । तए णं सा काली अज्जा पुप्फचूलाए अज्जाए एयमट्ठं नो आढाइ जाव तुसिणीया संचिट्ठइ । तए णं ताओ पुप्फचूलाओ अज्जाओ कालिं अज्जं अभिक्खणं २ हीलेंति निंदंति खिं(सं)सेंति ग-रहंति अवम-न्नंति अभिक्खणं २ एयमट्ठं निवारेंति । तए णं तीसे कालीए अज्जाए समणीहिं निगंथीहिं अभिक्खणं २ हीलिज्जमाणीए जाव वारिज्जमाणीए इमेयारूवे अ-ज्झत्थिए जाव समुप्पज्जित्था-जया णं अहं अ(आ)गारवासमज्जे वसित्था तथा णं अहं सयंवसा । जप्पभिइं च णं अहं मुं(डे)डा भवित्ता अ-गाराओ अणगारियं पव्वइया तप्पभिइं च णं अहं परवसा जाया । तं सेयं खलु मम कलं पाउप्पभायाए रयणीए जाव जलंते पाडि(क्कि)कयं उवस्सयं उवसंपज्जित्ताणं विहरित्तए-त्तिकट्ठु एवं संपेहेइ २ ता कलं जाव जलंते पाडि(ए)कं उवस्सयं गे(गि)ण्हइ तत्थ णं अणिवारिया अणोहट्ठिया सच्छंदमई अभिक्खणं २ हत्थे धोवेइ जाव आसयइ वा सयइ वा । तए णं सा काली अज्जा पासत्था पासत्थविहा० ओस-न्ना ओस-न्नविहा० कुसीला कुसीलविहा० अहाछंदा अहाछंदविहा० संसत्ता संसत्तविहा० बहूणि वासाणि साम-ण्णपरियागं पाउणइ २ ता अद्धमासियाए संलेहणाए अ(त्ता)प्पाणं झूसेइ २ ता तीसं भत्ताइं अणसणाए छेएइ २ ता तस्स ठाणस्स अणालोइयअपडिक्कंता कालमासे कालं किच्चा चमरचंचाए रायहाणीए कालवडिंसए भवणे उववायसभाए देवसय-णिज्जंसि देवदूसंतरिया अंगुलस्स असंखे(जाइ)ज्जभागमेत्ताए ओगाहणाए कालीदे- (वी)वित्ताए उवव-न्ना । तए णं सा काली देवी अहुणोवव-न्ना समाणी पंचविहाए पज्जतीए जहा सूरियाभो जाव भासामणपज्जतीए । तए णं सा काली देवी चउण्हं सामाणियसाहस्सीणं जाव अ-न्नेसिं च बहूणं कालवडेंसगभवणवासीणं असुरकुमा-राणं देवाण य देवीण य आहेवच्चं जाव विहरइ । एवं खलु गोयमा ! कालीए देवीए सा दिव्वा देविद्धी ३ लद्धा पत्ता अभिसम-न्नागया । कालीए णं भंते ! देवीए केवइयं कालं ठिई पन्नत्ता ? गोयमा ! अट्ठाइज्जाइं पलिओवमाइं ठिई पन्नत्ता । काली णं भंते ! देवी ताओ देवलोगाओ अणंतरं उ(व)वट्ठित्ता कहिं गच्छि-हिइ कहिं उववज्जिहिइ ? गोयमा ! महाविदेहे वासे सिज्झिहिइ [जाव अंतं काहिइ] । एवं खलु जंबू ! समणेणं जाव संपत्तेणं पढम[रस] वग्गस्स पढमज्झयणस्स अयमट्ठे प-न्नत्ते तिवेमि ॥ १५० ॥ (धम्मकहाणं पढमज्झयणं समत्तं) ॥

जइ णं भंते ! समणेणं० धम्मकहाणं पढमस्स वग्गस्स पढमज्झयणस्स

अयमट्ठे प-न्नते विइयस्स णं भंते ! अज्झयणस्स समणेणं (३) जाव संपत्तेणं के अट्ठे प-न्नते ? एवं खलु जंबू ! तेणं कालेणं तेणं समएणं रायगिहे न-यरे गुण-सिलए उज्जाणे सामी समोसठे परिसा निग्गया जाव पज्जुवासइ । तेणं कालेणं तेणं समएणं राई देवी चमरचंचाए रायहाणीए एवं जहा काली तहेव आगया नट्ट-विहिं उवदं(से)सित्ता पडिगया । भंतेत्ति भगवं गोयमे पुव्वभवपुच्छा । एवं खलु गोयमा ! तेणं कालेणं तेणं समएणं आमलकप्पा नयरी अंवसालवणे उज्जाणे जिय-सत्तू राया राई गाहावई रा(ई)इसिरी भारिया राई दारिया पासस्स समोसरणं राई दारिया जहेव काली तहेव निक्खंता तहेव सरीरवाउसिया तं चेव सव्वं जाव अंतं काहिइ । एवं खलु जंबू ! वि(इ)इयज्झयणस्स निक्खेवओ ॥ जइ णं भंते ! तइय-ज्झयणस्स उक्खेवओ । एवं खलु जंबू ! रायगिहे नयरे गुणसिलए उज्जाणे एवं जहेव राई तहेव रयणी वि नवरं आमलकप्पा नयरी रय(णी)णे गाहावई रयणसिरी भारिया रयणी दारिया सेसं तहेव जाव अंतं काहिइ । एवं विज्जू वि आमलकप्पा नयरी वि(ज्जु)ज्जू गाहावई विज्जुसिरी भारिया वि-ज्जू दारिया सेसं तहेव । एवं मेहा वि आमलकप्पाए नयरीए मेहे गाहावई मेहसिरी भारिया मेहा दारिया सेसं तहेव । एवं खलु जंबू ! समणेणं जाव संपत्तेणं धम्मकहाणं पढमस्स वग्गस्स अयमट्ठे पन्नते ॥ १५१ ॥ जइ णं भंते ! समणेणं० दोच्चस्स वग्गस्स उक्खेवओ । एवं खलु जंबू ! समणेणं० दोच्चस्स वग्गस्स पंच अज्झयणा पन्नत्ता तंजहा-सुंभा निंसुंभा रंभा निरंभा म(द)यणा । जइ णं भंते ! समणेणं० धम्मकहाणं दोच्चस्स वग्गस्स पंच अज्झयणा पन्नत्ता दोच्चस्स णं भंते ! वग्गस्स पढमज्झयणस्स के अट्ठे प-न्नते ? एवं खलु जंबू ! तेणं कालेणं तेणं समएणं रायगिहे नयरे गुण-सिलए उज्जाणे सामी समोस(ढो)ठे परिसा निग्गया जाव पज्जुवासइ । तेणं कालेणं तेणं समएणं सुंभा देवी वलिचंचाए रायहाणीए सुंभवडेंसए भवणे सुंभंसि सीहासणंसि कालीगमएणं जाव नट्टविहिं उवदंसेत्ता जाव पडिगया । पुव्वभवपुच्छा । सावत्थी नयरी कोट्टए उज्जाणे जियसत्तू राया सुंभे गाहावई सुंभसिरी भारिया सुंभा दारिया सेसं जहा का(लिया)लीए नवरं अद्दुट्ठाई पलिओवमाई ठिई । एवं खलु जंबू ! निक्खेवओ अज्झयणस्स । एवं सेसावि चत्तारे अज्झयणा सावत्थीए नवरं माया पिया सरिस-नामया । एवं खलु जंबू ! निक्खेवओ वि(ती)इयवग्गस्स ॥ १५२ ॥ उक्खे(वओ)वो तइयवग्गस्स । एवं खलु जंबू ! समणेणं० तइय(स्स)वग्गस्स चउप-न्नं अज्झयणा पन्नत्ता तंजहा-पढमे अज्झयणे जाव चउपन्नतिमे अज्झयणे । जइ णं भंते ! सम-णेणं० धम्मकहाणं तइय-वग्गस्स चउप्प(न्नं) [अ]ज्झयणा पन्नत्ता पढमस्स णं

भंते ! अज्झयणस्स समणेणं० के अट्ठे प-न्नते ? एवं खलु जंबू ! तेणं कालेणं तेणं समएणं रायगिहे नयरे गुण-सिलए उज्जाणे सामी समोसठे परिसा निग्गया जाव पज्जुवासइ । तेणं कालेणं तेणं समएणं अ(इ)ला देवी धर(णी)णाए रायहाणीए अ-लाव(डं)डेंसए भवणे अ-लंसि सीहासणंसि एवं कालीगमएणं जाव नट्टविहिं उवदंसेत्ता पडिगया । पुव्वभवपुच्छा । वाणारसीए नयरीए काममहावणे उज्जाणे अ ले गाहावई अ-लसिरी भारिया इला दारिया सेसं जहा कालीए नवरं धरण(स्स)अग्ग-महिसित्ताए उववाओ साइरे(ग)गं अद्धपल्लिओव(म)मं ठिई सेसं तहेव । एवं खलु निक्खेवओ पढमज्झयणस्स । एवं क(मा सते)मसोतरा सोयामणी इंदा घ(णा)णया विज्जुया-वि । सव्वाओ एयाओ धरणस्स अग्गमहिसीओ (एव) । एए छ अज्झयणा वेणुदेवस्स वि आविसेसिया भाणियव्वा, एवं जाव घोसस्स वि एए चेव छ अज्झ-यणा । एवमेते दाहिणिल्लणं इंदाणं चउप्प-न्नं अज्झयणा भवंति सव्वाओ वि वाणा-रसीए काममहावणे उज्जाणे । तइयवग्गस्स निक्खेव(ओ)गो ॥ १५३ ॥ चउत्थस्स उक्खेव-गो । एवं खलु जंबू ! समणेणं० धम्मकहाणं चउत्थवग्गस्स चउप्प-न्नं अज्झ-यणा प-न्नत्ता तंजहा-पढमे अज्झयणे जाव चउप्प-न्नइमे अज्झयणे । पढमस्स अज्झ-यणस्स उक्खेव-गो । एवं खलु जंबू ! तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं कालेणं तेणं समएणं रुया देवी रु(भू)याणंदा राय-हाणी रुयगव(डिं)डेंसए भवणे रुयगंसि सीहासणंसि जहा कालीए तहा नवरं पुव्वभवे चंपाए पुण्णभेदे उज्जाणे रुयगगाहावई रुयगसिरी भारिया रुया दारिया सेसं तहेव नवरं भूयाणं(द)दा अग्गमहिसित्ताए उववाओ देसूणं पल्लिओवमं ठिई । निक्खेवओ । एवं खलु सुरुया वि रुयंसा वि रुयगावई वि रुयकंता वि रुयप्पभा वि । एयाओ चेव उत्तरिल्लणं इंदाणं भाणियव्वाओ जाव महाघोसस्स । निक्खेवओ चउत्थवग्गस्स ॥ १५४ ॥ पंचमवग्गस्स उक्खेवओ । एवं खलु जंबू ! जाव वत्तीसं अज्झयणा प-न्नत्ता तंजहा-कमला कमलप्पभा चेव, उप्पला य सुदंसणा । रुववई वहरुवा, सुरुवा सुभगा वि य ॥ १ ॥ पुण्णा बहुपुत्तिया चेव, उत्तमा भारिया वि य । पउमा वसुमई चेव, कणगा कणगप्पभा ॥ २ ॥ वडेंसा के(उ)ऊमई चेव, वइरसेणा रइप्पिया । रोहिणी नवमिया चेव, हिरी पुप्फवई(ति) वि य ॥ ३ ॥ भुयगा भुयगवई चेव, महाकच्छा(ऽ)परा(फुडा)इ(य)या । सुघोसा विमला चेव, सुस्सरा य सरस्सई ॥ ४ ॥ उक्खेवओ पढमज्झयणस्स । एवं खलु जंबू ! तेणं कालेणं तेणं समएणं राय-गिहे समोसरणं जाव परिसा पज्जुवासइ । तेणं कालेणं तेणं समएणं कमला देवी कम-लाए रायहाणीए कमलवडेंसए भवणे कमलंसि सीहासणंसि सेसं जहा कालीए तहेव

नवरं पुव्वभवे नागपुरे नयरे सहसंववणे उज्जाणे कमलस्स गाहावइस्स कमल-
 सिरीए भारियाए कमला दारिया पासस्स(०) अंतिए निक्खंता कालस्स पिसायकु-
 मारिंदस्स अग्गमहिंसी अद्धपलिओवमं ठिई । एवं सेसा वि अज्झयणा दाहिणिज्झाणं
 वाणमंतरिंदाणं भ(भा)णियव्वाओ (सव्वाओ) नागपुरे सहसंववणे उज्जाणे मायापि-
 (या)यरो धूया सरिसनामया ठिई अद्धपलिओवमं । पंचमो वग्गो समत्तो ॥ १५५ ॥
 छट्ठो वि वग्गो पंचमवग्गसरिसो नवरं महाका(लिंदा)याईणं उत्तरिज्झाणं इंदाणं अग्ग-
 महिंसीओ । पुव्वभवे सागे(य)ए नयरे उत्तरकुरुज्जाणे मायापि-यरो धूया सरिस-
 नामया । सेसं तं चेव । छट्ठो वग्गो समत्तो ॥ १५६ ॥ सत्तमस्स वग्गस्स उक्खे-
 वओ । एवं खलु जंवू ! जाव चत्तारि अज्झयणा प-न्नत्ता तंजहा-सूरप्पभा आयवा
 अच्चिमाली पभंकरा । पढमज्झयणस्स उक्खेवओ । एवं खलु जंवू ! तेणं कालेणं
 तेणं समएणं रायगिहे समोसरणं जाव परिसा पज्जुवासइ । तेणं कालेणं तेणं समएणं
 सूरप्पभा देवी सूरंसि विमाणंसि सूरप्पभंसि सीहासणंसि सेसं जहा कालीए तहा
 नवरं पुव्वभवो अरक्खुरीए नयरीए सूरप्पभस्स गाहावइस्स सूरसिरीए भारियाए
 सूरप्पभा दारिया सूरस्स अग्गमहिंसी ठिई अद्धपलिओवमं पंचहिं वाससएहिं अब्भ-
 हियं सेसं जहा कालीए । एवं सेसाओ वि सव्वाओ अरक्खुरीए नयरीए । सत्तमो
 वग्गो समत्तो ॥ १५७ ॥ अट्ठमस्स उक्खेवओ । एवं खलु जंवू ! जाव चत्तारि
 अज्झयणा प-न्नत्ता तंजहा-चंदप्पभा दोसि-नाभा अच्चिमाली पभंकरा । पढम-
 (स्स अ)ज्झयणस्स उक्खेवओ । एवं खलु जंवू ! तेणं कालेणं तेणं समएणं रायगिहे
 समोसरणं जाव परिसा पज्जुवासइ । तेणं कालेणं तेणं समएणं चंदप्पभा देवी चंद-
 प्पभंसि विमाणंसि चंदप्पभंसि सीहासणंसि सेसं जहा कालीए नवरं पुव्वभ(वे)वो
 महुराए नयरीए भंडि(चंद)वडेंसए उज्जाणे चंदप्पमे गाहावई चंदसिरी भारिया
 चंदप्पभा दारिया चंदस्स अग्गमहिंसी ठिई अद्धपलिओवमं प-न्ना(साए)सवाससह-
 स्सेहिं अब्भहियं, सेसं जहा कालीए । एवं सेसाओ वि महुराए नयरीए मायापि-
 यरो(वि) धूया सरिस-नामा । अट्ठमो वग्गो समत्तो ॥ १५८ ॥ नवमस्स उक्खेवओ ।
 एवं खलु जंवू ! जाव अट्ठ अज्झयणा पन्नत्ता तंजहा-पउमा सिवा सई अंजू रोहिणी
 न(व)मिया [इ य ।] अ(च)यला अच्छरा ॥ पढमज्झयणस्स उक्खेवओ । एवं खलु
 जंवू ! तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं
 कालेणं तेणं समएणं पउमावई देवी सोहम्मे कप्पे पउमवडेंसए विमाणे सभाए
 सुहम्माए पउमंसि सीहासणंसि जहा कालीए एवं अट्ठ वि अज्झयणा कालीगमएणं
 नायव्वा नवरं सावत्थीए दो-जणीओ हत्थिणाउरे दो-जणीओ कंपिल्लपुरे दो-जणीओ

सा(गेयनयरे)एए दो-जणीओ पउमे पियरो विजया मायराओ सव्वाओ वि पासस्स अंति(ए)यं पव्वइयाओ सक्कस्स अग्गमहिंसीओ ठिई सत्त पलिओवमाई महाविदेहे वासे अंतं काहिति । नवमो वग्गो समत्तो ॥ १५९ ॥ दसमस्स उक्खेवओ । एवं खलु जंबू ! जाव अट्ठ अज्झयणा पन्नत्ता तंजहा-कण्हा य कण्हराई रामा तह राम-रक्खिया वसू-या । वसुगुत्ता वसुमिक्का वसुंधरा चेव ईसाणे ॥ १ ॥ पढमज्झयणस्स उक्खेवओ । एवं खलु जंबू ! तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं कालेणं तेणं समएणं कण्हा देवी ईसाणे कप्पे कण्हवडेंसए विमाणे सभाए सुहम्माए कण्हंसि सीहासणंसि सेसं जहा कालीए एवं अट्ठवि अज्झयणा कालीगमएणं ना(णे)यव्वा नवरं पुव्वभ-वो वाणारसीए नयरीए दो-जणीओ रायगिहे नयरे दो-जणीओ सावत्थी(ए)नयरीए दो-जणीओ कोसंबीए नयरीए दो-जणीओ रामे पिया धम्मा माया सव्वाओ वि पासस्स अरहओ अंतिए पव्वइयाओ पुप्फ-चूलाए अज्जाए सिस्सि(णी)णियत्ताए ईसाणस्स अग्गमहिंसीओ ठिई नवपलिओवमाई महाविदेहे वासे सिज्झिहिति बुज्झिहिति मुच्चिहिति सव्वदुक्खाणं अंतं काहिति । एवं खलु जंबू ! निक्खेव-गो दसमवग्गस्स । दसमो वग्गो समत्तो ॥ १६० ॥ एवं खलु जंबू ! समणेणं भगवया महावीरेणं आइगरेणं तित्थगरेणं सयंसंबुद्धेणं पुरिसोत्तमेणं [पुरिससीहेणं] जाव संपत्तेणं धम्मकहाणं अयमट्ठे पन्नत्ते । धम्मकहा सुयक्खंधो समत्तो । दसहिं वग्गेहिं नायाधम्मकहाओ समत्ताओ ॥ १६१ ॥ बीओ सुयक्खंधो समत्तो ॥ नायाधम्मकहाओ समत्ताओ ॥



णमोऽत्यु णं समणस्स भगवओ णायपुत्तमहावीरस्सं

सुत्तागमे

तत्थ णं

उवासगदसाओ

तेणं कालेणं तेणं समएणं चम्पा नामं नयरी होत्था । वण्णओ । पुण्णभेइ उज्जाणे । वण्णओ ॥ १ ॥ तेणं कालेणं तेणं समएणं अज्जसुहम्मे समोसरिए जाव जम्बू पज्जुवासमाणे एवं वयासी-जइ णं भन्ते ! समणेणं भगवया महावीरेणं जाव सम्पत्तेणं छट्ठस्स अज्जस्स नायाधम्मकहाणं अयमट्ठे पण्णत्ते, सत्तमस्स णं भन्ते ! अंगस्स उवासगदसाणं समणेणं जाव सम्पत्तेणं के अट्ठे पण्णत्ते ? एवं खलु जम्बू ! समणेणं जाव सम्पत्तेणं सत्तमस्स अंगस्स उवासगदसाणं दस अज्जयणा पण्णत्ता, तंजहा-आणन्दे १, कामदेवे य २, गाहावइचुलणीपिया ३, सुरादेवे ४, चुल्लसयए ५, गाहावइकुण्डकोलिए ६, सद्दालपुत्ते ७, महासयए ८, नन्दिणीपिया ९, सालिहीपिया १० ॥ २ ॥ जइ णं भन्ते ! समणेणं जाव सम्पत्तेणं सत्तमस्स अंगस्स उवासगदसाणं दस अज्जयणा पण्णत्ता पढमस्स णं भन्ते ! समणेणं जाव सम्पत्तेणं के अट्ठे पण्णत्ते ? एवं खलु जम्बू ! तेणं कालेणं तेणं समएणं वाणियगामे नामं नयरे होत्था । वण्णओ । तस्स [णं] वाणियगामस्स नयरस्स बहिया उत्तरपुर(त्थि)च्छिमे दिसीभाए दूइपलासए नामं उज्जाणे [होत्था] । तत्थ णं वाणियगामे नयरे जियसत्तू राया (होत्था) । वण्णओ । तत्थ णं वाणियगामे आणन्दे नामं गाहावई परिवसइ, अट्ठे जाव अपरिभूए । तस्स णं आणन्दस्स गाहावइस्स चत्तारि हिरण्णकोडीओ निहाणपउत्ताओ, चत्तारि हिरण्णकोडीओ वु(व)ट्ठिपउत्ताओ, चत्तारि हिरण्णकोडीओ पवित्थरपउत्ताओ, चत्तारि वया दस-गोसाहस्सिएणं वएणं होत्था । से णं आणन्दे गाहावई बहूणं राईसर जाव सत्थ-वाहाणं बहूसु कज्जेसु य कारणेसु य मन्तेसु य कुडुम्बेसु य गुज्जेसु य रहस्सेसु य निच्छएसु य ववहारेसु य आपुच्छणिज्जे (य) पडिपुच्छणिज्जे, सयस्सवि य णं कुडुम्बस्स मेढी पमाणं आहारे आलम्बणं चक्खू, मे(ढी)ढिभूए जाव सव्वकज्ज-व(ट्ठा)ट्ठावए यावि होत्था । तस्स णं आणन्दस्स गाहावइस्स सि(वा)वनन्दा नामं भारिया होत्था, अहीण जाव सुरूवा आणन्दस्स गाहावइस्स इट्ठा आणन्देणं गाहा-

वइणा सद्धिं अणुरत्ता अविरत्ता इ(ट्ठा)ट्ठे सद् जाव पच्चविहे माणुस्सए कामभोए पच्चणुभवमाणी विहरइ । तस्स णं वाणियगामस्स वहिया उत्तरपुर-च्छिमे दिसीभाए एत्थ णं कोल्लाए नामं सन्निवेसे होत्था, रिद्धत्थिमिय जाव पासादीए (४) । तत्थ णं कोल्लाए सन्निवेसे आणन्दस्स गाहावइस्स बहुए मित्तनाइनियगसयणसम्बन्धि-परिजणे परिवसइ, अट्ठे जाव अपरिभूए । तेणं कालेणं तेणं समएणं समणे भगवं महावीरे जाव समोसरिए । परिसा निग्गया, कूणिए राया जहा तहा जियसत्तू निग्गच्छइ (२ त्ता) जाव पज्जुवासइ । तए णं से आणन्दे गाहावई इमीसे कहाए लद्धट्ठे समाणे 'एवं खलु समणे जाव विइरइ, तं महाफलं [जाव] गच्छामि णं जाव पज्जुवासामि' एवं सम्पेहेइ, सम्पेहिता ण्हाए सुद्धप्पावेसाइं जाव अप्पमहग्घाभरणालङ्घियसरीरे सयाओ गिहाओ पडिणिक्खमइ, पडिनिक्खमिता सको(रे)रण्ठमल्लदामेणं छत्तेणं धरिजमाणेणं मणुस्सवग्गुरापरिक्खित्ते पायविहारचा-रेणं वाणियगामं नयरं मज्झंमज्जेणं निग्गच्छइ, निग्गच्छिता जेणामेव दू(दु)इपलासे उज्जाणे जेणेव समणे भगवं महावीरे तेणेव उवागच्छइ, उवागच्छिता तिव्खुत्तो आयाहिणं पयाहिणं करेइ, करेत्ता वन्दइ नमंसइ जाव पज्जुवासइ । तए णं समणे भगवं महावीरे आणन्दस्स गाहावइस्स तीसे य महइमहालियाए परिसाए जाव धम्मकहा, परिसा पडिगया, राया य ग(ए)ओ ॥ ३ ॥ तए णं से आणन्दे गाहावई समणस्स भगवओ महावीरस्स अन्तिए धम्मं सोच्चा निसम्म हट्ठुत्तु जाव एवं वयासी-‘सद्दहामि णं भन्ते ! निग्गन्थं पावयणं, पत्तियामि णं भन्ते ! निग्गन्थं पावयणं, रोएमि णं भन्ते ! निग्गन्थं पावयणं, एवमेयं भन्ते !, तहमेयं भन्ते !, अवितहमेयं भन्ते !, इच्छियमेयं भन्ते !, पडिच्छियमेयं भन्ते !, इच्छियपडिच्छिय-मेयं भन्ते !, से जहेयं तुब्भे वयह'त्तिकट्ठु जहा णं देवाणुप्पियाणं अन्तिए वहवे राई-सरतलवरमाडम्बियकोडुम्बियसेट्ठि[सेणावइ]सत्थवाहप्पभि(इया)ईओ मुण्(डे)डा भवित्ता अ-गाराओ अणंगारियं पव्वइया नो खलु अहं तहा संचाएमि मुण्डे जाव पव्वइत्तए, अहं णं देवाणुप्पियाणं अन्तिए पच्चाणुव्वइयं सत्तसिक्खावइयं दुवालसविहं गिहिधम्मं पडिवज्जिस्सामि । अहासुहं देवाणुप्पिया ! मा पडिवंधं करे(हि)ह ॥ ४ ॥ तए णं से आणन्दे गाहावई समणस्स भगवओ महावीरस्स अन्तिए तप्पढमयाए थूलगं पाणाइवायं पच्चक्खाइ, 'जावजीवाए दुविहं तिविहेणं न करे(इ)मि न कारवे- (इ)मि मणसा वयसा कायसा' १ । तयाणन्तरं च णं थूलगं मुसावायं पच्चक्खाइ, 'जावजीवाए दुविहं तिविहेणं न करेमि न कारवेमि मणसा वयसा कायसा' २ । तयाणन्तरं च णं थूलगं अ(दत्ता)दिण्णादाणं पच्चक्खाइ, 'जावजीवाए दुविहं

तिविहेणं न करेमि न कारवेमि मणसा वयसा कायसा' ३ । तयाणन्तरं च णं सदारसन्तो(सी)सिए परिमाणं करेइ, 'नन्नत्थ एक्काए सिवनन्दाए भारियाए, अवसेसं सव्वं मेहुणविहिं पच्चक्खा(इ)मि मणसा वयसा कायसा' ४ । तयाणन्तरं च णं इच्छाविहिपरिमाणं करेमाणे हिरण्णसुवण्णविहिपरिमाणं करेइ, 'नन्नत्थ चउहिं हिरण्णकोडीहिं निहाणपउत्ताहि, चउहि वु-द्धिपउत्ताहि, चउहि पवित्थर-पउत्ताहि, अवसेसं सव्वं हिरण्णसुवण्णविहिं पच्चक्खामि ३' । तयाणन्तरं च णं चउप्पयविहिपरिमाणं करेइ, 'नन्नत्थ चउहिं वएहिं दसगोसाहस्सिएणं वएणं, अवसेसं सव्वं चउप्पयविहिं पच्चक्खामि ३' । तयाणन्तरं च णं खेत्तवत्थु-विहिपरिमाणं करेइ, 'नन्नत्थ पञ्चहिं हलसएहिं नियत्तणसइएणं हल्लेणं, अवसेसं सव्वं खेत्तवत्थुविहि पच्चक्खामि ३' । तयाणन्तरं च णं सगडविहिपरिमाणं करेइ, 'नन्नत्थ पञ्चहिं सगडसएहिं दिसायत्तिएहिं, पञ्चहिं सगडसएहिं संवाहणिएहि, अवसेसं सव्वं सगडविहिं पच्चक्खामि ३' । तयाणन्तरं च णं वाहणविहिपरिमाणं करेइ, 'नन्नत्थ चउहि वाहणेहिं दिसायत्तिएहिं, चउहिं वाहणेहिं संवाहणिएहिं, अव-सेसं सव्वं वाहणविहि पच्चक्खामि ३' ५ । तयाणन्तरं च णं उवभोगपरिभोगविहिं पच्चक्खाएमाणे उल्लणियाविहिपरिमाणं करेइ, 'नन्नत्थ एगाए गन्धकासाईए, अवसेसं सव्वं उल्लणियाविहिं पच्चक्खामि ३' । तयाणन्तरं च णं दन्तवणविहि-परिमाणं करेइ, 'नन्नत्थ एगेणं अल्लट्ठीमहुएणं, अवसेसं दन्तवणविहिं पच्चक्खामि ३' । तयाणन्तरं च णं फलविहिपरिमाणं करेइ, 'नन्नत्थ एगेणं खीरामल्लएणं, अवसेसं फलविहिं पच्चक्खामि ३' । तयाणन्तरं च णं अब्भङ्गणविहिपरिमाणं करेइ, 'नन्नत्थ सयपागसहस्सपागेहिं तेल्लेहिं, अवसेसं अब्भङ्गणविहिं पच्चक्खामि ३' । तयाणन्तरं च णं उव्वट्ठ(ण)णाविहिपरिमाणं करेइ, 'नन्नत्थ एगेणं सुरहिणा गन्धट्ठएणं, अवसेसं उव्वट्ठ-णाविहिं पच्चक्खामि ३' । तयाणन्तरं च णं मज्जणविहि-परिमाणं करेइ, 'नन्नत्थ अट्ठहिं उ(ट्ठि)ट्ठिएहिं उदगस्स घडएहिं, अवसेसं मज्जणविहिं पच्चक्खामि ३' । तयाणन्तरं च णं वत्थविहिपरिमाणं करेइ, 'नन्नत्थ एगेणं खोमजुयलेणं, अवसेसं वत्थविहिं पच्चक्खामि ३' । तयाणन्तरं च णं विलेवणविहि-परिमाणं करेइ, 'नन्नत्थ अ(ग)गुरुकुंकुमचन्दणमादिएहिं, अवसेसं विलेवणविहिं पच-क्खामि ३' । तयाणन्तरं च णं पुप्फविहिपरिमाणं करेइ, 'नन्नत्थ एगेणं सुद्धपउमेणं मालइकुसुमदामेणं वा, अवसेसं पुप्फविहिं पच्चक्खामि ३' । तयाणन्तरं च णं आभ-रणविहिपरिमाणं करेइ, 'नन्नत्थ मट्ठक[ण]ेजएहि नाममुद्दाए य, अवसेसं आभरण-विहि पच्चक्खामि ३' । तयाणन्तरं च णं धूवणविहिपरिमाणं करेइ, 'नन्नत्थ अगल्लु-

रक्कधूवमादिएहिं, अवसेसं धूवणविहिं पच्चक्खामि ३' । तयाणन्तरं च णं भोयणविहि-
परिमाणं करेमाणे पेजविहिपरिमाणं करेइ, 'नन्नत्थ एगाए कट्टपेज्जाए, अवसेसं
पेजविहिं पच्चक्खामि ३' । तयाणन्तरं च णं भक्खविहिपरिमाणं करेइ, 'नन्नत्थ
एगेहिं घयपुण्णेहिं खण्डखजएहिं वा, अवसेसं भक्खविहिं पच्चक्खामि ३' । तयाण-
न्तरं च णं ओदणविहिपरिमाणं करेइ, 'नन्नत्थ कलमसालिओदणेणं, अवसेसं ओदण-
विहिं पच्चक्खामि ३' । तयाणन्तरं च णं सूवविहिपरिमाणं करेइ, 'नन्नत्थ कलायसू-
वेण वा मुग्गमाससूवेण वा, अवसेसं सूवविहिं पच्चक्खामि ३' । तयाणन्तरं च णं
घयविहिपरिमाणं करेइ, 'नन्नत्थ सारइए(ण)णं गोघयमण्डेणं, अवसेसं घयविहिं
पच्चक्खामि ३' । तयाणन्तरं च णं सागविहिपरिमाणं करेइ, 'नन्नत्थ वत्थुसाएण
वा सुत्थियसाएण वा, अवसेसं सागविहिं पच्चक्खामि ३' । तयाणन्तरं च णं
माहुरयविहिपरिमाणं करेइ, 'नन्नत्थ एगेणं पालङ्गामाहुरएणं, अवसेसं माहुरयविहिं
पच्चक्खामि ३' । तयाणन्तरं च णं जेमणविहिपरिमाणं करेइ, 'नन्नत्थ सेहं(व)-
वदालियं(वे)वेहिं, अवसेसं जेमणविहिं पच्चक्खामि ३' । तयाणन्तरं च णं पाणिय-
विहिपरिमाणं करेइ, 'नन्नत्थ एगेणं अन्तलिक्खोदएणं, अवसेसं पाणियविहिं पच्च-
क्खामि ३' । तयाणन्तरं च णं मुहवासविहिपरिमाणं करेइ, 'नन्नत्थ पच्चसोगन्धिएणं
तम्बोलेणं अवसेसं मुहवासविहिं पच्चक्खामि ३' ६ । तयाणन्तरं च णं चउच्चिहं
अणट्ठादण्डं पच्चक्खाइ, तंजहा-अवज्झाणायरियं पमायायरियं हिंसप्पयाणं पावक-
म्मोवएसे ३, ७ ॥ ५ ॥ इह खलु 'आणन्दा'(इ)ई समणे भगवं महावीरे आणन्दं
समणोवासगं एवं वयासी-“एवं खलु आणन्दा ! समणोवासएणं अभिगयजीवा-
जीवेणं जाव अणइक्कमणिज्जेणं सम्मतस्स पच्च अइयारा पेयाला जाणियव्वा न समा-
यरियव्वा, तंजहा-संका, कङ्गा, विइगिच्छा, परपासण्डपसंसा, परपासण्डसंय-
(वो)वे । तयाणन्तरं च णं थूलगस्स पाणाइवायवेरमणस्स समणोवासएणं पच्च अइ-
यारा पेयाला जाणियव्वा न समायरियव्वा, तंजहा-वन्धे, वहे, छविच्छेए, अइभारे,
भत्तपाणवोच्छेए १ । तयाणन्तरं च णं थूलगस्स सुसावायवेरमणस्स पच्च अइयारा
जाणियव्वा न समायरियव्वा, तंजहा-सहसा[व]भक्खाणे, रहसा[व]भक्खाणे,
सदारमन्तमेए, मोसोवएसे, कूडलेहकरणे २ । तयाणन्तरं च णं थूलगस्स अदिण्णा-
दाणवेरमणस्स पच्च अइयारा जाणियव्वा न समायरियव्वा, तंजहा-तेणाहडे,
तक्करप्पओगे, विरुद्धरज्जाइक्कमे, कूलतु(ल)लकूडमाणे, तप्पडिरुवगववहारे ३ । तया-
णन्तरं च णं सदारसन्तो-सिए पच्च अइयारा जाणियव्वा न समायरियव्वा, तंजहा-
इतरियपरिगहियागमणे, अपरिगहियागमणे, अणङ्ग(किट्ठा)कीडा, परविवाहकरणे,

कामभोगतिब्बाभिलासे ४ । तयाणन्तरं च णं इच्छापरिमाणस्स समणोवासएणं पञ्च अइयारा जाणियव्वा न समायरियव्वा, तंजहा-खेतवत्थुपमाणाइक्कमे, हिरण्ण-सुवण्णपमाणाइक्कमे, दुपयचउप्पयपमाणाइक्कमे, धणधन्नपमाणाइक्कमे, कुवियपमाणाइक्कमे ५ । तयाणन्तरं च णं दिसि(०)वयस्स पञ्च अइयारा जाणियव्वा न समायरियव्वा, तंजहा-उद्धुदिसिपमाणाइक्कमे, अहोदिसिपमाणाइक्कमे, तिरियदिसिपमाणाइक्कमे, खेतवुद्धी, सइअन्तरद्धा ६ । तयाणन्तरं च णं उवभोग-परिभोगे दुविहे पण्णत्ते, तंजहा-भोयणओ य कम्मओ य । तत्थ णं भोयणओ [य] समणोवासएणं पञ्च अइयारा जाणियव्वा न समायरियव्वा, तंजहा-सचित्ताहारे, सचित्तपडिक्कहाहारे, अप्पउलिओसहिभक्खणया, दुप्पउलिओसहिभक्खणया, तुच्छोसहिभक्खणया । कम्मओ णं समणोवासएणं पण्णरस कम्मा-दाणाइं जाणियव्वाइं न समायरियव्वाइं, तंजहा-इज्जालकम्मे, वणकम्मे, साढीकम्मे, भाढीकम्मे, फोढीकम्मे, दन्तवाणिज्जे, लक्(खा)खवाणिज्जे, रसवाणिज्जे, विसवाणिज्जे, केसवाणिज्जे, जन्तपीलणकम्मे, निहंछणकम्मे, दवग्गिदावणया, सरदहतलावसोसणया, असईजणपोसणया ७ । तयाणन्तरं च णं अणद्धादण्डवेर-मणस्स समणोवासएणं पञ्च अइयारा जाणियव्वा न समायरियव्वा, तंजहा-कन्दप्पे, कुक्कु[ड]ए, मोहरिए, संजुत्ताहिगरणे, उवभोगपरिभोगाइरित्ते ८ । तयाणन्तरं च णं सामाइयस्स समणोवासएणं पञ्च अइयारा जाणियव्वा न समायरियव्वा, तंजहा-मणदुप्पणिहाणे, वयदुप्पणिहाणे, कायदुप्पणिहाणे, सामाइयस्स सईअकरणया, सामाइयस्स अणवट्ठियस्स करणया ९ । तयाणन्तरं च णं देसावगासियस्स समणोवासएणं पञ्च अइयारा जाणियव्वा न समायरियव्वा, तंजहा-आणवणप्पओगे, पेसवणप्पओगे, सद्धानुवाए, रुवाणुवाए, वहिया पोग्गल-पक्खेवे १० । तयाणन्तरं च णं पोसहोववासस्स समणोवासएणं पञ्च अइयारा जाणियव्वा न समायरियव्वा, तंजहा-अप्पडिलेहियदुप्पडिलेहियसिज्जासंथारे, अप्प-मज्जियदुप्पमज्जियसिज्जासंथारे, अप्पडिलेहियदुप्पडिलेहियउच्चारपासवणभूमी, अप्प-मज्जियदुप्पमज्जियउच्चारपासवणभूमी, पोसहोववासस्स सम्मं अणणुपाल्लणया ११ । तयाणन्तरं च णं अहासंविभागस्स समणोवासएणं पञ्च अइयारा जाणियव्वा न समायरियव्वा, तंजहा-सचित्तनिक्खेवणया, सचित्त(पे)पिहणया, कालाइक्कमे, प(रो)रववदेसे, मच्छरिया १२ । तयाणन्तरं च णं अपच्छिममारणन्तियसंलेहणाद्दस-णाराहणाए पंच अइयारा जाणियव्वा न समायरियव्वा, तंजहा-इहलोगासंसप्प-ओगे, परलोगासंसप्पओगे, जीवियासंसप्पओगे, मरणासंसप्पओगे, कामभोगा-

संसप्पओगे १३ ॥ ६ ॥ तए णं से आणन्दे गाहावई समणस्स भगवओ महावीरस्स अन्तिए पञ्चाणुव्वइयं सत्तसिक्खावइयं दुवालसविहं सावयधम्मं पडिवज्जइ, पडिवज्जित्ता समणं भगवं महावीरं वन्दइ नमंसइ, वंदित्ता नमंसित्ता एवं वयासी-
‘नो खलु मे भन्ते ! कप्पइ अज्जप्पभिइं अन्नउत्थिए वा अन्नउत्थियदेवयाणि वा वन्दित्तए वा नमंसित्तए वा, पुर्व्वि अणालत्तेणं आलवित्तए वा संलवित्तए वा, तेसिं असणं वा पाणं वा खाइमं वा साइमं वा दाउं वा अणुप्पदाउं वा, नन्नत्थ रायाभि-
ओगेणं गणाभिओगेणं वलाभिओगेणं देवयाभिओगेणं गु(रु)रुनिग्गहेणं वित्तिकन्ता-
रेणं । कप्पइ मे समणे निग्गन्थे फासुएणं एसणिज्जेणं असणपाणखाइमसाइमेणं वत्थपडिग्गहकम्म्वलपायपुंछणेणं पीढफल(ग)यसिज्जासंथारएणं ओसहभेसज्जेण य पडिलाभेमाणस्स विहरित्तए’त्तिकड्डु इमं एयारूवं अभिग्गहं अभिगिण्हइ, अभिगि-
ण्हित्ता पसिणाइं पुच्छइ, पुच्छित्ता अट्ठाइं आदियइ, आदिइत्ता समणं भगवं महावीरं तिक्खुतो वन्दइ, वंदित्ता समणस्स भगवओ महावीरस्स अन्तियाओ दूइपलासाओ उजाणाओ पडिणिक्खमइ, पडिनिक्खमित्ता जेणेव वाणियगामे नयरे जेणेव सए गिहे तेणेव उवागच्छइ, उवागच्छित्ता सिवनन्दं भारियं एवं वयासी-‘एवं खलु देवाणुप्पिए ! मए समणस्स भगवओ महावीरस्स अन्तिए धम्मं निसन्ते, सेऽवि य धम्मं मे इच्छिए पडिच्छिए अभिरुइए, तं गच्छ णं तुमं देवाणुप्पिए ! समणं भगवं महावीरं वन्दाहि जाव पज्जुवासाहि, समणस्स भगवओ महा-
वीरस्स अन्तिए पञ्चाणुव्वइयं सत्तसिक्खावइयं दुवालसविहं गिहिधम्मं पडि-
वज्जाहि’ ॥ ७ ॥ तए णं सा सिवनन्दा भारिया आणन्देणं समणोवासएणं एवं वुत्ता समाणा हट्ठतुट्ठा कोडुम्बियपुरिसे सद्दावेइ, सद्दावेत्ता एवं वयासी-‘खिप्पा-
मेव लहुकरण जाव पज्जुवासइ । तए णं समणे भगवं महावीरे सिवनन्दाए तीसे य महइ जाव धम्मं कहेइ । तए णं सा सिवनन्दा समणस्स भगवओ महावीरस्स अन्तिए धम्मं सोच्चा निसम्म हट्ठ जाव गिहिधम्मं पडिवज्जइ २ ता तमेव धम्मियं जाणप्पवरं दुरुहइ, दुरुहित्ता जामेव दि(सं)सिं पाउब्भूया तामेव दि-सिं पडिगया ॥ ८ ॥ ‘भन्ते’त्ति भगवं गोयमे समणं भगवं महावीरं वन्दइ नमंसइ, वंदित्ता नमं-
सित्ता एवं वयासी-‘पहू णं भन्ते ! आणन्दे समणोवासए देवाणुप्पियाणं अन्तिए मुण्डे जाव पव्वइत्तए ?’ नो इण्ठे समट्ठे, गोयमा ! आणन्दे णं समणोवासए वहुइं वासाइं समणोवासगपरियागं पाउणिहिइ, पाउणिता जाव सोहम्मं कप्पे अरुणे विमाणे देवत्ताए उववज्जिहिइ । तत्थ णं अत्थेगइयाणं देवाणं चत्तारि पल्लिओवमाइं ठिई पणत्ता । तत्थ णं आणन्दस्स[ऽ]वि समणोवासगस्स चत्तारि पल्लिओवमाइं ठिई

पण्णत्ता । तए णं समणे भगवं महावीरे अन्नया कयाइ बहिया जाव विहरइ । तए णं से आणन्दे समणोवासए जाए अभिगयजीवाजीवे जाव पडिलाभेमाणे विहरइ । तए णं सा सिवनन्दा भारिया समणोवासिया जाया जाव पडिलाभेमाणी विहरइ ॥ ९ ॥ तए णं तस्स आणन्दस्स, समणोवासगस्स उच्चावएहिं सीलव्वय-
गुणवेरमणपच्चक्खाणपोसहोववासेहि अप्पाणं भावेमाणस्स चउ(चो)इस संवच्छराइं वइक्कन्ताइं, पण्णरसमस्स संवच्छरस्स अन्तरा वट्टमाणस्स अन्नया कयाइ पुव्वरत्ता-
वरत्तकालसमयंसि धम्मजागरियं जागरमाणस्स इमेयाख्वे अज्झत्थिए चिन्तिए पत्थिए मणोगए सङ्कप्पे समुप्पज्जित्था-‘एवं खलु अहं वाणियगामे नयरे बहूणं राईसर जाव सयस्सवि य णं कुडुम्बस्स जाव आधारे, तं एएणं वि(व)क्खेवेणं अहं नो संचाएमि समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरित्तए, तं सेयं खलु ममं कल्लं जाव जलन्ते विउलं असणं० जहा पूरणो जाव जेट्टपुत्तं कुडुम्बे ठवेत्ता तं मित्त जाव जेट्टपुत्तं च आपुच्छित्ता कोल्लाए सन्निवेसे नायकुलंसि पोसहसालं पडिलेहिता समणस्स भगवओ महावीरस्स अन्तियं धम्मपण्णत्तिं उवसम्पज्जित्ता णं विहरित्तए’ एवं सम्पेहेइ, संपेहिता कल्लं विउलं[०] तहेव जिमियभुत्तुत्तरागए तं मित्त जाव विउल्लेणं पुप्फ[०] ५ सक्कारेइ सम्माणेइ, सक्कारित्ता संमाणित्ता तस्सेव मित्त जाव पुरओ जेट्टपुत्तं सदावेइ, सदावेत्ता एवं वयासी-‘एवं खलु पुत्ता ! अहं वाणियगामे बहूणं राईसर[०] जहा चिन्तियं जाव विहरित्तए, तं सेयं खलु मम इदाणिं तुमं सयस्स कुडुम्बस्स आलम्बणं ४ ठवेत्ता जाव विहरित्तए’ । तए णं जेट्टपुत्ते आणन्दस्स समणोवास(ग)-
यस्स तहत्ति एयमट्ठं विणएणं पडिसुणेइ । तए णं से आणन्दे समणोवासए तस्सेव मित्त जाव पुरओ जेट्टपुत्तं कुडुम्बे ठवेइ, ठवेत्ता एवं वयासी-‘मा णं देवाणु-
प्पिया । तुब्भे अज्जप्पभिइं केइ मम बहूसु कज्जेसु जाव आपुच्छउ वा पडिपुच्छउ वा, ममं अट्ठाए असणं वा ४ उवक्खडेउ [वा] उवकरेउ वा । तए णं से आणन्दे समणोवासए जेट्टपुत्तं मित्तनाइं आपुच्छइ, आपुच्छित्ता सयाओ गिहाओ पडिणि-
क्खमइ, पडिनिक्खमित्ता वाणियगामं नयरं मज्झंमज्झेणं निग्गच्छइ, निग्ग-
च्छित्ता जेणेव कोल्लाए सन्निवेसे जेणेव नायकुले जेणेव पोसहसाला तेणेव उवा-
गच्छइ, उवागच्छित्ता पोसहसालं पमज्जइ, पमज्जित्ता उच्चारपासवणभूमिं पडिलेहेइ, पडिलेहिता दब्भसंथारयं संथरइ, दब्भसंथारयं दु-रुहइ, दु-रुहिता पोसहसालाए पोसहिए दब्भसंथारोवगए समणस्स भगवओ महावीरस्स अन्तियं धम्मपण्णत्तिं उवसम्पज्जित्ता णं विहरइ ॥ १० ॥ तए णं से आणन्दे समणोवासए उवासगपडि-

माओ उवसम्पजित्ता णं विहरइ । पढमं उवासगपडिमं अहावुत्तं अहाकप्पं अहा-
मगं अहातच्चं सम्मं काएणं फासेइ पाळेइ सोहेइ तीरेइ कित्तेइ आराहेइ । तए णं
से आणन्दे समणोवासए दोच्चं उवासगपडिमं, एवं तच्चं चउत्थं पढमं छट्ठं
सत्तमं अट्ठमं नवमं दसमं एक्कारसमं जाव आराहेइ ॥ ११ ॥ तए णं से आणन्दे
समणोवासए इमेणं एयाहवेणं उरालेणं विउलेणं पयत्तेणं पग्गहिएणं तवोकम्मेणं
सुक्के जाव किसे धम्मणिसन्तए जाए । तए णं तस्स आणन्दस्स समणोवासगस्स
अन्नया कयाइ पुव्वरत्ता जाव धम्मजागरियं जागरमाणस्स अयं अज्जत्थिए ५-
एवं खलु अहं इमेणं जाव धम्मणिसन्तए जाए, तं अत्थि ता मे उट्ठाणे कम्मे वले
वीरिए पुरिसक्कारपरक्कमे सद्धाधिइसंवेगे, तं जाव ता मे अत्थि उट्ठाणे सद्धाधिइ-
संवेगे जाव य मे धम्मायरिए धम्मोवएसए समणे भगवं महावीरे जिणे सुहत्थी
विहरइ ताव ता मे सेयं कल्लं जाव जलन्ते अपच्छिममारणन्तियसंलेहणाञ्जसणा-
ञ्जसियस्स भत्तपाणपडियाइक्खियस्स कालं अणवकङ्कमाणस्स विहरित्तए' एवं
सम्पेहेइ, संपेहिता कल्लं पाउ जाव अपच्छिममारणन्तिय जाव कालं अणवकङ्कमाणे
विहरइ । तए णं तस्स आणन्दस्स समणोवासगस्स अन्नया कयाइ सुमेणं अज्जव-
साणेणं सुमेणं परिणामेणं लेसाहिं विसुज्जमाणीहिं तदावरणिजाणं कम्माणं खओ-
वसमेणं ओहिनाणे समुप्पन्ने । पुरत्थिमेणं लवणसमुद्दे पच्चजोयणस(याइ)इयं खेत्तं
जाणइ पासइ, एवं दक्खिणेणं पच्चत्थिमेणं य, उत्तरेणं जाव चुल्लहिमवन्तं वासधर-
पव्वयं जाणइ पासइ, उट्ठं जाव सोहम्मं कप्पं जाणइ पासइ, अहे जाव इमीसे
रयणप्पभाए पुढवीए लोलुयञ्चुयं नरयं चउरासीइवाससहस्सट्ठिइयं जाणइ पासइ
॥ १२ ॥ तेणं कालेणं तेणं समएणं समणे भगवं महावीरे समोसरिए, परिसा
निगया जाव पडिगया । तेणं कालेणं तेणं समएणं समणस्स भगवओ महावीरस्स
जेट्ठे अन्तेवासी इन्दभूई नामं अणगारे गोयमगोत्तेणं सत्तुस्सेहे समचउरंससंठाण-
संठिए वज्जरिसहनारायसङ्खयणे कणगपुलगनिघसपम्हगोरे उग्गतवे दित्ततवे तत्त-
तवे घोरतवे महातवे उराले घोरगुणे घोरतवस्सी घोरवम्भचेरवासी उच्छूढसरीरे
संखित्तविउलतेउलेसे छट्ठंछट्ठेणं अणिकिखत्तेणं तवोकम्मेणं संजमेणं तवसा अप्पाणं
भावेमाणे विहरइ । तए णं से भगवं गोयमे छट्ठक्खमणपारणगंसि पढमाए पोरिसीए
सज्जायं करेइ, विइयाए पोरिसीए ज्ञाणं त्रियाइ, तइयाए पोरिसीए अतुरियं अचवलं
असम्भन्ते सुहपत्तिं पडिलेहेइ, २ ता भायणवत्थाइं पडिलेहेइ, २ ता भायणवत्थाइं
पमज्जइ, २ ता भायणाइं उग्गाहेइ, उग्गाहेता जेणेव समणे भगवं महावीरे तेणेव
उवागच्छइ, उवागच्छित्ता समणं भगवं महावीरं वन्दइ नमंसइ, वंदित्ता नमंसित्ता

एवं वयासी-‘इच्छामि णं भन्ते ! तुब्भेहिं अब्भणुण्णाए छट्ठकखमण(स्स)पारणगंसि वाणियगामे नयरे उच्चनीयमज्झिमाइं कुलाइं घरसमु(द्वा)दाणस्स भिक्खायरियाए अडित्तए’ । अहासुहं देवाणुप्पिया ! मा पडिबन्धं करेह । तए णं भगवं गोयमे समणेणं भगवया महावीरेणं अब्भणुण्णाए समाणे समणस्स भगवओ महावीरस्स अन्तियाओ दूइपलासाओ उज्जाणाओ पडिणिकखमइ, पडिणिकखमिता अतुरियमचवलमसम्भन्ते जुगन्तरपरिलोयणाए दिट्ठीए पुरओ ई(इ)रियं सोहेमाणे जेणेव वाणियगामे नयरे तेणेव उवागच्छइ, उवागच्छिता वाणियगामे नयरे उच्चनीयमज्झिमाइं कुलाइं घरसमु-दाणस्स भिक्खायरियाए अडइ । तए णं से भगवं गोयमे वाणियगामे नयरे जहा पण्णत्तीए तहा जाव भिक्खायरियाए अडमाणे अहापज्जत्तं भत्तपाणं सम्मं पडिग्गाहेइ, पडिग्गाहिता वाणियगामाओ पडिणिग्गच्छइ पडिणिग्गच्छिता कोल्लायस्स सन्निवेसस्स अदूरसामन्तेणं व(वी)ईवयमाणे बहुजणसहं निसामेइ । बहुजणो अन्नमन्नस्स एवमाइक्खइ ४-‘एवं खलु देवाणुप्पिया ! समणस्स भगवओ महावीरस्स अन्तेवासी आणन्दे नामं समणोवासए पोसहसालाए अपच्छिम जाव अणवकंखमाणे विहरइ’ । तए णं तस्स गोयमस्स बहुजणस्स अन्तिए ए(यं)यमट्ठं सोच्चा निसम्म अयमेयारूवे अज्झत्थिए ४-‘तं गच्छामि णं आणन्दं समणोवासयं पासामि’ एवं सम्पेहेइ, संपेहिता जेणेव कोल्लाए सन्निवेसे जेणेव आणन्दे समणोवासए जेणेव पोसहसाला तेणेव उवागच्छइ । तए णं से आणन्दे समणोवासए भगवं गोयमं एज्जमाणं पासइ, पासिता हट्ठ[तुट्ठ] जाव हियए भ(ग)यवं गोयमं वन्दइ नमंसइ, वंदित्ता नमंसित्ता एवं वयासी-‘एवं खलु भन्ते ! अहं इमेणं उरालेणं जाव धमणिसन्तए जाए, (नो) न संचाएमि देवाणुप्पियस्स अन्तियं पाउब्भविता णं तिक्खुत्तो मुद्धानेणं पाए अभिवन्दित्तए, तुब्भे णं भन्ते ! इच्छाकारेणं अणभिओएणं इओ चेव एह, जा णं देवाणुप्पियाणं तिक्खुत्तो मुद्धानेणं पाएसु वन्दामि नमंसांमि’ । तए णं से भगवं गोयमे जेणेव आणन्दे समणोवासए तेणेव उवागच्छइ ॥ १३ ॥ तए णं से आणन्दे समणोवासए भगवओ गोयमस्स तिक्खुत्तो मुद्धानेणं पाएसु वन्दइ नमंसइ, वंदित्ता नमंसित्ता एवं वयासी-‘अत्थि णं भन्ते ! गिहिणो गि(हि)हमज्झावसन्तस्स ओहिनाणे (णं) समुप्पज्जइ?’ हन्ता अत्थि । जइ णं भन्ते ! गिहिणो जाव समुप्पज्जइ, एवं खलु भन्ते ! ममावि गिहिणो गिहिमज्झावसन्तस्स ओहिनाणे समुप्पज्जे-पुरत्थिमेणं लवणसमुद्दे पच्च जोयणसयाइं जाव लोलुयच्चुयं नरयं जाणामि पासामि । तए णं से भगवं गोयमे आणन्दं समणोवासयं एवं वयासी-‘अत्थि णं आणन्दा ! गिहिणो जाव समुप्पज्जइ, नो चेव णं एमहालए, तं णं तुमं आणन्दा ! एयस्स ठाणस्स

आलोएहि जाव तवोकम्मं पडिवज्जाहि' । तए णं से आणन्दे समणोवासए भगवं गोयमं एवं वयासी-‘अत्थि णं भन्ते । जिणवयणे सन्ताणं तच्चाणं तहियाणं सच्चूयाणं भावाणं आलोइज्जइ जाव पडिवज्जिज्जइ?’ नो इण्ठे समट्ठे । ‘जइ णं भन्ते । जिणवयणे सन्ताणं जाव भावाणं नो आलोइज्जइ जाव तवोकम्मं नो पडिवज्जिज्जइ तं णं भन्ते । तुब्भे चेव एयस्स ठाणस्स आलोएहि जाव पडिवज्जह’ । तए णं से भगवं गोयमे आणन्देणं समणोवासएणं एवं युत्ते समाणे संकिए कंखिए विइगिच्छासमावन्ने आणन्दस्स अन्तियाओ पडिणिक्खमइ, पडिनिक्खमिता जेणेव दूइपलासे उज्जाणे जेणेव समणे भगवं महावीरे तेणेव उवागच्छइ, उवागच्छिता समणस्स भगवओ महावीरस्स अदूर-सामन्ते गमणागमणाए पडिक्कमइ, पडिक्कमिता एसणमणेतणं आलोएइ, आलोएत्ता भत्तपाणं पडिदंसेइ, पडिदंसित्ता समणं भगवं महावीरं वन्दइ नमंसइ, वंदित्ता नमंसित्ता एवं वयासी-‘एवं खलु भन्ते । अहं तुब्भेहिं अवमणुण्णाए तं चेव सव्वं कहेइ जाव तए णं अहं संकिए ३ आणन्दस्स समणोवासगस्स अन्तियाओ पडिणिक्खमामि, पडिनिक्खमिता जेणेव इहं तेणेव हव्वमागए, तं णं भन्ते । किं आणन्देणं समणोवासएणं तस्स ठाणस्स आलोएयव्वं जाव पडिवजेयव्वं उदाहु मए?’ ‘गोयमा’ इ समणे भगवं महावीरे भगवं गोयमं एवं वयासी-‘गोयमा ! तुमं चेव णं तस्स ठाणस्स आलोएहि जाव पडिवज्जाहि, आणन्दं च समणोवासयं एयमट्ठं खामेहि’ । तए णं से भगवं गोयमे समणस्स भगवओ महावीरस्स ‘तह’त्ति एयमट्ठं विणएणं पडिसुणेइ, पडिसुणेत्ता तस्स ठाणस्स आलोएइ जाव पडिवज्जइ, आणन्दं च समणोवासयं एयमट्ठं खामेइ । तए णं समणे भगवं महावीरे अन्नया कयाइ वहिया जणवयविहारं विहरइ ॥ १४ ॥ तए णं से आणन्दे समणोवासए वट्ठहिं सीलव्वएहिं जाव अप्पाणं भावेत्ता वीसं वासाइं समणोवासगपरियागं पाउणित्ता एक्कारस्स य उवासगपडिमाओ सम्मं काएणं फासित्ता मासियाए संलेहणाए अत्ताणं झूसित्ता सट्ठिं भत्ताइं अणसणाए छेदेत्ता आलोइयपडिक्कन्ते समाहिपत्ते कालमासे कालं किच्चा सोहम्मस्से कप्पे सोह-म्मवडिसगस्स महाविमाणस्स उत्तरपुर-च्छिमेणं अरुणे विमाणे देवत्ताए उववन्ने । तत्थ णं अत्थेगइयाणं देवाणं चत्तारि पलिओवमाइं ठिई पण्णत्ता, तत्थ णं आण-न्दस्सवि देवस्स चत्तारि पलिओवमाइं ठिई पण्णत्ता । आणन्दे णं भन्ते ! देवे ताओ देवलोगाओ आउक्खएणं ३ अणन्तरं चयं चइत्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्जिहिइ ॥ १५ ॥ निक्खेवो ॥ सत्त-मस्स अहस्स उवासगदसाणं पढमं अज्झयणं समत्तं ॥

जइ णं भन्ते ! समणेणं भगवया महावीरेणं जाव संपत्तेणं सत्तमस्स अङ्गस्स उवासग्गदसाणं पढमस्स अज्झयणस्स अयमट्ठे पण्णत्ते, दोच्चस्स णं भन्ते ! अज्झयणस्स के अट्ठे पण्णत्ते ? एवं खलु जम्बू ! तेणं कालेणं तेणं समएणं चम्पा नामं नयरी होत्था । पुण्णभेदे उज्जाणे । जियस(त्तु)तू राया । कामदेवे गाहाव(इ)ई । भद्दा भारिया । छ हिरण्णकोडीओ निहाणपउत्ताओ, छ(हि०)बुद्धिपउत्ताओ, छ-पवित्थरपउत्ताओ । छ वया दसगोसाहस्सिएणं वएणं । (तेणं का० तेणं स० भगवं म०) समोस(ड्ढे)रणं । जहा आणन्दो तहा निग्गओ, तहेव सावयधम्मं पडिव-ज्जइ । सा चेव वत्तव्वया जाव जेट्ठपुत्तं मित्तनाई (आपुच्छड) आपुच्छित्ता जेणेव पोसहसाला तेणेव उवागच्छइ, उवागच्छित्ता जहा आणन्दो जाव समणस्स भग-वओ महावीरस्स अन्तियं धम्मपण्णत्तिं उवसंपज्जित्ता-णं विहरइ ॥ १६ ॥ तए णं तस्स कामदेवस्स समणोवासग्गस्स पुव्वरत्तावरत्तकालसमयंसि एगे देवे मायी मिच्छ-द्दिट्ठी अन्तियं पाउव्वभूए । तए णं से देवे एगं महं पिसायरुवं विउव्वइ । तस्स णं देवस्स पिसायरुवस्स इमे एयारुवे वण्णावासे पण्णत्ते-सीसं से गोकिलज्जसंठाण-संठियं, सालिभसेल्लसरिसा से केसा कविलतेएणं दिप्पमाणा, महल्लउट्टियाकभल्लसंठा-णसंठियं निडालं, मुगुंसपुंछं व तस्स भुमगाओ फुग्गफुग्गाओ विगय(वी)बीभ(त्थ)-च्छदंसणाओ, सीसघडिविणिग्गयाई अच्छीणि विगय-बीभच्छदंसणाई, कण्णा जह सुप्पकत्तरं चेव विगयबीभच्छदंसणिज्जा, उरव्वभपुडसन्निभा से नासा, ब्रुसिरा जम-लच्चुल्लीसंठाणसंठिया दो[S]वि तस्स नासापुडया, घोडयपुंछं व तस्स मंसूई कविलक-विलाई विगयबीभच्छदंसणाई, उट्ठा उ(ट्ठ)ट्ठस्स चेव लम्बा, फालसरिसा से दन्ता, जिब्भा ज(ह)हा सुप्पकत्तरं चेव विगयबीभच्छदंसणिज्जा, हल्लकु(डा)दालसंठिया से हणुया, गल्लकडिल्लं च तस्स खड्डं फुट्टं कविलं फरुसं महल्लं, मुइज्जाकारोवमे से खन्धे, पुरवरकवाडोवमे से वच्छे, कोट्टियासंठाणसंठिया दो-वि तस्स बाहा, निसापाहाणसं-ठाणसंठिया दो-वि तस्स अग्गहत्था, निसालोढसंठाणसंठियाओ हत्थेसु अगुलीओ, सिप्पिपुडग(संठाण)संठिया से नक्खा, ण(ह)हावियपसेवओ व्व उरंसि लम्बन्ति दो-S-वि तस्स थणया, पोट्टं अयकोट्ठओ व्व वट्टं, पाणकलन्दसरिसा से नाही, सिक्कगसंठाणसंठि(या)ए से नेत्ते, किण्णपुड(संडवसण)संठाणसंठिया दो-S-वि तस्स वसणा, जमलकोट्टियासंठाणसंठिया दो-S-वि तस्स ऊरु, अज्जुणगुट्टं व तस्स जाणूई कुडिलकुडिलाई विगयबीभच्छदंसणाई, जंघाओ क(रक)क्खडीओ लोमेहिं उवचि-याओ, अहरीसंठाणसंठिया दो-S-वि तस्स पाया, अहरीलोढसंठाणसंठियाओ पाएसु अंगुलीओ, सिप्पिपुड(सं०)संठिया से नक्खा, लडहमडहजाणुए विगयभग्गभुग्ग-

(भमुहे)भुमए अवदालियवयणविव(रे)रनिलालियगजीहे सरडकयमालियाए उन्दुर-
मालापरिणद्धसुकयचिंधे नउलकयकणपूरे सप्पकयवेगच्छे अप्फोडन्ते अभिगज्जन्ते
भीममुक्कट्टहासे नाणाविहपञ्चवण्णेहिं लोमेहिं उवचिए एगं महं नीलुप्पलगवलगुलिय-
अयसिकुसुमप्पगासं असिं खुरधारं गहाय जेणेव पोसहसाला जेणेव कामंदेवे समणो-
वासए तेणेव उवागच्छइ, उवागच्छिता आसु(र)रत्ते रुद्धे कुविए चण्डिकिए मिसिमि-
सीयमाणे कामदेवं समणोवासयं एवं वयासी-‘हं भो कामदेवा ! समणोवासया ! अप्प-
त्थियपत्थिया दुरन्तपन्तलक्खणा हीणपुण्णचाउद्दसिया हिरिसिरिधिइकित्तिपरिवज्जिया
धम्मकामया पुण्णकामया सग्गकामया मोक्खकामया धम्मकंखिया पुण्णकंखिया
सग्गकंखिया मोक्खकंखिया धम्मपिवासिया पुण्णपिवासिया सग्गपिवासिया मोक्ख-
पिवासिया नो खलु कप्पइ तव देवाणुप्पिया ! जं सीलाइं वयाइं वेरमणाइं पच्चक्खा-
णाइं पोसहोववासाइं चालित्तए वा खोभित्तए वा खण्डित्तए वा भजित्तए वा उज्झित्तए
वा परि(ट्ठि)च्चइत्तए वा, तं जइ णं तुमं अज्ज सीलाइं जाव पोसहोववासाइं न छ(इ)-
ड्हेसि न भज्जेसि तो ते अहं अज्ज इमेणं नीलुप्पल[०] जाव असिणा खण्डाखण्डि करेमि,
ज-हा णं तुमं देवाणुप्पिया ! अट्ठुहट्ठवसट्ठे अकाले चेव जीवियाओ ववरोविज्जसि’ ।
तए णं से कामदेवे समणोवासए तेणं देवेणं पिसायरूवेणं एवं वुत्ते समाणे अभीए
अतत्थे अणुव्विग्गे अक्खुभिए अचलिए असम्भन्ते तुसिणीए धम्मज्झाणोवगए
विहरइ ॥ १७ ॥ तए णं से देवे पिसायरूवे कामदेवं समणोवासयं अभीयं जाव
धम्मज्झाणोवगयं विहरमाणं पासइ, पासित्ता दोच्चं-पि तच्चं-पि कामदेवं (समणोवासयं)
एवं वयासी-‘हं भो कामदेवा ! समणोवासया ! अपत्थियपत्थि० जइ णं तुमं अज्ज
जाव ववरोविज्जसि’ । तए णं से कामदेवे समणोवासए तेणं देवेणं दोच्चं-पि तच्चं-पि
एवं वुत्ते समाणे अभीए जाव धम्मज्झाणोवगए विहरइ । तए णं से देवे पिसायरूवे
कामदेवं समणोवासयं अभीयं जाव विहरमाणं पासइ, पासित्ता आसु-रत्ते (५) तिव-
लियं भिउडि निडाले साहट्ठुकामदेवं समणोवासयं नीलुप्पल-जाव असिणा खण्डा-
खण्डि करेइ । तए णं से कामदेवे समणोवासए तं उज्जलं जाव दुरहियासं वेयणं सम्मं
सहइ जाव अहियासेइ ॥ १८ ॥ तए णं से देवे पिसायरूवे कामदेवं समणोवासयं
अभीयं जाव विहरमाणं पासइ, पासित्ता जाहे नो संचाएइ कामदेवं समणोवासयं
निग्गन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते
तन्ते परितन्ते सणियं सणियं पच्चोसक्कइ, पच्चोसक्किता पोसहसालाओ पडिणिक्ख-
मइ, पडिनिक्खमिता दिव्वं पिसायरूवं विप्पजहइ, विप्पजहित्ता एगं महं दिव्वं हत्थि-
रूवं विउव्वइ, सत्तज्जपइट्ठियं सम्मं संठियं सुजायं पुरओ उदग्गं पिट्ठओ वाराहं अया-

कुच्छि अलम्बकुच्छि पेलम्बलम्बोदराधरकरं अब्भुगयमउलमल्लियाविमलधवलदन्तं
 कञ्चणकोसीपविट्टदन्तं आणामियचावललियसंविद्धियग्गसोण्डं कु(म्मिव)म्मपडिपुण्ण-
 चलणं वीसइनक्खं अल्लीणपमाणजुत्तपुच्छं मत्तं मेहमिव गुलगुलेन्तं मणपवणजङ्गवेगं
 दिव्वं हत्थिरुवं विउव्वइ, विउव्वित्ता जेणेव पोसहसाला जेणेव कामदेवे समणोवा-
 सए तेणेव उवागच्छइ, उवागच्छित्ता कामदेवं समणोवासयं एवं वयासी-‘हं भो
 कामदेवा ! समणोवासया ! तहेव भणइ जाव न भजेसि, तो ते अज्ज-अहं
 सोण्डाए गिण्हामि, गिण्हित्ता पोसहसालाओ नीणेमि, नीणित्ता उट्ठं वेहासं उव्वि-
 हामि, उव्विहित्ता तिक्खेहिं दन्तमुसलेहिं पडिच्छामि, पडिच्छित्ता अहे धरणितलंसि
 तिक्खुत्तो पाएनु लोलेमि, जहा णं तुमं अट्टदुहट्टवसट्ठे अकाले चेव जीवियाओ
 ववरोविज्जसि’ । तए णं से कामदेवे समणोवासए तेणं देवेणं हत्थिरुवेणं एवं वुत्ते
 समणे अभीए जाव विहरइ । तए णं से देवे हत्थिरुवे कामदेवं समणोवासयं
 अभीयं जाव विहरमाणं पासइ, पासित्ता दोच्चं-पि तच्चं-पि कामदेवं समणोवासयं
 एवं वयासी-‘हं भो कामदेवा ! तहेव जाव सो-ऽ-वि विहरइ । तए णं से देवे हत्थि-
 रुवे कामदेवं समणोवासयं अभीयं जाव विहरमाणं पासइ, पासित्ता आसु(र)रुत्ते ४
 कामदेवं समणोवासयं सोण्डाए गिण(ह)हेइ, गिण्हित्ता उट्ठं वेहासं उव्विहइ, उव्वि-
 हित्ता तिक्खेहिं दन्तमुसलेहिं पडिच्छइ, पडिच्छित्ता अहे धरणितलंसि तिक्खुत्तो पाए-
 (पट्ठे)नु लोलेइ । तए णं से कामदेवे समणोवासए तं उज्जलं जाव अहियासेइ ॥१९॥
 तए णं से देवे हत्थिरुवे कामदेवं समणोवासयं जाहे नो संचाएइ जाव सणियं
 सणियं पच्चोसक्कइ, पच्चोसक्कित्ता पोसहसालाओ पडिणिक्खमइ, पडिनिक्खमित्ता दिव्वं
 हत्थिरुवं विप्पजहइ, विप्पजहित्ता एगं महं दिव्वं सप्पहवं विउव्वइ, (तं) उग्गविसं
 चण्डविसं घोरविसं (दिट्ठिविसं) महाकायं म(सि)सीमूसाकालगं नयणविसरोसपुण्णं
 अंजणपुंजनिगरप्पगासं रत्तच्छं लोहियलोयणं जमलजुयलचञ्चलजीहं धरणीयलवे-
 (णी)णिभूयं उक्कडफुडकुडिलजडिलकक्कसवियड(फु)फडाडोवकरणदच्छं लोहागरध-
 म्ममाणधमधमेन्तघोसं अणागलियतिव्वचण्डरोसं सप्पहवं वि(वे)उव(वे)वइ, २ ता
 जेणेव पोसहसाला जेणेव कामदेवे समणोवासए तेणेव उवागच्छइ, उवागच्छित्ता
 कामदेवं समणोवासयं एवं वयासी-‘हं भो कामदेवा ! समणोवासया ! जाव न भ(ज्ज)-
 जेसि तो ते अ(ज्ज)जेव अहं सरसरस्स कायं दु(रु)ह्हामि, २ ता पच्छिमेणं भाएणं
 तिक्खुत्तो गीवं वेढेमि, वेढेत्ता तिक्खाहिं विसपरिगयाहि दाढाहिं उरंसि चेव निकुट्टेमि,
 ज-हा णं तुमं अट्टदुहट्टवसट्ठे अकाले चेव जीवियाओ ववरोविज्जसि’ । तए णं से कामदेवे
 समणोवासए तेणं देवेणं सप्पहवेणं एवं वुत्ते समणे अभीए जाव विहरइ, सो-ऽ-वि

दोच्चं-पि तच्चं-पि भणइ, कामदेवो-ऽ-वि जाव विहरइ । तए णं से देवे सप्पह्वे कामदेवं
समणोवासयं अभीयं जाव पासइ, पासित्ता आसु-रुते ४ कामदेवस्स समणोवास(ग)-
यस्स सरसरस्स कायं दुरुहइ, दुरुहिता पच्छिमभाएणं तिक्खुत्तो गीवं वेढे(ई)इ, वेढेत्ता
तिक्खाहिं विसपरिगयाहिं दाढाहिं उरंसि चेव निकुट्टेइ । तए णं से कामदेवे सम-
णोवासए तं उज्जलं जाव अहियासेइ ॥ २० ॥ तए णं से देवे सप्पह्वे कामदेवं
समणोवासयं अभीयं जाव पासइ, पासित्ता जाहे नो संचाएइ कामदेवं समणोवासयं
निग्गन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते
३ सणियं सणियं पच्चोसक्कइ, पच्चोसक्किता पोसहसालाओ पडिणिक्खमइ, पडिनिक्ख-
मित्ता दिव्वं सप्पह्वं विप्पजहइ, विप्पजहिता एगं महं दिव्वं देवह्वं वि-उव्वइ,
हारविराइयवच्छं जाव दस-दिसाओ उज्जोवेमाणं पभासेमाणं पासाईयं दरिसणिज्जं
अभिरुवं पडिरुवं दिव्वं देवह्वं विउव्वइ, विउव्वित्ता कामदेवस्स समणोवासयस्स
पोसहसालं अणुप्पविसइ, अणुप्पविसित्ता अन्तलिक्खपडिवन्ने सखिखिणियाई पन्न-
वण्णाई वत्थाई पवरपरिहिए कामदेवं समणोवासयं एवं वयासी-‘हं भो कामदेवा !
समणोवासया ! धन्ने सि णं तुमं देवाणुप्पिया ! स(म्)पुण्णे कयत्थे कयलक्खणे, सुलद्धे
णं तव देवाणुप्पिया ! माणुस्सए जम्मजीवियफले, जस्स णं तव निग्गन्थे पावयणे
इमेयारुवा पडिवत्ती लद्धा पत्ता अभिसमन्नागया । एवं खलु देवाणुप्पिया ! सक्के
देविन्दे देवराया जाव सक्कंसि सीहासणंसि चउरासीईए सामाणियसाहस्सीणं जाव
अन्नेसिं च वहूणं देवाण य देवीण य मज्जगए एवमाइक्खइ ४-एवं खलु देवा(०) !
जम्बुद्वीवे दीवे भारहे वासे चम्पाए नयरीए कामदेवे समणोवासए पोसहसालाए
पोसहि(ए)यवम्भ(चेरवासी)चारी जाव दब्भसं(थ)थारोवगए समणस्स भगवओ
महावीरस्स अन्ति(ए)यं धम्मपण्णत्तिं उवसम्पज्जित्ता-णं विहरइ, नो खलु से
स(क्का)क्को केणइ देवेण वा दाणवेण वा जाव गन्धव्वेण वा निग्गन्थाओ पावय-
णाओ चालित्तए वा खोभित्तए वा विपरिणामित्तए वा । तए णं अहं सक्कस्स देवि-
न्दस्स देवरण्णो एयमट्ठं असद्दहमाणे ३ इहं हव्वमागए, तं अहो णं देवाणुप्पिया !
इद्धी ६ लद्धा ३, तं दिट्ठा णं देवाणुप्पिया ! इद्धी जाव अभिसमन्नागया, तं खामेसि
णं देवाणुप्पिया ! खमन्तु मज्ज देवाणुप्पिया ! खन्तुम(र)रहन्ति णं देवाणुप्पिया !
नाई भुज्जो करणयाएत्ति-कट्टु पायवडिए पज्जलिउडे एयमट्ठं भुज्जो भुज्जो खामेइ,
खामेत्ता जामेव दि(सिं)सं पाउव्भूए तामेव दिसं पडिगए । तए णं से कामदेवे
समणोवासए निखवसगं (इइ) तिकट्टु पडिमं पारेइ ॥ २१ ॥ तेणं कालेणं तेणं
समएणं समणे भगवं महावीरे जाव विहरइ । तए णं से कामदेवे समणो-

बासए इमीसे कहाए लद्धट्टे समाणे 'एवं खलु समणे भगवं महावीरे जाव विहरइ, तं सेयं खलु मम समणं भगवं महावीरं वन्दिता नमंसित्ता तओ पडिणियत्तस्स पोसहं पारित्तए'त्ति कट्टु एवं सम्पेहेइ, संपेहिता सुद्धप्पावेसाइं वत्थाइं जाव मणुस्स-वग्गुरापारिक्खित्ते सयाओ गिहाओ पडिणिक्खमइ, पडिनिक्खमित्ता चम्पं नगरिं मज्झमज्झेणं निग्गच्छइ, निग्गच्छित्ता जेणेव पुण्णभेदे उज्जाणे जहा संखो जाव पज्जुवासइ । तए णं समणे भगवं महावीरे कामदेवस्स समणोवासयस्स तीसे य जाव धम्मकहा समत्ता ॥ २२ ॥ कामदेवा ! इ समणे भगवं महावीरे कामदेवं समणोवासयं एवं वयासी-से नूणं कामदेवा ! तुब्भं पुव्वरत्तावरत्तकालसमयंसि एगे देवे अन्तिए पाउब्भूए, तए णं से देवे एगं महं दिव्वं पिसायरुवं विउव्वइ, विउ-व्वित्ता आसु-रुत्ते ४ एगं महं नीलुप्पल-जाव असिं गहाय तुमं एवं वयासी-हं भो कामदेवा ! जाव जीवियाओ ववरोविज्जसि, तं तुमं तेणं देवेणं एवं वुत्ते समाणे अभीए जाव विहरसि, एवं वण्णगरहिया तिणि-वि उवसग्गा तहेव पडिउच्चारयेव्वा जाव देवो पडिगओ । से नूणं कामदेवा ! अट्टे समट्टे ? हन्ता, अत्थि । 'अज्जो ! इ समणे भगवं महावीरे बहवे समणे निग्गन्थे य निग्गन्थीओ य आमन्तेत्ता एवं वयासी-जइ ताव अज्जो ! समणोवासगा गिहिणो गि(हिं)हमज्झावसन्ता दिव्वमा-णु(स्)सतिरिक्खजोणिए उवसग्गे सम्मं सहन्ति जाव अहियासेन्ति, सक्का-पुणा(इ)इं अज्जो ! समणेहिं निग्गन्थेहिं दुवालसङ्गं गणिपिडगं अहिज्जमाणेहिं दिव्वमाणुसति-रिक्खजोणिए सम्मं सहित्तए जाव अहियासित्तए । तओ ते बहवे समणा निग्गन्था य निग्गन्थीओ य समणस्स भगवओ महावीरस्स त(हिं)हत्ति एयमट्ठं विणएणं पडिसु-णन्ति । तए णं से कामदेवे समणोवासए ह० जाव समणं भगवं महावीरं पसिणाइं पुच्छइ, अट्ठमादियइ, समणं भगवं महावीरं तिक्खुत्तो वन्दइ नमंसइ, वंदित्ता नमं-सित्ता जामेव दि-सिं पाउब्भूए तामेव दि-सिं पडिगए । तए णं समणे भगवं महावीरे अन्नया क्याइ चम्पाओ पडिणिक्खमइ, पडिनिक्खमित्ता बहिया जणवय-विहारं विहरइ ॥ २३ ॥ तए णं से कामदेवे समणोवासए पढमं उवासगपडिमं उव-सम्पज्जित्ताणं विहरइ, तए णं से कामदेवे समणोवासए बहूहिं [सीलवएहिं] जाव भावेत्ता वीसं वासाइं समणोवासगपरियागं पाउणित्ता एक्कारस उवासगपडिमाओ सम्मं काएणं फासेत्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेदेत्ता आलोइयपडिक्कन्ते समाहिपत्ते कालमासे कालं किच्चा सोहम्मं कप्पे सोहम्म-वडिसयस्स महाविमाणस्स उत्तरपुरत्थिमेणं अरुणाभे विमाणे देवत्ताए उववन्ने । तत्थ णं अत्थेगइयाणं देवाणं चत्तारि पलिओवमाइं ठिई पणत्ता, (तत्थणं) काम-

देवस्स-ऽवि देवस्स चत्तारि पलिओवमाइं ठिइं पण्णत्ता । से णं भन्ते । कामदेवे
(देवे) ताओ देवलोगाओ आउक्खएणं भवक्खएणं ठिइक्खएणं अणन्तरं चयं
चइत्ता कहिं गमिहिइ, कहिं उववज्जिहिइ ? गोयमा ! महाविदेहे वासे सिज्जिहिइ
(जाव सव्वदुक्खा०) ॥ २४ ॥ निक्खेवो ॥ सत्तमस्स अज्झस्स उक्खसगद-
साणं वीयं अज्झयणं समत्तं ॥

उक्खेवो तइयस्स अज्झयणस्स । एवं खलु जम्बू ! तेणं कालेणं तेणं समएणं
वाणारसी नामं नयरी(होत्था), कोट्ट(गनाम)ए उज्जाणे, जियसत्तू राया । तत्थ णं
वाणारसीए न(य)गरीए चुलणीपिया नामं गाहावई परिवसइ, अट्ठे जाव अपरिभूए ।
सामा भारिया । अट्ठ हिरण्णकोडीओ निहाणपउत्ताओ, अट्ठ-बु-वृत्तिपउत्ताओ, अट्ठ-
पवित्थरपउत्ताओ, अट्ठ वया दसगोसाहस्सिएणं वएणं, जहा आणं(दो)दे राईसर[०]
जाव सव्वकज्जवड्ढावए यावि होत्था । सामी समोस(ट्ठे)ट्ठे, परिसा निग्गया, चुलणी-
पिया-वि जहा आणन्दो तहा निग्गओ, तहेव गिहियम्मं पडिवज्जइ । गोयमपुच्छा
तहेव सेसं जहा कामदेवस्स जाव पोसहसालाए पोसहिए वम्मचारी समणस्स भग-
वओ महावीरस्स अन्तियं धम्मपण्णत्तिं उवसम्पज्जित्ता-णं विहरइ ॥ २५ ॥ तए णं
तस्स चुलणीपियस्स समणोवासयस्स पुव्वरत्तावरत्तकालसमयंसि एगे देवे अन्तियं
पाउवभूए । तए णं से देवे एणं (महं) नीलुप्पल-जाव असिं गहाय चुलणीपियं
समणोवासयं एवं वयासी-हं भो चुलणीपिया ! समणोवासया ! जहा कामदे(वे)वो
जाव न भज्जसि तो ते अहं अज्ज जेट्ठं पुत्तं साओ गिहाओ नीणेमि, नीणेत्ता तव
अग्गओ घाएमि, घाएत्ता तओ मंससोल्ले करेमि, करेत्ता आदाणभरियंसि कडाहयंसि
अद्देहमि, अद्देहत्ता तव गायं मंसेण य सोणिण्ण य आ(इं)यच्चामि, जहा णं तुमं अट्ठदु-
हट्ठवसट्ठे अकाले चेव जीवियाओ ववरोवि(ज्जा)ज्जसि ॥ २६ ॥ तए णं से चुलणीपिया
समणोवासए तेणं देवेणं एवं वुत्ते समाणे अभीए जाव विहरइ । तए णं से देवे
चुलणीपियं समणोवासयं अभीयं जाव पासइ, पासित्ता दोच्चं-पि तच्चं-पि चुलणीपियं
समणोवासयं एवं वयासी-हं भो चुलणीपिया ! समणोवासया ! तं चेव भणइ, सो
जाव विहरइ । तए णं से देवे चुलणीपियं समणोवासयं अभीयं जाव पासित्ता
आसु-रुत्ते ४ चुलणीपियस्स समणोवास-यस्स जेट्ठं पुत्तं गिहाओ नीणेइ, नीणेत्ता
अग्गओ घाएइ, घाएत्ता तओ मंससोल्लए करेइ, करेत्ता आदाणभरियंसि कडाहयंसि
अद्देइ, अद्देहत्ता चुलणीपियस्स समणोवासयस्स गायं मंसेण य सो(णी)णिण्ण य
आयच्चइ । तए णं से चुलणीपिया समणोवासए तं उज्जलं जाव अहियासेइ । तए
णं से देवे चुलणीपियं समणोवासयं अभीयं जाव पासइ, पासित्ता दोच्चं-पि चुलणी-

पियं समणोवासयं एवं वयासी-हं भो चुलणीपिया ! समणोवासया ! अपत्थिय-
 प(त्थि)त्थया [!] जाव न भजसि तो ते अहं अज्ज मज्झिमं पुत्तं साओ गिहाओ
 नीणेमि, नीणेत्ता तव अग्गओ घाएमि, जहा जेट्ठं पुत्तं तहेव भणइ, तहेव करेइ ।
 एवं तच्चं-पि कणीयसं जाव अहियासेइ ॥ २७ ॥ तए णं से देवे चुलणीपियं
 समणोवासयं अभीयं जाव पासइ, पासित्ता चउत्थं-पि चुलणीपियं समणोवासयं एवं
 वयासी-“हं भो चुलणीपिया ! समणोवासया ! अपत्थियप-त्थ० ४ जइ णं तुमं
 जाव न भजसि तओ अहं अज्ज जा इमा तव माया भद्दा सत्थवा(हिणी)ही देवय-
 गुरुजणणी दुक्करदुक्करकारिया तं ते साओ गिहाओ नीणेमि, नीणेत्ता तव अग्गओ
 घाएमि, घाएत्ता तओ मंससोल्लए करेमि, करेत्ता आदाणभरियंसि कडाहयंसि अद्-
 हेमि, अद्देत्ता तव गायं मंसेण य सोणिण्ण य आयच्चामि जहा णं तुमं अद्दुहट्ठ-
 सट्ठे अकाले चेव जीवियाओ ववरोविज्जसि” । तए णं से चुलणीपिया समणोवासए
 तेणं देवेणं एवं वुत्ते समाणे अभीए जाव विहरइ । तए णं से देवे चुलणीपियं
 समणोवासयं अभीयं जाव विहरमाणं पासइ, पासित्ता चुलणीपियं समणोवासयं
 दोच्चं-पि तच्चं-पि एवं वयासी-हं भो चुलणीपिया ! समणोवासया ! तहेव जाव
 ववरोविज्जसि । तए णं तस्स चुलणीपियस्स समणोवासयस्स तेणं देवेणं दोच्चं-पि
 तच्चं-पि एवं वुत्तस्स समाणस्स इमेयारूवे अज्जत्थिए ५-अहो णं इमे पुरिसे अणा-
 रिए (अणारियबुद्धी) अणारि(याइं पावाइं)यकम्माइं समायरइ, जेणं म(म)मं जेट्ठं
 पुत्तं साओ गिहाओ नीणेइ, नीणेत्ता मम अग्गओ घाएइ, घाएत्ता जहा कयं तहा
 चिन्तेइ जाव गायं आयच्चइ, जेणं म-मं मज्झिमं पुत्तं साओ गिहाओ जाव
 सोणिण्ण य आयच्चइ, जेणं ममं कणीयसं पुत्तं साओ गिहाओ तहेव जाव आयच्चइ,
 जा-ऽ-वि य णं इमा ममं माया भद्दा सत्थवाही देवयगुरुजणणी दुक्करदुक्करकारिया
 तं-पि य णं इच्छइ सा(सया)ओ गिहाओ नीणेत्ता मम अग्गओ घा(इ)एत्तए, तं
 सेयं खलु ममं एयं पुरिसं गिण्हित्तए त्तिकट्ठ उ(ट्ठा)द्धाइए, से-ऽ-वि य आगासे उप्प-
 इए, तेणं च खम्मे आसाइए, महया महया सद्देणं कोलाहले कए, तए णं सा भद्दा
 सत्थवा-ही तं कोलाहलसद्दं सोच्चा निसम्म जेणेव चुलणीपिया समणोवासए तेणेव
 उवागच्छइ, उवागच्छित्ता चुलणीपियं समणोवासयं एवं वयासी-किण्णं पुत्ता ! तुमं
 महया महया सद्देणं कोलाहले कए ? तए णं से चुलणीपिया समणोवासए अम्मयं
 भद्दं सत्थवाहिं एवं वयासी-एवं खलु अम्मो । न जा(या)णामि, केवि पुरिसे आलु-
 रुत्ते ५ एणं महं नीलुप्पल-जाव असिं गहाय ममं एवं वयासी-हं भो चुलणी-
 पि० समणोवासया ! अपत्थियप-त्थया ४ वज्जिया जइ णं तुमं जाव ववरोविज्जसि ।

(न०णं) अहं तेणं पुरिसेणं एवं वुत्ते समाणे अभीए जाव विहरामि । तए णं से पुरिसे ममं अभीयं जाव विहरमाणं पासइ, पासित्ता ममं दोच्चं-पि तच्चं-पि एवं वयासी-हं भो चुलणीपि० समणोवासया । तहेव जाव गायं आयब्बइ । तए णं अहं तं उज्जलं जाव अहियासेमि । एवं तहेव उच्चारयेव्वं सव्वं जाव कणीयसं जाव आयब्बइ, अहं तं उज्जलं जाव अहियासेमि । तए णं से पुरिसे ममं अभीयं जाव पासइ, पासित्ता ममं चउत्थं-पि एवं वयासी-हं भो चुलणीपि० समणोवासया । अपत्थिया-पत्थया जाव न भज्जसि तो ते अज्ज जा इमा (तव) माया (भ०) गुरु[०] जाव वव-रोविज्जसि । तए णं अहं तेणं पुरिसेणं एवं वुत्ते समाणे अभीए जाव विहरामि । तए णं से पुरिसे दोच्चं-पि तच्चं-पि ममं एवं वयासी-हं भो चुलणीपि० समणोवासया । अज्ज जाव ववरोविज्जसि । तए णं तेणं पुरिसेणं दोच्चं-पि तच्चं-पि ममं एवं वुत्तस्स समा-णस्स इ(अय)मेयाह्वे अज्जत्थिए ५-अहो णं इमे पुरिसे अणारिए जाव समायरइ, जेगं म-मं जेट्ठं पुत्तं साओ गिहाओ तहेव जाव कणीयसं जाव आयब्बइ, तु(ज्जे)ब्बे-
 S-वि य णं इच्छइ साओ गिहाओ नीणेत्ता मम अग्गओ घाएत्तए, तं सेयं खलु ममं एयं पुरिसं गिण्हित्तए तिकहु उ-द्धाइए, से-S-वि य आगासे उप्पइए, मए-S-वि य खम्मे आसाइए, महया महया सहेणं कोलाहले कए ॥ २८ ॥ तए णं सा भद्दा सत्यवाही चुलणीपियं समणोवासयं एवं वयासी-नो खलु के(इ)ई पुरिसे तव जाव कणीयसं पुत्तं साओ गिहाओ नीणेइ, नीणेत्ता तव अग्गओ घाएइ, एस (न) णं केइ पुरिसे तव उवसग्गं करेइ, एस णं तुमे विदरिसणे दिट्ठे, तं णं तुमं इ(दा)याणि भग्गव्वए भग्गनियमे भग्गपोस(होववासे)हे विहरसि, तं णं तुमं पुत्ता ! एयस्स ठाणस्स आलोएहि जाव पडिवज्जाहि । तए णं से चुलणीपिया समणोवानए अम्मणाए भद्दाए सत्यवाहीए तहत्ति एयमट्ठं विणएणं पडिसुणेइ, पडिसुणेत्ता तस्स ठाणस्स आलोएइ जाव पडिवज्जइ ॥ २९ ॥ तए णं से चुलणीपिया समणोवासए पढमं उवासग-पडिमं उवसम्पज्जित्ता-णं विहरइ, पढमं उवासगपडिमं अहावुत्तं जहा आणन्दो जाव ए(इ)क्कारस-वि । तए णं से चुलणीपिया समणोवासए तेणं उरालेणं जहा कामदेवो जाव सोहम्मे कप्पे सोहम्मवडिसगस्स महाविमाणस्स उत्तरपुरत्थिमेणं अत्थप्पमे विमाणे देवनाए उवव(ञ्चो)जे । चत्तारि पलिओवमाइं ठिई (जाव) पण्णत्ता । महाविदेहे वासे सिज्जिहिइ ५ ॥ ३० ॥ निक्खेवो (तहेव) ॥ सत्तमस्स अङ्गस्स उवासगदसाणं तइयं अज्झयणं समत्तं ॥

उक्खेवओ चउत्थस्स अज्झयगस्स । एवं खलु जम्बू ! तेणं कालेणं तेणं सम-एणं वाणारत्ती नामं नयरी । कोट्टए उज्जाणे । जियस-तू राया । सुरादेवे गाहाव-ई,

अहे (जाव अपरिभूए) । छ हिरण्णकोडीओ जाव छ वया दसगोसाहस्सिएणं वएणं । धन्ना भारिया । सामी समोसढे । जहा आणन्दो तहेव पडिबज्जइ गिहिधम्मं । जहा कामदेवो जाव समणस्स भगवओ महावीरस्स धम्मपण्णत्तिं उवसम्पज्जिता-णं विहरइ ॥ ३१ ॥ तए णं तस्स सुरादेवस्स समणोवासयस्स पुव्वरत्तावरत्तकालसमयंसि एगे देवे अन्तियं पाउब्भवित्था । से देवे एगं महं नीलुप्पल-जाव असिं गहाय सुरादेवं समणोवासयं एवं वयासी-हं भो सुरादे० समणोवासया । अपत्थियप-त्थया ४ जइ णं तुमं सी(लव्वया)लाइं जाव न भज्जसि तो ते जेट्ठं पुत्तं साओ गिहाओ नीणेमि, नीणेत्ता तव अग्गओ घाएमि, घाएत्ता पच्च (मंस)सोल्लए करेमि, (२ ता) आ(या)-द्धानभरियंसि कडाहयंसि अद्देमि, अद्देत्ता तव गायं मंसेण य सोणिएण य आ(-च)-यच्चामि, जहा णं तुमं अकाले चेव जीवियाओ ववरोविज्जसि । एवं मज्झि(मं)मयं, कणीयसं, एक्के पच्च सोल्लया, तहेव करेइ, जहा चुलणीपियस्स, नवरं एक्के पच्च सोल्लया । तए णं से देवे सुरादेवं समणोवासयं चउत्थं-पि एवं वयासी-हं भो सुरादेवा ! समणोवासया । अपत्थियप-त्थया ४ जाव न परिच्चय(भंज)सि (त)तो (अहं) ते अज्ज (तव) सरीरंसि जमगसमगमेव सोलस रोगायङ्के पक्खि(वे)वामि, तं-जहा-सासे, कासे जाव को(ढए)ढे, ज-हा णं तुमं अट्ठुहट्ठ[०] जाव ववरोविज्जसि । तए णं से सुरादेवे समणोवासए जाव विहरइ । एवं देवो दोच्चं-पि तच्चं-पि भणइ जाव ववरोविज्जसि ॥ ३२ ॥ तए णं तस्स सुरादेवस्स समणोवासयस्स तेणं देवेणं दोच्चं-पि तच्चं-पि एवं वुत्तस्स समाणस्स इमेयारूवे अज्जत्थिए ४ (समु०)-अहो णं इमे पुरिसे अणारिए जाव समायरइ, जेणं ममं जेट्ठं पुत्तं जाव कणीयसं जाव आयच्चइ, जे-ऽ-वि य इमे सोलस रोगायङ्का ते-ऽ-वि य इच्छइ मम सरीरगंसि पक्खिवित्तए, तं सेयं खलु ममं एयं पुरिसं गिण्हित्तए त्तिकहु उ-द्धाइए । से-ऽ-वि य आगासे उप्पइए, तेण य खम्ममे आसाइए, महया महया सद्देणं कोलाहले कए ॥ ३३ ॥ तए णं सा धन्ना भारिया कोलाह(लसद्)लं सोच्चा निसम्म जेणेव सुरादेवे समणोवासए तेणेव उवागच्छइ, उवागच्छित्ता एवं वयासी-किण्णं देवाणुप्पिया ! तुब्भेहिं महया महया सद्दे(ण)णं कोलाहले कए ? तए णं से सुरादेवे समणोवासए धन्नं भारियं एवं वयासी-एवं खलु देवाणुप्पिए ! के(इ)-ऽ-वि पुरिसे तहेव कहेइ जहा चुलणीपिया । धन्ना-ऽ-वि पडि-भणइ-जाव कणीयसं, नो खलु देवाणुप्पिया ! तुब्भं के-ऽ-वि पुरिसे सरीरंसि जमग-समगं सोलस रोगायङ्के पक्खिवइ, एस-णं के-वि पुरिसे तुब्भं उवसगं करेइ, सेसं जहा चुलणीपियस्स तहा भणइ । एवं सेसं जहा चुलणीपियस्स निरवसेसं जाव सोहम्(म)मे कप्पे अरुगकन्ते विमाणे उववन्ने । चत्तारि पलिओवमाइं ठिई, महा-

विदेहे वासे सिज्जिहिइ ५ ॥ ३४ ॥ निक्खेवो ॥ सत्तमस्स अङ्गस्स उवास-
गदसाणं चउत्थं अज्झयणं समत्तं ॥

उक्खेवो पञ्चमस्स । एवं खलु जम्बू ! तेणं कालेणं तेणं नमएणं आ(लं)लभिया
नामं नयरी-। सहवणे उज्जाणे । जियसत्तू राया । चुल्लसयए गाहावई(परिवसइ),
अद्धे जाव छ हिरण्णकोडीओ जाव छ वया दसगोसाहस्सिएणं वएणं । बहुला भारिया ।
सामी समोस-ढे । जहा आणंदो तहा (धम्मं सोचा) गिहिधम्मं पडिवजइ, सेसं जहा
कामदे-वो जाव धम्मपण्णत्तिं उवसम्पज्जित्ताणं विहरइ ॥ ३५ ॥ तए णं तस्स चुल्लसय-
गस्स समणोवासयस्स पुव्वरत्तावरत्तकालसमयंसि एगे देवे अन्तियं जाव अस्सिं गहाय
एवं वयासी-हं भो चुल्लसय० समणोवासया ! जाव न भज्जसि तो ते अज्ज जेट्ठं पुत्तं साओ
गिहाओ नीणेमि, एवं जहा चुलणीपियं, नवरं एक्केक्के सत्त मंससोळ्या जाव कणीयसं
जाव आयच्चामि । तए णं से चुल्लसयए समणोवासए जाव विहरइ । तए णं से देवे
चुल्लसयगं समणोवासयं चउत्थं-पि एवं वयासी-हं भो चुल्लसयगा ! समणोवासया !
जाव न भज्जसि तो ते अज्ज जाओ इमाओ छ हिरण्णकोडीओ निहाणपउत्ताओ, छ
बु-द्धिपउत्ताओ, छ पवित्थरपउत्ताओ (सव्वाओ) ताओ साओ गिहाओ नीणेमि, नीणेत्ता
आ-लभियाए नयरीए सिद्धाडग[०]जाव पहेसु सव्वओ समन्ता विप्पइरामि, ज-हा
णं तुमं अट्टुहट्टवसट्टे अकाले चेव जीवियाओ ववरोविज्जसि ॥ ३६ ॥ तए णं
से चुल्लसयए समणोवासए तेणं देवेणं एवं वुत्ते समणे अभीए जाव विहरइ । तए णं
से देवे चुल्लसयगं समणोवासयं अभीयं जाव पासित्ता दोच्चं-पि तच्चं-पि तहेव भणइ
जाव ववरोविज्जसि । तए णं तस्स चुल्लसयगस्स समणोवासयस्स तेणं देवेणं दोच्चं-पि
तच्चं-पि एवं वुत्तस्स समाणस्स अयमेयारूवे अज्झत्थिए ४-‘अहो णं इमे पुरिसे
अणारिए जहा चुलणीपिया तहा चिन्तेइ जाव कणीयसं जाव आयच्चइ, जाओ-ऽ वि
य णं इमाओ म-मं छ हिरण्णकोडीओ निहाणपउत्ताओ छ बु-द्धिपउत्ताओ छ
पवित्थरपउत्ताओ ताओ-ऽ-वि य णं इच्छइ ममं साओ गिहाओ नीणेत्ता आ-लभियाए
नयरीए सिद्धाडग-जाव विप्पइरित्तए, तं सेयं खलु ममं एयं पुरिसं गिहित्तए’
त्ति-कट्टु उ-द्धाइए जहा सुरादे-वो तहेव भारिया पुच्छइ तहेव कहे० । सेसं जहा
चुलणीपियस्स जाव सोहम्मे कप्पे अरुणसिट्ठे विमाणे उववन्ने, चत्तारि पलिओवमाई
ठिई । सेसं तहे(तं चे)व जाव महाविदेहे वासे सिज्जिहिइ [५] ॥ ३७ ॥ निक्खेवो ॥
सत्तमस्स अङ्गस्स उवासगदसाणं पञ्चमं अज्झयणं समत्तं ॥

छट्ठस्स उक्खेवओ । एवं खलु जम्बू ! तेणं कालेणं तेणं समएणं कम्पिळपुरे
नयरे । सह(र)सम्बवणे उज्जाणे । जियसत्तू राया । कुण्डकोलिए गाहावई । पूसा

भारिया । छ हिरण्णकोडीओ निहाणपउत्ताओ, छ वु-ड्डिपउत्ताओ, छ पवित्थरपउ-
त्ताओ, छ वया दसगोसाहस्सिएणं वएणं । सामी समोसढे । जहा कामदेवो तहा साव-
यधम्मं पडिवजइ । (से) स(व्वे)च्चेव वत्तव्वया जाव पडिलाभेमाणे विहरइ ॥ ३८ ॥
तए णं से कुण्डकोलिए समणोवासए अन्नया कयाइ पुव्वावरण्हकालसमयंसि जेणेव
असोगवणिया जेणेव पुढविसिलापट्टए तेणेव उवागच्छइ, उवागच्छिता नाममुद्गं
च उत्तरिजगं च पुढ(वी)विसिलापट्टए ठवेइ, ठवेत्ता समणस्स भगवओ महावीरस्स
अन्तियं धम्मपण्णत्तिं उवसम्पज्जिता-णं विहरइ ॥ ३९ ॥ तए णं तस्स कुण्डकोलि-
यस्स समणोवासयस्स एगे देवे अन्तियं पाउव्वभवित्था । तए णं से देवे नाममु(द्गं)द्दं
च उत्तरि(यं)जं च पुढ-विसिलापट्टयाओ गे(गि)ण्हइ, २ ता सखिंखिणिं[०] अन्तलि-
क्खपडिवज्जे कुण्डकोलियं समणोवासयं एवं वयासी-हं भो कुण्डकोलि०समणोवासया ।
सुन्दरी णं देवाणुप्पिया ! गोसालस्स मङ्गलिपुत्तस्स धम्मपण्णत्ती, नत्थि उट्ठाणे
इ वा कम्मे इ वा बळे इ वा वी(वि)रिए इ वा पुरिसक्कारपरक्कमे इ वा, नियया सव्व-
भावा, मंगुली णं समणस्स भगवओ महावीरस्स धम्मपण्णत्ती, अत्थि उट्ठाणे इ
वा कम्मे इ वा बळे इ वा वीरिए इ वा पुरिसक्कारपरक्कमे इ वा, अणियया
सव्वभावा ॥ ४० ॥ तए णं से कुण्डकोलिए समणोवासए तं देवं एवं वयासी-
जइ णं देवा-! सुन्दरी गोसालस्स मङ्गलिपुत्तस्स धम्मपण्णत्ती-नत्थि उट्ठाणे इ वा
जाव नियया सव्वभावा, मंगुली णं समणस्स भगवओ महावीरस्स धम्मपण्णत्ती-
अत्थि उट्ठाणे इ वा जाव अणियया सव्वभावा, तुमे णं देवा-! इमा एयारूवा दिव्वा
देविद्धी दिव्वा देवज्जुई दिव्वे देवाणुभावे किणा लद्धे, किणा पत्ते, किणा अभि-
समन्नागए, कि उट्ठाणेणं जाव पुरिसक्कारपरक्कमेणं, उदाहु अणुट्ठाणेणं अकम्मेणं
जाव अपुरिसक्कारपरक्कमेणं ? तए णं से देवे कुण्डकोलियं समणोवासयं एवं वयासी-
एवं खलु देवाणुप्पिया ! मए इमेयारूवा दिव्वा देविद्धी ३ अणुट्ठाणेणं जाव अपुरि-
सक्कारपरक्कमेणं लद्धा पत्ता अभिसमन्नागया । तए णं से कुण्डकोलिए समणोवासए
तं देवं एवं वयासी-जइ णं देवा-! तुमे इमा एयारूवा दिव्वा देविद्धी ३ अणुट्ठाणेणं
जाव अपुरिसक्कारपरक्कमेणं लद्धा पत्ता अभिसमन्नागया, जेसि णं जीवाणं नत्थि
उट्ठाणे इ वा जाव परक्कमे इ वा, ते कि न देवा ? अह णं देवा-! तुमे इमा एयारूवा
दिव्वा देविद्धी ३ उट्ठाणेणं जाव परक्कमेणं लद्धा पत्ता अभिसमन्नागया, तो जं
वदसि-सुन्दरी णं गोसालस्स मङ्गलिपुत्तस्स धम्मपण्णत्ती, नत्थि उट्ठाणे इ वा जाव
नियया सव्वभावा, मंगुली णं समणस्स भगवओ महावीरस्स धम्मपण्णत्ती-अत्थि
उट्ठाणे इ वा जाव अणियया सव्वभावा, तं ते मिच्छा । तए णं से देवे कुण्ड-

कोलिएणं समणोवासएणं एवं वुत्ते समाणे संकिए जाव कलु(स)सं समावन्ने नो
 संचाएइ कुण्डकोलियस्स समणोवासयस्स किञ्चि पा(मु)मोक्खमाइक्खित्तए, नाममुद्दयं
 च उत्तरिज्जयं च पुढविसिलापट्टए ठवेइ, ठवेत्ता जामेव दि-सिं पाउब्भूए तामेव
 दि-सिं पडिगए । तेणं काळेणं तेणं समएणं सामी समोसढे । तए णं से कुण्ड-
 कोलिए समणोवासए इमीसे कहाए लद्धट्ठे हट्ठ(तुट्ठे) जहा कामदेवो तहा निग्गच्छइ
 जाव पज्जुवासइ । धम्मकहा ॥ ४१ ॥ 'कुण्डकोलिया' इ समणे भगवं महावीरे
 कुण्डकोलियं समणोवासयं एवं वयासी-से नूणं कुण्डकोलिया ! कत्तं तुव(भं)म पुब्बा-
 वरण्हकालसमयंसि असोगवणियाए एगे देवे अन्तियं पाउब्भवित्था । तए णं से
 देवे नाममुद्दं च तहेव जाव पडिगए । से नूणं कुण्डकोलिया ! अट्ठे समट्ठे ? हन्ता
 अत्थि । तं धन्ने सि णं तुमं कुण्डकोलिया ! जहा कामदेवो । 'अज्जो' इ समणे
 भगवं महावीरे समणे निग्गन्थे य निग्गन्थीओ य आमन्तिता एवं वयासी-जइ ताव
 अज्जो ! गिहिणो गि-हमज(झे)ज्ञावसन्ता णं अन्नउत्थिए अट्ठेहि य हेऊहि य पत्ति-
 णेहि य कारणेहि य वागरणेहि य निप्पट्ठपत्तिणवागरणे करेन्ति, सक्का पुणाइं
 अज्जो ! समणेहिं निग्गन्थेहिं दुवालसङ्गं गणिपिडगं अहिज्जमाणेहिं अन्नउत्थिया
 अट्ठेहि य जाव निप्पट्ठपत्ति(णा)णवागरणा करित्तए । तए णं समणा निग्गन्था य
 निग्गन्थीओ य समणस्स भगवओ महावीरस्स तहत्ति एयमट्ठं विणएणं पडि-
 सुणेन्ति । तए णं से कुण्डकोलिए समणोवासए समणं भगवं महावीरं वंदइ नमं-
 सइ, वंदित्ता नमंसित्ता पत्तिणाइं पुच्छइ, पुच्छित्ता अट्ठमादियइ, २ ता जामेव दि-सं
 पाउब्भूए तामेव दि-सं पडिगए । सामी वहिया जणवयविहारं विहरइ ॥ ४२ ॥
 तए णं तस्स कुण्डकोलियस्स समणोवासयस्स वहूहि सील[०]जाव भावेमाणस्स
 चोइ[र]स संवच्छराइं व(वि)इक्कन्ताइं, पण्णरसमस्स संवच्छरस्स अन्तरा वट्ठमाणस्स
 अन्नया कयाइ जहा कामदेवो तहा जेट्ठपुत्तं (कुटुंबे) ठवेत्ता तहा पोसहसालाए जाव
 धम्मपण्णत्तिं उवसम्पज्जित्ता णं विहरइ । एवं एक्कारस उवासगपडिमाओ, तहेव जाव
 सोहम्मे कप्पे अरुणज्जए विमाणे जाव अन्तं काहिइ ॥ ४३ ॥ निक्खेवो ॥ सत्त-
 मस्स अङ्गस्स उवासगदसाणं छट्ठं अज्झयणं समत्तं ॥

सत्तमस्स उक्खेवो । पोलासपु(र)रे नामं नयरे । सहस्सम्बव(णं)णे उज्जा-णे । जिय-
 सत्तू राया । तत्थ णं पोलासपुरे नयरे सद्दालपुत्ते नामं कुम्भकारे आजीवियोवासए
 परिवसइ, आजीवियसमयंसि लद्धट्ठे गहियट्ठे पुच्छियट्ठे विणिच्छियट्ठे अभिगयट्ठे
 अट्ठिमिजपेमाणुरागरत्ते य, अयमाउसो । आजीवियसमए अट्ठे अयं परमट्ठे सेसे
 अणट्ठेत्ति (एवं) आजीवियसमएणं अप्पाणं भावेमाणे विहरइ । तस्स णं सद्दालपुत्तस्स

आजीविओवासगस्स एक्का हिरण्णकोडी निहाणपउत्ता, एक्का वु-ड्ढिपउत्ता, एक्का पविथरपउत्ता, ए(गे)क्के वए दसगोसाहस्सिएणं वएणं । तस्स णं सद्दालपुत्तस्स आजीविओवास(य)गस्स अग्गिमित्ता नामं भारिया होत्था । तस्स णं सद्दालपुत्तस्स आजीविओवासगस्स पोलासपुरस्स नगरस्स वहिया पच्च कुम्भकारावणसया होत्था । तत्थ णं वहवे पुरिसा दिण्णभइभत्तवेयणा कल्लाकल्लिं वहवे करए य वारए य पिहडए य घडए य अद्धघडए य कलसए य अलिञ्जरए य जम्बूलए य उट्टियाओ य करेन्ति । अन्ने य से वहवे पुरिसा दिण्णभइभत्तवेयणा कल्लाकल्लिं तेहिं वट्ठहिं करएहि य जाव उट्टिया(हिं)हि य रायमग्गंसि वित्तिं कप्पेमाणा विहरन्ति ॥ ४४ ॥ तए णं से सद्दालपुत्ते आजीविओवासए अन्नया कयाइ पुव्वा-वरण्हकालसमयंसि जेणेव असोगवणिया तेणेव उवागच्छइ, उवागच्छिता गोसालस्स मङ्गलिपुत्तस्स अन्तियं धम्मपण्णत्तिं उवसम्पज्जित्ता-णं विहरइ । तए णं तस्स सद्दाल-पुत्तस्स आजीविओवासगस्स एगे देवे अन्तियं पाउव्वमवित्था । तए णं से देवे अन्तलिक्खपडिवन्ने सखिखिणियाइं जाव परिहिए सद्दालपुत्तं आजीविओवासयं एवं वयासी-एहिइ णं देवाणुप्पिया । कल्लं इ(ह)हं महामाहणे उप्पन्नणाणदंसणधरे तीयप-डुप्पन्नमणागयजाणए अरहा जिणे केवली सव्वण्णू सव्वदरिसी तेलोक्कवहियमहिय-पूइए सदेवमणुयासुरस्स लो-गस्स अच्चणिज्जे वन्दणिज्जे (पूयणिज्जे) सक्कारणिज्जे संमाण-णिज्जे कल्लाणं मङ्गलं देवयं चेइयं जाव पज्जुवासणिज्जे त(वो)च्चकम्मसम्पयासम्पउत्ते, तं णं तुमं वन्देज्जाहि जाव पज्जुवासेज्जाहि, पाडिहारिए-णं पीढफलगसिज्जासंथारएणं उवनिमन्तेज्जाहि, दोच्चं-पि तच्चं-पि एवं वयइ वडत्ता जामेव दि-सं पाउव्वभूए तामेव दि-सं पडिगए ॥ ४५ ॥ तए णं तस्स सद्दालपुत्तस्स आजीविओवासगस्स तेणं देवेणं एवं वुत्तस्स समाणस्स इमेयाहवे अज्जत्थिए ४ समुप्पन्ने-‘एवं खलु म-मं धम्मायरिए धम्मोवएसए गोसाले मङ्गलिपुत्ते, से णं महामाहणे उप्पन्नणाणदंसणधरे जाव त-च्चकम्मसम्पयासम्पउत्ते, से णं कल्लं इहं हव्वमागच्छिस्सइ । तए णं तं अहं वन्दिस्सामि जाव पज्जुवासिस्सामि, पाडिहारिएणं जाव उवनिमन्तिस्सामि’ ॥ ४६ ॥ तए णं कल्लं जाव जलन्ते समणे भगवं महावीरे जाव समोस(ड्ढे)रिए । परिसा निग्गया जाव पज्जुवासइ । तए णं से सद्दालपुत्ते आजीविओवासए इमीसे कहाए लद्धेहे समाणे ‘एवं खलु समणे भगवं महावीरे जाव विहरइ, तं गच्छामि णं समणं भगवं महावीरं, वन्दामि जाव पज्जुवासामि’ एवं सम्पेहेइ, संपेहिता ण्हाए सुद्धप्पावेसाइं जाव अप्पमहग्गधाभरणालंक्रियसरीरे मणुस्सवग्गुरापरिगए साओ गिहाओ पडिणि- (गच्छ)क्खमइ, २ ता पोलासपुरं नयरं मज्झंमज्झेणं निग्गच्छइ, निग्गच्छिता

जेणेव सहस्तम्बवणे उजाणे जेणेव नमणे भगवं महावीरं नमोऽवगच्छत्, उवागच्छिता तिकण्ठो आयाहिणं पयाहिणं करेत्, करेता वन्द्य नमंसत्, गन्दिता नमंसिता जाय पञ्जुवासत् ॥ ४७ ॥ तए णं नमणे भगवं महावीरे सद्दालपुत्तस्स आजीविओवासगस्स तीसे य महइ जाय धम्मकजा मनता । 'सद्दालपुत्ता' १ नमणे भगवं महावीरे सद्दालपुत्तं आजीविओवासयं एवं वयासी- 'मे नूणं सद्दालपुत्ता । कइं तुमं पुव्वावरण्हकालसमयंसि जेणेव वसोणवणिवा जाय विहरत्ति । तए णं तुव्वं एणे देवे [अन्तिथं] पाउच्चमवित्ता । तए णं से देवे अन्नत्तिस्सपडिक्खे एवं वयासी- ह भो सद्दालपुत्ता ! तं चं व सव्वं जाय पञ्जुवासिस्सामि' । से नूणं सद्दालपुत्ता ! अट्ठे समट्ठे ? हंता अत्थि । (तं) नो गल्ल सद्दालपुत्ता ! तेणं देवेणं गोनालं मङ्गलिपुत्तं पाणिहाय एवं बुत्ते । तए णं तस्स सद्दालपुत्तरम आजीविओवासयरम समणेणं भगवया महावीरेणं एवं बुत्तस्स समागस्स इमेयात्थे अज्जनिए ४- 'एणं णं समणे भगवं महावीरे महामाहणे उप्पज्जगणदंमणधरे जाव तज्जकम्ममम्पया- सम्पउत्ते, तं सेयं खलु ममं समणं भगवं महावीरं वन्दिता नमंसिता पाडिहारिणं पीढफलग[०] जाव उवनिमन्तिताए' एवं सम्पेहेइ, संपेहिता उट्ठाए उट्ठेइ, उट्ठेता समणं भगवं महावीरं वन्दइ नमंसइ, वन्दिता नमंसिता एवं वयानी- 'एवं गल्ल भन्ते ! ममं पोलासपुरस्स नयरस्स वहिया पय कुम्भकारावणसया । तत्थ णं तुव्वे पाडिहारियं पीढ[०] जाव संथारयं ओणिण्हिता- णं विहरइ' । तए णं समणे भगवं महावीरे सद्दालपुत्तस्स आजीविओवासगस्स एयमट्ठं पडिहणेइ, पडिहणेता सद्दालपुत्तस्स आजीविओवासगस्स पयकुम्भकारावणसएणु फालुएसणिज्जं पाडिहारियं पीढफलग- जाव संथारयं ओणिण्हि(या)ता- णं विहरइ ॥ ४८ ॥ तए णं से सद्दालपुत्ते आजीविओवासए अन्नया क्या(ई)इ वायाहययं कोलालभण्डं अन्तो सालाहिंनो चहिया नीणेइ, नीणेत्ता आयवंसि दलयइ । तए णं समणे भगवं महावीरे सद्दालपुत्तं आजीविओवासयं एवं वयासी- 'सद्दालपुत्ता ! एस णं कोलालभण्डे कओ ?' तए णं से सद्दालपुत्ते आजीविओवासए समणं भगवं महावीरं एवं वयासी- एणं णं भन्ते ! पुव्वि मट्ठिया आसी, तओ पच्छा उदएणं निमिज्जइ, २ ता छारेण य करिसेण य एगयओ मीसिज्जइ, २ ता चक्के आ(रु)रोहिज्जइ, त(त्तो)ओ वहवे करणा य जाव उट्ठियाओ य कज्जंति । तए णं समणे भगवं महावीरे सद्दालपुत्तं आजीविओवासयं एवं वयासी- 'सद्दालपुत्ता ! एस णं कोलालभण्डे कि उट्ठाणेणं जाव पुरि- सक्कारपरक्कमेणं कज्ज(न्ति)ति, उदाहु अणुट्ठाणेणं जाव अपुरिसक्कारपरक्कमेणं कज्ज- ति ?' तए णं से सद्दालपु(त्तो)त्ते आजीविओवासए समणं भगवं महावीरं एवं वयासी-

‘भन्ते ! अणुट्टाणेणं जाव अपुरिसक्कारपरक्कमेणं(कज्जति), नत्थि उट्टाणे इ वा जाव परक्कमे इ वा, नियया सव्वभावा’ ॥ ४९ ॥ तए णं समणे भगवं महावीरे सद्दाल-
 पुत्तं आजीविओवासयं एवं वयासी-‘सद्दालपुत्ता । जइ णं तुब्भं केइ पुरिसे वायाहयं वा
 पक्केल्लयं वा कोलालभण्डं अवहरे(ज)जा वा वि(क्खरि-)-क्खरेजा वा भिन्दे-जा वा
 अर्च्छिदे-जा वा परि(ठ)ट्ठवे-जा वा, अग्गिमित्ताए वा भारियाए सद्धिं विउ(उरा)लाइं
 भोगभोगाइं भुज्जमाणे विहरे(-वा)जा, तस्स णं तुमं पुरिसस्स किं दण्डं [नि]वत्तेजासि ?’
 भन्ते ! अहं णं तं पुरिसं आओसे-जा वा हणे-जा वा वं(वंधि)धेजा वा महे-जा वा
 तज्जे-जा वा ताले-जा वा निच्छोडे-जा वा निब(भं)भच्छे-जा वा अकालेचेव जीवि-
 याओ ववरो(वि)वे(-वा)जा । सद्दालपुत्ता ! नो खलु तुब्(भ)भं केइ पुरिसे वा(त)याहयं वा
 पक्केल्लयं वा कोलालभण्डं अवह(रे)रइ वा जाव परिट्ठवेइ वा, अग्गिमित्ताए वा भारियाए
 सद्धिं विउलाइं भोगभोगाइं भुज्जमाणे विहरइ, नो वा तुमं तं पुरिसं आओसेज्जसि वा
 ह(णे)णिज्जसि वा जाव अकाले चेव जीवियाओ ववरो-वेज्जसि, जइ(णं)नत्थि उट्टाणे
 इ वा जाव परक्कमे इ वा नि(ति)यया सव्वभावा । अ(हं)ह णं तुब्भं के(इं)इ पुरिसे
 वायाहयं जाव परिट्ठवेइ वा, अग्गिमित्ताए वा जाव विहरइ, तुमं वा तं पुरिसं
 आओसेसि वा जाव ववरो(-ज्ज)वेसि, तो जं वदसि नत्थि उट्टाणे इ वा जाव नियया
 सव्वभावा तं ते मिच्छा । एत्थ णं से सद्दालपुत्ते आजीविओवासए सम्बुद्धे ॥ ५० ॥
 तए णं से सद्दालपुत्ते आजीविओवासए समणं भगवं महावीरं वन्दइ नमंसइ,
 वन्दिता नमंसित्ता एवं वयासी-‘इच्छामि णं भन्ते ! तुब्भं अन्ति(यं)ए धम्मं निसा-
 म्मेत्ताए’ । तए णं समणे भगवं महावीरे सद्दालपुत्तस्स आजीविओवासगस्स तीसे
 य जाव धम्मं परिकहेइ । तए णं से सद्दालपुत्ते आजीविओवासए समणस्स भग-
 वओ महावीरस्स अन्तिए धम्मं सोच्चा निसम्म हट्ठुट्ठ जाव हियए जहा आणंदो
 तहा गिहिधम्मं पडिवज्जइ । नवरं एगा हिरण्णकोडी निहाणपउत्ता, एगा हिरण्ण-
 कोडी बुद्धिपउत्ता, एगा हिरण्णकोडी पवित्थरपउत्ता, ए(ग)गे वए दसगोसाहस्सिएणं
 वएणं, जाव समणं भगवं महावीरं वन्दइ नमंसइ, वन्दिता नमंसित्ता जेणेव
 पोलासपुरे नयरे तेणेव उवागच्छइ, उवागच्छित्ता पोलासपुर नयरं मज्झमज्झेणं
 जेणेव सए गिहे जेणेव अग्गिमित्ता भारिया तेणेव उवागच्छइ, उवागच्छित्ता
 अग्गिमित्तं भारियं एवं वयासी-‘एवं खलु देवाणुप्पिए । समणे भगवं महावीरे
 जाव समोस-ढे, तं गच्छाहि णं तुमं समणं भगवं महावीरं, वन्(द)दाहि जाव पज्जु-
 वा(स)सार्हि, समणस्स भगवओ महावीरस्स अन्तिए पञ्चाणुव्वइयं सत्तसिक्खावइयं
 दुवाल्सविहं गिहिधम्मं पडिव-जाहि’ ॥ ५१ ॥ तए णं सा अग्गिमित्ता भारिया

सद्दालपुत्तस्स ममणोवासगरस्स 'त-ह'त्ति एयमट्ठं विणए-णं पडिठ्ठेण्ण । तए णं से सद्दालपुत्ते समणोवासए कोडुम्बियपुरिसे सद्दवेड, सद्दविता एवं वयासी-‘गिप्पामेव भो देवाणुप्पिया ! लहुकरणजुत्तजोइयं समणुरवालिहागसमलिहियविणए(हि)हिं जम्भू-णयामयकलावजोत्तपइविसिद्धएहिं रययामयघण्टमुत्तरजुगवरकणखटयनन्धापग्गहोण-हि(य)एहिं नीलुप्पलकयामे(ल)लएहिं पवरगोणजुवाणणहिं नागामणिकगगघण्टिया-जालपरिगयं सुजायजुगजुत्तउज्जुगपसत्थसुविरइयनिम्मियं पवरलक्खणोववेयं जुगामेव धम्मियं जाणप्पवरं उवट्ठवेह, उवट्ठवेत्ता मम एयमागणियं पग्गप्पिणह’ । तए णं ते कोडुम्बियपुरिसा जाव पच्चप्पिणन्ति ॥ ५२ ॥ तए णं सा अग्गिमिना भारिया ण्हाया सुद्धप्पावेसाइं जाव अप्पमहग्गामरणालंक्रियसरीरा (जाव) चेडिया-चक्कवालपरिकिग्गा धम्मियं जाणप्पवरं दुरुहड, दुरुहिता पोन्नासपुरं नग(णय)रं मज्झं-मज्झेणं निग्गच्छइ, निग्गच्छिता जेणेव महस्सम्भवणे उज्जाणे तेणेव उवागच्छड, उवागच्छिता धम्मियाओ जाणाओ पच्चोरुहड, पच्चोरुहिता चेडियाचक्कवालपरियुटा जेणेव समणे भगवं महावीरे तेणेव उवागच्छड, उवागच्छिता तिक्खुत्तो जाव वन्दइ नमंसइ, वंदिता नमंसित्ता नच्चासत्ते नाइदूरे जाव पञ्चलिउडा ठिइया चेव पज्जुवासइ ॥ ५३ ॥ तए णं समणे भगवं महावीरे अग्गिमित्ताए तीसे य जाव धम्मं कहेइ । तए णं सा अग्गिमित्ता भारिया समणस्स भगवओ महावीरस्स अन्तिए धम्मं सोच्चा निसम्म हट्ठवुट्ठा समणं भगवं महावीरं वन्दइ नमंसइ, वंदिता नमंसित्ता एवं वयासी-‘सद्दहामि णं भन्ते ! निग्गन्थं पावयणं जाव से जहेयं तुव्भे व(द)यह, जहा णं देवाणुप्पियाणं अन्तिए वहवे उग्गा भोगा जाव पव्वइया नो खलु अहं तहा संचाएमि देवाणुप्पियाणं अन्तिए मुण्डा भवित्ता जाव अ(ह)हं णं देवाणुप्पियाणं अन्तिए पञ्चाणुव्वइयं सत्तसिक्खावइयं दुवालसविहं गिहि-धम्मं पडिवज्जिस्सामि’ । अहाइहं देवाणुप्पिया ! (म)मा पडिवन्नं करेह । तए णं सा अग्गिमित्ता भारिया समणस्स भगवओ महावीरस्स अन्तिए पञ्चाणुव्वइयं सत्त-सिक्खावइयं दुवालसविहं गिहि(सावग)धम्मं पडिवज्जइ, पडिवज्जित्ता समणं भगवं महावीरं वन्दइ नमंसइ, वंदिता नमंसित्ता त(ता)मेव धम्मियं जा(णं)णप्पवरं दुरुहड, दुरुहिता जामेव दि-सं पाउब्भूया तामेव दि-सं पडिगया । तए णं समणे भगवं महावीरे अन्नया कयाइ पोलासपुराओ [नयराओ] सहस्संम्भव(ण)गाओ (उज्जा-णाओ) पडि-निग्गच्छइ, पडिनिग्गच्छिता वहिया जणवयविहारं विहरइ ॥ ५४ ॥ तए णं से सद्दालपुत्ते समणोवासए जाए अभिगयजीवाजीवे जाव विहरइ । तए णं से गोसाले मल्ललिपुत्ते इमीसे कहाए लद्धे समणे-‘एवं खलु सद्दालपुत्ते आजीवियसमयं वमि-

(चइ)त्ता समणाणं निगगन्थाणं दिट्ठिं पडिवन्ने, तं गच्छामि णं सद्दालपुत्तं आजीविओ-
चासयं समणाणं निगगन्थाणं दिट्ठिं वामेत्ता पुणरवि आजीवियदिट्ठिं गे-ण्हावितए'
त्ति-कहु एवं सम्पेहेइ, सपेहिता आजीवियसङ्घसम्परिवुडे जेणेव पोलासपुरे नयरे
जेणेव आजीवियसभा तेणेव उवागच्छइ, उवागच्छिता आजीवियसभाए भण्ड-
(ग)निकखेवं करेइ, करेत्ता कइवएहिं आजीविएहिं सद्धि जेणेव सद्दालपुत्ते समणोवासए
तेणेव उवागच्छइ । तए णं से सद्दालपुत्ते समणोवासए गोसालं मङ्गलिपुत्तं एज्जमाणं
पासइ, पासित्ता नो आढाइ, नो परिजा(णा)णइ, अणाढा[य]माणे अपरिजाण-
माणे तुसिणीए संचिट्ठइ ॥ ५५ ॥ तए णं से गोसाले मङ्गलिपुत्ते सद्दालपुत्तेणं समणो-
चासएणं अणाढाइज्जमाणे अपरिजाणिज्जमाणे पीढफलगसिज्जासंथारट्ठयाए समणस्स
भगवओ महावीरस्स गुणकित्तणं करे(ति)माणे सद्दालपुत्तं समणोवासयं एवं वयासी-
'आगए णं देवाणुप्पिया । इहं महामाहणे ?' तए णं से सद्दालपुत्ते समणोवासए गोसालं
मङ्गलिपुत्तं एवं वयासी-'के णं देवाणुप्पिया । महामाहणे ?' तए णं से गोसाले मङ्गलि-
पुत्ते सद्दालपुत्तं समणोवासयं एवं वयासी-'समणे भगवं महावीरे महामाहणे' 'से
केणट्ठेणं देवाणुप्पिया । एवं वु(उ)च्चइ-समणे भगवं महावीरे महामाहणे ?' 'एवं खलु
सद्दालपुत्ता । समणे भगवं महावीरे महामाहणे उप्पन्नणाणदंसणधरे जाव महिय-
यूइए जाव त-च्चकम्मसम्पयासंपउत्ते, से तेणट्ठेणं देवाणुप्पिया । एवं वु-च्चइ-समणे
भगवं महावीरे महामाहणे' 'आगए णं देवाणुप्पिया । इहं महागोवे ?' 'के णं
देवाणुप्पिया । महागोवे ?' 'समणे भगवं महावीरे महागोवे' 'से केणट्ठेणं देवाणुप्पिया ।
जाव महागोवे ?' 'एवं खलु देवाणुप्पिया । समणे भगवं महावीरे संसाराडवीए वहवे
जीवे न(त)स्समाणे विणस्समाणे खज्जमाणे छिज्जमाणे भिज्जमाणे लुप्पमाणे विलुप्प-
माणे धम्ममएणं दण्डेणं सा(सं)रक्खमाणे संगोवेमाणे निव्वाणमहावा(डे)डं साहत्थि
सम्पावेइ, से तेणट्ठेणं सद्दालपुत्ता । एवं वुच्चइ-समणे भगवं महावीरे महागोवे'
'आगए णं देवाणुप्पिया । इहं महासत्थवाहे ?' 'के णं देवाणुप्पिया । महासत्थवाहे ?'
सद्दालपुत्ता । समणे भगवं महावीरे महासत्थवाहे' 'से केणट्ठेणं (देवाणु० महासत्थ-
वाहे) ?' 'एवं खलु देवाणुप्पिया । समणे भगवं महावीरे संसाराडवीए वहवे जीवे
न-स्समाणे विणस्समाणे जाव विलुप्पमाणे (उम्मग्गपडिवण्णे) धम्ममएणं पन्थेणं
सा-रक्खमाणे निव्वाणमहापट्ठ(णं)सि)णाभिमुहे साहत्थि सम्पावेइ, से तेणट्ठेणं सद्द-
लपुत्ता । एवं वुच्चइ-समणे भगवं महावीरे महासत्थवाहे' 'आगए णं देवाणु-
प्पिया । इहं म(ह)हाधम्मकही ?' 'के णं देवाणुप्पिया । महाधम्मकही ?' 'समणे भगवं
महावीरे महाधम्मकही' 'से केणट्ठेणं समणे भगवं महावीरे महाधम्मकही ?' 'एवं

खलु देवाणुप्पिया ! समणे भगवं महावीरे महइमहालयंसि संसारं(मि)सि वहवे जीवे न-स्समाणे विणस्समाणे [खज्जमाणे छिज्जमाणे भिज्जमाणे लुप्पमाणे विलुप्पमाणे] उम्मग्गपडिवन्ने सप्पहविप्पणट्ठे मिच्छत्तवलाभिभूए अट्ठविहकम्मतमपडलप(डि)डो-
 च्छन्ने वहूहिं अट्ठेहि य जाव वागरणेहि य चाउरन्ताओ संसारकन्ताराओ साहत्यि
 नित्यारेइ, से तेणट्ठेणं देवाणुप्पिया ! एवं वुच्चइ-समणे भगवं महावीरे महावम्म-
 कही' 'आगए णं देवाणुप्पिया ! इहं महानिजामए ?' '(से) के णं देवाणुप्पिया !
 महानिजामए ?' 'समणे भगवं महावीरे महानिजामए' 'से केणट्ठेणं (समणे०) ?' 'एवं
 खलु देवाणुप्पिया ! समणे भगवं महावीरे संसारमहासमुद्वे वहवे जीवे न-स्समाणे
 विणस्समाणे [जाव विलुप्पमाणे] वु(वु)इमाणे नि(वु)वुइमाणे उप्पियमाणे धम्ममईए
 नावाए निव्वाणतीराभिमुहे साहत्यि सम्पावेइ, से तेणट्ठेणं देवाणुप्पिया ! एवं वुच्चइ-
 समणे भगवं महावीरे महानिजामए' ॥ ५६ ॥ तए णं से सद्दालपुत्ते समणोवासए
 गोसालं मङ्गलिपुत्तं एवं वयासी-'तुब्भे णं देवाणुप्पिया ! इयच्छेया जाव इयनिउणा
 इयनयवादी इयउवएसलद्धा इयविण्णाणपत्ता, पभू णं तुब्भे मम धम्मायरिएणं
 धम्मोवएसएणं (समणेणं) भगवया महावीरेणं सद्धिं विवादं क(रि)रेत्तए ?' 'नो ति(इ)-
 णट्ठे समट्ठे' 'से केणट्ठेणं देवाणुप्पिया ! एवं वुच्चइ-नो खलु पभू तुब्भे मम धम्माय-
 रिएणं जाव महावीरेणं सद्धिं विवादं क-रेत्तए ?' 'सद्दालपुत्ता ! से जहानामए केइ पुरिसे
 तरुणे जुगवं जाव निउणसिप्पोवगए एणं महं अयं वा एल्यं वा सूयरं वा कुक्कुडं
 वा तित्तिरं वा वट्ठयं वा लावयं वा कवोयं वा कविज्जलं वा वायसं वा सेणयं वा
 हत्थंसि वा पायंसि वा खुरंसि वा पुच्छंसि वा पिच्छंसि वा सिङ्गंसि वा विसाणंसि
 वा रोमंसि वा जहिं जहि गिण्हइ तहिं तहिं निच्चलं निप्फन्दं धरेइ, एवामेव समणे
 भमवं महावीरे ममं वहूहिं अट्ठेहि य हेऊहि य जाव वागरणेहि य जहिं जहिं गिण्हइ
 तहिं तहिं निप्पट्ठपसिणवागरणं करेइ, से तेणट्ठेणं सद्दालपुत्ता ! एवं वुच्चइ-नो
 खलु पभू अहं तव धम्मायरिएणं जाव महावीरेणं सद्धिं विवादं क-रेत्तए' ॥ ५७ ॥
 तए णं से सद्दालपुत्ते समणोवासए गोसालं मङ्गलिपुत्तं एवं वयासी-'जम्हा णं
 देवाणुप्पिया ! तुब्भे मम धम्मायरियस्स जाव महावीरस्स संतेहिं तच्चेहिं तहिएहिं
 (सव्वेहिं) सव्वभूए-हिं भावेहिं गुणकित्तणं करेह तम्हा णं अहं तुब्भे पाडिहारिएणं
 पीड-जाव संथारएणं उवनिमन्तेमि, नो चेव णं धम्मो-त्ति वा तवो-त्ति वा, तं
 गच्छह णं तुब्भे मम कुम्भारावणेसु पाडिहारियं पीडफलग-जाव ओगिण्हि(उव-
 संपज्जि)ताणं विहरह' । तए णं से गोसाले मङ्गलिपुत्ते सद्दालपुत्तस्स समणोवासयस्स
 एयमट्ठं पडिउणेइ, पडिउणेत्ता कुम्भ(भका)भारावणेसु पाडिहारियं पीड जाव ओगि-

णिह-त्ता-णं विहरइ । तए णं से गोसाले मङ्गलिपुत्ते सद्दालपुत्तं समणोवासयं जाहे नो
 संचाएइ बहूहिं आघवणाहि य पण्णवणाहि य सण्णवणाहि य विण्णवणाहि य
 (परुवणेहि य) निग्गन्थाओ पावयणाओ (सं)चालित्तए वा खोमित्तए वा विपरिणामित्तए
 वा ताहे सन्ते तन्ते परितन्ते पोलासपुराओ नगराओ पडिणिक्खमइ, पडिनिक्ख-
 मित्ता बहिया जणवयविहारं विहरइ ॥ ५८ ॥ तए णं तस्स सद्दालपुत्तस्स समणो-
 वासयस्स बहूहिं सील-जाव भावेमाणस्स चोइस संवच्छरा व(वी)इक्कन्ता, पण्ण-
 रसमस्स संवच्छरस्स अन्तरा वट्ठमाणस्स पुव्वरत्तावरत्तकाले जाव पोसहसालाए
 समणस्स भगवओ महावीरस्स अन्तियं धम्मपण्णत्तिं उवसम्पज्जित्ता-णं विहरइ । तए
 णं तस्स सद्दालपुत्तस्स समणोवासयस्स (अंतिए) पुव्वरत्तावरत्तका(लसमयंसि)ले एगे
 देवे अन्तियं पाउब्भवित्था । तए णं से देवे एगं महं नीलुप्पल-जाव असिं गहाय
 सद्दालपुत्तं समणोवासयं एवं वयासी-जहा चुलणीपियस्स तहेव देवो उवसगं करेइ,
 नवरं एक्केके पुत्ते नव (२) मंससोल्लए करेइ जाव कणीयसं घाएइ, घाइत्ता जाव
 आयच्चइ । तए णं से सद्दालपुत्ते समणोवासए अभीए जाव विहरइ । तए णं से देवे
 सद्दालपुत्तं समणोवासयं अभीयं जाव पा(से)सित्ता चउत्थं-पि सद्दालपुत्तं समणोवा-
 सयं एवं वयासी-‘हं भो सद्दालपुत्ता ! समणोवासया ! अपत्थियप-त्थया जाव न
 भञ्जसि तओ ते जा इमा अग्गिमित्ता भारिया धम्मसहाइया धम्म(वि)विइज्जिया धम्मा-
 पुरागरत्ता समसुहदु(ह)क्खसहाइया तं ते साओ गिहाओ नीणेमि, नीणेत्ता तव अग्गओ
 घाएमि, घाएत्ता नव मंससोल्लए करेमि, करेत्ता आदाणभरियंसि कडाहयंसि अद्दहेमि,
 अद्दहेत्ता तव गायं मंसेण य सोणिण्ण य आयच्चामि, जहा णं तुमं अद्दुहदु[०]
 जाव ववरोविज्जसि’ । तए णं से सद्दालपुत्ते समणोवासए तेणं देवेणं एवं वुत्ते समाणे
 अभीए जाव विहरइ । तए णं से देवे सद्दालपुत्तं समणोवासयं दोच्चं-पि तच्चं-पि एवं
 वयासी-‘हं भो सद्दालपुत्ता ! समणोवासया ! तं चेव भणइ । तए णं तस्स सद्दालपु-
 त्तस्स समणोवासयस्स तेणं देवेणं दोच्चं-पि तच्चं-पि एवं वुत्तस्स समाणस्स अयं
 अज्झत्थिए ४ समुप्प(जित्था)जे । एवं जहा चुलणीपिया तहेव चिन्तेइ-‘जेणं ममं
 जेट्ठं पुत्तं, जेणं ममं मज्झि-मयं पुत्तं, जेणं म-मं कणीयसं पुत्तं जाव आयच्चइ,
 जा-ड-वि य णं म-मं इमा अग्गिमित्ता भारिया समसुहदु-क्खसहाइया तं-पि य
 इच्छइ साओ गिहाओ नीणेत्ता मम अग्गओ घाएत्तए, तं सेयं खलु ममं एयं पुरिसं
 गिण्हित्तए’ त्ति-कट्ठ उ-द्धाए जहा चुलणीपिया तहेव सव्वं भाणियव्वं, नवरं
 अग्गिमित्ता भारिया कोलाहलं सु(णे)णित्ता भणइ, सेसं जहा चुलणिपियावत्त-
 व्वया, नवरं अरुणभूए विमाणे उव(वाओ)वजे, जाव महाविदे(ह)हे वासे सिज्झि-

हिइ (५) ॥ ५९ ॥ निक्खे(वो)वओ ॥ सत्तमस्स अज्झस्स उवासगदसाणं
सत्तमं अज्झयणं समत्तं ॥

अट्ठमस्स उक्खेवओ । एवं खलु जम्बू ! तेणं कालेणं तेणं समएणं रायणिहे
नयरे । गुणसि(लए)ले उज्जाणे । सेणि(य)ए राया । तत्थ णं रायणिहे महासयए नामं
गाहावई परिवसइ, अट्ठे-जहा आणन्दो । नवरं अट्ठ हिरण्णकोडीओ सकंसाओ
निहाणपउत्ताओ, अट्ठ हिरण्णकोडीओ सकंसाओ वु(-द्धी)ट्ठिपउत्ताओ, अट्ठ हिरण्ण-
कोडीओ सकंसाओ पवित्थरपउत्ताओ, अट्ठ वया दसगोसाहस्सिएणं वएणं । तस्स
णं महासयगस्स रेव(इ)ईपामोक्खाओ तेरस भारियाओ होत्था, अहीण[०] जाव
सुरूवाओ । तस्स णं महासयगस्स रेवईए भारियाए कोल(ह)घरियाओ अट्ठ हिर-
ण्णकोडीओ, अट्ठ-वया दसगोसाहस्सिएणं वएणं होत्था । अवसेसाणं दुवालसण्हं
भारियाणं कोल-घरिया एगमेगा हिरण्णकोडी, एगमेगे य वए दसगोसाहस्सिएणं
वएणं होत्था ॥ ६० ॥ तेणं कालेणं तेणं समएणं सामी समोस-ढे । परिसा
निग्गया । जहा आणन्दो तहा निग्गच्छइ, तहेव साव(ग)यधम्मं पडिवज्जइ । नवरं
अट्ठ हिरण्णकोडीओ सकंसाओ उच्चारैइ, अट्ठ वया, रेवईपामोक्खाहिं तेर(से)सहिं
भारियाहिं अवसेसं मेहुणविहिं पच्चक्खाइ, सेसं सव्वं तहेव । इमं च णं एयारुवं
अभिग्गहं अभिगिण्हइ-कल्लकल्लिं [च णं] कप्पइ मे वे(वे-दो)शेणियाए कंसपाईए
हिरण्णभरियाए संववहरित्तए । तए णं से महासयए समणोवासए जाए अभिगय-
जीवाजीवे जाव विहरइ, तए णं समणे भगवं महावीरे वहिया जणवयविहारं विहरइ
॥ ६१ ॥ तए णं तीसे रेव-ईए गाहावइणीए अन्नया कया-इ पुव्वरत्तावरत्तकालसम-
यंसि कु(ट्ठ)डुम्ब[०] जाव इमेयारुवे अज्झत्थिए ४-‘एवं खलु अहं इमांसि दुवाल-
सण्हं सवत्तीणं विघाएणं नो संचाएमि महासयएणं समणोवासएणं सद्धिं उ(ओ)रा-
लाइं माणुस्सयाइं भोगभोगाइं भुज्जमाणी विहरित्तए, तं सेयं खलु म-मं एयाओ दुवा-
लस-वि सवत्तियाओ अग्गिप्पओगेणं वा सत्थप्पओगेणं वा विसप्पओगेणं वा जीवि-
याओ ववरोवित्ता, एयांसि एगमेगं हिरण्णको(डीं)डिं एगमेगं वयं सयमेव उवसम्प-
जित्ता-णं महासयएणं समणोवासएणं सद्धिं उरालाइं जाव विहरित्तए’ एवं सम्पेहेइ,
संपेहित्ता तांसि दुवालसण्हं सवत्तीणं अन्तराणि य छिद्दाणि य वि(रहा)वराणि य
पडिजागरमाणी विहरइ । तए णं सा रेवई गाहावइणी अन्नया कया-इ तांसि
दुवालसण्हं सवत्तीणं अन्तरं जाणित्ता छ सवत्तीओ सत्थप्पओगेणं उद्वेइ, उद्वेत्ता
छ सवत्तीओ विसप्पओगेणं उद्वेइ, उद्वेत्ता तांसि दुवालसण्हं सवत्तीणं कोलघरियं
एगमेगं हिरण्णकोडिं एगमेगं वयं सयमेव पडिवज्जइ, पडिवजित्ता महासयएणं

समणोवासएणं सद्धिं उरालाईं भोगभोगाईं भुञ्जमाणी विहरइ । तए णं सा रेवई गाहावइणी मंसलोलुया मंसेसु मुच्छिया जाव अज्झोववन्ना बहुविहेहिं मंसेहि य सोल्लेहि य तल्लिएहि य भजिएहि य सुरं च महं च मेरगं च मज्जं च सीधुं च पसन्नं च आसाएमाणी ४ विहरइ ॥ ६२ ॥ तए णं रायगिहे नयरे अन्नया कयाइ अमा(रि)घाए धुट्ठे यावि होत्था । तए णं सा रेवई गाहावइणी मंसलोलुया मंसेसु मुच्छिया ४ कोलघरिए पुरिसे सद्दावेइ, सद्दावेत्ता एवं वयासी-‘तुब्भे (णं) देवाणुप्पिया ! म(मं)म कोलघरिएहिंतो (गो)वएहिंतो कल्लकल्लिं दुवे दुवे गोणपोयए उद्देवह, उद्देवत्ता म-मं उवणेह । तए णं (ते) कोल-घरिया पुरिसा रेव-ईए गाहावइणीए ‘तह’ति एयमट्ठं विणएणं पडिसु(णे)णन्ति, पडिसुणेत्ता रेवईए गाहावइणीए कोलघ-रिएहिंतो वएहिंतो कल्लकल्लिं दुवे दुवे गोणपोयए वहेन्ति, वहेत्ता (तं) रेवईए गाहावइणीए उवणेन्ति । तए णं सा रेवई गाहावइणी तेहिं गोणमंसेहिं सोल्लेहि य ४ सुरं च ६ आसाएमाणी ४ विहरइ ॥ ६३ ॥ तए णं तस्स महासयगस्स समणोवासगस्स बहूहिं सील-जाव भावेमाणस्स चो(चउ)इस संवच्छरा वइक्कन्ता । एवं तहेव जे(ट्ठ)ट्ठं पुत्तं ठवेइ जाव पोसहसालाए धम्मपण्णत्तिं उवसम्पज्जित्ता-णं विहरइ । तए णं सा रेवई गाहावइणी मत्ता लुलिया विइण्णकेसी उत्तरिजयं विकड्डुमाणी २ जेणेव पोसहसाला जेणेव महासयए समणोवासए तेणेव उवागच्छइ, उवागच्छित्ता मोहुम्मायजणणाईं सिङ्गारियाईं इत्थिभावाईं उवदंसेमाणी २ महासययं समणोवासयं एवं वयासी-‘हं भो महासय(गा)या ! समणोवासया ! धम्मकामया पुण्णकामया सग्गकामया मोक्खकामया धम्मकड्डिया ४ धम्मपिवासिया ४ किण(कि)णं तुब्भं देवाणुप्पिया ! धम्मेण वा पुण्णेण वा सग्गेण वा मोक्खेण वा [?] जण्णं तुमं मए सद्धिं उ-रालाईं जाव भुञ्जमाणे नो विहरसि(?)’ । तए णं से महासयए समणोवासए रेवईए गाहाव-इणीए एयमट्ठं नो आढाइ, नो परियाणाइ, अणाढायमाणे अपरियाणमाणे तुसिणीए धम्मज्झाणोवगए विहरइ । तए णं सा रेवई गाहावइणी महासययं समणोवासयं दोच्चं-पि तच्चं-पि एवं वयासी-‘हं भो ! (म० स०) तं चेव भणइ, सो-ऽ-वि तहेव जाव अणाढायमाणे अपरियाणमाणे विहरइ । तए णं सा रेव-ई गाहावइणी महासयएणं समणोवासएणं अणाढाइज्जमाणी अपरियाणिज्जमाणी जामेव दि-सिं पाउब्भूया तामेव दि-सिं पडिगया ॥ ६४ ॥ तए णं से महासयए समणोवासए पढमं उवासगपडिमं उवसंपज्जित्ता-णं विहरइ । पढमं अहासुत्तं जाव एक्का-रस-ऽ-वि । तए णं से महासयए समणोवासए तेणं उरालेणं जाव किसे धम-गिसन्तए जाए । तए णं तस्स महासययस्स समणोवासयस्स अन्नया कया(इ)ई

पुव्वरत्तावरत्तकाले धम्मजागरियं जागरमाणस्स (इमेयारुवे) अयं अज्जत्थिए ४-
 'एवं खलु अहं इमेणं उरालेणं जहा आणन्दो तहेव अपच्छिममारणन्तियसंलेहणा-
 (ए ज्जो)झूसियसरीरे भत्तपाणपडियाइक्खिए कालं अणवकङ्कमाणे विहरइ । तए णं
 तस्स महासयगस्स समणोवासगस्स सुभेणं अज्जवसाणे(परिणामे)णं जाव खओवस-
 मेणं ओहिणाणे समुप्पन्ने । पुरत्थिमेणं लवणसमुद्दे जोयण(स)साह(स्स)स्सियं खे(त्तं)त्ते
 जाणइ पासइ, एवं दक्खिणेणं पच्चत्थिमेणं, उत्तरेणं जाव चुल्लहिमवन्तं वासहरपव्वयं
 जाणइ पासइ, अहे इमीसे रयणप्पभाए पुढवीए लोलुयच्चुयं नरयं चउ(चो)रासी[इ]वा-
 ससहस्सट्ठिइयं जाणइ पासइ ॥ ६५ ॥ तए णं सा रेवई गाहावइणी अन्नया कया-इ
 मत्ता जाव उत्तरिज्जयं विकङ्कमाणी २ जेणेव पोसहसाला जेणेव महासयए समणो-
 वासए तेणेव उवागच्छइ, उवागच्छित्ता महासययं तहेव भणइ, जाव दोच्चं-पि
 तच्चं-पि एवं वयासी-‘हं भो तहेव । तए णं से महासयए समणोवासए रेवईए
 गाहावइणीए दोच्चं-पि तच्चं-पि एवं वुत्ते समणे आसु-रुत्ते ४ ओहिं पउंजइ, पउंजित्ता
 ओहिणा आभोएइ, आभोएत्ता रेवई गाहावइणिं एवं वयासी-‘हं भो रेव(ई)इ !
 अपत्थियपत्थिए-!-४ एवं खलु तुमं अन्तो सत्तरत्तस्स अलसएणं वाहिणा अभि-
 भूया समाणी अट्ठदुहट्ठवसट्ठा असमाहिपत्ता कालमासे कालं किच्चा अहे इमीसे रयण-
 प्पभाए पुढवीए लोलुयच्चुए नरए चउरासी(ई)इवाससहस्सट्ठिइएसु नेरइएसु नेरइयत्ताए
 उववज्जिहिसि’ । तए णं सा रेवई गाहावइणी महासयएणं समणोवासएणं एवं
 वुत्ता समाणी (भीया) एवं वयासी-‘रुट्ठे णं म-मं महासयए समणोवासए, हीणे णं
 म-मं महासयए समणोवासए, अवज्जाया णं अहं महासयएणं समणोवासएणं, न
 नज्जइ णं अहं केणवि कुमारेणं मारिज्जिस्तामि’त्ति-कट्ठु भीया तत्था तसिया उव्विग्गा
 सज्जायभया सणियं २ पच्चोसक्कइ, पच्चोसक्कित्ता जेणेव सए गिहे तेणेव उवागच्छइ,
 उवागच्छित्ता ओहय[०] जाव झियाइ । तए णं सा रेवई गाहावइणी अन्तो सत्तरत्तस्स
 अलसएणं वाहिणा अभिभूया अट्ठदुहट्ठवसट्ठा कालमासे कालं किच्चा इमीसे रयणप्प-
 भाए पुढवीए लोलुयच्चुए नरए चउरासीइवाससहस्सट्ठिइएसु नेरइएसु नेरइयत्ताए
 उववन्ना ॥ ६६ ॥ तेणं कालेणं तेणं समएणं समणे भगवं महावीरे, समोस-रणं,
 जाव परिसा पडिगया । ‘गोयमा’-!-इ समणे भगवं महावीरे एवं वयासी-‘एवं
 खलु गोयमा ! इहेव रायगिहे नयरे म-मं अन्तेवासी महासयए नामं समणोवासए
 पोसहसालाए अपच्छिममारणन्तियसंलेहणाए झूसियसरीरे भत्तपाणपडियाइक्खिए
 कालं अणवकङ्कमाणे विहरइ । तए णं तस्स महासयगस्स रेवई गाहावइणी मत्ता
 जाव विक(ङ्क)ङ्कमाणी २ जेणेव पोसहसाला जेणेव महासयए तेणेव उवागच्छइ, उवा-
 गच्छित्ता मोहुम्माय[०] जाव एवं वयासी-तहेव जाव दोच्चं-पि तच्चं-पि एवं वयासी

तए णं से महासयए समणोवासए रेवईए गाहावइणीए दोच्चं-पि तच्चं-पि एवं वुत्ते
समाणे आसु-स्ते ४ ओहिं पउंजइ, पउंजित्ता ओहिणा आभोएइ, आभोएत्ता रेवई
गाहावइणिं एवं वयासी-जाव 'उववज्जिहिसि' । नो खलु कप्पइ गोयमा । समणो-
वासगस्स अपच्छिम[०] जाव झूसियसरीरस्स भत्तपाणपडियाइक्खियस्स परो सन्तेहिं
तच्चेहिं तहिएहिं सन्भूएहि अणिट्ठेहिं अकन्ते-हिं अप्पिएहिं अमणुण्णेहिं अमणामेहिं
वागरणेहिं वागरित्तए, तं गच्छ(ह)णं देवाणुप्पिया । तुमं महासययं समणोवासयं
एवं वयाहि-नो खलु देवाणुप्पिया । कप्पइ समणोवासगस्स अपच्छिम-जाव
भत्तपाणपडियाइक्खियस्स परो सन्ते-हिं जाव वागरित्तए । तुमे य णं देवाणुप्पिया ।
रेवई गाहावइणी संतेहिं ४ अणिट्ठेहिं ५ वागरणेहिं वागरिया, तं णं तुमं एयस्स
ठाणस्स आलोएहि जाव जहारिहं च पायच्छित्तं पडिव-ज्जाहि' । तए णं से भगवं
गोयमे समणस्स भगवओ महावीरस्स 'तह'त्ति एयमट्ठं विणएणं पडिसुणेइ,
पडिसुणेत्ता तओ पडिणिक्खमइ, पडिनिक्खमित्ता रायगिहं न(ग)यरं मज्झमज्झेणं
अणुप्पविसइ, अणुपविसित्ता जेणेव महासयगस्स समणोवासयस्स गिहे जेणेव
महासयए समणोवासए तेणेव उवागच्छइ । तए णं से महासयए (समणोवासए)
भगवं गोयमं एजमाणं पासइ, पासित्ता ह(ट्ठे)ट्ठ जाव हियए भगवं गोयमं वन्दइ
नमंसइ । तए णं से भगवं गोयमे महासययं समणोवासयं एवं वयासी-एवं खलु
देवाणुप्पिया । समणे भगवं महावीरे एवमाइक्खइ भासइ पण्णवेइ परुवेइ-नो
खलु कप्पइ देवाणुप्पिया । समणोवासगस्स अपच्छिम जाव वागरित्तए, तुमे णं
देवाणुप्पिया । रेवई गाहावइणी सन्तेहि जाव वागरि(या)आ, तं णं तुमं देवाणु-
प्पिया । एयस्स ठाणस्स आलोएहि जाव पडिव-ज्जाहि' । तए णं से महासयए
समणोवासए भग(वं)वओ गोयमस्स 'तह'त्ति एयमट्ठं विणएणं पडिसुणेइ, पडिसुणेत्ता
तस्स ठाणस्स आलोएइ जाव अहारिहं च पायच्छित्तं पडिवज्जइ । तए णं से
भगवं गोयमे महासयगस्स समणोवासयस्स अन्तियाओ पडिणिक्खमइ, पडि-
निक्खमित्ता रायगिहं नगरं मज्झमज्झेणं निगगच्छइ, निगगच्छित्ता जेणेव समणे
भगवं महावीरे तेणेव उवागच्छइ, उवागच्छित्ता समण भगवं महावीरं वंदइ
नमंसइ, वंदित्ता नमंसित्ता संजमे(णं)ण तवसा अप्पाणं भावेमाणे विहरइ । तए णं
समणे भगवं महावीरे अन्नया कया-इ रायगिहाओ नयराओ पडिणिक्खमइ, पडि-
निक्खमित्ता बहिया जणवयविहारं विहरइ ॥ ६७ ॥ तए णं से महासयए समणो-
वासए वहुहि सील-जाव भावेत्ता वीसं वासाई समणोवास-यपरिया(गं)यं पाउणित्ता
ए-कारस उवासगपडिमाओ सम्मं काए-ण फासित्ता मासियाए संलेहणाए अप्पाणं
झूसित्ता सट्ठिं भत्ताई अणसणाए छेदेत्ता आलोइयपडिक्कन्ते समाहिपत्ते कालमासे

कालं किञ्चा सोहम्मे कप्पे अरुणवडिंसए विमाणे देवत्ताए उववन्ने । चत्तारि पलिओवमाइं ठिई । महाविदे-हे वासे सिज्जिहिइ ॥ ६८ ॥ निक्खेवो ॥ सत्तमस्स अंगस्स उवासगदसाणं अट्ठमं अज्झयणं समत्तं ॥

नवमस्स उक्खेवो । एवं खलु जम्बू ! तेणं कालेणं तेणं समएणं नावत्थी नयरी । कोट्ट(ग)ए उज्जाणे । जियस-तू राया । तत्थ णं सावत्थीए नयरीए नन्दिणी-पिया नामं गाहावई परिवसइ, अट्ठे । चत्तारि हिरण्णकोडीओ निहाणपउत्ताओ, चत्तारि हिरण्णकोडीओ बु-द्धिपउत्ताओ, चत्तारि हिरण्णकोडीओ पवित्थरपउत्ताओ, चत्तारि वया दसगोसाहस्सिएणं वएणं । अस्सिणी भारिया । सानी समोसडे । जहा आणन्दो तहेव गिहिधम्मं पडिवज्जइ । सानी वहिया (विहारं) विहरइ । तए णं से नन्दिणीपिया समणोवासए जाए जाव विहरइ । तए णं तस्स नन्दिणीपियस्स समणोवासयस्स बहूहिं सीलव्वयगुण[०] जाव भावेमाणस्स चोद्दस संवच्छराइं वइक्कन्ताइं । तहेव जेट्ठं पुत्तं ठवेइ, धम्मपण्णात्तिं, वीसं वासाइं परियागं, नागत्तं अरुणगवे विमाणे उववाओ । महाविदे-हे वासे सिज्जिहिइ ॥ ६९ ॥ निक्खेवो ॥ सत्तमस्स अंगस्स उवासगदसाणं नवमं अज्झयणं समत्तं ॥

दसमस्स उक्खेवो । एवं खलु जम्बू ! तेणं कालेणं तेणं समएणं सावत्थी नयरी । कोट्टए उज्जाणे । जियस-तू राया । तत्थ णं सावत्थीए नयरीए नालिही-पिया नामं गाहावई परिवसइ । अट्ठे दित्ते । चत्तारि हिरण्णकोडीओ निहाणपउत्ताओ, चत्तारि हिरण्णकोडीओ बु-द्धिपउत्ताओ, चत्तारि हिरण्णकोडीओ पवित्थर-पउत्ताओ । चत्तारि वया दसगोसाहस्सिएणं वएणं । फण्णुणी भारिया । सानी समोस-डे । जहा आणन्दो त(ह)हेव गिहिधम्मं पडिवज्जइ, जहा कामदेवो तहा जेट्ठं पुत्तं ठवे(इ)त्ता पोसहसालाए समणस्स भगवओ महावीरस्स धम्मपण्णात्तिं उवसन्प-जित्ताणं विहरइ । नवरं निस्वसग्गाओ एक्कारस-वि उवासगपडिमाओ तहेव भाणिय-व्वाओ । एवं कामदेवगमेणं नेयव्वं जाव सोहम्मे कप्पे अरुणकीले विमाणे देवत्ताए उववन्ने । चत्तारि पलिओवमाइं ठिई, महाविदे-हे वासे सिज्जिहिइ ॥ ७० ॥ (०) ॥ सत्तमस्स अंगस्स उवासगदसाणं दसमं अज्झयणं समत्तं ॥

दसण्ह-वि पणरसमे संवच्छरे वट्ठमाणणं चिन्ता । दसण्ह-वि वीसं वासाइं समणो-वासयपरियाओ । एवं खलु जम्बू ! समणेणं जाव सम्पत्तेणं सत्तमस्स अङ्गस्स उवासगदसाणं अयमट्ठे पण्णात्ते ॥ ७१ ॥ उवासगदसाओ समत्ताओ । उवासगदसाणं सत्तमस्स अङ्गस्स एगो सुयखन्वो दस अज्झयणा एकसरगा दससु चेव दिवसेसु उद्दिस्सिज्जंति तओ सुयखन्वो समुद्दिस्सिज्जइ अणुण्णाविज्जइ दोसु दिवसेसु, अङ्गं तहेव ॥

णमोऽत्यु णं समणस्स भगवओ णायपुत्तमहावीरस्स

सुत्तागमे

तत्थ णं

अंतगडदसाओ

[पढमो वग्गो]

तेणं कालेणं तेणं समएणं चंपा-नामं न(ग)यरी (हो० व० तत्थ णं चं० न० उ० दि० ए०) पुण्णभेदे (णा०) उज्जाणे (हो०) वण्णओ, (ती० चं० न० को० ना० ए० हो० म० हि० व०) तेणं कालेणं तेणं समएणं अज्जसुहम्मो (थे० जाव पं० अ० स० सं० पु० च० गा० सु० वि० जे० चं० न० जे० पु० उ० ते०) समोसरि(ते)ए परिसा निग्ग(ता)या जाव पडिग-या, तेणं कालेणं तेणं समएणं अज्जसुहम्मस्स अंतवासी अज्जजंबू जाव पज्जुवास(माणे)इ, एवं व(दासि)यासी-ज- (ति)इ णं भंते ! समणेणं (भ० म०) आ(इग)दिकारेणं जाव संपत्तेणं सत्तमस्स अंगस्स उवासगदसाणं अयमट्ठे पण्णत्ते अट्ठमस्स णं भंते ! अंगस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! समणेणं जाव संपत्तेणं अट्ठमस्स अंगस्स अंतगडदसाणं अट्ठ वग्गा पण्णत्ता, जइ णं भंते ! समणेणं जाव संपत्तेणं अट्ठमस्स अंगस्स अंतगडदसाणं अट्ठ वग्गा पण्णत्ता पढमस्स णं भंते ! वग्गस्स अंतगडदसाणं समणेणं जाव संपत्तेणं कइ अज्झयणा पण्णत्ता ? एवं खलु जंबू ! समणेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स दस अज्झयणा पण्णत्ता, तं०-‘गोयम-समुद्द-सागर-गंभीरे चेव होइ थिसिए य । अयले कंपिले खलु अक्खोभ-पसेण(ती)इ(वण्णी)विण्हू ॥ १ ॥’ जइ णं भंते ! सम- णेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स दस अज्झ- यणा पण्णत्ता (तं० गो० जाव वि०) पढमस्स णं भंते ! अज्झयणस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं वारवई-नामं नयरी होत्था, दुवालसजोयणायामा नवजो(अ)यणवित्थिण्णा धणवड्ढ- इणिम्माया चामीकरपागारा नाणामणिपंचवण्णकविसीसग(परि)मंडिया सुरम्मा अल- कापुरिसंकासा पमुदियपक्कीलिया पच्चक्खं देवलोगभूया पासा(दी)दिया ४, तीसे णं

चारवईणयरीए बहिया उत्तरपुरच्छिमे दिसीभाए एतय णं रेवयए नामं पव्वए होत्या
तत्थ णं रेवयए पव्वए नंदणवणे नामं उज्जाणे होत्या वण्णओ, सुरप्पिए नामं जक्खा-
यतणे होत्या, असोगवरपायवे[०], तत्थ णं वारवई(ए)ण-यरीए कण्हे नामं वासुदेवे
राया परिवसइ महया[०] रायवण्णओ, से णं तत्थ सनुद्विजयपा(सु)मोक्खाणं दसण्हं
दसाराणं वलदेवपा-मोक्खाणं पंचण्हं महावीराणं पज्जुण्णपामोक्खाणं अद्धुट्ठाणं कुमार-
कोडीणं संवपामोक्खाणं सट्ठीए दुद्धंतसाहस्सीणं महसेणपामोक्खाणं छप्पण्णाए वल-
च(ग्ग)यसाहस्सीणं वीरसेणपामोक्खाणं एगवीसाए वीरसाहस्सीणं उगसेणपामो-
क्खाणं सोलसण्हं रायसाहस्सीणं रुप्पिणीपामोक्खाणं सोलसण्हं दे(वि)वीसाहस्सीणं
अत्तेसिं च वट्ठूणं ईसर जाव सत्थवाहाणं वारवईए नयरीए अद्धमरहस्स य सम-
(न्त-त्त)त्थस्स आहेवच्चं जाव विहरइ, तत्थ णं वा(वा)रवईए नयरीए अंबग(वि-
ण्हू)वण्ण(णी)ही-नामं राया परिवसइ, महया० रायवण्णओ, तस्स णं अंबगवण्हिस्स
रण्णो धारिणी नामं देवी होत्या वण्णओ, तए णं सा धारिणी देवी अण्णया कयाइं
तंसि तारिसगंसि सयणिजंसि (एवं) जहा महव्वले 'सुमिण्हंसणकहणा जम्मं वाल-
त्तणं कलाओ य । जोव्वणपाणिग्गहणं (कंता) कण्णा पासायमोगा य ॥ १ ॥' नवरं
गोयसो नामेणं अट्ठण्हं रायवरकण्णणं एगदिवसेणं पाणिं गेण्हावेति अट्ठट्ठओ दाओ,
तेणं कालेणं तेणं समएणं अरहा अरिट्ठणेमी आ-दिकरे जाव विहरइ चउव्विहा देवा
आगया कण्हे-वि निग्गाए, तए णं तस्स गोयमस्स कुमारस्स[०] जहा मेहे तहा निग्गाए
धम्मं सोच्चा (णि०) जं नवरं देवाणुप्पिया ! अम्मापियरो आपुच्छामि देवाणुप्पि-
याणं० एवं जहा मेहे जाव अणगारे जाए [इरिया सप्पि-ए] जाव इणमेव निग्गंथं
पावयणं पुरओ काळं विहरइ, तए णं से गोयमे (अ०) अण्णया कया(इ)इं अरहओ
अरिट्ठणेमिस्स तहाल्लवाणं थेराणं अंतिए सामाइयमाइयाइं एक्कारस्स अंगाइं अहि(ज)-
जेइ २ ता वट्ठूहिं चउत्थ जाव भावेमाणे विहरइ, (तएणं) ते अरिहा अरिट्ठणेमी
अण्णया कया-इं वारवईओ [नयरीओ] नंदणवणाओ (उ०) पडिणिक्खमइ (२
ता) बहिया जणवयविहारं विहरइ, तए णं से गोयमे अणगारे अण्णया कया-इं
जेणेव अरहा अरिट्ठणेमी तेणेव उवागच्छइ २ ता अरहं अरिट्ठणेमिं तिक्खुत्तो आया-
हिणपयाहिणं करेइ २ ता वंदइ नमंसइ वं० २ ता एवं वयासी-इच्छामि णं भंते !
तुव्वेहिं अब्भणुण्णाए समाणे मासियं भिक्खुपडिमं उवसंपज्जित्ताणं विहरेत्तए, एवं
जहा खंदओ तहा वारस भिक्खुपडिमाओ फासेइ (०) गुणरयणं-पि तवोक्कम्मं तहेव
फासेइ निरवसेसं जहा खंदओ तहा चित्तेइ तहा आपुच्छइ तहा थेरेहिं सद्धिं सेत्तुअं
दुट्ठइ मासियाए संलेहणाए वारस वरिसाई परियाए जाव सिद्धे (५) ॥ १ ॥ एवं

खलु जंबू ! समणेणं जाव संपत्तेणं अट्टमस्स अंगस्स अंतगडदसाणं पढम[स्स]व-
ग्ग[स्स]पढम[स्स]अज्झयणस्स अयमट्ठे पण्णत्ते, एवं जहा गोयमो तहा सेसा वण्ही
पिया धारिणी माया समुद्दे सागरे गंभीरे थिमिए अयले कंपिल्ले अक्खोभे पसेणई
विण(हुए)हू एए एगगमा, पढमो वग्गो दस अज्झयणा पण्णत्ता ॥ २ ॥

[दोच्चो वग्गो]

जइ दोच्चस्स वग्गस्स[०] उक्खेवओ, तेणं कालेणं तेणं समएणं वा-रवईए नय-
रीए वण्ही पिया धारिणी माया-अक्खोभसागरे खलु समुद्दहिमवत-अ(य)चलनामे
य । धरणे य पूरणे-वि य अभिचंदे चेव अट्टमए ॥ १ ॥ जहा पढ(मो)मे वग्ग(गो)गे
तहा सव्वे अट्ट अज्झयणा, गुणरय(ण)णं तवोकम्मं, सोलस-वासाई परियाओ,
सेत्तुजे मासियाए संलेहणाए (जाव) सि(द्धे)द्धी (०) ॥ ३ ॥

[तच्चो वग्गो]

जइ तच्चस्स[०] उक्खेवओ एवं खलु जंबू ! (स० जाव सं० अ० अं०) तच्चस्स
वग्गस्स अंतगडदसाणं तेरस अज्झयणा पण्णत्ता, तं०-अणीयसे(ण) अणंतसेणे
[अजियसे-णे] अणिहय(वि)रि(उ)ऊ देव(जसे)सेणे सत्तुसेणे सारणे गए समुद्दे दुम्मुद्दे
कूवए दारुए अणादिट्ठी । जइ णं भंते ! समणेणं जाव संपत्तेणं (०) तच्चस्स वग्गस्स
अंतगडदसाणं तेरस अज्झयणा प० (तं० अ० जाव अ०) तच्चस्स णं भंते ! वग्गस्स
पढम-अज्झयणस्स अंतगडदसाणं (०) के अट्ठे प० ? एवं खलु जंबू ! तेणं
कालेणं तेणं समएणं भद्विलपुरे नामं न(य)गरे होत्था (रि०) वण्णओ, तस्स णं भद्वि-
लपुरस्स (न०) उत्तरपुर(त्थि)च्छिमे दिसीभाए सिरिवणे नामं उज्जाणे होत्था
वण्णओ, जियसत्तू राया, तत्थ णं भद्विलपुरे न-यरे नागे नामं गाहावई होत्था अट्ठे
जाव अपरिभूए, तस्स णं नागस्स गाहावइस्स सुलसा नामं भारिया होत्था सू(सु-
कु)माला जाव सुरूवा, तस्स णं नागस्स गाहावइस्स पुत्ते सुलसाए भारियाए अत्तए
अणीय(ज)से-नामं कुमारे होत्था सू-माले जाव सुरूवे पंचधाइपरिक्खित्ते तं०-खीर-
धाई[०] जहा दढपइण्णे जाव गिरि० सुहंसुहेणं परिवड्ढइ, तए णं तं अ(णि)णीयसं
कुमारं सा(इ)तिरेगअट्ठवासजायं अम्मापियरो कलायरिय[०] जाव[०] भोगसमत्थे
जाए यावि होत्था, तए णं तं अ-णीयसं कुमारं उम्मुक्कवालभावं जा(णे)णित्तं अम्मा-
पियरो सरि[सियाणं] जाव वत्तीसाए इब्भवरकण्णगाणं एगदिवसे पाणिं गेण्हावेंति,
तए णं से नागे गाहावई अणीयसस्स कुमारस्स इमं एयारुवं पीइदाणं दलयइ
तं०-वत्तीसं हिरण्णकोडीओ[०] जहा म(हव)हावलस्स जाव उप्पि पासायवरगए
फुट्ठ० विहरइ, तेणं कालेणं तेणं समएणं अरहा अरिद्ध[णेमी] जाव समोसढे सिरि-

वणे उज्जाणे ज(अ)हा जाव विहरइ परिसा निग्गया, तए णं तस्स अणीयसस्स
 (कु०) तं (म०) जहा गोयमे तहा नवरं सामाइयमाइयाइं चोइस-पुव्वाइं अहिज्जइ
 वीसं वासाइं परियाओ सेसं तहेव जाव सेत्तुज्जे पव्वए मासियाए संलेहणाए जाव
 सिद्धे (५) । एवं खलु जंबू ! समणेणं [०] अट्ठमस्स अंगस्स अंतगडदसाणं तच्चस्स
 वग्गस्स पढम-अज्झयणस्स अयमट्ठे पण्णत्ते, एवं जहा अणीयसे एवं सेसा-वि अणं-
 तसे(णो)णे जाव सत्तुसेणे छ-अज्झयणा ए(ग)क्कगमा बत्तीसओ दाओ वीसं वासा
 परियाओ चोइस [पु०] सेत्तुज्जे (जाव) सिद्धा ॥ छट्ठमज्झयणं समत्तं ॥ ४ ॥ (ज०
 णं० भं० उ० स०) तेणं कालेणं तेणं समएणं बारवईए नयरीए जहा पढ(मे नव-
 रं)मं वसुदेवे राया धारिणी देवी सीहो सुमिणे सारणे कुमारे पण्णासओ दाओ चोइस
 पुव्वा वीसं वासा परियाओ सेसं जहा गोयमस्स जाव सेत्तुज्जे सिद्धे ॥ ५ ॥ जइ [०]
 उक्खे[व]ओ अट्ठमस्स एवं खलु जंबू ! तेणं कालेणं तेणं समएणं बारवईए नयरीए
 जहा पढमे जाव अरहा अरिट्ठणेमी सामी समोसढे । तेणं कालेणं तेणं समएणं
 अरहओ अरिट्ठणेमिस्स अंतेवासी छ अणगारा भायरो सहोदरा होत्था सरिसया
 सरित्तया सरिव्वया नीलुप्पलगुलियअयसिकुसुमप्पगासा सिरिवच्छं कियवच्छा कुसुम-
 कुंडलभइलया नलकु(व्व)व्वरसमाणा, तए णं ते छ अणगारा जं चेव दिवसं मुंडा
 भवेत्ता अ(आ)गाराओ अणगारियं पव्वइया तं चेव दिवसं (अरहं) अरिट्ठणेमिं
 वंदंति णमंसंति वं० २ ता एवं वयासी-इच्छामो णं भंते ! तुब्भेहिं अब्भणुण्णाया
 समाणा जावजीवाए छट्ठंछट्ठेणं अणिक्खित्तेणं तवक्कम्मसंजमेणं तवसा अप्पाणं भावे-
 माणे विहरित्तए, अहासुहं देवाणुप्पिया ! मा पडिवंधं करेह, तए णं (ते) छ अण-
 गारा अरहया अरिट्ठणेमिणा अब्भणुण्णाया समाणा जावजीवाए छट्ठंछट्ठेणं जाव
 विह(रें)रंति, तए णं-छ अणगारा अण्णया कयाइं छट्ठक्खमणपार(णं)णयंसि पढ-
 माए पोरिसीए सज्झायं करेंति ज(ह)हा गोय(मसा०)मो जाव इच्छामो णं (भं०)
 छट्ठक्खमणस्स पार(णा)णए तुब्भेहिं अब्भणुण्णाया समाणा तिहिं संघाडएहिं बार-
 वईए नयरीए जाव अडित्तए, अहासुहं देवाणुप्पिया ! मा पडिवंधं करेह, तए णं-
 छ अणगारा अरहया अरिट्ठणेमिणा अब्भणुण्णाया समाणा अरहं अरिट्ठणेमि वंदंति
 नमंसंति वं० २ ता अरहओ अरिट्ठणेमिस्स अंतियाओ सह(रु)संववणाओ (०) पडिणि
 क्खमंति २ ता तिहिं संघाडएहिं अतुरियं जाव अडंति, तत्थ णं एगे संघाडए बार-
 वईए नयरीए उच्चणीयमज्झिमाइं कुलाइं घरसमुदाणस्स भिक्खायरियाए अडमा-
 णे (२) वसुदेवस्स रण्णो देवईए देवीए गेहे अणुपविट्ठे, तए णं सा देवई देवी ते
 अणगारे एज्जमाणे पासइ पा(सइ)सेत्ता हट्ठ जाव हियया आसणाओ अब्भुट्ठेइ २

त्ता सत्तट्ट-पयाइं (अ० २ ता) तिक्खुत्तो आयाहिणपयाहिणं करेइ २ ता वंदइ नमं-
सइ वं० २ ता जेणेव भत्तघ(रे)रए तेणेव उवाग(च्छइ २ ता)या सीहकेसराणं
मोयगाणं थालं भरेइ (०) ते अणगारे पडिलाभेइ (०) वंदइ नमंसइ वं० २ ता
पडिविसजेइ, त(दा)याणंतरं च णं दोच्चे संघाडए वारवईए (न०) उच्च[०] जाव
विसजेइ, तयाणंतरं च णं तच्चे संघाडए वारवईए न-गरीए उच्च-जाव पडिलाभेइ
२ ता एवं वयासी-किण्णं देवाणुप्पिया ! कण्हस्स वासुदेवस्स इमीसे वारवईए नय-
रीए (दु०) नवजोयण० पच्चक्खदेवलोगभूयाए समणा निगंथा उच्च-जाव अडमाणा
भत्तपाणं नो लभंति (?) जण्णं ताइं चेव कुलाइं भत्तपाणाए भुज्जो २ अणुप्पविसंति ?,
तए णं ते अणगारा देवइं देविं एवं वयासी-नो खलु देवा० ! कण्हस्स वासुदेवस्स
इमीसे वारवईए नयरीए जाव देवलोगभूयाए समणा निगंथा उच्च-जाव अडमाणा
भत्तपाणं णो लभंति नो [जं] चेव णं ताइं ताइं कुलाइं दोच्चं-पि तच्चं-पि भत्तपाणाए
अणुपविसंति, एवं खलु देवाणुप्पि० ! अम्हे भद्दिलपुरे न-गरे नागस्स गाहावइस्स
पुत्ता नुलसाए भारियाए अत्तया छ भायरो सहोदरा सरिसया[०] जाव नलकुब्बर-
समाणा अरहओ अरिट्ठणेमिस्स अंतिए धम्मं सोच्चा-संसारभउव्विगा भीया जम्म-
(ण)मरणाणं मुंडा जाव पव्वइया, तए णं अम्हे जं चेव दिवसं पव्वइया तं चेव
दिवसं अरहं अरिट्ठणेमिं वंदामो नमंसामो वं० २ ता इमं एयारुवं अभिगहं अभि-
णेहामो-इच्छामो णं भंते ! तुब्भेहिं अब्भणुणाया समाणा जाव अहासुहं०, तए
णं अम्हे अरहओ (अ०) अब्भणुणाया समाणा जावज्जीवाए छट्ठंछट्ठेणं जाव विह-
रामो, तं अम्हे अज्ज छट्ठक्खमणपारणयंसि पढमाए पोरिसिए जाव अडमाणा तव गेहं
अणुप्पविट्ठा, तं नो खलु देवाणुप्पिए ! ते चेव णं अम्हे, अम्हे णं अण्णे-देवइं देवि एवं
वदंति २ ता जामेव दिसं पाउब्भूया तामेव दिसं पडिगया, (तए णं) तीसे देवईए
(देवीए) अयमेयारुवे अ(ब्भ)ज्झत्थिए ४ समुप्पण्णे, एवं खलु अहं पोलासपुरे नयरे
अइमुत्तेणं कुमारसमणेणं वालत्तणे वागरिया तुमण्णं देवाणुप्पिए ! अट्ठ पुत्ते पयाइ-
स्ससि सरिसए जाव नलकुब्बरसमाणे नो चेव णं भरहे वासे अण्णाओ अम्मयाओ
तारिसए पुत्ते पयाइस्संति तं णं मिच्छा, इमं णं पच्चक्खमेव दिस्सइ भरहे वासे
अण्णाओ-वि अम्मयाओ (खलु) एरिस जाव पुत्ते पयायाओ, तं गच्छामि णं अरहं
अरिट्ठणेमिं वंदामि (न० वं०) २ ता इमं च णं एयारुवं वागरणं पुच्छिस्सामी-
तिकट्ठु एवं संपेहेइ २ ता कोडुंबियपुरिसा सद्दावेइ २ ता एवं वयासी लहुकरण-
प्पवरं[०] जाव उवट्ठवेंति, जहा देवाणंदा जाव पज्जुवासइ-ते अरहा अरिट्ठणेमी
देवइं देविं एवं वयासी-से नूणं तव देवई ! इमे छ अणगारे पासेत्ता अयमेयारुवे

अ(ज्झ)ब्भत्थिए० एवं खलु अहं पोलासपुरे नयरे अइमुत्तेणं तं चेव जाव निग्ग-
च्छसि २ ता जेणेव ममं अंतियं हव्वमागया से नूणं देवई ! अ(त्थे)ट्ठे समट्ठे ?
हंता अत्थि, एवं खलु देवाणुप्पिए ! तेणं कालेणं तेणं समएणं भद्विलपुरे नयरे नागे
नामं गाहावई परिवसइ अट्ठे०, तस्स णं नागस्स गाहावइस्स सुलसा-नामं भारिया
होत्था, सा सुलसा गाहावइणी वालत्तणे चेव ने(नि)मित्तएणं वागरिया-एस णं
दारिया णिंदू भविस्स०, तए णं तीसे सुलसाए गाहावइणीए भत्तिवहुमाणसुस्सूसाए
हरिणेगमेसी-देवे आराहिए यावि होत्था, तए णं से हरिणेगमेसी देवे सुलसाए
गाहावइणीए अणुकंपण(ट्ठया)ट्ठाए सुलसं गाहावइणिं तुमं च (णं) दो-वि समउ-
उयाओ करेइ, तए णं तुब्भे दो-वि सममेव गब्भे गिण्हह सममेव गब्भे परिवहह
सममेव दारए पयायह, तए णं सा सुलसा गाहावइणी विणिहायमावण्णे दारए
पया(इ)यइ, तए णं से हरिणेगमेसी देवे सुलसाए अणुकंपणट्ठाए विणिहायमावण्णए
दारए करयलसंपुडेणं गेण्हइ २ ता तव अंतियं साहरइ (२) तं-समयं च णं तुमं-पि
नवण्हं मासाणं० सुकुमालदारए पसवसि, जे-वि (अ) य णं देवाणुप्पिए ! तव पुत्ता
ते-वि य तव अंतियाओ करयलसंपुडेणं गेण्हइ २ ता सुलसाए गाहावइणीए अंतिए
साहरइ, तं तव चेव णं देव(इ)ई ! एए पुत्ता णो चेव सुलसाए गाहावइणीए, तए
णं सा देवई देवी अरहओ अरिट्ठणेमिस्स अंतिए एयमट्ठं सोच्चा निसम्म हट्ठतुट्ठ
जाव हियया अरहं अरिट्ठणेमिं वंदइ नमंसइ वं० २ ता जेणेव ते छ अणगारा तेणेव
उवागच्छइ [२ ता] ते छप्पि अणगारा वंदइ नमंसइ वं० २ ता आगयण(हु)हया
पप्फुयलोयणा कंचुयपडिक्खित्तया दरियवलयवाहा धाराहयकलंवपुप्फगंपिव समूस-
सियरोमकूवा ते छप्पि अणगारे अणिमिसाए दिट्ठीए पेहमाणी २ सुचिरं निरिक्खइ
२ ता वंदइ नमंसइ वं० २ ता जेणेव अ(रि)रहा अरिट्ठणेमी तेणेव उवागच्छइ २
ता अरहं अरिट्ठणेमिं तिक्खुत्तो आयाहि(णं)णपयाहिणं करेइ २ ता वंदइ नमंसइ
वं० २ ता तमेव धम्मियं जाणं दु(र)रुहइ २ ता जेणेव वारवई-नयरी तेणेव उवा-
गच्छइ २ ता वारवई नयरिं अणुप्पविसइ २ ता जेणेव सए गिहे जेणेव वाहिरिया
उवट्ठाणसाला तेणेव उवागच्छइ २ ता धम्मियाओ जाणप्पवराओ पच्चोरुहइ २ ता
जेणेव सए वासघरे जेणेव सए सयणिज्जे तेणेव उवागच्छइ २ ता सयंसि सयणि-
ज्जंसि निसीयइ, तए णं तीसे देवईए देवीए अयं अब्भत्थिए ४ समुप्पण्णे-एवं खलु
अहं सरिसए जाव नलकु-व्वरसमाणे सत्त पुत्ते पयाया, नो चेव णं मए एगस्स-वि
वालत्तणए समुब्भूए, एस-वि-य णं कण्हे वासुदेवे छण्हं छण्हं मासाणं ममं अंतियं
पायवंदए हव्वमागच्छइ, तं थण्णाओ णं ताओ अम्माओ जासिं मण्णे णियगकुच्छि-

संभूययाईं थणदुद्धलद्धयाईं महुससमुल्लवयाईं मंमण(प)जंपियाईं थणमूलकक्खदेस-
 भागं अभिसरमाणाईं सुद्धयाईं पुणो य कोमलकमलोवमेहिं हत्थेहिं (गेण्हंति) गिण्हि-
 ऊण उच्छंगि णिवेसियाईं देंति समुल्लवए सुमहुरे पुणो २ मंजुलप्पभणिए अहं णं
 अधण्णा अपुण्णा अकयपुण्णा एत्तो ए(क)कतरमपि न पत्ता, ओहय० जाव झिया-
 यइ । इमं च णं कण्हे वासुदेवे ण्हाए सव्वालंकारविभूसिए देवईए देवीए पायवंदए
 हव्वमागच्छइ, तए णं से कण्हे वासुदेवे देवई देविं० पासइ २ ता देवईए देवीए
 पायग्गहणं करेइ २ ता देवई देवी एवं वयासी-अण्णया णं अम्मो ! तुब्भे ममं
 पासेत्ता हट्ठ जाव भवह, किण्णं अम्मो ! अज्ज तुब्भे ओहय[०] जाव झियायह ?,
 तए णं सा देवई देवी कण्हं वासुदेवं एवं वयासी-एवं खलु अहं पुत्ता ! सरिसए जाव
 समाणे सत्त-पुत्ते पयाया नो चेव णं मए एगस्स-वि वालत्तणे अणुब्भूए तुमं-पि(य)णं
 पुत्ता ! ममं छण्हं २ मासाणं ममं अंतियं पादवंदए हव्वमागच्छसि तं धण्णाओ णं
 ताओ अम्मयाओ जाव झियामि, तए णं से कण्हे वासुदेवे देवई देविं एवं वयासी-
 मा णं तुब्भे अम्मो ! ओहय-जाव झियायह अहण्णं तहा घ(त्ति)इस्सामि जहा णं
 ममं सहोदरे कणीयसे भाउए भविस्सतीतिकट्ठु देवई देविं ताहिं इट्ठाहिं (कं० जाव)
 वग्गूहिं समासासेइ (२) तओ पडिणिक्खमइ २ ता जेणेव पोसहसाला तेणेव उवाग-
 च्छइ २ ता जहा अभओ नवरं हरिणेगमेसिस्स अट्ठमभत्तं पगेण्हइ जाव अंजलि कट्ठु
 एवं व-यासी-इच्छामि णं देवाणुप्पिया ! सहोदरं कणीयसं भाउयं विदिण्णं, तए णं
 से हरिणेगमेसी (देवे) कण्हं वासुदेवं एवं वयासी-होहिइ णं देवाणुप्पिया ! तव देव-
 लोयत्तुए सहोदरे कणीयसे भाउए से णं उम्मुक्क[०] जाव अणुप्पत्ते अरहओ अरिड्ड-
 गेमिस्स अंतियं मुंडे जाव पव्वइस्सइ, कण्हं वासुदेवं दोच्चं-पि तच्चं-पि एवं वदइ २
 ता जामेव दिसं पाउब्भूए तामेव दिसं पडिगए, तए णं से कण्हे वासुदेवे पोसह-
 सालाओ पडिणि० जेणेव देवई देवी तेणेव उवागच्छइ २ ता देवईए देवीए
 पायग्गहणं करेइ २ ता एवं वयासी-होहिइ णं अम्मो ! म(मं)म सहोदरे कणीयसे
 (भाउ-ए)त्तिकट्ठु देवई देविं ताहिं इट्ठाहि जाव आसासेइ २ ता जामेव दिसं पाउ-
 ञ्भूए तामेव दिसं पडिगए । तए णं सा देवई देवी अण्णया कयाईं तंसि तारिस-
 गंसि जाव सीहं सुमिणे पासेत्ता पडिबुद्धा जाव पाढया हट्ठ(तु०)हियया (तं ग० सु०)
 परिवहइ, तए णं सा देवई देवी नवण्हं मासाणं जासु(म)मिणारत्तवंधुजीवयलक्खार-
 ससरसपारिजातकतरुणदिवायरसमप्पभं सव्वणयणकंतं सुकुमालं जाव सुखं गयता-
 लुयसमाणं दारयं पयाया जम्मणं जहा मेहकुमारे जाव जम्हा णं अम्हं इमे दारए
 गयतालुसमाणे तं होउ णं अम्ह एयस्स दारगस्स नामधेजे गयसुकुमाले (२), तए

णं तस्स दारगस्स अम्मापियरे नामं करेति गयसुकुमा(ले)लो-त्ति सेसं जहा मेहे जाव
 (अलं-) भोगसमत्थे जाए यावि होत्था । तत्थ णं वा-स्वईए नयरीए सोमिले नामं
 माहणे परिवसइ अरिउ०वे० जाव सुपरिणिट्टिए यावि होत्था, तस्स सोमिलमाहणस्स
 सोमसिरी नामं माहणी होत्था सू-माल०, तस्स णं सोमिलस्स (मा०) धूया सोमसिरीए
 माहणीए अत्तया सोमा-नामं दारिया होत्था सो(सुकु)माला जाव सुलुवा रुवेणं जाव
 लावण्णेणं उक्किट्ठा उक्किट्ठसरीरा यावि होत्था, तए णं सा सोमा दारिया अण्णया
 कयाइ ण्हाया सव्वालंकारविभूसिया बहूहिं खुज्जाहिं जाव परिक्खित्ता सयाओ
 गिहाओ पडिणिक्खमइ २ ता जेणेव रायमग्गे तेणेव उवागच्छइ २ ता राय-
 मग्गंसि कणगतिंदूसएणं कीलमाणी (२) चिट्ठइ । तेणं कालेणं तेणं समएणं अरहा
 अरिट्ठणेमी समोसढे परिसा निग्गया, तए णं से कण्हे वासुदेवे इमीसे कहाए लद्धट्ठे
 समाणे ण्हाए सव्वालंकारविभूसिए गयसुकुमालेणं कुमारेणं सद्धिं हत्थिखंधवरगए
 सकोरंटमल्लदामेणं छत्तेणं धरेज्जमाणेणं से(य)अवरचामराहिं उद्धुव्वमाणीहिं वारवईए
 नयरीए मज्झंमज्झेणं अरहओ अरिट्ठणेमिस्स पायवंदए निग्गच्छमाणे सोमं दारियं
 घानइ २ ता सोमाए दारियाए रुवेण य जोव्वणेण य लावण्णेण य जाव विम्हिए, तए
 णं (से) कण्हे[०] कोडुंबियपुरिसे सद्दावेइ २ ता एवं वयासी-गच्छह णं तुव्वे-देवाणु-
 प्पिया ! सोमिलं माहणं जायित्ता सोमं दारियं गेण्हह २ ता कण्णंतेउरंसि पक्खि-
 वह, तए णं एसा गयसुकुमालस्स कुमारस्स भारिया भविस्सइ, तए णं कोडुंबिय
 जाव पक्खिवंति, तए णं से कण्हे वासुदेवे वारवईए नयरीए मज्झंमज्झेणं निग्ग-
 च्छइ २ ता जेणेव सह-संववणे उज्जाणे जाव पज्जुवासइ, तए णं अरहा अरिट्ठणेमी
 कण्हस्स वासुदेवस्स गयसुकुमालस्स (कुमारस्स) तीसे य धम्मकहाए कण्हे पडि-
 गए, तए णं से गयसुकुमाले (कु०) अरहओ अरिट्ठणेमिस्स अंति(यं)ए धम्मं सोच्चा जं
 नवरं अम्मापियरं आपुच्छामि जहा मेहो (णवरं) महेलियावज्जं जाव वड्ढियकुले, तए
 णं से कण्हे वासुदेवे इमीसे कहाए लद्धट्ठे समाणे जेणेव गयसुकुमाले-तेणेव उवा-
 गच्छइ २ ता गयसुकुमालं (०) आलिंइ २ ता उच्छंगे निवेसेइ २ ता एवं वयासी-तुमं
 ममं सहोदरे कणीयसे भाया तं मा णं तुमं देवाणुप्पिया ! इयाणि अरहओ (अ०अं०)
 मुंडे जाव पव्वयाहि, अहण्णं वारवईए नयरीए महया (२) रायाभिसेएणं अभि-
 सिंचिस्सामि, तए णं से गयसुकुमाले-कण्हेणं वासुदेवेणं एवं वुत्ते समाणे तुसिणीए
 संचिट्ठइ, तए णं से गयसुकुमाले-कण्हं वासुदेवं अम्मापियरो य दोच्चं-पि तच्चं-पि एवं
 वयासी-एवं खलु देवाणुप्पिया ! माणुस्सया कामा खेलासवा जाव विप्पजहियव्वा
 भविस्संति, तं इच्छामि णं देवाणुप्पिया ! तुव्वेहिं अव्वणुत्ताए (स०) अरहओ अरिट्ठणे-

मिस्स अंति ए जाव पव्वइत्तए, तए णं तं गयसुकुमालं कण्हे वासुदेवे अम्मापियरो
य जाहे नो संचाए० वहुयाहिं अणुलोमाहि जाव आघवित्तए ताहे अकामाई चेव एवं
वयासी-तं इच्छामो णं ते जाया ! एगदिवसमवि रज्जसिरिं पासित्तए निक्खमणं जहा
महावलस्स जाव तमाणाए तहा[०]तहा जाव संजमइ, से गयसुकुमाले अणगारे
जाए ई(इ)रिया(०) जाव[०] गुत्तवंभयारी, तए णं से गयसुकुमा(रे)ले (अ०) जं चेव
दिवसं पव्वइए तस्सेव दिवसस्सा पुव्वावरण्हकालसमयंसि जेणेव अरहा अरिट्ठणेमी
तेणेव उवागच्छइ २ ता अरह अरिट्ठणेमि तिक्खुत्तो आयाहिणपयाहिणं० वंदइ
नमंसइ वं० २ ता एवं वयासी-इच्छामि णं भंते ! तुव्वेहि अब्भणुणाए समाणे
महाकालंसि सुसाणंसि एगराइयं महापडिमं उवसंपजित्ता-णं विह(रे)रित्तए,
अहासुहं देवाणुप्पिया ! मा पडिवंधं करेह, तए णं से गयसुकुमाले अणगारे अरहया
अरिट्ठणेमिणा अब्भणुणाए समाणे अरहं अरिट्ठणेमिं वंदइ नमंसइ वं० २ ता
अरहओ अरिट्ठणेमिस्स अंति० सह-संववणाओ उज्जाणाओ पडिणिक्खमइ २ ता
जेणेव महाकाले सुसाणे तेणेव उवागए २ ता थंडिल्लं पडिलेहेइ २ ता (उच्चार-
पासवणभूमिं पडिलेहेइ २ ता) ई(सिं)सिपब्भारगएणं काएणं जाव दो-वि पाए साहड्डु
एगराई महापडिमं उवसंपजित्ताणं विहरइ, इमं च णं सोमिले माहणे सामिधेयस्स
अट्ठाए वा-रवईओ नयरीओ वहिया पुव्वणिग्गए समिहाओ य दब्भे य कुसे य
पत्तामोडं च गेण्हइ २ ता तओ पडिणियत्तइ २ ता महाकालस्स सुसाणस्स अदूर-
सामंतेणं वीईवयमाणे (२) संजाकालसमयंसि पविरलमणुस्संसि गयसुकुमाल अणगारं
पासइ २ ता तं वेरं सरइ २ ता आसुरुत्ते ५ एवं वयासी-एस णं भो ! से
गय(सू)सुकुमाले कुमारे अ(८)पत्थिय जाव परिवज्जिए, जे णं मम धूयं सोमसिरीए
भारियाए अत्तयं सोमं दारियं अदिट्ठदोसपइयं कालवत्तिणिं विप्पजहेत्ता मुंडे जाव
पव्वइए, तं सेयं खलु ममं गयसुकुमालस्स कुमारस्स वेरनिज्जायणं करेत्तए, एवं
संपेहेइ २ ता दिसापडिलेहणं करेइ २ ता सरसं मट्ठियं गेण्हइ २ ता जेणेव गयसुकुमाले
अणगारे तेणेव उवागच्छइ २ ता ग(ज)य-सुकुमालस्स कुमा(अणगा)रस्स मत्थए
मट्ठियाए पालिं वंधइ २ ता जलंतीओ चिययाओ फुल्लियकिसुयसमाणे ख(य)इरंगारे
कहल्लेणं गेण्हइ २ ता गय-सुकुमालस्स अणगारस्स मत्थए पक्खिवइ २ ता भीए
५ तओ खिप्पामेव अवक्कमइ २ ता जामेव दिसं पाउब्भूए तामेव दिस पडिगए, तए
णं (से) तस्स ग-य-सुकुमालस्स अणगारस्स सरीरयंसि वेयणा पाउब्भूया उज्जला
जाव दुरहियासा, तए णं से गय-सुकुमाले अणगारे सोमिलस्स माहणस्स मणसा-वि
अप्पदुस्समाणे तं उज्जलं जाव अहियासेइ, तए णं तस्स गय-सुकुमालस्स अणगा-

रस्स तं उज्जलं जाव अहियासेमाणस्म सुमेणं परिणामेणं पसत्थज्जवसाणेणं त(या)दा-
वरणिजाणं कम्माणं खएणं कम्मरयविकिरणकरं अपुव्वकरणं अणु[८]पविट्ठस्स
अणंते अणुत्तरे जाव केवलवरणाणदंसणे समुप्पण्णे, तओ पच्छा सिद्धे जाव-
प्पहीणे, तत्थ णं अहासंनिहिंएहिं देवेहिं सम्मं आराहियंतिकट्ठु दिव्वे सुरभिगंधोदए
वुट्ठे दसद्धवण्णे कुसुमे निवाडिए चेलुक्खेवे कए दिव्वे य गीयगंधव्वणिणाए कए
यावि होत्था । तए णं से कण्हे वासुदेवे कळं पाउप्पभायाए जाव जलंते ण्हाए
सव्वालंकारविभूसिए हत्थिखंधवरगए सको(रं)रेंटमल्लदामेणं छत्तेणं धरेज्जमाणेणं
सेयवरचासराहिं उट्ठु(प्प)व्वमाणीहिं महया भडचडगरपहकरवंदपरिक्खित्ते वा-रवई
नयरिं मज्झंमज्जेणं जेणेव अरहा अरिट्ठणेमी तेणेव पहारेत्थ गमणाए, तए णं से
कण्हे वासुदेवे वारवईए नयरीए मज्झंमज्जेणं निगच्छमाणे ए(गं)ळं पुरिसं पासइ
जुणं जराजजरियदेहं जाव (किलंतं) महइमहालयाओ इट्ठगरासीओ एगमेगं इट्ठं
गहाय वहिया रत्थापहाओ अंतोगिहं अणुप्पविसमाणं पासइ, तए णं से कण्हे
वासुदेवे तस्स पुरिसस्स अणुकंपणट्ठाए हत्थिखंधवरगए चेव एगं इट्ठं गेण्हइ
२ ता वहिया रत्थापहाओ अंतोगिहं अणुप्पवेसेइ, तए णं कण्हेणं वासुदेवेणं एगाए
इट्ठगाए गहियाए समाणीए अणेगेहिं पुरिससएहिं से महालए इट्ठगस्स रासी
वहिया रत्थापहाओ अंतोघरंसि अणुप्पवेसिए, तए णं से कण्हे वासुदेवे वारवईए
न-गरीए मज्झंमज्जेणं निगच्छइ २ ता जेणेव अरहा अरिट्ठणेमी तेणेव उवागए
२ ता जाव वंदइ नमंसइ वं० २ ता गयसुकुमालं अणगारं अपासमाणे अरहं अरिट्ठ-
णेमिं वंदइ नमंसइ वं० २ ता एवं वयासी-कहि णं भंते ! से म-मं सहोदरे कणीयसे
भाया गयसुकुमाले अणगारे (?) जा(जण)णं अहं वंदामि नमंसामि [?], तए णं अरहा
अरिट्ठणेमी कण्हं वासुदेवं एव वयासी-साहिए णं कण्हा ! गयसुकुमालेणं अणगारेणं
अप्पणो अट्ठे, तए णं से कण्हे वासुदेवे अरहं अरिट्ठणेमिं एवं वयासी-कण्हणं
(भंते !) गयसुकुमालेणं अणगारेणं साहिए अप्पणो अट्ठे ?, तए णं अरहा अरिट्ठ-
णेमी कण्हं वासुदेवं एवं वयासी-एवं खलु कण्हा ! गयसुकुमाले णं (अणगारे णं)
ममं कट्ठं पुव्वावरण्हकालसमयंसि वंदइ नमंसइ वं० २ ता एवं वयासी-इच्छामि
णं जाव उवसंपज्जिताणं विहरइ, तए णं तं गयसुकुमालं अणगारं एगे पुरिसे पासइ
२ ता आनुस्ते ५ जाव सिद्धे, तं एवं खलु कण्हा ! गयसुकुमालेणं अणगारेणं
साहिए अप्पणो अट्ठे, तए णं से कण्हे वासुदेवे अरहं अरिट्ठणेमिं एवं वयासी-
(वेस) से के णं भंते ! से पुरिसे अ-पत्थियपत्थिए जाव परिवज्जिए (?) जे-णं ममं
सहोद(रं)रे कणीय(सं)से भाय(रं)रे गयसुकुमा(लं)ले अणगा(रं)रे अकाले चेव

जीवियाओ ववरोविए [१], तए णं अरहा अरिट्ठणेमी कण्हं वासुदेवं एवं वयासी-
मा (णं) कण्हा ! तुमं तस्स पुरिसस्स पदोसमावज्जाहि, एवं खलु कण्हा ! तेणं
पुरिसेणं गयसुकुमालस्स अणगारस्स साहिज्जे दिण्णे, कहण्णं भंते ! तेणं पुरिसेणं
गयसुकुमालस्स णं सा(हे)हिज्जे दिण्णे ?, तए णं अरहा अरिट्ठणेमी कण्हं वासुदेवं
एवं वयासी-से नूणं कण्हा ! ममं तुमं पायवंदए हव्वमागच्छमाणे वारवईए नय-
रीए (एणं) पुरिसं पाससि जाव अणु-पविसिए, जहा णं कण्हा ! तुमं तस्स पुरिसस्स
साहिज्जे दिण्णे एवमेव कण्हा ! तेणं पुरिसेणं गयसुकुमालस्स अणगारस्स अणेग-
भवसयसहस्ससंचियं कम्मं उदीरेमाणेणं बहुकम्मणिज्जरत्थं साहिज्जे दिण्णे, तए णं
से कण्हे वासुदेवे अरहं अरिट्ठणेमिं एवं वयासी-से णं भंते ! पुरिसे मए कहं
जाणियव्वे ?, तए णं अरहा अरिट्ठणेमी कण्हं वासुदेवं एवं वयासी-जे णं कण्हा !
तुमं वारवईए नयरीए अणु-पविसमाणं पासेत्ता ठियए चेव ठिइमेएणं कालं करिस्सइ
तण्णं तुमं जा(णे)णिज्जासि एस णं से पुरिसे, तए णं से कण्हे वासुदेवे अरहं अरिट्ठ-
णेमि वंदइ नमंसइ वं० २ ता जेणेव आभिसे(ये)यं हत्थिरय(णे)णं तेणेव उवागच्छइ
२ ता हत्थिं दु-रुहइ २ ता जेणेव वारवई नयरी जेणेव सए गिहे तेणेव पहारेत्थ
गमणाए, (तए णं) तस्स सोमिलमाहणस्स कलं जाव जलंते अयमेयारुवे अ-ब्भत्थिए
४ समुप्पण्णे-एवं खलु कण्हे वासुदेवे अरहं अरिट्ठणेमिं पायवंदए निग्गए तं
नायमेयं अरहया विण्णायमेयं अरहया सुयमेयं अरहया सि(द्ध)ट्ठमेयं अरहया
भविस्सइ कण्हस्स वासुदेवस्स, तं न नज्जइ णं कण्हे वासुदेवे ममं केणवि कुमारेणं
मारिस्सइत्तिकट्ठु भीए ४ सयाओ गिहाओ पडिणिक्खमइ, कण्हस्स वासुदेवस्स
वा-रवई नयरीं अणु-पविसमाणस्स पुरओ सपक्खिं सपडिदिसिं हव्वमागए, तए णं
से सोमिले माहणे कण्हं वासुदेवं सहसा पासेत्ता भीए ४ ठि(ए य)यए चेव ठिइमेयं
कालं करेइ धरणि(त्त)तलंसि सव्वंगेहि धसत्ति संणिवडिए, तए णं से कण्हे
वासुदेवे सोमिलं माहणं पासइ २ ता एवं वयासी-एस णं (भो) देवाणुप्पिया ! से
सोमिले माहणे अ-पत्थियपत्थिए जाव परिवज्जिए जे(ण)णं ममं सहोयरे कणीयसे
भायरे गयसुकुमाले अणगारे अकाले चेव जीवियाओ ववरोविए[ति]त्तिकट्ठु सोमिलं
माहणं पाणेहिं कड्ढावेइ २ ता तं भूमिं पाणिएणं अब्भोक्खावेइ २ ता जेणेव सए
गिहे तेणेव उवागए सयं गिहं अणु-पविविद्धे, एवं खलु जंवू ! जाव अट्ठमस्स अंगस्स
अंतगडदसाणं तच्चस्स वग्गस्स अट्ठमज्झयणस्स अयमट्ठे पण्णत्ते ॥ ६ ॥ नवमस्स
(उ) उक्खेवओ, एवं खलु जंवू ! तेणं कालेणं तेणं समएणं वारवईए नयरीए जहा
पढमए जाव विहरइ, तत्थ णं वारवईए-वलदेवे नामं राया होत्था वण्णओ, तस्स

णं वलदेवस्स रण्णो धारिणी-नामं देवी होत्था वण्णओ, तए णं सा धारिणी सीहं सुमिणे जहा गोयमे नवरं सुमुहे नामं कुमारे पण्णासं कण्णाओ पण्णासओ दाओ चौद्दस-पुव्वाइं अहिज्जइ वीसं वासाइं परियाओ सेसं तं चेव (जाव) सेत्तुज्जे सिद्धे निक्खेवओ । एवं दुम्मुहे-वि कूव(दार)ए-वि, तिण्णिवि वलदेवधारिणीसुया, दारुए-वि एवं चेव, नवरं वा(व)सुदेवधारिणीसुए । एवं अणा(धि)दिट्ठी-वि वा-सुदेवधारिणीसुए, एवं खलु जंवू ! समणेणं जाव संपत्तेणं अट्ठमस्स अंगस्स अंतगडदसाणं तच्चस्स वग्गस्स तेरसमस्स अज्झयणस्स अयमट्ठे पण्णत्ते ॥ ७ ॥

[चउत्थो वग्गो]

जइ णं भंते ! समणेणं जाव संपत्तेणं (‘‘अं०) तच्चस्स वग्गस्स अयमट्ठे पण्णत्ते चउत्थस्स (णं भं० व० अं० स० जाव सं०) के अट्ठे पण्णत्ते ? एवं खलु जंवू ! समणेणं जाव संपत्तेणं चउत्थस्स वग्गस्स (अं०) दस अज्झयणा पण्णत्ता, तं०-जालिमयालिउवया(लि)ली पुरिससेणे य वारिसेणे य । पज्जुणसंवअणिरुद्धे सच्चणेमी य दढणेमी (य) ॥ १ ॥ जइ णं भंते ! समणेणं जाव संपत्तेणं चउत्थस्स वग्गस्स दस अज्झयणा पण्णत्ता पढमस्स णं (भं०) अज्झयणस्स (स०जाव सं०) के अट्ठे पण्णत्ते ? एवं खलु जंवू ! तेणं कालेणं तेणं समएणं वा-रवई (णा०) नयरी (हो०), तीसे जहा पढमे कण्हे वासुदेवे आहेवच्चं जाव विहरइ, तत्थ णं वारवईए नगरीए वसुदेवे राया, [तस्स णं वसुदेवस्स रण्णो] धारिणी [नामं देवी होत्था] वण्णओ जहा गोयमो नवरं जालिकुमारे पण्णासओ दाओ बारसंगी सोलस-वासा परियाओ सेसं जहा गोयमस्स जाव सेत्तुज्जे सिद्धे । एवं मया-ली उवया-ली पुरिससेणे य वारिसेणे य । एवं पज्जुणे-वि-त्ति, नवरं कण्हे पिया रुप्पिणी माया । एवं सवे-वि, नवरं जंववई माया । एवं अणिरुद्धे-वि, नवरं पज्जुणे पिया वेदब्भी माया । एवं सच्चणेमी, नवरं समुद्दविजए पिया सिवा माया, (एवं) दढणेमी-वि, सव्वे एगगमा, चउत्थ[स्स] वग्गस्स निक्खेवओ ॥ ८ ॥

[पंचमो वग्गो]

जइ णं भंते ! समणेणं जाव संपत्तेणं चउत्थस्स वग्गस्स अयमट्ठे पण्णत्ते पंचमस्स (णं भं०) वग्गस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंवू ! समणेणं जाव संपत्तेणं पंचमस्स वग्गस्स दस अज्झयणा पण्णत्ता, तं०-‘पउमावई य गोरी गंधारी लक्खणा सुसीमा य । जंवव(ई)इसच्चभामा रुप्पिणिमूलत्ति(री)रिमूलदत्ता-वि ॥ १ ॥’ जइ णं भंते ! [समणेणं जाव संपत्तेणं] पंचमस्स वग्गस्स दस अज्झयणा प० पढमस्स णं भंते ! अज्झयणस्स-के

अट्टे प० ? एवं खलु जंवू ! तेणं कालेणं तेणं समएणं वारवई-नगरी-जहा पढमे जाव कण्हे वासुदेवे आहेवच्चं जाव विहरइ, तस्स णं कण्हस्स वासुदेवस्स पउमावई ना(मं)म देवी हो(हु)त्था वण्णओ, तेणं कालेणं तेणं समएणं अरहा अरिट्ठणेमी समोसढे जाव विहरइ, कण्हे वासुदेवे निग्गए जाव पज्जुवासइ, तए णं सा पउमाव(इ)ई देवी इमीसे कहाए लद्धट्ठा (समाणी) हट्ठ० जहा देवई जाव पज्जुवासइ, तए णं अ-रहा अरिट्ठणेमी कण्हस्स वासुदेवस्स पउमावईए (दे०) य धम्मकहा परिसा पडिगया, तए णं कण्हे वासुदेवे अरह अरिट्ठणेमिं वंदइ नमंसइ वं० २ ता एवं वयासी-इमीसे णं भंते ! वारवईए न-गरीए-नवजोयण[०] जाव देवलोगभूयाए किंमूलाए विणासे भविस्सइ ? कण्हाइ ! अरहा अरिट्ठणेमी कण्हं वासुदेवं एवं वयासी-एवं खलु कण्हा ! इमीसे वा-रवईए नयरीए-नवजोयण-जाव[०] भूयाए सुरग्गिदीवायणमूलाए विणासे भविस्सइ, (तए णं) कण्हस्स वासुदेवस्स अरहओ अरिट्ठणेमिस्स अंतिए ए(यमट्ठं)यं सोच्चा निसम्म (अ०) एयं अब्भत्थिए ४-धण्णा णं ते जालिमयालि(उ०)पुरिससेण-वारिसेणपज्जुणसंवअणिरुद्धदढणेमिसच्चणेमिप्पभियओ कुमारा जे णं (चिच्चा) चइत्ता हिरण्णं जाव परिभा(ए)इत्ता अरहओ अरिट्ठणेमिस्स अंतियं मुंडा जाव पव्वइया, अहण्णं अधण्णे अकयपुण्णे रज्जे य जाव अंतेउरे य माणुस्सएसु य कामभोगेसु मुच्छिए ४ नो संचाएमि अरहओ अरिट्ठणेमिस्स जाव पव्वइत्तए, कण्हाइ ! अरहा अरिट्ठ-णेमी कण्हं वासुदेवं एवं वयासी-से नूणं कण्हा ! तव अयम-ब्भत्थिए ४-धण्णा णं ते जाव पव्वइत्तए, से नूणं कण्हा ! अ(यम)ट्ठे समट्ठे ? हंता अत्थि, तं नो खलु कण्हा ! तं एवं भू(यं)तं वा भव्वं वा भविस्सइ वा जण्णं वासुदेवा चइत्ता हिरण्णं जाव पव्व-इस्संति, से के-णं [अ]ट्ठेणं भंते ! एवं वुच्चइ-न ए(वं)यं भूयं वा जाव पव्व-इस्संति ? कण्हाइ ! अरहा अरिट्ठणेमी कण्हं वासुदेवं एवं वयासी-एवं खलु कण्हा ! सव्वे-वि य णं वासुदेवा पुव्वभवे नि-दाणगडा, से ए(ए)तेणट्ठेणं कण्हा ! एवं वुच्चइ-न एयं भूयं० पव्वइस्संति, तए णं से कण्हे वासुदेवे अरहं अरिट्ठणेमि एवं वयासी-अहं णं भंते ! इ(ओ)तो कालमासे कालं किच्चा कहिं गमिस्सामि (?) कहिं उव्वजिस्सामि ?, तए णं अ-रहा अरिट्ठणेमी कण्हं वासुदेवं एवं वयासी-एवं खलु कण्हा ! वारवईए नयरीए तए णं अ-रहा अरिट्ठणेमी कण्हं वासुदेवं एवं वयासी-एवं खलु कण्हा ! वारवईए नयरीए सुरग्गिदीवायण(कुमार)कोवनि(इ)दट्ठाए अम्मपिडिनियगविप्पहूणे रामे(ण)णं वल-देवे-णं सद्धि दाहिणवेयालिं अभिमुहे जो(जु)हिट्ठिलपामोक्खाणं पंचण्हं पंडवाणं पंडुरायपुत्ताणं पासं पंडुमहुरं संपत्थिए कोसंबवणकाणणे नग्गोहवरपायवस्स अ(घे)हे पुढविसिलापट्टए पीयवत्थपच्छाइयसरीरे ज(र)राकुमारेणं तिव्वेणं कोदंडविप्पमुक्केणं इसुणा वामे पा(ये)दे विद्धे समाणे कालमासे कालं किच्चा तच्चाए वालुयप्पभाए

पुढवीए उज्जलिए नरए नेरइयत्ताए उववज्जिहिसि, तए णं कण्हे वासुदेवे अरहओ
 अरिद्वणेमिस्स अंतिए एयमट्ठं सोच्चा निसम्म ओहय-जाव झियाइ, कण्हाइ !
 अरहा अरिद्वणेमी कण्हं वासुदेवं एवं वयासी-मा णं तुमं देवाणुप्पिया ! ओहय-जाव
 झियाहि, एवं खलु तुमं देवाणुप्पिया ! तच्चाओ पुढवीओ उज्जलियाओ अणंतरं
 उव्वट्ठिता इहेव जं(वूदी)वुदीवे भारहे वासे आगमेसाए उस्सप्पिणीए पुंडे(पुण्णे)सु
 जणवएसु सयदुवारे वारसमे अममे नासं अरह्ण भविस्सत्ति, तत्थ तुमं वहुइं
 वासाइं केवलपरियागं पाउणेत्ता सिज्जिहिसि ५, तए णं से कण्हे वासुदेवे अरहओ
 अरिद्वणेमिस्स अंतिए एयमट्ठं सोच्चा निसम्म हट्ठतुट्ठं० अप्फोडेइ २ ता वग्गइ
 २ ता तिक्खइं छिंदइ २ ता सीहणायं करेइ २ ता अरहं अरिद्वणेमिं वंदइ नमंसइ
 वं० २ ता तमेव आ(अ)भिसेक्कं ह(त्थिर०)त्थि दु-रुहइ २ ता जेणेव वारव-ई
 नयरी जेणेव सए गिहे तेणेव उवागए अभिसेयहत्थिरयणाओ पच्चोरुहइ (०)
 जेणेव वाहिरिया उवट्ठाणसाला जेणेव सए सीहासणे तेणेव उवागच्छइ २ ता
 सीहासणवरंसि पुरत्थाभिमुहे निसीयइ २ ता कोडुंवियपुरिसे सद्दावेइ २ ता
 एवं वयासी-गच्छह णं तुम्हे देवाणुप्पिया ! वारवईए नयरीए सिंघाडग[०]
 जाव उवघोसेमाणा एवं वयह-एवं खलु देवाणुप्पिया ! वारवईए नयरीए-नव-
 जोयण-जाव-भूयाए सुरग्गिदीवायणमूलाए विणासे भविस्सइ, तं जो णं देवाणु-
 प्पिया ! इच्छइ वा-रवईए नयरीए राया वा जुवराया वा ईसरे तलवरे माडं-
 वियकोडुंवियइव्भसेट्ठी वा देवी वा कुमारो वा कुमारी वा अरहओ अरिद्व-
 णेमिस्स अंतिए मुंडे जाव पव्वइत्ताए तं णं कण्हे वासुदेवे विसजेइ, पच्छातुर-
 स्स-वि य से अहापवित्तं वित्ति अणुजाणइ महया ड[द्धि]द्धीसक्कारसनुदएण य से
 निक्खमणं करेइ, दोच्चं-पि तच्चं-पि घोसणयं घोसेह २ ता मम ए(यमाणत्ति)यं
 पच्चप्पिणह, तए णं ते कोडुंविय जाव पच्चप्पिणंति, तए णं सा पउमावई-देवी
 अरहओ० अंतिए धम्मं सोच्चा निसम्म हट्ठतुट्ठ[०] जाव हियया अरहं अरिद्वणेमिं
 वंदइ नमंसइ वं० २ ता एवं वयासी-सद्दहामि णं भंते ! निग्गंथं पा(प)वयणं०
 से जहेयं तुम्हे वदह जं नवरं देवाणुप्पिया ! कण्हं वासुदेवं आपुच्छामि, तए
 णं अहं देवा० अंतिए मुंडा जाव पव्वयामि, अहासुहं देवाणुप्पि० ! मा पडि-
 वंथं करे(हि)ह, तए णं सा पउमावई देवी धम्मियं जाणप्पवरं दुरुहइ २ ता जेणेव
 वा-रवई-नयरी जेणेव सए गिहे तेणेव उवागच्छइ २ ता धम्मियाओ जाणाओ
 पच्चोरु(भ)हइ २ ता जेणेव कण्हे वासुदेवे तेणेव उवागच्छइ २ ता करयल० अंजलिं
 कट्ठु (कण्हं वा०) एवं वयासी-इच्छामि णं देवाणुप्पिया ! तुम्हेहिं अव्वणुण्णाया

समाणी अरहओ अरिट्ठणेमिस्स अंतिए मुंडा जाव पव्व०, अहासुहं०, तए णं से कण्हे वासुदेवे कोडुंविए (पु०) सद्दावेइ २ ता एवं वयासी-खिप्पामेव (भो दे०) पउमावईए (०) महत्थं निक्खमणाभिसेयं उवट्ठवेह २ ता एयमाणत्तियं पच्चप्पिणह, तए णं ते जाव पच्चप्पिणंति, तए णं से कण्हे वासुदेवे पउमावईं देविं पट्ठयं[सि] दुरुहेइ (०) अट्ठसएणं सोवण्णकलस जाव महाणिक्खमणाभिसेएणं अभिसिंचइ २ ता सव्वालंकारविभूसियं करेइ २ ता पुरिससहस्सवाहिणिं सि(वि)वियं दुरु(हावे)हेइ २ ता वारवईए नयरीए मज्झमज्झेणं निग्गच्छइ २ ता जेणेव रेवयए पव्वए जेणेव सहसंववणे उज्जाणे तेणेव उवागच्छइ २ ता सीयं ठवेइ (०) पउमावईं देवी सीयाओ पच्चोरुहइ २ ता जेणेव अरहा अरिट्ठणेमी तेणेव उवागच्छइ २ ता अरहं अरिट्ठणेमिं तिक्खुत्तो आयाहिणपयाहिणं करेइ २ ता वंदइ नमंसइ वं० २ ता एवं वयासी-एस णं भंते ! मम अग्गमहिंसी पउमावई-नामं देवी इट्ठा कंता पिया मणुणा मणा(मा अ)भिरासा जाव किंसंण पुण पासणयाए ? तण्णं अहं देवाणुप्पिया ! सिस्सि(णी)णिभिक्खं दलयामि पडिच्छंतु णं देवाणुप्पिया ! सिस्सिणिभिक्खं, अहासुहं०, तए णं सा पउमावई (०) उत्तरपुर-च्छि(मे)मं दिसीभा(गे)गं अवक्कमइ २ ता सयमेव आभरणालंकारं ओमुयइ २ ता सयमेव पंचमुट्ठियं लोयं करेइ २ ता जेणेव अरहा अरिट्ठणेमी तेणेव उवागच्छइ २ ता अरहं अरिट्ठणेमिं वंदइ नमंसइ वं० २ ता एवं वयासी-आलित्ते जाव धम्ममाइक्खि(तं)उं, तए णं अरहा अरिट्ठणेमी पउमावईं देवि सयमेव पव्वावेइ २ ता सयमेव मुंडावेइ सयमेव जक्खणीए अज्जाए सिस्सिणिं दलयइ, तए णं सा जक्खणी अज्जा पउमावईं देवि स(यं)यमेव पव्वा० जाव संजमियव्वं, तए णं सा पउमावईं जाव सजमइ, तए णं सा पउमावईं अज्जा जाया ईरियासमिया जाव गुत्तवंभयारिणी, तए णं सा पउमावईं अज्जा जक्खणीए अज्जाए अंतिए सामाइयमाइयाइं एक्कारस अंगाईं अहिज्जइ, बहूहि चउत्थछट्ठमदसमदुवालसेहिं मासद्धमासखमणेहि० अप्पाणं भावेमा(णी)णा विहरइ, तए णं सा पउमावईं अज्जा बहुपडिपुण्णाईं वीसं वासाईं सामण्णपरियागं [पाउणइ] पाउणित्ता मासियाए संलेहणाए अप्पाणं झू(झो)सेइ २ ता सट्ठिं भत्ताईं अणस(णेणं)णा-ए छेदेइ २ ता जस्सट्ठाए कीरइ जिणकप्पभावे थेरकप्पभावे जाव तमट्ठं आराहेइ चरिमुस्सासेहिं सिद्धा ५ ॥ ९ ॥ (उ० य अ०) तेणं कालेणं तेणं समएणं वारवई (ण०) रेवयए उज्जाणे नंदणवणे तत्थ णं वारवईए नयरीए कण्हे वासुदेवे० तस्स णं कण्ह[स्स]वासुदेवस्स गोरी देवी वण्णओ अरहा (अ०) समोसढे कण्हे णिग्गए गोरी

जहा पउमावई तहा निग्गया धम्मकहा परिसा पडिगया, कण्हे-वि, तए णं सा गोरी जहा पउमावई तहा निक्खंता जाव सिद्धा ५ । एवं गं(गां)धारी । लक्खणा । सुसीमा । जंववई । सच्चभामा । रुप्पिणी । अट्ठ-वि पउमाव[इ]ईसरिसाओ अट्ठ अज्जयणा ॥ १० ॥ (‘‘न०) तेणं कालेणं तेण समएणं वारवई[ए]नयरीए रेवयए (प०) नंदणवणे (उ०) कण्हे०, तत्थ णं वारवईए नयरीए कण्हस्स वासुदेवस्स पु(त्तए)त्ते जंववईए देवीए अत्तए संवे नामं कुमारे होत्था अहीण०, तस्स णं संवस्स कुमारस्स मूलसिरी-नामं भारिया होत्था वण्णओ, अरहा-समोसडे कण्हे निग्गए मूलसिरी-वि निग्गया जहा पउमावई जं नवरं देवाणुप्पिया । कण्हं वासुदेवं आपुच्छामि जाव सिद्धा । एवं मूलदत्ता-वि । पंचमो वग्गो ॥ ११ ॥

[छट्ठो वग्गो]

जइ (णं भं०) छट्ठ(म)स्स उक्खेवओ नवरं सोलस अज्जयणा प०, तं०— ‘म(मं)काई किक(म्)मे चेव मोगगरपाणी य कासवे । खेमए धिइ(ध)हरे चेव केलासे हरिचंदणे ॥ १ ॥ वारत्तसुदंसणपुण्णभद्दसुमणभद्दसुपइट्ठे मेहे । अइमुत्ते अ[ह] अलक्खे अज्जयणाणं [उ] तु सोलसयं ॥ २ ॥’ जइ सोलस अज्जयणा प०[०] पढमस्स अज्जयणस्स के अट्ठे पण्णत्ते ? एवं खलु जंवू ! तेणं कालेणं तेणं समएणं रायगिहे नगरे गुणसिलए उज्जाणे सेणिए राया (तत्थ णं) म-काई-नामं गाहावई परिवसइ अट्ठे जाव अपरिभूए, तेणं कालेणं तेणं समएणं समणे भगवं महावीरे आदिकरे गुणसिलए जाव विहरइ परिसा निग्गया, तए णं से म-काई गाहावई इमीसे कहाए लद्धट्ठे जहा पण्णत्तीए गंगदत्ते तहेव इमो(ऽ)वि जेट्ठपुत्तं कुडुंवे ठवेत्ता पुरिससहस्सवाहिणीए सीयाए निक्खंते जाव अणगारे जाए ईरियासमिए०, तए णं से म-काई अणगारे समणस्स भगवओ महावीरस्स तहारुवाणं थेराणं अंतिए सामाइयमाइयाइं एक्कारस अंगाइं अहिज्जइ सेसं जहा खंदगस्स, गुणरयणं तवोकम्मं सोलसवासाइं परियाओ तहेव वि(पु)उले सिद्धे । (दो० उ०) किकमे-वि एवं चेव जाव वि-उले सिद्धे ॥ १२ ॥ (त० उ० ए० ख० जं०) तेण कालेणं तेणं समएणं रायगिहे (ण०) गुणसिलए उज्जाणे सेणिए राया चेत्तणा-देवी[वण्णओ], तत्थ णं रायगिहे-अज्जुणए नामं मालागारे परिवसइ, अट्ठे[०] जाव अपरिभूए, तस्स णं अज्जुणयस्स मालायारस्स वंधुमई-नामं भारिया होत्था सूमा०, तस्स णं अज्जुण-यस्स मालायारस्स रायगिहस्स नयरस्स वहिया एत्थ णं महं एगे पुप्फारामे होत्था कि(क)ण्हे जाव नि(कु-गु)उरंवभूए दसद्धवण्णकुसुमकुसुमिए पासाईए ४, तस्स णं पुप्फारामस्स अदूरसामंते तत्थ णं अज्जुणयस्स माला(गा)यारस्स अज्जय-

पज्जयपिडपज्जयागए अणेगकुलपुरिसपरंपरागए मोगगरपाणिस्स जक्खस्स जक्खा-
ययणे होत्था, तत्थ णं मोगगरपाणिस्स पडिमा एगं महं पलसहस्सणिप्फणं
अयोमयं मोगगरं गहाय चिट्ठइ, तए णं से अज्जुणए मालागारे वालप्पभिइं चेव
मोगगरपाणिजक्ख(स्स)भत्ते यावि होत्था, कल्लकल्लिप(च्छि)त्थि(या)यपिडगाइं गेण्हइ
२ ता रायगिहाओ न-यराओ पडिणिक्खमइ २ ता जेणेव पुप्फारामे तेणेव उवा-
गच्छइ २ ता पुप्फुच्चयं करेइ २ ता अग्गाइं वराइं पुप्फाइं गहाइ २ ता
जेणेव मोगगरपाणिस्स जक्खाययणे तेणेव उवागच्छइ २ ता मो(मु)ग्गरपाणिस्स
जक्खस्स महरिहं पुप्फच्चणयं करेइ २ ता जणुपाय(व)पडिए पणामं करेइ, तओ
पच्छा रायमग्गंसि वित्तिं कप्पेमाणे विहरइ, तत्थ णं रायगिहे नयरे ललिया
नामं गोट्ठी परिवसइ अड्ढा[०] जाव अपरिभू(या)ता जंकयसुकया यावि होत्था, तए
णं रायगिहे न-यरे अण्णया कयाइ पमो(ए)दे धुट्ठे यावि होत्था, तए णं से अज्जुणए
मालागारे कल्लं पभूयत(राए)रेहिं पुप्फेहिं कज्जमितिकट्ठु पच्चूसकालसमयंसि वंधु-
मईए भारियाए सद्धिं प-त्थियपिडगाइं गेण्हइ २ ता सयाओ गिहाओ पडि-
णिक्खमइ २ ता रायगिहं न-गरं मज्झमज्झेणं निग्गच्छइ २ ता जेणेव पुप्फा-
रामे तेणेव उवागच्छइ २ ता वंधुमईए भारियाए सद्धिं पुप्फुच्चयं करेइ, तए
णं तीसे ललियाए गोट्ठीए छ गोट्ठिल्ला पुरिसा जेणेव मोगगरपाणिस्स जक्खस्स
जक्खाययणे तेणेव उवागया अभिरममाणा चिट्ठंति, तए णं से अज्जुणए माला-
गारे वंधुमईए भारियाए सद्धिं पुप्फुच्चयं करेइ (०) अग्गाइं वराइं पुप्फाइं गहाय
जेणेव मोगगरपाणिस्स जक्खस्स जक्खाययणे तेणेव उवागच्छइ, तए णं-छ
गोट्ठिल्ला पुरिसा अज्जुणयं मालागारं वंधुमईए भारियाए सद्धिं एजमाणं पासंति
२ ता अण्णमण्णं एवं वयासी-एस णं देवाणुप्पिया ! अज्जुणए मालागारे वंधु-
मईए भारियाए सद्धिं इहं हव्वमागच्छइ तं सेयं खलु देवाणुप्पिया ! अम्हं
अज्जुणयं मालागारं अव(उ)ओडयवंधणयं करेत्ता वंधुमईए भारियाए सद्धिं
विउलाइं भोगभोगाईं भुंजमाणाणं विहरित्तए-त्तिकट्ठु एयमट्ठं अण्णमण्णस्स पडि-
सुणेंति २ ता कवाडंतरेसु निलुक्कंति निच्चला निप्फंदा तुसिणीया पच्छग्गा
चिट्ठंति, तए णं से अज्जुणए मालागारे वंधुम(ईए)इभारियाए सद्धिं जेणेव मोगगर-
पाणिजक्खाययणे तेणेव उवागच्छइ (०) आलोए पणामं करेइ (०) महरिहं पुप्फ-
च्चणं करेइ (०) जणुपायपडिए पणामं करेइ, तए णं-छ गो(ट्ठे)ट्ठिल्ला पुरिसा दव-
दवस्स कवाडंतरेहिंतो निग्गच्छति २ ता अज्जुणयं मालागारं गेण्हंति २ ता
अवओड(ग)यवंधणं करेंति (०) वंधुमईए मालागारीए सद्धिं वि-उलाइं भोगभोगाईं

भुंजमाणा विहरंति, तए णं तस्स अज्जुणयस्स मालागारस्स अयमज्जत्थिए ४ (स०), एवं खलु अहं वालप्पभिइं चेव मोग्गरपाणिस्स भगवओ कळाकळिं जाव कप्पेमाणे विहरामि, तं जइ णं मोग्गरपा(णि)णी जक्खे इह संणिहिए होंते से णं किं मनं एयाह्वं आवइं पावेज्जमाणं पासंते?, तं नत्थि णं मोग्गरपा-णी जक्खे इह संणि-हिए, सुव्वत्तं तं एस कट्ठे, तए णं से मोग्गरपा-णी जक्खे अज्जुणयस्स मालागारस्स अयमेयारुवं अ-व्वत्थियं जाव विया(णि)णेत्ता अज्जुणयस्स मालागारस्स सरीरयं अणु-पविसइ २ ता तडतडतडस्स वंधाइं छिंदइ, [छिंदित्ता] तं पलसहस्सणिप्फणं अयोमयं मोग्गरं गेण्हइ २ ता ते इत्थिसत्तमे पुरिसे घाएइ, तए णं से अज्जुणए मालागारे मोग्गरपाणिणा जक्खेणं अण्णाइट्ठे समाणे रायगिहस्स न-गरस्स परिपेरंतेणं कळाकळिं छ इत्थिसत्तमे पुरिसे घाएमाणे विहरइ, (तए णं) रायगिहे नयरे सिंघाडग-जाव महापहपहेसु बहुजणो अण्णमण्णस्स एवमाइक्खइ ४-एवं खलु देवाणुप्पिया ! अज्जुणए मालागारे मोग्गरपाणिणा अण्णाइट्ठे समाणे राय-गिहे नयरे वहिया छ इत्थिसत्तमे पुरिसे घा(य)एमाणे विहरइ, तए णं से सेणिए राया इमीसे कहाए लद्धट्ठे समाणे कोडुंविय० सद्दावेइ २ ता एवं वयासी-एवं खलु देवाणुप्पिया ! अज्जुणए मालागारे जाव घाएमाणे जाव विह-रइ तं मा णं तुव्वे के-इ कट्ठस्स वा तणस्स वा पाणियस्स वा पुप्फफलाणं वा अट्ठाए सइरं निग्गच्छड मा णं तस्स सरीरस्स वावती भविस्सइत्तिकट्ठु दोच्चं-पि तच्चं-पि घोसणयं घोसेह २ ता खिप्पामेव ममेयं पच्चप्पिणह, तए णं ते कोडुं-विय[०] जाव पच्चप्पिणंति, तत्थ णं रायगिहे न-गरे सुदंसणे नामं सेट्ठी परि-वसइ अट्ठे०, तए णं से सुदंसणे समणोवासए यावि होत्था अभि(म)गय-जीवाजीवे जाव विहरइ, तेणं कालेणं तेणं समएणं समणे भगवं जाव समो-सडे [०] विहरइ, तए णं रायगिहे न-गरे सिंघाडग० बहुजणो अण्णमण्णस्स एवमाइक्खइ जाव किमंग पुण विपुलस्स अट्ठस्स गहणयाए [०] एवं तस्स सुदंसणस्स बहुजणस्स अंतिए ए-यं सोच्चा निसम्म अयं अ-व्वत्थिए ४-एवं खलु समणे जाव विहरइ तं गच्छामि णं [०] वंदामि०, एवं संपेहेइ २ ता जेणेव अम्मापियरो तेणेव उवागच्छइ २ ता करयल० अज्जलिं कट्ठु एवं वयासी-एवं खलु अम्मयाओ ! समणे जाव विहरइ तं गच्छामि णं समणं भगवं महावीरं वंदामि नमंसामि जाव पज्जुवासामि, तए णं (तं) सुदंसणं सेट्ठिं अम्मापियरो एवं वयासी-एवं खलु पुत्ता ! अज्जु(णे)णए मालागारे जाव घाएमाणे विहरइ, तं मा णं (तुमं) पुत्ता ! समणं भगवं महावीरं वंदए निग्गच्छाहि, मा णं

तव सरीरयस्स वावत्ती भविस्सइ, तुमणं इहगए चेव समणं भगवं महावीरं वंदाहि नमंसाहि, तए णं सुदंसणे सेट्ठी अम्मापि(तरो)यरं एवं वयासी-किण्णं(तुमं) अहं अम्मयाओ ! समणं भगवं महावीरं इहमागयं इह-पत्तं इह समोसढं इहगए चेव वंदिस्सामि(न०)?, तं गच्छामि णं अहं अम्मयाओ ! तुब्भेहिं अब्भणुण्णाए समाणे (स०) भगवं महावीरं वं(दा० जाव प०)दए, तए णं-सुदंस(ण)णं सेट्ठिं अम्मापियरो जाहे नो संचा(यं)एंति वट्ठहिं आघवणाहिं ४ जाव परू-वेत्तए ताहे एवं वयासी-अहासुहं०, तए णं से सुदंसणे अम्मापिईहिं अब्भणु-ण्णाए समाणे ण्हाए सुद्धप्पावेसाइं जाव सरीरे सयाओ गिहाओ पड्डिणिक्ख-मइ २ ता पायविहारचारेणं रायगिहं नगरं मज्झमज्झेणं निग्गच्छइ २ ता मोग्गरपाणिस्स जक्खस्स जक्खाययणस्स अदूरसामंतेणं जेणेव गुणसिलए उज्जाणे जेणेव समणे भगवं महावीरे तेणेव प(पा)हारेत्थ गमणाए, तए णं से मोग्गरपाणी जक्खे सुदंसणं समणोवासयं अदूरसामंतेणं वीईवयमाणं (२) पासइ २ ता आसुरते ५ तं पलसहस्सणिप्फण्णं अयोमयं मोग्गरं उल्लालेमाणे २ जेणेव सुदंसणे समणोवासए तेणेव पहारेत्थ गमणाए, तए णं से सुदंसणे समणोवासए मोग्गरपाणिं जक्खं एजमाणं पासइ २ ता अभीए अतत्थे अणुव्विग्गे अक्खुभिए अचलिए असंभंते वत्(थए)थंतेणं भूमिं पमज्जइ २ ता कर-यल० एवं वयासी-नमोऽत्थु णं अरहंताणं जाव संपत्ताणं नमोऽत्थु णं सम-णस्स जाव संपाविडकांमरस, पुर्व्वि (च) पि णं मए समणस्स भगवओ महा-वीरस्स अंतिए थूलए पाणाइवाए पच्चक्खाए जावज्जीवाए थूलए मुसावाए थूलए अदिण्णादाणे सदारसंतोसे कए जावज्जीवाए इच्छापरिमाणे कए जावज्जीवाए, तं इदाणिं-पि णं तरसेव अंतियं सव्वं पाणाइवायं पच्चक्खामि जावज्जीवाए (०) मुसावायं (०) अदत्तादाणं (०) मेहुणं (०) परिग्गहं पच्चक्खामि जावज्जीवाए सव्वं कोहं जाव मिच्छादंसणसल्लं पच्चक्खामि जावज्जीवाए सव्वं असणं पाणं खाइमं साइमं चउव्विहं-पि आहारं पच्चक्खामि जावज्जीवाए, जइ णं एत्तो उवसग्गाओ सुच्चि-स्सामि तो मे कप्पेइ पारेत्तए अह णो एत्तो उवसग्गाओ (न) मुच्चिस्सामि तओ मे तहा पच्चक्खाए चेवत्तिकट्ठु सागारं पडिमं पडिवज्जइ । तए णं से मोग्गर-पा-णी जक्खे तं पलसहस्सणिप्फण्णं अयोमयं मोग्गरं उल्लालेमाणे २ जेणेव सुदंसणे समणोवासए तेणेव उवाग(च्छ०)ए नो चेव णं संचाएइ सुदंसणं समणो-वासयं तेयसा समभिपडित्तए, तए णं से मोग्गरपाणी-जक्खे सुदंसणं समणो-वासयं सव्वओ समंताओ परिघोलेमाणे २ जाहे नो [चेव णं] संचाएइ सुदं-

सणं समणोवासयं तेयसा समभिपडित्तए ताहे सुदंसणस्स समणोवासयस्स
पुरओ सपक्खि सपडिदिसि ठिच्चा सुदंसणं समणोवासयं अणिमिसाए दिट्ठीए
सुच्चिरं निरिक्खइ २ ता अज्जुणयस्स मालागारस्स सरीरं विप्पज(हा)हइ २ ता
तं पलसहस्सणिप्फणं अयोमयं मोगगरं गहाय जामेव दिसं पाउब्भूए तामेव
दिसं पडिगए, तए णं से अज्जुणए मालागारे मोगगरपाणिणा जक्खेणं विप्प(ज०)-
मुक्के समाणे धसत्ति धरणियलंसि सव्वंगेहिं (सं)निवडिए, तए णं से सुदंसणे
समणोवासए निस्सवग्गमितिकट्ठु पडिमं पारेइ, तए णं से अज्जुणए मालागारे
त(ओ)तो मुहुत्तंतरेणं आसत्थे समाणे उट्ठेइ २ ता सुदंसणं समणोवासयं एवं
वयासी-तुब्भे णं देवाणुप्पिया ! के कहिं वा संपत्थिया ?, तए णं से सुदंसणे
समणोवासए अज्जुणयं मालागारं एवं वयासी-एवं खलु देवाणुप्पिया ! अहं
सुदंसणे नामं समणोवासए अभिगयजीवाजीवे गुणसिलए उज्जाणे समणं भगवं
महावीरं वंदए संपत्थिए, तए णं से अज्जुणए मालागारे सुदंसणं समणो-
वासयं एवं वयासी-तं इच्छामि णं देवाणुप्पिया ! अहमवि तुमए सद्धिं समणं
भगवं महावीरं वं(दे)दित्तए जाव पज्जुवा(से)सित्तए, अहासुहं देवाणुप्पिया !
मा पडिवंधं करेह, तए णं से सुदंसणे समणोवासए अज्जुणएणं मालागारेणं
सद्धिं जेणेव गुणसिलए उज्जाणे जेणेव समणे भगवं महावीरे तेणेव उवा-
गच्छइ २ ता अज्जुणएणं मालागारेणं सद्धिं समणं भगवं महावीरं तिक्खुत्तो
जाव पज्जुवासइ, तए णं [से] समणे भगवं महावीरे सुदंसणस्स समणोवास-
गस्स अज्जुणयस्स मालागारस्स तीसे य० धम्मकहा०, सुदंसणे पडिगए ।
तए णं से अज्जुणए [मालागारे] समणस्स भगवओ महावीरस्स अंति(ए)यं धम्मं
सोच्चा [निसम्म] हट्ठ० सद्वहामि णं भंते ! निग्गंथं पावयणं जाव अब्भुट्ठेमि,
अहासुहं०, तए णं से अज्जुणए मालागारे उत्तर० सयमेव पंचमुट्ठियं लोयं
करेइ [करित्ता] जाव अणगारे जाए जाव विहरइ, तए णं से अज्जुणए अण-
गारे जं चेव दिवसं मुंडे जाव पव्वइए तं चेव दिवसं समणं भगवं महावीरं
वंदइ नमसइ वं० २ ता इमं एयारुवं अभिग्गहं उ(ग्गे-ओग्गे)ग्गिण्हइ-कप्पइ मे
जावजीवाए छट्ठंछट्ठेणं अणिक्खित्तेणं तवोकम्मणेणं अप्पाणं भावेमाणस्स विहरित्तए-
त्तिकट्ठु अयमेयारुवं अभिग्गहं ओग्गेण्हइ २ ता जावजीवाए जाव विहरइ,
तए णं से अज्जुणए अणगारे छट्ठक्खमणपारणयंसि पढ(म)माए पोरिसीए सज्जायं
करेइ जहा गोयमसामी जाव अड(विहर)इ, तए णं तं अज्जुणयं अणगारं
रायगिहे नयरे उच्च[०] जाव अडमाणं वहवे इ(त्थिया)त्थीओ य पुरिसा य

डहरा य महल्ला य जुवाणा य एवं वयासी-इमेणं मे पिता-मा(र)रिए [माता
मारि-या] भाया० भगिणी० भज्जा० पु(त्त)ते० धूया० सुण्हा० इमेण मे अण्ण-
यरे सयणसंवंधिपरियणे मारिएत्तिकट्ठु अप्पेगइया अक्कोसंति अप्पेगइया हीलंति
निंदंति खिसंति गरिहंति तज्जेति तालेंति, तए णं से अज्जुणए अणगारे तेहिं
वहूहिं इत्थीहि य पुरिसेहि य डहरेहि य महल्लेहि य जुवाणएहि य आ-तो-
-सिज्जमाणे जाव तालेज्जमाणे तेसिं मणसा-वि अपउस्समाणे सम्मं सहइ
सम्मं खमइ तितिक्खइ अहियासेइ सम्मं सहमाणे० रायगिहे नयरे उच्चणीय-
मज्झिमकुलाइं अडमाणे जइ भत्तं ल-हइ तो पाणं न लभइ जइ पाणं तो भत्तं न
लभइ, तए णं से अज्जुणए (अ०) अदीणे अविमणे अकलुसे अणाइले अविसा(इं)दी
अपरितंतजोगी अडइ २ ता रायगिहाओ न-गराओ पडिणिक्खमइ २ ता
जेणेव गुणसिलए उज्जाणे जेणेव समणे भगवं महावीरे जहा गोयमसामी जाव
पडिंदसेइ २ ता समणेणं भगवया महावीरेणं अब्भणुण्णाए अमुच्छिए ४
विलमिव पण्णगभूएणं अप्पाणेणं तमाहारं आहारेइ, तए णं समणे भगवं
महावीरे अन्नया (क०) राय०, पडिणिक्खमइ २ ता वहि जण० विहरइ, तए णं से
अज्जुणए अणगारे तेणं ओ(उ)रालेणं (वि०) पयत्तेणं पग्गहिएणं महानुभागेणं तवो-
क्कम्मेणं अप्पाणं भावेमाणे बहुपुण्णे छम्मासे सासण्णपरियागं पाउणइ, [पाउ-
णित्ता] अद्धमासियाए संलेहणाए अप्पाणं झू[ञ्जु]सेइ [२ ता] तीसं भत्ताइं अणसणाए
छेदेइ २ ता जस्सट्ठाए कीरइ जाव सिद्धे ३ ॥ १३ ॥ (उ० च० अ० ए० ख० जं०)
तेणं कालेणं तेणं समएणं रायगिहे न-गरे गुणसिलए उज्जाणे (तत्थ णं) सेणिए
राया कासवे नामं गाहावई परिवसइ जहा म-काई, सोलस वासा परियाओ
विपुले सिद्धे ४ । एवं खेमए-उ-वि गाहावई, नवरं का(गं)यंदी नयरी सोलस
वासा परियाओ विपुले पव्वए सिद्धे ५ । एवं धिइहरे-वि गाहावई का(मं)यंदीए
नयरीए सोलस वासा परियाओ (जाव) विपुले सिद्धे ६ । एवं केलासे-वि गाहा-
वई नवरं सागेए नयरे बारस-वासाइं परियाओ विपुले सिद्धे ७, एवं हरि-
चंदणे-वि गाहावई साएए बारस-वासा परियाओ विपुले सिद्धे ८ । एवं वारत्तए-वि
गाहावई नवरं रायगिहे न-गरे बारस-वासा परियाओ विपुले सिद्धे ९ । एवं
सुदंसणे-वि गाहावई नवरं वाणिय[ग]गामे नयरे दूइपलासए उज्जाणे पंच-वासा
परियाओ विपुले सिद्धे १० । एवं पुण्णभदे-वि गाहावई वाणिय-गामे नयरे पंच-
वासा परियाओ विपुले सिद्धे ११ । एवं सुमणभदे-वि गाहावई सावत्थीए नयरीए
वहुवा(स-सा)साइं परि० सिद्धे १२ । एवं सुपइट्ठे-वि गाहावई सावत्थीए नयरीए

सत्तावीसं वासा परियाओ विपुले सिद्धे १३ । एवं मेहे वि गाहावई रायगिहे नयरे
वहूईं वासाईं परियाओ विपुले सिद्धे १४ ॥ १४ ॥ (उ० प० अ० ए० व० ए०
ख० जं०) तेणं कालेणं तेणं समएणं पोलासपुरे न-गरे सि-रिवणे उज्जाणे, तत्थ णं
पोलासपुरे नयरे विजये नामं राया होत्था, तस्स णं विजयस्स रण्णो सिरी-
नामं देवी होत्था वण्णओ, तस्स-णं विजयस्स रण्णो पुत्ते सिरीए देवीए
अत्तए अइमुत्ते नामं कुमारे होत्था सू-माले[०], तेणं कालेणं तेणं समएणं
समणे भगवं महावीरे जाव सि-रिवणे विहरइ, तेणं कालेणं तेणं समएणं
समणस्स भगवओ महावीरस्स जेठ्ठे अंतेवासी इंदभू(ई)ती जहा पण्णत्तीए जाव
पोलासपुरे नयरे उच्च-जाव अडइ, इमं च णं अइमुत्ते कुमारे ण्हाए सव्वा-
लंकारविभूत्तिए वहूहिं दारए[हिं]हि य दारिया-हि य डिंभएहि य डिंभियाहि
य कुमारएहि य कुमारियाहि य सद्धिं संपरिवुडे स(या)ओ गिहाओ पडिणिक्ख-
मइ २ ता जेणेव इंदद्धाणे तेणेव उवागए तेहिं वहूहिं दारएहि य ६ संपरि-
वुडे अभिरममाणे २ विहरइ, तए णं भगवं गोयमे पोलासपुरे न-यरे उच्च
जाव अडमाणे इंदद्धाणस्स अदूरसामंतेणं वीईवयइ, तए णं से अइमुत्ते कुमारे
भगवं गोयमं अदूरसामंतेणं वीईवयमाणं पासइ २ ता जेणेव भगवं गोयमे
तेणेव उवागए २ ता भगवं गोयमं एवं वयासी-के णं भंते ! तुव्मे ? किं
वा अडह ? , तए णं भगवं गोयमे अइमुत्तं कुमारं एवं वयासी-अम्हे णं
देवाणुप्पिया ! समणा निग्गंथा ईरियासमिया जाव वंभयारी उच्च-जाव अडामो,
तए णं अइमुत्ते कुमारे भगवं गोयमं एवं वयासी-एह णं भंते ! तुव्मे
(जेणेव) जा णं अहं तु(हं)व्मं भिक्खं दवावेमीतिकट्ठु भगवं गोयमं अंगु-
लीए गेण्हइ २ ता जेणेव सए गिहे तेणेव उवागए, तए णं सा सि-रिदेवी
भगवं गोयमं एजमाणं पासइ २ ता हट्ठ० आसणाओ अच्चुड्डेइ २ ता
जेणेव भगवं गोयमे तेणेव उवागया भगवं गोयमं तिकखुत्तो आयाहि-णपयाहि०
वंदइ० विउलेणं असण० जाव पडिविसजेइ, तए णं से अइमुत्ते कुमारे
भगवं गोयमं एवं वयासी-कहि णं भंते ! तुव्मे परिवसह ? , तए णं
[सिं] भगवं गोयमे अइमुत्तं कुमारं एवं वयासी-एवं खलु देवाणुप्पिया ! मम
धम्मायगिणं धम्मोवएसए भगवं महावीरे आङगरे जाव संपाविउकामे इहेव
पोलासपुरस्स न-गरस्स वहिया सिरिवणे उज्जाणे अहापडिह्वं उगहं उगि-
ट्ठित्ता सज्जमेणं जाव भावेमाणे विहरइ, तत्थ णं अम्हे परिवसामो, तए णं
से अइमुत्ते कुमारे भगवं गोयमं एवं वयासी-गच्छासि णं भंते ! अहं

तुब्भेहिं सद्धिं समणं भगवं महावीरं पायवंदए, अहासुहं०, तए णं से
 अइमुत्ते कुमारे भग(वं)वया गोयमेणं सद्धि जेणेव समणे (भ०) महावीरे तेणेव
 उवागच्छइ २ ता समणं भगवं महावीरं तिक्खुत्तो आयाहि-णपयाहिणं करेइ
 २ ता वंदइ जाव पज्जुवासइ, तए णं भगवं गोयमे जेणेव समणे भगवं
 महावीरे तेणेव उवागए जाव पडिदंसेइ २ ता संजमेणं तव० विहरइ, तए
 णं समणे भगवं महावीरे अइमुत्तस्स कुमारस्स तीसे य धम्मकहा, तए णं से
 अइमुत्ते (कु०) समणस्स भगवओ महावीरस्स अंतिए धम्मं सोच्चा निसम्म हट्ठ०
 जं नवरं देवाणुप्पिया ! अम्मापियरो आपुच्छामि, तए णं अहं देवाणुप्पियाणं
 अंतिए जाव पव्वयामि, अहासुहं देवाणुप्पिया ! मा पडिवंधं [करेह], तए
 णं से अइमुत्ते [कुमारे] जेणेव अम्मापियरो तेणेव उवागए जाव पव्वइत्तए,
 अइमुत्तं कुमारं अम्मापियरो एवं वयासी-बाले-सि जा(ता)व तुमं पुत्ता !
 असंबुद्धे-सि० किं णं तुमं जा(णा)णसि धम्मं?, तए णं से अइमुत्ते कुमारे
 अम्मापियरो एवं वयासी-एवं खलु (अहं) अम्मयाओ ! जं चेव जाणामि तं चेव
 न जा(या)णामि जं चेव न जा-णामि तं चेव जाणामि, तए णं तं अइमुत्तं
 कुमारं अम्मापियरो एवं वयासी-कहं णं तुमं पुत्ता ! जं चेव जा-णसि जाव
 तं चेव जा-णसि?, तए णं से अइमुत्ते कुमारे अम्मापियरो एवं वयासी-
 जाणामि अहं अम्मयाओ ! जहा जाएणं अवस्समरियव्वं न जाणामि अहं
 अम्मयाओ ! काहे वा कहिं वा कहं वा केचिरेण वा?, न जाणामि-अम्म-
 याओ ! केहि कम्माययणेहिं जीवा नेरइयतिरिक्खजोणिमणुस्सदेवेषु उववज्जंति,
 जाणामि णं अम्मयाओ ! जहा सएहि कम्माययणेहिं जीवा नेरइय[०] जाव
 उववज्जंति, एवं खलु अहं अम्मयाओ ! जं चेव जाणामि तं चेव न जा-णामि
 जं चेव न जा-णामि तं चेव जाणामि, इच्छामि णं अम्मयाओ ! तुब्भेहि
 अव्वमणुण्णाए जाव पव्वइत्तए, तए णं तं अइमुत्तं कुमारं अम्मापियरो जाहे नो
 संचाएंति वट्ठहि आघव० तं इच्छामो ते जाया ! एगदिवसमवि रा(ज)यसिरिं पासेत्तए,
 तए णं से अइमुत्ते कुमारे अम्मापिउवयणमणुयत्तमाणे तुसिणीए संचिट्ठइ अभिसेओ
 जहा महावलस्स निक्खमणं जाव सामाइयमाइयाइं अहिज्जइ वट्ठइ वासाइं सामण-
 परियागं गुणरयणं जाव विपुले सिद्धे १५ । (उ० सो० अ० ए० ख० जं०)
 तेणं कालेणं तेणं समएणं वा(बा)णारसीए नयरीए काममहावणे उज्जाणे, तत्थ
 णं वाणारसी(इ)ए अलक्खे नामं राया होत्था, तेणं कालेणं तेणं समएणं
 समणे जाव विहरइ परिसा निग्गया, तए णं [से] अलक्खे राया डमीसे कहाए

लद्धे (स०) हट्टुट्ट० जहा कूणिए जाव पज्जुवासइ धम्मकहा०, तए णं से अलक्खे राया समणस्स भगवओ महावीरस्स अंतिए जहा उदायणे तहा निक्खंते नवरं जेट्टुपुत्तं रज्जे अहिसिचइ एक्कारस अंगाईं वहु वासा परियाओ जाव विपुले सिद्धे १६ । एवं जंवू ! समणेणं जाव छट्ट-स्स वग्गस्स अयमट्ठे पण्णत्ते ॥ १५ ॥

[सत्तमो वग्गो]

जइ णं भंते ! सत्तमस्स वग्गस्स उक्खेवओ[०] जाव तेरस अज्झयणा पण्णत्ता तं०—‘नंदा तह नंद(मती)वई नं(दो)दुत्तर नं(द)दिसेणिया चेव । म(हया)रुय सुमरु-य महमरु-य मरु(हे)देवा य अट्ठमा ॥ १ ॥ भद्दा य सुभद्दा य सुजाया सुमणा(तिया)वि य । भूयदि(त्ता)ण्णा य वो(द्ध)धव्वा सेणिय-भज्जा(ण)णं नामाईं ॥ २ ॥’ जइ णं भंते ! ० तेरस अज्झयणा पण्णत्ता पढमस्स णं भंते ! अज्झयणस्स समणेणं० के अट्ठे पण्णत्ते ? एवं खलु जंवू ! तेणं कालेणं तेणं समएणं रायगिहे नयरे गुणसिलए उज्जाणे सेणिए राया (व०) तस्स णं सेणियस्स रण्णो नंदा नामं देवी होत्था वण्णओ, सामी समोसट्ठे परिसा निग्गया, तए णं सा नंदा-देवी इमीसे कहाए लद्धट्टा (स० जाव हट्ट०) कोडुंवियपुरिसे सद्दावेइ २ ता जाणं जहा पउमावई जाव एक्कारस अंगाईं अहिज्जिता वीसं वासाईं परियाओ जाव सिद्धा । एवं तेरस-वि देवीओ नंदागमेण नेयव्वाओ (णि०) ॥ सत्तमो वग्गो समत्तो ॥ १६ ॥

[अट्ठमो वग्गो]

जइ णं भंते ! अट्ठमस्स वग्गस्स उक्खेवओ-जाव दस अज्झयणा पण्णत्ता, तं०—काली सुकाली महाकाली कण्हा सुकण्हा महाकण्हा । वीरकण्हा य वो-धव्वा रामकण्हा तहेव य ॥ १ ॥ पिउसेणकण्हा नवमी दसमी महासेणकण्हा य । जइ० दस अज्झयणा[०] पढमस्स (णं भं०) अज्झयणस्स (स० जाव सं०) के अट्ठे पण्णत्ते ? एवं खलु जंवू ! तेणं कालेणं तेणं समएणं चंपा नामं न-गरी होत्था पुण्णभद्दे उज्जाणे, तत्थ णं चंपाए नयरीए कोणिए राया वण्णओ, तत्थ णं चंपाए नयरीए सेणियस्स रण्णो भज्जा कोणियस्स रण्णो चुल्लमाउया काली नामं देवी होत्था वण्णओ जहा नंदा जाव सामाइयमाइयाईं एक्कारस अंगाईं अहिज्जइ, वहुहि चउत्थ० जाव अप्पाणं भावेमाणी विहरइ, तए णं सा काली (अज्जा) अण्णया कयाइ जेणेव अज्जचंदणा अज्जा तेणेव उवागया २ ता एवं वयासी-इच्छासि णं अज्जाओ ! तुब्भेहि अब्भणुण्णाया समा-णा रयणावलं तवं उवसंपजेत्ताणं विहरेत्तए, अहासुहं०, तए णं सा काली अज्जा अज्जचंदणाए अब्भणुण्णाया

समा-णा रयणावलिं (त०) उवसंपज्जिता-णं विहरइ तं०-चउत्थं करेइ चउत्थं करेत्ता
सव्वकामगुणियं पारेइ सव्वकामगुणियं पारेत्ता छट्ठं करेइ छट्ठं करेत्ता सव्व-
कामगुणियं पारेइ २ अट्ठमं करेइ २ सव्वकाम० २ अट्ठ छट्ठाईं करेइ २
सव्वकाम० २ चउत्थं करेइ २ सव्वकाम० २ छट्ठं करेइ २ सव्वकाम० २
अट्ठमं करेइ २ सव्वकाम० २ दसमं करेइ २ सव्वकाम० २ दुवालसमं
करेइ २ सव्वकाम० २ चोद्दसमं० २ सव्व० २ सोलसमं० २ सव्व० २
अट्ठारसमं० २ सव्व० २ वीसइमं० २ सव्व० २ बावीसइमं० २ सव्व० २
चउवीसइमं० २ सव्व० २ छव्वीसइमं० २ सव्व० २ अट्ठावीसइमं० २
सव्व० २ तीसइमं० २ सव्व० २ बत्तीसइमं० २ सव्व० २ चोत्तीसइमं०
२ सव्व० २ चोत्तीसं छट्ठाईं करेइ २ सव्व० २ चोत्ती(सइमं)सं करेइ २ सव्व० २
वत्ती-सं० २ सव्व० २ तीसं० २ सव्व० २ अट्ठावी-सं० २ सव्व० २ छव्वी-सं०
२ सव्व० २ चउवी-सं० २ सव्व० २ बावी-सं० २ सव्व० २ वी-सं० २
सव्व० २ अट्ठार(समं)सं० २ सव्व० २ सोलसमं० २ सव्व० २ चोद्दसमं० २
सव्व० २ वारसमं० २ सव्व० २ दसमं० २ सव्व० २ अट्ठमं० २ सव्व०
२ छट्ठं० २ सव्व० २ चउत्थं० २ सव्व० २ अट्ठ छट्ठाईं करेइ २ सव्व०
२ अट्ठमं करेइ २ सव्व० २ छट्ठं करेइ २ सव्व० २ चउत्थं० २ सव्व०
एवं खलु एसा रयणावलीए तवोकम्मस्स पढमा परिवाडी एगेणं संवच्छरेणं
तिहिं मासेहिं बावीसाए य अहोरत्तेहिं अहासुत्ता जाव आराहिया भवइ,
तयाणंतरे च णं दोच्चाए परिवाडीए चउत्थं करेइ २ विगइवज्जं पारेइ २
छट्ठं करेइ २ विगइवज्जं पारेइ (०) एवं जहा पढमाए-वि नवरं सव्वपारणए विगइ-
वज्जं पारेइ जाव आराहिया भवइ, तयाणंतरे च णं तच्चाए परिवाडीए चउत्थं
करेइ चउत्थं करेत्ता अलेवाडं पारेइ सेसं तहेव, एवं चउत्था परिवाडी नवरं
सव्वपारणए आयंविं पारेइ सेसं [तहेव] तं चेव, -‘पढमंमि सव्वकामं पार-
णयं विइयए विगइवज्जं । तइयंमि अलेवाडं आयंवि(लमो)लं चउत्थंमि ॥ १ ॥’
तए णं सा काली अज्जा रयणावली-तवोकम्मं पंचहिं संवच्छरेहिं दोहि य
मासेहिं अट्ठावीसाए य दिवसेहिं अहासुत्तं जाव आराहेत्ता जेणेव अज्जचंदणा
अज्जा तेणेव उवा० २ ता अज्जचंदणं अज्जं वंदइ नमंसइ वं० २ ता वट्ठहिं
चउत्थ[०] जाव अप्पाणं भावेमाणी विहरइ, तए णं सा काली अज्जा तेणं
उ(ओ)रालेणं जाव धमणिसंतया जाया यावि होत्था से जहा इंगाल० जाव
सुहुयहुयासणे इव भासरासिपलिच्छण्णा तवेणं तेएणं तवतेयसिरीए अ-तीव
७५ सुत्ता०

उवसो-हेमाणी चिट्ठइ, तए णं तीसे कालीए अज्जाए अण्णया कयाइ पुव्वरत्ता-
 वरत्तकाले अयम-ब्भत्थिए जहा खंदयस्स चिंता जहा जाव अत्थि उट्ठा० ताव
 ता(व) मे सेयं कल्लं जाव जलंते अज्जचंदणं अज्जं आपुच्छिता अज्जचंदणाए
 अज्जाए अब्भणुण्णायाए समाणीए संलेहणाइस्सणाइस्सियाए भत्तपाणपडियाइक्खियाए
 पायोवगयाए कालं अणवकंखमाणीए विहरेत्तएत्तिकट्ठु एवं संपेहेइ २ ता कल्लं
 जेणेव अज्जचंदणा अज्जा तेणेव उवागच्छइ २ ता अज्जचंदणं (अज्जं) वंदइ नमंसइ
 वं० २ ता एवं वयासी-इच्छामि णं अज्जो ! तुब्भेहिं अब्भणुण्णाया समाणी
 संलेहणा० जाव विहरेत्तए, अहासुहं०, (तओ) काली अज्जा अज्जचंदणाए अब्भणु-
 ण्णाया समाणी संलेहणा० जाव विहरइ, सा काली अज्जा अज्जचंदणाए अंतिए
 सामाइयमाइयाइं एकारस अंगां अहिज्जिता बहुपडिपुण्णाइं अट्ठ संवच्छराइं
 सामण्णपरियागं पाउणित्ता मासियाए संलेहणाए अ(प्पा)त्ताणं झुसेत्ता सट्ठिं भत्ताइं
 अणसणाए छे(दे)दिता जस्सट्ठाए कीरइ जाव चरिमुस्सासनीसासेहिं सिद्धा ५ ॥
 निक्खे(वो)वओ॥ [पढमं] अज्जयणं [समत्तं] ॥ १७ ॥ (उ० वि० अ० ए० ख० जं०)
 तेणं कालेणं तेणं समएणं चंपा-ना(म)मं नयरी पुण्णभेइ उज्जाणे कोणिए राया, तत्थ
 णं सेणियस्स रण्णो भज्जा कोणियस्स रण्णो चुल्लमाउया सुकाली-ना-मं देवी होत्था
 जहा काली तहा सुकाली-वि निक्खंता जाव बहूहिं चउत्थ-जाव भावेमाणी
 विहरइ, तए णं सा सुकाली अज्जा अण्णया कयाइ जेणेव अज्जचंदणा अज्जा
 जाव इच्छामि णं अज्जो ! तुब्भेहिं अब्भणुण्णाया समाणी कणगावली-तवोकम्मं
 उवसंपज्जित्ताणं विहरेत्तए, एवं जहा रयणावली तहा कणगावली-वि, नवरं तिष्ठ
 ठाणेषु अट्ठमाइं करेइ जहा रयणावलीए छट्ठाइं एक्काए परिवाडीए संवच्छरो पंच
 मासा वारस य अहोरत्ता चउण्हं पंच वरिसा नव मासा अट्ठारस दिवसा
 सेसं तहेव, नव वासा परियाओ जाव सिद्धा ॥ १८ ॥ एवं महाकाली-वि,
 नवरं खुट्ठागं सीहनिक्कीलियं तवोकम्मं उवसंपज्जित्ताणं विहरइ, तं०-चउत्थं
 करेइ २ सव्वकामगुणियं पारेइ २ छट्ठं करेइ २ सव्वकामगुणियं पारेइ
 २ चउत्थं करेइ २ सव्वका० २ अट्ठमं करेइ २ सव्वका० २ छट्ठं०
 २ सव्व० २ दसमं० २ सव्व० २ अट्ठमं० २ सव्व० २ दुवाल-सं० २ सव्व०
 २ दसमं० २ सव्व० २ चोद्द-सं० २ सव्व० २ (वारसमं) दुवाल-सं० २ सव्व०
 २ सोलसमं० २ सव्व० २ चोद्द-सं० २ सव्व० २ अट्ठार-सं० २ सव्व०
 २ सोलसमं० २ सव्व० २ वीस० २ सव्व० २ अट्ठार० २ सव्व० २
 वीस० २ सव्व० २ सोलसमं० २ सव्व० २ अट्ठार० २ सव्व० २ चोद्द-सं०

२ सव्व० २ सोलसमं० २ सव्व० २-दुवालसं० २ सव्व० २ चोह-सं०
 २ सव्व० २ दसमं० २ सव्व० २-दुवालसं० २ सव्व० २ अट्ठमं० २
 सव्व० २ दसमं० २ सव्व० २ छट्ठं० २ सव्व० २ अट्ठमं० २ सव्व०
 २ चउत्थं० २ सव्व० २ छट्ठं० २ सव्व० २ चउत्थं० २ सव्वकामगुणियं
 पारेइ-तहेव चत्तारि परिवाडीओ, एक्काए परिवाडीए छम्मासा सत्त य दिवसा,
 चउण्हं दो वरिसा अट्ठावीसा य दिवसा जाव सिद्धा ॥ १९ ॥ एवं कण्हा-वि
 नवरं महालयं सीहणिक्कीलियं तवोकम्मं जहेव खुड्ढागं नवरं चोत्तीसइमं जाव
 नेयव्वं तहेव ऊसारेयव्वं, एक्काए वरिसं छम्मासा अट्ठारस य दिवसा, चउण्हं
 छव्वरिसा दो मासा वारस य अहोरत्ता, सेसं जहा कालीए जाव सिद्धा ॥ २० ॥
 एवं सुकण्हा-वि नवरं सत्तसत्तमियं भिक्खुपडिमं उवसंपज्जित्ताणं विहरइ, पढमे
 सत्तए एक्केकं भोयणस्स दत्तिं पडिगाहेइ एक्केकं पाणयस्स, दोच्चे सत्तए दो
 दो भोयणस्स दो दो पाणयस्स पडिगाहेइ, तच्चे सत्तए तिणिणं चउत्थे०
 पंचमे० छ० सत्तमे सत्तए सत्त दत्तीओ भोयणस्स पडि(ग)गाहेइ सत्त पाण-
 यस्स, एवं खलु एयं सत्तसत्तमियं भिक्खुपडिमं एगूणपण्णाए रा(इ)तिदिएहिं एगेण
 य छण्णउएणं भिक्खासएणं अहासुत्ता जाव आराहेत्ता जेणेव अज्जचंदणा
 अज्जा तेणेव उवागया [२ ता] अज्जचंदणं अज्जं वंदइ नमंसइ वं० २ ता
 एवं वयासी-इच्छामि णं अज्जाओ ! तुव्मेहिं अब्भणुण्णाया समाणी अट्ठट्ठमियं
 भिक्खुपडिमं उवसंपज्जित्ताणं विहरेत्तए, अहासुहं०, तए णं सा सुकण्हा अज्जा
 भिक्खुपडिमं उवसंपज्जित्ताणं विहरेत्तए, अहासुहं०, तए णं सा सुकण्हा अज्जा
 अज्जचंदणाए अब्भणुण्णाया समाणी अट्ठट्ठमियं भिक्खुपडिमं उवसंपज्जित्ताणं
 विहरइ, पढमे अट्ठए एक्केकं भोयणस्स दत्तिं पडिगाहेइ एक्केकं पाण(ग)यस्स
 जाव अट्ठमे अट्ठए अट्ठट्ठ भोयणस्स (दत्तिं) पडिगाहेइ अट्ठ पाण-यस्स, एवं खलु
 एयं अट्ठट्ठमियं भिक्खुपडिमं चउसट्ठीए रा-तिदिएहिं दोहि य अट्ठासीएहिं
 भिक्खासएहिं अहासु(त्तं)ता जाव नवनवमियं भिक्खुपडिमं उवसंपज्जित्ता-णं विह-
 रइ, पढमे नवए एक्केकं भोयणस्स दत्तिं पडिगाहेइ (य) एक्केकं पाणयस्स जाव
 नवमे नवए नव नव द० भो० पडि०-नव २ पाणयस्स, एवं खलु नवनव-
 मियं भिक्खुपडिमं एकासी-ईराइदिएहिं चउहिं पंचोत्तरेहिं भिक्खासएहिं अहा-
 सुत्ता जाव दसदसमियं भिक्खुपडिमं उवसंपज्जित्ताणं विहरइ, पढमे दसए एक्केकं
 भोयणस्स दत्तिं पडिगाहेइ-एक्केकं पाणयस्स जाव दसमे दसए दस २ भोयणस्स
 द(त्तिं)त्ती[ओ] पडि-गाहेइ दस २ पाण[य]स्स०, एवं खलु एयं दसदसमियं
 भिक्खुपडिमं एकेणं राइंदियसएणं अद्धछट्ठेहिं भिक्खासएहिं अहासुत्तं जाव

आराहेइ २ ता बहुहिं चउत्थ जाव मासद्धमासविविहतवोकम्मेहिं अप्पाणं भावेमाणी
विहरइ, तए णं सा सुकण्हा अज्जा तेणं उं-रालेणं जाव सिद्धा ॥ निक्खे-वओ ॥
पंचम(अ)ज्झय(णा)णं ॥ २१ ॥ एवं महाकण्हा-वि नवरं खुड्ढागं सव्वओभइं
पडिमं उवसंपज्जिताणं विहरइ, (तं०-) चउत्थं करेइ २ सव्वकामगुणियं
पारेइ २ छट्ठं करेइ २ सव्व० २ अट्ठमं० २ सव्व० २ दसमं० २ सव्व०
२ दुवालसमं० २ सव्व० २ अट्ठमं० २ सव्व० २ दसमं० २ सव्व० २
दुवालसमं० २ सव्व० २ चउत्थं० २ सव्व० २ छट्ठं० २ सव्व० २ दुवाल-सं०
२ सव्व० २ चउत्थं० २ सव्व० २ छट्ठं० २ सव्व० २ अट्ठमं० २ सव्व०
२ दसमं० २ सव्व० २ छट्ठं० २ सव्व० २ अट्ठमं० २ सव्व० २ दसमं० २
सव्व० २ दुवाल-सं० २ सव्व० २ चउत्थं० २ सव्व० २ दसमं० २ सव्व० २
दुवालसमं० २ सव्व० २ चउत्थं० २ सव्व० २ छट्ठं० २ सव्व० २ अट्ठमं०
२ सव्व० एवं खलु एवं खुड्ढागसव्वओभइस्स तवोकम्मस्स पढमं परिवाडिं
तिहिं मासेहिं दसहिं दिवसेहिं अहासुत्तं जाव आरा(हे)हिता दोच्चाए परिवाडीए
चउत्थं करेइ २ विगइवज्जं पारेइ २ जहा रयणावलीए तहा एत्थ-वि चत्तारि
परिवाडीओ पारणा तहेव, चउण्हं कालो संवच्छरो मासो दस य दिवसा सेसं तहेव
जाव सिद्धा ॥ निक्खे-वओ ॥ [छट्ठं] अज्झयणं ॥ २२ ॥ एवं वीरकण्हा-वि नवरं
महालयं सव्वओभइं तवोकम्मं उवसंपज्जिता-णं विहरइ, तं०-चउत्थं करेइ
२ सव्व० २ छट्ठं० २ सव्व० २ अट्ठमं० २ सव्व० २ दसमं० २ सव्व०
२ दुवालसमं० २ सव्व० २ चोइ(चउद)सं० २ सव्व० २ सोल(सं)समं० २
सव्व० २ (प० लया) दसमं० २ सव्व० २ दुवालसमं० २ सव्व० २ चोइ-सं०
२ सव्व० २ सोल-समं० २ सव्व० २ चउत्थं० २ सव्व० २ छट्ठं० २
सव्व० २ अट्ठमं० २ सव्व० २ (वि० ल०) सोल-समं० २ सव्व० २ चउत्थं० २
सव्व० २ छट्ठं० २ सव्व० २ अट्ठमं० २ सव्व० २ दसमं० २ सव्व० २ दुवाल०
२ सव्व० २ चोइ-सं० २ सव्व० २ (ति० ल०) अट्ठमं० २ सव्व० २ दसमं०
२ सव्व० २ दुवाल-सं० २ सव्व० २ चोइसमं० २ सव्व० २ सोलसमं० २
सव्व० २ चउत्थं० २ सव्व० २ छट्ठं० २ सव्व० २ (च० ल०) चोइ-सं० २ सव्व०
२ सोलसमं० २ सव्व० २ चउत्थं० २ सव्व० २ छट्ठं० २ सव्व० २
अट्ठमं० २ सव्व० २ दसमं० २ सव्व० २ दुवाल० २ सव्व० २ (पं० ल०) छट्ठं०
२ सव्व० २ अट्ठमं० २ सव्व० २ दसमं० २ सव्व० २ दुवाल० २ सव्व०
२ चोइ-सं० २ सव्व० २ सोलसमं० २ सव्व० २ चउत्थं० २ सव्व० २ (छ० ल०)

दुवाल० २ सव्व० २ चोद्दसं० २ सव्व० २ सोलसमं० २ सव्व० २
चउत्थं० २ सव्व० २ छट्ठं० २ सव्व० २ अट्ठमं० २ सव्व० २ दसमं०
२ सव्व० (स० ल०) एक्केकाए लयाए अट्ठ मासा पंच य दिवसा चउण्हं दो वासा
अट्ठ मासा वीसं दिवसा सेसं तहेव जाव सिद्धा ॥ २३ ॥ एवं रामकण्हा-वि नवरं
भद्दोत्तरपडिमं उवसंपज्जिताणं विहरइ तं०-दुवालसमं करेइ २ सव्व० २ चोद्दसमं०
२ सव्व० २ सोलसमं० २ सव्व० २ अट्ठारसमं० २ सव्व० २ वीसइमं० २
सव्व० २ सोलसमं० २ सव्व० २ अट्ठारसमं० २ सव्व० २ वीसइमं० २ सव्व०
२ दुवालसमं० २ सव्व० २ चोद्दसमं० २ सव्व० २ वीसइमं० २ सव्व० २
दुवाल-सं० २ सव्व० २ चोद्दसमं० २ सव्व० २ सोलसमं० २ सव्व० २
अट्ठार-समं० २ सव्व० २ चोद्दसमं० २ सव्व० २ सोलसमं० २ सव्व० २
अट्ठारसमं० २ सव्व० २ वीसइमं० २ सव्व० २ दुवालसमं० २ सव्व० २
अट्ठारसमं० २ सव्व० २ वीसइमं० २ सव्व० २ दुवालसमं० २ सव्व० २
चोद्दसमं० २ सव्व० २ सोलसमं० २ सव्व० एक्काए कालो छम्मासा वीस
य दिवसा, चउण्हं कालो दो वरिसा दो मासा वीस य दिवसा, सेसं तहेव
जहा काली जाव सिद्धा ॥ २४ ॥ एवं पिउसेणकण्हा-वि नवरं मुत्तावलीतवोक्कमं
उवसंपज्जिताणं विहरइ, तं०-चउत्थं करेइ २ सव्व० २ छट्ठं० २ सव्व० २
चउत्थं० २ सव्व० २ अट्ठमं० २ सव्व० २ चउत्थं० २ सव्व० २ दसमं० २
सव्व० २ चउत्थं० २ सव्व० २ दुवाल० २ सव्व० २ चउत्थं० २ सव्व०
२ चोद्दसमं० २ सव्व० २ चउत्थं० २ सव्व० २ सोलसमं० २ सव्व० २
चउत्थं० २ सव्व० २ अट्ठार-समं० २ सव्व० २ चउत्थं० २ सव्व० २
वीसइमं० २ सव्व० २ चउत्थं० २ सव्व० २ बावीसइमं० २ सव्व० २
चउत्थं० २ सव्व० २ चउवीसइमं० २ सव्व० २ चउत्थं० २ सव्व० २
छव्वीसइमं० २ सव्व० २ चउत्थं० २ सव्व० २ अट्ठावीसं० २ सव्व० २
चउत्थं० २ सव्व० २ तीसइमं० २ सव्व० २ चउत्थं० २ सव्व० २ बत्तीसइमं०
२ सव्व० २ चउत्थं० २ सव्व० २ चोत्तीसइमं०[सव्व०] (२ ता च० २ ता
स० २ ता व० २ ता) एवं तहेव ओसारेइ जाव (चउत्थं करेइ) चउत्थं
क(रे-इ)रित्ता सव्वकामगुणियं पारेइ, एक्काए कालो एक्कारस मासा पणरस
य दिवसा चउण्हं तिणिं वरिसा दस य मासा सेसं जाव सिद्धा ॥ २५ ॥ एवं
महासेणकण्हा-वि, नवरं आयंबिलवड्डुमाणं तवोक्कमं उवसंपज्जिताणं विहरइ,
तं०-आयंबिलं करेइ २ चउत्थं करेइ २ बे आयंबिलाईं करेइ २ चउत्थं

करेइ २ तिण्णि आयंविलाइं करेइ २ चउत्थं० २ चत्तारि० २ चउत्थं० २ पंच०
 २ चउत्थं० २ छ० २ चउत्थं० २ एवं एकोत्तरियाए वड्ढीए आयंविलाइं वड्ढंति
 चउत्थंतरियाइं जाव आयंविलसयं करेइ २ चउत्थं करेइ, तए णं सा
 महासेणकण्हा अज्जा आयंविलवड्ढमाणं तवोकम्मं चोद्दसहिं वासेहिं तिहि य मासेहिं
 वीसहि य अहोरत्तेहिं अहासुत्तं जाव सम्मं काएणं फासेइ जाव आरा-हिता
 जेणेव अज्जचंदणा अज्जा तेणेव उवा० २ ता (अ० अ०) वंदइ नमंसइ वंदित्ता
 नमंसित्ता वड्ढहिं चउ(त्थेहिं)त्थ जाव भावेमाणी विहरइ, तए णं सा महा-
 सेणकण्हा अज्जा तेणं उ-रालेणं जाव उवसोभेमाणी चिट्ठइ, तए णं तीसे
 म(ह)हासेणकण्हाए अज्जाए अण्णया कयाइं पुव्वरत्तावरत्तकाले चित्ता जहा खंद-
 यस्स जाव अज्जचंदणं(-आ)पुच्छइ जाव संलेहणा[०] कालं अणवकंखमाणी
 विहरइ, तए णं सा महासेणकण्हा अज्जा अज्जचंदणाए अज्जाए अंतिए सामाइयाइं
 एक्कारस अंगाईं अहिजित्ता बहुपडिपुण्णाइं सत्तरस वासाइं परियायं पालइत्ता
 मासियाए संलेहणाए अप्पाणं झू-सित्ता सट्ठि भत्ताइं अणसणाए छे-दित्ता
 जस्सट्ठाए कीरइ जाव तमट्ठं आराहेइ [आराहिता] चरिमउस्सासणीसासेहिं
 सिद्धा बुद्धा [०] । अट्ठ य वासा आ(दी)ई एक्कोत्त(रि)रियाए जाव सत्तरस । एसो
 खलु परियाओ सेणियभज्जा-णं नायव्वो ॥ १ ॥ एवं खलु जं(वु)वू ! समणेणं
 (भगवया महावीरेणं आ-दिगरेणं) जाव संपत्तेणं अट्ठमस्स अंगस्स अंतगड-
 दसाणं अयमट्ठे पण्णत्ते (०) ॥ अंगं स(सं)मत्तं ॥ २६ ॥ अंतगडदसाणं अंगस्स
 एगो सुयखंधो अट्ठ-वग्गा अट्ठसु चेव दिवसेसु उद्दि[स्सि]सिज्जंति, तत्थ पढमविइय-
 वग्गे दस दस उद्देसगा तइयवग्गे तेरस उद्देसगा चउत्थपंचमवग्गे दस दस
 उद्देस(या)गा छट्ठवग्गे सोलस उद्देसगा सत्तमवग्गे तेरस उद्देसगा अट्ठमवग्गे दस
 उद्देसगा सेसं जहा नायाधम्मकहाणं ॥ २७ ॥



णमाऽत्यु णं समणस्स भगवओ णायपुत्तमहावीरस्स

सुत्तागमे

तत्थ णं

अणुत्तरोववाइयदसाओ

[पढमो वग्गो]

तेणं कालेणं तेणं समएणं रायगिहे (णा०) [नयरे] (हो० से० ना० रा० हो०
चे० दे० गु० उ० व० ते० का० ते० स० रा० न०) अज्जसुहम्म(णा० थे०)स्स
समोस(रिए)रणं परिसा निग्गया जाव जंबू (जाव) पज्जुवासइ० एवं वयासी-जइ
णं भंते । समणेणं जाव संपत्तेणं अट्ठमस्स अंगस्स अंतगडदसाणं अयमट्ठे पण्णत्ते
नवमस्स णं भंते ! अंगस्स अणुत्तरोववाइयदसाणं समणेणं जाव संपत्तेणं के अट्ठे
पण्णत्ते ?, (तेणं०) तए णं से सुहम्मे अणगारे जं(बू)बुं अणगारं एवं वयासी-एवं
खलु जम्बू ! समणेणं जाव संपत्तेणं नवमस्स अंगस्स अणुत्तरोववाइयदसाणं तिणिं
वग्गा पण्णत्ता, जइ णं भंते ! समणेणं जाव संपत्तेणं नवमस्स अंगस्स अणुत्तरो-
ववाइयदसाणं (ति०) तओ वग्गा पण्णत्ता पढमस्स णं भंते ! वग्गस्स अणुत्तरोववा-
इयदसाणं समणेणं जाव संपत्तेणं (के) कइ अज्झयणा पण्णत्ता ? एवं खलु जंबू ! सम-
णेणं जाव संपत्तेणं अणुत्तरोववाइयदसाणं पढमस्स वग्गस्स दस अज्झयणा पण्णत्ता,
तं०-(गा०-)-जालिमयालिउव(मा-जा-लि)याली पुरिससेणे य वारिसेणे य दीहदंते
य लट्ठदंते य वे(वि)हल्ले वेहा[य]से अभए इ य कुमारे ॥ जइ णं भंते ! समणेणं जाव
संपत्तेणं पढमस्स वग्गस्स दस अज्झयणा पण्णत्ता पढमस्स णं भंते ! अज्झयणस्स
अणुत्तरोववाइयदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! तेणं
कालेणं तेणं समएणं रायगिहे नयरे रिद्धत्थिमियसमिद्धे गुणसिलए उज्जाणे सेणिए
राया धा(र)रिणी-देवी सी(ह)हो सुमि(णं)णे (पा० प० जाव) जाली-कुमा(रिजाए)रो
जहा मेहो (जाव) अट्ठट्ठओ दाओ जाव उप्पि पासाय० विहरइ, (तें० का० ते० स०
स० भ० म० जाव) सामी समोसढे सेणिओ निग्गओ जहा मेहो तहा जाली-वि
निग्गओ तहेव निक्खंतो जहा मेहो, एक्कारस अंगाई अहिज्जइ, गुणरयणं तवोकम्मं
[जहा खंदयस्स] एवं जा चेव खंद(य)ग[स्स] वत्तव्वया सा चेव चित्तणा आपुच्छणा
थेरेहिं सद्धिं वि(पु)उलं तहेव दु(रु)रुहइ, नवरं सोलस वासाई सामणपरियाणं

पाउणिता कालमासे कालं किच्चा उड्डं चंदिम० सोहम्मीसाण जाव आरणञ्चुए कप्पे नव-य-गेवे(जे)ज(य)विमाणपत्थडे उड्डं दूरं वी(इ)ईवइत्ता विजयविमाणे देवत्ताए उववण्णे, त(या)ए णं (ते) थेरा भगवंतो जालिं अणगारं कालगयं जा(णे)णित्ता परिणिव्वाणवत्तिं कालस्सग्गं करेति २ ता पत्तचीवराइं गेण्हंति तहेव उत्त(ओय)रंति जाव इमे से आयारभंडए, भंते ! त्ति भगवं गोयमे जाव एवं वयासी-एवं खलु देवाणुप्पियाणं अंतेवासी जा(लि)ली नामं अणगारे पगइभद्दए से णं जाली अणगारे कालगए कहिं गए कहिं उववण्णे ? एवं खलु गोयमा ! ममं अंतेवासी तहेव जहा खंदयस्स जाव काल० उड्डं चंदिम जाव विज(य)ए विमाणे देवत्ताए उववण्णे । जालिस्स णं भंते ! देवस्स केवइयं कालं ठिई पणत्ता ? गोयमा ! वत्तीसं सागरोवमाइं ठिई पणत्ता । से णं भंते ! ताओ देवलो(गा)याओ आउक्खएणं ३ कहिं गच्छिहिइ २ ? गोयमा ! महाविदेहे वासे सिज्झिहिइ (जाव स० अं० क०), (ता) एवं [खलु] जंवू ! समणेणं जाव संपत्तेणं अणुत्तरोववाइयदसाणं पढम[स्स]-वग्गस्स पढम[स्स अ]ज्झयणस्स अयमट्ठे पणत्ते । (इति प० प० स०) एवं सेसाण-वि अट्ठ(नव)ण्हं भाणियव्वं, नवरं (सत्त) छ धा-रि(णी)णिसुआ वे-हल्लवेहा-[य]सा चेळ्णाए (अ० णं०), आइल्लणं पंचण्हं सोलस वासाइं सामण्णपरियाओ तिण्हं वारस वासाइं दोण(ह)हं पंच वासाइं, आइल्लणं पंचण्हं आ(अ)णुपुव्वीए उववा(ओ)यो विजए वेजयंते जयंते अपराजिए सव्वट्ठसिद्धे, दीहदंते सव्वट्ठसिद्धे, उ(अणु)क्कमेणं सेसा, अभओ विजए, सेसं जहा पढमे, अभयस्स नाणत्तं, रायगिहे नयरे सेणिए राया नंदा देवी (माया) सेसं तहेव, एवं खलु जंवू ! समणेणं जाव संपत्तेणं अणुत्तरोववाइयदसाणं पढमस्स वग्गस्स अयमट्ठे पणत्ते ॥ १ ॥ [(इति) पढमो वग्गो समत्तो ॥]

[दोच्चो वग्गो]

जइ णं भंते ! समणेणं जाव संपत्तेणं अणुत्तरोववाइयदसाणं पढमस्स वग्गस्स अयमट्ठे पणत्ते दोच्चस्स णं भंते ! वग्गस्स अणुत्तरोववाइयदसाणं समणेणं जाव संपत्तेणं के अट्ठे पणत्ते ? एवं खलु जंवू ! समणेणं जाव संपत्तेणं अणु-त्तरोववाइयदसाणं दोच्चस्स वग्गस्स तेरस अज्झयणा पणत्ता, तं०--दीह-सेणे महासेणे लट्ठदंते य गूढदंते य सुद्धदंते [य] हल्ले दुमे दुमसेणे महादुमसेणे य आहिए ॥ सीहे य सीहसेणे य महासीहसेणे य आहिए पुण्णसेणे य वो(द्ध)धव्वे तेरसमे होइ अज्झयणे ॥ जइ णं भंते ! समणेणं जाव संपत्तेणं अणुत्तरोव-वाइयदसाणं दोच्चस्स वग्गस्स तेरस अज्झयणा प० दोच्चस्स णं भंते ! वग्गस्स

पढम-ज्झयणस्स समणेणं (३) जाव संपत्तेणं के अट्ठे प० ? एवं खलु जंबू ! तेणं कालेणं तेणं समएणं रायगिहे नयरे गुणसिलए उज्जाणे सेणिए राया धा-रिणी देवी सी(हे)हो सुमिणे जहा जाली तहा जम(मणं)मं वालत्तणं कलाओ नवरं दीहसे(णे)णो कुमा(रे)रो स(च्चे)व्वेव वत्तव्वया जहा जालिस्स जाव अंतं काहिइ, एवं तेरस-वि रायगिहे (न०) सेणि(ए)ओ(प्पि)पिया धारिणी माया तेरसण्ह-वि सोलस-वासा परियाओ, आणुपुव्वीए (उ०) विजए दोण्णि वेजयंते दोण्णि जयंते दोण्णि अपराजिए दोण्णि, सेसा महादुमसेणमाई पंच सव्वट्ठसिद्धे, एवं खलु जंबू ! समणेणं० अणुत्तरोववाइयदसाणं दोच्चस्स वग्गस्स अयमट्ठे पण्णत्ते, मासियाए संलेहणाए दोसु-वि वग्गोसु ॥ २ ॥ [ति(०बीओ) दोच्चो वग्गो समत्तो ।]

[तच्चो वग्गो]

जइ णं भंते ! समणेणं जाव संपत्तेणं अणुत्तरोववाइयदसाणं दोच्चस्स वग्गस्स अयमट्ठे पण्णत्ते तच्चस्स णं भंते ! वग्गस्स अणुत्तरोववाइयदसाणं समणेणं जाव संपत्तेणं के अट्ठे प० ? एवं खलु जंबू ! समणेणं जाव संपत्तेणं अणुत्तरो-ववाइयदसाणं तच्चस्स वग्गस्स दस अज्झयणा पण्णत्ता, तं०-धण्णे य सुण-क्खत्ते [य], इसिदासे (अ) य आहिए । पेहए रामपुत्ते य, चंदिमा पि(पु)ट्ठिमा-इ(या)य ॥ १ ॥ पेढालपुत्ते अणगारे, नवमे पो(पु)ट्ठिले (इ) वि य । वे-हल्ले दसमे चुत्ते, इमे(ते)य दस (ए० अ०) आहि(ते)या ॥ २ ॥ जइ णं भंते ! समणेणं जाव संपत्तेणं अणुत्तरोववाइयदसाणं तच्चस्स वग्गस्स दस अज्झयणा प० पढमस्स णं भंते ! अज्झयणस्स समणेणं जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं का(गं-कं)यंदी ना(म)मं नयरी होत्था रिद्धत्थिमियसमिद्धा सह(र)संववणे उज्जाणे सव(वोदुए)वउउ० जि(अ)यस(त्तु)तू राया, तत्थ णं का-यंदीए नयरीए भद्दा-नामं सत्थवाही परिवसइ अट्ठा जाव अपरिभू(आ)या, तीसे णं भद्दाए सत्थवाहीए पुत्ते धण्णे ना(मए)मं दारए होत्था अहीण जाव सुरुवे पंचधा[इ]ई-परिग्गहिए तं०-खीरधाई[ए] जहा म(हाव)हब्बले जाव वावत्त(रि)रिं कलाओ अ(हि०)हीए जाव अलं-भोगसमत्ये जाए यावि होत्था, तए णं सा भद्दा सत्थवाही धण(ण)णं दारयं उम्मुक्कवालभावं जाव भोगसमत्यं या(वा)वि(या)जा-णि(या)त्ता वत्तीसं पासायवडिसए कारेइ अब्भुग्गयमूसिए जाव तेसिं मज्झे भवणं अणेग-खंभसयसंणिविट्ठं जाव वत्तीसाए इब्भवरक्कणगाणं एगदिवसेणं पाणिं गेण्हावेइ (२) वत्तीसओ दाओ जाव उप्पि पासाय० फु(ट्टे)ट्ठंतेहिं जाव विहरइ, तेणं कालेणं तेणं समएणं समणे० समोसडे परिसा निग्गया राया जहा कोणिओ तहा जियसत्तू

निग्गओ, तए णं तस्स धण्णस्स तं महया (ज०) जहा जमाली तहा निग्ग-ओ,
नवरं पाय(विहा)चारेणं जाव जं नवरं अम्मयं भद्दं सत्थवाहिं आपुच्छामि, तए णं
अहं देवाणुप्पियाणं अंतिए जाव पव्वयामि जाव जहा जमाली तहा आपुच्छइ
मु(पु)च्छिया वुत्तपडिवुत्तया जहा म-हव्वले जाव जाहे नो संचाएइ जहा थावच्चा-
पुत्तो जियसत्तुं आपुच्छइ छत्तचामराओ० सयमेव जियसत्तू निक्खमणं करेइ
जहा थावच्चापुत्तस्स कण्हो जाव पव्वइए (०) अणगारे जाए ई(इ)रियासमिए
जाव [गुत्त]वंभयारी, तए णं से धण्णे अणगारे जं चेव दिवसं मुंडे भवित्ता
जाव पव्वइए तं चेव दिवसं समणं भगवं महावीरं वंदइ नमंसइ वं० २ ता
एवं वयासी-[एवं खलु] इच्छामि णं भंते ! तुब्भे(णं)हिं अब्भणुण्णाए समाणे
जावजीवाए छट्ठंछट्ठेणं अणिक्खित्तेणं आयंविळपरिग्गहिणं तवोकम्मणेणं अप्पाणं
भावेमाणे विह(रे)रित्तए छट्ठस्स-वि-य णं पारण(गं)यंसि कप्(प)पेइ [मे] आयंविळं
पडि(ग्गहि)गाहेत्तए नो चेव णं अणायविळं तं-पि-य संसट्ठं नो चेव णं असं-
सट्ठं तं-पि-य णं उज्झियधम्मियं नो चेव णं अणुज्झियधम्मियं तं-पि-य (णं) जं
अण्णे वहवे समणमाहणअतिहिक्खिवणवणीमगा नावकंखंति, अहासुहं देवाणुप्पिया !
मा पडिवंयं करेह, तए णं से धण्णे अणगारे समणेणं भगवया महावीरेणं
अब्वभणुण्णाए समाणे हट्ठ० जावजीवाए छट्ठंछट्ठेणं अणिक्खित्तेणं तवोकम्मणेणं
अप्पाणं भावेमाणे विहरइ, तए णं से धण्णे अणगारे पढमछट्ठ(क)खमणपारण-
यंसि पढमाए पो(र)रिसीए सज्झायं करेइ जहा गोयमसामी तहेव आपु-
च्छइ जाव जेणेव का(कं)यंदी नयरी तेणेव उवागच्छइ २ ता का-यंदीए नयरीए
उच्च० जाव अडमाणे आयंविळं [नो अणायंविळं] जाव नावकंखंति, तए णं
से धण्णे अणगारे ताए अब्भुजयाए (पयययाए) पयत्ताए पग्गहियाए एसणाए
[एसमाणे] जइ भत्तं लभइ तो पाणं न लभइ अह पाणं (ल०णो) तो भत्तं न लभइ,
तए णं से धण्णे अणगारे अदीणे अविमणे अक्खुसे अविसा(यी)दी अपरितंतजोगी
जयणघडणजोगचरित्ते अहापज्ज(त्त)तं समु(दा)द्दाणं पडिगाहेइ २ ता का-यंदीओ
नयरीओ पडिणिक्खमइ [पडिणिक्खमित्ता] जहा गोयमे जाव पडिदंसेइ, तए
णं से धण्णे अणगारे समणेणं भगवया महावीरेणं अब्वभणुण्णाए समाणे अमु-
च्छिए जाव अणज्जोववण्णे विलमिव पण्णगभूएणं अप्पाणेणं आहारं आहा-
रेइ २ ता संजमेणं तवसा० विहरइ, [तए णं] समणे भगवं महावीरे अण्णया
कया(ई)इ का-यंदी(ए)ओ नयरीओ सहसंववणाओ उज्जाणाओ पडिणिक्खमइ २
ता वहिया जणवयाविहारं विहरइ, तए णं से धण्णे अणगारे समणस्स भग-

वओ महावीरस्स तहारूवाणं थेराणं अंतिए सामाइयमाइयाइं एकारस्स अंगाइं
 अहिज्जइ [अहिज्जिता] संजमेणं तवसा अप्पाणं भावेमाणे विहरइ, तए णं से
 धण्णे अणगारे तेणं उ(ओ)रालेणं (त०) जहा खंदओ जाव० चिट्ठइ, धण्णस्स
 णं अणगारस्स पायाणं अय(इ)मेयारूवे तवरूवलावण्णे होत्था, से जहा-नामए
 सुक्कछल्ली-इ वा कट्ठपाउया-इ वा जरग्ग(उ)ओवाहणा-इ वा, एवामेव धण्णस्स अण-
 गारस्स पाया सुक्का (लुक्खा) निम्मंसा अट्ठिचम्मछिरत्ताए पण्णायंति नो चेव
 णं मंससोणियत्ताए, धण्णस्स णं अणगारस्स पायंगुलियाणं अयमेयारूवे० से
 जहा-नामए कलसंगलिया-इ वा मुग्ग(सं०)माससंगलिया-इ वा तरुणिया छिण्णा उण्हे
 दिण्णा सुक्का समाणी मिलायमाणी २ चिट्ठंति, एवामेव धण्णस्स (अ०) पायंगुलि-
 याओ सुक्काओ जाव सोणियत्ताए, धण्णस्स (णं अ०) जंघाणं अयमेयारूवे० से जहा०
 काकजंघा-इ वा कंकजंघा-इ वा ढेणियालि(य)याजंघा-इ वा जाव सोणियत्ताए, धण्णस्स
 (णं) जाणूणं अयमेयारूवे० से जहा० का(ली)लिपोरे-इ वा मयूरपोरे-इ वा ढेणियालि-
 यापोरे-इ वा एवं जाव सोणियत्ताए, धण्णस्स उरुस्स० जहा नामए सामक(रे)रिल्ले-इ
 वा वो(रि)रीकरिल्ले-इ वा सल्लइकरिल्ले-इ वा साम-लिकरिल्ले-इ वा तरुणिए (छि०)
 उण्हे जाव चिट्ठइ एवामेव धण्णस्स उरु जाव सोणियत्ताए, धण्णस्स कडिप(ट्ठ)त्तस्स
 इमेयारूवे० से जहा० उट्टपा(ए)दे-इ वा जरग्गपाए-इ वा [महिसपाए-इ वा] जाव
 सोणियत्ताए, धण्णस्स उदरभायणस्स इ(अय)मेयारूवे० से जहा० सुक्कदिए-इ वा भज्ज-
 (णय)यणकभल्ले-इ वा कट्ठकोलंबए-इ वा, एवामेव उदरं सुक्कं[०], धण्णस्स पा(पां)सु-
 लि(या)यक(रं)डयाणं इमेयारूवे० से जहा० थासयावली-इ वा पाणावली-इ वा मुंडा-
 वली-इ वा[०], धण्णस्स पि(ट्ठ)ट्टिकरंड-याणं अयमेयारूवे० से जहा० कण्णावली-इ
 वा गोलावली-इ वा वट्टयावली-इ वा, एवामेव०, धण्णस्स उ(रु)रक-डयस्स अय-
 मेयारूवे० से जहा० चित्त(य)कट्टरे-इ वा वियणपत्ते-इ वा तालियंटपत्ते-इ वा एवा-
 मेव०, धण्णस्स वाहाणं० से जहा-नामए समिसंगलिया-इ वा प(वा)हा(य)या-
 संगलिया-इ वा अगतिय-संगलिया-इ वा एवामेव०, धण्णस्स हत्थाणं० से जहा०
 सुक्कछगणिया-इ वा वडपत्ते-इ वा पलासपत्ते-इ वा, ए(व)वामेव०, धण्णस्स हत्थं-
 गुलियाणं० से जहा० क(लाय)लसंगलिया-इ वा मुग्ग(०)माससंगलिया-इ वा तरुणिया
 छिण्णा आयवे दिण्णा सुक्का समाणी एवामेव०, धण्णस्स गीवाए० से जहा० करग-
 गीवा-इ वा कुंडियागीवा-इ वा उच्च(त्थ)ट्ठवणए-इ वा एवामेव०, धण्णस्स णं हणु(आ)-
 याए० से जहा० लाउ(य)फले-इ वा हकुवफले-इ वा अंवगट्टिया-इ वा एवामेव०,
 धण्णस्स-उट्ठाणं० से जहा० सुक्कजलोया-इ वा सिलेसगुलिया-इ वा अलत्त(गं)-

गुलिया-इ वा एवामेव०, वणस्स जिग्माए० से जहा० वटपत्ते-इ वा पत्तसपत्ते-इ
 वा (उंवर०) सागपत्ते-इ वा एवामेव०, वणस्स ना(लिया)साए० से जहा०
 अंबगपेसिया-इ वा अंबाडगपेसिया-इ वा माउ(लि)हंगपेसिया-इ वा तरुनिया एवा-
 मेव०, वणस्स अच्छीगं० से जहा० वीगाछि(दे)दे-इ वा व(ची)दी(पर्वी)सगाछि-दे-इ
 वा पा(प)भाइयता(रि)रगा-इ वा एवामेव०, वणस्स कग्गाणं० से जहा० मू(लि)-
 लाछलिया-इ वा बालुं० कारेळय(न)ठ(ली)दिया-इ वा एवामेव०, वणस्स (अ०)
 सीसस्स० से जहा० तरुणगलाउए-इ वा तरुणगगुलाउ(यत्ति)ए-इ वा सिम्हा(ल)ए-इ
 वा तरुणए जाव चिट्ठइ, एवामेव वणस्स अणगारस्स सीमं सुक्कं लुक्कं निम्मं
 अट्टिचम्म(च्छि)छिरत्ताए पग्गायइ नो चेव णं संससोणियत्ताए, एवं सुव्वत्य(मेव),
 नवरं उ(द)यरमाय(ण)णं क(ग्ग)ग्गा जीहा उट्ठा एणसिं अट्ठी न भग्गइ चम्म
 छिरत्ताए पग्गायइ-त्ति भग्गइ, वग्गे णं अणगारेणं सुक्केणं लु(सु)क्केणं पायनंयोत्ता
 विगयतडिकरालेणं कडिकडाहेणं पि-ट्टिम(व)स्तिण्णं उदरमायणेणं जंङ्गमाणेहिं
 पा(यं)सुलि[य]कडएहिं अक्खसुत्तमान्हा(ति वा)विव (गणिजमान्हाति वा) ग(णि)-
 येजमा(णा)णेहिं पि-ट्टिकरंडगसंघीहिं गंगातरंगभूणं उरकडगंदसमाएणं सुक्कसण-
 समागाहिं बाहाहिं सि(स)दिक्कडाली-विव लं(चलं)तेहि य अणहत्थेहिं कंपगवा-
 ड(ओ)एविव वेवमाणीए सीसवलीए पव्वायवयगक्रमले उच्चमउव(डा)डमुहे उच्चुइ-
 णयणकोसे जीवं-जीवेणं गच्छइ जीवं-जीवेणं चिट्ठइ भासं भासिस्सा(मीति)मि ति
 गिला(य)इ ३ से जहा नामए ईगाल्लसगडिया-इ वा जहा खंदओ नहा जाव हुयान्णो
 इव भासरा(सी)सिपलिच्छण्णे तवेणं तेणं तवतेयसिरीए (अ०) उवसोभेमाणं २
 चिट्ठइ ॥ ३ ॥ तेणं कालेणं तेणं समएणं रायगिहे नयरे गुगसिलए उज्जाणे सेणिए
 राया, तेणं कालेणं तेणं समएणं समणे भगवं महावीरे समोसहे परिखा निग्गया
 सेणि(ओ)ए निरग-ए वम्मकहा परिखा पडिगया, तए णं से सेणिए राया समणस्स
 भगवओ महावीरस्स अंतिए वम्मं सोळा निसम्म समणं भगवं महावीरं वंदइ नमं-
 सड वं० २ ता एवं वयासी-इमासि णं संते । इंदमू-इपामोक्खणं चो(चउ)इमण्हं
 समणसाहस्सीणं क(य)इरे अणगारे महादुक्करकारए चेव महाणिजरयराए चेव ? एवं
 खलु सेगिया । इमासि इंदमूइपामोक्खणं चो-इमण्हं समणसाहस्सीणं वण्णे अण-
 गारे महादुक्करकारए चेव महाणिज(रा)रयराए चेव, से केणट्ठेणं संते ! एवं खुच्चइ
 इमासि जाव साहस्सीणं वण्णे अणगारे महादुक्करकारए चेव महाणिज(-कार)रय-
 राए चेव ? एवं खलु सेगिया । तेणं कालेणं तेणं समएणं का-यंदी ना-मं नयरी
 ओत्था [०] उप्पि पानायवटिसए विहरइ, तए णं अहं अणगया कयाइ पुव्वाण्णु-

(वि)व्वीए चरमाणे गामाणुगामं दूइज्जमाणे जेणेव का-यंदी नयरी जेणेव सह-संव-
वणे उज्जाणे तेणेव उवागए [उवागमिता] अहापडिरुवं उग्गहं उग्गिण्हामि २ ता
संजमेणं जाव विहरामि, परिसा निग्गया, तहे(तं चे)व जाव पव्वइए जाव विलमिक्
जाव आहारेइ, धण्णस्स णं अणगारस्स पादानं सरीरवण्णओ सव्वो जाव
उवसोभमाणे २ चिट्ठइ, से तेणट्ठेणं सेणिया ! (इमं) एवं वुच्चइ-इमासिं चउदसण्हं
(समण)साहस्सीणं धण्णे अणगारे महादुक्करकारए महानिजरयराए चेव, तए णं से
सेणि(य)ए राया समणस्स भगवओ महावीरस्स अंति(यं)ए एयमट्ठं सोच्चा निसम्म
हट्ठ० समणं भगवं महावीरं तिक्खुतो आयाहि(णं)णपयाहिणं करेइ २ ता वंदइ
नमंसइ वं० २ ता जेणेव धण्णे अणगारे तेणेव उवागच्छइ २ ता धण्णं अण-
गारं तिक्खुतो आयाहि-णपयाहिणं करेइ २ ता वं(दे)दइ नमंसइ वं० २ ता एवं
वयासी-धण्णे(ऽ)सि णं तुमं देवाणुप्पिया ! सुपुण्णे(०) सुकयत्थे कयलक्खणे सुलद्धे
णं देवाणुप्पिया ! तव मा(म)णुस्सए जम्मजीवियफलेत्तिकट्ठु वंदइ नमंसइ वं० २ ता
जेणेव समणे भगवं महावीरे तेणेव उवागच्छइ २ ता समणं भगवं महावीरं
तिक्खुतो (जाव) वंदइ नमंसइ वं० २ ता जामेव दि(सिं)सं पाउब्भूए तामेव
दि-सं पडिगए ॥ ४ ॥ तए णं तस्स धण्णस्स अणगारस्स अणया कया(इं)इ पुव्व-
रत्तावरत्तका(ले)लसमयंसि धम्मजागरियं० इमेयारूवे अ(ज्झ)ब्भत्थिए० एवं खलु
अहं इमेणं उ-रालेणं [०] जहा खंदओ तहेव चिता आपुच्छ(णा)णं थेरेहिं सद्धिं
वि(-लप०)उलं दुरु(हंति)हइ मासिया संलेहणा नव-मा(स)सा परियाओ जाव काल-
मासे कालं किच्चा उट्ठं चंदिम जाव नव-य-गे(वि)वेज्ज(वि०)विमाणपत्थडे उट्ठं दूरं
वीईवइत्ता सव्वट्ठसिद्धे विमाणे देवत्ताए उववण्णे, थेरा तहेव उ(त्त)यरंति जाव इमे
से आयारभंडए, भंतेत्ति भगवं गोयमे तहेव पुच्छइ जहा खंदयस्स भगवं वागरेइ
जाव सव्वट्ठसिद्धे विमाणे उववण्णे । धण्णस्स णं भंते ! देवस्स केवइयं कालं ठिई
पण्णत्ता ? गोयमा ! तेत्तीसं सागरोवमाइं ठिई पण्णत्ता । से णं भंते ! ता(त)ओ
देवलोगाओ (आ० ३) कहिं गच्छिहिइ कहिं उववज्जिहिइ ? गोयमा ! महाविदे(ह)हे
वासे सिज्झिहिइ ५ । तं एवं खलु जंबू ! समणेणं जाव संपतेणं पढमस्स अज्झय-
णस्स अयमट्ठे पण्णत्ते ॥ ५ ॥ (इ० ति० व०) पढ(म)मं अज्झयणं समत्तं ॥ जइ
णं भंते ! [०] उक्खेवओ एवं खलु जंबू ! तेणं कालेणं तेणं समएणं [का-यंदी-
(ना०) नयरी (हो०) जियस० राया तत्थ णं] का-यंदीए नयरीए भद्दा-नामं सत्थ-
वाही परिवसइ अट्ठा०, तीसे णं भद्दाए सत्थवाहीए पुत्ते सुणक्खत्ते नामं दारए
होत्था अहीण० जाव सुरुवे पंचधाइपरिक्खत्ते जहा ध(न्ने)ण्णो त(हेव)हा वत्तीसओ
दाओ जाव उप्पि पासायव(डें)डिंसए विहरइ, तेणं कालेणं तेणं समएणं (सामी)

समोस(हे)रणं जहा ध-ण्णो तहा सुणक्ख(ते-ऽ)तो-वि निग्ग(ते)ओ जहा थावच्चापु-
त्तस्स तहा निक्खमणं जाव अणगारे जाए ई-रियासमिए जाव वंभयारी, तए णं से
सुणक्खत्ते (अणगारे) जं चेव दिवसं समणस्स भगवओ महावीरस्स अंतिए मुंडे
जाव पव्वइए तं चेव दिवसं अभिग्गहं तहेव जाव बिलमिव [०] आहारेइ संजमेणं
जाव विहरइ [०] वहिया जणवयविहारं विहरइ एक्कारस अंगाई अहिज्जइ [०] संजमेणं
तवसा अप्पाणं भावेमाणे विहरइ, तए णं से सुणक्खत्ते (अ०) तेणं ओ-रालेणं [०]
जहा खंदओ तेणं कालेणं तेणं समएणं रायगिहे नयरे गुणसिलए उज्जाणे सेणिए
राया सामी समोसडे परिसा निग्गया राया निग्गओ धम्मकहा राया पडिगओ परिसा
पडिगया, तए णं तस्स सुणक्खत्तस्स अण्णया कया-इ पुव्वरत्तावरत्तकालसमयंसि
धम्मजा० जहा खंदयस्स व(हु)ह्वासा परियाओ गोयमपुच्छा तहेव कहेइ जाव
सव्वट्ठसिद्धे विमाणे दे(वे)वत्ताए उववण्णे तेत्तीसं सागरोवमाइं ठिई पण्णत्ता, से णं
भंते !० महाविदे(-वासे)हे सिज्जिहिइ ॥ [(इ०) वी(वी)यं अज्झयणं समत्तं ॥]
एवं (ख० जं०) सुणक्खत्तगमेणं सेसा-वि अट्ठ भाणियव्वा, नवरं आ-णुपुव्वीए
दोण्णि रायगिहे दोण्णि साएए दोण्णि वाणियग्गामे नवमो हत्थि(ण)णापुरे दसमो
रायगिहे नवण्हं भद्दाओ जणणीओ नवण्ह-वि वत्तीसओ दाओ नवण्हं निक्खमणं
थावच्चापुत्तस्स सरिसं वेहल्लस्स-पिया करेइ छम्मासा वेहल्लए नव धण्णे सेसाणं व-ह्वा
वासा(ई) मासं संलेहणा सव(वे)वट्ठसिद्धे महाविदे-हे सि(ज्जणा)जिज्ज(हिं)स्संति [एवं
दस अज्झयणाणि] । एवं खलु जंबू ! समणेणं भगवया महावीरेणं आइगरेणं तित्थ-
गरेणं सयंसंबुद्धेणं लोगणाहेणं लोगप्पदीवेणं लोगपज्जोयगरेणं अभयदएणं सरण-
दएणं चक्खुदएणं मग्गदएणं धम्मदएणं धम्मदेसएणं धम्मवरच्चाउरंतचक्कवट्ठिणा
अप्पडिहयवरणाणदंसणधरेणं जिणेणं जाणएणं बुद्धेणं वोहएणं मोक्केणं सोयएणं
तिण्णेणं तारएणं सिवमयलमस्यमणंतमक्खयमव्वावाहमपुणरावत्तयं सिद्धिगइणाम-
धेयं ठाणं संपत्तेणं अणुत्तरोववाइयदसाणं तच्चस्स वग्गस्स अयमट्ठे पण्णत्ते ॥ ६ ॥
अणुत्तरोववाइयदसाओ समत्ताओ ॥ (अणुत्तरोववाइयदसाणामं सुत्तं) नवममंगं समत्तं ॥
[अणुत्तरोववाइयदसाणं एगो सुयखं० तिण्णि व० तिसु चेव दिवसेसु उ० तत्थ
पढमे वग्गे दस उद्देस० विइ(वी)ए वग्गे तेरस उद्देस० तइए वग्गे दस उद्देस०
सेसं जहा धम्मकहा ने(ना)यव(वं)वा ॥ ७ ॥]



णमोऽत्थु णं समणस्स भगवओ णायपुत्तमहावीरस्स

सुत्तागमे

तत्थ णं

पण्हावागरणं

नमो अरिहंताणं नमो सिद्धाणं नमो आयरियाणं नमो उवज्जायाणं नमो लोए
सव्वसाहूणं । (तेणं कालेणं तेणं समएणं चंपा-नाम नगरी होत्था, पुण्णभेदे उज्जाणे
असोगवरपायवे पुढाविसिलापट्टए, तत्थ णं चंपाए नयरीए कोणिए नाम राया
होत्था, धारिणी देवी, तेणं कालेणं तेणं समएणं समणस्स भगवओ महावीरस्स
अंतेवासी अज्जसुहम्ममे नाम थेरे जाइसंपन्ने कुलसंपन्ने बलसंपन्ने रुवसंपन्ने विणय-
संपन्ने नाणसंपन्ने दंसणसंपन्ने चरित्तसंपन्ने लज्जासंपन्ने लाघवसंपन्ने ओयंसी
तेयंसी वच्चंसी जसंसी जियकोहे जियमाणे जियमाए जियलोभे जियनिदे जिय-
इंदिए जियपरीसहे जीवियासमरणभयविप्पमुक्के तवप्पहाणे गुणप्पहाणे मुत्तिप्प-
हाणे विज्जापहाणे मंतप्पहाणे वंभप्पहाणे वयप्पहाणे नयप्पहाणे नियमप्पहाणे
सच्चप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे चोइसपुव्वी
चउनाणोवगए पंचहिं अणगारसएहिं सद्धिं संपरिवुडे पुव्वाणुपुव्वि चरमाणे
गामाणुगामं दूइज्जमाणे जेणेव चंपा न(ग)यरी तेणेव उवागच्छइ जाव अहापडिरुवं
उग्गहं उग्गिण्हित्ता संजमेणं तवसा अप्पाणं भावेमाणे विहरति । तेणं कालेणं
तेणं समएणं अज्जसुहम्मस्स अंतेवासी अज्जजंबू नाम अणगारे कासवगोत्तेणं
सत्तुस्सेहे जाव संखित्तविपुलतेयलेस्से अज्जसुहम्मस्स थेरस्स अदूरसामन्ते उट्ठं-
जाणू जाव संजमेणं तवसा अप्पाणं भावेमाणे विहरइ । तए णं से अज्जजंबू
जायसद्धे जायसंसए जायकोउहल्ले उप्पन्नस(द्धे)द्धे ३ संजायस-द्धे ३ समुप्पन्नस-द्धे
३ उट्ठाए उट्ठेइ २ ता जेणेव अज्जसुहम्ममे थेरे तेणेव उवागच्छइ २ ता अज्जसुह-
म्(मे)मं थे(रे)रं तिक्खुत्तो आयाहिणपयाहिणं करेइ २ ता वंदइ नमंसइ वं० २ ता
नच्चासन्ने नाइदूरे विणएणं पंजलिपुडे पज्जुवासमाणे एवं वयासी-जइ णं भंते ! सम-
णेणं भगवया महावीरेणं जाव संपत्तेणं णवमस्स अंगस्स अणुत्तरोववाइयदसाणं अय-
मट्ठे प० दसमस्स णं (भं०) अंगस्स पण्हावागरणाणं समणेणं जाव संपत्तेणं के अट्ठे
प० ? जंबू ! दसमस्स अंगस्स समणेणं जाव संपत्तेणं दो सुयक्खंवा पण्णत्ता-

आसवदारा य संवरदारा य, पढमस्स णं भंते ! सुयक्खंधस्स समणेणं जाव संपत्तेणं
 कइ अज्झयणा पण्णत्ता ? जम्बू ! पढमस्स णं सुयक्खंधस्स समणेणं जाव संपत्तेणं
 पंच अज्झयणा पण्णत्ता, दोच्चस्स णं भंते !० एवं चेव, एएसि णं भंते ! अण्हय-
 संवराणं समणेणं जाव संपत्तेणं के अट्ठे पण्णत्ते ?, तत्ते णं अज्जमुहम्मो थेरे जंवूनामेणं
 अणगारेणं एवं वुत्ते समाणे जं० अणगारं एवं वयासी-) जंवू ! इणमो अण्हयसंवर-
 विणिच्छयं पवयणस्स निस्संदं । वोच्छामि णिच्छयत्थं सुहासियत्थं महेसीहिं ॥ १ ॥
 पंचविहो पण्णत्तो जिणे[हिं]हिं इह अण्हओ अणादीओ । हिंसामोसमदत्तं अव्वंभ-
 परिग्गहं चेव ॥ २ ॥ जारिसओ जंनामा जह य कओ जारिसं फलं देति । जेविय
 करेति पावा पा(णि)णवहं तं निसामेह ॥ ३ ॥ पा-णवहो नाम एस निच्चं जिणेहिं
 भणिओ-पावो चंडो रुद्धो खुद्धो साहसिओ अणारिओ णिग्घिणो णिस्संसो महव्वओ
 पइभओ १० अतिभओ वीहणओ तासणओ अणज्जो उव्वेयणओ य णिरवयक्खो
 णिद्धम्मो णिप्पिवासो णिक्कलुणो णि-रयवासगमणनिधणो २० मोहमहव्वमयपयट्ठओ
 मरणावेमणस्सो २२ ॥ पढमं अधम्मदारं ॥ १ ॥ तस्स य नामाणि इमाणि
 गोण्णाणि होति तीसं, तंजहा-पाणवहो १ उम्मूलणा सरीराओ २ अवीसंभो ३
 हिंसविहिंसा ४ तहा अकिच्चं च ५ घायणा ६ मारणा य ७ वहणा ८ उद्वणा ९
 तिवायणा य १० आरंभसमारंभो ११ आउयकम्मस्सुवद्दवो भेयणिट्ठवणगालणा य
 संवट्ठगसंखेवो १२ मच्चू १३ असंजमो १४ कडगमट्ठणं १५ वोरमणं १६ परभव-
 संकामकारओ १७ दुग्गतिप्पवाओ १८ पावकोवो य १९ पावलोभो २० छविच्छेओ
 २१ जीवियंतकरणो २२ भयंकरो २३ अणकरो य २४ वज्जो २५ परितावणअण्हओ
 २६ विणासो २७ निज्जवणा २८ लुंपणा २९ गुणाणं विराहणत्ति ३० विय तस्स
 एवमादीणि णामधेज्जाणि होति तीसं पाणवहस्स कल्लसस्स कडुयफलदेसगाइं ॥ २ ॥
 तं च पुण करेति केइ पावा अ(रु)संजया अविरया अणिहुयपरिणामदुप्पयोगी पाणवहं
 भयंकरं बहुविहं बहुप्पगारं परदुक्खुप्पायणप्पसत्ता इमेहिं तसथावरेहिं जीवेहिं पडिणि-
 विट्ठा, किं ते ?, पाठीणतिमितिमिगिलअणेगल्लसविविहजातिमंदुक्कदुविहकच्छमणक्क-
 मगरदुविहगाहादिलिवेढयमंदुयसीमागारपुल्लयसुंमुमारवहुप्पगारजलयरविहाणाकत्ते य
 एवमादी, कुरंगरुत्सरभचमरसंवर(हु)उरव्वमससयपसयगोणरोहिंयहयगयस्वरकरभ-
 खग्गवानरगवयविगसियालकोलमजारकोल्लुण(का)कसिरियंदलगावत्तकोकंतिरगोक्क-
 णमियमहिसविग्घछगलदीवि(य)यासाणतरच्छअच्छ(व)मल्लसहूलसीहचिल्ललचउप्प-
 यविहाणाकए य एवमा(यी)दी, अयगरगोणसवराहिमउल्लिका(ओ)उदरदव्वमुप्प-
 यासालियमहोरगोरगविहाणक्कए य एवमादी, छीरलसरं वसेहसेल्लगोशुं(हु)दरणल-

लसरडजाहगमुगुं(सी-सा)सखाडहि(ला)लवाउ(प्पि)प्पइय[घी]घरोलियसिरीसिचगणे
यं एवमादी, काडंव(कं)कवकवलाकासारसआडासेतीयकुललवंजुलपारिप्पवचकी-
वसजण-[पि]पीपीलिय[दीविय]हंसधत्तरिट्ठगभासकुलीकोसकुंचदगतुंडडेणियालगसू-
(यी)ईमुहकविलपिंगलक्खगकारंडगचक्कवागउकोसगरुलपिंगुलसुयवरहिणमयणसाल-
नंदीमुहनंदमाणगकोरंगभिंजारगकोणालगजी(वं)वजीव(ग)कतित्तिरवट्ठकलावककपि-
जलककवोतक[काग]पारेवयग(च)चिडिगडिंककुडवेसरमयूरगचउरगहयपोंडरीय-
सालग[करक]वीरल्लसेणवायसयविहंग(भे)मिणासि(य)चासवग्गुलिचम्मट्टिलविततप-
क्खिखहयरविहाणाकते य एवमादी, जलथलखगचारिणो उ पंचिदिए पसुगणे-
वियतियचउरिंदिए विविहे जीवे पियजीविए मरणदुक्खपडिक्खूले वराए हणंति
वहुसंकिलिट्ठकम्मा । इमेहिं विविहेहिं कारणेहिं, किं ते ?, चम्मवसामंसमेयसोणिय-
जगफिप्फिसमत्थु[लि]लुंगहितयंतपित्तफोफसदंत(ट्ठी)ट्ठा अट्ठिमिंजनहनयणकण्णह्हा-
रुणिनक्कधमणिंसिं गदादिपिच्छविसविसाणवालहेउं, हिंसंति य भमरमधुकरिगणे रसेसु
गिद्धा तहेव तेंदिए सरीरोवकरणट्ठयाए किवणे वेंदिए वहवे वत्थोहरपरिमंडणट्ठा,
अण्णेहि य एवमाइएहिं वहूहिं कारणसतेहिं अवुंहा इह हिंसंति तसे पाणे इमे य एणिं-
दिए वहवे वराए तसे य अण्णे तदस्सिए चेव तणुसरीरे समारंभंति अत्ताणे असरणे
अणाहे अवंधवे कम्मनिगलवद्धे अकुसलपरिणाममंदबुद्धिजणदुव्विजाणए पुढ(वी)-
विम[ये]ए पुढ-विसंति(ये)ए जलमए जलगए अणलाणिलतणवणस्सतिगणनिस्सिए य
तम्मयतज्जिते चेव तदाहारे तप्परिणतवण्णगंधरसफासवोंदिरूवे अचक्खुसे चक्खुसे
य तसकाइए असंखे थावरकाए य सुहुमवायरपत्तेयसरीरनामसाधारणे अणंते
हणंति अविजाणओ य परिजाणओ य जीवे इमेहिं विविहेहिं कारणेहिं, किं ते ?,
करिसणपोक्खरणीवाविवप्पिणिकूवसरतलागचित्तिवे(दि)तियखातियआरामविहारथू-
भपागारदारगोउरअट्ठालगचरियासेतुसंकमपासायविकप्पभवणघरसरणलेणआवणचे-
तियदेवकुलचित्तसभापवाआयतणावसहभूमिघरमंडवाण य कए भायणमंडोवगरणस्स
विविहस्स य अट्ठाए पुढविं हिंसंति मंदबुद्धिया जलं च मज्जणयपाणभोयणवत्थधोवण-
सोयमादिएहिं पयणपयावणजलावणविदंसणेहिं अगाणिं सुप्पवियणतालयंटपेहुणमुह-
करयलसागपत्तवत्थमादिएहिं अणिलं अगारपरिवा(डि-या)रभक्खभोयणसयणासण-
फल(क)गमुसलउखलततविततातोज्जवहणवाहणमंडवविविहभवणतोरणाविडंगदेव-
कुलजालयद्धचंदनिज्जूगचंदसालियवेतियणिस्सेणिदोणिचंगेरेखीलमेढकसभापवावस-
हगंधमल्लाणुलेवणंवरजुयनंगलमइयकुलियसंदणसीयारहसगडजाणजोगगअट्ठालगचरि-
अदारगोपुरफलिहाजंतसूलियलउडमुसंडिसतग्घिवहुपहरणावरणुवक्खराण कते,

अण्णेहि य एवमादिएहिं वट्ठहिं कारणसत्तेहिं हिंसन्ति ते तरुण्णे भणिता एवमादी
सत्ते सत्तपरिवज्जिया उवहणन्ति दढमूढा दारुणमती कोहा माणा माया लोभा
हस्सरती अरती सोय-वेदथी जीयकामत्यधम्महेउं सवसा अवसा अट्ठा अणट्ठाए
य तसपाणे थावरे य हिंसन्ति (हिंसन्ति) मंदवुद्धी सवसा हणन्ति अवसा हणन्ति
सवसा अवसा दुहओ हणन्ति अट्ठा हणन्ति अणट्ठा हणन्ति अट्ठा अणट्ठा दुहओ
हणन्ति हस्सा हणन्ति वेरा हणन्ति रती-य हणन्ति हस्सवेरारती य हणन्ति कुद्धा हणन्ति
लुद्धा हणन्ति मुद्धा हणन्ति कुद्धा लुद्धा मुद्धा हणन्ति अत्था हणन्ति धम्मा हणन्ति कामा
हणन्ति अत्था धम्मा कामा हणन्ति ॥ ३ ॥ कयरे ते ?, जे ते सोयरिया मच्छबंधा
साउणिया वाहा क्रूरकम्मा वाउरिया दीवितबंधणप्पओगतप्पगलजालवीरल्लगायसी-
दब्भवग्गुराकूडछेलिहत्था (दीविया) हरिएसा[सा]उणिया य वीदंसगपासहत्था वण-
चरगा लुद्धयमहुवातपोतघाया एणीयारा पण्णियारा सरदहवीहिअतलागपल्लपरि-
गालणमलणसोतबंधणसलिलासयसोसगा विसगरस्स य दायगा उत्तणवल्लरदवग्गि-
णिद्वयपलीवका क्रूरकम्मकारी इमे य वहवे मिलक्खुजाती, के ते ?, सकजवणस[व]-
वरवव्वरगायमुखंडोदभडगतित्थियपक्कणियकुलक्खगोडसीहलपारसकौचंधदविल(चि)-
विल्ललपुल्लिंदअरोसडोवपोक्कणगंधहारगवहलीयजल्लरोममासवडसमलया चुंचुया य
चूलिया कौकणगा मेतपण्हवमालवमहुरआभासियाअणक्कचीणल्हासियखसखासिया
नेहुरमरहट्टमुट्ठि(अ)यआरवडोविलगकुहणकेकयहृणरोमगरुमरुगा चिलायविसय-
वासी य पावमतिणो जलयरथलयरसणप्फतोरगखहचरसंडासतोंडजीवोव(ग)घाय-
जीवी सण्णी य असण्णिणो य पज्जत्ता असुभळेस्सपरिणामा एते अण्णे य
एवमादी करेंति पाणातिवायकरणं पावा पावाभिगमा पावरुई पाणवहकयरती
पाणवहरुवाणुट्ठाणा पाणवहकहासु अभिरमंता तुट्ठा पावं करेत्तु हों(हो)ति य बहु-
प्पगारं । तस्स य पावस्स फलविवागं अयाणमाणा वट्ठन्ति महब्भयं अविस्साम-
वेयणं दीहकालवहुदुक्खसंकडं नरयतिरिक्खजोणिं, इओ आउक्खए चुया असुभक्क-
म्मवहुला उववज्जन्ति नरएसु हुलितं महालएसु वयरामयकुड्डनिस्संधिदारविरहिय-
निम्मह्वभूमितलखरामरिसविसमणिरयचरचारएसुं महोसिणसया[व]पतत्तदुग्गंधवि-
स्सउव्वेयजण्णेषु वीभच्छदरिसणिज्जेसु निच्चं हिमपडलसीयलेसु कालोभासेसु य
भीमगंभीरलोमहरिसणेषु णिरभिरामेसु निप्पडियारवाहिरोगजरापीलिएसु अतीव-
निच्चंधकारतिमिस्सेसु पतिभएसु ववगयगहचंदसूरणक्खत्तजोइसेसु मेयवसामंसपडल-
पोच्चडपूयरुहिरुक्किणविलीणचिक्कणरसियावावण्णकुहियचिक्खल्लकद्मेसु कुकूलानल-
पलित्तजालमुम्मुरअसिक्खुरकरवत्तधारासुनिसितविच्छुयडंक्रनिवातोवम्मफरिसअति-

दुस्सहेसु य अत्ताणासरणकड्डयदुक्खपरितावणेषु अणुबद्धनिरंतरवेयणेषु जमपुरिस-
 संकुलेसु, तत्थ य अन्तोमुहुत्तलद्धिभवपच्चएणं निव्वत्तेति उ ते सरीरं हुंडं
 बीभच्छदरिसणिज्जं बीहणगं अट्ठिहारुणहरोमवज्जियं असुभ-गंध-दुक्खविसहं, ततो
 य पज्जत्तिमुवगया इंदिएहिं पंचहिं वेदंति असुभाए वेयणाए उज्जलवलविउलउक्कड-
 कवरफस्सपयंडघोरबीहणगदारुणाए, किं ते ?, कंदुमहाकुंभियपयणपउलणतवम-
 तलणभट्टभज्जणाणि य लोहकडाहुक्कड्डणाणि य कोट्टवलिकरणकोट्टणाणि य सामलि-
 तिकखगगलोहकंटकअभिसरणपसारणाणि फालणविदालणाणि य अवकोडकबंधणाणि
 लट्टिसयतालणाणि य गलगबलुलंबणाणि सुलगभेयणाणि य आएसपवंचणाणि
 खिसणविमाणणाणि विघुट्टपणिज्जणाणि वज्जसयमातिकाति य एवं ते । पुव्वकम्म-
 कयसंचयोवतत्ता निरयग्गिमहरिगसंपलिता गाढदुक्खं महब्भयं कक्कसं असार्यं
 सारीरं मानसं च तिव्वं दुविहं वेदंति वेयणं पावकम्मकारी बहूणि पलिओवम-
 सागरोवमाणि कलुणं पालेन्ति ते अहाउयं जमकातियतासिता य सहं करंति
 भीया, किं ते ?, अविभायसामि(माम)भायवप्पतायजितवं मुय मे मरामि दुब्बलो
 चाहिपीलिओऽहं किं दाणिऽसि ? एवंदारुणो णिइय मा देहि मे पहारे उस्सासेतं
 (एयं) मुहुत्तयं मे देहि पसायं करेहि मा रुस वीसमामि गोविज्जं मु(च)य[ह] मे
 मरामि, गाढं तण्हातिओ अहं देह पाणीयं हंता पिय इमं जलं विमलं सीयलंति घेतूण
 य नरयपाला तवियं तउयं से दंति कलसेण अंजलीसु दट्टूण य तं पवे[पि]वियंगोवंगा
 अंसुपगलंतपप्पुयच्छा छिण्णा तण्हाइयम्ह कलुणाणि जंपमाणा विप्पेक्खन्ता दिसो-
 दिसिं अत्ताणा असरणा अणाहा अवंधवा बंधुविप्पहूणा विपलायंति य मिगा इव
 वेगेण भयुव्विग्गा, घेतूण बला पलायमाणानं निरणकंपा मुहं विहाडेत्तुं लोहडं-
 डेहिं कलकलं ण्हं वयणंसि लुभंति केइ जमकाइया हसंता, तेण दट्टा संतो रसंति
 य भीमाइं विस्सराइं खंति य कलुणगाइं पारेवतगाव एवं पलवितविलावकलुणा-
 कंदियबहुरुन्नरुदियसदो परि[वे]देवितरुद्धबद्धयनारकारवसंकुलो णीसट्ठो रसियभणिय-
 कुविउक्कूइयनिरयपालतज्जिय गेण्ह-क्कम पहर छिंद भिंद उप्पाडेहुक्खणाहि कत्ताहि
 विकत्ताहि य भुज्जो हण विहण विच्छुभोच्छुब्भ आकड्ड विकड्ड किं ण जंपसि ?
 सराहि पावकम्माइं दुक्कयाइं एवं वयणमहप्पगब्भो पडिसुयासहसंकुलो तासओ
 सया निरयगोयराण महाणगरडज्जमाणसरिसो निग्घोसो सु[च]व्वए अणिट्ठो तहियं
 नेरइयाणं जाइज्जंताणं जायणाहिं, किं ते ?, असिवणदब्भवणजंतपत्थरसूइतलक्खा-
 रवाविकलकलन्तवेयर णिकलंबवालुयाजलियगुहनिरुंभणउसिणोसिणकंटइल्लुग्गमरह-
 जोयणतत्तलोहमग्गगमणवाहणाणि, इमेहिं विविहेहिं, आयुहेहिं किं ते ? मोगगरमुसु-

ठिकरकयसत्तिहलगयमुसलचक्कौततोमरंसूललउलभिडिमालस[द]द्वलपट्टिसचम्मेट्ट-
दुहणमुट्टियअसिखेडगखग्गचावनारा(यं)यकणककप्पणिवासिपरसुटंकतिक्खनिम्मल-
अण्णेहि य ए(य)वमादिएहिं असुभेहिं वेउव्विएहिं पहरणसतेहिं अणुवद्धतिव्ववेरा परो-
प्परवेयणं उदीरेंति अभिहणंता, तत्थ य मोग्गरपहारचुण्णिगमुसुंडिसंभग्गमहितदेहा
जंतोवपीलणफुरंतकप्पिया केइत्थ सचम्मका विगत्ता णिम्मूल(ल)लूणकण्णोद्वणासिका
छिण्णहत्थपादा असिकरकयतिक्खकौतपरसुप्पहारफालियवासीसंतच्छित्तंगमंगा कल-
कलमाणखारपरिसित्तगाढडज्झंतगतकुंतग्गभिण्णजजरियसव्वदेहा विलोलंति मही-
तले (निग्गयग्गजीहा) विसूणियंगमंगा, तत्थ य विगसुणगसियालकाकमज्जारसरभं-
दीवियवियग्गसइलसीहदप्पियखुहाभिभूतेहिं णिच्चकालमणसिएहिं घोरा-SS-रसमाण-
भीमरुवेहिं अक्कमिता दढदाढागाढडक्कद्धियसुतिक्खनहफालियउद्धदेहा विच्छिप्पंते
समंतओ विमुक्कसंधिवंधणावियंगमंगा कंककुररगिद्धघोरकट्टवायसगणेहि य पुणो खंर-
थिरदढणक्खलोहतुंडेहिं ओवतिता पक्खाहयतिक्खणक्खविकिन्नजिब्भंछियनयणनि-
(द्ध)दओलुग्गविगतवयणा, उक्कोसंता य उप्पयंता निपतंता भमंता पुव्वकम्मोदयो-
वगता पच्छाणुस[ये]एण डज्झमाणा णिदंता पुरेकडाइं कम्माइं पावगाइं तहिं २ तारि-
साणि ओसन्नचिक्कणाइं दुक्खातिं अणुभवित्ता ततो य आउक्खएणं उव्वट्टिया समाणा
वहवे गच्छंति तिरियवसहिं दुक्खुत्तरं सुदारुणं जम्मणमरणजरावाहिपरियट्टणारहट्टं
जलथलखहचरपरोप्परविहिंसणपवंचं इमं च जगपागडं वरा[का]गा दुक्खं पावेन्ति
दीहकालं, किं ते?, सीउण्हतण्हाखुहवेयणअप्पईकारअडविजम्मणणिच्चभउव्वि-
ग्गवासजग्गणवहवंधणताडणंकणनिवायणअट्टिभंजणनासाभेयप्पहारदूमणछविच्छेय-
णअभिओगपावणकसंकुसारनिवायदमणाणि वाहणाणि य मायापितिविप्पयोगसोयप-
रिपीलणाणि य सत्थग्गिविसाभिघायगलगवलआवलणमारणाणि य गलजालुच्छि-
पणाणि प(ओ)उलण-विकप्पणाणि य जावजीवि[क]गवंधणाणि पंजरनिरोहणाणि
य सयूहनिद्धाडणाणि धमणाणि य दोहणाणि य कुदंडगलवंधणाणि वाडगपरिवार-
णाणि य पंकजलनिमज्जणाणि (य) वारिप्पवेसणाणि य ओवायणिभंगविसमणिवडणद-
वग्गिजालदहणाइं य, एवं ते दुक्खसयसंपलिता नरगाउ आगया इहं सावसेस-
कम्मा तिरिक्खपंचेंदिएसु पाविति पावकारी कम्माणि पमायरागदोसवहुसंचियाइं
अतीव अस्सायकक्कसाइं भमरमसगमच्छिमाइएसु य जाइकुलकोडिसयसहस्सेहिं
नवहिं चउरिंदियाण तहिं तहिं चेव जम्मणमरणाणि अणुभवंता कालं संखेज्जकं
भमंति नेरइ[अ]यसमाणतिव्वदुक्खा फरिसरसणघाणचक्खुसहिया तहेव तेइंदिएसु
कुंयुपिप्पीलिकाअवधिकादिकेसु य जातिकुलकोडिसयसहस्सेहिं अट्टहिं अणूणएहिं

तेइंदियाणं तहिं २ चेवं जम्मणमरणाणि अणुहवंता कालं संखेज्जकं भमंति नेरइय-
समाणतिव्वदुक्खा फरिसरसणघाणंसंपउत्ता (तेहेव वेइं(वे)दि(ये)एसु) गंडूलयजल्लय-
किमियचंदणगमादिएसु य जा(ती)तिकुलकोडिसयसहस्सेहिं सत्ताहिं अणूणएहिं वेइंदि-
याण तहिं २ चेव जम्मणमरणाणि अणुहवंता कालं संखिज्जकं भमंति नेरइयसमाणति-
व्वदुक्खा फरिसरसणसंपउत्ता पत्ता एगिंदियत्तणंपि-य पुढविजलजलणमारुयवणप्फति
सुहुमवायरं च पज्जत्तमपज्जत्तं पत्तेयसरीरणाम-साहारणं च पत्तेयसरीरजीविएसु य
तत्थवि कालमसंखेज्जगं भमंति अणंतकालं च अणंतकाए फासिंदियभावसंपउत्ता
दुक्खसमुदयं इमं अणिद्वं पाविति पुणो २ तहिं २ चेव परभवतरुणग(ह)णे
कोदालकुलियदालणसलिलमलणखुंभणरुंभणअणलाणिलविविहसत्थघट्टणपरोप्पराभिह-
णणमारणविरोहणाणि य अकामकाई परप्पओगोदीरणाहि य कज्जपओयणेहि य पेस्स-
पसुनिमि[त्तं]त्तओसहाहारमाइएहिं उक्खणणउक्कत्थणपयणकोट्टणपीसणपिट्टणमज्जण-
गालणआमोडणसडणफुडणभज्जणछेयणंतच्छणविलुंचणपत्तज्झोडणअग्गिदहणाइया-
(ति)त्ति एवं ते भवपरंपरादुक्खसमणुबद्धा अडंति संसारवीहणकरे जीवा पाणाइ-
वायनिरया अणंतकालं जेविय इह माणुसत्तणं आगया क(हिं वि)हंचि नरगा
उव्वट्टिया अधजा तेविय दीसंति पायसो विकयविगलरुवा खुजा वडभा य वामणा
य वहिरा काणा कुंटा पंगुला विउला य (अविय जल)मू(या)का य मंमणा य अं(धि-
ल्ल)धयगा एगचक्खू विणिहयस(पिस-वे)चिल्लया वाहिरोगपीलियअप्पाउयसत्यवज्झ-
बाला कुलक्खणुक्किन्नदेहा दुव्वलकुसंधयणकुप्पमाणकुसंठिया कुरुवा किविणा य
हीणा हीणसत्ता निच्चं-सोक्खपरिवज्जिया असुहदुक्खभा[ग]गी णरगाओ [उव्वट्टिया]
इहं सावसेसकम्मा, एवं णरगं तिरिक्खजोणिं कुमाणसत्तं च हिंडमाणा पावंति
अणंताइं दुक्खाइं पावकारी एसो सो पाणवहस्स फलविवागो इहलोडओ पा(प)-
रलोइओ अप्पसुहो बहुदुक्खो महब्भयो व्हुरयप्पगाढो दारुणो कक्कसो असाओ
चाससहस्सेहिं मुच्चती, न य अवेदयित्ता अत्थि हु मोक्खोत्ति एवमाहंतु, नायकल-
नंदणो महप्पा जिणो उ वीरवरनामधेज्जो क(हइ सीह)हेसी य पाणवह(ण)स्स
फलविवागं, एसो सो पाणवहो चंडो र्हो खुहो अणारिओ निग्घिणो निसंसो नह-
ब्भओ वीहणओ तासणओ अणज्जो उव्वेयणओ य णिरवयक्खो निद्वम्भो
निप्पिवासो निक्कलुणो निरयवासगमणनिधणो मोहमहब्भयपवट्ठओ मरणवेमणत्तो
पढमं अहम्मदारं समत्तंतिवेमि ॥ ४ ॥ जंवू! वित्तिं च अलियवयणं लहुमगलहु-
चवलभणियं भयंकरं दुहकरं अयसकरं वेरकरं अरतिरतिरागदोसमणसंकिळेसविय-
रणं अलियनियडिसातिजोयवहुलं नीयजणनिसेवियं निस्संसं अप्पचयकारकं परम-

साहुगरहणिजं परपीलाकारकं परमकिण्हलेस्ससहिंयं दुग्गइविणिवायवड्डुणं भवपुण-
 ञ्भवकरं चिरपरिचियमणुगतं दुरन्तं कित्ति(यं)तं वितितं अधम्मदारं ॥ ५ ॥ तस्स
 य णामाणि गोण्णाणि होति तीसं, तंजहा-अलियं १ सठं २ अणज्जं ३ मायामोसो
 ४ असंतकं ५ कूडकवडमवत्थुणं च ६ निरत्थयमवत्थयं च ७ विद्देसगरहणिजं
 ८ अणुज्जुं ९ कक्कणा य १० वंचणा य ११ मिच्छापच्छाकडं च १२ साती उ
 १३ उच्छन्नं १४ उक्कूलं च १५ अट्ठं १६ अब्भक्खाणं च १७ किब्बिसं १८ वलयं
 १९ गहणं च २० मम्मणं च २१ नूमं २२ निय(डी)यी २३ अप्पच्चओ २४ अस-
 मओ २५ असच्चसंधत्तणं २६ विवक्खो २७ अवही(आणाइ)यं २८ उवहिअसुद्धं
 २९ अवलोवोत्ति ३०, अविय तस्स एयाणि एवमादीणि नामधेज्जाणि होति तीसं
 सावज्जस्स अलियस्स वड्जोगस्स अणेगाइं ॥ ६ ॥ तं च पुण वदंति के[ई]इ अलियं
 पावा असंजया अविरया कवडकुडिलकडुयचटुलभावा कुद्धा लुद्धा भया य हस्स-
 ट्ठिया य सक्खी चोरचारभडा खंडरक्खा जियजूईकरा य गहियगहणा कक्कुरुग-
 कारगा कुलिंगी उवहिया वाणियगा य कूडतुलकूडमाणी कुडकाहावणोवजीवी
 पडगारकलायकारुड्जा वंचणपरा चारियचाटुयारनगरगोत्तियपरिचारगा दुट्ठवायि-
 सूयकअणवलभणिया य पुव्वकालियवयणदच्छा साहसिका लहुस्सगा असच्चा गार-
 विया असच्चट्ठावणाहिचित्ता उच्चच्छंदा अणिग्गहा अणियता छंदेण मुक्कवाता
 भवंति अलियाहिं जे अविरया, अवरे नत्थिकवादिणो वामलोकवादी भणंति नत्थि
 जीवो न जाइ इह परे वा लोए न य किंचिवि फुसति पुन्नपावं नत्थि फलं सुकय-
 दुक्कयाणं पंचमहाभूतियं सरीरं भासंति हे ! वातजोगजुत्तं, पंच य खंधे भणंति केई,
 मणं च मणजीविका वदंति, वाउजीवोत्ति एवमाहंसु, सरीरं सादियं सनिधणं इह-
 भवे एगे भवे तस्स विप्पणासंमि सव्वनासोत्ति, एवं जंपंति मुसावादी, तम्हा
 दाणवयपोसहाणं तवसंजमवंभचेरकल्लाणमाइयाणं नत्थि फलं नवि य पाणव[हे]ह-
 अलियवयणं न चेव चोरिक्ककरणपरदारसेवणं वा सपरिग्गहपावकम्मकरणं-पि नत्थि
 किंचि न नेरइयतिरियमणुयाण जोणी न देवलोको वा अत्थि न य अत्थि सिद्धि-
 गमणं अम्मापियरो नत्थि नवि अत्थि पुरिसकारो पच्चक्खाणमवि नत्थि नवि अत्थि
 कालमचू य अरिहंता चक्कवट्ठी वलदेवा वासुदेवा नत्थि नेवत्थि के[वि]इ रिसओ
 धम्माधम्मफलं च नवि अत्थि किंचि बहुयं च थोवकं वा, तम्हा एवं विजाणिऊण
 जहा सुवहु इंदियाणुकूलेसु सव्वविसएसु वट्टह णत्थि काइ किरिया वा अकिरिया
 वा एवं भणंति नत्थिकवादिणो वामलोगवादी, इमंपि वितीयं कुदंसणं असव्वभाववा-
 ण्णो पण्णवेंति मूढा-संभूतो अंडकाओ लोको सयंभुणा सयं च निम्मिओ, एवं एव

अलियं-पयावइणा इस्सरेण य कयंति केति, एवं विण्हुमयं कसिणमेव य जगंति केइ, एवमेके वदंति मोसं एको आया अकारको वेदको य सुकयस्स दुक्कयस्स य करणाणि कारणाणि सव्वहा सव्वहिं च निच्चो य निक्किओ निग्गुणो य अ(च्चो अ)णुवलेब-ओत्ति-विय एवमाहंसु असब्भावं, जंपि इहं किंचि जीवलोके दीसइ सुकयं वा दुक्कयं वा एयं अदिच्छाए वा सहावेण वावि दइवतप्पभावओ वावि भवति, नत्थेत्य किंचि कयकं [तत्तं]कयं च लक्खणविहाणनियती[ए]य कारि[यं]या एवं केइ जंपंति इद्धि-रससातगारवपरा बहवे करणालसा परूवेति धम्मवीमंसएण मोसं, अवरे अहम्मओ रायदुट्ठं अब्भक्खाणं भणंति-अलियं चोरोत्ति अचोरयं करेंतं डामरिउत्तिवि-य एमेव उदासीणं दुस्सीलोत्ति य परदारं गच्छतित्ति मइलित्ति सीलकलियं अयंपि गुरुतप्पओ, अण्णो एमेव भणंति उवाहणंता मित्तकलत्ताइं सेवंति अयंपि लुत्तधम्मो इमोवि विस्सं-भ[वाइ]घायओ पावकम्मकारी अकम्मकारी अगम्मगामी अयं दुरप्पा बहुएसु य पा(प)वगेसु जुत्तोत्ति एवं जंपंति मच्छरी, भद्दके वा गुणकित्तिनेहपरलोगनिप्पिवासा, एवं ते अलियवयणदच्छा परदोसुप्पायणप्पसत्ता वेढेन्ति अक्खातियवीएण अप्पाणं कम्मबंधणेण मुहरी असमिक्खियप्पलावा निक्खेवे अवहरंति परस्स अत्थंमि गढि-यगिद्धा अभिजुंजंति य परं असंतएहिं लुद्धा य करेंति कूडसक्खित्तणं असच्चा अत्थालियं च कज्जालियं च भोमालियं च तह गवालियं च गस्यं भणंति अहरगति-गमणं(कारणं), अजंपि य जातिरुवकुलसीलपच्चयं मायाणिगुणं चवल पिसुणं पर-मट्टभेदकम[स]संतकं विद्देसमणत्थकारकं पावकम्ममूलं दुदिट्ठं दुस्सुयं अमुणियं निहज्जं लोकगरहणिज्जं बहवंधपरिकिलेसबहुलं जरामरणदुक्खसोयनिम्मं असुद्धपरिणामसंकि-लिट्ठं भणंति अलिया(हिं)हिसं(ति)धिसंनिविट्ठा असंतगुणुदीरका य संतगुणनासका य हिंसाभूतोवघातितं अलियसंपउत्ता वयणं सावज्जमकुसलं साहुगरहणिज्जं अधम्म जणणं भणंति अणभिगयपुन्नपावा, पुणोवि अधिकरणकिरियापवत्तका बहुविहं अणत्थं अवमइं अप्पणो पररस य करेंति, एमेव जंपमाणा महिससूकरे य साहितिं घायगाणं सस-यपसयरोहिए य साहितिं वागुराणं तित्तिरवट्ठकलावके य कविंजलकवोयके य साहितिं साउणीणं असमगरकच्छमे य साहितिं मच्छियाणं संखंके खुल्लए य साहितिं म(ग्गि)-गराणं अयगरगोणसमंडलिदव्वीकरे मउली य साहितिं वा(यलिया)लवीणं गोहा सेहग सल्लगसरड[गे]के य साहितिं लुद्धगाणं गयकुलवानरकुले य साहितिं पासियाणं सुकबरहिणमयणसालकोइलहंसकुले सारसे य साहितिं पोसगाणं वधबंधजायणं च साहितिं गोम्मियाणं धणधन्नगवेलए य साहितिं तक्कराणं गामागरनगरपट्टणे य साहितिं चारियाणं पारघाइयपंथघातियाओ सा(हं)हिंति य गंठिमेयाणं कयं च चोरियं

नगरगोत्तियाणं लंछणनिलंछणधमणदुहणपोसणवणणदवणवाहणादियाइं साहिति
वहेणि गोमियाणं धातुमणिसिलप्पवालरयणागरे य साहिति आगरीणं पुप्फविहिं
फलविहिं च साहिति मालियाणं अग्घमहुकोसए य साहिति वणचराणं जंनाइं
विसाइं मूलकम्मं आ(हिंव्व)हेवण[आविधण]आभिओगमंतोसहिप्पओगे चोरियपर-
दारगमणवहुपावकम्मकरणं उक्खंधे गामघातियाओ वणदहणतलागभेयणाणि बुद्धि-
विसविणासणाणि वसीकरणमादियाइं भयमरणकिलेसदोसजणणाणि भाववहुसंकि-
लिट्ठमलिणाणि भूतघातोवघातियाइं सच्चाइंपि ताइं हिंसकाइं वयणाइं उदाहरंति
पुट्ठा वा अपुट्ठा वा परतत्तियवावडा य असमिक्खियभासिणो उवदिसंति सहसा
उट्ठा गोणा गवया दंसंतु परिणयवया अस्सा हत्थी गवेलगकुमुडा य किजंतु
किणावेध य विक्केह पयह य सयणस्स देह पियय दासिदासभयकभाडल्लका य त्तिस्सा
य पेसकजणो कम्मकरा य किंकरा य एए सयणपरिजणो य कीस अच्छंति [?] भारिया
भे क(रिंतु)रित्तु कम्मं गहणाइं वणाइं खेत्तखिलभूमिवट्ठराइं उत्तणघणसंकटाइं उज्जंतु
सूडिजंतु य रुक्खा भिजंतु जंतभंडाइयस्स उवहिस्स कारणाए वहुविहस्स य
अट्ठाए उच्छ्र दुजंतु पीलिजंतु य तिला पयावेह य इट्ठकाउ मम घरट्ठयाए खेत्ताइं
कसह कसावेह य लहुं गामआगरनगरखेडकव्वडे निवेसेह अडवीदेसेसु विपुल-
सीमे पुप्फाणि य फलाणि य कंदमूलाइं कालपत्ताइं गेण्हेह करेह संचयं परिजणट्ठ-
याए साली वीही जवा य लुच्चंतु मलिजंतु उप्(फ)पणिजंतु य लहुं च पविसंतु य
कौट्ठागारं अप्पमहउक्कोसगा य हंमंतु पोयसत्था सेणा णिज्जाउ जाउ डमर घोरा
वट्ठंतु य संगामा पवहंतु य सगडवाहणाइं उवणयणं चोलगं विवाहो जन्नो अमु-
गम्मि उ होउ दिवसे सुकरणे सुसुहुत्ते सुनक्खत्ते सुतिहिसु य अज्ज होउ ण्हवणं
मुदितं बहुखज्जपिज्जकलियं कोतुकं विण्हावणकं सत्तिकम्माणि कुणह ससिरविगहोव-
रागविसमेसु सज्जणपरियणस्स य नियकस्स य जीवियस्स परिरक्खणट्ठयाए पडि-
सीसकाइं च देह देह य सीसोवहारे विविहोसहिमज्जमंसभक्खन्नपाणमल्लाणुलेवणपई-
वजलिउज्जलसुगंधिधूवावकारपुप्फफलसमिद्धे पायच्छित्ते करेह पाणाइवायकरणेणं
बहुविहेणं विवरीउप्पायदुस्सुमिणपावसउणअसोमग्गहचरियअमंगलनिमित्तपडिघाय-
हेउं वित्तिच्छेयं करेह मा देह किंचि दाणं सुट्ठु हओ सुट्ठु हओ सुट्ठु छिन्नो भिन्नत्ति
उवदिसंता एवंविहं करेंति अलियं मणेण वायाए कम्मुणा य अकुसला अणज्जा अलि-
याणा अलियधम्मणिरया अलियासु कहासु अमिरमंता तुट्ठा अलियं करेत्तु हों-ति
य बहूप्पयारं ॥ ७ ॥ तस्स य अलियस्स फलविवागं अयाणमाणा वहेति महब्भयं
अविस्सामवेयणं दीहकालं बहुदुक्खसंकडं नरयतिरियजोणि तेण य अलिण्ण समणुबद्धा

आइद्धा पुणब्भवंधकारे भमंति भीमे दुग्गतिवसहिमुवगया, ते य दीसंतिह
दुग्गया दुरंता परवसा अत्थभोगपरिवज्जिया असुहिता फुडियच्छविवीभच्छविवज्जा
खरफरुसविरत्तज्जामज्जुसिरा निच्छाया लल्लविफलवाया असक्कतमसक्कया अगंधा
अचेयणा दुब्भगा अकंता काकस्सरा हीणभिन्नघोसा विहिंसा जडवहिरन्ध(मू)या य
मम्मणा अ(क)कंतविकयकरणा णीया णीयजणनिसेविणो लोगगरहणिज्जा भिच्चा अस-
रिसजणस्स पेस्सा दुम्मेहा लोकवेदअज्जप्पसमयसुतिवज्जिया नरा धम्मबुद्धिवियला
अलिण्ण य तेणं पडज्जमाणा असंतएण य अवमाणणपट्टिमंसाहिक्खेवपिसुणभेयण-
गुरुवंधवसयणमित्तवक्खारणादियाइं अब्भक्खाणाइं बहुविहाइं पावेंति अ(मणोर)-
णुवमा[णि]इं हिययमणदूमकाइं जावजीवं दुरुद्धराइं अणिट्ठ(स)खरफरुसवयण-
तज्जणनिब्भच्छणदीणवदणविमणा कुभोयणा कुवाससा कुवसहीसु किलिस्संता नेव
सुहं नेव निव्वुइं उवलभंति अचंतविपुलदुक्खसयसंपलित्ता । एसो सो अलियवयणस्स
फलविवाओ इहलोइओ परलोइओ अप्पसुहो बहुदुक्खो महव्भओ बहुरयप्पगाढो
दारुणो कक्कसो असाओ वाससहस्सेहिं मुच्चइ, न य अवेदयित्ता अत्थि हु मोक्खोत्ति,
एवमाहंसु नायकुलनंदणो महप्पा जिणो उ वीरवरनामधेज्जो कहेसी य अलियवयणस्स
फलविवागं एयं तं वितीयंपि अलियवयणं लहुसगलहुचवलभणियं भयंकरं दुहकरं
अयसकरं वेरकरं अरतिरतिरागदोसमणसंकिलेसविरयणं अलियणियडिसादि-
जोगवहुलं नी-यजणनिसेवियं निस्संसं अप्पच्चयकारकं परमसाहुगरहणिज्जं परपीला-
कारकं परमकण्हलेससहिंयं दुग्गतिविनिवायवड्ढणं (भव)पुणब्भवकरं चिरपरिचिय-
मणुगयं दु(रुत्तं)रंतं वितियं अधम्मदारं समत्तं ॥ ८ ॥ जंबू ! तइयं च अदत्तादाणं
हरदहमरणभयकलुसतासणपरसंतिगऽभेज्जलोभमूलं कालविसमसंसियं अहोऽच्छिन्न-
तण्हपत्थाणपत्थोइमइयं अकित्तिकरणं अणज्जं छिद्दमंतरविधुरवसणमग्गणउस्सव-
मत्तप्पमत्तपसुत्तवंचणक्खिखवणघायणपराणिहुयपरिणामतत्करजणवहुमयं अकलुणं राय-
पुरिसरक्खियं सया साहुगरहणिज्जं पियजणमित्तजणभेदविप्पीतिकारकं रागदोसवहुलं
पुणो य उप्पूरसमरसंगामडमरकलिकलहवेहकरणं दुग्ग[त्ति]इविणिवायवड्ढणं भवपुण-
ब्भवकरं चिरपरिचित्तमणुगयं दुरंतं तइयं अधम्मदारं ॥ ९ ॥ तस्स य णामाणि गोत्राणि
होति तीसं, तंजहा—चोरिक्कं १ परहडं २ अदत्तं ३ कूरे(कुरुडुय)क(यं)डं ४ परलाभो ५
असंजमो ६ परधणंमि गेही ७ लोलिक्कं ८ तक्करत्तणंति-य ९ अवहारो १० हत्थल(हु)त्तणं
११ पावकम्मकरणं १२ तेणिकं १३ हरणविप्पणासो १४ आदियणा १५ लुंण्णा
धणाणं १६ अप्पच्चओ १७ ओ(अ)वीलो १८ अक्खेवो १९ खेवो २० विक्खेवो
२१ कूडया २२ कुलमसी य २३ कंखा २४ लालप्पणपत्थणा य २५ (आससणाय)

वसणं २६ इच्छामुच्छा य २७ तण्हागेहि २८ नियडिकम्मं २९ अपरच्छंति ३०
विय तस्स एयाणि एवमादीणि नामधेजाणि होंति तीसं अदिजादाणस्स पावकलिकलु-
सकम्मवहुलस्स अणेगाइं ॥ १० ॥ तं पुण करेति चोरियं तकरा परदन्वहरा छेया
कयकरणलद्धलक्खा साहसिया लहुस्सगा अतिमहिच्छलोभग(च्छा)त्था दहरओवी-
लका य गोहिया अहिमरा अणभंजकभग्गसंधिया रायदुट्टकारी य विसयनिच्छूढलोक-
बज्झा उद्दोहकगामघाययपुरघायगपंथघायगआलीवगतिथ्यभेया लहुहत्थसंपउत्ता
जूडकरा खंडरक्खत्थीचोरपुरिसचोरसंधिच्छेया य गंधिभेदगपरधणहरणलोमावहार-
अक्खेवी हडकारका निम्महगगूढचोरकगोचोरगअस्सचोरगदासिचोरा य एकचोरा
ओकट्टकसंपदायकउच्छिपकसत्थघायकविल(चोरी)कोलीकारका य निग्गाहविप्पलुंपगा
बहुविहतेणिकहरणबुद्धी, एते अन्ने य एवमादी परस्स दन्वा हि जे अविरया । विपुल-
बलपरिग्गहा य बहवे रायाणो परधणंमि गिद्धा सए व दन्वे असंतुट्ठा परविसए अहिह-
णंति ते लुद्धा परधणस्स कज्जे चउरंग(सम)विभत्तवलसमग्गा निच्छियवरजोहजुद्धस-
द्धियअहमहमितिदप्पिएहिं [सेत्तेहिं] संपरिवुडा पउमसगडसूइचक्कागरगसुलवूहाति-
एहिं अणिएहिं उत्थरंता अभिभूय हरंति परधणाइं अवरे रणसीसलद्धलक्खा संगामं-
[मि] अतिवयंति सन्नद्धवद्धपरियरउप्पीलियचिंघपट्टगहियाउहपहरणा माडि(गुड)वर-
वम्मगुंडिया आविद्धजालिका कवयकंकडइया उरसिरमुहवद्धकंठतोणमाइतवरफलहर-
चितपहकरसरहसखरचावकरकरंछियसुनिसितसरवरिसचडकरक(भंते)मुयंतघणचंड-
वेगधारानिवायमग्गे अणेगधणुमंडलग्गसंधिताउच्छलियसत्तिकणगवामकरगहिय-
खेडगनिम्मलनिक्किट्टखग्गपहरंतकोंततोमरचक्कगयापरसुमुसललंगलसूललउलभिंड-
मालासव्वलपट्टिसचम्मेट्टुदुघणमोट्टियमोगगरवरफलहजंतपत्थरदुहणतोणकुवेणीपीड-
कलियईलीपहरणमिलिमिलिमिलंतखिप्पंतविज्जुज्जलविरचितसमप्पहणभत्तले फुडप-
हरणे महारणसंखभेरिवरतूरपउरपडुप(हडा)डहाहयणिणायगंभीरणंदितपक्खुभिय-
विपुलघोसे हयगयरहजोहतुरितपसरितउद्धततमंधकारवहुले कातरनरणयणहिययवा-
उलकरे विलुलियउक्कडवरमउडतिरीडकुंडलोडुदामाडोविय[म्मि]पागडपडागडसिय-
ज्झयवेजयंतिचामरचलंतछत्तंधकारगम्भीरे हयहेसियहत्थियगुलुगुलाइयरहघणघणाइ-
यपाइक्करहराइयअ(फा)फोडियसीहना[या]यल्लेलियविघुट्टुकुट्टकंठगयसइभीमगज्जिए
सयरहहसंतस्संतकलकलरवे आसूणियवयणसु[हे]इभीमदसणाधरोट्टगाढद[ट्टे](द)-
ट्टसप्प[ह]हार(कर)णुज्जयकरे अमरिसवसतिव्वरत्तनिद्वारितच्छे वेरदिट्टिकुद्धचिट्ठिय-
त्तिवलीकुडिलभिउडिकयनिलाडे वहपरिणयनरसहस्सविक्रमवियंभियवले वग्गंततुर-
गरहपहावियसमरभडा आवडियछेयलाघवपहारसाधिता समूसवियवाहुजुय(लं)ल्ले

मुकट्टहासपुक्रंतवोलबहुले फुर(फल)फलगावरणगहियगयवरपत्थितद(प्पि)रियभड-
खलपरोप्परपलमगजुद्धगवितविउसितवरासिरोसतुरियअभिमुहपहरितछिन्नकरिकरवि-
भंगितकरे अवइ[ट्ट]इनिमुद्धभिन्नफालियपगलियरुहिरकतभूमिकइमचिलिचिल्लपहे-
कुच्छि(वि)दालियगलित[रुलित]निमेहंतंतफुरुफुरंतविगलमम्माहयविकयगाढदिन्न-
पहारमुच्छितरुलंतवैभलविलावकलुणे हयजोहभमंततुरगउद्दाममत्तकुंजरपरिसंकि-
जणनिच्युक्कच्छिन्नधयभग्गरहवरनट्टसिरकरिकलेवराकिन्नपतितपहरणविकिन्नाभरण-
भूमिभागे नचंतकबंधपउरभयंकरवायसपरिलेतगिद्धमंडलभमंतच्छायंधकारगंभीरे-
वसुवसुहाविकंपितव्व पच्चक्खपिउवणं परमरुद्धवीहणगं दुप्पवेसतरगं अभिवर्यति संगाम-
संकडं परधणं महंता अवरे पाइक्कचोरसंधा सेणावतिचोरवंदपागड्डिका य अडवीदेस-
दुग्गवासी कालहरितरत्तपीतसुक्किल्लअणेगसयचिंधपट्टबद्धा परविसए अभिहणंति लुद्धा-
धणस्स 'कज्जे रयणागरसागरं उम्मीसहस्समालाउलाकुलवितोयपोतकलकलेंतकलियं
पा(ता)याल(कलस)सहस्सवायवसवेगसलिलउद्धम्ममाणदगरयरयंधकारं वरफेणप-
उरधवलपुलंपुलसमुट्टियट्टहासं मारुयविच्छुभमाणपाणियजलमालुप्पीलहुलियं अविक्क-
समंतओ खुभियलुलियखोखुब्भमाणपक्खलियचलियविपुलजलचक्कवालमहानईवेग-
तुरियआपूरमाणगंभीरविपुलआवत्तचवलभममाणगुप्पमाणुच्छलंतपच्चोणियत्तपाणिय-
पधावियखरफरुसपयंडवाउलियसलिलफुट्टंतवीतिकल्लोलसंकुलं महामगरमच्छकच्छ-
भोहारगाहतिमिसुंभमारसावयसमाहयसमुद्धायमाणकपूरघोरपउरं कायरजणहिययर्क-
पणं घोरमारसंतं महब्भयं भयंकरं पतिभयं उत्तासणगं अणोरपारं आगासं चेक्क
निरवलंबं उप्पाइयपवणधणितनोल्लियउवरुरितरंगदरियअतिवेगवेगचक्खुपहुमुच्छ-
रंतकच्छइगंभीरविपुलगजियगुंजियनिग्घायगरुयनिवतितसुदीहनीहारिदूरसु[चं]वंत-
गंभीरधु(गु)गधुगंतसहं पडिपहरुभंतजक्खरक्खसकुहंडपिसायरुसियतज्जायउवसग्ग-
सहस्ससंकुलं बहूप्पाइयभूयं विरचितवलिहोमधूवउवचारदिन्नरुधिरच्चणाकरणपयतजो-
गपययचरियं परियन्तजुगंतकालकप्पोवमं दुरंतमहानईनईव[इ]ईमहाभीमदरिसणिज्जं।
दुरणुच्चरं विसमप्पवेसं दुक्खुत्तारं दुरासयं लवणसलिलपुण्णं असियसियसमूसियगे(हि)-
हिं दच्छ(हत्थ)तरकेहिं वाहणेहिं अइवइत्ता समुद्धमज्झे हणंति गंतूण जणस्स पोते
परदव्वहरा नरा निरणुकंपा नि(रा)रवयक्खा गामागरनगरखेडकव्वडमडंबदोण-
मुहपट्टणासमणिगमजणवते य धणसमिद्धे हणंति थिरहिययछिन्नलज्जा वंदिग्गह-
गोग्गहे य गेण्हंति दारुणमती णिक्किवा णियं हणंति छिंदंति गेहसंधिं निक्खित्ताणि
य हरंति धणधज्जदव्वजायाणि जणवयकुलाणं णिग्घिणमती परस्स दव्वाहि जे
अविरया, तहेव केई अदिन्नादाणं गवेसमाणा कालाकालेसु संचरंता चियकापज-

लियसरसदरदङ्कुलद्वियकलेवरे सहिरलित्तवयणअखतखातियपीतडाइणिममंतम(य)यं-
करं जंबुयक्खिक्खियंते घूयकयघोरसेहे वेयालुद्वियनिसुद्धकहकहितपहसितवीहण-
कनिरभिरामे अतिदुब्धिगंधवीमच्छदरिसणिजे सुसाणवणमुन्नघरलेगअंतरावणगिरि-
कंदरविसमसावयसमाकुलासु वसहीसु किलिस्संता सीतातवसोत्तियसरीरा दङ्कुच्छवी
निरयतिरियभवसंकडदुक्खसंभारवेयणिजाणि पावकम्माणि संचिणंता दुल्लहभक्खन्न-
चाणभोयणा पिवासिया झुंझिया किलंता मंसकुणिमकंदमूलजंकिचिकयाहारा उव्विग्गा
उप्पुया असरणा अडवीवासं उव्वेति वालसतसंकणिजं अयसकरा तकरा भयंकरा
का(कस्)स हरामोत्ति अज्ज दव्वं इति सामत्यं करेति गुज्जं बहुयस्स जणस्स
कज्जकरणेसु विग्गकरा मत्तपमत्तपसुत्तवीसत्थिद्धाती वसणव्मुदएसु हरणवुद्धी
विगव्व सहिरमहिया परेति नरवतिमजायमतिकंता सज्जणजणदुगुंछिया सकम्मेहिं
पावकम्मकारी असुभपरिणया य दुक्खभागी निच्चाइलदुहमनिव्वुडमणा इह-लोके
चेव किलिस्संता परदव्वहरा नरा वसणसयसमावण्णा ॥ ११ ॥ तहेव केइ परस्स
दव्वं गवेसमाणा गहिता य हया य वद्धरुद्धा य तुरियं अतिधाडिया पुरवरं समप्पिया
चोरगहचारभड्चाडुकराण तेहि य कप्पडप्पहारनिदयआरक्खियखरफल्सवयण-
त्तज्जणगलच्छल्लुच्छल्लणाहिं विमणा चारगवसहिं पवेसिया निरयवसहिसरिसं तत्थवि
गोम्मियप्पहारदूमणनिव्वभच्छणकडुयवयणभेसण(गभया)गाभिभूया अक्खित्तनियं-
सणा मलिणदंडिखंडनिवसणा उक्कोडालंचपासमग्गणपरायणेहिं (दुक्खसमुदीरणेहिं)
गोम्मियभडेहिं विविहेहिं वंधणेहिं, किं ते १, हडिनिगड[वा]वालरज्जुयकुदंड-
गवरत्तलोहसंकलहत्यंदुयवज्जपट्टदामकणिक्कोडणेहिं अच्चेहि य एवमादिएहिं गोम्मिक-
भंडोवकरणेहिं दुक्खसमुदीरणेहिं संकोड[ण]मोडणाहिं वज्जंति मंदपु-ण्णा संपुड-
कवाडलोहपंजरभूमिघरनिरोहकूवचारगकीलगजूयचक्कविततवंधणखंभालणउद्धचलण-
वंधणविहम्मणाहि य विहेडयन्ता अवकोडकगाडउरसिरवद्धउद्धपूरितफुरंतउरकडग-
मोडणामेडणाहिं वद्धा य नीससंता सीसावेड[उ]ऊरुया[व]लचप्पडगसंधिवंधणतत्त-
सलागसूइयाकोडणाणि तच्छणविमाणणाणि य खारकडुयतित्तनावणजायणाकारण-
सयाणि बहुयाणि पावियंता उरक्खोढीदिन्नगाढपेल्लणअट्टिकसंभग्गसुपंसुलीगा गलका-
लक्कोहदंडउरउदरवत्थि-पिट्ठि-परिपीलिता म[त्थं]च्छंतहिययसंचुण्णियं(गुपं)गमंगा
आणत्तीकिकरेहिं केति अविराहियवेरेएहिं जमपुरिससन्निहेहिं पहया ते तत्थ
मंदपुण्णा चडवेलावज्जपट्टपाराइंछिवक्खसलतवरत्त[वे]वेत्तप्पहारसयताल्लियंगमंगा
किवणा लंवंतचम्मवणवेयणविमुहियमणा घणकोट्टिमनियलजुयलसंकोडियमोडिया य
कीरंति निस्सारा एया अन्ना य एवमादीओ वेयणाओ पावा पावेति अदन्तिदिया

वसद्वा बहुमोहमोहिया परधणंमि लुद्धा फासिंदियविसयतिव्वगिद्धा इत्थिगयस्सवसद्-
 रसगंधइद्वरतिमहितभोगतण्हाइया य धणतोसगा गहिया य जे नरगणा पुणरवि ते
 कम्मदुव्वियद्धा उवणीया रायकिंकराण तेसिं वहसत्थगपाडयाणं विलउलीकारकाणं
 लंचसयगेण्हगाणं कूडकवडमायानियडिआयरणपणिहिवंचणविसारयाणं बहुविहअलि-
 यसतजंपकाणं परलोकपरम्मुहाणं निरयगतिगामियाणं तेहि य आणत्तजीयदंडां
 तुरि(य)यं उग्घाडिया पुरवरे सिंघाडगतिचउक्कचच्चरचउम्मुहमहापहपहेसु वेत्तदंड-
 लउडकट्टलेहुपत्थरपणालिपणोल्लिमुट्टिलयापादपणिहजाणुकोप्परपहारसंभगमहियगत्ता
 अट्टारसकम्मकारणा जाइयंगमंगा कलुणा सुक्कोट्टकंठगलकतालुजीहा जायंता पाणीयं
 विगयजीवियासा तण्हादिता वरागा तंपिय ण लभंति वज्जपुरिसेहिं धाडियंता तत्थ
 य खरफरुसपडहघट्टितकूडगहगाडरुट्टनिसट्टपरामुट्टा वज्जकरकुडिजुयनियत्था सुरत्त-
 कणवीरगहियविमुकुलकंठेगुणवज्जदूतआविद्धमल्लदामा मरणभयुप्पण्णसेदआयतणे-
 हुत्तुपियकिलिन्नगत्ता चुण्णगुंडियसरीररयरेणुभरियकेसा कुसुंभगोक्किन्नमुद्धया छिन्नजी-
 वियासा घुन्नंता वज्ज[या]पाण[भीता]पीया तिलं तिलं चेव छिज्जमाणा सरीर-
 विक्किन्तलोहिओलि[त्ता]त्तकागणिमंसाणि खावियंता पावा खर[फरु]करसएहिं
 तालिज्जमाणदेहा वातिकनरनारिसंपरिवुडा पेच्छिज्जंता य नागरजणेण वज्जनेवत्थिया
 पणेज्जंति नयरमज्जेण किवणकलुणा अत्ताणा असरणा अणाहा अवंधवा वंधुविप्पहीणा
 विपिक्खिता दिसोदिसि मरणभयुव्विग्गा आघायणपडिदुवारसंपाविया अधन्ना
 सूलगविलगभिन्नदेहा, ते य तत्थ कीरंति परिकप्पियंगमंगा उल्लंविज्जंति रुक्खसालासु
 के-इ कलुणाइं विलवमाणा अवरे चउरंगधणियवद्धा पव्वयकडगा पमुच्चंते दूरपात-
 बहुविसमपत्थरसहा अन्ने य गयचलणमलयनिम्मदिया कीरंति पावकारी अट्टारस-
 खंडिया य कीरंति मुंडपरसूहि के-इ उक्कतकन्नोट्टनासा उप्पाडियनयणदसणवसणा
 जि[ब्भिंदियं]ब्भंछि[या]यछिन्नकन्नसिरा पणिज्जंते छिज्जन्ते य असिणा निव्विसया
 छिन्नहत्थपाया पमुच्चंते जावजीवबंधणा य कीरंति केइ परदव्वहरणलुद्धा कारगल-
 नियलजुयलरुद्धा चारगा[व]ए हतसारा सयणविप्पमुक्का मित्तजणनि[रिक्ख]र(क्कि)-
 क्कया निरासा बहुजणधिकारसदलज्जायिता (अलज्जाविया) अलज्जा अणुवद्धखुहापार-
 द्दसीउण्हतण्हवेयणदुग्घट्टया विवन्नमुहविच्छविआ विहलमतिलदुव्वला किलंता
 कासंता वाहिया य आमाभिभूयगत्ता पण्डनहकेसमंसुरोमा छगमुत्तंसि णियगंमि
 खुत्ता तत्थेव मया अकामका वंधिऊण पादेषु कट्ठिया खाइयाए छूडा तत्थ
 य व(व)गसुणगसियालकोलमज्जारवंदसंदंसगतुंडपक्खिगणविविहमुहसय[ल]विलुत्त-
 गत्ता कयविहंगा केइ किसिणो य कुहियदेहा अणिट्टवयणेहि सप्पमाणा चट्ट कयं जं

मज्झिमा निपायो तुट्ठेणं जणेण हम्ममाणा लज्जावणका य होंति सयणस्सवि-य दीहकालं
 मया संता, पुणो परलोगसमावन्ना नरए गच्छंति निरभिरामे अंगारपलितककप्प-
 अच्चत्थसीतवेदणअस्साउदिन्नसयतदुक्खसयसमभि(भू)हुते ततोवि उव्वट्ठिया
 समाणा पुणोवि प(डि)वज्जंति तिरियजोणिं तहिंपि निरयोवमं अणुहवंति वेयणं, ते
 अणंतकालेण जति नाम कहिं(चि-वि)पि मणुयभावं लभंति जेगेहिं गिरयगतिगमणति-
 रियभवसयसहस्सपरियट्ठेहिं तत्थवि-य भवं[त]तिऽणारिया नीचकुलसमुप्पण्णा
 आरियजणेवि लोगवज्झा तिरिक्खभूता य अकुसला कामभोगतिसिया जहिं निवंधंति
 निरयवत्तणिभवप्पवंचकरणपणोल्लि पुणोवि संसा(र)रावत्तणेममूले धम्मसुतिविवज्जिया
 अणज्जा कूरा मिच्छतसुतिपवन्ना य होंति एगंतदंडरुइणो वेढेंता कोसिकारकीडोव्व
 अप्पगं अट्ठकम्मतंतुघणवंधणेणं एवं नरगतिरियनरअमरगमणपेरंतचक्कवालं जम्म-
 जरामरणकरणगम्भीरदुक्खपखुभियपडरसलिलं संजोगवि[यो]ओगवीचीचिंतापसंग-
 पसरियवहवंधमहल्लविपुलकल्लोलकल्लुणविलवितलोभकलकलितवोलवहुलं अवमाण-
 णेणं तिक्खसिणपुलंपुलप्पभूयरोगवेयणपराभवविणिवातफरुसधरिसणसमावडियक-
 ठिणकम्मपत्यरतरंगरंगंतनिच्चमच्चुभयतोयपट्ठं कसायपायालसंकुलं भवसयसहस्सजल-
 संचयं अणंतं उव्वे(व)यणयं अणोरपारं महवभयं भयंकरं पइभयं अपरिमियमहिच्छ-
 कल्लसमतिवाउवेगउद्धम्ममाणआसापिवासपायालकामरतिरागंदोसवंधणवहुविहसंक-
 प्पविपुलदगरयरयंधकारं मोहमहावत्तभोगभममाणगुप्पमाणुच्छलंतवहुगव्मवासपच्चो-
 णियत्तपाणि[यं]यप(वाहिय)धावितवसणसमावन्नरुन्नचंडमारुयसमाहयामणुन्नवीची-
 चाकुलितभग्गफुट्ठंतनिट्ठकल्लोलसंकुलजलं पमातवहुचंडदुट्ठसावयसमाहयउद्धायमाणग-
 पूरघोरविट्ठंसणत्थवहुलं अण्णाणभमंतमच्छपरिहत्[थं]थअनिहुतिंदियमहामगरतुरिय-
 चरियखोखुव्वमाणसंतावनि[च]च्चयचलंतचवलचंचलअत्ता(ण)णाऽसरणपुव्वकयक-
 म्मसंचयोदिन्नवज्जवेइज्जमाणदुहसयविपाकधुचंतजलसमूहं इड्डिरससायगारवोहारग-
 हियकम्मपडिवद्धसत्तकट्ठिज्जमाणनिरयतलहुत्तसन्नविसन्नवहु[ल]लअरइरइभयविसा-
 यसोगमिच्छत्तसेलसंक[डं]डअणातिसंताणकम्मवंधणक्किलेसचिक्खिल्लसुदुत्तारं अमर-
 नरतिरियनिरयगतिगमणकुडिलपरियत्तविपुलवेलं हिंसालियअदत्तादाणमेहुणपरिग-
 हारंभकरणकारावणाणमोदणअट्ठविहअणिट्ठकम्मपिडितगुरुभारक्कंतदुग्गजलोघदूरप-
 णोल्लिज्जमाणउम्(मु)मग्गनि-मग्गदुल्लभतलं सारीरमणोमयाणि दुक्खानि उप्पियंता
 सातस्सायपरित्तावणमयं उव्वुड्ढनिवुड्ढयं करेंता चउरंतमहंतमणवयग्गं (संडं) रुदं संसार-
 सागरं अट्ठि[यं]यअणालंवणमपतिठाणमप्पमेयं चुलसीतिजोणिसयसहस्सगुविलं अणा-
 लोकमंधकारं अणंतकालं निच्चं उत्तयसुण्णभयसण्णसंपउत्ता (संसारसागरं) वसंति

उव्विगावासवसहिं जहिं आउयं निबंधंति पावकम्मकारी बंधवजणसयणमित्तपरि-
चज्जिया अणिट्ठा भवन्ति अणादेज्जदुव्विणीया कुठाणासणकुसेज्जकुभोयणा असुइणो
कुसंधयणकुप्पमाणकुसंठिया कुरुवा बहुकोहमाणमायालोभा बहुमोहा धम्मसन्नसम्मत्त-
पब्भट्ठा दारिद्रोवद्दवाभिभूया निच्चं परकम्मकारिणो जीवणत्थरहिया किविणा पर-
पिंडतक्का दुक्खलद्धाहारा अरसविरसतुच्छकयकुच्छिपूरा परस्स पेच्छंता रिद्धि-
सक्कारभोयणविसेससमुदयविहिं निंदंता अप्पक कयंतं च परिवयंता इह य पुरेकडाई
कम्माई पावगाई विमणसो सोएण डज्जमाणा परिभूया होंति सत्तपरिवज्जिया य
छेभासिप्पकलासमयसत्थपरिवज्जिया जहाजायपसुभूया अवियत्ता णिच्चनीयकम्मो-
वजीविणो लोयकुच्छणिजा मोघमणोर[हा]हनिरासबहुला आसापासपडिवद्धपाणा
अत्थोपायाणकामसोक्खे य लोयसारे होंति अफलवंतका य सुट्ठुविय उज्जमंता
तद्विसुज्जुत्तकम्मकयदुक्खसंठवियसित्थपिंडसंचयप[क]राखीणदव्वसारा निच्चं अधुव-
धणधण्णकोसपरिभोगविवज्जिया रहियकामभोगपरिभोगसव्वसोक्खा परसिरिभोगोव-
भोगनिस्साणमग्गणपरायणा वरागा अकामिकाए विणेंति दुक्खं णेव सुहं णेव
निव्वुत्ति उवलभंति अच्चंतविपुलदुक्खसयसंपलित्ता परस्स दव्वेहिं जे अविरया,
एसो सो अदिण्णादाणस्स फलविवागो इहलोइओ पारलोइओ अप्पसुहो बहुदुक्खो
महब्भओ बहुरयप्पगाढो दारुणो कक्कसो असाओ वाससहस्सेहिं मुच्चति, न य
अवेयइत्ता अत्थि उ मोक्खोत्ति, एवमाहंसु णायकुल-णंदणो महप्पा जिणो उ
वीरवरनामधेज्जो कहेसी य अदिण्णादाणस्स फलविवागं एयं तं ततियंपि अदि-ण्णा
दाणं हरदहमरणभयकलुसतासणपरसंतिकभेज्जलोभमूलं एवं जाव चिरपरिगतमणु-
गतं दुरंतं ततियं अहम्मदारं समत्तं तिबेमि ॥ १२ ॥ जंबू ! अवंभं च चउत्थं
सदेवमणुयासुरस्स लोयस्स पत्थणिज्जं पंकपणयपासजालभूयं धीपुरिसनपुंसवेदधिं
तवसंजमवंभचेरविग्घं भेदायतणबहुपमादमूलं कायरकापुरिससेवियं सुयणजणवज्ज-
णिज्जं उट्ठुनरयतिरियतिलोक्कपइट्ठाणं जरामरणरोगसोगबहुलं वधबंधविघातदुव्विधायं
दंसणचरित्तमोहस्स हेउभूयं चिरपरि[गय]चित्तमणुगयं दुरंतं चउत्थं अधम्मदारं
॥ १३ ॥ तस्स य णामाणि गोत्राणि इमाणि होंति तीसं, तं०-अवंभं १ मेहुणं
२ चरंतं ३ संसग्गि ४ सेवणाधिकारो ५ संकप्पो ६ वाहणा पदानं ७ दप्पो
८ मोहो ९ मणसं[खेवो]खोभो १० अणिग्गहो ११ चुग्गहो १२ विघाओ १३
विभंगो १४ विब्भमो १५ अधम्मो १६ असीलया १७ गामधम्म[ति]तत्ती १८ रत्ती
१९ राग(चित्ता)कामभोगमारो २१ वेरं २२ रहस्सं २३ गुज्जं २४ बहुमाणो २५
वंभचेरविग्घो २६ वावत्ति २७ विराहणा २८ पसंगो २९ कामगुणोत्ति ३० विय

तस्स एयाणि एवमादीणि नामधेज्जाणि होंति तीसं ॥ १४ ॥ तं च पुण निसेवंति ,
 सुरगणा सअच्छरा मोहंमोहियमती असुरभुयगगरुलविजुजलणदीवउदहिदिसिपवण-
 थणिया १० अणवन्निपणवन्नियइसिवादियभूयवादियकंदियमहाकंदियकूहंडपयंगदेवा
 ८ पिसायभूयजक्खरक्खसकिनरकिंपुरिसमहोरगगंधवा ८ तिरियजोइसविमाणवासि-
 मणुयंगणा जलयरथलयरखहयरा य मोहपडिवद्धचित्ता अवितण्हा कामभोगतिसिया
 तण्हाए वलवईए महईए समभिभूया गडिया य अतिमुच्छिया य अवंमे उस्सण्णा
 तामसेण भावेण अणुमुक्का दंसणचरित्तमोहस्स पंजरं पिव करेंति अ(णमण्णं)जोऽन्नं
 सेवमाणा, भुज्जो असुरसुरतिरियमणुअभोगरतिविहारसंपउत्ता य चक्खवट्ठी सुरनरवति-
 सक्कया सुरवरुव देवलोए भरहणगणगरणि[य]गमजणवयपुरवरदोणमुहखेडकव्वड-
 मडंवसंवाहपट्टणसहस्समंडियं थिमियमेयणियं एगच्छत्तं ससागरं भुंजिऊण वसुहं नर-
 सीहा नरवई नरिंदा नरवसभा मरुयवसभकप्पा अब्भहियं रायतेयलच्छीए दिप्पमाणा
 सोमा रायवंसतिलगा रविससिसंखवरचक्खसोत्थियपडागजवमच्छकुम्मरहवरभगभ-
 वणविमाणतु(रंग)रयतोरणगोपुरमणिरयणनंदियावत्तमुसलणंगलसुरइयवरकप्परुक्ख-
 सिगवतिभद्दांसणसुरुविथूभवरमउडसरियकुंडलकुंजरवरवसभदीवमंदिरगरुलद्वयइंद-
 केउदप्पणअट्ठावयचाववाणनक्खत्तमेहमेहलवीणाजुगलत्तदामदामिणिकमंडलुकमल-
 घंटावरपोतसूइसागरकुमुदागरमगरहारगागरनेउरणगणगरवइरकिन्नरमयूरवररायहं-
 ससारसचकोरचक्खवागमिहुणचामरखेडगपव्वीसगविपंचिवरतालियंटसिरियाभिसेयमे-
 इणिवग्गंकुसविमलकलसभिंजारवद्धमाणगपसत्थउत्तमविभत्तवरपुरिसलक्खणधरा व-
 चीसं वररायसहस्साणुजायमग्गा चउसट्टिसहस्सपवरजुवतीण णयणकंता रत्ताभा पउ-
 मपम्हकोरंटगदामचंपकसुत(त्त)यवरकणकनिहसव-ण्णा सुजायसव्वंगसुंदरंगा महग्घव-
 रपट्टणुग्गयविचित्तरागएणिपेणिणिम्मियदुगुल्लवरचीणपट्टकोसेज्जसोणीसुत्तकविभूसियंगा
 वरसुरभिगंधवरचुण्णवासवरकुसुमभरियसिरया कप्पियछेयायरियसुकयरइ[त्त]यमाल-
 (कुं)कड(लं)गंगयतुडियपवरभूसणपिणद्धदेहा एकावलिकंठसुरइयवच्छा पालंवपलंव-
 माणसुकयपडउत्तरिज्जमुद्धियापिगलंगुलिया उज्जलनेवत्थरइयचेल्लगविरायमाणा तेएण
 दिवाकरोव्व दित्ता सारयनवत्थणियमहुरगंभीरनिद्धोसा उप्पन्नसमत्तरयणचक्करय-
 णप्पहाणा नवनिहि(य)वइणो समिद्धकोसा चाउरंता चाउराहिं सेणाहिं समणुजातिज्ज-
 माणमग्गा तुरगवती गयवती रहवती नरवती विपुलकुलवीसुयजसा सारयससिसकल-
 सोमवयणा सूरु तेलोक्कनिग्गयपभावलद्धसद्दा समत्तभरहाहिवा नरिंदा ससेलवणकाणणं
 च हिमवंतसागरंतं धीरा भुत्तूण भरहवासं जियसत्तू पवररायसीहा पुव्वकडतवप्पभावा
 निविट्ठसंचियसुहा अणेगवाससयमायुवंतो भज्जाहि य जणवयप्पहाणाहिं लालियंता

अतुलसदफरिसरसरुवगंधे य अणुभवेत्ता तेवि उवणमंति मरणधम्मं अवितत्ता
 कामाणं । भुज्जो [भुज्जो] बलदेववासुदेवा य पवरपुरिसा महाबलपरक्कमा महाधणु-
 वियट्ठका महासत्तासागरा दुद्धरा धणुद्धरा नरवसभा रामकेसवा भायरो सपरिसा
 चसुदेवसमुद्दविजयमादियदसाराणं पज्जुन्नपतिवसंवअनिरुद्धनिसहउम्मुयसारणगयसु-
 मुहदुम्मुहादीण जायवाणं अद्धुट्ठाणवि कुमारकोडीणं हिययदयिया देवीए रोहिणीए
 देवीए देवकीए य आणंदहिययभावनंदणकरा सोलसरायवरसहस्साणुजातमग्गा
 सोलसदेवीसहस्सवरणयणहिययद[यि]इया णाणामणिकणगरयणमोत्तियपवालधण-
 धन्नसंचयरिद्धिसमिद्धकोसा हयगयरहसहस्ससामी गामागर-णगरखेडकव्वडमडंबदो-
 णमुहपट्ठणासमसं(वा)वाहसहस्सथिमियणिव्वुय-प-मुदितजणविविह[सर]सासनिप्फ-
 ज्जमाणमेइणिसरसरियतलागसेलकाणणआरामुज्जाणमणाभिरामपरिमंडियस्स दाहिण-
 ण्वेयडुगिरिविभत्तस्स लवणजलहिपरिगयस्स छव्विहकालगुणकामजुत्तस्स अद्धभर-
 हस्स सामिका धीरकित्तिपुरिसा ओहवला अइवला अनिहया अपराजियसत्तुमट्ठ-
 रिपुसहस्समाणमहणा साणुक्कोसा अमच्छरी अचवला अचंडा मितमंजुलपलावा-
 हसियगंभीर-महुर(परिपुण्णसच्चवयणा)भणिया अब्भुवगयवच्छला सरण्णा लक्ख-
 णवंजणगुणोववेया माणुम्माणपमाणपडिपुन्नसुजायसव्वंगसुंदरंगा सत्तिसोमागारकंत-
 पियदंसणा अमरिसणा पयंडडंडप्पयारगंभीरदरिसणिज्जा तालद्धउव्विद्धगरुलकेऊ
 बलवगगज्जंतदरितदप्पितमुट्ठियचाणूर(चू)मूरगा रिट्ठवसभघातिणो केसरिमुहविप्फा-
 डगा दरितनागदप्पमहणा जमलज्जुणभंजगा महासउणिपूतणारि[ऊ]वू कंसमउड-
 भोडगा जरासिंधमाणमहणा तेहि य (अब्भपडलपिंगलुज्जलेहि) अविरलसमसहिय-
 चंडमंडलसमप्प(हे)भेहिं (मंगलसयभत्तिच्छेयचित्तियखिखिणिमणिहेमजालविरइयप-
 रिगयपेरंतकणयघंटियपयलियखिणिखिणिंतसुमहुरसुइसुहसहालसोहिएहिं सपयरगमु-
 त्तदामलंवंतभूसणेहिं नरिंदवामप्पमाणरुंदपरिमंडलेहिं सीयायववायवरिसविसदोसणा-
 सएहिं तमरयमलवहुलपडलधाडणपहाकरेहिं मुद्धसुहसिवच्छायसमणुवद्धेहिं वेरुलि-
 यदंडसज्जिएहिं वयरामयवत्थिणिउणजोइयअडसहस्सवरकंचणसलागनिम्मिएहिं सुवि-
 मलरययसुट्ठच्छइएहिं णिउणोवियमिसिमिसितमणिरयणसूरमंडलवित्तिमिरकरनिग्गय-
 पडिहयपुणरविपच्चोवयंतचंचल-सूर-(म)मिरी(इ)यकवयं विणिम्मुयंतेहिं सपतिदंडेहिं
 आयवत्तेहिं धरिज्जंतेहिं विरायंता ताहि य पवरगिरिकुहरविहरणसमुट्ठियाहिं निरुवहय-
 चंमरपच्छिमसरीरसंजाताहिं अमइलसियकमलविमुकुलुज्जलितरयतगिरिसिहरविमल-
 ससिकिरणसरिसकलहोयनिम्मलाहिं पवणाहयचवलचलियसललियपणच्चियवीइपस-
 रियखीरोदगपवरसागरुप्पूरचंचलाहिं माणसंसरपसरपरिचियावासविसदवेसाहिं कण-

गगिरिसिहरसंसिताहिं उवाउप्पातचवलजयिणसिखवेगाहिं हंसवयूयाहिं चैव कलिया
नाणामणिअणगमहरिहतवणिजुजलविचितडंडाहिं सललियाहिं नरवतिसिरिसमुदय-
प्यगासणकरीहिं वरपट्टणुगयाहिं समिद्धरायकुलसेवियाहिं कालागुदयवर कुंडुस्कु-
रुद्धवूव[र]सवासविसदगंधुदूयाभिरामाहिं चिल्लिकाहिं उभयोपासंषि चामराहिं
उक्खिअप्पमाणाहिं सुहसीतलवातवीतियंगा अजिता अजितरहा हलमुसलकगगपाणी
संखचक्रगयसत्तिगंदगधरा पवरुजलमुकतविमलकोयूमतिरीडवारी कुंडलउज्जोविया-
णणा पुंडरीयणयणा एगावलीकंठरतियवच्छा सिरिवच्छमुलंछगा वरजसा सव्वोउय-
सुरभिकुसुमसुरइयपलंवसोहंतवियसंनचिनवगमालरतियवच्छा अट्टसयविमत्तलक्खण-
पसत्थमुंदरविराइयंगमंगा मत्तगयवरिंदललियविक्रमविलसियगती कडिसुनगनील-
पीतकोसिजवाससा पवरदिनतेया सारयनवथणियमहुरगंमीरनिद्धयोसा नरसीहा सीह-
विक्रमगई अत्यसि(य)या पवररायसीहा सोमा वा[वा]खइपुअचंदा पुव्वकयतवप्प-
भावा निविट्टसंचियमुहा अणेगवाससयमा(तु)युवंतो भजाहि य जगवयप्पहाणाहिं
लालियंता अतुलसद्वफरिसरसरुवगंधे अणुभवेत्ता ते-वि उवणमंति मरणवन्मं अवितत्ता
कामाणं । भुज्जो मंडलियनरवरेंदा सवला सअंतेउरा सपरिस्ता सपुरोहिया[S]मच्चदंड-
नायकसेणावतिमंतनीतिकुमला नाणामणिरयणाविपुलधणधन्नसंचयनिहीसंमिद्धकोसा
रजसिरि विपुलमणुभविता विक्रोसंता व्लेण मत्ता तेवि उवणमंति मरणवन्मं अवितत्ता
कामाणं । भुज्जो उत्तरकुलदेवकुलवणविवरपा[य]दचारिणो नरगणा भोगुत्तमा भोगल-
क्खणधरा भोगसत्तिरीया पसत्थसोमपडिपुण्णहवद(र)रिनणिजा मुजातसव्वंग-
सुंदरंगा रत्तुप्पलपत्तकंतकरचरणकोमलतला सुपइद्वियकुम्मचारुचलणा अणुपुव्वसु-
(जायपीवरं)संहयंगुलाया उअयतणुनंननिद्धनखा संठि(त)यसुसिलिद्धगूढगोंका एणी-
कुलविदयनवड्डाणुपुव्विजंवा नमुरगनि(सु)सगगूढजाणू वरवारणमनतुल्लविक्रमविला-
सितगती वरतुरगसुजायगुज्जडेसा आइअहयव्व निरुवलेवा पमुइयवरतुरगसीहअति-
रेगवट्टियकडा^{दि}गंगावनदाहिणावनतरंगमंगुररविकिरणवोहियविक्रोसायंतपन्हगंमीर-
विगटनाभी साहतनोणंदमुसलदप्पणनिगरियवरकणगच्छकसरिसवरवड्ढरवलियमज्जा
चउगममगहिणज्जतगुरुमिगिद्विआदेजलडहसुसालमउयरोमराई असविहगसुजा-
तपीनटुन्छी असोदरा पम्हविगटनाभा संनतपासा संगयपासा सुंदरपासा मुजात-
पामा मिन्माउउपीगरउपासा अकरंडुवकगगल्यगनिम्मलमुजायनिस्वहयदेहवारी
अणगमिन्मातलपमत्थममनलउवउयविच्छिअपिहुलवच्छा ज्ञयसंनिभपीणरइयपीवर-
पट्टसंठियणुनिच्छिअपिहलमुनिचिनवगयिर^रद्वसंधी पुरवरवरकल्लिहवट्टियमुदा
सुयंगेरविगुलभोगआचाणकडिउच्छट्टवीहवाहू रत्ततलोवतियमउयमंसलमुजायल-

कखणपसत्थअच्छिदजालपाणी पीवरसुजायकोमलवरंगुली तंवतलिणसुइइलनिद्ध-
 न-क्खा निद्धपाणिलेहा चंदपाणिलेहा सूरपाणिलेहा संखपाणिलेहा चक्काणिलेहा
 दिसासोवत्थियपाणिलेहा रविससिसंखवरचक्कदिसासोवत्थियविभत्तसुविरइयपाणिलेहा
 वरमहिसवराह[सीह]सइल[सी](सिं)रिसहेनागवरपडिपुन्नविउलखंधा चउरंगुलसुप्प-
 माणकंबुवरसरिसग्गीवा अवट्ठियसुविभत्तचित्तमंसू उवचियमंसलपसत्थसइलविपुलह-
 गुया ओयवियसिलप्पवालबिंवलसंनिभाधरोट्ठा पंडुरससिसकलविमलसंखगोखीर-
 फेणकुंददंगरयमुणालियाधवलदंतसेढी अखंडदंता अप्फुडियदंता अविरलदंता सुणि-
 द्धदंता सुजायदंता एगदंतसेढिंव अणेगदंता हुयंवहनिद्धंतधोयतत्तवणिजरत्तत-
 [ला]लतालुजीहा गरुलायतउज्जुतुंगनासा अवदालियपोंडरीयनयणा कोकासियधवल-
 पत्तलच्छा आणामियचावरइलकिण्हभमराजिसंठियसंगयाययसुजायभुमगा अल्लीणप-
 माणजुत्तसवणा सुसवणा पीणमंसलकवोलदेसभागा अचिरुगयवालचंदसंठियमहा-
 निडाला उडुवतिरिव पडिपुन्नसोमवयणा छत्तागारुत्तमंगदेसा घणनिचियसुवद्धलक्ख-
 गुन्नयकूडागारनिभपिंडियग्गसिरा हुयवहनिद्धंतधोयतत्तवणिजरत्तकेसंतकेसभूमी
 सामलीपोंडघणनिचियछोडियमिउविसतपसत्थसुहुमलक्खणसुंगंधिसुंदरभुयमोयगभि-
 गनीलक्कजलपहट्टभमरणनिद्धनिगुरुंवनिचियकुंचियपयाहिणावत्तमुद्धसिरया सुजात-
 सुविभत्तसंगयं(गमं)गा लक्खणवंजणगुणोववेया पसत्थवत्तीसेलक्खणधरा हंसस्सरा
 कुंचस्सरा दुंदुभिस्सरा सीहस्सरा ओघ(उज्ज)सरा मेघसरा सुस्सरा सु[र]सरनिग्घोसा
 वज्जरिंहनारायसंघयणा सेमचउरंससंठाणसंठिया छायाउज्जोवियंगमंगा पसत्थच्छवी
 निरातंका कंकग्गहणी क्वोतपरिणामा सगुणिपोसपिट्ठंतरोरुपरिणया पउमुप्पलसरि-
 सगंधुस्संसाससुरभिवयणा अणुलोमवाउंवेगा अवदायनिद्धकाला विग्गहियउन्नयकुच्छी
 अमयरसफलाहारा तिगा[ऊ]उयंसमूसिया तिपलिओवमट्ठि(ती)तिका तिच्चिं य पलि-
 ओवमाइं परमाउं पालयित्ता ते-वि उवणमंति मरणधम्मं अवि[त]तिता कामाणं ।
 पमया-वि य तेसि होंति सोम्मा सुजायसव्वंगसुंदरीओ पहाणमहिलागुणेहिं जुत्ता
 अतिकंतविसप्पमाणमउयसुकुमालकुम्मसंठियसिलिद्धच[र]लणा उज्जुमउयपीवरसुसा-
 हतंगुलीओ अब्भुजतरतिततलिणतंवसुइनिद्धनखा रोमरहियवट्ठसंठि[अ]यअजहजप-
 सत्थलक्खणअकोप्पजंघजुयला सुणिमिमतसुनिगूढजाणूंमंसलपसत्थसुवद्धसंधी कयली-
 खंभातिरेकसंठियनिव्वणसुकुमालमउयकोमलअविरलसमसहितसुजायवट्ठपीवरनिर-
 न्तरोरु अट्ठावयवीइपट्ठसंठियपसत्थविच्छिन्नपिहुलसोणी वयणायामप्पमाणदुगुणिय-
 विसालमंसलसुवद्धजहणवरधारिणीओ वज्जविराइयपसत्थलक्खणनिरोदरीओ तिवलि-
 वलियतणुनमियमज्झियाओ उज्जुयसंसहियजच्चतणुकसिणनिद्धआदेजलडहसुकुमाल-

मउयसुविभत्तरोमरातीओ गंगावत्तगपदाहिणावत्ततरंगंभंगरविकिरणतरुणवोधितआ-
 कोसायंतपउमगंभीरविगडनाभा अणुव्भडपसत्यसुजातपीणकुच्छी सन्ननपासा सुजात-
 पासा संगतपासा मियमायियपीणरतितपासा अकरंदुयकणगरुयगनिम्मलसुजाय-
 निस्वहयगायलट्ठी कंचणकलसपमाणसमसहियलट्ठ[चू]वु(चू)चुयआमेलगजमलजुय-
 लवट्ठियंपओहराओ भुयंगअणुपुव्वतणुयगोपुच्छवट्ठसमसहियनमियआदेजलउहवाहा
 तंवन्हा मंसलग्गहत्था कोमलपीवरवरंगुलीया निद्धपाणिलेहा ससिसूरसंस्त्रचक्कर-
 सोत्थियविभत्तसुविरइयपाणिलेहा पीणुण्णयकक्खवत्थियप्पदेसपडिपुन्नगलक्खोला चउरं-
 गुलसुप्पमाणकंवुवरसरिसगीवा मंसलसंठियपसत्यहणुया दालिमपुप्फप्पगासपीवरप-
 लंवकुंचितवराधरा सुंदरोत्तरोट्ठा दधिदगरयकुंदचंदवासंतिमडलअच्छिद्विमलदसणा
 रत्तुप्पलपउमपत्तसुकुमालतालुजीहा कणवीरमुउलऽकुडिलऽव्भुन्नयउ त्तुंगनासा सार-
 दनवक्कमलकुमुतकुवलयदलनिगरसरिसलक्खणपसत्यअजिम्हकंतनयणा आनामिय-
 चावरुडलकिण्हव्भराइसंगयसुजायतणुकसिणिनिद्धभुमगा अल्लीणपमाणजुत्तसवणा सुंस्स-
 वणा पीणमट्ठगंडलेहा चउरंगुलविसालसमनिडाला कोमुदिरयणिकरविमलपडिपुन्न-
 सोमवदणा छत्तुन्नयउत्तमंगा अकविलसुसिणिद्वदीहसिरया छत्तज्जयजूवथूभंदामिणिक-
 मंडलुकलसवाविसोत्थियपडागजवमच्छकुम्मर[ह]थवरमकरज्जयअंकथालअंकुसअट्ठा-
 वयसुपइट्ठ(मयू)अमरसिरियाभिसेयतोरणमेइणिउदधिवरपवरभवणगिरिवरवरायंसस-
 ललियगयउसभसीहचामरपसत्यवत्तीसलक्खणधरीओ हंससरि(त्य)च्छगतीओ
 कोइलमहुरगिराओ कंता सव्वस्स अणुमयाओ ववगयवलिपलितवंगदुव्वन्नवाधिदोहग्ग-
 सोयमुक्काओ उच्चत्तेण य नराण थोवूणमूसियाओ सिंगारागारचारुवेसाओ सुंदरथण-
 जहणवयणकरचरणणयणा लावन्नरूवजोव्वणगुणोववेया नंदणवणविवरचारिणीओ-व्व
 अच्छराओ उत्तरकुरुमाणुसच्छराओ अच्छेरगपेच्छणिज्जियाओ तिन्नि य पलिओवमाई
 परमाउं पालयित्ता ताओऽवि उवणमंति मरणधम्मं अवितित्ता कामाणं ॥ १५ ॥
 मेहुणसन्नासंपगिद्धा य मोहभरिया सत्येहिं हणंति एकमेकं विसयविस उदीरणु,
 अवरे परदारेहिं हम्मंति वि(सु)सुणिया धणनासं सयणविप्पणासं च पाउणंति, परस्स
 दाराओ जे अविरया मेहुणसन्नसंपगिद्धा य मोहभरिया अस्सा हत्थी गवा य
 महिसा, मिगा य मारेंति ए[क्के]कमेकं, मणुयगणा वानरा य पक्खी य विरुज्झंति,
 मित्ताणि खिप्पं भवंति सत्तू समये धम्मे गणे य भिंदंति पारदारी, धम्मगुणरया य
 वंभयारी खणेण उल्लोट्ठए चरित्ताओ जसमन्तो सुव्वया य पावेंति अ[य(ज)स]किप्पि
 रोगत्ता वाहिया पवड्ढित्ति रोयवाही, दुवे य लोया दुआराहगा भवंति-इहलोए चव
 परलोए परस्स दा(र)राओ जे अविरया, तहेव केइ परस्स दारं गवेसमाणा गहिया

हया य बद्धरुद्धा य एवं जाव गच्छति विपुलमोहाभिभूयसन्ना, मेहुणमूलं च सुव्वए
तत्थ तत्थ वत्तपुव्वा संगामा जणक्खयकरा सीयाए दोवईए कए रुप्पिणीए पड-
मावईए ताराए कंचणाए रत्तसुभदाए अहिल्लियाए सुवन्नगुलियाए किन्नरीए सुख-
विज्जुमतीए रोहिणीए य, अन्नेसु य एवमादिएसु बहवो महिलाकएसु सुव्वन्ति अइ-
कंता संगामा गामधम्ममूला इहलोए ताव नट्ठा परलोएवि-य नट्ठा महया मोह-
तिमिसंधकारे घोरे तसथावरसुहुमबादरेसु पज्जत्तमपज्जत्तसाहारणसरीरपत्तेयसरीरेसु
य अंडजपोतजजराउयरसजसंसेइमसंमुच्छिमउब्भियउववादिएसु य नरगतिरियदेव-
माणसेसु जरामरणरोगसोगबहुले पलिओवमसागरोवमाइं अणावीयं अणवदग्गं
दीहमद्वं चाउरंतसंसारकंतरं अणुपरियद्वंति जीवा मोहवससन्निविट्ठा । एसो सो
अवंभस्स फलविवागो इहलोइओ पारलोइओ य अप्पसुहो बहुदुक्खो महब्भओ
बहुरयप्पगाढो दासुणो कक्कसो असाओ वाससहस्सेहिं मुच्चती, न य अवेदइत्ता
अत्थि हु मोक्खोत्ति, एवमाहंसु नायकुलनंदणो महप्पा जिणो उ वीरवरनामधेजो
कहेसी य अवंभस्स फलविवागं एयं तं अवंभंपि चउत्थं सदेवमणुयासुरस्स
लोगस्स पत्थणिज्जं एवं चिरपरिचियमणुग[तं]यं दुरंतं चउत्थं अधम्मदारं समत्तंति
वेमि ॥ १६ ॥ जंबू ! इत्तो परिग्गहो पंचमो उ नियमा णाणामणिकणगरयणमह-
रिहपरिमलसपुत्तदारपरिजणदासीदासभयगपेसहयगयगोमहिसउट्टखरअयगवेलगसी-
यासगडरहजाणजुग्गसंदणसयणासणवाहणकुवियधणधन्नपाणभोयणाच्छायणगंधमल-
भायणभवणविहिं चेव बहुविहीयं भरहं णगणगरणियमजणवयपुरवरदोणमुहखेडं-
कब्बडमडंवसं-वाहपट्टणसहस्सपरिमंडियं थिमियमेइणीयं एगच्छत्तं ससागरं भुंजि-
ऊण वसुहं अपरिमियमणंततण्हमणुगयमहिच्छसारनिरयमूलो लोभकलिकसायमह-
क्खंधो चिंतासयनिचियविपुलसालो गारवपाविरल्लियग्गविडवो नियडितयापत्तपल्लव-
धरो पुप्फफलं जस्स कामभोगा आयासविसूराणाकलहपकंपियग्गसिहरो नरवति-
संपूजितो बहुजणस्स हिययदइओ इमस्स मोक्खवरमोत्तिमग्गस्स फलिहभूओ
चरिमं अहम्मदारं ॥ १७ ॥ तस्स य नामाणि इमाणि गोण्णाणि होंति तीसं, तंजहा-
परिग्गहो १ संचयो २ चयो ३ उवचओ ४ निहाणं ५ संभारो ६ संकरो
७ (एवं) आयरो ८ पिंडो ९ दव्वसारो १० तहा महिच्छा ११ पडिवंधो १२ लोहप्पा
१३ मह[द्दी]ई १४ उव्वकरणं १५ संरक्खणा य १६ भारो १७ संपाउप्पायको
१८ कलिकरंडो १९ पवित्थरो २० अणत्थो २१ संथवो २२ अगुत्ती २३ आयासो
२४ अविओगो २५ अमुत्ती २६ तण्हा २७ अणत्थको २८ आसत्ती २९ असंतो-
सोत्तिविय ३०, तरस एयाणि एवमादीणि नामधेज्जाणि होंति तीसं ॥ १८ ॥ तं च

पुण परिग्गहं ममायंति लोभघत्था भवणवरविमाणवासिणो परिग्गहस्ती परिग्गहे
 विविहकरणवुद्धी देवनिक्काया य असुरभुयगगस्लविज्जु[उ]जलणदीवउदहिदिसिपवण-
 थणियअणवंनियपणवंनियइसिवातियभूतवाइयकंदियमहाकंदियकुहंडपतंगदेवा पिसा-
 यभूयजक्खरक्खसक्किनरकिंपुरिसमहोरगगंधव्वा य तिरियवासी पंचविहा जोइसिया
 य देवा बहस्सतीचंदसूरसुक्कसनिच्छरा राहुधूमकैउवुधा य अंगारका य तत्ततव-
 णिज्जकणयवण्णा जे य गहा जोइसम्मि चारं चरंति केळु य गतिरतीया अट्ठावीसति-
 विहा य नक्खत्तदेवगणा नाणासंठाणसंठियाओ य तारगाओ ठियेस्सा चारिणो
 य अविस्साममंडलगती उवरिचरा उट्ठलोगवासी दुविहा वैमाणिया य देवा सोह-
 म्मीसाणसणंकुमारमार्हिंदवंभलोगलंतक्रमहासुक्कसहस्सारआणयपाणयआरणअच्चुया
 कप्पवरविमाणवासिणो सुरगणा गेवेज्जा अणुत्तरा दुविहा कप्पातीया विमाणवासी
 महिद्धिका उत्तमा सुरवरा एवं च ते चउव्विहा सपरिसावि देवा ममायंति भवण-
 वाहणजाणविमाणसयणासणाणि य नाणाविहवत्थभूसणा-णि य-भवरपहरणाणि य
 नाणामणिपंचवन्नदिवं च भायणविहिं नाणाविहकामलवे वैउव्वितअच्छरगणसंघाते
 दीवसमुदे दिसाओ विदिसाओ वणसंडे पव्वते य गामनगराणि य आरामुजाण-
 काणणाणि य कूवसरतलागवाविदीहिंयदेवकुलसभप्पववसहिमाइयाइं बहुकाइं कित-
 णाणि य परिगेण्हित्ता परिग्गहं विपुलदव्वसारं देवावि सइंदगा न तित्तिं न तुट्ठिं
 उवलमंति अचंतविपुललोभाभिभू[त]यास[त्ता]शा वासहरइक्खुगारवट्टपव्वयकुंडल-
 रुचगवरमाणुसोत्तरकालोदधिलवणसलिलदहपतिरतिकरअंजणकसेलदहिमुहऽवपातु-
 प्पायकंचणकचित्तविचित्तजमकवरसिहरकूडवासी वक्खारअक्म्मभूमिसु सुविभत्त-
 भागदेसासु कम्मभूमिसु, जेऽवि-य नरा चाउरंतचक्कवट्ठी वासुदेवा वलदेवा मंड-
 लीया इस्सरा तलवरा सेणावती इव्वा सेट्ठी रट्ठिया पुरोहिया कुमारो दंडणायगा
 माडंविद्या सत्थवाहा कोडुंविद्या अमच्चा एए अत्ते य एवमाती परिग्गहं संचिणंति
 अणंतं असरणं दुरंतं अधुवमणिच्चं असासयं पावकम्मनेम्मं अवकिरियव्वं विणास-
 मूलं वहवंधपरिकिलेसवहुलं अणंतसंकिलेसकारणं, ते तं धणकणगरयणानिचयं पिंडित्ता
 चेव लोभघत्था संसारं अतिवयंति सव्वदुक्खसंनिलयणं, परिग्गहस्[स]सेव य
 अट्ठाए सिप्पसयं सिक्खए बहुजणो कलाओ य वावत्तरिं सुनिपुणाओ लेहाइयाओ
 सउणस्यावसाणाओ-गणियप्पहाणाओ-चउसट्ठिं च महिलागुणे रतिजणणे सिप्पसेवं
 अस्सिमत्तिकिसिवाणिज्जं ववहारं अत्थसत्थ(इसु)ईसत्थच्छरूप(वा)गयं विविहाओ य
 जोगजुंजणाओ अत्तेसु एवमादिएसु वहुसु कारणसएसु जावजीवं नडिज्जए संचिणंति
 मंदवुद्धी परिग्गहस्सेव य अट्ठाए करंति पाणाण वहकरणं अलियनियडिसाइसंपओगे

परदव्वअभिज्जा संप[रि]रदारअभिगमणासेवणाए आयासविसूरणं कलहमंडणवे-
राणि य अवमाणणविमाणणाओ इच्छामहिच्छप्पिवाससतततिसिया तण्हगेहि-
लोभघत्था अत्ताणा अणिग्गहिंया करेति कोहमाणमायालोभे अकित्तणिजे परिग्गहे
चेव होंति नियमा सल्ला दंडा य गारवा य कसाया सन्ना य कामगुण-अण्हगा य
ईदियलेसाओ सयणसंपओगा सचित्ताचित्तमीसगाईं दव्वाईं अणंतकाईं इच्छंति
परिघेत्तुं सदेवमणुयासुरम्मि लोए लोभपरिग्गहो जिणवरेहिं भणिओ नत्थि एरिसो
प्पासो पडिवंधो अत्थि सव्वजीवाणं सव्वलोए ॥ १९ ॥ परलोगम्मि य नट्ठा
तमं पविट्ठा महयामोहमोहियमती तिमिसंधकारे तसथावरसुहुमवादरेसु पज्जतम-
पज्जत्तग एवं जाव परियट्ठंति दीहमद्धं जीवा लोभवससंनिविट्ठा । एसो सो परिग्ग-
हस्स फलविवाओ इहलोइओ परलोइओ अप्पसुहो बहुदुक्खो महव्वमओ वहरयप्प-
गाढो दारुणो कक्कसो असाओ वाससहस्सेहिं मुच्चइ, न-य-अवे(त)तित्ता अत्थि हु
मोक्खोत्ति, एवमाहंसु नायकुलनंदणो महप्पा जिणो उ वीरवरनामधेजो कहेसी
य परिग्गहस्स फलविवागं । एसो सो परिग्गहो पंचमो उ नियमा नाणामणिकण-
गरयणमहरिह एवं जाव इमस्स मोक्खवरमोत्तिमग्गस्स फलिहभूयो चरिमं अधम्म-
दारं समत्तं । एएहिं पंचहिं असंवरेहिं रयमा[दि]चिणित्तु अणुसमयं । चउव्विहग[ति]-
इ(पज्जं)पेरंतं अणुपरियट्ठंति संसारं ॥ १ ॥ सव्वगईं पक्खंदे का[हिं]हिंति अणंतए
अकयपुण्णा । जे य ण सुणंति धम्मं सो(सुणि)ऊण य जे पर्मायंति ॥ २ ॥ अणुसिट्ठं-
पि बहुविहं सिच्छादिट्ठी (य जे) णरा अ(हमा)वुद्धीया । वद्धनिकाइयकम्मा सु(णं)-
णेंति धम्मं न य करेति ॥ ३ ॥ किं सक्का काउं जे जं णेच्छह ओसहं मुहा पाउं ।
जिणवयणं गुणम[धु]हुरं विरेयणं सव्वदुक्खाणं ॥ ४ ॥ पंचेव य उज्जिऊणं पंचेव
य रक्खिऊण भावेण । कम्मरयविप्पमुक्का सिद्धिवरमणुत्तरं जंति ॥ ५ ॥ (त्तिवेसि ॥)
२० ॥ जंवू ।-एत्तो संवरदाराईं पंच वोच्छामि आणुपुव्वीए । जह भणियाणि भगवया
सव्वदुहविमोक्खणट्ठाए ॥ १ ॥ पढमं होइ अहिंसा वितियं सच्चवयणंति पन्नत्तं ।
दत्तमणुन्नाय संवरो य वंभचेरमपरिग्गहतं च ॥ २ ॥ तत्थ पढमं अहिंसा तसथा-
वरसव्वभूयखेमकरी । तीसे सभावणा(ए)ओ किची वोच्छं गुणुइसं ॥ ३ ॥ ताणि
उ इमाणि सुव्वय । महव्वयाईं लोका[हियस]धिइअव्वयाईं सुयसागरदेसियाईं तव-
संजममहव्वयाईं सीलगुणवरव्वयाईं सच्चज्जव्वयाईं नरगतिरियमणुयदेवगतिविवज्ज-
काईं सव्वजिणसासणगाईं कम्मरयविदारगाईं भवसयविणासणकाईं दुहसयविमोयण-
काईं सुहसयपवत्तणकाईं कापुरिसदुरुत्तराईं सप्पुरिस(तीरि)निसेवियाईं निव्वाणगमण-
मग्ग-सग्ग(ए)प(याण)णाय[गा]काईं संवरदाराईं पंच कहियाणि उ भगवया ।

तत्त्य पढमं अहिंसा जा सा सदेवमणुयासुरस्स लोगस्सं भवति दीवो ताणं सरणं गतीं
 पइद्वा निव्वाणं १ निव्वुई २ समाही ३ (संती) सत्ती ४ कित्ती ५ कंती ६ रती य
 ७ विरती य ८ सुयंगतित्ती ९-१० दया ११ विमुत्ती १२ खन्ती १३ सम्मत्तारा-
 हणा १४ महंती १५ वोही १६ बुद्धी १७ धिती १८ समिद्धी १९ रिद्धी
 २० विद्धी २१ ठिती २२ पुट्ठी २३ नंदा २४ भद्दा २५ विमुद्धी २६ लद्धी
 २७ विसिद्धिदिद्धी २८ कल्लणं २९ मंगलं ३० पमोओ ३१ विभूती ३२ रक्खा
 ३३ सिद्धावासो ३४ अणासवो ३५ केवलीण ठाणं ३६ सिवं ३७ समिई ३८ सी[ल]लं
 ३९ संजमोत्ति य ४० सीलपरिघरो ४१ संवरो ४२ य गुत्ती ४३ ववसाओ
 ४४ उस्सओ ४५ जज्जो ४६ आयतणं ४७ जतण मप्पमातो ४८-४९ अस्सासो
 ५० वीसासो ५१ अमओ ५२ सव्वस्सवि अमाघाओ ५३ चोक्खपविता ५४-५५
 सूती ५६ पूया ५७ विमल ५८ पभासा ५९ य निम्मलतर ६० त्ति एव-
 मादीणि निययगुणनिम्मियाइं पज्जवनामाणि होंति अहिंसाए भगवतीए ॥२१॥ एसा
 सा भगवती अहिंसा जा सा भौयाण विव सरणं पक्खीणं पिव ग(ग)मणं तिसियाणं
 पिव सलिलं खुहियाणं पिव असणं समुद्धमज्झे व पोतवहणं चउप्पयाणं व आसम-
 पयं दुहट्ठियाणं (व) च ओसहिवलं अडवीमज्झे विसत्थगमणं एत्तो विसिद्धतरिका
 अहिंसा जा सा पुढविजलअगणिमाख्यवणस्सइवीजहरितजलचरथलचरखेहचर-
 तसथावरसव्वभूयखेमकरी एसा भगवती अहिंसा जा सा अपारेमियनाणदंसणधरेहिं
 सीलगुणविणयतवसंयमनायकेहिं तित्थंकरेहिं सव्वजगजीववच्छलेहिं तिलोगमहिएहिं
 जिणचंदेहिं चुट्ठु दिट्ठा ओहिजिणेहिं विण्णाया उज्जुमतीहिं विदिट्ठा विपुलमतीहिं
 विविदिता पुव्वधरेहिं अधीता वेउव्वीहिं पतिच्चा आभिणिवोहियनाणीहिं सुयनाणीहिं-
 ओहिनाणीहिं-मणपज्जवनाणीहिं केवलनाणीहिं आमोसहिपत्तेहिं खेलोसहिपत्तेहिं जल्लो-
 सहिपत्तेहिं विप्पोसहिपत्तेहिं सव्वोसहिपत्तेहिं वीजबुद्धीहिं कुट्टबुद्धीहिं पदानुसारीहिं
 संभिन्नसोत्तेहिं नुयधरेहिं मणवल्लिएहिं वयवल्लिएहिं कायवल्लिएहिं नाणवल्लिएहिं दंसण-
 वल्लिएहिं चरित्तवल्लिएहिं खीरासवेहिं म(धु)हुआसवेहिं सप्पियासवेहिं अक्खीणमहाण-
 सिएहिं चारणेहिं विज्जाहरेहिं चउत्थभत्तिएहिं एवं जाव छम्मासभत्तिएहिं उक्खित्त-
 चरएहिं निक्खित्तचरएहिं अंतचरएहिं पंतचरएहिं ल्हहचरएहिं समुदाणचरएहिं
 अन्नइलाएहिं मोणचरएहिं संसट्ठकप्पिएहिं तज्जायसंसट्ठकप्पिएहिं उवनिहिएहिं
 इद्धेसणिएहिं संखादत्तिएहिं दिट्ठलाभिएहिं अदिट्ठलाभिएहिं पुट्ठलाभिएहिं आयंभिलि-
 एहिं पुरिमट्ठिएहिं एक्कासणिएहिं निव्वित्तिएहिं भिन्नपिंडवाइएहिं परिमियपिंडवाइएहिं
 अंतादारेहिं पंतादारेहिं अरसादारेहिं विरसादारेहिं ल्हहादारेहिं तुच्छादारेहिं अंतजी-

[वि]वीहिं पंतजी-वीहिं ल्हजी-वीहिं तुच्छजी-वीहिं उवसंतजी-वीहिं पसंतजी-वीहिं-
विवित्तजी-वीहिं अखीरमहुसप्पिएहिं अमज्जमंसासिएहिं ठाणाइएहिं पडि[मंठा]मट्ठाइहिं
ठाणुकडिएहिं वीरासणिएहिं णेसज्जिएहिं डंडाइएहिं लगंडसाइहिं एगपासगेहिं आयाव-
एहिं अप्पावएहिं अणिद्वु[व]भएहिं अकं[ड्ड]डुयएहिं धुतकेसमंसुलोमनखेहिं सव्वगाय-
पडिकम्मविप्पमुक्केहिं समणुचिन्ना सुयधरविदितत्थकायबुद्धीहिं धीरमतिबुद्धिणो य-
जे ते आसीविसउगतेयकप्पा निच्छयववसाय(विणीय)पज्जत्तकयमतीया णिच्चं
सज्झायज्झाणअणुबद्धधम्मज्झाणा पंचमहव्वयचरित्तजुत्ता समिता समितिसु समित-
पावा छव्विहजगवच्छला निच्चमप्पमत्ता एएहिं अन्नेहि य जा सा अणुपालिया भगवती-
इमं च पुढविदगअगणिमारुयतरुणतसथावरसव्वभूयसं(य)जमदयद्वयाते सुद्धं
उच्छं गवेसियव्वं अकतमकारिमणाद्वयमणुद्विट्ठं अकीयकडं नवहि य कोडिहिं सुपरि-
सुद्धं दसहिं य दोसेहिं विप्पमुक्कं उग्गमउप्पायणेसणासुद्धं ववगयच्चुयचावियचत्तदेहं च-
फासुयं च न नि(सि)सज्जकहापओयणक्खासुओ[व]णीयंति न तिगिच्छामंतमूलभेसज्ज-
कज्जेउं न लक्खणुप्पायसुमिणजोइसनिमित्तकहकप्पउत्तं नवि डंभणाए नवि रक्ख-
णाते नवि सासणाते नवि दंभणरक्खणसासणाते भिक्खं गवेसियव्वं नवि वंदणाते
नवि माणणाते नवि पूयणाते नवि वंदणमाणणपूयणाते भिक्खं गवेसियव्वं नवि
हीलणाते नवि निंदणाते नवि गरहणाते नवि हीलणनिंदणगरहणाते भिक्खं
गवेसियव्वं नवि भेसणाते नवि तज्जणाते नवि तालणाते नवि भेसणतज्जणताल-
णाते भिक्खं गवेसियव्वं नवि गारवेणं नवि कुहणयाते नवि वणीमयाते नवि
गारवकुहवणीमयाए भिक्खं गवेसियव्वं नवि मित्तयाए नवि पत्थणाए नवि सेव-
णाए नवि मित्तपत्थणसेवणाते भिक्खं गवेसियव्वं अन्नाए अगट्टिए अदुट्ठे अदीणे
अविमणे अकलुणे अविसाती अपरितंतजोगी जयणघडणकरणचरियविणयगुणजोग-
संपउत्ते भिक्खू भिक्खेसणाते निरते, इमं च णं सव्वजीवरक्खणदयट्ठाते पावयणं
भगवया सुकहियं अत्तहियं पेच्चाभावियं आगमेसिभदं सुद्धं नेयाउयं अकुट्टिलं अणु-
त्तरं सव्वदुक्खपावाण विउसमणं ॥ २२ ॥ तस्स इमा पंच भावणातो पढमस्स
वयस्स होंति पाणातिवायवेरमणपरिरक्खणद्वयाए-पढमं ठाणगमणगुणजोगजुंजण-
जुगंतरनिवातियाए दिट्ठीए ईरियव्वं कीडपयंगतसथावरदयावरेण निच्चं पुप्फफल-
तयप[वा]वालकंदमूलंदगमट्टियवीजहरियपरिवज्जिएण सं[स]मं, एवं खड्ड सव्वपाणा न
हीलियव्वा न निंदियव्वा न गरहियव्वा न हिंसियव्वा न छिंदियव्वा न भिंदियव्वा
न वहेयव्वा न भयं दुक्खं च किंचि लब्भा पावेउं एवं ईरियासमितिजोगेण
भावितो भवति अंतरप्पा असवलमसंकिलिट्ठनिव्वणचरित्तभावणाए अहिंसाए संजए

सुसाहू, वितीयं च मणेण पावएणं पाव[गं]कं अहम्मियं दारुणं निस्संसं वहवंधपरि-
 किलेसवहुलं जरा(भय)मरणपरिकिलेससंकिलिट्ठं न कयावि मणेण पावतेणं पावगं
 किंचि-वि ज्ञायव्वं एवं मणसमितिजोगेण भावितो भवति अंतरप्पा असवलमसंकिलिट्ठ-
 निव्वणचरित्तभावणाए अहिंसए संजए सुसाहू, ततियं च वतीते पावियाते पाव-कं-
 अ० कं....वईए पाविया(ओ)ए पावगं-न किंचिवि भासियव्वं एवं वतिसमितिजोगेण
 भावितो भवति अंतरप्पा असवलमसंकिलिट्ठनिव्वणचरित्तभावणाए अहिंसओ संजओ
 सुसाहू, चउत्थं आहारएसणाए सुद्धं उंछं गवेसियव्वं अन्नाए अ[गढिते]कहिए अ[हु]-
 सिट्ठे अदीणे अकलुणे अविसादी अपरितंतजोगी जयणघडणकरणचरियविणयगुणजोग-
 संपओगजुत्ते भिक्खू भिक्खेसणाते जुत्ते समुदाणेऊण भिक्खचरियं उंछं घेतूण आगतो
 गुरुजणस्स पासं गमणागमणातिचारे पडिक्कमणपडिक्कंते आलोयणदायणं च दाऊण
 गुरुजणस्स गुरुसंदिट्ठस्स वा जहोवएसं निरइयारं च अप्पमतो, पुणरवि अणेसणाते
 पयतो पडिक्कमिक्का पसंते आसीणंसुहनिंसंजे सुहुत्तमेत्तं च ज्ञाणसुहजोगनाणसज्झाय-
 गोवियमणे धम्ममणे अविमणे सुहमणे अविग्गहमणे समाहियमणे सद्धासंवेगनिज्जरमणे
 पवतणवच्छ(ल)लभाविमणे उट्ठेऊण य पहट्ठपुट्ठे जहारायणियं निमंतइत्ता य साहवे
 भावओ य विइण्णे य गुरुजणेणं उपविट्ठे संपमज्जिऊण ससीसं कायं तथा करतलं
 अमुच्छित्ते अगिद्धे अगट्ठिए अगारहिते अणज्जोववण्णे अणाइले अलुद्धे अणत्तट्ठित्ते
 असुरसुरं अचवचवं अदुत्तमविलंबियं अपरिसाडिं आलोयभायणे जयं पयत्तेण
 ववगयसंजोगमणिगालं च विगयधूसं अक्खोव्वंज-णव-णाणुलेवणभूयं संजमजायामाया-
 निमित्तं संजमभारवहणट्ठयाए भुंजेजा पाणवारणट्ठयाए संजएण समियं एवं आहार-
 समितिजोगेण भाविओ भवति अंतरप्पा असवलमसंकिलिट्ठनिव्वणचरित्तभावणाए
 अहिंसए संजए सुसाहू, पंचमं आदा[नं]णनिक्खेव[ण]णासिई पीढफलगसिज्जा-
 संथारगवत्यपत्तकंवलरयहरणचोलपट्ठगमुहपोत्तिगपायपुंछणादी एयंपि संजमस्स
 उववूहणट्ठयाए वातातवदंसमसगसीयपरिरक्खणट्ठयाए उवगरणं रागदोसरहितं
 परिहरितव्वं संजमेणं निच्चं पडिलेहणपप्फोडणपमज्जणाए अहो य राओ य अप्पमत्तेण
 होइ सययं निक्खियव्वं च गिण्हियव्वं च भायणभंडोवहिंउवगरणं एवं आयाणभंड-
 निक्खेवणासमितिजोगेण भाविओ भवति अंतरप्पा असवलमसंकिलिट्ठनिव्वण-
 चरित्तभावणाए अहिंसए संजते सुसाहू, एवमिगं संवरस्स दारं सम्मं संवरियं होति
 सुप्पणिहियं इमेहिं पंचहिवि कारणेहिं मणवयणकायपरिरक्खिएहिं णिच्चं आमरणंतं च
 एस जोगो जेयव्वो धितिमया सतिमया अणासवो अक्खुसो अच्छिद्दो-अपरिस्सावी-
 असंकिलिट्ठो नुद्धो सव्वजिणमणुत्तातो, एवं पढमं संवरदारं फासियं पालियं सोहियं

तीरियं किट्टियं आराहियं आणाते अणुपालियं भवति, ए(यं)वं नायसुणिणा भगवया पन्नवियं पल्लवियं पसिद्धं सिद्धं सिद्धवरसासणमिणं आववितं सुदेसितं पसत्थं पढमं संवरदारं समत्तं तिवेमि [इति पढमं संवरदारं] ॥ २३ ॥ जंवू । वित्थियं च सच्चवयणं सुद्धं सुच्चियं सिवं सुजायं सुभासियं सुव्वयं सुकहियं सुदिद्धं सुपत्तिट्ठियं सुप-
इट्ठियजसं सुसंजमियवयणवुइयं सुरवरनरवसभंपवरवलवगसुविहियजणवहुमयं परम-
साहुधम्मचरणं तवनियमपरिग्गहियं सुगतिपहदेस[गं]कं च लोगुत्तमं वयमिणं विजाहरगणगमणविजाणसाहकं सगगमगसिद्धिपहदेसकं अवितहं तं सच्चं उज्जुयं अकुडिलं भूयत्थं अत्थतो विसुद्धं उज्जोयकरं पभासकं भवति सव्वभावाण जीवलोगे अविसंवादि जहत्थमधुरं पच्चक्खं दयिवयं व जं तं अञ्छेरकारकं अवत्थंतरेसु
चहुएसु माणुसाणं सच्चेण महांसमुद्दमज्जेवि चिद्धंति न निमज्जंति मूढाणिया-वि पोया सच्चेण य उदगसंभमंमिवि न वुज्जइ न य मरंति थाहं ते लभंति सच्चेण य अगणि-
संभमंमिवि न उज्जंति उज्जुगा मणूसा सच्चेण य तत्ततेल्लतउलोहसीसकाइं छिवंति धरंति न य उज्जंति मणूसा पव्वयकडकाहिं मुच्चंते न य मरंति सच्चेण य परिग्ग-
(ही)हिया असिपंजरगया समराओ-वि णिइंति अणहा य सच्चवादी वहवंधभियोग-
चेरघोरेहिं पमुच्चंति य अमित्तमज्झाहिं निइंति अणहा य सच्चवादी सादेव्वाणि य देवयाओ करंति सच्चवयणे रताणं । तं सच्चं भगवं तित्थकरसुभासियं दसविहं चोद्द-
सपुव्वीहिं पाहुडत्थविदितं महारि(सि)सीण य समय(पइ)प्पदि(न्नचि)न्नं देविंदनरि-
दभासियत्थं वेमाणियसाहियं महत्थं मंतोसाहिविजासाहणत्थं चारणगणसमणसिद्ध-
विज्जं मणुयगणाणं वंदणिज्जं अमरगणाणं अच्चणिज्जं असुरगणाणं च पूयणिज्जं अणेग-
पासंडिपरिग्गहितं जं तं लोकंमि सारभूयं गंभीरतरं महांसमुद्दाओ थिरतरगं मेरुप-
व्वयाओ सोमतरगं चंदमंडलाओ दित्ततरं सूरमंडलाओ विमलतरं सरयनहयलाओ
सुरभितरं गंधमादणाओ जेविय लोगम्मि अपरिसेसा मंतजोगा जवा य विजा य
जंभका य अत्थाणि य सत्थाणि य सिक्खाओ य आगमां य स(च्चा)व्वाणिवि ताइं
सच्चे पइट्ठियाइं, सच्चंपि-य संजमस्स उवरोहकारकं किंन्वि न वत्तव्वं हिंसासावजसंप-
उत्तं भेयविकहकारकं अणत्थवायकलहकारकं अणज्जं अववायविवायसंपउत्तं वेलंवं
ओजधेज्जवहुलं निल्लज्जं लोयगरहणिज्जं दुदिद्धं दुस्सुयं अमुणियं अप्पणो थवणा परेसु
निंदा न तंसि मेहावी ण तंसि धञ्चो न तंसि पियधम्मो न तं कुलीणो न तंसि दाण-
[व]पती न तंसि सूरु न तंसि पडिह्वो न तंसि लट्ठो न पंडिओ न बहुस्सुओ नवि
य तं तवस्सी ण यावि परलोगणिच्छियमतीऽसि सव्वकालं जातिकुलत्ववाहिरोगेण
वावि जं होइ वज्जणिज्जं दु(हओ)हिलं उवयारमतिकंतं एवंविहं सच्चंपि न वत्तव्वं,

अह केरिसकं पुणाइ सच्चं तु भासियव्वं ?, जं तं दव्वेहिं पज्जवेहि य गुणेहिं कम्मेहिं
 बहुविहेहिं सिप्पेहिं आगमेहि य नामक्खायनिवाउवसग्गतद्वियसन्नाससंधिपदहेउज्जा-
 गियउणादिकिरियाविहाणधातुसरविभत्तिवज्जुतं तिकरं दसविहंपि सच्चं जह भणियं
 तह य कम्मुणा होइ दुवालसविहा होइ भासा वयणंपि-य होइ सोलसविहं, एवं अर-
 हंतमणुत्तायं समिक्खियं संजएण कालंमि य वत्तव्वं ॥ २४ ॥ इमं च अलियपिणुण-
 फरुसकडुयचवलवयणपरिरक्खणट्टयाए पावयणं भगवया रुक्कहियं अत्तहियं पेजाभा-
 विकं आगमेसिभदं सुद्धं नेयाउयं अकुडिलं अणुत्तरं सव्वदुक्खपावाणं विओसमणं,
 तस्स इमा पंच भावणाओ वितियस्स वयस्स अलियवयणस्स वेस्मणपरिरक्खणट्ट-
 याए, पढमं सोऊणं संवरट्ठं परमट्ठं सुट्ठ जाणिऊण न वेगियं न तुरियं न चवलं न
 कडुयं न फरुसं न साहसं न य परस्स पीलाकरं सायज्जं सच्चं च हियं च मियं च
 गाहगं च सुद्धं संगयमकाहलं च समिक्खितं संजतेण कालंमि य वत्तव्वं एवं अणु-
 वीतिसमितिजोगेण भाविओ भवति अंतरप्पा संजयकरचरणनयणवयणो सूरु सच्च-
 ज्जवसंपुत्तो, वितियं कोहो ण सेवियव्वो, कुद्धो चंडिकि[यो]ओ मणूसो अलियं भणेज्ज
 पिसुणं भणेज्ज फरुसं भणेज्ज अलियं पिसुणं फरुसं भणेज्ज कलहं करेजा वेरं करेजा
 विकहं करेजा कलहं वेरं विकहं करेजा सच्चं हणेज्ज सीलं हणेज्ज विणयं हणेज्ज सच्चं
 सीलं विणयं हणेज्ज वेसो हवेज्ज वत्थुं भवेज्ज गम्मो भवेज्ज वेसो वत्थुं गम्मो भवेज्ज
 एयं अन्नं च एवमादियं भणेज्ज कोहग्गिसंपलितो तम्हा कोहो न सेवियव्वो, एवं
 खंतीइ भाविओ भवति अंतरप्पा संजयकरचरणनयणवयणो सूरु सच्चज्जवसंपुत्तो,
 ततियं लोभो न सेवियव्वो लुद्धो लोलो भणेज्ज अलियं खेत्तस्स व वत्थुस्स व कतेण
 १ लुद्धो लोलो भणेज्ज अलियं कित्तीए लोभस्स व कएण २ लुद्धो लोलो भणेज्ज
 अलियं रिद्धी(ए)य व सोक्खस्स व कएण ३ लुद्धो लोलो भणेज्ज अलियं भत्तस्स व
 पाणस्स व कएण ४ लुद्धो लोलो भणेज्ज अलियं पीढस्स व फलगस्स व कएण ५
 लुद्धो लोलो भणेज्ज अलियं सेज्जाए व संथारकस्स व कएण ६ लुद्धो लोलो भणेज्ज
 अलियं वत्थस्स व पत्तस्स व कएण ७ लुद्धो लोलो भणेज्ज अलियं कंवलस्स व
 पायपुंछणस्स व कएण ८ लुद्धो लोलो भणेज्ज अलियं सीसस्स व सिस्सिणीए
 च कएण ९ लुद्धो लोलो भणेज्ज अलियं अन्नेसु य एवमादिसु बहुसु कारणसत्तेसु,
 लुद्धो लोलो भणेज्ज अलियं तम्हा लोभो न सेवियव्वो, एवं सुत्तीय भाविओ भवति
 अंतरप्पा संजयकरचरणनयणवयणो सूरु सच्चज्जवसंपुत्तो, चउत्थं न भाइयव्वं
 भीतं खु भया अइति लहुयं भीतो अवितिज्जओ मणूसो भीतो भूतेहिं विप्पइ
 भीतो अन्नं-पि हु भेसेज्जा भीतो तवसंजमं-पि हु सुएज्जा भीतो य भरं न नित्यरेज्जा

सप्पुरिसनिसेवियं च मग्गं भीतो न समत्थो अणुचरिउं तम्हा न भातियव्वं भयस्स
चा वाहिस्स वा रोगस्स वा जराए वा मच्चुस्स वा अन्नस्स वा ए(वमादिय)गस्स-वा-
एवं धेज्जेण भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो,
पंचमकं हासं न सेवियव्वं अलियाइ असंतकाइ जंपंति हासइता परपरिभवकारणं
च हासं परपरिवायप्पियं च हासं परपीलाकारणं च हासं भेदविमुत्तिकारकं च
हासं अन्नोन्नजणियं च होज्ज हासं अन्नोन्नगमणं च होज्ज मम्मं अन्नोन्नगमणं च
होज्ज कम्मं कंदप्पाभियोगगमणं च होज्ज हासं आसुरियं किब्बिसत्तणं च जणेज्ज
हासं तम्हा हासं न सेवियव्वं एवं मोणेण भाविओ भवइ अंतरप्पा संजयकर-
चरणनयणवयणो सूरु सच्चज्जवसंपन्नो, एवमिणं संवरस्स दारं सम्मं संवरियं होइ
सुप्पणिहियं इमेहिं पंचहिवि कारणेहिं मणवयणकायपरिरक्खएहिं निच्चं आमरणंतं
च एस जोगो जेयव्वो धितिमया मतिमया अणासवो अकलुसो अच्छिद्दो अपरिस्सावी
असंकिलिद्दो-सुद्धो-सव्वजिणमणुष्साओ, एवं वितियं संवरदारं फासियं पालियं सोहियं
तीरियं किट्टियं अणुपालियं आणाए आराहियं भवति, एव नायमुणिणा भगवया पन्नवियं
परुवियं पसिद्धं सिद्धवरसासणमिणं आघवितं सुदेसि(यं)तं पसत्थं वितियं संवरदारं
समतं तिबेमि [इति वितियं दारं] ॥ २५ ॥ जंबू ! दत्तमणुण्णायसंवरो नाम होति ततियं
सुव्वता ! महव्वतं गुणव्वतं परदव्वहरणपडिविरइकरणजुत्तं अपरिमियमणंततण्हाणु-
गयमहिच्छमणवयणकलुसआयाणसुनिग्गहियं सुसंजमियम[णो]णहत्थपायनिमियं
निग्गथं णेट्ठिकं निरुत्तं निरासवं निब्भयं विमुत्तं उत्तमनरवसभपवरवलवगसुविहित-
जणसंमतं परमसाहुधम्मचरणं जत्थ य गामागरनगरनिगमखेडकव्वडमडंबदोणमुद्द-
संवाहपट्टणासमगयं च किंचि दव्वं मणिमुत्तसिलप्पवालकंसदूसरययवरकणगरयणमादिं
पडियं पम्हुट्ठं विप्पणट्ठं न कप्पति कस्सति कहेउं वा गेण्हिउं वा अहिरन्नसुवन्निकेण
समलेट्ठुकंचणेण अपरिग्गहसंवुडेणं लोगमि विहरियव्वं, जंपिय होज्जाहि दव्वजातं
खल(थल)ग(यं)तं खेत-गतं रत्त-मंतरग(यं)तं वा किंचि तणकट्टसक्करादि अप्पं
च बहुं च अणुं च थूलं वा न कप्प(ती)ति उग्गहंमि अदिण्णंमि गिण्हिउं
जे, हणि हणि उग्गहं अणुन्नविय गेण्हियव्वं वज्जेयव्वो [य] सव्वकालं अचियत्त-
घरप्पवेसो अचियत्तभत्तपाणं अचियत्तपीडफलगसेज्जासंधारगवत्थपत्तकंबलयहरण-
निसेज्जचोलपट्टगमुद्दपोत्तियपायपुंछणाइ भायणभंडोवहिउवकरणं परपरिवाओ परस्स
दोसो परववएसेणं जं च गेण्हइ परस्स नासेइ जं च सुकयं दाणस्स य अंतरातियं
दाणविप्पणासो पेसुन्नं चैव मच्छरितं च, जेविय पीडफलगसेज्जासंधारगवत्थ(पत्त)-
पायकंबल[रयहरणनिसेज्जचोलपट्टग]मुद्दपोत्तियपायपुंछणादिभायणभंडोवहिउवकरणं

असंविभागी असंगहस्ती तवतेणे य वइतेणे य रुवतेणे य आयारे चेव भावतेणे य
सदकरे ज्वज्जकरे कलहकरे वेरकरे विकहकरे असमाहिकरे सया अप्पमाणभोती
सततं अणुवद्धवेरे य निच्चरोसी से तारिसए नाराहए वयमिणं, अह केरिसए पुणाइं
आराहए वयमिणं ? जे से उवहिभत्तपाणसंगहणदाणकुसले अच्चंतवालदुव्वलगि-
ल्लानवुद्धुखमके पवत्तिआयरियउवज्जाए सेहे साहम्मिके तवस्सीकुलगणसंवद्धे य
निजरट्ठी वेयावच्चं अणिसिसयं दसविहं बहुविहं करेति, न य अचियत्तस्स गिहं पविसइ
न य अचियत्तस्स गेण्हइ भत्तपाणं न य अचियत्तस्स सेवइ पीढफलगसेज्जासंथारग-
वत्थपायकंवलरयहरणनिसेज्जचोलपट्टयमुहपोत्तियपायपुंछणाइभायणमंडोवहिउवगरणं
न य परिवायं परस्स जंपति न यावि दोसे पररस गेण्हति परववएसेणवि न किंचि
गेण्हति न य विपरिणामेति कं(कि)चि जणं न यावि णासेति दिन्नसुक्यं दाळण य
[काळण य] न होइ पच्छात्ताविए सं-वि-भागसीले संगहोवग्गहकुसले से तारिसते
आराहते वयमिणं, इमं च परदव्वहरणवेरमणपरिरक्खणट्टयाए पावयणं भगवया
सुकहितं अत्तहितं पेच्चाभावितं आगमेत्तिभइं सुद्धं नेयाउयं अकुडिलं अणुत्तरं सव्वदुक्ख-
पावाण विओ[व]समणं, तस्स इमा पंच भावणातो ततियस्स (वयस्स) होति परदव्वह-
रणवेरमणपरिरक्खणट्टयाए, पढमं देवकुलसभप्पवावसहस्सखमूलआरामकंदरागर-
गिरिगुहाकम्मउज्जाणजाणसालाकुवितसालामंडवसुन्नवरसुसाणलेगआवणे अशंमि य
एवमादियंमि दग्गमट्टियवीजहरिततसपाणअसंसत्ते अहाकडे फासुए विवित्ते पसत्थे
उवस्सए होइ विहरियव्वं, आहाकम्मवहुले य जे से आसितसंमज्जिउस्सित्तसोहिय-
छायणदूमणलिंपणअणुलिंपणजलणमंडचाल[णे]ण अंतो वहिं च असंजमो जत्थ
च[ह]इती संजयाण अट्ठा वजेयव्वो हु उवस्सओ से तारिसए सुत्तपडिकुट्ठे, एवं विवित्त-
चासवसहिसमिइजोगेण भावितो भवति अंतरप्पा निच्चं अहिकरणकरणकारावण-
पावकम्मविरतो दत्तमणुन्नायओग्गहस्ती । वितीयं आरामुज्जाणकाणणवणंपदेसभागे
जं किंचि इक्कडं व कठिणगं च जंतुगं च परामेरकुच्चकुसडव्वभपलालमूयगवच्चय-
त्तणकट्टसक्करादी गेण्हइ सेज्जोवहिस्स अट्ठा न कप्पए उग्गहे अदिञ्चमि गेण्हि(गिण्हे)उं
जे हणि हणि उग्गहं अणुन्नविय गेण्हियव्वं एवं उग्गहसमित्तियोगेण भावितो भवति
अंतरप्पा निच्चं अहिकरणकरणकारावणपावकम्मविरते दत्तमणुन्नायओग्गहस्ती ।
ततीयं जस्सेव उवस्सते वसेज्ज सेज्जं तत्थेव गवेसेज्जा न निवायपवायउस्सुगतं न
उंसमसगेसु -खुभियव्वं एवं, संजमवहुले संवरवहुले संवुडवहुले समाहिवहुले धीरे
काएण फासयंतो सययं अज्जप्पज्जाणजुत्ते समिए एगे चरेज्ज धम्मं, एवं सेज्जास-
मित्तियोगेण भावितो भवति - अंतरप्पा निच्चं अहिकरणकरणकारावणपावकम्मविरते

दत्तमणुञ्जायउग्गहस्ती । चउत्थं साहारणपिंडपातलाभे भोत्तव्वं संजएण समियं न-
 सायसूयाहिकं न खद्धं ण वेगितं न तुरियं न चवलं न साहसं न य पर[स्स]पीलाकस्-
 सावज्जं तह भोत्तव्वं जह से ततियवयं न सीदति साहारणपिंडपा[त]यलाभे सुहुमं
 अदिन्नादाण-विरमण-वयनियम(विरम)णं, एवं साहारणपिंडवायलाभे समित्तियोगेण
 भावितो भवति अंतरप्पा निच्चं अहिकरणकरणकारावणपावकम्मविरते दत्तमणुञ्जाय-
 उग्गहस्ती । पंचमगं साहम्मिए विणओ पउंजियव्वो उव[ग]करणपारणासु विणओ-
 पउंजियव्वो वायणपरियट्ठणासु विणओ पउंजियव्वो दाणगहणपुच्छणासु विणओ
 पउंजियव्वो निक्खमणपवेसणासु विणओ पउंजियव्वो अन्नेसु य एवमादिसु बहुसु
 कारणसएसु विणओ पउंजियव्वो, विणओवि तवो तवोवि धम्मो तम्हा विणओ
 पउंजियव्वो गुरुसु साहूसु तवस्सीसु य, एवं विणतेण भाविओ भव-इ अंतरप्पा
 णिच्चं अधिकरणकरणकारावणपावकम्मविरते दत्तमणुञ्जायउग्गहस्ती । एवमिणं संव-
 रस्स दारं सम्मं संवरियं होइ सुपणिहियं एवं जाव आघवियं सुदेसितं पसत्थं-
 ततियं संवरदारं समत्तित्वेमि ॥ २६ ॥ जं(वु)वू ! एत्तो य वंभचेरं उत्तमतवनिय-
 मणाणदंसणचरित्तसम्मत्तविणयमूलं य[ज]मनियमगुणप्पहाणजुत्तं हिमवंतमहंततेयमंतं
 पसत्थगंभीरथिमितमज्झं अज्जवसाहुजणाचरितं मोक्खमगं विसुद्धसिद्धिगतिनिलयं
 सासयमव्वाचाहमपुणब्भवं पसत्थं सोमं सुभं सिवमचलमक्खयकरं जतिवरसारक्खितं-
 सुचरियं सु[भासि]साहियं नवरि मुणिवरेहिं महापुरिसधीरसूरधम्मियधितिमंताण
 य सया विसुद्धं भव्वं भव्वजणाणुचिन्नं निस्संकिणं निब्भयं नित्तुसं निरायासं
 निरुवलेवं निव्वुत्तिघरं नियमनिप्पकंपं तवसंजममूलदलियणेम्मं पंचमहव्वयसुरक्खियं
 समित्तियुत्तिगुत्तं ज्ञाणवरकवाडसुक्यमज्झप्पदिन्नफलिहं संनद्धोच्छइयदुग्गइपहं सुगति-
 पददेसगं च लोगतमं च वयमिणं पउमसरतलागपालिभूयं महासगडअरगतुंवभूयं
 महाविडिमरुक्खक्खंधभूयं महानगरपागारकवाडफलिहभूयं रज्जुपिणिद्धो व इंदकेतू-
 विसुद्धणेगगुणसंपिणद्धं जंमि य भग्गंमि होइ सहसा सव्वं संभग्गम(हि)थियचुन्निय-
 कुसल्लियपल्लट्ठपडियखंडियपरिसडियविणासियं विणयसीलतवनियमगुणसमूहं तं वंभं
 भगवंतं गहगणनक्खत्ततारगाणं (व) वा जहा उडुपती मणिमुत्तसिलप्पवालरत्तरय-
 णागराणं (च) व जहा समुद्धो वेरुल्लिओ चेव जहा मणीणं जहा मउडो चेव भूसणाणं
 वत्थाणं चेव खोमजुयलं अरविंदं चेव पुप्फजेट्ठं गोसीसं चेव चंदणाणं हिमवंतो
 चेव ओसहीणं सीतोदा चेव निन्नगाणं उदहीसु जहा सयंभुरमणो रुयगवरे चेव
 मंडलिकपव्वयाण पवरे एरावण इव कुंजराणं सीहोव्व जहा मिगाणं पवरे प[व]व-
 काणं चेव वेणुदेवे धरणो जह पण्णगइंदराया कप्पाणं चेव वंभलोए सभासु य

जहा भवे सुहम्मा ठितिसु लवसत्तमव्व पवरा दाणाणं चेव अभयदानं किमिरा[उ]ओ
 च्चेव कंवलणं संघयणे चेव वज्जरिसभे संठाणे चेव समचउरंसे आणेषु य परम-
 सुक्कज्झाणं णाणेषु य परमकेवलं तु सिद्धं लेसासु य परमसुक्कलेस्सा तित्थंकरे जहा
 च्चेव मुणीणं वासेसु जहा महाविदेहे गिरिराया चेव मंदरवरे वणेषु ज[हा]ह नंदणवणं
 पवरं दुमेषु जहा जंवू सुदंसणा वीसुयजसा जीय नामेण य अयं दीवो, तुरगवती
 गयवती रहवती नरवती जह वीसुए चेव राया रहिए चेव जहा महारहगते,
 एवमणेगा गुणा अहीणा भवंति एकंमि वंभचेरे जंमि य आराहियंमि आराहियं
 वयमिणं सव्वं, सीलं तवो य विणओ य संजमो य खंती गुत्ती मुत्ती तहेव इह-
 लोइयपारलोइयजसे य कित्ती य पच्चओ य, तम्हा निहुएण वंभचेरं चरियव्वं
 सव्वओ विसुद्धं जावजीवाए जाव सेयट्ठिसंजउत्ति, एवं भणियं वयं भगवया, तं
 च इमं—पंचमहव्वयसुव्वयमूलं, समणमणाइलसाहुसुचिन्नं । वेरविरामणपज्जवसाणं,
 सव्वसमुद्दमहोदधितित्थं ॥ १ ॥ तित्थकरेहिं सुदेसियमग्गं, नरयतिरिच्छविवज्जिय-
 मग्गं । सव्वपवित्तिमुनिम्मियसारं, सिद्धिविमाणअवंगुयदारं ॥ २ ॥ देवनरिंद-
 नमंसियपूयं, सव्वजगुत्तममंगलमग्गं । दुद्धरिसं गुणनाय[ग]कमेक्कं, मोक्खपहस्स
 वडिंस[क]गभूयं ॥ ३ ॥ जेण सुद्धचरिएण भवइ सुवंमणो सुसमणो सुसाहू सइसी समुणी
 ससंजए स एव भिक्खू जो सुद्धं चरति वंभचेरं, इमं च रतिरागदोसमोहपवड्ढणकरं
 किंमज्झपमायदोसपासत्थसीलकरणं अव्वंभंगणाणि य तेल्लमज्जणाणि य अभिक्खणं
 कक्ख[खा]खसीसकरचरणवदणधोवणसंचाहणगायकम्मपरिमद्दणाणुलेवणचुन्नवासधूव-
 णसरीरपरिमंडणवाउसि(य)कहसियभणियनट्ठगीयवाइयनडनट्टकजल्लमल्लपेच्छणवेल्लं-
 क(जा)जाणि य सिंगारागाराणि य अन्नाणि य एवमादियाणि तवसंजमवंभचेर-
 घातोवघातियाइं अणुचरमाणेणं वंभचेरं वज्जेयव्वाइं सव्वकालं, भावेयव्वो भवइ
 य अंतरप्पा इमेहिं तवनियमसीलजोगेहिं निच्चकालं, किं ते ?—अण्हाणकअदंत-
 धावणसेयमलजल्लधारणं मूणवयकेसलोए य खमदमअचेलगखुप्पिवासल्लाघवसीतो-
 सिणकट्ठसेज्जाभूमिनिसेज्जापरघरपवेसलद्धावलद्धमाणावमाणनिंदणइंसमसगफासनिय-
 मतवगुणविणयमादिएहिं जहा से थिरतर[गं]कं होइ वंभचेरं इमं च अव्वंभचेरविरमण-
 परिरक्खणट्ठयाए पावयणं भगवया सुकहियं—अत्तहितं—पेच्चाभाविकं आगमेसिभइं सुद्धं
 नेयाउयं अकुडिलं अणुत्तरं सव्वदुक्खपावाण विउसवणं, तस्स इमा पंच भावणाओ
 चउत्थ(व)यस्स होंति अव्वंभचेरवेरमणपरिरक्खणट्ठयाए, पढमं सयणासणघरदुवार-
 अंगणआगासगवक्खसालअभिलोयणपच्छवत्थुकपसाहणकण्हाणिकावकासा अव-
 कासा जे य वेसियाणं अच्छंति य जत्थ इत्थिकाओ अभिक्खणं मोहदोसरतिराग-
 वड्ढणीओ कहिति य कहाओ बहुविहांओ तेऽवि हु वज्जणिज्जा इत्थिसंसत्तसंक्रिलिद्धा

अज्ञेवि य एवमादी अवकासा ते हु वज्जणिज्जा जत्थ मणोविब्भमो वा भंगो वा
 भंस(गो)णा वा अट्ठं रुद्धं च हुज्ज ज्ञाणं तं तं वज्जेज्ज वज्जभीरु अणायतणं अंतपंतवासी,
 एवमसंसत्तवासवसहीसमितिजोगेण भावितो भवति अंतरप्पा आरतमणविरयगाम-
 धम्ममे जि[तें]तिदिए वंभचेरगुत्ते । वितियं नारीजणस्स मज्झे न कहेयव्वा कहा
 विचित्ता वि(व्वो)व्वोयविलाससंपउत्ता हाससिंगारलोइयकहव्व मोहजणणी न
 आवाहविवाहवरकहाविव इत्थीणं वा सुभगदुभगकहा चउसट्ठिं च महिलागुणा न
 चन्नदेसजातिकुलरूवनामनेवत्थपरिजणकहा इत्थियाणं अन्नावि य एवमादियाओ
 कहाओ सिंगारकलुणाओ तवसंजमवंभचेरघातोवघातियाओ अणुचरमाणेणं वंभचेरं
 न कहेयव्वा न सुणेयव्वा न चित्तेयव्वा, एवं इत्थीकहविरतिसमितिजोगेणं भावितो
 भवति अंतरप्पा आरतमणविरयगामधम्ममे जित्तिंदिए वंभचेरगुत्ते । ततीयं नारीण
 हसितभणि(त)तं चेट्ठियविप्पेक्खितगइविलासकीलियं विव्वोतियनट्ठगीतवातियसरीर-
 संठाणवन्नकरचरणनयणलाव-ण्णरूवजोव्वणपयोहराधरवत्थालंकारभूसणाणि य
 गुज्झोवकासियाइं अन्नाणि य एवमादियाइं तवसंजमवंभचेरघातोवघातियाइं अणुच-
 रमाणेणं वंभचेरं न चक्खुसा न मणसा न वयसा पत्थेयव्वाइं पावकम्माइं, एवं
 इत्थीरूवविरतिसमितिजोगेण भावितो भवति अंतरप्पा आरतमणविरयगामधम्ममे
 जित्तिंदिए वंभचेरगुत्ते । चउत्थं पुव्वरयपुव्वकीलियपुव्वसंगंथगंथसंथुया जे ते आवाह-
 विवाहचोल्लकेसु य तिथिसु जन्नेसु उरस्सवेसु य सिंगारागारचारुवेसाहि हावभावपललिय-
 विक्खेवविलाससालिणीहिं अणुकूलपेम्मिकाहिं सद्धिं अणुभूया सयणसंपओगा उदुसुह-
 चरकुसुमसुरभिचंदणसुगंधिवरवासधूवसुहफरिसवत्थभूसणगुणोववेया रमणिज्जाउज्ज-
 नेयपउरनडनट्ठ(ग)कजल्लमल्लमुट्ठिकवेलंबगकहगपवगलासगआइक्खगलंखमंखतूणइल्ल-
 तुंववीणियतालायरपकरणाणि य बहूणि महुरसरगीतसुस्सराइं अन्नाणि य एवमादि-
 याणि तवसंजमवंभचेरघातोवघातियाइं अणुचरमाणेणं वंभचेरं न तार्ति समणेण
 लब्भा दट्ठुं न कहेउं नवि सुमरिउं जे, एवं पुव्वरयपुव्वकीलियविरतिसमितिजोगेण
 आहारपणीयनिद्धभोयणविवज्जते संजते सुसाहू ववगयखीरदहिसप्पिनवनीयतेल्लगुल-
 खंडमच्छंडिकमहुमज्जमंसखज्जकविगतिपरिचत्तकयाहारे ण दप्पणं न बहुसो न
 नितिकं न सायसूपाहिकं न खद्धं तहा भोत्तव्वं जह से जायामाता-य भवति, न य
 भवति विब्भमो न भंसणा य धम्मस्स, एवं पणीयाहारविरतिसमितिजोगेण भावितो
 भवति अंतरप्पा आरयमणविरतगामधम्ममे जिइंदिए वंभचेरगुत्ते । एवमिणं संवरस्स
 दारं सम्मं संवरियं होइ सुपणिहितं इमेहिं पञ्चहिवि कारणेहिं मणवयणकायपरि-

रक्खिण्हिं णिच्चं आमरणंतं च एसो जोगो णेयव्वो धितिम(या)ता मतिमात-
अणासवो अकल्लसो अच्छिद्दो अपरिस्सावी असंकिलिद्धो सुद्धो सव्वजिणमणुच्चातो,
एवं चउत्थं संवरदारं फासियं पालितं सोहितं तीरितं किट्ठितं आणाए अणुपालियं
भवति, एवं नायमुणिणा भगवया पन्नवियं पल्लवियं पसिद्धं सिद्धवरसासणमिणं
आधवियं सुदेसितं पसत्थं चउत्थं संवरदारं समतंतिवेमि ॥ २७ ॥ जंबू ! अपरिग्गह-
संवुडे य समणे आरंभपरिग्गहातो विरते विरते कोहमाणमायालोभा एगे असंजमे
दो चेव रागदोसा तिन्नि य दंडगारवा य गुत्तीओ तिन्नि तिन्नि य विराहणाओ
चत्तारि कसाया आणसन्नाविकहा तथा य हुंति चउरो पंच य किरियाओ समिति-
इंदियमहव्वयाडं च छज्जीवनिकाया छच्च लेसाओ सत्त भया अट्ट य मया नव चेव
य वंभचेरवयगुत्ती दसप्पकारे य समणधम्मं एक्कारस य उवासकाणं वारस य
भिक(खूणं)खुपडिमा किरियठाणा य भूयगामा परमाधम्मिया गाहासोलसया
असंजमअवंभणायअसमाहिठाणा सवला परिसहा सूयगडज्जयणदेवभावणउद्देस-
गुणपक्कपावसुतमोहणिजे सिद्धातिगुणा य जोगसंगहे तित्तीसा आसातणा सुरिंदा
आदिं एक्कातियं करेत्ता एक्कुतरियाए व[ह्वि]हीए तीसातो जाव उ भवे तिकाहिका
विरतीपणिहीसु अविरतीसु य (अ०) एवमादिमु वहुसु ठाणेषु जिणपसत्थेषु अवितहेसु
मासयभावेनु अवट्ठिणसु संकं कंखं निराकरेत्ता सद्वहते सासणं भगवतो अणियाणे
अगारवे अलुद्धे अमूढमणवयणकायगुत्ते ॥ २८ ॥ जो सो वीरवरवयणविरतिपवित्थर-
बहुविहप्पकारो सम्मतविमुद्धमूलो धितिकंदो विणयवेतितो निग्गततिलोक्कविपुलजस-
नि[विड]चियपीण[प]पीवरसुजातखधो पंचमहव्वयविसालसालो भावणतयंतज्जाण-
नुभजोगनाणपल्लववरं कुरधरो बहुगुणकुसुमसमिद्धो सीलमुगंधो अण्हवफलो पुणो य
मोक्खवरवीजसारो मंदरगिरिसिहरचूलिका इव इमस्स मोक्खवरसुत्तिमग्गस्स
सिहरभूओ संवरवरपादपो चरिमं संवरदारं, जत्थ न कप्पइ गामागरनगरखेडकव्व-
उमउंवदोगसुहपट्टणासमगयं च किचि अप्पं व वहुं व अणुं व थूलं व तसथावरकाय-
दव्वजायं मगसावि परिघेत्तुं ण हिर-ग्गसुव-ग्गखेत्तवत्थु न दासीदासभयकपेसहय-
गयगवेलगं (च) वा न जाणजुग्गसयणा-सणा-इ ण छतकं न कुंडिया न उवाणहा न
पेहुगन्तीयगतालियंटका ण यावि अयतउयतंवसीसककंसरयतजातल्लवमणिमुत्ताधार-
पुट्ठमंउदंतमगिग्गिग(लेस)सेलकायवरचेलचम्मपत्ताइं महरिहाइं परस्स अज्जोव-
यायलोभजगणाटं परिग्गहेउं गुणवओ न यावि पुप्फकलकंदमूलादिवाइं सगसत्तरसाइं
उव्वभजारं तिहिवि जोगेहिं परिघेत्तुं ओसहमेसजभोयणट्ठयाए संजएणं, कि कारणं?,
अपरिमितगणदंमणधरेहिं सीलगुणविणयतवसंजमनायकेहिं तित्थयरेहिं सव्वजग-

[जी]जीववच्छलेहिं तिलोयमहि एहिं जिणवरिं देहिं एस जोणी जगा[जंगमा]णं दिट्ठा
न कप्पइ जोणिसमुच्छेदोत्ति तेण वज्जंति समणसीहा, जंपिय ओदणकुम्मासगं [जं]ज-
तप्पणमंशुभुजियतिलपुप्फपिट्ठसूपसकुलिवेढिमवरसरकचुन्नकोसगपिंडसिहरिणिवट्ठमो-
यगखीरदहिसप्पितेहगुलखंडमच्छंडियखज्जकवंजणविधिमादिकं पणीयं उवस्सए
परघरे व रत्ते न कप्प-ति तंपि सच्चिहिं काउं सुविहियाणं, जंपि-य उद्दिट्ठवियरचियग-
पज्जवजातं पक्किणपाउकरणपामिच्चं मीसकजायं कीयकडपाहुडं च दाणट्ठपुन्नपगडं
समणवणीमगट्ठयाए व कयं पच्छाकम्मं पुरेकम्मं नि[च्च]तिकम्मं मक्खियं अतिरित्तं
मोहरं चेव सयग्गहमाहडं मट्ठि[उ]ओवलित्तं अच्छेज्जं चेव अणीसट्ठं जं तं तिहीसु
जनेसु ऊसवेसु य अंतो व वहि व होज्ज समणट्ठयाए ठवियं हिंसासावज्जसंपउत्तं न
कप्प-ति तंपि-य परिघेत्तुं, अह केरिसयं पुणाइ कप्पति ?, जं तं एक्कारसपिंडवायसुद्धं
किणणहणणपयणकयकारियाणुमोयणनवकोडीहिं सुपरिसुद्धं दसहि य दोसेहिं विप्पमुक्कं
उग्गमउप्पायणेसणाए सुद्धं ववगयचुयचवियचत्तदेहं च फासुयं ववगयसंजोगमणिगालं
विगयधूमं छट्ठाननिमित्तं छक्कायपरिरक्खणट्ठा ह[णि]णिं ह-णिं फासुकेण भिक्खेण
वट्ठियव्वं, जंपि-य समणस्स सुविहियस्स उ रोगायंके बहुप्पकारंमि समुप्पन्ने
वाताहिकपित्तसिंभअतिरित्तकुविय तह सञ्चिवातजाते व उदयपत्ते उज्जलवलविउ-
ल[तिउल]कक्खडपगाढदुक्खे असुभकडुयफस्से चंडफलविवागे महब्भ[ये]ए जीवि-
यंतकरणे सव्वसरीरपरितावणकरे न कप्प-ति तारिसे-वि तह अप्पणो परस्स वा
ओसहमेसज्जं भत्तपाणं च तंपि संनिहिकयं, जंपि-य समणस्स सुविहियस्स तु
पडिग्गहधारिस्स भवति भायणमंडोवहिउवकरणं पडिग्गहो पादवंधणं पादकेस-
रिया पादठवणं च पडलाइं तिन्नेव रयत्ताणं च गोच्छओ तिन्नेव य पच्छाका
रयोहरणचोलपट्टकमुहणंतकमादीयं एयं-पि-य संजमस्स उववूहणट्ठयाए वायायवदंसम-
सगसीयपरिरक्खणट्ठयाए उवगरणं रागदोसरहियं परिहरियव्वं संजएण णिच्चं
पडिलेहणप्फोडणपमज्जणाए अहो य राओ य अप्पमत्तेण होइ सततं निक्खि-
यव्वं च णिहियव्वं च भायणमंडोवहिउव(क)रणं, एवं से संजते विमुत्ते निस्संगे
निप्परिग्गहहइं निम्ममे निन्नेहवंधणे सव्वपावविरते वासीचंदणसमाणकप्पे सम-
तिणमणिमुत्तालेट्ठुंकंचणे समे य भाणावमाणणाए समियरते समितरागदोसे समिए
समितीसु सम्म(दि)दिट्ठी समे य जे सव्वपाणभूतेसु से हु समणे सुयधारते उज्जु[त्ते]ते
संजते स साहू सरणं सव्वभूयाणं सव्वजगवच्छले सच्चमासके य संसारंतट्ठिते य
संसारसमुच्छिन्ने सततं मरणाणुपारते पारगे य सव्वेसिं संसयाणं पवयणमायाहि
अट्ठहि अट्ठकम्मगंठीविमोयके अट्ठमयमहणे ससमयकुसले य भवति सुहदुक्ख-

निव्विसेसे अब्भितरवाहिरंमि सया तवोवहाणंमि य सुद्धुजुते खंते दंते य हिय(धिति)-
 निरते ईरियासमिते भासासमिते एसणासमिते आयाणभंडमत्तनिकखेवणासमिते
 उच्चारपासवणखेलसिंघाणजल्ल[प]पारिद्धावणियासमिते मणगुत्ते वयगुत्ते कायगुत्ते गुत्ति-
 दिए गुत्तवंभयारी चाई लज्जू धञ्जे तवस्सी खंतिखमे जित्तिदिए सोधिए अणियाणे
 अवहिल्लेस्से अममे अकिचणे छिन्न(सोए)-न-गंथे निख्वलेवे सुविमलवरकंसभायणं व
 मुक्कतोए संखेविव निरंजणे विगयरागदोसमोहे कुम्मो इव इंदिएसु गुत्ते जच्चकंचणगं
 व जायख्वे पोक्खरपत्तं व निख्वलेवे चंदो इव सोम(भाव)याए सूरु-व्व दित्ततेए
 अचले जह मंदरे गिरिवरे अक्खोभे सागरो व्व थिमिए पुढवी-व सव्वफाससहे
 तवसा च्चिय भासरासिछन्निव्व जाततेए जलियहुयासणो विव तेयसा जलंते
 गोसीसचंदणं-पिव सीयले सुगंधे य हर(ए)यो विव समिय(ता)भावे उग्घोसियसुनिम्मलं
 व आयंसमंडलतलं व पागडभावेण सुद्धभावे सोंडीरे कुंजरोव्व वसभेव्व जायथामे
 सीहे वा जहा मिगाहिवे होति दुप्पवरिसे सारयसलिलं व सुद्धहिय(ये)ए भारंडे चेव
 अप्पमत्ते खग्गिविसाणं व एगजाते खाणुं चेव उड्डुकाए सुच्चागारेव्व अप्पडिकम्मे
 सुच्चागारावणस्संतो निवायसरणप्पदीपज्जाणमिव निप्पकपे जहा खुरो चेव एगधारे
 जहा अही चेव एगदिट्ठी आगासं चेव निरालंवे विहगे विव सव्वओ विप्पमुक्के
 कयपरनिए जहा चेव उरए अप्पडिवद्धे अनिलोव्व जीवोव्व अप्पडिहयगती
 गामे गामे ए[ग]करायं नगरे नगरे य पंचरायं दूज्जंते य जित्तिदिए जितपरीसहे
 निव्वमओ वि(सुद्धो)ऊ सच्चित्ताचित्तमीसकेहिं दव्वेहिं विरायं गते संचयातो विरए मुत्ते
 लहुके निरव्वकंखे जीवियमरणासविप्पमुक्के निस्संधि निव्वणं चरित्तं धीरे काएण
 फासयंते सततं अज्झप्प(ज)झाणजुत्ते निहुए एगे चरेज धम्मं । इमं च परिग्गह-
 वेरमणपरिरक्खणट्ठयाए पावयणं भगवया सुकहियं अत्तहियं पेच्चाभाविकं आगमेसिभइं
 सुद्धं नेयाउयं अकुडिलं अणुत्तरं सव्वदुक्खपावाण विओसमणं तस्स इमा पंच
 भावणाओ चरिमस्स वयस्स होंति परिग्गहवेरमणरक्खणट्ठयाए-पढमं सोइंदिएण
 सोच्चा सदाइं मणुन्नभद्गाइं, किं ते ?, वरसुरयमुइंगपणवद्धुरक्कच्छभिवीणाविपंची-
 वल्लयिवद्धीसकसुघोसनंदिसूसरपरिवादिणिवंसतूणकपव्वकत्तंतीतलतालतुडियनिग्घोस-
 गीयवाइयाइं नडनट्टकजल्लमल्लमुट्टिकवेलंवककहकपवकलासगआइक्खकलंखमंखतूण-
 डल्लतुववीणियतालायरपकरणाणि य वहूणि महरसरगीतसुस्सरात्तिं कंचीमेहलाकलाव-
 पत्तरकपहेरकपायजालगधंटियखिंखिणिरयणोरुजालियछु[दि]डियनेउरचलणमालिय-
 कणगनियलजालभूसणसद्दाणि लीलचंकम्ममाण ण्ढीरियाइं तरुणीजणहसियमणिय-
 च्चल्लरेभित्तमंजुलाइं गुणवयणाणि व वहूणि महरजणभासियाइं अत्तेसु य एवमादिएसु-

सद्देसु मणुन्नभद्देसु ण तेसु समणेण सज्जियव्वं न रज्जियव्वं न गिज्जियव्वं न मुज्जियव्वं न विनिग्घायं आवज्जियव्वं न लुभियव्वं न तुसियव्वं न हसियव्वं न सइं च मइं च तत्थ कुज्जा, पुणरवि सोइंदिएण सोच्चा सद्दाइं अमणुन्नपावकाइं, किं ते?, अक्कोसफरुसखिसणअवमाणणतज्जणनिब्भंछणदित्तवयणतासणउक्खुजिय-
रुन्नरडियकंदियनिग्घुट्टरसियकलुणविलवियाइं अन्नेसु य एवमादिएसु सद्देसु अमणुण-
पावएसु न तेसु समणेण रुसियव्वं न हीलियव्वं न निंदियव्वं न खिसियव्वं न छिंदियव्वं न भिं[भि]दियव्वं न वहेयव्वं न दुगुंछावत्तियाए लब्भा उप्पाएउं, एवं
सोत्तिदियभावणाभावितो भवति अंतरप्पा मणुन्नाऽमणुन्नसुब्भिदुब्भिरागदोसप्पणि-
हियप्पा साहू मणवयणकायगुत्ते संवुडे पणिहिर्तिदिए चरेज्ज धम्मं । वित्तियं
चक्खिदिएण पासिय रुवाणि मणुन्नाइं भद्दाइं सच्चित्ता[S]चित्तमीसकाइं कट्ठे पोत्थे
य चित्तकम्मे लेप्पकम्मे सेळे य दंतकम्मे य पंचहि वण्णेहि अणेगसंठाणसं(थि)ठि-
याइं गं[थि]ठिमवेढिमपूरिमसंघातिमाणि य मल्लाइं बहुविहाणि य अहिंयं नयणमण-
सुहकराइं वणसंडे पव्वते य गामागरनगराणि य खुदियपुक्खरिणिवावीदीहियगुंजा-
ल्लियसरसरपंतियसागरविलपंतियखादियनदीसरतलागवप्पिणीफुल्लुप्पलपउमपरिमंडि-
याभिरामे अणेगसउणगणमिहुणविचरिए वरमंडवविहभवणतोरणसभप्पवावसह-
सुकयसयणासणसीयरहसयडजाणजुग्गसंदणनरनारिगणे य सोमपडिरुवदरिसणिज्जे
अलंकितविभूसिते पुव्वकयतवप्पभावसोहग्गसंपउत्ते नडनट्टगजल्लमल्लमुट्ठियवेलंबग-
कह[क]गपवगलासगआइक्खगलंखमंखतूणइल्लतुंववीणियतालायरपकरणाणि य बहूणि
सुकरणाणि अन्नेसु य एवमादिएसु रुवेसु मणुन्नभद्देसु न तेसु समणेण सज्जियव्वं
न रज्जियव्वं जाव न सइं च मइं च तत्थ कुज्जा, पुणरवि चक्खिदिएण
पासिय रुवाइं अमणुन्नपावकाइं, किं ते?, गंडिकोठिककुणिउदरिकच्छुल्लपइल्लकुज्ज-
पंगुलवामणअंधिल्लगएगचक्खुविणिहयसप्पिसल्लगवाहिरोगपीलियं विगयाणि य मय-
ककलेवराणि सकिमिणकुहियं च दव्वरासिं अन्नेसु य एवमादिएसु अमणुन्नपावतेसु
न तेसु समणेण रुसियव्वं जाव न दुगुंछावत्तियावि लब्भा उप्पातेउं, एवं चक्खि-
दियभावणाभावितो भवति अंतरप्पा जाव चरेज्ज धम्मं । ततिय घाणिदिएण
अग्घाइय गंधातिं मणुन्नभद्दाइं, किं ते?, जलयथलयसरसपुप्फफलपाणभो-
यणकुट्टतगरपत्तचोददमणकमरुयएलारसपिक्रमंसिगोसीसरसचंदणकप्पूरलवंगअगर-
कुक्कुमकक्कोलउसीरसेयचंदणसुगन्धसारंगजुत्तिवरधूववासे उउयपिंडिमणिहारिमगंधि-
एसु अन्नेसु य एवमादि-एसु गंधेसु मणुन्नभद्देसु न तेसु समणेण सज्जियव्वं जाव
न सतिं च मइं च तत्थ कुज्जा, पुणरवि घाणिदिएण अग्घातिय गंधाणि अमणुन्न-

पावकाइं, किं ते ? , अहिमडअस्समडहत्थिमडगोमडविगसुणगसियालमणुयमज्जार-
सीहदीवियमयकुहियविणट्ठकिविणवहुदुरभिगंधेसु अजेसु य एवमादि-ए-सु गंधेसु
अमणुन्नपावएसु न तेसु समणेण रुसियव्वं जाव पणिहियपंचिदिए चरेज्ज
धम्मं । चउत्थं जिर्विदिएण साइय रसाणि उ मणुन्नभइकाइं, किं ते ? ,
उग्गाहिमविविहपाणभोयणगुलकयखंडकयतेल्लवयकयभक्खेसु बहुविहेसु लवणरस-
संजुत्तेसु निट्ठाणगदालियंवसेहंवदुद्धदहिसायबहुप्पगारेसु भोयणेसु य मणुन्नवन्नगंधरस-
फासवहुदव्वसंभितेसु अजेसु य एवमादिएसु रसेसु मणुन्नभइएसु न तेसु समणेण
सज्जियव्वं जाव न सइं च मतिं च तत्थ कुज्जा, पुणरवि जिर्विदिएण सायिय
रसातिं अमणुन्नपावगाइं, किं ते ? , अरसविरससीयलुक्खणिजप्पपाणभोयगाइं
दोसीणअमणुन्नाइं तित्तकडुयकसायअंविलरसल्लिंडनीरसाइं अजेसु य एवमा(ति)इएसु
रसेसु अमणुन्नपावएसु न तेसु समणेण रुसियव्वं जाव चरेज्ज धम्मं । पंचमगं
-परावेक्खाए-फासिदिएण फासिय फासाइं मणुन्नभइकाइं, किं ते ? , दगमंडवहार-
सेयचंदणसीयलविमलजलविविहकुसुमसत्थरओसीरमुत्तियमुणालदोसिणापेहुणउक्खे-
वगतालियंटवीयणगजणियसुहसीयले य पवणे गिम्हकाले सुहफासाणि य बहूणि
सयणाणि आसणाणि य पाउरणगुणे य सिसिरकाले अंगारपतावणा य आयवनिद्ध-
मउयसीयउसिणलहुया य जे उदुसुहफासा अंगसुहनिव्वुइकरा ते अजेसु य एवमादि-
तेसु फासेसु मणुन्नभइएसु न तेसु समणेण सज्जियव्वं न रज्जियव्वं न निज्झियव्वं
न मुज्झियव्वं न विणिग्घायं आवज्जियव्वं न लुभियव्वं न अज्जोववज्जियव्वं न
तत्सियव्वं न हसियव्वं न सतिं च मतिं च तत्थ कुज्जा, पुणरवि फासिदिएण फासिय
फासातिं अमणुन्नपावकाइं, किं ते ? , अणेगवधवंधतालणंकणअतिभारारोवणए अंग-
भंजणसूतीनखप्पवेसगायपच्छणणलक्खारसखारतेल्लकलकलंततउअसीसककाललोह-
सिंचणहडिवंधणरज्जुनिगलसंकलहत्यंडुयकुंभिपाकदहणसीहपुच्छणउव्वंधणसूलभेय-
गयचलणमलणकरचरणकन्ननासोट्टसीसछेयणजिब्भंछणवसणनयणहिय[य]यंतदंतभं-
जणजोत्तलयकसप्पहारपादपणिहजाणुपत्थरनिवायपीलणकविकच्छुअगणिविच्छुयडक्क-
वायातवदंसमसकनिवाते दुट्ठणिसज्जदुनिसीहियदुब्भिकक्खडगुरुसीयउसिणलुक्खेसु
बहुविहेसु अजेसु य एवमाइएसु फासेसु अमणुन्नपावकेसु न तेसु समणेण रुसियव्वं
न हीलियव्वं न निंदियव्वं न गरहियव्वं न खिसियव्वं न छिंदियव्वं न भिंदियव्वं
न वहेयव्वं न दुगुंछावत्तियं च लब्भा उप्पाएउं, एवं फासिंदियभावणाभावितो
भवति अंतरप्पा मणुन्नामणुन्नसुब्भिदुब्भिरागदोसपणिहियप्पा साहू मणवयणकायगुत्ते
संसुडे पणिहिर्तिदिए चारेज्ज धम्मं । एवमिणं संवरस्स दारं सम्मं संवरियं होइ

सुप्पणिहियं इमेहिं पंचहि-वि कारणेहिं मणवयकायपरिरक्खिएहिं निच्चं आसरणंतं च
 एस जोगो नेयव्वो धितिमया मतिमया अणासवो अकलुसो अच्छिद्दो अपरिस्सावी
 असंकिलिट्ठो सुद्धो सव्वजिणमणुज्जातो, एवं पंचमं संवरदारं फासियं पालियं सोहियं
 तीरियं किट्टियं अणुपालियं आणाए आराहियं भवति, एवं नायमुणिणा भगवया
 पञ्चवियं पहावियं पसिद्धं सिद्धं सिद्धवरसासणमिणं आघवियं सुदेसियं पसत्थं पंचमं
 संवरदारं समत्तंतिवेमि । एयातिं वयाइं पंचवि सुव्वयमहव्वयाइं हेउसयविचित्त-
 पुक्कलाइं कहियाइं अरिहंतसासणे पंच समासेण संवरा वित्थरेण उ पणवीसतिस-
 मियसहियसंवुडे सया जयणघडणसुविसुद्धदंसणे एए अणुचरियसंजते चरमसरीरधरे
 भविस्सतीति ॥ २९ ॥ पण्हावागरणे णं एगो सुयक्खंधो दस अज्झयणा एक्कसरगा
 दससु चेव दिवसेसु उट्ठिसिज्जंति एगंतरेसु आयंबिलेसु निरुद्धेसु आउत्तभत्तपाणएणं
 अंगं जहा आयारस्स ॥ ३० ॥



णमोऽत्यु णं समणस्स भगवओ णायपुत्तमहावीरस्स

सुत्तागमे

तत्थ णं
विवागसुयं

तेणं कालेणं तेणं समएणं चंपा नामं नयरी होत्था वण्णओ, (० चं० ण० उ०-
दि० एत्थ णं) पुण्णभेदे (णा०) उज्जाणे (हो० व०) ॥ १ ॥ तेणं कालेणं तेणं समएणं
समणस्स भगवओ महावीरस्स अंतेवासी अज्जसुहम्म-नामं अणगारे जाइसंप-न्ने
वण्णओ चउ(द)इसपुव्वी चउनाणोवगए पंचहि अणगारसएहिं सद्धिं संपरिवुडे
पुव्वाणपुव्वि जाव जेणेव पुण्णभेदे उज्जाणे अहापडिरुवं जाव विहरइ, परिसा
निग्गया धम्मं सोच्चा निसम्म जामेव दि(सं)सिं पाउब्भूया तामेव दि-सिं पडि-
गया, तेणं कालेणं तेणं समएणं अज्जसुहम्म(स्स)अंतेवासी अज्जजंबू-नामं अणगारे
सत्तुस्सेहे जहा गोयमसामी तहा जाव ज्ञाणकोटो[वगए] विहरइ, तए णं अज्ज-
जंबू-ना(मे)मं अणगारे जायसद्धे जाव जेणेव अज्जसुहम्म- अणगारे तेणेव उवागए
तिक्खुत्तो आयाहि(णं)णपयाहिणं करेइ २ ता वंदइ नमंसइ वं० २ ता जाव
पञ्चुवासइ, [२] एवं वयासी-जइ णं भंते ! समणेणं भगवया महावीरेणं जाव
संपत्तेणं दसमस्स अंगस्स पण्हावागरणाणं अयमट्ठे प-न्नत्ते, एक्कारसमस्स णं भंते !
अंगस्स विवागसुयस्स समणेणं जाव संपत्तेणं के अट्ठे प-न्नत्ते ?, तए णं अज्जसुहम्म-
अणगारे जं(वू)वुं अणगारं एवं वयासी-एवं खलु जंबू ! समणेणं जाव संपत्तेणं
एक्कारसमस्स अंगस्स विवागसुयस्स दो सुयक्खंधा प-न्नत्ता, तं०-दुहविवागा
य सुहविवागा य, जइ णं भंते ! समणेणं जाव संपत्तेणं एक्कारसमस्स अंगस्स
विवागसुयस्स दो सुयक्खंधा प-न्नत्ता, तं०-दुहविवागा य सुहविवागा य, पढमस्स
णं भंते ! सुयक्खंधस्स दुहविवागाणं समणेणं जाव संपत्तेणं (के) कइ अ(ट्ठे)ज्झयणा
प-न्न(त्ते)ता ?, तए णं अज्जसुहम्म- अणगारे जं-वुं अणगारं एवं वयासी-एवं
खलु जंबू ! समणेणं० आइगरेणं तित्थगरेणं जाव संपत्तेणं दुहविवागाणं दस
अज्झयणा प-न्नत्ता, तं०-‘मियापुत्ते य उज्झियए अभग्ग सगडे व(व)हस्सई
नंदी । उंवर सोरियदत्ते य देवदत्ता य अंजू य ॥ १ ॥’ जइ णं भंते ! समणेणं०
आइगरेणं तित्थ(य)गरेणं जाव संपत्तेणं दुहविवागाणं दस अज्झयणा प-न्नत्ता,

तं०-मियापुत्ते य जाव अंजू य, पढमस्स णं भंते ! अज्झयणस्स दुहविवागाणं
 समणेणं जाव संपत्तेणं के अट्ठे प-ज्जते ?, तए णं से सुहम्मे अणगारे जं-वुं अण-
 गारं एवं वयासी-एवं खलु जंवू ! तेणं कालेणं तेणं समएणं मिय[ग]गामे ना-मं
 नयरे होत्था वण्णओ, तस्स णं मिय-गामस्स नयरस्स वहिया उत्तरपुर(च्छि)-
 त्थिमे दिसीभाए चंदणपायवे नामं उज्जाणे होत्था सव्वोउय....वण्णओ, तत्थ णं
 मियग्गामे नयरे विजए-नामं खत्तिए राया परिवसइ वण्णओ, तस्स णं विजयस्स
 खत्तियस्स मिया-नामं देवी होत्था अहीण....वण्णओ, तस्स णं विजयस्स खत्ति-
 यस्स पुत्ते मियाए देवीए अत्तए मियापुत्ते-नामं दारए होत्था जाइअंधे जाइमूए
 जाइवहिरे जाइपंगुले (य) हुंडे य वायव्वे य, नत्थि णं तस्स दारगस्स हत्था वा
 पाया वा कण्णा वा अच्छी वा नासा वा, केवलं से तेसिं अंगोवंगणं आ(ग)गिई
 आ-गिइ(मि)मेत्ते, तए णं सा मिया-देवी तं मियापु(त्त)तं दारगं रहस्सियंसि भूमिघरंसि
 रहस्सिएणं भत्तपाणेणं पडिजागरमाणी २ विहरइ ॥ २ ॥ तत्थ णं मि(या)यग्गामे
 नयरे एगे जाइअंधे पुरिसे परिवसइ, से णं एगेणं सचक्खुएणं पुरिसेणं पुरओ-
 दंडएणं पग(टि)ट्ठिज्जमाणे २ फुट्टहडाहडसीसे मच्छियाचडगरपहकरेणं अन्निज-
 माणमग्गे मि-यग्गामे नयरे गे(गि)हे २ कालुणवडियाए वित्तिं कप्पेमाणे विहरइ ।
 तेणं कालेणं तेणं समएणं समणे भगवं महावीरे जाव समोसरिए जाव परिसा
 निग्गया । तए णं से विजए खत्तिए इमीसे कहाए लद्धे समणे जहा कू(को)णिए
 तहा निग्गए जाव पज्जुवासइ, तए णं से जाइअंधे पुरिसे तं म(हा)हया जणसइ जाव
 सुणेत्ता तं पुरिसं एवं वयासी-कि णं देवाणुप्पिया ! अज्ज मियग्गामे नयरे इंदमहे-इ
 वा जाव निग्गच्छइ ?, तए णं से पुरिसे तं जाइअंधपुरिसं एवं वयासी-नो खलु
 देवाणुप्पिया ! इंदमहे-इ वा जाव निग्गच्छइ, एवं खलु देवाणुप्पिया ! समणे
 जाव विहरइ, तए णं एए जाव निग्गच्छंति, तए णं से अंधपुरिसे तं पुरिसं एवं
 वयासी-गच्छामो णं देवाणुप्पिया ! अम्हे-वि समणं भगवं जाव पज्जुवासामो, तए
 णं से जाइअं(ध)धे पुरिसे [तेणं] पुरओ-दंडएणं [पुरिसेणं] पगट्ठिज्जमाणे २ जेणेव
 समणे भगवं महावीरे तेणेव उवागए (२ ता) तिक्खुत्तो आयाहि-णपयाहिणं करेइ
 २ ता वंदइ नमंसइ वं० २ ता जाव पज्जुवासइ, तए णं समणे भगवं महावीरे
 विजयस्स खत्तियस्स तीसे य० धम्ममाइक्खइ(०) जाव परिसा (जाव) पडिगया,
 विजए-वि गए ॥ ३ ॥ तेणं कालेणं तेणं समएणं समणस्स भगवओ महावीरस्स जेठे
 अंतेवासी इंदभू(ति)ई नामं अणगारे जाव विहरइ, तए णं से भगवं (२) गोयमे तं
 जाइअंधपुरिसं पासइ २ ता जायसइ जाव एवं वयासी-अत्थि णं भंते ! के(ई)इ

पुरिसे जाइअंधे जाइअंधारुवे ? हंता अत्थि, क[हं]हि णं भंते । से पुरिसे जाइअंधे जाइअंधारुवे ? एवं खलु गोयमा । इहेव मियग्गामे नयरे विजयस्स खत्तियस्स पुत्ते मियादेवीए अत्तए मियापुत्ते नामं दारए जाइअंधे जाइअंधारुवे, नत्थि णं तरस दारगस्स जाव आ-गिइ-मेत्ते, तए णं सा मियादेवी जाव पडिजागरमाणी २ विहरइ, तए णं से भगवं गोयमे समणं भगवं महावीरं वंदइ नमंसइ वं० २ ता एवं वयासी-इच्छामि णं भंते ! अहं तुब्भेहिं अब्भणु-च्चाए समाणे मियापुत्तं दार(यं)गं पासित्तए, अहासुहं देवाणुप्पिया !, तए णं से भगवं गोयमे समणेणं भग-च्या महावीरेणं अब्भणु-च्चाए समाणे ह(ट्ठे)ट्ठुट्ठे समणस्स भगवओ महावीरस्स अंतियाओ पडि-निक्खमइ २ ता अतुरियं जाव सोहेमाणे (२) जेणेव मि-यग्गामे नयरे तेणेव उवागच्छइ २ ता मि-यग्गामं नयरं मज्झमज्झे(ण)गं जेणेव मिया(ए)-देवीए गि(गे)हे तेणेव उवाग(च्छइ)ए, तए-णं सा मियादेवी भगवं गोयमं एजमाणं पासइ २ ता हट्ठुट्ठु जाव एवं वयासी-संदिसंतु णं देवाणुप्पिया । किमागमण-[प]प(यो)ओयणं ?, तए णं [से] भगवं गोयमे मियादेविं एवं वयासी-अहं णं देवा-णुप्पि(या)ए ! तव पुत्तं पासिउं हव्वमागए, तए णं सा मियादेवी मियापुत्तस्स दार- (य)गस्स अणुमग्गजायए चत्तारि पुत्ते सब्बालंकारविभूसिए करेइ २ ता भग(वं)वओ गोयमस्स पाएसु पाडेइ २ ता एवं वयासी-एए णं भंते । मम पुत्ते पासह, तए णं से भगवं गोयमे मि(यं)यादे(वीं)विं एवं वयासी-नो खलु देवा० अहं एए तव पुत्ते पासिउं हव्वमागए, तत्थ णं जे से तव जेठ्ठे (पु०) मियापुत्ते दारए जाइअंधे जाइअंधारुवे जं णं तुमं रहस्सियंसि भूमिघरंसि रहस्सिएणं भत्तपाणेणं पडिजागर-माणी २ विहरसि तं णं अहं पासिउं हव्वमागए, तए णं सा मियादेवी भगवं गोयमं एवं वयासी-से के णं गोयमा ! से तहारुवे नाणी वा तवस्सी वा जेणं तव एसमट्ठे मम ताव रह(स्सि)स्सीकए तुब्भं हव्वमक्खाए जओ णं तुब्भे जाणह ?, तए णं भगवं गोयमे मियादे-वि एवं वया(सि)सी-एवं खलु देवाणु-प्पिए ! मम धम्मायरिए समणे भगवं महावीरे (जाव) जओ णं अहं जानामि, जावं च णं मियादेवी भगवया गोयमेण सद्धिं एयमट्ठं संलवइ तावं च णं मियापुत्तस्स दारगस्स भत्तवेला जाया यावि होत्था, तए णं सा मियादेवी भगवं गोयमं एवं वयासी-तुब्भे णं भंते ! इ(ह)हं चेव चिट्ठह जा णं अहं तुब्भं मियापुत्तं दार-नां उव-दंसेमित्तिकट्ठु जेणेव भत्तपाणघ(रए)रे तेणेव उवागच्छइ २ ता वत्थपरिय(ट्ठं)ट्ठयं करेइ २ [ता] कट्ठसगडियं गिण्हइ २ [ता] वि(पु)उलस्स असणपाणखाइमसाइमस्स भरेइ २ [ता] तं कट्ठसगडियं अणुकट्ठमाणी २ जे(णे)णामेव भगवं गोयमे तेणेव उवागच्छइ

२ ता भगवं गोयमं एवं वयासी-एह णं तुब्भे भंते ! म(मं)म अणुगच्छह जा णं
 अहं तुब्भं मियापुत्तं दार-गं उवदंसेमि, तए णं से भगवं गोयमे मियादेविं
 पिट्ठओ समणुगच्छइ, तए णं सा मियादेवी तं कट्ठसगडियं अणुकट्ठमाणी २
 जेणेव भूमिघरे तेणेव उवागच्छइ २ ता चउप्पुडेणं वत्थेणं णासिगं वंधेइ णासिगं
 बंधमाणी भगवं गोयमं एवं वयासी-तुब्भे(ऽ)वि णं भंते ! एवं करेह तए णं
 से भगवं गोयमे मियादेवीए एवं वुत्ते समाणे तहेव करेइ, तए णं सा
 मियादेवी परंमुही भूमिघरस्स दुवारं विहाडेइ, त(ओ)ए णं गं(ऽ)धे निग्गच्छइ
 से जहा-नामए अहिमडे-इ वा सप्पकडेवरे इ वा जाव तओ(ऽ)वि[य]णं अणिट्ठ-
 तराए चेव जाव गंधे प-न्नते, तए णं से मियापुत्ते दारए तस्स वि-उलस्स असण-
 पाणखाइमसाइमस्स गंधेणं अभिभूए समाणे तंसि वि-उलंसि असणपाणखाइम-
 साइमंसि मुच्छिए० तं वि-उल असणं ४ आसएणं आहारेइ २ ता खिप्पामेव
 विद्धंसेइ २ ता तओ पच्छा पूयत्ताए य सोणियत्ताए य परिणामेइ तं-पि-य णं
 पूयं च सोणियं च आहारेइ, तए णं भगवओ गोयमस्स तं मियापुत्तं दार-गं
 पासित्ता अयमेयारुवे अज्झत्थिए [५] समुप्पज्जित्था-अहो णं इमे दारए पुरा-
 पोराणाणं दुच्चिण्णाणं दुप्पडिक्कंताणं असुभाणं पावाणं कडाणं कम्माणं पावगं
 फलवित्तिविसेसं पच्चणु(व)भवमाणे विहरइ, २ पच्चक्खं खलु अयं पुरिसे नर-गपडिहवियं
 वेयणं वे(एईति)यइत्तिकट्ठु मियं देविं आपुच्छइ २ ता मियाए देवीए गिहाओ
 पडिनिक्खमइ २ ता मियग्गामं नयरं मज्झंमज्झेणं निग्गच्छइ २ ता जेणेव
 समणे भगवं महावीरे तेणेव उवागच्छइ २ ता समणं भगवं महावीरं तिक्खुत्तो
 आयाहि-णपयाहिणं करेइ २ ता वंदइ नमंसइ वं० २ ता एवं वयासी-एवं खलु (भं०)
 अहं तुब्भेहिं अब्भणु-न्नाए समाणे मियग्गामं नयरं मज्झंमज्झे-णं अणुप्पविसामि
 [२] जेणेव मियाए देवीए गि-हे तेणेव उवागए, तए णं सा मियादेवी ममं एज्ज-
 माणं पासइ २ ता हट्ठा तं चेव सव्वं जाव पूयं च सोणियं च आहारेइ, तए णं मम
 इमे अज्झत्थिए(०) समुप्पज्जित्था-अहो णं इमे दारए पुरा जाव विहरइ ॥ ४ ॥
 से णं भंते ! पुरिसे पुव्वभवे के आ(सि)सी [१ किं-नामए वा किणोए वा] कयरंसि
 गामंसि वा नयरंसि वा [१] कि वा दच्चा कि वा भोच्चा किं वा समायरित्ता केसिं वा
 पुरा जाव विहरइ ?, गोयमाइ समणे भगवं महावीरे भगवं गोयमं एवं वयासी-एवं
 खलु गोयमा ! तेणं कालेणं तेणं समएणं इहेव जंवुदीवे दीवे भारहे वासे
 सयदुवारे नामं नयरे होत्था रिद्ध(त्य)त्थिमि(ए)य वण्णओ, तत्थ णं सयदुवारे नयरे
 थणवइ नामं राया हो(हु)त्था वण्णओ, तस्स णं सयदुवारस्स नयरस्स अदूरसामंते

किच्चा इमीसे रयणप्पभाएः पुढवीए उक्कोससागरोवम(ठि-)ट्टिइएसु जाव उववज्जिहिइ, से णं तओ अणंतरं उव्वट्ठिता स(सि)री(सि)सवेसु उववज्जिहिइ, तत्थ णं कालं किच्चा दोच्चाए पुढवीए उक्कोसेणं तिण्णि सागरोवमाइं...., से णं तओ अणंतरं उव्वट्ठिता पक्खीसु उववज्जिहिइ, तत्थ-वि कालं किच्चा तच्चाए पुढवीए सत्त सागरोवमाइं...., से णं तओ सीहेसु य...., तयाणंतरं (च णं) चो(चउ)त्थीए (पु०) उरगो पंचमी० इत्थी० छट्ठी० मणु(आ-ओ)या० अहे-सत्त(मा)मीए, त(तोऽ)ओ अणंतरं उव्वट्ठिता से जाइं इमाइं जलयरपंचिंदियतिरिक्खजोणियाणं मच्छकच्छ(भ)वगाहमगर(सु)सुंसु-मारा(दी)ईणं अ(द्ध)द्धुतेरस जाइकुलको(डी)डिजोणिपमुहसयसहस्साइं....तत्थ णं एगमेगंसि जो(णी)णिविहाणंसि अणेगसयसहस्सखुत्तो उद्दाइत्ता २ तत्(थेव)थ भुज्जो २ पच्चायाइस्सइ, से णं तओ उव्वट्ठिता....एवं चउ(प)पएसु उरपरिसप्पेसु भुयपरिसप्पेसु खहयरेसु चउरिंदिएसु तेइंदिएसु वेइंदिएसु वणप्फइएसु कडुयरुक्खेसु कडुयदुद्धिएसु वा(ऊ)उ० ते० उ० आ-उ० पुढ(वि)वी० अणेगसयसहस्सखुत्तो...., से णं तओ अणंतरं उव्वट्ठिता सुपइट्ठपुरे नयरे गोणत्ताए पच्चायाहिइ, से णं तत्थ उम्मुक्क जाव अ-न्नया कया-इ पढमपाउसं(मि)सि गंगाए महा-नईए खली(य)णमट्ठियं खणमाणे तडीए पेळिए समाणे कालगए तत्थेव सुपइ(ट्टे)ट्ठपुरे नयरे सेट्ठिकुलंसि पु(त्त)मत्ताए पच्चायाइस्सइ, से णं तत्थ उम्मुक्कवालभावे जाव जोव्वणगमणु[प]पत्ते तहारूवाणं थैराणं अंतिए धम्मं सोच्चा निसम्म मुंडे भवित्ता अ(आ)गाराओ अणगारियं पव्वइस्सइ, से णं तत्थ अणगारे भविस्सइ ई(इ)रियासमिए जाव वंभयारी, से णं तत्थ बहूई वासाइं सामण्णपरियागं पाउणित्तं आलोइयपडिक्कंते समाहिपत्ते कालमासे कालं किच्चा सोहम्(म)मे कप्पे देवत्ताए उववज्जिहिइ, से णं तओ अणंतरं चयं चइत्ता महाविदेहे वासे जाइं कुलाइं भवन्ति अट्ठाइं....जहा दढपइ-न्ने सा चेव वत्तव्वया कलाओ जाव सिज्झिहिइ [५] । एवं खलु जंबू ! समणेणं भगवया महावीरेणं जाव संपत्तेणं दुहविवागाणं पढमस्स अज्झयणस्स अयमट्ठे प-न्नत्तेत्तिवेमि ॥ ६ ॥

पढमं अज्झयणं समत्तं ॥

जइ णं भंते ! समणेणं जाव संपत्तेणं दुहविवागाणं पढमस्स अज्झयणस्स अय-मट्ठे प-न्नत्ते दोच्चस्स णं भंते ! अज्झयणस्स दुहविवागाणं समणेणं जाव संपत्तेणं के अट्ठे प-न्नत्ते ? , तए णं से सुहम्मे अणगारे जं-वुं अणगारं एवं वयासी-एवं खलु जंबू ! त्तेणं कालेणं तेणं समएणं वाणियगामे नामं नयरे होत्था रि(द्धि)द्धत्थिमियसमिद्धे । तस्स णं वाणियगामस्स (नग०) उत्तरपुर-त्थिमे दिसीभाए दूईपलासे नामं उज्जाणे होत्था, तत्थ णं वाणियगामे मित्ते नामं राया होत्था वण्णओ, तस्स णं मित्तस्स र-न्नो

सिरी-नामं देवी होत्था वण्णओ, तत्थ णं वाणियगा(मण०)मे कामज्झया-नामं गणिया होत्था अहीण जाव सुरूवा बावत्त(री)रिकलापंडिया चउसट्टिगणियागुणोववेया ए(कू)-गूणतीसविसेसे रममाणी एकवीसरइगुणप्पहाणा बत्तीसपुरिसोवयारकुसला नवंग-सुत्तपडिवोहिया अट्टारसदेसीभासाविसारया सिंगारागा(रु)रचारुवेसा गीयरइ(य)-गंधव्व-नट्टकुसला संगयगय० सुंदरथण० ऊसिय(ध)ज्झया सहस्सलंभा विदिण्णछत्त-चामरवालवीयणीया कण्णीरहप्पयाया यावि होत्था, बहूणं गणियाणं आहेवच्चं जाव विहरइ ॥ ७ ॥ तत्थ णं वाणियगामे विजयमित्ते नामं सत्थवाहे परिवसइ अट्ठे०, तस्स णं विजयमित्तस्स सुभद्दा-नामं भारिया होत्था अहीण०, तस्स णं विजयमित्तस्स पुत्ते सुभद्दाए भारियाए अत्तए उज्झियए नामं दारए होत्था अहीण जाव सुरूवे । तेणं कालेणं तेणं समएणं समणे भगवं महावीरे (जाव) समोस(ट्टि)ढे परिसा निग्गया राया(वि) जहा कू-णिओ तहा निग्गओ धम्मो कहिओ परिसा पडिगया राया य गओ, तेणं कालेणं तेणं समएणं समणस्स भगवओ महावीरस्स जेट्ठे अंतेवासी ईंदभू(इ)ई नामं अणगारे जाव ले[स्]से छट्ठंछट्ठेणं जहा पन्नत्तीए पढम जाव जेणेव वाणियगामे [नयरे] तेणेव उवागच्छइ २ ता उच्चनीय****अडमाणे जेणेव रायमग्गे तेणेव (उ०) ओगाढे, तत्थ णं बहवे हत्थी पासइ संनद्धबद्धवम्मियगुडिय-उप्पीलियकच्छे उट्ठामियघंटे नाणामणिरयणविविहगे(वि)वेज्जउत्तरकंचुइजे पडि-कप्पिए झयपडागवरपंचामेलआरूढहत्थारोहे गहियाउहप्पहरणे अ-न्ने य तत्थ बहवे आसे पासइ संनद्धबद्धवम्मियगुडिए आविद्धगु(डि)ढे ओसारियपक्खरे उत्तरकंचुइय-ओचूलमुहचंडाधरचामरथासगपरिमंडियकडिए आरूढ(अरु)आसारोहे गहियाउह-प्पहरणे अन्ने य तत्थ बहवे पुरिसे पासइ संनद्धबद्धवम्मियकवए उप्पीलियसरा-सणप(ट्टी)ट्टिए पि(णि)णद्धगेवेजे विमलवरबद्धचिंधपट्टे गहियाउहप्पहरणे, तेसिं च णं पुरिसाणं मज्झगयं (एगं) पुरिसं पासइ अव(उ)ओड(ग)यबंधणं उक्कित्तकण्ण-नासं नेहतुप्पियगतं वज्झक(रक)क्खडियजुय-नियत्थं कंठेगुणरत्तमल्लदामं चुण्णगुंडिय-(गायं)गतं चुण्णयं व[व]ज्झपाण(पी)पियं तिलंतिलं चेव छिजमाणं का(क-णी)-गणिमंसाइं खावियंतं पावं खक्खरगसएहिं हम्ममाणं अणेग-नर-नारीसंपरिवुडं चच्चरे चच्चरे खंडपडहएणं उग्घोसिज्जमाणं, इमं च णं एयारूवं उग्घोसणं पडिसुणेइ-नो खलु देवा० ! उज्झियगस्स दारगस्स केइ राया वा रायपुत्तो वा अवरज्झइ अप्पणो से सयाइं कम्माइं अवरज्झन्ति ॥ ८ ॥ तए णं से भगवओ गोयमस्स तं पुरिसं पासित्ता इमे अज्झत्थिए ५-अहो णं इमे पुरिसे जाव न(णि)रयपडिरुवियं वे(द)यणं वे(दे)एइत्तिकट्टु वाणियगामे नयरे उच्च-नीयमज्झिमकु(ले)लाई जाव अडमाणे अहापज्जत्तं समु(या)-

दा(णं)णियं गिण्हइ २ ता वाणियगा(मं)मे नय(रं)रे मज्झमज्झेणं जाव पडिदंसेइ,
 [२] समणं भगवं महावीरं वंदइ नमंसइ वं० २ ता एवं वयासी-एवं खलु अहं
 भंते ! तु(ज्झे)ब्भे(हि)हिं अब्भणु-आए समाणे वाणियगामं जाव तहेव (नि)वे-एइ,
 से णं भंते ! पुरिसे पुव्वभवे के आ-सी जाव पच्चणु-भवमाणे विहरइ ? एवं
 खलु गोयमा ! तेणं कालेणं तेणं समएणं इहेव जंबुदीवे २ भारहे वासे हत्थिणा-
 उरे नामं नयरे होत्था रिद्ध०, तत्थ णं हत्थिणाउरे नयरे सुनंदे नामं राया होत्था
 महया०, तत्थ णं हत्थिणाउरे (ण(य)गरे) बहुमज्झदेसभाए एत्थ णं महं एगे
 गोमंड(वे)वए होत्था अणेगखंभसयस-न्निविट्ठे पासाईए ४, तत्थ णं वहवे
 न(य)गरगोह्वाणं सणाहा य अणाहा य न-गरगा(वि)वी(उ)ओ य नगरवसभा य
 न-गरव(लि)लीवहा य न-गरपड्डया-ओ य पउरतणपाणिया निव्वभया निरुवसग्गा
 सुहंसुहेणं परिवसंति, तत्थ णं हत्थिणाउरे नयरे भीमे नामं कूडग्गा(ही)हे होत्था
 अहम्मिए जाव दुप्पडियाणंदे । तस्स णं भीमस्स कूडग्गाहस्स उप्पला-नामं
 भारिया होत्था अहीण०, तए णं सा उप्पला कूडग्गाहिणी अ-न्नया क्या(ई)इ
 आव-न्नसत्ता जाया यावि होत्था, तए णं तीसे उप्पलाए कूड[ग]गाहिणीए
 तिण(ह)हं मासाणं बहुपडिपुण्णाणं अयमेयारूवे दोहले पाउव्वभूए-धन्ना-ओ णं
 ताओ अम्मयाओ ४ जाव सुलद्धे जम्मजीवि(ए)यफळे जाओ णं वहूणं न-गरगो-
 (ह्)ह्वाणं सणाहाण य जाव वसभाण य ऊहेहि य थणेहि य वसणेहि य छे-
 (छ-छि)प्पाहि य ककुहेहि य वहेहि य कण्णेहि य अ(च्छि)च्छीहि य नासाहि
 य जिब्भाहि य ओ(उ)ट्टेहि य कंवळेहि य सोल्लेहि य तलिएहि य भज्जिएहि
 य परिसुक्केहि य लावणेहि य सुरं च महुं च मेरुगं च जाइं च सी(धुं)हुं च पस-न्नं
 च आसाएमाणीओ विसाएमाणीओ परिभाएमाणीओ परिभुं(ज)जेमाणीओ दोहलं
 वि(णयं)णेति, तं जइ णं अहमवि वहूणं न-गर जाव विणिज्जामित्तिकट्ठु तंसि दोह-
 लंसि अविणिज्जमाणंसि सुक्का भुक्खा निम्मंसा ओलुग्गा ओ-लुग्गसरीरा नित्तेया
 दीणाविमणवयणा पंडुल्लइयमु(ही)हा ओमंथियनयणवयणकमला जहोइयं पुप्फवत्थगं-
 वमल्लालंकाराहारं अपरिभुज्जमाणी करयलमलिय-व्व कमलमाला ओहय जाव झिया-
 (य)इ । इमं च णं भीमे कूडग्गाहे जेणेव उप्पला कूडग्गा(ह)हिणी तेणेव उवा-
 गच्छइ २ ता ओहय जाव पासइ २ [ता] एवं वयासी-कि णं तु(मे)मं देवाणु-
 प्पि-ए ! ओहय जाव झियासि ?, तए णं सा उप्पला भारिया भी(म)मं कूडग्गाहं
 एवं वयासी-एवं खलु देवाणुप्पिया ! ममं, तिण्हं मासाणं बहुपडिपुण्णाणं दोह(ले)ला
 पाउव्वभू(ए)या-ध-न्ना णं ता० जा-ओ णं वहूणं गो० ऊ(ह०)हेहि य जाव

लाव(ण)णेहि य सुरं च ६ आसाएमाणी[ओ]० दोहलं वि(णि)णेंति, तए णं
अहं देवाणुप्पिया ! तंसि दोहलंसि अविणिज्जमाणंसि जाव झियामि । तए णं से
भी(म)मे कूडग्गा-हे उप्पलं भारियं एवं वयासी-मा णं तुमं देवाणुप्पिया ! ओहय०
झियाहि, अहं णं (तं) तहा करिस्सामि जहा णं तव दोहलस्स संपत्ती भविस्सइ,
ताहिं इट्ठाहिं ५ जाव वग्गूहिं समासासेइ, तए णं से भी-मे कूडग्गा-हे अद्धरत्तका-
लसमयंसि एगे अवीए संनद्ध जाव पहरणे सया(सा)ओ गिहाओ निग्गच्छइ २ [ता]
हत्थिणाउ(रं)रे नयरे मज्झंमज्झेणं जेणेव गोमंडवे तेणेव उवाग(-२ ता)ए
वहूणं न-गरगो-रूवाणं जाव वसभाण य अप्पेगइयाणं ऊहे छिंदइ जाव अप्पे-
गइयाणं कंवले छिंदइ अप्पेगइयाणं अ-न्नम-न्नाणं अंगोवंग्गाणं वियंगेइ २ ता जेणेव
सए गिहे तेणेव उवागच्छइ २ ता उप्पलाए कूडग्गा-हिणीए उवणेइ, तए णं सा
उप्पला भारिया तेहिं वहूहिं गोमंसेहि य सोल्ले(सूले)हि य सुरं च [५] आसा-
एमा० तं दोहलं विणेइ, तए णं सा उप्पला कूडग्गा(ही-)हिणी संपुण्णदोहला
संमाणियदोहला विणीयदोहला वोच्छिन्नदोहला संप-न्नदोहला तं गव्वं सुहंसुहेणं
परिवहइ, तए णं सा उप्पला कूडग्गाहिणी अन्नया कया(इं-)इ नवण्हं मासाणं बहु-
पडिपुण्णाणं दार-गं पयाया ॥ ९ ॥ तए णं तेणं दारएणं जाय-मेत्तेणं चेव महया
महया सदेणं विघुट्ठे विसरे आरसिए, तए णं तस्स दारगस्स आरसियसइं सोच्चा
निसम्म हत्थिणाउरे नयरे वहवे न-गरगो-रूवा जाव वसभा य भीया""उव्विग्गा
सव्वओ समंता विप्पलाइत्था, तए णं तस्स दारगस्स अम्मापियरो अयमेयारूवं
नामधेज्जं करेंति, जम्हा णं अम्(हे)हं इमेणं दारएणं जायमेत्तेणं चेव महया महया
विच्चीसदेणं विघुट्ठे विस्सरे आरसिए तए णं एयस्स दारगस्स आरसि(यं)यसइं सोच्चा
निसम्म हत्थिणाउरे वहवे न-गरगो-रूवा जाव भीया ४ सव्वओ समंता विप्पला-
इत्था तम्हा णं होउ अम्हं दारए गोत्तासए नामेणं, तए णं से गोत्ता(से)सए दारए
उम्मुक्कवालभा० जाए यावि होत्था, तए णं से भी-मे कूडग्गाहे अन्नया कया-
(इं-इं)इ कालधम्मणा संजुत्ते, तए णं से गोत्तासे दारए व(ट्ठ)हुएणं मित्त-नाइ-
नियगसयणसंवंधिपरि(ज)यणेण सद्धिं संपरिवुडे रोयमाणे कंदमाणे विलवमाणे
भीमस्स कूडग्गा(हि)हस्स नीहरणं करेइ २ [ता] वहूइं लोइयमय(कज्जा)किच्चाइं
करेइ, तए णं से सु-नंदे राया गोत्तासं दारयं अन्नया कयाइ सयमेव कूडग्गा-हत्ताए
ठा(ठ)वेइ, तए णं से गोत्तासे दारए कूडग्गाहे जाए यावि होत्था अहम्मिए जाव
दुप्पडियाणंदे, तए णं से गोत्तासे दारए कूडग्गा(हि)हिताए कल्लकल्लिं अद्धर(त)त्ति-
यकालसमयंसि एगे अवीए संनद्धवद्धकवए जाव गहि(आ)याउह[८]पहरणे सया-ओ

गिहाओ नि(जा)गच्छइ [२] जेणेव गोमंडवे तेणेव उवागच्छइ २ [ता] बहूणं
न-गरगो-रुवाणं सणाहाण य जाव वियंगेइ २ ता जेणेव सए गे(गि)हे तेणेव उवा-
ग(च्छइ)ए, तए णं से गोत्तासे कूडग्गाहे तेहिं बहूहिं गोमंसे(हिं)हि य सोल्ले-हि य....
सुरं च ६ आसाएमाणे विसाएमाणे जाव विहरइ, तए णं से गोत्तासे कूडग्गाहे एय-
कम्मे....सुवहुं पावकम्मं समज्जिणित्ता पंचवाससयाइं परमाउयं पालइत्ता अट्टुह-
ट्टोवगए कालमासे कालं किच्चा दोच्चाए पुढवीए उक्कोसं तिसागरोवमठिइएसु नेरइएसु
नेरइयत्ताए उवव-न्ने ॥ १० ॥ तए णं सा विजयमित्तस्स सत्थवाहस्स सुभद्दा नामं
भारिया जाय-निंदुया यावि होत्था जाया जाया दारगा विणिहायमावज्जंति, तए णं
से गोत्तासे कूडग्गाहे दोच्चा(ओ)ए पुढवी(ओ)ए अणंतरं उव्वट्ठित्ता इहेव वाणिय-
गामे नयरे विजयमित्तस्स सत्थवाहस्स सुभद्दाए भारियाए कुच्छिसि पुत्तत्ताए उव-
व-न्ने, तए णं सा सुभद्दा सत्थवाही अ-न्नया कया(इं)इ नवण्हं मासाणं बहुपडि-
पुण्णाणं दार-गं पयाया, तए णं सा सुभद्दा सत्थवाही तं दारगं जायमेत्तयं चैव एगंते
उ(कु)कुट्टडियाए उज्झावेइ उज्झावेत्ता दोच्चं-पि गिण्हावेइ २ ता अ(आ)णुपुव्वेणं
सारव(ख)खेमाणी संगोवेमाणी संवट्ठेइ, त-ए णं तस्स दारगस्स अम्मापियरो
ठिइवडियं [च] चंदसूरदंस(णियं)णं च जागरियं [च] महया इड्ढीसक्कारसमुदएणं
करंति, त-ए णं तस्स दारगस्स अम्मापियरो ए(इ)क्कारसमे दिवसे निव्वत्ते संपत्ते
वार(साहे)समे दिवसे इममेयारूवं गोणं गुणनिप्फन्नं नामधेज्जं करंति, जम्हा णं अम्हं
इमे दारए जाय-मेत्तए चैव एगंते उकुट्टडियाए उज्झिणए तम्हा णं होउ अम्हं
दारए उज्झियए नामेणं, तए णं से उज्झियए दारए पंचधाईपरिग्ग(ही)हिए
तं० खीरधाईए (१) मज्जणधाईए (२) मंडणधाईए (३) कीलावणधाईए
(४) अंकधाईए (५) जहा दढपइ न्ने जाव निव्वाधाए गिरिकंदरमल्लीणे [वि]व
चंप-गपायवे सुहंसुहेणं विहरइ, तए णं से विजयमित्ते सत्थवाहे अ-न्नया कया-इ
गणिसं च १ धरिसं च २ मेज्जं च ३ पारिच्छेज्जं च ४ चउव्विहं भंडगं गहाय
लवणसमुदं पोयवहणे(णं)ण उवागए, तए णं से विजयमित्ते तत्थ लवणसमुदे पोय-
विवत्तीए नि[व]वुड्ढभंडसारं अत्ताणे असरणे कालधम्मणा संजुते, तए णं तं
विजयमित्तं सत्थवाहं जे जहा बहवे ईसरतलवरमाडंबियकोडुंवियइब्भसेट्टिसत्थवाहा
लवणसमुदे पोयविवत्तीए छूढं निव्वुड्ढभंडसारं कालधम्मणा संजुतं सुणंति ते तहा
हत्थ-निक्खेवं च बहिरभंडसारं च गहाय एगं(तं)ते अवक्कमंति । तए णं सा सुभद्दा
सत्थवाही विजयमित्तं सत्थवाहं लवणसमुदे पोयविवत्तीए निव्वुड्ढ० कालधम्मणा
संजुतं सुणेइ २ ता महया पइसोएणं अप्फुन्ना समाणी परसु-नियत्ता-विव चंपगलया

धस-त्ति धरणीयलंसि सव्वंगे(हिं)ण संनि(प)वडिया, तए णं सा सुभद्दा सत्थ-
वाही सुहुत्तंतरे-ण आसत्था समाणी वहुहिं मित्त जाव परिवुडा रोयमाणी कंदमाणी
विलवमाणी विजयमित्तसत्थवाहस्स लोइयाइं मयकिच्चाइं करेइ, तए णं सा सुभद्दा
सत्थवाही अ-न्नया कया-इ लवणसमुद्दोत्तरण च लच्छिविणासं च पोयविणासं च
पइमरणं च अणुचिं(त)तेमाणी २ कालधम्मणा संजुत्ता ॥ ११ ॥ तए णं ते न-गर-
गुत्तिया सुभदं सत्थवा(हं)हिं कालगयं जाणिता उज्झियगं दारगं सया-ओ गिहाओ
निच्छुभंति निच्छुभित्ता तं गिहं अ-न्नस्स दलयंति, तए णं से उज्झियए दारए
सयाओ गिहाओ निच्छूढे समाणे वाणियगामे नयरे सिंघाडग जाव पहेसु जूय-
(ख)खेलएसु वेसियाघ-रेसु पाणागारेसु य सुहंसुहेणं परिवड्ढइ, तए णं से उज्झियए
दारए अणोह[ट्टि]इए अणिवारिए सच्छंदमई सइर[प]पयारे मज्जप्पसंगी चोरजूयवेस-
दारप्पसंगी जाए यावि होत्था, तए णं से उज्झियए अ-न्नया कया-इ कामज्झयाए
गणियाए सद्धिं संपलगे जाए यावि होत्था, कामज्झयाए गणियाए सद्धिं विउलाइं
उरालाईं माणुस्सगाईं भोगभोगाईं भुंजमाणे विहरइ, तए णं तस्स विजयमित्तस्स
र-न्नो अ-न्नया कया-इ सिरीए देवीए जो(णी)णिसूले पाउब्भूए यावि होत्था, नो
संचाएइ विजयमित्ते राया सि(रि)रीए देवीए सद्धिं उरालाईं माणुस्सगाईं भोगभोगाईं
भुंजमाणे विहरित्तए, तए णं से विजयमित्ते राया अ-न्नया कया-इ उज्झियदारयं
कामज्झयाए गणियाए गिहाओ निच्छुभावेइ २ ता कामज्झयं गणियं अब्भितरियं
ठावेइ २ ता कामज्झयाए गणियाए सद्धिं उरालाईं भोगभोगाईं भुंजमाणे विहरइ ।
तए णं से उज्झियए दारए कामज्झयाए गणियाए गिहाओ निच्छुभेमाणे कामज्झ-
याए गणियाए मुच्छिए गिद्धे गढिए अज्झोवव-न्ने अ-न्नत्थ कत्थइ सुइं च रइं च
धिइं च अविंदमाणे तच्चित्ते तम्मणे तल्लेसे तदज्झवसाणे तदट्ठोवउत्ते तयप्पियकरणे
तब्भावणाभाविए कामज्झयाए गणियाए बहूणि अंतराणि य छि(द्वा)इयाणि य
विवराणि य पडिजागरमाणे २ विहरइ, तए णं से उज्झियए दारए अ-न्नया कया-इ
कामज्झयं गणियं अंतरं ल(भे)ब्भेइ, [२] कामज्झयाए गणियाए गिहं रहसियं
अणुप्पविसइ २ ता कामज्झयाए गणियाए सद्धिं उरालाईं माणुस्सगाईं भोगभोगाईं
भुंजमाणे विहरइ । इमं च णं मित्ते राया ण्हाए सव्वालंकारविभूसिए मणुस्स-
वागुरा(ए)परि[खि]क्खित्ते जेणेव कामज्झयाए गिहे तेणेव उवागच्छइ २ ता तत्थ
णं उज्झियए दारए कामज्झयाए गणियाए सद्धिं उरालाईं भोगभोगाईं जाव विहर-
माणं पासइ २ ता आसुरत्ते [४] तिवलियभिउडिं नि(लाडे)डाळे साहट्टु उज्झिय-गं
दार-गं पुरिसेहिं गिण्हावेइ २ ता अट्ठिमुट्ठिजाणुकोप्परपहारसंभग्गमहियगतं करेइ

२ ता अव-ओड-यवंधणं करेइ २ ता एएणं विहाणेणं वज्झं आणावेइ, एवं खलु
 गोयमा ! उज्झियए दारए पुरापोराणाणं कम्माणं जाव पच्चणु-भवमाणे विहरइ
 ॥ १२ ॥ उज्झियए णं भंते ! दारए इओ कालमासे कालं किच्चा कहिं गच्छिहि०
 कहि उववज्झिहिइ ? गोयमा ! उज्झियए दारए पणवीसं वासाइं परमाउयं
 पालइत्ता अजेव तिभागावसेसे दिवसे सूलीभिन्ने कए समाणे कालमासे कालं किच्चा
 इमीसे रयणप्पभाए पुढवीए नेरइयत्ताए उववज्झिहिइ, से णं तओ अणंतरं उव्व-
 ङ्किता इहेव जंबुदीवे दीवे भारहे वासे वेयङ्गुगिरिपायमूले वाणरकुलंसि वाणरत्ताए
 उववज्झिहिइ, से णं तत्थ उम्मुक्कवालभावे तिरियभो(ए)गेसु मुच्छिए गिद्धे गडिए
 अज्झोववन्ने जाए जाए वा-णरपेळए वहेइ तं एयकम्मे [एयप्पहाणे एयविजे एय-
 समुदायारे] कालमासे कालं किच्चा इहेव जंबुदीवे दीवे भार(ह)हे वासे इंदपुरे नयरे
 गणियाकुलंसि पुत्तत्ताए पच्चायाहिइ, तए णं तं दार(गं)यं अम्मापियरो जाय(मि)मेत्तकं
 वद्धेहिंति नपुंसगकम्मं सिक्खावेहिंति, तए णं तस्स दार-यस्स अम्मापियरो
 निव्वत्तवारसाहस्स इमं एयाह्वं नामधेज्जं क(रेहि)रेंति तं०-हो(ऊ)उ णं [अम्हं इमे
 दारए] पियसेणे नामं नपुंसए, तए णं से पियसेणे नपुंसए उम्मुक्कवालभावे जोव्वण-
 गमणुप्पत्ते विण(णा)णयपरिणय-मेत्ते ह्वेण य जोव्वणेण य लावण्णेण य उक्किट्ठे
 उक्किट्ठसरीरे भविस्सइ, तए णं से पियसेणे नपुंसए इंदपुरे नयरे वहवे राईसर
 जाव पभि(इ-य)ईओ बहूहि य विज्जाप[यो]ओगेहि य मंतचुण्णेहि य हियउड्ढावणाहि
 य निण्हवणेहि य पण्हवणेहि य वसीकरणेहि य आभि-ओगिएहि य अभि-ओगित्ता
 उरालाई माणुस्सगाई भोगभोगाई भुंजमाणे विहरिस्सइ, तए णं से पियसेणे नपुं-
 सए एयकम्मे० सुवहुं पावकम्मं समज्झिणित्ता ए-क्कवीसं वाससयं परमाउयं पालइत्ता
 कालमासे कालं किच्चा इमीसे रयणप्पभाए पुढवीए नेरइयत्ताए उववज्झिहिइ, त(ओ)-
 त्तो सरीस(सिरिसि)वेसु सुंसुमारं तहेव जहा पढमो जाव पुढवि० से णं तओ अणं-
 तरं उव्वङ्किता इहेव जंबुदीवे दीवे भारहे वासे चंपाए नयरीए महिसत्ताए पच्चाया-
 हिइ, से णं तत्थ अ-न्नया कया-इ गोट्टिल्लएहिं जीवि(आ)याओ ववरोविए समाणे
 तत्थेव चंपाए नयरीए सेट्ठिकुलंसि पुत्तत्ताए पच्चायाहिइ, से णं तत्थ उम्मुक्कवाल-
 भावे तहाह्वणं थेराणं अंतिए केवलं वोहिं....अणगारे सोहम्मे कप्पे जहा पढमे
 जाव अंतं करेहिइ ॥ निक्खेवो ॥ १३ ॥ विइयं अज्झयणं समत्तं ॥

तच्चस्स उक्खेवो एवं खलु जंबू ! तेणं कालेणं तेणं समएणं पुरिमताले नामं
 नयरे होत्था रिद्ध०, तस्स णं पुरिमतालस्स नयरस्स उत्तरपुर-त्थिमे दिसीभाए
 एत्थ णं अमोहदंसणे उज्जाणे होत्था, तत्थ णं पुरिमताले (ण०) म(हव)हावले नामं

राया होत्था, तत्थ णं पुरिमतालस्स नयरस्स उत्तरपुर-त्थिमे दिसीभाए देसप्पंते
 अडवी संठिया, एत्थ णं साला-नामं अडवी-चोरपल्ली होत्था विसमगिरिकंदरकोलं-
 वसं-निविट्ठा वंसीकलंकपागारपरिक्खित्ता छिन्नसेलविसमप्पवायफरिहोवगूढा अग्नि-
 तरपाणीया सुदुल्लभजलपेरंता अणेगखंडी-विदियजणदि-न्ननिग्गम[८]पवेसा सुवहुय-
 स्स-वि कुवियस्स जणस्स दुप्पहंसा यावि होत्था, तत्थ णं सालाडवीए चोरपल्लीए
 विजए नामं चोरसेणावई परिवसइ अहम्मिए जाव (हणछिन्नभिन्नवियत्तए) लोहिय-
 पाणी बहु-नयर-निग्गयजसे सूरे दढप्पहारे साहसिए सइवेही परिवसइ (अहम्मिए०)
 असिलट्टिपढममल्ले, से णं तत्थ सालाडवीए चोरपल्लीए पंचण्हं चोरसयाणं आहवच्चं
 जाव विहरइ ॥ १४ ॥ तए णं से विजए चोरसेणावई बहूणं चोराण य पारदारि-
 याण य गंठिभेयाण य संधिच्छेयाण य खंडपट्टाण य अ-न्नोसिं च बहूणं छि-न्नभि-न्न-
 वाहिराहियाणं कुड्ढे यावि होत्था, तए णं से विजए चोरसेणावई पुरिमतालस्स
 नयरस्स उत्तरपुर-त्थिमिळ्ळं जणवयं बहूहिं गामघाएहि य न-गरघाएहि य गोग्गह-
 णेहि य वंदिग्गहणेहि य पंथकोट्टहि य खत्तखणणेहि य ओ-वीलेमाणे (२) विद्धंसे-
 माणे तज्जेमाणे तालेमाणे नित्थाणे निद्धणे निक्कणे कप्पायं करेमाणे विहरइ, महव्व-
 लस्स र-न्नो अभिक्खणं २ कप्पायं गे-ण्हइ, तस्स णं विजयस्स चोरसेणावइस्स
 खंदसि(रि-री) नामं भारिया होत्था अहीण०, तस्स णं विजयचोरसेणावइस्स पुते
 खंदसिरीए भारियाए अत्तए अभग्गसेणे नामं दारए होत्था अहीणपुण्णपं(चं)-
 विदियसरीरे वि(ण्णा)न्नयपरिणयमेत्ते जोव्वणगमणु-पत्ते । तेणं कालेणं तेणं
 समएणं समणे भगवं महावीरे पुरिमताले नयरे (जे० अ० उ० ते०) समोसढे
 परिसा निग्गया राया निग्गओ धम्मो कहिओ परिसा राया य पडिगओ, तेणं
 कालेणं तेणं समएणं समणस्स भगवओ महावीरस्स जेठ्ठे अंतेवासी गोयमे जाव
 रायमग्गं समोगाढे, तत्थ णं बहवे हत्थी पासइ बहवे आसे पुरिसे संनद्धवद्धकवए
 ते(सि)सिं णं पुरिसाणं मज्झगय एणं पुरिसं पासइ अव-ओडय जाव उग्घो(से)सि-
 ज्जमाणं, तए णं तं पुरिसं रायपुरिसा पढमं(मि)सि चच्चरंसि नि(सि)सीया(वि)
 वेति २ ता अट्ठ चुल्ल[प्पिय]पिउए अग्गओ घाएंति २ [ता] कसप्पहारेहि तालेमाणा २
 कल्लुणं का-गणिमंसाइं खावेति खावेत्ता रुहिरपा(णी)णियं च पा(यं)एंति तयाणंतरे
 च णं दोच्चंसि चच्चरंसि अट्ठ चुल्ल(लहु)माउयाओ अग्गओ घा-एंति एवं तच्चे चच्चरे
 अट्ठ महापिउए चउत्थे अट्ठ महामाउयाओ पंचमे पुते छट्ठे सुण्हा सत्तमे जामा-
 उया अट्ठमे धूयाओ नवमे नत्तुया दसमे नत्तुईओ एक्कारसमे नत्तुयावई वारसमे
 नत्तुइणीओ तेरसमे पिउस्सियपइया चो(चउ)इसमे पिउसियाओ प-न्नरसमे माउ-

सियापइया सोलसमे माउ(स्सि)सियाओ सत्तरसमे मा(सि)मियाओ अट्टारसमे अव-
 सेसं मित्त-नाइ-नियगसयणसंवंधिपरि-यणं अग्गओ घा-एंति २ ता कसप्पहारेहिं
 तालेमाणा २ कल्लुणं का-गणिमंसाइं खावेंति [२] रुहिरपा-णियं च पाएंति ॥ १५ ॥
 तए णं से भगवं गोयमे तं पुरिसं पा(स)सेइ २ ता इमे ए(अयमे)यारूवे अज्झ-
 थिए (पत्थिए) समुप्प-न्ने जाव तहेव निग्गए एवं वया-सी-एवं खलु अहं णं भंते !
 तं चेव जाव से-णं भंते ! पुरिसे पुव्वभवे के आसी जाव विहरइ ? एवं खलु
 गोयमा ! तेणं कालेणं तेणं समएणं इहेव जंबुदीवे दीवे भारहे वासे पुरिमताले-ना-
 (म)भं नयरे होत्था रिद्ध०, तत्थ णं पुरिमताले नयरे उदिओदिए-नामं राया होत्था
 महया०, तत्थ णं पुरिमताले निन्नए-नामं अंडयवाणियए होत्था अट्ठे जाव अपारि-
 भूए अहम्मिए जाव दुप्पडियाणंदे, तस्स णं नि-न्नयस्स (अंडयवाणिय-ग-स्स) वहवे
 पुरिसा दि-न्नभइभत्तवेयणा कल्लकल्लिं कु(को)दालियाओ य पत्थि(या)यपिडए [य]
 गि-ण्हंति, [२] पुरिमतालस्स नयरस्स परिपेरंतेसु वहवे काइअंडए य घू(घू)इअं-
 डए य पारेवइ० टिट्ठिभिअंडए य ख[ग्गि]गि अं० मयूरि० कुक्कुडिअंडए य अ-न्नेसिं
 च बहूणं जलयरथलयरखहयरमाईणं अंडाईं गेण्हंति २ ता पत्थियपिडगाईं भरेंति
 [२] जेणेव नि-न्नयए अंडवाणियए ते[णामे]णेव उवागच्छन्ति २ ता नि-न्नय(ग)स्स
 अंडवाणियस्स उवणेंति, तए णं (से) तस्स नि-न्नयस्स अंडवाणियस्स वहवे पुरिसा
 दि-न्नभइ० वहवे काइअंडए य जाव कुक्कुडिअंडए य अ-न्नेसिं च बहूणं जलयरथल-
 यर(खेच)खहयरमाईणं अंडयए तवएसु य कवल्लीसु य कं(डु)दुएसु य भज्जणएसु य
 इंगालेसु य त(लिं)लेंति भ(ज्जं)जेंति सो(ल्लिं)ल्लेति तलेंता भ(ज्जिं)जंता सो-ल्लेंता
 रायमग्गे अंतरावणंसि अंडय(एहि य)पणि(ग)एणं वित्तिं कप्पेमाणा विहरंति,
 अप्प(णो)णा-वि य णं से नि-न्नयए अंडवाणियए तेहिं वहूहिं काइ(य)अंडएहि य
 जाव कुक्कुडिअंडएहि य सोल्लेहि य तलिएहि य भ(ज्जे)जिएहि य सुरं च****आसाएमाणे
 विसाएमाणे विहरइ, तए णं से नि-न्नए अंडवाणियए एयकम्म ४ सुवहुं पावकम्मं
 समज्जिणित्ता एणं वाससहस्सं परमाउयं पालइत्ता कालमासे कालं किच्चा तच्चाए पुढ-
 वीए उक्कोससत्तसागरोवमठि-इएसु नेरइएसु नेरइयत्ताए उवव-न्ने ॥ १६ ॥ से णं तओ
 अणंतरं उव्वट्ठित्ता इहेव सालाडवीए चोरपल्लीए विजयस्स चोरसेणावइस्स खंदसिरीए
 भारियाए कुर्च्छिसि पुत्तत्ताए उवव-न्ने, तए णं तीसे खंदसिरीए भारियाए अ-न्नया
 कया-इ तिण्हं मासाणं बहुपडिपुण्णाणं इमे एयारूवे दोहले पाउव्भूए-ध-न्ना-ओ णं
 ताओ अम्मया० जाओ णं वहूहिं मित्त-नाइ-नियगसयणसंवंधिपरियणमहिलाहिं
 अ-न्नाहि य चोरमहिलाहिं सद्धिं संपरिवुडा ण्हाया सव्वालंकारविभूसिया वि-उल्लं

असणं पाणं खाइमं साइमं सुरं च म० च आसाएमाणी विसाएमाणी० विहरंति
जिमियभुत्तुत्तरागयाओ पुरिस-नेवत्थिया संनद्धवद्ध जाव [गहियाउहए] पहरणा (वरणा)
भारिए (हि य) हिं फ (लि) लएहि निक्किट्टाहिं असीहिं अंसागएहिं तोणेहिं सजीवेहिं
धणूहिं समुक्खित्तेहिं सरोहिं समुल्लालिया-हिं दा (हा) माहिं लंबिया-हि य ओसारि-
याहिं ऊरुघंटाहिं छिप्पतूरेणं वज्जमाणेणं २ महया उक्किट्ट जाव समुदरवभूर्य-पिव
करेमाणीओ सालाडवीए चोरपल्लीए सब्बओ समंता ओलोएमाणीओ २ आहिं ड-
माणीओ (२) दोहलं विणेति, तं जइ (णं) अहं-पि जाव [दोहलं] विणिज्जामि-
त्तिकट्टु तंसि दोहलंसि अविणिज्जमाणंसि जाव झियाइ । तए णं से विजए चोर-
सेणावई खंदसि-रिभारियं ओहय जाव पासइ, २ [त्ता] एवं वयासी-किं णं
तुमं देवाणुप्पि-या ! ओहय जाव झियासि?, तए णं सा खंदसिरी (भा०) विजयं
एवं वयासी-एवं खलु देवाणुप्पिया ! म-म तिण्हं मासाणं जाव झियामि, तए णं से
विजए चोरसेणावई खंदसिरीए भारियाए अंति(यं)ए एयमट्ठं सोच्चा निसम्म खंद-
सिरिभारियं एवं वयासी-अहासुहं देवाणुप्पियत्ति एयमट्ठं पडिमुणेइ, तए णं सा
खंदसि(री)रिभारिया विजएणं चोरसेणावइणा अब्भणु न्नाया समाणी हट्ठतुट्ठ० वट्ठहिं
मित्त जाव अन्नाहि य वट्ठहिं चोरमहिलाहिं सद्धि संपरिवुडा ण्हाया सव्वालंकार-
विभूसिया वि-उल असणं ४ सुरं च ६ आसाएमा(णा)णी ४ विहरइ जिमिय-
भुत्तुत्तरागया पुरिस-नेव[च्छा]त्था संनद्धवद्ध जाव आहिं डमाणी दोहलं विणेइ, तए णं
सा खंदसि-रिभारिया संपुण्णदोहला संमाणियदोहला विणीयदोहला वोच्छि-न्नदोहला
संप-न्नदोहला तं गव्वं सुहंसुहेणं परिवहइ, तए णं सा (खंदसिरी) चोरसेणावइणी
नवण्हं मासाणं बहुपडिपुण्णाणं दार-गं पयाया, तए णं से विज(य)ए चोरसेणावई
तस्स दारगस्स महया इ(द्धि)द्धीसक्कारसमुदएणं दसरत्तं ठिइवडियं करेइ, तए णं
से विजए चोरसेणावई तस्स दारगस्स एक्कारसमे दिवसे वि-उलं असणं ४
उवक्खडावेइ [२] मित्त-नाइ० आमंतेइ २ ता जाव तस्सेव मित्त-नाइ० पुरओ एवं
वयासी-जम्हा णं अम्हं इमंसि दारगंसि गव्वगयंसि समाणंसि इमे एयारूवे दोहले
पाउब्भूए तम्हा णं होउ अम्हं दार(गे)ए अभग्गसेणे नामेणं, तए णं से अभग्गसेणे
कुमारे पंचधाई(ए) जाव परिवट्ठइ ॥ १७ ॥ तए णं से अभग्गसेणे कुमारे
उम्मुक्कवालभावे यावि होत्था अट्ठ दारियाओ जाव अट्ठओ दाओ.....उप्पि
पासा०.....भुंजमाणे विहरइ, तए णं से विजए चोरसेणावई अ-न्नया कया(ई)इ
कालधम्मणा संजुत्ते, तए णं से अभग्गसे(ण)णे कुमारे पंचहि चोरसएहि सद्धि संपरि-
वुडे रोयमाणे कंदमाणे विलवमाणे विजयस्स चोरसेणावइस्स महया इ-द्धीसक्कार-

समुदणं नीहरणं करेइ २ ता वहुई लोइयाई मयकिचाई करेइ २ ता के(व)णइ-
 कालेणं अप्पसोए जाए यावि होत्था, तए णं ते पंच चोरसयाई अन्नया कया(ई)इ
 अभग्गसेणं कुमारं सालाडवीए चोरपल्लीए महया २ चोरसेणावइत्ताए अभिसिंचंति ।
 तए णं से अभग्गसे-णे कुमारं चोरसेणावई जाए अहम्मिए जाव कप्पायं गि-ण्हइ,
 तए णं (से) ते जाणवया पुरिसा अभग्गसेणेणं चोरसेणावइणा बहुगामघायावणाहिं
 ताविया समाणा अन्नमन्नं सदावेति २ ता एवं वयासी-एवं खलु देवाणुप्पिया !
 अभग्गसेणे चोरसेणावई पुरिमतालस्स नयरस्स उत्तरिळं जणवयं वहुहिं गामघाएहिं
 जाव निद्धणं करेमाणे विहरइ, तं सेयं खलु देवाणुप्पिया ! पुरिमताले नयरे
 म-हावलस्स र-न्नो एयमट्ठं वि-न्नवित्तए, तए णं ते जा(ज)णवया पुरिसा एयमट्ठं
 अन्नमन्नेणं पडिस्सुणेंति २ ता महत्थं महग्घं महरिहं रा(य)यारिहं पाहुडं
 गि-ण(हे)हंति २ ता जेणेव पुरिमताले नयरे तेणेव उवाग० २ ता जेणेव म-हावले
 राया तेणेव उवाग० २ ता म-हावलस्स र-न्नो तं महत्थं जाव पाहुडं उवणेंति [२]
 करयल""अंजलिं कट्ठु म-हावलं रायं एवं वयासी-एवं खलु सामी ! सालाडवीए
 चोरपल्लीए अभग्गसेणे चोरसेणावई अम्हे वहुहिं गामघाएहि य जाव निद्धणे करेमाणे
 विहरइ, तं इच्छामि णं सामी ! तु(ब्भं)ज्झं वाहुच्छायापरिग्गहिया निब्भया निरु-
 वसग्गा सुहेणं परिवसित्तएत्तिकट्ठु पा-य वपडिया पंजलिउडा म-हावलं रायं एयमट्ठं
 वि-न्नवेंति, तए णं से म-हावले राया तेसिं जा-णवयाणं पुरिसाणं अंतिए एयमट्ठं
 सोच्चा निसम्म आसुरुते जाव मिसिमिसेमाणे तिवलियं भिउडिं निडाले माहट्ठु
 दंडं सदावेइ २ ता एवं वयासी-गच्छह णं तु० देवाणुप्पिया ! सालाडविं चोरपल्लिं
 विलुंपाहि २ ता अभग्गसेणं चोरसेणावई जीवग्गाहं गि-ण्हाहि २ ता म-मं उव-
 णेहि, तए णं से दंडे तहत्ति एयमट्ठं पडिस्सुणेइ, तए णं से दंडे वहुहिं पुरिसेहिं
 संनद्धवद्ध जाव पहरणेहि सद्धिं संपरिवुडे मग्गइएहिं फलएहिं जाव छिप्पतूरेणं
 वज्जमाणेणं महया जाव उक्कि(ट्ठि)ट्ठ जाव करेमाणे पुरिमतालं नयरं मज्झंमज्झेणं
 निग्गच्छइ २ ता जेणेव सालाडवी(ए) चोरपल्ली(ए) तेणेव पहारेत्थ गमणाए, तएणं
 तस्स अभग्गसेणस्स चोरसेणावइ(य)स्स चारपुरिसा इमीसे कहाए लद्धट्ठा समाणा
 जेणेव सालाडवी चोरपल्ली जेणेव अभग्गसेणे चोरसेणावई तेणेव उवाग(या)च्छंति
 २ ता करयल जाव एवं वयासी-एवं खलु देवाणुप्पिया ! पुरिमताले नयरे
 म-हावलेणं र-न्ना म(हया)हाभडचडगरेणं दं(डं)डे आणत्ते-गच्छह णं तु(मे)ब्भे
 देवाणुप्पिया ! सालाडविं चोरपल्लिं विलुंपाहि अभग्गसेणं चोरसेणावई जीव(ग)गाहं
 गेण्हाहि २ ता म-मं उवणेहि, तए णं से दंडे महया भडचडगरेणं जेणेव

सालाडवी चोरपल्ली तेणेव पहारेत्थ गमणाए, तए णं से अभग्गसेणे चोरसेणावई
 तेसिं चारपुरिसाणं अंतिए एयमद्धं सोचा निसम्म पंच-चोरसयाईं सद्दवेइ सद्द-
 वेत्ता एवं वयासी-एवं खलु देवाणुप्पिया ! पुरिमताले नयरे म-हावले जाव तेणेव
 पहारेत्थ गमणाए (आगए, तए णं से अभग्गसेणे ताईं पंच-चोरसयाईं एवं
 वयासी-) तं सेयं खलु देवाणुप्पिया ! अम्हं तं दंडं सालाडविं चोरपल्लिं असंप(त्तं)ते
 अंतरा चेव पडिसेहित्तए, तए णं ताईं पंच-चोरसयाईं अभग्गसेणस्स चोरसेणा-
 वइस्स तहत्ति जाव पडिसुणेंति, तए णं से अभग्गसेणे चोरसेणावईं वि-उलं असणं
 पाणं खाइमं साइमं उवक्खडावेइ २ ता पंचहि चोरसएहिं सद्धिं ण्हाए भोयणमंड-
 वंसि तं वि-उलं असणं ४ सुरं च ६ आसाएमाणे ४ विहरइ, जिमियभुत्तुत्तराग-
 ए-वि (अ) य णं समाणे आयंते चोक्खे परमसुइभूए पंचहि चोरसएहि सद्धिं अल्लं
 चम्मं दु(रु)हइ २ [ता] सं-नद्धवद्ध जाव पहरणेहिं मग्गइएहिं जाव रवेणं पुव्वा
 (पच्चा)वरण्हकालसमयंसि सालाडवीओ चोरपल्लीओ निग्गच्छइ २ [ता] विसमदुग्ग-
 गहणं ठिए गहियभत्तपाणे तं दंडं पडिवालेमाणे चिट्ठइ, तए णं से दंडे जेणेव
 अभग्गसेणे चोरसेणावईं तेणेव उवागच्छइ २ [ता] अभग्गसेणेणं चोरसेणावइणा
 सद्धिं संपलग्गे यावि होत्था, तए णं से अभग्गसेणे चोरसेणावईं तं दंडं खिप्पामेव
 हयमहिय जाव पडिसेहि० तए णं से दंडे अभग्गसेणे-णं चोरसेणावइणा हय जाव
 पडिसेहिए समाणे अ(त्त)थामे अवले अवीरिए अपुरिसक्कारपरक्कमे अधारणिज्जमिति-
 कट्ठु जेणेव पुरिमताले नयरे जेणेव म-हावले राया तेणेव उवागच्छइ २ ता
 करयल० एवं वयासी-एवं खलु सामी ! अभग्गसेणे चोरसेणावईं विसमदुग्गगहणं
 ठिए गहियभत्तपा(णि)णीए नो खलु से सक्का केणइ सुवहुएणावि आसवलेण वा
 हत्थिवलेण वा जोहवलेण वा रहवलेण वा चाउरिणिणि-पि० उरंउरेणं गिण्हित्तए
 ताहे सामेण य भे-एण य उवप्प(दा)याणेण य वि[स्](वी)संभमाणे उ(प)वयए
 यावि होत्था, जे-वि (य) से अर्द्धभतरगा सीसग(स)भमा मित्त-नाइ-निर्यगसयण-
 संवंधिपरियणं च वि-उलधणकणगरयणसंतसारसाव(इ)एज्जेणं भिदइ अभग्गसेणस्स
 य चोरसेणावइस्स अभिक्खणं २ महत्थाईं महग्घाईं महरिहाईं पाहुडाईं पेसेइ
 [२] अ(भंग)भग्गसेणं चोरसेणावईं वी(वि)संभमाणेइ ॥ १८ ॥ तए णं से म-हावले
 राया अ-ज्जया कया-इ पुरिमताले नयरे एगं महं महइमहालियं कूडागारसालं करेइ
 अणेगक्खंभसयसंनिविट्ठं पासा(इ)ईयं दरसणिज्जं०, तए णं से म-हावले राया
 अ-ज्जया कया-इ पुरिमताले नयरे उस्सुक्कं जाव दूसरत्तं पमोयं (उग्ग)घोसाव्रेइ
 २ ता कोडुंविउपुरि(सं)से सद्दवेइ २ ता एवं वयासी-गच्छह णं तुब्भे देवाणुप्पिया !

सालाडवीए चोरपल्लीए तत्थ णं तु[ब्भे]म्हे अभग्गसेणं चोरसेणावइं करयल जाव एवं व०-एवं खलु देवाणुप्पिया ! पुरिमताले नयरे महावलस्स र-ओ उस्सुक्के जाव दसरत्ते पमो-ए उग्घोसिए तं किं णं देवाणुप्पिया ! वि-उलं असणं ४ पुप्फवत्थ-(गंध)मल्लालङ्का(रे य)रं ते इहं हव्वमाणिज्जउ उदाहु सयमेव गच्छि[त्था]ता ?, तए णं [ते] कोडुंबियपुरिसा म-हावलस्स र-ओ करयल जाव पडिउणेंति २ ता पुरिमतालाओ नयराओ पडि० नाइविकिट्ठेहिं अद्धानेहिं सुहेहिं वस(हिं)हीपायरासेहिं जेणेव सालाडवी चोरपल्ली तेणेव उवागच्छंति [२] अभग्गसेणं चोरसेणावइं करयल जाव एवं वयासी-एवं खलु देवाणुप्पिया ! पुरिमताले नयरे म-हावलस्स र-ओ उस्सुक्के जाव उदाहु सयमेव गच्छि-ता ?, तए णं से अभग्गसेणे चोरसेणावई ते कोडुंबियपुरिसे एवं वयासी-अहं णं देवाणुप्पिया ! पुरिमता(ले)लनय(रे)रं सयमेव गच्छामि, ते कोडुंबियपुरिसे सक्कारेइं...पडिविसज्जेइ, तए णं से अभग्गसेणे चोरसेणावई बहूहिं मित्त जाव परिवुडे ण्हाए सव्वालंकारविभूसिए सालाडवीओ चोरपल्लीओ पडि-निक्खमइ २ ता जेणेव पुरिमताले नयरे जेणेव म(-ल)हावले राया तेणेव उवागच्छइ २ ता करयल० म(हव्व)हावलं रायं जएणं विजएणं वद्धावेइ २ ता महत्थं जाव पाहुडं उवणेइ । तए णं से म-हावले राया अभग्गसेणस्स चोरसेणावइस्स तं महत्थं जाव पडिच्छइ, अभग्गसेणं चोरसेणावइं सक्कारेइ संमाणेइ पडिविसज्जेइ कूडागारसालं च से आवसहं दलयइ, तए णं [से] अभग्गसेणे चोरसेणावई म-हावलेणं र-ओ विसज्जिए समाणे जेणेव कूडागारसाला तेणेव उवागच्छइ, तए णं से म(-ल)हावले राया कोडुंबियपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! वि-उलं असणं पाणं खाइमं साइमं उवक्खडावेह २ ता तं वि-उलं असणं ४ सुरं च ६ सुबहुं पुप्फ[वत्थ]गंधमल्लालंकारं च अभग्गसेणस्स चोरसेणावइस्स कूडागार-सा(लाए)लं उवणेह, तए णं ते कोडुंबियपुरिसा करयल जाव उवणेंति, तए णं से अभग्गसेणे चोरसेणावई बहूहिं मित्त-नाइ जाव सद्धिं संपरिवुडे ण्हाए सव्वालंकारवि-भूसिए तं वि-उलं असणं ४ सुरं च ६ आसाएमाणे ४ पमत्ते विहरइ, तए णं से म-हावले राया कोडुंबियपुरिसे सद्दावेइ २ ता एवं वयासी-गच्छह णं तु(ब्भे)म्हे देवाणुप्पिया ! पुरिमतालस्स नयरस्स दुवाराइं पिहे० अभग्गसेणं चोरसेणावइं जीव-गाहं गिण्हह [२] ममं उवणेह, तए णं ते कोडुंबियपुरिसा करयल जाव पडिउणेंति २ ता पुरिमतालस्स नयरस्स दुवाराइं पिहेंति अभग्गसेणं चोरसेणावइं जीवगाहं गिण्हंति [२] म-हावलस्स र-ओ उवणेंति, तए णं से म-हावले राया अभग्गसेणं चोरसेणा-वइं एएणं विहाणेणं वज्झं आणवेइ, एवं खलु गोयमा ! अभग्गसेणे चोरसेणावई

पुरा(पु)पोराणां जाव विहरइ । अभग्गसेणे णं भंते ! चोरसेणावई कालमासे कालं किच्चा कहिं गच्छिहि० कहिं उववज्जिहिइ ? गोयमा ! अभग्गसेणे चोर-सेणावई सत्तत्तीसं वासाइं परमाउयं पालइत्ता अज्जेव तिभागावसेसे दिवसे सूलभिन्ने कए समाणे कालमासे कालं किच्चा इमीसे रयणप्पभाए पुढवीए उक्कोस.....नेरइएसु उववज्जिहिइ, से णं तओ अणंतरं उव्वट्ठिता.....एवं संसारो जहा पढ(मो)मे जाव पुढवीए, तओ उव्वट्ठिता वाणारसीए नयरीए सूयरत्ताए पच्चायाहिइ, से णं तत्थ सो[सू]यरिएहिं जीवियाओ ववरोविए समाणे तत्थेव वाणारसीए नयरीए सेट्ठिकुलंसि पुत्तत्ताए पच्चायाहिइ, से णं तत्थ उम्मुक्कवालभावे.....एवं जहा पढमे जाव अंतं काहिइ ॥ निक्खेवो ॥ १९ ॥ तइयं अज्झयणं समत्तं ॥

जइ णं भंते !.....चउत्थस्स उक्खेवो, एवं खलु जंवू । तेणं कालेणं तेणं सम-एणं साहंजणी-नामं नयरी होत्था रिद्धत्थिमियसमिद्धा, तीसे णं साहंजणीए वहिया उत्तरपुर-त्थिमे दिसीभाए देवरमणे नामं उज्जाणे होत्था, तत्थ णं साहंजणीए नय-रीए महचंदे नामं राया होत्था महया०, तस्स णं महचंदस्स र-न्नो सुसेणे नामं अमच्चे होत्था सामभेयदंड० निग्गहकुसले, तत्थ णं साहंजणीए नयरीए सु(दं)दरि-सणा-नामं गणिया होत्था वण्णओ, तत्थ णं साहंजणीए नयरीए सुभदे नामं सत्थ-वाहे (हो०) परिवसइ अट्ठे०, तस्स णं सुभदस्स सत्थवाहस्स भद्दा-नामं भारिया होत्था अहीण०, तस्स णं सुभद(स्स)सत्थवाहस्स पुत्ते भद्दाए भारियाए अत्तए सगडे नामं दारए होत्था अहीण०, तेणं कालेणं तेणं समएणं समणे भगवं महावीरे.....समोस-रणं परिसा राया य निग्गए धम्मो कहिओ परिसा (रा०) पडिग(ओ)या, तेणं कालेणं तेणं समएणं समणस्स भगवओ महावीरस्स जेट्ठे अंतेवासी जाव रायमग्गमोगाढे तत्थ णं हत्थी आसे पुरिसे...ते-सि च णं पुरिसाणं मज्झग[ए]यं पासइ एणं सइ-त्थीयं पुरिसं अव-ओड-यवंधणं उक्खित्त जाव घो(सेण)सिज्जमाणं चिंता तहेव जाव भगवं वागरेइ, एवं खलु गोयमा ! तेणं कालेणं तेणं समएणं इहेव जंवुदीवे दीवे भारहे वासे छगलपुरे नामं नयरे होत्था, तत्थ सी(सिं)हगि(रि)री नामं राया होत्था महया०, तत्थ णं छगलपुरे नयरे छ(णि)णिए नामं छागलि(छगली)ए परिवसइ अट्ठे० अहम्मिए जाव दुप्पडियाणंदे, तस्स णं छ-णियस्स छा(छ)गलियस्स वहवे अ(जा)याण य ए(ला)ल्याण य रोज्जाण य वसभाण य ससयाण य सूयराण य पसयाण य सिंघाण य हरिणाण य मयूराण य महिसाण य सयवद्धाण य सहस्सव-द्धाण य जूहाणि वाडगंसि संनिरुद्धाईं चिट्ठंति, अ-न्ने य तत्थ वहवे पुरिसा दि-न्न-भइभत्तवेयणा वहवे अए य जाव महिसे य सारक्(ख)खेमाणा संगोवेमाणा चिट्ठंति,

अ-न्ने य से वहवे पुरिसा अयाण य जाव गिहंसि निरुद्धा चिट्ठंति, अ-न्ने य से वहवे पुरिसा दि-न्नभइभत्तवेयणा वहवे सय(अ)ए य (जाव) सहस(महि)से य जीवियाओ ववरो-वेंति [२] मंसाइं क(प्पि-णी)प्पणिकप्पियाइं करेंति [२] छ(णी)णियस्स छाग-लि-यस्स उवणेंति, अन्ने य से वहवे पुरिसा ताइं व(हु)हुयाइं अयमंसाइं जाव महि-समंसाइं तवएसु य कवल्लीसु य कं(दू)दुएसु य भज्जणेनु य इंगालेसु य त(लं)लेंति य भज्जेति य सो(ल्लयं)ल्लेति य ० तओ रायमग्गंसि वित्तिं कप्पेमाणा विहरंति, अप्पणा-वि-य णं से छ(न्निय-)णिए छाग(ली)लिए तेहिं बहुवि० मंसेहिं जाव महि-समंसेहिं सोल्लेहि य त(ले)लिएहि य भ(ज्जे)जिएहि य सुरं च ६ आसाएमाणे विहरइ, तए णं से छ(न्नी)णिए (य) छगलि-ए एयकम्मे....सुवहुं पावकम्मं कलि-कलुसं समज्जिणित्ता सत्त-वाससयाइं परमाउयं पालइत्ता कालमासे कालं किच्चा चो-त्थीए पुढवीए उक्कोसेणं दससागरोवमठिइएसु नेरइयत्ताए उवव-न्ने ॥ २० ॥ तए णं तस्स सुभइ-सत्थवाहस्स भद्दा भारिया जा(व)यनिंदुया यावि होत्था, जाया जाया दारगा विणिहायमावज्जंति, तए णं से छ-णिए छाग(ले-)लिए चो-त्थीए पुढवीए अणंतरं उव्वट्ठित्ता इहेव साहंजणीए नयरीए सुभइस्स सत्थवाहस्स भद्दाए भारियाए कुच्छिसि पुत्तत्ताए उवव-न्ने, तए णं सा भद्दा सत्थवाही अ-न्नया कया-इ नवण्हं मासाणं बहुपडिपुष्णाणं दारगं पयाया, तए णं तं दारगं अम्मापियरो जायमेत्तं चेव सगडस्स हे(ट्ठ)ट्ठा[ओ] ठावेंति (०) दोच्चं-पि गिण्हावेंति (०) अणुपुव्वेणं सारक्(खं)खेति संगोवेंति संवट्ठेति जहा उज्झियए जाव जम्हा णं अम्हं इमे दारए जायमेत्ते चेव सगडस्स हेट्ठा ठाविए तम्हा ण हो-उ णं अम्हं एस दारए सगडे नामेणं, सेसं जहा उज्झियए, सुभइे लवणसमुदे कालगए माया-वि कालगया, से(S)वि सयाओ गिहाओ निच्छूढे, तए णं से सगडे दारए सया-ओ गिहाओ निच्छूढे समाणे सिं(सं)घाडग....तहेव जाव सु-दरिसणाए गणियाए सद्धिं संपलग्गे यावि होत्था, तए णं से सुसेणे अमच्चे तं सगडं दारगं अ-न्नया कया-इ सुदरिसणाए गणियाए गिहाओ निच्छुभावेइ [२] सु-दरिस(णं)णियं गणियं अब्भितरियं ठा-वेइ २ ता सुदरिसणाए गणियाए सद्धि उरालाई माणुस्सगाइं भोगभोगाईं भुंजमाणे विहरइ, तए णं से सगडे दारए सुदरिसणा(ओ)ए गिहाओ निच्छूढे समाणे अ-न्नत्थ कत्थ(इ)वि सुइं वा ...अलभ० अ-न्नया कया-इ रह(स्सि)सियं सुदरिसणा-गेहं(सि) अणुप्पविसइ २ ता सुदरि(सि)सणाए सद्धि उरालाई भोगभोगाईं भुंजमाणे विहरइ, इमं च णं सुसेणे अमच्चे ण्हाए सव्वालंकारविभूसिए मणुस्सवग्गुराए जेणेव सुदरिसणा[ए] गणियाए गेहे तेणेव उवागच्छइ २ [ता] सगडं दारयं सु-दरिसणाए

गणियाए सद्धि उरालाई भोगभोगाई भुंजमाणं पासइ २ ता आसुरुत्ते जाव
 मि(स)सिमिसेमाणे तिवलियं भिउडि निडाले साहट्टु सगडं दारयं पुरिसेहिं
 गिण्हावेइ [२] अट्ठि जाव महियं करेइ [२] अव-ओड-यवध(णं)ण करेइ २ ता
 जेणेव महचंदे राया तेणेव उवागच्छइ उवागच्छिता करयल जाव एवं वयासी-एवं
 खलु सामी ! सगडे दारए म-मं अंते-उरंसि अवरद्धे, तए णं से महचंदे राया
 सुसेणं अमच्चं एवं वयासी-तुमं चेव णं देवाणुप्पिया ! सगडस्स दारगस्स दंडं
 (नि)वत्तेहि, तए णं से सुसेणे अमच्चे महचंदेणं र-न्ना अब्भणु-न्नाए समाणे सगडं दारयं
 सुदरिसणं च गणियं एएणं विहाणेणं वज्झं आणवेइ, तं एवं खलु गोयमा ! सगडे
 दार-ए पु(पो)रा-पोराणाणं....पच्चणुभवमाणे विहरइ ॥ २१ ॥ सगडे णं भंते !
 दारए कालगए कहिं गच्छहिं० कहिं उववज्जिहिइ ? सगडे णं दारए गोयमा !
 सत्ताव-न्नं वासाई परमाउयं पालइत्ता अज्जेव तिभागावसेसे दिवसे एगं महं अ(ओ)-
 योमयं त(त्त)त्तं समजोइभूयं इ(त्थी)त्थिपडिमं अवयासाविए समाणे कालमासे कालं
 किच्चा इमीसे रयणप्पभाए पुढवीए नेरइयत्ताए उववज्जिहिइ, से णं तओ अणंतरे
 उव्वट्ठिता रायगिहे नयरे मातंगकुलंसि जुग(जम)लत्ताए पच्चायाहिइ, तए णं तस्स
 दारगस्स अम्मापियरो नि[०]वत्तवारस(म)गस्स (दि०) इमं एयारुवं गोणं नामधेज्जं
 करिस्संति, तं हो-उ णं दार० सगडे नामेणं हो-उ णं दारिया सुदरिसणा-नामेण,
 तए णं से सगडे दारए उम्मुक्कवालभावे जोव्वण....भविस्सइ, तए णं सा सुदरि-
 सणा-वि दारिया उम्मुक्कवालभावा (विण(णा)णय) जोव्वणगमणुप्पत्ता रुवेण य जोव्व-
 णेण य लावणेण य उक्किट्ठा उक्किट्ठसरीरा यावि भविस्सइ, तए णं से सगडे दारए
 सुदरिसणाए रुवेण य जोव्वणेण य लावणेण य मुच्छिए ४ सुदरिसणाए (भ०) सद्धि
 उरालाई (मा०) भोगभोगाई भुंजमाणे विहरिस्सइ, तए णं से सगडे दारए अ-न्नया
 (कया(इ)इं) सयमेव कूड-गा-हितं उवसंपज्जिताणं विहरिस्सइ, तए णं से सगडे
 दारए कूड-गाहे भविस्सइ अहम्मिए जाव दुप्पडियाणंदे एयकम्मे० सुवहुं पावकम्मं
 (जाव) समज्जिणित्ता कालमासे कालं किच्चा इमीसे रयणप्पभाए पुढवीए नेरइयत्ताए
 उवव-न्ने, संसारो तहेव जाव पुढवीए, से णं तओ अणंतरे उव्वट्ठिता वाणारसीए
 नयरीए मच्छत्ताए उववज्जिहिइ, से णं तत्थ (णं) मच्छवंधिएहि वहिए तत्थेव
 वाणारसीए नयरीए सेट्ठिकुलंसि पुत्तत्ताए पच्चायाहिइ वोहिं वु(ज्जे)द्धे० पव्व०
 सोहम्मे कप्पे....महाविदेहे वासे सिज्झिहिइ ॥ निक्खेवो ॥ २२ ॥ चो-त्थं
 अज्झयणं समत्तं ॥
 जइ णं भंते !....पंचमस्स (अज्झयणस्स) उक्खे(वओ)वो, एवं खलु जंबू ! तेणं

कालेणं तेणं समएणं कोसंवी-नामं नयरी होत्या रिद्धत्थिमिय० वाहिं चंदोरणे
 उजाणे, तत्थ णं कोसंवीए नयरीए सयाणीए नामं राया होत्या महया०, (त० णं स०
 २०) मियावई (णा०) देवी (हो० अ० जाव सु०), तस्स णं सयाणीयस्स (२०)
 पुत्ते मिया(वतीए)देवीए अत्तए उदायणे नामं कुमारे होत्या अहीण० जुवराया,
 तस्स णं उदायणस्स कुमारस्स पउमाव(इ)ई-नामं देवी होत्या, तस्स णं
 सयाणीयस्स सोमदत्ते नामं पुरोहिए होत्या रिउ[व]वेय०, तस्स णं सोमदत्तस्स
 पुरोहियस्स वसुदत्ता नामं भारिया होत्या, तस्स णं सोमदत्तस्स पुत्ते वसुदत्ताए
 अत्तए व(व)हस्सइदत्ते नामं दारए होत्या अहीण०, तेणं कालेणं तेणं समएणं
 समणे भगवं महावीरे.....समोस(रि)एरणं, तेणं कालेणं तेणं समएणं भगवं
 गोयमे तहेव जाव रायमग्गमोगाडे तहेव पासइ हत्थी आसे पुरि(से)समज्जे
 पुरिसं चिंता तहेव पुच्छइ पुव्वभवं भगवं वागरेइ-एवं खलु गोयमा ! तेणं
 कालेणं तेणं समएणं इहेव जंजुदीवे दीवे भारहे वासे सव्वओभदे नामं नयरे होत्या
 रि-द्धत्थिमियसमि० तत्थ णं सव्वओभदे नयरे जियसत्तू (ना(णा)मं) राया (हो०),
 तस्स णं जियसत्तुस्स र-न्नो महेसरदत्ते नामं पुरोहिए होत्या रिउव्वेय जाव अथ-
 व्वणकुसले या(आ)वि होत्या, तए णं से महेसरदत्ते पुरोहिए जियसत्तुस्स र-न्नो
 रजवलविवद्धणअट्ठआए कल्लकल्लि एगमेणं माहणदार-यं एगमेणं खत्तियदार-यं एग-
 मेणं वइस्सदार-यं एगमेणं सुइदार-यं गिण्हावेइ २ ता तेसिं जीवंतगाणं चेव हिय-
 उंडए गिण्हावेइ [२] जियसत्तुस्स र-न्नो संतिहोमं करेइ, तए णं से महेसरदत्ते
 पुरोहिए अट्ठमीचोइसीसु दुवे २ माहणखत्तियवइस्(वे)स सुदे चउ(चो)ण्हं मासाणं
 चत्तारि २ छण्हं मासाणं अट्ठ २ संवच्छरस्स सोलस २ जाहे जाहे(ऽ)वि-य णं
 जियसत्तू राया परवलेणं अभिजुंजइ ताहे ताहे-वि-य णं से महेसरदत्ते पुरोहिए
 अट्ठसयं माहणदारगाणं अट्ठसयं खत्तियदारगाणं अट्ठसयं वइस्सदारगाणं अट्ठसयं
 सुइदारगाणं पुरिसेहिं गिण्हावेइ गिण्हावेत्ता तेसिं जीवंताणं चेव हिययउंडीओ
 गिण्हावेइ २ ता जियसत्तुस्स र-न्नो संतिहोमं करेइ ॥ २३ ॥ तए णं से महेसरदत्ते
 पुरोहिए एयकम्म० सुवहुं पावकम्मं समजिणित्ता तीसं वाससयं परमाउयं पालइत्ता
 कालमासे कालं किच्चा पंच(मा)मीए पुढवीए उक्कोसेणं सत्तरससागरोवमट्ठिइए नर-गे
 उवव ने, से णं तओ अणंतुरं उव्वट्ठित्ता इहेव कोसंवीए नयरीए सोमदत्तस्स पुरोहि-
 यस्स वसुदत्ताए [भारियाए] पुत्तत्ताए उवव-ने, तए णं तस्स दारगस्स अम्मापियरो
 निव्वत्तवारसाहस्स इ(मं)यं एयात्तुवं नाम(वि)धेज्जं करेत्ति, जम्हा णं अम्हं इमे दारए
 सोमदत्तस्स पुरोहियस्स पुत्ते वसुदत्ताए अत्तए तम्हा णं होउ अम्(ह)हं दारए व-ह-

ओभासिया वेसाणिया णंगोलिया, तेसि णं दीवाणं चउसु वि दिसासु लवणसमुद्धं चत्तारि चत्तारि जोयणसयाइं ओगाहेत्ता एत्थ णं चत्तारि अंतरदीवा प० तं० हय-
 कण्णदीवे, गयकण्णदीवे गोकण्णदीवे सक्कुलिकण्णदीवे, तेसु णं दीवेसु चउव्विहा मणुस्सा परिवसंति तं० हयकण्णा गयकण्णा गोकण्णा सक्कुलिकण्णा, तेसि णं दीवाणं
 चउसु विदिसासु लवणसमुद्धं पंच पंच जोयणसयाइं ओगाहेत्ता एत्थ णं चत्तारि अंतर-
 दीवा प० तं० आयंसमुहदीवे मेंढगमुहदीवे अओमुहदीवे गोमुहदीवे । तेसु णं दीवेसु चउव्विहा मणुस्सा भाणियव्वा, तेसि णं दीवाणं चउसु विदिसासु लवणसमुद्धं छ
 छजोयणसयाइं ओगाहेत्ता एत्थ णं चत्तारि अंतरदीवा प० तं० आसमुहदीवे हत्थि-
 मुहदीवे सीहमुहदीवे वग्घमुहदीवे, तेसु णं दीवेसु मणुस्सा भाणियव्वा तेसिं णं
 दीवाणं चउसु विदिसासु लवणसमुद्धं सत्तसत्तजोयणसयाइं ओगाहिता एत्थ ण चत्तारि
 अंतरदीवा प० तं० आसकण्णदीवे हत्थिकण्णदीवे अकण्णदीवे कण्णपाउरणदीवे ।
 तेसु णं दीवेसु मणुस्सा भाणियव्वा । तेसिं णं दीवाणं चउसु विदिसासु लवणसमुद्धं
 अठ्ठ अठ्ठजोयणसयाइं ओगाहिता एत्थ णं चत्तारि अंतरदीवा प० तं० उक्कामुहदीवे
 मेहमुहदीवे विज्जुमुहदीवे विज्जुदंतदीवे तेसु णं दीवेसु मणुस्सा भाणियव्वा । तेसिं णं
 दीवाणं चउसु विदिसासु लवणसमुद्धं णव णव जोयणसयाइं ओगाहिता एत्थ णं चत्तारि
 अंतरदीवा प० तं० घणदंतदीवे लठ्ठदंतदीवे गूढदंतदीवे सुद्धदंतदीवे, तेसु णं दीवेसु
 चउव्विहा मणुस्सा परिवसंति तं० घणदंता लठ्ठदंता गूढदंता सुद्धदंता । जंबुद्दीवे
 दीवे मंदरस्स पव्वयस्स उत्तरेणं सिहरिस्स वासहरपव्वयस्स चउसु विदिसासु
 लवणसमुद्धं तिण्णि तिण्णि जोयणसयाइं ओगाहिता एत्थ णं चत्तारि अंतरदीवा
 प० तं० एगरुयदीवे सेसं तहेव निरवसेसं भाणियव्वं जाव सुद्धदंता ॥ ३७५ ॥
 जंबुद्दीवस्स णं दीवस्स बाहिरिल्लाओ वेइयंताओ चउद्दिसि लवणसमुद्धं पंचाणउइजोयण-
 सहस्साइं ओगाहेत्ता एत्थ णं महइमहालया महालिजरसंठाणसंठिया चत्तारि महा-
 पायाला प० तं० वलयामुहे केउए जूवए ईसरे, तत्थ णं चत्तारि देवा महिद्धिया जाव
 पलिओवमठिइया परिवसंति तं० काले महाकाले वेलंबे पभंजणे ॥ ३७६ ॥ जंबु-
 दीवस्स णं दीवस्स बाहिरिल्लाओ वेइयंताओ चउद्दिसिं लवणसमुद्धं बायालीसं २ जोयण-
 सहस्साइं ओगाहिता एत्थ णं चउण्हं बेलंधरणागरायाणं चत्तारि आवासपव्वया
 प० तं० गोथूमे उदयभासे संखे दगसीमे, तत्थ णं चत्तारि देवा महिद्धिया जाव परि-
 वसंति तं० गोथूमे सिवए जाव मणोसिलए । जंबुद्दीवस्स णं दीवस्स बाहिरिल्लाओ वेइय-
 न्ताओ चउसु विदिसासु लवणसमुद्धं बायालीसं २ जोयणसहस्साइं ओगाहेत्ता एत्थ णं
 चउण्हं अणुवेलंधरणागराईणं चत्तारि आवासपव्वया प० तं० कक्कोडए विज्जुप्पभे

केलासे अरुणप्पमे । तत्थ णं चत्तारि महिद्धिया जाव पलिओवमठिईया देवा परिव-
संति तं० कक्कोडए कद्दमए केलासे अरुणप्पमे ॥ ३७७ ॥ लवणे णं समुद्दे चत्तारि चंदा
पभासिंसु वा पभासंति वा पभासिस्संति वा, चत्तारि सूरिया तविंसु वा तवंति वा तवि-
स्संति वा, चत्तारि कत्तियाओ जाव चत्तारि भरणीओ, चत्तारि अग्गी जाव चत्तारि
जमा, चत्तारि अंगारया जाव चत्तारि भावकेऊ ॥ ३७८ ॥ लवणस्स णं समुद्दस्स
चत्तारि दारा प० तं० विजए वेजयंते जयंते अपराजिए, ते णं दारा णं चत्तारि
जोयणाइं विक्खंभेणं तावइयं चेव पवेसेजं पण्णत्ता, तत्थ णं चत्तारि देवा महिद्धिया
जाव पलिओवमठिईया परिवसंति विजए जाव अपराजिए ॥ ३७९ ॥ धायइक्खंडे णं
दीवे चत्तारि जोयणसयसहस्साइं चक्कवालविक्खंभेणं प० ॥ ३८० ॥ जंबुदीवस्स णं
दीवस्स वहिया चत्तारि भरहाइं चत्तारि एरवयाइं, एवं जहा सदुद्देसए तहेव णिरव-
सेसं भाणियव्वं, जाव चत्तारि मंदरा चत्तारि मंदरचूलियाओ ॥ ३८१ ॥ णंदीस-
रवरस्स णं दीवस्स चक्कवालविक्खंभस्स बहुमज्झदेसभाए चउद्दिसिं चत्तारि
अंजणगपव्वया प० तं० पुरच्छिमिल्ले अंजणगपव्वए दाहिणिल्ले अंजणगपव्वए,
पच्चत्थिमिल्ले अंजणगपव्वए उत्तरिल्ले अंजणगपव्वए, ते णं अंजणगपव्वया चउरासीइ-
जोयणसहस्साइं उट्ठं उच्चत्तेणं एगं जोयणसहस्सं उव्वेहेणं मूले दसजोयणसहस्साइं
विक्खंभेणं तदणंतरं च णं मायाए मायाए परिहाएमाणा परिहाएमाणा उवरिमेगं
जोयणसहस्सं विक्खंभेणं प० मूले एकतीसं जोयणसहस्साइं छच्चत्तेवीसे जोयणसए
परिक्खेवेणं उवरिं तिणिण २ जोयणसहस्साइं एगं च छावट्ठं जोयणसयं परिक्खेवेणं
मूले विच्छिण्णा मज्झे संखित्ता उप्पि तणुया गोपुच्छसंठाणसंठिया सव्वअंजण-
मया अच्छा जाव पडिरूवा, तेसिणं अंजणगपव्वयाणं चउद्दिसिं चत्तारि २ णं-
दाओ पुक्खरणीओ प० तासिणं पोक्खरणीणं पत्तेयं पत्तेयं चउद्दिसिं चत्तारि वण-
खंडा प० तं० पुरच्छिमेणं दाहिणेणं पच्चत्थिमेणं उत्तरेणं, पुव्वेणं असोगवणं
दाहिणओ होति सत्तवण्णवणं, अवरेण चंपगवणं, अंबवणं उत्तरे पासे ॥ १ ॥
तत्थ णं जे से पुरच्छिमिल्ले अंजणगपव्वए तस्स णं चउद्दिसिं चत्तारि णंदापोक्खर-
णीओ पण्णत्ताओ तं० णंदा णंदुत्तरा आणंदा णंदिवद्धणां, तासिणं पोक्खरणीणं पत्तेयं
पत्तेयं चउद्दिसिं चत्तारि तिसोवाणपडिरूवगा प० तेसिणं तिसोवाणपडिरूवगाणं पुरओ
चत्तारि तोरणा प० पुरच्छिमेणं दाहिणेणं पच्चत्थिमेणं उत्तरेणं, तासिणं पोक्खर-
णीणं पत्तेयं पत्तेयं चउद्दिसिं चत्तारि वणखंडा प० तं० पुरओ दाहिणओ पच्चत्थिमेणं
उत्तरेणं, पुव्वेणं असोगवणं जाव अंबवणं उत्तरे पासे । तासिणं पुक्खरणीणं बहु-
मज्झदेसभाए चत्तारि दहिमुहगपव्वया प० ते णं दहिमुहगपव्वया चउसट्ठिं जोयण-

सहस्साइं उड्डं उच्चत्तेणं एगं जोयणसहस्समुव्वेहेणं, सव्वत्थसमा पल्लगसंठाणसंठिया
दसजोयणसहस्साइं विक्खंभेणं एकतीसं जोयणसहस्साइं छच्चतेवीसजोयणसए
परिक्खेवेणं सव्वरयणामया अच्छा जाव पडिह्वा । सेसं जहेव अंजणगपव्वयाणं
तहेव णिरवसेसं भाणियव्वं जाव अंजवणं उत्तरेपासे । तत्थ णं जे से दाहिणिल्ले
अजगगपव्वए तस्सणं चउद्दिसि चत्तारि णंदाओ पुक्खरणीओ प० तं० भद्दा
विसाला कुमुया पोडरीणिणी । सेसं तं चेव जाव दहिमुहगपव्वया जाव वणखंडा ।
तत्थणं जे से पच्चत्थिमिल्ले अंजणगपव्वए तस्स णं चउद्दिसि चत्तारि णंदाओ पोक्खर-
णीओ पण्णत्ताओ तं० णंदिसेणा अमोहा गोथूमा सुदंसणा, सेसं तं चेव, तहेव
दहिमुहगपव्वया तहेव जाव वणखंडा । तत्थणं जे से उत्तरिल्ले अंजणगपव्वए तस्स
णं चउद्दिसि चत्तारि णंदाओ पोक्खरणीओ प० तं० विजया वेजयंती जयंती अपरा-
जिया, तहेव दहिमुहगपव्वया, तहेव जाव वणखंडा । णंदीसरवरस्स णं दीवस्स चक्क-
वालविक्खंभस्स बहुमज्झदेसभाए चउसु विदिसासु चत्तारि रतिकरगपव्वया प० तं०
उत्तरपुरच्छिमिल्ले रतिकरगपव्वए दाहिणपुरत्थिमिल्ले रतिकरगपव्वए दाहिणपच्चत्थि-
मिल्ले रतिकरगपव्वए उत्तरपच्चत्थिमिल्ले रतिकरगपव्वए, ते णं रतिकरगपव्वया दस-
जोयणसयाइं उड्डं उच्चत्तेणं दसगाउयसयाइं उव्वेहेणं, सव्वत्थसमा झल्लरिसंठाण-
संठिया, दसजोयणसहस्साइं विक्खंभेणं, एकतीसं जोयणसहस्साइं छच्चतेवीसे जोयण-
सए परिक्खेवेणं, सव्वरयणामया अच्छा जाव पडिह्वा । तत्थ णं जे से उत्तरपुरच्छि-
मिल्ले रतिकरगपव्वए तस्सणं चउद्दिसिमीसाणस्स देविदस्स देवरण्णो चउण्हमग्गम-
हिंसीणं जंबुद्दीवप्पमाणमेत्ताओ चत्तारि रायहाणीओ पण्णत्ताओ तं० णंदोत्तरा णंदा
उत्तरकुरा देवकुरा । कण्हाए कण्हराईए कामाए कामरक्खियाए, तत्थ णं जे से
दाहिणपुरच्छिमिल्ले रतिकरगपव्वए तस्सणं चउद्दिसि सक्कस्स देविदस्स देवरण्णो
चउण्हमग्गमहिंसीणं जंबुद्दीवप्पमाणाओ चत्तारि रायहाणीओ प० तं० सुमणा सोम-
णसा अच्चिमाली मणोरमा । पउमाए सिवाए मईए अजूए । तत्थणं जे से दाहिण-
पच्चत्थिमिल्ले रतिकरगपव्वए तस्सणं चउद्दिसि सक्कस्स देविदस्स देवरण्णो चउण्ह-
मग्गमहिंसीणं जंबुद्दीवप्पमाणमेत्ताओ चत्तारि रायहाणीओ प० तं० भूया भूयवडिंसा
गोथूमा सुदंसणा । अमलाए अच्छराए नवमियाए रोहिणीए । तत्थ णं जे से उत्तर-
पच्चत्थिमिल्ले रतिकरगपव्वए तस्सणं चउदिसिमीसाणस्स चउण्हमग्गमहिंसीणं जंबु-
द्दीवप्पमाणमेत्ताओ चत्तारि रायहाणीओ प० तं० रयणा रयणोच्चया सव्वरयणा
रयणसचया । वसूए वसुगुत्ताए वसुमिताए वसुंधराए ॥ ३८२ ॥ चउव्विहे सच्चे
प० तं० णामसच्चे ठवणसच्चे दव्वसच्चे भावसच्चे ॥ ३८३ ॥ आजी-

वियाणं चउव्विहे तवे प० तं० उगगतवे घोरतवे रमनिज्जूहणया जिब्भिदियपडि-
संलीणया ॥ ३८४ ॥ चउव्विहे संजमे प० तं० मणसंजमे वइसंजमे कायसजमे
उवगरणसंजमे । चउव्विहे चियाए प० तं० मणचियाए वइचियाए कायचियाए
उवगरणचियाए, चउव्विहा अकिंचणया प० तं० मणअकिंचणया वइअकिंचणया
कायअकिंचणया उवगरणअकिंचणया ॥ ३८५ ॥ चउत्थट्ठाणस्स वीओ-
देसो समत्तो ॥

चत्तारि राईओ प० तं० पव्वयराई पुढविराई वालुयराई उदगराई । एवामेव
चउव्विहे कोहे प० तं० पव्वयराइसमाणे पुढविराइसमाणे वालुयराइसमाणे उदग-
राइसमाणे । पव्वयराइसमाणं कोहमणुपविट्ठे जीवे कालं करेइ णेरइएसु उववज्जइ,
पुढविराइसमाणं कोहमणुपविट्ठे जीवे कालं करेइ तिरिक्खजोणिएसु उववज्जइ, वालु-
यराइसमाणं कोहमणुपविट्ठे जीवे कालं करेइ मणुस्सेसु उववज्जइ, उदगराइसमाणं
कोहमणुपविट्ठे जीवे कालं करेइ देवेसु उववज्जइ, चत्तारि उदगा प० तं० कइमोदए
खंजणोदए वालुओदए सेलोदए, एवामेव चउव्विहे भावे प० तं० कइमोदगसमाणे
खंजणोदगसमाणे वालुओदगसमाणे सेलोदगसमाणे । कइमोदगसमाणं भावमणुपविट्ठे
जीवे कालं करेइ णेरइएसु उववज्जइ एवं जाव सेलोदगसमाणं भावमणुपविट्ठे जीवे
कालं करेइ देवेसु उववज्जइ ॥ ३८६ ॥ चत्तारि पक्खी प० तं० रुयसंपन्ने णाममेगे
णो रुवसंपन्ने, रुवसंपन्ने णाममेगे णो रुयसंपन्ने, एगे रुयसंपन्ने वि रुवसंपन्ने वि,
एगे णो रुयसंपन्ने णो रुवसंपन्ने, एवामेव चत्तारि पुरिसजाया प० तं० रुयसंपन्ने
णाममेगे णो रुवसंपन्ने ४ ॥ ३८७ ॥ चत्तारि पुरिसजाया प० तं० पत्तियं करेमिति
एगे पत्तियं करेइ, पत्तियं करेमिति एगे अपत्तियं करेइ, अपत्तियं करेमिति एगे
पत्तियं करेइ, अपत्तियं करेमिति एगे अपत्तियं करेइ, चत्तारि पुरिसजाया प० तं०
अप्पणो णाममेगे पत्तियं करेइ णो परस्स, परस्स णाममेगे पत्तियं करेइ णो अप्पणो
४ । चत्तारि पुरिसजाया प० तं० पत्तियं पवेसामिति एगे पत्तियं पवेसेइ, पत्तियं
पवेसामिति एगे अपत्तियं पवेसेइ, अपत्तियं पवेसामिति एगे पत्तियं पवेसेइ, अप-
त्तियं पवेसामिति एगे अपत्तियं पवेसेइ, चत्तारि पुरिसजाया प० तं० अप्पणो णाम-
मेगे पत्तियं पवेसेइ णो परस्स ४ ॥ ३८८ ॥ चत्तारि रुक्खा प० तं० पत्तोवए
पुप्फोवए फलोवए छायोवए, एवामेव चत्तारि पुरिसजाया प० तं० पत्तो वा रुक्ख-
समाणे पुप्फो वा रुक्खसमाणे फलो वा रुक्खसमाणे छायो वा रुक्खसमाणे
॥ ३८९ ॥ भारं णं वहमाणस्स चत्तारि आसासा प० तं० जत्थ णं अंसाओ अंसं
साहरइ तत्थ वि य से एगे आसासे पणत्ते, जत्थ वि य णं उच्चारं वा पासवणं

वा परिठावेति तत्थ वि य से एगे आसासे प० जत्थ वि य णं णागकुमारावासंसि
 वा सुवन्नकुमारावासंसि वा वासं उवेइ तत्थ वि य से एगे आसासे प० जत्थ वि
 य णं आवकहाए चिट्ठइ जाव आसासे प०, एवामेव समणोवासगस्स चत्तारि
 आसासा प० तं० जत्थ वि य णं सीलव्वयगुगव्वयवेरमणपचक्खाणपोनदोववा-
 साइं पडिबज्जइ तत्थ वि य से एगे आसासे प०, जत्थ वि य णं सामाइयं देसा-
 चगासियं सम्ममणुपालेइ तत्थ वि य से एगे आसासे प०, जत्थ वि य णं चाउद्दसट्ठमु-
 द्दिट्ठपुण्णिमासिणीसु पडिपुण्णं पोसहं सम्मं अणुपालेइ तत्थ वि य से एगे आसासे
 प०, जत्थ वि य णं अपच्छिममारणंतियसंलेहणाजूसणाजूमिए भत्तपाणपडिया-
 इक्खिए पाओवगए कालमणवक्कंखमाणे विहरइ तत्थ वि य से एगे आसासे प०
 ॥ ३९० ॥ चत्तारि पुरिसजाया प० तं० उदिओदिए णाममेगे, उदियत्थमिए
 णाममेगे, अत्थमिओदिए णाममेगे, अत्थमियत्थमिए णाममेगे । भरहे राया
 चाउरंतचक्कवट्ठी णं उदिओदिए, वंभदत्ते णं राया चाउरंतचक्कवट्ठी उदियत्थमिए,
 हरिएसवलेणमणगारे अत्थमिओदिए, काले णं सोयरिए अत्थमियत्थमिए ॥ ३९१ ॥
 चत्तारि जुंमा प० तं० कडजुंमे तेयोए दावरजुंमे कलिओए, णेरइयाणं चत्तारि
 जुंमा प० तं० कडजुंमे जाव कलिओए, एवमसुरकुमाराणं जाव थणियकुमाराणं,
 एवं पुढविकाइयाणं आउतेउवाउवणस्सइवेदियाणं तेइदियाणं चउरिंदियाणं पंचि-
 दियतिरिक्खजोणियाणं मणुस्साणं वाणमंतरजोइसियाणं वेमाणियाणं सव्वेसि जहा
 नेरइयाणं ॥ ३९२ ॥ चत्तारि सूर्रा प० तं० खंतिसूरे तवसूरे दाणसूरे जुद्धसूरे,
 खंतिसूर्रा अरिहंता तवसूर्रा अणगारा; दाणसूरे वेसमणे जुद्धसूरे वासुदेवे ॥ ३९३ ॥
 चत्तारि पुरिसजाया प० तं० उच्चे णाममेगे उच्चच्छंदे उच्चे णाममेगे णीयच्छंदे णीए
 णाममेगे उच्चच्छंदे णीए णाममेगे णीयच्छंदे ॥ ३९४ ॥ असुरकुमाराणं चत्तारि
 लेस्सा प० तं० कण्हलेस्सा णीललेस्सा काउलेस्सा तेउलेस्सा, एवं जाव थणिय-
 कुमाराणं एवं पुढविकाइयाणं आउवणस्सइकाइयाणं वाणमंतराणं सव्वेसि जहा
 असुरकुमाराणं ॥ ३९५ ॥ चत्तारि जाणा प० तं० जुत्ते णाममेगे जुत्ते जुत्ते णाममेगे
 अजुत्ते अजुत्ते णाममेगे जुत्ते अजुत्ते णाममेगे अजुत्ते, एवामेव चत्तारि पुरिसजाया
 प० तं० जुत्ते णाममेगे जुत्ते ४ । चत्तारि जाणा प० तं० जुत्ते णाममेगे जुत्तपरिणए,
 जुत्ते णाममेगे अजुत्तपरिणए ४ । एवामेव चत्तारि पुरिसजाया प० तं० जुत्ते णाममेगे
 जुत्तपरिणए ४ । चत्तारि जाणा प० तं० जुत्ते णाममेगे जुत्तरुवे जुत्ते णाममेगे
 अजुत्तरुवे ४ । एवामेव चत्तारि पुरिसजाया प० तं० जुत्ते णाममेगे जुत्तरुवे ४ ।
 चत्तारि जाणा प० तं० जुत्ते णाममेगे जुत्तसोभे ४ । एवामेव चत्तारि पुरिसजाया

प० तं० जुत्ते णाममेगे जुत्तसोभे ४ । चत्तारि जुग्गा प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते णाममेगे जुत्ते ४ । एवं जहा जाणेण चत्तारि आलावगा तहा जुग्गेणवि पडिवक्खो तहेव पुरिसजाया जाव सोभेत्ति, चत्तारि सारही प० तं० जोआवइत्ता णाममेगे णो विजोयावइत्ता, विजोयावइत्ता णाममेगे णो जोयावइत्ता, एगे जोयावइत्तावि विजोयावइत्तावि, एगे णो जोयावइत्ता णो विजोयावइत्ता, एवामेव चत्तारि पुरिसजाया, चत्तारि हया प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते णाममेगे जुत्ते ४ । एवं जुत्तपरिणए जुत्तरूवे जुत्तसोभे सव्वेसिं पडिवक्खो पुरिसजाया । चत्तारि गया प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते णाममेगे जुत्ते ४ । एवं जहा हयाणं तहा गयाणवि भाणियव्वं । पडिवक्खो तहेव पुरिसजाया, चत्तारि जुग्गारिया प० तं० पंथजाई णाममेगे णो उप्पहजाई उप्पहजाई णाममेगे णो पंथजाई एगे पंथजाई वि उप्पहजाई वि एगे णो पंथजाई णो उप्पहजाई । एवामेव चत्तारि पुरिसजाया ४ ॥ ३९६ ॥ चत्तारि पुप्फा प० तं० रुवसंपन्ने णाममेगे णो गंधसंपन्ने गंधसंपन्ने णाममेगे णो रुवसंपन्ने एगे रुवसंपन्नेवि गंधसंपन्नेवि एगे णो रुवसंपन्ने णो गंधसंपन्ने । एवामेव चत्तारि पुरिसजाया प० तं० रुवसंपन्ने णाममेगे णो सीलसंपन्ने ४ ॥ ३९७ ॥ चत्तारि पुरिसजाया प० तं० जाइसंपन्ने णाममेगे णो कुलसंपन्ने कुलसंपन्ने णाममेगे णो जाइसंपन्ने ४ । चत्तारि पुरिसजाया प० तं० जाइसंपन्ने णाममेगे णो बलसंपन्ने बलसंपन्ने णाममेगे णो जाइसंपन्ने ४ । एवं जाईए रुवेण य चत्तारि आलावगा, एवं जाईए सुएण य ४ । एवं जाईए सीलेण ४ एवं जाईए चरित्तेण ४ । एवं कुलेण वलेण ४ । कुलेण रुवेण ४ । कुलेण सुएण ४ । कुलेण सीलेण ४ । कुलेण चरित्तेण ४ । चत्तारि पुरिसजाया प० तं० बलसंपन्ने णाममेगे णो रुवसंपन्ने ४ । एवं वलेण सुएण ४ । एवं वलेण सीलेण ४ । एवं वलेण चरित्तेण ४ । चत्तारि पुरिसजाया प० तं० रुवसंपन्ने णाममेगे णो सुयसंपन्ने ४ । एवं रुवेण सीलेण ४ । रुवेण चरित्तेण ४ । चत्तारि पुरिसजाया प० तं० सुयसंपन्ने णाममेगे णो सीलसंपन्ने ४ । एवं सुएण चरित्तेण य ४ । चत्तारि पुरिसजाया प० तं० सीलसंपन्ने णाममेगे णो चरित्तसंपन्ने ४ । एए इक्कवीसं भंगा भाणियव्वा ॥ ३९८ ॥ चत्तारि फला प० तं० आमलगमहुरे सुद्धियामहुरे खीरमहुरे खंडमहुरे, एवामेव चत्तारि आयरिया प० तं० आमलगमहुरफलसमाणे जाव खंडमहुरफलसमाणे ॥ ३९९ ॥ चत्तारि पुरिसजाया प० तं० आयवेयावच्चकरे णाममेगे णो परवेयावच्चकरे ४ । चत्तारि पुरिसजाया प० तं०

करेइ णाममेगे वेयावच्चं णो पडिच्छइ पडिच्छइ णाममेगे वेयावच्चं णो करेइ ४ ।
 ॥ ४०० ॥ चत्तारि पुरिसजाया प० तं० अठ्ठकरे णाममेगे णो माणकरे माणकरे
 णाममेगे णो अठ्ठकरे, एगे अठ्ठकरेवि माणकरेवि एगे णो अठ्ठकरे णो माणकरे,
 चत्तारि पुरिसजाया प० तं० गणठ्ठकरे णाममेगे णो माणकरे ४, च० पु० जा०
 प० तं० गणसंगहकरे णाममेगे णो माणकरे ४ । चत्तारि पुरिसजाया प० तं०
 गणसोभकरे णाममेगे णो माणकरे ४ । चत्तारि पुरिसजाया प० तं० गणसोहिकरे
 णाममेगे णो माणकरे ४ ॥ ४०१ ॥ चत्तारि पुरिसजाया प० तं० रुवं णाममेगे
 जहइ णो धम्मं धम्मं णाममेगे जहइ णो रुवं एगे रुवंपि जहइ धम्मंपि जहइ,
 एगे णो रुवं जहइ णो धम्मं, चत्तारि पुरिसजाया प० तं० धम्मं णाममेगे
 जहइ णो गणसंठिइं ४ । चत्तारि पुरिसजाया प० तं० पियधम्मं णाममेगे णो
 दढधम्मं दढधम्मं णाममेगे णो पियधम्मं, एगे पियधम्मंवि दढधम्मंवि एगे णो
 पियधम्मं णो दढधम्मं ॥ ४०२ ॥ चत्तारि आयरिया प० तं० पव्वावणायरिए
 णाममेगे णो उवट्ठावणायरिए उवट्ठावणायरिए णाममेगे णो पव्वावणायरिए, एगे
 पव्वावणायरिएवि उवट्ठावणायरिएवि, एगे णो पव्वावणायरिए णो उवट्ठावणाय-
 रिए, चत्तारि आयरिया प० तं० उद्देसणायरिए णाममेगे णो वायणायरिए ४
 धम्मायरिए सम्मत्तपओ णायव्वो ॥ ४०३ ॥ चत्तारि अंतेवासी प० तं० पव्वा-
 वणंतेवासी णाममेगे णो उवट्ठावणंतेवासी ४ जाव धम्मंतेवासी, चत्तारि अंतेवासी
 प० तं० उद्देसणंतेवासी णाममेगे णो वायणंतेवासी ४ ॥ ४०४ ॥ चत्तारि णिग्गंथा
 प० तं० रायणिए समणे निग्गंथे महाकम्मं महाकिरिए अणायावी असमिए धम्मस्स
 अणाराहए भवइ, रायणिए समणे निग्गंथे अप्पकम्मं अप्पकिरिए आयावी समिए
 धम्मस्स आराहए भवइ, ओमराइणिए समणे निग्गंथे महाकम्मं महाकिरिए अणा-
 यावी असमिए धम्मस्स अणाराहए भवइ, ओमराइणिए समणे निग्गंथे अप्पकम्मं
 अप्पकिरिए आयावी समिए धम्मस्स आराहए भवइ, चत्तारि निग्गंथीओ प० तं०
 राइणिया समणी निग्गंथी ४ एवं चेव, चत्तारि समणोवासगा प० तं० रायणिए
 समणोवासए महाकम्मं ४ तहेव, चत्तारि समणोवासियाओ प० तं० रायणिया सम-
 णोवासिया महाकम्मा तहेव चत्तारि गमा ॥ ४०५ ॥ चत्तारि समणोवासगा प०
 तं० अम्मापिइसमाणे भाइसमाणे मित्तसमाणे सबत्तिसमाणे । चत्तारि समणोवा-
 सगा प० तं० अद्दागसमाणे पडागसमाणे खाणुसमाणे खरकंटकसमाणे ॥ ४०६ ॥
 समणस्स णं भगवओ महावीरस्स समणोवासगाणं सोहम्मं कप्पे अरुणाभे विमाणे
 चत्तारि पल्लिओवमाइं ठिई प० ॥ ४०७ ॥ चउहिं ठाणेहिं अहुणोववन्ने देवे देवलोगेसु

इच्छेज्जा माणुसं लोगं हव्वमागच्छित्तए णो चेव णं संचाएइ हव्वमागच्छित्तए तं०
अहुणोववन्ने देवे देवलोगेसु दिव्वेसु कामभोगेसु मुच्छिए गिद्धे गडिए अज्झोववन्ने
से णं माणुस्सए कामभोगे णो आढाइ णो परियाणाइ णो अठुं वंधइ णो णियाणं
पगरेइ, णो ठिइप्पगणं पगरेइ, अहुणोववन्ने देवे देवलोगेसु दिव्वेसु कामभोगेसु
मुच्छिए ४ तस्स णं माणुस्सए पेमे वोच्छिण्णे दिव्वे पेमे संकंते भवइ, अहुणोववन्ने
देवे देवलोएसु दिव्वेसु कामभोगेसु मुच्छिए ४ तस्स णं एवं भवइ, इयहिं गच्छं
मुहुत्तेण गच्छं तेणं कालेणमप्पाउआ मणुस्सा कालधम्मणा संजुता भवन्ति, अहुणोव-
वन्ने देवे देवलोएसु दिव्वेसु कामभोगेसु मुच्छिए ४ तस्स णं माणुस्सए गंधे पडिकूले
पडिलोमे यावि भवइ, उद्धं पिय णं माणुस्सए गंधे जाव चत्तारिपंचजोयणसयाइं
हव्वमागच्छइ ४ इच्चेएहिं चउहिं ठाणेहिं अहुणोववन्ने देवे देवलोएसु इच्छेज्जा
माणुसं लोगं हव्वमागच्छित्तए णो चेव णं संचाएइ हव्वमागच्छित्तए ॥४०८॥ चउहिं
ठाणेहिं अहुणोववन्ने देवे देवलोएसु इच्छेज्जा माणुसं लोगं हव्वमागच्छित्तए संचा-
एइ हव्वमागच्छित्तए तं० अहुणोववन्ने देवे देवलोगेसु दिव्वेसु कामभोगेसु अमु-
च्छिए जाव अणज्झोववन्ने तस्स णं एवं भवइ अत्थि खलु मम माणुस्सए भवे
आयरिएइ वा उवज्झाएइ वा पवत्तीइ वा थेरेइ वा गणीइ वा गणहरेइ वा गणा-
वच्छेएइ वा जेसिं पभावेण मए इमा एयारूवा दिव्वा देविद्धी दिव्वा देवजुइ लद्धा
पत्ता अभिसमण्णागया तं गच्छामि णं ते भगवंते वंदामि जाव पज्जुवासामि, अहु-
णोववन्ने देवे देवलोएसु जाव अणज्झोववन्ने तस्स णं एवं भवइ एस णं माणुस्सए
भवे णाणीइ वा तवस्सीइ वा अइदुक्करदुक्करकारए तं गच्छामि णं भगवन्तं वंदामि
जाव पज्जुवासामि, अहुणोववन्ने देवे जाव अणज्झोववन्ने तस्स णं एवं भवइ अत्थि णं
मम माणुस्सए भवे मायाइ वा जाव सुण्हाइ वा तं गच्छामि णं तेसिमंतियं पाउब्भवामि
पासंतु ता मे इममेयारूवं दिव्वं देविद्धिं दिव्वं देवजुइ लद्धं पत्तं अभिसमण्णागयं,
अहुणोववन्ने देवे देवलोएसु जाव अणज्झोववन्ने तस्स णं एवं भवइ अत्थि णं मम
माणुस्सए भवे मित्तेइ वा सुहीइ वा सहीइ वा सहाएइ वा संगइए वा तेसिं च णं
अम्हे अण्णमण्णस्स संगारे पडिसुए भवइ, जो मे पुव्वि चयइ से संवोहियव्वे इच्चे-
एहिं जाव संचाएइ हव्वमागच्छित्तए ॥ ४०९ ॥ चउहिं ठाणेहिं लोगंधगारे सिया
तं० अरिहंतैहिं वोच्छिज्जमाणेहिं, अरिहंतपण्णत्ते धम्मे वोच्छिज्जमाणे पुव्वगए
वोच्छिज्जमाणे जायतेए वोच्छिज्जमाणे, चउहिं ठाणेहिं लोउज्जोए सिया तं० अरिहंतैहिं
जायमाणेहिं, अरिहंतैहिं पव्वयमाणेहिं, अरिहंताणं णाणुप्पायमहिमासु, अरिहंताणं
परिनिव्वाणमहिमासु, एवं देवंधगारे देवुज्जोए देवसन्निवाए देवुकलिया देवकहकहए,

चउहिं ठाणेहिं देविंदा माणुसं लोगं हव्वमागच्छंति, एवं जहा तिठाणे जाव लोगं-
 तिया देवा माणुस्सं लोगं हव्वमागच्छेज्जा तं० अरिहंतेहिं जायमाणेहिं जाव अरिहं-
 ताणं परिनिव्वाणमहिमासु ॥ ४१० ॥ चत्तारि दुहसेज्जाओ प० तं० तत्थ खलु
 इमा पढमा दुहसेज्जा से णं मुंडे भवित्ता अगाराओ अणगारियं पव्वइए निग्गंथे
 पावयणे संकिए कंखिए वित्तिगिच्छिए भेयसमावण्णे कलुससमावण्णे निग्गंथं पावयणं
 णो सदहइ णो पत्तियइ णो रोएइ, निग्गंथं पावयणं असदहमाणे अपत्तियमाणे अरोए-
 माणे मणं उच्चावयं नियच्छइ विणिघायमावज्जइ पढमा दुहसेज्जा, अहावरा दोच्चा
 दुहसेज्जा से णं मुंडे भवित्ता अगाराओ अणगारियं पव्वइए सएणं लाभेणं णो
 तुस्सइ परस्स लाभमासाएइ पीहेइ पत्थेइ अभिलसइ परस्स लाभमासाएमाणे
 जाव अभिलसमाणे मणं उच्चावयं नियच्छइ विणिघायमावज्जइ दोच्चा दुहसेज्जा,
 अहावरा तच्चा दुहसेज्जा, से णं मुंडे भवित्ता अगाराओ अणगारियं पव्वइए
 दिव्वे माणुस्सए कामभोगे आसाएइ जाव अभिलसइ दिव्वे माणुस्सए कामभोए
 आसाएमाणे जाव अभिलसमाणे मणं उच्चावयं नियच्छइ, विणिघायमावज्जइ तच्चा
 दुहसेज्जा, अहावरा चउत्था दुहसेज्जा से णं मुंडे भवित्ता जाव पव्वइए तस्स
 णमेवं भवइ जया णं अहमगारवासमावसामि तया णमहं संवाहणपरिमइणगायव्वमंग-
 गाउच्छोलणाइं लभामि जप्पभिइं च णं अहं मुंडे भवित्ता जाव पव्वइए तप्पभिइं-
 च णं अहं संवाहणं जाव गाउच्छोलणाइं णो लभामि से णं संवाहणं जाव गाउ-
 च्छोलणाइं आसाएइ जाव अभिलसइ से णं संवाहणं जाव गाउच्छोलणाइं आसाए-
 माणे जाव मणं उच्चावयं नियच्छइ विणिघायमावज्जइ चउत्था दुहसेज्जा ॥ ४११ ॥
 चत्तारि सुहसेज्जाओ प० तं० तत्थ खलु इमा पढमा सुहसेज्जा से णं मुंडे
 भवित्ता अगाराओ अणगारियं पव्वइए निग्गंथे पावयणे णिस्संकिए णिक्कंखिए,
 णिव्वित्तिगिच्छिए, णो भेयसमावण्णे णो कलुससमावण्णे निग्गंथं पावयणं सदहइ
 पत्तियइ रोएइ निग्गंथं पावयणं सदहमाणे पत्तियमाणे रोएमाणे णो मणं उच्चावयं
 नियच्छइ, णो विणिघायमावज्जइ पढमा सुहसेज्जा, अहावरा दोच्चा सुहसेज्जा से
 णं मुंडे भवित्ता जाव पव्वइए सएणं लाभेणं तुस्सइ, परस्स लाभं णो आसाएइ, णो
 पीहेइ, णो पत्थेइ, णो अभिलसइ, परस्स लाभमणासाएमाणे जाव अणभिलसमाणे
 णो मणं उच्चावयं नियच्छइ, णो विणिघायमावज्जइ, दोच्चा सुहसेज्जा, अहावरा
 तच्चा सुहसेज्जा, से णं मुंडे भवित्ता जाव पव्वइए दिव्वमाणुस्सए कामभोगे णो
 आसाएइ जाव णो अभिलसइ, दिव्वमाणुस्सए कामभोगे अणासाएमाणे जाव अण-
 भिलसमाणे णो मणं उच्चावयं नियच्छइ णो विणिघायमावज्जइ, तच्चा सुहसेज्जा,

अहावरा चउत्था सुहसेज्जा, से णं मुंडे भविता जाव पव्वइए तस्स णमेवं
भवइ जइ ताव अरिहंता भगवंता हट्ठा आरोग्गा बलिया कलसरीरा अनयराइं
ओरालाइं कल्लाणाइं विउलाइं पयत्ताइं पग्गहियाइं महाणुभागाइं कम्मक्खयकारणाइं
तवोकम्माइं पडिवज्जंति किमंगपुण अहं अब्भोवगमिओवक्कमियं वेयणं णो सम्मं
सहामि खमामि तितिक्खेमि अहियासेमि ममं च णं अब्भोवगमिओवक्कमियं सम्मम-
सहमाणस्स अखममाणस्स अतितिक्खमाणस्स अणहियासेमाणस्स किमण्णे कज्जइ ?
एगंतसो मे पावे कम्मे कज्जइ ममं च णं अब्भोवगमिओ जाव सम्मं सहमाणस्स
जाव अहियासेमाणस्स किमण्णे कज्जइ ? एगंतसो मे णिज्जरा कज्जइ, चउत्था सुह-
सेज्जा ॥ ४१२ ॥ चत्तारि अवायणिज्जा प० तं० अविणीए, विगईपडिवद्धे,
अविओसवियपाहुडे, मायी, चत्तारि वायणिज्जा प० तं० विणीए, अविगईपडिवद्धे,
विओसवियपाहुडे, अमायी ॥ ४१३ ॥ चत्तारि पुरिसजाया प० तं० आयंभरे
णाममेगे णो परंभरे, परंभरे णाममेगे णो आयंभरे, एगे आयंभरेवि परंभरेवि,
एगे णो आयंभरे णो परंभरे ॥ ४१४ ॥ चत्तारि पुरिसजाया प० तं० दुग्गए णाम-
मेगे दुग्गए, दुग्गए णाममेगे सुग्गए, सुग्गए णाममेगे दुग्गए, सुग्गए णाममेगे
सुग्गए, चत्तारि पुरिसजाया प० तं० दुग्गए णाममेगे दुव्वए, दुग्गए णाममेगे
सुव्वए, सुग्गए णाममेगे दुव्वए, सुग्गए णाममेगे सुव्वए, चत्तारि पुरिसजाया प०
तं० दुग्गए णाममेगे दुप्पडियाणंदे, दुग्गए णाममेगे सुप्पडियाणंदे ४ । चत्तारि
पुरिसजाया प० तं० दुग्गए णाममेगे दुग्गइगामी, दुग्गए णाममेगे सुगइगामी ४ ।
चत्तारि पुरिसजाया प० तं० दुग्गए णाममेगे दुग्गइं गए, दुग्गए णाममेगे सुगइं गए
॥ ४१५ ॥ चत्तारि पुरिसजाया प० तं० तमे णाममेगे तमे, तमे णाममेगे जोई,
जोई णाममेगे तमे, जोई णाममेगे जोई, चत्तारि पुरिसजाया प० तं० तमे णाममेगे
तमवले, तमे णाममेगे जोईवले, जोई णाममेगे तमवले, जोई णाममेगे जोईवले, चत्तारि
पुरिसजाया प० तं० तमे नाममेगे तमवलपलज्जणे, तमे नाममेगे जोईवलपलज्जणे,
४ ॥ ४१६ ॥ चत्तारि पुरिसजाया प० तं० परिण्णायकम्मे णाममेगे णो परिण्णायसण्णे,
परिण्णायसण्णे णाममेगे णो परिण्णायकम्मे, एगे परिण्णायकम्मेवि परिण्णायसण्णेवि,
एगे णो परिण्णायकम्मे णो परिण्णायसण्णे, चत्तारि पुरिसजाया प० तं० परिण्णाय-
कम्मे णाममेगे णो परिण्णायगिहावासे, परिण्णायगिहावासे णाममेगे णो परिण्णाय-
कम्मे ४ । चत्तारि पुरिसजाया प० तं० परिण्णायसण्णे णाममेगे णो परिण्णाय-
गिहावासे परिण्णायगिहावासे णाममेगे णो परिण्णायसण्णे ४ ॥ ४१७ ॥ चत्तारि
पुरिसजाया प० तं० इहत्ये णाममेगे णो परत्ये परत्ये णाममेगे णो इहत्ये ४ । चत्तारि

पुरिसजाया प० तं० एगेणं णाममेगे वड्डइ एगेणं हायइ, एगेणं णाममेगे वड्डइ दोहि हायइ, दोहिं णाममेगे वड्डइ एगेण हायइ, दोहिं णाममेगे वड्डइ दोहिं हायइ ॥ ४१८ ॥ चत्तारि कंथका प० तं० आइन्ने णाममेगे आइन्ने, आइन्ने णाममेगे खलुंके, खलुंके णाममेगे आइन्ने, खलुंके णाममेगे खलुंके, एवामेव चत्तारि पुरिसजाया प० तं० आइन्ने णाममेगे आइन्ने, चउभंगो । चत्तारि कंथका प० तं० आइन्ने णाममेगे आइन्नेत्ताए विहरइ, आइन्ने णाममेगे खलुंकेत्ताए विहरइ ४ । एवामेव चत्तारि पुरिसजाया प० तं० आइन्ने णाममेगे आइन्नेत्ताए विहरइ, चउभंगो । चत्तारि पकंथका प० तं० जाइसंपन्ने णाममेगे णो कुलसंपन्ने ४ । एवामेव चत्तारि पुरिसजाया प० तं० जाइसंपन्ने णाममेगे चउभंगो । चत्तारि कंथगा प० तं० जाइसंपन्ने णाममेगे णो बलसंपन्ने ४ । एवामेव चत्तारि पुरिसजाया प० तं० जाइसंपन्ने णाममेगे नो बलसंपन्ने ४ । चत्तारि कंथगा प० तं० जाइसंपन्ने णाममेगे णो रुवसंपन्ने ४ । एवामेव चत्तारि पुरिसजाया प० तं० जाइसंपन्ने णाममेगे णो रुवसंपन्ने ४ । चत्तारि कंथगा प० तं० जाइसंपन्ने णाममेगे णो जयसंपन्ने ४ । एवामेव चत्तारि पुरिसजाया प० तं० जाइसंपन्ने ४ । एवं कुलसंपन्नेण य बलसंपन्नेण य ४ । कुलसंपन्नेण य रुवसंपन्नेण य ४ । कुलसंपन्नेण य जयसंपन्नेण य ४ । एवं बलसंपन्नेण य रुवसंपन्नेण य ४ । बलसंपन्नेण य जयसंपन्नेण य ४ । सव्वत्थ पुरिसजाया पडिवक्खो, चत्तारि कंथगा प० तं० रुवसंपन्ने णाममेगे णो जयसंपन्ने ४ । एवामेव चत्तारि पुरिस० ॥ ४१९ ॥ चत्तारि पुरिसजाया प० तं० सीहत्ताए णाममेगे णिक्खंते सीहत्ताए विहरइ, सीहत्ताए णाममेगे णिक्खंते सियालत्ताए विहरइ, सियालत्ताए णाममेगे णिक्खंते सीहत्ताए विहरइ, सियालत्ताए णाममेगे णिक्खंते सियालत्ताए विहरइ ॥ ४२० ॥ चत्तारि लोगे समा प० तं० अपइठ्ठाणे णरए, जंजुहीवे दीवे, पालए जाणविमाणे, सव्वट्ठसिद्धे महाविमाणे, चत्तारि लोगे समा, सपक्खि सपडिदिसिं प० तं० सीमंतए णरए समयक्खेत्ते उडुविमाणे ईसिंपब्भारा पुढवी ॥ ४२१ ॥ उड्डलोए णं चत्तारि विसरीरा प० तं० पुढविकाइया आउवणस्सइका० उराला तसा पाणा, अहे लोगे णं चत्तारि विसरीरा प० तं० एवं चेव, एवं तिरियलो-एवि ४ ॥ ४२२ ॥ चत्तारि पुरिसजाया प० तं० हिरिसत्ते हिरिमणसत्ते चलसत्ते थिरसत्ते ॥ ४२३ ॥ चत्तारि सेज्जपडिमाओ प० चत्तारि वत्थपडिमाओ प० चत्तारि पायपडिमाओ प० चत्तारि ठाणपडिमाओ प० ॥ ४२४ ॥ चत्तारि सरीरगा जीवफुडा प० तं० वेउव्विए आहारगे तेयए कम्मए; चत्तारि सरीरगा कम्ममुम्मीसगा प० तं० ओरालिए वेउव्विए आहारगे तेयए ॥ ४२५ ॥ चउहिं अत्थिकाएहिं लोगे फुडे प० तं० धम्म-

त्थिकाएणं अधम्मत्थिकाएणं जीवत्थिकाएणं पोग्गलत्थिकाएणं । चउहिं बायरकाएहिं
 उववज्जमाणेहिं लोगे फुडे प० तं० पुढविकाइएहिं आउकाइएहिं वाउवणस्सइकाइएहिं ।
 चत्तारि पएसग्गेणं तुल्ला प० तं० धम्मत्थिकाए अधम्मत्थिकाए लोगागासे एगजीवे ।
 चउण्हमेगसरीरं नो सुपस्सं भवइ तं० पुढविआउतेउवणस्सइकाइयाणं ॥ ४२६ ॥
 चत्तारि इंदियत्था पुठ्ठा वेदेंति तं० सोइंदियत्थे घाणिंदियत्थे जिन्मिदियत्थे फासि-
 दियत्थे ॥ ४२७ ॥ चउहिं ठाणेहिं जीवा य पोग्गला य णो संचाएन्ति-वहिया लोगंता-
 गमण्याए तं० गइअभावेणं निरुवग्गहयाए लुक्खत्ताए लोगाणुभावेणं ॥ ४२८ ॥
 चउव्विहे णाए प० तं० आहरणे आहरणतद्देसे आहरणतद्देसे उवन्नासोवणाए ।
 आहरणे चउव्विहे प० तं० अवाए उवाए ठवणाकम्मे पडुप्पन्नविणासी । आहरण-
 तद्देसे चउव्विहे प० तं० अणुसिद्धी उवालंभे पुच्छा णिस्सावयणे । आहरणतद्देसे
 चउव्विहे प० तं० अधम्मजुत्ते पडिलोमे अंतोवणीए दुरुवणीए । उवण्णासोवणाए
 चउव्विहे प० तं० तव्वत्थुए तदन्नवत्थुए पडिणिमे हेऊ ॥ ४२९ ॥ चउव्विहे
 हेऊ प० तं० जावए थावए वंसए लूसए, अहवा हेऊ चउव्विहे प० तं०
 पच्चक्खे अणुमाणे ओवम्मे आगमे अहवा हेऊ चउव्विहे प० अत्थित्तं अत्थि सो
 हेऊ अत्थित्तं णत्थि सो हेऊ णत्थित्तं अत्थि सो हेऊ णत्थित्तं णत्थि सो हेऊ ॥ ४३० ॥
 चउव्विहे संखाणे प० तं० पडिकम्मं ववहारे रज्जू रासी ॥ ४३१ ॥ अहोलोगे णं
 चत्तारि अंधयारं करेंति तं० णरगा णेरइया पावाइं कम्माइं असुभा पोग्गला,
 तिरियलोगे णं चत्तारि उज्जोयं करेंति तं० चंदा सूरा मणी जोई, उड्डुलोगे णं
 चत्तारि उज्जोयं करेंति तं० देवा देवीओ विमाणा आभरणा ॥ ४३२ ॥ चउट्ठा-
 णस्स तइओदेसो समत्तो ॥

चत्तारि पसप्पगा प० तं० अणुप्पन्नाणं भोगाणं उप्पाएत्ता एगे पसप्पए,
 पुव्वुप्पन्नाणं भोगाणं अविप्पओगेणं एगे पसप्पए, अणुप्पण्णाणं सोक्खाणं उप्पाइत्ता
 एगे पसप्पए पुव्वुप्पण्णाणं सोक्खाणं अविप्पओगेणं एगे पसप्पए ॥ ४३३ ॥
 णेरइयाणं चउव्विहे आहारे प० तं० इंगालोवमे मुम्मुरोवमे सीयले हिमसीयले ।
 तिरिक्खजोणियाणं चउव्विहे आहारे प० तं० कंक्रोवमे विलोवमे पाणमंसोवमे
 पुत्तमंसोवमे । मणुस्साणं चउव्विहे आहारे, असणे पाणे खाइमे साइमे । देवाणं
 चउव्विहे आहारे प० तं० वण्णमंते गंधमंते रसमंते फासमंते ॥ ४३४ ॥
 चत्तारि जाइआसीविसा प० तं० विच्छुयजाइआसीविसे मंडुक्कजाइआसीविसे
 उरगजाइआसीविसे मणुस्सजाइआसीविसे । विच्छुयजाइआसीविसस्स णं भंते केवइए
 विसए प० ? पभूणं विच्छुयजाइआसीविसे अद्धभरहप्पमाणमेत्तं वोंदि विसेणं

विसपरिणयं विसट्टमाणि करेत्तए विसएसे विसट्टयाए नो चेव णं संपत्तीए करिंसु
वा करेति वा करिस्संति वा मंडुकजाइआसीविसस्स पुच्छा, पभूणं मंडुकजाइआसी-
विसे भरहप्पमाणमेत्तं वोदिं विसेणं विसपरिणयं विसट्टमाणि तं चेव जाव करिस्संति,
उरगजाइआसीविसस्स पुच्छा, पभूणं उरगजाइआसीविसे जंबुद्दीवप्पमाणमेत्तं
वोदिं विसेणं सेसं तं चेव जाव करिस्संति वा । मणुस्सजाइआसीविसपुच्छा, पभूणं
मणुस्सजाइआसीविसे समयक्खेत्तपमाणमेत्तं वोदिं विसेणं विसपरिणयं विसट्टमाणि
करेत्तए विसएसे विसट्टयाए नो चेव णं जाव करिस्संति वा ॥ ४३५ ॥ चउव्विहा
वाही प० तं० वाइए पित्तिए सिंभिए सन्निवाइए, चउव्विहा तिगिच्छा प० तं०
विज्जो ओसहाइं आउरे परियारए, चत्तारि तिगिच्छगा प० तं० आयतिगिच्छए
णाममेगे णो परतिगिच्छए परतिगिच्छए णाममेगे णो आयतिगिच्छए जाव चउ-
भंगो ॥ ४३६ ॥ चत्तारि पुरिसजाया प० तं० वणकरे णाममेगे णो वणपरिमासी,
वणपरिमासी णाममेगे णो वणकरे, एगे वणकरेवि वणपरिमासीवि, एगे णो वणकरे
णो वणपरिमासी, चत्तारि पुरिसजाया प० तं० वणकरे णाममेगे णो वणसारक्खी ४ ।
चत्तारि पुरिसजाया प० तं० वणकरे णाममेगे णो वणसंरोही ४ ॥ ४३७ ॥ चत्तारि
वणा प० तं० अंतो सल्ले णाममेगे णो बाहिंसल्ले ४ । एवामेव चत्तारि पुरिसजाया
प० तं० अंतो सल्ले णाममेगे णो बाहिंसल्ले ४ । चत्तारि वणा प० तं० अंतो दुट्ठे
णाममेगे णो बाहिंदुट्ठे, बाहिंदुट्ठे णाममेगे णो अंतो दुट्ठे ४ । एवामेव चत्तारि
पुरिसजाया प० तं० अंतो दुट्ठे णाममेगे णो बाहिंदुट्ठे ४ ॥ ४३८ ॥ चत्तारि पुरिस-
जाया प० तं० सेयंसे णाममेगे सेयंसे, सेयंसे णाममेगे पावंसे, पावंसे णाममेगे सेयंसे,
पावंसे णाममेगे पावंसे । चत्तारि पुरिसजाया प० तं० सेयंसे णाममेगे सेयंसेत्ति सालि-
सए सेयंसे णाममेगे पावंसेत्ति सालिसए ४ । चत्तारि पुरिसजाया प० तं० सेयंसेत्ति
णाममेगे सेयंसेत्ति मण्णइ, सेयंसेत्ति णाममेगे पावंसेत्ति मण्णइ ४ । चत्तारि पुरिसजाया
प० तं० सेयंसे णाममेगे सेयंसेत्ति सालिसए मन्नइ सेयंसे णाममेगे पावंसेत्ति सालिसए
मन्नइ ४ ॥ ४३९ ॥ चत्तारि पु० प० तं० आघवइत्ता णाममेगे णो परिभावइत्ता,
परिभावइत्ता णाममेगे णो आघवइत्ता ४ । चत्तारि पु० प० तं० आघवइत्ता णाम-
मेगे णो उंछजीवियासंपन्ने, उंछजीवियासंपन्ने णाममेगे णो आघवइत्ता ४ ॥ ४४० ॥
चउव्विहा रुक्खविगुव्वणा प० तं० पवाल्ताए पत्ताए पुप्फत्ताए फलत्ताए
॥ ४४१ ॥ चत्तारि वाइसमोसरणा प० तं० किरियावाई अकिरियावाई अण्णाणियावाई
वेणइयावाई, णेरइयाणं चत्तारि वाइसमोसरणा प० तं० किरियावाई जाव वेणइया-
वाई, एवमसुरकुमाराणवि जाव थणियइकुमाराणं, एवं विगलिंदियवज्जं जाव वेमाणि-

याणं ॥ ४४२ ॥ चत्तारि मेहा प० तं० गज्जिता णाममेगे णो वासित्ता, वासित्ता
 णाममेगे णो गज्जिता, एगे गज्जितावि वासित्तावि, एगे णो गज्जिता णो वासित्ता,
 एवामेव चत्तारि पु० प० तं० गज्जिता णाममेगे णो वासित्ता ४ । चत्तारि मेहा प०
 तं० गज्जिता णाममेगे णो विज्जुयाइत्ता, विज्जुयाइत्ता णाममेगे णो गज्जिता ४ ।
 एवामेव चत्तारि पु० प० तं० गज्जिता णाममेगे णो विज्जुयाइत्ता ४ । चत्तारि मेहा
 प० तं० वासित्ता णाममेगे णो विज्जुयाइत्ता ४ । एवामेव चत्तारि पु० प० तं०
 वासित्ता णाममेगे णो विज्जुयाइत्ता ४ । चत्तारि मेहा प० तं० कालवासी णाममेगे
 णो अकालवासी, अकालवासी णाममेगे णो कालवासी ४ । एवामेव चत्तारि पुरिस-
 जाया प० तं० कालवासी णाममेगे णो अकालवासी ४ । चत्तारि मेहा प० तं०
 खेत्तवासी णाममेगे णो अखेत्तवासी ४ । एवामेव चत्तारि पु० प० तं० खेत्तवासी
 णाममेगे णो अखेत्तवासी ४ । चत्तारि मेहा प० तं० जणइत्ता णाममेगे णो णिम्मव-
 इत्ता, णिम्मवइत्ता णाममेगे णो जणइत्ता ४ । एवामेव चत्तारि अम्मापियरो प०
 तं० जणइत्ता णाममेगे णो णिम्मवइत्ता ४ । चत्तारि मेहा प० तं० देसवासी णाम-
 मेगे णो सव्ववासी ४ । एवामेव चत्तारि रायाणो प० तं० देसाहिवई णाममेगे णो
 सव्वाहिवई ४ । चत्तारि मेहा प० तं० पुक्खलसंवट्टए पज्जुण्णे जीमूए जिम्हे ।
 पोक्खलसंवट्टए णं महामेहे एगेणं वासेणं दसवाससहस्साइं भावेइ, पज्जुण्णे णं महामेहे
 एगेणं वासेणं दसवाससयाइं भावेइ, जीमूए णं महामेहे एगेणं वासेणं दसवासाइं
 भावेइ, जिम्हे णं महामेहे बहुवासेहिं एगं वासं भावेइ वा ण भावेइ वा ॥ ४४३ ॥
 चत्तारि करंडगा प० तं० सोवागकरंडए वेसियाकरंडए गाहावइकरंडए रायकरंडए,
 एवामेव चत्तारि आयरिया प० तं० सोवागकरंडगसमाणे, वेसियाकरंडगसमाणे, गाहा-
 वइकरंडगसमाणे, रायकरंडगसमाणे ॥ ४४४ ॥ चत्तारि स्वखा प० तं० साले
 णाममेगे सालपरियाए साले णाममेगे एरंडपरियाए ४ । एवामेव चत्तारि आयरिया
 प० तं० साले णाममेगे सालपरियाए साले णाममेगे एरंडपरियाए एरंडे णाममेगे
 ४ । चत्तारि स्वखा प० तं० साले णाममेगे सालपरिवारे ४ । एवामेव चत्तारि
 आयरिया प० तं० साले णाममेगे सालपरिवारे ४ । गाहा सालदुममज्झगारे जह
 साले णाम होइ दुमराया, इय सुंदरआयरिए सुंदरसीसे मुणेयव्वे (१) एरंडमज्झ-
 गारे जह साले णाम होइ दुमराया, इय सुंदरआयरिए मंगुलसीसे मुणेयव्वे (२)
 सालदुममज्झयारे एरंडे णाम होइ दुमराया, इय मंगुलआयरिए सुंदरसीसे मुणेयव्वे
 (३) एरंडमज्झयारे, एरंडे णाम होइ दुमराया, इय मंगुलआयरिए मंगुलसीसे मुणे-
 यव्वे (४) ॥ ४४५ ॥ चत्तारि मच्छा प० तं० अणुसोयचारी पडिसोयचारी, अंतचारी

मज्झचारी, एवामेव चत्तारि भिक्खागा प० तं० अणुसोयचारी पडिसोयचारी अंत-
 चारी मज्झचारी ॥ ४४६ ॥ चत्तारि गोला प० तं० मधुसित्थगोले जडगोले
 दारुगोले मट्टियागोले, एवामेव चत्तारि पुरिसजाया प० तं० मधुसित्थगोलसमाणे ४ ।
 चत्तारि गोला प० तं० अयगोले तडगोले तंबगोले सीसगोले एवामेव चत्तारि पु०
 प० तं० अयगोलसमाणे जाव सीसगोलसमाणे ४ । चत्तारि गोला प० तं०
 हिरण्णगोले सुवण्णगोले रयणगोले वयरगोले एवामेव चत्तारि पुरिसजाया प० तं०
 हिरण्णगोलसमाणे जाव वयरगोलसमाणे ॥ ४४७ ॥ चत्तारि पत्ता प० तं० असि-
 पत्ते करपत्ते खुरपत्ते कलंवचीरियापत्ते, एवामेव चत्तारि पु० प० तं० असिपत्त-
 समाणे जाव कलंवचीरियापत्तसमाणे ॥ ४४८ ॥ चत्तारि कडा प० तं० सुंबकडे
 विदलकडे चम्मकडे कंबलकडे एवामेव चत्तारि पु० प० तं० सुंबकडसमाणे जाव
 कंबलकडसमाणे ॥ ४४९ ॥ चउव्विहा चउप्पया प० तं० एगखुरा दुखुरा गंडीपदा
 सणप्पदा, चउव्विहा पक्खी प० तं० चम्मपक्खी लोमपक्खी समुग्गपक्खी वियय-
 पक्खी । चउव्विहा खुद्दपाणा प० तं० वेइंदिया तेइंदिया चउरिंदिया संसुच्छिम-
 पंचिदियतिरिक्खजोणिया ॥ ४५० ॥ चत्तारि पक्खी प० तं० णिवइत्ता णाममेगे
 णो परिवइत्ता परिवइत्ता णाममेगे णो णिवइत्ता एगे णिवइत्तावि परिवइत्तावि एगे णो
 णिवइत्ता णो परिवइत्ता एवामेव चत्तारि भिक्खागा प० तं० णिवइत्ता णाममेगे णो
 परिवइत्ता ४-॥४५१॥ चत्तारि पुरिसजाया प० तं० णिक्कट्ठे णाममेगे णिक्कट्ठे णिक्कट्ठे
 णाममेगे अणिक्कट्ठे ४ । चत्तारि पुरिसजाया प० तं० णिक्कट्ठे णाममेगे णिक्कट्ठप्पा
 णाममेगे अबुहे ४ । चत्तारि पुरिसजाया प० तं० बुहे णाममेगे बुहे बुहे
 चत्तारि पुरिसजाया प० तं० बुहे णाममेगे बुहहियए ४ ।
 चउव्विहे संवासे प० तं० आयाणुकंपए णाममेगे णो पराणुकंपए ४ ॥ ४५२ ॥
 चउव्विहे संवासे प० तं० दिव्वे असुरे रक्खसे माणुसे, चउव्विहे संवासे प० तं०
 देवे णाममेगे देवीए सद्धिं संवासं गच्छइ देवे णाममेगे असुरीए सद्धिं संवासं
 गच्छइ असुरे णाममेगे देवीए सद्धिं संवासं गच्छइ असुरे णाममेगे असुरीए
 सद्धिं संवासं गच्छइ, चउव्विहे संवासे प० तं० देवे णाममेगे देवीए सद्धिं संवासं
 गच्छइ, देवे णाममेगे रक्खसीए सद्धिं संवासं गच्छइ, रक्खसे णाममेगे ० ४ ।
 चउव्विहे संवासे प० तं० देवे णाममेगे देवीए सद्धिं संवासं गच्छइ, देवे णाममेगे
 मणुस्सीहिं सद्धिं संवासं गच्छइ ४ । चउव्विहे संवासे प० तं० असुरे णाममेगे
 असुरीहिं सद्धिं संवासं गच्छइ, असुरे णाममेगे रक्खसीहिं सद्धिं संवासं गच्छइ ४
 चउव्विहे संवासे प० तं० असुरे णाममेगे असुरीए सद्धिं संवासं गच्छइ, असुरे

णाममेगे मणुस्सीए सद्धिं संवासं गच्छइ ४ । चउव्विहे संवासे प० तं० रक्खसे
 णाममेगे रक्खसीए सद्धिं संवासं गच्छइ, रक्खसे णाममेगे माणुस्सीए सद्धिं संवासं
 गच्छइ ४ ॥ ४५३ ॥ चउव्विहे अवद्धंसे प० तं० आसुरे आभियोगे संमोहे
 देवकिब्बिसे, चउहिं ठाणेहिं जीवा आसुरत्ताए कम्मं पकरेंति तं० कोहसीलयाए
 पाहुडसीलयाए संसत्ततवोक्कम्मेणं निमित्ताजीवयाए, चउहिं ठाणेहिं जीवा आभि-
 ओगत्ताए कम्मं पगरेंति तं० अत्तुक्कोसेणं परपरिवाएणं भूइकम्ममेणं कोउयकरणेणं ।
 चउहिं ठाणेहिं जीवा सम्मोहत्ताए कम्मं पगरेंति तं० उम्मग्गदेसणाए मग्गंतराएणं
 कामासंसपओगेणं भिज्जानियाणकरणेणं । चउहिं ठाणेहिं जीवा देवकिब्बिसियाए
 कम्मं पगरेंति तं० अरिहंताणं अवण्णं वयमाणे अरिहंतपण्णत्तस्स धम्मस्स अवण्णं
 वयमाणे, आयरियउवज्झायाणमवण्णं वयमाणे चाउवण्णस्स संघस्स अवण्णं
 वयमाणे ॥ ४५४ ॥ चउव्विहा पव्वज्जा प० तं० इहलोगपडिबद्धा परलोगपडि-
 बद्धा दुहंओ लोगपडिवद्धा अप्पडिवद्धा, चउव्विहा पव्वज्जा प० तं० पुरओपडिवद्धा
 मग्गओपडिवद्धा दुहओपडिवद्धा अप्पडिवद्धा, चउव्विहा पव्वज्जा प० तं० ओवाय-
 पव्वज्जा अक्खायपव्वज्जा संगारपव्वज्जा विहगगइपव्वज्जा चउव्विहा पव्वज्जा
 प० तं० तुयावइत्ता पुयावइत्ता मोयावइत्ता परिपूयावइत्ता, चउव्विहा पव्वज्जा
 प० तं० णडखइया भडखइया सीहखइया सीयालक्खइया, चउव्विहा किसी
 प० तं० वाविया परिवाविया णिंदिया परिणिंदिया एवामेव चउव्विहा पव्वज्जा
 प० तं० वाविया परिवाविया णिंदिया परिणिंदिया, चउव्विहा पव्वज्जा प० तं०
 धण्णपुंजियसमाणा धण्णविरल्लियसमाणा धण्णविक्खित्तसमाणा धण्णसंकट्टियसमाणा
 ॥ ४५५ ॥ चत्तारि सण्णाओ पण्णत्ताओ तं० आहारसण्णा भयसण्णा मेहुण-
 सण्णा परिग्गहसण्णा चउहिं ठाणेहिं आहारसण्णा समुप्पज्जइ तं० ओमको-
 ठयाए छुहावेयणिज्जस्स कम्मस्स उदएणं मईए तदट्ठोवओगेणं, चउहिं ठाणेहिं
 भयसण्णा समुप्पज्जइ तं० हीणसत्तयाए भयवेयणिज्जस्स कम्मस्स उदएणं मईए
 तदट्ठोवओगेणं, चउहिं ठाणेहिं मेहुणसण्णा समुप्पज्जइ तं० चियमंससोणिययाए
 मोहणिज्जस्स कम्मस्स उदएणं मईए तदट्ठोवओगेणं, चउहिं ठाणेहिं परिग्गहसण्णा
 समुप्पज्जइ तं० अविमुत्तयाए लोभवेयणिज्जस्स कम्मस्स उदएणं मईए तदट्ठोव-
 ओगेणं ॥ ४५६ ॥ चउव्विहा कामा सिंगारा कलुणा वीभच्छा रोद्धा, सिंगारा
 कामा देवाणं, कलुणा कामा मणुयाणं, वीभच्छा कामा तिरिक्खजोणियाणं,
 रोद्धा कामा णेरइयाणं ॥ ४५७ ॥ चत्तारि उदगा प० तं० उत्ताणे णाममेगे
 उत्ताणोदए उत्ताणे णाममेगे गंभीरोदए गंभीरे णाममेगे उत्ताणोदए गंभीरे णाममेगे

गंभीरोदए, एवामेव चत्तारि पुरिसजाया प० तं० उत्ताणे णाममेगे उत्ताणहियए
उत्ताणे णाममेगे गंभीरहियए ४ चत्तारि उदगा प० तं० उत्ताणे णाममेगे उत्ताणोभासी
उत्ताणे णाममेगे गंभीरोभासी ४ । एवामेव चत्तारि पुरिसजाया प० तं० उत्ताणे
णाममेगे उत्ताणोभासी, उत्ताणे णाममेगे गंभीरोभासी ४ । चत्तारि उदही प० तं०
उत्ताणे णाममेगे उत्ताणोदही, उत्ताणे णाममेगे गंभीरोदही ४ । एवामेव चत्तारि
पुरिसजाया प० तं० उत्ताणे णाममेगे उत्ताणहियए ४ । चत्तारि उदही प० तं० उत्ताणे
णाममेगे उत्ताणोभासी उत्ताणे णाममेगे गंभीरोभासी ४ । एवामेव चत्तारि पुरिसजाया
प० तं० उत्ताणे णाममेगे उत्ताणोभासी ४ ॥ ४५८ ॥ चत्तारि तरगा प० तं० समुदं
तरामित्ति एगे समुदं तरइ, समुदं तरामित्ति एगे गोप्पयं तरइ, गोप्पयं तरामित्ति एगे
४ । चत्तारि तरगा प० तं० समुदं तरित्ता णाममेगे समुदे विसीयइ, समुदं तरित्ता
णाममेगे गोप्पए विसीयइ ४ ॥ ४५९ ॥ चत्तारि कुंभा प० तं० पुण्णे णाममेगे पुण्णे
पुण्णे णाममेगे तुच्छे, तुच्छे णाममेगे पुण्णे तुच्छे णाममेगे तुच्छे, एवामेव चत्तारि
पुरिसजाया प० तं० पुण्णे णाममेगे पुण्णे ४ । चत्तारि कुंभा प० तं० पुण्णे णाममेगे
पुण्णोभासी, पुण्णे णाममेगे तुच्छोभासी ४ एवामेव चत्तारि पुरिसजाया प० तं० पुण्णे
णाममेगे पुण्णोभासी ४ । चत्तारि कुंभा प० तं० पुण्णे णाममेगे पुण्णरूवे पुण्णे
णाममेगे तुच्छरूवे ४ । एवामेव चत्तारि पुरिसजाया प० तं० पुण्णे णाममेगे
पुण्णरूवे ४ । चत्तारि कुंभा प० तं० पुण्णेवि एगे पियठ्ठे, पुण्णेवि एगे अवदले, तुच्छेवि
एगे पियठ्ठे तुच्छेवि एगे अवदले, एवामेव चत्तारि पुरिसजाया प० तं० पुण्णेवि
एगे पियठ्ठे ४ । तहेव, चत्तारि कुंभा प० तं० पुण्णेवि एगे विस्संदइ, पुण्णेवि एगे णो
विस्संदइ, तुच्छेवि एगे विस्संदइ, तुच्छेवि एगे णो विस्संदइ । एवामेव चत्तारि
पुरिसजाया प० तं० पुण्णेवि एगे विस्संदइ ४ तहेव । चत्तारि कुंभा प० तं० भिन्ने
जजरिए परिस्साई अपरिस्साई । एवामेव चउव्विहे चरित्ते प० तं० भिन्ने जाव
अपरिस्साई । चत्तारि कुंभा प० तं० महुकुंभे णाममेगे महुप्पिहाणे महुकुंभे णाममेगे
विसपिहाणे विसकुंभे णाममेगे महुप्पिहाणे विसकुंभे णाममेगे विसपिहाणे ४
एवामेव चत्तारि पुरिसजाया ४ । हिययमपावमकल्लसं जीहा वि य मhurभासिणी
णिच्चं, जंमि पुरिसंमि विज्जइ से मधुकुंभे महुपिहाणे (१) हिययमपावमकल्लसं,
जीहा वि य कडुयभासिणी णिच्चं, जंमि पुरिसंमि विज्जइ, से मधुकुंभे विसपिहाणे,
(२) जं हिययं कल्लसमयं जीहा वि य मधुरभासिणी णिच्चं, जंमि पुरिसंमि विज्जइ,
से विसकुंभे मधुपिहाणे (३) जं हिययं कल्लसमयं, जीहा वि य कडुयभासिणी
णिच्चं, जंमि पुरिसंमि विज्जइ, से विसकुंभे विसपिहाणे (४) ॥ ४६० ॥ चउ-

विहा उवसग्गा प० तं० दिव्वा माणुसा तिरिक्खजोणिया आयसंवेयणिज्जा ।
 दिव्वा उवसग्गा चउविहा प० तं० हासा पओसा वीमंसा पुढोवेमाया,
 माणुस्सा उवसग्गा चउविहा प० तं० हासा पाओसा वीमंसा कुसील-
 पडिसेवणया, तिरिक्खजोणिया उवसग्गा चउविहा प० तं० भया पदोसा
 आहारहेउं अवचलेणसारक्खणया, आयसंवेयणिज्जा उवसग्गा चउविहा
 प० तं० घट्टणया पवडणया थंभणया लेसणया ॥ ४६१ ॥ चउविहे कम्मे
 प० तं० सुभे णामं एगे सुभे, सुभे णाममेगे असुभे, असुभे० ४ । चउविहे कम्मे
 प० तं० सुभे णाममेगे सुभविवागे, सुभे णाममेगे असुभविवागे, असुभे णाममेगे
 सुभविवागे, असुभे णाममेगे असुभविवागे । चउविहे कम्मे प० तं० पगडीकम्मे,
 ठिइकम्मे, अणुभावकम्मे पदेसकम्मे ॥ ४६२ ॥ चउविहे संघे प० तं० समणा
 समणीओ सावगा साविगाओ ॥ ४६३ ॥ चउविहा बुद्धी प० तं० उप्पत्तिया
 वेणइया कम्मिया, पारिणामिया, चउविहा मई प० तं० उग्गहमई ईहामई
 अवायमई धारणामई अहवा चउविहा मई, अरंजरोदगसमाणा, वियरोदग-
 समाणा सरोदगसमाणा सागरोदगसमाणा ॥ ४६४ ॥ चउविहा संसारसंमा-
 चण्णगा जीवा प० तं० णेरइया तिरिक्खजोणिया मणुस्सा देवा, चउविहा सव्व-
 जीवा प० तं० मणजोगी वइजोगी कायजोगी अजोगी, अहवा चउविहा सव्वजीवा
 प० तं० इत्थिवेयगा पुरिसवेयगा णपुंसकवेयगा अवेयगा, अहवा चउविहा सव्व-
 जीवा प० तं० चक्खुदंसणी अचक्खुदंसणी ओहिदंसणी केवलदंसणी, अहवा चउ-
 विहा सव्वजीवा प० तं० संजया असंजया संजयासंजया णोसंजयाणोअसंजया
 ॥ ४६५ ॥ चत्तारि पुरिसजाया प० तं० मित्ते णाममेगे मित्ते, मित्ते णाममेगे अमित्ते,
 अमित्ते णाममेगे मित्ते, अमित्ते णाममेगे अमित्ते, चत्तारि पुरिसजाया प० तं० मित्ते
 णाममेगे मित्तरूवे चउभंगो ॥ ४६६ ॥ चत्तारि पुरिसजाया प० तं० मुत्ते णाममेगे
 मुत्ते मुत्ते णाममेगे अमुत्ते ४ । चत्तारि पुरिसजाया प० तं० मुत्ते णाममेगे मुत्तरूवे
 ४ ॥ ४६७ ॥ पंचिदियतिरिक्खजोणिया चउगइया चउआगइया प० तं० पंचिदिय-
 तिरिक्खजोणिया पंचिदियतिरिक्खजोणिएसु उववज्जमाणा णेरइएहिंतो वा, तिरिक्ख-
 जोणिएहिंतो वा, मणुस्सेहिंतो वा, देवेहिंतो वा उववज्जेज्जा, से चेव णं से पंचिदियति-
 रिक्खजोणिए पंचिदियतिरिक्खजोणियत्तं विप्पजहमाणे णेरइयत्ताए वा जाव देवत्ताए
 वा उवागच्छेज्जा, मणुस्सा चउगइया चउआगइया एवं चेव मणुस्सावि ॥ ४६८ ॥
 वेइंदिया णं जीवा असमारंभमाणस्स चउविहे संजमे कज्जइ तं० जिब्भामयाओ
 सोक्खाओ अववरोवेत्ता भवइ, जिब्भामएणं दुक्खेणं असंजोगेत्ता भवइ, फासामयाओ

सोक्खाओ अववरोवेत्ता भवइ, फासामयाओ दुक्खाओ असंजोगेता भवइ, बेइंदिया णं जीवा समारंभमाणस्स चउव्विहे असंजमे कज्जइ तं० जिब्भामयाओ सोक्खाओ ववरोविता भवइ जिब्भामएणं दुक्खेणं संजोगेता भवइ फासामयाओ सोक्खाओ ववरोविता भवइ फासामएणं दुक्खेणं संजोगेता भवइ ॥ ४६९ ॥ समदिट्ठियाणं णेरइयाणं चत्तारि किरियाओ पण्णत्ताओ तं० आरंभिया, परिग्गहिया मायावत्तिया, अपच्चक्खाणकिरिया, सम्मदिट्ठियाणमसुरकुमाराणं चत्तारि किरियाओ प० एवं चेव । एवं विगलेंदियवज्जं जाव वेमाणियाणं ॥ ४७० ॥ चउहिं ठाणेहिं संते गुणे णासेज्जा तं० कोहेणं पडिनिसेवेणं, अकयण्णुयाए, मिच्छत्ताहिणिवेसेणं । चउहिं ठाणेहिं संते गुणे दीवेज्जा तं० अब्भासवत्तियं, परछंदाणुवत्तियं, कज्जहेउं, कयपडिकइएइ वा; णेरइयाणं चउहिं ठाणेहिं सरीरुप्पत्ती सिया तं० कोहेणं माणेणं मायाए लोभेणं, एवं जाव वेमाणियाणं, णेरइयाणं चउठाणणिव्वत्तिए सरीरे तं० कोहनिव्वत्तिए जाव लोभनिव्वत्तिए, एवं जाव वेमाणियाणं । चत्तारि धम्मदारा प० तं० खंती मुत्ती अज्जवे मइवे ॥ ४७१ ॥ चउहिं ठाणेहिं जीवा णेरइयत्ताए कम्मं पगरेंति तं० महारंभयाए, महापरिग्गहयाए पंचिंदियवहेणं कुणिमाहारेणं, चउहिं ठाणेहिं जीवा तिरिक्खजोणियत्ताए कम्मं पगरेंति तं० साइल्लयाए नियडिल्लयाए अलियवयणेणं कूडतुलकूडमाणेणं, चउहिं ठाणेहिं जीवा मणुरसत्ताए कम्मं पगरेंति तं० पगइभइयाए पगइविणीययाए साणुक्कोसयाए अमच्छरियाए । चउहिं ठाणेहिं जीवा देवाउयत्ताए कम्मं पगरेंति तं० सरागसंजमेणं संजमासंजमेणं वालतवोक्कमेणं अकामणिज्जराए ॥ ४७२ ॥ चउव्विहे वज्जे प० तं० तते वितते घणे झुसिरे, चउव्विहे णट्टे प० तं० अंचिए रिभिए आरभडे भिसोले, चउव्विहे गेये प० तं० उक्खित्तए पत्तए मंदए रोविंदए, चउव्विहे मल्ले प० तं० गंथिमे वेढिमे पूरिमे संघाइमे चउव्विहे अलंकारे प० तं० केसालंकारे वत्थालंकारे मल्लालंकारे आभरणालंकारे, चउव्विहे अभिणए प० तं० दिट्ठंतिए पाडंसुए सामंतोवायणिए लोगमब्भावसिए ॥ ४७३ ॥ सणंकुमारमाहिंदेसु णं कप्पेसु विमाणा चउवण्णा प० तं० णीला लोहिया हालिद्दा सुक्किल्ला । महासुक्कसहस्सारेसु णं कप्पेसु देवाणं भवधारणिज्जा सरीरगा उक्कोसेणं चत्तारि रयणीओ उड्डं उच्चतेणं पण्णत्ता ॥ ४७४ ॥ चत्तारि उदगगब्भा प० तं० उस्सा महिया सीया उसिणा, चत्तारि उदगगब्भा प० तं० हेमगा अब्भसंथडा सीओसिणा पंचरुविया माहे उ हेमगा गब्भा फग्गुणे अब्भसंथडा, सीओसिणा उ चित्ते, वइसाहे पंचरुविया (१) चत्तारि माणुस्सीगब्भा प० तं० इत्थित्ताए पुरिसत्ताए णपुंसगत्ताए विवत्ताए अप्पं सुक्कं वहुं ओयं इत्थी तत्थ पजायइ, अप्पं ओयं

वहुं सुक्कं पुरिसो तत्थ पजायइ (१) दोण्हं पि रत्तसुक्काणं, तुल्लभावे नपुंसओ;
 इत्थीओतसमाओगे, विंवं तत्थ पजायइ (२) ॥ ४७५ ॥ उप्पायपुव्वस्स णं
 चत्तारि चूलियावत्थू प०, चउव्विहे कव्वे प० गज्जे पज्जे कत्थे गेए ॥ ४७६ ॥ णेरइ-
 याणं चत्तारि समुग्घाया प० तं० वेयणासमुग्घाए कसायसमुग्घाए मारणंतियसमु-
 ग्घाए वेउव्वियसमुग्घाए एवं वाउकाइयाणावि ॥ ४७७ ॥ अरहओ णं अरिट्ठनेमिस्स
 चत्तारि सया चोद्दसपुव्वीणं अजिणाणं जिणसंकासाणं सव्वक्खरसंनिवाईणं जिणो इव
 अवित्तहवागरमाणं उक्कोसिया चोद्दसपुव्विसंपया होत्था, समणस्स णं भगवओ
 महावीरस्स चत्तारि सया वाईणं सदेवमणुयासुराए परिसाए अपराजियाणं उक्कोसिया
 वाइसंपया होत्था ॥ ४७८ ॥ हेठ्ठिल्ला चत्तारि कप्पा अद्धचंदसंठाणसंठिया प० तं०
 सोहम्मो ईसाणे सणंकुमारे माहिंदे, मज्झिल्ला चत्तारि कप्पा पडिपुण्णचंदसंठाणसंठिया
 प० तं० बंभलोगे लंतए महासुक्के सहस्सारे, उवरिल्ला चत्तारि कप्पा अद्धचंदसंठाण-
 संठिया प० तं० आणए पाणए आरणे अञ्चुए ॥ ४७९ ॥ चत्तारि समुद्दा पत्तेयरसा
 प० तं० लवणोदए वरुणोदए खीरोदए घओदए, चत्तारि आवत्ता प० तं० खरावत्ते
 उन्नयावत्ते गूढावत्ते आमिसावत्ते, एवामेव चत्तारि कसाया प० तं० खरावत्तसमाणे कोहे
 उन्नयावत्तसमाणे माणे, गूढावत्तसमाणा माया, आमिसावत्तसमाणे लोभे । खरावत्त-
 समाणं कोहमणुपविट्ठे जीवे कालं करेइ णेरइएसु उव्वज्जइ, उन्नयावत्तसमाणं माणं एवं
 चेव गूढावत्तसमाणं मायमेवं चेव आमिसावत्तसमाणं लोभं अणुपविट्ठे जीवे कालं करेइ
 णेरइएसु उव्वज्जइ ॥ ४८० ॥ अणुराहा णक्खत्ते चउतारे प० पुव्वासाढे एवं चेव ।
 उत्तरासाढे एवं चेव ॥ ४८१ ॥ जीवा णं चउट्ठाणनिव्वत्तिए पोग्गले पावक्कम्मत्ताए
 चिणिसु वा चिणंति वा चिणिस्संति वा तं० णेरइयणिव्वत्तिए तिरिक्खजोणियणिव्व-
 त्तिए मणुस्सणिव्वत्तिए देवणिव्वत्तिए । एवं उव्वचिणिसु वा उव्वचिणंति वा उव्वचिणि-
 स्संति वा एवं चिणउव्वचिणवंधोदीरवेय तह णिज्जरा चेव ॥ ४८२ ॥ चउप्पएसिया
 खंधा अणंता प० चउप्पएसोगाढा पोग्गला अणंता प० चउसमयठिईया पोग्गला
 अणंता प० चउगुणकालगा पोग्गला अणंता जाव चउगुणलुक्खा पोग्गला अणंता
 प० ॥ ४८३ ॥ चउट्ठाणस्स चउत्थोद्देसो समत्तो ॥ चउट्ठाणं समत्तं ॥

पंचमहाणं

पंचमहव्वया प० तं० सव्वाओ पाणाइवायाओ वेरमणं, सव्वाओ मुसा-
 वायाओ वेरमणं, सव्वाओ अदिन्नादाणाओ वेरमणं, सव्वाओ मेहुणाओ वेरमणं,
 सव्वाओ परिग्गहाओ वेरमणं, पंचाणुव्वया प० तं० थूलाओ पाणाइवायाओ
 वेरमणं, थूलाओ मुसावायाओ वेरमणं, थूलाओ अदिन्नादाणाओ वेरमणं, थूलाओ

मेहुणाओ वेरमणं (सदारसंतोसे), इच्छापरिमाणे ॥ ४८४ ॥ पंच वण्णा प० तं०
 किण्हा नीला लोहिया हालिदा सुक्खिळा, **पंचरसा** प० तं० तित्ता कडुया कसाया
 अंबिला महुरा, **पंचकामगुणा** प० तं० सदा रुवा गंधा रसा फासा, पंचहिं
 ठाणेहिं जीवा सज्जंति तं० सदेहिं जाव फासेहिं, एवं रज्जंति मुच्छंति गिज्जंति
 अज्झोववज्जंति, पंचहिं ठाणेहिं जीवा विणिघायमावज्जंति तं० सदेहिं जाव फासेहिं,
 पंच ठाणा अपरिण्णाया जीवाणं अहियाए असुभाए अखमाए अणिस्सेयसाए
 अणाणुगामियत्ताए भवंति तं० सदा जाव फासा, पंचठाणा सुपरिण्णाया जीवाणं
 हियाए सुभाए जाव आणुगामियत्ताए भवंति तं० सदा जाव फासा, पंच ठाणा
 अपरिण्णाया जीवाणं दुग्गइगमणाए भवंति तं० सदा जाव फासा, पंचठाणा
 परिण्णाया जीवाणं सुगइगमणाए भवंति तं० सदा जाव फासा ॥ ४८५ ॥ पंचहिं
 ठाणेहिं जीवा दुग्गइं गच्छंति तं० पाणाइवाएणं जाव परिग्गहेणं, पंचहिं ठाणेहिं
 जीवा सोगइं गच्छंति तं० पाणाइवायवेरमणेणं जाव परिग्गहवेरमणेणं ॥ ४८६ ॥
 पंच **पडिमाओ** प० तं० भद्दा सुभद्दा महाभद्दा सव्वओभद्दा बहुत्तरपडिमा
 ॥ ४८७ ॥ पंच **थावरकाया** प० तं० इंदे थावरकाए विबे थावरकाए सिप्पे
 थावरकाए संमई थावरकाए पायावच्चे थावरकाए, पंच **थावरकायाहिवई** प० तं०
 इंदे थावरकायाहिवई, जाव पायावच्चे थावरकायाहिवई ॥ ४८८ ॥ पंचहिं ठाणेहिं
ओहिंदंसणे समुप्पज्जिउकामेवि तप्पडमयाए खंभाएज्जा तं० अप्पभूयं वा
 पुढविं पासित्ता तप्पडमयाए खंभाएज्जा, कुंथुरासिभूयं वा पुढविं पासित्ता तप्पड-
 मयाए खंभाएज्जा, महइमहालयं वा महोरगसरीरं पासित्ता तप्पडमयाए खंभाएज्जा,
 देवं वा महिद्धियं जाव महेसक्खं पासित्ता तप्पडमयाए खंभाएज्जा, पुरेसु वा
 पोराणाइं महइमहालयाइं महाणिहाणाइं पहीणसामियाइं पहीणसेउयाइं पहीण-
 गुत्तागाराइं उच्छिण्णसामियाइं उच्छिण्णसेउयाइं उच्छिण्णगुत्तागाराइं जाइं इमाइं
 गामागरणगरखेडकव्वडमंडवदोणमुहपट्टणासमसंवाहसंनिवेसेसु सिंघाडगतिगचउक्क-
 चचरचउम्मुहमहापहपहेसु णगरणिद्धमणेसु सुसाणसुण्णागारगिरिकंदरसंतिसेलोवट्ठा-
 वणभवणगिहेसु संनिक्खित्ताइं चिट्ठंति ताइं वा पासित्ता तप्पडमयाए खंभाएज्जा,
 इच्चेएहिं पंचहिं ठाणेहिं ओहिंदंसणे समुप्पज्जिउकामे तप्पडमयाए खंभाएज्जा ॥ ४८९ ॥
 पंचहिं ठाणेहिं केवलवरनाणदंसणे समुप्पज्जिउकामे तप्पडमयाए णो खंभाएज्जा तं०
 अप्पभूयं वा पुढविं पासित्ता तप्पडमयाए णो खंभाएज्जा सेसं तहेव जाव भवणगिहेसु
 संनिक्खित्ताइं चिट्ठंति ताइं वा पासित्ता तप्पडमयाए णो खंभाएज्जा, सेसं तहेव,
 इच्चेएहिं पंचहिं ठाणेहिं जाव णो खंभाएज्जा ॥ ४९० ॥ णेरइयाणं सरीरगा पंचवण्णा

पंचरसा प० तं० किण्हा जाव सुक्लिह तित्ता जाव मधुरा, एवं निरंतरं जाव वेमाणि-
याणं ॥ ४९१ ॥ पंच सरीरगा प० तं० ओरालिए वेउव्विए आहारए तेयए
कम्मए, ओरालियसरीरे पंचवण्णे पंचरसे प० तं० किण्हे जाव सुक्लिह, तित्ते जाव
महुरे, एवं जाव कम्मगसरीरे, सव्वे वि णं वादरवोदिधरा कलेवरा पंचवण्णा पंचरसा
दुग्धा अठ्ठासा ॥ ४९२ ॥ पंचहिं ठाणेहिं पुरिमपच्छिमगाणं जिणाणं **दुग्गमं**
भवइ तं० दुआइक्खं दुविभज्जं दुपस्सं दुतितिक्खं दुरणुचरं । पंचहिं ठाणेहिं
मज्झिमगाणं जिणाणं सुगमं भवइ तं० सुआइक्खं सुविभज्जं सुपस्सं सुतितिक्खं
सुरणुचरं ॥ ४९३ ॥ पंचठाणाइं समणेणं भगवया महावीरेणं समणाणं निग्गंथाणं
णिच्चं वणिण्याइं णिच्चं कित्तियाइं णिच्चं वुइयाइं णिच्चं पसत्थाइं णिच्चमब्भणु-
ण्णायाइं भवंति तं० खंती मुत्ती अज्जवे मद्दवे लाघवे, पंचठाणाइं समणाणं जाव
अब्भणुण्णायाइं भवंति तं० सच्चे संजमे तवे चियाए वंभचेरवासे ॥ ४९४ ॥
पंचठाणाइं समणाणं जाव अब्भणुण्णायाइं भवंति तं० उक्खित्तचरए णिक्खित्त-
चरए अंतचरए पंतचरए ल्हचरए, पंचठाणाइं जाव अब्भणुण्णायाइं भवंति तं०
अन्नायचरए अन्नवेलचरए मोणचरए संसट्ठकप्पिए तज्जायसंसट्ठकप्पिए, पंचठाणाइं
जाव अब्भणुण्णायाइं भवंति तं० उवनिहिए सुद्धेसणिए संखादत्तिए दिठ्ठलाभिए
पुठ्ठलाभिए, पंचठाणाइं जाव अब्भणुण्णायाइं भवंति तं० आयंबिलिए निव्वियए
पुरिमद्धिए परिमियपिंडवाइए भिन्नपिंडवाइए, पंचठाणाइं जाव अब्भणुण्णायाइं
भवन्ति तं० अरसाहारे विरसाहारे अंताहारे पंताहारे ल्हहाहारे, पंचठाणाइं जाव
भवन्ति तं० अरसजीवी विरसजीवी अंतजीवी पंतजीवी ल्हजीवी, पंचठाणाइं जाव
भवन्ति तं० तंजहा-ठाणाइए उक्कुडुआसणिए पडिमट्ठाइं वीरासणिए णेसज्जिए, पंचठाणाइं
जाव भवन्ति तं० दंडायइए लगंडसाइं आयावए अवाउडए अकंडुयए ॥ ४९५ ॥
पंचहिं ठाणेहिं समणे निग्गंथे **महानिज्जरे** महापज्जवसाणे भवइ तं० अगिलाए
आयरियवेयावच्चं करेमाणे एवं उवज्झायवेयावच्चं थेरवेयावच्चं तवस्सिवेयावच्चं
गिलाणवेयावच्चं करेमाणे, पंचहिं ठाणेहिं समणे निग्गंथे **महानिज्जरे** महापज्जवसाणे
भवइ तं० अगिलाए सेहवेयावच्चं करेमाणे, अगिलाए कुलवेयावच्चं करेमाणे, अगि-
लाए गणवेयावच्चं करेमाणे, अगिलाए संघवेयावच्चं करेमाणे, अगिलाए साहम्मिय-
वेयावच्चं करेमाणे ॥ ४९६ ॥ पंचहिं ठाणेहिं समणे निग्गंथे **साहम्मियं संभो-**
इयं विसंभोइयं करेमाणे णाइक्कमइ तं० सकिरियट्ठाणं पडिसेवित्ता भवति
पडिसेवित्ता णो आलोएइ आलोएत्ता णो पट्ठवेइ पट्ठवेत्ता णो णिव्विसइ जाइं
इमाइं थेराणं ठिइप्पकप्पाइं भवंति ताइं अइयंचिय २ पडिसेवेइ से हंद हं पडिसेवामि

किं मे थेरा करिस्संति ? पंचहिं ठाणेहिं समणे निग्गंथे साहम्मियं पारंचियं करेमाणे
 णाइक्कमइ तं० सकुले वसइ कुलस्स भेयाए अब्भुट्ठेत्ता भवइ, गणे वसइ गणस्स भेयाए
 अब्भुट्ठेत्ता भवइ हिंसप्पेही छिहप्पेही अभिक्खणं अभिक्खणं पसिणायतणाइं पउंजित्ता
 भवइ, आयरियउवज्झायस्स णं गणंसि पंचवुग्गहट्ठाणा प० तं० आयरियउवज्झाए
 णं गणंसि आणं वा धारणं वा नो सम्मं पउंजित्ता भवइ, आयरियउवज्झाए णं गणंसि
 आहाराइणियाए किइक्कम्मं णो सम्मं पउंजित्ता भवइ, आयरियउवज्झाए णं गणंसि जे
 सुयपज्जवजाए धारेन्ति ते काले २ णो सम्ममणुप्पवाएत्ता भवइ, आयरियउवज्झाए णं
 गणंसि गिलाणसेहवेयावच्चं णो सम्ममब्भुट्ठेत्ता भवइ, आयरियउवज्झाए णं गणंसि
 अणापुच्छियचारी यावि भवइ, णो आपुच्छियचारी, आयरियउवज्झायस्स णं गणंसि
 पंच अब्भुग्गहट्ठाणा प० तं० आयरियउवज्झाए णं गणंसि आणं वा धारणं वा सम्मं
 पउंजित्ता भवइ एवमहाराइणियाए सम्मं किइक्कम्मं पउंजित्ता भवइ, आयरियउवज्झाए
 णं गणंसि जे सुयपज्जवजाए धारेन्ति ते काले २ सम्ममणुपवाइत्ता एवं गिलाणसेहवेया-
 वच्चं सम्मं अब्भुट्ठित्ता भवइ, आयरियउवज्झाए णं गणंसि आपुच्छियचारी यावि भवइ,
 णो अणापुच्छियचारी ॥४९७॥ पंच निसिज्जाओ प० तं० उकुडुया गोदोहिया सम-
 पायपुया पलियंका अद्धपलियंका ॥४९८॥ पंच अज्जवट्ठाणा प० तं० साहुअज्जवं साहु-
 मइवं साहुलाघवं साहुखंती साहुमुत्ती ॥४९९॥ पंच विहा जोइसिया प० तं० चंदा सूरा
 गहा णक्खत्ता ताराओ ॥ ५०० ॥ पंच विहा देवा प० तं० भवियदव्वदेवा
 णरदेवा धम्मदेवा देवाइदेवा भावदेवा ॥ ५०१ ॥ पंचविहा परियारणा प०
 तं० कायपरियारणा फासपरियारणा रूवपरियारणा सइपरियारणा मणपरियारणा
 ॥ ५०२ ॥ चमरस्स णं असुरिंदस्स असुरकुमाररणो पंच अग्गमहिंसीओ प० तं०
 काली राई रयणी विज्जू मेहा, वलिस्स णं वइरोयणिंदस्स वइरोयणरणो पंच अग्ग-
 महिंसीओ प० तं० सुभा णिसुभा रंभा णिरंभा मयणा ॥ ५०३ ॥ चमरस्स णं असुरि-
 दस्स असुरकुमाररणो पंच संगामिया अणिया पंच संगामिया अणियाहिंवई प०
 तं० पायत्ताणिए पीढाणिए कुंजराणिए महिसाणिए रहाणिए, दुमे पायत्ताणियाहिंवई
 सोदामे आसराया पीढाणियाहिंवई कुंथू हत्थिराया कुंजराणियाहिंवई लोहियक्खे
 महिसाणियाहिंवई किण्णरे रहाणियाहिंवई, वलिस्स णं वइरोयणिंदस्स वइरोयणरणो
 पंच संगामिया अणिया पंच संगामिया अणियाहिंवई प० तं० पायत्ताणिए जाव
 रहाणिए, महादुमे पायत्ताणियाहिंवई महासोदामे आसराया पीढाणियाहिंवई
 मालंकारे हत्थिराया कुंजराणियाहिंवई महालोहिअक्खे महिसाणियाहिंवई किंपुरिसे
 रहाणियाहिंवई, धरणिदस्स णं णागिंदस्स नागकुमाररणो पंच संगामिया अणिया

पंच संगामिया अणियाहिवई प० तं० पायत्ताणिए जाव रहाणिए भइसेणे पायत्ताणि-
 याहिवई जसोधरे आसराया पीठाणियाहिवई सुदंसणे हत्थिराया कुंजराणियाहिवई
 नीलकंठे महिसाणियाहिवई आणंदे रहाणियाहिवई । भूयाणंदस्स नागकुमारिंदस्स
 नागकुमाररत्तो पंच संगामिया अणिया पंच संगामिया अणियाहिवई प० तं०
 पायत्ताणिए जाव रहाणिए, दक्खे पायत्ताणियाहिवई सुग्गीवे आसराया पीठा-
 णियाहिवई सुविक्रमे हत्थिराया कुंजराणियाहिवई सेयकंठे महिसाणियाहिवई णंदुत्तरे
 रहाणियाहिवई वेणुदेवस्स णं सुवण्णिंदस्स सुवन्नकुमाररत्तो पंच संगामिया अणिया
 पंच संगामिया अणियाहिवई प० तं० पायत्ताणिए एवं जहा धरणस्स तहा वेणुदेवस्स
 वि । वेणुदालियस्स य जहा भूयाणंदस्स, जहा धरणस्स तहा सव्वेसिं दाहिणिल्लानं
 जाव घोसस्स जहा भूयाणंदस्स तहा सव्वेसिं उत्तरिल्लानं जाव महाघोसस्स, सक्कस्स णं
 देविंदस्स देवरत्तो पंच संगामिया अणिया पंच संगामिया अणियाहिवई प० तं० पाय-
 त्ताणिए जाव उसभाणिए हरिणेगमेसी पायत्ताणियाहिवई वाऊ आसराया पीठाणि-
 याहिवई एरावणे हत्थिराया कुंजराणियाहिवई दामद्धी उसभाणियाहिवई माढरे रहा-
 णियाहिवई ईसाणस्स णं देविंदस्स देवरत्तो पंच संगामिया अणिया जाव पायत्ताणिए
 पीठाणिए कुंजराणिए उसभाणिए रहाणिए, लहुपरक्कमे पायत्ताणियाहिवई महावाऊ
 आसराया पीठाणियाहिवई पुप्फदंते हत्थिराया कुंजराणियाहिवई महादामद्धी उस-
 भाणियाहिवई महामाढरे रहाणियाहिवई जहा सक्कस्स तहा सव्वेसिं दाहिणिल्लानं जाव
 आरणस्स जहा ईसाणस्स तहा सव्वेसिं उत्तरिल्लानं जाव अञ्जुयस्स । सक्कस्स णं देवि-
 दस्स देवरत्तो अब्भितरपरिसाए देवाणं पंच पल्लिओवमाइं ठिई प० ईसाणस्स णं
 देविंदस्स देवरत्तो अब्भितरपरिसाए देवीणं पंच पल्लिओवमाइं ठिई प० ॥ ५०४ ॥ पंच
 विहा पडिहा प० तं० गइपडिहा ठिइपडिहा वंधणपडिहा भोगपडिहा बलवीरिय-
 पुरिसक्कारपरक्कमपडिहा ॥ ५०५ ॥ पंचविहे आजीवे प० तं० जाइआजीवे
 कुलाजीवे कम्माजीवे सिप्पाजीवे लिंगाजीवे ॥ ५०६ ॥ पंच रायक्कुहा प० तं०
 खग्गं छत्तं उप्पेसं उवाहणाओ वालवीयणी ॥ ५०७ ॥ पंचहिं ठाणेहिं छउमत्थे णं
 उदिण्णे परिसहोवसग्गे सम्मं सहेज्जा खमेज्जा तितिकखेज्जा अहियासेज्जा तं०
 उदिन्नक्कमे खलु अयं पुरिसे उम्मत्तगभूए तेण मे एस पुरिसे अक्कोसए वा अवह-
 सइ वा णिच्छोढेइ वा णिब्भच्छेइ वा वंधइ वा रुंधइ वा छविच्छेयं करेइ वा पमारं
 वा णेइ उद्वेइ वा वत्थं वा पडिग्गहं वा कंवलं वा पायपुच्छणमच्छिंदइ वा विच्छिंदइ
 वा भिंदइ वा अवहरइ वा जक्खाइठ्ठे खलु अयं पुरिसे तेण मे एस पुरिसे अक्कोसइ वा
 तहेव जाव अवहरइ वा ममं च णं तब्भववेयणिजे कम्मे उदिन्ने भवइ तेण मे एस

पुरिसे अक्रोसइ वा जाव अवहरइ वा ममं च णं सम्मं असहमाणस्स अखममाणस्स अतिविक्खमाणस्स अणहियासेमाणस्स किं मन्ने कज्जइ ? एगंतसो मे पावे कम्मे कज्जइ ममं च णं सम्मं सहमाणस्स जाव अहियासेमाणस्स किं मन्ने कज्जइ ? एगंतसो मे निज्जरा कज्जइ इच्चेएहिं पंचहिं ठाणेहिं छउमत्थे उदिन्ने परिसहोवसग्गे सम्मं सहेज्जा जाव अहियासेज्जा ॥ ५०८ ॥ पंचहिं ठाणेहिं केवली उदिन्ने परिसहोवसग्गे सम्मं सहेज्जा जाव अहियासेज्जा तं० खित्तचित्ते खलु अयं पुरिसे तेण मे एस पुरिसे अक्रोसइ वा तहेव जाव अवहरइ वा दित्तचित्ते खलु अयं पुरिसे तेण मे एस पुरिसे जाव अवहरइ वा जक्खाइठ्ठे खलु अयं पुरिसे तेण मे एस पुरिसे जाव अवहरइ वा ममं च णं तब्भववेयणिज्जे कम्मे उदिन्ने भवइ तेण मे एस पुरिसे जाव अवहरइ वा ममं च णं सम्मं सहमाणं खममाणं तित्तिक्खमाणं अहियासेमाणं पासित्ता बहवे अन्ने छउमत्था समणा निग्गंथा उदिन्ने परिसहोवसग्गे एवं सम्मं सहिस्संति जाव अहियासिस्संति इच्चेएहिं पंचहिं ठाणेहिं केवली उदिन्ने परिसहोवसग्गे सम्मं सहेज्जा जाव अहियासेज्जा ॥ ५०९ ॥ पंच हेऊ प० तं० हेउं न जाणइ हेउं न पासति हेउं ण वुज्झइ हेउं नाभिगच्छइ हेउमण्णाणमरणं मरइ, पंच हेऊ प० तं० हेउणा ण जाणइ जाव हेउणा अण्णाणमरणं मरइ, पंच हेऊ प० तं० हेउं जाणइ जाव हेउं छउमत्थमरणं मरइ, पंच हेऊ प० तं० हेउणा जाणइ जाव हेउणा छउमत्थमरणं मरइ, पंच अहेऊ प० तं० अहेउं न जाणइ जाव अहेउं छउमत्थमरणं मरइ, पंच अहेऊ प० तं० अहेउणा न जाणइ जाव अहेउणा छउमत्थमरणं मरइ, पंच अहेऊ प० तं० अहेउं जाणइ जाव अहेउं केवलिमरणं मरइ, पंच अहेऊ प० तं० अहेउणा ण जाणइ जाव अहेउणा केवलिमरणं मरइ ॥ ५१० ॥ केवलिस्स णं पंच अणुत्तरा प० तं० अणुत्तरे णाणे अणुत्तरे दंसणे अणुत्तरे चरित्ते अणुत्तरे तवे अणुत्तरे वीरिए ॥ ५११ ॥ पउमप्पहे णं अरहा पंच चित्ते होत्था तं० चित्ताहिं चुए चइत्ता गब्भं वक्कंते चित्ताहिं जाए चित्ताहिं मुंडे भवित्ता अगाराओ अणगारियं पव्वइए चित्ताहिं अणंतं अणुत्तरे णिन्वाधाए निरावरणे कसिणे पडिपुच्चे केवलवरनाणदंसणे समुप्पन्ने चित्ताहिं परिनिव्वुए । पुप्फदंतं णं अरहा पंच मूले होत्था मूलेणं चुए चइत्ता गब्भं वक्कंते, एवं चेव एएणं अभिलावेणं इमाओ गाहाओ अणुगंतव्वाओ ॥ पउमप्पभस्स चित्ता मूले पुण होइ पुप्फदंतस्स; पुव्वाइं आसाढा सीयलस्सुत्तर विमलस्स भद्दवया (१)- रेवइया अणंतजिणो पूसो धम्मस्स संतिणो भरणी, कुंथुस्स कत्तियाओ अरस्स तह रेवईओ य (२) मुणिसुव्वयस्स सवणो आसिणि नमिणो य नेमिणो चित्ता, पासस्स विसाहाओ पंच य हत्थुत्तरे वीरो (३) सेसं जहा आयारे ॥ ५१२ ॥ पंचमट्ठाणस्स पढमोइसो समत्तो ॥

नो कप्पइ निगंथाणं वा, निगंथीणं वा इमाओ उद्दिट्ठाओ गणियाओ वियंजि-
याओ पंच महण्णवाओ महाणईओ अंतो मासस्स दुब्बुत्तो वा, तिक्खुत्तो वा, उत्तरि-
त्तए वा संतरित्तए वा तं० गंगा जउणा सरऊ एरावई मही, पंचहिं ठाणेहिं कप्पइ तं०
भयंसि वा, दुब्बिक्खंसि वा, पव्वहेज्ज व णं कोई उदयोधंसि वा एज्जमाणंसि, महता
वा अणारिएहिं, णो कप्पइ णिगंथाणं वा णिगंथीणं वा पढमपाउसंसि गामाणुगामं
दूइज्जित्तए, पंचहिं ठाणेहिं कप्पइ तं० भयंसि वा दुब्बिक्खंसि वा जाव महता वा
अणारिएहिं, वासावासं पज्जोसवियाणं णो कप्पइ णिगंथाणं वा निगंथीणं वा गामाणु-
गामं दूइज्जित्तए, पंचहिं ठाणेहिं कप्पइ तं० णाणठ्याए दंसणठ्याए चरित्तठ्याए
आयरियउवज्जाया वा से वीसुंभेज्जा आयरियउवज्जायाणं वा वहिया वेयावच्चं करण-
याए ॥ ५१३ ॥ पंच अणुग्घाइमा प० तं० हत्थकम्मं करेमाणे मेहुणं पडिसेवेमाणे
राइभोयणं भुंजमाणे सागारियपिंडं भुंजमाणे रायपिंडं भुंजमाणे, पंचहिं ठाणेहिं
समणे निगंथे रायंतेउरमणुपविसमाणे नाइक्कमइ तं० णगरं सिया सव्वओ समंता
गुत्ते गुत्तदुवारे वहवे समणा निगंथा णो संचाएन्ति भत्ताए वा पाणाए वा निक्ख-
मित्तए वा पविसित्तए वा तेसिं विण्णवणठ्याए रायंतेउरमणुपविसेज्जा पाडिहारियं
वा पीढफलगसेज्जासंथारगं पच्चप्पिणमाणे रायंतेउरमणुपविसेज्जा हयस्स वा गयस्स
वा दुट्ठस्स आगच्छमाणस्स भीए रायंतेउरमणुपविसेज्जा परो वा णं सहसा वा
वलसा वा वाहाए गहाय रायंतेउरमणुपविसेज्जा वहिया व णं आरामगयं वा उज्जाण-
गयं वा रायंतेउरजणो सव्वओ समंता संपरिक्खवित्ता णं निविसेज्जा इच्चेएहिं पंचहिं
ठाणेहिं समणे निगंथे जाव णाइक्कमइ ॥ ५१४ ॥ पंचहिं ठाणेहिं इत्थी पुरिसेण
सद्धिं असंवसमाणी वि गव्वं धरेज्जा तं० इत्थी दुब्बियडा दुन्निसन्ना सुक्क-
पोग्गले अहिट्ठेज्जा, सुक्कपोग्गलसंसिट्ठे वा से वत्थे अंतो जोणीए अणुपविसेज्जा सयं
वा सा सुक्कपोग्गले अणुपविसेज्जा परो वा से सुक्कपोग्गले अणुपविसेज्जा सीओदगविय-
डेण वा से आयममाणीए सुक्कपोग्गले अणुपविसेज्जा, इच्चेएहिं पंचहिं ठाणेहिं जाव
धरेज्जा, पंचहिं ठाणेहिं इत्थी पुरिसेण सद्धिं संवसमाणी वि गव्वं नो
धरेज्जा तं० अप्पत्तजोवणा अइक्कंतजोवणा जाइव्वं गेलन्नपुट्ठा दोमणंसिया इच्चे-
एहिं पंचहिं ठाणेहिं इत्थी पुरिसेण सद्धिं संवसमाणी वि गव्वं नो धरेज्जा, पंचहिं
ठाणेहिं इत्थी पुरिसेण सद्धिं संवसमाणी वि गव्वं नो धरेज्जा तं०
निच्चोउआ अणोउआ वावन्नसोया वाविद्धसोया अणंगपडिसेविणी इच्चेएहिं पंचहिं
ठाणेहिं इत्थी पुरिसेण सद्धिं संवसमाणी वि गव्वं नो धरेज्जा, पंचहिं ठाणेहिं इत्थी
पुरिसेण सद्धिं संवसमाणी वि गव्वं नो धरेज्जा तं० उदुंसि णो णिगाम-

पडिसेविणी यावि भवइ, समागया वा से सुक्कपोग्गला पडिविद्धंसंति उदिन्ने वा से पित्त-
 सोणिए पुरा वा देवकम्मुणा पुत्तफले वा नो निदिठ्ठे भवइ इच्चेएहिं जाव णो
 धरेज्जा ॥ ५१५ ॥ पंचहिं ठाणेहिं निग्गंथा निग्गंथीओ य एगयओ ठाणं
 वा सेज्जं वा निसीहियं वा चेएमाणा णाइक्कमंति तं० अत्थेगइया निग्गंथा
 निग्गंथीओ य एगं महं अगामियं छिन्नावायं दीहमद्धं अडविमणुपविट्ठा तत्थेग-
 यओ ठाणं वा सेज्जं वा निसीहियं वा चेएमाणा णाइक्कमंति अत्थेगइया निग्गंथा २
 गामंसि वा णगरंसि वा जाव रायहाणिसि वा वासं उवागया एगइया जत्थ उवस्सयं
 लभंति एगइया णो लभंति तत्थेगयओ ठाणं वा जाव णाइक्कमंति अत्थेगइया
 निग्गंथा निग्गंथीओ य णागकुमारावासंसि वा सुवन्नकुमारावासंसि वा वासं उवा-
 गया तत्थेगयओ ठाणं वा जाव णाइक्कमंति, आमोसगा दीसंति ते इच्छंति निग्गंथीओ
 चीवरपडियाए पडिगाहेत्तए तत्थेगयओ ठाणं वा जाव णाइक्कमंति, जुवाणा दीसंति ते
 इच्छंति निग्गंथीओ मेहुणपडियाए पडिगाहेत्तए तत्थेगयओ ठाणं वा जाव णाइक्कमंति,
 इच्चेएहिं पंचहिं ठाणेहिं जाव णाइक्कमंति । पंचहिं ठाणेहिं समणे निग्गंथे अचेलेए
 सचेलियाहिं निग्गंथीहिं सद्धि संवसमाणे नाइक्कमइ तं० खित्तचित्ते समणे निग्गंथे
 निग्गंथेहिं अविज्जमाणेहिं अचेलो सचेलियाहिं निग्गंथीहिं सद्धि संवसमाणे नाइ-
 क्कमइ एवमेएणं गमएणं दित्तचित्ते जक्खाइठ्ठे उम्मायपत्ते निग्गंथीपव्वावियए समणे
 निग्गंथेहिं अविज्जमाणेहिं अचेलेए सचेलियाहिं निग्गंथीहिं सद्धि संवसमाणे णाइक्कमइ
 ॥ ५१६ ॥ पंच आसवदारा प० तं० मिच्छत्तं अविरई पमाओ कसाया जोगा,
 पंच संवरदारा प० तं० सम्मत्तं विरई अपमाओ अकसाइत्तं पसत्थजोगित्तं, पंच
 दंडा प० तं० अट्ठादंडे अणट्ठादंडे हिंसादंडे अकम्हादंडे दिट्ठिविपरियासियादंडे ।
 पंच किरियाओ प० तं० आरंभिया परिग्गहिया मायावत्तिया अपच्चक्खाणकिरिया
 मिच्छादंसणवत्तिया, मिच्छदिट्ठिनेरइयाणं पंच किरियाओ प० तं० आरंभिया
 जाव मिच्छादंसणवत्तिया एवं सव्वेसिं निरंतरं जाव मिच्छादिट्ठियाणं वेमाणियाणं ।
 णवरं विगलेंदिया मिच्छादिट्ठी न भञ्जंति सेसं तहेव पंच किरियाओ प० तं०
 काइया अर्हिगरणिया पाओसिया पारियावणिया पाणाइवायकिरिया, नेरइयाणं पंच
 एवं चेव निरंतरं जाव वेमाणियाणं, पंच किरियाओ प० तं० आरंभिया जाव मिच्छादं-
 सणवत्तिया णेरइयाणं पंच जाव वेमाणियाणं । पंच किरियाओ प० तं० दिट्ठिया
 पुट्ठिया पाडुच्चिया सामंतोवणिवाइया साहत्थिया एवं णेरइयाणं जाव वेमाणियाणं, पंच
 किरियाओ प० तं० णेसत्थिया आणवणिया वेयारणिया अणाभोगवत्तिया अणव-
 कंखवत्तिया, एवं जाव वेमाणियाणं, पंच किरियाओ प० तं० पेज्जवत्तिया दोसं-
 वत्तिया पओगकिरिया समुदाणकिरिया इरियावहिया एवं मणुस्साण वि सेसाणं

णत्थि ॥ ५१७ ॥ **पंच विहा परिण्णा** प० तं० उवहिपरिण्णा उवस्सयपरिण्णा
 क्रसायपरिण्णा जोगपरिण्णा भत्तपाणपरिण्णा ॥ ५१८ ॥ पंच विहे ववहारे प० तं०
 आगमे सुए आणा धारणा जीए, जहा से तत्थ आगमे सिया आगमेणं ववहारं पठु-
 वेज्जा, णो से तत्थ आगमे सिया जहा से तत्थ सुए सिया सुएणं ववहारं पठुवेज्जा
 णो से तत्थ सुए सिया एवं जाव जहा से तत्थ जीए सिया जीएणं ववहारं पठुवेज्जा
 इच्चेएहिं पंचहिं ववहारं पठुवेज्जा, आगमेणं जाव जीएणं जहा २ से तत्थ आगमे जाव
 जीए तहा २ ववहारं पठुवेज्जा से किमाहु भंते ! आगमवलिया सनणा णिग्गंथा ? इच्चेयं
 पंच विहं ववहारं जया जया जहिं जहिं तथा तथा तहिं तहिं अणिस्सिओवस्सियं सम्मं
 ववहरमाणे समणे णिग्गंथे आणाए आराहए भवइ ॥ ५१९ ॥ **संजयमणुस्साणं**
सुत्ताणं पंच जागरा प० तं० सद्दा जाव फासा संजयमणुस्साणं जागराणं पंच
 सुत्ता प० तं० सद्दा जाव फासा असंजयमणुस्साणं सुत्ताणं वा जागराणं वा पंच
 जागरा प० तं० सद्दा जाव फासा ॥ ५२० ॥ पंचहिं ठाणेहि जीवा रयं आइज्जंति
 तं० पाणाइवाएणं जाव परिग्गहेणं । पंचहिं ठाणेहिं जीवा रयं वमंति तं० पाणाइ-
 वायवेरमणेणं जाव परिग्गहवेरमणेणं । पंचमासियं णं भिक्खुपडिमं पडिचत्तस्स अण-
 गारस्स कप्पंति पंचदत्तीओ भोयणस्स पडिगाहेत्तए पंचपाणगस्स ॥ ५२१ ॥ पंच
 विहे उवघाए प० तं० उग्गमोवघाए उप्पायणोवघाए एसणोवघाए परिकम्मोवघाए
 परिहरणोवघाए **पंचविहा विसोही** प० तं० उग्गमविसोही उप्पायणविसोही
 एसणाविसोही परिकम्मविसोही परिहरणविसोही, **पंचहिं ठाणेहिं जीवा दुल्लभ-**
वोहियत्ताए कम्मं पगरेंति तं० अरिहंताणमवण्णं वदमाणे अरिहंतपण्णत्तस्स
 धम्मस्स अवण्णं वदमाणे आयरियउवज्झायाणमवण्णं वदमाणे चाउवण्णस्स संघस्स
 अवण्णं वदमाणे विविक्कतववंभचेराणं देवाणं अवण्णं वदमाणे, पंचहिं ठाणेहिं जीवा
सुलभवोहियत्ताए कम्मं पगरेंति, अरिहंताणं वण्णं वदमाणे, जाव विविक्कतव-
 वंभचेराणं देवाणं वण्णं वदमाणे ॥ ५२२ ॥ पंच **पडिसंलीणा** प० तं० सोइं-
 दियपडिसंलीणे जाव फासिंदियपडिसंलीणे, **पंच अपडिसंलीणा** प० तं० सोइं-
 दियअपडिसंलीणे जाव फासिंदियअपडिसंलीणे, **पंच विहे संवरे** प० तं०-
 सोइंदियसंवरे जाव फासिंदियसंवरे **पंचविहे असंवरे** प० तं० सोइंदियअसंवरे
 जाव फासिंदियअसंवरे ॥ ५२३ ॥ **पंचविहे संजमे** प० तं० सामाइयसंजमे छेदो-
 वट्ठावणियसंजमे परिहारविसुद्धियसंजमे सुहुमसंपरायसंजमे अहक्खायचरित्तसंजमे,
 एगिंदिया णं जीवा असमारंभमाणस्स पंचविहे संजमे कज्जइ तं० पुढाविकाइयसंजमे
 जाव वणस्सइकाइयसंजमे, एगिंदिया णं जीवा समारंभमाणस्स पंचविहे असंजमे

कज्जइ तं० पुढविकाइयअसंजमे जाव वणस्सइकाइयअसंजमे, पंचिंदिया णं जीवा असमारंभमाणस्स पंचविहे संजमे कज्जइ तं० सोइंदियसंजमे जाव फासिंदियसंजमे, पंचिंदिया णं जीवा समारंभमाणस्स पंचविहे असंजमे कज्जइ तं० सोइंदियअसंजमे जाव फासिंदियअसंजमे, सव्वपाणभूयजीवसत्ता णं असमारंभमाणस्स पंचविहे संजमे कज्जइ तं० एगिंदियसंजमे जाव पंचिंदियसंजमे, सव्वपाणभूयजीवसत्ता णं समारंभमाणस्स पंचविहे असंजमे कज्जइ तं० एगिंदियअसंजमे जाव पंचिंदियअसंजमे ॥५२४॥ पंच-
विहा तणवणस्सइकाइया प० तं० अग्गवीया मूलवीया पोरवीया खंधवीया वीयरुहा ॥ ५२५ ॥ पंचविहे आयारे प० तं० णाणायारे दंसणायारे चरित्ता-
यारे तवायारे वीरियायारे, पंचविहे आयारपक्कप्पे प० तं० मासिए उग्घाइए मासिए अणुग्घाइए चउमासिए उग्घाइए चउमासिए अणुग्घाइए आरोवणा,
आरोवणा पंचविहा प० तं० पठुविया ठविया कसिणा अकसिणा हाडहडा ॥ ५२६ ॥ जंबुद्दीवे दीवे मंदरस्स पव्वयस्स पुरच्छिमे णं सीयाए महानईए उत्तरेणं पंचवक्खारपव्वया प० तं० मालवंते चित्तकूडे पम्हकूडे णल्लिणकूडे एगसेले, जंबू-
मंदरस्स पुरओ सीयाए महाणईए दाहिणेणं पंचवक्खारपव्वया प० तं० तिकूडे वेसमणकूडे अंजणे मायंजणे सोमणसे, जंबूमंदरपव्वयस्स पच्चत्थिमेणं सीओयाए महाणईए दाहिणेणं पंचवक्खारपव्वया प० तं० विज्जुप्पमे अंकावई पम्हावई आसीविसे सुहावहे, जंबूमंदरस्स पच्चत्थिमेणं सीओयाए महाणईए उत्तरेणं पंच
वक्खारपव्वया प० तं० चंदपव्वए सूरपव्वए णागपव्वए देवपव्वए गंधमायणे, जंबूमंदरस्स दाहिणेणं देवकुराए कुराए पंचमहद्दहा प० तं० निसहदहे देवकुरुदहे सूरदहे सुलसदहे विज्जुप्पहदहे, जंबूमंदरउत्तरेणं उत्तरकुराए कुराए पंचमहद्दहा प०
तं० नीलवंतदहे उत्तरकुरुदहे चंददहे एरावणदहे मालवंतदहे, सव्वेवि णं वक्खारप-
व्वया सीयासीओयाओ महाणईओ मंदरं वा पव्वयंतेणं पंचजोयणसयाइं उद्धं उच्चत्तेणं पंचगाउयसयाइं उव्वेहेणं, धायइसंडे दीवे पुरत्थिमद्धेणं मंदरस्स पव्वयस्स पुरच्छिमेणं सीयाए महाणईए उत्तरेणं पंचवक्खारपव्वया प० तं० मालवंते एवं जहा जंबुद्दीवे तहा जाव पोक्खरवरदीवद्धुपच्चत्थिमद्धे वक्खारा दहा य वक्खारपव्व-
याणं उच्चत्तं भाणियव्वं, समयक्खेत्ते णं पंच भरहाइं पंच एरवयाइं एवं जहा चउठ्ठाणे विइए उद्देसे तहा एत्थवि भाणियव्वं जाव पंच मंदरा पंचमंदरचूलियाओ णवरं उडुयारा णत्थि ॥ ५२७ ॥ उसमे णं अरहा कोसलिए पंचधणुसयाइं उद्धं उच्चत्तेणं होत्था भरहे णं राया चाउरंतचक्कवट्ठी पंचधणुसयाइं उद्धं उच्चत्तेणं होत्था बाहुबली णं अणगारे एवं चेव । वभी णं अज्जा एवं चेव एवं सुंदरीवि, पंचहिं ठाणेहिं सुत्ते वि

वुज्जेज्जा तं० सद्देणं फासेणं भोयणपरिणामेणं णिइक्खएणं सुविणदंसणेणं, पंचहिं
 ठाणेहिं समणे णिग्गंथे णिग्गंथिं णिग्गहमाणे वा अवलंबमाणे वा
 णाइक्कमइ तं० णिग्गंथिं च णं अन्नयरे पसुजाइए वा पक्खीजाइए वा ओहाएज्जा
 तत्थ णिग्गंथे णिग्गंथिं णिग्गहमाणे वा अवलंबमाणे वा णाइक्कमइ णिग्गंथे णिग्गंथिं
 दुग्गंसि वा विसमंसि वा पक्खलमाणि वा पवडमाणि वा गेण्हमाणे वा अवलंबमाणे
 वा णाइक्कमइ णिग्गंथे णिग्गंथिं सेयंसि वा पंकंसि वा पणगंसि वा उदगंसि वा उक्क-
 स्समाणि वा उवुज्जमाणि वा णिग्गहमाणे वा अवलंबमाणे वा णाइक्कमइ णिग्गंथे
 णिग्गंथिं णावं आरुहमाणे वा ओरुहमाणे वा णाइक्कमइ खित्तइत्तं दित्तइत्तं जक्खाइत्तं
 उम्मायपत्तं उवसग्गपत्तं सार्हिगरणं सपायच्छित्तं जाव भत्तपाणपडियाइक्खियं
 अट्टजायं वा निग्गंथे णिग्गंथिं णिग्गहमाणे वा अवलंबमाणे वा णाइक्कमइ ॥ ५२८ ॥
 आयरियउवज्जायस्स णं गणंसि पंच अतिसेसा प० तं० आयरियउवज्जाए
 अंतोउवस्सयस्स पाए निगिज्झिय २ पप्फोडेमाणे वा पमज्जेमाणे वा णाइक्कमइ आय-
 रियउवज्जाए अंतो उवस्सयस्स उच्चारपासवणं विगिचमाणे वा विसोहेमाणे वा णाइ-
 क्कमइ आयरियउवज्जाए पभू इच्छा वेयावडियं करेज्जा इच्छा णो करेज्जा आयरिय-
 उवज्जाए अंतो उवस्सयस्स एगराई वा दुराई वा एगागी वसमाणे णाइक्कमइ । आय-
 रियउवज्जाए वार्हिं उवस्सयस्स एगराई वा दुराई वा वसमाणे णाइक्कमइ । पंचहिं
 ठाणेहिं आयरियउवज्जायस्स गणावक्कमणे प० तं० आयरियउवज्जाए गणंसि
 आणं वा धारणं वा नो सम्मं पउजित्ता भवइ, आयरियउवज्जाए गणंसि अहाराय-
 णियाए किइक्कम्मं वेणइयं नो सम्मं पउजित्ता भवइ, आयरियउवज्जाए गणंसि जे
 सुयपज्जवजाए धारित्ति ते काले णो सम्ममणुपवादेत्ता भवइ, आयरियउवज्जाए
 गणंसि सगणियाए वा परगणियाए वा निग्गंथीए बहिंलेसे भवइ, मित्ते णाइगणे वा से
 गणाओ अवक्कमेज्जा तेसिं संगहोवग्गहट्ठयाए गणावक्कमणे पण्णत्ते । पंच विहा
 इट्ठिमंता मणुस्सा प० तं० अरहंता चक्कवट्ठी वलदेवा वासुदेवा भावियप्पाणो
 अणगारा ॥ ५२९ ॥ पंचमट्ठाणस्स बिइओ उद्देसो समत्तो ॥

पंच अत्थिकाया प० तं० धम्मत्थिकाए अधम्मत्थिकाए आगासत्थिकाए
 जीवत्थिकाए पोग्गलत्थिकाए धम्मत्थिकाए अवन्ने अगंधे अरसे अफासे अरुवी
 अजीवे सासए अवट्ठिए लोगदव्वे से समासओ पंचविहे प० तं० दव्वओ खेत्तओ
 कालओ भावओ गुणओ दव्वओ णं धम्मत्थिकाए एगं दव्वं खेत्तओ लोगपमाणमेत्ते
 कालओ ण कयाइ णासी न कयाइ न भवइ न कयाइ न भविस्सइत्ति भुविं भवइ
 य भविस्सइ य धुवे णित्तिए सासए अक्खए अव्वए अवट्ठिए णिच्चे, भावतो अवन्ने

अगंधे अरसे अफासे, गुणओ गमणगुणे य (१) अवम्मत्थिकाए अवन्ने एवं चेव
 नवरं गुणओ ठाणगुणे (२) आगासत्थिकाए अवन्ने एवं चेव णवरं खेत्तओ लोका-
 लोगप्पमाणमित्ते गुणओ अवगाहणागुणे सेसं तं चेव (३) जीवत्थिकाए णं अवन्ने
 एवं चेव णवरं दव्वओ णं जीवत्थिकाए अणंताइं दव्वाइं, अरुवी जीवे सासए, गुणओ
 उवओगगुणे, सेसं तं चेव (४) पोम्मलत्थिकाए पंचवन्ने पंचरसे दुगंधे अठ्ठफासे
 रूवी अजीवे सासए अवट्ठिए जाव दव्वओ णं पोम्मलत्थिकाए अणंताइं दव्वाइं,
 खेत्तओ लोगप्पमाणमेत्ते, कालओ ण कयाइ णासी जाव णिचे भावओ वण्णमंते
 गंधमंते रसमंते फासमंते, गुणओ गहणगुणे ॥ ५३० ॥ पंच गईओ प० तं०
 निरयगई तिरियगई मणुयगई देवगई सिद्धिगई । पंच इंदियत्था प० तं० सोइं-
 दियत्थे जाव फासिदियत्थे पंच मुंडा प० तं०-सोइंदियमुंडे जाव फासिदियमुंडे,
 अहवा पंच मुंडा प० तं० कोहमुंडे, माणमुंडे, मायामुंडे, लोभमुंडे, सिरमुंडे
 ॥ ५३१ ॥ अहे लोणे णं पंच वायरा प० तं० पुढविकाइया आउ० वाउ० वणस्सइ-
 काइया उराला तसा पाणा ॥ उड्डुलोगे णं पंच वायरा, एए चेव, तिरियलोगे णं
 पंच वायरा प० तं० एगिंदिया जाव पंचिदिया । पंच विहा वादरतेउकाइया प० तं०
 इंगाले जाला मुम्मुरे अच्ची अलाए, वादरवाउकाइया पंचविहा प० तं० पाईण-
 वाए पडीणवाए उदीणवाए दाहिणवाए विदिसिवाए पंचविहा अचित्ता वाउ-
 काइया प० तं० अक्कंते थंते पीलिए सरीराणुणए संमुच्छिमे ॥ ५३२ ॥ पंच
 नियंठा प० तं० पुलाए वउसे कुसीले नियंठे सिणाए । पुलाए पंच विहे प०
 तं० णाणपुलाए दंसणपुलाए चरित्तपुलाए लिगपुलाए अहासुहुमपुलाए नामं पंचमे ।
 वउसे पंचविहे प० तं० आभोगवउसे अणाभोगवउसे संवुडवउसे असंवुडवउसे
 अहासुहुमवउसे णामं पंचमे । कुसीले पंचविहे प० तं० णाणकुसीले दंसण-
 कुसीले चरित्तकुसीले लिगकुसीले अहासुहुमकुसीले णामं पंचमे । नियंठे पंचविहे
 प० तं० पढमसमयनियंठे अपढमसमयनियंठे चरिमसमयनियंठे अचरिमसमयनियंठे
 अहासुहुमनियंठे णामं पंचमे । सिणाए पंच विहे प० तं० अच्छवी असबले अक-
 म्मंसे संसुद्धणाणदंसणधरे अरहा जिणे केवली अपरिस्सावी ॥ ५३३ ॥ कप्पइ
 निगंथाणं वा निगंथीणं वा पंचवत्थाइं धारेत्तए वा परिहरित्तए वा तं० जंगिए
 खोमिए साणए पोत्तिए तिरीडपट्टए णामं पंचमे । कप्पइ निगंथाण वा निगंथीण वा
 पंच रयहरणाइं धारित्तए वा परिहरित्तए वा, तंजहा-उण्णिणए उट्टिए साणए पच्चा-
 पिच्चियए मुंजापिच्चिए णामं पंचमे ॥ ५३४ ॥ धम्मं चरसाणस्स पंच निस्सा-
 टाणा प० तं० छक्काए गणो राया गिहवई सरीरं । पंच णिही प० तं०

पुत्तणिही मित्तिणिही सिप्पणिही धणणिही धन्नाणिही पंचविहे सोए प० तं०
 पुढविसोए आउसोए तेउसोए मंतसोए वंभसोए, पंचठाणाई छउमत्थे सव्व-
 भावेणं ण जाणइ ण पासइ तं० धम्मत्थिकायं अधम्मत्थिकायं आगासत्थि-
 कायं जीवं असरीरपडिवद्धं परमाणुपोग्गलं, एयाणि चेव उप्पण्णणाणदंसणधरे अरहा
 जिणे केवली सव्वभावेणं जाणइ पासइ धम्मत्थिकायं जाव परमाणुपोग्गलं । अहे
 लोणे णं पंच अणुत्तरा महइमहालया महाणिरया प० तं० काले महाकाले रोरुए
 महारोरुए अप्पइठ्ठाणे, उड्डुलोगे णं पंच अणुत्तरा महइमहालया महाविमाणा
 प० तं० विजये वेजयंते जयंते अपराजिए सव्वठुसिद्धे ॥ ५३५ ॥ पंच पुरिस-
 जाया प० तं० हिरिसत्ते हिरिमणसत्ते चलसत्ते थिरसत्ते उदयणसत्ते पंच मच्छा
 प० तं० अणुसोयचारी पडिसोयचारी अंतचारी मज्झचारी सव्वचारी, एवामेव पंच
 भिक्खागा प० तं० अणुसोयचारी जाव सव्वसोयचारी पंच वणीमगा प० तं०
 अतिहिवणीमए किवणवणीमए माहणवणीमए साणवणीमए समणवणीमए । पंचहिं
 ठाणेहिं अचेले पसत्थे भवइ तं० अप्पा पडिलेहा लाघविए पसत्थे रुवेवेसा-
 सिए तवे अणुण्णाए विउले इंदियनिग्गहे पंच उक्कला प० तं० दंडुकले रज्जुकले
 तेणुकले देसुकले सव्वुकले पंच समिईओ प० तं० इरियासमिई भासा जाव
 पारिठावणियासमिई ॥ ५३६ ॥ पंचविहा संसारसमावन्नगा जीवा प० तं०
 एगिंदिया जाव पंचिंदिया, एगिंदिया पंचगइया पंचागइया प० तं० एगिंदिए एगिं-
 दिएसु उववज्जमाणे एगिंदिएहिंतो वा जाव पंचिंदिएहिंतो वा उववज्जेजा से चेव णं
 से एगिंदिए एगिंदियत्तं विप्पजहमाणे एगिंदियत्ताए वा जाव पंचिंदियत्ताए वा
 गच्छेज्जा, वेईंदिया पंचगइया पंचागइया एवं चेव, एवं जाव पंचिंदिया पंचगइया
 पंचागइया प० तं० पंचिंदिया जाव गच्छेज्जा ॥ ५३७ ॥ पंचविहा सव्वजीवा
 प० तं० कोहकसाई जाव लोभकसाई अकसाई, अहवा पंचविहा सव्वजीवा प० तं०
 नेरइया जाव देवा सिद्धा, अह भंते ! कलमसूरतिलमुग्गमासणिप्फावकुलत्थआलि-
 संदगसईणपलिसंथगाणं एएसि णं धन्नाणं कुट्टाउत्ताणं जहा सालीणं जाव केवइयं
 कालं जोणी संचिठ्ठइ ? गोयमा ! जहण्णेणं अंतोमुहुत्तं उक्कोसेणं पंच संवच्छराई,
 तेण परं जोणी पमिलायइ जाव तेण परं जोणीवोच्छेदे पण्णत्ते ॥ ५३८ ॥ पंच
 संवच्छरा प० तं० णक्खत्तसंवच्छरे जुगसंवच्छरे पमाणसंवच्छरे लक्खणसंव-
 च्छरे सणिचरसंवच्छरे, जुगसंवच्छरे पंचविहे प० तं० चंदे चंदे अभिवद्धिए
 चंदे अभिवद्धिए चेव, पमाणसंवच्छरे पंचविहे प० तं० णक्खत्ते चंदे उळ
 आइचे अभिवद्धिए लक्खणसंवच्छरे पंचविहे प० तं० समगं नक्खत्ता जोगं

जोयंति समगं उऊ परिणमंति; णच्चुण्हं णाइसीओ बहूदओ होइ णक्खत्ते (१)
 ससिसगलपुण्णमासी जोएइ विसमचारिणक्खत्ते कडुओ बहूदओ या तमाहु संवच्छरं
 चंदं (२) विसमं पवाल्लिणो परिणमंति, अणुदूस्स देंति पुप्फफलं; वासं ण सम्म वासइ
 तमाहु संवच्छरं कम्मं (३) पुढविदगाणं तु रसं पुप्फफलाणं तु देइ आदिच्चो;
 अप्पेण वि वासेणं सम्मं निप्फज्जे सस्सं (४) आइच्चतेयतविया खणलवदिवसा
 उऊ परिणमंति; पूरिति रेणुथलयाइं, तमाहु अभिवद्धियं जाण ५ (५३९) **पंच-**
विहे जीवस्स निज्जाणमग्गे प० तं० पाएहिं ऊहहिं उरेणं सिरेणं सव्वंगेहिं
 पाएहिं निज्जाणमाणे णिरयंगामी भवइ ऊहहिं णिज्जाणमाणे तिरियगामी भवइ
 उरेणं णिज्जाणमाणे मणुयगामी भवइ सिरेणं णिज्जाणमाणे देवगामी भवइ सव्वंगेहिं
 णिज्जाणमाणे सिद्धिगइपज्जवसाणे पण्णत्ते, **पंचविहे छेयणे** प० तं० उप्पायच्छेयणे
 वियच्छेयणे बंधच्छेयणे पएसच्छेयणे दोधारच्छेयणे, **पंचविहे आणंतरिए**
 प० तं० उप्पायणंतरिए वियणंतरिए पएसणंतरिए समयणंतरिए सामण्णाणंतरिए ।
पंचविहे अणंतए प० तं० णामणंतए ठवणाणंतए दव्वाणंतए गणणाणंतए पए-
 साणंतए, अहवा **पंचविहे अणंतए** प० तं० एगओऽणंतए दुहओणंतए देस-
 वित्थाराणंतए सव्ववित्थाराणंतए सासयाणंतए ॥ ५४० ॥ **पंचविहे णाणे** प० तं०
 आभिणिबोहियणाणे सुयणाणे ओहिणाणे मणपज्जवणाणे केवलणाणे **पंचविहे**
णाणावरणिज्जे कस्से प० तं० अभिणिबोहियणाणावरणिज्जे जाव केवलणाणा-
 वरणिज्जे, **पंचविहे सज्झाए** प० तं० वायणा पुच्छणा परियट्ठणा अणुप्पेहा धम्मकहा,
पंचविहे पच्चक्खाणे प० तं० सद्दहणसुद्धे विणयसुद्धे अणुभासणासुद्धे अणुपालणा-
 सुद्धे भावसुद्धे **पंचविहे पडिक्कमणे** प० तं० आसवदारपडिक्कमणे मिच्छत्तपडि-
 क्कमणे कसायपडिक्कमणे जोगपडिक्कमणे भावपडिक्कमणे **पंचहिं ठाणेहिं सुत्तं**
वाएज्जा तं० संगहट्ठयाए उवग्गहणट्ठयाए निज्जरणट्ठयाए सुत्ते वा मे पज्जवयाए भवि-
 स्सइ सुत्तस्स वा अवोच्छित्तिणयट्ठयाए **पंचहिं ठाणेहिं सुत्तं सिक्खिज्जा** तं०
 णाणट्ठयाए दंसणट्ठयाए चरित्तट्ठयाए वुग्गहविमोयणट्ठयाए अहत्थे वा भावे जाणि-
 स्सामीति कडु, सोहम्मीसाणेसु णं कप्पेसु विमाणा पंचवण्णा प० तं० किण्हा जाव
 सुक्खिज्जा (१) सोहम्मीसाणेसु णं कप्पेसु विमाणा पंचजोयणसयाइं उड्ढं उच्चत्तेणं प०
 (२) वंमलोगलंतएसु णं कप्पेसु देवाणं भवधारणिज्जसरीरगा उक्कोसेणं पंचरयणीओ
 उड्ढं उच्चत्तेणं प० (३) णेरइया णं पंचवण्णे पंचरसे पोग्गले बंधेसु वा बंधंति वा
 बंधिस्संति वा तं० किण्हे जाव सुक्खिल्ले, तित्ते जाव मधुरे, एवं जाव वेमाणिया
 ॥ ५४१ ॥ जंबुदीवे दीवे मंदरस्स पव्वयस्स दाहिणेणं गंगामहाणइं पंचमहाणइंओ

समप्पेति तं० जउणा सरऊ आदी कोसी मही (१) जंवूमंदरस्स दाहिणेणं सिधुम-
 हाणइं पंचमहाणदीओ समप्पेति तं० सयद्दू विभासा वितत्था एरावती चंदभागा (२)
 जंवूमंदरस्स उत्तरेणं रत्तामहानइं पंचमहाणइंओ समप्पेति तं० किण्हा महाकिण्हा
 नीला महानीला महातीरा (३) जंवूमंदरस्स उत्तरेणं रत्तावइं महाणइं पंचमहा-
 णइंओ समप्पेति तं० इंदा इंदसेणा सुसेणा वारिसेणा महाभोया (४) ॥ ५४२ ॥
पंच तित्थयरा कुमारवासमज्जे वसित्ता मुंडा जाव पव्वइया तं०
वासुपुज्जे मल्ली अरिठ्ठनेमी पासे वीरे । चमरचंचाए णं रायहाणीए पंच सभा
प० तं० सुहम्मासभा उववायसभा अभिसेयसभा अलंकारियसभा ववसायसभा,
एगमेगे णं इंदठ्ठाणे णं पंच सभाओ प० तं० सुहम्मासभा जाव ववसायसभा । पंच
णक्खत्ता पंच तारा प० तं० धणिठ्ठा रोहिणी पुणव्वसू हत्थो विमाहा, जीवा णं
पंचठ्ठाणणिव्वत्तिए पोग्गले पावकम्मत्ताए चिणिंसु वा चिणंति वा चिणिस्संति वा तं०
एगिंदियनिव्वत्तिए जाव पंचिंदियनिव्वत्तिए एवं चिण उवचिण वंध उदीर वेद तह
णिज्जरा चेव, पंचपएसिया खंधा अणंता प० पंचपएसोगाढा पोग्गला अणंता प०
जाव पंच गुणलुक्खा पोग्गला अणंता पण्णत्ता ॥ ५४३ ॥ पंचसट्ठाणस्स तइओ
उद्देसो समत्तो, पंचमट्ठाणं समत्तं ॥

छट्ठट्ठाणं

छहिं ठाणेहिं संपन्ने अणगारे अरिहइ गणं धारित्तए तं० सद्धी पुरिसजाए, सच्चे
 पुरिसजाए, मेहावी पुरिसजाए, बहुस्सुए पुरिसजाए, सत्तिमं, अप्पाहिगरणे, छहिं
 ठाणेहिं निग्गंथे निग्गंथिं गिण्हमाणे वा अवलंबमाणे वा नाइक्कमइ, तं० खित्तचित्तं,
 दित्तचित्तं, जक्खाइठ्ठं, उम्मायपत्तं, उवसग्गपत्तं, साहिगरणं ॥ ५४४ ॥ छहिं
 ठाणेहिं निग्गंथा निग्गंथीओ य साहम्मियं कालगयं समायरमाणा णाइक्कमन्ति तं०
 अंतोहितो वा वाहिं णीणेमाणा, वाहिंहितो वा निव्वाहिं णीणेमाणा, उवेहमाणा वा,
 उवासमाणा वा, अणुन्नवेमाणा वा, तुसिणीए वा संपव्वयमाणा ॥ ५४५ ॥ छ
 ठाणाइं छउमत्थे सव्वभावेणं ण जाणइ ण पासइ तं० धम्मत्थिकायमधम्मत्थि-
 कायमागासं जीवमसरीरपडिवद्धं परमाणुपोग्गलं सइं एयाणि चेव उप्पन्नानादंस-
 णधरे अरहा जिणे जाव सव्वभावेणं जाणइ पासइ धम्मत्थिकायं जाव सइं ॥ ५४६ ॥
 छहिं ठाणेहिं सव्वजीवाणं णत्थि इद्धीति वा जुत्तीति वा जसेइ वा वळेइ वा वीरेएइ वा
 पुरिसक्कार जाव परक्कमेति वा तं० जीवं वा अजीवं करणयाए, अजीवं वा जीवं करणयाए,
 एगसमएणं वा दो भासाओ भासित्तए, सयं कडं वा कम्मं वेएमि वा मा वा वेएमि,

परमाणुपोगलं वा छिंदित्तए वा भिंदित्तए वा, अगणिकाएण वा समोदहित्तए, वहिया वा लोगंता गमण्याए ॥ ५४७ ॥ छजीवनिकाया प० तं० पुढविकाइया जाव तसकाइया ॥ ५४८ ॥ छ तारग्गहा प० तं० सुक्के, बुहे, वहस्सई, अंगारए, सणिच्चरे, केऊ ॥ ५४९ ॥ छव्विहा संसारसमावज्जगा जीवा प० तं० पुढविकाइया जाव तसकाइया ॥ ५५० ॥ पुढविकाइया छगइया छआगइया प० तं० पुढविकाइए पुढविकाइएसु उववज्जमाणे पुढविकाइएहिंतो वा जाव तसकाइएहिंतो वा उववजेज्जा, सो चेव णं से पुढविकाइए पुढविकाइयत्तं विप्पजहमाणे पुढविकाइयत्ताए वा जाव तसकाइयत्ताए वा गच्छेज्जा, आउकाइयावि छगइया छआगइया, एवं चेव जाव तसकाइया ॥ ५५१ ॥ छव्विहा सव्वजीवा प० तं० आभिणिबोहियणाणी जाव केवलणाणी, अन्नाणी ॥ ५५२ ॥ अहवा छव्विहा सव्वजीवा प० तं० एगिदिया जाव पंचिदिया, अण्णिदिया ॥ ५५३ ॥ अहवा छव्विहा सव्वजीवा प० तं० ओरालियसरीरी, वेउव्वियसरीरी, आहारगसरीरी, तेयगसरीरी, कम्मगसरीरी, असरीरी ॥ ५५४ ॥ छव्विहा तणवणस्सइकाइया प० तं० अग्गवीया मूलवीया पोरेवीया खंधवीया वीयरुहा संमुच्छिमा ॥ ५५५ ॥ छठाणाइं सव्वजीवाणं णो सुलभाइं भवंति, तं० माणुस्सए भवे, आयरिए खित्ते जम्मं, सुकुले पच्चायाती, केवलपन्नत्तस्स धम्मस्स सवणया सुयस्स वा सद्दहण्या, सद्दहियस्स वा पत्तियस्स वा रोइयस्स वा सम्मं काएणं फासण्या ॥ ५५६ ॥ छ इंदियत्था प० तं० सोइंदियत्थे जाव फासिंदियत्थे णोइंदियत्थे ॥ ५५७ ॥ छव्विहे संवरे प० तं० सोइंदियसंवरे जाव फासिंदियसंवरे णोइंदियसंवरे ॥ ५५८ ॥ छव्विहे असंवरे प० तं० सोइंदियअसंवरे, जाव फासिंदिअसंवरे, णोइंदिअसंवरे ॥ ५५९ ॥ छव्विहे साए प० तं० सोइंदियसाए जाव नोइंदियसाए ॥ ५६० ॥ छव्विहे असाए प० तं० सोइंदियअसाए, जाव नोइंदियअसाए ॥ ५६१ ॥ छव्विहे पायच्छित्ते प० तं० आलोयणारिहे, पडिक्कमणारिहे, तदुभयारिहे, विवेगारिहे, विउस्सग्गारिहे, तवारिहे ॥ ५६२ ॥ छव्विहा मणुस्सा प० तं० जंबूदीवगा, धायइखंडदीवपुरच्छिमद्धगा, धायइखंडदीवपच्चत्थिमद्धगा, पुक्खरवरदीवद्धुपुरत्थिमद्धगा, पुक्खरवरदीवद्धुपच्चत्थिमद्धगा, अंतरदीवगा, अहवा छव्विहा मणुस्सा प० तं० संमुच्छिममणुस्सा, कम्मभूमगा अकम्मभूमगा अंतरदीवगा, गब्भवक्कंतियमणुस्सा कम्मभूमिगा अकम्मभूमिगा अतरदीवगा ॥ ५६३ ॥ छव्विहा इद्धिमंता मणुस्सा प० तं० अरहंता, चक्कवटी, वलदेवा, वासुदेवा, चारणा, विज्जाहरा ॥ ५६४ ॥ छव्विहा अणिद्धिमंता मणुस्सा प० तं० हेमवंतगा हेरववंतगा हरिवंसगा रम्मगवंसगा कुरु-

वासिणो अंतरदीवगा ॥ ५६५ ॥ छव्विहा ओसप्पिणी प० तं० सुसमसुसमा जाव
दुसमदुसमा, छव्विहा उस्सप्पिणी प० तं० दुसमदुसमा जाव सुसमसुसमा ॥ ५६६ ॥
जंबुद्दीवे दीवे भरहेरवएसु वासेसु तीताए उस्सप्पिणीए सुसमसुसमाए समाए मणुया
छच्च धणुसहस्साइं उद्धमुच्चत्तेणं हुत्था, छच्च अद्धपलिओवमाइं परमाउं पालयित्था
॥ ५६७ ॥ जंबुद्दीवे दीवे भरहेरवएसु वासेसु इमीसे ओसप्पिणीए सुसमसुसमाए समाए
एवं चेव ॥ ५६८ ॥ जंबू० भरहेरवए आगमिस्ताए उस्सप्पिणीए सुसमसुसमाए समाए
एवं चेव, जाव छच्च अद्धपलिओवमाइं परमाउं पालइस्संति ॥ ५६९ ॥ जंबुद्दीवे
दीवे देवकुलउत्तरकुरासु मणुया छधणुस्सहस्साइं उद्धं उच्चत्तेणं प० छच्च अद्धपलि-
ओवमाइं परमाउं पालेति ॥ ५७० ॥ एवं धायइसंडदीवपुरच्छिमद्धे चत्तारि आला-
वगा जाव पुक्खरवरदीवद्धपच्चच्छिमद्धे चत्तारि आलावगा ॥ ५७१ ॥ छव्विहे
संघयणे प० तं० वडरोसभणारायसंघयणे, उसभणारायसंघयणे, नारायसंघयणे, अद्ध-
नारायसंघयणे, कीलियासंघयणे, छेवट्टसंघयणे ॥ ५७२ ॥ छव्विहे संठाणे प० तं०
समच्चउरंसे, णग्गोहपरिमंडले, साई, खुजे, वामणे, हुंडे ॥ ५७३ ॥ छट्ठाणा
अणत्तवओ अहियाए असुभाए जाव अणाणुगामियत्ताए भवंति, तं० परियाए
परियाले सुए तवे लाभे पूयासकारे ॥ ५७४ ॥ छट्ठाणा अत्तवतो हियाए जाव
आणुगामियत्ताए भवंति तं० परियाए परियाले जाव पूयासकारे ॥ ५७५ ॥ छव्विहा
जाइआरिया मणुस्सा प० तं० अंवठा य कलंदा य वेदेहा वेदिगाइया; हरिता
चुंचुणा चेव छप्पेया इब्भजाइओ ॥ ५७६ ॥ छव्विहा कुलारिया मणुस्सा
प० तं० उग्गा भोगा राइन्ना इक्खागा णाया कोरवा ॥ ५७७ ॥ छव्विहा लोगट्ठिई
प० तं० आगासपइठ्ठिए वाए वायपइठ्ठिए उदही उदहिपइठ्ठिया पुढवी पुढविपइ-
ठ्ठिया तसा थावरा पाणा अजीवा जीवपइठ्ठिया जीवा कम्मपइठ्ठिया ॥ ५७८ ॥
छइसाओ प० तं० पाईणा पडीणा दाहिणा उईणा उद्धा अहा ॥ ५७९ ॥ छहिं
दिसाहिं जीवाणं गई पवत्तइ तं० पाईणाए जाव अहाए एवमागई वक्कंती आहारे
वुद्धी निवुद्धी विगुव्वणा गइपरियाए समुग्घाए कालसंजोगे दंसणाभिगमे णाणाभि-
गमे जीवाभिगमे अजीवाभिगमे एवं पंचिंदियतिरेक्खजोणियाणवि मणुस्साणवि
॥ ५८० ॥ छहिं ठाणेहिं समणे णिग्गंथे आहारमाहारेमाणे णाइक्कमइ तं० वेयण-
वैयावच्चे इरियठाए य संजमठाए, तह पाणवत्तियाए छट्ठं पुण धम्मचित्ताए, छहिं
ठाणेहिं समणे णिग्गंथे आहारं वोच्छिदमाणे णाइक्कमइ तं० आतंके उवसग्गे तिति-
क्खणे वंभचेरगुत्तीए पाणिदया तवहेउं सरीखुच्छेयणठाए ॥ ५८१ ॥ छहिं
ठाणेहिं आया उम्मायं पाउणेज्जा तं० अरहंताणमवणं वदमाणे, अरहंतपन्नत्तस्स

धम्मस्स अवणं वदमाणे, आयरियउवज्जायाणमवणं वदमाणे, चाउव्वनस्स
 संघस्स अवणं वदमाणे, जक्खावेसेण चेव मोहणिजस्स चेव कम्मस्स उदणं
 ॥ ५८२ ॥ छव्विहे पमाए प० तं० मज्जपमाए, णिहपमाए, विसयपमाए, कसाय-
 पमाए, जूयपमाए, पडिलेहणापमाए ॥ ५८३ ॥ छव्विहा पमायपडिलेहणा प० तं०
 आरभडा संमद्दा, वज्जेयव्वा य मोसली तइया, पप्फोडणा चउत्थी विक्खित्ता
 चेइया छठी (१) छव्विहा अप्पमायपडिलेहणा प० तं० अणत्तावियं अवलितं,
 अणाणुबंधिं अमोसलिं चेव छप्पुरिमा णव खोडा पाणी पाणविसोहणी (२)
 ॥ ५८४ ॥ छ लेसाओ प० तं० कण्हलेसा जाव सुक्कलेसा, पंचिंदियतिरिक्खजो-
 णियाणं छ लेसाओ प० तं० कण्हलेसा जाव सुक्कलेसा, एवं मणुस्सदेवाण वि
 ॥ ५८५ ॥ सक्कस्स णं देविंदस्स देवरत्तो सोमस्स महारत्तो छ अग्गमहिंसीओ प०
 ॥ ५८६ ॥ सक्कस्स णं देविंदस्स देवरण्णो जमस्स महारत्तो छ अग्गमहिंसीओ प०
 ॥ ५८७ ॥ ईसाणस्स णं देविंदस्स मज्झिमपरिसाए देवाणं छ पलिओवमाइं ठिई
 प० ॥ ५८८ ॥ छ दिसिकुमारिमहत्तरियाओ प० तं० रुवा रुतंसा सुरुवा रुववई
 रुवकंता रुयप्पभा, छ विज्जुकुमारिमहत्तरियाओ प० तं० आला सक्का सतेरा सोया-
 मणी इंदा घणविज्जुया ॥ ५८९ ॥ धरणस्स णं नागकुमारिंदरस नागकुमाररत्तो
 छ अग्गमहिंसीओ प० तं० आला सक्का सतेरा सोयामणी इंदा घणविज्जुया,
 भूयाणंदस्स णं नागकुमारिंदस्स नागकुमाररण्णो छ अग्गमहिंसीओ प० तं० रुवा
 रुवंसा सुरुवा रुववई रुवकंता रुयप्पभा, जहा धरणस्स तहा सव्वेसिं दाहिणिल्लाणं
 जाव घोसस्स, जहा भूयाणंदस्स तहा सव्वेसि उत्तरिल्लाणं जाव महाघोसस्स
 ॥ ५९० ॥ धरणस्स णं नागकुमारिंदस्स नागकुमाररत्तो छसामाणियसाहस्सीओ
 पण्णत्ताओ, एवं भूयाणंदस्स वि जाव महाघोसस्स ॥ ५९१ ॥ छव्विहा उग्गहमई
 प० तं० खिप्पमोगिण्हइ बहुमोगिण्हइ बहुविधमोगिण्हइ धुवमोगिण्हइ अणिस्सि-
 यमोगिण्हइ असंदिद्धमोगिण्हइ ॥ ५९२ ॥ छव्विहा ईहामई प० तं० खिप्पमी-
 हइ, बहुमीहइ, जाव असंदिद्धमीहइ ॥ ५९३ ॥ छव्विहा अवायमई प० तं०
 खिप्पमवेइ जाव असंदिद्धमवेइ छव्विहा धारणा प० तं० बहुं धारेइ बहुविहं धारेइ
 पोराणं धारेइ दुद्धरं धारेइ अणिस्सियं धारेइ असंदिद्धं धारेइ ॥ ५९४ ॥ छव्विहे
 वाहिरए तवे प० तं० अणसणं ओमोयरिया भिक्खायरिया रसपरिच्चाए कायकिलेसो
 पडिसंलीणया ॥ ५९५ ॥ छव्विहे अब्भंतारिए तवे प० तं० पायच्छित्तं विणओ
 वेयावच्चं तहेव सज्झाओ ज्ञाणं विउस्सग्गो ॥ ५९६ ॥ छव्विहे विवादे प० तं०
 ओसक्कइत्ता उस्सक्कइत्ता अणुलोमइत्ता पडिलोमइत्ता भइत्ता भेलइत्ता ॥ ५९७ ॥

छव्विहा खुदा पाणा प० तं० वेइंदिया तेइंदिया चउरिंदिया संमुच्छिमपंचिंदियतिरि-
 क्खजोणिया तेउकाइया वाउकाइया ॥ ५९८ ॥ छव्विहा गोयरचरिया प० तं० पेडा
 अद्धपेडा गोमुत्तिया पतंगवीहिया संवुक्कवट्टा गंतुपचागया ॥ ५९९ ॥ जंबुद्दीवे दीवे
 मंदरस्स पव्वयस्स दाहिणेणमिमीसे रयणप्पभाए पुढवीए छ अवक्कंतमहानिरया
 प० तं० लोले लोलुए उद्वहे निद्वहे जरए पजरए ॥ ६०० ॥ चउत्थीए णं पंकप्पभाए
 पुढवीए छ अवक्कंता महानिरया प० तं० आरे वारे मारे रोरे रोरुए खाडखडे
 ॥ ६०१ ॥ वंभलोए णं कप्पे छ विमाणपत्थडा प० तं० अरए विरए नीरए निम्मले
 वितिमिरे विमुद्धे ॥ ६०२ ॥ चंदस्स णं जोइसिंदस्स जोइसरन्नो छ णक्खत्ता पुव्वं
 भागा समखेत्ता तीसइमुहुत्ता प० तं० पुव्वाभइवया कत्तिया महा पुव्वाफग्गुणी
 मूलो पुव्वासाढा ॥ ६०३ ॥ चंदस्स णं जोइसिंदस्स जोइसरन्नो छ णक्खत्ता
 णत्तंभागा अवड्ढुखेत्ता पन्नरसमुहुत्ता प० तं० सयभिसया भरणी अद्दा अस्सेसा
 साई जेठ्ठा ॥ ६०४ ॥ चंदस्स णं जोइसिंदस्स जोइसरन्नो छ णक्खत्ता उभयंभागा
 दिवड्ढुखेत्ता पणयालीसमुहुत्ता प० तं० रोहिणी पुणव्वसू उत्तराफग्गुणी विसाहा
 उत्तरासाढा उत्तराभइवया ॥ ६०५ ॥ अभिचंदे णं कुलकरे छ धणुसयाई उड्डं उच्च-
 त्तेणं हुत्था ॥ ६०६ ॥ भरहे णं राया चाउरंतचक्कवट्ठी छ पुव्वसयसहस्साई महाराया
 हुत्था ॥ ६०७ ॥ पासस्स णं अरहओ पुरिसादाणियस्स छस्सया वाईणं सदेवमणुया-
 सुराए परिस्साए अपराजियाणं संपया होत्था ॥ ६०८ ॥ वासुपुज्जे णं अरहा छहि पुरिस-
 सएहिं सद्धिं मुंडे जाव पव्वइए ॥ ६०९ ॥ चंदप्पभे णं अरहा छम्मासे छउमत्थे होत्था
 ॥ ६१० ॥ तेइंदियाणं जीवाणं असमारभमाणस्स छव्विहे संजमे कज्जइ तं० घाणामाओ
 सोक्खाओ अववरोवेत्ता भवति घाणामएणं दुक्खेणं असंजोगेत्ता भवइ जिन्वामाओ
 सोक्खाओ अववरोवेत्ता भवइ एवं चेव फासामाओ वि ॥ ६११ ॥ तेइंदियाणं
 जीवाणं समारभमाणस्स छव्विहे असंजमे कज्जइ तं० घाणामाओ सोक्खाओ ववरो-
 वेत्ता भवइ घाणामएणं दुक्खेणं संजोगेत्ता भवइ जाव फासमएणं दुक्खेणं संजोगेत्ता
 भवइ ॥ ६१२ ॥ जंबुद्दीवे दीवे छ अक्कम्मभूमीओ प० तं० हेमवए हेरण्णवए हरि-
 वासे रम्मगवासे देवकुरा उत्तरकुरा ॥ ६१३ ॥ जंबुद्दीवे दीवे छव्वासा प० तं० भरहे
 एरवए हेमवए हेरण्णवए हरिवासे रम्मगवासे ॥ ६१४ ॥ जंबुद्दीवे दीवे छव्वासहर-
 पव्वया प० तं० चुल्लहिमवंते महाहिमवंते निसडे नीलवंते रुप्पी सिहरी ॥ ६१५ ॥
 जंबूमंदरदाहिणे णं छ कूडा प० तं० चुल्लहिमवंतकूडे वेसमणकूडे महाहिमवंतकूडे
 वेसलियकूडे निसडकूडे रुयगकूडे ॥ ६१६ ॥ जंबूमंदरउत्तरेणं छकूडा प० तं०
 नीलवंतकूडे उवदंसणकूडे रुणिकूडे मणिकंचणकूडे सिहरिकूडे तिगिच्छकूडे ॥ ६१७ ॥

जंबुदीवे दीवे छ महद्दहा प० तं० पउमद्दहे महापउमद्दहे तिगिच्छद्दहे केसरिद्दहे
 महापोंडरीयद्दहे पुंडरीयद्दहे ॥ ६१८ ॥ तत्थ णं छ देवयाओ महद्धियाओ जाव
 पलिओवमठ्ठिईयाओ परिवसंति तं० सिरी हिरी धिई कित्ती बुद्धी लच्छी ॥ ६१९ ॥
 जंबूमंदरदाहिणेणं छ महानईओ प० तं० गंगा सिधू रोहिया रोहियंसा हरी हरिकंता
 ॥ ६२० ॥ जंबूमंदरस्स उत्तरे णं छ महानईओ प० तं० णरकंता णारिकंता सुवण्ण-
 कूला रूप्पकूला रत्ता रत्तवई ॥ ६२१ ॥ जंबूमंदरपुरच्छिमे णं सीयाए महानईए
 उभयकूले छ अंतरनईओ प० तं० गाहावई दहावई पंकवई तत्तजला मत्तजला
 उम्मत्तजला ॥ ६२२ ॥ जंबूमंदरपच्चत्थिमे णं सीओयाए महानईए उभयकूले छ
 अंतरनईओ प० तं० खीरोदा सीहसोया अंतोवाहिणी उम्मिमालिणी फेणमालिणी
 गंभीरमालिणी ॥ ६२३ ॥ धायइसंडदीवपुरच्छिमद्देणं छ अकम्मभूमीओ प० तं०
 हेमवए एवं जहा जंबुदीवे २ तहा णई जाव अंतरणईओ जाव पुक्खरवरदीवद्धपच्चत्थि-
 मद्दे भाणियव्वं ॥ ६२४ ॥ छ उऊ प० तं० पाउसे वरिसारत्ते सरए हेमंते वसंते गिम्हे
 ॥ ६२५ ॥ छ ओमरत्ता प० तं० तइए पव्वे सत्तमे पव्वे एक्कारसमे पव्वे पन्नरसमे
 पव्वे एगूणवीसइमे पव्वे तेवीसइमे पव्वे ॥ ६२६ ॥ छ अइरत्ता प० तं० चउत्थे
 पव्वे अठ्ठमे पव्वे दुवालसमे पव्वे सोलसमे पव्वे वीसइमे पव्वे चउवीसइमे पव्वे
 ॥ ६२७ ॥ आभिणिवोहियणाणस्स णं छव्विहे अत्थोग्गहे प० तं० सोइंदियत्थोग्गहे
 जाव नोइंदियत्थोग्गहे ॥ ६२८ ॥ छव्विहे ओहिणाणे प० तं० आणुगामिए
 अणाणुगामिए वड्डमाणए हीयमाणए पडिवाई अपडिवाई ॥ ६२९ ॥ नो कप्पइ
 निगंथाण वा निगंथीण वा इमाई छअवयणाई वइत्तए तं० अलियवयणे हीलि-
 यवयणे खिसियवयणे फरुसवयणे गारत्थियवयणे विउसवियं वा पुणो उदीरत्तए
 ॥ ६३० ॥ छ कप्पस्स पत्थारा प० तं० पाणाइवायस्स वायं वयमाणे
 सुसावायस्स वायं वयमाणे अदिन्नादाणस्स वायं वयमाणे अविरइवायं वयमाणे
 अपुरिसवायं वयमाणे दासवायं वयमाणे इच्चेए छ कप्पस्स पत्थारे पत्थरेत्ता सम्मम-
 परिपूरेमाणे तट्ठाणपत्ते ॥ ६३१ ॥ छ कप्पस्स पलिमंथू प० तं० कोकुइए संजमस्स
 पलिमंथू मोहरिए सच्चवयणस्स पलिमंथू चक्खुलोलुए इरियावहियाए पलिमंथू
 तित्तिणिए एसणागोयरस्स पलिमंथू इच्छालोभिए मुत्तिमग्गस्स पलिमंथू भिज्जाणि-
 दाणकरणे मोक्खमग्गस्स पलिमंथू सव्वत्थ भगवया अणिदाणता पसत्था ॥ ६३२ ॥
 छव्विहा कप्पठिई प० तं० सामाइयकप्पठिई छेओवट्ठावणियकप्पठिई निव्विसमाण-
 कप्पठिई णिव्विट्ठकप्पठिई जिणकप्पठिई थिविरकप्पठिई ॥ ६३३ ॥ समणे भगवं
 महावीरे छट्ठेणं भत्तेणं अपाणएणं मुंडे जाव पव्वइए ॥ ६३४ ॥ समणस्स णं

भगवओ महावीरस्स छठ्ठेणं भत्तेणं अपाणएणं अणंते अणुत्तरे जाव समुप्पण्णे
 ॥ ६३५ ॥ समणे भगवं महावीरे छठ्ठेणं भत्तेणं अपाणएणं सिद्धे जाव सव्वदुक्ख-
 प्पहीणे ॥ ६३६ ॥ सणकुमारमाहिंदेसु णं कप्पेसु विमाणा छ जोज्यणसयाइं उड्डं उच्च-
 त्तेणं प० ॥ ६३७ ॥ सणकुमारमाहिंदेसु णं कप्पेसु देवाणं भवधारणिज्जगा सरीरगा
 उक्कोसेणं छ रयणीओ उड्डं उच्चत्तेणं पण्णत्ता ॥ ६३८ ॥ छव्विहे भोज्यणपरिणामे
 प० तं० मणुत्ते रसिए पीणणिज्जे विहणिज्जे [मयणणिज्जे दीवणिज्जे] दप्पणिज्जे
 ॥ ६३९ ॥ छव्विहे विसपरिणामे प० तं० उक्के भुत्ते निवइए मंसाणुसारी सोणि-
 याणुसारी अट्ठिमिजाणुसारी ॥ ६४० ॥ छव्विहे पट्ठे प० तं० संसयपट्ठे वुग्गहपट्ठे अणु-
 जोगी अणुलोमे तहणाणे अतहणाणे ॥ ६४१ ॥ चमरचंचा णं रायहाणी उक्कोसेणं
 छम्मासा विरहिया उववाएणं ॥ ६४२ ॥ एगमेगे णं इंदट्ठाणे उक्कोसेणं छम्मासा
 विरहिए उववाएणं ॥ ६४३ ॥ अहेसत्तमा णं पुढवी उक्कोसेणं छम्मासा विरहिया
 उववाएणं ॥ ६४४ ॥ सिद्धिगई णं उक्कोसेणं छम्मासा विरहिया उववाएणं ॥ ६४५ ॥
 छव्विहे आउयवंधे प० तं० जाइणामनिधत्ताउए गइणामनिधत्ताउए ठिइणामनिध-
 त्ताउए ओगाहणाणामनिधत्ताउए पएसणामनिधत्ताउए अणुभावणामनिधत्ताउए
 ॥ ६४६ ॥ णेरइयाणं छव्विहे आउयवंधे प० तं० जाइणामनिधत्ताउए जाव
 अणुभावणामनिधत्ताउए एवं जाव वेमाणियाणं ॥ ६४७ ॥ णेरइया णियमा छम्मा-
 सावसेसाउया परभवियाउयं पगरेंति, एवामेव असुरकुमारावि जाव थणियकुमारा,
 असंखेज्जवासाउया सन्निपंचिदियतिरिक्खजोणिया णियमं छम्मासावसेसाउया पर-
 भवियाउयं पगरेंति, असंखेज्जवासाउया सन्निमणुस्सा णियमं जाव पगरेंति, वाण-
 मंतरा जोइसवासिया वेमाणिया जहा णेरइया ॥ ६४८ ॥ छव्विहे भावे प० तं०
 ओदइए उवसमिए खइए खयोवसमिए पारिणामिए संनिवाइए ॥ ६४९ ॥ छव्विहे
 पडिक्कमणे प० तं० उच्चारपडिक्कमणे पासवणपडिक्कमणे इत्तरिए आवकहिए जंकिंचि-
 मिच्छा सोमणंतिए ॥ ६५० ॥ कत्तियाणक्खत्ते छत्तारे प० ॥ ६५१ ॥ असिलेसा-
 णक्खत्ते छत्तारे प० ॥ ६५२ ॥ जीवा णं छट्ठाणनिव्वत्तिए पोग्गले पावक्कम्मत्ताए
 चिणिंसु वा चिणंति वा चिणिस्संति वा तं० पुढविकाइयनिव्वत्तिए जाव तसकायनि-
 व्वत्तिए एवं चिण उवचिण वंध उदीर वेय तह णिज्जरा चेव ॥ ६५३ ॥ छप्पएसिया णं
 खंधा अणंता प० ॥ ६५४ ॥ छप्पएसोगाढा पोग्गला अणंता प० ॥ ६५५ ॥ छसमय-
 ठिईया पोग्गला अणंता प० ॥ ६५६ ॥ छगुणकालगा पोग्गला जाव छगुणलुक्खा
 पोग्गला अणंता पण्णत्ता ॥ ६५७ ॥ छट्ठाणं छट्ठमज्झयणं समत्तं ॥

सत्तमट्ठाणं

सत्तविहे गणावक्कमणे प० तं० सव्वधम्मा रोएमि एगइया रोएमि एगइया णो रोएमि सव्वधम्मा वितिगिच्छामि एगइया वितिगिच्छामि एगइया नो वितिगिच्छामि सव्वधम्मा जुहुणामि एगइया जुहुणामि एगइया णो जुहुणामि इच्छामिणं भंते । एगल्लविहारपडिसं उवसंपज्जिता णं विहरित्तए ॥ ६५८ ॥ सत्तविहे विभंगणाणे प० तं० एगदिसिलोगाभिगमे, पंचदिसिलोगाभिगमे, किरियावरणे जीवे, मुदग्गे जीवे, अमुदग्गे जीवे, रूवी जीवे, सव्वमिणं जीवा, तत्थ खलु इमे पढमे विभंगणाणे जया णं तहारुवस्स समणस्स वा माहणस्स वा विभंगणाणे समुप्पज्जइ से णं तेणं विभंगणाणेणं समुप्पन्नेणं पासइ पाईणं वा पडीणं वा दाहिणं वा उदीणं वा उट्ठं वा जाव सोहम्मे कप्पे तस्स णमेवं भवइ अत्थि णं मम अइसेसे णाणदंसणे समुप्पन्ने एगदिसिं लोगाभिगमे संतेगइया समणा वा माहणा वा एवमाहंसु पंचदिसिं लोगाभिगमे जे ते एवमाहंसु मिच्छं ते एव माहंसु पढमे विभंगणाणे, अहावरे दोच्चे विभंगणाणे जया णं तहारुवस्स समणस्स वा माहणस्स वा विभंगणाणे समुप्पज्जइ से णं तेणं विभंगणाणेणं समुप्पन्नेणं पासइ पाईणं वा पडीणं वा दाहिणं वा उदीणं वा उट्ठं वा जाव सोहम्मे कप्पे तस्स णं एवं भवइ अत्थि णं मम अइसेसे णाणदंसणे समुप्पन्ने पंचदिसिं लोगाभिगमे संतेगइया समणा वा माहणा वा एवमाहंसु एगदिसिं लोगाभिगमे जे ते एवमाहंसु मिच्छं ते एवमाहंसु दोच्चे विभंगणाणे । अहावरे तच्चे विभंगणाणे जया णं तहारुवस्स समणस्स वा माहणस्स वा विभंगणाणे समुप्पज्जइ, से णं तेणं विभंगणाणेणं समुप्पन्नेणं पासइ पाणे अइवाएमाणा, मुसं वएमाणे अदिन्नमादितमाणे मेहुणं पडिसेवमाणे परिग्गहं परिणिण्हमाणे, राइभोयणं भुंजमाणे वा पावं च णं कम्मं कीरमाणं णो पासइ तस्स णमेवं भवइ अत्थि णं मम अइसेसे णाणदंसणे समुप्पन्ने किरियावरणे जीवे संतेगइया समणा वा माहणा वा एवमाहंसु णो किरियावरणे जीवे जे ते एवमाहंसु मिच्छं ते एवमाहंसु तच्चे विभंगणाणे । अहावरे चउत्थे विभंगणाणे जया णं तहारुवस्स समणस्स वा माहणरस वा जाव समुप्पज्जइ से णं तेणं विभंगणाणेणं समुप्पन्नेणं देवामेव पासइ वाहिरच्चंतरए पोगळे परियाइइत्ता पुढेगत्तं णाणत्तं फुसिया फुरित्ता फुट्ठित्ता विकुब्बित्ता णं विकुब्बित्ता णं चिट्ठित्तए तस्स णमेवं भवइ अत्थि णं मम अइसेसे णाणदंसणसमुप्पन्ने मुदग्गे जीवे संतेगइया समणा वा माहणा वा एवमाहंसु अमुदग्गे जीवे, जे ते एवमाहंसु मिच्छं ते एवमाहंसु चउत्थे विभंगणाणे, अहावरे पंचमे विभंगणाणे जया णं तहारुवस्स समणस्स जाव समुप्पज्जइ, से णं तेणं

विभंगणाणेणं समुप्पन्नेणं देवामेव पासइ बाहिरब्भितरए पोग्गलए अपरियायिइत्ता पुढेगत्तं णाणत्तं जाव विउव्वित्ता णं चिठ्ठित्तए तस्स णमेवं भवइ अत्थि जाव समुप्पन्ने अमुदग्गे जीवे, संतेगइया समणा वा माहणा वा एवमाहंसु मुदग्गे जीवे, जे ते एवमाहंसु मिच्छं ते एवमाहंसु, पंचमे विभंगणाणे । अहावरे छट्ठे विभंगणाणे, जया णं तहारूवस्स समणस्स वा माहणस्स वा जाव समुप्पज्जति, से णं तेणं विभंगणाणेणं समुप्पन्नेणं देवामेव पासइ बाहिरब्भितरए पोग्गले परियाइत्ता वा, अपरियायिइत्ता वा पुढेगत्तं णाणत्तं फुसेत्ता जाव विउव्वित्ता चिठ्ठित्तए तस्स णमेवं भवइ, अत्थि णं मम अइसेसे णाणदंसणे समुप्पन्ने रूवी जीवे संतेगइया समणा वा माहणा वा एवमाहंसु अरूवी जीवे जे ते एवमाहंसु मिच्छं ते एवमाहंसु छट्ठे विभंगणाणे । अहावरे सत्तमे विभंगणाणे जया णं तहारूवस्स समणस्स वा माहणस्स वा विभंगणाणे समुप्पज्जइ, से णं तेणं विभंगणाणेणं समुप्पन्नेणं पासइ सुहुमेणं वाउकाएणं फुडं पोग्गलकायं एयंतं वेयंतं चलंतं खुब्भंतं फंदंतं घटंतं उदीरंतं तं तं भावं परिणमंतं तस्स णमेवं भवइ अत्थि णं मम अइसेसे णाणदंसणे समुप्पन्ने, सव्वमिणं जीवा संतेगइया समणा वा माहणा वा एवमाहंसु जीवा चेव अजीवा चेव जे ते एवमाहंसु मिच्छं ते एवमाहंसु तस्स णमिमे चत्तारि जीवनिक्काया णो सम्ममुवगया भवंति तंजहा पुढविकाइया आऊ तेऊ वाउकाइया, इच्चेएहिं चउहिं जीवनिक्काएहिं मिच्छादंडं पवत्तेइ, सत्तमे विभंगणाणे ॥ ६५९ ॥ सत्तविहे जोणि-संगहे प० तं० अंडया पोयया जराउया रसया संसेयया संमुच्छिमा उब्भिया, अंडगा सत्तगइया सत्तागइया प० तं० अंडगे अंडगेसु उववज्जमाणे अंडएहिंतो वा पोयएहिंतो वा जाव उब्भिएहिंतो वा उववजेज्जा से चेव णं से अंडए अंडगत्तं विप्पजहमाणे अंडयत्ताए वा पोययत्ताए वा जाव उब्भियत्ताए वा गच्छेज्जा, पोयया सत्तगइया सत्तागइया, एवं चेव, सत्तण्हवि गइरागई भाणियव्वा जाव उब्भियत्ति ॥ ६६० ॥ आयरियउवज्जायस्स णं गणंसि सत्तसंगहठाणा प० तं० आयरियउवज्जाए गणंसि आणं वा धारणं वा सम्मं पडंजित्ता भवइ, एवं जहा पंचठ्ठाणे जाव आयरियउवज्जाए गणंसि आपुच्छियचारी यावि भवइ, नो अणापुच्छियचारी यावि भवइ आयरियउवज्जाए गणंसि अणुप्पन्नाइं उवगरणाइं सम्मं उप्पाइत्ता भवइ, आयरियउवज्जाए गणंसि पुव्वुप्पन्नाइं उवकरणाइं सम्मं सारक्खेत्ता संगोवइत्ता भवइ नो असम्मं सारक्खेत्ता संगोवित्ता भवइ ॥ ६६१ ॥ आयरियउवज्जायस्स णं गणंसि सत्त असंगहठाणा प० तं० आयरियउवज्जाए गणंसि आणं वा धारणं वा नो सम्मं पडंजित्ता भवइ, एवं जाव उवगरणाणं नो सम्मं सारक्खेत्ता संगोवेत्ता

भवइ ॥ ६६२ ॥ सत्त पिंडेसणाओ प० ॥ ६६३ ॥ सत्तपाणेसणाओ प० ॥ ६६४ ॥
 सत्त उग्गहपडिमाओ प० ॥ ६६५ ॥ सत्त सत्तिकया प० ॥ ६६६ ॥ सत्त महज्ज-
 यणा प० ॥ ६६७ ॥ सत्तसत्तमिया णं भिक्खुपडिमा एगूणपन्नयाए राईदिएहिं एगेण
 य छण्णउएणं भिक्खासएणं अहासुत्तं (अहा अत्थं) जाव आराहिया यावि भवइ
 ॥ ६६८ ॥ अहे लोणे णं सत्त पुढवीओ प० सत्त घणोदहीओ प० सत्त घणवाया
 प० सत्त तणुवाया प० सत्त उवासंतरा प० एएसु णं सत्तसु उवासंतरेसु सत्ततणुवाया
 पइठिया एएसु णं सत्तसु तणुवाएसु सत्त घणवाया पइठिया एएसु णं सत्तसु घणवा-
 एसु सत्त घणोदही पइठिया एतेसु णं सत्तसु घणोदहीसु पिंडलगपिहुणसंठाणसंठि-
 आओ सत्त पुढवीओ प० तं० पढमा जाव सत्तमा, एयासि णं सत्तण्हं पुढवीणं सत्त
 णामधेज्जा प० तं० घम्मा वंसा सेला अंजणा रिठ्ठा मघा माघवई, एयासि णं सत्तण्हं
 पुढवीणं सत्त गोत्ता प० तं० रयणप्पभा सक्करप्पभा वालुअप्पभा पंकप्पभा धूमप्पभा
 तमा तमतमा ॥ ६६९ ॥ सत्तविहा वायरवाउकाइया प० तं० पाईणवाए पडीण-
 वाए दाहिणवाए उदीणवाए उड्ढुवाए अहोवाए विदिसिवाए ॥ ६७० ॥ सत्त संठाणा
 प० तं० दीहे रहस्से वट्टे तंसे चउरंसे पिहुले परिमंडले ॥ ६७१ ॥ सत्त भयट्ठाणा
 प० तं० इहलोगभए परलोगभए आदाणभए अकम्हाभए वेयणभए मरणभए
 असिलोगभए ॥ ६७२ ॥ सत्तहिं ठाणेहिं छउमत्थं जाणेज्जा तं० पाणे अइवाएत्ता
 भवइ मुसं वइत्ता भवइ अदिन्नमाइत्ता भवइ सइफरिसरसरुवगंधे आसाएत्ता भवइ
 पूयासक्कारमणुवूहेत्ता भवइ इमं सावज्जंति पण्णवेत्ता पडिसेवेत्ता भवइ णो जहावाई
 तहाकारी यावि भवइ ॥ ६७३ ॥ सत्तहिं ठाणेहि केवली जाणेज्जा तं० णो पाणे
 अइवाएत्ता भवइ जाव जहावाई तहाकारी यावि भवइ ॥ ६७४ ॥ सत्त मूलगोत्ता
 प० तं० कासवा गोयमा वच्छा कोच्छा कोसिया मंडवा वासिठ्ठा । जे कासवा ते
 सत्तविहा प० तं० ते कासवा ते संडेल्ला ते गोल्ला ते वाला ते मुंजइणो ते पव्व-
 पेच्छइणो ते वरिसकण्हा, जे गोयमा ते सत्त विहा प० तं० ते गोयमा ते गरगा ते
 भारद्वा ते अंगिरसा ते सक्कराभा ते भक्खराभा ते उदगत्ताभा, जे वच्छा ते सत्त
 विहा प० तं० ते वच्छा ते अग्गेया ते मित्तिया ते सामिलिणो ते सेलयया ते
 अठ्ठिसेणा ते वीयकम्हा, जे कोच्छा ते सत्तविहा प० तं० ते कोच्छा ते मोग्गलायणा
 ते पिंगलायणा ते कोडीणा ते मंडलिणो ते हारिता ते सोमया, जे कोसिया ते सत्त
 विहा प० तं० ते कोसिया ते कच्चायणा ते सालंकायणा ते गोलिकायणा ते पक्खि-
 कायणा ते अग्गिच्चा ते लोहिता, जे मंडवा ते सत्तविहा प० तं० ते मंडवा ते
 अरिठ्ठा ते समुता ते तैला ते एलावच्चा ते कंडिल्ला ते खारातणा, जे वासिठ्ठा ते

सत्तविहा प० तं० ते वासिठ्ठा ते उंजायणा ते जारेकण्हा ते वग्धावच्चा ते कोडिन्ना
 ते सण्णी ते पारासरा ॥ ६७५ ॥ सत्त मूलणया प० तं० नेगमे संगहे वव्हारे
 उज्जुसुए सद्दे समभिरुढे एवंबूते ॥ ६७६ ॥ सत्त सरा प० तं० सज्जे रिसभे गंधारे
 मज्झिमे पंचमे सरे, धेवते चेव णिसादे सरा सत्त वियाहिया (१) एएसि णं सत्तण्हं
 सराणं सत्त सरठ्ठाणा प० तं० सज्जं तु अग्गजिब्भाए उरेण रिसभं सरं, कण्डुग्गएण
 गंधारं मज्जजिब्भाए मज्झिमं (२) णासाए पंचमं वूया दंतोठ्ठेण य धेवयं,
 मुद्धाणेण य णेसायं सरठ्ठाणा वियाहिया (३) सत्त सरा जीवनिस्सिया प० तं०
 सज्जं रवइ मयूरो कुकुडो रिसहं सरं, हंसो णदइ गंधारं मज्झिमं तु गवेलगा (४)
 अह कुसुमसंभवे काले कोइला पंचमं सरं, छठ्ठं च सारसा कोंचा णिसायं सत्तमं
 गया (५) सत्तसरा अजीवनिस्सिया प० तं० सज्जं रवइ मुइंगो गोमुही रिसभं
 सरं, संखो णदइ गंधारं मज्झिमं पुण झल्लरी (६) चउचलणपइठ्ठाणा गोहिया
 पंचमं सरं, आडंबरो य रेवइयं महाभेरी य सत्तमं (७) एएसि णं सत्त सराणं सत्त
 सरलक्खणा प० तं० सज्जेण लभइ विट्ठिं कयं च ण विणस्सइ, गावो मित्ता य पुत्ता
 य णारीणं चेव वल्लभो (८) रिसभेण उ एसज्जं, सेणावच्चं धणाणि य; वत्थगंधम-
 लंकारं इत्थीओ सयणाणि य (९) गंधारे गीयजुत्तिण्णा वज्जवित्ती कलाहिया,
 भवंति कइणो पन्ना जे अन्ने सत्थपारगा (१०) मज्झिमसरसंपन्ना भवंति सुह-
 जीविणो, खायती पीयती देती, मज्झिमं सरमस्सिओ (११) पंचमसरसंपन्ना भवंति
 पुढवीपई, सूरा संगहकत्तारो अणेगगण्णायगा (१२) धेवयसरसंपन्ना भवंति
 कलहप्पिया; साउणिता वग्गुरिया सोयरिया मच्छवंधा य (१३) चंडाला मुठ्ठिया
 सेया, जे अन्ने पावकम्मिणो; गोघातगा य जे चोरा, णिसायं सरमस्सिता (१४)
 एएसि णं सत्तण्हं सराणं तओ गामा प० तं० सज्जगामे मज्झिमगामे गंधारगामे,
 सज्जगामस्स णं सत्त मुच्छणाओ प० तं० मंगी कोरव्वीया हरी य रययणी य
 सारकंता य, छट्ठी य सारसी णाम सुद्धसज्जा य सत्तमा (१५) मज्झिमगामस्स णं
 सत्तमुच्छणाओ प० तं० उत्तरमंदा रयणी उत्तरा उत्तरासमा; आसोकंता य सोवीरा,
 अभीरु हवइ सत्तमा (१६) गंधारगामस्स णं सत्त मुच्छणाओ प० तं० णंदी य
 खुदिमा पूरिमा य चउत्थी य सुद्धगंधारा, उत्तरगंधारा वि य पंचमिया हवइ मुच्छा उ
 (१७) सुट्ठुतरमायामा सा छट्ठी णियमसो उ णायव्वा अह उत्तरायया कोडीमायसा
 सत्तमी मुच्छा (१८) सत्त सराओ कओ संभवन्ति गेयस्स का भवइ जोणी? कइ
 समया उस्सासा कइ वा गेयस्स आगारा? (१९) सत्त सरा णाभीओ भवंति,
 गीयं च रुयजोणीयं; पादसमा ऊसासा तिन्नि य गेयस्स आगारा (२०) आइमिउ

आरभंता, समुब्बहंता य मज्झगारंमि; अवसाणे तज्जविंतो तिञ्चि य गेयस्स आगारा (२१) छद्दोसे अठ्ठगुणे तिञ्चि य वित्ताइं दो य भणिईओ जाणाहिति सो गाहिइ सुसिक्खिओ रंगमज्झम्मि (२२) भीतं दुतं रहस्सं गायंतो मा य गाहि उत्तालं, काकस्सरमणुणासं च होंति गेयस्स छद्दोसा (२३) पुन्नं रत्तं च अलंकियं च वतं तहा अविघुट्ठं; मधुरं सम सुकुमारं अठ्ठ गुणा होंति गेयस्स (२४) उरकंठ-सिरपसत्थं च गेज्जंते मउरिभिअपदवद्धं; समतालपडुक्खेवं सत्तसरसीहरं गीयं (२५) निद्दोसं सारवंतं च हेउजुत्तमलंकियं, उवणीय सोवयारं च मियं मधुरमेव य (२६) सममद्धसमं चेव सव्वत्थ विसमं च जं, तिञ्चि वित्तप्पयाराइं चउत्थं नोवलब्भइ (२७) सक्कया पागया चेव दुहा भणिईओ आहिया; सरमंडलम्मि गिज्जंते पसत्था इसिभासिया (२८) केसी गायइ मधुरं केसी गायइ खरं च रुक्खं च, केसी गायइ चउरं केसि विलंबं दुतं केसी (२९) विस्सरं पुण केरिसी? सामा गायइ मधुरं काली गायइ खरं च रुक्खं च, गोरी गायइ चउरं, काण विलंबं दुतं अंधा (३०) विस्सरं पुण पिंगला, तंतिसमं तालसमं पादसमं लयसमं गहसमं च, नीससिऊससि-यसमं संचारसमा सरा सत्त (३१) सत्त सरा य तओ गामा मुच्छणा एगवीसई ताणा एगूणपण्णासा समत्तं सरमंडलं (३२) **सरमंडलं समत्तं ॥ ६७७ ॥**

सत्तविहे कायकिल्लेसे प० तं० ठाणाइए उकुड्डयासणिए पडिमट्ठाई वीरासणिए णेसज्जिए दंडाइए लगंडसाई ॥ ६७८ ॥ जंबुद्दीवे दीवे सत्तवासा प० तं० भरहे एरवए हेमवए हेरन्नवए हरिवासे रम्मगवासे महाविदेहे ॥ ६७९ ॥ जंबुद्दीवे २ सत्त वासहरपव्वया प० तं० चुल्लहिमवंते महाहिमवंते निसहे नीलवंते रुप्पी सिहरी मंदरे ॥ ६८० ॥ जंबुद्दीवे २ सत्त महानईओ पुरत्थाभिमुहीओ लवणसमुदं समप्पेति तं० गंगा रोहिया हिरी सीया णरकंता सुवण्णकूला रत्ता ॥ ६८१ ॥ जंबुद्दीवे २ सत्त महानईओ पच्चत्थाभिमुहीओ लवणसमुदं समप्पेति तं० सिंधू रोहियंसा हरिकंता सीतोदा णारिकंता रुप्पकूला रत्तवई ॥ ६८२ ॥ धायइसंडदीवपुरच्छिमद्धे णं सत्त वासा प० तं० भरहे जाव महाविदेहे, धायइसंडदीवपुरच्छिमे णं सत्त वासहर-पव्वया प० तं० चुल्लहिमवंते जाव मंदरे धायइसंडदीवपुरत्थिमद्धे णं सत्त महानईओ पुरत्थाभिमुहीओ कालोयसमुदं समप्पेति तं० गंगा जाव रत्ता, धायइसंडदीवपुरत्थि-मद्धे णं सत्त महानईओ पच्चत्थाभिमुहीओ लवणसमुदं समप्पेति तं० सिंधू जाव रत्तवई, धायइसंडदीवे पच्चत्थिमद्धे णं सत्त वासा एवं चेव णवरं पुरत्थाभिमुहीओ लवणसमुदं समप्पेति पच्चत्थाभिमुहीओ कालोदं सेसं तं चेव ॥ ६८३ ॥ पुक्खरवर-दीवद्वूपुरच्छिमद्धे णं सत्त वासा तहेव णवरं पुरत्थाभिमुहीओ पुक्खरोदं समुदं

समप्पेति पच्चत्थाभिमुहीओ कालोदं समुहं समप्पेति सेसं तं चेव एवं पच्चत्थिमद्धेवि
 णवरं पुरत्थाभिमुहीओ कालोदं समुहं समप्पेति, पच्चत्थाभिमुहीओ पुक्खरोदं समप्पेति,
 सव्वत्थ वासा वासहरपव्वया णईओ य भाणियव्वाणि ॥ ६८४ ॥ जंबुद्दीवे २
 भारहे वासेऽतीयाए उस्सप्पिणीए सत्त कुलगरा होत्था, तंजहा-मित्तदामे सुदामे य
 सुपासे य सयंपभे; विमलघोसे सुघोसे य महाघोसे य सत्तमे ॥ ६८५ ॥ जंबुद्दीवे २
 भारहे वासे इमीसे ओसप्पिणीए सत्त कुलगरा होत्था तं० पढमित्थ विमलवाहण
 चक्खुम जसमं चउत्थमभिचंदे; तत्तो य पसेणइ पुण मरुदेवे चेव नाभी य (१)
 एएसि णं सत्तण्हं कुलगराणं सत्त भारियाओ हुत्था, तं० चंदजसा चंदकंता सुत्त
 पडिस्स चक्खुकंता य; सिरिकंता मरुदेवी, कुलकरइत्थीण नामाई (२) ॥ ६८६ ॥
 जंबुद्दीवे २ भारहे वासे आगमिस्साए उस्सप्पिणीए सत्त कुलगरा भाविस्संति तं०
 मित्तवाहण सुभोमे य सुप्पमे य सयंपभे; दत्ते सुहुमे [सुहे सुत्तवे] सुवंधू य आगमे-
 स्सिण होक्खइ ॥ ६८७ ॥ विमलवाहणे णं कुलगरे सत्तविहा सुक्खा उवभोगत्ताए हव्व-
 मागच्छिस्सु तं० मत्तंगया य भिंगा चित्तंगा चेव होंति चित्तरसा; मणियंगा य
 अणियणा सत्तमगा कप्पसुक्खा य (१) ॥ ६८८ ॥ सत्तविहा दंडनीई प० तं०
 हक्कारे मक्कारे धिक्कारे परिभासे मंडलवंधे चारए छविच्छेदे ॥ ६८९ ॥ एगमेगस्स
 णं रत्तो चाउरंतचक्कवट्टिस्स णं सत्त एगिंदियरयणा प० तं० चक्करयणे छत्तरयणे
 चम्मरयणे दंडरयणे असिरयणे मणिरयणे काकणिरयणे ॥ ६९० ॥ एगमेगस्स णं
 रत्तो चाउरंतचक्कवट्टिस्स सत्त पंचिंदियरयणा प० तं० सेणावइरयणे गाहावइरयणे
 वड्डतिरयणे पुरोहियरयणे इत्थिरयणे आसरयणे हत्थिरयणे ॥ ६९१ ॥ सत्तहिं
 ठाणेहिं ओगाढं दुस्समं जाणेज्जा, तं० अकाले वरिसइ काले ण वरिसइ असाधू
 पुज्जंति साधू ण पुज्जंति गुरूहिं जणो मिच्छं पडिवन्नो मणोदुहया वइदुहया ॥ ६९२ ॥
 सत्तहिं ठाणेहिं ओगाढं सुसमं जाणेज्जा तं० अकाले ण वरिसइ काले वरिसइ असाधू
 ण पुज्जन्ति साधू पुज्जन्ति गुरूहिं जणो सम्मं पडिवन्नो मणोसुहया वइसुहया ॥ ६९३ ॥
 सत्तविहा संसारसमावन्नगा जीवा प० तं० नेरइया, तिरिक्खजोणिया, तिरिक्खजो-
 णिणिओ, मणुस्सा, मणुस्सीओ, देवा, देवीओ ॥ ६९४ ॥ सत्तविहे आउभेदे-प०
 तं० अज्जवसाणनिमित्ते, आहारे, वेयणा, पराघाए, फासे, आणापाणू, सत्तविहं
 भिज्जए आउं ॥ ६९५ ॥ सत्तविहा सव्वजीवा प० तं० पुढविकाइया आउ-
 तेउ-वाउ-वणस्सइ० तसकाइया अकाइया, अहवा सत्तविहा सव्वजीवा प० तं०
 कण्हलेसा जाव सुक्कलेसा अलेसा ॥ ६९६ ॥ वंभदत्ते णं राया चाउरंतचक्कवट्टी सत्त
 धणूइं उड्डं उच्चतेणं सत्त य वाससयाई परमाउं पालइत्ता कालमासे कालं किच्चा अहे

सत्तमाए पुढवीए अप्पइठाणे णरए णेरइयत्ताए उववण्णे ॥ ६९७ ॥ मल्ली णं अरहा
 अप्पसत्तमे मुंडे भावित्ता अगाराओ अणगारियं पव्वइए तं० मल्ली विदेहरायवरक-
 ण्णगा, पडिबुद्धी इक्खागराया, चंदच्छाए अंगराया, रूपी कुणालाहिवई, संखे
 कासीराया, अदीणसत्तू कुरुराया, जियसत्तू पंचालराया ॥ ६९८ ॥ सत्तविहे दंसणे
 प० तं० सम्मदंसणे मिच्छदंसणे सम्ममिच्छदंसणे चक्खुदंसणे अचक्खुदंसणे
 ओहिदंसणे केवलदंसणे ॥ ६९९ ॥ छउमत्थवीयरणे णं मोहणिज्जवज्जाओ सत्त
 कम्मपयडीओ वेएइ, तं० णाणावरणिज्जं, दंसणावरणिज्जं, वेयणियं, आउयं, नामं,
 गोयमंतराइयं ॥ ७०० ॥ सत्त ठाणाइं छउमत्थे सव्वभावेणं न जाणइ न पासइ,
 तं० धम्मत्थिकायं, अधम्मत्थिकायं, आगासत्थिकायं, जीवं असरीरपडिबद्धं, पर-
 माणुपोग्गलं, सइं, गंधं ॥ ७०१ ॥ एयाणि चेव उप्पज्जणाणे जाव जाणइ पासइ,
 तं० धम्मत्थिकायं जाव गंधं ॥ ७०२ ॥ समणे भगवं महावीरे वयरोसभणाराय-
 संघयणे समचउरंससंठाणसंठिए सत्त रयणीओ उड्डं उच्चतेणं होत्था ॥ ७०३ ॥
 सत्तविकहाओ प० तं० इत्थिकहा, भत्तकहा, देसकहा, रायकहा, मिउकालणिया,
 दंसणभेयणी, चरित्तभेयणी ॥ ७०४ ॥ आयरियउवज्झायस्स णं गणंसि सत्त अइसेसा
 प० तं० आयरियउवज्झाए अंतो उवस्सयस्स पाए णिगिज्झिय २ पप्फोडेमाणे वा
 पमज्जेमाणे वा णाइक्कमइ एवं जहा पंचट्ठाणे जाव चाहिं उवस्सयस्स एगरायं वा
 दुरायं वा वसमाणे णाइक्कमइ उवगरणाइसेसे भत्तपाणाइसेसे ॥ ७०५ ॥ सत्तविहे
 संजमे प० तं० पुढविकाइयसंजमे जाव तसकाइयसंजमे अजीवकायसंजमे ॥ ७०६ ॥
 सत्त विहे असंजमे प० तं० पुढविकाइयअसंजमे जाव तसकाइयअसंजमे, अजीवकाय-
 असंजमे ॥ ७०७ ॥ सत्तविहे आरंभे प० तं० पुढविकाइयआरंभे जाव अजीवकाय-
 आरंभे एवमणारंभेवि एवं सारंभे वि एवमसारंभे वि एवं समारंभेवि एवं असमारंभेवि
 जाव अजीवकायअसमारंभे ॥ ७०८ ॥ अह भंते ! अयसिकुसुंभकोद्वकंगुरालग (वरा-
 कोदूसगा) सणसरिसवमूलगवीयाणं एएसि णं धच्चाणं कोट्टाउत्ताणं पल्लाउत्ताणं जाव
 पिहियाणं केवइयं कालं जोणी संचिठ्ठइ? गोयमा ! जहच्चेणं अंतोमुहुत्तं उक्कोसेणं
 सत्त संवच्छराइं, तेण परं जोणी पमिलायइ जाव जोणीवोच्छेदे प० ॥ ७०९ ॥
 वायरआउकाइयाणं उक्कोसेणं सत्त वाससहस्साइं ठिई प० ॥ ७१० ॥ तच्चाए णं
 वालयप्पभाए पुढवीए उक्कोसेणं नेरइयाणं सत्त सागरोवमाइं ठिती प० ॥ ७११ ॥
 चउत्थीए णं पंकप्पभाए पुढवीए जहण्णेणं नेरइयाणं सत्तसागरोवमाइं ठिती प०
 ॥ ७१२ ॥ सद्धस्स णं देविंदस्स देवरन्नो वरुणस्स महारन्नो सत्त अग्गमहिसीओ
 प० ॥ ७१३ ॥ ईसाणस्स णं देविंदस्स देवरन्नो सोमस्स महारन्नो सत्त अग्ग

महिसीओ प० ॥ ७१४ ॥ ईसाणस्स णं देविंदस्स देवरण्णो जमस्स महारण्णो सत्त
 अग्गमहिसीओ प० ॥ ७१५ ॥ ईसाणस्स णं देविंदस्स देवरण्णो अन्भितरपरिसाए
 देवाणं सत्त पलिओवमाइं ठिई प० ॥ ७१६ ॥ सक्कस्स णं देविंदस्स देवरण्णो
 अन्भितरपरिसाए देवाणं सत्त पलिओवमाइं ठिई प० ॥ ७१७ ॥ सक्कस्स णं
 देविंदस्स देवरण्णो अग्गमहिसीणं देवीणं सत्त पलिओवमाइं ठिई प० ॥ ७१८ ॥
 सोहम्मे कप्पे परिग्गहियाणं देवीणं उक्कोसेणं सत्त पलिओवमाइं ठिई प० ॥ ७१९ ॥
 सारस्सयमाइच्चाणं सत्त देवा सत्त देवसया प० ॥ ७२० ॥ गद्धतोयतुसियाणं
 देवाणं सत्त देवा सत्त देवसहस्सा प० ॥ ७२१ ॥ सणकुमारे कप्पे उक्कोसेणं देवाणं
 सत्त सागरोवमाइं ठिई प० ॥ ७२२ ॥ माहिंदे कप्पे उक्कोसेणं देवाणं साइरेगाइं
 सत्तसागरोवमाइं ठिई प० ॥ ७२३ ॥ वंभलोए कप्पे जहन्नेणं देवाणं सत्त सागरो-
 वमाइं ठिई प० ॥ ७२४ ॥ वंभलोयलंतएसु णं कप्पेसु विमाणा सत्त जोयणसयाइं
 उड्डं उच्चत्तेणं प० ॥ ७२५ ॥ भवणवासीणं देवाणं भवधारणिज्जा सरीरगा उक्कोसेणं सत्त
 रयणीओ उड्डं उच्चत्तेणं प०, एवं वाणमंतराणं एवं जोइसियाणं सोहम्मीसाणेसु णं कप्पेसु
 देवाणं भवधारणिज्जगा सरीरा सत्त रयणीओ उड्डं उच्चत्तेणं प० ॥ ७२६ ॥ णंदीसर-
 वरस्स णं दीवस्स अंतो सत्त दीवा प० तं० जंबुदीवे २ धायइसंडे दीवे पोक्खरवरे
 वरुणवरे खीरवरे घयवरे खोयवरे ॥ ७२७ ॥ णंदीसरवरस्स णं दीवस्स अंतो
 सत्त समुद्दा प० तं० लवणे कालोए पुक्खरोदे वरुणोए खीरोदे घओदे खोओए
 ॥ ७२८ ॥ सत्त सेढीओ प० तं० उज्जुआयया एगओवंका दुहओवंका एगओखुहा
 दुहओखुहा चक्कवाला अद्धचक्कवाला ॥ ७२९ ॥ चमरस्स णं असुरिंदस्स असुर-
 कुमाररन्नो सत्त अणिया सत्त अणियाहिवई प० तं० पायत्ताणिए पीढाणिए कुंज-
 राणिए महिसाणिए रहाणिए नट्टाणिए गंधव्वाणिए दुमे पायत्ताणियाहिवई एवं जहा
 पंचट्टाणे जाव किन्नरे रहाणियाहिवई रिठ्ठे णट्टाणियाहिवई गीयरई गंधव्वाणिया-
 हिवई वलिस्स णं वइरोयणिंदस्स वइरोयणरन्नो सत्त अणिया सत्त अणियाहिवई
 प० तं० पायत्ताणिए जाव गंधव्वाणिए महहुमे पायत्ताणियाहिवई जाव किंपुरिसे
 रहाणियाहिवई महारिठ्ठे णट्टाणियाहिवई गीयजसे गंधव्वाणियाहिवई, धरणस्स णं
 णागकुमारिंदस्स णागकुमाररण्णो सत्त अणिया सत्त अणियाहिवई प० तं० पाय-
 त्ताणिए जाव गंधव्वाणिए रुद्धेसेणे पायत्ताणियाहिवई जाव आणंदे रहाणियाहिवई
 नंदणे णट्टाणियाहिवई तेत्तली गंधव्वाणियाहिवई भूयाणंदस्स सत्त अणिया सत्त
 अणियाहिवई प० तं० पायत्ताणिए जाव गंधव्वाणिए दक्खे पायत्ताणियाहिवई
 जाव णंदुत्तरे रहाणियाहिवई रई णट्टाणियाहिवई माणसे गंधव्वाणियाहिवई एवं

जाव घोसमहाघोसाणं णेयव्वं सक्कस्स णं देविदस्स देवरत्तो सत्त अणिया सत्त अणियाहिवई प० तं० पायत्ताणिए जाव गंधव्वाणिए हरिणेगमेसी पायत्ताणियाहिवई जाव माढरे रहाणियाहिवई सेए णट्टाणियाहिवई तुंवुरु गंधव्वाणियाहिवई ईसाणस्स णं देविदस्स देवरण्णो सत्त अणिया सत्त अणियाहिवइणो प० तं० पायत्ताणिए जाव गंधव्वाणिए लहुपरक्कमे पायत्ताणियाहिवई जाव महासेए णट्टाणियाहिवई रए गंधव्वाणियाहिवई सेसं जहा पंचठ्ठाणे एवं जाव अच्चयस्स वि णेयव्वं ॥ ७३०-७३१ ॥ चमरस्स णं असुरिदस्स असुरकुमाररत्तो दुमस्स पायत्ताणियाहिवइस्स सत्त कच्छाओ प० तं० पढमा कच्छा जाव सत्तमा कच्छा, चमरस्स णं असुरिदस्स असुरकुमाररत्तो दुमस्स पायत्ताणियाहिवइस्स पढमाए कच्छाए चउसठ्ठि देवसहस्सा प० जावइया पढमा कच्छा तब्बिगुणा दोच्चा कच्छा तब्बिगुणा तच्चा कच्छा एवं जाव जावइया छट्ठा कच्छा तब्बिगुणा सत्तमा कच्छा एवं बलिस्स वि णवरं महहुमे सठ्ठिदेवसाहस्सिओ सेसं तं चेव धरणस्स एवं चेव णवरं अट्ठावीसं देवसहस्सा सेसं तं चेव जहा धरणस्स एवं जाव महाघोसस्स णवरं पायत्ताणियाहिवई अन्ने ते पुव्वभणिता ॥ ७३२ ॥ सक्कस्स णं देविदस्स देवरण्णो हरिणेगमेसिस्स सत्त कच्छाओ प० तं० पढमा कच्छा एवं जहा चमररस तहा जाव अच्चयस्स, णाणत्तं पायत्ताणियाहिवईणं ते पुव्वभणिया देवपरिमाणमिमं सक्कस्स चउरासीइं देवसहस्सा, ईसाणस्स असीइं देवसहस्साइं देवा इमाए गाहाए अणुगंतव्वा, 'चउरासीइ असीइ वावत्तरि सत्तरी य सट्ठीया; पन्ना चत्तालीसा तीसा वीसा दससहस्सा' (१) जाव अच्चयस्स लहुपरक्कमस्स दसदेवसहस्सा जाव जावइया छट्ठा कच्छा तब्बिगुणा सत्तमा कच्छा ॥ ७३३ ॥ सत्तविहे वयणविकप्पे प० तं० आलावे, अणालावे, उल्लावे, अणुल्लावे, संलावे, पलावे, विप्पलावे ॥ ७३४ ॥ सत्तविहे विणए प० तं० णाणविणए, दंसणविणए, चरित्तविणए, मणविणए, वइविणए, कायविणए, लोगोव-यारविणए ॥ ७३५ ॥ पसत्थमणविणए सत्तविहे प० तं० अपावए असावज्जे अकि-रिए निस्वक्केसे अण्हकरे अच्छविकरे अभूताभिसंकमणे ॥ ७३६ ॥ अप-सत्थमणविणए सत्तविहे प० तं० पावए सावज्जे सकिरिए सउवक्केसे अण्हकरे छविकरे भूयाभिसंकमणे ॥ ७३७ ॥ पसत्थवइविणए सत्तविहे प० तं० अपावए असावज्जे जाव अभूयाभिसंकमणे ॥ ७३८ ॥ अपसत्थवइविणए सत्तविहे प० तं० पावए, जाव भूयाभिसंकमणे ॥ ७३९ ॥ पसत्थकायविणए सत्तविहे प० तं० आउत्तं गमणं आउत्तं ठाणं आउत्तं निसीयणं आउत्तं तुअट्ठणं आउत्तं उल्लंघणं आउत्तं पल्लं-घणं आउत्तं सव्विदियजोगजुंजणया ॥ ७४० ॥ अपसत्थकायविणए सत्तविहे प० तं०

अणाउत्तं गमणं, जाव अणाउत्तं सच्चिदियजोगजुंजणया ॥ ७४१ ॥ लोगोवयार-
विणए सत्तविहे प० तं० अब्भासवत्तियं परच्छंदाणवत्तियं कज्जहेउं कयपडिडिइया
अत्तगवेसणया देसकालणुया सव्वत्थेसु यापडिलोमया ॥ ७४२ ॥ सत्त समुग्घाया
प० तं० वेयणासमुग्घाए कसायसमुग्घाए मारणंतियसमुग्घाए वेउव्वियसमुग्घाए
तेजससमुग्घाए आहारगसमुग्घाए केवलिसमुग्घाए, मणुस्साणं सत्त समुग्घाया प०
एवं चेव ॥ ७४३ ॥ समणस्स णं भगवओ महावीरस्स तित्थंसि सत्त पवयणनि-
ण्हगा प० तं० बहुरया जीवपएसिया अवत्तिया सामुच्छेइया दोकिरिया तेरासिया
अवद्धिया, एएसि णं सत्तण्हं पवयणनिण्हगाणं सत्तऽधम्मायरिया होत्था तं० जमाली
तीसगुत्ते आसाढे आसमित्ते गंगे छलुए गोठ्ठामाहिले, एएसि णं सत्तण्हं पवयणनि-
ण्हगाणं सत्त उप्पत्तिनगरा होत्था तं० सावत्थी उसमपुरं सेयविया मिहिलमुल्ल-
गार्तीरं पुरिमंतरंजि दसपुर णिण्हगउप्पत्तिनगराई ॥ ७४४ ॥ सायावेयणिजस्स
कम्मस्स सत्तविहे अणुभावे प० तं० मणुन्ना सद्दा मणुण्णा रुवा जाव मणुन्ना फासा
मणोत्तह्या वइमुह्या ॥ ७४५ ॥ असायावेयणिजस्स णं कम्मस्स सत्तविहे अणु-
भावे प० तं० अमणुन्ना सद्दा जाव वइदुह्या ॥ ७४६ ॥ महाणक्खत्ते सत्ततारे प०
॥ ७४७ ॥ अभिईयाइया सत्तनक्खत्ता पुव्वदारिया प० तं० अभिई सवणो धणिठ्ठा
सयभिसया पुव्वाभद्दवया उत्तराभद्दवया रेवई, अस्सिणियाइया णं सत्त णक्खत्ता
दाहिणदारिया प० तं० अस्सिणी भरिणी कत्तिया रोहिणी सिगसिरे अद्दा पुणव्वसू
पुस्साइया णं सत्त णक्खत्ता अवरदारिया प० तं० पुस्सो असिळेसा मघा पुव्वाफ-
ग्गुणी उत्तराफग्गुणी हत्थो चित्ता, साइयाइया णं सत्त णक्खत्ता उत्तरदारिया प० तं०
साई विसाहा अणुराहा जेठ्ठा मूलो पुव्वाआसाढा उत्तरासाढा ॥ ७४८ ॥ जंबुद्दीवे
दीवे सोमणसे वक्खारपव्वए सत्त कूडा प० तं० सिद्धे सोमणसे तह बोधव्वे
मंगलावईकूडे, देवकुरु दिमल कंचण विसिठ्ठकूडे य बोद्धव्वे ॥ ७४९ ॥ जंबुद्दीवे
दीवे गंधमायणे वक्खारपव्वए सत्त कूडा प० तं० सिद्धे य गंधमायण बोद्धव्वे
गंधिलावईकूडे उत्तरकुरुफलिहे लोहिंयक्ख आगंदणे चेव ॥ ७५० ॥ बिईदि-
याणं सत्त जाइकुलकोडिजोणीपमुहसयसहस्सा प० ॥ ७५१ ॥ जीवा णं सत्त-
ट्ठाणनिव्वत्तिए पोग्गले पावकम्मत्ताए चिणिंसु वा चिणंति वा चिणिस्संति वा
तं० नेरइयनिव्वत्तिए जाव देवनिव्वत्तिए एवं चिण जाव णिज्जरा चेव ॥ ७५२ ॥
सत्तपएसिया खंधा अणंता प० ॥ ७५३ ॥ सत्त पएसोगाढा पोग्गला जाव सत्त-
गुणलक्खा पोग्गला अणंता प० ॥ ७५४ ॥ सत्तमट्ठाणं समत्तं, सत्तम-
मज्झयणं समत्तं ॥

अठमहाणं

अठहिं ठाणेहिं संपन्ने अणगारे अरिहति एगल्लविहारपडिमं उवसंपज्जिताणं विहरित्तए तं० सद्धी पुरिसजाए सच्चे पुरिसजाए मेहावी पुरिसजाए बहुस्सुए पुरिसजाए सत्तिमं अप्पाहिगरणे धिइमं वीरियसंपन्ने ॥ ७५५ ॥ अठविहे जोणिसंगहे प० तं० अंडया पोयया जाव उब्भिया उववाइया, अंडया अठगइया अठागइया प० तं० अंडए अंडएसु उववज्जमाणे अंडएहिंतो वा जाव उववाइएहिंतो वा उववज्जेज्जा, से चेव णं से अंडए अंडगतं विप्पजहमाणे अंडगत्ताए वा पोयगत्ताए वा जाव उववाइयत्ताए वा गच्छेज्जा एवं पोययावि जराउयावि सेसाणं गइरागइं णत्थि ॥ ७५६ ॥ जीवा णं अठ कम्मपयडीओ चिणिसु वा चिणंति वा चिणिस्संति वा तं० णाणावरणिज्जं दरिसणावरणिज्जं वेयणिज्जं मोहणिज्जं आउयं नामं गोतं अंतरा-इयं, नेरइया णं अठ कम्मपगडीओ चिणिसु वा ३ एवं चेव, एवं निरंतरं जाव वेमाणियाणं २४. जीवाणमठकम्मपगडीओ उवचिणिसु वा ३ एवं चेव एवं चिण उवचिण बंध उदीर वेय तह णिज्जरा चेव, एए छ चउवीसा दंडगा भाणियव्वा ॥ ७५७ ॥ अठहिं ठाणेहिं माई मायं कट्ठु नो आलोएज्जा नो पडिक्कमेज्जा जाव नो पडिवज्जेज्जा, तं० करिंस्सु वाऽहं करेमि वाऽहं करिस्सामि वाऽहं अकित्ती वा मे सिया अवण्णे वा मे सिया अवणए वा मे सिया कित्ती वा मे परिहाइस्सइ जसो वा मे परिहाइस्सइ, अठहिं ठाणेहि माई मायं कट्ठु आलोएज्जा जाव पडिवज्जेज्जा तं० माइस्स णं अस्सि लोए गरहिए भवइ उववाए गरहिए भवइ आजार्इ गरहिया भवइ एगमवि माई मायं कट्ठु नो आलोएज्जा जाव नो पडिवज्जेज्जा णत्थि तस्स आराहणा एगमवि माई माय कट्ठु आलोएज्जा जाव पडिवज्जेज्जा अत्थि तस्स आराहणा बहुओवि माई मायं कट्ठु नो आलोएज्जा जाव नो पडिवज्जेज्जा नत्थि तस्स आराहणा बहुओवि माई मायं कट्ठु आलोएज्जा जाव अत्थि तस्स आराहणा आयरियउवज्जायस्स वा मे अइसेसे णाणदंसणे समुपज्जेज्जा, से तं सममालोएज्जा माई णं एसे माई णं मायं कट्ठु से जहा नामए अयागरेइ वा तंवागरेइ वा तउ-आगरेइ वा सीसागरेइ वा रुप्पागरेइ वा सुवन्नागरेइ वा तिलागणीइ वा तुसागणीइ वा वुसागणीइ वा णलागणीइ वा दलागणीइ वा सोडियालिच्छाणिवा भंडियालि-च्छाणि वा गोलियालिच्छाणि वा कुंभारावाएइ वा कवेल्लुयावाएइ वा इट्ठावाएइ वा जंतवाडचुल्लीइ वा लोहारंवरिसाणि वा तत्ताणि समजोइभूयाणि किसुकफुल्लस-माणानि उक्कासहस्साइं विणिम्मुयमाणानि २ जालासहस्साइं पमुंचमाणानि इंगालस-हस्साइं परिकिरमाणानि अतो २ झियायंति एवामेव माई मायं कट्ठु अंतो २ झिया-

यइ जइवि य णं अण्णे केइ वदंति तं पि य णं माई जाणइ अहमेसे अभिसंकिज्जामि
माई णं मायं कट्ठु अणालोइयपडिक्कंते कालमासे कालं किच्चा अण्णयरेसु देवलोगेसु
देवत्ताए उववत्तारो भवंति तंजहा नो महिद्धिएसु जाव नो दूरंगइएसु नो चिरट्ठिई-
एसु से णं तत्थ देवं भवइ णो महिद्धिए जाव णो चिरट्ठिईए जावि य से तत्थ
वाहिरब्भंतारिया परिसा भवइ साविय णं णो आढाइ णो परिजाणाइ णो महारिहे-
णमासणेणं उवनिमंतेइ भासंपि य से भासमाणस्स जाव चत्तारि पंच देवा अवुत्ता
चेव अब्भुट्ठंति मा वहुं देवे ! भासउ से णं तओ देवलोगाओ आउक्खएणं भव-
क्खएणं ठिइक्खएणं अणंतरे चयं चइत्ता इहेव माणुस्सए भवे जाई इमाई कुलाई
भवंति तं० अतकुलाणि वा पंतकुलाणि वा तुच्चकुलाणि वा दरिदुक्कुलाणि वा
भिक्षुवागकुलाणि वा किवणकुलाणि वा तहप्पगारेसु कुलेसु पुमत्ताए पच्चायाइ से
णं तत्थ पुमे भवइ दुस्सवे दुवण्णे दुग्गंधे दुरसे दुफासे अणिठ्ठे अकंते अप्पिए अम-
णुण्णे अमणामे हीणस्सरे दीणस्सरे अणिठ्ठसरे अकंतसरे अपियस्सरे अमणुण्ण-
स्सरे अमणामस्सरे अणाएज्जवयणपच्चायाए जाविय से तत्थ वाहिरब्भंतारिया
परिसा भवइ सावि य णं णो आढाइ णो परिजाणाइ णो महारिहेणं आसणेणं उव-
णिमंतेइ भासंपि य से भासमाणस्स जाव चत्तारि पंच जणा अवुत्ता चेव अब्भु-
ट्ठंति मा वहुं अज्जउत्तो ! भासउ माई णं मायं कट्ठु आलोइयपडिक्कंते कालमासे
कालं किच्चा अण्णतरेसु देवलोगेसु देवत्ताए उववत्तारो भवंति तं० महिद्धिएसु जाव
चिरट्ठिईएसु से णं तत्थ देवे भवइ महिद्धिए जाव चिरट्ठिईए हारविराइयवच्छे
कडगतुडियथंभियभुए अंगदकुंडलमउडगंडतलकन्नपीढधारी विचित्तहत्थाभरणे
विचित्तवत्थाभरणे विचित्तमालामउली कल्लाणगपवरवत्थपरिहिए कल्लाणगपवर-
गंधमल्लाणुलेवणधरे भासुरवोदी पलंववणमालधरे दिव्वेणं वण्णेणं दिव्वेणं गंधेणं
दिव्वेणं रसेणं दिव्वेणं फासेणं दिव्वेणं संघाएणं दिव्वेणं संठाणेणं दिव्वाए इद्धीए
दिव्वाए जुईए दिव्वाए पभाए दिव्वाए छायाए दिव्वाए अच्चीए दिव्वेणं तेएणं
दिव्वाए लेस्साए दसदिसाओ उज्जोएमाणे पभासेमाणे महयाऽहयणदृगीयवाइयतंती-
तलतालतुडियघणमुइंगपडुप्पवाइयरवेणं दिव्वाइं भोगभोगाईं भुंजमाणे विहरइ
जावि य से तत्थ वाहिरब्भंतारिया परिसा भवइ, सावि य णं आढाइ परिजाणाइ
महारिहेण आसणेणं उवनिमंतेइ भासंपि य से भासमाणस्स जाव चत्तारि पंच देवा
अवुत्ता चेव अब्भुट्ठंति वहुं देवे ! भासउ से णं तओ देवलोगाओ आउक्खएणं
३ जाव चइत्ता इहेव माणुस्सए भवे जाई इमाई कुलाई भवंति, इद्धाई जाव बहु-
जणस्स अपरिभूयाईं तहप्पगारेसु कुलेसु पुमत्ताए पच्चायाइ, से णं तत्थ पुमे भवइ

सुहवे सुवन्ने सुगंधे सुरसे सुफासे इठ्ठे कंते जाव मणामे अहीणस्सरे जाव मणाम-
 स्सरे आदेज्जवयणे पच्चायाए जाऽविय से तत्थ वाहिरब्भंतरिया परिसा भवइ
 सावि य णं आढाइ जाव बहुमज्जउत्ते ! भासउ ॥ ७५८ ॥ अठ्ठविहे संवरे
 प० तं० सोइंदियसंवरे जाव फासिंदियसंवरे मणसंवरे वइसंवरे कायसंवरे, अठ्ठविहे
 असंवरे प० तं० सोइंदियअसंवरे जाव कायअसंवरे ॥ ७५९ ॥ अठ्ठ फासा प०
 तं० कक्कडे मउए गरुए लहुए सीए उसिणे निद्धे लुक्खे ॥ ७६० ॥ अठ्ठविहा
 लोगठिई प० तं० आगासपइठ्ठिए वाए वायपइठ्ठिए उदही एवं जाव छठाणे जाव
 जीवा कम्मपइठ्ठिया अजीवा जीवसंगहीया जीवा कम्मसंगहीया ॥ ७६१ ॥ अठ्ठविहा
 गणिसंपया प० तं० आयासंपया सुयसंपया सरीरसंपया वयणसंपया वायणासंपया
 मइसंपया पयोगसंपया संगहपरिण्णानाम अठ्ठमा ॥ ७६२ ॥ एगमेगे णं महानिही
 अठ्ठचक्कवालपइठ्ठाणे अठ्ठजोयणाई उड्डं उच्चत्तेणं प० ॥ ७६३ ॥ अठ्ठसमिईओ
 प० तं० इरियासमिई भासासमिई एसणासमिई आयाणभंडमत्तनिक्खेवणासमिई
 उच्चारपासवणखेलजल्लसिंघाणपारिठ्ठावणियासमिई मणसमिई वइसमिई कायसमिई
 ॥ ७६४ ॥ अठ्ठहिं ठाणेहिं संपन्ने अणगारे अरिहइ आलोयणा पडिच्छित्तए तं०
 आयाखं आहारवं ववहारवं ओवीलए पकुव्वए अपरिस्साई निज्जावए अवायदंसी
 ॥ ७६५ ॥ अठ्ठहिं ठाणेहिं संपन्ने अणगारे अरिहइ अत्तदोसमालोइत्तए तं० जाइ-
 सपन्ने कुलसपन्ने विणयसंपन्ने णाणसंपन्ने दंसणसंपन्ने चरित्तसंपन्ने खंते दंते ॥ ७६६ ॥
 अठ्ठविहे पायच्छित्ते प० तं० आलोयणारिहे पडिक्कमणारिहे तदुभयारिहे विवेगारिहे
 विउस्सग्गारिहे तवारिहे छेयारिहे मूलारिहे ॥ ७६७ ॥ अठ्ठ मयठ्ठाणा प० तं०
 जाइमए कुलमए वलमए रुवमए तवमए सुयमए लाभमए इस्सरियमए ॥ ७६८ ॥
 अठ्ठ अकिरियावाई प० तं० एगावाई अणेगावाई मितवाई निम्मितवाई सायवाई
 समुच्छेदवाई णियावाई ण संति परलोगवाई ॥ ७६९ ॥ अठ्ठविहे महानिमित्ते
 प० तं० भोमे उप्पाए सुविणे अंतलिक्खे अगे सरे लक्खणे वंजणे ॥ ७७० ॥
 अठ्ठविहा वयणविभत्ती प० तं० निद्देसे पढसा होइ विइया उवएसणे; तइया करणंमि
 कया चउत्थी संपयावणे (१) पंचमी य अवायाणे छठी सस्सामिवायणे; सत्तमी
 सज्जिहाणत्थे अठ्ठमी आमंतणी भवे (२) तत्थ पढसा विभत्ती निद्देसे सो इमो
 अहं वत्ति १-विइया उण उवएसे भण कुण व इमं व तं वत्ति (३) तइया कर-
 णंमि कया णीयं च कयं च तेण व मए वा, हंदि णमो साहाए हवइ चउत्थी
 पयाणंमि (४) अवणे गिण्हसु तत्तो इत्तोत्ति व पंचमी अवादाणे; छठी तस्स
 टमस्स व गयस्स वा सामिसंवंधे (५) हवइ पुण सत्तमीयं इमंमि आहारकाल-

मावे य; आमंतणी भवे अठ्ठी उ जह हे जुवाणंति (६) ॥ ७७१ ॥ अठ्ठ ठाणाई
 छउमत्थे णं सव्वभावेणं ण जाणइ ण पासइ तं० धम्मत्थिकायं जाव गंधं वायं,
 एयाणि चेव उप्पण्णणाणदंसणधरे अरहा जिणे केवली जाणइ पासइ जाव गंधं
 वायं ॥ ७७२ ॥ अठ्ठविहे आलवेए प० तं० कुमारभिचे, कायतिगिच्छा, सालाई,
 सल्लहत्ता, जंगोली, भूयवेज्जा, खारतंते, रसायणे ॥ ७७३ ॥ सक्कस्स णं देविंदस्स
 देवरत्तो अठ्ठग्गमहिंसीओ प० तं० पउमा सिवा सई अंजू अमला अच्छरा णवमिया
 रोहिणी ॥ ७७४ ॥ ईसाणस्स णं देविंदस्स देवरत्तो अठ्ठग्गमहिंसीओ प० तं०
 कण्हा कण्हराई सामा सामरक्खिया वसू वसुगुत्ता वसुमिता वसुंधरा ॥ ७७५ ॥
 सक्कस्स णं देविंदस्स देवरत्तो सोमस्स महारत्तो अठ्ठग्गमहिंसीओ प० ईसाणस्स णं
 देविंदस्स देवरत्तो वेसमणस्स महारत्तो अठ्ठग्गमहिंसीओ प० ॥ ७७६-७७७ ॥
 अठ्ठ महग्गहा प० तं० चंदे सूरु सुके बुहे वहस्सई अंगारए सणिचरे केऊ ॥ ७७८ ॥
 अठ्ठविहा तणवणस्सइकाइया प० तं० मूले कंदे खंधे तथा साले पवाले पत्ते पुप्फे
 ॥ ७७९ ॥ चउरिंदिया णं जीवा असमारभमाणस्स अठ्ठविहे संजमे कज्जइ तं०
 चक्खुमाओ सोक्खाओ अववरोवेत्ता भवइ चक्खुमाणं दुक्खेणं असंजोएत्ता भवइ
 एवं जाव फासामाओ सोक्खाओ अववरोवेत्ता भवइ फासामणं दुक्खेणं असंजो-
 एत्ता भवइ ॥ ७८० ॥ चउरिंदिया णं जीवा समारभमाणस्स अठ्ठविहे असंजमे
 कज्जइ तं० चक्खुमाओ सोक्खाओ ववरोवेत्ता भवइ चक्खुमाणं दुक्खेणं संजोएत्ता
 भवइ एवं जाव फासामाओ सोक्खाओ ० ॥ ७८१ ॥ अठ्ठ सुहुमा प० तं० पाणसुहुमे
 पणगसुहुमे वीयसुहुमे हरियसुहुमे पुप्फसुहुमे अंडसुहुमे लेणसुहुमे सिणेहसुहुमे
 ॥ ७८२ ॥ भरहस्स णं रण्णो चाउरंतचक्कवट्टिस्स अठ्ठपुरिसजुगाई अणुवद्धं सिद्धाई
 जाव सव्वदुक्खप्पहीणाई तं०-आइच्चजसे महाजसे अइवले महावले तेयवीरिए
 कित्तवीरिए दंडवीरिए जलवीरिए ॥ ७८३ ॥ पासस्स णं अरहओ पुरिसादाणियस्स
 अठ्ठ गणा अठ्ठ गणहरा होत्था तं० सुभे अज्जघोसे वसिट्ठे वंभयारी सोमे सिरिधरे
 वीरिए भद्दजसे ॥ ७८४ ॥ अठ्ठविहे दंसणे प० तं० सम्मदंसणे मिच्छदंसणे सम्मा-
 मिच्छदंसणे चक्खुदंसणे जाव केवलदंसणे सुविणदंसणे ॥ ७८५ ॥ अठ्ठविहे अद्धो-
 चमिए प० तं० पलिओवमे सागरोवमे उस्सप्पिणी ओसप्पिणी पोरगलपरियट्ठे
 तीतद्धा अणागयद्धा सव्वद्धा ॥ ७८६ ॥ अरहओ णं अरिट्ठनेमिस्स जाव अठ्ठमाओ
 पुरिसजुगाओ जुगंतकरभूमी दुवासपरियाए अंतमकासी ॥ ७८७ ॥ समणेणं भग-
 वया महावीरेणं अठ्ठ रायाणो मुंडे भवेत्ता अगाराओ अणंगारिअं पव्वाविया तं०
 चीरंगय वीरजसे संजयए णिज्जए य रायरिसी, सेयसिवे उदायणे (तह संखे

कासिवद्धणे) ॥ ७८८ ॥ अठ्ठविहे आहारे प० तं० मणुण्णे असणे पाणे खाइमे साइमे अमणुण्णे जाव साइमे ॥ ७८९ ॥ उप्पिं सणकुमारमाहिंदाणं कप्पाणं हेठ्ठिं बंभलोए कप्पे रिठ्ठे विमाणे पत्थडे एत्थ णमक्खाडगसमचउरंससंठाणसंठियाओ अठ्ठ कण्हराईओ प० तं० पुरच्छिमेणं दो कण्हराईओ दाहिणेणं दो कण्हराईओ पच्चच्छिमेणं दो कण्हराईओ उत्तरेणं दो कण्हराईओ, पुरच्छिमा अब्भंतारा कण्हराई दाहिणं बाहिरं कण्हराई पुट्ठा, दाहिणा अब्भितरा कण्हराई पच्चच्छिमगं बाहिरं कण्हराई पुट्ठा, पच्चच्छिमा अब्भंतारा कण्हराई उत्तरं बाहिरं कण्हराई पुट्ठा, उत्तरा अब्भंतारा कण्हराई पुरच्छिमं बाहिरं कण्हराई पुट्ठा, पुरच्छिमपच्चच्छिमिल्लाओ बाहिराओ दो कण्हराईओ छलंसाओ उत्तरदाहिणाओ बाहिराओ दो कण्हराईओ तंसाओ सव्वाओ वि णं अब्भंतरकण्हराईओ चउरंसाओ, एयासि णं अट्ठण्हं कण्हराईणं अठ्ठ नामधेज्जा प० तं० कण्हराईति वा मेहराईति वा मवाति वा माघवईति वा वातफलिहेति वा वातपलिकखोभेति वा देवपलिहे वा देवपलिकखोभेति वा, एयासि णं अट्ठण्हं कण्हराईणं अठ्ठसु उवासंतरेसु अठ्ठलोगंतियविमाणा प० तं० अच्ची अच्चिमाली वइरोयणे पभंकरे चंदाभे सूराम्भे सुपइट्ठाम्भे अग्गिच्चाभे, एएसु णं अठ्ठसु लोगंतियविमाणेसु अठ्ठविहा लोगंतिया देवा प० तं० सारस्सयमाइच्चा वण्ही वरुणा य गइतोया य, तुसिया अक्कावाहा अग्गिच्चा चेव बोधव्वा (१) एएसि णं अट्ठण्हं लोगंतियदेवाणं अजहण्णमणक्कोसेणं अठ्ठ सागरोवमाई ठिई प० ॥ ७९० ॥ अठ्ठ धम्मस्थिकायमज्झपएसो प० अठ्ठ अहम्मस्थिकायमज्झपएसो एवं चेव अठ्ठ आगासस्थिकायमज्झपएसो प० एवं चेव अठ्ठ जीवमज्झपएसो प० ॥ ७९१ ॥ अरहंता णं महापउमे अठ्ठ रायाणो मुंडा भवेत्ता अगाराओ अणगारियं पव्वावेस्सति तं० पउमं पउमगुम्मं नल्लिणं नल्लिणगुम्मं पउमद्वयं धणुद्वयं कणगरहं भरहं ॥ ७९२ ॥ कण्हस्स णं वासुदेवस्स अठ्ठ अग्गमहिंसीओ अरहओ णं अरिठ्ठनेमिस्स अतिए मुंडा भवेत्ता अगाराओ अणगारियं पव्वइया सिद्धाओ जाव सव्वदुक्खप्पहीणाओ तं० पउमावई य गोरी गंधारी लक्खणा सुसीमा य जंबवई सच्चभामा रुप्पिणी कण्हअग्गमहिंसीओ ॥ ७९३ ॥ वीरियपुव्वस्स णं अठ्ठ वत्थू अठ्ठ चूलियावत्थू प० ॥ ७९४ ॥ अठ्ठ गइओ प० तं० णिरयगई तिरियगई जाव सिद्धिगई गुरुगई पणोल्लणगई पब्भारगई ॥ ७९५ ॥ गंगासिधुरत्तात्तवइदेवीणं दीवा अठ्ठ २ जोयणाई आयामविकखंभेणं प० ॥ ७९६ ॥ उक्कामुहमेहमुहविज्जु-मुहविज्जुदंतदीवाणं दीवा अठ्ठ २ जोयणसयाई आयामविकखंभेणं प० ॥ ७९७ ॥ कालोदे णं समुदे अठ्ठ जोयणसयसहस्साई चक्कवालविकखंभेणं प० ॥ ७९८ ॥

अन्मंतरपुक्खरद्धे णं अट्ठ जोयणसयसहस्साइं चक्खवालविकखंभेणं प० एवं वाहिर-
 पुक्खरद्धेवि ॥ ७९९ ॥ एगमेगस्स णं रज्जो चाउरंतचक्खवट्ठिस्स अट्ठ सोवन्निए
 काक्किणिरयणे छत्तले दुवालसंसिए अट्ठकणिए अधिकरणिसंठिए प० ॥ ८०० ॥
 मागधस्स णं जोयणस्स अट्ठ धणुसहस्साइं निधत्ते प० ॥ ८०१ ॥ जंबू णं सुदंसणा
 अट्ठ जोयणाइं उट्ठं उच्चत्तेणं बहुमज्जदेसभाए अट्ठ जोयणाइं विकखंभेणं साइरेगाइं
 अट्ठ जोयणाइं सव्वग्गेणं प० ॥ ८०२ ॥ कूडसामली णं अट्ठ जोयणाइं एवं चेव
 ॥ ८०३ ॥ तिमिसगुहा णमट्ठ जोयणाइं उट्ठं उच्चत्तेणं ॥ ८०४ ॥ खंडप्पवायगुहा
 णं अट्ठ जोयणाइं उट्ठं उच्चत्तेणं एवं चेव ॥ ८०५ ॥ जंबूमंदरस्स पव्वयस्स
 पुरच्छिमेणं सीताए महानइए उभओ कूले अट्ठ वक्खारपव्वया प० तं० चित्तकूडे
 पम्हकूडे नल्लिणकूडे एगसेले तिकूडे वेसमणकूडे अंजणे मायंजणे ॥ ८०६ ॥
 जंबूमंदरपच्चच्छिमेणं सीओयाए महानइए उभओकूले अट्ठ वक्खारपव्वया
 प० तं० अकावई पम्हावई आसीविसे सुहावहे चंदपव्वए सूरपव्वए णागपव्वए
 देवपव्वए ॥ ८०७ ॥ जंबूमंदरपुरच्छिमेणं सीआए महानइए उत्तरेणं अट्ठ
 चक्खवट्ठिविजया प० तं० कच्छे सुकच्छे महाकच्छे कच्छगावई आवत्ते जाव पुक्ख-
 लावई ॥ ८०८ ॥ जंबूमंदरपुरच्छिमेणं सीयाए महानइए दाहिणेणमट्ठ चक्खवट्ठि-
 विजया प० तं० वच्छे सुवच्छे जाव मंगलावई ॥ ८०९ ॥ जंबूमंदरपच्चच्छिमेणं
 सीओयाए महानइए दाहिणेणं अट्ठ चक्खवट्ठिविजया प० तं० पम्हे जाव सलिलावई
 ॥ ८१० ॥ जंबूमंदरपच्चत्थिमेणं सीओयाए महानइए उत्तरेणं अट्ठ चक्खवट्ठिविजया
 प० तं० वप्पे सुवप्पे जाव गंधिलावई ॥ ८११ ॥ जंबूमंदरपुरच्छिमेणं सीताए
 महानइए उत्तरेणमट्ठ रायहाणीओ प० तं० खेमा खेमपुरी चेव जाव पुंडरीगिणी
 ॥ ८१२ ॥ जंबूमंदरपुरच्छिमेणं सीताए महानइए दाहिणेणमट्ठ रायहाणीओ प० तं०
 सुसीमा कुंडला चेव जाव रयणसंचया ॥ ८१३ ॥ जंबूमंदरपच्चच्छिमेणं सीओआए
 महानइए दाहिणेणं अट्ठ रायहाणीओ प० तं० आसपुरा जाव वीतसोगा ॥ ८१४ ॥
 जंबूमंदरस्स पच्चच्छिमेणं सीओआए महानइए उत्तरेणं अट्ठ रायहाणीओ प० तं०
 विजया वेजयंती जाव अउज्जा ॥ ८१५ ॥ जंबूमंदरस्स पुरच्छिमेणं सीयाए
 महानइए उत्तरेणं उक्कोसपए अट्ठ अरेहंता अट्ठ चक्खवट्ठी अट्ठ बलदेवा अट्ठ
 वासुदेवा उप्पज्जिसु वा उप्पज्जंति वा उप्पज्जिस्संति वा ॥ ८१६ ॥ जंबूमंदरपुरच्छि-
 मेणं सीयाए महानइए दाहिणेणं उक्कोसपए एवं चेव ॥ ८१७ ॥ जंबूमंदरपच्चत्थिमेणं
 सीओयाए महानइए दाहिणेणं उक्कोसपए एवं चेव ॥ ८१८ ॥ एवं उत्तरेणवि
 जंबूमंदरपुरच्छिमेणं सीआए महानइए उत्तरेणं अट्ठ दीहवेयद्धा अट्ठ तिमिसगुहाओ

अठु खंडगप्पवायगुहाओ अठु कयमालगा देवा अठु णट्टमालगा देवा अठु गंगा-
 कुंडा अठु सिंधुकुंडा अठु गंगाओ अठु सिंधूओ अठु उसभकूडपव्वया अठु उस-
 भकूडा देवा प० जंबूमंदरपुरच्छिमेणं सीयाए महाणईए दाहिणेणं अठु दीहवेयद्धा
 एवं चेव जाव अठु उसभकूडा देवा प० णवरमेत्थ रत्तारत्तावईओ तासिं चेव कुंडा
 ॥ ८१९ ॥ जंबूमंदरपच्चत्थि० सीओआए महाणईए दाहिणेणं अठु दीहवेयद्धा जाव
 अठु गंगकुंडा अठु सिंधुकुंडा अठु गंगाओ अठु सिंधूओ जाव अठु उसभकूडा देवा
 प० जंबूमंदरपच्चत्थिमेणं सीओआए महाणईए उत्तरेणं अठु दीहवेयद्धा जाव अठु नट्ट-
 मालगा देवा अठु रत्तकुंडा अठु रत्तावइकुंडा अठु रत्ताओ जाव अठु उसभकूडा देवा
 प० ॥ ८२० ॥ मंदरचूलिया णं बहुमज्झदेसभाए अठु जोयणाइं विक्खंभेणं प०
 ॥ ८२१ ॥ धायइसंडदीवे पुरत्थिमद्वेणं धायइस्सुखे अठु जोयगाइं उट्ठं उच्चत्तेणं
 प० बहुमज्झदेसभाए अठु जोयगाइं विक्खंभेणं साइरेगाइं अठु जोयगाइं सव्वग्गेणं
 प० एवं धायइस्सुखाओ आडवेत्ता सच्चेव जंबूदीववत्तव्वया भाणियव्वा जाव मंदर-
 चूलियत्ति एवं पच्चत्तिमद्वेवि महाधायइस्सुखाओ आडवेत्ता जाव मंदरचूलियत्ति
 ॥ ८२२ ॥ एवं पुक्खरवरदीवद्धुरच्छिमद्वेवि पउमस्सुखाओ आडवेत्ता जाव मंदर-
 चूलियत्ति एवं पुक्खरवरदीवपच्चत्थिमद्वे महापउमस्सुखाओ जाव मंदरचूलियत्ति
 ॥ ८२३ ॥ जंबुदीवे दीवे मंदरे पव्वए भइसालवणे अठु दिसाहत्थिकूडा प० तं०-
 पउमुत्तर नीलवंते सुहत्थी अंजगगिरी, कुमुए य पलासए वडिंसे अठुमए रोयणा-
 गिरी ॥ ८२४ ॥ जंबुदीवस्स णं दीवस्स जगई अठु जोयणाइं उट्ठं उच्चत्तेणं बहुम-
 ज्झदेसभाए अठु जोयगाइं विक्खंभेणं प० ॥ ८२५ ॥ जंबुदीवे दीवे मंदरपव्वयस्स
 दाहिणेणं महाहिमवंते वासहरपव्वए अठु कूडा प० तं० सिद्धे महाहिमवंते हिमवंते
 रोहिंता हरीकूडे, हरिंका हरेवासे वेहलिए चेव कूडा उ ॥ ८२६ ॥ जंबूमंदरउत्त-
 रेणं रुप्पिमि वासहरपव्वए अठु कूडा प० तं० सिद्धे य रुप्पी रम्मग नरकंता बुद्धि
 रुप्पकूडे या, हिरण्णवए मणिक्कंठे य रुप्पिमि कूडा उ ॥ ८२७ ॥ जंबूमंदरपुर-
 च्छिमेणं स्यगवरे पव्वए अठु कूडा प० तं०-रिट्ठे तवणिज्ज कंचण स्यय दिसासोत्थिए
 पलंवे य; अंजणे अंजणपुलए स्यगस्स पुरच्छिमे कूडा (१) तत्थ णं अठु दिसा-
 कुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं० णंदुत्तरा
 य णंदा य आणंदा णंदिवद्धगा, विजया य वेजयंती जयंती अपराजिया ॥ ८२८ ॥
 जंबूमंदरदाहिणेणं स्यगवरे पव्वए अठु कूडा प० तं०-कणए कंचणे पउमे नलिणे ससि
 दिवायरे चेव, वेसमणे वेहलिए स्यगस्स उ दाहिणे कूडा (१) तत्थ णं अठु दिसा-
 कुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं० समाहारा

सुप्पइत्ता सुप्पवुद्धा जसोहरा; लच्छिवई सेसवई चित्तगुत्ता वसुंधरा ॥ ८२९ ॥
 जंबूमंदरपच्चत्थिमेणं रुयगवरे पव्वए अठु कूडा प० तं० सोत्थिए य अमोहे य
 हिमवं मंदरे तहा, रुअगे रुयगुत्तमे चंदे अठुमे य सुदंसणे (१) तत्थ णं अठु
 दिसाकुमारिमहत्तरियाओ महिद्धियाओ जाव पलिओवमठ्ठिईयाओ परिवसंति तं०—
 इलादेवी सुरादेवी पुढवी पडमावई, एगनासा नवमिया सीया भद्दा य अठुमा
 ॥ ८३० ॥ जंबूमंदरउत्तररुअगवरे पव्वए अठुकूडा प० तं० रयणे रयणुच्चए या
 सव्वरयणे रयणसंचए चेव, विजये य वेजयंते य जयंते अपराजिए (१) तत्थ णं
 अठु दिसाकुमारिमहत्तरियाओ महिद्धियाओ जाव पलिओवमठ्ठिईयाओ परिवसंति
 तं०—अलंबुसा मितकेसी पोंडरी गीतवारुणी, आसा य सव्वगा चेव सिरी हिरी चेव
 उत्तरओ ॥ ८३१ ॥ अठु अहेलोगवत्थव्वाओ दिसाकुमारिमहत्तरियाओ प०
 तं० भोगंकरा भोगवई सुभोगा भोगमालिणी; सुवच्छा वच्छमिता य, वारि-
 सेणा वलाहगा (१) अठु उड्डलोगवत्थव्वाओ दिसाकुमारिमहत्तरियाओ प० तं०—
 मेघंकरा मेघवई सुमेघा मेघमालिणी, तोयधारा विचित्ता य पुप्फमाला अणिदिता २
 ॥ ८३२ ॥ अठु कप्पा तिरियमिस्सोववन्नगा प० तं० सोहम्मे जाव सहस्सारे
 ॥ ८३३ ॥ एएसु णं अठुसु कप्पेसु अठु इंदा प० तं० सक्के जाव सहस्सारे
 ॥ ८३४ ॥ एएसि णं अठुण्हं इंदाणं अठु परियाणिया विमाणा प० तं० पालए
 पुप्फए सोमणसे तिरिवच्छे णंदावत्ते कामकमे पीडमणे विमले ॥ ८३५ ॥ अठुठ-
 मिया णं भिक्खुपडिमा णं चउसठ्ठीए राइंदिएहिं दोहि य अठ्ठासीएहिं भिक्खासएहिं
 अहासुत्ता जाव अणुपालियावि भवइ ॥ ८३६ ॥ अठुविहा संसारसमावन्नगा जीवा
 प० तं० पढमसमयनेरइया अपढमसमयनेरइया एवं जाव अपढमसमयदेवा
 ॥ ८३७ ॥ अठुविहा सव्वजीवा प० तं० नेरइया तिरिक्खजोणिया तिरिक्खजोणिणीओ
 मणुस्सा मणुस्सीओ देवा देवीओ सिद्धा ॥ ८३८ ॥ अहवा अठुविहा सव्वजीवा
 प० तं० आभिणिवोहियनाणी जाव केवल्लनाणी मइअन्नाणी सुयअन्नाणी विभंग-
 नाणी ॥ ८३९ ॥ अठुविहे संजमे प० तं० पढमसमयसुहुमसंपरायसरागसंजमे,
 अपढमसमयसुहुमसंपरायसरागसंजमे, पढमसमयवादरसंजमे, अपढमसमयवादर-
 संजमे, पढमसमयउवसंतकसायवीयरायसंजमे, अपढमसमयउवसंतकसायवीयराय-
 संजमे, पढमसमयखीणकसायवीयरायसंजमे, अपढमसमयखीणकसायवीयरायसंजमे
 ॥ ८४० ॥ अठु पुढवीओ प० तं० रयणप्पभा जाव अहे सत्तमा ईसिपब्भारा
 ॥ ८४१ ॥ ईसिप्पब्भाराए णं पुढवीए बहुमज्झदेसभाए अठुजोयणिए खेत्ते अठु
 जोयणाइं वाहल्लेणं प० ॥ ८४२ ॥ ईसिपब्भाराए णं पुढवीए अठु नामधेज्जा प०

तं० ईसीइ वा, ईसिपम्भाराइ वा, तणूइ वा, तणुतणूइ वा, सिद्धीति वा, सिद्धालण्ड
वा, मुत्तीइ वा, सुत्तालण्ड वा ॥ ८४३ ॥ अठुहिं ठाणेहिं सम्मं संघडियव्वं जइयव्वं
परक्कमियव्वं अस्सि च णं अठ्ठे णो पमाएयव्वं भवइ, असुयाणं धम्माणं सम्मं सुण-
णयाए अब्भुठ्ठेयव्वं भवइ, सुयाणं धम्माणं ओगिण्हणयाए उवधारणयाए अब्भुठ्ठेयव्वं
भवइ, पावाणं कम्माणं संजमेणमकरणयाए अब्भुठ्ठेयव्वं भवइ, पोराणाणं कम्माणं
तवसा विगिंचणयाए विसोहणयाए अब्भुठ्ठेयव्वं भवइ, असंगिहीयपरियणस्स संगि-
ण्हणयाए अब्भुठ्ठेयव्वं भवइ, सेहं आयारगोयरगहणयाए अब्भुठ्ठेयव्वं भवइ, गिला-
णस्स अगिलाए वेयावच्चकरणयाए अब्भुठ्ठेयव्वं भवइ, साहम्मियाणमधिकरणंसि
उप्पणंसि तत्थ अणिसिओवस्सिओ अपक्खग्गाही मज्झत्थभावभूए कह णु साह-
म्मिया अप्पसद्दा अप्पज्झा अप्पतुमंतुमा उवसामणयाए अब्भुठ्ठेयव्वं भवइ
॥ ८४४ ॥ महासुक्कसहस्सारेसु णं कप्पेसु विमाणा अठ्ठ जोजेणसयाइं उड्डं उच्चत्तेणं
प० ॥ ८४५ ॥ अरहओ णं अरिठ्ठेनेमिस्स अठ्ठसया वाईणं सदेवमणुयासुराए
परिसाए वाए अपराजियाणं उक्कोसिया वाइसंपया होत्था ॥ ८४६ ॥ अठ्ठसामइए
केवलिसमुग्घाए प० तं० पढमे समए दंडं करेइ बीए समए कवाडं करेइ तइए
समए मंथानं करेइ चउत्थे समए लोगं पूरेइ पंचमे समए लोगं पडिसाहरइ छठ्ठे
समए मंथं पडिसाहरइ सत्तमे समए कवाडं पडिसाहरइ अठ्ठमे समए दंडं पडि-
साहरइ ॥ ८४७ ॥ समणस्स णं भगवओ महावीरस्स अठ्ठ सया अणुत्तरोववाइ-
याणं गइक्कलाणाणं जाव आगमेसिभद्दाणं उक्कोसिया अणुत्तरोववाइयसंपया होत्था
॥ ८४८ ॥ अठ्ठविहा वाणमंतरा देवा प० तं०-पिसाया भूया जक्ख्वा रक्खसा
किन्नरा किंपुरिसा महोरगा गंधव्वा ॥ ८४९ ॥ एएसि णं अठ्ठहं वाणमंतरदेवाणं
अठ्ठरक्ख्वा प० तं०-कलंबो अ पिसायाणं वडो जक्ख्वाणमेव य; तुलसी भूयाणं
भवे रक्खसाणं च कंडओ (१) असोओ किन्नराणं च किंपुरिसाण य चंपओ;
नागरक्खो भुयंगाणं गंधव्वाण य तेंदुओ (२) ॥ ८५० ॥ इमीसे रयणप्पभाए
पुढंवीए बहुसमरमणिजाओ भूमिभागाओ अठ्ठजोयेणसए उड्डवाहाए सूरविमाणे
चारं चरइ ॥ ८५१ ॥ अठ्ठ नक्खत्ता चंदेणं सद्धिं पमइं जोगं जोएंति तं०
कत्तिया रोहिणी पुणव्वसू महा चित्ता विसाहा अणुराहा जेठ्ठा ॥ ८५२ ॥
जंबुदीवस्स णं दीवस्स दारा अठ्ठजोयणाइं उड्डं उच्चत्तेणं प०-सव्वेसिंपि दीवसमु-
द्दाणं दारा अठ्ठजोयणाइं उड्डं उच्चत्तेणं प० ॥ ८५३ ॥ पुरिसवेयणिजस्स णं कम्मस्स
जहण्णेणं अठ्ठसंवच्छराइं वंधठिई प० ॥ ८५४ ॥ जसोकित्तीनामएणं कम्मस्स
जहणेणं अठ्ठ मुहुत्ताइं वंधठिई प० ॥ ८५५ ॥ उच्चगोयस्स णं कम्मस्स एवं चेव

॥ ८५६ ॥ तेइंदियाणमठु जाइकुलकोडीजोणीपमुहसयसहस्सा प० ॥ ८५७ ॥
 जीवा णं अठुठाणणिव्वत्तिए पोगगले पावकम्मत्ताए चिणिंसु वा चिणंति वा चिणि-
 स्संति वा तं०-पढमसमयनेरइयनिव्वत्तिए जाव अपढमसमयदेवनिव्वत्तिए एवं
 चिण उवचिण जाव णिज्जरा चेव ॥ ८५८ ॥ अठुपएसिया खंधा अणंता प०
 ॥ ८५९ ॥ अठु पएसोगाढा पोगगला अणंता प० ॥ ८६० ॥ जाव अठुगुणलुक्खा
 पोगगला अणंता प० ॥ ८६१ ॥ अठुमं ठाणं समत्तं ॥

नवमहाणं

नवहिं ठाणेहिं समणे णिग्गंथे संभोइयं विसंभोइयं करेमाणे णाइक्कमइ तं०-
 आयरियपडिणीयं उवज्जायपडिणीयं थेरपडिणीयं कुल० गण० संघ० नाण०
 दंसण० चरित्तपडिणीयं ॥ ८६२ ॥ नव वंभचेरा प० तं० सत्थपरिज्ञा लोगविजओ
 जाव उवहाणसुयं महापरिण्णा ॥ ८६३ ॥ नव वंभचेरगुत्तीओ प० तं० विवित्ताइं
 सयणासणाइं सेवित्ता भवइ णो इत्थिसंसत्ताइं नो पसुसंसत्ताइं नो पंडगसंसत्ताइं १
 नो इत्थीणं क्हं कहेत्ता २ नो इत्थिठाणाइं सेवित्ता भवइ ३ नो इत्थीणमिंदियाइं
 मणोहराइं मणोरमाइं आलोइत्ता निज्जाइत्ता भवइ ४ नो पणीयरसभोई ५ नो
 पाणभोयणस्स अइमत्तं आहारए सया भवइ ६ नो पुव्वरयं पुव्वकीलियं समरेत्ता
 भवइ ७ णो सद्दाणुवाई णो रुवाणुवाई णो सिलोगाणुवाई ८ णो सायसोक्खपडिक्खे
 यावि भवइ ९ ॥ ८६४ ॥ नव वंभचेरअगुत्तीओ प० तं० नो विवित्ताइं सयणा-
 सणाइं सेवित्ता भवइ इत्थीसंसत्ताइं पसुसंसत्ताइं पंडगसंसत्ताइं इत्थीणं क्हं कहेत्ता
 भवइ इत्थीणं ठाणाइं सेवित्ता भवइ इत्थीणं इंदियाइं जाव निज्जाइत्ता भवइ पणीय-
 रसभोई पाणभोयणस्स अइमायमाहारए सया भवइ पुव्वरयं पुव्वकीलियं सरित्ता
 भवइ सद्दाणुवाई रुवाणुवाई सिलोगाणुवाई जाव सायासुक्खपडिक्खे यावि भवइ
 ॥ ८६५ ॥ अभिगंदणाओ णं अरहओ सुमई अरहा नवहिं सागरोवमकोडिसयसह-
 स्सेहिं विइक्कंतेहिं समुप्पन्ने ॥ ८६६ ॥ नव सव्भावपयत्था प० तं० जीवा अजीवा
 पुणं पावो आसवो संवरो णिज्जरा वंधो मोक्खो ॥ ८६७ ॥ णवविहा संसारसमा-
 ऋज्जगा जीवा प० तं० पुढविकाइया जाव वणस्सइकाइया वेइंदिया जाव पंचिदि-
 यत्ति ॥ ८६८ ॥ पुढवीकाइया नवगइया नव आगइया प० तं० पुढवीकाइए पुढ-
 वीकाइएउ उववज्जमाणे पुढवीकाइएहिंतो वा जाव पंचिदिएहितो वा उववजेज्जा, से
 चेव णं से पुढवीकाइए पुढवीकायत्तं विप्पजहमाणे पुढविकाइयत्ताए जाव पंचिदि-
 यत्ताए वा गच्छेज्जा, एवं आउकाइयावि जाव पंचिदियत्ति ॥ ८६९ ॥ नवविहा
 सव्वजीवा प० तं० एणिंदिया वेइंदिया तेइंदिया चउरिंदिया नेरइया पंचिदियति-

रिक्खजोणिया मणुस्सा देवा सिद्धा ॥ ८७० ॥ अहवा नवविहा सव्वजीवा प० तं०
 षडमसमयनेरइया अपडमसमयनेरइया जाव अपडमसमयदेवा सिद्धा ॥ ८७१ ॥
 नवविहा सव्वजीवोगाहणा प० तं० पुढविकाइओगाहणा आउ० जाव वणस्सइकाइ-
 ओगाहणा वेइंदियोगाहणा तेइंदियोगाहणा चउरिंदियोगाहणा पंचिंदियोगाहणा
 ॥ ८७२ ॥ जीवा णं नवहिं ठाणेहिं संसारं वत्तिं सु वा वत्तंति वा वत्तिस्संति वा तं०
 पुढविकाइयत्ताए जाव पंचिंदियत्ताए ॥ ८७३ ॥ नवहिं ठाणेहिं रोगुप्पत्ती सिया तं०
 अच्चासणाए अहियासणाए अइणिद्दाए अइजागारेणं उच्चारनिरोहेणं पासवणनिरोहेणं
 अद्धानगमणेणं भोयणपडिकूलयाए इंदियत्यविकोवणयाए ॥ ८७४ ॥ णवविहे
 दरिसणावरणिजे कस्से प० तं०-निद्दा निद्धानिद्दा पयला पयलापयला थीणगिद्धी
 चक्खुदरिसणावरणे अचक्खुदरिसणावरणे ओहिंदरिसणावरणे केवलदरिसणावरणे
 ॥ ८७५ ॥ अभीई णं णक्खत्ते साइरेगे नवमुहुत्ते चंदेणं सद्धिं जोगं जोएइ
 ॥ ८७६ ॥ अभीईआइआ णं णवनक्खत्ता णं चंदस्स उत्तरेणं जोगं जोएंति तं०, अभीई
 सवणो धणिट्ठा जाव भरणी ॥ ८७७ ॥ इमीसे णं रयणप्पभाए पुढवीए बहुसम-
 रमणिजाओ भूमिभागाओ णवजोअणसयाइ उड्डं अवाहाए उवरिल्ले तारारूवे चारं
 चरति ॥ ८७८ ॥ जंबुद्दीवे णं दीवे णवजोअणिया मच्छा पविसिंसु वा पविसंति वा
 पविसिस्संति वा ॥ ८७९ ॥ जंबुद्दीवे दीवे भारहे वासे इमीसे ओसप्पिणीए णव
 बलदेववासुदेवपियरो होत्था तं० पयावई य वंभे य रोदे सोमे सिवेइया, महासीहे
 अग्गिसीहे दसरह नवमे य वसुदेवे (१) इत्तो आढत्तं जहा समवाये निरवसेसं
 जाव एगा से गन्भवसही सिज्जिस्सति आगमिस्सेणं ॥ ८८० ॥ जंबुद्दीवे दीवे
 भारहे वासे आगमेस्साए उस्सप्पिणीए नवबलदेववासुदेवपियरो भविस्संति नव
 बलदेववासुदेवमायरो भविस्संति, एवं जहा समवाए निरवसेसं जाव महाभीमसेणे
 य सुग्गीवे य अपच्छिमे; एए खलु पडिसत्तू कित्तीपुरिसाण वासुदेवाणं सव्वेवि
 चक्कजोही हम्महेहंती सचक्केहिं ॥ ८८१ ॥ एगमेगे णं महानिही नवनव जोयणाई
 विक्खंभेणं प० एगमेगस्स णं रण्णो चाउरंतचक्कवट्ठिस्स णव महानिहओ प० तं०
 “णेसप्पे पंडुयए पिंगलए सव्वरयण महापउमे, काले य महाकाले माणवग महा-
 निही संखे (१) नेसप्पंमि निवेसा गामागरनगरपट्टणाणं च, दोणसुहमडंबाणं
 खंधाराणं गिहाणं च (२) गणियस्स य बीयाणं माणुम्माणस्स जं पमाणं च,
 यन्नस्स य बीयाणं उप्पत्ती पंडुए भणिया (३) सव्वा आभरणविही पुरिसाणं
 जा य होइ महिलानं, आसाण य हत्थीण य पिंगलगनिहिम्मि सा भणिया (४)
 रयणाइं सव्वरयणे चोइस पवराइं चक्कवट्ठिस्स, उप्पज्जंति एगिदियाइं पंचिंदि-

यांइ च (५) वत्थाण य उप्पत्ती निप्पत्ती चेव सव्वभत्तीणं, रंगाण य धोयाण य
 सव्वा एसा महापउमे (६) काले कालण्णाणं भव्वपुराणं च तीसु वासेसु; सिप्पसय्य
 कम्माणि य, तिन्नि पयाए हियकराई (७) लोहस्स य उप्पत्ती होइ महाकालि
 आगराणं च, रूपस्स सुवण्णस्स य मणिमोत्तिसिलप्पवालाणं (८) जोधाण य
 उप्पत्ती आवरणाणं च पहरणाणं च, सव्वा य जुद्धनीई, माणवए दंडनीई य
 (९) नट्टविही नाडगाविही, कव्वस्स चउव्विहस्स उप्पत्ती, संखे महानिहिम्मी,
 तुडियंगाणं च सव्वेसिं (१०) चक्कठपइठ्ठाणा अठुस्सेहा य नव य विक्खंभे,
 बारसदीहा मंजूससंठिया, जन्हवीइ मुहे (११) वैरुलियमणिकवाडा कणगमया
 विविहरयणपडिपुत्ता, ससिसूरचक्कलक्खण अणुसमजुगवाहुवयणा य (१२) पलि-
 ओवमट्ठिईया णिहिसरिणामा य तेसु खलु देवा; जेसि ते आवासा अक्किज्जा आहि-
 वच्चा वा (१३) एए ते नवनिहओ पभूयधणरयणसंचयसमिद्धा जे वसमुवगच्छंती
 सव्वेसिं चक्कवट्ठीणं” (१४) ॥ ८८२ ॥ नव विगईओ प० तं० खीरं दहिं णवणीयं
 सप्पिं तेलं गुलो महं मज्जं मंसं ॥ ८८३ ॥ नवसोयपरिस्सवा वोदी प० तं० दो
 सोत्ता दो णेत्ता दो घाणा मुहं पोसे पाऊ ॥ ८८४ ॥ णवविहे पुत्ते प० तं० अन्नपुत्ते
 पाणपुत्ते वत्थपुत्ते लेणपुत्ते सयणपुत्ते मणपुत्ते वडपुत्ते कायपुत्ते नमोक्कारपुत्ते ॥ ८८५ ॥
 णव पावस्सायतणा प० तं० पाणाइवाए मुसावाए जाव परिग्गहे कोहे माणे माया
 लोहे ॥ ८८६ ॥ नवविहे पावस्सुयपसंगे प० तं० उप्पाए निमित्ते मंते आइक्खिए
 तिगिच्छए, कला आवरणे अन्नाणे मिच्छापावयणेति य ॥ ८८७ ॥ णव णेउणिया
 वत्थू प० तं० संखाणे निमित्ते काइए पोराणे पारिहत्थिए परपंडिए वाइए भूइक्कमे
 तिगिच्छए ॥ ८८८ ॥ समणस्स णं भगवओ णायपुत्तमहावीरस्स नव गणा होत्था
 तं० गोदासगणे उत्तरवलिस्सहगणे उद्देहगणे चारणगणे उद्वाइयगणे विस्सवाइयगणे
 कामड्डियगणे माणवगणे कोडियगणे ॥ ८८९ ॥ समणेणं भगवया महावीरेणं सम-
 णाणं णिग्गंथाणं णवकोडिपरिसुद्धे भिक्खे प० तं० ण हणइ ण हणावइ हणंतं
 णाणुजाणइ ण पयइ ण पयावेइ पयंतं णाणुजाणइ ण किणइ ण किणावेइ किणंतं
 णाणुजाणइ ॥ ८९० ॥ ईसाणस्स णं देविदस्स देवरण्णो वरुणस्स महारत्तो णव
 अग्गमहिंसीओ प० ॥ ८९१ ॥ ईसाणस्स णं देविदस्स देवरत्तो अग्गमहिंसीणं
 णवपलिओवमाइं ठिई प० ॥ ८९२ ॥ ईसाणे कप्पे उक्कोसेणं देवीण णव पलिओ-
 वमाइं ठिई प० ॥ ८९३ ॥ नव देवनिंकाया प० तं० “सारस्सयमाइच्चा वण्ही
 वरुणा य गइतोया य तुसिया अव्वावाहा अग्गिच्चा चेव रिठ्ठा य” ॥ ८९४ ॥
 अव्वावाहाणं देवाणं नव देवा नव देवसया प० एवं अग्गिच्चावि एवं रिठ्ठावि

॥ ८९५-६ ॥ णव गेवेज्जविमाणपत्थडा प० तं० हेठ्ठिमहेठ्ठिमगेविज्जविमाणपत्थडे
हेठ्ठिममज्झिमगेविज्जविमाणपत्थडे हेठ्ठिमउवरिमगेविज्जविमाणपत्थडे मज्झिमहेठ्ठि-
मगेविज्जविमाणपत्थडे मज्झिममज्झिमगेविज्जविमाणपत्थडे मज्झिमउवरिमगेविज्जवि-
माणपत्थडे उवरिमहेठ्ठिमगेविज्जविमाणपत्थडे उवरिममज्झिमगेविज्जविमाणपत्थडे
उवरिमउवरिमगेविज्जविमाणपत्थडे ॥ ८९७ ॥ एएसि णं णवण्हं गेविज्जविमाणपत्थ-
डाणं णव नामधिज्जा प० तं० भेदे सुभेदे सुजाए सोमणसे पियदरिसणे, सुदंसणे
अमोहे य सुप्पबुद्धे जसोधरे ॥ ८९८ ॥ नवविहे आउपरिणामे प० तं० गइपरि-
णामे गइबंधणपरिणामे ठिइपरिणामे ठिइबंधणपरिणामे उद्धंगारवपरिणामे अहे-
गारवपरिणामे तिरियंगारवपरिणामे दीहंगारवपरिणामे रहस्संगारवपरिणामे ॥ ८९९ ॥
नवनवमिया णं भिक्खुपडिमा एगासीए राइंदिएहिं चउहिं य पंचुत्तरेहिं भिक्खा-
सएहिं अहासुत्ता जाव आराहिया यावि भवइ ॥ ९०० ॥ नवविहे पायच्छित्ते
प० तं० आलोयणारिहे जाव मूलारिहे अणवठुप्पारिहे ॥ ९०१ ॥ जंबूमंदरदाहि-
णेणं भरहे दीहवेयड्ढे नव कूडा प० तं० सिद्धे भरहे खंडग माणी वेयड्ढ पुण्ण
तिमिसगुहा, भरहे वेसमणे या भरहे कूडाण णामाई ॥ ९०२ ॥ जंबूमंदरदाहिणेणं
निसमे वासहरपव्वए णवकूडा प० तं० सिद्धे निसहे हरिवास विदेह हरि धिइ
अ सीओया, अवरविदेहे रुयगे निसमे कूडाण नामाणि ॥ ९०३ ॥ जंबूमंदरपव्वए
णंदणवणे णव कूडा प० तं० णंदणे मंदरे चेव निसहे हेमवए रयय रुयए य,
सागरचित्ते वइरे बलकूडे चेव बोद्धव्वे ॥ ९०४ ॥ जंबूमालवंतवक्खारपव्वए णव
कूडा प० तं० सिद्धे य मालवंते य उत्तरकुरु कच्छ सागरे रयए, सीया तह पुण्ण-
णामे हरिस्सहकूडे य बोद्धव्वे ॥ ९०५ ॥ जंबू० कच्छे दीहवेयड्ढे नव कूडा प० तं०
सिद्धे कच्छे खंडग माणी वेयड्ढ पुण्ण तिमिसगुहा, कच्छे वेसमणे या कच्छे कूडाण
णामाई ॥ ९०६ ॥ जंबू० सुकच्छे दीहवेयड्ढे णव कूडा प० तं० सिद्धे सुकच्छे खंडग
माणी वेयड्ढ पुण्ण तिमिसगुहा; सुकच्छे वेसमणे या सुकच्छि कूडाण णामाई
॥ ९०७ ॥ एवं जाव पोक्खलावइमि दीहवेयड्ढे एवं वच्छे दीहवेयड्ढे एवं जाव
मंगलावइमि दीहवेयड्ढे ॥ ९०८ ॥ जंबू० विज्जुप्पमे वक्खारपव्वए नव कूडा प०
तं०-सिद्धे अ विज्जुणामे देवकुरा पम्ह कणग सोवत्थी, सीओयाए सजले हरिकूडे
चेव बोद्धव्वे ॥ ९०९ ॥ जंबू० पम्हे दीहवेयड्ढे नव कूडा प० तं०-सिद्धे पम्हे
खंडग माणी वेयड्ढ एवं चेव जाव सलिलावइमि दीहवेयड्ढे एवं वप्पे दीहवेयड्ढे एवं जाव
गंधिलावइमि दीहवेयड्ढे नव कूडा प० तं०-सिद्धे गंधिल खंडग माणी वेयड्ढ पुत्र
तिमिसगुहा; गंधिलावइ वेसमण कूडाणं होंति णामाई (१) एवं सव्वेसु दीहवेयड्ढेसु

दो कूडा सरिसणामगा सेसा ते चेव ॥ ९१० ॥ जंवूमंदरउत्तरेणं नीलवंते वासहर-
 पव्वए णव कूडा प० तं० सिद्धे नीलवन्त विदेहे सीया कित्ती य नारिकंता य, अव-
 रविदेहे रम्मगकूडे उवदंसणे चेव ॥ ९११ ॥ जंवूमंदरउत्तरेणं एरवए दीहवेयड्डे
 नव कूडा प० तं० सिद्धे रयणे खंडग माणी वेयड्ड पुण्ण तिमिसगुहा, एरवए वेस-
 मणे एरवए कूडणामाई ॥ ९१२ ॥ पासे णं अरहा पुरिसादाणि वज्जरिसहणा-
 रायसंघयणे समचउरंससंठाणसंठिए नव रयणीओ उड्डं उच्चत्तेणं होत्था ॥ ९१३ ॥
 समणस्स णं भगवओ महावीरस्स तित्थंसि णवहिं जीवेहिं तित्थगरणामगोत्ते कम्म-
 णिव्वत्तिए तं० सेणिएणं सुपासेणं उदाइणा पोट्टिलेणं अणगारेणं दढाउणा संखेणं
 सयएणं सुलसाए साविआए रेवईए ॥ ९१४ ॥ एस णं अज्जो ! कण्हे वासुदेवे, रामे
 चलदेवे, उदए पेढालपुत्ते, पुट्टिले, सयये गाहावई, दारुए नियंठे, सच्चई नियंठीपुत्ते,
 सावियवुद्धे अंवडे परिव्वायए, अज्जाविणं सुपासा पासावच्चिज्जा, आगमेस्साए उस्स-
 प्पिणीए चाउज्जामं धम्मं पन्नवइत्ता सिज्झिहंति जाव अंतं काहंति ॥ ९१५ ॥ एस
 णं अज्जो ! सेणिए राया भिभिसारे कालमासे कालं किच्चा इमीसे रयणप्पभाए पुढ-
 चीए सीमंतए नरए चउरासीइवाससहस्सट्ठिईयंसि निरयंसि णेरइयत्ताए उववज्जिहिति
 से णं तत्थ णेरइए भविस्सइ काले कालोभासे जाव परमकिण्हे वज्जेणं से णं तत्थ
 वेयणं वेदिहिती उज्जलं जाव दुरहियासं से णं तओ नरयाओ उव्वट्टेत्ता आगमेस्साए
 उस्सप्पिणीए इहव जंवुदीवे दीवे भारहे वासे वेयड्डुगिरिपायमूले पुंडेसु जणवएसु
 सयदुवारे णयरे संमुइस्स कुलगरस्स भद्दाए भारियाए कुच्छिसि पुमत्ताए पच्चा-
 याहिइ तए णं सा भद्दा भारिया नवण्हं मासाणं बहुपडिपुण्णाणं अद्धट्ठमाण य राई-
 दियाणं वीइक्कंताणं सुकुमालपाणिपायं अहीणपडिपुन्नपंचिंदियसरीरं लक्खणवज्जण०
 जाव सुरूवं दारगं पयाहिती जं रयणि च णं से दारए पयाहिती तं रयणि च णं
 सयदुवारे णयरे सव्वभंतरबाहिरए भारग्गसो य कुंभग्गसो य पउमवासे य रयणवासे
 य वासे वासिहिति तए णं तस्स दारगस्स अम्मापियरो एक्कारसमे दिवसे वइक्कंते
 जाव बारसाहे दिवसे अयमेयारुवं गोण्णं गुणनिप्फण्णं नामधिज्जं काहंति जम्हा णं
 अम्हं इमंसि दारगंसि जायंसि समाणंसि सयदुवारे नयरे सव्वभंतरबाहिरए भार-
 ग्सो य कुंभग्गसो य पउमवासे य रयणवासे य वासे वुट्ठे तं होउ णं अम्हं इमस्स
 दारगस्स नामधिज्जं महापउमे तए णं तस्स दारगस्स अम्मापियरो नामधिज्जं
 काहिति महापउमेत्ति, तए णं महापउमं दारगं अम्मापियरो साइरेगं अट्ठवासजायगं
 जाणित्ता महया रायाभिसेएणं अभिसिंचिहंति से णं तत्थ राया भविस्सइ महया
 हिमवंतमहंतमलयमंदररायवन्नओ जाव रज्जं पसाहेमाणे विहरिस्सइ तए णं तस्स

महापउमस्स रत्तो अन्नया कयाइ दो देवा महिद्धिया जाव महेसक्खा सेणाकम्मं कांहिति तं० पुण्णभद्दए माणिभद्दए तए णं सयदुवारं णगरे वहवे राईसरतलवरमा-
 ङंबियकोडुंबियइब्भसेट्ठिसेणावइसत्थवाहप्पभिइयो अन्नमन्नं सद्दावेहिंति एवं वइस्संति जम्हा णं देवाणुप्पिया ! अम्हं महापउमस्स रत्तो दो देवा महिद्धिया जाव महेसक्खा
 सेणाकम्मं करंति तं० पुन्नभद्दे य माणिभद्दे य तं होउ णं अम्हं देवाणुप्पिया ! महा-
 पउमस्स रत्तो दोच्चेवि नामधेजे देवसेणे, तए णं तस्स महापउमस्स दोच्चेवि नाम-
 धेजे भविस्सइ देवसेणेति २ तए णं तस्स देवसेणस्स रण्णो अण्णया कयाइ सेयसं-
 खतलविमलसन्निकासे चउदंते हत्थिरयणे समुप्पज्जिहिंति तए णं से देवसेणे राया
 तं सेयसंखतलविमलसन्निकासं चउदंतं हत्थिरयणं दुरुढे समाणे सयदुवारं णगरं-
 मज्झमज्झेणं अभिक्खणं २ अइज्जाहि य णिज्जाहि य, तए णं सयदुवारं णगरे वहवे
 राईसरतलवर जाव अन्नमन्नं सद्दावेहिंति २ एवं वइस्संति जम्हा णं देवाणुप्पिया !
 अम्हं देवसेणस्स रत्तो सेयसंखतलविमलसन्निकासे चउदंते हत्थिरयणे समुप्पन्ने
 तं होउ णं अम्हं देवाणुप्पिया ! देवसेणस्स रण्णो तच्चेवि णामधेजे विमलवाहणे
 तए णं तस्स देवसेणस्स रत्तो तच्चेवि णामधेजे भविस्सइ विमलवाहणे २ तए णं
 से विमलवाहणे राया तीसं वासाइं अगारवासमज्झे वसित्ता अम्मापिईहिं
 देवत्तगएहिं गुस्महत्तरएहिं अब्भणुत्ताए समाणे उदुमि सरए संवुद्धे अणुत्तरे
 मोक्खमग्गे पुणरवि लोगंतिएहिं जीयकप्पिएहिं देवेहि ताहिं इट्ठाहिं कंताहिं पियाहिं
 मणुत्ताहिं मणामाहिं उरालाहिं कल्लाणाहिं धन्नाहिं सिवाहिं मंगल्लाहिं सस्सिरीआहिं
 वग्गूहि अभिणंदिज्जमाणे अभिथुवमाणे य वहिया सुभूमिभागे उज्जाणे एणं
 देवदूसमादाय मुंढे भविता अगाराओ अणगारियं पव्वयाहिंति तस्स णं भगवंतस्स
 साइरेगाइं दुवालस वासाइं निच्चं वोसट्ठकाए चियत्तदेहे जे केई उवसग्गा
 उप्पज्जंति तं० दिव्वा वा माणुसा वा तिरिक्खजोणिया वा ते उप्पन्ने सम्मं सहिस्सइ
 खमिस्सइ तितिक्खिस्सइ अहिंयासिस्सइ तए णं से भगवं इरियासमिए भासासमिए
 जाव गुत्तवंभयारी अममे अकिंचणे छिन्नगंथे निस्सुत्तेवे कंसपाईव मुक्कतोए जहा-
 भावणाए जाव सुहुयहुयासणेइव तेयसा जलंते, कंसे संखे जीवे गगणे वाए य सारए
 सलिले, पुक्खरपत्ते कुम्मे विहगे खग्गे य भारंढे (१) कुंजर वसहे सीहे नगराया
 चेव सागरमक्खोभे, चंदे सूरं कण्णे वसुंधरा चेव सुहुयहुए (२) नत्थि णं तस्स
 भगवंतस्स कत्थइ पडिवंधे भवइ, से य पडिवंधे चउव्विहे प० तं०—अंडए वा पोय-
 एइ वा उग्गहेइ वा पग्गहिएइ वा जं णं जं णं दिसं इच्छइ तं णं तं णं दिसं अपडिबद्धे
 सुइभूए लहुभूए अणप्पगंथे संजमेणं अप्पाणं भावेमाणे विहरिस्सइ, तस्स णं भगवंतस्स

अणुत्तरेणं नाणेणं अणुत्तरेणं दंसणेणं अणुत्तरेणं चरित्तेणं एवं आलएणं विहारेणं
अज्जवे मद्दवे लाघवे खंती मुत्ती गुत्ती सच्च संजम तवगुणसुचरियसोवचियफलपरि-
निव्वाणमग्गेणं अप्पाणं भावेमाणस्स ज्ञाणंतरियाए वट्टमाणस्स अणंते अणुत्तरे
निव्वाघाए जाव केवलवरनाणदंसणे समुप्पज्जिहिति, तए णं से भगवं अरहा जिणे
भविस्सइ केवली सव्वन्नू सव्वदरिसी सदेवमणुयासुरस्स लोगस्स परियागं जाणइ
पासइ सव्वलोए सव्वजीवाणं आगइ गइ ठिइ चवणं उववायं तक्कं मणोमाणसिये
भुत्तं कडं परिसेवियं आवीकम्मं रहोकम्मं अरहा अरहस्स भागी तं तं कालं मणस-
वयसकाइए जोगे वट्टमाणानं सव्वलोए सव्वजीवाणं सव्वभावे जाणमाणे पासमाणे
विहरइ, तए णं से भगवं तेणं अणुत्तरेणं केवलवरनाणदंसणेणं सदेवमणुआसुरलोगं
अभिसमिच्चा समणानं णिग्गंथाणं पंच महव्वयाइ सभावणाइ छच्च जीवनिकायधम्मं
देसेमाणे विहरिस्सइ से जहानामए अज्जो ! मए समणानं णिग्गंथाणं एगे आरंभ-
ठाणे पण्णत्ते एवामेव महापउमेवि अरहा समणानं णिग्गंथाणं एगं आरंभठ्ठाणं पन्न-
वेहिति, से जहानामए अज्जो ! मए समणानं णिग्गंथाणं दुविहे वंधणे प० तं०
पेज्जबंधणे, दोसबंधणे, एवामेव महापउमेवि अरहा समणानं णिग्गंथाणं दुविहे
बंधणं पन्नवेहिती तं० पेज्जबंधणं च दोसबंधणं च से जहानामए अज्जो ! मए
समणानं णिग्गंथाणं तओ दंडा प० तं० मगदंडे ३ एवामेव महापउमेवि समणानं
णिग्गंथाणं तओ दंडे पण्णवेहिति तं० मणोदंडं ३ से जहानामए एएणं अभिलावेणं
चत्तारि कसाया प० तं० कोहकसाए ४ पंच कामगुणे प० तं० सदे ५ छजीवनिकाया
प० तं० पुढविकाइया जाव तसकाइया एवामेव जाव तसकाइया से जहानामए
एएणं अभिलावेणं सत्त भयठ्ठाणा प० तं० एवामेव महापउमेवि अरहा समणानं
णिग्गंथाणं सत्त भयठ्ठाणा पन्नवेहिति, एवमठ्ठ मयठ्ठाणे, णव वंभचेरगुत्तीओ दस-
विहे समणधम्मे एवं जाव तेत्तीसमासायणाउत्ति से जहानामए अज्जो ! मए सम-
णानं णिग्गंथाणं थेरकप्पे जिणकप्पे मुंडभावे अण्हाणए अदंतवणे अच्छत्तए
अणुवाहणए भूमिसेज्जा फलगसेज्जा कट्टसेज्जा केसलोए वंभचेरवासे परघरपवेसे
जाव लद्धावलद्धवित्तीओ प० एवामेव महापउमेवि अरहा समणानं णिग्गंथाणं
थेरकप्पं जिणकप्पं जाव लद्धावलद्धवित्ती पण्णवेहिती, से जहानामए अज्जो !
मए समणानं णिग्गंथाणं आहाकम्मिएइ वा उदेसिएइ वा मीसजाएइ वा अज्झोय-
रएइ वा पूइए कीए पामिच्चे अच्छेज्जे अणिसठ्ठे अभिहडेइ वा कंतारभत्तेइ वा दुब्भि-
क्खभत्तेइ वा गिलाणभत्ते वदलियाभत्तेइ वा पाहुणभत्तेइ वा मूलभोयणेइ वा कंद०
फल० वीय० हरियभोयणेइ वा पडिसिद्धे एवामेव महापउमे वि अरहा समणानं०

आहाकम्मियं वा जाव हरियभोयणं वा पडिसेहिस्सइ, से जहाणामए अज्जो ! मए समणाणं णिग्गंथाणं पंचमहव्वइए सपडिक्कमणे अचेलए धम्मे प० एवामेव महा-
 पउमेवि अरहा समणाणं णिग्गंथाणं पंचमहव्वइयं जाव अचेलगं धम्मं पण्णवेहिती,
 से जहाणामए अज्जो ! मए पंचाणुव्वइए सत्तसिक्खावइए दुवालसविहे सावगधम्मे
 प० एवामेव महापउमेवि अरहा पंचाणुव्वइयं जाव सावगधम्मं पण्णवेस्सइ, से
 जहाणामए अज्जो ! मए समणाणं णिग्गंथाणं सेज्जायरपिंडेइ वा रायपिंडेइ वा पडि-
 सिद्धे एवामेव महापउमेवि अरहा समणाणं णिग्गंथाणं सेज्जायरपिंडेइ वा जाव
 पडिसेहिस्सइ, से जहाणामए अज्जो ! मम णव गणा इगारस गणहरा, एवामेव
 महापउमस्स वि अरहओ णव गणा इगारस गणहरा भविस्संति । से जहाणामए
 अज्जो ! अहं तीसं वासाइं अगारवासमज्झे वसित्ता मुंडे भवित्ता जाव पव्वइए दुवा-
 लस संवच्छराइं तेरस पक्खा छउमत्थपरियागं पाउणित्ता तेरसहिं पक्खेहिं ऊणगाइं
 तीसं वासाइं केवलिपरियागं पाउणित्ता वायालीसं वासाइं सामण्णपरियागं पाउणित्ता
 वावत्तरि वासाइं सव्वाउयं पालइत्ता सिज्झिस्सं जाव सव्वदुक्खाणमंतं करेस्सं, एवा-
 मेव महापउमेवि अरहा तीसं वासाइं अगारवासमज्झे वसित्ता जाव पव्विहिति दुवा-
 लस संवच्छराइं जाव वावत्तरिवासाइं सव्वाउयं पालइत्ता सिज्झिहिती जाव सव्वदु-
 क्खाणमंतं काहिती, “जंसीलसमायारो अरहा तित्थंकरो महावीरो, तस्सीलसमा-
 यारो होइ उ अरहा महापउमे ॥ ९१६ ॥ महापउमच्चरिअं समत्तं ॥

णव णक्खत्ता चंदस्स पच्छंभागा प० तं० अभिई सवणो धणिठ्ठा रेवइ अस्सिणि
 मग्गसिर पूसो, हत्थो चित्ता य तहा पच्छंभागा णव हवंति ॥ ९१७ ॥ आण-
 यपाणयआरणञ्जुएसु कप्पेसु विमाणा णव जोयणसयाइं उड्ढं उच्चत्तेणं प० ॥ ९१८ ॥
 विमलवाहणे णं कुलगरे णव धणुसयाइं उड्ढं उच्चत्तेणं होत्था ॥ ९१९ ॥ उसभे णं
 अरहा कोसलिए णं इमीसे ओसग्पिणीए णवहिं सागरोवमकोडाकोडीहिं विईकंताहिं
 तित्थे पवत्तिए ॥ ९२० ॥ घणदंतलठ्ठदंतगूढदंतसुद्धदंतदीवा णं दीवा णवणवजोय-
 णसयाइं आयामविक्खंभेणं प० ॥ ९२१ ॥ सुक्कस्स णं महागहस्स णव वीहीओ
 प० तं०-हयवीही गयवीही णागवीही वसहवीही गोवीही उरगवीही अयवीही
 मियवीही वेसाणरवीही ॥ ९२२ ॥ नवविहे नोकसायवेयणिजे कम्मे प० तं०-
 इत्थिवेए पुरिसवेए णपुंसगवेए हासे रई अरई भये सोगे दुगुंछे ॥ ९२३ ॥ चउरि-
 दियाणं णव जाइकुलकोडीजोणिपमुहसयसहस्सा प० ॥ ९२४ ॥ भुयगपरिसप्पथल-
 यरपांचिदियतिरिक्खजोणियाणं नवजाइकुलकोडीजोणिपमुहसयसहस्सा प० ॥ ९२५ ॥
 जीवा णं णवठ्ठाणनिवत्तिए पोग्गळे पावकम्मत्ताए चिणिंसु वा ३ ॥ ९२६ ॥ पुढवि-

काइयनिवत्तिए जाव पंचिदियनिवत्तिए एवं चिण उवचिण जाव णिज्जरा चेव
 ॥ ९२७ ॥ णव पएसिया खंधा अणंता प० ॥ ९२८ ॥ णव पएसोगाढा पोग्गला
 अणंता प० ॥ ९२९ ॥ जाव णव गुणलुक्खा पोग्गला अणंता प० ॥ ९३० ॥
 नवमं ठाणं नवममज्झयणं समत्तं ॥

दसमठाणं

दसविहा लोग्गिइ प० तं० जणं जीवा उद्दाइत्ता २ तत्थेव २ भुज्जो २ पच्चायंति,
 एवं एगा लोग्गिइ प० १ जणं जीवाणं सया समियं पावे कम्मे कज्जइ एवं एगा
 लोग्गिइ प० २ जणं जीवा सया समियं मोहणिज्जे पावे कम्मे कज्जइ एवं एगा लोग्ग-
 ठिइ प० ३ ण एवं भूयं वा भव्वं वा भविस्सइ वा जं जीवा अजीवा भविस्संति
 अजीवा वा जीवा भविस्संति एवं एगा लोग्गिइ प० ४ ण एवं भूयं ३ जं तसा
 पाणा वोच्छिज्जिस्संति थावरा पाणा वोच्छिज्जिस्संति तसा पाणा भविस्संति वा एवं पि
 एगा लोग्गिइ प० ५ ण एवं भूयं वा ३ जं लोगे अलोगे भविस्सइ अलोगे वा लोगे
 भविस्सइ एवं एगा लोग्गिइ प० ६ ण एवं भूयं वा ३ जं लोए अलोए पविस्सइ
 अलोए वा लोए पविस्सइ एवं एगा लोग्गिइ प० ७ जाव ताव लोगे ताव ताव
 जीवा जाव ताव जीवा ताव ताव लोए एवं एगा लोग्गिइ प० ८ जाव ताव जीवाण
 य पोग्गलाण य गइपरियाए ताव ताव लोए जाव ताव लोए ताव ताव जीवाण य
 पोग्गलाण य गइपरियाए एवं एगा लोग्गिइ प० ९ सव्वेसु वि णं लोगंतेसु अवद्ध-
 पासपुठ्ठा पोग्गला लुक्खत्ताए कज्जंति जेणं जीवा य पोग्गला य नो संचायंति वहिया
 लोगंता गमण्याए एवं एगा लोग्गिइ पण्णत्ता ॥ ९३१ ॥ दसविहे सहे प० तं०
 नीहारि पिंडिमे लुक्खे भिन्ने जज्जरिए इय; दीहे रहस्से पुहत्ते य, काकणी खिखि-
 णिस्सरे ॥ ९३२ ॥ दस इंदियत्थातीता प० तं० देसेण वि एगे सद्दाइं सुणिसु
 सव्वेण वि एगे सद्दाइं सुणिसु देसेण वि एगे रुवाइं पासिसु सव्वेण वि एगे रुवाइं
 पासिसु एवं गंधाईं रसाईं फासाईं जाव सव्वेण वि एगे फासाईं पडिसंवेदेसु
 ॥ ९३३ ॥ दस इंदियत्था पडुप्पन्ना प० तं०—देसेण वि एगे सद्दाइं सुणेंति, सव्वेण
 वि एगे सद्दाइं सुणेति, एवं जाव फासाईं, दस इंदियत्था अणागया प० तं०—देसेण
 वि एगे सद्दाइं सुणिस्संति सव्वेण वि एगे सद्दाइं सुणिस्संति एवं जाव सव्वेण वि
 एगे फासाईं पडिसंवेदेस्संति ॥ ९३४ ॥ दसहिं ठाणेहिं अच्छिन्ने पोग्गले चलेज्जा
 तं०—आहारिज्जमाणे वा चलेज्जा, परिणामेज्जमाणे वा चलेज्जा, उस्ससिज्जमाणे वा
 चलेज्जा, निस्ससिज्जमाणे वा चलेज्जा, वेदेज्जमाणे वा चलेज्जा, णिज्जरिज्जमाणे वा

चलेजा, विउव्विज्जमाणे वा चलेजा, परियारिज्जमाणे वा चलेजा, जक्खाइठ्ठे वा चलेजा, वायपरिग्गहे वा चलेजा ॥ ९३५ ॥ दसहिं ठाणेहिं कोहुप्पत्ती सिया तं० मणुन्नाइं मे सद्दफरिसरसरूवगंधाइमवहरिंसु, अमणुन्नाइं मे सद्दफरिसरसरूवगंधाइं उवहरिंसु, मणुन्नाइं मे सद्दफरिसरसरूवगंधाइं अवहरइ, अमणुन्नाइं मे सद्दफरिसजावगंधाइं उवहरइ, मणुण्णाइं मे सद्द जाव अवहरिस्सइ, अमणुण्णाइं मे सद्द जाव उवहरिस्सइ, मणुण्णाइं मे सद्द जाव गंधाइं अवहरिंसु वा अवहरइ अवहरिस्सइ, अमणुण्णाइं मे सद्द जाव उवहरिंसु वा उवहरइ उवहरिस्सइ, मणुण्णामणुण्णाइं सद्द जाव अवहरिंसु अवहरइ अवहरिस्सइ उवहरिंसु उवहरइ उवहरिस्सइ अहं च णं आयरियउवज्झायाणं सम्मं वट्ठामि ममं च णं आयरियउवज्झाया मिच्छं पडिवन्ना ॥ ९३६ ॥ दसविहे संजमे प० तं० पुढविकाइयसंजमे जाव वणस्सइकाइयसंजमे वेइंदियसंजमे तेइंदियसंजमे चउरिदियसंजमे पंचिंदियसंजमे अजीवकायसंजमे ॥ ९३७ ॥ दसविहे असंजमे प० तं० पुढविकाइयअसंजमे, आउ० तेउ० वाउ० चणस्सइ० जाव अजीवकायअसंजमे ॥ ९३८ ॥ दसविहे संवरे प० तं०-सोइंदियसंवरे जाव फासिंदियसंवरे मण० वय० काय० उवकरण० सूचीकुसग्गसंवरे ॥ ९३९ ॥ दसविहे असंवरे प० तं०-सोइंदियअसंवरे, जाव सूचीकुसग्गअसंवरे ॥ ९४० ॥ दसहिं ठाणेहिं अहमंतीति थंभिज्जा तं०-जाइमएण वा कुलमएण वा जाव इस्सरियमएण वा णागसुवन्ना वा मे अंतियं हव्वमागच्छंति, पुरिसधम्माओ वा मे उत्तरिए अहोहिए नाणदंसणे समुप्पन्ने ॥ ९४१ ॥ दसविहा समाही प० तं०-पाणाइवायवेरमणे, मुसा० अदिन्ना० मेहुण० परिग्गह० इरियासमिई भासा० एसणा० आयाण० उच्चारपासवणखेलजल्लसिघाणपारिठ्ठावणियासमिई ॥ ९४२ ॥ दसविहा असमाही प० तं० पाणाइवाए जाव परिग्गहे, इरियाऽसमिई जाव उच्चार० ॥ ९४३ ॥ दसविहा पव्वज्जा प० तं०-छंदा रोसा परिजुन्ना सुविणा पडिस्सुआ चेव सारणिया रोगिणिया अणाढिया देवसन्नत्ती वच्छाणुवंधिया ॥ ९४४ ॥ दसविहे समणधम्मे प० तं० खंती मुत्ती अज्जवे मद्दवे लाघवे सच्चे संजमे तवे चियाए वंभचेरवासे ॥ ९४५ ॥ दसविहे वेयावच्चे प० तं० आयरियवेयावच्चे उवज्झायवेयावच्चे थेरवेयावच्चे तवस्सि० गिलाण० सेह० कुल० गण० संघवेयावच्चे साहम्मियवेयावच्चे ॥ ९४६ ॥ दसविहे जीवपरिणामे प० तं० गइपरिणामे इंदियपरिणामे कसायपरिणामे लेस्सा० जोग० उवओग० णाण० दंसण० चरित्त० वेयपरिणामे ॥ ९४७ ॥ दसविहे अजीवपरिणामे प० तं० वंधणपरिणामे गइ० संठाण० भेद० वण्ण० रस० गंध० फास० अगुरुलहु० सद्दपरिणामे ॥ ९४८ ॥ दसविहे अंतलिक्खिए असज्झाइए प० तं०-

उक्तावाए दिसिदाघे गजिए विजुए निग्घाए जूयए जक्खालित्ते धूमिया महिया
 रयउग्घाए ॥ ९४९ ॥ दसविहे ओरालिए असज्जाइए प० तं०-अठ्ठि मंसं सोणिए
 असुइसामंते सुसाणसामंते चंदोवराए सूरुवराए पडणे रायवुग्गहे उवस्सयस्स
 अंतो ओरालिए सरीरगे ॥ ९५० ॥ पंचिदियाणं जीवाणं असमारभमाणस्स दस-
 विहे संजमे कज्जइ तं०-सोयामयाओ सुक्खाओ अववरोवेत्ता भवइ, सोयामएणं
 दुक्खेणं असंजोगेत्ता भवइ, एवं जाव फासामएणं दुक्खेणं असंजोएत्ता भवइ, एवं
 असंजमोवि भाणियव्वो ॥ ९५१ ॥ दससुहुमा प० तं०-पाणसुहुमे, पणगसुहुमे
 जाव सिणेहसुहुमे, गणियसुहुमे, भंगसुहुमे ॥ ९५२ ॥ जंवूमंदरदाहिणेणं गंगासिधु-
 महाणईओ दसमहाणईओ समप्पेति तं० जउणा, सरळ, आवी, कोसी, मही, सिंधू,
 विवच्छा, विभासा, एरावई, चंदभागा ॥ ९५३ ॥ जंवूमंदरउत्तरेणं रत्तारत्तवईओ
 महाणईओ दस महाणईओ समप्पेति तं०-किण्हा, महाकिण्हा, नीला, महानीला,
 तीरा, महातीरा, इंदा जाव महाभोगा ॥ ९५४ ॥ जंवुदीवे दीवे भारहे वासे दस
 रायहाणीओ प० तं० चंपा, महुरा, वाणारसी य, सावत्थी, तह य साएयं, हत्थि-
 णाउर, कंपिल्लं, मिहिला, कोसंवि, रायगिहं ॥ ९५५ ॥ एयासु णं दस रायहाणीसु
 दस रायाणो मुंडा भवेत्ता जाव पव्वइया, तं०-भरहे, सगरो, मघवं, सणंकुमारो,
 संती, कुंथू, अरे, महापउमे, हरिसेणो, जयणामे ॥ ९५६ ॥ जंवूमंदरपव्वए दस
 जोयणसयाई उव्वेहेणं धरणितले दस जोयणसहस्साई विक्खंभेणं उवरि दसजोय-
 णसयाई विक्खंभेणं दसदसाई जोयणसहस्साई सव्वग्गेणं प० ॥ ९५७ ॥ जंवुदीवे
 दीवे मंदरस्स पव्वयस्स बहुमज्जदेसभाए इमीसे रयणप्पभाए पुढवीए उवरिमहे-
 ठ्ठिल्लेसु खुडुगपयरेसु एत्थ णं अठ्ठ पएसिए स्यगे प० जओ णं इमाओ दस दिसाओ
 पव्वहंति तं० पुरच्छिमा, पुरच्छिमदाहिणा, दाहिणा, दाहिणपच्चत्थिमा, पच्चत्थिमा,
 पच्चत्थिमुत्तरा, उत्तरा, उत्तरपुरच्छिमा, उट्ठा, अहो ॥ ९५८ ॥ एएसि णं दसणं दिसाणं
 दस णामधिज्जा, प० तं०-इंदा अग्गीइ जमा णेरई वारुणी य वायव्वा, सोमा ईसा-
 णावि य विमला य तमा य वोद्धव्वा ॥ ९५९ ॥ लवणस्स णं समुद्दस्स दस जोयण-
 सहस्साई गोतिथविरहिणं खेत्ते प० ॥ ९६० ॥ लवणस्स णं समुद्दस्स दस जोयण-
 सहस्साई उदगमाले पन्नत्ते ॥ ९६१ ॥ सव्वेवि णं महापायाला दसदसाई जोयण-
 सहस्साई उव्वेहेणं प० मूले दस जोयणसहस्साई विक्खंभेणं प० बहुमज्जदेसभागे
 एगपएसियाए सेढीए दसदसाई जोयणसहस्साई विक्खंभेणं प० उवरिं मुहमूले दस
 जोयणसहस्साई विक्खंभेणं प० तेसिं णं महापायालाणं कुट्ठा सव्ववइरामया सव्व-
 त्थसमा दस जोयणसयाई वाहल्लेणं प० सव्वेवि णं खुद्दा पायाला दस जोयणसयाई

उव्वेहेणं प० मूले दसदसाइं जोयणाइं विक्खंभेणं बहुमज्झदेसभाए एगपएसियाए
 सेढीए दस जोयणसयाइं विक्खंभेणं प० उवरिं मुहमूले दसदसाइं जोयणाइं विक्खं-
 भेणं प० तेसि णं खुड्ढापायालाणं कुड्ढा सव्ववइरामया सव्वत्थ समा दस जोयणाइं
 बाह्लेणं प० ॥ ९६२ ॥ धायइसंडगा णं मंदरा दस जोयणसयाइं उव्वेहेणं धर-
 णितले देसूणाइं दस जोयणसहस्साइं विक्खंभेणं उवरिं दस जोयणसयाइं विक्खं-
 भेणं प० ॥ ९६३ ॥ पुक्खरवरदीवद्धगा णं मंदरा दस जोयण एवं चेव
 ॥ ९६४ ॥ सव्वेवि णं चट्टवेयड्डपव्वया दसजोयणसयाइं उड्डं उच्चत्तेणं दस गाउ-
 यसयाइं उव्वेहेणं सव्वत्थसमा पल्लगसंठाणसंठिया दसजोयणसयाइं विक्खंभेणं प०
 ॥ ९६५ ॥ जंबुदीवे दीवे दस खेत्ता प० तं० भरहे एरवए हेमवए हेरन्नवए
 हरिवस्से रम्मगवस्से पुव्वविदेहे अवरविदेहे देवकुरा उत्तरकुरा ॥ ९६६ ॥
 माणुसुत्तरे णं पव्वए मूले दस वावीसे जोयणसए विक्खंभेणं प० ॥ ९६७ ॥
 सव्वेवि णं अंजणगपव्वया दस जोयणसयाइं उव्वेहेणं मूले दस जोयण-
 सहस्साइं विक्खंभेणं उवरि दस जोयणसयाइं विक्खंभेणं प० ॥ ९६८ ॥ सव्वेवि
 णं दहिमुहपव्वया दस जोयणसयाइं उव्वेहेणं सव्वत्थसमा पल्लगसंठाणसंठिया
 दस जोयणसहस्साइं विक्खंभेणं प० ॥ ९६९ ॥ सव्वेवि णं रइकरयपव्वया
 दस जोयणसयाइं उड्डं उच्चत्तेणं दस गाउयसयाइं उव्वेहेणं सव्वत्थसमा ब्रल्लरिसंठाण-
 संठिया दस जोयणसहस्साइं विक्खंभेणं प० ॥ ९७० ॥ रुयगवरे णं पव्वए दस
 जोयणसयाइं उव्वेहेणं, मूले दस जोयणसहस्साइं विक्खंभेणं उवरि दस जोयण-
 सयाइं विक्खंभेणं प० एवं कुंडलवरेवि ॥ ९७१ ॥ दसविहे दवियाणुओगे प० तं०
 दवियाणुओगे माउयाणुओगे एगठियाणुओगे करणाणुओगे अप्पियणप्पिए भाविया-
 भाविए बाहिरावाहिरे सासयासासए तहणाणे अतहणाणे ॥ ९७२ ॥ चमरस्स णं
 असुरिंदस्स असुरकुमाररत्तो तिगिच्छिक्खडे उप्पायपव्वए मूले दसवावीसे जोयणसए
 विक्खंभेणं प० ॥ ९७३ ॥ चमरस्स णं असुरिंदस्स असुरकुमाररत्तो सोमस्स महा-
 रत्तो सोमप्पमे उप्पायपव्वए दस जोयणसयाइं उड्डं उच्चत्तेणं दस गाउयसयाइं
 उव्वेहेणं मूले दस जोयणसयाइं विक्खंभेणं प० ॥ ९७४ ॥ चमरस्स णं असुरिंदस्स
 असुरकुमाररत्तो जमस्स महारत्तो जमप्पमे उप्पायपव्वए एवं चेव, एवं वरुणस्सवि
 एवं वेसमणस्स वि ॥ ९७५ ॥ बलिस्स णं वइरोयणिदस्स वइरोयणरत्तो रुयगिदे
 उप्पायपव्वए मूले दसवावीसे जोयणसए विक्खंभेणं प० ॥ ९७६ ॥ बलिस्स णं
 वइरोयणिदस्स सोमस्स एवं चेव, जहा चमरस्स लोगपालाणं तं चेव बलिस्स वि
 ॥ ९७७ ॥ धरणस्स णं णागकुमारिदस्स णागकुमाररत्तो धरणप्पमे उप्पायपव्वए

दस जोयणसयाई उड्डं उच्चतेणं दस गाउयसयाई उव्वेहेणं मूले दस जोयणसयाई विक्खंभेणं ॥ ९७८ ॥ धरणस्स नागकुमारिदस्स णं नागकुमाररणो कालवालस्स महारणो महाकालप्पभे उप्पायपव्वए दस जोयणसयाई उड्डं उच्चतेणं एवं चेव, एवं जाव संखवालस्स, एवं भूयाणंदस्स वि, एवं लोगपालाणंपि से जहा धरणस्स, एवं जाव थणियकुमाराणं सलोगपालाणं भाणियव्वं, सव्वेसिं उप्पायप्रव्वया भाणियव्वा सरिसणामगा ॥ ९७९ ॥ सक्कस्स णं देविंदस्स देवरत्तो सक्कप्पभे उप्पायपव्वए दस जोयणसहस्साई उड्डं उच्चतेणं दसगाउयसहस्साई उव्वेहेणं मूले दस जोयणसहस्साई विक्खंभेणं प० ॥ ९८० ॥ सक्कस्स णं देविंदस्स देवरणो सोमस्स महारत्तो जहा सक्कस्स तहा सव्वेसिं लोगपालाणं सव्वेसि च इंदानं जाव अञ्जुयत्ति, सव्वेसिं पमाणमेगं ॥ ९८१ ॥ वायरवणस्सइकाइयाणं उक्कोसेणं दस जोयणसयाई सरीरोगाहणा प० ॥ ९८२ ॥ जलचरपंचिंदियतिरिक्खजोणियाणं उक्कोसेणं दस जोयणसयाई सरीरोगाहणा प० उरपरिसप्पथलचरपंचिंदियतिरिक्खजोणियाणं उक्कोसेणं एवं चेव ॥ ९८३ ॥ संभवाओ णं अरहाओ अभिनंदणे अरहा दसहिं सागरोवमकोडिसयसहस्सेहिं वीइकंतेहिं समुप्पन्ने ॥ ९८४ ॥ दसविहे अणंतए प० तं० णामाणंतए ठवणाणंतए दव्वाणंतए गणणाणंतए पएसाणंतए एगओणंतए दुहओणंतए देसवित्थाराणंतए सव्ववित्थाराणंतए सासयाणंतए ॥ ९८५ ॥ उप्पायपुव्वस्स णं दस वत्थू प० ॥ ९८६ ॥ अत्थिणत्थिप्पवायपुव्वस्स णं दस चूलवत्थू प० ॥ ९८७ ॥ दसविहा पडिसेवणा प० तं०-दप्प पमाय णाभोगे आउरे आवईसु य, संकिए सहसक्कारे भय प्पयोसा य वीमंसा ॥ ९८८ ॥ दस आलोयणा दोसा प० तं० आकं पइत्ता अणुमाणइत्ता जंदिट्ठं वायरं च सुहुमं वा, छणं सद्दाउलगं बहुजण अव्वत्त तस्सेवी ॥ ९८९ ॥ दसहिं ठाणेहिं संपन्ने अणगारे अरिहइ अत्तदोसमालोएत्तए तं०-ज्राइसंपन्ने कुलसंपन्ने एवं जहा अट्ठठाणे जाव खंते दंते अमाई अपच्छाणुतावी ॥ ९९० ॥ दसहिं ठाणेहिं संपन्ने अणगारे अरिहइ आलोयणं पडिच्छित्तए तं०-आयारवं अवहारवं जाव अवायदंसी पियधम्मो दढधम्मो ॥ ९९१ ॥ दसविहे पाय-च्छित्ते प० तं०-आलोयणारिहे जाव अणवट्ठप्पारिहे पारंचियारिहे ॥ ९९२ ॥ दसविहे मिच्छित्ते प० तं०-अधम्मो धम्मसण्णा धम्मो अधम्मसण्णा उम्मग्गे मंग-सण्णा मग्गे उम्मंगसण्णा अजीवेसु जीवसज्जा जीवेसु अजीवसण्णा असाहुसु साहु-सण्णा साहुसु असाहुसण्णा अमुत्तेसु मुत्तसण्णा मुत्तेसु अमुत्तसण्णा ॥ ९९३ ॥ चंदप्पमे णं अरहा दस पुव्वसयसहस्साई सव्वाउयं पालइत्ता सिद्धे जावप्पहीणे ॥ ९९४ ॥ धम्मो णं अरहा दस वाससयसहस्साई सव्वाउयं पालइत्ता सिद्धे जाव-

प्पहीणे ॥ ९९५ ॥ णमी णं अरहा दस वाससहस्साइं सव्वाउयं पालइत्ता सिद्धे जाव
 प्पहीणे ॥ ९९६ ॥ पुरिससीहे णं वासुदेवे दसवाससयसहस्साइं सव्वाउयं पालइत्ता
 छठीए तमाए पुढवीए नेरइयत्ताए उववन्ने ॥ ९९७ ॥ णमी णं अरहा दस धण्डूं
 उड्डं उच्चत्तेणं दस य वाससयाइं सव्वाउयं पालइत्ता सिद्धे जावप्पहीणे ॥ ९९८ ॥
 कण्हे णं वासुदेवे दस धण्डूं उड्डं उच्चत्तेणं दसवाससयाइं सव्वाउयं पालइत्ता तच्चाए
 वालुयप्पभाए पुढवीए नेरइयत्ताए उववन्ने ॥ ९९९ ॥ दसविहा भवणवासी देवा
 प० तं०-असुरकुमारा जाव थणियकुमारा ॥ १००० ॥ एएसि णं दसविहाणं
 भवणवासीणं देवाणं दस रुक्खा प० तं०-आसत्थ सत्तिवण्णे सामलि उंवर
 सिरीस दहिवन्ने, वंजुल पलास वप्पे तए य कणियारुक्खे ॥ १००१ ॥ दसविहे
 सोक्खे प० तं०-आरोग्ग दीहमाउं अड्डेज्जं काम भोग संतोसे; अत्थि सुहभोग
 निक्खम्ममेव तत्तो अणावाहे ॥ १००२ ॥ दसविहे उवघाए प० तं०-उग्गमोवघाए
 उप्पायणोवघाए जह पंचमे ठाणे जाव परिहरणोवघाए णाणोवघाए दंसणोवघाए
 चरित्तोवघाए अचियत्तोवघाए सारक्खणोवघाए ॥ १००३ ॥ दसविहा विसोही प०
 तं०-उग्गमविसोही उप्पायणविसोही जाव सारक्खणविसोही ॥ १००४ ॥ दसविहे
 संकिलेसे प० तं०-उवहिसंकिलेसे उवस्सयसंकिलेसे कसायसंकिलेसे भत्त-
 पाणसंकिलेसे मणसंकिलेसे वइसंकिलेसे कायसंकिलेसे णाणसंकिलेसे दंसणसंकिलेसे
 चरित्तसंकिलेसे ॥ १००५ ॥ दसविहे असंकिलेसे प० तं० उवहिसंकिलेसे जाव
 चरित्तसंकिलेसे ॥ १००६ ॥ दसविहे बले प० तं०-सोइंदियबले जाव फासिंदि-
 यबले णाणबले दंसणबले चरित्तबले तवबले वीरियबले ॥ १००७ ॥ दसविहे सच्चे
 प० तं०-जणवय सम्मय ठवणा नामे रुवे पडुच्चसच्चे य, ववहार भाव जोगे दसमे
 ओवम्मसच्चे य ॥ १००८ ॥ दसविहे मोसे प० तं०-कोहे माणे माया लोभे पिजे
 तहेव दोसे य, हास भए अक्खाइय उवघायनिसिए दसमे ॥ १००९ ॥ दसविहे
 सच्चा मोसे प० तं० उप्पन्नमीसए विगयमीसए उप्पन्नविगयमीसए जीवमीसए अजी-
 वमीसए जीवाजीवमीसए अणंतमीसए परित्तमीसए अद्धामीसए अद्धद्वामीसए
 ॥ १०१० ॥ दिठ्ठिवायस्स णं दस नामधेज्जा प० तं० दिठ्ठिवाएइ वा हेउवाएइ वा
 भूयवाएइ वा तच्चावाएइ वा सम्मावाएइ वा धम्मावाएइ वा भासाविजएइ वा पुव्व-
 गएइ वा अणुजोगगएइ वा सव्वपाणभूयजीवसत्तसुहावहेइ वा ॥ १०११ ॥ दसविहे
 सत्थे प० तं०-सत्थमग्गी विसं लोणं सिणेहो खार मंबिलं, दुप्पउत्तो मणो वाया काया
 भावो य अविरई ॥ १०१२ ॥ दसविहे दोसे प० तं०-तज्जायदोसे मइभंगदोसे
 पसत्थारदोसे परिहरणदोसे, सलक्खण कारण हेउदोसे संकामणं निग्गह वत्थुदोसे

॥१०१३॥ दसविहे विसेसे प० तं०-वत्थु तज्जायदोसे य दोसे एंगठिएइ य, कारणे य पडुप्पण्णे दोसे निव्वे हि अठ्ठमे; अत्तणा उवणीए य विसेसेति य ते दस...॥१०१४॥ दसविहे सुद्धावायाणुओगे प० तं०-चंकारे मंकारे पिंकारे सेयंकारे सायंकारे एंगत्ते पुहुत्ते संजुहे संकामिए भिन्ने ॥ १०१५ ॥ दसविहे दाणे प० तं० अणुकंपा संगहे चेव भये कालुणिएइ य; लज्जाए गारवेणं च, अहम्मे पुण सत्तमे ॥ धम्मे य अठ्ठमे वुत्ते काहीइ य कयंति य ॥ १०१६ ॥ दसविहा गई प० तं०-निरयगई, निरयविग्गहगई, तिरियगई, तिरियविग्गहगई, एवं जाव सिद्धिगई, सिद्धि-विग्गहगई ॥ १०१७ ॥ दसमुंडा प० तं०-सोइंदियमुंडे जाव फासिदियमुंडे, कोहं-मुंडे जाव लोभमुंडे दसमे सिरंमुंडे ॥ १०१८ ॥ दसविहे संखाणे प० तं०-परि-कम्मं ववहारो रज्जू रासी कलसवन्ने य, जावंतावइ वग्गो घणो य तह वग्गवग्गो वि, कप्पो य ॥ १०१९ ॥ दसविहे पच्चक्खाणे प० तं०-अणागयमइक्कंतं कोडी-सहियं नियंटियं चेव, सागारमणागारं, परिमाणकंडं, निरवसेसं, संकेयं चेव अद्धाए, पच्चक्खाणं दसविहं तु ॥ १०२० ॥ दसविहा सामायारी प० तं०-इच्छा मिच्छा तहक्कारो आवस्सियां निसीहिया, आपुच्छणा य पडिपुच्छा छंदणा य निमं-तणा, उवसंपया य काले सामायारी भवे दसविहा उ ॥ १०२१ ॥ समणे भगवं महावीरे छउमत्थकालियाए अंतिमराइयंसि इमे दस महासुमिणे पासित्ता णं पडि-बुद्धे तं०-एगं च णं महाघोररूवदित्तधरं तालपिसायं सुमिणे पराजियं पासित्ता णं पडिबुद्धे १ एगं च णं महं सुक्किलपक्खगं पुंसकोइलगं सुमिणे पासित्ता णं पडि-बुद्धे २ एगं च णं महं चित्तविचित्तपक्खगं पुंसकोइलगं सुविणे पासित्ता णं पडि-बुद्धे ३ एगं च णं महं दामदुगं सव्वरयणामयं सुमिणे पासित्ता णं पडिबुद्धे ४ एगं च णं महं सेयं गोवग्गं सुमिणे पासित्ता णं पडिबुद्धे ५ एगं च णं महं पउ-मसरं सव्वओ समंता कुसुमियं सुमिणे पासित्ता णं पडिबुद्धे ६ एगं च णं महा-सागरं उम्मीवीचीसहस्सकलियं भुयाहिं तिन्नं सुमिणे पासित्ता णं पडिबुद्धे ७ एगं च णं महं दिणयरं तेयसा जलंतं सुमिणे पासित्ता णं पडिबुद्धे ८ एगं च णं महं हरिवेइलियवज्जामेणं निययेणमंतेणं माणुसुत्तरं पव्वयं सव्वओ समंता आवेढियं परि-वेढियं सुमिणे पासित्ता णं पडिबुद्धे ९ एगं च णं महं मंदरे पव्वए मंदरचूलियाओ उवरिं सीहासणवरगयमत्ताणं सुमिणे पासित्ता णं पडिबुद्धे १० जण्णं समणे भगवं महावीरे एगं महं घोररूवदित्तधरं तालपिसायं सुमिणे पराजियं पासित्ता णं पडि-बुद्धे तण्णं समणेणं भगवया महावीरेणं मोहणिज्जे कम्मे मूलाओ उग्घाइए १ जण्णं समणे भगवं महावीरे एगं महं सुक्किलपक्खगं जाव पडिबुद्धे तं णं समणे भगवं

महावीरे सुक्कज्झाणोवगए विहरइ २ जणं समणे भगवं महावीरे एगं महं चित्त-
विचित्तपक्खगं जाव पडिबुद्धे तं णं समणे भगवं महावीरे ससमयपरसमइयं चित्त-
विचित्तं दुवालसंगं गणिपिडगं आघवेइ पण्णवेइ पुरुवेइ दंसेइ निदंसेइ उवदंसेइ
तं० आयारं जाव दिट्ठिचार्यं ३ जणं समणे भगवं महावीरे एगं महं दामदुगं
सव्वरयणा जाव पडिबुद्धे तं णं समणे भगवं महावीरे दुविहं धम्मं पण्णवेइ, तं०-
अगारधम्मं च अणगारधम्मं च ४ जं णं समणे भगवं महावीरे एगं महं सेयं
गोवगं सुमिणे जाव पडिबुद्धे तं णं समणस्स भगवओ महावीरस्स चाउव्वण्णाइण्णे
संघे तं०-समणा समणीओ सावगा सावियाओ ५ जणं समणे भगवं महावीरे
एगं महं पउमसरं जाव पडिबुद्धे तं णं समणे भगवं महावीरे चउव्विहे देवे पण्ण-
वेइ, तं० भवणवासी वाणमंतरा जोइसवासी वेमाणवासी ६ जणं समणे भगवं
महावीरे एगं महं उस्मीवीची जाव पडिबुद्धे तं णं समणेणं भगवया महावीरेणं
अणाईए अणवदग्गे दीहमद्धे चाउरंतसंसारकंतारे तिन्ने ७ जणं समणे भगवं
महावीरे एगं महं दिणकरं जाव पडिबुद्धे तं णं समणस्स भगवओ महावीरस्स
अणंते अणुत्तरे जाव समुप्पन्ने ८ जणं समणे भगवं महावीरे एगं महं हरिवे-
रुलिय जाव पडिबुद्धे तं णं समणस्स भगवओ महावीरस्स सदेवमणुयासुरे लोणे
उराला कित्तिवन्नसइसिलोगा परिगुव्वंति इति खलु समणे भगवं महावीरे इइ० ९
जणं समणे भगवं महावीरे मंदरे पव्वए मंदरचूलियाए उवरिं जाव पडिबुद्धे तं
णं समणे भगवं महावीरे सदेवमणुयासुराए परिसाए मज्झगए कैवलपन्नतं धम्मं
आघवेइ पण्णवेइ जाव उवदंसेइ १० ॥ १०२२ ॥ दसविहे सरागसम्महंसणे ५०
तं०-निसग्गुवएसरुई आणरुई सुत्तवीयरुइमेव, अभिगम वित्थाररुई किरिया संखेव
धम्मरुई ॥ १०२३ ॥ दससण्णाओ ५० तं०-आहारसण्णा भयसण्णा मेहुणसण्णा
परिग्गहसण्णा कोहसण्णा माणसण्णा मायासण्णा लोहसण्णा लोगसण्णा ओहसण्णा
नेरइयाणं दस सण्णाओ एवं चेव एवं निरंतरं जाव वेमाणियाणं २४ ॥ १०२४ ॥
नेरइया णं दसविहं वेयणं पच्चणुभवमाणा विहरंति तं० सीयं उसिणं खुहं पिवासं कंडुं
परज्झं भयं सोगं जरं वार्हि ॥ १०२५ ॥ दस ठाणाई छउमत्थे णं सव्वभावेणं न
जाणइ ण पासइ तं०-धम्मत्थिगायं जाव वायं अयं जिणे भविस्सइ वा ण वा भवि-
स्सइ अयं सव्वदुक्खाणमंतं करेस्सइ वा ण वा करेस्सइ एयाणि चेव उप्पण्णणीण-
दंसणघरे अरहा जाणइ पासइ जाव अयं सव्वदुक्खाणमंतं करेस्सइ वा ण वा करेस्सइ
॥ १०२६ ॥ दस दसाओ ५० तं०-कम्मविवागदसाओ, उवासगदसाओ, अंतगडद-
साओ, अणुत्तरोववायदसाओ, आयारदसाओ, पण्हावागरणदसाओ, वंधदसाओ,

दोगिद्धिदसाओ, दीहदसाओ, संखेवियदसाओ ॥ १०२७ ॥ कम्मविवागदसाणं
 दस अज्झयणा प० तं०-मियापुत्ते य गोत्तासे अंडे सगडेइ यावरे, माहणे णंदिसेणे य
 सोरियत्ति उदुंवरे १ सहसुद्धाहे आमलए कुमारे लेच्छई इइ २ ॥ १०२८ ॥ उवासग-
 दसाणं दस अज्झयणा प० तं०-आणंदे कामदेवे अ गाहावइ चूलणीपिया, सुरादेवे
 चुल्लसयए गाहावइ कुंडकोलिए (१) सद्दालपुत्ते महासयए णंदिणीपिया सालइयापिया
 ॥ १०२९ ॥ अंतगडदसाणं दस अज्झयणा प० तं०-णमि मातंगे सोमिले रामगुत्ते
 सुदंसणे चेव, जमाली य भगाली य किंकमे पल्लएइ य (१) फाले अंवडपुत्ते य एमेए
 दस आहिआ ॥ १०३० ॥ अणुत्तरोववाइयदसाणं दस अज्झयणा प० तं०-इसिदासे य
 धण्णे य सुणक्खत्ते य काइए, सट्ठाणे सालिभदे य आणंदे तेयली इय (१) दस-
 ण्णभदे अइमुत्ते एमेए दस आहिआ ॥ १०३१ ॥ आयारदसाणं दस अज्झयणा
 प० तं० वीसं असमाहिट्ठाणा एगवीसं सबला तेत्तीसं आसायणाओ अट्ठविहा गणि-
 संपया दस चित्तसमाहिट्ठाणा एगारसउवासगपडिमाओ वारस भिक्खुपडिमाओ
 पज्जोसवणाकप्पो तीसं मोहणिज्जट्ठाणा आज्ञाट्ठाणं ॥ १०३२ ॥ पण्हावागर-
 णदसाणं दस अज्झयणा प० तं० उवमा संखा इसिभासियाइं आयरियभासियाइं
 महावीरभासियाइं खोमगपसिणाइं कोमलपसिणाइं अद्दागपसिणाइं अंगुठपसिणाइं
 बाहुपसिणाइं ॥ १०३३ ॥ वंधदसाणं दस अज्झयणा प० तं०-बंधे य मोक्खे य
 देवद्धि दसारमंडलेवि य, आयरियविप्पडिवत्ती उवज्झायविप्पडिवत्ती भावणा
 विमुत्ती साओ कम्मे ॥ १०३४ ॥ दोगेहिदसाणं दस अज्झयणा प० तं० वाए
 विवाए उववाए सुक्खत्ते कसिणे बायालीसं सुमिणे तीसं महासुमिणा वावत्तरिं सव्व-
 सुमिणा हारे रामे गुत्ते एमेए दस आहिआ ॥ १०३५ ॥ दीहदसाणं दस अज्झ-
 यणा प० तं० चंदे सूरए सुक्के य सिरिदेवी पभावई दीवसमुद्दोववत्ती बहुपुत्ती मंद-
 रेइ य थेरे संभूयविजए थेरे पम्ह ऊसासनीसासे ॥ १०३६ ॥ संखेवियदसाणं
 दस अज्झयणा प० तं० खुड्डियाविमाणपविभत्ती महल्लियाविमाणपविभत्ती अंगचू-
 लिया वग्गचूलिया विवाहचूलिया अरुणोववाए वरुणोववाए गरुलोववाए वेलंधरो-
 ववाए वेसमणोववाए ॥ १०३७ ॥ दस सागरोवमकोंडाकोडीओ कालो उस्सप्पिणीए
 दस सागरोवमकोडाकोडीओ कालो ओसप्पिणीए ॥ १०३८ ॥ दसविहा नेरइया
 प० तं०-अणंतरोववन्ना परंपरोववन्ना अणंतरावगाढा परंपरावगाढा अणंतराहारगा
 परंपराहारगा अणंतरपज्जत्ता परंपरपज्जत्ता चरिमा अचरिमा एवं निरंतरं जाव
 चेमाणिया ॥ १०३९ ॥ चउत्थीए णं पंकप्पभाए पुढवीए दस निरयावाससयस-
 हस्सा प० ॥ १०४० ॥ रयणप्पभाए पुढवीए जहजेणं नेरइयाणं दसवाससहस्साइं

ठिई प० ॥ १०४१ ॥ चउत्थीए णं पंकप्पभाए पुढवीए उक्कोसेणं नेरइयाणं दस
सागरोवमाई ठिई प० ॥ १०४२ ॥ पंचमाए णं धूमप्पभाए पुढवीए जहन्नेणं
नेरइयाणं दस सागरोवमाई ठिई प० ॥ १०४३ ॥ असुरकुमारणं जहन्नेणं दस-
वाससहस्साई ठिई प० ॥ १०४४ ॥ एवं जाव थणियकुमारणं वायरवणस्सइकाइ-
याणं उक्कोसेणं दसवाससहस्साई ठिई प० ॥ १०४५ ॥ वाणमंतराणं देवाणं
जहण्णेणं दस वाससहस्साई ठिई प० ॥ १०४६ ॥ बंभलोए कप्पे देवाणं उक्कोसेणं
दस सागरोवमाई ठिई प० ॥ १०४७ ॥ लंतए कप्पे देवाणं जहण्णेणं दस सागरोवमाई
ठिई प० ॥ १०४८ ॥ दसहिं ठाणेहिं जीवा आगमेसिभइत्ताए कम्मं पगरेंति तं०-
अणिदाणयाए, दिट्ठिसंपन्नयाए, जोगवाहियत्ताए, खंतिखमणयाए, जिइंदिययाए, अमा-
इल्लयाए, अपासत्थयाए, सुसामण्णयाए, पवयणवच्छल्लयाए, पवयणउब्भावणयाए
॥ १०४९ ॥ दसविहे आसंसप्पओगे प० तं०-इहलोगासंसप्पओगे, परलोगासस-
प्पओगे, दुहओलोगासंसप्पओगे, जीवियासंसप्पओगे, मरणासंसप्पओगे, कामासंस-
प्पओगे, भोगासंसप्पओगे, लाभसंसप्पओगे, पूयासंसप्पओगे, सक्कारासंसप्पओगे
॥ १०५० ॥ दसविहे धम्मे प० तं०-गामधम्मे, णगरधम्मे, रठ्ठधम्मे, पासंड-
धम्मे, कुलधम्मे, गणधम्मे, संघधम्मे, सुयधम्मे, चरित्तधम्मे, अत्थिकायधम्मे
॥ १०५१ ॥ दसथेरा प० तं० गामथेरा, णगरथेरा, रठ्ठथेरा, पसत्थारथेरा, कुलथेरा,
गणथेरा, संघथेरा, जाइथेरा, सुअथेरा, परियायथेरा ॥ १०५२ ॥ दसपुत्ता प०
तं०-अत्तए खेत्तए दिन्नए विन्नए उरसे मोहरे सोंडीरे संवुद्धे उवयाइए धम्मंतेवासी
॥ १०५३ ॥ केवलिसस णं दस अणुत्तरा प० तं० अणुत्तरे णाणे अणुत्तरे दंसणे
अणुत्तरे चरित्ते अणुत्तरे तवे अणुत्तरे वीरिए अणुत्तरा खंती अणुत्तरा मुत्ती अणुत्तरे
अज्जवे अणुत्तरे मइवे अणुत्तरे लाघवे ॥ १०५४ ॥ समयखेत्ते णं दस कुराओ प०
तं०-पंच देवकुराओ पंच उत्तरकुराओ तत्थ णं दस महइमहालया महादुमा प०
तं०-जंबू सुदंसणा धायइस्सखे महाधायइस्सखे पउमस्सखे महापउमस्सखे पंच
कूडसामलीओ तत्थ णं दस देवा महिद्धिया जाव परिवसंति तं० अणाडिए जंबुद्दी-
वाहिवई सुदंसणे पियदंसणे पोंडरीए महापोडरीए पंच गरुला वेणुदेवा ॥ १०५५ ॥
दसहिं ठाणेहिं ओगाढं दुस्समं जाणेज्जा तं०-अकाले वरिसइ काले ण वरिसइ
असाहू पूइज्जंति साहू ण पूइज्जंति गुरुसु जणो मिच्छं पडिवन्नो अमणुण्णा सहा जाव
फासा ॥ १०५६ ॥ दसहिं ठाणेहिं ओगाढं सुसमं जाणेज्जा तं०-अकाले न वरिसइ
तं चेव विवरीयं जाव मणुण्णा फासा ॥ १०५७ ॥ सुसमसुसमाए णं समाए दस-
विहा स्सखा उवभोगत्ताए हव्वमागच्छंति तं०-मत्तंगया य भिगा तुडियंगा दीव

जोइ चित्तंगा; चित्तरसा मणियंगा गेहागारा अणियणा य ॥ १०५८ ॥ जंबू-
दीवे २ भारहे वासे तीताए उस्सप्पिणीए दस कुलगरा होत्थां तं०-सयज्जले
सयाऊ य अणंतसेणे य अमितसेणे य, तक्कसेणे भीमसेणे महाभीमसेणे य सत्तमे
(१) दढरहे दसरहे सयरहे ॥ १०५९ ॥ जंबुदीवे २ भारहे वासे आगमीसाए
उस्सप्पिणीए दस कुलगरा भविस्संति तं०-सीमंकरे सीमंधरे खेमंकरे खेमंधरे-
विमलवाहणे संमुई पडिअए दढधणू दसधणू सयधणू ॥ १०६० ॥ जंबुदीवे दीवे
मंदरपव्वयस्स पुरच्छिमेणं सीयाए महानईए उभओ कूले दस वक्खारपव्वया प०
तं०-मालवंते चित्तकूडे विचित्तकूडे वंभकूडे जाव सोमणसे ॥ १०६१ ॥ जंबूमंद-
रपच्चत्थिमे णं सीओआए महाणईए उभओ कूले दस वक्खारपव्वया प० तं०-
विज्जुप्पभे जाव गंधमायणे एवं धायइसंडपुरच्छिमद्धेवि वक्खारा भाणियव्वा जाव
पुक्खरवरदीवद्धपच्चत्थिमद्धे ॥ १०६२ ॥ दसकप्पा इंदाहिठ्ठिया प० तं० सोहम्ममे
जाव सहस्सारे पाणए अच्चुए एएसु णं दससु कप्पेसु दस इंदा प० तं०-सक्के ईसाणे
जाव अच्चुए एएसु णं दसण्हं इंदाणं दस परिजाणियविमाणा प० तं०-पालए पुप्फए
जाव विमलवरे सव्वओभेदे ॥ १०६३ ॥ दस दसमिया णं भिक्खुपडिमा णं एगेण
राइंदियसएणं अद्धच्छेहिं य भिक्खासएहिं अहासुत्ता जाव आराहियावि भवइ
॥ १०६४ ॥ दसविहा संसारसमावन्नगा जीवा प० तं०-पढमसमयएगिंदिया
अपढमसमयएगिंदिया एवं जाव अपढमसमयपंचिंदिया ॥ १०६५ ॥ दसविहा
सव्वजीवा प० तं०-पुढविकाइया जाव वणस्सइकाइया वेइंदिया जाव पंचिंदिया
अणिदिया ॥ १०६६ ॥ अहवा दसविहा सव्वजीवा प० तं० पढमसमयनेरइया
अपढमसमयनेरइया जाव अपढमसमयदेवा पढमसमयसिद्धा अपढमसमयसिद्धा
॥ १०६७ ॥ वाससयाउयस्स णं पुरिसस्स दस दसाओ प० तं०-वाला किट्ठा य
मंदा य वला पत्ता य हायणी, पवंचा पवभारा य मुंमुही सावणी तहा ॥ १०६८ ॥
दसविहा तणवणस्सइकाइया प० तं०-मूले कंदे जाव पुप्फे फले वीए ॥ १०६९ ॥
सव्वओवि णं विजाहरसेढीओ दसदसजोयणाइं विक्खंभेणं प० ॥ १०७० ॥
सव्वओवि णं आभिओगसेढीओ दस दस जोयणाइं विक्खंभेणं प० ॥ १०७१ ॥
गेविज्जगविमाणाणं दस जोयणसयाइं उद्धं उच्चत्तेणं प० ॥ १०७२ ॥ दसहिं ठाणेहिं
सह तेयसा भासं कुज्जा, तं० केइ तहारुवं समणं वा माहणं वा अच्चासाएज्जा, से
य अच्चासाइए समाणे परिकुविए तस्स तेयं निसिरेज्जा से तं परितावेइ, से तं
परितावित्ता तामेव सह तेयसा भासं कुज्जा, केइ तहारुवं समणं वा माहणं वा अच्चा-
साएज्जा से य अच्चासाइए समाणे देवे, परिकुविए तस्स तेयं निसिरेज्जा से तं परि-

तावेइ से तं २ तमेव सह तेयसा भासं कुज्जा, केइ तहारुवं समणं वा माहणं वा
 अच्चासाएज्जा, से य अच्चासाइए समाणे परिकुविए देवे य परिकुविए दुहओ पडिण्णा
 तस्स तेयं निसिरेज्जा ते तं परितावित्ति ते तं परियावेत्ता तमेव सह तेयसा भासं
 कुज्जा, केइ तहारुवं समणं माहणं वा अच्चासाएज्जा से य अच्चासाइए परिकुविए
 तस्स तेयं निसिरेज्जा तत्थ फोडा संमुच्छंति ते फोडा भिज्जंति ते फोडा भिन्ना
 समाणा तामेव सह तेयसा भासं कुज्जा, केइ तहारुवं समणं वा माहणं वा अच्चासाएज्जा
 से य अच्चासाइए देवे परिकुविए तस्स तेयं निसिरेज्जा, तत्थ फोडा संमुच्छंति ते
 फोडा भिज्जंति, ते फोडा भिन्ना समाणा तामेव सह तेयसा भासं कुज्जा, केइ
 तहारुवं समणं वा माहणं वा अच्चासाएज्जा से य अच्चासाइए परिकुविए देवेवि य परि-
 कुविए ते दुहओ पडिण्णा ते तस्स तेयं निसिरेज्जा, तत्थ फोडा संमुच्छंति, सेसं
 तहेव जाव भासं कुज्जा, केइ तहारुवं समणं वा माहणं वा अच्चासाएज्जा, से य
 अच्चासाइए परिकुविए तस्स तेयं निसिरेज्जा, तत्थ फोडा संमुच्छंति ते फोडा
 भिज्जंति तत्थ पुला संमुच्छंति ते पुला भिज्जंति, ते पुला भिन्ना समाणा तामेव
 सह तेयसा भासं कुज्जा, एए तिन्नि आलावगा भाणियव्वा केइ तहारुवं समणं वा
 माहणं वा अच्चासाएमाणे तेयं निसिरेज्जा से य तत्थ णो कम्मइ णो पकम्मइ अंचियं
 अंचियं करेइ करेत्ता आयार्हिणपयाहिणं करेइ २ ता उड्ढं वेहासं उप्पयइ २ से णं
 तओ पडिहए पडिणियत्तइ २ ता तमेव सरीरगमणुदहमाणे २ सह तेयसा भासं
 कुज्जा जहा वा गोसालस्स मंखलिपुत्तस्स तवतेए ॥ १०७३ ॥ दस अच्छेरगा
 प० तं०-उवसग्ग गम्भहरणं इत्थीतित्थं अभाविया परिसा, कण्हस्स अवरकंका
 उत्तरणं चंदसूराणं (१) हरिवंसकुलुप्पत्ती चमरुप्पाओ य अठ्ठसयसिद्धा, असंजएसु
 पूआ दसवि अणंतेण कालेण २ ॥ १०७४ ॥ इमीसे णं रयणप्पभाए पुढवीए रयणे
 कंडे दसजोयणसयाइं वाहल्लेणं प० ॥ १०७५ ॥ इमीसे रयणप्पभाए पुढवीए वयरे
 कंडे दस जोयणसयाइं वाहल्लेणं प० एवं वेरुलिए लोहितक्खे मसारगल्ले हंसगम्भे
 पुलए सोगंधिए जोइरसे अंजणे अंजणपुलए रयए जायरुवे अंके फलिहे रिठ्ठे जहा
 रयणे तहा सोलसविहा भाणियव्वा ॥ १०७६ ॥ सव्वेवि णं दीवसमुद्दा दसजोयण-
 सयाइं उव्वेहेणं प० ॥ १०७७ ॥ सव्वेवि णं महादहा दस जोयणाइं उव्वेहेणं
 प० ॥ १०७८ ॥ सव्वेवि णं सलिलकुंडा दसजोयणाइं उव्वेहेणं प० ॥ १०७९ ॥
 सीआसीओया णं महानईओ मुहमूले दस दस जोयणाइं उव्वेहेणं प० ॥ १०८० ॥
 कत्तियाणक्खत्ते सव्ववाहिराओ मंडलाओ दसमे मंडले चारं चरइ ॥ १०८१ ॥
 अणुराहा णक्खत्ते सव्वव्भंतराओ मंडलाओ दसमे मंडले चारं चरइ ॥ १०८२ ॥

दस णक्खत्ता णाणस्स विद्धिकरा प० तं० भिगसिरमहा पुस्सो तिन्निय पुव्वाइं
मूलमस्सेसा, हत्थो चित्ता य तहा दस विद्धिकराइं णाणस्स ॥ १०८३ ॥ चउप्पय-
थलयरपंचिंदियतिरिक्खजोणियाणं दस जाइकुलकोडिजोणिपमुहसयसहस्सा प०
उरपरिसप्पथलयरपंचिंदियतिरिक्खजोणियाणं दस जाइकुलकोडिजोणिपमुहसय-
सहस्सा प० ॥ १०८४ ॥ जीवा णं दसठाणनिव्वत्तिया पोग्गले पावकम्मत्ताए
चिर्णिस्तु वा ३ तंजहा-पढमसमयएगिंदियनिव्वत्तिए जाव फासिंदियनिव्वत्तिए,
एवं चिण उवचिण वंध उदीर वेय तह णिज्जरा चेव ॥ १०८५ ॥ दसपएसिया
खंधा अणंता प० ॥ १०८६ ॥ दस पएसोगाढा पोग्गला अणंता प० ॥ १०८७ ॥
दससमयठिईया पोग्गला अणंता प० दसगुणकालगा पोग्गला अणंता प०
॥ १०८८ ॥ ॥ एवं वण्णेहिं गंधेहिं रसेहिं फासेहिं दसगुणलुक्खा पोग्गला अणंता
प० ॥ १०८९ ॥ दसमं ठाणं समत्तं ॥ दसमं अज्झयणं समत्तं ॥
ग्रंथसंख्या ॥ ३७०० ॥

ठाणं समत्तं



णमोऽत्थु णं समणस्स भगवओ णायपुत्तमहावीरस्स समवाए

सुयं भे आउसं ! तेणं भगवया एवमक्खायं ॥ १ ॥ [इह खलु समणेणं भगवया महावीरेणं आइगरेणं तित्थगरेणं सयंसंबुद्धेणं पुरिसुत्तमेणं पुरिससीहेणं पुरिसवरपुंडरीएणं पुरिसवरगंधहत्थिणा लोगुत्तमेणं लोगनाहेणं लोगहिएणं लोगपर्देवेणं लोगपज्जोअगरेणं अमयदएणं चवखुदएणं मग्गदएणं सरणदएणं जीवदएणं धम्मदएणं धम्मदेसएणं धम्मनायगेणं धम्मसारहिणा धम्मवरचाउरंतचक्खवट्ठिणा अप्पडिह्यवरनाणदंसणधरेणं वियट्ठच्छउमेणं जिणेणं जावएणं तिन्नेणं तारएणं बुद्धेणं बोहएणं मुत्तेणं मोयगेणं सव्वज्जुणा सव्वदरिसिणा सिवमयलमह्यमणंतमक्खयमव्वावाहमपुणरावित्तिसिद्धिगइनामधेयं ठाणं संपाविउक्कामेणं इमे दुवालसंगे गणिपिउगे पन्नत्ते, तं जहा-आयारे १ सूयगडे २ ठाणे ३ समवाए ४ विवाहपन्नत्ती ५ नायाधम्मकहाओ ६ उवासगदसाओ ७ अंतगडदसाओ ८ अणुत्तरोववाइयदसाओ ९ पण्हावागरणं १० विवागसुए ११ दिट्ठिवाए १२ ॥ २ ॥ तत्थ णं जे से चउत्थे अंगे समवाए त्ति आहिते तस्स णं अयमट्ठे पन्नत्ते-तं जहा] एगे आया, एगे अणाया, एगे दंडे, एगे अदंडे, एगा किरिआ, एगा अकिरिआ, एगे लोए, एगे अलोए, एगे धम्मे, एगे अधम्मे, एगे पुण्णे, एगे पावे, एगे वंधे, एगे मोक्खे, एगे आसवे, एगे संवरे, एगा वेयणा, एगा णिज्जरा ॥ ३ ॥ जंबुद्दीवे दीवे एगं जोयणसयसहस्सं आया-मविक्खंभेणं पण्णत्ते । अप्पइट्ठाणे नरए एगं जोयणसयसहस्सं आयामविक्खंभेणं पन्नत्ते । पालए जाणविमाणे एगं जोयणसयसहस्सं आयामविक्खंभेणं पन्नत्ते । सव्वट्ठसिद्धे महाविमाणे एगं जोयणसयसहस्सं आयामविक्खंभेणं पन्नत्ते । अद्धानक्खत्ते एगतारे पन्नत्ते । चित्ताणक्खत्ते एगतारे पन्नत्ते । सातिनक्खत्ते एगतारे पन्नत्ते ॥ ४ ॥ इमीसे णं रयणप्पभाए पुढवीए अत्थेगइयाणं नेरइयाणं एगं पलिओवमं ठिई पन्नत्ता । इमीसे णं रयणप्पहाए पुढवीए नेरइआणं उक्कोसेणं एगं सागरोवमं ठिई पन्नत्ता । दोच्चाए पुढवीए नेरइयाणं जहन्नेणं एगं सागरोवमं ठिई पन्नत्ता । असुरकुमारणं देवाणं अत्थेगइयाणं एगं पलिओवमं ठिई पन्नत्ता । असुरकुमारणं देवाणं उक्कोसेणं एगं साहिर्यं सागरोवमं ठिई पन्नत्ता । असुरकुमारिंदवज्जियाणं भोमिज्जाणं देवाणं अत्थेगइआणं एगं पलिओवमं ठिई पन्नत्ता । असंखिज्जवासाउयसण्णिपंचिंदियतिरिक्खजोणियाणं अत्थेगइआणं एगं पलिओवमं ठिई पन्नत्ता । असंखिज्जवासाउयग-वभवक्कंतियसण्णिमणुयाणं अत्थेगइयाणं एगं पलिओवमं ठिई पन्नत्ता । वाणमंतराणं

देवाणं उक्कोसेणं एगं पलिओवमं ठिई पन्नत्ता । जोइसियाणं देवाणं उक्कोसेणं एगं पलिओवमं वाससयसहस्समब्भहियं ठिई पन्नत्ता । सोहम्मं कप्पे देवाणं जहन्नेणं एगं पलिओवमं ठिई पन्नत्ता । सोहम्मं कप्पे देवाणं अत्थेगइआणं एगं सागरोवमं ठिई पन्नत्ता । ईसाणे कप्पे देवाणं जहन्नेणं साइरेणं एगं पलिओवमं ठिई पन्नत्ता । ईसाणे कप्पे देवाणं अत्थेगइयाणं एगं सागरोवमं ठिई पन्नत्ता । जे देवा सागरं सुसागरं सागरकंतं भवं मणुं माणुसोत्तरं लोगहियं विमाणं देवत्ताए उववन्ना तेसि णं देवाणं उक्कोसेणं एगं सागरोवमं ठिई पन्नत्ता । ते णं देवा एगस्स अद्धमासस्स आणमंति वा पाणमंति वा उस्ससंति वा नीससंति वा । तेसि णं देवाणं एगस्स वाससहस्सस्स आहारट्ठे समुप्पज्जइ । संतेगइया भवसिद्धिया जे जीवा ते एगेणं भवग्गहणेणं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाण-मंतं करिस्संति ॥ ५ ॥ दो दंडा पन्नत्ता, तं जहा-अट्ठादंडे चेव, अणट्ठादंडे चेव । दुवे रासी पन्नत्ता, तं जहा-जावरासी चेव, अजीवरासी चेव । दुविहे वंधणे पन्नत्ते, तं जहा-रागबंधणे चेव, दोसबंधणे चेव । पुव्वाफगुणी नक्खत्ते दुतारे पन्नत्ते । उत्तराफगुणी नक्खत्ते दुतारे पन्नत्ते । पुव्वाभइवया नक्खत्ते दुतारे पन्नत्ते । उत्तरा-भइवया नक्खत्ते दुतारे पन्नत्ते ॥ ६ ॥ इमीसे णं रयणप्पभाए पुढवीए अत्थेगइ-याणं नेरइयाणं दो पलिओवमाइं ठिई पन्नत्ता । दुच्चाए पुढवीए अत्थेगइयाणं नेरइ-याणं दो सागरोवमाइं ठिई पन्नत्ता । असुरकुमाराणं देवाणं अत्थेगइयाणं दोपलिओ-वमाइं ठिई पन्नत्ता । असुरकुमारिंदवज्जियाणं भोमिज्जाणं देवाणं उक्कोसेणं देसूणाइं दो पलिओवमाइं ठिई पन्नत्ता । असंखिज्जवासाउयसणिणपंचेदियतिरिक्खजोणिआणं अत्थेगइयाणं दोपलिओवमाइं ठिई पन्नत्ता । असंखिज्जवासाउयगब्भवक्कंतियसन्निपंचि-दियमाणुस्साणं अत्थेगइयाणं दोपलिओवमाइं ठिई पन्नत्ता । सोहम्मं कप्पे अत्थेगइ-याणं देवाणं दो पलिओवमाइं ठिई पन्नत्ता । ईसाणे कप्पे अत्थेगइयाणं देवाणं दो पलिओवमाइं ठिई पन्नत्ता । सोहम्मं कप्पे अत्थेगइयाणं देवाणं उक्कोसेणं दो साग-रोवमाइं ठिई पन्नत्ता । ईसाणे कप्पे देवाणं उक्कोसेणं साहियाइं दो सागरोवमाइं ठिई पन्नत्ता । सणकुमारे कप्पे देवाणं जहन्नेणं दो सागरोवमाइं ठिई पन्नत्ता । माहिंदे कप्पे देवाणं जहन्नेणं साहियाइं दो सागरोवमाइं ठिई पन्नत्ता । जे देवा सुभं सुभकंतं सुभवणं सुभगंधं सुभलेसं सुभफासं सोहम्मवडिसं विमाणं देवत्ताए उववण्णा तेसि णं देवाणं उक्कोसेणं दो सागरोवमाइं ठिई पन्नत्ता ॥ ७ ॥ ते णं देवा दोण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं दोहिं वाससहस्सेहिं आहारट्ठे समुप्पज्जइ । अत्थेगइया भवसिद्धिया

जीवा जे दोहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति
 सव्वदुक्खाणमंतं करिस्संति ॥ ८ ॥ तओ दंडा पन्नत्ता, तं जहा-मणदंडे, वड्ढे,
 कायदंडे । तओ गुत्तीओ पन्नत्ताओ, तं जहा-मणगुत्ती, वयगुत्ती, कायगुत्ती । तओ
 सल्ला पन्नत्ता, तं जहा-मायासल्ले णं, नियाणसल्ले णं, मिच्छादंसणसल्ले णं । तओ
 गारवा पन्नत्ता, तं जहा-इड्ढीगारवे णं, रसगारवे णं, सायागारवे णं । तओ विरा-
 हणा पन्नत्ता, तं जहा-नाणविराहणा, दंसणविराहणा, चरित्तविराहणा । मिगसिरन-
 ँखत्ते तितारे पन्नत्ते । पुस्सनक्खत्ते तितारे पन्नत्ते । जेट्टानक्खत्ते तितारे पन्नत्ते ।
 अभीइनक्खत्ते तितारे पन्नत्ते । सवणनक्खत्ते तितारे पन्नत्ते । अस्सिणिनक्खत्ते तितारे
 पन्नत्ते । भरणीनक्खत्ते तितारे पन्नत्ते ॥ ९ ॥ इमीसे णं रयणप्पभाए पुढवीए अत्थे-
 गइयाणं नेरइयाणं तिणि पलिओवमाइं ठिई पन्नत्ता । दोच्चाए णं पुढवीए नेरइयाणं
 उक्कोसेणं तिणि सागरोवमाइं ठिई पन्नत्ता । तच्चाए णं पुढवीए नेरइयाणं जहण्णेणं
 तिणि सागरोवमाइं ठिई पन्नत्ता । असुरकुमाराणं देवाणं अत्थेगइयाणं तिणि पलि-
 ओवमाइं ठिई पन्नत्ता । असंखिज्जवासाउयसन्निपंचिंदियतिरिक्खजोणियाणं उक्कोसेणं
 तिणि पलिओवमाइं ठिई पन्नत्ता । असंखिज्जवासाउयसन्निगम्भवक्कंतियमणुस्साणं
 उक्कोसेणं तिणि पलिओवमाइं ठिई पन्नत्ता । सोहम्मीसाणेसु अत्थेगइयाणं देवाणं
 तिणि पलिओवमाइं ठिई पन्नत्ता । सणकुमारमाहिं देसु कप्पेसु अत्थेगइयाणं देवाणं
 तिणि सागरोवमाइं ठिई पन्नत्ता । जे देवा आभंकरं पभंकरं आभंकरपभंकरं चंदं
 चंदावत्तं चंदप्पभं चंदकंतं चंदवण्णं चंदलेसं चंदज्झयं चंदसिगं चंदसिट्ठं चंदकूडं
 चंदुत्तरवडिसगं विमाणं देवत्ताए उववण्णा तेसि णं देवाणं उक्कोसेणं तिणि सागरो-
 वमाइं ठिई पन्नत्ता ॥ १० ॥ ते णं देवा तिण्हं अद्धमासाणं आणमंति वा पाणमंति वा
 ऊसंसंति वा नीसंसंति वा । तेसि णं देवाणं तिहिं वाससहस्सेहिं आहारट्ठे समु-
 प्पज्जइ । संतेगइया भवसिद्धिया जीवा जे तिहिं भवग्गहणेहिं सिज्झिस्संति बुज्झिस्संति
 मुच्चिस्संति परिनिव्वाइस्संति सव्वदुक्खाणमंतं करिस्संति ॥ ११ ॥ चत्तारि कसाया
 पन्नत्ता, तं जहा-कोहकसाए माणकसाए मायाकसाए लोभकसाए । चत्तारि ज्ञाणा
 पन्नत्ता, तं जहा-अट्ठज्झाणे रुद्धज्झाणे धम्मज्झाणे सुक्कज्झाणे । चत्तारि विगहाओ
 ५०, तं जहा-इत्थिकहा भत्तकहा रायकहा देसकहा । चत्तारि सण्णा पन्नत्ता, तं
 जहा-आहारसण्णा भयसण्णा मेहुणसण्णा परिग्गहसण्णा । चउव्विहे वंधे पन्नत्ते,
 तं जहा-पगइबंधे ठिइबंधे अणुभावबंधे पएसबंधे, चउगाउए जोयणे पन्नत्ते
 ॥ १२ ॥ अणुराहानक्खत्ते चउतारे पन्नत्ते । पुव्वासाढानक्खत्ते चउतारे पन्नत्ते ।
 उत्तरासाढानक्खत्ते चउतारे पन्नत्ते ॥ १३ ॥ इमीसे णं रयणप्पभाए पुढवीए अत्थे-

गइयाणं नेरइयाणं चत्तारि पलिओवमाइं ठिई पन्नत्ता । तच्चाए णं पुढवीए अत्थेगइ-
याणं नेरइयाणं चत्तारि सागरोवमाइं ठिई पन्नत्ता । असुरकुमाराणं देवाणं अत्थेगइ-
याणं चत्तारि पलिओवमाइं ठिई पन्नत्ता । सोहम्मीसाणेसु कप्पेसु अत्थेगइयाणं देवाणं
चत्तारि पलिओवमाइं ठिई पन्नत्ता । सणकुमारमाहिंदेसु कप्पेसु अत्थेगइयाणं देवाणं
चत्तारि सागरोवमाइं ठिई पन्नत्ता । जे देवा किट्ठिं सुकिट्ठिं किट्ठियावत्तं किट्ठिप्पभं-
किट्ठिजुत्तं किट्ठिवण्णं किट्ठिलेसं किट्ठिज्झयं किट्ठिसिंगं किट्ठिसिट्ठं किट्ठिकूडं किट्ठुत्तर-
वडिसंगं विमाणं देवत्ताए उववण्णा तेसि णं देवाणं उक्कोसेणं चत्तारि सागरोवमाइं
ठिई पन्नत्ता ॥ १४ ॥ ते णं देवा चउण्हऽद्धमासाणं आणमंति वा पाणमंति वा
ऊससंति वा नीससंति वा । तेसिं देवाणं चउहिं वाससहस्सेहिं आहारट्ठे समुप्पज्जइ ।
अत्थेगइया भवसिद्धिया जीवा जे चउहिं भवग्गहणेहिं सिज्झिस्संति जाव सव्वदु-
क्खाणं अंतं करिस्संति ॥ १५ ॥ पंच किरिया पन्नत्ता, तं जहा-काइया अहिगर-
णिया पाउसिया पारितावणिया पाणाइवायकिरिया । पंचमहव्वया पन्नत्ता, तं जहा-
सव्वाओ पाणाइवायाओ वेरमणं, सव्वाओ मुसावायाओ वेरमणं, सव्वाओ अदत्ता-
दाणाओ वेरमणं, सव्वाओ मेहुणाओ वेरमणं, सव्वाओ परिग्गहाओ वेरमणं । पंच
कामगुणा पन्नत्ता, तं जहा-सद्दा रुवा रसा गंधा फासा । पंच आसवदारा पन्नत्ता,
तं जहा-मिच्छत्तं अविरइं पमाया कसाया जोगा । पंच संवरदारा पन्नत्ता, तं जहा-
सम्मत्तं विरइं अप्पमत्तया अकसाया अजोगया । पंच निज्जरट्ठाणा पन्नत्ता, तं जहा-
पाणाइवायाओ वेरमणं, मुसावायाओ वेरमणं, अदिन्नादाणाओ वेरमणं, मेहुणाओ
वेरमणं, परिग्गहाओ वेरमणं । पंच समिईओ पन्नत्ताओ, तं जहा-इरियासमिई-
भासासमिई एसणासमिई आयाणभंडमत्तनिक्खेवणासमिई उच्चारपासवणखेलसिंघा-
णजल्लपारिट्ठावणियासमिई । पंच अत्थिकाया पन्नत्ता, तं जहा-धम्मत्थिकाए अध-
म्मत्थिकाए आगासत्थिकाए जीवत्थिकाए पोग्गलत्थिकाए ॥ १६ ॥ रोहिणी नक्खत्ते
पंचतारे पन्नत्ते । पुणव्वसुनक्खत्ते पंचतारे पन्नत्ते । हत्थनक्खत्ते पंचतारे पन्नत्ते ।
विसाहानक्खत्ते पंचतारे पन्नत्ते । धणिट्ठानक्खत्ते पंचतारे पन्नत्ते ॥ १७ ॥ इमीसे
णं रयणप्पभाए पुढवीए अत्थेगइयाणं नेरइयाणं पंच पलिओवमाइं ठिई पन्नत्ता ।
तच्चाए णं पुढवीए अत्थेगइयाणं नेरइयाणं पंचसागरोवमाइं ठिई पन्नत्ता । असुरकु-
माराणं देवाणं अत्थेगइयाणं पंचपलिओवमाइं ठिई पन्नत्ता । सोहम्मीसाणेसु कप्पेसु
अत्थेगइयाणं देवाणं पंचपलिओवमाइं ठिई पन्नत्ता । सणकुमारमाहिंदेसु कप्पेसु
अत्थेगइयाणं देवाणं पंच सागरोवमाइं ठिई पन्नत्ता । जे देवा वायं सुवायं वायावत्तं
वायप्पभं वायकंतं वायवण्णं वायलेसं वायज्झयं वायसिंगं वायसिट्ठं वायकूडं वाउत्त-

रवडिसंगं सूरं सुसूरं सूरावत्तं सूरप्पमं सूरकंतं सूरवण्णं सूरलेसं सूरज्जयं सूरसिंगं
 सूरसिद्धं सूरकूडं सूस्तरवडिसंगं विमाणं देवत्ताए उववण्णा तेसि ण देवाणं उक्कोसेणं
 पंच सागरोवमाइं ठिई पन्नत्ता ॥ १८ ॥ ते णं देवा पंचहं अद्धमासाणं आणमंति
 वा पाणमंति वा ऊससंति वा नीससंति वा । तेसि णं देवाणं पंचहिं वाससहस्सेहिं
 आहारट्ठे समुप्पज्जइ । संतेगइया भवसिद्धिया जीवा जे पंचहिं भवग्गहणेहिं सिज्झि-
 स्संति जाव अंतं करिस्संति ॥ १९ ॥ छ लेसाओ पण्णत्ता, तं जहा-कण्हलेसा नील-
 लेसा काउलेसा तेउलेसा पम्हलेसा सुक्कलेसा । छ जीवनिक्काया पन्नत्ता, तं जहा-
 पुढविकाए आउकाए तेउकाए वाउकाए वणस्सइकाए तसकाए । छव्विहे वाहिरे
 तवोकम्मे पन्नत्ते, तं जहा-अणसणे ऊणोयरिया वित्तीसंखेवो रसपरिच्चाओ फायकि-
 लेसो संलीणया । छव्विहे अर्विभतरे तवोकम्मे पन्नत्ते, तं जहा-पायच्छित्तं विणओ
 वेयावच्चं सज्झाओ द्वाणं उरस्सग्गो । छ छाउमत्थिया समुग्घाया पन्नत्ता, तं जहा-
 वेयणासमुग्घाए कसायसमुग्घाए मारणंतिअसमुग्घाए वैउव्वियसमुग्घाए तेयसमु-
 ग्घाए आहारसमुग्घाए । छव्विहे अत्थुग्गहे पन्नत्ते, तं जहा-सोइंदियअत्थुग्गहे
 चक्खुइंदियअत्थुग्गहे घाणिंदिअत्थुग्गहे जिर्विभदियअत्थुग्गहे फासिंदियअत्थुग्गहे
 नोइंदियअत्थुग्गहे ॥ २० ॥ कत्तियानक्खत्ते छतारे पन्नत्ते । असिलेसानक्खत्ते छतारे
 पन्नत्ते ॥ २१ ॥ इमीसे णं रयणप्पभाए पुढवीए अत्थेगइयाणं नेरइयाणं छ पलि-
 ओवमाइं ठिई पन्नत्ता । तच्चाए णं पुढवीए अत्थेगइयाणं नेरइयाणं छ सागरोवमाइं
 ठिई पन्नत्ता । असुरकुमाराणं देवाणं अत्थेगइयाणं छ पलिओवमाइं ठिई पन्नत्ता ।
 सोहम्मीसाणेसु कप्पेसु अत्थेगइयाणं देवाणं छ पलिओवमाइं ठिई पन्नत्ता । सणंकु-
 मारमाहिंदेसु कप्पेसु अत्थेगइयाणं देवाणं छ सागरोवमाइं ठिई पन्नत्ता । जे देवा
 सयं वाई सयंभुं सयंभूरमणं घोसं सुघोसं महाघोसं किट्ठिघोसं वीरं सुवीरं वीरगतं
 वीरसेणियं वीरावत्तं वीरप्पमं वीरकंतं वीरवण्णं वीरलेसं वीरज्जयं वीरसिंगं वीरसिद्धं
 वीरकूडं वीस्तरवडिसंगं विमाणं देवत्ताए उववण्णा तेसि णं देवाणं उक्कोसेणं छ
 सागरोवमाइं ठिई पन्नत्ता ॥ २२ ॥ ते णं देवा छण्हं अद्धमासाणं आणमंति वा
 पाणमंति वा ऊससंति वा नीससंति वा । तेसि णं देवाणं छहिं वाससहस्सेहिं
 आहारट्ठे समुप्पज्जइ । संतेगइया भवसिद्धिया जीवा जे छहिं भवग्गहणेहिं सिज्झि-
 स्संति जाव सव्वदुक्खाणमंतं करिस्संति ॥ २३ ॥ सत्त भयट्ठाणा पन्नत्ता, तं जहा-
 इहलोगभाए परलोगभाए आदाणभाए अकम्हाभाए आजीवभाए मरणभाए असिलोग-
 भाए । सत्त समुग्घाया पन्नत्ता, तं जहा-वेयणासमुग्घाए कसायसमुग्घाए मारणंति-
 यसमुग्घाए वैउव्वियसमुग्घाए तेयसमुग्घाए आहारसमुग्घाए केवलिसमुग्घाए ।

समणे भगवं महावीरे सत्त रयणीओ उद्धं उच्चत्तेणं होत्था । इहेव जंबुद्दीवे दीवे सत्त वासहरपव्वया पन्नता तं जहा-चुल्लहिमवंते महाहिमवंते निसडे नीलवंते रूप्पी सिहरी मंदरे । इहेव जंबुद्दीवे दीवे सत्त वासा पन्नता, तं जहा-भरहे हेमवए हरिवासे महाविदेहे रम्मए एरण्णवए एरवए । खीणमोहेणं भगवया मोहणिज्जव-ज्जाओ सत्त कम्मपयडीओ वेए(ज्ज)ई ॥ २४ ॥ महानक्खत्ते सत्ततारे पन्नत्ते । कत्तिआइआ सत्त नक्खत्ता पुव्वदारिआ प० (अभियाइया सत्त नक्खत्ता) महाइआ सत्त नक्खत्ता दाहिणदारिआ प० । अणुराहाइआ सत्त नक्खत्ता अवर-दारिआ प० । धणिट्ठाइआ सत्त नक्खत्ता उत्तरदारिआ प० ॥ २५ ॥ इमीसे णं रयणप्पभाए पुढवीए अत्थेगइयाणं नेरइयाणं सत्त पलिओवमाइं ठिई प० । तच्चाए णं पुढवीए नेरइयाणं उक्कोसेणं सत्त सागरोवमाइं ठिई प० । चउत्थीए णं पुढवीए नेरइयाणं जहण्णेणं सत्त सागरोवमाइं ठिई प० । असुरकुमाराणं देवाणं अत्थे-गइयाणं सत्त पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं सत्त पलिओवमाइं ठिई प० । सणंकुम्मरै कप्पे अत्थेगइयाणं देवाणं उक्कोसेणं सत्त सागरोवमाइं ठिई प० । माहिंदे कप्पे देवाणं उक्कोसेणं साइरेगाइं सत्त सागरो-वमाइं ठिई प० । वंभलोए कप्पे अत्थेगइयाणं देवाणं सत्त साहिया सागरोवमाइं ठिई प० । जे देवा समं समप्पमं महापमं पभासं भासुरं विमलं कंचणकूडं सणं-कुमारवडिसगं विमाणं देवत्ताए उववण्णा तेसि णं देवाणं उक्कोसेणं सत्त सागरोवमाइं ठिई प० ॥ २६ ॥ ते णं देवा सत्तण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं सत्तहिं वाससहस्सेहिं आहारट्ठे समु-प्पज्जइ । संतेगइया भवसिद्धिया जीवा जे णं सत्तहिं भवग्गहणेहिं सिज्जिस्संति जाव सव्वदुक्खाणमंतं करिस्संति ॥ २७ ॥ अट्ठ मयट्ठाणा पन्नत्ता, तं जहा-जाति-मए कुलमए वलमए रुवमए तवमए सुयमए लाभमए इस्सरियमए । अट्ठ पवयण-मायाओ प० तं जहा-इरियासमिई भासासमिई एसणासमिई आयाणभंडमत्त-निक्खेवणासमिई उच्चारपासवणखेलजल्लसिंघाणपारिट्ठावणियासमिई मणगुत्ती वइ-गुत्ती कायगुत्ती । वाणमंतराणं देवाणं रुक्खा अट्ठ जोयणाइं उद्धं उच्चत्तेणं पन्नत्ता । जंबू णं सुदंसणां अट्ठ जोयणाइं उद्धं उच्चत्तेणं प० । कूडसामली णं गरुलावासे अट्ठ जोयणाइं उद्धं उच्चत्तेणं पन्नत्ता । जंबुद्दीवस्स णं जगई अट्ठ जोयणाइं उद्धं उच्च-त्तेणं पन्नत्ता । अट्ठसामइए केवलिसमुग्धाए पन्नत्ते तं जहा-पढमे समए दंडं करेइ, वीए समए क्वाडं करेइ, तइए समए मंथं करेइ, चउत्थे समए मंथंतराई पूरेइ, पंचमे समए मंथंतराई पडिसाहरइ, छट्ठे समए मंथं पडिसाहरइ, सत्तमे समए क्वाडं

पडिसाहरइ, अट्टमे समए दंडं पडिसाहरइ, तओ पच्छा सरीरत्थे भवइ । पासस्स
 णं अरहओ पुरिसादाणिअस्स अट्ट गणा अट्ट गणहरा होत्था, तं जहा-सुभे य
 सुभघोसे य, वसिट्ठे वंभयारि य । सोमे सिरिधरे चेव, वीरभेद्द जसे इय ॥ १ ॥
 अट्ट नक्खत्ता चंदेणं सद्धिं पमदं जोगं जोएंति, तं जहा-कत्तिया, रोहिणी, पुणव्वसू,
 महा, चित्ता, विसाहा, अणुराहा, जेद्धा ॥ २८ ॥ इमीसे णं रयणप्पभाए पुढवीए
 अत्थेगइयाणं नेरइयाणं अट्ट पलिओवमाइं ठिई प० । चउत्थीए पुढवीए अत्थे-
 गइयाणं नेरइयाणं अट्ट सागरोवमाइं ठिई प० । असुरकुमारारणं देवारणं अत्थेगइ-
 याणं अट्ट पलिओवमाइं ठिई प० । सोहम्मीसाणेसु कप्पेसु अत्थेगइयाणं देवारणं
 अट्ट पलिओवमाइं ठिई प० । वंभलोए कप्पे अत्थेगइयाणं देवारणं अट्ट सागरो-
 वमाइं ठिई प० । जे देवा अच्चि अच्चिमालिं वड्ढोयणं पभंकरं चंदामं सूरामं
 सुपइट्ठामं अग्गिच्चाभं रिट्ठामं अरुणाभं अरुणत्तरवडिसगं विमाणं देवत्ताए उववण्णा
 तेसि णं देवारणं उक्कोसेणं अट्ट सागरोवमाइं ठिई प० ॥ २९ ॥ ते णं देवा
 अट्ठहं अद्धमासाणं आणमंति वा पाणमंति वा ऊससंति वा नीससंति वा । तेसि
 णं देवारणं अट्ठहिं वाससहस्सेहि आहारट्ठे समुप्पज्जइ । संतेगइया भवसिद्धिया जीवा
 जे अट्ठहिं भवग्गहणेहि सिज्झिस्संति वुज्झिस्संति, जाव अंतं करिस्संति ॥ ३० ॥
 नव वंभचेरगुत्तीओ पन्नत्ताओ, तं जहा-नो इत्थीपसुपंडगसंसत्ताणि सिज्जासणाणि
 सेवित्ता भवइ, नो इत्थीणं कहं कहित्ता भवइ, नो इत्थीणं गणाइं सेवित्ता भवइ,
 नो इत्थीणं इंदियाणि मणोहराइं मणोरमाइं आलोइत्ता निज्झाइत्ता भवइ, नो पणी-
 यरसभोई, नो पाणभोयणस्स अइमायाए आहारइत्ता, नो इत्थीणं पुव्वरयाइं पुव्व-
 कीलिआइं समरइत्ता भवइ, नो सद्धानुवाई नो रुवाणुवाई नो गंधाणुवाई नो रसा-
 णुवाई नो फासाणुवाई नो सिलोगाणुवाई, नो सायासोक्खपडिवद्धे यावि भवइ ।
 नव वंभचेरअगुत्तीओ पन्नत्ताओ तं जहा-इत्थीपसुपंडगसंसत्ताणं सिज्जासणाणं सेव-
 णया जाव सायानुक्खपडिवद्धे यावि भवइ । नव वंभचेरा पन्नत्ता, तं जहा-सत्थ-
 परिण्णा लोगविजओ सीओसणिज्ज सम्मत्तं । आवंति धुत विमोहा [यण] उवहाण-
 सुयं महपरिण्णा । पासे णं अरहा पुरिसादाणीए नव रयणीओ उद्धं उच्चत्तेणं होत्था
 ॥ ३१ ॥ अभीजी नक्खत्ते साइरेगे नव मुहुत्ते चंदेणं सद्धिं जोगं जोएइ । अभी-
 जियाइया नव नक्खत्ता चंदस्स उत्तरेणं जोगं जोएंति, तं जहा-अभीजि सवणो
 जाव भरणी । इमीसे णं रयणप्पभाए पुढवीए बहुसमरमणिज्जाओ भूमिभागाओ नव
 जोयणसाए उद्धं आवाहाए उवरिळे ताराहवे चारं चरइ ॥ ३२ ॥ जंवुद्दीवे णं दीवे
 नवजोयणिआ मच्छा पविसिंसु वा ३ । विजयस्स णं दारस्स एगमेगाए वाहाए नव

नव भोमा पन्नत्ता । वाणमंतराणं देवाणं सभाओ सुहम्माओ नव जोयणाइं उद्धं उच्चत्तेणं पन्नत्ता । दंसणावरणिज्जस्स णं कम्मस्स नव उत्तरपगडीओ प०, तं जहा-निदा पयला निदानिदा पयलापयला थीणद्धी चक्खुदंसणावरणे अचक्खुदंसणावरणे ओहिदंसणावरणे केवलदंसणावरणे ॥ ३३ ॥ इमीसे णं रयणप्पभाए पुढवीए अत्थेगइयाणं नेरइयाणं नव पलिओवमाइं ठिई प० । चउत्थीए पुढवीए अत्थेगइयाणं नेरइयाणं नव सागरोवमाइं ठिई प० । असुरकुमाराणं देवाणं अत्थेगइयाणं नव पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं नव पलिओवमाइं ठिई प० । वंभलोए कप्पे अत्थेगइयाणं देवाणं नव सागरोवमाइं ठिई प० । जे देवा पम्हं सुपम्हं पम्हावत्तं पम्हप्पभं पम्हकंतं पम्हवण्णं पम्हलेसं पम्हज्झयं पम्हसिंगं पम्हसिट्ठं पम्हकूडं पम्हुत्तरवडिसंगं सुज्जं सुसुज्जं सुज्जवित्तं सुज्जपभं सुज्जकंतं सुज्जवण्णं सुज्जलेसं सुज्जज्झयं सुज्जसिंगं सुज्जसिट्ठं सुज्जकूडं सुज्जुत्तरवडिसंगं रुड्ढं रुड्ढावत्तं रुड्ढप्पभं रुड्ढकंतं रुड्ढवण्णं रुड्ढलेसं रुड्ढज्झयं रुड्ढसिंगं रुड्ढसिट्ठं रुड्ढकूडं रुड्ढलुत्तरवडिसंगं विमाणं देवत्ताए उववण्णा तेसि णं देवाणं नव सागरोवमाइं ठिई प० ॥ ३४ ॥ ते णं देवा नवण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं नवहिं वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे नवहि भवग्गहणेहिं सिज्झिस्संति जाव सव्वदुक्खाणमंतं करिस्संति ॥ ३५ ॥ दसविहे समणधम्ममे पन्नत्ते, तं जहा-खंती मुत्ती अज्जवे मद्देवे लाघवे सच्चे संजमे तवे चियाए वंभचेरवासे । दस चित्तसमाहिट्ठाणा पन्नत्ता, तं जहा-धम्मचिता वा से असमुप्पण्णपुव्वा समुप्पज्जिजा सव्वं धम्मं जाणित्तए, सुमिणदंसणे वा से असमुप्पण्णपुव्वे समुप्पज्जिजा अहातच्चं सुमिणं पासित्तए, सण्णिनाणे वा से असमुप्पण्णपुव्वे समुप्पज्जिजा पुव्वभवे सुमरित्तए, देवदंसणे वा से असमुप्पण्णपुव्वे समुप्पज्जिजा दिव्वं देविद्धिं दिव्वं देवजुइं दिव्वं देवाणुभावं पासित्तए, ओहिनाणे वा से असमुप्पण्णपुव्वे समुप्पज्जिजा ओहिणा लोगं जाणित्तए, ओहिदंसणे वा से असमुप्पण्णपुव्वे समुप्पज्जिजा ओहिणा लोगं पासित्तए, मणपज्जवनाणे वा से असमुप्पण्णपुव्वे समुप्पज्जिजा जाव मणोगए भावे जाणित्तए, केवलनाणे वा से असमुप्पण्णपुव्वे समुप्पज्जिजा केवलं लोगं जाणित्तए, केवलदंसणे वा से असमुप्पण्णपुव्वे समुप्पज्जिजा केवलं लोयं पासित्तए, केवलमरणं वा मरिजा सव्वदुक्खप्पहीणाए । मंदरे णं पव्वए मूले दस जोयणसहस्साइं विक्खंभेणं प० । अरिहा णं अरिट्ठनेमी दस धणूइं उद्धं उच्चत्तेणं होत्था । कण्हे णं वासुदेवे दस धणूइं उद्धं उच्चत्तेणं होत्था । रामे णं

बलदेवे दस धणूइं उद्धं उच्चत्तेणं होत्था । दस नक्खत्ता नाणवुद्धिकरा प० तं जहा—“मिगसिर अद्दा पुस्सो, तिण्णि अ पुव्वा य मूलमस्सेसा । हत्थो चित्तो य तहा, दस वुद्धिकराइं नाणस्स” अकम्मभूमियाणं मणुआणं दसविहा रुक्खा उव-भोगत्ताए उवत्थिया प० तं जहा—“मत्तंगया य भिगा, तुडिअंगा दीव जोइ चित्तंगा । चित्तरसा मणिअंगा, गेहागारा अनिगिणा य ॥ १ ॥” ३६ ॥ इमीसे णं रयणप्पभाए पुढवीए अत्थेगइयाणं नेरइयाणं जहण्णेणं दस वाससहस्साइं ठिई प० । इमीसे णं रयणप्पभाए पुढवीए अत्थेगइयाणं नेरइयाणं दस पलिओवमाइं ठिई प० । चउत्थीए पुढवीए दस निरयावाससयसहस्साइ प० । चउत्थीए पुढवीए नेरइयाणं अत्थेगइयाणं उक्कोसेणं दस सागरोवमाइं ठिई प० । पंचमीए पुढवीए अत्थेगइयाणं नेरइयाणं जहण्णेणं दस सागरोवमाइं ठिई प० । असुरकुमारानं देवानं अत्थेगइयाणं जहण्णेणं दस वाससहस्साइं ठिई प० । असुरिंदवज्जाणं भोमिज्जाणं देवानं अत्थेगइयाणं जहण्णेणं दस वाससहस्साइं ठिई पञ्चत्ता । असुरकुमारानं देवानं अत्थेगइयाणं दस पलिओवमाइं ठिई प० । वायरवणस्सइकाइयाणं उक्कोसेणं दस वाससहस्साइं ठिई प० । वाणमंतराणं देवानं अत्थेगइयाणं जहण्णेणं दस वाससहस्साइं ठिई प० । सोहम्मीसाणेसु कप्पेसु अत्थेगइयाणं देवानं दस पलिओवमाइं ठिई प० । वंभलोए कप्पे देवानं उक्कोसेणं दस सागरोवमाइं ठिई प० । लंतए कप्पे देवानं अत्थेगइयाणं जहण्णेणं दस सागरोवमाइं ठिई प० । जे देवा घोसं सुघोसं महाघोसं नंदिघोसं सुसरं मणोरमं रम्मं रम्मगं रमणिज्जं मंगलावत्तं वंभलो-गवडिसगं विमाणं देवत्ताए उववण्णा तेसि णं देवानं उक्कोसेणं दस सागरोवमाइं ठिई प० ॥ ३७ ॥ ते णं देवा दसण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवानं दसहिं वाससहस्सेहिं आहारट्ठे समुप्पज्जइ । संतेगइआ भवसिद्धिआ जीवा जे दसहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ३८ ॥ एक्कारस उवासगपडिमाओ प० तं जहा—दंसणसावए, कयव्वयकम्मे, सामाइअकडे, पोस-होववासनिरए, दिया वंभयारी रत्ति परिमाणकडे, दिआ वि राओ वि वंभयारी असिणाइं विअडभोई मोलिकडे, सचित्तपरिण्णाए, आरंभपरिण्णाए, पेसंपरिण्णाए, उद्धिट्ठभत्तपरिण्णाए, समणभूए आवि भवइ समणाउसो ! लोगंताओ इक्कारसएहिं एक्कारेहिं जोयणसएहिं आवाहाए जोइसंते पण्णत्ते । जंबूदीवे दीवे मंदरस्स पव्वयस्स एक्कारसहिं एकवीसेहिं जोयणसएहिं अवाहाए जोइसे चारं चरइ । समणस्स णं भग-

चओ महावीरस्स एक्कारस गणहरा होत्था, तं जहा-इंदभूई अग्गिभूई वायुभूई विअत्ते सोहम्मि मंडिए मोरियपुत्ते अकंपिए अयलभाए मेअजे पभासे । मूले नक्खत्ते एक्कार-सतारे पन्नत्ते । हेट्ठिमगेविजयाणं देवाणं एक्कारसमुत्तरं गेविज्जविमाणसत्तं भवइ त्ति मक्खायं । मंदरे णं पव्वए धरणितलाओ सिहरतले एक्कारसभागपरिहीणे उच्चत्तेणं प० ॥ ३९ ॥ इमीसे णं रयणप्पभाए पुढवीए अत्थेगइयाणं नेरइयाणं एक्कारस पलिओवमाइं ठिई प० । पंचमीए पुढवीए अत्थेगइयाणं नेरइयाणं एक्कारस साग-रोवमाइं ठिई प० । असुरकुमाराणं देवाणं अत्थेगइयाणं एक्कारस पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं एक्कारस पलिओवमाइं ठिई प० । लंतए कप्पे अत्थेगइयाणं देवाणं एक्कारस सागरोवमाइं ठिई प० । जे देवा वंभं सुवंभं वंभावत्तं वंभप्पभं वंभकत्तं वंभवणं वंभलेसं वंभज्जयं वंभ-सिंगं वंभसिद्धं वंभकूडं वंभुत्तरवडिसगं विमाणं देवत्ताए उववण्णा तेसि णं देवाणं (उक्कोसेणं) एक्कारस सागरोवमाइं ठिई प० ॥ ४० ॥ ते णं देवा एक्कारसण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं एक्कारसण्हं वाससहस्साणं आहारट्ठे समुप्पज्जइ । संतेगइआ भवसिद्धिआ जीवा जे एक्कारसहिं भवग्गहणेहिं सिज्जिस्संति वुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ४१ ॥ वारस भिक्खुपडिमाओ पन्नत्ताओ, तं जहा-मासिआ भिक्खुपडिमा, दोमासिआ भिक्खुपडिमा, तिमासिआ भिक्खुपडिमा, चउ-मासिआ भिक्खुपडिमा, पंचमासिआ भिक्खुपडिमा, छमासिआ भिक्खुपडिमा, सत्तमासिआ भिक्खुपडिमा, पढमा सत्तराईदिआ भिक्खुपडिमा, दोच्चा सत्तराईदिआ भिक्खुपडिमा, तच्चा सत्तराईदिआ भिक्खुपडिमा, अहोराइआ भिक्खुपडिमा, एग-राइआ भिक्खुपडिमा । दुवालसविहे संभोगे प० तं जहा-“उवहीसुअभत्तपाणे, अंजलीपग्गहे त्ति य । दायणे य निकाए अ अब्भुट्ठाणेति आवरे । कितिकम्मस्स य करणे, वेयावच्चकरणे इअ । समोसरणं संनिसिज्जा य, कहाए अ पवंधणे” । दुवाल-सावत्ते कितिकम्मे पन्नत्ते, तं जहा-“दुओणयं जहाजायं, कितिकम्मं वारसावयं । चउसिरं तिगुत्तं च, दुपवेसं एगनिक्खमणं” । विजया णं रायहाणी दुवालस जोयण-सयसहस्साइं आयामविक्खंभेणं प० । रामे णं वलदेवे दुवालस वाससयाइं सव्वाउयं पालित्ता देवत्तं गए । मंदरस्स णं पव्वयस्स चूलिआ मूले दुवालस जोयणाइं विक्खंभेणं प० । जंवूदीवस्स णं दीवस्स वेइआ मूले दुवालस जोय-णाइं विक्खंभेणं प० । सव्वजहणिया राई दुवालसमुहुत्तिआ प० । एवं दिवसोऽवि नायव्वो । सव्वट्ठसिद्धस्स णं महाविमाणस्स उवरिल्लाओ चूलिअग्गाओ

दुवालस जोयणाई उद्धं उप्पइआ ईसिपब्भारनामपुढवी पण्णत्ता । ईसिपब्भाराए
 णं पुढवीए दुवालस नामधेज्जा पण्णत्ता, तं जहा-ईसित्ति वा ईसिपब्भाराति वा
 तणूइ वा तणूयतरि त्ति वा सिद्धित्ति वा सिद्धालए त्ति वा मुत्तीति वा मुत्तालए त्ति
 वा वंभे त्ति वा वंभवडिसए त्ति वा लोकपरिपूरणे त्ति वा लोगगचूलिआइ
 वा ॥ ४२ ॥ इमीसे णं रयणप्पभाए पुढवीए अत्थेगइयाणं नेरइयाणं वारस पलि-
 ओवमाई ठिई प० । पंचमीए पुढवीए अत्थेगइयाणं नेरइयाणं वारस सागरो-
 वमाई ठिई प० । असुरकुमाराणं देवाणं अत्थेगइयाणं वारस पलिओवमाई ठिई
 प० । सोहम्मीसाणेसु कप्पेसु अत्थेगइयाणं देवाणं वारस पलिओवमाई ठिई
 प० । लंतए कप्पे अत्थेगइयाणं देवाणं वारस सागरोवमाई ठिई प० । जे
 देवा महिंदं महिदज्झयं कंबुं कंबुग्गीवं पुंखं सुपुंखं महापुंखं पुंडं सुपुंडं महापुंडं नरिंदं
 नरिदकंतं नरिदुत्तरवडिसगं विमाणं देवत्ताए उववण्णा तेसि णं देवाणं उक्कोसेणं
 वारस सागरोवमाई ठिई प० ॥ ४३ ॥ ते णं देवा वारसण्हं अद्धमासाणं आण-
 मंति वा पाणमंति वा उस्ससंति वा नीससंति वा । तेसि णं देवाणं वारसहिं वास-
 सहस्सेहिं आहारट्ठे समुप्पज्जइ । संतेगइया भवसिद्धिआ जीवा जे वारसहिं भव-
 ग्गहणेहिं सिज्झिस्संति वुज्झिस्संति मुच्चिस्संति परिनिव्वाइस्संति सव्वदुक्खाणमंतं
 करिस्संति ॥ ४४ ॥ तेरस किरियाठाणा प० तं जहा—अट्ठादंडे अणट्ठादंडे
 हिसादंडे अकम्हादंडे दिट्ठिविपरिआसिआदंडे मुसावायवत्तिए अदिच्चादाणवत्तिए
 अज्जत्थिए माणवत्तिए मित्तदोसवत्तिए मायावत्तिए लोभवत्तिए इरिआवहिए नामं
 तेरसमे । सोहम्मीसाणेसु कप्पेसु तेरस विमाणपत्थडा प० । सोहम्मवडिसगे णं
 विमाणे णं अद्धतेरसजोयणसयसहस्साई आयामविक्खंभेणं प० । एवं ईसाणव-
 डिसगे वि । जलयरपंचिदिअतिरिक्खजोणिआणं अद्धतेरसजाइकुलकोडीजोणीपमुह-
 सयसहस्साई प० । पाणाउस्स णं पुव्वस्स तेरस वत्थू प० । गब्भवक्कंति-
 अपंचेदिअतिरिक्खजोणिआणं तेरसविहे पओगे प० तं जहा—सच्चमणपओगे
 मोसमणपओगे सच्चामोसमणपओगे असच्चामोसमणपओगे सच्चवइपओगे मोसवइप-
 ओगे सच्चामोसवइपओगे असच्चामोसवइपओगे ओरालिअसरीरकायपओगे ओरालि-
 अमीससरीरकायपओगे वेउव्विअसरीरकायपओगे वेउव्विअमीससरीरकायपओगे
 कम्मसरीरकायपओगे । सूरमंडलं जोअणेणं तेरसे (स) हिं एगसट्ठिभाग (ने)
 हिं जोयणस्स ऊणं पन्नत्तं ॥ ४५ ॥ इमीसे णं रयणप्पभाए पुढवीए अत्थेगइयाणं
 नेरइयाणं तेरस पलिओवमाई ठिई प० । पंचमीए पुढवीए अत्थेगइयाणं नेरइ-
 याणं तेरस सागरोवमाई ठिई प० । असुरकुमाराणं देवाणं अत्थेगइयाणं तेरस

पलिओवमाइं ठिई प० । सोहम्मीसाणेसु कप्पेसु अत्येगइआणं देवाणं तेरस
 पलिओवमाइं ठिई प० । लंतए कप्पे अत्येगइआणं देवाणं तेरस सागरोवमाइं
 ठिई प० । जे देवा वज्जं सुवज्जं वज्जावत्तं वज्जप्पभं वज्जकंतं वज्जवण्णं वज्जलेसं
 वज्जह्वं वज्जसिंगं वज्जसिट्ठं वज्जकूडं वज्जुत्तरवडिसंगं वडरं वडरावत्तं वडरप्पभं वड-
 रकंतं वडरवण्णं वडरलेसं वडरह्वं वडरसिंगं वडरसिट्ठं वडरकूडं वडरुत्तरवडिसंगं लोगं
 लोगावत्तं लोगप्पभं लोगकंतं लोगवण्णं लोगलेसं लोगह्वं लोगसिंगं लोगसिट्ठं
 लोगकूडं लोगुत्तरवडिसंगं विमाणं देवत्ताए उववण्णा तेसि णं देवाणं उक्कोसेणं तेरस
 सागरोवमाइं ठिई प० ॥ ४६ ॥ ते णं देवा तेरसहिं अद्धमासेहिं आणमंति वा
 पाणमंति वा उस्ससंति वा नीससंति वा । तेसि णं देवाणं तेरसहिं वाससहस्सेहिं
 आहारट्ठे समुप्पज्जइ । संतेगइआ भवसिद्धिआ जीवा जे तेरसहिं भवग्गहणेहिं
 सिज्झिस्संति वुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति
 ॥ ४७ ॥ चउद्दस भूअग्गामा पन्नत्ता, तं जहा-सुहुमा अपज्जत्ता सुहुमा पज्जत्ता
 वादरा अपज्जत्ता वादरा पज्जत्ता वेइंदिया अपज्जत्ता वेइंदिया पज्जत्ता तेदिया
 अपज्जत्ता तेंदिया पज्जत्ता चउरिदिआ अपज्जत्ता चउरिदिआ पज्जत्ता पंचिदिआ
 असन्निअपज्जत्ता पंचिदिआ असन्निपज्जत्ता पंचिदिआ सन्निअपज्जत्ता पंचिदिआ
 सन्निपज्जत्ता । चउदस पुव्वा प० तं जहा-उप्पायपुव्वमग्गेणियं च तइयं च
 वीरियं पुव्वं । अत्थीनत्थि पवायं तत्तो नाणप्पवायं च ॥ १ ॥ सच्चप्पवायपुव्वं तत्तो
 आयप्पवायपुव्वं च । कम्मप्पवायपुव्वं पच्चक्खाणं भवे नवमं ॥ २ ॥ विज्जाअणुप्प-
 वायं अवञ्ज पाणाउ वारसं पुव्वं । तत्तो किरियविसालं पुव्वं तह बिंदुसारं च ॥ ३ ॥
 अग्गेणीअस्स णं पुव्वस्स चउद्दस वत्थू पन्नत्ता । समणस्स णं भगवओ महावीरस्स
 चउद्दस समणसाहस्सीओ उक्कोसिआ समणसंपया होत्था । कम्मविसोहिमग्गणं पडुच्च
 चउदस जीवट्ठाणा पन्नत्ता, तं जहा-मिच्छदिट्ठी सासायणसम्मदिट्ठी सम्मामिच्छदिट्ठी
 अविरयसम्मदिट्ठी विरयाविरए पमत्तसंजए अप्पमत्तसंजए निअट्ठिवायरे अनियट्ठिवायरे
 सुहुमसंपराए उवसामए वा खवए वा उवसंतमोहे खीणमोहे सजोगीकेवली अजोगी-
 केवली । भरहेरवयाओ णं जीवाओ चउद्दस चउद्दस जोयणसहस्साइं चत्तारि अ एगु-
 त्तरे जोयणसए छच्च एगूणवीसे भागे जोयणस्स आयामेणं पन्नत्ता । एगमेगस्स णं रत्तो
 चाउरंतचक्कवट्ठिस्स चउद्दस रयणा पन्नत्ता, तं जहा-इत्थीरयणे सेणावडरयणे गाहाव-
 डरयणे पुरोहियरयणे वड्डुडरयणे आसरयणे हत्थिरयणे असिरयणे दंडरयणे चक्करयणे
 छत्तरयणे चम्मरयणे मणिरयणे काणिणिरयणे । जंबुद्वीवे णं दीवे चउद्दस महानईओ
 पुव्वावरेण लवणसमुद्दं समप्पेति, तं जहा-गंगा सिंधू रोहिआ रोहिअंसा हरी

हरिकंता सीआ सीओदा नरकंता नारिकंता सुवण्णकूला रूप्पकूला रत्ता रत्तवई
 ॥ ४८ ॥ इमीसे णं रयणप्पमाए पुढवीए अत्थेगइयाणं नेरइयाणं चउदस पलिओ-
 वमाइं ठिई प० । पंचमीए णं पुढवीए अत्थेगइयाणं नेरइयाणं चउदस सागरो-
 वमाइं ठिई प० । असुरकुमाराणं देवाणं अत्थेगइयाणं चउदस पलिओवमाइं
 ठिई प० । सोहम्मीसाणेसु कप्पेसु अत्थेगइयाणं देवाणं चउदस पलिओवमाइं
 ठिई प० । लंतए कप्पे देवाणं उक्कोसेणं चउदस सागरोवमाइं ठिई प० ।
 महासुक्के कप्पे देवाणं जहण्णेणं चउदस सागरोवमाइं ठिई प० । जे देवा सिरि-
 कंतं सिरिमहिअं सिरिसोमनसं लंतयं काविट्ठं महिंदं महिदकंतं महिंदुत्तरवडिसगं
 विमाणं देवत्ताए उववण्णा तेसि णं देवाणं उक्कोसेणं चउदस सागरोवमाइं ठिई
 प० ॥ ४९ ॥ ते णं देवा चउदसहिं अद्धमासेहिं आणमंति वा पाणमंति वा
 उस्ससंति वा नीससंति वा । तेसि णं देवाणं चउदसहिं वाससहस्सेहिं आहारट्ठे
 समुप्पज्जइ । संतेगइया भवसिद्धिआ जीवा जे चउदसहिं भवग्गहणेहिं सिज्जिस्संति
 वुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ५० ॥
 पन्नरस परमाहम्मिआ पन्नत्ता, तं जहा-अंबे अंवरिसी चेव, सामे सवले त्ति आवरे ।
 रुद्धोवद्धकाले अ, महाकाले त्ति आवरे ॥ १ ॥ असिपत्ते धणु कुंभे, वालुए वेअर-
 णीति अ । खरस्सरे महाघोसे, एते पन्नरसाहिआ ॥ २ ॥ णमी णं अरहा पन्नरस
 धणूइं उट्ठं उच्चत्तेणं होत्था । धुवराहू णं बहुलपक्खस्स पडिवए पन्नरसभागं पन्नरस-
 भागेणं चंदस्स लेसं आवरेत्ताणं चिट्ठति, तं जहा-पढमाए पढमं भागं वीआए
 दुभागं तइआए तिभागं चउत्थीए चउभागं पंचमीए पंचभागं छट्ठीए छभागं सत्त-
 मीए सत्तभागं अट्ठमीए अट्ठभागं नवमीए नवभागं दसमीए दसभागं एक्कारसीए
 एक्कारसभागं बारसीए बारसभागं तेरसीए तेरसभागं चउदसीए चउदसभागं पन्न-
 रसेसु पन्नरसभागं । तं चेव सुक्कपक्खस्स य उवदंसेमाणे २ चिट्ठति, तं जहा-पढमाए
 पढमं भागं जाव पन्नरसेसु पन्नरसभागं । छ णक्खत्ता पन्नरसमुहुत्तसंजुत्ता पन्नत्ता,
 तं जहा-सतभिसय भरणि अद्दा असलेसा साई तहा जेट्ठा । एते छण्णक्खत्ता पन्न-
 रसमुहुत्तसंजुत्ता ॥ १ ॥ चेत्तासोएसु णं मासेसु पन्नरसमुहुत्तो दिवसो भवति, एवं
 चेत्तासोएसु णं मासेसु पन्नरसमुहुत्ता राई भवति । विज्जाअणुप्पवायस्स णं पुव्वस्स
 पन्नरस वत्थू पण्णत्ता । मणूसाणं पण्णरसविहे पओगे प० तं जहा-सच्चमणप-
 ओगे मोसमणपओगे सच्चमोसमणपओगे असच्चामोसमणपओगे सच्चवइपओगे मोस-
 वइपओगे सच्चमोसवइपओगे असच्चामोसवइपओगे ओरालिअसरीरकायपओगे ओरा-
 लिअमीससरीरकायपओगे वेउव्वियसरीरकायपओगे वेउव्वियमीससरीरकायपओगे

आहारयसरीरकायपओगे आहारयमीससरीरकायप्पओगे कम्मयसरीरकायपओगे
 ॥ ५१ ॥ इमीसे णं रयणप्पभाए पुढवीए अत्थेगइआणं नेरइआणं पण्णरस पलि-
 ओवमाइं ठिई प० । पंचमीए पुढवीए अत्थेगइआणं नेरइयाणं पण्णरस सागरो-
 चमाइं ठिई प० । असुरकुमारणं देवाणं अत्थेगइयाणं पण्णरस पलिओवमाइं
 ठिई प० । सोहम्मीसाणेसु कप्पेसु अत्थेगइआणं देवाणं पण्णरस पलिओवमाइं
 ठिई प० । महासुक्के कप्पे अत्थेगइआणं देवाणं पण्णरस सागरोवमाइं ठिई
 प० । जे देवा णंदं सुगंदं णंदावतं णंदप्पभं णंदकंतं णंदवण्णं णंदलेसं णंदज्जयं
 णंदसिंगं णंदसिट्ठं णंदकूडं णंदुत्तरवडिसगं विमाणं देवत्ताए उववण्णा तेसि णं देवाणं
 उक्कोसेणं पण्णरस सागरोवमाइं ठिई प० ॥ ५२ ॥ ते णं देवा पण्णरसण्हं
 अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं
 पण्णरसहि वाससहस्सेहिं आहारट्ठे समुप्पज्जइ । संतेगइआ भवसिद्धिआ जीवा जे
 पन्नरसहिं भवग्गहणेहिं सिज्जिस्संति वुज्जिस्संति मुच्चिस्संति परिनिव्वाइस्संति
 सव्वदुक्खाणमंतं करिस्संति ॥ ५३ ॥ सोलस य गाहा सोलसगा पन्नत्ता, तं जहा-
 समए वेयालिए उवसग्गपरिञ्ञा इत्थीपरिण्णा निरयविभत्ती महावीरथुई कुसीलपरि-
 भासिए वीरिए धम्मे समाही मग्गे समोसरणे आहातहिए गंथे जमईए गाहासोल-
 समे सोलसगे । सोलस कसाया पन्नत्ता, तं जहा-अणंताणुवंधी कोहे, अणंताणुवंधी
 माणे, अणंताणुवंधी माया, अणंताणुवंधी लोभे, अपच्चक्खाणकसाए कोहे, अपच्च-
 क्खाणकसाए माणे, अपच्चक्खाणकसाए माया, अपच्चक्खाणकसाए लोभे, पच्च-
 क्खाणावरणे कोहे, पच्चक्खाणावरणे माणे, पच्चक्खाणावरणा माया, पच्चक्खाणावरणे
 लोभे, संजलणे कोहे, संजलणे माणे, संजलणे माया, संजलणे लोभे । मंदरस्स णं
 पव्वयस्स सोलस नामधेया पन्नत्ता, तं जहा-मंदर मेरु मणोरम, सुदंसण सयंपभे
 य गिरिराया । रयणुच्चय पियदंसण, मज्झे लोगस्स नाभी य ॥ १ ॥ अत्थे अ
 सूरिआवत्ते, सूरिआवरणे त्ति अ । उत्तरे अ दिसाई अ, वडिंसे इअ सोलसमे ॥ २ ॥
 पासस्स णं अरहतो पुरिसादाणीयस्स सोलस समणसाहस्सीओ उक्कोसिआ समण-
 संपदा होत्था । आयप्पवायस्स णं पुव्वस्स णं सोलस वत्थू पन्नत्ता । चमरवलीणं
 ऊवारियालेणे सोलस जोयणसहस्साइं आयामविक्खंभेणं प० । लवणे णं समुद्दे
 सोलस जोयणसहस्साइं उस्सेहपरिवुद्धीए पन्नत्ते ॥ ५४ ॥ इमीसे णं रयणप्पभाए
 पुढवीए अत्थेगइयाणं नेरइयाणं सोलस पलिओवमाइं ठिई प० । पंचमीए पुढ-
 वीए अत्थेगइयाणं नेरइयाणं सोलस सागरोवमाइं ठिई प० । असुरकुमारणं देवाणं
 अत्थेगइयाणं सोलस पलिओवमाइं ठिई प० । सोहम्मीसाणेसु कप्पेसु अत्थेगइ-

याणं देवाणं सोलस पलिओवमाई ठिई प० । महासुक्के कप्पे देवाणं अत्थेगइयाणं
 सोलस सागरोवमाई ठिई प० । जे देवा आवत्तं विआवत्तं नंदिआवत्तं महाणंदि-
 आवत्तं अंकुसं अंकुसपलंवं भदं सुभदं महाभदं सव्वओभदं भदुत्तरवडिंसं विमाणं
 देवत्ताए उववण्णा तेसि णं देवाणं उक्कोसेणं सोलस सागरोवमाई ठिई प०
 ॥ ५५ ॥ ते णं देवा सोलसहिं अद्धमासाणं आणमंति वा पाणमंति वा उस्ससंति वा
 नीससंति वा । तेसि णं देवाणं सोलसवाससहस्सेहिं आहारट्ठे समुप्पज्जइ । संतेग-
 इआ भवसिद्धिआ जीवा जे सोलसहिं भवग्गहणेहिं सिज्झिस्संति वुज्झिस्संति मुच्चि-
 स्संति परिनिव्वाइस्संति सव्वदुक्खाणमंतं करिस्संति ॥ ५६ ॥ सत्तरसविहे असंजमे
 पन्नत्ते, तं जहा-पुढविकायअसंजमे आउकायअसंजमे तेउकायअसंजमे वाउकाय-
 असंजमे वणस्सइकायअसंजमे वेइंदिअअसंजमे तेइंदियअसंजमे चउरिंदियअसंजमे
 पंचिदियअसंजमे अजीवकायअसंजमे पेहाअसंजमे उवेहाअसंजमे अवहट्ठअसंजमे
 अप्पमज्जणाअसंजमे मणअसंजमे वइअसंजमे कायअसंजमे । सत्तरसविहे संजमे
 पन्नत्ते, तं जहा-पुढवीकायसंजमे आउकायसंजमे तेउकायसंजमे वाउकायसंजमे
 वणस्सइकायसंजमे वेइंदिअसंजमे तेइंदियसंजमे चउरिदिअसंजमे पंचिदिअसंजमे
 अजीवकायसंजमे पेहासंजमे उवेहासंजमे अवहट्ठसंजमे पमज्जणासंजमे मणसंजमे
 वइसंजमे कायसंजमे । माणुसत्तरे णं पव्वए सत्तरस एकवीसे जोयणसए उड्डं उच्चत्तेणं
 पन्नत्ते । सव्वेसिं पि णं वेलंधरअणुवेलंधरणागराईणं आवासपव्वया सत्तरस एकवीसाई
 जोयणसयाई उड्डं उच्चत्तेणं पन्नत्ता । लवणे णं समुद्दे सत्तरा जोयणसहस्साई सव्व-
 ग्गेणं पन्नत्ते । इमीसे णं रयणप्पभाए पुढवीए बहुसमरमणिज्जाओ भूमिभागाओ
 सातिरेगाई सत्तरस जोयणसहस्साई उड्डं उप्पत्तिता ततो पच्छा चारणाणं तिरिआ
 गती पवत्ताति । चमरस्स णं असुरिंदस्स असुररण्णो तिगिळिकूडे उप्पायपव्वए सत्त-
 रस एकवीसाई जोयणसयाई उड्डं उच्चत्तेणं पन्नत्ते । बलिस्स णं असुरिंदस्स रुअगिदे
 उप्पायपव्वए सत्तरस एकवीसाई जोयणसयाई उड्डं उच्चत्तेणं पन्नत्ते । सत्तरसविहे
 मरणे पन्नत्ते, तं जहा-आवीईमरणे ओहिमरणे आयंतियमरणे वलायमरणे वसट्ठमरणे
 अंतोसल्लमरणे तब्भवमरणे बालमरणे पंडितमरणे वालपंडितमरणे छउमत्थमरणे
 केवलमरणे वेहासमरणे गिद्धिपिट्ठमरणे भत्तपच्चक्खाणमरणे इंगिणिमरणे पाओवग-
 मणमरणे । सुहुमसंपराए णं भगवं सुहुमसंपरायभावे वट्ठमाणे सत्तरस कम्मपगडीओ
 णिवंधति, तं जहा-आभिणिबोहियणाणावरणे सुयणाणावरणे ओहिणाणावरणे मणप-
 ज्वणाणावरणे केवलणाणावरणे चक्खुदंसणावरणे अचक्खुदंसणावरणे ओहिदंसणा-
 वरणे केवलदंसणावरणे सायावेयणिज्जं जसोकित्तिनामं उच्चागोयं दाणंतरायं लाभंतरायं

भोगंतरायं उवभोगंतरायं वीरिअंतरायं ॥ ५७ ॥ इमीसे णं रयणप्पभाए पुढवीए
 अत्थेगइआणं नेरइयाणं सत्तरस पलिओवमाइं ठिई पन्नत्ता । पंचमीए पुढवीए अत्थे-
 गइयाणं नेरइयाणं उक्कोसेणं सत्तरस सागरोवमाइं ठिई प० । छट्ठीए पुढवीए अत्थे-
 गइयाणं नेरइयाणं जहण्णेणं सत्तरस सागरोवमाइं ठिई प० । असुरकुमारारणं देवारणं
 अत्थेगइयाणं सत्तरस पलिओवमाइं ठिई प० । सोहम्मीसाणेषु कप्पेसु अत्थेगइआणं
 देवारणं सत्तरस पलिओवमाइं ठिई प० । महासुक्के कप्पे देवारणं उक्कोसेणं सत्तरस
 सागरोवमाइं ठिई प० । सहस्सारे कप्पे देवारणं जहण्णेणं सत्तरस सागरोवमाइं
 ठिई प० । जे देवा सामाणं सुसामाणं महासामाणं पडमं महापडमं कुमुदं महाकुमुदं
 नल्लिणं महानल्लिणं पोंडरीअं महापोंडरीअं सुक्कं महासुक्कं सीहं सीहकंतं सीहवीअं
 भाविअं विमाणं देवत्ताए उववण्णा तेसि णं देवारणं उक्कोसेणं सत्तरस सागरोवमाइं
 ठिई प० ॥ ५८ ॥ ते णं देवा सत्तरसहिं अद्धमासेहिं आणमंति वा पाणमंति वा
 उस्ससंति वा नीससंति वा । तेसि णं देवारणं सत्तरसहिं वाससहस्सेहिं आहारट्ठे
 समुप्पज्जइ । संतेगइया भवसिद्धिआ जीवा जे सत्तरसहिं भवग्गहणेहिं सिज्झिस्संति
 बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ५९ ॥
 अट्टारसविहे वंभे पन्नत्ते, तं जहा-ओरालिए कामभोगे णेव सयं मणेणं सेवइ, नो
 वि अन्नं मणेणं सेवावेइ, मणेणं सेवंतं पि अण्णं न समणुजाणाइ ओरालिए काम-
 भोगे णेव सयं वायाए सेवइ, नो वि अण्णं वायाए सेवावेइ, वायाए सेवंतं पि अण्णं
 न समणुजाणाइ, ओरालिए कामभोगे णेव सयं काएणं सेवइ, नो वि यऽण्णं काएणं
 सेवावेइ, काएणं सेवंतं पि अण्णं न समणुजाणाइ, दिव्वे कामभोगे णेव सयं मणेणं
 सेवइ, णो वि अण्णं मणेणं सेवावेइ, मणेणं सेवंतं पि अण्णं न समणुजाणाइ, दिव्वे
 कामभोगे णेव सयं वायाए सेवइ, णो वि अण्णं वायाए सेवावेइ, वायाए सेवंतं पि
 अण्णं न समणुजाणाइ, दिव्वे कामभोगे णेव सयं काएणं सेवइ, णो वि अण्णं काएणं
 सेवावेइ, काएणं सेवंतं पि अण्णं न समणुजाणाइ । अरहतो णं अरिट्ठनेमिस्स
 अट्टारस समणसाहस्सीओ उक्कोसिया समणसंपया होत्था । समणेणं भगवया महा-
 वीरेणं समणाणं णिगंथाणं सखुद्धयविअत्ताणं अट्टारस ठाणा पन्नत्ता, तं जहा-वयच्छक्कं
 कायच्छक्कं, अकप्पो णिहिभायणं; पलियंक निसिज्जा य, सिणाणं सोभंज्जणं ॥ १ ॥
 आयायस्स णं भगवतो सचूलिआगस्स अट्टारस पयसहस्साइं पयग्गेणं पन्नत्ताइ ।
 वंभीए णं लिवीए अट्टारसविहे लेखविहाणे पन्नत्ते, तं०-वंभी जवणी लियादोसा
 ऊरिया खरोट्टिया खरसाविया पहाराइआ उच्चत्तरिआ अक्खरपुट्ठि(त्थि)या
 भोगवयता वेणतिया णिण्हइया अंकलिवि गणिअलिवी गंधव्वलिवी[भूयलिवि]

आदंसलिवी माहेसरीलिवी दामिलिवी बोलिंदिलिवी । अत्थिनत्थिप्पवायस्स णं पुव्वस्स णं अट्टारस वत्थू प० । धूमप्पभाए णं पुढवीए अट्टारसुत्तरं जोयणसयसहरसं चाहल्लेणं प० । पोसासाढेसु णं मासेसु सइ उक्कोसेणं अट्टारस सुहुत्ते दिवसे भवइ सइ उक्कोसेणं अट्टारस सुहुत्ता राती भवइ ॥ ६० ॥ इमीसे णं रयणप्पभाए पुढवीए अत्थेगइयाणं नेरइयाणं अट्टारस(पलिओवमाइं ठिई प० । छट्ठीए पुढवीए अत्थेगइयाणं नेरइयाणं अट्टारस)सागरोवमाइं ठिई प० । असुरकुमाराणं देवाणं अत्थेगइयाणं अट्टारस पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं अट्टारस पलिओवमाइं ठिई प० । सहस्सारे कप्पे देवाणं उक्कोसेणं अट्टारस सागरोवमाइं ठिई प० । आणते कप्पे देवाणं अत्थेगइयाणं जहण्णेणं अट्टारस सागरोवमाइं ठिई प० । जे देवा कालं सुकालं महाकालं अंजणं रिट्ठं सालं समाणं दुमं महादुमं विसालं सुसालं पउमं पउमगुम्मं कुमुदं कुमुदगुम्मं नल्लिणं नल्लिणगुम्मं पुंडरीअं पुंडरीयगुम्मं सहस्सारवडिसगं विमाणं देवत्ताए उववण्णा तेसि णं देवाणं(उक्कोसेणं)अट्टारस सागरोवमाइं ठिई प० ॥ ६१ ॥ ते णं देवा णं अट्टारसेहिं अद्धमासेहिं आणमंति वा पाणमंति वा ऊससंति वा नीससंति वा । तेसि णं देवाणं अट्टारसवाससहस्सेहिं आहारट्ठे समुप्पज्जइ । संतेगइया भवसिद्धिया (जीवा)जे अट्टारसहिं भवग्गहणेहिं सिज्जिस्संति वुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ६२ ॥ एगूणवीसं णायज्जयणा पन्नत्ता, तं जहा-उक्खित्तणाए संघाडे, अडे कुम्मे अ सेलए । तुंबे अ रोहिणी मल्ली, मागंदी चंदिमाति अ ॥ १ ॥ दावइवे उदगणाए, मंडुक्के तेत्तली इअ । नंदिफले अवरकंका, आइण्णे सुंसमा इअ ॥ २ ॥ अवरे अ पोंडरीए, णाएं एगूणवीसमे । जंबुद्दीवे णं दीवे सूरिआ उक्कोसेणं एगूणवीसं जोयणसयाइं उद्धमहो तवयंति । सुक्के णं महग्गहे अवरे णं उदिए समाणे एगूणवीसं णक्खत्ताइं समं चारं चरित्ता अवरेणं अत्थमणं उवागच्छइ । जंबुद्दीवस्स णं दीवस्स कलाओ एगूणवीसं छेअणाओ पन्नत्ता । एगूणवीसं तित्थयरा अगारवासमज्झे वसित्ता मुंडे भवित्ता णं अगाराओ अणगारिअं पव्वइआ ॥ ६३ ॥ इमीसे णं रयणप्पभाए पुढवीए अत्थेगइयाणं नेरइयाणं एगूणवीसं पलिओवमाइं ठिई प० । छट्ठीए पुढवीए अत्थेगइयाणं नेरइयाणं एगूणवीसं सागरोवमाइं ठिई प० । असुरकुमाराणं देवाणं अत्थेगइयाणं एगूणवीसं पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं एगूणवीसं पलिओवमाइं ठिई प० । आणयकप्पे[अत्थेगइयाणं] देवाणं उक्कोसेणं एगूणवीसं सागरोवमाइं ठिई प० । पाणए कप्पे[अत्थेगइयाणं]

देवाणं जहण्णेणं एगूणवीसं सागरोवमाइं ठिई प० । जे देवा आणतं पाणतं णतं विणतं घणं सुसिरं इंदं इंदोकंतं इंदुत्तरवडिसगं विमाणं देवत्ताए उववण्णा तेसि णं देवाणं उक्कोसेणं एगूणवीसं सागरोवमाइं ठिई प० ॥ ६४ ॥ ते णं देवा एगूणवीसाए अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं एगूणवीसाए वाससहस्सेहिं आहारट्ठे समुप्पज्जइ । संतेगइआ भवसिद्धिया जीवा जे एगूणवीसाए भवग्गहणेहिं सिज्झिस्संति वुज्झिस्संति मुच्चिस्संति परिनिव्वाइस्संति सव्वदुक्खाणं अंतं करिस्संति ॥ ६५ ॥ वीसं असमाहिंठाणा पन्नत्ता, तं जहादवदवचारि यावि भवइ, अपमज्जियचारि यावि भवइ, दुप्पमज्जियचारि आवि भवइ, अतिरित्तसेज्जासणिए, रातिणिअपरिभासी, थेरोवघाइए, भूओवघाइए, संजलणे कोहणे, पिट्ठिमंसिए, अभिक्खणं अभिक्खणं ओहारइत्ता भवइ, णवाणं अधिकरणं अणुप्पण्णाणं उप्पाएत्ता भवइ, पोराणाणं अधिकरणं खामिअविउसविआणं पुणोदीरेत्ता भवइ, ससरक्खपाणिपाए, अकालसज्जायकारए यावि भवइ, कलहकरे, सद्दकरे, झंझकरे, सूरप्पमाणभोई, एसणाऽसमिते यावि भवइ । मुणिसुव्वए णं अरहा वीसं धणूइं उड्ढं उच्चत्तेणं होत्था । सव्वेऽविअ णं घणोदही वीसं जोयणसहस्साइं बाहल्लेणं पन्नत्ता । पाणयस्स णं देविंदस्स देवरण्णो वीसं सामाणिअसाहस्सीओ पन्नत्ताओ । णपुंसयवेयणिज्जस्स णं कम्मस्स वीसं सागरोवमकोडाकोडीओ बंधओ बंधठिई प० । पच्चक्खाणस्स णं पुव्वस्स वीसं वत्थू । उस्सप्पिणिओसप्पिणिमंडले वीसं सागरोवमकोडाकोडीओ कालो पन्नत्तो ॥ ६६ ॥ इमीसे णं रयणप्पभाए पुढवीए अत्थेगइयाणं नेरइयाणं वीसं पलिओवमाइं ठिई प० । छट्ठीए पुढवीए अत्थेगइयाणं नेरइयाणं वीसं सागरोवमाइं ठिई प० । असुरकुमाराणं देवाणं अत्थेगइयाणं वीसं पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं वीसं पलिओवमाइं ठिई प० । पाणत्ते कप्पे देवाणं उक्कोसेणं वीसं सागरोवमाइं ठिई प० । आरणे कप्पे देवाणं जहण्णेणं वीसं सागरोवमाइं ठिई प० । जे देवा सायं विसायं सुविसायं सिद्धत्थं उप्पलं भित्तिलं तिगिच्छं दिसासोवत्थियं पलंवं रुइलं पुप्फं सुपुप्फं पुप्फावत्तं पुप्फपभं पुप्फकंतं पुप्फवण्णं पुप्फलेसं पुप्फज्झयं पुप्फसिंगं पुप्फसिद्धं पुप्फुत्तरवडिसगं विमाणं देवत्ताए उववण्णा तेसि णं देवाणं उक्कोसेणं वीसं सागरोवमाइं ठिई प० ॥ ६७ ॥ ते णं देवा वीसाए अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं वीसाए वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे वीसाए भवग्गहणेहिं सिज्झिस्संति

चुज्झिस्संति मुच्चिस्संति परिणिव्वाइस्संति सव्वदुक्खाणमंतं करिस्संति ॥ ६८ ॥
 एकवीसं सबला पणत्ता, तं जहा-हत्थकम्मं करेमाणे सबले, मेहुणं पडिसेवमाणे
 सबले, राइभोअणं भुंजमाणे सबले, आहाकम्मं भुंजमाणे सबले, सागारियं पिंडं
 भुंजमाणे सबले, उद्देसियं कीयं आहट्टु दिज्जमाणं भुंजमाणे सबले, अभिक्खणं
 अभिक्खणं पडियाइक्खेत्ता णं भुंजमाणे सबले, अंतो छण्हं मासाणं गणाओ गणं
 संकममाणे सबले, अंतो मासस्स तओ दगलेवे करेमाणे सबले, अंतो मासस्स तओ
 माईठाणे सेवमाणे सबले, रायपिंडं भुंजमाणे सबले, आउट्टिआए पाणाइवायं करे-
 माणे सबले, आउट्टिआए मुसावायं वदमाणे सबले, आउट्टिआए अदिण्णादाणं
 गिण्हमाणे सबले, आउट्टिआए अणंतरहिआए पुढवीए ठाणं वा निसीहियं वा
 चेतेमाणे सबले, एवं' आउट्टिआ चित्तमंताए पुढवीए एवं आउट्टिआ चित्तमंताए
 सिलाए कोलावासंसि वा दारुए ठाणं वा सिज्जं वा निसीहियं वा चेतेमाणे सबले,
 जीवपइट्टिए सपाणे सबीए सहुरिए सउत्तिगे पणगदगमट्ठीमक्कडासंताणए तहप्पगारे
 ठाणं वा सिज्जं वा निसीहियं वा चेतेमाणे सबले, आउट्टिआए मूलभोअणं वा कंद-
 भोअणं वा तयाभोयणं वा पवालभोयणं वा पुप्फभोयणं वा फलभोयणं वा हरिय-
 भोयणं वा भुंजमाणे सबले, अंतो संवच्छरस्स दस दगलेवे करेमाणे सबले, अंतो
 संवच्छरस्स दस माइठाणाइ सेवमाणे सबले, अभिक्खणं अभिक्खणं सीतोदय-
 वियडवग्घारियपाणिणा असणं वा पाणं वा खाइमं वा साइम वा पडिगाहिता भुंज-
 माणे सबले ॥ ६९ ॥ णिअट्टिवादरस्स णं खवियसत्तयस्स मोहणिज्जस्स कम्मस्स
 एकवीस कम्मंसा संतकम्मा प० तं जहा-अपच्चक्खाणकसाए कोहे, अपच्चक्खा-
 णकसाए माणे, अपच्चक्खाणकसाए माया, अपच्चक्खाणकसाए लोभे, पच्चक्खा-
 णावरणकसाए कोहे, पच्चक्खाणावरणकसाए माणे, पच्चक्खाणावरणकसाए माया,
 पच्चक्खाणावरणकसाए लोभे, संजलणकसाए कोहे, संजलणकसाए माणे, संज-
 लणकसाए माया, संजलणकसाए लोभे, इत्थिवेदे, पुंवेदे, णपुंवेदे, हासे, अरति,
 रति, भय, सोग, दुगुंछा । एकमेक्काए णं ओसप्पिणीए पंचमच्छट्ठाओ समाओ एक-
 वीसं एकवीस वाससहस्साइं कालेणं प० तं जहा-दूसमा दूसमदूसमा । एगमे-
 गाए णं उरस्सप्पिणीए पढमबितिआओ समाओ एकवीसं एकवीसं वाससहस्साइं
 कालेणं प० तं जहा-दूसमदूसमाए दूसमाए य ॥ ७० ॥ इमीसे णं रयणप्पभाए
 पुढवीए अत्थेगइयाणं नेरइआणं एकवीसपलिओवमाइं ठिई प० । छट्ठीए पुढवीए
 अत्थेगइयाणं नेरइयाणं एकवीससागरोवमाइं ठिई प० । असुरकुमारारणं देवारणं
 अत्थेगइयाणं एगवीसपलिओवमाइं ठिई प० । सोहम्मीसाणेसु कप्पेसु अत्थेगइ-

याणं देवाणं एकवीसं पलिओवमाइं ठिई प० । आरणे कप्पे देवाणं उक्कोसेणं एकवीसं सागरोवमाइं ठिई प० । अच्चते कप्पे देवाणं जहण्णेणं एकवीसं सागरोवमाइं ठिई प० । जे देवा सिरिवच्छं सिरिदामकंडं मल्लं किट्टं चावोण्णतं अरण्णवडिसगं विमाणं देवत्ताए उववण्णा तेसि णं देवाणं उक्कोसेणं एकवीसं सागरोवमाइं ठिई प० ॥ ७१ ॥ ते णं देवा एकवीसाए अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं एकवीसाए वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे एकवीसाए भवग्गहणेहिं सिज्जिस्संति बुज्जिस्संति मुच्चिस्संति परिनिव्वाइस्संति सब्बदुक्खाणमंतं करिस्संति ॥ ७२ ॥ वावीसं परीसहा प० तं जहा-दिगिंछापरीसहे, पिवासापरीसहे, सीतपरीसहे, उस्सिणपरीसहे, दंसमसगपरीसहे, अचेलपरीसहे, अरइपरीसहे, इत्थीपरीसहे, चरिआपरीसहे, निसीहिआपरीसहे, सिज्जापरीसहे, अक्कोसपरीसहे, वहपरीसहे, जायणापरीसहे, अलाभपरीसहे, रोगपरीसहे, तण्णाफासपरीसहे, जल्लपरीसहे, सक्कारपुरक्कारपरीसहे, पण्णापरीसहे, अण्णाणपरीसहे, दंसणपरीसहे । दिट्ठिवायस्स णं वावीसं सुत्ताइं छिन्नछेयणइयाइं ससमयसुत्तपरिवाडीए वावीसं सुत्ताइं अछिन्नछेयणइयाइं आजीवियसुत्तपरिवाडीए । वावीसं सुत्ताइं तिकणइयाइं तेरासियसुत्तपरिवाडीए । वावीसं सुत्ताइं चउक्कणइयाइं ससमयसुत्तपरिवाडीए । वावीसविहे पोग्गलपरिणामे पन्नत्ते, तं जहा-कालवण्णपरिणामे, नीलवण्णपरिणामे, लोहियवण्णपरिणामे, हालिद्ववण्णपरिणामे, सुक्किल्लवण्णपरिणामे, सुब्बिगंधपरिणामे, दुब्बिगंधपरिणामे, तित्तरसपरिणामे, कडुयरसपरिणामे, कसायरसपरिणामे, अंविलरसपरिणामे, महुररसपरिणामे, कक्खडफासपरिणामे, मडयफासपरिणामे, गुरुफासपरिणामे, लहुफासपरिणामे, सीतफासपरिणामे, उस्सिणफासपरिणामे, णिद्धफासपरिणामे, लुक्खफासपरिणामे, अगुरुलहुफासपरिणामे, गुरुलहुफासपरिणामे ॥ ७३ ॥ इमीसे णं रयणप्पभाए पुढवीए अत्थेगइयाणं नेरइयाणं वावीस पलिओवमाइं ठिई प० । छट्ठीए पुढवीए (नेरइयाणं) उक्कोसेणं वावीसं सागरोवमाइं ठिई प० । अहेसत्तमाए पुढवीए [अत्थेगइयाणं] नेरइयाणं जहण्णेणं वावीसं सागरोवमाइं ठिई प० । असुरकुमाराणं देवाणं अत्थेगइयाणं वावीसं पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं वावीसं पलिओवमाइं ठिई प० । अच्चुते कप्पे देवाणं (उक्कोसेणं) वावीसं सागरोवमाइं ठिई प० । हेट्ठिमहेट्ठिमगेवेज्जगाणं देवाणं जहण्णेणं वावीसं सागरोवमाइं ठिई प० । जे देवा महियं विसूहियं विमलं पभासं वणमालं अच्चुतवडिसगं विमाणं देवत्ताए उववण्णा तेसि णं देवाणं उक्कोसेणं वावीसं साग-

रोवमाइं ठिई प० ॥ ७४ ॥ ते णं देवा वावीसाए अद्धमासएणं आणमंति वा पाणमंति वा उस्ससंति वा नीससंति वा । तेसि णं देवाणं वावीनवाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे वावीसं भवग्गहणेहिं सिज्जिस्संति वुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ७५ ॥ तेवीसं सुयगडज्झयणा पन्नता, तं जहा-समए, वेतालिए, उवसग्गपरिणा, श्रीपरिणा, नरयविभत्ती, महावीरथुई, कुसीलपरिभासिए, वीरिए, धम्मे, समाही, मग्गे, समोसरणे, आहत्तहिए, गंथे, जमईए, गाथा, पुंडरीए, किरियाठाणा, आहारपरिणा, [अ]प्पच्चक्खाणकिरिआ, अणगारसुयं, अद्दइज्जं, णालंदइज्जं । जंबुद्वीवे णं दीवे भारहे वासे इमीसे णं ओसप्पिणीए तेवीसाए जिणाणं सूखगमणमुहुत्तंसि केवलवरनाणदंसणे समुप्पण्णे । जंबुद्वीवे णं दीवे इमीसे णं ओसप्पिणीए तेवीस तित्थकरा पुव्वभवे एक्कारसंगिणो होत्था, तं जहा-अजित संभव अभिणंदण सुमई जाव पासो वद्धमाणो य, उसमे णं अरहा कोसलिए चोदसपुव्वी होत्था । जंबुद्वीवे णं दीवे इमीसे ओसप्पिणीए तेवीसं तित्थंकरा पुव्वभवे मंडलिरायाणो होत्था, तं जहा-अजित संभव अभिणंदण जाव पासो वद्धमाणो यं, उसमे णं अरहा कोसलिए पुव्वभवे चक्कवट्ठी होत्था ॥ ७६ ॥ इमीसे णं रयणप्पभाए पुढवीए अत्थेगइयाणं नेरइयाणं तेवीसं पलिओवमाइं ठिई प० । अहे सत्तमाए णं पुढवीए अत्थेगइयाणं नेरइयाणं तेवीसं सागरोवमाइं ठिई प० । असुरकुमारारणं देवाणं अत्थेगइयाणं तेवीसं पलिओवमाइं ठिई प० । सोहम्मीसाणाणं देवाणं अत्थेगइयाणं तेवीसं पलिओवमाइं ठिई प० । हेट्ठिमहेट्ठिमगेवेज्जाणं देवाणं जहण्णेणं तेवीसं सागरोवमाइं ठिई प० । जे देवा हेट्ठिमहेट्ठिमगेवेज्जयविमाणेसु देवत्ताए उववण्णा तेसि णं देवाणं उक्कोसेणं तेवीसं सागरोवमाइं ठिई प० ॥ ७७ ॥ ते णं देवा तेवीसाए अद्धमासाणं (मासेहिं) आणमंति वा पाणमंति वा उस्ससंति वा नीससंति वा । तेसि णं देवाणं तेवीसाए वाससहस्सेहिं आहारट्ठे समुप्पज्जइ । संतेगइआ भवसिद्धिया जीवा जे तेवीसाए भवग्गहणेहिं सिज्जिस्संति वुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ७८ ॥ चउव्वीसं देवाहिदेवा प० तं जहा-उसभअजितसंभवअभिणंदणसुमइपउमप्पहसुपासचंदप्पहसुविधिसीअलसिज्जंसवासुपुज्जविमलअणंतधम्मसंतिकुंथुअरमल्लीमुणिसुव्वयनमिनेमीपासवद्धमाणा । चुल्लहिमवंतसिहरीणं वासहरपव्वयाणं जीवाओ चउव्वीसं चउव्वीसं जोयणसहस्साइं णववत्तीसे जोयणसए एगं अट्ठत्तीसइभागं जोयणस्स किंचि विसेसाहिआओ आयामेणं प० । चउवीसं देवठाणा सइंदया प० सेसा अहमिंदा अनिंदा अपुरोहिआ ।

उत्तरायणगते णं सूरिए चउवीसंगुलिए पोरिसीछायं णिव्वत्तइत्ता णं णिअट्टति ।
 गंगासिंधूओ णं महाणदीओ पवाहे सातिरेगेणं चउवीसं कोसे वित्थारेणं प० ।
 रत्तारत्तवतीओ णं महाणदीओ पवाहे सातिरेगे चउवीसं कोसे वित्थारेणं प० ॥७९॥
 इमीसे णं रयणप्पभाए पुढवीए अत्थेगइयाणं नेरइयाणं चउवीसं पलिओवमाइं ठिई
 प० । अहे सत्तमाए पुढवीए अत्थेगइयाणं नेरइयाणं चउवीसं सागरोवमाइं ठिई
 प० । असुरकुमारारणं देवाणं अत्थेगइयाणं चउवीसं पलिओवमाइं ठिई प० ।
 सोहम्मीसाणेसु कप्पेसु अत्थेगइयाणं देवाणं चउवीसं पलिओवमाइं ठिई प० ।
 हेट्ठिमउवरिमगेविज्जाणं देवाणं जहण्णेणं चउवीसं सागरोवमाइं ठिई प० । जे देवा
 हेट्ठिममज्झिमगेवेज्जयविमाणेसु देवत्ताए उववण्णां तेसि णं देवाणं उक्कोसेणं चउवीसं
 सागरोवमाइं ठिई प० ॥ ८० ॥ ते णं देवा चउवीसाए अद्धमासाणं आणमंति
 वा पाणमंति वा ऊससंति वा नीससंति वा । तेसि णं देवाणं चउवीसाए वाससह-
 स्सेहि आहारट्ठे समुप्पज्जइ । संतेगइआ भवसिद्धिया जीवा जे चउवीसाए भवग्गह-
 णेहिं सिज्जिस्संति वुज्जिस्संति मुच्चिस्संति परिनिव्वाइस्संति सव्वदुक्खाणमंतं
 करिस्संति ॥ ८१ ॥ पुरिमपच्छिमगाणं तित्थगराणं पंचजामस्स पणवीसं भाव-
 णाओ प० तं जहा-इरियासमिई, मणगुत्ती, वयगुत्ती, आलोयभायणभोयणं,
 आदाणभंडमत्तनिकखेवणासमिई, अणुवीतिभासणया, कोहविवेगे, लोभविवेगे, भयवि-
 चेगे, हासविवेगे, उग्गहअणुणवणया, उग्गहसीमजाणणया, सयमेव उग्गहं अणु-
 गिण्हणया, साहम्मियउग्गहं अणुणविय परिभुंजणया, साहारणभत्तपाणं अणुणविय
 पडिभुंजणया, इत्थीपसुपंडगसंसत्तगसयणासणवज्जणया, इत्थीकहविवज्जणया, इत्थीणं
 इंदियाणमालोयणवज्जणया, पुव्वरयपुव्वकीलिआणं अणुणसरणया, पणीताहारविवज्ज-
 णया, सोइंदियरागोवरई, चक्खिंदियरागोवरई, घाणिंदियरागोवरई, जिब्भिंदिय-
 रागोवरई, फासिंदियरागोवरई । मल्ली णं अरहा पणवीसं धणु उट्ठं उच्चत्तेणं होत्था ।
 सव्वे वि दीहवेयट्ठपव्वया पणवीसं जोयणाणि उट्ठं उच्चत्तेणं पन्नत्ता पणवीसं पणवीसं
 गाउआणि उव्विद्धेणं प० । दोच्चाए णं पुढवीए पणवीसं णिरयावाससयसहस्सा
 पन्नत्ता । आयास्स णं भगवओ सच्चूलिआयस्स पणवीसं अज्झयणा पन्नत्ता, तं
 जहा-सत्थपरिण्णा लोगविजओ सीओसणीअ सम्मत्तं । आवंति धुय विमोह उव-
 हाणसुयं महपरिण्णा । पिंडेसण सिज्जिरिआ भासज्झयणा य वत्थ पाएसा । उग्गह-
 पडिमा सत्तिकसत्तया भावण विमुत्ती । निसीहज्झयणं पणवीसइमं । मिच्छादिट्ठि-
 विगलिंदिए णं अपज्जत्तए णं संकिलिद्धपरिणामे णामस्स कम्मस्स पणवीसं उत्तरपय-
 ङीओ णिवंधति-तिरियगतिनामं विगलिंदियजातिनामं ओरालियसरीरणामं तेअग-

सरीरणामं कम्मणसरीरनामं हुंडगसंठाणनामं ओरालिअसरीरंगोवंगणामं छेवट्टसंघ-
यणनामं वण्णनामं गंधणामं रसणामं फासणामं तिरिआणुपुव्विनामं अगुरुलहुनामं
उवघायनामं तसनामं वादरणामं अपज्जत्तयणामं पत्तेयसरीरणामं अथिरणामं अनुभ-
णामं दुभगणामं अणादेज्जनामं अजसोकित्तिनामं निम्माणनामं । गंगासिंधूओ णं
महाणदीओ पणवीसं गाउयाणि पुहुत्तेणं दुहओ घडमुहपवित्तिएणं मुत्तावलिहार-
संठिएणं पवातेण पडंति । रत्तारत्तवईओ णं महाणदीओ पणवीसं गाउयाणि पुहुत्तेणं
मकर (घड) मुहपवित्तिएणं मुत्तावलिहारसंठिएणं पवातेण पडंति । लोगविंदुसारस्स
णं पुव्वस्स पणवीसं वत्थू प० ॥ ८२ ॥ इमीसे णं रयणप्पभाए पुढवीए
अत्थेगइयाणं नेरइयाणं पणवीसं पलिओवमाइं ठिई प० । अहे सत्तमाए पुढवीए
अत्थेगइआणं नेरइयाणं पणवीसं सागरोवमाइं ठिई पणत्ता । असुरकुमाराणं देवाणं
अत्थेगइयाणं पणवीसं पलिओवमाइं ठिई प० । सोहम्मीसाणे णं देवाणं अत्थेग-
इयाणं पणवीसं पलिओवमाइं ठिई प० । मज्झिमहेट्ठिमगेवेज्जाणं देवाणं जहण्णेणं
पणवीसं सागरोवमाइं ठिई प० । जे देवा हेट्ठिमउवारिमगेवेज्जगविमाणेसु देवत्ताए
उववण्णा तेसि णं देवाणं उक्कोसेणं पणवीसं सागरोवमाइं ठिई प० ॥ ८३ ॥ ते
णं देवा पणवीसाए अद्धमासेहिं आणमंति वा पाणमंति वा उस्ससंति वा नीससंति
वा । तेसि णं देवाणं पणवीसं वाससहस्सेहिं आहारट्ठे समुप्पज्जइ । संतेगइया
भवसिद्धिआ जीवा जे पणवीसाए भवग्गहणेहिं सिज्झिस्संति वुज्झिस्संति मुच्चिस्संति
परिनिव्वाइस्संति सव्वदुक्खाणसंतं करिस्संति ॥ ८४ ॥ छव्वीसं दसकप्पववहारणं
उद्देसणकाला पन्नत्ता, तं जहा-दस दसाणं छ कप्पस्स दस ववहाररस । अभव-
सिद्धियाणं जीवाणं मोहणिज्जस्स कम्मस्स छव्वीसं कम्मंसा संतकम्मा पन्नत्ता, तं
जहा-मिच्छत्तमोहणिज्जं सोलस कसाया इत्थीवेदे पुरिसवेदे नपुंसकवेदे हासं अरति
रति भयं सोगं दुगुंछा ॥ ८५ ॥ इमीसे णं रयणप्पभाए पुढवीए अत्थेगइयाणं
नेरइयाणं छव्वीसं पलिओवमाइं ठिई प० । अहे सत्तमाए पुढवीए अत्थेगइयाणं
नेरइयाणं छव्वीसं सागरोवमाइं ठिई प० । असुरकुमाराणं देवाणं अत्थेगइयाणं
छव्वीसं पलिओवमाइं ठिई प० । सोहम्मीसाणे णं देवाणं अत्थेगइयाणं छव्वीसं
पलिओवमाइं ठिई प० । मज्झिममज्झिमगेवेज्जयाणं देवाणं जहण्णेणं छव्वीसं
सागरोवमाइं ठिई प० । जे देवा मज्झिमहेट्ठिमगेवेज्जयविमाणेसु देवत्ताए उववन्ना
तेसि णं देवाणं उक्कोसेणं छव्वीसं सागरोवमाइं ठिई प० ॥ ८६ ॥ ते णं देवा
छव्वीसाए अद्धमासाणं आणमंति वा पाणमंति वा उस्ससंति वा नीससंति वा ।
तेसि णं देवाणं छव्वीसं वाससहस्सेहिं आहारट्ठे समुप्पज्जइ । संतेगइया भवसिद्धिया

जीवा जे छव्वीसेहिं भवग्गहणेहिं सिज्झिस्संति वुज्झिस्संति मुच्चिस्संति परिणिव्वाइ-
 स्संति सव्वदुक्खाणमंतं करिस्संति ॥ ८७ ॥ सत्तावीसं अणगारुणा पन्नत्ता, तं
 जहा-पाणाइवायाओ वेरमणं, मुसावायाओ वेरमणं, अदिन्नादाणाओ वेरमणं, मेहु-
 णाओ वेरमणं, परिग्गहाओ वेरमणं, सोइंदियनिग्गहे, चक्खिंदियनिग्गहे, घाणिं-
 दियनिग्गहे, जिब्भिंदियनिग्गहे, फासिंदियनिग्गहे, कोहविवेगे, माणविवेगे, मायावि-
 वेगे, लोभविवेगे, भावसच्चे, करणसच्चे, जोगसच्चे, खमा, विरागया, मणसमाहरणया,
 वयसमाहरणया, कायसमाहरणया, णाणसंपण्णया, दंसणसंपण्णया, चरित्तसंपण्णया,
 वैयणअहियासणया, मारणंतियअहियासणया । जंवुद्दीवे दीवे अभिइवज्जेहिं सत्तावी-
 साए णक्खत्तेहिं संववहारे वट्ठति । एगमेगे णं णक्खत्तमासे सत्तावीसाहिं राइंदियाहिं
 राइंदियगेणं पन्नत्ते । सोहम्मीसाणेसु कप्पेसु विमाणपुढवी सत्तावीसं जोयणसयाइं
 वाहल्लेणं पन्नत्ता । वैयगसम्मत्तवंधोवरयस्स णं मोहणिज्जस्स कम्मस्स सत्तावीसं
 उत्तरपगडीओ संतकम्मंसा पन्नत्ता । सावणसुद्धसत्तमीसु णं सूरिए सत्तावीसंगुलियं
 पोरिसिच्छायं णिव्वत्तइत्ता णं दिवसखेत्तं नियट्ठेमाणे रयणिखेत्तं अभिणिवट्ठमाणे चारं
 चरइ ॥ ८८ ॥ इमीसे णं रयणप्पभाए पुढवीए अत्थेगइयाणं नेरइयाणं सत्तावीसं
 पलिओवमाइं ठिई प० । अहे सत्तमाए पुढवीए अत्थेगइयाणं नेरइयाणं सत्तावीसं
 सागरोवमाइं ठिई प० । असुरकुमाराणं देवाणं अत्थेगइयाणं सत्तावीसं पलि-
 ओवमाइं ठिई प० । सोहम्मीसाणेसु कप्पेसु अत्थेगइयाणं देवाणं सत्तावीसं
 पलिओवमाइं ठिई प० । मज्झिमउवरिमगेवेज्जयाणं देवाणं जहण्णेणं सत्तावीसं
 सागरोवमाइं ठिई प० । जे देवा मज्झिममज्झिमगेवेज्जयाविमाणेसु देवत्ताए
 उववण्णा तेसि णं देवाणं उक्कोसेणं सत्तावीसं सागरोवमाइं ठिई प० ॥ ८९ ॥
 ते णं देवा सत्तावीसाए अद्धमासेहिं आणमंति वा पाणमंति वा उस्ससंति वा नीस-
 संति वा । तेसि णं देवाणं सत्तावीसवाससहस्सेहिं आहारट्ठे समुप्पज्जइ । संतेगइया
 भवसिद्धिया जीवा जे सत्तावीसाए भवग्गहणेहिं सिज्झिस्संति वुज्झिस्संति मुच्चि-
 स्संति परिनिव्वाइस्संति सव्वदुक्खाणमंतं करिस्संति ॥ ९० ॥ अट्ठावीसविहे
 आयारपकप्पे पन्नत्ते, तं जहा-मासिआ आरोवणा, सपंचराइमासिया आरोवणा,
 सदसराइमासिया आरोवणा, (सपण्णरसराइमासिआ आरोवणा, सवीसइराइमासिआ
 आरोवणा, सपंचवीसराइमासिआ आरोवणा) एवं चेव दोमासिआ आरोवणा,
 सपंचराइदोमासिआ आरोवणा, एवं तिमासिआ आरोवणा, चउमासिआ आरोवणा,
 उवघाइया आरोवणा, अणुवघाइया आरोवणा, कसिणा आरोवणा, अकसिणा
 आरोवणा, एतावता आयारपकप्पे एताव ताव आयरिअव्वे । भवसिद्धियाणं जीवाणं

अत्येगइयाणं मोहणिजस्स कम्मस्स अट्ठावीसं कम्मंसा संतक्कम्मा पन्नत्ता तं जहा-
 सम्मत्तवेअणिजं मिच्छत्तवेयणिजं सम्ममिच्छत्तवेयणिजं सोलस कसाया नव णोक-
 साया । आभिणिवोहियणाणे अट्ठावीसइविहे ५० तं० सोइंदियअत्थावग्गहे, चक्खि-
 दियअत्थावग्गहे, घाणिंदियअत्थावग्गहे, जिब्बिंदियअत्थावग्गहे, फासिंदियअत्था-
 वग्गहे, णोइंदियअत्थावग्गहे, सोइंदियवंजणोग्गहे, घाणिंदियवंजणोग्गहे, जिब्बि-
 दियवंजणोग्गहे, फासिंदियवंजणोग्गहे, सोतिंदियईहा, चक्खिंदियईहा, घाणिंदिय-
 ईहा, जिब्बिंदियईहा, फासिंदियईहा, णोइंदियईहा, सोतिंदियावाए, चक्खिंदिया-
 वाए, घाणिंदियावाए, जिब्बिंदियावाए, फासिंदियावाए, णोइंदियावाए, सोइंदिय-
 धारणा, चक्खिंदियधारणा, घाणिंदियधारणा, जिब्बिंदियधारणा, फासिंदियधारणा,
 णोइंदियधारणा । ईसाणे णं कप्पे अट्ठावीसं विमाणावाससयसहस्सा ५० । जीवे
 णं देवगइम्मि वंधमाणे नामस्स कम्मस्स अट्ठावीसं उत्तरपगढीओ णिवंधति, तं
 जहा-देवगतिनामं, पंचिंदियजातिनामं, वेडव्वियसरीरनामं, तेयगसरीरनामं,
 कम्मणसरीरनामं, समचउरंससंठाणणामं, वेडव्वियसरीरंगोवंगणामं, वण्णणामं,
 गंधणामं, रसणामं, फासणामं, देवाणुपुव्विणामं, अगुरुलहुणामं, उवघायणामं, परा-
 घायणामं, उस्सासणामं, पसत्थविहायोगइणामं, तसणामं, वायरणामं, पज्जत्तनामं,
 पत्तेयसरीरनामं, थिराथिराणं सुभासुभाणं (सुभगनामं, सुस्सरनामं), आएज्जाणाए-
 ज्जाणं दोण्हं अण्णयरं एगं नामं णिवंधइ, जसोकित्तिनामं, निम्माणनामं । एवं चेव
 नेरइया वि, णाणत्तं अप्पसत्थविहायोगइणामं, हुंडगसंठाणणामं, अयिरणामं,
 दुब्भगणामं, असुभनामं, दुस्सरनामं, अणादिज्जणामं, अजसोकित्तीणामं, णिम्माण-
 णामं ॥ ९१ ॥ इमीसे णं रयणप्पभाए पुढवीए अत्येगइयाणं नेरइयाणं अट्ठावीसं
 पलिओवमाइं ठिई ५० । अहे सत्तमाए पुढवीए अत्येगइयाणं नेरइयाणं अट्ठावीसं
 सागरोवमाइं ठिई ५० । असुरकुमारणं देवाणं अत्येगइयाणं अट्ठावीसं पलिओवमाइं
 ठिई पन्नत्ता । सोहम्मीसाणेषु कप्पेषु देवाणं अत्येगइयाणं अट्ठावीसं पलिओवमाइं
 ठिई ५० । उवरिमहेट्ठिमगेवेज्जयाणं देवाणं जहण्णेणं अट्ठावीसं सागरोवमाइं ठिई
 ५० । जे देवा मज्झिमउवरिमगेवेज्जएसु विमाणेषु देवत्ताए उववण्णां तेसि णं
 देवाणं उक्कोसेणं अट्ठावीसं सागरोवमाइं ठिई ५० ॥ ९२ ॥ ते णं देवा अट्ठावी-
 साए अट्ठमासेहिं आणमंति वा पाणमंति वा ऊससंति वा नीससंति वा । तेसि णं
 देवाणं अट्ठावीसाए वाससहस्सेहिं आहारट्ठे समुप्पज्जइ । संतेगइया भवसिद्धिया
 जीवा जे अट्ठावीसाए भवग्गहणेहिं सिज्झिस्संति वुज्झिस्संति मुच्चिस्संति परि-
 णिव्वाइस्संति सव्वदुक्खाणमंतं करिस्संति ॥ ९३ ॥ एगूणतीसइविहे पावसुयपसंगे

णं प० तं० भोमे, उप्पाए, सुमिणे, अंतरिक्खे, अंगे, सरे, वंजणे, लक्खणे,
 भोमे तिविहे प० तं० सुत्ते वित्ती वत्तिए, एवं एक्केकं तिविहं, विकहाणुजोगे,
 विजाणुजोगे, मंताणुजोगे, जोगाणुजोगे, अण्णतित्थियपवत्ताणुजोगे । आसाढे
 णं मासे एगूणतीसराइंदिआइ राइंदियग्गेणं पन्नत्ताइं । (एवं चेव) भद्दवए णं मासे ।
 कत्तिए णं मासे । पोसे णं मासे । फग्गुणे णं मासे । वइसाहे णं मासे । चंददिणे
 णं एगूणतीसं मुहुत्ते सातिरेगे मुहुत्तग्गेणं प० । जीवे णं पसत्थऽज्जवसाणजुत्ते
 भविए सम्मदिट्ठी तित्थकरनामसाहिआओ णामस्स णियमा एगूणतीसं उत्तरपग-
 ढीओ निवंधित्ता वेमाणिएसु देवेसु देवत्ताए उववज्जइ ॥ ९४ ॥ इमीसे णं रयण-
 प्पभाए पुढवीए अत्थेगइयाणं नेरइयाणं एगूणतीसं पलिओवमाइं ठिई प० । अहे
 सत्तमाए पुढवीए अत्थेगइयाणं नेरइयाणं एगूणतीसं सागरोवमाइं ठिई प० ।
 असुरकुमाराणं देवाणं अत्थेगइयाणं एगूणतीसं पलिओवमाइं ठिई प० । सोहम्मि-
 साणेसु कप्पेसु देवाणं अत्थेगइयाणं एगूणतीसं पलिओवमाइं ठिई प० । उवरिम-
 मज्झिमगेवेज्जयाणं देवाणं जहण्णेणं एगूणतीसं सागरोवमाइं ठिई प० । जे देवा
 उवरिमहेट्ठिमगेवेज्जयविमाणेसु देवत्ताए उववण्णा तेसि णं देवाणं उक्कोसेणं एगूण-
 तीसं सागरोवमाइं ठिई प० ॥ ९५ ॥ ते णं देवा एगूणतीसाए अद्धमासेहिं आण-
 मंति वा पाणमंति वा ऊससंति वा नीससंति वा । तेसि णं देवाणं एगूणतीसं वास-
 सहस्सेहिं आहारट्ठे समुप्पज्जइ । संतेगइया भवसिद्धिया जीवा जे एगूणतीसभव-
 ग्गहणेहिं सिज्झिस्संति वुज्झिस्संति मुच्चिस्संति परिनिव्वाइस्संति सव्वदुक्खाणमंतं
 करिस्संति ॥ ९६ ॥ तीसं मोहणीयठाणा प० तं० जे यावि तसे पाणे, वारिमज्जे
 विगाहिआ । उदएण कम्मा मारेई, महामोहं पकुव्वइ ॥ १-१ ॥ सीसावेढेण जे
 केई, आवेढेइ अभिक्खणं । तिक्खासुभसमायारे, महामोहं पकुव्वइ ॥ २-२ ॥
 पाणिणा संपिहित्ता णं, सोयमावरिय पाणिणं । अंतोनदंतं मारेई, महामोहं पकुव्वइ
 ॥ ३-३ ॥ जायतेयं समारब्भ, वहुं ओरुंभिया जणं, अंतोधूमेण मारेई(जा),
 महामोहं पकुव्वइ ॥ ४-४ ॥ सिस्सम्मि जे पहणइ, उत्तमंगम्मि चेयसा । विभज्ज
 मत्थयं फाले, महामोहं पकुव्वइ ॥ ५-५ ॥ पुणो पुणो पणिधिए, हरित्ता उवहसे
 जणं । फलेणं अदुवा दंडेणं, महामोहं पकुव्वइ ॥ ६-६ ॥ गूढायारी निगूहिज्जा,
 मायं मायाए छायाए । असच्चवाई णिण्हाई, महामोहं पकुव्वइ ॥ ७-७ ॥ धंसेइ जो
 अभूएणं, अक्रम्मं अत्तकम्मुणा । अदुवा तुम कासित्ति, महामोहं पकुव्वइ ॥ ८-८ ॥
 जाणमाणो परिसओ, सच्चासोसाणि भासइ । अक्खीणज्झंसे पुरिसे, महामोहं पकु-
 व्वइ ॥ ९-९ ॥ अणायगस्स नयवं, दारे तस्सेव धंसिया । विउलं विक्खोभइत्ता

णं, किच्चा णं पडिवाहिरं ॥ १० ॥ उवगसंतं पि झंपित्ता, पडिलोमाहिं वग्गुहिं ।
 भोगभोगे वियारेइ, महामोहं पकुव्वइ ॥ ११-१० ॥ अकुमारभूए जे केई,
 कुमारभूए त्ति हं वए । इत्थीहिं गिद्धे वसए, महामोहं पकुव्वइ ॥ १२-११ ॥
 अवंभयारी जे केई, वंभयारी त्ति हं वए । गद्देव्व गवां मज्झे, विस्सरं नयई
 नदं ॥ १३ ॥ अप्पणो अहिए वाले, मायामोसं वहुं भसे । इत्थीविसयगेहीए,
 महामोहं पकुव्वइ ॥ १४-१२ ॥ जं निस्सिए उव्वहइ, जससाहिगमेण वा । तस्स
 लुब्भइ वित्तम्मि, महामोहं पकुव्वइ ॥ १५-१३ ॥ ईसरेण अदुवा गामेणं, अणि-
 सरे ईसरीकए । तस्स संपयहीणस्स, सिरी अतुलभागया ॥ १६ ॥ ईसादोसेण
 आविट्ठे, कलुसाविलचेयसे । जे अंतराअं चेएइ, महामोहं पकुव्वइ ॥ १७-१४ ॥
 सप्पी जहा अंडउडं, भत्तारं जो विहिंसइ । सेणावइं पसत्थारं, महामोहं पकुव्वइ
 ॥ १८-१५ ॥ जे नायगं च रट्ठस्स, नेयारं निगमस्स वा । सेट्ठिं वहुरवं हंता,
 महामोहं पकुव्वइ ॥ १९-१६ ॥ बहुजणस्स नेयारं, दीवं ताणं च पाणिणं ।
 एयारिसं नरं हंता, महामोहं पकुव्वइ ॥ २०-१७ ॥ उवट्ठियं पडिविरयं, संजयं
 सुतवस्सियं । वुक्कम्म धम्माओ भंसेइ, महामोहं पकुव्वइ ॥ २१-१८ ॥ तहेवाणंतणा-
 णीणं, जिणाणं वरदंसिणं । तेसिं अवण्णवं वाले, महामोहं पकुव्वइ ॥ २२-१९ ॥
 नेयाइअस्स मग्गस्स, दुट्ठे अवयरई वहुं । तं तिप्पयंतो भावेइ, महामोहं पकुव्वइ
 ॥ २३-२० ॥ आयरियउवज्जाएहिं, सुयं विणयं च गाहिए । ते चेव खिसई
 वाले, महामोहं पकुव्वइ ॥ २४-२१ ॥ आयरियउवज्जायाणं, सम्मं नो पडित-
 प्पइ । अप्पडिपूयए थद्धे, महामोहं पकुव्वइ ॥ २५-२२ ॥ अवहुस्सुए य जे केई,
 सुएणं पविकत्थई । सज्झायंवायं वयइ, महामोहं पकुव्वइ ॥ २६-२३ ॥ अतव-
 स्सीए य जे केई, तवेण पविकत्थइ । सव्वलोयपरे तेणे, महामोहं पकुव्वइ
 ॥ २७-२४ ॥ साहारणट्ठा जे केई, गिलाणम्मि उवट्ठिए । पभू ण कुणई किच्चं,
 मज्झं पि से न कुव्वइ ॥ २८ ॥ सढे नियडीपण्णाणे, कलुसाउलचेयसे । अप्पणो
 य अवोहीय, महामोहं पकुव्वइ ॥ २९-२५ ॥ जे कहाहिगरणाइं, संपउंजे पुणो
 पुणो । सव्वतित्थाण भेयाणं, महामोहं पकुव्वइ ॥ ३०-२६ ॥ जे अ आहम्मिए
 जोए, संपओजे पुणो पुणो । सहाहेउं सहीहेउं, महामोहं पकुव्वइ ॥ ३१-२७ ॥
 जे अ माणुस्सए भोए, अदुवा पारलोइए । तेऽतिप्पयंतो आसयइ, महामोहं पकु-
 व्वइ ॥ ३२-२८ ॥ इद्धी जुई जसो वण्णो, देवाणं बलवीरिय । तेसिं अवण्णवं
 वाले, महामोहं पकुव्वइ ॥ ३३-२९ ॥ अपस्समाणो पस्सामि, देवे जक्खे य
 गुज्झगे । अण्णाणी जिणपूयट्ठी, महामोहं पकुव्वइ ॥ ३४-३० ॥ ९७ ॥ थेरे णं

मंडियपुत्ते तीसं वासाइं सामण्णपरियायं पाउणित्ता सिद्धे बुद्धे जाव सव्वदुक्खप्प-
हीणे । एगमेगे णं अहोरत्ते तीसमुहुत्ते मुहुत्तग्गेणं पन्नत्ते । एएसि णं तीसाए मुहुत्ताणं
तीसं नामधेज्जा प०, तं जहा-रोद्धे, सत्ते, मित्ते, वाळ, सुपीए, अभिचंदे, माहिंदे,
पलंबे, वंभे, सच्चे, आणंदे, विजए, विस्ससेणे, पायावच्चे, उवसमे, ईसाणे, तट्टे,
भाविअप्पा, वेसमणे, वरुणे, सतरिसभे, गंधव्वे, अग्गिवेसायणे, आतवे, आवत्ते,
तट्टवे, भूमहे, रिसंभे, सव्वट्टसिद्धे, रक्खसे । अरे णं अरहा तीसं धणु(णू)इं उट्ठं
उच्चत्तेणं होत्था । सहस्सारस्सं णं देविंदस्स देवरत्तो तीसं सामाणियसाहस्सीओ
प० । पासे णं अरहा तीसं वासाइं अगारवासमज्झे वसित्ता अगाराओ अणगारियं
पव्वइए । समणे भगवं महावीरे तीसं वासाइं अगारवासमज्झे वसित्ता अगाराओ
अणगारियं पव्वइए । रयणप्पभाए णं पुढवीए तीसं निरयावाससयसहस्सा प०
॥ ९८ ॥ इमीसे णं रयणप्पभाए पुढवीए अत्थेगइयाणं नेरइयाणं तीसं पलिओवमाइं
ठिई प० । अहे सत्तमाए पुढवीए अत्थेगइयाणं नेरइयाणं तीसं सागरोवमाइं ठिई
प० । असुरकुमाराणं देवाणं अत्थेगइयाणं तीसं पलिओवमाइं ठिई प० । सोहम्मी-
साणेषु कप्पेषु देवाणं अत्थेगइयाणं तीसं पलिओवमाइं ठिई प० । उवरिमउवरिम-
गेवेज्जयाणं देवाणं जहण्णेणं तीसं सागरोवमाइं ठिई प० । जे देवा उवरिममज्झि-
मगेवेज्जएसु विमाणेषु देवत्ताए उववण्णा तेसि णं देवाणं उक्कोसेणं तीसं सागरोवमाइं
ठिई प० ॥ ९९ ॥ ते णं देवा तीसाए अद्धमासेहिं आणमंति वा पाणमंति वा
उस्ससंति वा नीससंति वा । तेसि णं देवाणं तीसाए वाससहस्सेहिं आहारट्टे समु-
प्पज्जइ । संतेगइया भवसिद्धिया जीवा जे तीसाए भवग्गहणेहिं सिज्जिस्संति
वुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ १०० ॥
एकतीसं सिद्धाइगुणा पन्नत्ता, तं जहा-खीणे आभिणिवोहियणाणावरणे, खीणे सुय-
णाणावरणे, खीणे ओहिणाणावरणे, खीणे मणपज्जवणाणावरणे, खीणे केवलणाणा-
वरणे, खीणे चक्खुदंसणावरणे, खीणे अचक्खुदंसणावरणे, खीणे ओहिदंसणावरणे,
खीणे केवलदंसणावरणे, खीणे निद्दा, खीणे णिद्दाणिद्दा, खीणे पयला, खीणे पयला-
पयला, खीणे थीणद्धी, खीणे सायावेयणिज्जे, खीणे असायावेयणिज्जे, खीणे दसण-
मोहणिज्जे, खीणे चरित्तमोहणिज्जे, खीणे नेरइआउए, खीणे तिरिआउए, खीणे मणु-
स्साउए, खीणे देवाउए, खीणे उच्चागोए, खीणे निच्चागोए, खीणे सुभणामे, खीणे
असुभणामे, खीणे दाणंतराए, खीणे लाभंतराए, खीणे भोगंतराए, खीणे उवभोगं-
तराए, खीणे वीरिअंतराए ॥ १०१ ॥ मंदरे णं पव्वए धरणितले एकतीसं जोयण-
सहस्साइं छच्चेव तेवीसे जोयणसए किंचिदेसूणा परिकखेवेणं पन्नत्ता । जया णं सूरिए

सव्ववाहिरियं मंडलं उवसंकमिता चारं चरइ तथा णं इहगयस्स मणुस्सस्स एक-
 तीसाए जोयणसहस्सेहिं अट्ठहि अ एकतीसेहिं जोयणसएहिं तीसाए सट्ठिभागे जोय-
 णस्स सूरिए चक्खुप्फासें हव्वमागच्छइ । अभिवट्ठिए णं मासे एकतीसं सातिरेगाइं
 राइंदियाइं राइंदियग्गेणं पन्नत्ते । आइच्चे णं मासे एकतीसं राइंदियाइं किंचि विसेसूणाइं
 राइंदियग्गेणं पन्नत्ते ॥ १०२ ॥ इमीसे णं रयणप्पभाए पुढवीए अत्थेगइयाणं नेरइयाणं
 एकतीसं पलिओवमाइं ठिई प० । अहे सत्तमाए पुढवीए अत्थेगइयाणं नेरइयाणं
 एकतीसं सागरोवमाइं ठिई प० । असुरकुमाराणं देवाणं अत्थेगइयाणं एकतीसं पलि-
 ओवमाइं ठिई प० । सोहम्मीसाणेसु कप्पेसु अत्थेगइयाणं देवाणं एकतीसं पलिओ-
 वमाइं ठिई प० । विजयवेजयंतजयंतअपराजिआणं देवाणं जहण्णेणं एकतीसं साग-
 रोवमाइं ठिई प० । जे देवा उवरिमउवरिमगेवेज्जयविमाणेसु देवत्ताए उववण्णा तेसि
 णं देवाणं उक्कोसेणं एकतीसं सागरोवमाइं ठिई प० ॥ १०३ ॥ ते णं देवा एकती-
 साए अद्धमासेहिं आणमंति वा पाणमंति वा उस्ससंति वा नीससंति वा । तेसि णं
 देवाणं एकतीसं(स)वाससहस्सेहिं आहारट्ठे समुप्पज्जइ । संतेगइया भवसिद्धिया जीवा
 जे एकतीसेहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति
 सव्वदुक्खाणमंतं करिस्संति ॥ १०४ ॥ बत्तीसं जोगसंगहा प०, तं जहा-आलोयण,
 निरवलावे, आवईसु दढधम्मया । अणिस्सिओवहाणे य, सिक्खा निप्पडिकम्मया
 ॥ १ ॥ अण्णायया, अलोभे य, तितिक्खा अज्जवे सुई । सम्मदिट्ठी समाही य,
 आयारे विणओवए ॥ २ ॥ धिईमई य संवेगे, पणिही सुविहि संवरे । अत्तदोसोव-
 संहारे, सव्वकामविरत्तया ॥ ३ ॥ पच्चक्खाणे विउस्सग्गे, अप्पमादे लवालवे ।
 ज्ञाणसंवरजोगे य, उदए मारणंतिए ॥ ४ ॥ संगणं च परिण्णायया, पायच्छित्तकरणे
 वि य । आराहणा य मरणंते, बत्तीसं जोगसंगहा ॥ ५ ॥ १०५ ॥ बत्तीसं देविदा
 प०, तं जहा-चमरे बली धरणे भूआणंदे जाव घोसे महाघोसे चंदे सूरै सक्के ईसाणे
 सणंकुमारै जाव पाणए अच्चुए । कुंथुस्स णं अरहओ बत्तीसहिया बत्तीसं जिणसया
 होत्था । सोहम्मे कप्पे बत्तीसं विमाणावाससयसहस्सा प० । रेवइणक्खत्ते बत्ती-
 सइतारे पन्नत्ते । बत्तीसतिविहे णट्ठे पन्नत्ते ॥ १०६ ॥ इमीसे णं रयणप्पभाए पुढ-
 वीए अत्थेगइयाणं नेरइयाणं बत्तीसं पलिओवमाइं ठिई प० । अहे सत्तमाए पुढवीए
 अत्थेगइयाणं नेरइयाणं बत्तीसं सागरोवमाइं ठिई प० । असुरकुमाराणं देवाणं अत्थे-
 गइयाणं बत्तीसं पलिओवमाइं ठिई प० । सोहम्मीसाणेसु कप्पेसु देवाणं अत्थेगइयाणं
 बत्तीसं पलिओवमाइं ठिई प० । जे देवा विजयवेजयंतजयंतअपराजियविमाणेसु
 देवत्ताए उववण्णा तेसि णं देवाणं अत्थेगइयाणं बत्तीसं सागरोवमाइं ठिई प० ।

ते णं देवा वत्तीसाए अद्धमासेहिं आणमंति वा पाणमंति वा उस्ससंति वा नीससंति वा । तेसि णं देवाणं वत्तीसवाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे वत्तीसाए भवग्गहणेहिं सिज्झिस्संति वुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ १०७ ॥ तेत्तीसं आसायणाओ पन्नत्ताओ, तं जहा-सेहे राइणियस्स आसन्नं गंता भवइ आसायणा सेहस्स, सेहे राइणियस्स पुरओ गंता भवइ आसायणा सेहस्स, सेहे राइणियस्स सपक्खं गंता भवइ आसायणा सेहस्स, सेहे राइणियस्स आसन्नं ठिच्चा भवइ आसायणा सेहस्स, जाव सेहे राइणियस्स आलवमाणस्स तत्थगए चेव पडिखुणित्ता भवइ आसायणा सेहस्स । चमरस्स णं असुरिंदस्स असुररण्णो चमरचंचाए रायहाणीए एक्कमेक्कवाराए तेत्तीसं तेत्तीसं भोमा प० । महाविदेहे णं वासे तेत्तीसं जोयणसहस्साइं साइरेगाइं विक्खंभेणं प० । जया णं सूरिए बाहिराणंतरं तच्चं मंडलं उवसंकमिन्ता णं चारं चरइ तथा णं इह गयस्स पुरिसस्स तेत्तीसाए जोयणसहस्सेहिं किंचिविसेसूणेहिं चक्खुप्फासं हव्वमागच्छइ ॥ १०८ ॥ इमीसे णं रयणप्पभाए पुढवीए अत्थेगइयाणं नेरइयाणं तेत्तीसं पलिओवमाइं ठिई प० । अहे सत्तमाए पुढवीए कालमहाकालरोस्यमहारोरुएसु नेरइयाणं उक्कोसेणं तेत्तीसं सागरोवमाइं ठिई प० । अप्पइट्ठाणनरं नेरइयाणं अजहण्णमणुक्कोसेणं तेत्तीसं सागरोवमाइं ठिई प० । असुरकुमारणं अत्थेगइयाणं देवाणं तेत्तीसं पलिओवमाइं ठिई प० । सोहम्मीसाणेसु अत्थेगइयाणं देवाणं तेत्तीसं पलिओवमाइं ठिई प० । विजयवेजयंतजयंतअपराजिएसु विमाणेसु उक्कोसेणं तेत्तीसं सागरोवमाइं ठिई प० । जे देवा सव्वट्ठसिद्धे महाविमाणे देवत्ताए उववण्णा तेसि णं देवाणं अजहण्णमणुक्कोसेणं तेत्तीसं सागरोवमाइं ठिई प० ॥ १०९ ॥ ते णं देवा तेत्तीसाए अद्धमासेहिं आणमंति वा पाणमंति वा उस्ससंति वा निस्ससंति वा । तेसि णं देवाणं तेत्तीसाए वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे तेत्तीसं भवग्गहणेहिं सिज्झिस्संति वुज्झिस्संति मुच्चिस्संति सव्वदुक्खाणमंतं करिस्संति ॥ ११० ॥ चोत्तीसं जिणाइसेसा प० तं जहा-अंवट्टिए केसमंसुरोमनहे, निरामया निरुवळेवा गायलट्ठी, गोक्खीरपंडुरे मंससोणिए, पउमुप्पलगंधिए उस्सासनिस्सासे, पच्छन्ने आहारनीहारे अदिस्से मंसचक्खुणा, आगासगयं चक्कं, आगासगयं छत्तं, आगासगयाओ सेयवरचामराओ, आगासफालिआमयं संपायपीडं सीहासणं, आगासगओ कुड्डीसहस्सपरिमंडिआभिरामो इंदज्झओ पुरओ गच्छइ, जत्थ जत्थ वि य णं अरहंता भगवंतो चिट्ठंति वा निसीयंति वा तत्थ तत्थ वि य णं तक्खणादेव संछन्नपत्तपुप्फपल्लवसमाउलो सच्छत्तो सज्जओ सघट्ठो

सपडागो असोगवरपायवो अभिसंजायइ, ईसिं पिट्ठओ मउडठाणंमि तेयमंडलं
 अभिसंजायइ अंधकारे वि य णं दस दिसाओ पभासेइ, बहुसमरमणिजे भूमिभागे,
 अहोसिरा कंटया जायंति, उऊ विवरीया सुहफासा भवंति, सीयलेणं सुहफासेणं सुर-
 भिणा मारुएणं जोयणपरिमंडलं सव्वओ समंता संपमज्जिजइ, जुत्तफुसिएणं मेहेण य
 निहयरयरेणूयं किज्जइ, जलथलयभासुरपभूतेणं विटट्ठाइणा दसद्धवणेणं कुसुमेणं जाणु-
 स्सेहप्पमाणमित्ते (अचित्ते) पुप्फोवयारे किज्जइ, अमणुण्णाणं सदफरिसरसरूवगंधाणं
 अवकरिसो भवइ, मणुण्णाणं सदफरिसरसरूवगंधाणं पाउब्भाओ भवइ, पच्चाहरओ वि
 य णं हिययगमणीओ जोयणनीहारी सरो, भगवं च णं अद्धमागहीए भासाए धम्म-
 माइक्खइ, सा वि य णं अद्धमागही भासा भासिज्जमाणी तेसिं सव्वेसिं आरियम-
 णारियाणं दुप्पयचउप्पअमियपसुपक्खिसरीसिवाणं अप्पणो हियसिवसुहयभासत्ताए
 परिणमइ, पुव्ववद्धवेरा वि य णं देवासुरनागसुवण्णजक्खरक्खसकिनरकिपुरिसगरू-
 लगंधव्वमहोरगा अरहओ पायमूले पसंतचित्तमाणसा धम्मं निसामंति, अण्णउत्थि-
 यपावयणिया वि य णमागया वंदंति, आगया समाणा अरहओ पायमूले निप्पलिव-
 यणा हवंति, जओ जओ वि य णं अरहंतो भगवंतो विहरंति तओ तओ वि य णं
 जोयणपणवीसाए णं ईती न भवइ, मारी न भवइ, सच्चक्कं न भवइ, परचक्कं न भवइ,
 अइवुट्ठी न भवइ, अणावुट्ठी न भवइ, दुब्भिक्खं न भवइ, पुव्वुप्पण्णा वि य णं
 उप्पाइया वाही खिप्पमिव उवसमंति ॥ १११ ॥ जंबुदीवे णं दीवे चउत्तीसं चक्कवट्ठि-
 विजया प० तं जहा-वत्तीसं महाविदेहे दो भरहे एरवए । जंबुदीवे णं दीवे चोत्तीसं
 दीहवेयट्ठा प० । जंबुदीवे णं दीवे उक्कोसपए चोत्तीसं तित्थंकरा समुप्पज्जंति, चमरस्स
 णं असुरिंदस्स असुररण्णो चोत्तीसं भवणावाससयसहस्सा प० । पढमपंचमछट्ठी-
 सत्तमासु चउसु पुढवीसु चोत्तीसं निरयावाससयसहस्सा प० ॥ ११२ ॥ पणतीसं
 सच्चवयणाइसेसा प० । कुंथू णं अरहा पणतीसं धणूइं उड्ढं उच्चत्तेणं होत्था । दत्ते णं
 वासुदेवे पणतीसं धणूइं उड्ढं उच्चत्तेणं होत्था । नंदणे णं वलदेवे पणतीसं धणूइं उड्ढं
 उच्चत्तेणं होत्था । वितियचउत्थीसु दोसु पुढवीसु पणतीसं निरयावाससयसहस्सा प०
 ॥ ११३ ॥ छत्तीसं उत्तरज्झयणा प० तं जहा-विणयसुयं, परीसहो, चाउरंगिज्जं, असं-
 खयं, अकाममरणिज्जं, पुरिसविज्जा, उरब्भिज्जं, काविलियं, नमिपव्वज्जा, दुमपत्तयं,
 बहुसुयपूजा, हरिएसिज्जं, चित्तसंभूयं, उसुयारिज्जं, सभिक्खुगं, समाहिठाणाइं, पावस-
 मणिज्जं, संजइज्जं, मियचारिया, अणाहपव्वज्जा, समुद्दपालिज्जं, रहनेमिज्जं, गोयमके-
 सिज्जं, समितिओ, जन्नतिज्जं, सामायारी, खलुंकिज्जं, मोक्खमग्गगई, अप्पमाओ,
 तवोमग्गो, चरणविही, पमायठाणाइं, कम्मपयडी, लेसज्झयणं, अणगारमग्गो, जीवा-

जीवविभत्ती य । चमरस्स णं असुरिदस्स असुररण्णो सभा सुहम्मा छत्तीसं जोयणाइं उड्डं उच्चत्तेणं होत्था । समणस्स णं भगवओ महावीरस्स छत्तीसं अज्जाणं साहस्सीओ होत्था । चेत्तासोएसु णं मासेसु सइ छत्तीसंगुलियं सूरिए पोरिसिछायं निव्वत्तइ ॥ ११४ ॥ कुंथुस्स णं अरहओ सत्ततीसं गणा सत्ततीसं गणहरा होत्था । हेमवयहेरण्ण-वयाओ णं जीवाओ सत्ततीसं जोयणसहस्साइं छच्च चउसत्तरे जोयणसए सोलस यं एगूणवीसइभाए जोयणस्स किचि विसेसूणाओ आयामेणं पन्नत्ताओ । सव्वासु णं विजयवेजयंतजयंतअपराजिआसु रायहाणीसु पागारा सत्ततीसं सत्ततीसं जोयणाइं उड्डं उच्चत्तेणं प० । खुड्डियाए णं विमाणपविभत्तीए पढमे वग्गे सत्ततीसं उद्देसणकाला प० । कत्तियवहुलसत्तमीए णं सूरिए सत्ततीसंगुलियं पोरिसिछायं निव्वत्तइत्ता णं चारं चरइ ॥ ११५ ॥ पासस्स णं अरहओ पुरिसादाणीयस्स अट्ठतीसं अज्जिआसाहस्सीओ उक्कोसिया अज्जियासंपया होत्था । हेमवयएरण्णवईयाणं जीवाणं धणूपिट्ठे अट्ठतीसं जोयणसहस्साइं सत्त य चत्ताले जोयणसए दस एगूणवीसइभागे जोयणस्स किचि विसेसूणा परिक्खेवेणं पन्नत्ता । अत्थस्स णं पव्वयरण्णो वितिए कंडे अट्ठतीस जोयण-सहस्साइं उड्डं उच्चत्तेणं होत्था । खुड्डियाए णं विमाणपविभत्तीए वितिए वग्गे अट्ठ-तीसं उद्देसणकाला प० ॥ ११६ ॥ नमिस्स णं अरहओ एगूणचत्तालीसं आहोहिंय-सया होत्था । समयखेत्ते एगूणचत्तालीसं कुलपव्वया प०, तं जहा-तीसं वासहरा, पंच मंदरा, चत्तारि उसुकारा । दोच्चउत्थपंचमल्लद्वसत्तमासु णं पंचसु पुढवीसु एगू-णचत्तालीसं निरयावाससयसहस्सा प० । नाणावरणिज्जस्स मोहणिज्जस्स गोत्तस्स आउयस्स एयासि णं चउण्हं कम्मपगडीणं एगूणचत्तालीसं उत्तरपगडीओ पन्नत्ताओ ॥ ११७ ॥ अरहओ णं अरिट्ठनेमिस्स चत्तालीसं अज्जियासाहस्सीओ होत्था । मंद-रचूलियाणं चत्तालीसं जोयणाइं उड्डं उच्चत्तेणं पण्णत्ता । संती अरहा चत्तालीसं धणूइं उड्डं उच्चत्तेणं होत्था । भूयाणंदस्स णं नागकुमारस्स नागरओ चत्तालीसं भवणावा-ससयसहस्सा प० । खुड्डियाए णं विमाणपविभत्तीए तइए वग्गे चत्तालीसं उद्देसण-काला प० । फग्गुणपुण्णिमासिणीए णं सूरिए चत्तालीसंगुलियं पोरिसिछायं निव्वत्तइत्ता णं चारं चरइ । एवं कत्तियाए वि पुण्णिमाए । महासुक्के कप्पे चत्तालीसं विमाणा-वाससहस्सा प० ॥ ११८ ॥ नमिस्स णं अरहओ एगचत्तालीसं अज्जियासाहस्सीओ होत्था । चउसु पुढवीसु एकचत्तालीसं निरयावाससयसहस्सा प०, तं जहा-रयण-प्पभाए पंकप्पभाए तमाए तमतमाए । महालियाए णं विमाणपविभत्तीए पढमे वग्गे एकचत्तालीसं उद्देसणकाला प० ॥ ११९ ॥ समणे भगवं महावीरे बायालीसं वासाइं स्साहियाइं सामण्णपरियागं पाउणित्ता सिद्धे जाव सव्वदुक्खप्पहीणे । जंबुदीवस्स णं

दीवस्स पुरच्छिमिल्लाओ चरमंताओ गोथूभस्स णं आवासपव्वयस्स पच्चच्छिमिल्ले
 चरमंते एस णं वायालीसं जोयणसहस्साइं अवाहातो अंतरे पन्नत्तं । एवं चउद्दिसिं
 पि दओभासे संखोदयसीमे य । कालोए णं समुद्दे वायालीसं चंदा जोइंसु वा जोइंति
 वा जोइस्संति वा वायालीसं सूरिया पभासिंसु वा पभासिंति वा पभासिस्संति वा ।
 संमुच्छिमभुयपरिसप्पाणं उक्कोसेणं वायालीसं वाससहस्साइं ठिई प० । नामकम्मे
 वायालीसविहे पन्नत्ते, तं जहा-गइनामे, जाइनामे, सरीरनामे, सरीरंगोवंगनामे,
 सरीरबंधणनामे, सरीरसंधायणनामे, संघयणनामे, संठाणनामे, वण्णनामे, गंधनामे,
 रसनामे, फासनामे, अगुरुलहुयनामे, उवघायनामे, पराघायनामे, आणुपुव्वीनामे,
 उरंसासनामे, आयवनामे, उज्जोयनामे, विहगगइनामे, तसनामे, थावरनामे, सुहुम-
 नामे, वायरनामे, पज्जत्तनामे, अपज्जत्तनामे, साहारणरारीरनामे, पत्तेयसरीरनामे,
 थिरनामे, अथिरनामे, सुभनामे, असुभनामे, सुभगनामे, दुब्भगनामे, सुसरनामे,
 दुस्सरनामे, आएज्जनामे, अणाएज्जनामे, जसोकित्तिनामे, अजसोकित्तिनामे, निम्मा-
 णनामे, तित्थकरनामे । लवणे णं समुद्दे वायालीसं नागसाहरसीओ अर्विभतरियं वेलं
 धारंति । महालियाए णं विमाणपविभत्तीए बितिए वग्गे वायालीसं उद्देसणकाला
 प० । एगमेगाए ओसप्पिणीए पंचमछट्ठीओ समाओ वायालीसं वाससहस्साइं कालेणं
 पन्नत्ताइं । एगमेगाए उस्सप्पिणीए पढमवीयाओ समाओ वायालीसं वाससहस्साइं
 कालेणं पन्नत्ताइं ॥ १२० ॥ तेयालीसं कम्मविवागज्जयणा प० । पढमचउत्थपंच-
 मासु पुढवीसु तेयालीसं निरयावाससयसहस्सा प० । जंबुदीवस्स णं दीवस्स पुरच्छि-
 मिल्लाओ चरमंताओ गोथूभस्स णं आवासपव्वयस्स पुरच्छिमिल्ले चरमंते एस णं
 तेयालीसं जोयणसहस्साइं अवाहाए अंतरे प० । एवं चउद्दिसिं पि दग्गभागे संखे
 दयसीमे । महालियाए णं विमाणपविभत्तीए तइए वग्गे तेयालीसं उद्देसणकाला प०
 ॥ १२१ ॥ चोयालीसं अज्जयणा इसिभासिया दियलोगचुयाभासिया प० । विम-
 लस्स णं अरहओ णं चउआलीसं पुरिसजुगाइं अणुपिट्ठिं सिद्धाइं जाव प्पहीणाइं ।
 धरणस्स णं नागिंदस्स नागरणो चोयालीसं भवणावाससयसहस्सा प० । महालि-
 याए णं विमाणपविभत्तीए चउत्थे वग्गे चोयालीसं उद्देसणकाला प० ॥ १२२ ॥
 समयखेत्ते णं पणयालीसं जोयणसयसहस्साइं आयामविकखंभेण प० । सीमंतए णं
 नरए पणयालीसं जोयणसयसहस्साइं आयामविकखंभेण प० । एवं उड्डुविमाणे वि ।
 ईसिपब्भारा णं पुढवी एवं चेव । धम्मे णं अरहा पणयालीसं धणूइं उड्डुं उच्चत्तेणं
 होत्था । मंदरस्स णं पव्वयस्स चउद्दिसिं पि पणयालीसं पणयालीसं जोयणसहस्साइं
 अवाहाए अंतरे प० । सव्वे वि णं दिवद्धुखेत्तिया नक्खत्ता पणयालीसं मुहुत्ते

चंदेण सद्धिं जोगं जोइंसु वा जोइंति वा जोइस्संति वा-तिन्नेव उत्तराई, पुणव्वसू, रोहिणी विसाहा य । एए छ नक्खत्ता, पणयालमुहुत्तसंजोगा ॥ महालियाए णं विमाणपविभत्तीए पंचमे वग्गे पणयालीसं उद्देसणकाला प० ॥ १२३ ॥ दिट्ठिवायस्स णं छायालीसं माउयापया प० । वंभीए णं लिवीए छायालीसं माउयक्खरा प० । पभंजणस्स णं वाउकुमारिंदस्स छायालीसं भवणावाससयसहस्सा प० ॥ १२४ ॥ जया णं सूरिए सव्वव्विंमतरमंडलं उवसंकमिता णं चारं चरइ तथा णं इहगयस्स मणूसस्स सत्तचत्तालीसं जोयणसहस्सेहिं दोहि य तेवट्ठेहिं जोयणसएहिं एकवीसाए य सट्ठिभागोहिं जोयणस्स सूरिए चक्खुफासं हव्वमागच्छइ । थेरे णं अग्गिभूईं सत्तचत्तालीसं वासाई अगारमज्झे वसित्ता मुंडे भवित्ता अगाराओ अणगारियं पव्वइए ॥ १२५ ॥ एगमेगस्स णं रत्तो चाउरंतचक्कवट्ठिस्स अडयालीसं पट्टणसहस्सा प० । धम्मस्स णं अरहओ अडयालीसं गणा अडयालीसं गणहरा होत्था । सूरमंडले णं अडयालीसं एकसट्ठिभागे जोयणस्स विक्खंभेणं प० ॥ १२६ ॥ सत्तसत्तमियाए णं भिक्खुपडिमाए एगूणपन्नाए राइंदिएहिं छन्नउइभिक्खासएणं अहासुत्तं जाव आराहिया भवइ । देवकुरुउत्तरकुरुएसु णं मणया एगूणपन्ना राइंदिएहिं संपन्नजोव्वणा भवंति । तेइंदियाणं उक्कोसेणं एगूणपन्ना राइंदिया ठिई प० ॥ १२७ ॥ मुणिसुव्वयस्स णं अरहओ पंचासं अज्जियासाहस्सीओ होत्था । अणंते णं अरहा पन्नासं धणूइं उड्डं उच्चत्तेणं होत्था । पुरिसुत्तमे णं वासुदेवे पन्नासं धणूइं उड्डं उच्चत्तेणं होत्था । सव्वे वि णं दीहवेयद्धा मूले पन्नासं पन्नासं जोयणाणि विक्खंभेणं प० । लंतए कप्पे पन्नासं विमाणावाससहस्सा प० । सव्वाओ णं तिमिस्सगुहाखंडगप्पवायगुहाओ पन्नासं पन्नासं जोयणाइं आयामेणं प० । सव्वे वि णं कंचणगपव्वया सिहरतले पन्नासं पन्नासं जोयणाइं विक्खंभेणं प० ॥ १२८ ॥ नवण्हं वंभचेराणं एकावन्नं उद्देसणकाला प० । चमरस्स णं असुरिंदस्स असुररत्तो सभा सुधम्मो एकावन्नखंभसंयसंनिविट्ठा प० । एवं चेव वलिस्स वि । सुप्पमे णं वलदेवे एकावन्नं वाससयसहस्साइं परमाउं पालइत्ता सिद्धे वुद्धे जाव सव्वदुक्खप्पहीणे । दंसणावरणनामाणं दोण्हं कम्माणं एकावन्नं उत्तरकम्मपगंडीओ पन्नत्ताओ ॥ १२९ ॥ मोहणिज्जस्स णं कम्मस्स वावन्नं नामधेज्जा प०, तं जहा-कोहे, कोवे, रोसे, दोसे, अखमा, संजलणे, कलहे, चंडिके, भंडणे, विवाए, माणे, मदे, दप्पे, थंभे, अत्तुक्कोसे, गव्वे, परपरिवाए, अक्कोसे, अवक्कोसे (परिभवे), उन्नए, उन्नामे, माया, उवही, नियडी, चलए, गहणे, णूमे, कक्के, कुरुए, दंभे, कूडे, जिम्हे, किच्चिसे, अणायरणया, गूहणया, वंचणया, पलिकुंचणया, सातिजोगे, लोभे, इच्छा, मुच्छा, कंखा, गेही,

तिण्हा, भिज्जा, अभिज्जा, कामासा, भोगासा, जीवियासा, मरणासा, नंदी, रागे । गोथूभस्स णं आवासपव्वयस्स पुरच्छिमिल्लाओ चरमंताओ वलयामुहस्स महापायालस्स पच्चच्छिमिल्ले चरमंते एस णं वावन्नं जोयणसहरसाइं अवाहाए अंतरे प० । एवं दगभासस्स णं केउगस्स संखस्स जूयगस्स दगसीमस्स ईसरस्स । नाणावरणिज्जस्स नामस्स अंतरायस्स एतेसि णं तिण्हं कम्मपगडीणं वावन्नं उत्तरपयढीओ पन्नत्ताओ । सोहम्मसणकुमारमाहिंदेसु तिसु कप्पेसु वावन्नं विमाणावाससयसहस्सा प० ॥ १३० ॥ देवकुरुत्तरकुर्याओ णं जीवाओ तेवन्नं तेवन्नं जोयणसहस्साइं साइरेगाइं आयामेणं पन्नत्ताओ । महाहिमवंतरुप्पीणं वासहरपव्वयाणं जीवाओ तेवन्नं तेवन्नं जोयणसहस्साइं नव य एगतीसे जोयणसए छच्च एगूणवीसइभाए जोयणस्स आयामेणं पन्नत्ताओ । समणस्स णं भगवओ महावीरस्स तेवन्नं अणगारा संवच्छरपरियाया पंचसु अणुत्तरेसु महइमहालएसु महाविमाणेसु देवत्ताए उववन्ना । संमुच्छिमउरपरिसप्पाणं उक्कोसेणं तेवन्नं वाससहस्सा ठिई प० ॥ १३१ ॥ भरहेरवएसु णं वासेसु एगमेगाए उस्सप्पिणीए ओसप्पिणीए चउवन्नं चउवन्नं उत्तमपुरिसा उप्पज्जिनु वा उप्पज्जंति वा उप्पज्जिस्संति वा, तं जहा-चउवीसं तित्थकरा वारस चक्कवट्ठी नव बलदेवा नव वासुदेवा । अरहा णं अरिद्वेनेमी चउवन्नं राइंदियाइं छउमत्थपरियायं पाउणिता जिणे जाए केवली सव्वन्नू सव्वभावदरिसी । समणे भगवं महावीरे एगदिवसेणं एगनिसिज्जाए चउप्पन्नाइं वागरणाइं वागरित्था । अणंतस्स णं अरहओ चउपन्नं गणहरा होत्था ॥ १३२ ॥ मल्लिस्स णं अरहओ [मल्ली णं अरहा] पणपन्नं वाससहस्साइं परमाउं पालइत्ता सिद्धे बुद्धे जाव प्पहीणे । मंदरस्स णं पव्वयस्स पच्चच्छिमिल्लाओ चरमंताओ विजयदारस्स पच्चच्छिमिल्ले चरमंते एस णं पणपन्नं जोयणसहस्साइं अवाहाए अंतरे प० । एवं चउद्विसिं पि विजयवेजयंतजयंतअपराजियं ति । समणे भगवं महावीरे अंतिमराइयंसि पणपन्नं अज्झयणाइं कल्लाणफलविवागाइं पणपन्नं अज्झयणाइं पावफलविवागाइं वागरित्ता सिद्धे बुद्धे जाव प्पहीणे । पढमविइयासु दोसु पुढवीसु पणपन्नं निरयावाससयसहस्सा प० । दंसणावरणिज्जनामाउयाणं तिण्हं कम्मपगडीणं पणपन्नं उत्तरपगडीओ प० ॥ १३३ ॥ जंवुट्ठीवे णं दीवे छप्पन्नं नक्खत्ता चंदेण सद्धि जोगं जोइंसु वा जोइंति वा जोइस्संति वा । विमलस्स णं अरहओ छप्पन्नं गणा छप्पन्नं गणहरा होत्था ॥ १३४ ॥ तिण्हं गणिपिडगाणं आयारचूलियावज्जाण सत्तावन्नं अज्झयणा प० तं जहा-आयारे सूयगडे ठाणे । गोथूभस्स णं आवासपव्वयस्स पुरच्छिमिल्लाओ चरमंताओ वलयामुहस्स महापायालस्स बहुमज्झदेसभाए एस णं सत्तावन्नं जोयणसहस्साइं अवाहाए

अंतरे प० । एवं दगभासस्स केउयस्स य संखस्स य जूयस्स य दयसीमस्स ईस-
 रस्स य । मल्लिस्स णं अरहओ सत्तावन्नं मणपज्जवनाणिसया होत्था । महाहिमवंत-
 रुष्पीणं वासहरपव्वयाणं जीवाणं धणुपिट्ठं सत्तावन्नं सत्तावन्नं जोयणसहस्साइं
 दोन्नि य तेणउए जोयणसए दस य एगूणवीसइभाए जोयणस्स परिकम्बेवेणं प०
 ॥ १३५ ॥ पढमदोच्चपंचमासु तिसु पुढवीसु अट्ठावन्नं निरयावाससयसहस्सा प० ।
 नाणावरणिज्जस्स वेयणियआउयनामअंतराइयस्स एएसि णं पंचण्हं कम्मपगढीणं
 अट्ठावन्नं उत्तरपगढीओ पन्नत्ताओ । गोथूमस्स णं आवासपव्वयस्स पच्चच्छिमिद्धाओ
 चरमंताओ वलयासुहस्स महापायालस्स बहुमज्जदेसभाए एस णं अट्ठावन्नं जोयण-
 सहस्साइं अवाहाए अंतरे प० । एवं चउदिसिं पि नेयव्वं ॥ १३६ ॥ चंदस्स णं
 संवच्छरस्स एगमेगे उऊ एगूणसट्ठिं राइंदियाइं राइंदियग्गेणं प० । संभवे णं अरहा
 एगूणसट्ठिं पुव्वसयसहस्साइं अगारमज्झे वसित्ता मुंडे जाव पव्वइए । मल्लिस्स णं
 अरहओ एगूणसट्ठिं ओहिनाणिसया होत्था ॥ १३७ ॥ एगमेगे णं मंडले सूरिए सट्ठिए
 सट्ठिए सुहुत्तेहिं संघाइए । लवणस्स णं समुदस्स सट्ठिं नागसाहस्सीओ अग्गोदयं
 धारंति । विमले णं अरहा सट्ठिं धणूइं उड्डं उच्चत्तेणं होत्था । वलिस्स णं वइरोयणिंदस्स
 सट्ठिं सामाणियसाहस्सीओ पन्नत्ताओ । वंभस्स णं देविंदस्स देवरणो सट्ठिं सामाणि-
 यसाहस्सीओ पन्नत्ताओ । सोहम्मोसाणेषु दोसु कप्पेसु सट्ठिं विमाणावाससयसहस्सा
 प० ॥ १३८ ॥ पंचसंवच्छरियस्स णं जुगस्स रिउमासेणं मिज्जमाणस्स इगसट्ठिं उऊ-
 मासा प० । मंदरस्स णं पव्वयस्स पढमे कंडे इगसट्ठिजोयणसहस्साइं उड्डं उच्चत्तेणं
 प० । चंदमंडले णं एगसट्ठिविभागविभाइए समंसे प० । एवं सूरस्स वि ॥ १३९ ॥
 पंचसंवच्छरिए णं जुगे वासट्ठिं पुन्निमाओ वावट्ठिं अमावसाओ पन्नत्ताओ । वासुपुज्जस्स
 णं अरहओ वासट्ठिं गणा वासट्ठिं गणहरा होत्था । सुक्कपक्खस्स णं चंदे वासट्ठिं भागे
 दिवसे दिवसे परिवड्डइ, ते चेव बहुलपक्खे दिवसे दिवसे परिहायइ । सोहम्मोसा-
 णेषु कप्पेसु पढमे पत्थडे पढमावलियाए एगमेगाए दिसाए वासट्ठिं वासट्ठिं विमाणा
 प० । सव्वे वेमाणियाणं वासट्ठिं विमाणपत्थडा पत्थडग्गेणं प० ॥ १४० ॥ उसभे
 णं अरहा कोसलिए तेसट्ठिं पुव्वसयसहस्साइं महारायमज्झे वसित्ता मुंडे भवित्ता
 अगाराओ अणगारियं पव्वइए । हरिवासरम्मयवासेसु मणुस्सा तेसट्ठिए राइंदिएहिं
 संपत्तजोव्वणा भवंति । निसडे णं पव्वए तेसट्ठिं सूरुदया प० । एवं नीलवंते वि
 ॥ १४१ ॥ अट्ठमिया णं भिक्खुपडिमा चउसट्ठीए राइंदिएहिं दोहि य अट्ठासीएहिं
 भिक्खासएहिं अहासुत्तं जाव भवइ । चउसट्ठिं असुरकुमारावाससयसहस्सा प० ।
 चमरस्स णं रत्तो चउसट्ठिं सामाणियसाहस्सीओ पन्नत्ताओ । सव्वे वि दधि मुहाणं

पव्वया पल्लासंठाणसंठिया सव्वत्थ समा विक्खंभुस्सेहेणं चउसट्ठि जोयणसहस्साइं
 प० । सोहम्मीसाणेसु वंभलोए य तिसु कप्पेसु चउसट्ठि विमाणावाससयसहस्सा
 प० । सव्वस्स वि य णं रत्तो चाउरंतचक्कवट्ठिरस चउसट्ठिलट्ठीए महग्घे मुत्तामणि-
 (मए)हारे प० ॥ १४२ ॥ जंबुदीवे णं दीवे पणसट्ठि सूरमंडला प० । थेरे णं मोरि-
 यपुत्ते पणसट्ठिवासाइं अगारमज्झे वसित्ता मुंडे भवित्ता अगाराओ अणगारियं पव्व-
 इए । सोहम्मवडिसयस्स णं विमाणस्स एगमेगाए वाहाए पणसट्ठि पणसट्ठि भोमा
 प० ॥ १४३ ॥ दाहिणड्ढमाणस्सखेत्ता णं छावट्ठि चंदा पभासिंसु वा पभासंति वा
 पभासिस्संति वा । छावट्ठि सूरिया तविंसु वा तवंति वा तविस्संति वा । उत्तरड्ढ-
 माणस्सखेत्ता णं छावट्ठि चंदा पभासिंसु वा पभासंति वा पभासिस्संति वा ।
 छावट्ठि सूरिया तविंसु वा तवंति वा तविस्संति वा । सेज्जंसस्स णं अरहओ छावट्ठि
 गणा छावट्ठि गणहरा होत्था । आभिणित्रोहियनाणस्स णं उक्कोसेणं छावट्ठि साग-
 रोवमाइं ठिई प० ॥ १४४ ॥ पंचसंवच्छरियस्स णं जुगरस नक्खत्तमासेणं मिज्ज-
 माणस्स सत्तसट्ठि नक्खत्तमासा प० । हेमवयएरन्नवयाओ णं वाहाओ सत्तट्ठि सत्तट्ठि
 जोयणसयाइं पणपन्नाइं तिण्णि य भागा जोयणस्स आयामेणं प० । मंदरस्स णं
 पव्वयस्स पुरच्छिमिल्लाओ चरमंताओ गोयमदीवस्स पुरच्छिमिल्ले चरमंते एस णं
 सत्तसट्ठि जोयणसहस्साइं अवाहाए अंतरे प० । सव्वोसिं पि णं नक्खत्ताणं सीमा-
 विक्खंभे णं सत्तट्ठि भागं भइए समंसे प० ॥ १४५ ॥ धायइसंडे णं दीवे अडसट्ठि
 चक्कवट्ठिविजया अडसट्ठि रायहाणीओ प० । उक्कोसपए अडसट्ठि अरहंता समु-
 प्पज्जिंसु वा समुप्पज्जंति वा समुप्पज्जिस्संति वा । एवं चक्कवट्ठी वलदेवा वासुदेवा ।
 पुक्खरवरदीवड्ढे णं अडसट्ठि विजया एवं चेव जाव वासुदेवा । विमलस्स णं
 अरहओ अडसट्ठि समणसाहस्सीओ उक्कोसिया समणसंपया होत्था ॥ १४६ ॥
 समयखित्ते णं मंदरवज्जा एगूणसत्तरिं वासा वासधरपव्वया प० तं जहा-पणतीसं
 वासा तीसं वासहरा चत्तारि उसुयारा । मंदरस्स पव्वयस्स पच्चच्छिमिल्लाओ चरमं-
 ताओ गोयमदीवस्स पच्चच्छिमिल्ले चरमंते एस णं एगूणसत्तरिं जोयणसहस्साइं
 अवाहाए अंतरे प० । मोहणिज्जवज्जाणं सत्तण्हं कम्मपगडीणं एगूणसत्तरि उत्तर-
 पगडीओ पन्नत्ताओ ॥ १४७ ॥ समणे भगवं महावीरे वासाणं सवीसइराए मासे
 वइक्कंते सत्तरिएहिं राइंदिएहिं सेसेहिं वासावासं पज्जोसवेइ । पासे णं अरहा पुरि-
 सादाणीए सत्तरिं वासाइं बहुपडिपुन्नाइं सामन्नपरियागं पाउणित्ता सिद्धे बुद्धे जाव
 प्पहीणे । वासुपुज्जे णं अरहा सत्तरि धणूइं उड्डं उच्चत्तेणं होत्था । मोहणिज्जस्स णं
 कम्मस्स सत्तरिं सागरोवमकोडाकोडीओ अवाहूणिया कम्मट्ठिई कम्मनिसेगे प० ।

माहिंदस्स णं देविंदस्स देवरत्तो सत्तरिं सामाणियसाहस्सीओ पन्नत्ताओ ॥ १४८ ॥
 चउत्थस्स णं चंदसंवच्छरस्स हेमंताणं एक्कसत्तरीए राइंदिएहिं वीइक्कंतेहिं सव्व-
 वाहिराओ मंडलाओ सूरिए आउट्ठिं करेइ । वीरियप्पवायस्स णं पुव्वस्स एक्कसत्तरिं
 पाहुडा प० । अजिते णं अरहा एक्कसत्तरिं पुव्वसयसहस्साइं अगारमज्जे वसित्ता
 मुंडे भवित्ता जाव पव्वइए । एवं सगरो वि राया चाउरंतचक्कवट्ठी एक्कसत्तरिं पुव्व
 जाव पव्वइए त्ति ॥ १४९ ॥ वावत्तरिं सुवन्नकुमारावाससयसहस्सा प० । लवणस्स
 समुद्दस्स वावत्तरिं नागसाहस्सीओ वाहिरियं वेलं धारंति । समणे भगवं महावीरे
 वावत्तरिं वासाइं सव्वाउयं पालइत्ता सिद्धे बुद्धे जाव प्पहीणे । थेरे णं अयलभाया
 वावत्तरिं वासाइं सव्वाउयं पालइत्ता सिद्धे जाव प्पहीणे । अविंभतरपुक्खरद्धे णं
 चावत्तरिं चंदा पभासिंसु वा पभासंति वा पभासिस्संति वा, वावत्तरिं सूरिया तविंसु
 वा तवंति वा तविस्संति वा । एगमेगस्स णं रत्तो चाउरंतचक्कवट्ठिस्स वावत्तरिपुर-
 वरसाहस्सीओ पन्नत्ताओ । वावत्तरि कलाओ प० तं जहा-लेहं, गणियं, रुवं, नट्ठं,
 गीयं, वाइयं, सरगयं, पुक्खरगयं, समतालं, जूयं, जणवायं, पोक्खच्चं, अट्ठावयं,
 दगमट्ठियं, अन्नविहीं, पाणविहीं, वत्थविहीं, सयणविहीं, अज्जं, पहेलियं, मागहियं,
 गाहं, सिलोगं, गंधजुत्तिं, मधुसित्थं, आभरणविहीं, तरुणीपडिकम्मं, इत्थीलक्खणं,
 पुरिसलक्खणं, हयलक्खणं, गयलक्खणं, गोणलक्खणं, कुक्कुडलक्खणं, मिंदयल-
 क्खणं, चक्कलक्खणं, छत्तलक्खणं, दंडलक्खणं, असिलक्खणं, मणिलक्खणं,
 कागणिलक्खणं, चम्मलक्खणं, चंदलक्खणं, सूरचरियं, राहुचरियं, गहचरियं,
 सोभागकरं, दोभागकरं, विज्जागयं, मंतगयं, रहस्सगयं, सभासं, चारं, पडिचारं,
 वूहं, पडिवूहं, खंधावारमाणं, नगरमाणं, वत्थुमाणं, खंधावारनिवेसं, वत्थुनिवेसं,
 नगरनिवेसं, ईसत्थं, छरुप्पवायं, आससिक्खं, हत्थिसिक्खं, धणुव्वेयं, हिरण्णपागं
 सुवन्नपागं मणिपागं धातुपागं, वाहुजुद्धं दंडजुद्धं मुट्ठिजुद्धं लट्ठिजुद्धं जुद्धं निजुद्धं
 जुद्धाइं जुद्धं, सुत्तखेडं नालियाखेडं वट्ठेखेडं धम्मखेडं चम्मखेडं, पत्तच्छेज्जं कडग-
 च्छेज्जं, सजीवं निजीवं, सउणख्यं । संमुच्छिमखहयरपंचिंदियतिरिक्खजोणियाणं
 उक्कोसेणं वावत्तरिं वाससहस्साइं ठिई प० ॥ १५० ॥ हरिवासरम्मयवासयाओ णं
 जीवाओ तेवत्तरिं तेवत्तरिं जोयणसहस्साइं नव य एगुत्तरे जोयणसए सत्तरस य
 एगूणवीसइभागे जोयणस्स अद्धभागं च आयामेणं प० । विजए णं वलदेवे तेव-
 त्तरिं वाससयसहस्साइं सव्वाउयं पालइत्ता सिद्धे जाव प्पहीणे ॥ १५१ ॥ थेरे णं
 अग्गिभूई गणहरे चोवत्तरिं वासाइं सव्वाउयं पालइत्ता सिद्धे जाव प्पहीणे । निस-
 हाओ णं वासहरपव्वयाओ तिगिच्छिओ णं दहाओ सीतोयामहानदीओ चोवत्तरिं

जोयणसयाइं साहियाइं उत्तराहिमुही पवहिता वइरामयाए जिब्भियाए चउजोयणा-
यामाए पन्नासजोयणविक्खंभाए वइरतले कुंडे महया घडमुहपवत्तिएणं मुत्तावलि-
हारसंठाणसंठिएणं पवाएणं महया सदेणं पवडइ । एवं सीता वि दक्खिणाहिमुही
भाणियव्वा । चउत्थवज्जासु छसु पुढवीसु चोवत्तरिं नरयावाससयसहस्सा प०
॥ १५२ ॥ सुविहिस्स णं पुप्फदंतस्स अरहओ पन्नत्तरि जिणसया होत्था । सीतले
णं अरहा पन्नत्तरि पुव्वसहस्साइं अगारवासमज्झे वसित्ता मुंडे भवित्ता जाव पव्व-
इए । संती णं अरहा पन्नत्तरिवाससहस्साइं अगारवासमज्झे वसित्ता मुंडे भवित्ता
अगाराओ अणगारियं पव्वइए ॥ १५३ ॥ छावत्तरि विज्जुकुमारावाससयसहस्सा
प० । एवं-दीवदिसाउदहीणं, विज्जुकुमारिदथणियमग्गीणं । छण्हं पि जुगलयाणं,
छावत्तरि सयसहस्साइं ॥ १५४ ॥ भरहे राया चाउरंतचक्कवट्ठी सत्तहत्तरि पुव्वसय-
सहस्साइं कुमारवासमज्झे वसित्ता महारायाभिसेयं संपत्ते । अंगवंसाओ णं सत्तहत्तरि
रायाणो मुंडे जाव पव्वइया । गइतोयतुसियाणं देवाणं सत्तहत्तरि देवसहस्सपरिवारा
प० । एगमेगे णं मुहुत्ते सत्तहत्तरि लवे लवग्गेणं प० ॥ १५५ ॥ सक्कस्सणं देविदस्स
देवरत्तो वेसमणे महाराया अट्टहत्तरीए सुवन्नकुमारदीवकुमारावाससयसहस्साणं
आहेवच्चं पोरेवच्चं सामितं भट्ठितं महारायत्तं आणाईसरसेणावच्चं कारेमाणे पालेमाणे
विहरइ । थेरे णं अकंपिए अट्टहत्तरि वासाइं सव्वाउयं पालइत्ता सिद्धे जाव प्पहीणे ।
उत्तरायणनियट्ठे णं सूरिए पढमाओ मंडलाओ एगूणचत्तालीसइमे मंडले अट्टहत्तरिं
एगसट्ठिभाए दिवसखेत्तस्स निवुड्ढेत्ता रयणिखेत्तस्स अभिनिवुड्ढेत्ता णं चारं चरइ,
एवं दक्खिणायणनियट्ठे वि ॥ १५६ ॥ वलयामुहस्स णं पायालस्स हिट्ठिल्लाओ चर-
मंताओ इमीसे णं रयणप्पभाए पुढवीए हेट्ठिल्ले चरमंते एस णं एगूणासि जोयणस-
हस्साइं अवाहाए अतरे प० । एवं केउस्स वि जूयस्स वि ईसरस्स वि । छट्ठीए
पुढवीए बहुमज्झदेसभायाओ छट्ठस्स घणोदहिस्स हेट्ठिल्ले चरमंते एस णं एगूणा-
सीति जोयणसहस्साइं अवाहाए अतरे प० । जंबुदीवस्स णं दीवस्स बारस्स य
वारस्स य एस णं एगूणासीइं जोयणसहस्साइं साइरेगाइं अवाहाए अंतरे प०
॥ १५७ ॥ सेज्जंसे णं अरहा असीइं धणूइं उड्ढं उच्चत्तेणं होत्था । तिविट्ठे णं वासु-
देवे असीइं धणूइं उड्ढं उच्चत्तेणं होत्था । अयले णं वलदेवे असीइं धणूइं उड्ढं उच्च-
त्तेणं होत्था । तिविट्ठे णं वासुदेवे असीइवाससयसहस्साइं महाराया होत्था । आउ-
वहुले णं कंडे असीइ जोयणसहस्साइं वाहल्लेणं प० । ईसाणस्स देविदस्स देवरत्तो
असीइं सामाणियसाहस्सीओ पन्नत्ताओ । जंबुदीवे णं दीवे असीउत्तरं जोयणसयं ओगा-
हेत्ता सूरिए उत्तरकट्ठोवगाए पढमं उदयं करेइ ॥ १५८ ॥ नवनवमिया णं भिक्खु-

पडिमा एकासीइ राइंदिएहिं चउहि य पंचुत्तरेहिं (भिक्खासएहिं) अहासुत्त जाव
 आराहिया । कुंथुस्स णं अरहओ एकासीतिं मणपज्जवनाणिसया होत्था । विवाहपन्न-
 तीए एकासीति महाजुम्मसया प० ॥ १५९ ॥ जंबुद्दीवे दीवे वासीयं मंडलसयं जं
 सूरिए दुक्खुत्तो संक्रमित्ता णं चारं चरइ, तं जहा-निक्खममाणे य पविसमाणे य ।
 समणे भगवं महावीरे वासीए राइंदिएहिं वीइकंतेहिं गब्भाओ गब्भं साहरिए । महा-
 हिमवंतस्स णं वासहरपव्वयस्स उवरिल्लाओ चरमंताओ सोगंधियस्स कंडस्स हेट्ठिल्ले
 चरमंते एस णं वासीइं जोयणसयाइं अवाहाए अंतरे प० । एवं रुप्पिस्स वि ॥ १६० ॥
 समणे भगवं महावीरे वासीइ राइंदिएहिं वीइकंतेहिं तेयासीइमे राइंदिए वट्टमाणे
 गब्भाओ गब्भं साहरिए । सीयलस्स णं अरहओ तेसीइं गणा तेसीइं गणहरा
 होत्था । थेरे णं मंडियपुत्ते तेसीइं वासाइं सव्वाउयं पालइत्ता सिद्धे जाव प्पहीणे ।
 उसभे णं अरहा कोसलिए तेसीइं पुव्वसयसहस्साइं अगारमज्झे वसित्ता मुंढे
 भवित्ता णं जाव पव्वइए । भरहे णं राया चाउरंतचक्कवट्ठी तेसीइं पुव्वसयसहस्साइं
 अगारमज्झे वसित्ता जिणे जाए केवली सव्वन्नू सव्वभावदरिसी ॥ १६१ ॥
 चउरासीइ निरयावाससयसहस्सा प० । उसभे णं अरहा कोसलिए चउरासीइं
 पुव्वसयसहस्साइं सव्वाउयं पालइत्ता सिद्धे बुद्धे जाव प्पहीणे । एवं भरहो वाहुवली
 वंभी सुंदरी । सिज्जंसे णं अरहा चउरासीइं वाससयसहस्साइं सव्वाउयं पालइत्ता
 सिद्धे जाव प्पहीणे । तिविट्ठे णं वासुदेवे चउरासीइं वाससयसहस्साइं सव्वाउयं
 पालइत्ता अप्पइट्ठाणे नरए नेरइयत्ताए उववन्नो । सक्कस्स णं देविंदस्स देवरन्नो
 चउरासीइ सामाणियसाहरसीओ पन्नत्ताओ । सव्वे वि णं वाहिरया मंदरा चउरा-
 सीइं चउरासीइं जोयणसहस्साइं उट्ठं उच्चत्तेणं प० । सव्वे वि णं अंजणगपव्वया
 चउरासीइं चउरासीइं जोयणसहस्साइं उट्ठं उच्चत्तेणं प० । हरिवासरम्मयवासियाणं
 जीवाणं धणुपिट्ठा चउरासी जोयणसहस्साइं सोलस जोयणाइं चत्तारि य भागा
 जोयणस्स परिक्खेवेणं प० । पंकवहुलस्स णं कंडस्स उवरिल्लाओ चरमंताओ हेट्ठिल्ले
 चरमंते एस णं चोरासीइ जोयणसयसहस्साइं अवाहाए अंतरे प० । विवाहपन्नतीए
 णं भगवतीए चउरासीइं पयसहस्सा पदग्गेणं प० । चोरासीइ नागकुमारावाससय-
 सहस्सा प० । चोरासीइ पइन्नगसहस्साइं पन्नत्ताइं । चोरासीइं जोणिप्पमुहसय-
 सहस्सा प० । पुव्वाइयाणं सीसपहेलियापज्जवसाणाणं सट्ठाणट्ठाणंतराणं चोरासीए
 गुणकारे प० । उसभस्स णं अरहओ कोसलियस्स चउरासीइ गणा चउरासीइ
 गणहरा होत्था, उसभस्स णं अरहओ कोसलियस्स उसभसेणपामोक्खाओ चउरा-
 सीइ समणसाहस्सीओ होत्था । सव्वे वि चउरासीइ विमाणावाससयसहस्सा

सत्ताणउई च सहस्सा तेवीसं च विमाणा भवंतीति मक्खायं ॥ १६२ ॥
 आयारस्स णं भगवओ सचूलियागस्स पंचासीइ उद्देसणकाला प० । धायइसंडस्स
 णं मंदरा पंचासीइ जोयणसहस्साइं सव्वग्गेणं प० । स्यए णं मंडलियपव्वए पंचा-
 सीइ जोयणसहस्साइं सव्वग्गेणं प० । नंदणवणस्स णं हेट्ठिल्लाओ चरमंताओ सोगंधि-
 यस्स कंडस्स हेट्ठिल्ले चरमंते एस णं पंचासीइ जोयणसयाइं अवाहाए अंतरे प०
 ॥ १६३ ॥ सुविहिस्स णं पुप्फदंतस्स अरहओ छलसीइ गणा छलसीइ गणहरा
 होत्था । सुपासस्स णं अरहओ छलसीइ वाइसया होत्था । दोच्चाए णं पुढवीए बहु-
 मज्झदेसभागाओ दोच्चस्स घणोदहिस्स हेट्ठिल्ले चरमंते एस णं छलसीइ जोयणसह-
 स्साइं अवाहाए अंतरे प० ॥ १६४ ॥ मंदरस्स णं पव्वयस्स पुरच्छिमिल्लाओ चर-
 मंताओ गोथूमस्स आवासपव्वयस्स पच्चच्छिमिल्ले चरमंते एस णं सत्तासीइं जोयण-
 सहस्साइं अवाहाए अंतरे प० । मंदरस्स णं पव्वयस्स दक्खिणिल्लाओ चरमंताओ
 दगभासस्स आवासपव्वयस्स उत्तरिल्ले चरमंते एस णं सत्तासीइं जोयणसहस्साइं
 अवाहाए अंतरे प० । एवं मंदरस्स पच्चच्छिमिल्लाओ चरमंताओ संखस्स आवास-
 पव्वयस्स पुरच्छिमिल्ले चरमंते एस णं सत्तासीइं जोयणसहस्साइं अवाहाए अंतरे
 प० । एवं चेव मंदरस्स उत्तरिल्लाओ चरमंताओ दगसीमस्स आवासपव्वयस्स दार्हि-
 णिल्ले चरमंते एस णं सत्तासीइं जोयणसहस्साइं अवाहाए अंतरे प० । छण्हं कम्म-
 पगडीणं आइमउवरिल्लवज्जाणं सत्तासीइं उत्तरपगडीओ पन्नत्ताओ । महार्हिमवंतकू-
 डस्स णं उवरिमंताओ सोगंधियस्स कंडस्स हेट्ठिल्ले चरमंते एस णं सत्तासीइ जोय-
 णसयाइं अवाहाए अंतरे प० । एवं रुप्पिकूडस्स वि ॥ १६५ ॥ एगमेगस्स णं चंदि-
 मसूरियस्स अट्ठासीइ अट्ठासीइ महग्गहा परिवारो प० । दिट्ठिवायस्स णं अट्ठासीइ
 सुत्ताइं पन्नत्ताइं, तं जहा-उज्जुसुयं परिणयापरिणयं एवं अट्ठासीइ सुत्ताणि भाणिय-
 व्वाणि जहा नंदीए । मंदरस्स णं पव्वयस्स पुरच्छिमिल्लाओ चरमंताओ गोथूमस्स
 आवासपव्वयस्स पुरच्छिमिल्ले चरमंते एस णं अट्ठासीइं जोयणसहस्साइं अवाहाए
 अंतरे प० । एवं चउसु वि दिसासु नेयव्वं । वाहिराओ उत्तराओ णं कट्ठाओ सूरिए
 पढमं छम्मासं अयमाणे चोयालीसइमे मंडलगते अट्ठासीति एगसट्ठिभागे मुहुत्तस्स
 दिवसखेत्तस्स निवुड्ढेत्ता रयणिखेत्तस्स अभिनिवुड्ढेत्ता सूरिए चारं चरइ । दक्खिण-
 कट्ठाओ णं सूरिए दोच्चं छम्मासं अयमाणे चोयालीसतिमे मंडलगते अट्ठासीइं एग-
 सट्ठिभागे मुहुत्तस्स रयणिखेत्तस्स निवुड्ढेत्ता दिवसखेत्तस्स अभिनिवुड्ढेत्ता णं सूरिए
 चारं चरइ ॥ १६६ ॥ उसमे णं अरहा कोसलिए इमीसे ओसप्पिणीए ततियाए सुस-
 मद्दसमाए (समाए) पच्छिमे भागे एगूणणउए अद्धमासेहिं सेसेहिं कालगए जाव सव्व-

दुक्खप्पहीणे । समणे भगवं महावीरे इमीसे ओसप्पिणीए चउत्थाए दूसमसुसमाए
समाए पच्छिमे भागे एगूणनउइए अद्धमासेहिं सेसेहिं कालगए जाव सव्वदुक्खप्प-
हीणे । हरिसेणे णं राया चाउरंतचक्कवट्ठी एगूणनउइं वाससयाइं महाराया होत्था ।
संतिस्स णं अरहओ एगूणनउइं अज्जासाहस्सीओ उक्कोसिया अजियासंपया होत्था
॥ १६७ ॥ सीयळे णं अरहा नउइं धणूइं उड्डं उच्चतेणं होत्था । अजियस्स णं अर-
हओ नउइं गणा नउइं गणहरा होत्था । एवं संतिस्स वि । सयंभुस्स ण वासुदेवस्स
णउइ वासाइं विजए होत्था । सव्वेसि णं वट्टवेयड्डपव्वयाणं उवरिल्लाओ सिहरतलाओ
सोगंधियकण्डस्स हेट्ठिल्ले चरमंते एस णं नउइ जोयणसयाइं अवाहाए अंतरे प०
॥ १६८ ॥ एकाणउइं परवेयावच्चकम्मपडिमाओ पन्नत्ताओ । कालोए णं समुद्दे
एकाणउइं जोयणसयसहस्साइं सहियाइं परिकखेवेणं प० । कुंथुस्स णं अरहओ
एकाणउइं आहोहियसया होत्था । आउयगोयवज्जाणं छण्हं कम्मपगडीणं एकाणउइं
उत्तरपगडीओ पन्नत्ताओ ॥ १६९ ॥ वाणउइं पडिमाओ पन्नत्ताओ । थेरे णं इंदभूती
वाणउइ वासाइं सव्वाउयं पालइत्ता सिद्धे बुद्धे । मंदरस्स णं पव्वयस्स बहुमज्झ-
देसभागाओ गोथूभस्स आवासपव्वयस्स पच्चच्छिमिल्ले चरमंते एस णं वाणउइं
जोयणसहस्साइं अवाहाए अंतरे प० । एवं चउण्हं वि आवासपव्वयाणं ॥ १७० ॥
चंदप्पहस्स णं अरहओ तेणउइं गणा तेणउइं गणहरा होत्था । संतिस्स णं अरहओ
तेणउइं चउइसपुव्विसया होत्था । तेणउइमंडलगते णं सूरिए अतिवट्टमाणे वा निव-
ट्टमाणे वा समं अहोरेतं विसमं करेइ ॥ १७१ ॥ निसहनीलवंतियाओ णं जीवाओ चउ-
णउइ जोयणसहस्साइं एकं छप्पणं जोयणसयं दोन्नि य एगूणवीसइभागे जोयणस्स
आयामेणं प० । अजियस्स णं अरहओ चउणउइ ओहिनाणिसया होत्था ॥ १७२ ॥
सुपासस्स णं अरहओ पंचाणउइ गणा पंचाणउइ गणहरा होत्था । जंबुद्वीवस्स णं दीव-
स्स चरमंताओ चउइसिं लवणसमुदं पंचाणउइ पंचाणउइ जोयणसहस्साइं ओगाहिता
चत्तारि महापायालकलसा प० तं जहा-वल्लयामुहे केऊए जूयए ईसरे । लवणसमुदस्स
उभओ पासं पि पंचाणउयं पंचाणउयं पदेसाओ उव्वेहुस्सेहपरिहाणीए प० । कुंथू णं
अरहा पंचाणउइ वाससहस्साइं परमाउयं पालइत्ता सिद्धे बुद्धे जाव प्पहीणे । थेरे णं
मोरियपुत्ते पंचाणउइ वासाइं सव्वाउयं पालइत्ता सिद्धे बुद्धे जाव प्पहीणे ॥ १७३ ॥
एगमेगस्स णं रत्तो चाउरंतचक्कवट्ठिस्स छण्णउइं छण्णउइं गामकोडीओ होत्था ।
वासकुमारणं छण्णउइ भवणावाससयसहस्सा प० । ववहारिए णं दंडे छण्णउइ
अंगुलाइं अंगुलमाणेणं । एवं धणू नालिया जुगे अक्खे मुसले वि हु । अब्भितरओ
आइमुहुत्ते छण्णउइअंगुलछाए प० ॥ १७४ ॥ मंदरस्स णं पव्वयस्स पच्चच्छिमि-

ल्लाओ चरमंताओ गोथूमस्स णं आवासपव्वयस्स पच्चच्छिमिल्ले चरमंते एस णं सत्ता-
 णउइ जोयणसहस्साइं अवाहाए अंतरे पन्नत्ते । एवं चउदिसिं पि । अट्ठण्हं कम्मप-
 गडीणं सत्ताणउइ उत्तरपगडीओ पन्नत्ताओ । हरिसेणे णं राया चाउरंतचक्कवट्ठी देसू-
 णाईं सत्ताणउइ वाससयाईं अगारमज्जे वसित्ता मुंडे भवित्ता णं जाव पव्वइए
 ॥ १७५ ॥ नंदणवणस्स णं उवरिल्लाओ चरमंताओ पंडुयवणस्स हेट्ठिल्ले चरमंते एस
 णं अट्ठाणउइ जोयणसहस्साइं अवाहाए अंतरे पन्नत्ते । मंदरस्स णं पव्वयस्स पच्च-
 च्छिमिल्लाओ चरमंताओ गोथूमस्स आवासपव्वयस्स पुरच्छिमिल्ले चरमंते एस णं
 अट्ठाणउइ जोयणसहस्साइं अवाहाए अंतरे प० । एवं चउदिसिं पि । दार्हिणभर-
 हड्डस्स णं धणुप्पिट्ठे अट्ठाणउइ जोयणसयाईं किंचूणाईं आयामेणं पन्नत्ते । उत्तराओ
 णं कट्ठाओ सूरिए पढमं छम्मासं अयमाणे एगूणपन्नासतिमे मंडलगते अट्ठाणउइ
 एकसट्ठिभागे मुहुत्तस्स दिवसखेत्तस्स निवुड्ढेत्ता रयणिखेत्तस्स अभिनिवुड्ढित्ता णं
 सूरिए चारं चरइ । दक्खिणाओ णं कट्ठाओ सूरिए दोच्चं छम्मासं अयमाणे एगूण-
 पन्नासइमे मंडलगते अट्ठाणउइ एकसट्ठिभाए मुहुत्तस्स रयणिखित्तस्स निवुड्ढेत्ता
 दिवसखेत्तस्स अभिनिवुड्ढित्ता णं सूरिए चारं चरइ । रेवईपढमजेट्ठापज्जवसाणाणं
 एगूणवीसाए नक्खत्ताणं अट्ठाणउइ ताराओ तारग्गेणं पन्नत्ताओ ॥ १७६ ॥ मंदरे
 णं पव्वए णवणउइ जोयणसहस्साइं उड्डं उच्चत्तेणं पन्नत्ते । नंदणवणस्स णं पुरच्छि-
 मिल्लाओ चरमंताओ पच्चच्छिमिल्ले चरमंते एस णं नवनउइ जोयणसयाईं अवाहाए
 अंतरे पन्नत्ते । एवं दक्खिणिल्लाओ चरमंताओ उत्तरिल्ले चरमंते एस णं णवणउइ
 जोयणसयाईं अवाहाए अंतरे पन्नत्ते । उत्तरे पढमे सूरियमंडले नवनउइ जोयण-
 सहस्साइं साइरेगाईं आयामविक्खंभेणं पन्नत्ते । दोच्चे सूरियमंडले नवनउइ जोयण-
 सहस्साइं साहियाईं आयामविक्खंभेणं पन्नत्ते । तइए सूरियमंडले नवनउइ जोयण-
 सहस्साइं साहियाईं आयामविक्खंभेणं पन्नत्ते । इमीसे णं रयणप्पभाए पुढवीए
 अंजणस्स कंडस्स हेट्ठिल्लाओ चरमंताओ वाणमंतरभोमेज्जविहाराणं उवरिमंते एस
 णं नवनउइ जोयणसयाईं अवाहाए अंतरे पन्नत्ते ॥ १७७ ॥ दसदसमिया णं
 भिक्खुपडिमा एगेणं राइंदियसतेणं अद्धच्छट्ठेहिं भिक्खासतेहिं अहासुत्तं जाव आरा-
 हिया वि भवइ । सयभिसया नक्खत्ते एकसयतारे पन्नत्ते । सुविही पुप्फदंते णं
 अरहा एणं धणूसयं उड्डं उच्चत्तेणं होत्था । पासे णं अरहा पुरिसादाणीए एक्कं वास-
 सयं सव्वाउयं पालइत्ता सिद्धे जाव प्पहीणे । एवं थेरे वि अज्जसुहम्मे । सव्वे वि
 णं दीहवेयड्डपव्वया एगमेगं गाउयसयं उड्डं उच्चत्तेणं प० । सव्वे वि णं चुल्लहिम-
 वंतसिहरीवासहरपव्वया एगमेगं जोयणसयं उड्डं उच्चत्तेणं प० एगमेगं गाउयसयं

उव्वेहेणं प० । सव्वे वि णं कंचणपव्वया एगमेगं जोयणसयं उड्डं उच्चत्तेणं प०
 एगमेगं गाउयसयं उव्वेहेणं प० एगमेगं जोयणसयं मूले विक्खंभेणं प० ॥१७८॥
 चंदप्पमे णं अरहा दिवड्डं धणुसयं उड्डं उच्चत्तेणं होत्था । आरणे कप्पे दिवड्डं
 विमाणावाससयं प० । एवं अञ्चुए वि ॥ १७९ ॥ सुपासे णं अरहा दो धणुसया
 उड्डं उच्चत्तेणं होत्था । सव्वे वि णं महाहिमवंतरुप्पीवासहरपव्वया दो दो जोयण-
 सयाइं उड्डं उच्चत्तेणं प० दो दो गाउयसयाइं उव्वेहेणं प० । जंवुद्दीवे णं दीवे दो
 कंचणपव्वयसया प० ॥ १८० ॥ पउमप्पमे णं अरहा अड्ढाइज्जाइं धणुसयाइं उड्डं
 उच्चत्तेणं होत्था । असुरकुमाराणं देवाणं पासायवडिंसगा अड्ढाइज्जाइं जोयणसयाइं
 उड्डं उच्चत्तेणं प० ॥ १८१ ॥ सुमई णं अरहा तिण्णि धणुसयाइं उड्डं उच्चत्तेणं
 होत्था । अरिट्ठनेमी णं अरहा तिण्णि वाससयाइं कुमारवासमज्झे वसित्ता मुंडे भवित्ता
 जाव पव्वइए । वेमाणियाणं देवाणं विमाणपागारा तिण्णि तिण्णि जोयणसयाइं उड्डं
 उच्चत्तेणं प० । समणस्स भगवओ महावीरस्स तिन्नि सयाणि चोइसपुव्वीणं होत्था ।
 पंचधणुसइयस्स णं अंतिमसारीरियस्स सिद्धिगयस्स सातिरेगाणि तिण्णि धणुसयाणि
 जीवप्पदेसोगाहणा प० ॥१८२॥ पासस्स णं अरहओ पुरिसादाणीयस्स अड्ढुट्ठसयाइं
 चोइसपुव्वीणं संपया होत्था । अभिनंदणे णं अरहा अड्ढुट्ठाइं धणुसयाइं उड्डं
 उच्चत्तेणं होत्था ॥ १८३ ॥ संभवे णं अरहा चत्तारि धणुसयाइं उड्डं उच्चत्तेणं
 होत्था । सव्वे वि णं णिसढनीलवंता वासहरपव्वया चत्तारि चत्तारि जोयणसयाइं
 उड्डं उच्चत्तेणं चत्तारि चत्तारि गाउयसयाइं उव्वेहेणं प० । सव्वे वि णं वक्खार-
 पव्वया णिसढनीलवंतवासहरपव्वयए णं चत्तारि चत्तारि जोयणसयाइं उड्डं उच्चत्तेणं
 चत्तारि चत्तारि गाउयसयाइं उव्वेहेणं पञ्चत्ते । आणयपाणएसु दोसु कप्पेसु चत्तारि
 विमाणसया प० । समणस्स णं भगवओ महावीरस्स चत्तारि सया वाईणं सदेव-
 मणुयासुरंमि लोगंमि वाए अपराजियाणं उक्कोसिया वाइसंपया होत्था ॥ १८४ ॥
 अजिए णं अरहा अद्धपंचमाइं धणुसयाइं उड्डं उच्चत्तेणं होत्था । सगरे णं राया
 चाउरंतचक्कवट्ठी अद्धपंचमाइं धणुसयाइं उड्डं उच्चत्तेणं होत्था ॥ १८५ ॥ सव्वे वि
 णं वक्खारपव्वया सीआसीओआओ महानईओ मंदरपव्वयंतेणं पंच पंच जोयण-
 सयाइं उड्डं उच्चत्तेणं पंच पंच गाउयसयाइं उव्वेहेणं प० । सव्वे वि णं वासहरकूडा
 पंच पंच जोयणसयाइं उड्डं उच्चत्तेणं होत्था, मूले पंच पंच जोयणसयाइं विक्खंभेणं
 प० । उसभे णं अरहा कोसलिए पंच धणुसयाइं उड्डं उच्चत्तेणं होत्था । भरहे णं
 राया चाउरंतचक्कवट्ठी पंच धणुसयाइं उड्डं उच्चत्तेणं होत्था । सोमणसगंधमादण-
 विज्जुप्पभमालवंताणं वक्खारपव्वयाणं मंदरपव्वयंतेणं पंच पंच जोयणसयाइं उड्डं

उच्चतेणं पंच पंच गाउयसयाइं उव्वेहेणं प० । सव्वे वि णं वक्खारपव्वयकूडा
हरिहरिस्सहकूडवज्जा पंच पंच जोयणसयाइं उड्डं उच्चतेणं मूले पंच पंच जोयणसयाइं
आयामविकखंभेणं प० । सव्वे वि णं नंदणकूडा वलकूडवज्जा पंच पंच जोयण-
सयाइं उड्डं उच्चतेणं मूले पंच पंच जोयणसयाइं आयामविकखंभेणं प० । सोहम्मी-
साणेसु कप्पेसु विमाणा पंच पंच जोयणसयाइं उड्डं उच्चतेणं प० ॥ १८६ ॥ सण-
कुमारमाहिंदेसु कप्पेसु विमाणा छ जोयणसयाइं उड्डं उच्चतेणं प० । चुल्लहिमवंत-
कूडस्स उवरिल्लाओ चरमंताओ चुल्लहिमवंतस्स वासहरपव्वयस्स समधरणितले एस
णं छ जोयणसयाइं अवाहाए अंतरे पन्नत्ते । एवं सिहरीकूडस्स वि । पासस्स णं
अरहओ छ सया वाईणं सदेवमणुयासुरे लोए वाए अपराजियाणं उक्कोसिया वाईसं-
पया होत्था । अभिचंदे णं कुलगरे छ धणुसयाइं उड्डं उच्चतेणं होत्था । वासुपुज्जे णं
अरहा छहिं पुरिससएहिं सद्धि मुंडे भवित्ता अगाराओ अणगारियं पव्वइए ॥ १८७ ॥
वंभलंतएसु कप्पेसु विमाणा सत्त सत्त जोयणसयाइं उड्डं उच्चतेणं प० । समणस्स णं
भगवओ महावीरस्स सत्त जिणसया होत्था । समणस्स भगवओ महावीरस्स सत्त
वेउव्वियसया होत्था । अरिद्धनेमी णं अरहा सत्त वाससयाइं देसूणाइं केवलपरियागं
पाउणित्ता सिद्धे बुद्धे जाव प्पहीणे । महाहिमवंतकूडस्स णं उवरिल्लाओ चरमंताओ
महाहिमवंतस्स वासहरपव्वयस्स समधरणितले एस णं सत्त जोयणसयाइं अवाहाए
अंतरे पन्नत्ते । एवं रुपिकूडस्स वि ॥ १८८ ॥ महासुक्कसहस्सारेसु दोसु कप्पेसु
विमाणा अट्ठ जोयणसयाइं उड्डं उच्चतेणं प० । इमीसे णं रयणप्पभाए पुढवीए पढमे
कंडे अट्ठसु जोयणसएसु वाणमंतरभोमेज्जविहारा प० । समणस्स णं भगवओ महा-
वीरस्स अट्ठसया अणुत्तरोववाइयाणं देवाणं गइक्कलाणाणं ठिइक्कलाणाणं आगमेसि-
भदाणं उक्कोसिया अणुत्तरोववाइयसंपया होत्था । इमीसे णं रयणप्पभाए पुढवीए
वहुसमरमणिज्जाओ भूमिभागाओ अट्ठहिं जोयणसएहिं सूरिए चारं चरइ । अरहओ
णं अरिद्धनेमिस्स अट्ठ सयाइं वाईणं सदेवमणुयासुरंमि लोगंमि वाए अपराजियाणं
उक्कोसिया वाईसंपया होत्था ॥ १८९ ॥ आणयपाणयआरणअच्चएसु कप्पेसु विमाणा
नव नव जोयणसयाइं उड्डं उच्चतेणं प० । निसडकूडस्स णं उवरिल्लाओ सिहरतलाओ
णिसडस्स वासहरपव्वयस्स समे धरणितले एस णं नव जोयणसयाइं अवाहाए अंतरे
पन्नत्ते । एवं नीलवंतकूडस्स वि । विमलवाहणे णं कुलगरे णं नव धणुसयाइं उड्डं
उच्चतेणं होत्था । इमीसे णं रयणप्पभाए बहुसमरमणिज्जाओ भूमिभागाओ नवहिं
जोयणसएहिं सव्वुवरिमे ताराखुवे चारं चरइ । निसडस्स णं वासहरपव्वयस्स उव-
रिल्लाओ सिहरतलाओ इमीसे णं रयणप्पभाए पुढवीए पढमस्स कंडस्स बहुमज्झदे-

सभाए एस णं नव जोयणसयाइं अवाहाए अंतरे पन्नते । एवं नीलवंतस्स वि
 ॥ १९० ॥ सव्वे वि णं गेवेज्जविमाणे दस दस जोयणसयाइं उड्डं उच्चत्तेणं पन्नते ।
 सव्वे वि णं जमगपव्वया दस दस जोयणसयाइं उड्डं उच्चत्तेणं प०, दस दस गाउ-
 यसयाइं उव्वेहेणं प०, मूले दस दस जोयणसयाइं आयामविकखंभेणं प० । एवं
 चित्तविचित्तकूडा वि भाणियव्वा । सव्वे वि णं वट्टवेयड्डपव्वया दस दस जोयण-
 सयाइं उड्डं उच्चत्तेणं प०, दस दस गाउयसयाइं उव्वेहेणं प० मूले दस दस जोय-
 णसयाइं विकखंभेणं प०, सव्वत्थ समा पल्लगसंठाणसंठिया प० । सव्वे वि णं हरि-
 हरिस्सहकूडा वक्खारकूडवज्जा दस दस जोयणसयाइं उड्डं उच्चत्तेणं प०, मूले दस दस
 जोयणसयाइं विकखंभेणं प० । एवं बलकूडा वि नंदणकूडवज्जा । अरहा वि अरिद्व-
 नेमी दस वाससयाइं सव्वाउयं पालइत्ता सिद्धे बुद्धे जाव सव्वदुक्खप्पहीणे । पासस्स
 णं अरहओ दस सयाइं जिणाणं होत्था । पासस्स णं अरहओ दस अंतेवासीसयाइं
 कालगयाइं जाव सव्वदुक्खप्पहीणाइं । पउमद्दहपुंडरीयद्दहा य दस दस जोयणस-
 याइं आयामेणं प० ॥ १९१ ॥ अणुत्तरोववाइयाणं देवाणं विमाणा एकारस जोय-
 णसयाइं उड्डं उच्चत्तेणं प० । पासस्स णं अरहओ इकारस सयाइं वेउव्वियाणं होत्था
 ॥ १९२ ॥ महापउममहापुंडरीयद्दहाणं दो दो जोयणसहस्साइं आयामेणं प० ॥ १९३ ॥
 इमीसे णं रयणप्पभाए पुढवीए वइरकंडस्स उवरिल्लाओ चरमंताओ लोहियक्ख-
 कंडस्स हेट्ठिल्ले चरमंते एस णं तिन्नि जोयणसहस्साइं अवाहाए अंतरे प० ॥ १९४ ॥
 तिगिच्छिकेसरिदहाणं चत्तारि चत्तारि जोयणसहस्साइं आयामेणं पन्नताइं ॥ १९५ ॥
 धरणितले मंदरस्स णं पव्वयस्स बहुमज्झदेसभाए रुयगनाभीओ चउदिसिं पंच पंच
 जोयणसहस्साइं अवाहाए अंतरे मंदरपव्वए पन्नते ॥ १९६ ॥ सहस्सारे णं कप्पे
 छ विमाणावाससहस्सा प० ॥ १९७ ॥ इमीसे णं रयणप्पभाए पुढवीए रयणस्स
 कंडस्स उवरिल्लाओ चरमंताओ पुलगस्स कंडस्स हेट्ठिल्ले चरमंते एस णं सत्त जोय-
 णसहस्साइं अवाहाए अंतरे पन्नते ॥ १९८ ॥ हरिवासरस्सयाणं वासा अट्ठ जोय-
 णसहस्साइं साइरेगाइं वित्थरेणं प० ॥ १९९ ॥ दाहिणद्धभरहस्स णं जीवा पाईण-
 पढीणायया दुहओ समुद्दं पुट्ठा नव जोयणसहस्साइं आयामेणं प० । अजियस्स
 णं अरहओ साइरेगाइं नव ओहिनाणसहस्साइं होत्था, मंदरे णं पव्वए धरणि-
 तले दस जोयणसहस्साइं विकखंभेणं पन्नते, जंवूदीवे णं दीवे एगं जोयण-
 सयसहस्सं आयामविकखंभेणं प०, लवणे णं समुद्दे दो जोयणसयसहस्साइं
 चक्कवालविकखंभेणं प० ॥ २०० ॥ पासस्स णं अरहओ तिन्नि सयसाह-
 स्सीओ सत्तावीसं च सहस्साइं उक्कोसिया सावियासंपया होत्था ॥ २०१ ॥ धाय-

उच्चत्तेणं पंच पंच गाउयसयाइं उव्वेहेणं प० । सव्वे वि णं वक्खारपव्वयकूडा
हरिहरिस्सहकूडवज्जा पंच पंच जोयणसयाइं उव्वं उच्चत्तेणं मूले पंच पंच जोयणसयाइं
आयामविकखंभेणं प० । सव्वे वि णं नंदणकूडा वलकूडवज्जा पंच पंच जोयण-
सयाइं उव्वं उच्चत्तेणं मूले पंच पंच जोयणसयाइं आयामविकखंभेणं प० । सोहम्मि-
साणेसु कप्पेसु विमाणा पंच पंच जोयणसयाइं उव्वं उच्चत्तेणं प० ॥ १८६ ॥ सणं-
कुमारमाहिंदेसु कप्पेसु विमाणा छ जोयणसयाइं उव्वं उच्चत्तेणं प० । चुल्लहिमवंत-
कूडस्स उवरिल्लाओ चरमंताओ चुल्लहिमवंतस्स वासहरपव्वयस्स समधरणितले एस
णं छ जोयणसयाइं अवाहाए अंतरे पन्नत्ते । एवं सिहरीकूडस्स वि । पासस्स णं
अरहओ छ सया वाईणं सदेवमणुयासुरे लोए वाए अपराजियाणं उक्कोसिया वाईसं-
पया होत्था । अभिचंदे णं कुलगरे छ धणुसयाइं उव्वं उच्चत्तेणं होत्था । वासुपुजे णं
अरहा छहिं पुरिससएहिं सद्धि मुंडे भवित्ता अगाराओ अणगारियं पव्वइए ॥ १८७ ॥
वंमलंतएसु कप्पेसु विमाणा सत्त सत्त जोयणसयाइं उव्वं उच्चत्तेणं प० । समणस्स णं
भगवओ महावीरस्स सत्त जिणसया होत्था । समणस्स भगवओ महावीरस्स सत्त
वेउव्वियसया होत्था । अरिट्टनेमी णं अरहा सत्त वाससयाइं देसूणाइं केवलपरियागं
पाउणिता सिद्धे बुद्धे जाव प्पहीणे । महाहिमवंतकूडस्स णं उवरिल्लाओ चरमंताओ
महाहिमवंतस्स वासहरपव्वयस्स समधरणितले एस णं सत्त जोयणसयाइं अवाहाए
अंतरे पन्नत्ते । एवं रुप्पिकूडस्स वि ॥ १८८ ॥ महासुक्कसहस्सारेसु दोसु कप्पेसु
विमाणा अट्ट जोयणसयाइं उव्वं उच्चत्तेणं प० । इमीसे णं रयणप्पभाए पुढवीए पढमे
कंडे अट्टसु जोयणसएसु वाणमंतरभोमेज्जविहारा प० । समणस्स णं भगवओ महा-
वीरस्स अट्टसया अणुत्तरोववाइयाणं देवाणं गइक्कलाणाणं ठिइक्कलाणाणं आगमेसि-
भद्दाणं उक्कोसिया अणुत्तरोववाइयसंपया होत्था । इमीसे णं रयणप्पभाए पुढवीए
बहुससरमणिज्जाओ भूमिभागाओ अट्टहिं जोयणसएहिं सूरिए चारं चरइ । अरहओ
णं अरिट्टनेमिस्स अट्ट सयाइं वाईणं सदेवमणुयासुरंमि लोगंमि वाए अपराजियाणं
उक्कोसिया वाईसंपया होत्था ॥ १८९ ॥ आणयपाणयआरणअच्चुएसु कप्पेसु विमाणा
नव नव जोयणसयाइं उव्वं उच्चत्तेणं प० । निसढकूडस्स णं उवरिल्लाओ सिहरतलाओ
णिसढस्स वासहरपव्वयस्स समे धरणितले एस णं नव जोयणसयाइं अवाहाए अंतरे
पन्नत्ते । एवं नीलवंतकूडस्स वि । विमलवाहणे णं कुलगरे णं नव धणुसयाइं उव्वं
उच्चत्तेणं होत्था । इमीसे णं रयणप्पभाए बहुससरमणिज्जाओ भूमिभागाओ नवहिं
जोयणसएहिं सव्वुवरिमे ताराव्वे चारं चरइ । निसढस्स णं वासहरपव्वयस्स उव-
रिल्लाओ सिहरतलाओ इमीसे णं रयणप्पभाए पुढवीए पढमस्स कंडस्स बहुमज्झदे-

सभाए एन णं नव जौयणनयाइं अवाहाए अंतरे पञ्चते । एवं नीलवन्तस्स वि
 ॥ १९० ॥ नव्वे वि णं मेवेज्जविमाणे दस दस जौयणनयाइं उट्ठं उच्चतेणं पञ्चते ।
 सव्वे वि णं जमगपव्वया दस दस जौयणनयाइं उट्ठं उच्चतेणं प०, दस दस नाउ-
 यसयाइं उच्चतेणं प०, मूले दस दस जौयणनयाइं आगमविक्खंभेणं प० । एवं
 चित्तविचित्तकूडा वि भाणियच्चा । सव्वे वि णं वट्ठेयदुपव्वया दस दस जौयण-
 नयाइं उट्ठं उच्चतेणं प०, दस दस नाउयसयाइं उच्चतेणं प० मूले दस दस जौय-
 णनयाइं विक्खंभेणं प०, सव्वत्थ गमा पत्तननंद्राणत्तुठिया प० । सव्वे वि णं हग्गि-
 हरिस्तहवृत्ता वक्खारकूटवज्जा दस दस जौयणनयाइं उट्ठं उच्चतेणं प०, मूले दस दस
 जौयणनयाइं विक्खंभेणं प० । एवं वल्लवृत्ता वि मंदणकूटवज्जा । अरहा वि अरिद्ध-
 नेमी दस वागसयाइं सव्वाउयं पालइत्ता तिदे सुद्धे जाव नव्वदुयगप्पहीणे । पानस्स
 णं अरहओ दस सयाइं जिणाणं होत्था । पानस्स णं अरहओ दस अंतवासीनयाइं
 कालगयाइं जाव सव्वदुक्खप्पहीणाइं । पउमद्दहपुंढरीयद्दहा य दस दस जौयणन-
 याइं आयामेणं प० ॥ १९१ ॥ अणुत्तरोववाइयाणं ठेवाणं विमाणा एक्कारस जौय-
 णनयाइं उट्ठं उच्चतेणं प० । पानस्स णं अरहओ एक्कारस नयाइं वेउच्चियाणं होत्था
 ॥ १९२ ॥ महापउममहापुंढरीयद्दहाणं दो दो जौयणनहरत्ताइं आयामेणं प० ॥ १९३ ॥
 इमीसे णं रयणप्पभाए पुढवीए वदरवंउस्स उवरिद्धाओ चरमंताओ लोहियक्ख-
 कंडस्स हेट्ठिणे चरमंते एस णं तिन्नि जौयणसहस्साइं अवाहाए अंतरे प० ॥ १९४ ॥
 तिगिन्निच्छकेसरिदहाणं चत्तारि चत्तारि जौयणसहस्साइं आयामेणं पञ्चत्ताइं ॥ १९५ ॥
 धरणितले मंदरस्स णं पव्वयस्स बहुमज्जदेसभाए रयगनाभीओ चउदिसिं पंच पंच
 जौयणसहस्साइं अवाहाए अंतरे मंदरपव्वए पञ्चते ॥ १९६ ॥ सहस्सारे णं कप्पे
 छ विमाणावाससहस्सा प० ॥ १९७ ॥ इमीसे णं रयणप्पभाए पुढवीए रयणस्स
 कंडस्स उवरिद्धाओ चरमंताओ पुलगस्स कंडस्स हेट्ठिणे चरमंते एस णं सत्त जौय-
 णसहस्साइं अवाहाए अंतरे पञ्चते ॥ १९८ ॥ हरिवासरम्मयाणं वासा अट्ठ जौय-
 णसहस्साइं साइरेगाइं वित्थरेणं प० ॥ १९९ ॥ दाहिणद्धुभरहस्स णं जीवा पाईण-
 पहीणायया दुहओ समुद्धं पुट्ठा नव जौयणसहस्साइं आयामेणं प० । अजियस्स
 णं अरहओ साइरेगाइं नव ओहिनाणसहस्साइं होत्था, मंदरे णं पव्वए धरणि-
 तले दस जौयणसहस्साइं विक्खंभेणं पञ्चते, जंवूदीवे णं दीवे एगं जौयण-
 सयसहस्सं आयामविक्खंभेणं प०, लवणे णं समुद्धे दो जौयणसयसहस्साइं
 चक्कवालविक्खंभेणं प० ॥ २०० ॥ पासस्स णं अरहओ तिन्नि सयसाह-
 स्सीओ सत्तावीसं च सहस्साइं उक्कोसिया सावियासंपया होत्था ॥ २०१ ॥ धाय-

इखंडे णं दीवे चत्तारि जोयणसयसहस्साइं चक्कवालवैक्खंभेणं पन्नत्ते ॥ २०२ ॥
 लवणस्स णं समुद्दस्स पुरच्छिमिल्लाओ चरमंताओ पच्चच्छिमिल्ले चरमंते एस णं पंच
 जोयणसयसहस्साइं अवाहाए अंतरे पन्नत्ते ॥ २०३ ॥ भरहे णं राया चाउरंतचक्क-
 वट्ठी छ पुव्वसयसहस्साइं रायमज्झे वसित्ता मुंडे भवित्ता अगाराओ अणगारियं
 पव्वइए ॥ २०४ ॥ जंबूदीवस्स णं दीवस्स पुरच्छिमिल्लाओ वेइयंताओ धायइखंड-
 चक्कवालस्स पच्चच्छिमिल्ले चरमंते एस णं सत्त जोयणसयसहस्साइं अवाहाए अंतरे
 पन्नत्ते ॥ २०५ ॥ माहिंदे णं कप्पे अट्ठ विमाणावाससयसहस्साइं पन्नत्ताइं ॥ २०६ ॥
 अजियस्स णं अरहओ साइरेगाइं नव ओहिनाणिसहस्साइं होत्था ॥ २०७ ॥
 पुरिससीहे णं वासुदेवे दस वाससयसहस्साइं सव्वाउयं पालइत्ता पंचमाए पुढवीए
 नेरइएसु नेरइयत्ताए उववन्ने ॥ २०८ ॥ समणे भगवं महावीरे तित्थगरभवग्गहणाओ
 छट्ठे पोट्टिलभवग्गहणे एगं वासकोडि सामन्नपरियागं पाउणित्ता सहस्सारे कप्पे
 सव्वट्ठविमाणे देवत्ताए उववन्ने ॥ २०९ ॥ उसभसिरिस्स भगवओ चरिमस्स य
 महावीरवद्धमाणस्स एगा सागरोवमकोडाकोडी अवाहाए अंतरे पन्नत्ते ॥ २१० ॥
 दुवालसंगे गणिपिडगे पन्नत्ते, तं जहा-आयारे, सूयगडे, ठाणे, समवाए,
 विवाहपन्नत्ती, णायाधम्मकहाओ, उवासगदसाओ, अंतगडदसाओ, अणुत्तरोव-
 चाइयदसाओ, पण्हावागरणाइं, विवागसुए, दिट्ठिवाए । से किं तं आयारे ?
 आयारे णं समणाणं निग्गंथाणं आयारगोयरविणयवेणइयट्ठाणगमणचंकमणपमाण-
 जोगजुंजणभासासमितिगुत्तीसेज्जोवहिभत्तपाणउग्गमउप्पायणएसणाविसोहिसुद्धासुद्ध-
 ष्गहणवयणियमतवोवहाणसुप्पसत्थमाहिज्जइ । से समासओ पंचविहे पन्नत्ते, तं
 जहा-णाणायारे, दंसणायारे, चरित्तायारे, तवायारे, विरियायारे । आयारस्स णं
 परित्ता वायणा, संखेज्जा अणुओगदारा, संखेज्जाओ पडिवत्तीओ, संखेज्जा बेढा,
 संखेज्जा सिलोगा, संखेज्जाओ निज्जुत्तीओ । से णं अंगट्ठयाए पढमे अंगे दो सुय-
 क्खंधा, पणवीसं अज्झयणा, पंचासीइं उद्देसणकाला, पंचासीइं समुद्देसणकाला,
 अट्ठारस पदसहस्साइं पदग्गेणं, संखेज्जा अक्खरा, अणंता गमा, अणंता पज्जवा,
 परित्ता तसा, अणंता थावरा, सासया कडा निवद्धा णिकाइया जिणपण्णत्ता भावा
 आघविज्जंति पण्णविज्जंति परुविज्जंति दंसिज्जंति निदंसिज्जंति उवदंसिज्जंति । से एवं
 णाया एवं विण्णाय । एवं चरणकरणपरुवणया आघविज्जंति पण्णविज्जंति परुविज्जंति
 दंसिज्जंति निदंसिज्जंति उवदंसिज्जंति । से तं आयारे ॥ २११ ॥ से किं तं सूअगडे ?
 सूअगडे णं ससमया सूइज्जंति, परसमया सूइज्जंति, ससमयपरसमया सूइज्जंति,
 जीवा सूइज्जंति, अजीवा सूइज्जंति, जीवाजीवा सूइज्जंति, लोगो सूइज्जति, अलोगो

सूइज्जति, लोगालोगो सूइज्जति । सूअगडे णं जीवाजीवपुण्णपावासवसंवरनिज्जरण-
 वंधमोक्खावसाणा पयत्था सूइज्जंति । समणाणं अचिरकालपव्वइयाणं कुसमयमोह-
 मोहमइमोहियाणं संदेहजायसहजवुद्धिपरिणामसंसइयाणं पावकरमलिनमइगुणविसोह-
 णत्थं असीअस्स किरियावाइयसयस्स चउरासीए अकिरियवाइणं सत्तट्ठीए अण्णा-
 णियवाइणं वत्तीसाए वेणइयवाइणं तिण्हं तेवट्ठीणं अण्णादिट्ठियसयाणं वृहं किच्चा
 ससमए ठाविज्जति णाणदिट्ठंतवयणणिस्सारं नुट्टु दरिसयंता विविहवित्थराणुगमपरम-
 सव्भावगुणविसिद्धा मोक्खपहोयारगा उदारा अण्णाणतमंधकारदुग्गेनु दीवभूआ
 सोवाणा चेव सिद्धिसुगइग्गिहुत्तमस्स णिक्खोभनिप्पकंपा नुत्तत्था । नुयगडस्स णं
 परित्ता वायणा संखेज्जा अणुओगदारा संखेज्जाओ पडिवत्तीओ संखेज्जा वेढा संखेज्जा
 सिलोगा संखेज्जाओ निज्जुत्तीओ । से णं अंगट्ठयाए दोच्चे अंगे दो नुयक्खंधा तेवीसं
 अज्झयणा तेत्तीसं उद्देसणकाला तेत्तीसं समुद्देसणकाला छत्तीसं पदसहस्साइं पय-
 ग्गेणं पन्नत्ताइं, संखेज्जा अक्खरा अणंता गमा अणंता पज्जवा परित्ता तसा अणंता
 थावरा सासया कडा णिवद्धा णिकाइया जिणपणत्ता भावा आघविज्जंति पण्णविज्जंति
 परूविज्जंति दंसिज्जंति निदंसिज्जंति उवदंसिज्जंति । से एवं आया एवं णाया एवं
 विण्णाया एवं चरणकरणपरूवणया आघविज्जंति पण्णविज्जंति परूविज्जंति दंसिज्जंति
 निदंसिज्जंति उवदंसिज्जंति । सेत्तं सूअगडे ॥ २१२ ॥ से किं तं ठाणे ? ठाणे णं
 ससमया ठाविज्जंति, परसमया ठाविज्जंति, ससमयपरसमया ठाविज्जंति, जीवा
 ठाविज्जंति, अजीवा ठाविज्जंति, जीवाजीवा ठाविज्जंति, लोगा ठाविज्जंति, अलोगा
 ठाविज्जंति, लोगालोगा ठाविज्जंति, ठाणेणं दव्वगुणखेत्तकालपज्जवपयत्थाणं-सेला
 सलिला य समुद्दा, सूरभवणविमाणआगरणदीओ । णिहिओ पुरिसज्जाया, सरा य
 गोत्ता य जोइसंचाला ॥ १ ॥ एक्कविहवत्तव्वयं दुविह जाव दसविहवत्तव्वयं, जीवाण
 पोगगलाण य लोगट्ठाइं च णं परूवणया आघविज्जंति । ठाणस्स णं परित्ता वायणा,
 संखेज्जा अणुओगदारा, संखेज्जाओ पडिवत्तीओ, संखेज्जा वेढा, संखेज्जा सिलोगा,
 संखेज्जाओ संगहणीओ । से णं अंगट्ठयाए तइए अंगे, एगे नुयक्खंधे, दस अज्झ-
 यणा, एक्कवीसं उद्देसणकाला, (एक्कवीसं समुद्देसणकाला), वावत्तरिं पयसहस्साइं
 पयग्गेणं पन्नत्ताइं । संखेज्जा अक्खरा, (अणंता गमा) अणंता पज्जवा, परित्ता
 तसा, अणंता थावरा, सासया कडा णिवद्धा णिकाइया जिणपन्नत्ता भावा आघवि-
 ज्जंति पण्णविज्जंति परूविज्जंति (दंसिज्जंति) निदंसिज्जंति उवदंसिज्जंति । से एवं
 आया एवं णाया एवं विण्णाया एवं चरणकरणपरूवणया आघविज्जंति । से तं ठाणे
 ॥ २१३ ॥ से किं तं समवाए ? समवाए णं ससमया सूइज्जंति, परसमया सूइज्जंति,

ससमयपरसमया सूइज्जंति, जाव लोगालोगा सूइज्जंति । समवाए णं एकाइयाणं एगट्ठाणं एगुत्तरियपरिवुद्धीए, दुवालसंगरस य गणिपिडगस्स पल्लवग्गे सम-
 णुगाइज्जइ ठाणगसयस्स, वारसविहवित्थरस्स सुयणाणस्स जगजीवहियरस भगवओ
 समासेणं समोयारे आहिज्जति । तत्थ य णाणाविहप्पगारा जीवाजीवा य वण्णिया
 वित्थरेण, अवरे वि अ बहुविहा विसेसा नरगतिरियमणुअसुरगणाणं आहास्ससास-
 लेसाआवाससंखआययप्पमाणउववायचवणओगाहणोवहिवेयणविहाणउवओगजोगइं-
 दियकसाय, विविहा य जीवजोणी, विक्खंभुस्सेहपरिरयप्पमाणं विहिविसेसा य मंद-
 रादीणं महीधराणं, कुलगरतित्थगरगणहराणं सम्मत्तभरहाहिवाण चक्कीणं चेव चक्क-
 हरहलहराण य, वासाण य निगमा य समाए । एए अण्णे य एवमाइ एत्थ वित्थ-
 रेणं अत्था समाहिज्जंति । समवायस्स णं परित्ता वायणा जाव से णं अंगट्ठयाए
 चउत्थे अंगे एगे अज्झयणे एगे सुयक्खंधे एगे उद्देसणकाले एगे समुद्देसणकाले एगे
 चउयाले पदसतसहस्से पदग्गेणं पन्नत्ते । संखेज्जाणि अक्खराणि जाव चरणकरण-
 पल्लवणया आघविज्जंति । से त्तं समवाए ॥ २१४ ॥ से किं तं वियाहे ? वियाहेणं
 ससमया विआहिज्जंति परसमया विआहिज्जंति ससमयपरसमया विआहिज्जंति, जीवा
 विआहिज्जंति अजीवा विआहिज्जंति जीवाजीवा विआहिज्जंति, लोगे विआहिज्जइ
 अलोगे विआहिज्जइ लोगालोगे विआहिज्जइ । वियाहेणं नाणाविहसुरनरिंदरायरिसि-
 विविहसंसइअपुच्छियाणं जिणेणं वित्थरेण भासियाणं दव्वगुणखेत्तकालपज्जवपदेस-
 परिणामजहच्छियभावअणुगमनिक्खेवणयप्पमाणसुनिउणोवक्कमविविहप्पकारपगडप-
 यासियाणं लोगालोगपयासियाणं संसारसमुद्दसंदउत्तरणसमत्थाणं सुरवइसंपूजियाणं
 अवियजणपयहिययाभिनंदियाणं तमरयविद्धंसणाणं सुदिट्ठदीवभूयईहामतिबुद्धिवद्ध-
 णाणं छत्तीससहस्समणूयाणं वागरणाणं दंसणाओ सुयत्थवहुविहप्पगारा सीस-
 हियत्था य गुणमहत्था । वियाहस्स णं परित्ता वायणा संखेज्जा अणुओगदारा संखे-
 ज्जाओ पडिवत्तीओ संखेज्जा वेढा संखेज्जा सिलोगा संखेज्जाओ निज्जुत्तीओ । से णं
 अंगट्ठयाए पंचमे अंगे एगे सुयक्खंधे एगे साइरेगे अज्झयणसते दस उद्देसगसहस्साइं
 दस समुद्देसगसहस्साइं छत्तीसं वागरणसहस्साइं चउरासीईं पयसहस्साइं पयग्गेणं
 प० । संखेज्जाइं अक्खराइं अणंता गमा अणंता पज्जवा परित्ता तसा अणंता थावरा
 सासया कडा णिवद्धा णिकाइया जिणपण्णत्ता भावा आघविज्जंति पण्णविज्जंति पल्लविज्जं-
 ति दंसिज्जंति निदंसिज्जंति उवदंसिज्जंति । से एवं आया से एवं णाया से एवं विण्णाया
 एवं चरणकरणपल्लवणया आघविज्जंति । से त्तं वियाहे ॥ से किं तं णायाधम्मकहाओ ?
 णायाधम्मकहासु णं णायाणं णगराईं उज्जाणाईं वणखंडा रायाणो अम्मापियरो

समोत्तरणां धम्मायरिया धम्मज्जाओ इहलोइयपरलोइअइद्धीविसेसा भोगपरिचाया
 पव्वजाओ सुयपरिगहा तवोवहाणां परियाणा संलेहणाओ भत्तपच्चक्खाणां पाओ-
 वगमणां देवलोगगमणां सुकुलपजायायां पुणवोहिलाभा अंतकिरियाओ य आघ-
 विज्जंति जाव नायाधम्मकहानु णं पव्वइयाणं विणयकरणजिणसाभिसासणवरे संज-
 मपइण्णपालगधिइमइववसायदुव्वलाणं तवनियमतवोवहाणरणदुद्धरभरभगयणिस्स-
 हयणिसिद्धाणं घोरपरीसहपराजियाणं सहपारद्धरुद्धसिद्धालयमग्गनिग्गयाणं विसयसुह-
 तुच्छआनावसदोसमुच्छियाणं विराहियचरित्तनाणदंसणजइगुणविविहप्पयारनिससार-
 सुन्नयाणं संसारअपारदुक्खदुग्गइभवविविहपरंपरापवंचा । धीराण य जियपरिसहक-
 सायसेण्णधिइधणियसंजमउच्छाहनिच्छियाणं आराहियनाणदंसणचरित्तजोगनिससल-
 सुद्धसिद्धालयमग्गमभिमुहाणं सुरभवणविमाणसुक्खां अणोवमां भुत्तूण चिरं च
 भोगभोगाणि ताणि दिव्वाणि महरिहाणि ततो य कालकमत्तुयाणं जह य पुणो लद्ध-
 सिद्धिमग्गाणं अंतकिरिया । चलियाण य सदेवमाणुस्सधीरकरणकारणानि बोधण-
 अणुसासणाणि गुणदोसदरिसणाणि दिट्ठंते पच्चये य सोऊण लोगमुणिणो जहट्टिय-
 सासणम्मि जरमरणनासणकरे आराहिसंजमा य सुरलोगपडिनियत्ता ओवेंति जह
 सासयं सिवं सव्वदुक्खमोक्खं । एए अण्णे य एवमाइअत्था वित्थरेण य । णाया-
 धम्मकहासु णं परित्ता वायणा संखेज्जा अणुओगदारा जाव संखेज्जाओ संगहणीओ ।
 से णं अंगट्टयाए छट्ठे अगे दो सुअक्खंधा एगूणवीसं अज्जयणा, ते समासओ
 दुविहा पन्नत्ता, तं जहा-चरित्ता य कप्पिया य, दस धम्मकहाणं वग्गा, तत्थ णं
 एगमेगाए धम्मकहाए पंच पंच अक्खाइयासयाइं एगमेगाए अक्खाइयाए पंच
 पंच उवक्खाइयासयाइं, एगमेगाए उवक्खाइयाए पंच पंच अक्खाइयउवक्खा-
 इयासयाइं, एवमेव सपुव्वावरेणं अद्दुट्ठाओ अक्खाइयाकोडीओ भवंतीति मक्खा-
 याओ, एगूणतीसं उद्देसणकाला एगूणतीसं समुद्देसणकाला संखेज्जाइं पयसह-
 स्साइं पयग्गेणं पन्नत्ता, संखेज्जा अक्खरा जाव चरणकरणपरुवणया आघविज्जंति ।
 से तं णायाधम्मकहाओ ॥ २१५ ॥ से किं तं उवासगदसाओ ? उवास-
 गदसासु णं उवासयाणं णगरां उज्जाणां वणखंडा रायाणो अम्मापियरो समोस-
 र्णां धम्मायरिया धम्मकहाओ इहलोइयपरलोइयइद्धिविसेसा उवासयाणं सीलव्व-
 यवेरमणगुणपच्चक्खाणपोसहोववासपडिवज्जणयाओ सुयपरिगहा तवोवहाणा पडि-
 माओ उवसग्गा संलेहणाओ भत्तपच्चक्खाणां पाओवगमणां देवलोगगमणां सुकु-
 लपच्चायाया पुणो वोहिलाभा अंतकिरियाओ आघविज्जंति । उवासगदसासु णं उवा-
 सयाणं रिद्धिविसेसा परिसा वित्थरधम्मसवणाणि वोहिलाभअभिगमसम्मत्तविसुद्धया

थिरत्तं मूलगुणउत्तरगुणाइयारा ठिईविसेसा य बहुविसेसा पडिमाभिग्गहग्गहणपालणा
उवसग्गाहियासणा णिखसग्गा य तवा य विचित्ता सीलव्वयगुणवेरमणपच्चक्खाण-
पोसहोववासा अपच्छिममारणंतिया य संलेहणाओसणाहिं अप्पाणं जह य भावइत्ता
वहूणि भत्ताणि अणसणाए य छेअइत्ता उववण्णा कप्पवरविमाणुत्तमेसु जह अणुभ-
वंति सुरवरविमाणवरपोडरीएसु सोक्खाइं अणोवमाइं कमेण भुत्तूण उत्तमाइं तओ
आउक्खएणं चुया समाणा जह जिणमयंमि वोहिं लद्धूण य संजमुत्तमं तमरयोघ-
विप्पमुक्का उवेंति जह अक्खयं सव्वदुक्खमोक्खं । एते अत्ते य एवमाइअत्था वित्थ-
रेण य । उवासयदसासु णं परित्ता वायणा संखेज्जा अणुओगदारा जाव संखेज्जाओ
संगहणीओ । से णं अंगट्ठयाए सत्तमे अगे एगे सुयक्खंधे दस अज्जयणा दस उद्दे-
सणकाला दस समुद्देसणकाला संखेज्जाइं पयसयसहस्साइं पयग्गेणं पणत्ता । संखे-
ज्जाइं अक्खराइं जाव एवं चरणकरणपरुवणया आघविज्जंति । से तं उवासगदसाओ
॥२१६॥ से किं तं अंतगडदसाओ ? अंतगडदसासु णं अंतगडाणं णगराइं उज्जाणाइं
वणाइं राया अम्मापियरो समोसरणा धम्मायरिया धम्मकहा इहलोइयपरलोइयइद्धिवि-
सेसा भोगपरिच्चाया पव्वज्जाओ सुयपरिग्गहा तवोवहाणाइं पडिमाओ बहुविहाओ खमा
अज्जवं मह्वं च सोअं च सच्चसहियं सत्तरसविहो य संजमो उत्तमं च वंभं आकिं-
चणया तवो चियाओ समिइगुत्तीओ चेव तह अप्पमायजोगो सज्जायज्जाणेण य
उत्तमाणं दोहं पि लक्खणाइं पत्ताण य संजमुत्तमं जियपरीसहाणं चउव्विहकम्म-
क्खयम्मि जह केवलस्स लंभो परियाओ जत्तिओ य जह पालिओ मुणिहिं पायो-
वगओ य जो जहिं जत्तियाणि भत्ताणि छेअइत्ता अंतगडो मुनिवरो तमरयोघविप्प-
मुक्को मोक्खसुहमणुत्तरं च पत्ता । एए अत्ते य एवमाइअत्था वित्थारेणं परुवेई ।
अंतगडदसासु णं परित्ता वायणा संखेज्जा अणुओगदारा जाव संखेज्जाओ संगह-
णीओ, जाव से णं अंगट्ठयाए अट्ठमे अगे एगे सुयक्खंधे दस अज्जयणा सत्त वग्गा
दस उद्देसणकाला दस समुद्देसणकाला संखेज्जाइं पयसयसहस्साइं पयग्गेणं प०
संखेज्जा अक्खरा जाव एवं चरणकरणपरुवणया आघविज्जंति । से तं अंतगड-
दसाओ ॥ २१७ ॥ से किं तं अणुत्तरोववाइयदसाओ ? अणुत्तरोववाइयदसासु णं
अणुत्तरोववाइयाणं नगराइं उज्जाणाइं वणखंडा रायाणो अम्मापियरो समोसरणाइं
धम्मायरिया धम्मकहाओ इहलोगपरलोगइद्धिविसेसा भोगपरिच्चाया पव्वज्जाओ
सुयपरिग्गहा तवोवहाणाइं परियागो पडिमाओ संलेहणाओ भत्तपाणपच्चक्खाणाइं
पाओवगमणाइं अणुत्तरोववाओ सुकुलपच्चायाया पुणो वोहिलाभो अंतकिरियाओ य
आघविज्जंति । अणुत्तरोववाइयदसासु णं तित्थकरसमोसरणाइं परमंगल्लजगहियाणि

जिणातिसेसा य बहुविसेसा जिणसीसाणं चेव समणगणपवरगंधहत्थीणं थिरजसाणं
 परिसहसेणारिउवलपमद्दणं तवदित्तचरित्ताणसम्मत्तसारविविहप्पगारवित्थरपस-
 त्थगुणसंजुयाणं अणगारमहरिसीणं अणगारगुणाण वण्णओ उत्तमवरतवविसिद्धणाण-
 जोगजुत्ताणं जह य जगहियं भगवओ जारिसा इद्धिविसेसा देवासुरमाणसाणं परि-
 साणं पाउब्भावा य जिणसमीवं जह य उवासंति जिणवरं जह य परिकहंति धम्मं
 लोगगुह अमरनरसुरगणाणं सोऊण य तरस्स भासियं अवसेसकम्मविसयविरत्ता नरा
 जहा अवभुवंति धम्ममुरालं संजमं तवं चावि बहुविहप्पगारं जह बहूणि वासाणि
 अणुचरित्ता आराहियनाणदंसणचरित्तजोगा जिणवयणमणुगयमहियभासिया जिणव-
 राण हिययेणमणुण्णेत्ता जे य जहिं जत्तियाणि भत्ताणि छेअत्ता लद्धूण य समाहि-
 मुत्तमज्जाणजोगजुत्ता उववन्ना मुणिवरोत्तमा जह अणुत्तरेसु पावंति जह अणुत्तरं
 तत्थ विसयसोक्खं तओ य चुआ कमेण काहिति संजया जहा य अंतकिरियं एए
 अजे य एवमाइअत्था वित्थरेण । अणुत्तरोववाइयदसासु णं परित्ता वायणा संखेज्जा
 अणुओगदारा संखेज्जाओ संगहणीओ । से णं अंगट्ठयाए नवमे अंगे एगे सुयक्खंधे
 दस अज्झयणा तिन्नि वग्गा दस उद्देसणकाला दस समुद्देसणकाला संखेज्जाइं पय-
 सयसहस्साइं पयग्गेणं प० । संखेज्जाणि अक्खराणि जाव एवं चरणकरणपट्ठवणया
 आघविज्जंति । से तं अणुत्तरोववाइयदसाओ ॥ २१८ ॥ से कि तं पण्हावागरणाणि ?
 पण्हावागरणेषु णं अट्ठुत्तरं पसिणसयं अट्ठुत्तरं अपसिणसयं अट्ठुत्तरं पसिणापसिणसयं
 विज्जाइसया नागसुवन्नैहिं सद्धिं दिव्वा सवाया आघविज्जंति । पण्हावागरणदसासु
 णं ससमयपरसमयपण्णवयपत्तेअवुद्धविविहत्थभासाभासियाणं अइसयगुणउवसमणाण-
 प्पगारआयरियभासियाणं वित्थरेणं वीरमहेसीहिं विविहवित्थरभासियाणं च जगहि-
 याणं अद्दागंगुट्ठवाहुअसिमणिखोमआइच्चमाइयाणं विविहमहापसिणविज्जामणपसिण-
 विज्जादेवयपयोगपहाणगुणप्पगासियाणं सब्भूयदुगुणप्पभावनरगणमइविम्हयकराणं
 अईसयमईयकालसमयदमसमत्तित्थकरुत्तमस्स ठिइकरणकारणाणं दुरहिगमदुरवगा-
 हस्स सव्वसव्वशुसम्मअस्स अवुहजणविवोहणकरस्स पच्चक्खयपच्चयकराणं पण्हाणं
 विविहगुणमहत्था जिणवरप्पणीया आघविज्जंति । पण्हावागरणेषु णं परित्ता वायणा
 संखेज्जा अणुओगदारा जाव संखेज्जाओ संगहणीओ । से णं अंगट्ठयाए दसमे अंगे
 एगे सुयक्खंधे पणयालीसं उद्देसणकाला पणयालीसं समुद्देसणकाला संखेज्जाणि पय-
 सयसहस्साणि पयग्गेणं पञ्चत्ता । संखेज्जा अक्खरा अणंता गमा जाव चरणकरण-
 पट्ठवणया आघविज्जंति । से तं पण्हावागरणाइं ॥ २१९ ॥ से कि तं विवागसुयं ?
 विवागसुए णं सुक्कडुक्कडाणं कम्माणं फलविवागे आघविज्जंति से समासओ दुविहे